

Nakom Pejume Diwesi

Po diwesi xua peru diwesi
xua poxonae aena

y

Po diwesi xua pena jume diwesi

El libro de Génesis
y un resumen de pasajes selectos
del Antiguo Testamento

y

El Nuevo Testamento de Nuestro Señor Jesucristo
en el idioma Cuiba-Wámonae
de los Llanos de Colombia y Venezuela



El texto del Nuevo Testamento en el idioma cuiba-wámonae
de Los Llanos de Colombia y Venezuela
se imprimió originalmente por
la Sociedad Bíblica Internacional en 1987.

El texto del libro de Génesis y un resumen de pasajes selectos
del Antiguo Testamento en el idioma cuiba-wámonae
de Los Llanos de Colombia y Venezuela
se imprimió originalmente por
la Sociedad Bíblica Internacional en 1997.

Edición revisada del libro de Génesis y un resumen de pasajes selectos
del Antiguo Testamento y el Nuevo Testamento
en el idioma Cuiba-Wámonae
de Los Llanos de Colombia y Venezuela
© 2022 Sociedad Bíblica Colombiana 1M

ISBN: 978-958-745-756-8
Impreso en Colombia

Contenido

	<i>página</i>
Índice alfabético	iv
Introducción	v
Génesis	1
Prólogo	115
Resumen—historias del Antiguo Testamento	116
Salmos	385
Proverbios	405
Tabla Cronológica	409
El Período Intertestamentario	414
San Mateo	423
San Marcos	534
San Lucas	595
San Juan	696
Hechos	768
Romanos	852
1 Corintios	898
2 Corintios	940
Gálatas	968
Efesios	983
Filipenses	999
Colosenses	1010
1 Tesalonicenses	1020
2 Tesalonicenses	1029
1 Timoteo	1034
2 Timoteo	1047
Tito	1056
Filemón	1062
Hebreos	1064
Santiago	1100
1 San Pedro	1111
2 San Pedro	1122
1 San Juan	1129
2 San Juan	1139
3 San Juan	1141
Judas	1143
Apocalipsis	1147
Vocabulario	1195
Mapas	1203

Índice alfabético

Libros y sus abreviaturas

Antiguo Testamento (AT) Nuevo Testamento (NT)

Abdías	Abd(AT)	2 Juan	2 Jn(NT)
Amós	Am(AT)	3 Juan	3 Jn(NT)
Apocalipsis	Ap(NT)	Judas	Jud(NT)
Cantares	Cnt(AT)	Jueces	Jue(AT)
Colosenses	Col(NT)	Lamentaciones	Lm(AT)
1 Corintios	1 Co(NT)	Levítico	Lv(AT)
2 Corintios	2 Co(NT)	Lucas	Lc(NT)
1 Crónicas	1 Cr(AT)	Malaquías	Mal(AT)
2 Crónicas	2 Cr(AT)	Marcos	Mr(NT)
Daniel	Dn(AT)	Mateo	Mt(NT)
Deuteronomio	Dt(AT)	Miqueas	Mi(AT)
Eclesiastés	Ec(AT)	Nahúm	Nah(AT)
Efesios	Ef(NT)	Nehemías	Neh(AT)
Esdras	Esd(AT)	Números	Nm(AT)
Ester	Est(AT)	Oseas	Os(AT)
Éxodo	Ex(AT)	1 Pedro	1 Pe(NT)
Ezequiel	Ez(AT)	2 Pedro	2 Pe(NT)
Filemón	Flm(NT)	Proverbios	Pr(AT)
Filipenses	Fil(NT)	1 Reyes	1 R(AT)
Gálatas	Gá(NT)	2 Reyes	2 R(AT)
Génesis	Gn(AT)	Romanos	Ro(NT)
Habacuc	Hab(AT)	Rut	Rt(AT)
Hageo	Hag(AT)	Salmos	Sal(AT)
Hebreos	He(NT)	1 Samuel	1 S(AT)
Hechos	Hch(NT)	2 Samuel	2 S(AT)
Isaías	Is(AT)	Santiago	Stg(NT)
Jeremías	Jr(AT)	Sofonías	Sof(AT)
Job	Job(AT)	1 Tesalonicenses	1 Ts(NT)
Joel	Jl(AT)	2 Tesalonicenses	2 Ts(NT)
Jonás	Jon(AT)	1 Timoteo	1 Ti(NT)
Josué	Jos(AT)	2 Timoteo	2 Ti(NT)
Juan	Jn(NT)	Tito	Tit(NT)
1 Juan	1 Jn(NT)	Zacarías	Zac(AT)

Introducción

Para comprender mejor el Nuevo Testamento es indispensable conocer algo del Antiguo Testamento, pues en él se encuentra el trasfondo histórico y religioso en que se fundamenta el Nuevo Testamento. Puesto que el Antiguo Testamento es tres veces más extenso que el Nuevo Testamento, su traducción demoraría mucho más tiempo.

Este libro tiene varias secciones: el libro completo de Génesis, un resumen del resto del Antiguo Testamento (Historias 1-138, Salmos y Proverbios), una tabla cronológica de la Biblia, los acontecimientos que ocurrieron en el período intertestamentario, el Nuevo Testamento completo, un vocabulario de palabras en español que aparecen en el Antiguo Testamento y una serie de mapas.

El resumen que presentamos en este libro incluye los acontecimientos más importantes del resto del Antiguo Testamento. A pesar de su brevedad, en este resumen se suministran datos que le pueden dar al lector un conocimiento general sobre el desarrollo de la historia en aquella época. Contiene las historias, los personajes y las costumbres del Antiguo Testamento que se mencionan en el Nuevo Testamento. Además, se dan a conocer algunos de los pasajes más importantes que se citan en el Nuevo Testamento.

El resumen se divide en historias, cada una con un título y debajo una o más referencias a los pasajes del Antiguo Testamento que sirvieron como base para su elaboración. En ocasiones, algunos acontecimientos no se han incluido en las historias, pero todos los hechos narrados en las historias han sido tomados de los pasajes citados, excepto la información implícita que se ha añadido como parte del trasfondo necesario para las historias.

Para facilitar el seguimiento de la lectura, sobre todo en forma grupal, las historias (llamadas “diwesi” en Cuiba-Wámonae) se han dividido en secciones más cortas.

**Nakom Pejume Diwesi xua
peru diwesi xua poxonae aena**

Poxonae Aena

Tamropatsiya Éxana

Génesis

Meje poxonae aena tamrópata pítaba xua daxita fórota

1 ¹Poxonae aena tamrópata pítaba xua daxita éxana, Nakom peitabokong fóroba, yáwano Nakom po nakue fórota. ²Bárapo nakue icha koyene jopa xeinaeyo. Daxita be pin marmene pentatheibüng bichokono matatsún dukua xua kirei. Nakom pía Pejumopetünaxü tatsi matatsún dukuaenaebiya mene.

³Néxata Nakom namchi: “Bárabü penthande”, jei. Daxota beya pentha. ⁴Poxonae Nakom tane xua pentha, Nakom nantaxeina xua pentha bara wüünae. Néxata tsanaya éxana xua kirei. ⁵Xua pentha Nakom wüngduta: “Ápara matakabi”, jei. Yawa xua kirei Nakom wüngduta: “Ápara mérawi”, jei. Poxonae Nakom nakobeweta bárapo koyenein, bárapo matakabi Nakom wüngduta: “Uno”, jei.

⁶Bapoxonae ekeicha Nakom namchi: “Bárabü pebishato naexande xua mera nantiya tsanaya nawepu mene ekaenéxabe xua icha mera athawé dukueika xuano xua icha mera ira werukuiya bárapo pebishátotha”, jei. Daxota daxita bara baxua duba. ⁷Nakom tsabiya forotsiya éxana xua pin marmene nawepu tsata epakaxínabe. Icha épato mene ira berukuareka. Icha épato athabé dukuiya. ⁸Potusato ichaxota icha épato mene athabé dukuiya, bárapo tusato Nakom wüngduta: “Ápara peitaboko”, jei. Poxonae Nakom nakobeweta bárapo koyenein, bárapo matakabi Nakom wüngduta: “Dos”, jei.

⁹Ekeicha Nakom namchi: “Po mene peitaboko itabara berukuareka bárabü mene imoxoyo namene xatanékare xua írano penaexanaenexa”, jei. Daxota daxita bara baxuang duba. ¹⁰Xua ichaxota jopa mene ekaeyo baxua Nakom wüngduta: “Ápara ira”, jei. Yáwano mene wüngduta xua po mene namene xataneka, bárapo mene Nakom wüngduta: “Ápara marmene”, jei. Poxonae Nakom tane baxua xua bara baxua wüünae, Nakom jeye: ¹¹“Bárabü íratha daxita pexuwiwang nafórabare. Bárabü xúware daxita pepabotong xua pokotsiwa pexu nakoita, yawa naeinno xua pokotsiwa pethéi nakoita”, jei Nakom. Daxota daxita baxuang éxana. ¹²Ira fórota daxita pexuwiwang. Yawa xuwa pepabotong xua nakoitena pexu, yawa ünbowang, naeinno xua nakoita pethéi. Bapoxonae Nakom tane xua bara bárxuang wüünae. ¹³Poxonae Nakom nakobeweta bárapo koyenein, bárapo matakabi Nakom wüngduta: “Tres”, jei.

¹⁴⁻¹⁵Ekeicha Nakom namchi: “Bárabü xéinare xua peyonoyonéi tsurubenaewang peitabokong; xua pentha peexaneikaenexa ira betsika; xua jomokóichato mérawi nexa, irü xua xometo poto atsa matakabi nexa; yawa xua penaitapeiña xeinaenexa matakabin, yawa wei, yawa xua awüübo, yawa xua pexeiña matakabin xua peaiñakuí matakabin”, jei. Daxota daxita bárxuang bara éxana.

¹⁶Nakom xometo aiñatobe éxana poto peitiyotsinexa nakua. Poto pinto, barapoto pentha éxana matakeitha. Poto tsikitoyo tsekae, barapoto poto pentha éxana mérawi. Bara yawa éxana opitéi. ¹⁷⁻¹⁸Nakom duba peitabókotha xua peyonoyoneiwang xua pentha peexaneikaenexa tsane ira, matakábitha yawa merawitha. Nakom tsana éxana xua peitakireiwa yawa xua pentha. Nakom tane xua bara báraxuang wüünae. ¹⁹Poxonae Nakom nakobeweta bárapo koyenein, bárapo matakabi Nakom wüingduta: “Cuatro”, jei.

²⁰Ekeicha Nakom namchi: “Bárabü jinómpare daxita menepiwang. Yáwano bárabü jinómpare pepupunaewang poxi ira matatsún pupuna dubenanáebiya”, jei. Daxota daxita báraxuang éxana. ²¹Nakom daxita menepiwang éxana xua jinompa pin marménetha xua bichokono piñong. Matáütano éxanano pokotsiwang xua ira pókotsi meneintha jinompa. Matáütano éxanano daxita peyapupunaewi. Nakom daxita baxuang tane xua bara wüünae. ²²Bapoxonae Nakom weyataeya yábara paeba daxita duwéi xua éxana. Bárapo duweimonaetha jeye: “Bárabü panaitapexuita ponde meneintha xua daxita marméneintha wüingka paexande. Yáwano bárabü peyapupunaewi nawire bárapo kae pin nákuathe”, jei. ²³Poxonae Nakom nakobeweta bárapo koyenein, bárapo matakabi Nakom wüingduta: “Cinco”, jei. ²⁴Ekeicha Nakom namchi: “Bárabü bárapo írathe naexande daxitang duwéi, kamatsáwangno, yáwano xua poxi jiwi itakoxone éxana, yáwano bárabü naexande daxita unupiwi xua xuang ayéi, yáwano bárabü naexande poxi xua íratha petompakuetongtha pebobenaponaewi”, jei. Daxota daxita báraxuang bara éxana. ²⁵Nakom daxita báraxuang fóroba. Bapoxonae Nakom tane xua daxita báraxuang bara wüünae.

²⁶Ekeicha Nakom namchi: “Nama ánoxuae jintong exanaeinchi xua pebin tsane. Bapong naka kuikoyenejüpaena. Bapong kanamataxeinaena duwéi, kamatsáwangno, poxi xua menepiwi, peyapupunáewino, yáwano xua poxi jiwi itakoxone éxana, yawa unupiwi xua poxi ayéi tsenae, yawa poxi xua íratha petompakuetongtha pebobenaponaewi”, jei.

²⁷Poxonae Nakom éxana pebin, be Nakom kuikoyenejüpati.

Nakom fórota pebin yawa petsiríwano.

²⁸Yawa Nakom weyataeya yábara paeba póngbetha xua peforotsixae.

Nakom namchi:

“Bárabü pexui paxexeinaponde.

Pinmonae panakatsiwaponde.

Pentakaponaewi panaexanapondeno bárapo írathe.

Yawa duwéi menepiwi pamataxeinapondeno,

peyapupunáewino, yáwano daxita poxi íratha petompakuetongtha pebobenaponaewi”, jei.

²⁹Bapoxonae Nakom namchi: “Ínkane pataema. Paka katsíbatsi daxita pepabotong xua nakoita pethéi, yáwano daxita ünbotong, naeinno xua nakoita pethéi. Daxita baxuang paiña nenabanéibiwa tsane. ³⁰Íchitha daxita bapoxi, poxi unupixi xua ayéi tsenaeno yáwano poxi íratha petompakuetongtha pebobenaponaewi yáwano peyapupunaewi, daxita bapoxi xua pexuwiwang tsijain éxanang xua pexaenexa”, jei Nakom. Daxota daxita báraxuang bara éxana. ³¹Bapoxonae Nakom tane xua daxita pokotsiwang bapong éxana bara wüünae. Poxonae Nakom nakobeweta bárapo koyene, bárapo matakabi Nakom wüingduta: “Seis”, jei.

2¹Peitabokong yawa ira yawa xuano daxita xua báyatha Nakom fóroba daxita baxuang naopikopatsiya weta. ²Nakom daxita weta xua éxana daxitang. Daxota poxonae matakabi jopa, po matakabi Nakom wüngduta: “Siete”, jei, bárapo matakábitha Nakom opidukuaeya kopataba yawa eka. ³Bapoxonae Nakom weya-taeya yábara paeba bárapo matakabi. Nakom bárapo matakabi wüngduta: “Ápara pentakeiseikáe matakabi, po matakabi pepa pexeña tamatakabi”, jei. Bárapo matakaiha Nakom eka pewetsixae xua pokotsiwa fóroba.

Meje poxonae pebin pábitha pona Edén nákuatha

⁴⁻⁵Bárapo diwesi po diwesi xua poxonae Nakom fórota peitaboko yawa xua poxonae ira. Poxonae Nakom pong Pekanamataxeinaeinxae éxana peitaboko yawa írano, kaena báyatha kataunxuae naein aibi, yawa naepanaewang aibi. Baxuang aibi tsipéi kataunxuae Nakom pong Pekanamataxeinaeinxae jopa exanaeyo ema xua ira nexa. Yáwano jopa exanaeyo jintong xua penakuichiwa tsane xua peübiwa tsane. ⁶Dáichitha ira susuna éxana po meraxi ira wétsina píchapa xua petsüxi.

⁷Néxata Nakom pong Pekanamataxeinaeinxae éxana pebin xua tsórobo weya. Nakom ponxo ofutaba pebin xua peasüüwa kana éxana. Daxota pebin asüü pópona, pong Adán. [Hebreo jumetha pojume: “Adán”, jei tsiwiyo jumejúpa pojume: “Adama”, jei xua: “Tsórobo”, jei.]

⁸Bapoxonae Nakom pong Pekanamataxeinaeinxae éxana xua pexeña pabi xua boka Edén íratha, po ira eka pokotsiwa xua ichaxota xometo weekoina. Bárapo pábitha Nakom pebin kuaranota, po pebin Nakom éxana. ⁹Baxota daxita karepaya Nakom naein xuwa éxana, po naein pexeña naein, po naein pethéi nakoita xua penabanaewa tsane. Pabi müxübürü beya icha nae Nakom éxana xua bárapo nae xeina pethéi, po pethéi xua jiwi antabüyapusüü éxanatsi, po peantabüyapusüüwa ataya tsiteka xua icha xane bárapo pethéi. Yawa Nakom éxana icha naeno, po nae jiwi yaputane exainchi xua pokoyene icha wüünae, yáwano pokoyene icha jopa wüünaeyo xua poxonae icha xane bárapo pethéi.

¹⁰Edén ira dena mene naexanadena xua daxita pabi atatsika exanadena. Bapoxonae icha muxunene beya xua poxonae Edén ira wemene paneparena cuatro po ménebe náexana. ¹¹Bárapo cuatro po ménebe kae mene pewüng Pisón. Bárapo mene tajü aiña menein epatong éxana xua mene jejeyowapona xua daxita Havila nákuatha ichaxota oro nain matawüng bobena íratha xua xuang daedaena xua pexeñawang nawita. ¹²Bárapo oro nain matawüng bichokono aiña matoma. Barichi baxota xeina xua pexeña nain xua nae nain xua aiña matomang. Barichi baxota xeina xua pexeña ibótong, po ibótong ónice ibo matawüng.

¹³Icha mene pewüng Guijón xua bárapo mene matawakaicha eékapona Cus nákuatha. ¹⁴Icha mene pewüng Tigris xua bárapo mene daxita matawakaicha eékapona Asiria nákuatha ichaxota pokotsiwa xometo weekoina. Yáwano icha méneno pewüng Eufrates.

¹⁵Nakom, pong Pekanamataxeinaeinxae, kuaranota pebin pábitha, po pabi Edén nákuatha eka, xua bapong peübinexa yawa xua bapong peyapukapoponaenexa. ¹⁶Nakom barái bapongtha: “Bara kaitaküüpa xua pethéi nexaewa xua xuwa bárapo pábitha xua daxitang. ¹⁷Saya meisha jopa thei xaeinde po nae jiwi yaputane exainchi xua pokoyene icha wüünae, xuano xua icha jopa wüünaeyo icha xane bárapo pethéi. Barapókotsi nae jopa thei xaeinde. Icha thei xáename bárapo nae, bara tüpáename”.

Meje poxonae Nakom petsiriwa taéxana pebin

¹⁸Nakom, pong Pekanamataxeinaeinxae, néxata nantanaxeina, jeye: “Baxua jopa wüünaeyo xua pebin kompa pepoponaewa. Methaunxuae ichüing exanaein xua bapong peyantsinéxatsi yawa peyawenaenéxatsi”, jei. ¹⁹Nakom, pong Pekanamataxeinaeinxae, tsórobong éxana daxita duwéi xua unupiwi yawa peyapupunaewi. Néxata daxita bapoxi Nakom kápona pebintha yawa xua pebin pentawüing dubinexa daxita barapoxi. Daxota daxita barapoxi tsitekaeya wüingdubena. ²⁰Pebin daxita íraxuang wüingduba xua poxi jiwi itakoxone éxana yawa daxita peyapupunaewang, yáwano daxita unupiwi. Íchitha bárapo duwéi jíwana bárapo pebin jopa xeinaeyo xua pong peyantsíwatsi, pong peyawenaenéxatsi xua bapong nantawénona.

²¹Néxata Nakom, pong Pekanamataxeinaeinxae, itamáipana éxana, pebin bichokono itamáipana éxanatsi. Poxonae bapong maitungkua Nakom peyene yenewejonta, ekeicha yenewí akataba. ²²Nakom, pong Pekanamataxeinaeinxae, bárapo peyene weya éxana petsiriwa. Nakom tsita itapeiñaxeina bapowa pebintha. ²³Poxonae pebin, pong pemaitungkuaexae, poxonae taeba petsiriwa, bapong namchi, jeye:

“¡Ápara barapowa xaniwaicha tawito weya píchapa!

¡Yawa bara xaniwaicha tapiwa weya píchapa!

Bapowa wüingdutang: ‘Petsiriwa’, barang tsipéi Nakom neyenewejonta”, jei pebin.

[Hebreo jumetha pojume petsiriwa xua: “Isha”, jei, tsiwiyo jumejúpa xua: “Ish”, jei pojume: “Pebin”, jei.]

²⁴Poxoru bapongbe, pongbe xua Nakom kopiya éxanabe, bapongbe Nakom kana éxanabe xua be kaein penaexanáexaebe daxota ba pebiwi paxa jiwi wepu natsaba, pía piowaxi barü jijinaetsi. Jiwi ba éxana baxua xua pebiwi pisheuri jiwi be kae jiwi penaexanaewa tsane. ²⁵Bara bekein pebin piowabe yaputánebe xua jumasáinabe, íchitha jopa tsakeinaeyo xua aura xua pejumasainaexaebe.

Meje poxonae pebin jumefeba Nakomtha

3¹Jomo^a yaputane xua pemuxujaiñabiwa beyakaincha icha duwéi xua poxi Nakom fórota, pong Pekanamataxeinaeinxae. Jomo barái, yábüyo baraichi, jeye:

—¿Báraxua Nakom paka tsipáebabe xua bepa pinae ü dapo naein jopa patheixaembe tsánebe xua po naein bárapo pábitha xuwa? jei jomo.

²Petsiriwa jumenota, jomo jumenótatsi, jeye:

—Pana itakúüpabe xua paxangbe pethéi daxita náexitha xua pábitha xuwa.

³Meisha jopa pana itakúüpáeyobe xua pata thei xáewabe po nae pabi tútutha ungkua. Pana netsipáebabe Nakom xua bepa pinae jopa patheixaein tsánebe bárapo nae. Yawa bepa pinae jopa patheijáyabin tsánebe. Icha bepa pinae patheixaein bepa pinae pawerapaein.

^a3.1 Kaurimonaé pía pentakaponaéin tatsi pong Satanás, bapong kanaüta jomo tsipéi bapong jomo, pong bichokono peyaputaéin.

⁴Jomo jumebarái petsiríwatha:

—Ápara jopa xaniyeyo. Jopa ápara patüpaembe tsane. ⁵Nakom beta yaputane xua poxonae bárapo nae patheixáenamebe bapoxonae paxeináenamebe peyaputáe koyene, paiña neyaputaenexa tsánebe pokotsiwa xua wüünae yawa pokotsiwa xua abe. Poxoru bapoxonae be Nakom pakuijüpáenamebe, jei jomo.

⁶Petsiriwa yaputane xua bárapo nae pethéi wüünae nawita yawa be xaena xua neyaputaenexa tsánebe pokotsiwa xua wüünae, yawa pokotsiwa xua abe. Bapoxonae thei úkuta yawa thei xane. Yawa pía pebin kata, irü bapong thei xaexuba. ⁷Bapoxonae beya natsakéinabe xua aura xua júmasa úngkuabe. Néxata po nae pewüing higuera nae, bárapo nae axu xüxúkabe, baxota naákatabe.

⁸Pebin irü petsiriwa jumetánebe xua Nakom pona pábitha kiripitha poxonae jowijowi xeika. Bapoxonae naeintha kuitaya nantsiyatékabe pábitha. Nakom kuitaya nantsiyatékatsibe. ⁹Íchitha Nakom, pong Pekanamataxeinaeinxae wawái, pebin wábatsi, jeye:

—¿Ínkane? ¿Eta xota ékame? jei Nakom. ¹⁰Pebin jumenota, Nakom jumenótatsi, jeye:

—Kajumetainchi xua pábitha póname. Junuwang daxota kakuitaya nantsiyatékatsi yáitama jumasainang, jei pebin.

¹¹Nakom biataeya jumebarái:

—¿Jintam kamuxutsipaeba xua pinae jumasáiname? Payaputánemebe xua patamasáinamebe ápara poxoru patheixanemebe pothéi bekein yábara paka tsipaeba-tsibeba báyatha, jei Nakom.

¹²Pebin jumenota:

—Petsiriwa, powa inta éxaname xua tana neyantsinexa, bapowa nekata bárapo naetheito. Bapoxonae thei xang, jei pebin.

¹³Néxata Nakom pong Pekanamataxeinaeinxae petsiriwa yáiñabatsi, jeye:

—¿Eta xua metha baxua éxaname? jei Nakom. Barapowa Nakom jumenótatsi, jeye:

—Jomo nemuxujáiñaba, daxota naetheito xaexubang, jei.

¹⁴Néxata Nakom, pong Pekanamataxeinaeinxae, jomo baraichi:

—Xua baxua neexanaexae, xam meisha daxita duweitha jopa wepu xaexaenaekuibim tsane, xua kata ayapubé éxanatsi.

Ánoxuae yawa xua ataya tsáneno saya íratha najonakaponáename. Matáütano saya tsórobo xáename.

¹⁵Exanaein xua xam Satanás, pongxaem jomom,

irü yábüyo paiña nenaitafaetabiwambe tsane.

Barichi tsane jiña nemómoxi susato jiwi,

irü barapowa pía pemómoxi susato jiwi tatsi,

penaitafáetabi jiwi tsane.

Barapowa pía pemómoxi susato jintong jíwana tatsi kaamanayabina.

Yawa xam jüjütsíname xua bapong jopa peexanaenexa baxua, jei Nakom.

¹⁶Petsiriwa baraichi:

—Bichokono atsiperüütanem tsane poxonae yapuruwajináename, yawa poxonae pexui pabeibíname.

Jinsheuri kuikuineibíname neperüü jíwichipaexae.

Bapong pía peitorobi koyenéwatha kakana mataxeinaena, jei Nakom.

¹⁷Pebin baraichi: —Poxoru nejumenaitomatsiya exanaexae, pokotsiwa xua bapowa kaitoroba, xua dapó jumetha bárapo naethei xáneme, xua báyatha kaba-raichi: ‘Jopa bewa xaem bárapo naetheito’, jang,

ánoxuae exanaein xua ira nama jopa pexaexaenakaewa tsane, abe paiña neexanaexaebe.

Néxata saya pexaewa jopa juniya nenaúpain nakuiteibínexa tsane, daxita matakabi poxonae poponeibíname.

¹⁸Ira kata matasojei tsane, yawa kata áyabo tsane.

Yawa néxata xaibíname ü unu pipexaewa.

¹⁹Bichokono nakuiteibíname, yawa najainchiya exaneibíname beya poxonae daxota pexaewa nexeineibiwa tsane, xua nexaibiwa tsane.

Bárapo koyenetha poponeibíname beya poxonae kamüthütsina.

Tsipéi báyatha tsórobo weya kaéxanatsi, daxota ekeicha kaewa tsórobo naexanáename poxonae tüpáename, jei Nakom.

²⁰Pebin píowa wüngduta pewüng Eva. Barapowa be koxiwa kanamata kana exanaena daxita jiwí xua asüü jinompa xua bárapo kae pin nákuathe. [Hebreo jumetha po wüng: “Eva”, jei tsiwiyo jumejúpa pojume: “Asüü”, jei.]

²¹Nakom pong Pekanamataxeinaeinxae éxana paparuwa xua duwéi peboko, xua pebin irü yábüyo penaakatsíwabe. ²²Ekeicha Nakom pong Pekanamataxeinaein namchi:

—Ánoxuae pebin naka tsita naitüüta xua pong be waxainchi jíwanatsi poxoru ánoxuae bapong yaputane xua wüünae yawa xua abe, icha waxainchi ichichi xua nantaxéinatsi. Néxata jopa kopatsin tsane xua bapong xaena po naethei jiwí antabüyapusüüwa exainchi, xua po naethei jiwí ayapusüüya jinompa exainchi xua ataya tsitekaeya, jei Nakom.

²³Daxota Nakom pong Pekanamataxeinaein itaweta bárapo pebin pexeíña pabi weya, po pabi Nakom éxana Edén íratha. Nakom itoroba xua bapong dangweya penakuichinexa tsorobotha xua pábitha poxoru báyatha Nakom pebin fórota tsórobo weya. ²⁴Nakom itaweta pebin pexeíña pabi weya. Bapoxonae pabi pemü-xübúrútha, pokotsiwa ichaxota xometo wekoina, bara wétsina Nakom itoroba querubines matawüngmonae, po querubines bárapo nae yakaincha matawakai-cha umena. Yawa Nakom noba xua jerajeréi tsungkuae xua be kusi pejúmope xua koicha nayerababa xua ichamonae jopa pepatsinexa tsane ichaxota nae ungkua po naethei jiwí antabüyapusüüya jinompa éxanatsi xua ataya tsiteka xua icha xaiba.

Meje xua pewowin yábara pong pewüng Caín, irü peweicho tatsi pong pewüng Abel

4 ¹Pebin píowa barü pópona powa pewüng Eva. Barapowa bara pexuyo búpana taékatsi. Bapoxonae Eva pexuyo tanakatsíwatsi pebinwüütiyo pewüng Caín. Bapowa namchi: “Báyatha xeinang taxanto. Pong inta nakatsiwa bapong Nakom nekata”, jei Eva. [Hebreo jumetha po wüng: “Caín”, jei tsiwiyo jumejúpa pojume: “Xeina”, jei.] ²Bapoxonae kotakaya Abel nakatsiwa, Caín péyapin tatsi. Poxonae Abel nawichatane ovejamonae xeina xua peewatsiwa irü Caín poxonae nawichatane aiña pabin üba.

³Pírapae kaentakabi Caín kápona pexaewa xua pía pábitha üba, xua pekatsiwanexa Nakomtha, xua wüünae pejainchiwanexa Nakomtha. ⁴Irü Abel Nakomtha kata ovejang, po ovejang bichokono naxainwaeta yawa kata powi xua bichokono nasita. Nakom pong Pekanamataxeinaeinxae, tsita itakuiwüünaetsi xua Abel éxana, yawa xua pía pekatsíwatsi bichokono wüünae. ⁵Íchitha nama Nakom jopa tsita daichichi Caín. Nakom pía pekatsíwatsi jopa Nakom tsita itakuiwüünaetsi. Caín bichokono kaseba péyapin, yawa itabara anáepana. ⁶Néxata Nakom pong Pekanamataxeinaeinxae Caín baraichi:

—¿Eta xua metha néyapin kasébate yawa bichokono itabara anáepaname? ⁷Icha exanaetsípame xua wüünae jopa bichokono itabara anaepanaem tsipae. Dáichitha jopa baxua exanaem xua wüünae. Po peabe koyene nantaxéiname nejüntü-koyenéwatha baxua kakana éxana xua abe neexanaewa. Íchitha xam kaitaküüpa xua itawétame barapokuí xua daxota jopa neexanaewa tsane baxua, jei Nakom xua Caín tsipáebatsi.

⁸Kaentakabi Caín péyapin waba xua pía barü ponaetsi icháwatha. Poxonae aishówatha pónabe, Caín péyapin kuintaba. Bapoxonae bexuba péyapin, Abel péntapin bexotsi. ⁹Néxata Nakom, pong Pekanamataxeinaeinxae, Caín baraichi:

—¿Ínkane néyapin Abel? jei Nakom.

Caín jumenota Nakomtha:

—Büü jopa taeíño. Ápara tanakuichiwa aibi xua táyapin ta-enaewa.

¹⁰Nakom, pong Pekanamataxeinaeinxae, Caín baraichi:

—¿Eta xua éxaname? Poxonae néyapin jana tang, xua íratha boka xua poxonae bexúbame, yaputang xua bewa bapong Abel yantomatsin. ¹¹Daxota xam ichamonae wepu jopa nexaexaenakáe jintom tsane yawa kaitawétatsi po ira weya ichaxota néyapin bexúbame. ¹²Bekein matowa nakuiteibíname pabi, íchitha jopa kata xuweibi tsane. Saya pópona dukuanaetsíname bárapo kae pin nákuathe xua nejeita dukuanaetsinexa pexaewa. Bápana jopa kaitaküüpa tsane xua nenafifina kaewatsiwa, jei Nakom.

¹³Néxata Caín jumenota Nakomtha, pong Pekanamataxeinaein:

—¡Jopa neitaküüpaeyo xua áwiya tapoponaewa xua inta éxaname xua bichokono inta dangwéi! ¹⁴Ánoxuae neitawétame bárapo ira weya. Yawa bewa ponaein icha nákuatha xua tajü beya xua bárapo pin nákuathe xua neitabara weya. Matáütano jopa bápana nafifinakáewatsin tsane. Bara barichi tsane pomonae xua netaena metha nebexubina, jei Caín.

¹⁵Nakom, pong Pekanamataxeinaeinxae, jumenota, jeye:

—Bara barichi tsane icha ichüng kabexubina. Pong abe kata exanaena, bapong aíña koyeneintha tsane abe exanaeinchi xua ichüng exanaena, jei Nakom.

Néxata Nakom icha koyeneya kana éxana Caín pía pepongtha xua daxota Caín jopa pebexubinexa tsainchi poxonae taeinchi ichamonae. ¹⁶Caín wárapa, ichaxota weya bapong barü kueikueijeí Nakom, pong Pekanamataxeinaeinxae. Bapoxonae Nod nákuatha pópona, po nakua eka ichaxota wekoina xometo xua Edén nakua weya.

Meje yábara xua Caín pía pemómoxi susato jiwi tatsi

¹⁷Caín pisheuri barü pópona. Bapowa pexuyo búpana taékatsi. Bapoxonae Caín pexanto tanakatsíwatsi pewüng Enoc. Bapoxonae Caín tómará éxana, bichokono

pin tómará. Bárápo tómará pewüŋ Enoc, po wüŋ Caín pexántotha wüŋduta. ¹⁸Enoc Irad paxa tatsi. Irad Mejuyael paxa tatsi. Mejuyael Metusael paxa tatsi. Metusael Lamec paxa tatsi.

¹⁹Lamec aiñáwabe xeina. Ichowa pewüŋ Ada, ichowa pewüŋ Zila. ²⁰Ada pexuyo tanakatsíwatsi pewüŋ Jabal. [Hebreo jumetha po wüŋ: “Jabal”, jei tsiwiyo jumejúpa pojume: “Matakápona”, jei.] Pomonae kaena báyatha duweibokong bomü-xüxi éxana dubenanáebiya xua kawárapa dubenanáebiya yawa vaca pexeinaewi, barapomonae pía pamo susatopin tatsi ápara bapong pong Jabal. ²¹Jabal peweicho yántatsi, pong pewüŋ Jubal. [Hebreo jumetha po wüŋ: “Jubal”, jei tsiwiyo jumejúpa pojume: “Trompeta”, jei.] Pomonae xua peyaputaewi xua arpa tangbaba yawa xua oibo oba, barapomonae pía pamo susatopin tatsi ápara bapong pong Jubal. ²²Iri Zila barapowa tanakatsíwatsi pexuyo pewüŋ Tubal-caín, pong penainwang peexanaein. Bapong éxana pokotsiwa petsobianainwang pewüŋ bronce yawa petsaebia nainwang pewüŋ hierro. Tubal-caín pamcho nantaüta bapowa pewüŋ Naama.

²³Kaentakeitha Lamec barái piowabetha:

“Ada’, jang, ‘Zila’, jang, panejumetáemabe beta,
xua paka tsipaebinchibe.

Bexubang pebin pong pewowin, yáitama newangduta poxonae panabengbe.

²⁴Icha ichamonae Caín abe éxanatsi péyapin pebexubixae,
aiña koyeneintha tsane, xua Abel peyantomatsinexa tsainchi,
bapoxonae nama inta abe exanaena ichamonae,
yatsikaewa bichokono aiña koyeneintha tsane,
peyantomatsinexa tsainchi pong bexubang”, jei Lamec.

Meje yábara xua ekeicha ichüŋ xua Eva pexanto tatsi xuano xua Adán pexanto tatsi

²⁵Adán ekeicha pisheuri barü pópona. Bapoxonae Eva icha pexanto tanakatsíwatsi, bapong pewüŋ Set. Bapowa namchi: “Nakom, pong Pekanamataxeinaeinxae, nekata taxanto pong xua Abel pekoutha tanakatsíwatsi. Bapong Abel pong xua Caín péyapin bexuba”, jei Eva. [Hebreo jumetha po wüŋ: “Set”, jei tsiwiyo jumejúpa pojume: “Kata”, jei.] ²⁶Barichi Set bapong pexanto tanakatsíwatsi pewüŋ Enós. Bapoxonae jiwi kopiya kanantaforotsiya éxana xua Nakomtha wüükeiba xua Nakom wüŋ ununutéibatsi poxonae yawa wüünae jainteiba.

Meje yábara xua Adán pía pemómoxi susato jiwi tatsi

5 ¹Daxita meje bárápo pewüŋxi xua Adán pía pemómoxi susato jiwi tatsi. Poxonae Nakom pebin éxana be Nakom kuijúpatsi. ²Nakom pebin fórota, yawa petsiríwano, Nakom weyataeya yábara paeba. Poxonae Nakom aena po matakeitha fórota, xua bapongbe fórotatsi, Nakom wüŋduta: “Jiwi”, jei.

³Adán pexanto tanakatsíwatsi poxonae 130 po weibe xeina. Adán yatsikaewa bichokono kuijúpatsi, bapong pewüŋ Set. ⁴Bapoxonae, Adán ekeicha pópona 800 po weibe. Yáwano bárápo weibetha ekeicha pebiwúútoxi tanakatsíwatsi, yawa tanakatsíwatsino yabüxiwaxi. ⁵Bapong Adán pópona 930 po weibe. Bapoxonae bárápo weitha Adán tüpa.

⁶Set 105 po weibe xeina poxonae tanakatsíwatsi pexanto, bapong pewüŋ Enós. ⁷Poxonae Enós nakatsiwa, bapoxonae Set ekeicha pópona 807 po weibe.

Bárapo weibetha ekeicha pebiwúutoxi tanakatsíwatsi, yáwano yabüxiwaxino tanakatsíwatsi. ⁸Bapong Set pópona 912 po weibe. Bapoxonae bárapo weitha Set tüpa.

⁹Enós 90 po weibe xeina poxonae pexanto tanakatsíwatsi, bapong pewüing Cainán. ¹⁰Poxonae Cainán nakatsiwa, bapoxonae Enós ekeicha pópona 815 po weibe. Bárapo weibetha ekeicha pebiwúutoxi tanakatsíwatsi, yawa yabüxiwaxi tanakatsíwatsino. ¹¹Bapong Enós 905 po weibe pópona. Barapoxonae bárapo weitha Enós tüpa.

¹²Cainán 70 po weibe xeina poxonae tanakatsíwatsi pexanto, pong pewüing Mahalaleel. ¹³Poxonae Mahalaleel nakatsiwa, bapoxonae Cainán ekeicha pópona 840 po weibe. Bapoxonae bárapo weibetha ekeicha pebiwúutoxi tanakatsíwatsi, yáwano yabüxiwaxi tanakatsíwatsino. ¹⁴Bapong Cainán pópona 910 po weibe. Bapoxonae bárapo weitha Cainán tüpa.

¹⁵Mahalaleel 65 po weibe xeina poxonae pexanto tanakatsíwatsi, pong pewüing Jared. ¹⁶Bapoxonae Mahalaleel ekeicha pópona 830 po weibe. Poxonae Jared nakatsiwa, bapoxonae bárapo weibetha ekeicha pebiwúutoxi tanakatsíwatsi, yawa yabüxiwaxi tanakatsíwatsino. ¹⁷Bapong Mahalaleel 895 po weibe pópona. Barapoxonae bárapo weitha Mahalaleel tüpa.

¹⁸Jared 162 po weibe xeina poxonae tanakatsíwatsi pexanto, pong pewüing Enoc. ¹⁹Poxonae Enoc nakatsiwa, bapoxonae Jared ekeicha 800 po weibe pópona. Bapoxonae bárapo weibetha ekeicha pebiwúutoxi tanakatsíwatsi, yáwano yabüxiwaxi tanakatsíwatsino. ²⁰Bapong Jared pópona 962 po weibe. Barapoxonae bárapo weitha Jared tüpa.

²¹Enoc 65 po weibe xeina poxonae tanakatsíwatsi pexanto, pong pewüing Matusalén. ²²Enoc exaneiba xua Nakom itoroba. Poxonae Matusalén nakatsiwa, bapoxonae Enoc ekeicha pópona 300 po weibe. Bapoxonae bárapo weibetha ekeicha pebiwúutoxi tanakatsíwatsi, yawa yabüxiwaxi tanakatsíwatsino. ²³Bapong Enoc pópona 365 po weibe. ²⁴Enoc peexaneibixae xua pokotsiwa Nakom itoroba, daxota kaentakábitha Enoc aichúrukuae, poxoru Nakom pita.

²⁵Matusalén 187 po weibe xeina poxonae tanakatsíwatsi pexanto, pong pewüing Lamec. ²⁶Bapoxonae, Matusalén ekeicha pópona 782 po weibe. Bapoxonae bárapo weibetha ekeicha pebiwúutoxi tanakatsíwatsi, yawa yabüxiwaxi tanakatsíwatsino. ²⁷Bapong Matusalén pópona 969 po weibe. Barapoxonae bárapo weitha Matusalén tüpa.

²⁸Lamec 182 po weibe xeina poxonae pexanto tanakatsíwatsi. ²⁹Lamec pexanto wüingduta: “Noé”, jei. Bárapo wüing, wüingduta tsipéi Lamec jeye: “Nakom, pong Pekanamataxeinaeinxae, ira abe éxana poxoru báyatha naka itoroba xua bewa pinae dangweya nakuitsinchi wa-übinexa pexaewa pábitha. Íchitha bárapo pexuyo naka yawenaena xua wanafinakaewatsiwa tsainchi”, jei Lamec. [Hebreo jumetha po wüing: “Noé”, jei tsiwiyo jumejúpa pojume: “Nafifinakaeka”, jei.] ³⁰Poxonae Noé nakatsiwa, bapoxonae Lamec ekeicha 595 po weibe pópona. Bapoxonae bárapo weibetha ekeicha pebiwúutoxi tanakatsíwatsi, yawa yabüxiwaxi tanakatsíwatsino. ³¹Bapong Lamec 777 po weibe pópona. Barapoxonae bárapo weitha Lamec tüpa.

³²Noé 500 po weibe xeina poxonae pía pexui tatsi tanakatsíwatsi, ichüing pewüing Sem, ichüing pewüing Cam, ichüing pewüing Jafet.

Meje yábara poxonae pebiwi jopa juniya abe exanaeyo

6¹Poxonae jiwi pin bicheito naexanapona bárapo kae pin nákuathe, bárapo jiwi pexántixi forobapona. ²Nakom piamonae tatsi^b tane bárapo yábüxi, xua bichokono pexeñowaxi. Néxata barapomonae jíwana itapeta barapowaxitha, yawa nótano xua be pókotsi koyeneya powáxitha ichichipa. ³Íchitha Nakom, pong Peka-namataxeinaeinxae, namchi: “Metha jopa kopatsiño xua pebiwi aiña wei jinom-paena, tsipéi saya abe peexaneibiwi. Saya meisha bara kopatang xua ekeicha 120 po weibetha jinompaena”.

⁴Poxonae Nakom piamonae tatsi yabüxitha bara nota xua ichamonae pexántixi tatsi xua barapowaxitha peexanaenexa pexui, bapoxonae bárapo Nakom piamonae tatsi bara natsita fórotatsi pebiwi pomonae bichokono tajü matutu dubeiña. Barapomonae, pomonae bichokono maxü dangwéi poxonae naba, pomonaetha, pomonae jiwi wüünae jainta kaena báyatha.

⁵Nakom, pong Peka-namataxeinaeinxae, nekota xua daxita írangtha jiwi abe peexanaewi, yawa xua jiwi nantaxeineiba nawita xua abe éxana. ⁶⁻⁷Daxota Nakom anthüthüdewei, báyatha peexanaexae pebin. Nakom anthüthüdewiya namchi, jeye: “Xang pebin xubin pong báyatha fórotang. Yáwano daxita duweixi, poxi jiwi itakoxone éxana, bebang tsane. Yáwano daxita bebang tsane poxi íratha pena-jonokaewi, yáwano pepupunáewino. Tsipéi bichokono anthüthüdewein báyatha taforotsixae”, jei Nakom.

⁸Dáichitha Noé Nakom tsita jüntükoyene wüünaetsi.

Meje yábara xua Noé pía pin pepa barakunae tatsi

⁹Baxue xua Noé pediyesi. Bapong Noé pebin pong pentükuikoyene wüünaein. Noé jumekowünteiba xua Nakom itorobeiba. Írürü pebiwi jinompa, saya meisha bapong Noé wepu Nakom tsita jüntükoyene wüünaetsi xua bárapo pebiwi jíwana. ¹⁰Noé xeina akoibi po pexántobe tatsi. Ichüng pewüing Sem, ichüng pewüing Cam, ichüng pewüing Jafet. ¹¹Nakom bárapo kae pin nakue tane xua daxita írangtha jiwi xeina nawita penasikuimatakaetsi koyenewa, yáwano penabenoutsi koyenewa. ¹²Jiwi abe éxana nawita. Nakom tane xua daxita írangtha jiwi nasikuimatakaeta nawita.

¹³Bapoxonae Noé baraichi, jeye: “Xang kaewitaxubin daxita jiwi. Tsipéi bárapo nakuathepiwi abe éxana daxota jiwi nabenouta. Daxita jiwi bárapo kae pin nakuathepiwi kaewitaxubin yáwano abe exanaein bárapo kae pin nakue.

¹⁴”Jera éxande pepa barakunae, xua po naepaewang xua nainjujuwa. Petutun éxande. Yáwano daxita nantiya wang katsábare xua xota ponaintong akuito yawa pejumawérena katsábare xua jopa pejujuwinexa tsane. ¹⁵Báraxua éxande, xua 135 po metro epatíyobe xua a-epapiya deka, yawa éxande 22 po metro epatíyobe yawa ekeicha kaeto tsiwiyo xua petutu dena. Yawa éxande 13 po metro epatíyobe yawa ekeicha tsiwiyo kaeto xua tajü müxübürü dukópiya. ¹⁶Akoibi po tütube exanéichama xua icha tutu ira betsika, yawa xua icha tutu epatotha yawa xua baranama icha tutu athawétsika. Yáwano müxübürü nasaba éxande saya kaewa ichaxoyo bómüxü müxübürü dukuapona xua athawétsika. Namaxü matamataütsinka

^b6.2 Ichamonae nantaxeina xua pomonae Nakom piamonae tatsi ápara matatsunpiwi.

ichaxoyo kobeyaxiri epadukuaréname baxoyo müxübürü dure. Yawa kae boupa éxande xua pejojoniyaewa xua kae muxunénetha xua barakunaetha.

¹⁷”Tha itorobichi xua awüübo, xua matakaewina daxita bárapo kae pin nákuathe. Daxita abe tsane xua xuang peantabüyapusüüwa xeina xua daxita bárapo írathe. Daxita xua bárapo kae pin nákuathe xeina wérapa exanaein. ¹⁸Xamtha katsiwüünae muxudutsinchi. Jiña pexui kata joniyaena barakunaetha. Yawa jinsheuri, yawa nekopéinxino yawa xamno joniyaename.

¹⁹”Yáwano barakunaetha kaponáename duwein, pebto, pesowátono. Daxita karepaya poxi jinompa bárapo nákuathe nantaübiya kaponde pebtixi, pesowatixino, xua bapoxi jopa pewerapaewa tsane ichi xam ichim tsane xua jopa tüpaem tsane. ²⁰Barakunaetha daxita bapoxi kana puna nabarü naishajojoniyaena, pepunaewi barichi tsane, barichi tsáneno poxi jiwi itakoxone éxana, yáwano barichi tsáneno poxi najónaka íratha xua bapoxi irü pejinompaenexa tsane. ²¹Yáwano daxita karepaya pexaewang kaponde paiña nexei naenexa xua paiña nexaewa tsane, yáwano pexaenexa poxi daxita kapóname”, jei Nakom.

²²Noé xaniwaicha daxita beta éxana be pókotsi koyeneya xua Nakom itoroba. **7** ¹Bapoxonae Nakom, pong Pekanamataxeinaeinxae, Noé baraichi: “Barakunaetha joníyama. Yawa barü joníyama jiñamonae. Poxoru ánoxuae daxita jiwi pomonae jinompa bárapo matakábitha, saya meisha xam netsita jüntükoyene wüünaem. ²Siete póyobe duwéi pebtong nore xua yawa siete póyobe pesowabi po duweimonae xua paka tsikópata xua paiña nexaenexa. Yawa nore kae pebtong yawa kae pesowabi, pomonae xua kamatsawang. ³Barichinde, siete póyobe pebtong yanore peyapupunaewi xua daxita jopa nayajüpaeyo xua yawa siete póyobe pesowabi bara ichiya tsiniyama xua bárapo kae pin nakue weya jopa pewerawerakaewa tsane bárapo peyapupunaewi. ⁴Poxoru siete po matakabibetha tsane ema itorobin xua cuarenta po matakábibe tsane yawa cuarenta po merawíyobe tsane. Daxita bebang tsane xua írangtha jinompa yáwano xua xuang báyatha fórotang”, jei Nakom.

⁵Noé daxita éxana be pókotsi koyeneya báyatha Nakom, pong Pekanamataxeinaein itoroba.

Meje yábara poxonae awüübo daxita ira buta

⁶Noé 600 po weibe xeina poxonae xua awüübo daxita ira buta. ⁷Noé barakunaetha barü joniya pexántobe xua akoibi pongbe. Yawa pisheuri barü joniya, yawa pekopeinxi tatsi tajojoníyatsi xua penakapanenebiyaenexa tsane barakunaetha xua bárapo awüübotha.

⁸⁻⁹Duweixi, poxi jiwi itaküüpatsi xua pexaewa, yawa poxi kamatsawang, yáwano poxi yapupuna, yáwano poxi najónaka íratha, daxita bapoxi Noé nakana puna nabarü naishajojoníyatsi barakunaetha xua be ayunbe tsíniya pesowábino, pebtongno, be pókotsi koyeneya Nakom Noé itoróbatsi. ¹⁰Poxonae siete po matakábibe tsuxubi bapoxonae xua awüübo tamrópata pítaba xua daxita ira buta.

¹¹Noé 600 po weibe xeina. Bárapo weitha xua poxonae ¹⁷ po matakábibe tsuxubi xua poxonae po xometo kotakaya dukua xua pena wei, barapoxonae bárapo matakéitha yatsikaewa awüübo tsuxubi íratha. Po mene ira jumaweekeina jemeicha bárapo mene bopiya mene ungueina, yawa icha mene athawé mene othopeika nawita. ¹²Ema yakuarenta po matakábibe tsungkuae yawa yakuarenta po merawíyobe tsungkuae.

¹³Bárapo matakábitha poxonae aena awüübo tsanaya Noé pía pexántobe barakunaetha barü joniya, irü Sem, irü Cam, irü Jafet. Yáwano pisheuri Noé barü joniya, yáwano irü pekopeinxi tatsi Noé tajojoníyatsi xua akoibi powáyobe. ¹⁴Yáwano joniya duweixi unupixi, yáwano poxi jiwi itakoxone éxana, yáwano ichixi poxi najónaka íratha, yáwano peyapupunaewi. ¹⁵Daxita duwéi Noé nakana puna nabarü naishajojoníyatsi barakunaetha xua be ayunbe tsíniya, pebto yawa pesowátono. ¹⁶Barakunaetha joniya duwein pesowato yawa pebtono, yawa daxita ichíxino xua barompaya yawa pesowabi tsíniya, xua báyatha Noé peitorobixae-tsi Nakom. Bapoxonae Nakom, pong Pekanamataxeinaeinxae, barakunae boupa xatataba.

¹⁷Báyatha awüübo tsungkuae cuarenta po matakábibe. Poxonae awüübo, barakunae yantakaewoungka, yáwano barakunae nakototabina. ¹⁸Mene jopa naépa mene naruntabiyo poxonae awüübo, íchitha barakunae nakototodúkuapona. ¹⁹Maisha jopa naruntabiyo xua awüübo. Yáwano daxita demuxuwang xua po demuxuwang bichokono tajü matutu dubeiña baxuang daxita matakaewa, po demuxuwang beyakaincha icha demuxuwang xua bárapo kae pin nákuathe xeina. ²⁰Poxonae demuxuwang matakaewa xua tajü matutu dubeiña, mene kataunxuae áwiya jopa naépa mene naruntabiyo xua ekeicha kaeto be siete po metro epa-tíyobe icha.

²¹Barichi daxita jiwi bunothopa pomonae báyatha jinompa íratha. Yáwano yawérapa daxita peyapupunaewi. Yáwano daxita wérapa poxi jiwi itakoxone éxana. Yáwano daxita wérapa unupixi, yáwano daxita wérapa poxi najónaka íratha. ²²Yáwano daxita wérapa xua xuang íratha xeina xua pokotsiwa xeina peantabüyapusüüwa yawa xua xuang itakúüpatsi penameikáunewa. ²³Saya meisha Noé, yáwano xua kápona daxita barakunaetha daxita meisha baxuang nakapanenébiya. Saya ichawang daxita wérapa, jíwino yáwano poxi jiwi itakoxone éxana, yáwano peyapupunáewino xua itabokopiwi, yáwano poxi najónaka íratha. ²⁴Wérapa tsipéi bichokono pin awüübo bárapo kae pin nákuathe beya 150 po matakábibe.

Meje yábara poxonae jowanaya bárapo awüübo

8 ¹Néxata Nakom kuiyábara nantanaxeina Noé yawa daxítano kuiyábara nantanaxeina poxi báyatha éxana poxi Noé barakunaetha kápona. Nakom éxana xua joibo ira matatsún bubujéi. Bapoxonae mene bewayo jowanaya. ²Xua bopiya mene ungueina namene epa-akataba, yawa po mene itaboko bopiya wemene ungueika namene epa-akataba. Yawa xua ema duneika namüüdun-taba. ³Mene bewayo jowapona. Poxonae 150 po matakábibe tsuxubi bapoxonae mene jowanaya.

⁴Poxonae 17 po matakábibe xua siete po xometobetha, barapoxonae barakunae demuxúwatha nayüütabungkua ichaxota Ararat demuxuwa matawüing. ⁵Kataunxuae mene jowapona. Yawa poxonae po matakabi xua nantakarukua xua diez po xometobetha, bapoxonae bárapo matakábitha itakúüpatsi xua petaewa demuxuwang xua bichokono tajü matutu taeumena.

⁶Poxonae cuarenta po matakábibe yapukaewa Noé saranaxoya xua báyatha müxübürü nasaba éxana. ⁷Noé yakopatata uni. Íchitha uni saya yapupuna dukua-naebiya. Abü éwata xua ira petsewiwa tsane. ⁸Bapoxonae ekeicha Noé yakopatata

topiboto pía yaputaetsi icha ira báyatha kou tsewa. ⁹Íchitha topiboto ekeicha kaewa yapatopa barakunaetha poxoru jopa kaxinaeyo ichaxota peyapoponaewa tsane, poxoru kou áwiya awüübo. Noé pekóbetha yapita yawa kópata xua bara ekeicha barakunaetha yapurunadena.

¹⁰Noé éwata icha siete po matakábibe, bapoxonae ekeicha yakopataba topiboto. ¹¹Bara kirei tsanaicha poxonae topiboto ekeicha kaewa yapatopa. Peopípatha kapatopa olivo pemaxüranáe naewiyo. Noé bapoxonae yaputane xua bara aena kou ira tsewaponae. ¹²Kataunxuae áwiya ekeicha icha siete po matakábibe éwata, ekeicha yaitoroba topiboto. Íchitha topiboto ekeicha jopa yapatopaeyo.

¹³Poxonae Noé 601 po weibe xeina, bapoxonae ira tsewa. Po matakabi xua kopiya nantakarukua xua po xometo kopiya dukua, bárapo xométotha Noé sáraka xua peyenepawa deka xua athabeicha, yawa tane xua ira bara tsewa.

¹⁴Poxonae 27 po matakábibe xua icha xometo, po xometo xua kotakaya dukua, bapoxonae ira yatsikaya bara ira tsewa. ¹⁵⁻¹⁶Néxata Nakom Noé baraichi, jeye: “Pesato be joníyama barakunae weya, jinsheuri bichi, jinpexui bichi, nekopeinxi bichi. ¹⁷Nore daxita xua poxi barü póname barakunaetha: peyapupunaewi, yáwano poxi jiwi itakoxone éxana, yáwano poxi najónaka íratha. Nore barapomonae xua peponaenexa daxita írangtha, yawa peweinxi nawita peexanaenexa, xua bichokono nayota peexanaenexa bárapo kae pin nákuathe”.

¹⁸Noé yawa pisheuri, yawa akoibi pongbe pexántobe tatsi yawa pekopeinxi tatsi, pesato bebarü joniya barakunae weya. ¹⁹Yawa pesato bejojoniya daxita poxi kápona, yáwano poxi jiwi itakoxone éxana yawa unupiwi, yawa poxi najónaka íratha, yawa poxi yapupuna.

Meje poxonae Nakom Noé tsiwüünae muxudútsatsi

²⁰Bapoxonae Noé éxana altar matawüing, pokotsiwa xua xota duweixi yüüba-beibiyathopa xua tauta Nakom nexa. Baxua éxana Nakom nexa pongxae Pekanamataxeinaein. Pita duwéi yawa peyapupunaewi, poxi pexeñixi tsenae, poxi tsikópatatsi xua pexaewa tsane. Jíwana nonota tsíniya kaexi xua daxita karepaya duweixi. Bapoxonae duweixi juteba yawa tauta xua Nakom tsita exainchi.

²¹Nakom, pong Pekanamataxeinaeinxae, poxonae baxua túxusi tuxune bárapo túxusi tsita túxusi wüünaetsi bichokono. Nakom namchi, jeye: “Jopa ekeicha abe exanaein tsane ira xua jiwi abe peexanaexae poxoru poxonae pewowi, beya poxonae piñong bárapo jiwi ba abe nantanaxeina. Yáwano daxita duweixi jopa abe exanaein tsane. Jopa barichin tsane xua ichi ichin xua poxonae abe éxanang daxitang.

²²Poxonae kataunxuae bárapo kae pin nakua dukuaena, jiwi übeibina yawa joteibina. Atou tsaibi tsane, yawa ake tsaibi tsane. Awüübo tsaibi tsane, yawa wei tsaibi tsane. Barichino matakabin tsaibi tsane, yawa mérawi tsaibi tsane”, jei Nakom.

9¹Nakom, Noé weyataeya yábara páebatsi yáwano pipexuino, xua po jume-the, poxonae jeye: “Pexui nawita paxéinare, nayota paexande bárapo kae pin nákuathe. ²Daxita duweixi bárapo nakuatheapixi paka kuitaya junuwina. Daxita poxi peyapupunaewi, yawa irapíxino, yawa menepíwino, daxita bapoxi

pakana mataxeináename. ³Paxaema daxita duweixi yawa xua pexuwiwangno xua paichichípame xua paiña nexaewa. Báraxua paka kátatsi. ⁴Íchitha ichawa xua jopa bewa paxaem xua meje: jopa paxaeinde pewito xua pejana dubena xua jopa jana pichapabarenaeyo.

⁵Daxita barompaya pebiwi yantomatsin xua xuya bexubinchi poxonae icha ichüing paka jíwana bexuba. Daxita barompaya duweixi yantomatsin xua xuya bexubinchi xua poxonae icha duwein paka jíwana bexuba.

⁶Icha pebin bexuba, xua ichüing bexotsi,
 bapong xuya bexubinchi, tsipéi pebin kaena báyatha fórotatsi,
 Bapong naka kuikoyenejúpa.
 Daxota jopa bewa ichüing bexubichi.

⁷¡Bara paxam pexui pinmonae paxéinare!

¡Bárapo pexui bichokono nayota paexande bárapo kae pin nákuathe!” jei Nakom.

⁸⁻⁹Ekeicha Nakom Noé baraichi yawa pipexui tatsi baraichi, jeye: “Pataema, xang paka tsiwüünae muxudutsinchi. Yáwano tsiwüünae muxudutsin paiña nemómoxi susato jiwi pomona xua bexa tsane nakatsiwaponaena. ¹⁰Bari-chino tsiwüünae muxudutsin daxita duweixi poxi barü póname, poxi pesato bejojoniya barakunae weya: peyapupunaewi, yáwano poxi jiwi itakoxone éxana, yawa unupiwi xua xuang ayéi, yáwano daxita ichixi poxi bárapo nakuatheapixi. ¹¹Tapaka tsiwüünae muxudutsíwatsi jopa ekeicha ichawa tsane. Jopa pebiwi ekeicha kabetsin tsane pin awúübotha xua poxonae daxita bunothopa. Yawa duwéixino jopa kabetsin tsane pin awúübotha xua poxonae daxita bunothopa. Ekeicha jopa pin awüübo tsane xua bárapo kae pin nakue werawerakaena. ¹²Báraxua ápara xua paka tsita itapeiñaxeina pokoyene xua tapaka tsiwüünae muxudutsíwatsi bara exanaein paxamtha, yawa duweimonae nexa exanaein.

¹³Takoinwawa kuaranotang tsakinaebotha. Báraxua paka tsita itapeiñaxeina ponaena pokoyene xua bewa exanaein xua tsiwüünae muxudutang bárapo kae pin nákuathe. ¹⁴Poxona xang éxanang tsakinaebowa ira matatsuntha, takoinwawa naitüütsina tsakinaebówatha. ¹⁵Néxata daxita yábara kuinantanaxeinaein xua báyatha paka tsiwüünae muxudútatsi xua yawa daxita duweixíthano. Yawa ekeicha bápana jopa kae awüübo tsane xua daxota werawerakaena daxita jiwi yawa duwéi.

¹⁶Poxona koinwawa tsakinaebówatha ungukaena, taein yawa yábara kuinantanaxeinaein pokoyene xua báyatha pebiwi tsiwüünae muxudutang xua petsitekeibinexa tsane, matáütano yawa daxita duweixíthano poxi jinompa bárapo kae pin nákuathe”, jei Nakom.

¹⁷Barapoxona Nakom namchi Noétha, jeye: “Báraxua ápara xua petsita-itapeiñaxeinaewa xua báyatha éxanang petsiwüünae muxudutsiwa daxita pebíwitha yáwano póxitha xua jinompa bárapo írathe”, jei Nakom.

Meje yábara xua Noé pipexui yábara paeba

¹⁸Sem, irü Cam, irü Jafet daxita barapomona Noé pipexui tatsi, pomonae báyatha barakunae wejojoniya xua pesato bejojoniya. Bapong Cam Canaán paxa tatsi.

¹⁹Bárapo akoibi pongbe Noé pexántobe tatsi. Bárapo akoibi póngbexae daxota

bichokono pinmonae ekeicha nakatsiwapona bárapo kae pin nákuathe. Barapomonae waámo susato jiwi.

Meje xua poxonae Cam abe éxana

²⁰Bapong Noé peúbin. Bapong kopiya üba uvakuéi. ²¹Kaentakabi Noé apa vino mera yawa kúüpatsti. Íratha naxuba yawa tamasaboka píabo tútutha xua duweibokong bómüxü. ²²Cam Canaán paxa tatsi. Bapong Cam paxa tane xua tamasaboka, Noé pexanto tainchi. Cam jopa yawenaeyo paxa saya pona petsipaebinexa peweichobetha Semtha irü Jafettha xua saya paxa pekuikaponaenexa. ²³Néxata Sem, yawa Jafet, pítabe paparuwa, po paparuwa apiya, baxota nama akatsiya pejumapónabe yawa baxota paxa mata ákatabe poxoru tamasaina. Xua jopa petaenéxabe xua paxa tatsi tamasaina daxota naitamuxunene kapónabe.

²⁴Poxonae Noé nakosataxuba, poxonae sátatsi xua kúüpatsti, Noé yaputane xua pexanto tainchi, pong xuiyapin. ²⁵Bapoxonae Noé namchi, xua Cam pexanto tatsi yábara jeye:

“Bárabü Nakom abe exanaena bapongtha,
pong taxanto icha neichi, xua abe inta éxana poxonae netane.
Bapong peweicho jiwi amanaya tanakuichina,
xua be pong pebusikuitaetaeinchi peexanaewa tsainchi,
xuano xua peweicho jiwi kanamataxeináeinchi”, jei Noé.

²⁶Áwiya Noé namchi, jeye:

“Pong Pekanamataxeinaein, pong ta Nakom, bárabü Sem yawenaeinchi.
Yawa bara Canaán Sem amanaya pía petanakuitsinchi tsane.

²⁷Bara Nakom yawenaena,

xua Jafet pía pemómoxi susato jiwi tatsi bichokono pinmonae tsane,
yawa xua jüntema penabarü jinompaewa tsane Sem pía pemómoxi susato
jiwi tatsi.

Matáütano bara Canaán Jafet amanaya pía petanakuitsinchi tsane”, jei Noé.

[Hebreo jumetha pojume: “Jafettha”, jei tsiwiyo jumejúpa pojume: “Tsanaya”,
jei.]

²⁸Poxonae weta xua pin awüübo, Noé bapoxonae ekeicha pópona 350 po weibe.

²⁹Daxota bapong néxata pópona 950 po weibe. Bárapo weitha Noé tüpa.

Meje yábara xua Noé pía pemómoxi susato jiwi tatsi poxonae jowanaya xua pin awüübo

10¹Daxita meje barapomonae Sem pía pemómoxi susato jiwi tatsi, irü Cam pía pemómoxi susato jiwi tatsi, irü Jafet pía pemómoxi susato jiwi tatsi. Barapongbe Noé pía pexántobe tatsi xua akoibi pongbe, pongbe xua barompaya pía pexui xéinabe poxonae jowanaya xua pin awüübo.

²Jafet pía pexui tatsi meje barapomonae pewüngxi:

ichüng Gomer, ichüng Magog, ichüng Madai,
ichüng Javán, ichüng Tubal, ichüng Mesec, ichüng Tiras.

³Gomer pía pexui tatsi meje barapomonae pewüngxi:

ichüng Asquenaz, ichüng Rifat, ichüng Togarma.

⁴Javán pía pexui tatsi meje barapomonae pewüngxi:

ichüng Elisá, ichüng Tarsis, ichüng Quitim, ichüng Rodanim.

⁵Barapomonae ápara Jafet pía pemómoxi susato jiwi tatsi pomonae nakatsiwapona marmene itapatha. Daxita barompaya nakuangpiwi irü xua tsikimonaexi xua seikaya barompaya nabarü jinompa, barompaya pía irang xeina yawa barompaya pía jumein xeina.

⁶Cam pía pexui tatsi, meje barapomonae pewüngxixi tatsi:
ichüing Cus, ichüing Mizraim, ichüing Fut, ichüing Canaán.

⁷Cus pía pexui tatsi meje barapomonae pewüngxixi:
ichüing Seba, ichüing Havila, ichüing Sabta,
ichüing Raama, ichüing Sabteca.

Raama pía pexui tatsi:
ichüing Seba, ichüing Dedán.

⁸Cus, Nimrod paxa tatsi. Bapong Nimrod kopiya pong bichokono toxeincha dangwéi poxonae ichamonae kanamataxéinatxi poxonae pópona. ⁹Bapong Nimrod pepa pejeichin xua Nakom, pong Pekanamataxeinaein, yábara tsiéxanatsi xua jopa wüünaeyo. Daxota poxonae barapomonae yábara paeba ichüing xua pókotsin beta pejeichin, bárapo diwésiyo barapomonae xeina xua jeye: “Bapong barichi ichi Nimrod ichi, pong pepa pejeichin xua Nakom yábara tsiéxanatsi”, jei bárapo diwésiyo.

¹⁰Meje pewüngxixi xua pepa tómarang, po pepa tómarang xua bapong kanamataxeina: icha pepa tómara Babel tómara, icha pepa tómara Erec tómara, icha pepa tómara Acad tómara, yawa icha pepa tómara Calne tómara xua po tómara eka Sinar nákuatha. ¹¹Nimrod Sinar nakua wewarapiya, Asiria nakua bewarapiya. Baraxota Asiria nákuatha tómara éxana pewüing Nínive, yawa icha tómara éxana pewüing Rejobot, yawa icha tómara éxana pewüing Cálaj. ¹²Barichi icha tómara éxana xua pepa tómara xua Resén tómara. Bárapo tómara Resén tómara eka ichaxota náitama táekabe Nínive tómara yawa Cálaj tómara.

¹³Mizraim bapong ludeomonae pía pamo susatopin tatsi,
irü anameomonae pía pamo susatopin tatsi,
irü lehabitamonae pía pamo susatopin tatsi,
irü naftuitamonae pía pamo susatopin tatsi.

¹⁴Barichi bapong patruseomonae pía pamo susatopin tatsi,
irü casluhitamonae pía pamo susatopin tatsi,
pomonae filisteomonae weya píchapa,
irü caftoritamonae pía pamo susatopin tatsi.

¹⁵Canaán Sidón paxa tatsi.
Bapong Sidón pepa matapin.
Barichi Canaán irü Het paxa tatsi.

¹⁶Barichi Canaán jebuseomonae pía pamo susatopin tatsi,
yawa irü amorreomonae pía pamo susatopin tatsi,
irü gergeseomonae pía pamo susatopin tatsirü.

¹⁷Bapong Canaán heveomonae irü pía pamo susatopin tatsi,
irü araqueomonae pía pamo susatopin tatsi,
irü sineomonae pía pamo susatopin tatsi.

¹⁸Barichi bapong Canaán arvadeomonae pía pamo susatopin tatsi,
irü zemareomonae pía pamo susatopin tatsi,

irü hamateomonaē pía pamo susatopin tatsi.

Bapoxonaē daxita bicheitong cananeomonaē tsana tajü nakayayatsiya pona.
¹⁹Cananeomonaē pía ira tatsi bichokono pin nakua náexana xua beya Gerar nakua kaxiníyatsi xua Sidón tómara weya xua Gaza tómara kaxiníyatsi. Matáütano Sodoma tómara yawa Gomorra tómara kaxiníyatsi. Matáütano Adma tómara, yawa Zeboím tómara beya xua yawa Lasa tómara kaxiníyatsi.

²⁰Daxita barapomonaē ápara Cam pía pemómoxi susato jiwi tatsi. Daxita barompaya nakuangpiwi irü xua tsikimonaexi xua seikaya barompaya nabarü jinompa, barompaya pía irang xeina, yawa barompaya pía jumein xeina.

²¹Bapong Sem, Jafet péntapin tatsi. Bapong Sem xeina pexui. Daxita Heber pía pexui tatsi, barapomonaē ápara Sem pía pemómoxi tatsi.

²²Sem pía pexui tatsi:

ichüng Elam, ichüng Asur, ichüng Arfaxad, ichüng Lud, ichüng Aram.

²³Aram pía pexui tatsi:

ichüng Uz, ichüng Hul, ichüng Geter, ichüng Mas.

²⁴Bapong Arfaxad Sélaj paxa tatsi.

Irü bapong Sélaj Heber paxa tatsi.

²⁵Kotakaya Heber aiña pexántobe xeina.

Pong kopiya pewüng Peleg. Bárapo wüng wüngdútatsi tsipéi, poxonaē bapong pópona, jiwi natsaba, pomonaē jinompa bárapo íratha.

[Hebreo jumetha po wüng: “Peleg”, jei tsiwiyo jumejúpa pojume: “Natsaba”, jei.]

Peleg peweicho tatsi pewüng Joctán.

²⁶Bapong Joctán Almodad paxa tatsi,

irü Selef paxa tatsi,

irü Hazar-mávet paxa tatsi,

irü Jéraj paxa tatsi.

²⁷Barichi Joctán Adoram paxa tatsi,

irü Uzal paxa tatsi,

irü Dicla paxa tatsi.

²⁸Barichi Joctán Obal paxa tatsi,

irü Abimael paxa tatsi,

irü Seba paxa tatsi.

²⁹Barichi Joctán, Ofir paxa tatsi,

irü Havila paxa tatsi,

irü Jobab paxa tatsi.

Daxita barapomonaē Joctán pía pexui tatsi.

³⁰Yawa barapomonaē jinompa po írathang ichaxota po nakua Mesa nakua matawüng wetaerukuiya, xua Sefar nakua matawüng betaerukuiya, xua ichaxota bichokono demuxuwa tajü matutu dukua xua pokotsiwa xometo wekouneibina.

³¹Daxita barapomonaē Sem pía pemómoxi susato jiwi tatsi. Daxita barompaya nakuangpiwi irü xua tsikimonaexi xua seikaya barompaya nabarü jinompa, barompaya pía irang xeina yawa barompaya pía jumein xeina.

³²Daxita barapomonaē Noé pía pemómoxi susato jiwi tatsi pía jiwimonaē tatsi. Ekeicha pía pemómoxi susato jiwi tatsi tsóponaē yawa pía irang tatsi tatsoponaē-tsi. Poxonaē jowanaya xua pin awüüibo bapoxonaē natsabapona xua seikaya aiña nakuangmonaē penaexanaenexa bárapo kae pin nákuathe.

Meje yábara xua bo xua tajüicha éxana, po bo pewüing Babel

11 ¹Bárapo dapaetha, daxita pomonae jinompa bárapo kae pin nákuathe bara kae jumetha kueikueijei. ²Barapomonae wárapa bara weya icha pokotsiwa xometo wekounaibina weya. Barapoxonae barapomonae Sinar nakua kaxibiya, po nakua ira matafátsana. Bárapo nákuatha barapomonae naeba.

³Kaentakeitha kaemonae nabarái, jeye: “Exanaeinchi adobe matawüing xua tsórobo weya yawa sebinchi ishótotha”, jei. Bapoxonae barapomonae tamrópata notarúküpa xua adobe éxana xua tsórobo kauyenababa poxoru jopa pexeinaexae ibowang. Matáütano jopa akabiyo xua xota katsana. Saya ákaba po peka-tsanaewa pewüing brea nain poxoru jopa pexeinaexae mortero nain matawüing xua katsana.

⁴Bapoxonae ekeicha najéi: “Anthá, exanaeinchi pepa tómara yawa exanaeinchi bo xua tajüicha xua tajü matutu unguiya xua itaboko jayüicha. Xain daxita jiwi naka yábara diwesi yaputáe dubenanáebiya. Xain jopa nawepu tsata othopaetsi xua tajü daxita írangtha”, jei barapomonae naka yábara diwesi.

⁵Íchitha Nakom, pong Pekanamataxeinaein, patopeika xua petanexa tómara, po tómara pepa tómara, matáütano xua petanexa bo xua tajüicha xua jiwi éxana. ⁶Néxata, Nakom, pong Pekanamataxeinaein, nantanaxeina, jeye: “Mexeya poxoru barapomonae kae tomarapiwi yawa kae jumekueikueijéi, daxota nama ánoxuae barapomonae bárapo bo éxana xua tajüicha. Matáütano barapomonae itakúüpatsi xua daxita jopa juniya eexanaponaeyo xua pokoyenein nantaxeina. ⁷Metha wüünae xua parekaeinchi xua seikaya barompaya pijume kueikueijei waexanaenexa, xua jopa kaemonae penajumekopi yaputaenexa pijumetha”, jei Nakom.

⁸Nakom, pong Pekanamataxeinaein, daxita barapomonae tsanajinomparuta éxana xua daxita írangtha. Yawa barapomonae nakobebaparenta xua pepa tómara éxana. ⁹Bárapo íratha Nakom, pong Pekanamataxeinaein, éxana xua daxita barapomonae barompaya seikaya kueikueijei xua daxota ichamonae jopa jumeyaputaeyo. Yawa barapoxonae tsanajinomparuta éxana xua daxita karepaya bárapo kae pin nákuathe. Daxota bárapo tómara pewüing Babel tómara. [Hebreo jumetha po wüing: “Babel”, jei tsiwiyo jumejúpa pojume xua jei: “Seikaya kueikueijei xua daxota ichamonae jopa jumeyaputaeyo”, jei.]

Meje yábara xua Abram pía pamo susato jiwi tatsi

¹⁰Meje barapomonae Sem pía pemómoxi susato jiwi tatsi.

Poxonae aiña po weibe weta xua pin awüübo, poxonae Sem 100 po weibe xeina, bapoxonae Sem tanakatsíwatsi pexanto, pewüing Arfaxad. ¹¹Poxonae Arfaxad nakatsiwa bapoxonae Sem ekeicha 500 po weibe pópona yawa pía pexui tanakatsíwatsi pebiwüütixi yawa yabüxino.

¹²Arfaxad 35 po weibe xeina poxonae tanakatsíwatsi pexanto pewüing Sélaj. ¹³Bapoxonae Arfaxad 403 po weibe pópona ekeicha yawa tanakatsíwatsi pía pexui, pebiwi yawa yabüxino.

¹⁴Sélaj 30 po weibe xeina poxonae tanakatsíwatsi pexanto pewüing Heber. ¹⁵Bapoxonae Sélaj 403 po weibe pópona ekeicha yawa pía pexui tanakatsíwatsi, pebiwi yawa yabüxino.

¹⁶Heber 34 po weibe pópona poxonaē tanakatsíwatsi pexanto pewüing Peleg.
¹⁷Bapoxonaē Heber 430 po weibe pópona ekeicha yawa tanakatsíwatsi pía pexui, pebiwi yawa yabüxino.

¹⁸Peleg 30 po weibe pópona poxonaē pexanto tanakatsíwatsi pewüing Reu.
¹⁹Bapoxonaē Peleg 209 po weibe pópona ekeicha yawa tanakatsíwatsi pía pexui, pebiwi yawa yabüxino.

²⁰Reu 32 po weibe pópona poxonaē pexanto tanakatsíwatsi pewüing Serug.
²¹Bapoxonaē Reu 207 po weibe pópona ekeicha yawa tanakatsíwatsi pía pexui, pebiwi yawa yabüxino.

²²Serug 30 po weibe pópona poxonaē tanakatsíwatsi pexanto pewüing Nacor.
²³Bapoxonaē Serug 200 po weibe pópona ekeicha yawa tanakatsíwatsi pía pexui, pebiwi yawa yabüxino.

²⁴Nacor 29 po weibe xeina poxonaē pexanto tanakatsíwatsi pewüing Taré.
²⁵Bapoxonaē Nacor 119 po weibe pópona ekeicha yawa tanakatsíwatsi pía pexui, pebiwi yawa yabüxino.

²⁶Taré 70 po weibe xeina poxonaē pía pexui tanakatsíwatsi: ichüing pewüing Abram, ichüing pewüing Nacor, ichüing pewüing Harán.

²⁷Meje barapomonaē Taré pía pemómoxi susato jiwi tatsi.

Bapong Taré Abram paxa tatsi yawa Nacor paxa tatsi yawa Harán paxa tatsi. Bapong Harán Lot paxa tatsi. ²⁸Harán paxa tsíwana tüpa pong Taré, ichaxota Ur tómara xua Caldea nákuatha. Harán tüpa ichaxota báyatha nakatsiwüingka. ²⁹Abram nakóyoba petsiriwa powa pewüing Sarai. Iriü Nacor nakóyoba peyüingyo powa pewüing Milca. Barapowa Milca Harán pexantiyo tatsi yawa pong pewüing Isca, barapong pamcho tatsi. ³⁰Sarai jopa xeinaeyo pexui poxoru aitapexuibi.

³¹Taré wárapa Ur tómara weya xua caldeomonaē pía nakua weya tatsi, pía poponaetsi Canaán ira beya. Taré pexanto barü pona pong pewüing Abram, yawa pemomo barü pona pong pewüing Lot. Yawa pekopeiño barü pona powa pewüing Sarai. Poxonaē pata Harán tómaratha bárapo tómaratha ena. ³²Taré tüpa Harán tómaratha poxonaē 205 po weibe xeina, po tómara wüingduta po wüing xua pexanto tatsi pewüing tatsi, pongxae pexanto tsíwana túpatsi.

Meje yábara xua poxonaē Abram Canaán nakua bewarapiya

12 ¹Kaentakeitha Nakom, pong Pekanamataxeinaein, Abram baraichi, jeye: “Jiña ira kuenta wárapare yawa jiñamonaē kuenta wárapare. Matáütano axa piamonaē tatsi kuenta wárapare neponaenexa icha íratha, po ira katsita-itüütsinchi.

²Nemómoxi susato jiwi pin bicheitomonaē exanaein.

Yawa weyataeya kayábara paebinchi xua kayawenaeinchi.

Yawa ka-exanaeinchi xua ichamonaē tsita aiñakuim tsane.

Kopiya takayawenáexaetsi, daxota ichamonaē yawenáename.

³Xuya weyataeya yábara paebin xua tayawenaewa, pomonaē weyataeya kayábara paeba.

Xuya abe exanaein, pomonaē abe kata éxana.

Kayawenaeinchi poxoru yábara katsiwüüinaē muxudútatsi,

xua daxota daxita nakuangmonaē jüntükoyene weiweinaena,

poxonaē yawenaein barapomonaē, xua poxoru xamxae”, jei Nakom.

⁴Abram Harán tómara weya wárapa icha be pókotsi koyeneya Nakom, pong Pekanamataxeinaein, muxujéi. Irü Lot nápona. Abram 75 po weibe xeina poxonae bara weya wárapa xua pewarapaenexa Canaán ira beya. ⁵Yawa Abram píowa barü pona powa pewüing Sarai, yawa peyüing barü pona pong pewüing Lot. Yawa kápona daxita piyawa, yawa kápona pomonae báyatha tanakuítatsi Harán tómaratha xuano irü Lot tanakuítatsi. Matapaiña pata Canaán nákuatha.

⁶Poxonae pata Canaán nákuatha, Abram bárapo Canaán nakua matawakaicha toketaba, beya Siquem tómaratha patopa ichaxota nae unguua, po nae pewüing encina nae matawüing, po nae ichaxota jiwi ewateiba pojumein xua pía nakomüing tatsi paebeiba. Bárapo nae unguua Moré íratha. Bárapo Canaán nákuatha jinompa pomonae pewüing cananeomonae. ⁷Baxotiya Nakom, pong Pekanamataxeinaein, Abram tsita naitüütatsi. Yawa baraichi, jeichichi: “Bárapo ira jiña nemómoxi susato jiwi katsin”, jei Nakom. Néxata Abram éxana altar matawüing, pokotsiwa xua ichaxota duweixi yüübabeibiyathopa xua tauta Nakom nexa yáitama bárapo íratha Abram tsita naitüütatsi Nakom.

⁸Bapoxonae Abram pona xua po íraxae demuxuwang icha pokotsiwa xometo wekounaibina. Baraxota tómara éxana xua duweibokong bomüxüxi xua ichaxota Betel tómara náitama táekabe Hai tómara. Betel tómara eka icha pokotsiwa xometo bejopiya. Hai tómara eka ichaxota pokotsiwa xometo wekounaibina. Baraxota Abram ekeicha éxana altar matawüing, pokotsiwa xua ichaxota duweixi yüübabeibiyathopa xua tauta Nakom nexa yawa xua Nakomtha petsipaebinxaxa. ⁹Pírapae bara weya pona. Bewayo Néguev nakua beya pona.

Meje yábara xua poxonae Abram jopa beta exanaeyo pongtha, pong Egipto nakua peewatsin

¹⁰Bárapo dapaetha irü bárapo nákuatha bichokono pin mayayo nakua tsúrukuae xua daxita pexaewa tüpa. Abram wárapa xua Egipto nákuatha pepoponaenexa xua saya bara kaeto, yáitama aibi xua penabanaewa ichaxota pópona.

¹¹Poxonae bara Abram Egipto nákuatha muxu pepatopáe píowa barái powa pewüing Sarai, jeye: “Taema, xang bara xaniwaicha yaputang xua xam pexeñowam. ¹²Poxonae Egipto nakuamonae kataena jei tsane: ‘Ápara bárapo pebinje píowa tatsi bapowe’, jei tsane. Bapoxonae nebexubina. Saya xam jopa kabexubi tsane, nekapichinxaxa tsane. ¹³Daxota katsipáebatsi néxata jande: ‘Ápara taewei-cho’, neyábara jande. Bapoxonae xain jopa nebexubiyo jiña neexanaexae baxua, xua jopa tana neyaita aenáe exanaewam tsane”, jei Abram.

¹⁴Poxonae Abram Egipto nákuatha patopa egiptomonae ichamonae Sarai tainchi xua pexeñowa bichokono. ¹⁵Barichi barapowa tainchi pomonae irü pentakaponaewi xua pomonae pong Egipto nakua peewatsin pía petanakuichiwichi. Barapomonae, pomonae Egipto nakua peewatsin pía petanakuichiwixaxetsi, tsipáebatsi xua pinae barapowayo bichokono pexeñowayo tsekaxe. Néxata barapowa kapoinchi Egipto nakua peewatsin pin piabotha tatsi. ¹⁶Poxoru Sarai tainchi, pong Egipto nakua peewatsin Abram weyatainchi. Abram amanaya ovejang katsíbatsi, yawa vacangno katsíbatsi, yawa búrronno katsíbatsi, yawa camellong katsíbatsi. Matáütano Abramtha tapunatoróbatsi pebiwi, po pebiwi xua Abram amanaya petanakuichinéxatsi. Barichino Abram tapunatoróbatsi yábüxi, poyábüxi xua Abram petanakuichinéxatsi.

¹⁷Poxoru Sarai eka Egipto nakua peewatsin piabotha tatsi, daxota Nakom, pong Pekanamataxeinaein, Egipto nakua peewatsin abe exainchi yawa pía matabüxüyo tatsi abe taexainchi. Nakom itoroba pin peatenewa xua daxota Egipto nakuamonaé átene. ¹⁸Daxota Egipto nakua peewatsin najumekaitoroba xua Abram pewabinéxatsi. Abram baraichi, jeye: “¿Eta xua metha inta baxua éxaname? ¿Eta xua metha jopa netsipaebim xua barapowa ápara jiña petsiriwa? ¹⁹Xam páebame xua barapowa amcho. Inta éxaname xua áwatha tapetsiriwa taexanaewa tsane. Bara pónare, barapowa ungue jiña petsiriwa. ¡Pire, moya barü ponde!” jei Egipto nakua peewatsin.

²⁰Egipto nakua peewatsin itoroba pía petanakuichiwichi xua Abram Egipto nakua weya bara pepukopatsinéxatsi xua pewartapaenexa. Itoróbano xua yawa píowa bara pebarü warapaenexa xua yáwano daxita pekaponanexa pokotsiwa xua xeina.

Meje yábara xua Abram yawa Lot nawepu tsatajópabe

13 ¹Abram píowa barü wárapa Egipto nakua weya xua ekeicha pekoyo beya Néguev nakua beya. Yawa daxita múxuna kawárapa xua xeina. Abram peyüng barü wárapa, pong pewüng Lot. ²Abram bichokono kopei pexeinaein. Bapong xeina xua oro nain matawüng yawa xeina xua plata nain matawüng. Yawa duwéi xeina nawita.

³Ekeicha Néguev nakua wewarapiya, bewayo wawárapa tsíniya, Betel tómara bewarapiya. Ekeicha bárapo tomarathiya bara weya wárapa ichaxota beya báyatha kopiya naebopa xua poxonaé éxana duweibokong bomüxüxi xua saya kaeto eka. Bárapo ira eka ichaxota náitama tayékabe Hai tómara yawa Betel tómara.

⁴Bárapo íratha kaena báyatha Abram éxana altar matawüng, pokotsiwa xua ichaxota duweixi yüübabeibiyathopa xua tauta Nakom nexa, pong Pekanamataxeinaein. Baxotiya Nakomtha tsipaebeiba.

⁵Irü Lot kopei pexeinaein icha paxong tatsi ichi xua Abram. Lot jopa juniya xeinaeyo ovejang yawa vacang jopa juniya xeinaeyo yawa jiwi pomonae xua puna-eexanapoinchi tómarang xua duweibokong bomüxüxi exanapona. ⁶Íchitha, ichaxota Lot irü Abram xua barompaya piamonae barü popónabe jopa pexaewa nawita tsaenaebiyaeyo xua penabanaewa tsane daxita barapomonae yawa xua duweimonae nexa. Nama jopa itaküüpaetsi xua pebürüya jinompa. ⁷Pomonae xua Abram pía vacang tayapu-eénatsi irü pomonae Lot pía vacang tayapu-eénatsi barapomonae naba. Barichi bárapo dapaetha cananeomonae irü ferezeomonae daxita barapomonae áwiya baxota jinompa.

⁸Kaentakeitha Abram Lot baraichi, jeye: “Xam irü xang ápara kaemonaetsi. Báraxua jopa wüünaeyo xua waxantha pepichapaewa tsane penabi koyenewa. Matáütano jopa wüünaeyo xua penabi koyenewa petapichapáewatsi pomonae jiña duweixi kata eena irü pomonae inta eena taduweixi. ⁹Taema daxita ira xua neitapetsinexa xua po ira ichichípame. Katsipáebatsi xua newepu tsatajópabe. Icha póname párowa béreka, tha ponaetsi weyabeicha. Icha póname weyabeicha, tha ponaetsi párowa béreka”, jei Abram.

¹⁰Lot daxita jüpaya tane xua pamarafoto xua Jordán mene. Yawa tane xua pamarafoto mera nawita xeina yawa be Nakom pía pexeiña pabi tatsi xua beya Zoar tomariyo kaxiniya. Bárapo ira jüpa be Egipto ira. Bárapo ira kaena báyatha

wüünae poxonae kataunxuae Nakom, pong Pekanamataxeinaein jopa abe exanaeyo Sodoma tómará yawa Gomorra tómará. ¹¹Néxata Lot itapeta daxita xua pamarafoto xua Jordán mene. Yawa pona párowa béreka xua baxota pópona. Baxua éxana Abram xua nawepu tsatajópabe Lot.

¹²Abram Canaán nákuatha pópona. Irü Lot pona xua pepoponaenexa duweibokong bomüxütha ichaxota imoxoyo po tómarang xua ena pamarafótotha xua ichaxota Sodoma tómará xua pepa tómará. ¹³Pebiwi pomonae Sodoma tomarapiwi barapomonae peaitabé jiwi. Bichokono abe éxana Nakomtha, pongxae Pekanamataxeinaeinxae tatsi.

Meje yábara xua Nakom Abram tsiwüünae muxudútsi xua pekatsiwa tsainchi Canaán nakua

¹⁴Lot pekoutha tatsi poxonae wárapa, bapoxonae Nakom, pong Pekanamataxeinaein, Abram baraichi, jeye: “Po íratha ékame bara weya beta taema párowa béreka, yawa beta taema weyabeicha, yawa beta taema ichaxota pokotsiwa xometo wekoina, matáütano beta taema ichaxota pokotsiwa xometo beothopeibiya. ¹⁵Daxita bárapo irang kakatinchi po irang táneme. Bara jiña ira tsaibi tsane irü jiña nemómoxi susato jiwi pía irang tatsi tsane. ¹⁶Barapomonae jiña nemómoxi susato jiwi xang exanaein xua barapomonae pinmonae tsane icha táetowa beno ichi. Icha ichi xua jiwi jopa itaküüpaetsi xua peununaewa táetowa pepürü, barichi jiña nemómoxi susato jiwi pinmonae tsane jopa peyábara jüpáewatsi tsainchi xua peununáewatsi. ¹⁷Ponde xua ira xaxaintaxore. Ponde xua apiyiya ira. Ponde xua tajü dena ira. Ekeicha kaibe iyande xua apiyiya ira. Ekeicha iyande xua tajü dena ira. Baxua éxande yáitama bárapo ira kakatinchi”, jei Nakom.

¹⁸Bara Abram íshaka pía duweibokong bomüxüxi xua pepoponaenexa untha ichaxota po uniyo pewüng encina naein. Pebin pía uniyo pong pewüng Mamre. Bárapo uniyo boka imoxoyo Hebrón tómará xua pepa tómará. Baraxota Abram éxana altar matawüng, pokotsiwa xua ichaxota duweixi yüübabeibiyathopa xua tauta Nakom nexa, pong Pekanamataxeinaein.

Meje yábara xua Abram kapanepa, Lot kapanétsi

14 ¹Bárapo dapaetha Amrafel bapong Sinar nakua peewatsin. Irü Arioc bapong Elasar nakua peewatsin. Irü Quedarlaomer bapong Elam nakua peewatsin. Irü Tidal bapong Goím nakua peewatsin. ²Daxita barapomonae, pomonae nakua peewatsiwi naba éxana. Pong pewüng Bera naba éxanatsi pong Sodoma tómará peewatsin. Irü naba éxanatsi pong pewüng Birsa, pong Gomorra tómará peewatsin. Irü naba éxanatsi pong pewüng Sinab, pong Adma tómará peewatsin. Irü naba éxanatsi pong pewüng Semeber, pong Zeboím tómará peewatsin. Irü barichi naba éxanatsi pong Bela tómará peewatsin, po tómará icha wüng Zoar tómará. ³Barapomonae xua cinco pongbe pomonae aunxuae naba éxanatsi, barapomonae pía ejercitomonae kaetuta éxana pamarafótotha, po pamarafoto pewüng Sidim ichaxota po pin pukua xua sarebeno pukua xua po ira mene matawüng dútatsi ánoxuae xua: “Mar Muerto mene”, jei.

⁴Quedarlaomer bapong kui-amanayabapona doce po weibetha, xua amanayabapoinchi barapomonae, pomonae cinco pongbe, pomonae tómarang peewatsiwi. Íchitha poxonae trece po weibetha barapomonae nantü tsakarabiya weta xua naba

peexanaewa tsainchi Quedarlaomer. ⁵Icha weitha bapoxonae Quedarlaomer irü ichamonae, pomonae tómarang peewatsiwi, pomonae penabarü jinompaewixae, Astarot-karnaim nakua beyiya. Barapomonae baxotiya yótaba, refaitamonae yótabatsi. Bapoxonae ekeicha zuzitamona yótabatsi Ham nákuatha. Irü emitamonae yótabatsi Save-kiriataim nákuatha. ⁶Barichi barapomonae yótaba, horeomonae yótabatsi demuxúwangtha ichaxota Seír demuxuwa matawüing. Horeomonae El-parán petuwexua matawüing bebarainíyatsi. Bárapo wexua imoxoyo eka ichaxota irasaina xuépana tsúrukuae nakua.

⁷Quedarlaomer kaibe náwiya irü pomonae xua punapoinchi. Bapoxonae barapomonae pata En-mispat nákuatha xua icha wüingno Cades. Baxotiya daxita abe éxana amalecitamonae daxita piyawang tatsi xua xuaunxuae pía nákuatha xeina. Barichi abe éxana amorreomonae daxita piyawang tatsi xua xuaunxuae pía nákuatha xeina xua Hazezón-tamar nákuatha.

⁸⁻⁹Néxata Sodoma tómara peewatsin, irü Gomorra tómara peewatsin, irü Adma tómara peewatsin, irü Zeboím tómara peewatsin, irü Bela tómara peewatsin, daxita barapomonae Sidim pamarafoto beyiya. Barapomonae cinco pongbe pomonae tómarang peewatsiwi yótaba, Quedarlaomerbarü pong Elam nakua peewatsin yótabatsi. Pomonae barü pona, barapomonae ápara Tidal, irü Amrafel, irü Arioc. Daxita barapomonae tómara peewatsiwi. Ichüing pong Elam nakua peewatsin, irü ichüing pong Goím nakua peewatsin, irü ichüing pong Sinar nakua peewatsin, irü ichüing pong Elasar nakua peewatsin.

¹⁰Daxita matapaeicha Sidim pamarafótotha müthüing nawita xua saya baxoyo bobendeka xua penain xua anainkuito. Sodoma tómara peewatsin, irü Gomorra tómara peewatsin, poxonae kuitaya naetsiríkuabe xua naba, müthü joparéka. Ichamonae pomonae tómarang peewatsixae demuxuwang berüküpiya. ¹¹Barapomonae pomonae pebarainaexae, barapomonae nota pexaewang. Matáütano nota jiwi, múxunano xua xuang xeina xua Sodoma tómaratha jinompa irü Gomorra tómaratha xua jinompa. Barapoxonae barapomonae bara weyiya.

¹²Poxoru Lot, pong Abram peyüing tatsi baxota pópona xua Sodoma tómaratha, daxota bapong wáetabatsi yawa múxuna kapoinchi pía nakua weya xua bapong xeina. ¹³Pebin pong napaeba, bapong daxita baxua Abram tsipáebatsi. Abram hebreomonaepin. Bapong Abram pópona untha ichaxota encina naein matawüing nawita. Pebin pía unu tatsi pong pewüing Mamre, amorreomonaepin. Bapong Mamre Escol peweicho tatsi, yawa Aner peweicho tatsi. Daxita barapomonae Abram pía peyaitáe jíwichi.

¹⁴Poxonae Abram yaputane xua peyüing tatsi tawáetabatsi yawa kapoinchi pía nakua weya, bapoxonae kaetukaetuteta pomonae xua báyatha wíchata piabotha xuano xua beta petanakuichiwichi. Daxita barapomonae 318 pongbe pebiwi. Daxita barapomonae pubaraina pomonae nakua peewatsiwi, Dan tómara beya pubarainíyatsi. ¹⁵Merawitha Abram aña bichéitobe éxana pomonae xua peyaitáe jíwichi. Daxita barapomonae benaekaeya ba tómara peewatsiwi, pentakaponaewi benaekaeya betsi. Abram piamonae tatsi abe exanapona beya Hoba tómaratha, po tómara Damasco tómara pepuya beya taékatsi. ¹⁶Matáüta ekeicha kaewa wekobonota daxitang xua xuang báyatha bárapo tómara peewatsiwi nota. Abram peyüing kapanepa bapong Lot. Yáwano xua Lot piyawa tatsi pokotsiwang xua báyatha tanótatsi, báxuano kapanepano. Yawa kapanepa yábüxi yawa icha jíwino.

Meje yábara xua Melquisedec Abram weyataeya yábara paeba

¹⁷Abram kaibe náwiya poxonae weta xua yótaba, xua yótabatsi Quedarlaomer yawa pomonae nakua peewatsiwi, pomonae Quedarlaomer punapoinchi. Pong Sodoma tómara peewatsin pona xua Abram matenta weiweinaeya pejakobinéxatsi Savé marafótotha matawüing. Bárapo marafoto, “Nakua peewatsin pía marafoto tatsi”, jei.

¹⁸Néxata patopa Melquisedec, pong Salem tómara peewatsin xuano xua sacerdotemonaepin náexana Nakom nexa, po Nakom itabókotha peekaein. Sacerdotemonaepin pong petsipaebin Nakomtha jiwi nexa. Bapong Abram taxawénatsi pan yawa vino mera xua irü piamonae tatsi nexa. ¹⁹Bapong Melquisedec Abram wüünae jaintiya baráichichi xua po jumethe, jeye:

“Bárabü Nakom beta kata exanaena,
pong peitabókotha peekaein,
pong peitaboko éxana, yawa ira éxana.

²⁰Matáütano bárabü waxainchi wüünae jainchinchichi Nakom,
pong peitabókotha peekaein,
pong xua kayawena xua amanáyabame jiña nekaitafáetabi jiwi”,
jei Melquisedec xua Abram tsipáebatsi.

Néxata Abram kata, Melquisedec kátatsi xua diez xuangbetha kaewang jíwana wetsatsaba tsíniya pokotsiwang xua báyatha yábara amanáyaba poxonae naba.

Meje poxonae Abram irü Sodoma tómara peewatsin natsipáebabe

²¹Bapoxonae pong Sodoma tómara peewatsin Abram baraichi, jeye:

—Nekobénare pomonae xua téikatsi poxonae amanayabatsibe poxonae naba exanátsibe. Bapoxonae nore pokotsiwang kopeiwang xua xeina barapomona, jei pong Sodoma tómara peewatsin.

²²Íchitha Abram jumenota bapongtha, jeye:

—Báyatha Nakomtha nayábara kuiwüünae tsiwanaya páebang pong Pekanamataxeinaein, pong peitabókotha peekaein, xuano xua peitaboko éxana yawa ira éxana. ²³Baxua éxanang xua xang jopa bewa pichin tsane pokotsiwa jíñawa xua xuang saya pepawi. Aichaxaibin xua bexa tsane xam jam tsane: ‘Abram kopei xeinaein náexana poxoru kopei xeinaein kana éxanang’, jam tsane.

²⁴”Jopa notsiño xua saya meisha xang nexa. Saya meisha kopatang xua xane pomonae xua neyawena po pexaewa xua báyatha yábara amanáyabang poxonae naba éxanang. Barichirü icha pebiwi po pebiwi neyanabapona. Bapong Aner irü Escol irü Mamre barapomona piyawang jíwana notsina pokotsiwang xua báyatha payábara amanáyabang ichamona poxonae pananabang, jei Abram.

Meje yábara xua Nakom tsiwüünae muxuduta Abramtha

15 ¹Bapoxonae pírapae Nakom, pong Pekanamataxeinaein, Abram baraichi poxonae tsita naitüütatsi, jeye:

—Jopa junuwinde Abram,
poxoru xang pong takaita-araranaeinchi.
Pokotsiwa xua takakatsíwatsi,
xua beta neexanaexae,
bichokono nawichina, jei Nakom.

²⁻³Abram jumenota:

—Nakom, pong Pekanamataxeinaem, pokotsiwa xua tana nekatsiwam tsane baxua jopa neyawenáe tsipae tsipéi xam yaputáneme xua jopa pexuyo xeinaeíño. Xam jopa tana nekatsimxaem taxanto, daxota pokotsiwa xua takopiniwa bapong Eliezer xeinaena, pong Damasco tomarapin, pong jíwana pomonae inta nakuita.

⁴Nakom, pong Pekanamataxeinaein, Abram jumenótatsi, jeye:

—Pong jíña nekopiniwa xeinaena, ápara pong yatsikaewa jíña nexanto tsane. Jopa ápara ichüing tsane pong seikáyapin, jei Nakom.

⁵Nakom Abram pesato beya kapoinchi yawa jeichichi:

—Peitaboko benekóichama yawa unúnare opitéi icha kaitaküüpa xua neunu-naewa. Bara barichi tsane jíña nemómoxi susato jiwi kata bichokono pinmonae tsane, jei Nakom.

⁶Abram yábara jumekowünta xua Nakom paeba. Daxota Nakom, pong Pekanamataxeinaein, Abram yábara nantanaxéinatsi xua bara bapong pentakuiwüünaein.

⁷Nakom Abram baraichi, jeichi:

—Xang Nakom, pong daxita jiwi takanamataxeinaein, kapítatsi Ur tómara weya, po tómara eka Caldea nákuatha, takakatsinéxatsi bárapo ira, po íratha ánoxuae úngkuame, be pokotsiwa jiwi koxiyeiwi pejüntanajebiwa pía pexui xua petsite-kaenexa tsane, jei Nakom.

⁸Abram jumenota, jeye:

—Nakom, pong Tananekanamataxeinaein, ¿eta bichin tsane xua xaniwaicha tayaputaewa tsane xua bárapo ira taxeinaewa tsane xua be pokotsiwa xua jiwi pejüntanajebiwa pía pexui? jei Abram.

⁹Nakom namchi:

—Ínkane inta kaponde vaca pesowátiyo, yawa cabra pesowátiyo, yawa oveja pebtiyo xua daxita bárapo duweimonaein akoibi po weibe xeina. Yawa inta kaponde topiboto yawa mauto, pong penang, jei Nakom.

¹⁰Daxita bárapo duwéi Abram kapatopa Nakom nexa yawa jíwana tsaba ichawang péitabara deka xua nantíyabe wikuaranobapoiña. Íchitha peyapupunaewi jopa jíwana witsabiyo xua topiboto yawa mauto xua penang. ¹¹Daxita bárapo duwéi xua poxonae juteba, kékerein pounanonobabika yawa pepongtha yanonobaba íchitha Abram yaitaweteibeka kékerein. ¹²Poxonae muxu pekiréi tsanaichae Abram maitúngkuataba. Barapoxonae Abram matawakaicha jópatsi xua bichokono kirei xua daxota Abram bichokono junuwa. ¹³Bapoxonae Nakom namchi Abramtha:

—Xaniwaicha bewa yaputáename xua jíña nemómoxi susato jiwi icha nákuatha jinompaena. Barapomonae busikuitaetaeyebebinchi xua amanaya penakui-chiwa tsane ichamonae nexa. Yawa abe exaneibinchi 400 po weibetha tsane. ¹⁴Íchitha xang abe exanaein pomonaetha, pomonae xua jíña nemómoxi susato jiwi busikuitatainchi. Bapoxonae jíña nemómoxi susato jiwi panenebiya tsane yawa kopei nawita kapanenebiyaena. ¹⁵Xam yanthüthüya wüünae tüpáename. Poxonae bichokono amom tsane, bapoxonae tüpáename. ¹⁶Poxonae wétsina xua 400 po weibe, jíña nemómoxi susato jiwi kaibe nawibiyaena bárapo íra-the. Baxua jopa exanaeyo tsipéi kataunxuae áwiya seika peabe koyenewa, po peabe koyenewa exanaein amorreomonaetha xua bárapo Canaán nákuathe, jei Nakom.

¹⁷Poxonae mérawi xua bichokono kirei, barapoxonae Nakom tsita itüüta, Abram tsita itüütatsi, pokotsiwa xua ichaxota pan pesebiwa xua peyauyo xua bara weya píchapa xua muréi. Yawa tsita itüütatsi xua bara weya píchapa isho xua be banaxuto xua itanata. Baraxuabe xua pokotsiwa xua be pan pesebiwa banaxútono xua itanata dukuapónabe tútiya iya ichaxota barapowitong nantíyabe widubenaipoña, po pewi báyatha Abram witsaba éxana.

¹⁸Bárapo matakeitha Nakom, pong Pekanamataxeinaein, Abram tsiwüünae muxudutsiya baráichichi, jeichichi:

—Bárapo ira jiña nemómoxi susato jiwi katsin, po ira Egipto mene wetaerukuiya xua beya opinarunta Eufrates ménetha, po mene bichokono pin mene. ¹⁹Baxua ápara yábara páebang xua katsin jang: queneomonae pía ira, irü quezeomonae pía ira, irü cadmoneomonae pía ira, ²⁰irü heteomonae pía ira, irü ferezeomonae pía ira, irü refaitamonae pía ira, ²¹irü amorreomonae pía ira, irü cananeomonae pía ira, irü gergeseomonae pía ira, irü jebuseomonae pía ira, jei Nakom.

**Meje yábara xua petsiriwa, powa pewüng Agar,
yawa pexanto tatsi, pong pewüng Ismael**

16 ¹Sarai jopa itaküüpaetsi xua pía pebin pexui peitakataewa. Íchitha Sarai xeina powa pía pebusikuitaetaewayo tatsi, powa amanaya tanakuítatsi pewüng Agar, Egipto nakuapiwayo. ²Néxata Sarai pisheuri barái Abramtha, jeye:

—Nakom, pong Pekanamataxeinaein, jopa nekopatsiyo xua xang taxanto taein. Íchitha katsipáebatsi: pire powa inta amanaya nakuita. Metha moya pexui xeinaein xua barapowa saya inta exanaena, jei Sarai.

Abram jumejejí xua Sarai paeba. ³Sarai, powa Abram píowa tatsi bapowa waba, Agarwayo wábatsi, xua Abram kátatsi píowa peexanaenexa. Baxua éxana poxonae Abram diez po weibe yapukaewa poxonae Canaán íratha pópona. Bapowa Agar Egipto nakuapiwayo, powayo Sarai amanaya pía petanakuichiwayo tatsi. ⁴Abram nakuara popónabe Agar; bapoxonae Agar pexuyo búpana taékatsi. Poxonae Agar naperüü kuiyaputane xua bara pexuyo xeina, Sarai atsakiya tainchi. ⁵Néxata Sarai barái pishéuritha Abramtha, jeye:

—¡Xam ápara jiñakoutham xua bapowa atsakiya netane! Xang barapowa kakátatsi xua jinsheuri neexanaenexa. Íchitha ánoxuae xua poxonae barapowa naperüü kuiyaputane xua pexuyo xeina, bichokono atsakiya netane. Bara Nakom, pong Pekanamataxeinaein, yábara paebina pokoyene xua jintam metha piakoutha xua daxota barapowa abeya neyábara nantaxeina; xua icha metha xam jampa, ichi-kuiitha xua metha icha xang jampa, jei Sarai.

⁶Abram pisheuri jumenota Sarai, jeye:

—Taema, powa amanaya jiña nekatanakuichiwa bara kaitaküüpa xua kana éxaname barapówatha pokoyene xua xam ichichípame, jei Abram.

Néxata Sarai tamrópata pítaba xua abe kana éxana bichokono barapówatha xua daxota Agar naetsíriwa. ⁷Íchitha matatsunpin Agar táebatsi ichaxota irasaina xuépana tsúrukuae nakua, ichaxota imoxoyo méniyo, po méniyo mene natsibotarukua xua fétotha ichaxota imoxoyo namto, po namto Shur nakua betaerukuiya. ⁸Matatsunpin Agar yaiñabiya baráichichi, jeye:

—Agar, powa Sarai amanaya netanakuichiwa, ¿eta werenam yawa eta beyam? jei matatsunpin.

Agar jumenota, jeye:

—Kuitaya naetsiriwang Sarai, powa amanaya tanakuitang, jei Agar.

⁹Néxata bapong matatsunpin, Nakom pong Pekanamataxeinaein pía matatsunpin tatsi, Agar baráichichi, jeye:

—Kaibe nawíyama ichaxota pópona powa amanaya netanakuichiwa. Jumejéi tsaibinde daxita xua kaitorobeiba barapowa, jei matatsunpin.

¹⁰Ekeicha Nakom, pong Pekanamataxeinaein pía matatsunpin tatsi, namchi:

“Pin bicheito exanaein jiña nemómoxi susato jiwi,
xua ichamonae jopa itaküüpáe tsainchi xua peununaewa.

¹¹Po pexuyo búpana kata eka,
barapong nexanto tsane, pong kata nakatsiwina.
Bapong wüingdutsíname: ‘Ismael’, jam tsane.
Bárapo wüing wüingdutsíname,
tsipéi yábara kaununutsiya paeba,
xua Nakom kajumetane,
poxonae anthüthütanem xua wekoyam.

¹²Bapong nexanto poponaena, icha pókotsin ichi,
pong bichokono anáepana.
Bapong naba exanaena daxita jíwitha,
xuya bapongtha naba exanaeinchi pinmonae.
Bapong wepu tsanapoponaena Abram pía pemómoxi susato jiwi tatsi,
ichaxota pokotsiwa xometo wekoina wétsina”,
jei matatsunpin.

¹³Agar yábara jume wüingduta Nakomtha, pongxae petsipaebixaetsi, po wüing: “El-roi”, jei. Bapowa jeye:

—Xam Nakomüm pongxaem netáneme, jei bapowa.

Bapowa nantaxeina, jeye: “Nakom netane. ¡Áwiya kataunxuae asüü popo-
nangda!” jei barapowa. [Hebreo jumetha po wüing: “El-roi”, jei yábara jume jei:
“Po Nakom netane”, jei.] ¹⁴Daxota bapowa bárapo fetó wüingduta: “Beer-lajai-
roi”, jei. Bárapo fetó mene, mene eka ichaxota nantiya ékabe po írabe pewüing
Cades írú xua icha ira pewüing Bered. [Hebreo jumetha po wüing: “Beer-lajai-roi”,
jei yábara jume jei: “Pong xua xaniwaicha asüü pópona xuano xua bara netane,
bapong pía fetó tatsi”, jei.]

¹⁵Agar pexuyo pebinwüüto tanakatsíwatsi xua Abram itakatainchi. Abram
wüingduta: “Ismael”, jei. ¹⁶Abram 86 po weibe xeina poxonae Ismael nakatsiwa.

Meje yábara xua penawithabi koyenewa Nakom kata Abramtha

17 ¹Poxonae Abram 99 po weibe xeina, bapoxonae Abram tsita naitüütatsi
Nakom, pong jiwi Pekanamataxeinaeinchi, Abram baraichi:

—Xang Nakom daxita peyapusüüwa taxeinaein. Taitabaratha beta xaniwaicha
póponde xua jopa abe koyenewa neexanaewa. ²Yábara katsiwüünae muxudutsin-
chi. Xang exanaein xua xam xeináename nawita jiña nemómoxi susato jiwi xua
bichokono pinmonae tsane, jei Nakom.

³Poxonae Abram báraxua jumetane, Abram ira betaeungkuareka xua beya
peitapatha ira jayareka Nakom pebarükui-iturajinaenéxatsi poxonae kataunxuae
Nakom kueikueijeji xua jeye:

4—Xam katsiwüünae muxudútatsi: Xam ka-exanaeinchi xua aiña nákuang jiwi xua jiña nemómoxi susato jiwi pía pamo susatopin tatsim tsane. ⁵Ánoxuae ekeicha jopa kajéi tsane: ‘Abram’, jei tsane. [Hebreo jumetha po wüing: ‘Abram’, jei yábara jei: ‘Koxiyüing pong peaiñakuín éxanatsi’, jei.] Ánoxuae yawa bexa tsáneno kajéi tsane: ‘Abraham’, kajéi tsane yáitama exanaein xua xam ka-exanaeinchi xua aiña nákuang jiwi xua jiña nemómoxi susato jiwi pía pamo susatopin tatsim tsane. [Hebreo jumetha po wüing: ‘Abraham’, jei yábara jei: ‘Pin bicheitomonae paxa tatsi’, jei.] ⁶Exanaein xua jiña nemómoxi susato jiwi pin bicheitong tsane. Jiña nemómoxi susato jíwixae tsane, barapomonae jíwana nakua peewatsiwi naexanaponaena yawa aiña nákuang jiwi naexanaponaena.

⁷”Báraxua xua katsiwüünae muxudútatsi xua yawa jiña nemómoxi susato jíwíthá xua ápara xang jiña Nakom tanaexanaponaewa tsane xua ataya tsane, xuano xua jiña nemómoxi susato jiwi pía Nakom tatsi tatsoponaewa tsane xua ataya tsane. ⁸Xam daxita kakatinchi Canaán ira, yawa jiña nemómoxi susato jiwi katsin xua be takantanabotsíwatsi xua ataya tsitekaena yawa jiña Nakomüing kata tsópónae tsainchi. Bárapo ira kakatinchi, po ira ápara xua ichaxota ánoxuae póponame, jei Nakom.

⁹Ekeicha Nakom Abraham baraichi, jeye:

—Xua katsiwüünae muxudútatsi báraxua neyábara jumekuiwere xua beta éxande yawa jiña nemómoxi susato jiwi bicheitong barichi tsane. ¹⁰Báraxua ápara xua paka tsiwüünae muxudútatsi yawa bewa jiña nemómoxi susato jiwi neyábara jumekuiwetsina xua beta exanaena. Daxita pebiwi paiñaxantha bewa nawithabina ichaxota peréi ena. ¹¹Daxota daxita pebiwi paxam bewa withabinchi xua ichaxota peréi ena. Báraxua paka yaputane éxana xua paka tsita itapeiñaxeina xua bara exanaein po petsiwüünae muxudutsiwa xua paka tsipáebatsi.

¹²”Ánoxuae yawa bexa tsáneno, daxita pexui, xua pebiwi, xua paxam, bewa withabeibinchi xua ichaxota peréi ena xua ocho po matakabibetha xua poxonae nakatsiwa. Barichi bewa withabeibichi po pebinwüütixi nakatsiwa paiña bóxitha. Bewa barichi tsáneno barapoxi withabinchi, poxi xua bekein jopa paiñamonaeyo, pomonae xua powaxi pebusikuitaetaewáxichi pía pexui, powaxi icha nakuapiwi pákata putóroba poxonae pakómokame pekakomokáe paratixitha.

¹³”Daxita barapoxi bewa withabinchi xua ichaxota peréi ena, xua icha koyenewa jopa peseikaewa tsane. Poxonae baxua paexanáename, xua pexui pebinwüütixi pawithábame xua ichaxota nareixakaena xua bara pawang dube-neibíname, bapoxonae bara paka tsita itapeiñaxeinaena pokoyene xua tapaka tsiwüünae muxudutsíwatsi bara ápara paxéiname ataya. ¹⁴Pong jopa withabichi xua ichaxota peréi ena, bapong jopa bewa póponae tsane paiñaxantha xua bapong jopa pebarükui-iturajinaexae pokoyene xua tapaka tsiwüünae muxudutsíwatsi.

Meje yábara poxonae Nakom yábara tsiwüünae muxuduta xua Isaac nakatsiwina

¹⁵Barichi Nakom Abraham baráichichi, jeye:

—Jinsheuri Sarai ánoxuae jopa bárapo wüingtha wabim tsane. [Hebreo jumetha po wüing: ‘Sarai’, jei yábara jume jei: ‘Powa nakua peewatsin pexantiyo tatsi’,

jei.] Ánoxuae xua beya bexa tsáneno jinsheuri meje po wüingthe wabinchi: ‘Sara’, jei tsainchi. [Hebreo jumetha po wüing: ‘Sara’, jei yábara jume jei: ‘Powa nakua peewatsin pexantiyo tatsi, bapowa taxantiyo’, jei.]

¹⁶Barapówatha beta exanaein. Xam nexanto xeináename xua takakatsíwatsi tsainchi xua poxonae barapowa kata pabetsina. Bara xaniwaicha barichi tsane barapówatha beta exanaein. Barapowa pomonae aiña nakuangpiwi barapomonae pía pakue susato jíwanapiwayo tatsainchi. Barapowa pía pemómoxi susato jiwi tatsi, barapomonae jíwana naexanaena xua nakua peewatsiwi tsane, jei Nakom.

¹⁷Néxata Abraham ira betaeungkuareka beya ira jayataba peitapatha yawa aje-jei. Bapoxonae nantaxeinaeya namchi, jeye: “¿Bara metha koxiyüing nakatsiwatsipa jampa poxonae 100 po weibe xeina? Ápara aibi. ¿Bara metha Sara pexuyo pebin-wüüto xeinaena jampa poxonae 90 po weibe xeina? Ápara aibi”, najéi. ¹⁸Néxata Abraham namchi Nakomtha, jeye:

—¡Bárabü jame maisha Ismael jüntema poponaena xua beta jiña nekata exanáe koyenáyatha tsane xua beta neexanaexae bapongtha! jei Abraham.

¹⁹Nakom jumenota, jeye:

—Báyatha katsipáebatsi xua jinsheuri Sara kata pabetsina pexuyo yawa wüing-dutsíname pexúyotha po wüing: ‘Isaac’, jei. [Hebreo jumetha po wüing: ‘Isaac’, jei be pojume xua jeye: ‘Peajejeiwa’, jei.] Bapongtha irü tsiwüünae muxudutsin xua tatsiwüünae muxudutsiwa. Bapong yaweneibin yawa jiña nemómoxi susato jíwithano xua ataya tsane. ²⁰Báyatha kajumetainchi xua yábara neyáíñabame Ismael yawa beta exanaein bapongtha. Yawa exanaein xua bapong pexui xeinaena nawita yawa pía pemómoxi susato jiwi tatsi pinmonae tsóponae tsane. Ismael xeinaena doce po pexántobe, pomonae xua pentakaponaewi, pomonae xua peaiñakuí jiwi, xua doce pomonae bicheito matabüxübe pentakaponáewi-chi. Yawa bapongxae tsane bichokono pin nakuamonaepiwi exanaein. ²¹Xua báyatha katsiwüünae muxudútatsi áwiya Isaactha xeixenapong. Bapong icha weitha nakatsiwina, pong Sara tsiperüü wenakatsiwinchi xua kata exanaena, jei Nakom.

Meje yábara xua Abraham penawithabi koyenewa éxana

²²Poxonae Nakom najumeweta xua Abraham tsipáebatsi, bapoxonae bara weya natsixitaba. ²³Bapoxonae bárapo matakeitha Abraham pexanto withaba, pong Ismael. Yáwano withaba pía petanakuichiwichi, pomonae tanakatsiwinchi piabotha tatsi. Yáwano withaba pomonae xua báyatha tapunatoróbatsi poxonae kómoka pekakomokáe paratixitha xua poxonae kaenaeta icha nakuapiwi. Daxita pomonae Abraham piabotha tajinómpatsi, xuano xua Abraham yawénatsi nawita, daxita barapomonae Abraham withaba. Báraxua Abraham éxana be pókotsi koyeneya xua Nakom itoróbatsi.

²⁴Abraham 99 po weibe xeina poxonae withábatsi ichaxota peréi eka. ²⁵Irü pexanto tatsi Ismael 13 po weibe xeina poxonae withábatsi xua ichaxota penareixakaekawa. ²⁶Bárapo matakeitha Abraham pexántobe withabatsibe pong Ismael. ²⁷Yawa withábatsi pomonae Abraham piabotha peta-enaewichi. Yawa withabatsino pomonae Abraham petanakuichiwichi. Yáwano withábatsi pomonae Abraham tapunatoróbatsi poxonae kómoka pekakomokáe paratixitha pomonaetha, pomonae icha nakuapiwi.

**Meje yábara poxonae Nakom ekeicha Abraham yábara
tsiwüünae muxudútatsi xua pekatsiwa tsainchi
pexuyo, pebinwüüto, xua Nakom katsina**

18¹Nakom, pong Pekanamataxeinaein, Abraham tsita naitüütatsi ichaxota po momiyo pewüng Mamre matawüng. Báraxua Abraham tsita naitüütatsi poxonae matáeinaxae, poxonae xua eka duweibokong bómüxü boupatha.

²Abraham tane xua péitabara beya akoibi pongbe pebinbe asiya taungkuatsibe xua tsiwiyo tajü beya. Poxonae Abraham taeba bárapo akoibi pongbe, naiña asiya unguataba, yawa kuinaepoiña pía jakobichi. Bapoxonae Abraham ira betaeungkuareka beya ira jayataba peitapatha barapomonae peyábara kui-iturajinaexaetsi.

³Abraham namchi:

—Tajintong pekono juméyotha katsipáebatsi: Abü ékare, jopa ponaeinde. ⁴Icha kaitakuiwüünae tha wüükaetsi ichüng mera xua paka nekataxu ikikaenexa tsane xua pata kuikoyene. Bapoxonae nae ünübürü tsika pana nafifinakáeware kaeto.

⁵Poxoru ánoxuae taxantha papátame xua xang pongxaein tapaka kayawenaewa tsainchi. Pákata xawenaeinchi penabanaewa paiña matha neunadangweinexa poxonae ekeicha námtotha paponáename.

Bárapo akoibi pongbe xua Abraham peitabaratha taungkuatsibe, bapongbe Abraham jumenótatsibe:

—Moya daichane, jei.

⁶Abraham Sara pía duweibokong bomüxütha joniya. Abraham pishéuritha barái Sara, jeye:

—¡Naiña, naiña! Pire tres po korótobe xua pin korotong^c xua trigobeno, xua pexeña beno. Péntabü múxuna kauyentábare yawa baxua tsiki panxi éxande, jei Abraham. ⁷Bapoxonae Abraham, ichaxota vaca umena bara bekuinaepoiña. Naitapeta pirayo poyo bichokono nasiteka, yáwano kata pong tanakuítatsi, kaena barapong jopa kobenaematiyo xua penabanaewa tasete. ⁸Yawa Abraham bárapo akoibi póngbetha katsiba bárapo duwéi yawa queso yawa cabra mipi. Poxonae barapomonae nae ünübürü tsika xunaena Abraham jain matüütaeyeka pía ekeicha wüükaetsi xua peapatsinexa barapomonaetha. ⁹Poxonae nainweta, pomonae Abraham pesiwaponawichi, barapomonae Abraham yáinábatsi, jeichichi:

—¿Ínkane jinsheuri Sara? jei.

Abraham jumenota:

—Ápara duweibokong bomüxütha eka, jei.

¹⁰Barapomonae jíwana kaein Abraham baraichi:

—Icha weitha tha kaibe patoparánaetsi, kasiwaponaeinchi. Xua ápara jang: ‘Bexa jinsheuri Sara pexuyo kata pabetsina pebinwüüto’, jang.

Matapaiña Abraham yaputane xua ápara deta kou Nakom pongxae xuaunxuae petsipaebixaetsi. Kopiya jopa daxua nantaxeinaeyo.

Poxonae baxua daxita barapomonae natsipaeba, Sara pía pebin weya jume-taeungkuwa, Abraham pejuma weya tatsi xua boboupa wérena. ¹¹Abraham báyatha amo tsekae, yawa Sara akue tsekaeba. Daxota matáüta Sara jopa nantanupeibiyo xua pexui pexeinaewa tsane. ¹²Daxota Sara jopa be naünthüthü dangwéi

^c 18.6 Xua bárapo tres po korótobe weya píchapa be 21.9 po lítrobe xua pin korotong.

exanaeyo xua jopa peajejeiwa tsane. Daxota piakoutha natsipaeba: “¿Eta xua metha bepa pexuyo xeinakuaein? Ápara, tapebin Abraham báyatha amo tsekae irü xang ápara akuein báyatha”, najéi bapowa. ¹³Íchitha Nakom, pong Pekanamataxeinaein, Abraham baraichi, jeye:

—¿Eta xua metha Sara ajejei? ¿Jopa jumekowüntsiyo xua pexuyo xeinaena xua yáitama báyatha penapataewa? ¹⁴¿Eta pokotsiwa jane xua dangwéi xua pokotsiwa xang Nakomxaein jopa neitaküüpaeyo xua taexanaewa? Jume ápara, daxua aibi. Icha weitha kaiberena kasiwaponaeinchi. Xua ápara jang: ‘Bexa jinsheuri Sara pexuyo tanakatsiwinchi pebinwüüto’, jang.

¹⁵Poxonae báraxua Sara jumetane, bichokono junuwa yawa ichichipa jumematawenta. Daxota barapowa namchi, jeye:

—Xang jopa ápara ajejangyo, jei.

Íchitha Nakom, pong Pekanamataxeinaein, Sara jumenótatsi, jeye:

—Xang bara yaputang xua ajejam, jei Nakom.

Meje yábara poxonae Abraham wüüka Nakomtha xua kapanepaena Sodoma tomaramonae

¹⁶Bapoxonae pomonae Abraham pesiwaponaewichi asiya umenarüküpa yawa Sodoma tómara beyiya. Abraham saya tsiwiyo námtotha nápona, barapoxonae putáeungkua barapomonae xua napeñabatsi.

¹⁷Néxata Nakom, pong Pekanamataxeinaein, najéi:

—Bewa tsipaebin Abrahamtha xua taexanaewa tsane. ¹⁸Tsipéi bapong, pomonae pin bicheito nakuapiwi, barapomonae pía pamo susato jintong tatsi tsane, xua pomonae bichokono pedangwéi jiwi. Kaena báyatha bapongtha yábara tsiwüünae muxudutang xua yawenaein bapong xua daxota daxita nakuangthamonae jüntükoyene weiweinaena xua poxoru bapongxae exanaein xua tsiwüünae muxudutang.

¹⁹”Bapong Abraham itapeta wabang poxoru yaputang xua bapong bara itorobina pía pexui. Yawa pía pemómoxi susato jiwi itorobina xua pejumekowüntsinea takuidubi koyenewa yawa xua barapomonae peexanaenexa pokoyene xua wüünae yawa pokoyene xua xaniyéi. Bapoxonae exanaein daxita pokotsiwa báyatha barapomonae yábara tsiwüünae muxudutang xua taexanaewa tsane, najéi Nakom.

²⁰Daxota Nakom Abraham baraichi, jeye:

—Daxita jiwi yábara kueikueijeji xua Sodoma tomarapiwi yawa Gomorra tomarapiwi daxita barapomonae bichokono peabe koyenewang éxana. Barapomonae abe pía peéxanae koyenewang tatsi, bichokono jopa juniya abeyo. ²¹Tha ánoxuae bara beya ponaetsi. Xaniwaicha tayaputaenexa icha bara metha xaniwaicha barapomonae bichokono abe éxana icha be pókotsi koyeneya ichamonae netsipaeba. Barapoxonae bara yaputaein, jei Nakom.

²²Pebin nakuéyatabe, pomonae Abraham pesiwaponaewichi, bapongbe jíwana xua akoibi póngbexae, bapongbe Sodoma tómara beya pónabe. Íchitha Nakom, pong Pekanamataxeinaein, kataunxuae barü ékatsi Abraham. ²³Abraham imoxoyo kakuita unguataba Nakomtha, yáwano baraino Nakomtha, jeye:

—¿Jiña abe exanaetsi pomonae jopa abe exanaeyo, múxuna yáwano pomonae piakoutha xua poxonae abe éxana? ²⁴Metha tómaratha jinompa cincuenta pongbe jiwi, pomonae jopa abe peexanáewiyo. Daxota metha ¿jiña abe exanaetsi tómara yawa jopa yábara jüntükui koyene jüntemainaem tsane daxita bárapo tomarapiwi

xua bárapo cincuenta póngbetha jopa abe peexanáewixae? ²⁵Jopa kaitaküüpaeyo xua neexanaewa baxua xua jutébame barapomonaе, pomonaе jopa abe peexanáewiyo, yawa xua múxuna jutébame pomonaе xua piakoutha xua abe peexanaewi xua icha be pókotsi koyeneya ichipáе xua bárapo matabüxúyobe nantajúpaya abe éxana. Xam juezmonaepin, pong jiwi peyábara paebin penatsikuentsiwa xua abe peexanaexae. Xam saya neexaneibim pokotsiwa xua xaniyéi yawa pokotsiwa xua wüünae, jei Abraham.

²⁶Nakom Abraham jumenótatsi, jeye:

—Icha cincuenta pongbe nekotang Sodoma tómaratha, pomonaе xua jopa abe peexanáewiyo, barapomonaexae kakuijüntemainaеin po peabewang xua éxana daxita pomonaе baxota jinompa. Yawa jopa tómarara abe exanaeин tsane xua wera-wéraka, jei Nakom.

²⁷Ekeicha Abraham namchi Nakomtha:

—Aurang xua kabaraichichi tsipéi xam yatsikaya pepa Nakomüm, nama xang saya takuipawin. ²⁸Metha cinco pongbe akoibi xua xaniwaicha xua cincuenta pongbe nexa. Icha saya meisha poxoru cinco pongbe akoibi ¿daxota daxita tómarara jiña abe exanaetsi? jei Abraham.

Ekeicha Nakom Abraham jumenótatsi, jeye:

—Icha nekotang cuarenta y cinco pongbe, pomonaе xua jopa abe peexanáewiyo, tómarara jopa abe exanaeин tsane.

²⁹—Icha saya cuarenta pongbe xua wüünae peexanaewi ¿áwiya abe exanáe-name tómarara? jei Abraham.

Ekeicha Nakom namchi, jeye:

—Yáwano bárapo cuarenta póngbexae, pomonaе wüünae peexanaewi, jopa tómarara abe exanaeин tsane, jei Nakom.

³⁰Ekeicha Abraham jumedangweya wüüka Nakomtha, jeye:

—Jumedangweya katsipáebatsi. Jopa nekasebinde xua poxoru yábara takajumefayakotsixaetsi barapomonaе. Icha barapomonaе saya meisha treinta póngbexae táetsipame, ¿áwiya jiña abe exanaetsi tómarara? jei Abraham.

Ekeicha Nakom Abraham jumenótatsi, jeye:

—Saya barapoxonaе icha barapókotsi treinta póngbexae, pongbe xua jopa abe exanaeyo, jopa tómarara abe exanaeин tsane.

³¹Abraham ekeicha jumedangweya wüüka Nakomtha, jeye:

—Tananakanamataxeinaeин, maisha bichokono aurang xua jumedangweya kabaraichichi. ¿Eta xua metha tsipae icha saya veinte pongbe tsipae, pomonaе xua wüünae peexanaewi?

Ekeicha Nakom Abraham jumenótatsi, jeye:

—Yáwano saya meisha barapoxonaе, poxonaе veinte póngbexae, jopa tómarara abe exanaeин tsane.

³²Kataunxuae Abraham jumedangweya wüüka, jeye:

—Tananakanamataxeinaeин Nakom, jopa nekasebinde. Bara nama saya bárapo jumeyo saya katsipaеbinchi, yawa jopa ekeicha nama kajumefayakotsi tsainchi. ¿Eta xua metha tsipae icha saya diez pongbe tsipae?

Ekeicha Nakom jumenota, jeye:

—Yáwano saya meisha barapoxonaе, poxonaе diez póngbexae, jopa tómarara abe exanaeин tsane.

³³Poxonae Nakom irü Abraham najumewétabe, bapoxonae Nakom napítaba. Bapoxonae irü Abraham pía duweibokong bómüxü beya pona.

**Meje yábara poxonae Nakom abe éxana Sodoma
tómara yawa Gomorra tómarano**

19¹Bara kirei tsanaicha poxonae bárapo matatsunpinbe patópabe Sodoma tómaratha. Lot, Abraham peyüng tatsi, bapong eka ichaxota tómarapeyachainchadutsiwa piaboupa xua ichaxota jiwi nakaetuteiba. Poxonae bapong tane xua bapongbe jondénabe, bapong wüünae asiya matenta unguataba yawa ira betaeungkuareka beya imoxoyo ira jayataba peitapatha. ²Yawa Lot namchi barapóngbetha, jeye:

—Jumedangweya paka baraichichibe. Pana nemuxujejándebe xua mérawi paiña nepatopaewa tsánebe tabohta, pongxaein xua tapaka yawenaewa tsáinchibe. Baraxota paka taxu-ikikaena mératha. Bapoxonae baya tsane, kaemúmbohta moya bara paponáenamebe, jei Lot.

Íchitha barapongbe Lot jumenótatsi, jeye:

—Jume, bara saya tsane. Pata saya mérawi tómara námtohta poponáetsibe, jeibe.

³Bapoxonae áwiya Lot jumedangweya wüüka. Matapaiña barapongbe jumejeibe xua Lot piabotha petaponáewatsibe. Poxonae barapongbe Lot piabotha tapatopatsibe, bapoxonae Lot pexeíña pexaewa éxana. Yawa pan éxana xua jopa múxuna pentsiyo lewadurabeno matawüng xua pan kotowa éxana. Bapoxonae pongbe Lot pepunapatopaewatsibe, barapongbe xanebe. ⁴Barapongbe kataunxuae jopa bokáeyobe xua pemaitungkuaenéxabe. Bapoxonae daxita pebiwi, pomonae Sodoma tomarapiwi, bárapo pebiwi Lot píabo tatsi bo yakaincha yatoxórota ume-naxuba. Bárapo pebiwi ichamonae pewowi jiwi yáwano pítiri jíwino. ⁵Barapomonae wawái Lot beya, jeye:

—¿Inkánera pebinbe, pongbe kata patópabe jiña botha mérawi xua ánoxuae? ¡Pesato bérena punatotabarénabe! ¡Pata tha barapongbe kentichi! jei barapomonae.

⁶Néxata Lot múxuna joniya petsipaebinxeta. Íchitha poxonae petutu wejoniya peboupa boupa dangwéi éxana. ⁷Lot barái barapomonaetha, jeye:

—Tajiwimonae pam, paka wüükatsi jopa paexanaeinde pokoyene xua jopa xae-xaenakaeyo, xua pokoyene paiña neexanaewa tsane barapóngbetha. ⁸Taxantiyo nakuéyatabe inta barapowáyobe kataunxuae jopa jitha ekáeyobe. Tha wabichi paiña neexanaenexa tsane barapowáyobetha xua be pokotsiwa paichichípame. Íchitha meisha jopa paexanaeinde icha koyene barapóngbetha, tsipéi barapongbe, pomonae ápara tawabiwi tabohta, jei barapong.

⁹Íchitha barapomonae ekeicha Lot jumebaraichi, jeye:

—¡Natsixitábare bara weya! Saya meisha painta seika xua pata tana neitobiwa tsane pong icha nakuapin, ichi pókotsin ichim. Methaunxuae ánoxuae bichokono abe paka kana exanaeinchi beyakaincha xua abe pata kana exanaewa tsane barapóngbetha.

Bara bapoxonae tamrópata notarúküpa xua Lot abe pekana exanáewatsi barapomonae, yawa bara imoxoyo kakuuta umenarúküpa peboupa xua íratha pexoyaenexa xua kanameicha pejojoniyaenexa. ¹⁰Íchitha pongbe Lot pesiwa

ponaeinchibe, barapomonaē Lot nakobe yóbatsi xua pemaxü pichinéxatsi, yawa bómüxü bemaxü xawénatsi. Bapongbe boupa xatatábabe. ¹¹Bapoxonaē pongbe Lot pesiwa ponaeinchibe itakuere kirei éxana, itakuere kirei éxanatsi pomonaē xua aishówatha umena, pomonaē xuaunxuae abe exanapáebatsi. Daxita ítata kirei éxanatsi, pexuino, yáwano píñonno beya barapomonaē bojéi tsompáe xua peboupa jayabompa.

¹²Néxata Lot baraichi pongbe pesiwa ponaexáetsibe, jeye:

—¿Xam xote jiña matabüxüyo ekeicha áwiya xéiname? Wábare jiña pexui, yawa nexántixi, nerobi jíwino, yáwano daxítano xua xote xéiname. Tajü beya kaponde xua weye. ¹³Tsipéi po tómare pata tha abe exanáetsibe. Poxoru bichokono kaena báyatha Nakom yábara anáepana barapomonaē xua barapomonaē abe éxana xua Nakom kuitane bárapo tómarathe. Daxota Nakom pana itoroba bepa pinae tómara werawéraka paexanaeinbe, jeibe.

¹⁴Néxata Lot perobi jiwi siwaponā, po perobi xua bexa tsane pexantíyobe tsiwabina. Lot barái bárapo perobibetha, jeye:

—Asiya paumende. Weye panatsixibarü kúpare poxoru Nakom, pong Pekana-mataxeinaein, po tómare imoxoyo werawéraka éxana, jei.

Íchitha Lot peróbibe jopa jumekowüntíchibe xua Lot baraibe peróbibe. ¹⁵Bara nama pentha tsóponaē Lot baraichi matatsunpinbe, jéyebe:

—¡Naiña, naiña! Asiya úngkuare yawa weye jiñawa kaponde yawa nexantíyobe kaponde icha aichaxaibim xua netüpaewa tsane poxonaē Nakom tómara daxita abe kana exanaena, jeibe bapongbe.

¹⁶Íchitha Lot kame báyatha ka-ekauya, daxota barapongbe Lot maxü-pitaxorena-tsibe tsipéi Nakom Lot beta yábara kuinantanaxéinatsi. Yáwano Lot píā pexantíyobe tamaxü- karendenatsibe yawa píowa tamaxü-karendenatsíbeno. Daxita bapongbe tómara weya kapónatsibe xua pekapanenebiyaenexa tsainchi. ¹⁷Poxonaē aishowa beya pananébiya xua tómara weya, bárapo matatsunpinbe jíwana kaein bapong namchi:

—¡Kuinaeponde, nakapanépare! ¡Jopa napatomeicha nekotsinde! Yáwano jopa ponaeinde demuxuwa pamarafoto deka. Pónare demuxuwa matasóittha icha ichichípame xua jiña nenakapanepaewa, jei.

¹⁸Íchitha Lot jumebarái, jeye:

—¡Tananesiwaponāewi pam, paka wúükatsi xua jopa pana neitoróbíndebe demuxúwatha! ¹⁹Paxambe báyatha pana neyawénamebe nawita yawa báyatha panekapanépamebe. Íchitha jopa beponaeiño demuxuwa matasóittha. Bara jemba neyangkabopaena námtotha yawa bara jemba tüpaein. ²⁰Bara patáemabe. Tsiki tomariyo tang bara imoxoyo. Bárabü neitaküüpaena xua baxota panepaein. Bara pana nepukopatábare tana nekapanepaenexa tsane tsiki tomariyotha xua jopa aiñakuiyo, jei.

²¹Bárapo matatsunpinbe jíwana kaein Lot jumenótatsi, jeye:

—Bara báyatha kajumetaínchi. Methaunxuae exanaein xuaunxuae newúükame. Jopa bárapo tomariyo abe exanaein tsane xua báyatha yábara netsipáebame. ²²Íchitha moya naiña bara beya ponde. Tsipéi jopa neitaküüpaeyo xua werawéraka éxanang poxonaē kataunxuae jopa patopaem bárapo tomariyotha, jei.

Poxoru tsiki tomariyo, daxota bárapo tomariyo wüngduta pewüng Zoar tómara. [Hebreo jumetha po wüng: “Zoar”, jei yábara jei: “Tsiki tomariyo”, jei.]

²³Poxonae báyatha pentha Lot patopa Zoar tomaríyotha. ²⁴Sodoma tómara yawa Gomorra tómarano, bárapo tómarabe matatsún tsika Nakom duneika éxana xua isho, yáwano xua be pendare xua bichokono anaintáu. ²⁵Daxita tómarang abe yáwano daxita jíwino wérapa. Yáwano demuxuwa pamarafótotha tüpa daxita xua xuang xuwa baxota. ²⁶Lot pisheuri puna-ekapoinchi. Íchitha barapowa kaibe napatomeicha nekoya baxota; kaena yakuinaya sareto pépato tsanaya.

²⁷Abraham kaemúmbottha nakosataxuba yawa pona ichaxota báyatha Nakomtha tsipaeba. ²⁸Abraham Sodoma tómara benekoya yawa Gomorra tómara benekóyano yawa demuxuwa pamarafótono benekoya. Abraham tane xua bichokono petsüxüing tsúrukuae. ²⁹Baxua xua báyatha Nakom abe éxana bárapo tómarangtha ichaxota demuxuwa po marafótotha, ichaxota Lot báyatha pópona. Íchitha Nakom Abraham yábara nantanaxéinatsi, xua daxota Lot wepítatsi ichaxota daxita werawéraka éxana.

Meje yábara xua poxonae Lot pexantíyobe itapexuítabe

³⁰Bapoxonae Lot junuwa nawita xua eka Zoar tomaríyotha. Yawa wárapa pía poponaetsi demuxúwatha. Yawa pexantíyobe nakuéyatabe barü pona. Daxita bárapo akoibi pongbe, xua pexantiyobearü baxota ibo müthütha barü pópona. ³¹Kaentakeitha, matapiwa barái peyapiyo, jeye:

—Maisha axa nákata báyatha amo tsekae. Xote jiwi aibi xua pebinbe wanaka pichinéxabe xua wakuikoyeneya. ³²Kúüpatsi exanaeinchi wáxabe, yawa ishabo-káeinchibe wáxabe xua pexui wanákata exanaenéxabe, jeibe.

³³Bárapo merawitha barapówabe paxa küüpa éxanabe vino mera. Bapoxonae matapiwa paxa yaichena ishaboka. Íchitha koxiyüing Lot jopa yaputaeyo xua poxonae pexantiyo yaichena ishamaitúngkuatsi. Matáüta jopa yaputaeyo poxonae kuenta nontapónatsi. ³⁴Bapoxonae ekeicha icha matakeitha matapiwa barái peyapiyo, jeye:

—Taema, báyatha mérawi waáxabe ishamaitungkuang. Ekeicha bárapo merawithe waáxabe küüpa exanáeinchibe xua xuya waáxabe yaichena kaishamaitungkuana. Bapoxonae xua pexui pebüriya waxeinaenéxabe tsane xua waáxabe peunaunto pexui, jei.

³⁵Bárapo merawitha ekeicha paxa küüpa éxanabe vino mera. Bapoxonae bárapo xuiyapiwa yaichena ishamaitungkua paxa. Matáüta ekeicha barapowáyotha Lot jopa yaputaeyo xua poxonae xuiyapiwayo, xua pexantioxae, xua yaichena ishamaitúngkuatsi. Yáwano matáüta jopa yaputaeyo poxonae kuenta nontapónatsi.

³⁶Bapoxonae Lot pexantiyobexaebe unaunto pexuyo kapopóinchibe. ³⁷Matapiwa pebinwüüto pabeta, bapong pewüing Moab. [Hebreo jumetha po wüing: “Moab”, jei tsiwiyo jumejúpa pojume: “Taxa weya”, jei.] Bapong Moab moabitamonae paxa tatsi. ³⁸Xuiyapiwa barichi pabeta, bapong pewüing Ben-ammi. [Hebreo jumetha po wüing: “Ben-ammi”, jei tsiwiyo jumejúpa pojume: “Tamonae pexanto tatsi”, jei.] Bapong Ben-ammi amonitamona paxa tatsi.

Meje yábara Abraham yawa Abimelec

20 ¹Abraham, ichaxota pópona, bara weya wárapa, Néguev ira bewarapiya. Yawa Gerar tómaratha pópona, po tómara ichaxota náitama tayékabe Cades tómara yawa Shur tómara. ²Poxonae Abraham baxotiya pópona, Abraham

Sara yábara namchi: “Ápara tamcho”, jei. Bapoxonae Abimelec, pong Gerar tómara peewatsin, bapong itoroba xua Sara pekarenaenexa tsainchi xua Abimelec píowa peexanaenexa. ³Íchitha kaena bárapo merawitha, Abimelec amichinae xua Nakom namchi:

—Xam imoxoyo tüpáename, tsipéi powa pitapáebame ápara powa býatha jitha eka, jei Nakom.

⁴Íchitha kataunxuae bapong býatha jopa imoxoyo kakuita ponaeyo bapówatha. Bapong jumenota Nakomtha:

—Tananekanamataxeinaein, xam jopa ba jintong bexubim, pong bekein jopa abe exanaeyo. ⁵Abraham netsipaeba xua pinae ápara pamcho tatsi bapowa. Yawa irü bapowa netsipaeba xua pinae ápara peweicho tatsi bapong. Bara baxua éxanang tsipéi poxoru tajumekowüntsixae xua bapongbe páebabe, yáwano yaputang xua jopa abe exanaeiño, jei Abimelec.

⁶Néxata Nakom jumenota michinaebotha, jeye:

—Bara beta yaputang xua xam baxua éxaname tsipéi nejumekowüntsixae xua bapongbe páebabe. Íchitha jopa kakuibarü jejeichi xua xam imoxoyo kakuita ponáename bapówatha, xua kotakaya jopa abe tana netsita exanaewam tsane. ⁷Íchitha ánoxuae xam ekeicha barapowa píowa tatsi taexande bárapo pebintha. Tsipéi bárapo pebin taitorobi jume diwesi pepaebin. Bapong newüükaena, xua kata wüükaena, xua xam jopa netüpaenexa tsane. Íchitha icha xam jopa ekeicha barapowa píowa tatsi taexanaem bárapo pebintha, xam, irü jiñamonaeno, bara methaunxuae pawerapáename, jei Nakom.

⁸Bapoxonae icha matakeitha, baya kaemúmbatha, Abimelec asiya unguwa yawa waba pía petanakuichiwichi, yáwano tsipaeba barapomonaetha, xua petsipaebi-xaetsi michinaebotha, xua Nakom tsipaeba bapongtha. Poxonae barapomonae Abimelec jumetaerükúpatsi, pomonae pía petanakuichiwixaetsi, bapoxonae barapomonae bichokono jumetaya junuwarüküpa. ⁹Bapoxonae Abimelec Abraham wábatsi, yawa baraino Abrahamtha, jeye:

—Taema xua painta éxaname xam. ¿Eta xua kata éxanatsi xua daxota inta abe éxaname, xua daxota Nakom pana wérapa exanaena, xang, yawa tamona? Xua inta éxaname ápara jopa bewa baxua exanáe. ¹⁰¿Eta xuara xua táneme, xua xuang paxeinang, xua daxota éxaname jíñatsi? jei Abimelec poxonae Abraham tsipáebatsi.

¹¹Abraham Abimelec jumenótatsi, jeye:

—Mexeya ítara bárapo tómaratha jopa Nakom jumekowüntsíyowe jang. Yawa mexeya ítara nebexubinawejang, yáitama taseuri pexeiñowayo. ¹²Bekein ápara jame xaniyéi ápara bara tayapiyo, taxa pexantiyo tatsi, íchitha xua taena aibi. Daxota neitaküüpa xua barapowa perüünakóyobang. ¹³Poxonae Nakom newárapa éxana, xua taxa píabo tatsi wérena, yawa poxonae ponang icha tómaratha, jangje barapówatha: ‘Pokotsiwa xua tana neyawenaenexam tsane meje baxue: Poxonae daxita tómarangtha pateibinchibe néxata jam tsaibinde: Bapong ápara taeweicho, jam tsaibinde’, jang.

¹⁴Ekeicha Abimelec Sara kaewa píowa tatsi taéxana Abrahamtha. Yáwano Abimelec Abraham amanaya katsíbatsi owejang, vacangno, pong pebusikuitaetaéinchino, múxuna yawa powa pebusikuitaetaewátsino. ¹⁵Yawa Abimelec Abraham baraichi, jeye:

—Taema xua tairang. Itapere ira, po íratha kaitakuiwüüinae xua nepoponaenexa baxota, jei Abimelec.

¹⁶Yawa Abimelec Sara baráichichi, jeye:

—Baxua xua eweicho katang namatómata mil po paratíyobe. Báraxua xua ápara tsita itapeiñaxeinang, xua pokoyene ápara jopa takapichíwatsi, xua ápara daxita pomonae kabarü jinompa jopa abe kayábara paebi tsane, xua jopa nenatsianae exanaewam tsane.

¹⁷Néxata Abraham wüüka Nakomtha. Yawa Nakom yawena xua Abimelec axaibi éxanatsi, yawa píowa tatsi axaibi éxanatsi, yawa axaibi éxanatsi powaxi Abimelec pía pebusikuitaetaewaxi tatsi, xua barapówaxi pexui pexeinaenexa. ¹⁸Tsipéi Sara báyatha pekaponaxaetsi Abimelec Abraham weya, daxota Nakom, pong Pekana-mataxeinaein, kana éxana xua yábüxi jopa itaküüpaetsi xua xeina pexui, powaxi xua Abimelec piabotha tajinómpatsi.

Meje yábara poxonae Isaac nakatsiwa

21 ¹Nakom petsiwüünae muxudutsixae, daxota Sara yábara nantaxéinatsi. Nakom Sara taéxanatsi pokotsiwa báyatha petsipaebixaetsi. ²Sara pexuyo yapúruwa pópona, xua Abraham itakatainchi. Poxonae Abraham bichokono penapataein tsekae, pexuyo tanakatsíwatsi po matakábitha báyatha Nakom yábara tsiwüünae muxuduta.

³Abraham pexanto wüingduta po wüing Isaac, po pexanto tanakatsíwatsi, xua Sara pexanto tatsi. ⁴Bapoxonae Abraham pexanto withaba, pong Isaac, ichaxota peréi eka poxonae ocho po matakábibe yapujopa xua poxonae nakatsiwa, tsipéi baxua Nakom báyatha pemuxutsipaebixae. ⁵Abraham 100 po weibe xeina poxonae pexanto tanakatsíwatsi, pong pewüing Isaac. ⁶Néxata Sara nantaxeina, jeye:

—Nakom nejüntükoyene weiweina éxana. Yawa daxita pomonae neyaitane, xua inta pexuyo nakatsiwa, írürü neyábara jüntükoyene weiweinaena. ⁷Dapong aibi xua Abraham yábara tsipáebatsi xua pexui taxeinaewa, xua tana namipi apatsiwa. Tsipéi ápara Abraham báyatha penapataein, xua dakotsiwa pexuyo taitakataewa pebinwüüto, jei Sara.

⁸Isaac wichabaxuba, yáwano ekeicha jopa mito apatichi. Po mataketha jopa ekeicha mito apatichi, bárapo mataketha Abraham pin fiesta éxana.

Meje yábara poxonae petsiriwa, powa Agar, xotsi Abraham píabo weya, yawa pexanto múxuna xotsi, Ismael

⁹Sara tane Agar pexanto tatsi, pong pewüing Ismael, pong báyatha Agar Egipto nakuapiwayo itakatane Abrahamtha. Bapong Isaac kuikapónatsi Sara pexanto tatsi. ¹⁰Néxata Sara Abraham baráichichi, jeye:

—Itawere bárapo jiña nebusikuitaetaewa, xua bara pexanto barü warapaena. Taxanto Isaac, jopa bewa tsabi tsane pokotsiwa xua jüntüina jébame, xua daxota bárapo jiña nebusikuitaetaewa pexanto tatsi bárapo kopei naxeinatsipa, jei Sara.

¹¹Bárapo jumetha Abraham anthüthütane, tsipéi nantanaxeina nawita xua yatsikaya pepa pexanto tatsi, bapong Ismael. ¹²Íchitha Nakom Abraham baráichichi, jeye:

—Jopa matowa yábara nantaxeinaeinde Ismael, yawa jiña nebusikuitaetaéwano. Moya éxande xua Sara pokotsiwa kaitoroba. Tsipéi Isaac weya nakatsiwina jiña pepa nemómoxi susato jiwí, pomonae katsin tapaka yábara tsimuxudutsíwatsi. ¹³Nama jiña nebusikuitaetaewa pexanto tatsi, xang exanaein xua bapong

pía pexui tatsi pin nakuamonae exanaena. Tsipéi Ismael, bapong irü nexanto, jei Nakom.

¹⁴Icha matakeitha, baya kaemúmbottha, Abraham kata pan, Agar kátatsi. Yáwano kátano chivo penüngboko dérabü, xua mera wüngka, yáwano pejúmatha tabotsika daxita baxuang. Yáwano Ismael, Agar pexántoxae, maxükobenátatsi yawa Abraham napéyaba.

Agar wárapa irasaina xuépana tsúrukuae nakua beya ichaxota Beerseba ira matawüing. Íchitha Agar jopa yaputaeyo ichaxota ponaena. ¹⁵Poxonae mera werawerakanaya, xua báyatha chivo penüngboko derabütha yakápona, bapoxonae Agar pexanto tsiki náeyottha pebüxüpániyo deka kuareta. ¹⁶Agar tajü beya eka, jopa tajüyo, saya icha be pókotsi pépobo yajopeika poxonae pebin punuxuba, bara pokotsiyo tsika poxoru nantaxeina jeye: “Jopa petüpaeyo be taeiño icha tüpaena”, jei. Poxonae Agar ekoundeka, barapowa wekoyéi bichokono. ¹⁷Íchitha Nakom jumetane xua Ismael wekoyéi. Peitaboko wétsika, Nakom pía matatsunpin tatsi Agar wábatsi, yawa namchino, jeye:

—¿Eta xua Agar? Jopa junuwinde tsipéi Nakom jumetane xua Ismael wekoyéi xua ichaxota eka. ¹⁸Bara beya ponde. Kobekaponde nekobetha, yawa matatéikare bapong, tsipéi xang exanaein xua bapong pía pexui tatsi pin nakuamonae naexanaena, jei matatsunpin.

¹⁹Néxata Nakom éxana xua Agar itakúüpatsi xua fetto mene tane. Barapowa baxota pona yawa chivo pena bokotong dérabü wüngka éxana mera. Bapoxonae Agar pexántottha ápata mera, Ismaeltha. ²⁰⁻²¹Nakom yawena nawita bapongtha, pong xua wichabaxuba, yáwano poponano ichaxota irasaina xuépana tsúrukuae nakua. Yawa bapong yaputane beta xua bicheibi namajüna. Bapong Ismael ichaxota irasaina xuépana tsúrukuae nakua pópona, xua ichaxota Parán ira matawüing. Yawa Ismael pena tawábatsi yábüyo, powa Egipto nakuapiwayo, xua Ismael penakoyobinexa.

Meje yábara xua Abraham irü Abimelec nantiya nata éxanabe xua petsiwüünae muxudutsiwa

²²Bapoxonae pirapaeyo Abimelec patopa Abraham petsipaebinéxatsi. Pong Ficol, bapong Abimelec kueyatatsi. Bapong Ficol kanamataxeina Abimelec pía ejercitomonae tatsi. Abimelec namchi Abrahamtha, jeye:

—Patang xua Nakom kayawena nawita xua éxaname. ²³Jumexaniyéi páebare xote, Nakom peitabaratha, xua pokoyene jopa inta abe neexanaewam tsane, yawa pokoyene tapexui inta jopa abe neexanaewam tsane, yawa pokoyene jopa inta abe neexanaewam tsane tamómoxi susato jiwi. Inta wüünae éxande, icha báyatha ichin xua wüünae kata exainchi. Yawa beta éxande pomonae xote jinompe, xua ichaxota ánoxuae pajinómpame.

²⁴Abraham jumenota, jeye:

—Jumexaiñeya páebang Nakom peitabaratha xua baxua kata éxanatsi, jei Abraham.

²⁵Bapoxonae Abraham Abimelec yábara tsipáebatsi, xua po mera müthü báyatha Abimelec pía petanakuichiwichi káibatsi. ²⁶Abimelec Abraham jumenótatsi, jeye:

—Jopa yaputaieiño xua pong éxana baxua. Kaena báyatha xam jopa yábara netsipaebim baxua. Beya ánoxuae, báyatha jopa yábara jumetaieiño baxua.

²⁷Néxata Abraham nota ovejang, vacangno. Daxita Abimelec katsíbatsi. Bárapo matakábitha bapongbe nantíyabe yábara nata tsiwüünae muxudútabe. ²⁸Íchitha Abraham tsata siete póyobe ovejang, pesowabi xua penawang. ²⁹Daxota Abimelec Abraham yáíñabatsi, jeye:

—¿Eta xua metha tsátame siete póyobe ovejang pesowabi xua penawang?

³⁰Abraham Abimelec jumenótatsi, jeye:

—Pire bárapo ovejang, xua po ovejang kakatsíbatsi, ápara taitapeiñatsinexa xua xang bárapo mera müthü kuang, jei.

³¹Daxota bárapo wüing wüingduta, po wüing: “Beerseba”, jei yáitama baxota bapongbe Nakom peitabaratha nantíyabe yábara nata tsiwüünae muxudútabe. [Hebreo jumetha po wüing: “Beerseba”, jei yábara jume jei: “Feto müthü ichaxota yábara nata tsiwüünae muxudútabe”, jei.] ³²Poxonae bapongbe wetababe, xua baxua éxanabe Beerseba íratha, bapoxonae Abimelec, Ficol bichi, bapongbe kai-beya pónabe filisteomonae pía nakua tatsi beya.

³³Abraham Beerseba íratha übanota nae, po nae pewüing tamarisco nae mata-wüing. Baxota Abraham Nakomtha wüüka, po Nakom ataya tsitekaeya peantabü-süüwatha pepoponaein. ³⁴Abraham aiña wei dapaein pópona filisteomonae pía nákuatha tatsi.

Meje yábara poxonae Nakom Abraham jüntübükoyene jüjútatsi

22 ¹Pírapae, Nakom Abraham jüntübükoyene jüjútatsi peyaputaenexa icha Abraham xaniwaicha beta jumekowünta Nakom. Abraham wábatsi pewüingtha:

—Abraham, jei.

Abraham jumenota, jeye:

—¿Jai? Xote ékangje, jei.

²Nakom Abraham baraichi, jeye:

—Nexanto Isaac pire pepa nexanto, pong bichokono antobem, yawa kaponde Moriah ira beya. Baxota bexore xua inta netautsinexa po demuxúwatha bexa katsipaebinchi, jei Nakom.

³Bapoxonae icha matakaitha, baya kaemúmbötha, Abraham asiya unguwa. Yawa pía burro paparuwa tsijumaküta. Yáwano isho ukuboba, xua ishoto peexanaenexa, xua ichaxota pexanto peyüütaboichaenexa. Abraham pona xua báyatha ichaxota Nakom kayábara jei, yawa xua Isaacno. Yawa Abraham barü pona nakuéyatabe jíwanabe, pomonae pía petanakuichixaetsi, pongbe pewowinbe. ⁴Poxonae akoibi po matakábibe yapukaewa, bapoxonae Abraham tane po ira pewüing Moriah xua áwiya tajü ékiya. ⁵Néxata Abraham barái pongbe, xua pía petanakuichiwichi jíwanabe, jeye:

—Xote páenare yawa burro pakáenare. Xang yawa taxanto, tha Nakomtha pata wüükaetsibe. Bapoxonae tha pata kaibe denaetsibe.

⁶Abraham nota isho, xua petautsinexa bárapo ishótotha, yawa peutukuratha tajibika pexántotha, Isaactha. Bapoxonae kusi pita, yawa ishoto, yawa pónabe pexántobe.

⁷Bapoxonae Isaac paxa barái Abrahamtha, jeye:

—¡Axa! jei.

—¿Eta xua taxanto? jei Abraham.

Isaac namchi, jeye:

—Taema, xeinatsibe isho, yawa ishoto xua itanata, íchitha, ¿ínkane ovejiyo, pókotsi ovejiyo xua ba tautéibame xua poxonae katsibéibame Nakom? jei Isaac.

⁸Abraham pexanto jumenota, jeye:

—Nakom itorobina ovejiyo, xua tatautsinexa, xua Nakom takatsinexa, jei.

Kataunxuae pexántobe moya ekapónabe. ⁹Poxonae Abraham pexántobe patópabe xua po íratha báyatha Nakom yábara paeba, bapoxonae Abraham éxana altar matawüing, xua xota pokotsiwa duwéi peyüübabeibiyathopaewa, yáwano matha isho xaxaintajeba. Bapoxonae Abraham pexanto kübaxuba bümákatha, pong pewüing Isaac, yáwano yüütaboicha ishótotha xua ichaxota duwéi peyüübabeibiyathopaewa, xua petautsinexa Nakom nexa. ¹⁰Bapoxonae Abraham kusi nakobewentsiya pita xua pexanto pebexubinexa. ¹¹Bapoxonae Abraham wabíkatsi peitaboko wétsika Nakom pía matatsunpin tatsi jeye:

—¡Abraham! ¡Itompáe!

Abraham jumenota, jeye:

—¿Jai? ¿Eta xua? Xote úngkuangje, jei Abraham.

¹²Nakom pía matatsunpin tatsi Abraham baráichichi, jeye:

—Jopa pexuyo kaitakueinchinde xua abe éxaname bapongtha. Tsipéi ánoxuae yaputang xua beta jumekowúntame Nakom, yáitama jopa jumefebim Nakom xua kátame nexanto, pong pepa nexanto.

¹³Néxata Abraham asiya nekota. Bapoxonae Abraham naeyo büxüpánatha tsika taenota oveja pebto, xua mate totoxorowoungkua. Bapoxonae Abraham oveja pebto pita, yawa bexuba peyüütaboichiya tautsinexa xua Nakom nexa, xua pexanto pekoutha tatsi. ¹⁴Bapoxonae Abraham bárapo íriyo wüingduta: “Jehovah-yireh”, jei. Daxota kataunxuae bárapo íriyo wüing, ba jeye: “Bárapo urutotha Nakom kata xua ichüing nantawénona”, ba jei. [Hebreo jumetha pojume xua: “Jehovah-yireh”, jei xua yábara jei: “Nakom ba kata xua pokotsiwa ichüing nantawénona”, jei.]

¹⁵Ekeicha Abraham peitaboko wétsika wábatsi Nakom pía matatsunpin tatsi.

¹⁶Bárapo matatsunpin Abraham baráichichi, jeye:

—Nakom báyatha paeba: ‘Tsipéi baxua éxaname, xua nexanto nekátame, pong pepa nexanto, xua jopa nejumefebim, daxota jumexaiñeya páebang takoutha xua wüüinae takamuxutsidutsíwatsi. ¹⁷Bichokono wüüinae kayawénatsi. Xang exanaein xua jiña nemómoxi susato jiwi bichokono pinmonae tsane, icha opitéi ichi xua peitabókotha bichokono aiñawang, yáwano ichi xua táetowa benong ichi xua pokotsiwa pepa pin mene itapatha bobena. Yáwano barapomonae ataya amanaya-beibina pía peita aenaenéi jíwichi, yawa xua pía tómarang tatsi. ¹⁸Daxita karepaya nakuangpiwi jüntükoyene weiweinaena xua barapomonae beta tayawenaexae tsane, icha kaichichi, yawa icha ichin nemómoxi susato jíwitha. Barapomonae yawenaein yáitama nejumekowúntame jiña neexanaexae xua kaitoróbatsi’.

¹⁹Abraham ekeicha pexanto kaewa barü iya ichaxota tajinómpatsi pía petana-kuichi jiwixaetsi. Barapoxonae bárapo matabüxüyo daxita kaewa iyiya Beerseba ira matawüing beya ichaxota báyatha Abraham pópona.

Meje yábara Nacor pía pemómoxi susato jiwi tatsi

²⁰Pírapae Abraham piamonae yábara jumetane xua icha nákuatha petajinom-paexaetsi, xua jeye: “Barichi Milca pexui xeina xua Nacor itakatainchi, pong

eweicho. ²¹Pong kopiya nakatsiwa, pewüng Uz. Pírapae ichüing nakatsiwa, Uz péyapín, pewüing Buz, yawa ichüing pewüing Quemuel, Aram paxa tatsi. ²²Bapoxonae pírapae ichamonae nakatsiwa: Quesed, irü Hazo, irü Pildas, irü Jidlaf, irü Betuel. ²³Bapong Betuel Rebeca paxa tatsi”, jei xua Abraham tsipáebatsi.

Barapomonae ocho pongbe, xua Nacor pía pexui tatsi, xua Milca tanakatsíwatsi. Nacor, pong Abraham peweicho tatsi. ²⁴Matáütano Nacor icha pexui xeina xua ichówatha, powa pewüing Reúma, xua bapowa tanakatsíwatsi. Barapomonae pewüingxi meje: Irü Tébj, irü Gajam, irü Tajas, irü Maacá.

Meje poxonae Sara tüpa, yawa poxonae petüpaewa bótatsi Macpela ibowóu wüingtha

23 ¹Sara 127 po wéiyobe pópona. ²Bapoxonae tüpa Quiriat-arba tómaratha, xua po pepa tómará xua icha wüing Hebrón tómará. Bárápo tómará eka Canaán nákuatha. Abraham píowa siwawekoyéi, xua Sara tüpa. Bapoxonae Abraham bichokono anthüthütane.

³Bapoxonae Abraham píowa weya pona xua petüpaewa, xua peponaenexa heteomonae pía nákuatha tatsi. Bapong tsipaeaba Het píamonae tatsi poxoru barapomonae ba nakaetuteiba tómará boupa peyakaincha dutsiwarena. Jeye barapomonaetha:

⁴—Bara bekein xang dobin tsokuaein, íriyo paka komotinchi xua tapetsiriwa baraxota tamüthüthüxubinexa tsane petüpáe ibowoutha bobena, jei Abraham.

⁵Het pía pexui tatsi Abraham jumenótatsi, jeye:

⁶—¡Taema, matha ínkane pana nejumetaema! Ápara xam pata tajiwimonae jintom, pong Nakom kaitapeta pataxantha. Jinsheuri jame ibowoutha petüpaewa bore, po ibowóu bichokono pexeiña wou, po wou bekein pata ibowóu. Ápara ichüing dapong aibi paxang jíwana, pong kakobematawenta, xua daxota jinsheuri pía pepong jüntema petüpáe nebotsinexa bárápo ibowoutha.

⁷Néxata Abraham asiya unguá. Bapoxonae ira betaeungkuareka Het pía pexui tatsi peitabaratha tatsi xua pebarükui-iturajinaexae. ⁸Abraham barái Het pía pexui tátsitha, jeye:

—Icha metha moya bara paxaiñam, xua tapetsiriwa petüpaewa tabotsinexa ibowoutha xote, jame maisha painta wüükare Efrontha, pong Zojar pexanto tatsi. ⁹Bü taxaiña bérena kaenaeta, xua po wou Macpela ira matawüing, xua po wou pitapatha boka ichaxota Efrón pía ira tatsi. Xang xaniwaicha matomatsin ibowóu. Bapoxonae xang yatsikaya ta-ibowou tsane, xua po ibowóu boka po írathe.

¹⁰Efrón eka peitabarayo deka, Het pía pexui tatsi peitabarayo deka tatsi. Bapong Efrón hebreomonaepin bichokono najumetsébiya wawái pía Abraham píamonae jumetaetsi, yáwano pía Abraham pejumetaenexa tsainchi pomonae nakaetuta xua ichaxota tómará boupa peyakaincha dutsiwarena.

¹¹Efrón jeye:

—¡Jume, Tananekanamataxeinaein! Matha nejumetaema. Xang saya amanaya kakátatsi ira yawa ibowóu, xua po ibowóu boka bárápo íratha. Bara tatomarapiwi yatsikaya katane xua bárápo ira amanaya takakatsíwatsi. Baraxota moya jinsheuri petüpaewa bore ibowoutha, jei Efrón.

¹²Íchitha ekeicha Abraham ira betaeungkuareka peitabaratha, pomonae jinompa bárápo tómaratha. ¹³Daxita barapomonae peitütha tatsi, Abraham Efrón jumenótatsi. Abraham jeye:

—¡Matha taema! Ínkane xam nejumetaema. Jumedangweya kajeichi. Nejumeje-jande xua ira nexa kamatomatsinchi pekakomokáe paratixitha. Bapoxonae taseuri petüpaewa botsin baxota, jei Abraham.

¹⁴Néxata Efrón Abraham jumenótatsi, jeye:

¹⁵—Tapentakaponaein, ínkane nejumetaema: Bárapo ira 400 po pekakomokáe paratiximonaebe namatómata. Bárapo matoma jopa naka tsita aiñakuíyobe tsipéi saya matoma yáyatha. Pónare xua petüpaewa bore jinsheuri ibowoutha.

¹⁶Abraham jumejejéi xua matoma katsina, xua bekein ayéi matoma, xua Efrón matoma ununa xua 400 po pekakomokáe paratiximonaebe xua Het pía pexui tatsi peitütha tatsi. Abraham wüünaeya bárapo matoma kata Efrontha. ¹⁷Efrón pía ira tatsi eka Macpela íratha icha pokotsiwa Mamre ira wétsina. Bárapo ira tütutha xeina ibowóu, yawa naein xua umena ira tütutha, yawa xua bárapo ira pekuariya tatsi. Baxuang daxita Abraham múxuna kómota.

¹⁸Bárapo ira daxita Abraham pía ira. Baxua Het pía pexui tatsi yatsikaya kuitane. Yáwano pomonae ba nakaetuta tómara boupa peyakaincha dutsiwarena, daxita barapomonae baxua irü Abraham kuitainchi. ¹⁹Bapoxonae Abraham pisheuri baxota ibowoutha bota petüpaemonae, xua ichaxota po ibowóu boka Macpela íratha, xua pokotsiwa icha Mamre ira wétsina. Bárapo ira daxita yaputane xua Hebrón pewüingtha. Yawa bárapo ira boka Canaán nákuatha. ²⁰Daxota bárapo ira, yawa ibowouno, yatsikaya Abraham pía ira xua báyatha Het pía pexui tatsi kaenaeta.

Meje yábara poxonae Abraham pexanto yábüyo tasiwawenawení, xua Isaac nexa

24 ¹Nama báyatha Abraham penapataein tsekaeba. Bapong Abraham yawe-néibatsi nawita Nakom, pong Pekanamataxeinaein, poxonae poponeiba. ²Kaentakeitha Abraham waba, pong bichokono penapataein, pong tanakuítatsi, pong kanamataxeina xua kanamataxéinatsi pomonae Abraham tanakuítatsi. Bapong ápara petayapukaekaexaetsi daxita xua xuang Abraham piyawang tatsi. Abraham barái bapongtha, jeye:

—Namaxüyüütaboré xua tatopajumawétsina xua wakuikoyenyatha. ³Nakom, pong Pekanamataxeinaein, peitabaratha jumexaiñeya páebare, po Nakom peewatsin itaboko yawa xua peewatsin ira. Inta nayábara natsiwüüinae muxudure Nakom peitabaratha xua jopa nekopatsiwam tsane xua taxanto Isaac yábüyo penakue-yobiwa tsane, powa xote pópone bárapo Canaán írathe xua ichaxota póponang. ⁴Pónare taira beya ichaxota kaena báyatha póponang, yawa wabareno yábüyo xua tamonae jíwanamonaewayo xua taxanto nexa.

⁵Abraham jumenótatsi pong petayapukaekaexaetsi, jeye:

—Icha yábüyo jopa juntukuru be nepunaponaeyo bérene, ¿eta bichokuaein tsane? ¿Néxata metha bewa nexanto kaponaein icha kain kaena báyatha po íratha póponame?

⁶Abraham jumenota, jeye:

—¡Bara, bara, inta taxanto jopa bara beya kaponaeinde! ⁷Nakom, pong Pekanamataxeinaeinxae, pong itaboko peewatsin, bapong taxa píabo tatsi weneitorobarena, xua yawa bapong tamonae pía ira tatsi weneitorobarénano. Bapong Nakom kaena báyatha nemuxutsipaeba xua pinae bárapo ira tamómoxi susato

jiwi katsinchi. Yáwano bapong Nakom itoroba pía matatsunpin xua katsíwana pona xua xam tamonaē weya jiña nekapatopaenexa yábüyo xua taxanto nexa. ⁸Icha yábüyo jopa kapunadenaeyo bérene, bara baxua yatsikaya itompaena. Jopa nantawenonaem xua inta neyábara jumewetsiwam xua kaitoróbatsi. Íchitha jopa ichipaeiño xua taxanto inta kapóname bara beya, jei Abraham.

⁹Néxata pong Abraham petayapukaekaexaetsi, bapong namaxüyüütabora Abraham petopa pejuma wétsina tatsi. Yawa bapong Nakom peitabaratha jumexaiñeya kueikueijeji xua xaniwaicha peexanaenexa xua báyatha Abraham itoroba.

¹⁰Bapoxonae bapong jíwana pita xua amanaya pexeña pekatsiwang xua báyatha Abraham xeina. Bapong pita diez póyobe camello xua Abraham piyawa, yawa pona Nacor pía tómara beya ichaxota pijimonaē tatsi tajinómpatsi, xua po tómara eka Siria mesopotámica íratha. ¹¹Pong Abraham tayapukáekatsi, poxonae bapong tómara pejuma beya patopa, bapoxonae írú nama kirei tsanaicha. Bárapo hóratha ba yábüxi mera kaponeiba xua piabongtha pekaponeibinexa. Bapong camellong nafifinakaumena éxana ichaxota müthü mera. ¹²Bapoxonae bapong Nakomtha wüüka, jeye:

—Nakom, pong Abraham pía Pekanamataxeinaein tatsim, éxande xua ánoxuae xang bara wüünaeya ponaein. Yawa Abraham, tapentakaponaein, yábara tsita itüüre jiña neayapusüüwa. ¹³Tha xote ekaetsi xua ichaxota írürü mera kapanathopeiba, po müthü mérathe pebiwi pexántixi tatsi, po pebiwi po tómarathe jinompe. ¹⁴Ínkane kópare xua powáxitha jangje: ‘Ínkane íratha pajébare jurúwato xua mera taapaenexa’, jang, bapowa jei tsane xua bapowa nejumenotsina: ‘Xam ápare mera, yáwano pata tha apatichi jiña camellomonaē’, jei tsane, kópare xua bapowa ápara powayo itapeta wábame Isaac nexa. Bapoxonae xang xaniwaicha yaputaein xua xam Abraham yawéname jiña neayapusüüwatha.

¹⁵Kataunxuae bapong jopa najumewetsiyo poxonae Rebeca patopa yawa pía jurúwato peutukuratha yaeta. Rebeca Betuel pexantiyo tatsi. Bapong Betuel Milca pexanto tatsi yawa Nacor pexanto tatsi, xua bapong Nacor Abraham peweicho tatsi. ¹⁶Bárapo yábüyo pexeñowayo tsekae. Yawa barapowa pemishidukuawa; bápana barapowa pebin jopa pichiyo. Barapowayo müthü mera deka dunadeka pía jurúwato wüngta mera. Bapoxonae ekeicha kaibe náwiya. ¹⁷Bapoxonae pong Abraham pía petanakuitinchi, bapong pubarapoiña xua kuinaepoiña, barapowayo pubarapóiñatsi, yawa pukaxinapoinchi. Bapoxonae bapong jeye:

—Já, mera nekare. Tha apaetsi xua jiña juruwatotha yakáponame, jei bapong.

¹⁸Barapowayo jumenota, jeye:

—Moya ápare Tananekanamataxeinaein, jei.

Bapoxonae jurúwato pekóbetha komaungkuanaya yawa pebin mera ápatatsi.

¹⁹Poxonae bapong naxumera weta barapowayo barái bapongtha, jeye:

—Tha yawa mera takaponaetsi jiña camellomonaē xua peapaenexa mera xua ichichipa, jei barapowayo.

²⁰Naiña wünsaina tsanaebiya xua barapowa epababa ichaxota apathopeiba camellomonaē. Barapowa müthü mera beya matowa bekuinaeyiya tsaibi, beya poxonae matapaiña daxita camellomonaē mera apa. ²¹Poxonae barapowa baxua exanawiya, barapong saya baxua kuitane yawa jopa paebiyo. Tsi-péi bapong ichichipa yaputane icha metha Nakom bara beta yawena bapong pía pesiwaponaeintha.

²²Poxonae camellomonae naxumera weta bapoxonae bapong pewiyainaewa pita xua oro nainto, xua daedaena, xua arewe nawita seis gramos po dewíyobe. Yawa bapong bárapo pewiyainaewa barapowa kátatsi. Yáwano barapowa kátatsi aiñáwabe xua penamaxüatatsiwa xua oro nain xua daedaena yawa xua 100 gramos po dewíyobe xua petsita-wüünaexaetsi pokotsiwa bapowa éxana. ²³Yawa bapong barái bapówatha, jeye:

—Ínkane netsipáebare, ¿jintam pexantiyomda? Icha axa píabo tatsi jopa tutu nakükünaeyo, tha baxota mérawi ponaetsi, yáwano pebiwi tana nekuéyabi jíwino, jei bapong.

²⁴Barapowayo jumenota, jeye:

—Ápara Betuel pexantiyong, pong Milca pexanto tatsi yawa Nacor pexanto tatsi. ²⁵Pata botha, xua taxa piabotha, jopa tutu nakükünaeyo. Moya baxota mérawi paponde yawa jiña nekakuéyabi jíwino. Matáüta naepanaewang bobena nawita xua camellomonae pexaenexa, jei bapowa.

²⁶Néxata pong Abraham pía petanakuichinxetsi, bapong pentabokototha ungkua yawa wüünae jainta Nakomtha, pong Pekanamataxeinaein. ²⁷Yawa bapong jeye:

—¡Wüünae kajáintatsi Nakom Tananekanamataxeinaein, pong Abraham tapentakaponaein pía Nakom tatsim! Tapentakaponaein Abraham, bapongtha wüünae éxaname xua jopa juniya yawenaem bapong neayapusúüwatha, yawa nexañéiwatha. Namto netsita-itüütame, po namto ichaxota Abraham piamonae píabo tatsi ungkua, jei bapong.

²⁸Barapowayo pena tatsi píabo tatsi bekuinaepoiña pía pena tsipaebichi xua daxita baxua yábara. ²⁹Barapowayo peweicho nantaüta, bapong pewüng Labán. Bapong Labán müthü mera bekuinaepoiña xua petaenéxatsi pebin, pong yopítatsi. ³⁰Bapong Labán báyatha tane xua pamcho tatsi wiyaina xua wüünae yawa xua tarúkuatsi pemáxütha penamaxüatatsiwa xua nantíyabe tarúkuatsi. Yawa Labán jumetane xua pamcho tatsi paeba xua petsipaebixaetsi pebin. Labán imoxoyo kakuita unguataba, imoxoyo kakuita unguatábatsi, pong Abraham pía petanakuichin tatsi xua kataunxuae áwiya bapong camellomonae kapópona imoxoyo müthü mératha. ³¹Yawa Labán barái bapongtha, jeye:

—Xam antha pong wüünae nekata exanaein Nakom, po Nakom Pekanamataxeinaein. ¿Eta xua metha kame xote pesátotha póponame? Báyatha tutu wüünae éxanang xam nexa, yawa xua xota camellomonae peumenaenexa, jei Labán.

³²Néxata bapong pona botha, pong Abraham pía petanakuitinchi. Labán daxita jumawejona xua camellomonae kápona. Bapoxonae Labán ápata camellomonae naepanaewa. Yawa mera xawena xua petaxu ikikaenexa tsainchi pong Abraham pía petanakuitinchi, yáwano xua irü petaxu ikikaenexa tsainchi pomonae Abraham pía petanakuitinchantatsi punapoinchi xua píakui koyeneya peexaenexa. ³³Poxonae Abraham pía petanakuitinchi pexaewa ápatatsi, bapoxonae bapong namchi, jeye:

—Ánoxuae kataunxuae jopa xaein tsane tha matha paebichi pokoyeneya xua eta xua metha patopang.

Labán namchi, jeye:

—Moya ínkane páebare, jei.

³⁴Pong Abraham pía petanakuichixaetsi, bapong namchi, jeye:

—Ápara xang Abraham pía tanakuichin tatsin. ³⁵Nakom, pong Pekanamataxeinaein, bapong inta Abraham tapentakaponaein wüünae taexainchi, yawa taexainchi xua kopei nawita xeina. Daxota tapentakaponaein Abraham kátatsi ovejamona, yawa vacamonaeno, pekakomokáe paratixino yawa oro nain xua pedaedaenaewa. Yáwano múxuna kátatsi pomona petanakuichinexa tsainchi, yawa matáütano powaxi petanakuichinexa tsáinchino. Yáwano camellomónaeno kátatsi, yáwano kátatsi burromona. ³⁶Matáüta Sara pisheuri itakatane pexuyo pebinwüüto Abrahamtha, poxona bichokono penapataewayo tsekae. Yáwano Abraham, pong tapentakaponaein, bapong pexanto daxita júntüna jeba.

³⁷“Yáwano Abraham tapentakaponaein neéxana xua tsiwüünae muxudutang yawa nejéi: ‘Jopa inta taxanto kopatsinde xua perüünakoyobina yábüyo, Canaán irawayo, xua xote ichaxota ánoxuae póponang. ³⁸Taxa piamona tatsi beya ponde, yawa tamonaetha jeire yábüyo taxanto nexa’, jei.

³⁹“Néxata jumenotang, jangje: ‘Tapentakaponaein, ¿eta bichokuaein tsane icha yábüyo jopa juntukuru be nepunadeniyo?’ jang.

⁴⁰“Néxata bapong nejumenota, jeye: ‘Nakom, pong Pekanamataxeinaein, beta jumekowüntsiya póponang. Bapong Nakom, pía matatsunpin itorobina nekabarü ponaenexa xua jüntema neponaenexa poxonae wárapame. Pichíname yábüyo taxanto nexa xua tamonaetha xua taxa piamonae jíwana tatsi. ⁴¹Saya meisha poxonae póname tamonaetha, icha jopa barapomona juntukuru be jejeyo ichüng pexantiyo, bara saya jemba itompáe tsane xua báyatha netsiwüünae muxudútame Nakom peitabaratha xua exanáename’, nejéi, jei bapong.

⁴²—Ánoxuae müthü mératha patopang. Bapoxona Nakom tsipaebang, po Nakom Abraham, tapentakaponaein pía Nakom tatsi. Jangje: ‘Nakom, xam pongxaem Abraham pía Nakom tatsim, icha bara metha xaiñéi xua xam inta exanáename xua jüntema taponaeenexa poxonae wárapang, bapoxona neyawende. ⁴³⁻⁴⁴Pekono jumetha kabaraichichi xua ánoxuae ékang ichaxota müthü mera eka. Inta éxande xuaje: Yábüyo, powayo patopa, powayo pía mera kapatichi, xua powáyotha xang jangje: Já taema, merayo tsiwiyo nekare, tha apaetsi xua nenta-sípatha yakáponame juruwatotha, jang, éxande xua barapowayo nejumenotsina, xua jei tsane: Moya ápare. Tha yawa icha mera kapatichi jiña camellomona nexa, nejéi tsane. Yawa Nakom kópare xua bárapo yábüyo ápara powayo tsane xua báyatha itapétame Abraham, pong tapentakaponaein, bapong pexanto tatsi nexa’, jangje.

⁴⁵“Kataunxae xang jopa najumewetsiño tanthütotha xua Nakomtha wüükauyang, poxonae yábüyo tang, powayo pewüng Rebeca, powayo peutukuratha yakápona jurúwato. Yawa müthü mera dunatabareka, jurúwato mene wüngtábano. Bapoxona barapowayo barang: ‘Já, ínkane mera tsiwiyo nekare’, jang. ⁴⁶Barapowayo poxona pekóbetha komaungkuanaya mera, nebaraino: ‘Moya ápare. Yáwano tha jiña camellomona mera apatichi’, jei. Bara barapowa nekata mera. Yáwano inta mera ápata camellomónaetha. ⁴⁷Bapoxona barapowayo yáíñabang jangje: ‘Xam, ¿jintam pexantiyomda?’ jang. Jeye xua nejumenota: ‘Ápara xang Betuel pexantiyo tatsin, pong Nacor pexanto tatsi yáwano Milca pexanto tatsi’, nejéi. Néxata bapowa katang xua pewiyainaewa yawa xua penamaxüxatatsiwa aiñáwabe nantíyabe perutsinéxabe.

48”Pentabokototha unguang, weyatang Nakom, pong Pekanamataxeinaein, yawa wüünae jáintangno xua bárapo Nakom, Abraham, pong tapentakaponaein, pía Nakom tatsi. Jangje: ‘Xam beta netsita-itúütame namto xua beta taponae-nexa xua tapichinexa xua Abraham, tapentakaponaein, xua bapong peweicho tatsi pexantiyo tatsi, xua Abraham pexanto tatsi nexa’, jang.

49”Ánoxuae payaputaema. Ínkane panetsipáebare icha bara metha panantana-xéiname xua páebang wüünae, yawa icha bara metha paiña ünthütotha paánto-bem Abraham, pong tapentakaponaein. Icha jume, ínkane yawa panetsipáebare xua tayaputaenexa xua pokotsiwa bewa exanaein, jei.

50Néxata bapong jumenótatsi, Labán irü Betuel jumenótabe bapongtha, jeibe:

—Baxua xua páebame, Nakom wétsika pona, pong Pekanamataxeinaein. Jopa be ‘je’ pajangyo, yawa jopa be ‘bara’ pajangyo. 51Xote taema, bekein bara Rebeca unguue, moya pire yawa kaibe barü iyande. Barapowayo jiña nentakaponaein Abraham, bapong pexanto tatsi píowa tatsi tsane xua báyatha Nakom petaexanaexae.

52Pong Abraham pía petanakuichinxaeisi, poxonae baxua jumetaeba, bapoxonae pentabokototha unguua Nakom petsipaebinxexa, pong Pekanamataxeinaein, beya peitapatha ira jáyata poxonae ira betaeungkuareka. Bapong jeye: “Jako Nakom xua beta inta éxaname”, jei. 53Bapoxonae bapong nota pekakomokáe parátixi yáwano xua pedaedaenaewa, pokotsiwa pewüing oro nain. Yáwano bapong nota dorobürü. Bapoxonae bapong daxita baxuang Rebeca kátatsi. Yawa bapong ichauyo amanaya Rebeca peweicho tatsi kátatsi, yawa írüno Rebeca pena tatsi katatsino po kopei bichokono aiña matoma.

54Bapoxonae bapong, írüno pomonae pepunaponaexaeisi, daxita barapomonae matabüxúyobe nábane yáwano apa, yawa maitumena mérawi baraxota. Icha matakábitha poxonae nakosapenta, bapoxonae pong Abraham petanakuichinxaeisi, bapong jeye:

—Bara panepukópare tha kaibe nawiyáetsi Abraham píabo beya, pong tapentakaponaein, jei.

55Íchitha Rebeca peweicho tatsi namchi irü pena tatsi namchi, jeye:

—Kópare xua abü saya kaeto, diez po matakábibe, pataxantha ekaena bapowa. Bapoxonae xain kapuna iyaena, jei barapomonae.

56Íchitha pong Abraham petanakuichinxaeisi, bapong namchi, jeye:

—Jopa paneapusíwinde, yáitama kaena báyatha Nakom wüünaeya kópata xua xang bara warapaein. Daxota panepukópare tha kaibe nawiyáetsi Abraham píabo beya, pong tapentakaponaein.

57Néxata Rebeca peweicho tatsi, bapong jumenótatsi irü pena tatsi jumenota, jeye:

—Ínkane matha pata wabichi Rebeca, pata tha matha jumetaetsi xua paeba bapowa.

58Rebeca pena wábatsi, yawa peweicho wábatsi, jeye:

—¿Jiña po pebinje napuna-iyaeisi? jei.

Bapowa jumenota, jeye:

—Aja, tha ponaetsi, jei bapowa.

59Bara néxata barapomonae Rebeca pukópatatsi xua pona. Yáwano irü pukópatatsi xua pona powa yapu-eeneiba. Yawa irü pukópatatsi xua pona pong Abraham

petanakuichinxetsi yawa múxunano pomonae xua bapong pepunaponáewichi.
⁶⁰Rebeca wüünae yábara páebatsi, yábara jeichiche po jumethe:

“Maisha pata tamcho wüünaem.

¡Xam bara kaewayo koxiwam tsane bichokono pinmonae nexa, xua jopa juniya tsane!

¡Bárabü jiña nemómoxi susato jiwi ataya amanayabeibina pía peaitaetabí jíwichi!”

⁶¹Néxata Rebeca camellomonae tsijuma ekeika irü tsijuma eneika powaxi Rebeca pía petanakuichiwaxichi. Bapoxonae barapówaxi napunapona Abraham pía petanakuichin tatsi peputha. Daxota Rebeca nápona báyatha pewabixae pong Abraham pía petanakuichin tatsi yawa pona bara weya.

⁶²Bapoxonae írürü Isaac pópona Néguev nákuatha. Íchitha bapong kaena müthü mera wenawirena, po müthü mera wüing jeye: “Beer-lajai-roi”, jei. Bapo wüing xua jei: “Bapong, pong asiüü yawa netane”, jei. ⁶³Bapong Isaac poxonae aena tabópiya tsanaicha, tsiwiyo poponataba. Bapoxonae bapong taeba xua kakuita dendénatsi camellomonae.

⁶⁴Bapoxonae Rebeca Isaac táebatsi. Poxonae Rebeca Isaac tainchi, íratha non-tabika Rebeca caméllötha tsika. ⁶⁵Bapoxonae Rebeca yáíñaba pong Abraham petanakuichinxetsi, jeye Rebeca: “¿Jintame pebin pong naka kakuita dena wexua wérena?” jei bapowa. Pong Abraham pía petanakuichinxetsi jume-nota: “Ápara tapentakaponaein”, jei bapong, xua Rebeca jumenótatsi. Bapoxonae barapowa pía paparuwa pítaba, po paparuwa itafáfana kaka. Bárapo paparúwatha náitabara karontaba xua saya naitakuere seika éxana xua píakui koyeneya éxana.

⁶⁶Bapong, pong Abraham pía petanakuichinxetsi, bapong Isaac tsipáebatsi daxita xua báyatha éxana bapong. ⁶⁷Bapoxonae Isaac Rebeca barü íyatsi duweibokong bómüxü beya xua kopiya Isaac pena tatsi pía duweibokong bómüxü tatsi. Bapoxonae Isaac perüünakóyoba Rebeca. Isaac Rebeca antobetsi nawita. Bekein Isaac kopiya wekoyéi poxoru pena petatüpaexetsi, íchitha ánoxuae Isaac kuimataatéikatsi poxoru Rebeca pepatopaexae.

**Meje yábara Abraham pía pemómoxi susato jiwi tatsi,
yawa Quetura pía pemómoxi susato jiwi tatsi**

25 ¹Abraham ekeicha icha petsiriwa perüünakóyoba. Bárapo petsiriwa pewüing Quetura. ²Barapowa Abraham itakatainchi pexui. Ichüing pewüing Zimrán, ichüing Jocsán, ichüing Medán, ichüing Madián, ichüing Isbac, yawa ichüing pewüing Súa. ³Bapong Jocsán, Seba paxa tatsi, yawa Dedán paxa tatsi. Dedán pía pemómoxi susato jiwi tatsi pewüing asureomonae, ichamonae pewüing letusitamonaenae, ichamonae pewüing leumitamonaenae. ⁴Madián pía pexui tatsi, kaein pewüing Efa, ichüing pewüing Efer, ichüing Hanoc, ichüing Abida, ichüing Elda. Daxita barapomonae Quetura pía pemómoxi susato jiwi tatsi.

⁵Abraham kata pexántötha, pong Isaac, daxita xua xuang xeina. ⁶Íchitha nama Abraham pía pexuitha saya tsiwixi katsiba xua po pexui éxana ichowabetha, Quetura irü Hagar, po petsiriwáyöbe kotakaya notapenteiba. Yawa poxonae kataunxuae pópona Abraham, taitorobareka icha pexantoxi tatsi icha nakua béreka, petsabinexa Isaac weya barapomonae.

Meje yábara poxonae Abraham tüpa, yawa poxonae ibowoutha bóyatsi

⁷Abraham 175 po wéiyobe pópona. ⁸Bapong tüpa, saya amotha bokopa tsipéi bichokono amo tsekæ. ⁹Isaac yawa Ismael, barapongbe Abraham pexantobexæ, ibowoutha bóyatsi, po ibowóu boka ichaxota Macpela ira matawüing, xua pokotsiwa icha xometo wekoina xua Mamre ira wétsina yawa xua Efrón pía íratha tatsi, pong Zojar pexanto tatsi, pong hebreomonaepin. ¹⁰Bárapo ira, po ira báyatha Abraham kómota Het pía pexui tatsi. Bárapo íratha Abraham ibowoutha bóyatsi ichaxota pisheuri tatsi yaíbowou boka.

¹¹Abraham pekoutha tatsi poxonae tüpa, bapoxonae Nakom Isaac bichokono beta yawénatsi. Isaac imoxoyo müthü mera pópona, po müthü mera ichaxota jeye: “Beer-lajai-roi”, jei. [Hebreo jumetha xua: “Beer-lajai-roi”, jei bapo wüing xua yábara jei: “Bapong pong asiüü, yawa netane”, jei.]

Meje yábara Ismael pía pemómoxi susato jiwi tatsi

¹²Meje daxita pomonae Ismael pía pexui tatsi, pong Abraham pexanto tatsi yawa Agar pexanto tatsi. Agar bapowa Egipto nakuapiwayo yawa powa Sara petanakuichiwáyotsi. ¹³Tamrópata poxonae aena nakatsiwa, pong matapin pewüing Nebayot. Bapoxonae xuiyapin nakatsiwa pewüing Quedar. Bapoxonae ichüing nakatsiwa ekeicha pewüing Adbeel. Bapoxonae ekeicha ichüing nakatsiwa Mibsam. ¹⁴Ichüing nakatsiwa Misma, ichüing Duma, ichüing Masá. ¹⁵Ichüing Hadad, ichüing Tema, ichüing Jetur, ichüing Nafis irü ichüing Quedema.

¹⁶Bárapo wüingxi, xua doce pongbe pebiwi, xua Ismael pía pexui tatsi. Yáwano daxita karepaya barapomonae barompaya pía tómarang wüingduba, xua pewüingxitha ichaxota jinompa, yawa po tsiki tómaraxi ichaxota maiteiba poxonae warapeiba. Daxita bárapo doce pongbe pentakaponaewi nakatsiwa xua barompaya piamonaexi tatsi tsíniya nexa.

¹⁷Ismael 137 po weibe xeina poxonae tüpa. ¹⁸Bapong Ismael pía pemómoxi susato jiwi tatsi jinompa po ira nakakuíta ékabe Havila nakua yawa Shur nakua. Yawa xua bárapo nákuabe ékabe Egipto nakua itabaratha poxonae ichüing patopa xua Asur wérena.

Baxota barapong Ismael, pía pemómoxi susato jiwi tatsi jinompa bekein barapomonae kaemona nantiya nábabe.

Meje yábara poxonae Esaú nakatsiwa yawa Jacob nakatsiwa

¹⁹Meje baxue Isaac pediyesi, pong Abraham pexanto tatsi. ²⁰Isaac 40 po weibe xeina poxonae Rebeca nakóyobatsi, powayo Betuel pexantiyo tatsi yawa xua Labán pamcho tatsi, xua barapomonae arameomonae jíwanamona, pomona jinompa Padan-aram íratha. [Hebreo jumetha po wüing: “Padan-aram”, jei, bapo wüing yábara jei: “Aram ira xua ira matafátsana”, jei.]

²¹Rebeca jopa itaküüpaetsi xua pexeinaewa pexui. Daxota Isaac Nakomtha pekono jumetha wüüka xua Rebeca tawüükatsi. Nakom jumetane xua Isaac wüüka. Bapoxonae Rebeca pexuyo búpana taékatsi.

²²Íchitha, pong бүтйоthа namaékabe, bapongbe бүтйоthа nábabe. Barapowa nantaxeinaeya najéi:

—Icha Nakom jumetane poxonae pawüükang pexuyo, néxata ¿eta xua ekeicha daxua inta daichi xua atenein?

Néxata barapowa pona xua Nakomtha tsipaeba. ²³Nakom jumenota, jeye:
 “Pexúyobe matadudúbitha aiña bichéitobe náexanabe.
 Barapongbe búpana nabepónabe, yakuiya nauchataénabe poxonae
 nakatsiwínabe.

Bapongbe tsanaya poponáenabe, kaein dangwéi beyakaincha ichüing.
 Matapin matakaponaeinchi, xua xuiyapin péntapin matakaponaeina”.

²⁴Matakabi tsuxubi, po mataketha Rebeca pexúyobe éxana, pongbe namaé-
 kabe. ²⁵Pong kopiya nakatsiwa, anakó tsekae yawa natsobia. Bapong pewüing
 Esaú. [Hebreo jumetha po wüing: “Esaú”, jei yábara jei: “Anakó tsekae”, jei.]
²⁶Pong kotakaya nakatsiwa, bapong Esaú taxubüxütéi wáetabatsi, daxota bapong
 matawüing dútatsi: “Jacob”, jei. Isaac 60 po weibe xeina poxonae Rebeca pabétabe
 pexúyobe. [Hebreo jumetha po wüing: “Jacob”, jei yábara jei: “Petaxubüxüiteito”,
 jei, yawa xuano xua jei: “Pong pemuxujaiñabin”, jei.]

Meje yábara poxonae Esaú kaenaeta pía peitorobi koyenewa xua matakápona

²⁷Bapongbe pexúyobe wichabaxúbabe. Esaú aishówatha pópona nawita yawa
 pejeichin tsekae. Jacob nama jüntema pópona yawa ichichipa xua saya duweibo-
 kong bómüxü pópona. ²⁸Isaac xane xua Esaú jeiteiba, daxota Esaú paxa antobetsi
 bichokono, Isaac pexanto ántobe. Íchitha Rebeca ántobe bichokono Jacob, Jacob
 pena bichokono antobetsi.

²⁹Kaentakábitha Jacob setauya irü Esaú wéxotha kaibe nawirena; bichokono
 finapona. ³⁰Yawa jei Jacobtha:
 —Ínkane tsiwiyo nekare púpara, po úpara tsobia éxaname, yáitama muxu tain
 tatüpa, jei.

Daxota bapong pewüing Edom jáintatsi, tsipéi po púpara tsobia wüüka. [Hebreo
 jumetha po wüing: “Edom”, jei yábara jei: “Tsobia”, jei.] ³¹Jacob namchi:

—Kopiya matha nekare xua pokuikoyene jiñakoya daxita kanamataxéiname,
 xua matapinxuem.^d

³²Néxata Esaú namchi:

—Taema, tain imoxoyo muxu tatüpa. Jopa neyawenaeyo icha taitorobi koyene
 xeinang, xua matapinxaein, icha tain tüpaein, jei.

³³Jacob namchi:

—¡Ánoxuae Nakom peitabaratha jumexaiñeya páebare pokoyene xua jiñakoya
 daxita kanamataxéiname, xua matapinxuem, ápara tawa daxita!

Bapoxonae Esaú, Nakom peitabaratha, jumexaiñeya paeba. Bapoxonae Esaú
 peyapintha kaenaeta pokoyene piakoya daxita kanamataxeina, xua matapinxae,
 xua Jacob bárapo koyene kátatsi. ³⁴Néxata Jacob, Esaú péyapin kátatsi pan yawa
 púpara. Poxonae Esaú najainweta xua xane, yawa xua apa, bapoxonae nontapona
 yawa pona. Baxua xua kaena báyatha Esaú nakuibaraxuba, pokoyene xua piakoya
 daxita kanamataxeina, pokoyene xeina báyatha xua matapinxae.

^d25.31 Hebreomonae piakui xeina, poxonae matapin, bapong péyapin jiwi toxenta xeina peitorobi koyene,
 poxonae paxa tatsi tüpa. Péyapin jiwi toxecha aiñawang xeina xua paxa tatsi pekopiniwa tatsi. Bapong
 xeina pokoyene sacerdotemonaein náexana piamonae nexa. Bapong xeina pokoyene xua tsiwüüinae yábara
 muxudútatsi, xua Nakom tsiwüüinae yábara muxudútatsi, xua Canaán ira xua piamonae tatsi nexa. Matáü-
 tano bapong xeina pokoyene xua yántatsi xua Nakom yanta.

Meje yábara poxonae Isaac wárapa Gerar tómara beya

26 ¹Bárapo dapaetha, pin mayayo tsúrukuae poxonae pexaewa aibi bárapo nákuatha. Barichirü kaena báyatha, poxonae Abraham pópona, xua pin mayayo tsúrukuae. Daxota Isaac Gerar tómara beya wárapa ichaxota pópona Abimelec, pong filisteomonae pía nakua peewatsin tatsi. ²Baxota Gerar tómaratha Nakom, pong Pekanamataxeinaein, Isaac tsita naitúütatsi, jeichi:

—Jopa Egipto nakua beya ponaeinde. Ékare xua ichaxota katsipaebinchi. ³Íchitha ánoxuae saya baxota póponde bárapo nákuathe. Xang kayantiya poponaeinchi, yáwano wüüinae kata exanaeinchi, tsipéi bárapo ire kakatinchi, yawa katsin jiña nemómoxi susato jíwitha. Bapoxonae nayábara jumewetsin xua báyatha axang, Abrahamtha, tsiwüüinae muxudutang.

⁴”Xang exanaein, xua jiña nemómoxi susato jiwi pinmonae tsane bichokono, ichi opitéi ichi xua aiñawang bichokono peitabókotha. Yáwano katsin daxita po ire. Yawa tayawenaexae tsane nemómoxi susato jiwi. Daxota daxita nakuangthapiwi jüntükoyene weiweinaena xua bárapo nemómoxi susato jíwixae. ⁵Baxua exanaein tsipéi Abraham nejumejejei, xua éxana xua itorobang, yawa nejumeyábara wetsiya éxana xua báyatha itorobang, yawa nejumeyábara wetsiya éxana tajume díwesi taitorobi koyenewa yawa xua takuidubi koyenewa.

Meje yábara poxonae Isaac muxitóroba, xua Abimelec muxitórobatsi

⁶Néxata Isaac Gerar tómaratha pópona. ⁷Pomona baxota jinompa, barapomona Isaac yáñabatsi, jeichichi:

—¿Barapowa ápara jinsheuri? jei.

Bapong jumenota, jeye:

—Bapowa ápara tamcho, jei.

Íchitha Isaac pejunuwixae, jopa juntukuru bejeyo “Ápara taseuri”, jopa bejeyo, tsipéi pisheuri tatsi bichokono pexeñowayo. Bapong nantanaxeina xua mexeya ítara bárapo tomarapiwi xua pebiwi yábara bexuichipatsiwéi bapowa.

⁸Isaac aiña xometong yapuxénabatsi xua bapong baxota eka. Kaentakábitha Abimelec, pong filisteomona pía nakua peewatsin tatsi, bapong Isaac, xua bómüxü epanasaba wetaeungkuéikatsi, xua Isaac pishéuribe narenungkuarékabe. ⁹Néxata Abimelec ichüngtha najumekaitoroba, xua Isaac wabinchi Abimelec bérena. Bapoxona Abimelec Isaac yáñabatsi, jeichichi:

—¿Barapowa xam jinsheuri bárada? Dáichitha, ¿eta xua metha páebame xua bapowa ápara amcho?

Isaac jumenota, jeye:

—Ápara mexeya ítara barapowa neyábara bexubinawejang.

¹⁰Abimelec Isaac jumenótatsi, jeye:

—¿Eta xua metha baxua painta éxaname? Metha ápara tomarapin muxu jinsheuri pepitichi. Xam imoxoyo éxaname xua pana natsi-aenaekuentang, xua abepákata éxanatsi jiña nenaerabixae.

¹¹Néxata Abimelec daxita pía tomarapiwi muxutsipaeba, jeye:

—Icha ichüng abe exanaena barapongtha, icha jopa tsipae yawa píowa tatsithano, bapong bara tüpaena, pong baxua éxana, jei.

Meje yábara poxonae Isaac kopeixeinaein náexana Gerar tómaratha

¹²Bárapo weitha, baxota Isaac üba yáwano wüünaeya tanawétatsi, Nakom beta peyawenaexae. ¹³Bapong Isaac kopeixeinaein náexana yawa ekeicha bichokono mataropeicha xeixenapona, tsipéi Nakom yawena. ¹⁴Bapong Isaac ovejang nawita xeina, yáwano vacangno xeina, yáwano matáütano bapong múxuna xeina nawita pomona pía petanakuichinéxatsi. Daxota, daxita baxuang Isaac yábara úwatsi filisteomona.

¹⁵Isaac paxa tatsi Abraham. Poxonae bapong Abraham pópona pía petanakui-chiwixaetsi, barapomonae báyatha mera müthüng boupa seika exananoba. Íchitha ánoxuae filisteomonae mera müthüng boupa matatsaeba tsorobongtha. ¹⁶Mata-paiña Abimelec Isaac baraichi, jeye:

—Po tómará weye wárapare, yáitama xam kopei nexainaem beyakaincha paxang.

¹⁷Isaac wárapa yawa naebopa Gerar demuxuwa marafoto deka, xua pía duweibokong bómüxü éxana xua baxota namapópona. ¹⁸Ekeicha Isaac mera müthüng patapenta, po mera müthüng báyatha boupa seika exananoba poxonae Abraham pópona. Bárapo mera müthüng filisteomonae tamatatsaeba tsorobongtha poxonae Abraham tüpa. Ekeicha bárapo wüngxí wüngduba bárapo mera müthüng, po mera müthü wüngxí báyatha wüngduba paxa tatsi.

¹⁹Kaentakábitha, Isaac pía petanakuichiwichi mera müthü kueyompa demuxuwa pamarafoto tsika. Barapomonae epakaxina xua búpana mene nawowota dukuarena. ²⁰Íchitha Gerar tomarapiwi, pomona peyapukainompaewi ovejamona, barapomona ba pomona Isaac pía petayapu kainompaewichi pía ovejamona, barapomonae betsi, yáitama barapomona namchi, jeye:

—Ápara pata mera, jei.

Daxota Isaac bárapo mera müthü wüngduta po wüng jeye: “Esec”, jei. [Hebreo jumetha po wüng: “Esec”, jei yábara jei: “Naba”, jei.] Tsipéi bapong irü betsi. ²¹Ekeicha barapomonae icha mera müthü jórotaba yawa ekeicha bárapo mera müthü nayábara ba. Bárapo mera müthü ekeicha Isaac wüngduta: “Sitna”, jei. [Hebreo jumetha po wüng: “Sitna”, jei yábara jei: “Peaitafaetabí koyenewa”, jei.] ²²Bara weya Isaac tajü beya wárapa yawa icha mera müthü ekeicha jórotaba. Nama bárapo mera müthü ekeicha jopa nayábara beyo, daxota wüngduta: “Rejobot”, jei. [Hebreo jumetha pojume: “Rejobot”, jei yábara jei: “Pinwa náexana”, jei.]

Bapong jeye: “Ánoxuae Nakom naka kata ira, yawa naka pukópata xua jinóm-patsi xote, yawa éxanatsi xua ichichípatsi xua jüntema beta jinóm-patsi”, jei.

Meje yábara poxonae Isaac irü Abimelec nantiya nata yábara tsiwüünae muxudútabe

²³Bara weya Isaac wárapa Beerseba tómará beya. ²⁴Bárapo merawitha, Isaac tsita naitüütatsi Nakom, pong Pekanamataxeinaein, jeichichi:

“Ápara Nakomüng,
po Nakomüng Abraham axa pía Nakom.
Jopa junuwinde,
ápara bara kayantapopoinchi.

Abraham pong inta nakuita,
bichokono taantobexae,
daxota wüünae kata exanaeinchi.

Kata bichokono pinmonae exanaeinchi jiña nemómoxi susato jiwí”.

²⁵Néxata baxota Isaac exananota altar matawüing, xua xota pokotsiwa duwéi peyüübabeibiyathopaewa, xua xota duwéi petautsiwa xua petúxusi exanaewa Nakomtha. Bapoxonae, baxota bapong Nakomtha wüüka. Bapoxonae, bárapo íra-tha, bapong naebopa xua pía duweibokong bómüxü éxana, yawa pía petanakuichi jíwichi tatsi, barapomonae mera müthü kua.

²⁶Kaentakábitha, Abimelec Gerar tómara wérena pona pía jintong kueyatatsi, bapong Ajuzat. Irü Ficol nápona. Bapong Ficol, pong soldadomonae pía pentakaponaein tatsi pomonae Abimelec pía soldadomonae. Abimelec bara wérena pona xua Isaac pebarü kueikueijeinexa tsainchi. ²⁷Isaac barái barapomonaetha, jeye:

—Icha paxam pana neaitafaetabim yáwano pana netorótame paiña tómara weya, ¿eta xua metha ekeicha pana netaethoparéname?

²⁸Barapomonae Isaac jumenótatsi, jeye:

—Paxang payaputang xua Nakom kayantapópona, yawa panantanaxeinang xua paexanaein petsiwüünae muxudutsiwa xamtha yawa paxánghano. Xua xamtha paexanaein petsiwüünae muxudutsiwa, baxue: ²⁹Xua xam jopa painta abe exanaem tsane, yáitama paxang báyatha jopa abe paka exanaetsi. Nama saya meisha wüünaeya paka exainchi. Yáwano betiya wüünaeya jüntemiya paka napéyabatsi. Ánoxuae Nakom kata wüünae éxana.

³⁰Néxata Isaac pin fiesta éxana barapomonae nexa. Barapomonae nanábane yáwano naapa. ³¹Icha matakeitha baya, asiya umenarúküpa yáwano jumexaiñeya kueikueijeinei Nakom peitabaratha xua kaemonae nantiya nata yábara tsiwüünae muxuduba. Yawa Isaac barái: “Baja”, jei. Isaac barapomonae jüntema napéyabatsi.

³²Bárapo matakeitha, pomonae Isaac pía petanakuichiwichi pata xua Isaac yábara petsipaebinxexa tsainchi xua müthü mera xua báyatha kua, jeye:

—¡Báyatha mera pajorotabang! jei.

³³Isaac bárapo mera müthü wüingduta: “Seba”, jei. [Hebreo jumetha po wüing: “Seba”, jei yábara jume jei: “Petsiwüünae muxudutsiwa”, xuano xua jei: “Nawita”, jei.] Daxota bárapo tómara kataunxuae wüingdukua: “Beerseba”, jei. [Hebreo jumetha po wüing: “Beerseba”, jei yábara jei: “Po mera müthü ichaxota éxana petsiwüünae muxudutsiwa”, jei.]

³⁴Poxonae Esaú 40 po weibe xeina, bapoxonae perüünakóyoba powa pewüing Judit, powa Beerí pexantiyo tatsi. Matáüta bapong Beerí hebreomonaepin. Yáwano perüünakóyoba powa pewüing Basemat, powa Elón pexantiyo tatsi, yawa matáüta bapong Elón hebreomonaepin irü. ³⁵Barapong Esaú piowayobe tatsi, powáyobe namadenakékabe, barapowáyobe Isaac antabükoyenebé éxanatsi yawa Rebeca antabükoyenebé éxanatsi.

Meje poxonae Isaac pexántobe wüünae yábara paeba xua Nakom exanaena bapongbetha

27 ¹Isaac bichokono penapataein tsekae yáwano kaena báyatha itamüna. Kaentakábitha bapong pexanto waba Esaú, pong matapin, yawa baraino pexanto, jeye:

—¡Owáe! jei.

Esáú paxa jumenota, jeye:

—¿Jai? Ékang xote, jei.

²Isaac namchi:

—Maisha nama bichokono penapataein tsoponaein, kaentakeitha aunxuae tüpaein. ³Daxota untha pépobo kaponde yawa bicheibi xua inta nejeichinexa duwéi. ⁴Bapoxonae pexaewa éxande xua üpa xeika, xua pokotsiwa ichichipang yawa inta xawena tha üpa apaetsi. Bapoxonae wüünae kayábara paebinchi Nakom peitabaratha, xuano xua xeináename takopiniwa, xua matapinxuem, xua baxua matha pewünaeya tsane poxonae tüpaein.

⁵Rebeca pisheuri jumetane Isaac, xua tsipaeba pexántotha Esaútha. Íchitha, barapowa saya be taxeinainchi Jacob, pokotsiwa Isaac katapaeba Esaútha matapinxae. Daxota barapowa éxana xua Jacob paxa muxujaiñabina poxonae Esaú untha ponaena, xua paxa tsijeita xua pexaenexa duwéi. ⁶Bapowa, Rebeca, pexántotha barái, Jacobtha, pong xuiyapintha, jeye:

—Taema, axa jumetang xua néntapin Esaú baraichi. ⁷Jeichiche: ‘Untha jeire duwein. Bapoxonae pexaewa éxande xua üpa xeika tha üpa apaetsi yawa wüünae kayábara paebinchi xua Nakom kata exanaena, xua baxua matha pewünaeya tsane poxonae tüpaein’, jei.

⁸’Daxota xam, taxantom, beta nejumetaema xua xang enang kabaraichichi: ⁹Ponde ichaxota waduweimonae jinompa yawa inta karenande cabríyobe pexeiñiyo tsekaebe. Tha pexaewa exanaetsi xua üpa xeika, xua pokotsiwa ichichipa axa. ¹⁰Bapoxonae axa takapóiñama xua peüpa apaenexa. Bapoxonae wüünae kayábara paeibina, xua Nakom kata exanaena, xua matha pewünaeya tsane poxonae tüpaena.

¹¹Íchitha Jacob pena jumenota, jeye:

—Tántapin anakó; xang jopa dáichino. ¹²Icha taxa nejayabina yawa neyaputaena, bü yaputane xua bapong muxujaiñabang. Bü abe neyábara paeba xua jopa wüünaeya tana neyábara paebiwa tsipae.

¹³Íchitha Jacob pena jumenótatsi, jeye:

—Taxanto, ápara jame axa abe neyábara paeibina xua natsi-aenaekuentang xua jopa karaichi tsane. Ánoxuae taema yawa éxande xua katsipáebatsi. Inta kaponde aiña póyobe cabríyobe.

¹⁴Jacob pona pejeitsinexa cabríyobe, yawa pena taxawena. Barapowa, Rebeca, pexaewa seta xua üpa xeika éxana, be pokotsiwa Isaac ichichipa. ¹⁵Esaú pía pexeiña kamisha tapítatsi, pong matapin, po kamisha bota bomüxütha yawa bárapo kamisha Jacob jumaxátatatsi, pong xuiyapin. ¹⁶Barapoxonae Jacob pena maxüxátatatsi yawa wishi xatatatsino xua cabrito perüüto ichaxota bapong anaibi. ¹⁷Yawa pena kátatsi pexaewa, po pexaewa üpa xeika, yawa panno xua báyatha bapowa ánapa. ¹⁸Néxata Jacob joniya ichaxota paxa tatsi eka yawa baraino paxa, jeye:

—¡Axa! jei Jacob.

Isaac pexanto jumenota, jeye:

—Xote bokangje. ¿Eta po taxantomda? jei Isaac.

¹⁹Jacob jumenota paxa, jeye:

—Ápara xang nexantong Esaún, pong matapin. Yawa éxanang xua báyatha netsipáebame. Ínkane nontaponde yawa ékare yawa xaema pewito, pong báyatha bexubang, yawa wüünae neyábara páebare xua Nakom inta exanaena, jei Jacob.

²⁰Néxata Isaac pexanto yáíñaba, jeye:

—Owáe, ¿eta bichim xua bichoina duwéi táebame?

Bapong, Jacob, paxa jumenota, jeye:

—Jiña Nakom, po Nakom Pekanamataxeinaein, bárapo Nakom neyawena xua bárapo duwein naiña taebang.

²¹Íchitha Isaac pexanto barái Jacob, jeye:

—Ínkane imoxoyo úngkuare yawa kajayabinchi icha bara metha taxantom Esaúm.

²²Jacob paxa imoxoyo kakuita unguua, pía paxa jayabichi. Néxata Isaac jeye:

—Ápara Jacob jumem, íchitha nemaxü Esaú maxüm.

²³Daxota Isaac jopa yaputaeyo, poxoru bapong, Jacob, pemáxütha penatana-wítatsi, ichi péntapin tatsi ichi, pong Esaú. Íchitha poxonae muxu Jacob wüünae peyábara paebichi, xua Nakom taexanaena Jacob, bapoxonae ekeicha Isaac Jacob yáíñabatsi, jeye:

²⁴—¿Metha bara taxantom Esaúm jampa? jei.

—Aa, ápara Esaún, jei Jacob.

²⁵Néxata Isaac, Jacob páxaxae baraichi, jeye:

—Owáe, neápare tha xaetsi xua báyatha pong bexúbame duwein. Bapoxonae wüünae kayábara paebinchi xua Nakom kata exanaena.

Bapoxonae Jacob paxa ápata yáwano vino mera taxawena. Bapoxonae Isaac xane yáwano ápano. ²⁶Yáwano Isaac barái pexántotha, jeye:

—Imoxoyo úngkuare yáwano netsutsúbare, jei.

²⁷Poxonae Jacob paxa imoxoyo kakuita unguataba xua pía tsutsubichi, bapoxonae Isaac pexanto tatuxutaba paparuwa. Bapoxonae jeye xua pexanto yábara wüünae paeba, xua Nakom taexanaena, jeye:

“Aja, bárapo túxusi,

taxanto túxusi.

Báraxua ba atuxusiwexuatanem,

xua Nakom beta xuwa éxana.

²⁸Bárabü Nakom ema kakatsina peitaboko wétsika.

Yawa bárabü pexuwiwang wüünaeya íratha xuwina,

xua übíname, xua trigoxú nawichina,

yáwano uvakuéi nawichina vino mera nexa.

²⁹Bárabü pinmonae jiwi kata nakuichina.

Yáwano bárabü daxita nákuang jiwi pentabókotha umenaena neitabáratha, pía jiña nekabarükuí iturajinaenexa tsane.

Bárabü itorobiya kanamataxeináename xua barompaya jiña eweicho jiwi.

Yáwano barapomonae bárabü pentabokototha umenaena neitabáratha,

pía jiña nekabarükuí iturajinaenexa tsane.

Pomonae abe kayábara paeba,

bárabü Nakom abe exanaena barapomonaetha,

xua átene peexanaenexa.

Yáwano pomonae wüünaeya kayábara paeba,

bárabü Nakom wüünaeya taexanaena barapomonaetha”, jei Isaac.

³⁰Isaac najumeweta xua Jacob wüünae yábara páebatsi xua Nakom taexanaena. Yawa aena Jacob paxa wenawirena, xua poxonae irü Esaú botha patopa xua jeita.

³¹Bapoxonae irü Esaú paxa taseta pexaewa xua üpa xeika. Bapoxonae paxa takaya yawa barái paxa, jeye:

—Nantakotekatábare axa. Pewito xaema, po duwein nexanto bexuba. Yawa ánoxuae wüünae neyábara páebare xua Nakom inta exanaena.

³²Néxata Isaac yáíñaba pexántotha, jeye:

—¿Jintam xamda?

—Ápara Esaún, nexantong, pong matapin, jei Esaú xua jumenota.

³³Isaac nanthüthü kabenaeka, jumejjijiyeya namchi:

—¿Jintam metha kou báyatha jeita yawa inta pexaewa xawena xua üpa xeika, xuano báyatha nábanang pewünaeya xua kou patópame? Báyatha wüünae yábara páebang ichüing xua Nakom taexanaena. Báyatha bapong xeina xua wüünae tayábara paebiwa, xua Nakom taexanaena bapong.

³⁴Poxonae Esaú jumetaeba baxua, bichokono ünthüthüwekoyéi. Yawa anaya jumedangweya jeye:

—¡Axang, xangno irü nekare jiña wüünae neyábara paebiwam, xua Nakom inta exanaena!

³⁵Isaac jumenota pexanto, jeye:

—Néyapin báyatha patopa yawa nemuxuitóroba. Yawa kápona bapong xua wüünae tayábara paebiwa, xua Nakom taexanaena bapong, bekein xua xam nexa.

³⁶Esaú jei:

—¡Daxota wüingdútatsi po wüing, pewüing Jacob! ¡Ánoxuae nama aiñakuíyobe xua nemuxujáíñaba! Kopiya matha neyábara muxujáíñaba xua pokoyene takoya daxita kanamataxeinaein, matapinxaein. Ekeicha nama ánoxuae nekaiba xua imoxoyo tana nekatsiwam xua jiña wüünae tana neyábara paebiwam, xua Nakom inta exanaena. ¿Jopa ichawa áwiya xeinaem, xua wüünae tana neyábara paebiwam tsane? jei Esaú. [Hebreo jumetha po wüing: ‘Jacob’, jei yábara jei: ‘Pong pemuxujáíñabin’, jei, xuano xua jei: ‘Petaxubüxüiteito’, jei.]

³⁷Isaac pexanto jumenota, jeye:

—Taema, xang katang Jacobtha pokoyene xua bapong kakana mataxeinaena. Yáwano jiñamonae éxanang xua bapong pía petanakuichiwichi tsainchi. Ichichipang xua barapong trigoxú nawita xeinaena, uvakuéi nawita xeinaena xua vino mera nexa. Owáe, ¿eta xua ánoxuae kata exanaeinchi? jei Isaac.

³⁸Ekeicha Esaú jeye:

—¿Jopa ekeicha írürü be wüünae tana neyábara paebiwam tsane, xua Nakom inta exanaena? ¡Irü xang wüünae neyábara páebare!

Ekeicha bapong Esaú namtsébiya wekoyéi. ³⁹Isaac pexanto barái, jeye:

“Taema, po ira ichaxota poponáename jopa bichokono ira wüünae tsane.

Jopa kata ema duneikaena itaboko wétsika.

⁴⁰Xam irü jiñamonae kusi pakarubena dubenanaebiyáename, xua xota panakobeyántame.

Jiñamonae tanakuichina, xua néyapin piamonae tatsi tanakuitinchi.

Íchitha bexa tsane, poxonae jiñamonae maxü dangwéi naexanaena,

bapoxonae itaküüpaeinchi xua panenebiyaena,

xua poxonae bekein itorobinchi, xua poxonae néyapin piamonae tatsi

itorobina”, jei Isaac.

Meje poxonae Esaú nantanaxeina xua Jacob bexubinchi

⁴¹Esaú anaya péyapin kaseba, yáitama Jacob paxa wüünae yábara páebatsi xua Nakom taexanaena, xua pokoyene bekein paxa pía wüünae peyábara paebíwatsi tsainchi. Yawa Esaú nantaxeina, jeyeno: “Metha bexa taxa peushiwa bichokono paanthüthütanein tsane poxonae tüpaena. Bapoxonae taxa pekoutha, poxonae tüpaena, tha táyapin bexubichi Jacob”.

⁴²Poxonae Rebeca jumetane xua pinae Esaú péyapin yábara najüntükoyene weta xua bexubina, bapoxonae bapowa ichüngtha najumekaruta xua Jacob wabinchi, yawa pexanto barái Jacobtha, jeye:

—Taema, bepa Esaú néntapin kabexubei, xua be pentoma éxana xamtha. ⁴³Daxota owáe, nejumetaema. Anetha naiña ponde taeweicho píabo beya tatsi, pong pewüng Labán, pong Harán tómaratha pópona. ⁴⁴Kataunxuae abü bapongtha naékare beya abü poxonae yapukaewina xua bapong eweicho kakaseba. ⁴⁵Yawa éware beya poxonae bapong jüntemainena xua éxaname, xua bapong be káibame. Néxata kaitorobinchi xua kaiberena nepatoparenaenexa. ¡Jopa be nentapuxana exanaeyo bárapo taxántobe poxonae bena bexuichípabe!

Meje poxonae Jacob péntapin kuitaya naetsíriwa Padan-aram nákuatha, xua Esaú kuitaya naetsiríwatsi

⁴⁶Kotakaya Rebeca barái pishéuritha, Isaactha, jeye:

—Bichokono antabükoyenetaetabin xua abe éxana powáyobe, heteomonaewáyobe, powáyobe Esaú perüünakóyobabe. Icha Jacob píchapa heteomonaewayo, be pokotsiwáyobe ichi, xua powáyobe popónabe Canaán nákuatha, nama baxua inta bichokono abe, xua daxota metha bewa jame tüpáetsipang, jei Rebeca.

28 ¹Néxata Isaac pexanto waba, Jacob. Yawa wüünaeya yábara páebano xua Nakom taexanaena. Bapong jeye:

—Jopa perüünakoyobinde powayo Canaán nakuapiwayo xua po írathe. ²Padan-aram nakua beya ponde amo píabo tatsi, pong pewüng Betuel, pong ena paxa tatsi. Yawa baxotiya axuyo pexántixi tatsi jíwana pire, pong pewüng Labán. ³Nakom, pong daxita peyapusüüwa pexeinaein, bárabü bapong kata wüünae exanaena, yawa kata pinmonae exanaeinchi jiña nemómoxi susato jiwi, xua aiña nakuangpiwi peexanaenexa, xua xamxaem.

⁴Bárabü Nakom kata wüünae exanaena. Yáwano bárabü jiña nemómoxi susato jíwino wüünae taexanaeinchi, ichi báyatha amo ichichi, pong Abraham, poxonae tsiwüünae muxudútatsi, poxonae bapong wüünae yábara páebatsi. Bárabü bárapo jiña nemómoxi susato jiwi xeinaena pía ira, po ire, po íratha jinómpatsi ánoxuae xua be dobiwi koyeneya jinómpatsi, po ira Nakom amo kátatsi poxonae tsiwüünae yábara muxudútatsi, xua barapomonae katsinchi bárapo ire.

⁵Baxua paeba Isaac poxonae pexanto itoroba, Jacob, Padan-aram nakua beya. Yawa baxotiya Jacob patopa Labán piabotha tatsi, pong Betuel pexanto tatsi, yáwano bapong Betuel arameomonae jintong. Labán Rebeca peweicho tatsi. Bapowa Rebeca, Jacob pena tatsi yawa Esaú pena tatsi.

⁶Esaú yaputane poxonae Jacob paxa wüünae yábara páebatsi, yawa poxonae paxa itoróbatsi Padan-aram nakua beya, xua baxotiya pepitsinexa yábüyo.

Yáwano Esaú yaputane xua Jacob paxa muxujeichi, xua bepa pinae jopa pichi tsane yábüyo, Canaán nakuapiwayo.

⁷Jacob jumekowüntsiya pona Padan-aram nakua beya paxa pemuxujeichixaetsi báyatha, yáwano pena pemuxujeichixaetsi báyatha. ⁸Barichi Esaú yaputane xua paxa tatsi aitafaetabí Canaán nakuapiwaxi. ⁹Daxota, Esaú siwaponae Ismael piamonae tatsi beya, pong báyatha tüpa, pong Abraham pexanto tatsi. Yáwano Esaú perüünakóyoba Ismael pexantiyo tatsi, powa xua kananeamonaewayo aibi, powa pewüng Majalat, powa Nebayot pamcho tatsi. Esaú bapowa pítano, yáwano kaena báyatha xeina ichówabe, kananeamonaewáyobe.

Meje poxonae Nakom Jacob tsita naitüütatsi Betel tómaratha

¹⁰Jacob pía tómarae wewarapiya xua Beerseba tómarae, yawa pona po namto Harán tómarae betaerukuiya. ¹¹Jacob ekopa icháwatha, xua ichaxota maitungkuapeyakireixae, tsipéi xometo báyatha jopeika. Ibótiyo natsibota xua nantabüxü yüütungkuape. Baxota nantabüxü yüütabota yáwano maitungkuano. ¹²Baxota bapong amichinae. Kamaita xua pokotsiwa penonobabeibiyathopaewa, xua íratha ungueika yawa athabé ungueiye peitabókotha. Yáwano Nakom pía matatsunpiwi baxoyo juneibiya yawa juneibika. ¹³Yáwano kamaita xua Nakom, pong Pekanamataxeinaein, asiya ungueiye bápapo penonobabeibiyáewatha. Bapong jeichichi:

—Ápara xang Pekanamataxeinaein, po Nakom jiña amo Abraham pía Nakomüng, yáwano Isaac axa pía Nakomüng. Po íratha ánoxuae maitungkuame, bápapo ira kakatinchi, yáwano bápapo ira jiña nemómoxi susato jiwí katsin. ¹⁴Barapomonae, jiña nemómoxi susato jiwí, bichokono pinmonae tsane, icha táetowa ichi, xua bichokono nawita. Barapomonae pinmonae naexanaponaena ichaxota pokotsiwa beye, barichi tsáneno irü ichaxota pokotsiwa beiche. Yáwano barichi tsáneno ichaxota pokotsiwa xometo wekoina, matáütano barichi tsáneno ichaxota pokotsiwa xometo jopeika. Daxita nakuangpiwi wüünae taexanaein, xamxae yawa jiña nemómoxi susato jíwixae tsane.

¹⁵”Xang kayántatsi, bara bápapo kabebétatsi xua xota ponéibame. Ekeicha bexa kaiberena kaitoroba denaechi po írathe. Jopa kapunaxubi tsainchi, yáitama jopa wetsiño kataunxuae xua báyatha katsiwüünae muxudútatsi.

¹⁶Poxonae Jacob nakosataxuba, poxonae amichinae, jeye:

—¡Ápara bara Nakom, pong Pekanamataxeinaein, xote pópone bekein jopa yaputaeiño!

¹⁷Junuwa bichokono bapong Jacob, yáwano najéi:

—Bápapo ire, Nakom pía ira, yáwano xote Nakom netsipaebika, jei.

¹⁸Icha matakeitha, baya kaemúmbottha, Jacob asiya ungueiye yawa pita po ibótotha báyatha nantabüxü yüütungkuape. Bapong pita bápapo iboto yawa kuaranota. Bapoxonae penasíwatha mata-epataba bápapo iboto xua Nakom petsita-itüütsinéxatsi, xua ápara Nakom wüünae jáintatsi. ¹⁹Jacob bápapo ira wüngduta po wüng xua jei: “Betel”, jei [Hebreo jumetha pojume: “Betel”, jei yábara jei: “Nakom píabo tatsi”, jei] xua ichaxota imoxoyo eka po tómarae kaena báyatha pewüng: “Luz tómarae”, jei [Hebreo jumetha pojume: “Luz”, jei yábara jei: “Almendronaein”, jei.]

²⁰Baxota Jacob éxana xua petsiwüünae muxudutsiwa Nakomtha, jeye:

—Nakom, icha neyántame, yawa nebebétame poxonae wárapang taxuyo beya, yawa icha nekátame paparuwa, yawa penabanaewa, ²¹yawa icha jüntemiya

axaibiya kaewa patopiyaein taxa piabotha, néxata bapoxonae Nakomüm, pong Pekanamataxeinaein, bara ta Nakomüm tsane. ²²Matáütano, ichaxota xua po írathe bárapo ibótoje notang, bárapo ira, xua po íratha wüünae takajainchíwatsi. Yawa daxita xua nekátame, xuya kakatinchi kaewa xua daxita diez xóyobe jíwana.

Meje poxonae Jacob yawa Raquel nakaxínabe

29 ¹Jacob kataunxuae námtotha ekapona, yawa pona pomonaetha, pomonaenae jinompa ichaxota xometo pokotsiwa wekoina. ²Jacob tane wéxotha xua xeina mera müthü. Imoxoyo bárapo mera müthü akoibi po oveja matabü-xúyobe umenathopa, tsipéi bárapo mera müthü apathopa duweimonae. Bárapo mera müthü boupa akatabota pin ibo panáwatha. ³Daxita ovejamonaenae pata bárapo mera müthütha, bapoxonae pomonaenae ovejamonaenae peewatsiwi ibo panawa tapataxuba xua mera müthü boupa akatabota, xua ovejamonaenae peapaenexa mera. Bapoxonae ekeicha barapomonaenae müthü boupa akataba. ⁴Jacob yáíñaba pomonaenae oveja peewatsiwi, jeye:

—Tajiwimonae pam, ¿eta wérena po jiwi pam?

—Ápara Harán tomarapiwi pang, jei barapomonaenae.

⁵Ekeicha Jacob yáíñaba, jeye:

—¿Paxam Labán payaputáneme, pong Nacor pexanto tatsi? jei.

—Aa, bara payaitang, jei barapomonaenae.

⁶Ekeicha Jacob yáíñaba, jeye:

—¿Bara bapong jüntema pópona? jei.

Barapomonaenae jumenota, jeye:

—Aa, bara jüntema pópona. Taema, Raquel dawarena Labán pexantiyo tatsi yawa ovejamonaenae karena, jei pomonaenae oveja peewatsiwi.

⁷Néxata Jacob barái:

—Ápara kataunxuae matakabi, yawa kataunxuae jopa kireyo xua poxonae daxita ovejamonaenae penakaetutsinexa. Ovejamonaenae mera paápare. Yawa pakáponde ovejamonaenae xua pexaenexa naepanaewang.

⁸Barapomonaenae Jacob jume epanótatsi, jeye:

—Jopa pana itaküüpaeyo xua paéxanang. Pata tha abü ewatichi xua kopiya penakaetutsinexa daxita ovejamonaenae, yawa pomonaenae ovejamonaenae peyapukainompaewi xua pataxubina iboto, po iboto xua boupa akatababota xua mera peapatsinexa ovejamonaenae.

⁹Poxonae Jacob kataunxuae barapomonaenae barü kueikueijeji, irü bapoxonae Raquel patopa, yawa ovejamonaenae kapotopa, xua paxa tatsi pía ovejamonaenae tatsi. Barapowa Raquel powa yapu-eneiba bárapo ovejamonaenae. ¹⁰Bapoxonae Jacob Raquel táebatsi, yawa Jacob tane ovejamonaenae xua paxuyo tatsi pía ovejamonaenae tatsi, pong pewüng Labán, xua pena tatsi peweicho tatsi. Jacob pona yawa boupa saranaxuba mera müthü boupa. Bapoxonae ápata mera ovejamonaenae, xua Labán pía ovejamonaenae tatsi.

¹¹Bapoxonae Jacob Raquel jakóbatsi, yawa tsutsúbatsi, yawa wekoyéi Jacob.

¹²Poxonae Jacob nayopita xua jei: “Ápara Rebeca pexantong”, jei, yawa xua jei: “Ápara Labán perobin tatsin”, jei, Raquel paxa bekuinaeya, paxa tsipaeba.

¹³Poxonae Labán jumetaeba baxua, xua Jacob paeba, xua bapong Jacob Labán perobi, xua pamcho tatsi pexanto tatsi, bapoxonae Labán bara bekuinaeya xua

pejakobinéxatsi Jacob. Yawa namaxükateita wáetabatsi, yawa jakobiya tsutsuabatsino. Bapoxonae Labán píabo beya kápona. Baxotiya, Labán piabotha tatsi, Jacob diwesi yábara paeba xua daxita piamonae tatsi. ¹⁴Labán Jacob baraichi, jeye:

—Metha moya bara xam kaein jíwanam xua yatsikaya pomonae kae jiwimonae pang.

Jacob barü ékatsi Labán, kae xometo.

Meje yábara xua Jacob Lea nakóyobatsi, yawa Raquel nakóyobatsi

¹⁵Bapoxonae pírapae, Labán Jacob baraichi, jeye:

—Jopa amanaya inta nakuichim tsane saya, yáitama tarobim. Jame netsipáebare, ¿eta xóyobe ichichípame xua pentoma takakatsiwa tsainchi?

¹⁶Labán aiña po pexantíyobe tatsi, matapiwa pewüing Lea irü xuiyapiwa pewüing Raquel. ¹⁷Lea saya aitarara. Raquel nama pexeiñowa bichokono. ¹⁸Jacob ichichipa bichokono Raquel. Jacob jumenotsiya namchi:

—Metha moya Raquel, powa xuiyapiwa, metha barapówaxae tsane kata nakui-tsинchi siete po weibe, jei.

¹⁹Labán jumenota, jeye:

—Ichichipang xua xéiname bapowa. Aichaxaibin xua bapowa dobin pitinchi. Metha moya daichi, kakatinchi barapowa. Kabarü ekaeinchi. Tabotha ékare. Jopa warapaem tsane.

²⁰Bara Jacob yábara nakuita Raquel siete po weibe. Íchitha bapong jopa nantaxeinaeyo xua taayapubetsi, xua yábara nakuita aiña wei bapowa, poxoru bichokono Raquel antobetsi. ²¹Poxonae siete po weibe weta, Jacob paxuyo barái, jeye:

—Nekare nexantiyo tapichinexa bapowa, tsipéi báyatha wei aibi, po weitha báyatha natsiwüüinae muxudutang xua barapowa tayábara nakuichiwa tsane, jei.

²²Bapoxonae Labán daxita waba pomonae pekuariya peta-enaewichi, xua fiesta pesiwaponaenexa, xua Labán éxana, xua Jacob píowa pepichixae. ²³Íchitha mérawi, Labán Lea paxa wábatsi, yawa paxa kapoinchi Jacob beya. Jacob bapowa barü maitungkua. ²⁴Yawa Labán amanaya kata, xua Lea paxa kátatsi, xua kaewayo jíwana powaxi petanakuichiwaxichi, xua barapowayo Lea petanakui-chinexa tsainchi. Bapowa pewüing Zilpa. ²⁵Bapoxonae baya, Jacob yaputane xua barü maitungkua Lea. Bapoxonae Jacob jumedangweya wawái, Labán beya jeye:

—¿Eta pokotsiwa inta baxua éxaname? ¿Bara ápara Raquel jopa yábara nakui-chiñora? ¿Eta pokotsiwa metha nemuxuitórobame xua ichowayo nekátame?

²⁶Labán jumenota, jeye:

—Xote patakuí paxeinang xua kataunxae jopa nakoyobiyo xuiyapiwa, xua matapiwa punarúkuatsi. ²⁷Were siete po matakábinbe, xua fiesta matakabin, xua Lea jiña nepichixae. Néxata, yawa bapoxonae Raquel kakatinchi icha ekeicha inta nakuichíname icha siete po weibe.

²⁸Jacob jumebarü jejéi. Poxonae bárapo siete matakábinbe weta, xua poxonae Jacob pita Lea, bapoxonae Labán Raquel Jacob kátatsi, Labán pexantiyo kaenaeta, xua Jacob píowa nexa. ²⁹Labán yawa kata, Raquel kátatsi, kaewayo jíwana powaxi Labán petanakuichiwaxichi, xua barapowayo Raquel petanakuichinexa tsainchi. Barapowayo pewüing Bilha. ³⁰Yawa Jacob Raquel beya imoxoyo nakakuikuínabe. Yawa Jacob bichokono bapowa ántobe beyakaincha xua poxonae Lea antobetsi. Jacob ekeicha yábara tanakuita icha siete po weibe Labán xua Raquel yábara nakuítatsi.

Meje yábara Jacob pía pexui tatsi

³¹Poxonae Nakom tane xua Jacob jopa tsita wüünaetsi Lea, bapoxonae Nakom bara kópata xua Lea pexui xeinaena. Íchitha Raqueltha jopa daichichi.

³²Lea pexuyo búpana taékatsi. Kotakaya tanakatsíwatsi pebinwüüto, bapong pewüing Rubén. [Hebreo jumetha po wüing: “Rubén”, jei yábara jei: “Bapong tane”, jei.] Barapowa jeye: “Nakom netane xua wekoyang. Pebinwüütoxae daxota taseuri neántobe tsane”, jei Lea.

³³Ekeicha Lea icha pebinwüüto tanakatsíwatsi, bapong pewüing Simeón. [Hebreo jumetha po wüing: “Simeón”, jei yábara jei: “Jumetane”, jei.] Ekeicha Lea namchi, jeye: “Nakom nejumetane xua xang jopa tsita wüünaeíño Jacob, daxota Nakom icha pebinwüüto nekata”, jei.

³⁴Ekeicha icha pebinwüüto Lea tanakatsíwatsi, bapong pewüing Leví. [Hebreo jumetha po wüing: “Leví”, jei yábara jei: “Imoxoyo barü pona”, jei.] Barapowa jeye: “Ánoxuae tapebin imoxoyo nebarü ponaena, tsipéi báyatha tsita itakatang akoibi po pebinwüüto”, jei.

³⁵Kataunxuae ekeicha Lea icha pebinwüüto tanakatsíwatsi, bapong pewüing Judá. [Hebreo jumetha po wüing: “Judá”, jei yábara jei: “Wüünae jainta”, jei.] Bapowa jeye: “Ánoxuae Nakom wüünae jaintang”, jei. Bapoxonae ekeicha Lea jopa xeinaeyo pexui.

30 ¹Poxonae Raquel tane xua pexui jopa Jacob itakataetsi, bapoxonae Lea úwatsi. Raquel namchi Jacob beya, jeye:

—¡Inta éxande pexui! ¡Icha jopa inta exanaem tsane, tha tüpaetsi! jei bapowa.

²Íchitha Jacob kaseba bapówatha yawa jei:

—¿Metha bara xang Nakomüing? Ápara bapong Nakom kaéxana xua jopa xeinaem pexui.

³Néxata Raquel Jacob baráichichi:

—Taema, powa inta nakuita, bapowa Bilha pire, yawa bapowa imoxoyo kakuita ponde. Poxonae bapowa pexui xeinaena, be natsikotaein xua xang ápara katsita pabétatsi. Daxota bapoxonae pexui xeinaein.

⁴Daxota Raquel, powa pía petanakuichixaetsi, bapowa Jacob kátatsi powa pewüing Bilha, xua bapowa Jacob be píowa peexanaenexa. Bara Jacob bapowa pita. ⁵Bapoxonae bapowa Jacob pexuyo itakatainchi, pebinwüüto. ⁶Bapoxonae Raquel namchiya jeye: “Nakom nejumetane poxonae wüükang. Daxota Nakom inta xaiñeya éxana tsipéi nekata pebinwüüto”, jei. Daxota bárapo pebinwüüto wüing ununútatsi po wüing: “Dan”, jei. [Hebreo jumetha po wüing: “Dan”, jei, tsiwiyo jumejúpa pojume: “Xaiñeya éxana”, jei.]

⁷Bapoxonae ekeicha Bilha Jacob itakatainchi icha pebinwüüto. ⁸Raquel namchiya jeye: “Bekein tantapiyo báyatha bichokono pananabangbe, dáichitha jumequí amanáyabang”, jei. Daxota bárapo pebinwüüto wüing ununútatsi po wüing: “Neftalí”, jei. [Hebreo jumetha po wüing: “Neftalí”, jei yábara jei: “Bichokono pananabangbe”, jei.]

⁹Poxonae Lea yaputane xua ekeicha nama pexui juntukuru xeina aibi, bapoxonae bapowa waba powa pía petanakuichixaetsi, powa pewüing Zilpa. Yawa bapowa Jacob kátatsi, Lea kata, xua Jacob be píowa peexanaenexa tsane.

¹⁰Bapoxonae bapowa Zilpa pexuyo, pebinwüüto, Jacob itakatainchi. ¹¹Lea namchiya jei: “¡Maisha pinmonae xeinang!” Daxota bárapo pebinwüüto wüing ununútatsi po wüing: “Gad”, jei. [Hebreo jumetha po wüing: “Gad”, jei yábara jei: “Pinmonae xeina”, jei.]

¹²Bapoxonae ekeicha Zilpa icha pebinwüüto Jacob itakatainchi. ¹³Bapoxonae ekeicha Lea namchiya jeye: “¡Maisha ünthüthüweiweinang! Daxota ánoxuae yábüxi neyábara paebina xua xang ünthüthüweiweinang”. Daxota bárapo pebinwüüto wüing ununútatsi po wüing: “Aser”, jei. [Hebreo jumetha po wüing: “Aser”, jei yábara jei: “Ünthüthüweiweina”, jei.]

¹⁴Kaentakeitha Rubén pábitha pona poxonae trigoxú naweta. Baxota Rubén pábitha taeba pekueito, po kueito Rubén pena takapona, powa pewüing Lea. Poxonae Raquel tane bárapo kueito, jeye Lea beya:

—Taema, icha mandrágorakuei nekatsíbare, po kuitong nexanto kata kapatopa. [Hebreomonae yábara jumekowüinta xua bárapo kuei yawena xua petsiríwaxi pexeinaewa pexui.]

¹⁵Bapowa jumenota, jeye:

—¡Jopa katsita aiñakuiyo xua poxonae bara kaeto nekáíbame tapebin! ¡Ánoxuae barichi juntukuru nekáíbame taxanto pía mandrágorakuei!

Raquel jumenota, jeye:

—Icha nexanto pía mandrágorakuei nekatsíname, ánoxuae mérawi Jacob kaishamaitungkuaena.

¹⁶Merawitha, poxonae Jacob pabi wenawirena, Lea matenta jopa xua pejakobinexa, yawa jei:

—Ánoxuae mérawi nebarü maitúngkuare, tsipéi býatha nakuimatómatang pekueitha, xua mandragorakueitha, po kuei taxanto inta bekein kapatopa.

Bárapo mérawi Jacob Lea ishamaitékatsi. ¹⁷Ekeicha Lea Jacob itakatainchi icha pebinwüüto tsipéi býatha Nakom jumetane xua býatha Lea wüüka bapongtha.

¹⁸Néxata Lea namchiya jeye: “Nakom nekata tamatoma tsipéi powa inta tapenakuichixae, bapowa taseuri katang”, jei. Daxota bárapo pebinwüüto wüing ununútatsi po wüing: “Isacar”, jei. [Hebreo jumetha bárapo wüing: “Isacar”, jei, tsiwiyo jumejúpa pojume: “Tantoma”, jei.]

¹⁹Bapoxonae ekeicha Lea Jacob icha pebinwüüto itakatainchi, xua daxota ánoxuae daxita seis pongbe xeina. ²⁰Lea ekeicha namchi: “Maisha Nakom xua amanaya nekata wüünae nawita. Ánoxuae taseuri tsita wüünaein, tsipéi bapong itakatang seis pongbe, xua pebiwiwüütixi, xua taxantoxi”, jei. Bárapo pebinwüüto wüing ununútatsi po wüing: “Zabulón”, jei. [Hebreo jumetha po wüing: “Zabulón”, jei, tsiwiyo jumejúpa pojume: “Amanaya pekatsiwa”, jei yawa “Tsita wüünaetsi”, jei.] ²¹Matapaiña Lea pexuyo xeina xua yábüyo, bapowa pewüing Dina.

²²Íchitha Nakom Raquel yábara kuinantanaxéinatsi. Yawa Nakom Raquel jumeta inchi xua bapowa wüüka bapongtha. Bapoxonae Nakom takópata xua Raquel xeinaena pexui. ²³Poxonae pong Raquel kopiya tanakatsíwatsi, jeye Raquel: “Nakom neurakapanepa xua kataunxae poxonae pexui jopa xeinaeíño. ²⁴Metha moya ichiyo nekatsina”, jei. Daxota bárapo pebinwüüto wüing ununútatsi po wüing: “José”, jei. [Hebreo jumetha po wüing: “José”, jei, tsiwiyo jumejúpa pojume: “Kata ekeicha”, jei.]

Meje yábara xua Jacob kopei pexeinaein náexana Labán piabotha tatsi

²⁵Bapoxonae pírapae, poxonae Raquel pabeta pexuyo, pong pewüing José, bapoxonae Jacob Labán baraichiya jeichi:

—Bara nepukópare xua taponenexa barompaya taira beya. ²⁶Tapexui neka-tsíbare yawa petsiriwáxino nekatsíbare tsipéi barapówaxi yábara nakuitang xua xam kata nakuítatsi. Bara nepukópare. Bara beta nekuiyaputáneme xua xang dangweya kata nakuítatsi báyatha.

²⁷Íchitha Labán jumenota, jeye:

—Taema, abü ékare taxantha. Tsipéi yaputang xua Nakom inta wüünae éxana jiña neekaexae xote. ²⁸Netsipáebare ¿eta xóyobe jiña newüükaetsi? Néxata baxua matoma kakatsinchi.

²⁹Néxata Jacob jumenota, jeye:

—Báyatha xam beta nekuiyaputáneme xua kata nakuitéibatsi yawa xua jiña duweimonae kata yapu-eeníbatsi. ³⁰Tsipéi poxonae kataunxuae jopa patopaeíño, be kónotha xéiname. Íchitha ánoxuae nama bichokono ekeicha nawita xéiname. Bara kaena poxonae aena patopang, Nakom kayawena nawita, pong Pekanamataxeinaein. Dáichitha ¿eta poxonae metha tawa tamrópata pitabokuaein xua tawa nakuitang, xua tapexui nexa?

³¹Labán yáíñaba, jeye:

—¿Eta xóyobe pentoma ichichípame xua kakatinchi?

Jacob jumenota, jeye:

—Jopa pentoma nekatinde. Ekeicha jiña ovejamonae kata yapu-eenaeinchi, icha baxua inta éxaname xua meje: ³²Ánoxuae nepukópare xua daxita jiña duweimonaetha xua tatsabinexa ovejaxi, petsaebiyaxi, yawa po ovejaxi xua yakikíbiya, yawa paromang, yawa barichino daxita cábraxi xua yakikíbiya, yawa paromang. Po duwéi, pomonaein xua seikaya nekatsibíname bexa, xua ápara be tana nematomatsiwam.

³³”Barapoxonae pírapae, poxonae táename po duwein xua xeinaein, bapoxonae yaputáename icha kakáibatsi, yawa ichikuihitha xua icha xaiñeya páebang. Po duweimonaeyakikíbiya ápara taduweimonaey. Icha inta táename taduweimonaey xua xei-nang, po cabrang xua tsaebia, xua jopa yakikibiyaeyo yawa jopa paromangyo, yawa po ovejang xua íñapana xua jopa tsaebiyaeyo, bapoxonae yaputáename xua bárapo duweimonaey ápara jiña duweimonaey poxoru kakáibatsi. Icha jopa baxua daichiyo, bapoxonae yaputáename xua jopa ápara kakaibichi, xua ápara xaiñeya kata éxanatsi.

³⁴Néxata Labán jumenota, jeye:

—Bara wüünae, yábara jumekowüntang xua netsipáebame.

³⁵Bapoxonae kaena Labán daxita pebtong tsaba, xua cabrang, poxi yakikíbiya yawa poxi paromang. Yawa tsaba cabrang pesowabi, poxi yakikíbiya, yawa poxi paromang, yawa daxitang xua naíñapana kaka. Yáwano tsaba oveja pebtong, petsaebiyaxi. Bapoxonae Labán pía pexantongtha wekobenata xua petayapu kainompaenexa tsainchi.

³⁶Bapoxonae Labán pona akoibi po matakábibe, xua námtotha pona, xua ichaxota weya po íratha Jacob pópona. Bapoxonae írürü Jacob icha duweimonaey yapukapópona, Labán pía duweimonaey tatsi, po cabrangmonae xua tsaebia, yawa po ovejamonae xua pemáíñawa.

³⁷Jacob naein maxüranaein ukuboba xua aisha, xua alamonaein, yawa almendronaein, yawa kastañonaein. Bapoxonae bárapo naewang yatapaincha tsebokokasiba xua petaenexa xua yaninijeji xua yatapaincha ñnapana. Baxua Jacob éxana xua Nakom peyawenaexae. ³⁸Bapoxonae Jacob noba naewang xua býatha yatapaincha kasiba, duweimonae peitabaratha, ichaxota pata peapanexa mera. ³⁹Baraxota cabra pebtong itoisha éxana xua pesowatong. Tspíei báraxua éxana imoxoyo naewang, daxota peweinxi yakikíbiya tsenae yawa paromang tsenae poxonae náexana.

⁴⁰Bapoxonae Jacob ovejang pesowatong, peweinxi wetsaba, yawa bárapo pesowatong kápona ichaxota Labán pía ovejang, po ovejang xua yakikíbiya yawa tsabia. Daxota Jacob pía duweimonae pin duweimonae éxana, xua pía duweimonae. Yawa tsaba pía duweimonae, xua Labán pía duweimonae weya.

⁴¹Daxita koyene tsaibi, poxonae po duweimonae bichokono nasita itoisha éxana xua peweinxi pexeinaenexa, bapoxonae Jacob noba naewang ichaxota mera peapaenexa. Bapoxonae duweimonae tane naewang poxonae itoisha éxana. ⁴²Íchitha poxonae pata duweimonae xua jiopa, jopa nobiyo naewang. Daxota po duweimonae bichokono jiopa, xua po duwein jiopa weya naexanuménapona, bárapo duweimonae Labán pía duweimonae tatsi. Yawa po duweimonae bichokono nasita, xua po duwein nasita weya naexanuménapona, bárapo duweimonae Jacob pía duweimonae tatsi.

⁴³Daxota Jacob náexana pong kopei pexeinaein bichokono. Bapong xeina nawita ovejang, yawa pomonae amanaya petanakuichiwichi xua pebiwi yawa yábüxi, yawa camellong, yawa burrong.

Meje poxonae Jacob namicha wárapa Canaán nakua beya

31 ¹Jacob yaputane xua Labán pía pexui tatsi jinompaeya namchi: “Jacob daxita býatha nota xua waxa piyawang tatsi. Daxota ánoxuae kopei pexeinaein náexana”. ²Yawa Jacob yaputane xua Labán Jacob jopa beta taetsi, icha be jopa kopiya ichiyo. ³Íchitha Nakom, pong Pekanamataxeinaein, bapong Jacob baráichichi:

—Kaibe nawíyama axa pía ira beya, ichaxota jiñamonae jinompa, yawa xang Nakomüng kayantinchi.

⁴Jacob najumekaruta xua petawabinexa tsainchi Raquel yáwano Lea xua petadenaenexa tsáinchibe ichaxota Jacob ovejamonae yapukapópona. ⁵Yawa Jacob barái barapowáyobetha, jeye:

—Yaputang xua paiña axa nama ekeicha xua inta éxana aibi nama ánoxuae jopa peraichiwa icha jopa be kopiya ichiyo. Íchitha taxa pía Nakom tatsi neyantapoponeiba. ⁶Býatha paxambe payaputánemebe xua paiña axa xaniwaicha beta tanakuitang. ⁷Dáichitha bapong nemuxuitóroba. Yawa diez pokoyénebe jopa xaniwaicha nentoma katsibeibiyo. Seikaya, nama Nakom jopa taxuyo kopatichi xua taxuyo abe tanaexanaewa tsane. ⁸Jame nama icha bapong jei tsipae: ‘Pentoma kakatinchi, kakatsibinchi duwéi, poxi paromang pesowabi’, jei tsipae, néxata pesowabi nebotaponáetsipa, poxi paromang pesowábixi. Yawa icha jei tsipae: ‘Pentoma kakatinchi, kakatsibinchi duwéi, poxi penayakikibiyaxi’, jei tsipae, néxata pesowabi nebotaponáetsipa, penayakikibiyaxi pesowábixi. ⁹Tspíei paiña axa jopa nekatsiyo pentoma, daxota Nakom nota xua paiña axa pía duweimonae tatsi, xua tana nekatsibinexa.

¹⁰”Kaentakábitha, poxonae duweimonae yapukapóponang, amichinaein. Pesowabi pejana xeina. Kamaitang xua pebtong xua nayawainta pesowábitha, bárapo pebtong penayakikibiwang yawa paromang. Yawa tangno xua peweinxi paromang tsenae yawa penayakikibiyaxi tsenae poxonae náexana.

¹¹”Bárapo michinaebotha Nakom pía matatsunpin tatsi newaba tawüingtha, ‘Jacob’, jei. Jangje: ‘Xote úngkuangje’, jang. ¹²Matatsunpin nejéi: ‘Beta yaputaema, yawa nekotsíname daxita pebtong xua pesowábitha pona, baxua daxita penayakikibiwang yawa paromang, poxoru yaputang daxita xua báyatha Labán kata éxana. ¹³Xang ápara Nakomüing, po Nakomüing báyatha katsita naitúütatsi Betel tómaratha, xua kain baxotiya iboto mataépatame penasiwa mératha yáwano xua natsiwüüinae muxudútame: ¡Póinchibe! Nontaponde, po ira weye wárapare. Kaibe nawíyama jiña ira beya ichaxota báyatha nakatsíwame’, nejéi, jei Jacob.

¹⁴Néxata Raquel yawa Lea, bapowáyobe Jacob jumenótatsibe, jeibe:

—Paxang jopa paxeinaeiño pata taxa piabotha xua pokotsiwa pata taxa pata nejúntüna jebiwa. ¹⁵Nama bapong pana natsikotane be paxang ichamonaen pang. Bapong pana nekaenaeta xamtha. Yawa éxana xua pin pentoma kátame, xua pana nenakoyobinexam tsane. ¹⁶Baxua xaniwaicha, daxita xua pata taxa piyawang xua Nakom tanota, baxua patawa yawa pata pexuí piyawang tatsi. Daxota xam éxande daxita pokotsiwa xua Nakom báyatha katsipaeba, jeibe.

¹⁷⁻¹⁸Bapoxonaen Jacob xaxaintaxuba xua kaibe pewarapiyaenexa Canaán nakua beya ichaxota paxa tatsi pópona, pong pewüing Isaac. Jacob pía pexuí kuarebika caméllongtha yáwano piowayobe kuaretsikabe caméllongtha. Bapoxonaen yawa nota daxita xua xuang xeina yawa daxita námtotha kápona duweimonaen, xua báyatha bárapo duweimonaetha busikuimatómakatsi Padan-aram íratha.

¹⁹Poxonaen Labán icháwatha pona xua pía nasibichi ovejang, Raquel paxa kaiba ibo nakomüing, xua paxa tatsi xeina botha. ²⁰Baxua báyatha Jacob éxana poxonaen namicha wárapa, xua Labán jopa napeyabichi, pong arameomonaepin.

Meje poxonaen Labán Jacob pubarapoinchi

²¹Jacob daxita kanaetsiriwa xua xeina. Kaena naiña Eufrates mene, mene xenta iya. Yawa bichoina pona Galaad demuxuwang beya. ²²Poxonaen akoibibe po matakábibe weta, Labán tsipáebatsi xua Jacob namicha wárapa. ²³Néxata Labán piamonaen yánabatsi xua Jacob pepubarainaenexa tsainchi. Siete po matakabibetha Jacob pukaxínatsi Galaad demuxúwangtha. ²⁴Íchitha bárapo merawitha Nakom Labán tsita naitúütatsi, pong arameomonaepin, xua amichinaen éxanatsi. Nakom michinaebotha Labán jeichichi: “Jumetaema, jopa Jacob jumedangweya tsipaebinde”, jei.

²⁵Labán Jacob putaepoinchi Galaad demuxúwangtha ichaxota báyatha Jacob naebopa. Baxota irü Labán piamonaen barü naebopa.

Meje yábara xua Jacob irü Labán ekeicha naitakoxónebe

²⁶Yawa Labán Jacob beya jeye:

—¿Eta xua éxaname? ¿Eta pokotsiwa metha nemuxuitórobame? ¡Taxantíyobe namicha inta kapóname, be tsikotanemebe xua barapowáyobe be powáyobe xua wáetabamebe xua poxonaen be naba éxaname! ²⁷¿Eta xua metha namichiya wárapame? ¿Eta xua metha taxantíyobe inta matsiyátamebe, matáütano jopa

netsipaebim xua wárapame? Icha yaputaetsipang xua póname, kapubájajei tsi-paetsi jüntema, yawa xua tangbaba katsipu exanaetsípatsi xua pin pexáewano katsipu exanaetsípatsi. ²⁸Yawa jopa nekopatsim xua taxantíyobe tsutsubang yawa tamomoxitha. Ápara saya be pong kantsiyaiba.

²⁹”Neitaküüpa xua abe pákata exanaeinchi, íchitha mérawi axa pía Nakom tatsi nebarái nejéi: ‘Nejumetaema. Jopa Jacob dangweya tsipaebinde’, nejéi Nakom. ³⁰Icha ichípame xua kaibe warapíyame axa piabotha tatsi ζeta xua metha nekáibame taíbo nakomüng?

³¹Néxata Jacob Labán jumenótatsi, jeye:

—Ápara yáitama junuwang. Mexeya ítara nexantíyobe kaewa dangweya pita-mawejang. ³²Icha ichamonae jíwana, pomonae xote ene, icha barapomonae xeina jiña ibo nakomüng, bewa tüpaena. Wámonae naka tane xua xaniyang páebang. Netsipáebare icha xeinang jiñawang, yawa moya pire xua jiña ibo nakomüng, jei.

Íchitha Jacob jopa yaputaeyo xua báyatha Raquel paxa kaiba ibo nakomüng. ³³Labán joniya Jacob pía duweibokong bómüxü tatsi. Ekeicha joniya Lea pía duweibokong bómüxü tatsi. Yawa joniya Lea yawa Raquel pía petanakuichiwáyobe tatsi pía duweibokong bómüxü tatsi, íchitha jopa taeyo ibo nakom. Poxonae Lea pía duweibokong bómüxü wejoniya Raquel pía duweibokong bómüxü tatsi beta-joníyatsi. ³⁴Barapowa Raquel, báyatha pita pía ibo nakomüng, yawa bota büxüpánatha wétsina xua petsijuma ekeikáewatha camélllotha. Bapoxonae baxota ekeika xua küneka. Labán matowa jeita dukuanaebiya daxita matapaecha duweibokong bómüxü, íchitha jopa taebiyo. ³⁵Raquel Labán baraichi:

—Axa jopa nekasebinde xua jopa asiya taungkuaexae neitabáratha, yáitama nantawang.

Áwiya Labán jeitapona pía ibo nakomüng bárapo duweibokong bómüxü, íchitha jopa taebiyo.

³⁶Jacob Labán kasébatsi, yawa jumedangweya jeye:

—¿Eta po peabe koyenewa éxanang xua daxota nebarapóname poxoru bichokono nekasébame? ³⁷Daxita inta tawang táneme, íchitha, ζeta xuara táneme xua jiña botha kata pítatsi? Xote ere pokotsiwa xua táebame xua jiñamonae peitabaratha yawa xua tamonae peitabarathano, xua barapomonae wanaka yábara paebinexa pokoyene jintam metha abe éxana. ¿Metha xam jampa? ¿Ichikuitha xang metha jampa?

³⁸”Bárapo veinte po weibetha xua kata nakuítatsi jiña ovejang yawa jiña cabrang, jopa peweinxi naxuba exanaeiño xua daxota jopa yayapaeyo. Jopa bápana xaeiño kae oveja xua pebto xua jiña ovejang jíwana. Bara beta eéngang. ³⁹Yáwano bápana jopa kata kapaneibichi duweixi, poxi xainwabasinéibatsi unupiwi, xua bárapo unupiwi xainwabasineiba. Baxuang daxita pentoma kakatsibéibatsi xua penapuxanebiwa. Icha duweixi notéibatsi matakaitha icha jopa tsipae mérawi tsipae, metha moya pentoma newüükeibichípame.

⁴⁰”Matakaitha muxu tatüpeibi xua átsaxae, mérawi muxu taakexae tatüpeibi. Jopa maiteibiño mérawi tsipéi kata nakuitéibatsi. ⁴¹Veinte po weibe jiña botha póponang. Ápara baxua yábara tanakuitang xua jiña aiña nexantíyobe xua catorce po weibe. Po duweimonae xua nekátame, kata nakuítatsi seis po weibe. Yawa diez pokoyénebe jopa xapain nentoma katsibeibim.

⁴²”Nakom, po Nakom tamo Abraham pía Nakom tatsi, xua irü po Nakom taxa Isaac pía Nakom tatsi, po Nakom wüünae jainteiba, bapong neyanta. Icha bapong

jopa neyantsi tsipae, metha báyatha nekobesa itorobíchipame. Íchitha Nakom netane xua aperüütanein yawa xua antamobin, bekein dangwéi kata nakuítatsi. Daxota mérawi bárapo Nakom kamuxuweta xua xang yábara.

⁴³Néxata Labán Jacob jumenótatsi, jeye:

—Barapowáyobe bara taxantíyobe. Yawa barapoxi bara tamómoxi yawa ovejamonaē bara taovejamonaē; daxita xua tanemeno ápara tawang. Seikaya nama, jopa abe exanaein tsane taxantiyobetha yawa pía pexuitha tatsi, xua poxi barapowáyobe báyatha xéinabe. ⁴⁴Daxota taema, xang irü xam nantiya nata yábara tsiwüünae muxudutsínchibe. Baxua be waxáinchibe wakoutha tsita itapeiñaxeinatsibe pokoyene xua xaniwaicha exanáeinchibe xua páebatsibe. ⁴⁵Néxata Jacob pita iboto. Yawa bárapo iboto asiya nota xua peyábara nantaxeinaewanéxabe pía penatsiwüünae muxudutsíwabe. ⁴⁶Jacob barái piamonaē, jeye:

—¡Pakáponde icha ibótong!

Daxita barapomonaē ibótong kápona xua penantatsunjebinexa beya bichokono tajü matakoronungkuiya. Yawa baxota barapomonaē xane xua ichaxota bárapo ibo matakoronungkua. ⁴⁷Labán baxua wüngduta pijumetha jeye: “Yegar-sahaduta”. Yawa Jacob pijumeya wüng baxua jeye: “Galed”, jei. [Arameo jumetha pojume: “Yegar-sahaduta”, jei, bárapo jume yábara paeba xua jeye: “Xaiñeya penanayábara diwesi paebiwa xua pematakoronungkuaewa”, jei.] ⁴⁸Labán néxata namchi:

—Ánoxuae, bárapo iboto xua matakoronungkua, bara yatsikaewa tsita itapeiñaxeina xua nantiya nata yábara tsiwüünae muxudutatsibe.

Daxota baxua wüngduta po wüng: “Galed”, jei. [Hebreo jumetha pojume: “Galed”, jei, yábara jei: “Xaiñeya penanayábara diwesi paebiwa xua pematakoronungkuaewa”, jei.] ⁴⁹Yáwano wüngdútano po wüng xua jei: “Mizpa”, jei. [Hebreo jumetha pojume: “Mizpa”, jei, yábara jei: “Nakom wanaka eenáe matakoronungkuaewa” jei.] Tspíei Labán jeye:

—Bara Nakom, pong Pekanamataxeinaein, ka-eena xaniwaicha, yáwano ne-énano xaniwaicha poxonaē bara jopa nama ekeicha natáe tsáinchibe. ⁵⁰Icha abe éxaname taxantiyobetha, bara Nakom katane. Matáütano icha yábüxi nótime, bara bekein ichamonaē jopa kataeyo penetsipaebinxá, ápara bara Nakom yatsikaewa naka kuitánebe, jei.

⁵¹Kame kataunxuae Labán Jacob barü kueikueijeichi, jeye:

—Taema, xua baxota úngkuabe po ibótong xua pematakoronungkuaewa, yawa po iboto xua báyatha asiya notang, yábara nantanaxéinatsi naka éxana pokoyene xua nantiya yábara nata tsiwüünae muxudutatsibe. ⁵²Pematakoronungkuaewa xua ibótong, yawa po iboto xua asiya notang, bárapo aiña koyénebe tsita itapeiñaxeinatsibe xua jopa jiña muxunene beya po naein tsane, xua irü jopa tamuxunene béreka ponaem tsane, xua jopa abe wanata exanaewa tsáinchibe.

⁵³”Bárabü Nakom, po Nakom amo Abraham pía Nakom tatsi, yáwano xua irü bárapo Nakom tamo Nacor pía Nakom tatsi, yáwano waámo susatopin, pong Taré, pía Nakom tatsi, bárabü bapong naka yawena xua nayábara jumewetsiya exanáeinchibe, xua báyatha nantiya nata yábara tsiwüünae muxudutatsibe.

Néxata Jacob Nakom peitabaratha tsiwüünae muxuduta xua exanaena xua Labán namchi, po Nakom Jacob paxa tatsi, Isaac, wüünae jainteiba. ⁵⁴Bapoxonaē Jacob demuxúwatha duwein tauta xua petúxusi exanaenexa Nakomtha. Yawa piamonaē waba xua pexaenexa. Daxita barapomonaē nábane yawa merawitha

jinompa demuxúwatha. ⁵⁵Icha matakábitha, baya kaemúmbbotha, Labán asiya unguwa, yawa pemómoxi tsutsuba yawa pexantiyo tsutsúbabe. Bapoxónaeno weya-taeya yábara paeba barapomonae xua Nakom beta exanaena barapomonaetha, yawa bapoxonae kaibe náwiya pía ira beya.

**Meje poxonae Jacob junuwa xua péntapin
pekaxinaewa tsane, pong Esaú**

32 ¹Jacob námtotha ekaona, yawa Nakom pía matatsunpiwi tatsi Jacob tsita naitúütatsi. ²Poxonae Jacob taeba matatsunpiwi, Jacob jeye:

—Ápara bárapo bicheito Nakom pía bicheito tatsi.

Poxoru bárapo bicheito Jacob pía bicheito yántatsi, daxota bárapo ira wüing ununuta po wüing jei: “Majanaim”, jei. [Hebreomonae jumetha po wüing: “Majanaim”, jei yábara jei: “Aíña bichéitobe”, jei.] ³Jacob ichamonae najumekaitoroba Seír ira beya, xua po ira Edom nákuatha eka, xua petawüünae muxutsipaebine-xa tsainchi xua Jacob peweicho tsita patopaena, pongxae Esaú. ⁴Jacob jeye xua penajumekaitorobiwa:

—Jande taewéichotha Esaú: ‘Jacob eweicho nakuiwüünaeta’. Yawa kajéi: ‘Xang kaena báyatha Labantha napóponang aíña wei beya ánoxuae. ⁵Yawa xeinang vacang, búrronno, ovéjangno, tana neyawenaewino, tana neyawenaewaxino, yawa ichichipang xua tana nententa weyataeya wabiwam tsane’, kajéi, jande jei, jei Jacob xua najumekaruta.

⁶Pomonae penajumekaitorobíwichi, poxonae barapomonae kaibe nawibiya, Jacob jeichichi:

—Esaú eweicho báyatha patang. Báyatha bapong dawarena nekajakobinexa. Bapong yánabatsi 400 pebiwi.

⁷Poxonae Jacob baxua jumetaeba, bichokono junuwa, nabenaeka nawita. Bapoxonae piamonae tsaba, xua aíña bichéitobe éxana, pomonae pebarü ekaexae. Yáwano ovejang tsaba, yawa vacang tsaba, yawa camellong tsaba. ⁸Jacob nantaxeina xua icha Esaú kae bicheito abe exanaena yawa icha takuaintinchi, metha icha bicheito panenebiyaena. ⁹Bapoxonae Jacob Nakomtha wüüka, jeye:

—Nakom, pom Pekanamataxeinaein, pong Nakom tamo Abraham pía Nakom tatsim, yawa xua irü taxa Isaac pía Nakom tatsim. Kaena báyatha netsipáebame xua jam: ‘Jiña ira beya kaibe nawíyama xua jiñamonae béyano, yawa beta kayawenaeinchi xua bara beta xaniwaicha ponáename’, nejam. ¹⁰Maisha bichokono aurang xua dakotsiwa inta wüünae éxaname, xua poxonae ichichípame, xua poxonae bekein abe taexanáewatha. Daxita tsitekaeya wüünaeya éxaname xua páebame. Kaena báyatha bárapo Jordán ménetha ponang poxonae kataunxuae jopa xinaeíño kopei. Saya naeto káponang. Jame ánoxuae aíña pin bichéitobe xeinang.

¹¹”Taema, nekapanépare taeweicho wérena, Esaú. Maisha junuwang xua tana nekuainchiwa tsane, xua yábüxi jutebinchi, yawa xua pexui jutebinchi. ¹²Kaena báyatha xaniwaicha beta netsipáebame xua beta warapaein. Yawa netsipáebame xua tamómoxi susato jiwi pinmonae tsane icha be táetowa pürütixi ichi, xua nawita, xua pin mene itapatha bobena, pokotsiwa xua bichokono nawita, xua pokotsiwa jopa bewa xapain ununáe, jei Jacob xua Nakom wüüka.

Meje poxonae Jacob itoroba ichawang xua pekatsinexa peweicho

¹³Bárapo merawitha Jacob maiteka baxota. Yawa itapeta jíwana nota tsíniya daxita xua xeina, xua amanaya peweicho pekatsinexa, Esaútha. ¹⁴Doscientos póyobe cabrang pesowabi, yawa 20 póyobe cabrang pebtong, yawa 200 póyobe ovejamonae pesowabi, yawa 20 póyobe oveja xua pebtong. ¹⁵Matáütano kátano 30 póyobe camellomonae xua peweinxi yawa pona. Yawa kátano 40 póyobe vacamonae, yáwano 10 póyobe vacamonae, pebtong penawang, xua aiña weibe xeina, yawa 20 póyobe burrang pesowabi, yawa 10 póyobe burrong pebtong. ¹⁶Jacob kaitoroba bárapo duweimonaein pía petanakuichiwichitha, xua daxita barompaya be tajüyo tsíniya pía duweimonaein kaumeiña, xua nayakaincha umeiña, yawa jeino: —Pana netsíwana nantakaponde, be daxita duweimonae tajüyo pana nawepu tsatajjinka, jei Jacob.

¹⁷Pong xua kopiya Jacob kaitoroba, muxuje:

—Poxonae kakaxinaena taeweicho Esaú, kayaiñabiya jei tsane: ‘¿Jintam jiña nentakaponaein? ¿Eta xota póname? Yawa ¿jintam pía duweimonae xua kapóname?’ kayaiñabiya jei tsane. ¹⁸Néxata jumenotsiya jande: ‘Ápara xam jiñawang xua amanaya kakatsiba, xua Jacob kakata jiña nekantenta weyataeyawabin. Xaniwaicha páebang xua bapong dawarena, xua pataputha pona’, néxata jande, jei Jacob.

¹⁹Yáwano ichúngthano muxujéi, pong pekaitorobin. Barichino ichamonáethano muxujéi tsóponae, pomonae pekaitorobixae bárapo duweimonae, jeye:

—Poxonae pakaxíbame taeweicho Esaú, bara pajumichiponaeinde irü. ²⁰Pajande irü: ‘Jacob, pong nekantenta weyataeyawabin, bapong dawarena pataputha’, pajande, jei Jacob.

Jacob nantaxéinare jeye: “Exanaein xua jopa taeweicho peanaepanaewa tsane poxonae baxuang katsibin, xuang netsíwana daxita nantakajjinka. Bapoxonae yatsikaewa nekotsin. Metha bapoxonae neweyataeya jakobina”, najéi.

²¹Jacob kaitoroba xua daxita tsiwanaya nantakajjinkatsi xua po duweimonae bicheitong xua bapong katsiba. Bapong Jacob narúntaba merawitha bárapo íratha. ²²Bárapo merawitha Jacob asiya unguwa; waba pishéuribe aiñáwabe, yawa pía petanakuichiwayobetsi, múxuna yawa pía pexuino pebinwúütixi xua once pongbe. Bapoxonae daxita barapomonae meníyotha kuaranobiya iya éxana ichaxota tsewa, po méniyo pewüing Jaboc méniyo. ²³Matáütano baxoyo itorobiya daxita xua bapong xeina.

Meje poxonae Jacob najírababe matatsunpin Peniel nákuatha

²⁴Poxonae Jacob kompa narúntaba, bapoxonae icha pebin Jacob jírabatsi beya yakuipeñthatsina. ²⁵Poxonae bárapo pebin yaputane xua jopa amanayabiyo, néxata Jacob kirakuaintaxotsi xua pekira nexatabinéxatsi poxonae Jacob jírabatsi. ²⁶Néxata bárapo pebin Jacob jeichichi:

—¡Nesotábare tsipéi báyatha pentha tsóponae!

Jacob jumenota, jeye:

—Icha jopa wüünae neyábara paebim tsane xua tana neyawenaewam tsane, methaunxuae jopa kasotabi tsainchi, jei Jacob.

²⁷—¿Eta powüm xam? jei bapong.

—Tawüing Jacob, jei Jacob.

²⁸Néxata bárapo pebin Jacob baraichi:

—Ánoxuae nama jopa ekeicha Jacob kajéi tsane. Bara newüing Israel tsane, tsipéi Nakomtha naba exanapóname yawa kapanépame báyatha pokotsiwa xuaunxuae wúükame. Nakom kakata pena jüntübükoyenewa xua jiña nekanamataxeinaewa tsane jiwi. [Hebreo jumetha po wüing: ‘Israel’, jei yábara jei: ‘Bapong, pong Nakomtha naba’, jei.]

²⁹Néxata Jacob yáíñaba, jeye:

—Ínkane xam, ¿eta po matawüm? jei Jacob.

Bapong Jacob jumenótatsi:

—¿Eta pokotsiwa metha nemátawüing yáíñabame? Baxua jopa nantawenonaem.

Bapoxonae bárapo pebin bara weya Jacob wüünae yábara páebatsi xua peyawenaewa tsainchi.

³⁰Daxota bárapo ira Jacob wüingduta po wüing: “Peniel”, jei tsipéi jei: “Nakom tang, nantiya pana itabara tangbe, yawa kataunxuae ítowang póponang”, jei. [Hebreo jumetha po wüing: “Peniel”, jei yábara jei: “Nakom péitabara”, jei, ichi-kuitha xua yábara jei: “Pong kanamataxeina jiwi xua Nakom nexa”, jei.] ³¹Jacob bara muxu peponáe Peniel ira weya poxonae xometo pichatabina, yawa nayubapona. ³²Daxota ánoxuae Israel pía pemómoxi susato jiwi tatsi jopa xaeyo xua duwéi penepe, po penepe pethümatakeretha dubena xua pekíratha, tsipéi kaena báyatha Jacob abe éxanatsi bara weya.

Meje poxonae Jacob pewéichobe nakaxínabe

33 ¹Poxonae Jacob taeba xua Esaú dawarena, xua 400 po bicheitomonaebe yánabatsi, xua pebiwi, bapoxonae Jacob pexui tsaba. Lea pía pexui tatsi nota, yawa Raquel pexanto tatsi pita. Matáütano powáyobe pía petanakuichiwayóbe tátsibe, barapowáyobe pía pexui tátsino pítabe. ²Matha kopiya pía petanakuichiwayobetha tsata, takuaranótabe pexui. Bapoxonae barichino Lea beya takuaranoba pía pexui. Bapoxonae kotakaya tabükaungkuareka Raquel yawa José.

³Bapoxonae daxita bárapo matabüxúyobe Jacob matakápona. Yawa Jacob pentabokototha ira betaeungkuareka, yawa peitapatha ira jayareka siete pokuíyobe, xua peweicho peitabaratha, pong pewüing Esaú, beya imoxoyo kakuita unguatábatsi Jacob.

⁴Íchitha Esaú ítata kuinaepoiña pekaxinaenexa. Pemáxütha pekóbetha wishi wáetaba yawa kateita wáetaba, tsutsúbano. Yáwano bapongbe pewéichobe wekoyeibe. ⁵Bapoxonae Esaú yábara nantanaxeinataba yabüxitha yawa pexuithano, Jacob yáíñabatsi:

—Meje, ¿jintambarü barapomonae?

Jacob jumenota, jeye:

—Bárapo pexui, po pexui báyatha Nakom nekata, pongxaein takatsita takuipawinchi.

⁶Néxata powáyobe, Jacob pía petanakuichiwayóbe tatsi, imoxoyo umenarúküpa. Yawa barapowáyobe irü pía pexuino pentabokotongtha írabe taeumendeka yawa ira jayabarüküpareka peitapathang. ⁷Bapoxonae ekeicha Lea yawa pexuino imoxoyo umenarúküpa yawa pentabokotongtha írabe taeumendeka yawa peitapathang ira jayabarüküpareka bara jütiya ichi, icha ichi

powáyobe petanakuichiwayobe. Bapoxonae nama Raquel irü José, xua Raquel pexanto, imoxoyo unguatábabe irü barichibe pentabokototha írabe taeungkuarékabe.

⁸Bapoxonae Esaú yáñaba, jeye:

—¿Eta xua jíñatsi, xua tsiéxaname, xua bárapo bicheitong tsana éxaname, xua kata tainchi?

Jacob peweicho jumenota, jeye:

—Ápara xua amanaya takakatsiwa tsainchi, xua tana neweyataewam tsane, jei Jacob.

⁹Esaú jumenota, jeye:

—Taeweicho, bara báyatha nawita xeinang. Moya bara jíñawa xéinare, jei Esaú.

¹⁰Íchitha Jacob jumedangweya namchi:

—¡Jume ápara! Icha pexeña jüntübükoyene katsita xéinatsi, moya jejeya pire xua amanaya takakatsíwatsi, yáitama bara yatsikaewa katainchi, icha be pókotsi koyeneya ichi, xua Nakom bara yatsikaewa tane. Ápara tsipéi nententa weyatáneme. ¹¹Bara kajeichi, moya jejeya nore xua xuang amanaya takakatsíwatsi, xua xuang kata kapoinchi. Bara Nakom báyatha nawita nekata. Matáüta jopa inta kaewiyo seikaeyo.

Jacob matowa paeba. Matapaiña Esaú jejéi yawa bara nota. ¹²Íchitha Esaú namchi:

—Anthá weya poinchi. Xang kayantinchi.

¹³Jacob jumenota, jeye:

—Tanekanamataxeinaein, xam yaputáneme xua pexui fifinapona. Yawa nantanaxeinang xua ovejang, yawa vacang, yawa pweinxi, icha fifinapona kaentakábitha, werapáetsipa daxita duweimonae. ¹⁴Metha saya tawüünae beya nantakaponde pongxaein takatsita takuipawinchi. Xang nama saya bewayo tha barü ponaetsi daxita bárapo duweimonae xua netsíwana enaponaena, yawa pexui xua nantakaponaena beya ichaxota paka kaxibinchi Seír íratha, jei.

¹⁵—Je, jei Esaú—, yawa jeino kópabare icha pebiwi, pomonae barü ponang, xua nekayawenaewa tsane, jei.

Jacob jumenota, jeye:

—Bara saya. Jopa be kaákabe exanaetsi.

¹⁶Bárapo matakeitha Esaú Seír ira beya kaibeya pona.

Meje poxonae Jacob patopa Siquem tómaratha

¹⁷Seikaya nama Jacob Sukot ira beya pona. Baxotiya Jacob bo nata éxana. Yawa bárapo duweimonae tsiéxana boutong. Daxota Jacob baxota wüngduta po wüng: “Sukot”, jei. [Hebreo jumetha po wüng: “Sukot”, jei yábara jei: “Boutong”, jei.]

¹⁸Poxonae Jacob Padan-aram wérena pona, wüünaeya patopa yawa kapané-patsi Canaán ira beya. Yawa Siquem pía tómara ítapa beya tatsi naebopa. ¹⁹Cien po paratixithabeta Jacob ira kómota Hamor pía pexui tátsitha, xua pong Hamor Siquem paxa tatsi. Yawa baxota irü Jacob piamonae tatsi pía duweibokong bomü-xüxitha jinompa. ²⁰Bapoxonae Jacob éxana íbótong, xua altar matawüng, xua xota pokotsiwa duwéi peyüübabeibiyathopaewa, xua ichaxota duwéi petauteibiwa poxonae wüünae jainta Nakom. Yawa baxua wüngduta po wüng: “El-Elohei-Israel”, jei. [Hebreo jumetha po wüng xua: “El-Elohei-Israel”, jei yábara jei: “Nakom ápara Israel pía Nakom tatsi”, jei.]

Meje poxonae Siquem jónaka, Dina jónakatsi

34 ¹Írürü bapoxónaerü Dina xua penowayo, powayo báyatha Lea pisheuri itakatane pong Jacob, barapowa siwaponá icha yábüxi, powaxi jinompa bárapo tómaratha. ²Baxota Dina tainchi pong pewüing Siquem, pong Hamor pexanto tatsi. Bapong Hamor hebreomonaepin. Bapong Hamor pentakaponaepin náexana bárapo íratha. Siquem Dina dangweya wáetabatsi yawa bapowa maxü-jónakatsi. Dina kéntatsi. ³Dina abe éxanatsi Siquem, powáyoxae Jacob pexantiyo tatsi. Bichokono Siquem barapowa ántobe, daxota jumewüüinae paeba pía xuya antobetsi, xua pía Dina ántobe tsane. ⁴Néxata Siquem paxa tsipaeba, jeye:
—Inta barapowa wábare xua tapetsiriwa taexanaenexa, jei Siquem.

Meje poxonae Dina peweicho jiwimonaе tatsi xuya jopa beta exanaeyo

⁵Jacob, pong Israel, pexantiyo yábara jümetane Dina pokotsiwa xua juiña Siquem éxana. Jacob pía pexui tatsi pebinwüütixi wéxotha jinompa yawa pía duweimonaе tayapu-eénatsi. Abü kataunxuae Jacob, pong Israel, pía pexui jopa tsipaebiyó beya poxonaе pía pexui botha tapátatsi. Bapoxonaе matapaiña tsipaeba. ⁶Bapoxonaе Hamor, Siquem paxa tatsi, pona ichaxota Jacob, xua Jacob petsipaebinexa tsainchi, xua Jacob pexantiyo pewüükaenexa tsainchi, xua pexanto petawüükaenexa.

⁷Jacob pía pexui tatsi wexua wenawibarena. Poxonaе daxita barapomonaе yaputane xua juiña éxana, bapoxonaе daxita bichokono anáepana. Tsipéi xua baxua juiña éxana, bichokono Israel piamonaе tatsi^e tsita abetsi poxonaе Siquem maxüjónaka yábüyo, xua peitakueiña exaenaenexa, xua barapomonaе pamcho tatsi. Báraxua ápara bapong jopa bewa exanáe.

⁸Hamor tsipaeba, Jacob piamonaе tatsi tsipáebatsi, jeye:

—Paiña amcho Dina, barapowa taxanto Siquem ántobe nawita. Panejumetaema. Bara papukópare barapowa xua taxanto pepichinexa. ⁹Bara paichinde pata taji-wimonaetha. Bapoxonaе paxang panotsin paiña nexántixi. Xuya pata taxantixi panore. ¹⁰Pataxantha páenare. Pata ira pin ira. Baraxota paka barü jinompaeinchi. Pakaenaeta dubenanaebíyama, yawa pakómoka dubenanaebíyama bárapo nákuatha.

¹¹Siquem Jacob baraichi, yáwano Dina peweichowi tatsi baraichi, jeye:

—Jumedangweya paka tsipáebatsi xua pana netsita wüünaem. Paka katsinchi xua pokotsiwa panewüükame. ¹²Jopa netsita aiñakuiyo icha nawita pana newüükáename tsipéi paka katsibinchi. Íchitha matha barapowa bara papukópare xua pichin, xua tapetsiriwa taexanaewa tsane.

¹³Íchitha poxoru Siquem Dina abe kana éxanatsi, daxota Jacob pía pexui tatsi muxujaiñabiya jumenota, yawa Hamor muxuitórobatsi xuano irü Siquem muxuitórobatsi. ¹⁴Daxita barapomonaе jeye:

—Jopa pana itaküüpaeyo xua pata tamcho pakaenaetang pebintha, pong jopa kataunxuae withabichi xua ichaxota peréi eka. Tsipéi icha jopa baxua exanaetsi metha pana neakaura tsipae. ¹⁵Baxua jame pakópatang xua ichi poxonaе matha paichimje: Daxita pebiwi pam bewa paka withabina ichaxota peréi páename icha paichin.

^e 34.7 Xua “Israel piamonaе tatsi”, jei: “Ápara bara barapomonaе pomonaе Jacob piamonaе tatsi”.

¹⁶Bapoxonae paxam panore pata taxantixi. Yawa paxang panotsin bapoxonae paiña nexántixi jiwi. Yawa paxamtha pajinompaein. Yawa kae jiwi naexanaeinchi. ¹⁷Nama icha jopa paexanaem tsane xua paka kui-itoróbatsi, xua daxita paiña pebiwi pewithabiwa tsainchi, bapoxonae pawarapaein paxam weya, pata tamcho pakawarapaein, jei daxita barapomonae Jacobbarü.

¹⁸Bapoxonae Hamor irü Siquem, pexántobe bara baxua pebüriya yábara jumejeibe. ¹⁹Bapoxonae naiña pewowin withábatsi tsipéi bapong Jacob pexantiyo tatsi bichokono taichichípati. Bapong bichokono toxecha aiñakuí ichamonae, pomonae xua paxa tatsi piabotha tatsi. ²⁰Siquem irü paxa tatsi, pong Hamor, pexántobe pónabe tómara peyakaincha yapukuráratsi boupa iya. Baxota Siquem páxabe tsipáebabe pebiwi, pomonae baxota nakaetuta, pomonae jinompa bárapo tómaratha xua pejumekowüntsiwa tsáinchibe, jeye:

²¹—Bárapo pebiwi wajiwimonae, jüntema jinompa xote. Yawa bárapo pebiwi írürü baxota ichichipa kaenaeta éxana yawa ichichipa kómoka éxana. Yawa baraxote ira boke barapomonae nexa. Barapomonae pexántixi tatsi waxainchi notsinchi. Yawa barapomonae xuya naka jíwana notsina. ²²Íchitha xua kaemonae waexanaenexa, barapomonae itakúüpati xua pejinompaewa tsane waxantha, icha waxainchi daxita pebiwi withabinchi icha barapomonae ichi, xua nawithaba xua poxonae piakuiya éxana. ²³Daxita xua barapomonae xeina, yawa pía duweimonae tatsi, daxita wawa tsane. Saya icha jejeichi xua wanaka withabiwa tsane, barapomonae ataya naka barü jinompaena.

²⁴Daxita pebiwi, xua tomarangpiwi, bara yábara jumejejéi xua býatha Hamor paeba irü Siquem. Bapoxonae daxita pebiwi bara withabébatsi, pomonae jinompa bárapo tómaratha. ²⁵Poxonae akoibi po matakábibe tsuxubi, Simeón irü Leví, Jacob pexántobe tatsi, xua yawa Dina pewéichobe tatsi, barapongbe tómaratha patópabe poxonae kataunxuae pebiwi átene xua withabébatsi. Kusi kapónabe, yawa daxita jutébabe pomonae átene, xua xaiña bobena peparaxaewang.

²⁶Hamor bexotsi, irü Siquem bexotsi. Bapoxonae Dina pítatsi Siquem píabo weya tatsi. Bapoxonae bapongbe pónabe. ²⁷Bapongbe tánebe petüpaewi xua bobena, yawa abe éxanabe tómara tsipéi Siquem Dina abe éxanatsi. ²⁸Yawa barapongbe ovejang nótabe, yawa vacamonae nótabe, burromónaeno, yáwano daxita nótabe xua xuang tómaratha xeina, xua wéxotha xéinano. ²⁹Daxita nótabe xuang bomüxüngtha xeina. Yáwano daxita pexui teikaeya kápona, yawa yabüxino, xua petanakuitsinéxatsi. ³⁰Néxata Jacob barái, Simeón yawa Leví baraichi, jeye:

—Ánoxuae bichokono abe pana tsipéi exanáenabe. Ánoxuae cananeomonae yawa ferezeomonae, pomonae xua imoxoyo po írathe jinompa, daxita barapomonae nekasebina. Yawa xangtha imoxoyo patsina, yawa nebena. Íchitha xang pebiwi be kónotha xeinang. Barapomonae nakaetutsina yawa naka bena. Nebexubina, yawa paka bexubínabe, yawa daxita wajiwimonae, jei Jacob.

³¹Barapongbe jumenótabe, jeye:

—Waxainchi jopa be kopatichi xua amcho nákata abe éxanatsi, xua be powayo pebiwi jeiteka petsikotaewa tsainchi, jei Jacob pexántobe tatsi.

Meje poxonae Jacob ekeicha kaibeya pona Betel tómara weya

35 ¹Nakom Jacob baráichichi, jeye:
—Anthá nontaponde, yawa ponde xua Betel tómaratha nepoponae nexa. Baxotiya exanáename altar matawüing, xua xota pokotsiwa duwéi

peyüübabeibiyathopaewa xua ichaxota duwéi petautsiwa poxonae newüünae jáintame. Xang ápara po Nakomüing katsita-itúütatsi poxonae eweicho jumetaya naetsiríwame, pong Esaú.

²Néxata Jacob barái piamonae matabüxü yawa barái pía pepunaponaexaetsi, jeye:

—Panore daxita xua xuang ibo nakomüing, xua ichamonae pía nakomüing tatsi, po ibo nakomüing xuang paxéiname, yawa pabébande. Yawa panowaepende, yawa icha paparuwang panamaxátabare. ³Anetha naiña poinchi Betel tómara beya. Baxotiya Nakom nexa exanaetsi xua altar matawüing, xua ichaxota duwéi petautsiwa poxonae Nakom wüünae jáintatsi. Bárapo Nakom po Nakom neyawena poxonae xang bichokono anthüthütanein, poxonae taeweicho jumetaya naetsiriwang, yáwano xua po Nakom neyanatapópona xua ichaxótaba poneibang.

⁴Bapoxonae daxita Jacob pía pexui tatsi, yawa pía pepunaponaewixaetsi, daxita barapomonae Jacob katsíbatsi xua xuang ibo nakomüing, yáwano wárowang xua býatha barapomonae namuxuwárowaba. Daxita baxuang Jacob múthüka nae büxüpana deka, po nae pewüing encina nae, po nae unguua ichaxota imoxoyo po ira pewüing Siquem. ⁵Poxonae Jacobbarü pona, daxita bárapo matabüxüyobe Nakom éxana xua daxita tomarapiwimonae junuwina. Daxota jopa Jacob pía pexui tatsi tapubaraponaetsi po tomarapiwi xua býatha pekuariya petajinompáewichi.

⁶Jacob irü piamonae tatsi pata ichaxota po tómara pewüing Luz, po pepa tómara xua icha wüing Betel tómara, po tómara eka Canaán nákuatha. ⁷Baxotiya Jacob éxana xua altar matawüing. Bapoxonae bárapo ira wüingduta: “El-Betel”, jei. Tsipéi baxota býatha Jacob tsita naitúütatsi Nakom poxonae peweicho jumetaya naetsiríwa. [Hebreo jumetha po wüing: “El-Betel”, jei yábara jume jei: “Betel tomarapiwi pía Nakom tatsi”, jei.]

⁸Baxotiya petsiriwa tüpa, powa pewüing Débora, powa býatha Rebeca mito ápatatsi poxonae Rebeca pexuyo tsekæ. Bapowa Débora múthütha xotsi nae petabaka büxüpana deka, po nae unguua ichaxota imoxoyo Betel tómara. Jacob wüingduta: “Alónbacut”, jei. [Hebreo jumetha po wüing: “Alónbacut”, jei yábara jume jei: “Po nae ichaxota wekoyéi”, jei.]

Meje poxonae Nakom, pong Pekanamataxeinaein ekeicha Jacob kátatsi po petsiwüünae muxudutsiwa býatha kátatsi

⁹Poxonae Jacob kaibe náwiya xua Padan-aram ira weya, ekeicha baxota Nakom Jacob tsita naitúütatsi, yawa Jacob wüünaeya yábara páebatsi.

¹⁰Yawa jeichiche, jeye:

“Xam newüing Jacob, íchitha ánoxuae nama ekeicha jopa kawüing ununáe tsane.

Nama ánoxuae newüing Israel tsane,
xua ánoxuae nexa yawa xua bexa tsáneno”.

Poxonae Jacob icha wüing wüingdútatsi xua: “Israel”, jei xua Nakom wüingduta, bapoxonae Nakom jeye:

¹¹“Xang ápara Nakomüing,

po Nakomüing daxita taayapusúü itorobi koyenewa xeinang.

Xeináename jiña pexui pebinwúütixi,

yawa xua bapoxonae xeináename jiña nemómoxi susato jiwi.

Xam nexaiña weyaxáe naexanaena kae nakuapiwi,
xua xeina aiña tomarangpiwi.

Nemómoxi susato jiwi pía xantha tatsi pinmonae nakua peewatsiwi
naexanaena.

¹²Po ira katang Abraham yawa Isaac,
bárapo ira irü kakátatsi.
Poxonae tüpáename,
bapoxonae nemómoxi susato jíwitha katsin”,
jei Nakom.

¹³Bapoxonae Nakom pónataba ira weya, po íratha Jacob tsipáebatsi. ¹⁴Bapoxonae Jacob iboto pita yáwano asiya kuaranota, xua po íratha báyatha petsipaebi-xaetsi, xua Nakom tsipaeba. Báraxua éxana peyábara jüntanainaenexa xua Nakom éxana. Bapoxonae Jacob bárapo iboto mataépata penasiwa yawa vino mératha, xua Nakom petsita-itüütsinéxatsi, xua ápara Nakom wüüinae jáintatsi. ¹⁵Bapoxonae bárapo ira Jacob wüingduta: “Betel”, jei, po íraxae ichaxota Nakom Jacob tsipáebatsi.

Meje xua poxonae tüpa petsiriwa, powa pewüing Raquel, poxonae Benjamín nakatsiwa

¹⁶Bapoxonae Betel tómara wewarapiya. Íchitha kataunxuae tajüyo wejiniya xua Efrata tómara beya nexa, xua poxonae Raquel pexuyo pabeba. Dáichitha jopa xapain Raquel pexuyo pabebiyo. ¹⁷Poxonae jopa xapain Raquel pabebiyo, bapoxonae powa peyaweneibiwa, xua poxonae pexui nakatsiweiba, bapowa jeye: —Jopa junuwinde, tsipéi xaniwaicha kata nakatsiwina bárapo pexuyo pebinwüüto.

¹⁸Raquel muxu imoxoyo petüpáe, xua poxonae ekeicha jopa penajumeikau-naewa tsane. Daxota bárapo pexuyo, pong matapaiña nakatsiwa, wüingdútatsi: “Benoni”, jei. [Hebreo jumetha po wüing: “Benoni”, jei yábara jume jei: “Taxanto pong nakatsiwa poxonae aperüütanein”, jei.] Íchitha bapong paxa wüingdútatsi: “Benjamín”, jei. [Hebreo jumetha po wüing: “Benjamín”, jei yábara jei: “Taxanto pong takobekoxapin, pong neyawena”, jei.]

¹⁹Bapoxonae Raquel tüpanaicha, yawa müthütha xotsi námtotha xua poxonae Efrata tómara beya pona, xua po tómara ánoxuae icha wüing Belén. ²⁰Raquel pía müthü matatsuntha Jacob nota iboto xua pokotsiwa yábara nantaxeinapópona. Áwiya kataunxuae bárapo iboto itapeñaxeinungkua xua Raquel pía müthü tatsi.

Meje yábara Rubén poxonae bapong pita Bilha, po petsiriwa paxa tatsi píowa tatsi

²¹Bapoxonae Israel bara weya pona, yawa naebopa pekuariya ichaxota unγκua po bo Migdal-eder matawüing xua be bómüxü xua apiyeicha ichaxota xua tajü petaewa. ²²Icha matakábitha, poxonae Israel baxota pópona, Rubén ishamaitung-kua powa pewüing Bilha. Bapowa Rubén paxa tatsi píowa tatsi. Poxonae Rubén paxa, pong Israel, kuiyaputainchi, bichokono paxa kasébatsi.

Meje xua Israel pía pexui tatsi xua doce pongbe

Israel pía pexui tatsi doce pongbe xua pebiwi.

²³Po pexui Lea tanakatsíwatsi meje barapomona:

Rubén pong matapin,
ichüing pewüing Simeón, ichüing Leví,
ichüing Judá, ichüing Isacar, ichüing Zabulón.

²⁴Nama meje pongbe Raquel tanakatsíwatsi:

Ichüing José, ichüing Benjamín.

²⁵Nama xua Bilha, powa Raquel pía petanakuichiwayo tatsi, tanakatsíwatsi meje barapongbe:

Ichüing Dan, ichüing Neftalí.

²⁶Nama Zilpa, powa Lea pía petanakuichiwayo tatsi, tanakatsíwatsi meje barapongbe:

Ichüing Gad, ichüing Aser.

Daxita bárapo pexui Jacob pía pexui tatsi, pomona nakatsiwa Padan-aram íratha.

Meje xua poxona Isaac tüpa

²⁷Jacob pona xua petaenexa paxa, pong pewüing Isaac, Mamre tómara beya, po tómara icha wüing wüingduta: “Quiriat-arba”, jei, ichikuitha xua jei: “Hebrón”, jei. Bárapo tómara Isaac pía tómara. Baxotiya kaena býatha Abraham pópona pewünaeya poxona tüpa.

²⁸Isaac 180 po weibe xeina poxona tüpa. ²⁹Bapong Isaac tüpa xua saya amotha bokopa. Esaú irü Jacob paxa ibowoutha xúbabe.

Meje xua Esaú pía pemómoxi susato jiwi tatsi

36 ¹Meje po diwesi xua Esaú pía pemómoxi susato jiwi tatsi yábara, pong xua icha wüing Edom baraichi. ²Bapong Esaú akoibi po yabúyobe nakóyoba Canaán nakuapiwaxi. Bapong Esaú píowa tatsi pewüing Ada, Elón pexantiyo tatsi, pong hebreomonaepin. Ichowa Esaú píowa tatsi pewüing Oholibama, Aná pexantiyo tatsi, Zibeón pemoyo tatsi, pong hebreomonaepin. ³Ichowa Esaú píowa tatsi pewüing Basemat. Basemat Ismael pexantiyo tatsi xua pong Nebayot, bapong pamcho tatsi.

⁴Powa pewüing Ada, bapowa Esaú tsita itakatainchi pebinwüüto pewüing Elifaz. Irü Basemat pebinwüüto tanakatsíwatsi pewüing Reuel, xua Esaú tsita itakatainchi. ⁵Irü Oholibama tanakatsíwatsi pebinwüüto pewüing Jeús. Ichüing pewüing Jalam, ichüing pewüing Coré. Daxita bárapo pexui Esaú pía pexui tatsi, po pexui tanakatsíwatsi poxona Esaú pópona Canaán íratha.

⁶Esaú piowaxi barü wárapa, yawa pía pexuino xua pebiwi, yawa xua pexanti-xino. Yáwano barü wárapa pomona pía pekuéyaba jiwixaetsi. Bapoxona daxita Esaú barü pona icha ira beya, xua tajü beya, xua pía peweicho tatsi pexaiña weya tatsi, pong pewüing Jacob. Esaú daxita pía duweimona kápana. Daxita icháwangno kápana xua xeina, xua býatha yábara nakuita poxona Canaán íratha pópona. ⁷Tsipéi Esaú pewéichobe nawita xéinabe, daxota jopa itaküüpáetsibe xua imoxoyo nakakuita ékabe. Tsipéi, ichaxota po íratha popónabe, baraxota aiña duweimonaein jopa itaküüpaetsi xua pexaenexa naepanaewang. ⁸Daxota Esaú, pong icha wüing Edom, bapong pona ichaxota demuxuwang beya, ichaxota po ira pewüing Seír.

⁹Pomona Esaú pía pemómoxi susato jiwi tatsi, barapomona edomitamona, pomona jinompa bárapo demuxúwangtha ichaxota po ira pewüing Seír. ¹⁰Meje bárapo pebiwi, po pebiwi Esaú pía pexui tatsi:

Pong pewüŋ Elifaz, bapong Ada pexanto tatsi, powa Esaú píowa tatsi.

Pong pewüŋ Reuel, bapong Basemat pexanto tatsi, powa Esaú píowa tatsi.

¹¹Meje Elifaz pía pexui tatsi:

ichüŋg pewüŋ Temán, ichüŋg pewüŋ Omar,

ichüŋg pewüŋ Zefo, ichüŋg pewüŋ Gatam,

ichüŋg pewüŋ Quenaz.

¹²Elifaz ichowa xeina powa xua jopa xapain píowa tatsiyo.

Bapowa pewüŋ Timna.

Bapowa pexuyo éxana pebinwüüto,

pong wüŋgdútatsi Amalec baraichi.

Daxita barapomonaé kaena báyatha Ada pía pemómoxi susato jiwi tatsi,

powa Esaú piowaxi jíwana tatsi.

¹³Meje Reuel pía pexui tatsi xua pebiwi:

ichüŋg pewüŋ Najat, ichüŋg pewüŋ Zéraj,

ichüŋg pewüŋ Sama, ichüŋg pewüŋ Miza.

Daxita barapomonaé Basemat pía pemómoxi susato jiwi tatsi,

xua powa Esaú píowa tatsi xua ichowa.

¹⁴Powa pewüŋ Oholibama, bapowa Esaú píowa tatsi xua ichowa. Bapowa xua pía pexui tatsi meje:

ichüŋg pewüŋ Jeús, ichüŋg pewüŋ Jalam,

ichüŋg pewüŋ Coré.

Bapowa Oholibama Aná pexantiyo tatsi,

Zibeón pemoyo tatsi.

¹⁵Esaú pía pemómoxi susato jiwi tatsi, barapomonaé pentakaponaewi náexana, pomonaé Elifaz pía pexui tatsi, pong Esaú pexanto tatsi xua matapin.

Meje xua pentakaponaewi:

ichüŋg pewüŋ Temán, ichüŋg pewüŋ Omar,

ichüŋg pewüŋ Zefo, ichüŋg pewüŋ Quenaz,

¹⁶ichüŋg pewüŋ Coré, ichüŋg pewüŋ Gatam,

ichüŋg pewüŋ Amalec.

Daxita barapomonaé pentakaponaewi náexana, xua Elifaz pía pexui tatsi,

xua barapomonaé pentakaponaewi náexana Edom pía íratha tatsi. Daxita

barapomonaé powa Ada pía pemómoxi susato jiwi tatsi.

¹⁷Pentakaponaewi, pomonaé Reuel pía pexui tatsi, pong Esaú pexanto tatsi, barapomonaé meje:

ichüŋg pewüŋ Najat, ichüŋg pewüŋ Zéraj,

ichüŋg pewüŋ Sama, ichüŋg pewüŋ Miza.

Daxita barapomonaé pentakaponaewi náexana Edom pía íratha tatsi.

Barapomonaé Reuel pía pexui tatsi. Daxita barapomonaé Basemat pía

pemómoxi susato jiwi tatsi, powa Esaú píowa tatsi.

¹⁸Meje Oholibama pía pexui tatsi, powa Aná pexantiyo tatsi. Bapowa Oholibama Esaú píowa tatsi. Oholibama pía pexui tatsi xua pentakaponaewi meje:

ichüŋg pewüŋ Jeús, ichüŋg pewüŋ Jalam,

ichüŋg pewüŋ Coré.

¹⁹Daxita barapomonaé Esaú pía pemómoxi susato jíwana tatsi, pong icha wüŋg Edom, xua daxita barapomonaé Esaú piamonaé tatsi, pía pentakaponaewi tatsi.

Meje Seír pía pemómoxi susato jiwi tatsi, pong horeomonaepin

²⁰Seír, pong horeomonaepin, pía pexui tatsi jinompa ichaxota po ira pewüng Seír. Seír pía pexui tatsi meje:

ichüng pewüng Lotán, ichüng pewüng Sobal,
ichüng pewüng Zibeón, ichüng pewüng Aná.

²¹Ichüng pewüng Disón, ichüng pewüng Ezer,
ichüng pewüng Disán. Daxita barapomona horeomona pía pentakaponaewi tatsi. Bárapo horeomona Seír pía pemómoxi susato jiwi tatsi, pomona jinompa Edom pía íratha tatsi.

²²Lotán pía pexui tatsi meje:
ichüng pewüng Hori, ichüng pewüng Hemam.
Powa pewüng Timna, bapowa Lotán pamcho tatsi.

²³Sobal pía pexui tatsi meje:
ichüng pewüng Alván, ichüng pewüng Manajat,
ichüng pewüng Ebal, ichüng pewüng Sefo,
ichüng pewüng Onam.

²⁴Zibeón pía pexui tatsi meje:
ichüng pewüng Ayias, ichüng pewüng Aná. Bapong Aná, báyatha bapong ira büxüpana mene kopiya taeba, xua po mene aménetau, ichaxota irasaina xuépana tsúrukuae nákuatha poxona paxa tayapukapópona burromona, po paxa tatsi pewüng Zibeón.

²⁵Aná pexanto xeina pewüng Disón. Yáwano pexantiyo xeina, bapowa pewüng Oholibama.

²⁶Pong pewüng Disón pía pexui tatsi meje:
ichüng pewüng Hemdán, ichüng pewüng Esbán,
ichüng pewüng Itrán, ichüng pewüng Querán.

²⁷Ezer pía pexui tatsi meje:
ichüng pewüng Bilhán, ichüng pewüng Zaaván,
ichüng pewüng Acán.

²⁸Disán pía pexui tatsi meje:
ichüng pewüng Uz, ichüng pewüng Arán.

²⁹Horeomona pía pentakaponaewi tatsi meje:
ichüng pewüng Lotán, ichüng pewüng Sobal,
ichüng pewüng Zibeón, ichüng pewüng Aná,

³⁰ichüng pewüng Disón, ichüng pewüng Ezer,
ichüng pewüng Disán. Daxita barapomona horeomona pía pentakaponaewi tatsi, xua pía pexuibarü xua pomona jinompa Seír pía íratha.

Meje yábara xua Edom nakua pía peewatsiwi tatsi

³¹Meje xua barapomona kaena báyatha nakua peewatsiwi náexana, pomona xua itoroba jíwitha xua Edom pía íratha tatsi, baxua pewünaeya xua poxona Israel pía pemómoxi susato jiwi tatsi xeinaena pía nakua peewatsin tatsi.

³²Pong pewüng Bela, bapong Beor pexanto tatsi. Bapong Bela Edom pía nakua peewatsin tatsi. Bapong Beor pía pepa tómarata tatsi pewüng Dinaba.

- ³³Poxonae Bela tüpa, xuya pekoutha pong pewüing Jobab, bapong nakua peewatsin náexana. Bapong Zéraj pexanto tatsi. Bapong Zéraj Bosra tomarapin.
- ³⁴Poxonae Jobab tüpa, xuya pekoutha pong pewüing Husam, bapong nakua peewatsin náexana. Bapong Husam Temán nakuapin.
- ³⁵Poxonae Husam tüpa, xuya pekoutha nakua peewatsin náexana pong pewüing Hadad. Bapong Hadad Bedad pexanto tatsi. Bapong Bedad, pong xua báyatha Madián yótabatsi ichaxota po ira pewüing Moab. Bapong Bedad pía pepa tómara tatsi pewüing Avit.
- ³⁶Poxonae Hadad tüpa, xuya pekoutha nakua peewatsin náexana pong pewüing Samla, bapong Masreca tomarapin.
- ³⁷Poxonae Samla tüpa, xuya pekoutha nakua peewatsin náexana pong pewüing Saúl, pong Rejobot tomarapin, po tómara mene itapatha eka.
- ³⁸Poxonae Saúl tüpa, xuya pekoutha nakua peewatsin náexana pong pewüing Baal-janán, pong Acbor pexanto tatsi.
- ³⁹Barichi poxonae Baal-janán tüpa, pong Acbor pexanto tatsi, xuya pekoutha nakua peewatsin náexana pong pewüing Hadad. Bapong pía tómara tatsi pewüing Pau. Bapong Hadad píowa tatsi pewüing Mehetabel, powa Matred pexantiyo tatsi, yawa xua irü pong Mezaab pemoyo tatsi.

Meje yábara Esaú piamonae tatsi xua pentakaponaewi

⁴⁰Pomonae Esaú piamonae tatsi pía pentakaponaewi tatsi, pomonae xua yábara barü tsábatsi piamonae matabüxüing, yawa pía írangno múxuna pewüingxi, barapomonae pewüingxi meje:

ichüing pewüing Timna, ichüing pewüing Alva,
ichüing pewüing Jetet, ⁴¹ichüing pewüing Oholibama,
ichüing pewüing Ela, ichüing pewüing Pinón,

⁴²ichüing pewüing Quenaz, ichüing pewüing Temán,
ichüing pewüing Mibzar, ⁴³ichüing pewüing Magdiel,
ichüing pewüing Iram.

Daxita barapomonae pentakaponaewi xua Esaú piamonae tatsi, pong icha wüing Edom, pong edomitamonae pía pamo susatopin tatsi.

37 ¹Jacob pópona Canaán íratha, po íratha báyatha Jacob pena tatsi yawa paxa tatsi jinompa, saya xua penajinompaewi Canaán nákuatha. ²Meje xua Jacob pía pexui tatsi pía diwesi tatsi.

Meje yábara xua José amichinae

Poxonae José pewowinwüito tsekae, poxonae 17 po weibe xeina, bapong ovejamonae yapukapoponeiba, yawa irü bapong pía peweicho jiji tatsi. José nápona Bilha pía pexui tatsi yawa irü Zilpa pía pexui tatsi, xua barapówabe José paxa tatsi píowa tátsibe. José paxa tsipaeba po diwesi jopa wüünaeyo, xua peweicho jiji tatsi éxana.

³Bapong Israel bichokono ántobe pexanto, pong pewüing José, beyakaincha icha pexuitha xua ántobe, tsipéi bapong José nakatsiwa poxonae bapong Israel bichokono amo. Daxota bapong Israel pexanto taéxana po paparuwa bichokono pexeíña paparuwa, po paparuwa be dorouto. ⁴Poxonae José peweicho jiji yaputainchi

xua José bichokono paxa antobetsi, beyakaincha xua barapomonae antobetsi, bapoxonae José peweicho jiwi ita-aenaeneichi, matáüta wüünae jopa jakobeibichi.

⁵Kaentakábitha José amichinae. Bapoxonae José tsipaeba peweicho jiwi xua báyatha amichinae. Íchitha kataunxuae kame José ita-aenaeneichi peweicho jiwi beyakaincha xua kopiya. ⁶Tsipéi José báyatha, jeye:

—Panejumetaema xua paka tsipaebinchi xua xang báyatha amichinaein. ⁷Amichinaein xua waxainchi wéxotha tómaratha jinómpatsi. Yawa éxanang pekuntong xua trigobotong. Tatrigobotong kunto asiya ungkua yawa bopiya ungkuiya. Íchitha paiña trigobotong kuntong umena pematawakáichatha xua tawa. Yawa tatrigo-botong kuntong wüünae jáintatsi yawa tsita írabe taumendékatsi.

⁸Néxata José peweicho jiwi jumenótatsi, jeye:

—¿Baxua páebame poxoru ichichípame pong pata nakua peewatsin naexáname?

José ekeicha peweicho jiwi bichokono kasébatsi beyakaincha xua kopiya tsipéi José baxua paeba. ⁹Bapoxonae ekeicha José amichinae. Baxua múxunano José tsipaeba peweicho jíwitha, jeye:

—Pajumetaema xua xang ekeicha amichinaein. Tang xometo yawa jomokóichato, yawa once xóyobe opitéi, daxita baxuang wüünae nejainta.

¹⁰Poxonae José paxa tsipaeba baxua, yawa poxonae peweicho jiwi tsipaeba, bapoxonae José paxa baraichi, jeye:

—¿Eta xua baxua páebame xua báyatha amichinaem? ¿Metha ena, irü xang, irü jiña eweicho jiwi jiña wüünae tapaka jainchíwatsi, yawa xua jiña itabaratha írabe pataeumendekaen?

¹¹José peweicho jiwi úwatsi. Saya meisha paxa tatsi baxua yábara nantaxeina nawita.

Meje xua José peweicho jiwi yábara nantükuí wétatsi xua pebexubiwa tsainchi

¹²Kaentakeitha José peweicho jiwi tatsi pona Siquem tómará beya xua tajeita naepanaewang xua paxa tatsi pía ovejamonaein tatsi nexa. ¹³Néxata Israel José baraichi, jeye:

—Taema jiña eweicho jiwi imoxoyo Siquem tómará bejinompiya, ovejamona yapukainompa. Íchipang xua xam bara beya ponde xua netaenexa.

—Je, moya ponaen, jei José.

¹⁴Ekeicha José paxa jeichi:

—Je, bara wüünae. Beta taema xua jiña eweicho jiwi éxana, yáwano xua múxuna ovejamonaein. Néxata inta tsiwüing jumeKarenande, jei.

Israel itoroba, José itoróbatsi, Hebrón nakua weya xua Siquem tómará beya.

¹⁵Poxonae José patopa imoxoyo Siquem tómará, itaxanúnguatsi wéxotha. Néxata José kaxínatsi pebin. Bapoxonae José yáíñabatsi, jeichichi:

—¿Eta xua metha nekobáuyame? jeichichi José.

¹⁶Bapong jumenota:

—Ápara wenawenang tsauya taeweicho jiwi. Ínkane netsipáebare, ¿eta xota metha ovejamona yapukainompa? jei José.

¹⁷Bárapo pebin jumenota, jeye:

—Báyatha barapomonae wárapa po nakua weye. Barapomonae jumetang xua jeye: ‘Dotán nakua beya bü poinchi’, jei.

Néxata José peweicho jiwi pekoyo weya taponá, yawa kaxina Dotán nákuatha. ¹⁸José peweicho jiwi tajü tainchi xua patopaena. Pewünaetha José, peweicho jiwi yábara nantükuí wétatsi xua pebexubiwa tsainchi. ¹⁹José peweicho jiwi tatsi najéi:

—¡Pataema, dawarena pong peamichinaein! ²⁰Anetha bexubinchi, bapoxonae müthütha xubinchi. Waxa tsipaebinchi xua José xainchi unupin, pong ayéi. Xain bapoxonae ekeicha jopa amichinae tsai biyo.

²¹Poxonae Rubén baxua peweicho yábara jumetane, peweicho bekapanepaena. Rubén jeye:

—Bara tsane, jopa pabexúbinde. ²²Jopa pajana exanaeinde. Saya jame müthü paxoreinka, po müthü boka irasaina xuépana tsúrukuae nákuatha. Jopa pabexúbinde bapong.

Rubén nantaxeina xua José pekapanepaewa tsainchi, xua peweicho bexa peka-ponaenexa tsane páxatha.

Meje poxonae José peweicho jiwi kaenáetatsi, xuano poxonae ichamonae kapoinchi Egipto nakua beya

²³Poxonae José patopa ichaxota jinompa peweicho jiwi tatsi, peweicho jiwi jumaxuénatsi pía paparuwa, po paparuwa xua be dorouto, xua aiña müü ítene xeina, xua namaxátata.

²⁴José peweicho jiwi wáetabatsi, yawa müthü xorékatsi, po müthü tsewa xua poxoru mera aibi. ²⁵Barapoxonae barapomonae ena xua pexaenexa. Jemeicha barapomonae taerúküpa xua pexaiña tadendénatsi pomonae xua wárapa Galaad nakua weya, pomonae Ismael pía pemómoxi susato jiwi tatsi. Barapomonae pía caméllongtha kajjinka xua petuxueiwang, icha petuxuéiwangno kajjinka xua bálsamo nae nain matawüing, icha petuxuéiwangno kajjinka mirra nae nain matawüing xua pekaenaetsinexa Egipto nakua beya. ²⁶Néxata Judá peweicho jiwi barái, jeye:

—Daxua ápara yábara aibi xua wabexubixae tsane waeweicho. Matáütano jopa naka itaküüpaeyo xua namicha wabexubiwa waeweicho. ²⁷Jame saya kaenaetsinchi Ismael pía pemómoxi susato jíwitha tatsi. Jopa bexubí tsainchi, tsipéi bapong ápara waeweicho.

Bara baxua Judá peweicho jiwi jumebarü jejeichi. ²⁸Pomonae pekaenaetsi jiwi xua Madián nakuapiwi, José peweicho jiwi tatsi taxentapoinchi. Barapoxonae José peweicho jiwi müthü jutsínatsi, yawa kaenaetaxotsi barapomonaetha, xua pentoma veinte po parátixi napumatómata pomonaetha, pomonaexae icha wüingno Ismael pía pemómoxi susato jiwi tatsi. Bara barapomonae José kapoinchi Egipto nakua beya.

Meje poxonae Jacob pía pexui muxuitórobatsi xua José yábara náerabatsi

²⁹Poxonae Rubén kaibeya pona müthü beya, jopa peweicho kaxinaeyo müthütha, tsipéi bapong aicháwiya poxonae Ismael pía pemómoxi susato jiwi tatsi pata. Bapoxonae bapong pía paparuwa nantákari tsitsinaxuba xua bichokono peweko-yeixae. ³⁰Bapoxonae kaibeya pona ichaxota jinompa peweicho jiwi tatsi. Jeye:

—¡José aichúrukuae! ¿Eta xuaunxae exanakuaein? ¿Ínkane metha bapong?

³¹Néxata poxonae Rubén peweicho jiwí tsipáebatsi pokoyeneya xua báyatha José kaenátatsi Ismael pía pemómoxi susato jíwítha tatsi, bapoxonae barapomonae pita José pía paparuwa tatsi, yawa cabrito jánatha kaxueba paparuwa, po cabrito xua barapomonae bexuba. ³²Barapoxonae barapomonae kápona bárapo paparuwa paxa tatsi beya. Barapomonae jeye:

—Meje po paparuwe pataebotang. Ínkane matha taema icha metha nexanto pía paparuwa, jei barapomonae.

³³Poxonae Jacob tane xua ápara pexanto tatsi pía paparuwa tatsi, jeye:

—¡Aa! ¡Ápara taxanto pía paparuwa tatsi! ¡Unupin xaexotsi, xua yawa yapiwa xainchi! jei Jacob.

³⁴Jacob pía paparuwa nama tsitsinaxuba poxoru wekoyéi. Bichokono itabara tsobia yawa pexanto siwawekoyéi aiña matakabin. ³⁵Jacob bekein daxita pexántixi itanuwé matatéikatsi, yawa pebiwi bekein paxa itanuwé matateika, íchitha bapong baxua aichaxaibi xua pía pexui peitanuwé matateikáewatsi. Íchitha bapong áwiya wekoyéi tsóponae, yawa bapong jeye:

—Áwiya methaunxuae wekoyang tsóponae tsane beya poxonae taein bapong ichaxota pateibathopa pomonae werapeiba.

Barapoxonae José paxa siwawekoyéi tsoponaetsi.

³⁶Egipto nákuatha madianitamonae José kaenaetaxotsi pongtha, pong pewüng Potifar. Bapong Potifar, pong aiñakuí, pong Pekanamataxeinaein pomonae bo peewatsiwi, pong Egipto nakua peewatsin píabo tatsi.

Meje xua pong pewüng Judá irü powa pewüng Tamar

38 ¹Matakabi jopa, po matakábitha Judá kuenta wárapa peweicho jiwí. Bapong Judá wárapa yawa pópona pebin piabotha tatsi, pong pewüng Jira, yawa xua bapong, pong adulamitamonaepin. ²Barapomonae pía tómaratha Judá itakoxone éxana, pong pewüng Súa pexantiyo tatsi, pong cananeomonaepin. Judá perüünakóyoba barapowa. ³Poxonae báyatha nabarü popónabe Judá píowa tatsi pexuyo xeina. Bapoxonae bapowa tanakatsíwatsi pebinwüito yawa wüngduta pewüng Er, jei.

⁴Ekeicha barapowa yaperüwajina ichiyo. Bapoxonae bapowa tanakatsíwatsi pebinwüito yawa wüngduta pewüng Onán, jei. ⁵Ekeicha bapowa yaperüwajina ichiyo yawa tanakatsíwatsi pebinwüito pewüng Sela, jei. Bapong Sela nakatsiwa poxonae Judá pópona Quezib tómaratha.

⁶Judá tawaba yábüyo pexanto poxonae piño, pong matapin, pong pewüng Er. Bapong nakóyoba, perüünakóyobatsi powa pewüng Tamar. ⁷Íchitha Nakom, pong Pekanamataxeinaein jopa baxua tawüünaetsi xua Er pokotsiwa abe éxana. Daxota Nakom, pong Pekanamataxeinaein éxana xua Er tüpa. ⁸Néxata Judá pexanto barái, pong Onán poxonae piño, jeye:

—Bapowa pire, powa eweicho kuenta tüpa yawa éxande pokotsiwa bewa exa-naem barapowa nexa, tsipéi bapowa nekotsiwa yawa xua néntapin pemómoxi susato jiwí pexeinaenexa xua xamxae, tsipéi baxua wakuikoyene.

⁹Íchitha Onán yaputane icha pexui tanakatsiwinchi, ichamonae yábara nantaxeinaena xua bárapo pexui ápara jopa pía pexui tatsi. Daxota poxonae Onán píowa kenta exaneiba, kopiya íratha napameibebéi tsaibi xua jopa pexui pexeinaenexa bapówatha. Daxota Onán baxua éxana xua peweicho tatsi jopa pexeinaenexa

pía pemómoxi susato jiwi, xua Onán peweicho petsita-exanaexae pexui. ¹⁰Nakom, pong Pekanamataxeinaein, bichokono aichaxaibi baxua xua pokotsiwa Onán éxana. Daxota barichi Nakom, pong Pekanamataxeinaein, tüpa éxana, Onán tüpa éxanatsi. ¹¹Néxata Judá barái pekopéiñotha, powa Tamar:

—Abü axa piabotha póponare beya poxonae Sela taxanto wichabina. Jopa ichüing pitsinde.

Íchitha Judá xaniwaicha nantaxeina xua mexeya pexanto tabarichichainchiwéi, xua mexeya tatüpaeinchiwéi pong Sela, ichi Sela pewéichobe tatsi ichi, xua túpabe.

Daxota Tamar paxa piabotha pópona.

¹²Bara írürü aiña wei weta, bapoxónaerü, Judá píowa tatsi tüpa, powa xua pong Súa pexantiyo tatsi. Pewüing bapowa Batsúa. Poxonae Judá najüntübükoyene kópata xua píowa siwawekoyéi, bapoxonae wárapa Timnat tómara beya, ichaxota jinompa pomona na thaba pía ovejang. Bapong Judá pía jintong kueyatatsi, pong pewüing Jira, pong adulamitamonaepin. ¹³Judá pekopeiño tatsi, powa pewüing Tamar, bapowa tsipáebatsi ichamonae jeye:

—Axuyo pona Timnat beya xua penathabinexa pía ovejang, jei.

¹⁴Bapoxonae bapowa pía dorouto namaxuena xua po dorouto kopiya namaxátata, xua poxoru poxonae pekuenta tüpaewayotsixaetsi pía pebin. Bapowa náitabara ákata paparúwatha. Yawa paparúwatha xua bichokono apiya namaxátata xua daxita bapowa jopa peyaitaenéxatsi. Bapoxonae bapowa eka Enaim tómara pía peyakainchadutsíwatha, xua po peyakainchadutsiwa dukua po namto xua Timnat tómara betaerukuiya.

Daxita bapowa baxua éxana tsipéi yaputane xua Sela metha báyatha piño, xua bapowa pekotsiwa tatsi xua dáichitha áwiya jopa barü poponaeyo bapong. ¹⁵Bapoxonae Judá tane bapowa. Bapong nantaxeina xua mexeya ítara powa pesikuiweiweináewawei xua bapowa pebiwi pejeichiwa, tsipéi bapowa daxita náitabara ákata. ¹⁶Bapoxonae Judá namto weya pona xua imoxoyo pekakita ungkuaenexa bapówatha. Judá jeye bapówatha:

—¿Nekópatame xua taka ishamaitungkuaeinexa tsainchi?

Íchitha Judá jopa yaputaeyo xua ápara pekopeiño. Barapowa jumenota:

—Jiña, ¿eta xua nekatichi xua neishamaitúnguame pentoma? jei bapowa.

¹⁷Judá jumenota:

—Xam nexa, itorobin cabrito xua takuráratha ungkua.

—Je, bara wüünae, —jei bapowa—. Íchitha kopiya matha nekobénare pokotsiwa xua xeinaein beya poxonae inta itorobadenáename cabriyo.

¹⁸Judá jumenota:

—¿Eta xua kata kopatsinchi? jei.

Bapowa jeye:

—Nékobe nare jiña anillo, yawa xua newiyainaewa, yáwano po naewa nekobena babátame.

Bapoxonae baxuang Judá kata, yawa bapoxonae ishamaitungkua yawa itapexuita.

¹⁹Bapoxonae bapowa Tamar pona. Pírapae bapowa namaxuenaxuba xua daxita naákata. Bapoxonae bapowa namaxátata icha paparuwa, po paparuwa namaxátata xua pekuenta tüpaewayoxaetsi pía pebin. ²⁰Pirapaeyo Judá

kaitoroba pía jintong cabriyo, po pía jintong tatsi adulamitamaepin. Daxota Judá itoroba xua bapowa ekeicha kaewa pekatsinexa anillo xua peyamüüjinaewa yawa xua wiyaina, yawa naewa. Íchitha Judá pía jintong tatsi jopa kaxinaeyo bapowa. ²¹Néxata Judá pía jintong tatsi yáíñaba po pebiwi xua baxota jinompa, jeye:

—¿Ínkane eta xota pópona powa pesikuiweiweinaewa, powa Enaim tomarapiwayo, powayo xua báyatha námtotha ekeiba?

Bárapo pebiwi jumenota, jeye:

—Xote dapokotsiwayo aibi, powa pesikuiweiweinaewa, jei barapomona.

²²Néxata ekeicha bapong, pong Judá pía jintong tatsi, pona Judatha. Bapong jeye Judatha:

—Jopa kaxinaeño yábüyo. Írürü pebiwi pomona baxota jinompa netsipaeba pinae baxota aibi powa pesikuiweiweinaewa, jei bapong.

²³Judá jeye:

—Bárabü barapowa daxita baxuang xeinaena, xua daxota jopa ichamonae wanaka kuikapanaenéxabe xua barapowa tana nemuxujaiñabixae. Íchitha tsipaebin xua xam kaitoróbatsi xua kapóname cabrito xua barapowa jopa kaxinaem.

²⁴Poxonae imoxoyo be akoibi po xométo be yapukaewa, bapoxonae ichamonae pata Judatha yawa jeye:

—Nekopeño icha pebiwi ishamaíta, daxota ánoxuae yaperüwajina pexuyo.

Néxata Judá jumedangweya wawái, jeye:

—¡Papire barapowa yawa pataure! jei Judá.

²⁵Íchitha poxonae bapowa teikómpatsi, bapoxonae bapowa najumekaitoroba ichüngtha xua paxúyotha, jeye:

—Pong xua daxita xeina baxuang, bapong pexui inta éxana. Payábara nantana-xéinare xua pong daxita baxuang piyawa, xua anillo xua peyamüüjinaewa yawa xua wiyaina, yawa naewa penayüüyüü tungkueibinaewa, jei bapowa.

²⁶Poxonae Judá tane daxita baxuang xua piyawang, bapoxonae jeye:

—Metha bapowa xaniwaicha beta éxana beyakaincha xang, tsipéi jopa daxua exanaeño xua bapowa peperüü wenakoyobinexa taxanto, pong Sela.

Yáwano bápana jopa ekeicha ishamaichiyo bapówatha.

²⁷Tamar pebinwúütobe tanakatsíwatsi xua namaékabe. ²⁸Poxonae nakatsiwa kaeyo xua bapongbe jíwana namaxüyotsina, néxata powa peyawenaewa xua pexui nakatsiweiba, bapowa jiomúütotha kobeketa pomüütotha tsobia, yawa bapowa jeye:

—Barapong kopiya nakatsiwa, jei.

²⁹Íchitha bapoxonae barapong ekeicha kaewa namaxütokuntábiya. Barapoxonae peweicho tatsi kopiya nakatsiwa. Daxota barapowa, powa yawena poxonae pexui nakatsiweiba, jeye:

—¿Eta bichim xua kopiya nantakauchatabíkame? jei.

Bapoxonae bapowa wüngduta pexúyotha: “Fares”, jei. [Hebreo jumetha po wüng: “Fares”, jei yábara jei: “Pong nantakauchatabika”, jei.] ³⁰Bapoxonae ichiyo kotakaya nakatsiwa, pong xua kobekétatsi xua xota müü tsobia. Barapong wüngdútatsi po wüng: “Zéraj”, jei. [Hebreo jumetha po wüng: “Zéraj”, jei yábara jei: “Tsobia be kónotha”, jei.]

**Meje yábara xua poxonae José kanamataxeina
daxitang xua Potifar piyawang tatsi**

39 ¹Poxonae José kapoinchi Egipto nakua beya xua pekaenaetsinexa tsainchi baxotiya, baraxotiya Egipto nakuapin, pong pewüing Potifar, kómota José Ismael pía pemómoxi susato jíwitha tatsi, pomonae José kapoinchi Egipto nákuatha. Bapong Potifar pong kanamataxeina pomonae Egipto nakua peewatsin píabo tatsi petayapu eenaewichi.

²Íchitha José yawénatsi Nakom, pong Pekanamataxeinaein, xua beta éxana pía penakuichiwa. Yáwano José beta tanakuita poxonae pía pentakaponaein piabotha tatsi tapópona, pong bárapo Egipto nakuathapin. ³José pía pentakaponaein yaputainchi xua José yántatsi Nakom, pong Pekanamataxeinaein. Yáwano yaputane xua Nakom éxana xua José bara wüünaeya eexanapona. ⁴Daxota José beta tsita exanapona pía pentakaponaeinchi. Yáwano José éxanatsi xua pong peyawenaein. Yáwano José kana éxanatsi pentakaponaein Potifar piabotha tatsi xua daxita pomonae penakuichiwi kanamataxeinátsi. José itoróbatsi xua daxita kanamataxeínano xua Potifar piabotha xeina.

⁵Po matakabi weya xua poxonae Potifar itoroba daxitang xua xuang xeina piabotha xua José itoróbatsi yáwano xua José kanamataxeina, bapoxonae Nakom, pong Pekanamataxeinaein wüünae taéxana bárapo Egipto nakuapintha yáwano xua xuang bapong xeina, bomüxütha yawa pábitha, tsipéi José beta petaexanaexae xua daxita Potifar piyawang tatsi. ⁶Poxonae José yapu-eena daxitang, bapoxonae Potifar jopa yábara nántabü exanaeyo baxuang. Saya meisha yábara nantanaxeina nawita pexaewa xua xane.

**Meje yábara Potifar píowa tatsi poxonae José
naerabiya abe yábara páebatsi**

Bara José daxita tsita wüünae náexana xuano bichokono pexeíng. ⁷Bapoxonae icha matakabin yapukaewa. Bapoxonae José pía pentakaponaein píowa tatsi poxonae José tainchi, bapowa yábara itakuiwüünaetsi. Kaentakeitha bapowa jeye Josetha:

—Xam neishamaitúngkuare, jei.

⁸Íchitha José jopa baxua beexanaeyo yawa jumenota, jeye:

—Matha taema, tananentakaponaein neitoroba xua yapu-eéng daxitang xua xuang xeina. Yawa bapong jopa yábara nantaxeinaeyo piyawang poxonae baraxote popónangje. ⁹Po bothe jopa ichüing poponaeyo pókotsin ichi xang ichi, saya xang ápara. Tananentakaponaein bara nekópata xua taxainaewa daxita xua xuang xeina piabotha. Saya meisha jopa nekopatsiyo xua xam takapichiwa tsainchi. Bapong ápara píowa tatsim. Baxua jopa neitaküüpaeyo xua taexanaewa, tsipéi baxua Nakom bichokono tsita abetsi.

¹⁰Bekein barapowa José wábatsi nawita daxita matakabi xua José peishamaitungkuaenexa barapówatha, yáwano imoxoyo pebokaenexa, íchitha José jopa jumejeyo xua bapowa waba. ¹¹Kaentakeitha José botha joniya xua peexanaenexa pía penakuichiwa, matáütano irü baraxota jiwaibi. ¹²Barapowa wáetaba José pía paparuwa tatsi, yawa jeye:

—Neishamaitúngkuare, jei.

Íchitha José naetsíriwa, yawa pía paparuwa kuenta naetsíriwa. Bapowa pekó-betha komaungkua po paparuwa naiña weruya. ¹³Poxonae bapowa yaputane xua pekó-betha xeina paparuwa xua takuenta naetsiríwatsi, ¹⁴bapoxonae bapowa waba pomonae bárapo botha nakuita yawa jeye barapomonaetha:

—Pataema, tapebin maisha nákata kapatópano pebin, pong hebreomonaepin. Ánoxuae bapong naka aura éxana. Bapong taxaiña jondena yawa ichichipa neishamaitungkua, íchitha xang najumetsébiya wawang. ¹⁵Poxonae bichokono najumetsébiya wawang, bapong naetsíriwa, yawa xote paparuwa kuenta naetsíriwa.

¹⁶Bapoxonae bapowa bota José pía paparuwa tatsi beya abü poxonae José pía pentakaponaein tatsi patopa botha. ¹⁷Néxata barapowa bara jumichiya jüpa paeba pía pebintha, jeye:

—Pong jiña nekatanakuichin, pong hebreomonaepin, pong painta kapatópame, bapong tutu jondena yawa ichichipa inta abe éxana xua daxota naka aura éxana. ¹⁸Íchitha, poxonae bichokono najumetsébiya wawang, bapong naetsíriwa yawa xote kuenta naetsíriwa pía paparuwa, jei barapowa xua pía pebin tsipaeba.

Meje poxonae José jiwi pekübibotha étatsi

¹⁹Barapong José pía pentakaponaein tatsi bichokono anáepana poxonae baxua jumetane, xua píowa tsipáebatsi xua jeye: “Baxua inta éxana jiña nekatanakuichin”. ²⁰Néxata José wáetabatsi yawa kapoinchi jiwi pekübibotha ichaxota ichamonae jebéibatsi xua poxonae báyatha téikatsi, xua poxonae pong bárapo Egipto nakua peewatsin itoroba. José ekeiba baxota.

²¹Bekein José jiwi pekübibotha étatsi, íchitha José yántatsi Nakom, pong Pekanamataxeinaein, yawa José yawénatsi beta peantobexaetsi. Nakom kana éxana xua José beta tsita éxana pong jiwi pekübibó peewatsin. ²²Pong jiwi pekübibó peewatsin José itoróbatsi xua pekanamataxeinaewa tsane pomonae jiwi pekübibotha pejebíwatsi. Matáütano daxita kanamataxeina daxita pokotsiwang éxana pomonae jébatsi jiwi pekübibotha. ²³Pong jiwi pekübibó peewatsin jopa yábara nantükoyene exabiyo xua José daxita pe-eeanaewa, tsipéi José bara Nakom yawénatsi xua daxita beta peexanaewa.

Meje yábara poxonae José xua yábara paeba aiña michináebobe xua ichüngbe amichinae

40 ¹Pírapae, xua poxonae be kaentakabíyobe yapukaewa xua José étatsi jiwi pekübibotha, bapoxonae pong Egipto nakua peewatsin takaponéibatsi xua peapaewa, írürü pong Egipto nakua peewatsin takaponéibatsi pan, bapongbe Egipto nakua peewatsin kasebatsibe. ²Egipto nakua peewatsin yábara anaepánabe pongbe xua meje: pong Egipto nakua peewatsin takaponéibatsi xua peapaewangf, írürü pong xua barichi xua Egipto nakua peewatsin takaponéibatsi xua pexaewa.

³Egipto nakua peewatsin kui-itoroba xua bárapo pebinbe maxükübiya waeta-biya kaponáeinchibe, pong Pekanamataxeinaein, pomonae jiwi pekübibó peyapueenaewi píabo tatsi beya xua ichaxota ungukea po bo jiwi pekübibó. Bárapo jiwi

f 40.2 Pong Egipto nakua peewatsin takaponéibatsi xua peapaewa vino mera, bapong kopiya matha mene jüjütsiya apeiba pewúnaeya poxonae Egipto nakua peewatsin peapaewa tsane bárapo mera xua bárapo korotíyotha.

pekübibó po botha báyatha José étatsi. ⁴Pong jiwi pekübibó peyapuenaein, bapong José kui-itoróbatsi xua bárapo pebinbe beta peyapuekaenexa tsáinchibe. José bapongbe ápatabe pexaewa. Barapongbe kaena báyatha étatsibe jiwi pekübibotha.

⁵Icha merawitha, pongbe jiwi pekübibotha étatsibe, bapongbe barompaya amichinaebe. Barompaya pía michinaebe xéinabe xua po michináebobe seikaya xeina xua yábara kaunúnuta.

⁶Baya José patopa ichaxota bapongbe ékabe. José tane xua bapongbe itabara wekoyeibe. ⁷Daxota José yáíñaba bapongbe jeye:

—¿Eta pokotsiwa metha ánoxuae icha itabara paxéinamebe? jei José.

⁸Bapongbe José jumenótatsibe, jeibe:

—Paxangbe paamichinaeinbe, íchitha dapong aibi, pong xua xuya yábara pana netsipaebínabe bárapo michinaebo, jeibe.

Bapoxonae José baraibe bapongbe:

—Moya panetsipaebarebe xua paamichinaembe tsipéi ba Nakom jiwi yaweníbatsi. Bapong neyaputane exanaena xua xuya yábara paebin xua paamichinaembe, jei José.

⁹Néxata pong kaponeiba xua peapaewa, bapong kopiya matha José tsipáebatsi, jeye:

—Uvakuéi ünbotó kamaitang xua táitabara deka yaünbodukua. ¹⁰Bárapo uvakuéi ünbotó pin ünbotó tsóponae, yawa pentono tsóponae. Bapoxonae uvakuéi tsofia tsóponae. ¹¹Takobetha etang peapaewa, Egipto nakua peewatsin pía peapaewa tatsi. Néxata pitang uvakuéi yawa pemera yukang Egipto nakua peewatsin pía pekaapáewatha. Kotakaya takoutha Egipto nakua peewatsin katang pía kóbetha xua pía pekaapaewa, jei pong kaponeiba peapaewa.

¹²José jumenotsiya jeye:

—Ápara jiña michinaebo meje: xua akoibi po uva ünbotó ápara xua akoibi po matakábibe yábara kaununutapaeba. ¹³Poxonae akoibi po matakábibe jopaena, Egipto nakua peewatsin ekeicha kakana exanaena xua tanakuítame bapong. Xam kaewa katsíname peapaewa Egipto nakua peewatsin pekóbetha, ichi ichim xua poxonae kopiya éxaname. ¹⁴Poxonae baxua yapukaewa nekayábara jüntanáinare. Néxata xam neyábara páebare Egipto nakua peewatsintha xua taneishanaxubinexa tsane bárapo bo weya xua tana neyawenaewam tsane. ¹⁵Ápara newáetaba hebreomonae pía ira tatsi weya. Jopa bewa xote neetsi jiwi pekübibotha, tsipéi ápara jopa abe exanaeíño bárapo írathe.

¹⁶Pong pexaewa kaponeiba, poxonae bapong tane xua José beta paeba ichüing yábara, bapong jeye:

—Xua xang seikaya amichinaein, akoibi po kótebe tantatututha eka, xua pan bobena po pan íñapana. ¹⁷Po kótebe athawé ekeikabobena pan xua tsijuntutujeba xua xeika xua Egipto nakua peewatsin pexaenexa. Íchitha peyapupunaewi yapata xua pexaenexa xua daxita tantatututha káponang xua akoibi po kotéthabe, jei pong pexaewa kaponeiba, xua Egipto nakua peewatsin takaponéibatsi.

¹⁸Néxata José jumenotsiya jeye:

—Ápara jiña michinaebo meje: xua akoibi po kótebe ápara xua akoibi po matakábibe yábara kaununutapaeba. ¹⁹Poxonae akoibi po matakábibe wétsina, Egipto nakua peewatsin itorobina ichamonae xua asiya naetha kayakoibo müü dutsina. Peyapupunaewi kawixaena.

²⁰Poxonae akoibi po matakábibe tsuxubi, Egipto nakua peewatsin yantakabi jopa xua po matakábitha nakatsiwa. Bapong Egipto nakua peewatsin pin fiesta éxana daxita piamonae tatsi nexa, pomonae Egipto nakua peewatsin tanakuítatsi. Daxita barapomonae peitütha tatsi, Egipto nakua peewatsin itoroba xua pekübibó weya pekopatabinexa tsainchi, pong kaponeiba peapaewang, irü pong kaponeiba pan.

²¹Pong kaponeiba pía peapaewa, bapong kaewa kakana éxanatsi xua ekeicha kaponeiba peapaewa. Bapong kaewa katsina peapaewa Egipto nakua peewatsin pekóbetha, ichi kopiya báyatha ichi. ²²Íchitha pong pan kaponeiba, Egipto nakua peewatsin itoroba xua naetha yakoibomúü dutsinchi pebexubinéxatsi icha be pókotsi koyeneya báyatha José paeba. ²³Íchitha pong kaponeiba xua peapaewa Egipto nakua peewatsin nexa, José yábara jüntemáinatsi xua José peyawenaewa tsainchi.

Meje poxonae José xuya tapaeba xua Egipto nakua peewatsin amichinae

41 ¹Írürü aiña weibe xentaba. Kaentakeitha Egipto nakua peewatsin amichinae yawa nakamaita xua Nilo mene itapatha unguwa.

²Egipto nakua peewatsin kamaita xua siete póyobe ménetha juina xua pexeíña vacang yawa naxaiñawaeta. Bárapo siete vaca póyobe naepanaewa xayompa xua thüüthüüwa. ³Bárapo siete vaca póyobe pekoyo wetajujuínatsi mene wétsina icha vacang, po vacang jopa naxaiñawaetsiyo yawa yüüyüüwa. Bárapo vacang mene itapatha umena ichaxota icha vacang umena, xua siete póyobe xua po vacang naxaiñawaeta. ⁴Bapoxonae bárapo vacang, po vacang kotakaya jujuina xane, xua po vacang yüüyüüwa, bárapo vacang po vacang kopiya jujuina xainchi. Bapoxonae Egipto nakua peewatsin nakosataxuba.

⁵Íchitha ekeicha Egipto nakua peewatsin maitungkuwa. Ekeicha amichinae. Kamaita xua siete po botíyobe, xua trigobotong, wüünae nawita, xua xuwina bara kae bótotha tsina. ⁶Bárapo siete po botíyobe pekoyo wetapichipéinatsi icha siete po botíyobe. Bárapo siete po botíyobe yaboto tsakena yawa jopa beta nakoichiyo poxoru jóiboxae, xua po joibo píchapa ichaxota pokotsiwa xometo wekoina. ⁷Bárapo siete po botíyobe, po botíyobe xua yaboto tsakena, xane po siete po botíyobe xua kopiya juina, po siete po botíyobe xua yaboto wüünae nawita, bárapo siete po botíyobe xainchi. Egipto nakua peewatsin nakosataxuba. Yaputane matapaiña xua deta kou ápara amichinae.

⁸Íchitha baya yábara nantüéxana nawita. Bapoxonae namakaitoroba xua daxita pepatsinexa, pomonae ba yábara wüünae yaputaiba pokotsiwang xua bexa exa-neibina, xua pepatsinéxano egiptomonae, pomonae peyaputaewi. Poxonae Egipto nakua peewatsin tsipaeba xua amichinae, daxita barapomonae jíwana jopa itaküüpaetsi xua kaunúnuta xua bárapo michináebobe paeba. ⁹Néxata pong takaponeiba peapaewa, xua Egipto nakua peewatsin takaponéibatsi, bapong Egipto nakua peewatsin baraichi, jeye:

—Yaputang xua abe éxanang. ¹⁰Poxonae xam, nakua neéwatsin, nekasébame yawa kasébame ichüng, pong jiña nekatanakuichin, pana neitoróbame jiwi pekübibó beya. Bárapo bo pong kanamataxeina, pong pomonae jiwi pekübibó peyapukainompéibiwi, bapong píabo tatsi. ¹¹Kae merawitha, pong kata kaponeiba

pexaewa xua nexaibinexa, bapong amichinae yawa irü amichinaein. Bárapo michináebobe barompaya xeina xua yábara kaunúnuta.

¹²Baxota panabarü pópona pewowin, hebreomonaepin, pong jiwi pekübibó peyapukaungkuaein tanakuítatsi. Bapong patsipaebang xua paamichinaein. Barapong yábara pana tsipaeba bárapo michináebobe. ¹³Báraxua báyatha kana exainchi ichi be pókotsi koyeneya báyatha bapong pana netsipaeba, xua poxonae tamrópata pítabang xua kata nakuítatsi ekeicha, yawa xua poxonae ichüng saya naetha yakoibomúü dutsinchi xua pebexubinéxatsi.

¹⁴Egipto nakua peewatsin najumekaitoroba xua José pewabinéxatsi, kaena naiña wábatsi jiwi pekübibó weya. José naopinasibaxuba yawa icha paparuwa namaxátataba yawa Egipto nakua peewatsin peitabaratha táungkuatsi. ¹⁵Egipto nakua peewatsin José baraichi:

—Xang amichinaein, dapong aibi pong kaununutsiya paeba xua bárapo michinaebo paeba. Íchitha yaputang poxonae jumetaneme, bara kaitaküüpa xua yábara kaununatsiya páebame bárapo michinaebo.

¹⁶José jumenota Egipto nakua peewatsin jeye:

—Báraxua yábara jopa neitaküüpaeyo. Íchitha Nakom aunxuae neyawenaena xua xuya tayábara paebiwa tsane bárapo michinaebo, xua daxota beta jiña neponaenexa tsane.

¹⁷Egipto nakua peewatsin José baraichi:

—Xua amichinaein, xang asiya unguang Nilo mene itapatha. ¹⁸Mene wétsina jujuina vaca siete póyobe, pexeña vacang yawa naxaiñawaeta, xua naepanaewa xayompa xua thüüthüüwa. ¹⁹Bárapo vacang pekoyo wétsina tajujuínatsi icha siete póyobe vacang jopa pexeña vacangyo yawa yüüyüüwa. ¡Bápana xang jopa taeiño vacang daxita Egipto nákuatha pókotsi vacang ichi bárapo vacang ichi, xua bichokono yüüyüüwa! ²⁰Bárapo vacang xane, xainchi po vacang kopiya jujuina, po vacang naxaiñawaeta. ²¹Íchitha poxonae najainweta, xua icha vacang najainwétatsi, áwiya yüüyüüwa íchitha. Dapokotsin aibi xua yaputane xua bárapo vacang báyatha xane, tsipéi áwiya yüüyüüwa. Bapoxonae nakosataxubang.

²²Bapoxonae ekeicha amichinaein siete trigo po botíyobe. Nawita xeina trigoxú yawa yaboto wüünae xua xuwa saya bara kae bótotha tsina. ²³Bárapo trigobotong pekoyo wétsina taxúwatsi icha siete po botíyobe xua jopa beta nakoichiyo yawa xua yaboto tsakena poxoru joibo nawita, po joibo píchapa ichaxota pokotsiwa xometo wekoina. ²⁴Bárapo siete po trigobotíyobe, po trigobotong jopa wüünaeyo, xane siete po trigobotíyobe pexeña botong, bárapo botong xainchi. Daxita barapomona, pomona peyaputaewi, yábara tsipaebang xua amichinaein. Dáichitha barapomonae jíwana jopa inta xuya yábara netsipaebiyo bárapo michináebobe.

²⁵Néxata José Egipto nakua peewatsin jumenótatsi:

—Aiña michináebobe xua xam amichinaem, ápara bara kae michinaebo. Nakom yábara katsita-itüüta xua pokotsiwa bexa exanaena. ²⁶Siete póyobe vaca xua pexeña vacang, ápara xua siete po weibe. Bara jüta ichi xua trigoboto siete po botíyobe xua pexeña botíyobe. Bara namichinae júpabe. ²⁷Siete póyobe vacang xua abe xuano xua yüüyüüwa, xua po vacang kotakaya jujuina, barichi ápara xua siete po weibe. Bara jüta ichi xua trigo siete po botíyobe xua po botong tsakena yawa xua jopa beta nakoichiyo poxoru joibo, po joibo píchapa ichaxota pokotsiwa xometo wekoina. Baxua siete po weibe tsane xua pin mayayo nakua tsúrukuae tsane.

²⁸”Baxua xaniwaicha tsane be xua páebang. Nakom yábara katsiwüünae muxu-duta xua bexa exanaena. ²⁹Siete po weibe jopaena xua po weithang pexaewang nawita xeinaena daxita írangtha xua Egipto nákuatha. ³⁰Bapoxonae siete po weibe jopaena po weithang xua pin mayayo nakua tsúrukuae tsane. Dapong aibi tsane xua yábara nantanaxeina xua báyatha Egipto nákuatha nawita xeina pexaewa, tsipéi bárapo pin mayayo abe tsúrukuae tsane bárapo Egipto nákuatha.

³¹”Poxonae pin mayayo jainbo patopaena, bichokono abe tsane. Po pexaewa xua báyatha nawita Egipto nákuatha, daxita bárapo pexaewa aichúrukuae tsane. ³²Bárapo michináebobe najúpabe xua xam amichinaem, tsipéi Nakom nakana kuiweta xua baxua peexanaenexa. Imoxoyo baxua naiña exanaena.

³³”Metha jame maisha wüünae xua jéitame pebin, pong bichokono peyaputaen. Bapoxonae éxande xua bapong peewatsin tsane daxita írang xua Egipto nákuatha.

³⁴”Bewa exanáe pokotsiwe: Itapere pentakaponaewi, pomonae xua bárabü ponaena daxita bárapo nákuathe xua pejotsinexa pokotsiwang naweta Egipto nákuatha xua bárapo siete po weibetha nexa poxonae jopa xaexaenakaeyo tsane. Barapomonae bárabü jíwana nonotsiniyaena poxonae 5 xuangbetha tsíniya xua penawetsiwang, xua pejíwana jejebaponaewa tsane. ³⁵Bárabü trigoxú kaetukaetu-tsina xua poxu nakoichina pexeíña weithang, po wei xua imoxoyo tsane. Bárabü barapomonae jebina xua xam jíña nekanamataxeinaenexa xuano xua bárabü tómaratha jebina xua jiwi peapatsinéxatsi tsane. ³⁶Bapoxonae trigoxú bobenaena xua bárapo nákuatha nexa, xua jiwi jopa piyain pewerapaenexa siete po weibetha xua poxonae pin mayayo nakua tsane bárapo Egipto nákuatha.

Meje xua poxonae José kana éxanatsi pong xua taitoroba Egipto nákuatha Egipto nakua peewatsin nexa

³⁷Daxita baxua xua José paeba, Egipto nakua peewatsin tsita wüünaetsi. Bari-chi, pomonae Egipto nakua peewatsin tanakuítatsi, barapomonae daxita baxua itakuiwüünaetsi. ³⁸Egipto nakua peewatsin tsipaeba barapomonaetha jeye:

—Dapokotsin aibi icha pókotsin iche xua írürü Nakom pejumopetünaxü yanta-sírü, jei Egipto nakua peewatsin.

³⁹Barichi Egipto nakua peewatsin José baráichichi, jeye:

—Ajibi dapong pong yaputane yawa xua bichokono peyaputaen xua icha xam ichim. Barápara baxua Nakom yábara yaputane kaéxana daxita baxuang. ⁴⁰Kaé-xanatsi xua inta neyapu ewatsiwa tabo. Tamonae kajumekowüntsina pokotsiwa itoróbame. Saya xang aiñakuin beyakaincha xam, tsipéi xang yatsikaewa pong jiwi itorobiya taéwatsin bárapo nákuathe. ⁴¹Taema, xam kaéxanatsi xua xam inta itorobeibíname daxita Egipto nákuatha. ⁴²Daxita jiwi peyaputaenexa xua José kanamataxeina Egipto nakua peewatsin nexa, daxota Egipto nakua peewatsin nakobesí wejonta anillo, po anillo piabómüxü kanaxóbiya éxana, xua pentakaponaen piyawa tatsi. Bapoxonae José kobesí xátatatsi. Bapoxonae Egipto nakua peewatsin itoroba xua José jumaxatatinchi po paparuwa bichokono wüünae, xua po paparuwa aiña matoma. Yáwano José wíyatatsi wárowa, po wárowa oro nain matawüng.

⁴³Bapoxonae José joniya éxanatsi karonae, po nae kotakaya dukua xua Egipto nakua peewatsin pía nae tatsi, ichaxota Egipto nakua peewatsin ékiya, xua kawayu pekaponaenaeyo. Bapoxonae, poxonae jiwi José tainchi, wawái jeye:

“¡Pabarükui-iturajínare!” jei. Bárapo koyenéwatha Egipto nakua peewatsin kana éxana xua José éwata daxita Egipto nákuatha. ⁴⁴Kotakaya Egipto nakua peewatsin jeye Josetha:

—Bekein xang Egipto nakua taéwatsin, pongxaein jiwi itorobiya taéwatsin bárapo nákuathe, ichüing jopa exanáe tsane poxonae matha jopa kawüükaeyo.

⁴⁵Bapong Egipto nakua peewatsin José wüingdútatsi xua José Egipto nakuapin po wüing: “Zafenat-panéaj”, jeichichi. [Egiptomonae jumetha po wüing: “Zafenat-panéaj”, jei yábara jume jei: “Nakom paeba: Bapong asiüü pópona”, jei.] Yawa Egipto nakua peewatsin éxana xua José pita yábüyo, powa Asenat, Potifera pexantiyo tatsi, pong sacerdotemonaepin náexana On^g tómaratha. Bapoxonae bara José pona petaenexa daxita Egipto nákuatha.

⁴⁶José 30 po weibe xeina poxonae tamrópata pítaba xua Egipto nakua peewatsin tanakuítatsi, pong Egipto nakuapiwi itorobiya pía pepa peewatsinchi. Bara José Egipto nakua peewatsin weya pona. Bapoxonae pópona dukuaeta daxítangtha Egipto nákuatha.

⁴⁷Pexaewa íratha xuwa nawita bárapo siete po weibethang, xua poxonae bárapo weithang xua bichokono pexaewang nawita. ⁴⁸Bapong daxita trigoxú nota xua xuwa bárapo nákuatha poxonae bárapo siete po weibethang. Yáwano barapoxun jeba tómarangtha. Daxita karepaya tómarangtha jeba trigoxún xua tómarang kuaríyatha nonotsíniya. ⁴⁹José trigoxú nota ichi be xua táetowa ichi xua xuang bobena marmene itapatha. Bapong nawita nota xua bomüxüing wüingba trigoxún, xua jopa itaküüpaetsi xua ununa.

⁵⁰Pewünaeya xua poxonae pin mayayo wei patsina xua jainbo nákuang tsane, bapoxonae José píowa tatsi aiña po pexántobe tanakatsíwatsi. José píowa tatsi pewüing Asenat, powa Potifera pexantiyo tatsi, pong sacerdotemonaepin náexana On tómaratha.

⁵¹Pong kopiya nakatsiwa José wüingduta po wüing: “Manasés”, jei tsipéi jeye: “Nakom nekanajüntemaina éxana xua daxita báyatha anthüthütanein yawa xua daxita tamonae múxuna”, jei. [Hebreo jumetha po wüing: “Manasés”, jei tsiwiyo jumejúpa pojume jei: “Jüntemaina”, jei.]

⁵²Pong kotakaya nakatsiwa José wüingduta po wüing: “Efraín”, jei tsipéi jeye: “Nakom neéxana xua pexui xeinang ichaxota po nákuatha báyatha anthüthütanein”, jei José. [Hebreo jumetha po wüing: “Efraín”, jei tsiwiyo jumejúpa pojume jei: “Pexui xeina”, jei.]

Meje poxonae matakabin óthopa xua pin mayayo tsane

⁵³Báyatha werawéraka siete po weibe, po weithang xua pexaewa nawita Egipto nákuatha. ⁵⁴Siete po weibe óthopa, po weithang xua pin mayayo tsane xua jainbo nákuang tsane, icha be pókotsi koyeneya báyatha José paeba. Daxita nákuangtha bichokono jainbo tsúrukuae. Saya meisha Egipto nakua jopa daichiyo. Baxota xeina penabanaewang.

⁵⁵Poxonae Egipto nakuapiwi jainpa, barapomonae pona Egipto nakua peewatsin beya xua pía wüükaetsi trigoxú. Egipto nakua peewatsin piamonaetha, jeye:

^g 41.45 Potifera, bapong tanakuita On tomarapiwi pía Nakom tatsi, po Nakom xua xometo. Xua Egipto jumetha: “On”, jei yábara jei: “Xometo”, jei.

“Papónare José beya. Moya bara paexande xua pokotsiwa José paka tsipaeba”, jei Egipto nakua peewatsin.

⁵⁶Poxonae bárapo mayayo jainbo nakua tsuxubi, bichokono daxita tómarangtha xua Egipto nákuatha, José yausarakapenta po bongtha ichaxota trigoxú bobena xua pekaenaetsinexa bárapo egiptomonaetha. Bárapo pin mayayo daxita matakábintha bichokono abe tsaibi. ⁵⁷Daxita nakuangpiwi pata Egipto nákuatha xua José pekomo-kaenexa tsainchi trigoxú tsipéi daxita nákuangtha aibi xua penabanaewang.

Meje yábara poxonae José péntapin jiwi tatsi pona Egipto nakua beya

42 ¹Poxonae Jacob yaputane xua pinae trigoxú xeina Egipto nákuatha, bapoxonae pía pexui barái, jeye:

—¿Eta xua baxota paexanómpame xua dakotsiwa saya nantiya pana natáneme? ²Ichamonae netsipaeba xua pinae Egipto nákuatha xeina trigoxú. Bara beya papónare. Pakómokare trigoxú xua waxainchi nexa xua áwiya wajinompa dubenanaebiyaenexa tsane, jei Jacob.

³Néxata diez pongbe José peweicho jiwi tatsi pona Egipto nakua beya xua pekomokaenexa trigoxú. ⁴Íchitha Jacob jopa pukopatsiyo Benjamín, pong José peweicho tatsi, poxoru Jacob nantaxeina, xua ítara mexeya ichauyo xua abe napeipeichipawei.

⁵Israel pía pexui tatsi, xua pebiwi, punapona ichamonae, pomonae xua pona xua pía komokaetsi trigoxú tsipéi daxita Canaán íratha jainbo tsúrukuae. ⁶Bapong José éxanatsi bárapo nákuatha pong jiwi peitorobin xua Egipto nakua peewatsin nexa, matáütano bapong xua pong trigoxú pekaenaetsin jíwitha, pomonae icha nákuang wérena peponaewi. Poxonae José peweicho jiwi peitabaratha tapátatsi, bapoxonae pentabokotongtha enondeka yawa íratha náitapa yüübajeba pebarükui-iturajinaenexa tsainchi José. ⁷José péntapin jiwi yáitane, íchitha éxana be poxonae jopa yaputaetsi, yawa yáíñabano pin jumetha, jeye:

—¡Paxam! ¿Eta wérena papóname?

—Ápara Canaán nakua paweparendenang xua trigoxú pata komokaenexa, jei-chichi xua jumenótatsi.

⁸Bara bekein José peweicho jiwi yáitane, kame barapomonae jopa José yaitaetsi. ⁹Néxata José namichinae nantaxéinataba xua báyatha mérawi kamaita barapomonae, bapoxonae barái, jeye:

—¡Paxam ápara pomonae jiwi namicha pekui-amanayabeibiwi pam! Saya ápara papátame xua paiña yaputaetsi pata ira, xua jopa beta paararanaeiño, xua bapoxonae paiñamonae pía abe painta exanaetsi pata tómar.

¹⁰Íchitha barapomonae jumenota, jeye:

—¡Pong pata nentakaponaem, jume! Paxang ápara pomonae pekuipawi jiwi pang. Papatang pata komokaenexa trigoxú pataxaenexa. ¹¹Daxita paxang ápara kae axa panantaütang. Paxang pomonae xaniyéi pepaebiwi pang. Bápana jopa namicha paamanayabéibin xua abe pata exaneibiwa tsane. Paxang pomonae pekuipawi jiwi pang.

¹²José jumebarái:

—Ápara panáerabame. Ápara paxam papátame xua paiña yaputaetsi pata ira xua jopa beta paararanaeiño xua bapoxonae paiñamonae pía abe painta exanaetsi pata tómar, jei.

¹³Barapomonae José jumenótatsi:

—Paxang kae eweicho jiwi pang, xua doce pongbe pang, xua pomonae xaiñeya pata paebiwi pang. Matáütano kae axa paxeinang yawa Canaán nákuatha paji-nompang. Pata táyapin ánoxuae páxatha narúntaba. Ichüing nama jopa panabarü poponaeyo; napuxana.

¹⁴Íchitha ekeicha José jeye:

—¡Bara be pókotsi koyeneya páebang, ápara paxam pomonae jiwi namicha pekui-amanayabeibiwi pam! ¹⁵Daxota paka jüjütinchi: ¡Egipto nakua peewatsin wüingtha nayábara tsiwüünae muxudutang xua xaniyang, weye jopa paponae tsane beya abü poxonae paiña eweicho patopaena, pong xuiyapin! ¹⁶Kaein paxam jíwana bárabü ponaena xua pekarenaenéxatsi paiña eweicho. Ichamonae enaena jiwi pekübibotha. Bexa yaputaen icha metha bara paxaniyam pokotsiwa papáebame. ¡Icha jopa paxaniyam ápara poxoru jiwi namicha pekui-amanayabeibiwi pam! Egipto nakua peewatsin wüingtha nayábara tsiwüünae muxudutang xua bara xaniyang, jei José.

¹⁷José itoroba xua daxita barapomonae jébatsi jiwi pekübibotha xua akoibi po matakabibetha tsane. ¹⁸Poxonae akoibi po matakábibe tsuxubi, José jeye:

—Xang Nakom kunuwang xua daxota bapong barükui-iturajinang. Báraxua paxande xua paiña eweicho pakarénande yawa Nakom paka yábara kuijüntemainaena abe paiña neexanaewa xua jopa paiña newerapaewam. ¹⁹Icha bara paxam xaniwaicha pomonae pejüntükoyene wüünae jiwi pam, bara kaein pajiwana ékare jiwi pekübibotha. Bara ichamonae pam papónare yawa pakáponde trigoxú xua paiñamonaebü xane. ²⁰Bapoxonae painta barü dénande paiña néyapin yawa taein icha bara xaniyéi xua pana tsipáebame. Icha jopa xaniyeya papaebim, pawerapáename, jei.

Bara barapomonae pebüriya yábara nantaxeinaeya jejéi. ²¹Íchitha kaemonae nantiya natsipaeba, jei:

—Bara xaniyéi waxainchi abe éxanatsi waewéichotha José. Waxainchi jopa jumekuiru jejeichi poxonae papái xua bepa pinae sotabichi, xuano xua jopa yábara najüntükoyene xéinatsi bara bekein ajüntütane táethatsi. Daxota ánoxuae xuya nákata dangwéi abe waexanaexae.

²²Rubén jumenota, jeye:

—Kaena báyatha paka tsipáebatsi: ‘Jopa pewowin abe paexanaeinde’, paka jeichi. Íchitha jopa paexanaem pokotsiwa paka itoróbatsi, daxota bewa pentoma exanaetsi xua bapong petüpaexae.

²³Barapomonae jopa yaputaeyo xua José bara yaputane pokotsiwa barapomonae paeba poxonae natsipaeba hebreo jumetha, tsipéi José náemata kueikuejei Egipto jumetha xua ichüing tsipáebatsi. Bapoxonae xuya ichüing José peweicho jiwi tatsi tsipáebatsi hebreo jumetha. ²⁴José natsixitaba barapomonae weya yawa wekoyéi. Bapoxonae kaibe dena ichaxota barapomonae ena xuano tsipáebano. José Simeón peweicho jiwi wepu wáetabatsi xua barapomonae peitütha tatsi. José itoróbano xua Simeón kübatsi pemüütotha.

²⁵Pírapae José itoroba xua barapomonae kotein petawünbinéxatsi trigoxú. Matáütano itoróbano xua daxita barapomonae barompaya ekeicha kaewa katsibinchi pekakomokáe parátixi xua daxita koteintha pejeyaenexa. Matáüta itoróbano xua barapomonae pekatsibinexa penabanaewa xua poxonae pewarapaenexa. Daxita baxua José éxana barapomonaetha.

Meje poxonae Benjamín Egipto nakua beya barü poinchi

²⁶Bara néxata barapomonae trigoxú pía burrong tsijumajebika. Yawa bara pona-rúküpa. ²⁷Poxonae pata xua ichaxota maitathopa, ichüng pía dúrubi yapu-ishanaxuba xua peapatsinexa pía burro. Bapoxonae bapong taeba xua pía durubitha tarukuarékatsi pía pekakomokáe parátixi tatsi. ²⁸Néxata peweicho jiwi barái, jeye:

—¡Pataema, kaewa kou nekata takakómokae parátixi! ¡Bárapo takakómokae parátixi báraxua dukuareke takotetha!

Barapomonae bichokono najüntübenaeka, yáwano barapomonae junuwiya jiji-yeya kaemonae najéi:

—Nakom nákata dangwéi éxana xua wayapin wakaenaetaxubixae, jei.

²⁹Poxonae barapomonae pata Canaán íratha, Jacob pía pexui tsipáebatsi daxita xua pokotsiwa barapomonae taéxanatsi, xua ichamonae taéxana. Barapomonae Jacob pía pexui baraichi, jeye:

³⁰—Pebin pong Egipto nákuatha peitorobin, bapong pin jumetha pana tsipaeba. Yawa pana yábara paeba xua pinae ápara pomonae jiwi namicha pekui-amanaya-beibiwi pang, yáitama bepa pinae pía nákuatha papatang.

³¹”Íchitha paxang bapong patsipaebang: ‘Paxang ápara pomonae xaiñeya pata paebiwi pang. Matáütano jopa bápana dapomonae pangyo, pomonae xua jiwi namicha pekui-amanayabeibiwi pang’, pajang bapongtha. ³²Yawa pajangje: ‘Paxang kaepi eweicho jiwi pang, xua doce pongbe pang. Kae axa paxeinang, yáwano ánoxuae ichüng jopa panabarü poponaeyo; napuxana’, pajang. Yawa pajang: ‘Pata táyapin narúntaba páxatha Canaán íratha’, pajang bapongtha.

³³”Néxata bapong pana barái, jeye: ‘Daxota tha yaputaetsi icha metha bara paxam pomonae xaiñeya pepaebiwi pam. Ichüng paiña eweicho pakuenta wárapare taxangtha yawa bara papónare paiña nekaponaenexa trigoxú xua paiñamonaepexaenexa’, pana nejéi.

³⁴”Ekeicha pana nejéi: ‘Inta painta barü dénande paiña eweicho, pong xuiyapin. Tha bapoxonae beta yaputaetsi xua bara paxam barapomonae pam, pomonae xaiñeya pepaebiwi pam, matáütano jopa pomonae namicha jiwi pekui-amanayabeibiwi pam. Néxata bapoxonae paiña eweicho pukopatsin yawa bara bapoxonae paxam saya jüntema parubenanaebiyáename bárapo nákuathe’, pana nejéi bapong.

³⁵Poxonae barapomonae barompaya nota trigoxú pía koteintha, José peweicho jiwi tatsi, barapomonae tane xua daxita barompaya pía koteintha tatsi kou tadubendékatsi durubixi, xua tútutha tadubendékatsi pekakomokáe parátixi tatsi. Poxonae barapomonae durubixi tane, xua tútutha dubendeka pekakomokáe parátixi, barapomonae bichokono najüntükabenaeka, írürü paxa tatsi najüntükabenaeka. ³⁶Néxata Jacob pía pexui barái, jeye:

—Maisha paxam bara nama pexui múxuna jopa pana neyawa kopataponaem. José ánoxuae jopa naka barü poponaeyo; napuxana. Barichi Simeón jopa naka barü poponaeyo. ¡Ekeicha ánoxuae paichichípame xua painta barü póname Benjamín! ¡Daxita baxua, ápara painta abe exanapóname! jei Jacob xua pía pexui tsipaeba.

³⁷Néxata Rubén paxa barái, jeye:

—Inta Benjamín kópare xua nebaru ponaena xua ta-eenaenexa tsane. Bexa ekeicha kaewa kata pukopatinchi. Icha ekeicha kaewa jopa kata pukopatichi, moya bexore tapexúyobe, nakuéyatabe pongbe.

³⁸Íchitha Jacob jumenota, jeye:

—Taxanto jopa paka punaponae tsane. José paiña eweicho kaena báyatha tüpa. Saya meisha bapong Benjamín kompa nakópata. Icha bapong ichauyo xua abe peipeitsípatsi poxonae warapaena, ápara paxam paiñakoutha patsipaem xua itanuwetha tüpáetsipang.

43 ¹Bárapo jainbo nakua ekeicha jopa juniya tsoponaeyo nákuatha. ²Jacob irü pía pexui tatsi xane trigoxú, pokotsiwa xua tanakópabatsi xua kaena báyatha Egipto nakua wekarendena. Bapoxonae Jacob barái pía pexui, jeye:

—Ekeicha papónare paiña nekomokaenexa trigoxú xua tsiwiyo xua waxainchi nexa.

³Íchitha Judá jumebarái, jeye:

—Barapong Egipto nakuapin bara dangweya pana tsipaeba, pana nejeye: ‘Icha paiña eweicho jopa pakápatzim xote, pong xuiyapin, bara néxata jopa papatsinde, jopa pana taeinde’, pana nejéi pong Egipto nakuapin. ⁴Icha pata taeweicho pukópatame xua pabarüponaein, bara paponaein xua pata pákata komotsinéxatsi trigoxú. ⁵Íchitha icha jopa pukopatsim xua pabarüponaein, jopa paponaein tsane. Bárapo pebin pana tsipaeba, pana nejeye: ‘Icha paiña eweicho jopa pakápatzim xote, pong xuiyapin, bara néxata jopa papatsinde, jopa pana taeinde’, pana nejéi, jei Judá xua paxa tsipaeba.

⁶Néxata Israel, xua icha wüing Jacob, barái pía pexui, jeye:

—¿Eta xua metha painta abe éxaname bichokono? ¿Eta xua metha bapong patsipaébame xua pinae paiña eweicho paxéiname ichüing? jei Jacob.

⁷Barapomonae jumenota, jeye:

—Ápara bapong pana yábara yáíñaba nawita yawa xua wámonae yábara pana yáíñaba nawita. Pana nejeye: ‘¿Paiña axa áwiya póponara? ¿Ichüing paiña eweicho paxéinamera?’ pana nejéi. Paxang saya pajumenotang xua bapong pana yáíñaba. ¡Jopa patsakeinaeiño xua bapong pata tana neyábara yaiñabiwa tsane pata taeweicho xua pata takaponaewa tsane! jei barapomonae.

⁸Néxata Judá paxa tsipaeba, pong Israel, jeye:

—Icha paichichipang xua asüü pata jinompaewa, bara bárapo pewowin pukópare xua ta-eenaenexa, bara paponarüküpaein. Bara bapoxonae jopa wainwérapae tsainchi, irü xam jopa netüpaenexa, irü paxam, irü pata pexui jopa pewerapaenexa.

⁹”Bara xang takoya kajumenotinchi pata taeweicho nexa, icha peipéitatsi xua abe, bara newüükáename po pentoma ichi be pokoyeneya ichichipang, icha bapong tüpaena. Icha ekeicha takoutha jopa kaewa kakatsi tsainchi nexanto, ápara takouthang tsane xua jopa beta exanaeiño xua neitüütha tsane, yawa xua bara ataya petsitekaenexa tsane. ¹⁰Icha jopa báyatha paenaein tsipae xote, metha báyatha porukae paponáetsipang, yawa nakuéyatabe pokuíyobe tsipae kaiberena paponáetsipang, xua pexaewa pakaponáetsipang.

¹¹Néxata Judá paxa jumenótatsi, jeye:

—Icha, icha koyene aibi, pokotsiwe paexande: Paiña koteinthá pajéyama xua pokotsiwa bapong amanaya paiña nekatsinexa. Bapong patakaponde xua yatsikaewa pokotsiwa xeina nákuatha: bálsamo nae nain xua tuxuúi pakare, banto meráyono, petuxuúi merangno, mirra nain xua tuxuúi, pethüno xua pexu xeina, yawa almendrathüno matawüingno xua pexu xeina. ¹²Matáütano ekeicha

pekakomokáe parátixi pakáponde xua ekeicha pantaropabábare. Bara bárapo parátixi pakatsíbare pebintha, po parátixi xua báyatha kaewa paka katsiba paiña durubintha. Metha ápara maisha nakobe tsontsontsiya jeya.

¹³¡Anetha! Moya pabarüponde paiña eweicho, xain ekeicha patáneme bárapo pebin. ¹⁴Bara Nakom, pong daxita peyapusúü itorobi koyenewa pexeinaein, bárapo pebin kana exanaeinchi xua paka yábara najüntükoyene xeinaena, xua paiña eweicho ichüing pepukopatsinéxatsi, yawa xua irü Benjamín pepukopatsinéxatsi. Matáütano Nakom newepita tapexui bara icha moya saya tsane, xua bara jopa tabarüpoponaewa tsane pexui.

¹⁵Israel pía pexui tatsi bara nota pokotsiwa xua bárapo pebin amanaya pekatsibinéxatsi. Yáwano bara parátixi nota xua ekeicha mataropababa, yawa Benjamín barü poinchi. Bara ponarúküpa Egipto nakua beya. Bapoxonae barapomonae pata José peitabaratha tatsi.

Meje yábara Jacob pía pexui, xua pebiwi, poxonae jinompa José piabotha tatsi

¹⁶José tane xua Benjamín péntapin jiwi punapona. Bapoxonae José itoroba pong pentakaponaein pomonae pía petanakuichiwichi piabotha tatsi, jeye:

—Bárapo pebiwi kaponde tabo beya. Vaca bexore yawa nakuiwüunaere, tsipéi barapomonae barü xaein ánoxuae mataéiñaxae.

¹⁷Pong pentakaponaein pomonae José tanakuítatsi, bapong bara éxana be pókotsi koyeneya José itoroba. Bara bapong daxita barapomonae kapoinchi José píabo beya tatsi. ¹⁸Íchitha barapomonae junuwa tsipéi barapomonae kapoinchi José píabo beya tatsi. Barapomonae natsipaeba jeye:

—¡Ápara bapong naka muxuitóroba! Xote naka kápona ápara poxoru parátixi wanotsixae, po parátixi kou kaewa nákata jeya kaena báyatha. Ápara naka bena, yawa naka itorobina xua wanakuichiwa tsane bara naka kana ichane icha pomonae pebusikuitaetaeyebéiwichi ichichi, xua waduweimonae kainompaeinchi.

¹⁹Poxonae barapomonae boboupatha patarúküpa José piabotha tatsi, imoxoyo kakuita umenarúküpa, pong pentakaponaein imoxoyo kakuita umenarúkúpatsi xua pebarü kueikueijeinéxatsi. ²⁰Barapomonae barái bapongtha, jeye:

—¡Jaibó pong pata nekanamataxeinaem! Kaena báyatha papatang xua pata komotsinexa trigoxú. ²¹Poxonae papatang xua ichaxota pamaithopang, dúrubin payapu ishakupentang. Dúrubin koibótongtha pekakomokáe parátixi barompaya painta dubenadeka durubíxitha. Bárapo pekakomokáe parátixi bara kou omeichang tsíniya. Ekeicha kaewa pakápatang xua kaewa patakatsibinexa. ²²Yawa ekeicha pakápatang pekakomokáe parátixi xua pata komokaenexa trigoxú. Íchitha jopa payaputaeiño xua pong jeya dúrubin koibótongtha pata kakómokae parátixi xua po pekakomokáe parátixi kopiya.

²³Pong pentakaponaein jumenota, jeye:

—Saya jüntema paponde. Jopa pajunuwinde. Paiña Nakom xuano xua paiña axa pía Nakom tatsi, bárapo Nakom metha moya bárapo paiña parátixi jeya paiña dúrubin koibótongtha. Bara báyatha notang parátixi xua metha pakómokame.

Pong pentakaponaein bara Simeón ishanaxotsi yawa barapomonae pía xaiña betakarendénatsi. ²⁴Bapoxonae daxita barapomonae kapoinchi José píabo tatsi

beya yawa jojoniya. Barapomonae mera kátatsi xua penataxu ikikaenexa yawa barapomonae pía burrong pexaewa taápatatsi. ²⁵Barapomonae nakuiwüünaetsi-jeba piyawang xua pokotsiwang José amanaya pekatsibinéxatsi. Barapomonae éwata xua José pepatopaewa matáeíñaxae, tsipéi barapomonae yaputane xua bapong barü xaena baxota.

²⁶Poxonae José patopa botha, barapomonae José katsíbatsi xua barapomonae karendena. Barapomonae pentabokotongtha umena, yawa írabe taeumendeka beya ira jayabareka peitapangtha xua José pebarükui-iturajinaexaetsi. ²⁷José yáíñaba xua eta bichi barapomonae. Yáwano yáíñabano jeye:

—¿Eta bichi paiña axa, pong amo, pong báyatha yábara pana netsipáebame? ¿Kataunxuae pópona? jei José.

²⁸Barapomonae írabe taeumendeka beya írabe jayabareka peitapangtha xua José pebarükui-iturajinaenéxatsi. Bapoxonae jeye:

—Pata taxa, pong katsita pekuipawi jintong, bara jüntema pópona. Kataunxuae áwiya pópona, jei barapomonae. ²⁹José matawakaicha tane, barapomonae matawakaicha tainchi. José tane, Benjamín tainchi, pong José péyapin xua kae axang yawa xua kae énatha.

Bapoxonae José jeye:

—¿Meje ápara bapong paiña eweicho, pong xuiyapin, pong yábara báyatha pana netsipáebame? ¡Pong be taxanto katsikotainchi bara Nakom beta kayawenaena! jei José.

³⁰Poxonae báraxua paeba, José bichokono penthütotha nantaxeina poxonae peweicho tane daxota bichokono ünthüthüwekoyéi. José kaena naiña pía tutu bejoniya, pía wekoyeichi. ³¹Poxonae José naitanuwekopata, náitabara kiataxuba yawa bara weya pona. Bapoxonae jeye:

—¡Bara pexaewa paápare! jei José.

³²José ápatatsi pexaewa pía pexaethopáewatha. Jacob pía pexantong tatsi icha pexaethopáewatha ápatatsi pexaewa. Barichi Egipto nakuapiwi icha pexaethopáewatha ápatatsi pexaewa barapomonae, tsipéi Egipto nakuapiwi piakui xeina xua jopa kopatsiyo xua hebreomonae pebarüxáewatsi.

³³José peweicho jiwi tatsi enoundeka icha be pókotsi koyeneya José itoroba. Beta napuna-eena tsíniya ichi be pókotsi koyeneya ichi xua kaena báyatha poxonae napuna-nakatsiwapona. Pong kopiya nakatsiwa opikaeka kotakaya eenatsinadeka xuiyapixi. Barapomonae bichokono najüntükoyene benaeka, kaemonae nantiya náitabara tane.

³⁴José ápata pexaewa xua xuang pía pexaethopáewatha tabobeinchi. Benjamín jopa juniya katsichi beyakaincha xua péntapin jiwi takatsíbatsi. José irü peweicho jiwi pebürüya nakuara apa yawa nabarü jüntükoyene weiweina.

Meje yábara poxonae José wáetaba, Benjamín wáetabatsi

44 ¹Poxonae baxua weta José itoroba pong pentakaponaein pomonae petana-kuichiwichi tatsi píabo, jeye:

—Barapomonae kotein patawünbare trigoxú daxita xua barapomonae itaküü-patsi xua pekaponaenexa. Matáütano barapomonae daxita barompaya pía durubíxitha patajéyama pekakomokáe parátixi. ²Yawa takorotiyo xua penain plata matawüing korótiyo jeinka kótetha, pong xuiyapin pía kótetha tatsi. Múxuna

jeinka ichaxota jékame pekakomokáe parátixi, po pekakomokáe paratixitha báya-tha kómota trigoxú.

Barapong, pong bo pentakaponaein pomonae petanakuichiwichi José piabotha tatsi, éxana pokotsiwa José itoroba. ³Kaemümbo poxonae xometo aena ekoina, José peweicho jiwi pukópata xua bara pewarapaenexa yawa xua bara pía burrong pekaponaenexa. ⁴Áwiya kataunxuae jopa tajü bejiniyaeyo xua tómara weya xua poxonae José barái pong pentakaponaein pomonae petanakuichiwichi tatsi píabo, jeye:

—Taema, barapomonaе pubaraponde. Poxonae pukaxíname jande: ‘¿Eta pokotsiwa xuya pana matómatame xua abe poxonae pákata wüünae éxanatsi? ¿Eta pokotsiwa pana káibame korótiyo, po korótiyo xua penain korótiyo xua plata matawüng? ⁵Ápara bárapo korótiyo, po korotíyotha pong tananekanamataxeinaein daxita matakabi apeiba, yawa xua poxoru bárapo korótiyo bapong tsita aiñakuichi. ¡Maisha kou abe paéxaname!’ pajande, jei José.

⁶Pong bo pentakaponaein pomonae petanakuichiwichi José piabotha, poxonae pukaxina, ekeicha bárapo jumejúpa paeba. ⁷Barapomonaе jume-nota, jeye:

—Pata tananentakaponaem, ¿eta xua yábara pana tsipáebame baxua? ¡Paxang pomonae pekuipawi pang! ¡Bápana jopa paexanaeiño baxua! ⁸Kaibe payiyang xua Canaán nakua weparentenang xua ekeicha kaewa pata katsinexa pekakomokáe parátixi, po pekakomokáe parátixi panotang durubíxitha. Bápana jopa pakaibiño pokotsiwa xua plata nain matawüng yawa oro nain matawüng, xua xuang tabobeinchi jiña nekanamataxeinaein piabotha tatsi. ⁹Paxang pekuipawi pang. Icha kaein paxang jíwana paka kaiba bárapo korótiyo, bara moya tüpaena pong xua tatáebame pía kótetha tatsi. Yawa bara beya paxang jíña pata nebusikuitaetaeyebibi jiwi pang tsane icha táebame.

¹⁰Néxata pong bo pentakaponaein pomonae petanakuichiwichi José piabotha, jeye:

—Bara xaiñéi exanaena barapokotsiwa xua papáebame. Íchitha meisha pong korótiyo xeina, bapong ápara pong tabusikuitaetaein tsane. Nama ichamonae bü pona poxoru jopa abe exanaeyo, jei.

¹¹Daxita barapomonaе barompaya pía kotein tatsi naiña íratha tajeíbikatsi yawa yauíshaka tsíniya kotein. ¹²Pong bo pentakaponaein jeita daxita karepaya kotein. Kopiya matha tamrópata pítaba matapin weya, beya ekeicha tajejeitapoinchi xuí-yapi jiwi xua icha ichi poxonaе napuna-nakatsiwapona. Bapong pong bo pentakaponaein korótiyo taeba Benjamín pía kótetha tatsi. ¹³Bapoxonaе barapomonaе pía paparuwang tsitsika poxoru barapomonaе bichokono anthütane. Bapoxonaе barapomonaе piyawang tsijumajebika pía burrongtha, yawa ekeicha kaibe iyiya tómara beya.

¹⁴Poxonaе Judá, irü peweicho jiwi tatsi pata José piabotha tatsi, áwiya kataunxuae José eka piabotha. Néxata barapomonaе pentabokotongtha enoundeka, yawa ira taeumendeka beya ira jayabareka peitapangtha xua José pebarükui-iturajinaenéxatsi. ¹⁵Bapoxonaе José jeye:

—¿Eta pokotsiwa xua paéxaname? ¿Jopa ápara yábara payaputaem xua írürü neitaküüpa xua beta tayábara paebiwa tsane pomonae xua ichawang inta abe exaneiba, xua Nakom yaputane tanaexanaexae? jei José.

¹⁶Judá jumenota, jeye:

—Jopa pana itaküüpaeyo xua pata kajumenotsíwatsi. Jopa pana itaküüpaeyo xua pata katsita-itapeiñaxeináewatsi pokoyene xua jopa pata kakaibíwatsi bárapo korótiyo. Nakom pana tane xua kaena báyatha abe paéxanang. Xote bara pákata umeinchi. Bara paxang jiña tapana nebusikuitaetaeyebeibiwi pang, yawa múxuna pong báyatha korótiyo tataébatsi pía kótetha tatsi.

¹⁷Íchitha José jeye:

—¡Ápara icha koyene aibi! Saya meisha pong tataébatsi korótiyo pía kótetha tatsi, bapong jame tabusikuitaetaein tsane. Bara ichamonae saya jüntema ponaena axa píabo beya tatsi. Barapoxonae bara ichamonae jopa paka pubaraponae tsane.

Meje yábara xua Judá jumedangweya yábara jumeyawena, xua Benjamín yábara jumeyawénatsi

¹⁸Judá imoxoyo kakuita pona, José imoxoyo kakuita poinchi, jeye:

—Pong Tananekanamataxaeinaein, jumedangweya kabaraichi, nekópare xua ichauyo namicha katsipaebinchi. Ínkane taema, jopa nekasebinde. Bara xam bara be poxonae yatsikaewa be Egipto nakua peewatsin tsipaem. ¹⁹Xam pana neyáña-bame xua icha bara metha paxeinang pata taxa, ichikuitha xua icha bara metha paxeinang pata taeweicho. ²⁰Paxang paka jumenótatsi, paka jeichi: ‘Pata taxa paxeinang; báyatha amo. Yawa pata taeweicho paxeinang; pewowin, pong naka-tsiwa poxonae pata taxa amo tsekae’, paka jeichi. ‘Pata taxa bichokono ántobe pexanto, tsipéi bárapo pexanto tatsi yatsikaya kompa tanakópatatsi xua pena nantaüta poxoru bapong peweicho tatsi tatúpatsi’.

²¹”Xam pana itoróbame xua bepa pinae pákata karenainchi pata taeweicho Benjamín xua neyaitaenexa. ²²Paxang paka tsipáebatsi xua bárapo pewowin jopa itaküüpaetsi xua paxa pekuenta ponaewa, tsipéi icha paxa kuenta ponáetsipa metha paxa tatsi tüpáetsipa itanuwetha. ²³Íchitha xam pana tsipáebame xua pinae icha jopa bapong pabarüdenang tsane pinae jopa pana matenta wabim tsipae.

²⁴”Poxonae kaibe payiyang, ichaxota pata taxa pópona, patsipaebang daxita pokotsiwa xua pana tsipáebame. ²⁵Néxata pata taxa pana itoroba, pana jei: ‘Kaibe payiyande xua paiña nekomokaenexa trigoxú’, pana nejéi. ²⁶Íchitha paxang pata taxa pabarang pajangje: ‘Jopa pana itaküüpaeyo xua paponang icha jopa pata taeweicho pana nepunaponaeyo tsane, pong xuiyapin. Tsipéi icha pata taeweicho jopa pana kueyatsiyo, jopa pana itaküüpáe tsipae xua pata taewa tsane bapong, pong Egipto nakuapin’, pajang.

²⁷”Yawa taxa pana nejéi: ‘Paxam payaputáneme xua taseuri neitakatane nakué-yatabe pongbe pexúyobe. ²⁸Ichüing taxanto inta napuxanáwiya. Bara xaniwaicha yaputang xua metha duwein, pong unupin, pong ayéi, bapong metha taxanto xae-xotsi beya ánoxuae ekeicha jopa kaewa patopaeyo. ²⁹Icha taxanto bapong pakaponaétsipame yawa icha napeipeichipa, xua daxota inta bapong aibi tsipae, paxam ápara paiñakoutham tsipae xua xang itanuwetha tüpáetsipang’, pana jei pata taxa.

³⁰”Bara barichi, maisha taxa pejüntükoyénetha bichokono ántobe, xua pata taeweicho bichokono antobetsi. Taxa paeba xua pinae icha pata taeweicho jopa kaibe pana punapatoparenaeyo, ³¹xua poxonae kaibe paparenaein, pinae pata taxa tüpáetsipa xua poxonae jopa táetsipae. Bara paxang ápara patakouthang tsipae xua pata taxa itanuwetha tüpáetsipa. ³²Xang taxa tsipaebang xua taxa tana

neitorobinexa xua ta-eenaenexa taeweicho. Yawa jangje: ‘Icha jopa kaewa kakati-chi nexanto, ápara xang takouthang tsane xua jopa beta exanaeíño xua neitüütha tsane xua bara ataya petsitekaenexa tsane’, jang.

³³”Daxota xang jumedangweya katsipáebatsi xua bara nekópare tana neexa-naenexa be pong jiña tana nebusikuitaetaewam xua bárapo taeweicho pekoutha tatsi. Bara kópare xua bapong peweicho jiwi pepunaponanexa. ³⁴Tsipéi, jopa neitaküüpaeyo xua kaibeya ponáetsipang ichaxota taxa pópona, icha taeweicho jopa kaibe nepuna-iyayeyo. Jopa be taeíño pokoyene jopa wüünaeyo xua taxa antükoyenetane tsane bichokono.

Meje yábara xua poxonae José peweicho jiwi tsita naitapeíña xeina

45 ¹José jopa itaküüpaetsi xua naitanuwebaxuba daxita peitütha tatsi pomonae petanakuichiwichi. Yawa wawái, jei:

—¿Daxita pam, pomonae inta penakuichiwi pam bara weye papónare! jei José.

Jopa jintong José barü unguuaetsi xua pomonae pía petanakuichiwichi, saya peweicho jíwixae barü umeinchi. Bapoxonae José peweicho jiwi tsita naitapeíña xeina. ²Néxata bapong wekoyéi. Bichokono jumedangweya wekoyéi xua daxota daxita Egipto nakuapiwi yaputane yawa beya diwesi jumepíchapa Egipto nakua peewatsin piabotha tatsi. ³José barái peweicho jiwi jeye:

—Ápara xang José. ¿Kataunxuae áwiya taxa pópona?

Peweicho jiwi tatsi bichokono nabenaeka, báyatha itabara taeumeinchi, yawa jopa itaküüpaetsi xua José pejumenotsíwatsi. ⁴Íchitha José barái, jeye:

—Anetha, imoxoyo pana nekakitaponde, jei.

Poxonae barapomonae imoxoyo kakuita pona, José jeye:

—Ápara xang José, paiña eweichong, pongxaein pana nekaenáetame icha-monaetha poxonae nekápona Egipto nákuatha. ⁵Íchitha paka itoróbatsi jopa pajüntütanende. Matáütano jopa kaemonae pana nakasebinde xua pata tana nekaenaetaxubixaemxae, ápara Nakom neitoroba takapanepaenexa jiwi. ⁶Bara báyatha naka yapuxénaba nakuéyatabe po weibe xua báyatha jainbo tsúrukuae nakua. Kataunxuae áwiya seika cinco po weibe xua pexaewa jopa naweteibi tsane, bara bekein übeibitha tsane.

⁷”Íchitha Nakom paiña wünaeya neitoroba xua bárapo írathe paiña nepákata jinompaenexa paiña nemómoxi susato jiwi, yawa xua pía tapaka kapanenebiyaetsi bárapo pin jainbo tsúrukuae nákuatha. ⁸Ápara Nakom bapong neitoroba bárapo nákuathe. Paxam jopa pana neitorobim. Nakom neéxana xua pong tayawenaecin Egipto nakua peewatsin xua kapanepang pin jainbo nakua weya. Matáütano Nakom neéxana xua kanamataxeinang daxita xua Egipto nakua peewatsin piabotha, yawa neéxana xua daxita Egipto nakua taitorobang Egipto nakua peewatsin.

⁹Anetha, naiña papónare ichaxota taxa pópona yawa pajande bapongtha: ‘Nexanto José namchi jeye: Nakom neéxana xua daxita Egipto nakua taitorobin Egipto nakua peewatsin. Anetha nesiwaponde. Jopa bayathande. ¹⁰Gosén íratha poponáename, yawa jiña pexui barü poponáename, nemómoxino barü poponáename. Yawa múxuna poponáename jiña duweimonae, daxítano xua xam xéiname. Bara bapoxonae poponáename imoxoyo ichaxota póponang. ¹¹Baraxota kakatinchi pexaewa yawa jiñamonae katsin. Yáwano pexaewa katsin daxita xua xuang barü póponame xua jopa jiña nekata akoibinexa. Kataunxuae áwiya jainbo tsúrukuae

ekeicha cinco po weibetha tsane, jei nexanto José', pajande, jei José xua peweicho jwi najumekaruta.

¹²Ekeicha José jeye:

—Benjamín taeweicho irü paxam bara yatsikaewa pana nejumetaneme xua xuaunxuae paka tsipáebatsi baxua exanaein. ¹³Taxa patsipáebare xua pokoyene daxita Egipto nakuapiwi taitorobeibin, yáwano payábara tsipáebare daxita pokotsiwang xua patáneme xote. ¡Naiña papónare painta barü dénande taxa!, jei.

¹⁴José peweicho naishakateita wáetaba, pong Benjamín. José tamrópata pítaba xua wekoyéi. Barichi Benjamín peweicho naishakateita wekoyéi tsungkuae. ¹⁵Bapoxonae José tsutsuba daxita peweicho jwi yáwano wekoyeino poxonae peweicho jwi naishakateita teika. Bapoxonae José peweicho jwi jopa junuwiya tsipaebichi.

Meje poxonae Egipto nakua peewatsin Jacob wábatsi xua patopaena Egipto nákuatha

¹⁶Egipto nakua peewatsin piabotha, po bo pexeiña bo, baxota diwesi jumexuba xua pinae José peweicho jwi tatsi pata. Bapoxonae Egipto nakua peewatsin bichokono jüntükoyene weiweina, irü jüntükoyene weiweina pomonae Egipto nakua peewatsin tanakuítatsi. ¹⁷Yawa Egipto nakua peewatsin barái, José baraichi, jeye:

—Eweicho jwi tsipáebare: 'Bárabü bü kotein kápona yawa pía duweimonaeno yawa bárabü bü kaibe nawibiya Canaán nakua beya. ¹⁸Yawa barü patsina pía paxa tatsi yawa piamonae tátsino. Bapong katsin po ira xua wüünae, xua Egipto nákuatha. Yawa katsin pexaewa, pokotsiwa wüünae xua Egipto nákuatha nakoita'. ¹⁹Itoróbare: 'Bü weye kápone kawayu pekaponae naexi, xua pía yábüxi pekarendenaenexa, xua pexui pekarendenaenéxano, yáwano xua pía paxa pebarü denadenaenexa. ²⁰Bü jopa yábara nantaxeinaeyo bichokono pokotsiwa xeina. Tsipéi daxita pokotsiwang xeina Egipto nákuatha, bara bapomonae irü piyawa tatsi', jei Egipto nakua peewatsin xua José tsipáebatsi.

²¹Israel pía pexui tatsi baxua éxana, pong Jacobxae. José kata barapomonaetha kawayu pekaponae naexi xua báyatha Egipto nakua peewatsin itoroba, yáwano kátano pexaewa xua poxonae pewartapaenexa. ²²Yawa José katsiba pena paparuwang xua penamaxatabinexa. Íchitha nama Benjamín kátatsi parátixi 300 po paratiximonaebe, xua pekakomokáe parátixi, xua ponain plata nain matawüng. Yáwano katatsino cinco xóyobe paparuwang xua penawang.

²³José paxa taitoroba 10 póyobe burrong. Bárapo burrongtha paxa tatsijumajebika pokotsiwang xua bichokono wüünae xua Egipto nákuatha xeina. Icha 10 búrrangtha tsijumajebika trigoxú, yáwano pan, xua paxa tatsi pexaenexa poxonae wárapa. ²⁴Poxonae José napéyaba peweicho jwi, jeye:

—Jopa anaya pana nakaseba ponaeinde námtotha xua báyatha tapana nekae-naetaxubíwamxae, jei José.

Néxata barapomonae ponarúkupa.

Meje xua poxonae Jacobbarü pona Egipto nakua beya

²⁵Bara barapomonae Egipto nakua wewarapiya. Canaán nákuatha pata ichaxota barapomonae pía paxa tatsi tapopoinchi, pong Jacob. ²⁶Bapoxonae Jacob tsipáebatsi, jeichichi:

—¡Áwiya José pópona, yáwano bapong Egipto nakua peewatsin taitoróbatsi daxita Egipto nakua! jei barapomona.

Íchitha Jacob jopa yaputaeyo xua paeba poxoru jopa itaküüpaetsi xua yábara pejumekowüntsiwa pokotsiwa tsipáebatsi. ²⁷Íchitha barapomona tsipaeba, Jacob tsipáebatsi, pokotsiwa xua báyatha José barapomona tsipáebatsi. Yáwano Jacob tane kawayu pekaponae naexi xua báyatha José taitoroba xua Jacob pekaponae néxatsi. Bichokono yábara najüntükoyene süütaba. ²⁸Néxata Jacob jeye:

—¡Ánoxuae bara xaniwaicha yaputang xua taxanto José inta kataunxuae pópona! Tha taeyopiyaetsi pewünaeya xua poxona tüpaein, jei Jacob.

46 ¹Israel, pong Jacob, bara wárapa yawa daxita kápona pokotsiwa xua xeina. Poxona patopa Beerseba nákuatha, baxota duwéi tauta petúxusi exanae nexa Nakom nexa, po Nakom paxa tatsi pía Nakom tatsi, pong Isaac. ²Bárapo merawitha Nakom Jacob barü kueikueijeichi poxona tsita naitüütatsi. Pewüngtha wábatsi, jeye:

—Jacob, Jacob, jei.

Jacob jumenota, jeye:

—Xote ékangje, jei.

³Néxata Nakom jeye:

—Xang ápara Nakom pongxaein axa pía Nakom tatsin. Jopa junuwinde xua neponaewa Egipto nakua beya, tsipéi baraxota jiña nemómoxi susato jiwi bichokono pin bicheitomonae exanaein. ⁴Kabarü ponaeinchi Egipto nakua beya. Xang baraxotiya takoya pichin jiña nemómoxi susato jiwi xua Egipto nakua weya pichin. Barichi poxona tüpáename José ekaena nemuxunénetha, jei Nakom xua Jacob tsipáebatsi.

⁵Bapoxona Jacob Beerseba nakua weya pona. Israel pía pexui kuarétatsi kawayu pekaponae náeyo tha. Yáwano barapomona pía pexui, pía yabüxino kua reba kawayu pekaponae náexitha, po naexi báyatha Egipto nakua peewatsin itoroba xua barapomona baxota pekaponae nexa. ⁶Jacob pona Egipto nakua beya, yawa daxita piamona kápona. Yawa vacang kápona, ovéjangno kápona. Matáütano yawa múxuna kápona xua xuang báyatha ekeicha xeina Canaán nákuatha. ⁷Jacob pía pexui tatsi, yawa pexántixi tatsi, pemómoxi tátsino, pemomo jiwi tátsino, daxita barapomona Jacob punapoinchi.

Meje daxita pewüngxi tatsi pomona xua báyatha pona Egipto nakua beya

⁸Poxona Israel wárapa Egipto nakua beya, punapoinchi pía pexui írürü pemómoxi tátsino. Bárapo pexui Lea itakatane pía pebin, xua pomonaexae pía pexui xeixaina tsíniya, pomonaexae Jacob piamona tatsi. Barapomona pewüngxi meje:

Rubén, Jacob pexanto tatsi, pong matapin.

⁹Rubén pía pexui tatsi meje:

Hanoc, ichüng pewüng Falú,

ichüng pewüng Hesrón, ichüng pewüng Carmi.

¹⁰Simeón pía pexui tatsi, meje:

Jemuel, ichüng pewüng Jamin, ichüng pewüng Ohad,

ichüng pewüng Jaquin, ichüng pewüng Zojar,

ichüng pewüng Saúl. Bapong Saúl kananeamonaewayo pexanto tatsi.

- ¹¹Leví pía pexui tatsi meje:
Gersón, ichüng pewüng Cohat, ichüng pewüng Merari.
- ¹²Judá pía pexui tatsi meje:
Er, ichüng pewüng Onán, ichüng pewüng Sela,
ichüng pewüng Fares, ichüng pewüng Zéraj. Íchitha nama Er irü Onán
kaena báyatha túpabe Canaán nákuatha.
- Fares pía pexui tatsi meje:
Hesrón, ichüng pewüng Hamul.
- ¹³Isacar pía pexui tatsi meje:
Tola, ichüng pewüng Fúa, ichüng pewüng Jasub,
ichüng pewüng Simrón.
- ¹⁴Zabulón pía pexui tatsi meje:
Sered, ichüng pewüng Elón, ichüng pewüng Jahleel.
- ¹⁵Daxita bárapo pexui kaena báyatha Lea itakatane, xua Jacob itakatainchi,
poxonae pópona Padan-aram nákuatha, xuaunxuae pomonae ekeicha pía pexui
xeixeina tsíniya. Yáwano Lea pía pebin itakatane yábüyo, powayo pewüng Dina.
Daxita Lea pía pemómoxi susato jiwí tatsi treinta y tres pomonae jíwibe, múxuna
pía pexantong jiwí tatsi, yáwano yabüyono, powayo Dina. Pebiwí unúnatsi yawa
yábüxi unúnatsi.
- ¹⁶Bárapo pexui xua Zilpa itakatane pía pebin, Israel, xua pomonaexae pía pexui
xeixeina tsíniya, barapomonae pewüngxi meje:
Gad pía pexui tatsi meje:
Zifión, ichüng pewüng Hagui, ichüng pewüng Suni,
ichüng pewüng Ezbón, ichüng pewüng Eri,
ichüng pewüng Arodi, ichüng pewüng Areli.
- ¹⁷Aser pía pexui tatsi meje:
Imna, ichüng pewüng Isva, ichüng pewüng Isvi,
ichüng pewüng Bería irü barapomonae pamcho tatsi pewüng Sera.
Bería pía pexui tatsi meje:
Heber, ichüng pewüng Malquiel.
- ¹⁸Barapongbe, Gad irü Aser, kaena báyatha yábüyo powa Zilpa itakatane, xua
Jacob itakatainchi. Barapowa Zilpa ápara powa Lea amanaya pía petanakuichi-
wáyotsi, powayo Lea paxa taputorotatsi, pong Labán. Zilpa pía pemómoxi susato
jiwí tatsi dieciseis pomonae jíwibe xua daxita múxuna pexántobe tatsi.
- ¹⁹Raquel, Jacob píowa tatsi, barapowa pía pexui tatsi meje:
José irü Benjamín.
- ²⁰José pía pexui meje, xua píowa itakatainchi powa Asenat:
bara Manasés, ichüng pewüng Efraín. Barapongbe nakatsíwabe
Egipto nákuatha. Barapowa Asenat Potifera pexantiyo tatsi, pong
sacerdotemonaepin On^h tómaratha.
- ²¹Benjamín pía pexui tatsi meje:
Bela, ichüng pewüng Bequer, ichüng pewüng Asbel,
ichüng pewüng Gera, ichüng pewüng Naamán,
ichüng pewüng Eji, ichüng pewüng Ros,

ichüing pewüing Mupim, ichüing pewüing Hupim,
ichüing pewüing Ard.

²²Daxita barapomonaē Raquel pía pemómoxi susato jiwi múxuna pexántobe tatsi, irü yawa xua Jacob pía pemómoxi susato jiwi tatsi, catorce pomonaē jíwibe xua daxita.

²³Bárapo pexui xua Bilha itakatane pía pebin Israel, xua pomonaexae pía pexui xeixeina tsíniya, barapomonaē pewüingxi meje:

Dan pexanto tatsi, meje: Husim.

²⁴Neftalí pía pexui tatsi meje:

Jahzeel, ichüing pewüing Guni, ichüing pewüing Jezer,
ichüing pewüing Silem.

²⁵Dan irü Neftalí, barapongbe petsiriwa powa Bilha, barapowa pía pexui tatsi xua báyatha pía pebin itakatane, xua Jacob itakatainchi. Barapowa Bilha, ápara powa Raquel amanaya pía petanakuichiwáyotsi, powa báyatha Raquel paxa tapu-torotatsi, pong Labán. Bilha pía pemómoxi susato jiwi tatsi xua múxuna pexántobe tatsi siete pomonaēbe xua daxita.

²⁶Daxita Jacob punapátatsi Egipto nákuatha. Bara daxita barapomonaē kaemonaē náexana. Daxita be sesenta y seis pongbe. Jopa yábüxi ununaetsi xua Jacob pekopeinxi tatsi. ²⁷José nakuéyatabe pongbe tatsi, pongbe xua nakatsíwabe Egipto nákuatha. Bara Jacob piamonaē tatsi setenta po jiwimonaēbe nakatsíwabe pomonaē pata Egipto nákuatha.

Meje poxonaē José páxabe nakaxínabe Egipto nákuatha

²⁸Jacob natsíwana itorobiya Judá xua José peyaiñabinéxatsi xua pokoyene eta bichi tsane poxonaē ponaena Gosén íratha xua daxota yawa penataenéxabe baxota. ²⁹Poxonaē Gosén íratha pata, bapoxonaē José itoroba xua petanakuíwüü-naeta jebinéxatsi pía kawayu pekaponanaexi tatsi xua paxa pententa weiweinaya jakobinexa. Poxonaē paxa peitütha naitapeíña xeina, paxa naishakateita wáetaba. José paxa utukuradenunkuiya wekoyéi tsungkuae. Bayiyo wekoyéi tsungkuae. ³⁰Néxata Israel barái, José baraichi, jeye:

—¡Poxonaē xua matha xaniwaicha takatáewatsi, xua áwiya póponame, bara nama neitaküüpa xua tatüpaewa tsane! jei Israel pong Jacob.

³¹José barái peweicho jiwi yawa barái pomonaē paxa tatsi piamonaē tatsi, jeye:

—Tha Egipto nakua peewatsin taetsi xua tatsipaebínexa diwesi. Tha bapong tsipaebichi, tha jeichi: ‘Taeweicho jiwi yawa taxa piamonaē, pomonaē jinompa Canaán nákuatha, dendena xua pejinompaenexa ichaxota póponang’, tha jeichi.

³²Yawa tha jeichi: ‘Karendena ovejang, vacangno, yawa icháwangno, pokotsiwang xua barapomonaē xeina tsipéi barapomonaē pía penakuichiwang tatsi ápara xua ovejang eena yawa vacang wíchata’, tha jeichi.

³³”Néxata, poxonaē pong Egipto nakua peewatsin paka yáíñaba, icha paka jei: ‘¿Eta pokotsiwara, pokotsiwa xua paiña nenakuichi dubenanaebiyawang?’ paka jei, ³⁴paxam pajumenore. Néxata pajande: ‘Ápara ovejang patawichiti jiwi pang, icha báyatha pata amo susato jiwi ichi’, pajande. Bapoxonaē paka itaküüpaena xua pajinompáename Gosén íratha, tsipéi Egipto nakuapiwi jopa kopatsiyo xua ichamonaē pebarü jinompáewatsi, xua pomonaē oveja peewatsiwi, jei José xua peweicho jiwi tsijumakanakanaüta.

Meje poxonae Jacob patopa Egipto nakua peewatsin peitabaratha tatsi

47 ¹José pona xua Egipto nakua peewatsin petsipaebínéxatsi diwesi, jeye: Taxa irü taeweicho jiwi Canaán nakua werendena. Yawa Gosén íratha báyatha pata xua múxuna kápona ovejang, vacang, daxita icháwangno xua báyatha pokotsiwang xeina, jei José xua Egipto nakua peewatsin tsipáebatsi.

²Cinco pongbe itapeta xua peweicho jiwi tatsi jíwana. Barapongbe José tsita itüüta Egipto nakua peewatsintha xua Egipto nakua peewatsin peyaitaenexa.

³Néxata Egipto nakua peewatsin José peweicho jiwi tatsi yáíñabatsi, jeye:

—¿Eta pokotsiwara, pokotsiwa xua paiña nenakuichiwang? jei Egipto nakua peewatsin.

Barapomonaе jumenota, jeye:

—Paxang pomonaе pekuipawi jiwi pang. Ápara paxang ovejang patayapu eenaewi pang, ichi báyatha pata amo susato jiwi ichi. ⁴Daxota parenenang pata enaenexa po nákuathe, tsipéi Canaán nákuatha bichokono jainbo. Naepanaewang aibi xua pata ovejamonaе pexaenexa. Paka wüükatsi xua patanekopatsinexam xua patajinompaenexa Gosén íratha, jei barapomonaе.

⁵Néxata Egipto nakua peewatsin José baraichi, jeye:

—Jiña axa irü jiña eweicho jiwi, barapomonaе kou dendena xua nekakaetunaenexa. ⁶Xam jiñakoya kanamataxéiname Egipto nakua. Barapomonaе kare Gosén ira, po nakua xua wüüinae xua barapomonaе pejinompaenexa bárapo íratha. Icha barapomonaе jíwana táneme, xua bichokono peyaputaеin, néxata pakobenare xuiña tabacang duweimonaе inta éwata.

⁷Barichi José paxa kápona Jacob, xua Egipto nakua peewatsin petsita-itüütsinéxatsi. Jacob weyataeya yábara paeba xua bara Nakom Egipto nakua peewatsin xua peyawenaewa tsainchi. ⁸Jacob yáíñabatsi, Egipto nakua peewatsin yáíñaba, jeye:

—Ánoxuae, ¿eta po weibe xéiname? jei Egipto nakua peewatsin.

⁹Jacob jumenota, jeye:

—Ánoxuae báyatha xeinang 130 po weibe xua póponang. Be kónotha wei yawa bárapo weitha poxonaе póponang, bichokono inta ayapubé. Íchitha áwiya jopa poponaеiño, icha báyatha jopa be ichiyo xua poxonaе jinompa tamo susato jiwi, xua aiña wei dapaein jinompa.

¹⁰Bapoxonaе Jacob weyataeya yábara paeba xua bara Nakom Egipto nakua peewatsin peyawenaewa tsainchi. Yawa poxonaе Egipto nakua peewatsin napeiñabatsi, bara weya pónataba. ¹¹José kata barapomonaetha irang, po pexeña irang ena Egipto nákuatha, be pókotsi koyeneya Egipto nakua peewatsin José itoróbatsi. Poxoru José pekatsixae, daxota paxa tatsi irü peweicho jiwi tatsi xeina irang Ramesés matawüing íratha. ¹²Barichi, José pexaewa kata paxa irü peweicho jiwi irü daxita pomonaе paxa tatsi piamonaе tatsi, be pókotsi koyeneya xua barapomonaе daxita kae matabüxyo tsíniya nantawénona.

**Meje yábara pokoyene xua José kanamataxeina
Egipto nakua peewatsin nexa**

¹³Pexaewa jopa xeinaeyo daxita nákuangtha. Yawa jainbo ekeicha jopa juniya mataropeicha tsoponaeyo. Nama Egipto nakuapiwi írürü beyobi tsóponaе, ichi

Canaán nakuapiwi ichi xua beyobi tsóponae poxoru jainpa. ¹⁴José daxita nota pekakomokáe parátixi xua báyatha bapong matoma katsíbatsi poxonae kómokatsi trigoxú, pomonae Egipto nákuatha yawa pomonae Canaán nákuatha. Bárapo pekakomokáe parátixi daxita bota Egipto nakua peewatsin piabotha tatsi po bo pexeña bo. ¹⁵Poxonae pekakomokáe parátixi werawéraka Egipto nákuatha yawa Canaán nákuatha, bapoxonae daxita Egipto nakuapiwi pona Josetha xua José tsipáebatsi, jeye:

—¡Xam pexaewa pana katsíbare! Tsipéi jopa wüünaeyo icha saya pana nekópatame xua patain pawérapang neitüütha xua saya poxoru ánoxuae jopa pata xeinaexae pekakomokáe parátixi.

¹⁶Néxata José jumenota, jeye:

—Icha ánoxuae jopa paxeinaem pekakomokáe parátixi, moya pakáponde duweimonaein. Bárapo duweimonaein pana kare xuya paka katsibinchi trigoxú, jei José.

¹⁷Egipto nakuapiwi José takapoinchi kawayun, ovejang, vacang yawa burrong, xua José takapoinchi. Xuya José katsiba trigoxú bárapo weitha xua poxonae jainbo. ¹⁸Poxonae bárapo wei yapukaewa, bapoxonae icha weitha, barapomonae pona José beya xua José petsipaebinéxatsi, jeye:

—Pong pata nentakoponaem, jopa panantawenonaeiño xua paka tsipáebatsi xua jopa ánoxuae paxeinaeiño pekakomokáe parátixi. Barichi pata duweimonaein bara jiñawang. Ánoxuae jopa ichawa paxeinaeiño xua paka katsíbatsi. Saya meisha pata pepong panakopabang, yawa meisha irang paxeinang.

¹⁹”Pana kómokare pata irang xua xuya pata tana nekatsibinexam trigoxú. Yawa pana nekana éxande pomonae Egipto nakua peewatsin pía pebusikuitaetaeyebewiwi pang. Bapoxonae pata irang panakuichin bapong nexa. Trigoxú pana katsíbare xua peübixu xua bapoxonae antüsüüya patajinompaenexa, yawa xua ira jopa penaxubinexa. Icha baxua éxaname xain bapoxonae jopa pana taem xua pawarapaein, yawa xua pata ira napentsina.

²⁰Néxata José kómota daxita irang, po irang xeina Egipto nákuatha Egipto nakua peewatsin nexa. Egipto nakuapiwi kaenaeta pía irang tsipéi bichokono jainpa. Daxota daxita bárapo ira ápara Egipto nakua peewatsin pía ira tatsi.

²¹Bara daxita Egipto nakuapiwi kana éxanatsi pomonae pebusikuitaetaeyebéwichi xua daxita Egipto nákuatha.

²²Meisha José jopa komotsiyo po ira sacerdotemonae pía ira tatsi, tsipéi Egipto nakua peewatsin barapomonaetha katsiba trigoxú. Daxota bárapo sacerdotemonae jopa nantawenonae yo xua kaenaeta pía ira, tsipéi barapomonae xane pokotsiwa xua Egipto nakua peewatsin katsibeiba.

²³Bapoxonae José tsipaeba jíwitha, jeye:

—Ánoxuae paxam Egipto nakua peewatsin pía pebusikuitaetaeyebéwichi pam, yawa po irang xua paiña irang Egipto nakua peewatsin pía irang tatsi, tsipéi paka kómokatsi xua Egipto nakua peewatsin nexa. ²⁴Íchitha bewa Egipto nakua peewatsin kae muxunene jíwana pakatsibim pexaewa xua naweta xua poxonae pexaewa payapabin epaxúname xua poxonae cinco po epatongbe tsíniya. Bárapo epatong, xua cuatro po epatongbe xua nakópaba, baxua xua paiña neübinexa, yáwano xua paiña nexaenexa, xuano xua paiña pexui pexaenexa. Barichino xua pexaenexarü pomonae paka barü jinompa.

²⁵Barapomonae jumenota, jeye:

—Bara xam beta painta éxaname. Bara pana kapanéname xua jopa patawera-paenexa. Bara paxang Egipto nakua peewatsin pía pebusikuitaetaeyebéwichi pang, jei barapomonae.

²⁶Báraxua José kui-itoroba xua pinae daxita Egipto nakuapiwi bewa Egipto nakua peewatsin katsibichi kae muxunene jíwana pexaewa xua naweta xua poxonae yapabin epangxuna xua poxonae cinco po epatongbe tsíniya. Bárapo peitorobi koyene áwiya kataunxuae exanapona jiwi. Íchitha nama sacerdotemonae jopa nantawenonaeyo xua baxua peexanaewa xua poxonae jíwana kata, tsipéi bárapo sacerdotemonae pía irang xeina, xua Egipto nakua peewatsin pía irang aibi.

Meje poxonae Jacob ichichipa xua petüpaein peboyaenexa tsainchi ibowoutha Canaán nákuatha

²⁷Bara Israel pía pemómoxi susato jiwi tatsi naeba Egipto nákuatha xua peji-nompaenexa bárapo nákuatha. Barapomonae xeina Gosén ira. Bárapo íratha barapomonae bichokono pinmonae náexana. ²⁸Jacob 17 yaweijopa Egipto nákuatha. Yawa bárapo nákuatha 147 po weibe yaweijopa. ²⁹Kaentakeitha Israel, pong Jacob, yaputane xua bara imoxoyo tüpaena. Daxota Jacob najumekaruta xua petawabinéxatsi pexanto tatsi, pong José, xua pejeinexa:

—Icha bara xaniyam xua exanáename pokotsiwa xua kaitoróbatsi, nakobebore tathüto jumawétsina yawa Nakom peitabaratha nayábara tsiwüünae muxudure poxonae netsipáebame xua exanáename pokotsiwa aunxuae kawüükaeinchi. Kawüükatsi, jopa tatüpaein neboyaeinde Egipto nákuatha. ³⁰Poxonae tüpaein, ichi báyatha tamo susato jiwi ichi, nekaponde Egipto nakua weya, yawa tatüpaein nebóyama barapomonae pía ibowoutha tatsi.

—Bara exanaein pokotsiwa neitoróbame, jei José.

³¹Kame áwiya Jacob pexanto tsipaeba jeye:

—Nakomtha peitabaratha nayábara tsiwüünae muxudure xua exanáename pokotsiwa xua netsipáebame.

Bapoxonae José Nakom peitabaratha nayábara tsiwüünae muxuduta xua exanaena. Bapoxonae Israel, pong Jacob, írabe taebokareka cámatha xua pentanono beicha.

Meje yábara poxonae Jacob weyataeya tayábara paeba José pexántobe tatsi

48 ¹Bapoxonae tsiwiyo pirapaeyo, José tsipáebatsi xua pinae paxa tatsi átene. Bara néxata José bara beya pona, yawa pexántobe kápona, Manasés irü Efraín. ²Poxonae Jacob tsipáebatsi xua pinae Jacob pexanto siwapoinchi xua petaenéxatsi, nantüsüütaba yawa eka cámatha. ³Jacob, José baraichi, jeye:

—Nakom, po Nakom daxita peayapusüü itorobi koyenewa pexeinaein, bapong netsita naitüüta Luz tómaratha ichaxota Canaán nákuatha, yawa weyataeya neyábara paeba. ⁴Po jumethe nejeye: ‘Taema, xang exanaein xua xam bichokono pinmonae xeináename pexui. Yawa exanaein xua jiña nemómoxi susato jiwi ekeicha pinmonae naexanaena xua aiña nákuangtha. Barichi po ire katsin jiña nemómoxi susato jiwi. Bara bárapo ira barapomonae pía ira tatsi tsane xua ataya tsane’, nejéi Nakom.

⁵Jiña pexui, Efraín irü Manasés, pongbe xua kopiya kata nakatsiwa Egipto nákuatha kaena báyatha pewünaeya xua poxonae kakaetúnatsi, barapongbe Efraín irü Manasés, bapongbe be taxántobe tsíkotang icha Rubén ichi, irü Simeón xua pongbe taxántobe. ⁶Icha xeináename icha pexui, po pexui bexa kata nakatsiwina, bara yatsikaya nama jiña pexui tsane. Ápara tapexui aibi tsane xua jopa xeináe tsane xua pokotsiwang ba jüntüna jebang tapexui xua poxonae tatüpaewa tsane. Pomonae bexa kata nakatsiwina, saya meisha barapomonae xainaena irang Canaán nákuatha xua po irang Manasés pía ira tajiwana weukutsina, xua irü bari-chi xua po irang Efraín pía ira tajiwana weukutsina. ⁷Poxonae kaiberena ponang xua Padan-aram wérena, bapoxonae ena Raquel inta tüpa Canaán nákuatha xua poxonae imoxoyo patopang Efrata íratha. Bárapo íratha námtotha müthüthüxubang. Ánoxuae bárapo Efrata ira pewüng Belén tómara.

⁸Bapoxonae Israel, pong Jacob, tainchi José pía pexui tatsi, yawa yáíñaba, jeye: —Bapongbe ¿jintam piamonaera? jei Jacob.

⁹—Ápara taxántobe, pongbe Nakom nekata xote Egipto nákuatha, jei José xua paxa jumenota.

Néxata Jacob barái pexanto, xua José baraichi, jeye:

—Bárapo jiña nexántobe imoxoyo nórebe xote, ichaxota xang xua weyataeya tayábara paebinexa, jei Jacob.

¹⁰Israel bichokono amo tsekae, yawa itamaikéi kirei. Jopa itaküüpaetsi xua beta tane. Bara José páxatha pexántobe imoxoyo kuaranótobe. Bapoxonae Jacob tsutsúbabe bapongbe, yawa naishakateita wáetababe. ¹¹Bapoxonae Jacob pexanto barái, xua José baraichi, jeye:

—¡Bápana ekeicha jopa takatsakeinaewa xua takatáewatsi! ¡Íchitha Nakom nekópata xua yawa múxuna tang jiña pexui!

¹²José paxa pía xaiña weya pía pexui maxünoya xua bapongbe Jacob peshá-tiyo deka, pentabokototha taungkuatsibe. Yawa José pentabokototha ira betaeungkuareka beya poxonae ira jáyata peitapatha xua paxa pebarükui-iturajinaenexa. ¹³Bapoxonae José pexántobe maxüxawena. Pong Efraín baraichi, xua xuiyapin pekoxa weya kobekapoinchi. Pong Manasés baraichi, xua matapin, petsokona weya kobekapoinchi, yawa páxatha imoxoyo kuaranoba. Bara Efraín Israel pemaxütsawena weya taékatsi, irü Manasés Israel pemaxükoxa weya taékatsi.

¹⁴Íchitha poxonae Israel namaxüyota, namaxü epataütábiya xua icha koyeneya éxana. Pemaxükoxa weya Efraín matasipa jáyabatsi, pong xuiyapin, yawa pemaxütsawena weya Manasés matasipa jáyabatsi bekein bapong, pong matapin. ¹⁵Néxata José weyataeya yábara páebatsi, xua Jacob weyataeya yábara paeba po jumethe, jeye:

“Po Nakom tamo Abraham jumekowünta,
irü xua taxa Isaac jumekowünta,

xua po Nakom neena nawita kaena báyatha poxonae aena nakatsiwang,
bárabü bárapo Nakom bárapo pexúyobe kata yawenaeinchi.

¹⁶Bárabü Nakom bárapo pexúyobe yawenaeinchi,
pong nekanepa éxana xua daxita,
poxonae jopa juniya inta abe tsaibiyo.
Xua barapongbexaebe tsane,
daxita jiwi neyábara jüntanainaena,

irü Abraham yábara jüntanainaeinchi,
irü Isaac yábara jüntanainaeinchi.

Bárabü barapomonaе pemomo susato jiwi nawita xeináenabe.

Bárabü pemomo susato jiwi tatsi bichokono pinmonae tsane bárapo kae pin nákuathe”, jei Jacob.

¹⁷Íchitha José tsita abetsi xua paxa tatsi pekobekoxa weya Efraín matasipa jáyabatsi. Daxota José paxa kobepita xua Efraín matasipawepítatsi, xua jame bárapo kobekoxa weya Manasés pentasipa jayabinéxatsi. ¹⁸José paxa barái, xua jeye:

—¡Axa, bara, jopa barichinde! Jame pomuxunene weye matapin. Jame bárapo nemaxükoxa weya matasipajáyabare matapin, jei José.

¹⁹Íchitha José paxa tatsi aichaxaibi éxana. José paxa baraichi, jeye:

—¡Owáe, bara báyatha seikaya yaputang jang! Matapin bichi forotsina kae bicheito xua jiwi pinmonae tsane. Yawa bapong peaiñakuín naexanaena. Íchitha xuiyapin bichokono aiñakuí tsane beyakaincha matapin. Matáütano bárapo xuiyapin forotsina aiña bicheitong jiwi xua bichokono pinmonae.

²⁰Barichi, bárapo matakábitha Jacob weyataeya yábara páebabe Efraín yawa Manasés xua pojúmethe, jeye:

—Tamonae paiña wüngtha paebeibina,
poxonae xua weyataeya yábara paebeibinchi ichamonae,
xua Nakom taexanaena,
xua ichamonae taexanaeinchi, jei tsaibi tsane:
‘Bara Nakom kata exanaena icha matha ichi,
poxonae Efraín taexainchi, irü icha matha ichi,
poxonae Manasés taexainchi’, jei tsaibi tsane,
xua poxonae weyataeya yábara paebeibina.

Bárapo jumeintha Israel itapeta, Efraín itapétatsi, xua Efraín peaiñakuín beyakaincha Manasés, pong matapin. ²¹Bapoxonae Jacob José baraichi, jeye:

—Taema, methaunxuae tüpaein. Íchitha Nakom paka yantapoponaena. Yawa paka exanaena xua kaibe payiyáename paiña amo susato jiwi pía ira beya tatsi. ²²Xam nawita kakátatsi beyakaincha jiña eweicho jiwi xua katang. Ira kakátatsi, po ira pewüing Siquem, po ira báyatha yábara amanáyabang amorreomonaе poxonae naba éxanang barapomonaetha, poxonae pana najutebang bicheibintha yawa kusingha. [Hebreo jumetha po wüng xua: ‘Siquem’, jei yábara jei: ‘Peutukura’, jei yawa jei: ‘Pokotsiwa bichokono wüünae beyakaincha ichawa’, jei.]

Meje poxonae Jacob weyataeya yábara paeba pía pexui

49 ¹Jacob pía pexui waba, jeye: “Imoxoyo pana nekakitaponde, yawa yábara paka tsipaebinchi pokoyene xua bexa ichamonae pákata exanaena xuano irü pokoyene xua bexa paiña nemómoxi susato jiwi taexanaeinchi:

²Imoxoyo paponde, pajumetaema xua, xang Jacob, páebang paxamtha, po pexui tapexui pamxaem.

Yawa pajumetaema pokoyene xua xang paiña axang, Israel, paka tsipaébatasi.

³Xam, Rubén, taxantom pong matapim,

yawa pong inta kopiya nakatsíwame,

taka exanáexaetsi poxonae pena jintong pedangwéi koyenewa taxeinaexae.

Pong xua kopiya nakatsiwa,
ichamonaе bapong ba barükui-iturajínatsi,
yawa bapong ba matakápona peweicho jiwi.

⁴Íchitha ánoxuae jopa neraichiwa xam.

Jopa pong nekanamataxeinaewa tsane jiña eweichomonaе,
tsipéi xam aiña muxu xéiname.

Ápara xam jopa nebarükui iturajinaem,
poxonaе ishamaitúngkuame yábüyo xua énowa, powa taseuri.
Neáura éxaname poxonaе bárapo peabewa éxaname.

⁵Simeón irü Leví bara ewéichobe pambe,

irü paiña nemómoxi susato jiwi pajumetaema pokotsiwa paka tsipáebatsi.

Icha jüntükoyene paxéinamebe,

xua daxota saya penabi jüntükoyene paxéinamebe, xua daxota naba
paexanéibamebe ichamonaetha.

Paxambe pana nakuijüpamebe.

⁶Bápana jopa ichichipéibiño xua irü na-ekeibang,

xua poxonaе ichauxi payábara paebéibamebe,

xua poxonaе juntukuru paexanéibamebe,

bichokono paiña neanaepaneibixaembe.

Báyatha poxonaе pajüntükoyene anaepanéibamebe,

bapoxonaе aiñamonaе pajutebéibamebe saya poxonaе paiña amcho abe
éxanatsi ichüng.

Ichikuitha saya poxonaе bekein panaitakueintéibamebe.

Vacang pebtong pajanababéibamebe,

xua daxota jopa itaküüpaetsi xua peponaewa.

⁷¡Barichi bepa maisha bichokono abe pambe kai!

Bara maisha paiña koibanaewa bara be pong peaitabein pía pekoibanaewa
tatsi,

pókotsin xua bichokono peaitabein.

Paka yábara exanáeinchibe,

xua paiñamonaе daxita tómarangtha,

tsana nabarü jinoutadutsina ichamonaetha,

xua ichaxota tapexui pía pemómoxi susato jiwi tatsi.

⁸Xam Judá, jiña eweicho jiwi wüünaе kajainchina.

Xam amanayabíname poxonaе naba exanáename pomonaetha,
pomonaе jiña nekaitafáetabi jiwi.

Jiña eweicho jiwi katsita exanaena,

be pókotsi koyene xua barapomonaе pentabokotongtha enondekaena,
yawa íratha náitapa yüübajebina,

xua nekabarükuí iturajinaenexa tsane.

⁹Xam Judá, pong taxantom.

Xam jüntema póponame be neuthü koxim.

Poxonaе ba najainweta duwein, naroiba,

yawa jüntema bokoundeka be pong xua piño natsikotane neuthü.

Barichi xam dangwam be neuthü pesowatom xua dangwéi, xua daxota
dapong aibi xua bárapo neuthü petsakabíwatsi,

xua daxota anáepana.

¹⁰Dapong aibi xua pong Judá wekobepichinchi pía peayapusúü itorobi koyenewa tatsi.

Matáütano dapong aibi pong Judá wekobepichinchi pía naeto, po naeto xua yábara kaunúnuta pía peayapusúü itorobi koyenewa, po naeto nakobenabábaba, xua pong peitorobinxae jiwi, beya abü tsane poxonae patopaena pong pewüng ‘Siloh’, jei, pong bárapo naeto pía naeto tatsi, pongtha, pong daxita jiwi jumekowüntsina pokoyene xua exanaena, pokotsiwa xua bapong itoroba”.

[Hebreo jume pojume: “Siloh”, jei yábara jume jei: “Beya poxonae Siloh patopaena, xua pong Mesías baraichi”, jei, yawa ichikuitha xua jei: “Beya poxonae bapong patopaena Sílohtha”, jei.]

¹¹“Bapong Siloh pía burro penüng ketanota uvakuéi ümbotha, po ümbótotha barapong taitapeta.

¹²Peitamaikéitobe bichokono jerajérapa beyakaincha vino mera xua mera wüüinae.

Yawa pía wanong bichokono íñapana beyakaincha cabra mipi. Bapong bichokono pexeiñang tsane.

¹³Zabulón xam poponáename mera mene itapatha, ichaxota jerang pejebouneibiwa, irü nemómoxi susato jiwi.

Bárapo nakua muxunene itiya namuxunene kopatsina Sidón nákuatha.

¹⁴⁻¹⁵Isacar, xam xeináename pexeiña ira tsane xua jiña ira.

Bapoxonae irü nemómoxi susato jiwi xeinaena bárapo ira xua nafifinakaewatsina.

Daxota poxonae ichamonae icha ichichipaena, xua pepitsinexa tsane pokotsiwa xua xeinaena, barapomonaе saya kopatsina, xua bara saya petanotsíwatsi tsainchi. Barapoxonae barapomonaе kana exanaeinchi, xua bichokono tanakuichina ichamonae, xua bekein bara barapomonaе pía ira tatsi.

¹⁶Dan, jiñamonae itorobiya ewatsíname, icha icha bicheito ichi, pomonaе xua tamonaе. Bekein jiñamonae jopa aiñakuiyo tsane, xua jopa be ichamonae ichiyo, irü pomonaexae xua irü tamonaе.

¹⁷Dan, xam bichokono neanaepanaexae, daxota jiña nemómoxi susato jiwi kajüpaena, xua daxota abe kana exanaena ichamonaetha. Xam bichokono anaepanáename icha xua be jomo ichi xua anáepana, po jomo xua ba námtotha eka, xua kawayu taxubüxütéi sinchi, xua daxota jopeika pong ekeika.

- 18; Ooo, Nakom Tananekanamataxeinaein,
éwatang xua tamonae daxita nekapanepaewam tsane!
- 19 Gad, jiña nemómoxi susato jiwi barainaeinchi soldadomona.
Íchitha barapomona xuya bexa barainaena.
- 20 Aser, jopa juniya kata xuwi tsane pexaewa jiña írangtha.
Yawa xam xeináename pexaewa xua bichokono wüünae,
xua daxota irü pomona nákuang peewatsiwi xaena bárapo pexaewa.
- 21 Neftalí, xam saya jüntema poponáename,
ichi be oweibi ichi, pókotsin xua saya pópona.
Irü jiña nemómoxi susato jiwi jüntema jinompaena,
yawa pía írangtha tsanajinomparutsina.
- 22 José, xam bichokono pexeíña jüntükoyene nexeiaein.
Xamxaem bichokono kata pinmonae tsane jiña nemómoxi susato jiwi, icha
be nae ichi,
pókotsi nae unguua imoxoyo mene,
xuano xua nakoita pethéi.
Yáwano xua pemaxüranaein asiya nantakükúnüba.
- 23 Soldadomona, po soldadomonae bicheibi pepupunaewi, bárapo
soldadomonae jiña nemómoxi susato jiwi ita-aenaenei tsainchi.
Bárapo soldadomonae nemómoxi susato jiwi bichéibitha punaeinchi
matowa kafayakoteibina.
- 24 Íchitha jiña nemómoxi susato jiwi bichokono maxüdüangwéi tsane,
yawa pía naein bicheibin yabichéi anaepanaena.
Yábara jüntükoyene weiwéiname Nakom,
po Nakom ta Nakom, po Nakom daxita peayapusüü itorobi koyene pexeinaein.
Yábara jüntükoyene weiwéiname pong xua matawüing dútatsi,
pong xua jeichichi:
'Pong oveja peewatsin', jeichichi,
pong tananeyantsin.
- 25 Yábara jüntükoyene weiweingang xua Nakom kayawenaena,
po Nakom, xang jiña axaxáein, ta Nakom.
Bapong Nakom beta weyataeya kayábara paebina,
pong daxita peayapusüü itorobi koyene pexeinaein itabókotha yawa íratha.
Bárabü Nakom bichokono kayawenaena,
yawa jiñamona xua pexui nawita paxeináename.
- 26 Xang, pongxaein jiña axaxáein,
nawita beta weyataeya kayábara páebatsi,
beyakaincha xua poxona taxa yawa taena weyataeya neyábara paeba.
Bárapo weyataeya takayábara paebíwatsi,
xua tajü tsóponae, ápara xam nexa irü xua jiña pexui nexa.
Nakom kaitapeta xua eweicho jiwi jíwanam,
xua pata naneyawenaewam tsane,
xua bapong pata tanekapanenebiwa tsane.
- 27 Benjamín, jiña nemómoxi susato jiwi nawabcheiteibina.
Barapomona natsikotaena,
ichi be namo ichi tsane,

xua ba bichokono kuikoxone xua jeita.

Bapong xane duwéi xua teika baya.

Yawa pokotsiwa xua nakópaba,

kópata xua icha duweimonae xaena mérawi”, jei Jacob.

²⁸Daxita barapomona, xua doce pomonaebe, ápara Israel pía pexui tatsi, yáwano daxita baxuang paeba poxona pía pexui yábara paeba. Daxita pía pexui barompaya yábara paeba tsíniya.

Meje poxona Jacob petüpaein bótatsi Macpela ira ibowoutha

²⁹Bapoxona pía pexui barái, jeye: “Bara saya tsiwiyo inta akoibi xua tatüpaenexa. Tatüpaein panabore ichaxota tamo susato jiwi petüpaewi bobena. Ibowoutha pana nebóyama, po ibowóu boka ichaxota po ira pong pewüing Efrón pía ira tatsi, pong hebreomonaepin. ³⁰Baxota xua Canaán nákuatha ápara xua jei, xua po ibowóu boka Macpela íratha xua ichaxota náitama táekabe Mamre ira. Bárapo ibowóu kaena báyatha Abraham waámo kómota xua yawa ira kómota, po ira pong pewüing Efrón pía ira tatsi. Bárapo ibowóu waámo daxita pía pemomo susato jiwi tsikómota. ³¹Bárapo ibowoutha waámo petüpaein bóyatsi, yawa píowa tatsi baxota petüpaein bóyatsi, powa waakue Sara. Irü taxa Isaac, xua paiña amo, baxota ibowoutha bóyatsi, irü Isaac píowa tatsi, powa paiña akue baxota petüpaein bóyatsi, powa Rebeca. Baxota irü taseuri petüpaein boyang, powa Lea. ³²Ira yawa ibowóu kómotang pomona pewüing heteomona.”

³³Poxona Jacob baxua najumeweta, poxona pía pexui tsipaeba, ekeicha petaxu cámatha nataxuyüütabota; bapoxona tüpa.

50 ¹Néxata José paxa petüpaein naishakateita wáetaba. Yawa wekoyeya paxa tsutsuba. ²Bapoxona José itoroba pomona jiwi peyawübiwi, pomona xua tanakuítatsi, xua paxa petüpaein petántawe othobabinéxatsi petuxuéiwangtha. Bara barapomona baxua éxana.

³Cuarenta po matakábibe kobenáemata xua poxona Jacob petüpaein kaxuébatsi petuxuéiwangtha. Daxota aíña matakabin kobenáemata poxoru nantawénona xua peexanaenexa baxua xua be píakui pexeinaexae. Egipto nakuapiwi, Israel, pong Jacob, petüpaein siwawekoyeichi setenta po matakábibe.

⁴Poxona Jacob yábara itanuwé káewatsi xua wekoyéi, bapoxona José tsipaeba pomona xua Egipto nakua peewatsin píabo petaewatsíwichi, po bo pin bo, jeye:

—Icha xang beta éxanang xua daxota pana nebarükui iturajíname, paka wüükatsi xua painta tsipáebare Egipto nakua peewatsin. ⁵Bapong patsipáebare pokoyene xua taxa, poxona juntukuru tüpaena, taxa nekui-itoroba xua Nakom peitabaratha tana nakuiwüünae tsiwünaya yábara paebinexa pokoyene xua exanaein. Neitoroba xua bepa pinae bapong taxa ibowoutha boyaein, po ibowóu xua báyatha natsiwüünaeta, xua po ibowóu boka Canaán nákuatha. Bapong wüükang xua bapong tana nepukopatsinexa xua taponanexa xua taxa ibowoutha taboyaenexa petüpaein. Bapoxona ekeicha patopaen, jei José barapomonaetha.

⁶Bara Egipto nakua peewatsin jumenota, jeye:

—Moya axa petüpaein bóyama ibowoutha icha be pókotsi koyeneya bapong kaitoroba.

⁷José pona xua paxa petüpaein peboyaenexa ibowoutha. Yáwano José yánabatsi pomona pentakaponaewi, pomona xua pekanamataxeinaewi Egipto nakua

peewatsin píabo tatsi, xuano daxita pomonae pekanamataxeinaewi Egipto nákuatha Egipto nakua peewatsin nexa. ⁸Barichi José yánabatsi pomonae José piamonae tatsi, yawa Jacob piamonae tatsi, yawa peweicho jiwi kuéyabatsi. Barapomonae saya meisha kuenta jijinka pía pexui xua Gosén íratha ena. Yáwano kuenta jijinka pía ovejang yawa pía vacang. ⁹Barichi José yánabatsi pomonae xua jijinka kawayu pekaponaeénaxitha, írúno pomonae jijinka kawayuntha. Daxita barapomonae pin bicheito jiwi.

¹⁰Barapomonae pata ichaxota po ira pewüng Atad ira, po ira eka ichaxota pokotsiwa xometo wekoina xua icha muxunene wétsina xua Jordán ménetha. Baraxota barapomonae piakuitha éxana pókotsi koyene xua barapomonae Jacob petüpaein yábara siwawekoyeichi bichokono. Baxota José paxa petüpaein siwawekoyéi siete po matakabibetha.

¹¹Cananeomonae tane baxua, pomonae bárapo nákuatha jinompa. Barapomonae jeye: “Maisha Egipto nakuamonae bichokono siwawekoyéi, xua pong petüpaein siwawekoyeichi”, jei. Daxota bárapo ira wüngduta jeye: “Abel-mizraim”, jei. Bárapo ira eka ichaxota pokotsiwa xometo wekoina, xua icha muxunene wétsina eka xua Jordán ménetha. [Hebreo jumetha pojume: “Abel-mizraim”, jei yábara jei: “Egipto nakuapiwi pía pesiwawekoyéi koyenewa”, jei.]

¹²Jacob pía pexui tatsi bara éxana daxita be pókotsi koyeneya Jacob kui-itoroba. ¹³Jacob pía pexui kapoinchi Canaán nakua beya. Jacob ibowoutha býatsi ichaxota po ira pewüng Macpela, po ibowóu býatha Abraham kómota, xua komotatsi pong pewüng Efrón, pong hebreomonae-pin. Abraham bárapo ibowóu kómota, xua pía pemómoxi susato jiwi tsikómota. Bárapo ira yawa bárapo ibowóu boka ichaxota náitama táekabe po ira pewüng Mamre. Macpela eka Mamre pewünae weya.

Meje poxonae José jüntema jinompa kana éxana peweicho jiwi

¹⁴Poxonae José paxa ibowoutha boya petüpaein, kaibe náwiya Egipto nakua beya. José daxita kaewa barü eka-pona, peweicho jiwi tátsino írú ichamonaeno pomonae kuéyabatsi xua paxa tatsi peboyaenéxatsi. ¹⁵Jacob býatha petüpaexae, daxota José peweicho jiwi tatsi natsipaeba, jeye:

—Metha ánoxuae ápara José naka ita-aenaenei, yawa xuya abe naka exanaena xua kopiya abe wataexanaexaetsi.

¹⁶Néxata José peweicho jiwi tsipáebatsi, jeye:

—Jiña axa pana nejume-itoroba pewünaeya xua poxonae tüpaena. ¹⁷Bepa pinae paka jeichi: ‘Kawúükatsi, yábara kuijüntemáinare jiña eweicho jiwi pokoyenein xua kata abe éxana, tsipéi xaniwaicha jopa beta kata exanaeyo’, be pinae paka jeichi, xua axa pana nejume-itoroba. Daxota jumedangweya paka wúükatsi: pana yábara kuijüntemáinare pata abe exanáe koyenewa. Bara paxang Nakom amana-pí petanakuichiwichi pang, po Nakom jiña axa pía Nakom tatsi, jei José peweicho jiwi tatsi.

Poxonae José tsipáebatsi baxua, bapoxonae José wekoyéi. ¹⁸José peweicho jiwi tatsi yawa wekoyéi tsürüküpáe. José peitabaratha tatsi pentabokotongtha tau-meinchi. Yawa írabe taeumendeka beya poxonae irang jayabareka peitapangtha, xua José pebarükui-iturajinaenéxatsi. Yawa barapomonae jeye:

—Bara paxang panatsikotang be pomonae amanaya jiña pata pákata nakuichi jíwichi pang, jei barapomonae.

¹⁹Íchitha José jumenota, jeye:

—Jopa pajunuwinde. Jopa beexanaeiño pokoyene xua Nakom jopa itorobiyo. ²⁰Paxam panantaxéiname xua abe painta éxaname. Íchitha Nakom icha koyeneya éxana bárapo koyene weya. Ekeicha pexeíña koyeneya kana éxana xua peexanaenexa pokotsiwa xua ánoxuae tainchi. Nakom éxana xua pinmonae pekapanenebiyaenéxatsi pin jainbo weya. ²¹Daxota jopa pajunuwinde. Paka katsibinchi penabanaewang yawa xua paiña pexui penabanaewa tsane.

Bara barapomonae José jüntema jinompa kana éxana peweicho jiwi xua poxonae antobeya tsipaeba.

Meje poxonae José tupa Egipto nákuatha

²²José irü paxa tatsi piamonae tatsi jinompa Egipto nákuatha. José pópona 110 po weibe. ²³Yawa José tane xua Efraín pía pexui tatsi pía pemómoxi tatsi. Barichi poxonae Maquir pía pexui tatsi tanakatsíwatsi José pentabokototha tatsi kuarébatsi xua be piamonae éxana. Bapong Maquir pong José pemomo tatsi, pong xua Manasés pexanto tatsi.

²⁴Kaentakábitha José peweicho jiwi barái, jeye:

—Be kónotha inta seika matakabi xua tatüpaewa tsane. Íchitha Nakom paka yawenaena, yawa paka kaponena po nakue weye, xua paiña nepaka kaponena ichaxota po íratha báyatha Abraham waámo yábara tsiwüünae muxudútatsi, irü xua Isaac amo yábara tsiwüünae muxudútatsi, irü xua taxa Jacob yábara tsiwüünae muxudútatsi.

²⁵José itoroba xua Israel pía pexui tatsi nayábara tsiwüünae muxudubina poxonae xua tsipáebatsi pokoyene xua barapomonae bewa exanaena. José jeye:

—Bara xaniwaicha, Nakom paka yawenaena xua paiña neponaewa tsane bárapo nakue weye. Poxonae baxua pákata exanaena, panakaponde tapepong bárapo nakue weye.

²⁶José tupa Egipto nákuatha poxonae 110 po weibetha. Petüpaein matawé othobábatsi petuxuíwangtha. Yawa yantaxatatababótatsi Egipto nákuatha pokotsiwangtha ba xua jiwi nayawa múthüka xua caja xua naepaewa.

Nakom Pejume Diwesi Xua Peru Diwesi Prólogo

Meje po diwesi xua Nakom Pejume Diwesi xua peru diwesi xua poxonae aena. Bárapo diwesi ápara xua aiña díborong. Bárapo diwesin kaena báyatha Nakom pía Pejumopetünaxü tatsi itoroba, Israel pía pemómoxi susato jiwi tatsi itoróbatsi xua petinaenexa bárapo diwesin. Bárapo diwésintha yábara paeba xua poxonae Nakom kana éxana Israel pía pemómoxi susato jiwi tatsi, xua piamonae tatsi petanaexanaewa tsainchi. Daxita bárapo diwesin kaena báyatha tina xua beya dos mil po weibe yapukaewa.

Po diwesi xua xéiname ánoxuae jopa yawa múxuna tinaeyo daxita. Saya meisha yábara tina xua peaiñakuín koyenewang xuano xua jopa peayapubenexa poxonae yóroba. Kamuxuwétatsi poxonae wétame xua yórobame po diwesi, ínkane daxita omeicha yórobare xua Nakom Pejume Diwesi xua peru diwesi xua poxonae aena xua wwei jumetha xua ichaxota jei: “Antiguo Testamento”, jei.

Diwesi Xua Nakom Pejume Diwesi Xua Peru Diwesi

Resumen—historias del Antiguo Testamento

Meje yábara poxonae Egipto nakuapiwi Israel pía pemómoxi
susato jiwi tatsi jopa xapain taexanaetsi

(Exodo 1)

Poxonae José tüpa xua irü peweicho jiwi tatsi tawerapatsi, bapoxonae bapomona pía pemómoxi susato jiwi tatsi áwiya jinompa Egipto nákuatha. Barapomona wüing jeichichi po wüing xua jei: “Israel pía pemómoxi susato jiwi tatsi”, jei, tsipéi barapomonae jíwana tatsi pebin pong pewüing Israel bapong pía pemómoxi susato jiwi tatsi. Bapong Israel icha wüing Jacob. Bapong José paxa tatsi. Barapomona pía pexui tatsi pinmonae xeina, xua aiña dapaeinxano beya daxota bichokono jiwi ayéi naexanapona.

Bárapo dapaetha Egipto nakuapin tamrópata pítaba xua pong Egipto nakua peewatsin náexana xua ichüing petüpaexae pong kopiya. Bapong Egipto nakua peewatsin José kaena báyatha jopa yábara jumetaetsi pokoyene xua José beta éxana poxonae pin jainbo nakua tsúrukuae Egipto nákuatha.

Egipto nakua peewatsin jopa beta yábara nantanaxeinaeyo, xua jopa beta yábara nantanaxéinaetsi, Israel pía pemómoxi susato jiwi tatsi poxoru pinmonae. Bapong junuwa xua pokoyene Israel pía pemómoxi susato jiwi tatsi bichokono peayapusüü jiwi penaexanaewa tsane beyakaincha xua Egipto nakuapiwi.

Daxota Egipto nakua peewatsin Israel pía pemómoxi susato jiwi tatsi yábara tamrópata notarükúpatsi xua pekana exanaewa tsainchi be pomonae jiwi pebusikuitaetaeyebéwichi. Bapong Egipto nakua peewatsin bichokono itoroba, xua Israel pía pemómoxi susato jiwi tatsi bichokono itoróbatsi, xua bapong dangweya petanakuichiwa tsainchi. Matáütano bapong kana éxana xua Israel pía pemómoxi susato jiwi tatsi pía matabüxüing barompa tsíniya.

Bapong itoroba Egipto nakuapiwi xua seikaya pijimonaexae xua barapomonae pekanamataxeixeiniyaewa tsane, xua daxita matabüxüing tsíniya pekanamataxeixeiniyaewa tsainchi bárapo Israel pía pemómoxi susato jiwi tatsi, xua bárapo matabüxüing tsíniya be kaein kana barü ompatsiníyatsi. Bapoxonae bapong itoroba xua bepa pinae petaexanaewa tsainchi aiña tómarabe xua pepa tómarabe, xua pexawang matabong nexa.

2

Bekein Egipto nakuapiwi abe taéxana, Israel pía pemómoxi susato jiwi tatsi abe taexainchi, íchitha áwiya Nakom yawena, xua Israel pía pemómoxi susato jiwi tatsi yaweinchi. Barapomona pexui bichokono xeixeiapona ekeicha, bekein Egipto nakuapiwi abe taéxana. Baxua Egipto nakuapiwi taéxana poxoru bichokono ita-aenaenei barapomonaetha beyakaincha xua poxonae aena, yawa bichokono abe taexanapona beyakaincha xua poxonae kopiya. Beya írürü Egipto nakua peewatsin bara ichiya kana éxana barapomonaetha.

Bapong itoroba, yábüxi itoróbatsi powaxi peyawenaewaxi poxonae yábüxi pexui tanakatsiwéibatsi powaxi Israel pía pemómoxi susato jiwi tatsi. Barapówaxi itoróbatsi xua bepa pinae tajutebebinchi pexui pebinwüütoxi xua poxonae tanakatsiwéibatsi pexui.

Barapówaxi, powaxi peyawenaewaxi poxonae yábüxi pexui tanakatsiwéibatsi, barapówaxi pebürüya yábara nantaxeinarúkupa xua jumekowünta Nakomtha xua jopa pejumekowüntsíwatsi pong Egipto nakua peewatsin. Nakom tsita wüünaetsi xua pokoyene barapówaxi nantanaxeina xua jopa pejutebiwa tsane pexui. Daxota Nakom taéxana, barapówaxi taexainchi xua bárapo koyene bara tawüüinae tsainchi barapówaxi. Néxata pong peewatsin Egipto nakua, Israel pía pemómoxi susato jiwi tatsi itoróbatsi xua barapomonae pía pexui xua pebiwi ménetha pebebaichaibinexa tsane poxonae naexaneiba ichaxota po mene pewüng Nilo mene.

**Meje yábara poxonae Moisés jüjüta xua yawena Israel
pía pemómoxi susato jiwi tatsi**

(Exodo 2.1-22)

Bárapo dapaetha xua poxonae bárapo koyene Israel pía pemómoxi susato jiwi tatsi taexanéibatsi írürü bapoxonae Israel pía pemómoxi susato jiwi tatsi jíwanapin bapong pishéuribe tanakatsíwatsibe pexuyo pebinwüüto. Bapong Leví pía pemómoxi susato jiwi jíwanapin tatsi. Bapong Leví pong Jacob pexanto tatsi. Bárapo pebin pexanto tatsi bichokono ítabüng tsekae, daxota yábüyo jopa ichipaeyo xua pexubiwa Nilo ménetha.

Barapowa pexanto matsiyata piabotha akoibi po xometíyobetha xua pía Egipto nakuapiwi jopa peitaküüpaewa tsainchi xua pexuyo petaebiwa tsainchi. Íchitha bapowa yaputane xua nama ekeicha jopa itaküüpaetsi xua pexuyo pematayatsiwa pewekoyeixae.

Néxata bapowa pita xua peyakuaewa kote xua be jériyo. Báraxua pejuma weya katsaba éxana xua be jutukunainto xua peanainkuitong xua mera jopa pejujuwinexa. Bapoxonae pexuyo boteta bárapo peyakuaewa kótetha. Yakote kopatabaruta naepanáewatha mene itapatha xua Nilo ménetha. Yábüyo matapiwayo xua pexuyo pentapiyo tatsi baxota imoxoyo ungukea xua pía yaputaetsi xua eta be kana ichi tsainchi kote.

Pirapaeyo bapoxonae Egipto nakua Pekanamataxeinaein pexantiyo tatsi baxota patopa. Barapowa bara beya pona xua penowaenexa ménetha. Bapoxonae barapowa kote taebaruta. Barapowa itoroba pía pebusikuitaetaewayo xua petapichinéxatsi kote. Barapowayo, powayo pepichixae peitabarayo deka taeta, xua peitabarayo táetatsi, powayo Egipto nakua peewatsin pexantiyo tatsi. Poxonae bapowa yapupataxuba bapoxonae pexuyo yakote taebótatsi. Pexuyo wekoyéi bichokono. Egipto nakua peewatsin pexantiyo tatsi yábara jüntükuí naetabareka exainchi bárapo pexuyo.

Barapoxonae barapowayo powayo pexuyo pámxoxae tatsi imoxoyo unguatába. Néxata bapowayo tsipaeba Egipto nakua peewatsin pexantiyo tatsi xua bepa pinae tawabina yábüyo xua barapowa pexuyo petawichitinexa tsainchi. Barapowa Egipto nakua peewatsin pexantiyo tatsi bara yábara barü jejéi xua barapowayo paeba.

Barapowayo píabo bekuinaepoiña, xua pena pewabinexa. Barapowa Egipto nakua peewatsin pexantiyo tatsi matómata bapówatha xua petawichitinéxatsi

bárapo pexuyo. Poxonae pexuyo báyatha xumitokópatatsi, barapowa powa koxi-waxae, kápona pexuyo Egipto nakua peewatsin pexantíyotha tatsi. Barapowa bara yatsikaewa pepa pexanto éxana. Bárapo pexanto wüngduta: “Moisés”, jei.

2

Moisés wíchaba yawa pepa pebin náexana. Kaentakábitha xua poxonae pona námtotha, tane be piamonae tatsi pomonae Israel pía pemómoxi susato jiwi tatsi. Barapomonae, pomonae Israel pía pemómoxi susato jiwi tatsi nantawénona bichokono dangweya nakuita. Báraxua Moisés yábara jüntükuí naetaba exainchi.

Pirapaeyo Moisés tane Egipto nakuapin xua bapong kuainta, xua Israel pía pemómoxi susato jiwi tatsi jíwanapin kuaintáyatsi. Moisés bichokono awabchüsüü. Matha beta tane. Dapomonae aibi pomonae petáewatsi. Bara Moisés néxata bexuba Egipto nakuapin, yawa müthüthüxuba taetabotha xua ichamonae jopa petaewa tsane.

Icha matakábitha, Moisés poxonae ekeicha pona xua námtotha peponaenexa, tane Israel pía pemómoxi susato jiwi tatsi jíwanapinbe xua nabeyáyuyabe. Moisés imoxoyo patopa ichaxota bapongbe nabeyáyuyabe. Moisés néxata kaseba pongtha pong jopa xeinaeyo xua xota penayaita aenáe exanaewa, xua bapong ekeicha jopa pebenexa ichüng. Néxata bapong Moisés barü anaepánatsi. Néxata bapong Moisés yábara páebatsi jeye:

“¿Jintam kaitoroba pataxantha xua naexáname pong be jiwi neyábara paebin xua penatsikuentsiwa xua abe peexanaexae xuano xua naexáname pong be pentakaponaein?” jei bapong.

Néxata bapong namchi, Moisés baraichi, jeye:

“¿Jiña nebexubichi icha mexuae ichim Egipto nakuapin?” jei bapong.

Moisés najüntükoyene benaeka yawa junuwa poxonae pebin baxua paebe tsipéi yábara nantanaxeina xua metha daxita bara báyatha yaputane. Poxonae Egipto nakua peewatsin jumetane xua pokotsiwa juiña éxana, bapoxonae bapong itoroba xua Moisés pebexubiwa tsainchi.

Íchitha Moisés naetsíriwa, Egipto nakua wenaetsiriwiya. Madián nakua bewarapiya. Bárapo nákuatha Moisés pópona sacerdotemonaepin piabotha tatsi. Bapong Moisés yábüyo pita xua kaewayo jíwana xua sacerdotemonaepin pexántixi tatsi. Barapowayo pewüng Séfora. Bara Moisés piowabe pexuyo xéinabe pebinwüüto pewüng Gersón.

**Meje yábara poxonae Nakom Moisés wábatsi xua peponaenexa
xua peyawenaenexa Israel pía pemómoxi susato jiwi tatsi**

(Exodo 2.23—4.31)

Pírapae xua poxonae aiña wei yapukaewa bapoxonae pong Egipto nakua peewatsin tüpa. Ekeicha ichüng xuya bapong pukoya kaponaeinchi pong Egipto nakua peewatsin.

Bapoxonae Nakom yábara najüntükui wüünaeta xua peyawenaewa tsane piamonae pomonae Israel pía pemómoxi susato jiwi tatsi. Nakom tane xua Egipto nakuapiwi bichokono átene éxana, xua átene exanéibatsi Israel pía pemómoxi susato jiwi tatsi. Bara Nakom jumenaitáewata pokotsiwa xua pimonaexae wüü-katsi. Daxota yábara najüntükui wüünaeta xua Moisés peitorobiwa tsainchi, xua barapomonae penotsiwa tsainchi Egipto nakua weya.

Kaentakeitha Moisés paxuyo wéxotha ta-eenauya ovejang. Poxonae bapong patopa ichaxota Horeb demuxuwa matawüing, bapoxonae tane xua naewa taxungkua xua íchitha jopa weyowanayiyo. Moisés imoxoyo kakuita pona xua peyaputaenexa pokotsiwa xua tane. Néxata Nakom Moisés tsipáebatsi xua Moisés pewüingtha tapáebatsi. Bara Moisés jumenota. Néxata Nakom itoroba xua bapong Moisés penataxuwejontsinexa xua nataxuxátata. Baxua Nakom itoroba tsipéi ápara peita-baratha táungkuatsi xua Moisés peitabaratha taungkua. Bara baxua Moisés éxana pokotsiwa Nakom itoroba.

Nakom barái, jeye:

—Ápara xang Nakomüing. Ápara jiña amo susato jiwi pía Nakomüing tatsin. Abraham pía Nakomüing tatsin, irü Isaac pía Nakomüing tatsin, irü Jacob pía Nakomüing tatsin. Xang tang, maisha Egipto nakuapiwi jiñamonae pomonae Israel pía pemómoxi susato jiwi tatsi bichokono átene exanéibatsi. Xang tha kapane-paetsi. Tha Egipto nakua weya notichi. Tha bapoxonae kaponaetsi Canaán nakua beya. Bárapo nakua wüünae, yawa barapomonae jüntükoyene weiweinaeya jinom-paena bárapo nákuatha.

”Moisés ichichipang xua neponaewa tsane ichaxota pong Egipto nakua peewatsin. Bapong barü kueikueijande. Xam matakaponáename Israel pía pemómoxi susato jiwi tatsi xua Egipto nakua weya matakaponáename, jei Nakom.

Moisés jumenota, jeye:

—Xang jopa ta-aiñakuín. Jopa neitaküüpaeyo xua taexanaewa, jei Moisés.

Nakom jeye:

—Xang kayantiya poponaeinchi xua nekaitaküüpaewa tsane xua neexanaewa baxua, jei Nakom.

2

Moisés yáíñaba jeye:

—Israel pía pemómoxi susato jiwi tatsi yábara neyaiñabina: ¿Jintam kaitoroba? nejéi tsane. ¿Eta xua metha jumenotakuaein? jei Moisés.

Nakom jumenota, jeye:

—Barapomonae tsipáebare xua xang ápara takaitorobíwatsi pongxaein Nakomxaein. Matáütano tsipaebareno xua xang ápara Abraham pía Nakom tatsin, yawa xua Isaac pía Nakom tatsin, yawa xua irü Jacob pía Nakom tatsin. Yawa tsipáebare xua xang bara tapoponaein xua tawüing Jehová. Daxitang báraxua kopiya matha tsipáebare pítiri jiwi xua Israel pía pemómoxi susato jiwi tatsi.

”Bapoxonae daxita pam xua nakaemonae pam paponde. Daxita pam patsipáebare pong Egipto nakua peewatsin xua xang tapaka itorobíwatsi aishowa beya xua ichaxota po ira beya yapujüpa akoibi po matakábibe xua namto iya.

”Patsipáebare xua daxota bara beya papóname xua paiña nejutebinexa tsane duwéi xua pana netsita exanaewam tsane xua be ofrendang matawüing po ofrendang xua amanaya pata tana nekatsiwam tsane. Bapong jopa ichichipáe tsane xua jopa paka nekapukopabi tsane xua paiña neponaewa tsane. Xang tha átene exa-naetsi Egipto nakuapiwi. Néxata bapoxonae bapong paka pukopabina xua paiña neponaewa tsane xua poxonae paka itorobina xua bara paiña neponaewa tsane pexaiña weya.

Íchitha Moisés jumenota, jeye:

—Pítiri jiwi, po pítiri jiwi pemuxuwetsí jiwi Israel pía pemómoxi susato jiwi tatsi metha jopa nejumekowüntsi tsane poxonae baxua tsipaebin, jei Moisés.

Néxata Nakom Moisés tsipáebatsi jeichi:

—Naewa íratha xoreíña, po naewiyo nenakobebabinaewa, jeichi.

Bara Moisés po naewiyo penakobe babinaewa íratha xoya. Bapoxonae naewa jomo náexana. Bapoxonae ekeicha Moisés tsipáebatsi jeichi:

—Jomo boso pire, jeichi.

Íchitha poxonae Moisés boso pita ekeicha kaewa naewa naexananaya. Barichi Nakom itoroba, Moisés itoróbatsi jeichi:

—Nakobejeinka paparúwatha xua jiña kamíshatha. Bapoxonae ekeicha nakobejutsina, jeichi.

Poxonae baxua éxana xua nakobejeka yawa xua ekeicha nakobejutsina bichokono akobebe tsanaya. Be fura kobexainchi. Bara be xua báyatha bichokono átene. Poxonae Moisés ekeicha kaewa nakobejeka, yawa xua ekeicha nakobejutsina, bapoxonae ekeicha kobewüünae tsanaya. Yawa Nakom jeye:

—Poxonae exanáename bárapo koyenéwabe, bapoxonae pítiri jiwi xua Israel pía pemómoxi susato jiwi tatsi yábara kajumekowüntsina xua ápara xang pong takaitoróbíwatsi. Icha kataunxuae jopa yábara kajumekowüntsiyo, bewa tsiwiyo mene pichim xua Nilo mera, yawa íratha matatsún epatábare. Bapoxonae bárapo mera pejana naexananayaena.

3

Íchitha Moisés áwiya junuwa xua peexanaewa tsane baxua, pokotsiwa Nakom ichichipa xua bapong Moisés peexanaewa tsane baxua. Moisés namchi, jeye:

—Bápana jopa beta kueikueijang jiwi peitabaratha. Najumekatsanoteibang, jei. Nakom namchi jeye:

—Nantanaxéinare xua xang ápara Nakom pongxaein xua kakoibo exainchi. Taema yawa éxande pokotsiwa xua katsipáebatsi. Xam kayawenaeinchi xua nekai-taküüpaenexa xua nekueikueiweiwa tsane beta jiwi peitabaratha tatsi.

Íchitha áwiya Moisés jopa ichipaeyo. Moisés wüüka Nakomtha xua Nakom peitorobiwa tsane ichüng. Nakom bichokono kaseba, Moisés kasébatsi, tsipéi Moisés baxua wüüka. Íchitha Nakom jeye:

—Eweicho Aarón itaküüpatsi xua nekayawenaewa. Néxata xam kuita katsipaebinchi, néxata Aarón xuya tsipaebina jíwitha xua daxita ichamonaetha pokotsiwa xua katsipáebatsi. Bapong Aarón námtotha kakaxinaena poxonae xua kaibeya ponáename Egipto nakua beya.

4

Moisés pona ichaxota paxuyo tatsi eka, yawa paxuyo wüüka xua paxuyo pepukopatsiwa tsainchi xua pesiwaponaenexa piamonae Egipto nakua beya. Bapong Jetro pong Moisés paxuyo tatsi. Bapong bara yábara nantanaxeinaeya jejéi.

Bapoxonae Moisés píowa barü wárapa Egipto nakua beya, yawa pía pexui barü wárapa. Námtotha, Nakom áwatha muxu Moisés pebexubichi tsipéi jopa pexanto withábiyo xua pokotsiwa ichaxota pebiwi nareixakaena xua jopa tsiwiyo jumapawí kaxinaxubétsiyo. Íchitha Moisés píowa tatsi, kaena naiña pexanto

withabaxuba. Bapoxonae bara Nakom kópata xua bara kataunxuae peponaewa tsane námtotha.

Ichá be pókotsi koyeneya báyatha Nakom Aarón petsipaebixaetsi xua bepa pinae Aarón petaewa tsane Moisés, bara námtotha nakaxínabe. Nékata Moisés daxita yábara tsipaeba, Aarón tsipáebatsi daxita pokoyenein báyatha Nakom Moisés tsipáebatsi.

Pirapaeyo bapongbe daxita kaetukaetútabe pítiri jiwi xua Israel pía pemómoxi susato jiwi tatsi. Aarón bárapo pítiri jiwi yábara tsipaeba daxita pokoyene xua pinae Nakom Moisés tsipáebatsi. Yawa bapongbe tsita itúútabe bárapo pítiri jiwi xua naewa jomo náexana xua ekeicha kaewa naewa náexana. Yawa bárapo pítiri jiwi tsita itúútatsi xua Moisés bichokono akobebe tsanaya be fura kobexainchi. Bara be xua báyatha átene. Ekeicha kobewüünae tsanaya xua akobexaibi tsanaya.

Bara bárapo pítiri jiwi xua Israel pía pemómoxi susato jiwi tatsi yábara nantaxeinarúkupa pokoyene xua Nakom methaunxuae yawenaena xua barapomonae yawenaeinchi pomonae Israel pía pemómoxi susato jiwi tatsi. Bárapo pítiri jiwi pentabokotongtha umena xua Nakom wüünae pejainchiwa tsainchi.

**Meje yábara xua poxonae Egipto nakua peewatsin jopa
bekopatsiyo xua Israel pía pemómoxi susato jiwi tatsi
Egipto nakua weya peponaewa tsane**

(Exodo 5—10)

Moisés irü Aarón pónabe xua pía táetsibe pong Egipto nakua peewatsin. Bapongbe tsipáebabe bapongtha jeibe:

—Nakom pana itorobeba xua aishówatha pata po naewa tsane yawa xua pin pexaewa pata nabarü exanaewa tsane bapong nexa, jeibe bapongbe.

Íchitha pong Egipto nakua peewatsin jeye:

—Nakom pong paiña Nakom jopa netsita aiñakuiyiyo. Jopa paka kopatsichi xua paiña neponaewa. Saya meisha baxua xua paichichípamebe ápara xua paiña abe exanáetsibe. Jopa pakopatsimbe xua paiñamonae penakuichiwa tsane.

Pong Egipto nakua peewatsin itoroba ichamonae pomonae pentakaponaewi xua Egipto nakuapiwi, xua Israel pía pemómoxi susato jiwi tatsi peitorobinéxatsi xua ekeicha mataropeichiya bichokono penakuichiwa tsane. Barichi pong Egipto nakua peewatsin itoroba jeye:

—Nama ekeicha jopa naepanaewang pakatsibinde po naepanaewang xua peka-nantawenonaewa xua peexanaewa tsane tsórobong xua adobe matawüing nexa. Jame ichichipang xua nama barapomonae piakoya jeichina naepanaewang xua adobe nawita peexanaewa tsane xua kaentakeitha nexa xua ichi kopiya ichaibi. ¡Maisha Israel pía pemómoxi susato jiwi tatsi fifina! Daxota barapomonae ichichipa pona aishówatha xua pía exanaetsi pin penabanaewa xua barapomonae pía Nakom tatsi nexa, jei pong Egipto nakua peewatsin.

Bara bapoxonae Israel pía pemómoxi susato jiwi tatsi jopa itaküüpaetsi xua adobe nawita peexanaewa, poxoru áwiya barapomonae nantawénona xua peponaewa xua piakoutha pejeichinexa naepanaewang. Daxota Egipto nakuapiwi kuainteiba nawita, Israel pía pemómoxi susato jiwi tatsi kuaintéibatsi. Nékata Israel pía pemómoxi susato jiwi tatsi Moisés kasébatsi irü Aarón kasébatsi xua yáitama ítara barapomonae kapanenebiya tsipaebichi bárapo penakuichiwa weya

xua poxonae dangweya nakuita. Íchitha ánoxuae nama bichokono nama ayapubé taexainchi. Moisés bara weya pona yawa tsipaeba Nakom, jeye:

—¿Eta xua painta baxua éxaname, pongxaem pata tananentakaponaem? Ánoxuae nama bichokono painta jopa xaexaenakaeyo beyakaincha kopiya, jei Moisés.

Nakom Moisés jumenótatsi, jeye:

—Saya abü paéware yawa bexa patáename. Daxitang xua báyatha katsipáebatsi bara baxuang táename. Bapong pong Egipto nakua peewatsin paka itorobina xua paiña neponaewa tsane Egipto nakua weya. Xang paka matakaponaeinchi Canaán nakua beya, yawa bárapo nakua paka katinchi, jei Nakom.

2

Moisés pona yawa baxua yábara tsipaeba pítiri jiwi xua Israel pía pemómoxi susato jiwi tatsi. Íchitha barapomonae nama jopa ekeicha jumenaitomatsiyo pokotsiwa xua Moisés paeba.

Moisés irü Aarón ekeicha pónabe ichaxota pong Egipto nakua peewatsin. Aarón náetiyo íratha xuba yawa náetiyo jomo naexananaya. Íchitha pong Egipto nakua peewatsin jopa ichipaeyo xua pejumetaewa xua Moisés irü Aarón páebabe. Bapoxonae Nakom Moisés tsipáebatsi xua bepa pinae Aarón mene jayabina naetfyotha Nilo mene xua mene pejana penaexananaeyaenexa.

Bara barichi, Moisés irü Aarón éxanabe pokotsiwa itorobatsibe Nakom. Daxita duwéi xua xuang bárapo ménetha jinompa, wérapa. Matáütano mene aibi xua peapaenexa. Bekein baxua éxana íchitha áwiya pong Egipto nakua peewatsin jopa kopatsiyo xua peponaewa tsane Israel pía pemómoxi susato jiwi tatsi.

Néxata Nakom ekeicha itoroba kamatsaxi. Bapoxi Egipto nakuapiwi abe kana exainchi. Nakom jopa juniya itorobiyo kwei xua Egipto nakuapiwi tsi-itoróbikatsi. Bapoxonae waeso itoroba, yawa orong itoroba yawa tarüng yawa bapoxonae ekeicha deina itoroba. Íchitha deina jopa yaponaeayo Gosén nákuatha ichaxota jinompa Israel pía pemómoxi susato jiwi tatsi.

3

Ekeicha bapoxonae Nakom itoroba xua vaca pía domae, xua daxota daxita vacang wérapa Egipto nakuapiwi pía vacang tatsi. Íchitha Israel pía pemómoxi susato jiwi tatsi pía vacang tatsi jopa tawerapaetsi.

Tsiwiyo pirapaeyo, Nakom éxana xua daxita Egipto nakuapiwi pekaxibinéxatsi xua pokotsiwang be furang xua peaperüütanewang. Bapoxonae ekeicha itoroba xua tsükütsükei xua be pepatong xua baxua yawa yaitajoibopona. Nawita pabin xua baxuang penameiwa yapabi abe éxana. Íchitha daxita baxuang jopa othopeikaeyo ichaxota jinompa Israel pía pemómoxi susato jiwi tatsi. Ekeicha naiña Nakom itoroba suremonae. Daxita bárapo suremonae daxita xane po penameiwang xua xuang nakópaba xua nakuapiwi pía penameiwang tatsi xua pabintha.

Bapoxonae ekeicha Nakom itoroba xua kirei xua daxita Egipto nákuatha. Saya meisha Gosén nákuatha jopa daichiyo ichaxota Israel pía pemómoxi susato jiwi tatsi jinompa. Báyatha kirei tsungkuae xua akoibi po matakabibetha. Matakábintha kirei ichi mérawi ichi. Baxua daxita Nakom itoroba nueve xóyobe xua bárapo peabewang xua Egipto nakuapiwi tsi-itoróbatsi.

Daxita koyeneintha poxonae aena Nakom itorobeiba bárapo peabe koyenein, bépara pong Egipto nakua peewatsin jei tsaibéi: “Tha ánoxuae kopatichi Israel pía pemómoxi susato jiwi tatsi xua peponaewa tsane”, bépara jei tsaibéi. Íchitha poxonae Moisés wüüka Nakomtha xua Nakom peduntaba exanaenexa daxita bárapo koyenein, pong Egipto nakua peewatsin ekeicha ichawa nantanaxeineiba, yawa ekeicha Israel pía pemómoxi susato jiwi tatsi jopa kopatsichi xua peponaewa tsane.

Kaentakeitha Nakom Moisés itoróbatsi pongtha, pong Egipto nakua peewatsin, xua petsipaebineixa xua Nakom paeba xua jei: “Báyatha jopa kabexubichi ápara xua daxitang nákuang jiwi tana neyábara jumetaenexa xua xang xeinang bichokono peayapusíü itorobi koyenewa”, xua jei Nakom.

**Meje yábara xua poxonae pong Egipto nakua peewatsin Israel
pía pemómoxi susato jiwi tatsi itoróbatsi xua
bara peponaewa tsane Egipto nakua weya**

(Exodo 11.1—13.16)

Bapong, pong Egipto nakua peewatsin, kataunxuae áwiya kame jopa kopatsiyo xua Israel pía pemómoxi susato jiwi tatsi peponaewa tsane. Daxota Nakom yábara najüntükoyene wüünaeta xua ekeicha bara nama kaeto itorobina xua peabewa xua Egipto nakuapiwi tsi-itorobinchi. Nakom yábara najüntükoyene wüünaeta xua daxita pexui pejutebiwa tsane, xua matapin jiwi, pebiwi xua daxita matabüxüing tsíniya xua pomonae daxita Egipto nákuatha jinompa.

Barichi Nakom yábara najüntükoyene wüünaeta xua pejutebiwa tsane duwéi xua matapixi xua poxi kopiya náexana. Pewünaeyo xua baxua, kopiya Nakom Moisés tsipáebatsi yawa Aarón tsipáebatsi xua eta bichi tsane xua jopa petawerapaewa tsainchi matapin jiwi Israel pía pemómoxi susato jiwi tatsi pía pexui tatsi. Barichino xua jopa petawerapaenexa tsainchi duwéi matapixi poxi xua kopiya náexana xua Israel pía pemómoxi susato jiwi tatsi piyawang tatsi.

Nakom tsipaeba, Israel pía pemómoxi susato jiwi tatsi tsipáebatsi jeye:

—Diez po matakabibetha xua bárapo xométotha, bárapo matakábitha daxita matabüxü tsíniya barompaya pam bewa pakerabanobim chivo ichikuitha ovejaxi xua penaxi xua kae wei xeina xua saya poxi xua jopa abe tsenaeyo. Abü pakerabanóbare xua catorce po matakabibetha nexa xua bárapo xométotha. Icha kae matabüxüyo saya tsikimonaeyo, barapomonae bewa icha matabüxüyotha nana-barü xaena xua be kaemonae penabarü xaenexa.

”Catorce po matakabibetha xua bárapo xométotha bewa duwéi pajutebíname naiña xua poxonae xometo jopeika. Yáwano tsiwiyo bewa bómüxü boupa pakaxuebim duwéi pejánatha xua nantíyabe pemuxunenéwabe yawa xua pentatútutha.

”Pematabüxü jiwi pam bewa paenaem bomüxütha beya poxonae xua ekeicha icha matakabi tsane. Bárapo matabüxü bewa duwéi pasebim yawa bewa paxaem. Yáwano bewa paxaemno noxútixi po noxútixi xua axutsaxa. Barichino bewa paxaemno pan po pan xua jopa múxuna pentsiyo levadura matawüing xua xuang pan kotowa éxana. Jopa bewa piwang pajanakaem tsane xua duwéi piwang. Po pewi xua nakópaba bewa pawitauchim. Bewa pana nataxuxátibim sapatong ichi be ichi xua poxonae báyatha pana nakuixaxáintame xua paiña newarapaewa tsane, jei Nakom.

2

Moisés daxita baxua yábara tsipaeba pítiri jíwitha xua Israel pía pemómoxi susato jiwi tatsi. Israel pía pemómoxi susato jiwi tatsi éxana daxita pokotsiwa xua Nakom itoroba, pokotsiwa xua daxita pematabüxü jiwi bewa exanaena. Bapoxonae Nakom juteba poxi matapixi xua Egipto nakuapiwi xua daxita barompa matabüxü tsíniya.

Matáütano bara kana ichiya éxana duweimonaein xua Egipto nakuapiwi pía duweimonaein tatsi. Nama Israel pía pemómoxi susato jiwi tatsi piabongtha tatsi Nakom tane ichaxota duwein janang xua dubena bomüxüng pebopathang. Bárapo bongtha Nakom jopa jutebiyo matapin jiwi. Nakom matatsún pona bárapo bomüxüng. Bárapo matakabi weya barapomonae aiñakuí kana éxana po matakabi xua Pascua wüing matakabi.

Papaetha Egipto nakuapiwi pexui matapin jiwi tawerapóinkatsi xua daxita matabüxüng tsíniya. Bara ichi, daxita duweimonaein xua poxi kopiya naexanjijinka, barapoxi werapajujuinka xua Egipto nakuapiwi piyawang tatsi. Barichi irü pong Egipto nakua peewatsin pexanto tatúpatsi matapin. Kaena bárapo merawitha pong Egipto nakua peewatsin itoroba, Israel pía pemómoxi susato jiwi tatsi itoróbatsi xua peponaewa tsane Egipto nakua weya.

3

Bara néxata Israel pía pemómoxi susato jiwi tatsi nota péntabüing xua pan nexa pewünaeya xua poxonae múxuna pentsina xua xuang levadura matawüing xua pokotsiwa pan kotowa éxana. Matáütano nota ichawang xua piyawang tatsi peponadüküpaenexa.

Matáütano barapomonae Israel pía pemómoxi susato jiwi tatsi wüüka Egipto nakuapiwimonaetha xua barapomonae pekatsibinéxatsi xua xuang peitüpanaewang xua xuang aiña matomang xuano xua pekatsibinéxatsi paparuwang. Bara, barapomonae katsibébatsi. Kaena bárapo merawitha Israel pía pemómoxi susato jiwi tatsi wárapa. Barapomonae tómara bewarapiya po tómara pewüing Sukot.

Bárapo pebiwi 600,000 pebiwi yawa barü jijinka ichamonae xua piowaxi xuano xua pía pexui tatsi. Matáütano pía duweimonaein múxuna jijinka. Barapomonae Israel pía pemómoxi susato jiwi tatsi kaena báyatha jinompa Egipto nákuatha xua 430 po weibetha.

4

Nakom tsipaeba barapomonae xua pinae bewa barapomonae daxita wei yábara nantanaxeinaeya aiñakuí kana exaneibina Pascua wüing matakabi xua peyábara jüntanainaenexa tsaibi tsane mérawi po mérawi bichokono wüünae xua poxonae barapomonae wárapa. Bewa barapomonae jutebina ovejaxi xua penaxi icha be pókotsi koyeneya báyatha ichi xua poxonae Egipto nákuatha éxana mérawi xua poxonae bara weya wárapa. Yáwano barapomonae bewa bebái levadurabeno xua pewünaeya po matakabi Pascua wüing matakabi tsane.

Matáütano barapomonae bewa saya sebi pan xua jopa múxuna pentsiyo levadura. Yáwano barapomonae bewa xaena bárapo pan xua beya kae semana

yapujopa. Báraxua barapomonaewa bewa exanaena xua peyábara jüntanainaenexa tsaiibi tsane xua poxonaewa býatha barapomonaewa nantawénona xua naiña pewarapaewa Egipto nakua weya.

Nakom itoroba, daxita Israel pía pemómoxi susato jiwi tatsi itoróbatsi, xua aiñakuí pekana exaneibinexa bárapo matakabi, yáwano xua pía pexui yábara petsipaebeibinexa bárapo matakabi xua eta pokotsiwa metha barapomonaewa aiñakuí kana éxana bárapo matakabi.

Bapoxonaewa ekeicha Nakom tsipaeba, Israel pía pemómoxi susato jiwi tatsi tsipáebatsi xua bepa pinae Nakom itapeta takana-exanaeinchi matapin jiwi xua daxita barompaya matabüxüing tsíniya xua Nakom petanakuitsinéxatsi. Matáütano bewa pinae barapomonaewa duweimonaein bara kana ichi tsane. Bewa katsina Nakomtha daxita duweimonaexi xua poxi kopiya naexanajjinka.

Báraxua Nakom itoroba tsipéi býatha Nakom kapanepa Israel pía pemómoxi susato jiwi tatsi matapin jiwi poxonaewa po merawitha pexui matapin jiwi werapoinka, xua Egipto nakuapiwi pía pexui, poxonaewa Pascua wüing matakabi. Barichi Nakom itoroba, Israel pía pemómoxi susato jiwi tatsi itoróbatsi xua pejutebiwa tsane duwéi poxi kopiya náexana xua poxi seikaya xua Nakom nexa, xua pinae bewa tsita túxusi exanaeinchi poxonaewa xua tauta xua be ofrendang matawüing xua Nakom nexa.

Barapomonaewa itakúüpatsi xua pejutebiwa icha duwéi, icha aichaxaibi xua pejutebiwa bárapo duwéi, po duwéi xua Nakom itoroba. Barapomonaewa itakúüpatsi xua pebexubiwa oveja xua penüing, ichikuitha chivo xua petautsinexa Nakom nexa. Barichi barapomonaewa bewa bexubina oveja xua penüing, ichikuitha xua chivo xua be pematomatsiwa xua daxota matapin jopa petüpaenexa.

Nakom itoroba barapomonaetha xua bewa daxita pía pexui yábara kuidubina pokoyene xua eta pokotsiwa metha barapomonaewa baxua éxana, matáütano xua bárapo pexui daxota jopa pejüntemainaenexa daxita pokotsiwa xua Nakom éxana barapomonaewa nexa, poxonaewa Egipto nakua weya pona.

**Meje yábara poxonaewa Israel pía pemómoxi susato jiwi tatsi
Mar Rojo mene epa-üngkababiya xua Nakom peyawenaexaewa**

(Exodo 13.17—15.21)

Namto dukuiya, pomonaewa pewüing filisteomonaewa barapomonaewa pía xaiña iya tatsi dukuiya. Bara xoyaya, imoxoyo iya xua Canaán nakua beya xua poxonaewa Egipto nakua weya poneiba. Bara xoyaya Israel pía pemómoxi susato jiwi tatsi jopa matakaponaetsi, Nakom jopa matakaponaeyo. Bara xoyaya Nakom jopa matakaponaeyo, tsipéi jopa ichipaeyo xua Israel pía pemómoxi susato jiwi tatsi jopa antükuiyapusüü tsane poxonaewa yotabinchi, xua poxonaewa yotabina filisteomonaewa.

Jame Nakom matakápona, Israel pía pemómoxi susato jiwi tatsi matakapoinchi po namto bichokono tajü iya, po namto iya xua ichaxota kae mene xua po pin marmene pewüing Mar Rojo mene. Barapomonaewa Sukot tómara wewarapiya. Bapoxonaewa Nakom matakápona, barapomonaewa matakapoinchi tsakinaebówatha xua pinwa xua piepatotha perukaewa. Báraxua barapomonaewa pewüünaewa tarukua-poinchi xua poxonaewa matakábitha.

Poxonae mérawi, bárapo tsakinaebowa pentha be ishoto. Yawa bárapo tsakinaebowa barapomonae pentha taexainchi xua peitaküüpaewa tsainchi xua peponaewa tsane áwiya. Poxonae barapomonae wárapa, José piwang kawárapatsi.

Bapong José pewünaeya poxonae tüpaena, piamonae muxuwüünaeta xua Israel pía pemómoxi susato jiwi tatsi, xua bepa pinae jame maisha José piwang kaponaeinchi Canaán nakua beya. Daxota José bewa piwang kawarapeibinchi poxonae warapeiba beya poxonae piwang boyaeinchi ibowoutha Canaán nákuatha.

2

Bara bárapo Israel pía pemómoxi susato jiwi tatsi pata ichaxota po ira pewüng Etan. Poxonae barapomonae baxota pata, bapoxonae Nakom itoroba xua bepa pinae barapomonae naebina Mar Rojo mene itapatha.

Nakom ichichipa xua pong Egipto nakua peewatsin nantanaxeinaena pokoyene xua Israel pía pemómoxi susato jiwi tatsi taayapubetsi xua pewarapaewa xua daxota Egipto nakuapiwi pena jüntükoyene wüünaetsinexa xua Israel pía pemómoxi susato jiwi tatsi pepubarainaewa tsainchi. Bara barichi, bara Israel pía pemómoxi susato jiwi tatsi naeba Mar Rojo mene itapatha. Bapong Egipto nakua peewatsin xuano ichamonae pomonae peaiñakuí jiwi nantanaxeinaeya jeye: “Waxainchi jopa beta nantanaxéinaetsi poxonae barapomonae pukópabatsi xua peponaewa tsane”, jei pomonae peaiñakuí jiwi.

Néxata nakaetuta penawabchüü-exaneibiwi yawa kaetuta kawayu pekaponae-naexi xua penabinexa. Yawa Egipto nakua peewatsin matakápona barapomonae. Barapoxonae daxita barapomonae ponarúküpa xua pubaráinatsi Israel pía pemómoxi susato jiwi tatsi.

Bara Israel pía pemómoxi susato jiwi tatsi kaxíbatsi Mar Rojo mene itapatha be pokoyeneya býatha barapomonae nantanaxeina xua barapomonae Israel pía pemómoxi susato jiwi tatsi yábara nantanaxéinatsi. Barapomonae Israel pía pemómoxi susato jiwi tatsi tane xua pexaiña betarendénatsi. Barapoxonae barapomonae bichokono junuwa. Barapomonae wüüka Nakom xua peyawenaewa tsainchi barapomonae. Yawa barapomonae Moisés yábara anaepánatsi. Barapomonae paeba jeye:

—Metha painta wüünáetsipa icha paenáetsipang Egipto nákuatha, jei barapomonae. Néxata Moisés barái barapomonae jeye:

—Paiñaxoba pajunúwame. Xaniwaicha panantanaxeinare. Bara patáename ánoxuae pokoyeneya xua Nakom paka kapanenebiya tsane. Barapomonae pomonae penawabchüü-exaneibiwi pomonae Egipto nakuapiwi methaunxuae kaewitaxuinchi, yawa ekeicha jopa bápána tae tsainchi, jei Moisés.

3

Barapoxonae kaena naiña, Nakom Moisés itoróbatsi. Moisés tsipáebatsi, xua bapong Moisés itoroba, Israel pía pemómoxi susato jiwi tatsi itoróbatsi xua pejonokapentsiwa tsane piabong xua chivonamüü. Yawa Moisés itoróbatsi xua náewatha pekowainexa Mar Rojo mene, xua bapoxonae mene pena epatsatsinéxabe xua aiña epatobe penaexanaenéxabe. Mene bishato dena, namto dena éxana yawa tsewa exanadena.

Néxata Nakom tsakinaebowa tsixita po tsakinaebowa xua kopiya Israel pía pemómoxi susato jiwi tatsi matakapoinchi. Ekeicha bárapo tsakinaebowa pekoyo wetaruya xua barapomonae Israel pía pemómoxi susato jiwi tatsi pekoyo wetarukuíyatsi. Bárapo koyeneya bara baxua barichi xua Egipto nakuapiwi yakaincha dúkuatsi yawa xua Israel pía pemómoxi susato jiwi tatsi pepuya weya tarúkuatsi. Egipto nakuapiwi jopa itaküüpaetsi xua petáewatsi Israel pía pemómoxi susato jiwi tatsi. Tsakinaebowa baxua kirei éxana kiripitha poxonae kataunxuae jopa bichokono kireyo.

Mérawi joibo, po joibo bichokono thünéi. Bárapo joibo mene aiña mene epatobe éxana xua daxita yamérawi tsungkuae. Israel pía pemómoxi susato jiwi tatsi icha muxunene bepaya xua namto weyiya po namto xua nayeyetadukuiya xua mene dena. Barapomonae baxoyo dendena poxonae bárapo mene xua barapomonae pekuariya tatsi nantiya mene taerúkuabe mexeya bara baxua tsungkuae xua pokotsiwa tómará peyakainchadutsiwa.

Egipto nakuapiwi tane namto xua po namto mene iya dukuiya barapoxonae tamrópata notarúkupa xua barichi baxoyo irü iyiya xua Israel pía pemómoxi susato jiwi tatsi pebarainaenéxatsi. Íchitha Nakom éxana xua bárapo Egipto nakuapiwi jopa xapain peyiyaenexa tsane. Kawayu pekaponae naexi xua penabi naexi baraponaexi pemáxüxi maxünaxatábaba. Bichokono dangwéi xua daxota jopa peitaküüpáewatsi xua pejewabiwa.

Daxita Israel pía pemómoxi susato jiwi tatsi báyatha epa-üngkababarena Mar Rojo mene matawüng. Bapoxonae Nakom Moisés itoróbatsi xua Moisés mene matatsún iya penakobe yotsinexa. Poxonae Moisés baxua éxana, mene ekeicha kaewa namene kaekuntaba. Yawa Egipto nakuapiwi xua kataunxuae áwiya námtotha pona, barapomonae yantakaewapéntatsi. Bárapo mene épato matakaewaxuba yawa bunothopa.

Daxita barapomonae Israel pía pemómoxi susato jiwi tatsi nakapanenébiya, xua icha muxunénetha nakapanenébiya. Báraxua bara barichi pokoyene poxonae Nakom kapanepa, xua Israel pía pemómoxi susato jiwi tatsi kapanépatsti, xua poxonae barainébatsi xua Egipto nakuapiwi baraineba.

4

Israel pía pemómoxi susato jiwi tatsi tane pokoyene xua Nakom éxana xua barapomonae taéxanatsi. Barapoxonae barapomonae Nakom pía peayapusüüwa tatsi yábara najüntükoyene kabenáekatsi. Yawa Nakom bara beta yábara kuijumekowúntatsi. Barichi Moisés bara beta yábara kuijumekowúntatsi xua pong Nakom pía petanakuichinxatsi xua bara bapong pong Nakom itoroba. Barapomonae penaxünae wei yábara éxana xua pokoyene pokotsiwa barapomonae tane. Bárapo penaxünae wei yábara éxana xua Nakom pekanaxünaenéxatsi. Bárapo penaxünae wei jeye:

“Wüünae jainchinchí Nakom wanaka kapanepaexae.

Nakom bunothopa éxana Egipto nakuapiwi,
pomonaé wanaka aitaftabiwi.

Ichüng aibi Nakom, pong ichi bapókotsin ichi,
xua pong pepa Nakomxae.

Bapong naka yaita-arárana, yawa naka matakápona
Canaán nakua beya”, jei barapomonae.

**Meje yábara xua poxonae Israel pía pemómoxi susato jiwi tatsi Sinai
matawüing demuxuwa beya pona xua Mar Rojo mene matawüing weya pona**

(Exodo 15.22—17.16)

Moisés matakápona, xua Israel pía pemómoxi susato jiwi tatsi matakapoinchi Mar Rojo mene matawüing ítapa iya, xua irasaina xuépana tsúrukuae nakua beya. Barapomonae pona akoibi po matakabibetha xua matáütano jopa kaxibiyo mera. Matapaiña pata ichaxota momo, po momo yábara matawüing jei: “Mara mera matawüing”, jei, tsipéi bárapo mómotha mene müthü eka po mera xua amene-tsaxa. Néxata daxita tamrópata notarúkupa xua aitakonaе tsürüküpáе xua yái-tama mera aibi xua peapaewa. Moisés yáñaba Nakomtha jeye:

—Nakom, ¿eta pokotsiwa exanakuaein? jei.

Nakom tsita itüüta naewa, xua Moisés tsita itüütatsi, xua icha Moisés xubina ménetha, mene ekeicha mene wüüinae naexanatabina xua peapaewa nexa. Bara baxua Moisés éxana. Bapoxonae bara daxita bárapo pexeikae mera apa. Baraxota ichaxota: “Mara mera matawüing”, jei, Nakom tsipaeba, barapomonae tsipáebatsi, xua bepa pinae bewa Nakom jumekowünteibinchi xua bapoxonae bepa pinae bápana jopa ayapubé taexaneibí tsane barapomonaetha xua pókotsi po peabe koyenein tsi-itoroba Egipto nakuapíwitha.

Bapoxonae ekeicha pona ichaxota po ira Elim ira matawüing. Bárapo íratha irí mene natsibotadubena xua doce po ménebe xua tsiki meníyobe. Baraxota yawa piabong xüxübaba xua chivonamüü bong, yawa nafinakaena bárapo íratha.

2

Bapoxonae ekeicha barapomonae kuenta wárapa Elim ira xua bárapo ira iyiya. Barapomonae ekeicha Moisés yábara aitakonaе tsürüküpaetsi. Barapomonaе paeba jei: “Metha painta wüünáetsipa icha paenáetsipang Egipto nákuatha ichaxota pexaewa paxeinang. Methaunxuae pawarapaein patain bárapo irasaina xuépana tsúrukuae nákuatha”, jei barapomonaе. Moisés tsipaeba barapomonaetha jeye:

—Ápara Nakom payábara aitakonaem. Ápara jopa paneyábara aitakonaem. Nakom pexaewa pákata itorobina, jei.

Néxata Nakom pin duweimonae itoroba bárapo kiripitha xua tsakein duweimonaе. Daxita barapomonae tsakein yateika poxonaе matatsún yapupuna po bong xua chivonamüü bomüxüing. Bara barapomonae pewi xeina xua tsakeinwi.

3

Icha matakábitha, xua poxonaе dono báyatha tsewa, bapoxonaе Israel pía pemómoxi susato jiwi tatsi ichawa tane xua íratha óthopa mérawi xua íñapana xua bara be abikuei. Bárapo pexaewa wüingduta: “Maná”, jei. Bichokono xeika be galletang xua poxonaе múxuna xane banto. Néxata Moisés tsipaeba jeye:

—Baxua ápara pan, xua Nakom pákata itorobika, xua paiña nexaenexa po pan yábara paka tsipáebatsi. Bewa paponeibíname xua daxita baya tsaibi xua barompaya pam panotéibare xua aiña korótobe tsaibi xua aiña lítrobe tsaibi xua saya meisha baxua. Jopa ekeicha ichawa pantaropecihiya notsinde. Yawa jopa bewa pajebim tsane xua icha matakábitha nexa, tsipéi icha baxua paexanaetsípame oro naexanáetsipa bárapo matabüingtha. Matáütano jopa bewa panotsim

poxonae pentakeiseikáe matakábitha. Íchitha poxonae pewünaeya xua pentakeiseikáe matakabi tsane, bewa pin wang panotsiname xua aiña matakábibe nexa. Bapoxonae bárapo matabüng jopa napentsí tsane, jei.

Bara barapomonae pona yawa nota pexaewa po pexaewa íñapana. Néxata barapomonae tane poxonae kanaüba xua daxita kame áwiya jüpa xeina xua wünba. Barapomonae jopa nantaxeinaeyo pokoyene xua jopa aiñakuiyo icha kaein nawita nota, ichikuitha xua ichüng be kónotha nota. Daxita jüpa tsaba daxita jíwitha xua daxota daxita aiña korótobe tanakopabábatsi xua aiña lítrobe.

Íchitha ichamonae Moisés jopa jumekowüntichi. Yawa barapomonae ichawang jeba xua icha matakábitha nexa. Bichokono oro wüngka yawa tuxamna icha be pokoyeneya báyatha Nakom paeba. Barichi matakabi jopa, xua ichamonae báyatha jopa pin wang notsiyo poxonae pewünaeya xua pentakeiseikáe matakabi tsane. Bara barapomonae pona pentakeiseikáe matakábitha xua penotsinexa. Íchitha bárapo matakábitha barapomonae jopa taeyo, tsipéi Nakom ichichipa xua barapomonae penafinakaewatsiwa tsane.

Baxua bara barichi, matapaiña barapomonae daxita yábara jumekowünta pokotsiwa Nakom Moisés yábara tsipáebatsi pexaewa po pexaewa íñapana. Bárapo pexaewa barapomonae matawüng duta: “Maná”, jei. Bárapo pexaewa bara be kayetang xua poxonae múxuna xane banto. Yawa yapuwüünae xua peyaperiba-biwa bárapo pexaewa.

Nakom, Moisés itoróbatsi xua juruwatoha jeyaena bárapo maná pexaewa matawüng xua aiña korótobe xua aiña lítrobe. Matáütano itoróbatsi xua pejebinexa ichaxota altar matawüng xua ichaxota duwéi tautathopa xua Nakom nexa. Baxua Moisés kobe-itoróbatsi xua pía pemómoxi susato jiwi tatsi peyaputaenexa pokoyene xua eta bichira bárapo pexaewa.

Barapomonae Israel pía pemómoxi susato jiwi tatsi daxita matakabi nota bárapo pexaewa. Saya meisha jopa notsiyo pentakeiseikáe matakábitha. Yawa bárapo pexaewa barapomonae nábane beya poxonae pata ichaxota ira opidukua xua Canaán ira.

4

Bapoxonae ekeicha, Israel pía pemómoxi susato jiwi tatsi pona ichaxota beya po ira pewüng Refidim, yawa baxota barapomonae piabong xüxübaba. Barapomonae jopa xeinaeyo mera xua peapaenexa. Ekeicha barapomonae Moisés yábara aitakonaetsi. Moisés tsipáebatsi barapomonae jeye:

—Methaunxuae pawarapaein pata mératsi, jei.

Moisés jumenota barapomonae jeye: “Jopa bewa Nakom yábara pa-aitakonaem”, jei. Néxata Moisés yáñaba Nakomtha jeye:

—¿Eta bichin tsane xua barapomonae mera taapatsinexa? jei.

Néxata Nakom Moisés tsipáebatsi jeye:

—Pire jiña naewa po náewatha xua báyatha jáyabame Nilo mene. Bárapo náewatha matakueintaxore iboto, jei Nakom.

Bara baxua Moisés éxana xua pítiri jiwi peitütha tatsi pomonae Israel pía pemómoxi susato jiwi tatsi. Bapoxonae iboto wérena mene nantapichapabarena xua daxita barapomonae peapaenexa. Baraxota ichaxota Moisés piamonae tatsi mera apa, Moisés wüngduta xua jei: “Meriba”, jei, icha wüng: “Masá”, jei.

5

Bapoxonae Moisés barü pona po íratha amalecitamonae pía ira tatsi. Amalecitamonae barapomonae Esaú pía pemómoxi susato jiwi tatsi. Esaú bapong pong Jacob peweicho tatsi. Barapomonae amalecitamonae jumetane xua Israel pía pemómoxi susato jiwi tatsi juiña baxota pona.

Bapoxonae barapomonae pona xua naba peexanaenexa Israel pía pemómoxi susato jíwitha tatsi. Moisés itoroba, Josué itoróbatsi yawa ichamonae pomonae penawabchüü-exaneibiwi xua naba peexanaenexa barapomonaetha xua amalecitamonae. Bara Israel pía pemómoxi susato jiwi tatsi amanáyaba poxonae naba éxana. Nakom yábara anáepana, amalecitamonae yábara anaepánatsi. Daxota Nakom Moisés itoróbatsi jeye:

—Baxua yábara tínare xua baxua jiwi jopa peyábara jüntemainaenexa, yawa jande Josuetha: ‘Bepa pinae Nakom omeicha matapaetaxubi daxita amalecitamonae’, jande, jei Nakom. Penamchixae, Josué irü Israel pía pemómoxi susato jiwi tatsi omeicha matapaetaxuba, xua amalecitamonae matapaetaxotsi poxonae naba éxana.

**Meje yábara poxonae Jetro siwaponae, Moisés siwapoinchi
irasaina xuépana tsúrukuae nákuatha**

(Exodo 18.1-24)

Jetro, pong Moisés paxuyo tatsi, jumetane daxita xua Nakom Moisés taexainchi. Jetro siwaponae, Moisés siwapoinchi, irasaina xuépana tsúrukuae nákuatha ichaxota po ira pewüng Refidim. Irü Moisés píowa punapoinchi, irü pexántobe tatsi. Poxonae Moisés yábara kueikueijejé daxita xua Nakom taéxanatsi, Jetro jüntübükoyene weiweina.

Icha matakeitha Jetro tane poxonae Moisés eka xua jiwi pejüntükoyene naitaübiya itawetsinéxatsi poxonae jopa xapain exaneibiyo jiwi. Jiwi bichokono pinmonae pata xua poxonae baya tsaibi xua beya yakiréi tsaibi.

Jetro namchi jeye:

—¿Eta xua metha kompa yawéname bárapo jiwi poxonae baya tsaibi beya yakiréi tsaibi?

Moisés jumenota jeye:

—Poxoru daxita barapomonae neitatapata poxonae xeineiba pokotsiwa xua dangwéi. Barapomonae yawenang yáwano barapomonae jíwana jüntübükoyene naitaübiya itawetang poxonae barapomonae jopa xapain exaneibiyo. Barapomonae kuidubang Nakom pía peitorobi koyenein tatsi, jei.

Ekeicha Jetro jeye:

—Jopa daxua wüünaeyo xua xam kompa éxaname daxita. Xam nafifina exanáename, jiwi barichi tsane. Bichokono kata dangwéi bárapo penakuichiwa, jopa kaitaküüpaé tsane. Ánoxuae nejumetaema, kamuxuwétatsi yáwano bara Nakom kayanta. Naexande be pókotsin xua kueikueijejé jíwitha xua Nakom nexa. Yawa tatsipáebare Nakomtha pokoyene xua jiwi ichichipa. Barapomonae kuidúbare Nakom pía peitorobi koyenewa tatsi. Tsita éxande pokoyeneya xua barapomonae bewa jinompáé yáwano pokoyeneya xua bewa barapomonae exanáé.

”Barapomonae jíwana pebiwi itapere, po pebiwi xua peyaputaewi, xuano xua bichokono antobetsi Nakom, xuano xua xaiñeya peexanaewi, xuano xua aichaxaibi

xua naerabiya peyábara muxujaiñabiwa xua pexeineibinexa ichüing piyawang. Barapomonaé éxande pentakaponaewi xua nekayawenaenexa jiña nenakuichiwa, pokoyenein xua poxonaé saya jopa bichokono ayapubeyo. Saya yawenéibare poxonaé barapomonaé tadangwéi tsaibichi, jei.

Bara Moisés paxuyo jumenaitómata. Bárano éxana pokotsiwa paxuyo tsipáebatsi.

**Meje yábara poxonaé Nakom irü Israel pía pemómoxi susato
jiwi tatsi nantiya nata yábara tsiwüüinaé muxudútabe yáwano
xua Nakom kátano barapomonaétha xua diez po peitorobi
koyenewangbe ichaxota po demuxuwa pewüing Sinaí**

(Exodo 19.1—20.20)

Bara Israel pía pemómoxi susato jiwi tatsi wárapa po ira pewüing Refidim weya, yawa bara beya pona ichaxota po ira pewüing Sinaí. Matáüta baxota ichaxota imoxoyo Sinaí demuxuwa matawüing xüxübaba piabong xua chivonamüü bong. Bara néxata Moisés demuxuwa juiña. Nakom barái, Moisés baraichi, jeye:

—Taema, yawa daxita Israel pía pemómoxi susato jiwi tatsi yábara jüntanaina kana éxande pokoyene xua býatha yawenang barapomonaé xua Egipto nakuapiwi weya panenebiya poxonaé Egipto nakuapiwi tsi-itorobang xua abe xua bichokono taayapubetsi. Matáütano yábara jüntanaina kana éxande pokoyene xua býatha beta éénang, xuano xua xote káponang, tsipéi baxota tsiwüüinaé yábara paka muxudutsinchi.

Icha barapomonaé exanaena pokotsiwa itorobang, yawa icha bara eexana-ponaena pokotsiwa býatha yábara netsiwüüinaé muxuduta bara taitapetsi jiwi tsane xua pepa tajiwimonaé tsane. Bara bekein yábara kanamataxeinang daxita irangpiwi íchitha barapomonaé kana exanaein xua pomonaé taitapetsi jiwi tsane. Barapomonaé ápara pomonaé xua tsita itapeiñaxeina xua ichamonaé tsita itapeiñaxéinatsi pokoyene xua xang eta bichinda, jei Nakom.

2

Moisés ekeicha pona ichaxota Israel pía pemómoxi susato jiwi tatsi, yawa tsipáebano barapomonaétha pokotsiwa xua Nakom Moisés tsipáebatsi. Barapomonaé bara yábara jumejéi pokotsiwa xua barapomonaé tsiwüüinaé yábara muxuduta Nakomtha. Néxata ekeicha Moisés demuxuwa bejuiña, yawa tsipaeba Nakomtha pokoyene xua jiwi yábara jumejéi. Nakom jeye:

—Bara wüüinaé. Ánoxuae ichichipang xua paiña yapukuraratsiwa tsane bárapo demuxuwa. Bü ichüing jopa juñaeyo bárapo demuxúwatha. Bü jopa ponaeyo bárapo kurara tútutha. Icha ichüing daxua éxana, ichamonaé ibówatha bewa kuinbabina, xua bapong kuinbabinchi xua beya tüpa exanaeinchi. Daxita barapomonaé tsipáebare xua bü pía paparuwang matánaka daxita. Matáütano pebiwi tsipáebare bü jopa piowaxi kentsiyo tsipéi dota baxoyo tha dunadekaetsi, yawa tha poponaetsi bárapo demuxúwatha pewünaeya xua poxonaé wewerakaena akoibi po matakábibe.

Moisés tsipaeba barapomonaétha xua býatha tsipáebatsi xua Nakom tsipaeba. Bapoxonaé xua poxonaé akoibi po matakábibe tsuxubi, demuxuwa matawé jopéikatsi tsakinaebowa xua bichokono kirei. Yámüxü jerajeréi, yawa “tei, tei”, jei, yáwano petsíxüno. Matáütano pokotsiwa xua pewüing trompeta baxua busixuba.

Bichokono jiwi junuwa éxanatsi. Néxata Moisés itoroba xua bepa pinae daxita nakaetutsina ichaxota imoxoyo demuxuwa. Néxata Nakom Moisés tsipáebatsi xua bepa pinae juinaena. Bapoxonae ekeicha Nakom Moisés tsipáebatsi xua bepa pinae dunadekaena xua petsipaebiwa tsane barapomonae xua jopa bewa pinae kurara dena jjonadenae tsane. Bara Moisés dunatabareka.

3

Néxata Nakom demuxuwa wetsipaebareka po demuxúwaxae xua bichokono tajüicha xua jiwi tsipaebarekatsi diez po peitorobi koyenewangbe xua ekeicha Moisés tapaeba barapomonaetha. Meje jeye:

“Ápara xang paiña Nakomüing.

Xang ápara bapong, pongxaein xua paka kapanépatsi Egipto nakua weya ichaxota báyatha pajinómpame, xua saya paka busikuitatane.

Jopa bewa bápana wüünae pajainchim ichüing Nakom, po Nakom jopa xaiñeyo.

Jopa ichawa Nakom pakanaxobiya exanaeinde, yáwano jopa wüünae pajainchinde, tsipéi xang uwiya paka asíwatsi.

Jopa daxua paexanaeinde, xua pana newüing táíbame, poxonae pawiwijam tsaibi,

tsipéi tha abe kana exanaetsi icha dapong daxua éxana.

Payábara jüntanainaeya nantaxéinare

penafifinakáewatsi matakábitha, xua pentakeiseikáe matakábitha.

Paka itaküüpa xua paiña nenakuichiwa, xua icha matakábintha xua seis po matakabibetha.

Íchitha poxonae siete po matakábibe tsuxubi, ichüing jopa bewa nakuichi tsane bárapo matakábitha.

Barichi jopa bewa nakuichi tsane,

xua metha bekein barapomonae tsipae, pomonae xua paiña botha paiña nepákata nakuichi jiwi.

Matáütano paiña duweimonae jopa bewa nakuichi tsane.

Paiñaxoba pajüntemáiname

xua xang taexanaewa peitaboko,

yawa ira xua poxonae seis po matakabibetha,

xua bapoxonae nafifinakaewatekatabang

poxonae siete po matakábibe tsuxubi.

Xua bárapo pentakeiseikáe matakabi,

xua poxonae siete matakabi tsuxubi,

bárapo matakabi jopa najüpaeyo,

xua icha matakabin xua seis po matakábibe.

Paiña axa jiwi pabarükui-iturajínare,

yawa paiña ena jiwi pabarükui-iturajínare.

Bapoxonae paka kana exanaeinchí,

xua aiña wei paiña nejinompaewa,
 abü xua poxonae bárapo íratha pajinompáename,
 po ira xua tapaka kakatsiwa tsainchi.
 Jopa ichamonae pajutebinde.
 Jopa ichowa papichinde powa ichüing píowa tatsi,
 powa pisheuri xeina pataetham.
 Jopa pakaibinde ichüing piyawa tatsi.
 Jopa papaebinde ichawa,
 pokoyenein xua jopa pexaiñeiwa,
 pokoyenein xua ichamonae jopa xapain
 peexanaewa kana éxanatsi.
 Jopa payábara úwinde pokotsiwa ichamonae xeina,
 xuano xua paiña nexeiwaewa xua ichüing píabo tatsi,
 xuano xua paiña nexeiwaewa,
 xua pomonae ichüing piabotha petajinompáewichi,
 xuano xua paiña nexeiwaewa,
 xua ichüing pía duweimonae tatsi.
 Barichino jopa bewa bichokono uwiya
 payábara nantaxeinaem,
 xua paiña nexeiwaewa pokotsiwa
 xua ichamonae xeina”, jei Nakom.

Báraxua xua býatha Nakom tsipaeba, xua Israel pía pemómoxi susato jiwi tatsi tsipáebatsi xua diez po peitorobi koyenewangbe.

Barapomonae junuwa éxanatsi xua poxonae jumetane xua Nakom pejume jume-tainchi. Moisés jumedangweya baráichichi barapomonae jeye:

—Ánoxuae xua bexa tsáneno xam bewa matha jumetáename pokotsiwa Nakom paebeiba. Néxata barapoxonae pana netsipaebéibare pokotsiwa xua Nakom ichi-chipa xua pata netsipaebéibiwam tsane. Icha Nakom pejume pajumetáetsipang, pajumetaya naichababíchipang, jei barapomonae.

Moisés jumenota jeye:

—Jopa pajunuwinde xua Nakom pejume. Jame saya Nakom ichichipa xua paju-nuweibíname poxonae abe paexanéibame, jei Moisés.

**Meje yábara xua Nakom Moisés kátatsi ichawa xua peitorobi
 koyenewa xua pomonae amanaya pebusikuitaetaeyebé bí jíwichi
 barapomonae nexa, irü pomonae jiwi pekaibiwi barapomonae nexa**

(Exodo 20.21—23.33)

Moisés ekeicha kaewa pona demuxúwatha ichaxota matatutudukuiya, po demuxúwaxae taücha xua po demuxuwa Sinaí demuxuwa matawüing, ichaxota Nakom matawakeicha yakaincha dúkuatsi tsakinaebowa. Baraxota Nakom tsipaeba, Moisés baraichi, jeye:

—Daxita Israel pía pemómoxi susato jiwi tatsi tsipáebare pokotsiwa xua ánoxuae takatsipaebiwa tsainchi. Matáütano barapomonae yábara jüntanaina éxande pokotsiwa xua býatha tane xua poxonae tsipaebang peitaboko wétsika. Barapomonae jopa bewa icha pekayábara nantaxeinaewa exanáe xua oro nain nakom peexanaewa, ichikuitha plata nain Nakom peexanaewa xua wüüinae pejainchinexa.

bapong jüntübükaewa xua ekeicha jopa pexeinaewa tsane amanaya pía petana-kuitinchi xua baxua peexanaexae.

4

”Bewa dapokotsin xuya bexuichi pong bexuba ichüing xua ichüing bexotsi xua poxoru kopiya matha peyábara nantaxeinaexae xua penamaxüwáinchiwa. Íchitha ichikuitha metha pebin jopa daxua tsakeinaeyo xua poxonae ichüing jemeicha tüpa xua poxonae saya pía jintong karütaba. Bapoxonae bapong itakúüpatsi xua naetsí-riwa tómaratha po tómara jíwana xua po tómarang ichaxota nakapanenébiya tsaibi.

”Íchitha icha ichikuitha metha bapong matha kopiya yábara nantanaxeina xua penamaxüwáinchiwa, bapoxonae jopa bewa pakopatsim xua pepoponaewa tsane. Bapong bewa bexubinchi metha bekein bapong ponáetsipa tómaratha xua ichaxota taáltar ungkua xua pewaetabinexa penainto, po penainto nantiya kua-ranótabe pentútutha xua bapong pía nakapanepaetsi. Barichi bewa bexubinchi pókotsin xua kuainta paxa xuano xua ichikuitha pena kuainta, xua ichikuitha tsipae xua poxonae abe yábara paeba. Barichi dapokotsin bewa tüpaena pong xua ichüing wáetabatsi pekaenaetsinexa xua pía pekakomokáe paratixichi.

5

”Icha pebin kaiba duwein, ichikuitha xua bexuba bárapo duwein, ichikuitha xua kaenaeta bárapo duwein, bapong kaewa bewa takanawichi pentoma pongtha pong kaiba, pong kopiya pexeinaexae bárapo duwein. Icha bexuba kaein buey bewa kaewa takanawichina cinco póyobe buey. Icha bexuba kaein oveja xua penüing bewa kaewa takanawichina cuatro póyobe oveja. Icha áwiya xeina bárapo duwein xua báyatha kaiba bewa kaewa takanawichina pongtha pong kaiba yawa icha duweinno múxunano.

6

”Metha pebin pía pabi tautaxuba xua pena pabi, xua daxota ichamonae pía pabin tatsi be taitarekapubabarénatsi yawa tataxotsi. Poxoru barapomonae jopa xeinaeyo pexaewa, daxota bapong bewa kaewa takanawichina pía pexaewa tatsi, xua poxonae tanawétatsi pía pexaewa tatsi, pomonaetha, pomonae xua pexaewa petayapabitaustixae.

”Pepa peitorobi koyenewa ápara jame bewa ichüing pentoma katsi, xua poxonae abe pekana exanaexae ichüingtha. Xuano xua bewa barichi, bewa ichüingtha pentoma katsi xua poxonae abe petaexanaexae ichawang xua seikaya irü ichüing piyawang tatsi. Icha ichüing namaxüwainta xua seikaya ichüing pebexubíwatsi bewa bapong xuya bexubinchi. Icha ichüing abe kana éxana ichüingtha bewa bapong xuya abe kana exanaetsi icha be pókotsi koyeneya xua kopiya báyatha abe peexanaexae, jei Nakom.

Bárapo peitorobi koyenein Nakom kata, xua Israel pía pemómoxi susato jiwí tatsi kátatsi xua barapomonae kaemonae nantiya wüünaeya xaniwaicha penata eexanaponaewa tsane.

7

Barichi Nakom kata icha peitorobi koyenein, Moisés kátatsi xua xuang yábara pokoyeneya xua Nakom wüünae pejainteibiwa tsainchi. Nakom itoroba, Moisés

itoróbatsi xua bepa pinae baxua tsipaebina Israel pía pemómoxi susato jíwitha tatsi. Nakom barái, Moisés baraichi, jeye:

—Saya bewa meisha itapeta pana newüünae jainchíname. Bewa dapókotsi jiwi pajutebíname Israel pía pemómoxi susato jiwi tatsi pókotsi jiwi xua duwéi juteba xua ofrenda matawüng petautsinexa icha Nakom nexa po Nakom jopa xaniwai-chiyo. Matáütano bewa pajutebíname pókotsi jiwi mara pexeinaewi xua abe kana exanapona ichamonaetha.

”Matáütano bewa panafinakaewatsíname pentakeiseikáe matakábitha. Bari-chi pabi xua poxonae seis po weibe yapujopa xua poxonae kame paübabóname, ekeicha bárapo pabi ira itompa paexande xua poxonae 7 po weibetha. Itompaíña paéxanabore ira xua kae wei.

8

”Daxita weitha akoibi pokuíyobe xua fiesta wüing matakabin xua bárapo mata-kábintha daxita pebiwi bewa patsina xua wüünae tana nejainchinexa. Ichamonae pomonae icha nakuapiwi xua dobiwi, bewa barapomonae xaniwaicha pakana exanaem, tsipéi paxam báyatha dobiwi koyeneya pajinómpame Egipto nákuatha. Poxonae ichüing paiñamonae jintong patsikópatame pekakomokáe parátixi xua paka nakowaeta pong akopeibi, paiñaxoba bárapo pebaxu ekeicha pamataropei-cha wúükame.

”Jopa abe koyeneya pakana exanaeinde powaxi xua pisheuri jiwi kuenta wéra-patsi. Bari-chi jopa abe pakana exanaeinde peakoibi jiwi po pexuí xua koxiyei jiwi pía pexui kuenta wérapa. Jopa paexanaeinde pokoyene xua Nakom jopa paka tsita aiñakuiyiyo. Matáüta jopa tsümüjume pabarüpaebinde pomonae pía tómara jiwi kanamataxeina.

”Pewi jopa paxaeinde po duwein xua jopa pajutebim xua saya pikoya tüpa. Bari-chi bewa beta pakana exanaem pomonae kopei pexeinae jiwi, xuano pomonaetha, pomonae peakopeibí jiwi, xua bárapo koyeneya xua xaniwaicha beta paiña netae-xanaponaewa tsane xua daxita jiwi. Jopa bewa pakopatsim xua ichamonae paka yábara matómata pekakomokáe paratixitha xuano xua ichikuitha xua poxonae náemata ichawang amanaya paka katsibeiba xua daxota abe paéxaname barapomonae nexa, jei.

9

Bapoxonae ekeicha Nakom Moisés baraichi, jeye:

—Matatsunpin tha itorobichi xua paiña nepaka eenaenexa, xuano xua paiña nepaka kaponae nexa Canaán nakua beya, po nakua xua báyatha yábara paka tsiwüünae muxudútsi xua tapaka katsiwa tsainchi. Icha paxam panejumeko-wüntsíname xua pokotsiwa paka itoróbatsi, néxata paka yawenaeinchi xua poxonae naba pana exanáename daxita pomonaetha, pomonae xua ánoxuae jinompa bárapo nákuatha xua Canaán nákuatha.

”Bewayo bárapo nakuapiwi aáichaponae tsane exanaponaein tsipéi paka yawenaeinchi xua paiña nejutebaponaewa. Bara bapoxonae bárapo nakua Canaán nakua paiña nakua tsane xua daxita. Íchitha barapomonaetha jopa nantiya yábara pana natsiwüünae muxudutsín-debe pokoyene xua nantiya paiña nenayawenaewam tsane.

”Matáütano jopa wüünae pajainchinde barapomonae pía nakomüng tatsi pókotsi nakomüng jopa xaiñeyo. Saya meisha xang itapeta wüünae pana nejainde. Matáütano íratha pabébande barapomonae pía altares matawüng ichaxota duwéi jutebeiba pía nakomüng nexa. Matáütano abe pata éxande xua xuang barapomonae yábara nantaxeina xua pinae pía nakomüng tatsi ápara baraxota jinompa. Daxita barapomonae pajutébare, tsipéi barapomonae paka muxujaiñabeibíchipa xua daxota wüünae paiña nejainteibiwa tsipae pía nakomüng tatsi, jei Nakom.

Daxita bárapo jumein Nakom tsipaeba, xua Moisés tsipáebatsi, ichaxota mata-tutudukuiya xua Sinaí demuxuwa matawüng.

**Meje yábara xua poxonae Moisés pejánatha matawetsikatsíkata
Israel pía pemómoxi susato jíwitha tatsi xua bara xaniwaicha
pokoyene xua peexanaewa Nakomtha**

(Exodo 24)

Bapoxonae ekeicha Moisés yábara tsipaeba Israel pía pemómoxi susato jíwitha tatsi xua peitorobi koyenewang po peitorobi koyenewang Nakom kata ichaxota Sinaí demuxuwa. Daxita pebürüya yábara nantaxeina xua bara peexanaewa tsane pokotsiwa xua barapomonae peitorobiwa tsainchi. Bara Moisés tina bárapo peitorobi koyenewang.

Bapoxonae icha matakábitha Moisés éxana altar matawüng xua ichaxota duwéi petautsinexa Nakom nexa. Baxua éxana ichaxota imoxoyo bárapo demuxuwa matawüng Sinaí. Matáütano Moisés itoroba xua pewowi jutebina vaca pebtong, xua pewi wíjwána tautsina Nakom nexa xua be ofrendang matawüng. Bapoxonae Moisés matawetsikatsíkata vaca pebtong jánatha xua jíwana xua ichaxota duwéi tauta altartha. Yawa nota icha jana xua nakópaba korotongtha.

Bapoxonae Moisés jumedangweya yóroba pokoyenewa xua Israel pía pemómoxi susato jiwi tatsi méyoxuae éxana xua nayábara tsiwüünae muxuduta Nakomtha xua pokoyenewa pekana exanaewa tsane Nakomtha. Daxita barapomonae ekeicha paeba, xua pinae pebürüya yábara nantaxeina xua pinae bara exanaponaena daxita koyenein pokotsiwa xua peexanapaebibixae. Néxata Moisés matawetsikatsíkata vacajánatha daxita Israel pía pemómoxi susato jíwitha tatsi, po jana xua nakópata korotongtha, yawa jeye:

—Báraxua xua bárapo pejana xua ápara bara xaniwaicha tsita itapeiñaxeina xua paxam pakana éxaname xua papáebame írürü xua Nakom kana éxana xua paeba.

2

Bapoxonae Moisés peweicho barü pona pong Aarón. Yawa barü pona pong pewüng Nadab, yawa barü pona pong pewüng Abiú, pongbe Aarón pexántobe tatsi. Yáwano setenta póyobe barü pona pomonae pítiri jiwi. Daxita barapomonae Moisés barü juña demuxuwa beicha xua Sinaí demuxuwa xua saya pepuya weya.

Báyatha pewünaeyo Nakom itoroba, Moisés itoróbatsi xua bepa pinae baxua Moisés exanaena xua pinae íchitha jopa daxita barü juñae tsane. Baraxota Nakom barapomonae tsita naitúütatsi. Bapoxonae poxonae barapomonae pekoutha kompa ena, bapoxonae pewi nabarü xane po pewi xua báyatha tauta xua Nakom nexa xua be ofrendang.

Néxata ekeicha Nakom Moisés itoróbatsi xua pinae ekeicha kompa dabe juñaena demuxúwatha. Nakom paeba xua bepa pinae baxoteicha katsinchi aiña ibótobe po ibótobe xua matadaméi xua báyatha Nakom tina pía peitorobi koyenewangxae tatsi. Bara Moisés ekeicha athabé juña. Nakom Moisés tsipáebatsi tsakinaebowa weya. Moisés patopa tsakinaebówatha. Baraxota tsakinaebówatha Moisés pópona cuarenta po matakábibe.

Moisés peweicho kuenta pona irü ichüng pebin pong pewüing Hur. Bapongbe Moisés kuenta pónabe xua itoróbabe xua pekanamataxeinaenéxabe Israel pía pemómoxi susato jiwi tatsi poxonae bapong Moisés kataunxuae aicháwiya.

Meje yábara poxonae Nakom Moisés tsipáebatsi xua Israel pía pemómoxi susato jiwi tatsi pinae bü éxana Nakom píabo tatsi xua be chivonomüü bo; bárapo bo be anserabókobo xua pekawarapéibibo

(Exodo 25.1—31.11; Levítico 24.1-9)

Moisés pópona Sinaí matawüing demuxúwatha. Bapoxonae Nakom Moisés tsi-páebatsi xua pinae Nakom ichichipa xua Israel pía pemómoxi susato jiwi tatsi exanaena Nakom píabo tatsi xua chivonomüü bo xua pekawarapéibibo xua bárapo botha Nakom wüünae pejainteibinéxatsi. Nakom Moisés baraichi, jeye:

—Tsipáebare Israel pía pemómoxi susato jiwi tatsi xua bü kaetukáetuta daxita xua tabo paiña neexanaenexa. Matáütano daxita bü kaetukáetuta pokotsiwang xua tútutha paiña nejebinexa. Barichiya paexánare be pókotsi koyeneya xua bari-chungkuae tsane xua methaunxuae katsita-itüütsinchi. Veinticinco po métrobe paexánare xua pin bishato dena pokotsiwa xua be párowa wétsina xuano xua be pokotsiwa weyabeicha. Matáütano cincuenta po métrobe paexande xua apiya pokotsiwa béreka xua ichaxota xometo wekoina xuano xua ichaxota pokotsiwa xometo bejopiya.

”Matáütano peboupa paexande icha wétsina pokotsiwa xometo wekoina. Pekuar-riya pamatawakaicha dúbare paparuwang xua íñapana xua saya naewang paka-kobabareinka xua paiña nejónaka penteibiwaneixa xua poxonae paichichípame xua paiña nejónaka pentébiwa.

2

”Tabo pin tutuwüüto paexande xua cinco po métrobe xua pin bishato dena, yawa 15 po métrobe xua apiya. Pemüxübürü naepaewang paexande xua asiya pakuaranóbare. Yawa pakayobanóbare íratha yawa bababiya pakatokobábare naewaxitha xua pakerabanóbare bümüükangtha. Naepaewang imoxoyo paka-teibanobarena xua poxonae penáintotha pamüxübürü xatanoparékame ichaxoyo daxita naepaewang barompaya xeixeina tsíniya xua be pemuxuwaitong tsiniya-deka. Bárapo penaintong xua paiña nexatabakorekaewa be cuátrobe tsina.

”Pepa bómüxü cuatro pokoyenéwabe paexande xua poxonae paákabame xua poxonae panamajebame. Xua matha dukuiya, xua kopiya dukuiya, paakatábare pokotsiwa xua paparuwa xua bichokono wüünae. Bárapo paparuwatha pakuaranóbare xua be pokotsiwa querubines matawüing, pomonae be matatsunpiwi, xua pejúmope xua saya payakuáname. Bárapo paparuwa xua íñapana pamüüpipawi éxande xua yatapaincha tsofia paexande yawa yatapaincha purupúraka paexande yawa yatapaincha süüjei paexande.

Ichawa xua pejumabotsiwa xua ichaxota dos baxota paakatábare paparuwa xua chivonamüü. Ichawa xua pejumabotsiwa xua ichaxota tres baxota paakatábare xua oveja penabokong xua mataropeicha boko xüxükapona xua paboko itúpana éxande xua paboko tsofia éxande. Bara nama ichawa xua pejumabotsiwa xua ichaxota xua cuatro baxota paakatábare xua duweibokong xua mataropeicha boko xüxükapona xua paboko tsewa éxaname.

3

”Tútutha xua tabo xua chivonamüü bo nakuéyatabe po tútube paexande. Icha tutu tsiki tútiyo, icha tutu pin tutu. Bárapo tútube payakaincha epataütadúyama pókotsi paparuwa báyatha kopiya paakatábame pepa bómüxü. Po tutu tsiki tútiyo, po tutu xua peboupa tajü wepu bokarena, bárapo tútiyo ápara po tútiyo bichokono yatsikaewa aiñakuí. Po tútiyo xua bichokono pepa peaiñakuí tútiyo, bárapo tutíyotha paére tacaja xua be boura. Bárapo caja saya naepaewa paexande xua matha weya yawa xua dabeya paitabarajuma wejébare oro naintong. Bárapo caja petututha pabórebe xua ibótobe panawa xua po ibotobetha matatina taitorobi koyenewa.

”Matáütano xua yantaxátata caja oro nainto paexande. Yawa pakuarérebe aiña querubinbe matawüngbe, pongbe be matatsunpinbe, xua nantíyabe ékabe. Bárapo aiña querubinbe matawüngbe nantíyabe náitama táeungkuabe xua pekuárafe nakuárafe denúngkuabe xua kuárafe opidukuarékabe ichaxoyo tútiya deka. Bara weya xua ichaxota yantaxátata caja Israel pía pemómoxi susato jiwi tatsi tha barü kueikueijeichi. Tha yábara tsipaebichi pokoyeneya xua bewa exanaena.

”Icha tutu, po tutu xua pin tutu, bárapo tútutha akoibi pokoyenéwabe pakana éxande. Pakuaranore pexaethopaewa xua pan nexa xua paexande naepaewa xua oro naintongtha paitabarajuma wekatsabábare. Pakuaranore pokotsiwa be dämpara xua ichaxota penasiwa itanakanoba. Báraxua paexande oro nainto xua daxita oro nainto matapaeicha paexande, xua be nae maxúrana paexande xua be siete po korotíyobe xeina. Matáütano pakuaranore tsiki altar matawüño xang nexa. Baxota peopixi xua cuatro xóyobe, athabé taeumeiña paexande xua be pokoyeneya cuatro pomuxunenebetha. Altar matawüng naepaewa paexande xua oro nainto paitabara jumawejébare. Baxua paexande xua baxota paiña netautsinexa incienso nain xua túxusi wüüinae.

”Sacerdotemonae bewa tsiwixi matawé bebái incienso nain xua túxusi wüüinae xua doce po pánbetha yawa xua beta jeboundeka pexaethopáewatha xua aiña námto be exanadeka xua kae namto deka seis xóyobe xua najüpa dékabe.

”Barapomonae bewa baxua exanaena daxita pentakeiseikáe matakábintha. Bárapo pan bara yatsikaya tapan tsane. Pírapae barapomonae itaküüpaeinchi xua penabanaewa poxonae xua báyatha bobenadüküpa. Íchitha ichamonae ekeicha dapomonae aibi xua pekopatsíwatsi xua penabanaewa. Bárapo sacerdotemonae bewa xaniwaicha tae dämpara matawüng xua pokotsiwa penasiwa itanakajeba xua siete korotíyobe xua kae penainto tsika. Báraxuang bewa taxumenáe matakábintha yawa merawintha.

4

”Aishowa beya pánatha pakuaranore nakuéyatabe pokoyenéwabe. Pakuaranore pin altar matawüng pokotsiwa xua ichaxota duwéi payüübabathopéibame xua

paiña netautsinexa xang nexa xua cuatro xóyobe xua peopixi athabé taeumeiña xeina cuatro pomuxunenebetha. Baxua naepaewa paexande xua bronce naintotha paitabarajuma wekatsabábare. Baxua paexande xua baxota sacerdotemonaepin pejutebeibinexa duwéi xua po duwéi petautsiwa tsane xua be ofrendang matawüing xang nexa.

”Matáütano baxotiya paére pokotsiwa xua be pin tanque xua ichaxota mera kapanathopeiba sacerdotemonaexua penakobe kiateibinexa. Baxua paexande bronce nainto.

”Daxitang baxuang paexande xua daxota paka itaküüpa xua paiña nekaponawa poxonae pawarapéibame. Daxita bárxuang bewa xeináe xua pokotsiwa ichaxoyo kauchabiya naewang xua be pemuxuwaitong xua daxota paiña nepaka itaküüpaewa xua pakáponame.

”Bara jüta ichiya paexande daxita pokotsiwang xua panantawénoname be: Xua pekaxae paratong, yawa korótixi xua be juruwatong xua oro naintong, yawa parátatong yawa be tenedorang xua pin wang, yáwano korotong xua petsutsorokuaewang xua bronce nain. Daxita baxuang sacerdotemonaexeuina xua petautsinexa duwéi altar matawüingtha xua pin altar matawüing xua pánatha unguwa, jei Nakom.

5

Barapoxonaexeuina Nakom Moisés tsipáebatsi xua pinae pokoyeneya eta bichi tsane poxonae kana éxana xua tauta incienso nain xua túxusi wüünae xua poxonae meisha baxua Nakom piabotha tauta xua chivonamüübotha. Jiwi piabongtha jopa yábara kopatsiyo xua petautsiwa.

Barichi, Nakom tsipaeba, Moisés tsipáebatsi, jeye:

—Meisha Aarón irü pía pemómoxi susato jiwi tatsi itaküüpatsi xua naexanapona sacerdotemonaexeuina xua piakoutha pekayábara kanantaxeinaewi pokoyene xua xuang peexanaewa tabotha xua chivonamüübotha.

6

Matáütano Nakom Moisés tsita itüütatsi xua eta bichi tsane sacerdotemonaexeuina paparuwang xua saya meisha barapomonaexeuina xua ichamonae aibi. Bárapo paparuwang bewa sacerdotemonaexeuina namaxatabina poxonae nakuita Nakom piabotha xua chivonamüübotha. Bárapo paparuwang bewa pexeña paparuwang tsane po paparuwa xua ínapana.

Irü Aarón, pong sacerdotemonaexeuina pía pentakaponaeinchi tatsi, bapong bewa nantaxátatsi xua penantaxatatsiwa xua seikaya xua jopa barichiyo icha ichamonae piyawang taichichi. Bewa namaxatatsina icha paparuwa be dorouto xua naiña weruya. Bárapo paparuwa bichokono süüjei xua wüünae.

Yawa bewa namaxatatsina icha paparuwa xua be akuareibi éxana. Bárapo paparuwa naiña weruya. Bárapo paparuwa bewa xeináe aiña po ibótobe xua peutukuratha ira wétsina nantiya botétabe. Bárapo ibótobe bewa xeináe pewüingxi xua doce po wüingbe xua pematawüing dubinexa xua pomonaexeuina Israel pexantong tatsi xua doce pongbe xua pewüingxi. Kae iboto bewa xeináe seis po wüingbe, icha iboto bewa xeináe seis po wüingbe.

Icha paparuwa bewa nantákari xatatsina. Bárapo paparuwa bewa xeináe doce po ibotíyobe xua bichokono peitüpanáe ibótixi. Bewa xeináe kae iboto daxita

Israel pía pemómoxi susato jiwi tatsi matabüxúyobe nexa xua be pokoyeneya doce po bicheito matabüxúyobe tsíniya.

7

Barichi Nakom tsipaeba, Moisés tsipáebatsi pokoyene xua eta bichi tsane poxona exanaena penasiwa xua tuxuúi. Jiwi jopa itaküüpaetsi xua pexeinaewa piabongtha bárapo penasiwa xua tuxuúi.

Nakom Moisés tsipáebatsi pokoyene xua eta bichi tsane poxona kana éxana poxona Aarón irü pexántobe tatsi tamrópata notarüküpaena xua kananakuichiya éxana xua sacerdotemonae pía penakuichiwa.

Barichi Nakom, Moisés yábara tsipáebatsi pewüngxi pomonae xua Nakom itapeta xua petaexanaewa tsainchi daxita pokotsiwang xua píabo nexa xua chivonámüübo nexa. Pong kanamataxeina daxita pomonae xua nakuita Nakom piabotha bapong pewüng Bezaleel, irü Aholiab pong Bezaleel pía peyawenaeinchi tatsi.

**Meje yábara poxonae Israel pía pemómoxi susato jiwi tatsi
jopa exanaeyo xua Nakom itoroba yawa éxana oro nain nakom**

(Exodo 31.18—34.35)

Moisés pópona cuarenta po matakábibe demuxúwatha xua Sinaí matawüng demuxúwatha. Bárapo matakábintha Nakom Moisés daxita yábara tsipáebatsi pokotsiwa xua Nakom ichichipa xua Israel pía pemómoxi susato jiwi tatsi peexanaewa tsane.

Barapomonae Israel pía pemómoxi susato jiwi tatsi jinompa peíra matafatsanáewatha xua Sinaí demuxuwa pepuya béreka. Barapomonae nama ekeicha jopa ichichipaeyo xua Moisés peewatsíwatsi. Barapomonae bichokono ajüntükoyenefaetabí xua Moisés báyatha peewatsíwatsi. Barapomonae nantanaxeina xua metha Moisés ekeicha jopa patopáe tsane.

Daxota daxita barapomonae Aarón wüükatsi xua bepa pinae barapomonae taexanaetsi pía nakomüng xua barapomonae pematakaponae néxatsi Canaán nakua beya. Néxata Aarón itoroba xua bepa pinae barapomonae daxita karendenaena xua penamuxuwarowabiwang xua oro nain xua yábüxi namuxuwárowaba. Bara baxua barapomonae éxana, yawa bara Aarón oro nain nainseta.

Barapoxonae bapong vaca pebto kana éxana xua pía Nakom éxana. Aarón Israel pía pemómoxi susato jiwi tatsi tsipáebatsi xua pinae bárapo vaca pebto ápara Nakom po Nakom xua báyatha barapomonae kapanépati Egipto nakua weya.

Matáütano Aarón tsipaeba barapomonae xua pinae icha matakábitha barapomonae bü exanaena fiesta poxona wüünae jainchina bárapo oro nain nakom. Bara baxua éxana. Icha matakábitha barapomonae éxana pin fiesta, yáwano duweimonae juteba xua petautsinexa bárapo oro nain nakom nexa po oro nain nakom xua vaca pebto kanaxóbiya éxana xua be ofrendang matawüng.

2

Mexeya poxoru Nakom tane xua pokotsiwa Israel pía pemómoxi susato jiwi tatsi éxana daxota Nakom Moisés itoróbatsi xua penawichikaewa bichoina demuxuwa wétsika. Israel pía pemómoxi susato jiwi tatsi jopa exanaeyo pokotsiwa Nakom itoroba pía peitorobi koyenéwatha, xuano xua wüünae jainta icha nakom xua oro nain vaca pebto kanaxóbiya éxana.

Nakom bichokono Israel pía pemómoxi susato jiwi tatsi yábara anaepánatsi. Nakom Moisés tsipáebatsi xua bepa pinae Nakom daxita jutebina barapomona. Yáwano tsipaeba xua pinae exanaena xua Moisés irü pía matabüxüyono naexanaena piamona tatsi. Íchitha nama Israel pía pemómoxi susato jiwi tatsi jopa naexanáe tsane piamona tatsi.

Moisés jumedangweya wüüka xua jopa Nakom peexanaewa tsane baxua. Moisés tsipaeba Nakomtha xua Nakom yábara jüntanainaena pokoyene báyatha Nakom yábara tsiwüünae muxuduta Abrahamtha, irü Isaactha irü Jacobtha xua bepa pinae barapomonaetha taexanaena pinmonae pía pemómoxi susato jiwi tatsi.

Matáüta Moisés tsipáebano Nakomtha xua icha Nakom jutebina Israel pía pemómoxi susato jiwi tatsi bapoxonae Egipto nakuapiwi nantaxeináetsipa xua Nakom báyatha pita barapomona Egipto nakua weya xua pía poxoru abe peexanáewaxae tsane barapomonaetha. Bara Nakom jumetane, Moisés jumetainchi. Bara Nakom yábara najüntükoyene wüünaeta xua jopa pejutebiwa tsane, xua jopa pejutebiwa tsainchi Israel pía pemómoxi susato jiwi tatsi.

3

Bara néxata Moisés tamrópata pítaba xua demuxuwa wétsika, yawa aiña ibo panawabe katsikabe xua po ibo panawabetha báyatha Nakom tina pía peitorobi koyenein. Poxonae Moisés dabe patopareka bapong tane vaca pebto xua oro nainto éxana. Yawa tane xua bárapo jiwi nawiraba xua bárapo vaca pebto nexa xua oro nainto xua barapomonae aiñakuí pekana exanaexae.

Bichokono Moisés anáepana. Bárapo ibo panawabe íratha xorékabe yawa tanataba xua pepürü náexana. Bapoxonae pita oro nainto xua vaca pebto kanaxóbiya éxana yawa abe éxana. Moisés bichokono kaseba, Aarón kasébatsi. Néxata Aarón Moisés tsipáebatsi jeye:

—Takoya aibi. Jopa nantaxeinaeiño xua barapomona abe éxana. Wámonae kawüünae éwata báyatha. Poxonae jopa patopaem barapomona neitoroba xua taexanaewa oro nain nakomüng xua bárapo oro nain nakomüng petsíwana kajjijinkaenexa tsainchi poxonae pona Canaán nakua beya. Bapoxonae notang wámonae pía wárowang yawa daxita jebiyang tanainkatatsinexa ishótotha. Barapoxonae jemeicha bara weya pinae vaca pebto píchipa.

Íchitha naerabiya paeba Moísesta. Moisés tane xua barapomona jopa exa-naeyo pokotsiwa Nakom itoroba poxoru jopa Nakom jumekowüntsichi. Daxota tsipaeba barapomonaetha jeye:

—Pomona ichichipa peexanaewa pokotsiwa Nakom itoroba taxaiña beume-narenaena, jei.

Néxata Leví pía pemómoxi susato jiwi tatsi, Moisés pexantha taumeinchi. Bapoxonae barapomona pona daxita karepaya bomüxüxitha xua chivo namüüboxi. Barapoxonae barapomona juteba imoxoyo be tres mil po jiwimonaebe pomona ichichipa xua wüünae pejainchiwa po nakom xua oro nain nakom xua vaca pebto kanaxóbiya éxana.

Bapoxonae Moisés jumedangweya wüüka Nakomtha xua Nakom peyábara kuijüntemainaewa tsane xua Israel pía pemómoxi susato jiwi tatsi peyábara kuijüntemainaewa tsainchi pokotsiwa barapomona éxana. Nakom Moisés jumenótatsi xua pinae bara moya daichane, saya pinae jopa ekeicha yantsí tsane poxona

barapomonae námtotha pona. Néxata Moisés jumedangweya wüüka Nakomtha xua jopa kompa exanáe tsane xua barapomonae jopa kompa exanáe tsainchi poxonae wárapa. Nakom jumenota xua pinae bara moya daichane.

4

Bapoxonae ekeicha Nakom itoroba, Moisés itoróbatsi jeye: “Éxande aiña ibo panawabe. Ekeicha juiñama demuxuwa beicha xua takatatinaewa tsainchi ekeicha xua taitorobi koyenewang”, jei Nakom.

Poxonae Moisés bara bejuíña, ekeicha Nakom Moisés yábara jüntanaina éxanatsi, xua pinae Israel pía pemómoxi susato jiwi tatsi jopa bewa barü jinompaetsi pomonae jinompa Canaán nákuatha. Matáütano barapomonae Israel pía pemómoxi susato jiwi tatsi, jopa bewa irü jumekowüntsí tsane bárapo nakomüng, po nakomüng xua jumekowünta Canaán nakuapiwi. Matáütano Nakom icha koyene xua pía peitorobi koyenewa tatsi Moisés yábara nantanaxeina éxanatsi.

Bara barichi Moisés, ekeicha pópona demuxúwatha cuarenta po matakábibe. Nakom tina ibo panawabetha po peitorobi koyenewang xua diez po peitorobi koyenewangbe xua kopiya Moisés kátatsi. Barapoxonae Moisés ekeicha pekoyo bedunadeka xua demuxuwa wedunadeka. Moisés bichokono itabara pentha poxoru báyatha Nakom barü kueikueijeji, xua Moisés barü kueikueijeichi poxonae tane Nakom pía pexeíña peitüpanáe koicha tatsi. Bapong baxua jopa nayábara yaputaeyo xua itabara pentha.

Poxonae Aarón Moisés itabara tainchi, irü xua poxonae ichamonae itabara tánerü bichokono barapomonae junuwa xua Moisés imoxoyo pekakitaponáewatsi. Íchitha matapaiña Moisés imoxoyo kakuita poinchi. Moisés daxita yábara tsipaeba Israel pía pemómoxi susato jíwítha tatsi, pokoyene Nakom itoroba, pokoyene xua Israel pía pemómoxi susato jiwi tatsi bewa peexanaewa tsane. Néxata Moisés paparúwatha náitabara ákata.

Poxonae Moisés barü kueikueijeji tsaibi Nakomtha náitabara wejonapenteiba paparuwa. Ekeicha Moisés náitabara akateiba bárapo paparuwa poxonae Israel pía pemómoxi susato jiwi tatsi tane xua Moisés itabara pentha.

**Meje yábara poxonae Israel pía pemómoxi susato jiwi tatsi éxana
Nakom píabo xua chivonamüü bo po bo xua pekawarapéibibo**

(Exodo 35—40)

Moisés daxita kaetuta Israel pía pemómoxi susato jiwi tatsi. Matáütano yábara tsipáebano pokotsiwa xua Nakom paeba xua ichichipa xua barapomonae peexanaewa tsane Nakom píabo xua chivonamüü bo. Barichi Moisés itoroba xua barapomonae Moisés petakarendenaenexa tsainchi xua Nakom píabo nexa daxita xua pokotsiwa barapomonae xeina xua pokotsiwa barapomonae ichichipa kata xua peexanaenexa tsane xua Nakom píabo tatsi.

Moisés yawa tsipaeba xua pomonae yaputane pokoyene xua kana éxana ichawa weya xua Nakom píabo nexa bara irü barapomonae yawenaena.

Matáütano, Moisés tsipaeba xua Bezaleel irü pong pía peyawenáeinchirü pong pewüng Aholiab bara bapongbe kanamataxeináenabe bárapo penakuichiwa poxonae éxana Nakom píabo. Poxoru daxita barapomonae najüntükoyene tsakáraba xua peexanaewa tsane Nakom píabo, daxota barapomonae tamrópata notarúküpa xua daxitang tajótatsi pokotsiwang xua bómüxü nexa.

Pinmonae xua barapomonae jíwana, ichichipa nawita xua peyawenaewa bárapo penakuichiwa xua poxonae éxana Nakom píabo. Barapomonae nawita jebathopa. Daxota Moisés tsipaeba xua pinae bare tsane. Bara pinae ápara daxita xeina xua nantawénona.

2

Pomonae penakuichiwi bara éxana icha be pókotsi koyeneya báyatha Nakom kui-itoroba xua Moisés kui-itoróbatsi poxonae pópona demuxúwatha. Bara daxitang xaxaintajeba naepaewang, yawa paparuwang xua peakababiwang, yawa pexaethopaewang, yawa penasiwa xua petuxueiwa yáwano incienso nain xua túxusi wüüinae. Jopa ichawang bebayo. Bara daxita nota pokotsiwa xua barapomonae jebathopa. Daxita xátaba xua ichawa nakópata aibi.

Barichi nota pekakomokáe parátixi, po parátixi xua báyatha Moisés wekobenota pebiwi poxonae pewüngtináewatsi yawa peununáewatsi bárapo pebiwi xua Israel pía pemómoxi susato jiwi tatsi. Matáütano éxana paparuwang, po paparuwang xua sacerdotemonae namaxátaba. Daxita baxuang bara weta. Bapoxonae Moisés daxita nekoba, yawa tane xua bara barichungkuae ichi be pókotsi koyeneya báyatha Nakom tsita itüüta xua Moisés tsita itüütatsi.

Néxata Nakom Moisés tsipáebatsi xua bewa pinae jebí daxita Nakom piabotha. Moisés itoróbatsi xua bepa pinae penasíwatha xua petuxueiwa baxota pinae matawetsikababina, xua peyábara kaununutsinexa tsane xua bárapo bo meisha Nakom píabo tatsi xua ekeicha ichawa nexa aibi. Matáüta Moisés itoróbatsi Nakom xua bewa pinae exanaena pokoyene xua sacerdotemonae petamropatanotsiwa xua poxonae aena xua penakuichiwa ichi sacerdotemonae ichi. Bara baxua éxana Moisés. Poxonae Nakom píabo daxita nakobeweta írürü imoxoyo kae wei yapukáewarü xua poxonae kaena báyatha barapomonae Egipto nakua wewarapiya.

3

Poxonae barapomonae nakobeweta daxita pokotsiwa Nakom itoroba, bapoxonae tsakinaebowa, po tsakinaebowa kaena báyatha barapomonae matakapoinchi poxonae námtotha pona xua beya ichaxota Sinaí demuxuwa, bárapo tsakinaebowa írabe jopeika.

Yawa Nakom píabo matatsún wejopéikatsi xua daxita Nakom píabo akataba. Báraxua yábara kaunúnuta xua Nakom baxota eka. Bara kaena barapoxonae weya, barapomonae tsita itüütatsi tsakinaebowa xua poxonae barapomonae pexuekeibinexa Nakom píabo xua pekawarapeibinexa.

Poxonae tsakinaebowa imoxoyo matatsún dukua bómüxü, barapomonae jopa kawarapéibiyo. Poxonae tsakinaebowa bómüxü matatsún wenatsixitaba, bapoxonae barapomonae yaputane xua Nakom ichichipa xua barapomonae ekeicha kawarapaena.

**Meje yábara poxonae Nakom Moisés yábara tsipáebatsi xua pokotsiwa
Nakom ichichipa xua pekatsibinéxatsi, xua Israel pía pemómoxi
susato jiwi tatsi pekatsibinexa xua ofrenda matawüng**

(Levítico 1—7; Números 5; 15.1-31; 28.1-15)

Nakom Moisés tsipáebatsi xua pinae bapong ichichipa xua jiwi pekatsibeibiwa tsane bapongtha xua cinco po ofréndangbe xua jopa nakoyenejúpaeyo.

Bárapo ofrendang matawüing bewa barapomonaē Nakom tsita exanaponaēinchi. Kae ofrenda matawüing, xua bárapo ofrendang jíwana xua Nakom kátatsi, bárapo ofrenda matawüing, xua duwéi ompin kata xua Nakom petabexubinexa tsainchi, xua poxonaē jintong abe peexanaexae.

Bárapo ofrenda matawüing, xua ompiwa pekatsiwa Nakomtha, meje baxue: vaca pebto irü tsipae, ichikuitha oveja penüing irü tsipae, ichikuitha chivo irü tsipae, ichikuitha tsakeinto irü tsipae, ichikuitha topiboto irü tsipae. Íchitha daxita baxuang íraxuang xua xuang ü naxainwaeta xua penaxiñabiwang.

Pong xua kapatopa vaca pebto, vaca matasípatha nakobeyüütabota aiña kóbebe. Bara yawa sacerdotemonaepin bexuba duwéi. Barapoxonaē sacerdotemonaepin pejánatha matawetsikatsíkata xua po pin altar matawüing xua ichaxota duwéi yüü-babeibiyathopa xua tauteiba. Yawa bárapo sacerdotemonaepin daxita tauta ompin.

Bara Nakom yábara barü jejéi xua bara vaca petüpaewa tsane xua pematoma-tsiwa xua abe peexanaexae pong vaca tabexotsi. Nakom pebin tainchi xua bárapo pebin bichokono Nakom tsita jüntükoyene wüünaetsi.

2

Icha ofrenda matawüing, xua bárapo ofrendang jíwana xua cinco po ofrendangbe jíwana, saya pexu. Bárapo pexu jame bewa pebena kopiya exanáe xua poxonaē ofrenda matawüing éxana Nakom pekatsiwa tsainchinexa. Icha ofrenda matawüing bewa pebena múxuna xubí penasiwa. Yáwano icha ofrenda matawüing bewa pebena múxuna xubí penasiwa, po pexu xua kopiya pexu tata. Daxita bárapo ofrendang bewa múxuna pentsi tsiwixi xua incienso nain xua túxusi wüünae.

Icha ofrendang matawchichiüing xua Nakomtha pekatsiwa báraxuang bewa anapáe. Daxita bárapo ofrendang, xua pebena xua Nakomtha pekatsiwa, bárapo ofrendang bewa múxuna pentsi penasiwa yawa sarebena. Íchitha Nakom itoroba xua pinae jopa múxuna pentsi tsane levadurabeno yawa banto mera xua poxonaē éxana.

Poxonaē ichüing kápona bárapo ofrendang jíwana xua Nakom pekatsiwa tsainchi xua pexubeno, sacerdotemonaepin saya tsiwiyo jíwana pita, yawa tauta altar matawüingtha ichaxota duwéi petautsiwa. Yawa daxita múxuna tauta incienso nain xua túxusi wüünae.

Bapoxonaē sacerdotemonaepin itakúüpatzi xua xane pokotsiwa xua nakópaba. Íchitha poxonaē sacerdotemonaepin kápona ofrenda xua pexu xua Nakom pekatsiwa tsainchi, icha sacerdotemonaepin daxita omeicha tatauta. Bapong baxua éxana xua be Nakom amanaya pekatsíwatsi.

3

Icha ofrenda matawüing xua Nakom pekatsíwatsi báraxua petsabi ofrenda. Meje baxue: vaca pebto irü tsipae, ichikuitha vaca pesowato irü tsipae, ichikuitha oveja penüing irü tsipae, ichikuitha chivo irü tsipae. Pong xua kapatopa xua Nakom pekatsiwa tsainchi duweín matasípatha nakobe yüütabotsina aiña kóbebe.

Yawa bapoxonaē sacerdotemonaepin duwéi bexuba. Néxata bapong sacerdotemonaepin matawetsikatsíkata pejánatha altar matawüingtha ichaxota xua duwéi petautsiwa. Bapoxonaē bapong duwéi marathüto pita, yawa pejápató jíwana pita yawa daxita penasiwa.

Daxita baxuang sacerdotemonaepin tauta altar matawüingtha ichaxota duwéi petautsiwa. Bapong baxua éxana xua be Nakom amanaya pekatsíwatsi. Pong duwéi kápona pekatsinexa Nakom bapong bewa katsina sacerdotemonaepintha pentákari yawa petopa xua pekoxatopa. Barichi itakúüpatsi kápona piabotha po pewi xua nakópaba pexaenexa.

Akoibi po ofréndangbe xeina po ofrendang xua petsabi ofrendang. Icha ofrenda, xua bárapo ofrendang jíwana, bárapo ofrenda jiwi kata poxonae xua jiwi Nakom yábara jüntükoyene weiwéinatsi xua bárapo jiwi beta petaexanaexaetsi. Pong xua kata Nakomtha bárapo ofrenda, xua duwein, bewa múxuna kaponáe kayetang, yawa bewa múxuna kaponáe pan, po pan xua múxuna penta levadurabeno, xuano xua ichikuitha icha pan xua jopa múxuna pentsiyo levadurabeno. Pewi xua bárapo ofrenda jíwana, barapowi bewa xaena poxonae po matakábitha aena bexuba.

Icha ofrenda, bárapo ofrenda kata Nakomtha xua penayábara jumeweteibinexa xua bara peexaneibiwa tsane pokoyene xua Nakomtha penayábara kuiwüünae tsimuxudutsiwa.

Barichi icha ofrenda po ofrenda: “Amanaya pekatsi ofrenda”, jei, tsipéi jintong saya ápatsi kata Nakomtha. Bárapo ofréndabe, po ofréndabe xua opidúkuabe, jintong itakúüpatsi xua pewixaewa bárapo matakábitha poxonae po matakábitha aena bexuba, ichikuitha xua baya tsane. Íchitha jopa itakúüpaetsi xua pobaya tsane pewixaewa. Pong xua xane bárapo pewi maisha bewa jüntükoyene wüünae Nakom peitütha tatsi xua poxonae éxana ofrenda, po ofrenda xua petsabi ofrenda.

4

Nakom jopa ichipaeyo xua Israel pía pemómoxi susato jiwi tatsi pexaewa tsane xua duwéi penasiwang, xuano xua ichikuitha pejanang. Matáütano jopa ichipaeyo xua barapomona pejutebeibiwa tsane duwéi aishówatha. Jame, Nakom ichichipa xua jiwi duwein kaponae sacerdotemonaepintha yawa xua petabexubiwa tsainchi, ichi be pokoyeneya ichi, poxonae éxana po ofrenda petsabi ofrenda icha barapomona ichichipa xua pewixaewa.

Barichi Nakom ichichipa xua poxonae jiwi peyapupunaewi yajutebina xua peyaenexa, íratha yajana othopeika exanaena, xuano xua íratha yajana matatsaebina tsorobotha.

Icha ofrenda báraxua tsiéxana xua abe peéxanae koyenein. Bárapo ofrenda exaneiba xua poxonae ichüng abe éxana. Icha sacerdotemonaepin ichauyo abe éxana, bapong bewa vaca pebto kaponáe Nakom píabo beya. Matáütano bewa pentasípatha nakobe yüütabotsina aiña kóbebe, yawa icha sacerdotemonaepin bexubina bárapo duwein.

Bapoxonae bewa tsiwiyo pejana kaponae Nakom píabo tütutha xua vaca pebto jana. Matáütano bárapo pejanang bewa kaxuebina pentutu sojeiwangtha xua xuang nantiya umena xua ichaxota be pókotsi koyeneya cuatro pomuxunénebe xua ichaxota tauta incienso nain xua túxusi wüünae xua tsiki altar matawüüño.

Matáütano bewa tsiwiyo tsikatsikatsina pejánatha xua pekuariya paparuwa, po paparuwa xua bopiya dukueika, po paparuwa xua bárapo tütube yakaincha dukuarénatsibe, xua yakaincha dúkuatsi, po tútiyo yatsikaewa Nakom pía tútiyo tatsi. Bárapo tütutha eka caja, po caja xua Nakom yatsikaewa pía caja tatsi.

Matáütano bewa pejánatha tabüwetsikababina po pin altar matawüing aishó-watha ungkuiya xua po pejanang nakópaba. Bapoxonae bewa bárapo pin altar matawüingtha tautsina duwein pamarathútobe xuano xua pejápató jíwanano xua duwein jápató yáwano penasiwang xua duwein nasiwa. Yáwano bewa daxita pepong xua nakópata tómara pepuya beya xua aishówatha tajü beya tautsina.

5

Icha daxita Israel pía pemómoxi susato jiwi tatsi ichauxi abe éxana, pítiri jiwi bewa kaponaena vaca pebto, yawa barapomonaewu bewa pentasípatha nakobeyüübe-bina aiña kobeintha, yawa sacerdotemonaepin barapomonaewu tabexubinchi bárapo duwein. Bapoxonae kotakaya sacerdotemonaepin kana éxana bárapo vaca pebto ichi pokoyeneya báyatha kana ichiya éxanatsi icha sacerdotemonaepin xua poxonae ichauyo abe éxana.

Icha pebin pong bichokono peaiñakuín, icha abe éxana bapong bewa kaponaena chivo pebto. Icha jintong pong jopa peaiñakuín, icha abe éxana, bapong bewa kaponaena chivo pesowato, ichikuitha oveja pesowato. Icha bapong jopa xeinaeyo chivo pesowato, yawa oveja pesowato, bara néxata itakúüpatsi xua pekaponawu aiña kotsátobe, ichikuitha aiña topibótobe. Kaein peyapupunaewu yabexubina xua po ofrenda xua be pentoma xua abe peexanaexae. Icha peyapupunaewu yabexubina xua po ofrenda xua ompin pekatsiwa xua abe peexanaexae.

Icha bapong jopa xeinaeyo peyapupunaewu, bapong itakúüpatsi xua kápona pexu xua pexubeno. Íchitha bárapo pexubeno jopa bewa múxuna xubí tsane penasiwa, xuano xua jopa múxuna xubí tsane incienso nain xua túxusi wüünae. Bara bapoxonae Nakom yábara jüntemaina xua bapong abe éxana poxonae bapong kápona bárapo ofrenda. Icha matha pejánatha matawetsikatsíkata tútutha xua Nakom piabo, bapoxonae bewa pewi tautsina. Icha matha jopa daichiyo bara néxata sacerdotemonaewu itakúüpatsi xua pexawu bárapo pewi.

6

Icha ofrenda matawüing po ofrenda xua poxonae jintong piakoutha abe éxana. Bárapo ofrenda kata Nakomtha poxonae jintong abe éxana poxoru jopa exanaeyo pokotsiwa Nakom itoroba pía peitorobi koyenéwatha xua bekein jopa tsakeinaeyo xua baxua éxana. Bapong néxata bewa kaponáe oveja penüing Nakom piabotha xua petautsinexa bárapo duwein piakóuthaxae xua abe éxana.

Icha jintong naerabiya paeba xua poxonae Nakom pewüing tapáebatsi xua ichüing pekaibinéxatsi, néxata bapong barichi bewa kaponáe Nakom piabotha oveja penüing xua pebexubiwanexa. Baxua éxana, xua oveja bexuba, xua piakóuthaxae xua abe éxana, tsipéi báyatha Nakom pewüing tapáebatsi xua ichüing pejumekowüntsínéxatsi penáerabi jume.

Poxonae bapong baxua éxana xua poxonae náeraba paeba, bapoxonae bewa kaponáe oveja penüing, yawa xua sacerdotemonaepin pebexubinexa. Bapoxonae sacerdotemonaepin bewa tabütsikatsikátsina bárapo duwein jánatha xua pin altar matawüing xua pokotsiwa ichaxota duwéi tauteiba Nakom nexa. Matáütano bewa bapong tautsina pamarathútobe, xua oveja marathútobe, yawa pejápató jíwana, yawa penasiwa. Bapoxonae sacerdotemonaewu itakúüpatsi xua pexawu pewi xua nakópaba.

Barichi pong xua báyatha kaiba, xua ichüng báyatha káibatsi, bapong bewa ekeicha kaewa katsina. Yawa bewa ekeicha tsiwiyo mataropeicha katsina peka-komokáe parátixi xua bapong báyatha kaiba. Báraxua bewa bapong kaponaena xua poxonae po matakeitha oveja kápona xua tauta.

7

Barichi Nakom ichichipa xua Israel pía pemómoxi susato jiwi tatsi pekaponei-biwa tsane icha ofrendang. Daxota daxita matakabi tsaibi sacerdotemonaepin ita-kúüpatsi xua jutebeibina oveja pebto ayunbe tsaibi, xua poxi kae wei xeina, xua be ofrenda xua ompin pekatsiwa Nakomtha. Icha duwein bexubeiba baya tsaibi; icha duwein bexubeiba kiripitha tsaibi.

Yawa bewa múxuna kaponeibina vino mera yawa pexubeno be ofrendang daxita koyenáyatha poxonae xua kápona oveja penüng pekatsinexa Nakomtha. Poxonae pentakeiseikáe matakabi, bárapo matakábitha bewa tauchina ayunbe ovéjabe, xua poxi kae wei xeina, xua poxonae baya. Ekeicha bewa barichi poxonae kiripitha.

Po matakabi kopiya dukua xua daxita xometongtha tsaibi, bárapo matakábitha bewa bexubina chivo yawa tautsina be ofrenda xua Nakom nexa xua abe peexanaexae barapomona. Yawa bewa tautsina vaca pébtobe ayunbe, yawa kaein oveja pong piño, matáütano siete póyobe ovejang, xua poxi kae wei xeina. Baxuang bewa exanáe xua be ofrenda xua ompiwang pekatsiwa Nakomtha.

**Meje yábara poxonae sacerdotemona. tamrópata notarüküpa
xua éxana pía penakuichiwang**

(Levítico 8—9)

Poxonae Moisés pópona demuxúwatha, po demuxuwa pewüng Sinaí, bapoxonae Nakom Moisés daxita yábara tsipáebatsi pokuikoyenewangtha xua sacerdotemona. tamrópata notarüküpaena xua peexanaewa tsane pía penakuichiwang. Barapoxonae Moisés daxita jiwi kaetukaetuteta ichaxota imoxoyo Nakom píabo tatsi ungkua, xua chivonámüübo.

Moisés matawane, Aarón matawainchi, xuano xua Aarón pía pexantong tatsi tamatawainchino. Néxata Aarón jumaxátatatsi paparuwa, Moisés jumaxátata xua sacerdotemona pía pentakaponaein tatsi pía paparuwa tatsi. Irü Aarón pía pexantong tatsi icha paparuwang jumaxátabatsi, xua po paparuwang seikaya sacerdotemona namaxátaba.

Bapoxonae Moisés penasíwatha matawetsikatsíkata Nakom píabo tatsi, xua chivonámüübo, po penasiwa xua tuxuéi. Barichi daxita matawetsikatsíkata xua xuang baxota umena xua be pexaethopaewang, yawa matawetsikatsíkatatsi pena sacerdotemona.

Bara bapoxonae, Aarón irü pía pexantong tatsi pekobethang buey matasípa-tha nakobeyüübebina aiña kobeintha. Yawa Moisés bexuba bárapo buey xua po ofrenda Nakom nexa xua barapomona. abe peexanaexae. Moisés buey nasiwa tauta altar matawüngtha. Pewi, powi xua nakópaba, barapowi tómara pepuya beya tajü beya tauta xua aishówatha.

Bapoxonae bexuba oveja pong penüng xua ofrenda éxana po ofrenda xua duwéi ompin petautsiwa yawa pekatsiwa Nakomtha.

Matáütano ichüingno oveja bexuba penüing xua saya tsiéxana xua Nakom peka-tsiwatsi bárapo fiesta nexa. Pejánatha xua tsiwixi, xua oveja pejana pong kota-kaya bexuba, bárapo pejánatha daxita sacerdotemonae barompaya kaxuebébatsi. Tsiwixi muxuyoro opitabü kaxuebébatsi xua pekoxa weya, yawa tsiwixi kobesí kaxuebébatsi xua po kobesítoxi pekobesimatanaexi xua pekoxa weya, yáwano taxusi kaxuebébatsi xua petaxusimatanaexi xua pekoxa weya.

Bapoxonae po pejana xua nakópaba, bárapo pejánatha tabü epababa altar mata-wüing xua pinwa. Moisés pita pemarathútobe, yawa pejápató jíwana, yawa pena-siwa, yawa petopa xua pekoxatopa, yawa pan xua jopa levadura xeinaeyo.

Daxita baxuang Moisés Aarón kátatsi, xua irü pexántobe tatsi katatsibe. Daxita bárapo pexaewa barapomonae ofrenda éxana xua be Nakom amanaya pekatsíwa-tsi. Bapoxonae daxita tauta. Matáütano bapong Aarón oveja pentákari tauta xua ofrenda éxana Nakom nexa xua be Nakom amanaya pekatsíwatsi.

Bapoxonae, poxonae baxua nakobeweta, Aarón irü pía pexui tatsi pewi xua nakópaba, barapowi seta yawa bara xane, xua pan múxuna xane. Bárapo pewi, xua barapomonae wiseta, ápara oveja, pong kotakaya bexuba, bapong pewi. Daxita baxua xua éxana Nakom nexa beya kae semana yapujopa.

Poxonae weta bárapo semana, bapoxonae Aarón éxana icha ofrenda Nakom nexa, po ofrenda seikaya tsiéxana xua poxonae abe peéxanae koyenein éxana. Matáütano barichi aiña ofrendang éxana, po ofrendang ompiwang, xua bapong piakoutha nata éxana xua abe peexanaexae.

Barichino bapong Aarón taéxana ofrendang xua daxita jiwi nexa. Meje daxita baxuangje xua poxonae bapong taéxana, xua daxita jiwi taexainchi: Po ofrendang xua poxonae jiwi abe peéxanae koyenewang éxana, yawa po ofrendang xua pexu ofrendang, yawa po ofrendang xua petsabi ofrendang.

Israel pía pemómoxi susato jiwi tatsi éxana daxita ofrendang icha be pókotsi koyeneya Nakom báyatha itoroba. Daxota Nakom pekoicha itoroba tsakinaebo-wang weya xua petautsinexa daxitang ofrendang xua pokotsiwa pekatsiwang-tsi xua bara káetotha. Poxonae tane baxua, daxita barapomonae jeye: “¡Maisha Nakom bichokono peyapusüüwa pexeinaein!” jei barapomonae.

Meje yábara xua po peitorobi koyenein sacerdotemonae bewa jumekowüntsiya exanaena

(Levítico 21—22)

Barapomonae sacerdotemonae yáitama saya meisha ü éxana Nakom nexa xua poxonae éxana xua sacerdotemonae pía penakuichiwa, daxota bewa jumekowün-tsiya exanaena icha koyenewang, xua peitorobi koyenewang, po peitorobi koye-newang xua ichamonae jopa nantawenonaeyo xua peexanaewa.

Barapomonae jopa yábara kopatichi xua pemüthükeibiwa petüpaewi xua piamonae. Saya meisha barapomonae yábara kópabatsi xua pemüthükeibiwa tsane paxa jiwi, yawa pía pexui, yawa peweicho jiwi, yawa pamcho jiwi xua pemishidubenaewaxi, tsipéi icha petüpaein jayabíchipa nataxobíchipa Nakomtha.

Néxata barapomonae jopa itaküüpaetsípaetsi xua penakuichiwa tsane xua poxonae tanakuíta Nakom xua poxonae sacerdotemonaepin kuiya éxana. Barichi barapomonae yábara kuikópabatsi xua saya meisha penotsiwa tsane powaxi bápána

jopa jitha peenaewa. Barichi barapomonaē yábara kuikópabatsi xua saya meisha penotsiwa tsane powaxi xua pishéuriwi pekuenta werapaewaxichi.

Sacerdotemonaē pía pentakaponaēin tatsi bewa jumekowüntsiya exanaena icha peitorobi koyenewang xua bekein ayapubé, beyakaincha pokotsiwa icha sacerdotemonaē bewa exanaena. Bapong jopa yábara jumekopatichi xua pemüthüthü xubinexa petüpaēin xua piamonaē matabüxü jintong tatsi, bekein bara paxa tatsi tsipae ichikuitha bekein bara pena tatsi tsipae.

Bapong jopa yábara jumekopatichi xua pepichiwa powa pekuenta tüpáewatsi pisheuri. Matáütano jopa yábara jumekopatichi xua penakuichiwa sacerdotemonaē koyeneya pong xua nabena.

Nakom, sacerdotemonaē yaputane exainchi pokoyene xua pinae pomonaē tsita jüntükoyene wüünaeya jinómpatsi meisha barapomonaē itaküüpatsi xua pejfwana xaewa pexaewa, po pexaewa býatha sacerdotemonaē xane, po pexaewa Israel pía pemómoxi susato jiwi tatsi kápona ofrenda nexa.

Matáütano xua pinae pomonaē xua jinompa sacerdotemonaē piabongtha tatsi, barapomonaē irü pinae itaküüpatsi xua penabanaewa bárapo pexaewa. Matáütano Nakom, sacerdotemonaē yaputane exainchi xua pinae jopa bewa jejéi poxonaē ichamonaē ofrenda kápona xua po duwein nabena.

Meje yábara poxonaē Aarón pexántobe tatsi bexótsibe, xua Nakom bexúbabe, poxonaē jopa peexanaexaēbe pokotsiwa Nakom itoroba

(Levítico 10.1-7)

Nakuéyatabe matapinbe xua Aarón pexántobe tatsi, ichüing pewüing Nadab, ichüing pewüing Abiú. Barapongbe kaentakábitha jopa jumekowüntsiya exanaēbe pokotsiwa Nakom itoroba pía peitorobi koyenéwatha. Bárapo peitorobi koyenewa pokoyenewa xua býatha Nakom taitoroba pomonaē tanakuítatsi sacerdotemonaē koyeneya.

Bapongbe baxua éxanabe poxonaē ishoto yawa incienso nain, xua túxusi wüünaē, jébabe korotobetha, xua pía korótobe, yawa ofrenda éxanabe Nakomtha Nakom piabotha tatsi, xua chivonámüübo. Pokotsiwa bapongbe éxanabe, baxua Nakom jopa tsita wüünaētsi tsipéi jopa exanaeyo be pókotsi koyenewa xua Nakom itoroba. Daxota Nakom pekoicha itoroba, xua bárapo koicha, bapongbe bexótsibe baraxota xua Nakom piabotha tatsi. Néxata Moisés jeye:

—Bara xaniwaicha Nakom ichichipa xua waxainchi daxita koyenein exanaēinchi be pókotsi koyeneya bapong naka itoroba.

Bapoxonaē Moisés najumekaruta xua pewabinéxatsi Aarón piamonaē tatsi, xua bapongbe petüpaēinbe tómará pepuya beya, xua aishówatha tajü beya pekaponaenexatsibe.

Matáütano Moisés tsipaēba, Aarón tsipáēbatsi yawa pexántobe tatsi tatsipae-batsibe, pongbe xua áwiya kataunxuae popónabe. Bapongbe, ichüing pewüing Eleazar, ichüing pewüing Itamar. Barapóngbetha xua akoibi pongbe tsipáēbatsibe xua pinae barapomonaē jopa po nae tsane Nakom píabo weya tatsi xua poxonaē pewekoyeinexa xua poxoru pebexubixáētsibe Nadab irü Abiú. Tsipéi bárapo akoibi pongbe penasíwatha matawetsikatsíkatatsi, po penasiwa xua tuxuéi xua yábara kaunúnuta xua penakuichiwa tsane Nakom piabotha tatsi xua Nakom nexa. Bara barapomonaē jumekowüntsiya éxana, Moisés jumekowúntatsi.

**Meje yábara po pexaewa xua Nakom jopa yábara kopatsiyo
xua Israel pía pemómoxi susato jiwi tatsi pexaewa**

(Levítico 11)

Nakom Moisés itoróbatsi, irü Aarón itoróbatsi, xua barapongbe pewito yábara petsipaebinéxabe Israel pía pemómoxi susato jíwitha tatsi pokoyene xua barapomonaé bara itakúüpaetsi xua pexaewa bárapo pewito xua jopa itakúüpaetsi xua pexaewa icha duwéi.

Meje daxita bárapo duweixi pewüngxí, xua po duwéi barapomonaé itakúüpaetsi xua pewixaewa, xua íratha pejinompaewa: po duwéi xua petaxukoibokobishaka dubenaewa, xua irü naepanaewa ekeicha kaewa topobasine pekotsoropi pexaewa, po duwéi be vacang, xuano be ovejang, xuano be chivong xuano be oweibin. Barapomonaé jopa yábara kopabichi xua pexaewa icha duweiwí.

Meje bárapo duweimonaé pewüngxí xua barapomonaé jopa yábara kopabichi xua pexaewa: maranang, yawa conejang yawa camellong, tsipéi bárapo duwéi jopa nakuikoyenejúpaeyo po duwéi xua kopiya.

Matáütano barichi barapomonaé jopa yábara kopabichi xua pejayabiwa bárapo duwéi xua poxonaé tüpa. Bárapo duwéi, po duwéi Israel pía pemómoxi susato jiwi tatsi jopa itakúüpaetsi xua pexaewa, wüngdutsiya jeye: “Ápara bárapo duweimonaé kamatsawang”, jei.

Barapomonaé yábara kópabatsi xua pexaewa daxita duwéi xua menepiwang xua xuang jumasirabaxu dubena, xuano xua kuarabaxu dubena, xua yawa tse-boko dubena. Íchitha jopa itakúüpaetsi xua pexaewa icha duwéi xua menepiwang po duwéi jopa jumasirabaxu dubenaeyo xuano xua jopa kuarabaxu dubenaeyo.

Itakúüpaetsi xua pexaewa daxita peyapupunaewang. Íchitha jopa itakúüpaetsi xua pexaewa icha peyapupunaewi xua kamatsawang, po peyapupunaewi peteikaewang icha duwéi xua pexaewa nexa, xuano xua bauri xane. Itakúüpaetsi xua pexaewa suremonaé, íchitha jopa itakúüpaetsi xua pexaewa ichixi poxi be icha xaraxárawa ichi.

Jopa itakúüpaetsi xua pexaewa poxi be jerawaiña, poxi kamatsawang. Barichi jopa itakúüpaetsi xua pexaewa poxi xua íratha najónaka, poxi be wamaintong xua kamatsawang. Icha bárapo kamatsaxi petüpaexi icháuxitha matawé othopeika xua ichüng piyawang tatsi, barapoxonaé baraxoxi taxoba xua xuang ichüng piyawang tatsi.

Barichi ichawang, xua xuang penainwang xua taxoba, xua xuang be korotong, bewa baxuang matha ikikaena poxonaé ichichipa xua ekeicha pekaapaewa bárapo korotong. Matáütano barichi bewa juruwatong wakabobi xua tsórobong xua petaxobixae.

**Meje yábara xua Nakom Moisés yábara tsipáebatsi pokoyene
xua jiwi Nakom jopa tsita jüntükoyene nataxobichi xua
peexanaexae xua wüünae, xuano xua ichikuitha jiwi Nakom
tsita jüntükoyene nataxóbatsi xua peexanaexae xua abe**

(Levítico 12—15; Números 19)

Ichikuitha ichamonaé exaneiba pokoyenein xua daxota barapomonaé najüntükoyenein taxobeiba Nakom peitabaratha tatsi. Pomonaé xua najüntükoyene taxoba

Nakom peitabaratha tatsi, barapomonaewa bewa ponaena tómarapepuya beya xua aishówatha tajü beya pejinompaewa tsane.

Barapomonaewa jopayábara kopatsichi xua ichamonaewa imoxoyo pekakitaponáewatsi. Matáütano barapomonaewa jopayábara kopatsichi xua peponaewa tsane Nakom piabotha tatsi xua chivonamüübotha. Daxita pomonaewa xujayababa, xujayabábatsi pomonaewa najüntükoyene taxoba Nakom peitabaratha tatsi, barapomonaewa irübarichi najüntükoyene taxoba Nakom peitabaratha tatsi.

Poxonaewa ichünga ekeicha kaewa jüntükoyene wüünaewa náexana Nakom peitabaratha tatsi, matha tsiwanaya kopiya bewa nowaena, matha kopiya béwano matana-kaena píapaparuwang. Matáütano ichikuitha bapong bewa kaponanaewa ofrendang matawünga xua Nakom pekatsíwatsi tsainchi. Ichikuitha bapong bewa ewatsina xua sacerdotemonaepin exanaewa icha koyenewang, pokoyene xua bapong pejüntükoyene wüünaewa exanaewa tsainchi.

2

Nakom Moisés tsipáebatsi, xua bapong Moisés petsipaebinexa Israel píapemómoxi susato jíwitha tatsi, pokoyene xua petsiriwa pókotsi ofrendang bewa kaponaena, powa anoxuaetha pexuyo pebinwüüto tanakatsíwatsi. Poxonaewa ichayábüyo pexuyo pebinwüüto tanakatsíwatsi bewa barapowa yábara kanantaxeinaetsi xua barapowa ápara najüntükoyene taxoba Nakom peitabaratha tatsi xua cuarenta po matakabibetha tsane. Pexuyo pebinwüüto bewa withabichi ocho po matakabibetha xua ichaxota nareixakaeka.

Poxonaewa cuarenta po matakábibe yapukaewa barapowa, bara néxata barapowa bewa kaponanaewa sacerdotemonaepintha oveja, xua penünga, xua be ofrenda, xua pókotsi ofrenda ompin pekatsiwa Nakomtha. Matáütano bewa takaponanaewa kotsato, ichikuitha topiboto. Bapoxonaewa barapowa ekeicha kaewa pejüntükoyene wüünaewa tsane Nakom peitabaratha tatsi. Icha barapowa peakopebiwayo xua daxota jopaxeinaeyo oveja penünga, bara barapowa itaküüpatsi xua pekaponanaewa sacerdotemonaepintha aiña kotsátobe, ichikuitha aiña topibótobe.

Icha bárapo petsiriwa tanakatsíwatsi pexuyo xuyábüyo, barapowa bewa ewatsina ochenta po matakábibe xua tsiwanaya xua poxonaewa sacerdotemonaepintha pekaponanaewa tsane duwéi xua be ofrenda xua Nakomtha pekatsiwa tsane xua ekeicha kaewa pena jüntükoyene wüünaewa exanaewa tsane Nakom peitabaratha tatsi.

3

Matáütano Nakom Moisés yábara tsipáebatsi, xuano xua irü Aaron tsipáebatsi pokoyene xua eta bewa bichi poxonaewa ichünga aperüütane. Matáütano Nakom yábara tsipaeba bapongbetha pokoyene xua eta bewa bichi xua poxonaewa peyábara yaputaewa xua poxonaewa icha bichokono aperüütane xuano xua poxonaewa ichikuitha saya tsiwiyo aperüütane.

Icha bichokono aperüütane bara néxata sacerdotemonaepin bewa yábara jei tsane: “Ápara bárapo pebin najüntükoyene taxoba Nakom peitabaratha tatsi”, jei tsane. Pong peaperüütanexaewa bewa ponaena tómarapepuya beya xua aishówatha pepoponaewa tsane, xuano xua ichamonaewa jopaimoxoyo pekakitaponaewa tsane bapongtha.

Íchitha, icha bárapo peaperüütanewa saya bara jume tsane, sacerdotemonaepin bewa perüütaena icha bara metha xaniwaicha perüüjume. Icha xaniwaicha perüüjume, sacerdotemonaepin taexanaena, xua bárapo pebin taexanaeinchi, ofrenda matawüing xua Nakomtha pekatsiwa tsane.

Baxua exanaena tómara pepuya beya xua aishówatha. Pita aiña peyapupunaeinbe. Ichüing koroto tsjuntututha yabexuba, po koroto xua mera xeina. Pong peaperüütanein baxota matawetsikatsíkatatsi pejánatha siete pokuikoyenebetha. Bapoxonae sito ichüing, pong ayasúü, yajautaxuba pejánatha xua korótotha yawa yakopataba xua bara peyapurunaenexa.

Néxata bapong, pong peaperüütanein, bewa matanakaena pía paparuwa. Matáütano bewa nantakatepateya sibaxubina, yawa bewa nowaexubinano.

Bapoxonae poxonae yapukaewa seis po matakábibe xua poxonae éxana bárapo akoibi pokoyénebe, bewa ekeicha exanaena bárapo akoibi pokuikoyenéwabe. Bapoxonae icha matakábitha bewa kaponaena meje barapoxi: ayunbe oveja penüingbe, yawa kae oveja pesowato, ichikuitha kaein oveja penüing, yawa aiña kotsátobe, ichikuitha aiña topibótobe.

Matáütano bewa kaponaena pebeno, xua pexubeno, xua ofrenda matawüing xua Nakomtha pekatsiwa tsane, xua yawa tsiwiyo penasiwa múxuna xuba. Duweimonaein kana éxana xua ofrenda matawüing xua Nakomtha pekatsiwa tsiéxana xua poxonae jintong piakoutha xua abe éxana poxonae jopa jumekowüntsiyo Nakom pía peitorobi koyenewa.

Matáütano icha ofrenda matawüing xua Nakomtha pekatsiwa tsiéxana xua poxonae jintong yaputaeya éxana abe peéxanae koyene.

Matáütano icha ofrenda matawüing xua po ofrenda ompin pekatsiwa poxonae duwéi ompin petautsiwa xua be pematomatsiwa Nakomtha. Tsiéxana xua poxoru jintong éxana abe peéxanae koyene. Bapoxonae sacerdotemonaepin icha koyene éxana xua jintong taéxanatsi pongxae peaperüütanein. Sacerdotemonaepin kaxueba, pong peaperüütaneinxae kaxuébatsi tsiwixitha xua pejanaxitha, po duwein jana xua býatha bexuba xua be pókotsi ofrenda matawüing xua poxonae jintong piakoutha xua abe éxana.

Sacerdotemonaepin jintong muxuyoro opitabü kaxuébatsi, pomuxuyoro opitabü xua pekoxa weya, yawa pekobesimatanaetha, xua pokobesimátanae pekoxa weya, yawa petaxusimatanaetha, xua potaxusimátanae pekoxa weya. Bapoxonae bapong sacerdotemonaepin tsiwiyo penasíwatha wetsikatsíkata altarjuma xua pinwa.

Yawa bapong sacerdotemonaepin tsiwixitha penasiwaxitha jintong kaxuébatsi pekoutha ichaxota býatha pejánangtha kaxuébatsi. Bara bapoxonae pebin ekeicha kaewa jüntükoyene wüünae Nakom peitabaratha tatsi.

4

Poxonae pebin perüüfúrubatsi yawa petsuwe tajujuínatsi, bapong yábara kanantanaxéinatsi xua bara ápara najüntükoyene taxoba Nakom peitabaratha tatsi. Barichi daxita Nakom tsita nataxóbatsi xua uang bapong jayababa, pong peperüüfurubinchi.

Daxita ichamonae, pomonae xua jayababa ichawang xua uang býatha bapong jayababa, barapomonae irü najüntükoyene taxoba Nakom peitabaratha tatsi íchitha saya xua bárapo matakeitha. Barapomonae bewa matanakaena pía

paparuwang, yawa bewa nowaena. Bapoxonae poxonae tabópiya, barapomonae ekeicha kaewa jüntükoyene wüünae naexanaena Nakom peitabaratha tatsi. (Bara báraxua barichi poxoru Israel pía pemómoxi susato jiwi tatsi piákui, xua ba icha matakabi tsuxubi xua poxonae tabópiya tsanaicha).

Poxonae pong peperüüfurubinchi perüüjume tsane, bapoxonae bewa kaponaena sacerdotemonaepintha be ofrenda matawüing aiña kotsátobe, ichikuitha aiña topibótobe. Ichüing, pong peyapupunaein, ápara pókotsi ofrenda matawüing xua poxonae jintong yaputaeya éxana abe peéxanae koyenewang. Ichüing, pong peyapupunaein, ápara pókotsi ofrenda matawüing ompin pekatsiwa poxonae xua duwéi ompin pekatsiwa Nakomtha.

Barapoxonae, poxonae baxua nakuiweta xua bapoxonae ekeicha kaewa bapong pena jüntükoyene wüünae exanaenexa Nakom peitabaratha tatsi.

5

Poxonae pebin yawa yábüyo ba éxana penakentsi koyenewa, bewa bekein bapoxonae nowaebe. Bapongbe bewa yábara kanantanaxeinaetsibe xua ápara najüntükoyene taxóbabe Nakom peitabaratha tatsi xua poxonae beya tabópiya. Barichi yábüxi bewa yábara kanantanaxéinaetsi xua ápara bara najüntükoyene taxoba Nakom peitabaratha tatsi poxonae xua nantawane. Nakom aichaxaibi xua piábo beya petaponáewatsi pomonae xua petsita-najüntükoyene taxobíwatsi.

6

Poxonae ichüing jáyaba pong tüpa, xuano xua ichikuitha barichi icha pona ichaxota boka bárapo petüpaein, bapoxonae bapong najüntükoyene taxoba Nakom peitabaratha tatsi xua beya kae semana yapukaewa.

Icha jintong, pong xua jopa najüntükoyene taxobiyo Nakomtha, bapong bewa tsiwiyo mératha matawetsikatsikatsina po mera xua báyatha yábara kanakuixaxainta bapong nexa, pong najüntükoyene taxoba Nakom peitabaratha tatsi. Baxua bewa exanaena poxonae akoibi po matakábibe yawa xua poxonae siete po matakábibe. Bárapo mera múxuna xuba ipuna xua vaca, pong petsóbiyang ipuna, pong xua báyatha ompin tauta daxita.

Bapong, pong xua najüntükoyene taxoba Nakom peitabaratha tatsi, poxonae siete po matakábibe tsuxubi bewa nowaena, yawa bewa matanakaena pía paparua. Poxonae tabópiya tsanaicha xua poxonae icha matakabi tsuxubi, bapoxonae bapong ekeicha kaewa najüntükoyene wüünae éxana Nakom peitabaratha tatsi.

**Meje yábara poxonae Nakom Moisés kátatsi icha peitorobi koyenewang
xua Nakom ichichipa, xua po peitorobi koyenewang Israel pía
pemómoxi susato jiwi tatsi pejumekowüntsiya exanaewa tsane**

(Levítico 18—20)

Nakom kata aiña peitorobi koyenein, Moisés kátatsi xua Nakom ichichipa xua Israel pía pemómoxi susato jiwi tatsi pejumekowüntsiya exanaewa tsane. Nakom paeba jeye:

—Paxam Israel pía pemómoxi susato jiwi tatsi pam, icha pana nejumekowüntsiya exanáename bárapo tapaka itorobi koyenéwatsi, bapoxonae ataya tsane paka barü poponaeinchi.

”Kae koyene xua tapaka itorobi koyenéwatsi, xua paxam jopa bewa pakenta exanaem pomonae xua barompaya paiñamonae matabüxü. Icha koyene xua tapaka itorobi koyenéwatsi pebin jopa bewa kenta exanáe icha pebintha, xuano xua irü yábüyo jopa bewa kenta exanáe icha yabüyotha. Barichi matáütano itoróbano xua jiwi pinae jopa bewa kenta exanáe duweintha. Barichino itoróbano xua pebin jopa bewa kentsí yábüyo xua poxonae kataunxuae nantawane.

”Daxita bárapo koyenein éxana pomonae Canaán nákuatha jinompa, pokoyenein bichokono abe. Daxota bárapo ira tha pitichi barapomonae weya xua tha paka katsinéxatsi bárapo ira. Maisha ichichipang xua paiña nejumekowüntsiya exanaewa tsane daxita bárapo tapaka itorobi koyenewangtsi, xua írürü daxota jopa abe tapaka exanáewatsi tsainchi, jei Nakom.

2

Nakom ekeicha tsipaeba Israel pía pemómoxi susato jíwitha tatsi jeye:

—Pajüntükoyene wüünaeya jinómpare xua jopa paiña nexainaewa tsane paiña nejäüntükoyeneintha xua peabe koyene. Matáütano ichamonae jopa kuijüpaeya paexanaeinde. Ichichipang xua paiña nejumekowüntsiya exanaewa daxita xua tapaka itorobi koyenewangtsi, tsipéi xang pongxaein tajüntükoyene wüünaein xua jopa taxeinaewa tajüntükoyenetha xua peabe koyene.

”Yábara jüntanaina paka éxanatsi xua paiña axa jiwi pabarükui-iturajínare. Panafinakáeware pentakeiseikáe matakábitha. Jopa paexanaeinde nakomüng, po nakomüng xua jopa xaiñeyo.

”Barichino jopa pakaibinde, xuano xua jopa pamuxu-itorobéibinde ichamonae. Barichino matáüta jopa tawüngtha pana nayábara tsiwüünae muxudutsinde xua jopa paiña neexanaewa tsane pokotsiwa xua bekein báyatha paexanapáebame.

”Pantomakéibare pomonae xua pákata nakuita daxita matakabi tsaibi xua poxonae weteiba. Beta pata éxande pomonaetha, pomonae pemuxusipanáe jiwi, pomonaethano, pomonae péitata kirei jiwi, pomonaethano, pomonae peakopeibí jiwi, pomonaethano, pomonae be dobiwi koyeneya jinompa xua icha nakua wérena peponaewi.

”Jopa paita aenáenande paiñamonae. Matáütano jopa paexanaeinde xua penayantomokaewa. Matáütano ichamonae xaniwaichiya pata éxande ichi pókotsi koyeneya paiñakoutha pana nata ichim.

”Jopa paponaeinde xua paiña tana neyábara yaputaetsi pomonaetha, pomonae xua yábara wüünae yaputaeya kueikueije tsaibi pokotsiwa xua bexa tsane. Barichi jopa paponaeinde pomonaetha, pomonae petsipaebiwi dowátsitha xua paiñamonae perowatsin.

”Papesábare beta pokotsíwatha xua poxonae papesábame. Yawa pakanáübare beta pokotsíwatha xua poxonae pakanáübame. Jüpa paexande xua poxonae bekein pakaenátame xuano xua poxonae bekein pakómokame.

”Barichi pabexore pong pexanto bexuba xua poxonae Nakom tsibexotsi xua poxonae be ofrenda matawüng éxana, po Nakom jopa xaiñeyo. Yábara jüntanaina paka éxanatsi xua bewa jumekowüntsiya paiña neexanaewa tsane daxita xua tapaka itorobi koyenewangtsi, xua kataunxuae paiña nejinompaenexa Canaán nákuatha.

**Meje yábara poxonae Nakom Moisés yábara tsipáebatsi pókotsi
fiestang matawüing bewa exanaena Israel pía pemómoxi susato
jiwi tatsi, xua pókotsi fiestang matawüing Nakom peyábara
barükui-iturajinaexaetsi**

(Levítico 16.23; Números 28.16—29.40)

Nakom, Moisés tsipáebatsi xua bapong Moisés yábara jüntanainiya kanan-taxeinaeya exanaena Israel pía pemómoxi susato jíwitha tatsi pokoyene xua barapomonaе penafifinakaewatsinexa po matakеitha xua pentakeiseikáе mata-kabi, po matakabi xua opidukua kae semánatha, xua bara peichaponaenexa daxita semánangtha. Barapomonaе daxita koyenein xua penakuichiwang bewa exanaena icha matakábintha xua seis po matakábibe. Matáütano barapomonaе bewa nakaetsina pentakeiseikáе matakábitha xua Nakom wüü-nae pejainchinéxatsi xua ichaxota pebóupatha xua Nakom piabotha tatsi xua chivonamüübotha.

Po fiesta matakabi xua po fiesta kopiya dukua xua daxita weitha pewüing Pascua fiesta matakabi. Bárapo Pascua fiesta matakabi Israel pía pemómoxi susato jiwi tatsi exaneiba po matakabi xua catorce xua po xometo kopiya dukua xua daxita weitha. Barapomonaе Israel pía pemómoxi susato jiwi tatsi exaneiba bárapo Pascua fiesta matakabi xua pekayábara jüntanainaenexa pokoyene xua poxonaе Nakom kapanepa, xua barapomonaе kapanenebíyatsi Egipto nakua weya.

Bapoxonaе, xua poxonaе ekeicha po matakabin xua quince xua beya veintiuno, po matakábibe xua áwiya bárapo xométotha, barapomonaе bárapo matakábintha éxana ichawa xua poxonaе po fiesta matakabin wüing jeye: “Po matakabin xua jiwi xane pan, po pan xua jopa kotowiyo, xua jopa pemuxuna xubixae levadurabeno”, jei bárapo fiesta matawüing.

Bárapo fiesta matakabin, ápara xeina penafifinakáewatsi matakabin. Po fiesta matakábibe xua poxonaе jiwi nafifinakáewata, yapu óthopa po matakabi xua quince matakabi yawa po matakabi xua veintiuno matakabi.

Matáütano barapomonaе nafifinakáewata po matakábitha xua pentakeiseikáе matakábitha bárapo semánatha. Barichi pan xaiba, po pan jopa múxuna pentsiyo levadurabeno penafifinakáewatsi matakábintha tsaibi. Daxita matakábintha xua bárapo semánatha jiwi xaiba pan, po pan jopa múxuna pentsiyo levadurabeno.

Bárapo matakábintha Israel pía pemómoxi susato jiwi tatsi bewa jutebina aiña duweimonaеin xua be ofrendang matawüing xua Nakomtha pekatsiwanexa. Barapomonaе daxita matakabi bewa jutebeibina ayunbe vaca pebtíyobe peweiñobe xua kataunxuae jopa kae wei xeinaeyo. Yawa daxita matakabi bewa jutebeibina kaein oveja pong piño, yawa siete póyobe tsaibi ovejang penawang xua kae wei yapu óthopa.

Baxua éxana xua be ofrenda matawüing, po ofrenda xua duwéi ompiwa peka-tsiwa Nakomtha. Daxita barompaya tsíniya xua duwéi yawa bewa múxuna katsina pexubenong xua be ofrenda matawüing xua Nakomtha pekatsiwa. Barichi daxita matakabi bewa jutebeibina chivo xua be ofrenda matawüing xua Nakom peka-tsiwa, po ofrenda xua poxonaе jiwi abe peexanaexae.

2

Bárapo semánatha xua poxonae jiwi pan xane xua po pan jopa múxuna pen-tsiyo levadurabeno, icha fiesta matakabin kana éxana, xua po fiesta matakabin wüing jeye: “Pexaewa penawetsiwa fiesta matakabin wüing, po pexaewa xua poxonae kopiya naweta”, jei bárapo fiesta matakabin wüing. Poxonae yapukaewa pentakeiseikáe matakabi xua penafinakáewatsi matakabi, bárapo semánatha bapoxonae icha matakábitha jiwi bewa kaponaena sacerdotemonaepintha pexu-mápato, po pexaewa xua poxonae kopiya jiwi jota bárapo weitha. Báraxua jiwi bewa exanáe xua be ofrenda matawüing, po ofrenda xua be Nakom amanaya pekatsíwatsi.

Barichino jiwi bewa kaponaena oveja, pong penüing, xua be ofrenda matawüing, po ofrenda ompiwa Nakom pekatsíwatsi. Yáwano jiwi bewa kaponaena pexu-beno xua be ofrenda matawüing xua Nakom pekatsíwatsi. Matáütano bewa vino meráyono katsina. Barapomonae jopa bewa xae pexaewa pexu, po pexaewa xua poxonae kopiya jota, xuano xua jopa bewa exanáe pan, po pan xua éxana bárapo pexubenong weya.

Saya barapomonae bara xaena bárapo pexaewa icha matha kana éxana bárapo pexaewa be ofrenda matawüing xua Nakom pekatsíwatsi. (Barapomonae bárapo ofrenda matawüing jopa katsiyo Nakomtha xua poxonae kataunxuae jinompa ira-saina xuépana tsúrukuae nákuatha tsipéi barapomonae kataunxuae jopa xeinaeyo pabin. Íchitha Nakom baxua yábara tsipaeba Israel pía pemómoxi susato jíwitha tatsi, ápara xua barapomonae bexa peexanaewa tsane poxonae patsina Canaán nákuatha.)

3

Kotakaya xua poxonae yapukaewa cincuenta po matakábibe, po cincuenta matakábibe xua poxonae ununapondena xua ichaxota po fiesta matakabin wüing xua jeye: “Pexaewa penawetsiwa fiesta matakabi wüing, po pexaewa xua poxonae kopiya naweta”, xua jei, barapoxonae bárapo cincuenta po matakábitha éxana ichawa, icha fiesta matakabi wüing xua jei: “Pentecostés matakabi wüing”, jei xua bárapo fiesta matakabi wüing.

Bárapo matakábitha xua poxonae Pentecostés fiesta matakabi wüing éxana, barapomonae, Israel pía pemómoxi susato jiwi tatsi, bewa kaponaena xua be ofrenda matawüing, po ofrenda Nakom amanaya pekatsíwatsi xua po pexaewa jíwana xua barapomonae jota bárapo weitha.

Barichi matáütano bewa barapomonae jutebina meje xua pókotsi duweimonaenje: siete póyobe ovejang xua poxi kae wei xeina, yawa vaca pebto, yawa ayunbe ovéjabe xua píñobe. Daxita bárapo duweimonaein bewa kaponaena xua be ofrendang matawüing, po ofrendang xua Nakom ompiwang pekatsíwatsi.

Matáütano bewa bexubina chivo xua be ofrenda matawüing xua Nakom pekatsíwatsi, po ofrenda xua poxonae jiwi abe peexanaexae. Matáütano bewa bexubina ayunbe ovejýobe póyobe xua kae wei yapujópabe xua be ofrenda matawüing xua Nakom pekatsíwatsi, po ofrenda xua petsabiwa. Bárapo matakabi xua Pentecostés matakabi ápara pentakeiseikáe matakabi xua penafinakáewatsi matakabi, po matakabi xua opikarukua kae semánatha.

Barichi Nakom tsipaeba Israel pía pemómoxi susato jíwitha tatsi pokoyene xua barapomonae poxonae icha jota pokotsiwa tanawétatsi jopa bewa daxita notsi tsane. Yáwano jopa bewa barapomonae pichi tsane pokotsiwa xua barapomonae tajopéikatsi íratha. Barapomonae bewa ichawa saya tae pábitha pokotsiwa xua barapomonae tanawétatsi, xua ichamonae penotsinexa, pomonae xua bichokono peakopeibiwi.

4

Po mataketha xua poxonae kopiya, xua poxonae po xometo siete xometobetha, bárapo matakábitha ekeicha éxana icha fiesta matakabi wüing. Bárapo fiesta matakabi wüing jiwi wüingduta jeye: “Trompetang peobiwang pía fiesta”, yábara jei. Bárapo matakabi barichi xua ekeicha icha matakabi, po matakabi pentakeiseikáe matakabi xua penafinakáewatsi matakabi. Bárapo matakábitha daxita bewa nakaetutsina ichaxota Nakom píabo tatsi unguwa, xuano xua pejutebiwa tsáneno duwéi xua be ofrendang matawüing xua Nakom pekatsíwatsi.

Barapomonae bewa jutebina meje bárapo duweimonaeinje: vaca pebto, pong kataunxuae jopa xeinaeyo kae wei, yawa kaein oveja, pong piño, yawa siete póyobe ovejang xua xuang kae wei yapu óthopa. Daxita bárapo duweimonaein bewa kaponaeina xua be ofrendang matawüing, po ofrendang xua ompiwang xua Nakom pekatsíwatsi. Matáütano daxita bárapo duweimonaein xua barompaya kaein tsíniya kantaüta tsíniya pexubeno. Barichi matáütano bewa bexubina chivo xua be ofrenda matawüing, po ofrenda xua tsiéxana, xua jiwi abe peexanaexae.

5

Po mataketha xua poxonae diez matakabi, xua poxonae po xometo siete xometobetha, bárapo matakábitha ekeicha éxana icha fiesta matakabi wüing. Bárapo fiesta matakabi wüing jiwi wüingduta jeye: “Ekeicha kaewa beta peexanaewa peyábara anthüthüdéwexae xua kopiya abe peexanaexae”, yábara jei.

Bárapo fiesta matakabi bichokono pepa peañakuí matakabi, tsipéi bárapo matakábitha Israel pía pemómoxi susato jiwi tatsi bewa yábara tsipaebina Nakomtha pokoyene barapomonae ekeicha kaewa beta peexanaewa peyábara anthüthüdéwexae xua kopiya abe peexanaexae bárapo weitha. Barapomonae wüüka Nakomtha xua Nakom baxua peyábara jüntemainaewa tsane, xua barapomonae baxua peyábara jüntemainaewa tsainchi. Bárapo matakabi barichi pentakeiseikáe matakabi xua penafinakaewatsiwa, xua po matakabi xua opidukua xua kae semánatha.

Bárapo matakábitha sacerdotemonae icha koyenewang éxana, xua jiwi tae-xainchi, Nakom piabotha tatsi. Bárapo sacerdotemonae tawüüka, jiwi tawüükatsi Nakomtha, xua Nakom peyábara jüntemainaenexa abe peéxanae koyenewang xua báyatha Israel pía pemómoxi susato jiwi tatsi éxana bárapo weitha.

Bárapo matakabi ápara meisha po matakabi daxita weithang tsaibi xua poxonae ichüing itaküüpatsi xua peponaewa ichaxota caja boka, po caja xua Nakom pía caja tatsi. Bárapo caja boka paparuwa pepuya jumawétsina xua po paparuwa peyakaincha epataütadurenaewa xua Nakom piabotha tatsi. Baraxota caja jumamatatsuntha Nakom naitüüteiba tsakinaebówatha.

Saya meisha bárapo mataketha pong sacerdotemonae pía pentakaponaein tatsi joniya bárapo tütutha. Íchitha bapong matha bewa xaniwaichiya exanaena daxita

be pókotsi koyeneya báyatha Nakom itoroba xua pokotsiwa bewa exanaena. Icha baxua jopa exanaeyo pókotsi koyeneya xua báyatha Nakom itoroba, bapong, pong sacerdotemonae pía pentakaponaeinxae tatsi, tüpáetsipa.

Bárapo matakábitha xua poxonae pejoniyaewa bapong, pong sacerdotemonae pía pentakaponaein tatsi, bewa matha nowaexubina xuano xua pexeiña paparuwa bewa namaxatatsina po paparuwa müü wüünae. Bewa bapong kaponaena po duweimonaeinje: vaca pebto, pong kataunxuae jopa kae wei yapujopaeyo, xua be ofrenda matawüing, po ofrenda xua tsiéxana xua abe peexanaexae.

Matáütano bewa kaponaena oveja xua penüing xua be ofrenda matawüing xua ompiwa pekatsiwa Nakomtha, po ofrenda xua pong sacerdotemonae pía pentakaponaein tatsi nata éxana, xuano irü nexa ichamona, pomona sacerdotemonae. Barichino bewa kaponaena ayunbe chívobe xua be ofrenda matawüing, po ofrenda xua tsiéxana xua poxonae abe peexanaexae.

Matáüta bewa kaponaena kaein oveja xua penüing xua be ofrenda matawüing, po ofrenda xua Nakom ompiwa pekatsíwatsi xua tsiéxana xua daxita Israel pía pemómoxi susato jiwi tatsi abe peexanaexae.

Barapoxonae barapomonae icha koyeneya bewa exanaena xua ibótixi bebái xua bapoxonae barapongbe chívobe kaein pejíwana itapetsinéxatsi, xua bárapo chivo pebexubinéxatsi xua be ofrenda matawüing, po ofrenda xua tsiéxana xua jiwi abe peexanaexae. (Ichüing chivo saya kopatábatsi xua penaetsirikuaenexa irasaina xuépana tsúrukuae nakua beya.)

Poxonae sacerdotemonae pía pentakaponaein tatsi imoxoyo joniya ichaxota Nakom pía caja tatsi boka, bewa kaponaena xua xuangje: penain korótiyo xuano xua múxuna kápona pejuntutha peitereto xua yonoyonéi. Barichi korotíyotha kápona aiña kobéthabe xua incienso nain xua túxusi wüünae xua petaxueyekaponaewa tsane peitereto xua poxonae bapong joniya. Bapoxonae bapong vaca pebto jánatha matawetsikatsíkata xua peyantaxatatsiwa caja.

Bapoxonae ekeicha kaibe joniya pesato beya yawa bexuba chivo xua be ofrenda matawüing, po ofrenda xua tsiéxana xua jiwi abe peexanaexae. Ekeicha bapong kaibe joniya ichaxota báyatha kopiya joniya yawa kaya incienso nain xua túxusi wüünae, yawa chivo jánatha matawetsikatsíkata xua peyantaxatatsiwa caja. Bari-chi bapong bewa bárapo duwéi jánangtha matawetsikatsikatsina icha tutu xua Nakom píabo, xua chivonámüübo, xuano xua bewa matawetsikatsikatsina altar matawüing xua pinwa, po altar pánatha unguwa.

Barapoxonae bapong bewa chivo matasípatha nakobe yüütabotsina aiña kóbebe xua pong asüü. Barapoxonae bapong bewa jumedangweya yábara kaununutsiya paebina abe peéxanae koyene xua báyatha Israel pía pemómoxi susato jiwi tatsi éxana bárapo weitha.

Barapoxonae ichüing pita bárapo chivo xua pekaponanexa ichaxota irasaina xuépana tsúrukuae nakua beya, yawa baxota pekopatabinéxano. Baxua éxana xua yábara kaunúnuta xua ápara bárapo abe peéxanae koyenein chivo kápona tajü beya, po peabe koyenein báyatha Israel pía pemómoxi susato jiwi tatsi éxana bárapo weitha.

Bapoxonae, poxonae baxua weta, sacerdotemonae pía pentakaponaein tatsi najumaxuenaxuba bárapo paparuwa, po paparuwa xua pexeiñawa. Ekeicha icha paparuwa namaxátata, po paparuwa báyatha namaxátata poxonae nakuiteiba Nakom nexa xua Nakom piabotha tatsi.

Bara néxata bapong pana bejoniya, yawa bara nakobeweta xua éxana ofrendang matawüing xua Nakom pekatsíwatsi. Bewa duwéi ompiwang tautsina ichaxota altar matawüing xua pinwa xua be ofrendang matawüing, po ofrendang xua Nakom ompiwang pekatsíwatsi. Matáütano bewa tautsina duwéi penasiwa xua be ofrenda matawüing, xua po ofrendang jíwana xua tsiéxana xua jiwi abe peexanaexae.

Bapoxonae ichüing bewa tautsina duwéi tómara pepuya beya xua aishówatha pokotsiwa xua nakópaba, po duwéi xua poxonae be ofrendang matawüing éxana, xua po ofrendang xua tsiéxana xua jiwi abe peexanaexae. Bárapo matakábitha, barichi Israel pía pemómoxi susato jiwi tatsi bewa kaein vaca pebto bexubina, pong kataunxuae jopa kae wei yapujopaeyo. Yawa barapomonae bewa bexubina kaein oveja pong piño. Yawa bewa jutebina ovejasi siete póyobe xua poxi kae wei yapu óthopa.

Daxita bárapo duweimonaein bewa jutebina xua be ofrendang matawüing, po ofrendang xua Nakom ompiwang pekatsíwatsi. Daxita bárapo duweimonaein barompaya yawa kantaüta pexubeno xua be ofrenda. Barichi bewa bexubina chivo xua ofrenda matawüing, po ofrenda xua Nakom pekatsíwatsi xua tsiéxana xua jiwi abe peexanaexae.

6

Po matakábitha xua quince xua áwiya bárapo xométotha xua siete xometobetha, bárapo matakábitha ekeicha tamrópata pítaba icha fiesta matakabi wüing. Bárapo fiesta matakabi wüing jiwi wüingduta jeye: “Jiwi boutong peakabiwang fiesta matakabi”, yábara jei. Bárapo fiesta matakabin kae semana yapukaewa.

Po matakabi kopiya dukua, xuano xua po matakabi “ocho”, jei, bárapo matakábibe ápara pentakeiseikáe matakábibe xua penafinakáewatsi matakabi. Bárapo matakabibetha Israel pía pemómoxi susato jiwi tatsi bewa nakaetutsina Nakom piabotha tatsi.

Poxonae tamrópata pítaba bárapo fiesta matakabi jiwi bewa boutong akabina, yawa xua bewa jinompaena bárapo boutoxitha bárapo semánatha. Baxua barapomonae éxana xua baxua barapomonae peyawenaenéxatsi xua yábara jüntanaina pekana exanaewa tsainchi pokoyene xua poxonae jinompa xua poxonae Egipto nakua wérena pona, xua poxonae Canaán ira beya wárapa.

Bárapo fiéstatha bichokono jiwi jüntübükoyene weiweina, tsipéi bárapo matakábintha jiwi yábara tsipaeba Nakomtha, pokoyene jüntükoyene weiweina xua poxoru xeina pexaewang xua naweta, xuano xua yábara jüntükoyene weiweina xua Nakom peyawenaexae, xua barapomonae peyawenaexaetsi. Bárapo matakábintha barichi Israel pía pemómoxi susato jiwi tatsi bewa kaponae xua be ofrenda matawüing, po ofrenda xua Nakom ompiwang pekatsíwatsi. Matáüta icha ofrenda matawüing bewa kaponae, po ofrenda xua tsiéxana xua jiwi abe peexanaexae.

**Meje yábara xua poxonae pebin abe yábara paeba,
Nakom abe yábara páebatsi, xua daxota bárapo pebin bexotsi**

(Levítico 24.10-23)

Kaentakábitha pebin, pong xua paxa tatsi Egipto nakuapin xuano xua seikaya pena tatsi Israel pía pemómoxi jiwi tatsi jíwana, bapong ba xua icha pebin betsi,

yawa bapong abe yábara paeba, Nakom abe yábara páebatsi. Néxata Nakom, Moisés tsipáebatsi, jeichichi:

—Bárapo pebin kaponde tómara pepuya beya, aishówatha tajü beya. Yáwano múxuna kapondeno po pebiwi xua jumetánerü poxonae xua bapong paeba. Daxita pomonae jumetane pokotsiwa bapong paeba, bewa barapomonae nakobeyüütumenaena bapong pentasípatha tatsi. Barapoxonae barapomonae bewa kuinbabina, bapong kuinbabinchi ibówangtha xua beya tüpa peexanaewa tsainchi. Báraxua bewa paexanáename daxita pomonaetha, pomonae xua abe tana neyábara paebebiwi, jei Nakom.

Bara baxua barapomonae éxana xua Nakom peitorobixae.

Meje yábara poxonae Nakom Moisés yábara kátatsi peitorobi koyenewang xua ira xuano xua bong

(Levítico 25)

Nakom Moisés itoróbatsi xua bapong Moisés petsipaebinexa Israel pía pemómoxi susato jíwitha tatsi xua barapomonae bewa bara kana ichi tsane pía irang xua itompa exanaena bárapo weitha ichi barapomonae nata ichi xua nata éxana pentakeiseikáe matakabi xua nafifinakáewata.

Beya poxonae seis po weibe yapukaewa barapomonae itakúüpatsi xua üba bárapo pía írangtha. Barapoxonae icha wei jopa xua “siete”, jei, barapomonae bárapo weitha bewa irang itompa exanaena xua pía irang tatsi. Bárapo weitha barapomonae jopa kopatsichi xua peübiwa pábitha, yawa jopa kopatsichi xua peyabakaxuetsiwa, yáwano jopa kopatsichi xua pemaxüranaein peukubobiwa, yáwano jopa kopatsichi xua pejotsiwa xua naweta.

Pomonae peakopebiwi irü dobiwi, xua icha nakua wérena peponaewi, bárapo weitha barapomonae itakúüpatsi xua pona tuíratha, xua penotsinexa xua xuang pípato xuwa tuíratha. Barichi duweimonaein itakúüpatsi xua pexaewa xua xuang xuwa tuíratha. Pong ira pexeinaein, bapong irü itakúüpatsi xua nota xua xuang pokotsiwa xuwa baraxota, íchitha bewa xaena xua jopa bewa jebeibí tsane.

2

Daxita weitha xua poxonae cincuenta po weibetha tsaibi, báraxua xua yábara kaunúnuta xua poxonae yapukáewaba xua poxonae yábara aiñakuí éxana penafifinakáewatsi wei xua siete pokuikoyenéwabe kápona, barapoxonae bewa exanáe icha wei xua peaiñakuí wei xua penafifinakáewatsi wei. Bárapo penafifinakáewatsi wei jiwi wüingduta jeye: “Penafifinakáewatsi jubileo wei matawüing”, yábara jei.

Tsipéi bárapo weitha, barapomonae, Israel pía pemómoxi susato jiwi tatsi jopa kopatsichi xua peübiwa íratha. Barichi icha peitorobi koyenein xeina, po peitorobi koyenein barapomonae bewa meisha jumekowüntsiya exanaena bárapo weitha. Bárapo weitha ira, po ira xua báyatha Israel nakuapin nomataxuba ichüingtha xua irü Israel nakuapin, bárapo ira ekeicha kaewa katsina icha matabüxüyotha xua piamatabüxüyo tatsi pong xua penomatsixae bárapo ira.

Daxota Israel pía pemómoxi susato jiwi tatsi pekoutha xeina ira, po irang xua báyatha pamo jiwi tatsi xeina, po irang poxonae Moisés tsaba Canaán ira xua pomonae doce po bicheito matabüxübe nexa. Bárapo peitorobi koyenewa bewa kana exanaena ira yábara, yawa bong yábara, po bong xua tsika tomaraxitha

xeina, xua po bong jopa umenaeyo pepa tómarangtha, xua po bong umena ichaxota po pepa tómarang nantíyabe yaputoxórota.

Icha peitorobi koyene po peitorobi koyene xua Israel pía pemómoxi susato jiwi tatsi bewa yábara meisha jumekowüntsiya exanaena poxonae po wei xua penaffinakáewatsi jubileo wei matawüing. Barapomonaewu bewa pukopabina pomonaewu xua Israel pía pemómoxi susato jiwi tatsirü, pomonaewu xua báyatha piakoutha pomonaewu be pebusikuitaetaeyebéwíwichi naexaneiba peakopeibixae.

**Meje yábara poxonae xua Nakom Moisés yábara yaputane
exainchi pokuikoyeneya Israel pía pemómoxi susato jiwi tatsi
exanaena xua poxonae exaneiba xua be ofrenda matawüing
xua Nakom amanya pekatsibeibiwa tsainchi**

(Levítico 27)

Poxonae ichüing ichichipa xua ichawa yábara najüntükui wüünaeta Nakomtha xua bepa pinaewu bara peexanaewa tsane, bara nakana éxana piakoya xua Nakom piyawa petaxanaewa xua be ofrenda matawüing xua saya piakoya peichichipaexae.

Ichikuitha bara bapong kápona duweimonaewu xua be ofrendang matawüing. Ichikuitha bapong bara kata bo xua be ofrenda matawüing. Ichikuitha bapong bara kata ira xua be ofrenda matawüing. Íchitha icha jintong ichawa yábara nantana-xeina xua jopa exanáewu tsane xua nakana éxana piakoya xua Nakom piyawa petaxanaewa xua be ofrenda matawüing, sacerdotemonaewu bewa katinchi cincuenta po pekakomokáewu paratiximonaewu.

Icha yábüyo, sacerdotemonaewu bewa katinchi treinta po pekakomokáewu paratiximonaewu. Icha pexuyo xua pebinwüüto, ichikuitha pewowin, sacerdotemonaewu bewa katinchi 5 po pekakomokáewu paratiximonaewu. Icha pexuyo xua yábüyo, sacerdotemonaewu bewa katinchi 3 po pekakomokáewu paratiximonaewu.

Icha pebin kápona duwein, po duwein xua duwein jíwana xua báyatha Nakom itoroba xua be ofrenda nexa, bapong bewa bexubina bárapo duwein yawa kata bárapo duwein Nakomtha. Íchitha, icha icha duwein bapong kápona, po duwein xua Nakom jopa itorobiyo, bapong bewa kaenaetaxubina bárapo duwein. Barapoxonae bewa katsina bárapo pekakomokáewu parátixi sacerdotemonaetha xua bárapo duwein matoma.

Íchitha icha bapong jopa ichipaeyo xua katsina pía duwein, bapong itakúüpati xua katsina pekakomokáewu parátixi sacerdotemonaetha xua be bárapo duwein matoma. Matáütano bewa ekeicha tsiwiyo matoropeicha katsina xua be po pentoma báyatha nantómata bárapo duwein. Bapoxonae bárapo duwein bara abü xeinaena.

Íchitha icha kata bo xua be ofrenda matawüing éxana saya kaenaetsina xua barapoxonae bárapo matoma katsina sacerdotemonaetha. Íchitha icha aichaxaibi xua kaenaeta píabo, itakúüpati xua saya pekakomokáewu parátixi katsina sacerdotemonaetha xua be bárapo bo nantómata. Matáütano bewa ekeicha tsiwiyo matoropeicha katsina xua be po pentoma báyatha nantómata bárapo bo, xua barapoxonae bárapo bo bara abü xeinaena.

Icha bapong, pía pabi jíwana be ofrenda matawüing kana éxana xua Nakom nexa, bara néxata sacerdotemonaewu saya yábara júta matoma wüükaena bárapo

pabi, xua bárapo pebin wüükaeinchi xua be pokoyeneya ira seikanaya, xua peübiwa tsane, xua penawetsiwa tsane pewünaeyo xua poxonae penafifinakáewatsi jubileo wei matawüng.

Bara néxata bapong kopatano xua bara sacerdotemonae kanakuita exanaena bárapo pabi. Íchitha icha aichaxaibi xua kaenaeta pía pabi, itaküüpatsi saya peka-komokáe parátixi katsina sacerdotemonaetha xua be bárapo pabi matoma, yáwano ekeicha tsiwiyo mataropeicha katsina xua be po pentoma nantómata bárapo pabi. Barapoxonae bárapo pabi bara abü xeinaena.

Icha sacerdotemonae bárapo pabi kanakuita éxana bapoxonae bárapo ira ekeicha pía ira tsane, pong xua kopiya xeina bárapo ira poxonae xua penafifinakáewatsi jubileo wei matawüng jopaena.

2

Ichawang jopa bewa exanáe xua be ofrenda matawüng tsipéi báyatha báruang Nakom piyawang tatsi. Pokotsiwang xua báyatha Nakom piyawang tatsi ápara xua duweimonaein, xua po duweimonaein kopiya naexanapona. Barichino xua kaewa jíwana xua diez xuangbe jíwana xua naweta xua jiwi kopiya jota, barchino xua kaein jíwana xua diez póxibe jíwana xua duweimonaein.

Barichi icha koyene xeina, pokoyene xua pong bichokono abe peexanaein, xuano xua irü pókotsin icha nakuapin, pong pawáetabame poxonae naba paéxaname xua pókotsi jiwi Nakom báyatha yábara paebe xua bewa barapókotsi jiwi pinae jutebinchi, barapókotsi jiwi jopa peyábara itaküüpáewatsi xua saya pepukopababíwatsi.

Matáütano jopa itaküüpaetsi xua paratixitha penapumatomakaewa xua pepukopababiwa tsainchi. Barichino barapomonae jopa yábara itaküüpaetsi xua duwéi petajutebiwa tsainchi xua barapomonae jopa pejutebiwa tsainchi xua be pentoma xua abe peexanaexae.

Meje yábara poxonae Nakom Moisés itoróbatsi xua daxita pewüngtinaewa, xuano xua daxita barompaya bicheitong xua Israel pía pemómoxi susato jiwi tatsi petatsenebinéxatsi irang xua penobinexa bomüxüxi xua chivonámüübondong

(Números 1—2)

Poxonae kae wei yapukaewa xua poxonae Israel pía pemómoxi susato jiwi tatsi báyatha pona Egipto nakua weya, bapoxonae Nakom Moisés itoróbatsi xua bapong Moisés irü Aarón daxita pewüngtinaewa tsánebe Israel pía pemómoxi susato jiwi tatsi xua doce po bicheito matabüxübe. Barichi, pebin yábara wüngdútatsi xua daxita barompaya bicheitong jíwana xua doce po bicheito matabüxübe pókotsi jiwi xua bichokono aiñakuí xua Moisés pewéichobe peyawenaenexa tsáinchibe bárapo penakuichiwa.

Bara néxata ununa daxita pebiwi po pebiwi xua saya meisha xeina beyakaincha xua veinte po weibe. Meje xua pebiwi unúnatsi bárapo bicheitongje xua doce po bicheito matabüxübe: Rubén pía bicheito matabüxü, irü Simeón pía bicheito matabüxü, irü Judá pía bicheito matabüxü, irü Isacar pía bicheito matabüxü, irü Zabulón pía bicheito matabüxü, irü Efraín pía bicheito matabüxü, irü Manasés pía bicheito matabüxü, irü Benjamín pía bicheito matabüxü, irü Dan pía bicheito

matabüxü, irü Aser pía bicheito matabüxü, irü Gad pía bicheito matabüxü, irü Neftalí pía bicheito matabüxü.

Íchitha Leví pía bicheito matabüxü tatsi jopa ununaeyo. Bara daxita xua bárapo bicheito matabüxü, xua unúnatsi seiscientos tres mil quinientos cincuenta po bicheito matabüxübe xua saya pebiwi (603,550).

2

Nakom, Moisés tsipáebatsi pokoyene xua pinae Israel pía pemómoxi susato jiwi tatsi bewa piabong daxita matawakeicha exanaena Nakom píabo, xua chivonámüübong. Petauchipa xua ichaxota peboupa weruya, xua Nakom píabo, bárapo tauchipa bewa ichaxota pokotsiwa xometo wekounebina, bewa bara betauchipa taenorekaena. Bárapo muxunene wétsina bewa boxi exanaena, meje pomonae: Judá pía bicheito matabüxü, irü Isacar pía bicheito matabüxü, irü Zabulón pía bicheito matabüxü. Barapomonae kopiya nantakawarapeiba xua poxonae daxita Israel pía pemómoxi susato jiwi tatsi jónakapenteiba piabomüxüxi xua poxonae warapeiba icháwatha.

Pemüxübürü xua Nakom píabo, bárapo müxübürü bewa ichaxota pokotsiwa párowa wétsina, bewa bara be müxübürü taenorekaena ichaxota xua “sur”, jei. Bara wétsina bewa boxi exanaena meje pomonae: Rubén pía bicheito matabüxü, irü Simeón pía bicheito matabüxü, irü Gad pía bicheito matabüxü. Barapomonae kotakaya warapeiba xua poxonae daxita Israel pía pemómoxi susato jiwi tatsi warapeiba.

Icha tauchipa xua Nakom píabo, bewa exanaena ichaxota pokotsiwa xometo beothopeibiya betauchipa taeruyaena. Bara wererena bewa boxi exanaena meje pomonae: Efraín pía bicheito matabüxü, irü Manasés pía bicheito matabüxü, irü Benjamín pía bicheito matabüxü. Barapomonae kotakaya ekeicha warapeiba xua poxonae daxita Israel pía pemómoxi susato jiwi tatsi warapeiba.

Icha pemüxübürü xua Nakom píabo, pomüxübürü ichaxota pokotsiwa weyabei-cha, bewa bara be müxübürü taeruyaena ichaxota xua “norte”, jei. Bara wérena bewa boxi exanaena meje pomonae: Dan pía bicheito matabüxü, irü Aser pía bicheito matabüxü, irü Neftalí pía bicheito matabüxü. Barapomonae tabüdube-neiba xua poxonae daxita Israel pía pemómoxi susato jiwi tatsi warapeiba.

Meje yábara poxonae xua Nakom itapeta, xua itapétatsi Leví pía bicheito matabüxü tatsi xua sacerdotemonae peyawenaenéxatsi

(Números 3—4; 7—8)

Poxonae Israel pía pemómoxi susato jiwi tatsi pona Egipto nakua weya, bapoxonae Nakom tsipaeba barapomonaetha pokoyene xua pexui xua matapin jiwi, pomonae kopiya nakatsiwina xua daxita barompaya pía matabüxü tsíniya xua bárapo matabüxü pía pexui tatsi, ápara barapoxi Nakom piamonae tatsi.

Baxua Nakom éxana tsipéi kaena báyatha Nakom jopa itorobiyo xua matapin jiwi pejutebíwatsi xua bekein poxonae meisha Nakom itoroba xua matapin jiwi pejutebíwatsi xua daxita Egipto nakuapiwi daxita barompaya pía matabüxüng tsíniya bárapo matabüxüng pía pexui tatsi.

Poxonae Israel pía pemómoxi susato jiwi tatsi imoxoyo pata ichaxota Sinaí demuxuwa matawüng, barapoxonae Nakom tsipaeba barapomonaetha. Nakom jeye:

—Itapetang Leví pía bicheito matabüxü tatsi xua barapomonaе pekoutha petanakuichinexa tsainchi xua matapin jiwi xua inta penakuichinexa. Leví pía pemómoxi susato jiwi tatsi wüngdutang: ‘Levitamonae’, jang, jei Nakom.

Moisés irü Aarón bapongbe Leví pía pemómoxi susato jiwi jíwanabe tatsi. Nakom namchi xua bepa pinae barapomonaе levitamonae yawenaena xua Aarón yawenaechi, xuano xua sacerdotemonaе peyawenaewa tsainchi. Saya meisha barapomonaе levitamonae jopa yábara kopatichi xua duwéi pejutebiwa xua poxonaе be ofrenda matawüng éxana, tsipéi bárapo koyenein saya meisha éxana pomonaе sacerdotemonaе.

Levitamonae pía penakuichiwa tatsi ápara xua kapaneiba Nakom píabo xua chivonámüübo xua poxonaе jónakapenteiba. Yawa daxita kaponeiba xua xuang daxita xeina bárapo botha be Nakom pía caja tatsi. Barichino barapomonaе daxita kaponeiba xua xuang pokotsiwang barapomonaе kanakuichiya exaneiba xua be korotong xua poxonaе baxota nakuiteiba Nakom piabotha tatsi.

Matáütano barichi, levitamonae yawena, sacerdotemonaе yawénatsi po penakuichiwa xua sacerdotemonaе nantawénona xua merang pekaponaeewa yawa isho pekaponaeewa.

2

Kaena báyatha Leví xeina akoibi póyobe tatsi xua pexántobe tatsi. Meje xua barapóyobe tatsi: ichüng Gersón, ichüng Cohat, ichüng Merari. Cohat pía pemómoxi susato jiwi jíwana tatsi barapong Moisés, irü Aarón, írürü sacerdotemonaeno.

Daxita ichamonae xua pomonaе Cohat pía pemómoxi susato jiwi tatsi, barapomonaе kaponeiba daxita xua xuang jebeiba baxota xua Nakom piabotha tatsi. Baxuang kaponeiba xua poxonaе Israel pía pemómoxi susato jiwi tatsi warapeiba icháwatha beya.

Gersón pía pemómoxi susato jiwi tatsi irü kaponeiba daxita paparuwa xua po paparuwang xua peyakainchadubiwang tütutha xua Nakom piabotha tatsi. Yáwano xua xuang po paparuwang xua daxita akababa Nakom píabo, baxuang daxita kaponéibarü.

Írürü Merari pía pemómoxi susato jiwi tatsi, irü barapomonaе kaponeiba daxitang naepaewang, po naepaewang xua penonobaba pondekaewa xuano xua pemüxübürü xatabakorekaenaintong.

Barichino pebiwi, po pebiwi peaiñakuí jiwi, po pebiwi jíwana xua pomonaе doce po bicheito matabüxübe, bárapo pebiwi yawena, levitamonae yawénatsi. Bárapo pebiwi kápona seis ponaеbe xua buey pekaponaeenaеxi, yawa doce póyobe xua bueymonae xua bárapo bueymonae pekaenaponeibinexa bárapo buey pekaponaeenaеxi. Daxita baxuang levitamonae katsíbatsi xua peyawenaenéxatsi poxonaе nakuíta.

Cuatro ponaеbe xua buey pekaponaeenaеxi baraponaеxi Merari pía pemómoxi susato jiwi tatsi katsíbatsi, tsipéi naepaewang bichokono arewe. Icha naеbe xua nakuéyatabe ponaеbe xua buey pekaponaeenaеxi, bárapo naеbe Gersón pía pemómoxi susato jiwi tatsi kátatsi pekaponaeenexa paparuwang. Cohat pía pemómoxi susato jiwi tatsi jopa katichi buey pekaponaeenaеxi jíwana, tsipéi xua xuang barapomonaе kápona bichokono peaiñakuín xua seikaya Nakom piyawangxae.

Kaena báyatha Nakom yábara itoroba xua barapomonae bewa naetongtha kaye-badubina peutukuratha barapokotsiwang poxonae wárapa.

Barichi, kaena báyatha icha koyene sacerdotemonae éxana, xua peaiñakuí koyenewa xua seikaya levitamonaexa, pokoyene xua barapomonae levitamonaexa xua maisha pejüntükoyene wüünae exanaewa tsainchi Nakom peitütha tatsi. Barapoxonaexa barapomonae itaküüpatsi xua Nakom petanakuichiwa tsainchi.

Poxonaexa bárapo koyene éxana, levitamonaexa kápona vaca pebto ayunbe xua petabexubiwa tsainchi. Ichüing bexuba xua be ofrenda matawüing, po ofrenda xua Nakom ompin pekatsíwatsi. Ichüing bexuba xua be ofrenda matawüing, po ofrenda xua tsiéxana xua jiwí abe peexanaexa.

3

Levitamonae Nakom píabo matawakaicha yabo bobena xua piaboxi ákaba, xuano xua irü levitamonaexa matawakaicha yabo bobeinchi ichamonae xua Israel pía pemómoxi susato jiwí tatsi. Moisés, irü Aarón, irü sacerdotemonae daxita barapomonae piaboxi ákaba ichaxota pokotsiwa xometo wekouneibina xua ichaxota pomuxunene imoxoyo Nakom píabo peboupa betaeungkuareka.

Ichamonae, pomonaexa Cohat pía pemómoxi susato jiwí jíwana tatsi, barapomonae piaboxi ákaba ichaxota pokotsiwa xometo beothopeibiya xua ichaxota pomuxunene Nakom píabo pejuma beicha. Gersón pía pemómoxi susato jiwí tatsi, barapomonae piaboxi ákaba xua ichaxota pokotsiwa párowa wétsina xua “sur”, jei xua ichaxota pomuxunene Nakom píabo be müxübürü taerukuareka. Irü Merari pía pemómoxi susato jiwí tatsi, barapomonae piaboxi ákaba xua ichaxota pokotsiwa weyabeicha xua “norte”, jei xua ichaxota pomuxunene Nakom píabo be müxübürü taeungkuiya.

**Meje yábara poxonae xua Nakom yábara tsipaeba,
Moisés yábara tsipáebatsi, po petsiwüünae muxudutsiwa
xua nazareomonae éxana Nakomtha**

(Números 6.30)

Nakom Moisés yábara tsipáebatsi xua jopa pinae bewa daxua exanáe tsane xua icha ichüing ichichipa nakuita Nakom nexa xua saya bara kaeto nexa, ichikuitha xua daxita matakabin xua poxonae abü pópona.

Akoibi pokuikoyenebe xeina xua jopa bewa exanáe tsane pong ichichipa nakuita Nakom nexa. Meje bárapo koyenéwabe: piaxoba apa vino mera. Ichikuitha piaxoba uvakuéi xane. Yawa piaxoba nantanasibaxuba. Matáütano piaxoba imoxoyo kakuita pona pong petüpaein xua metha bekein barompaya piamonaexa jiwí tatsi xua imoxoyo. Icha bapo koyenein exanáetsipa xua nejumetáewatha, barapoxonaexa bapong najüntükoyene taxobíchipa Nakom peitabaratha tatsi.

Bárapo jintong bewa pepu najüntükoyene wüünae exaneibina Nakom peitabaratha be pókotsi koyeneya báyatha nayábara kuiwüünae tsimuxuduta Nakomtha daxita matakabi xua poxonae tanakuiteiba Nakom. Icha bapong exanáetsipa pokotsiwa xua piaxoba bapong éxana, najüntükuikoyene taxobíchipa Nakom peitabaratha tatsi. Daxota barapong bewa ekeicha exanaena xua báyatha penayábara kuiwüünae tsimuxudutsiwa Nakomtha.

Poxonae weta xua po matakábintha poxonae bapong tanakuita Nakom, barapoxonae bapong bewa kaponaena oveja xua pebto xua be ofrenda matawüing, po ofrenda xua Nakom ompin pekatsíwatsi. Barichi bewa kaponaena icha oveja xua pebto xua be ofrenda matawüing, po ofrenda petsabiwa xua kantaüta pan. Ichüing pong sacerdotemonae jíwana, bewa daxita baxuang katsina Nakomtha xua be ofrenda matawüing.

Bapoxonae pebóupatha xua Nakom píabo boupatha tatsi, bapong, pong xua báyatha nayábara tsiwüünae muxuduta Nakomtha, bewa nantanasibaxubina xua bichokono nantakatepataxubina. Yawa bewa kantaütsiya nantanaxubina ishótotha ichaxota duwéi tauta, po duwéi xua be ofrenda matawüing, po ofrenda xua petsabiwa.

Barapoxonae sacerdotemonaepin pita ovejamaxü xua jawa, po oveja báyatha bexuba poxonae ofrenda matawüing éxana, po ofrenda xua petsabiwa, yawa kantaüta tsiwiyo pan. Daxita báraxuang sacerdotemonaepin pekobebetha tajeba, pongxae kápona bárapo ofrenda matawüing pekóbetha tajébatsi. Bapoxonae bapong bárapo ovejamaxü yawa pan kata Nakomtha be ofrenda matawüing xua be pokotsiwa Nakom amanaya pekatsíwatsi.

Néxata bárapo pebin kata sacerdotemonaepintha oveja pekoxatopa yawa pentákari barapókotsi jüta koyeneya ichi poxonae éxana po ofrenda matawüing petsabiwang. Poxonae daxita báraxua weta, bara báyatha weta pokotsiwa nayábara kuiwüünae tsimuxuduta Nakomtha. Bara bapong yábara kópatatsi xua ekeicha peapaewa vino mera.

Poxonae jintong éxana barapókotsi koyene xua penayábara kuiwüünae tsimuxudutsiwa bewa exanaena daxita pokoyenein xua Nakom ichichipa. Icha jopa exanaeyo baxua, Nakom abeya yábara paebíchipa pokoyene xua bapong jopa exanaeyo xua báyatha nayábara kuiwüünae tsimuxuduta.

2

Ichikuitha metha yábüyo exanáetsipa pokotsiwa báyatha nayábara kuiwüünae tsimuxuduta Nakomtha. Íchitha icha barapowa paxa tatsi báraxua aichaxaibi, ichikuitha icha bapowa pía pebin tatsi báraxua aichaxaibirü bara Nakom yábara jüntemaina baxua, bapowa yábara jüntemáinatsi.

Íchitha icha bapowa pía pebin tatsi, ichikuitha xua poxonae bapowa paxa tatsi, icha namchi xua pinae bara baxua wüünae, ichikuitha xua pinae baxua kaena báyatha yaputane xua dáichitha jopa paebiyo, bara néxata barapowa bewa nayábara kuiwüünaetsina xua peexanaewa pokotsiwa xua báyatha nayábara kuiwüünae tsimuxuduta.

Meje yábara xua poxonae Israel pía pemómoxi susato jiwí tatsi pona Sinaí demuxuwa weya, yawa xua pona Canaán ira beya

(Números 9.15—10.36)

Barapoxonae weya xua poxonae Israel pía pemómoxi susato jiwí tatsi weta Nakom píabo tatsi, xua chivonámüübo, bárapo bo tsakinaebowa daxita matatsún matawakaicha akatsíkatsi xua poxonae matakeitha. Bárapo tsakinaebowa mérawi bichokono pentha exananoteiba bárapo bo xua po koicha pentha.

Israel pía pemómoxi susato jiwí tatsi yaputane xua barapomonae jopa bewa ponáe tsane abü poxonae tsakinaebowa matatsún dukueika Nakom píabo xua chivonámüübo. Yawa yaputane xua barapomonae pepuya weya bewa ponaena bárapo tsakinaebowa xua poxonae bárapo tsakinaebowa matatsún wenatsixitaba Nakom píabo tatsi. Veinte po matakabibetha xua po xometo nantakarukua xua icha weitha xua poxonae weta xua poxonae Israel pía pemómoxi susato jiwí tatsi pona Egipto nakua weya. Barapoxonae tsakinaebowa matatsún wenatsixita Nakom píabo tatsi.

Bara néxata Israel pía pemómoxi susato jiwí tatsi pona. Kopiya wárapa barapomonae meje: Judá pía bicheito matabüxü tatsi, irü Isacar pía bicheito matabüxü tatsi, irü Zabulón pía bicheito matabüxü tatsi. Bapoxonae irü wárapa levitamona, pomona xua naepaewang kanamata kajijinka, yáwano pomona xua kanamata kajijinka paparuwang xua po paparuwang tütutha peyakainchadubiwa xua Nakom piabotha.

Bapoxonae ekeicha wárapa Rubén pía bicheito matabüxü tatsi, irü Simeón pía bicheito matabüxü tatsi, irü Gad pía bicheito matabüxü tatsi, peputha tapoinchi, xua peputha taponna ichamonae xua levitamona, pomona xua daxita kajijinka xua xuang jeba Nakom piabotha. Nakom píabo býatha tsíwana wetanoteiba xua ichaxota naebathopeiba, daxota kanameicha tütutha jebeiba daxita xua xuang kanakuichiya éxana sacerdotemona.

Bapoxonae kotakaya ekeicha wárapa meje barapomonae: Efraín pía bicheito matabüxü tatsi, irü Manasés pía bicheito matabüxü tatsi, irü Benjamín pía bicheito matabüxü tatsi. Ekeicha bapoxónaerü kotakaya wáraparü xua tabükarubena meje barapomonae: Dan pía bicheito matabüxü tatsi, irü Aser pía bicheito matabüxü tatsi, irü Neftalí pía bicheito matabüxü tatsi.

Meje yábara poxonae xua Israel pía pemómoxi susato jiwí tatsi Nakom yábara jüntükoyene anaepánatsi nakuéyatabe pokuikoyenebetha

(Números 11)

Bapoxonae tsiwiyo bayiyo, Israel pía pemómoxi susato jiwí tatsi yábara jüntükoyene anáepana pokotsiwa taayapubetsi, pokotsiwa xua barapomonae bewa eexanaponaena. Nakom bichokono kaseba, barapomonae bichokono kasébatsi. Nakom itorobika ishoto, xua daxota tamrópata pítaba xua taxua boxi.

Bara néxata barapomonae pona Moiestha, yawa bapong Moisés tsipáebatsi xua bapong Moisés pewüikaenexa Nakomtha xua bapomonae petaitaxutabinéxatsi ishoto. Bara Moisés baxua éxana xua barapomonae wüüka, yawa bara Nakom itaxutaba ishoto.

Barapoxonae xua poxonae bárapo dapae yapukaewa, Israel pía pemómoxi susato jiwí tatsi bara nama ajainfáetabi. Néxata barapomonae tamrópata notarúkupa xua yábara jüntükoyene anáepana xua penabanaewa maná pexaewa matawüng, po pexaewa xua Nakom itaboko weitorobika. Barapomonae maisha be xaena icha pexaewa, po pexaewa xua býatha kopiya xane poxonae jinompa Egipto nákuatha.

Daxota Nakom bichokono kaseba, barapomonae bichokono kasébatsi. Barichi Moisés bichokono kaseba, xua barapomonae bichokono kasébatsi. Moisés tsipaeba Nakomtha xua pinae bara nama Moisés jopa itaküüpaetsi xua piakoya pekanamataxeinaponaewa, xua barapomonae pekanamataxeinapónáewatsi. Yawa Moisés wüüka Nakomtha xua Nakom Moisés peyawenaewa tsainchi.

Néxata Nakom, Moisés tsipáebatsi xua bepa pinae kaetuta exanaena pía matabüxi xua setenta póyobe xua penapatáe jiwi. Bara Nakom yábara tsiwüüinae muxuduta xua pekatsiwa tsane peyaputáe koyene xua barapomonae pekatsiwa tsainchi, xua bapoxonae barapomonae peitaküüpaewa tsainchi xua Moisés peyawenaewa tsainchi.

2

Barichi Nakom Moisés tsipáebatsi xua bepa pinae Israel pía pemómoxi susato jiwi tatsi taitorobinchi pewi xua daxita pewixaenexa bárapo kae xométotha nexa, xua beya barapomonae bárapo duwéi ajainfáetabi tsane xua bárapo xométotha xane. Moisés jopa yábara jumekowüntsiyo pokoyene xua icha bara Nakom xaiñéi xua pewi nawita taitorobikaena xua peapatsinéxatsi bárapo pebiwi xua seiscientos mil pomonae matabüxübe xua pebiwi xua saya kae xométotha tsane. Daxota Nakom barái, Moisés baraichi jeye:

—Xang neitaküüpa xua taexanaewa daxita koyenein; methaunxuae bara táename.

Bara néxata Moisés kaetuta pía matabüxi xua setenta póyobe xua penapatáe jiwi. Nakom yawena, barapomonae yawénatsi, pomonae penapatáe jiwi xua peyaputáe jiwi pekana exanebiwa tsainchi, xua barapomonae peitaküüpaewa tsainchi xua Moisés peyawenaewa tsainchi.

Bara néxata Nakom itorobika pin tsakeinmonae, xua Israel pía pemómoxi susato jiwi tatsi taitorobíkatsi. Bárapo tsakeinmonae boxi íriya matatsún yapupuna dubenanáebiya. Daxita barapomonae yateika tsakein xua pin tsakeinmonae yawa yajuteba, yawa barapomonae yawi eba. Íchitha Nakom bichokono kaseba, barapomonae kasébatsi abe peyábara paebixaetsi. Daxota Nakom tsi-itorobika peátene koyenewa. Pinmonae domae xayébatsi yawa pinmonae wérapano.

Meje yábara poxonae María irü Aarón Moisés úwatsi

(Números 12)

Pirapaeyo poxonae weta xua poxonae Nakom taitorobika pin tsakein duweimonae, barapoxonae María irü Aarón tamrópata pítababe xua abe peyábara paebíwabe peweicho xua bapong Moisés. Moisés abe yábara páebatsi pamcho, irü peweicho abe yábara páebatsi. María irü Aarón jopa ichipáeyobe yábüyo powa peipeika, powa Moisés pita.

Barichi, María irü Aarón Moisés yábara nantaxéinatsi pokoyene xua bapong Moisés piakoutha nayábara kanantanaxeina xua bapong Moisés daxita wepu pong pepa peaiñakuí jintong náexana. Íchitha baxua jopa xaiñeyo pokotsiwa xua María nantanaxeina xuano xua irü Aarón nantanaxeina. Bapong Moisés ápara nayábara nantanaxeina piakoya xua bapong jopa aiñakuiyo.

Nakom yaputane pokotsiwa xua María irü Aarón nantanaxéinabe. Daxota bárapo akoibi póyobe María, irü Aarón irü Moisés, bárapo akoibi póyobe Nakom piabo beya itorobébatsi. Baxota Nakom, María irü Aarón muxutaiñabatsibe xua Moisés abe peyábara paebixaetsi. Yawa Nakom bapongbe tsipáebatsibe xua saya meisha Moisés tsipaebinchi.

Nakom tsítatsi xua Moisés beta tanakuita beyakaincha ichamonae xua Nakom tanakuítatsi. Néxata Nakom, María abe kana éxanatsi. Nakom tsi-itorobika, barapowa tsi-itorobíkatsi, peátene koyenewa xua po peatenewa barapowa aperüübé éxanatsi.

Néxata Moisés wüüka Nakomtha xua bapowa peperüüwüünae exanaewa tsainchi. Íchitha Nakom paeba xua pinae kopiya barapowa peatenexae daxota bewa tómarara pepuya beya pepoponaewa tsane, xua aishówatha, xua kae semánatha tsane beya poxonae ekeicha axaibi tsane. Bapoxonae bara Nakom perüüwüünae éxana, axaibi éxana.

Meje yábara poxonae Israel pía pemómoxi susato jiwi tatsi itoroba pebiwi doce pongbe xua peyanabarüküpaewa tsane Canaán ira

(Números 13—14)

Poxonae weta xua poxonae María ekeicha kaewa patopa tómaratha ichaxota boxi umena, barapoxonae Israel pía pemómoxi susato jiwi tatsi pona xua ichaxota Parán ira beya, po ira irasaina xuépana tsúrukuae nakua. Baraxota, ichaxota xua Parán ira, Nakom Moisés tsipáebatsi xua bapong Moisés peitorobinexa pebiwi doce pongbe, xua po pebiwi jíwana xua bárapo doce po bicheito matabüxümonaebe xua bárapo pebiwi peyanabarüküpaewa tsane Canaán ira.

Bara néxata Moisés itoroba bárapo pebiwi. Tsipaeba bárapo pebíwitha xua bárapo pebiwi petaenexa xua eta bichi jiwi pomonae xua baxota jinompa, yáwano xua petaenexa ira xua eta bichi ira, icha bárapo ira wüünae xua peübiwanexa. Néxata bara bárapo pebiwi, po pebiwi xua doce pongbe, bara pona.

2

Bárapo pebiwi ekeicha kaewa parena cuarenta po matakabibetha. Yawa bárapo pebiwi daxita yábara tsipaeba Israel pía pemómoxi susato jíwitha tatsi xua xuang pokotsiwa báyatha bárapo pebiwi tane. Bárapo pebiwi bárxuang yábara tsipaeba xua pinae bárapo ira Canaán ira pinae bichokono wüünae, xua pinae íchitha pomonae baxota jinompa pinae dangwéi. Yawa tsipaeba xua pinae ichamonae xua barapomonae jíwana pinae bichokono taichicha. Barichino xua pinae matáüta tómarang beta nayapukurárata.

Saya meisha Josué, pong Efraín pía bicheito matabüxü jíwana, pong xua irü nayántaba, irü saya meisha Caleb, pong Judá pía bicheito matabüxü jíwana, pong xua irü nayántaba, bapongbe namchibe xua pinae Israel pía pemómoxi susato jiwi tatsi bewa ponaena yawa bapoxonae yotabina bárapo irapiwi xua Canaán irapiwi. Barapongbe yábara jumekowúntabe xua Nakom yawenaena, xua barapomonae yawenaeinchi.

Icha pebiwi, xua diez pongbe, po pebiwi irü yanabarüküpa, bárapo pebiwi namchi xua pinae wámonae bápána jopa itaküüpaetsi xua peyábara yotabiwa tsane bárapo ira. Bara daxita barapomonae Israel pía pemómoxi susato jiwi tatsi itapeta jumenaitáewata pokotsiwa paeba barapongbe xua diez pongbe xua beyakaincha pejumenaitaewatsiwa pokotsiwa paeba Josué irü xua paeba Caleb.

3

Ekeicha barapomonae tamrópata notarüküpa xua ekeicha Moisés yábara jüntükoyene anaepanarükúpaetsi xua irü Aarón yábara jüntükoyene anaepanarükúpaetsi.

Barapomonae Israel pía pemómoxi susato jiwi tatsi namchi xua metha wüünáetsipa icha báyatha enáetsipa Egipto nákuatha. Beya nama barapomonae

nantaxeina xua ichüing itapetinchi xua Pekanamataxeinaein peexanaewa tsainchi xua bepa pinae barapomonaе kaewa matakaponaeinchi Egipto nakua beya.

Néxata Nakom, Moisés tsipáebatsi jeye:

—Methaunxuae daxita Israel pía pemómoxi susato jiwi tatsi jutebin. Meisha methaunxuae jopa jutebin tsane jiña matabüxümonae, tsipéi jiña nemomo susato jiwi pin bicheito kata exanaeinchi, jei Nakom.

Nakom bichokono kaseba, Israel pía pemómoxi susato jiwi tatsi bichokono kasébatsi, tsipéi yáitama kaena báyatha Nakom pexeiña koyene taéxana, Israel pía pemómoxi susato jiwi tatsi taéxanatsi, bekein barapomonaе jopa yábara jumekowüntsiyo pokoyene xua Nakom katsina barapomonaetha Canaán ira. Dáichitha bapoxonaе Moisés tsipaeba Nakomtha jeye:

—Icha exanaetsípame baxua yawa icha Egipto nakuapiwi yaputáetsipa baxua, néxata Egipto nakuapiwi abe kayábara paebíchipa. Barapomonaе kayábara paebíchipa xua pinae xam Nakom jopa bichokono xeinaem jiña neayapusíü koyenewa xua daxota Israel pía pemómoxi susato jiwi tatsi jiña nekatsiwa tsane Canaán ira. Yáwano barapomonaе kayábara paebíchipa xua pinae daxota jutébame daxita barapomonaе.

Bapoxonaе Moisés wüüka Nakomtha jeye:

—Nakom, ekeicha yábara kuijüntemáinare pokotsiwa xua Israel pía pemómoxi susato jiwi tatsi éxana.

Bara Nakom namchi jeye:

—Bara moya daichi tsane. Íchitha exanaein xua barapomonaе pejinompaewa tsane irasaina xuépana tsúrukuae nákuatha xua cuarenta po weibetha tsane. Yáwano exanaein xua barapoxonaе werapaena daxita pomonaе xua jopa ichipaeyo xua tana neyábara jumekowüntsiwa pokoyene xua barapomonaе takatsiwa tsane Canaán ira. Saya meisha Josué irü Caleb jopa wérapae tsane xua xain barapomonaе pepatsiwa tsane Canaán íratha, jei Nakom.

4

Bara Moisés báraxua yábara tsipaeba barapomonaetha pokotsiwa xua báyatha Nakom Moisés tsipáebatsi. Barapomonaе bichokono jüntükoyene wekoyéi xua poxonaе baxua jumetane. Bara néxata barapomonaе najüntüküikoyene wüünaeta xua barapomonaе peyotabiwa tsane pomonaе Canaán íratha jinompa. Íchitha Nakom jopa yawenaeyo, barapomonaе jopa yawenaetsi.

Daxota barapomonaе jopa amanayabiyo poxonaе naba éxana pomonaetha, pomonaе jinompa Canaán íratha. Báraxua éxana xua jopa peamanayabiwa, tsipéi báyatha Nakom yábara tsipaeba xua barapomonaе pejinompaewa tsane irasaina xuépana tsúrukuae nákuatha xua cuarenta po weibetha tsane.

Meje yábara poxonaе Coré, irü Datan, irü Abiram Nakom abe yábara páebatsi

(Números 16—17)

Pebin, pong pewüing Coré, bapong namchi xua bepa pinae nama jopa pejichi-paewa tsane xua pejumekowüntsiwa pokotsiwa Moisés paeba. Bapong Coré, Cohat pía pemómoxi susato jiwi jíwanapin tatsi xua Cohat bapong Leví pexanto tatsi.

Barichi Moisés, Cohat pía pemómoxi susato jiwi jíwanapin tatsi. Barichi Datan irü Abiram bapongbe Rubén pía bicheito matabüxü jiwi jíwanapinbe tatsi.

Bapongbe irü pebürüya jüpaeya nanantanaxéinabe xua Coré paeba. Barichi ichamonaе xua pebiwi xua doscientos cincuenta po pebiwi matabüxübe, bárapo pebiwi irü pebürüya jüpaeya nanantanaxeina xua pokotsiwa Coré paeba. Bárapo pebiwi, po pebiwi xua peañakuí jiwi.

Bara daxita barapomonaе pona xua Moisés irü Aarón siwapónatsibe. Yawa barapomonaе Moisés irü Aarón abe yábara páebatsibe pokoyene xua bapongbe piakoutha pentakaponaеinbe náexanabe xua ichamonaе jíwana xua Israel pía pemómoxi susato jiwi tatsi. Néxata Moisés tsipaeba barapomonaetha jeye:

—Baya tsane Nakom yábara paebina pong xua báyatha bapong itapeta, pong xua ofrenda matawüng peexaneibinexa, jei Moisés.

Barapoxonaе Moisés biatane, Coré biatainchi. Bapong Coré bekein levitamonaepin xua báyatha bekein bapomonaе Nakom itapeta xua pekaponaenexa xua xuang daxita xeina Nakom piabotha tatsi, dáichitha bapong jopa exanaeyo pokotsiwa Nakom itoroba. Saya Coré ichichipa penaexanaewa tsane sacerdotemonaepin. Néxata Moisés najumekaruta xua pewabinéxatsi Datan irü Abiram. Íchitha bapongbe aichaxaibibe xua peponáewabe. Bapongbe jeibe ichüngtha:

—Painta tsipáebare Moisés: ‘Bapong pana muxitóroba. Bapong pana tsipaeba xua pinae Nakom pana katsina ira xua patajinompaenexa bárapo íratha. Dapo jumetha saya pajinompang irasaina xuépana tsúrukuae nákuatha. Jopa paxei-naeiño pata ira. Moisés jopa bewa piakoya nayábara nantaxeinae xua ápara pata tananekanamataxeinaein’, jeibe bapongbe xua najumekarútabe ichüngtha.

2

Moisés Coré tsipáebatsi xua pinae baya tsane pebóupatha ichaxota xua jojneibiya, xua poxonaе poneiba Nakom piabotha tatsi xua chivonámüübo baraxota, daxita kaetutsinchi pomonaе jopa jumekowüntsiyo, pomonaе Moisés abe yábara páebatsi. Barapomonaе ápara doscientos cincuenta po pebiwi matabüxübe. Yáwano tsipaeba xua pinae daxita barapomonaе barompaya kajijinkaena incienso nain xua túxusi wüünae xua kantarübina penain korótixi xua pókotsi penain korótixi pejuntutha tauta bárapo incienso nain xua túxusi wüünae. Bara daxita barapongbe baxua éxanabe pokotsiwa Moisés paeba. Yawa Nakom tsipaeba ichamonaetha xua bepa pinae daxita barapomonaе tajü beumeiñaena xua akoibi pongbe weya xua boxi xua ichaxota jinompa bárapo akoibi pongbe xua pebiwi, po pebiwi kanamataxeina daxita pomonaе jopa pejumekowüntsiwi.

Néxata Nakom éxana xua ira nayetaxubina xua bárapo akoibi pongbe pebüxüpana wétsina tatsi. Bárapo akoibi pongbe othopareka, yawa piamonaе matabüxü tatsi taothoparékatsti, yawa tamuxuna othoparékatsti pokotsiwang xua xuang xeina barapomonaе.

Barichino matáütano Nakom itoroba ishoto tsakinaebowa weya, po tsakinaebowa xua daxita matawakaicha matatsún ungueika caja xua Nakom pía caja tatsi. Bárapo ishótotha Nakom daxita tauta bárapo doscientos cincuenta po pebiwi matabüxübe, po pebiwi kápona xua incienso nain xua túxusi wüünae xua be ofrenda matawüng.

Bárapo koyenetha xua poxonaе Nakom baxua éxana, baxua Nakom tsita itapeiñaxeina xua pokoyene Nakom báyatha itapeta, xua Aarón itapétatsi, xua bapong pong sacerdotemonaе pepa pekanamataxeinaewa tsainchi.

3

Barapoxonae icha matakábitha, barapomonae Israel pía pemómoxi susato jiwi tatsi yábara jüntükoyene anaepanarúkupa pokoyene ápara xua Moisés irü Aarón piakouthabe xua ichamonae Israel pía pemómoxi susato jiwi tatsi wérapa. Néxata Nakom bichokono yábara anáepana, xua barapomonae Israel pía pemómoxi susato jiwi tatsi bichokono yábara anaepánatsi. Nakom tamrópata pítaba xua daxita juteba barapomonae. Néxata Moisés barái, Aarón baraichi jeye:

—Aarón, taure incienso nain xua túxusi wüünae xua pexantha tatsi barapomonae xua Israel pía pemómoxi susato jiwi tatsi. Bapoxonae metha ekeicha Nakom jopa jutebi tsane daxita barapomonae, jei Moisés.

Bara baxua éxana Aarón. Ichitha býatha wérapa bichokono pinmonae beyakaincha xua catorce mil jiwi.

Barapoxonae Nakom tsipaeaba, Moisés tsipáebatsi jeye:

—Moisés, itoróbare xua barompaya daxita pomonae xua peaiñakuí jiwi xua bárapo doce po bicheito matabüxübe pekarenaenexa naewiyo xamtha. Bárapo naewangtha wüngtínare pebin pewüng, po pebiwi xua peaiñakuí jiwi xua barompaya jíwanang xua bárapo doce po bicheito matabüxübe. Matáütano Aarón wüngtínare po náewatha xua Leví pía pemómoxi susato jiwi tatsi pía naewa tatsi.

”Daxita bárapo naewang nóbare tabohta ichaxota po tutu tsiki tútiyo xua yatsikaewa tatutu. Pía naewa tatsi, pong xua býatha itapetang xua penaexanaewa tsane sacerdotemonaepin, noxu axupichapaena, jei Nakom.

Bara néxata Moisés tsipaeaba, Israel pía pemómoxi susato jiwi tatsi tsipáebatsi, pokotsiwa xua býatha Moisés tsipáebatsi Nakom. Bara daxita barompaya bicheito matabüxüng karendena naewaxi. Moisés daxita bárapo naewang kuaranoba Nakom piabotha tatsi.

Bapoxonae icha matakábitha tane xua po náewatha Aarón wüngdukua jopa saya meisha noxu axupichapaeyo bárapo naewa weya, bara yawa pentonong óthopa yawa pekuéi óthopa. Bara bapoxonae Moisés bárapo doce po náewangbe kápona pesato beya xua xain barapomonae Israel pía pemómoxi susato jiwi tatsi peita-küüpaewa tsainchi xua piakoutha petaewang tsane bárapo naewang. Bapoxonae Nakom ekeicha Moisés itoróbatsi, xua bapong Moisés ekeicha Nakom piabotha pekuaranotsinexa Aarón pía naewa tatsi.

Báraxua éxana poxoru Nakom kui-itaweta daxita pomonae xua pejüntükoyene anaepanaewa xua jopa penaexanaexae sacerdotemonaepin. Daxota Nakom itoroba xua ekeicha bárapo naewa Moisés kuaranotsina Nakom piabotha tatsi xua daxita jiwi peyaputaewa tsane xua bara Nakom itapeta, xua Aarón bapong pong sacerdotemonaepin pekanamataxeinaeinchi.

**Meje yábara poxonae Moisés irü Aarón jopa exanáeyobe
pokotsiwa Nakom itoroba**

(Números 20.1-13,22-29)

Barapomonae, Israel pía pemómoxi susato jiwi tatsi, pata ichaxota po ira pewüng Cades. Baraxota ichaxota po íratha pata, mera aibi xua barapomonae peapaewa tsane. Néxata barapomonae Israel pía pemómoxi susato jiwi tatsi bichokono jüntükoyene anáepana, xua Moisés yábara jüntükoyene anaepánatsi. Barapomonae jeye:

—Metha jame báyatha wüünae tsipae xua icha kaena báyatha daxítatsi Nakom wanaka jutebiwa tsipae, xua irü Coré pebexubiwa tsipaetsi, xua irü Datan pebexubiwa tsipaetsi xua yawa irü Abiram pebexubiwa tsipaetsi. Xam pana pítame Egipto nakua weya. Saya amanaya pana pítame. Pana yawéname aibi. Bárapo ire maisha bichokono tsewa. Jopa baxota xuwiyo pexaewa, matáütano mera aibi xua waapaewa tsane, jei barapomonaе.

Néxata Moisés irü Aarón pónabe pebóupatha xua Nakom píabo boupa. Nakom Moisés baraichi jeye:

—Jiña naewa pire yawa bapoxonaе xam irü Aarón pakaetúrebe daxita barapomonaе xua Israel pía pemómoxi susato jiwi tatsi. Barapoxonaе iboto tsipáebare. Bara barapoxonaе bara weya néxata mera pichapaena, jei Nakom.

2

Bara Moisés irü Aarón kaetútabe daxita barapomonaе Israel pía pemómoxi susato jiwi tatsi. Néxata Moisés jume anaepanaeya barái barapomonaе, jeye:

—¡Xang jopa yaputaeiño xua eta xua metha bepa mera exanokuaein bárapo iboto weya! ¡Ápara paxam pomonaе jopa paiña nejumekowüntsi jiwi pam bichokono! jei Moisés.

Bara néxata Moisés náewatha matadobakota iboto nakuéyatabe pokuikoyenebetha. Bapoxonaе iboto weya mera píchapa. Bichokono mera nawita yawa xua pinmonaе jüpatzi xua peapaewa nexa, yáwano xua pía duweimonaein tatsi peapaenexa.

Íchitha Nakom yábara jüntükoyene anáepana, Moisés irü Aarón yábara jüntükoyene anaepánatsibe, tsipéi bapongbe jopa yábara jumekowüntsíyobe pokotsiwa Nakom paeba. Báyatha bekein Nakom tsipaeba, Moisés bekein tsipáebatsi xua bepa pinae iboto tsipaebina xua Moisés tsipaebina, dáichitha bapoxonaе bapong jüntükuí anáepana barapomonaetha yawa bapoxonaе jume anaepanaeya matabakota iboto.

Daxota Nakom, Moisés irü Aarón tsipáebatsibe xua bepa pinae bapongbe jopa matakaponaebe tsane, xua Israel pía pemómoxi susato jiwi tatsi jopa matakaponáe tsainchi Canaán ira beya. Saya barapomonaе pinae werapaena baxota xua irasaina xuépana tsúrukuae nákuatha. Tsiwiyo bayiyo bapoxonaе Aarón tüpa. Eleazar, pong Aarón pexanto tatsi, pong matapin po pexui jíwana tatsi xua áwiya tajinómpatsi, bapong Aarón pexanto pekoutha xuya tanakatsíwatsi pong sacerdotemonaе pía pentakoponaeinchi tatsi.

**Meje yábara poxonaе Israel pía pemómoxi susato jiwi tatsi
jüntükoyene anáepana Nakomtha, yawa xua poxonaе
Nakom itoroba jomong xua barapomonaе pesinebinéxatsi**

(Números 20.14-21; 21.4-9)

Israel pía pemómoxi susato jiwi tatsi báyatha jinomparúkupa ichaxota irasaina xuépana tsúrukuae nákuatha xua imoxoyo áwatha bara cuarenta po weibe. Barapoxonaе Israel pía pemómoxi susato jiwi tatsi ekeicha Nakom yábara jüntükoyene anaepánatsi, irü xua Moisés yábara jüntükoyene anaepánatsi.

Barapomonaе enapona Canaán ira námtotha. Íchitha barapomonaе nantawénona xua iyiya po namto xua bichokono tajü iya, tsipéi Edom nakuapiwi, xua Esaú

pía pemómoxi susato jiwi tatsi, jopa kopatsiyo xua Israel pía pemómoxi susato jiwi tatsi baraxoyo petayiaewa tsane xua bárapo ira iya. Bapong Esaú Jacob peweicho tatsi.

Barapomona Israel pía pemómoxi susato jiwi tatsi jüntükoyene anáepana xua bepa pinae barapomonaefifina xua peponaewa ichaxota irasaina xuépana tsúrukuae nákuatha, yáwano xua pinae barapomonaejainfáetabi xua pexaewa maná matawüing, po pexaewa Nakom itaboko wetaitorobika, xua barapomonaetaitorobíkatsi.

2

Daxota Nakom itorobika jomong, xua daxita barapomonaebarompaya piaboxitha tatsi, xua pinmonaefsinébatsi. Pinmonaewérapa pesinebixaetsi. Barapomonaeyaputane xua Nakom itoroba jomong abepenatsi exanaexae xua barapomonaefNakom abepeyábara paebixaetsi. Daxota Israel pía pemómoxi susato jiwi tatsi pona Moisesstha yawa jeye:

—Painta wúükare Nakom xua jopa ekeicha peitorobinexa jomong, jei.

Moisés báraxua éxana, yawa Nakom jeye bapongtha:

—Éxande penainto xua bronze nainto matawüing xua be jomo éxande. Yawa náewatha tajü duchama. Barapoxonaef, pong báyatha jomo sinchi poxonaef taena bárapo bronze nainto xua be jomo éxaname, bara barapoxonaef bapong axaibitsane.

Moisés be jomo éxana xua bronze nainto. Pinmonaef, pomonaef Israel pía pemómoxi susato jiwi tatsi, poxonaef sinébatsi axaibitsounaef saya poxonaef tane bárapo jomo xua bronze nainto xua Moisés kana éxana.

Meje yábara poxonaef Israel pía pemómoxi susato jiwi tatsi amanáyaba aiña bichéitobe xua poxonaef naba éxana

(Números 21.21-35)

Barapomonaef, Israel pía pemómoxi susato jiwi tatsi, diwesi itoroba ichüingtha xua petsipaefbinéxatsi pong amorreomonaef pía nakua tatsi itorobiya peewatsin. Barapomonaef, amorreomonaef, jinompa pokotsiwa púmpana wétsina xua Jordán ménetha xua icha pokotsiwa xometo wekounaefibina.

Barapomonaef, Israel pía pemómoxi susato jiwi tatsi, wüüka bapongtha xua bapong jüntema pona peexanaewa tsane pía íratha, xua Israel pía pemómoxi susato jiwi tatsi jüntema pona peexanaewa tsainchi. Íchitha bapong pong nakua itorobiya peewatsin jopa jejeyo. Bapong kaetuta pía penawabchüü-exaneibiwi tatsi yawa pona xua Israel pía pemómoxi susato jiwi tatsi naba peexanaewa tsainchi.

Néxata Israel pía pemómoxi susato jiwi tatsi kaetuta pía penawabchüü-exaneibiwi tatsi, yawa barapoxonaef naba éxana amorreomonaetha. Bara yawa Israel pía pemómoxi susato jiwi tatsi amanáyaba xua poxonaef naba éxana barapomonaetha. Daxita jutébano. Yáwano pita bárapo ira, yáwano jinompa bárapo íratha.

2

Barapoxonaef barapomonaef ekeicha pona ichaxota po nakua pewüing Basán. Pong Basán nakua itorobiya peewatsin, bapong pía penawabchüü-exaneibiwi kaetuta. Bárapo penawabchüü-exaneibiwi naba éxana Israel pía pemómoxi susato

jíwitha tatsi. Nakom Israel pía pemómoxi susato jiwi tatsi tsipáebatsi, xua bepa pinae barapomonaē, Israel pía pemómoxi susato jiwi tatsi, jopa junuwí tsane; tsipéi bapong Nakom irü yawenaena, xua Israel pía pemómoxi susato jiwi tatsi yawenaēinchi, peamanayabiwa tsane poxonaē naba éxana pomonaētha, pomonaē xua jinompa Basán nákuatha.

Bara barichi Israel pía pemómoxi susato jiwi tatsi amanáyaba xua poxonaē naba éxana barapomonaētha. Yáwano jutébano pomonaē xua bárapo nákuatha jinompa. Yawa bara Israel pía pemómoxi susato jiwi tatsi bárapo nákuatha jinompa.

**Meje yábara poxonaē pong Moab nakua itorobiya peewatsin,
Balaam wüükatsi xua bapong Balaam abe peyábara paēbiwa tsane,
xua Israel pía pemómoxi susato jiwi tatsi abe peyábara paēbiwa tsainchi**
(Números 22—25; 31)

Bara barichi Israel pía pemómoxi susato jiwi tatsi amanáyaba aiña bichéitobe xua naba éxana amorreomonaētha irü xua pomonaētha xua pomonaē jinompa Basán nákuatha. Barapoxonaē Israel pía pemómoxi susato jiwi tatsi naēba xua boxi ákaba ichaxota po nakua pewüing Moab nakua. Bárapo nakua, xua Moab nakua, Canaán ira peitabaratha taékatsi xua icha muxunénetha xua Jordán ménetha.

Barapomonaē, pomonaē Moab nákuatha pejinompaewi, barapomonaē junuwa xua Israel pía pemómoxi susato jiwi tatsi petáewatsi tsipéi barapomonaē bichokono pinmonaē. Yáwano barapomonaē junuwa tsipéi báyatha barapomonaē, Israel pía pemómoxi susato jiwi tatsi, amanáyaba aiña bichéitobe xua poxonaē naba éxana.

Barapoxonaē néxata pong Moab nakua itorobiya peewatsin najumekaitoroba xua pewabinéxatsi pebin, pong pewüing Balaam. Bapong Balaam wüünaē yaputaiba pokotsiwa xua bexa peexanaewa tsane. Daxota bapong Balaam wábatsi xua bapong Balaam abe peyábara paēbiwa tsane, xua Israel pía pemómoxi susato jiwi tatsi abe peyábara paēbiwa tsainchi.

Barichi pomonaē Madián nákuatha pejinompaewi, barapomonaē tamrópata notarúküpa xua moabitamonae peyawenaewa tsainchi. Balaam yaputane xua pokotsiwa ichichipa moabitamonae. Daxota bapong tsipaēba barapomonaētha jeye:

—Paxam moabitamonae pam abü paéware. Tha takoya jumetaetsi pokotsiwa Nakom netsipaēba, jei Balaam.

Bara Nakom jumenota bapongtha jeye:

—Balaam, Israel pía pemómoxi susato jiwi tatsi jopa abe yábara paēbinde, tsipéi ichichipang xua Israel pía pemómoxi susato jiwi tatsi bara xaniwaichiya betiya peponaewa tsane, jei Nakom.

Bara Balaam tsipaēba barapomonaētha xua pinae jopa peponaewa tsane bara beya.

Néxata pong Moab nakua itorobiya peewatsin, bapong itoroba icha bicheito, po bicheito xua diwesi petakaponaewa tsainchi, xua penajumekarutsiwa tsane. Bárapo pebiwi bichokono peaiñakuí jiwi beyakaincha icha pebiwi, po pebiwi bekein kopiya itorobébatsi. Barapomonaē, pomonaē xua kotakaya peitorobebi-xaetsi, Balaam jumedangweya wüükatsi xua bepa pinae Balaam bewa ponaena. Barapomonaē Balaam tsipáebatsi xua bepa pinae pong Moab nakua itorobiya

peewatsin, Balaam nawita katsibinchi ichawang xua icha bara beya ponaena xuano xua icha Israel pía pemómoxi susato jiwi tatsi abe peyábara paebiwa tsainchi.

Bara néxata Balaam ekeicha yáíñaba Nakomtha xua pokoyene bapong Balaam eta bichi tsane. Néxata Nakom paeba xua Balaam bara itakúüpatsi xua peponaewa tsane, xua dáichitha bapong bewa saya meisha exanaena pokotsiwa Nakom itoroba.

2

Bapong Nakom bekein jopa peichipaexae xua Balaam peponaewa tsane, daxota Nakom itoroba matatsunpin xua Balaam jopa pekopatsiwa tsainchi xua peponaewa tsane. Bara Balaam juntukuru ekeika búrratha xua pesowáttoxae xua piyüngtha. Burra tane, xua matatsunpin tainchi, xua námtotha asiya unguwa. Íchitha bapong Balaam jopa taeyo, matatsunpin jopa taetsi. Néxata burra namto weya natsixitaba. Néxata Balaam kuaintaxuba.

Barapoxonae matatsunpin unguwa ichaxota pokotsiwa xua pemüxübürü nantiya úngkuabe námtotha. Poxonae burra tane, xua matatsunpin tainchi, bapoxonae napatomeicha xuba. Burra epa-arúbatsi, irü Balaam petaxu báxuano nayáitata. Barapoxonae ekeicha Balaam kuaintaxuba.

Néxata matatsunpin pona ichaxota po namto bichokono tsiki namtiyo dena. Barapoxonae nama burra jirawüüna poxonae matatsunpin tainchi, Balaam bichokono anáepana, yawa ekeicha bichokono kuainta burra beyakaincha xua kopiya. Néxata Nakom éxana xua burra pepaebiwa tsane, burra xua pesowáttoxae. Balaam yáíñabatsi jeye:

—¿Eta xua metha nekuáintame? jei burra.

Néxata Balaam jumenota, xua burra jumenótatsi jeye:

—Kakuáintatsi yáitama neéxaname be pong tana nekui-amameibin.

Ekeicha burra yáíñaba, Balaam yáíñabatsi, jeye:

—¿Bara báyatha jopa exanaeiño poxonae neitoróbame?

Balaam jumenota:

—Jume, jei Balaam.

Néxata Nakom éxana xua Balaam petaewa tsane, xua matatsunpin petaewa tsainchi, xua matatsunpin námtotha asiya unguwa xua yawa pekóbeta kusi komaungkuwa. Matatsunpin bichokono Balaam jumedangweya biyatainchi tsipéi bapong Balaam bichokono kuainta pía burra. Matatsunpin tsipaeba, xua Balaam tsipáebatsi jeye:

—Patopang xua jopa takapukopatsiwa tsainchi xua neponaewa tsane, jei.

Balaam jumenota, matatsunpin jumenótatsi jeye:

—Bara methauxuae kaibe nawiyáein tabo beya, jei Balaam.

Íchitha matatsunpin namchi jeye:

—Bara kaitaküüpa xua nepunaponaewa barapomonae, pomonae báyatha kaitoroba xua saya meisha nepaebiwa tsane pokotsiwa Nakom kajume-itoroba xua pokotsiwa nepaebiwa tsane, jei matatsunpin.

3

Bara bapoxonae Balaam pona ichaxota pópona pong Moab nakua itorobiya peewatsin. Icha matakábitha Balaam irü pong Moab nakua itorobiya peewatsin

juñabe demuxuwa icha, po demuxuwa weya xua itakúüpatzi xua petaewa daxita boxi, xua Israel pía pemómoxi susato jiwi tatsi piaboxi tatsi. Néxata Balaam tsipaeba, pong Moab nakua itorobiya peewatsin tsipáebatsi, jeye:

—Éxande siete xuangbe xua xuang altar matawüing pokotsiwa ichaxota duwéi tauta Nakom nexa. Duwéi kaponde xua be ofrenda matawüing xua catorce póyobe, xua siete vacang pebtong yawa siete ovejang xua penawang. Daxita xua barompaya kae altar matawüing tsíniya vaca pebto múxuna oveja xua penüing bexórebe.

Bara baxua éxana pong Moab nakua itorobiya peewatsin. Bapoxonae Balaam tsipaeba bapongtha xua bepa pinae baxota ewatsinchi, xua bepa pinae matha tae xua icha ichawa Nakom paeba. Balaam tsiwiyo tajü weungkuiya. Nakom tsipaeba bapongtha, xua Balaam tsipáebatsi, xua pokotsiwa bewa Balaam tsipaebina pongtha, pong Moab nakua itorobiya peewatsin. Bara Balaam kaibeya pona, tsipaeba bapongtha jeye:

—Xam inta itoróbame xua tana newabinexa xua tapatopaewa tsane xua abe tayábara paebiwa Israel pía pemómoxi susato jiwi tatsi. Íchitha jopa neyapujúpaeyo xua taexanaewa baxua, tsipéi Nakom ichichipa xua barapomonae bara petayapu wüünaewa tsainchi xua pejinompaewa tsane. Nakom nawita taéxana barapomonaetha xua jopa pekakuiyábara jüpáewatsi xua peununaewa daxita xua xuang taéxana barapomonaetha. ¡Xang ichichipáetsipang xua barapomonae jíwanang tana naexanaewa!

Poxonae bapong, pong Moab nakua itorobiya peewatsin, jumetane baxua, bapong bichokono jüntükoyene anáepana. Íchitha Balaam bapongtha yábara kanantaxeina éxana pokoyene xua bapong Balaam saya meisha itakúüpatzi xua pepaebiwa pokotsiwa Nakom itoroba.

4

Néxata bapong, pong Moab nakua itorobiya peewatsin, Balaam kapoinchi icha demuxuwa beya. Yáwano baxota bapong, pong Moab nakua itorobiya peewatsin, éxana ekeicha icha siete xuangbe xua xuang altar matawüing. Bara bapong, pong Moab nakua itorobiya peewatsin, juteba vaca pebtong múxuna ovejang, xua penawang, xua be ofrendang matawüing tsíniya. Barapoxonae poxonae bapong, pong Moab nakua itorobiya peewatsin, éxana baxua Balaam jeye:

—Taema, Nakom bápana jopa ekeicha icha koyene exanáe, poxonae nantükuí weteiba xua peexaneibiwa tsane. Jopa be barichiyo icha jiwi ichi. Bapong Nakom paeba xua bepa pinae exanaena xua Israel pía pemómoxi susato jiwi tatsi bara petayapu wüünaewa tsainchi xua xaniwaicha pejinompaewa tsane. Bara baxua Nakom nayábara jüntükuí wétsina xua peexanaewa tsane. Báraxua ápara páebang pokotsiwa báyatha Nakom neitoroba xua tapaebiwa tsane. Yawa jopa neitaküüpaeyo xua icha koyeneya taexanaewa tsane.

”Nakom jopa tsítatsi xua Israel pía pemómoxi susato jiwi tatsi abe peexanaewa, yawa bara bapong yanta barapomonae. Dapokotsiwa aibi tsane, pokotsiwa Israel pía pemómoxi susato jiwi tatsi abe kana éxanatsi xua poxonae Israel pía pemómoxi susato jiwi tatsi abe yábara páebatsi.

Báraxua pong Moab nakua itorobiya peewatsin aichaxaibi. Balaam tsipáebatsi jeye:

—Icha jopa kaitaküüpaeyo xua abe neyábara paebiwa Israel pía pemómoxi susato jíwitha tatsi, bapoxonae jopa pata tamonae jintom tsipaem, jei.

5

Barapoxonae bapong, pong Moab nakua itorobiya peewatsin, ekeicha Balaam kapoinchi icha demuxuwa beya xua bara nama tres po demuxúwabe. Ekeicha éxana siete xuangbe xua xuang altar matawüng, ichaxota bapong juteba vacang pebtong yawa ovejang.

Barapoxonae, poxonae xua baxua éxana pong Moab nakua itorobiya peewatsin, Balaam jopa jüjütsiyo xua peexanaewa pía kuikoyene xua peyábara wüünae kueikueijejiwa xua pokotsiwa bexa exanaena. Daxota bapong jopa baxua exanaeyo tsipéi bapong Balaam yaputane xua bara xaniwaicha Nakom peexanaewa tsane pokoyene xua bara Israel pía pemómoxi susato jiwi tatsi petayapu wüünaewa tsainchi xua pejinompaewa tsane.

Balaam bara benekoya icha beumeña Israel pía pemómoxi susato jiwi tatsi pia-boxi tatsi. Nakom pía Pejumopetünaxü tatsi Balaam tsipáebatsi xua pokoyeneya bapong Balaam pepaebiwa tsane. Balaam jeye:

—Nakom nekópata xua be taamachinaewa tsane xua neichiyatsika xua pen-thiya tang xua takamaichiwa Israel pía pemómoxi susato jiwi tatsi. Barapomonae peayapusüü jiwi naexanaena, tsipéi Nakom yawena barapomonae, xua Israel pía pemómoxi susato jiwi tatsi yawénatsi. Nakom yawena Israel pía pemómoxi susato jíwitha tatsi xua barapomonae peamanayabiwa tsane pomonae pía peaitafaetabí jíwichi.

”Nakom kopatsina xua petaayapubewa tsainchi xua pejinompaewa pomonae xua ichichipa xua Israel pía pemómoxi susato jiwi tatsi petaayapubewa tsainchi xua pejinompaewa tsane. Barichi Nakom kopatsina xua petayapu wüünaewa tsainchi xua pejinompaewa tsane pomonae xua ichichipa xua Israel pía pemómoxi susato jiwi tatsi petayapu wüünaewa tsainchi xua pejinompaewa tsane, jei Balaam.

Poxonae baxua jumetane, pong Moab nakua itorobiya peewatsin bichokono jüntükoyene anáepana, jeye:

—Ponde jiña bo beya. Báyatha bekein kayábara nantanaxéinatsi xua pong kopei nexeinaein tanaexanaewa tsainchi, xuano xua pong bichokono aiñakuí jintong tanaexanaewa tsainchi, íchitha ánoxuae baxua jopa be tanaexanaewa tsainchi, jei.

Balaam jumenota jeye:

—Meisha neitaküüpa xua tapaebiwa pokotsiwa xua Nakom neitoroba. Metha ponaein tabo beya, íchitha kopiya katsipaebinchi ichawa. Nakom nekópata xua be taamachinaewa tsane xua neichiyatsika xua pen-thiya tang xua takamaichiwa Israel pía pemómoxi susato jiwi tatsi.

”Xang tang Israel pía pemómoxi susato jiwi jíwana tatsi xua pong bexa naexanaena. Barapong pong bexa naexanaena, bapong amanayabina pomonaethe meje barapomonae: moabitamonae amanayabinchi, irü edomitamonae amanayabinchi, írürü amalecitamonae amanayabinchi. Barichi bapong ceneomonae irü amana-yabinchi, jei.

Bara néxata bapoxonae Balaam píabo benawiya.

6

Barapoxonae Balaam tsipaeba yábüxi, powaxi Moab nákuatha jinompa, yawa powaxi jinompa Madián nákuatha, xua barapówaxi icha koyenewa pejeichinexa xua pokoyeneya Israel pía pemómoxi susato jiwi tatsi abe peexanaewa tsainchi. Bara barapówaxi bichokono ichichipa baxua. Barapówaxi kaena naiña pona bara beya ichaxota jinompa Israel pía pemómoxi susato jiwi tatsi. Barapówaxi Israel pía pemómoxi susato jiwi tatsi wábatsi xua irü penaponaenexa ichaxota ichamonae éxana fiesta matakabin xua poxonae ichamonae duwéi juteba xua barompaya pía nakomüng tatsi nexa, po nakomüng jopa xaiñeyo.

Bara barapoxonae ichamonae Israel pía pemómoxi susato jiwi tatsi tamrópata notarúkupa xua írürü wüünae pejainchiwa bárapo nakomüng, xua po nakomüng jopa xaiñeyo. Barichi barapomonae, Israel pía pemómoxi susato jiwi tatsi, kenta éxanano bárapo yábüxi, powaxi xua Moab nakuapiwaxi xua irü Madián nakuapiwaxi.

Néxata Nakom kaseba daxita barapomonae. Moisés itoróbatsi irü pomonae pentakaponaewi xua pokoyene daxita pejutebiwa tsainchi xua ichamonae xua Israel pía pemómoxi susato jiwi tatsi, pomonae xua báyatha irü wüünae jáintarü po nakomüng jopa xaiñeyo.

Barichino Moisés itoróbatsi, xua madianitamona peyotabinéxatsi, xua daxita barapomonae abe pekana exanaenexa tsainchi tsipéi barapomonae báyatha Israel pía pemómoxi susato jiwi tatsi muxujaiñabébatsi. Israel pía pemómoxi susato jiwi tatsi kaetuta pía penawabchüü-exaneibiwi. Bara naba éxana madianitamonae, yawa barapomonae amanáyaba poxonae naba éxana.

Balaam bexotsi irü jutébatsi pebiwi xua madianitamona. Yábüxi kapoinchi yawa pexui kapoinchi. Yawa barapomonae kapónano vacang yawa daxita kapónano pokotsiwang xua xuang madianitamona xeina. Bapoxonae barapomonae kápona yábüxi yawa pexui xua kápona Moisés beya yawa Eleazar beya. Bapong Eleazar pong sacerdotemona pía pentakaponaein tatsi.

Íchitha Moisés kaseba barapomonaetha yáitama barapomonae jopa yawa jutebiyo yábüxi, tsipéi barapówaxi Israel pía pemómoxi susato jiwi tatsi muxujaiñabébatsi. Baxua éxana poxonae itorobébatsi xua wüünae pejainchiwa tsane pía nakomüng, po nakomüng xua jopa xaiñeyo. Bara barapoxonae barapomonae daxita pexui juteba, yawa daxita yábüxi juteba. Saya meisha jopa jutebiyo penowaxi, powaxi kataunxuae jopa jitha peenaewa.

7

Bapoxonae Moisés yábara nantaxeina kana éxana barapomonaetha, xua pokoyene barapomonae Nakom tsita najüntükoyene taxóbatsi, tsipéi báyatha barapomonae pona ichaxota petüpaewi bobena. Daxota bewa exanáe ofrendang xua báyatha Nakom itoroba, xua jopa pena jüntükoyene taxobinexa.

Barichi barapomonae bewa maisha tawüünaeinchi pokotsiwang xua barapomonae xeina. Bewa iche: ichawang bewa anapaena ishótotha, ichawang bewa ikikaena. Néxata Moisés irü Eleazar tsata katsíbabe xua xuang báyatha moabitamonae yábara yótatsi poxonae naba. Ichawang pomonae penawabchüü-exaneibiwi katsíbatsi, ichawang levitamona katsíbatsi, ichawang katsíbatsi pomonae yaseika.

**Meje yábara poxonae Moisés ekeicha éxana
xua pewüngtinaewa daxita**

(Números 26)

Israel pía pemómoxi susato jiwi tatsi jinompa po nákuatha pewüng Moab xua ichaxota imoxoyo Jordán mene. Kaentakabi Nakom tsipaeba, Moisés irü Eleazar tsipáebatsibe, xua pokoyene bapongbe bewa exanáenabe jeye:

—Ekeicha paexándebe xua daxita pewüngtináewatsi, tsipéi báyatha cuarenta po weibe yapukaewa xua poxonae paéxaname ichawa xua daxita pewüngtináewatsi, jei Nakom.

Poxonae báraxua éxana barapoxonae bichokono pebiwi nayota xua pomonae beyakaincha veinte po weibe xeina. Barapomonae seiscientos un mil setecientos treinta po jiwi bicheitomonae matabüxübe (601,730).

Nakom paeba xua pinae bárapo pewüngtinaewa bara wüünae, xua baxua kanantawénona xua kanameicha peíra tsatsiwa tsane Canaán ira xua poxonae baraxotiya patsina. Báraxua xua pía peexanaenexa xua pin ira pexeinaenexa pomonae pin bicheito matabüxü, xua xuano tsiki íriyo pexeinaenexa pomonae tsiki bicheito matabüxüyo.

Bárapo pewüngtinaewa jopa irü levitamonaewa yawa múxuna wüngtinaetsi, tsipéi barapomonae jopa xeináe tsane barompaya pía ira. Poxonae daxita jiwi ununa, jopa yawa ununaetsi levitamonaewa. Saya bárapo levitamonaewa tsanaya ununébatsi. Ununébatsi daxita pebiwi xua pexui xua poxi kae xometo xeina beya xua amomonaeno. Daxita veintitrés mil po pebiwi matabüxübe.

2

Poxonae nakobeweta xua pewüngtinaewa daxita, barapoxonae Moisés irü Eleazar tánebe xua Israel pía pemómoxi susato jiwi tatsi daxita pomonae xua kaena báyatha unúnatsi, xua wüngtinébatsi ichaxota Sinaí demuxuwa matawüng, daxita barapomonae báyatha kou wérapa. Saya meisha Josué jopa tüpaeyo, irü Caleb jopa tüpaeyo, irü Moisés jopa tüpaeyo.

Barapomonae báyatha wérapa ichaxota irasaina xuépana tsúrukuae nakua icha be pókotsi koyeneya báyatha Nakom paeba tsipéi barapomonae báyatha jopa yábara jumekowüntsio xua Nakom katapaeba barapomonaetha, xua barapomonae katapáebatsi Canaán ira.

**Meje yábara poxonae Israel pía pemómoxi susato jiwi jíwana tatsi
Moisés wúükatsi xua Moisés pekatsinexa ira, po ira eka ichaxota
pokotsiwa xometo wepichapabeina xua Jordán ménetha**

(Números 32)

Barapomonae, Israel pía pemómoxi susato jiwi tatsi, pomonae xua Rubén pía bicheito matabüxü tatsi, irü Gad pía bicheito matabüxü tatsi, barapomonae vaca nawita xeina. Barapomonae tane xua po ira eka ichaxota pokotsiwa xometo wekounibina xua Jordán ménetha. Bárapo ira wüünae xua barapomonae vaca peapatsinexa naepanaewang. Daxota barapomonae pona, yawa Moisés tsipáebatsi xua pinae barapomonae beenaena bárapo íratha xua daxota jopa pexeinaenexa Canaán ira jíwana.

Poxonae aena, baxua be Moisés fayakota éxanatsi poxoru saya icha ira wúuka-tsi. Bapong nantaxeina xua metha ichamonae, pomonae xua diez matabüxümo-naebe, jüntükoyene junuwina xua kompa peponaewa tsane Canaán ira beya, icha báyatha ichi, pomonae xua diez pongbe, pomonae xua yanabarúküpa xua tsiwanaya poxonae cuarenta po weibe. Íchitha pebiwi, pomonae Rubén pía bicheito matabüxü tatsi jíwana, irü po pebiwi Gad pía bicheito matabüxü tatsi jíwana, barapomonae nayábara wüünae paeba jeye:

—Pakuenta ponang tómarangtha pata yábüxi yawa pata pexui. Íchitha kopiya daxita bárapo tómarang payaputoxórotang. Bapoxonae daxita pang paka punapoinchi pata paka kayawenaewa tsainchi xua naba waexanaenexa pomonaetha, pomonae jinompa Canaán íratha.

Néxata Moisés namchi:

—Bara wüünae. Paka katsinchi bárapo ira. Dáichitha bewa panayábara jume-wetsíname xua pokotsiwa xuaunxuae panayábara kuiwüünae tsimuxudútame, xua paiña neyawenaenexam tsane paiñamonae poxonae naba.

Barapomonaetha Moisés kata ira, Rubén pía bicheito matabüxü tatsi kátatsi, irü Gad pía bicheito matabüxü tatsi kátatsi, irü Manasés pía bicheito matabüxü jíwanamonae tatsi kátatsi.

**Meje yábara poxonae Nakom itoroba, xua Israel pía pemómoxi
susato jiwi tatsi itoróbatsi, xua petsatsinexa Canaán ira**

(Números 27.1-11; 34—36)

Nakom tsipaeba, Moisés tsipáebatsi jeye:

—Po irang ichaxota Canaán ira itamataeka, bárapo irang patsábare xua Canaán ira weya. Matha kopiya paexande xua ibótixi pekopababiwa xua peyaputaenexa jintam xeinaena po ira xua ira tsaba xua Canaán ira.

Barapomonae baxua éxana. Pomonae xua nueve po bicheito matabüxübe, irü Manasés pía bicheito matabüxü jíwanamonae tatsi, po bicheito matabüxü jíwanamonae ichichipa jinompa ichaxota pokotsiwa xometo beothepeibiya xua Jordán ménetha.

Nakom yaputane xua Josué kanamataxeinaena, xua Israel pía pemómoxi susato jiwi tatsi kanamataxeináeinchi, poxonae xua bapong Moisés tüpaena. Daxota Nakom itoroba, Moisés itoróbatsi, irü Eleazar itoróbatsi, pongxae sacerdotemonae pía pentakaponaein tatsi. Bapongbe itorobatsibe xua ira petsatsinéxabe pewünaeya xua poxonae Moisés tüpaena. Barichi Nakom itoroba xua barompaya bárapo matabüxüing kaein pebin jíwana itapetatsiniyáenabe xua bárapo pebiwi peyawenaenexatsibe.

2

Icha koyeneno xua Nakom tsipaeba, Moisés tsipáebatsi, xua icha pinae pebin jopa xeinaeyo pexui pebinwúütoxi, pinae néxata pexui xua yábüxi, paxa kopiniwa pichina bárapo ira. Íchitha pinae bewa jitha enaena xua penotsiwa pebiwi, po pebiwi xua pía bicheito matabüxü jíwana tatsi, xua bárapo ira bárapo bicheito matabüxü pía ira petatsozonaewa tsainchi.

3

Nakom itoroba xua levitamonaetha jopa pexeinaewa tsane Canaán ira jíwana. Íchitha Nakom itoroba xua Israel pía pemómoxi susato jiwi tatsi bewa katsina

barapomonaetha cuarenta y ocho po pepa tómarangbe xua levitamonaе pejinompaewa tsane bárapo pepa tómarangtha. Barichino Israel pía pemómoxi susato jiwí tatsi bewa múxuna katsibina irang, po irang xua bárapo tómarang matawakai-cha xeixeina tsíniya naepanaewang, po naepanaewang ichaxota levitamonaе pía duweimonaе tatsi petaxaenéxatsi naepanaewang.

Daxita xua barompaya bicheito matabüxüng tsíniya, bárapo bicheito matabü-xüng barompaya bewa levitamonaе katsibinchi aiña tómarang xua pepa tómara xua Canaán ira, po pepa tómarang jíwana xua báyatha barapomonaе katsinchi. Po bicheito matabüxü bichokono pin ira xeina bewa levitamonaе ekeicha aiña tómarang katsibebinchi xua pepa tómarang. Po bicheito matabüxü jopa xeinaeyo pin ira bewa levitamonaе katsibebinchi pepa tómarang xua saya kónotha.

4

Icha pepa tómarang xua seis po pepa tómarangbe, xua cuarenta y ocho po tómarang jíwana, bárapo pepa tómarang bewa kayábara nantaxeinaetsi xua sei-kaya bárapo pepa tómarang, ápara po tómarang xua jiwí ichaxota nakapanenebi-yathopa. Daxota poxonaе pebin itatema bexuba ichüng, bapong itakúüpaetsi xua pepanepaewa kae tómaratha xua bárapo seis po tómarangbe jíwana. Bapoxonaе pong tüpa piamonaе tatsi jopa itakúüpaetsi xua penajíwana yantomatsinexa.

Íchitha, icha pebin kopiya matha yábara nantanaxeina xua ichüng pebexubíwa-tsi yáwano bara bexuba ichüng, bapong bewa tüpaena bekein bara panepa bárapo tómarang jíwana beya. Bárapo seis po tómarangbe saya meisha barapomonaе nexa pomonaе xua saya icha xaniwaicha itatema ichüng bexotsi. Bapong bewa ekaena bárapo tómaratha beya poxonaе tüpaena pong sacerdotemonaе pía pentakaponaеin tatsi. Bapoxonaе bapong bara yábara kópatatsi xua peponaewa tsane icha tómaratha, ichikuitha xua pía tómaratha.

Íchitha icha bapong tómara weya pona pewünaeyo xua tüpaena pong sacerdotemonaе pía pentakaponaеin tatsi, yawa icha táebatsi xua pong petüpaein piamonaе jíwana tatsi, bara kópatatsi xua bapong pexubíwatsi, xua piamonaе yantómatatsi pong pebexubixaetsi. Bapoxonaе jiwí yábara paebina xua bapong ápara jopa abe exanaeyo poxonaе piamonaе jintong yantómata.

Nakom itoroba jeye:

—Paitapere tres po tómarangbe xua ichaxota pokotsiwa xometo wekounebina xua Jordán ménetha, yawa tres po tómarangbe xua ichaxota pokotsiwa xometo beothopeibiya xua Jordán ménetha. Bárapo seis po tómarangbe, po tómarang xua ichaxota jintong nakapanepa poxonaе ichüng itatema bexotsi, jei Nakom.

**Meje yábara poxonaе Moisés beta muxuweta pomonaetha,
pomonaе xua pinmonaе náexana
ichaxota irasaina xuépana tsúrukuaе nákuatha**

(Deuteronomio 1—11)

Bara báyatha weta cuarenta po weibe xua poxonaе Israel pía pemómoxi susato jiwí tatsi pona Egipto nakua weya. Barapoxonaе bara barapomonaе najüntü-kuikoyene weta xua pepatsiwa tsane Canaán íratha. Bárapo ira báyatha Nakom yábara wüünaе tsmuxuduta barapomonaetha xua pinaе pekatsiwa tsane, xua barapomonaе pekatsiwa tsainchi. Moisés yaputane xua jopa barü patopáe tsane

barapomonaē Canaán íratha, tsipéi báyatha Nakom tsipaeba, Moisés tsipáebatsi, xua pinae bapong Moisés kopiya tsiwanaya tüpaena.

Pewünaeya xua Moisés tüpa, bapong yábara nantaxeina kana éxana Israel pía pemómoxi susato jíwitha tatsi xua yábara tsipaeba peitorobi koyenewang, po peitorobi koyenewang Nakom kata barapomonaetha xua cuarenta po weibetha ichaxota po demuxuwa Sinaí demuxuwa matawüing. Bara ekeicha ichamonaē náexana, pomonaē xua ekeicha pinmonaē náexana, pomonaē xua jopa peyábara yaputaewi Nakom pía peitorobi koyenewang tatsi. Bara barapomonaē nawichitápona irasaina xuépana tsúrukuaē nákuatha.

2

Bara Moisés yábara tsipaeba barapomonaetha pokoyene xua kaena báyatha Nakom ichichipa xua Moisés pía pamo susato jiwí tatsi peponaewa tsane Canaán ira beya, xua baxota pejinompaewa tsane. Barichi Moisés yábara tsipaeba barapomonaetha pokoyene xua báyatha itorobébatsi doce pongbe pebiwi, pomonaē xua yanabarúküpa bárapo Canaán ira. Yáwano tsipáebano pokoyene xua kaena báyatha barapomonaē pía pamo susato jiwí tatsi junuwa xua pepatsiwa tsane Canaán íratha.

Moisés tsipaeba barapomonaetha xua pinae daxota Nakom éxana xua barapomonaē saya pejinompa dubenanaebiyaenexa ichaxota irasaina xuépana tsúrukuaē nakua xua cuarenta po weibetha, xua beya daxita wéraparü pomonaē xua jopa ichipaeyo xua pepatsiwa tsane Canaán íratha.

Saya meisha nakuéyatabe pongbe jopa kataunxuaē tüpáeyobe. Barapongbe ápara Josué irü Caleb, pongbe kaena báyatha napónabe poxonaē yantarúküpa Canaán nakua xua doce pongbe. Bekein barapongbe kaena báyatha tsipáebabe Israel pía pemómoxi susato jíwitha tatsi xua bewa ponaena Canaán nakua beya, íchitha barapomonaē aichaxaibi xua peponaewa.

Barichi Moisés yábara jüntanaina éxana xua poxonaē báyatha amanayabeiba xua poxonaē naba éxana amorreomonaetha írüno xua poxonaē naba éxana pomonaetha, pomonaē Basán nákuatha jinompa.

Matáütano yábara jüntanaina éxana xua pinae bárapo ira, po ira báyatha amorreomonaē pía ira tatsi, irü Basán nakuamonaē pía ira tatsi, xua pinae ánoxuaē bárapo aiña írabe ápara Rubén pía bicheito matabüxü tatsi barapomonaē pía írabe tatsi, irü Gad pía bicheito matabüxü tatsi barapomonaē pía írabe tatsi, xua irü Manasés pía bicheito matabüxü jíwanamonaē tatsi barapomonaē pía írabe tatsi. Bárapo írabe ékabe ichaxota pokotsiwa xometo wekouneibina xua Jordán ménetha.

3

Barichi Moisés tsipaeba barapomonaetha xua jeye:

—Nakom netsipaeba xua pinae jopa paka barü ponáe tsainchi Canaán nakua beya tsipéi pinae tüpaein. Poxonaē pinae tüpaein, pinae Josué paka matakaponnaena Canaán nakua beya.

”Bichokono aiñakuí xua poxonaē pajinompáename Canaán nákuatha bewa yábara jumekowüntsiya paexanaponáename daxita xua Nakom pía peitorobi koyenewang tatsi.

”Barichi bichokono aiñakuí xua paiña pexui paiña nekuidubiwa tsane bárapo peitorobi koyenein, xua Nakom pía peitorobi koyenein tatsi, xuano xua paiña nemómoxi paiña nekuidubiwa tsane bárapo peitorobi koyenewang.

”Barichi aiñakuí xua jopa wüünae paiña nejainchiwa tsane po nakomüing xua jopa xaiñeyo. Kaena báyatha poxonae po matakeitha Nakom paiña amo susato jiwi tsipáebatsi, xuano xua poxonae Nakom bapomonaetha kata diez po peitorobi koyenewangbe, barapoxonae weya xua beya ánoxuae, dapokotsiwang aibi, pokotsiwangtha xua barapomonaek pekanaxobiwa nakomüing.

”Daxota jopa bewa wüünae pajainchim tsane po nakomüing xua jopa xaiñeyo. Yawa jopa bewa wüünae pajainchim tsane xometo, poto atsa. Matáütano jopa bewa wüünae pajainchim tsane jomokóichato. Matáütano jopa bewa wüünae pajainchim tsane opitéi.

”Paka muxuwétatsi icha wüünae pajaintíname icha nakomüing, po nakomüing xua jopa xaiñeyo, Nakom abe paka exanáetsipa. Nakom kopatsipa xua icha nakuapiwi paka kaponaena Canaán nakua weya, xua daxota ekeicha paiña neichichi-paewa tsane, xua Nakom wüünae paiña nejainchiwa tsane, jei Moisés.

4

Moisés yábara jüntanaina kana éxana barapomonaetha pokoyenein xua Nakom beta kana éxana, xua Israel pía pemómoxi susato jiwi tatsi beta kana éxanatsi. Saya meisha barapomonaek yatsikaya jumetane xua poxonae Nakom kueikueijeji, ichamonae jopa daichiyo.

Barichi Nakom icha nakuapiwi, pomonaek pebusikuitaetaeyebéwichi xua amana penakuichiwa, bapong kopiya barapókotsi koyene bápana jopa exanaeyo xua daxita pekapanenebíwatsi xua poxonae busikuitaetaeyebéwatsi, xua jopa barichiyo ichi Israel pía pemómoxi susato jiwi tatsi ichichi xua Nakom kapanenebiya, xua poxonae busikuitaetaeyebéwatsi, xua Egipto nakuapiwi busikuitaetaeyebéba.

Barichino Moisés yábara yaputaeya tsipaeba barapomonaetha xua pokotsiwa báyatha Nakom tsiwüünaek muxuduta barapomonaek pía pamo susato jíwitha tatsi, xua pinaek icha bapomonaek jumekowüntsiya exanaena pokotsiwa Nakom itoroba, bara Nakom yawenapona barapomonaek. Bárapo koyene Nakom áwiya exanaponaena, xua taexanaponaek inchi Israel pía pemómoxi susato jiwi tatsi, pomonaek xua ánoxuae jinompa xua bara pepu tsiteka tsane.

5

Barichi, Moisés ekeicha tsipaeba Nakom pía peitorobi koyenewang tatsi, xua diez po peitorobi koyenewangbe, po peitorobi koyenein báyatha Nakom kata poxonae Nakom kueikueijeji demuxúwatha, po demuxuwa pewüing Sinaí demuxuwa matawüing.

Barichi Moisés yábara nantaxeina kana éxana barapomonaetha icha peitorobi koyenein, po peitorobi koyenein báyatha Nakom kata barapomonaetha. Yáwano yábara tsipáebano barapomonaetha xua poxonae báyatha pía pamo susato jiwi tatsi Nakom ita-aenaenei tsaibichi xua poxonae Egipto nakua weya pona. Barapomonaetha muxuweta xua ekeicha barapomonaek jopa anaepanáek tsane Nakomtha.

Yawa muxuweta xua barapomonaek ekeicha jopa abe exanáek tsane xua saya poxoru barapomonaek pía yaputaetsi xua eta xua metha Nakom taexanaena barapomonaetha. Barichi tsipáebano barapomonaetha xua pokoyene pinaek poxonae

cuarenta po weibetha pinae Nakom jüntükoyene jüjüta barapomonaetha xua icha metha Nakom jumekowüntsinci, ichikuitha xua icha metha Nakom jopa jumekowüntsí tsainchi.

Barapomonaetha tsipáebano xua pokoyene pinae barapomonaetha jainpaena, xua dáichitha Nakom taitoroba barapomonaetha pexaewa xua maná matawüing xua barapomonaetha pexaewa tsane. Baxua Nakom éxana barapomonaetha xua barapomonaetha peyaputaenexa xua pokoyene xua jiwi jopa meisha peunasúü tsipae pexaewa, xua jame jiwi yawa peasúü koyenewiya jinompa xua pejumekowüntsixa Nakom Pejume diwesi.

6

Barichi, Moisés tsipaeba barapomonaetha, jeye:

—Paxam, pomonaetha Israel pía pemómoxi susato jiwi tatsi pam, pajumetaema: pong Jehová baraichi, bapong ápara kompa Wanakom. Ichüing Nakom aibi. Waxainchi bewa bapong Nakom ántobe tsainchi xua bichokono waantüyapustüüwatha. Bewa daxita matakabin yábara jüntanaineibinchi Nakom pía peitorobi koyenewang tatsi. Bárapo peitorobi koyenein bewa wapexui kuidubinchi, yáwano bewa baxua yábara kueikueijeichi daxita matakabi ichaxota wajinompawa.

”Matáütano bewa tinaeinchi Nakom pía peitorobi diwesi yawa bewa bárapo diwesi jebichi tsiki kajíyotha xua bapoxonaetha wamaxüingtha bewa dubinchi, xuano xua bewa waitapatha dubinchi. Matáütano bewa wabómüxüing naetongtha tinadubinchi xuano xua pebopathang, jei Moisés.

7

Barichino muxutsipaeba barapomonaetha, xua pinae poxonaetha barapomonaetha ponaena Canaán nákuatha, barapomonaetha pinae bewa jutebina daxita pomonaetha baxota jinompa xua Canaán nákuatha, tsipéi barapomonaetha pía kuikoyenewang tatsi bichokono abe.

Barapomonaetha jopa yábara kuikopatichi xua pokuikoyene penakuiyábara tsiwüünae muxudutsiwa xua nantiya penayawenaewa, yáwano jopa yábara kopabebichi xua barapomonaetha pejéwana noteibíwatsi. Báraxua jopa yábara kopabebichi tsipéi icha kae koyenewa xua bárapo koyenéwabe jíwana barapomonaetha exanáetsipa, barapoxonaetha barapomonaetha wüünae jainchíparü po nakomüing barapomonaetha wüünae jainta.

Barichi tsipaeba barapomonaetha xua pinae daxitang bewa abe exanaena Canaán nakuapiwi pía altar matawüing tatsi ichaxota duwéi tauteiba pía nakomüing nexa. Barichi bewa abe exanaena daxita po nakomüing jopa xaiñeyo, xuano xua daxita pokotsiwang xua kananeamonae éxana xua pía nakomüing nexa. Daxita báraxuang barapomonaetha bewa exanaena xua barapomonaetha irü jopa jüpa peexanaenexa tsane, xua icha cananeomonae ichi, xua icha nakomüing wüünae jainta. Barapomonaetha meisha bewa wüünae jainchina Nakom, po Nakom yatsikaewa pepa Nakom.

8

Moisés yábara jüntanaina kana éxana barapomonaetha xua Israel pía pemómoxi susato jiwi tatsi jopa ápara barapomonaetha itapetebichi xua poxoru ichauxi báyatha

wüünae peexanaexae. Ápara Nakom itapeta barapomonaе xua barapomonaе pean-tobexaetsi. Yáwano Nakom itapeta barapomonaе tsipéi Nakom bara nayábara jumekuiwetapona xua exanapona xua báyatha nakuitsiwüünae muxuduta barapomonaе pía pamo susato jíwitha tatsi xua bapong Abraham, irü Isaac, irü Jacob.

Moisés yábara jüntanaina éxana barapomonaetha xua barapomonaе jopa Nakom peyábara jüntemainaewa tsainchi poxonaе jinompaena Canaán nákuatha. Yawa barapomonaе jopa bewa Nakom peyábara jüntemainaewa tsainchi bekein kopei xeinaena bárapo íratha.

Moisés múxuna tsipáebano xua Nakom kata barapomonaetha Canaán nakua tsi-péi pomonaе jinompa bárapo nákuatha bichokono abe peexanaewi. Jopa katsiyo bárapo nakua xua poxoru Israel pía pemómoxi susato jiwi tatsi beta peexanae-xae. Moisés yábara tsipaeba barapomonaе xua báyatha abe peexanaewi nawita, yawa Nakom jopa jumekowüntsichi poxonaе irasaina xuépana tsúrukuae nákuatha jinompa.

9

Ekeicha Moisés jeye:

—Nakom pong Wanakom naka itoroba xua bepa pinae exaneibinchi pokoyenexi saya be kónotha xua meje: Nakom naka itoroba xua bepa pinae barükui-iturajinaeinchi bapong. Yáwano naka itoroba xua bepa pinae exanaponaeinchi pokui-koyenein báyatha Nakom yábara naka kuiduba xua pía peitorobi koyenewang tatsi.

”Barichi naka itoroba xua pinae bewa ántobe tsainchi bapong daxita wajüntü-koyenéwatha, xuano xua itapeta waexanaewa tsane pokotsiwa bapong ichichipa, yawa jumekowüntsiya waexanaewa tsane pía peitorobi koyenewang tatsi.

”Payábara nantanaxéinare xua bárapo peitorobi koyenewang paka yawena. Jopa payábara jüntemainaеinde xua Nakom paka itapeta, irü paiña amo susato jiwi itapétatsi, xua piamonaе tatsi paiña nepaka kana exanaenexa, jei Moisés.

Bapoxonaе Moisés yaputane éxana barapomonaе xua icha jumekowüntsina Nakom pía peitorobi koyenewang tatsi, Nakom itawetsina, cananeomonaе itawetsinchi, xua bapoxonaе bárapo Canaán nakua Israel pía pemómoxi susato jiwi tatsi katsinchi. Matáütano Moisés yaputane éxana barapomonaе xua Nakom itorobina ema xua pexaewang barapomonaе beta petanawetsiwa tsainchi.

Meje yábara poxonaе Moisés jüntanaina kana éxana Israel pía pemómoxi susato jíwitha tatsi xua Nakom pía peitorobi koyenewang tatsi

(Deuteronomio 12—26)

Moisés yábara jüntanaina kana éxana Israel pía pemómoxi susato jíwitha tatsi xua Nakom pía peitorobi koyenewang tatsi. Matáüta Moisés yábara jüntanaina kana éxana barapomonaetha xua pokoyene bewa Nakom petajumekowüntsiwa tsainchi bárapo pía peitorobi koyenewang tatsi, po peitorobi koyenewang tatsi báyatha Nakom Moisés tsipáebatsi ichaxota po demuxuwa pewüng Sinaí.

Barichino Moisés múxuna tsipáebano icha pena peitorobi koyenewang, xua Nakom pía peitorobi koyenewang tatsi, xua báyatha Nakom Moisés kátatsi.

Moisés tsipaeba barapomonaetha xua eta bewa bichi tsane xua icha barapomonaе ichichipa pexeinaewa tsane pong nakua itorobiya peewatsin, xua

barapomonaē pía nakua tatsi petawatsinéxatsi ichi be icha nakuapiwi ichi. Jopa bewa barapomonaē itapetsí tsane xua pong barapomonaē pía nakua tatsi petawatsinéxatsi, xua pong seikaya icha nakuapin.

Pong nakua itorobiya peewatsin jopa bewa yábara nantaxeinae xua nawita pexeinaewa kawayumonaēin. Matáütano jopa bewa yábara nantaxeinae xua nawita pexeinaewa yabüximonaē. Matáütano jopa bewa yábara nantaxeinae xua nawita pexeinaewa pekakomokáē parátixi. Pong nakua itorobiya peewatsiwin jopa bewa exanáē tsane xua barapomonaē kaibeya peponaewa Egipto nakua beya. Pong nakua itorobiya peewatsin bewa kaponáē pekóbetha Nakom pía peitorobi koyenewa tatsi yawa bewa bárapo diwesi daxita matakabi yorobéibina.

2

Barichi Moisés barapomonaetha yábara tsipaeba Nakom pía peitorobi jume pía petapaebiwichi. Moisés tsipaeba jeye:

—Yábara naitawatsiya pataema poxonaē ichüng paeba xua pinae Nakom pía peitorobi jume pepaēbin penaexanaewa. Naitawatsiya patáemano xua icha bara metha be pókotsin xua penayábara jumekuiwetsiya exanaewa xua icha be pókotsi koyeneya báyatha paeba xua ichikuitha metha saya náeraba.

”Bara barapoxonaē payaputáename icha bara barapong xaniwaicha pong Nakom pía peitorobi jume pepaēbin, pong báyatha Nakom itoroba, ichikuitha metha bapong, pong saya naerabiya pepaēbin. Bara Nakom tüpa kana exanaena pomonaē xua naerabiya jeye: ‘Ápara xang pongxaein Nakom peitorobi jume tapaebin tana neitoróbixae’, jei. Barichi Nakom tüpa kana exanaena pomonaē jeye: ‘Ápara xang pongxaein icha nakomüng tayábara kueikueijein’, jei, jei Moisés.

3

Barichi Moisés barapomonaetha tsipaeba jeye:

—Jopa paponaeinde pomonaetha, pomonaē xua peyábara wüünae yaputaewi pokotsiwa xua bexa exanaena, xua bapoxonaē irü paiña neyaputaenexa, tsipéi bárapo koyene Nakom aichaxaibi. Bárapo koyene icha nakuapiwi ba exaneiba, jei Moisés.

4

Barichi matáütano Moisés tsipaeba Israel pía pemómoxi susato jíwitha tatsi jeye:

—Kaentakabi tsane Nakom pákata itorobina pong Nakom pía peitorobi jume pepaēbin, pókotsin ichi be xang ichin. Bapong yábara paka tsipaebina pokotsiwa xua Nakom peichichipaewa xua paiña neexanaewa tsane. Poxonaē icha jopa pae-xanaem tsane pokotsiwa bapong paka itoroba bara Nakom paka yaiñabina jei tsane: ‘¿Eta xua metha jopa pana nejumekowüntsims?’ paka jei tsane, jei Moisés.

5

Barichi Moisés tsipaeba Israel pía pemómoxi susato jíwitha tatsi jeye:

—Paka itaküüpa xua átene paiña neexanaewa bapongtha, pong abe éxana, saya poxonaē icha aiña pongbe, ichikuitha xua icha akoibi pongbe, matha yábara páebabe pokotsiwa bapong éxana pewünaeya xua átene paiña neexanaewa tsane penatsikuentsexae bapong.

6

Barichi Moisés ekeicha tsipaeba icha koyenéwangno Israel pía pemómoxi susato jíwitha tatsi xua jeye:

—Icha ichüing asiya pakobematatabarútame paiña nebexubinexa pong bichokono abe peexanaeinxae, kaena bárapo matakábitha bewa bapong petüpaein bichoina pajontsíname, yawa petüpaein pamüthüthü xubíname. Bewa baxua paexanaem tsipéi Nakom yábara nantaxeina xua bárapo abe peéxanae koyenewa, xua bapong éxana, ápara bichokono abe.

”Icha patáneme koto xua peyapupunaein tobüboka, xua ichikuitha peweinxi yabobena, barapoxonae paka itaküüpa xua petobü panótame, ichikuitha xua peweinxi panótame. Íchitha pakópare xua yapurunaena koxiwa xua ekeicha penaforsinexa poxonae nebota.

”Amonitamonaie irü moabitamonae jopa jüpaetsi xua penaexanaewa tsane Israel pía pemómoxi susato jiwi tatsi piamonae tatsi, tsipéi barapomonae Balaam pentoma katsíbatsi xua Israel pía pemómoxi susato jiwi tatsi abe peyábara paebinéxatsi.

”Poxonae pakakuitapóname uvakuéi pabi, xua ichamonae pía uvakuéi pabi, bara paka itaküüpa xua paiña nexunaewa uvakuéi, xua paiña nexaenexa pábitha. Uvakuéi pabi pexeinaein baxua jopa bewa yábara nantaxeinae xua ápara bara pakáibame. Íchitha jopa yábara paka kopatsiyo xua payaúnbo ukubóbame uvakuéi xua pakáponame paiña bongtha xua bexa tsane paiña nexaewa. Barichi barapókotsi koyeneya jopa paexanaeinde xua pókotsi peübiwang xua trigoxú xua ichikuitha barichi xua ichawang xua peübiwang.

”Icha pebin pong paxam jíwana, icha bapong pisheuri xuba xua poxoru bapowa abe éxana yawa píabo weya icha pukópata, bapong bewa píowa katsina papera xua po papératha píowa tsipaeba xua jei: ‘Xam abe éxaname daxota kaxotsi. Ánoxuae yatsikaewa jopa tapetsiriwam tsane’, xua jei bárapo papératha.

”Paxam jíwana dapong aibi pong átene kana exanaena ichüing xua poxoru koxiyei jiwi abe peexanaexae, xua ichikuitha pía pexui tatsi abe peexanaexae. Ápara jame pebin bewa átene paexanaem poxoru bapong piakoya xua abe peexanaexae.

”Jopa bewa ichüing náewatha pakuainchim, xua poxonae beyakaincha cuarenta pokuíyobe, xua poxoru abe peexanaexae.

”Jopa bewa buey pawano atsim poxonae pexu xutanakapona xua pebebainexa pentapepe. Bewa pakopatsim xua pexu bewa xaena icha jainpa.

”Icha pebin tüpa, yawa píowa kuenta tüpa, yawa aitaexuiya tüpa, barapong pong petüpaexae bewa pweicho pekoutha tapoponaetsi. Pexuyo pebinwüüto, po pexuyo xua barapowa kopiya tanakatsíwatsi, bara bewa yábara nantaxeinae xua bárapo pexuyo ápara pexanto tatsi, pong petüpaexae. Bárapo koyeneya bapong, pong petüpaexae, pía pemómoxi susato jiwi xeinaena, xua barapomonae pichina ira, po ira xua bapong pía ira tatsi.

Meje yábara poxonae Moisés muxuweta Israel pía pemómoxi susato jíwitha tatsi pewünaeya xua tüpa

(Deuteronomio 27—30)

Poxonae bara imoxoyo tüpa, Moisés matha muxuweta Israel pía pemómoxi susato jíwitha tatsi, jeye:

newerapaewa tsane. Paitapere pokoyene xua bapoxonae ayapusüüya paiña neji-nompaewa tsane.

”Nakom paantobeinde yáwano jumekowüntsiya paexande pokotsiwa Nakom itoroba. Icha jopa jumekowüntsiya paexanaem tsane pokotsiwa Nakom itoroba, yawa icha wüünae pajainchíname icha nakomüng, Nakom paka tsi-itorobina pokoyenein xua jopa xaexaenakaeyo. Bapoxonae daxita jiwi yaputaena xua Nakom átene paka kana éxana, pomonae Israel pía pemómoxi susato jiwi tatsi pam, xua múxuna paiña irang jopa xaexaenakaeyo. Nakom baxua peexanaewa tsane poxoru jopa paiña neyábara jumewetsimxae xua paiña neexanaponaewa xua báyatha payábara kuitsiwüünae muxudútame xua Nakom paiña netaexanaewa tsane.

”Íchitha icha ekeicha saya meisha Nakom wüünae pajainchíname, yáwano xua paiña neexanaewa pokotsiwa xua Nakom itoroba pía peitorobi koyenéwatha, bara Nakom wüünaeya pákata exanaena. Bara Nakom ekeicha kaibe paka matakaya tsane Canaán nakua beya. Nakom ekeicha xaniwaicha jinompa paka kana exanaena.

**Meje yábara poxonae Moisés tüpa irü xua Josué xuya
pentakaponaein náexana, xua pong Israel pía pemómoxi susato
jiwi tatsi pía pentakaponaein tatsi
(Números 27.12-23; Deuteronomio 31—34)**

Poxonae Moisés najumeweta xua muxuweta Israel pía pemómoxi susato jíwitha tatsi, barapoxonae Moisés barapomonaetha jeye:

—Báyatha ciento veinte po weibe xeinang yawa bara imoxoyo tüpaeinba. Poxonae tüpaein takoutha Josué naexanaena, pong paiña nepaka kanamataxeinaein. Bapong paka matakaponaena Canaán nakua beya. Pomonae peajüntükoyeneyapusüü jiwi pana naexanaponde xua daxita pam, jei Moisés.

Moisés daxita tina Nakom pía peitorobi koyenewang tatsi xua pokotsíwatha be papera xua matatoyorobapona. Barapoxonae kata levitamonaetha yáwano kátano penapatáe jíwitha, po penapatáe jiwi Israel pía pemómoxi susato jiwi tatsi muxuwetéibatsi. Moisés itoroba barapomonaetha jeye:

—Payorobéibare poxonae po wei xua penafinakáewatsi wei, xua poxonae siete po weibetha tsaibi, xua poxonae po fiesta matakábintha boutong akabéibatsi pomonaexaetsi Israel pía pemómoxi susato jiwi tatsichi xua jinómpatsi bárapo boutongtha kae semánatha. Jumedangweya payorobéibare po peitorobi koyenein xua báyatha tinang daxita wamonaetha xua pebiwi néxano, yawa yábüxi néxano yawa pexui néxano, jei Moisés.

2

Nakom tsipaeba, Moisés tsipáebatsi jeye:

—Moisés imoxoyo tüpáename. Josué wábare. Pana nabarü pondebe tabo beya xua chivonámüübo, jei Nakom.

Bara Moisés baxua éxana xua Nakom itoroba. Bara néxata Nakom naitüüta pia-botha, xua tsakinaebówatha naitüüta, yawa Nakom Josué tsipáebatsi jeye:

—Josué, antübüyapusüüya póponde. Jopa junuwinde, tsipéi xang kayanteibinchi. Kayawenaeinchi xua Israel pía pemómoxi susato jiwi tatsi jiña nematakaponaewa tsane Canaán nakua beya, jei Nakom.

Bapoxonae Nakom Moisés tsipáebatsi jeye:

—Moisés nekobetha matajáyabare Josué xua daxita Israel pía pemómoxi susato jiwí tatsi peitütha tatsi, xua jiwí peyaputaenexa xua jiña neitorobi koyenewa Josué kakuixeinaena, jei. Baxua Moisés éxana xua Nakom itoroba.

3

Bapoxonae Moisés irü Josué naxúnabe pewéi xua Israel pía pemómoxi susato jiwí tatsi tanaxúnatsi. Bárapo wei Nakom pía peajüntübükoyenesüüwa tatsi kanaxúnatsi yawa kanaxüna xua pemuxuwetsiwa xua jopa bewa nakuibarapentsi xua peexanaewa pokotsiwa Nakom itoroba.

Bapoxonae Moisés beta yábara paeba daxita Israel pía pemómoxi susato jíwitha tatsi xua barompaya pomonae doce po bicheitomonae matabüxübe, jeye:

—Bárabü Nakom paka yawenaena xua jüntemiya paiña nejinompaewa, jei Moisés.

Bapoxonae Moisés demuxuwa icha juiña, po demuxuwa pewüing Nebo. Bárapo demuxuwa weya itaküüpatsi xua petaewa Canaán nakua. Baraxota Moisés tüpa. Dapong aibi xua pong yaputane ichaxota pía müthü boka xua Moisés petüpaein. Bapong kaena báyatha pong toxenta yatsikaya Nakom pía peitorobi jume pepaebin, pong matakarakuanáebiya, xua Israel pía pemómoxi susato jiwí tatsi matakarakuanaebíyatsi.

Israel pía pemómoxi susato jiwí tatsi áwiya Moisés jopa yábara itanuwé kaewa dubenanaebíyatsi. Poxonae matapaiña barapomonae Moisés yábara itanuwé káewatsi, bapoxonae Josué náexana pong xua Israel pía pemómoxi susato jiwí tatsi pekanamataxeinaeinchi. Josué kátatsi peyaputáe koyenewa, Nakom kata.

Meje yábara poxonae Israel pía pemómoxi susato jiwí tatsi epatoya üngkabiya Jordán mene iya xua Josué matakápona

(Josué 1—5)

Bara Moisés báyatha túpaba. Nakom Josué tsipáebatsi xua bepa pinae Josué matakaponaena Israel pía pemómoxi susato jiwí tatsi icha muxunene beya, xua Jordán mene iya, xua Canaán nakua beya pepatsinexa. Bárapo nakua ápara po nakua yábara báyatha Nakom tsiwüünae muxuduta xua bepa pinae bárapo nakua Israel pía pemómoxi susato jiwí tatsi katsinchi.

Barichi Nakom báyatha yábara tsiwüünae muxuduta Israel pía pemómoxi susato jíwitha tatsi xua bepa pinae barapomonae yawenaeinchi xua peamanayabinexa daxita koyenein xua poxonae penabeibiwang xua poxonae naba exaneiba xua pexeinaenexa Canaán nakua. Daxota Josué bichokono muxuweta Israel pía pemómoxi susato jíwitha tatsi jeye:

—Payábara jüntanainéibare Nakom pía peitorobi koyenein tatsi. Bewa daxita payábara jumekuiya exanaem pokotsiwa Nakom itoroba pía peitorobi koyenéwatha, xain bapoxonae Nakom paka yawena, jei Josué.

Barapoxonae ekeicha Josué itoroba, Israel pía pemómoxi susato jiwí tatsi itoróbatsi, jeye:

—Panakuiwüünaere xua icha muxunene beya paiña nepatsinexa xua Jordán mene iya. Pomonae Rubén pía bicheito matabüxümonae tatsi pam, irü Gad pía bicheito matabüxümonae tatsi pam, irü Manasés pía bicheito matabüxümonae

jiwana tatsi pam, payábara nantanaxéinare xua báyatha Moisés paka katsiba-paeba irang, po irang ena ichaxota pokotsiwa xometo wekoina xua icha muxu-nene wétsina xua Jordán ménetha. Báyatha payábara tsiwüünae muxudúbame xua paponáename yawa xua payawenáename ichamonae, Israel pía pemómoxi susato jiwi tatsi, xua poxonae naba peexanaewa tsane pomonaetha, pomonae xua jinompa Canaán nákuatha, jei Josué.

2

Bapoxonae Josué itoroba pebin nakuéyatabe xua peyantabinéxabe Canaán nakua. Néxata bara barapongbe pónabe Jericó tómara beya yawa nantsiyataba yábüyo piabotha tatsi powa pesikuiweiweinaewa pebíwitha, bapowa piabotha tatsi. Bapowa pewüing Rahab.

Íchitha pong Jericó tómara peewatsin jumetane xua pinae pebiwi Israel pía pemómoxi susato jiwi tatsi pata Rahab piabotha tatsi, po pebiwi xua Canaán nakua yanabarúküpa. Bapong itoroba ichamonae Rahab piabotha tatsi pomonae petanakuichiwichi. Tómara peewatsin najumekaruta barapomonaetha xua barapomonae pejeinexa Rahabtha:

—Bárapo pebiwi painta putórobare, jei barapomonae xua najumekaruta pong Jericó tómara peewatsin.

Rahab kaena báyatha tsiwüünae yaputane xua barapomonae tapatsinchi piabotha. Daxota bapowa matsiyata, bárapo pebinbe matsiyatabátsibe, ichaxota xua bapowa nantatsún eta pokotsiwa pewüing linobotong xua paparuwa éxana, xua barapowa yerababeba piabómüxü tútutha. Poxonae barapomonae pata, po pebiwi pong Jericó tómara peewatsin itoroba, bárapo pebiwi barapowa yáíñabatsi:

—¿Ínkane pongbe patópabe? jei.

Rahab jumenota:

—Báyatha patópabe. Jopa yaputaeiño xua po nakua wérena pónabe. Báyatha pónabe weye, Jericó tómara weya, jei bapowa.

Bapoxonae barapomonae kaena naiña ponarúküpa xua bárapo pebinbe pepubarainaenexatsibe.

Bara néxata Rahab pona xua bárapo pebinbe petsipaebinéxatsibe, pongbe aun-xuae pematsiyabixáetsibe. Barapowa tsipaeba jeye:

—Bara yaputang xua Nakom daxita Canaán nakua Israel pía pemómoxi susato jiwi tatsi katsinchi. Panayawendebe xua icha ichin xua paka yawenatsibe poxonae paka matsiyabátsibe búpana. Tamonae bichokono junuwa. Paka kunuwa tsipéi báyatha pajumetang poxonae Nakom paka yawena. Panayábara nantanaxéinare poxonae papatsíname ekeicha xua tamatabüxüyo tabarüpanepaenexa, jei.

Barapowa baxua wüüka xua barapowa peyawenaenéxatsi xua poxonae Jericó tomarapiwi yotabinchi. Bara bárapo pebinbe pebürüya yábara nantaxéinabe xua bapowa wüüka. Bo, Rahab píabo tatsi, athawétsika tómara peyaputoxorota dutsiwa müxübürütha ungpoyi. Barapowa pita pemüüto. Bárapo pemüütotha bárapo pebinbe yamüüyorékatsibe xua ventana wéreka, xua barapowa píabo tatsi, po ventana pesato werukuiya xua tómara müxübürü deka. Barapowa bárapo pebinbe tsipáebatsibe jeye:

—Panantsiyabarebe untha akoibi po matakábibe pewünaeya xua poxonae kaibe panawibiyáename paiñamonaetha, jei.

Bárapo pebinbe jumenótabe:

—Ketoure bárapo ventánatha pemüito xua petsobiamüito. Daxita jiña mata-büxüyo barü nakaeture jiña botha. Bapoxonae daxita Israel pía pemómoxi susato jiwí tatsi xaniwaicha yaputaena xua bárapo bo ápara jiña bo. Daxota paxang jopa paka jutebi tsainchi poxonae tútutha páename, poxonae papatsin, jei.

Rahab jumenota bapongbetha jeye:

—Baxua exanaein, jei.

Bara bapoxonae pónatababe, pongbe yantababe Jericó tómara.

Barapoxonae bárapo pebinbe xua poxonae nantsiyábabe untha xua akoibi po matakábibe, barapongbe kaibe nawíyabe. Bara beyíyabe ichaxota Josué pópona xuano xua ichaxota jinompa ichamonae Israel pía pemómoxi susato jiwí tatsi. Bárapo pebinbe yábara tsipáebabe barapomonaetha jeye:

—Nakom naka yawena xua daxota daxita Canaán nakuapiwi naka kunuwa, jei.

3

Néxata Nakom Josué itoróbatsi xua Josué peitorobinexa, xua sacerdotemona peitorobinéxatsi, mene ítapa beya, xua Jordán mene, xua bara beya kaponaena caja, xua Nakom pía caja tatsi. Bara Josué baxua éxana. Kaena bapoxonae, poxonae sacerdotemona petáxutha kaxibarúkupa mene, bapoxonae naiña mene natsata éxanabe. Po mera yamene dangweideka, bárapo mera namene kaetubeka. Bekein irü bárapo dapaetha awüübo.

Sacerdotemona, pomona xuaunxuae kápona Nakom pía caja tatsi, barapomona mene tuwüütha umena beya poxonae matha daxita jiwí panenebiya icha muxunene beya. Barichi Josué itoroba pebiwi doce pongbe xua kaein jíwana tsíniya xua pomona doce po jiwí matabüxümonaebe xua daxita barompaya pebiwi penotsinexa ibótong, po ibótong pin ibótong. Bárapo ibótong bobena ménetha ichaxota sacerdotemona umena xua tuwüütha. Poxonae bárapo ibótong nota bapo pebiwi nantatsún jeba ichaxota xua akabina piaboxi.

Josué itoroba xua barapomona baxua peexanaewa xua daxita Israel pía pemómoxi susato jiwí tatsi pekayábara jüntanainaenexa bexa xua Nakom bichokono wüünae éxana, xua barapomona wüünae taexainchi, bárapo matakábitha. Néxata sacerdotemona, pomona kápona caja xua Nakom pía caja tatsi, barapomona icha muxunene benonoboiña, xua mene wenonoboiña, ichaxota pokotsiwa xometo beothopeibiya bara benonoboiña. Poxonae bárapo sacerdotemona nonoboiña, bapoxonae ekeicha pekoyo mene dangweideka xua ichaunxuae kopiya ichi xua mene dangweideka.

4

Pexui, po pexui báyatha nakatsiwa poxonae cuarenta po weibetha, xua poxonae Israel pía pemómoxi susato jiwí tatsi saya dubenanáebiya irasaina xuépana tsúrukuae nákuatha, bárapo pexui jopa withabichi xua pebinwüütoxi xua ichaxota nareixakaena xua poxonae ocho po matakabibetha tsaiibi tsane. Bárapo koyene jopa exanaeyo bekein báyatha Nakom Abraham tsipáebatsi xua pinae Abraham irü pía pemómoxi susato jiwí tatsi bewa exanaena.

Poxonae Israel pía pemómoxi susato jiwí tatsi icha muxunene beya pona xua Jordán mene iya, barapoxonae Nakom Josué itoróbatsi xua bepa pinae pebiwi

withabinchi. Baxua barapomonae éxana xua poxonae po wei po xometo xua nantakarukua.

Israel pía pemómoxi susato jiwi tatsi ba éxana Pascua fiesta matakabin poxonae catorce matakabi xua bárapo xométotha. Barapomonae trigoxú nota xua naweta, po trigoxú xuwa Canaán nákuatha xua peexanaenexa pan, po pan xua jopa xeinaeyo levadurabeno. Bárapo pan xane xua kae semánatha poxonae yapukaewa bárapo Pascua fiesta matakabin. Néxata Nakom éxana xua jopa othoparekae tsane itaboko wéreka po pexaewa maná matawüing tsipéi Israel pía pemómoxi susato jiwi tatsi jopa nantawenonaeyo bárapo pexaewa.

Meje yábara poxonae Israel pía pemómoxi susato jiwi tatsi amanayabeba, Jericó tomarapiwi amanayabébatsi

(Josué 6)

Jiwi pomonae jinompa Jericó tómaratha bichokono junuwa, Israel pía pemómoxi susato jiwi tatsi kuikunúwatsi. Daxita pomonae Jericó tomarapiwi, tómara tútutha jinompa pejunuwixae. Dapong aibi xua pejondenaewa xuano xua pejoniyaewa pesato beya. Peboupang xua tómara peyaputoxorota dutsiwa boupang xaniwaicha dangwéi exananoba. Néxata Nakom Josué tsita itúútatsi xua pokoye-neya bewa exanaena xua poxonae peyábara nabinexa Jericó tómara. Nakom jeye:

—Daxita jiña penawabchüü-exaneibiwi wábare yawa ichamonae sacerdotemona xua pekaponanexa tacaja xua pepa tacaja. Yawa pantawakaicha enapónare xua Jericó tómara peyaputoxorota dutsiwa. Báraxua paexande xua bara kaeto xua daxita matakabi tsaibi xua seis po matakabibetha. Bü ichamonae piaxoba kueikueije poxonae pantawakaicha enaponéibame Jericó tómara.

”Poxonae siete po matakábibe tsuxubi, bárapo matakábitha, siete pokuikoye-nabetha pantawakaicha enaponáename tómara. Poxonae pawetsíname baxua barapoxonae sacerdotemona bewa obina pía trompetang xua oveja xua penüing pía matetong. Bapoxonae, poxonae penawabchüü-exaneibiwi jumetaena xua oba, bárapo penawabchüü-exaneibiwi bewa daxita wawái tsane. Bapoxonae íratha jopiyaena pokotsiwa xua tómara peyaputoxorota dutsiwa.

”Daxita abe kana exanaein pokotsiwa xua xuang tómaratha xeina. Daxita jiwi pajutébare, yawa duweimonaein pajutébare. Tabohta pajébare daxita xua xuang pokotsiwang penáinwangtha kana éxana. Barapoxonae tómara pataure. Jopa bewa paxeinaem ichauxi xua xoxi xeina Jericó tómaratha, jei Nakom.

2

Josué daxita yábara paeba jíwitha xua báyatha Nakom bapong tsipáebatsi. Josué tsipáebano xua Israel pía pemómoxi susato jiwi tatsi bewa jutebina daxita Jericó tomarapiwi. Saya meisha pinae Rahab irü piamonae tatsi bewa yábara kuinantaxeinaeinchi xua jopa pejutebiwa tsainchi barapomonae, tsipéi bapowa báyatha yawena, xua yawenatsibe pongbe xua Jericó tómara yantababe. Bara baxua Israel pía pemómoxi susato jiwi tatsi éxana be pókotsi koyene báyatha Josué tsipaeba.

Bara Israel pía pemómoxi susato jiwi tatsi yakaincha matawakaicha enapona Jericó tómara xua bara kaeto tsaibi xua beya seis po matakábibe. Poxonae nama siete po matakábibe tsuxubi bárapo matakábitha yakaincha matawakaicha enapona siete pokuibobetha. Bara néxata sacerdotemona oba pía trompetang.

Barapoxonae pomonae penawabchüü-exaneibiwi wawái. Barapoxonae báraxua jopiya xua Jericó tómara peyaputoxorota dutsiwa. Barapoxonae kaena naiña Israel pía pemómoxi susato jiwi tatsi, pomonae penawabchüü-exaneibiwi, jojoniya Jericó tomaratha yawa daxita jutébano, xua Jericó tomarapiwi jutébatsi. Yawa daxita múxuna jutébano duweimonaein. Saya meisha Rahab jopa bexubichi, yawa piamonae matabüxüyo tatsi jopa tajutebichi.

Pebinbe nakuéyatabe, pongbe xua báyatha Jericó tómara yantababe, bapongbe siwáyabe, Rahab siwáyatsi, yawa piamonae tatsi tasiwayíyatsi. Bapongbe kapónabe, Rahabbarü kapoinchi, ichaxota Israel pía pemómoxi susato jiwi tatsi piaboxi tatsi beya. Bara néxata Israel pía pemómoxi susato jiwi tatsi pin ishoto éxana xua tauta Jericó tómara.

**Meje yábara poxonae Israel pía pemómoxi susato jiwi tatsi
yábara naba éxana Hai tómara**

(Josué 7—8)

Kaein Israel pía pemómoxi susato jiwi tatsi jíwana jopa exanaeyo pokotsiwa báyatha Nakom itoroba poxonae nota pokotsiwang xua xeina Jericó tomarapiwi, bekein báraxua Nakom kobe-itaweta. Bapong pewüng Acán.

Bapong Acán tane xua pépato xua oro nain yawa plata nain parátixi xua peka-komokáe parátixi. Yáwano táneno paparuwa xua peitüpanáe paparuwa, pokotsiwa xua be ruana matawüng. Bapong bichokono ichichipa nawita xua penotsinexa daxita baxuang. Bara bapong daxita kápona, yawa daxita baxuang múthüka íra-tha ichaxota piabo táungkuatsi. Ichamonae jopa yaputaeyo pokotsiwa xua bapong éxana.

Pírapae bapoxonae, Israel pía pemómoxi susato jiwi pía penawabchüü-exaneibiwi tatsi yótaba, xua yótabatsi po tómara pewüng Hai tomarapiwi. Poxoru yáitama jopa pin tomariyo daxota jopa itorobiyo daxita pomonae penawabchüü-exaneibiwi. Poxonae pomonae penawabchüü-exaneibiwi xua Israel pía pemómoxi susato jiwi tatsi yótaba, xua yótabatsi Hai tomarapiwi, pebiwi xua Hai tomarapiwi pía tómara bichokono dangweya arárana yawa amanáyaba, xua pomonae Israel pía pemómoxi susato jiwi pía penawabchüü-exaneibiwi tatsi amanayabapéntatsi.

Bárapo matakábitha treinta y seis pongbe jutébatsi xua pebiwi. Poxonae báraxua éxana barapoxonae Israel pía pemómoxi susato jiwi tatsi ajüntükoyenefaetabí bichokono. Daxota Josué yábara yáñnaba báraxua Nakomtha jeye:

—Nakom ¿eta pokotsiwa metha pana amanáyaba Hai tomarapiwi? jei.

Nakom Josué jumenótatsi jeye:

—Jopa paamanayabim poxonae naba paéxaname bárapo Hai tomarapiwi poxoru ichüng paxam jíwana pam jopa exanaeyo pokotsiwa báyatha paka itoróbatsi. Itorobang xua paiñamonae jopa bewa notsi tsane pokotsiwang xeina Jericó tomarapiwi, jei Nakom.

2

Icha matakábitha kaemúmbosha, barapomonae ibótixi bebeya yawa wüüka Nakomtha xua Nakom pekowainexa pong xua abe kana mataéxana xua barapomonae jíwana. Bara kopiya Nakom matha itapeta po bicheito matabüxü

xua Judá pía bicheito matabüxü tatsi. Bapoxonae ekeicha itapeta icha matabüxüyo, xua pomatabüxüyo bárapo bicheito matabüxü jíwana. Barapoxonae ekeicha yatsikaewa Nakom itapeta, Acán itapétatsi. Josué yáñnaba bapong jeye:

—¿Eta pokotsiwa éxaname? jei.

Bapoxonae bapong Acán daxita yábara paeba pokotsiwa xua éxana. Nóxata Acán kapoinchi aishowa beya, Israel pía pemómoxi susato jiwi tatsi kápona xua barapomonae piaboxi weya. Bapong yawa múxuna kapoinchi daxita pokotsiwa xua bapong xeina, yawa múxunano xua xuang báyatha nota Jericó tómaratha. Bapong Acán bexotsi, ibówatha tüpa éxanatsi.

Bapoxonae Nakom tsipaeba, Israel pía pemómoxi susato jiwi tatsi tsipáebatsi, xua Hai tomarapiwi peyotabinéxatsi. Nakom itoroba xua Israel pía pemómoxi susato jiwi tatsi aiña bichéitobe peexanaenexa pomonae penawabchüü-exaneibiwi. Ichamonae, pomonae penawabchüü-exaneibiwi bicheito naematadüküpa.

Barapoxonae bárapo bicheito pomonae penawabchüü-exaneibiwi barapoinchi, Hai tomarapiwi barapona. Nóxata ichamonae, pomonae xua icha bicheito jíwana, po bicheito xua nantsiyata umena ichaxota imoxoyo tómará, barapomonae bará tómará beothopiya yawa barapomonae tómará tauta.

Barapoxonae pomonae penawabchüü-exaneibiwi xua Israel pía pemómoxi susato jiwi tatsi pomonae xua muxuitorobeiba, xua Hai tomarapiwi muxuitorobéibatsi xua bepa pinae ápara dúküpa, bárapo penawabchüü-exaneibiwi bewa kaewa patsi Hai tómaratha. Yawa bara barapomonae bewa yotabí, Hai tomarapiwi bewa yotabichi. Bewa Hai tomarapiwi daxita jutebichi.

Barapoxonae jame Nakom namchi xua barapomonae Israel pía pemómoxi susato jiwi tatsi barái cheibichi xua pinae barapomonae bara itakúüpatsi xua penotsiwa tsane vacang yawa icháwangno xua xuang wekobexuneba poxonae juteba, xua Hai tomarapiwi jutébatsi.

3

Poxonae báraxua nakuiyapuweta, barapoxonae Josué altar matawüing éxana xua duwéi petautsinexa xua Nakom nexa. Báraxua ibowang ákaba xua ichaxota po demuxuwa pewüing Ebal. Bara baxota Israel pía pemómoxi susato jiwi tatsi duwéi juteba xua be ofrendang matawüing, po ofrendang xua Nakom ompiwang pekatsibíwatsi. Icha ofrendang matawüing, po ofrendang xua petsabiwa duwéi.

Josué tina ibótongtha baraxota xua Nakom pía peitorobi koyenewang tatsi, po peitorobi koyenewang Nakom taitoroba, xua Moisés taitoróbatsi.

Josué jumedangweya yóroba xua daxita Israel pía pemómoxi susato jiwi tatsi pejumetaenexa. Josué yábara yóroba xua Nakom beta exanaena Israel pía pemómoxi susato jíwitha tatsi xua icha barapomonae jumekowüntsiya exanaena pokotsiwa itoroba bárapo peitorobi koyenein. Matáütano Josué yábara yóroba xua Nakom abe exanaena barapomonaetha icha jopa yábara jumekowüntsiya exanáe tsane pokotsiwa itoroba bárapo peitorobi koyenein.

Josué itoroba barapomonaetha xua barapomonae bewa exanaena xuaunxuae xua bapong paeba tsipéi báyatha Moisés Josué kui-itoróbatsi báraxua pewünaeya xua poxonae tüpa.

Meje yábara poxonae Gabaón tomarapiwi Israel pía pemómoxi susato jiwí tatsi muxujaiñabébatsi

(Josué 9)

Po tómara pewüing Gabaón tómara, bárapo tomarapiwi, barapomonae bichokono Israel pía pemómoxi susato jiwí tatsi kunúwatsi. Gabaón tómara, bárapo tómara eka Canaán nákuatha.

Barapomonae báyatha jumetane xua Nakom Israel pía pemómoxi susato jiwí tatsi yawénatsi poxonae yábara naba éxana aiña tómarang, yáwano xua múxuna jutébanu jiwí. Barapomonae aichaxaibi xua bara pebarichinexatsirü, daxota barapomonae Israel pía pemómoxi susato jiwí tatsi muxujaiñabébatsi.

Barapomonae paparuwang namaxátaba xua peru paparuwang, yawa pan kajinjinka xua axumáinbatsi. Bara Israel pía pemómoxi susato jiwí tatsi siwapoinchi. Barapomonae Israel pía pemómoxi susato jiwí tatsi tsipaebébatsi, jeye:

—Tajü wérena pata ponaewi. Josué, painta éxande xua peyábara tsiwüünae muxudutsiwa xua waxainchi wanayawenaenexa tsane, jei.

Israel pía pemómoxi susato jiwí tatsi baxua éxana, íchitha barapomonae jopa yábara wüükaeyo Nakomtha xua barapomonae peyawenaenéxatsi, xua Nakom peyawenaenexa. Israel pía pemómoxi susato jiwí tatsi yábara tsiwüünae muxuduta xua peyawenaewa tsane, xua Gabaón tomarapiwi peyawenaewa tsainchi, yawa xua jopa penajutebiwa tsane, xua Gabaón tomarapiwi jopa pejutebiwa tsainchi.

Poxonae akoibi po matakábibe yapukaewa Israel pía pemómoxi susato jiwí tatsi yaputane xua barapomonae ápara Canaán nakuapiwi. Néxata jopa daxua nantaxeinaeyo tsipéi báyatha Israel pía pemómoxi susato jiwí tatsi yábara tsiwüünae muxuduta xua bepa pinae jopa jutebi tsane barapomonae. Daxota Israel pía pemómoxi susato jiwí tatsi jopa itaküüpaetsi xua pejutebiwa barapomonae.

Pírapae Israel pía pemómoxi susato jiwí tatsi barapomonaetha kana éxana xua pomonae amanaya pía petanakuiteibíwichi. Barapomonae Israel pía pemómoxi susato jiwí tatsi isho tanakuitéibatsi, yawa merang tajoteibatsi.

Meje yábara poxonae Israel pía pemómoxi susato jiwí tatsi amanayabeba aiña tomarangpiwi poxonae naba

(Josué 10–12)

Pong xua Jerusalén tómara itorobiya peewatsin jumetane xua Gabaón tomarapiwi yábara tsiwüünae muxuduba Israel pía pemómoxi susato jíwíthatsi xua bewa pinae jopa penajutebiwa tsane xua bepa pinae maisha nayawenaena. Pong Jerusalén tómara itorobiya peewatsin baxua aichaxaibi xua Gabaón tomarapiwi éxana.

Daxota bapong kaetuta ichamona, pomona irü icha tómarang itorobiya peewatsiwi xua cuatro po tómarangbe, pomona xua kaemona penabarü naexanaewi. Bara néxata nakaetuta xua kaemona peexanaewa pía penawabchüü-exaneibiwi exaneibi tatsi xua néxata cinco po tómarangbe. Bara bárapo pía penawabchüü-exaneibiwi exaneibi tatsi pona xua penabinexa Gabaón tomarapíwíthatsi. Néxata Gabaón tomarapiwi Israel pía pemómoxi susato jiwí tatsi wüükatsi xua peyawenaenéxatsi, tsipéi báyatha nabarü nayábara tsiwüünae muxuduba xua panayawenaenéxabe.

Nakom Josué tsipáebatsi xua bepa pinae yawenaena xua Josué peamanayabiwa tsane poxonae naba exanaena. Bara néxata Josué kaetukáetuta pía penawabchüü-exaneibiwi. Bara yawa pona xua penabiwa tsane. Nakom peyawenaexae, daxota Israel pía pemómoxi susato jiwi tatsi juteba pomonaein penawabchüü-exaneibiwi, xua cinco pomonae matabüxübe, pomonae tómará peewatsiwi barapomonae pía penawabchüü-exaneibiwi exaneibi tatsi.

Matáütano Israel pía pemómoxi susato jiwi tatsi dúküpa éxana pomonae nakópaba, pomonae jopa werapaeyo. Matáütano pomonae penawabchüü-exaneibiwi, pomonae Israel pía pemómoxi susato jíwixae tatsi pubaráineba, yawa jutébano pinmonae.

Matáütano Nakom yawena xua peitaboko wétsika othopeika éxana xua be pepatong xua bichokono pin wang xua baxotang aiña pebiwi jutébatsi, xua pinmonae beyakaincha xua pókotsi bicheito Israel pía pemómoxi susato jiwi tatsi juteba.

2

Bárapo matakábitha Nakom ekeicha icha koyene éxana Israel pía pemómoxi susato jiwi tatsi nexa. Josué wüüka Nakomtha jeye:

—Nakom, matakabi ekeicha pin matakabi éxande xua ekeicha pata nabaponaewa tsane, jei Josué.

Nakom éxana xua xometo poto átsato narúntaba naexanaduta xua aiña hórangtha.

Israel pía pemómoxi susato jiwi tatsi amanayabeba ichamonae, pomonae penawabchüü-exaneibiwi, pomonae pía peaitafaetabíwichi. Barapoxonae barapomonae ekeicha pona icha tómarang beyiya xua pomonae cinco pomatabüxübe, pomonae tómarang itorobiya peewatsiwi, barapomonae pía tómarang tatsi. Bari-chi barapomonae Israel pía pemómoxi susato jiwi tatsi pona icha pepa tómarang beya yawa po tomarixi ichaxota tsiki tomarixi. Barapomonae Israel pía pemómoxi susato jiwi tatsi amanayabeiba daxita tomarangpiwi poxonae naba exaneiba.

Barapomonae, Israel pía pemómoxi susato jiwi tatsi, jiwi jutebéibano nawita, pomonae jinompeiba pepa tómarangtha yawa pomonae jinompeiba ichaxota po tomarixi tsiki tomarixi. Yawa jutébano cinco pongbe pomonae itorobiya peewatsiwi pepa tómarang.

3

Iriü icha tómará, po tómará xua pepa tómará, bárapo tómará pewüing Hazor tómará. Pong xua bárapo tómará itorobiya peewatsin, bapong jumetane xua juiña nabenouta. Barapoxonae bapong kaetuta pinmonae, pomonae írürü pía pepa tómarang itorobiya peewatsiwi, pomonae xua bichokono dangwéi. Daxita barapomonae kaetuta pía penawabchüü-exaneibiwi exaneibi tatsi, kawayumonaeinno, yawa kawayu pekaponaeáexino xua po naexi penabiwánexa. Bara barapomonae pona xua penabinexa Israel pía pemómoxi susato jíwitha tatsi.

Nakom Josué tsipáebatsi xua bepa pinae Josuebarü jopa kunuwi tsane barapomonaetha xua poxoru tsipéi Israel pía pemómoxi susato jiwi tatsi baya tsane amanayabina barapomonaetha.

Bara barapoxonae Josué pía penawabchüü-exaneibiwi matakápona. Néxata bara barapomonae itabenaekaeaya yótába pía peaitafaetabíwichi. Bara Israel pía

pemómoxi susato jiwi tatsi amanáyaba, yawa jutébanano daxita, yawa tatautebano po naexi, kawayu pekaponae naexi, xua po naexi penabewanexa. Matáütano tataxutserapa ukubobeba kawayumonaein.

Bapoxonae Josué barü pona pía penawabchüü-exaneibiwi Hazor tómara beya. Bara amanayabeba xua pomonae baxota jinompa Hazor tómaratha. Matáütano jutébanano daxita, yawa bárapo tómara tautano. Bapoxonae Josuebarü pona yawa abe éxana icha tomarixi, yawa icha tómarang xua pepa tómarang. Yawa daxita jutébanano jiwi. Íchitha Josuebarü bara nota vacang yawa icháwangno xua barapomonae tayeba.

Bara baxua barichi xua poxonae Josué irü pía penawabchüü-exaneibiwi tatsi xua Israel pía pemómoxi susato jiwi tatsi yábara amanáyaba aiña irang po irang xua pepa tómarang, bárapo tómarang pía irang tatsi.

Meje yábara poxonae Josué irang taira tsaba Israel pía pemómoxi susato jiwi tatsi nexa, pomonae doce po bicheito matabüxümonaebe

(Josué 13—22)

Josué matakápona, Israel pía pemómoxi susato jiwi tatsi matakapoinchi. Barapomonae Israel pía pemómoxi susato jiwi tatsi jopa kuinaya benetsiyo xua poxonae yábara naba éxana Canaán nakua. Aiña dapaein peyapukaewa ponaexae, Josué bichokono penapataein náexana. Nakom Josué tsipáebatsi xua pinae bekein jopa nakuibarapentsiyo xua yábara naba éxana Canaán nakua, bapong bewa irang taira tsabina xua pomonae nueve po bicheito matabüxümonaebe nexa yawa ichamonae nexa, pomonae xua Manasés pía pemómoxi susato jiwi jíwana tatsi. Daxita barapomonae kataunxuae jopa xeinaeyo irang.

Eleazar, pong sacerdotemona pía pentakaponaein tatsi, irü Israel pía pemómoxi susato jiwi tatsi matabüxümonaexi pía pekanamataxeináewichi tatsi, daxita barapomonae yawena xua irang tsaba. Matáütano ibótixi kopababa peyaputaenexa xua ira pong nakanaba.

2

Pebin pong pewüng Caleb, bapong áwiya pópona. Bapong Caleb jíwana pomonae doce po pebiwimonaebe, po pebiwi xua báyatha yantabarúküpa Canaán nakua xua poxonae aena kopiya. Barapong Caleb jüntükoyene tsakáraba, Israel pía pemómoxi susato jiwi tatsi jüntükoyene tsakábatsi xua áwiya peyábara naba exanaewa tsane Canaán nakua. Kaena báyatha Moisés yábara tsiwüünae muxuduta xua Caleb xeinaena irang po irang báyatha yantabeiba poxonae taiba. Daxota Caleb wüüka, Josué wüükatsi, xua pekatsiwa tsainchi bárapo ira jíwana, xua Canaán nakua ira jíwana, xua po ira báyatha Caleb nayántaba.

Josué bara yábara jejéi yawa bara Caleb kátatsi xua po tómara pewüng Hebrón tómara. Bara néxata Caleb pona, yawa naba éxana jíwitha pomonae xua jinompa bárapo Hebrón tómaratha. Yawa bara yábara amanayabaxuba ira. Caleb bapong Judá pía pemómoxi susato jiwi jíwana tatsi. Caleb pía ira xeina, xua po ira Judá pía pemómoxi susato jiwi tatsi báyatha xeina, bárapo ira jíwana. Bárapo ira pokotsiwa párowa wekeina xua ichaxota “sur”, jei, xua Canaán ira wétsina. Baxota Jerusalén tómara tütutha eka.

Íchitha Judá pía pemómoxi susato jiwi tatsi jopa itaküüpaetsi xua peamanayabiwa pomonaetha, pomonae pewüng jebuseomona, pomonae jinompa Jerusalén

tómaratha. Bara néxata Judá pía pemómoxi susato jiwi tatsi saya néxata najinompa baxota xua jebuseomonae pía xantha tatsi.

Ichaxota xua pokotsiwa weyabeicha xua ichaxota “norte”, jei, xua Canaán íratha, bárapo ira Efraín pía pemómoxi susato jiwi pía ira tatsi. Barichi Manasés pía pemómoxi susato jiwi tatsi, pomonae kataunxuae irang jopa xeinaeyo, ira nota bara beicha xua ichaxota “norte”, jei. Bárapo aiña bicheitomonaebe, barapomonaebe pía jiwi tatsi nantaxeina xua be barapomonae jopa bichokono tsita pin írathi. Íchitha Josué tsipaeba barapomonae jeye:

—Bara paka itaküüpa xua paiña notsiwa demuxuwang xua po demuxuwang imoxoyo ena, icha kopiya barapomonae dúküpa paéxaname, pomonae xua baraxota jinompa, jei Josué.

3

Barapoxonae Israel pía pemómoxi susato jiwi tatsi Nakom píabo tatsi nota xua chivonámüübo Silo tómaratha, xua pepa tómara. Yawa barapomonae najüntükui weta xua irang tatsabina ichamonae xua siete pomonae bicheito matabüxübe, po irang xua nakópaba. Néxata ichamonae pebiwi itoróbatsi xua siete po írabe peexanaenexa, po ira xua báyatha nakópaba. Bárapo siete po bicheito matabüxübe ibótixi kopababa peyaputaenexa pong xua ira nakanaba.

Simeón pía pemómoxi susato jiwi tatsi, irü Benjamín pía pemómoxi susato jiwi tatsi, barapomonaebe irang nota ichaxota imoxoyo Judá pía pemómoxi susato jiwi tatsi, barapomonae pía irang tatsi. Zabolón pía pemómoxi susato jiwi tatsi, irü Isacar pía pemómoxi susato jiwi tatsi, irü Aser pía pemómoxi susato jiwi tatsi, irü Neftalí pía pemómoxi susato jiwi tatsi, irü Dan pía pemómoxi susato jiwi tatsi, daxita barapomonae bichokono pin irang nota xua ichaxota pokotsiwa weyabeicha xua ichaxota “norte”, jei.

4

Barapoxonae sacerdotemonae irü levitamonae katsibébatsi cuarenta y ocho po tómarangbe, xua pepa tómarang, tsipéi barapomonae kaena báyatha jopa xeinaeyo pía irang. Barapomonae bárapo tómarang jíwana itapeta seis po tómarangbe, xua be po tómarang xua ichaxota jintong nakapanepa poxonae xua itatema bexuba ichüng. Bapoxonae bapong jopa pebexubiwa tsainchi xua poxonae peyantomatsíwatsi pong petüpaexae.

Poxonae nakobeweta xua ira tsaba éxana, bapoxonae Josué tsipaeba pebiwi pomonae Rubén pía pemómoxi susato jiwi tatsi, irü pomonae Gad pía pemómoxi susato jiwi tatsi. Barichi ichamonae jíwana tsipaeba Josué, pomonae Manasés pía pemómoxi susato jiwi tatsi. Pokotsiwa xua Josué tsipaeba daxita barapomonae-tha jeye:

—Bárabü paiña irang be panawibíyama. Báyatha wetang xua Moisés báyatha tsiwüünae muxudutang xua tapaka yawenaewa tsainchi. Pákata tsábatsi irang, po irang párowa beenareka xua ichaxota ‘oeste’, jei, xua Jordán mene wétsina. Pajumekowüntsiya éxande daxita xua Nakom pía peitorobi koyenewang. Paantobeinde Nakom, yawa pata éxande pía penakuichiwang tatsi xua daxita paiña nejüntübükoyenéwatha, jei Josué.

Meje yábara poxonae Josué najumekopiweta xua Israel pía pemómoxi susato jiwi tatsi muxuwétatsi

(Josué 23—24)

Bichokono Josué amo tsekæ. Daxota Josué daxita waba pomonae Israel pía pemómoxi susato jiwi tatsi pía pekanamataxeináewichi. Barapomonaetha Josué najumekopiweta xua muxuweta poxonae imoxoyo tüpa. Jeye barapomonaetha:

—Paxam báyatha payaputáneme xua Nakom paka yawena poxonae yábara naba paéxaname Canaán nakuapíwitha. Barapomonaetha paamanáyabame xua paiña nejnompæenexa bárapo nákuatha.

”Ánoxuæe bara meje paichaponéibinde: Daxita po peitorobi koyenewang xua Moisés naka kata bewa pajumekowüntsiya exanaponaem. Jopa kaemonaetha pana nabariü exanaeinde cananeomonaetha, pomonaetha áwiya jinompa dubenanáebiya icháwatha xua bárapo íratha. Barapomonaetha jíwanamonaetha jopa panakoyobinde.

”Matáütano jopa nakomüng wüünaetha pajainchinde xua cananeomonaetha pía nakomüng tatsi, po nakomüng jopa xaiñeyo. Icha bárapo koyenein jíwana paexanáename, Nakom jopa paka yawenaponaetha tsane xua poxonae payótame barapomonaetha. Nakom bara saya kopatsipa xua barapomonaetha bara enáetsipa xua bapoxonaetha Nakom yaputáetsipa icha abe paexanaetsípame ichi barapomonaetha ichi.

”Jüntübükoyene weiwéinatsi Nakomtha poxoruba wüünaetha jinompéibatsi. Íchitha icha jopa nayábara jumekuü exanaetsi pokotsiwa báyatha Nakomtha nayábara tsiwüünaetha muxudúbatsi xuano xua icha nakomüng wüünaetha jáintatsi po nakomüng jopa xaiñeyo, bapong Nakom bichokono naka kasebina. Bapong naka kobewepichina po ire, po ira báyatha bapong naka kata.

Josué yábara kanantanaxeina éxana barapomonaetha daxita pokotsiwa xua wüünaetha, pokotsiwa xua Nakom taéxana barapomonaetha pía pamo susato jíwitha tatsi xua Abraham weya. Barichi Josué yábara kanantanaxeina éxana barapomonaetha daxita xua xuang Nakom taéxana, xua barapomonaetha taéxanatsi. Barapoxonaetha Josué jumedangweya tsipaeba, jeye:

—Jopa wüünaetha pajainchinde icha nakomüng, po nakomüng jopa xaiñeyo. Jame meisha wüünaetha pajainde po Nakom xua yatsikaewa pepa Nakom, jei Josué.

Bara barapomonaetha jumejéi xua bepa pinaetha meisha wüünaetha jainchina po Nakom pepa Nakom. Barapoxonaetha Josué daxita barapomonaetha itoroba xua barompaya piabong beya penawibiyaenexa xua pía írangtha. Ira bárapo ira Israel pía pemómoxi susato jiwi tatsi barapomonaetha pía ira tatsi. Daxota bárapo ira jopa wüng unutaponaeyo po wüngtha xua: “Canaán”, jei. Jame bárapo nakua wüng unutapona po wüng: “Israel”, jei.

2

Barapoxonaetha pírapæe Josué tüpa. Josué ciento diez po weibe xeina poxonae tüpa. Bapong müthüthü xotsi ichaxota po tómara xua bapong pía tómara xua Israel nákuatha xua ichaxota po ira Efraín pía pemómoxi susato jiwi tatsi pía ira tatsi, tsipéi bapong Josué bárapo yajiwi susato jintong.

Poxonaetha kataunxuæe Josué pópona, Israel pía pemómoxi susato jiwi tatsi wüünaetha jainta Nakomtha. Barapomonaetha áwiya wüünaetha jaintapona Nakom poxonae kataunxuæe áwiya jinompa penapatáe jiwi. Bárapo penapatáe jiwi báyatha tane xua poxonae Nakom kata ira, xua barapomonaetha kátatsi.

Bárapo dapaetha Israel pía pemómoxi susato jiwi tatsi baxota José piwang müthúkatsi xua báyatha piwa kapoinchi, xua poxonae Egipto nakua weya piwa kapoinchi. Baraxota José piwang müthúkatsi xua Israel nákuatha ichaxota po íra-tha pía pemómoxi susato jiwi tatsi tajinómpatsi.

Meje yábara poxonae Israel pía pemómoxi susato jiwi tatsi tamrópata notarúküpa xua jopa jumekowüntsiya exanaeyo pokotsiwa Nakom itoroba

(Jueces 1.1—3.6)

Bara irü Josué tüparü, írürü wéraparü pomonae báyatha kuitane xua Nakom beta éxana poxonae Israel pía pemómoxi susato jiwi tatsi yawenéibatsi xua yábara amanáyaba Canaán nakua. Barapoxonae barapomonae, pomonae wérapa, barapomonae pía pexui tatsi tamrópata notarúküpa xua jopa jumekowüntsiya exanaeyo pokotsiwa Nakom itoroba pía peitorobi koyeneintha.

Daxota barapomonae jopa itaküüpaetsi xua daxita tómarang peyábara amana-yabiwa xua pepa tómarang, po pepa tómarang cananeomonae pía pepa tómarang tatsi. Matáütano barapomonae jopa jutebiyo pomonae baraxota jinompa. Matáütano barapomonae jopa ichipaeyo xua ekeicha penabewa icha pepa tómarangtha. Saya meisha barapomonae tamrópata notarúküpa xua nayábara tsiwüünae muxuduba cananeomonaetha. Israel pía pemómoxi susato jiwi tatsi wüüka barapomonaetha pekakomokáe parátixi xua daxota jopa abe exanáe tsane barapomonaetha. Daxota ichamonae, cananeomonae, jinompeiba Israel nákuatha.

Barapoxonae Israel pía pemómoxi susato jiwi tatsi tamrópata notarúküpa xua wüünae jainta icha nakomüng, po nakomüng xua pepa nakomüng aibi, po nakomüng cananeomonae wüünae jainteiba. Matáütano barapomonae tamrópata notarúküpa xua jitha peenaewa cananeomonaetha.

Bichokono Nakom anáepana, xua Israel pía pemómoxi susato jiwi tatsi kasébatsi, poxoru barapomonae jopa jumekowüntsiya exanaeyo pokotsiwa báyatha Nakom itoroba. Báyatha Nakom itoroba Israel pía pemómoxi susato jíwitha tatsi xua cananeomonae pejutebíwatsi. Matáütano Nakom itoroba xua Israel pía pemómoxi susato jiwi tatsi jopa jitha peenaewa cananeomonaetha. Itoróbano xua jopa peyábara tsiwüünae muxudutsiwa tsane xua kaemonae penayawenaewa tsane.

Itoroba xua Israel pía pemómoxi susato jiwi tatsi jopa wüünae pejainchiwa tsane nakomüng, po nakomüng xua pepa nakomüng aibi. Bekein Nakom daxita baxuang itoroba, dapo jumetha barapomonae jopa exanaeyo xua Nakom itoroba. Daxota Nakom najumekaruta matatsunpintha xua petapaebinéxatsi xua jeye:

—Jopa paka yawenáe tsainchi poxonae panábame cananeomonaetha tsipéi jopa pana nejumekowüntsim. Daxota kopatang xua cananeomonae áwiya jinompa paiña íratha, xua Israel nákuatha, xua tayaputaenexa tsane icha metha pata nanejumekowüntsiwam tsane, ichikuitha xua icha metha jopa pata nanejumekowüntsiwam tsane. Bara kaena barapoxonae weya bara cananeomonae paiña nepaka kaitafáetabi jiwi tsane, jei matatsunpin xua saya Nakom tapáebatsi.

Israel pía pemómoxi susato jiwi tatsi, poxonae báraxua jumetane pokotsiwa matatsunpin paeba, xua Nakom tapáebatsi, barapomonae bichokono najüntü-éxaba. Daxota Israel pía pemómoxi susato jiwi tatsi juteba duwéi xua be ofrenda matawüng xua Nakom nexa.

2

Israel pía pemómoxi susato jiwi tatsi barü jinompeiba Israel nákuatha cananeomona nae pomona xua kaena báyatha jinompa baraxota. Peexanaexae báraxua, daxota Israel pía pemómoxi susato jiwi tatsi wüünae jainta icha nakomüing, po nakomüing cananeomona wüünae jainteiba. Matáüta barapomona Israel pía pemómoxi susato jiwi tatsi jitha eenapona cananeomonaetha. Icha be pókotsi koyeneya Nakom báyatha yábara tsipaeba bárapo Israel pía pemómoxi susato jíwitha tatsi, bara barapomona amanayabébatsi pía peaitafaetabí jíwichi poxona naba, abeya kana exanebátsino.

Israel pía pemómoxi susato jiwi tatsi bichokono peaperüütanexae daxota wüüka Nakomtha xua barapomona peyawenaewa tsainchi. Nakom itoroba pomona juezmona, pomona pentakaponaewi xua Israel pía pemómoxi susato jiwi tatsi peyawenaewa tsainchi.

Poxonae pópona pong juezmonaepin, barapoxona Israel pía pemómoxi susato jiwi tatsi wüünae jainta Nakom, po Nakom xua yatsikaewa pepa Nakom. Íchitha poxonae pong juezmonaepin tüpa, Israel pía pemómoxi susato jiwi tatsi tamrópata notarúküpa xua wüünae pejainchiwa tsane icha nakomüing. Báraxuang barapomona saya ekeicha júpa exanapona aiña wei.

Meje yábara poxona Nakom itoroba pomona juezmona xua Israel pía pemómoxi susato jiwi tatsi pekanamataxeinaewa tsainchi

(Jueces 3.7—5.31)

Pomona xua Mesopotamia nákuatha jinompa, barapomona kopiya nantaéxana xua Israel nakuapiwi amanayabébatsi xua poxona naba éxana. Báraxua Nakom bara kópata xua Israel nakuapiwi amanayabébatsi, tsipéi barapomona tamrópata notarúküpa xua wüünae jainta icha nakomüing, po nakomüing jopa xaiñeyo. Daxota pong Mesopotamia nakua itorobiya peewatsin, bapong itorobiya éwata Israel nakua ocho po weibetha.

Daxota Israel pía pemómoxi susato jiwi tatsi wüüka Nakomtha, po Nakom xua pepa Nakom. Nakom itapeta pebin, pong pewüing Otoniel, pong Caleb peyüing tatsi, xua Israel pía pemómoxi susato jiwi tatsi pekapanenebiyaenéxatsi, xua Otoniel pekapanepaenexa.

Otoniel yawénatsi Nakom, daxota Otoniel naba éxana pongtha, pong Mesopotamia nakua itorobiya peewatsin. Bara Otoniel pía penawabchüü-exaneibiwi barü naba éxana yawa barü yótaba xua Mesopotamia nakuapiwi yótabatsi. Barapoxona Otoniel náexana pong juezmonaepin xua bapong Israel nakuapiwi pekanamataxeinaenéxatsi. Bapong Otoniel Israel pía pemómoxi susato jiwi tatsi kanamataxéinatsi cuarenta po weibetha. Barapoxona Otoniel bara tüpa.

2

Poxona Otoniel tüpa, ekeicha Israel pía pemómoxi susato jiwi tatsi abe éxana xua ekeicha jopa exanaeyo pokotsiwa Nakom itoroba pía peitorobi koyeneintha. Bapoxona ekeicha Nakom saya bara kópata xua Israel pía pemómoxi susato jiwi tatsi amanayabébatsi, xua pong Moab nakua itorobiya peewatsin amanáyaba, poxona naba éxana. Bapong, pong Moab nakua itorobiya peewatsin, itorobiya éwata Israel nakua dieciocho po weibetha.

Ekeicha Israel pía pemómoxi susato jiwi tatsi wüüka Nakomtha xua peyawenaenexa tsainchi. Bara Nakom itoroba icha juezpin, xua pong pewüng Aod itoróbatsi, xua pong Eglón pong Moab nakua itorobiya peewatsin pebexubiwa tsainchi. Nakom itoroba, Aod itoróbatsi, xua Israel pía pemómoxi susato jiwi tatsi peyawenaewa tsainchi, xua peyotsiwa tsane Moab nakuapiwi. Barapoxonae poxonae baxua yapukaewa Israel pía pemómoxi susato jiwi tatsi jüntema jinompa xua ochenta po weibetha.

3

Ichüing irü juezmonaepin náexana, pong Pekanamataxeinaein. Bapong pewüng Samgar. Bapong Israel pía pemómoxi susato jiwi tatsi yawénatsi. Bapong Samgar pinmonae juteba filisteomonae xua seiscientos po jiwimonaebe pokotsíwatha xua be naebo xua opisojei xuano xua kusira dukua.

4

Poxonae Aod tüpa barapoxonae ekeicha Israel pía pemómoxi susato jiwi tatsi jopa exanaeyo pokotsiwa Nakom itoroba. Bapoxonae ekeicha Nakom saya bara kópata xua pong cananeomonae pía ira tatsi itorobiya peewatsin bara Israel pía pemómoxi susato jiwi tatsi yotebinchi, xuano bara barapong barapomonae itorobiya peewatsiwa tsainchi.

Penawabchüü-exaneibiwi xua cananeomonae, bárapo penawabchüü-exaneibiwi pía pentakaponaeinchi pewüng Sísara. Bapong Sísara Israel pía pemómoxi susato jiwi tatsi abe kana exanéibatsi daxita wei xua veinte po weibetha. Ekeicha Israel pía pemómoxi susato jiwi tatsi wüüka Nakomtha xua barapomonae peyawenaewa tsainchi.

Bárapo dapaetha yábüyo pópona, powa juezmonaewayo náexana Israel nákuatha, powa kanamataxeina bárapo nakua. Barapowa pewüng Débora. Nakom najumekaruta barapówatha xua ichüing petsipaebinéxatsi icha pebintha, pong pewüng Barac. Daxota Débora tsipaeba bapongtha jeye:

—Kaeture penawabchüü-exaneibiwi, yawa barü ponde. Barü naba exandeno pongtha, pong pewüng Sísara. Bara yaputang xua Nakom xaniwaicha paka yawenaena xua paiña neamanayabiwa tsane Sísara, jei Débora.

Barac junuwa xua baxua exanaena pokotsiwa xua Débora itoroba. Barapong jumenota jeye:

—Bara naba exanaein icha saya jame pana yantsíname, jei.

Débora jumenota, Barac jumenótatsi, jeye:

—Moya daichi, naponaein. Poxoru xam junúwame daxota Nakom kopatsina, xua yábüyo kopatsinchi, xua Sísara pebexubiwa tsainchi. Jopa kakópatsi tsane xua nebexubiwa tsane bapong.

Barac irü Débora bara pónabe xua pía penawabchüü-exaneibiwi pekaetutsinéxabe, pomonae xua Israel pía pemómoxi susato jiwi tatsi jíwana. Bara barapomonae yótaba, xua cananeomonae yótabatsi. Íchitha Sísara panepa.

Bapoxonae Sísara pona bomüxütha penantsiyatarabinexa. Pebin, pong ceneomonaepin, bapong piabómüxü tatsi. Ceneomonae írürü Canaán nakuapiwi be kaemonae náexana xua penayawenaenéxabe. (Ceneomonae xeina piamonae xua Moisés píowa tatsi piamonae tatsi. Barapong xua ceneomonaepin kuenta wárapa piamonae. Yawa bapong pópona Israel nákuatha.)

Bapong jopa ekaeyo piabotha. Saya píowa tatsi eka botha, powa pewüng Jael. Bapowa Sísara wábatsi xua petajoniyaenexa tsainchi piabotha. Bapowa ápata, Sísara ápatatsi pemipi, yawa bapong matsiyatababótatsi. Ítara mexeya bapong yawenatsiwejei, íchitha ápara barapowa yawena, Israel pía pemómoxi susato jwi tatsi yawénatsi. Pírapae, poxonae Sísara maitungkua, bapowa penáintotha bapong matasipamatíbatsi. Bapong tüpataba.

Pirapaeyo Barac patopa bárapo botha xua Sísara pewenaweneinéxatsi. Barapowa petüpaein itüütabota, Barac tsita itüütabótatsi xua Sísara petüpaein. Bárapo matakábitha Israel pía pemómoxi susato jwi tatsi daxita amanayabeba, xua daxita cananeomonae amanayabébatsi. Bapoxonae Débora yawa Barac wei naxúnabe xua kanaxúnabe xua peyawenaexáetsibe, xua Nakom yawena. Bapoxonae poxonae weta baxua, Israel pía pemómoxi susato jwi tatsi jüntema jinompa cuarenta po weibetha.

Meje yábara poxonae pebin, pong pewüng Gedeón, Israel pía pemómoxi susato jwi tatsi kapanenebíyatsi poxonae yotébatsi, xua yoteba pomonae pewüng madianitamonae

(Jueces 6.1—8.29)

Poxonae Débora tüpa, barapoxonae ekeicha Israel pía pemómoxi susato jwi tatsi jopa exanaeyo pokotsiwa Nakom itoroba pía peitorobi koyeneintha. Nakom yawena, madianitamonae yawénatsi, xua barapomonae peamanayabiwa tsane poxonae xua naba éxana Israel pía pemómoxi susato jíwitha tatsi, xuano xua itorobiya peewatsiwa tsane barapomonaetha xua siete po weibetha.

Pinmonae pata pomonae madianitamonae irü amalecitamonae irü icha tomarangpiwi xua daxita barapomonae Israel pía pemómoxi susato jwi tatsi abe petayapabi exanaewa tsainchi, pexaewang yawa duweimonaein. Daxota Israel pía pemómoxi susato jwi tatsi jopa xeinaeyo xua penabanaewang.

Barapoxonae Israel pía pemómoxi susato jwi tatsi wüüka Nakomtha xua barapomonae peyawenaewa tsainchi. Nakom tsipaeba barapomonaetha jeye:

—Bichokono paaperaxatane tsurubenanaebiyam yáitama jopa paexanaem pokotsiwa tapaka itorobíwatsi. Yaitamano icha nakomüng wüünae pajáintame, po nakomüng jopa xaiñeyo, jei Nakom.

Dáichitha Nakom itoroba matatsunpin. Nakom jeye matatsunpintha:

—Tsipáebare pebin, pong pewüng Gedeón, bü bapong naba éxana pomonaetha, pomonae madianitamonae pía penawabchüü-exanebiwi tatsi. Matáütano bapong inta tsipáebare xua bü bapong wakaboba altar matawüng xua báyatha paxa tatsi éxana xua ichaxota duwéi tautathopa xua be ofrendang matawüng xua icha Nakom nexa, po Nakom jopa xaiñeyo, po Nakom pewüng Baal. Itorobareno xua bü bapong ekeicha pekoutha exananota ichawa xua altar matawüng xua xang nexa, po Nakomxaein pepa Nakomüng. Matáütano bü bapong vaca pebto bexuba xua inta petautsinexa xua be ofrenda matawüng, po ofrenda xua ompiwa tana nekatsiwa, jei Nakom xua matatsunpin tsipáebatsi.

Bekein Gedeón ichichipa xua peexanaewa pokotsiwa Nakom itoroba, íchitha bapong kunuwa pomonae paxa tatsi piamonae tatsi, írürü pomonae xua tomarapiwi. Daxota bapong báraxua saya mérawi éxana. Icha matakábitha xua poxonae kaemumbo, poxonae ichamonae báraxua tane pokotsiwa xua bapong éxana

mérawi, barapomonaē ichichipa xua bapong pebexubíwatsi. Íchitha Gedeón paxa tatsi tsipaeba barapomonaetha, jeye:

—Icha Baal xaniwaicha ápara pong pepa Nakom, bara itakúüpatsi xua piakoya penakapanepaewa, jei Gedeón paxa tatsi.

Daxota Gedeón panepa xua jopa beXuichi.

2

Barapoxonaē pinmonaē nakaetuta pomonaē xua madianitamonaē, irü amalecitamonaē, írürü ichamonaē, yawa barapomonaē pía penawabchüü-exaneibiwi pinmonaē éxana. Yawa barapomonaē piabómüxüng exananoba Israel nákuatha. Gedeón Nakom peyawenaexae, daxota bapong irü pía penawabchüü-exaneibiwi kaetuta xua bichokono pinmonaē. Íchitha Nakom tsipaeba bapongtha:

—Ápara bichokono kata pinmonaē, pomonaē penawabchüü-exaneibiwi, beya-kaincha xua nantawenóname xua jiña neamanayabiwa tsane, jei Nakom.

Daxota Gedeón namchi barapomonaetha jeye:

—Pomonaē xua pajunúwame moya kaibeya paponde paiña bong beya, jei Gedeón.

Íchitha penawabchüü-exaneibiwi áwiya bichokono pinmonaē tatsi. Daxota Gedeón kápona fetó mene beya xua bárapo penawabchüü-exaneibiwi mera pea-paenexa. Saya trescientos po penawabchüü-exaneibiwi exaneibíwibe, pomonaē mera pekóbetha kápona xua poxonaē apa. Icha penawabchüü-exaneibiwi pentabokotongtha umena xua peopiratongtha nauboba poxonaē apa. Nakom, Gedeón tsipáebatsi, jeichichi:

—Bárapo penawabchüü-exaneibiwi itoróbare xua piabong beya penawibiyae-nexa, po penawabchüü-exaneibiwi pentabokotongtha umena xua peopiratongtha nauboba poxonaē apa. Saya meisha pomonaē penawabchüü-exaneibiwi nata éxande, pomonaē mera pekóbetha kápona xua poxonaē apa xua trescientos pomonaēbe, jei Nakom.

Bara baxua Gedeón éxana, pokotsiwa Nakom itoroba. Bárapo merawitha, Gedeón daxita penawabchüü-exaneibiwi exaneibíwitha barompaya kata tsíniya trompetang yawa banaxuto xua mataxátata jurúwato. Barapomonaē baxuang kajjinka xua poxonaē pona ichaxota imoxoyo pomonaē pía peaitafaetabíwichi pía chivo namüüboxi taumeinchi. Gedeón pía trompeta oba, barapoxonaē irü daxita pía trompetang oba. Barapomonaē pía banaxutong matawé opiwakabarúküpa xua jurúwato xua bárapo banaxutong peyonoyoneinexa. Barapoxonaē yawa barapomonaē pebürüya wawái jeye:

—Nakom írürü Gedeón, jei.

Trescientos po penawabchüü-exaneibiwi exaneibíwibe xua Israel pía pemómoxi susato jiwí tatsi baraxota abü umena ichaxota xua imoxoyo pía peaitafaetabíwichi piaboxi taumeinchi. Barapoxonaē amalecitamonaē, irü madianitamonaē, írürü xua ichamonaē, barapomonaē itatema kaemonaē naba. Barapomonaē nonobadúküpa daxita, yawa kaena naiña dúküpa.

Ichamonaē penawabchüü-exaneibiwi xua Israel pía pemómoxi susato jiwí tatsi, xua jopa jiwaniyo po penawabchüü-exaneibiwi xua trescientos pomonaēbe, barapomonaē pata yawa pubaraina. Poxonaē báraxua exanempa ichamonaē Israel pía pemómoxi susato jiwí tatsi daxita yakaincha eena xua ichaxota itakúüpatsi

xua penantsiyabiwa pomonaexae xua pía peaitafaetabíwichi, pewünaeya xua Jordán mene epa-üngkababiyaena. Bara baxua peexanaexae daxota madianitamonaepinmonae jutébatsi írürü bexótsibe nakuéyatabe pongbe xua tómara itorobiya peewatsin.

Barapoxonae pírapae Gedeón irü pía penawabchüü-exaneibiwi tatsi xua trescientos pomonaebe, daxita barapomonaepinmonae Jordán mene epa-üngkababiya. Barapoxonae ekeicha wáetaba ichüngbe nakuéyatabe pongbe, pongbe tómara itorobiya peewatsin xua madianitamonaepinbe, yawa bara barapomonaepinbe, bapongbe bexótsibe.

3

Barapoxonae, xua poxonae Gedeón yótaba madianitamonaepinmonae, Israel pía pemómoxi susato jiwi tatsi ichichipa xua Gedeón peexanaewa tsainchi pong nakua itorobiya peewatsin. Íchitha bapong Gedeón jeye:

—Bara, jame maisha bapong Nakom pákata tsane pong xua nakua itorobiya peewatsin tsane, jei Gedeón.

Ekeicha Gedeón jeye:

—Pana nekatsíbare paiña nenamuxu warowabiwang xua oro naintong pepena éxana xua xuang panótame poxonae payótabame madianitamonaepinmonae, jei.

Bara barapomonaepinmonae Gedeón baxuang katsíbatsi. Daxita bárapo oro naintong bapong yawa múxuna éxana xua be pókotsi kamíshiyo sacerdotemonaepinmonae najumaxátata, po kamisha xua akuareibi. Bapoxonae Israel pía pemómoxi susato jiwi tatsi jüntema jinompa cuarenta po weibetha xua beya poxonae Gedeón tüpa. Íchitha bapoxonae Israel pía pemómoxi susato jiwi tatsi tamrópata notarúküpa xua wüünae jainta bárapo kamíshiyo, po kamíshiyo Gedeón báyatha éxana xua poxonae barapomonaepinmonae bekein bewa wüünae jainchi po Nakom pepa Nakom.

Meje yábara poxonae Nakom ekeicha éxana pomonaepinmonae juezmonae xua Israel pía pemómoxi susato jiwi tatsi pekanamataxeinaewa tsainchi

(Jueces 8.30—12.15)

Gedeón piowaxi itakatainchi setenta po pexui jiwimonaepinmonae. Bara kaein pewüng Abimelec, po pexanto xua itakatainchi powa pía pebusikuitaetaewayo. Poxonae Gedeón tüpa ekeicha Israel pía pemómoxi susato jiwi tatsi tamrópata notarúküpa xua abe éxana, xua wüünae jainta icha nakomüng, po nakomüng jopa xaiñeyo. Abimelec Siquem tómara beya pona, po tómara ichaxota pena tatsi tapopónatsi. Bapong Abimelec tsipaeba jíwitha jeye:

—Pana éxande xua tapákata naexanaewa tsainchi pong nakua itorobiya taéwatsin, jei Abimelec.

Abimelec kaetukaetuteta pomonaepinmonae pía pepunaponáewichi tsainchi. Yawa barü pona barapomonaepinmonae xua pejutebiwa tsane setenta po jiwimonaepinmonae xua peweicho jiwi tatsi. Saya jopa Jotam bexuichi, pong xua báyatha nantsiyataba xua daxota napaeba. Pírapae Jotam pona ichaxota Siquem tómara yawa tsiwiyo tajü weungkuarena. Bara bewawaya pomonaepinmonae, pomonaepinmonae baxota jinompa. Jotam barapomonaepinmonae tsipaeba, jeye:

—Abimelec irü pomonaepinmonae nekapunaponae, daxita pam bichokono abe paiña neexanaewi pam. Taxa pía pexui tatsi xua taweichomonaepinmonae pajutébame. Nakom

kopatsina xua ichamonae paka jutebina abe paiña neexanáewaxae xua barapomonaе peyantomatsíwatsi, jei xua wawái.

Daxota poxonaе akoibi po weibe weta, Nakom bara kópata xua jiwi, pomonaе Siquem tomarapiwi, irü Abimelec barü nantiya náбabe. Abimelec piamonaе barü yótaba, xua Siquem tomarapiwi yótabatsi. Yawa barapomonaе tauta bómüxü, po bo pin bo xua tajüicha, yawa jiwi múxuna taxua po jiwi tútutha ena. Poxonaе Abimelec naba éxana icha tomarapiwi, yábüyo Abimelec pentasipa wetaxorékatsi iboto, po iboto xua pin ibo panawa yawa bara Abimelec bexotsi.

2

Pírapae poxonaе Abimelec tüpa, pong pewüing Tola, bapong náexana pong juezmonaepin. Pong Israel pía pemómoxi susato jiwi tatsi itorobiya kanamataxéinatsi xua veintitrés po weibetha. Bapoxonaе ekeicha ichüing kotakaya náexana juezmonaepin, pong pewüing Jair. Bapong Israel pía pemómoxi susato jiwi tatsi itorobiya kanamataxéinatsi xua veintidós po weibetha.

Poxonaе bárapo wei weta filisteomonaе irü amonitamonaе Israel pía pemómoxi susato jiwi tatsi yótabatsi. Israel pía pemómoxi susato jiwi tatsi itorobiya kanamataxéinatsi yawa abe kana exanéibatsi xua dieciocho po weibetha. Bara Nakom kópata xua bara barapomonaе átene xua poxoru barapomonaе ekeicha wüüinae jainta icha nakomüing, po nakomüing xua jopa xaiñeyo. Bapoxonaе nama Nakom wüükatsi jeye:

—Nakom pana yawende xua pata taamanayabiwa tsane barapomonaе, jei.

Nakom jumenota jeye:

—Bara pawüükare icha nakomüing, po nakomüing pawüinae jáintame, xua bárapo nakomüing paiña nepaka kapanenebiyaenexa tsane icha metha bárapo nakomüing itaküüpatsi xua peexanaewa baxua, jei Nakom.

Bara néxata Israel pía pemómoxi susato jiwi tatsi nakuibarapenta xua wüüinae pejainchiwa icha nakomüing, po nakomüing xua jopa xaiñeyo. Bara Nakom, po Nakom xua xaniwaicha pepa Nakom, barapomonaе ekeicha bara yaweinchi.

3

Barapoxónaerü pebin pópona, pong pewüing Jefté. Bapong penawabchüü-exaneibiwi jíwanapin, pong awabchüsüü. Peweicho jiwi tatsi, po pexui paxa tatsi pía pexui tatsi, xua jopa pena tatsi pía pexui tatsi, barapomonaе jopa bapong antobetsi tsipéi bapong powa peweiweinaewa pexanto tatsi. Poxonaе amonitamonaе pata xua naba peexanaenexa Israel nakuapíwitha, Jefté peweicho jiwi tsipáebatsi jeichichi:

—Anetha pana yawende. Painta naexande penawabchüü-exaneibiwi pía pekanamataxeinaeinchi. Icha amanáyabame amonitamonaе, néxata paka exanaeinchi juezmonaepin xua wanákuatha, jei.

Jefté jumejéi. Jefté diwesi najumekaitoroba pongtha, pong amonitamonaе pía nakua tatsi itorobiya peewatsin. Bapong yáñabatsi jeye:

—¿Eta xua metha naba paéxaname Israel nakuapíwitha? jei.

Bapong jumenota jeye:

—Yáitama kaena báyatha Israel nakuapiwi ira pana kaiba, jei.

Jefté jumenota jeye:

—Ápara paxang ira jopa paka kaibichi, jei Jefté.

Pong amonitamonaē pía nakua tatsi itorobiya peewatsin jopa ichipaeyo xua Jefté pejumenaitaewatsíwatsi. Néxata Nakom Jefté yawénatsi xua amonitamonaē peamanayabíwatsi poxonaē naba éxanatsi.

Efraín pía pemómoxi susato jiwi tatsi bichokono Jefté kasébatsi yáitama barapomonaē jopa wabebichi xua írürü kaemonaē penaexanaewa tsane bárapo penawabchüü-exaneibiwi exaneibíwitha. Jefté, Manasés pía pemómoxi susato jiwi jíwana tatsi. Daxota Manasés pía pemómoxi susato jiwi tatsi, irü Efraín pía pemómoxi susato jiwi tatsi nantiya nábabe. Bichokono pinmonaē wérapa, pomonaē Efraín pía pemómoxi susato jiwi tatsi. Jefté náexana pong juezmonaepin, pong Israel nakuapiwi pekanamataxeináewatsi xua seis po weibetha.

4

Poxonaē Jefté tüpa, ichüng xuya juezmonaepin pekoutha náexana, pong pewüing Ibzán. Bapong Israel nakuapiwi kanamataxéinatsi xua siete po weibetha. Bapoxonaē ekeicha ichüng xuya pekoutha náexana juezmonaepin, pong pewüing Elón. Bapong Israel nakuapiwi kanamataxéinatsi xua diez po weibetha. Bapoxonaē kotakaya ekeicha ichüng pekoutha náexana juezmonaepin pong pewüing Abdón. Bapong Israel nakuapiwi kanamataxéinatsi xua ocho po weibetha pewüinaeya xua tüpa.

Meje yábara poxonaē Sansón Israel pía pemómoxi susato jiwi tatsi kapanépatsi poxonaē yotébatsi, xua filisteomonaē yoteba

(Jueces 13—16)

Bapoxonaē ekeicha poxonaē Abdón tüpa, Israel pía pemómoxi susato jiwi tatsi abe éxana xua jopa exanaeyo pokotsiwa Nakom itoroba pía peitorobi koyeneintha. Barapoxonaē nama Nakom kópata xua filisteomonaē bara Israel pía pemómoxi susato jiwi tatsi amanayabapéntatsi poxonaē naba exanéibatsi.

Bárapo dapaetha Nakom itoroba matatsunpin yabüyotha, xua Israel pía pemómoxi susato jiwi tatsiwayo, powayo xua jopa itaküüpaetsi xua pexui pexeinaewa. Matatsunpin, yábüyo tsipáebatsi jeye:

—Nakom kakatsina pexuyo. Jopa vino mera apaeinde. Bárapo pexuyo tana-kuichina, Nakom tanakuichinchi, daxita matakabi poxonaē pópona. Bapong nazareomonaepin naexanaena xua pong seikaya tanakuita Nakom nexa. Jopa nexanto matanasibinde. Matáütano bapong yotabina, filisteomonaē yotabinchi, jei matatsunpin.

Poxonaē matatsunpin pónataba, yábüyo pía pebin yábara tsipaeba pokotsiwa xua býatha bapowa tane. Ekeicha Nakom itoroba matatsunpin xua barapowa pía pebinbe petsipaebinexa tsáinchibe. Daxota pebin jumekowünta xua bara xaniyéi pokotsiwa xua píowa tsipáebatsi.

Icha be pókotsi koyeneya matatsunpin paeba, yábüyo bara pexuyo tanakatsíwatsi pebinwüüto. Yáwano wüingduta bárapo pexúyotha pewüing Sansón. Nakom yawena bapong. Poxonaē Sansón wíchaba, bapong ajüntükuiyapusúü tsóponaē. Sansón bichokono pinmonaē juteba filisteomonaē, yáwano bong tatauta. Bapong Sansón náexana pong juezmonaepin xua Israel pía pemómoxi susato jiwi tatsi pekanamataxeinaewa tsainchi xua veinte po weibetha.

2

Sansón yábüyo pita filisteomonaewayo powa pewüng Dalila, bekein baxua paxa jopa kuijichipaetsi, irü pena jopa kuijichipaetsi tsipéi seikaya ichamonaewayo.

Filisteomonae ichichipa xua Sansón pebexubíwatsi. Daxota Dalila powa bichokono Sansón peantobexaetsi, bapowa wüükatsi xua Sansón peyainabiwa tsainchi xua eta xua metha maxü dangwéi. Daxota filisteomonae bapowa barükuiyábaratsimuxudútatsi xua nawita katapáebatsi pekakomokáe parátixi icha bapowa baxua yábara yainabina. Néxata barapowa muxuitóroba xua bepa pinae pía pebin namicha yábara tsipaebichi xua pía peyapusüüwa. Íchitha Sansón muxuitóroba barapówatha tsipéi jeye:

—Icha nekútsina xua vacaperüütongtha, xua penaperüütong, jopa neitaküüpa tsane xua tanamaxü ukutsiwa tsane. Bapoxonae ekeicha jopa peyapusüüwa xeinaein tsane, icha be ichüing ichi, xua jopa xeinaeyo peyapusüüwa, jei.

Barapowa Dalila filisteomonaetha wüüka siete po perüütíyobe xua vacaperüü. Yawa bapowa Sansón kútatsi. Bapoxonae kataunxuae irü filisteomonae bomüxütha nantsiyata umena. Néxata barapowa Dalila tsipaeba Sansontha jeye:

—¡Sansón, filisteomonae botha pata, aunxuae kawaetabina! jei.

Sansón naiña nawexunapenta vacaperüü bichokono. Be dangwéi aibi xua saya be totowa. Bapoxonae pírapae ekeicha Dalila pía pebin yábara yainaba xua pía peyapusüüwa. Barapowa barái jeye:

—Jopa beta netsipaebim poxonae xua kopiya katsipáebatsi. Ánoxuae nama bara xaniwaicha namicha yábara netsipáebare jiña neyapusüüwa, jei.

Íchitha Sansón ekeicha naerabiya paeba jeye:

—Icha nekútame bümüüwangtha xua pena bümüüwang, bapoxonae taayapusüüwa jopa xeinaein tsane icha be icha pebin ichi xua jopa xeinaeyo peyapusüüwa.

Dalila kúta bárapo bümüüwangtha, Sansón kútatsi, poxonae irü filisteomonae bomüxütha nantsiyata umena. Néxata ekeicha barapowa tsipaeba Sansontha jeye:

—¡Sansón, filisteomonae botha pata, aunxuae kawaetabina! jei.

Íchitha daxita bárapo bümüüwang Sansón nawexunapenta. Ekeicha Dalila jumedangweya tsipaeba. Ekeicha Sansón Dalila muxuitórobatsi jei:

—Icha néntana múxuna yakuáneme paparuwa xua pókotsi mákinatha xua yakuane xua bichokono inta dangwéi éxaname, bapoxonae jopa taayapusüüwa xeinaein tsane, icha be ichüing ichi, xua jopa xeinaeyo peyapusüüwa, jei.

Bapoxonae barapowa bara baxua éxana. Barapowa wawái jeye:

—¡Sansón, filisteomonae botha pata, aunxuae kawaetabina! jei.

Bapoxonae bichoina nontapona yawa nantanawexunapenta mákinatha xua báyatha matana múxuna yakuainchi paparuwa, xua pókotsi mákinatha xua yakuane. Néxata ekeicha barapowa jumefayakota, Sansón jumefayakótatsi, yawa jeye:

—Xam jopa xaniwaicha neantobem. Icha neántobe tsipaem bara xaniwaicha netsipaebichípame.

Barapowa matowa jumefayakota xua daxota matapaiña barapoxonae barapowa bara xaniwaicha tsipáebatsi. Barapowa jeichichi:

—Daxota xang bichokono taayapusüüwa xeinang, poxoru taena nekaenaeta Nakomtha kaena báyatha, poxonae kataunxuae bütfyotha taena tsiperüü weékang

xua tanakuichiwa tsane Nakom nexa. Bápana jintong jopa tana nentanasibi. Icha nentanasibina, ekeicha jopa xeinaein tsane taayapusüüwa, ichi be ichüing ichi, xua jopa xeinaeyo peayapusüüwa.

Néxata barapowa najumekaitoroba xua filisteomonae pewabinexa tsainchi. Barapowa maiteka éxana, Sansón maiteka exainchi. Barapowa waba pebin xua Sansón pentakatepateya sibiwa tsainchi. Bapoxonae ekeicha barapowa wawái jeye: —¡Sansón, filisteomonae botha pata, aunxuae kawaetabina! jei.

3

Sansón nontapona. Jopa nayábara nantaxeinaeyo xua Nakom jopa yawenaeyo. Bapoxonae, filisteomonae, Sansón wáetabatsi. Itamaikéi jútatsino nantiyatabe. Yawa kapoinchi filisteomonae pía nakua beya tatsi. Baraxota jiji pekübibotha étatsi, yawa kana éxanatsi xua trigoxú petaxukatoyorobinexa, xua filisteomonae petaxukatoyorobinexa tsainchi pin ibówatha. Po dapaetha poxonae Sansón étatsi jiji pekübibotha, ekeicha Sansón matanaxuwa.

Kaentakeitha, poxonae filisteomonae pin fiesta tsiexanompa pía Nakom, po Nakom jopa xaiñeyo, najumekaitoroba xua Sansón pewabinéxatsi xua pekuikaponaenexa tsainchi. Irü pewowin Sansón matakaekapoinchi. Sansón tsipaeba barapongtha xua bepa pinae kaponatsi ichaxota nantiya úngkuabe pokotsiwa xua bómüxü nantiya babatanótabe xua bichokono pin bo.

Néxata bara Sansón, Nakomtha tsipaeba yawa wüüka xua peyawenaewa tsainchi, xua Sansón peyawenaewa tsainchi xua bara nama kaeto tsane. Bapoxonae naishakateita wáetaba pokotsiwa xua bo nantiya babatanótabe yawa toroya pokotsiwa pewünae beya. Bapong éxana xua daxita bo pebabatanobiwa saya dubenanaya. Pepa bómüxü jiji mataperabatsi pomonae xua baxota ena. Sansón irü tüpa. Bapong pinmonae juteba filisteomonae bárapo matakaitha beyakaincha poxonae matha juteba poxonae pópona.

Meje yábara poxonae Rut barapowa nakuiduba xua pejumekowüntsiwa Nakomtha, po Nakom pepa Nakom

(Rut 1—4)

Po dapaetha poxonae Israel nakuapiwi kanamataxéinatsi juezmanae, barapoxonae bichokono pin jainbo nakua tsúrukuae. Bárapo dapaetha pebin, pong pewüing Elimelec, pong Judá pía pemómoxi susato jiji jíwanapin tatsi, pona xua pepoponaenexa Moab nákuatha. Yawa barü pona pisheuri, powa pewüing Noemí irü pexántobe. Ichüing pewüing Mahlón, ichüing pewüing Quelión.

Bapong Elimelec tüpa Moab nákuatha. Mahlón, irü Quelión, pongbe xua Elimelec pexántobe tatsi, bapongbe nakóyobabe Moab nakuamonaewáyobe. Mahlón pita powayo pewüing Rut, irü Quelión pita powayo pewüing Orfa. Barichi bapongbe túpabe xua Noemí pexántobe tatsi. Barapowa bichokono wekoyéi.

2

Tsiwiyo bayiyo, Noemí jumetane xua pinae Israel nákuatha xeina pexaewa. Noemí najüntükoyene weta xua kaewa nawiyáena pía nakua beya. Pekopéiñobe barü pona. Néxata bapowa ekeicha tsipaeba pekopéiñobetha jeye:

—Kaewa papóndebe bara paiñamonae beya, yawa xua paiña pebinbe paiña nejeichinéxabe xua paiñamonae jíwana, jei.

Orfa bara najüntükoyene weta xua kaibeya peponaewa tsane piamonae beya. Íchitha nama Rut ichichipa xua pámiyo pepunaponaewa, xua Noemí pekopeiño pepunaponáewatsi. Rut pámiyo tsipaeba jeye:

—Ichichipang xua takapuna ponáewatsi. Jiñamonae bara tamonae tsane, xuano jiña Nakom bara irü ta Nakom tsane, jei Rut.

Bara daxota Noemí bara kópata xua bara barü pópona pekopeiño, xuano xua bara kueyatatsi Belén tómara beya, ichaxota báyatha Noemí nakatsiwa.

3

Poxonae Belén tómaratha patópabe, bapoxonae jiwi aena jota pexu, pokotsiwa xua naweta, po pexu pewüing cebádaxu. Néxata Noemí yáíñabatsi, Rut yáíñaba, xua icha metha wüünae xua Rut ponaena xua ichaxota peübiwa xua penotsinexa cebádaxu, pokotsiwang xua taothopeikéibatsi íratha, pomonae xua jota.

Israel nákuatha píakui xeina xua pomonae peakopeibí jiwi bara noteiba pokotsiwang taothopeikéibatsi pomonae jota. Daxota Noemí yábara nantaxeina xua báraxua bara wüünae.

Bara Rut pónataba xua cebádaxu nota. Po pábitha xua barapowa pona, bárapo pabi, pong pewüing Booz, bapong pía pabi tatsi. Bapong Booz kopei pexeinaein. Rut pía pebin tatsi, pong báyatha tatúpatsi, bapong Booz tajü peweicho. Poxonae Booz tane, xua barapowa tainchi, Booz yábara yáíñaba ichüingtha jeye:

—Barapowayo ¿eta pomonae jitowayo? jei.

Bapong Booz jumenótatsi jeye:

—Ápara barapowa moabitamonawayo, powa kaewa barü patopa Noemí, jei.

Bapoxonae Booz Rut jopa atetichi. Bapong Rut beta tsipáebatsi jeye:

—Jopa junuwinde xua nótame cebádaxu tapabitha, jei.

Rut yáíñaba bapongtha jeye:

—¿Eta xua metha jopa neatetsim? Ápara xang icha nakuapiwayong, jei.

Bapong Rut jumenótatsi jeye:

—Jumetang xua amiyo beta taéxaname, powa Noemí. Nakom kakatsina pentoma poxoru wüünaeya jumekowúntame Nakom, jei.

Booz ápata penabanaewa xua mataeiñaxaetha, Rut ápatatsi. Barapoxonae Booz itoroba pomonae pía petanakuichiwichi jeye:

—Bara paothopeika éxande cebádaxu xua barapowa bara penotsiwa tsane, jei.

Barapowa bichokono jopa juniya notsiyo cebádaxu xua barapowa itakúüipatsi xua kápona Noemí píabo beya tatsi.

4

Noemí bichokono jüntükoyene weiweina xua tsipéi bapowa pona Booz pía pábitha tatsi, pong xua piamonae jíwanaxae tatsi. Noemí tsipaeba bapówatha xua bepa pinae poneibina bárapo pábitha. Noemí ichichipa xua Booz penakoyobiwa tsane Rut.

Israel nákuatha píakui xeina xua icha pebin tüpa, xua kataunxuae jopa pexui xeinaeyo, néxata piamonae jiwi jíwana tatsi, pomonae xua imoxoyo, bewa kosheuri pitichi xua powa kuenta tüpa. Noemí, Rut itoróbatsi xua Booz petsipaebinéxatsi xua Booz penakoyobinexa Rut. Bara Booz tsipaeba bapówatha jeye:

—Bara ichichipang xua takapichinéxatsi. Íchitha, icha nekotsiwa xéiname, pong jinsheuri piamonae jiwi jíwana tatsi, pong imoxoyo, nama xang tajüng. Daxota barapong bewa matha tsipaebíname, jei Booz.

Rut kátatsi, Booz kata, cebádaxu xua Noemí amanaya pekatsinéxatsi, yawa Rut kaibe itorobíwatsi Noemí píabo beya.

Bárapo mataketha, Booz pona pebóupatha xua ichaxota tómara peyaputoxoro rota dutsiwa. Baxota Booz ewatungkua xua poxonae beya abü pichatabina baxota pong Rut pekotsiwa yatsikaewa, pong xua imoxoyo, pong xua Mahlón piamonae jiwi jíwana tatsi. Poxonae bapong naitapeiña xeina, Booz yáíñaba bapongtha jeye:

—¿Ichichípame xua jíña komotsichi ira, po ira xua báyatha Mahlón, pong báyatha tüpa, pía ira tatsi? Icha komotsiname bárapo ira bewa yawa pichíname Rut, jei.

Bekein bapong ichichipa xua ira pekomotsiwa íchitha jopa ichipaeyo xua Rut penakoyobíwatsi. Daxota Booz ira kómota yawa bara Rut nakóyobatsi. Bapoxonae bara Rut irü Booz pexuyo xéinabe. Pexanto tatsi pewüng Obed. Íchitha bárapo pexuyo kayábara nantanaxéinatsi xua ápara Mahlón pexanto tatsi, pong bekein báyatha tüpa.

Noemí jüntükoyene weiweina xua pemomo xeina. Barapowa éwata pemomo. Daxita yábüxi xua Belén tomarawaxi jüntükoyene weiweina tsipéi Nakom pexuyo itoroba xua Noemí nexa, xua barapowa peewatsinéxatsi poxonae barapowa penapataewa tsane. Poxonae Obed piño, bapong pexanto xeina pewüng Isaí. Bapong Isaí David paxa tatsi, pong David Israel nakua peewatsin náexana.

**Meje yábara poxonae Samuel náexana,
pong xua Nakom Pejume Diwesi pepaebin**

(1 Samuel 1—3)

Pírapae pebin pópona ichaxota po ira xua Efraín pía pemómoxi susato jiwi tatsi pía ira tatsi. Bapong pewüng Elkana. Aiñáwabe xeina. Ichowayo pewüng Ana. Barapowa Ana jopa xeinaeyo pexui. Matáütano barapowa wekoyeya pópona tsi-péi ichowayo xua pía pametiyoxae kuikaponéibatsi. Daxita weitha tsaibi, Elkana daxita piamatabüxüyo barü poneiba Silo tómara beya ichaxota ungkua Nakom píabo tatsi, xua chivonámüübo. Baxotiya duwéi kapateiba xua pejutebeibinexa xua be ofrendang matawüng xua Nakom nexa.

Kaentakeitha poxonae barapomonae Silo tómaratha jinompa, Ana Nakom píabo boupa beya pona. Ana Nakomtha jumedangweya wüüka xua pexuyo pekatsinéxatsi. Barapowa tsipaeba Nakomtha jeye:

—Icha nekátame pexuyo xua pebinwüüto, yábara katsiwüünae muxudútatsi xua taxanto kakatsinchi xua nekatanakuiteibiwa tsane daxita matakabi poxonae pópona, jei.

Elí, pong sacerdotemonaepin pía pentakaponaein tatsi, jumetane yawa jumetana, jeye:

—Bara jüntema póponde. Bárabü Nakom kakatsina pokotsiwa xua wüükame, jei Elí.

Icha matakábitha Elkana daxita piamonae matabüxüyo kaibe barü warapiya píabo beya. Barapoxonae pirapaeyo Ana pexuyo yaperüwajina. Aiña xome-tong yapukaewa, bapoxonae pexuyo pabeta, pebinwüüto. Pexúyotha wüngduta pewüng: “Samuel”, jei.

2

Poxonae Samuel naxumito baraxuba, bapoxonae pena kapoinchi Nakom píabo tatsi beya. Barapowa pexuyo kobenata pongtha, pong pewüing Elí, pong sacerdotemonae píá pentakaponaein tatsi. Bapowa tsipaeba, Elí tsipáebatsi jeye:

—Ápara bárapo pexuyo xua báyatha Nakom wüükang. Bárapo pexuyo Nakom tanakuichinchi xua ánoxuae xuano xua bexa tsáneno, jei Ana.

Ana Nakomtha tsipaeba jeye:

—Jako Nakom xua tana nejumetaewam poxonae kawüükatsi pexuyo xua daxota nekátame, jei.

Barapoxonae Elkana daxita piamonae matabüxü ekeicha kaibe barü warapiya píabo beya. Nama Samuel narúntaba ichaxota Elí. Daxita weitha tsaibi Samuel pena takaponéibatsi paparuwang, xua penawang, xua poxonae barapowa píá pebin punaponéibatsi Nakom píabo tatsi beya.

3

Bapong Elí, aiña pexántobe xeina. Ichüing pewüing Ofni. Ichüing pewüing Finees. Bapongbe jopa jumekowünteibíyobe Nakomtha. Poxonae Israel píá pemómoxi susato jiwi tatsi kapaneiba duwéi, xua be ofrendang matawüing xua Nakom nexa, bapongbe jopa ewateibíyobe xua abü matha petaxuewa tsane penasiwa xua Nakom nexa. Íchitha barapongbe bichoina pewito jíwana jumedangweya wüükéibabe xua penasiwa xeina poxonae ánoxuae nakobeweta xua poxonae withaba.

Matáütano bapongbe yábüxi kenta exanéibabe, powaxi nakuita xua imoxoyo peboupa xua Nakom piabotha tatsi, po bo xua chivonámüübo. Barapongbe jopa bewa baxua exanaebe. Elí pexántobe muxutáíñababe xua baxua peexaneibixaebe. Íchitha baxua Elí pexántobe jopa yábara kuitsakeináeyobe.

Samuel jopa kuijüpaeyo pokotsiwa xua bapongbe exanéibabe. Saya bapong ichi-hipa nawita xua pejumekowüntsiwa Nakom.

Kaentakabi, Elí siwapoinchi pong Nakom peitorobi jume pepaebin. Bapong Elí tsipáebatsi jeye:

—Nakom neitoroba xua takatsipaebiwa tsainchi xua bapong paeba: ‘Elí pexántobe tatsi akui-itafaetabin pokotsiwa bapongbe exanéibabe. Elí kópata xua pexántobe tatsi jopa neyábara tsakeináeyobe. Daxota kopatang xua Elí piamonae matabüxü tatsi werawerakaena. Yaputaena xua ápara bara xang Nakomüing xaniwaicha kajume-itoróbatsi xua poxonae taena xua pexántobe tatsi tüpáenabe kaentakábitha’, jei Nakom, jei Nakom peitorobi jume pepaebin.

4

Poxonae Elí amo tsekae, barapoxonae kae merawitha Samuel nakosataxuba. Jumetane Nakom piabotha xua be ichüing wábatsi pewüingtha. Samuel nantaxeina xua ápara Elí waba. Daxota Samuel Elí bekuinaepoiña jeye:

—Jai, xote úngkuangje, jei.

Elí namchi:

—Ápara jopa kawabichiba, jei.

Ekeicha Samuel barichi aiñakuiyobetha, ichüing bapong wábatsi. Nama poxonae akoibi pokuikoyenebetha xua Samuel wábatsi, Elí yaputane xua ápara Nakom Samuel wábatsi. Néxata Elí namchi:

—Kaibe póiñama jiña cámatha. Ekeicha jumetaema. Icha Nakom ekeicha kawaba, néxata jande: ‘Moya netsipáebare pongxaem xua Tananekanamataxeinaein’, jande, jei Elí xua Samuel tsipáebatsi.

Samuel ekeicha maitungkua. Ekeicha Nakom Samuel pewüingtha wábatsi. Barapoxonae nama Samuel jumenota Nakomtha icha be pókotsi koyeneya báyatha Elí tsimuxuduta.

Nakom namchi, jeye:

—Daxita abe peéxanae koyenein xua báyatha yábara tsipaebang xua Elí pía matabüxümonaetha tatsi, bara patopeikaena. Báraxua bara xaiñéi tsane.

”Tsipáebare Elí xua baxua itorobang xua abe éxanang ápara poxoru xua bárapo pexántobe tatsi abe peexanaexae. Bekein Elí baxua kuiyaputane, íchitha jopa pía pexui kuimatawentsiyo poxonae abe éxana, jei Nakom xua Samuel tsipáebatsi.

Icha matakeitha xua poxonae kaemümba, Samuel bichokono junuwa xua Elí petsipaebiwa tsainchi xua báyatha Samuel tsipáebatsi Nakom. Íchitha Elí matowa yáiñaba xua bepa pinae tsipaebichi. Bara matapaiña Samuel tsipaeba, Elí tsipáebatsi. Néxata Elí paeba jeye:

—Bárabü Nakom éxana pokotsiwa xua ichichipa tsipéi bapong bara xaniwaicha peexanaein, jei Elí.

Samuel nawichatáepona. Nakom kópata xua bara Samuel yábara paeba pokotsiwang xua bexa exanaena, xua bara baxuang penamchixae bara exanaena, icha be pókotsi koyeneya Samuel paeba. Daxota jiwí Samuel yábara nantanaxéinatsi xua bara ápara pong Nakom pía peitorobi jume pepaebin.

Meje yábara poxonae filisteomonae Israel pía pemómoxi susato jiwí tatsi yótabatsi

(1 Samuel 4—7)

Bárapo dapaetha, daxita filisteomonae nakaetuta yawa pin bicheito penawabchüü-exaneibiwi éxana xua penawabchüütsinexa Israel pía pemómoxi susato jíwíthatsi. Írürü Israel pía pemómoxi susato jiwí tatsi kaetuta pinmonae xua penawabchüütsinexa. Poxonae po matakabi aena xua naba, filisteomonae bara amanáyaba xua naba éxana.

Néxata Israel pía pemómoxi susato jiwí tatsi juntukuru kápona caja, xua Nakom pía caja, po caja eka Nakom piabotha tatsi xua pekaponanexa poxonae naba éxana filisteomonaetha. Israel pía pemómoxi susato jiwí tatsi nantanaxeina xua icha baxua exanaena, metha Nakom yawenaena xua filisteomonae peamanayabiwa tsainchi poxonae naba éxana.

Daxota Israel pía pemómoxi susato jiwí tatsi icha pebiwi itoroba, xua Silo tómara beya itoróbatsi, xua pekarenaenexa Nakom pía caja tatsi xua pekaponanexa ichaxota penawabchüü-exaneibiwi naeba, xua Israel pía pemómoxi susato jiwí tatsi. Elí pexántobe tatsi, pongbe sacerdotemonaepinbe, barapongbe yantapónabe Nakom pía caja tatsi.

Bara ekeicha Israel pía pemómoxi susato jiwí tatsi irü filisteomonae nábabe. Barapoxonae nama Israel pía pemómoxi susato jiwí tatsi daxita omeicha amanayabapéntatsi xua filisteomonae amanayabapenta. Treinta mil po

penawabchiüü-exaneibiwi matabüxübe jutébatsi xua Israel pía pemómoxi susato jiwi tatsi. Yawa bexótsibe pongbe xua Elí pexántobe tatsi.

Yáwano filisteomonaē pita Nakom pía caja tatsi. Poxonaē Elí baxua jumetane, xua diwesi jopa jumewüünaeyo, síyatha pejuma bejopiya, po síyatha xua eka. Wishi jantékatsi yawa tüpa. Elí, bapong pong juezmonaepin náexana xua Israel nakuapiwi pekanamataxeináewatsi xua cuarenta po weibetha.

2

Filisteomonaē kápona bárapo Nakom pía caja tatsi xua icha tómaratha, po tómara barapomonaē pía tómarang jíwana tatsi. Barapomonaē bárapo caja eta pía Nakom tatsi piabotha tatsi, po bo pin bo xua barapomonaē pía Nakom tatsi, po Nakom xua saya iboto éxana.

Icha matakábitha kaemúmbbotha barapomonaē tane pía Nakom tatsi xua íratha tabókatsi. Ekeicha barapomonaē pekoutha kuareta. Íchitha baya barapomonaē tane xua barapomonaē pía ibo nakom tatsi jopa saya kou jopeikaeyo bara yawa pentasipa tatantékatsi yawa pemaxübe tatantekatsino. Yáwano barapomonaē piabongtha tatsi tapátatsi pin jirimonaē yáwano xua abe éxana. Barapomonaē kaxibébatsi xua peaperüütanewang. Báraxua barapomonaē xeina ápara poxoru barapomonaē tapita Nakom pía caja tatsi.

Néxata filisteomonaē bárapo caja ekeicha dabe kajjina tsíniya icha tómaratha xua barapomonaē pía tómarang tatsi. Daxita tómarangtha xua poxonaē barapomonaē kaponeiba, jiwi bárapo tomarangpiwi írürü kaxibébatsi bárapo peaperüütanewang. Daxota matapaiña barapomonaē pía sacerdotemonaē yáíñaba, yawa yáíñaba pomonaetha, pomonaē xua yábara wüünaē yaputaiba pokotsiwa xua bexa exaneibina, jeye:

—¿Eta kana ichainchi bárapo caja? jei.

Sacerdotemonaē, írürü pomonaē xua yábara wüünaē yaputaiba pokotsiwa xua bexa exanaena, jeye:

—Vaca ayunbe pawishikérebe pekaponaeináeyotha. Bapoxonaē baxota paére Nakom pía caja. Yáwano pamuxuna jébare pokotsiwang xua amanaya pekatsibiwang, pokotsiwang xua bichokono aiña matoma xua oro nain éxana. Bapoxonaē paitoróbare beye xua daxota Israel pía pemómoxi susato jiwi tatsi pía Nakom tatsi jopa ekeicha naka kasebi tsane, jei.

Bara baxua barapomonaē éxana. Matáütano barapomonaē bara kópata xua ponaeyo, pekaponaeinaeyo bara ponaena ichaxota xua pokotsíwatha vaca ichi-chipa pona. Bara néxata, vaca bopiya íyabe ichaxoyo iya po tómara xua Israel pía pemómoxi susato jiwi tatsi pía tómarang tatsi jíwana, po tómara xua imoxoyo. Néxata filisteomonaē yaputane xua barapomonaē átene exanéibatsi ápara poxoru kou pepichixae Nakom pía caja tatsi. Ápara jopa jemeicha ateneyo.

Tómara, ichaxoyo po tómara vaca béyabe, bárapo tómaratha jinompa sacerdotemonaē. Pebiwi, po pebiwi xua bárapo tómaratha jinompa, bichokono jüntü-koyene weiweina xua poxonaē tane xua dawarena pekaponaeinaeyo xua baxota boka Nakom pía caja tatsi. Bárapo vácabe barapomonaē bexuba xua be ofrendang matawüng, po ofrendang xua Nakom ompiwang pekatsíwatsi.

Pekaponaeinaeyo bárapo napaewang barapomonaē baxua isho éxana. Pokotsiwang xua amanaya pekatsibiwang xua oro nain, baxuang barapomonaē pin íbó-watha jeba, po íbowa xua imoxoyo unguwa.

(Pebiwi, xua baxota pejinompaewi, tane xua tsijuntutuboka Nakom pía cájatha, bekein Nakom jopa kopatsiyo xua petaewa. Daxota Nakom éxana xua barapomona-e pinmonae wérapa xua petaexae báraxua.)

Poxonae baxua éxana, ichamonae, pomonae baxota jinompa, bichokono jüntü-koyene wekoyéi. Barapomonae nantanaxeina xua metha bara wüünae xua Nakom pía caja tatsi itorobina icháwatha. Daxota pomonae jinompa po tómaratha xua pewüing Quiriat-jearim, barapomonae wüükatsi jeye:

—Pakáponde Nakom pía caja paiña tómaraya beya.

Quiriat-jearim tomarapiwi bara pía tómaraya bekayiya. Nakom pía caja boka bárapo tómaratha veinte po weibetha.

3

Poxonae Elí tüpa, bapoxonae Samuel pekoutha náexana pong juezmonaepin Israel nákuatha. Bapong barapomonae pía pentakaponaein tatsi náexana. Bapong pópona Ramá tómaratha bekein daxita weitha tsaibi poneiba akoibi po tomarabetha xua peyábara jumetaenexa po peabewang xua jiwi yábara kueikueije. Bapong yawena xua jiwi eta bichi tsane xua ekeicha beta exanaena. Veinte po weibe yapukaewa xua poxonae Nakom pía caja kaewa patopa Israel nakua bérena.

Matapaiña Israel pía pemómoxi susato jiwi tatsi yábara nantanaxeina xua penakuibarapentsiwa xua wüünae pejainchiwa icha nakomüing, po nakomüing xua jopaxaiñeyo. Barapoxonae itapeta wüünae jainta po Nakom pepa Nakom xua po Nakom xaniwaicha. Daxota Samuel tsipaeba Israel pía pemómoxi susato jiwitha tatsi xua daxita barapomonae bewa ponaena Mizpa tómaraya beya. Poxonae pata bárapo tómaratha Israel pía pemómoxi susato jiwi tatsi tsipaeba Nakomtha pokoyene xua pinae barapomonae nakuiyaputane, xua barapomonae báyatha abe éxana.

Poxonae barapomonae baxua éxana írürü filisteomonae yábara nantanaxei-nompa xua Israel pía pemómoxi susato jiwi tatsi peyotabiwa tsainchi. Israel pía pemómoxi susato jiwi tatsi junuwa bichokono poxonae jumetane xua filisteomonae dawarendena. Samuel wüükatsi Israel pía pemómoxi susato jiwi tatsi xua bepa pinae tawüükaetsi Nakomtha. Daxota Samuel tawüüka Nakomtha barapomonae. Yawa oveja bexuba pong xua kae wei xeina xua be ofrenda matawüing, po ofrendang xua Nakom ompiwa pekatsíwatsi.

Bara Nakom baxua taéxana xua barapomonae pewüükaexae. Nakom itoroba bichokono pin yámüxü xua bichokono junuwa exainchi filisteomonae pía penawabchüü-exaneibiwi tatsi. Bara néxata Israel pía pemómoxi susato jiwi tatsi pía penawabchüü-exaneibiwi tatsi pubaraina. Bara barapomonae pinmonae juteba xua filisteomonae jutébatsi. Poxonae báraxua weta filisteomonae pía tómarangtha jinompa. Ekeicha Israel pía pemómoxi susato jiwi tatsi jopaxa exanaetsi aiña wei.

Meje yábara poxonae Nakom Saúl kana exainchi xua Israel nakua itorobiya peewatsin

(1 Samuel 8.1—13.2)

Poxonae Samuel bichokono penapataein tsekae, bapong éxana xua pexántobe tatsi náexana pomonae xua juezmonae xua Israel pía pemómoxi susato jiwi tatsi pekanamataxeinaeinéxatsi. Dáichitha bárapo pexántobe tatsi jopaxa beta matakaponáeyobe.

Pexántobe jopa kuijüpáetsibe, xua bapongbe jopa paxa kuijüpáeyobe. Barapongbe notéibabe pekakomokáe parátixi xua jiwi bapongbe katsibéibatsibe xua pía jiwi petaexanaewa tsainchi pokotsiwa bárapo jiwi ichichipa xua bapongbe petaexaneibiwa tsánebe xua jopa bewa exanáe. Barapongbe jopa xaniwaicha exanáeyobe baxua.

Daxota penapatáe jiwi pomonae xua Israel pía pemómoxi susato jiwi tatsi barapomonae Samuel siwapoinchi. Barapomonae Samuel wúükatsi jeye:

—Itapere pong wanakua itorobiya peewatsin tsane, ichi icha nakuamonaepiwi ichi, xua nakua itorobiya peewatsin xeina, jei.

Samuel aichaxaibi baxua, íchitha bapong wúüka Nakomtha xua peyawenaenexa tsainchi xua eta bichi tsane xua exanaena baxua. Bara Samuel tsipáebatsi Nakom jeye:

—Bewa exanáename pokotsiwa barapomonae kawúüka. Barapomonae ápara jopa kaitawétsiyo. Ápara neitaweta xua takanamataxeinaewa barapomonae. Baxua éxana poxonae kawúüka xua ichüng neexanaewa pong nakua itorobiya peewatsin barapomonae nexa.

Bexa barapomonae jopa tawüünae tsainchi poxonae pong nakua itorobiya peewatsin barapomonae kui-itorobebinchi xua pematomatsiwa tsane xua pin matoma xua impuesto matómawüng. Yáwano barapomonae itorobebinchi xua bapong petanakuichiwa tsainchi amanaya xua pong nakua itorobiya peewatsinxae.

Matáütano barapomonae bexa tsipaebina xua pinae barapomonae kaewa peúruxae xua poxoru báyatha pekawüükaexae barapomonae xua jiña netaexanaewa pong nakua itorobiya peewatsin. Íchitha báraxua néxata pepu dukuáe poxonae bekein barapomonae jopa ichichipaeyo xua ekeicha pexeinaewa pong nakua itorobiya peewatsin, jei Nakom.

Bapoxonae Samuel pona ichaxota barapomonae ena yáwano yábara tsipaeba barapomonaetha pokotsiwa báyatha bapong tsipáebatsi Nakom. Barapomonae jopa tsakeinaeyo pokotsiwa Samuel tsipaeba. Saya áwiya barapomonae Samuel wúükatsi xua bapong petaexanaewa tsane pong nakua itorobiya peewatsin barapomonae nexa, ichi icha nakuamonaepiwi ichi, xua xeina pomonae nakua itorobiya peewatsiwi.

Néxata Nakom, Samuel itoróbatsi xua bara Samuel exanaena pokotsiwa xua barapomonae Samuel wúükatsi. Yáwano Nakom, Samuel yábara tsipáebatsi xua pong naexanaena nakua itorobiya peewatsin Israel pía pemómoxi susato jiwi tatsi nexa. Samuel jeichichi:

—Baya tsane xua pókotsi hórathe pebin kata itorobinchi, pong xua Benjamín pía pemómoxi susato jiwi jiwanaepin tatsi. Bapong penasiwa matasipawé epatábare xua peyábara kaununutsinexa xua bapong, pong nakua itorobiya peewatsin tsane. Bapong Israel pía pemómoxi susato jiwi tatsi kapanenebiya tsainchi poxonae yotébatsi xua filisteomonae yoteba, jeichichi Samuel.

2

Penamíchixae bara baxua éxana. Icha matakeitha, pebin pong pewüng Saúl patopa xua Samuel tainchi xuano xua peyaiñabinéxatsi xua eta xota metha itakúüpatsi burromonae pekaxinaewa xua Saúl paxa tatsi piyawang, po burromonae xua aichurubena. Nakom Samuel tsipáebatsi jeye:

—Bapong Saúl ápara pong kopiya nakua itorobiya peewatsin naexanaena Israel nákuatha, jei Nakom.

Néxata Samuel, Saúl tsipáebatsi xua báyatha pinae kaxiba burromonae. Bara néxata Samuel, Saúl wábatsi xua pebarü xaenexa fiéstatha xua po fiesta baxua éxana xua Nakom wüünae pejainchinéxatsi.

Bara néxata bapongbe pónabe icháwatha ichaxota ungkua altar matawüing xua xota pokotsiwa duwéi tauteibathopa Nakom nexa. Baraxotiya, Samuel Saúl duweinwito kátatsi, xua pin wito, xua Saúl pexaenexa. Bárapo merawitha Samuel waba, Saúl wábatsi, xua piabotha petamaitekaenéxatsi. Barapoxonae baya bapongbe pónabe tómara pemüxübürü beya. Baraxotiya Samuel Saúl penasíwatha matasipawé epatábatsi. Samuel tsipaeba, Saúl tsipáebatsi, xua Saúl pong Israel nakua itorobiya peewatsin tsane. Matáütano Samuel tsipaeba Saúltha pokoyene xua po matakeitha taexanaeinchi, xua Nakom taexanaena. Penamchixae bara daxita éxana icha be pókotsi koyeneya Samuel tsipaeba.

Bárapo matakeitha, Nakom Saúl kátatsi xua pekueikueijiwa icha pókotsi koyeneya báyatha Nakom kana ichi pomonaetha, pomonae Nakom pía peitorobi jume petapaebiwichi poxonae kata xua pekueikueijiwa. Nakom, Saúl yawénatsi xua pepoponaewa icha jüntükuikoyeneya.

Poxonae Saúl píabo beya kaipe náwiya jopa piamonae baxua yábara tsipaebiyo, xua Samuel tsipaeba, xua pokoyene Saúl Israel nakua itorobiya peewatsin tsane. Saya meisha piamonae yábara tsipaeba xua burromonae, xua pinae burromonae ichamonae báyatha tane.

3

Néxata Samuel tsipaeba Israel pía pemómoxi susato jíwitha tatsi xua penakae-tutsiwa tsane ichaxota po tómara pewüing Mizpa. Bárapo tómaratha ibótixi kopababa xua peitapetsiwanexa pong nakua itorobiya peewatsin naexanaena. Poxonae baxua éxana, kopiya itapeta Benjamín pía pemómoxi susato jiwí tatsi. Poxonae ekeicha ibótixi kopababa, bapoxonae itapeta Saúl pía matabüxü jiwimonae tatsi. Poxonae ekeicha éxana baxua xua akoibi pokuikoyenebetha, bapoxonae nama Saúl itapétatsi.

Poxonae Saúl jéitatsi, kopiya jopa bapong taetsi tsipéi nantsiyata boka ichaxota bobena sakun xua wünba. Daxota ichamonae pona baxota xua Saúl pepichinéxatsi.

Bapoxonae Samuel tsipaeba jíwitha xua eta bewa bichi pokotsiwa xua exanaena pókotsin xua nakua itorobiya peewatsin. Yawa baxua yábara tina pokotsíwatha xua be papera. Bapoxonae báraxua Nakom piabotha tatsi bota, po bo chivonámüübo.

Barapoxonae Samuel napéyaba Israel pía pemómoxi susato jiwí tatsi xua penawibiyaenexa piabong beya. Saúl irü píabo benawiya, yawa bapong barü pona pomonae penawabchüü-exaneibiwi, xua tsikimonaeyo, xua Israel pía pemómoxi susato jiwí tatsi jíwana.

4

Bara kae xometo yapukáewaba, bapoxonae amonitamona pía penawabchüü-exaneibiwi tatsi Israel pía pemómoxi susato jiwí tatsi yótabatsi xua icha tomarapiwi. Poxonae Saúl baxua jumetane, bapoxonae kaetukaetuteta Israel pía pemómoxi susato jiwí tatsi pía penawabchüü-exaneibiwi tatsi.

Nakom yawena, daxota Israel pía pemómoxi susato jiwi tatsi tómara napaeba éxana. Bárapo matakeitha Israel pía pemómoxi susato jiwi tatsi ichichipa daxita juteba pomonae xua báyatha Saúl aichaxaibichi xua nakua itorobiya peewatsin penaexanaewa. Íchitha Saúl jeye:

—Bara, jopa bapomonae pajutebinde tsipéi Nakom naka yawena xua waamanayabiwa amonitamona, jei.

Bapoxonae Israel pía pemómoxi susato jiwi tatsi daxita pona ichaxota po tómara pewüng Gilgal. Baxota barapomona duwéi juteba xua be ofrendang matawüng, po ofrendang xua petsabiwang xua Nakom nexa. Yawa baxota pinmonae nakae-tuta xua Saúl peyábara barükui-iturajináewatsi. Bapoxonae baxota Saúl mataxátatatsi tepa xua nakua itorobiya peewatsin penaexanaexae. Bárapo matakeitha barapomona bichokono nabarü jüntükoyene weiweina.

5

Poxonae Israel pía pemómoxi susato jiwi tatsi jinompa Gilgal tómaratha, barapomonaetha Samuel muxuweta poxoru imoxoyo petüpaewa tsane. Kopiya matha Samuel tsipaeba barapomonaetha jeye:

—Icha xang pákata abe exanéibatsi, baxua yábara panetsipáebare, jei.

Daxita Israel pía pemómoxi susato jiwi tatsi jumenota jeye:

—Bápana jopa painta abe exanaem. Bápana jopa pana muxuitorobim, jei barapomona.

Bapoxonae Samuel yábara kanantanaxeina éxana barapomonaetha, bapong jeye:

—Nakom beta kana éxana paiña amo susato jíwitha. Matáütano Nakom yawena barapomona poxonae barapomona kapoinchi Egipto nakua weya. Nakom paka kata Canaán nakua.

”Paxam matowa icha nakomüng pawünae jaintéibame. Paiña neexaneibixae bapo koyene, daxota Nakom kopateiba xua bara icha nakuapiwi paka amanaya-beiba, pomona paiña nepaka kaitafáetabi jiwi. Poxonae aena panakui-barapentéibame xua wüünae paiña nejainteibiwa icha nakomüng, bapoxonae Nakom pawüükéibame xua bapong paka kapanenebiya tsaibi tsane. Bara baxua Nakom exaneiba.

”Poxonae báyatha pawüükame Nakom xua paiña nepákata exanaewa pong nakua itorobiya peewatsin, bapoxonae Nakom payábara abe éxaname. Ánoxuae nama pong nakua itorobiya peewatsin irü paxam bewa xaniwaicha pajumeko-wüntsiya exanaem daxita xua Nakom pía peitorobi koyenein tatsi paka itoroba. Daxita matakabi Nakom pákata wüükeibinchi, jei Samuel.

Bapoxonae Saúl, pong nakua itorobiya peewatsinxae, tres mil po penawabchüü-exaneibiwi matabüxübe itapeta xua peyanabinéxatsi, yáwano pexanto kueyatatsi, pong pewüng Jonatán. Ichamonae kaibe nawibiya piabong beya.

Meje yábara poxonae Saúl, pong nakua itorobiya peewatsin, jopa exanaeyo pokotsiwa itoróbatsi Nakom, xuano xua Nakom Saúl tsipáebatsi xua jopa ekeicha nakua itorobiya peewatsin naexanaponáe tsane

(1 Samuel 13.3—15.35)

Barapoxonae pírapae, filisteomona kaetukáetuta penawabchüü-exaneibiwi xua pinmonae. Yáwano nakuiwüünaeta xua naba peexanaenexa Israel pía

pemómoxi susato jíwitha tatsi. Bapong Saúl, pong nakua itorobiya peewatsinxae, irü pía penawabchüü-exaneibiwi tatsi jinompa Gilgal tómaratha. Barapomonae ewatempa xua Samuel pepatopaewa tsipéi Samuel jutebina duwéi xua be ofrenda matawüng xua Nakom nexa. Samuel báyatha tsipaeba Saúltha jeye:

—Pana éware siete po matakabibetha xua tapatopaewa tsane, jei.

Íchitha poxonae Samuel jopa patopaeyo poxonae yapukaewa siete po matakábibe, ichamonae jíwana néxata nawibiya. Néxata bapong Saúl, pong nakua itorobiya peewatsinxae, saya piakoutha éxana xua duwéi pejutebiwa xua be ofrenda matawüng, yawa bárapo duwéi tauta Nakom nexa. Tsiwiyo pirapaeyo Samuel patopa. Poxonae Samuel jumetane xua juiña Saúl éxana, Samuel bichokono kaseba, Saúl kasébatsi. Saúl tsipáebatsi jeye:

—Poxoru tautame duwéi poxonae xang jopa patopaeiño, daxota Nakom jeichina icha pebin xua bapong nekoutha xuya penaexanaewa tsane pong Israel nakua itorobiya peewatsin tsane, jei.

Pirapaeyo Samuel píabo benawiya.

2

Saúl wárapa Gilgal tómara weya. Yawa pía penawabchüü-exaneibiwi tatsi barü wárapa. Barapomonae nakuiwüünáetaba xua naba peexanaenexa. Barapoxonae írürü Jonatán, Saúl pexanto tatsi, irü ichüng, pong pewowinwüüto, pong xua Jonatán dejonang tayapu-eénatsi, bapongbe pónabe ichaxota penawabchüü-exaneibiwi xua filisteomonae. Bárapo filisteomonae eena ichaxota po namtiyo, tsiki namtiyo tsika, xua ichaxota demuxuwa náitama táekabe.

Jonatán éwata xua peyawenaewa tsainchi, xua Nakom peyawenaewa tsane bapongtha, xua pejutebiwa tsane pomonae xua penawabchüü-exaneibiwi, xua filisteomonae. Bapong Jonatán ichichipa xua Nakom tsita itapeiñaxeinaena xua xaniwaicha yawenaena barapóngbetha, xua barapoxonae penawabchüü-exaneibiwi, xua filisteomonae, barapongbe pekopatsinexatsibe xua bara moya pejuiñáenéxabe ichaxota filisteomonae pía penawabchüü-exaneibiwi tatsi jinompa xua ichaxota demuxuwa nantiya náitama táekabe. Bara baxua éxana.

Filisteomonae pía penawabchüü-exaneibiwi tatsi bara kópata, bapongbe bara kopatatsibe, jeichíchibe:

—Moya bara pajuindebe ichaxota paumenang, jei filisteomonae pía penawabchüü-exaneibiwi tatsi.

Bara bapongbe bara bepatopíyabe. Nakom yawena xua penawabchüü-exaneibiwi jutébatsi xua veinte pongbe. Néxata daxita icha filisteomonae pía penawabchüü-exaneibiwi tatsi junuwa yawa daxita tsanarúküpa. Barapomonae jopa yaputaeyo xua eta bichi tsane xua exanaena.

Saúl imoxoyo ungkua ichaxota bomüxüng xua pía penawabchüü-exaneibiwi tatsi piabómüxüng. Saúl tane bárapo bong weya xua poxonae baxua éxana. Irü Saúl pía pebiwimonae kápona baxota xua irü naba peexanaenexa. Bárapo matakeitha Nakom yawena, Israel pía pemómoxi susato jiwí tatsi yaweinchi, xua pejutebiwa pinmonae xua filisteomonae pía penawabchüü-exaneibiwi tatsi.

Bárapo matakeitha Saúl, pong nakua itorobiya peewatsin báyatha jeye:

—Daxita jopa bewa nabanáe tsane, beya abü poxonae daxita omeicha yota exanaein pomonae tana neaitafáetabi jiwi xua be penayamatomokaewa. Icha ichüing nabanaena, bapong bewa tüpaena, jei.

Daxita Saúl pía penawabchüü-exaneibiwi tatsi jumetaiuchi. Daxota daxita barapomonae jopa pexaewaxi nabanaeyo bárapo matakábitha, bekein barapomonae bichokono jainpa. Poxonae barapomonae pona ichaxota bana nawita, dapong aibi xua banto siwatokétaba xua pedaebinexa. Saya meisha bapong Jonatán banto daeba poxoru bapong báyatha jopa paxa jumetaeyo xua poxonae paxa tatsi paeba. Bapong Jonatán tsiwiyo jíwana pita banto mera yawa bara daeba.

Bárapo merawitha, Saúl ichichipa kaibe náwiya, yawa ichichipa naba éxana ekeicha filisteomonaetha. Daxota sacerdotemonaepin yáíñaba Nakomtha jeye:

—Nakom ¿metha bara paponaein jampa? Ichikuitha ¿metha jopa paponaein tsane jampa? jei.

Íchitha Nakom jopa jumenotsiyo poxoru Jonatán tsiwiyo banto mera daeba. Bara néxata barapomonae ibótixi kopababa xua pía yaputaetsi pong xua abe éxana icha wüing naitüütaba. Néxata Jonatán wüing naitüütaba.

Saúl báyatha najüntükui wüünaeta xua pebexubiwa tsane pong abe éxana xua poxonae xane. Barichi pexanto yawa najüntükui wüünaeta xua pebexubiwa, pong yatsikaewa pexanto tatsi. Íchitha daxita Israel pía pemómoxi susato jiwi tatsi paeba:

—Jonatán jopa bewa tüpáe tsane, tsipéi bapong, pong xua kopiya tamrópata pítaba xua juteba xua filisteomonaetha jutébatsi, jei.

Pijimonaetha yamatéikatsi Jonatán. Daxota Jonatán napaeba xua paxa jopa bexubichi.

3

Saúl bichokono peayapusüüwa xeina xua peitorobiwa. Bapong bichokono pinmonae éxana pía penawabchüü-exaneibiwi tatsi. Yawa naba éxana pomonae Israel nakuapiwi pía peaitafaetabi jíwichi. Íchitha áwiya kataunxuae Saúl jopa yábara kuiwüünaetha tsozonaetsi filisteomonaetha.

Barapoxonae pírapae, Samuel Saúl jeichi:

—Nakom ichichipa xua yotabíname amalecitamonae, xuano xua nejutebiwa tsane daxita jiwi yawa múxuna daxita duwéi. Nakom paeba xua pinae daxita bewa werapaena, jei Samuel.

Báraxua Nakom éxana xua amalecitamonae abe peexanaewa tsainchi poxoru báyatha Israel pía pemómoxi susato jiwi tatsi yótabatsi poxonae Egipto nakua werendena xua peponaenexa Canaán nakua beya.

Daxota Saúl kaetukaetuteta pinmonae xua penawabchüü-exaneibiwi yawa bara yótaba amalecitamonae. Bara barapomonae amanayabapenta, yawa daxita juteba. Saya meisha jopa bexubichi pong nakua itorobiya peewatsin. Saya maxüketsiya kapoinchi pía nakua beya. Yawa Israel pía pemómoxi susato jiwi tatsi yábara nantanaxeina xua jopa pejutebiwa po duwéi xua pexeiña duwéi. Saya meisha juteba po duwéi xua jopa pexeiña duweiyo.

Nakom, Samuel tsipáebatsi xua Saúl yábara jeye:

—Saúl jopa neyábara jumekowüuntsiyo. Kaewa yábara anthüthüdewein xua yáitama bapong kopatang xua báraxua bapong penaexanaewa, pong nakua itorobiya peewatsin, jei Nakom.

Bara néxata Samuel pona xua Saúl pejeichinéxatsi. Poxonae Samuel kaxina Gilgal tómaratha, xua Saúl kaxínatsi, bapoxonae Saúl kopiya kueikueijei, jeye:

—Báyatha éxanang xua pokotsiwa Nakom neitoroba xua bepa pinae exanaein, jei.

Íchitha Samuel jumenota jeye:

—¿Eta pokotsiwa metha jumetang xua ovejang fibompa yawa vacang fibompa? jei.

Saúl jumenota jeye:

—¿Jai? Itapeta panotang po duwéi xua bichokono wüünae, xua po duwéi pata-jutebinexa xua be ofrendang matawüing xua Nakom nexa. Báyatha icha duweimonaein pajutebang, jei Saúl.

Néxata Samuel jumenota jeye:

—Taema, Nakom mérawi netsipaeba xua pinae xam jopa kaitaküüpa tsane xua nakua itorobiya neéwatsin nenaexanaponaewam tsane, bepa pinae jopa exanaem pokotsiwa xua Nakom kakuí itoroba. Nakom báyatha katsipaeba xua bepa pinae daxita jiwi jutebíname xuano bepa pinae daxita duwéi jutebíname. Daüimetha áwiya xéiname bárapo duwéi jíwanamonae, jei Samuel.

Saúl jumenota, jeye:

—¡Báraba exanakoumbá pokotsiwa Nakom neitoroba! Bara ápara báyatha naba éxanang amalecitamonaetha. Daxita jutebang yawa wáetabang pong amalecitamonae pía nakua tatsi itorobiya pía petaewatsinchi. Saya meisha ichamonae duwéi jíwana kápata xua pejutebinexa xua be ofrendang matawüing xua Nakom nexa, jei Saúl.

Samuel jumenota, jeye:

—Kopiya matha, jame Nakom ichichipa xua neexanaewa tsane pokotsiwa xua bapong kaitoroba. Báraxua jame yatsikaewa aiñakuí beyakaincha xua duwéi jutébame xua be ofrendang matawüing xua bapong nexa. Jame pokotsiwa aiñakuí, pokotsiwa xua bewa ichüing exanáe, ápara jame xua pokotsiwa bapong itoroba.

”Maisha bichokono jopa wüünaeyo xua jopa exanaem pokotsiwa Nakom kaitoroba xua neexanaewa tsane. Poxonae baxua éxaname, ápara abe éxaname icha be ichi xua poxonae éxaname xuipaxaewi pía koyeneya, ichikuitha xua poxonae be ibo nakomüing wüünae jáintame. Nakom jopa kakópatsi tsane xua nenaexanaponaewa xua nakua itorobiya neéwatsin, tsipéi jopa báyatha exanaem pokotsiwa bapong kakuí itoroba, jei Samuel.

4

Néxata Saúl, pong nakua itorobiya peewatsin, bichokono junuwa xua jopa ekeicha penaexanaewa tsane xua nakua itorobiya peewatsin. Néxata Saúl wüüka, Samuel wüükatsi, xua Samuel pekuiyábara jüntemainanexa pokotsiwa Saúl éxana. Íchitha Samuel namchi:

—Ápara Nakom jopa ichawa beya pepaebin ichi be jopa jiwi ichiyo. Bara nekoutha Nakom icha pebin exanaena, xua pong nakua itorobiya peewatsin, jei Samuel.

Bapoxonae Samuel bexuba amalecitamonae pía nakua tatsi itorobiya petaewatsinchi. Bapoxonae Samuel pona piabotha. Saúl irü piabotha benawiya. Bárapo matakabi weya ekeicha pepu bápana jopa nataéyobe. Samuel bichokono wekoyéi xua Saúl ekeicha jopa penaexanaewa tsane xua nakua itorobiya peewatsin.

**Meje yábara poxonae Nakom David itapétatsi,
xua pong Israel nakua itorobiya peewatsin éxanatsi**

(1 Samuel 16.1-13)

Kaentakeitha poxonae baxua yapukaewa, Nakom Samuel tsipáebatsi:

—Jopa yábara nantü exabinde xua taitawetsixae Saúl, pong nakua itorobiya peewatsin. Jame ichüing, pong nakua itorobiya peewatsin, itapetang. Ponde bara beya bapo pebintha. Yawa mata epatábare penasiwa xua jiña neyábara kaununu-tsinexa xua ápara ichüing pong nakua itorobiya peewatsin tsane, jei Nakom.

Samuel Belén tómara beitorobíyatsi Nakom, xua Isaí pía pexui tatsi kaein pejé-wana matasipawé epatabinéxatsi penasíwatha. Bapong, Isaí, pong Judá pía pemómoxi susato jiwi jíwanamonae tatsi.

Daxota Samuel pona Belén tómara beya. Samuel tane pebin xua taicha, yawa xua itúpana, xua pong matapin, xua Isaí pía pexui jíwana tatsi. Bapoxonae Samuel nantaxeina xua bapong ápara pong Nakom itapeta, pong Samuel jeita. Íchitha Nakom Samuel baráichichi jeye:

—Jume. Bekein bapong taicha yawa itúpana, ápara bapong jopa itapetsiño. Jiwi tane ichüingtha xua saya matha weyatane, penthükoyene jopa yaputaeyo. Nama seikaya xang jintong jüntükoyene yaputang. Bárapo koyeneya jame jintong itape-tang, pong penthükoyene wüüinaein, jei Nakom.

Néxata Isaí ichamonae pía pexui waba, tamrópata wawabapona. Íchitha Nakom Samuel baráichichi xua ápara jopa daxita barapomonae jiwaniyo pong xua jeita. Néxata Samuel yáíñaba Isaítha jeye:

—¿Jopa xeinaem icha nexanto? jei.

Samuel jumenótatsi Isaí jeye:

—Ichüing xeinang pong David. Bapong bichokono pewowin. Wéxotha pópona xua yapukapópona ovejang, xua uang penawang, jei Isaí.

Néxata Samuel itoroba xua David pewabinéxatsi. Poxonae David patopa, Samuel baraichi Nakom, jeye:

—Ápara bapong pong xua jeitang. Penasíwatha matasipawé epatábare, jei Nakom.

Néxata Samuel David matasipawé epatábatsi penasíwatha xua írürü poxonae daxita peweicho jiwi kuitaeumeinchi baxua. David pewowinwüüto. Bichokono itúpana, yawa itabara tsobia, yawa bichokono itamünmüngka. Bárapo matakabi weya Nakom pía pejumopetünaxü tatsi Davidbarü popoinchi. Poxonae daxita baxua weta Samuel píabo benawiya.

**Meje yábara poxonae David tangbaba arpa Saúl nexa
pong nakua itorobiya peewatsin**

(1 Samuel 16.14-23)

Nakom nakuibaraxuba xua Saúl peyawenáewatsi pong nakua itorobiya peewatsin. Daxota ichikuitha bapong kauri barü popoinchi yawa matayaiba exanéibatsi. Néxata Saúl pía petanakuiteibíwichi nantanaxeina xua pewabiwa tsane ichüing, xua petanbabiwa tsane arpa poxonae Saúl matayaiba exanéibatsi kauri, xua bára-xua xua pebusi, xua petanbabiwa busi, Saúl jüntema peexaneibinéxatsi. Ichüing, pong Saúl pía petanakuichiwichi jíwana tatsi, paeba jeye:

—Ápara David, pong Isaí pexanto tatsi, yaputane beta xua tangbaba ápatha, jei. Daxota Saúl, pong nakua itorobiya peewatsin, pomonae petanakuichiwichi tawábatsi, David wábatsi. Daxota daxita koyeneintha tsaibi David tangbabeiba arpa poxonae Saúl, pong nakua itorobiya peewatsin, matayaiba exanéibatsi kauri. David bichokono tsita jüntükoyene wüünae, xua Saúl tsita jüntükoyene wüünaetsi. Bapong Saúl, David itoróbatsi xua petakaponeibinéxatsi pokotsiwang xua penayanabiwang, xua penainwang, xua poxonae naba exaneiba Saúl.

**Meje yábara poxonae David bexuba penawabchüü-exaneibiwi exaneibín,
pong bichokono taicha, xua filisteomonaepin**

(1 Samuel 17.1-18.5)

Icha dapaetha penawabchüü-exaneibiwi, xua Israel pía pemómoxi susato jiwi tatsi, naba filisteomonaetha. Demuxúwangtha jinompa. Nantiya náitabara penta xua naba. Penawabchüü-exaneibín, pong bichokono taicha, pong peakuiyein xua filisteomonaepin, bapong filisteomonaepi bapong tatsi weya pona, xua ovejanamüü bong.

Yawa Israel pía pemómoxi susato jiwi tatsi kawétatsi, pomonaexae penawabchüü-exaneibiwi. Bapong tres po mérobe xeina xua taicha. Matáütano bapong penain kamisha namaxátata xua bichokono arewe, xua penaperüü atsiwanexa. Bapong matawüing dútatsi: “Goliat”, baraichi. Bapong wawái Israel pía pemómoxi susato jiwi tátsitha jeye:

—Paitoróbare kaein, pong paxam jíwana, pong patanabetsibe. Icha xang bapong kui-amanayabin, bapoxonae tamonaepi filisteomonaepi kanamataxeinaena paiña nakua, xua Israel nakua. Íchitha icha bapong nekui-amanayabina, pong paiñamonaepi jintong, paxam pakana mataxeináename tamonaepi, xua filisteomonaepi, jei Goliat.

Israel pía pemómoxi susato jiwi tatsi, xua penawabchüü-exaneibiwi, bichokono kuikunuwa, Goliat kuikunúwatsi. Daxota barapomonaepi jopa be pekaxinchiwa xua naba peexanaewa bapongtha.

2

Akoibi pongbe xua matapin jiwi xua David peweicho jiwi tatsi, barapomonaepi Saúl pía penawabchüü-exaneibiwi jíwana tatsi. Barapoxonae írürü David paxa tayapukapópona ovejang xua penawang. Icha matakeitha Isaí pexanto barái Dávidtha, jeye:

—Ponde ichaxota eweichomonaepi jinompa xua netaenexa barapomonaepi. Yawa takaponde penabanaewa barapomonaepi, jei Isaí.

Bara David patopa ichaxota Saúl pía penawabchüü-exaneibiwi tatsi tajinómpatsi. Báyatha yapukaewa xua beyakaincha kae xometo xua daxita matakabi tsaibi Goliat kaweta xua naba peexanaenexa Israel pía pemómoxi susato jíwitha tatsi. David jumetane poxonae Goliat kaweta Israel pía pemómoxi susato jíwitha tatsi. Daxota bapong namchi jeye:

—Bapong bara jopa bewa kaweta dukua-naebiyae xua jopa bewa kaweta dukua-naebíyaetsi wámonaepi, pomonaepi penawabchüü-exaneibiwi, tsipéi waxainchi ápara Nakom piamonaetsi. Xang nabin pong Goliat, pong jopa pejumekowüntsini Nakom, jei David.

Poxonae báraxua Saúl jumetane, najumekaitoroba xua David pewabinéxatsi. Saúl David jeichichi:

—Xam jopa kaitaküüpaeyo xua naba neexanaewa bapongtha. Bapong ápara kaena báyatha penawabchüü-exaneibiwi exanaein xua bichokono akuiyéi xua penabewa. Xam ápara saya pewowim, jei Saúl.

Íchitha David jumenota jeye:

—Xang eenéibang taxa pía ovejang, yawa neuthümonae jutebeibang, yawa duwéi xua osomonae, po duweimonae akuiyéi, jutebeibang poxonae bekein taxa pía ovejang ichichipa taxáibatsi. Poxonae baxua exaneibang, Nakom wüükeibang yawa bapong neyaweneiba. Bara beta yaputang xua Nakom neenaena poxonae naba exanaein bapongtha, pong filisteomonaepin, jei David.

3

Saúl, pong nakua itorobiya peewatsin, nama jopa xeinaeyo xua pepaebiwa. Saya meisha David tsita járabatsi penain kamisha. David namaxátata bárapo penain kamisha. Íchitha David koxánatsi xua namaxátata tsipéi báyatha jopa namaxata-tsiyo barapókotsi penain kamisha. Daxota namawejonta.

Bapoxonae David pona penátotha, po penato ameneibi xua poxoru weixae. Baxota pita cinco po ibówabe, po ibowang xua matadaméi yawa dunukuetha jeya. Bara David pona ichaxota Goliat beya xua naba peexanaenexa bapongtha. Ichawa David jopa kaponae, saya meisha yawetsirübürü kápona.

Poxonae David tainchi xua dawarena, Goliat David kuikapánatsi. Íchitha David jeye:

—Nakom, pong pepa Nakom, po Nakom xua paxang, pomonae Israel pía pemómoxi susato jiwí tatsi pangxaein, pong wüünae pajainteibang, bárapo Nakom neyawenaena. Bárapo matakeithe daxita jiwí yaputaena xua pokoyene Nakom ápara pana yawena.

Goliat tamrópata pítaba xua pona ichaxota David beya. Írürü David imoxoyo unguapona. Bara néxata David ibowa dúnukue wejutsina, yawa yawetsirübürü-tha duta. Bara David yawewetaxuba yawetsirübürü yawa bara punuxuba. David itapathina, Goliat itapathínatsi, bárapo ibówatha, yawa íratha jopa éxana. David Goliat bekuinaepoiña, yawa piawáttotha wishi ukutaxuba, Goliat piawáttotha wishi ukutaxotsi.

Néxata penawabchüü-exaneibiwi xua filisteomonae, bichokono junuwa, yawa tamrópata notarúkupa xua tsanarúkúpeinouta. Íchitha penawabchüü-exaneibiwi, xua Israel pía pemómoxi susato jiwí tatsi, pubaraina xua beya pía tómarang beya. Barapomonae Israel pía pemómoxi susato jiwí tatsi bichokono pinmonae jíwana juteba.

Poxonae Saúl, pong nakua itorobiya peewatsin tane baxua, Abner, pong penawabchüü-exaneibiwi pía pentakaponaein tatsi, bapong wüükatsi xua David petabarü denaenexa tsainchi. Bara Abner barü dena. Poxonae David peitabaratha patopa, Saúl, pong nakua itorobiya peewatsin, David pekóbetha kapatopa Goliat pentasipa.

Néxata Saúl David wábatsi xua baxota peekaenexa. Bapoxonae Saúl pexanto tatsi, pong pewüng Jonatán, bapong David pía jintong tatsi náexana. Bapong Jonatán David kusi kátatsi xua piawato tsane.

Barapoxonae nama Saúl David itorobéibatsi xua ichaxota naba exaneiba. David beta exaneiba, daxota David kana éxanatsi xua pomonae penawabchüü-exaneibiwi pía pentakaponaewi jíwana tatsi. Daxita jiwi jüntükoyene weiweina poxonae diwesi jumetainchi xua David beta éxana. Barichi pomonae pentakaponaewi xua Saúl peyawenáewatsi, poxonae barapomonae diwesi jumetane xua David amanáyaba poxonae naba éxana, barapomonae irü jüntükoyene weiweina.

**Meje yábara poxonae Saúl, pong nakua itorobiya peewatsin,
David úwatsi yawa ichichipa bexotsi**

(1 Samuel 18.6—20.42)

Icha weitha David ekeicha pinmonae juteba penawabchüü-exaneibiwi xua filisteomonae. Poxonae Davidbarü kaibe nawibiya, yábüxi xua Israel pía pemómoxi susato jiwi tatsi, David irü pía penawabchüü-exaneibiwi tatsi daxita barapomonae maténatsi. Barapówaxi nawiraba yawa naxüna. Barapówaxi Saúl yábara kanaxünajínkatsi, irü David yábara kanaxünajínkatsi. Barapówaxi kaunanaya naxüna xua pinae Saúl pinmonae juteba pía peaitafaetabí jíwichi, íchitha xua pinae David toxeincha áwiya pinmonae juteba beyakaincha xua Saúl juteba.

Poxonae Saúl baxua jumetane bichokono anáepana, tsipéi bapong nantanaxeina xua methaunxuae jiwi David exanaeinchi pong nakua itorobiya peewatsin. Bapong Saúl tamrópata pítaba xua David uwiya yábara nantanaxéinatsi.

2

Icha mataketha Saúl ekeicha matayaiba éxanatsi kauri. David pía arpa tangbaba Saúl nexa. Poxonae David tangbabeka, Saúl dejona komaungkua. Nakuéyatabe pokuikoyenebetha David sotábatsi. Íchitha David nakuéyatabe pokuikoyenebetha nantsiyatáraba, yawa dejónatha David jopa kawatabichi. Saúl yaputane xua ápara David yawénatsi Nakom, xua nama Saúl ekeicha jopa peyawenáewatsi Nakom. Daxota David kunúwatsi. Saúl náemata David kana éxanatsi xua pong ichamonae pekanamataxeináewatsi, xua penawabchüü-exaneibiwi jíwana.

Saúl abü éwata xua David icha mataketha bexubinchi xua poxonae naba éxana. Íchitha David amanayabeiba xua poxonae naba exaneiba, poxoru Nakom yawenéibatsi. Barapoxonae Saúl bichokono David kunúwatsi, beyakaincha xua kopiya. Íchitha David antobetsi Israel pía pemómoxi susato jiwi tatsi.

3

Barapoxonae Saúl nantanaxeina pokoyeneya xua David abe kana exanaeinchi xua tüpaena. Mical, powa xuiyapiwa xua Saúl pexántixi tatsi, barapowa David antobetsi. Daxota Saúl, David tsipáebatsi xua kópatatsi xua bara David penakoyobinexa barapowa.

Saúl tsipaeba pomonae pentakaponaewi xua David pemuxuwetsinéxatsi xua bara jumejéi tsane pokotsiwa xua Saúl ichichipa. David aichaxaibi xua jéjéi xua poxonae Saúl tsipaeba xua katsina pexantiyo bapongtha. David tsipáebatsi daxita barapomonae jeye:

—Saúl pexantiyo kakatapaeba, powa Mical, icha pinae jutebíname cien po jiwi-monaebe xua filisteomonae, jei.

Saúl nantaxeina xua David pebexubiwa tsainchi poxonae naba éxana filisteomonaetha. Bapoxonae xua aichúrukuae tsane David pong Saúl pía peaitafaetabí

jintongtsi. David bara jumejejeí xua Saúl paeba. Yawa David bara pona xua peju-tebiwa doscientos po jiwimonaebe xua filisteomona.

Bara David irü Mical napitabebe. Saúl ekeicha bichokono junuwa beyakaincha xua kopiya tsipéi tane xua ápara pexantiyo tatsi bichokono David antobetsi, yawa xua David bichokono yawénatsi Nakom.

Néxata Saúl najüntükoyene yapuweta xua David pebexubiwa tsainchi. Baxua Saúl piamonae matabüxü yábara tsipaeba, yawa tsipaeba pomonaetha, pomonae pentakaponaewi, xua pomonae píabo tatsi petaewatsíwichi. Íchitha Jonatán, xua Saúl pexanto tatsi, pong David pamoyo, David tsipáebatsi jeye:

—David, taxa kabexubapaeba, jei.

Pírapae Jonatán paxa muxuweta jeye:

—Axa, jopa David bexubinde. Ápara David jopa abe kata exanaeyo, jei.

Matapaiña Saúl, pong nakua itorobiya peewatsin, najüntükui kopatsiya paeba jeye:

—Ápara David jopa bexubín tsane, jei.

Bárapo koyeneya David áwiya nanaexanapona Saúl pía penawabchüü-exa-neibiwi exanebíwitha tatsi. David naba éxana filisteomonaetha, yawa bara amánayaba poxona naba éxana barapomonaetha.

4

Barapoxonae ekeicha Saúl matayaiba éxanatsi kauri. Bara David tatanbaba arpa Saúl nexa, pong nakua itorobiya peewatsin. Íchitha Saúl ekeicha bapong David sotábatsi dejónatha. David naetsíriwa, xua kuitaya naetsiríwatsi Saúl. Píabo benawiya. Mical xua David píowa tatsi barapowa David muxuwétatsi jeye:

—Bárapo merawitha bewa naetsiríwíname. Taxa ichichipa xua nekabexubiwa tsane, jei.

Barapoxonae néxata Saúl itoroba pebiwi xua peenaenexa David píabo tatsi xua jopa pepanepaenexa. Daxota Mical, David ventana weyorékatsi. Mical ibo nakom bota cámatha. Xaxaintabota yawa aiña paparúwangtha matakatabota xua mexeya David bara boka baxota.

Néxata pebiwi pomonae Saúl yawenéibatsi, barapomona David piabotha tajojo-níyatsi xua David pemaxüketsiwa tsainchi yawa pekaponae néxatsi ichaxota Saúl. Íchitha barapowa Mical namchi:

—David domáebatsi, jei.

Pírapae Saúl, pong nakua itorobiya peewatsin, yaputane xua ápara pexantiyo muxuitórobatsi, xua Mical paxa muxuitóroba. Saúl bichokono anáepana, daxota Mical bichokono paxa muxutáíñabatsi. Daxota Mical paxa muxuitóroba jeye:

—David netsipaeba xua bepa pinae nebexubina icha jopa yawenaeiño xua naetsíriwa, jei bapowa xua náeraba.

Barapoxonae írürü David pona Samuel beya xua baxua yábara tsipaeba. Saúl David jéitatsi, íchitha jopa itaküüpaetsi xua David petaebíwatsi. Néxata David pona yawa kaxina pía jintong, pong Jonatán, yawa barái jeye:

—¿Eta pokotsiwa metha axa neyábara anáepana? jei David.

Jonatán David jumenótatsi jeye:

—Ápara jopa xaiñeyo. Jopa taxa kakasébiyo, jei.

Íchitha David namchi jeye:

—Bara beta yaputang xua ápara axa neyábara anáepana, íchitha jopa katsipáe-biyo tsipéi yaputane xua ápara xam tajitom, jei David.

Daxota David itoroba, Jonatán itoróbatsi, xua yawa jeye:

—Ponde axa beya netaenexa xua icha áwiya axa nekaseba. Ekeicha kaewaré-nande xua baxua yábara tana netsipaebinexam, jei David.

Bara bapong baxua David jumejejeichi, yawa pona paxa beya. Pírapae Jonatán jeita, David jéitatsi, íchitha jopa kopatsiyo xua ichamonae peyaputaewa. Jonatán David jeichi:

—Ánoxuae yaputang xua taxa kajeita xua nekabexubinexa tsane, jei Jonatán.

Bekein Saúl David peita aenaeníwatsi, íchitha David irü Jonatán namuxuwé-tabe xua pía jintongbe penaexaneibiwa tsánebe xua ataya. Yawa nayábara tsi-wüünae muxudútabe xua nantiya penayawenaenéxabe xua icha David tüpaena, Jonatán yawenaena David pía matabüxümonae tatsi, yawa icha Jonatán tüpaena, David yawenaena Jonatán pía matabüxümonae tatsi.

Barapoxonae David bara weya pona. Bapong David yaputane xua ápara Saúl yábara anáepana, xua David yábara anaepánatsi, yawa bewa maisha naetsiriwina xua jopa pebexubiwa tsainchi.

**Meje yábara poxonae David Saúl kuitaya naetsiríwatsi,
xua írürü David pebiwi pinmonae kaetúnatsi**

(1 Samuel 21—23)

Poxonae David Saúl kuitaya naetsiríwatsi, David pona ichaxota sacerdotemo-naepin, pong pewüng Ahimelec. David bapongtha wüüka pan. Ahimelec najüntü-koyene benaeka xua tsipéi David kompa patopa. Daxota bapong David yáíñabatsi jeye:

—¿Eta pokotsiwa metha kompa patópame? jei.

Íchitha David muxuitóroba bapongtha jeye:

—Ápara Saúl taéxanang xua peaiñakuí koyenewa, pokotsiwa xua namicha xua Saúl nexa, pong wanákuatha peewatsin. Tha bexa barü nakaetutsichi pewowi, jei David.

Néxata Ahimelec David baraichi jeye:

—Ápara pan aibi. Saya meisha po pan bobena baraxote ápara Nakom piyawang xua báyatha jeba pexaethopáewatha, xua po pexaethopaewa Nakom piabotha tatsi ungkua. Saya meisha sacerdotemonae pan ba xane bárapo pan, jei.

Dapo jumetha Ahimelec David kátatsi bárapo pan xua pewowi petakayaené-xatsi, pomonae xua ewatómpatsi, xuano xua pebarü xaenexa bárapo pewowi. Bapoxonae David yáíñaba, Ahimelec yáíñabatsi, jeye:

—¿Baxote xéiname kusi jampa? ¿Ichikuitha xéiname dejona jampa? jei David.

—Aja, jei Ahimelec.

Bara Ahimelec David kusi kátatsi, po wato xua báyatha Goliat xeina. Daxita bara baxuang David nota, yáwano bara pona Israel nakua weya.

2

Kopiya matha Gat tómara beya pona, po tómara jíwana xua filisteomonae pía tómarang tatsi. Íchitha bárapo tomarapiwi David yaitaerükúpatsi. David bichokono junuwa xua mexeya ítara bexotsiwéi pong Gat tómara itorobiya peewatsin.

Daxota náemata David be pong matayáibatsi náexana. Bapoxonae David pona Gat tómará weya, yawa bapoxonae pona xua pepoponaenexa ichaxota ibowóu, po ibowóu pewüng Adulam.

Poxonae pomonae, xua David piamatabüxüyo tatsi, jumetane xua juiña David pópona ibowoutha, bapoxonae barapomonae David kaetúnatsi. Daxita pebiwi, pomonae xua báyatha Saúl ita-aenaeneichi, David kaetúnatsi. Yawa pomonae báyatha pentoma amanayabeibi jiwi, barapomonae David kaetúnatsi. Barichi pomonae aichaxaibi xua Saúl penaexanaewa pong nakua itorobiya peewatsin, bárapo pebiwi irü David kaetúnatsi. Daxota David kaetúnatsi cuatrocientos po pebiwimonaebe.

David paxa kápona, yawa pena kápona xua pepoponaenéxabe ichaxota pópona pong Moab nakua itorobiya peewatsin, xuano xua baxota jüntema pepoponaenéxabe. Néxata pong, Nakom peitorobi jume pepaebin, pong pewüng Gad, bapong David tsipáebatsi jeye:

—Ibowóu weya wárapare. Untha nepoponaewa tsane, po unu báyatha Judá pía pemómoxi susato jiwimonae tatsi xeina, jei Gad.

3

Bara kaena barapoxonae David wárapa. Bara kaena bárapo dapaetha Saúl David jéitatsi. Bekein ichichipa David putáebatsi, íchitha bapong jopa itaküüpaetsi xua David peputaebíwatsi. Yawa bapong Saúl bichokono kaseba pomonaetha, pomonae píabo petaewateibíwichi, tsipéi barapomonae jopa Saúl tsipaebichi pokoyene xua David irü Jonatán ápara pía jintongbe náexanabe.

Írürü pebin pópona pong pewüng Doeg, pong Edom nakuapin. Bapong Doeg báyatha Nakom piabotha tatsi pona, xua chivonámüübo, xua poxonae David wüüka pan yawa xua wüüka kusi. Bapong daxita baxua Saúl yábara tsipáebatsi. Néxata Saúl, pong nakua itorobiya peewatsin, itoroba ichüing xua Ahimelec pepatopaewa tsane ichaxota Saúl. Bichokono Ahimelec kasébatsi yáitama David yawénatsi. Jeye:

—¿Eta xua metha David yawéname? jei Saúl.

Ahimelec jumenota jeye:

—Baxua éxanang tsipéi David irü pomonae napunapona, barapomonae ápara juiña nekatanakuichiwi, jei Ahimelec.

Bárapo jumetha Saúl bichokono anáepana. Saúl kui-itoroba pía penawabchüü-exaneibiwi tatsi jeye:

—Ahimelec, pabexore. Yáwano pajutébare icha sacerdotemonaeno, pomonae xua barü pópona Ahimelec. Yáwano pajutébare piamonae tatsi, pía pexui tátsino, yawa daxita pía duweimonae tátsino. Daxita pajutébare, jei Saúl.

Meisha Abiatar napaeba, pong Ahimelec pexanto tatsi. Bapong Abiatar pona xua David jéitatsi. David tsipaeba bapongtha, jeye:

—Yáitama Saúl naka jéitabe xua pía wanaka bexubinexa tsánebe, daxota wüünae xua nabarü poponáeinhibe, jei David.

Bárapo matakábintha filisteomonae nawabcheita Israel pía pemómoxi susato jiwi tatsi pía tómaratha tatsi, po tómará pewüng Keila. Íchitha David naba éxana barapomonaetha. David yawénatsi Nakom, daxota David amanáyaba poxonae naba éxana filisteomonaetha. Saúl yaputane xua David pópona Keila tómaratha.

Daxota Saúl kanantüwetsiya yábara éxana xua David petsimaxeinaenéxatsi xua pebexubinéxatsi. Néxata David yáíñaba Nakomtha jeye:

—Nakom, ¿eta bewa ichin tsane? jei.

Bara Nakom David jumenótatsi:

—Saúl nakuiwüunaeta xua peponaenexa Keila tómara beya. Keila tomarapiwi kanakobewenatsina Saúltha, pong Israel nakua itorobiya peewatsin, jei Nakom.

Daxota David, irü po pebiwi kuéyabatsi, Keila tómara weya wárapa. Barapomonaé itapataya warapeinouta. Poxonae Saúl yaputane xua David báyatha wárapa Keila tómara weya, bapoxonae najüntükoyene baraxuba baxua xua báyatha David yábara najüntükoyene wétatsi. Bapoxonae néxata, Davidbarü nakaetuta pía penawabchüü-exaneibiwi xua seiscientos po pebiwimonaebe.

4

Saúl áwiya David jeitapoinchi. Íchitha Nakom jopa kopatsiyo xua David petaebíwatsi. Kaentakeitha Jonatán pona xua David namicha siwapoinchi. David baraichi jeye:

—David, jopa junuwinde. Taxa jopa kaabe exanáé tsane. Kaentakeitha tsane xam, pong Israel nakua itorobiya neéwatsim tsane. Nama aibi xang, saya kayawénatsi poxonae matakáponame. Taxa báyatha baxua yaputane, jei Jonatán.

Bapoxonae David irü Jonatán ekeicha natsipáebabe xua bepa pinae pía jintongbe naexaneibínabe xua ataya tsane. Bapoxonae Jonatán kaibeya pona píabo beya. David nantsiyata dukuanaebiya demuxúwangtha. Íchitha poxonae pomonaé baxota jinompa yaputane xua David baxota pópona, Saúl tsipáebatsi jeye:

—Paka yawénatsi xua David pata tha waetabichi, jei.

Poxonae David baxua yaputane, bapoxonae David irü po pebiwi punajinóm-patsi bara weya natsixibarüküpa. Néxata Saúl, pong nakua itorobiya peewatsin, írürü pía penawabchüü-exaneibiwi tatsi, Davidbarü pubarapoinchi xua áwatha pepukaxibarüküpaetsi. Néxata írürü patopa pong diwesi pekaponaein. Bapong Saúl tsipáebatsi jeye:

—Saúl, filisteomonaé nawabchü éxana wamonaetha, jei.

Daxota Saúl Davidbarü pubarapéntatsi. Néxata Saúl pona xua naba éxana filisteomonaetha.

Meje yábara poxonae David jopa bexúbiyo, xua Saúl jopa bexubichi, xua aiña koyenebetha

(1 Samuel 24—27)

Poxonae Saúl weta xua naba éxana filisteomonaetha, bapoxonae ekeicha David pubaráinatsi. Bapong Saúl yáíñaba ichamonaetha xua eta xota metha David pópona. Bapong Saúl barü pona pía penawabchüü-exaneibiwi xua tres mil po pebiwimonaebe. David irü po pebiwi kuéyabatsi ibowóu iyiya. Tajü beya éniya po ibowóu xua baxota boka. Saúl baxoyo joniya xua pewexekaenexa. David jopa taetsi. Pebiwi, po pebiwi xua David pepunajinompaewichi, poxonae Saúl tainchi barapomonaé David jeichichi:

—Taema David, Saúl patopa. Moya bexore, jei.

Íchitha David aichaxaibi éxana baxua tsipéi Saúl áwiya Israel nakua itorobiya peewatsin, yáwano poxoru David kayábara nantanaxeina xua ápara pía

pekanamataxeinaeinchi. Bara saya imoxoyo kakuita pona bapongtha xua jopa tajü busi bokaeyo. Kúsitha tathabaxuba peopírawa xua Saúl penauyapatsiwa tatsi.

Poxonae Saúl ibowóu wejoniya yawa poxonae tajü bejíníya, David pepuya wekui-naepoiña yawa bichokono jumedangweya wawái. David pentabokototha ira betaeungkuareka xua beya ira jayareka peitapatha xua Saúl pexaiña beya tatsi. David tsita itiüita xua Saúl pía penauyapatsiwa tatsi peopírawa. David tsipaeba bapongtha jeye:

—Bekein neitaküüpa xua takabexubíwatsi íchitha jopa exanaeiño, tsipéi xam pongxaem Nakom kaitapeta xua Israel nakua itorobiya neéwatsin. Nakom paebina pokoyene xua jintam metha naitakatsatsontiya nantanaxeina, icha metha xang, ichikuitha icha metha xam, jei.

Poxonae Saúl jumentane pokotsiwa David tsipaeba, bapong bichokono wekoyéi. Bapong jumenota, jeye: —Xam David itapeta éxaname xua wüünae beyakaincha xang. Xang nantanaxeinang xua abe takata exanaewa tsainchi. Bápana jintong jopa ekeicha nayabchéi baraxubi poxonae penamaxüwáinchiwa tsane pongtha, pong pía peaitafaetabí jintongtsi.

”Xam inta beta éxaname. Mexeya poroxu baxua éxaname daxota Nakom pentoma kakatsina xua baxua neexanaexae. Xang yaputang xua Nakom ka-exanaena pong nakua itorobiya neéwatsin. Israel nakuapiwi dangwéi tsane yawa beta exanaena xua daxota jüntükoyene weiweina tsurubenanaebiyaena xua poxonae kanamataxeina dukuanaebiyáename. Íchitha neyábara tsiwüünae muxudure xua xam tamona matabüxü neyawa múxuna beta exanáename xua ataya tsane, jei Saúl.

Bara David tsipaeba xua pinae baxua exanaena. Bapoxonae Saúl, pong nakua itorobiya peewatsin, píabo beya pona. David irü po pebiwi pepunajinompawichi nantsiyabompa demuxúwangtha.

2

Barapoxonae pírapae tüpa Samuel, pong Nakom pía penakajume kaitorobí jume pepaebin. Daxita Israel nakuapiwi bichokono Samuel siwawekoyéi tsurubenanaebíyatsi.

Pírapae David ichamonae itoroba xua diez pongbe, pomonae pía pepunajinompawichi, xua pesiwaponaewa pebin, pong pewüng Nabal, Carmel tómaratha. David itoroba barapomonae xua Nabal pewüükaenéxatsi pexaewa. Bapong Nabal pong bichokono kopei pexeinaein. Bárapo matakábintha bapong pía ovejang na thabawiya xua xuang penawang. David tsipaeba bárapo pebíwitha jeye:

—Painta jakóbare Nabal yawa painta tsipáebare. Nabal painta jande: ‘Poxonae jíña ovejamona nekata ewatsiwi jinompa aishówatha, tamona imoxoyo, xua jíñamonae imoxoyo kakuita jinómpatsi. Tamona jopa abe paka kana exanaeyo. Yawa jopa abe exanaeyo paiñawang’, jande, jei David.

Íchitha Nabal abeya jumenota bárapo pebíwitha, xua po pebiwi David punajinómpatsi. Yawa Nabal bárapo pebiwi jopa katsibebichi pexaewa. David bichokono anáepana tsipéi Nabal jopa yábara jakobiyo xua báyatha pebiwi, pomonae David pebarü poponaewi, barapomonae Nabal tayawénatsi pomonae pía ovejamona petayapu eenaewichi. Néxata David itoroba pebiwi xua penakuiwüünaetsiwa tsane xua peyotabinexa Nabal píabo tatsi.

Nabal píowa tatsi pewüng Abigail. Barapowa pexeíñowa, yawa peyaputaewayo. Kaein jíwana xua pomonae Nabal pía petanakuichiwichi jíwana tatsi, bapong

jumetane xua Nabal paeba. Barapong baxua yábara tsipaeba Abigailtha pokotsiwa pisheuri tatsi paeba pomonaetha, pomonae David najumekaruta.

Daxota barapowa nantanaxeina xua petakaponáewatsi pokotsiwa amanaya xua David pexaewa pekatsíwatsi. Bara barapowa pexaewa nantatsún jeba po pexaewa xua wüünae, yawa búrrangtha tsijumajebika. Abigail pona xua David takayatsi. Poxonae bapowa David kaxínatsi, bara bapowa daxita baxuang David kátatsi. Abigail David tsipáebatsi jeye:

—Pire daxita pexaewa xua kata kapónatsi. Jopa nantanaxeinaeinde xua Nabal nebexubiwa tsane, yawa pomonae piabotha tajinómpatsi xua poxoru Nabal abe pejumenotsixae, xua jiñamonae abe pejumenotsixaetsi, xua be yantómatame jiñamonae xua daxota abe éxaname, jei Abigail.

David yaputane xua Abigail beta paeba xua poxonae báraxua paeba. Bara David nota pokotsiwang xua amanaya pekatsibíwatsi.

Áwiya kataunxuae quince po matakábibe jopa yapukaewiyo xua poxonae Nabal tüpa. David yábara yaputane xua Nabal natsi-aenaekuenta abe peexanaexae xua poxonae Nakom abe kana éxana bapongtha.

Néxata David waba, Abigail wábatsi, xua bepa pinae David pichina barapowa. Bara barapowa jejéi. Bara napítabe. Abigail irü ichowa Ahinoam barapówabe xua David pítabe xua poxonae Saúl kuitaya naetsiríwatsi, pong nakua itorobiya peewatsin. Mical Saúl pexantiyo tatsi, powa xua kopiya David pisheuri, barapowa Saúl kata icha pebintha.

3

Saúl ekeicha ichawa nantanaxeina xua David pebexubiwa tsainchi. Bapong Saúl tres mil po pebiwimonaebe kaetukáetuta, pomonae xua penawabchüü-exaneibiwi. Bapoxonae pona xua David pejeitsinéxatsi. David itoroba pomonae xua yanabaráüküpa, xua peyanabarüküpaenexa xua ichaxota naeba Saúl pía penawabchüü-exaneibiwi tatsi. Néxata David irü tsikimonaeyo, pomonae pepunaponáewichi jíwana, baxota pona ichaxota bárapo penawabchüü-exaneibiwi naeba.

Nakom kana éxana xua bárapo penawabchüü-exaneibiwi maita xua Saúl pía penawabchüü-exaneibiwi tatsi. Daxita barapomonae Davidbarü jopa taetsi. Pong xua David yántatsi, bapong ichichipa xua Saúl pebexubiwa tsainchi. Íchitha David jopa kopatsiyo xua baxua peexanaewa. Néxata David namchi:

—Bara, jopa bebexubichi tsainchi Saúl, tsipéi Nakom yaputaainchi bapong xua penatsi anaekuentsiwa xua daxota Nakom abe kana exanaena bapongtha, jei.

Daxota Davidbarü saya meisha korótiyo pita xua mera yawa eka, yawa dejona xua Saúl piyawang tatsi. Bapoxonae Davidbarü pona demuxúwatha xua matakorongkua xua tsiwiyo tajü.

Bara weya David wawái xua pong pewüng Abner wabíyatsi, pong penawabchüü-exaneibiwi pía Pekanamataxeinaein tatsi, xua Saúl pía penawabchüü-exaneibiwi tatsi. David kuikápona, xua kuikapónatsi Abner. David namchi:

—Abner, bewa maisha Saúl beta eenáename. Imoxoyo Saúl piabomüxütha papatang. Saya maitékame. Jopa ewatsim Saúl. Taema xeinang Saúl pía dejona, yawa pía koroto xua mera yawa eka, jei David.

Bapoxonae Saúl, David yaputainchi xua wawái, yawa David tsipáebatsi jeye:

—David ¿xamda? jei.

David jumenota jeye:

—Aja, ápara xang. Bápana jopa exanaein xua abe takata exanáewatsi. ¿Eta xua metha nebaráiname? ¿Eta xua metha ichichípame xua jiña nebexubichi? jei.

Néxata Saúl, pong nakua itorobiya peewatsinxae, David tsipáebatsi jeye:

—Xaniyam. Bekein xam jopa inta abe exanaem, xang abe kata éxanatsi poxonae juntukuru kabexubinchi. Neyábara jüntemáinare pokotsiwa éxanang. Jopa bekabexubichi ekeicha, jei.

Bapoxonae David barái, Saúl baraichi jeye:

—Itoróbare pebin xua pepichinexa jiña dejona. Nakom bara ne-eena xua jopa tüpaein tsane icha kaichichi xua bárapo merawitha. Nakom ka-eena xua jopa takabexubíwatsi, jei David.

Néxata Saúl píabo beya kaibe náwiya, irü David kaibe barü iya po pebiwi pepunaponáewichi.

Bekein Saúl tsipaeba, ánoxuae xua David tsipáebatsi xua jeye: “Jopa kabe-xubi tsainchi”, jei, dáichitha David jopa jumekowüntsiyo xua Saúl paeba. Daxota David ekeicha pona filisteomonae pía ira beya tatsi ichaxota po tómara pewüng Gat. David piowabe barü pona, yáwano pebiwi barü pona po pebiwi pekueyabixaetsi.

4

Poxonae Saúl David yábara yaputainchi xua Gat tómara beya wárapa, nama ekeicha David jopa pubaráinaetsi. Bara David wüüka ira pongtha, pong Gat tómara itorobiya peewatsin xua ichaxota David pepoponaewa tsane. Barapong, pong Gat tómara itorobiya peewatsin, David tómara kátatsi, po tsiki tomariyo pewüng Siclag. Bárapo tómaratha David pópona beyakaincha xua kae weibe.

Néxata David irü po pebiwi pekueyabixaetsi barapomonae naba éxana pomonaetha, pomonae Israel pía peaitafaetabí jíwichi. Yáwano daxita juteba, yáwano bara nota papübürüng yawa duweimonaein. David muxuitóroba pongtha, pong Gat tómara itorobiya peewatsin, xua pinae Davidbarü juteba Israel pía pemómoxi susato jiwi tatsi xua yawa ichamonaeno jutébanu, pomonae Israel pía pemómoxi susato jiwi tatsi kaemonae nayawa éxana.

Pong Gat tómara itorobiya peewatsin nantanaxeina xua metha moya Israel pía pemómoxi susato jiwi tatsi ápara David pía peaitafaetabí jíwichi.

Meje yábara poxonae Saúl pía pexui barü tüpa poxonae nayota

(1 Samuel 28—31; 1 Crónicas 10)

Bárapo matakábintha filisteomonae kaetukáetuta pía penawabchüü-exaneibiwi tatsi xua naba peexanaenexa Israel pía pemómoxi susato jíwitha tatsi. Pong Gat tómara itorobiya peewatsin, pong pewüng Aquis, bapong ichichipa xua David irü po pebiwi pekueyabixaetsi metha wüünae xua kaemonae penaexanaewa tsane filisteomonae pía penawabchüü-exaneibiwi tatsi xua naba peexanaenexa Israel pía pemómoxi susato jíwitha tatsi. Bara David jejéi.

Poxonae filisteomonae nakaetutompa xua naba peexanaenexa Israel pía penawabchüü-exaneibiwi tátsitha, írürü Saúl pía penawabchüü-exaneibiwi tatsi kaetukáetuta. Poxonae tane xua bichokono pinmonae xua ápara deta filisteomonae pía penawabchüü-exaneibiwi tatsi, bichokono Saúl junuwa.

Bara néxata Saúl wüüka Nakomtha xua petsita-itüütsinéxatsi xua eta methaun-xuae bichi tsane. Íchitha Nakom jopa baxua yábara jumenotsiyo. Matáütano Saúl maichinaebotha jopa tsipaebichi. Yáwano jopa jumenotichi iboto weya, po iboto kana exaneiba pía yaputaibichi xua Nakom ichichipa. Matáütano Saúl jopa jumenotichi pomonae Nakom pía penakajume kaitorobí koyenewa petakueikuejei jíwíchi weya.

Saúl pía yaputaetsi xua eta bichi tsane xua exanaena, daxota ichichipa siwaponna yábüyo powa dowatsi wabeiba. Báyatha anaya Saúl daxita juteba pomonae dowatsi wabeiba xua daxita pomonae jinompa Israel nákuatha. Íchitha, pomonae Saúl pía petanakuichiwichi tsipáebatsi xua pinae áwiya ichowayo pópona, powayo dowatsi wabeiba xua pinae barapowayo pópona Endor tómaratha.

Néxata Saúl be icha jintong náexana xua jopa peyaputaenéxatsi ichamonae. Bara pona xua barapowayo siwapoinchi. Barapowa aichaxaibi waba dowatsi tsipéi bichokono junuwa xua icha metha Saúl kuiyaputaena bapoxonae itorobina xua bapowa pebexubiwa tsainchi. Íchitha Saúl barái bapówatha xua jopa daxua exanáe tsane. Saúl wüüka barapówatha xua barapowa pewabinexa Samuel perowatsi tatsi.

Poxonae barapowa tane xua Samuel pía perowatsi, bapoxonae matapaiña barapowa yaputane xua ápara barapong Saúl xua pong nakua itorobiya peewatsin xua patopa xua bapowa petaenéxatsi. Néxata Samuel barái Saúltha jeye:

—¿Eta pokotsiwa metha nefayakótame? jeichichi Saúl.

Saúl jumenota jeye:

—Bichokono inta jopa xaexaenakaeyo. Filisteomonae nebaraina, Nakom jopa nejumenotsiyo. Ápara kawábatsi xua yábara tana netsipaebinexam pokotsiwa xua bewa exanaein, jei Saúl.

Íchitha Samuel jumenota jeye:

—Jopa nejüpaeyo xua yábara takatsipaebíwatsi xua neyáíñabame. Ápara Nakom nama ánoxuae jopa jíña jintoiño. Ápara nama ánoxuae jíña neaitafáetabi jintong tsipéi kaena báyatha jopa jumejejam poxonae kaitoroba xua daxita nejutebiwa amalecitamonae.

”Daxota ánoxuae, icha be báyatha katsipáebatsi, Nakom jopa kakopatsiyo xua áwiya naexáname pong nakua itorobiya neéwatsin. Baya tsane filisteomonae paka amanayabapentsina. Xam irü daxita jíña pexui xua pebiwi, barü tüpáename, jei Samuel perowatsi xua Saúl tsipáebatsi.

Saúl pejumetaexae baxua daxota bichokono junuwa.

2

Poxonae filisteomonae pía penawabchüü-exaneibiwi tatsi báyatha nakaetuta, ichamonae pomonae tómará itorobiya peewatsiwi xua filisteomonae, barapomonae Aquis tsipáebatsi, pong Gat tómará itorobiya peewatsin jeye:

—Aquis, jopa kopatsim tsane xua David pía wanaka punaponaewa tsane xuano irü xua pía pekueyabiwichi. Pajunuwang xua metha David icha barü poinchi, bapong yawenáetsipa Israel nakuapiwi xua poxonae naba éxanatsi, jei barapomonae.

Néxata barapomonae éxana xua Aquis, pong Gat tómará itorobiya peewatsin, itorobina xua David pía tómará beya nawichina Siclag tómará beya, múxunano pomonae pía pekueyabiwichi.

Poxonae Davidbarü pata pía tomarathiya, kou David pekoutha tatsi amalecitamonae kou Siclag tomarapiwi yótabatsi. David piyawang tatsi kou daxita tanótatsi, yawa kou tanótatsi pomonae pekueyabiwichi, yawa pía yábüxi tatsi kou múxuna notébatsi yawa múxuna pexui. Davidbarü kou piabong tatátatsi.

David yáinaba Nakomtha jeye:

—¿Metha bara wüünae xua tapubarainaewa tsane barapomonae? jei.

Bara Nakom David jumenótatsi jeye:

—Moya taema. Papubaraponde, jei Nakom.

Bara Davidbarü pekoyo weyiya, bárano pukaxibarúküpa. Davidbarü pinmonae juteba. Yáwano pía yábüxi kapanenebiya múxuna pía pexui, yawa pía duweimonaeinno.

David nawita nota, amalecitamonae piyawang notébatsi. Barapokotsiwang jíwana David taitoroba duweimonaein, yawa icháwangno xua taitoróbatsi pomonae penapataewimonae nexa, pomonae xua Judá pía pemómoxi susato jiwi tatsi nexa xua irü David piamonaexae tatsirü. Baxuang David taitoroba xua xuang be amanaya pekatsiwa barapomonaetha, pomonae yatsikaewa David piamonae tatsi.

Pírapae xua poxonae David kaibe itorobíwatsi xua múxuna pomonae pekueyabiwichi, bapoxonae filisteomonae Israel pía pemómoxi susato jiwi tatsi yótabatsi. Bara filisteomonae amanayabapenta xua naba, yawa Israel pía pemómoxi susato jiwi tatsi pinmonae jutébatsi. Matáütano Saúl baráinatsi yawa pía pexui múxuna baráinatsi. Saúl pía pexui barü bexotsi. Daxota Saúl tüpa, Nakom abe kana éxana jopa pejumekowüntsixae Nakomtha.

Meje yábara poxonae David kana éxanatsi xua pong Israel nakua itorobiya peewatsin

(2 Samuel 1—6; 8—10; 1 Crónicas 11—16; 18—20; 26.29—27.34)

Pírapae xua poxonae filisteomonae Saúl bexotsi, ichüing diwesi kápona Siclag tómara beya. David yábara tsipáebatsi pokoyene xua báyatha Saúl tüpa, xua irü pía pexui báyatha barü tüpa. Poxonae David yábara jumetane xua Saúl bexotsi, pong nakua itorobiya peewatsin, yawa pexanto tatsi bexotsi, pong pewüing Jonatán, barapoxonae David bichokono wekoyéi. Bapoxonae David penaxünae wei éxana xua peyábara nantanaxeinae wei barapomonaetha.

Jonatán kaena báyatha David pía jintong tatsi, irü Saúl bapong pong kopiya xua Israel nakua itorobiya peewatsin náexana. Néxata Nakom David tsipáebatsi xua kaibeya peponaewa tsane Hebrón tómara beya. Bárapo tómara eka ichaxota po ira xua Judá pía pemómoxi susato jiwi tatsi pía ira tatsi. David pona xua pepoponaewa tsane baraxotiya. Pebiwi, pomonae Judá pía pemómoxi susato jiwi tatsi, barapomonae David mataépatatsi penasiwa yawa bara kana éxanatsi pong Judá nakua itorobiya peewatsin, pong xua Judá pía pemómoxi susato jiwi jíwana tatsi.

2

Abner pong penawabchüü-exaneibiwi pía Pekanamataxeinaein tatsi xua Saúl pong nakua itorobiya peewatsin pía penawabchüü-exaneibiwi tatsi, bapong áwiya pópona. Jopa bexubichi. Bapong Abner waba, Is-boset wábatsi, pong Saúl pexanto tatsi, pong kataunxuaerü jopa bexubichi. Abner bapongtha kana éxana xua daxita Israel pía pemómoxi susato jiwi tatsi pía nakua tatsi itorobiya petaewatsinchi.

Meisha saya Judá nakuapiwi barapomona David itorobiya kanamataxeina. Bapoxona irü Joab kanamataxeina David pía penawabchüü-exaneibiwi tatsi. Írürü Abner kanamataxeina Is-boset pía penawabchüü-exaneibiwi tatsi. Joab irü Abner bapongbe itoróbabe xua barapomonaebe pomona xua penawabchüü-exaneibiwi penabiwa tsánebe.

Bara Is-boset pía penawabchüü-exaneibiwi tatsi amanayabapéntatsi, David pía penawabchüü-exaneibiwi tatsi amanayabapenta. Pebiwi pomona David pepuna-jinompawewichi pubaraina, Is-boset pía penawabchüü-exaneibiwi tatsi pubaráinatsi beya yakiréi. Poxona barapomona pubaraina, Abner namawainta, Asael bexotsi pong Joab peweicho tatsi. David pía penawabchüü-exaneibiwi tatsi, írürü Is-boset pía penawabchüü-exaneibiwi tatsi bayiyo kuinaya jopa wetsiyo xua nayoteiba. Íchitha David daxita koyeneintha bichokono dangwéi tsoponeibi.

Kaentakabi, Is-boset muxutánaka, Abner muxutánakatsi, jeichichi:

—¿Eta pokotsiwa metha kenta éxaname powa xua taxa pía koseuri jíwana tatsi, powa xua taxa pía pebusikuitaetaewaxi jíwana tatsi? jeichichi.

Abner bichokono anáepana. Daxota najüntükoyene weta xua David peyawenaewa tsainchi. Abner najumekaitoroba ichamona xua diwesi takapoinchi xua David peyaiñabinéxatsi xua icha wüünae xua David pekaetunaewa tsainchi. Bara David jumenota barapomona xua pinae bara nantanaxeina xua bara wüünae.

Íchitha xua pewünaeya tsane baxua Is-boset irü Abner matha bewa kaewa putorotsínabe yábüyo powa Mical pía pebintha pong David. Bara Is-boset irü Abner kaewa putorotabe yábüyo Dávidtha. Bapoxona Abner pona xua David tainchi, yawa jeye:

—Tha tsipaebichi penapatáe jiwi pomona Israel nakuapiwi xua xaniwaicha nekayawenaewa tsane, jei Abner.

Báraxua David bara itakoyene wüünaetsi yáwano bara kópata xua bara Abner jüntema poponaena.

3

Bara néxata Joab kaewarena poxona jiwi penamaxüwétixae xua yawa peyotabixáe tomarapiwi. Joab jumetane xua pinae David pekopatsiwa xua bara Abner jüntema poponaena. Bapoxona Joab bichokono anáepana. Joab jopa tsipaebiyi Dávidtha íchitha saya najumekaruta ichamonaetha xua bepa pinae bü kaibe dena tsane Abner.

Poxona Abner patopa néxata Joab tsipaeba barapongtha xua bepa pinae bara kompa tsipaebi. Poxona kompa natsipáebabe bapoxona Joab namawainta, Abner bexotsi. Báraxua Joab éxana xua peweicho yantómata pong Asael xua báyatha Abner kopiya penamaxüwáinchixae poxona naba.

Poxona David yábara jumetane xua pinae Joab namawainta, xua Abner bexotsi, bapoxona David bichokono anáepana. Bapoxona David daxita itoroba xua bepa pinae Abner bichokono siwawekoyéi tsainchi irü baxua Joab itanuwé itoróbatsi. Daxota daxita Israel nakuapiwi yaputane xua ápara David jopa itorobiyo xua Abner petüpaewa tsane.

Poxona Is-boset yaputane xua Abner tüpa bapong bichokono junuwa. Pira-paeyo, nakuéyatabe pongbe, pongbe xua pía penawabchüü-exaneibiwi tatsi pía pekanamataxeinaeinbe tatsi, bapongbe Is-boset bexotsi poxona maitungkua.

Pía pentasipa kapoinchi David beya. Barapongbe nantanaxéinabe xua metha David weiweinaena xua pong pía peaitafaetabín jintongtsi bara báyatha tupa.

Íchitha David itoroba pebiwi pomonae pepunajinompaewichi xua barapongbe pebexubiwa tsáinchibe, xua Is-boset pebexubíwaxaetsi xua bapong yantómatatsi.

Pírapae xua poxonae Is-boset bexotsi, bapoxonae daxita pomonae Israel nakua-piwi, pomonae báyatha Is-boset kanamataxeina, barapomonae David kaetúnatsi ichaxota bapong eka Hebrón tómaratha. Bara David kana éxanatsi xua pong Israel nakua itorobiya peewatsin.

Bapong David kaena báyatha Judá nakua itorobiya peewatsin náexana siete po weibe yawa bara káetono. Bárapo nákuabe ekeicha kae nakua náexana. David náexana xua daxita Israel pía pemómoxi susato jiwí tatsi pía nakua tatsi itorobiya petaewatsinchi. Bapong kanamataxeina barapomonae treinta y tres po weibe.

4

David pong nakua itorobiya peewatsin, irü Israel pía pemómoxi susato jiwí tatsi, barapomonae ichichipa xua jame metha Jerusalén tómara, bárapo tómara yatsi-kaewa pepa tómara tsane xua Israel nakua pía pepa tómara. Íchitha jame barapomonae bewa matha jutebina jebuseomonae xua pomonae baxota jinompa. Bara barapomonae jebuseomonae amanayabapéntatsi. Daxota bárapo tómara wüingduta jeye: “David pía tómara tatsi”, jei.

Bapoxonae pírapae barapomonae bárapo pepa tómara matawakaicha ekeicha éxana icha bong, po tómaraxae báyatha bichokono ayapusúü. David ekeicha bichokono peajüntükoyenesüüing naexanapona tsipéi Nakom yawenapoinchi. Írürü Hiram, pong Tiro tómara peewatsin, bapong David taitoróbatsi naepaewang múxunano pomonae penakuichiwi xua barapomonae David píabo tatsi petaexanaenéxatsi po bo pin bo.

Baxua Hiram pong Tiro tómara peewatsin éxana xua be amanaya kata xua barompaya bapong kata. Bara David yaputane xua ápara bara xaniwaicha xua bapong yawenapoinchi Nakom.

Jerusalén tómaratha, David ekeicha icha yábüxi nota, tsipéi barapoxonae nakua itorobiya peewatsiwi piakui xua aiñáwaxi xeina. Matáütano aiñáwaxi pita xua piowaxi powaxi pía pebusikuitaetaewaxi. Bapoxonae bapong ekeicha pexui bichokono pinmonae xeina.

Filisteomonae jumetane xua David Israel nakua itorobiya peewatsin náexana. Bapoxonae filisteomonae yótaba, Israel nakuapiwi yótabatsi aiñakuiyobetha. Íchitha David irü pía penawabchüü-exaneibiwi tatsi bárapo aiñakuiyobetha amanáyaba, tsipéi Nakom yawena, Israel nakuapiwi yawénatsi.

5

Poxonae daxita baxua weta, David bara najüntükoyene weta xua bara ápara bárapo matakabi tsuxubi xua pekaponanexa Nakom pía caja tatsi Jerusalén tómara beya. Bara David kaetukaetuteta pía penawabchüü-exaneibiwi tatsi yawa bara barapomonae pona Quiriat-jearim tómara beya xua baraxotiya ichaxota Nakom pía caja tatsi boka. Bara barapomonae bárapo Nakom pía caja tatsi bota, xua pekaponanáyetha bekein báyatha Nakom itoroba xua levitamonaewewa naetongtha utukuraponaena pía caja tatsi. Yawa bara ponarúkupa Jerusalén tómara beya.

Daxita barapomonae nawirabijjinka yáwano naxünajjinka. Icháwatha xua poxonae námtotha bueymonae ka-enapona íratha xuirabathopa. Néxata pebin, pong xua peputha pona pekaponae xuaunxuae bueymonae ka-enapona, bapong nakobewenta dukuapona xua Nakom pía caja tatsi jopa pejopeikaenexa tsane bekein báyatha Nakom itoroba xua jiwi jopa bewa jayabí. Íchitha bapong baxota bexotsi, Nakom bexuba xua bapong pejayatabixae Nakom pía caja tatsi.

Poxonae baxua Nakom éxana daxita jüntükoyene wekoyéi. Barapomonae Nakom pía caja tatsi kápona bomüxütha po bo imoxoyo unguua. Baxota bota. Saya jopa kaponaeyo Jerusalén tómara beya. Nakom yawena pong xua piabotha tabótatsi Nakom pía caja tatsi.

6

Pírapae bapoxonae, David ekeicha najüntükoyene xeina xua kaponaena Nakom pía caja tatsi Jerusalén tómara beya. Barapoxonae jame barapomonae éxana icha be pókotsi koyeneya Nakom itoroba Israel pía pemómoxi susato jíwitha tatsi. Barapomonae náetotha kayetaduta poxonae levitamona utukurajjinka Nakom pía caja tatsi xua Jerusalén tómara beya kápona. Poxonae baxua éxana ichamonae írürü naxünajjinka yawa nawirabijjinka xua námtotha xua daxita bárapo námtotha.

Poxonae Jerusalén tómaratha pata, Nakom pía caja tatsi bota ovejanamüü botha. Barapomonae aiña duweimonae juteba xua ofrendang matawüing, po ofrenda xua pekatsinexa xua Nakom nexa. Nakuéyatabe pokoyenéwabe éxana xua ofrendang matawüingbe. Icha ofrendang, po ofrendang xua ompiwa pekatsiwa xua Nakom nexa. Icha ofrendang matawüing, po ofrendang xua petsabiwa xua Nakom nexa.

Bara néxata David daxita waba xua penabanaenexa pomonae xua baxota ena xua pin penabanáewatha. Poxonae xane bapoxonae daxita piabongtha nawiba. Poxonae David piabotha patopa píowa kasébatsi powa pewüing Mical. Bapong jeichichi:

—Ápara xam bekein pong nakua itorobiya neéwatsin, nama wejóntame jiña paparuwa jíwana yawa nawirábame be pong kakuí amameiba, jei Mical.

Íchitha David píowa jumenota jeye:

—Ápara nawirabang Nakom nexa yáitama jüntükoyene weiweingang xua báyatha Nakom wüünae peexanaexae Israel nakuapiwi nexa, jei David.

Mical baxua peexanaexae daxota bapowa jopa itaküüpaetsi xua pexui pexei-naewa tsane.

7

Bapoxonae David tsaba levitamona xua aiñamonae tsíniya éxana xua pe-enaenexa ovejanamüü bo xua ichaxota Nakom pía caja tatsi boka. Barapomonae jíwanatha David barái xua pebusin tangbabina. Ichamonaetha David barái xua naxünaena peweixi. Ichamonaetha David itoroba xua pe-enaenexa peboupa.

David barái sacerdotemonaetha, yawa baraino ichamonaetha levitamona xua enaena tómaratha xua Gabaón tómara. Baraxota Nakom píabo tatsi áwiya unguua po bo chivonámüübo. Bárapo bo Saúl pong nakua itorobiya peewatsin kaena báyatha kápona bárapo tómaratha. Kaena báyatha po bo xua chivonámüübo, bárapo bo Moisés ákaba poxonae pópona.

David matowa kaetukáetuta penawabchüü-exaneibiwi. Poxonae naba éxana ichamonaetha, bara daxita amanayabeiba. David beta Pekanamataxeinaein xua yatsikaewa xaniwaicha matakápona piamonae.

Matáüta David yábara kanantanaxeinanareka pía jintong pong pewüing Jonatán. David beta tayawena Jonatán piamonae matabüxüyo tatsi xua be pókotsi koyeneya Jonatán ichichipa.

David jeita icha metha kataunxuae áwiya jinompa Saúl pía pemómoxi susato jiwi tatsi. David taeba xua áwiya kataunxuae pópona pebin pong saya pejayujáyu-jei jintong pong pewüing Mefi-bozet. Bapong Jonatán pexanto tatsi. Néxata David piabotha waba xua bapong pepoponaenexa pong pejayujáyujei jintong. Matáütano David éxana xua pebiwi petanakuichiwa tsainchi Mefi-bozet pía ira tatsi, po pebiwi kaena báyatha Saúl tanakuítatsi.

Meje yábara poxonae Nakom, David yábara tsiwüünae muxudútatsi

(2 Samuel 7; 1 Crónicas 17)

Poxonae aena xua David pía pekanamataxeinaewa, poxonae David píabo tawétatsi, bapoxonae bara David amanáyaba pomonae pía peaitafaetabí jíwichi xua aiña nakuangpiwi, po jiwi xua Israel nakua imoxoyo kakuita énatsti. Natán pong Nakom peitorobi jume pepaebin bara wábatsi. Bara Natán jeichichi:

—Ichichipang xua pin bo exanaein xua Nakom píabo tatsi xua pépabo xua pepu ungkuaewa. Jopa netsita wüünaeyo xua Nakom pía caja tatsi pebokaewa ovejana-müü bóyotha xua poxonae xang tabo xeinang xua pexeiña bo, jei David.

Natán jumenota jeye:

—Bara beta nantanaxéiname. Nakom kayawenaena xua poxonae exanáename píabo, jei.

Íchitha bárapo merawitha Nakom Natán tsipáebatsi, jeichichi:

—Ínkane David tsipáebare xua xang bara ápara poponeibang po botha chivonámüübo xua kaena báyatha poxonae Israel pía pemómoxi susato jiwi tatsi aena wárapa Egipto nakua weya. Matáütano tsipáebare xua xang bápana itorobin xua pépabo inta peexanaenexa. Matáütano bapong tsipáebare xua bapong itapetang poxonae saya pong oveja peewatsin pópona. Matáütano barande xua bapong kana éxanang xua tamonae pekanamataxeináewatsi.

”Bapong barü poponeibang, yawa yaweneibang xua amanayabeiba pía peaitafaetabí jíwichi xua penabewa. Yawa barande xua bapongtha tha yábara tsiwüünae muxudutsichi xua meje: bapong aiñakuí penaexanaein tsane, yáwano daxita bapong yaitaeinchi. Bárapo ira tha Israel pía pemómoxi susato jiwi tatsi katsichi xua bárapo íratha ataya pejinompaenexa xua ichamonae jopa abe petaexaneibinexa barapomonaetha.

”David, pía pemómoxi susato jíwitha tatsi exaneibín xua barapomonae Israel nakua itorobiya peewatsiwi. Ekeicha jopa icha koyeneya nantanaxeinaein tsane xua taexanaewa. Áwiya pía pemómoxi susato jiwi tatsi nakua itorobiya peewatsiwa naexanaena. Jopa barapomonae kana exanaein tsane icha pókotsi koyeneya báyatha kana ichin Saúl poxonae piamonae tatsi jopa takopatsiño xua pekanamataxeinaewa tsane piamonae.

”Icha David piamonae tatsi ichauxi exaneiba xua peabe koyenéwangtha, átene exanaein icha be pókotsi koyeneya xua ba koxiyüing kana ichi pexanto xua

poxonae pexanto átene éxana abe peexanaexae. Poxonae David tüpaena, kaein xua pía pexui jíwana tatsi bapong nakua itorobiya peewatsin tsane. Bichokónono bapong ayapusúü exanaein. Bapong ápara pong inta exanaena tabo, jei Nakom.

2

Icha matakeitha daxita baxua Natán tsipaeba, David tsipáebatsi. Bara néxata David pona ovejanamúü bóyotha xua ichaxota Nakom pía caja tatsi boka. David tsipaeba Nakomtha jeye:

—Tananekanamataxeinaein, jopa yaputaeiño xua eta bichin tsane xua takatsita-itüütsiwa tsainchi xua takaantobéwatsi tsipéi beta inta éxaname. Tamatabüxüyo jiwi yawa xang ápara bekein jopa pata aiñakuí jiwi pang, xam nekana éxaname xua Israel nakua itorobiya taéwatsin. Daxita baxua ápara xam éxaname.

”Xam ápara bichokono peajüntüyapusüüwa nexeiaein. Xam ápara bara kaein Nakom pong ánoxuae xaniwaicha nepoponaein. Daxita koyenein painta éxaname xua pexeiña koyenein xua pomonae Israel pía pemómoxi susato jiwi tatsi pangxaein xua poxoru saya ápara jiñamonae pangxaein.

”Pana kapanépame poxonae pana busikuitatayebeiba Egipto nákuatha. Yáwano bárapo ira weya tórotame cananeomonae xua pata tanekatsinexam bárapo ira xua pata jinompawa tsane bárapo íratha. Bara jumedangweya kawúükatsi. Moya bara nayábara jumewere pokotsiwa xua neyábara tsiwüünae muxudútame. Bara bapoxonae jiwi taena jiña neayapusüüwa, yáwano yaputaena xua xam ápara Nakomüm pongtha xua paxang wüünae pata takajainteibíwatsi pomonae Israel nakuapiwi pangxaein.

Meje yábara poxonae David, pong nakua itorobiya peewatsin, ichauyo éxana xua abe, xua íchitha Nakom yábara jüntemaina baxua

(2 Samuel 11—12)

Kaentakábitha David itoroba pong pewüing Joab, pong penawabchüü-exaneibiwi pía Pekanamataxeinaein tatsi xua bapong naba peexanaenexa amonitamonae. David eka Jerusalén tómaratha. Kaentakeitha kiripitha xua poxonae David piabotha júmatha pona xua ichaxota matatupa pereka, bara wétsika tane yábüyo xua nowayauya. Bárapo yábüyo bichokono pexeiñowa. Néxata David yábara yáíñaba jeye:

—¿Jintam barapawara? jei.

Bara jeichichi:

—Ápara barapowa, pong pewüing Urías, bapong píowa tatsi. Bapong Urías ápara jíwana po pebiwi Joab punapoinchi xua naba peexanaewa tsane amonitamonae. Ápara barapowa Betsabé baraichi, jei.

Bichokono David ichichipa barapowa, daxota najumekaruta xua petabarü denaenexa tsainchi. Poxonae barapowa patopa David piabotha tatsi, bapoxonae David ishamaiteka barapowa. Bapowa ekeicha náwiya piabotha. Bapoxonae pírapae, barapowa yaputane xua pexuyo xeina. Bapoxonae barapowa ichauyo David taitoróbatsi xua muxutsipáebatsi baxua yábara. Barapowa jeye:

—Pexuyo xeinang, jiña pexuyo, jei.

David aichaxaibi xua daxita peyaputaewa tsane xua bapong ishamaiteka Urías píowa tatsi. Daxota David éxana xua daxita jopa peyaputaewa tsane. David

najumekaruta Joabtha xua Urías petsipaebinéxatsi xua diwesi pekaponanexa Jerusalén tómaru beya xua naba peexanaewa yábara. Daxota Joab, Urías itoróbatu Jerusalén tómaru beya.

Poxonae Urías patopa, David yábara yáinaba bapongtha xua penabewa. Bapoxonae David itoroba bapongtha xua bapong piabotha pemaitekaenexa. David nantaxeina xua metha bárupo merawitha Urías pisheuri ishamaitekaena xua daxota daxita jiwi nantaxeinaena xua Betsabé pía pexuyo ápara yawa Urías pía pexuyo tatsi xua jopa daxita peyaputaenexa pokotsiwa David éxana.

Íchitha, Urías jopa ponaeyo piabotha. Saya bapong maitungkua David píabo boupatha tatsi ichaxota maiteiba pomonae David pía petanakuiteibíwichi. Icha mataketha, David barái xua Urías baraichi jei:

—¿Eta xua metha jiña botha jopa ponaem? jei.

Urías jumenota jeye:

—Inta jopa wüunaeyo xua tabotha taponawea yawa xua taseuri taishamaitekaewa poxonae kataunxuae penawabchüü-exaneibiwi wéxotha jinompa xua naba exanompa, xuano xua poxonae kataunxuae Nakom pía caju tatsi boka ovejanamüü bóyotha, jei.

Néxata David itoroba xua icha matakabi abü ekeicha pepoponawea tsane Jerusalén tómaratha. David waba xua pebarüxaewa tsane, yawa küüpa éxanatsi Urías. Íchitha Urías bárupo merawitha jopa ponaeyo piabotha.

Icha mataketha kaemumbo, David nama jopa yaputaetsi xua peexanaewa. Bara nama David nantükoyene weta xua Joab tatínatsi carta xua bepa pinae Urías notichi ichaxota tayapuwüunaetsi xua pebexubíwatsi xua poxonae naba éxana. Bara baxua éxana Joab. Bara Urías bexotsi xua poxonae naba éxana.

Bara matakabin yapukaewa xua báyatha po matakábintha áwiya Betsabé pisheuri siwawekoyéi. David najumekaitoroba xua petabarü denaenéxatsi yawa bara pita barapowa yawa píowa éxana. Íchitha Nakom tane daxita pokotsiwa David éxana. Daxota Nakom kaseba, David kasébatsi.

2

Néxata Nakom najumediwesi itoroba pongtha, pong Nakom peitorobi jume pepaebin, pong Natán xua David nexa. Natán tsipaeba, David tsipáebatsi pong nakua itorobiya peewatsin jeye:

—Kaena báyatha pebinbe tsiwanaya popónabe tómaratha. Ichüing kopei pexeinaein. Ichüing peakopeibin. Pebin, pong kopei pexeinaein, bapong bichokono pin duweimonae xeina. Íchitha nama, pong peakopeibin saya meisha peweiño xeina ovejiyo pesowátiyo, po ovejiyo xua bichokono ántobe. Bapong itakoxone éxana bapóyotha.

”Kaentakábitha, pong kopei pexeinaein írürü siwapoinchi. Bapong nantawénona xua penabanaewa éxana pong pesiwaponaeinchinexa. Íchitha poxoru bapong peantüsiwayataein, jopa ichipaeyo xua kaein jíwana pebexubiwa xua pía duweimonae jíwana tatsi xua pexaewa peexanaenexa. Saya bapong pona xua bexuba ovejiyo peweiño pesowátiyo po ovejiyo pong peakopeibin piyiyo tatsi, jei Natán.

Poxonae David baxua jumetane bichokono anáepana. Jeye:

—Bapong bewa bexubichi. Bewa matomatsina bárupo ovejiyo pebexubixae. Bewa cuatro póyobe katsichi pong peakopeibin xua xuang ovejaxi pebtoxi peweinxi, jei David.

Néxata Natán jeye Dávidtha:

—Ápara xam baxua éxaname xua bichokono abe. Nakom nejumekaitoroba xua takatsipaebiwa tsainchi xua pinae bapong nakua itorobiya neéwatsin kaéxana yawa pinae ka-eena. Bapong Nakom kakata aiña yábüxi, daxita barapówaxi ápara jiñowaxi.

”Íchitha xam bexúbame Urías yawa káibame píowa tatsi. Báyatha yaputang xua penawabchüü-exaneibiwi pomonae amonitamonaexa pomonae xua Urías bexotsi, íchitha Nakom kayaputane xua baxua kui-itoróbame. Náerabame Nakomtha xua bichokono jopa auram, xuano xua jopa jumekowüntsiya exanaem Nakom pía peitorobi koyene tatsi. Daxota bapong átene ka-exanaena.

”Nakom kopatsina xua jiñamonaexa matabüxü barapomonaexa piamonaexa tatsi kaemonaexa nantiya nabena, yawa kata exanaena xua jopa wüünaeyo. Matáütano ichüing jiñowaxi kata kentsina mataketha xua daxita petaenexa. Xam jopa ichipaem xua daxita jopa peyaputaewa tsane xua Betsabetha éxaname. Nakom exanaena xua Israel nakuapiwi daxita peitütha tatsi baxuang. Jopa namicha tsane daxita xua xuang abe neexanaexae, jei Natán.

Baxuang Natán tsipaeba xua David tsipáebatsi. Bara David jumenota jeye:

—Aja, bara xaiñéi. Jumefebang Nakom, yawa éxanang ichawa xua bichokono abe, jei.

Néxata Natán David baraichi jeye:

—Bekein bara baxua éxaname, Nakom jopa kabexubi tsane. Íchitha pexuyopong Betsabé pabeta, bapong tüpaena, jei.

Bara néxata Natán píabo benawiya.

3

Bapoxonaexa, pírapaexa pexuyo bichokono átene tsanaya. David yábara nainbota yawa tawüüka pexanto nexa xua siete po matakábibe. Íchitha pexuyo tüpa.

Bapoxonaexa poxonaexa weta baxua, David pónataba xua pebaru nakaetutsiwa tsainchi Joab, yawa pía penawabchüü-exaneibiwi baru nakaetuna xua áwiya naba exanompaxa amonitamonaxa, yawa bara amanáyaba.

Pírapaexa, Betsabé pabeta icha pexanto. Bárapo pexuyo wüingdútatsi Salomón baraichi. Nakom najumekaruta Natantha xua bepa pinae David tsipaebinchi xua pinae Salomón antobetsi.

Meje yábara poxonaexa Absalón, David pexanto tatsi, abe éxana páxatha

(2 Samuel 13—15)

Absalón, pong kaein jíwana xua David pía pexui tatsi, bapong Absalón pepa pamcho nantaüta. Absalón pámhobe kaein éxababe yawa kaein áxababe. Barapowa pewüing Tamar, powa xua bichokono pexeñowayo.

Amnón, bapong irü xua kaein jíwana xua David pía pexui tatsi. Bapong ántobe, Tamar antobetsi, bekein bapowa Amnón pamcho xua icha ena xeina. Bapong kaentakábitha pamcho muxuitóroba xua bepa pinae pamcho kompa siwaponaxa ponaxatsi pía tütutha. Poxonaexa Amnón pámhobe kompa ékabe, bara pamcho jónaka. Íchitha bapong kotakaya pamcho kaseba yawa pamcho bara weya napunatorobaba.

Poxonaexa David baxua yaputane xua pokotsiwa Amnón éxana, jopa pexanto muxutaenaxa xua jopa átene exanaeyo tsipéi pexanto tatsi xua matapin.

Poxoru peexanaexae báraxua pámmochotha, Absalón peweicho yábara anáepana dukuanaebiya. Íchitha saya moya. Amnón jopa abe exanaetsi.

Poxonae aiña weibe yapukaewa, Absalón bichokono pin penabanaewa éxana. Daxita peweicho jiwí waba xua pepa peweichomonaé yáwano waba po peweicho jiwí xua icha pena xeina. Bapong Absalón itoroba pía peyawenaewichi xua bepa pinae abú ewatsina xua Amnón tsiwiyo metha küüpaeinchi xua bepa pinae bapoxonae bexubinchi. Bara Amnón bexotsi.

Néxata daxita ichamonaé xua David pía pexui tatsi búrraxi tsijuma enadüküpeika yawa kaena naiña dúkúpa pejunuwixae. Absalón yaputane xua paxa kasebinchi xua Amnón pebexubixaetsi. Daxota Absalón Israel nakua wewarapiya xua pepoponaewa tsane pámmochotha, xua pena tatsi paxa tatsi, xua saya kaeto tsane. Absalón baraxotiya pópona akoibi po weibe.

Bapoxonae írürü bara nama David naitanuwebaraxuba xua Amnón siwawekoyeichi. Bekein David ichichipa xua Absalón kaibe nawidenaena, íchitha David jopa pexanto wábiyo. Daxota Joab muxupéiñaba, David muxupéiñabatsi, xua bepa pinae kopatichi xua Absalón siwayaeinchi. David jejéi.

Daxota Joab kápona, Absalón kapónatsi Jerusalén tómaratha. Íchitha aiña weibetha xua ekéichano jopa ichipaeyo xua David petaewa, xua Absalón petaewa tsainchi. Matapaiña bara nakaetútabe yawa bara David pexanto jakoba, xua Absalón paxa jakóbatsi.

2

Absalón bapong bichokono pexeiñüng. Daxita Israel pía pemómoxi susato jiwí tatsi bichokono ichichipa nawita bapongtha. Bara Absalón najüntükoyene yapuweta xua icha koyene namicha peexanaewa tsane. Bapong ichichipa xua penaexanaewa tsane xua Israel pía nakua tatsi itorobiya peewatsin tsane.

Absalón pebiwi aiña tuntong éxana tsíniya xua peyawenaewa tsainchi. Bara tamrópata pítaba xua daxita matakabin pebóupatha ungueiba ichaxota xua Jerusalén tómara peyaputoxorota dutsiwa. Pomonaé peboupa peewatsiwi xua David petáewatsi, Absalón barapomonaetha tsipaeba jeye:

—Taxa, pong nakua itorobiya peewatsin, jopa be paka yawenáé tsane. Poxonae paxéiname pokotsiwa pákata dangwéi, bapong jopa paka jumenaitomatsiyo. Jame icha xang paiña nakua itorobiya taéwatsin naexanáetsipang beta paka yawenaetsípatsi, jei Absalón.

Daxita jiwí Absalón yábara nantanaxéinatsi xua bapong bichokono pejüntükoyene wüünaein. Daxota bapong bichokono antobetsi daxita yawa jumekowúntatsi.

Poxonae cuatro po weibe yapukaewa, Absalón nayaputane xua bara báyatha nakuiwüünáetaba xua peamanayabiwa tsane paxa xua daxota paxa pekoutha penaexanaewa tsane pong nakua itorobiya peewatsin. Bara néxata Absalón wüüka nakua itorobiya peewatsintha, pong David, pong Absalón paxa tatsi, jeye:

—Nepukópare xua taponaeewa tsane Hebrón tómara beya xua tana nayábara jumewetsinexa xua báyatha nayábara tsiwüünae muxudutang Nakomtha, jei Absalón.

Bara David, Absalón pukópatatsi. Íchitha Absalón paxa jopa xaniwaicha tsi-paebiyo. Pokotsiwa xua bapong nakuiyábara wüünaeta ápara xua piakoutha pía

naexanaetsi pong Israel nakua itorobiya peewatsin Hebrón tómaratha. Pinmonae xua Israel pía pemómoxi susato jiwi jíwana tatsi Absalón yawénatsi.

Barichirü Absalón yawénatsi pong pewüng Ahitofel, pong kaein jíwana pomonae pemuxutsipaebi jiwi pomonae xua David pía bicheito tatsi. Ahitofel bapong pong bichokono peyaputaen. Bapong, pong Betsabé pamo tatsi.

3

Poxonae David yaputane xua petsimüxüpatsíwatsi, bapoxonae juntukuru naiña peponaewa tsane Jerusalén tómara weya. Matáütano barü pona pomonae xua peyawenaewichi, yawa pomonaeno xua pekueyabiwichi. David naiña pona xua pewünaeya tsane xua Absalón patopaena xua Davidbarü jutebinchi.

Bara David piamatabüxüyo, irü pomonae peyawenaewichi, írürü pía penawabchüü-exaneibiwi tatsi daxita barapomonae Jerusalén tómara weyiya. Íchitha David piowaxi kuenta pona piabotha diez powáyobe, powaxi pía pebusi-kuitaetaewaxi xua bo petaewatsinexa tsainchi.

Pong pewüng Sadoc irü pong pewüng Abiatar xua pongbe sacerdotemonae jíwanabe, írürü levitamonae, daxita barapomonae pona xua David petaenéxatsi xua poxonae bapong Jerusalén tómara weya wárapa. Barapomonae karendena Nakom pía caja tatsi poxoru barapomonae ichichipa David peputha takapoinchi pong nakua itorobiya peewatsinxae.

Íchitha bapong barái barapomonaetha xua bepa pinae pekoutha etsina Nakom pía caja tatsi, tsipéi icha pinae xaiñéi xua pinae David yawena dukuanaebíyatsi Nakom, bara pinae Jerusalén tómara beya ponaena.

Bekein barái barapomonaetha xua bepa pinae yawenaetsi, xua David yawenaeinchi, xua barapomonae be natsikotaena pomonae namicha pejinompaewi xua jiwi peamanayabiwa. Bapoxonae itaküüpatsi xua diwesi petakaponaenéxatsi David pokotsiwa pexanto tatsi éxana Jerusalén tómaratha. Néxata sacerdotemonae irü levitamonae ekeicha pekoutha bota Nakom pía caja tatsi ichaxota báyatha boka.

4

David wekoyeya wárapa. David yaputane xua pinae Ahitofel Absalón yawénatsi. David Nakomtha wüüka xua jopa pekopatsiwa tsane, xua Absalón jopa peexanaewa tsane, pokotsiwa xua Ahitofel muxutsipaeba.

Kotakaya Husai xua ichüng xua kaein jíwana xua pomonae jiwi pemuxutsipaebi xua pomonae David pía bichéitoxae tatsi, bapong David siwapoinchi. Bapong Husai bichokono wekoyéi xua Absalón David bebexubinchi. Íchitha David muxuweta bapongtha, Husai muxuwétatsi jeye:

—Ekeicha Jerusalén tómara beya kaibe iyande xua Absalón beya. Naerabiya páebare bapongtha xua nekayábara nantaxeinaenexa xua ápara Absalón piamonae tatsim. Ichichipang xua inta naexanáename be pong jiwi pekui-amanayabín xua namicha nepoponaen. Poxonae yaputáename xua taxanto éxana baxuang yábara tsipáebare sacerdotemonaetha xua bapoxonae barapomonae diwesi inta pekaponaenexa, jei David.

Husai jejei. Bapoxonae ekeicha David wárapa, tajü wepu wárapa Jerusalén tómara.

**Meje yábara poxonae bekein Absalón piakoya náexana
nakua itorobiya peewatsin xua Nakom jopa kopatsiyo
xua bapong peexanaewa baxua**

(2 Samuel 16—20)

Absalón írürü pomonae pía pepunaponáewichi, írürü Ahitofel, poxonae barapomonae pata Jerusalén tómaratha, Husai kaxina barapomonae jeye:

—Bárabü beta pajinómpame icha paichichípame tapaka kayawenaewa tsainchi, jei Husai.

Absalón jejéi. Bapoxonae Absalón yáíñaba, Ahitofel yáíñabatsi jeye:

—¿Eta xua exanokuaein? jei.

Bara Ahitofel jumenota jeye:

—Jame maisha bewa kentsíname axa pía kosheuriwi, powaxi xua axa pía pebusikuitaetaewaxi tatsi, powaxi axa kuenta wárapa peta-eenaenéxatsi píabo, jei.

Baxua Ahitofel paeba xua bapoxonae jopa peitaküüpaewa tsainchi xua bapongbe páxabe penaitakoxonáewabe xua báyatha páxabe tsana nawepu jópabe. Bara néxata pomonae Absalón pepunaponáewichi boyo exaneta xua bómüxü matatupa wétsika xua matatupa pereka. Bara Absalón bara be ka-ekoíña yábüxi xua paxa tatsi pishéurixi, bara yawa kéntano.

Bárapo koyene peexanaexae, daxita Israel pía pemómoxi susato jiwi tatsi tane pokotsiwa xua Absalón éxana. Pokotsiwa xua Ahitofel paeba bichokono daxita tsijumewüünaetsi.

2

Bapong Ahitofel muxutsipaeba ekeicha, Absalón muxutsipáebatsi jeye:

—Kaeture penawabchüü-exaneibiwi. Bapoxonae pubarainaein axa xuano pomonae axa pepunajinompaewichi. Poxonae axa bichokono fifinaponaena barapoxonae bexubín bapong. Barapoxonae pomonae axa pía pepunajinompae-wichi barapomonae kakaetunaena xua ataya jiña nekayawenaponaewa tsane, jei Ahitofel.

Daxita nantanaxeina xua bara kou wüünae pokotsiwa Ahitofel paeba. Pewü-naeya xua poxonae jumenaitomatsina pokotsiwa xua Ahitofel paeba, matha Absalón yáíñaba, Husai yáíñabatsi xua eta pokotsiwa metha Husai nantaxeina. Husai jeye:

—Taema, nantanaxeinang xua ánoxuae Ahitofel nama katsawiya paeba. Ápara axa penawabchüü-exaneibiwi exanaein, pong bichokono peyaputaen xua naba. Daxota metha bapong pía pepunaponáewichi mérawi jopa barü maitekae tsane.

”Daxota poxonae bapong jéitame ápara David piamonae jiña penawabchüü-exaneibiwi jíwana jutebinchi xua poxonae irü axa jopa bexubí tsainchi. Axa pepanepaexae daxota ichamonae nantaxeinaena xua ápara jopa be amanayabim poxonae naba éxaname íchitha xua ápara meisha axa amanáyaba xua poxonae naba.

”Xang nantanaxeinang xua metha jame bewa wabíname daxita Israel pía pemómoxi susato jiwi tatsi xua daxita bárapo nákuatha jinompa xua pin penawabchüü-exaneibiwi neexanaewam tsane. Bapoxonae daxita jutebíname pomonae axa David pía pepunajinompaewichi tatsi, jei Husai.

Absalón írürü daxita pomonae pentakaponaewi, pomonae xua pekananta-exanaewi, daxita barapomonae nantanaxeina xua bichokono wüünae pokotsiwa Husai paeba beyakaincha xua Ahitofel paeba. Barapomonae ichichipa xua Husai paeba, bekein pokotsiwa xua Ahitofel paeba jame bichokono yatsikaewa wüünae beyakaincha xua Husai naerabiya paeba.

Íchitha Nakom jopa kopatsiyo xua Absalón peyaputaewa tsane pokotsiwa xua xaiñéi poxoru Nakom ichichipa átene peexanaewa tsane, xua Absalón átene peexanaewa tsainchi. Bara néxata Absalón írürü pomonae pepunajinompawichi bara jumenaitómata pokotsiwa Husai paeba.

Bara néxata Husai tsipaeba sacerdotemonaetha pokotsiwa xua báyatha éxana. Néxata Husai najumekaruta xua David petsipaebinéxatsi jeye:

—Naiña icha muxunene bepapanenebíyama Jordán mene iya xua pakuitaya dükúpare. Absalón itorobina pía penawabchüü-exaneibiwi tatsi xua nekawaeta-biwa tsane xuano xua nekabexubiwa tsáneno, jei Husai.

Ahitofel yaputane xua jopa jumenaitomatsichi, xua Absalón irü po pebiwi pía pepunajinompawichi jopa jumenaitomatsiyo, xua Ahitofel muxutsipaeba. Bapoxonae Ahitofel píabo beya pona yawa piakoutha nabexuba.

3

Barapoxonae irü Absalón kaetuteta pía penawabchüü-exaneibiwi tatsi. Bara David tajü bejíniya tómara beya po tómara pewüng Mahanaim. Kaena báyatha David pía penawabchüü-exaneibiwi tatsi kankuiwüünaeta éxana xua naba peexanaenexa.

Pomonae xua pentakaponaewi barapomonae David jopa kopatichi xua peponaewa ichaxota xua naba peexanaewa tsane. Daxota David eka ichaxota po tómara pewüng Mahanaim. David pexanto bichokono ántobe, xua Absalón bichokono paxa antobetsi. Daxota David itoroba pía penawabchüü-exaneibiwi tatsi xua bepa pinae pexanto jopa abe taéxanae tsainchi.

Absalón pía penawabchüü-exaneibiwi tatsi irü David pía penawabchüü-exaneibiwi tatsi bara naba. Po penawabchüü-exaneibiwi xua amanáyaba ápara David pía penawabchüü-exaneibiwi tatsi. David pía penawabchüü-exaneibiwi nama-wainta, Absalón pía penawabchüü-exaneibiwi tatsi tajutébatsi veinte mil po bichéitobe xua penawabchüü-exaneibiwi.

Bapoxonae kaena naiña David pía penawabchüü-exaneibiwi tatsi tane xua Absalón naetsíriwa múlatha. Íchitha mula nae maxúrana büxüpana nantapichatábiya. Absalón wishi aütábatsi naexuranáewatha. Mula bichokono dangweya kuinaerukua-pona xua jopa naruntabiyo. Absalón pekoutha naetha dukua pewishi-aütabixaetsi.

Néxata kaein pong penawabchüü-exaneibiwi jíwana kuinaepoiña yawa Joab tsipáebatsi. Joab bichokono jumedangweya kaseba bapongtha poxoru jopa Absalón bexubichi baxotiya. Íchitha bapong pong penawabchüü-exaneibiwi exanaein jopa bexúbiyo tsipéi báyatha David pong nakua itorobiya peewatsinxae paeba xua bepa pinae pexanto jopa tabexubi tsainchi.

Bara bapoxonae, Joab irü pewowin pong xua xeina pía penainto xua penayantsiwa, bapongbe namawáintabe, Absalón bexotsi poxonae naetha dukua. Poxonae baxua weta, Joab tsipaeba pebiwi po pebiwi pepunajinompawichi, xua pinae báyatha weta xua naba peexanaewa.

4

David yaputane xua pía pepunajinompaewichi amanáyaba xua naba, xuano xua pexanto tatsi báyatha bexotsi. Bapoxonae bichokono wekoyéi yawa pexanto báyatha siwawekoyéi tsurukuaenáebiya aiña matakabin. Néxata Joab pona yawa David muxutáinabatsi. David jeichichi:

—Ápara bara katsawiya éxaname paxangtha pomonae pangxaein xua pananabang xua xam nexa. Bekein paka yawénatsi íchitha be pata tana neaitafáetabi jintong pana netsita natsikotáneme. Najüntükoyene kabenaekang xua xam ichichípame xua daxita pawarapaein xua Absalón meisha asüü pepoponaewa tsane. Maisha jame ponde yawa tsita itüüre jiña nekapunainompáewitha xua xam jüntükoyene weiwéiname xua barapomonae nekayawenaexae. Icha jopa bárapo koyeyena exanaem tsane daxita kapunapentsina, jei Joab.

Néxata David pona, yawa eka ichaxota imoxoyo peboupa xua tómara peyaputoxorota dutsiwa. Pía penawabchüü-exaneibiwi jüntükoyene tsakáraba poxonae David tsipaeba barapomonaetha.

5

Pírapae pebiwi, po pebiwi xua Judá pía pemómoxi susato jiwi tatsi, barapomonae pona xua David pejeitsinéxatsi pong nakua itorobiya peewatsinxae. Barapomonae David wúükatsi xua kaibe peiyaenexa Jerusalén tómara beya. Barapomonae David kuéyabatsi poxonae kaibe nawibiya Jerusalén tómara beya. Íchitha ichamonae xua Israel pía pemómoxi susato jiwi tatsi xua once pomatabüxúyobe, barapomonae uwa bichokono, Judá pía pemómoxi susato jiwi tatsi úwatsi.

Pebin ichüng, pong pewüing Seba, bapong tamrópata pítaba xua naba peexanaewa, xua David piamonae tatsi naba peexanáewatsi. Saya meisha Judá pía pemómoxi susato jiwi tatsi David punapoinchi. Seikaya irü ichamonae Seba yawenapoinchi.

Poxonae David kaibe patoparena, xua Jerusalén tómara bepatoparena, bapoxonae itoroba pía penawabchüü-exaneibiwi tatsi xua naba peexanaenexa, xua Seba naba peexanaewa tsainchi. Íchitha poxoru Seba tómaratha nantsiyata, daxota Joab yaputoxórota duta tómara. Petsiriwa, powa peyaputaewa, powa baxota pópona, barapowa Joab yáinabatsi jeye:

—Joab, ¿eta xua metha ichichípame xua abe neexanaewa tsane pata tómaratha? Paxang ápara Israel nakuapiwi pang pomonae pangxaein xua jopa abe pákata exanaetsi, jei bapowa. Tómara jumamatasipa xorékatsi, xua Joab taxorékatsi.

Joab jumenota barapówatha jeye:

—Saya Seba jüntü náponang pong pekanamata-exanaein pomonae xua naba peexanaewa Dávidtha, jei.

Néxata barapowa muxupéinaba tomarapíwitha xua bepa pinae bexubinchi Seba. Bapoxonae bárapo tomarapiwi Seba bexotsi. Tómara jumamatasipa xorékatsi, xua Joab taxorékatsi. Poxonae baxua bara natsita itapeinaxeina, Joab saya bara nakuibaraxuba xua naba peexanaewa. Joab pía penawabchüü-exaneibiwi tatsi saya píabo benawibiya, xua kaibe nawibiya.

**Meje yábara poxonae David kaetukáetuta pokotsiwang xua
Nakom píabo tatsi, po bo pin bo, peexanaenexa tsane**

(2 Samuel 24; 1 Crónicas 21.1—26.28; 28.1—29.22a)

Pírapae David xua poxonae aiña wei kanamataxeina Israel nakua, bapoxonae kauri pía pentakaponaein tatsi David itoróbatsi xua peexanaewa tsane pewüng-tinaewa jiwi. Íchitha Nakom, David kasébatsi, poxoru David nantanaxeina xua icha pin bicheito xeina, metha yawenaeinchi xua amanáyaba xua poxonae naba. Jüntemaina xua Nakom bapong yawénatsi.

Daxota Nakom abe éxana Israel nakua. Bárapo nákuatha Nakom itoroba domae xua pinmonae átene. Matáütano Nakom itoroba matatsunpin xua abe peexanaenexa Jerusalén tómara. Íchitha ekeicha Nakom ichawa nantanaxeina. Itoroba matatsunpintha xua bepa pinae jopa abe exanáe tsane Jerusalén tómara. Mata-tsunpin narunta ichaxota pebin pong jebuseomonaepin xu sirisiriteiba trigoxú. David tane, xua matatsunpin tainchi. Néxata Nakom, David itoróbatsi xua bárapo íratha peexanaewa tsane altar matawüng xua xota duwéi tauteiba xua Nakom nexa.

Daxota David kómota bárapo ira, xua jebuseomonaepin komotatsi. Bárapo pebin bekein ichichipa saya amanaya douta bárapo ira, íchitha David pong nakua itorobiya peewatsinxae namchi, jeye:

—Bárapo ira bewa matomatsin tsipéi aichaxaibin xua Nakomtha katang pokotsiwa xua báyatha ichüng saya amanaya nekata xuano xua jopa matomatsiño, jei.

Bapoxonae David baxota éxana xua altar matawüng xua Nakom nexa. Baxota David aiña duweimonaein juteba xua be ofrendang matawüng, po ofrendang xua Nakom ompiwang pekatsíwatsi. Icha ofrendang matawüng, po ofrendang petsabiwang.

Néxata Nakom éxana xua pekoicha altar matawüng pematawé othopaewa tsainchi xua petautsinexa po ofrendang xua Nakom ompiwa pekatsíwatsi. Néxata Nakom itoroba matatsunpin xua kusi pekuaranotsinexa xua duwéi pekuaríyatha xua peyábara paebiwa xua nama ekeicha jopa átene exanáe tsane ichamonaetha. Poxonae David baxota éxana altar matawüng xua ichaxota duwéi tauteiba xua Nakom nexa Jerusalén tómaratha, bapong jeye:

—Po írathe éxanang altar matawüng xua xota duwéi tauteiba xua Nakom nexa. Xote po írathe taxanto akabina Nakom píabo tatsi, po bo pin bo, xua témplobo matawüng, jei David.

2

Bekein Nakom David tsipáebatsi xua pinae bapong jopa dapoiño xua Nakom píabo tatsi exanaena, íchitha David ichichipa pexanto yawena xua ákaba Nakom píabo tatsi. Bara tamrópata pítaba xua kaetukáetuta pokotsiwang xua bómüxü nexa.

David itoroba pomona xua Jerusalén tómaratha jinompa, pomona xua penanapaincha jinompaewi xua icha nakuapiwi, xua barapomona xua ibowa nakuita xua bo penayakaincha akabiwangnexa. Yawa múxuna kaetuta penainwa xua hierro nainwang matawüng, yawa pokotsiwang xua bronce nainwang matawüng, yawa napaewang múxuna kaetuta xua ponapaewang weweinaein.

Matáütano David kaetuteta daxita sacerdotemonae, írürü levitamona. David éxana xua levitamona aiña bicheitong náexana tsíniya. Daxita bicheitong tsíniya barompaya pía penakuichiwang xeixeina tsíniya. Icha bicheito itapétatsi xua beta ikika yawa beta jehebapona Nakom piabotha tatsi, po bo pin bo, yáwano xua nakuiwüünaeta xua po ofrendang xua pexun xua Nakomtha pekatsiwanexa. Írürü ichamona itapétatsi xua beta itorobapona ichamonaetha xua poxona nakuita. Írürü ichamona itapétatsi xua peboupa eena. Írürü ichamona itapétatsi xua petanbabiwang éxana xua wüünae pejainchiwanexa Nakomtha.

Daxota ápara baxua David éxana, poxoru bapong yaputane xua barapomona ekeicha jopa bewa ichawa beya pekainadutsiwa tsane xua po bo Nakom píabo, po bo chivonámüübo. Íchitha levitamona bewa yawenaponaena sacerdotemonaetha. Barapoxona írürü pinmonae jinompa pomona Aarón pía pemómoxi susato jiwi tatsi. Bichokono pinmonae tsóponae, veinticuatro pomatabüxü jíwibe náexana xua sacerdotemona pía pexui tatsi.

Néxata icha koyeneya éxana. Barapomona ibótixi kopababa xua penayaputaenexa xua pena jüntükoyene wetsinexa xua eta bichi tsane xua po matakabi poxona nakuitaponaena Nakom piabotha tatsi, po bo pin bo.

3

Bapoxona David pexanto waba pong Salomón, yawa pexanto barái jeye:

—Salomón, xam takoutha naexanáename pongxaem nakua itorobiya neéwatsin tsane poxona tüpaein. Bewa akabíname Nakom píabo tatsi, po bo pin bo. Nakom jopa nekopatsiyo xua taexanaewa píabo tatsi, po bo pin bo, yáitama tana nawabchü exaneibín xua yáitama jiwi pinmonae jutebang.

”Nakom netsipaeba xua pinae xua jame poxoru taxantom jame pinae pongxaem jüntema nepoponaem xua daxota pinae xam jame pongxaem Nakom píabo tatsi exanáename, po bo pin bo. Kaitoróbatsi xua Nakom píabo tatsi neakabiwa tsane, po bo pin bo, xuano xua jumekowüntsiya neexanaewa tsane daxita pokotsiwa xua Nakom pía peitorobi koyenewang tatsi itoroba, jei David.

Matáütano David pexanto yábara muxutsipaeba daxita pokotsiwang xua Nakom píabo tatsi nexa, po bo pin bo, xua báyatha kaetukáetuta. Daxita barapokotsiwang xua meje: oro nain matawüng, plata nain matawüng, yawa bronce nain matawüng, yawa hierro nain matawüng, yawa napaewang yawa ibowa.

David pexanto tsita itüüta xua Nakom píabo tatsi, po bo pin bo, eta bichi tsane poxona ákaba bo yawa xua panang xua ira xuépana xua Nakom píabo tatsi pekuariya. Matáütano pexanto barái xua eta bichi tsane xua penakuichiwang tsabina levitamaetha írürü sacerdotemonaetha. Bapoxona pexanto tsipaeba:

—Daxita baxuang xua Nakom píabo tatsi, po bo pin bo, yábara peexanaewa xuano xua tsaba éxana daxita penakuichiwang, daxita baxuang ápara Nakom yábara neitoroba, jei David.

4

Pírapae David, pongxae xua nakua itorobiya peewatsin, itoroba pomona pentakaponaewi xua Salomón amanaya peyawanaewa tsainchi xua Nakom píabo tatsi peakabiwa tsane, po bo pin bo. Bapoxona daxita kaetukáetuta, pomona pentakaponaewi írü Salomón. Barapomona kaetukaetútatsi Jerusalén tómaratha, yawa baraino jeye:

—Xang bekein báyatha nantanaxeinang xua taakabiwa tsane Nakom píabo tatsi, po bo pin bo. Bekein kaetukaetutang daxitang xua taakabiwa tsane, íchitha bapoxonae Nakom netsipaeba xua pinae aichaxaibi xua taakabiwa tsane píabo tatsi, xua po bo pin bo, tsipéi pinae xang tana nawabchü exaneibín. Nakom nekana éxana xua Israel nakua itorobiya taewatsiwa.

”Bárapo Nakom Salomón itapétatsi xua bapong xuya kotakaya nakua itorobiya peewatsin tsane, xuano xua peakabiwa tsane píabo tatsi, xua po bo pin bo. Nakom namchi xua pinae poxonae Salomón tüpaena, bara ü bárapo jiwi tsoponeibi tsane xua kaein jíwana nakua itorobiya peewatsin tsoponeibi tsane xua Salomón píá pemómoxi susato jiwi tatsi jíwana tsaibi tsane icha jumekowúntsiya exanaponaena Nakom píá peitorobi koyenein tatsi.

”Daxota ánoxuae xam, Salomón bewa Nakom wüünae jainchíname xua daxita nejüntükoyenáyatha. Nantanaxéinare xua icha Nakom wüünae jáintame xuano xua jumekowúntame Nakom, bapong kayawenaena xua beta exanáename pokotsiwa xua exanéibame. Nantaxéinare xua bapong kaitapeta xua neakabinexa píabo tatsi, xua po bo pin bo. Daxota najüntükoyene süütábare yawa bara beta nakuire, jei David.

Bapoxonae David jíwitha jeye:

—Daxita paxam, pomonae Israel píá pemómoxi susato jiwi tatsi pam, pana nakuidúbare Nakom píá peitorobi koyenein tatsi yawa bárapo píá peitorobi koyenein pajumekowünde xua ataya paiña nejinompaewa tsane Israel nákuatha, jei David.

David itoroba pomonae pentakaponaewi jeye:

—Salomón taxanto payawende, tsipéi áwiya bapong pewowin. Taxanto Nakom píabo tatsi, po bo pin bo, bewa wüünae exanaena. Báyatha kaetukaetutang daxita xua taxanto nantawénona xua Nakom píabo tatsi, po bo pin bo, peakabiwa tsane. Nawita baxua ápara tawang xua takatsiwanexa Nakom. Barichi paxam, be pakatsíname Nakom xua paiñawa jíwana, paiña nekatsiwa tsane Nakom píabo tatsi nexa, po bo pin bo, jei David.

5

Pinmonae xua barapomonae jíwana bara baxua éxana, daxota David bichokono jüntükoyene weiweina. Néxata David Nakomtha wüüka xua daxita peitütha tatsi pomonae xua pentakaponaewi. David jeye Nakomtha:

—Nakom xam pongxaem nekanamataxeinaem xua daxita nákuangtha nepoponaein, yawa pexeña jüntükoyene nexeiaein. Daxitang xua xuang xeina bárapo kae pin nákuathe ápara jiñawang. Ápara xam bapom pong xua daxitang pata tana nekatsibiwam. Paxang ekeicha tsiwixi kaewa jíwana paka katsibéibatsi pokotsiwa xua pana katsibéibame. Xam pana nejüntükoyene yaputáneme yáwano ichichípame xua bewa pomonae xaniwaicha peexanaewi pang tsane. Xam yaputáneme xua daxita baxuang weiweinaeya katang xua jiña bo nexa, xua po bo pin bo.

”Barichiya éxana pomonae xua ánoxuae xote ene. Pana yawenéibare xua wüünae pata takajainteibiwa tsane xua jopa paakoyenefáctabi tsaibin tsane. Salomón yawende xua pejumekowúntsinexa jiña neitorobi koyenewang xuano xua peakabinexa jiña bo xua pin bo, jei David xua Nakomtha wüüka.

Néxata David tsipaeba daxita jíwitha, xua bepa pinae Nakomtha wüükaena. Daxita barapomonae pentabokotongtha umena yawa yábara jakoba Nakomtha xua

barapomonae beta petaexanaexaetsi. Bapoxonae icha matakábitha barapomonae duwéi kápona xua pejutebiwa tsane xua be ofrendang matawüing xua petautsinexa xua Nakom nexa. Bichokono pin penabanaewa éxana poxonae jiwi jüntükoyene weiweina.

**Meje yábara poxonae David, pong nakua itorobiya peewatsinxae,
peweixi nawita tina xua wüünae pejainchinexa Nakomtha**

(2 Samuel 22—23; 1 Crónicas 16; Salmos 18; 96; 105.1—15)

David kaena báyatha yaputane xua arpa tangbaba. Bichokono ichichipa xua tangbaba, yawa naxüna yawa penaxünae weixi tina. Matáütano diwésixi exanéibano xua wüingduta: “poema”, jei. Icha diwésixi ápara xua yábara kaunanaya kueikueijeiya paeba xua wüünae pejainchíwatsi icha pebin, pong xua báyatha tüpa. Icha diwésixi yábara kaunanaya kueikueijeiya paeba xua wüünae pejainchiwa Nakomtha.

Icha weyo David tina xua pejakobinexa Nakomtha xua báyatha pekapanepaexaetsi Saúl weya, pong nakua itorobiya peewatsin. Bárapo weyo jeye:

“Nakom ápara bapong, pong tana ne-eenaein,
yawa nekanepa.

¡Daxita bewa wüünae jainchina Nakomtha!

Tha bapong wüükeibichi xua tana neyaweneibiwa
tsane poxonae xua inta jopa xaexaenakéibiyo.

Bara bapong neyaweneibina.

Poxonae bara xaniwaicha yaputang

xua bara nebexubina,

pomonae tana neaitafáetabi jiwi,

bapoxonae Nakomtha wüükang

xua tana neyawenaewa tsane.

Bara bapong nejumetane

yawa kaseba pomonaetha,

pomonae tana neaitafáetabi jiwi.

Bara bapong inta patopeika,

yawa nekanepa

pomonae tana neaitafáetabi jiwi weya,

bara bekein barapomonae

bichokono pedangwéi jiwi.

Nakom yaputane xua xang ápara

jopa bewa bara neichi tsane pokoyeneya

xua barapomonae inta éxana,

tsipéi jumekowünteibang Nakom

pía peitorobi koyenein tatsi.

Daxota Nakom neyawena.

Bara Nakom bara barichi.

Bapong Nakom beta taéxana pomonaetha,

pomonae wüünae peexanaewi.

Abe taéxana pomonaetha,

pomonae abe peexanaewi.

Ápara bara bapong xaniwaicha neyawena.
 Pokotsiwa xua Nakom
 yábara najüntükoyene wüünaeta
 xua peexanaewa tsane,
 baxua bichokono yatsikaewa wüünae.
 Nakom eena pomonaetha,
 pomonae peyábara jumekowünteibíwichi.
 Bapong neyawena xua amanáyabang
 daxita pomonae tana neaitafáetabi jiwi.
 Daxota Nakom tha baxua yábara jakobichi
 xua inta beta peexanaexae,
 yáwano tha tanaxüneibichi
 poxonae póponang”, jei David.

2

David pong nakua itorobiya peewatsinxae ekeicha icha peweiyo éxana xua Nakomtha wüünae pejainchiwanexa poxonae po matakeitha Nakom pía caja tatsi ichamonae kápata Jerusalén tómaratha. Meje baxue xua David paeba bárapo weitha, jeye:

“¡Antha, yábara jakobinchi Nakomtha
 xua nákata beta peexanaexae!
 ¡Daxita jiwi yábara tsipaebinchi
 pokotsiwa xua báyatha Nakom éxana!
 ¡Tsita barükui-iturajinaeya
 kanaxünaeinchi Nakom!
 ¡Yawa yábara nantanaxeinaeinchi
 xua bichokono pexeiña peitüpanáe koyenewang,
 pokotsiwa xua báyatha bapong éxana!
 Nakom jopa yábara jüntemainaeoyo
 xua báyatha Abraham
 yábara tsiwüünae muxudútatsi,
 xua irü Isaac barichichi,
 xua irü Jacob barichichi,
 xua barapomonae
 pía pemómoxi susato jiwi tatsi
 bepa pinae katsichi Canaán nakua.
 Yawa bara naka kata bárapo nakua.
 ¡Antha, daxita jiwi tsipaebinchi
 xua Nakom ápara pong
 bárapo kae pin nakue éxana!
 ¡Po ibo nakomüng
 xua jiwi wüünae jainteiba,
 xua pekanaxobiwa,
 ápara saya jopa xaiñeyo!
 ¡Matáütano bárabü
 bárapo kae pin nakuepiwi

wüünae jainchina,
 xua Nakom wüünae jaintinchi,
 tsipéi bapong éxana
 bárapo kae pin nakue!
 ¡Matáütano bárabü daxita jiwi
 ataya wüünae jainchina Nakom,
 po Nakom wüünae pajainteibang,
 pomonae Israel
 pía pemómoxi susato jiwi tatsi pangxaein!”
 jei David.

3

Tsiwiyo pirapaeyo xua pewünaeyo tsane xua tüpaena, David pong nakua itorobiya peewatsinxae, ekeicha icha penaxünae weyo éxana. David jeye bárapo peweyotha:

“Xang David, pong tsokuaein
 xua Nakom neéxana
 Israel nakua itorobiya taéwatsin.
 Xang bapong tsokuaein,
 xua tanaxünang Nakom.
 Nakom pía Pejumopetünaxü tatsi
 xua takueikueijejewa nekata
 xua pinae bewa paebin.
 Nakom paeba pinae,
 pong xua piamonae xaniwaichiya matakápona,
 xua pebarükui-iturajinaexae
 Nakom pía peitorobi koyene tatsi,
 bapong pinae daxita jiwi
 jüntübükoyene weiweina éxanatsi.
 Icha ichi xua Nakom jiwi
 jüntübükoyene weiweina éxanatsi,
 barichi poxonae baya pentha tsina,
 xua poxonae aitawüünae,
 ema peduntabixae mérawi,
 xua daxota pexeña matakabi,
 baxua jiwi
 jüntübükoyene weiweina éxanatsi.
 Tamatabüxümonae beta taéxana,
 xua Nakom beta taexainchi.
 Nakom netsiwüünae muxuduta,
 xua tamonae jopa pewerawerakaewa tsane.
 Nama pomonae jopa Nakom jumekowüntsichi,
 barapomonae be pomonae jopa wüünae exanaeyo,
 xua daxota barapomonae Nakom bebái.
 Báraxua icha be
 pemaxüranaewang ichi xua sojei,

xua jiwi jopa ichipaeyo xua peteikaewa,
xua daxota jiwi saya tauta ishótotha”,
jei David.

Meje yábara poxonae Salomón, pong Israel nakua itorobiya peewatsin náexana, pong David pexanto tatsi

(1 Reyes 1.1—2.12; 1 Crónicas 29.22b—30)

David, pong nakua itorobiya peewatsinxae, poxonae bichokono amo tsekae, bichokono ake tsaibi. Bekein icháwatha nanta-kiyonobabeiba íchitha áwiya amanayabéibatsi xua ake. Poxonae baxua David tainchi, pomonae David pía petanakuichiwichi, barapomonae nantanaxeina xua jüntünapona yábüyo penowayo, powayo pexeñowayo xua David pe-eenaenéxatsi, yawa xua peishamaiteibinéxatsi, xuano xua atou peexaneibinéxatsino. Daxota barapomonae jeita yábüyo. Bara barapomonae taeba yábüyo penowayo pewüing Abisag.

2

Adonías, bapong pong peweicho jiwi tsiwanáe matapin náexana xua David pía pexantong jiwi jíwana tatsi, po pexui áwiya tajinómpatsi. Bárapo pewowin bichokono pexeñüing. Barapong kaena báyatha jopa paxa muxuwetichi xua poxonae abe éxana. Barapong yaputane xua paxa tatsi báyatha amo tsekae xuano xua nama jopa peayapusüüwa xeinaeyo. Daxota juntukuru náexana pong nakua itorobiya peewatsin.

Bara bapong kaetukaetuteta pomonae pía pepunajinompeibiwichi tatsi. Barapoxonae Joab tsipáebatsi pong penawabchüü-exaneibiwi pía pekanamataxeinaeinchi tatsi, po penawabchüü-exaneibiwi David pía penawabchüü-exaneibiwi tatsi. Matáütano bapoxonae Abiatar tsipáebatsi pong sacerdotemonaepin. Bapongbe páebabe xua Adonías peyawenaewa tsainchi.

Íchitha Sadoc pong icha sacerdotemonaepin, írürü Natán pong Nakom peitorobi jume pepaebin, írürü pong pentakaponaein pewüing Benaía, írürü pomonae David peewatsíwichi, daxita barapomonae Adonías jopa yawenaetsi.

Néxata Adonías pin penabanaewa éxana ichaxota po ira pewüing Rogel. Bapong Adonías daxita waba pomonae pentakaponaewi xua Judá pía pemómoxi susato jiwi tatsi. Matáütano daxita peweicho jiwi waba, meisha bara kaein peweicho jopa wábiyo pong Salomón. Matáütano Natán jopa wabichi. Matáütano bara kaein jíwana jopa wabichi xua penawabchüü-exaneibiwi jíwanapin po penawabchüü-exaneibiwi David yawenéibatsi pongxae pong nakua itorobiya peewatsin.

3

Natán jumeyaputane pokotsiwa Adonías exanapaeba. Bapoxonae Natán pona Betsabeta xua Salomón pena tatsi. Natán irü Betsabé nabarü pónabe xua pepaebinéxabe Salomontha pokotsiwa xua exanapaeba Adonías. Natán tsipaeba xua báyatha David tsiwüüinae paeba pokoyene xua Salomón xuya nakua itorobiya peewatsin naexanaena poxonae bapong tüpaena.

Daxota bara Betsabé pona xua David petsipaebinéxatsi. Daxita baxua bapowa tsipaeba pokotsiwa xua Natán báyatha tsipaeba. Poxonae barapowa baxua tsipaebauya, bapoxonae Natán patopa yawa bapong paeba xua pinae baxua ápara

bara xaiñéi xua bapowa paeba. Néxata David waba, Benaía wábatsi, pong penawabchüü-exaneibiwi pía Pekanamataxeinaein tatsi po penawabchüü-exaneibiwi David peewatsíwichi. David jeye:

—Salomón múlatha kuaretsinka tangtha. Gihón natiyo bebarü iyande. Baraxotiya Sadoc irü Natán bewa bapongbe Salomón matawé epatabinchi penasíwatha xua petsita-itüüta peiña xeinaenexa xua ápara taxanto Salomón pong ekeicha nakua itorobiya peewatsin, jei David.

Sadoc, irü Natán, irü Benaía bara baxua éxana, pokotsiwa David itoroba. Jiwi, pomonae xua tane xua Salomón matawé epatábatsi penasíwatha, barapomonae wawái, jeye:

—¡Bara bapong Salomón pong nakua itorobiya peewatsin ajüntükoyenesüüya poponaena! jei xua wawái jiwi.

Adonías írürü pía jiwi tatsi anoxuaetha najainwetarüküpa xua xane. Bapoxonae jumetaerüküpa xua jiwi wawái. Bapoxonae Abiatar pexanto tatsi patopa. Barapong Adoníasbarü tsipáebatsi xua pinae David pexanto kana éxana pong xuya nakua itorobiya peewatsin pong Salomón.

Daxita pomonae jinompa ichaxota Adonías xua ichaxota pin penabanáewatha, poxonae barapomonae baxua jumetaerüküpa bichokono junuwarüküpa. Pía bong bekuinaeyiya. Íchitha Adonías Nakom píabo xua chivonámüübo beya pona, yawa opiwáetaba altartha. Israel pía pemómoxi susato jiwi tatsi piákui xeina xua kópata xua pebin itaküüpatsi xua peponaewa Nakom piabotha xua peopiwaetabinexa altar matawüing xua bapoxonae bapong jopa pebexubiwa tsainchi. Néxata Salomón tsipaeba, Adonías tsipáebatsi:

—Jopa kabexubi tsainchi icha ekeicha jopa abe neexanaewa tsane. Jiña bo benawíyama, jei Salomón.

4

David yaputane xua nama imoxoyo tüpaena. Daxota pexanto muxuweta, Salomón paxa muxuwétatsi. Bapong Salomón pongxae xuya nakua itorobiya peewatsin náexana. David pexanto barái jeye:

—Yaputang xua bara nama imoxoyo tüpangba. Poxonae bárapo nakuapiwi kanamataxeináename jopa be aitura benaexanaem tsane. Ajüntükoyenesüü naexande. Icha daxita Nakom pía peitorobi koyenein tatsi jumekowüntaponáename, bara kata wüüinae tsóponae tsane. Matáütano icha barichiponaem tsane bara Nakom exanaena pokotsiwa báyatha Nakom yábara netsiwüüinae muxuduta. Bapong netsipaeba xua ataya tsane kaein tamómoxi susato jiwi jíwana naexanaena Israel nakua itorobiya peewatsin icha barapomonae Nakom jumekowüntsina, jei David.

Matáütano David itoroba xua Salomón pebexubinexa, xua Joab pebexubiwa tsainchi, xua Abner pebexubixaetsi, írüno xua pebexubixaetsi Amasa, pongbe xua penawabchüü-exaneibiwi pekanamataxeinaeinbe xua bapongbe peyantomatsiwa tsáinchibe.

David tüpa, xua yakuiya tüpa, xua Israel nakua itorobiya peewatsin penaexanaewa xua cuarenta po weibetha. Salomón, pong David pexántoxae tatsi, bapong xuya nakua itorobiya peewatsin náexana. Salomón yatsikaewa beta nakua itorobiya ewateiba poxoru Nakom peyawenaewaxaetsi xua xaniwaicha beta tatsóponae tsainchi.

Meje yábara poxonae Salomón itorobiya éwata Israel nakua*(1 Reyes 2.13—4.34; 2 Crónicas 1)*

Pírapae xua poxonae David tüpa, Adonías, xua David pexántoxae tatsi, bapong pona xua Betsabé petañéxatsi. Betsabé, Salomón pena tatsi pong nakua itorobiya peewatsinxae. Bapong Adonías wüüka, Betsabé wüükatsi jeichichi:

—Betsabé, Salomón inta wüükare xua tana nekopatsiwa tsane xua tanakoyo-binexa Abisag powayo báyatha taxa David éénatsi xua poxonae tsiwiyo kaeto poponataba xua poxonae kataunxuae jopa tüpaeyo, jei Adonías.

Bara néxata Betsabé pona Salomón beya xua baxua petawüükaenexa. Íchitha poxonae Salomón jumetaeba xua baxua pena wüükatsi bichokono anáepana. Bapong Salomón itoroba pía penawabchüü-exaneibiwi jíwana tatsi xua Adonías pebexubiwa tsainchi. Salomón yaputane xua Adonías ichichipa xua pepichiwa Abisag xua náemata baxua éxana xua pía xuya naexanaetsi pong nakua itorobiya peewatsin.

Barapoxonae Salomón bara itoroba xua Abiatar pong sacerdotemonaepin Jerusalén tómara wenaetsiriwiya. Salomón itoroba, Abiatar itoróbatsi xua Abiatar pepoponaewa tsane pía tómaratha ichaxota báyatha pópona. Daxota Salomón itoroba tsipéi Abiatar yawena, xua Adonías yawénatsi, poxonae Adonías piakoya náexana nakua itorobiya peewatsin.

Salomón jopa itorobiyo xua Abiatar pebexubíwatsi yáitama báyatha Salomón paxa tayawénatsi, xua David yawénatsi. Bapong Abiatar Elí pía pemómoxi susato jiwi jíwana tatsi. Baxua Nakom éxana xua penayábara jumewetsinexa xua kaena báyatha xua aiña wei Nakom anaepanaeya yábara paeba, xua yábara páebatsi Elí píamonae matabüxüyo tatsi pomonae bichokono abe peexanaewi.

2

Joab pong penawabchüü-exaneibiwi pía Pëkanamataxeinaein tatsi jumetane xua pokotsiwa Abiatar kana éxanatsi. Bapoxonae bapong bichokono junuwa, Salomón kunúwatsi. Daxota Joab pona Nakom piabotha yawa opiwáetaba altartha, po altar xua unguua Nakom piabotha tatsi xua chivonámüübo. Bapong jumedangweya wüüka xua jopa pebexubinéxatsi.

Bapong irü Adonías yawénatsi poxonae Adonías piakoya náexana nakua itorobiya peewatsin, daxota bapong Salomón kunúwatsi. Íchitha áwiya dapo jumetha Salomón itoroba, xua Benaía itoróbatsi, pong pentakaponaein pomonae David éénatsi, xua baxota pebexubinéxatsi Joab poxoru báyatha Abner pebexubixaetsi írürü Amasa pebexubixaetsi. Barapongbe penawabchüü-exaneibiwi pekanamataxeinaeinbe.

Salomón yantómata xua daxota Joab tüpa. Baxua Salomón éxana xua paxa peitorobixaetsi xua David peitorobixae pong nakua itorobiya peewatsinxae. Bara kaena bapoxonae weya, Salomón jüntema pópona. Jopa ekeicha dapo koyene taexanaetsi po pebiwi ichichipa náexana nakua itorobiya peewatsin xua Salomón kueranta tanaexánatsi. Daxita Israel pía pemómoxi susato jiwi tatsi bara yábara jejéi xua bara Salomón pong nakua itorobiya peewatsin tsane.

3

Pirapaeyo bapoxonae, Salomón pong nakua itorobiya peewatsinxae daxita pebiwi kaetukaetuteta pomonae Israel pía pemómoxi susato jiwi tatsi. Daxita

barapomonaē Salomón barü pona Gabaón ira beya ichaxota Nakom píabo tatsi unguua xua chivonámüübo. Baraxota Salomón pin duwéi bicheitomonaē juteba xua be ofrendang matawüing, xua po ofrendang Nakom ompiwang pekatsíwatsi. Bárapo merawitha Nakom Salomón yáñabatsi, jeichichi:

—¿Eta pokotsiwa ichichípame xua jiña nekata exanaewa tsainchi? jeichichi. Salomón jumenota jeye:

—Xam pong nakua itorobiya taéwatsin neéxaname xua pinmonae nexa bara bekein pewowin yáwano bekein aenang pokotsiwa taexanaewa. Neyawende xua tayaputaewanexa xua pokotsiwa xua wüünae xuano xua tayaputaewanexa pokotsiwa xua abe. Bapoxonaē xain xaniwaicha pong nakua itorobiya taéwatsin tsane xua jiñamonaē nexa, jei Salomón xua jumenota Nakomtha.

Nakom ichichipa nawita xua Salomón wüüka xua peyaputáē koyenewa peyawenaenexa piamonaē. Nakom jeye:

—Bápana jopa newüükaem xua takayawenáewatsi xua nejutebiwa jiña nekaitafáetabi jiwi. Bápana newüükaemno xua aiña dapaein nepoponaewa taka exanáewatsi. Bápana newüükaemno xua kopei nexeinaein taka exanáewatsi. Xuano bápana newüükaemno xua neaiñakuí jintong taka exanáewatsi. Deta daxua jopa newüükaem. Deta daxua newüükame xua neyaputaewa tsane pokotsiwa xua wüünae xuano xua neyaputaewa tsane pokotsiwa xua abe xua jiñamonaē neyawenaewa tsane. Baxua pokotsiwa newüükame bara bichokono wüünae.

”Daxota kakatinchi pokotsiwa xua báyatha newüükame xua jiña neyaputaewa tsaiibi tsane. Yawa matáüta icha koyeneinno kakatinchi. Kakana exanaeinchi xua toxeincha pong nakua itorobiya neéwatsin tsane xuano xua toxeincha pong kopei nexeinaein tsane xuano xua toxeincha pong neaiñakuí jintom tsane xua bárapo kae pin nákuathe, jei Nakom xua Salomón tsipáebatsi.

4

Pírapae bapoxonaē, aiñáwabe petsiríwabe pónabe xua Salomón pesiwaponae-néxatsi pongxae pong nakua itorobiya peewatsin. Daxota barapowa pónabe xua Salomón peyawenaenéxabe pokoyene xua barapówabe jopa tawüünaetsibe. Barapówabe kae botha popónabe. Barapówabe pexuyo pabétabe xua bara imoxoyo kaentakábitha. Íchitha bárapo pexúyobe kaein jíwana tüpa merawitha. Ichawayo jeye:

—Pong asüü ápara taxanto, jei.

Ichawayo jeye:

—Náerabame, bapong ápara taxanto, jei.

Bárapo pexuyo nayábara jumematsontsónobabe.

Yawa ánoxuae barapówabe Salomón tsipáebatsi xua bepa pinae Salomón be píá pexuyo exanaena pong xua asüü. Salomón pong nakua itorobiya peewatsinxae poxonaē baxua jumetane, itoroba pomonaē píá petanakuichiwichi xua petaxawenaenexa tsainchi kusi. Bapoxonaē kui-itoroba xua pexuyo, pong asüü, tsana epatoyatinchi xua bárapo epatíyobe barapówabe tsana epakatsínchibe. Néxata yábüyo, powa xua pexuyo pena tatsi, pong xua asüü jeye:

—¡Bara! ¡Jumedangweya paka jeichi! ¡Jopa exanaeinde baxua! Bárabü barapowa barü ponaena, jei.

Báraxua paeba poxoru pexanto ántobe. Barapowa ichichipa xua ichowa barü poponaena pexuyo xua bapoxonae xain bapong jopa bexubichi. Íchitha ichowa paeba xua metha jame wüünae xua bárapo pexuyo bara epatoyatinchi. Barapowa baxua paeba poxoru icha jopa itaküüpaetsi xua pebarü poponaewa, barichi barapowa aichaxaibi xua ichowa pebarü poponaewa bárapo pexuyo. Nékata Salomón jeye:

—Barapowa pakare pexuyo pówaxae xua barapong yábara ajüntütánetsi. Barapowa ápara pexuyo pena tatsi, jei Salomón.

Bara baxua pexuyo kana éxanatsi.

Daxita Israel pía pemómoxi susato jiwi tatsi baxua jumetane pokoyene xua Salomón pong nakua itorobiya peewatsin beta taéxana, xua barapówabe beta taéxanatsibe xua poxonae jopa tawüünaetsibe. Barapoxonae barapomonae yaputane xua ápara bara xaniwaicha xua Nakom kata peyaputáe koyenewa, xua Salomón kátatsi.

5

Poxonae Salomón kanamataxeinaeya éwata Israel nakua, barapomonae jüntema jinompeiba. Aiña nakuangpiwi, pomonae bárapo Israel nakua pekuariya petanaewichi, daxita bárapo nakuapiwi Salomón pekakomokáe parátixi katsibéibatsi xua nakua kanamataxeinaeya peewatsixae. Dapomonae aibi xua Israel pía pemómoxi susato jiwi tatsi peyotsíwatsi.

Salomón, pong nakua itorobiya peewatsinxae, bichokono kopeixeinaein. Bapong kawayu nawita xeina. Yawa nawita xeina po naexi kawayu pekaponaeaxi. Yawa pexaewa bichokono jopa juniya xeinaeyo. Xua poxóruxae xua poxonae Salomón nakua itorobiya peewatsin náexana, daxita Israel nákuatha bichokono wüünae tsúrukuae.

Matáütano bapong Salomón bichokono peyaputaein. Aiña diwésixi tina, po diwésixi xua yábara kanaütsiya paeba. Yawa penaxünae weixi nawita tina. Matáütano naein yábara nakuiduba, yawa tina pía yaputaetsi, yáwano duweimonaein yábara nakuiduba, yawa tina pía yaputaetsi. Salomón bichokono pepa peyaputaein daxota jiwi tajü werenapiwi pateiba xua Salomón pejumetaibinéxatsi xua paeba. Daxita jiwi Salomón takapatéibatsi xua xuang amanaya pekatsibeibíwatsi.

Meje yábara poxonae Salomón, pong nakua itorobiya peewatsinxae, ákaba Nakom píabo tatsi, po bo pin bo

(1 Reyes 5—7; 2 Crónicas 2.1—5.1)

Hiram pong xua Tiro tómara itorobiya peewatsin xua pepa tómara, bapong David pong nakua itorobiya peewatsinxae pía jintong tatsi tsaibi. Daxota poxonae David tüpa, bapong Hiram itoroba pía bicheitomonae jíwana Salomón beya xua Salomón pejakobinéxatsi. Hiram jeye:

—Salomón, maisha wüünae xua nakua itorobiya neéwatsin nenaexanaewam, jei Hiram.

Daxota Salomón najumekaruta pebin Hiram beya, xua saya tapáebatsi jeye:

—Hiram, kawüükatsi xua neitorobinexam pomonae jiña nekatanakuichiwi xua kaemonae yawa Israel pía pemómoxi susato jiwi tatsi penabarü ukubobinexa weweinaein. Bárapo naein xuwa imoxoyo Tiro tómara. Ichichipang xua bárapo

naewang taexanaewa tsane Nakom píabo tatsi, po bo pin bo, xua Témplobo matawüing, jei Salomón.

Bara Hiram jumenota jeye:

—Je, jei.

Daxota Salomón itoroba pebiwi pomonae pía petanakuichiwichi jíwana tatsi xua Hiram pong tómara itorobiya peewatsinxae pía petanakuichiwichi peyawenaewa tsainchi xua penakuichiwa. Matáütano Salomón itoroba pexaewa xua pomonae petanakuichiwichimonae nexa. Poxonae Salomón baxua exanapona, ekeicha kaetubapona peakabiwang xua Nakom píabo tatsi nexa, po bo pin bo. Matáütano icha peakabiwang xeina xua xuang báyatha David yábara kanakuixainwaetsiya weta.

2

Bara cuatro po weibe xentaba xua poxonae Salomón nakua itorobiya peewatsin náexana. Barapoxonae Salomón bara tamrópata pítaba xua ákaba Nakom píabo tatsi, po bo pin bo. Barapoxonae írürü, cuatrocientos ochenta po weibe yapukaewa xua poxonae kaena báyatha Israel pía pemómoxi susato jiwi tatsi panenebiya Egipto nakua weya.

Bapong Salomón baxota exananota Nakom píabo tatsi, po bo pin bo, ichaxota kaena báyatha David exananota altar matawüing Nakom nexa, xua poxonae matha peatenewa xayébatsi poxonae pinmonae wérapa. Bárapo Nakom píabo tatsi, po bo pin bo, xeina diez po métrobe xua tayiya. Treinta po métrobe xeina xua apiya yawa quince po métrobe xeina xua taücha. Ichaxota xua jójonebiya, xeina pana xua bichokono pin pana xua cinco po métrobe xeina xua apiya yawa xua diez po métrobe xeina xua tayiya.

Tútutha, Nakom píabo tatsi aiña tútube éxana. Po tutu xua ichaxota wejójonebíbiya, bárapo tutu veinte po métrobe xeina xua apiya, yawa diez po métrobe xeina xua tayiya. Icha tutu xua po tutu seikaya Nakom pía tutu, bárapo tutu diez po métrobe xeina xua nantiya namuxunene júpabe. Po tutu xua Nakom pía tutu, bárapo tútutha eka Nakom pía caja tatsi. Bárapo Nakom pía cájatha tatsi aiña querubinbe matawüingbe ékabe. Yawa paparua epataüta duya xua aiña tútube peexanaenexa.

Nakom píabo tatsi pekuariya xua aishowa beya baraxota tútixi éxana xua potutixitha jebathopa ichauxi. Nakom píabo tatsi, po bo pin bo, ü ibowa éxana. Tútutha naepaewang xua itúpana éxana, po naepaewang weweinaein. Yawa múxuna ákaba oro nain matawüing xua peitafafanaewang pejuma wekatsababiwanexa naepaewang.

Icha tútutha, po tutu xua pin tutu, baraxota ungkua xua altar matawüing ichaxota tautathopa incienso nain xua túxusi wüüinae. Yawa diez po pexaethopaewang umena xua baxota pan jebathopa, po pan xua Nakom nexa. Matáütano xeina diez xóyobe xua xota pekoichang itanakanoba xua candelero matawüing. Yáwano cien po tázangbe xua pin tazang xua amuxuwaibi. Daxita baxuang oro naintha éxana.

3

Pong peitüpanaewang peexanaein bapong pewüing Hiram. Bapong bronze nainto tanque éxana xua pinwa xua mera penotsiwa nexa, yawa éxanano diez xóyobe xua xuang ichaxota nakobekiatathopa xua yenenenejei tsúrukuae xua tsiki yantiyo.

Yawa bapong éxana altar matawüing xua duwéi pejutebeibiwa xua Nakom nexa. Matáütano penaintong éxana xua pekanotsiwa duwéi poxonae tauta Nakom nexa. Yawa nantiya kuaranótabe pepaboto xua ichaxota jojoneibiya xua Nakom piabotha xua ibowa xua bichokono taücha.

Salomón nakobeweta Nakom píabo tatsi, po bo pin bo, poxonae siete po weibe tsuxubi xua barapoxonae néxata yapujóparü once po weibe xua poxonae bapong tamrópata pita xua itorobiya éwata Israel nakua. Salomón tutuxitha xua Nakom píabo kuaríyatha tatsi, baxota jeba oro nain matawüing yawa plata nain matawüing xua kaena báyatha David kata Nakomtha pongxae Salomón paxa tatsi. Barapoxonae Salomón itoroba xua petaexanaenexa tsainchi pepa píabo tatsi xua bichokono pin bo xua Jerusalén tómaratha tsane.

**Meje yábara poxonae Salomón, pongxae nakua itorobiya peewatsin,
fiesta éxana xua jiwi peyaputaenexa
xua bárapo bo ápara Nakom píabo tatsi, po bo pin bo**

(1 Reyes 8.1—9.9; 2 Crónicas 5.2—7.22)

Salomón, pong nakua itorobiya peewatsin, poxonae weta xua ákaba Nakom píabo tatsi, po bo pin bo, daxita itoroba pomonaetha, pomonae peaiñakuí jiwi xua Israel nakuapiwi xua penakaetutsinexa Jerusalén tómaratha. Baxua bewa exanaena poxonae írürü jiwi fiesta éxana poxonae jiwi yábara nantaxeina xua báyatha Israel pía pemómoxi susato jiwi tatsi jinompa náekona boutixitha. Ichichipa fiesta éxana xua yábara peexanaenexa xua nakobeweta xua ákaba Nakom píabo tatsi, po bo pin bo.

Yawa fiesta éxana poxoru ichichipa Nakom piabotha pekaponenexa Nakom pía caja tatsi xua boka chivonamüübotha xua kaena báyatha baxua David kana mataéxana pong nakua itorobiya peewatsin. Poxonae daxita jiwi nakaetuta, levitamonaenae karendena Nakom pía caja tatsi yawa bota ichaxota Nakom pía tútiyo xua bárapo querubinbe matawüingbe pebüxüpana wétsina. Saya meisha baxota xeina xua Nakom pía caja juntútutha xua aiña ibótobe xua po ibótobe matadaméi tsekaebe. Bárapo ibotobetha matatina xua diez po peitorobi koyenéwabe.

Bárapo matakábitha Israel pía pemómoxi susato jiwi tatsi bichokono jopa juniya jutebiyo ovejaxi xua aiña po weibe xeina yawa bueymonaenae xua be ofrendang matawüing xua Nakom nexa. Sacerdotemonaenae irü levitamonaenae barapomonaenae tangbaba yawa naxüna pebarükui-iturajinaenexa Nakom. Tsipéi bárapo Nakom bichokono wüünae yawa bápana barapomonaenae jopa yábara nakuibaraxubichi xua peantobéwatsi.

Poxonaenae kataunxuae daxita barapomonaenae naxüna, Nakom patopeika piabotha, po bo pin bo, xua yatsakinaebowa patopeika xua po tsakinaebowa bichokono daedaena. Sacerdotemonaenae jopa itaküüpaetsi xua jinompa Nakom piabotha tatsi, po bo pin bo, tsipéi tsakinaebowa bichokono daedaena. Yawa pekoicha aitatüna xütane exanéibatsi.

Néxata Salomón namchi, jeye:

—Nakom bichokono pewüünaenae. Bapong Nakom itapeta Jerusalén tómara xua be pepa pía tómara tatsi. Yawa taxa David itapétatsi xua be pong nakua itorobiya peewatsin penaexanaenexa. Poxonaenae taxa ichichipa taákaba Nakom píabo tatsi, po bo pin bo, Nakom namchi, jeye: ‘Xam nexanto xeináename, yawa bapong tabo inta akabina’, jeyéi Nakom, jei Salomón.

—Ánoxuae Nakom nayábara jumeweta pía peyábara tsiwüüinae muxudutsiwa xua taxa yábara tsiwüüinae muxudútatsi, tsipéi ánoxuae xang pong Israel nakua itorobiya taéwatsin. Matáútano Nakom píabo tatsi ákabang, po bo pin bo, yawa baraxota etang Nakom pía caja tatsi, jei Salomón.

2

Néxata Salomón ekeicha tsipaeba Nakomtha, jeye:

—Xam Nakomüm pong xua pepa Nakomüm. Daxita icha nakomüng jopa kakui-jüpaeyo, po nakomüng jopa xaiñeyo. Xam beta kana éxaname jiñamonaetha yáwano yábara barü jumewétame xua báyatha yábara tsiwüüinae muxudútame barapomona.

”Ánoxuae pana itaküüpa xua pata taewa xua nayábara jumewétame xua nayábara tsiwüüinae muxudútame táxatha David, pong nakua itorobiya peewatsin. Xam táxatha tsipáebame xua bepa pinae icha taxa pía pemómoxi susato jiwi jíwana tatsi, icha jumekokowüntaponaena jiña neitorobi koyenewang barapomonaé jíwana tsaibi tsane pinae kanamataxeineibina, xua Israel pía pemómoxi susato jiwi tatsi kanamataxeineibinchi.

”Tananekanamataxeinaein jumedangweya kawüükatsi xua jiña neyábara jume-kuiwetsiwa xua beta jiña pata tana nekana exanaewam.

”Xang bo éxanang xua kata éxanatsi. Jopa nenantawenonaewa xua jiwi nekatsí exanaewa bo xua ichaxota neekaewa tsane. Daxita paxang payaputang xua xam bichokono daxita kanatüpaeya tayékame bárapo kae pin nakue yawa itaboko ichaxota athabeicha póponame. Báyatha netsipáebame xua ichichípame nepoponaewa bárapo jiñabothé, po bo báyatha kata éxanatsi. Jumedangweya kawüükatsi xua baraxote poponéibare. Poxonae jiñamonae kawüüka po bo weye xua jiña botha, jumenore barapomona.

Ichikuitha poxonae bapong bara benekotungkuiya tajü peekaexae, kawüükatsi xua bapong bara nejumenotsiwa tsane poxonae kawüüka. Poxonae jiñamonae abe éxana xua daxota xam kópatame xua barapomonaé bara amanayabinchi pía peaitaetabí jíwichi poxonae naba, icha barapomonaé kawüüka, moya yawende barapomona.

”Ichikuitha tsipae xua poxonae ema aibi tsipae, icha jiwi kawüüka moya taitoróbare ema. Ichikuitha xua poxonae pejainpaewa taéxaname, icha jiwi kawüüka, moya kare pexaewa. Ichikuitha icha domae taitoróbame xua pinmonae wérapa, icha barapomonaé kawüüka, moya yawende barapomona.

Ichikuitha icha peabewa taitoróbame xua daxota peübiwang taabetsi, néxata icha barapomonaé kawüüka yáwano icha aura xua abe peexanaexae yawa icha nakuibarapenta, kawüükatsi xua jumetaema xua barapomonaé kawüüka. Matáútano yábara jüntemáinare pokotsiwa barapomonaé abe éxana.

Icha pong icha nakuapin kayábara jumetane xua pexeña diwesim, yawa icha xote patope xua nekawüükaenexa, kawüükatsi xua barichi bapong jumetaema xua kawüüka. Poxonae icha báraxua tsaibi tsane, daxita jiwi bárapo kae pin nákuathe kayábara yaputaena yáwano kayábara barükui-iturajinaena.

”Icha jiñamonae abe éxana xua daxota xam kópatame xua barapomonaé bara maxükübiya kaponaéinchi weye xua po nakua bichokono tajü, icha barapomonaé aura xua abe peexanaexae yawa icha kawüüka xua juiña pobe betaumendena,

xua jiña bo betaeumendena, kawüükatsi xua yábara jüntemáinare pokotsiwa xua barapomonaе abe éxana, jei Salomón.

3

Salomón najumeweta xua Nakomtha wüüka. Bapoxonaе Nakom éxana xua pekoicha peitaboko weothopeika xua petautsinexa duwéi xua be ofrendang matawüing, po ofrendang xua Nakom ompiwa pekatsíwatsi. Néxata daxita jiwi tsipaeba Nakomtha jeye:

—Jako Nakom xua beta jiña painta exanaexae.

Matáütano barapomonaе pentabokototha umena Nakom peitabaratha tatsi. Barapoxonaе Salomón pong nakua itorobiya peewatsin yawa jiwi jopa juniya jutebiyo ovejaxi xua penawang xua aiña po weibe xeina. Bueymonaeinno juteba xua be ofrendang matawüing xua Nakom nexa.

Poxonaе ocho po matakábibe yapukaewa xua poxonaе fiesta éxana, daxita jiwi barompaya piabongtha nawibiya. Daxita weiweinaeya jijinka xua pewüünaewa petaxae xua báyatha Nakom peexanaexae Dávidtha pong nakua itorobiya peewatsin, xuano irü barichichi Salomón pong nakua itorobiya peewatsin, xuano irü barichichi daxita Israel pía pemómoxi susato jiwi tatsi.

4

Kae merawitha, xua pirapaeyo bapoxonaе, Nakom Salomón tsita naitüütatsi maichinaebotha. Nakom Salomón tsipáebatsi jeye:

—Kajumetaинchi xua poxonaе newüükame. Itoróbare xua Israel pía pemómoxi susato jiwi tatsi inta kaponeibina tabotha xua pin bo pokotsiwang xua uang be ofrendang matawüing xua ánoxuae weya tsane xua yawa bexa tsáneno. Barapoxonaе jumetaein Israel pía pemómoxi susato jiwi tatsi xua poxonaе tana newüükaewa tsane. Barapomonaе yábara jüntemainaein pía abewang, xua poxonaе barapomonaе najüntüteweiba xua jopa atsakiya pejinompeibiwa tsane, yáwano xua jejéi tseibi tsane xua bepa pinae abe éxana xuano xua nakuibarapentsina xua abe peéxanae koyenewang.

”Icha xam daxita jumekowüntsíname xua takaitorobi koyenéwatsi, kopatsin xua jiña nemómoxi susato jiwi jíwana tatsi tsaibi tsane, xua kanamataxeineibina Israel nakua. Íchitha icha jopa daxita pajumekowüntsím tsane xua taitorobi koyenewang xuano xua wüünae pajainchíname icha nakomüing, exanaein xua jiñamonae bewa ponaena xua pejinompaenexa icha nákuatha xua po nakua pepa pía ira tatsi wepu tajü tatsi.

”Matáütano xubíchipang tabo, xua jopa tapoponaewa tsane bárapo botha, xuano kopatsin xua jiwi, po jiwi icha nakuapiwi bara werawéraka kana exanaena tabo. Bapoxonaе poxonaе ichamonae taena tabo xua abe, barapoxonaе yaputaena xua baxua éxana ápara poxoru Israel pía pemómoxi susato jiwi tatsi abe éxana xuano xua wüünae jainta icha nakomüing, jei Nakom xua Salomón tsipáebatsi.

**Meje yábara poxonaе Salomón, pong nakua itorobiya peewatsin,
bichokono peajüntüyapusúü itorobi koyenewa pexeinaein**

(1 Reyes 9.10—10.29; 2 Crónicas 8.1—9.29)

Salomón, pong nakua itorobiya peewatsin, bapong ákaba Nakom píabo tatsi, po bo pin bo, xuano xua píabo tatsi xua pexeña bo. Veinte po weibe nakuita.

Bapong Salomón itoroba ichamonaetha, xua icha nakuapiwi pomonae xua Israel nákuatha jinompa, xua petaakabinéxatsi bárapo bobé. Xuano itoroba xua barapomonaé exanaena icha penakuichiwano.

Salomón yawa itoroba barapomonaetha xua peakabinexa tómara peyaputoxorota dutsiwa xua Jerusalén tómara peyaputoxorota dutsiwa dukuaewa tsane, xua peyapusúü tómara tsane. Yáwano itoroba xua penakuichiwa tsane icha tómarangno xua Israel nákuatha. Jopa itorobiyo piamonae xua amanaya petanakuichíwatsi.

Salomón irü Hiram, pong Tiro tómara itorobiya peewatsin, bapongbe itoroba pókotsi naein xua pejotsinaein xua oro nain matawüng Salomón petakarende-naenexa tsainchi. Jopa meisha baxua takarendenaetsi. Takarendenatsino peitüpanaewang pokotsiwang be wárowang xua penaintong. Yáwano takarendénatsi naepaewang xua xuang aiña matomang, pokotsiwang be weiweinaein. Matáütano takarendénatsi xua be pentetongno xua éxana pokotsiwa xua marfil matawüng xua xuang aiña matomang. Matáütano takarendénatsi papobüng.

2

Bara írürü powa Sabá nakua itorobiya peewatsiwa, barapowa jumetane xua pinae daxita paeba xua pinae Salomón bichokono peyaputaen yawa pejüntükoyene wüünaein.

Poxonae barapowa baxua jumetane, barapoxonae barapowa pona xua Salomón petaexanaewa tsainchi peyaiñabiwang, po peyaiñabiwang bichokono ayapubé. Bara Salomón beta jumenota xua peyaiñabíwatsi. Poxonae barapowa tane xua bichokono wüünae xuano xua jopa juniya itüpanaeyo xua Salomón píabo tatsi xua pin bo, jeye:

—Jopa kopiya jumekowüntsiño pokotsiwa xua jiwi netsipaeba xua kayábara paeba. Íchitha ánoxuae bara xang takoutha tang. Takoutha yaputang xua tsiwiyo netsipaeba xua kayábara paeba. ¡Maisha daxota deta kou jiñamonae matabüxüyo jüntükoyene weiweina xuano po pebiwi peaiñakuí jiwi xua jiña nákuatha! ¡Maisha bichokono wüünae jiña Nakom xua Israel nakuapiwi pekatsixaetsi, pong wüünae, pong nakua itorobiya peewatsin! jei barapowa.

Néxata barapowa Salomón katsíbatsi oro nain matawüng, xuano xua peitüpanaewang pokotsiwa be wárowang xua penaintong, yáwano xuano pebeno xua tuxuéi xua pexaewa múxuna seta xua daxota xeika.

Salomón xuya kakatsibapona, barapowa kakatsibapoinchi daxita koyenewang xua xuang peitüpanaewang xua pokotsiwang barapowa itapetsiya notsina xua xuang tütuntha jeba xua Salomón piabotha tatsi xua pin bo. Barapoxonae barapowa kaibe náwiya pía ira beya.

3

Salomón jopa juniya katsibeibichi pekakomokáe parátixi daxita weitha tsaibi po impuesto matomang weya xua báyatha icha nakuapiwi katsibeiba xuano irü Israel nakuapiwi katsibeiba.

Bapong Salomón pía pexeña peekeibithopeibiwa xeina xua saya bapong nexa xua marfil matawüng éxana, xua matha weyang oro nain matawüng múxuna éxana. Matáütano bárapo pía peekeibithopeibiwa tatsi seis poyürütíyobe xeina

xua nonobabébiya xua ichaxota ekeibiya baxota opidukuiya. Nantíyabe pemáxi-tha, xua ichaxota peekeibithopeibiwa, baxota nantíyabe kuaranótabe xua be neuthü kanaxóbiya éxana. Matáütano xua ichaxota nonobabébiya baxota nantíyabe aiñumbe tsíniya nóichabe xua be néuthübe, kae neuthü kae muxunénetha yawa kae neuthü icha muxunénetha xua daxita néxata doce póyobe. Salomón apeiba oro nain korótotha. Matáütano Salomón cuatro mil potutun xeina xua pin bicheito kawayumonaenexa. Yáwano xéinano doce mil pebiwi, pomonae itakúüpatsi xua peenaewa kawayuntha. Bichokono jopa juniya kawayu bicheitong xeinaeyo, xua daxota itoroba xua aiña tómarang peexanaewa xua penobinexa kawayu bicheitong. Barapong pong toxeincha nakua itorobiya peewatsin Salomón bichokono yatsikaya pong toxeincha kopei pexeinaein xua bárapo kae pin nákuathe. Matáütano bichokono yatsikaya pong toxeincha pepa peyaputaein.

**Meje yábara poxonae Salomón, pong nakua itorobiya peewatsin,
jopa jumekowüntsiyo Nakom poxonae amo tsóponae**

(1 Reyes 11; 2 Crónicas 9.30-31)

Poxoru Salomón, pong nakua itorobiya peewatsin, bichokono yábüxi ichichipa nawita, daxota bapong aiña yábüxi xeina. Bapong aiña yábüxi nota xua icha nakuapiwaxi xua bekein poxonae Nakom Israel pía pemómoxi susato jiwi tatsi itoróbatsi xua bepa pinae jopa notsi tsane xua icha nakuapiwi. Íchitha Salomón pita pong Egipto nakua itorobiya peewatsin pexantiyo tatsi yáwano icha yabüxino xua icha nakuangpiwaxi. Daxita barapówaxi icha nakuangpiwaxi, po nákuang ichaxota xua píakui xeina, xua icha nakomüng wüünae jainta.

Salomón bichokono piowaxi ántobe daxota poxonae bapong bichokono amo tsekae náemata muxupéiñabatsi xua pinae wüünae jainchina barapówaxi pía nakomüng tatsi. Matáütano Salomón piowaxi aiñawang taéxana xua xuang altar matawüng xua ichaxota imoxoyo Jerusalén tómara xua baxota wüünae pejaintebinexa pía nakomüng, po nakomüng jopa xaiñeyo. Írürü bapong Salomón wüünae jainta bárapo nakomüng icha pókotsi koyeneya ichi xua poxonae wüünae jainta po Nakom pepa Nakom. Néxata Nakom bichokono kaseba, Salomón kasébatsi, jeichichi:

—Xam jopa exanaem xua páebang taitorobi koyeneintha. Daxota jopa kopatsin tsane xua jiña nemómoxi susato jiwi itorobiya peewatsiwa tsane Israel nakua. Saya meisha barapomona kopatsin xua itorobiya peewatsiwa tsane po írixi tsiki írixi tsipéi tabo unguia po írathe.

”Matáütano báraxua exanaein tsipéi axa David kaena báraxua báyatha yábara tsipaebang. Yábara tsipáebangno pokoyene xua bapong bara kaein pía pemómoxi susato jiwi jíwana tatsi bapong pong nakua itorobiya peewatsin tsóponae tsane. Xua ichawa xua Israel nakua nexa, kaein jíwana exanaein pong nakua itorobiya peewatsin xua jíwana pomonae peaiñakuí jiwi, pomonae kata nakuita, jei Nakom.

Bara kaena bárapo matakabi weya po nakuangpiwi xua Israel nakua tanta-wakaicha énatsi, barapomona Israel pía pemómoxi susato jiwi tatsi taayápube exanapoinchi.

Írürü poponarü pebin pong pewüng Jeroboam pong Efraín pía pemómoxi susato yajintong tatsi. Barapong Jeroboam jíwana pomonae peaiñakuí jiwi xua Salomón

petanakuichiwichi. Kaentakábitha Jeroboam Jerusalén tómara weya pona. Bapoxonae bapong kaxina pebin, pong pewüing Ahías, pong Nakom pía peitorobi jume pepaebin. Barapoxónaerü jiwaibi. Ahías pita pía penauiyapatsiwa xua penawa yáwano bárapo paparuwa nantarabiya epatsitsika xua doce xóyobe éxana. Nékata Ahías barái, Jeroboam baráichichi, jeye:

—Diez po paparuwíyobe pire xuaunxuae tapaparuwa weya tsitsikang. Nakom najüntükoyene weta xua bepa pinae xam saya pong nakua itorobiya neéwatsin naexanáename pomonae diez po bicheitomonaebe nexa xua Israel pía pemómoxi susato yajiwi tatsi, pomonae xua doce po bicheitomonaebe.

”Nakom jopa kopatsí tsane xua David pía pemómoxi susato jiwi tatsi jopa ataya naexanaponáe tsane xua daxita Israel nakua itorobiya peewatsiwa tsipéi Salomón wüüinae jainta icha nakomüing po nakomüing xua jopa xaiñeyo. Bárapo koyeneya Nakom taexanaena xua barapomonae jopa taxaxanakáe tsainchi xua bekein jopa peatayanexa.

”Bapong Nakom kopatsina xua David pía pemómoxi susato jiwi tatsi pomonae nakua itorobiya peewatsiwi naexanaena saya pomonae tsikimonaeyo nexa xua Israel pía pemómoxi susato jiwi tatsi. Nakom baxua exanaena tsipéi báraxua kaena báyatha Nakom David yábara tsiwüüinae muxudútsi, yawa poxoru David exaneiba pokotsiwa Nakom itoroba pía peitorobi koyenéwatha.

”Nakom ichichipa xua neyaputaewa xua icha daxita jumekowüintsíname Nakom pía peitorobi koyenewa tatsi, kata exanaena xua jiña nemómoxi susato jiwi Israel nakua itorobiya peewatsiwa naexanatsiniyaena poxonae tüpáename, jei Ahías xua Jeroboam tsipáebatsi.

3

Jeroboam bichokono penakuichin, daxota Salomón itoroba, Jeroboam itoróbatsi, xua pekanamata-ewatsinexa pebiwi, pomonae xua Efraín pía pemómoxi susato jiwi tatsi írürü Manasés pía pemómoxi susato jiwi tatsi. Báyatha daxita bárapo matabüxümonaebe Salomón itoroba xua pía petanakuichiwa tsainchi. Íchitha bapoxonae, Jeroboam bichokono anáepana xua poxoru pomonae piamonaexae tatsi kou nakuita po penakuichiwa bichokono dangwéi.

Nékata Jeroboam tamrópata pítaba xua naba éxana Salomontha. Íchitha Jeroboam jopa kui-amanayabiyo daxota Salomón nantanaxeina xua Jeroboam pebexubiwa tsainchi. Íchitha Jeroboam Egipto nakua beya naetsíriwa. Baraxota Jeroboam pópona beya poxonae Salomón tüpa.

Salomón Israel nakua itorobiya peewatsin náexana cuarenta po weibetha. Poxonae Salomón tüpa, pekoutha pexanto tatsi xuya pong nakua itorobiya peewatsin náexana. Barapong pewüing Roboam.

Meje yábara poxonae Israel nakua aiña nákuabe náexana

(1 Reyes 12.1-24; 2 Crónicas 10.1—11.4)

Barapoxonae, xua poxonae Salomón tüpa, pexanto tatsi Roboam Siquem tómara beya pona. Baraxotiya Israel pía pemómoxi susato jiwi tatsi nakaetuta xua Roboam pong nakua itorobiya peewatsin peexanaewa tsainchi.

Nékata barapoxonae, Israel pía pemómoxi susato jiwi tatsi pomonae xua pokotsiwa weyabeicha pejinompaewi xua ichaxota “norte”, jei, barapomonae

najumekaruta xua pewabinéxatsi Jeroboam, pong báyatha Salomón kuitaya wárapatsi Egipto nakua beya. Daxota wábatsi xua pinae bara Jeroboam itakúüpatsi xua kaiberena pepatopaewa xua poxoru Salomón báyatha tüpa.

Bara Jeroboam patopa. Bapong tsipaeba, Roboam tsipáebatsi, xua Israel pía pemómoxi susato jiwi tatsi najumekaruta xua jeye:

—Poxonae axa, pong nakua itorobiya peewatsin náexana dukuanaebiya, bapong painta exaneiba xua bichokono dangwéi panakuiteibang bapong nexa. Icha jopa bichokono pana itorobim xua dangwéi pákata nakuítatsi, bara paxang pebüriya paka yábara barü jejéi tsainchi xua bara xam pong xuya nakua itorobiya neewatsiwam tsane, jei Jeroboam xua Israel pemómoxi susato jiwi tatsi najumekaruta.

Bara Roboam jumenota daxita barapomonaetha jeye:

—Abü, bexa baxua yábara paka tsipaebinchi xua akoibi po matakabibetha tsane, jei.

Roboam pona ichaxota pomonae xua báyatha Salomón pía pemuxuweteibiwi tatsi, xua barapomonaetha peyaiñabinexa jeye:

—¿Eta xua exanaein? jei.

Barapomonaetha Roboam jumenótatsi jeye:

—Bara baxua éxande pokoyeneya xua Jeroboam katsipaeba. Icha jopa itorobim xua barapomonaetha bichokono dangwéi kata nakuita, barapomonaetha kaántobe tsane, jei barapomonaetha.

Roboam aichaxaibi pokotsiwa xua tsipáebatsi. Daxota bapong yáíñaba pewowi jíwanamonaetha, po pewowi xua kae weitha nabarü nakatsiwa jeye:

—¿Eta xua exanaein? jei.

Bárapo pewowi Roboam jumenótatsi jeye:

—Itoróbare xua barapomonaetha bichokono dangweya kata nakuita beyakaincha xua axa itoroba barapomonaetha, jei bárapo pewowi.

Pírapae poxonae akoibi po matakábibe yapukaewa, bara Jeroboam irü daxita jiwi pata xua pejumetaenexa pokotsiwa Roboam paebina. Roboam tsipaeba barapomonaetha jeye:

—Bara paka itoróbatsi xua paiña inta nakuitsiwa beyakaincha xua taxa paka itoroba, jei.

Báraxua daxita éxana xua penayábara jumewetsinexa xua báyatha Nakom Jeroboam tsipáebatsi xua poxonae Ahías yaputaeya éxanatsi xua poxonae Jeroboam tsipáebatsi.

2

Pomonae ichaxota weyabeya pejinompaewi xua ichaxota “norte”, jei, poxonae jumetane baxua natsipaeba, jeye:

—Ajumekoyenefaetabichi xua wayawenaponaewa tsane David pía matabüxümonae tatsi, pong nakua itorobiya peewatsin. Wakoutha nata exanaeinchi, pokotsiwa xuaunxuae yábara nantaxéinatsi, jei barapomonaetha.

Néxata daxita piabong beya nawíbiya. Daxota Roboam itorobiya kanamataxeina saya nakuéyatabe po bichéitobe xua Israel pía pemómoxi susato jiwi jíwanamonaetha tatsi. Judá pía pemómoxi susato jiwi tatsi, írürü Benjamín pía pemómoxi susato jiwi tatsi, bárapo bichéitobe Roboam kanamataxeina. Benjamín piamonae ápara tsikimonaeyo xua pomonae Judá pía pemómoxi susato jiwi tatsi pekuariya

petajinompáewichi. Bara kaena barapoxonae weya xua peya nákuíyo xua poxonae kanamataxeina bárapo nakua wüngduta jeye: “Judá nakua”, jei.

3

Daxita ichamonae Israel pía pemómoxi susato jiwi tatsi Roboam jopa ichichi-paetsi xua nakua itorobiya peewatsin penaexanaewa. Kaentakábitha barapomonae tüpa éxana, xua ibówatha kuinbaba, pong Roboam itoroba xua barapomonae dangwéi petanakuitsiwa tsane xua Roboam nexa.

Barapoxonae Jeroboam itapétatsi xua pong nakua itorobiya peewatsin naexanaena. Néxata Roboam kaetukaetuteta pía penawabchüü-exaneibiwi tatsi. Bapong waba pomonae Judá pía pemómoxi susato jiwi tatsi, irü Benjamín pía pemómoxi susato jiwi tatsi xua naba peexanaenexa Israel pía pemómoxi susato jíwitha tatsi xua pomonae xua weyabeya jinompa xua ichaxota “norte”, jei.

Roboam aichaxaibi xua aiña nákuabe. Bapong ichichipa xua Israel nakua bara kae nakua naexanaena ichi poxonae Salomón ichi poxonae kanamataxeina bárapo nakua. Íchitha Nakom itoroba pong pewüng Semaías, pong Nakom pía peitorobi jume pepaebin, xua bapong peponaenexa Roboam beya xua Roboam petsipaebinéxatsi xua jeye:

—Jopa naba exanaeinde Israel pía pemómoxi susato jíwitha tatsi xua pomonae xua weyabeya pejinompaewi xua ichaxota ‘norte’, jei. Poxoru tsipéi Nakom kópata xua Israel nakua aiña nákuabe naexanaena xua Judá nakua yawa Efraín nakua, jei.

Daxota Semaías pona xua Roboam petsipaebinéxatsi pokotsiwa xua Nakom yábara paeba xua aiña nákuabe. Poxonae Roboam jumetane báraxua barapoxonae bapong itoroba pía penawabchüü-exaneibiwi tatsi xua piabong beya penawibiyae-nexa. Bara daxita nawibiya.

**Meje yábara poxonae Jeroboam, pong nakua itorobiya peewatsin,
kanamataxeina pomonae jinompa weyabeicha xua ichaxota “norte”,
jei, xua Israel nákuatha**

(1 Reyes 12.25—14.20)

Barapoxonae xua poxonae Israel nakua aiña nákuabe náexana, Jeroboam kanamataxeina pomonae xua weyabeicha jinompa ichaxota xua “norte”, jei, xua Israel nakua. Bara kaena barapoxonae weya bárapo Israel nakua icha wüng wüngduta jeye: “Efraín nakua”, jei. Jeroboam bapong Efraín pía pemómoxi susato jiwi yajintong tatsi. Bapong éxana Siquem tómara xua yatsikaya pepa tómara xua Efraín nákuatha po nákuatha xua bapong itorobiya kanamataxeina. Siquem tómara eka Efraín pía pemómoxi susato jiwi tatsi pía nákuatha tatsi.

Barapoxonae pirapaeyo, Jeroboam yábara nántabü éxaba xua pía jiwi tatsi ponaena Jerusalén tómara beya, xua Judá nákuatha, xua baraxotiya peexanaenexa ofrendang matawüng Nakom piabotha tatsi, po bo pin bo, xua Nakom nexa. Bapong nantaxeina xua metha barapomonae ekeicha kaewa Roboam peyawaewa tsainchi. Daxota bapong juntukuru éxana icha nakomüng xua Efraín nakuapiwi nexa. Daxota bapong oro nainto matawüng éxana xua vaca pébtobe xua penüng kanaxóbiya éxana. Jeroboam tsipaeba jíwitha jeye:

—Bárapo penain baca pébtobe ápara paiña nakomüngbe. Anoxuae jopa panantawenonaem xua paiña neponaewa tsane Jerusalén tómara beya xua paiña neta-kaponaewa tsane xua be ofrendang matawüng xua Nakom nexa.

Barapoxonae ichüing vaca pebto xua oro nainto matawüing kuaranota Dan tómaratha. Ichüing kuaranota xua ichaxota Betel tómaratha, po tómarata tajü ékiya xua Dan tómarata weya.

Poxonae báraxua éxana, daxota Efraín nakuapiwi wüünae jainta po nakomüing xua jopa xaiñeyo. Matáütano jopa jumekowüntsiya exanaeyo pokotsiwa xua Nakom itoroba pía peitorobi koyenéwatha.

Matáütano Jeroboam sacerdotemonae kana éxana xua daxita karepaya matabüxü jiwi jíwana. Jopa meisha sacerdotemonae kana exanaeyo xua Leví pía pemómoxi susato jiwi jíwana tatsi.

Matáütano Jeroboam paeba jíwitha xua bepa pinae pin fiesta exanaena xua poxonae ocho po xométo be yapujopa xua bárapo weitha xua wüünae pejainchiwanexa bárapo nakomüing xua oro nain matawüing éxana, xua vaca pébtobe kanaxóbiya éxana.

2

Kaentakabi, po matakabi xua kopiya xua fiesta matakabin, Jeroboam pona xua duwéi pejutebinexa xua petatautsinexa be ofrendang xua oro nain nakom nexa, po oro nain nakom kaein jíwana xua bárapo vaca pébtobe kanaxoba éxana. Poxonae Jeroboam baxua exanawiya, pong Nakom pía peitorobi jume pepaebin tatsi, pong xua tajü wérena xua Judá nakua wérena pona, bapong Jeroboam jeichichi:

—¡Nejumenaitáeware xua pokotsiwa bewa katsipaebinchi! Kaein pong xua David pía pemómoxi susato jiwi jíwana tatsi, kaentakábitha patopaena. Bapong daxita sacerdotemonae jutebinchi pomonae xua xote duwéi tauteiba altar matawüingtha xua oro nain nakomüing nexa. Matáütano baxota jiwi piwang tautebinchi. Báraxua xua penayábara jume itapeiñaxeinaenexa xua ápara bara xaiñéi pokotsiwa páebang. Nakom exanaena xua pekayatsinexa tsane xuaje xua altar matawüing xua ánoxuae tsane, jei.

Poxonae Jeroboam báraxua jumetane bapoxonae bapong bichokono anáepana. Bapong najumekaruta xua bapong pewaetabiwa tsainchi pong Nakom pía peitorobi jume pepaebin. Íchitha poxonae Jeroboam nontapona poxonae kowai bapongtha, barapoxonae Jeroboam kobekuenobanáyatsi. Matáütano xua altar matawüing daxita tantánaka xua tsiwixi náexana. Néxata Jeroboam barái pongtha, pong Nakom pía peitorobi jume pepaebin, jeye:

—¡Jumedangweya inta wúükare Nakomtha xua akobexaibin tsane!

Pong Nakom pía peitorobi jume pepaebin jejéi. Bapoxonae bara Jeroboam akobexaibi tsanaya pongxae nakua itorobiya peewatsin. Íchitha barapoxonae, Jeroboam jopa nakuibaraxubiyo xua abe peexanaewa xua báyatha éxana poxonae aena éxana Efraín nákuatha, xuano xua icha abe peéxanae koyenéwangno. Jeroboam áwiya exanapona xua sacerdotemonae kana exanapona, pomonae xua jopa Leví pía pemómoxi susato yajiwiyi tatsi.

3

Pirapaeyo bapoxonae pong pewüing Abías, bapong átene pong Jeroboam pexanto tatsi, pongxae nakua itorobiya peewatsin. Barapong, pong nakua itorobiya peewatsinxae, píowa itoroba xua pesiwaponaenéxatsi Ahías pong Nakom pía peitorobi jume pepaebin. Kaena báyatha bapong Ahías Jeroboam tsipáebatsi xua

pinæ Jeroboam pong nakua itorobiya peewatsin naexanaena. Nama barapoxonæ Ahías bichokono amo tsekæ yawa jopa taeyo xua itatünaxü tsüküna.

Barapowa xua Jeroboam píowa tatsi, poxonæ Ahías siwapoinchi barapowa ichawa najumaxátata xua Ahías jopa peyaitæwa tsane. Íchitha Nakom Ahías baráichichi xua bapowa patopaena. Kaena poxonæ barapowa patopa ichaxota Ahías eka, barapowa baráichichi, Ahías jeye:

—Jopa bewa ichawa najumaxatatsim xua jopa takayaitæwatsi tsainchi. Xang yaputang xua xam Jeroboam píowa tatsim. Diwesi xeinang xua jopa wüünaeyo.

”Taema jiña pebin tsipáebare xua Nakom paeba, xua jeye: ‘Xam pong Efraín nakua itorobiya neéwatsin kaéxanatsi, íchitha jopa exanaem pokotsiwa xua kaitoróbatsi. Bichokono abe éxaname beyakaincha xua ichamonæ báyatha abe éxana pomonæ báyatha katsiwanaya jinompa. Jopa neyábara nantaxeinaem. Deta mai-sha ü oro nain nakomüng wüünae jáintame. Daxota kata werawéraka exanaeinchi jiñamonæ matabüxü. Daxita pebiwi jutebin poxonæ báraxua exanaein’, jei Nakom.

”Báraxua ápara xua Nakom paeba xua jiña pebin tsipáebatsi. Ánoxuæ jiña bo beya ponde. Barichino xua poxonæ patopáename nexanto kata tüpaena. Bapong kopiya tsiwanaya kanamata tüpaena xua Nakom penayábara jumewetsinexa pokotsiwa xua báyatha paeba.

”Pírapæ Nakom ekeicha ichüng exanaena pong Efraín nakua itorobiya peewatsin tsane. Bapong jutebina, Jeroboam piamonæ matabüxü tatsi jutebinchi, pomonæ xua kataunxuæ jinompa. Bexa tsane Nakom abe kana exanaena Efraín pía pemómoxi susato jíwitha tatsi. Barapomonæ itorobinchi icha nakua beya xua tajü beya, xua Nakom itorobina poxoru bichokono abe peexanaewi. Barapomonæ abe exaneiba beya poxonæ Jeroboam kopiya itoroba xua barapomonæ abe peexanaewa, jei Ahías.

Jeroboam píowa tatsi píabo benawiya. Poxonæ patopa pexanto tatúpatsi. Jeroboam veinte po weibe kanamataxeina jiwi Efraín nákuatha. Poxonæ bapong tüpa, pexanto xuya pekoutha pong nakua itorobiya peewatsin tanaexánatsi, pong pewüng Nadab.

**Meje yábara poxonæ itorobiya éwata Efraín nákuatha pong Nadab,
irü kotakaya itorobiya éwata pong Baasa, irü kotakaya itorobiya
éwata pong Ela, irü kotakaya itorobiya éwata pong Zimri,
irü kotakaya itorobiya éwata pong Omri**

(1 Reyes 15.25—16.28)

Nadab itorobiya éwata Efraín nákuatha saya aiña po weibetha. Bapong Nadab jopa exanaeyo pokotsiwa itoróbatsi Nakom, yawa bapong daxita pokotsiwang abe éxana pokotsiwang xua paxa tatsi báyatha éxana.

Barapoxonæ kaena poxonæ Nadab naba éxana filisteomonaetha, pong pewüng Baasa pong pekanamataxeinaeinxæ, Nadab pía penawabchüü-exaneibiwi tatsi, bapong naba éxana xua Nadab naba éxanatsi. Pírapæ Nadab bexotsi xua Baasa namawainta.

2

Baasa xuya pekoutha nakua itorobiya peewatsin náexana. Bapoxonæ Baasa juteba daxita pebiwi, pomonæ Jeroboam pong nakua itorobiya peewatsinxæ, bapong piamonæ tatsi.

Baasa itorobiya éwata Efraín nákuatha veinticuatro po weibetha. Bapong Baasa kana éxana xua Tirsá tómara pepa tómara xua Efraín nákuatha. Bapong bichokono abe éxana ichi Jeroboam piamonae tatsi ichi xua abe éxana. Barichi Baasa jopa exanaeyo pokotsiwa Nakom pía peitorobi koyenewa tatsi itoroba.

Bárapo matakábintha Nakom najumekaruta pongtha pong Nakom pía peitorobi jume pepaebin pong pewüng Jehú pojume xua Baasa nexa, jeye: “Xam kakana éxanatsi pong Efraín nakua itorobiya neéwatsin, íchitha éxaname xua abe ichi Jeroboam ichi xua abe éxana. Daxota tha kopatichi xua ichüng kata abe exanaena xua jiñamonae abe exanaeinchi ichi be pókotsi koyeneya taichim xua Jeroboam piamonae tatsi”, jei Nakom.

3

Poxonae Baasa tüpa pexanto xuya pekoutha tanaexánatsi pong nakua itorobiya peewatsin pong pewüng Ela. Ela itorobiya éwata Efraín nákuatha saya aiña po weibetha.

Pong penawabchüü-exaneibiwi pekanamataxeinaexae, pong pewüng Zimri, xua Ela pía penawabchüü-exaneibiwi tatsi, bapong Ela bexotsi xua Zimri nama-wainta. Bapong Zimri xuya Efraín nakua itorobiya peewatsin náexana. Zimri daxita pebiwi juteba, xua jutébatsi Baasa pía matabüxümonae tatsi. Íchitha Zimri itorobiya éwata Efraín nakua saya kae semánatha. Penawabchüü-exaneibiwi, pomonae Efraín nákuatha jinompa, barapomonae yaputane xua Zimri bapong Ela bexotsi, pongxae pong nakua itorobiya peewatsin.

Barapomonae najüntükoyene weta xua itapétatsi pong pewüng Omri xua jíwana pomonae penawabchüü-exaneibiwi pekanamataxeináewichi.

4

Omri, nakua itorobiya peewatsin náexana. Bara néxata barapomonae pona xua Zimri pewaetabiwa tsainchi. Íchitha bapong Zimri pin pekóichatha itanataba nakua itorobiya peewatsin píabo tatsi, po bo pin bo. Poxoru bapong tütutha eka bárapo pin botha daxota bapong tüpa.

Omri itorobiya éwata Efraín nákuatha saya doce po weibetha. Bapong bichokono abe éxana beyakaincha pomonae kopiya, pomonae Efraín nakua itorobiya éwata. Bapong éxana xua jiwi wüünae jainchina po nakomüng jopa xaiñeyo. Bapong demuxuwa kómota, po demuxuwa pewüng Samaria demuxuwa. Baraxota éxana pepa tómara xua Efraín nakua nexa. Poxonae Omri tüpa, bapong pexanto pekoutha xuya tanaexánatsi, pong nakua itorobiya éwata, pong pewüng Acab.

**Meje yábara poxonae itorobiya éwata Judá nákuatha pong
pewüng Roboam, irü kotakaya itorobiya éwata pong Abías,
irü kotakaya itorobiya éwata pong Asa**

(1 Reyes 14.21—15.24; 2 Crónicas 11.5—16.14)

Roboam, pong Salomón pexanto tatsi, bapong pong kopiya itorobiya éwata Judá nakua xua icha muxunénetha xua Israel nákuatha xua icha pokotsiwa weyabeicha xua ichaxota “sur”, jei.

Pokotsiwa kopiya xua éxana, matha bapong éxana xua pía nakua tatsi bichokono ayapusüü tsane. Baxua éxana xua ichüng jopa ayapubé petaexanaewa

tsane xua poxonae bapong itorobiya ewatapona Judá nakua xua daxota pebara-xubiwa tsane. Barapong daxita tómarangtha bichokono dangwéi yapuwüünae exananoba. Matáütano ekeicha dangwéi exananoba xua pokotsiwang tómarang peyaputoxorota dutsiwa dubiwang. Barapoxonae barapong bárapo pepa tómarangtha bong éxana xua pejebinexa pexaewang yawa xua pejebinexa xua xuangtha penabewang.

Po dapaetha xua poxonae Roboam itorobiya éwata Judá nákuatha daxita sacerdotemonae irü levitamona pata xua Efraín nakua werendena xua Judá nákuatha pejinompaewa tsane. Daxota barapomona pata tsipéi Jeroboam jopa kopatsiyo xua barapomona penakuichiwa Nakom nexa xua Efraín nákuatha. Bapong Jeroboam kaena báyatha itapeta ichamonae xua sacerdotemonae, xua po sacerdotemonae nakuita vaca pébtobe nexa, xua oro nainto matawüingbe éxanabe.

Bara daxita pomona Efraín nakuapiwi pomona ichichipa wüünae jainta Nakom, po Nakom pepa Nakom, barapomonae írürü Judá nákuatha pata. Daxota pata xua duwéi pekaponanexa, xua be ofrendang matawüing Nakom piabotha tatsi, po bo pin bo, xua Jerusalén tómaratha.

Barapomonae írürü yawena xua Judá nakua bichokono peyapusüüwa tsane. Roboam jumekowüntsiya éxana pokotsiwa Nakom itoroba pía peitorobi koyenewangtha xua akoibi po weibetha xua poxonae aena itorobiya éwata Judá nákuatha. Daxota Nakom kana éxana xua Judá nakua bichokono ayapusüü.

2

Íchitha kotakaya, Roboam pong Judá nakua itorobiya peewatsin nakuibaraxuba xua pejumekowüntsiya exanaewa pokotsiwa Nakom pía peitorobi koyenewang tatsi itoroba. Pomona Judá nákuatha pejinompaewi, barapomona pía nakomüing tsiéxana altar matawüing, po nakomüingxae xua jopa xaiñeyo. Matáüta bara bárapo nakomüingtha wüünae jainta.

Bárapo dapaetha pebiwi umena tsíniya ichaxota altar matawüing umena. Bárapo pebiwi tanakuita, bárapo nakomüing tanakuítatsi. Poxonae icha pebiwi kajijinka duwéi xua be ofrendang matawüing, po pebiwi xua umena tsíniya ichaxota umena altar matawüing, kenta éxana po pebiwi xua duwéi kajijinka. Bárapo Judá nakua-piwi, poxonae baxua éxana, barapomona bichokono abe peéxanae koyenein éxana ichi be cananeomona ichi kaena báyatha. Daxota Nakom báyatha bewa pitsina cananeomona, xua bárapo ira weya pita.

Poxonae Roboam cinco po weibe xeina xua itorobiya éwata Judá nakua, bapoxonae pong Egipto nakua itorobiya éwata bapong kaetuta pía penawabchüü-exaneibiwi tatsi, Judá nakuapiwi yótabatsi. Bárapo penawabchüü-exaneibiwi teika daxita tomarangpiwi, po tómarang báyatha Roboam dangweya exananoba. Bari-chino áwatha muxu pepichi exanaeno Jerusalén tómarara.

Néxata Nakom najumekaitoroba pongtha, pong Nakom peitorobi jume paebin, pong pewüing Semaías xua Roboam petsipaebinéxatsi, xua petatsipaebinexatsino pomona peaiñakuí jiwi pomona tanakuítatsi. Semaías jeye:

—Nakom kópata xua paiña nepaka kaitafáetabi jiwi pákata abe éxana tsipéi paxam pana nakuibarapéntame xua paiña nejumekowüntsiya exanaewa pokotsiwa itoroba Nakom pía peitorobi koyenewang tatsi, jei Semaías.

Roboam irü piamonae tatsi pomonae peaiñakuí jiwi bichokono wekoyéi poxonae jejéi xua pinae bara baxua ápara éxana. Pirapaeyo, ekeicha Semaías patopa xua tane. Ekeicha icha diwesi kapatopa xua Nakom paeba xua jeye:

—Nakom báyatha tane xua paxam bara pana kuiyaputáneme xua jopa paexanaem pokotsiwa Nakom paka itoroba. Daxota Nakom jopa kopatsiyo xua pong Egipto nakua itorobiya peewatsin jopa werawéraka exanáe tsane Jerusalén tómarara. Bekein Nakom paka kapanenebiya tsane dáichitha Egipto nakua itorobiya peewatsin pákata ayapubé exanaena. Nakom exanaena xua bewa pákata ponáename pin matoma Egipto nakua itorobiya peewatsintha, jei Semaías.

Bara néxata Egipto nakua itorobiya peewatsin yáwano pía penawabchüü-exaneibiwi tatsi pata Jerusalén tómaratha. Barapomonae daxita kápona pokotsiwang oro nain matawüng xua báyatha bekein Salomón éxana xua Nakom píabo tatsi nexa, po bo pin bo, yawa xua bekein píabo tatsi nexa. Daxota Roboam barapokotsiwang ekeicha éxana xua petanotsixaetsi, íchitha saya bronce nain weya kana éxana.

Poxonae diecisiete po weibe yapukaewa xua Roboam itorobiya éwata Judá nakua barapoxonae Roboam tüpa. Roboam pexanto tatsi pong pewüng Abías ekeicha bapong paxa pekoutha pong nakua itorobiya peewatsin náexana.

3

Poxonae Abías, pong nakua itorobiya peewatsin, naexanapona bekein icha peitorobi koyenein exanapona íchitha jopa jumekowüntsiya exanaponaeyo daxita xua Nakom pía peitorobi koyenewang tatsi. Dáichitha Nakom kópata xua pong nakua itorobiya peewatsin penaexanaewa tsipéi kaena báyatha Nakom peyábara tsipaebixáe baxua xua David yábara tsipáebatsi pongxae xua Abías paxa tatsi pía pamo xua pong kaena báyatha tüpa.

David jumekowünteiba Nakom. Saya meisha bara káetotha xua jopa beta exanaeyo xua poxonae najumekaruta xua Urías pebexubiwa tsainchi, xua pía Urías kaibichi yábüyo xua David pekaibinexa.

Abías pong nakua itorobiya peewatsinxae, bapong naba exaneiba, xua Jero-boam naba exanéibatsi, pong Efraín nakua itorobiya peewatsin. Nakom yawena xua Abías amanáyaba poxonae naba éxana peyábara jumekowüntsixae Nakomtha. Poxonae amanáyaba xua naba, Judá pía pemómoxi susato jiwi tatsi kaiba icha tómarang xua pepa tómarang, po tómarang ena Efraín nákuatha.

Abías tüpa poxonae tres po weibe yapukaewa xua poxonae pong nakua itorobiya peewatsin náexana. Abías pexanto tatsi, pong pewüng Asa, bapong paxa pekoutha xuya pong nakua itorobiya peewatsin náexana.

4

Asa bara xaniwaicha piamonae beta itorobiya éwata. Bapong Asa daxita jumekowüntsiya éxana pokotsiwa Nakom pía peitorobi koyenewang tatsi itoroba. Asa abe éxana xua xuang altar matawüng xua xuang báyatha jiwi tsiéxana pía nakomüng nexa. Bapong Asa itoroba jiwi xua saya meisha wüünae pejainchinexa Nakom, pong pepa Nakom, xuano xua daxita pejumekowüntsiya exanaewa tsane pokotsiwa Nakom itoroba pía peitorobi koyewangtha.

Po weixi kopiya xua poxonae Asa, pong nakua itorobiya peewatsin náexana, Judá nakuapiwi jopa nantawenonaeyo xua nanapona xua naba peexanaewa.

Bárapo wéixitha Asa ayapusüüya exanapona daxita tómarangtha xua Judá nákuatha. Ekeicha beta éxana xua xuang tómarang peyaputoxorota dutsiwa dubiwang. Yáwano bichokono pin bicheito éxanano pomonae pía penawabchüü-exaneibiwi tatsi.

Barapoxonae pírapae pomonae Cus nakuapiwi Judá nakuapiwi tsimaxa-pátatsi xua peyotabiwa tsainchi. Barapomonae xeina kae millon pebiwi xua penawabchüü-exaneibiwi.

Néxata Asa Nakomtha wüüka, xua Judá nakuapiwi tawúükatsi, xua Nakom peyawenaewa tsane bárapo nakuapiwi. Nakom peyawenaexae daxota amanáyaba xua naba éxana. Poxonae kaibe nawibiya xua poxonae naba éxana barapoxonae barapomonae námtotha kaxina pong pewüng Azarías, pong Nakom pía peitorobi jume pepaebin. Barapong jeye barapomonaetha:

—Nakom ichichipa xua bara tsitekaeya daxita paiña nejumekowüntsiya exanaponaewa tsane pokotsiwa xua bapong paka itoroba. Barapoxonae bapong paka yaweneibina xua xaniwaicha paiña neponeibiwa tsane, jei Azarías.

5

Bara Asa werawéraka exanapona xua xuang báyatha jiwi pía nakomüng xua jopa xaiñeyo, po nakomüng barapomonae éxana, pomonae Judá nakuapiwi. Bari-chi bapong Asa pakue kana éxana xua jopa peaiñakuiwayo yáitama báyatha pía Nakom peexanaexae xua jopa xaiñeyo. Bara yawa daxita werawéraka yawa tauta pakue tatsi pía Nakom tatsi.

Poxonae írürü Asa itorobiya éwata Judá nakua, pinmonae Efraín nakua weya wárapa xua pía jinompaetsi Judá nákuatha, tsipéi barapomonae yaputane xua Nakom yawena dukuanaebiya, xua Judá nakuapiwi yawena dubenanaebíyatsi.

Pírapae Baasa pong Efraín nakua itorobiya peewatsin yáwano pomonae pía penawabchüü-exaneibiwi tatsi pata Judá nákuatha xua penabinexa. Néxata Asa nota pekakomokáe parátixi xua xuang bobena Nakom piabotha tatsi, po bo pin bo, múxunano xua pía pekakomokáe parátixi tatsi. Barapoxonae bárapo pekakomokáe parátixi itoroba, pong Siria nakua itorobiya peewatsin nexa, xua Asa peyawenaewa tsainchi. Daxota pong Siria nakua itorobiya peewatsin naba éxana Efraín nákuatha.

Efraín nakuapiwi néxata najúntükui barapenta xua naba peexanaewa Judá nákuatha xua penawabchüü-exaneibiwi pomonae Siria nakuapiwi peararanaexae. Íchitha Nakom, Asa barü anaepánatsi. Nakom Asa tsipáebatsi xua najumekarútsi pongtha, pong Nakom pía peitorobi jume pepaebin, pong pewüng Hanani xua kou Nakom jeye:

—Nakom báyatha paeba jeye: ‘Jame bewa yábara nejumekowüntsípame pokoyene xua xang takayawenáewatsi, ichi báyatha ichin, poxonae Cus nakua pía penawabchüü-exaneibiwi tatsi amanayabapéntame. Íchitha ánoxuae jopa yábara nejumekowüntsim. Xang tang daxita pokotsiwa jiwi éxana yawa yawenang pomonae newüünae jainta. Íchitha mexeya poxoru xang yaputang xua pokotsiwa éxaname xua jopa be nejumekowüntsiwa poxonae wüükame pong Siria nakua itorobiya peewatsin xua nekayawenaewa tsane, daxota kopatsin xua ánoxuae yawa bexa tsane ichamonae naba exanaponaena xamtha’, jei Nakom, jei Hanani xua Nakom tapáebatsi.

Poxonae Asa baxua jumetane bichokono anáepana. Asa itoroba xua Hanani abe pekana exanaewa tsainchi yawa xua jiwi pekübibotha peetsiwa tsainchi. Pírapae barapoxonae Asa átene xua ataxutane. Matáütano jopa Nakomtha wüükaeyo xua peyawenaewa tsainchi.

Poxonae aiña weibe yapukaewa, barapoxonae Asa tüpa xua poxonae cuarenta y uno po weibe xeina xua itorobiya éwata. Asa pexanto tatsi, pong pewüing Josafat, bapong xuya pexanto pekoutha tanaexánatsi pong nakua itorobiya peewatsin.

**Meje yábara poxonae Elías yábara paeba xua ápara abe éxana pong
pewüing Acab, pong Efraín nakua itorobiya peewatsin**

(1 Reyes 16.29—19.21)

Aiña dapaein xua poxonae pewünaeya tsane xua tüpaena pong Judá nakua itorobiya peewatsin, pong pewüing Asa, bapoxonae tüpa pong nakua itorobiya peewatsin, pong pewüing Omri, pong Efraín nakuapin. Omri pexanto tatsi xuya pexanto pekoutha tanaexánatsi pong nakua itorobiya peewatsin, bapong pewüing Acab.

Bapong Acab bichokono abe peexanaein beyakaincha ichamonae pomonae kopiya, pomonae Efraín nakua itorobiya peewatsiwi. Barapong bichokono abe peexanaewa poxonae bapong nakóyoba yábüyo pewüing Jezabel, powa xua icha nakuapiwayo. Barapowa pexantiyo tatsi pong itorobiya éwata Sidón tómara. Daxita jiwi pomonae jinompa Sidón tómaratha wüünae jainteiba Nakom, po Nakom pewüing Baal, po Nakom jopa xaiñeyo.

Jezabel muxupéiñaba, Acab muxupéiñabatsi, xua irü bewa wüünae jainchina po Nakom pewüing Baal. Matáütano Acab muxupéiñabatsi, Jezabel muxupéiñaba, xua pinae bapowa bewa taexanaetsi Baal píabo xua Samaria tómaratha, xua Efraín nakua pía pepa tómara. Matáütano Jezabel itoroba xua petajutebíwatsi daxita pomonae Nakom pía peitorobi jume pepaebiwi, po Nakom xua pepa Nakom.

Pebin, pong pewüing Abdías, bapong kanamataxeina pomonae Acab píabo tatsi petanakuichiwichi. Bapong Abdías seikaya pong Nakom ántobe, po Nakom xua pepa Nakom. Daxota bapong ibowouthang matayabajeba cien po jiwimonaebe, pomonae xua Nakom pía peitorobi jume pepaebiwi yáwano pexaewa takaponeiba.

2

Bárapo dapaetha pópona Efraín nákuatha pong Nakom peitorobi jume pepaebin. Bapong pewüing Elías. Kaentakeitha bapong Elías siwapona, xua Acab siwapoinchi, pong nakua itorobiya peewatsin. Bapong jeye Acabtha:

—Xang ápara pongxaein tanakuitang Nakom, po Nakom pepa Nakom. Ánoxuae yatsikaewa katsipáebatsi jopa kuinaya duneikae tsane Efraín nákuatha beya abü poxonae paebin, jei Elías.

Néxata Elías tsipáebatsi Nakom xua Elías bewa nantsiyatsina ichaxota imoxoyo penato, po penato pewüing Querit. Bara Elías baxua éxana. Poxonae Elías baxota nantsiyata eka, pexaewa takapatathópatsi pepupunaewi be uni. Seikaya irü Acab bapong Elías jéitatsi matowa tsaibi. Íchitha Elías jopa taetsi. Elías abü baxota pópona, beya abü poxonae bárapo penátiyo tsewanaya poxoru ema aibi.

Néxata Nakom Elías tsipáebatsi xua bepa pinae bapong ponaena tómaratha ichaxota imoxoyo Sidón tómara, xuano xua Elías bepa pinae ekaena powa pía pebin pekuenta tüpaewáyotsi piabotha tatsi.

Poxonae Elías patopa bárapo tómaratha, bapong tane xua powa pekuenta tüpaewáyotsi pisheuri notauya isho. Elías wüüka, barapowa wüükatsi, xua tsiwiyo pexaewa pekatsiwa tsainchi. Barapowa powa pekuenta tüpaewáyotsi pisheuri, Elías yábara tsipáebatsi xua pokotsiwang xeina piabotha xua bara saya tsiwiyo harinabeno yawa tsiwiyo penasiwa merayo. Báraxuang saya meisha jüpatsi xua peexaewa pan tsiwixi xua bapowa meisha nexa xuano xua meisha pexanto tatsi nexa.

Íchitha Elías tsipaeba barapówatha xua bepa pinae kopiya matha bapong taexanaeinchi pan. Bapoxonae pinae bapowa itakúüpatsi éxana icha pan xua bapowa nexa írúno xua pexanto tatsi nexa. Matáütano Elías tsipaeba barapówatha xua icha pinae bapowa baxua exanaena, xuaunxuae Elías itoroba, Nakom kana exanaena xua harinabeno yawa penasiwa abü ayapusúü tsane beya abü poxonae ekeicha dunaena.

Bara néxata powa pekuenta tüpaewáyotsi pía pebin, éxana panyo xua Elías nexa. Bara penasiwa mera yawa harinabeno abü taayapusüütsi poxonae po matakábintha xua tsewa bichokono poxoru ema aibi.

Kaentakábitha powa pisheuri pekuenta tüpaewáyotsi pexanto tatsi átene, yawa nameikofúntaba. Néxata Elías wüüka Nakomtha. Wüükano xua Nakom peyawenaewa tsane powa pekuenta tüpaewáyotsi pisheuri, pówaxae xua báyatha Elías beta yawénatsi. Bapoxonae Elías koibodakiba pexuyo yawa koibo ofutaba. Bara pexuyo ekeicha nameikauna.

Poxonae powa pekuenta tüpaewáyotsi pisheuri yaputane xua pexanto tatsi ekeicha asüü, barapowa yaputane xua Elías ápara xaniwaicha pong Nakom pía peitorobi jume pepaebin, po Nakom Elías itoróbatsi xua bapowa peyawenaewa tsainchi.

3

Bara yapu óthopa akoibi po weibe xua jopa dunaeyo. Jainbo nakua bichokono jopa juniyiyo xua daxita Efraín nákuatha. Poxonae írú jainbo nakua tsurukuaerü, Acab jopa wetsiyo xua Elías pejeichíwatsi, xua daxita jüpáyangtha jeita. Néxata Nakom Elías tsipáebatsi xua bepa pinae penaitapeiña xeinaewa tsane Acab peitabaratha tatsi. Matáütano Elías tsipáebatsi xua pepaebiwa tsane xua pinae bara imoxoyo ema dunaena. Poxonae Acab tane, Elías tainchi, Acab jeye:

—¡Káyana patópame! Xam éxaname xua daxota bichokono pinmonae jopa xapain exanaeyo xua pata nákuatha, jei.

Íchitha Elías jumenota jeye:

—Ápara xang dapong aibi pongxaein xua jopa xapain pejinompaewa exanaeiño jíña nakuapiwi. Ápara jame xam poxoru jopa exanaem pokotsiwa itoroba Nakom pía peitorobi koyeneintha, yawa poxoru wüünae jáintame po Nakom pewüing Baal, po Nakom jopa xaiñeyo. Bexa yaputaeinchi jintam metha yatsikaya pepa Nakom. Daxita jiwi tsipáebare xua peponaewa tsane demuxúwatha, po demuxuwa pewüing Carmelo, yawa kaponde daxita pomonae Baal pía peitorobi jume pepaebiwi tatsi, jei Elías.

4

Bara daxota Acab kaetuta jiwi, yawa kápona daxita pomonae Baal pía peitorobi jume pepaebiwi Carmelo demuxúwatha. Poxonae daxita nakaetuta, Elías tsipaeba barapomonaetha jeye:

—Ánoxuae yábara najüntükoyene yapuwetinchi xua eta po Nakom metha wüünae jaintinchi. Icha ta Nakom, po Nakom pepa Nakom, moya bara wüünae pajainde. Ichikuitha icha Baal ápara po Nakom pepa Nakom, néxata moya bara wüünae pajainde, jei.

Íchitha dapong aibi pong xua Elías jumenótatsi. Ekeicha Elías tsipaeba jeye:

—Xang bapong kompong pongxaein tapaebin Nakom pía peitorobi jume tatsi, po Nakom pepa Nakom. Daxita ichamonae newepu jutébatsi. Ánoxuae xote nakae-tuta cuatrocientos cincuenta pomonaebe, pomonaepaebiwi Baal pía peitorobi jume tatsi, po Nakom jopa xaiñeyo.

”Ánoxuae yábara yaputaeinchi po Nakom xua pong xaniwaicha pepa Nakom. Ánoxuae pana nekare vaca pébtobe. Bara barapomonaepa Baal piamonae tatsi exanaena xua altar matawüing írürü xang exanaein tawa. Barapoxonaepa barapomonaepa bárapo vaca pébtobe pajíwana bexore. Ichüing xang tha bexuichi. Barapoxonaepa bárapo vaca pébtobe botinchi altar matatsuntha xuano xua isho matatsún úngkuatha. Íchitha áwiya jopa matawetautsi tsainchi.

”Néxata barapoxonaepa ta Nakom wabín irü paña Nakom pawábare. Po Nakom jame xua itaboko wétsika itoroba ishoto xua petautsinexa ichüing vaca pebto, barapong ápara jame yatsikaya pong pepa Nakom, jei.

Daxita jiwi nantanaxeina xua bara baxua itakuiwüünaetsi. Daxota daxita barapomonaepa Elías jumenótatsi yawa jumedangweya wawái jeye:

—¡Maisha báraxua exanaeinchi! jei.

Elías kópata xua bara Baal pía peitorobi jume petapaebiwichi bara itapeta vaca pebto pong ichichipa. Barapomonaepa nakuixaxainta kaena kaemúmbotha. Barapoxonaepa barapomonaepa wabompa pía Nakom Baal kaena poxonaepa kaemúmbotha beya yamatéiñaxae. Íchitha barapomonaepa ichawa jopa taeyo. Matáeiñaxae Elías tamrópata pítaba xua kuikápona barapomonaepa, jeye:

—Bewa ekeicha bichokono pawawam. Ápara metha Baal ichawa nantanaxei-nekiya, ichikuitha metha ápara énatsi, ichikuitha metha ápara tajü wárapa, ichikuitha metha ápara maiteka, jei Elías.

Daxota barapomonaepa, pomonaepa Baal pía peitorobi jume petapaebiwichi bichokono ekeicha jumedangweya wawái. Bapoxonaepa barapomonaepa piakoya naperüü thaba kusintha, yawa dejónangtha naperüü thaba xua Baal pekoicha peitorobi-kaewa tsane. Bara bekein barapomonaepa baraxota kaena kaemúmbotha wawái chompae xua beya yamatéiñaxae, be pomonaepa pematsiyaibi jiwi wawái chompae, barapomonaepa jopa taeyo xua pejumenotsíwatsi.

5

Néxata Elías éxana altar matawüing Nakom nexa, po Nakom pepa Nakom. Bara daxita kanakuí wüünaetajeba. Yáwano altar matawüing matawakaicha pekuariya namto éxana. Barapoxonaepa matowa matawé epababa mérangtha. Daxota bichokono mene wüingka baraxota xua ichaxota xua matawakaicha namto éxana xua daxota isho susuna, altar matawüing susúnano, vaca pebto susúnano. Kiripitha pókotsi hóratha poxonaepa ba jiwi duwéi juteba xua ofrenda matawüing peexanaenexa Nakom nexa, barapoxonaepa Elías jumedangweya wüüka Nakom, jeye:

—Nakom, éxande po matakeithe xua daxita jiwi xua Efraín nakuapiwi taena xua xam pepa Nakomüm xuano xua xang jiña nekatanakuitinchi, jei Elías.

Barapoxonae Nakom itaboko weitorobika ishoto xua daxita duwein omeicha taxua éxana. Yáwano taxua éxana isho, yáwano altar matawüing taxua éxana, yáwano taxua éxana mera po mera xua námtotha eka xua báyatha mene jujuinka. Poxonae jiwi tane báraxua, barapoxonae barapomonae wawái jeye:

—Nakom, po Nakom Elías wüünae jainta, barapong ápara yatsikaya kou xaniwaicha pepa Nakom, jei barapomonae.

Néxata Elías jeye:

—¡Daxita patéikare pomonae Baal pía peitorobi jume petapaebiwichi! ¡Jopa düküpaé tsane xua matáütano kaein jopa panepáé tsane! jei.

Bara jiwi teika barapomonae, kaena bárapo matakeitha Elías juteba barapomonae.

Barapoxonae, Elías tsipaeba, Acab tsipáebatsi jeye:

—Naiña ponde jiña bo beya tsipéi icha jopa ponaem tsane, ema kaatsanáetsipa, jei Elías.

6

Poxonae Elías baxua paeba, jopa tsakinaebowa dubenaeyo itabókotha, matáütano xua kae tsakinaebowa. Daxota Acab píabo beya pona yawa bárapo matakeitha bichokono pin ema duna. Poxonae Acab piabotha patopa, báraxua píowa yábara tsipaeba, powa pewüing Jezabel jeye:

—Elías juteba daxita pomonae Baal peitorobi jume pía petapaebiwichi, jei.

Néxata barapowa Jezabel bichokono anáepana. Yawa barapowa najumekaruta xua Elías petsipaebiwa tsainchi, jeye:

—Aunxuae kabexuichi. Icha ánoxuae jopa kabexuichi methaunxuae baya tsane, jei xua barapowa najumekaruta.

Poxonae Elías baxua jümetane, barapoxonae pejunuwixae naetsíriwa pokotsiwa párowa béreka, xua ichaxota “sur”, jei, xua Judá nakua iya pona. Ekeicha dabe-reka párowa béreka pona xua ichaxota “sur”, jei, xua beya patopa demuxúwatha po demuxuwa pewüing Sinaí. Baraxotiya Elías taeba ibowóu. Bárapo ibowoutha joniya xua pemaitungkuaewa tsane baxota. Néxata Nakom Elías yáíñabatsi, jeichichi:

—¿Eta pokotsiwa metha naetsiríwame? jeichichi.

Elías jumenota jeye:

—Xang bara kom pang pongxaein jíwanang pomonae xua wüünae nekajaintebiwa. Nejeita xua tana nebexubiwa tsane, jei Elías.

Nakom, Elías tsipáebatsi, jeichichi:

—Siete mil pomonaebe jinompa Efraín nákuatha pomonae xua báyatha jopa Baal wüünae jainchichi. Ánoxuae kaibe nawíyama ichaxota pokotsiwa weyabeicha xua ichaxota ‘norte’, jei, yawa tsipáebare pong pewüing Eliseo xua bapong írürü pong taitorobi jume pepaebin tsane poxonae tüpáename, jei Nakom.

Poxonae Elías kaxina xua Eliseo kaxínatsi, Eliseo peutukuratha tabótatsi paparuwa. Barapoxonae pírapae Eliseo Elías punapopoinchi xua penakuidubinexa xua penaexanaenexa pong Elías pía peyawenaeinchi tatsi.

Meje yábara poxonae Acab, pong nakua itorobiya peewatsin, abe éxana, xua poxonae Elías tsipaeba xua Nakom abe kana exanaena bapongtha

(1 Reyes 20—21)

Poxonae Acab itorobiya éwata Efraín nakua, barapoxonae írürü pong itorobiya peewatsin Siria nakua pong pewüng Ben-adad, bapong naba éxana Samaria toma-rapíwitha xua pepa tómara xua Efraín nákuatha. Néxata Nakom itoroba pong pía peitorobi jume pepaebin xua Acab petsipaebiwa tsainchi xua jeye:

—Báyatha Nakom paeba jeye: ‘Tha yawenaetsi penawabchüü-exaneibiwi, pomona Efraín nakuapiwi, xua peamanayabiwa tsane xua poxonae penabiwa xua paiña neyaputaewa tsane xua xang ápara Nakomüng, pongxaein pepa Nakomüng’, jei Nakom, jei pong Nakom pía peitorobi jume pepaebin.

Be pókotsi koyeneya paeba pong Nakom pía peitorobi jume pepaebin, bara Efraín nakuapiwi amanáyaba xua penabiwa. Íchitha Siria nakua pía penawabchüü-exaneibiwi tatsi ekeicha naba éxana Efraín nakuapíwitha. Néxata kaibe náwiya pong Nakom pía peitorobi jume pepaebin, yawa Acab tsipáebatsi, jeye:

—Nakom báyatha paeba jeye: ‘Tha ekeicha exanaetsi xua penawabchüü-exaneibiwi xua Efraín nakuapiwi yotabina xua Siria nakuapiwi yotabinchi’, jei bapong.

Bara éxana báraxua. Efraín nakuapiwi ekeicha amanáyaba xua penabiwa. Íchitha Ben-adad, pong Siria nakua itorobiya peewatsin, jumedangweya wüüka, Acab wüükatsi, jeye:

—Jopa nebexubinde, jei.

Acab jumejéi, yawa barapoxonae éxana xua saya nayábara tsiwüünae muxudútabe xua saya maisha penayawenaewa tsánebe. Acab bara kópata xua bara saya peponaewa tsane bapong. Néxata Nakom Acab yábara anaepánatsi poxoru jopa bexubichi Ben-adad. Yawa Nakom, Acab taitoróbatsi pong Nakom pía peitorobi jume pepaebin xua pejeinéxatsi:

—Nakom báyatha paeba jeye: ‘Yáitama xam jopa bexubim Ben-adad pongxae, pong Siria nakua itorobiya peewatsin, daxota xam bewa tüpáename xua baxua neexanaexae’, jei Nakom xua Acab tsipáebatsi.

Poxonae Acab báraxua jumetane, bichokono anáepana yawa píabo beya pona.

2

Imoxoyo ichaxota bo, po bo pin bo, xua po bo Acab xeina pepa tómaratha xua Jezreel tómara, baxota xeina ira xua ichüng pía ira tatsi, pong pewüng Nabot, bapong pía ira tatsi. Bárapo ira Nabot pía matabüxüyomona e pía ira tatsi xua kaena poxonae báyatha poxonae Canaán nakua ira nata epaúkuta éxana pomona doce pomona matabüxúyobe nexa xua Israel pía pemómoxi susato jiwi tatsi xua poxonae pópona pong pewüng Josué.

Acab pong nakua itorobiya peewatsin bapong ichichipa xua Nabot pekomsíwatsi bárapo ira xua pexaewa peübinexa. Acab, Nabot jumejárabatsi xua pekomsínéxatsi pekakomokáe paratixitha, ichikuitha xua metha icha ira pekatsiwa tsainchi xua pexeña ira, xua po ira eka icha íratha. Íchitha Nabot aichaxaibi xua pekanaetsiwa. Acab anáepana bichokono.

Daxota poxonae bapong piabotha patopa aichaxaibi xua penabanaewa. Poxonae bapong píowa kuitainchi xua bichokono anáepana, barapoxonae píowa yáíñabatsi, powa Jezabel, jeye:

—¿Eta pokotsiwa metha anáepaname? jei.

Acab píowa jumenota jeye:

—Nabot asiwa ira, jei.

Néxata barapowa pía pebin yábara kanantanaxeina éxana jeye:

—Xam ápara pong nakua itorobiya neéwatsin xua ápara kaitaküüpa xua neexanaewa pokotsiwa xua poxonae ichichípame xua éxaname. Yábara katsiwüünae muxudútatsi tha xéinatsi ira xua amanaya takakatsinéxatsi poxonae xeinang, jei barapowa.

Daxota barapowa cartang tatina pebiwi, po pebiwi peaiñakuí jiwi, po pebiwi xua Jezreel tomarapiwi. Barapowa wüüka bárapo pebíwitha xua petajeichinéxatsi ayunbe pebinbe xua peakuibeinbe, xua Nabot naerabiya petsipaebinéxatsi xua pinae Nabot abe yábara paeba Nakomtha yawa xua pinae abe yábara paeba pongtha pong nakua itorobiya peewatsin. Pokotsiwa xua bapowa ichichipa, ápara xua náemata báraxua peexanaenexa xua baraxota Nabot penatsi aenaekuentzinexa xuano xua tüpa peexanaenéxatsi ibówangtha.

Israel pía pemómoxi susato jiwi tatsi piákuí xeina, xua pía peitorobi koyenewang tatsi, xua pinae poxonae nakuéyatabe pongbe yábara paeba ichüng, xua pinae bapong abe peexanaewa, xua bapoxonae xaniwaicha tüpa pekana exanaewa tsainchi pong abe peexanaexae.

Barapoxonae Jezabel sello dutaba cártangtha, po sello xua Acab piyawang tatsi xua pong nakua itorobiya peewatsinxae. Bara bapoxonae bapowa itoroba bárapo cartang. Bara barapomonae éxana pokotsiwa barapowa itoroba. Bara bapoxonae Nabot bexotsi. Jezabel báraxua yábara tsipáebatsi. Barapowa Acab tsipáebatsi xua pinae báyatha tüpa Nabot, xua bara Acab itaküüpatsi xua ira pexeinaewa tsane, xua po ira báyatha bapong ichichipa. Bara báyatha bapong xeina ira.

3

Néxata Nakom Elías itoróbatsi xua Acab pejeiwa tsainchi:

—Nakom kata itoroba diwesi xua meje pojume: ‘Xam tüpáename. Aurimonaе kajanadaebina xua po jana íratha janabobéname, ichi be pókotsi koyeneya ichi xua Nabot janadáebatsi. Yapultang xua bichokono neakuibem, daxota jiñamatabüxümonaeyo werawéraka kana exanaein ichi be pókotsi koyeneya báyatha werawéraka kana éxanang Jeroboam piamonaе matabüxü tatsi, irü xua pong Baasa piamonaе matabüxü tatsi’, jei Nakom, jei Elías xua Acab tsipáebatsi.

Poxonae Acab báraxua yábara jumetane xua pokotsiwa bapong báyatha abe éxana, bapong wekoyéi. Néxata ekeicha Nakom itoroba Elías xua Acab petatsipaebiwa tsainchi jeye:

—Nakom jeye meje: ‘Paiñamonae matabüxü tatsi jopa abe taexanaewa tsane poxonae xua abü kataunxuae asüü póponame. Jame baxua exanaein poxonae nexanto pong Efraín nakua itorobiya peewatsin naexanaena’, jei Nakom, jei Elías xua Nakom tsipáebatsi.

**Meje yábara poxonae pong pewüing Josafat
itorobiya éwata Judá nakua**

(1 Reyes 22.41-50; 2 Crónicas 17.1—21.1a)

Poxonae Acab itorobiya éwata Efraín nakua, Josafat pong Asa pexanto tatsi írürü itorobiya éwata Judá nakua. Josafat bichokono wüünaeya nakua itorobiya éwata poxonae po wei aena kopiya. Bapong jumekowüntsiya éxana pokotsiwa itoroba Nakom pía peitorobi koyenewang tatsi. Yawa bapong ichichipa xua pekuidubiwa tsainchi, xua Nakom pekuidubiwa tsane, pokotsiwa bewa exanaena bapong. Matáütano bapong pinmonae éxana, pomonae pía penawabchüü-exaneibiwi tatsi. Matáütano éxana xua tómarang peyaputoxorota dutsiwa dubiwang xua pepa tómarang xua Judá nákuatha.

Nakom tsita wüünaetsi pokotsiwa Josafat éxana. Yawa Nakom kana éxana xua Josafat kopeixeinaein bichokono, yawa pong jiwi peyaputaeinchi wüünae peexanaexae, yawa peayapusüü itorobi koyenein pexeinaeinxae.

Josafat, pong nakua itorobiya peewatsin, ichawang jíwana werawéraka kana éxana xua xuang altar matawüing xua ichaxota jiwi nakomüing wüünae jainteibathopa, po nakomüing xua jopa xaiñeyo. Matáütano daxita juteba pebiwi, po pebiwi xua ewateiba altar matawüing xua kenta peexaneibiwa tsane icha pebintha, po pebiwi xua pata xua wüünae pejaintsiwa altar matawüing.

Matáütano bapong itoroba pomonae pía peaiñakuí jiwi tatsi, múxuna levitamonae yawa sacerdotemonae ichaxota po tómarara beya xua Judá nakua beya xua barapomonae pekuidubinexa jíwitha xua Nakom pía peitorobi koyenewang tatsi. Barapomonae kápona ichawa xua pokotsiwa be papera xua pionababapona xua ichaxota tinaduba Nakom pía peitorobi koyenewang tatsi.

2

Íchitha bexa poxonae Josafat bichokono kopeixeinaein náexana yawa bichokono pong jiwi peyaputaeinchi náexana xua wüünae peexanaexae, bapoxonae bapong éxana xua jopa wüünaeyo. Bapong Josafat piamonae matabüxüyo kana éxana pongtha pong Efraín nakua itorobiya peewatsin. Bapong baxua éxana poxonae pexanto tatsi, pong matapin pong pewüing Joram, bapong nakóyoba powa pewüing Atalía, powa Jezabel pexantiyo tatsi, xuano xua Acab pexantiyo tatsi, pongxae pong itorobiya éwata Efraín nakua. Daxota Judá nakuapiwi yawa Efraín nakuapiwi kaemonae náexana xua penayawenaewa tsánebe.

Icha dapaetha xua pírapae, Josafat pona Samaria tómarara beya, xua pepa tómarara xua Efraín nakua, xua pesiwaponae néxatsi Acab. Acab tsipaeba xua bepa pinae nabarü yotabibe Siria nakuapiwi xua kaewa pekapanepaenexa Ramot tómarara, xua po tómarara Galaad nákuatha eka.

Josafat bara yábara nantanaxeinaeya jejéi xua báraxua bara peexanaewa tsane. Íchitha Josafat tsipaeba xua pinae matha báraxua yábara peyaiñabiwa tsane Nakomtha. Néxata Acab kaetuta cuatrocientos pomonae matabüxübe, pomonae Nakom pía peitorobi jume pepaebiwi. Daxita paeba xua Nakom yawenaena Efraín nakuapiwi yawa Judá nakuapiwi xua peamanayabiwa tsane xua penabiwa. Íchitha barapomonae xaniwaicha dapomonae aibi xua Nakom pía peitorobi jume pepaebiwi. Daxota Josafat yáiñaba jeye:

—¿Ichüing xéiname pong yatsikaewa Nakom pía peitorobi jume pepaebin? jei.
Acab jumenota jeye:

—Aja, ánoxuae pópona ichüing bapong pewüing Micaías, íchitha ita-aenaenang tsipéi bápana jopa beta netsipaebi. Saya diwesin netsipaebeiba, po diwesin abe, jei Acab.

Dapo jumetha áwiya Josafat ichichipa yábara jumetane xua Micaías yábara pepaebiwa tsane xua penabewa. Bara Acab itoroba xua Micaías pewabiwa tsainchi. Bara baxua éxana. Micaías patopa yawa jeye:

—Josafat, jopa paamanayabim tsane xua naba paiña neexanaewa tsane. Nakom kópata xua bara naerabiya paka tsipaeba pomonae Nakom pía peitorobi jume pepaebiwi tatsi, xua Acab petüpaewa tsane xua poxonae naba exanaena, jei Micaías.

3

Íchitha dapo jumetha Acab irü Josafat pona xua naba peexanaewa tsane Siria nakuapíwitha pomonae xua jinompa Ramot tómaratha, xua pepa tómara, xua po tómara Galaad nákuatha eka. Íchitha Acab ichüing náexana poxonae ichawa namaxátata xua jopa peyaitaewa tsainchi xua bara be pong ichüing xua penawabchüü-exaneibiwi jíwanapin.

Pong Siria nakua itorobiya peewatsin ichichipa xua Acab pebexubíwatsi. Bapong pía pekueyabiwichi baraina, Josafat baráinatsi. Bapong Josafat namaxátata pókotsi paparuwang ba namaxátaba pomonae nakua itorobiya peewatsiwi. Íchitha poxonae barapomonae imoxoyo kakuita umenarúküpa, tane xua ápara Acab aibi. Néxata barapenta xua pebaraináewatsi Josafat.

Poxonae naba éxana, penawabchüü-exaneibiwi pong xua Siria nakuapin pépobo punuxuba xua saya itatema punuxubiya. Bara pepobotha Acab upaxotsi xua ichaxoyo iya xua seseikawadukua xua penainto. Acab tüpa bárapo matakeitha xua poxonae tabópiya. Petüpaein kapoinchi Samaria tómara beya. Baraxota petüpaein müthüthü xotsi. Barapomonae ikika karonaxi xua po naexi penabenaexi. Yáwano pejana íratha othopeika yawa auri janadáebatsi.

Bara bapoxonae nayábara jumeweta xua pokotsiwa paeba Nakom pía peitorobi jume pepaebin, xua báyatha Nakom Acab tsipáebatsi, poxonae Elías saya tapaeba pongxae pong Nakom pía peitorobi jume pepaebin. Poxonae Acab tüpa, matha bapong itorobiya éwata Efraín nakua veintidós po weibetha. Pexanto pekoutha ekeicha tanaexánatsi pong nakua itorobiya peewatsin. Bapong pewüing Ocozías. Bapong Ocozías pong bichokono peakuibein ichi paxa tatsi ichi.

4

Bapoxonae, poxonae Josafat kaibeya píabo beya pona Jerusalén tómara beya, pong pewüing Jehú, pong Nakom pía peitorobi jume pepaebin, bapong Josafat kaxínatsi. Josafat jeichichi:

—Nakom jopa tsita wüünaetsi xua báyatha Acab jopa bewa yawenaem, tsipéi bárapo pebin bichokono peakuibein. Íchitha bapong tsita wüünaetsi xua xam báyatha werawéraka kana éxaname xua xuang altar matawüing xua xuang po nakomüing nexa, xua jopa xaiñeyo. Yáwano tsita wüünaetsi poxonae báraxua yábara yaiñabeibíname Nakom pokotsiwa bewa exaneibíname, jei Jehú.

Bara barichi Josafat jüntükuikoyene tsakabapona jiwi. Bapong jeye:

—Meisha saya wüünae pajainde Nakom, pong xaniwaicha pepa Nakom. Bapong waámo susato jiwi kapanépatzi Egipto nakua weya. Matáütano barapong Canaán nakua naka kata, jei.

Matáütano Josafat itapeta pomonae juezmanae yawa jeye barapomonaetha:

—Beta itorobiya pakana mataxéinare. Yáwano jiwi jopa pakobewenotéibinde pekakomokáe parátixi xua poxonae jiwi paiña nepaka katsibeibiwa xua pía paiña nenaerabeibiwa tsane barapomonae nexa, jei.

5

Pírapae barapoxonae, moabitamonae irü amonitamonaе yawa ichamonae, barapomonaе pata Judá nákuatha xua naba peexanaewa tsane. Poxonae Josafat jumetane, itoroba daxita jiwi, Judá nakuapiwi xua penajainbotsinexa. Matáütano kaetuta daxita jiwi Nakom piabotha tatsi, po bo pin bo, yawa baraxota wüüka Nakomtha. Bapong jeye:

—Xam neayapusüüwa nexeiaen pong Tananekanamataxeinaen. Bárapo ire pana nekátame tsipéi Abraham pía pemómoxi susato jiwi tatsi pang, pong jiña jintong. Ichamonae pomonae pata tamo susato jiwi ákaba jiña bo xua pata tana neitaküüpaewa xua xote pata kawükeibiwa tsainchi yawa pata takawükeibinexa xua pata tana neyawenebiwam xua poxonae paxeineibang xua jopa wüünaeyo.

”Poxonae pata amo susato jiwi pata po írathe xam jopa kopatsim xua barapomonaе pepichiwa amonitamonaе pía ira tatsi, xua irü moabitamonae pía ira tatsi, ichikuitha xua edomitamonae pía ira tatsi. Ánoxuae taema xua pokoyene pata tana nematomatsiwa. Jopa payaputaеiño xua eta xua paexanaen, tsipéi barapomonaе bichokono pedangwéi jiwi beyakaincha paxang. Daxota paka wüükatsi xua pata tana neyawenaewam tsane, jei Josafat xua wüüka Nakomtha.

Néxata Nakom najumekaitoroba jiwi nexa, pomonae xua Judá nakuapiwi, xua poxonae najumekaruta levitamonae pintha pong pewüng Jahaziel. Bapong jeye:

—Jopa pajunuwinde, tsipéi Nakom naba exanaena paxam nexa xua poxonae naba paiña neexanaewa tsane. Paponde baya xua paiña nekaxibinexa barapomonaе yawa patáename xua pokoyene Nakom paka kapanepaena pomonae paiña nepaka kaitafáetabi jiwi weya, jei Jahaziel Nakom nexa.

Néxata daxita jiwi pentabokotongtha umena xua petsipaebinexa Nakomtha, jeye:

—Jako Nakom xua jiña pata tana neyawenaewam tsane, jei.

Barapoxonae levitamonae wüünae jainta, Nakom wüünae jáintatsi. Baya penawabchüü-exaneibiwi pomonae xua Judá nakuapiwi ponarüküpa xua pekaxibiwa tsane pía peaitafaetabí jíwichi. Josafat pong nakua itorobiya peewatsin itoroba xua ichamonae pebiwi petanaxünaenexa Nakom. Yawa itoróbano xua wüünae pejainchinexa Nakomtha xua kopiya matakápona ichamonae xua penawabchüü-exaneibiwi.

Nakom éxana xua amonitamonaе, yawa moabitamonae, írürü pomonae xua barapomonaе barü poinchi jume itaxanaena xua poxonae jumetaena xua Judá nakuapiwi naxünajijinkaena. Daxota barapomonaе tamrópata notarüküpa xua kaemonae naba.

Barapoxonae Judá nakua pía penawabchüü-exaneibiwi tatsi pata yawa tane pía peaitafaetabí jíwichi xua wérapa yawa xua íratha bobenapoiña. Barapomonaе

daxita nota xua xuang kápona pomonae pía peaitafaetabí jíwichi. Bapoxonae piabong benawibiya. Barapomonae, tsipaeba Nakomtha, jeye:

—Jako Nakom xua paamanáyabang pata tana neaitafáetabi jiwi jiña pata tana neyawenaexaemxae, jei barapomonae.

6

Pírapae xua poxonae Josafat itorobiya éwata Judá nakua, ekeicha kaewa kaemonae nabarü éxana pongtha, pong Efraín nakua itorobiya peewatsin. Bapong, irü pong Efraín nakua itorobiya peewatsin pong pewüng Ocozías, bapongbe itoróbabe xua pin jerang peexanaewa xua pekanaeta dubenanaebiyaenexa kopei.

Íchitha Nakom jopa tsita wüünaetsi xua Josafat peyawenaewa pongtha, pong nakua itorobiya peewatsin, pong xua peakuibein. Daxota Nakom itoroba, Eliezer itoróbatsi, pong Nakom pía peitorobi jume pepaebin, xua bapong petsipaebinexa xua pejeinexa:

—Nakom abe kana exanaena xua pin jerang pefobabiwa tsane xuano xua pebubabiwa tsane, jei Eliezer.

Icha be pókotsi koyeneya paeba, pong Nakom pía peitorobi jume pepaebin, bara pin jerang fobaba yawa bubaba.

Meje yábara poxonae Acab pía pexui tatsi itorobiya éwata Efraín nakua, poxonae irü Eliseo Elías pekoutha tatsi tanaexánatsi, pong Nakom peitorobi jume pepaebin

(1 Reyes 22.51-53; 2 Reyes 1—3)

Poxonae Josafat itorobiya éwata Judá nakua, Ocozías pong Acab pexanto tatsi, bapong irü Efraín nakua itorobiya éwata. Kaentakábitha Ocozías jopeika xua tajü wejopeika, yawa átene náexana. Barapong ichichipa yaputane xua icha metha axaibi tsane. Daxota bapong ichamonae jíwana itoroba pomonae xua pía petanakuichiwichi tatsi xua peyaiñabinexa nakomtha, po Nakom jopa xaiñeyo xua ichamonae pía Nakom tatsi, pomonae jinompa kae tómaratha xua filisteomonae pía tómarang jíwana tatsi.

Nakom baxua aichaxaibi daxota Elías itoróbatsi xua Ocozías petsipaebiwa tsainchi. Nakom, Elías tsipáebatsi pong Nakom pía peitorobi jume pepaebin, jeichichi:

—Taema, ponde xua nekaxibinexa pomonae Ocozías pía petanakuichiwichi, pong nakua itorobiya peewatsin. Bapomonae tsipáebare xua ápara xang pongxaein bewa itapeta newüükeibina. Matáütano tsipáebare barapomonae bü kaibeya pona. Tsipaebareno xua Ocozías methaunxae tüpaena, jei Nakom xua Elías tsipáebatsi.

Elías bara pona xua pomonae Ocozías petanakuichiwichi petsipaebinéxatsi pokotsiwa xua Nakom itoroba. Pomonae xua Ocozías pía petanakuichiwichi kaibe nawibiya, yawa bara Ocozías yábara tsipáebatsi xua pinae Ocozías petüpaewa tsane. Íchitha barapomonae jopa yábara yaputaeyo xua baxua ápara Elías paeba xua barapomonae tsipáebatsi. Íchitha Ocozías yaputane xua ápara Elías baxua paeba xua barapomonae tsipáebatsi.

Néxata Ocozías pía penawabchüü-exaneibiwi kui-itoroba xua Elías pewaeta-biwa tsainchi xuano xua pekarendenaenexa tsainchi. Íchitha Elías jeye: “Itaboko weothopeikaena xua be isho ítare yawa paka tautsina xua jiwi petsita-itapeiñaxei-naewa tsainchi xua ápara tsipaebang Nakom nexa”, jei Elías. Bara barichi, isho

ítare itaboko weothopeika, yawa Nakom tauta éxana daxita barapomonaе xua daxota wérapa.

Ocozías ekeicha ichamonaе itoroba penawabchüü-exaneibiwi xua Elías peka-renderaenéxatsi. Barichi daxita barapomonaе taxotsi xua daxota wérapa. Ekeicha Ocozías icha penawabchüü-exaneibiwi itoroba xua akoibi pokuiyobetha. Poxonaе pata ichaxota Elías pópona, penawabchüü-exaneibiwi éwata tajü bérena xua saya pentakaponaеin pona. Barapong pona xua Elías kompa petsipaеbiwa tsainchi. Bapong Elías peitabaratha pentabokototha táungkuatsi yawa jumedangweya paeba jeye:

—Elías, jumedangweya kabaraichi xua jopa pana jutebinde, jei.

Néxata Nakom Elías tsipáebatsi jeichichi:

—Barapomonaе punayande, jeichichi.

Ekeicha Ocozías pong nakua itorobiya peewatsin tsipáebatsi, Elías tsipaeba jeye:

—Ocozías, tüpáename tsipéi itoróbame ichamonaе xua jiña yábara nekata yaiñabinexa nakomüngtha, po nakomüng xua xaniwaicha aibi. Baxua éxaname xua jiña yaputaetsi xua icha metha axaibim tsane, Ichikuitha xua metha icha jopa axaibim tsane, jei Elías.

Icha be pókotsi koyeneya Elías yábara paeba, xua Ocozías yábara páebatsi, bara Ocozías tüpa. Saya meisha báyatha aiña weibe itorobiya éwata nakua. Barapong jopa xeinaeyo pexui. Daxota bapong peweicho pekoutha tanaexánatsi pong nakua itorobiya peewatsin pong pewüng Joram.

2

Pirapaeyo Nakom ichichipa xua Elías pepichíwatsi peitaboko beicha xua pin katsawauri yakatsawauri káichatsi. Bapoxónaerü Eliseo Elías punapopoinchi. Bapongbe aiña tómarangtha siwaponéibabe. Poxonaе patópabe Jordán ménetha, Elías pía paparuwa yarabaxuba xua po paparuwa penaуapatsiwa. Barapoxonaе bárapo paparúwatha Elías barü dakiba mera. Mera petusato naexananaya, xua tsewa náexana. Barapoxonaе barapongbe mene pebishato íyabe. Elías yaputane xua methaunxuae kaponaeinchi xua Nakom kaponaeina. Elías tsipaeba, Eliseo tsipáebatsi, jeye:

—Eliseo, ¿eta xua kata exanaeinchi pewünaeya xua taponaeina tsane? jei.

Eliseo wüüka jeye:

—Ichichipang xua Nakom pía Pejumopetünaxü tatsi tana nekatsiwa tsane pía peayapusüüwa tatsi tayaputaenexa xua taexanaewa tsane pexeiña petsita-itüübi koyenewang, ichi kakana ichi poxonaе xua bárapo peayapusüüwa kakata. Ichichipang xua bichokono nawita ekeicha mataropeicha taxeiнаewa xua bárapo peayapusüüwa. Báraxua ichi be poxonaе ichi xua ba matapin ekeicha ichawa mataropeicha xeina, xua matapinxae xua koxiyüng pekopiniwa tatsi xua poxonaе tüpa, jei Eliseo.

Elías, Eliseo tsipáebatsi, jeye:

—Pokotsiwa wüükame inta ayapubé xua takakatsíwatsi. Íchitha icha netáename poxonaе ponaеin, takoutha Nakom kakatsina bárapo peayapusüüwa, jei Elías.

Barapoxonaе kaena naiña, poxonaе natsipaebúngkuabe, Eliseo tane kawayun be xua ka-ekapónabe pekaponaenaeyo xua pókotsi naеxi penabinaеxi. Daxita báraxuang be saya itanata. Baraxota Elías athabé káichatsi xua asüü xua pin

katsawáuritha. Bara baxua éxana, naiña Elías aichúrukuae icha. Saya meisha Elías pekoutha tabókatsi paparuwa, xua po paparuwa penaupatsiwa xua tajopéikatsi poxonae káichatsi. Eliseo pita paparuwa yawa pona Jordán mene beya. Poxonae Eliseo patopa ménetha, mene dakiba paparúwatha xua Elías pía paparúwatha tatsi xua penaupatsiwa, yawa jeye:

—Nakom, pongxaem pepa Nakomüm, neyawende icha báyatha ichim poxonae yawéname Elías, jei Eliseo.

Néxata mera aiña muxunénebe naexananaya, xua ira tsewa náexana. Yawa Eliseo pebishato epataüta iya. Pírapae, ichamonae pomonae Nakom pía peitorobi jume pepaebiwi, Eliseo jumefayakótatsi xua bepa pinae Eliseo itorobina ichamonae xua Elías pejechiwa tsainchi. Barapomonae nantanaxeina xua metha Nakom xuíka icha íratha xua po ira tajü. Bara ichamonae itoróbatsi pebiwi xua Elías pejechiwa tsainchi. Íchitha jopa Elías taetsi poxoru itaboko bekáichatsi xua Nakom itaboko bekaicha.

3

Bárapo dapaetha Joram itorobiya éwata Efraín nakua xua doce po weibetha. Yawa bapong bichokono peakuibein, íchitha ichi be jopa paxa tatsi ichiyo pong pewüng Acab pong bichokono abe peexanaein. Bapong jopa wüünae jainchiyo po Nakom pewüng Baal, xua po Nakom jopa xaiñeyo. Íchitha bapong wüünae jainta nakomüng po nakomüng oro nain matawüng weya éxana xua be vaca pebtong éxana.

Poxonae Acab kataunxuae pópona xua poxonae jopa tüpaeyo, Moab nakuapiwi Acab katsíbatsi pekakomokáe parátixi. Baxua Acab katsíbatsi xua be pentoma xua bapong jopa pekana exanaewa tsane be pomonae pía pebusikuitaetaewi xua peamanayabixae bárapo nakuapíwitha. Íchitha pírapae poxonae Acab tüpa, Moab nakuapiwi aichaxaibi xua Joram pekatsibiwa tsainchi bárapo matomang. Néxata Joram wüüka pongtha, pong pewüng Josafat, pong Judá nakua itorobiya peewatsin jeye:

—Neyawende xua naba waexanaewa pomonaetha, pomonae Moab nakuapiwi. Bara Nakom naka yawenáenabe xua waamanayabiwa tsánebe xua poxonae naba exanáeinhibe, jei.

Pong Moab nakua itorobiya peewatsin tane xua jopa amanayabaponaeyo xua penabiwa. Bapoxonae bapong pexanto bexuba pong matapin yawa tauta éxana Nakom nexa, po Nakom xua jopa xaiñeyo, xua be ofrenda matawüng, po ofrenda pía Nakom ompin pekatsiwa.

Báraxua éxana asiyeicha xua ichaxota pokotsiwa tómara peyaputoxorota dutsiwa. Penawabchüü-exaneibiwi pomonae xua Efraín nakuapiwi yawa Judá nakuapiwi pía penawabchüü-exaneibiwi tatsi bapong tainchi poxonae baxua éxana. Barapomonae bichokono aichaxaibi xua petaewa báraxua daxota piabong benawibiya.

**Meje yábara poxonae Eliseo pexeña petsita-itüütsi koyenewang éxana,
pong Nakom peitorobi jume pepaebin**

(2 Reyes 4—5)

Eliseo, pong Nakom peitorobi jume pepaebin, aiña tómarangtha eéxana tsíniya aiña pexeña petsita-itüütsi koyenewang.

Kae koyene bapong éxana meje: Kaentakabi pomonae Nakom pía peitorobi jume pepaebiwi jíwana tüpa pewünaeya xua poxonae kaewa matoma katsina xua báyatha pentoma nakowaeta. Pebin, pong báyatha kowaeta éxana pekakomokáe parátixi, bapong ichichipa pita nakuéyatabe pewowinbe, pongbe xua Nakom pía peitorobi jume pepaebin bapong pexántobe tatsi. Bapong ichichipa xua pepichiwa bárapo pewowinbe xua pekana exanaenéxabe be pongbe xua pía pebusikuitae-taeinbe tatsi. Bapong nantaxeina xua bapoxonae kaewa be pentoma xeinaenexa xua báyatha pókotsi matoma amanáyabatsi.

Yábüyo, powa pong Nakom peitorobi jume pepaebin píowa tatsi, bapowa weko-yéi bichokono xua pexántobe petapichiwaxaetsi. Barapowa pona, xua Eliseo pesiwaponaewa tsainchi, pong Nakom peitorobi jume pepaebin xua bepa pinae yawenaetsi. Barapowa, powa pekuenta tüpaewáyotsi pisheuri, bichokono peakopeibiwayo. Saya meisha barapowa piabotha xeina kae jurúwato xua wüngka penasiwa. Néxata Eliseo itoroba jeye:

—Daxita jiña nekuariyamonaе wüükare icha juruwatong xua be pokoyeneya ichaxota kayapujüpanaya xua newüükaewa xua bapoxonae ekeicha bárapo büngtha neepakaewa bárapo penasiwa, po penasiwa tsiwanaya xéiname, jei Eliseo.

Bara baxua éxana powa pisheuri pekuenta tüpaewáyotsi. Pía pexui barü nayauxatataba bo, yawa daxita juruwatong wünba, po juruwatong xua nakowaeta. Néxata Eliseo barái powa pekuenta tüpaewáyotsi pisheuri, jeye: “Kaenaere bárapo penasiwa merang yawa matómare xua báyatha jiña pebin matoma amanáyaba xuano bara nexainaewa tsane po penasiwa merang nakópaba xua jiña pexui nebarü xaewa tsane”, jei Eliseo.

2

Barichi Eliseo icha pexeiña petsita-itüütsi koyenewa éxana po tómaratha pewüng Sunem. Bárapo tómaratha pópona yábüyo, powa yaputane xua Eliseo ápara pong Nakom pía petanakuichinchi tatsi. Poxonae barapowa taiba, xua Eliseo táibatsi, Eliseo katsibéibatsi xua penabanaewa. Kaentakeitha barapowa irü pía pebin tatsi najüntükui yapuwétabe xua piabotha peexanaewa tsánebe tutu xua pemaitekaenexa pong Nakom peitorobi jume pepaebin.

Eliseo ichichipa tsita itapeiñaxeina barapówatha xua jüntübükoyene weiweina xua poxoru baxua petaexanaexaetsi. Eliseo wüüka Nakomtha pexuyo xua barapowa pekatsinéxatsi, tsipéi barapowa jopa pexui xeinaeyo. Bara baxua Nakom éxana. Pexuyo nakatsiwa yawa bapong wíchaba. Íchitha kaentakeitha jemeicha bárapo pexuyo matasipatáibatsi bichokono. Kaena bárapo matakeitha tüpa.

Néxata barapowa pía pexuyo bota Eliseo pía cámatha tatsi, yawa naiña pona xua Eliseo jéitatsi. Poxonae Eliseo patopa, bara tütutha joniya xua pía tütutha, yawa pexuyo kompa barü eka tütutha. Barapoxonae Eliseo wüüka Nakomtha xua pexuyo ekeicha kaewa asüü peexanaewa tsainchi. Néxata bapong pexuyo matapeningkua xua atou éxana. Pexuyo pekoibótotha naopira bota yawa koibo ofutaba. Pexuyo bara nekota, yawa Eliseo kaewa asüü kata koxíwatha.

3

Barichi Eliseo icha pexeiña petsita-itüütsi koyenewa éxana. Kaentakeitha Siria nakuapin pópona, pong pewüng Naamán. Bapong perüüjoropouna xua tsábana.

Naamán píowa tatsi xeina, powa pía pebusikuitaetaewa tatsi xua penowayo, powayo xua Efraín nakuapiwayo. Bárapo penowayo Naamán píowa tatsi tsipáebatsi jeye:

—Pong Nakom pía peitorobi jume pepaebin, bapong itakúüpatsi Naamán axaibi peexanáewatsi, pong pópona Samaria tómaratha xua pepa tómara xua Efraín nákuatha, jei barapowayo.

Néxata pong Siria nakua itorobiya peewatsin, Naamán bara takópatatsi xua bara peponaewa tsane Efraín nakua beya. Naamán pukátatsi carta xua Joram nexa pong Efraín nakua itorobiya peewatsin.

Poxonae Joram yóroba bárapo carta bichokono anthüthütane. Bapong nanta-naxeina xua metha náemata baxua éxana pong Siria nakua itorobiya peewatsin xua ekeicha petamropatapichiwa tsane xua penabewa tsane, yáitama cártatha wúükatsi xua Naamán axaibi peexanaewa tsainchi.

Poxonae Eliseo baxua yaputane barapoxonae bapong najumekaruta xua petsipaebiwa tsainchi Joram jeye:

—Naamán inta itorobarena xua bapong peyaputaewa tsane xua Israel nákuatha pópona pong Nakom peitorobi jume pepaebin, po Nakom xua xaniwaicha pepa Nakom. Baxua yaputaena poxonae axaibi exanaein bapong xua Nakom pía pexeíña peayapusúü itorobi koyenéwatha tatsi, jei Eliseo.

Poxonae Naamán patopa Eliseo piabotha tatsi, Eliseo saya najumekaruta pongtha, pong pía petanakuichinchi xua Naamán jeichichi:

—Nowaema Jordán ménetha xua siete pokuiyobetha xua xain bapoxonae axaibim, jei xua Eliseo najumekaruta.

Néxata Naamán bichokono anáepana poxoru bapong nantanaxeina xua metha Eliseo jonyáetsipa bo weya piakoya xua Naamán petawüükaenéxatsi Nakomtha. Matáütano bapong jopa taeyo xua eta pokotsiwa metha bewa ponáe xua penowaewa tsane Jordán ménetha, xua poxonae bekein pexeíña menein xeina Damasco tómaratha, xua pepa tómara xua Siria nákuatha. Naamán báyatha nakuixainwae-tsiya weta xua kaibeya peponaenexa Siria nakua beya peanaepanaexae. Íchitha Naamán baraichi pomonae pía petanakuichiwichi jeichichi:

—Taema, icha Eliseo kawüükáetsipa ichawa xua neexanaewa pokotsiwa ayapubé báyatha kaena naiña exanaetsípame. Íchitha bapong kawüüka xua neexanaewa pokotsiwa xua yapuwüünae. Néxata ¿eta pokotsiwa jopa exanaem baxua? Maisha baxua éxande, jeichichi.

Bara Naamán pona yawa Jordán ménetha nowane xua siete pokuíyobe icha be pókotsi koyeneya Eliseo paeba. Poxonae Naamán weta xua siete pokuikoyenebe xua nowane bara bapoxonae báyatha axaibi. Néxata Naamán kaibe náwiya Eliseo píabo tatsi beya. Bapong Naamán ichichipa Eliseo xua ichawang kátatsi amanaya xua pokotsiwang aiña matoma. Íchitha Eliseo aichaxaibi xua baxua pekobewepichiwa. Bapoxonae Naamán kaibe náwiya Siria nakua beya.

4

Barapoxonae pirapaeyo xua poxonae Naamán báyatha pona, pebin pong pewüng Giezi, pong Eliseo pía petanakuichinchi, pona xua pepukaxinaenexa xua pewüükaenexa ichawa xua báyatha Naamán Eliseo takapoinchi pokotsiwa xua amanaya pekatsiwang. Bapong Naamán muxujáñabatsi, jeye:

—Pinae Eliseo nantawénona ichawa xua pekakomokáe parátixi yawa paparuwang xua nakuéyatabe pongbe nexa pewowi, pomonae Nakom peitorobi jume pepaebiwi, pomonae xua ánoxuae pata, jei Giezi.

Néxata Naamán kata bapongtha pokotsiwa xua wüüka. Giezi matsiyatajeba yawa narena Eliseo peputha tatsi. Íchitha Eliseo yáíñaba jeye:

—¿Eta wérena pónamera? jei.

Bapong jumenota jeye:

—Ápara xote póponang, jopa ichawa exanaeíño, jei Giezi.

Néxata Eliseo namchi jeye:

—Xang yaputang pokotsiwa xua éxaname. Ápara ánoxuae daxua aibi xua pong Nakom pía petanakuichinchi pewüükaewa pekakomokáe parátixi. Nakom abe kakana exanaena xua nexainaewa tsane po peatenewa Naamán xeina xua bara ataya tsane xua jiña nepoponaewatha.

Bara baxua Nakom éxana icha be pókotsi koyeneya Eliseo báyatha paeba.

**Meje yábara poxonae Nakom kapanepa éxana Efraín nakuapiwi
poxonae naba exanéibatsi, xua Siria nakuapiwi naba exaneiba**

(2 Reyes 6.8—8.15)

Kaentakábitha poxonae Joram itorobiya éwata Efraín nakua, pong Siria nakua itorobiya éwata pong pewüng Ben-adad, yawa pía penawabchüü-exaneibiwi tatsi, barapomonae naba éxana, Efraín nakuapiwi naba éxanatsi. Íchitha barapomonae pomonae Siria nakua pía penawabchüü-exaneibiwi tatsi, jeye:

—Efraín nakua pía penawabchüü-exaneibiwi tatsi pewünaeya naka yaputane pokotsiwa xua exanaeinchi, jei barapomonae.

Néxata Ben-adad yáíñaba pomonae peaiñakuí jiwi, pomonae pía petanakuichiwichi jeye:

—¿Ínkane dapong pong waxantha pópona, pong naka kui-amanáyaba xua daxota Efraín nakuapiwi naka kuiyaputane? jei.

Barapomonae Ben-adad jumenótatsi, jeye:

—Paxang jíwana dapong aibi pong jiwi pekaenaetsin. Saya meisha Eliseo, pong Nakom peitorobi jume pepaebin, Joram daxita yábara tsipáebatsi pokotsiwa xua namicha kueikueijam jiña tútutha, jei.

Néxata Ben-adad bichokono anáepana yawa yáíñaba pebiwi pomonae pía pekueyabiwichi, jeye:

—¿Eta xota metha pópona Eliseo? Paitoróbare penawabchüü-exaneibiwi xua Eliseo pewaetabiwa tsainchi, jei Ben-adad.

Poxonae yaputane xua pinae Eliseo pópona Dotán tómaratha, bapoxonae itoroba penawabchüü-exaneibiwi xua bárapo tómara peyaputoxorota dutsiwa tsane. Baya kaemumbo, pong Eliseo pía petanakuichinchi, bapong tane penawabchüü-exaneibiwi yawa namchi jeye:

—¡Taema! ¿Eta xua exanaeinchi Eliseo? jei.

Eliseo jumenota, jeye:

—Jopa junuwinde, tsipéi pin bicheitomonae pomonae penawabchüü-exaneibiwi naka yawenaena beyakaincha xua barapomonae, jei.

Néxata Eliseo wüüka Nakomtha xua nekota petaexanaewa tsainchi pong pía petanakuichinchi. Barapong, pong Eliseo petanakuichinchi, itakúüpatsi xua tane

xua demuxuwa xua ichaxota Dotán tómara eka bichokono nawita karnaexi xua penabinaexi xua saya be itanata. Yawa táneno kawayumonaein xua saya be itanata xua matatsunpiwi eneika xua eénatsi Eliseo.

Barapoxonae Eliseo wüüka Nakomtha, xua Nakom kana exanaena xua Siria nakuapiwi pía penawabchüü-exaneibiwi tatsi itakuere kirei exanebinchi, xua saya bara káetotha tsane. Poxoru Nakom báraxua éxana, daxota Eliseo pona yawa tsi-paeba barapomonaetha jeye:

—Panaitakatsontsoniya póname, paka itaxanumena. Paka itakayopichinchi xua ichaxota paiña neponaewa, jei Eliseo.

Bara Eliseo matakápona, barapomonaetha matakapónatsi Samaria tómaratha, xua pepa tómara Efraín nákuatha. Barapomonaetha pona akoibi po hórabe pepatsinexa bárapo tómaratha.

Néxata Eliseo wüüka Nakomtha xua ekeicha Nakom nekota peexanaewa tsane penawabchüü-exaneibiwi. Bara Nakom baxua éxana. Poxonae bárapo Siria nakua-monaetha tainchi, xua Joram tane, Joram ichichipa xua pejutebiwa barapomonaetha. Íchitha Eliseo itoroba xua bewa bapong apatsina pexaewa barapomonaetha yawa bara pukopatsina xua peponaewa tsane. Bara báraxua Joram éxana. Daxota saya bara kaeto Siria nakuapiwi nakuibarapenta xua naba peexanaewa Efraín nakuapíwitha.

2

Pírapae barapoxonae Ben-adad, pong nakua itorobiya peewatsin, bapong ekeicha Efraín nakuapiwi naba éxanatsi. Barichi bapong pía penawabchüü-exaneibiwi tatsi daxita eena xua Samaria tómara peyaputoxorota dutsiwa.

Daxota Samaria tomarapiwi jopa itaküüpaetsi xua pexaewa pejeichiwa. Báraxua aiña dapaein peexanaexae Samaria tomarapiwi muxu piyain pewérapae. Kopya pexaewa daxitang bichokono aiña matoma kaenaeta beya poxonae pexaewa aibi. Daxota jiwi bichokono jainpa. Daxota yábüxi muxu pía pexui pejutebí xua yatsikaya pía pexui xua pía xaetsi xua pejainpaexae. Joram pong nakua itorobiya peewatsin jeye:

Ápara Eliseo piakoutha xua Siria nakuapiwi báraxua nákata éxana, jei Joram.

Yawa Joram juntukuru Eliseo pebexubiwa tsainchi xuano xua pentasipa ükui-biwa tsainchi. Daxota Joram itoroba penawabchüü-exaneibiwi exaneibín Eliseo píabo tatsi beya. Eliseo yaputane xua patopaena penawabchüü-exaneibiwi jíwanapin xua pejeichíwatsi xua barapoxonae pentasipa ükui-biwa tsainchi. Poxonae penawabchüü-exaneibiwi jíwanapin patopa Eliseo jopa taboupa saranaxoyaeyo. Kaena barapoxonae naiña patopa pong nakua itorobiya peewatsin xua Eliseo petsi-paebiwa tsainchi, yawa Eliseo jeichichi:

—Daxita bárapo abe peéxanae koyenewa Nakom wérena pona. ¿Eta xua paxanaein xua daxota Nakom pata taneyawenaewa tsane? jei.

Yawa Eliseo jumenota jeye:

—Nakom netsipaeba xua pinae baya tsane xua pókotsi hórathe Samaria tómaraboupa peyaputoxorotadutsíwatha matoma yayathiya kaenaetsina harinabeno yawa cebadabeno.

Íchitha pong peaiñakuín pong nakua itorobiya peewatsin punapoinchi jeye:

—Báraxua xaniwaicha aibi. Bekein Nakom pekoiboto exanáetsipa itaboko wétsika yawa othopeika exanáetsipa pexaewa ápara baxua jopa daichipae, jei pong peaiñakuín.

Eliseo jumenota bapongtha jeye:

—Xam jiñakoya táename báraxua, íchitha xam jopa kaitaküüpa tsane xua nexaewa tsane báraxua, jei.

3

Xua ichaxota tómara yaputoxórota duta pebóupatha pejúmatha ena pebiwi xua cuatro pongbe pomonae perüüjoropouna xua tsábana. Bárapo pebiwi nantana-xeina xua peponaewa tsane ichaxota pomonae penawabchüü-exaneibiwi, pomonae Siria nakuapiwi pía chivo namüübómüxüng taumeinchi.

Barapomonae natsipaeba jeye:

—Ápara wajainwerapaeinchi icha watómaratha enaeinchi. Barapoinchi ichaxota Siria nakuapiwi pía penawabchüü-exaneibiwi tatsi piabómüxüng taumeinchi. Metha ápara pexaewa naka katsibina. Metha bekein ichikuitha naka jutebíchipa, jei barapomonae.

Daxota barapomonae bara beya pona poxonae tabópiya. Poxonae barapomonae baxota pata, jopa kaxinaeyo pomonae penawabchüü-exaneibiwi xua Siria nakuapiwi. Jiwi aibi, tsipéi Nakom býatha éxana xua Siria nakuapiwi jumetaena pebusi xua kawayu pekaponaeaxi xua penabewa yawa xua kawayu busi. Siria nakuapiwi nantanaxeina xua bárapo penawabchüü-exaneibiwi xua bichokono pinmonae naba exanaena barapomonaetha. Daxota barapomonae kou dúkupa. Daxita piyawang íratha naputsantsiya jeba.

Bárapo cuatro pongbe pu-üngkabarúkupa xua poxonae dúkupa penawabchüü-exaneibiwi xua Siria nakuapiwi. Néxata bárapo pebiwi, pomonae xua cuatro pongbe, pomonae xua peperüüjoropounaewi nabanerúkupa yawa aparúkupa. Nótano pekakomokáe parátixi yawa paparuwang xua xuang kou býatha Siria nakuapiwi kuenta dúkupa. Íchitha kaena naiña barapoxonae nantanaxeinárúkupa jeye:

—Ichamonae báraxua yábara tsipaebinchi xua pexeiña diwesi. Icha jopa báraxua yábara tsipaebinchi ichamonae, naka kasebíchipa pomonae watomarapiwi, jei barapomonae.

Daxota barapomonae pona pebóupatha ichaxota xua tómara peyaputoxorota dutsiwa. Barapomonae tsipaeba po diwesi pexeiña diwesi pomonae xua tómara boupá peewatsiwi.

Barapomonae najumekaruta xua petsipaebiwa tsainchi Joram, pong nakua itorobiya peewatsin. Barapong itoroba pebiwi kawáyutha xua petataewa tsainchi icha bara xaniwaicha paeba. Poxonae barapomonae kaibe nawibiya bara paeba xua pinae bara xaiñéi. Barapoxonae daxita jiwi pona yawa daxitang nota xua xuang kou Siria nakuapiwi kuenta dúkupa. Bara baxua éxana be pókotsi koyeneya Eliseo paeba býatha.

Bara Samaria tómara boupá harinabeno kaenaeta yawa cebadabeno kaenaeta. Saya matoma yáyatha kaenaeta. Pong peaiñakuín, pong xua býatha Eliseo jopa yábara jumekowüntsichi, barapong jiwi petáxutha nataxuna taxunáunabatsi tómara pebóupatha xua daxota tüpa éxanatsi barapong.

Báraxua bara nayábara jumeweta pokotsiwa býatha paeba Eliseo pong Nakom peitorobi jume pepaebin. Pong peaiñakuín tane pokotsiwa xua býatha yábara nantaxeina xua ápara pinae Nakom jopa itaküüpaetsi xua peexanaewa tsane Siria

nakuapíwitha. Íchitha barapong jopa itaküüpaetsi xua pexaewa, po pexaewa Siria nakuapiwi kuenta dúküpa xua piamonae wepu xainchi petüpaexae.

4

Pírapae Eliseo pona Damasco tómara beya, xua pepa tómara xua Siria nakua. Bapoxónaerü Ben-adad pong nakua itorobiya peewatsin átene. Bara néxata Ben-adad itoroba pong pía petanakuichinchi, pong peaiñakuín, pong pewüing Hazael, xua petayaiñabinéxatsi Eliséotha xua jeye:

—¿Metha axaibin tsane jampa? Ichikuitha ¿metha jopa axaibin tsane, jampa? jei bapong.

Bara Eliseo jumenota, Hazael jumenótatsi jeye:

—Ben-adad axaibi tsane po peatenewa xua xeina. Íchitha bapong bexa tüpaena. Bapoxonae xam, Hazael, pekoutha naexanáename pong Siria nakua itorobiya neéwatsin, jei Eliseo.

Bara Hazael pona, yawa Ben-adad tsipáebatsi jeye:

—Eliseo netsipaeba xua pinae axaibim tsane, jei Hazael.

Icha mataketha Hazael bexuba, Ben-adad bexotsi poxonae paparúwatha itabara akatababótatsi, po paparuwa atatsika. Barapoxonae, Siria nakuapiwi Hazael kana éxanatsi xua pokoyene Siria nakua itorobiya peewatsiwa tsane.

Meje yábara poxonae Joram itorobiya éwata Judá nakua

(2 Reyes 8.16-24; 2 Crónicas 21.1b—22.1)

Poxonae írürü Joram itorobiya éwata Efraín nakua, barapoxonae Josafat tüpa. Barapong Josafat Judá nakua itorobiya éwata treinta y cinco po weibe. Néxata Joram pong Josafat pexanto tatsi, pong matapin, bapong paxa pekoutha xuya pong nakua itorobiya peewatsin náexana Judá nákuatha. Matáütano Joram, pong Judá nakua itorobiya peewatsinxae, bapong itoroba xua daxita peweicho jiwi tatsi petajutebiwa tsainchi, xuano xua petajutebiwa tsainchi xua pomonae yábara nantanaxéinatsi xua bapong pebexubiwa tsainchi xua pekoutha petanaexanaewa tsainchi ichüing, pong nakua itorobiya peewatsin.

Joram píowa tatsi pewüing Atalía. Bapowa Acab pexantiyo tatsi, pong báyatha Efraín nakua itorobiya peewatsin. Daxota bapong Joram, pong Judá nakua itorobiya peewatsin, írürü daxita peabe koyenein éxana icha ichi pomonae Efraín nakua itorobiya peewatsiwi xua kaena báyatha éxana. Joram jüntükuikoyene tsakáraba, jiwi jüntükuikoyene tsakábatsi xua wüünae pejainchiwa tsane nakomüing po nakomüing jopa xaiñeyo. Joram bichokono kasébatsi Nakom. Íchitha báyatha Nakom tsiwüünae muxuduta xua David tsiwüünae muxudútatsi, jeye:

—Jiña nemómoxi susato jiwi jíwana tatsi kana exaneibín pong nakua itorobiya peewatsin tsaibi tsane, jei.

Nakom petsipaebixae baxua, daxota ichüing jopa itorobiyo xua Joram pebexubiwa tsainchi, yawa xua pekoutha petanaexanaewa tsainchi ichüing, pong nakua itorobiya peewatsin, icha báyatha kana ichaibichi pomonae Efraín nakua itorobiya peewatsiwi.

Bárapo dapaetha, Edom nakuapiwi katsibeiba pekakomokáe parátixi, Judá nakua itorobiya peewatsin katsibéibatsi, xua be impuesto matómawüing xua poxorü barapong bárapo Edom nakuapiwi peamanayabebíxaetsi xua poxonae naba exanéibatsi.

Bárapo Edom nakuapiwi aichaxaibi xua impuesto matómawüing katsibeiba, xua Judá nakuapiwi katsibéibatsi. Daxota naba éxana Judá nakuapíwitha. Edom nakuapiwi amanáyaba, xua Judá nakuapiwi amanáyabatsi, poxonae naba éxana Judá nakuapíwitha. Nakom kópata xua bara Judá nakuapiwi amanayabébatsi xua poxoru Joram jopa peexanaexae pokotsiwa Nakom itoroba. Matáütano Joram kátatsi carta, po carta báyatha Elías tina, pong Nakom pía peitorobi jume pepaebin, pewünaeya xua poxonae kapoinchi itaboko beicha. Bárapo cártatha Elías paeba jeye:

—Nakom kayábara jeye: ‘Xam jopa exanaem pokotsiwa kaitoróbatsi icha ichi axa Josafat, irü icha ichi amo Asa. Xam éxaname barapókotsi koyenein xua peabe koyenein, pókotsi koyenein éxana pomonae Efraín nakua itorobiya peewatsiwi. Jutébame eweicho jiwi pomonae xua pejüntükoyene wüünae jiwi beyakaincha xam. Daxota kopatang xua bara jiña matabüxümonae kata abe exanaeinchi, yáwano xua jiña nakua kata abe exanaeinchi. Xam atenem tsane, yawa túpáename’, jei Nakom, jei Elías xua cártatha tina Nakom nexa.

2

Pírapae, Nakom kópata xua filisteomonae, irü árabemonae xua Judá nakuapiwi tsimaxapátatsi. Yawa Nakom kópata xua bara Joram daxita piyawang tanotinchi, matáütano xua Joram piowaxi petanotsiwa tsainchi, yáwano xua pía pexui petanotsiwa tsainchi. Saya jopa pitichi pong xuiyapin.

Matáütano Nakom kópata xua Joram xeina peatenewa púnütha xua pírapae aña weibe bárapo peatenewa tüpa éxanatsi. Poxonae Joram müthüthü xotsi jopa piamonae matowa siwawekoyéi tsurubenanaebiyatsi. Joram tüpa xua poxonae ocho po weibe yakuí opidukua xua nakua itorobiya éwata. Bapoxonae pexanto tatsi pong xuiyapin, pong pewüing Ocozías, xuya pekoutha tanaexánatsi xua itorobiya peewatsiwa Judá nakua.

Meje yábara poxonae Jehú wetaxuba, xua wetaxotsi Acab piamonae matabüxüyo tatsi, pong nakua itorobiya peewatsin

(2 Reyes 8.25—10.36; 2 Crónicas 22.2-9)

Ocozías itorobiya éwata Judá nakua saya kae wei. Bapong bichokono abe peexanaein. Ocozías pena tatsi pewüing Atalía. Barapowa Acab pexantiyo tatsi pong Efraín nakua itorobiya peewatsin. Barapowa pexanto itoroba nawita xua Ocozías abe peexanaewa.

Kaentakábitha Ocozías pona Jezreel tómará beya pesiwaponaewa tsane ichaxota icha Joram, po Joram seikaya Efraín nakua peewatsin. Ocozías irü Joram báyatha nakae jiwimonaebe náexanabe. Ocozías siwapona Joram, pong wang xeina, xua naba peexanaexae penawabchüü-exaneibíwitha xua pomonae Siria nakuapiwi.

2

Poxonae Ocozías pópona bárapo tómaratha, Eliseo pong Nakom pía peitorobi jume pepaebin, kaein jíwana itapeta pomonae Nakom peitorobi jume pía pepaebiwi xua bapong peyawenaewa tsainchi, jeye:

—Pónare ichaxota Efraín nakuapiwi pía penawabchüü-exaneibiwi tatsi. Barapomonae jíwana itapere pong pewüing Jehú, pong pomonae penawabchüü-exaneibiwi

pía pekanamataxeináewichi jíwanapin tatsi. Inta bapong matasipawé epatábare penasiwa méralha. Bapong inta tsipaebareno xua bapong naexanaena pong Efraín nakua itorobiya peewatsin tsane.

”Itorobareno bü bewa daxita pebiwi jutebina, po pebiwi xua Acab irü píowa tatsi Jezabel piamonae matabüxüyo tatsi. Báraxua bewa Jehú exanaena poxoru Acab piowabe báyatha pinmonae jutébabe, pomonae Nakom wüünae jainteiba, jei Eliseo.

Pong Nakom pía peitorobi jume pepaebin bara pona yawa bara éxana pokotsiwa Eliseo itoroba. Barapoxonae bapong naetsíriwa. Néxata ichamonae pomonae peaiñakuí jiwi xua Jehú pía petanakuichiwichi barapomonae Jehú yáíñabatsi jeye:

—Jehú ¿eta xua katsipaeba pong Nakom pía peitorobi jume pepaebin? jei.

Jehú jumenota jeye:

—Bepa pinae xuya naexanaein xua Efraín nakua itorobiya taewatsiwa tsane, jei.

Bapoxonae daxita pomonae penawabchüü-exaneibiwi pía pekanamataxeináewichi barapomonae jejéi xua Jehú peyawenaewa tsainchi.

Néxata Jehú irü ichamonae pomonae penawabchüü-exaneibiwi pía pekanamataxeináewichi tatsi yábara natsipaeba jeye:

—¿Eta bichainchi xua poxonae Joram wabexubiwa tsainchi? jei.

Írürü bapoxonae Joram eka piabotha Jezreel tómaratha. Bapong éwata xua wang jume tsane. Pírapae, Jehú nontabiya pía karonáeyotha, ponaeyo xua penabinaeyo, yawa bara pona Jezreel tómara beya. Joram irü Ocozías poxonae tánebe xua Jehú baxoyo dena, barapoxonae bapongbe karonáeyotha nontábiyabe xua po naexi penabinaexi xua barompaya pía náeyotha nawepu tsata pónabe. Yawa bara barapongbe pónabe xua Jehú pententa kaxinaenéxatsi. Poxonae nakaxiba, Joram Jehú yáíñabatsi jeye:

—¿Jüntema póponame? ¿Eta pokotsiwa patópame? jei.

Jehú jumenota jeye:

—Jopa jüntema jinompa naexanáe tsainchi Efraín nákuatha poxonae kataunxuae ena pópona powa Jezabel. Áwiya bapowa wüünae jaintapona nakomüng, po nakomüng xua jopa xaiñeyo. Matáütano bapowa kauri pía koyenéwano exanapona poxonae xuípaxaewi pía koyeneya exanapona, jei xua Jehú jumenota.

Néxata Joram yaputane xua pinae Jehú patopa xua ápara Joram pekueranta itorobiya kanamata-ewatsiwa tsainchi nakua. Barapoxonae Joram jumedangweya wawái, xua Ocozías wábatsi jeye:

—¡Dota, dota Ocozías naetsiríware, naka tsimaxaxéinabe! jei.

Jehú pepobotha punuxuba, Joram punuxotsi, yawa bara bexotsi. Barapoxonae áwiya Jehú barapona, Ocozías barapoinchi. Bara Ocozías bexotsi. Jehú bexuba bapongbe tsipéi bapongbe Acab pía pemómoxi susato jíwanabe tatsi. Barapoxonae Joram petüpaein xotsi ichaxota po ira báyatha pebin pía ira tatsi pong pewüng Nabot. Bara baraxota Joram jana nakayataxuba bárapo íratha.

3

Jehú patopa Jezreel tómaratha. Barapoxonae Jehú tane xua Jezabel xainxaiñéi xua naetsíriwa bo ventana tsika, po bo nakua itorobiya peewatsin píabo tatsi, po bo pin bo. Jehú tsipaeba ichamonae jíwana pomonae po bo pin bo peyapukai-nompaewi jeye:

—Barapowa Jezabel ventana paxuinka, jei Jehú.

Bara baxua barapomonaé éxana, yawa bara barapowa túpa, xainwaetekéikatsi. Barapoxonaé Jehú taitoroba carta po pebiwi aiñakuí xua Samaria tomarapiwi, po pebiwi xua Acab pía pexui tatsi tayapu-eenéibatsi. Jehú cártatha tsipaeba jeye:

—Kaein pajíwana itapere Acab pía pemómoxi susato jiwi tatsi. Bapong pakana éxande pong nakua itorobiya peewatsin. Barapoxonaé daxita paxam pakaeture paiña penawabchüü-exaneibiwi, tsipéi xang naba paka exanaeinchi, jei Jehú.

Íchitha pebiwi bichokono junuwa xua báraxua peexanaewa tsane. Bara barapomonaé jumenota jeye:

—Bara jopa dapong kaein jíwana pakana exanaein tsane, pong nakua itorobiya peewatsin, pong Acab pía pemómoxi susato jiwi tatsi, jei bárapo pebiwi.

Néxata Jehú itoroba jeye:

—Bara néxata daxita pewowi jiwi pajutébare Acab pía pemómoxi susato jiwi tatsi, jei.

Acab pía pemómoxi susato jiwi tatsi bichokono pinmonaé, be setenta po jiwi matabüxümonaébe. Bara daxita jutébatsi yawa pentasipang Jehú betaitorobíyatsi. Barapoxonaé Jehú daxita juteba pomonaé xua Acab pijimonaé tatsi yawa pomonaé báyatha Acab yawenéibatsi. Omeicha jutébatsi. Ichüng jopa nakopatsiyo. Bara saya bárapo koyeneya nayábara jumekuiweta be pókotsi koyeneya báyatha Elías paeba, pong Nakom pía peitorobi jume pepaebin, xua poxonaé Elías Acab tsipáebatsi xua Nakom nexa.

4

Jehú, pong nakua itorobiya peewatsin, bapong ichichipa xua jiwi pebarapentsiwa tsane xua wüünaé pejainteibiwa po Nakom pewüng Baal, po Nakom xua jopa xaiñeyo. Daxota Jehú muxujaiñabiya tsipaeba xua bepa pinaé pin fiesta exanáé xua petsita-exanaewa tsainchi po Nakom pewüng Baal. Itoroba xua bepa pinaé petapatsiwa tsainchi daxita sacerdotemonaé, po sacerdotemonaé jutebeiba duwéi xua be ofrendang matawüng xua Baal nexa. Matáütano itoróbano xua pinaé daxita petapatsiwa tsainchi pomonaé Baal peitorobi jume pepaebiwi.

Poxonaé daxita nakaetuta, Jehú jopa kopatsiyo xua baxota barü nakaetutsina pomonaé xua seikaya wüünaé pejainteibiwi Nakom, po Nakom pepa Nakom. Bapoxonaé Jehú náemata bexuba duwein xua be ofrenda matawüng, po ofrenda xua ompiwa pekatsiwa Baal nexa. Bapoxonaé piamonaé tsita kowai pomonaé xua Baal píabo tatsi, po bo pin bo yakaincha matawakaicha umena. Barapoxonaé barapomonaé jojoniya yawa juteba daxita pomonaé wüünaé jainta Baal. Bapoxonaé abe kana éxana Baal píabo tatsi, xua po bo pin bo. Tsipéi báraxua éxana daxota Efraín nakuapiwi nakuibarapenta xua wüünaé pejainchiwa Baal.

5

Nakom tsita wüünaetsi pokotsiwa xua Jehú éxana. Daxota Nakom Jehú yábara tsiwüünaé muxudútatsi xua pinaé Jehú pía pemómoxi susato jiwi tatsi pomonaé nakua itorobiya peewatsiwa naexaneibina xua pinaé beya cuatro pongbe tsane. Dáichitha Jehú jopa beta exanaeyo poxonaé jopa exanaponaeyo pokotsiwa Nakom pía peitorobi koyenewa tatsi itoroba. Bapong wüünaé jaintapona ayunbe vaca pébtobe xua oro nain matawüng xua kaena báyatha Jeroboam éxana.

Po dapaetha, poxonae Jehú itorobiya éwata Efraín nakua, Nakom kópata xua bara Siria nakuapiwi pepichiwa tsane Efraín nakua, xua daxita ira po ira eka Jordán mene pejuma wétsina ichaxota pokotsiwa xometo wekounibina. Jehú itorobiya éwata Efraín nakua veintiocho po weibe. Poxonae Jehú tüpa, pexanto xuya pekoutha tanaexánatsi, pong nakua itorobiya peewatsin pong pewüing Joacaz.

Meje yábara poxonae yábüyo, powa pewüing Atalía, irü kotakaya pebin pewüing Joás, itorobiya éwata Judá nakua

(2 Reyes 11—12; 2 Crónicas 22.10—24.27)

Yábüyo powa pewüing Atalía, powa Joram kuenta tüpa pong báyatha itorobiya éwata Judá nakua, barapowa jumetane xua Jehú namawainta xua barapowa pexanto tabexotsi pong pewüing Ocozías, pong itorobiya éwata Judá nakua.

Barapowa juntukuru namawainta xua daxita David pía pemómoxi susato jiji tatsi petajutebiwa tsainchi. Barapowa nantanaxeina jeye: “Poxonae báraxua exanaein bara barapoxonae tana neitaküüpaewa tsane xua tana naexanaewa tsane xua nakua itorobiya taewatsiwa. Barapoxonae ichüing xain jopa peitaküüpaewa tsainchi xua pong nakua itorobiya peewatsiwa penaexanaewa”, najéi barapowa.

Íchitha yábüyo powa pewüing Josaba, xua Joram pexantiyo tatsi, powayo báyatha pexantiyo kuenta tüpa, barapowa perobi matsiyataba pong pewüing Joás, pong Ocozías pexanto tatsi. Barapoxonae kataunxuae Joás bichokono pewowin.

Barapowa Josaba pipebin tatsi pewüing Joiada. Bapong sacerdotemonae pía Pekanamataxeinaein tatsi. Josaba pía pebinbe matayáibatsibe, xua Joás matayáibatsi, yawa yábüyo matayátatsi, powa xua Joás peeneibiwa tsainchi. Joás yawa yábüyo matsiyátatsi ichaxota Nakom píabo tütutha tatsi, po bo pin bo, xua po tútiyo jíwana xua tsiki tütixi, xua beya seis po weibetha. Írürü bárapo weitha Atalía itorobiya éwata Judá nakua.

2

Barapong Joás bara siete po weibe xeina xua wíchaba. Barapoxonae Joiada kayábara nantanaxeina jeye:

—Ánoxuae matapaiña xeinang pinmonae pomonae neyawenaena xua taexanaewa tsane Joás, pong nakua itorobiya peewatsin tsane, najéi Joiada.

Bara barapoxonae Joiada daxita kaetuta pomonae peaiñakuí jiji pomonae penawabchüü-exaneibiwi pía pekanamataxeinaewi tatsi. Barapoxonae Joiada tsita itüüta barapomonaetha xua Joás petaenéxatsi. Barapoxonae bapong pebürüya barü yábara nantajüpaya nantanaxeina xua bara Joás penaexanaewa tsane, pong nakua itorobiya peewatsin tsane.

Matáütano bapong Joiada kaetuta levitamona. Bapong Joiada muxuweta barapomonaetha, xua levitamona xua Joás peyawenaewa tsainchi, xua Joás pakue tatsi pekuiyainwa tatsi. Bara barapomona baxua éxana xua Joiada peitorobixae.

Pírapae, Joás kapoinchi Nakom píabo tatsi weya, po bo pin bo. Barapong kuaranótatsi pin pánatha xua asiyeicha, yawa mataxátatatsi xua be pexeíña tepa. Bara bapong kana exainchi pong nakua itorobiya peewatsin. Daxita jiji jüntübükoyene weiweina, yawa naxüna, yawa tangbaba.

Atalía jumetane xua pinmonae juiña ajumeyaxa ichaxota Nakom píabo tatsi, po bo pin bo. Barapoxonae barapowa bara bekuinaepoiña jeye:

—Tha yaputaetsi, ¿eta pokotsiwa metha baraxota exanompa? jei.

Barapowa tane xua Joás ungpoyi xua ichaxota tajiicha. Barapoxonae barapowa jumedangweya wawái barapomonaetha, jeye:

—Ápara pana netsi éxaname, jei.

Néxata Joiada itoroba pomonae penawabchüü-exaneibiwi, jeye:

—Barapowa Nakom píabo tatsi, po bo pin bo, weya pakáponde. Bara pabexóreno, jei Joiada.

Bara baxua éxana pomonae penawabchüü-exaneibiwi xua Joiada peitorobixae.

3

Joiada itoroba xua pong nakua itorobiya peewatsin Joás irü daxita jiwi pebüriya yábara nantaxeinaena xua meisha Nakom wüünae pejainchiwa tsainchi, po Nakom pepa Nakom. Barapoxonae, pomonae xua baxota jinompa Jerusalén tómaratha, pona ichaxota Baal píabo tatsi ungpua. Abe éxana bárabo bo. Yawa bexotsi sacerdotemonaepin, pong xua duwéi jutebeiba xua be ofrendang matawüng xua Baal nexa.

Pírapae Joiada nakuiwüünaeta éxana sacerdotemonae yawa levitamona xua barapomona pe-eenaenexa Nakom píabo tatsi, po bo pin bo, yáwano daxita peexanaenexa pokoyeneya be býatha Moisés tsita itüütsiya éxanatsi Nakom.

Joiada báraxua peexanaexae daxota Joás xuya pong Judá nakua itorobiya peewatsin náexana. Aiña wei, Joiada pong sacerdotemonaepin, Joás yawénatsi xua Nakom wüünae pejainchiwa tsainchi. Barapoxonae pírapae Joiada tawaba yábüyo aiñáwabe xua Joás píowa peexanaenéxabe. Yawa bara Joás pexui xeina.

Kae koyene pokotsiwa Joás éxana bapong itoroba xua jiwi bewa nonotaponaena xua impuesto matómawüng xua icha pekakomokáe paratixitha pemuxuna kaetutabinexa xua ekeicha wüünae peexanaenexa Nakom píabo tatsi, po bo pin bo. Jiwi baxua peexanaexae, ekeicha wüünae éxana Nakom píabo tatsi, po bo pin bo. Ekeicha bichokono dangwéi exananota.

4

Poxonae Joiada tüpa, ichamonae pebiwi pomonae peaiñakuí jiwi, pomonae xua Judá nakuapiwi, barapomona Joás jüntükuikoyene tsakábatsi xua wüünae pejainchiwa tsane po nakomüng jopa xaiñeyo. Daxota Nakom taitoroba pomonae pía peitorobi jume pepaebi jíwitha. Barapomona Nakom itoroba xua petapaebinéxatsi jíwitha jeye:

—Pana nakuiбарapende xua wüünae paiña nejainchiwa po nakomüng xua jopa xaiñeyo. Saya meisha wüünae pana nejainde, jei barapomona xua Nakom paeba.

Daümetha aibi pong xua éxana pokotsiwa barapomona itoroba. Kaein jíwana pomonae xua Nakom peitorobi jume pepaebiwi jíwana, bapong ápara Zacarías, Joiada pexanto tatsi. Zacarías tsipaeba jíwitha jeye:

—Paxam jopa jumekowüntsia paexanaem pokotsiwa xua Nakom pía peitorobi koyenewang tatsi paka itoroba. Icha kataunxuae abe paexanáename Nakom átene paka exanaena. Paxam panaitematsiya éxaname Nakom, daxota xuya bapong paka naitematsina, jei Zacarías.

Joás aichaxaibi pokotsiwa Zacarías paeba, daxota Joás itoroba jiwi xua Zacarías ibotíxitha pekuinbabinéxatsi xuano xua baxota tüpa peexanaenéxatsi. Bara

barichi Zacarías bexotsi pánatha xua ichaxota Nakom píabo tatsi, po bo pin bo. Joás yábara nakui-itapeiñaxeina xua pokoyene peichaxaibíwaxae xua báyatha Joiada taéxana, pong Zacarías paxa tatsi.

Xua abe pekana exanaewa tsainchi Joás xua Zacarías pebexubíwaxaetsi, Nakom kópata xua bara Siria nakua pía penawabchüü-exaneibiwi tatsi bara pata Judá nákuatha. Siria nakuapiwi daxita juteba pomonae peaiñakuí jiwi pomonae Judá nakua pía penawabchüü-exaneibiwi tatsi pekanamataxeináewichi. Joás wang éxanatsi.

Néxata nakuéyatabe pebinbe pongbe xua Joás pía petanakuichiwichibe tatsi, bapongbe juntukuru Joás tüpa peexanaewa tsainchi xua be pentoma xua Zacarías pebexubixaetsi. Joás pía cámatha bexubabótatsi.

Joás tüpa xua poxonae weta xua itorobiya éwata Judá nakua xua cuarenta po weibetha. Joás pexanto xuya pekoutha tanaexánatsi pong nakua itorobiya peewatsin, po pexántoxae tatsi pewüing Amazías.

**Meje yábara poxonae Joel, pong Nakom peitorobi jume pepaebin,
kueikueijeji Nakom Pejume Diwesi Judá nakuapíwitha**

(Joel 1—3)

Kaentakabi Nakom itoroba suremonae xua pinmonae yáwano icháwangno xua pichixi xua daxita baxuang daxita pexaenexa pexaewang, po pexaewang naweta pabintha Judá nákuatha. Bara néxata jiwi bichokono pinmonae jainpa. Matáütano Nakom éxana xua jopa pedunaewa tsane. Bapoxonae Nakom itoroba pong peitorobi jume pepaebin pong pewüing Joel, xua bapong yábara petsipaebinexa barapomonaetha bárapo peabewang. Joel barapomonaetha jeye:

—Paxam, pomonae pítiri jiwi pam irü ichamonae pam, pana nejumetaema. Bara xaniwaicha nákata abe tsóponae. Daxitang xua wa-übiwang nákata werawéraka. Bárapo weithe dapong aibi tsane xua peweiweinaewa xua poxonae penawetsixae pexaewa. Daxita jiwi bewa wüükaena Nakomtha xua wanaka yawenaewa tsane. Matáütano jopa xéinatsi pexu xua wakatsibeibinexa Nakom xua be ofrendang matawüing. Be Nakom ichichipa xua daxita jiwi múxuna werawéraka exanaeinchi bárapo kae pin nákuathe.

”Icha paxam ekeicha kaewa wüünae pajainchíname Nakom, yawa icha patsita-itapeiñaxeinaéname xua bara xaniwaicha payábara auram pokoyene xua báyatha paéxaname xua abe paiña neexanáe koyenein, barapoxonae bapong Nakom paka yábara jüntemainaena xua báyatha abe paéxaname. Bapong itakúüpatsi xua ekeicha kaewa wüünae pákata éxana xua daxota ekeicha beta paiña nejinompaewa tsane. Nakom jopa paka yábara aitakonaeyo, yawa beta peexanaein.

”Bapong Nakom aichaxaibi xua ayapubé pákata éxana. Íchitha paxam bewa pana nakuiyábara yaputaem xua abe paiña neexanaewam. Jopa bewa payábara paebim xua pinae payábara auram xua abe paéxaname poxonae ápara jopa xaniwaicha payábara auram.

”Daxota paxam, pomonae pítiri jiwi pam, daxita jiwi pawábare yawa pabarüna-kaecture, yawa yábara najainbotinchi xua watsita-itapeiñaxeinaenexa Nakom xua bara yábara nantanaxeinaeya yaputainchi abe waexanáe koyenein. Barapoxonae pakópare xua bara sacerdotemonae nákata wüükaena Nakomtha xua wanaka yábara jüntemainaewa tsane xua abe waexanáe koyenein, jei Joel.

2

Barapoxonae poxonae xua jiwi éxana xua Joel paeba, bara Nakom éxana pokotsiwa poxonae barapomonae wüüka. Nakom tsipaeba barapomonaetha jeye:

—Ekeicha jopa itorobin tsane pinmonae xua suremonaein. Matáütano bara ekeicha kaewa beta pákata exanaeinchi. Pexaewa paka katsinchi xua bichokono jopa juniyiyo. Wüünae pana nejainde xua wüünae tapákata exanáexaetsi, jei Nakom.

Nakom ekeicha tsipaeba barapomonaetha jeye:

—Icha mataketha tsane Tajumopetünaxü kayataxubiya katsibin daxita karepaya jíwitha. Matáütano Tajumopetünaxü pákata exanaena pókotsi koyenein xua bichokono wüünae, xuano xua itabókotha icha ichi bárapo írathe. Daxota jiwi neyábara yaputaena xua bara ápara póponang.

”Daxita baxuang bara exanaein pewünaeya po matakabi báyatha itapetang xua opiweraerakaeya dukaena bárapo kae pin nákuathe. Daxita pomonae newüüka xua tayawenaewa tsane poxonae bichokono átene tsúrukuae tsane bárapo mataketha bara kapanepaein bara weya. Bexa icha matakábitha tsane xua poxonae po matakábitha jiwi bichokono átene tsane xua írürü poxonae Judá nakuapiwi tsanajinoutarutsina icha nákuangtha, bapoxonae exanaein xua Judá nakuapiwi ekeicha kaewa beta jinompaena.

”Barichi átene kana exanaein pomonae Judá nakuapiwi átene exanéibatsi. Matáütano bárapo matakábitha jüntükoyene naitaübiya itawetsin daxita nákuang jiwi. Matáütano barapomonae átene kana exanaein pomonae xua abe éxana. Matáütano kana exanaein xua Jerusalén tómara penaexanaewa, po tómara peaiñakuí tómara tsane ichaxota poponaein. Matáütano beta eenaein Judá nakuapiwi, jei Nakom xua barapomonae jumenótatsi.

**Meje yábara poxonae Joacaz, bapoxonae irü xua Joás,
bapoxonae irü xua Jeroboam II,* itorobiya éwata Efraín nakua,
írürü poxonae Amazías Judá nakua itorobiya éwata**

(2 Reyes 13.1—14.24; 2 Crónicas 25)

Jehú pong Efraín nakua itorobiya peewatsin tüpa. Poxonae bapong tüpa, ekeicha pexanto xuya pekoutha tanaexánatsi, pong nakua itorobiya peewatsin, pong pewüng Joacaz. Joacaz itorobiya éwata Efraín nakua diecisiete po weibe. Bapong ekeicha írürü wüünae jaintapona xua oro nain nakomüng xua vaca pebtong kanaxoba, icha báyatha ichamonae ichi pomonae itorobiya éwata Efraín nákuatha xua wüünae jainta oro nain nakomüng.

Bárapo dapaetha, barapoxonae Nakom kópata xua bara Hazael pong Siria nakua itorobiya peewatsin amanayabina barapomonaetha poxonae naba. Efraín nakuapiwi aiña weithang bewa Hazael katsinchi pong Siria nakua itorobiya peewatsin, po pekakomokáe parátixi Efraín nakuapiwi jehebapona xua írürü pexanto tatsi pekatsiwa tsainchi, pong pewüng Ben-adad II.

Íchitha Joacaz pong nakua itorobiya peewatsin baxua yábara wüüka Nakomtha. Barapoxonae Nakom itoroba pebin pong Efraín nakuapiwi yawénatsi xua barapomonae peamanayabiwa tsane pomonae Siria nakuapiwi.

* Poxonae “II”, jei, yábara kaunúnuta pong xua kotakaya nakatsiwa ichi be iche: Jeroboam II, ápara pong xua kotakaya nakatsiwa. Ichüng Jeroboam pong kopiya nakatsiwa.

Poxonae Joacaz tüpa, ekeicha pexanto xuya pekoutha tanaexánatsi, pong nakua itorobiya peewatsin, pong pewüing Joás. Joás itorobiya éwata Efraín nakua dieci-seis po weibe. Yawa bapong wüünae jainta oro nain nakomüing xua vaca pebtong kanaxoba.

2

Pírapae barapoxonae, poxonae xua Joás tamrópata pítaba xua itorobiya éwata Efraín nakua, Amazías, pong Joás pexanto tatsi, bapong kana éxanatsi xua itorobiya éwata Judá nakua. Bapong Amazías, Joás pexanto tatsi, po Joás pong báyatha tüpa, pong xua Judá nakua itorobiya éwata báyatha. Bapong Amazías itorobiya éwata Judá nakua veintinueve po weibetha. Bapong xaniwaicha peexanaein yawa pejüntükoyene wüünaein, íchitha yawa éxana pokuikoyenein xua abe.

Pokuikoyenein xua bapong éxana, kae koyene xua bapong éxana poxonae aena tamrópata pítaba xua Judá nakua itorobiya éwata, bapong najumekaitoroba xua ayunbe pebinbe pebexubíwatsibe, pongbe xua báyatha Joás paxa tatsi tabexotsi. Íchitha jopa jutebichi barapongbe pía pexui tatsi tsipéi Nakom pía peitorobi koyenéwatha paeba xua pinae jopa bewa pewowi jutebichi xua poxonae paxa jiji tatsi abe exaneiba.

Barapoxonae Amazías kaetuta penawabchüü-exaneibiwi xua naba peexanaenexa Edom nákuatha. Yáwano bapong wábano ichamonae penawabchüü-exaneibiwi pomonae xua Efraín nakuapiwi xua peyawenaewa tsainchi xua báraxua yábara matómata xua pekakomokáe paratixitha.

Íchitha pong Nakom peitorobi jume pepaebin, Nakom itoroba. Bapong patopa xua Amazías yaputane exainchi xua pinae Amazías jopa yawenáe tsainchi Nakom icha bapong punajinómpatsi bárapo penawabchüü-exaneibiwi xua Efraín nakuapiwi. Daxota Amazías pía tómara bepu-itorobiya xua Efraín nakua bepu-itorobiya. Barapomonae bichokono anáepana xua daxota poxonae kaibe iyiya abe éxana aiña tómarang, po tómarang ena Judá nákuatha.

Amazías yawa pía penawabchüü-exaneibiwi tatsi amanáyaba xua naba éxana Edom nakuapíwitha. Íchitha Amazías éxana pokotsiwa jopa bewa exanáe. Bapong Jerusalén tómara beya kápona ibo nakomüing po ibo nakomüing Edom nakuapiwi wüünae jainteiba. Bekein Amazías yaputane xua bárapo ibo nakomüing jopa itaküüpaetsi xua Edom nakuapiwi yawénatsi, xua peamanayabiwa poxonae naba éxana Judá nakuapíwitha, íchitha Amazías duwéi juteba xua be ofrenda matawüing xua bárapo ibo nakomüing nexa.

Néxata Nakom itoroba pong peitorobi jume pepaebin xua bapong Amazías petsipaebinéxatsi xua Nakom bichokono Amazías kasébatsi, xua Amazías baxua peexanaexae. Barapong, pong Nakom peitorobi jume pepaebin, paeba xua pinae Nakom tüpa exanaena bapong. Bapoxonae bapong naetsirikua, tsipéi Amazías pong nakua itorobiya peewatsin namanáichaba xua pía bexuichi.

3

Pírapae, Amazías tatina carta, Joás tatínatsi pong Efraín nakua itorobiya peewatsin. Amazías yábara tsipaeba bapongtha xua naba peexanaenexa xua poxoru penawabchüü-exaneibiwi xua Efraín nakuapiwi poxonae kaibe nawibiya piabong beya bichokono abe éxana aiña tómarang, po tómarang ena Judá nákuatha.

Joás jumenota bapongtha xua bewa naba exanáe Efraín nákuatha, tsipéi Efraín nakuapiwi amanayabina Judá nakuapíwitha poxonae naba éxana. Yáwano tsipaeba xua jopa bewa nantanaxeinae xua Judá nakuapiwi itakúüpatsi xua peyotsiwa aiña tomarangpiwi saya meisha poxonae xua Edom nakuapiwi amanayabéibatsi poxonae naba exainchi.

Amazías jopa jumenaitaewatsiyo pokotsiwa xua Joás paeba. Amazías daümetha kaetuta pía penawabchüü-exaneibiwi yawa bara pona xua naba peexanaenexa Efraín nakuapíwitha.

Efraín nakuapiwi amanáyaba xua penabiwa. Daxota Efraín nakuapiwi abe éxana kae muxunene xua Jerusalén tómara peyaputoxorota dukuáewatsi. Yáwano barapomonae daxita nota pekakomokáe parátixi. Daxítano nótano xua xuang bichokono aiña matoma xua xuang Nakom piabotha xua pin bo xeina. Daxítano nótano xua xuang xeina Amazías piabotha xua pin bo. Barapomonae daxita bára-xuang Samaria tómara beya kápona. Bárapo koyeneya Nakom tüpa éxana xua Amazías wüünae pejainchixae nakomüng, po nakomüng jopa xaiñeyo.

4

Bárapo dapaetha, Eliseo átene, pong Nakom peitorobi jume pepaebin. Eliseo yaputane xua bapong nama imoxoyo tüpáenaba. Barapoxonae Eliseo tsipaeba, Joás tsipáebatsi, xua Nakom Efraín nakuapiwi yawenaeinchi xua peamanayabiwa tsane Siria nakuapíwitha poxonae naba éxana.

Poxonae Eliseo tüpa, bapoxonae Joás pong nakua itorobiya peewatsin irü pía penawabchüü-exaneibiwi tatsi bara amanáyaba, Ben-adad II pía penawabchüü-exaneibiwi tatsi amanayabapéntatsi, pong Siria nakua itorobiya peewatsin.

Poxonae Joás tüpa, pexanto xuya pekoutha tanaexánatsi, pong nakua itorobiya peewatsin, pong pewüng Jeroboam II. Jeroboam II, Efraín nakua itorobiya éwata cuarenta y un po weibe. Barichi bapong nakomüng wüünae jainta, po nakomüng xua oro nain xua vaca pebtong kanaxoba, po nakomüng írürü báyatha wüünae jainta ichamonae, pomonae Efraín nakua itorobiya peewatsiwi. Barapong Jeroboam II bichokono peyapusúü itorobi koyenewa xeina.

Barapoxonae weya xua poxonae Joás tüpa, Amazías pong Judá nakua itorobiya peewatsin, bapong áwiya aiña wei pópona, beya poxonae ichamonae bapong pebürüya yábara kanamataxéinatsi xua pebexubiwa tsainchi. Bara bapong bexotsi. Poxonae Amazías tüpa, xuya pekoutha pexanto tanaexánatsi, pong nakua itorobiya peewatsin, pong pewüng Uzías xua icha wüng Azarías.

Meje yábara poxonae Jonás tsipaeba pongtha, pong Efraín nakua itorobiya peewatsin, yawa poxonae yábara kueikueijeji xua Nakom abe peexanaewa tsane Nínive tómara

(2 Reyes 14.25; Jonás 1—4)

Poxonae Jeroboam II itorobiya éwata Efraín nakua, barapoxonae poponarü pong pewüng Jonás pong Nakom peitorobi jume pepaebin. Nakom itoroba, Jonás itoróbatsi, xua Jeroboam II petsipaebinéxatsi pongxae Efraín nakua itorobiya peewatsin, xua Nakom tapáebatsi jeye:

—Xam Jeroboam II amanayabíname aiña penabiwang. Matáütano ekeicha kaewa ira kapanenebiyam tsane, po irang báyatha ichamonae pákata nota, po

irang xua paiña irang kaena báyatha, xua po irang Efraín nákuatha ena, jei Jonás xua Nakom tapáebatsi.

Bara baxua éxana. Nakom Jeroboam II yawénatsi xua daxota Efraín nakua ekeicha kaewa pexeña nakua náexana, xua nawita xeina.

2

Kaentakábitha Nakom itoroba, Jonás itoróbatsi Nínive tómara beya, xua pepa tómara, xua Asiria nakua pía pepa tómara tatsi. Daxota Jonás bara beya bekein itoróbatsi xua petsipaebinxexa bárapo tomarapíwitha xua Nakom petatsipaebíwatsi tsainchi jeye:

—Jonás inta jande Nínive tomarapiwi: ‘Nakom abe pákata exanaena paiña tómara xua Nínive tómara, tsipéi pomonae xua bárapo tómaratha jinompa bichokono abe peexanaewi’, inta jande, jei Nakom.

Íchitha Jonás aichaxaibi xua peponaewa baraxota. Jératha nontabiya po naetha, po nae pin nae, po nae xua bara tajü weya pona xua ichaxota Nínive tómara eka. Bapong Jonás najeye:

Icha tajü ponaein, Nakom jopa netáe tsane, najéi.

Íchitha Nakom yaputane pokotsiwa xua Jonás éxana. Daxota Nakom itoroba xua bichokono pin joibo xua yawa ema. Néxata daxita pomonae xua jératha pona bichokono yábara junuwa bárapo joibo. Bapomonae jeye:

—¿Jintam metha abe éxana xua daxota bárapo joibo nákata patopa? jei.

Néxata barapomonae ibótixi bebeya xua pía yaputaetsi pong xua abe éxana xua daxota pin joibo. Poxonae barapomonae báraxua éxana, barapoxonae barapomonae yaputane xua ápara bapong Jonás abe éxana. Ichamonae Jonás yábara yáñabatsi jeichichi:

—¿Eta pokotsiwara xua éxaname xua abe?

Bara Jonás jumenota barapomonaetha jeye:

—Ápara bekein Nakom jumataya ponang, jei.

Barapoxonae Jonás kui-itoroba barapomonae xua bepa pinae ménetha xoyaeinchi xua pin mene xua marmene. Poxonae aena, barapomonae aichaxaibi xua baxua peexanaewa. Íchitha bárapo joibo xua yawa ema bichokono ekeicha abe tsóponae beyakaincha xua kopiya.

Barapoxonae barapomonae yaputane xua bara nama jopa peitaküüpaewa tsainchi xua penakapanenebiwa tsane. Matapaiña barapomonae juntukuru Jonás xoyatsi ménetha, xua pin marmentha. Kaena naiña barapoxonae bárapo joibo xua yawa ema yainjei tsanaya. Daxita pomonae xua jératha pona bara yaputaerüküpa xua Nakom pong xaniwaicha peayapusúüng.

Poxonae Jonás ménetha jopiya, Nakom éxana xua Jonás pekiyanaewa tsainchi duwein, pong bichokono piño. Jonás bárapo duwein pekotsórotha eka tres po matakabibetha, matakábintha tsaibi yawa merawintha tsaibi. Poxonae Jonás bárapo duwein pekotsórotha eka, bapong tsipaeba Nakomtha, jeye:

—Jako Nakom xua inta itoróbame duwein xua tana nekapanepaewam xua jopa tabunopaewa tsane, jei Jonás.

Néxata Nakom itoroba duweintha xua Jonás taetabotha peyakabaxubinéxatsi. Bara bárapo duwein Jonás yakabaxotsi. Baraxota, Nakom ekeicha Jonás tsipáebatsi xua bewa pinae ponaena Nínive tómara beya. Barapoxonae nama Jonás éxana

pokotsiwa Nakom itoroba. Bara Jonás pona Nínive tómara beya, yawa bárapo tomarapíwitha jeye:

—Poxonae cuarenta po matakábibe yapukaewina, Nakom kaewitaxubina Nínive tómara, jei Jonás.

Poxonae Nínive tomarapiwi báraxua jumetane, barapomonaе bichokono jüntü-koyene wekoyéi. Néxata pong nakua itorobiya peewatsin tsipaeba daxita barapomonaetha jeye: “Xua abe paéxaname pana nakuibarapende, maisha yábara pana najainbore. Nakomtha pawúükare xua Nakom jopa kaewitaxuba peexanaenexa po tómare xua Nínive tómara”, jei bapong.

Nakom tane bárapo jiwi xua barapomonaе bichokono wekoyéi poxoru aura xua abe peexanaexae báyatha. Barapoxonae Nakom juntukuru yawena barapomonaetha xua pokotsiwa pewüükaexaetsi xuano xua jopa pekaewitaxubiwa tsane Nínive tómara.

3

Jonás bichokono anáepana poxonae tane xua Nakom beta taéxana, xua Nínive tomarapiwi beta taéxanatsi. Jonás nantanaxeina xua Nakom bewa meisha beta taéxanae, xua Israel pía pemómoxi susato jiwi tatsi bewa beta taexanaetsi. Daxota Jonás jeye Nakomtha:

—Xang báyatha yaputang pokotsiwa bexa exanáename, daxota xang báyatha naetsiriwang jératha, xua pin nae xua báraxua neexanaexae tsane. Yaputang xua xam jiwi neyábara jüntükuiwüüinaein, xuano xua jiwi neyábara kuijüntemainein bin xua abe pía peéxanae koyenein tatsi. Xang nantaxeinang xua mexeya ítara kaewitaxubinamewe jántokuae barapomonaе xua be dobiwi, xua icha nakuapiwi xua bichokono abe peexanáewixae. Bichokono anáepanang. Ichichipang bichokono xua tatüpaewa. Daxota maisha nebexore, jei Jonás.

Nakom jumenota, Jonás jumenótatsi jeye:

—Bara xaniwaicha éxanang poxonae beta taéxanang barapomonaе poxonae yábara kuijüntemainang abe pía peexanaewang bárapo Nínive tomarapiwi, po tómara xua pepa tómara.

Meje yábara poxonae Amós kueikueijei Nakom Pejume Diwesi Efraín nakuapíwitha, pong Nakom peitorobi jume pepaebin

(Amós 1—9)

Poxonae po dapaetha Jeroboam II itorobiya éwata Efraín nakua, bapoxonae Nakom diwesi itoroba Efraín nakuapiwi nexa xua poxonae itoróbatsi pong Nakom peitorobi jume pepaebin, pong pewüng Amós. Amós tapaeba xua Nakom tapáebatsi barapomonaetha jeye:

—Nakom báyatha paeba jeye: ‘¡Pajumetaema, paxam pomonaе pamxaem Israel pía pemómoxi susato jiwi tatsi pam! Paiña amo susato jiwi xote po írathe káponang xua poxonae Egipto nakua wérena káponang. Ápara xang paka itapétatsi xua daxita nakuangpiwi pexantha tatsi. Paxam pa-aichaxaibim xua paiña neexanaewa pokotsiwa xua tapaka itorobíwatsi, daxota abe paka kana exanaeinchi. Yábara yaputane exanaein xua tamonaе pomonaе taitorobi jume pepaebiwi, pokotsiwa xua bexa exanaein. Bapoxonae payaputáename xua xang ápara pongxaein daxita barapokotsiwang éxanang’, jei Nakom, jei Amós.

Ekeicha Amós tapaeba, xua Nakom tapáebatsi barapomonaetha jeye:

—Ekeicha Nakom jeye: ‘Xang itorobikaein pong paiña nepaka kaitafáetabi jintong xua patopaena paiñaxantha yawa paka amanayabina poxonae naba paka éxana. Kaena báyatha paka éxanatsi xua bichokono pajáinpame. Yawa pákata itoróbatsi xua jopa dunaeyo ema. Yawa pákata itoróbatsi peatenewa, po peatenewa xua pinmonae xeina, yawa pichiwang xua xane paiña pexaewang, xua pábitha paúbame. Íchitha áwiya pa-aichaxaibim xua paiña neexanaewa pokotsiwa xua tapaka itorobíwatsi bara bekein patáneme daxita xua xuang poxonae baxua éxanang. Daxota metha wüünae xua yábara paiña nenakuixainwaetsiwa xua átene paiña nepákata exanaewa tsane xua pokotsiwa itorobin xua paxam nexa. Paiña nepaka kaitafáetabi jiwi paka jíwana jutebina pinmonae. Poxonae báraxua exanaena pomonae jinompa Efraín nákuatha werawerakaena’, jei Nakom, jei Amós.

2

Ekeicha Amós tapaeba, xua Nakom tapáebatsi barapomonaetha jeye:

—Ekeicha Nakom jeye: ‘Icha paichichípame xua ekeicha kaewa beta paiña nejinompaewa tsane, jame bewa wüünae tapana nejainchiwam xua poxonae icha nakomüng aibi, po nakomüng xua xaniwaicha aibi. Paka kasébatsi tsipéi ichamonae jopa xaiñeya paiña netaexanáe jiwi pam. Matáütano peabe jiwi pam. Yawa jopa xaniwaicha paiña nepaebi jiwi pam. Barichi ichamonae jopa pamuxuwetsim, pomonae xua abe peéxanae jiwi. Pomonae peakopeibí jiwi pamuxuitoróbame nawita. Yawa abe pakana éxaname xua kopei xeinaewi paiña nenaexanaewa tsane barapomonaexae. Bara yaputang pokotsiwa xua paéxaname. Exanaein xua bárapo pekakomokáe parátixi jopa paka jüntükoyene weiweina exanáe tsane xua báyatha pakáibame peakopeibí jiwi. Paxam paichichípame xua daxita jiwi yábara paka yaputaena xua poxonae wüünae patanewüünae jainteibiwam, yawa poxonae xua pakaponéibame duwéi xua be ofrendang matawüng. Íchitha bárapo ofrendang matawüng aichaxaibin tsipéi jopa pajüntükoyene wüünaem poxonae paéxaname bárapo ofrendang matawüng. Icha paxaiñam xua paiña tana newüünae jaintichi maisha patsita jüntükoyene wüünáeibare ichamonae, yawa xaniwaichiya pata éxande daxita jíwitha’, jei Nakom, jei Amós.

Ekeicha Amós tapaeba, xua Nakom tapáebatsi jeye:

—Ekeicha Nakom jeye: ‘Daxita matakabin tsaibi nakomüng wüünae pajainta-póname, po nakomüng jopa xaniwaichiyo, daxota paka itawetsinchi po ira weye yawa pajinompáename ichaxota po ira tajü beya. Daxita pomonae xua kopei xeinaewi náexana, xua poxoru pemuxuitóroba dubenanaebiyaexae ichamonaetha, bapomonae kopiya bebang tsane. Barapomonae aichaxaibin tsipéi barapomonae bichokono peatsakaewi tha daxota átene kana exanaetsi. Barichi Jeroboam II pi-matabüxüyo tatsi tha kaewitaxuichi. Daxita altar matawüng ichaxota duwéi paju-tébame xua be ofrendang matawüng xua icha nakomüng nexa, daxita baxuang abe tsane. Daxita pekóu tsane, bara xubin’, jei Nakom, jei Amós xua Nakom tapáebatsi.

3

Sacerdotemonaepin, pong tanakuita oro nain nakom xua vaca pebto kanaxoba, bapong pópona Betel tómaratha. Poxonae bapong jumetane pokotsiwa Amós paeba,

bapong pona ichaxota pong nakua itorobiya peewatsin xua peyábara paebinexa báraxua. Bapong yábara tsipaeba pokotsiwa xua Amós namchi xua Nakom exanaena Efraín nakuapíwitha. Barapoxonae bapong kotakaya Amós tsipáebatsi jeichichi:

—Bárapo diwesi tsipáebare Judá nakuapíwitha. Xote jopa tsipaebinde bárapo diwesi, jei barapong.

Néxata Amós jumenota bapongtha, jeye:

—Xang ápara kaena báyatha pongxaein pong oveja taéwatsin, íchitha ápara Nakom neitoroba xua Pejume Diwesi takueikueijang Efraín nakuapíwitha.

”Xam nejumematawéntame xua baxua tayábara paebaponaewa. Xam bewa yábara yaputaem xua jiña pexui jutebinchi xua saya jutebinchi. Barichi jíñowa kana exanaeinchi be powa xua pebiwi pejeitekaewayo. Jiña ira ichamonae kata natsikobetsana exanaeinchi. Matáütano kakaponaena icha nakua beya ichaxota xua netüpaewa tsane.

”Nakom kana exanaena xua daxita Israel pía pemómoxi susato jivi tatsi, pomonae Efraín nakuapiwi, icha nákuangtha pejinompaewa tsane xua poxoru báyatha jopa peexanaexae pokotsiwa Nakom itoroba, jei Amós.

4

Pírapae Nakom tsipaeba, Amós tsipáebatsi, jeichichi:

—Átene kana exanaein pomonae pexu pekaenaeteibiwi, pomonae jopa ichichi-paeyo fiesta matakabin, yáwano jopa ichichipaeyo penafinakáewatsi matakabin xua jopa petaayapubewa tsainchi xua kanameicha pexun pekaenaeteibiwa tsane. Barapomonae pexun yawa pekakomokáe parátixi naerabiya pesabeiba poxonae kaenaeteiba. Barapomonae pekakomokáe parátixi pinwa wüüka bekein saya tsiwiyo pexu kata jíwitha. Daxota barapomonae toxeinchiya nawita xeina.

Barichi Nakom jeye:

—Icha matakábitha tsane Efraín nakuapiwi bichokono peichichipaewa tsane xua pejumetaewa tajume diwesi íchitha jopa baxua jumetáe tsane. Barapomonae bichokono ichichipaena xua tana neyaputaewa tsane íchitha jopa neyábara yaputáe tsane. Daxitang bara baxuang tsane xua wüünae pejaintaponáewaxae po nakomüng jopa xaiñeyo. Barapomonae bichokono átene tsane. Dapo nakua aibi tsane xua ichaxota barapomonae itakúüpatsi xua pepanenebiwa xua jopa peatenewa tsane.

”Bekein bara Efraín nakua abe exanaein, dáichitha jopa kopatsin tsane xua daxita pewerapaewa. Jiwi pomonae abe peexanaewi pomonae jeye: ‘Ápara Nakom jopa bichokono nákata abe exanáe tsane’, jei, bara barapomonae werapaena. Dáichitha jopa kopatsin tsane xua ichamonae jopa pebarichiwa tsane.

”Barapoxonae David pía pemómoxi susato jivi tatsi ekeicha naexanaena, pomonae nakua itorobiya peewatsiwi. Bárapo matakábintha ekeicha kaewa kaponaein pía nákuatha pomonae Efraín nakuapíwixae. Barapomonae ekeicha kaewa beta jinompaena Israel nákuatha. Bápana barapomonae ekeicha jopa itawetsin tsane pía nakua weya.

Meje yábara poxonae pong pewüng Uzías itorobiya éwata Judá nakua

(2 Reyes 15.1-7; 2 Crónicas 26)

Poxonae írürü Jeroboam II itorobiya éwata Efraín nakua, barapoxónaerü pebin, pong pewüng Uzías xua icha wüngno Azarías, xua pong Amazías pexanto tatsi,

bapong kana éxanatsi pong nakua itorobiya peewatsin xua Judá nákuatha. Bapoxonae bapong itorobiya éwata Judá nakua cincuenta y dos po weibetha. Bárapo Judá nakua itorobiya peewatsin bichokono pewüinaein.

Poxonae Uzías pewowin, barapong jumekowüntsiya éxana pokotsiwa Nakom itoroba. Bara Nakom yawena, Uzías yawénatsi, xua peamanayabeibiwa aiña penabiwang. Uzías Jerusalén tómara bichokono ayapusúü éxana xuano xua barichi icha tómarang yaputoxorotaduba. Báraxua éxana Uzías xua pía peaitafaetabí jíwichi jopa peitaküüpaewa tsainchi, xua peamanayabiwa tsane Judá nakua.

Dáichitha bapong Uzías poxonae kopeixeinaein náexana, xuano xua bichokono peayapusúü itorobiwa xeina, bapong bichokono wüünae najainta xua ichamonae áebatsi. Barapong írürü éxana xua abe. Barapong juntukuru pona Nakom piabotha tatsi, po bo pin bo, petautsinexa incienso nain xua túxusi wüünae xua Nakom nexa. Ichamonae pomonae sacerdotemonae jíwana bekein jeye bapongtha:

—Jopa báraxua exanaeinde. Saya meisha sacerdotemonae kópatatsi xua petautsiwa incienso nain xua túxusi wüünae xua poxoru Aarón pía pemómoxi susato jiwí jíwanaxae tatsi, jei barapomonae.

2

Íchitha Uzías jopa jumenaitomatsiyo. Bapong kaseba barapomonaetha. Daxota Nakom átene kana éxana bapongtha xua barapoxonae kaena naiña Uzías bichokono perüüjoropouna xua perüütsábana xua abe peexanaexae. Uzías bichoina kaena naiña naetsíriwa Nakom píabo tatsi weya, po bo pin bo. Bápana ekeicha jopa kopatichi xua peponaewa Nakom piabotha tatsi, po bo pin bo, xua poxonae bapong pópona. (Nakom pía peitorobi jumekoyenewang tatsi itoroba xua ichüng jopa kopatichi xua peponaewa Nakom piabotha pókotsin xua bichokono perüüjoropouna xua perüütsábana.)

Matáütano bapong Uzías jopa kopatichi xua penakuichiwa xua nakua itorobiya peewatsinxae. Daxota Uzías pexanto tatsi, pong pewüng Jotam, bapong bewa exaena paxa tatsi pía penakuichiwa tatsi pewünaeya xua paxa tatsi tüpaena. Poxonae tüpa, Jotam xuya paxa pekoutha náexana, pong nakua itorobiya peewatsin.

Meje yábara poxonae pong pewüng Oseas, pong Nakom peitorobi jume pepaebin, kueikuejei Nakom Pejume Diwesi Efraín nakuapíwitha yawa Judá nakuapíwitha

(Oseas 1—14)

Poxonae Jeroboam II itorobiya éwata Efraín nakua, írürü xua Uzías, pong icha wüng Azarías, itorobiya éwata Judá nakua, barapoxonae Nakom itoroba pong Nakom peitorobi jume pepaebin, pong pewüng Oseas. Daxota Oseas itoróbatsi xua bapong pekueikuejeinexa Nakom Pejume Diwesi Efraín nakuapíwitha irü Judá nakuapíwitha. Bapong aiña wei kueikuejei Nakom Pejume Diwesi. Bapong áwiya kueikuejei tsóponae bárapo diwesi poxonae pong pewüng Ezequías Judá nakua itorobiya éwata.

Nakom itoroba, Oseas itoróbatsi, xua bapong penakoyobiwa tsane yábüyo, powa kaena báyatha saya peweiweinaewayo aiña pebíwitha. Báraxua Nakom itoroba xua Israel pía pemómoxi susato jiwí tatsi petsita-itapeiñaxeinaenexa tsainchi xua barapomonae poxoru aiña nakomüng pexeinaexae. Daxota jopa beta taexanaeyo

Nakom, po Nakom pepa Nakom. Barichi barapowa poxoru aiña pebiwi pejeichixae daxota jopa beta taexanaeyo pisheuri.

Poxonae Oseas barapokotsíwayo pita, bara bapoxonae barapowa pexuyo búpana taékatsi, yawa bara tanakatsíwatsi pebinwüüto. Nakom tsipaeba, Oseas tsipáebatsi jeichichi:

—Bárapo nexanto wüngdure po wüng: ‘Jezreel’, jei. Barapong daxita kaewita-xuina pomonae Jehú piamonae matabüxüyo tatsi, pong Jeroboam II paxa tatsi, pía pamo tatsi. Baxua exanaena tsipéi kaena báyatha Jehú pinmonae juteba, pomonae Jezreel tomarapiwi, po tómara pepa tómara. Yáwano bapong nexanto Jezreel exanaena xua werawerakaena Efraín nakuapiwi, jei Nakom.

Pírapae Oseas píowa tatsi ekeicha tanakatsíwatsi xua yábüyo. Nakom jeye:

—Oseas nexantiyo wüngdure po wüng: ‘Jopa antobetsi’, jei, tsipéi ekeicha jopa taantobewa tsane Efraín nakuapiwi, jei Nakom.

Ekeicha kotakaya bapowa tanakatsíwatsi icha pexuyo pebinwüüto. Nakom jeye:

—Oseas wüngdure bárapo nexanto po wüng xua jei: ‘Jopa tamonaeyo’, jei, tsipéi Efraín nakuapiwi jopa tamonae naexanáe tsane, pomonae taitapetsiwa, jei Nakom.

2

Ekeicha Nakom jeye:

—Kaentakábitha pinmonae jinompaena pomonae Israel pía pemómoxi susato jiwí tatsi. Barapomonae wüngdutsinchi jei tsainchi: ‘Nakom pía pexui tatsi, po Nakom asiüü pópona’, jei tsainchi. Bárapo matakábintha tsane Judá nakuapiwi irü Efraín nakuapiwi kaemonae naexanaena. Bárapo nakuapiwimonaebe bara kae nakua tsane. Yawa pedangwéi jiwí tsane, jei Nakom.

Nakom tsipaeba, Oseas tsipáebatsi jeichichi:

—Efraín nakuapiwi tha átene exanaetsi poxoru barapomonae wüünae jainta po nakomüng jopa xaiñeyo xua poxonae bewa jame newüünae jainchina. Barapomonae abe inta éxana, ichi yábüyo ichi, xua poxonae abe taéxana pía pebintha, poxonae bekein pía pebin beta taexainchi. Barapowa ba pona xua jeita icha pebiwi xua weiweina. Barapowa jopa auriyo xua poxonae pokotsiwa éxana.

”Íchitha kaentakábitha tsane jopa ekeicha átene kana exanaein tsane Efraín nakuapiwi. Bara exanaeinno xua xaniwaicha jinompaena. Barapoxonae barapomonae meisha xang newüünae jainchina. Ekeicha bapoxonae jopa wüünae jainchi tsane nakomüng, po nakomüng jopa xaiñeyo, jei Nakom.

3

Ekeicha Nakom Oseas tsipáebatsi, jeye:

—Oseas, ekeicha kaponde jinsheuri jiña bo beya bekein bapowa ishamaiteka icha pebin. Áwiya antobeinde barapowa. Báraxua éxande xain barapoxonae Efraín nakuapiwi yaputane xua ápara barapomonae áwiya antobein bekein bara barapomonae icha nakomüng xeina xua wüünae pejainteibiwa, jei Nakom.

Néxata Oseas píowa yaboupa xatatabanota botha. Bapong jopa kopatsiyo xua bapowa ekeicha ichüng peishamaitekaewa. Barichi bapong jopa ishamaitekaeyo barapowa.

Baxua Oseas éxana xua barapomonae petsita-itapeiñaxeinaexaetsi xua bárapo Efraín nakuapiwi jopa xeináe tsane, pong Efraín nakua itorobiya peewatsin xua

aiña wei tsane. Matáütano báraxua éxana xua bárapo Efraín nakuapiwi petsita-ita-peñaxeinaexaetsi xua jopa itaküüpáe tsainchi xua Nakom petsitajutebiwa tsainchi duwéi xua be ofrenda matawüng, xua aiña wei tsane, xuano xua jopa xeináe tsane altares matawüng xua ichaxota Nakom wüünae pejainchiwa.

4

Matáütano Oseas yábara tsipaeba barapomonaetha pokotsiwang xua Nakom aichaxaibi, xua xuang éxana bárapo Efraín nakuapiwi. Oseas jeye:

—Nakom paka yábara paebe pinae aiña koyenein paéxaname xua peabe koyenein. Paka yábara páebano xua pinae paxam jopa paexaneibim pokotsiwa pana nayábara tsiwüünae muxudubéibame bapongtha. Jiwi pajutebéibame yáwano pakaibéibame ichamonae piyawang. Ichamonae piowaxi tatsi pata ishamaitéibame.

”Daxota Nakom paiña irang kana exanaena irasaina xuépana tsúrukuae nakua. Ichamonae pomonae paxam jíwana pam náexana sacerdotemonae. Ichamonae náexana pomonae Nakom peitorobi jume pepaebiwi. Íchitha jopa yábara tsita aiñakuichi Nakom pía peitorobi jume tatsi, xuano jopa yábara kuidubiyo piamonaetha bárapo diwesi. Daxita pam wüünae pajáintame naein nakomüng. Matáütano paishamaitéibame powaxi peweiweinaewaxi powaxi xua nakuita ichaxota altar matawüng xua naein nakomüng nexa. Daxota Nakom daxita pam átene paka kana exanaena.

”Barichi Judá nakuapiwi éxana xua peabe koyenein. Daxota barichi Nakom átene kana éxana barapomonaetha. Poxonae pákata ayapubé xua poxonae icha nakuapiwi naba paka éxana, papóname ichaxota Asiria nakua itorobiya peewatsin xua paiña nepaka yawenaenexa, xua poxonae bekein bewa Nakom pawüükaem. Daxita báraxua xuang báyatha Nakom netsipaeba, jei Oseas.

5

Ekeicha Oseas jeye barapomonaetha:

—Bárabü daxita waxainchi yábara tsipaebinchi Nakomtha xua bichokono waanthüthütanéwatsi wayábara yaputaexae xua abe éxanatsi. Bárabü wüükatsino Nakomtha xua wanaka kana exanaewa tsane xua wajumekowüntsiya exanaewa pía peitorobi koyenewang tatsi. Matáütano bapong wüükaeinchi kaewa wajüntükoyene wüünaewa tsainchi yawa waayapusüü jiwi tsainchi.

Bapoxonae Oseas jeye bapomonaetha:

—Nakom netsipaeba jeye: ‘Judá nakuapiwi irü Efraín nakuapiwi bichoina nepenta xua tana nejumekowüntsiwa. Barapomonaetha báraxua éxana ichi be poxonae dono ichi xua baya kaena naiña aibi. Barapomonaetha taitorobang pomonae taitorobi jume pepaebiwi xua barapomonaetha pemuxuwetsiwa tsainchi xua maisha tana nejumenaetaewatsiwa tsane. Xang ichichipang xua nejumekowüntsiya exanaponaena xuano xua tana neyábara yaputaewa tsane beta. Barapomonaetha neyábara nantanaxeina xua bichokono tayábara jüntükoyene weiweinaewa tsane icha netsita juteba aiña duwéi xua be ofrendang matawüng. Íchitha báraxua jopa jichipaeiño xua barapomonaetha éxana. Jame pokotsiwa ichichipang xua maisha barapomonaetha pexeinaewa tsane nantanuweya peyábara nantaxeinae ünthüto xua ichamonae peyawenaewa tsainchi. ¡Bena Efraín nakuapiwi beta jinompa

kana exanokuaein! Íchitha jopa neitaküüpaeyo xua bara takana-ichiwa tsane tsi-péi barapomonae bichokono abe peéxanae jiwi. Barapomonae nantanaxeina xua jopa taeiño pokotsiwa barapomonae éxana. Íchitha xang barapomonae báraxua kuiyaputang pokotsiwa xua éxana. Tha daxota barapomonae átene kana exanae-tsi', jei Nakom, jei Oseas barapomonaetha.

Ekeicha Oseas jeye barapomonaetha:

—Bekein matowa tabebang tsoptioneibi pomonae nakua itorobiya peewateibiwi, íchitha pomonae xuya pekoutha naexaneiba, pomonae nakua itorobiya peewateibiwa, barapomonae bápana jopa yaputaibí xua tana newüünae jainteibiwa. Poxonae barapomonae taayápube tsaibichi xua poxonae naba exanéibatsi ichamonae, barapomonae poneiba icha nákuangtha xua peyaweneibiwa tsainchi, pomonae xua icha nakomüng wüünae pejainteibiwa, po nakomüng xua jopa xaiñeyo. Saya barapomonae yaputane xua wüüka ichamonae xua peyaweneibiwa tsainchi. Jopa barapomonae newüukeibiyo xua tayaweneibiwa tsane. Poxoru barapomonae matha jopa beta yábara nantanaxeineibiyo xua exaneiba, daxota kaena naiña abe exaneiba. Xang bichokono aichaxaibin po nakombe xua oro nainto xua vaca pébtobe kanaxóbabe, xua po nakombe býatha jiwi wüünae jainta Efraín nakuapiwi. Bárapo nakombe bápana jopa naexanáe pepa nakomüng tsipéi ápara jiwi saya kanaüta éxana. Barapomonae pomonae Efraín nakuapiwi jopa neyábara nantanaxeinaeyo. Yawa barapomonae nawita éxana pokotsiwa altar matawüng xua wüünae pejainteibiwa tsane pía nakomüng, po nakomüng jopa xaiñeyo. Daxota icha nakuapiwi itorobin xua bárapo Efraín nakuapiwi átene kana exanebinchi. Matáüta icha nakuapiwi barapomonae pía tómarang weya notebinchi, yawa kaponebinchi icha nákuangtha, xua baraxota pía pexui tatsi tajutebinchi, jei Nakom, jei Oseas jíwitha.

6

Ekeicha pírapae Oseas tsipaeba jíwitha jeye:

—Nakom býatha paeba jeye: 'Poxonae barapomonae beta jinompa kana éxanang, daxua ekeicha barapomonae ichawang nantanaxeina xua wüünae pekana exanaewa pokotsiwang altar matawüng xua wüünae pejainteibiwa tsane pía nakomüng xua jopa xaiñeyo. Daxota barapomonae átene kana exanaein. Methaunxuae Asiria nakuapiwi patsina yawa kaponaena pía nakua beya, po nakom xua oro naintong xua vaca pebto kanaxoba xua wüünae pajáintame. Barapoxonae Asiria nakua itorobiya peewatsin ekeicha matha weya jumawekaxuebina bárapo nakom oro naintong piyawangtha xua xuang pía oro naintong. Barapomonae, pomonae Asiria nakuapiwi, paka kaponaena pía nákuatha xua Asiria nákuatha. Bárapo altares matawüng xua býatha paéxaname daxita abe exanaeinchi yawa pekóu tsane. Bárapo altar matawüngtha xuwina xua xuang sojei. Icha barapomonae exanáetsipa pokotsiwa xua wüünae xuano xua xaiñéi bara barapomonae ekeicha beta jinompa exanaetsipang. Pana newüükare xua tapaka tsita naitüütsiwa tsainchi xua xang ápara pongxaein bara pepa Nakomüng. Yáwano paexande pokotsiwang xua netsita wüünae. Barapoxonae ema pákata itorobinchi paiña íratha. Matáütano ichawang beta pákata exanaeinchi. Paxam saya panantanaxéiname nawita xua bara paka yaéwata paiña nawabchüü-exaneibiwi, poxonae bekein bewa panantanaxeinaem xua bara paka yaéwatatsi xua tapaka yawenaewa tsainchi. Daxota jopa paamana-yabim tsane poxonae ichamonae naba paka exanaena', nejéi Nakom, jei Oseas.

7

Barapoxonae Oseas ekeicha tsipaeba barapomonaetha, jeye:

—Nakom báyatha paeba jeye: ‘Paiña amo susato jiwi, poxonae kapane-pang Egipto nakua weya xua poxonae busikuitaetaeyebé batsi, barapomona kana éxanang xua bara beta pejinompaewa tsane. Xang barapomona yatsikaewa beta taéxanang, ichi be poxonae koxiyüng ichi xua ba poxonae pía pexui beta yawena, xuano xua poxonae pexaewa ba ápata beta, xuano xua poxonae ba beta kuiduba xua pona. Íchitha paxam jopa beta pana nejumekowüntsím, ichi be poxonae ba pexui ichi xua paxa jiwi jopa beta jumekowüntsiyo, xuano xua poxonae paxa jiwi jopa beta tsipaebiyo. Daxota kopatsin xua ichamonae bara paka kaponaena Asiria nakua beya, xuano xua paka kaponaena Egipto nákuatha xua baxota paiña nejinompaewa tsane. Bekein ichawang pákata éxanatsi, íchitha áwiya paka antobetsi. Jopa paka werawérakae exanáe tsainchi. Matáütano kaentakeitha tsane ekeicha kaewa paka kaponaeinchi pepa paiña nákuatha. Daxota paxam bewa ekeicha kaewa pana nejumekowüntsím, xuano xua bewa beta painta exanaem, xuano xua bewa xaiñeya paexanaem. Paxam poxonae báyatha Egipto nákuatha pajinóm-pame xua poxonae paka busikuitaetaeyebaba, barapoxonae pana newüünae jaintéibame. Íchitha poxonae kopei xeinaewi pana naexáname, xuano xua peayapusúü jiwi pana naexáname, barapoxonae paiñakoutha wüünae pana najáintame xua ichamonae paéebame, yáwano barapoxonae pana neyábara jüntemáiname. Daxota kopatsin xua bara paiña nepaka kaitafáetabi jiwi átene paka kana exanaena. Matáütano kana exanaein xua Samaria tómara, po tómara xua pepa tómara xua Efraín nákuatha, bárapo tómara saya tómara tsane. Dáichitha icha matakeitha tsane paka kapanenebiyaeinchi xua poxonae ichamonae naba paka éxana, xua barapoxonae jopa pajíwana tupaem tsane’, nejéi Nakom, jei Oseas.

8

Oseas ekeicha jeye:

—Maisha Nakomtha payábara wúükare xua pajande: ‘Nakom paaurang poxoru payábara yaputang xua jopa pata exanaewa pokotsiwa pana itoróbame. Nama ekeicha jopa pata wüünae jainchiwa tsane po nakomüng xua jopa xaiñeyo’, pajande Nakomtha. Nakom báyatha paeba jeye: ‘Bexa tsane Efraín nakuapiwi yawenaein, yáwano yawenaein xua bárapo nakuapiwi nawita xeinaena. Bárapo dapaetha bárapo Efraín nakuapiwi jopa wüünae pejainchiwa tsane po nakomüng xua jopa xaiñeyo’, jei Nakom. Icha bara paxaiñam xua pana najüntükui wüü-náetame, bewa pana nejumenaetaewatsím pokotsiwa xua tapaka tsipaebíwatsi, tsipéi Nakom pía jüntübükoyenein tatsi bichokono wüünae. Pomona xua Nakom pejumekowüntsiwíchi, barapomona ichichipa nawita xua beta pejinompaewa icha Nakom ichi. Pomona xua peexanaewi pokotsiwa Nakom itoroba pía peitorobi koyenéwangtha, bara barapomona beta wüünaeya jinompa xua Nakom peyawenaponaexae. Ichamonae pomona xua abe peexanaponaewi, bara barapomona jopa beta wüünaeya jinompaeyo, xua Nakom jopa peyawenaponaexae barapomona, jei Oseas.

**Meje yábara pong pewüing Isaías, pong Nakom peitorobi jume
pepaebin kueikuejei Nakom Pejume Diwesi Judá nakuapíwitha**

(Isaías 1—6)

Uzías, pong icha wüing Azarías, aiña wei itorobiya éwata Judá nakua. Baraponae Nakom itoroba pong Nakom peitorobi jume pepaebin, pong pewüing Isaías. Nakom itoroba, Isaías itoróbatsi, xua Isaías pekueikuejeinexa Nakom Pejume Diwesi Judá nákuatha, xuano xua po nakuangpiwi ichaxota imoxoyo Judá nakua kakuita énatzi. Isaías bárapo Judá nakuapíwitha jeye:

—Nakom báyatha paeba jeye: ‘Daxita paxam, pomonae abe peéxanae jiwi pam, xua jopa pana nejumenaitaewatsim pokotsiwa paka itoróbatsi. Beta xaniwaicha pákata exainchi, ichi be poxonae koxiyüing ichi xua poxonae ba pía pexui beta taéxana. Painta abe éxaname, ichi be poxonae ichamonae ichi xua poxonae ba paxa jiwi jopa beta taexanaeyo. Pákata itorobéibatsi daxitang pokoyenein pákata ayapubé tsaibi. Saya meisha Jerusalén tómara paxéiname ichaxota pajinómpame. Bekein báraxua paka tsiéxanatsi íchitha áwiya jopa pana nejumekowüntsime. Nama dapókotsi koyenewa aibi xua tapákata exanaewa tsainchi xua daxota matapaiña paiña nejumekowüntsiwa tsane. Bichokono aichaxaibin po duwéi xua pana netsita jutebéibame xua be ofrendang matawüing. Báraxuang jopa netsita aiñakuiyo poxonae báraxua pana netsita exanéibame. Aichaxaibin fiestang matakabin, po matakabin xua bekein pana netsita exanéibame. Matáütano jopa paka jumenaitomatichi poxonae pana newúükame, tsipéi abe paexanapóname. Maisha beta paexande, pana nakuibarapende xua abe paiña neexanaewang. Xaniwaicha pata éxana dubenanaebíyama ichamonae, pomonae xua peakopeibi jiwi. Bekein bichokono abe paexanapóname, icha pana nakuibarapéntame xua xuang daxita abe peéxanae koyene paexanapóname bara beta pajinompáename. Íchitha icha jopa paexanaponaem tsane pokotsiwa xua paka itoróbatsi, pákata jopa yapuwüünae tsane. Pomonae báyatha Jerusalén tómaratha jinompa netsita betiya exaneiba, yáwano xaniwai-chiya taexaneiba ichamonaetha. Íchitha pomonae ánoxuae jinompa, barapomonae namawainta xua ichamonae pejutebíwatsi. Matáütano barapomonae jumejejei tsaibi xua penotébiwa pekakomokáe parátixi xua naerabiya peexaneibinexa ichamonae nexa. Daxota itorobin pokotsiwa xua bichokono ayapubé xua barapomonae nexa xua penakuidubinexa xua daxota inta betiya peexanaenexa’, jei Nakom, jei Isaías.

2

Ekeicha Isaías jeye:

—Matakabin othopaena, po matakábintha jiwi pinmonae patsina xua daxita nákuang wérena. Barapomonae patsina Nakom piabotha tatsi, po bo pin bo, xua ekeicha bichokono Nakom peyábara yaputaewa tsainchi. Bárapo matakábintha jiwi jopa ekeicha nabi tsane.

”Íchitha xua pewünaeya tsane daxita baxua, Judá nakuapiwi átene kana exanaein xua báyatha wüünae pejainchixae icha nakomüing, po nakomüing jopa xaiñeyo. Bichokono barapomonae átene kana exanaein xua daxota anaya abe exanaena pía nakomüing xua poxonae kuinaenouta xua penantsiyabinexa.

”Jerusalén tomarapiwi irü Judá nakuapiwi bichokono abe peexanaewi ichi Sodoma tomarapiwi báyatha ichi xua bichokono abe peexanaewi. Pomonae

pentakaponaewi nama bichokono abe peexanaewi beyakaincha ichamona, tsipéi barapomona abe kana éxana pomonaetha, pomona peakopeibiwi. Matáütano barapomona kuiduba ichamonaetha xua abe peexanaewa tsane. Íchitha poxona Nakom wétsina xua Judá nakuapiwi átene peexanáewatsi, Nakom yábara jünte-mainaena pomona xua áwiya jinompa xua báyatha abe exanapona.

”Yawa Nakom Jerusalén tómara tsana exanaena xua seikaya Nakom pía tómara tsane, jei Isaías.

3

Pírapae ekeicha Isaías jeye:

—Paxam pomona Judá nakuapiwi pam, pomona jopa beta paexanaem bekein paka yawénatsi nawita. Báraxua paéxaname ichi be uva pabi ichi poxona pebin, pong uva pabi pexeinaein, bekein beta eena, íchitha jopa uvakuéi dubenaeyo. Pong uva pabi pexeinaein daxota juntukuru werawéraka éxana uva pabi.

”Nakom beta pákata éxana, íchitha paxam jopa beta pata exanaem, xuano xua ichamonaetha abe pata éxaname. Barapomona pía irang tatsi pata nótame xua paiña nexainaewa tsane.

”Paiñamona, pomona juezmona, jumejéi tsaibi xua penotéibiwa peka-komokáe parátixi, barapoxona xua naerabiya petaexaneibiwa tsane ichamona nexa pomona pedoutsixae bárapo peka-komokáe parátixi. Báraxuang paiña neexanaexae Nakom kopatsina xua bara icha nakuapiwi naba paka exaneibina, jei Isaías.

4

Poxona po weitha Uzías tüpa, pong nakua itorobiya peewatsin, pong icha wüing Azarías, barapoxona Isaías pona Nakom piabotha tatsi, po bo pin bo. Bárapo botha Isaías tsita naitüütatsi Nakom xua eka pía pexeña ekeibithopáewatha. Isaías tane xua Nakom xeina bichokono peayapusüü itorobi koyenewa. Isaías jumetá-neno xua itabókotha jumedangweya wawái pomona serafinmona matawüing, pomona be matatsunpiwi xua jeye: “Nakom bapong ápara pong jopa pexeinaein abe peéxanae koyenein”, jei serafinmona matawüing.

Néxata Isaías jeye:

—Ápara Nakom átene neexanaena, abe takueikueijeixae xuano xua abe taexanaexae ichi Judá nakuapiwi ichi, jei Isaías.

Néxata Nakom itoroba serafinmonaepin jeye: “Altarjúmatha pire xua isho itareto. Bárapo isho itarétotha Isaías koibojáyabare”, jei Nakom.

Poxona báraxua éxana serafinmonaepin Isaías tsipáebatsi jeye: “Nakom báyatha kayábara jüntemaina pokotsiwa xua abe éxaname, xuano xua pokotsiwa abe páebame”, jei serafinmonaepin.

Barapoxona Nakom jeye:

—¿Jintam itorobin? Yawa ¿jintam painta ponaena xua painta pekueikueijeinexa Tajume diwesi? jei Nakom.

Néxata Isaías jumenota jeye:

—Maisha xang neitoróbare; tha exanaetsi, jei Isaías.

Bara Nakom jejéi. Yawa Isaías itoróbatsi jeye:

—Judá nakuapiwi tsipáebare inta jande: ‘Bekein matowa pajumetaéname Tajume diwesi, bápána jopa payaputaem tsane. Paxam be pomonae pemuxusipanáe jiwi pam, xuano xua be pomonae peitatakiréi jiwi pam’, jei inta jande, jei Nakom.

Ekeicha Nakom tsipaeba, Isaías tsipáebatsi, jeichichi:

—Áwiya Tajume diwesi tsipaebaponde Judá nakuapiwi beya poxonae barapomonae werawerakaena, jei Nakom poxonae Isaías tsipáebatsi.

**Meje yábara poxonae Jotam itorobiya éwata Judá nakua,
irü kotakaya Acaz itorobiya éwata Judá nakua**

(2 Reyes 15.32—16.20; 2 Crónicas 27—28; Isaías 7.1—9.7)

Poxonae Uzías tüpa, pong Judá nakua itorobiya peewatsin, pong icha wüing Azarías, pexanto xuya pekoutha tanaexánatsi pong nakua itorobiya peewatsin, pong pewüing Jotam. Bapong Jotam beta éwata Judá nakua. Bapong jumekowüintsiya éxana pokotsiwa Nakom itoroba pía peitorobi koyenéwangtha. Daxota Nakom kana éxana xua Jotam bichokono peayapusüüwa pexeinaewa.

Bara Jotam amanáyaba amonitamonaetha poxonae naba éxana barapomonaetha. Matáütano bapong Jotam xua aiña tómarang yaputoxórota báraxuang ekeicha dangwéi éxana, xua Judá nákuatha. Matáütano xua Jerusalén tómara yaputoxórota ekeicha dangwéi éxana, ichi báyatha paxa tatsi ichi xua poxonae éxana.

Jotam tüpa poxonae nakua itorobiya éwata xua dieciseis po weibetha. Barapoxonae pexanto xuya pekoutha tanaexánatsi, pong nakua itorobiya peewatsin, pong pewüing Acaz.

2

Bapong Acaz bichokono abe peexanaein. Bapong bichokono jopa exanaeyo pokotsiwa Nakom pía peitorobi koyenéwangtha itoroba. Bapong abe peéxanae koyenein éxana ichi báyatha ichi pomonae Efraín nakua itorobiya peewatsiwi. Matáütano bapong pía pexui juteba xua be ofrenda matawüing xua pía Nakom nexa, po Nakom jopa xaiñeyo.

Nakom kópata xua Siria nakua pía penawabchüü-exaneibiwi tatsi, írürü Efraín nakua pía penawabchüü-exaneibiwi tatsi yota exanaeinchi yawa amanayabinchi pinmonae, po tomarangpiwi xua Judá nákuatha ena. Efraín nakuapiwi pinmonae teikeba Judá nakuapiwi.

Íchitha Nakom itoroba pong peitorobi jume pepaebin, pong pewüing Obed, xua jeye barapomonaetha: “Judá nakuapiwi bara pakópabare xua piabong beya penawibiyaenexa tsipéi Efraín nakuapiwi pam, irü Judá nakuapiwi ápara bara kaemonaepaiña nenaexanáe jiwi pam”, jei Obed.

Bara Efraín nakuapiwi báraxua éxana. Poxonae Acaz itorobiya éwata Judá nakua, edomitamonae jopa ichichipaeyo xua Acaz itorobiya peewatsiwa Judá nakua. Daxota barapomonaepa.

3

Siria nakuapiwi irü Efraín nakuapiwi ekeicha pata Judá nákuatha xua naba peexanaenexa. Yawa Jerusalén tómara yakaincha matawakaicha eena xua Jerusalén tomarapiwi jopa peitaküüpaewa tsainchi xua peponaewa bara weya. Íchitha

Nakom itoroba, Isaías itoróbatsi, xua Acaz petsipaebiwa tsainchi xua pinae jopa junuwí tsane xua Siria nakuapiwi pekuiyainwa xuano xua Efraín nakuapiwi pekuiyainwa.

Isaías tsipaeba, Acaz tsipáebatsi jeye:

—Báyatha Nakom paeba pinae xua ánoxuae Jerusalén tomarapiwi jopa junuwí tsane. Matáütano netsipaeba xua pinae poxonae sesenta y cinco po weibe wétsina pinae Efraín nakua aichane. Yábüyo powa jopa perüünakoyobiyo pebin, barapowa tanakatsíwatsi pexanto. Bárapo pexuyo wüingdútatsi po wüing: ‘Emanuel’, jei, xua yábara kaununutsiya jeye: ‘Nakom naka barü pópona’, jei.

”Pewünaeya xua poxonae pexuyo yaputaena pokotsiwa xua abe yawa pokotsiwa xua wüünae, Asiria nakuapiwi werawéraka exanaena, xua Siria nakuapiwi werawéraka exanaeinchi, xua írürü Efraín nakuapiwi werawéraka exanaeinchi.

”Barichi Nakom yábara tsiwüünae muxuduta xua itorobina ichüing, pong nakua itorobiya peewatsin, pong xua David pía pemómoxi susato jiwi tatsi pongxae nakua itorobiya peewatsin. Barapong, pong ichüing, pong nakua itorobiya peewatsin, Judá nakuapiwi jüntema jinompa exanaeinchi. Bapong bichokono beta exanaena, xuano xua xaiñeya exanaena. Tawüünaeponaeinchi, xuano xua peyapusüüwa xeinaena, jei Isaías xua Acaz tsipáebatsi.

Íchitha Acaz jopa yábara jumekowüntsiyo pokotsiwa xua Isaías tsipaeba. Bapong Acaz pona ichaxota pong Asiria nakua itorobiya peewatsin, pong pewüing Tiglatpileser, xua peyawenaewa tsainchi xua poxonae naba peexanaewa Siria nakuapíwitha irü Efraín nakuapíwitha. Báraxua Acaz éxana poxonae bekein jame bewa wüükaena Nakomtha xua peyawenaewa tsainchi xua poxonae naba peexanaewa Siria nakuapíwitha irü Efraín nakuapíwitha.

Acaz kata pong Asiria nakua itorobiya peewatsintha pokotsiwang xua amanaya pekatsiwang xua pía yawenaetsi xua naba peexanaewa. Bapong pekakomokáe paratixino kátano, xua xuangno pokotsiwang bichokono wüünae xua aiña mato-mang xua xuang bobena Nakom piabotha tatsi.

Tiglat-pileser naba éxana Siria nakuapíwitha. Yawa bara yótabano Siria nakua-piwi pía penawabchüü-exaneibiwi tatsi, yawa bexúbano pong Siria nakua itorobiya peewatsin. Íchitha Asiria nakuapiwi ápara jopa yawenaetsi Judá nakuapiwi. Bichokono abe kana éxana beyakaincha Siria nakuapiwi irü beyakaincha Efraín nakuapiwi.

4

Poxonae báraxua weta Acaz pona ichaxota Damasco tómara, po tómara xua pepa tómara xua Siria nákuatha. Daxota Acaz bara beya pona xua petaenexa pong Asiria nakua itorobiya peewatsin. Poxonae kataunxuae eka Damasco tómaratha, bapong tane xua altar matawüing xua baxua bichokono ichichipa. Bapong najumekaitoroba ichüingtha xua petatsipaebinéxatsi sacerdotemonaepintha, pong pewüing Urías, Jerusalén tómaratha xua jeye:

—Inta éxande altar matawüing ichi be pókotsi altar xua unguia Damasco tómaratha.

Urías daxita ichichipeiba pokotsiwa xua Acaz paebeiba. Daxota Urías itoroba ichamonaetha xua peexanaewa tsane xua ichawa xua altar matawüing, xua be pókotsi altar matawüing xua unguia Damasco tómaratha. Poxonae Acaz kaibe

patopiya Jerusalén tómaratha bapong tane altar matawüing. Acaz itoroba icha sacerdotemonaetha jeye:

—Bárapo altar matatsuntha duwéi pajutebéibare daxita matakabin xua be ofrendang matawüing. Nama ekeicha bárapo altar matatsuntha jopa ekeicha duwéi pajutebinde po altar báyatha Salomón éxana, jei Acaz.

Barapoxonae pírapae, Acaz Nakom píabo tatsi, po bo pin bo, peboupa xatatabanota xua jiwi jopa peitaküüpaewa tsainchi, xua duwéi pejutebiwa, bárapo botha xua be ofrenda matawüing. Bapong Acaz Jerusalén tómara pekuariya aiña altar matawüing éxana xua icha nakomüing nexa. Yawa baraxota bara wüünae jainta bárapo nakomüing, po nakomüing jopa xaiñeyo. Acaz tüpa poxonae nakua itorobiya éwata xua dieciseis po weibe. Barapoxonae pexanto xuya pekoutha tanaexánatsi, pong nakua itorobiya peewatsin, pong pewüing Ezequías.

Meje yábara poxonae Isaías kueikueijei Nakom Pejume Diwesi Judá nakuapíwitha, xuano xua Efraín nakuapíwitha

(Isaías 9.8—12.6)

Nakom tsipaeba, Isaías yábara tsipáebatsi, pongxae Nakom peitorobi jume pepaebin, xua pokotsiwa yábara Efraín nakuapiwi éxana. Daxota Isaías itoróbat si xua báraxua peyábara paebinexa barapomonaetha. Isaías jeye:

—Paxam pomonae Efraín nakuapiwi pam paiñakoutha wüünae paiña nenajainchiwi pam xua paébbame ichamonae. Íchitha Nakom paka kana exanaena xua paauram tsane xua paiña neexanaexae báraxua. Bekein Nakom pákata kopabeiba xua paiña nepaka kaitafáetabi jiwi paka yoteiba, íchitha áwiya jopa Nakom pajumekowüntsim. Daxota Nakom pákata itorobeiba pokotsiwa xua uang pákata ayapubé tsaibi.

”Peitorobi koyenewang pakana éxaname xua jopa pexaiñeiwa xua daxota ekeicha dabeya ichamonae muxujáinbaba ichamonaetha. Pa-aichaxaibim nawita xua paiña nejumetaewa Nakom pía peitorobi koyenewang tatsi.

”Daxota Nakom itorobina pong Asiria nakua itorobiya peewatsin, xua bapong daxita pam paka werawéraka exanaena xua báyatha abe paiña neexanaexae ichamonaetha. Barapong bichokono peitabein. Daxota Nakom kopatsina xua bapong Efraín nakuapiwi átene kana exanaeinchi xuano xua írürü Judá nakuapiwi átene exanaeinchi. Matáütano bapong abe exanaena Samaria tómara, po tómara xua pepa tómara xua Efraín nákuatha. Matáütano bapong naba éxana Judá nakuapiwi.

”Íchitha poxonae Nakom nakuibaraxuina xua bapong peitorobeibíwatsi xua daxita Israel pía pemómoxi susato jiwi tatsi átene pekana exaneibíwatsi, barapoxonae Nakom barichi xuya átene kana exanaena bapongtha. Bapong nantanaxeina jeye: ‘Amanayabaponang pinmonae, tangweixae, yáwano peyaputáe koyenewa taxeinaexaeno’, jei bapong.

”Báraxua ápara jopa xaiñeyo. Ápara poxoru xua Nakom báraxua kópata daxota bapong amanáyaba. Nakom exanaena xua bapong átene tsane, xuano xua domaebinchi. Barapoxonae Efraín nakuapiwi pomonae kataunxuae jinompa bárapo nákuatha, Nakom jumekowüntsinchi. Barapomonaé saya tsikimonaeyo tsane xua jumekowünta. Jopa daichiyo ichi poxonae báyatha ichi poxonae pinmonae jumekowünta.

”Daxota paxam pomonae Judá nakuapiwi pam jopa pajunuwinde xua Asiria nakuapiwi pekuiyainwa tatsi, tsipéi bexa tsane barapomonaé nama ekeicha jopa paka yoteibí tsane.

”Barapoxonae kaentakábitha tsane Nakom pákata itorobina David pía pemó-moxi susato jiwi jíwana tatsi, xua pong pákata naexanaena pong nakua itorobiya peewatsin. Nakom pía Pejumopetúnaxü tatsi, bapong peyaputaein kana exanaeinchi xuano xua pejëüntübükoyene wüünaein kana exanaeinchi. Matáütano bapong kana exanaeinchi xua xaniwaichiya taexanaena ichamonaetha.

”Poxonae bapong poponaena, bárapo kae pin nakua bichokono wüünae tsúru-kuae tsane. Daxua aibi tsane xua pokoyene poxonae daxota jiwi penabenoutsíwa. Daxota bárapo kae pin nakuapiwi Nakom yábara yaputaeinchi, xuano xua pomonae icha nakuangpiwi patsina xua barapong pongxae nakua itorobiya peewatsin wüünae pejëinchiwa tsainchi.

”Matáütano Nakom exanaena xua Israel pía pemómoxi susato jiwi tatsi ekeicha kaewa patsina pía nákuatha, pomonae xua býatha icha nákuangtha kaponébat-si. Daxita Judá nakuapiwi írürü Efraín nakuapiwi kae nakuapiwi naexanaena. Kaemonae pebüriya jakobina Nakomtha xua barapomonae wüünae petaexanae-aetsi, jei Isaías.

**Meje yábara poxonae pong pewüng Miqueas, pong Nakom peitorobi
jume pepaebin, kueikueijei Nakom Pejume Diwesi Judá
nakuapíwitha írürü Efraín nakuapíwitha**

(Miqueas 1—7)

Nakom itoroba pong Nakom peitorobi jume pepaebin, pong pewüng Miqueas, xua pekueikueijeinexa Nakom Pejume Diwesi Judá nakuapíwitha írürü Efraín nakuapíwitha. Miqueas bárapo diwesi kueikueijei poxonae Jotam itorobiya éwata Judá nakua, xuano xua beya poxónaerü ekeicha pong pewüng Ezequías itorobiya éwata Judá nakua. Miqueas tsipaeba, Judá nakuapiwi tsipáebatsi, írü Efraín nakuapiwi tsipáebatsi, jeye:

—¡Beta pana nejumetaema! Báraxua paka tsipáebatsi xua daxota paiña neyaputaenexa xua Nakom juntukuru átene paka kana éxana xua býatha abe paiña neexanaexae. Nakom abe kana exanaena Samaria tómara, po tómara xua pepa tómara xua Efraín nákuatha, tsipéi býatha barapomonae wüünae jainta po nakomüng jopa xaiñeyo. Daxita bong pekóu tsane. Daxita pía nakomüng xua xuang býatha Samaria tomarapiwi exananoba xuano xua býatha wüünae jainta, bárapo nakomüng abe exanaeinchi yáwano tautsina.

”Samaria tomarapiwi wüünae jainta po nakomüng jopa xaiñeyo. Barichi Jerusalén tomarapiwi írürü wüünae jainta bárapo nakomüng, po tómara Nakom itapeta xua pía tómara nexa. Barichi Nakom kopatsina pomonae icha nakuapiwi xua penawabchüü-exaneibiwi xua barapomonae Efraín nakuapiwi yotabinchi yawa teikaeya kaponebinchi icha nákuatha.

”Barichi Nakom kópata xua penawabchüü-exaneibiwi Judá nákuatha patsina xua abe peexanaewa tsane Jerusalén tómara, po tómara pepa tómara xua Judá nákuatha. Báraxua Nakom exanaena barapomonaetha tsipéi bichokono abe peexanaewi. Barapomonae kaiba, xua ichamonaebong kaibébatsi yáwano írangno kaibébatsi. Poxoru barapomonae báraxua peexanaexae daxota Nakom taitorobina pokotsiwa barapomonae petaayapubéwatsi.

”Paxam pomonae pentakaponáe jiwi pam, maisha bewa payábara yaputaem pokotsiwa wüünae. Paxam jopa paichichipaem xua wüünae paiña neexanaewa.

Saya meisha pajüntübükoyene weiweinéibame poxonae abe paexanéibame. Daxota poxonae Nakom bekein pawúükame íchitha baxua yábara Nakom jopa paka jume-notsí tsane, jei Miqueas.

2

Barichi Miqueas yábara kueikueijei pomonae xua naerabiya jeye:

—Paxang pomonae Nakom peitorobi jume pata kueikueijei jiwi pang, yawa pata kueikueijei jiwi Nakom Pejume Diwesi, jei.

Miqueas barapomonae yábara jei:

—Ápara barapomonae jopa xaiñeyo xua paeba. Ápara Nakom jopa yawenáe tsane xua barapomonae jopa yawenáe tsainchi. Barapomonae Nakom jopa itorobiyo xua pekueikueijeiwa tsane jíwitha, jei Miqueas.

Ekeicha Miqueas jeye:

—Nakom werawéraka exanaena Jerusalén tómara, yáwano werawéraka exanaena píabo, po bo pin bo. Tsipéi pomonae pentakaponaewi jopa xaiñeya exaneibiyo poxonae jiwi xeina pokotsiwa ayapubé.

”Barapomonae jumejéi tsaibi xua penotéibiwa pekakomokáe parátixi xua naerabiya peexaneibinexa ichamonae nexa. Ichamonae nayábara paeba xua pinae barapomonae ápara pomonae Nakom peitorobi jume pepaebiwi. Íchitha barapomonae jopa wüükeibiyo Nakomtha. Saya barapomonae ibótixi bebái tsaibi pía yaputaibichi xua pokotsiwa bexa exaneibina. Barapoxonae barapomonae ichamonae wüükeiba pekakomokáe parátixi xua báraxua peexanaexae.

”Barapomonae natsikuentisina Nakomtha abe peexanaexae. Barapomonae Nakom jopa kapanenebiyaeyo saya meisha poxoru nayábara paeba xua Nakom barü pona barapomonae, jei.

3

Barichi Miqueas yábara paeba xua pinae bara bárapo matakabi jopa xua poxonae po matakábitha Nakom nakuibaraxubina xua barapomonae átene peexanéwatsi. Matáütano Miqueas tsipaeba barapomonaetha xua pinae bárapo matakabi ápara wüünae. Miqueas ekeicha tsipaeba barapomonaetha jeye:

—Demuxuwa ichaxota unguwa Nakom píabo tatsi, po bo pin bo, bárapo demuxuwa bichokono toxeyincha aiñakuí tsane bárapo kae pin nákuathe. Jiwi pomonae xua icha nakuangpiwi patsina baraxota xua penakuidubinexa Nakom pía peitorobi koyenewang tatsi, po peitorobi koyenewang Nakom ichichipa xua barapomonae bewa jumekowüntsiya exanaena.

”Bárapo matakábintha ekeicha jiwi jopa nabenoutsi tsane. Daxita jüntema jinompaena. Nakom kana exanaena xua Israel pía pemómoxi susato jiwi tatsi kaewa patsina pía nákuatha pomonae xua tsanajinoutaruta icha nákuangtha.

”Ánoxuae po matakábinthe pomonae penawabchüü-exaneibiwi xua icha nakua-piwi naba paka éxana. Methaunxuae ichamonae paka kaponaena Caldea nákuatha xua ichaxota paiña nejinompaenexa. Íchitha bexa tsane ekeicha kaewa papatsíname. Barapoxonae paiña nakua peaiñakuí nakua tsane.

”Belén tómara, po tómara peya tomariyo ichaxota po tómaratha jinompa Judá pía pemómoxi susato jiwi tatsi, bárapo tomaríyotha naexanaena pexuyo pebinwüüto. Barapong daxita Israel pía pemómoxi susato jiwi tatsi ewatsinchi, jei Miqueas.

4

Barapoxonae pírapae Miqueas ekeicha tsipaeba barapomonaetha jeye:

—Nakom paka yábara paeba xua pinae bapong jopa beta jumekowüntsiya pata exanaem. Nakom ichichipa xua yábara paiña nenantanaxeinaewam tsane xua poxonae paiña amo susato jiwi kapanépati Egipto nakua weya, xuano xua paka kata Canaán nakua.

”Nakom jopa ichipaeyo xua duwéi paiña nejutebiwa xua be ofrenda matawüing xua bapong nexa. Nama bichokono jopa ichipaeyo xua paiña pexui paiña nejutebiwa xua be ofrenda matawüing xua bapong nexa. Pokotsiwa xua bapong ichichipa xua bewa paexanáename, xua jame maisha xaniwaicha paiña netaexanaewa tsane ichamonae. Yawa ichichipa xua bewa maisha ichamonae júntübü weiweinaya pata exaneibim. Yawa ichichipa xua bewa beta pajumekowüntsim bapong. Yawa ichichipa xua jopa bewa paiñakoutha wüünae pana najainchim xua ichamonae paáebame.

”Íchitha poxonae pakaenaetéibame ichauxi náemata po pesabiwang xua xota arewe papesábame, xua xoxi pakaenaetéibame fafaneneiba. Paxam pomonae kopei xeinaewi pam, paka tsipáebatsi. Jopa paka tsita aiñakuiyiyo poxonae ichamonae pakaibéibame xua paiña nexeineibinexa pokotsiwa paichichipéibame.

”¡Maisha daxita pam bichokono pomonae jiwi paiña nemuxuitórobi jiwi pam! Báraxua paiña neexanaexae, Nakom átene paka kana exanaena. Paxam bichokono abe paéxaname, ichi Acab ichi, pong báyatha Efraín nakua itorobiya peewatsin xua poxonae bapong abe éxana. Daxota paxam paatenem tsane.

”Nakom kopatsina xua paiña nepaka kaitafáetabi jiwi paka yotabina. Baxua Nakom pákata exanaena xua ápara mexeya poxoru abe paiña neexanaexae. Barapoxonae pírapae Nakom átene kana exanaena pomonae xua átene paka kana éxana. Bárapo matakábitha Judá nakuapiwi ekeicha kaewa pía nakua xeinaena. Barapoxonae bárapo nakua bichokono toxecha peaiñakuí nakua tsane. Jiwi, pomonae icha nakuapiwi, patsina xua pejinompaewa tsane bárapo nákuatha, jei Miqueas.

5

Barapoxonae Miqueas tsipaeba Nakomtha, xua poxonae Nakomtha wüüka jeye:

—Beta éenare pomonae jiña nekajumekowüntsiwi. Báraxua éxande ichi be ichi poxonae pong oveja peewatsin xua pía ovejang. Jüntema jinompa pana nekana éxande bárapo pata íratha. Beta painta éxande pokotsiwang xua wüünae xain jiwi pomonae icha nakuapiwi kayábara barükui-iturajina.

”Xam Nakomüm, pong pepa Nakomüm, xua jopa icha nakomüm, po Nakom jopa xaiñeyo. Xam pana neyábara jüntemaináename xua báyatha abe paéxanang. Bara yaputang xua xam nayábara jumewetsíname xua kaena báyatha Abraham yábara tsiwüünae muxudútame xuano xua irü barichim Jacob, pongbe xua pata amo susato jintongbe. Daxota ekeicha kaewa beta pana nekana exanáename, jei Miqueas poxonae tsipaeba Nakomtha.

Meje yábara poxonae Asiria nakuapiwi abe éxana Efraín nakuapíwitha

(2 Reyes 14.26-29; 15.8-31; 17)

Jeroboam II, pong Efraín nakua itorobiya peewatsin, bichokono bapong dangwéi. Bapong xeina pin bicheito xua pomonae pía penawabchüü-exaneibiwi tatsi

poxonae itorobiya éwata bárapo nakua. Nakom yawena, Jeroboam II yawénatsi, xua peamanayabeibiwa xua poxonae naba exaneiba pía peaitafaetabí jíwichi. Bárapo Efraín nakua ekeicha bichokono nawita kopei xeina.

Bapong Jeroboam II Efraín nakua itorobiya éwata cuarenta y un po weibetha. Poxonae bapong Jeroboam II tüpa, pexanto xuya pekoutha tanaexánatsi pong nakua itorobiya peewatsin, pong pewüing Zacarías.

2

Bapong Zacarías bichokono pong abe peexanaein. Barapong éxana ichi báyatha ichi pomonae Efraín nakua itorobiya peewatsiwi. Poxonae Zacarías seis po xométo-be xeina xua itorobiya éwata Efraín nakua, pebin pong pewüing Salum bapong Zacarías bexotsi. Bapong Salum xuya pekoutha náexana xua Efraín nakua peewatsiwa. Poxonae báraxua éxana bara Nakom nayábara jumeweta xua báyatha Jehú yábara tsiwüüinae muxudútatsi xua bepa pinae bapong pía pemómoxi susato jiwí tatsi Efraín nakua itorobiya ewateibina xua néxata daxita cuatro pongbe tsane.

Bapong Salum saya kae xométotha itorobiya éwata Efraín nakua, tsipéi pebin pong pewüing Manahem bapong Salum bexotsi. Barapoxonae Manahem xuya pekoutha náexana xua Efraín nakua itorobiya éwata.

3

Bapong Manahem diez po weibe itorobiya éwata Efraín nakua. Barapong bichokono abe peexanaein. Pong Asiria nakua itorobiya peewatsin, bapong yótaba, Efraín nakuapiwi yótabatsi. Poxonae bapong báraxua éxana, barapoxonae Manahem tsipaeba bapongtha jeye:

—Icha jopa pana nebexubim tsane, yawa icha jiña nenawabchüü-exaneibiwi kaibeya barü póname, kakatsibeibinchi pekakomokáe parátixi xua nawita xua daxita weitha tsaibi, jei Manahem xua tsipáebatsi pong Asiria nakua itorobiya peewatsin.

Poxonae Manahem tüpa, pexanto xuya pekoutha tanaexánatsi pong nakua itorobiya peewatsin pong pewüing Pekaía.

4

Bapong Pekaía bichokono abe peexanaein. Poxonae Pekaía nakua itorobiya éwata xua aiña po weibetha, pebin pong pewüing Peka pong penawabchüü-exaneibiwi jíwanapin, bapong naba éxana, Pekaía naba éxanatsi. Bara barapoxonae bapong Pekaía bexotsi. Barapoxonae bapong Peka xuya pekoutha náexana pong nakua itorobiya peewatsin. Cuatro pongbe xua néxata daxita xua Efraín nakua itorobiya ewateiba xua Zacarías weya xua barapoxonae beya Pekaía. Báraxua barapomonae éxana xua írürü poxonae Uzías, pong icha wüing Azarías, itorobiya éwata Judá nakua.

5

Barapong Peka bichokono abe peexanaein. Poxonae Peka itorobiya éwata Efraín nakua barapoxonae pong pewüing Tiglat-pileser, pong Asiria nakua itorobiya éwata, bapong yótaba, Efraín nakuapiwi yótabatsi. Bapong Tiglat-pileser aiña tómarang nota yawa pepa jiwí nota xua petajinompawea tsainchi Asiria nákuatha.

Poxonae Peka veinte po weibe itorobiya éwata Efraín nakua, barapoxonae pebin pong pewüng Oseas bapong waba ichamonae xua barü naba peexanaenexa xua naba peexanaenéxatsi Peka. Bara bapong Peka bexotsi. Barapoxonae Oseas xuya pekoutha náexana xua Efraín nakua itorobiya peewatsiwa. Poxonae Oseas tam-rópata pítaba xua itorobiya éwata Efraín nakua, barapoxónaerü Acaz írürü Judá nakua itorobiya éwata.

6

Oseas itorobiya éwata Efraín nakua saya nueve po weibe. Barichi bapong bichokono abe peexanaein, bekein bichokono jopa abe exanaeyo ichi be ichamonae jopa ichiyo. Poxonae Oseas itorobiya éwata Efraín nakua, barapoxonae pebin, pong pong pewüng Salmanasar, pong Asiria nakua itorobiya éwata, bapong yótaba, Efraín nakuapiwi yótabatsi.

Néxata Oseas bewa katsi bapongtha pekakomokáe parátixi xua jopa pebexubiwa tsainchi. Oseas aichaxaibi xua pekatsiwa pekakomokáe parátixi Asiria nakua-píwitha. Daxota Oseas najumekaitoroba ichüngtha xua petatsipaebiwa tsainchi pongtha, pong Egipto nakua itorobiya peewatsin xua Oseas peyawenaewa tsainchi. Barapoxonae Oseas ekeicha jopa katsiyo pekakomokáe parátixi pongtha, pong Asiria nakua itorobiya peewatsin.

Poxonae Salmanasar yaputane, barapoxonae Oseas kapoinchi jiwi pekübibotha, yawa yakaincha matawakaicha eena Samaria tómara, po tómara xua pepa tómara xua Efraín nákuatha xua jiwi jopa bara weya peponaewa tsane. Barapoxonae, poxonae akoibi po weibe yapukaewa, bapong Salmanasar amanáyaba Samaria tómara. Daxita jíwino kápona Asiria nakua beya. Yawa tsananonobatsíniya aiña tómarangtha.

Bara barichi Efraín nakua aibi pomonae xua Israel pía pemómoxi susato jiwi tatsi. Bapong Oseas pong tabüdukua xua itorobiya éwata Efraín nakua.

Baxua Nakom kópata xua Efraín nakuapiwi bara baxua taexanaeinchi, xua ichamonae taexanaena baxua. Báraxua Nakom takópata, tsipéi barapomonae báyatha jopa exanaeyo pokotsiwa Nakom itoroba pía peitorobi koyenéwangtha.

Barapomonae wüünae jainteiba po nakomüng jopa xaiñeyo. Matáütano barapomonae exaneiba altar matawüng ichaxota duwéi jutebeiba xua be ofrendang matawüng xua pía nakomüng tatsi nexa.

Barichi cananeomonae poxonae jinompa bárapo íratha, barapokotsiwa éxana xua bichokono abe éxana. Daxota Nakom bebái barapomonae bárapo ira weya, xua cananeomonae bebaichi. Barapoxonae Nakom kata bárapo ira Israel pía pemómoxi susato jíwitha tatsi.

Nakom itoroba pomonae Nakom peitorobi jume pepaebiwi, xua barapomonae petsipaebinéxatsi xua bewa penakuibarapentsiwa tsane xua abe peexanaewa xua ekeicha kaewa Nakom pejumekowüntsiwa tsainchi. Bekein bárapo Nakom peitorobi jume pepaebiwi báraxua itoroba, íchitha barapomonae jumefeba xua Nakom pejumekowüntsiwa tsainchi.

Barapomonae nakomüng éxana xua oro naintong xua vaca pébtobe kana-xoba xua bárapo nakomüng wüünae pejainchiwa tsane. Matáütano barapomonae pía pexui juteba xua be ofrendang matawüng xua bárapo nakomüng nexa, po nakomüng jopa xaiñeyo. Barichi barapomonae poxonae ichichipa yaputaiba

ichawang, barapomonaē poneiba ichaxota pomonaē wüünaē yaputaiba pokotsiwang xua bexa exanaena.

Daxita báraxuang xua poxonaē barapomonaē báraxua exaneiba jopa wüünaeyo. Daxota Nakom kaseba, barapomonaē kasébatsi, xuano xua báyatha daxota Nakom átene kana éxana barapomonaē. Meisha Judá nakuapiwi jinompa bekein barapomonaē írürü daxitang jopa exanaeyo pokotsiwa xua Nakom itoroba pía peitorobi koyenéwangtha.

7

Néxata pong Asiria nakua itorobiya peewatsin kápona jiwi, xua icha nakuangpiwi, xua pejinompaenexa ichaxota po tómarang xua ena Efraín nákuatha xua Efraín nakuapiwi pekueranta enaewa tsainchi. Bárapo jiwi, xua icha nakuapiwi, wüünaē jainta icha nakomüng, po nakomüng xua pía nákuang weya kápona.

Íchitha barapomonaē ichichíparü xua wüünaē pejainchiwa po Nakom Efraín nakuapiwi wüünaē jainteiba, po Nakom pepa Nakom. Daxota pong Asiria nakua itorobiya peewatsin itoroba, xua sacerdotemonaepin itoróbatsi xua barapong yábara pekuidubinexa xua poxonaē duwéi pejutebeibiwa xua be ofrenda matawüng xua Nakom nexa, po Nakom pepa Nakom.

Íchitha poxonaē barapomonaē Nakom wüünaē jainta, po Nakom pepa Nakom, yáwano múxuna wüünaē jainta icha nakomüng, po nakomüng jopa xaiñeyo. Daxota jopa exanaeyo pokotsiwa Nakom itoroba xua bekein meisha wüünaē pejainteibiwa tsainchi bapong, pongxae po Nakom pepa Nakom.

**Meje yábara poxonaē pong pewüng Ezequías,
itorobiya éwata Judá nakua, pong beta peexanaein**

(2 Reyes 18—20; 2 Crónicas 29—32; Isaías 36—39)

Ezequías bapong Acaz pexanto tatsi, pongxae pong nakua itorobiya peewatsin. Bapong Ezequías itorobiya éwata Judá nakua. Bapong bichokono beta peexanaein. Ezequías jumekowüntsiya éxana pokotsiwa Nakom itoroba pía peitorobi koyenéwangtha. Yawa bapong daxita abe kana éxana aiña altar matawüng xua xuang báyatha Judá nakuapiwi éxana xua baxota duwéi pejutebeibinexa xua be ofrendang matawüng xua pía nakomüng nexa, po nakomüng jopa xaiñeyo.

Poxonaē Ezequías aena tamrópata pítaba xua itorobiya éwata Judá nakua, bapong itoroba jiwi xua maisha itapeta Nakom wüünaē pejainteibiwa tsainchi, po Nakom pepa Nakom. Bapong báraxua éxana tsipéi pomonaē báyatha, pomonaē Judá nakua itorobiya peewateibiwi, kui-itaweta xua Nakom pejumekowüntsíwatsi.

Bapong Nakom píabo tatsi, po bo pin bo, peboupang ekeicha beta éxana. Barichi bapong kaetuta sacerdotemonaē yawa kaetuta levitamonaē xua pebarü nakaetutsinexa. Yawa jeye barapomonaetha:

—Maisha beta paexande daxita. Tsipéi báyatha Nakom átene kana éxana Judá nakuapiwi xua jopa peexanaexae pokotsiwa Nakom itoroba xua bewa barapomonaē exanaena, jei Ezequías poxonaē tsipaeba barapomonaetha.

2

Barapoxonaē levitamonaē náexana pokoyeneya xua daxota Nakom tsítatsi xua barapomonaē pejüntübükoyene wüünaewi. Barapoxonaē barapomonaē bara

itaküüpatsi xua Nakom petanakuichíwatsi Nakom piabotha tatsi, po bo pin bo. Barapomonae nota daxita xua xuang bobena Nakom piabotha tatsi, po bo pin bo, xua xuang jopa bewa jebí baraxota. Beta tutu kanakuiwetsiya éxana xua pokotsiwa be Nakom ichichipa xua bara pebarichiwa tsane.

Barapomonae bewa exanáe daxita báraxua, tsipéi kaena báyatha Acáz icha koyeneya éxana xua daxita seikaya éxana. Poxonae báraxua nakobeweta Ezequías itoroba sacerdotemonae jeye:

—Duwéi pajutébare xua be ofrendang matawüing, po ofrendang xua Nakom ompiwa pekatsibíwatsi, matáütano icha ofrendang matawüing, po ofrendang xua poxoru jiwí abe peexanaexae.

Barapoxonae Ezequías itoroba, xua levitamonaé itoróbatsi, xua barapomonae Nakom petanakuichiwa tsainchi ichi be pókotsi koyeneya báyatha David ichi poxonae Nakom tanakuítatsi. Bara barapókotsi koyeneya levitamonaé nakuita Nakom piabotha tatsi, po bo pin bo, ichi be pókotsi koyeneya báyatha Nakom itoroba.

3

Barapoxonae Ezequías daxita waba Judá nakuapiwi írürü Efraín nakuapiwi xua pepatsinexa xua penataenexa Pascua fiesta matawüing. Bárapo Pascua fiesta matawüing bichokono toxecha pin fiesta poxonae éxana. Judá nakuapiwi pinmonae pata. Íchitha nama Efraín nakuapiwi be jiwí yáyatha pata, tsipéi pinmonae pomonaé Efraín nakuapiwi kuikápona bárapo Pascua fiesta matawüing.

Poxonae bárapo Pascua fiesta matawüing éxana, ichamonae pomonaé pata xua penataenexa daxita abe éxana altar matawüing xua xuang báyatha Jerusalén tomarapiwi éxana xua baxota duwéi pejutebeibinexa xua be ofrendang matawüing pía nakomüing nexa, po nakomüing jopa xaiñeyo. Saya meisha jopa abe exanaeyo po altar matawüing unguá pánatha xua Nakom piabotha tatsi pánatha.

Barichi ménetha bebái po altar matawüing ichaxota tautathopeiba incienso nain xua túxusi wüünae. Tsipéi Nakom báyatha paeba xua bepa pinae meisha itapeta wüünae jainteibichi bapong xuano xua meisha piabotha tatsi.

Pomonaé xua pata xua penataenexa bárapo fiesta matawüing barapomonae jíwana najüntükoyene taxoba Nakomtha. Íchitha Ezequías Nakomtha wüüka xua Nakom peyábara jüntemainaenexa pokotsiwa barapomonae éxana tsipéi barapomonae pata xua írürü Nakom wüünae pejainchiwa tsainchi. Bara Nakom báraxua éxana xua Ezequías wüüka.

Poxonae weta bárapo Pascua fiesta matawüing, jiwí pona ichaxota po tómarang ena Judá nákuatha, yáwano daxitang abe éxana pokotsiwang altar matawüing xua xuang baraxota xeina xua icha nakomüing nexa. Barichino daxita altar matawüing abe éxana icha tómarangtha xua Efraín nákuatha. Barapoxonae daxita barompaya piabong benawibiya.

Bapong Ezequías pong Judá nakua itorobiya peewatsin, áwiya exanapona xua duwéi jutebapona xua be ofrendang matawüing xua Nakom piabotha tatsi. Daxota bapong báraxua éxana tsipéi Nakom báyatha báraxua itoroba. Bapong Ezequías tsikobe tsata penakuichiwang xua sacerdotemonae nexa írürü levitamonaé nexa. Nakom bichokono jüntübükoyene weiweina éxanatsi pokotsiwa Ezequías éxana, pong Judá nakua itorobiya peewatsin. Daxota Nakom éxana xua Ezequías nawita xeina.

4

Poxonae Ezequías itorobiya éwata Judá nakua, pebin pong pewüing Salmana-sar pong Asiria nakua itorobiya peewatsin, bapong werawéraka éxana Samaria tómara, po tómara xua pepa tómara xua Efraín nákuatha. Matáütano bapong pepa jiwí daxita nota pomonae xua baxota jinompa xua pía nakua beya kápona.

Poxonae weta diez po weibe, yawa xua poxonae Salmanasar báyatha tüpa, ichüing náexana pong Asiria nakua itorobiya peewatsin, pong pewüing Senaquerib. Bapong naba éxana Judá nakuapíwítha, yawa aiña tómarang nota. Saya meisha Jerusalén tómara jopa pichiyo.

Ezequías bapongtha tsipaeba xua bepa pinae katsina pekakomokáe parátixi xua jopa pebexubiwa tsainchi. Bara bapong kata daxita xua pía pekakomokáe parátixi tatsi xua bapong piyawa. Matáütano katsíbano po pekakomokáe parátixi bobena Nakom piabotha tatsi, po bo pin bo, xua ichaxota tsiki tútixi, potutixi aishówatha.

Matáütano bapong Nakom píabo tatsi peboupang boupa sáraka xua báyatha oro nain matha weya jumawekaxueba, xua baxuang pentaropeicha jehebaponaenexa xua pekatsiwa pongtha, pong Asiria nakua itorobiya peewatsin.

Íchitha Senaquerib jopa jüntükoyene weiweinaeyo poxonae daxita bárxuang kata. Daxota bapong itoroba ichamonae Jerusalén tómara beya, pomonae pía peaiñakuí jiwimonaé jíwana tatsi, pomonae xua saya petapaebiwa tsainchi. Barapomonae Ezequías tsipáebatsi jeye:

—Xam jopa kaitaküüpaeyo xua tana neamanayabiwam icha poxonae xua naba tana neexanaewam. Icha wúükame pong Egipto nakua itorobiya peewatsin xua nekayawenaewa tsane, ápara jopa beta kayawenáe tsane. Barichi jiña Nakom jopa kayawenáe tsane, tsipéi daxita tabebam jiña nakomüing pía altar matawüing, jei barapomonae xua Senaquerib paeba.

5

Barapoxonae barapomonae, pomonae Senaquerib najumekaruta, jumedangweya wawái xua pía xaiña beya tatsi Jerusalén tomarapiwi Senaquerib nexa. Jeye:

—¡Jopa payábara jumekowüntsinde Ezequías xua peitaküüpáewatsi xua paiña nepaka kapanenebiwa! Ezequías paka itoroba xua pinae paiña Nakom payábara jumekowüntsíname xua paiña nepaka kapanenebiwa tsane, íchitha paiña Nakom jopa paka kapanenebiyae tsane poxonae naba paka exanaeinchi.

”Paxang pomonae Asiria nakuapiwi pang aiña nákuang paamanáyabang. Bárapo nakuapiwi jopa kapanenebiyaetsi pía nakomüing. Jame pokotsiwa bewa paexanáename, maisha paexande pokotsiwa xua tapaka itorobíwatsi xua daxota jüntema painómpame pewünaeya xua tapaka kaponae tsainchi icha nakua beya, jei barapomonae Senaquerib nexa.

Dapong aibi xua pejumenotsiwa tsipéi báyatha Ezequías itoroba xua bewa jopa exanáe tsane pokotsiwa Senaquerib paeba. Barapoxonae Ezequías pona Nakom piabotha tatsi, po bo pin bo, yawa ichamonaetha najumekaitoroba xua petsipae-biwa tsainchi Isaías pong Nakom peitorobi jume pepaebin. Isaías tsipaeba barapomonaetha poxonae jumenota jeye:

—Jopa pajumetaya junuwinde Asiria nakuapiwi. Senaquerib pía nakua yábara jumetaena po diwesin xua abe. Daxota pía nakua benawibiyaena. Barapoxonae baraxotiya Senaquerib tüpaena, jei Isaías.

Barapoxonae barapomonae kaibe nawibiya pomonae Senaquerib itoroba.

Pírapae barapoxonae Senaquerib ekeicha ichamonaetha najumekaruta xua Jerusalén tómara beya peponaenexa. Barapoxonae barapomonae carta kápona xua Senaquerib tina. Bárapo cártatha barapókotsi jumeya paeba xua poxonae kopiya paeba. Poxonae Ezequías yóroba bárapo carta, barapoxonae kaena naiña pona Nakom piabotha tatsi, po bo pin bo, xua Nakomtha pewüükaenexa. Ezequías jeye Nakomtha:

—Nakom, pana yawende xua Asiria nakua itorobiya peewatsin jopa pata tana amanayabiwa tsane, xain daxita nakuangpiwi kayaputaena xua xam ápara po Nakom pepa Nakomüm, jei Ezequías.

6

Ekeicha Isaías najumekaitoroba ichüngtha xua Ezequías petsipaebiwa tsainchi xua jeye:

—Bara Nakom exanaena pokotsiwa wüükame, yáwano Asiria nakua pía penawabchüü-exaneibiwi jopa patsi tsane xua naba peexanaewa Jerusalén toma-rapíwitha, jei Isaías poxonae ichüng tapaeba.

Bárapo merawitha Nakom kaein jíwana itoroba pía matatsunpiwi xua pinmonae pejutebiwa tsainchi Asiria nakua pía penawabchüü-exaneibiwi tatsi. Barapoxonae Senaquerib kaibe náwiya Nínive tómara beya, po tómara xua pepa tómara bárapo nákuatha.

Poxonae Senaquerib Nínive tómaratha pópona, bapong bexotsi xua pexántobe bexotsi, xua pía pexui tatsi jíwana tatsi. Barapoxonae ekeicha pekoutha xuya pexanto tanaexánatsi pong Asiria nakua itorobiya peewatsin, pong pewüng Esarhadón, pong xua pía pexui tatsi jíwana tatsi. Poxonae bárxua éxana bara nayábara jumeweta pokotsiwa báyatha Isaías paeba xua Ezequías tsipáebatsi xua Nakom nexa.

7

Pírapae barapoxonae Ezequías átene xua poxoru xeina petsuwe. Néxata Nakom itoroba, Isaías itoróbatsi, xua Ezequías petsipaebinéxatsi xua methaunxuae Ezequías tüpaena. Íchitha Ezequías wüüka Nakomtha jeye:

—Neyábara nantanaxéinare xua kaena báyatha xaniwaichiya kata éxanatsi poxonae kajumekowüntsiya popónatsi, jei Ezequías.

Barapoxonae Nakom itoroba, Isaías itoróbatsi, xua Ezequías ekeicha petsipaebiwa tsainchi, xua pinae bara Nakom exanaena pokotsiwa Ezequías wüüka Nakomtha, xuano xua pinae Nakom exanaena xua Ezequías ekeicha quince po weibe pepoponaewa tsane. Ezequías bichokono yábara jüntübükoyene weiweina pokotsiwa Nakom paeba. Daxota bapong tina penaxünae wei xua kayábara naxüna xua wüünae petaexanaexaetsi xua Nakom taéxana.

8

Pebin, pong pewüng Merodac-baladang, pong Caldea nakua itorobiya peewatsin, bapong jumetane xua pinae Ezequías átene. Barapoxonae Merodac-baladang

taitoroba xua amanaya pekatsiwa xua Ezequías nexa xua ichamonaetha kaitoroba. Pewünaeya xua poxonae ekeicha kaibe dendena tsane barapomona, Ezequías barapomonaetha tsita kayopita ichaxota xeina xua xuang pokotsiwang aiña matoma. Barapoxonae Isaiás tsipaeba, Ezequías tsipáebatsi jeye:

—Kaentakábitha tsane Caldea nakua pía penawabchüü-exaneibiwi tatsi patsina xote. Barapomona daxita jiñawa xua tsita kayopítame, bapomona kaponana Babilonia tómara beya, po tómara xua pepa tómara xua Caldea nakua. Ichamona, pomona jiña pexui jíwana, barapomona tanakuichina pongtha, pong Caldea nakua itorobiya peewatsin, jei.

Íchitha Ezequías jopa yábara najúntübü-exabiyo báraxua, tsipéi barapong nan-tanaxeina xua bara jüntema pópona poxonae bapong áwiya pópona. Jopa tsita aiñakuichi xua bexa exanaena ichamona. Ezequías tüpa xua poxonae bapong itorobiya éwata Judá nakua veintinueve po weibetha. Barapoxonae pexanto xuya pekoutha tanaexánatsi pong Judá nakua itorobiya peewatsin, pong pewüng Manasés.

Meje yábara poxonae Manasés itorobiya éwata, irü kotakaya Amón itorobiya éwata, irü kotakaya Josías itorobiya éwata xua Judá nakua

(2 Reyes 21.1—23.30; 2 Crónicas 33—35; Jeremías 1—6)

Manasés pong Ezequías pexanto tatsi, bapong itorobiya éwata Judá nakua. Bapong Manasés bichokono abe peexanaein. Barapong ekeicha altar matawüng kaewa éxana, po altar matawüng icha Nakom nexa xua xuang paxa tatsi bekein báyatha abe éxana. Barapoxonae bapong wüünae jainta po nakomüng jopa xaiñeyo. Bárapo nakomüng kaena báyatha Canaán nakuapiwi wüünae jainta, pomona kaena báyatha baraxota jinompa.

Barichi bapong éxana ichawang xua altar matawüng Jerusalén tómaratha xua po nakomüng nexa xua jopa xaiñeyo. Matáütano bapong pexanto bexuba xua be ofrenda matawüng xua icha Nakom nexa xua jopa xaiñeyo.

Yawa poxonae bapong ichichipa yaputane ichawang, pona ichaxota pomona wüünae yaputaiba xua pokotsiwa bexa exanaena. Yáwano bapong siwaponeiba pomona xui-paxaewi, xuano xua siwapónano pomona dowatsi petsipaebiwi. Barapong báraxua peexanaexae írürü daxita bárapo Judá nakuapiwi barichiya éxana. Daxota barapong bichokono kasébatsi, Nakom kaseba.

Manasés abe peexanaexae, daxota Nakom itoroba pomona Nakom peitorobi jume pepaebiwi, xua Judá nakuapiwi petsipaebinéxatsi Nakom Pejume Diwesi. Barapomona jeye xua Nakom tsipáebatsi:

—Pokotsiwa xua Manasés éxana, báraxua bichokono jopa juniya abeyo, beya-kaincha po peabe koyenewang amorreomona éxana pomona báyatha jinompa po nákuathe. Matáütano bapong éxana xua Judá nakuapiwi wüünae pejainchiwa po nakomüng jopa xaiñeyo.

”Daxota Nakom jeye: ‘Xua báraxua paiña neexanaexae daxota daxita nákuangtha exanaein pokotsiwa xua petaayapubéwatsi. Jerusalén tómaratha barichin tsane po pepa tómara tatómara. Daxota kopatsin xua paiña nepaka kaitafáetabi jiwi paka yotsina, xuano xua Jerusalén tómarano abe peexanaewa tsane. Judá nakuapiwi bichokono abe exaneiba, xua daxota barapomona bichokono nejüntübükoyene anáepana exaneiba. Báraxua barapomona inta éxana kaena báyatha

xua poxonae Egipto nakua weya pona xua aiña wei. Íchitha ánoxuae Manasés bichokono toxeincha abe peexanaein beyakaincha ichamonae pomonae xua abe éxana. Xua barapong báraxua peexanaexae daxota bichokono átene paka kana exanebinchi', jei Nakom, jei pomonae Nakom pía peitorobi jume pepaebiwi.

2

Judá nakuapiwi jopa exanaeyo pokotsiwa Nakom peitorobi jume pepaebiwi paeba. Daxota Nakom kópata xua Asiria nakua pía penawabchüü-exaneibiwi tatsi pía pentakaponaewi tatsi, barapomonae Manasés wáetabatsi xua pekaponaenáxatsi icha tómaratha xua ichaxota bapong bichokono átene kana éxanatsi. Poxonae baraxota eka, bapong wüüka Nakomtha jeye:

—Nakom neyawende. Yábara yaputang xua xuang bichokono abe éxanang, daxota aurang yawa wekoyang, jei bapong Manasés.

Bara Nakom éxana pokotsiwa Manasés wüüka. Bara Nakom kópata, Manasés kópatatsi, xua kaewa peponaewa tsane Jerusalén tómara beya, xua ekeicha Judá nakua itorobiya peewatsiwa tsane. Matapaiña Manasés yaputane xua Nakom ápara po Nakom pepa Nakom. Poxonae Manasés ekeicha kaewa patopa Jerusalén tómaratha, daxitang abe éxana altar matawüing xua xuang báyatha bapong éxana icha nakomüing nexa. Matáütano abe éxana xua po Nakom exananota Nakom pia-botha tatsi, po bo pin bo.

Barapoxonae Manasés duwéi juteba xua be ofrendang matawüing xua Nakom nexa. Yáwano bapong itoroba Judá nakuapíwitha xua Judá nakuapiwi bewa meisha wüünae jainchina Nakom, po Nakom pepa Nakom. Matáütano bapong ekeicha bichokono dangwéi exananota xua Jerusalén tómara yatoxorotaduta. Matáütano bapong itoroba pinmonae pomonae pía penawabchüü-exaneibiwi tatsi xua daxita tómarangtha xua Judá nákuatha, xua peyapuaenexa ichaxota po tómara xeina xua xuang yatoxorotaduba.

Manasés tüpa xua poxonae itorobiya éwata Judá nakua xua cincuenta y cinco po weibetha. Barapoxonae pexanto pekoutha tanaexánatsi pong Judá nakua itorobiya peewatsin pong pewüing Amón.

3

Amón itorobiya éwata Judá nakua saya aiña wéithabe. Barapong Amón bichokono abe peexanaein. Bapong daxitang nakomüing wüünae jainta, po nakomüing paxa tatsi kopiya wüünae jainteiba, xua poxonae pewünaeya xua kapoinchi icha tómaratha. Barapong bichokono abe éxana beyakaincha xua poxonae paxa tatsi abe éxana.

Daxota Amón naba éxanatsi ichamonae, pomonae jíwana, pomonae peiañakuí jiwi, pomonae xua pía petanakuichiwichi. Barapomonae bapong bexotsi. Íchitha Judá nakuapiwi xuya juteba, barapomonae xuya jutébatsi. Barapoxonae Judá nakuapiwi ekeicha itapeta pong Judá nakua itorobiya peewatsin, pong pewüing Josías, pong Amón pexanto tatsi.

4

Josías áwiya kataunxuae pexuyo poxonae aena tamrópata pítaba xua itorobiya éwata Judá nakua. Íchitha bapong naajüntübüyapustüü éxana xua pía nakuidubichi

Nakom pía peitorobi koyenewang. Daxota bapong beta piamonae itorobiya éwata. Bapong daxitang abe éxana altar matawüing xua xuang umena Jerusalén tómaratha xua ichaxota jiwi wüünae jaintathopeiba po nakomüing jopa xaiñeyo. Baxua bapong éxana xua daxita Judá nákuatha, xuano xua Efraín nákuatha.

Barichi bapong itoroba xua daxita sacerdotemonae pejutebíwatsi pomonae duwéi jutebeiba xua be ofrendang matawüing xua po nakomüing nexa po nakomüing jopa xaiñeyo. Barapoxonae bapong itoroba xua ekeicha wüünae petaxanáewatsi Nakom píabo tatsi, po bo pin bo. Barapong taitoroba pekakomokáe parátixi pongtha, pong pewüing Hilcías, pong sacerdotemonae pía pentakaponaein tatsi xua Nakom píabo wüünae pexanebiwa tsane.

Poxonae ichamonae xaneba Nakom píabo tatsi, Hilcías taeba xua pokotsiwa xua be papera xua baraxota tinaduba Nakom pía peitorobi koyenewang tatsi. Bapoxonae Hilcías itoroba ichüing xua Josías petakaponaewa tsainchi báraxua xua ichaxota tinaduba. Poxonae Josías jumetane xua tayórobatsi bárapo diwesi, bichokono ajüntübükoyenetane. Barapoxonae bapong itoroba pía petanakuichiwichi jíwana pomonae peaiñakuí jiwi xua petayábara namnaewatsiwa tsainchi xua Nakom kana exanaena Judá nakuapíwitha.

Josías matapaiña yaputane xua Judá nakuapiwi irü Efraín nakuapiwi jopa beta jinompaeyo jopa peyábara jumekowüntsiya exanaexae pokotsiwa Nakom itoroba pía peitorobi koyenewangtha. Bárapo peitorobi koyenewang tinaduba barapokotsiwa xua be papera. Barapoxonae barapomonae pona ichaxota yábüyo powa pewüing Hulda. Barapowa peyábara kueikuejeywayo pokotsiwa paeba bárapo Nakom pía peitorobi koyenewang tatsi. Barapowa jumenota barapomonaetha xua pokotsiwa Nakom paeba jeye:

—Exanaein xua bárapo nakuabepiwi átene tsane aiña koyenein xua abe, tsipéi jopa exanaeyo pokotsiwa itorobang. Barapomonae saya itapeta wüünae jainteiba po nakomüing jopa xaiñeyo. Josías éxana pokotsiwa itorobang taitorobi koyenewangtha. Yawa bapong jumetane xua páebang. Matáütano bapong yábara yaputane po peabe koyenewang Judá nakuapiwi éxana. Daxota jopa kopatsin tsane xua barapomonae peatenewa tsane poxonae kataunxuae bapong áwiya pópona, jei Nakom poxonae Hulda tapaeba Nakom nexa.

Barapoxonae barapomonae kaibe nawibiya xua Josías petsipaebinéxatsi pokotsiwa xua Nakom paeba poxonae Hulda paeba.

Barapoxonae Josías daxita kaetuta Judá nakuapiwi Nakom piabotha tatsi. Barapomonaetha jumedangweya tayóroba bárapo Nakom pía peitorobi koyenewang tatsi. Bapong nayábara tsiwüünae muxuduta Nakomtha jeye:

—Nakom kata exanaeinchi pokotsiwa xua itoróbame jiña neitorobi koyenewangtha. Daxita tajüntübükoyeneyatha baxua exanaein, jei bapong.

Barichi daxita jiwi nayábara tsiwüünae muxuduta Nakomtha jeye:

—Nakom bara paichin tsane, jei.

5

Néxata Josías itoroba ichamonae xua daxitang abe peexanaewa tsane po nakomüing xua jopa xaiñeyo. Poxonae Josías pópona, Judá nakuapiwi duwéi jutebeiba xua be ofrendang matawüing xua saya meisha Nakom nexa, po Nakom pepa Nakom. Poxonae Josías dieciocho po weibetha itorobiya éwata Judá nakua,

barapoxonae bapong éxana Pascua fiesta matawüing xua bichokono wüüinae xua Nakom nexa.

Bekein daxita báraxua Judá nakuapiwi Nakom taéxanatsi íchitha áwiya Nakom Judá nakuapiwi yábara anaepánatsi xua báyatha Manasés abe peexanaexae. Daxota Nakom juntukuru abe éxana Judá nákuatha icha báyatha ichi Efraín nákuatha. Poxonae Josías itorobiya éwata Judá nakua, barapoxonae Nakom itoroba pong Nakom peitorobi jume pepaebin, pong pewüing Jeremías, xua Judá nakuapiwi petsipaebinéxatsi Nakom Pejume Diwesi. Jeremías jeye barapomonaetha:

—Nakom paeba xua pinae paxam, pomonae Judá nakuapiwi pam, jopa pinae pajumekowüntsim bapong. Yáwano pinae abe paiña neexanáe jiwi pam. Matáütano pinae wüüinae pajáintame nakomüing, po nakomüing jopa xaiñeyo xua paiñakoutha paéxaname. Paiña amo susato jiwi wüüinae jainteiba Nakom, po Nakom pepa Nakom, poxonae jinompa irasaina xuépana tsúrukuae nákuatha. Báraxua exaneiba poxonae barapomonae kapanépatsi Egipto nakua weya, xua poxonae Nakom kapanepa.

”Barapoxonae Nakom átene kana éxana pomonae Israel pía pemómoxi susato jiwi tatsi abe taexanéibatsi. Íchitha poxonae Nakom kata barapomonaetha po ire xua pexeña ira xua barapomonae pejinompaewa tsane baraxota, barapoxonae barapomonae nakuibarapenta xua Nakom wüüinae pejainchíwatsi. Barichi pomonae Nakom peitorobi jume pepaebiwi, írürü sacerdotemona nakuibarapenta xua Nakom wüüinae pejainchíwatsi.

”Daxita paxam wüüinae pajáintame po nakomüing xua jopa xaiñeyo. Jopa pai-tapetsim pokotsiwa xua wüüinae. Saya paitapétame pokotsiwa xua abe. Nawita pokotsiwa pákata dangwéi xua daxota paatenem. Ápara poxoru Nakom jopa pawüükaem. Deta aena poxonae pákata ayapubé tsaibi paka nantawenonéibame Nakom xua paiña nepaka kapanenebiwa tsane bara weya.

”Nakom kópata xua Efraín nakua bara wetaxuinchi. Íchitha Judá nakuapiwi jopa ekeicha Nakom wüüinae jaintichi, bekein taetha poxonae Nakom abe éxana Efraín nakuapíwitha. Íchitha icha bárapo Efraín nakuapiwi yábara yaputaena penatsi-kuentsiwa abe peexanaexae, xuano ekeicha icha wüüinae jaintsina Nakomtha, bara daxita baxuang Nakom yábara jüntemainaena pokotsiwa barapomonae éxana. Barapoxonae Nakom ekeicha kaewa kaponae barapomonae xote Jerusalén tómaratha.

”Daxota paxam Judá nakuapiwi pam, ekeicha kaewa wüüinae pajainde Nakom, po Nakom pepa Nakom. Icha jopa báraxua paexanaem tsane barapong itorobina pomonae penawabchüü-exaneibiwi, pomonae ichaxota norte werenapiwi, xua abe peexanaenexa Judá nakua xuano xua pía átene paka exanaetsi. Dapomonae aibi tsane paxam jíwana, pomonae xua beta peexanaewi, pomonae xua yaputane xua poxonae abe yawa poxonae wüüinae. Jopa payaputaem xua pokotsiwa pexaiñeiwa matáütano pokotsiwa penaerabiwa.

”Poxonae báraxua paéxaname Nakom jopa paka yábara jüntemaináe tsane paiña abewang matáütano jopa paka yawenáe tsane. Ápara bapong kopatsina xua pomonae penawabchüü-exaneibiwi paka kaponae icha nákuatha, jei Jeremías, Judá nakuapíwitha.

6

Josías treinta y un po weibe xeina xua itorobiya peewatsiwa Judá nakua xua poxonae pong pewüing Nekao, pong Egipto nakua itorobiya peewatsin, barü patopa

pía penawabchüü-exaneibiwi tatsi imoxoyo ichaxota Judá nakua. Daxota bapong patopa xua peyawenaenéxatsi pong Asiria nakua itorobiya peewatsin poxonae naba éxana ichamonaetha. Íchitha Josías pona xua naba peexanaenexa bapongtha. Bekein Nekao aichaxaibi xua naba peexanaewa, xua Josías naba peexanáewatsi, íchitha Josías ichichipa naba peexanaewa. Bara Josías bexotsi, Nekao namawainta.

Barapoxonae Judá nakuapiwi ichüng itapeta pong Judá nakua itorobiya peewatsin, pong pewüng Joacaz, pong Josías pexanto tatsi. Bapoxonae Jeremías tina penaxünae weyo xua Josías yábara kanaxúnatsi.

Meje yábara poxonae pong pewüng Nahúm, pong Nakom peitorobi jume pepaebin, Nakom Pejume Diwesi kueikueijejei Nínive tomarapíwitha

(Nahúm 1—3)

Poxonae Asiria nakuapiwi werawéraka éxana Efraín nakua, beya poxonae Josías itorobiya éwata Judá nakua, aiña wei dapaein yapukaewa. Barapoxonae Nakom itoroba pong Nakom peitorobi jume pepaebin, pong pewüng Nahúm. Nakom, bapong itoróbatsi xua pekueikueijeinexa Nakom Pejume Diwesi Nínive tómaratha, po tómarapa pepa tómarapa xua Asiria nákuatha. Nahúm jeye barapomonaetha:

—Nakom ápara bapong pong peayapusüüwa pexeinaein. Barichi bapong ichichipa xua meisha bapong wüünae paiña nejainteibiwa tsane. Poxonae bapong anáepana, paiñamonaé jintong dapong aibi, pong naka panepa. Nakom eena pomonaé peyábara jumekowüntsíwichi xua peyawenaewa tsane. Íchitha bapong werawéraka éxana pomonaé pía peaitafaetabí jíwichi.

”Ánoxuae paxam abe payábara nantaxéiname bapongtha daxota paka werawéraka exanaena. Nakom yawenaena Israel pía pemómoxi susato jíwitha tatsi tsi-péi barapomonaé Nakom piamonaé tatsi. Bekein Nakom kópata xua átene paiña neexanaewa tsane bárapo Israel pía pemómoxi susato jíwitha tatsi, íchitha ánoxuae bapong báraxua nakuikópata.

”Nakom itorobina pong paiña nepaka aitaftabin xua pía paka yotabiwa tsane. Barapomonaé paka kaponaena icha nakua beya xua pía paka exanaetsi pomonaé pebusikuitaetawichi pam. Poxonae ichamonaé paka yábara jumetaena, báraxua jüntübükoyene weiweinaena tsipéi paxam báyatha pomonaé abe paiña neexanáé jiwi pam, pomonaé peaitabé jiwi pam.

Meje yábara poxonae pong pewüng Sofonías, pong Nakom peitorobi jume pepaebin, kueikueijejei Nakom Pejume Diwesi Judá nakuapíwitha

(Sofonías 1—3)

Poxonae Josías itorobiya éwata Judá nakua, Nakom itoroba pong Nakom peitorobi jume pepaebin, pong pewüng Sofonías. Bapong Nakom itoroba xua pekueikueijejiwa tsane Nakom Pejume Diwesi Judá nakuapíwitha. Sofonías jeye barapomonaetha:

—Nakom báyatha paeba xua pinae daxita werawéraka exanaena pomonaé wüünae jainta po nakomüng jopa xaiñeyo. Bapong exanaena xua kae koyenetha tsane xua jiwi jopa ekeicha wüünae pejainchiwa tsane bárapo nakomüng xua jopa xaiñeyo.

”Paxam pomonaé pentakaponáé jiwi pam xua Judá nákuatha, Nakom átene paka exaneibina abe paiña nekuidubixae ichamonaé. Barichi Nakom átene paka

kana exanaena pomonae pam pakaenaeta dubenanaebíyame, írürü pomonae pam penaküpáe exanáe jiwi pam, írürü pomonae pam abe paiña neexanáe jiwi pam ichamonaetha. Nakom paka kaseba pomonae pentakaponáe jiwi pam. Barichirü paxamrü pomonae Nakom peitorobi jume pepaebiwi pam, írürü pomonae sacerdotemonaе jiwi pam abe paiña neexanáe jiwi pam. Poxonae ichamonaе paka muxuweteiba báraxuang pa-aichaxaibim.

”Daxota Nakom kopatsina xua paka jutebina paiña nepaka kaitafáetabi jiwi xua pinmonae pam, xuano xua paka kaponeibina icha nákuatha pomonae pam xua jopa paka jutebiyo. Maisha ánoxuae paexande pokotsiwa xua Nakom paka itoroba, xain barapoxonae saya jopa pawerapaem tsane poxonae ichamonaе abe exanaena Judá nákuatha. Barapomonae paka kaponae icha nákuatha. Íchitha poxonae wétsina báraxua, xua Nakom átene paka éxana, Nakom werawéraka exanaena xua icha nakuangpiwi pomonae abe pákata éxana.

”Barapoxonae ekeicha kaewa patsina Israel pía pemómoxi susato jiwi tatsi Judá nákuatha pomonae kataunxuae jinompa. Matáütano Nakom paka katsibina irang, po irang pomonae paiña nepaka kaitafáetabi jiwi pía irang tatsi tsipéi paxam Nakom piamonae tatsi pam. Bárapo mataketha jiwi jüntema jinompaena Israel nákuatha. Barapomonae jopa abe exanáe tsane, saya meisha yábara jumekowüntsina Nakomtha. Barapomonae jüntübükoyene weiweinaena tsipéi Nakom yawenaena barapomonae xua kaewa ekeicha jüntema pejinompaewa tsane.

Meje yábara poxonae pong pewüing Habacuc, pong Nakom peitorobi jume pepaebin, kueikueijeji Nakom Pejume Diwesi Judá nakuapíwitha

(Habacuc 1—3)

Poxonae kataunxuae jiwi jinompa Judá nákuatha, Nakom itoroba pong Nakom peitorobi jume pepaebin, pong pewüing Habacuc, xua bapong pekueikueijeinexa Nakom Pejume Diwesi bárapo Judá nakuapíwitha. Habacuc jeye barapomonaetha:

—Báyatha Nakom wüükang yawa yáíñabangno jangje: ‘Nakom, ¿eta pokotsiwa metha jopa átene kana exanaem daxita Judá nakuapiwi? Barapomonae abe éxana. Jopa jumekowüntsiya exanaeyo pokotsiwa itoróbame jiña neitorobi koyenéwangtha. Poxonae jiwi xeina xua peayapubewang, pentakaponaewi jopa beta exanaeyo xua báraxua yábara. Deta pomonae abe peexanaewi tawüünaepoinchi. Nama pomonae beta peexanaewi jopa tawüünaeponaetsi’, jangje Nakomtha.

”Barapoxonae Nakom nejumenota jeye: ‘Itorobin Caldea nakuapiwi xua Judá nakuapiwi átene peexanaewa tsainchi. Barapomonae bichokono pedangwéi jiwi, yawa peaitabé jiwi xua daxota abe exanaena Judá nakua’, nejéi.

”Ekeicha yáíñabang Nakom jangje: ‘Nakom, xam beta neexanaein. ¿Eta pokotsiwa metha Caldea nakuapiwi itoróbame xua abe peexanaewa tsane Judá nakua? Jame ápara barapomonae abe peexanaewi beyakaincha Judá nakuapiwi’, jangje.

”Nakom nejumenota jeye: ‘Ápara jopa daxita tsane barapokotsiwa xua exanaein. Kotakaya átene kana exanaein pomonae xua abe peexanaewi pomonae icha Caldea nakuapiwi ichi. Kana exanaein xua Caldea nakuapiwi átene exanebinchi icha nakuapiwi ichi pókotsi koyeneya báyatha kana ichi icha nakuapíwitha poxonae átene exaneiba. Bárapo matakábitha daxita jiwi, pomonae abe peexanaewi jopa yaputáe tsane pokotsiwa xua exanaena. Íchitha pomonae neyábara jumekowüntsina, asiüü jinompaena. Bárapo matakábitha daxita jiwi neyaputaena xua xang

Nakomüŋ ápara pongxaein taayapusúü itorobi koyenewang taxeinain', nejéi Nakom, jei Habacuc.

2

Ekeicha Habacuc paeba jeye:

—Barapomona, pomona xua éxana nakomüŋ, po nakomüŋ jopa xaiñeyo xua yábara jumekowünta, bárapo nakomüŋtha xua peyawenáewatsi, ápara bara barapomona seikaya pomona jopa peyaputáe jiwi. Barapomona éwata xua peyawenáewatsi, xua bárapo nakomüŋ peyawenaewa. Íchitha barapomona jopa yawenaetsi tsipéi bárapo nakomüŋ jopa peasúü jiwi.

”Nama seikaya Nakom jame ápara bárapo Nakom pong pepa Nakom. Bapong Nakom pópona piabotha tatsi, po bo pin bo. Daxita jiwi poxonae poneiba Nakom piabotha tatsi, po bo pin bo, bewa moya tsaibi petsita-itüüta peiña xeinaenexa xua bara barükui-iturajina Nakomtha.

”Ekeicha Nakomtha wüükang, jangje: ‘Ánoxuae yaputang xam Nakom pongxae peayapusúü itorobi koyenewang nexainaem. Kaitaküüpa xua átene neexanaewa jiwi pomona abe peexanaewi. Íchitha barichi xam ichichípame xua neyábara jüntemainaewa tsane pomona abe peexanaewi pomona nekajumekowüntsiwi. Bekein jopa painta wüünae tsoponaeyo, íchitha áwiya kawüünae jaintaponaeinchi, tsipéi xam Nakom neayapusüüwa nekátame yawa nekapanépame tana neaitafáetabi jiwi weya’, jangje Nakomtha, jei Habacuc.

**Meje yábara poxonae Joacaz, irü kotakaya Joacim,
itorobiya éwata Judá nakua**

(2 Reyes 23.31—24.7; 2 Crónicas 36.1-8; Jeremías 22.11—12; 25—26; 31; 36)

Poxonae Josías bexotsi xua poxonae naba, bapoxonae pexanto xuya pekoutha tanaexánatsi xua itorobiya éwata Judá nakua, pong pewüŋ Joacaz. Bapong Joacaz itorobiya éwata Judá nakua saya akoibi po xometobetha tsipéi Egipto nakua itorobiya peewatsin, pong pewüŋ Nekao, bapong naba éxana Judá nakuapíwitha.

Bapong Nekao amanáyaba daxota Judá nakuapiwi itorobébatsi xua bapong pekatsibiwa tsainchi pekakomokáe parátixi xua impuesto matawüŋ. Matáütano bapong Joacaz wáetabatsi. Egipto nakua beya kapoinchi. Barapoxonae Nekao éxana xua Joacim Judá nakua itorobiya peewatsiwa, pong Joacaz peweicho tatsi. Barapoxonae Jeremías, pong Nakom peitorobi jume pepaebin, paeba jeye:

—Joacaz, jopa ekeicha kaewa bápana patopáe tsane Judá nákuatha. Barapong tüpaena Egipto nákuatha, jei.

Bara bapong tüpa Egipto nákuatha.

2

Joacim jopa exanaeyo pokotsiwa Nakom itoroba. Bapong báraxua peexanaexae daxota Jeremías jeye Judá nakuapíwitha:

—Icha jopa pana nakuibarapentsim xua abe paiña neexanaewa, Nakom kopatsina xua penawabchüü-exaneibiwi, xua icha nakuapiwi, werawéraka exanaena Jerusalén tómara, jei Jeremías.

Poxonae sacerdotemonae báraxua jumetane, írürü po nakomüing jopa xaiñeyo pía peitorobi jume pepaebiwi tatsi poxonae báraxua jumetane, Jeremías juntukuru bexotsi. Bapoxonae pítiri jiwi jeye:

—Kaena báyatha, xua cien po weibetha, Miqueas, pong Nakom peitorobi jume pepaebin, jüpa paeba xua pinae Jerusalén tómara werawéraka exanaeinchi. Saya dapong aibi xua Miqueas pebexubiwa tsainchi daxota, jei bárapo pítiri jiwi.

Daxota barapomonae jopa Jeremías bexubichi.

Barapoxonae poxonae Joacim akoibi po weibetha itorobiya éwata Judá nakua, Jeremías tsipaeba barapomonaetha jeye:

—Paxam Judá nakuapiwi pam, kaena báyatha veintitrés po weibetha paka tsipáebatsi Nakom Pejume Diwesi. Íchitha paxam jopa paichipaem xua paiña nejumekowüntsiwa bárapo diwesi. Nakom báyatha paeba xua pinae icha pana nakuibarapéntame daxita xua abe paiña neexanaewang Nakom kopatsina xua ataya paiña nejinompaewa tsane bárapo írathe, po ira báyatha kátatsi paiña amo susato jiwi. Dapo jumetha paxam áwiya wüünae pajaintapóname icha nakomüing.

”Daxota Nakom kopatsina xua pong pewüing Nabucodonosor, pong Caldea nakua itorobiya peewatsin, naba paka exanaena yawa paka amanayabina. Barapoxonae icha nákuatha pajinompáename setenta po weibetha. Matáütano Nakom kopatsina xua Nabucodonosor amanayabina aiña nakuangpiwi xua po nákuang Judá nakua matawakaicha énatzi. Poxonae yapukaewina setenta po weibe, Nakom átene kana exanaena daxita Caldea nakuapiwi. Barapoxonae kaponaeinchi icha nakua beya. Bapoxonae jiwi aibi tsane Caldea nákuatha, jei Jeremías.

3

Pírapae Jeremías jeye barapomonaetha:

—Kaentakabi tsane, xua pírapae tsane, Nakom pákata exanaena pena petsiwüünae muxudutsiwa. Bárapo petsiwüünae muxudutsiwa jopa jüpaeyo poxonae yábara tsiwüünae muxudútatsi paiña amo susato jiwi poxonae nótatsi Egipto nakua weya. Pokotsiwa xua Nakom yábara tsiwüünae muxuduta barapomonaetha ápara xua pinae barapomonae katsinchi Canaán nakua icha exanapona xua Nakom itoroba. Bekein barapomonae jejéi Nakomtha íchitha jopa exanaeyo xua Nakom itoroba.

”Daxota Nakom pena petsiwüünae muxudutsiwa exanaena paiñamonaetha. Barapomonae xeinaena Nakom pía peitorobi koyenewang tatsi pía pejüntübükoyenewangtha xua daxota beta peyaputaibiwa tsane xua beta peexaneibiwa. Barapomonae paiñamonaetha Nakom pepa piamonaetha tatsi tsane. Nakom yábara jüntemainaena pokotsiwang xua barapomonae abe éxana, jei Jeremías.

Kaentakábitha Jeremías tsimuxupaeba pong pewüing Baruc, xua petinaenexa. Baruc daxita tina pokotsiwa xua xuang báyatha Jeremías tsipáebatsi Nakom. Jeremías jeye:

—Kataunxuae áwiya Nakom éwata xua Judá nakuapiwi penakuibarapentsiwa tsane xua abe éxana xua daxota Nakom jopa penantawenonaewa tsane xua átene pekana exanaewa xua abe peexanaexae, jei Jeremías.

Íchitha poxonae Joacim jumetane xua Nakom paeba, jopa yábara auriyo xua báyatha abe peexanaexae. Barapong tauta barapokotsiwa xua be papera xua ichaxota Baruc tina xua Jeremías paeba. Báraxua éxana peachaxaibixae pokotsiwa Jeremías tapaeba Nakom. Néxata Nakom itoroba, Jeremías itoróbatsi, xua ekeicha

Baruc petinaenexa tsane xua báyatha tina. Barichi Nakom Jeremías itoróbatsi xua Joacim petsipaebinéxatsi jeye:

—Joacim tüpaena Babilonia nákuatha xua pía nakua tajü weputsi, jei Jeremías.

4

Kaena báyatha xua poxonae Joacim tamrópata pítaba xua itorobiya éwata Judá nakua, bapong bewa katsina pekakomokáe parátixi xua Nekao pekatsinéxatsi, pong Egipto nakua itorobiya peewatsin. Joacim piamonae itoroba xua piamonae pekatsibiwa tsainchi pin impuesto matoma, xua daxota pexeinaewa tsane xua Nekao pekatsiwa tsainchi.

Bapoxonae Nabucodonosor, pong Caldea nakua itorobiya peewatsin, naba éxana Egipto nakuapíwitha. Nabucodonosor amanáyaba. Daxota bapong itoroba, Joacim itoróbatsi, xua Nabucodonosor pekatsibiwa tsainchi pekakomokáe parátixi. Íchitha poxonae akoibi po weibe yapukaewa Joacim aichaxaibi xua pekatsiwa pekakomokáe parátixi xua Nabucodonosor pekatsiwa tsainchi. Daxota Nakom kópata xua penawabchüü-exaneibiwi xua icha nakuangpiwi Judá nakuapiwi naba exanaeinchi.

Barapoxonae Nabucodonosor pong Caldea nakua itorobiya peewatsin patopa xua naba peexanaenexa Judá nakuapíwitha. Nabucodonosor wáetaba, Joacim wáetabatsi. Joacim kapónatsi Babilonia tómaratha. Múxuna kapoinchi pía nakuapiwi xua Judá nakuapiwi jíwana. Matáütano múxuna kapoinchi xua korotong jíwana yawa xua tazang xua pin wang jíwana xua xuang báyatha Nakom piabotha xeina. Báraxuang Nabucodonosor jeba piabotha Babilonia tómaratha.

Poxonae Joacim tüpa xuya pekoutha pexanto tanaexánatsi, pong Judá nakua itorobiya peewatsin, pong pewüing Joaquin.

Meje yábara poxonae Caldea nakuapiwi jíwana kápona Babilonia tómara beya xua Judá nakuapiwi

(Daniel 1—3)

Bapong Nabucodonosor kápona Babilonia tómara beya Judá nakuapiwi jíwana. Baxua éxana poxonae Joacim wáetabatsi. Bárapo Judá nakuapiwi pomonae xua teikébatsi barapomonae jíwana meje: Ichüing pewüing Daniel, ichüing pewüing Sadrac, ichüing pewüing Mesac, ichüing pewüing Abednego. Bárapo cuatro pongbe xua pewowi jíwana ápara po pewowi peyaputáe jiwi. Bapong Nabucodonosor pewowi kápona Judá nakua weya pekuidubinexa xua bárapo pewowi petakanamataxeinaewa tsainchi xua Caldea nákuatha.

Nakom yawena bárapo cuatro pongbe xua bárapo cuatro pongbe peyaputáe jiwi tsane. Matáütano Nakom kana éxana xua Daniel yábara yaputaeya kueikueijeji tsaibi peamaichinaewang.

Daxota Nabucodonosor yábara jüntübükoyene weiweina bárapo cuatro pongbe, tsipéi bárapo cuatro pongbe bichokono peyaputáe jiwi. Yawa kana éxana xua bárapo cuatro pongbe náexana pía pemuxuwetsíwichi pomonae jíwana, pomonae pía peyaweneibiwichi xua pekueikueijejwa xua bapong beta peexaneibiwa tsane.

Kaentakábitha Nabucodonosor amichinae. Barapong wüüka ichamonae pomonae pemuxuwetsíwichi jíwana xua petayabarapaebiwa tsainchi bárapo michinaebo yawa pokotsiwa xua yábara kaunúnuta bárapo michinaebo. Barapomonae Nabucodonosor tsipáebatsi jeye:

—Jopa pana itaküüpaeyo xua pata katsipaebiwa tsainchi xua yábara kaunúnuta bárapo michinaebo poxonae kataunxuae jopa payaputaieño po michinaebo táneme.

Barapoxonae Nabucodonosor bichokono anáepana. Bapong itoroba xua pejutebiwa tsainchi daxita pomonae pemuxuweteibíwichi xua Babilonia tomarapiwi. Daxota pata pomonae xua penawabchüü-exaneibiwi xua pewaetabiwa tsainchi Daniel. Daniel múxuna wáetabatsi akoibi pongbe pomonae pía jiwi tatsi. Daniel yáñaba, pongtha pong Pekanamataxeinaein pomonae penawabchüü-exaneibiwi. Bapong jeye:

—¿Eta xua paéxanang xua daxota Nabucodonosor paka itoroba xua pata tana nejutebiwam tsane?

Bara bapong jumenota jeye:

—Bapong anáepana tsipéi pinae jopa payaputaem xua payábara yaputaeya páebame po michinaebo bapong tane.

2

Bapoxonae Daniel pona ichaxota Nabucodonosor yawa jeye bapongtha:

—Abü jopa pana jutebinde. Matha tha wüükaetsi Nakom xua yábara yaputane tana neexanaewa tsane po michinaebo xua táneme.

Bara Nabucodonosor jejéi. Bapoxonae Daniel píabo beya pona. Barapoxonae Daniel yábara tsipaeba pía jiwi, xua akoibi pongbe, daxita pokotsiwa xua tsipaeba Nabucodonosor. Daniel bárapo matabüxü barü wüüka Nakomtha. Bapoxonae Nakom Daniel bara baxua yábara yaputaeya tsipáebatsi po michinaebo Nabucodonosor tane, yawa xua yábara kaunúnuta bárapo michinaebo. Bapoxonae Daniel pona ichaxota pongtha, pong pekanamataxeinaein pomonae penawabchüü-exaneibiwi yawa jeye:

—Jopa jutebinde Nabucodonosor pía pemuxuweteibíwichi. Matha kopiya nebarü ponde ichaxota Nabucodonosor, jei Daniel.

Barapoxonae bapong Daniel kapoinchi ichaxota Nabucodonosor. Baraxota Daniel tamrópata pítaba xua peyábara yaputaeya kueikueiweiwa po michinaebo býatha Nabucodonosor tane. Daniel jeye bapongtha:

—Dapong aibi pong bekein metha yaputaetha tsipéi jopa itaküüpaetsi xua peyábara yaputaeya kueikueiweiwa po michinaebo táneme. Íchitha Nakom, pong pepa Nakom, ichichipa xua yábara nekatsita-itüütsiwa pokotsiwa xua bexa exanaena.

”Po michinaebo xua xam táneme, ibowa táneme xua be jintong xua pinwa. Pentasipa oro nainto. Pentákari yawa pemaxübe báraxua plata nainto. Pekoto epa báraxua bronce nainto. Petópabe yawa pesítobe báraxua hierro nainto. Petáxube jíwana yakaincha tsórobo náexana, ichawa yakaincha hierro nain náexana.

”Poxonae táneme bapong, jemeicha petáxutha ibowa tajópatsi yawa petaxu abe tsanaya. Barapoxonae daxita bárapo ibo jintong abe tsanaya. Daxita joibo kapubaba. Barapoxonae bárapo ibowa, po ibowa býatha petáxutha jemeicha jopa, pin demuxuwa naexananaya. Báraxua ápara po michinaebo xua táneme.

”Báraxua ápara yábara kaunúnuta xua meje: Pentasipa xua oro nainto xam kayábara kaunúnuta tsipéi xam neayapusüü itorobi koyenewa nexeiaein. Pentákari xua plata nainto yábara kaunúnuta xua icha nakua. Bárapo nakua bexa tsane xeinaena peayapusüü itorobi koyenewa íchitha jopa bichokono ayapusüü tsane. Pekoto epa

xua bronce nainto yábara kaunúnuta icha nakua. Bárapo nakua pírapae tsane xeinaena peayapusíü itorobi koyenewa xua kónotha. Petópabe yawa pesítobe xua hie-ro nainto yábara kaunúnuta icha nakua. Bárapo nakua aiña nákuabe naexanaena. Kae nakua peayapusíü itorobi koyenewa xeinaena. Icha nakua jopa daichi tsane.

”Bárapo matakábintha Nakom exanaena icha nakuapiwi xua pepa piamonae tatsi, xua bápana jopa werawérakae tsane.

3

Pírapae Nabucodonosor Nakom éxana xua oro nainto. Barapoxonae bapong pía nakuapiwi itoroba xua wüünae petajainchiwa tsainchi bárapo Nakom, xua oro nainto, xuano xua pentabokotongtha peumenaewa tsane. Poxonae ichamonae jopa exanaeyo pokotsiwa Nabucodonosor itoroba, bapong itoroba xua barapomonae petautsiwa tsainchi ishótotha xua ichaxota bichokono atou.

Icha mataketha Sadrac, irü Mesac, irü Abednego jopa pentabokotongtha ume-naeyo yawa jopa wüünae jainchiyo bárapo oro nain nakomüing poxonae kakuita pona. Daxota Caldea nakuapiwi bárapo akoibi pongbe kapónatsi Nabukodonosortha, pongxae pong nakua itorobiya peewatsin. Bapong jeye bárapo akoibi póngbetha:

—Wüünae pajainde po Nakom éxanang xua oro nainto. Yawa paiña nentabokotongtha paumende, tsipéi dapó Nakom aibi pong paka kapanenebiya xang weya.

Íchitha bárapo akoibi pongbe jeye:

—Jopa bepaexanaeño báraxua. Meisha Nakom, pong pepa Nakom itakúüpatsi xua pana nekapanenebiya bárapo ishoto weya. Icha bapong aichaxaibi xua pata tana nekapanenebiwa tsane, íchitha áwiya jopa paexanaein tsane xua wüünae pata jainchiwa bárapo oro nain nakom.

Poxonae Nabucodonosor jumetane báraxua bapoxonae bichokono anáepana yawa itoroba jeye:

—Bichokono ishoto aitaretaú paexande. Bárapo akoibi pongbe pomonae Israel pía pemómoxi susato jiwi jíwana tatsi ishótotha pabebáyama, jei.

Piamonae tatsi baxua éxana. Bárapo ishoto bichokono atou xua daxota pomonae Sadrac, irü Mesac, irü Abednego ishótotha bebéyatsi. Pomonae, Nabucodonosor piamonae, barapomonae taxotsi yawa wérapa. Nabucodonosor tane xua bárapo ishótotha jinompa cuatro pongbe, xua pong kuéyata be Nakom pexanto. Nabucodonosor ishoto pebóupatha imoxoyo pona, yawa wawái jeye:

—Sadrac, Mesac, Abednego pajirajirawadena, jei.

Bara bárapo akoibi pongbe baxua éxana. Bárapo akoibi pongbe jopa taxuichi yawa jopa atuxu-ishotaneyo.

Nabucodonosor báraxua petaxae bapong tina jeye:

—Maisha bichokono wüünae Nakom, po Nakom pepa Nakom. Pong xua abe yábara paebina Nakomtha, po Nakom Sadrac pía Nakom tatsi, irü Mesac pía Nakom tatsi, irü Abednego pía Nakom tatsi, barapong átene kana exanaein. Dapo Nakom aibi, po Nakom itakúüpatsi xua peexanaewa icha pepa Nakom ichi, jei Nabucodonosor xua tina.

Meje yábara poxonae Joaquín itorobiya éwata Judá nakua

(2 Reyes 24.8-17; 2 Crónicas 36.9-10; Jeremías 22.24-30; 29.1-14)

Joaquín, pong Joacim pexanto tatsi, itorobiya éwata Judá nakua saya akoibi po xometobetha. Barapong jopa jumekowüntsiya exanaeyo pokotsiwa Nakom itoroba

pía peitorobi koyenéwangtha. Daxota Nakom itoroba Jeremías, pong Nakom peitorobi jume pepaebin, xua Joaquín petsipaebinéxatsi Nakom nexa. Jeremías jeye:

—Joaquín, Nakom netsipaeba xua pinae Nabucodonosor kakaponaena Babilonia tómaro beya, xua po tómaro pepa tómaro, xua Caldea nákuatha xua pinae baraxotiya tüpäename, jei Jeremías.

Barapoxonae pírapae Nakom kópata xua Nabucodonosor yakaincha matawa-kaicha eena Jerusalén tómaro. Jerusalén tomarapiwi bichokono jainpa. Daxota Joaquín kópata xua bara pepatsiwa tsane Jerusalén tómaratha Nabucodonosor irü pía penawabchüü-exaneibiwi tatsi. Barapoxonae Nabucodonosor kápona, Joaquín kapoinchi, Babilonia tómaro beya, po tómaro xua pepa tómaro xua Caldea nákuatha. Baraxotiya Nabucodonosor jiwi pekübibotha eta, xua Joaquín étatsi.

Matáütano Nabucodonosor kápona Babilonia tómaro beya pomonae Joaquín pía petanakuichiwichi, pomonae peaiñakuí jiwi. Matáütano kapónano pomonae xua artesanía beta yaputane. Yáwano kapónano pomonae Joaquín pía penawabchüü-exaneibiwi tatsi xua Judá nákuatha. Saya meisha pomonae peakopeibí jiwi Nabucodonosor kópata xua pejinompaewa Judá nákuatha. Barapong Nabucodonosor éxana xua Joaquín paxong tatsi, xua paxa tatsi peweicho tatsi, itorobiya ewatsina Judá nakua, pong pewüng Sedequías.

2

Bárapo matakábintha Jeremías carta tatina Judá nakuapíwitha, pomonae Nabucodonosor kápona Babilonia tómaro beya. Jeremías jeye barapomonaetha:

—Baraxotiya bong paákaba dubenanaebíyama. Paúba dubenanaebíyama. Jitha pa-eenaponde. Baraxotiya sesenta po weibe payapu othopáename pewünaeya tsane xua Nakom paka kopatsina xua kaibeya paiña neponaewa tsane Judá nakua beya, jei Jeremías xua tatina barapomonaetha.

Meje yábara poxonae Ezequiel, pong Nakom peitorobi jume pepaebin, tsipaeba Nakom Pejume Diwesi pomonaetha, pomonae kapoinchi Judá nakua weya poxonae Babilonia tómaratha jinompa

(Ezequiel 1—24)

Daxita pomonae Nabucodonosor kápona Judá nakua weya, xua Babilonia tómaro beya, kaein nápona pong pewüng Ezequiel. Poxonae Ezequiel Babilonia tómaratha eka, bapong tsita naitúütatsi Nakom michinaebotha. Bapong tane Nakom pía pexeña peitüpanáe koicha tatsi. Michinaebotha bara weya Ezequiel Nakom itoróbatsi jeichichi:

—Ezequiel, tsipáebare tajume diwesi pomonaetha, pomonae Judá nakua weya kapoinchi. Íchitha barapomonae abe peéxanae jiwi. Jopa kajumenaitómatsi tsane. Dáichitha aiñakuí xua nemuxuwetsiwa tsane barapomonae xua xang bexa átene exanaein, tsipéi báyatha abe éxana. Átene tsane piakóuthaxae xua poxonae abe éxana. Íchitha xam barichim jiñakoutham icha jopa baxua yábara tsipaebim barapomonae. Icha bekein yábara tsipaebiwatham tsane bara ápara barapomonae piakoutha tsane icha átene kana exanaein.

”Icha jopa muxuwetsim pong ba wüünae peexanaein xua dáichitha tamrópata pítaba xua abe éxana, bapong átene tsane piakóuthaxae xua abe éxana. Íchitha xam barichim tsane, jiñakoutham tsane icha jopa barapong muxuwetsim

poxonae táneme xua bapong abe éxana. Íchitha icha bapong muxuwétame metha moya bara kajumetáetsipa. Metha jopa abe exanáe tsipae daxota jopa átene tsipae. Bara báraxua ápara éxaname pokotsiwa kaitoróbatsi xua neexanaewam tsane, jei Nakom xua Ezequiel tsipáebatsi.

2

Po diwesi xua Ezequiel tsipaeba Judá nakuapíwitha Nakom nexa jeye:

—Nakom kopatsina xua penawabchüü-exaneibiwi, pomonae Caldea nakuapiwi, abe exanaena Jerusalén tómara. Yawa pinmonae jutebinchi. Ichamonae piyain werapaena. Ichamonae werapaena peatenexae tsane. Ichamonae saya tsanajinoutarutsina aiña nákuangtha. Nakom átene kana exanaena barapomonae tsipéi jopa Nakom jumekowüntsichi. Barapomonae wüünae jainteiba po nakomüng xua jopa xaiñeyo yáwano baxua exaneiba ichaxota Nakom píabo tatsi, po bo pin bo.

”Daxota Nakom kopatsina xua Judá nakuapiwi irü Caldea nakuapiwi penabewa tsane. Bapoxonae Judá nakuapiwi kaponaeinchi Babilonia tómara beya, pomonae kataunxuae asiüü poxonae naba. Barichi Sedequías kaponaeinchi Babilonia tómara beya. Bekein barapong naetsiriwina íchitha tüpaena pewünaeya xua patopaena Babilonia tómaratha. Saya be kónotha jiwi xua Judá nakuapiwi panenebiya tsane pomonae báraxua diwesi pepaebiwa tsane poxonae ekeicha kaewa patsina Judá nákuatha. Bapoxonae daxita jiwi yaputaena xua Nakom ápara po Nakom pepa Nakom.

3

Matáütano ekeicha Nakom tsipaeba xua poxonae Ezequiel tapaeba, jeye:

—Icha ba pebin ichi xua ba píowa beta eena, xang barichin beta eéng Israel pía pemómoxi susato jiwi tatsi. Kopiya barapomonae be petamasainaewi xua akopeibiwi. Barapoxonae beta éxanang barapomonaetha. Barapoxonae barapomonae átsaka yawa pona xua wüünae pejainchiwa icha nakomüng. Barapomonae icha be ichi poxonae yábüyo pona xua jeita pebiwi xua peishamaitenáewatsi tsainchi. Daxota tha átene kana exanaetsi Israel pía pemómoxi susato jiwi tatsi.

”Saya meisha átene kana exanaein pomonae xua báyatha abe peexanáewixae. Jopa dapong átene kana exanaein tsane xua poxoru paxa tatsi abe peexanaexae, ichikuitha poxonae xua poxoru pexanto tatsi abe peexanaexae. Jame bapong kuita átene kana exanaein poxonae bapong abe peexanaexae. Yábara jüntemainaen icha ichüng abe éxana xua dáichitha nakuikópata xua abe éxana xua bapoxonae ekeicha beta éxana.

”Jame bichokono ichichipang xua pong abe peexanaein ekeicha kaewa beta peexanaewa xua daxota jopa átene kana exanaein tsane. Íchitha icha pong beta peexanaein nakuibaraxuba xua beta peexanaewa, xua ekeicha abe peexanaewa, átene kana exanaein bichokono. Jopa yábara nantanaxeinaein tsane poxonae bekein báyatha ba wüünae éxana.

”Kaena báyatha poxonae bárapo Israel pemómoxi susato jiwi tatsi notang Egipto nakua weya, jopa exaneibiyo pokotsiwa itorobeibang. Judá nakuapiwi irü Efraín nakuapiwi bara tamonae, bekein barapomonae icha nakomüng xeina yáwano wüünae jainteiba. Áwiya antobein tsaibi bárapo nakuapíwibe. Íchitha barapomonae áwiya jeita icha nakomüng. Judá nakuapiwi tane xua Efraín nakuapiwi

éxana yawa tane xua Asiria nakuapiwi jutebina xua Efraín nakuapiwi jutebinchi. Bekein Judá nakuapiwi baxua tane íchitha jüpa éxana icha Efraín nakuapiwi ichi. Daxota kopatang xua Caldea nakuapiwi jutebina, xua Judá nakuapiwi jutebinchi.

Poxonae Ezequiel najumeweta barapomonaetha jeye:

—Methaunxuae Nabucodonosor kapatopaena ichamonae, pomonae xua Judá nakuapiwi, petsita-jumenaitapeña xeinaewa tsane xua pokotsiwa tapaka katsi-paebíwatsi ápara bara xaiñéi.

Meje yábara poxonae Nabucodonosor, pong Caldea nakua itorobiya éwata, werawéraka éxana Jerusalén tómara

(2 Reyes 24.18—25.21; 2 Crónicas 36.11-20a; Jeremías 21; 24; 27.12—28.17; 32—35; 37—39; Ezequiel 17.11-18)

Sedequías, pong Joaquín paxong tatsi, itorobiya éwata Judá nakua saya once po weibe. Barichi bapong jopa yábara jumekowüntsiya exanaeyo pokotsiwa Nakom itoroba pía peitorobi koyenéwangtha. Jeremías pong Nakom pía peitorobi jume pepaebin tsipaeba, Sedequías tsipáebatsi, jeye:

—Bewa jumekowüntsiya exanaem pokotsiwa Nabucodonosor kaitoroba, pong Caldea nakua itorobiya peewatsin. Tsipéi Nakom kopatsina xua pinmonae jopa átene tsane, pomonae xua báyatha Caldea nakuapiwi teikeiba xua Babilonia tómara beya pekaponanexa. Íchitha pomonae jüjüta xua peenaewa Judá nákuatha, barapomonaetha Nakom átene kana exanaena.

”Barichi pomonae jüjüta xua pedüküpaewa tsane Egipto nakua beya, barapomonaetha Nakom átene kana exanaena. Barichi Nakom kópata xua Nabucodonosor kawaetabina. Barapoxonae kakaponanexa Babilonia tómara beya ichaxota tüpáename xua poxonae bekein jüntema poponáename, jei Jeremías poxonae Sedequías tsipáebatsi.

Íchitha Sedequías aichaxaibi xua éxana pokotsiwa Jeremías itoroba Nakom nexa. Barichi ichamonae, pomonae icha nakomüng po nakomüng jopa xaiñeyo peitorobi jume pepaebiwi, barapomonaetha Sedequías muxupéiñabatsi xua pinae Nakom jopa kopatsí tsane xua Nabucodonosor peamanayabiwa tsane Jerusalén tómara. Yáwano barapomonaetha Sedequías tsipáebatsi xua pinae barapomonaetha kaewa xeinaena korotong yawa xua xuang tazang xua pin wang xua xuang kaena báyatha Babilonia tomarapiwi nota Nakom píabo tatsi weya, po bo pin bo.

Bekein Jeremías ekeicha tsipaeba barapomonaetha xua pinae Nabucodonosor daxita omeicha notsina xua pekaponanexa Babilonia tómara beya xua xuang áwiya bobena Nakom piabotha tatsi beya, po bo pin bo, poxonae Nakom kópata xua barapomonaetha kaewa patsina Judá nákuatha.

Sedequías jumekowünta pokotsiwa paeba pomonae po nakomüng xua jopa xaiñeyo pía peitorobi jume pepaebiwi. Bapong jopa jumekowüntsiyo pokotsiwa Jeremías paeba. Daxota Sedequías nakuibaraxuba pokotsiwa báyatha yábara tsi-wüüinae muxuduta xua Nabucodonosor katsinchi impuesto matoma. Barapoxonae bapong Sedequías wüüka pongtha, pong Egipto nakua itorobiya peewatsin, xua peyawenaewa tsainchi xua poxonae naba éxana.

Daxota Nakom kópata xua Nabucodonosor ekeicha pepatopaewa tsane xua yakaincha matawakaicha peenaenexa Jerusalén tómara. Barapoxonae nama

báraxua Nabucodonosor éxana bara kae wei yawa xua seis po xométope. Bárapo dapaetha Sedequías itoroba xua Jeremías pewaetabiwa tsainchi xua peetsinéxatsi jiwí pekübibotha. Báraxua éxana poxoru Jeremías áwiya paeba xua pinae Caldea nakuapiwi werawéraka exanaena Jerusalén tómara. Bekein Jeremías taéxanatsi, íchitha áwiya kueikueije Sedequíastha irü Judá nakuapíwitha xua Nakom Pejume Diwesi, po Nakom pepa Nakom. Kaentakábitha pong Judá nakua itorobiya peewatsin Jeremías wábatsi. Bapong Jeremías yáíñabatsi jeye:

—¿Eta xua bewa exanaein? jei bapong Sedequías.

Ekeicha Jeremías tsipaeba bapongtha jeye:

—Kópare xua Nabucodonosor irü piamonae tatsi patsina Jerusalén tómaratha, jei Jeremías.

Íchitha Sedequías junuwa xua báraxua peexanaewa.

Matapaiña patopa po matakabi poxonae Jerusalén tomarapiwi bichokono jainpa. Sedequías irü piamonae tatsi, pomonae pentakaponaewi, mérawi nantsiyabeiba tómara weya. Barapomonae jüjüta xua pedüküpaewa icháwatha. Íchitha Caldea nakua pía penawabchüü-exaneibiwi tatsi tane, yawa barapomonae téikatsi. Barapoxonae Sedequías nantíyabe itamaikéi jútatsibe, yawa kapoinchi Babilonia tómara beya. Bara baxua nayábara jumeweta pokotsiwa xua kaena báyatha Jeremías yábara paeba, xuano xua irü Ezequiel yábara paeba xua pinae Sedequías waetabinchi, kaponáinchino Babilonia tómara beya.

Pírapae Caldea nakua pía penawabchüü-exaneibiwi tatsi werawéraka éxana Nakom píabo tatsi, po bo pin bo, yawa werawéraka éxana nakua itorobiya peewatsin píabo tatsi, yáwano werawéraka éxana po bong, pexeña bong. Matáütano werawéraka éxana xua pokotsiwa Jerusalén tómara yatoxórota duta. Barapomonae pinmonae juteba, yáwano pomonae áwiya asüü kapoinchi Babilonia tómara beya. Saya tsikimonaeyo kakópatatsi.

Meje yábara poxonae Jeremías bichokono yábara wekoyeya paeba Nakomtha yawa jíwitha

(Lamentaciones 1—5)

Babilonia tómaratha Jeremías, pong Nakom peitorobi jume pepaebin, bichokono yábara najüntübükoyene xeina Jerusalén tómara. Bapong tsipaeba Jerusalén tomarapíwitha pomonae jinompa Babilonia tómaratha. Bapong jeye:

—Kaena báyatha Jerusalén tómaratha pinmonae jinompa. Íchitha ánoxuae aibi, saya tómara. Pomonae wanaka aitafaetabí jiwí naka teika. Yáwano naka kápona po nákuatha ichaxota naka busikuitatayeba. Daxita pomonae wanaka aitafaetabí jiwí abe naka exaneiba. Yawa dapong aibi pong naka yawena. Yawa dapong aibi pong naka itanuwé matateika. Waxainchi tsobenaetsi báyatha nákata exaneiba. Bekein Nakom báraxua nákata kópata xua abe waexanaexae tsipéi waxainchi jopa exanaetsi pokotsiwa xua bapong naka itoroba, jei Jeremías Jerusalén tomarapíwitha.

Bapoxonae Jeremías tsipaeba Nakomtha jeye:

—Nakom, daxita pomonae pata tana neaitafáetabi jiwí jüntübükoyene weiweina tsipéi xam kópatame xua bichokono pata taatenewanexa. ¡Xam Nakom, pong pata tananentakaponaem, kawúükatsi xua patopa éxaname po matakábitha irü barapomonae átene tsane xua báyatha abe pata tana neexanaexae! jei Jeremías.

2

Bapoxonae Jeremías tsipaeba Judá nakuapíwitha jeye:

—Nakom kópata xua bara daxita abe koyenewang xeinaeinchi. Bichokono abe waexanaexaetsi daxota pomonae wanaka aitafaetabí jiwi nákata abe éxana Nakom piabo tatsi, po bo pin bo. Ánoxuae baraxotiya Judá nákuatha jiwi aibi. Matáütano dapong aibi pong yábara kanantanaxeina penafinakáewatsi matakabi xuano xua fiesta matakabin xua poxonae exanéibatsi Nakom nexa. Ánoxuae baraxotiya jopa jinompaeyo sacerdotemona. Matáütano aibi pong Judá nakua itorobiya peewatsin. Dapong aibi pong yábara kanantanaxeina Nakom pía peitorobi koyenewang tatsi.

”Waxainchi daxítatsi wekoyeichi, pomonaetsi, pomonae Israel pía pemómoxi susato jíwichi. Tamonae bichokono siwawekoyang tspéi barapomonae bichokono átene exanéibatsi. Matáütano wekoyang tspéi barapomonae jopa ekeicha bápana taein tsane. Jopa neitaküüpaeyo xua taitanuwé matateikaewa barapomonae.

”Bárapo tamonae tsipáebatsi xua jopa po michinaebong xaiñeyo xua poxonae kueikueijeí tsaibi pomonae icha nakomüng peitorobi jume pepaebiwi. Bárapo tamonae jopa yábara tsipaebibichi xua barapomonae abe peexanaewa xua daxota penakuibarapentsiwa tsane xua abe peexanaewang. Daxota tamonae jopa yaputaeyo xua bewa beta jinompaena xua daxota Nakom jopa átene kana exanáe tsane bárapo tamonaetha.

”Wanaka aitafaetabí jiwi jüntübükoyene weiweina poxoru watómara, Jerusalén tómara, po tómara bichokono pexeña tómara, ánoxuae nákata pekóu. Nakom éxana xua báyatha yábara najüntübükoyene weta xua peexanaewa tsane. Bara najumeyábara kuiweta xua wanaka muxutaiñabeibiwa, jei Jeremías, Judá nakuapíwitha.

Jeremías ekeicha tsipaeba Nakomtha:

—Nakom, pong pata tananentakaponaem, jopa pana neyábara jüntemainaeinde, jei Jeremías.

3

Ekeicha Jeremías tsipaeba Judá nakuapíwitha jeye:

—Abü ewatsin xua bepijawa jopa aitakonaen tsane xua Nakom wanaka yawenaewa tsane. Yaputang xua Nakom kataunxuae áwiya naka ántobe. Bapong bara éxana pokotsiwa xua exanapaeba. Yáwano betiya nakayábara nantaxeinaena xua jopa aitakonaeyo. Matáütano bapong jopa naka bebái tsaibi tsane. Bekein ánoxuae bichokono naka átene éxana íchitha bexa tsane ekeicha nakayábara nantaxeinaena xua betiya wanaka yawenaewa tsane pía wanaka antobéwaxae.

”Daxota poxonae ichawa éxanatsi, bewa beta exanaetsi. Bewa ichamonae xaiñeya taexanaetsi. Icha jopa beta exaneibichi bewa maisha ekeicha beta exanaetsi be pokotsiwa Nakom ichichipa. Bewa daxua jopa exanaetsi xua poxonae náemata Nakom wúükatsi. Maisha jame bewa xaiñeya wüükaetsi Nakomtha, jei Jeremías, Judá nakuapíwitha.

Néxata Jeremías tsipaeba Nakomtha jeye:

—Nakom, xam pongxaem pata tananentakaponaem. Jopa pana neyábara jüntemainaeinde pokotsiwa xua kaena báyatha ichamonae painta exaneiba. Maisha paatenein.

Nakom xam itorobiya ewatéibame ataya tsane bárapo kae pin nakua. Maisha jopa pana neyábara jüntemainaeinde. Éxande xua bapoxonae ekeicha wüünae paka jáin-tatsi, jei Jeremías.

Meje yábara poxonae Abdías irü Ezequiel, pongbe Nakom peitorobi jume pepaebinbe, yábara kueikueijeibe Edom nakuapíwitha

(Ezequiel 25; Abdías)

Bapoxonae pirapaeyo, xua poxonae Nabucodonosor werawéraka éxana Jerusalén tómara, bapoxonae Nakom tsipaeba pongtha, pong Nakom peitorobi jume pepaebin, pong pewüing Ezequiel. Nakom Ezequiel yábara tsipáebatsi xua Edom nakuapiwi, xua Nakom petapaebinéxatsi. Ezequiel jeye Edom nakuapíwitha:

—Edom nakuapiwi pam, býatha Nakom paeba xua pinae paka yábara anáepana. Nakom pinae kaentakábitha tsane itorobina xua Israel pía pemómoxi susato jiwi tatsi werawéraka pákata exanaena paiña nakua xua Edom nakua. Báraxua pákata exanaena tsipéi paxam kaena býatha Caldea nakuapiwi payawéname poxonae Judá nakuapiwi jutébatsi. Daxota Nakom kopatsina xua paka nekajutebiwa tsane xua daxota paiña íratha jiwi pa-aibim tsane, jei Ezequiel.

Barichirü bárapo dapaetha Nakom itoroba ichüing, pong Nakom peitorobi jume pepaebin, pong pewüing Abdías, xua bapong pekueikueijeiwa tsane Edom nakuapíwitha. Bapong jeye:

—Paxam, pomonae Edom nakuapiwi pam, pajüntübükoyene weiwéiname xua poxonae Caldea nakuapiwi werawéraka éxana Jerusalén tómaratha xuano xua jutébatsi Judá nakuapiwi. Paxam kotakaya papóname yawa panótame pokotsiwang xua tómarangtha bobena. Matáütano pajutébame ichamonae, pomonae bekein jüjüta xua perüküpaewa.

”Methaunxuae Nakom xuya bara paka kana ichi tsane ichi be pókotsi koyeneya pakana ichim Judá nakuapiwi. Nakom exanaena xua Israel pía pemómoxi susato jiwi tatsi beta pejinompaewa tsane. Íchitha nama paxam werawéraka paka exanaena paiñakoutha wüünae paiña nenajainchíwaxae poxonae ichamonae paéebame.

Meje yábara poxonae pomonae jinompa Judá nákuatha pona Egipto nakua beya

(2 Reyes 25.22-26; Jeremías 40—44; Ezequiel 29—32)

Barapong Nabucodonosor, pong Caldea nakua peewatsin, itapeta pong pewüing Gedalías xua bapong gobernadormonaepin náexana xua Judá nakuapiwi nexa. Bapong Judá nakuapiwi éwatatsi pomonae xua yakópabatsi poxonae ichamonae kapónatsi Babilonia tómara beya. Bapoxónaerü Jeremías pópona Judá nákuatha. Bapong baraxota eka tsipéi, pong Caldea nakua pía penawabchüü-exaneibiwi tatsi Pekanamataxeinaein, bapong Jeremías kópatatsi xua bara kaibeya peponaewa tsane Judá nakua beya. Gedalías tsipaeba bárapo Judá nakuapíwitha jeye:

—Pataema. Paexande pokotsiwa xua Nabucodonosor paka itoroba. Bapoxonae xain jopa pajunuwim. Xain yawa jopa abe paka exanaeyo, jei Gedalías.

Íchitha barapoxonae pebin pong pewüing Ismael namawainta, Gedalías bexotsi. Barapoxonae bárapo Judá nakuapiwi bichokono junuwa xua pekuiyainwa tatsi Caldea nakuapiwi, daxota barapomonae Egipto nakua berüküpiya. Pomonae xua

Israel pía pemómoxi susato jiwi tatsi pía pentakaponáewichi, barapomonae jíwana pomonae penawabchüü-exaneibiwi pía pentakaponaewi tatsi.

Bárapo pentakaponaewi Jeremías siwapoinchi yawa jeye:

—Painta yábara wúükare Nakomtha pokotsiwa xua bewa paexanaein. Bara paexanaein pokotsiwa xua Nakom pana itoroba, jei.

Íchitha barapomonae jopa ichipaeyo xua peyaputaewa pokotsiwa xua Nakom itoroba xua barapomonae bewa exanaena. Báyatha barapomonae nantaxeina xua juntukuru peponaewa tsane Egipto nakua beya. Jeremías tsipaeba barapomonae-tha xua Nakom tapáebatsi jeye:

—Abü, pajinómpare Judá nákuatha. Bexa paka exanaeinchi xua jüntema paiña nejinompaewa tsane. Jopa Nabucodonosor pakuitaya junuwinde. Tsipéi bapong kana exanaein xua jopa abe paiña nepaka exanáe tsane. Jopa Egipto nakua beya pawarapaeinde xua baraxotiya ítara mexeya beta paiña nejinompaewa tsanewe pajam. Icha bara beya pawarapáename jopa beta pajinompaem tsane. Ichamonae piyain werapaena. Ichamonae jutebinchi poxonae naba éxana, jei Jeremías, xua Nakom tapáebatsi.

Íchitha bárapo pentakaponaewi jopa Jeremías jume-naitaewatsichi. Dapo jume-tha barapomonae piamonae daxita matakawárapa xua daxitang kápona Egipto nakua beya. Jeremías irü nápona barapomonaetha. Baraxotiya Egipto nákuatha, Nakom itoroba, Jeremías itoróbatsi, xua Jeremías pejeinexa Judá nakuapíwitha jeye:

—Methaunxuae Nabucodonosor piamonae barü patopaena xote xua pepichiwa tsane po nakue. Methaunxuae yawa pawardáename tsipéi wüünae pajáintame po nakomüng jopa xaiñeyo, jei Jeremías, Judá nakuapíwitha xua Nakom tapáebatsi.

2

Barapoxónaerü Ezequiel kueikueijei Nakom Pejume Diwesi pomonaetha, pomonae Judá nakua wérena kaponébatsi xua kapoinchi Babilonia tómaratha, xua Caldea nákuatha. Ezequiel jeye:

—Methaunxuae Caldea nakuapiwi pichina Egipto nakua. Matáüta Nakom exanaena xua bárapo Egipto nákuatha jiwi aibi tsane xua bara kaeto tsane. Nabucodonosor bichokono pinmonae jutebina pomonae jinompa Egipto nákuatha. Matáütano bapong Babilonia tómarara beya kaponaena daxita pekakomokáe parátixi xuano xuang bichokono peitüpanaewang xua baraxotiya xeina. Matáütano bapong aiña tómarang werawéraka exanaena, po tómarang xua ena bárapo Egipto nákuatha, jei Ezequiel xua Nakom tapáebatsi.

Meje yábara poxonae Babilonia tómaratha Ezequiel kueikueijei Nakom Pejume Diwesi pomonaetha, pomonae kaponébatsi Judá nakua weya

(Ezequiel 33—34; 36—48)

Nakom itoroba, Ezequiel itoróbatsi, xua kataunxuae áwiya pekueikueijei tsonaewa tsane Nakom Pejume Diwesi Babilonia tómaratha pomonaetha, pomonae Judá nakua weya kapoinchi. Baxua éxana bekein báyatha Caldea nakua pía penawabchüü-exaneibiwi tatsi werawéraka éxana Jerusalén tómarara.

Bapoxonae pirapaeyo xua poxonae Jerusalén tómarara werawéraka éxana, ichamonae Judá nakuapiwi pata Babilonia tómaratha. Barapomonae daxita yábara

paeba pokotsiwa xua tane Judá nákuatha pomonaetha, pomonae kopiya kapónatsi bárapo tómaratha. Néxata Nakom tsipaeba xua Ezequiel petapaebinexa pomonaetha, pomonae pepatsixae. Ezequiel jeye barapomonaetha:

—Paxam Israel pía pemómoxi susato jiwi tatsi pam, daxita koyenein abe peéxanae koyenein paexanéibame. Bekein báraxua paéxaname íchitha áwiya panantanaxéiname xua Nakom bewa paka kopatsina xua paiña nejinompaewa tsane Judá nákuatha. Matáütano báraxua panantanaxéiname xua poxoru kaena báyatha Nakom peyábara tsiwüünae muxudutsixae Abrahamtha xua pinae Abraham pía pemómoxi susato jiwi tatsi katsinchi bárapo Judá nakua. Nakom exanaena xua bárapo Judá nákuatha jiwi aibi tsane tsipéi paxam bichokono peabe koyenein paéxaname. Barapoxonae payaputáename xua Nakom ápara po Nakom pepa Nakom, jei.

2

Ekeicha Nakom Ezequiel yaputane exainchi xua pinae pomonae Nakom wüükéibatsi xua peyaputaibinexa pokotsiwa xua bapong ichichipa, ápara pinae barapomonae jopa exaneibiyo pokotsiwa Nakom itorobeiba.

Ekeicha Nakom itoroba, Ezequiel itoróbatsi, xua petsipaebiwa tsane pomonaetha, pomonae Israel pía pemómoxi susato jiwi tatsi pía pentakaponaewi tatsi. Ezequiel jeye:

—Nakom paka itaweta tsipéi jopa beta pamatakaponaem paiñamonae. Saya pana nayábara nantanaxéiname nawita xua paiña nexeiaewa nawita. Jopa paiñamonae payábara nantaxeinaem xua paiña neyawenaewam tsane. Paxam jopa beta panantaxeinaem xua paiñamonae payawéname ichi be ichi pomonae ovejang peewatsiwi xua saya oveja xane, xua jopa nantaxeinaeyo xua beta pe-eenaewa.

”Daxota Nakom ekeicha jopa paka exanáe tsane xua Israel pía pemómoxi susato jiwi tatsi pía pentakaponaewi tatsi paiña nenaexanaewa. Nakom ekeicha daxita kaetutetsina pomonae xua báyatha icha nákuangtha tsanajinoutaruta. Daxita barapomonae Nakom exanaena xua barapomonae ekeicha kaewa pejinompaewa tsane Israel nákuatha. Barapong piakoutha eenaena yawa yawenaena xua barapomonae beta pejinompaewa tsane. Nakom exanaena xua barapomonae itorobiya ewatsinchi pong David pía pemómoxi susato jiwi jíwana tatsi. Bárapo matakábintha barapomonae beta jinompaena tsipéi Nakom peyawenaexae barapomonae, jei.

3

Ekeicha Ezequiel tapaeba, Nakom tapáebatsi, poxonae tsipaeba pomonae báyatha kaponébatsi Judá nakua weya xua Caldea nakua beya. Jeye:

—Nakom daxita nakuangpíwitha átene kana exanaena pomonae xua báyatha abe paka kana exaneiba. Matáütano paka kana exanaena xua kaibeya paiña neponaewa tsane paiña nakua beya. Barapoxonae baraxotiya beta jinompa paka kana exanaena, jei.

4

Ekeicha Nakom tsipaeba Ezequieltha jeye:

—Israel pía pemómoxi susato jiwi tatsi átene kana exaneibín tsipéi barapomonae nakomüng wüünae jainta, po nakomüng jopa xaiñeyo. Daxota

nejüntübükoyene anáepana éxana. Daxota bewa átene kana exaneibín. Poxonae barapomonae itorobang icha nakua beya xua baraxotiya pejinompaenexa, barichi baraxotiya icha nakomüing wüünae jainteibina. Íchitha jopa daxita wérapa kana exanaein tsane bara bekein bichokono abe peexanaewi. Bapomonae ekeicha kaponaein Israel nákuatha. Ápara jopa poxóruyo xua barapomonae beta peexanaexae, saya ápara xua jiwi beta tana neyábara paebiwa tsane.

”Poxonae icha nakuangpiwi taena pokotsiwa xua éxanang bara bapoxonae neyaputaena xua xang ápara po Nakomüing pepa Nakomüing. Barapoxonae Israel nakuapiwi yábara jüntemainaein daxita pokotsiwa xua kaena báyatha abe éxana barapomonae. Barapomonae icha jüntübükoyene xeina kana exanaein. Tajumopetünaxü-itorobin xua barapomonae pekana exanaewa tsainchi xua jume-kowüntsiya peexanaewa tsane taitorobi koyenewang. Barapoxonae barapomonae pía nakua tatsi bara beta tsane. Ánoxuae ponde yawa daxita báraxuang tsipáebare Israel pía pemómoxi susato jiwi tatsi, jei Nakom.

Bara Ezequiel báraxua éxana xua peitorobixaetsi.

5

Kaentakábitha Ezequiel kamaita petafonabowa xua baraxota jiwi piwang bobena xua petsewiwang. Nakom tsipaeba, Ezequiel tsipáebatsi, jeye michinaebotha:

—Bárapo piwang xua jiwi piwang ekeicha kaewa pepa jiwi naexanaena, xua asiüü naexanaena, jei Nakom.

Bapoxonae Nakom tsipaeba, Ezequiel tsipáebatsi, pojumeya xua Ezequiel pepaebiwa tsane bárapo piwangtha. Poxonae Ezequiel báraxua paeba, bapong tane xua bárapo piwang nakaetubaba. Kopiya daxita saya ü piwa xua be jiwi pepong. Barapoxonae daxita pepong ompin xua pewi xeina. Íchitha áwiya petü-paewi. Bapoxonae ekeicha, Ezequiel tsipáebatsi xua pojumeya bewa Ezequiel paebina bárapo pepongtha. Bara barapong tsipaeba bárapo pepongtha. Bara barapoxonae asiüü yawa nantakobarúkupa. Barapoxonae Nakom Ezequiel tsipáebatsi jeye:

—Báraxua katsita-itúütatsi ápara xua bara kana ichin tsane bexa Israel pía pemómoxi susato jiwi tatsi. Piwang xua tsewa yábara kaunúnuta xua poxonae barapomonae icha nákuangtha saya jinoutaduta. Po pepong xua asiüü yábara kaunúnuta xua barapomonae ekeicha kaewa pejinompaewa tsane pía nákuatha xua barapoxonae beta jinompaena. Tajumopetünaxü barapomonae yawenaeinchi. Bari-chi exanaein xua Judá nakua irü Efraín nakua ekeicha kaewa kae nakua naexanaena. Kaein pong David pía pemómoxi susato jiwi jíwana tatsi, barapomonae itorobiya ewatsinchi, jei Nakom.

Barichi Nakom tsipaeba, Ezequiel tsipáebatsi jeye:

—Israel nakuapiwi amanayabebina pomonae pía peaitafaetabí jíwichi xua poxonae naba. Pebin pong pewüing Gog xua norte matawüing werenaena barü ponaena pía penawabchüü-exaneibiwi tatsi xua naba peexanaenexa tsane Israel nakuapíwitha. Íchitha xang Gog átene kana exanaein yawa daxita werawéraka taexanaein pía penawabchüü-exaneibiwi tatsi poxonae nawabchü éxana Israel nákuatha, jei Nakom.

6

Poxonae catorce po weibe yapukaewa xua poxonae Caldea nakua pía penawabchüü-exaneibiwi tatsi abe éxana Jerusalén tómara, bapoxonae Nakom éxana xua Ezequiel ekeicha kamaita. Bapong yábara kamaita xua bexa Nakom xua pokuikoyeneya Nakom kana exanaena Israel nakuapíwitha.

Bapong kamaita Jerusalén tómaratha xua pena bo, xua Nakom píabo tatsi, po bo pin bo. Bapong tane xua bárapo Nakom píabo tatsi, po bo pin bo, beta xüxüta-banota yawa beta ákaba. Yawa táneno pokoyene xua kanaüba. Matáütano bapong tane xua sacerdotemonae nakuíta bárapo Nakom piabotha tatsi, po bo pin bo, icha be pókotsi koyeneya itoroba Nakom pía peitorobi koyenéwangtha. Barichi bapong tane bárapo doce matabüxümonáeyobe jinompa Israel nákuatha, pomonae xua Israel pía pemómoxi susato jiwi tatsi. Táneno xua saya meisha kaein xaina pong nakua itorobiya peewatsin xua daxita nexa.

**Meje yábara poxonae Nabucodonosor, pong Caldea
nakua itorobiya peewatsin matsiyáibatsi**

(2 Reyes 25.27-30; Daniel 4)

Kaentakábitha Nabucodonosor, pong Caldea nakua itorobiya peewatsin kamaita xua naewa üngkataxubabota, po nae pin nae. Daniel pong Nakom peitorobi jume pepaebin yábara yaputaeya tsipaeba bárapo michinaebo. Nabucodonosor tsipáebatsi jeye:

—Po michinaebo xua xam táneme yábara kaunúnuta xua siete po weibetha tsane kantsiyaibina. Naepanaewang xáename icha vacamonae ichi. Báraxua exanáename beya poxonae yábara yaputáename xua ápara meisha bárapo Nakom pong jiwi kana éxanatsi xua penaexanaewang pomonae xua nakua itorobiya peewateibiwi, jei Daniel.

Bara baxua éxana.

Kaentakábitha Nabucodonosor pánatha pona xua piabotha tatsi. Barapong pia-koutha natsipaeba najéi:

—Maisha taayapusüü itorobi koyenewa xeinang. Daxota itorobang ichamonae xua Babilonia tómara inta éxana. Maisha bichokono ta-aiñakuín. Inta bárapo tómara bichokono wüünae daxota jüntübükoyene weiweinang, najéi.

Poxonae bapong báraxua paeba barapoxonae Nakom átene kana éxana bapongtha tsipéi piakoya atsakiya wüünae najainta. Barapongtha Nakom kana éxana xua pentsiyaibiwa tsainchi siete po weibetha. Poxonae bárapo siete po weibe yapukaewa, ekeicha Nakom axaibi éxana. Ekeicha Nakom kaewa kana éxana xua barapong Caldea nakua itorobiya peewatsiwa tsane. Bapoxonae matapaiña bapong yaputane xua Nakom, ápara pong peayapusüü itorobi koyenewa pexeinaein, xuano xua xaiñeya peexanaein.

2

Poxonae Nabucodonosor tüpa, pexanto xuya pekoutha tanaexánatsi, xua Caldea nakua itorobiya peewatsiwa, pong pewüng Evil-merodac. Bapong Evil-merodac Joaquín kopatábatsi jiwi pekübibó weya. Evil-merodac itoroba, Joaquín itoróbatsi, xua penakuichiwa tsane be pomonae jíwana, pomonae tómara pentakaponaewi xua Caldea nákuatha.

**Meje yábara poxonae Media nakuapiwi irü Persia nakuapiwi,
barapomonaebe aiña nákuang itorobiya éwatabe poxonae Caldea
nakuapiwi yótabatsi**

(Daniel 5; 7—8)

Kaein jíwana po pexui Nabucodonosor pía pexui tatsi, pewüing Belsasar. Poxonae Belsasar náexana pong nakua itorobiya peewatsin, barapoxonae Nakom éxana xua Daniel yábara kamaita pokotsiwa xua bexa tsane taena. Kamaita aiña michináebobe. Po michinaebo kopiya tane, bárapo michinaebotha tane cuatro póyobe duwéi xua mene wejjuina xua xuang bichokono ayéi. Daniel pekuariya taumeinchi matatsunpiwi. Barapoxonae Daniel kaein jíwana yáñaba bárapo matatsunpiwi jeye:

—¿Eta xua báraxua yábara kaunúnuta, bárapo michinaebo? jei Daniel.

Daniel jumenótatsi bárapo matatsunpin jeye:

—Bárapo michinaebotha xua xam táneme cuatro póyobe xua duwéi yábara kaunúnuta xua cuatro po nákuabe itorobiya ewatsina, xua icha nakuapiwi itorobiya ewatsinchi. Bárapo cuatro pongbe xua duwéi kaein jíwana, pong xua kotakaya yábara kaunúnuta po nakua bichokono peayapusúü itorobi koyenewa xeinaena beyakaincha icha nákuang xua tres po nákuangbe. Pentetong, xua bapong pentetong, xua diez po pentetongbe xena pentasípatha yábara kaunúnuta diez pongbe pomona xua nakua itorobiya peewatsiwi. Barapomona daxita barompaya itorobiya ewatsina pía nákuang xua bárapo kae pin nákuathe.

”Po penteto xua tútiya aena tsewekeina xua bárapo diez po pentetongbe pebishato tsina yábara kaunúnuta ichüing pong nakua itorobiya peewatsin. Barapong naba exanaena Nakomtha xuano irü abe kana exanaeinchi pomona Nakom wüünae pejainteibíwichi. Íchitha bexa tsane Nakom átene kana exanaena bapongtha. Barapoxona bexa tsane Nakom itorobina pexanto tsakinaebówangtha xua bapong ataya itorobiya peewatsiwa tsane bárapo kae pin nakue, jei matatsunpin xua Daniel tsipáebatsi.

2

Pírapae poxonae aiña weibetha ekeicha Nakom éxana xua Daniel kamaita. Bárapo michinaebotha Daniel tane oveja xua aiña weibe xena xua aiña matétobe dukua. Kae mateto bichokono apiya beyakaincha icha mateto. Barapong bichokono dangwéi. Íchitha chivo patopa yawa oveja yótabatsi. Bárapo chivo saya peitapatha xeina penteto xua pin mateto. Íchitha bárapo mateto nantesaranopa. Barapoxona pekoyo tsina cuatro po pentétobe xuwina. Bárapo cuatro po pentétobe jíwana kotakaya xuwekeina po pentétiyo tsiki matétiyo.

Bárapo matétiyo yábara kaunúnuta pókotsin xua piakoutha atsakiya wüünae penajainchin xuano xua peyüpanaein. Bapong Nakom píabo tatsi, po bo pin bo, abe kana exanaena. Jopa kopatsí tsane xua bárapo botha pekaponebiwa duwéi xua be ofrendang matawüing. Barapoxonae Daniel jumetane xua matatsunpin paeba xua pinae ekeicha kaewa exanaena Nakom píabo tatsi, po bo pin bo.

Barapoxonae Nakom itoroba matatsunpin pong pewüing Gabriel xua Daniel peyábara tsipaebiwa tsainchi po michinaebo báyatha tane. Daniel tsipáebatsi Gabriel, jeichichi:

—Oveja xua táneme ápara yábara kaunúnuta aiña pebinbe. Bexa tsane pong Media nakua itorobiya peewatsin ewatsina aiña nákuang. Irü pong Persia nakua itorobiya peewatsin ewatsina aiña nákuang.

”Chivo yábara kaunúnuta Grecia nakuapiwi xua bexa tsane itorobiya ewatsina aiña nákuang. Po penteto xua kopiya xua chivo mateto yábara kaunúnuta Grecia nakuapin pong nakua itorobiya peewatsin. Pomatetong, xua pekoyo tsina xuwa kae pin penteto weya xua cuatro po pentétobe, yábara kaunúnuta cuatro pomonaebe pomonaé nákuang itorobiya peewatsiwi. Barapomonaé nákuang tsaba xua ekeicha cuatro po nákuabe éxana ichaxota kopiya xua po nákuatha bara kaein itorobiya éwata.

”Po penteto tsiki matétiyo yábara kaunúnuta ichüing pong nakua itorobiya peewatsin. Barapong bichokono abe peexanaein. Yawa bapong abe kana éxana pomonaetha, pomonaé Nakom piamonaé tatsi, jei Gabriel.

3

Kae merawitha Belsasar, pong Caldea nakua itorobiya peewatsin, éxana pin fiesta. Barapong itoroba pomonaé pía petanakuichiwichi xua petakarendenaenexa tsainchi korotong yawa tazang xua pin wang xua xuang báyatha Nabucodonosor kápona Jerusalén tómara weya xua poxonaé nota Nakom piabotha tatsi, po bo pin bo. Daxita apa vino mera bárapo tázangtha yawa korotongtha. Barapoxonaé daxita pía nakomüing yábara kueikueijeji xua bichokono wüüinaé pía nakomüing tatsi.

Jemeicha barapomonaé tsita naitüütatsi xua saya ü pekobe xua pemüxübürütha tina ichaxota ena. Poxonaé Belsasar báraxua tane, bichokono junuwa. Barapoxonaé bapong kaena naiña itoroba xua petawabiwa tsainchi pomonaé peyaputáé jiwi, xua barapomonaé peyábara paebiwa tsane pokotsiwa xua tina xua poxonaé saya ü pekobe. Daxita barapomonaé jopa itaküüpaetsi xua báraxua peyábara paebiwa. Íchitha Belsasar pena tatsi Daniel yábara kanantanaxeinatábatsi. Belsasar penayábara tsipáebatsi, xua Daniel yábara páebatsi.

Belsasar itoroba xua Daniel pewabiwa tsainchi. Poxonaé Daniel patopa Belsasar jeye:

—Yábara netsipáebare xua báyatha tinaduta pemüxübürütha poxonaé saya ü pekobe. Barapoxonaé néxata kakatsinchi pokotsiwang xua amanaya takakatsiwa tsainchi xua xuang aiña matomang. Yawa kakana exanaeinchi pong neaiñakuí jintong tsane xua pomonaé jíwana pentakaponaewi, jei Belsasar.

Íchitha Daniel jumenota jeye:

—Jopa netsita aiñakuiyo xua xuang amanaya tana nekatsiwam pokotsiwang aiña matomang. Íchitha yábara katsipaebinchi pokotsiwa xua tinaduta pemüxübürütha. Axa yábara kanantanaxeinde. Bapong bichokono peyapusúü itorobiwa pexeinaein poxonaé dapiyaya Nakom matayaiba éxana. Daxota bapong naepa-naewa xane icha vacang ichi xua siete po weibetha. Barapoxonaé barapong yaputane xua meisha Nakom pong bichokono peyapusúü itorobi koyene pexeinaein beyakaincha xua axa.

”Xam bekein báraxua yaputáneme íchitha áwiya nayábara nantanaxéiname xua xéiname bichokono jiña neyapusúü itorobi koyenewa beyakaincha Nakom. Vino mera ápame korotongtha yawa tázangtha xua xuang báyatha nota Nakom

piabotha tatsi, po bo pin bo. Yawa jiña nakomüng yábara páebame xua bichokono wüünae bekein bárapo nakomüng jopa xaiñeyo.

”Xam jopa yábara nantanaxeinaem xua Nakom ápara itoroba daxita jíwitha bárapo kae pin nákuathe. Daxota Nakom itoroba xua tina pemüxübürütha poxonae saya ü pekobe bárapo jume xua akoibi pojúmebe: ‘Peununaewa, pepesabiwa, petsabiwa’, jei.

”Pojume xua: ‘Peununaewa’, jei, yábara kaunúnuta xua Nakom báyatha kata ununa xua po matakeitha itorobiya ewatsíname xua bara báyatha weta. Methaunxuae jiña nakua jopa ekeicha peayapusüüwa tsane.

”Pojume xua: ‘Pepesabiwa’, jei, yábara kaunúnuta xua Nakom kakuitane xua abe éxaname yawa kanaitémata icha jintong ichi xua pesaba pexu xua poxonae naitémata peseikaexae áwiya.

”Pojume xua: ‘Petsabiwa’, jei, yábara kaunúnuta xua Nakom tsabina jiña nakua xua aiña nákuabe peexanaewa tsane. Icha nakua Media nakuapiwi nexa. Icha nakua Persia nakuapiwi nexa, jei Daniel.

Bara kaena bárapo merawitha Belsasar bexotsi. Pírapae Media nakua pía penawabchüü-exaneibiwi tatsi irü Persia nakua pía penawabchüü-exaneibiwi tatsi pata Babilonia tómaratha, po tómara xua pepa tómara xua Caldea nákuatha. Barapoxonae pebin pong pewüng Darío, pong Media nakua itorobiya peewatsin, yawa múxuna itorobiya éwata Caldea nakua.

**Meje yábara poxonae Nakom kapanepa,
Daniel kapanépati ichaxota neuthümonae**

(Daniel 6)

Bapong Darío, Caldea nakua itorobiya peewatsin, itapeta pomonae xua gubernadormonae, pomonae xua nákuang petaewatsiwa tsainchi ichaxota po nákuangtha Darío itorobiya éwata. Daniel bárapo gubernadormonae jíwana. Bapong Daniel pía penakuichiwa beta éxana. Daxota Darío bapongtha yábara nantanaxeina xua Daniel bichokono aiñakuí jintong pekana exanaewa tsainchi xua xeinaena penakuichiwa, po penakuichiwa bichokono aiñakuí.

Icha gubernadormonae, pomonae Daniel pekuayabiwichi, barapomonae Daniel úwatsi poxoru Daniel aiñakuí jintong. Barapomonae jeita penáerabi diwesi po diwesi xua daxota Darío aichaxaibi tsane, xua Daniel aichaxaibi tsainchi, xua Daniel abe peexanaexae. Bekein barapomonae aiña matakabin jeita pokotsiwa xua Daniel éxana, pokotsiwa xua abe, íchitha barapomonae jopa taeyo pokotsiwa xua daxota Darío, Daniel aichaxaibi tsainchi. Jopa taeyo tsipéi Daniel beta kanamataxeina po nákuuyo ichaxota gubernadormonaepin tsekae. Barapoxonae barapomonae natsipaeba najéi:

—Daniel icha Nakom wüünae jainta. Wanakomüng jopa wüünae jainchichi. Xain bapoxonae Darío aichaxaibi, xua Daniel aichaxaibi tsainchi, najéi barapomonae.

Barapoxonae barapomonae pona ichaxota Darío yawa jeye:

—Pata nekanamataxeinaem, xam bichokono aiñakuim. Payábara nantaxeinang xua jame metha icha peitorobi koyenewa tináename xua poxonae jintong ichawa nantawénona jame bewa saya maisha itapeta kawüükaena. Íchitha icha ichüng nantawénona ichawa xua deta maisha saya pía nakomüng wüüka, ichikuitha xua

icha jintongtha wüüka, barapong bewa xubichi ichaxota po müthütha neuthümonae jinompa, abe peexanaexae. Bárapo peitorobi koyenewa jiwi jopa itaküüpaetsi xua wüükaena pía nakomtha yawa ichüngtha xua kae xométotha tsane. Icha peitorobi koyenewa jiwi jopa itaküüpaetsi xua toxeinchiya éxana bárapo peitorobi koyenewa bárapo xométotha, jei barapomona.

Poxonae Darío jumetane bárapo peitorobi koyenewa bichokono tsita aiñakuichi. Daxota bara jejéi. Íchitha barapong jopa yaputaeyo xua ápara Daniel pía peita-faetabí jíwichi jeita pokoyeneya xua Darío abe pekana exanaewa tsane, xua Daniel abe pekana exanaewa tsainchi.

2

Daniel Nakomtha wüükeiba akoibi pokuikoyenebetha xua kaentakábitha tsaibi. Bekein Daniel yaputane xua bárapo peitorobi koyene paeba, xua pena peitorobi koyenewa, áwiya jopa nakuibaraxubiyo xua Nakomtha pewüükeibiwa. Poxonae Daniel tainchi xua Nakomtha wüüka, barapoxonae barapomona pona ichaxota Darío xua Daniel peyopichinéxatsi.

Poxonae Darío yaputane, xua Daniel pía Nakom wüüka bekein bárapo peitorobi koyenewa jopa bárxua kopatsiyo, Darío anthüthütane. Darío aichaxaibi xua Daniel abe pekana exanaewa tsainchi. Íchitha Darío bewa kopatsina xua bara átene pekana exanaewa tsane, xua Daniel átene pekana exanaewa tsainchi, xua pepaebixae bárapo peitorobi koyenewa. Daxota Darío itoroba pomona pía petanakuichiwichi xua Daniel pexubiwa tsainchi ichaxota po müthütha neuthümonae jinompa. Darío jeye, Daniel tsipáebatsi:

—¡Bárabü kakapanepaena jiña Nakom!

Bara Darío pía petanakuichiwichi Daniel xotsi ichaxota po müthütha neuthümonae jinompa. Barapomona Daniel pin ibo panáwatha bichokono yaboupa xatababótatsi xua ichamonae jopa pepichiwa tsane. Bárapo merawitha Darío jopa maitekaeyo xua Daniel peyábara nantanaxeinaexaetsi.

Baya poxonae pentha tsina Darío bara bekuinaepoiña ichaxota Daniel xotsi neuthümonae pía müthütha. Darío wawái jeye:

—Daniel ¿áwiya asüüm? ¿Jiña Nakom kakapanepa neuthümonae weya? jei Darío.

Daniel jumenota jeye:

—Aja. Inta Nakom itoroba matatsunpin xua inta pekoibo akabinexa neuthümonae poroxu kaena báyatha jopa abe exanaeiño, jei Daniel.

Bichokono Darío jüntübükoyene weiweina poxonae Daniel jumetaiñchi. Barapoxonae Darío itoroba pomona pía petanakuichiwichi xua Daniel pepichiwa tsainchi neuthümonae pía müthü weya. Bara barapomona Daniel pítatsi. Matáütano barapomona Daniel tainchi xua jopa kuaekuaewiyo xua Nakom bapong peyawe-naexaetsi tsipéi Daniel yábara jumekowünta Nakomtha.

Barapoxonae Darío itoroba xua pomona Daniel pía peita-faetabí jíwichi bebái tsainchi ichaxota po müthütha neuthümonae jinompa. Barapomona kaena kawibapéntatsi bárapo neuthümonae poxonae aena bebaidékatsi bárapo müthütha. Barapoxonae Darío ekeicha pena peitorobiwa tina jeye:

—Daxita nákuang jiwi pam pabarükui-iturajínare Nakom, po Nakom Daniel wüünae jainteiba. Bárapo Nakom pepa Nakom, pong peayapusüüya peponaein

ataya. Pía peayapusúü itorobi koyenewa tatsi ataya tsiteka. Bárapo Nakom jiwi kapanépatzi pía peaitafaetabí jíwichi weya yawa abe pía peéxanae koyenewang tatsi weya. Bapong pexeña petsita-itüütsi koyenewang éxana peitabókotha yawa bárapo írathe. Bárapo Nakom Daniel kapanépatzi neuthümonae weya xua xuang bekein ayéi, jei Darío.

**Meje yábara poxonae Nakom éxana xua Daniel aiña michinaebong
taena poxonae Darío irü Ciro popónabe**

(Daniel 9—12)

Darío, pong Media nakua itorobiya peewatsin, múxuna itorobiya éwata Caldea nakua. Poxonae Darío tamrópata pítaba xua Caldea nakua itorobiya éwata Daniel yorobauya Nakom Pejume Diwesi xua Israel pía pemómoxi susato jiwi tatsi pía díborong tatsi. Barapong yóroba po diwesi kaena býatha Jeremías tina pong Nakom peitorobi jume pepaebin. Bárapo diwesi jeye:

—Israel pía pemómoxi susato jiwi tatsi ekeicha Jerusalén tómara exanaena poxonae yapukaewina setenta po weibe, jei bárapo diwesi xua Daniel yóroba.

Daniel najainbota poxonae Nakomtha wüüka jeye:

—Nakom yábara jüntemáinare Israel pía pemómoxi susato jiwi tatsi abe pía peéxanae koyenewang tatsi. Éxande xua ekeicha barapomona kaewa pejinom-paewa tsane pía nákuatha. Bara beta yaputang xua poxonae taexanéibatsi bárapo Israel pía pemómoxi susato jiwi tatsi. Báraxua kaena býatha Moisés pewünaeya yábara tina. Matáütano beta yaputang xua jopa peexanaexae pokotsiwa xua xam itoróbame, jei Daniel poxonae wüüka Nakomtha.

Bapoxonae Nakom itoroba matatsunpin, pong pewüng Gabriel, xua Daniel yábara petsipaebiwa tsainchi pokotsiwa bexa exanaena. Gabriel jeye:

—Daniel, patopang xua takayawenaewa tsainchi xua neyaputaewa tsane xua bexa tsane exanaena. Nakom bichokono kaántobe. Cuatrocientos noventa po dapaeinbe yapukaewina pewünaeya xua poxonae bárapo kae pin nakue werawéraka exanaena. Bárapo matakábintha jiwi nakuibarapentsina xua abe peexanaewang xua saya meisha beta peexanaewang tsane. Bárapo matakábintha bara nayábara jumewétsina xua xuang býatha yábara paeba pomona Nakom peitorobi jume pepaebiwi. Ekeicha jiwi exanaena xua Nakom pía tútiyo xua Nakom piabotha tatsi, po bo pin bo.

”Pong nakua itorobiya peewatsin, bapong Israel pía pemómoxi susato jiwi tatsi itorobinchi xua ekeicha kaewa peexanaewa tsane Jerusalén tómara. Poxonae itoroba baxua beya poxonae Mesías patopaena xua írürü barapoxonae býatha weta siete po dapaeinbe yawa tsiwiyo ekeicha. Poxonae wétsina bárapo dapaein xua tsiwiyo bapoxonae Mesías pitinchi poxonae bexotsi.

”Bapoxonae pomona penawabchüü-exaneibiwi abe exanaena Jerusalén tómara yawa abe exanaena Nakom píabo tatsi, po bo pin bo, yawa xua xuang bárapo botha xeina. Pewünaeya poxonae icha siete po dapaeinbe werawerakaena, po siete po dapaeinbe opidukua, bapoxonae nakua itorobiya peewatsin, pong kanamataxeina penawabchüü-exaneibiwi bapong yábara tsiwüünae muxudutsina ichüngtha xua bepa pinae maisha penayawenaewa tsane. Poxonae weta tres y media po dapaeinbe xua bárapo siete po dapaeinbe jíwana barapong jopa kopati tsane xua ichamonae duwéi pejutebeibiwa xua be ofrenda matawüng xua Nakom nexa.

”Poxonae opidukuaena xua werawéraka bárapo siete po dapaeinbe bara bára-xua exanaena xua pokotsiwa jiwi petaayapubéwatsi. Báraxua Nakom exanaena xua kaena báyatha yábara pepaebixae xua pinae jiwi taayápube tsainchi poxonae werawerakaena po kae pin nakue, jei Gabriel xua poxonae Daniel tsipáebatsi.

2

Poxonae Darío tüpa, barapoxonae Ciro, pong Persia nakua itorobiya peewatsin, xuya tamrópata pítaba xua múxuna itorobiya peewatsiwa Caldea nakua. Bárapo dapaetha Nakom ekeicha éxana xua Daniel petaewa tsane icha michinaebo. Bárapo michinaebo Daniel jopa yábara yaputaeyo. Daxota Daniel wüüka Nakomtha xua peyábara tsipaebiwa tsainchi bárapo michinaebo. Bara Nakom itoroba matatsunpin xua Daniel peyábara tsipaebiwa tsainchi bárapo michinaebo. Matatsunpin jeye:

—Daniel, Nakom bichokono kaántobe. Beta nejumenaitáeware pokotsiwa xua katsipaebinchi. Poxonae Ciro pong Persia nakua itorobiya peewatsin tüpaena, xuya pekoutha pukoya kaponaeinchi xua bárapo nakua itorobiya peewateibiwi tsane xua néxata daxita cuatro pongbe tsane.

”Pong ichaxota ‘cuatro’, jei, bapong bichokono kopei pexeinaein tsane yawa peayapusúü itorobi koyenewa xeinaena. Íchitha poxonae bapong itorobiya ewatsina barapoxonae patopaena pong jíwana pomonae penawabchüü-exaneibiwi, xua Grecia nakuapin. Bapong yótaba pongtha pong nakua itorobiya peewatsin. Barapoxonae bapong xuya itorobiya ewatsina bárapo nakua. Íchitha bapong kaena naiña tüpaena poxonae nayábara nantanaxeina xua pinae dapong aibi pong pekueranta naexanáewatsi, pong nakua itorobiya peewatsin. Barapong jopa xeináe tsane pía pexui xua pekoutha xuya itorobiya petaewatsiwa tsainchi nakua.

”Daxota po nákuang xua bapong báyatha itorobiya éwata, bárapo nákuang cuatro po nákuangbe naexanatsiniyaena xua daxita nákuang xeinatsiniyaena pong bárapo nakua itorobiya ewatsina. Pong Siria nakua itorobiya peewatsin xua kanamataxeina ichaxota ‘norte’, jei, barapong peaitafaetabín naexanaena xua Egipto nakua itorobiya peewatsin pía peaitafaetabinchi náexana, pong xua kanamataxeina xua ichaxota ‘sur’, jei. Pong Egipto nakua itorobiya peewatsin, bapong kopiya bichokono peayapusúü itorobi koyenewa xeinaena beyakaincha pong Siria nakua itorobiya peewatsin xeinaena.

”Kotakaya Siria nakua itorobiya peewatsin peayapusúü itorobi koyene xeinaena beyakaincha xua Egipto nakua itorobiya peewatsin xeinaena. Bara napuna-ichi tsóponae tsane daxita barapongbe. Poxonae pong Siria nakua itorobiya peewatsin bichokono peayapusúü itorobi koyenewa xeinaena, barapoxonae pebin patopaena. Bapong bichokono peayapusúüing tsane yawa Siria nakuapiwi jíwana jutebinchi yáwano barapomonae muxujaiñabebinchi. Bapoxonae bapong xuya itorobiya ewatsina Siria nakua. Bapong naba éxana pongtha, pong Egipto nakua itorobiya peewatsin íchitha jopa amanáyabi tsane pong Siria nakua itorobiya peewatsin.

”Poxonae bapong pong Siria nakua itorobiya peewatsin kaibeya ponaena pía nakua beya, bichokono Israel pía pemómoxi susato jiwi tatsi kasebinchi. Barapong itorobina penawabchüü-exaneibiwi xua barapomonae jiwi jopa pekopatsiwa tsainchi xua duwéi pekaponeibiwa tsane Nakom piabotha tatsi xua be ofrenda

matawüŋ. Saya barapomonae itorobeibinchi xua peexanaewa tsane baraxota pokotsiwa Nakom jopa kopatsiyo xua jiwi bárxua peexanaewa tsane.

”Barapong bichokono abe peexanaein tsane. Ichamonae pomonae Israel pía pemómoxi susato jiwi jíwana tatsi exanaena pokotsiwa barapong itoroba. Íchitha ichamonae pomonae Israel pía pemómoxi susato jíwana tatsi, pomonae beta jumekowüntsiya jinompa Nakomtha, barapomonae naba exanaena bapongtha. Barapong kaentakábitha tüpaena.

”Barapoxonae matatsunpin patopaena, pong pewüŋ Miguel, xua Israel pía pemómoxi susato jiwi tatsi pe-eeanaewa tsainchi. Bichokono ayapubé tsúrukuae tsane íchitha Nakom kapanepaena, xua bárapo Israel pía pemómoxi susato jiwi tatsi kapanepaeinchi. Matakabi patopaena, xua po matakábitha ekeicha kaewa asiüü tsane pomonae xua báyatha wérapa. Ichamonae jinompaena Nakomtha xua ataya tsane. Ichamonae nama átene kana exanebinchi xua ataya tsane, jei matatsunpin.

**Meje yábara poxonae Isaías, pong Nakom peitorobi jume pepaebin,
Israel pía pemómoxi susato jiwi tatsi tatínatsi pomonae kaibeya
pewarapaexae Judá nakua beya**

(Isaías 40—66)

Isaías pong Nakom peitorobi jume pepaebin tina díboro. Bárapo diborotha Isaías tatina pomonae Israel pía pemómoxi susato jiwi tatsi, pomonae xua ekeicha kaibeya pona Judá nakua beya xua Babilonia tómara weya pona, po tómara xua pepa tómara xua Caldea nákuatha. Isaías jeye barapomonaetha:

—Paxam pomonae Nakom piamonae tatsi pam, Nakom neitoroba bepa pinae paka péraxa matatéikatsi. Bapong netsipaeba xua pinae bara báyatha bichokono átene paka exaneiba xua abe paiña neexanaexae xua ekeicha nama jopa exanáe tsane.

”Ichüŋ kueikuejei ichaxota irasaina xuépana tsúrukuae nákuatha yáwano pana netsipaeba xua bepa pinae pana najüntükoyene wüünaetsin tsipéi pinae Nakom patopaena. Daxota daxita jiwi xua bárapo kae pin nakuapiwi taena xua ápara Nakom bichokono pejüntübükoyene wüünaein. Jiwi bara kaekuýobe xua pejinompaewa icha pentono ichi xua kaekuýobe xua matono wüünae. Nama Nakom Pejume Diwesi ajumeyapusüü xua ataya tsiteka. Pomonae poxonae bárapo Nakom pía pexeña jume diwesi kueikuejei tsane Jerusalén tomarapíwitha, bewa demuxuwatheicha umenae pekanawabinexa bárapo Jerusalén tomarapíwitha bárapo diwesi.

”¡Papáebare Judá nakuapíwitha xua pinae Nakom xote patopa! Bapong patopa xua pía pákata naexanaetsi pong nakua itorobiya peewatsin. Bapong katsina jíwitha pokotsiwa xua be penantomatsiwa. Pomonae xua beta éxana xua wüünae matoma katsina. Barapong piamonae betiya eenaena ichi be pókotsin ichi pong oveja pe-eeanaein.

”Nakom bichokono peayapusüü itorobi koyenewa pexeinaein. Yawa peyaputaetin daxita. Bapong bichokono toxecha pepa peaiñakuín beyakaincha ichamonae, pomonae xua peaiñakuí jiwi. Nakom xaniwaicha pepa Nakom. Jopa ápara nae Nakom xua po nae nakomüŋ jiwi éxana xua po nae nakomüŋ jiwi yábara nantanaxeina xua icha metha bara dangwéi tsungkuae bichokono. Bárapo nae nakomüŋ jopa peayapusüüwa pexeinaewa.

”Poxonae jintong nae úngkata, icha opi ishoto kana éxana, icha opi pía Nakom kana éxana. Barapomonae jopa nayábara tsakeinaeyo xua ápara barapomonae pomonae jopa peyaputáe jiwi. Bárapo nae nakomüng jopa itaküüpaetsi xua pena-jewabiwa. Matáütano bárapo nae nakomüng jopa itaküüpaetsi xua peyawenaewa pomonae wüünae pejainteibíwichi.

”Meisha bapong Nakom bichokono toxeincha peaiñakuín beyakaincha icha-monae pomonae xua peaiñakuí jiwi. Ichüng aibi ichi pókotsin Nakom ichi. Jopa bewa paebichi xua Nakom ápara jopa taeyo xua jiwi éxana. Bapong bápana jopa maitekae. Matáütano daxita koyenein yábara yaputane. Icha yábara jumekowüntsinchi xua bapong wanaka yawenaewa tsane, bara bapong ekeicha naka ajüntü-büyapusüü exanaena poxonae tsiki kuíyatsi xua fifínatsi, jei Isaías.

2

Ekeicha Isaías tatina Israel pía pemómoxi susato jiwi tatsi. Bapong jeye:

—Nakom báyatha paeba jeye: ‘Daxita bárapo kae pin nakuapiwi bewa newüünae jainteibina tsipéi barapomonae itorobiya éwatang. Paxam Israel pía pemómoxi susato jiwi tatsi pam, pomonae itapeta paka wabébatsi. Paka yawénatsi xua ekeicha kaewa paiña nepatsiwa paiña nákuatha xua poxonae icha nákuangtha painóm-pame. Bichokono paka antobetsi tsipéi tamonae jiwi pam. Jopa pajunuwinde tsipéi paka yantapopoinchi. Paka yawenatsino. Abe kana exanaein pomonaetha, pomonae abe paka kana éxana. Bekein tsikimonaeyo pam, paka yawénatsi’, jei Nakom.

”Ekeicha Nakom nejéi xua poxonae pexanto yábara paeba: ‘Pebin pákata itorobinchi, pong xua inta nakuichina, pong bichokono antobein. Tajumopetünaxü bapong yantinchi. Irü bapong daxita betiya peexanaewa tsane. Bapong jopa wawái tsóponae tsane jíwitha. Matáütano jopa abe peexanaein tsane. Bapong jumenaitawatsinchi, xua daxita jiwi jumenaitawatsina, poxonae bapong kuiduba’, jei Nakom, jei Isaías poxonae tina.

3

Ekeicha Isaías tina jeye:

—Wanakom ápara po Nakom pepa Nakom. Barapong jopa kopatsí tsane xua jiwi wüünae pejainchiwa tsane po nakomüng jopa xaiñeyo. Icha jiwi wüünae jainta bárapo nakomüng, bapong átene kana éxana barapomonae. Tsipéi ichüng aibi pókotsin ichi Nakom ichi.

”Yawa Nakom jeye: ‘Israel pía pemómoxi susato jiwi tatsi pam pana nejume-taema. Bekein kaena báyatha naba paéxaname xangtha íchitha paka yábara jüntemainaeinchi báraxua poxonae pana newüükáename. Paiña írangtha pákata itorobinchi ema. Tajumopetünaxü pákata itorobinchi. Jerusalén tómara ekeicha kaewa kana exanaein xua pepa peaiñakuí tómara tsane. Daxota Ciro pong nakua itorobiya peewatsin kana exanaein xua paka nekayawenaewa tsane bekein bapong jopa neyábara yaputaeyo xua pongxaein po Nakom pepa Nakomüng. Bapong paka kopabina xua saya paiña nejinompaewa tsane. Barapoxonae patamrópata notadüküpáename xua ekeicha kaewa paiña neakabiwa tsane tabo, xua pin bo, xua poxonae kataunxuae Ciro itorobiya éwata Caldea nakua. Caldea nakuapiwi átene kana exanaein tsipéi kaena báyatha bichokono abe paka kana exaneiba. Matáütano

átene kana exanaein tsipéi kaena báyatha piakoutha wüünae najainta xua ichamonaé áebatsi', jei Nakom.

"Ekeicha Nakom paka tsipaeba jeye: 'Bewa payábara jüntanainaem xua kaena báyatha pewünaeya yábara paka tsipáebatsi xua átene tapaka exanaewa tsainchi. Bara báyatha átene paka exanéibatsi. Íchitha saya jopa werawéraka paka exaneibichi. Báraxua paka kana exainchi xua tapaka kuidubinéxatsi xua paiña neexanaenam tsane pokotsiwa tapaka itorobíwatsi. Icha báyatha paexanaetsípame pokotsiwa paka itoróbatsi jopa átene paka exanáe tsipaetsi. Ánoxuae pawárapare Babilonia tómara weya. Kaibeya paponde paiña nakua beya xua Judá nakua. Xang paka yawenaeinchi. Aichaxaibin pomonaé xua abe peexanaewi yawa átene kana exanaein barapomonaé', jei Nakom.

"Nakom ekeicha jeye pexanto yábara, pong bárapo írathe itorobikaeinchi: 'Pong inta nakuíta bara tawüünaeponaeinchi. Daxita jiwi yábara yaputaena bapongtha. Daxita nakuapiwi bapong yábara najüntükoyene kabenaekaeinchi nawita tsipéi barapomonaé jumetaena pokotsiwa xua báyatha bápána jopa jumeté xua poxonaé bapong kueikueiji tsane. Bapong jopa pexeíñang tsane. Perüükuaekuaewina be jopa jintong koyene tsane. Daxita jiwi jopa tsita aiñakuichi tsainchi. Jiwi tsita pejemái jintongtsi tsainchi. Bapong bichokono aperüütane tsane', jei Nakom, jei Isaías xua tina.

4

Ekeicha Isaías tina jeye:

—Íchitha bapong naka wepu ita-araranaena xua átene peexanáewatsi tsane poxonaé bekein jame bewa átene tsainchi abe waexanaexae. Wang dubinchi xua poxonaé betsi ichamonaé poxoru báyatha abe waexanáewaxae. Pewangdubixaetsi barapong daxota Nakom naka yábara jüntemaina abe waexanáe koyenewang xua xuang kaena báyatha éxanatsi. Waxainchi aténetsi poxoru Nakom tajü wepu jinómpatsi icha ovejang ichi xua átene poxoru tajü wepu pona piamonaé. Íchitha Nakom kópata xua bapong naka tsiátene abe waexanaexae. Bapong pía koiboto weya jopa abe yábara paebí tsane ichamonaé. Saya kópata xua bara bapong abe pekana exanáewatsi xua jopa pijumeyo. Bapong bexubinchi bekein jopa exanaeyo pokotsiwa xua abe. Bexa tsane jiwi bara yaputaena xua bara baxua wüünae pokotsiwa xua bapong éxana xuano xua bapong paeba poxonaé bapong pópona wanákuatha. Barapong átene pekana exanáexaetsi, Nakom yábara jüntemainaena jiwi abe peéxanaé koyenewang tatsi xua xuang báyatha éxana, jei Isaías.

5

Ekeicha Isaías tina jeye:

—Nakom báyatha paeba jeye: 'Icha ichüing ichawa nantawénona, bü maisha newüüka. Bara báraxua katsin pokotsiwa xua bapong nantawénona. Paiña icháwatsi dangweya panakuítame íchitha jopa paxeinaem. Íchitha icha paéxaname pokotsiwa paka itoróbatsi bexa pákata wüünae ponaena. Yábara paka tsiwüünae muxudútatsi xua ataya tsitekaena. Xuaunxuae yábara paka tsiwüünae muxudútatsi meje xuaje: Paka ántobe tsaibi tsainchi xua írürü paxam pomonaé icha nakuangpíwitha pana neyábara kuidubíname', jei Nakom.

”Ánoxuae Nakom imoxoyo naka kakuita pópona. Nakom yábara jüntemainaena pongtha, pong nakuibaraxuba xua abe peexanaewa, yawa bara nápona Nakomtha. Nakom jopa exanaeyo xua pokotsiwa waxainchi nantanaxéinatsi xua pokoyeneya Nakom bewa exanaena. Barapong piakoya beta éxana beyakaincha xua nantaxéinatsi xua bapong itakúüpatsi xua peexanaewa. Pokotsiwa barapong paeba xua exanapaeba bara baxua exanaena.

”Nakom naka tsipaeba xua pinae bewa maisha xua ü wüünae exanaeinchi. Bewa nafifinakaewateibichi, penafifinakáewatsi matakábitha. Barichi Nakom beta kana exanaena ichamonaetha, pomonae icha nakua weya pona, icha ántobe tsainchi yawa icha exanaena pokotsiwa Nakom itoroba. Barapoxonae barapomonae itaküüpaeinchi xua duwéi pekaponae tsane Nakom piabotha tatsi, po bo pin bo, xua be ofrenda matawüing xua Nakom nexa. Bárapo Nakom piabotha tsane daxita nakuangpiwi patsina xua Nakomtha pewüükaewa tsane. Nakom báyatha paeba xua pinae bapong, bekein peaiñakuí jintong yawa bichokono pejüntübükoyene wüünaein, íchitha bapong yawena pomonae xua piakoutha jopa nawüünae jainteibiyo xua ichamonae jopa peabíwatsi, jei Isaías.

6

Barapoxonae Isaías ekeicha paeba:

—Nakom báyatha paeba jeye: ‘Ichamonae pomonae Israel pía pemómoxi susato jiwi tatsi naerabiya newüünae jainta. Barapomonae abe kana éxana pía petanakuichiwichi. Jame maisha bewa barapomonae beta kana exanaena ichamonae. Matáütano barapomonae bewa ichawang katsibina pomonaetha, pomonae peakopebí jiwi’.

”Pong Nakom pía petanakuitinchi báyatha paeba jeye: ‘Nakom pía Pejumope-tünaxü tatsi neyawena. Neitoroba xua Nakom Pejume Diwesi takueikuejeiwa pomonaetha, pomonae piakoutha jopa nawüünae jainteibiyo xua ichamonae jopa peabíwatsi. Neitoróbano xua jüntema jinompa takana-exanaewa tsane pomonae wekoyeya jinompa. Matáütano neitoróbano xua tayawenaewa tsane pomonae bekein báyatha bichokono abe peexanaewi. Matáüta neitoróbano xua tayábara kueikuejeiwa tsane xua ánoxuae po dapaethe, po dapaetha poxonae Nakom beta taéxana bárapo kae nakuapíwitha. Matáütano neitoróbano xua tayábara paebinexa xua matakabi jopaena po matakábitha Nakom átene kana exanaena daxita pomonae abe peéxanae jiwi. Neitoróbano xua taitanuwé matateikaenexa pomonae wekoyeya jinompa xuano xua ekeicha jüntübükoyene weiweinaeya jinompa takana-exanaewa tsane’, jei pong Nakom pía petanakuichinchi, jei Isaías.

7

Ekeicha Isaías jeye:

—Barichi Nakom báyatha paeba xua pinae beta yawenaena pomonae pía petanakuichiwichi. Íchitha bapong wérapa kana exanaena pomonae icha nakomüing wüünae pejainteibiwi, po nakomüing jopa xaiñeyo. Yawa paeba xua pinae aiña wei dapaein tsane, po dapaeintha xua jiwi jüntübükoyene weiweinaeya jinompaena. Bárapo dapaetha tsane neuthümonae yawa ovejamonae kae duweimonae jüntema naepanaewa nabarü xaena. Barichi dapong aibi tsane pong xua abe kana éxana ichüingtha, jei Isaías xua tina.

**Meje yábara poxonae Ciro, pong nakua itorobiya peewatsin,
kópata xua Judá nakuapiwi kaibe nawibiyaena Jerusalén tómara beya**

(2 Crónicas 36.20b-23; Esdras 1—2)

Judá nakuapiwi, pomonae báyatha Nabucodonosor kápona Babilonia tómara beya, kana exanébatsi xua pong nakua itorobiya peewatsin pía pebusikuitaetaewi tatsi xua setenta po weibetha. Bárapo setenta po weibetha Nakom itompa éxana bárapo ira xua bárapo ira ekeicha wüünae tsane poxoru jiwi aibi. Kaena báyatha Nakom itoroba xua Israel pía pemómoxi susato jiwi tatsi xua bewa itompa exanaena ira. Dapo jumetha barapomonae baxua jopa exanaeyo. Daxota poxonae barapomonae icha nakua beya kapoinchi, bárapo ira itompa xua jiwi aibi. Bara baxua éxana icha be pókotsi koyeneya Jeremías tsiwünaeya yábara paeba bára-xua, pong Nakom peitorobi jume pepaebin.

2

Poxonae yapukaewa bárapo setenta po weibe barapoxonae Caldea nakuapiwi jopa itorobiya ewatsiyo aiña nákuang. Meisha Persia nakuapiwi irü Media nakua-piwi nabarü itorobiya éwata aiña nákuang poxoru Caldea nakuapiwi amanáyabatsi. Barapoxonae Ciro, pong Persia nakua itorobiya peewatsin, múxuna itorobiya éwata Caldea nakua, Media nakuano. Po wei kopiya poxonae Ciro itorobiya éwata bárapo nákuang barapoxonae Nakom éxana xua Ciro yábara nántabü éxaba, xua Israel pía pemómoxi susato jiwi tatsi peyawenaewa tsainchi.

Daxota Ciro tina pena peitorobi koyenewa xua jeye: “Nakom, po Nakom pepa Nakom, nekópata xua aiña nákuang itorobiya taewatsiwa tsane xua bárapo kae pin nakue. Neitoróbano xua taakabiwa tsane Nakom píabo tatsi, po bo pin bo, Jerusalén tómaratha. Daxota kopatang xua daxita bárapo Israel pía pemómoxi susato jiwi tatsi pomonae xua jinompa ichaxota po nákuangtha itorobiya éwatang, bara ponaena Jerusalén tómara beya. Yawa barapomonae baraxotiya Nakom píabo tatsi, po bo pin bo, akabina. Barichi tsipaebang pomonae Israel pía pemómoxi susato jiwi tatsi pekuariya tajinómpatsi. Barapomonae itorobang xua pekatsibiwa tsane pokotsiwang xua Israel pía pemómoxi susato jiwi tatsi nantawénona xua Nakom píabo peakabiwa tsane. Itoróbangno xua barapomonae duwéi pekaponaenexa xua pejutebiwa tsane bárapo Nakom piabotha tatsi xua be ofrenda matawüng xua Nakom nexa”, jei Ciro poxonae pena peitorobi jume tina.

3

Pebiwi pomonae peaiñakuí jiwi xua Judá pía pemómoxi susato jiwi jíwana tatsi, irü Benjamín pía pemómoxi susato jiwi jíwana tatsi, irü sacerdotemonae, irü Leví pía pemómoxi susato jiwi jíwana tatsi jinompa Caldea nákuatha. Daxita barapomonae paeba xua pinae bepa ekeicha kaibeya ponaena Jerusalén tómara beya xua peakabinexa Nakom píabo tatsi, po bo pin bo. Israel pía pemómoxi susato jiwi tatsi katsibébatsi xua amanaya pekatsiwang xua xuang aiña matomang. Israel pía pemómoxi susato jiwi tatsi pekuariya petajinompáewichi báraxuang katsíbatsi xua Nakom píabo tatsi nexa, po bo pin bo.

Matáütano Ciro kata, Zorobabel kátatsi, pong Pekanamataxeinaein Judá pía pemómoxi susato jiwi tatsi, korotong yawa tazang. Bárapo korotong yawa tazang

xua xuang kaena báyatha Nabucodonosor nota Nakom piabotha tatsi, po bo pin bo. Bapoxonae barapomonae kaibeya pona Judá nakua beya pinmonae beya kaincha xua cuarenta y dos mil pomonaebe xua Israel pía pemómoxi susato jiwi tatsi. Ichamonae jíwana xua pomonae kaibeya peponaexae narúnaba Jerusalén tómaratha. Ichamonae barapomonae jíwana jinompa icha tómarangtha xua Judá nákuatha.

**Meje yábara poxonae Israel pía pemómoxi susato jiwi tatsi ekeicha
Nakom píabo tatsi éxana, po bo pin bo, Jerusalén tómaratha**

(Esdras 3—6; Hageo 1—2)

Siete po xometobetha xua poxonae po weitha Israel pía pemómoxi susato jiwi tatsi kaibeya pona Judá nakua beya, barapoxonae nakaetuta daxita Jerusalén tómaratha. Barapomonae yábara nakaetuta xua fiesta peexanaenexa xua Nakom nexa. Bárapo fiéstatha jiwi boutong ákaba.

Jesúa, pong sacerdotemonae pía pentakaponaein tatsi, irü Zorobabel, pong Judá pía pemómoxi susato jiwi tatsi pía Pekanamataxeinaein tatsi, bapongbe éxanabe altar matawüing. Báraxua éxanabe pánatha xua Nakom piabotha tatsi, po bo pin bo, ichaxota kaena báyatha unguua icha altar matawüing xua pinwa. Bárapo altar matawüing éxana xua duwéi petautsinexa xua be ofrenda matawüing xua Nakom nexa. Matáüta fiesta éxana xua Nakom nexa pokoyeneya báyatha Moisés itoroba.

Aiña xometobetha xua icha wei Jesúa irü Zorobabel kaetútabe jiwi xua peakabinexa Nakom píabo tatsi, po bo pin bo. Po matakábitha poxonae nakobeweta xua aena xüxütaba Nakom píabo tatsi, po bo pin bo, sacerdotemonae oba trompetang irü Leví pía pemómoxi susato jiwi tatsi dakaboba xua xuang pewüing platillos. Yáwano naxúnano po wei xua Nakom wüünae jáintatsi. Daxita jiwi jüntübükoyene weiweina.

2

Ichamonae pomonae xua jinompa Jerusalén tómaratha ápara jopa Israel pía pemómoxi susato jiwi jíwana tatsi. Ápara barapomonae kaena báyatha pomonae Asiria nakua itorobiya peewatsin kápona Judá nakua beya. Bekein barapomonae Israel pía pemómoxi susato jiwi tatsi pía peaitafaetabí jíwichi, íchitha barapomonae paeba xua peyawenaewa tsane xua ákaba Nakom píabo tatsi, po bo pin bo. Barapomonae ápara náeraba. Saya jeita pokoyeneya Israel pía pemómoxi susato jiwi tatsi abe taexanaeinchi. Daxota Jesúa, irü Zorobabel, irü ichamonaeno pomonae pentakaponaewi tsipaeba barapomonaetha jeye:

—Paxam pomonae icha nakuangpiwi pamxaem jopa panantawenonaeiño xua pata tanayawenaewam xua peakabiwa Nakom píabo tatsi, po bo pin bo. Saya báraxua paéxanang pokotsiwa xua Ciro pana itoroba pong Persia nakua itorobiya peewatsin, jei barapomonae.

Bárapo icha nakuangpiwi, pomonae peaitafaetabí jiwi, aichaxaibi xua bára-xua jumetane. Daxota barapomonae ekeicha icha koyeneya jeita pokoyeneya xua Israel pía pemómoxi susato jiwi tatsi jopa peitaküüpaewa tsainchi xua peakabiwa Nakom píabo tatsi, po bo pin bo.

Barapoxonae barapomonae pekakomokáe parátixi kata pomonaetha, pomonae Ciro tanakuítatsi, pomonae pentakaponaewi Judá nákuatha, pomonae Persia

nakuapiwi. Bárapo icha nakuangpiwi báraxua kata xua bárapo pentakaponaewi naerabiya pepaebinexa xua Israel pía pemómoxi susato jiwi tatsi pinae abe éxana. Matáütano bárapo icha nakuangpiwi Ciro tatínatsi cartang. Bárapo cártangtha jeye:

—Israel pía pemómoxi susato jiwi tatsi abe kayábara paeba xua pinae jopa jichi-paeyo xua nakua itorobiya neéwatsim, jei bárapo cártangtha.

Barapoxonae Persia nakuapiwi, pomonae pentakaponaewi Judá nákuatha, jopa kopatsiyo xua Israel pía pemómoxi susato jiwi tatsi peakabiwa tsane Nakom píabo tatsi, po bo pin bo. Baxua éxana beya poxonae Darío II xuya itorobiya éwata Persia nakua.

3

Poxonae Darío II itorobiya éwata Persia nakua, barapoxonae Nakom itoroba pomonae Nakom peitorobi jume pepaebiwi, pong pewüng Hageo, irü ichüng pong pewüng Zacarías. Bapongbe kueikueijeibe Nakom Pejume Diwesi Israel pía pemómoxi susato jíwitha tatsi. Hageo tsipaeba, Zorobabel irü Jesúa tsipáebatsibe jeye:

—¡Paxam Israel pía pemómoxi susato jiwi tatsi pam! Papáebame xua pinae kataunxuae dapo matakabi aibi xua paiña neakabiwa tsane Nakom píabo tatsi, po bo pin bo. Daxita paxam pexeíña bongtha pajinómpame. Daxota Nakom jopa pákata itorobiyo ema. Matáüta jopa paka kana exanaeyo xua nawita paiña nexei-naewa. Poxonae pexaewa pákata naweta jopa bichokono nawichiyo xua daxota pajáinpame. Matáütano jopa paxeinaem vino merang xua paiña neapaenexa. Saya be kónotha paxéiname paparuwang. Paponde; naewang pajeire xua paiña neakabinexa Nakom píabo tatsi, po bo pin bo.

Poxonae Zorobabel irü Jesúa jumetánebe báraxua, bichokono junúwabe. Íchitha Hageo jeye:

—Jopa pajunuwíndebe tsipéi Nakom paka yántabe, jei.

Bárapo jumetha Nakom jüntübükoyene tsakábame bapongbetha xua daxota ekeicha ichichípabe xua peakabiwa tsánebe Nakom píabo tatsi, po bo pin bo. Barapoxonae icha semánatha bara yatsikaewa nakuítabe Nakom píabo tatsi, po bo pin bo.

Pírapae icha xométotha, ekeicha Nakom icha diwesi kata, Hageo kátatsi, xua po jumetha jiwi pejüntübükoyene tsakabiwa tsainchi. Hageo jeye:

—Nakom báyatha paeba jeye: ‘Pokotsiwa xua beya ánoxuae wétame saya be kónotha. Áwiya bichokono seika nawita xua paiña nenakuichiwa xua Nakom píabo tatsi paiña neexanaewa tsane ichi po bo báyatha ichi. Paiñaxoba pajunúwame. Poponaein bárapo botha xua tabo. Pexeíña bo tsane poxonae pawetsíname beyakaincha po bo kopiya, po bo Salomón ákaba’, jei Nakom.

4

Ekeicha icha diwesi Nakom tsipaeba, Hageo tsipáebatsi, poxonae aiña xométoebe yapukaewa. Bárapo diwesi ápara Israel pía pemómoxi susato jiwi nexa. Nakom jeye:

—Ánoxuae pákata yapuwüünae ponaena tsipéi ekeicha painta tamrópata notarükúpame paiña neakabiwa tsane tabo, jei Nakom.

Israel pía pemómoxi susato jiwi tatsi tamrópata notarüküpa xua peakabiwa Nakom píabo tatsi, po bo pin bo. Barapoxonae barapomonae pentakaponaewi,

pomonae Persia nakuapiwi xua Ciro tamatakapónatsi Judá nákuatha, barapomonaе yáíñaba jeye:

—Paxam pomonae Israel pía pemómoxi susato jiwi tatsi pam. ¿Jintam paka itoroba xua paiña neakabiwa tsane bárapo Nakom píabo tatsi, po bo pin bo? jei.

Barapomonaе jumenota:

—Ápara báraxua paéxanang xua poxoru báyatha pana itoroba Ciro poxonaе kataunxuae asiüü pópona.

Barapoxonaе bárapo pentakaponaewi Darío II carta tatínatsi jeye:

—¿Metha bara xaniyéi jampa? ¿Metha Ciro itoroba jampa xua Israel pía pemómoxi susato jiwi tatsi peakabiwa tsane Nakom píabo tatsi jampa? jei.

Poxonaе barapomonaе kataunxuae éwata xua Darío II pejume epanotsiwa, barapoxónaerü Israel pía pemómoxi susato jiwi tatsi naitomatsiya nakuita Nakom píabo tatsi, po bo pin bo. Nakom bara yawena barapomonaetha. Poxonaе Darío II yóroba bárapo carta, barapoxonaе itoroba piamonaе, pomonaе pía petanakuichiwichi xua petajeichinéxatsi po petorobi koyenewa xua báyatha Ciro tina. Poxonaе barapomonaе taeba bárapo peitorobi koyene, Darío II kátatsi. Poxonaе Darío II báraxua yóroba barapoxonaе jume epanota cártatha pentakaponáewitha pomonaе Israel pía pemómoxi susato jiwi tatsi pía peaitafaetabí jíwichi. Bárapo cártatha jeye bárapo pentakaponáewitha:

—Bara pakópare xua Israel pía pemómoxi susato jiwi tatsi bara akabina bárapo Nakom píabo tatsi, po bo pin bo. Matáúitano barapomonaetha pakare po parátixi xua báyatha pajebapóname xua impuesto matómawüing. Bárapo paratixitha xain barapomonaе yawénatsi xua poxonaе Nakom píabo tatsi ákaba, po bo pin bo, jei.

Daxota bárapo pentakaponaewi Israel pía pemómoxi susato jiwi tatsi bewa yawenaetsi. Bárapo penakuichiwa bara weta seis po weibetha xua poxonaе Darío II itorobiya éwata Persia nakua.

5

Israel pía pemómoxi susato jiwi tatsi nakobeweta xua peakabiwa Nakom píabo tatsi, po bo pin bo. Barapoxonaе barapomonaе fiesta éxana xua poxonaе daxita barapomonaе nakaetuta Nakom piabotha tatsi. Barapomonaе jeye Nakomtha:

—Nakom, bárapo bo paéxanang xua po bo ápara ichaxota neekaewa tsane, jei.

Barapoxonaе barapomonaе aiña duweimonaеin juteba xua be ofrendang matawüing xua Nakom nexa. Daxita barapomonaе jüntübükoyene weiweina. Barapoxonaе barapomonaе itapeta sacerdotemonaе, irü Leví pía pemómoxi susato jiwi jíwana tatsi, xua barapomonaе pe-eenaewa tsane Nakom píabo tatsi, po bo pin bo, be pókotsi koyeneya báyatha Moisés itoroba. Barapoxonaе icha weitha barapomonaе Pascua fiesta matakabi wüing éxana. Daxita bichokono jüntübükoyene weiweina tsipéi Nakom yawena barapomonaetha xua poxonaе ekeicha ákaba Nakom píabo tatsi, po bo pin bo.

**Meje yábara poxonaе Zacarías, pong Nakom peitorobi jume pepaеbin,
kueikueijeі Nakom Pejume Diwesi pomonaetha,
pomonaе ekeicha kaewa pata Jerusalén tómaratha**

(Zacarías 1—14)

Poxonaе Hageo, pong Nakom peitorobi jume pepaеbin, Nakom Pejume Diwesi kueikueijeі Israel pía pemómoxi susato jíwitha tatsi, bárapo weitha barichi

Zacarías, irü pong Nakom peitorobi jume pepaebin kueikuejei barapomonaetha Nakom Pejume Diwesi. Zacarías jeye barapomonaetha:

—Nakom báyatha paeba pinae icha ekeicha kaewa exanaeinchi pokotsiwa itoroba pinae naka yawenaena. Jopa bewa barichiya exanaetsi icha kaena báyatha ichi waámo susato jiwi xua jopa beta jumekowüntsiya jinompaeyo.

Pomona Nakom peitorobi jume pepaebiwi tsipaeba nawita barapomonaetha xua barapomona jopa bewa exanáe tsane abe peéxanae koyenein. Bekein baxua tsipaeba pomona Nakom pía peitorobi jume pepaebiwi íchitha jopa exanaeyo pokotsiwa itorobébatsi. Daxota Nakom átene kana exaneba xua abe peexanaexae. Matáütano Nakom kópata xua bara barapomonae petaayápube tsaibi tsainchi xua kaena báyatha Nakom báraxua yábara paeba. Barapomona matapaiña yaputane xua poxonae átene kana exanébatsi ápara poru barapomonae mexeya abe peexanaexae.

2

Nakom éxana xua Zacarías petaewa tsane michinaebong. Bapong yábara tane pokotsiwa bexa exanaena. Icha michinaebong, bárapo michinaebongtha Zacarías tane xua ekeicha Jerusalén tómara pexeiña tómara tsane xua nawita xeinaena. Matáütano Zacarías yábara tsipaeba barapomonaetha xua pong nakua itorobiya peewatsin yábara xuano xua kaena báyatha bapong paeba xua pinae jeye:

—Patsipáebare Sión tomarapiwi. Pajande: ‘Patáename pong itorobiya paiña pepa paka ewatsin. Pákata jüntema patopaena, xua burriyotha ekeikaena penüngtha, xua burra pesowato koxi tatsi’, pajande. Bapong daxita itorobiya ewatsina xua bárapo kae pin nákuathe, jei Zacarías.

Barapoxonae ekeicha Zacarías jeye:

—Kaentakábitha Israel pía pemómoxi susato jiwi tatsi taena, xua Nakom taeinchi. Yawa barapomona jüntübükoyene wekoyéi tsane xua báyatha bapongtha pewang exanaexae. Íchitha Nakom yábara jüntemainaena barapomonaetha xua xuang báyatha barapomona abe peéxanae koyenein éxana. Barapoxona Nakom daxita notsina nakomüng, po nakomüng xua jopa xaiñeyo xua xuang xeina Judá nákuatha.

”Barapong ungkuaena demuxúwatha xua ichaxota olivo naein umena. Barapoxonae bárapo demuxuwa aiña demuxúwabe naexanaena. Barapoxona Nakom itorobiya ewatsina daxita bárapo kae pin nakue. Ekeicha aibi tsane xua kirei. Nakom átene kana exanaena pomonaetha, pomona Israel pía pemómoxi susato jiwi tatsi pía peaitafaetabí jíwichi tatsi.

Meje yábara poxonae nakua itorobiya peewatsin píowa tatsi, powa pewüng Ester, Israel pía pemómoxi susato jiwi tatsi kapanenebíyatsi

(Ester 1—10)

Kaentakábitha Asuero pong xuya Persia nakua itorobiya peewatsin píowa kaseba. Asuero píowa pewüng Vasti. Daxota Asuero píowa kaseba tsipéi bapowa Vasti jopa ponaeyo ichaxota fiesta, po fiesta Asuero éxana. Bapowa jeye:

—Bara, jei, poxonae Asuero bapowa wábatsi.

Daxota Asuero pía pemuxuweteibíwichi muxujeichi jeye:

—Icha yábüyo itapere, xain barapowa Vasti pekoutha xuya tanakatsíwatsi xua jinsheuri nexa. Tsipéi icha báraxua Vasti saya kópatame xua: ‘Bara’, pejeichaibiwa, bárapo nakuathepiwi, yábüxi, bara ichaibi tsipae pía pebíwitha, jei.

Asuero bara jejéi pokotsiwa barapomonae paeba. Barapoxonae barapong itoroba pomonae pía petanakuichiwichi xua petakapatsiwa tsainchi piabotha penowaxi xua pinmonae, powaxi xua pexeñowaxi. Barapong itapeta powa xua tsita wüünaetsi, xua powa píowa peexanaewa tsane xua Vasti pekoutha tatsi.

2

Susa tómara pepa tómara xua Persia nákuatha. Bárapo tómaratha Israel pía pemómoxi susato jiwi jíwana tatsi pópona pong pewüing Mardoqueo. Barapong yábüyo wíchata powa pewüing Ester. Bapowa Ester Mardoqueo paxong tatsi pexantiyo tatsi, irü pénowa tatsi pexantiyo tatsi. Mardoqueo pamcho wíchata tsipéi paxong tatsi tüpa irü pénowa tatsi tüpa. Ester bapowa pexeñawayo tsekae. Daxota Asuero pía petanakuichiwichi barapowayo takapátatsi piabotha tatsi, po bo pin bo, xua múxunano ichówaxi xua penowaxi.

Pong xua ta-eena yábüxi xua Asuero nexa tsita wüünaetsi Ester. Yawa daxota beta yawena barapowáyotha. Íchitha bapong jopa yaputaeyo xua Ester Israel pía pemómoxi susato jiwi jíwana tatsi. Mardoqueo kaena pewünaeya pamcho muxuweta xua jopa ichamonaetha penayopichiwa tsane. Daxita matakabi tsaibi Mardoqueo matawakaicha ekaponeiba Asuero píabo tatsi, po bo pin bo, pía yaputaetsi icha Ester jüntema pópona.

Poxonae kae wei yapukaewa bapoxonae Ester xuya pona merawitha ichaxota Asuero eka piabotha. Bapong Asuero tsita wüünaetsi Ester beyakaincha xua tsita wüünaetsi icha yábüxi. Bara barapowa Asuero píowa kana éxana. Íchitha bapong Asuero jopa yaputaeyo xua ápara Ester Israel pía pemómoxi susato jiwi jíwana tatsi.

3

Kaentakábitha Mardoqueo jumetane xua natsipáebabe nakuéyatabe pongbe. Barapongbe jíwanabe pomonae pentakaponaewi pomonae Asuero pía penawabchüü-exaneibiwi tatsi. Barapongbe natsipáebabe xua bepa pinae Asuero bexubinchi.

Barapoxonae Mardoqueo pona ichaxota eka Ester xua báraxua peyábara tsipaebinexa barapówatha. Barapoxonae Ester pía pebintha tsipaeba, Asuero tsipáebatsi, pokotsiwa báyatha Mardoqueo paeba. Barapoxonae Asuero jeita metha icha bára-xua bara xaniyéi. Kotakaya bapong yaputane pokotsiwa xua Ester ápara xaniyéi.

Barapoxonae Asuero najumekaitoroba xua pebexubiwa tsáinchibe pongbe namanáichabatsi xua bapongbe pekoibotathü katafotabiwa tsáinchibe. Itoroba xua petayabaratinaewa tsainchi po díborotha ichaxota tina daxita xua xuang bapong éxana poxonae aena tamrópata pítaba xua Persia nakua itorobiya peewatsiwa.

4

Pírapae Asuero tsita wüünaetsi pong jíwana pomonae petanakuichiwichi petakanamataxeináewatsi. Bapong pewüing Amán. Asuero bapongtha kana éxana xua Amán bichokono pong peaiñakuín. Asuero itoroba daxita jíwitha xua Amán peitabaratha tsaibi bewa pentabokotongtha taumeneibichi xua pebarükui-iturajineibiwa tsainchi. Daxita báraxua éxana pokotsiwa Asuero itoroba. Íchitha nama Mardoqueo jopa daichiyo.

Poxonae Amán tane xua jopa peitabaratha pentabokototha unguaeayo Mardoqueo, bichokono anáepana. Bapoxonae bapong jeita pokoyeneya xua Mardoqueo pebexubiwa tsainchi. Barichi nantaxeina xua daxita Israel pía pemómoxi susato jiwi tatsi pejutebiwa tsainchi. Bapong itoroba xua ichüng ibótixi pebebeyaewa tsane xua peyaputaenexa xua peitapetsiwa tsane matakabi, xua po matakábitha pejutebiwa tsainchi Israel pía pemómoxi susato jiwi tatsi. Néxata bapong siwaponá, Asuero siwapoinchi. Bapong jeye:

—Aíña nákuang, po nákuangtha ichaxota itorobiya éwatame. Bárapo nákuangtha jinompa pomonae xua jopa exanaeyo pokotsiwa xua itoróbame. Bewa jutebichi barapomonae, jei Amán.

Asuero jumenota bapongtha jeye:

—Bara moya éxande be pokotsiwa xua katsita wüünae. Tínare peitorobi koyenewa xua barapomonae pewerapaewa tsane, jei Asuero.

Bapoxonae Asuero barapongtha kata pía anillo xua bapong nakobesí xátata. Barapoxonae Amán itoroba ichamonae xua petatinaewa tsainchi cartang daxita nákuangtha ichaxota po nákuang Asuero itorobiya éwata. Bárapo cártangtha itoroba xua pejutebiwa tsainchi daxita Israel pía pemómoxi susato jiwi tatsi po matakábitha xua báyatha itapeta poxonae ibótixi bebeya.

5

Poxonae Mardoqueo báraxua jumetane bichokono anthüthütane. Barichi daxita Israel pía pemómoxi susato jiwi tatsi. Pírapae pomonae Asuero pía petanakuichiwichi Ester tsipáebatsi jeye:

—Taema, Mardoqueo paparuwa namaxátataba, po paparuwa áxüing yawa najumetsébiya wawái poxoru anthüthütane.

Barapoxonae Ester kaein jíwana itoroba pomonae Asuero petanakuichiwichi xua petayábara yaiñabinéxatsi Mardoqueotha xua eta pokotsiwa metha wekoyéi.

Bara bapong, pong Asuero petanakuichinchi, pona yawa Mardoqueo yábara yaiñabatsi. Bara Mardoqueo daxita yábara jumeyopita xua daxita Israel pía pemómoxi susato jiwi tatsi pejutebiwa tsainchi. Mardoqueo bárapo carta jíwana taitoroba Ester nexa po carta Amán tina. Yawa tsipaeba Estertha xua barapowa petsipaebinexa pía pebin xua Israel pía pemómoxi susato jiwi tatsi pekapanenebiyaewa tsainchi. Pong Ester báyatha itoroba, barapong Ester daxita yábara tsipáebatsi pokotsiwa báyatha Mardoqueo tsipaeba. Ekeicha Ester itoroba bapong xua Mardoqueo petsipaebinéxatsi jeye:

—Dapong aibi pong pona ichaxota eka pong nakua itorobiya peewatsin. Saya itakúüpatsi xua baxota pona poxonae bapong piakoya waba. Icha ichüng báraxua éxana xua bekein poxonae jopa wabichi, barapong bexubinchi. Saya itakúüpatsi xua penakapanepaewa poxonae pong nakua itorobiya peewatsin yoya naewa po naewa xua oro nainto. Barapoxonae pong patopa bara yaputane xua bara bapong jopa tüpáe tsane. Baraxota jopa ponaeiño beya kae xometo, tsipéi jopa newabiyo, jei Ester.

Barapoxonae bapong, pong Asuero petanakuichinchi, ekeicha pona Mardoqueotha. Yawa daxita báraxuang bapong Mardoqueotha tsipáebatsi pokotsiwa Ester tsipaeba. Mardoqueo jumenota jeye:

—Jopa aiñakuiyiyo, bekein xam Asuero píowa tatsim, ápara irü tüpáename po matakábitha poxonae daxita Israel pía pemómoxi susato jiwi tatsi jutebinchi.

Icha junúwame xua tüpáename, ichüing patopaena xua pong kapanepaena Israel pía pemómoxi susato jiwi tatsi. Metha tüpáename bekein yawenaetsípame ichi-kuitha jopa bekein yawenáe tsipaem. Metha xam naexáname Asuero píowa tatsi saya meisha poxoru kaitapeta xua jiñamonae yawenáename bárapo dapaethe, jei Mardoqueo.

Barapong, pong Asuero petanakuichinchi, ekeicha daxita báraxua Ester tsipáebatsi pokotsiwa Mardoqueo paeba. Ekeicha Ester itoroba bapongtha xua pokotsiwa Mardoqueo jumenótatsi jeye:

—Bara wüünae, bara exanaein pokotsiwa netsipáebame, bekein nebexubina. Pewünaeya xua exanaein báraxua, ichichipang xua nekaetutsiwa tsane daxita Israel pía pemómoxi susato jiwi tatsi, pomonae xua jinompa Susa tómaratha xua xote. Itoróbare bü barapomonae najainbota akoibi po matakabibetha. Yáwano painta wüükare Nakomtha. Barapoxonae tha ponaetsi ichaxota eka pong nakua itorobiya peewatsin. Icha tüpaein, bara moya tüpaein.

6

Barapoxonae barapong, pong Asuero petanakuichinchi, pona xua Mardoqueo beya. Barapong Mardoqueo tsipáebatsi pokotsiwa Ester paeba. Bara Mardoqueo éxana pokotsiwa Ester itoroba.

Poxonae Ester weta xua najainbota, barapoxonae itoroba xua pin penabanaewa exanaena pong nakua itorobiya peewatsin nexa irü Amán nexa. Barapoxonae barapowa namaxátata pókotsi paparuwa ba namaxátaba nakua itorobiya peewatsíwaxi. Barapoxonae pona yawa unguwa pebóupatha ichaxota eka pong nakua itorobiya peewatsin, pongxae pía pebin tatsi. Poxonae bapong barapowa tainchi, bapong tsita wüünaetsi. Asuero barapówatha yoya naewa, po naewa xua oro nainto. Bara barapowa joniya ichaxota po tütutha Asuero eka. Asuero yáíñaba barapówatha jeye:

—Ester, ¿eta pokotsiwa xua xam ichichípame? jei.

Barapowa jumenota jeye:

—Bárapo matakábithe katsiwábatsi pexaewa, xua tana nebarü xaewam tsane. Irü Amán bichi tsane, jei.

Barapoxonae Asuero itoroba xua pewabinéxatsi Amán. Bara bapongbe pónabe xua penabanaewanéxabe. Poxonae xane, Ester ekeicha tsiwábabe icha pexaewa xua baya tsane. Ester tsipaeba bapongtha Asuero, xua pinae Ester baya paebina pokotsiwa xua ichichipa xua Asuero petaexanaewa tsane. Bárapo matakábitha poxonae Amán piabotha pona, bapong Mardoqueo kaxínatsi. Mardoqueo jopa pentabokototha unguwaeyo Amán peitabaratha tatsi xua ichi báyatha ichi. Amán bichokono anáepana, íchitha saya jopa paebiyo, saya piabotha pona. Poxonae piabotha patopa atsakiya paeba piowatha irü pijimonaetha jeye:

—Maisha nawita xeinang pekakomokáe parátixi. Yawa pexui inta pinmonae yawa aiñakuí tana neexanaein, jei.

Yawa jeye:

—Ánoxuae Ester pexaewa pana netsiwaba, saya xang irü pong nakua itorobiya peewatsin, xuano xua icha penabanaewa pana netsiwaba baya tsane. Bekein bara báraxuang inta wüünae íchitha jüntemang aibi poxonae áwiya kataunxuae Mardoqueo, pong Israel pía pemómoxi susato jiwi jíwana tatsi, áwiya jopa exanaponaeyo pokotsiwa itorobang xuano xua tanakuitha, Asuero tanakuítatsi.

7

Néxata Amán píowa itoróbatsi, irü piamonae itoróbatsi jeye:

—Éxande naeto ichaxota po náetotha jiwi koibotathü katafobabathópatsi, po naeto xua bichokono tajüicha. Barapoxonae baya tsane ponde xua nejeinexa: ‘Asuero, itoróbare xua Mardoqueo pekoibotathü katafotabiwa tsainchi ichaxota po naeto exananotang’, xua nejeinexa.

Amán báraxua ichichipa xua peexanaewa. Bara bapong itoroba xua petakawatabiwa tsainchi naeto.

Bárapo merawitha Asuero jopa itaküüpaetsi xua pemaitekaewa. Daxota bapong itoroba pomonae pía petanakuichiwichi jíwana xua petaxawenaewa tsainchi díboro, po diborotha xua báyatha yábara tina xua xuang éxana poxonae aena tamrópata pítaba xua nakua itorobiya éwata. Pong pía petanakuichiwichi jíwana yóroba xua po diwesi Mardoqueo yábara. Bárapo diwesi paeba xua pinae Mardoqueo jumeyopita poxonae Asuero áwatha bexubapáebatsi pongbe jíwana pomonae pentakaponaewi, xua daxota Asuero jopa tüpaeyo. Néxata Asuero jeye:

—¿Eta xua báyatha taexainchi bapong xua beta peexanaexae? jei.

Asuero jumenótatsi pía petanakuichiwichi jeye:

—Ajibi, jei.

Barapoxónaerü kaena Amán patopa Asuero piabotha tatsi, po bo pin bo. Bapong patopa xua Asuero pewüükaenéxatsi xua Asuero peitorobinexa xua Mardoqueo náetotha pekoibotathü katafotabiwa tsainchi ichaxota po naeto exananta. Pewünaeya xua Amán peyaiñabiwa tsane bapongtha, pong nakua itorobiya peewatsin tane bapongtha yawa yáñabano jeye:

—¿Eta pokotsiwa taexanaein pongtha xua bichokono wüünae éxana pong netsita wüünae? jei.

Amán nantanaxeina poxonae Asuero báraxua paeba ápara bapong yábara páebatsi daxota jeye:

—Xang nantanaxeinang barapong bewa kopatsíname xua penamaxatatsiwa tsane jiña paparuwa, yawa jiña tepa, yawa kawáyutha kuaretsinka xua jiña kawayu jíwana. Barapoxonae jiñamonae jíwanapin pong bichokono peaiñakuín kopatsíname xua bapong pentakaekaponaewa tsane Susa tómaratha pong xua katsita aiñakuí. Barichino kopatsíname xua bara bapong pewawaiwa tsane xua jeye: ‘Meje pokotsiwa pong nakua itorobiya peewatsin éxana pongtha, pong tsita wüünaetsi’, xua pejeinexa, jei Amán.

Pong nakua itorobiya peewatsin jeye:

—Maisha wüünae xua páebame. Naiña ponde. Bara kana ichinde Mardoqueo, pong Israel pía pemómoxi susato jiwi jíwana tatsi, pokotsiwa xuaunxuae netsipáebame, jei.

8

Barapoxonae kaena baya daxita baxuang bewa bara kana ichiya exanaena Mardoqueotha pong pía peaitafaetabí jintong xua daxita yábara paeba Asuérotha. Barapoxonae Amán Mardoqueo jumaxátatatsi Asuero pía paparuwa tatsi, xua po paparuwa pexeña paparuwa. Yáwano Mardoqueo mataxátatatsi pokotsiwa

be tepa. Barapoxonae Amán kawáyutha kuaretsika, Mardoqueo kuaretsíkatsi. Amán matakaekapona ichaxota Susa tómaratha poxonae Mardoqueo ekeika kawáyutha. Amán wawaya jeye:

—Meje pokotsiwe pong nakua itorobiya peewatsin éxana pongtha, pong tsita wüünaetsi, jei.

Poxonae Amán weta báraxua, bapoxonae piabotha pona yawa bichokono weko-yéi. Daxita báraxua píowa yábara tsipaeba yawa pía jiwi tsipaeba, pokotsiwa xua báyatha bapong éxana. Amán jopa itaküüpaetsi xua Asuero pewüükáewatsi xua Asuero peitorobinexa xua Mardoqueo pekoibotathü katafotabiwa tsainchi náetotha ichaxota po naeto bapong exananota. Barapoxonae Amán píowa tsipáebatsi irü pía jiwi tsipáebatsi jeichichi:

—Icha barapong Mardoqueo ápara Israel pía pemómoxi susato jiwi jíwana tatsi, dotande. Ápara jopa kaitaküüpaeyo xua neamanayabiwam tsane bapong. Ápara bapong kaamanayabáitsipa, jei.

Kaena barapoxonae Asuero pía petanakuichiwichi pata Amán piabotha. Barapoxonae Amán barü poinchi ichaxota penabanaewa tsipéi Ester báyatha pexaewa weteta. Poxonae vino mera apena barapoxonae Asuero yáíñaba píowa jeye:

—¿Eta pokotsiwara xua xam ichichípame xua kata exanaeinchi, tsipéi bara exanaein pokotsiwa newúükame? jei.

Barapowa jumenota jeye:

—Jumedangweya kawüükatsi xua jopa nekopatsiwa tsane xua tana nebexubiwa tsane irü xua tamonaé jopa pejutebiwa tsainchi tsipéi daxita pana jutebapaeba. Icha saya pana kaenáetsipa xua pana kana exaneba pomonaé pebusikuitaetaewi pang metha jopa kajumefayakotsípaetsi. Báraxua kawüükatsi tsipéi bichokono jopa wüünaeyo icha daxita pang pana jutebina, jei Ester.

Néxata Asuero yáíñaba jeye:

—¿Jintam báraxua exanapaeba?

Ester jumenota jeye:

—Bapong eke, ápara Amán, pong pata tana neitafáetabi jintong, jei.

Poxonae Amán báraxua jumetane Amán bichokono pijunuwi peinanareka. Asuero bichokono anaepanaeya nontapona, pana beya pona. Amán pijunuwi Ester pixáíñatha nayüütungkua. Írürü Amán jumedangweya wüükauya xua Ester jumedangweya wüükáuyatsi xua Asuero jopa bapong pebexubiwa tsainchi. Poxonae Asuero tutuwa wejondena yawa báraxua tane xua Amán éxana, bichokono anáepana. Asuero jeye Amantha:

—¡Inta kéntame taseuri bara bekein netáneme xua ékang!

Asuero pía petanakuichiwichi kaein jíwana Asuero tsipáebatsi xua pinae Amán tsiexananota naeto po náetotha xua Mardoqueo pekoibotathü katafotabiwa tsainchi. Barapoxonae Asuero itoroba barapomonaetha xua Amán pebexubiwa tsainchi, xua pekoibotathü katafotabiwa tsainchi bárapo naeto wétsika. Barapoxonae poxonae Asuero koibanakaewa Ester tsipaeba bapongtha jeye:

—Ápara Mardoqueo taeweicho, jei.

Barapoxonae Asuero Mardoqueo xuya aiñakuí kana éxanatsi xua Amán pekoutha tatsi.

9

Íchitha áwiya Israel pía pemómoxi susato jiwi tatsi yábara itoróbatsi xua pejutebiwa tsainchi po peitorobi koyenewa xua Amán tina. Daxota Ester pona ichaxota eka pong nakua itorobiya peewatsin. Bara Asuero ekeicha yoya naewa po naewa xua oro nainto Ester pía xaiña beya. Barapowa jeye bapongtha:

—Jopa exanaeinde po peitorobi koyenewa báyatha Amán tina, tsipéi pana neju-tebichipa daxita pang.

Íchitha Asuero jeye:

—Jopa be najúntükui baraxubiño xua tajutebiwa Israel pía pemómoxi susato jiwi tatsi. Kanta báyatha tawüing xeina bárapo peitorobi koyenéwatha. Xam irü Mardoqueo bara patinarebe icha peitorobi koyenewa xua tapaka yawenaewa tsainchi, jei.

Bara Ester pewéichobe tínabe icha peitorobi koyenewa. Po peitorobi koyenewa Ester pewéichobe tínabe kópata xua irü Israel pía pemómoxi susato jiwi tatsi bara penayaweneibiwa tsane xua jopa xaiña pebobenouneibiwa. Daxota barapomonae peitaküüpaewa tsainchi xua jutebeibina pomonae naba exanéibatsi, po matakábitha xua báyatha itapeta xua poxonae ibótixi bebeya. Bárapo peitorobi koyenewa daxita barompaya icha jumeintha tínano pomonae nexa, pomonae jinompa daxita nákuangtha, po nákuangtha Asuero itorobiya éwata. Barapoxonae bárapo nákuangtha tsana itoroba bárapo peitorobi koyenewa.

Po matakabi xua báyatha itapeta xua Israel pía pemómoxi susato jiwi tatsi pejutebiwa tsainchi, bárapo matakabi jopa. Bárapo matakábitha Israel pía pemómoxi susato jiwi tatsi pinmonae juteba pía peaitafaetabí jíwichi poxonae yotéibatsi. Matáütano Amán pexantong tatsi tajutébatsi xua diez pongbe. Israel pía pemómoxi susato jiwi tatsi, pomonae xua Susa tómaratha jinompa, barapomonae pinmonae ekeicha icha matakábitha juteba pomonae pía peaitafaetabí jíwichi.

Barapomonae, poxonae weta xua naba, barapoxonae icha matakábitha pin fiesta éxana. Barapoxonae Mardoqueo carta tatina Israel pía pemómoxi susato jiwi tatsi. Bárapo cártatha itoroba xua daxita weitha tsaibi bárapo fiesta exaneibina xua peyábara nantanaxeinaenexa xua Israel pía pemómoxi susato jiwi tatsi kapane-nebíyatsi, xua Nakom kapanepa, pía peaitafaetabí jíwichi weya.

Barapoxonae Israel pía pemómoxi susato jiwi tatsi, pomonae jinompa pepa tómarangtha, bárapo fiesta exaneiba xua poxonae quince po matakábibe xua doce po xometobetha. Íchitha nama pomonae jinompa ichaxota tsiki tomarixi, irü pomonae jinompa ichaxota tómarang, kaewa aibi barapomonae bárapo fiesta éxana catorce po matakabibetha xua bárapo xométotha. Bárapo fiesta matawüing duta: “Purim”, jei.

Mardoqueo bichokono pong peaiñakuín, pong Asuero pía petakanamataxeinaeinchi Persia nákuatha. Saya meisha Asuero bichokono peaiñakuín beyakaincha Mardoqueo.

Amán báyatha nantaxeina xua abe peexanaewa Israel pía pemómoxi susato jiwi tatsi. Nama Mardoqueo jopa daichiyo. Bapong piamonae yawena nawita Israel pía pemómoxi susato jíwitha tatsi. Mardoqueo piamonae bichokono barükui-iturajínatsi.

**Meje yábara poxonae Esdras, pong sacerdotemonaepin,
kaibeya pona Jerusalén tómara beya**

(Esdras 7—10)

Cuarenta po weibe yapukaewa xua poxonae Israel pía pemómoxi susato jiwi tatsi weta xua ekeicha peakabiwa Nakom píabo tatsi, po bo pin bo. Barapoxonae Esdras, pong sacerdotemonaepin, ekeicha kaewa patopa Jerusalén tómaratha xua Babilonia tómara weya pona, po tómara xua pepa tómara xua Caldea nákuatha. Barapong Esdras penakuidubin xua Nakom peitorobi koyenewa tatsi. Exaneiba pokotsiwa bárapo peitorobi koyenéwangtha itoroba. Bárapo peitorobi koyenewang xuya ichamonaetha kuidubeiba.

Artajerjes, pong Persia nakua itorobiya peewatsin, barapong kópata xua írürü daxita Israel pía pemómoxi susato jiwi tatsi kaewa patsina Jerusalén tómaratha, pomonae xua báyatha punaxainxaiñeichi Esdras. Daxota pinmonae Israel pía pemómoxi susato jiwi tatsi yawa múxuna náexana sacerdotemonae jíwana. Yawa Leví pía pemómoxi susato jiwi jíwana tatsi, daxita barapomonae kaewa barü patopa Esdras.

Artajerjes, pong Persia nakua itorobiya peewatsin, pekaikomokáe parátixi katsiba, Esdras katsíbatsi, xua Esdras pekomokeibinexa duwéi xua pejutebeibinexa, xua be ofrendang matawüing Nakom nexa. Yawa Esdras tsipáebatsi xua pematomatsiwa tsainchi pokotsiwang xua barapomonae nantawénona Nakom piabotha tatsi, po bo pin bo.

Artajerjes yaputane xua barapomonae nawita jopa xeinaeyo pekaikomokáe parátixi. Daxota barapong carta itoroba Persia nakuapíwitha, pomonae pentakaponaewi Judá nákuatha. Bárapo cártatha itoroba xua bárapo sacerdotemonae irü Leví pía pemómoxi susato jiwi tatsi, jopa pewüükaewa tsainchi xua impuesto matoma. Matáütano bapong itoroba bárapo cártatha xua Esdras katsinchi pekaikomokáe parátixi yawa pexaewa xua Nakom piabotha tatsi nexa, po bo pin bo.

2

Pewünaeya tsane xua poxonae Israel pía pemómoxi susato jiwi tatsi kaibeya ponaena Judá nakua beya, xua Babilonia tómara weya, barapomonae najainbota. Barapomonae wüüka Nakomtha jeye:

—Nakom, pana yawende xua tajü paponang xua pawárapang Judá nakua beya, jei.

Barapomonae baxua éxana tsipéi Esdras aura. Barapong aura xua Artajerjes pewüükáewatsi pomonae barapong pía penawabchüü-exaneibiwi tatsi, xua barapomonae peararanaenéxatsi poxonae pona. Kaena báyatha Artajerjes jumetane xua barapomonae paeba, xua pinae ba Nakom yawena pomonae wüünae pejainteibíwichi. Bara Nakom jejéi yawa yawena barapomonaetha xua pewüükaexaetsi.

Bara barapomonae beta pona poxonae wárapa. Daxota barapomonae jüntema kápata Jerusalén tómaratha pokotsiwang tazang xua xuang aiña matoma, pekaikomokáe paratixino xua Nakom píabo tatsi nexa, po bo pin bo.

3

Poxonae Esdras patopa Jerusalén tómaratha bapong tane xua pinmonae Israel pía pemómoxi susato jiwi tatsi, irü sacerdotemonae, irü Leví pía pemómoxi susato

jiwi tatsi, barapomonaе nota yábüxi xua icha nakuangpiwaxi. Barapówaxi ápara powaxi icha nakomüng wüünae pejainchíwaxi. Barapoxonaе Esdras bichokono anthüthüdewei. Daxota Nakomtha wüüka jeye:

—Nakom pong tananentakaponaem, pata amo susato jiwi jopa exanaeyo pokotsiwa itoróbame. Poxonaе barapomonaе átene kana éxaname, kópatame xua barapomonaе pejutebíwatsi pía peaitafaetabí jíwichi. Ichikuitha kopatameno xua barapomonaе pekaponaewa tsainchi icha nákuangtha, po nákuangtha xua tajü.

”Ánoxuae pana kópatame xua kaewa papatang Jerusalén tómaratha. Yawa pana kópatame xua baraxota ekeicha paákabang jiña bo. Yawa kópatame xua pomonaе Persia nakua itorobiya peewatsiwi beta painta éxana. Maisha ekeicha abe paéxanang, pokotsiwa báyatha éxana pata amo susato jiwi, jei.

Poxonaе kataunxuae Esdras wüükauya Nakom, matawakaicha nakaetútatsi jiwi. Barapoxonaе bárapo jiwi Esdras jeichichi jeye:

—Yábüxi, powaxi icha nakuangpiwaxi, barapówaxi paitorobín xua paxa tatsi piabongtha. Matáütano paitorobín pía pexui tatsi xua pamo tatsi piabongtha, jei.

Barapomonaе itoroba barapówaxi múxuna piáwang xua xeina poxonaе nótatsi powaxi xua Israel pía pemómoxi susato jiwi jíwana tatsi aibi, xua kaewa peponaewa tsane pía nákuangtha. Matáütano barapówaxi, pía pexui tatsi, itoroba pía nákuangtha. Daxita báraxua éxana tsipéi Nakom peitorobi koyenéwatha tatsi paeba xua pinae Israel pía pemómoxi susato jiwi tatsi jopa bewa noteibí tsane yábüxi powaxi xua icha nakuangpiwaxi.

**Meje yábara poxonaе Nehemías Israel pía pemómoxi susato jiwi tatsi
jüntübükoyene tsakábatsi xua xaxainta ibowa müxübürü pokotsiwa
xua Jerusalén tómara yaputoxórota duta**

(Nehemías 1—7)

Nehemías bapong Israel pía pemómoxi susato jiwi jíwana tatsi. Bapong tana-kuita, xua Artajerjes tanakuítatsi, pong Persia nakua itorobiya peewatsin. Barapong Nehemías pópona Susa tómaratha, po tómara xua pepa tómara xua Persia nákuatha. Kaentakábitha Nehemías peweicho tatsi, pong pewüng Hanani, irü ichamonaе, pomonaе Jerusalén tómaratha jinompa, kaibeya pona Persia nakua beya xua Judá nakua weya. Nehemías yáinaba barapomonaetha jeye:

—¿Eta bichi Israel pía pemómoxi susato jiwi tatsi Jerusalén tómaratha?

Barapomonaе Nehemías jumenótatsi:

—Barapomonaе jopa beta jinompaeyo. Abe kana exanéibatsi pía peaitafaetabí jíwichi. Po ibowa müxübürü, pokotsiwa xua Jerusalén tómara yaputoxórota duta bichokono abe. Baxua abe bara kaena poxonaе weya poxonaе Nabucodonosor pía penawabchüü-exaneibiwi tatsi abe éxana.

Poxonaе Nehemías báraxua jumetane, bichokono anthüthütane. Daxota wüüka Nakomtha jeye:

—Nakom Tananekanamataxeinaein, bichokono peyapusüü itorobi koyenewa nexeiaein. Bara exanéibame pokotsiwa xua jíwitha yábara tsiwüünae muxudubéibame pomonaetha, pomonaе kaántobe, xuano xua éxana pokotsiwa itoróbame jiña neitorobi koyenéwangtha.

Paxang, pomonaе Israel pía pemómoxi susato jiwi tatsi pang, maisha jopa paxanaeiño pokotsiwa itoróbame jiña neitorobi koyenéwangtha. Daxota kópatame

xua pata tana neaitafáetabi jiwi tajü pana kápona pata nakua weya. Íchitha xam pana tsipáebame xua pinae icha kaewa paexanaein pokotsiwa itoróbame jiña neitorobi koyenéwangtha, pana kopatsíname xua kaewa pata patsiwa tsane pata nákuatha. Daxota éxande pokotsiwa xua kawüükatsi. Éxande xua pong nakua itorobiya peewatsin xua inta beta exanaena poxona wüükaein xua tana nekopatsiwa tsane xua kaibeya taponaeewa Judá nakua beya, jei.

2

Pírapae icha xometongtha, Nehemías takapona koroto xua vino mera wünta nakua itorobiya peewatsintha, tsipéi báraxua bapong pía petanakuichiwa tatsi. Poxonae Nehemías kata bapongtha, Nehemías tainchi xua itabara wekoyéi. Daxota bapong Nehemías yáíñabatsi jeye:

—¿Eta pokotsiwa metha itabara wekoyam?

Bekein Nehemías junuwa íchitha najüntübükoyene tsakataba yawa jumenota bapongtha jeye:

—Xang jopa jüntema poponaeiño tsipéi yaputang xua Jerusalén tómara áwiya kataunxuae abe. Icha kajüntübükoyene weiweina éxana xua kata nakuítatsi, jumedangweya kawüükatsi xua tana neitorobiwam tsane Judá nakua beya. Baraxotiya tha ekeicha kaewa wüünae exanaetsi xua Jerusalén tómara.

Bara Nehemías kópatatsi xua peponaeewa tsane. Matáütano Nehemías kana éxanatsi gobernadormonaepin xua Judá nákuatha. Nehemías cartang pukátatsi, Artajerjes kata. Bárapo cartang ichamonae nexa pomonae Persia nakuapiwi, pomonae irü Artajerjes takanamataxéinatsi. Barapomonae takana-mataxeina icha nákuang, po nákuang Judá nakua pekuariya táenatsi. Artajerjes barapomonae tha tsipaeba bárapo cártangtha xua pinae bewa Nehemías yawenaeinchi. Báraxua daxita éxana xua Nehemías pewüükaexae Nakomtha xua Nakom yawena bapongtha.

3

Nehemías Jerusalén tómara beya pona xua poxonae irü trece po weibe yapukaewa xua poxonae Esdras pona. Poxonae akoibi po matakábibe yapukaewa xua poxonae Jerusalén tómaratha patopa, barapoxonae barapong pebiwi kaetuta. Merawitha bárapo pebiwi barü pona xua pía taetsi xua ibowa müxübürü, pokotsiwa xua Jerusalén tómara yaputoxórota duta. Yawa táneno ichaxota bewa ekeicha kaewa wüünae exanaena.

Kopiya bapong jopa yábara tsipaebiyo ichamonaetha, pomonae Israel pía pemómoxi susato jiwi tatsi, pokotsiwa xua bapong nantanaxeina xua peexanaewa tsane. Poxonae barapong tane bárapo ibowa müxübürü, pokotsiwa xua Jerusalén tómara yaputoxórota duta, barapoxonae pona yawa jeye Israel pía pemómoxi susato jíwitha tatsi:

—Ichichipang xua waxainchi daxítatsi yóroba nakuitsinchi xua ibowa müxübürü, pokotsiwa xua Jerusalén tómara yaputoxórota duta. Tsipéi Artajerjes, pong Persia nakua itorobiya peewatsin, neyawenapaeba pekakomokáe paraxitha, jei.

Daxita pebürüya yábara nantanaxearúküpa pokotsiwa Nehemías paeba. Bara barapoxonae tamrópata notarúküpa xua daxita yóroba nakuita.

4

Pebiwi, Sanbalat irü Tobías irü Gesem, bárapo pebiwi Israel pía pemómoxi susato jiwi tatsi pía peaitafaetabí jíwichi. Barapomonae tane xua Israel pía pemómoxi susato jiwi tatsi báraxua nakuita. Barapoxonae barapomonae Israel pía pemómoxi susato jiwi tatsi kuikaponéibatsi. Barapomonae jeye:

—Paxam pa-aichaxaibim xua Artajerjes pákata náexana, pong nakua itorobiya peewatsin, ápara poxoru paichichípame xua paiña nenaexanaewam tsane xua pamatakaponáename bárapo nakue, jei.

Nehemías jumenota jeye:

—Nakom pana yawenaena. Paxam jopa bewa pajinompæm xote Jerusalén tómaratha tsipéi paxam ápara jopa pata tajiwiwimonæ pam, jei.

Bara Israel pía pemómoxi susato jiwi tatsi naitomatsiya yóroba nakuita. Daxita barompaya tsana barompa tsíniya pía penakuichiawang xua pía matabüxüng tsíniya xua be pokoyeneya ichaxota wérena pona. Barapomonæ éxana ibowa müxübürü, pokotsiwa xua Jerusalén tómaraya yaputoxórota duta, xuano xua peboupang dudubapónano. Sanbalat, irü Tobías, áwiya Israel pía pemómoxi susato jiwi tatsi kuikapónatsi. Barapomonæ jeye:

—Bápana jopa pawetsim tsane barapong penakuichiwa. Ápara báraxua jopa dangweiyo daxota ichamonæ itaküüpatsi xua abe peexanaewa, jei.

Íchitha Nehemías wüüka Nakomtha jeje:

—Nakom pana yawende. Bara kópare xua daxita po peabe koyenein painta exanaena Sanbalat irü Tobías, xua bárapo abe koyenewa ichamonæ exanaena barapóngbetha, jei Nehemías.

5

Poxonæ Israel pía pemómoxi susato jiwi tatsi tajü epawetáraba báraxua, barapoxonæ barapomonæ ita-aenaenei cheibichi pomonæ pía peaitafaetabí jíwichi. Barapomonæ, Israel pía pemómoxi susato jiwi tatsi icha koyeneya yábara kanantanaxéinatsi xua abe pekana exanaewa tsainchi. Barapomonæ juntukuru naba exanaena Jerusalén tómaratha xua daxota Israel pía pemómoxi susato jiwi tatsi jopa peitaküüpaewa tsainchi xua penakuichiwa.

Israel pía pemómoxi susato jiwi tatsi bara yaputane pokotsiwa xua yábara kanantanaxeinéibatsi pía peaitafaetabí jíwichi. Barapoxonæ barapomonæ wüüka Nakomtha, xua Nakom peyawenaewa tsane barapomonaetha. Barapoxonæ Israel pía pemómoxi susato jiwi tatsi itapeta pomonæ arárana tómaraya. Pomonæ xua nakuita ajüntübükoyenefaetabí. Íchitha Nehemías jeye:

—Jopa paajüntübükoyene faetabinde. Maisha beta panakuire xain Nakom naka yawena, jei Nehemías.

Sanbalat irü Tobías yaputánæbe xua Israel pía pemómoxi susato jiwi tatsi tómaraya eena. Barapoxonæ bapongbe jopa naba exanáeyobe Jerusalén tómaratha. Bara Israel pía pemómoxi susato jiwi tatsi naitomatsiya nakuita ibowa müxübürü, pokotsiwa xua Jerusalén tómaraya yaputoxórota duta. Nehemías tsaba éxana aiña bichéitobe. Icha bicheito nakuita, icha bicheito tómaraya arárana. Daxita pebiwi, pomonæ nakuita, pía kusin kajijinka pía peaitafaetabí jíwichi pekuiyainwa.

Barichi Nehemías itapeta ichüing, xua pong seikaya poxonae obina trompeta xua daxita penakaetutsiwa tsane, icha patsina ichamonae xua naba peexanaewa tsainchi. Poxonae barapomonaе nakuita merawitha tómaratha jinompeiba. Paparuwang yawa maiteiba yawa kusin kamaiteiba. Barapomonaе kaena pewünaetha nakui-wüünaeteiba pía peaitafaetabí jíwichi icha pata xua naba peexanaewa tsainchi.

6

Poxonae kataunxuae barapomonaе nakuita, barapoxonaе Nehemías tane xua Israel pía pemómoxi susato jiwi tatsi, pomonaе kopei pexeinae jiwi, barapomonaе xeina pomonaе pía pebusikuitaetaeyebébi jiwi. Barapomonaе, pomonaexae xua busikuitaetaeyebéba pía pexui tatsi, pomonaе peakopeibí jiwi. Barapomonaе Israel pía pemómoxi susato jiwi tatsi, tanoteba irang pomonaе peakopeibí jiwi, xua poxoru petaseikeibixaetsi xua matoma amanayabéibatsi. Nehemías muxutáíñaba bárapo Israel pía pemómoxi susato jíwitha tatsi jeye:

—Jopa pata notsinde barapomonaе pía irang tatsi. Nakom pía peitorobi koye-néwangtha jopa paka yábara kopatsiyo xua báraxua paiña neexanaewa barapomonaetha. Bárapo peakopeibí jíwitha kaewa pakatsíbare pía irang. Maisha barapomonaе saya pakópabare xua jüntema pejinompaewa tsane, jei Nehemías barapomonaetha.

Bara barapomonaе Nehemías yábara jumejejeichi báraxua. Nehemías barapomonaetha jopa nata wüükaeyo impuesto matoma xua pekakomokáe parátixi xua barapong nexa. Bekein barapong bara itakúüpatsi xua bárapo impuesto matoma pewüükaewa bárapo Israel pía pemómoxi susato jíwitha tatsi. Daxota jopa wüükaeyo tsipéi bapong yaputane xua barapomonaе bewa pin impuesto matoma katsina, xua Artajerjes pekatsiwa tsainchi, pong nakua itorobiya peewatsin.

Bárapo matakábintha weta xua peakabiwa ibowa müxübürü, pokotsiwa xua Jerusalén tómara yaputoxórota duta. Saya meisha seikanaya xua pedutsiwa xua peboupa akatabiwa.

Poxonaе Sanbalat, irü Tobías, irü Gesem yaputane xua imoxoyo pewetsiwa, barapoxonaе barapomonaе naerabiya najumekaruta xua bepa pinae Nehemías pesiwaponaewa tsane barapomonaetha. Barapomonaе jopa ichipaeyo xua Nehemías petsipaebiwa tsainchi, ápara saya poxoru ichichipa xua pebexubiwa tsainchi poxonaе tajü beya pona xua Jerusalén tómara weya. Íchitha Nehemías jopa ponaeyo bara beya. Saya najumekaruta ichüingtha jeye:

—Jopa beponaеño, tsipéi nawita xeinang xua taexanaewa. Yáwano exanangno pokotsiwa xua peaiñakuí koyenewa, jei.

Bekein Nehemías ekeicha wábatsi akoibi pokuikoyenebetha. Íchitha saya Nehemías bárapo jumetha jumenoteiba poxonaе najumekaruteiba ichüingtha. Ekeicha Nehemías wábatsi. Yáwano jeichichi:

—Icha jopa patopaem tsane, pata tha tsipaebichi Artajerjes xua xam ichichípame xua naba neexanaewa bapongtha, pong Persia nakua itorobiya peewatsin. Báraxua éxaname xua jiña itorobiya ewatsichi Judá nakua.

Íchitha Nehemías jumenota barapomonaetha jeye:

—Ápara aibi, saya ápara panáerabame. Ápara saya paichichípame xua Israel pía pemómoxi susato jiwi tatsi junuwa paéxaname, jei Nehemías.

Bapoxonaе nama Nehemías bichokono dangweya nakuita beyakaincha xua kopiya.

7

Kae merawitha Nehemías siwaponá pongtha, pong yábara kanantanaxeina xua ápara pía jintong tatsi. Barapong, Nehemías tsipábatsi jeye:

—Ánoxuae po merawithe jüjüta xua nekabexubiwa tsane, pomonae jiña nekai-tafáetabi jiwi jíwanapiwi. Maisha nantsiyare Nakom piabotha tatsi, po bo pin bo, jei bapong.

Íchitha Nehemías jeye:

—Jopa benantsiyatsiño bara beya, tsipéi saya meisha sacerdotemonae kópata-tsi xua baraxota peponaewa xua Nakom pía tútiyo xua Nakom piabotha tatsi, po bo pin bo, jei.

Pírapae Nehemías yaputane xua ápara bárapo pía peaitafaetabí jíwichi bárapo pía jintongtha tatsi kátatsi pekakomokáe parátixi xua saya kou tana najumekarú-tatsi. Kou Nehemías báraxua taéxanatsi náemata, pía kotakaya abe yábara pae-bichi icha bapong ponáetsipa bárapo tutíyotha xua Nakom pía tútiyo xua Nakom piabotha tatsi, po bo pin bo.

Barapoxonae pírapae bara nakobeweta xua ákaba ibowa müxübürü, pokotsiwa xua Jerusalén tómara yaputoxórota duta. Báraxua nakobeweta saya aiña xome-tobetha. Daxota daxita tomarangpiwi, po tomarang xua ena bárapo nákuatha xua Judá nákuatha, Jerusalén tomarapiwi yábara kanantanaxeinéibatsi xua ápara bara xaiñéi xua barapomonae yawenéibatsi Nakom. Barichi pía peaitafaetabí jíwichi yábara kanantanaxeinéibatsi.

Barapoxonae Nehemías itapeta icha pebiwi, po pebiwi xua peboupang pe-enei-biwi. Bárapo pebíwitha jeye:

—Beta pa-enéibare peboupang. Poxonae atou tsaibi néxata bárapo boupang pasarakapentéibare, xua saya poxonae atsa. Bapoxonae paxatababéibare peboupang, jei Nehemías.

Báraxua xua ibowa müxübürü, pokotsiwa xua Jerusalén tómara yaputoxórota duta bichokono pin ira xeina tútutha. Íchitha saya jiwi be kónotha xua bárapo tómaratha jinompa. Daxota Nehemías waba ichamonae, pomonae Israel pía pemómoxi susato jiwi jíwana tatsi, xua írürü pepatsiwa tsane xua pejinompaewa tsane bárapo Jerusalén tómaratha.

Meje yábara poxonae Esdras, irü Nehemías kuidúbabe jíwitha xua penakuibarapentsiwa xua abe peexanaewang xua maisha peexanaewa tsane pokotsiwa Nakom itoroba, pía peitorobi koyenéwangtha

(Nehemías 8—13)

Siete po xométope jopa xua poxonae Israel pía pemómoxi susato jiwi tatsi weta ibowa müxübürü, pokotsiwa xua Jerusalén tómara yaputoxórota duta. Barapoxonae Israel pía pemómoxi susato jiwi tatsi, pomonae Judá nákuatha jinompa, pata Jerusalén tómaratha xua fiesta peexanaenexa xua Nakom nexa. Bárapo fiesta xua poxonae jiwi boutong ákaba xua peyábara nantanaxeinaenexa xua pía pamo susato jiwi tatsi kaena báyatha kapanenebíyatsi Nakom Egipto nakua weya.

Poxonae bapomonae nakaetuta, bapoxonae Esdras, pong sacerdotemonae-pin, pita pokotsiwa be papera xua ichaxota tinaduba Nakom pía peitorobi

jumekoyenewang tatsi. Bapoxonae tayóroba barapomonaetha. Bapong tajü ungkopiya poxonae yóroba xua petajumetaewa tsainchi daxita. Matáütano yábara paeba pokotsiwa xua bárapo peitorobi koyenewang paeba, xua daxita barapomonaee peexanaewa tsane pokotsiwa itoroba bárapo peitorobi koyenewang.

Esdras yawénatsi Leví pía pemómoxi susato jiwi tatsi xua peyábara kueikueijejiwa xua paeba bárapo peitorobi koyenewang. Poxonae Israel pía pemómoxi susato jiwi tatsi yaputane bárapo Nakom pía peitorobi koyenewang tatsi, barapoxonae barapomonaee jüntübükoyene wekoyéi. Barapomonaee wekoyéi tsipéi báyatha jopa exanaeyo pokotsiwa Nakom itoroba pía peitorobi koyenéwangtha. Íchitha Esdras, irü Nehemías pong gobernadormonaepin, irü Leví pía pemómoxi susato jiwi tatsi, barapomonaee jeye barapomonaetha:

—Jopa pajüntübükoyene wekóyande tsipéi ánoxuae fiesta exainchi xua Nakom nexa. Maisha pajüntübükoyene weiwéinare, jei barapomonaetha.

2

Barapoxonae pemaxüranaein ukuboba be pókotsi koyeneya xua Nakom pía peitorobi koyenéyatha yábara paeba. Poxonae ákaba boutong, bárapo boutongtha dubena. Bárapo Israel pía pemómoxi susato jiwi tatsi kaena báyatha jopa beta exanaeyo bárapo fiesta poxonae Josué matakápona Canaán nakua beya xua aiña wei.

Veinticuatro matakábitha xua bárapo xométotha, daxita jiwi nakaetuta yawa jeye Nakomtha:

—Nakom, maisha pajüntübükoyene wekoyang tsipéi payábara yaputang xua kaena báyatha abe paéxanang, jei.

Bárapo mataketha itoroba ichüngtha xua petayorobiwa tsainchi Nakom pía peitorobi koyenewang xua pejumetaenexa. Barapoxonae barapomonaee wüüka Nakomtha jeye:

—Nakom maisha paajüntükoyenedewein tsipéi bichokono abe paéxanang. Pajüntübükoyene weiweinang yáitama beta painta éxaname. Daxota wüünae paka jáintatsi, jei barapomonaee.

Bapoxonae barapomonaee yábara kueikueijeji daxita pokotsiwa Nakom éxana pía pamo susato jíwitha tatsi. Yábara kueikueijeji xua poxonae Abraham pópona, matáütano xua beya barapoxonae poxonae Nakom kópata xua bárapo Israel pía pemómoxi susato jiwi tatsi kapaneibatsi pía peaitafaetabí jíwichi icha nákuangtha.

Barapomonaee wüüka Nakomtha jeye:

—Nakom, pana yawende tsipéi áwiya kataunxuae bewa paexanaponaein pokotsiwa Artajerjes pana itoroba pong Persia nakua itorobiya peewatsin. Báraxua bewa paexanaein bekein pajinompang pata nákuatha, jei.

Pírapae barapomonaee Nakomtha tsipaeba jeye:

—Nakom, yábara paka tsiwüünae muxudútatsi pata tha exanaetsi pokotsiwa itoróbame jiña neitorobi koyenéwangtha. Jopa jitha pa-eeanaponaein tsane pomonaetha, pomonaee jopa dapomonaeyo xua Israel pía pemómoxi susato jiwi tatsi aibi. Jopa pakomokeibin tsane pomonaetha, pomonaee icha nakuapiwi poxonae po mataketha penafinakáewatsi matakabi xuano xua po mataketha fiesta matakabi paéxanang xua xam nexa.

”Matáütano ira pata itompa exanaetsi xua kae weitha xua poxonae siete po weibetha tsaibi. Pomonaee xua báyatha pana matoma amanáyaba jüntema jinompa

paéxanang xua jopa baxua pata matoma wüükaewa. Matáütano pomonae xua patabusikui-tatayebeibiwi pata tha ekeicha saya jüntema jinompa exanaetsi. Pata tha sacerdotemonaes katsibeibichi impuesto matoma xua jopa peseikeibiwa tsane xua ofrendang matawüing xua Nakom piabotha tatsi, po bo pin bo, jei barapomonaes xua poxonaes yábara tsiwüüinaes muxuduta Nakomtha.

Barapomonaes aichaxaibi xua saya tsikimonaeyo pejinompaewa Jerusalén tómaratha. Daxota barapomonaes yábara nantanaxeina xua bara kaein jíwana ekaena xua poxonaes diez pongbe tsíniya Jerusalén tómaratha. Jopa exanaeyo báraxua pentakaponáewitha tsipéi daxita barapomonaes bara ena Jerusalén tómaratha.

3

Pírapae, poxonaes doce po weibe tsuxubi, Nehemías kaibeya pona Persia nakua beya pesiwaponaenexa Artajerjes, pong Persia nakua peewatsin. Poxonaes Nehemías kataunxuae aishówatha pona, Eliasib, pong sacerdotemonaepin, kópata xua Tobías, pong amonitamonaepin, xua bapong pepoponaewa icha tútutha xua Nakom piabotha tatsi, bekein Tobías Israel pía pemómoxi susato jiwi tatsi pía peitafaetabí jintongtsi.

Pírapae icha weitha xua poxonaes aiña wei yapukaewa, Nehemías patopa kaibeya xua Judá nákuatha. Poxonaes barapong tane baxua, bichokono anáepana. Daxota anáepana tsipéi Nakom jopa kopatsiyo pía peitorobi koyenéwatha xua amonitamonaes peponaewa Nakom piabotha tatsi, po bo pin bo. Néxata Nehemías daxita aishówatha bebái xua xuang Tobías piyawang tatsi. Barapoxonaes itoroba xua bárapo tutu ikikaena xua jopa Nakom petsita-nataxobiwa tsainchi.

4

Barichi Nehemías kaxina pomonaes Leví pía pemómoxi susato jiwi jíwana tatsi xua jopa busikuimatmakebichi. Barapomonaes bewa ponáe pía tómarang beya xua pejinompaewa tsane xua pejainpaexae. Daxota Nehemías ekeicha kaibeya kápona barapomonaes Jerusalén tómara beya, xua penakuichiwa tsane Nakom piabotha tatsi, po bo pin bo. Yawa bapong itapeta pebiwi, po pebiwi xua pematmakeibiwa tsane barapomonaetha.

Barichi bapong tane xua ichamonaes, Israel pía pemómoxi susato jiwi tatsi, nakuitha pentakeiseikáe matakábitha. Barichi tane xua ichamonaes bárapo pentakeiseikáe matakábitha kápona pexaewa pekaenaetsiwa tsane Jerusalén tómaratha. Daxota Nehemías itoroba xua bárapo boufang pexatababiwa tsane. Itoróbano xua jopa peyapusaumenaewa tsane bárapo boufang bárapo pentakeiseikáe matakábitha. Icha nakuangpiwi Jerusalén tómara pekuariya bewa abü baraxota naebina, bárapo pentakeiseikáe matakábitha xua beya baya tsane.

Barichi Nehemías irü muxutáinaba barapomonaetha. Bara barapomonaes yaputane xua poxonaes Nehemías paeba bara xaiñéi. Barapoxonaes Jerusalén tómara beya jopa ponaeyo pentakeiseikáe matakábitha.

Nehemías barichi muxutáinaba po pebiwi xua yábüxi xeina xua icha nakuapiwaxi. Barapomonaes muxutáinabatsi, tsipéi pía pexui tatsi jopa paebiyo pojume Judá nakuapiwi paeba. Matáütano Nehemías, barapomonaes tsiwüüinaes muxuduta éxanatsi xua jopa pekatsibiwa tsane pía pexui icha nakuapíwitha xua jitha peenaenexa tsane. Barichi Nehemías itoroba sacerdotemonaepin xua jopa penakuichiwa

tsane, pong xeina yábüyo, powa Sanbalat pexantiyo tatsi. Báraxua éxana tsipéi bapong Sanbalat, pong Israel pía pemómoxi susato jiwi tatsi, pía peaitafaetabí jintongtsi.

**Meje yábara poxonae Malaquías, pong Nakom peitorobi jume pepaebin,
kueikuejei Nakom Pejume Diwesi
Israel pía pemómoxi susato jíwitha tatsi**

(Malaquías 1—4)

Bara báyatha Israel pía pemómoxi susato jiwi tatsi weta ibowa müxübürü, pokotsiwa xua Jerusalén tómara yaputoxórota duta. Poxonae Nehemías kataunxuae matakapópona barapoxonae Nakom itoroba pong Nakom peitorobi jume pepaebin, pong pewüing Malaquías. Malaquías itoróbatsi xua Nakom Pejume Diwesi pekueikueijeinexa Judá nakuapíwitha. Malaquías jeye barapomonaetha:

—Nakom báyatha paeba xua pinae paxam pomonae sacerdotemonaem pam jopa pabarükui-iturajinaem bapong. Jopa beta paexanaem icha be pókotsi koyeneya Nakom itoroba. Duwéi pajutebéibame xua be ofrenda matawüing, po duwéi xua nabenena, tsipéi paiñakoutha pana natsipáebame xua pinae ápara Nakom jopa baxua taeyo.

”Pomonaem kaponeiba bárapo duwéi barichi Nakom jopa yábara barükui-iturajinaetsi. Bárapo duwéi jopa pakaponaem gobernadormonaepintha poxonaem impuesto matoma pakatsibéibame tsipéi ápara jopa píchipae bárapo duwéi. Íchitha paxam poxonaem pajutebéibame bárapo duwéi panantanaxeinéibame xua ápara pinaem Nakom jopa taeyo báraxua. Jame icha nakuapiwi poxonaem duwéi jutebeiba xua be ofrendang matawüing xua Nakom nexa, barapomonaem jutebeiba po duwéi pexeña duwéi. Nama paxam jopa paraichim.

”Paxam sacerdotemonaem jiwi pam maisha bewa jiwi yábara pakuidubim Nakom. Jopa bewa jiwi pakuidubim xua pokotsiwa naerabiya pakuidúbame. Barapoxonaem barapomonaem nakuiduba xua abe peexanaewa. Jopa paexanaem xua kaena báyatha Nakom paiña amo susato jiwi tsiwüünaem muxudútatsi. Daxota Nakom éxana xua jiwi jopa paka barükui-iturajinaeyo, jei.

2

Ekeicha Malaquías jeye:

—Paxam Israel pía pemómoxi susato jiwi tatsi pam, jopa paexanaem pokotsiwa xua jíwitha yábara patsiwüünaem muxudubéibame. Matáütano jopa paexaneibim pokotsiwa Nakomtha yábara patsiwüünaem muxudutéibame. Matáütano yábüxi panotéibame xua icha nakuangpiwaxi. Ichamonaem, xua paxam jíwana pam, ekeicha napentapona xua jitha peenaewa. Báraxua Nakom bichokono yábara ajüntübükoyenefaetabí xua patsita éxaname báraxua. Paxam papáebame xua pinaem ápara jiwi wüünaem, pomonaem abe peéxanaem jiwi. Barapoxonaem payaiñabéibame ichamonaemthajamje: ‘¿Eta xota Nakom pópona, pong jiwi pejëüntübükoyene naitaübiya itaweteibim poxonaem jiwi abe éxana?’ pajam tsaibim.

”Íchitha xaniyeya paka tsipáebatsi. Kaentakábitha tsane Nakom itorobin pongtha, pong xua penajumekaitorobín. Barapong jiwi tsiwünaeya yábara najüntükoyene wüünaemthaxanebinchi xua pewünaeya tsane xua Nakom pexanto tatsi patopaena. Bara barapoxonaem Nakom patopaena piabotha, po bo pin bo.

”Dapong aibi tsane pong xua bapong peitabaratha xua átsaka tapáebatsi xua poxonae bapong patopaena. Barapong dangweya pichina daxita xua jopa wüünaeyo, xua xuang Nakom piabotha tatsi xeina. Barapoxonae sacerdotemonaie itaküüpaeinchi xua xaniwaicha peexanaewa tsane xua xuang ofrendang matawüing.

”Barapong paka yábara paebina bichokono abe peéxanae koyenein paiña neexanaexae. Daxota barapong báraxua paka yábara paebina, tsipéi ichamonae paxam jíwana, be xui-paxaewi pía jüntübükoyeneya paéxana dubenanaebíyame. Matáütano ichamonae, paxam jíwana, icha pebiwi piowaxi tatsi pata kentéibame. Matáütano ichamonae xua paxam jíwana pam naerabiya paebeiba. Yáwano ichamonae xua paxam jíwana pam pomonaie peakopeibí jiwí yábara muxuitorobéibatsi ichawang, xuano xua bara ichichi pomonaetha, pomonaie icha nakuangpiwi. Pókotsi jiwimonaie xua poxonaie báraxua éxana bara nakuiyábara tsita itapeiñaxeina xua jopa Nakom pebarükui-iturajináewatsi, jei.

3

Ekeicha Malaquías jeye:

—Nakom bápana jopa ekeicha ichawa exanáe poxonaie paebeiba. Paxam ápara áwiya Jacob pía pemómoxi susato jiwí tatsi pam. Daxota icha kaewa ekeicha paéxaname xua pokotsiwa Nakom yábara patsiwüünaie muxudubíname, bara barapoxonaie Nakom pákata exanaena xua báyatha yábara paka tsiwüünaie muxuduta. Pakápare diez xuangbe jíwana xua paiñawang xua pákata naweta. Báraxua jame bapong Nakom paka wüüka. Ínkane báraxua paexande. Bara barapoxonaie patáename xua Nakom beta pákata exanaena.

”Paxam papáebame pajam: ‘Jopa naka tsita aiñakuiyo icha jopa exanaetsi pokotsiwa Nakom itoroba pía peitorobi koyenéwatha. Tsipéi pomonaie peabe jiwí, pomonaie jopa exanaeyo pokotsiwa Nakom itoroba, barapomonaie bichokono kopei xeináe jiwí náexana beyakaincha pomonaie beta peéxanaie jiwí. Poxonaie barapomonaie jopa exanaeyo pokotsiwa Nakom itoroba, Nakom jopa abe kana exanaeyo barapomonaetha. Saya jüntema jinompa’, pajam.

”Íchitha Nakom báyatha paeba xua pinaie imoxoyo patopaena po matakábitha xua jiwí werawéraka exanaeinchi, pomonaie jopa exanaeyo pokotsiwa Nakom itoroba pía peitorobi koyenéwangtha. Nakom werawéraka exanaena barapomonaie icha jiwí ichi poxonaie basura werawéraka éxana poxonaie tauta xua weyowanaya. Daxota bewa paexanaem pokotsiwa Nakom itoroba pía peitorobi koyenéwangtha. Bárapo Nakom pía peitorobi koyenewang Moisés waámo susato jiwí kuidubéibatsi poxonaie jinompa ichaxota imoxoyo po demuxuwa pewüing Sinaí, jei Malaquías.

4

Ekeicha Malaquías paeba barapomonaetha jeye:

—Kaentakábitha tsane Nakom pákata itorobina pong pewüing Elías, pong Nakom peitorobi jume pepaebin. Elías kuidubina xua koxiyei jiwí pía pexui antobeya barü jinompaena irü xua pexui paxa jiwí antobeya barü jinompaena pewünaeya tsane xua poxonaie Nakom werawéraka exanaena bárapo kae pin nakue.

**Meje yábara poxonae Nakom kópata xua bara petatenewa
tsainchi pong beta pejumekowüntsинchi**

(Job 1.1—2.10)

Kaena báyatha pebin pópona, pong bichokono kopei pexeinaein. Bapong pewüing Job. Bapong Nakomtha wüünae jainteiba. Beta exaneiba. Matáütano peakopeibí jíwitha beta taexaneiba. Bápana bapong kaibi ichamonaetha.

Kaentakábitha Nakom peitabaratha taumeinchi daxita matatsunpiwimonaе, barichi irü Satanás, pong kaurimonaе píа pentakaponaein tatsi. Nakom tsipaeba, Satanás tsipáebatsi jeye:

—Ínkane Job taema. Bapong pong yatsikaewa pejüntübükoyene wüünaein. Bapong bichokono beta éxana beyakaincha ichamonaе xua bárapo kae pin nákuathe. ¿Eta xua yábara nantaxéinamerü bapong? jei Nakom.

Satanás jumenota jeye:

—Maisha bapong kajumekowünta tsipéi bapong yaputane xua poxoru daxota kopeixeinaein éxaname. Bara xaiñéi katsipáebatsi icha daxita wepichíname pokotsiwang xua bapong xeina xaiña bapoxonaе abe kayábara paeba, jei Satanás.

Nakom jumenota jeye:

—Je. Ínkane taeinchi icha xaniwaicha páebame. Moya ponde. Moya daxita wepire daxita pokotsiwa xua bapong xeina. Íchitha bapong seika éxande, jei Nakom.

2

Bara barapoxonaе Satanás itoroba, Job taitoróbatsi daxitang xua abe koyenewang. Job jopa yaputaeyo xua Satanás irü Nakom bapong yábara páebatsi. Job daxitang vacang tawerapatsi, burromónaeno tawerapatsino, yawa ovejamonaе tawerapatsino, yawa camellomónaeno tawerapatsino. Barichi Satanás éxana xua Job daxita píа pexui tatsi tajutébatsi xua siete pongbe. Ichamonaе pateiba xua Job báraxuang peyábara tsipaеbeibiwa tsainchi. Bara bekein Job báraxua yábara bichokono anthühütane, jeye:

—Poxonaе nakatsiwang jumasainang yawa nakopeitiño. Poxonaе tüpaein barichin tsane, ichawa jopa kaponaein tsane. Pokotsiwang xua xeinang báyatha Nakom nekata. Barapong ekeicha kaewa newekobepita. Áwiya wüünae jaintapong Nakom pong tananentakaponaein, jei Job.

Bekein daxita báraxuang Job jüntüpukaewa éxanatsi áwiya bapong jopa abe exanaeyo yawa jopa abe yábara paebiyo Nakomtha.

3

Pírapae ekeicha matatsunpiwi Nakom peitabaratha tapátatsi, Satanás pong kaurimonaе píа pentakaponaein tatsi irü patopa. Nakom yáñaba, Satanás yáñabatsi, jeye:

—Já. ¿Bárapo koyeneya Job yábara nantaxéinamera? Bekein nemuxupéiñabame xua kakópatatsi xua bapong taayápube éxaname, dáichitha bapong áwiya nejumekowünta.

Satanás jumenota jeye:

—Ápara poxoru áwiya bapong seika xua peatenewa tsane. Kópare xua bapong bichokono peatenewa tsane. Barapoxonaе yaputáename xua jopa peitaküüpaewa

tsainchi xua nekajumekowüntsiwa tsane xua daxota abe nekayábara paebiwa tsane, jei.

Nakom jumenota jeye:

—Moya taema. Moya átene kana éxande íchitha jopa tüpa exanaeinde, jei.

Bara Satanás pona yawa Job bichokono perüütsábana kana éxanatsi. Bichokono Job átene. Poxonae píowa tainchi, píowa jeichichi:

—Bekein Nakom kópata xua daxita kajüntüpxana éxana ichawa, ánoxuae ekeicha kata kópata xua neaperüübewam. Dakotsiwa wüünae jaintapóname Nakom. ¡Maisha Nakom abe yábara páebare yawa túpare!

Íchitha Job píowa jumenota jeye:

—Jopa abe yábara paebinde Nakom. Poxonae Nakom naka kana éxana xua jüntema wajinompaewa jopa anaepanaetsi Nakomtha. Daxota jopa bewa anaepanaetsi tsainchi Nakomtha poxonae Nakom naka kana éxana xua átene tsainchi.

Bara Job áwiya wüünae jaintapona Nakomtha yawa jopa abe yábara paebiwa Nakomtha.

Meje yábara poxonae Job pía jiwi barü kueikueijeichi xua akoibi pongbe

(Job 2.11—14.21)

Job akoibi pongbe xeina pomonae xua pía jiwi tatsi. Ichüing pewüing Elifaz, irü ichüing pewüing Bildad, irü ichüing pewüing Zofar. Barapomonae yaputane xua poxonae xua Job jopa taxaexaenakaetsi. Bapoxonae bapomonae juntukuru Job siwapoinchi xua pekuimatateikaewa tsainchi. Bara barapomonae pata ichaxota Job pópona. Barapoxonae Job barü énatsi. Barapomonae Job jopa tsipaebichi xua matáütano bara kaeto xua beya kae semánatha. Barapomonae jopa tsipaebiyo peyaputaexae xua Job bichokono aperüütane. Pong kopiya paeba ápara bapong Job. Job jeye barapomonaetha:

—¡Káyana kou naexanokong! ¡Maisha be tüpaein daxua báyatha atenein!

Bapoxonae Job tsipáebatsi kaein jíwana pía jiwi tatsi, pong Elifaz, jeye:

—Xam kuimatateikéibame pomonae átene tsaibi. Jamaunxuae ánoxuae atenem deta jiñakoutha jopa kakuiyábara jüpaeyo báraxua xua nepaebiwa Nakomtha. Jüntanáinare xua Nakom beta kana éxana pomonae pejüntübükoyene wüünae jiwi, matáütano Nakom átene kana éxana pomonae peajüntükoyénebe jiwi. Metha ápara abe éxaname daxota atenem. Báraxua yábara wúükare Nakomtha xain barapoxonae ekeicha kaewa beta éxaname, xain bapoxonae Nakom kakana éxana xua jüntema nepoponaewa.

Néxata Job jumenota bapongtha jeye:

—Nama xang bichokono aperaxatanein. Jame bewa maisha pana nekuimatateikaem xua jopa bewa daxua paebim xua ápara takouthang xua daxota atenein. Papáebame xua pinae abe éxanang. Moya báraxua yábara pana netsipáebare. Maisha bena tüpaein ánoxuae. ¿Eta pokotsiwa metha Nakom jopa jüntema pópona nekana exanaeyo? ¿Eta pokotsiwa metha naka kápona po kae pin nákuathe xua daxua ekeicha naka átene éxana? Icha xang abe éxanang ¿eta pokotsiwa metha Nakom jopa neyábara jüntemainaeayo xua abe éxanang? jei.

Bapoxonae Bildad Job tsipáebatsi, jeichichi:

—Waxainchi yaputainchi xua ba Nakom xaniwaichiya éxana. Daxota poxonae icha ichüing átene metha ápara poxoru bapong abe éxana, jei.

Job jumenota bapongtha jeye:

—Xang yaputang xua ápara jopa abe exanaeíño. Íchitha jopa be yábara yaiña-biño Nakomtha. Bapong jopa nejumenotsiyo. Metha Nakom jopa tsita aiñakuichi poxonae ichüing beta peexanaein, ichikuitha poxonae ichüing abe peexanaein. Maisha Nakom benetsipaebina xua tana netsipáebiwa tsane xua jopa jichipaeyo pokotsiwa éxanang. Maisha barapoxonae be yaputaein, jei.

2

Barapoxonae Zofar Job tsipáebatsi, jeichichi:

Job, matowa páebame. Ítara mexeya jopa abe exanaeíño jam. Íchitha icha Nakom báraxua yábara katsipaeba ápara báraxua yábara katsipaebíchipa xua xuang bichokono abe éxaname. Tsipéi Nakom yaputane pong xua wüüinae peexanaein yawa pong xua abe peexanaein. Bekein báraxua jopa yábara paebim ápara abe éxaname. ¡Maisha Nakomtha wüükare, xain kayábara jüntemaina xua abe éxaname! ¡Maisha najüntemaxore bapongtha! Maisha Nakomtha wüükare. Barapoxonae xain ekeicha jopa atenem tsane, jei.

Job bichokono amuxufáetabi xua petsipaebíwatsi barapomonae. Daxota Job anaya jeye:

—Panantanaxéiname xua bichokono ápara pana netoxenta yaputáneme. Xang ápara irü barichin Nakom yábara yaputang. Paka yaputainchi, ápara pana nekui-káponame, bekein jopa abe exanaeíño báyatha. Barichi yaputang xua pinmonae, pomonae abe peéxanae jiwi, jopa ateneyo.

”Jopa pákata ayapubeyo xua yábara pana netsipáebame xua abe taexanaewa. Matáütano jopa pákata ayapubeyo xua yábara tapana netsipaebiwam xua pokotsiwa bewa exanaein. Íchitha icha bara paichim tsipae icha ichin metha jopa paka itaküüpáe tsipae xua báraxua paiña nepaebiwa xuaunxuae pana netsipáebame.

”Yaputang xua Nakom yaputane daxita. Barichino bapong yaputane xua pokotsiwa aunxuae pana netsipáebame. Saya jiwi pamuxuitoróbame nawita xua daxota paiña nekajumekowüntsiwa tsane. Bewa saya moyiya paexanaem xua xang yábara.

”Ánoxuae pana nejumetaema. Jopa panantanaxeinaeinde xua ápara Nakom piakoutha xua daxota atenein. Matáütano jopa Nakomtha naerabiya papaebinde xua xang yábara. Maisha Nakom jopa pakunuwim. Maisha bapong Nakomtha yatsikaewa betsipaebokuaein xua bapong yábara tana netsipáebiwa tsane xua ápara jopa abe taexanaewa. Maisha bapong yábara benetsipaebina pokotsiwa xua éxanang, tsipéi jopa yaputaeíño pokotsiwa xua báyatha éxanang. Ánoxuae bichokono atenein, jopa yaputaeíño xua eta pokotsiwa metha.

Meje yábara poxonae Job pía jiwi muxukónatsi

(Job 15—21)

Ekeicha Job tsipáebatsi Elifaz, jeichichi:

—Job, daxita jiwi kayábara yaputane xua xam neyaputaein. Íchitha bichokono abe páebame. Daxota Nakom jopa barükui-iturajinaem. Bárapo koyeneya nakuitsita-itapeñaxéiname xua natsi-aenaekuéntame. Ápara jopa barükui-iturajinaem Nakom. Xaniwaichiya nantanaxéinare po pebiwi xua xota jinompa, pomonae pítiri jiwi yawa bichokono peyaputáe jiwi beyakaincha xua xam. Dapokotsin

aibi pong xua yatsikaewa Nakom tsita wüünaetsi. Ekeicha katsipáebatsi, ápara ba átene pomonae abe éxana.

Job jumenota bapongtha jeye:

—Icha xam atenem tsipae xua írürü jopa atenein tsipae bara neitaküüpa xua tapaebiwa icha ichim xua daxitang tayábara paebiwa. Ápara jopa báraxua kata exanáe tsipaetsi. Jame maisha kakuí matateikaetsípatsi, xua pexeña jume takatsipaebiwa tsainchi. Bara bekein nekuimatateika páebame, maisha ekeicha daxua netsipáebame xua pinae ápara takoutha xua abe éxanang.

”Bichokono aperaxatanein, íchitha pomonae tana neaitafáetabi jiwi dakotsiwa atsakiya netsipaeba. Barichi pomonae pejüntükoyene wüünae jiwi báraxua jopa yábara yaputaeyo xua taatenewa. Icha icha diwesi paxéiname xua pata nanetsipaewam tsane xua po diwesi netsita wüünae, bárapo diwesi jame maisha pana netsipáebare. Barapoxonae taeinchi xua kaein paxam jíwana pam, ápara pong xaniwaicha peyaputaen.

2

Ekeicha Bildad Job tsipáebatsi, jeichichi:

—Job, bewa nantanaxeinaem kopiya pewünaeya xua nepaebiwa báraxua. Tsipéi jopa yábara yaputaem poxonae xua náerabame yawa xua poxonae xaiñeya páebame. Jopa jüntemainaeinde, ápara ba átene pomonae xua abe éxana.

Ekeicha Job jumenota bapongtha jeye:

—Maisha paxam saya nawita papaébame. Saya bárapo diwesi papaebapóname xua pinae ápara poxoru abe éxanang daxota atenein. Ápara daümetha jopa abe exanaeño. Jopa yábara yaputaeño xua Nakom kópata xua bara taatenewa tsane. Jopa neitaküüpaeyo xua báraxua tayábara najüntübüsübiwa. Pomonae inta penakuichiwi irü tamonae irü tajiwimonae jopa jichipaeyo xua imoxoyo tana neka-kuitaponaewa. Maisha jame nekuimatatéikare, jopa ekeicha nejumefayakotsinde. Bara yaputang xua ápara Nakom pópona. Kaentakábitha tsane bapong neyábara paebina xua ápara jopa abe taexanaewa, jei.

3

Ekeicha Zofar, Job tsipáebatsi, jeichichi:

—Bichokono kakasébatsi daxota jopa neitaküüpaeyo xua moya taekaewa. Bara xaiñéi. Pomonae abe peexanaewi bara bekein be tsítatsi xua wüünaeya pejinompaewa, íchitha ichikuitha barapomonae bexa tsane átene tsane, bekein pírapae tsane yawa bekein ichikuitha ánoxuae tsane, jei.

Job jumenota bapongtha, jeye:

—Ínkane pana nekópare xua tapaka katsipaebiwa tsainchi. Ánoxuae kakuimatatéikatsi. Ichamonae tang xua poxonae jinompa, barapomonaetha Nakom jopa átene kana exanaeyo bekein abe peéxanae jiwi. Poxonae barapomonae jinompeiba jopa nantanaxeinaeyo, xua Nakom jopa yábara nantanaxeinéibichi. Íchitha barapomonae kopei pexeinaponéibiwi. Poxonae werapeiba saya jüntema werapeiba.

”Paxam papaebíname xua pinae barapomonae pía pexui tatsi átene tsane xua paxa jiwi tatsi abe peexanaexae. Íchitha báraxua jopa xaiñeya papaebim. Poxonae ba ichüng tüpa, jopa aiñakuiyo icha báyatha átene, ichikuitha icha jopa báyatha ateneyo, tsipéi ápara bara báyatha tüpa. Yáwano icha báyatha jopa tsita

aiñakuíyotsi, poxonae abe éxana yawa xua poxonae wüünae éxana tsipéi báyatha tüpa. Bekein daxita báraxuang pana netsipáebame íchitha jopa paka jumekowüntichi. Daxita pokotsiwa tang bárapo kae pin nákuathe, netsita-itapeiñaxeina xua pinae paxam ápara pemuxuitórobi jiwí pam.

**Meje yábara poxonae Job ekeicha pía jiwí
barü najumematsontsónobatsi**

(Job 22—31)

Ekeicha Elifaz tsipaeba, Job tsipáebatsi, jeichichi:

—Pokotsiwa xua jopa kata wüünaeyo ápara xam po pebim bichokono abe neexanaem. Daxota atenem, tsipéi Nakom átene kana éxana pomonae abe peexanaewi. Jame kamuxuwétatsi, maisha nakuibaraxore xua abe neexanaewam. Maisha ánoxuae exánare pokotsiwa xua Nakom kaitoroba. Barapoxonae xain Nakom kakana éxana xua ekeicha jüntema nepoponaewam tsane, jei.

Job ekeicha jumenota barapongtha jeye:

—Xang yaputang xua jopa abe exanaeíño. Be jopa Nakom neyábara nantanaxei-naeyo. Bara xaniyéi ichikuítha jiwí átene tsaibi poxoru abe peexanaexae, íchitha nama xang jopa abe exanaeíño, jei.

2

Ekeicha Bildad Job tsipáebatsi, jeichichi:

—Nakom bichokono peayapusúü itorobi koyenewa pexeinaein. Dapokotsin aibi, pong xua Nakom tsita jüntübükoyene wüünaetsi. Bara báraxua xam yaputáneme, jei.

Job jumenota jeye:

—Bápana jopa neyawenáe pokotsiwa xua netsipáebame. Xang bara yaputang xua Nakom bichokono peayapusúü itorobi koyenewa pexeinaein. Nakom be netsita xua jopa inta betiya exanaeyo. Íchitha jopa naerabiya bepaebiño, bekein ichichípame xua tanaerabiwa tsane. Atenein bekein jopa abe exanaeíño. Báraxua áwiya tsiteka tsóponae xua tapaebiwa tsane bekein poxonae poponaein. Bara xaniyéi ichikuítha ichamonae átene abe peexanaexae. Xang nama jopa dáichino, jopa abe exanaeíño.

”Daxita yaputainchi xua poxonae jéitatsi ichaxota xua bobena oro naintong yawa plata naintong, yawa ibótixi po ibótixi xua aiña matoma. Íchitha daxita waxainchi jíwanatsi jopa yapuraeyo xua pejeichiwa peyaputáe koyenewa. Bari-chi jopa naka itaküüpaeyo xua wakomotsiwa tsane bárapo peyaputáe koyenewa. Saya meisha bapong Nakom bara kompa pong peyaputáe koyenewa pexeinaein. Barapong naka kuiduba xua wanaexanaewa tsane xua wayaputáe jíwichi tsainchi. Pinae bewa Nakom barükui-iturajinaetsi, yáwano pinae jopa bewa abe exanaetsi.

”¡Bena ekeicha kaewa barichokuaein tsane ichi kaena báyatha ichin poxonae báyatha aiñakuí jintong náexanang! Barapoxonae jiwí wüünaeya neyábara pae-beiba. Pomonae peakopeibiwi yaweneibang amanaya. Íchitha ánoxuae daxita pam pana nekuikáponame. Báraxua paxam bichokono pana nejüntübükoyene wekoyéi éxaname. Bara be barichi xua Nakom irü nexuba. Barapong kópata xua bara taatenewa tsane. Jopa nejumenotsiyo poxonae xang wüükang.

”Pomonae peakopeibí jiwí katsibeibang poxonae newüükeiba. Jopa yábara muxuitorobéibiño ichamonae. Jopa yábara nantanaxeinéibiño yábüxi xua

takenteibinexa, powaxi xua ichamonae piowaxi tatsi. Nakom neyaputane xua atenein bekein jopa abe exanaeño. Icha jopa beta exanaeño bárabü Nakom kopatsina xua átene tana nekana exanaewa tsane. Tsipéi xang Nakom kuitaya junuweibang xua abe tana neexanaewa tsane daxota beta exaneibang.

”Bápana jopa bichokono yábara kanantanaxeineibiño pekakomokáe parátixi xua jüntema tapoponeibiwa tsane. Jopa bápana wüünae jainteibiño jomokóichato, yawa xometo, poto átsato xua be Nakom takana-exaneibiwa. Matáütano bápana jopa wüünae jainteibiño po nakomüng jopa xaiñeyo. Matáütano bápana jopa kikaponeibiño pomonae tana neaitafáetabi jiwi poxonae átene tsaibi. Meisha bára-xua ichichipang xua Nakom yábara tana netsipáebiwa tsane xua atenein. Tsipéi xang yaputang xua jopa abe exanaeño. Báraxua daxita páebang pokotsiwa xua ichichipang xua tapaebiwa, jei Job.

Barapoxonae, Job pía jiwi tatsi, pongbe xua akoibi pongbe, saya bara moya, poxoru yaputane xua Job nayábara paebapona xua pinae jopa natsikuentsiyo Nakomtha.

Meje yábara poxonae ichüng Job muxukónatsi

(Job 32—37)

Barapoxonae ichüng tamrópata pítaba xua Job petsipaebíwatsi. Bapong pewüng Eliú. Barapong kopiya jopa paebiyo, tsipéi áwiya bapong pewowin irü poxoru Job pía jiwi tatsi báyatha pítiri jiwi. Barapong abü éwata xua kotakaya pepaebiwa tsane poxonae bárapo pítiri jiwi najumeweta xua paeba. Barapong bichokono Job kasébatsi, tsipéi Job paeba xua pinae jopa abe exanaeyo, xuano xua Nakom jopa beta exanaeyo bapongtha. Barichi daxota anáepana bárapo akoibi póngbetha, tsipéi Job jopa beta muxuwetichi. Daxota bapong jeye bárapo akoibi póngbetha:

—Poxonae aena, jopa paebiño, tsipéi bichokono paka tsita pewowinchi. Íchitha paxam pítiri jiwi pam, jopa peyaputáe jiwi pam. Daxota bewa kueikueijang tsane. Daxita báraxuang jumetang xua papáebame, íchitha paxam jíwana pam dapong aibi, pong xua itakúüpatsi xua po jumetha paiña netsipáebiwa Job, xua daxota peyaputaewa tsane xua abe éxana. Bara daxita jumetang pokotsiwa xua Job paeba. Methaunxuae ánoxuae báraxua yábara jumenotsin.

”Nakom bichokono peyapusúü itorobi koyenewa pexeinaein. Jopa bewa jume-matsontsónobi bapongtha. Ichikuitha Nakom junuwa éxana jíwitha, xua pía taexanaetsi pokotsiwa itoroba barapong. Job paeba xua pinae jopa tsita wüünaetsi xua wüünae pejainchiwa Nakomtha. Nama yaputang xua Nakom daxita barompaya katsiba. Pomonae wüünae éxana, beta kana exanaena barapomonaetha. Pomonae abe éxana, Nakom abe kana éxana barapomonaetha.

”Bara Job yaputane xua Nakom ataya xaniwaichiya peexanaein. Barapong yábara anaepanapona xua pinae jopa beta taexanaponaetsi Nakom. Bápana Nakom jopa jumenaitomatsiyo pomonae atsakiya yábara pepaebiwi xua pinae jopa abe exaneibiyo, xua deta átene tsaibi Nakom wüükéibatsi.

”Daxota Job katsipáebatsi. Bewa báraxua yábara auram Nakom peitabaratha tatsi, pokotsiwa xua báyatha abe éxaname. Jopa yaputaeño eta pokotsiwa metha Nakom jopa bichokono átene ka-exanaeyo, beyakaincha xua kopiya, tsipéi bichokono abe páebame. Bara yaputang xua pokotsiwa páebang ápara bara xaiñang. Nakom átene kana éxana pomonae xua abe éxana, xua pía tanakuibarapentichi

xua abe peexanaewa xuano xua pía tanakuidubichi xua petaexanaewa tsainchi pokotsiwa bapong itoroba. Nakom bichokono peayapusúü itorobi koyenewa pexinaein. Dapong aibi xua pong Nakom peyábara yaputáewatsi pía peayapusúü itorobi koyenewa.

Meje yábara poxonae Nakom Job jumenótatsi

(Job 38—42)

Nakom itoroba xua ema yaitajoibo-pona xua bichokono dangwéi. Bárapo jóibotha Job jumetane xua Nakom paeba. Nakom tsipaeba, Job tsipáebatsi, jeye:

—Bárapo pebiwi ápara po pebiwi jopa peyaputáe jiwi, pomona xua katsipaeba. Pokotsiwa xua neyábara paeba jopa xaiñeyo. Barichi xam Job, daxita jopa yábara yaputaem. Poxonae aena bárapo kae pin nakua éxanang bapoxona xua poponaem. Daxitang jopa yábara yaputaem xua bárapo ira nexa. Jopa yábara yaputaem pin marmene yawa opiteino. Yáwano jopa duwéi yábara yaputaem. Matáütano xam ápara jopa bichokono peayapusúü koyenewa xeinaem xua icha jopa be xang ichim. Daxota jopa bewa bichoina nejumenotsim poxona xua yaputaem xua páebame, jei Nakom.

Job jumenota Nakomtha jeye:

—Bara xaniwaicha páebame, daxota jopa neitaküüpaeyo xua ichawa tayábara paebiwa, jei.

Ekeicha Nakom tsipaeba, Job tsipáebatsi jóibotha, jeichichi:

—Xang pongxaein ápara bara xaiñawaichiya taexanaein. Bara yaputang pokotsiwa xua éxanang bárapo kae pin nákuathe. Takoya itorobang daxita bárapo kae pin nákuathe, jei.

Job jumenota Nakom jeye:

—Ánoxuae bara yaputang xua kaitaküüpa xua neexanaewa daxita koyenein. Yábara kueikueijang báyatha pokotsiwang jopa yábara yaputaeiño. Pewünaeya tsane xua báraxua inta exanaena xua atenein, kaena báyatha saya be kónotha kayábara yaputainchi. Íchitha ánoxuae yaputang xua xam, pong bara yatsikaewa nepoponaein. Xam bichokono pong neaiñakuín. Nama xang jopa dáichino. Maisha bichokono aurang xua poxona xua kayábara páebatsi, jei.

Pírapae Nakom tsipaeba, Elifaz tsipáebatsi, yawa Bildad tsipáebatsi, yawa Zofar jei cheibichi:

—Bichokono paka yábara anaepánatsi poxona xaniwaicha jopa papaebim, xua Job payábara páebame. Paxam papáebame xua pinae Job jopa xaniwaicha exanaeyo, jei Nakom.

Bapoxona Nakom itoroba xua barapomona xua duwéi pejutebiwa tsane xua be ofrendang matawüing xua bapomona nexa xua abe peexanaexae. Itoróbano xua barapomona Job pewüükaewa tsainchi, xua barapomona petawüükaewa tsainchi Nakomtha. Bara báraxua barapomona éxana. Bara bapoxona Nakom yábara jüntemaina xua barapomona xua abe peexanaewang tatsi xua Job abe peyábara paebixaetsi.

Barapoxona ekeicha Nakom kana éxana xua Job nawita kopei pexinaein. Bapong ekeicha nawita mataropeicha xeina xua xuang kaena báyatha bapong xeina. Ekeicha bapong kaewa piamona barükui-iturajínatsi, irü pía jiwi barükui-iturajínatsi. Barapong xeina diez pongbe pía pexui tatsi. Ataya jüntübükoyene weiweinapona poxona pópona.

Salmowéi

Salmos

Meje yábara poxonae Israel pía pemómoxi susato jiwi tatsi
tina peweixi xua Nakom wüünae pejainchíwatsi

Israel pía pemómoxi susato jiwi tatsi xeina díboro xua ichaxota tina peweixi, xua ciento cincuenta po wéixibe. Bárapo weixi pewüng “poemas”, jei, xua tanaxüneiba Nakomtha. Barichi bárapo weixi pewüng “Salmos”, jei. David, pong nakua itorobiya peewatsin, xua Israel pía pemómoxi susato jiwi jíwana tatsi, bapong icha weixi tina. Ichamonae irü icha weixi tina. Ichamonae, xua barapomonae jíwana, David pepuya weya aiña wei taji-nómpatsi. Barapomonae ekeicha kaewa pata Judá nákuatha, xua Babilonia tómara weya pona, po tómara xua pepa tómara xua Caldea nákuatha. Icha weixi tina xua Nakomtha pejakobiwa, xua wüünae petaexaneibixaetsi barapomonae. Icha weixi tina xua Nakom wüünae pejainchíwatsi. Icha weixi tina xua Israel pía pemómoxi susato jiwi tatsi peyábara nantanaxeineibinexa, xua kaena báyatha, poxonae Nakom pexeña itüütsi koyenewang taéxana. Icha weixi tina xua Nakomtha pewüükaewa, xua barapomonae peyaweneibi-néxatsi. Meje baxue pokotsiwa xua icha weixi, xua bárapo weixi jíwana, poxonae paeba.

Salmowéi 1

Nakom eena pong jopa exanaeyo pokotsiwa xua éxana pomonae abe peéxanae jiwi.

Nakom bapong eena, pong bichokono ichichipa yábara nantanaxeina nawita Nakom pía peitorobi jumekoyenewang, xua matakábitha tsaibi xuano xua merawitha tsaibi.

Bapong bara xaniwaicha poponeibina.

Nakom pejumekowüntsixaetsi,

bárapo jintong beta éxana, icha be nae ichi xua beta xuwa peunkuaexae ichaxota imoxoyo mene.

Bárapo koyene jopa jüpaeyo pokotsiwa éxana, pomonae abe peéxanae jiwi.

Nakom tsítatsi xua barapomonae xaniwaicha jopa jinompaeyo.

Yawa Nakom tsítatsi xua barapomonae jopa peaiñakuí jiwi, icha be noxu púriüwa ichi xua jopa aiñakuiyo, xua daxota saya joibo kapubaba.

Poxonae Nakom jüntübükoyene naitaübiya itawetsina jiwi, átene kana exanaena pomonae abe peéxanae jiwi.

Jame Nakom yawenaena pomonae xua wüünae peéxanae jiwi.

Salmowéi 2

(Hch 4.25-26; 13.33; He 1.5; 5.5; Ap 2.26-28; 11.18; 19.15)

Icha nakuangpiwi anaya bichokono yábara ajumeyaxa éxana pong Nakom itoroba.

Matáütano, pomonae nakua itorobiya peewatsiwi, anaya abe kana éxana Nakomtha.

Matáütano, bárapo nakua itorobiya peewatsiwi,
 anaya abe kana exanaena pongtha ichüing,
 pong nakua itorobiya peewatsin,
 pong xua Nakom taitapeta xua Israel pía pemómoxi susato jiwi tatsi nexa.
 Pinae barapomonaе jopa ichichipaeyo xua itorobiya peewatsíwatsi Nakom.
 Xuano xua pinae jopa ichichipaeyo xua itorobiya peewatsíwatsi,
 pong nakua itorobiya peewatsin,
 pong báyatha Nakom taitapeta.
 Íchitha Nakom, pong Pekanamataxeinaein,
 daxita jiwi báraxua kuikápona,
 bapomonaе kuikapónatsi, tsipéi bapong bichokono peayapusúü itorobi
 koyene pexeinaein beyakaincha barapomonaе.
 Nakom barapomonaе muxutáinabatsi yawa jeye barapomonaetha:
 —Pákata itapétatsi pong nakua itorobiya peewatsin,
 xua daxita nákuang xua Jerusalén tómara weya itorobiya peewatsin nexa,
 jei.
 Yáwano Nakom jeye:
 —Pong ánoxuae pákata itapétatsi,
 xua pong nakua itorobiya peewatsin,
 ápara bapong, pong taxanto.
 Ánoxuae bapong tsipaebang: ‘Xam taxantom,
 ánoxuae ítowang kaéxanatsi,
 báraxua jiwi tsita itapeñaxeinang xua xang jiña axang’, jang.
 Daxita nákuang katsin bapongtha,
 po nákuang xua xeina bárapo kae pin nákuathe,
 xua bárapo nákuangtha bapong itorobiya peewatsin nexa.
 Barapong átene kana exanaena bárapo nakuangpiwi xua xota be penainto
 xua arewe.
 Paxam, pomonaе nakua itorobiya peewatsiwi pam,
 xua icha nakuapiwi pam, bewa pana nakuidubim xua tapana nebarükui
 iturajinaewam tsane.
 Tsipéi icha jopa báraxua paexanaem tsane,
 paka yábara anaepanaeinchi, jei Nakom.

Salmowéi 8

(Mt 21.16; 1Co 15.27; Ef 1.22; He 2.6-8)

Xam Nakom, pong pata nentakaponaem,
 pongxaem itorobiya pana éwatame.
 Daxita nákuangtha jinompa jiwi,
 pomonaе xua kayábara barükui-iturajina.
 Pexui kana éxaname, xua bárapo pexui pemuxuwetsiwa tsane
 pomonaetha,
 pomonaе xua pentakaponaewi,
 xua bárapo pentakaponaewi penakuidubiwa tsane xua jopa bewa nabi
 peexanaewa tsane xamtha.
 Tang peitaboko, yawa tang jomokóichato,

yawa tang opitéi, xua xuang pokotsiwa éxaname,
 xuano xua bárxuang dúbame.
 Poxonae daxita bárxuang tang,
 yábara nantanaxeinang nawita xua dapokotsiwa pana neyábara nantübü
 éxabame,
 bekein paxang bichokono jopa aiñakuiyo jiwi pang.
 Íchitha xam pana nekana éxaname xua daxita duwéi pakana mataxeinang.
 Nakom xam, pong pata nentakaponaem,
 daxita peitorobi koyene neexanaein,
 daxota pajüntübükoyene weiweinang.

Salmowéi 19

(Ro 10.18)

Peitaboko, yawa xometo, poto átsato,
 yawa jomokóichato, yawa opitéi,
 poxonae bárxuang dubena,
 bárxuang yábara tsita itapeiñaxeina xua ápara Nakom bara kompa pópona,
 pong daxita bárapo pewüünaewang éxana.
 Jopa nantawenonaetsi xua wayábara paebiwa tsainchi,
 tsipéi bara daxítatsi naka itaküüpa xua wakoutha tainchi xua dubena.
 Jopa aiñakuiyiyo xua ichaxota wa-enaewa tsipéi bárxuang
 nayotadubena.
 Nakom piamonae tatsi kápona Nakom Pejume Diwesi tajü beya.
 Po diwésin xua barapomona paeba, tajü beya,
 jumepichapapona daxita bárapo kae pin nákuathe.
 Icha ichichípatsi xua ekeicha wayábara yaputaenexa Nakom,
 maisha bewa nakuidubichi Nakom pía peitorobi koyenewang tatsi.
 Bárapo Nakom pía peitorobi koyenewang tatsi bichokono jumewüünae.
 Naka kana éxana xua wayaputáe jíwichi.
 Poxonae nakuidúbatsi Nakom pía peitorobi koyenewang tatsi,
 bichokono naka éxana xua wanaka kuijicha xua wanakuidubíwatsi xua
 wüünae,
 icha ba banto ichi xua mene xeika.
 Bárapo peitorobi koyenewang naka tsipaeba,
 bepa pinae icha koyenewa nákata exanaena,
 icha jopa jumekowüntsiya exanáe tsainchi,
 pokotsiwa naka itoroba bárapo peitorobi koyenéwangtha.
 Pinae icha exanaeinchi pokotsiwa naka itoroba bárapo peitorobi
 koyenéwangtha,
 pinae Nakom beta nákata exanaena.
 Bichokono nákata dangwéi xua wayábara yaputáewatsi xua báyatha
 pokotsiwa bichokono abe éxanatsi nawita.
 ¡Neyábara jüntemáinare Nakom xua kaena báyatha peabe koyenewang
 éxanang,
 xuano xua bekein jopa yaputaeiño xua poxonae éxanang!
 Barichi jopa nekopatsinde xua tayábara nantaxeineibiwa,

xua abe taexaneibiwa tsane.
 Barapoxonae beta exanaein xua jopa abe taexanaewa.
 Nakom tananentakaponaein, maisha éxande xua daxita pokotsiwa katsita
 wüünaena,
 pokotsiwa xua páebang,
 pokotsíwano xua nantaxeinang.

Salmowéi 22

(Mt 27.35,46; Mr 15.24,34; Lc 23.34; Jn 19.24; He 2.12)

*(Poxonae David bárapo wei yábara kueikueijeí ápara xua Cristo
 yábara kueikueijeichi, poxonae náetotha tüpa.)*

Nakom, po Nakom ta Nakomüm, ¿Eta pokotsiwa metha nepunaxúbame?
 ¿Eta pokotsiwa metha jopa nejumenotsim poxonae kawúükatsi?
 Pata amo susato jiwi kayábara jumekowünta xua neyawenaewam tsane.
 Bara barapomonae yawéname xua saya jüntema pejinompaewa.
 Nama pokotsiwa xua xeinang, saya pokotsiwa xua bichokono inta dangwéi.
 Daxita jiwi nekuikápona xua poxoru takayábara jumekowüntsixaetsi xua
 tana neyawenaewam tsane.
 Bekein tang báraxua xua nekuikápona,
 íchitha áwiya kayábara jumekowüntéibatsi xua tana neyawenaewam tsane.
 Daxota jumedangweya kawúükatsi xua maisha tana neyawenaewam
 tsane.
 Nama jüntübükoyene natsepanayang.
 Maisha meratsipang.
 Bapomonae nekobewang duba yawa netaxuwangduba.
 Barapomonae poxonae netane saya jüntema nekuitane.
 Tapaparuwang natatsaba, yawa ibótixi bebeya penakueranta notsinexa
 tapaparuwang.
 ¡Nakom neyawende!
 Israel pía pemómoxi susato jiwi tatsi,
 pomonae yatsikaewa tamonae,
 barapomonae peitütha tatsi Nakom wüünae jaintsin.
 Daxota wüünae jaintsin,
 tsipéi nejumenota poxonae wüükang.

Salmowéi 23

(Ap 7.17)

Nakom bapong pong tana ne-eenaein.
 Nakom beta ne-eena,
 ichi be poxonae pong oveja peewatsin ichi,
 pong beta peexanaein poxonae pía ovejang matakápona beta.
 Bara daxita xeineibín pokotsiwa nantawénonang.
 Jopa inta seikeibi tsane.
 Bapong ne-eeneibina poxonae ichaxota poneibin.
 Ekeicha mataropeicha nekata beyakaincha pokotsiwa xua
 nantawénonang.

Nekapanepa tana neaitafáetabi jiwi weya.
 Xua poxonae tapoponeibiwa tsaibi,
 bapong báraxua peántobe koyenéwangtha neyaweneibina, inta beta exanéibano.
 Bara ataya bapong pía nákuatha neyawa poponeibina.

Salmowéi 34

(1Pe 2.3; 3.10-12)

Bárxuáng yábara jakobin Nakomtha xua inta wüünae peexanaexae.
 Daxita matakabi tsaibi tsane wüünae jaintaponeibin.
 Pomonae jopa peátsakae jiwi,
 barapomonae jüntübükoyene weiweinaena poxonae báraxua nejumetaena.
 ¡Bárabü Nakom pebürüya wüünae jáintatsi!
 Nakomtha wüükang xua tana neyawenaewa tsane.
 Bara bapong neyawena poxonae wüükang.
 Daxita bárxuáng weya,
 bapong nekapanepa pokotsiwang xua kunuwang.
 Nakom, pong pentakaponaein, itoroba matatsunpin xua bárapo
 matatsunpin jiwi peyawenaewa tsainchi,
 pomonae Nakom pebarükui-iturajináewatsi.
 Matáütano itoroba xua bárapo matatsunpin jiwi peyawenaenexa tsainchi,
 poxonae taayápube tsaibichi.
 Paexande ichi xang ichin.
 Pawüükare Nakom yawa yábara pajumekowünde Nakom xua paiña nepaka
 kayawenaewa tsane.
 Barapoxonae payaputáename xua maisha daxua wüünae,
 xua Nakom yawena pomonaetha,
 pomonae peyábara jumekowüntsíwichi xua peyawenaewa tsane.
 ¡Maisha Nakom payábara barü jumekowünde!
 Barapoxonae bara Nakom paka katsina xua pokotsiwa
 panantanawénoname,
 xua jopa pana nekata akoibi tsaibi tsane.
 Nama pomonae jopa Nakom yábara jumekowüntsichi xua peyawenaewa
 tsane,
 taayápube tsainchi yawa jainpaena.
 Icha paichichípame xua aiña wei paiña nejinompaewa,
 xuano icha paichichípame xua jüntübükoyene weiweinaeya paiña
 nejinompaewa tsane,
 jopa abe papaebinde,
 matáütano jopa panaerabeibinde.
 Jopa ichamonae abe pakana exanaeinde.
 Jopa pana naba dubenanaebiyaeinde.
 Yawa jopa pana natsipaeba dubenanaebiyaeinde xua daxota ichamonae
 penabarü anaepanaewa tsane.
 Nakom bara jumenaitómata pokotsiwa xua wüükatsi pomonae
 pejumekowüntsíwichi,
 pomonae beta peexaneibiwi.

Íchitha bapong aichaxaibi pomonae jopa pejumekowüntsíwichi,
 pomonae abe peexaneibiwi.
 Pomonae Nakom pejumekowüntsíwichi,
 bekein ichikuitha anthüthütane tsaibi,
 xua poxonae taayápube tsaibichi,
 íchitha pírapae Nakom yawenaena xua poxonae xeineiba bárapo koyenein.
 Nakom jopa kopatsiyo xua pong itapeta,
 xua petaapíwabe tsainchi,
 xua matáütano kae píwano.
 Nama pomonae abe peéxanae jiwi,
 piakoutha naajüntükoyenetane éxana xua abe peexanaexae.

Salmowéi 37

(Mt 5.5)

Jopa barichinde, ichi pomonae ichi,
 xua abeya nantaxeina xua peexanaewa tsane.
 Barapomonae saya bichoina werawéraka,
 saya kaekuíyobe icha naepanaewa ichi,
 xua saya kaekuíyobe xua poxonae tsakena yawa werawéraka.
 Maisha jame yábara jumekowünde Nakom xua nekayawenaewa tsane,
 yawa beta éxande.
 Barapoxonae Nakom kakatsina pokotsiwa xua neichichipaewa, xua
 nexenaewa.
 Kópare xua Nakom bara nekakanamata xeinaewa tsane daxita xua
 poxonae exanéibame.
 Barapong kaitüütsina ichamonaetha xua xam pongxaem xaiñeya neexanaein,
 xuano xua nejüntübükoyene wüünaein.
 Jopa aitakonaende.
 Jame éware xua Nakom kayawenaena.
 Jopa bichoina yábara barü anaepanaeinde,
 yawa jopa uwindeno pomonae xua ichamonaetha abe kana éxana
 pexeinaenexa pokotsiwa ichichipa.
 Jopa irü barichinde poxonae barapomonae abe éxana.
 Yábara nantanaxéinare xua Nakom werawéraka kana exanaena pomonae
 abe peexanaewi.
 Nakom kana éxana xua wüünaeya pejinompaewa tsane pomonae peyábara
 jumekowüntsíwichi xua peyawenaewa tsane.
 Íchitha bexa tsane, dapomonae ajibi tsane,
 pomonae xua abe peéxanae jiwi.
 Bárapo matakábintha irang xeinaena pomonae jopa báyatha peátsakae
 jiwi,
 yawa bara beta jinompaena.
 Bekein pomonae abe peéxanae jiwi ita-aenaenei,
 xua ita-aenaeneichi pomonae xua wüünae peéxanae jiwi,
 Nakom jüntübükoyene weiweina tsipéi yaputane,
 xua pomonae abe peéxanae jiwi,

jopa báyatha jinompáe tsane xua kaekuíyobe tsane.
 Metha jame wüünae xua akopeibi wanaexanáewatsi,
 xuano xua pexeña jüntübükoyeneya waexanaewa,
 beyakaincha xua poxonae kopei xeina naexanaeinchi,
 xuano xua abe koyeneya waexanaewa.
 Tspíeí kaentakábitha tsane Nakom átene kana exanaena pomonae abe
 peéxanae jiwi.
 Saya meisha katsina pomonaetha,
 pomonae xua wüünae peéxanae jiwi,
 xua pewüünaewa xua báyatha pejüntanajebiwi.
 Pomonae xua wüünae peexanaewi,
 barapomonae ba yawena pomonaetha,
 pomonae peakopeibí jiwi.
 Nama pomonae abe peéxanae jiwi ba pekakomokáe parátixi wüüka xua
 nakowaeta,
 íchitha ba jopa ekeicha kaewa katsiyo.
 Pomonae xua wüünae peéxanae jiwi ba kueikueijeí peyaputáe jumein.
 Barapomonae yaputane yawa bara éxana pokotsiwa Nakom itoroba pía
 peitorobi koyenéwangtha.
 Íchitha pomonae abe peexanaewi yábara kanantanaxeina xua pejutebiwa
 tsainchi pomonae beta peéxanae jiwi.
 Íchitha kaentakábitha tsane Nakom átene kana exanaena pomonae abe
 peéxanae jiwi.
 Seikaya nama Nakom katsibebina pomonaetha,
 pomonae xua wüünae peéxanae jiwi, xua wüünae.

Salmowéi 40

(He 10.5-7)

Éwatang xua Nakom tana neyawenaewa tsane;
 bara baxua bapong éxana.
 Bara neyawena xua nekanepa bárapo abe taéxanae koyenewang weya.
 Poxonae Nakom baxua inta éxana,
 be xua poxonae nejutsina xua ichaxota airono,
 xua bapoxonae nekuareta ichaxota iboto,
 po iboto dangwéi.
 Bapong neéxana xua bapongtha takayábara naxünaewa tsane xua wüünae
 tajainchiwa,
 poxonae pena wei nekata.
 Poxonae ichamonae netaena xua Nakom wüünaeya kayábara naxünang,
 barapoxonae bara Nakom yaputaeinchi xua bapong peaiñakuín.
 Matáütano barapoxonae, barapomonae Nakom yábara jumekowüntsínchi
 xua peyawenaewa tsane.
 Pomonae xua Nakom yábara jumekowüntatsi xua peyawenaewa tsane,
 barapomonae bara tayapuwüünae ponaeinchi.
 Nakom, pong tananentakaponaein, xua pongxaem xua neexanaein
 pokotsiwang peitüpanaewang.

Jopa kuijüpaem icha nakomüng,
 po nakomüng jopa xaiñeyo.
 Daxitang pokotsiwang xua éxaname ápara xua pata tana neyawenaewam
 tsane.
 Bekein ichichipang xua daxita báraxuang yábara takatsipaebiwi tsainchi,
 pokotsiwang xua éxaname,
 íchitha jopa xeinaeiño po jumetha xua takatsipaebíwatsi.
 Jopa ichipaem xua nekatsita jutebiwa duwéi,
 xua be ofrendang matawüng, xua xam nexa.
 Pokotsiwa jame ichichípame xua tajumetaewa tsane jiña neitorobi
 koyenewang,
 xuano xua taexanaewa tsane pokotsiwa neitoróbame bárapo jiña neitorobi
 koyenéwangtha.
 Bara xaniwaicha ichichipang xua tayaputaewa jiña neitorobi koyenewang,
 xua taexanaenexa xua pokotsiwa ichichípame,
 xua taexanaewa.
 Bara xam yaputáneme xua beta báraxua yábara tsipaebang jiji,
 pokotsiwa xua pexaiñéi koyenewa.
 Bápana jopa moya yawüngxeiñeiño xua pexaiñéi koyenewa xua báyatha
 éxaname.
 Jame bara baxua yábara tsipaebang ichamonaetha.
 Ánoxuae xeinang xua inta ayapubé.
 Kawüükatsi xua tana neyawenaewam tsane.
 Kópare xua átene kana exanaeinchi pomonae tana neaitafáetabi jiji.
 Íchitha daxita pomonae xua ichichipa xua wüünae nekajainchiwa,
 xuano xua kawüüka xua neyawenaewa tsane,
 moya kópare xua bara wüünae nekajainchiwa.
 Nakom, pong tananentakaponaem,
 nantawénonang bichokono xua tana neyawenaewam.
 ¡Anthá patopeinka, neyawénare!
 Saya meisha xam kompam, pongxaem xua kaitaküüpa xua tana
 neyawenaewam.

Salmowéi 46

Nakom bapong naka yawena poxonae xeinéibatsi xua nákata ayapubé.
 Daxota jopa junuwichi matáütano poxonae bekein icha táetsipatsi xua
 bárapo kae pin nakue xeináetsipa xua ira pejjijiyatsiwa, xuano xua ira
 ménetha pejopeikaewa.
 Báyatha Nakom itapeta Jerusalén tómara,
 po tómara xua pepa tómara, po tómaratha xua bapong ichaxota poponaena.
 Bárapo pepa tómara eenaena xua poxonae bekein icha nákuang wepu
 werawerakaeinchi.
 Nakom, po Nakom kaena báyatha Jacob wüünae jainteiba,
 bárapo Nakom naka yawena.
 Pataema poxonae bapong werawéraka kana éxana icha nákuang, po
 nákuang xua bárapo kae pin nákuathe ena.

Bapong jopa kopatsiyo xua bárapo nakuangpiwi naba naka exanapona,
 yawa daxita werawéraka taéxana,
 xua pía penakobe nabiwang tatsi,
 xua jiwi pejutebiawang.
 Báyatha bapong paeba xua bárapo nakuangpiwi bewa nakuibarapentsi xua
 naba wanaka exanaewa,
 pomonaetsi xua Israel pía pemómoxi susato jíwichi.
 Matáütano bapong itoroba xua bewa barapomonae jüntema jinompáe,
 xua bapoxonae Nakom peyábara yaputaewa tsainchi xua barapong ápara
 pepa Nakom.
 Bapong Nakom, po Nakom xua piakoya itorobiya éwata bárapo kae pin
 nakue.
 ¡Bárapo Nakom,
 pong peayapusúü itorobi koyenewa pexeinaein,
 naka yawena, pomonaexaetsi xua Israel pía pemómoxi susato jíwichi!

Salmowéi 51

(Ro 3.4)

Nakom, pong ta Nakom, jiña neantobéwaxae,
 neyábara jüntemáinare xua taabewang.
 Yábara yaputang xua pokotsiwa báyatha abe éxanang.
 Yaputang xua xam aichaxaibim pokotsiwa xua éxanang.
 Báraxua taexanaexae, daxota neyábara páebame xua abe éxanang,
 xuano xua átene nekana éxaname.
 Pewünaeya xua tanakatsiwa tsane,
 poxonae kataunxuae taena tsiperüü weékang,
 ajüntübükoyenebein.
 Íchitha jumedangweya kawúükatsi,
 xua neyábara jüntemáinare xua báyatha abe éxanang.
 Nekópare xua ekeicha kaewa jüntübükoyene weiweinaeya tapoponaewa
 tsane.
 Nejüntübükoyene wüünae kana éxande,
 yawa neexande xua taichichipaewa tsane xua taexanaewa pokotsiwa
 ichichípame.
 Jopa tajü neitorobinde,
 xua tajü weya xua ichaxota ékame.
 Jopa newepichinde jiña nejumopetünaxü.
 Jame maisha ekeicha kaewa jüntübükoyene weiweina neexande,
 poxoru xam bara nekapanépame bárapo abe taéxanae koyenewang weya.
 Itoróbare nejumopetünaxü xua tana neyawenaewa tsane.
 Barapoxonae tana neitaküüpaewa tsane xua takuidubiwa pomonae irü abe
 peexanaewi,
 xua peexanaewa tsane pokotsiwa xua itoróbame jiña neitorobi
 koyenéwangtha.
 Jiña neantobéwaxae neyábara jüntemáinare xua báyatha abe éxanang,
 barapoxonae xua wüünae takajainchiwa tsainchi.

Yaputang xua duwéi tajutebiwa xua be ofrendang matawüing xua xam nexa,

íchitha báraxua jopa ichichipaem.

Daxota seikaya icha koyeneya kata éxanatsi,

xua jopa taatsakaewa tsane, xua ichamonae ta-aebiwa.

Jerusalén tómará kana éxande xua ekeicha nawita pexeinaewa xua wüünae.

Pomonae, xua Jerusalén tomarapiwi,

kana éxande xua ekeicha bichokono mataropeichiya nekajumekowüntsiwa tsane.

Barapoxonae katsita wüünaena xua duwéi pajutebin,

xua be ofrendang matawüing xua xam nexa.

Salmowéi 73

Maisha wüünae xua Nakom beta taéxana pomonaetha,

pomonae beta petaexanáewichi,

xua jopa abe peexanaewi.

Bara muxu tana nakuíbaraxubi xua tajumekowüntsiwa xua Nakom beta

petaexanaewa pomonaetha,

pomonae beta petaexanáewichi,

poxonae xua kuitang xua beta jinompa pomonae abe peexanaewi.

Barapomonae kopei xeináe jiwi náexana saya poxoru kaiba nawita ichamonaetha.

Barapomonae abe yábara paeba,

Nakom abe yábara páebatsi.

Matáütano barapomonae abe yábara paeba,

abe yábara páebatsi,

pomonae Nakom wüünae pejainchíwichi.

Bekein bara báraxuang barapomonae éxana,

íchitha áwiya wüünaeya jinompa.

Barichi ichamonae,

pomonae Nakom pejumekowüntsíwichi,

báraxua yábara jumekowünta,

xua pomonae abe peexanaewi, áwiya beta jinompa.

Daxota barapomonae nantanaxeina xua barapomonae jopa yawenaetsi,

xua Nakom wüünae pejainteibíwatsi.

Xang barichin muxu irü tayábara jumekowüntsí báraxua.

Icha báraxua exanaetsipang,

ápara poxoru xaniwaicha jopa Nakom wüünae jainteibiponaeiño.

Bekein yábara nantanaxeinang báraxua,

íchitha xaniwaicha jopa yábara yaputaeiño xua jiwi, íchitha beta jinompa

poxonae bekein abe éxana.

Báraxua nantaxeinang beya poxonae Nakom piabotha tatsi,

po bo pin bo, jonyang.

Baraxotiya Nakom neyaputane éxana xua pinae Nakom átene kana

exanaena,

xua barapomonae átene kana exanaeinchi,
 xua abe peexanaexae.
 Bekein saya bara káetotha jopa xaniwaichiya yábara jumekowüntsíño,
 íchitha Nakom kataunxuae neyawenapona daxita koyeneintha tsaibi.
 Barapong bara inta omeicha xua tanantaütsiwa xua jopa nantawenonaeíño
 ichüing xua tana neyawenaewa tsane.
 Barapong átene kana exanaena pomonaetha,
 pomonae jopa taexanaetsi pokotsiwa itoroba bapong.
 Saya nama takoya juntukuru jumekowüntang.

Salmowéi 89

(Hch 2.30; 13.22; He 12.5-11; Ap 1.5; 21.7)

Tha paebichi, xua poxonae naxünang, xua jangje:
 “Nakom, pong Tananentakaponaem,
 maisha bichokono pana neantobem.
 Maisha bichokono pana yawéname xua jopa pana neyábara
 jüntemaineibim bápana.
 Ichüing ajibi, pókotsin ichi ichim,
 xua bárapo kae pin nákuathe yawa peitabókotha.
 Xam bichokono peayapusüü itorobi koyenewa nexeiaein.
 Xam jiñakoutha daxita itorobiya éwatame.
 Matáütano bichokono nejüntübükoyene wüünaein, xaiñeya neexanaeinno,
 xuano xua bichokono neantobein.
 Pomonae xua nekayábara jumekowüntsiwi xua neyawenaewa, bara
 barapomonae jüntübükoyene weiweinaeya jinompa.
 Pomonae xua Israel pía pemómoxi susato jiwi tatsi pangxaein,
 painta wüünae pona pata tana neyawenaewaxaem.
 David painta itapétame xua pong Israel nakua itorobiya peewatsiwa
 tsane.
 Bapongtha yábara tsiwüünae muxudútame,
 xua bapong pía pemómoxi susato jiwi jíwana tatsi,
 bapong ataya itorobiya ewatsina Israel nakua.
 Bapongtha yábara tsiwüünae muxudútame xua neyawenaewa tsane
 xua bapong yota exanaena pía peitafaetabí jíwichi, xuano xua bapong
 bichokono peaiñakuí jintong tsane.
 Matáütano bapong tsipáebame xua pinae bapong nekana exanaewa tsane
 xua ira itorobiya peewatsiwa tsane,
 po ira bichokono pin ira.
 Yawa paebameno xua pinae bapong pía pemómoxi susato jiwi tatsi,
 icha jopa exanáe tsane pokotsiwa xua itoróbame,
 pinae átene kana exanáename.
 Páebame xua pinae báraxua nayábara jumewetsíname, pokotsiwa báyatha
 yábara tsiwüünae muxudútame bapongtha.
 Íchitha xam kópatame xua pomonae pata tana neaitafáetabi jiwi,
 pata tana neamanayabiwa tsane.
 ¡Maisha pana neyawende!

Nakom, pong pata Tananentakaponaem,
Maisha nayábara jumewere xua báyatha yábara pana tsiwüünae
muxudúbame.

Jopa pana kasebinde.

Nakom daxita pang wüünae paka jáintatsi”, jang.

Salmowéi 91

(Mt 4.6; Lc 4.10-11; 10.19)

Daxítatsi waxainchi pomonaetsi xua wayábara jumekowüntsíwatsi Nakom
xua wanaka yawenaewa tsane,

barapomonaetsi Nakom naka eena.

Nakom jopa kopatsiyo xua ichawa waxeinaewa tsane xua jopa wüünaeyo.

Nakom taeinchi, xua poxonae pomonae abe peéxanae jiwí,
átene kana exanaeinchi.

Nama waxainchi jüntema jinompaeinchi,

xua jopa átene tsainchi,

xua wayábara jumekowüntsíwaxae,

xua wanaka yawenaewa tsane.

Nakom itoroba pía matatsunpiwimonaem,

xua wanaka yawenaewa tsane xua ichaxota ponéibatsi.

Nakom báyatha paeba, jeye:

“Bárapo pebin kapanepaein pokotsiwa xua taayapubetsi weya, tana
neantobexae,

xuano xua tana neyaitaexae.

Poxonaem newüükaena, bara jumenotsin.

Yáwano kapanepaein pokotsiwa xua taayapubetsi weya.

Barapong bichokono peaiñakuín kana exanaein.

Matáütano kana exanaein xua ekeicha aña wei pepoponaewa tsane,

xua petáe dukuanaebiyaenexa,

xua xuang pokotsiwang peitüpanaewang,

xua xuang báyatha éxanang bapong nexa”.

Salmowéi 95

(He 3.7-11,15; 4.3,5,7)

Nakomtha weiweinaeya tanaxünaeinchi.

Bárapo Nakom naka kapanepa bárxuang weya,

xua xuang poxonaem nákata ayapubé tsaibi.

Nakom piabotha ponaeinchi, po bo pin bo,

yáwano baraxota jakobiya kanaxünaeinchi xua pokotsiwang wanákata
exanaexae.

Bewa exanaetsi bárxua, tsipéi bárapo Nakom bichokono toxeincha

peaiñakuín beyakaincha po nakomüng xua ichamonae wüünaem jainteiba.

Bárapo Nakom pin marmene éxana,

yáwano írano éxana.

Barapong piakoya kanamataxeina daxítangtha xua bárapo kae pin
nákuathe.

Bewa barapong peitabaratha tatsi írabe taeumendékaetsi poxonae wantabokototha umeinchi, xua watsita-itapeñaxeinaenexa, xua wabarükuí iturajináewatsi. Barapong naka éxana. Bárapo Nakom ápara Wanakom. Waxainchi barapong piamonaetsi. Icha exanaeinchi pokotsiwa xua bapong naka itoroba, barapoxonae taeinchi xua bichokono peayapusúü itorobi koyenewa pexeinaein. Nakom báyatha naka tsipaeba, naka jeye: “Jopa bara paichinde, icha báyatha paiña amo susato jiwi ichi, poxonae dubenanáebiya irasaina xuépana tsúrukuae nákuatha. Barapomonae naba neéxana, bekein báyatha daxitang tane xua xuang éxanang barapomonae nexa. Daxota barapomonae kasebang xua beya cuarenta po weibetha. Matáütano barapomonae jopa kopatsiño xua pepatsiwa tsane Canaán nákuatha. Barapomonae daxota jopa itaküüpaetsi xua penafifinakaewatsiwa bárapo nákuatha, poxoru jopa nejumekowüntsiyo”, naka jei.

Salmowéi 100

Daxita jiwi, pomonae xua jinompa bárapo kae pin nákuathe, bewa barükui-iturajinaena, xua Nakom bewa barükui-iturajinaeinchi. Barapomonae bewa weiweinaeya wüünae jainchina, xua Nakom bewa weiweinaeya wüünae jainchinchinchi. Bewa xaniwaicha yaputaetsi xua Nakom ápara po Nakom pepa Nakom. Bárapo Nakom naka fórota; daxota piamonae jíwichi. Waxainchi nantawenónatsi Nakom, xua wanaka eenaewa tsane daxita matakabi, ichi be ovejamonae ichi, xua nantawénona pong pe-eenaeinchi daxita matakabi tsaibi. Bewa ponaetsi Nakom piabotha tatsi, po bo pin bo, yáwano baraxota bewa yábara jakobichi xua báyatha wanaka yaweneibixae. Matáütano bewa baxota wüünae jainchichi, tsipéi bapong pong pejüntübükoyene wüünaein. Bapong ataya naka ántobe tsaibi tsane, matáütano bápana jopa naka punaxubi tsane.

Salmowéi 103

Daxita tajüntübükoyenényatha Nakom wüünae jaintang. Jopa ichipaeiño xua tajüntemainawa tsane pokotsiwa xua ba bewa yábara jakobeibin,

xua pokotsiwa inta peexaneibixae.
 Bapong neyábara jüntemaina xua xuang daxitang báyatha abe
 taexanaewang.
 Neaxaibi éxana poxonae atenein.
 Nekapanepa tatúpae koyenewa weya.
 Nekana exaneiba xua jüntema tapoponeibiwa tsane.
 Barapong pejüntübükoyene wüünaein,
 yawa xaiñeya peexanaein.
 Moisés kana exainchi xua Nakom yábara yaputainchi.
 Irü ichamonae barichichi, pomonae Israel pía pemómoxi susato jiwi
 tatsi.
 Bapong jopa bichoina naka kasebeibiyo.
 Bapong naka yábara jüntemaina xua abe waexanaewang.
 Beta nákata éxana poxonae jame bewa barapong bekein átene naka
 exanaena.
 Bapong naka yaputane xua wajüntübükoyene faefaenaewi,
 xuano xua saya jíwichi.
 Bapong jopa naka atetsiyo,
 ichi poxonae koxiyüing ichi,
 xua pía pexui jopa atetsiyo.
 Naka yábara jüntemaina xua kaena báyatha abe exainchi.
 Wajinompaewa bárapo kae pin nákuathe saya kaekuiyobetsi, icha
 naepanaewa ichi,
 xuano xua ichi pentonong ichi xua kaekuíyobe.
 Nakom jopa bápána nakuibaraxubiyo xua peantobewa pomonaetha,
 pomonae xua pebarükui-iturajinaewichi,
 xuano xua petaexanáewichi pokotsiwa bapong itoroba.
 Nakom itorobiya éwata bárapo kae pin nákuathe,
 yawa itabókotha.
 Matatsunpiwi bewa wüünae jainchina,
 xua Nakom bewa wüünae jainchinchi.
 Barichi daxita jiwi bewa wüünae jainchina,
 xua Nakom bewa wüünae jainchinchi.
 Daxita tajüntübükoyenyatha Nakom wüünae jaintang.

Salmowéi 110

*(Mt 22.44; Mr 12.36; Lc 20.42-43; Hch 2.34-35; 1Co 15.25;
 Ef 1.20-22; Col 3.1; He 1.12-13; 6.20; 7.17,21; 8.1; 10.12-13)*

Meje po wei xua David naxüna Nakom pexanto tatsi yábara, xua
 jeye:

“Nakom Tananekanamataxeinaein baraichi, jeichichi:
 ‘Takoxa wérena ékare, beya abü tsane poxonae nekaitafáetabi jiwi pía
 pekanamataxeinaeinchi tatsi ka-exanaeinchi’,
 jeichichi pong Tananentakaponaein’.
 Nakom kópata xua pong pexántoxae tatsi bara nakua itorobiya
 ewatsina.

Nakom bapongtha yawena bara kaena barapoxonae weya xua poxonae nakatsiwa.

Yábara tsiwüüinae muxudútano bapongtha jeye:

“Xam pong pepa sacerdotemonaepim,

xua bara ataya tsitekaeya tsane,

ichi Melquisedec matha ichi,

pong kaena báyatha pópona.

Bapong pepa sacerdotemonaepin náexana xua ataya tsitekaeya pepoponaein”, jei Nakom.

Barapong, pongxae pong nakua itorobiya peewatsin,

bichokono peayapusúü itorobi koyenewa pexeinaein tsane.

Salmowéi 118

(Mt 21.9,42; 23.39; Mr 11.9-10; 12.10-11; Lc 13.35; 19.38;

20.17; Jn 12.13; Hch 4.11; He 13.6; 1Pe 2.7)

Maisha wüüinae xua jiwi yábara jakoba Nakomtha pokotsiwa xua petaexanaexaetsi.

Daxita Israel pía pemómoxi susato jiwi tatsi,

bewa yábara tsipaebina ichamonaetha xua Nakom bápana jopa

nakuibaraxubi xua wanaka antobewa.

Nakomtha wüükang yawa bara bapong nekapanepa pomonae tana neitafáetabi jiwi weya.

Jopa aiñakuiyiyo poxonae pinmonae tana neitafáetabi jiwi, íchitha bapong neyawena poxonae yota éxanang barapomonae.

Nakom wüüinae jaintang, tsipéi bapong neyawena poxonae yota éxanang pomonae tana neitafáetabi jiwi.

Nakom pexanto yábara jeye:

“Pebiwí pomonae ibo bong peakabiwi,

bárapo pebiwi xuba po iboto tabükaboka,

po iboto peaiñakuí iboto.

Íchitha Nakom itapeta bárapo iboto xua petabükabokaenexa bárapo peaiñakuí ibótoxae”, jei Nakom.

Waxainchi jeichichi:

“Maisha pokotsiwa Nakom éxana naka tsita wüüinae”, jeichichi.

Ánoxuae Nakom nákata éxana pokotsiwa bichokono wüüinae.

Daxota bewa jüntübükoyene weiweinaeya jinompaetsi.

Daxota jeichichi:

—Nakom, pong pata Tananentakaponaem,

jumedangweya paka wüükatsi,

pana kapanenebiya tsoponaeinde pata tana neitafáetabi jiwi weya,

yawa pana yawende, jeichichi.

Maisha bapong jiwi jüntübükoyene weiweina kana éxanatsi, pong patopa

Nakom peitorobixae,

xua peexanaenexa Nakom pía petanakuichiwa tatsi.

Daxita waxainchi bewa yábara jakobeibichi Nakomtha,

tsipéi bapong jopa bápana nakuibaraxubi xua wanaka antobewa.

Salmowéi 119

(1Pe 2.11)

(Bárapo wei bichokono apiya. Bárapo wei yábara naka kuiduba, xua poxonae nakuidúbatsi, yawa xua jumekowüntsiya waexanaewa pokotsiwa Nakom itoroba

pía peitorobi koyenéwangtha. Báraxua xua naka kuiduba xote xeina jeye:)

Pong xua éxana pokotsiwa Nakom itoroba pía peitorobi koyenéwangtha, bara bapong tawüünaepoinchi.

Pewowin, pong xua éxana pokotsiwa Nakom itoroba pía peitorobi koyenéwangtha, bara bapong,

pong bichokono pejüntübükoyene wüünaein tsane,

xua jopa pexeinaewa xua abe peéxanae koyenein.

Nakom, pong Tananentakaponaem,

daxita tajüntübükoyenényatha wüünae kajainchinchí.

Jopa nekopatsinde xua tana nakuibaraxubiwa xua jopa taexanaewa pokotsiwa itoróbame jiña neitorobi koyenéwangtha.

Daxita matakábintha tsaibi,

yábara nantanaxeina poneibang jiña neitorobi koyenewang,

xua jopa abe taexanaponaewa tsane.

Neyawende xua tataewa tsane,

xua xuang xeina jiña neitorobi koyenéwangtha,

xua xuang wüünae xua tana neyawenaenexa.

Báyatha jopa exanaeiño pokotsiwa itoróbame jiña neitorobi koyenéwangtha,

daxota báyatha atenein.

Daxota ánoxuae éxanang pokotsiwa itoróbame jiña neitorobi koyenéwangtha.

Nakom, jiña neitorobi koyenewang bara ataya tsiteka.

Poxonae nakuidubang bárapo jiña neitorobi koyenewang,

toxecha neyaputane éxana beyakaincha pomonae pítiri jiwi,

xuano xua beyakaincha pomonae tana neitafáetabi jiwi,

irü beyakaincha pomonae jiwi pekuidubi jiwi.

Jiña jumein bichokono nejüntübüyüüka kana éxana xua tajüntübükoyene weiweinaewa,

beyakaincha xua poxonae banto mera daebang,

xuano beyakaincha xua poxonae oro nainto xeinang.

Bárapo jiña neitorobi koyenewang neyawena xua tayaputaewa poxonae pokotsiwa bewa exaneibín,

ichi pekoicha ichi xua neyawena xua mérawi beta tataewa.

Yábara jüntübükoyene wekoyang,

xua pinmonae jinompa, pomonae jopa exanaeyo pokotsiwa itoróbame, jiña neitorobi koyenéwangtha.

Salmowéi 121

Bara kompa pong xua xaniwaicha naka yawena.

Ápara bapong Nakom, po Nakom xua éxana itaboko,

yawa ira éxana.

Barapong bápana jopa maitekae.
 Daxita matakabin tsaibi naka eeneiba.
 Yáwano naka kapanepeiba báraxuang weya xua poxonae nákata ayapubé
 tsaibi.

Salmowéi 135

(Ap 9.20)

¡Bara Nakom wüünae jáintatsi!
 Daxita pomonae xua panakuítame Nakom piabotha tatsi, po bo pin bo,
 Nakom wüünae pajainde.
 Tsipéi daxua wüünae xua Nakom wüünae jáintatsi,
 xuano xua Salmo matawüing weixi watsita naxünaewa.
 Waxainchi pomonaetsi, pomonae Israel pía pemómoxi susato jíwichi;
 Nakom naka itapeta pía piamonae tatsi wanaka exanaetsi.
 Barapong bichokono peayapusüü itorobi koyenewa xeina beyakaincha po
 nakomüing jopa xaiñeyo.
 Barapong Nakom éxana daxita pokotsiwa xua ichipa xua peexanaewa.
 Barapong nákata itoroba joibo, yawa émano.
 Nakom daxita matabüxüing tsíniya matapin jiwi juteba xua Egipto
 nakuapiwi,
 yawa duwéi juteba tsíniya xua poxi kopiya náexana,
 xua Egipto nakuapiwi pía duweimonae tatsi.
 Matáütano Nakom juteba pomonae nakua itorobiya peewatsiwi,
 pomonae xua bichokono pedangwéi jiwi.
 Yáwano Nakom tanota, barapomonae tanótatsi irang.
 Ekeicha bárapo irang naka katsiba.
 Nakom, pong jiwi Pekanamataxeinaeinchi,
 jiwi bapongtha ataya wüünae jainteibina.
 Nakom piamonaetha xaiñeya kana exanaena,
 xua barapomonaetha yábara jüntemainena,
 xua barapomonae abe pía peéxanae koyenewang tatsi.
 Po nakomüing icha nakuapiwi wüünae jainteiba ápara saya jemái,
 xua saya jiwi piakoutha kanaüta éxana.
 Bekein xeina pekoiboto,
 íchitha jopa itaküüpaetsi xua kueikueije.
 Bekein ítata dukua,
 íchitha jopa itaküüpaetsi xua petaewa.
 Bekein muxututudukua,
 íchitha jopa itaküüpaetsi xua pejumetaewa.
 Bekein ponxo dukua,
 íchitha jopa itaküüpaetsi xua penameikajuínaewa.
 Pomonae éxana bárapo nakomüing,
 írürü pomonae xua yábara jumekowünta bárapo nakomüingtha xua
 peyawenaewa tsainchi,
 bárapo jiwi pejemái jiwi tsane,
 icha bárapo nakomüing ichi, xua pejemái nakomüing.

Íchitha waxainchi daxítatsi,
 pomonae Israel pía pemómoxi susato jíwichi,
 bewa Nakom wüünae jainchichi, po Nakom pepa Nakom,
 po Nakom pópona piabotha xua Jerusalén tómaratha.

Salmowéi 137

(Ap 18.6)

Kaentakábitha waxainchi,
 Israel pía pemómoxi susato jíwichi,
 énantsi ichaxota imoxoyo mene poxonae jinómpatsi Babilonia tómaratha,
 po tómara xua pepa tómara xua Caldea nákuatha.
 Barapoxonae Jerusalén tómara yábara nantanaxéinatsi xua bárapo tómara
 bichokono abe tsúrukuae.
 Barapoxonae bichokono jüntübükoyene wekoyeichi.
 Pomonae xua Babilonia tómaratha jinompa,
 pomonae xua naka kápata baraxota,
 barapomonae naka wüüka xua bepa pinae wei naxünaetsi,
 po wei Jerusalén tómara wakayábara naxünaewa.
 Íchitha báraxua jopa be exanaetsi,
 tsipéi po nákuatha énantsi,
 bárapo nakua, ápara icha nakua.
 Bápana jopa yábara jüntemainaein tsane Jerusalén tómara.
 Bárapo tómara ápara Nakom pía pepa tómara tatsi.
 Báraxua jame bichokono netsita aiñakuí,
 beyakaincha ichawa xua netsita aiñakuí xua xeina bárapo kae pin
 nákuathe.
 Nakom, pong Tananentakaponaem,
 átene kana éxande Edom nakuapiwi,
 tsipéi barapomonae kaena báyatha ajejei poxonae Jerusalén tómara abe
 exainchi Caldea nakuapiwi.
 Yaputang xua kaentakábitha tsane,
 Nakom átene kana exanaena Caldea nakuapiwi,
 tsipéi kaena báyatha barapomonae abe naka kana exaneba.

Salmowéi 139

Nakom pong Tananekanamataxeinaein,
 daxita yaputáneme, pokotsiwa poxonae éxanang,
 xuano xua poxonae páebang.
 Jopa kataibichi poxonae netáibame.
 Metha bekein tajü naetsirikuáetsipang,
 xua ítara mexeya jopa tana netaewam tsane, jang,
 íchitha áwiya netáneme xua daxítangtha póponame.
 Jopa aiñakuiyiyo icha itaboko beicha ponang,
 bara baraxota ékame.
 Yawa jopa aiñakuiyiyo icha ira büxüpana béreka ponang,
 bara baraxota ékame.

Daxita icháwangno táneme,
 metha bekein kirei tsipae,
 íchitha áwiya táneme.
 Xam nefórotame xua taena tatsiperüüwé ekaewa.
 Wüünae kajainchinchí tsipéi xam, pongxaem xua peayapusúü itüüpanaewa
 neexanaein.
 Yáwano beta éxaname poxonae xua xuang exanéíbame.
 Inta yaputáneme tapepong,
 múxunano daxita nejüntübükoyene yaputanemeno.
 Matáütano jopa neitaküüpaeyo xua daxitang tayábara ununaewa,
 xua xuang tana neyábara nantanaxeinaewam.
 Báraxuang bichokono nawita, ichi be ichi xua táetowa bichokono nawita.
 Ita-aenaenang pomonae xua kaita-enaenei.
 Nakom, pong Tananentakaponaem,
 maisha átene kana éxande barapomona.
 Nakom nejüntübükoyene taema xua neyaputaewa tsane icha xeinang
 pokoyene xua abe.
 Xam yaputáneme daxita xua poxonae nantanaxeingang.
 Jopa nekopatsinde xua taexanaewa pokotsiwa xua jopa katsita wüünaeyo.
 Jame maisha neyawende xua taexanaewa tsane pokotsiwa xua ichichípame
 xua taexanaewa tsane.

Salmowéi 146

Nakom wüünae jaintang poxonae kataunxuae póponang.
 Yáwano salmowéi matawüing naxünang Nakom nexa.
 Poxonae nantawenónatsi xua wanaka yawenaewa,
 jopa bewa yábara jumekowüntichi pomonae nakua itorobiya peewatsiwi,
 xua wanaka yawenaewa tsane.
 Matáütano ichamonae jopa bewa yábara jumekowüntichi xua wanaka
 yawenaewa tsane.
 Ápara barapomona xua itaküüpaetsi xua wanaka yawenaewa tsane.
 Kaentakábitha daxita barapomona werapaena.
 Nama pong Nakom yawena,
 bapong bara tawüünaeponaeinchi,
 po Nakom báyatha Jacob wüünae jainteiba.
 Bárapo Nakom ira éxana, yawa itaboko éxana,
 yáwano pin marmene éxana,
 yáwano éxana xua xuang jinompa baraxotang.
 Nakom yábara kanantanaxeinaeya yawena pomonae xua abe kana exanéíbatsi,
 xua poxonae ichamonae abe kana exaneba.
 Barapong Nakom pexaewa ápata pomonae xua piyain,
 pomonae jopa xeinaeyo xua penabanaewa.
 Matáütano Nakom yawena xua peponaewa bara weya pomonae xua jiwi
 pekübibotha pejebíwatsi.
 Matáütano Nakom éxana xua ekeicha penekotsiwa pomonae peitatakiréi
 jiwi.

Yawa yawena pomonae xua jopa ajüntübükoyenesütiyo xua
pejumekowüntsíwatsi,
xua barapomonae ekeicha kaewa bichokono peajüntübükoyenesütiwa
tsane,
xua Nakom pejumekowüntsíwatsi.
Nakom bichokono ántobe
pomonae xua beta peexanaewi.
Yáwano Nakom beta eena powaxi
xua pishéuriwi pekuenta napentsíwatsi.
Yáwano Nakom yawena po pexui piakoibi jiwi.
Yáwano yawénano pomonae icha nakuapiwi xua Israel nákuatha jinompa.
Nama Nakom átene kana éxana pomonae xua abe peexanaewi.
Barapong, Nakom, ataya itorobiya ewatsina bárapo kae pin nakue.
¡Maisha bárabü Nakom wüünae jáintatsi!

Peyábara Yaputáe Diwésixi

Proverbios

Israel pía pemómoxi susato jiwi tatsi diwésixi nawita xeina, po diwésixi xua peyábara yaputáe diwésixi. Bárapo diwésixi barapomonaе ichichipa nawita poxonaе nantiya nayábara paebeiba. Icha diwésixi tina ichaxota po díboro pewüng Proverbios. Salomón, pong nakua itorobiya peewatsin, bapong bichokono peyaputaеin. Barapong Salomón nama aiña diwésixi tina, po diwésixi xua peyábara yaputáe diwésixi, beyakaincha xua ichamonae tina. Icha diwésixi seikaya ichamonae tina, po diwésixi peyábara yaputáe diwésixi.

Meje po diwésixi Israel pía pemómoxi susato jiwi tatsi tina, xua peyábara yaputáe diwésixi

(Proverbios 1—30)

Salomón, pong Israel nakua itorobiya peewatsin, tina bárapo diwésixi, pemu-xuwetsinexa pewówitha xua Israel nakuapiwi:

(1) Icha ichichípame xua neyaputaеin naexáname, bewa maisha jumenaitomatsim bárapo tsiki diwésixi.

(2) Saya pomonaе jopa peyaputáe jiwi, barapomonaе ba nápona pomonaetha, pomonaе abe peexanaewi.

Íchitha icha barapomonaе Nakom barükui-iturajínatsi, bara barapomonaе peyaputáe jiwi tsane.

(3) Bewa Nakom payábara jumekowüntsime xua paiña nepaka kayawenaewa tsane.

Jopa paiñakoutha pana nayábara jumekowüntsime, xua bara paiñakoutha paiña nenayawenaewam tsane, paiña nenantanaxeinaexae xua ápara paiña neyaputáe jiwi.

(4) Pomonaе xua mekabiya éxana xua pokotsiwa Nakom ichichipa, bara Nakom yawena xua barapomonaе bara beta peexanaewa tsane.

(5) Jopa bewa Nakom pakasebim, poxonaе Nakom átene paka kana éxana, xua abe paiña neexanaexae.

Báraxua pákata éxana ápara poxoru paka ántobe.

(6) Tajü paweponde powaxi xua peweiweinaewaxi, xua jopa paiña neperüü nakoyobinexa.

Saya paishamaire powaxi xua yatsikaewa paiñawaxi. Jopa bewa papichim icha pebin píowa tatsi.

(7) Maisha bewa paiña ichichi tsane, xua paiña nexeiawa peyaputáe koyene, beyakaincha xua paiña ichichi, xua paiña nexeiawa tsane pekakomokáe parátixi, xuano xua peitüpanaewang xua be wárowang.

**Meje icha diwésixi xua Salomón tina, xua peyábara
yaputáe diwésixi xua daxita jiwi nexa**

- (8) Poxonae pewowin peyaputáe koyenewa xeina,
xua daxota beta peexanaein,
koxiyüing irü koxiwa, barapomonae báraxua yábara jüntübükoyene
weiweina.
Íchitha poxonae pewowin jopa xeinaeyo peyaputáe koyenewa,
xua daxota jopa beta peexanaein,
koxiyüing irü koxiwa, barapomonae báraxua yábara jüntübükoyene wekoyéi.
- (9) Pebin, pong jopa xeinaeyo peyaputáe koyenewa,
xua daxota abe peexanaein,
barapong ítara mexeya peyaputaein.
Jame pomonae peyaputáe koyenewa pexeinaewi,
barapomonae jame jumetane poxonae muxuwétabatsi ichamonae.
- (10) Icha pebin jopa pía pexuyo muxuwetsiyo,
ápara poxoru jopa antobeyo pía pexuyo.
Icha xaniwaicha pía pexuyo ántobe,
bü muxuweta xua xaniwaicha peexanaewa tsane.
- (11) Jiwi, pomonae jopa peyaputáe jiwi,
jumekowüinta daxita pokotsiwa xua jumetane xua ichamonae paeba.
Jame, pomonae peyaputáe jiwi,
jumekowüinta pokotsiwa jumetane,
saya poxonae matha kopiya yaputane xua icha báraxua xaiñéi.
- (12) Jiwi, pomonae peyaputáe koyenewa pexeinaewi,
barapomonae jame saya jopa aitakonaeyo.
Pomonae xua bichoina anaepaneiba,
poxonae aichaxaibi tsaibi pokotsiwa xua ichamonae éxana,
báraxua yábara tsita itapeiñaxeina xua ápara poxoru jopa peyaputáe jiwi.
- (13) Icha ichüing anaepanaeya katsipaeba,
bara kaitaküüpa xua koibanakaewa nekana exanaewa bapong, xua
poxonae jumewüünaeya tsipáebame bapong.
Íchitha icha bapong anaepanaeya jumenotsípame,
bapong ekeicha bichokono kajume-matsontsonóbíchipa.
- (14) Jame daxua wüünae, xua bekein akopeibichi,
íchitha áwiya Nakom antobetsi beyakaincha xua poxonae kopei xeina
naexainchi,
yawa xua daxota nákata ayapubé.
Jame daxua wüünae,
xua kae matabüxü nabarü jinómpatsi,
xua ichaxota nantiya naantobeya jinómpatsi,
xua bekein pexaewa tsiwiyo,
beyakaincha xua poxonae jinómpatsi po botha ichaxota nantiya nakaseba
bekein pexaewa nawita.
- (15) Pokotsiwa xeina pomonae xua peátsakae jiwi ápara saya xua
taayapubetsi.

(16) Jame daxua wüünae xua jopa bewa bichokono anaepanaetsi, beyakaincha xua poxonae pong penawabchüü-exaneibiwi jíwanapin, xua daxita amanáyaba pepa tómara.

(17) Pong jopa peyaputaein, bara bapong tsita naitapeiña xeina ichamonaetha xua bara peyaputáe koyene xeina, icha jame jopa matowa yábara paebiyo pokotsiwa xua jopa yaputaeyo.

(18) Vino mera yawa icha merang, xua peátsaxae merang, saya jiwi kana éxanatsi xua jopa xapain pejinompaewa, yawa xeina xua petaayapubetsiwang.

Bárapo jiwi bápana jopa xeináe tsane peyaputáe koyenewa, pomonae apa nawita peátsaxae mera.

(19) Jopa bewa báraxua exanaetsi xua nayamatómatatsi xua ichamonae kopiya abe wanákata exanaexae.

Bewa abü ewatichi xua báraxua Nakom piakoya exanaena bapongtha, pongxae abe petaexanaexaetsi.

(20) Jopa bewa pomonae wa-aiñakuí jíwichi naexanaetsi xua poxonae wabarü jinompáewatha,

pomonae yatsikaewa peaiñakuí jiwi.

Poxonae pexaethopáewatha naékame,

xua ichüing piabotha tatsi,

bewa saya ekaem ichaxota eneiba pomonae jopa peaiñakuí jiwi.

Tsipéi icha ekaetsípame ichaxota eneiba pomonae peaiñakuí jiwi,

kaitoróbíchipa xua neekaewa tsane ichaxota eneiba pomonae jopa peaiñakuí jiwi.

Barapoxonae bichokono auram tsipae.

(21) Jopa bichokono banto daebinde,

tsipéi icha bichokono daebíname,

atenem tsipae xua nejüntüfaenaexae.

(22) Pomonae nekuariya jiwi,

jopa matowa siwaponaende,

tsipéi barapomonae kaitafáetabi tsipae icha matowa siwapóname.

(23) Pomonae nekaitafáetabi jiwi kare mera yawa penabanaewa poxonae nantanawénona,

xain barapomonae kayábara aura.

Nakom pentoma kakatsina xua beta jiña neexanaexae.

(24) Daxua wüünae xua boutotha jüntema wapoonaewa,

beyakaincha xua pin botha wapoonaewa ichaxota waseuri ajumetsá xua wawái.

(25) Po diwesin xua tajü weya patopa xua pexeiña diwesi, bichokono jumexeika ichi mera ichi, xua mene wüünae peamenekexae,

xua poxonae jintong bichokono pía mératsi.

(26) Penajumematsontsonobiwa be isho itareto.

Peyüüyüüjeiwa, báraxua be isho xua untha bobena.

Isho ítare weyowanaya poxonae jopa xeinaeyo isho.

Barichi penajumematsontsonobiwa jüntemaina,

xua poxonae ichamonae najumebaparenta xua peyüüyüüjeiwa.

(27) Jopa bichokono yábara najüntübükoyene exabinde xua pokotsiwa baya neexanaewa tsane, tsipéi jopa yábara yaputaem pokotsiwa baya tsane.

(28) Daxua wüünae xua poxonae ichamonae wüünae kayábara paeba, beyakaincha xua poxonae xam jiñakoutha wüünae nayábara páebame.

(29) Icha ichüng jopa exanaeyo pokotsiwa Nakom itoroba pía peitorobi koyenéwangtha,

Nakom jopa jumenaitómatsi tsane,
poxonae wúükatsi xua peyawenaewa tsane.

(30) Icha namicha éxanatsi xua abe,
xua jopa ichamonae wanaka kuiyaputaewa tsane, ápara jopa nákata wüünae tsipae.

Jame icha báraxua yábara páebatsi, xuano xua nakuibaraxotsi xua waexanaewa báraxua,
bara Nakom naka yábara jüntemainna xua abe waexanáewatsi.

PETINOUNKAEWA XUA AIÑA WEI

BAROMPA TSÍNIYA

TABLA CRONOLÓGICA

Bárapo petinounkaewa yábara kaununuta xua aiña wei barompa tsíniya.

A.C. — Cristo Pewiinae nakatsiwa

D.C. — Cristo Pepuya nakatsiwa

Poxonae aena	POXONAE TAMRÓPATA PÍTABÁ Poxonae aena fórota. Adán yawa Eva poxonae pábitha popónabe Edén nákuatha. Caín yawa Abel poxonae popónabe. Noé yawa poxonae daxita matakaewa. Poxonae xua Torre de Babel.
2000 A.C.	ISRAELMONAE PIA PAMO SUSATO JIWI TATSI Poxonae Abraham Palestina nákuatha patopa, bara be imoxoyo poxonae 1900. Poxonae Isaac nakatsiwa. Poxonae nakatsíwabe Jacob irií Esaú.
1800 A.C.	Poxonae Jacob doce po pia pexui tatsi pinmonae nakatsiwa xua Israel doce pia bicheitomonae tatsi. Bárapo Jacob doce po pia pexui tatsi kaein jíwana pong xua aiñakuí, bapong ápara José. Bapong José pong pe-aiñakuín kana-exánatsi, xua faraón kana-éxana, xua faraón petakanamata-xeinaewa tsainchi Egipto nákuatha. <div style="text-align: center;"> POXONAE ISRAELMONAE EGIPTO NÁKUATHA JINOMPA </div>
1600 A.C.	Poxonae Jacob pia pemómoxi susato jiwi tatsi busikui-taetaeyebébatzi Egipto nákuatha bara be imoxoyo poxonae 1700-1250.
1250 A.C.	Poxonae Moisés nota israelmonae Egipto nakua weya, bara be imoxoyo poxonae 1250. Poxonae israelmonae jinompa irasaina tsúrukuae nákuatha. Bárapo dapaetha Moisés kátatsi Nakom pia peitorobi koyenewa tatsi xua tina ibo panáwatha. Baraxua Moisés kátatsi ichaxota po demxuwa pewüng Sinaí. Bara be poxonae imoxoyo 1250-1210.

	<p>POXONAE CANAAN NAKUA WEKOBENÓTATSI XUA BARAPOXONAE BARAXOTA NAEATHOPA</p> <p>Josué kanamataxeina poxonae aena yábara yótaba Canaán nakua, bara be imoxoyo poxonae 1210. Pomonae pata, barapomonae kaemonae náexana Canaán nákuatha, pomonae xua doce po bichéitobe. Bárapo nakua wümduta: Israel nakua, jei. Poxonae baraxua éxana kanamataxeina éxana po pebiwi pe-aiñakuí jiwi be pomonae juezmonae, ichikuiha be pomonae pentakaponaewi.</p> <p>POMONAE NAKUA ITOROBIIYA PEEWATSIWI XUA ISRAEL NÁKUATHA</p>		
1000 A.C.	<p>Poxonae Saúl itorobiya kanamataxeina bara be imoxoyo poxonae 1030-1010. Poxonae David itorobiya kanamataxeina bara be imoxoyo poxonae 1010-970. Poxonae Salomón itorobiya kanamataxeina bara be imoxoyo poxonae 970-931.</p>		
930 A.C.	<p>POXONAE ISRAEL NAKUA AIÑA NÁKUABE NÁEXANA JUDA NAKUA (pomonae barompaya nakua itorobiya peewatsiniyaewang ichaxota pewüing sur)</p>		
	Nakua peewatsiwi Judá nákuatha	Xua éxana poxonae matakápona	Nakom peitorobi jume pepaebiwi
	Roboam 931-913	abe	
	Abías 913-911	abe	
	Asa 911-870	beta	
	Josafat 870-848	beta	
	Joram 848-841	abe	Elías
	Ocozías 841	abe	
850 A.C	Atalia (yabüyo) 841-835	abe	Eliseo
	Joás 835-796	beta	
800 A.C.	Amasías 796-781	beta	
	Azarías (icha wüing Uzías) 781-740	beta	Amós
750 A.C	Jotam 740-736	beta	
	Acáz 736-716	abe	
	Ezequías 736-687	beta	Miqueas

930 A.C.	POXONAE ISRAEL NAKUA, AIÑA NÁKUABE NATUFÓROTABE ISREAL NAKUA (pomonaē barompaya nakua itorobiya peewatsiniyaewang ichaxota pewüing norte)		
	Nakua peewatsiwi Israel nákuatha	Xua éxana poxonaē matakápona	Nakom peitorobi jume pepaēbiwi
	Jeroboam 931-91	abe	
	Nadab 910-909	abe	
900 A.C.	Baasa 909-886	abe	
	Ela 886-885	abe	Elías
	Zimri 7 po matakábibe poxonaē	abe	
	po weitha 885		
850 A.C.	Omri 885-874	abe	Eliseo
	Acab 874-853	abe	
	Ocozías 853-852	abe	
750 A.C.	Joram 852-841	abe	
	Jehú 841-814	abe	
	Joacaz 814-798	abe	
	Joás 798-783	abe	
	Jeroboam II 783-743	abe	
750 A.C.	Zacaría 6 po xométoē poxonaē	abe	Oseas
	po weitha 743		
	Salum kae xometo poxonaē	abe	
	po weitha 743		
	Menahem 743-738	abe	
	Pecaía 738-737	abe	
	Pécáj 737-732	abe	Isaías
	Oseas 732-723	abe	
	Bapoxonaē Samaria tómara werawéraka yawa Efraín (Israel) nakuapiwi teikéibatsi pekaponaeñéxatsi xua pebusikui-taetaeyebibinéxatsi po weitha 722.		
700 A.C.	POMONAE YAKUI-OPIDUBENA POXONAE ITOROBIYA ÉWATA JUDA NAKUA		
	Nakua peewatsiwi Judá nákuatha	Xua éxana poxonaē matakápona	Nakom peitorobi jume pepaēbiwi
	Manasés 687-642	abe	Jeremías
	Amón 642-640	abe	Sofonías
650 A.C.	Josías 640-609	beta	
	Joacaz 3 po xométoē poxonaē	abe	Nahúm
	po weitha 609		
	Joacim 609-598	abe	
	Joaquín 3 po xométoē poxonaē po	abe	
	weitha 598		
	Sedequías 598-587	abe	
600 A.C.	Jerusalén tomarapiwi wetapéntatsi julio xométotha poxonaē po weitha 587, ichikuitha xua poxonaē po weitha 586.		¿Habacuc?, Ezequiel

<p>580 A.C.</p>	<p style="text-align: center;">ICHA NAKUA BEYA PEKAPONAEWA YAWA XUA EKEICHA KAEWA PEKOUTHA PATA</p> <p>Poxonae Jerusalén tomarapiwi wetapéntatsi, barapoxonae dapuyaya judiomonae kaponébatsi Babilonia nakua beya.</p> <table border="1" style="width: 100%; border-collapse: collapse;"> <thead> <tr> <th style="width: 80%;"></th> <th style="width: 20%; text-align: center;">Nakom peitorobi jume pepaebiwi</th> </tr> </thead> <tbody> <tr> <td>Tamrópata pítaba xua Persa nakuapin itorobiya peewatsiwa aiña nakuang poxonae po weitha 539.</td> <td style="text-align: center;">Daniel</td> </tr> <tr> <td>Ciro pong Persa nakua itorobiya peewatsín, judiomonae kana-exánatsi xua kaewa pekoutha pepatsiwa poxonae 538. (Daniel 6.28)</td> <td style="text-align: center;">Hageo, Zacarías</td> </tr> <tr> <td>Tamrópata pítaba xua ekeicha ákaba Nakom piabo tatsi, po bo pin bo, poxonae po weitha 520</td> <td style="text-align: center;">Abdías, Malacluías</td> </tr> <tr> <td>Ekeicha pekoutha ákaba xua Jerusalén tómara peyakaincha-yatoxorotadutsiwa 445-443</td> <td style="text-align: center;">¿Joel?</td> </tr> </tbody> </table>		Nakom peitorobi jume pepaebiwi	Tamrópata pítaba xua Persa nakuapin itorobiya peewatsiwa aiña nakuang poxonae po weitha 539.	Daniel	Ciro pong Persa nakua itorobiya peewatsín, judiomonae kana-exánatsi xua kaewa pekoutha pepatsiwa poxonae 538. (Daniel 6.28)	Hageo, Zacarías	Tamrópata pítaba xua ekeicha ákaba Nakom piabo tatsi, po bo pin bo, poxonae po weitha 520	Abdías, Malacluías	Ekeicha pekoutha ákaba xua Jerusalén tómara peyakaincha-yatoxorotadutsiwa 445-443	¿Joel?
	Nakom peitorobi jume pepaebiwi										
Tamrópata pítaba xua Persa nakuapin itorobiya peewatsiwa aiña nakuang poxonae po weitha 539.	Daniel										
Ciro pong Persa nakua itorobiya peewatsín, judiomonae kana-exánatsi xua kaewa pekoutha pepatsiwa poxonae 538. (Daniel 6.28)	Hageo, Zacarías										
Tamrópata pítaba xua ekeicha ákaba Nakom piabo tatsi, po bo pin bo, poxonae po weitha 520	Abdías, Malacluías										
Ekeicha pekoutha ákaba xua Jerusalén tómara peyakaincha-yatoxorotadutsiwa 445-443	¿Joel?										

<p>400 A.C.</p>	<p style="text-align: center;">PO DAPAE POXONAE WETA ANTIGUO TESTAMENTO PEWÜNAEYA XUA POXONAE TAMRÓPATA PITABINA PO DAPAE XUA NUEVO TESTAMENTO</p> <p>Alejandro “pong pe-aiñakuín”, jei, éxana xua piamonae pekanamata-xeinaewa Palestina nákuatha poxonae po weitha 333 A.C. Tolomeomonae itorobiya kanamataxeina Palestina nakua. Barapomonae ápara Alejandro pia penawabchü-exaneibiwi tatsi, pia pekanamataxeinaein tatsi, bapong pia pemómoxi susato jiji tatsi. Barapong, pong pekanamata-xeinaein kaena báyatha itorobiya kanamataxeina Egipto nakua. Tolomeomonae itorobiya ewatapona Palestina nakua poxonae po weitha 323 A.C. beya poxonae po weitha 198 A.C.</p>
<p>200 A.C.</p>	<p>Palestina nakua itorobiya kanamataxeina seleucomonae. Barapomonae ápara Alejandro pia penawabchü-exaneibiwi tatsi, pia pekanamata-xeinaein tatsi, bapong pia pemómoxi susato jiji tatsi. Bapong pong pekanamata-xeinaein kaena báyatha itorobiya kanamataxeina Siria nakua. Seleucomonae itorobiya éwata poxonae po weitha 198 A.C. beya poxonae po weitha 166 A.C. Xua Judas Macabeo naba éxana pomonaetha, pomonae piamonae itorobiya takanamataxéinatsi, Palestina nakua itorobiya kanamataxeina Judas piamonae tatsi yawa pia pemómoxi susato jiji tatsi, baríchirü asmoneomonae. Daxita baraxua éxana poxonae po weitha 166 A.C. beya poxonae po weitha 63 A.C. Jerusalén tómara pong pewüng Pompeyo yábara yótaba. Bapong Pompeyo romanomonae pia penawabchü-exaneibiwi tatsi pia pekanamata-xeinaein tatsi. Baxua éxana poxonae po weitha 63 A.C., pewünaeya poxonae Cristo nakatsiwa. Palestina nakua itorobiya kanamataxeina pomonae nakua itorobiya peewatsiwi, pomonae Roma tómara peewatsín itoroba. Kaein bárapo nakua itorobiya peewatsiwi jíwana pewüng Herodes, “pong pe-aiñakuín”, jei. Bapong Herodes itorobiya kanamataxeina Jerusalén tómara poxonae po wei weya 37 beya poxonae po weitha 4, pewünaeya poxonae Cristo nakatsiwa.</p>

PO DAPAE POXONAE NUEVO TESTAMENTO	
D.C. 1	<p>Poxonae Jesús nakatsiwa. Juan, pong jiwi Pebautisabin éxana pia penakuichiwa. Poxonae Jesús bautisábatsi yawa poxonae Jesús kueikueijeji tsurubenáebiya jíwitha.</p>
D.C. 30	<p>Poxonae Jesús tüpa yawa xua poxonae ekeicha asiü. Poxonae Pablo jumekowünta Nakomtha (pong kopiya pewüing Saulo, pong Tarso tomarapín), bara be imoxoyo poxonae 37 po weibe, pepuyaya Cristo penanakatsiwa. Pablo pia penakuichiwa bara be imoxoyo po wei 41 beya poxonae 65 po weibe, dapuyaya xua poxonae Cristo nakatsiwa. Pablo ekeicha jiwi pekübibotha étatsi ichaxota nama imoxoyo tüpaena. Bara be imoxoyo poxonae 65 po weibe dapuyaya xua poxonae Cristo nakatsiwa.</p>

Podapae Dapuyaya Peru Diwesi Beya Pena Diwesi El Período Intertestamentario

Las personas que estudian historia nos dicen cuando sucedieron las cosas que se relatan en el Antiguo Testamento

En la época en que fue escrito el Antiguo Testamento, no había manera de dar fechas que pudieran ser entendidas por cualquier persona del mundo. La forma en que se cuentan los años actualmente, comienza a partir del año en que Jesucristo nació. Por esa razón, cuando leemos año 1978, quiere decir que han pasado 1978 años desde el año en que alguna gente piensa que Jesús nació. (La mayoría de los historiadores creen que Jesús nació unos años antes de eso.) Todo lo que relata el Antiguo Testamento sucedió antes de que Cristo naciera; por eso, actualmente, para dar fechas de aquella época, contamos los años hacia atrás comenzando desde el año en que Cristo nació. A esas fechas se les añaden las letras A.C., que significan antes de Cristo. Por ejemplo, 100 A.C. quiere decir cien años antes de Cristo; y 500 A.C., quinientos años antes de Cristo, o sea cuatrocientos años antes de 100 A.C. Sin embargo, antes de que Cristo naciera, la única forma de dar una fecha era mencionando los años que cierto rey llevaba gobernando algún país. El Antiguo Testamento da fechas de esa manera y, por eso, no podemos encontrar en éste ninguna fecha con las letras A.C.

Las personas que estudian historia han intentado aclarar las fechas de los hechos que se relatan en el Antiguo Testamento. Han logrado encontrar con bastante seguridad los años en que sucedieron la mayoría de las cosas desde la época del rey David en adelante y, más o menos, los años en que sucedieron las cosas desde la época de Abraham hasta David. En cuanto a las primeras cosas que nos relata el Antiguo Testamento, desde la época en que Dios hizo al mundo hasta Abraham, nadie puede dar fechas seguras. Estas son algunas de las fechas en que sucedieron cosas importantes.

Abraham vivió alrededor del año 2000 A.C.

Moisés vivió alrededor de 1400 ó 1300 A.C.

David comenzó a reinar alrededor del año 1000 A.C.

El ejército asirio destruyó Samaria en el año 722 ó 721 A.C.

El ejército caldeo derrotó al rey Joacim en el año 598 ó 587 A.C.

El ejército caldeo destruyó Jerusalén en el año 587 A.C.

El rey Ciro les permitió regresar a los israelitas a Judá en el año 536 A.C.

El profeta Malaquías predicó alrededor del año 400 A.C.

El período de más o menos 400 años entre Malaquías y el nacimiento de Jesús es llamado período intertestamentario; es decir, entre el Antiguo y el Nuevo Testamento.

Los griegos vencen a los persas y comienzan a reinar sobre muchos países del mundo

Lo último que nos relata el Antiguo Testamento es acerca de lo que dijeron e hicieron el sacerdote Esdras, el gobernador Nehemías y el profeta Malaquías. Ellos vivieron hasta, más o menos, el año 400 A.C. Durante aquellos años, los reyes de Persia dominaban muchos países, y también a Judá. Aunque les habían permitido a los israelitas regresar a Judá y reconstruir el templo de Dios y el muro que rodeaba la ciudad de Jerusalén, los israelitas todavía tenían que hacer lo que ordenara el rey de Persia.

Después de Nehemías, quien había sido nombrado gobernador de Judá por el rey Artajerjes de Persia, los reyes de Persia permitieron que los jefes de los sacerdotes fueran también gobernadores de Judá. Esta situación hizo al jefe de los sacerdotes una persona muy importante, y muchos hombres comenzaron a luchar por obtener ese puesto para llegar a ser poderosos, en lugar de quererlo para servir a Dios.

Durante los siguientes cien años los griegos fueron haciéndose cada vez más poderosos. La gente de muchos países comenzó a seguir sus costumbres, y a hablar el idioma griego. Por fin, alrededor del año 330 A.C., Alejandro el Grande, rey de Grecia, conquistó a todos los países sobre los que habían reinado los persas hasta entonces. Pero poco después de terminar de conquistarlos, murió; y como no tenía ningún hijo que ocupara su lugar como rey, los generales de su ejército dividieron en cuatro partes los países sobre los que había reinado Alejandro. Dos de las partes en que dividieron las naciones fueron Egipto y Siria. El general Tolomeo se convirtió en rey de Egipto. Escogió como capital de Egipto al puerto de Alejandría, que el rey Alejandro había construido. El general Seleuco se convirtió en el rey de Siria y de todos los países al oriente de Siria, y escogió a Antioquía como capital de Siria. Como Judá quedaba entre Egipto y Siria, los dos reyes querían hacerla parte del país que gobernaban. En un principio el rey Tolomeo fue quien logró quedarse con ella y Judá formó parte de Egipto por más de cien años.

Tolomeo fue un buen rey y trató bien a los israelitas; permitió que el jefe de los sacerdotes fuera a la vez el gobernante de Judá y no les estorbó para nada en cuanto a su religión. En aquella época muchos israelitas no vivían en Judá, sino en Egipto y en muchos otros lugares. Algunos de ellos ya no podían entender el idioma hebreo en que se hallaba escrito el Antiguo Testamento, porque habían crecido hablando el idioma griego. El siguiente rey de Egipto, hijo de Tolomeo, hizo que algunos israelitas que hablaban griego tradujeran el Antiguo Testamento al griego. Esta traducción, llamaba Septuaginta, fue hecha, según la tradición, alrededor del año 278 A.C. en Alejandría. Muchos israelitas también hablaban arameo, un idioma parecido al hebreo; así que algunos de ellos escribieron una interpretación en arameo del Antiguo Testamento en hebreo. A esta interpretación se les conoce como los Targumes.

Los israelitas que vivían lejos de Judá querían conservar su religión, a pesar de vivir muy lejos del templo de Jerusalén como para ir hasta allá. Así que comenzaron a construir pequeñas iglesias, a las que llamaron sinagogas. Las sinagogas no tenían altares para ofrecerle animales a Dios porque las ofrendas sólo se hacían en el templo. Las sinagogas eran lugares donde los israelitas podían reunirse para

adorar a Dios; allí oraban, leían el Antiguo Testamento y cantaban salmos. Algunos veces un hombre les predicaba un sermón. Si en un pueblo había al menos diez hombres israelitas, ellos construían una sinagoga y se reunían cada semana durante el día de descanso para adorar a Dios. La sinagoga también servía como salón de clases en donde los niños israelitas aprendían a leer el hebreo, para poder estudiar la ley de Dios. Muchos hombres israelitas se dedicaban a estudiar la ley de Dios con mucho cuidado; estos hombres eran llamados rabíes.

Además de los israelitas que vivían en Judá, aun había muchos israelitas que vivían en la parte norte de Israel, llamada Galilea. Sin embargo, en la parte central de Israel vivía mucha gente que no era israelita y era llamada samaritana. La mayoría de los samaritanos eran descendientes de la gente que los reyes de Asiria habían llevado para que vivieron allí cuando conquistaron a Efraín, pero algunos de ellos también tenían israelitas entre sus antepasados. Los samaritanos les ofrecieron ayuda a Zorobabel y a los demás israelitas para reconstruir el templo; pero como Zorobabel no la aceptó, ellos se enojaron con los israelitas. Tiempo después, los samaritanos construyeron su propio templo y tuvieron su propia copia de los libros escritos por Moisés. Ellos comenzaron a decir que su religión era mejor que la de los israelitas que vivían en Judá, y los israelitas, a decir que su religión era la única verdadera. Así fue como los israelitas y los samaritanos se convirtieron en enemigos que se odiaban entre sí.

Antíoco Epífanés reina sobre Siria y trata muy mal a los israelitas

Durante cierto tiempo Judá estuvo bajo el dominio de los reyes de Egipto, pero sucedió que un día Egipto y Siria se empezaron a pelear nuevamente. Así que, en el año 198 A.C., Judá quedó bajo el dominio de Siria. Durante un tiempo los reyes de Siria trataron bien a los israelitas, pero en el año 175 A.C. comenzó a reinar sobre Siria el rey Antíoco Epífanés. Este rey fue muy malo, y les causó muchos problemas a los israelitas. Quiso hacer que todos los que vivían en los países sobre los que reinaba siguieran las costumbres griegas y adoraran a los dioses griegos. Una de la formas en que trató de hacer que los israelitas siguieran las costumbres griegas fue nombrando a un nuevo jefe de los sacerdotes que tratara de hacer que los israelitas hicieran lo que él quería. Así que nombró nuevo jefe de los sacerdotes a un hombre llamado Jasón, que era hermano del jefe de los sacerdotes. Jasón trató de que los israelitas siguieran las costumbres griegas. A algunos de los israelitas les gustaron las costumbres griegas e hicieron lo que Jasón quería; ellos fueron llamados helenistas. Pero otros quisieron seguir obedeciendo las leyes de Dios; ellos fueron llamados asideos.

Tres años después de que Jasón había sido nombrado jefe de los sacerdotes, un hombre llamado Menelao le ofreció mucho dinero al rey Antíoco si lo hacía jefe de los sacerdotes; así que Antíoco nombró a Menelao jefe de los sacerdotes en lugar de Jasón. No podemos estar completamente seguros, pero es muy posible que Menelao ni siquiera haya sido descendiente de Aarón. Esto, naturalmente, hizo que los asideos se enojaran. En cierta ocasión, en que el rey Antíoco y su ejército estaban peleando contra Egipto, los israelitas oyeron un rumor falso de que Antíoco había muerto. Cuando Jasón lo supo, regresó a Jerusalén y se nombró a sí mismo jefe de los sacerdotes otra vez. Pero cuando Antíoco se enteró de la situación,

pensó que todos los israelitas se estaban rebelando contra él, y fue con su ejército a Jerusalén. Entonces mató a muchos israelitas y vendió a otros como esclavos; además, se llevó muchas cosas valiosas del templo a Antioquía, la capital de Siria.

Dos años después, el rey Antíoco y su ejército fueron a pelear otra vez contra los egipcios. Para entonces, los romanos, quienes vivían en el país llamado Italia, habían llegado a ser muy poderosos. Ellos no querían que el rey Antíoco conquistara a Egipto, de modo que enviaron a algunos hombres a reunirse con él para que le dijeran que se regresara a Siria. Antíoco no tuvo más remedio que obedecerlos, pero como le dio mucho coraje, decidió desquitarse con los israelitas. Entonces mandó a uno de sus oficiales, llamado Apolonio, con un ejército a destruir Jerusalén. Los israelitas vieron venir al ejército, pero no esperaban que los hicieran daño porque no habían hecho nada que hubiera a hecho enojar al rey Antíoco. El ejército llegó a Jerusalén el día de descanso, y los soldados mataron a todos los hombres que encontraron y agarraron a muchas mujeres y niños para venderlos como esclavos. También, construyeron una fortaleza cerca del templo y mataron a cualquiera que trató de acercarse al templo. Entonces todos los israelitas que habían logrado escapar de la matanza y de ser capturados, huyeron a otras ciudades, y hasta los sacerdotes abandonaron el templo y huyeron.

Luego el rey Antíoco estableció una ley que le ordenaba a toda la gente que vivía en los países que él gobernaba adorar a los dioses que él adoraba. Según esa ley era un grave delito descansar el día de descanso, circuncidar a los niños o leer las leyes que Dios le había dado a Moisés. Además, mandó a sus funcionarios a todas las ciudades de Judá para que allí construyeran altares a los dioses falsos. Forzaron a la gente a matar animales como ofrenda a los dioses falsos y a comer carne de puerco, y mataron a cualquier persona que desobedeciera alguna de estas leyes. Como todos los de Judá que no eran israelitas ya adoraban a dioses falsos, les parecieron bien esas leyes. También los israelitas que eran helenistas estuvieron de acuerdo en obedecerlas, pues a ellos los gustaban las costumbres griegas. Pero la mayoría de los israelitas eran asideos; muchos de ellos huyeron y se escondieron en el desierto, porque no querían dejar de obedecer las leyes de Dios. Los soldados del rey Antíoco mataron a muchos asideos; llegaron hasta matar a golpes a un hombre llamado Eleazar porque se negó a comer carne de puerco. Una mujer tuvo que presenciar como los soldados torturaban a sus siete hijos hasta matarlos porque no querían hacer lo que las leyes de Dios decían que no debían hacer. Una de las peores cosas que hizo el rey Antíoco fue convertir el templo de Dios en templo de Júpiter, un dios falso. Así que, a partir de diciembre del año 167 A.C., comenzó a ofrecerle animales allí. Llegó hasta meter al templo un puerco para ofrendárselo a Júpiter; eso estaba muy mal porque Dios les había dicho a los israelitas que no debían comer carne de puerco ni ofrecerle puercos. Unos cuatrocientos años antes, el profeta Daniel había predicho que un rey malo haría eso.

La familia del sacerdote Matatías hace algo para mejorar la situación de los israelitas

Unos seis meses después de que el rey Antíoco de Siria empezó a ofrecer animales al dios falso Júpiter en el templo de Dios, un sacerdote israelita llamado

Matatías hizo algo para tratar de mejorar la situación de los israelitas. Un funcionario del rey Antíoco trató de obligarlo a matar un animal como ofrenda a un dios falso, pero Matatías se negó a hacerlo. Así que el funcionario encontró a otro hombre que sí lo hizo; pero Matatías mató a ese hombre, porque las leyes de Dios dicen que los israelitas deben matar a cualquier israelita que adore imágenes. También tiró el altar y mató al funcionario. Entonces él y sus cinco hijos huyeron y se escondieron en el desierto. Poco a poco otros israelitas se les empezaron a unir, pues también querían obedecer las leyes de Dios. Formaron un ejército y empezaron a hacer ataques por sorpresa; iban por la noche a alguna de las ciudades de Judá y destruían los altares de los dioses falsos, circuncidaban a los niños que todavía no estaban circuncidados y mataban a los israelitas y a los funcionarios sirios que querían obligar a los israelitas a adorar a dioses falsos.

Matatías ya era viejo y murió pronto; pero antes, nombró general de su ejército a Judas, su tercer hijo, que era muy valiente. Judas dirigió al ejército israelita a continuar atacando a las ciudades, y hasta llegaron a derrotar a los sirios en tres batallas. La gente comenzó a decirle “Macabeo” a Judas, que quiere decir el martillador, después, a él y a toda su familia les comenzaron a decir “los Macabeos”. También les decían asmoneos, porque así se llamaba uno de sus antepasados.

Después de que los israelitas les ganaron esas batallas a los sirios, Judas pudo regresar a Jerusalén y reparar el templo. Judas y sus soldados tiraron el altar viejo del templo, porque la gente lo había usado para ofrecerles animales a los dioses falsos, e hicieron uno nuevo. Así que en diciembre del año 164 A.C., a los tres años de que el rey Antíoco había empezando a ofrecerle allí animales al dios falso Júpiter, los sacerdotes macabeos le ofrecieron otra vez animales al Dios verdadero. Los israelitas se pusieron muy contentos y celebraron una gran fiesta que duró toda una semana; además, decidieron celebrar la misma fiesta cada año. Esta fiesta es llamada Janukká o fiesta de la dedicación. Cuando el rey Antíoco se enteró de todo lo que había sucedido, se enojó mucho y decidió destruir a todos los israelitas, pero murió antes de poder hacerlo.

Los israelitas tuvieron problemas con otros reyes de Siria. El ejército sirio mató a Judas durante una batalla, y Jonatán, hermano de Judas, quedó como general del ejército israelita. Tiempo después, Jonatán fue también jefe de los sacerdotes y gobernante de Judá; pero un día, alguien lo mató y su hermano Simón, el único que quedaba de los cinco hermanos, se convirtió en nuevo jefe de los sacerdotes y en nuevo gobernante de Judá. Para entonces, los israelitas habían convencido a los sirios de que los dejaran gobernarse por sí mismos y de que no les impidieran practicar su religión. Pero alguien mató a Simón y a dos de sus hijos, y otro de los hijos de Simón, llamado Juan Hircano, se convirtió en jefe de los sacerdotes y en gobernante de Judá. Llegó a ser un hombre muy rico y un gobernante poderoso, y conquistó algunas de las ciudades que rodeaban a Judá, que para entonces era llamada Judea. Entre los que conquistó estaban los idumeos. Ellos eran edomitas que huyeron hacia la parte sur de Judea cuando los árabes invadieron su territorio. El rey Juan Hircano les dijo que decidieran entre seguir la religión israelita o irse de Judea; y como los idumeos decidieron seguir la religión israelita, todos los hombres fueron circuncidados. El último gobernante poderoso de la familia de los asmoneos fue el rey Alejandro Janeo, quien murió en el año 78 A.C.

Como algunos de los asideos querían que Judea fuera un país independiente, apoyaban a los sacerdotes-gobernantes asmoneos. Esta gente llegó a ser conocida como saducea; comenzó a seguir algunas costumbres e ideas griegas. Además, le daban mucha importancia al templo en Jerusalén y a los sacerdotes que trabajaban allí, y pensaban que la mejor manera de adorar a Dios era ofreciéndole animales. No creían en los ángeles ni que la gente pudiera volver a vivir después de morir, y solamente aceptaban, como su libro sagrado, los libros del Antiguo Testamento que Moisés escribió.

Otros asideos pensaban que los gobernantes asmoneos deberían haber dejado de pelear contra los sirios en cuanto éstos fueron convencidos de dejar que los israelitas siguieran su propia religión y sus costumbres. A ellos no les gustaba la manera en que los gobernantes asmoneos se peleaban por llegar a ser rey. Estos asideos llegaron a ser conocidos como los fariseos. Los fariseos estudiaban con mucho cuidado las leyes de Dios y trataban de obedecerlas. También trataban de obedecer algunas costumbres que no tenían que ver con las leyes de Dios y, a veces, pensaban que eran mejores que los demás por hacer eso. A los fariseos les gustaba la nueva costumbre de tener rabinos en las sinagogas, que enseñaran las leyes de Dios. Ellos pensaban que eso era más importante que ofrecer animales a Dios en el templo. Los fariseos aceptaban, no solamente los libros que escribió Moisés, sino todo el Antiguo Testamento, como su libro sagrado, incluyendo los salmos y los libros que escribieron los profetas. También creían en los ángeles y que la gente podía volver a vivir después de la muerte.

La familia herodiana gobierna a los israelitas

En aquella época, dos de los hijos del rey Alejandro Janeo estaban peleando para poder ser el nuevo rey de Judea. Un hombre idumeo llamado Antípatro, que había llegado a ser muy importante en Judea, decidió apoyar al que era menos poderoso, porque él mismo esperaba convertirse en rey en poco tiempo. Para entonces, los romanos, quienes vivían en el país llamado Italia, habían llegado a ser muy poderosos en todo el mundo. En el año 65 A.C. el general romano, Pompeyo, venció a Siria y convirtió en una provincia perteneciente a Roma. Dos años después, Pompeyo atacó a Jerusalén, y los romanos acordaron que fuera rey el hombre que Antípatro apoyaba. En realidad, Antípatro quería ser rey; por eso hizo todo lo que pudo para caerles bien a los romanos. Así que los romanos pusieron a Antípatro como funcionario romano en Judea, y a su hijo Herodes, que es conocido como Herodes el Grande, como gobernador de Galilea. Tiempo después, en el año 40 A.C., los romanos hicieron a Herodes rey de Judea, pero Herodes tardó tres años para conquistar a Jerusalén y comenzar a gobernar sobre Judea. Fue una persona muy mala y cruel. Mató a todos los miembros de la familia de los asmoneos que quedaban, y aun mató a dos de sus esposas y a tres de sus hijos. Además, adoró imágenes y, por eso, los israelitas lo odiaban. Como quería caerles mejor a los israelitas, hizo reconstruir el templo; ya que, además, le gustaba mucho hacer edificios bonitos. Este hombre era rey de Judea cuando nació Jesús, pero murió poco tiempo después.

Arquelao, hijo del rey Herodes el Grande, se convirtió en el siguiente rey; pero fue un rey tan malo que los romanos mandaron a un gobernador que gobernara

Judea en lugar de rey. Pilato, Félix y Festo son los gobernadores romanos que el Nuevo Testamento menciona. Herodes Antipas, otro de los hijos de Herodes el Grande, fue gobernante de Galilea; él fue quien ordenó a sus servidores matar a Juan el Bautista. También fue uno de los que decidió si Jesús merecía ser castigado con la muerte o no. El nieto de Herodes el Grande fue quien mandó matar al apóstol Jacobo; y su bisnieto, llamado Herodes Agripa, fue ante quien habló el apóstol Pablo para defenderse.

Aun cuando los gobernadores romanos y los miembros de la familia herodiana gobernaron Judea y Galilea, estos gobernantes dejaron que los israelitas siguieran sus propias costumbres y su religión. A ellos no les preocupaban estas cosas mientras los israelitas no iniciaran alguna rebelión y no dejaran de pagar sus impuestos. Los romanos no les caían bien a los israelitas, pero la mayoría de ellos pagaban sus impuestos y trataban de llevarse bien con los romanos. Los israelitas acudían a sus propias dirigentes (que eran los sacerdotes, el grupo de hombres que formaba el consejo supremo de los israelitas, llamado Sanedrín, y los rabinos) para que les dijeran qué hacer. Algunos de los israelitas, que querían empezar una rebelión en contra de los romanos, eran llamados zelotes.

Cuando Jesús nació, había israelitas viviendo en todos los países gobernados por los romanos. Muchos que no eran israelitas vieron que la religión israelita era buena, y se comenzaron a dar cuenta que era tonto adorar imágenes. Les gustó la idea de que hay sólo un Dios, y empezaron a pensar que las leyes israelitas mostraban una buena manera de vivir. Así que mucha gente se hizo israelita. Muchos otros no se hicieron israelitas, pero creyeron que hay sólo un Dios y fueron a las sinagogas para adorar a Dios junto con los israelitas.

**Nakom Pejume Diwesi
xua pena jume diwesi xua
Jesucristo yábara tínatsi**

Jesucristo Pía Pexeiña

Jume Diwesi Tatsi Mateo

Petináe Diwesi

Meje yábara pomonae Jesucristo pía pamo susatopiwi tatsi

(Lc 3.23-38)

1 ¹Meje bárapo diwesi Jesucristo pía pamo susatopiwi tatsi yábara. Jesucristo pong Nakom itoroba itaboko wétsika xua jiwi pekapanenebiyaenéxatsi. Bapong Abraham pía pemómoxi susato jíwanapin tatsi. Barapong Abraham pong báyatha kaena tüpa, pong kopiya naebopa po kae pin nákuatha xua israelmonae pomonae judiomonaexae beya pinmonae tsóponae. Matáütano Jesucristo David pía pemómoxi susato jíwanapin tatsi. Barapong David pong báyatha kaena tüpa, pong kaena báyatha Israel nakuapiwi itorobiya pía pepa peewatsinchi.

²Abraham Isaac paxa tatsi. Bapong Isaac Jacob paxa tatsi. Bapong Jacob, Judá paxa tatsi yawa Judá peweicho jiwi, bapongtha kae áxaba. ³Bapong Judá Fares irü Zara paxa tatsi. Tamar Fares pena tatsi irü Zara pena tatsi. Bapong Fares Esrom paxa tatsi. Bapong Esrom Aram paxa tatsi. ⁴Bapong Aram Aminadab paxa tatsi. Bapong Aminadab Naasón paxa tatsi. Bapong Naasón Salmón paxa tatsi. ⁵Bapong Salmón Booz paxa tatsi. Booz pena tatsi pewüing Rahab. Bapong Booz Obed paxa tatsi. Obed pena tatsi pewüing Rut. Bapong Obed Isaí paxa tatsi. ⁶Bapong Isaí David paxa tatsi, po David kaena báyatha Israel nakuamonae itorobiya pía pepa peewatsinchi. Matáütano David pexanto tatsi pewüing Salomón. Bapong Salomón pena tatsi pewüing Betsabé, powa kopiya báyatha Urías xeina.

⁷Bapong Salomón Roboam paxa tatsi. Bapong Roboam Abías paxa tatsi. Bapong Abías Asa paxa tatsi. ⁸Bapong Asa Josafat paxa tatsi. Bapong Josafat Joram paxa tatsi. Bapong Joram Uzías paxa tatsi. ⁹Bapong Uzías Jotam paxa tatsi. Bapong Jotam Acaz paxa tatsi. Bapong Acaz Ezequías paxa tatsi. ¹⁰Bapong Ezequías Manasés paxa tatsi. Bapong Manasés Amón paxa tatsi. Bapong Amón Josías paxa tatsi. ¹¹Bapong Josías Jeconías paxa tatsi, irü Jeconías peweicho jiwi bapongtha kae áxaba. Bapong Jeconías poxonae israelmonae teikaeya kapoinchi Babilonia nakua beya, bárapo jináebotha Jeconías nakatsiwa epatotha.

¹²Bapoxonae pírapae Jeconías tanakatsíwatsi pexanto Babilonia nákuatha. Jeconías Salatiel paxa tatsi. Bapong Salatiel Zorobabel paxa tatsi. ¹³Bapong Zorobabel Abiud paxa tatsi. Bapong Abiud Eliaquim paxa tatsi. Bapong Eliaquim Azor paxa tatsi. ¹⁴Bapong Azor Sadoc paxa tatsi. Bapong Sadoc Aquim paxa tatsi. Bapong Aquim Eliud paxa tatsi. ¹⁵Bapong Eliud Eleazar paxa tatsi. Bapong Eleazar Matán paxa tatsi. Bapong Matán Jacob paxa tatsi. ¹⁶Bapong Jacob José paxa tatsi. Bapong José píowa tatsi pewüing María. Barapowa María Jesús pena tatsi. Bapong Jesús icha wüing wüingdútatsi, po wüing “Mesías”, jei,

po wüing xua jei: “Pong Nakom itoroba itaboko wétsika xua jiwi pekapanene-biyaenexa tsainchi”, jei.

¹⁷Abraham pía xaiña weya tatsi trece póyobe pebiwi nakatsiwa xua Abraham múxunano daxota daxita catorce póyobe nakatsiwa, beya pudukua poxonae David nakatsiwa. Bapong irü Salomón pía xaiña weya tatsi trece póyobe pebiwi nakatsiwa xua Salomón múxunano daxota daxita catorce póyobe pebiwi nakatsiwa beya pudukua poxonae Israel nakuamonae teikaeya kapoinchi Babilonia nakua beya, beya pudukua poxonae Jeconías nakatsiwa. Salatiel pía xaiña weya tatsi trece póyobe pebiwi nakatsiwapona xua Jeconías múxunano. Daxota daxita catorce póyobe nakatsiwa, beya pudukua poxonae Mesías nakatsiwa.

**Meje yábara poxonae Jesucristo nakatsiwa
pebinwüüto bárapo kae pin nákuathe**

(Lc 2.1-7)

¹⁸Poxonae Jesucristo nakatsiwa bara iche: María Jesucristo pena tatsi, poxonae bapowa muxu pepichi pekotsiwa pong pewüing José, poxonae abü kataunxuae jopa periüinakoyabiyo, bapoxonae María pexuyo búpana taékatsi. Bárapo pexuyo Nakom pía Pejumopetünaxü tatsi María tsiperüü weéka éxanatsi. Bárapo pexuyo pewüing Jesús. ¹⁹José, María pía pebin tatsi tsane, poxonae pichina pong pejüntükoyene wüünaein. Daxota bapong José, María jopa be yábara paebichi xua katsa pexuyo pekapoonaexae xua búpana taékatsi xua María aura peexanaenexa tsainchi jiwi peitütha tatsi. Bapoxonae José namicha moyiya najüntükuyoyene baraxuba xua jopa pepichiwa tsane, xua jiwi jopa kataunxuae pekuiyábara yaputaenexa. ²⁰Poxonae kame kataunxuae baxua yábara nantaxeina, José maitúnguataba. Bapoxonae José amachinae tsita naitüütatsi matatsunpin po matatsunpin Nakom itoroba. Matatsunpin namchiya jeye: “José, David pía pemómoxi susato jíwanapin tatsim, jopa junuwinde xua nepichiwa tsane María xua jinsheuri neexanaewa tsane. Tsipéi bárapo pexuyo, po pexuyo nakatsiwina, ápara Nakom pía Pejumopetünaxü tatsi pía pexuyo tatsi. ²¹Bapowa tanakatsíwatsi pexanto. Bapong wüingdutsíname, po wüing ‘Jesús’, jei. Bárapo wüing, wüingdutsíname tsipéi bapong pijimonae kapanepaena xua abe pía peéxanae kuirukoyenein weya tatsi, xua daxota Nakom jopa petsitanéxatsi xua barapomona pexeinaewa penatsikuentsiwa”, jei matatsunpin.

²²Daxita báraxua éxana penakuiyábara jumewetsinexa pokotsiwa báyatha Nakom pía peitorobi jume pepaebin kaena báyatha yábara tsiwüünae muxuduta Nakom nexa, xua jeye:

²³“Matha taema,

yábüyo pexuyo búpana taékatsi powa jopa periüinakoyabiyo pebin.

Yawa tanakatsíwatsi pexanto,

po pexuyo wüingdútatsi,

po wüing ‘Emanuel’, jei”,

jei Nakom pía peitorobi jume pepaebin.

(Bárapo wüing jei: “Nakom naka barü pópona”, jei.)

²⁴Poxonae José nakosataxuba, bapong éxana pokotsiwa matatsunpin itoroba po matatsunpin Nakom itoroba. José María pítatsi. ²⁵Bekein kae botha nabarü popónabe dáichitha jopa kame imoxoyo naperüü kuikuináeyobe beya poxonae pexanto tanakatsíwatsi. José pexuyo wüingduta, po wüing “Jesús”, jei.

**Meje yábara poxonae pomonae opitéi pekayábara wüünae
yaputaewi barapomonae Jesús siwapoinchi xua petaenéxatsi**

2¹ Jesús nakatsiwa Belén tómaratha, Judea nákuatha. Barapoxónaerü Herodes pong Judea nakuapiwi pía peyanakua ewatsinchi pópona bárapo Judea nákuatha. Poxonae Jesús nakatsiwa pebiwi pata Jerusalén tómaratha. Barapomonae opitéi pekayábara wüünae yaputaewi. Barapomonae pía tómara tajü táenatsi ichaxota pokotsiwa xometo weekoina. ²Barapomonae ichawa beya yayáñaba tsíniya, jeye:

—¿Eta xota nakatsiwa pexuyo, po pexuyo judiomonae itorobiya pía pepa peewatsinchi exanaeinchi poxonae piño tsane? Paxang payaputang xua bapong nakatsiwa xote tsipéi bapong pía opiteito tatsi panaitomatsiya puna-enapónang pata nakua wérena, po nákuatha ichaxota pokotsiwa xometo weekoina. Papatang xua pata wüünae jainchiwa tsane bárapo pexuyo, jei.

³Herodes, pong Judea nakuapiwi pía peyanakua ewatsinchi poxonae bapong yábara jumetane xua pexuyo nakatsiwa pong jiwi itorobiya pía pepa peewatsinchi, bapoxonae bapong bichokono ünthüthüdeideije. Írürü Jerusalén tomarapíwino daxita bichokono ünthüthüdeideije pejumetaexae baxua. ⁴Néxata Herodes waba sacerdotemonae pía pentakaponaewi tatsi xua pía petanakaetutsinexa tsainchi piabotha. Irü wábano pomonae jiwi pekuidubiwi Moisés pía peitorobi koyenewa tatsi. Daxita barapomonaetha Herodes yáñaba, jeye:

—¿Eta xota nakatsiwina Mesías, pong bepa pinae Nakom itorobéi? jei Herodes.

⁵Barapomonae jumenota, jeye:

—Bapong nakatsiwina Belén tómaratha, po tómara Judea nákuatha eka. Bapong nakatsiwina bárapo tómaratha, tsipéi Nakom pía peitorobi jume pepaebin kaena býyatha tsiwüünaeya yábara muxudutsiya tina xua Mesías yábara, Nakom nexa. Nakom jeye:

⁶Belén tómara bekein tsiki tomariyo jíwana tómara xua Judea nákuatha, dáichitha Judea nakua pentakaponaewi yábara nantaxeinaena xua Belén tómara peaiñakuí tomariyo tsane.

Baxua nantaxeinaena tsipéi bárapo tomaríyotha nakatsiwina,
pong jiwi pía pekanamataxeinaeinchi tatsi.

Xang Nakom bapong itorobin tamonaetha,

pomonae Israel nakuapiwi,

xua bapong bárapo israelmonae itorobiya pía pepa Peewatsinchi tsainchi',
jei Nakom,

xua Nakom tatínatsi pong Nakom peitorobi jume pepaebin,

jei sacerdotemonae irü pomonae jiwi pekuidubiwi Moisés pía peitorobi
koyenewa tatsi.

⁷Néxata Herodes namicha moyiya waba pomonae opitéi pekayábara wüünae yaputaewi. Herodes yáñaba barapomonaetha: “¿Eta poxonae yatsikaewa bárapo opiteito paka tsita naitüüta?” jei bapong. ⁸Poxonae barapomonae jumenota bapongtha bapoxonae Herodes itoroba bárapo pebiwi Belén tómara beya. Herodes jeye barapomonaetha:

—Papónare Belén tómara beya. Beta wüünaeya pajaire bárapo pexuyo. Poxonae pataebíname bárapo pexuyo, néxata pana netsipáebare, tsipéi xang irü ponaein wüünae tajainchinexa tsanerü bárapo pexuyo, jei Herodes.

⁹Poxonae Herodes najumeweta, bárapo pebiwi bara ponarúkupa, pomonae opitéi pekayábara wüünae yaputaewi. Bapoxonae po opiteito báyatha tane pía nákuatha, bárapo opiteito jemeicha kaewa naitüütaba. Yawa barapomonae matakapoinchi. Bárapo opiteito dukuapona beya matapaiña matatsún dukuatabika ichaxota bárapo pexuyo boka. ¹⁰Poxonae bárapo pebiwi tane bárapo opiteito, barapomonae bichokono jüntükoyene weiweina. ¹¹Barapomonae bo jojoniya ichaxota tane bárapo pexuyo xua penabarü ékatsi, barapowa María. Bapoxonae barapomonae pentabokotongtha ena xua bárapo pexuyo wüünae pejainchinexa tsainchi, tsipéi barapoyo pong Pekanamataxeinaein peexanaexae tsainchi poxonae piño tsane. Bapoxonae barapomonae piáwang koibo ishakapenta xua kajijinka. Bárapo pexuyo katsíbatsi uang pokotsiwa pewüng oro nain. Katsíbatsino xua pokotsiwa pewüng incienso xua pokotsiwa túxusi tuxuéi bénata poxonae tauta éxana. Matáütano múxuna katsíbatsi icha petuxueiwa pokotsiwa pewüng mirra xua pokotsiwa anainkuito. ¹²Bapoxonae pírapae bárapo pebiwi maitumenaeya amachinae xua jopa bewa ekeicha patsi tsane ichaxota Herodes eka. Daxota barapomonae pía nakua beiyiya, icha namto iyiya.

Meje yábara poxonae Jesusbarü panenebiya Egipto nakua beya

¹³Poxonae bárapo pebiwi ponarúkupa bapoxonae Nakom itoroba matatsunpin ichaxota José. Matatsunpin tsita naitüüta poxonae José amachinae. Matatsunpin José baraichi, jeye: “Asiya úngkuare. Pexuyo pire yawa koxíwano. Egipto nakua bebarü naetsiriwiyama. Ékare bárapo nákuatha, beya abü poxonae ekeicha katsipaebinchi baxota. Tsipéi Herodes pexuyo jeitsina pebexubinexa tsainchi pexuyo”, jeichichi José matatsunpin.

¹⁴Poxonae kataunxuae mérawi, José nakosataxuba. José pexuyo pita, yáwano José pita yábüyo María xua pexuyo pena tatsi. Daxita barapóyobe wárapa Egipto nakua beya poxonae kataunxuae kirei tsungkuae. ¹⁵Bárapo nákuatha, Egipto nákuatha, barapóyobe ékabe beya poxonae juiña Herodes tüpa. Baxua José kana éxanatsi xua báyatha Nakom pía peitorobi jume pepaebin petsiwüünae yábara paebixae Nakom nexa xua jeye: “Wabang Taxanto Egipto nakua weya”, jei Nakom pong pía peitorobi jume pepaebin Nakom nexa pong jiwi Pekanamataxeinaeinchi.

Meje yábara poxonae Herodes itoroba, ichamonae itoróbatsi xua pejutebinéxatsi pexui

¹⁶Poxonae Herodes yaputane xua pomonae opitéi pekayábara wüünae yaputaewi muxujaiñabiya tsipaeba bapongtha xua ítara patapaeba, bapoxonae Herodes anaya bichokono anáepana. Néxata bapong itoroba, ichamonae itoróbatsi xua pejutebinéxatsi daxita pexui pebiwiwüütixi, po pexui kataunxuae penkuetixi, po penkuetixi kataunxuae jopa yapu othopaeyo aiña po weibe, irü po pexui xua báyatha yapu óthopa aiña po weibe. Barapong Herodes itoroba xua pejutebinéxatsi bárapo pexui pebiwiwüütixi daxita poxi Belén tómara kuariya beya. Herodes baxua éxana yáitama báyatha pomonae opitéi pekayábara wüünae yaputaewi yopita xua pinae tane pexuyo pía opiteito tatsi bárapo aiña po weibetha poxonae peputha taponae, opiteito peputha tatsi xua jináebotha, poxonae Judea nakua beya pona. ¹⁷Baxua Herodes kanakuiwetsiya éxanatsi, xua báyatha Jeremías pong Nakom pía peitorobi jume pepaebin petsiwüünae yábara paebixae, xua jeye:

18“Jumetang xua wekoyéi Ramá tómaratha,
 po tómará eka imoxoyo Belén tómaratha.
 Powá xua wekoyéi,
 bapowá Raquel,
 powá báyatha tüpa.
 Bapowá Raquel pía pemómoxi susatopiwi siwawekoyéi,
 tsipéi daxita tajutébatsi.
 Barapowá jopá naitanuwekopatsiyo tsipéi pexui báyatha wérapa bekein
 ichamonae jumematawenta”,
 jei Jeremías.

19Herodes bapoxonae pírapae tüpa. Bapoxonae matatsunpin pong Nakom itoroba, José tsita naitúütatsi poxonae José amachinae Egipto nákuatha. Matatsunpin jeye Josetha: 20“Natsixitábare. Pire bárapo pexuyo yawa koxiwa María, pexuyo pena tatsi. Israel nakua beya kaibe nawíyama. Tsipéi báyatha wérapa pomonae ichichipa xua bárapo pexuyo pebexubíwatsi”, jei matatsunpin.

21Bapoxonae José natsixitaba. José pita pexuyo yawa koxiwa. Israel nakua beya kaibe náwiya. 22José jumetane xua juiña pinae Arquelao náexana Judea nakua-piwi pía peyanakuaéwatsin tatsi. Arquelao Herodes pexanto tatsi. Arquelao xuya peyanakuaéwatsin náexana ichaxota báyatha koxiyang peyanakuaéwatsin náexana bapong Herodes. Tsipéi Arquelao eka Judea nákuatha daxota José junuwa xua peponaewa bárapo nákuatha. Daxota José pona Galilea nakua beya, tsipéi poxonae amachinae matatsunpin itoroba xua bewa pinae ponaena bárapo nákuatha. 23Poxonae José patopa bárapo nákuatha, bapoxonae pópona po tómaratha, po tómará pewüing Nazaret tómará. Baxua José kanakuiwetsiya éxanatsi, xua báyatha Nakom pía peitorobi jume pepaebiwi Jesús kayábara tsiwüünae muxudutsiya jeye: “Bapong wüingdutinchi po wüing jei: ‘Nazaret tomarapin’, jei”, jei bárapo Nakom pía peitorobi jume pepaebiwi.

**Meje yábara poxonae Juan, pong jiwi Pebautisabin jiwi,
 kuiduba ira xuépana susato tsúrukuae nákuatha**

(Mr 1.1-8; Lc 3.1-9,15-17; Jn 1.19-28)

3 1Pírapae poxonae aiña wei yapukaewa, poxonae abü kataunxuae Jesús eka Nazaret tómaratha, bapoxonae Juan pong jiwi Pebautisabin patopa ira xuépana susato tsúrukuae nakua beya xua Judea nákuatha. Bapong Juan Nakom Pejume Diwesi paeba dukuanaebiya. 2Juan namchi: “¡Icha jüntükoyene paxéinare Nakomtha paiña neáuraxae xua abe paéxaname! Tsipéi Nakom paka waba paiña nenaexanaenexa piamonae tatsi jíwana pomonae Nakom itorobiya peewatsixae”, jei Juan.

3Bárapo Juan ápara bapong pong kaena báyatha peyábara tinaexaetsi. Isaías pong Nakom pía peitorobi jume pepaebin, bapong kaena báyatha yábara jume-wüünaeya tina, xua kaena báyatha Juan yábara jumewüünaeya tínatsi. Isaías jeye:

“Jumetang pong wawái po ira xuépana susato tsúrukuae nákuatha.

Bapong wawaya jeye: ‘Patsinajüntükuikoyene wüünaere pong jiwi pía pepa Pekanamataxeinaeinchi pía pepatopáe wüünaeya tsane’,

jei pong wawái”,

jei Isaías petináe diwésitha.

⁴Juan jumaina duwein nabókoto, po duwein pewüng camello. Koreiña bókoto maraina. Juan xane pokotsiwang yapupuna, pokotsiwang be sure, matáütano bana dáebano. ⁵Jiwi pata Jerusalén tómara weya, írürü pata xua daxita tomarangpiwi xua Judea nakua weya, írürü pata po tomarangpiwi xua imoxoyo Jordán mene weya. Barapomonae pata Juan pejumetaenéxatsi. ⁶Poxonae barapomonae nayopita Nakomtha xua bepa pinae Nakom tsita áuratsi, xua abe peexanaexae, barapoxonae Juan bautisaba barapomonae Jordán ménetha.

⁷Íchitha poxonae Juan tane xua nawita pata fariseomonae jíwana írürü xua saduceomonae jíwana pata ichaxota Juan bautisaba, Juan jeye barapomonaetha: “¡Paxam pomonae pemuxuíróbi jiwi pam! ¡Paxam be bara jomomonae pam, tsipéi jomo ba kuitaya dúkúpa nawa! Bara paichim ánoxuae, paichichípame Nakom pakuitaya dúkúpame xua abe paka exanaeyainwa. Jopa papanenébiyaem tsane bekein bara paka bautisabinchi tsipéi jopa pajüntükoyene wüünaem Nakomtha. ⁸⁻⁹Xaniwaicha pajinómpare xain ichamonae paka kuitane, xua icha jüntükoyene paiña nexeiaewa Nakomtha xua paiña neáuraxae xua abe paéxaname. Tsipéi bekein paxam pajam: ‘Waxainchi Abraham pía pemómoxi susato jíwichixaetsi Nakom naka kapanenebiya tsane’, pajam, dáichitha paxam jopa xaniwaicha pajumekowüntsím Nakom. Daxota Nakom itakúüpa-tsi xua paka kuimatawenta pía jopa paka nepaka kapanenebiyaenexa tsane. Matáütano barichino Nakom itakúüpa-tsi xua jiwi forotsinchi bárapo ibótixi weya, po ibótixi xote Jordán mene itapatha bobena. Bárapo jiwi naexanaena, po jiwi yatsikaewa Abraham pía pemómoxi susato jiwi tatsi, pomonae pejumekowüntsiwixaetsi Nakom. ¹⁰Poxonae pebin naein üba, sipari ba kanakuiwüünaeta xua pekaukubobinexa po naein jopa nakoichiyo. Poxonae bárapo naein ukuboba nantatsún eta xua petautsinexa ishótotha. Paxam bara paka jüta ichiya paka kana exanaena. Nakom paka yábara nakuiwüünaeta xua paka bebái tsane ishótotha, ichaxota po ishótotha jopa kuinaya itakounayiyo tsipéi Nakom jopa wüünaeya pata exanaem. ¹¹Xang xaniwaicha paka bautisábatsi mératha paiña neáuraxae xua abe paéxaname xua daxota icha jüntükoyene paiña nexeiaewa tsane Nakomtha. Paka bautisábatsi mératha, íchitha nama pong tsiwanaya patopang, ápara bapong Mesías. Bapong paka bautisabina Nakom pía Pejumopetünáxütha tatsi poxonae Nakom paka najumopekatsibina. Bapong paka jíwana kuikopatsinchi xua átene tsane Cristo pejumekowüntsi-xaetsi xua ichamonae átene exanaena. Bapong bichokono peayapusúü itorobi koyenewa xeina beyakaincha xang. Bapong pong jiwi pía Pekanamataxeinaeinchi. Daxota bapong bichokono tsita pin ura xeinang xua tataxumúü ishana-xubiwa tsane pía penataxuxatatsiwa tatsi. Tsipéi xang bichokono tapawin, beyakaincha pomonae amanaya petanakuichiwi pía pentakaponaewi poxonae barükui-iturajina pía pentakaponáewichi. ¹²Bapong pong patopaena bapong báyatha tsinakobenata po papárato xua trigoxú nexa. Bapong trigoxú tsanaya seikaya matapepe jehebapona. Trigoxú jehebapona trigoxú matabohta. Matapepe jehebapona petautsinexa ishótotha, ichaxota po ishoto jopa kuinaya itakounayiyo. Bapong bara jüta kana ichi tsane jíwitha icha trigoxú kana ichiya ichi. Jiwi Nakom tsana nobina pomonae pejumekowüntsixaetsi pía nákuatha nexa. Ichamonae tsana nobinchi pomonae jopa pejumekowüntsíwichi, petautsinexa ishótotha ichaxota xua jopa itakounayiyo”, jei Juan.

Meje yábara poxonae Jesús bautisábatsi

(Mr 1.9-11; Lc 3.21-22)

¹³Néxata Jesús patopa ichaxota Juan ungkua Jordán ménetha xua Galilea nákuatha. Jesús patopa xua Juan pebautisabinexa tsane. ¹⁴Kopiya Juan juntukuru jumematawenta xua Jesús pebautisabíwatsi tsainchi tsipéi anakuikaura. Juan jeye Jesustha:

—Xang ápara pong xua tanantawenonaewa xua xam bewa jame tana nebautisabiwam tsane. Nama xang jopa bewa kabautisabi tsainchi, jei Juan.

¹⁵Íchitha Jesús jumenota:

—Ánoxuae bara ‘je’ jande pokotsiwa xua xaniwaicha, pokotsiwa ichichipang pokotsiwa xua wüünae éxanatsi pokotsiwa xua Nakom naka itoroba, jei Jesús.

Bapoxonae Juan jumejéi xua Jesús bautisábatsi. ¹⁶Néxata poxonae Jesús bautisábatsi, Jesús naiña mene wejuina. Bapoxonae naiña peitaboko nayausanaxuba. Jesús tane xua Nakom pía Pejumopetünaxü tatsi Jesús tapatopéikatsi, be topiboto yaruneika. ¹⁷Bapoxonae Jesús jumetane pokotsiwa peitaboko wetsipaebíkatsi, jeichichi: “Bapong ápara Taxanto, pong bichokono antobein, pong itapetang. Bapong nejüntükoyene weiweina éxana”, jei Nakom.

Meje yábara poxonae Jesús jüntükoyene jüjútatsi kaurimonae pía pentakaponaein tatsi xua Jesús abe koyeneya petaxanaenexa tsane

(Mr 1.12-13; Lc 4.1-13)

4 ¹Néxata Nakom pía Pejumopetünaxü tatsi Jesús matakáyatsi ira xuépana susato tsúrukuae nakua beya. Baxotiya kaurimonae pía pentakaponaein tatsi Jesús piraichi jüntükoyene jüjútatsi xua Jesús abe koyeneya petaxanaenexa tsane.

²Jesús jopa nabanaeyo baraxotiya cuarenta po matakábibe yawa cuarenta po merawibe. Poxonae bárapo matakabin yapukaewa bapoxonae Jesús bichokono jainpa. ³Kaurimonae pía pentakaponaein tatsi imoxoyo Jesús kakuita unguatábatsi. Bapong Jesús piraichi jüntükoyene jüjútatsi xua Jesús abe koyeneya petaxanaenexa tsane. Bapong Jesús baraichi:

—Icha xam yatsikaya Nakom Pexantom, netsita-itüüre. Bárapo ibótong itoróbare xain pan naexanapenta, jei kaurimonae pía pentakaponaein tatsi.

⁴Íchitha Jesús jumenota:

—Nakom Pejume Diwésitha namchi: ‘Jopa metha bepa meisha jiwi betiya unajinompae tsipae pan. Bara irü yáwano Nakom Pejume Diwésitha jiwi betiya yajüntükuikoyeneya jüntemiya jinómpatsi’, jei Nakom Pejume Diwésitha, jei Jesús.

⁵Néxata kaurimonae pía pentakaponaein tatsi Jesús matakapoinchi Jerusalén tómara beya. Baxotiya Jesús Nakom pin piabotha pentatupa beicha kapoinchi.

⁶Kaurimonae pía pentakaponaein tatsi Jesús baraichi, jeye:

—Icha bara xaniwaicha Nakom Pexanto tatsim, wenaxoreinke. Yáitama tsipéi Nakom Pejume Diwésitha namchi, jeye:

‘Nakom itorobina pía matatsunpiwi nekayanabinexa.

Bárapo matatsunpiwi asiya kawaetaboutsina pekóbeta,

xua jopa nekataxu tsakitungkuaenexa tsane ibótotha,

poxonae wenaxorékame’,

jei Nakom Pejume Diwésitha,

jei kaurimonae pía pentakaponaein tatsi.

⁷Jesús jumenota, jeye:

—Barichi Nakom Pejume Diwésitha namchi, jeye: ‘Jopa jüüntükoyene jüjütsiya wüükaeinde Nakom pong jiña Nekanamataxeinaein, xua nekajumejejeiwa tsane xua nekayawenaewa tsane poxonae jopa xapain exanaem’, jei Nakom Pejume Diwésitha, jei Jesús.

⁸Ekeicha kaurimonae pía pentakaponaein tatsi Jesús matakapoinchi ichaxota po demuxuwa bichokono atororo. Baraxotiya Jesús tsita itúütatsi daxita nákuang xua bárapo kae pin nákuathe. Matáütano Jesús tsita itúütatsi daxita nákuang pía peitüpanáe koyenewang. ⁹Kaurimonae pía pentakaponaein tatsi Jesús baraichi, jeye:

—Ichaunxuae nentabokototha unguáename taitabaratha, xua matáütano ichaunxuae newüünae jaintsíname xua nenantaxeináewaxae xua xang jiña takakanamataxeinaeinchi. Bapoxonae bárapo nákuang yawa múxuna nákuang pía peitüpanáe koyenewang, baxuang kakatsinchi xua jiña nekanamataxeinaenexa bárapo nákuang, jei kaurimonae pía pentakaponaein tatsi.

¹⁰Néxata Jesús jumenota:

—Xam pong kaurimonae pía pentakaponaem, bara nexubiríware. Yáitama Nakom Pejume diwésitha namchi, jeye: ‘Meisha wüünae jainde jiña Nekanamataxeinaein pong Nakom. Meisha bapong yatsikaewa taexande pokotsiwa kaitoroba’, jei Nakom Pejume Diwésitha, jei Jesús.

¹¹Bapoxonae kaurimonae pía pentakaponaein tatsi Jesús pía xaiña weya tatsi napítaba. Matatsunpiwi pata ichaxota Jesús xua pekuimatateikaenexa tsainchi, matáütano xua peapatsinexa tsainchi.

Meje yábara poxonae Jesús tamrópata pítaba pía penakuichiwa Galilea nákuatha

(Mr 1.14-15; Lc 4.14-15)

¹²Poxonae Jesús jumetane xua Juan jiwí pekübibotha eka, bapoxonae Jesús pona Galilea nakua beya. ¹³Íchitha Jesús jopa ekaeyo Nazaret tómaratha, jame saya pona Capernaum tómara beya xua baxotiya pepoponaenexa. Bárapo tómara eka, Galilea pukua itapatha ichaxota aiña nákuabe nakakuita ékabe po nákuuyo pewüng Zabulón nákuuyo, yawa po nákuuyo irü pewüng Neftalí nákuuyo. ¹⁴Pokotsiwa Jesús éxana poxonae Capernaum tómaratha pópona, baxua Jesús yábara nakuiwétatsi xua kaena báyatha Nakom pía peitorobi jume pepaebin, pong Isaías, pekayábara kuiwüünae tsiwüünaeya tinaexae poxonae jeye:

¹⁵“Po aiña nákuabe pewüng Zabulón nákuuyo matáütano Neftalí nákuuyo marmene kakuita ékabe,

Jordán mene jumawérena ichaxota Galilea tómara ichaxota jinompa pinmonae,
pomonaem jopa judiomonaeyo.

¹⁶Barapomonaem kaena báyatha jopa yaputaeyo Nakom,

matáütano kaena báyatha jopa nayábara yaputaeyo xua muxu bara nama pewerapaeba abe peexanaexae.

Daxita barapomonaem be pókotsi jiwimonaem poxonae pona pekiréiwatha xua poxonae matáütano jopa xeinaeyo xua penatsíwana itiyobiwa.

Dáichitha daxita barapomonaem nama jumekowüntsina,
xua jumekowüntsинchi pong Nakom itoroba.

Bapong barapomonae jüntükoyene babatsiya beta jinompaeya exanaeinchi ichi be jiwi ichi xua poxonae pin pekóichatha jinompa”,
 jei Isaías,
 pong Nakom pía peitorobi jume pepaebin.

¹⁷Bapoxonae Capernaum tómaratha Jesús tamrópata pítaba xua jiwi kuidúbatsi. Jesús namchi, jeye: “Icha jüntükoyene paxéinare Nakomtha, paiña neáuraxae xua abe paéxaname. Tsipéi Nakom paka waba paiña nenaexanaenexa piamonae tatsi pomonae Nakom itorobiya peewatsixae”, jei Jesús.

**Meje yábara poxonae Jesús waba cuatro póyobe pebiwi,
 pomonae duwéi peyamaewi**

(Mr 1.16-20; Lc 5.1-11)

¹⁸Jesús pona Galilea pukua itapatha. Jesús tane pongbe aiña kaepi pewéichobe. Ichüng pewüing Simón pong icha wüingno Pedro. Irü ichüng pewüing Andrés. Bapongbe duwéi peyamaeinbe. Bapongbe ménetha yamonáuyabe duwéi pokotsíwatha xua peyamaewa. ¹⁹Néxata Jesús baraibe bapongbe, jeye:

—Anetha, pana nepunapondebe. Paka kuidubínchibe. Ánoxuae nama xang paka itorobínchibe xua pinmonae payawenáenamebe xua barapomonae pejume-kowüntsiwa tsane Nakom icha báyatha páichimbe poxonae payamónamebe duwéi nawita, jei Jesús.

²⁰Naiña kaena barapongbe peyamaewang xubótabe. Napunapónabe ichaxota Jesús pona.

²¹Bapoxonae pírapae Jesús tane ichüngbe, pongbe aiña kaepi pewéichobe. Ichüng pewüing Santiago. Irü ichüng pewüing Juan. Bapongbe Zebedeo pexántobe tatsi. Bapongbe jératha paxa barü ékabe. Bapongbe peyamaewang nakui-wüünaetáyabe. Jesús waba, bapongbe wabatsibe. ²²Kaena naiña jera xubótabe matáütano paxa kuenta pónabe. Bapongbe Jesús punapóinchibe.

Meje yábara poxonae Jesús pin bicheitomonae kuiduba

(Lc 6.17-19)

²³Jesús pópona dukuaeta daxita Galilea nakua beya. Bapong kuiduba dukuaeta daxita judiomonae pía penakaetutsi bongtha tatsi. Jesús paeba dukuaeta Nakom pía pexeña jume diwesi tatsi, po diwesi yábara xua Nakom waba jiwi, petanaexanaenéxatsi piamonae pomonae Nakom jüntükoyene itorobiya éwata. Matáütano Jesús axaibi éxana jiwi xua daxita karepaya xoxi átene barapomonae yawa xua pomonae faefaena peatenexae. ²⁴Pin bicheitomonae jiwi jumetane daxita karepaya Siria nákuatha xua juiña Jesús itakúüpatsi jiwi axaibi éxana. Pomonae pejumetaexae xua Jesús éxana, barapomonae kápona daxita pomonae domáebatsi, yawa pomonae peatenexae, irü pomonae yakauríbatsi, irü pomonae amaméibatsi, irü pomonae múübatsi. Jesús axaibi éxana daxita barapomonae. ²⁵Pin bicheitomonae jiwi Jesús punapoinchi pomonae Galilea nakua weya pona. Írürü Jesús punapoinchi pomonae Decápolis nakua tómarang weya pona, írürü pomonae Jerusalén tómara weya pona, írürü pomonae Judea nakua weya pona. Írürü Jesús punapoinchi pomonae jinompa ichaxota po nakua eka imoxoyo Jordán ménetha xua icha muxunénetha xua tajüthiya.

Meje yábara poxonae Jesús kuiduba jiwi demuxuwatheicha

5¹Poxonae Jesús tane bárapo pin bicheitomonaе, bapoxonae Jesús pona demuxúwatha. Matáütano Jesús baxoteicha eka. Bapoxonae Jesús pijimonaе matawakaicha nakaetutarükúpatsi pomonaе pía pepunaponáewichi. ²Jesús tamrópata pítaba xua diwesi kuiduba bárapo pin bicheitomonaе.

Meje poxonae Jesús yábara kuiduba pomonaе pejüntükoyene weiweináe jiwi

(Lc 6.20-23)

³Jesús barái bárapo pin bicheitomonaе pomonaе pijimonaexae tatsi, jeye: “Maisha bichokono jüntükoyene weiweina pomonaе yaputane xua Nakom pekanantawenonáewatsi xua wüünaе pejinompaewa tsane. Tsipéi barapomonaе naexanaena Nakom piamonaе, pomonaе Nakom jüntükoyene itorobiya éwata.

⁴”Maisha bichokono jüntükoyene weiweina pomonaе bekein anthüthürewе xua siwawekoyéi petaexae xua ichamonaе abe kana éxana jíwitha. Dáichitha barapomonaе Nakom kuimatateikaena, barapomonaе kuimatateikaeinchi xua anthüthürewе, xua ichamonaе siwawekoyeichi.

⁵”Maisha bichokono jüntükoyene weiweina pomonaе Nakom bichokono pebarükui-iturajináewatsi xua jopa Nakom yábara ajüntükoyenetsákatsi. Barapomonaе nama patsina pena íratha po ira Nakom báyatha yábara paeba.

⁶”Maisha bichokono jüntükoyene weiweina pomonaе xua nawita xua exaneiba xua Nakom ichichipa, pexeinaenexa tsane pejüntükoyene wüünaewa Nakomtha xua Nakom jopa petsitanéxatsi xua barapomonaе pexeinaewa penatsikuentsiwa xua abe peexanaexae bapongtha. Barapomonaе yawénatsi, Nakom yawena xua barapomonaе pexeinaenexa tsane bárapo koyene.

⁷”Maisha bichokono jüntükoyene weiweina pomonaе nantanuweya pekayábara kuikanantaxeinaewi xua ichamonaе peyawenaenéxatsi. Barapomonaе xuya Nakom nantanuweya kayábara kuinantaxeinaena xua peyawenaenexa tsane.

⁸”Maisha bichokono jüntükoyene weiweina pomonaе pejüntüxeikae jiwi xua pomonaе jopa pekayábara nantaxeinaexae abe peéxanae kuirukoyene. Barapomonaе Nakom nekotsinchi.

⁹”Maisha bichokono jüntükoyene weiweina pomonaе jüntema pejinompaexae xua peyawenaexae xua irü ichamonaе jüntema jinompa peexanaexaetsi pomonaе kopiya abe nata exaneiba. Barapomonaе pomonaе jüntema pejinompaexae Nakom únuta ‘Tapexuí’, jei Nakom.

¹⁰”Maisha bichokono jüntükoyene weiweina pomonaе bekein bara aperüütane exainchi matáütano bekein bara anthüthütane exainchi, xua amsiya xaniwaicha peexanaexae pokotsiwa Nakom itoroba. Barapomonaе nama Nakom pijimonaе tatsi naexanaena pomonaе Nakom jüntükoyene itorobiya éwata.

¹¹”Maisha bichokono pajüntükoyene weiwéiname poxonae bekein bara ichamonaе abeya paka yábara paeba, poxonae bekeinno abe pákata éxana, matáütano poxonae bekeinno kanaerabiya paka yábara paeba tapaneantobemxaem. ¹²Pajüntükoyene weiwéinare. Matáütano jüntema painómpare tsipéi Nakom paka katsina pía pexeiña peitüpanaewang pokotsiwang Nakom paka júntüna jeba pía nakuatheicha. Icha ichamonaе abe pákata éxana payábara nantaxéinare, matha

kaena barichi poxonae ichamonaе abe éxana pomonaetha, pomonaе Nakom pía peitorobi jume pepaebiwi. Barapomonaе kaena báyatha jinompa poxonaе paxam kataunxuae jopa pajinompaem”, jei Jesús.

**Meje yábara poxonaе Jesús diwesi paeba xua sarebeno
yawa xua pekoicha yábarano**

(Mr 9.50; Lc 14.34-35)

¹³Ekeicha Jesús barái bárapo pin bicheitomonaе, pomonaе pijimonaexae tatsi jeye: “Sarebeno bara beno wüünae. Íchitha icha bárapo sarebeno jopa abenataeyo bapoxonaе jopa peitakiüüpáewatsi xua ekeicha peabenataewa. Bapoxonaе jiwi bárapo sarebeno xuba íratha. Matáüta saribeno taxunáunaba íratha. Paxam pomonaе tamonaе pam be bara jütiya ichiya pam, icha sarebeno kana ichichi. Paxam payawende jiwi pomonaе jinompa bárapo kae pin nákuathe xua daxita jiwi jopa abe peexanaewa tsane. Íchitha icha barapomonaе jopa xapain payawenaem tsane, Nakom bara paka bebái tsane. Tsipéi jopa wüünae pam, Nakom bara paka bebái tsane icha jiwi ichi poxonaе bebái sarebeno matáüta xua saribeno taxunáunaba, tsipéi jopa abenataeyo.

¹⁴”Icha pekoicha ichi poxonaе pentha xua poxonaе baxota jiwi yawénatsi, paxam bara jüta ichiya paichim poxonaе beta painómpame. Barapókotsi koyenéwatha jiwi payawéname xua beta jinompa. Po tómara ba demuxúwatha eka, bárapo tómara ba jiwi tajü tane. Bara paka yábara jüta koyene ichi, jiwi paka tane xua poxonaе beta paiña nejinompaewa. ¹⁵Jintong damong ba aibi xua pong pekoicha koicha éxana xua po pekoicha matakatsinexa korótotha. Jame, asiya koicha éxanatsi xua pekoichataenexa pomonaе bomüxütha ena. ¹⁶Bara paka yábara jüta koyene ichi xua jiwi peitabaratha tatsi. Beta painómpare xua jiwi paiña nepaka kataenexa xua wüünaeya paéxaname paiña neantobemxae Nakom. Bapoxonaе bárapo jiwi Nakom wüünae jainchinchí, pong paiña Axa, pong itabókotha eka”, jei Jesús.

**Meje yábara poxonaе Jesús jiwi yábara kuidúbatsi
Moisés pía peitorobi jume diwesi**

¹⁷Ekeicha Jesús barái bárapo pin bicheitomonaе, pomonaе pijimonaexae tatsi, jeye: “Jopa panantaxeinaeinde xua xang patopeikang xua ápara Moisés pía peitorobi jume diwesi takana-exanaewa tsane xua jiwi jopa ekeicha pekanantawenonaewa tsane bárapo Moisés pía peitorobi jume diwesi xuano irü bara kana ichin tsane pomonaе Nakom pía peitorobi jume pepaebiwi pía pekuidubiwang tatsi. Jame ápara patopeikang tanayábara jume kuiyábara wetsinexang tsane pokotsiwa kaena báyatha neyábara tsiwüünae paeba po diwésintha Moisés pía peitorobi koyenewa tatsi, írüno Nakom pía peitorobi jume pepaebiwi pía penakuidubiwang jumeintha. ¹⁸Bara xaniyeya paka tsipáebatsi poxonaе kataunxuae bárapo itaboko dukue, matáütano poxonaе kataunxuae bárapo ira dukue, Moisés pía peitorobi diwesi jopa werawérakae tsane. Matáütano jopa kae itanétiyo aichúrukuae tsane beya poxonaе wétsina pokotsiwa báyatha Nakom tsiwüünae yábara paeba xua wetapaeba. ¹⁹Pong yábara nantaxeina pekuidubinexa ichamonaetha xua tsita jume itaxexénatsi Nakom pía peitorobi koyenewa bekein saya po peitorobi koyenéwiyo peya

itorobi koyenéwiyo, bapong xuya, Nakom pía nakuatheicha kana jüntüküf itaxxenekaeinchi. Íchitha nama pomonae kuiduba ichamonaetha Nakom pía peitorobi koyenewang, matáütano xua éxana pokotsiwa Nakom itoroba, barapomonae peaiñakuí jiwi tsane Nakom pía peitorobi nakuatheicha tatsi. ²⁰Paka tsipáebatsi jame bewa jüntükoyene wüünae paexaneibíname ichamonaetha be pókotsi koyeneya xua Nakom paka itoroba, beyakaincha poxonae éxana pomonae pekuidubiwi Moisés pía peitorobi koyenewa tatsi, matáütano xua poxonae beyakaincha jinompa fariseomonae. Icha jopa yatsikaewa beta jüntükoyene wüünae paexanaem tsane beyakaincha xua poxonae barapomonae ítara mexeya wüünaeya éxana, jopa papatsim tsane Nakom pía peitorobi nakua beicha tatsi”, jei Jesús.

**Meje yábara poxonae Jesús yábara kuiduba
xua peanaepanáe kuikoyene**

(Lc 12.57-59)

²¹Ekeicha Jesús barái bápapo pin bicheitomonae, pomonae pijimonaexae tatsi, jeye: “Paxam pajumétáneme pokotsiwa Moisés namchi paiña amo susato jíwitha, jeye: ‘Jopa ichüng anaya bexubinde. Tsipéi pong xua ichüng bexotsi, ichamonae yábara paebina xua bapong natsikuenta xua abe peexanaexae’, jei. ²²Íchitha nama seikaya paka tsipáebatsi xua pong kaseba ichüngtha xuya ichamonae yábara paebina xua bapong natsikuenta xua abe peexanaexae. Írürü pong biatane ichüngtha xuya ichamonae yábara paebina xua bapong natsikuenta xua abe peexanaexae. Pomonae pekanamatakaitorobi bicheito bapong yábara paebinchi xua bapong natsikuenta tsipéi bapong bichokono ünthüthü anáepana. Matáütano írürü pong namchi xua ichüng jeichichi: ‘Xam nabenékame’, jei pong, bapong xubinchi po nakua beya ichaxota ishoto bápána jopa itakounayiyo.

²³⁻²⁴”Ekeicha paka tsipáebatsi. Ichakuitha ichüng duwein bekápona ichaxota xua be pexaethopaewa xua túxusi éxana Nakom nexa poxonae tauta. Poxonae kataunxuae jopa exanaeyo baxua, matha kopiya tsiwanaya yábara nantaxeinaena pokotsiwa icha metha býatha abe éxana ichüngtha. Matha be ichi tsane meje xuaje: Bü abü kataunxuae bota pokotsiwa pía pekatúxusi exanaewanexa xua Nakom nexa. Matha kopiya bewa ponaena ichüng beya xua pía penaitakoxone exanaewa tsánebe. Bapoxonae bapong kaibeya bewa ponaena xua duwein petúxusi exanaewa tsane Nakom nexa poxonae tauta.

²⁵”Icha ichamonae be paka itoroba paka nekakaponaenexa pongtha pong jiwi peyábara paebin penatsikuentsiwa, néxata patsipáebare barapomonae, poxonae kataunxuae námtotha paka barü pona xua paiña nenaitakoxone exanaewa tsánebe. Xain bapoxonae barapomonae jopa paka kaponaebe tsane pongtha pong jiwi peyábara paebin penatsikuentsiwa. Tsipéi icha barapomonae bara beya paka kaponáetsipa, bapoxonae pong jiwi peyábara paebin penatsikuentsiwa ekeicha dabeya policiamonae beya paka itorobíchipa. Bapoxonae nama policiamonae jiwi pekübibó beya paka itorobíchipa. ²⁶Bara xaiñeya paka tsipáebatsi. Paxam jopa paka pukópabi tsane jiwi pekübibó weya, beya abü poxonae pana pumatomakáename daxita parátixi kuntha po parátixi xua paxéiname”, jei Jesús.

**Meje yábara poxonae Jesús yábara kuiduba xua jintong pita,
powa ichüng píowa tatsi, powa bekein piseuri xeina taetha**

²⁷Ekeicha Jesús barái bárapo pin bicheitomonae, pomonae pijimonaexae tatsi, jeye: “Paxam pajumetáneme xua Moisés pía peitorobi koyenewang xua jeye kaena báyatha: ‘Jopa ichowa pichinde pong ichüng píowa tatsi, powa piseuri xeina taetham’, jei Moisés. ²⁸Íchitha nama xang paka tsipáebatsi. Icha pebin tane petsiriwa, yawa nantaxeinaeya jeye: ‘Barapowa ichichipang taishamaitungkuaewa tsane, bekein bapowa jopa taseuriyo’, jei, bapoxonae barápara abe éxana Nakomtha, icha be pókotsi koyene ichi, poxonae pita yabüyotha powa jopa bekein piséuriyo tatsi.

²⁹”Bara xaniyeya paka tsipáebatsi. Icha po itamaikeito paiña nekoxa wérena dukua icha bárapo itamaikeito paka éxana xua abe paiña neexanaewa tsane panaitamaikéí júkuare, bárapo itamaikeitong yawa tajü beya pabébande. Metha wüünae xua paiña nebebeiwa tsane kae itamaikéitoxi xua Nakom pía nakua beicha kae itamaikéitoxi paiña neyawa patsinexa. Baxua jame wüünae yatsikaewa, beyakaincha xua poxonae paiña pepong ompin paka bebái tsane ichaxota po nákuatha ishoto bápana jopa itakounayiyo. ³⁰Barichi icha paiña nékobe, pokobe paiña nekoxa weya, icha bárapo kobe paka éxana xua abe paiña neexanaewa tsane panakobe ukubóbare, yawa tajü beya pabébande. Metha wüünae xua kae kobexi paiña nebebeiwa tsane, xua kae kobexi paiña neyawa patsinexa Nakom pía nakua beicha. Baxua jame wüünae beyakaincha xua poxonae paiña pepong ompin paka bebái tsane ichaxota po nákuatha ishoto bápana jopa itakounayiyo”, jei Jesús.

**Meje yábara poxonae Jesús yábara kuiduba
xua jiwi piséurixi pepunapenteibiyainwa**

(Mt 19.9; Mr 10.11-12; Lc 16.18)

³¹Ekeicha Jesús barái bárapo pin bicheitomonae, pomonae pijimonaexae tatsi jeye: “Kaena báyatha Moisés pía peitorobi jume diwésitha namchiya jeye: ‘Pong punaxuba píowa peachaxaibixae xua pokotsiwa bapowa éxana, bapong bárabü píowa katsina papera, po papératha tina xua pexubiwa tsane piseuri’, jei bárapo Moisés pía peitorobi koyenetha. ³²Íchitha nama seikaya icha koyeneya paka tsipáebatsi. Icha pebin píowa punaxuba xua saya peachaxaibixae poxonae bekein bapowa jopa nasikuikoyene exanaeyo bapoxonae Nakom tsita abetsi xua bapong kana éxana piséuritha. Tsipéi bapong kana éxana píowa xua piseuri tatsi nasi-kuimatakaeta xua weiweina pebíwitha. Barichi pong pita petsiriwa, powa piseuri pepunaxubixae, bapong barichi piakoutha abe natsiéxana, tsipéi Nakom ichowa yábara nantaxeina xua bapowa kataunxuae ichüng píowa tatsi bekein punaxuba”, jei Jesús.

**Meje yábara poxonae Jesús yábara kuiduba xua jiwi
xaiñeya penakuiwüünaetsi wünaeya yábara paebiwa
xua peexanaewa pokotsiwa exanapaeba**

³³Ekeicha Jesús barái bárapo pin bicheitomonae, pomonae pijimonaexae tatsi, jeye: “Báyatha pajumetáneme xua paiña amo susato jiwi tsipáebatsi, xua Moisés tsipaeba. Moisés jeye: ‘Paxam jopa bewa naerabiya panakuiwüünae tsiwünaeya

yábara paebim tsane xua paiña neexanaewa pokotsiwa paexanapaebéibame xua Nakom peitabaratha tatsi. Íchitha jame bewa bara xaiñeya paexaneibíname pokotsiwa papaebéibame xua Nakom peitabaratha tatsi', jei Moisés pijimonaetha. ³⁴Íchitha xang seikaya icha koyeneya paka tsipáebatsi. Poxonae jiwi peitabaratha tatsi panakuiwüünae tsiwünaeya xaiñeya yábara paebíname pokotsiwa xua paexanapáebame bara moya baxua paexande, xua jiwi pía paiña nepaka kajumekowüntsínexa. Jopa yawa múxuna icha jumein papaebinde. Jopa pajande ichüngtha: 'Bara xaniyang xua exanaein. Nakuiwüünaetsiwünaeya xaiñeya yábara páebang Nakom peitabaratha xua exanaein', jopa pajande. Matáütano jopa pajande: 'Bara xaniyang. Báraxua páebang po wüngtha xua Nakom pía nakua wüngtheicha tatsi', jopa pajande baxua, tsipéi Nakom baraxoteicha eka pía pexeña ekeibithopeibiwa tatsi ichaxota bapong ewatsiya itorobeibeka jiwi. ³⁵Matáütano barapókotsi koyenewa jopa bewa panakuiwüünae tsiwünaeya yábara paebim ichüngtha xua ira yábara. Tsipéi bárapo ira ápara Nakom pía ira. Bárapo íratha nataxuyüüyüüteka. Barichi matáütano barapókotsi koyenewa jopa bewa panakuiwüünae tsiwünaeya yábara paebim ichüngtha xua Jerusalén tómara yábara, tsipéi bárapo tómara, po tómaratha ichaxota Nakom pópona pong jiwi itorobiya pía pepa Peewatsinchi. ³⁶Matáütano barapókotsi koyene jopa bewa panakuiwüünae tsiwünaeya yábara paebim ichüngtha xua paiña nentasipa yábara. Saya meisha Nakom paka yábara matasipayaputane. Pomonae pam xua pewowi pam xua pantanatsaebiam jopa paka itaküüpaeyo xua ekeicha pantana ñapáname. Matáütano pomonae pam pomonae amomonae pam xua pantana ñapáname jopa itaküüpaetsi xua ekeicha pantanatsaebiam. Matáütano jopa baxua daichiyo xua kaentanatoxitha. Saya meisha Nakom itaküüpatsi xua kana éxana baxua. ³⁷Saya meisha bárapo juméthabe patsipáebare ichüngtha ichaxota po jumetha jei 'Je, bara exanaein', jei, matáütano ichaxota po jumetha jei 'Jume, jopa exanaein tsane', jei. Tsipéi poxonae pamuxuna páebame poxonae pana tsiwüünae yábara páebame ichamonaetha Nakom pía wüngtha tatsi xua paiña neexanaewa pokotsiwa paéxana paebéibame báraxua ápara kaurimonae pía pentakaponaein tatsi paka tsimuxuduba xua paiña nepaebiwa baxua", jei Jesús.

**Meje yábara poxonae Jesús yábara kuiduba
xua penayantomokáe koyene**

(Lc 6.29-30)

³⁸Ekeicha Jesús barái bárapo pin bicheitomonae, pomonae pijimonaexae tatsi, jeye: "Paxam pajumétáneme xua báyatha Moisés paeba xua jeye: 'Pong itamaikéi esanopa ichüng peitamaikeito, bapong xuya bewa itamaikéi esanopaeinchi. Matáütano pong xua wanoteranopa, xua ichüng wanoteranópatsi, bapong xuya wanoteranopaeinchi', jei. ³⁹Íchitha nama icha koyeneya paka tsipáebatsi: Jopa xuya pebin pakaitakueinchinde poxonae paka kaitakueinta, pong peaitabein. Matáütano icha ichüng paka júmata tsakinopa pekóbeta, moya ekeicha icha júmata pana najúmata káeware xua paiña nekajúmata tsakinopaenexa. ⁴⁰Icha ichüng paka yábara yopichiya paeba pongtha pong jiwi peyábara paebin xua penatsikuentsiwa xua paiña nentoma amanayabixae bapong, bapoxonae bara pakare xua paka itoroba. Icha paiña kamisha pákata pita bara yawa múxuna pakare kamisha po kamisha peamütiyüü kamisha, po kamisha xua athawé peruyaewa. ⁴¹Icha soldadomonae

paka itoroba xua jeye: ‘Painta kaponde pokotsiwa arewe xua saya kae kilómetro beya’, jei, bara moya pakáponde pokotsiwa arewe xua ekeicha icha kae kilómetrono pantaropatábare. ⁴²Daxita koyenexi pokotsiwa ichamonae paka wüüka, moya bara pakaichabéibare. Pong paka nakowaeta paiñawa moya bara patsikobekópabare. Jopa paasiwinde paiñawang”, jei Jesús.

Meje yábara poxonae Jesús yábara kuiduba xua jiwi bewa ántobe pomonaetha, pomonae pía peaitafaetabí jíwichi

(Lc 6.27-28,32-36)

⁴³Ekeicha Jesús barái bárapo pin bicheitomonae, pomonae pijimonaexae tatsi, jeye: “Matáütano pajumetáneme xua kaena báyatha Moisés namchi, xua jeye: ‘Paantobeinde pomonae paiña jiwi. Matáütano pakasébare pomonae paiña nepaka ka-aitafaetabí jiwi’, jei xua Moisés paeba. ⁴⁴Íchitha icha koyeneya paka tsipáebatsi: Paantobeinde pomonae bekein paiña nepaka ka-aitafaetabí jiwi. Matáütano Nakomtha patawüükare pomonae bekein abe pákata éxana. ⁴⁵Icha paexanáename daxita bárapo koyenexi bapoxonae yatsikaewa Nakom piamonae tatsi pam tsane. Bara paichim tsane icha be paiña Axa ichi pong Nakom, pong peitabókotha peekaein xua daxita jiwi antobetsi. Nakom xometo pentha taéxana daxita jiwi pomonae pejüntükoyene wüünae jiwi nexa írürü pomonae peajüntükoyénebe jiwi nexa. Matáütano Nakom ema taitorobíkano daxita jiwi pomonae xaniwaicha pejüntükoyenexeikae jiwi nexa írürü pomonae peajüntükoyénebe jiwi néxano. ⁴⁶Icha saya meisha paántobem pomonae paiña nepaka antobexae, Nakom jopa paka kuiyábara matomakáe tsane. Tsipéi írürü bárapo koyene éxana pomonae parátixi pentomanotébiwi po parátixi jiwi bewa katsibina pong romanomonae itorobiya pía pepa peewatsinchi nexa, bekein jiwi yábara nantaxeina xua bapomonae peajüntükoyenebewi. Barapomonae ántobe pomonae xua pía peantobewixaetsi. ⁴⁷Matáütano icha saya meisha paiñamonae pajakóbame pomonae irü pejumekowüntsiwi poxonae paka siwaponae, xuano xua jopa pajakobim ichamonae, pomonae jopa pejumekowüntsiwi, bárapo koyene jopa wüünaeyo. Tsipéi pomonae Nakom jopa peyaputáe jiwi, barapomonae irü ba jakoba piamonae. Íchitha nama bewa toxeinchiya panantaxeinaem beyakaincha barapomonae poxonae nantaxeina. ⁴⁸Daxota paxam bewa bichokono xaniwai-chiya beta painompaem. Matáütano xua kaewiyo jopa bewa paexanaem tsane xua peabe koyenewa. Barapókotsi jüta koyeneya paichim tsane icha paiña Axa ichi pong Nakom, pong peitabókotha peekaein xua bichokono xaniwai-chiya beta pópona. Matáütano bapong kaewiyo jopa exanaeyo peabe koyenewa”, jei Jesús.

Meje yábara poxonae Jesús jiwi yábara kuidúbatsi xua jiwi wüünae peexanaewang

6¹Ekeicha Jesús barái bárapo pin bicheitomonae, pomonae pijimonaexae tatsi, jeye: “Poxonae paxam paéxaname pokotsiwang xua ichamonae tsita wüünaetsi xua Nakom paka itoroba, bapokotsiwang paexande xua Nakom paiña nepaka kakuitaenexa. Saya meisha jopa paexanaeinde xua jiwi ü paiña nepaka kakuitaenexa wüünaeya paiña nepaka kayábara paebinexa. Icha bapókotsi koyeneya paexanaetsípame néxata paiña Axa Nakom pong itabókotha peekaein jopa paka kata tsipae pokotsiwa paka yábara kuikoyenematomakaewa tsipéi jopa paexanaetsipaem Nakom nexa.

²”Daxota poxonae peakopeibiwi xoxi pakatsibéibame jopa ichamonae patsipaebinde xua baxua paiña neexanaexae. Jopa barapókotsi koyeneya bara paichinde icha be pomonae pemuxuitorobiwi ichi, poxonae ítara mexeya pomonae wüünaeya pepaebiwi. Tsipéi barapokotsimonae saya ichawa beya paeba xua pinae yawena nawita peakopeibí jíwitha. Barapomonae matha jiwi wabéibatsi xua barapomonae pejumetaenexa tsainchi, bapoxonae judiomonae pía penakaetutsibotha yawa námtongtha baxua yábara paeba nawita xua pinae yawena nawita pomonaetha, pomonae peakopeibí jiwi. Barapomonae baxua éxana pía xua jiwi beta yábara nantaxeinaetsi, pía xua jeichi jiwi: Maisha barapomonae betiya éxana, xua pejeinexa jiwi. Íchitha xaniwaicha paka tsipáebatsi, barapomonae xeina pía pekuiyábara matomakáewatsi poxonae jiwi baxua kaunuta tsipéi jopa moya exanaeyo Nakom nexa. ³⁻⁴Íchitha poxonae paxam payawéname peakopeibiwi namicha moya pakare barapomonaetha xua paiña jiwimonae jopa paka nekakuitaenexa. Matáütano poxonae Nakom paiña Axa paka tane poxonae namicha moya paéxaname baxua bapoxonae bapong Nakom paka katsina pokotsiwa pía pekuiyábara matomakaewa”, jei Jesús.

**Meje yábara poxonae Jesús jiwi yábara kuidúbatsi
pokoyene xua Nakom pewüükáewatsi**

(Lc 11.2-4)

⁵Ekeicha Jesús barái bárapo pin bicheitomonae, pomonae pijimonaexae tatsi, jeye: “Poxonae Nakom pawüükame, jopa barapókotsi koyeneya paexanaeinde icha be pomonae pemuxuitorobiwi ichi, pomonae ítara mexeya beta pepaebiwi. Barapomonae saya ichichipa xua jiwi pekuitaenexa poxonae barapomonae Nakom wüükatsi. Barapomonae ichichipa umena pewüükaenexa Nakomtha judiomonae pía penakaetutsi bongtha tatsi xua matáütano barichino námtongtha. Barapomonae baxua éxana xua pekuitaenéxatsi xua ichamonae pekuitaenexa. Bara xaniyéi paka tsipáebatsi. Barapomonae barompaya xeina pía pekuiyábara matomatsíwatsi poxonae jiwi yábara paeba xua barapomonae pinae bara wüünaeya éxana. Nama bapoxonae Nakom jopa katsiyo pía pematomatsiwa barapomonaetha tsipéi barapomonae jopa moya exanaeyo Nakom nexa. ⁶Íchitha poxonae Nakom pawüükame, barompaya paiña tutu beya paponde yawa bómüxü tutu pakoiboxatabábare. Bapoxonae paiña Axa Nakom baraxotiya patsipáebare. Paiña Axa paka yanta kompa yawa daxita paka kuitane pokotsiwa namicha paéxaname. Bapoxonae bapong Nakom paka katsina pokotsiwa pía paka yábara kuimatomakaewa, xua beta paiña neexanaexae poxonae Nakom patsipáebame.

⁷”Poxonae Nakom patsipáebame, jopa ekeicha matowa patsipaebinde pojúmetha xua pojume jopa paka yawenaeyo. Jopa bara paichinde icha be pokotsimonae ichi pomonae jopa peyaputaewi Nakom. Barapomonae nantaxeina xua bara Nakom jumetane pokotsiwa barapomonae tsipaeba xua matowa pepaebixae. ⁸Néxata jopa barapókotsi koyeneya bara paichinde icha be poxonae barapomonae icha ichi. Tsipéi paiña Axa Nakom bara yaputane pokotsiwa paiña nenantawenonaewam, xua beya poxonae pawüükame Nakom. ⁹Daxota Nakom patsipáebare, paichinde:

‘Pata Taxam,

xam pongxaem peitabókotha athabeicha neekaein.

Bárabü daxita jiwi kabarü kui-iturajina nejüntükoyene wüünaeinxae.

- ¹⁰Bárabü jopaena matakabi,
po matakábitha poxonae xam jiwi itorobiya ewatsíname bárapo kae pin nákuathe.
Bárabü jiwi exanaena pokotsiwa jiña neichichipae koyenewa xua bárapo kae pin nákuathe tsike.
Bárabü jiwi exanaena icha peitabókotha ichi xua éxana pokotsiwa jiña neichichipae koyenewa.
- ¹¹Daxita matakabin pexaewa pana katsibéibare xua po pexaewa daxita matakabin pata kanantawenonaewa tsaibi tsane.
- ¹²Pana neyábara kuikanajüntemáinare xua abe pata katsita exanáewatsi.
Bapoxonae pana neyábara kuikana-éxaname xua jopa ekeicha pata katsita natsikuentsíwatsi xua abe pata katsita exanáexaetsi.
Báraxua painta éxande icha paichin ichamonaetha.
Tsipéi paxang kopiya payábara kuikana-éxanang xua ichamonae jopa pana netsita natsikuentsiyo xua abe pata tanetsita exanaexae.
- ¹³Jopa pana kopatsinde xua abe pata exanaewa tsane poxonae jiwi pana nejüntükoyene jüjüta,
xua abe pata exanaewa tsane.
Íchitha pana nekananenebiya éxande bárapo abe peéxanae koyene weya',
pajande poxonae Nakomtha patsipáebame",
jei Jesús.

¹⁴Ekeicha Jesús barái bárapo pin bicheitomonae, pomonae pijimonaexae tatsi, jeye: "Tsipéi icha paxam pakuiyábara jüntemáiname pokotsiwa ichamonae pákata abe éxana, néxata xuya paiña Axa Nakom pong peitabókotha peekaein, xuya paka kuiyábara jüntemainaena pokotsiwa abe paéxaname. ¹⁵Íchitha icha paxam jopa pakuiyábara jüntemainaem pokotsiwa ichamonae abe pákata éxana, néxata xuya paiña Axa Nakom jopa paka kuiyábara jüntemaináe tsane pokotsiwa abe paéxaname", jei Jesús bárapo pin bicheitomonaetha pomonae pijimonaexae tatsi.

Meje yábara poxonae Jesús yábara kuiduba pokoyene peyábara nainbotsi kuikoyenewa

¹⁶Ekeicha Jesús barái bárapo pin bicheitomonae pomonae pijimonaexae tatsi, jeye: "Poxonae paxam payábara nainbótame xua Nakom beta paiña newüükaenexa tsane, jopa bara jüta ichiya koyeneya paexanaeinde icha be pomonae ichi pomonae ítara mexeya betiya peexanaewi dáichitha abe éxana. Barapomonae piyain itabara aenáenaka xua poxonae bekein peyábara nainbotsíwatha Nakom. Barapomonae jopa nantakaichetsiyo yawa jopa náitabara kiatsiyo. Barapomonae ichipa xua ichamonae yaputane xua barapomonae kou bara nainbota. Bara xaiñeya paka tsipáebatsi xua barapomonae báyatha xeina barompaya pía peyábara kuimatoma-káewatsi xua poxonae jiwi yábara wüünae jainta xua barapomonae kou bara nainbota. ¹⁷Íchitha paxam poxonae payábara nainbótame, xua Nakom betiya paiña newüükaenexa tsane, pana náitabara ikíkare yawa beta panantakaichere. ¹⁸Bapoxonae jiwi jopa paka kuiyaputáe tsane xua paxam bara kou payábara nainbótame. Namicha paiña netsita exanaexae Nakom bárapo koyene. Meisha saya paiña Axa Nakom paka kuiyaputane, tsipéi daxita yaputane pokotsiwa namicha paéxaname. Bapong paka katsina pokotsiwa pía paka yábara kuimatomaewa", jei Jesús.

**Meje yábara poxonae Jesús yábara kuiduba xua pokotsiwa
Nakom jiwi pejüntanajebíwatsi pía nakuatheicha**

(Lc 12.33-34)

¹⁹Ekeicha Jesús barái bárapo pin bicheitomonae, pomonae pijimonaexae tatsi, jeye: “Bárapo kae pin nákuathe jopa kopei pakaetubinde xua paiña nexenaewa tsane nawita bárapo kae pin nákuathe. Tsipéi bokobokowatong abe exanaena poxonae xane pokotsiwang xua paxéiname. Ichakuitha abe exanaena poxonae paiñawang axumáinbatsi. Ichakuitha paiñawang pokotsiwa paxéiname baxuang pomonae pekaibiwi paka kaibina. ²⁰Íchitha jame paexande po pejüntükoyene wüünaewa xua Nakom ichichipa. Bapoxonae Nakom paka katsibina pokotsiwa paiña nepaka jüntüna jebiwa pía nakuatheicha. Baraxoteicha bapokotsiwa bokobokowatong jopa xaeyo. Yawa jopa axumáinbatsi. Matáütano pomonae pekaibiwi jopa paka kaibiyo baxuang xuang Nakom paka nekayábara kuimatomakaewang. ²¹Ichaxota ba pajébame xua paiña neichichipaewang baxota ba payábara nantaxéiname nawita”, jei Jesús pijimonaetha.

**Meje yábara poxonae Jesús yábara kuiduba jiwi pokoyene
wüünaeya peexanaewa pejüntükoyene wétsina**

(Lc 11.34-36)

²²Ekeicha Jesús barái bárapo pin bicheitomonae, pomonae pijimonaexae tatsi, jeye: “Pekoicha ba yonoyonéi mérawi paiña nepaka kayawenaenexa xua beta paiña netaewa tsane kireitha. Barichi paiña itamaikeitong paka yawena xua beta paiña netaewa tsane. Icha paiña itamaikeitong wüünae, bara beta patáneme. ²³Íchitha icha paiña itamaikeitong abe, jopa beta pataetsipaem. Barichirü paiña jüntükoyenewang xua paiña nenantaxeinaewang. Icha paiña jüntükoyenewang xanepanáetsipa bara beta Nakom payábara najüntükoyene xeinaetsípame. Íchitha icha paiña jüntükoyenewang jopa wüünae tsipae jopa beta Nakom payábara najüntükoyene xeinaetsipaem. Paiña jüntükoyenewang paka kana exanáetsipa xua bichokono abe paexanaetsípame”, jei Jesús.

**Meje yábara poxonae Jesús yábara kuiduba jiwi,
xua pong nantaüta aiña pía Pekanamataxeináeinchibe tatsi**

(Lc 16.13)

²⁴Ekeicha Jesús barái bárapo pin bicheitomonae, pomonae pijimonaexae tatsi, jeye: “Jintong dapong aibi pong xeina aiña pía Pekanamataxeináeinchibe tatsi xua pong beta tanakuita bárapo pía aiña Pekanamataxeináeinchibe tatsi. Tsipéi bárapo petanakuichin meisha antobeya taéxana kaeintha pong pía pekanamataxeinaeinchi poxonae itoróbatsi. Icha pía pekanamataxeinaeinchi jopa taraichiyo. Kae pía pekanamataxeinaeinchi wüünaeya taéxana. Icha pía pekanamataxeinaeinchi abeya taéxana. Barichi jintong pong bichokono ántobe Nakom jopa itaküüpaetsi xua bichokono peantobewa parátixi poxonae yawa bichokono antobetsi Nakom”, jei Jesús bárapo pin bicheitomonaetha, pomonae pijimonaexae tatsi.

**Meje yábara poxonae Jesús yábara kuiduba pokoyene
xua Nakom eena pijimona**

(Lc 12.22-31)

²⁵Ekeicha Jesús barái bárapo pin bicheitomona, pomona pijimonaexae tatsi, jeye: “Paka tsipáebatsi, jopa bichokono payábara najüntükoyene exabinde pexaewa xua paiña neunajinompawa tsane yáwano xua paiña neapáewangno tsane. Barichi jopa bichokono payábara najüntükoyene exabinde papabürü xua paiña pepong nexa. Pokoyene xua asüü pejinompawa xua Nakom naka kata jame baxua aiñakuí, beyakaincha pexaewa xua peunajinompawa. Pepong aiñakuí irü, beyakaincha papabürü xua pepong nexa. ²⁶Pataema peyapupunaewi. Barapoxi jopa übiyo pábitha. Yawa xua penawetsiwa jopa notsiyo. Yawa jopa xeinaeyo bomüxüng xua pejebinexa pexaewang. Íchitha Nakom ápata peyapupunaewi pexaewa. ¡Paxam nama bichokono Nakom patsita aiñakuim, beyakaincha peyapupunaewi xua Nakom tsita aiñakuichi, po Nakom paiña Axa pong itabókotha eka! ²⁷Dapong aibi pong paxam jíwana pong itaküüpatsi xua xeinaena icha matakabi xua po matakábitha pepoponaewa tsane poxona tüpaena. Bekein bapong bichokono nayábara najüntü-éxaba baxua, íchitha jopa itaküüpaetsi xua xeinaena kaentakabi ekeicha.

²⁸”Paxam bichokono payábara najüntü-éxabame papabürü. Jame pakayábara nantaxéinare pentonong, po pentonong wéxotha xuwa, xua matono itúpana. Pentonong jopa nakuichiyo yawa jopa natsiexanaeyo papabürü penamaxatabinexa. ²⁹Íchitha paka tsipáebatsi xua pentonong matono itúpana bichokono beyakaincha pókotsi paparuwa Salomón namaxátata xua pexeiña paparuwa. Bapong Salomón pong kaena býatha judiomona itorobiya pía pepa peewatsinchi pong býatha tüpa. ³⁰Pentonong po matonong wéxotha ánoxuae xuwa, Nakom kana éxana xua matono itúpana. Íchitha pebiwi baya matono tautsina ichaxota pokotsíwatha pan seba, tsipéi saya pentono. Nakom kana éxana xua pentonong bichokono wüünae bara bekein saya pentonong. Barichi Nakom itaküüpatsi xua beta paka eenaewa xua beta paiña nejinompaenexa tsane. Matáütano Nakom paka katsina paparuwang. ¡Maisha pebiwi pam, saya be kónotha pajumekowúntame Nakom! ³¹Jopa paünthüthü deideijeya jinompaeinde xua ichawa paiña neyábara nantaxeinaexae. Jopa pajang tsaibinde: ‘¿Eta xua xaeinchi jane? ¿Eta xua apaeinchi jane? ¿Eta xua namaxatabinchi jane?’ jopa pajang tsaibinde. ³²Tsipéi bárapo kae pin nákuathe jiwí saya ü baxua pekayábara najüntükoyene éxabi pokotsiwa nantawénona. Íchitha nama paxam paiña Axa Nakom panantáütame. Barapong Nakom pong peitabokopin, pong yaputane daxita pokotsiwa xua xoxi panantawénoname. ³³Saya meisha jame bichokono kopiya payábara nantaxéinare xua paiña neexanaewa xua pokotsiwa Nakom ichichipa pong jiwí itorobiya pía pepa peewatsinchi. Matáütano jame bichokono payábara nantaxéinare paiña nexeiinaenexa pejüntükoyene wüünaewa Nakomtha. Icha paexanáename bárapo koyenewang néxata bapoxona Nakom paka katsibina xua daxita pokotsiwa panantawénoname. ³⁴Jopa payábara múxuna najüntü-exabinde ánoxuae pokotsiwa baya tsane pokotsiwa paiña neexanaewa tsane, tsipéi bárapo matakabi nama xeina pokotsiwa bichokono pákata ayapubé. Daxita matakabi tsopeoneibi pokotsiwa xua pákata ayapubé xua pokotsiwa paiña neexanaewang”, jei Jesús.

**Meje yábara poxonae Jesús kuiduba xua jiwi jopa bewa
yábara paebí xua ichamonaе penatsikuentsiwa**

(Lc 6.37-38,41-42)

7¹Ekeicha Jesús barái bárapo pin bicheitomonaе, pomonaе pijimonaexae tatsi, jeye: “Jopa ichamonaе payábara paebinde xua penatsikuentsiwa xua abe peexanaexae. Néxata bapoxonaе Nakom jopa paka yábara paebí tsane paiña nena-tsikuentsiwa xua abe paiña neexanaexae. ²Nakom piakoya paka yábara paebina xua paiña nenatsikuentsiwa xua abe paiña neexanaewa icha pokoyeneya paichim poxonaе ichamonaе payábara páebame xua penatsikuentsiwa xua abe peexanaexae. Icha dangweya payábara paebíname xua penatsikuentsiwa ichamonaе xua abe peexanaexae, Nakom barichi dangweya paka yábara paebina xua paiña nena-tsikuentsiwa xua abe paiña neexanaexae”, jei Jesús. ³Ekeicha Jesús paeba kaeintha pomonaе pijimonaе jíwana pekayábara júta pepaebi diwésiyo jeye: “Xam ba jíña jintong ítata táneme poxonaе ítata jopíyatsi naepútiyo, íchitha jopa taem xua írürü xam nama pin naepüto neitamaikéitha dukua. Barapókotsi júta koyeneya ichi, xam ba jíña jintong kuitáneme xua poxonaе abe éxana, íchitha jopa nayaputaem xua írürü xam baraichim nama bichokono abe éxaname. ⁴Icha jopa taem pin naepüto xua neitamaikéitha dukua jopa kaitaküüpaeyo xua nejeiwa jíña jintongtha: ‘Tajintong, kata jutinchi naepútiyo xua dukua neitamaikéitha’, xua nejeiwa. ⁵Xam nepaebim xua ichüng éxana xua baxua irü neexanáewatha. Xam kopiya nata jure bárapo pin naepüto xua neitamaikéitha dukua. Bapoxonaе beta táename nejutsinexa tsane naepútiyo xua jíña jintong peitamaikéitha tarúkuatsi.

⁶”Jopa patsipaebinde Nakom Pejume Diwesi pomonaе anaya paka áeba, xuano anaya áeba Nakom Pejume Diwesi pomonaе jopa pejumekowüntsiwi Nakom. Tsipéi barapomonaе peajüntükoyénebe jiwi bichokono. Barapomonaе bara abe éxana be barapókotsi júta koyeneya ichiya éxana icha be auri ichi xua poxonaе anaepanaya nawanowebaba pokotsiwa pakátame. Matáütano barapomonaе bara abe éxana be barapókotsi júta koyeneya ichiya éxana icha be marrano ichi, xua poxonaе petáxutha taxunáunaba xua iráíñaba po pexaewa paápatame”, jei Jesús.

**Meje yábara poxonae Jesús yábara paeba
xua jiwi bewa matowa wüükeibi Nakomtha**

(Lc 11.9-13; 6.31)

⁷Ekeicha Jesús barái bárapo pin bicheitomonaе, pomonaе pijimonaexae tatsi, jeye: “Matowa Nakom pawüükare, bapoxonaе paka katsibina pokotsiwa xua pawüükame. Báraxua matowa paexande icha paichim poxonaе matowa pajei-téibame beya poxonaе patáebame yawa icha paichim poxonaе matowa pawawam bomüxütha beya poxonaе ichüng paka jumenota. ⁸Tsipéi pong matowa wüüka ichüng bara kátatsi. Tsipéi pong matowa nekoba, bara taeba. Tsipéi pong bómüxü pekoibótotha matowa wawái, bara takoibo saranaxorénatsi, matáüta jumenótatsino.

⁹”Paxam pomonaе pexui paxéiname paka muxuwétatsi. Poxonaе paiña pexui paka wüüka pan, ¿pakatsípame iboto? ¡Jume! ¹⁰Ichakuitha tsipae, poxonaе paiña pexui paka wüüka duwéi, ¿pakatsípame jomowito? ¡Jume! Jopa baxua paraichim tsane. ¹¹Bara bekein peajüntükoyénebe jiwi pam, íchitha paxam payaputáneme

xua wüünaeya paiña pexui pakatsibéibame. Íchitha nama Nakom paiña Axa pong itabókotha peekaein bichokono jopa juniya paka katsiyo pejüntükoyene wüünaewang poxonae pawüükame beyakaincha poxonae paiña pexui pakatsibéibame poxonae paka wüükeiba.

¹²”Paexande ichamonaetha xua pokoyene paiña neichichipaewa xua barapomona beta paiña nepákata exanaewa tsane. Tsipéi bárapo koyenewa báyatha Moisés pía peitorobi koyenéwatha paka itoroba, matáütano Nakom pía peitorobi jume pepaebiwi báyatha paka kui-itoroba”, jei Jesús.

**Meje yábara poxonae Jesús yábara kuiduba
po boupayo tsiki boupayo dena**

(Lc 13.24)

¹³⁻¹⁴Néxata ekeicha Jesús barái bárapo pin bicheitomonae, pomona pijimonaexae tatsi, jeye: “Poxonae jiwi pona tómara beya, pomona itapeta pin namto iya pona, bárapo jiwi pinmonae, tsipéi bárapo tómara namto boupa iya xua jopa ayapubeyo. Pomona nama itapeta, po namto tsiki namtiyo iya pona, bárapo jiwi tsikimonaeyo tsipéi bárapo tsiki boupayo ayapubé iya. Barichi poxonae jiwi patsina Nakom pía nakua beicha saya tsikimonaeyo patsina tsipéi ichamona jopa tsita jüntüküikoyene wüünaetsi xua wüünaeya pejinompaewa Nakomtha. Daxota pomona Satanás pía nakua beya patsina pinmonae tsane tsipéi jopa taayapubetsi xua bárapo Satanás pía jüntükoyenéwatha tatsi jinompa. Nama itapeta pakanantaxeinaeya jinómpare Nakom pía jüntükoyenewa tatsi xua icha jiwi ichi poxonae seikaya írürü barompaya pona tómara tsika namtiyo boupayo iya”, jei Jesús.

**Meje yábara poxonae Jesús yábara kuiduba
xua jiwi yaputane nae, penakoichixae**

(Lc 6.43-44)

¹⁵Ekeicha Jesús barái bárapo pin bicheitomonae, pomona pijimonaexae tatsi, jeye: “Dota pam xua pomona penaerabiwi, pomona xua jeye: ‘Paxang papabang Nakom nexa’, jei. Barapomona paiña xaiña beya pata ítara mexeya jopa jüntükoyene anaepanaeyo icha be ichi pomona xua Nakom pejumejejei jíwichi xua peexanaewa pokotsiwa Nakom itoroba xua matáütano icha be ovejamona ichi xua pía kui koyene xeina xua jopa anaepanaeyo. Dáichitha barapomona bichokono antükuikoyenyápube xua anáepana, icha be neuthü ichi poxonae bichokono anáepana. ¹⁶Íchitha paxam pakayábara itakoxóname barapomona poxonae patáneme pokotsiwa barapomona éxana, icha be jiwi ichi xua poxonae yaputane nae, po nae penakoichixae. Matáütano jiwi jopa yaputaeyo xua bápana jiwi jopa terakáe uvakuéi po naetha sojei, tsipéi ápara uvakuéi xua ünboótotha po ünbo jopa edubenaeyo. Matáütano jiwi jopa bápana terakáe higo thei náexitha, tsipéi ápara higo thei xua higo naetha. ¹⁷Tsipéi daxita naein, po naein pexeña naein bara nakoita po pethéi pexeña thei. Matáütano daxita naein, po naein kamatsá naein bara nakoita po pethéi kamatsá thei. ¹⁸Po nae pexeña nae jopa bápana nakoichi po pethéi kamatsá thei. Barichi po nae kamatsá nae jopa bápana nakoichi po pethéi pexeña thei. ¹⁹Daxita naein, po naein jopa nakoichiyo po pethéi pexeña thei, jiwi bárapo naein úngkata. Bapoxonae jiwi bárapo naein tauta ishótotha. ²⁰Icha naein kana ichichi xua poxonae jopa

penakoichiyoxae, bara kana ichi tsainchi jiwi xua poxoru wüünaeya jopa peexa-naexaera tsane. Icha ichi xua payaputáneme naein poxonae pía pethéi patáneme, barichi jiwi pajüntükuikoyene yaputáneme poxonae patáneme pokotsiwa barapomonae éxana”, jei Jesús.

Meje yábara poxonae Jesús pinae paeba xua pinae daxita jiwi jopa patsi tsane Nakom pía peitorobi nakua beicha

(Lc 13.25-27)

²¹Ekeicha Jesús barái bárapo pin bicheitomonaе, pomonaе pijimonaexae tatsi, jeye: “Pinmonae jiwi neyábara kaunutsíyajei tsane: ‘Tanekanamataxeinaem’, jei tsane. Dáichitha barapomonae jíwana tsikimonaeyo patsina Nakom pía peitorobi nakua beicha. Saya meisha patsina pomonaе éxana xua pokotsiwa Taxa ichichipa. Barapomonae patsina ichaxota Taxa po nakuatheicha ewatsiya itorobeibeka. ²²Poxonae bárapo matakabi jopaena, po matakábitha poxonae Nakom yábara paebina xua jiwi penatsikuentsiwa pinmonae jiwi pijunuwi neyábara kaunutsí-yajei tsane: ‘Pata Tanekanamataxeinaem, paxang pakueikueijang nejume diwesi xam nexa. Matáütano kauri paitawetang newüngtha. Matáütano jiña newüngtha papaebang poxonae pexeíña petsita-itüütsi koyenewa paéxanang’, nejéi tsane. ²³Dáichitha barapomonae jumenotsin. Jang tsane: ‘Bü kanta bápana jopa paka yaitaetsi. ¡Taxaiña weya pana natsixibarü kúpare pomonaе abe paiña neexanáе jiwi pamxaem!’ jang tsane” jei Jesús.

Meje yábara poxonae Jesús aiña bomüxübe yábara paeba

(Mr 1.22; Lc 6.47-49)

²⁴Ekeicha Jesús barái bárapo pin bicheitomonaе, pomonaе pijimonaexae tatsi, jeye: “Pong nejumenaitómata pokotsiwa páebang matáütano éxanano pokotsiwa ichichipang barapong beta pópona Nakom nexa. Bara barapong barapókotsi jüta koyeneya nakana éxana icha be pókotsin peyaputaein ichi, pong bo akabanota peíra matatsukáewatha xua ichaxota ira dangwéi. Meje jeye: Kopiya müthüng tajü exanareka pekuaranobinexa bómüxü naetong. ²⁵Poxonae ema duneika yawa mene matakaewaxuba yawa joibo bómüxü dangweya kapubabanota, bárapo bómüxü jopa joparenaeyo, poxoru naetong tajü umenareka xuano poxoru bárapo bómüxü peíra matatsukáewatha ungkua ichaxota ira dangwéi. ²⁶Íchitha nama pong nejumetaetha xuano jopa exanaeyo pokotsiwa ichichipang jopa beta poponaeyo Nakom nexa. Bara barapong barapókotsi jüta koyeneya nakana éxana icha be pókotsin amaméibatsi ichi. Bapong be meje: Bapong be pókotsin bo akabanota ichaxota ira matafátsana xuano naetong jopa tajü umenarekaeyo poxoru táetowa. Baraxota mene pateiba poxonae awüübo tsaibi. ²⁷Poxonae ema duneika, yawa mene matakaewaxuba, yawa pin joibo kapubabanota bárapo bo, bapoxonae bárapo bómüxü joparena poxoru naetong jopa tajü umenarekaeyo xuano poxoru bómüxü ungkua ichaxota ira matafátsana. ¡Maisha bómüxü bichokono abe!” jei Jesús bárapo pin bicheitonaetha, pomonaе pijimonaexae tatsi.

²⁸Poxonae Jesús bárapo diwesi najumeweta, pomonaе Jesús jumetaинchi, barapomonae yábara najüntükoyene kabenaeka xua Jesús pía pekuidubiwang tatsi. ²⁹Tsipéi Jesús ba kuiduba be peyaputaein pía peayapustüü itorobi koyeneya tatsi. Jesús jopa kuidubiyo be judiomonaе pía pekuidubiwi pía pikoyeneya tatsi.

Meje yábara poxonae Jesús axaibi éxana pong perüüsáwatsi

(Mr 1.40-45; Lc 5.12-16)

8¹Poxonae Jesús peitapatororo wejuinka, pin bicheitomonae Jesús punapoinchi. ²Jesús imoxoyo kakuita poinchi pebin, pong perüüsáwatsi. Bapong pentabokotha ungkua Jesús peitabaratha tatsi xua Jesús pebarükui-iturajinaexaetsi. Bapong namchi Jesús beya, jeye:

—Pong Nekanamataxeinaem jiwi, icha bara ichichípame bara kaitaküüpa xua axaibi tana neexanaewam, tsipéi jiña neayapusúü itorobi koyenewa nexeiaem, jei bapong.

³Néxata Jesús nakobeyoya yawa matajáyaba bárapo pebin, pong perüüsáwatsi. Jesús barái, jeye:

—Bara ichichipang. ¡Bara axaibinde! ¡Bara kaaperüüxaibi éxanatsi! jei Jesús.

Bapoxonae bapong naiña ta-aichurukuaetsi xua peperüüsawíwatsi. ⁴Néxata Jesús barái peperüüsawinchi:

—Taema, jopa yábara tsipaebinde ichamonaetha xua neaxaibiwam. Saya jame meisha ponde sacerdotemonaepintha xua nenaitüütsinexa xua bapong nekataenexa xua býatha nejumewa. Bapongtha kare pokotsiwa xua pekatsiwa Nakomtha, pokotsiwa xua býatha Moisés kui-itoroba xua ekeicha jopa jiña nenataxobinexa jiña pepongtha. Bapoxonae daxita jiwi kayaputaena xua tsita itapeiñaxéinatsi xua xam bara jumem yawa xua perüüwüünaem, jei Jesús.

Meje yábara poxonae Jesús axaibi éxana pong soldadomonae romanomonae pía pentakaponaein tatsi tanakuítatsi

(Lc 7.1-10)

⁵Poxonae Jesús joniya Capernaum tómaratha, bapoxonae pebin Jesús imoxoyo kakuita poinchi. Bapong romanomonae soldadomonae pía pentakaponaein tatsi. Bapong nantaüta pong tanakuitéibatsi piabotha. ⁶Bárapo pentakaponaein Jesús jumedangweya baraichi, jeye:

—Tanekanamataxeinaem, pong inta nakuiteiba tabotha, cámatha boka. Bapong múübatsi yawa bichokono átene, jei bárapo pentakaponaein.

⁷Jesús namchi:

—Bara beya tha ponaetsi taaxaibi exanaenexa tsane bapong, jei Jesús.

⁸Bárapo soldadomonae pía pentakaponaein tatsi jumenota:

—Tanekanamataxeinaem, xang saya takuipawin. Aurang xua xam nepatopaewa tsane tabotha tsipéi xam aiñakuim. Icha saya paebíname xua bapong pía peatenéwatha tatsi, bapoxonae bara axaibi tsane pong inta nakuiteiba. ⁹Xang barichi xeinang tanekanamataxeinaein pong neitoroba. Barichirü xeinang soldadomonae pomonae itorobeibang. Poxonae ichüing itorobang: ‘ponde’, jang, bara bapong pona. Poxonae ichüing wabang: ‘antha’, jang, bara bapong patopa. Pong inta nakuita itorobang: ‘inta nakuire’, jang. Bara inta nakuita, jei barapong pong pentakaponaein.

¹⁰Poxonae Jesús baxua jumetaeba, jumekuiyábara kananthüthü nantaxeinanaya kabenaeka, beta pepaebixae romanomonae soldadomonae pía pentakaponaein tatsi. Jesús nekótaba pomonae punapoinchi, barái, jeye:

—Xaniyeya paka tsipáebatsi, Israel nákuatha irü dapokotsin jopa kaxinaeiño pókotsin icha pong iche pong tana nekuiyábara jumekowüntsín xua bara

neitaküüpa xua axaibi taexanaewa jiwi. ¹¹Paka tsipáebatsi, pinmonae patsina Nakom pía peitorobi nákuatha penabanaenexa tsane. Ichamonae pomonae ichaxota xometo ekoina, barapomonaepiwi patsínano. Ichamonae pomonae ichaxota xometo jopeika, barapomonaepiwi patsínano. Daxita karepaya barapomona Abraham barü ekiyaena, irü Isaac barü ekiyaena irü Jacob barü ekiyaena. Daxita karepaya bárapo nakuangmonaepiwi barü nabanaeinchi peitaboko beicha. Abraham, barü nabanaena barapomona ichaxoteicha Nakom itorobiya ewateiba jiwi. ¹²Ichamonae nantaxeina xua bepa pinae patsina Nakom pía peitorobi nakua beicha tatsi, bara bekein jopa wüünaeya peexanaewi. Daxota barapomonaebái tsainchi icháwatha waxaiña weya ichaxota pekiréiwatha. Baraxota barapomonaebichokono wekoyéi tsane yawa nantanuweya nantüjayabina, jei Jesús.

¹³Néxata Jesús barái pentakaponaein, jeye:

—Ponde jiña bo beya. Bara kata éxanatsi tanekuiyábara jumekowüntsimsxae xua bara taneitaküüpaewa xua takata exanáewatsi, jei Jesús.

Bapoxonaebárapo pentakaponaein pía petanakuichin tatsi bara kaena taaxaibi éxanatsi.

Meje yábara poxonae Jesús axaibi éxana Pedro pámiyo tatsi

(Mr 1.29-31; Lc 4.38-39)

¹⁴Jesús joniya Simón Pedro piabotha tatsi. Baraxota Jesús tane Pedro pámiyo tatsi xua cámatha boka yawa xua domáebatsi. ¹⁵Jesús kobepita, barapowa kobepítatsi. Domae ta-aichurukuatsi bapowa. Naiña barapowa nantakotaxuba. Bapoxonaebapowa pexaewa ápata barapomonaetha.

Meje yábara poxonae Jesús axaibi éxana pin bicheitomonae

(Mr 1.32-34; Lc 4.40-41)

¹⁶Poxonaebatópiya tsanaicha, ichamonae pomonae yakauríbatsi barapomona Jesús bekarendénatsi. Jesús pía jumetha itaweta kaurimonae. Barichi Jesús axaibi éxana daxita pomonae peatenewi. ¹⁷Poxonaebárapo koyenein éxana, bara nayábara jumekuiweta poxonaekaena báyatha Isaías peyábara kuitsiwünaeya paebixae. Bapong Isaías Nakom peitorobi jume pepaebin. Bapong jeye Cristo yábara: “Bapong naka wenowenói wajüntükoyene bojeiwa. Matáütano bapong naka wenowenói waátene koyenewang”, jei Isaías pejume diwésitha.

Meje yábara poxonae Jesús yábara paeba pomonae ichichipa xua pepunaponáewatsi

(Lc 9.57-62)

¹⁸Poxonaebárapo Jesús tane xua pin bicheitomonae nakaetuta bapongtha, bapoxonaebapong pijimonae itoroba xua icha muxunene beya peponaenexa tsane xua pukua epataüta iya. ¹⁹Poxonaekataunxae Jesús áwiya jopa pijimonae barü torotabiyaeyo xua icha muxunene beya nexa, bapoxonaebárapo Jesús imoxoyo kakuita unguatábatsi pong jiwi pekuidubin Moisés pía peitorobi koyene. Jesús baraichi:

—Pong jiwi Nekuidubim, kapunaponaeinchi daxita jüpaeyangtha xua ichaxotang neponaewa tsane, jei.

²⁰Jesús jumenota:

—Namomonae ba pía müthüing xeina ichaxota pemaitathopeibiwa. Irü peyapupunaewi ba kotong xeina, ichaxota peyamaitathopeibiwa. Íchitha nama xang pongxaein Nakom Tananeitapetsin nama jopa dáichino. Nama jopa xeinaeíño bo xua tabo xua xota nafifinakáekang, jei Jesús.

²¹Bapoxonae ichüing pong irü Jesús pijimonae jíwana bapong Jesús baraichi, jeye:

—Tanekanamataxeinaem, bara nepukópare tha taxa matha müthütha xubichi kopiya xua bapoxonae takapuna ponáewatsi tsainchi, jei.

²²Jesús jumenota:

—Maisha jame nepunaponde. Bara kópare xua petüpaewi bara müthükaeinchi, pomonae be pewerapaewi, jopa be tana nejumekowüntsíwixae, barapomonae müthükaena, jei Jesús.

Meje yábara poxonae Jesús xaiña dukuanaya éxana joibo yawa marátsakano xaiña mene dukuanaya éxanano

(Mr 4.35-41; Lc 8.22-25)

²³Néxata Jesús jératha nontabiya. Jesús pijimonae barü pona jératha. ²⁴Bapoxonae jemeicha pin joibo naetaba ménetha. Marátsakang jératha mene óthopa muxu pebunarekae. Dáichitha Jesús maitungkua. ²⁵Bapoxonae Jesús pijimonae yaübaxotsi, jeichichi Jesús:

—¡Pata Nekanamataxeinaem, pana kapanépare! ¡Yanabunarékatsi! jei Jesús pijimonae tatsi.

²⁶Jesús jumenota:

—¿Eta pokotsiwa metha bichokono pajunúwame? ¿Kataunxuae jopa pana neyábara jumekowüntsim xua bara tana neitaküüpaewa xua tapaka yawenáewatsi? jei Jesús.

Néxata Jesús asiya ungukea. Bapoxonae Jesús itawetaxuba joibo, marátsakano. Daxita kaewanaya joibo yawa marátsakano. ²⁷Bapoxonae bárapo pebiwi yábara najüntükoyene kabenaekarúkupa xua pokotsiwa Jesús daxita itaküüpatsi. Barapomonae najéi:

—¿Metha jintamda bapongda? ¡Jamaisha bapong itawetaxuba joibo yawa marátsakang xua daxita xaiña dubenanaya! najéi barapomonae.

Meje yábara pongbe yakauribatsibe, Gadara nakuapinbe

(Mr 5.1-20; Lc 8.26-39)

²⁸Poxonae Jesús patopa pukua icha muxunene beya xua po nákuatha Gadara nakua, bapoxonae pebinbe Jesús imoxoyo kakuita unguatabütsibe. Bapongbe ibowountha poponeibabe. Kaena báyatha bapongbe yakauribatsibe. Bárapo kaurimonae bapongbe anáepana kana exanátsibe daxota daxita jiwi junuwa xua peponaewa bárapo námtotha ichaxota bapongbe popónabe. ²⁹Bapoxonae jemeicha kaurimonae bapongbe wawái exanátsibe, jeibe:

—Nakom Pexantom tatsim, ¿eta pokotsiwa metha patópame pataxantha? ¿Patópame jiña paiña nepérxaxa exanátsibe pewünaeya xua po matakábitha xua poxonae Nakom átene pana exanaena xua abe pata exanaexae? jei bapongbe xua kaurimonae wawaya éxana.

³⁰Tsiwiyo tajüyo beya pin marrano duweimonae xayompa. ³¹Kaurimonae Jesús jeichi:

—Icha pana itawétame, moya pana nepukopabare marrano duweimonaetha, jei kaurimonae.

³²Néxata Jesús jumenota kaurimonaetha, jeye:

—Moya pataema, jei.

Néxata kaurimonae pebinbe wepu pónatsibe, yawa marrano duweimonaetha pata. Bárapo marrano duweimonae dúküpa, pin pitapatororo othopareka. Púkua-tha bunothopa. Kaurimonae kabunothópati.

³³Pomonae yapu-eena bárapo marrano duweimonae, junuwiya kuinaenouta peyábara paebinxaxa tomarapíwitha. Barapomonae yábara paeba daxita pokotsiwa Jesús kana éxana marrano duweimonaetha yáwano pokotsiwa Jesús kana éxana póngbexa yakauribatsibe. ³⁴Bapoxonae daxita tomarapiwi pona ichaxota Jesús eka. Poxonae Jesús tainchi, barapomonae Jesús jeichichi: “Maisha bewa warapáename Gadara nakua weya, po nakua pata nakua weya”, jei daxita barapomonae.

Meje yábara poxonae Jesús axaibi éxana pong pekuenobinchi

(Mr 2.1-12; Lc 5.17-26)

9¹Néxata Jesús jératha nontabiya. Jératha pona icha muxunene beya xua pukua epataüta iya. Jesús pía tómara beya patopa, bárapo tómara icha muxunénetha eka. ²Baraxota pebiwi pata. Bárapo pebiwi Jesús takarendénatsi pong pekuenobinchi. Xua xota pokotsíwathaxa pemaiteíbiwaxa, barapomonae barapokotsíwathaxa pekuenobinchi karendénatsi. Poxonae Jesús tane xua barapomonae yábara jumekowünta xua bara Jesús peitaküüpáewatsi xua axaibi peexanáewatsi pong pekuenobinchi, bapoxonae Jesús barái pekuenobinchi:

—Tajintong, najüntükoyene tsakatábare. Kakuiyábara jüntemainaya jüntüpu-xana exanátsiba jiña abe neexanáe kuirukoyenein, jei Jesús.

³Bapoxonae pomonae jiwaxa pekuidubiwi Moisés pía peitorobi koyenewaxa tatsi, barapomonae daxita karepaya piakoutha nantaxeina. Najéi: “Maisha bapong bichokono abe tsipéi pokotsiwa bapong paeba bichokono Nakom tsita ajumebetsi. Jintong dapokotsin aibi pong xua jiwaxa kakuiyábara jüntemainaya jüntüpu-xana éxanatsi abe pía peéxanaxa kuirukoyenein tatsi”, najéi barapomonae. ⁴Dáichitha Jesús yaputane xua barapomonae pijüntükoyéneinthaxa natsipaeba. Jesús barái barapomonaetha, jeye:

—¿Eta xua metha baxua abeyaxa pana neyábara kanantaxéiname? ⁵¿Eta po jume-tha barang tsane pekuenobinchi? ¿Metha jang tsane: ‘Jiña abe neexanáe kuirukoyenein kayábara jüntemáinatsi’, jang tsane? Ichakuitha ¿metha jang tsane: ‘Nontaponde, yawa bara pónare’, jang tsane? ⁶Daxota aunxuae paxa tsita itapeiñaxeinaeinchi xua xang pongxaein Nakom Tananeitapetsin, xua xeinang taayapusüü itorobi koyenewaxa xua bara tana neitaküüpaewaxa xua jiwaxa tayábara kakuijüntemainaya jüntüpu-xana exanaewaxa abe pía peéxanaxa kuirukoyenein tatsi pomonae jinompa bárapo kae pin nákuathe, jei Jesús.

Bara néxata pekuenobinchi Jesús barái, jeye:

—Katsipáebatsi nontaponde. Jiña nemaitungkuawaxa pire. Jiña bo beíyande, jei Jesús.

⁷Bapoxonae pong pekuenobinchi kaena naiña nontapona barapomonae peitütha tatsi, yawa pita xua pemaitungkuaewa. Bapoxonae píabo befiya. ⁸Poxonae jiwi tane baxua, barapomonae yábara najüntükoyene kabenaeka yawa Nakom wüüinae jáintatsi. Barapomonae nabarái:

—Ánoxuae waxainchi tainchi pokotsiwa pewüüinaewa pokotsiwa jopa yaputaetsi, yawa wüüinae jáintatsi xua Nakom bárapo jintongtha pekatsixae pía peayapusüü itorobi koyenewa, jei barapomonae.

Meje yábara poxonae Jesús waba Mateo

(Mr 2.13-17; Lc 5.27-32)

⁹Jesús bara weya póntaba ichaxota axaibi éxana pong pekuenobinchi. Bapoxonae Jesús tane pebin pong pewüng Mateo. Bapong eka ichaxota bapong parátixi matoma noteibeka po parátixi jiwi bewa katsibina pong romanomonae itorobiya pía pepa peewatsinchi nexa. Jesús barái Mateo:

—Nepunaponde, jei Jesús.

Bapoxonae Mateo kaena naiña nontapona yawa naiña punapónatsi Jesús.

¹⁰Pirapaeyo Jesús barü ékatsi, Mateo barü eka piabotha pexaethopewatha xua Jesús pebarü xaenéxatsi. Barichi Jesús barü eka pinmonae bárapo pexaethopewatha pomonae parátixi pentomanotéibiwi po parátixi jiwi bewa katsibina pong romanomonae itorobiya pía pepa peewatsinchi nexa. Írürü Jesús barü eka ichamonae pomonae abe peéxanae kuirukoyenein peexanaewi. Daxita barapomonae Jesús barü eka pexaethopewatha yawa Jesús pijimonae barü ékano penabanaenexa. ¹¹Íchitha poxonae fariseomonae tane xua Jesús dapokotsiwa barü eka, barapomonae namchi. Jesús pijimonae tatsi baraichi:

—Maisha Jesús abe éxana poxoru barü xayeka pomonae parátixi pentomanotéibiwi. Matáütano, barü xayeka pomonae abe peéxanae kuirukoyene peexanaewi, jeichichi Jesús pijimonae tatsi bárapo fariseomonae.

¹²Poxonae Jesús baxua jumetane, bapong Jesús namchi barapomonaetha:

—Pomonae ba xaniwaicha jinompa xua jopa ateneyo barapomonae ba jopa nantawenonaeyo pong jiwi peyawüübin. Saya jame meisha pomonae ba átene barapomonae jame nantawénona pong jiwi peyawüübin. Bara jüta koyene ichi barapomonae pomonae nebarü xane. Barapomonae nenantawénona xua tayábara kuijüntemainaexae abe pía peéxanae kuirukoyenein tatsi. ¹³Panakuidubaponde xua Nakom Pejume Diwesi paeba. Meje xua Nakom namchi, jeye: ‘Ichichipang xua jiwi nantanuweya peyábara nantaxeinaewa ichamonaetha xua peyawenaewa tsane. Baxua jame ichichipang beyakaincha xua ichichipang pokuikoyene xua jiwi duwéi petautsiwa xua túxusi éxana xang nexa’, jei Nakom. Barchinno xang patopang ápara tha jopa tawabinexa tsane pomonae pejüntükoyene wüüinaewi. Ápara jame patopang tha meisha tawabinexa tsane pomonae peajüntükoyénebe jiwi, xua barapomonae icha jüntükoyene pexeinaenexa tsane peúruxae xua abe éxana, jei Jesús.

Meje yábara poxonae Jesús yábara yáinábatsi pokoyene xua Nakom peyábara nainbotsíwatsi

(Mr 2.18-22; Lc 5.33-39)

¹⁴Néxata Juan pong jiwi Pebautisabin, bapong pía pepunajinompaewichi barapomonae pata Jesús pía xantha tapátatsi. Barapomonae Jesús yáinábatsi, jeye:

—Ápara paxang irü fariseomonaе jopa juniya Nakom payábara nainboteibiño poxonaе Nakom pawüükeibang. ¿Eta xua metha jiñamonaе daxua jopa kou dai-chiyo, saya kou ü penabaneibi? jei barapomonaе pomonaе Juan pía pepunajinom-paewichi tatsi.

¹⁵Jesús jumenota barapomonaе:

—Jiwi ba jopa bewa wekoyeya yábara nainbotsi poxonaе ichamonaе pexaewa tsinakaetuta penabanaenexa xua poxonaе pebin pekotsiwa pita. Poxonaе kataun-xuae áwiya bapong eka pexaewa penabanáewatha, bapoxonaе jiwi ba pebüriya nábane, jopa bewa yábara nainbotsi tsane. Íchitha icha pong aena píowa pita, kaena naiña wáetabatsi, ichamonaе wáetaba xua bapong tajü pekaponaexaetsi, bapoxonaе jame jiwi ba bewa wekoyeya yábara nainbotsi xua ekeicha bapong kaewa pepatopaewa tsane.

¹⁶“Jiwi ba jopa exanaeyo xua pena paparuwa tsiwiyo jíwana kaxinaxubeta po paparuwa kataunxuae jopa matanaxubiyo, xua bárapo paparuwa pewangbotsinexa peru dorouto. Icha baxua exanáetsipa xua pena paparúwatha wang bota peru doróutotha, bapoxonaе bárapo dorouto abe tsipae. Tsipéi poxonaе bárapo dorouto matanaxuba bárapo pena paparuwa natsaketábiya. Poxonaе bárapo pena paparuwa natsaketábiya ekeicha wang tsitsipanarena bárapo dorouto. Bapoxonaе ekeicha nama bichokono pin wang tsanaya beyakaincha xua poxonaе kopiya. ¹⁷Matáütano jiwi ba pena vino mera jopa eparekaeyo peru bokototha, tsipéi icha baxua exanáetsipa, bárapo pena vino mera abe exanáetsipa bárapo bókoto. Tsipéi bárapo bókoto jopa nayeyetaponaeyo poxonaе bárapo vino mera átsaxa. Bárapo pena vino mera naxuba yawa bárapo bókoto naxuba poxonaе bárapo bókoto tsi-tsika. Daxota bewa jame pena vino mera eparekae pena bokotongtha. Bapoxonaе pena vino mera jopa naxúbiyo, yawa pena bókoto jopa naxúbiyo poxoru bokoyeyena yawa poxoru pena bókoto”, jei Jesús.

Meje yábara xua poxonaе Jairo pexantiyo taaxaibi éxanatsi, yawa yábara xua bapoxonaе icha yábüyo irü axaibi éxanatsi poxonaе Jesús pía paparuwa tajayabatsirü

(Mr 5.21-43; Lc 8.40-56)

¹⁸Poxonaе kataunxuae Jesús kueikueijei barapomonaetha, bapoxonaе pebin patopa. Bapong judiomonaе pía penakaetútsibo pía Pekanamataxeinaein tatsi. Bapong pewüng Jairo. Jesús petáxutha írabe tatayekarékatsi. Bapong baxua éxana tsipéi Jesús pong aiñakuí peexanaeinchi. Bapong Jesús jeichi:

—Taxantiyo anoxuaetha inta tüpa. Icha xam ponáename yawa nekobetha mata-jayabíname, bapoxonaе barapowa ekeicha asüü tsane xua ekeicha nakosatsina, jei Jairo.

¹⁹Jesús bapoxonaе nontapona. Jairo punapoinchi. Irü Jesús pijimonaе punapoinchi. ²⁰Poxonaе Jesús iya irü yábüyo Jesús imoxoyo kakuita poinchi. Barapowa kaena báyatha be doce po wéiyobe xeina xua péntabü jánatha boka xua be nantawane. Barapowa Jesús pía paparuwa xaiñowa tajayabapóñatsi. Bapowa paparuwa tajáyaba xua peopírawa xua Jesús pía penamaxatatsiwa tatsi. ²¹⁻²²Baxua éxana tsipéi bapowa nanta-xeina, jeye: “Icha Jesús pía paparuwa tajayabín bapoxonaе axaibin tsane”, jei bapowa.

Poxonaе bapowa Jesús tajáyabatsi pía paparuwa, bapoxonaе kaena júntübü jana narúntaba.

Néxata Jesús napatomeicha nekota, yawa yábüyo tainchi. Jesús namchi bapówatha:

—Yábüyo, najüntemiya xore. Kaaxaibi éxanatsi jiña tana neyábara jumekowüntisixaem xua bara tana neitaküüpaewa xua takaaxaibi exanáewatsi, jei Jesús.

²³Jesús ekeicha pona. Poxonae Jesús patopa Pekanamataxeinaein piabotha tatsi, bapoxonae Jesús tane xua pebiwi oba tsipéi yábüyo báyatha tüpa. Bárapo pebiwi pomonae pekapuobiwi pewerapeibiwi. Matáütano Jesús tane pomonae pesiwa namtsébiya wekoyéi jiwi. ²⁴Jesús namchi jíwitha:

—Petutu weya paponde. Yábüyo ápara jopa tüpaeyo, ápara maitungkua, jei Jesús.

Poxonae Jesús baxua paeba, jiwi Jesús jumekuikapónatsi. ²⁵Íchitha Jesús itoroba xua barapomonae tutu wejojoniya pesato beya. Bapoxonae Jesús botutu joniya. Jesús kobepita, yábüyo kobepítatsi yáwano asiya kuaranotatsino penakosatsixa. ²⁶Xua Jesús yábüyo axaibi éxanatsi, bárapo diwesi daxita jiwi jumetae-táepona pomonae bárapo nákuatha jinompa.

Meje yábara poxonae Jesús axaibi éxana pongbe nantíyabe ítata nakútabe

²⁷Poxonae Jesús bara weya pona ichaxota yábüyo kaewa asiüü éxanatsi, pebinbe Jesús punapoinchi. Bapongbe peitatanakútsinbe. Bapongbe wawaya jeibe:

—Xam Jesús, David pía pemómoxi susatopin jíwanam pongxaem Nakom nekai-tapetsin pana neyábara najüntükoyene xeinarebe xua pata tana neyawenaexáemebe, jeibe bapongbe pongbe peitatanakútsinbe.

²⁸Poxonae Jesús bómüxü bejoniya, pongbe peitatanakútsinbe Jesús imoxoyo kakuita póinchibe. Jesús yáíñaba bapongbe:

—¿Bara pana neyábara jumekowüntamebe xua bara tana neitaküüpaewa xua axaibi tapaka ka-exanaewatsibe? jei.

Jumenótabe:

—Aja, pata Tanekanamataxeinaem, bara paka kuiyábara jumekuikowüntatsibe, jeibe.

²⁹Bapoxonae Jesús itamaikéi jáyababe bapongbe. Jesús namchi bapongbetha, jeye:

—Icha pana nekuiyábara jumekowüntamebe xua bara tana neitaküüpaewa xua axaibi tapaka exanaewatsibe bara baxua pákata exanáeinchibe xua axaibi paka exanáeinchibe, jei Jesús.

³⁰Bapoxonae kaena naiña aitamaikeixáibibe. Jesús jumedangweya baraibe bapongbe, jeye:

—Jopa pana nekuiyopichindebe ichamonaetha xua pákata exáinchibe baxua, jei Jesús bapongbetha.

³¹Dáichitha poxonae Jesús weya pónabe, pejumetaéwathabe xua Jesús paeba, tsipáebabe ichamonaetha pomonae bárapo nákuatha jinompa, daxita pokotsiwa xua Jesús kana éxana bapongbetha.

Meje yábara poxonae Jesús axaibi éxana pong pemuxusipanaein

³²Poxonae Jesús bo wejoniya írürü pongbe aitamaikeixaibi exanátsibe, bapoxonae ichamonae pata ichaxota Jesús. Barapomonae kápona pebin, pong

muxusípana, matáütano jopa paebiyo, tsipéi yakauríbatsi. ³³Bapoxonae Jesús itaweta kauri xua bárapo pebin muxusípana exainchi. Kaena naiña bapong kueikueije. Néxata pomonae xua tane xua Jesús éxana, barapomonae yábara najüntükoyene benaeka. Barapomonae namchi, jeye:

—Jopa bápana taetsi Israel nákuatha icha be ichi pokotsiwa Jesús éxana, jei barapomonae.

³⁴Íchitha poxonae fariseomonae jumetane baxua, barapomonae namchi Jesús yábara, jeye:

—Barapong kaurimonae itawétatsi tsipéi xeina kaurimonae pía pentakaponaein tatsi pía peayapusúü itorobi koyene tatsi, jei fariseomonae.

Meje yábara poxonae Jesús nantanuweya yábara kuinantaxeina jiwi xua peyawenaewa tsane

³⁵Jesús pona daxita pin tómarangtha yawa po tómaraxi tsiki tomaraxitha. Bapong kuiduba dukuanaeta judiomonae pía penakaetutsi bongtha tatsi. Matáütano bapong paeba dukuanaeta Nakom pía pexeña jume diwesi tatsi po diwesi yábara xua Nakom waba jiwi petanaexanaenéxatsi piamonae pomonae Nakom jüntükoyene itorobiya éwata. Matáüta bapong jiwi axaibi éxana dukuanaeta pomonae xua átene yawa xua kuenokuénona. ³⁶Poxonae Jesús jiwi tainchi, Jesús yábara nantaxeina barapomonae xua peyawenaewa tsane. Tsipéi barapomonae natsepa matáütano jopa itaküüpaetsi xua piakoutha penayawenaewa. Barapomonae bara be jüta koyeneya ichi, icha be ovejamonae ichi xua poxonae íratha bobena tsipéi natsepa matáütano tsipéi dapong aibi, pong pe-eeinaein ovejamonae xua peyawaenaena. ³⁷Néxata Jesús namchi pijimonaetha:

—Bara xaiñeya paka tsipáebatsi. Pábitha bapokotsiwa peübiwang naweta nawita, dáichitha ba penakuichiwi pomonae jota pinmonae aibi. Bara jüta ichi bárapo kae pin nákuathe. Jiwi pinmonae jinompa pomonae nantawénona xua pejumetaewa tsane Nakom pía pexeña jume diwesi tatsi. Dáichitha pomonae Nakom Pejume Diwesi kueikueije tsurubenanáebiya ichamonaetha, barapomonae pinmonae aibi, saya tsikimonaeyo. ³⁸Daxota Nakom pawüükare xua pekaitorobinexa tsane ichamona xua petakamuxu tsipaebinexa tsainchi pía pejume diwesi pomonaetha, pomonae bárapo kae pin nákuathe pejinompaewi, jei Jesús.

Meje yábara poxonae Jesús itapetsiya waba pía peitorobiwi tatsi xua doce póyobe

(Mr 3.13-19; Lc 6.12-16)

10¹Néxata Jesús pijimonae waba. Barapomonae jíwana itapétatsi doce póyobe, pomonae baraichi: “Jesús pía peitorobi jiwi tatsi”, jeichichi. Jesús barapomonae kata pía peayapusúü itorobi koyenewa xua kauri ichamona petaitawetsinéxatsi pomonae xua yakauríbatsi. Matáütano Jesús kata pía peayapusúü itorobi koyenewa xua pijimonae tatsi axaibi peexanaenexa pomonae xua átene, xuano xua kuenokuénona.

²Barapomonae pomonae doce póyobe pomonae peitorobíwichi, ichüng pewüng Simón, pong icha wüngno “Pedro” baraichi. Irü ichüng pewüng Andrés, pong Simón peweicho tatsi. Irü ichüng pewüng Santiago. Irü ichüng pewüng Juan, pong Santiago peweicho tatsi. Bapongbe Zebedeo pexántobe tatsi. ³⁻⁴Irü ichüng

pewüŋ Felipe, irü ichüŋ pewüŋ Bartolomé, irü ichüŋ pewüŋ Tomás, irü ichüŋ pewüŋ Mateo. Barapong Mateo pong parátixi pentomanoteibin po parátixi jiwi bewa katsibina pong romanomonaē itorobiya pía pepa peewatsinchi nexa. Irü ichüŋ pewüŋ Santiago, pong Alfeo pexanto tatsi. Irü ichüŋ pewüŋ Tadeo. Irü ichüŋ pewüŋ Simón, pong celotemonaepin. Irü ichüŋ pewüŋ Judas Iscariote, pong Jesús kaenaetaxúbatsi ichamonaetha xua pebexubinéxatsi.

**Meje yábara poxonaē Jesús itoroba pijimonaē xua barapomonaē
peyábara kueikueijeinexa jíwitha pokoyene xua Nakom waba
jiwi xua petanaexanaenéxatsi pijimonaē tatsi**

(Mr 6.7-13; Lc 9.1-6)

⁵Bárapo doce póyobe Jesús itoroba, Jesús jeye:

—Jopa panabarü ponaeinde po nakua ichaxota jinompa pomonaē jopa judiomonaeyo matáütano jopa paponaeinde po tómarang ena Samaria nákuatha. ⁶Meisha saya paponde pomonaē Israel nakuamonaepíwitha. Barapomonaē payawende tsipéi barapomonaē Nakom tajü wepu jinómpatsi xua piepatotha jinompa. Icha be pókotsi jüta koyeneya ichi oveja, bárapo ovejamonaē napuxana poxoru wepu pona tajü beya, xua pong pe-eenaēin bárapo ovejamonaē bapong tajü wepu poinchi icha xua poxonaē napuxana. ⁷Poxonaē papaeba dubenanaebíyame, papáebare barapomonaetha pokoyene xua ánoxuae Nakom waba jiwi xua petanaexanaenéxatsi piamonaē pomonaē itorobiya peewatsixae. ⁸Matáütano Nakom pía peayapusúü itorobi koyenéwatha pokoyenewe meje baxua paexande: Axaibi paexande pomonaē peatenewi; ekeicha asüü paexande pomonaē werapeibina; axaibi paexande pomonaē xua peperüüsawichimonaē; matáütano kaurimonaē pata taitawere pomonaē yakauríbatsi. Nakom amanaya paka kata bárapo pía peayapusúü itorobi koyene, daxota poxonaē jiwi payawéname Nakom pía peayapusúüwatha, jopa jiwi parátixi pawüükaeinde.

⁹Jopa pakaponaēinde parátixi xua poxonaē paiña newarapaenexa. ¹⁰Jopa pakaponaēinde kote xua paiña nejeyaenexa paparuwang poxonaē pawárapame. Saya kae kamisha panamaxátabare, jopa icha kamisha pakaponaēinde. Matáüta jopa pakaponaēinde ichawang xua paiña xua nenataxu xatabiwang, yawa icha iwatong jopa pakaponaēinde. Paiñaxoba paauram xua poxonaē jiwi paka katsibeibina tsipéi báraxua pokotsiwa paka kata ápara bara paiña matoma paiña netanakuichi-xaemxae Nakom.

¹¹”Poxonaē papanenebiyam pin tómaratha, ichakuitha tsiki tomaríyotha, pajaire pong jiwi barükui-iturajina xuano xua paka tsiwaba piabotha tatsi xua pía paka apatsinexa tsane. Bapong piabotha tatsi paiña nepuenaēinde beya tsane poxonaē bárapo tómara weya pawarapáename. ¹²Poxonaē bomüxütha pajojoníyame, bárapo bopiwi pajakóbare, pajande: ‘Bárabü Nakom jüntema jinompa paka kana exanaena’, pajande. ¹³Icha baxota jinompa pomonaē, pomonaetha jiwi barükui-iturajina, bara baxua Nakom barapomonaē taexanaēinchi pokotsiwa papáebame. Íchitha icha baxota jinompa pomonaē, pomonaetha jopa jiwi barükui-iturajinaeyo, baxua Nakom jopa taéxanaē tsane pokotsiwa papáebame barapomonaetha. Ekeicha kaewa pákata parenaena xua pokotsiwa papáebame. ¹⁴Íchitha icha tomara-piwi ichi jopa paka matenta weyataeya wábiyo yáwano icha jopa xapain paka jumenaitaewatsiyo, néxata bapoxonaē panatsixibare. Namto beya paponde xua

bómüxü weya xua ichakuitha icha tómará weya. Po tsórobo paiña táxutha dubena pana nataxu wenüinúbábare bárápo tómaratha. Poxonae baxua paéxaname patsita-itapeiñaxeináename, ápara xua barapomonae abe éxana paiña xaiña bérena xua poxonae barapomonae paka jume itaweta. ¹⁵Bara xaiñeya paka tsipáebatsi matakabi patopaena, po matakábitha Nakom yábara paebina jiwi petsita-natsikuent síxaetsi xua abe petsita-exanáexaetsi. Bárápo matakábitha jopa juniya bichokono átene tsane pomonae paka jume itaweta. Kaena báyatha Sodoma tomarapiwi irü Gomorra tomarapiwi bichokono abe éxana. Daxota Nakom átene exanaena bárápo tomaramonaebe. Bara bekein Sodoma tomarapiwi átene matáüta irü Gomorra tomarapiwi bekein átene tsipéi bichokono abe éxana barapomonae. Íchitha nama pomonae bárápo tómaratha jinompa, pomonae paka jume itaweta, jopa juniya péraxa jübebí tsainchi, beyakaincha poxonae Sodoma tomarapiwi yawa Gomorra tomarapiwi péraxa jübébatsi”, jei Jesús.

**Meje yábara poxonae Jesús yábara paeba xua ichamonae
abe exanaena Jesús pijimonaetha tatsi**

¹⁶Ekeicha Jesús jeye: “Paponde ichaxota paka itoróbatsi. Paka kaitoróbatsi pía xaiña beya pomonae jopa pejumekowüntsiwi, pomonae itaküüpatsi xua abe paiña nepaka exanaewa, icha ovejang ichi xua poxonae pona ichaxota neuthü jinompa xua itaküüpatsi xua abe peexanáewatsi. Paxam pananthüthü kuiwüünaetsiya tsakiya jinómpare, tsipéi ichamonae beya paka pepeichipa. Baxua bara paichinde icha jomo ichi xua peitakoxonaein poxonae waxouto kuitaya naetsiríwatsi. Paxam bara jütiya jopa paichim tsane jopa ichamonaetha abe paexanaeinde, icha topiboto ichi xua anáepana jopa nantaxeinekaeyo xua jüntema yapoponeka. ¹⁷Paxam dota pam, dota pomonae peajüntükoyénebe jiwi. Barapomonae paka teikaena pepaka kaponaenexa tsane pomonaetha, pomonae tómarang pentakaponaewi. Bapoxonae barapomonae paka kuainchina judiomona pía penakaetutsi bongtha tatsi. ¹⁸Matáüta barapomonae paka kaponaena pomonae peyanakua éwatsi jiwi peitabaratha tatsi. Matáüta paka kaponaena pomonae jiwi itorobiya pía pepa peewatsíwichi pía peitabaratha tatsi. Baxua paka kana exanaena paiña tana nejumekowüntsixaemxae. Dáichitha bárápo pentakaponaewi peitabaratha tatsi paka itaküüpaena xua pata neyábara paebiwang pokotsiwa báyatha tapákata exanáewatsi paxam. Matáütano paka itaküüpaena xua pata neyábara paebiwang pomonae jopa judiomona naexanaeyo peitabaratha tatsi. ¹⁹Íchitha poxonae paka kaponaena pentakaponaewi beya, jopa payábara najüntükoyene exabinde pokotsiwa xua paiña nejudenotsiwa tsane barapomonaetha. Nama Nakom paka tsijumedubina pojume xua paiña nekaunutsiwam tsane. ²⁰Tsipéi beta jopa papaebim chipae paiñakoutha, íchitha Nakom pía Pejumopetünaxü tatsi paka tsimuxukuei-kueijejei tsane. Bapong paka katsina po jumetha xua patsipaébíname.

²¹Jiwi kaenaetsina barompaya peweicho jiwi ichamonaetha xua ichamonae pejutebinexa tsane. Irü koxiyeiwi ichamonaetha kaenaetsina pía pexui xua ichamonae pejutebinexa tsane. Irü pexui paxeiwi kaenaetsina ichamonaetha xua ichamonae pejutebinexa tsainchi. ²²Daxita nakuangpiwi paka kasebina paiña tana nejumekowüntsixaemxae. Íchitha icha áwiya paantüyapusüüya nejumekowüntsiya jinompáename xua beya payakuiya werapaeya othopáename, poxonae bekein abe pákata éxana ichamonae Nakom napaeba paka kana exanaena. ²³Icha kae tomarapiwi paka

abe exanaena, pariüküpare icha tómara beya. Bara xaiñeya paka tsipáebatsi xua xang pongxaein Nakom Tananeitapetsin, ekeicha patopeikaein beya abü poxonae kataunxuae jopa panakuiwetsim tsane xua papóname daxita israelmonae pía nakua tómarangtha tatsi, xua papaeba dubenanaebíyame Nakom Pejume Diwesi.

²⁴”Pong ba aena nakuiduba xua peyaputaenexa, bapong jopa be bapokotsiño, pong pekuidubin jiwi, pong peyaputaen. Matáúta pong ba petanakuichin jopa aiñakuiyo, jopa be bapokotsiño pong xua peitorobixaetsi pong pía pekanamataxeinaeinchi tatsi. ²⁵Pong ba penakuidubin bewa nantaxeinae, bewa najéi: ‘Maisha ichamonae inta abe éxanatsi pong tana nekuidubin. Metha bara neichi tsane’, bewa najéi. Irü pong ba tana-kuita pía pekanamataxeinaeinchi bewa najéi: ‘Maisha ichamonae inta abe éxanatsi pong tanekanamataxeinaein. Metha bara neichi tsane’, bewa najéi. Icha pókotsi koye-neya bapongbe ichi poxonae baxua nayábara nantaxéinabe, barapókotsi koyeneya paka kana ichiya éxana jiwi icha poxonae neyábara ichiya namchi. Tsipéi jiwi abe neyábara paeba xua jeye: ‘Maisha bapong Beelzebú tsekæe pong kaurimonae pía pentakaponaein tatsi’, jei. Matáúta paka yábara jei tsane: ‘Maisha barapomonae Beelzebú pijimonae tatsi po Beelzebú kaurimonae pía pentakaponaein tatsi’, paka yábara jei tsane”, jei Jesús.

**Meje yábara poxonae Jesús yábara paeba
xua pongtha bewa ba jiwi kuitaya kunuwina**

(Lc 12.2-7)

²⁶Ekeicha Jesús jeye: “Jopa jiwi pakunúwinde xua tapana neyábara paebiwam. Tsipéi daxita diwesi, xua po diwesi bekein ánoxuae jiwi jopa yaputaeyo, bexa yaputaena. Pokotsiwa jiwi abe nameicha éxana dáichitha ichamonae bexa yaputaeponaena baxua. ²⁷Tsipéi daxita baxua xua nameicha paka tsipáebatsi, baxua xuya patsipáebare jiwi. Po diwesi xua mérawi paka tsipáebatsi, bárapo diwesi xuya ichamonae mataketha patsipáebare. Po diwesi xua paxapaxeya paka tsipáebatsi, bárapo diwesi xuya pánatha pana nejumekanawabiya wawande. ²⁸Tamonae pam, paka tsipáebatsi, jopa pakunúwinde pomonae itakúüpatsi xua paka jutebina xua saya meisha paiña pepongtha. Íchitha barapomonae jopa itakúüpaetsi xua ekeicha paka jumopeintünaxü jutebina. Jame paka tsipáebatsi pong jame bewa pajumekuitaya kunuwim bapong ápara jame Nakom. Tsipéi barapong Nakom itakúüpatsi xua paka bebái tsane pin ishótotha po pin ishótotha jopa bápana itakounayiyo xua werawé-raka paiña nepaka exanaenexa paiña pepong yawa paiña nejumopetünaxüng.

²⁹”Jiwi ba kaenaeta sito aiña póyobe, saya kae paratíyotha nantómata. Bekein bárapo síto be kaenaeta jiwi, íchitha jopa matoma nautsiyo, poxoru saya sito, íchitha paiña Axa Nakom yaputane yawa kópata poxonae bárapo síto be jíwana íratha yajopeika xua yatüpa. ³⁰Nakom daxita karepaya jopa juniya paka yábara yaputaeyo, daxota paka matanayaputane xua pontanatíyobe paiña nexeinaewa. ³¹Jopa pajunuwinde tsipéi paxam bichokono Nakom patsita aiñakuim, beyakaincha siri”, jei Jesús pijimonaetha.

**Meje yábara poxonae Jesucristo yábara paeba xua pomonae peyábara
paebíwichi ichamonae peitabaratha tatsi**

(Lc 12.8-9)

³²Ekeicha Jesús namchi: “Yábara paka tsipáebatsi pomonae xua nayopita ichamonaetha pomonae xua najéi: ‘Ápara paxang Jesús pijimonae tatsi pang’, najéi.

Barichi xang xuya jang tsane Nakomtha: ‘Barapomonae ápara tana nejumekowüntsiwi’, jang tsane xuya bárapo Nakom peitabaratha pong Taxa, pong peitabókotha peekaein. ³³Íchitha pomonae xua neyábara jei ichamonaetha: ‘Jopa bapong yaitaeiño’, jei, xang xuya barapomonae yábara jang tsane: ‘Ápara barapomonae jopa yaitaeiño’, jang tsane xuya Taxa beicha, pong peitabókotha peekaein”, jei Jesús.

**Meje yábara poxonae Jesús yábara paeba xua jiwi aiña bicheitong
naexanaena xua Jesús pejumekowüntsixaetsi xua
ichamonaetha jopa pejumekowüntsixaetsirü**
(Lc 12.51-53; 14.26-27)

³⁴Ekeicha Jesús namchi: “Jopa panantaxeinaeinde xua patopeikang saya meisha xua jiwi jüntema jinompa takana-exanaewa tsane. Jopa baxua tsipatopaeiño. Ápara jame tsipatopeikang taexanaenexa pokoyene jiwi naba éxanatsi xua daxota aiña bicheitong penaexanaenexa. Pomonae jopa nejumekowüntsiyo ita-aenae-aenéi pomonaetha, pomonae tana nejumekowüntsiwi. ³⁵Koxiyang pexanto ita-aenae-aenéi tsainchi. Irü koxiwa pexantiyo ita-aenae-aenéi tsainchi. Írürü ichowayo pekopeiño ita-aenae-aenéi tsainchi. ³⁶Daxota pebin barompaya piamonae pena aitafaetabí jiwi nakana éxanatsi.

³⁷”Pong ántobe paxa yawa pena beyakaincha xua neántobe, bapong jopa naexanáe tsane pong tajiwimonae jíwanapin. Pong ántobe pexanto beyakaincha xua neántobe, bapong jopa naexanáe tsane pong tajiwimonae jíwanapin. Yawa pong ántobe pexantiyo beyakaincha xua neántobe bapong jopa naexanáe tsane pong tajiwimonae jíwanapin. ³⁸Matáütano pong jopa áwiya éxana dukua-naebiyaeyo pokotsiwa itorobang, tsipéi jopa be péraxa exanaetsi icha be xua poxonae neichi néxata bapong jopa tajiwimonaepiño. ³⁹Pong naantobeya nata éxana pokotsiwa bapong ichichipa bapong jopa xeinaeyo peajüntüyapusüüwa, po peajüntüyapusüüwa ataya tsiteka xua Nakom pía nakua beicha. Íchitha pong neantobeya inta éxana pokotsiwa ichichipang taneantobexae bapong xeinaena peajüntüyapusüüwa, po peajüntüyapusüüwa ataya tsiteka xua Nakom pía nakua beicha”, jei Jesús.

**Meje yábara poxonae Jesús yábara paeba xua
pokotsiwang peyábara kuimatotsiwa**
(Mr 9.41)

⁴⁰Ekeicha Jesús namchi: “Pong xua paka matenta weyatane pía tana neyábara jumetaenexa tsane pokotsiwa papaebíname, barápara bapong yawa neweyatanerü. Barapong pong xua neweyatane, barápara matáütano weyatáenarü xua weyainchi pong xua tana neitoróbixae, bapong Nakom. ⁴¹Pong kueikueijeí Nakom pía peitorobi jume diwesi, Nakom bapongtha katsina pía peyábara kuimatotsiwa tsipéi barapong pong bárapo peitorobi jume pepaebin Nakom tanakuítatsi. Po peyábara kuimatotsiwa kátatsi pong Nakom peitorobi jume pepaebin, Nakom barichi tsane jüpa katsina pongtha pong matenta weyatane, xua matenta weyainchi pong Nakom pía peitorobi jume pepaebin. Matáüta irü pong xua pejüntükoyene xeikaein bapongtha Nakom katsina peyábara kuimatotsiwa tsipéi bapong wüünaeya pópona Nakom nexa. Nakom barichi tsane jüpa katsina

pongtha pong matenta weyatane xua matenta weyatainchi pong pejëntükoyene xeikaein. ⁴²Pong xua apatsina tajiwimonae jíwanapin bekein jopa matowa apatsiyo mera xua bekein kae korótiyo xua ameneké, dáichitha Nakom bapongtha katsina pía peyábara kuimatomatsiwa tsipéi bapong tajiwimonae jíwanapin yawénatsi”, jei Jesús.

**Meje yábara poxonae Juan pong jiwi Pebautisabin itoroba pijimonae
Jesús beya, peyaiñabinexa tsainchi Jesús**

(Lc 7.18-35)

11 ¹Jesús najumeweta xua pijimonae muxuwetsiya kuiduba, po jiwimonae tatsi xua doce póyobe tatsi. Bapoxonae Jesús bara weya natsixitaba xua tómarangtha peponaenexa po tómarang ena bárapo nákuatha xua jíwitha pekuidubinexa Nakom pía pexeíña jume diwesi tatsi.

²Juan pong jiwi Pebautisabin, bapong jiwi pekübibotha étatsi. Poxonae kataunxuae jiwi pekübibotha eka, bapong jumetane xua juiña Cristo éxana. Bapoxonae Juan itoróbabe Jesús beya pongbe pía pepunajinompawewichi jíwanabe tátsibe xua petayaiñabinexatsibe Jesús beya. ³Barapomonae Jesús yáiñabatsi xua Juan najumekaruta, xua jei:

—¿Metha bara xaniwaicha xam bapongda, pong bewa patopaena pong Mesías? ¿Ichakuitha metha bara ichüng pawüünae éwatang jampa? jei barapongbe xua Juan najumekaruta.

⁴Jesús jumenota barapongbe, jeye: “Papóndebe, matáüta Juan patsipáebarebe xuaunxuae pokotsiwa pana nekuitanemebe, matáütano xuaunxuae pokotsiwa pana nejumetanemebeno. ⁵Matáütano patsipáebarebe xua pomonae peitatanakütsi jiwi ekeicha tane, matáüta xua pomonae pejayuyajujeiwi ekeicha beta pona, matáütano xua pomonae peperüüsawichimonae ekeicha perüüwüünae, matáüta pomonae xua pemuxusipanaewi ekeicha muxunasaba, matáüta pomonae xua pewerapaewi ekeicha asiü tsane. Matáüta pomonae xua peakopeibí jiwi jumetane Nakom pía pexeíña pekapanenebiyáe jume diwesi. ⁶Patsipáebarebe Juan xua xang jangje: ‘Jüntükoyene weiweinaena pong jopa aiña ünthüthüngyo, pong xaniwaicha neyábara jumekowünta’, xua jang”, jei Jesús.

⁷Poxonae Juan pía penakanajume kaitorobinbe tatsi pónatababe, bapoxonae Jesús tamrópata pítaba xua yábara paeba jíwitha xua Juan yábara páebatsi, jeye: “Ira xuépana susato tsúrukuae nákuatha papóname. Poxonae bara beya póponame, ¿eta xua metha páiñatsi, paiña jumetaetsi pebin pong aiña ünthüthüto kuixeina icha be naepanaewa ichi xua saya joibo ba jübabiya kaya tsaibi? Jume ápara. ⁸Bara paichim. Papóname ¿paiña nejumetaenexa pebin pong peitüpanáe paparuwa namaxátata? Jume ápara. Payaputáneme pomonae peitüpanáe paparuwang namaxátaba, barapomonae ba jinompa pexeíña bongtha pomonae jiwi itorobiya pía pepa peewatsíwixaetsi. ⁹Jume. Jopa baxua patsiponaem xua jopa paiña jumetaenexa pebin pong aiña ünthüthüto kuixeina, matáütano xua jopa paiña jumetaenexa pebin pong peitüpanáe paparuwa namaxátata. Ápara jame baxua patsipóname xua paiña nejumetaenexa pong Nakom peitorobi jume pepaebin. Bapong Juan bichokono peaiñakuín pong Nakom pía peitorobi jume pepaebin jíwanapin

beyakaincha ichüing pong Nakom peitorobi jume pepaebin. ¹⁰Juan bapong ápara, pong yábara páebatsi Nakom Pejume Diwésitha poxonae Nakom netsi-paeba, nejéi:

‘Katsíwanae itorobinchi pong tana nakajumekarutsin.

Barapong jüntükui wüünaetsina jiwi xua daxita jiwi najüntükui wüünaetsina xam nexa,

xua nekantenta weyataeya wabinexa poxonae patopáename’,

nejéi Nakom Pejume Diwésitha.

¹¹Bara xaniyeya paka tsipáebatsi xua daxita Nakom peitorobi jume pepaebiwi pomonae Juan tsiwanaya jinómpatsi báyatha, dapokotsin aibi barapomonae jíwana pong yatsikaewa peaiñakuín beyakaincha pong Juan, pong jiwi Pebautisabin. Juan peaiñakuí diwesi yábara kueikueijeji pokoyene xua Nakom itorobina jiwi. Íchitha po diwesi xua tamonae ánoxuae paeba bárapo diwesi bichokono aiñakuí diwesi beyakaincha xua Juan kueikueijeji, bekein jiwi nantaxeina xua tamonae jopa aiñakuí jiwi.

¹²Juan pong jiwi Pebautisabin, poxonae bapong tamrópata pítaba xua kueikueijeji Nakom Pejume Diwesi xua beya ánoxuae pin bicheitomonae nejumekowünta pía penaexanaenexa Nakom piamonae tatsi. Barapomonae pichichi xua penaexanaewa Nakom piamonae tatsi pomonae Nakom itorobiya peewatsixae bekein ichamonae ayapubé taéxana barapomonaetha. ¹³Daxita po petináe diwesiin Nakom peitorobi jume pepaebiwi tina írürü Moisés pía peitorobi koyenewa tatsi bárapo naxobe peitorobi koyenéwathabe yábara tsiwüünae muxudutsiya paeba. Bárapo peitorobi koyenéwabe yábara paeba xua bexa tsane jopaena matakabi po mataketha xua Nakom jüntükoyene itorobiya kanamataxeinaena jiwi. Matapaiña Juan patopa. Bapoxonae irü Nakom tamrópata pítaba xua éxana pokotsiwa báyatha yábara tsiwüünae muxuduta. ¹⁴Icha paxam xaniwaicha paichichípame xua payábara jumekowüntame xua pokotsiwa barapomonae báyatha yábara paeba, bapoxonae bara panejumekowüntsíname xua páebang, xua jang: ‘Ápara Juan bapong Elías pong kaena báyatha tüpa. Barapong ápara pong Nakom peitorobi jume pepaebin, pong báyatha Nakom yábara paeba xua bepa pinae ekeicha patopaena’, jang. ¹⁵Icha pamuxudubéname moya pana nejumenaitáeware pokotsiwa tapaka tsipaebíwatsi.

¹⁶‘¿Eta pokotsimonae kuijúpatsi barapomonae pomonae xote jinompe pomonae Nakom jume itawétatsi? ¿Eta be jüta ichi barapomonae? Barapomonae be pexui, pokotsixi pánatha nabarü jinompa. Nabarü wawái tsurubenanáebiya. ¹⁷Barapoxi nabarái, jeye: ‘Báyatha oibo paka tsimuxu obatsiba íchitha jopa panawirabim. Báyatha paka tsimuxuwekoyeichiba icha be ichi poxonae ichüing tatúpatsi íchitha jopa pana itanuwé jumenotsim xua paiña newekoyeinexa’, jei barapoxi. ¹⁸Juan patopa pong jiwi Pebautisabin. Bapong jopa xaeyo pan, yawa jopa apaeyo vino mera. Íchitha paxam pajam: ‘Ápara Juan yakauríbatsi’, pajam. ¹⁹Bapoxonae xang pongxaein Nakom Tananeitapetsin patopang. Xang pan taxaein yawa vino mera taápaein. Paxam pana neyábara páebame pajam: ‘Bapong maisha jopa juniya nabanaeyo, yawa jopa juniya apaeyo. Peatsakaewi abe peéxanae jiwi pía jintong tatsi, irü pomonae parátixi pentomanotéibiwi, barapomonae pía jintong tatsi’, pana neyábara jam. Nakom piamonae tatsi barapomonae tsita éxana xua jiwi tsita éxanatsi Nakom pía peyaputáe koyeneintha

tatsi. Pokoyene barapomonaē éxana, baxua Nakom tsita pexaiñéi koyénetsi”, jei Jesús.

**Meje yábara poxonaē Jesús yábara paeba po
tomarangpiwi jopa pejumekowüntsíwichi**

(Lc 10.13-15)

²⁰Néxata Jesús tamrópata pítaba xua biatane aiña tomarangpiwi, ichaxota báyatha kopiya matha matowa éxana pía petsita-itüütsi koyenewang. Bekein Jesús baxua matowa éxana, íchitha barapomonaē jopa icha jüntükoyene xeinaeyo xua peúruxae xua abe éxana. ²¹Daxota bárapo tomarangpiwi beya, jeye: “¡Pai jaibó, Corazín tomarapiwi tsobenáe! ¡Irü Betsaida tomarapiwi tsobenáe! Po tsita itüütsi koyenewang éxanang Corazín tómaratha irü Betsaida tomarathano, ichüng jopa bápana exanaeyo bárapo tsita itüütsi koyenewang Tiro tómaratha yawa Sidón tómaratha. Icha bárapo tsita itüütsi koyenewang exanáetsipa Tiro tómaratha Sidón tomarathano, bárapo tomarabepiwi icha penantaxeináe koyenéwatha yábara nantapentsipa Nakomtha. Barapomonaē íratha enáetsipa yawa paparuwang namaxatabíchipa xua pokotsiwa be peru mapatong xua áxüng, yawa ipuna nakaxuebichipa pía pepongtha. Barapomonaē baxua exanáetsipa xua ichamonae petsita-ita-peñaxeinaewa tsainchi xua icha jüntükoyenein Nakom petsita-xeináewatsi peúruxae abe peexanaexae bapongtha. ²²Paxam pomonaē Corazín tomarapiwi pam irü Betsaida tomarapiwi pam, bara xaniyeya paka tsipáebatsi. Poxonaē bárapo matakabi patopeikaena po mataketha Nakom yábara paebina daxita jiwí petsita-natsikuentsíxaetsi abe petsita-exanáexaetsi, Tiro tomarapiwi irü Sidón tomarapiwi daxita bárapo tomarabepiwi bichokono péraxa jübebinchi. Íchitha nama paxam pomonaē Corazín tomarapiwi pam, írürü Betsaida tomarapiwi pamdü, daxita paxam jopa juniya paka péraxa jübebí tsane, beyakaincha xua péraxa jübebinchi Tiro tomarapiwi irü Sidón tomarapiwi. ²³Ínkane irü Capernaum tomarapiwi pamdü! ¿Bara pana nantaxéiname xua paka kapanenebiya tsane peitaboko beicha? Jume, ápara paka itorobina petüpáe koyenekuiru béreka. Po petsita-itüütsi koyenewang paiña tómaratha éxanang icha báyatha bárapo petsita-itüütsi koyenewang exanáetsipa Sodoma tómaratha, bara kataunxuae bárapo tómaraka ekáetsipa, xua beya ánoxuae tsipae. Tsipéi barapomonaē metha báyatha xeináetsipa icha jüntükoyene xua peúruxae xua abe éxana Nakomtha. Metha bapoxonaē Nakom jopa jutebíchipae bárapo tomarapiwi. ²⁴Íchitha paka tsipáebatsi paxam Capernaum tomarapiwi pam, matakabi patopeikaena po mataketha Nakom yábara paebina daxita jiwí petsita-natsikuentsíxaetsi abe petsita-exanáexaetsi. Bárapo mataketha bichokono paka péraxa jübebina, beyakaincha xua Sodoma tomarapiwi péraxa jübebinchi bichokono”, jei Jesús.

Meje yábara poxonaē Jesús waba jiwí:

“Anetha xang bérena tapaka yawenaewa tsainchi”, jei

(Lc 10.21-22)

²⁵Bara kaena bapoxonaē Jesús jüntükoyene weiweina éxanatsi Nakom pía Pejumopetünaxü tatsi. Jesús namchi, jeye: “Axa peitaboko Nekanamataxeinaem, yawa ira Nekanamataxeinaem. Wüünae kajáintatsi tsipéi jopa tsita itüübim pokotsiwa pexaiñéi koyenewa xang yábara pomonaetha, pomonaē bichokono penakuidubiwi

pomonaē be piñong penatsikotaewi tsipéi nantaxeina xua bichokono peyaputaewi daxita. Jame tsita itúütame bárapo pexaiñéi koyenewa xua xang yábara pomonaētha, pomonaē jopa bichokono penakuidubiwi, pomonaē be pexui penatsikotaewi tsipéi jopa nantaxeinaeyo xua bichokono peyaputáe jiwi daxita. ²⁶Axa, baxua éxaname nekatsita wüünaexae baxua”, jei Jesús Páxatha.

²⁷Ekeicha Jesús namchi pijimonaētha, jeye: “Taxa daxita nekata xua pía peitorobi koyenewa tatsi, matáütano xua pía peyaputáe koyenewa tatsi. Dapong aibi pong xaniwaicha nejüntükuikoyene yaputane. Jame saya meisha Taxa Nakom, nejüntükuikoyene yaputane. Dapong aibi pong Taxa jüntükuikoyene yaputainchi. Saya jame meisha xang Taxa jüntükuikoyene yaputang. Matáütano barichi Taxa meisha jüntükuikoyene yaputainchi pong saya bara kopatang xua bara Taxa pejüntükuikoyene yaputaewa tsainchi. ²⁸Anetha xang bérena daxita paxam xua tapaka yawenaewa tsainchi. Daxita paxam xua pokotsiwa paka jüntükuikoyene natsepa éxana paiña abe neexanáe kuirukoyene baxua paka jüntükuikoyene kanapuxanaeya yábara jüntemainaeinchi xua paiña nenaifina kaewatsinexa. Ekeicha pena jüntükuikoyene paka kana exanaeinchi, xua paiña nejüntükuikoyene weiweinaeya jinompaewa tsane. ²⁹Pana nekuikoyene xéinare takuidubi koyene paiña nenakuidubinexam tsane yawa paiña neyawenaenexa tsane xua paiña nekuidubiwa tsane ichamonae. Baxuang paexande tsipéi xang jopa bápana jüntükuikoyene anaepanaeya takuidubin jiwi. Matáüta bápana jopa tajüntükuikoyene atsakaēin. Matáütano jopa pajüntükuikoyene deideijeya jinompaem tsane. Saya jame wüünaeya painompáename tsipéi paexanáename takuidubi kuikoyenein. ³⁰Bárapo takuidubi kuikoyenewang jopa ayapubeyo paiña jüntükuikoyénetha. Bara paka itaküüpa xua paiña neexanaewa tsane bárapo takuidubi kuikoyenewang”, jei Jesús.

**Meje yábara poxonaē Jesús pijimonaē tatsi yaboto nota trigoxú
judiomonaē barompaya pía pentakeiseikáe matakeitha tatsi**

(Mr 2.23-28; Lc 6.1-5)

12 ¹Kaentakabi poxonaē judiomonaē barompaya pía pentakeiseikáe matakábitha tatsi bárapo matakeitha Jesús irü pijimonaē tátsino pabi iyiya. Jesús pijimonaē tatsi jainpa. Barapomonaē tamrópata notarúküpa xua yaboto xunumena-pona trigoxú, bapoxonaē pekóbetha xu matapepeta yawa xu xane. ²Poxonaē fariseomonaē kuitane xua Jesús pijimonaē tatsi éxana, bapoxonaē barapomonaē Jesús tsipáebatsi, jeye:

—Jamaisha jiñamonaē nakuita bárapo matakábithē poxonaē yaboto nota trigoxú. Ápara jiwi jopa yábara kopatichi xua penakuichiwa po matakeithe xua judiomonaē barompaya pía pentakeiseikáe matakabi tatsi, jei fariseomonaē. ³Jesús jumenota, jeye:

—Bárapo tajiwimonaē jopa ápara abe exanaeyo. Jopa payábara yorobim pokotsiwa báyatha David éxana poxonaē jainpa, poxonaē irü pijimonaē tajainpatsirü. Bapong David, pong kaena báyatha israelmonae itorobiya pía pepa Peewatsinchi. ⁴Bapong David irü pijimonaē tatsi barapomonaē Nakom pin piabotha tatsi jojniya. David xane pan, po pan ichamonae kana éxana xua Nakomtha pekatsíwatsi. Irü bárapo pan David pijimonaē kata xua pexaenexarü. Barapomonaē xane bekein bara Nakom pía peitorobi koyenéwatha kópata xua saya meisha sacerdotemonaē itaküüpatsi xua pexaewa tsane bárapo pan. ⁵Matáütano bekein payábara

yórobame Moisés pía peitorobi koyenéwatha ichaxota jei: ‘Sacerdotemonaepiwi nakuita judiomonae barompaya pía pentakeiseikáe matakábitha tatsi poxonae Nakom pin piabotha tatsi duwéi tauta xua petúxusi exanaenexa Nakom nexa’, jei. Ápara bárapo koyene jopa peabe koyenéwiyo. Jiwi bara kópata. Jopa kuimatawentsiyo bekein bara bárapo judiomonae barompaya pía pentakeiseikáe matakábitha tatsi éxana taetha. ⁶Íchitha paka tsipáebatsi xua nama taayapusúü itorobi koyenewa aiñakuí beyakaincha Moisés pía peitorobi koyenewang tatsi, xuano beyakaincha bárapo koyene pokoyene poxonae Nakom pin piabotha éxana. ⁷Paxam jopa wüünaeya payaputaem xua Nakom jei Pejume Diwésitha: ‘Ichichipang xua paiña nexainaewa tsane nantanuweya peyábara nantaxeinae ünthüto xua ichamonae paiña neyawenaewa tsane. Baxua jame bichokono ichichipang beyakaincha xua duwéi petautsiwa xua petúxusi exanaewa xang nexa’, jei Nakom Pejume Diwésitha. Icha báyatha payaputaetsípame pokotsiwa Nakom Pejume Diwésitha paeba, bapoxonae bárapo tamonae jopa abe payábara paebim chipae pomonae bekein bara jopa abe exanaeyo. ⁸Xang pongxaein Nakom Tana neitapétsixae taitorobi koyene xeinang xua jiwi takoya taitorobiwa pentakeiseikáe matakábitha, jei Jesús, fariseomonaetha.

Meje yábara poxonae Jesús kobewüünae éxana pong pekobemüübinchi

(Mr 3.1-6; Lc 6.6-11)

⁹Poxonae Jesús najumeweta xua fariseomona tsipáebatsi, bapoxonae Jesús bara weya natsixitabiya pónataba trigo pabi weya. Bapoxonae pona judiomonae pía penakaetútsibo tatsi beya, bapoxónaeno joniya bárapo botha. ¹⁰Bárapo botha pebin eka pong pekobemüübinchi. Baxota irü fariseomonae ena. Bárapo fariseomonae ichipa piraichi Jesús yáñabatsi xua icha Jesús jumenotsina icha jumetha xua bapoxonae Jesús pekuiyábara paebinéxatsi jíwitha xua Jesús abe éxana. Bárapo fariseomonae Jesús jeichichi:

—¿Bara Moisés pía peitorobi koyenejuméwatha yábara kópata jampa xua pong átene bara axaibi peexanáewatsi pentakeiseikáe mataketha jampa? jei.

¹¹Jesús jumenota, jeye:

—¿Jintam metha pong paxam jíwana, pong xaina kae oveja, metha jopa jutsipae icha bárapo oveja müthütha tajoparékatsi? Ápara bara áwiya jutsipa pía ovejaxae bara bekein pentakeiseikáe matakabi taetha. ¹²Nama ápara bichokono jiwi yábara Nakom tsita aiñakuichi beyakaincha xua oveja yábara Nakom tsita aiñakuichi. Daxota Nakom kópata xua bara jiwi pewüünae koyene exaneibina, bara bekein xua poxonae pentakeiseikáe matakábintha taetha, jei Jesús fariseomonaetha.

¹³Néxata Jesús barái pongtha pong pekobemüübinchi jeye:

—Nakobedoire, jei.

Poxonae bapong nakobedoita, bapoxonae naiña kobewüünae tsanaya icha icha kobe-ichi. ¹⁴Bapoxonae fariseomonae Jesús weya ponarúkupa xua Jesús pekuiyábara paebinéxatsi xua pokuikoyenéwatha Jesús pebexubiwa tsainchi.

Meje yábara xua Jesús peyábara tsiwüünae kuipaebíwatsi

¹⁵Poxonae Jesús yaputane xua yábara kuipáebatsi xua abe éxana matáütano xua bexubapáebatsi, bapoxonae Jesús bara weya pónataba. Matáütano Jesús

pinmonaeno punapoinchi. Jesús axaibi éxana dukuanaebiya daxita pomonae peatenewi. ¹⁶Matáüta Jesús barapomonaetha itoroba, jei: “Jopa baxua ichamonaetha pana nekuiyopichinde xua jiwi axaibi taexanaewa”, jei Jesús. ¹⁷Jesús itoroba pomonae xua axaibi peexanaexae xua jopa peyábara kueikueijeinexa tsainchi ichamonaetha. Baxua éxana xua penayábara jumekuiwetsinexa xua Isaías pejume diwésitha báyatha yábara tsiwünaeya tina Nakom nexa pong Nakom peitorobi jume pepaebin. Nakom jeye, Jesús yábara:

¹⁸“Bapong ápara pong inta nakuita, pong itapetang, pong bichokono antobein yawa xua nejüntükoyene weiweina éxana pong. Taitorobikaein tajumopetünaxü xua bapong peyantsiwa tsainchi. Bapong daxita nakuangpíwitha kápona exanaena tapexaiña jume diwesi pomonaetha,

pomonae jopa judiomonae naexanaeyo.

Barapong bárapo pexeiña jume diwesi kaponana, xua pejumekowüntsinexa tsane pomonae poxonae jumetaibina bárapo pexeiña jume diwesi xua bapoxonae barapomonae tayábara jüntemainaenexa abe pía peéxanae kuirukoyenein tatsi.

¹⁹Matáüta bapong jopa jumematsontsonobeibi tsane.

Bapong jopa namtsébiya wawái tsaibi tsane námtotha xua jiwi bapong pejumetaenexa tsaibi tsainchi, xua bapong pejumenaitawatsinexa tsaibi tsainchi.

²⁰Pomonae jopa peajüntükoyenesüüwi xua tana nejumekowüntsiwa, bapong jopa bebái tsaibi tsane.

Barapomonae kapanenebiya tsainchi.

Matáütano pijimonae tatsi poxonae jüntükoyene faefaenena, jopa anaya jutebi tsane.

Bara bapong yawenaena barapomonae.

Bapong baxua exanaena xua pijimonae yawenaponaena beya tsane xua kui-amanayabina pía peaitafaetabí jíwichi.

²¹Matáüta daxita nakuangpiwi jíwanamonae pomonae jopa judiomonae

naexanaeyo barapomonae bapong wüünae éwatatsi xua bara bapong barapomonae pekapanenebiwa tsainchi Nakom beicha”,

jei Nakom Jesús yábara Isaías pejume diwésitha.

Meje yábara poxonae Jesús baraichi xua pinae xeina Beelzebú pía peayapusüü itorobi koyenewa tatsi

(Mr 3.20-30; Lc 11.14-23; 12.10)

²²Bapoxonae jiwi Jesús takapatütsi pebin pong muxusípana exainchi kauri, matáütano xua ítata naküta exáinchino. Bapong Jesús axaibi éxana. Bapoxonae pebin muxunasaba, beta nekota, matáütano páebano. ²³Daxita pomonae kuitane baxua, pokotsiwa Jesús éxana, daxita barapomonae yábara najüntükoyene benaekaeya najéi: “Jina, ¿bapong ápara David pía pemómoxi susato jiwi jíwanapin tatsi jampa, pong Nakom yábara wüünae tsiwünaeya paeba xua pinae patopeikaena jampa?” jei.

²⁴Poxonae baxua fariseomonae jumetane, jeye: “Bapong kaurimonae itawétatsi ápara pexeinaexae Beelzebú pía peayapusüü itorobi koyenewa tatsi pong kaurimonae pía pentakaponaein tatsi”, jei fariseomonae.

²⁵Jesús yaputane xua fariseomonaе nantaxeina poxonae natsipaeba baxua, daxota jei fariseomonaetha: “Icha kae nakuapiwi nawepu tsátabe matáüta nábabe, bapoxonae jopa xaexaenaekaeyo. Matáüta írürü icha kae tomarapiwi nábabe, bapoxonae jopa xapain jinompaeyo bárapo tomarapiwi. Matáüta írürü icha kae bo matabüxüyomónaеbe nábabe, yawa nawepu tsatajópabe bapoxonae jopa xaexaenaekaeyo. ²⁶Barichi icha Satanás pijimonaе tatsi nawepu tsatajópabe, matáütano nábabe, bapoxonae jopa xaexaenaekaeyo. Satanás jopa itaküüpaetsi xua itoroba pijimonaе, tsipéi amsiya éxana. ²⁷Paxam pana neyábara jam: ‘Ápara bapong itaweta kauri tsipéi bapong xeina Beelzebú pía peayapusúü itorobi koyenewa tatsi, pong Beelzebú kaurimonaе pía pentakaponaеin tatsi’, pana neyábara jam. Icha baxua bara xaiñéi, ¿néxata eta po peayapusúü itorobi koyeneya tatsi paiñamonaе itaweta kauri? ¿Írürü barapomonaе itaweta kauri Beelzebú pía peayapusúü itorobi koyenéwatha tatsi? Daxota paiñamonaе paka yaputane xua ápara paxam panáerabame. ²⁸Íchitha nama xang kauri itawetang Nakom pía pejumopetünaxü tatsi pía peayapusúü itorobi koyenéwatha tatsi, xua bárapo pejumopetünaxü tana nekatsixae pía peayapusúü itorobi koyenewa. Baxua ápara paka tsipáebatsi paiña neyaputaenexa xua paiñaxantha patopang pongxaein Nakom Tananeitapetsin.

²⁹”Dapong aibi pong itaküüpatsi xua botha joniya po botha pong bichokono maxü dangwéi píabo tatsi xua daxita penotsiwa tsane pokotsiwa bapong xeina pong maxü dangwéi, icha jopa kopiya matha maxükütanotsiyo. Barapókotsi jüta koyeneya ichin. Xang kui-amanáyabang Satanás daxota neitaküüpa xua torotsiya itawetang bapong pijimonaе tatsi pomonaе kaurimonaе.

³⁰”Pomonaе jopa neyawenaeyo, barapomonaе ápara inta abe éxana. Barapomonaе éxana xua ichamonaе jopa tana nejumekowüntsiwa tsane. Barapomonaе jopa yawenaeyo xua ichamonaе nenakaetutsina tajiwiwimonaexae tsane.

³¹”Daxota paka tsipáebatsi xua pokotsiwa jiwi abe peéxanaе kuirukoyenein éxana matáütano pokotsiwa xua jiwi abe paeba, bárapo koyene Nakom itaküüpatsi xua yábara jüntemainaena daxita bárapo koyenein. Pong abe yábara paeba Nakom pía Pejumopetünaxü tatsi Nakom bápana jopa yábara jüntemaináe tsane xua bapong paeba. ³²Matáütano xang pongxaein Nakom Tananeitapetsin pong abe neyábara paeba Nakom itaküüpatsi xua bapong peyábara jüntemaináewatsi pokotsiwa bapong abe neyábara paeba. Íchitha pong nama bichokono abe yábara paeba Nakom pía Pejumopetünaxü tatsi, Nakom jopa bápana yábara jüntemaináe tsane bapong ánoxuae, matáütano xua bexa tsane”, jei Jesús.

**Meje yábara poxonae Jesús yábara kuiduba
xua pinae jiwi yaputane nae penakoichixae**

(Lc 6.43-45)

³³Ekeicha Jesús jeye: “Icha nae po nae pexeíña nae bara nakoita po pethéi pexeíña thei. Icha nae po nae peabe nae bara nakoita po pethéi kamatsá thei. Jiwi ba nae yaputane tsipéi po nae penakoichixae. ³⁴¡Paxam pomonaе bichokono abe peexanaewi pam! Icha jomomonaе ichi xua abe éxana jíwitha bara paichim, abe paéxaname jíwitha. Paxam jopa paka itaküüpaeyo xua wüünaeya paiña nepaebiwa, tsipéi pokotsiwa paiña koibótotha papáebame barápara baxua paiña jüntükoyénetha paka yábara nantaxéiname. ³⁵Pong ba pejüntükoyene wüünaein

bapong ba xua wüünae paeba, tsipéi ba pejäntükoyene xeikaein. Pong ba pejäntükoyenebein bapong ba xua abe paeba tsipéi ba pejäntükoyenebein. ³⁶Íchitha paka tsipáebatsi xua matakabi patopeikaena po matakéitha Nakom yábara paebina daxita jiwi penatsikuentsiwa abe peexanaexae bapongtha. Bárapo matakábitha daxita jiwi bewa átene tsane pepaebixae pojumein jopa wüünaeyo. ³⁷Poxonae Nakom yábara paebina daxita jiwi penatsikuentsiwa abe peexanaexae bapongtha, Nakom tsanaya tsabina pía pepaebixae jumeintha tsane. Pomonae paxam wüünaeya papáebame ichamonaetha poxonae kataunxuae pajinómpame po írathe, Nakom xuya paka yábara jei tsane: ‘Barapomonae bara jopa abe exanaeyo’, paka yábara jei tsane. Paxam pomonae báyatha abe papáebame poxonae kataunxuae pajinómpame po írathe Nakom xuya paka yábara jei tsane: ‘Maisha barapomonae abe pepaebiwi’, paka yábara jei tsane”, jei Jesús.

**Meje yábara poxonae pomonae pejäntükoyénebe jiwi Jesús
kui-itoróbatsi xua peexanaewa tsane pexeíña petsita-itüütsi koyenewa**

(Mr 8.12; Lc 11.29-32)

³⁸Néxata fariseomonae jíwanamonae írürü pomonae jiwi pekuidubiwi Moisés pía peitorobi koyene tatsi jíwanamonae, daxita barapomonae Jesús kui-itoróbatsi, jeichichi:

—Pong jiwi Pekuidubim, paichichipang xua pata taewa tsane xua tapana netsita-itüütsiwam tsane kae jiña pexeíña netsita-itüütsi koyenewa pokotsiwa Nakom kakatsina pía peayapusüü itorobi koyenéwatha. Bapoxonae paka jume-kowüntsinsi, jei.

³⁹Daxita barapomonaetha Jesús barái, jeye:

—Pomonae pejäntükoyénebe jiwi írürü pomonae jopa tana nejumekowüntsiwi barapomonae nekui-itoroba xua taexanaewa kae koyenewa tapexeíña tsita itüütsi koyenewa. Íchitha jopa tsita itüütsin tsane icha tapexeíña tsita itüütsi koyenewa. Saya meisha exanaein icha báyatha jüta koyene kana ichichi Jonás pong Nakom peitorobi jume pepaebin, pong kaena báyatha tüpa. ⁴⁰Nakom Jonás itoróbatsi Nínive tomarapiwi beya petsipaebinexa Nakom Pejume Diwesi barapomonaetha. Jonás jopa baxua peexanaexae daxota Nakom éxana xua Jonás kianaxorékatsi duwein pong piño. Bapong bárapo pin duwein tsijuntutha eka akoibi po matakabíyobe, matáütano akoibi po merawíyobe, beya poxonae ekeicha yakabaxotsi xua asüü pópona. Barichi tsane xang pongxaein Nakom Tananeitapetsin tüpaein. Bapoxonae müthütha nebotsina akoibi po matakabíyobe nexa tsane, matáütano akoibi po merawíyobe nexa tsane, beya poxonae ekeicha Nakom asüü juina neexanaena. ⁴¹Matakabi patopeikaena po matakábitha Nakom yábara paebina daxita jiwi pepérxaxa exanaenéxatsi penatsikuentsixae abe peexanaexae. Bárapo matakéitha Nínive tomarapiwi pomonae kaena báyatha jinompa barapomonae abeya paka yábara paebina poxonae umenaena Nakom peitabaratha. Baxua exanaena tsipéi bárapo Nínive tomarapiwi icha jäntükoyene xeina Nakomtha peúruxae xua abe éxana kaena báyatha poxonae Jonás muxuwetsiya tsipaeba barapomonaetha Nakom pía pexaiña jume diwesi tatsi. Íchitha paxam jopa bara paichim, jopa icha jäntükoyene paxeinaem. Nama ápara xote úngkuangje pongxaein taexanaein pokoyenewa pepa peaiñakuí koyenewa xua takaponaewa Nakom Pejume Diwesi daxita jíwitha. Barapókotsi koyenewa toxeinchiya aiñakuí koyenewa beyakaincha

Jonás pokuikoyene éxana poxonae Nakom Pejume Diwesi kápona Nínive tomarapíwitha. ⁴²Matáüta bárapo matakábitha tsane petsiriwa, powa kaena báyatha tûpa, bapowa asiya ungkuaena Nakom peitabaratha tatsi. Barapowa pía nakuapiwayo, po nakua tajü párowa béreka eka. Barapowa pía nakuapiwi tatsi itorobiya pía pepa peewatsíwayo. Barapowa yábara kueikueijejei tsane pomonae xua ánoxuae jinompa poxonae ungkuaena Nakom peitabaratha tatsi. Jei tsane bapowa: ‘Maisha pomonae xua jinompa poxonae Mesías pópona po írathe deke, barapomonae abe bichokono peexanaewi, tsipéi ajüüntükoyenefaetabiya jumetane pokotsiwa Mesías kuiduba bekein Mesías bichokono peyaputaein’, jei tsane barapowa. Barapowa baxua paebina tsipéi bapowa báyatha tajü wérena pona, pesiwaponaenéxatsi Salomón, pong kaena báyatha Israel nakuapiwi itorobiya pía pepa peewatsinchi. Bapowa yaputane xua Salomón bichokono peyaputaein Nakom yábara. Daxota bapowa ichichipa xua pekuidubíwatsi xua Salomón pekuidubinexa Nakom yábara. Nama ápara xote úngkuangje pongxaein taexanaein pokotsiwa pepa peaiñakuí koyenewa xua takuidubin Nakom yábara daxita jíwitha. Barapókotsi koyenewa toxechiya aiñakuí koyenewa beyakaincha Salomón pokuikoyene éxana poxonae kuiduba Nakom yábara bárapo petsiríwatha, jei Jesús.

**Meje yábara poxonae Jesús yábara paeba kauri
xua kaewa nauyata pebintha**

(Lc 11.24-26)

⁴³⁻⁴⁴Ekeicha Jesús jeye: “Poxonae pebin wepu poinchi kauri, bapoxonae kauri pona wéxotha ichaxota ira tsewa pepoponaenexa tsane baxota. Íchitha poxonae jopa kaxinaeyo xua ichaxota pepoponaenexa bapoxonae bapong nabarái: ‘Tha kaibeya ponaetsi pebin beya ichaxota báyatha wepu ponang’, jei kauri. Poxonae kaibeya pona kauri kaxina, pebin kaxínatsi xua wüünaeya pópona. ⁴⁵Néxata ekeicha kauri pona pebin weya. Pirapaeyo bapong barü patopa siete póyobe kauri pomonae bichokono abe beyakaincha bapong pong kopiya. Daxita bárapo kaurimonae pebin punajinómpatsi. Ánoxuae bapong nama yatsikaya bichokono abe kana exainchi beyakaincha poxonae kopiya abe kana exainchi poxonae saya kaein. Barichi tsane kaurimonae abe kana exanaena pomonaetha, pomonae ánoxuae jinompa, pomonaetha, pomonae peajüüntükoyénebe jiwi, icha bárapo kaurimonae ichi poxonae pebin abe kana exainchi”, jei Jesús.

Meje yábara xua Jesús pena tatsi írürü péyapin jiwi tátsino

(Mr 3.31-35; Lc 8.19-21)

⁴⁶Jesús kataunxuae kueikueijejei tsungkuae poxonae beya irü pena tatsi péyapin jiwi tátsino pata. Daxita barapomonáeyobe pesato beya umena bekein ichichipa Jesús barü kueikueijeichi kanta pin bicheito. ⁴⁷Ichüng Jesús baraichi, jeye:

—Ena, írürü néyapin jíwino pesato beya umena. Bépara bekein katáei, nekatsipaebinexa tsane, jei bapong.

⁴⁸Íchitha Jesús jopa bara jumejejeyo, saya jame yáñaba bapongtha, jeye:

—¿Jintam powa be taena natsikotánera? ¿Jintam pomonae be táyapin jiwi natsikotánera? jei Jesús bapongtha.

Baxua Jesús kaunuta pía pekuidubinexa xua peyábara kaunutsinexa pomonae pía pepunajinompaewichi.

⁴⁹Néxata Jesús pijimonaе kowai yawa jei jíwitha:

—Pomonaе xua kowang ápara barapomonaе be taena tsíkotang matáütano irü be táyapin jiwi tsikotangno. ⁵⁰Pomonaе xua éxana pokotsiwa Taxa Nakom itoroba, pong peitabókotha peekaein, barapomonaе be táyapin jiwi tsíkotang, matáütano irü be tayapixi tsikotangno, matáütano irü be taena tsikotangno, jei Jesús.

**Meje yábara poxonaе Jesús kuiduba jiwi pekayábara
jüta pepaebi diwésiyo xua pong peúbin yábara**

(Mr 4.1-9; Lc 8.4-8)

13 ¹Bárapo matakaitha kaena Jesús bo weya pona, bapoxonaе pukua itapatha ekopa. ²Tsipéi pin bicheito nakaetuta ichaxota Jesús daxota Jesús jératha nontabiya yawa tsiwiyo nayanatoroya bapoxonaе ekoundeka. Daxita bárapo pin bicheito táetabo mene itapatha umena. ³Jesús bárapo pin bicheito kuiduba peka-yábara júta pepaebi diwésintha.

Kae diwesíyotha Jesús namchi, jeye: “Pebin pong peúbin póntaba pábitha pía übichi. ⁴Poxonaе pong peúbin übauya, icha xu námtotha xu othopeika. Peyapu-punaewi yapata yawa xu xane. ⁵Icha xu, xu othopeika ibówangtha ichaxota ira itafáfana. Barapoxonaе bárapo xu kaena naiña xu xuwa tsipéi jopa tajü xu xuwarekaeyo. ⁶Íchitha poxonaе xometo atsa tsina bapoxonaе yaboto tsakiwa yawa tüpa tsipéi jopa tajü tabüopina xuwarekaeyo. ⁷Icha xu, xu othopeika ichaxota pesoi-wang xuwinaena. Bárapo xu yaboto nantakapánaba poxoru yawa múxuna xuwina pesoiwang. ⁸Icha xu, xu othopeika ichaxota ira wüünae. Poxonaе bárapo xu xu xuwa, xu nawüünaeta. Icha xun, xu nanakoitapona cien poxu matabüxüyobe tsí-niya. Icha xun, xu nanakoitapona sesenta poxu matabüxüyobe tsíniya. Icha xun, xu nanakoitapona treinta poxu matabüxüyobe tsíniya. ⁹Icha pamuxudubéname, moya pana nejumenaitáeware pokotsiwa tapaka tsipaebíwatsi”, jei Jesús.

**Meje yábara poxonaе Jesús namchi xua eta xua metha pekayábara
jüta pepaebi diwésiyo yábara jane, jei**

(Mr 4.10-12; Lc 8.9-10)

¹⁰Néxata Jesús pijimonaе imoxoyo kakuita umenarükúpatsi yawa yáñabatsi, jeichichi:

—¿Eta xua metha jíwitha páebame pekayábara júta pepaebi diwesin? jei Jesús pijimonaе tatsi.

¹¹Jesús jumenota barapomonaetha, jeye: “Meisha paxam yatsikaewa Nakom yábara paka yaputane éxana po pekuidubiwa xua moya peyawüngxainaewa. Bárapo moya peyawüngxainaewa xua jiwi jopa peyaputaewa ápara xua Nakom paka kana éxana xua paiña nepaka itaküüpaewa xua paiña nenaexanaewa Nakom piamonaе tatsi pam, pomonaе pamxaem Nakom itorobiya paka éwata. Íchitha jame ichamonaе pomonaе jopa nejumekowüntsiyo jopa daichichi. Nakom jopa kopatsiyo xua barapomonaе peyábara yaputaewa baxua. Daxota barapomonaе kuidubang pekayábara júta pepaebi diwésintha xua Nakom peyábara yaputaené-xatsi. ¹²Pong ba be kónotha Nakom yábara yaputainchi, Nakom bapongtha kana exanaena xua ichawa peyábara yaputaewa tsane beya poxonaе bapong ekeicha bichokono Nakom pejumekowüntsiwa tsainchi. Pong ba jopa ichipaeyo xua Nakom peyábara yaputáewatsi Nakom wepichina pokoyene bapong yaputane xua beya

daxota Nakom jopa pejumekowüntsiwa tsainchi. ¹³Daxota jíwítha páebang peka-yábara jüta pepaebi diwésintha. Baxua páebang barapomonaetha xua bekein pía tana nekui-taibenáewatha tsane íchitha jopa pía tana nekuiyapu-taibenáewatha tsane. Yawa xua bekein pía tana nejume-taibenáewatha tsane íchitha jopa pía tana nejumekopi-taibenáewatha tsane. ¹⁴Barapomonaetha baxua éxana báyatha petsiwüü-nae kuiyábara paebixaetsi, xua báyatha Isaías pong Nakom peitorobi jume pepaebin, petsiwüünae kuiyábara paebixae Pejume Diwésintha pokotsiwa barapomonaetha poxonaetha baxua exanaena. Isaías Mesías nexa jeye barapomonaetha:

‘Xaniwaicha pana nejumetaename íchitha jopa bepayaputaem tsane xua jopa paiña tana nejumekowüntsixaem tsane.

Pana nekuitáename íchitha xaniwaicha jopa bepayaputaem tsane xua paiña tana nekuiyábara jumekowüntsixaem tsane.

¹⁵Paxam bichokono paaiña ünthütom,

xua jopa paiña tana neyaputaexae jiwim.

Matáütano jopa wüünaeya pajumetaem tsane,
be pomonaetha penamuxujématsi jiwim pam tsane.

Panaichaketsínama icha be pomonaetha peitatanakütsi jiwim pam tsane.

Baxua paexanáename tsipéi jopa be paiña tana nejumetaewam tsane,
xua jopa paiña tana nejumekowüntsixinexa tsane.

Yáwano matáüta,

baxua paexanáename tsipéi jopa be paiña tana nekuitaewam tsane xua jopa paiña tana nejumekowüntsixaem tsane.

Matáüta baxua paexanáename tsipéi jopa be paiña tana neyaputaewam tsane paiña itamaikéitongtha.

Matáütano jopa paiña neáuraxae xua abe paéxanama daxota jopa paka jüntükoyene wüünae exanaetsi’,

jei Isaías barapomonaetha xua Mesías nexa’,

jei Jesús.

¹⁶Néxata Jesús pijimonaetha jeye: “Paxam pajüntükoyene weiwéinama tsipéi poxonaetha pana nekuitáneme pokotsiwa éxanang bapoxonaetha pana nekuiyaputáneme. Matáütano pajüntükoyene weiwéinama tsipéi poxonaetha pana nejumetaename pokotsiwa páebang bapoxonaetha pana nejumekowüntame. ¹⁷Xaniwaicha paka tsipáebatsi pin bicheitomonaetha, pomonaetha Nakom peitorobi jume pepaebiwi, matáütano írürü pomonaetha pejüntükoyene xeikáe jiwim, pomonaetha kaena báyatha jinompa barapomonaetha newünae éwata xua tapatopeikaewa. Daxita barapomonaetha bekein bichokono be taena pokotsiwa pana nekuitáneme, dáichitha jopa baxua taeyo. Matáütano bekein be jumetaena pokotsiwa pana nejumetaename dáichitha baxuang jopa nejumetaeyo”, jei Jesús.

Meje yábara poxonaetha Jesús pijimonaetha muxuyaputane éxana po diwesi xua pekayábara jüta pepaebi diwésiyo pong peúbin yábara

(Mr 4.13-20; Lc 8.11-15)

¹⁸Ekeicha Jesús jeye: “Pajumetaema xua paka tsipáebatsi pekayábara jüta pepaebi diwésiyo xua pong peúbin yábara: ¹⁹Pomonaetha bekein jumetaema po pekuidubi koyenewa xua Nakom tamrópata pítaba xua ewatsiya itoroba jiwim, barapomonaetha dáichitha jopa yaputaeyo bárapo koyenewa. Daxota barapomonaetha

jopa wüünaeya exanaeyo icha be pókotsi jüta koyeneya ichi xua pexutong xua poxutong námtotha othopeika. Bara jüta koyeneya kana ichichi pomonae jopa yaputaeyo takuidubiwa. Kaurimonae pía pentakaponaein tatsi barapomonae omeicha bara jüntükoyene weichichi takuidubi koyenewa daxota barapomonae jopa nejumekowüntsiyo. ²⁰⁻²¹Poxutong xua xu othopeika ibówangtha, bárapo xutong yábara kaunuta po jiwi wüünaeya jumetane Nakom Pejume Diwesi xuano jüntükoyene weiweinaya Nakom jumekowúntatsi. Íchitha bara kaeto jumekowúnta poxoru barapomonae anthüfaetabiya jumejeba Nakom Pejume Diwesi pejüntükoyeneintha. Poxonae yáitama barapomonae bichokono peatenexae, matáütano poxonae barapomonae yáitama abe petaexanaexaetsi ichamonae xua pejumekowüntsixae Nakom, bapoxonae kaurimonae abe éxana xua barapomonaetha jüntükoyene wejüntemaina éxanatsi xua Nakom pekayábara jüntemaináewatsi. ²²Poxutong xua xu othopeika pesóiwangtha, bárapo xutong kaunuta xua pomonae Nakom Pejume Diwesi jumetane íchitha saya barompaya pía jüntükoyénetha jinompa. Matáütano saya ü kopei kayábara nantaxeina. Matáütano saya éxana pokotsiwa jüntükoyene weiweina kana exainchi. Pokoyene pebiwi éxana baxuang barapókotsi jüta koyene éxana icha ichi xua poxutong be pesóiwangtha xu othopeika. Bárapo xutong jopa thei dubenaeyo. Barapókotsi jüta koyeneya ichi bárapo jiwi. Jopa wüünaeya Nakom tsita jinompaetsi. ²³Poxutong xua xu othopeika peíra wüünáewatha, bara nakoita. Bárapo xutong yábara kaunuta pomonae jumetane Nakom Pejume Diwesi, matáütano jumekowúntano poxoru jüntükoyene wüünaeya jumetane. Matáütano beta éxana dubenanáebiya beya matapaiña jiwi kuitane xua barapomonae bara wüünae Nakom peitabaratha tatsi. Bapoxonae ichamonae barapomonae jíwana beta yawena ichamonaetha icha bárapo xuto ichi xua cien poxu matabüxúyobe tsíniya tsóponae. Matáütano ichamonae barapomonae jíwana beta yawena ichamonaetha icha bárapo xuto ichi xua sesenta poxu matabüxúyobe tsíniya tsóponae xua jumekowúnta. Matáütano ichamonae barapomonae jíwana beta yawena ichamonaetha icha bárapo xuto ichi xua treinta poxu matabüxúyobe tsíniya tsóponae”, jei Jesús.

Meje yábara poxonae Jesús kuiduba pekayábara jüta pepaebi diwésiyo xua trigoxú yábara xua irü baxoyo xuwina ayaboxu

²⁴Bapoxonae Jesús ekeicha kuiduba jiwi icha pekayábara jüta pepaebi diwésiyo, jeye: “Yábara paka tsipáebatsi pokoyene xua Nakom exanaena pong jiwi ewatsiya peitorobixaetsi. Bapong yábara paebina daxita jiwi penatsikuentisixae abe peexanaexae. Bárapo koyenewa jüpa, icha be pókotsi koyeneya jüta ichi poxonae pebin ba üübapona pábitha peúbi xutong po peúbi xutong pexeíña xutong. ²⁵Íchitha poxonae kataunxuae jiwi maitumena, bapoxonae pong pabi pexeinaein pía peaitafaetabí jintongtsi tapatópatsi pía pábitha tatsi. Bapoxonae bapong áyabo xu taübarékatsi ichaxoyo übareka po pexu pexeíña xu. Poxonae nakobeweta xua üba ayaboxu, bapoxonae napitabiya pónataba. ²⁶Poxonae trigoxú yaóthopa bapoxonae irü áyabo xuwina. ²⁷Bapoxonae pong pabi pexeinaein baraichi pomonae pía petanakuichixaetsi: ‘Pata Tanekanamataxeinaem, icha bara metha úbame poxu pexeíña xu, ¿néxata eta wérena metha áyabo pona xua xuwa?’ jei. ²⁸Pong pabi pexeinaein jumenota pomonae pía petanakuichiwixaetsi jeye: ‘Ápara baxua inta

éxana pong tana neaitafáetabi jintong', jei. Bapoxonae bapong baraichi pomonae pía petanakuichiwichi, jeye: '¿Ichichípame xua pata po naewa tsane bara beya pata xunaenexa bárapo áyabo?' jei. ²⁹Íchitha bapong jumenota jeye: 'Bara tsane itompaena tsipéi icha bárapo áyabo paxunaetsípame payawaxunaetsípame trigoxú. ³⁰Bara saya yawa umenaena bárapo áyabo beya abü poxonae yawa nawetsina trigoxú. Tha néxata bapoxonae itorobichi penakuichiwi xua kopiya pexunaenexa bárapo áyabo xua pepa kuntong peexanaenexa, xua petautsinexa tsane, xua bapoxonae trigoxú pejebinexa tabotha xua trigoxú matabotha', jei pong pabi pexinaein", jei Jesús.

**Meje yábara poxonae Jesús kuiduba pekayábara jüta pepaebi diwésiyo
po peübixútiyo pewüing mostaza xutiyo**
(Mr 4.30-32; Lc 13.18-19)

³¹⁻³²Ekeicha Jesús jiwi kuiduba icha pekayábara jüta pepaebi diwésiyo, jeye: "Nakom waba jiwi xua petanaexaenéxatsi pijimonae tatsi, pomonae itorobiya peewatsixae beya pinmonae tsóponae xua pomonae jumekowüntapona Nakom. Bárapo koyene jüpa icha be poxonae pebin ichi poxonae übanota pábitha po peúbi xuto tsika xutiyo. Bárapo xuto xuwa beya pin nae tsóponae. Bárapo nae pepin naexae daxota siri pemaxúranangtha kotong éxana", jei Jesús.

**Meje yábara poxonae Jesús kuiduba pekayábara jüta pepaebi diwésiyo
xua levadura yábara xua pan kotowa éxana**
(Lc 13.20-21)

³³Jesús ekeicha kuiduba jiwi icha pekayábara jüta pepaebi diwésiyo, jeye: "Poxonae Nakom waba jiwi xua pijimonae tatsi petanaexaenéxatsi pomonae itorobiya peewatsixae, barapomonae pin bicheitomonae naexanapona. Bárapo koyene bara jüta ichi, icha levadura matawüing ichi pokotsiwa kotowa éxana poxonae pan éxana. Petsiriwa tres po tsoropabe trigoxú beno múxuna kauyentaba levadura matawüing pokotsiwa xua kotowa éxana pan. Bapoxonae péntübü naexananaya kokotowapona tsipéi levadura matawüing múxuna xuba", jei Jesús.

**Meje yábara poxonae Jesús kuiduba jiwi pekayábara
jüta pepaebi diwesíxitha**
(Mr 4.33-34)

³⁴Jesús kuiduba jiwi daxita bárapo koyenein xua xuang saya ü pekayábara jüta pepaebi diwesíxitha. Jesús jopa kuidubébiyo poxonae jopa paebébiyo pekayábara jüta pepaebi diwesíxitha. ³⁵Bara bárapo koyeneintha Jesús kueikueijeji xua penayábara jumewetsinexa xua báyatha pong Nakom peitorobi jume pepaebin pekuiyábara wüünae tsiwünaeya paebixae, xua jeye:

"Jíwitha tsipaebin pekayábara jüta pepaebi diwésintha.

Matáütano múxuna yábara tsipaebin pokotsiwa moya yawüingxeina xua jiwi jopa peyaputaewa,

pokoyene kaena báyatha moya yawüingxeina xua poxonae aena Nakom fórota po kae pin nákuathe xua pokotsiwa beya ánoxuae tsóponae",

jei bapong xua saya Jesús tapáebatsi.

**Meje yábara poxonae Jesús pijimonae yaputane éxana po
pekayábara jüta pepaebi diwésiyo xua áyabo yábara**

³⁶Néxata Jesús napéyaba pin bicheito jiwimonae. Bapoxonae botha joniya. Iriü baxota Jesús pijimonae tatsi bárapo botha najojoníyarü. Jesús pijimonae barai-chi, jeye:

—Yábara pana neyaputane éxande po diwésiyo xua áyabo po áyabo xuwa trigo pábitha, jei.

³⁷Néxata Jesús namchi, jeye: “Pong üba poxutong pexeiña xutong, trigoxutong jang, bapong ápara bara xang pongxaein Nakom Tananeitapetsin. ³⁸Matáütano po pábitha ichaxota üba jang, ápara jiwi pía jüntükoyenein yábara kaunutang. Pókotsi xutong xua yábara kaunutang xua pexeiña xutong jang, ápara yábara kaunutang pókotsi jiwimonae xua patsina Nakom pía peitorobi nakua beicha tatsi. Poxuto peabexutong, poxutong ayaboxu jang, ápara yábara kaunutang pókotsi jiwimonae kaurimonae pía pentakaponaein tatsi pijimonae tatsi. ³⁹Pong üba poxutong abe xua áyabo xu jang, ápara bapong kaurimonae pía pentakaponaein tatsi yábara kaunutang. Xua báyatha xu naweta jang, ápara yábara kaunutang, po mataketha xua Nakom daxita nakuiwetsina. Matáütano bárapo matakábitha Nakom yábara paebina jiwi penatsikuentsiwa abe peexanaexae bapongtha. Pomonae xua trigoxú, xu síraka jang, ápara yábara kaunutang matatsunpiwimonae. ⁴⁰Kopiya matha xuexuetapona áyabo petautsinexa ishótotha. Jiwi bara jütiya ichainchi po matakábitha tsane Nakom daxita yábara paebina jiwi penatsikuentsiwa abe peexanaexae bapongtha. Matáütano bárapo kae pin nakue werawerakaena. ⁴¹Xang pongxaein Nakom Tananeitapetsin itorobin tamatatsunpiwi xua jiwi penotsinexa tsainchi pomonae abe peexanaewi, pomonae xua kana éxana ichamonaetha xua ichamonae xuya irü abe peexanaenexa. Bárapo matatsunpiwi wenotsina pomonae abe peexanaewi pomonae tajiwimonae barü jinómpatsi. Bárapo abe peexanaewi jopa tamonaeyo pomonae itorobiya taewatsixae. ⁴²Daxita bárapo jiwi pomonae abe peexanáewixae bebái tsainchi, matatsunpiwi bebái tsane ichaxota ishoto jopa itakounayiyo ataya. Baxota daxita jiwi wekoyéi tsane matáüta baxota nantanuweya nantüjayabina, poxoru bichokono átene tsane. ⁴³Bapoxonae pomonae éxana pokotsiwa Nakom ichichipa barapomonae bichokono pexeiña koicha xeinaena po nákuatha ichaxota Nakom itorobiya éwata piamonae pong barapomonae pía páxaxae tatsi. Po pexeiña koicha xua barapomonae xeinaena, bichokono itüpana icha be xometo ichi xua poxonae pentha. Icha pamuxudubéname, moya pana nejumenaitáeware pokotsiwa tapaka tsipaebíwatsi”, jei Jesús.

**Meje yábara poxonae Jesús pekayábara jüta pepaebi
diwésiyo paeba xua po peitüpanaewa pokotsiwa bichokono
aiña matoma xua ira büxüpánatha boka pábitha**

⁴⁴Ekeicha Jesús namchi, jeye: “Yábara paka tsipáebatsi pokoyene xua Nakom éxana, pomonaetha, pomonae pejüntükoyene kanamataxeinaexae pong jiwi itorobiya pía pepa peewatsinchi. Bárapo koyene bara jüta ichi, icha be pokotsiwa peitüpanaewa ichi pokotsiwa aiña matoma xua ira büxüpánatha boka pábitha. Poxonae pebin bárapo peitüpanaewa jemeicha ira büxüpánatha namicha taebota,

bichokono tsorobotha matatsaebota, bichokono peichichipaexae baxua. Jopa muxutsipaebiyo ichamonaetha. Bichokono jüntükoyene weiweina. Bapoxonae piabotha pona pekaenaetsinexa daxita xua xuang pokotsiwang xeina. Bapoxonae bárapo paratixitha kómota bárapo pabi, po pábitha boka bárapo peitüpanaewa. Bewa barichi jiwi. Bewa jiwi bichokono beitakuijíchatsi xua pexeinaewanexa tsane bárapo peajüntüyapusüüwa, icha poxonae pebin ichi xua pitapeitüpanáewatsi piraichi daxita kaenaeta pokotsiwang xeina”, jei Jesús.

**Meje yábara poxonae Jesús kuiduba jiwi pekayábara jüta
pepaebi diwésiyo xua po wárowa pewüng perla**

⁴⁵Ekeicha Jesús namchi, jeye: “Barichirü yábara paka tsipáebatsi pokoyene xua Nakom exanaena pong jiwi ewatsiya peitorobixaetsi pokoyene bichokono wüünae. Bárapo koyene bara jüta icha be ichi poxonae jintong wárowang matowa jeita. Bárapo wárowang xua bapong jeita, pewüng perla. Bapong jeita pekomotsinexa tsane bárapo wárowang, po wárowang aiña matomang. ⁴⁶Poxonae bapong kae warowaxuto taebota, po warowaxuto perla matawüng xua bichokono aiña matoma, bapoxonae bapong piabotha pona matáüta bapoxonae kaenaeta daxita xua xuang pokotsiwa xeina. Bapoxonae kómota po wárowa bichokono aiña matoma, po wárowa pewüng perla. Bewa barichi jiwi. Bewa jiwi bichokono beitakuijíchatsi xua pexeinaenexa peajüntüyapusüüwa po peajüntüyapusüüwa ataya tsiteka, icha poxonae pebin ichi xua pitaperlatsi piraichi daxita kaenaeta pokotsiwang xeina”, jei Jesús.

**Meje yábara poxonae Jesús kuiduba jiwi pekayábara
jüta pepaebi diwésiyo xua pekayamonaewa yábara**

⁴⁷Ekeicha Jesús namchi, jeye: “Yábara paka tsipáebatsi pokoyene xua Nakom éxana pong jiwi ewatsiya peitorobixaetsi xua poxonae yábara paebina jiwi penatsikuentsixae abe peexanaexae. Bárapo koyene bara jüta ichi, icha be pokotsiwa xua xota jiwi yakamona duwéi ichi. Jiwi peyakamonaewa xoya pepa marmentha xua daxita duweimonaein tunto pekapiarenaenexa. ⁴⁸Poxonae bichokono wüngkaxuba xua peyakamonaewa pomonae peyaxunubiwi táetabo bejutaboreka. Bapoxonae enoundeka, xua naitaübiya tsana pejehebaponaenexa. Po duwéi pepa duwéi tsana naitaübiya jehebapona korotongtha. Po duwéi pokotsiwa kamatsawang bebái tsópone. ⁴⁹Barapókotsi jüta koyeneya ichi tsane poxonae matakabi patopeikaena, po mataketha xua poxonae nakua werawerakaena, matáütano Nakom daxita yábara paebina jiwi penatsikuentsixae abe peexanaexae bapongtha. Bapo mataketha matatsunpiwi patsikaena xua daxita jiwi petsabinexa tsainchi, pomonae abe peéxanae kuirukoyenein peéxanae jiwi tsana nobinchi xua pomonae wüünaeya peéxanae jiwi pía xaiña weya tatsi. ⁵⁰Pomonae abe peéxanae kuirukoyene peéxanae jiwi bebái tsainchi ishótotha ichaxota jopa ataya itakounayiyo. Baraxota wekoyéi tsane matáütano baxota nantanuweya nantüjayabina”, jei Jesús.

**Meje yábara poxonae Jesús kuiduba jiwi pekayábara jüta pepaebi
diwésiyo xua pena peitüpanaewa yawa xua peru peitüpanaewa yábara**

⁵¹Néxata Jesús pijimonaе yáíñaba, jeye:

—¿Bara daxita baxuang payaputáneme xuaunxuae paka tsipáebatsi? jei.

Barapomonae Jesús jumenótatsi:

—Aa, bara payaputang pokotsiwa xuaunxuae pana netsipáebame pong pata Tanekanamataxeinaemxaem, jei barapomonae.

⁵²Bapoxonae Jesús pijimonaetha namchi, jeye:

—Pomonae pekuidubiwi Nakom pía peitorobi diwesi pomonae tamonaexae barapomonae yábara kuiduba ichamonaetha xua pokoyene Nakom éxana pong itorobiya peewatsin jiwi. Barapomonae xeina aiña diwesi koyenéwabe, po diwesi xua xang yábara, peru diwesi poxonae kataunxuae aibin tsika po kae pin nákuathe tsike yábara. Matáütano xeina pena diwesi poxonae xua ánoxuae póponang yábara. Bárapo aiña diwesi koyenéwabe barapomonae paeba jíwitha. Barapomonae bara be jüta ichi icha be poxonae pong bo pexeinaein ichi. Poxonae piamonae tatsi nantawénona paparuwa yawa pexaewa, bapong baxua bara kata pijimonaetha, poxoru bapong jeba xua peruwa yawa xua penawa piamonae nexa, jei Jesús.

Meje yábara poxonae Jesús Nazaret tómaratha pópona

(Mr 6.1-6; Lc 4.16-30)

⁵³Poxonae Jesús najumeweta xua kuiduba jiwi bárapo pekayábara jüta pepaebi diwésixi bapoxonae Jesús tómara weya póntaba. ⁵⁴Bapoxonae Jesús patopa pía tómaratha, po tómara pewüng Nazaret tómara. Baraxota Jesús kuiduba jiwi, judiomonae pía penakaetutsibotha tatsi. Pomonae jinompa Nazaret tómaratha yábara najüntükoyene kabenaeka xua pokotsiwa Jesús kuiduba. Barapomonae natsipaeba, najéi:

—¿Eta xota metha bapong nakuiduba jane, xua daxota bapong daxita peyaputaecin? ¿Jintam metha pía peayapusúüwatha tatsi jane, poxonae po petsita-itüütsi koyene bapong éxana? ⁵⁵Ápara saya bapong pexanto tatsi pong xua pekobekoxonaein xua naepang pematabobiwa. Ápara bapong pena tatsi María. Ápara bapong Santiago péntapin tatsi, irü José péntapin tatsi, irü Simón péntapin tatsi, irü Judas péntapin tatsirü. ⁵⁶Matáütano irü pamcho jiwi tatsi ápara jinompa bárapo tómarathe. ¿Eta xota metha bapong nakuiduba jane, pokotsiwa xua beta naka kuiduba? jei barapomonae.

⁵⁷Daxota barapomonae Jesús kasébatsi pekui-uwixaetsi. Barapomonae uwa tsi-péi Jesús bichokono peyaputaecin. Jesús namchi jíwitha, xua nayábara paeba, jeye:

—Daxita jiwi ba barükui-iturajina pongtha pong Nakom peitorobi jume pepaebin. Nama pía nakuapiwi tatsi irü píabo matabüxyomonaepiwi tatsi barapomonae ba jopa bapong barükui-iturajinaetsi, jei Jesús, xua nayábara paeba.

⁵⁸Nazaret tómaratha, bárapo tómaratha Jesús saya be kónotha éxana pexeíña petsita-itüütsi koyenewang tsipéi bárapo tomarapiwi Jesús jopa jumekowüntichi.

Meje yábara poxonae Juan bexotsi

(Mr 6.14-29; Lc 9.7-9)

14¹Bapoxonae kaena Herodes pong Galilea nakuapiwi, pía peyanakua ewa-tsinchi, bapong jumetane daxita pokotsiwa juiña xua Jesús éxana. ²Herodes tsipaeba pomonae petanakuichiwixaetsi piabotha tatsi, xua Jesús yábara páebatsi. Herodes Jesús katsawiya yábara páebatsi, jeye: “Ápara bapong Juan, pong jiwi Pebautisabin, pong bekein báyatha tüpa, pong ekeicha asiüü juina. Tsipéi bapong peyapusüü itorobi koyenewa xeina daxota petsita-itüütsi koyenewa éxana”, jei Herodes.

³Baxua Herodes paeba tsipéi kaena báyatha Herodes kui-itoroba xua Juan pewaetabinéxatsi, matáütano xua pemaxükübinéxatsi, matáütano xua jiwi pekü-bibotha peetsinéxatsi. Baxua Herodes éxana tsipéi píowa tatsi powa pewüing Herodías, piakoutha baxua peichichipaexae. Barapowa kopiya Felipe xeina pong Herodes peweicho tatsi. Herodes peweicho yakaiba yábüyo. ⁴Juan báyatha paeba Heródestha, jeye: “Nakom pía peitorobi koyenewa jopa kopatsiyo xua nexainaewa bapowa tsipéi ichüing píowa tatsi”, jei Juan.

⁵Daxota Herodes bichokono anáepana. Herodes ichichipa xua Juan pebexubíwatsi. Dáichitha Herodes jopa baxua exanaeyo tsipéi junuwa, jiwi kunúwatsi. Tsipéi daxita jiwi nantaxeina xua Juan ápara pong Nakom pía peitorobi jume pepaebin. ⁶Íchitha poxona Herodes yantakabi jopa po matakábitha poxona kaena báyatha nowáeungkua, bárapo mataketha pinmonae nakaetuta xua pexaewa yábara nakaetuta pía xaetsi. Bárapo penakaetutsiwi peitütha tatsi Herodías pexantiyo tatsi nawiraba. Herodes baxua bichokono itakuiwüunaetsi. ⁷Herodes barapowa beya paeba, jeye:

—Nakom peitütha kata tsiwüünae yábara páebatsi xua pokotsiwa takakatsiwa tsainchi pokotsiwa xua tana newüükaewam tsane tsipéi inta pexeña penawirabi koyene éxaname, jei Herodes.

⁸Bapoxona pokotsiwa pena itoróbatsi barapowa Herodes wüükatsi baxua. Bapowa namchi, jeye:

—Nekare Juan pentasipa xua yüütabore paratongtha, pong jiwi Pebautisabin matasipa, jei Herodías pexantiyo tatsi.

⁹Íchitha baxua Herodes jumetaya wekoyéi tsanareka poxoru jopa ichipaeyo xua Juan petüpaewa tsane. Tsipéi mexeya poxoru báyatha Nakom peitütha peyábara tsiwüünae paebixae xua bepa pinae katsina xua pokotsiwa pewüükáewaxae tsainchi, matáütano mexeya poxoru bárapo pin bichéitha peitütha pepaebixae baxua, daxota itoroba xua bapowa bara katinchi baxua. ¹⁰Daxota Herodes pomonae petanakuichiwiwaetsi, barapomona Herodes kui-itoroba xua Juan pewishi-ukuibinéxatsi jiwi pekübibotha iya. ¹¹Bapoxona barapomona paratongtha matasipa yüütabota yawa karendena. Bapoxona Herodías pexantiyo tatsi kátatsi, ekeicha barapowayo xuya pena kata, Herodías kátatsi, xua peyaputaenexa xua bara kou Juan báyatha tüpa.

¹²Néxata pomona Juan pía pepunajinompawewichi, barapomona pata jiwi pekübibotha. Juan petüpaein pítatsi. Barapoxona barapomona Juan müthütha xotsi. Barapoxona barapomona pona Jesús beya xua baxua Jesús peyábara tsipaebinéxatsi.

Meje yábara poxona Jesús ápata pexaewa cinco mil pebiwi

(Mr 6.30-44; Lc 9.10-17; Jn 6.1-14)

¹³Poxona Jesús yaputane xua Juan tüpa, bapoxona kompa jératha pona icha muxunene beya ichaxota jiwi aibi. Íchitha jiwi yaputane xua ichaxota Jesús pona. Daxota pinmonae xua karepaya tomarangpiwi pekae iya pona, ichaxota Jesús ponaena jératha. ¹⁴Poxona Jesús jera wenontouña, bapoxona Jesús pin bicheito tane. Jesús yábara nantaxeina barapomona xua peyawenaewa tsane. Bapoxona Jesús axaibi éxana peatenewi. ¹⁵Tsipéi yáitama báyatha tabópiya tsanáichaba, daxota Jesús imoxoyo kakuíta umenarükúpatsi pijimona. Barapomona Jesús baráichichi, jeye:

—Ápara báyatha tabópiya tsanaicha. Ápara xote bomüxüng aibi. Bárapo jiwi itoróbare bü tsiki tómaraxi beya ponaena xua pekomokaenexa pexaewa xua pexaenexa, jei.

¹⁶Jesús jumenota pijimonae, jeye:

—Ápara jopa bewa ponáe barapomona, paxam jame maisha paápare pexaewa, jei.

¹⁷Jesús jumenótatsi pijimonae, jeye:

—Xote jopa pexaewa paxeinaeiño. Saya ápara cinco po paiñobe paxeinang matáüta saya aiñobe paxeinang duwéiyobe, jei.

¹⁸Jesús jumenota:

—Painta xawena baxua, jei. ¹⁹Bapoxonae Jesús najumekaitoroba xua bepa daxita bárapo jiwi íratha taenaetsei. Bapoxonae Jesús pekóbetha pita cinco po paiñobe yawa xua bárapo duwéiyobe xua aiñobe. Jesús peitaboko benekoicha yawa Nakomtha tsipaeba, jeye: ‘Axa, jüntükoyene weiweinang xua pexaewa pata tanekatsiwaxaem’, jei. Poxonae Jesús najumeweta xua Páxatha tsipaeba, bapoxonae pan epajánaka, yáwano duwéi epajanakeba. Bapoxonae Jesús pijimonae kaitoroba pexaewa xua pijimonae tatsi xuya pekakataponaenexa bárapo jiwi. ²⁰Daxita bárapo jiwi nábane beya bárapo jiwi jain kowüntarükúpati. Bapoxonae Jesús pijimonae tatsi doce pokote matabüxúyobe wünba xua báyatha nakópaba pokotsiwa xua báyatha bárapo jiwi jopa xaeyo petonsanaexae. ²¹Pomonae xua pexaewa nábane barapomonae cinco mil pebiwi. Yabüxino irü nanábane. Matáütano pexuino irü nábane. Dáichitha jopa ununaetsi pexui matáüta yábüxi jopa ununaetsi.

Meje yábara poxonae Jesús mene matatsunjúmatha pona

(Mr 6.45-52; Jn 6.16-21)

²²Néxata bapoxonae Jesús jera beitorobiya pijimonae, xua pijimonae kopiya petsíwana warapaenexa tsainchi icha muxunene beya xua pukua iya. Poxonae barapomonae ponarükúpaba bapoxonae Jesús bárapo jiwi pu-itoroba xua penawíbiyaenexa pía tómarang beya. ²³Bapoxonae Jesús demuxuwa beicha pona xua baxota kompa petsipaebinexa Nakomtha. Poxonae kirei tsuxubi Jesús demuxúwatha kompa eka. ²⁴Poxonae Jesús Paxa tsipaebauya, bapoxonae kaena írürü Jesús pijimonae tatsi kataunxuae tuwüütha yanapona. Jera marátsaka kaewa karena tsaibi tsipéi joibo dawerena dangwéi. ²⁵Matakeiwünaeyo Jesús mene matatsunjúmatha pona, pijimonae itiya pona. ²⁶Poxonae Jesús pijimonae taerükúpatsi, barapomonae nanthüthü kuikoyene nabenaeka. Junuwiya wawaya jeye:

—¡Pai jaibó, jina! ¡Ápara dowatsi! jei barapomonae.

²⁷Jesús pijimonaetha kaena naiña tsipaeba, jeye:

—¡Ápara xang! ¡Jopa pajunuwinde! ¡Maisha pajüntükoyene weiwéinare! jei Jesús.

²⁸Bapoxonae néxata Pedro Jesús baráichichi, jeye:

—Tanekanamataxeinaem, icha bara metha xam yatsikaewa bapom, moya neitoróbare xua mene matatsunjuma taiyaenexa nexaiña beya, jei Pedro.

²⁹Jesús jumenota, jeye:

—¡Moya anetha dénande! jei Jesús.

Néxata Pedro mene matatsunjuma nontabiya dunareka jera wéreka. Bara Pedro mene matatsunjuma iya pona pepatopaenexa Jesús pía xaiña beya tatsi. ³⁰Dáichitha poxonae Pedro yábara nantaxeinanareka pin joibo, bapoxonae bichokono junuwanareka. Daxota bapoxonae Pedro yamene jopareka. Bapoxonae Pedro jumedangweya wawaya jeye:

—¡Tanekanamataxeinaem, nekananépare, nepitaxuina! jei.

³¹Bapoxonae Jesús naiña kobepitaxuina. Jesús namchi, jeye:

—¡Maisha be kónotha neyábara jumekowúntame xua bara tana neitaküüpaewa xua takayawenaewa tsainchi! ¿Eta xua metha aiña jünyükoyeneintha nantaxéiname? jei Jesús.

³²Poxonae Jesús irü Pedro nontábiyabe jératha, Jesús bapoxonae joibo yainjei tsanaya éxana. ³³Daxita pomonae jératha ena, barapomonae Jesús wüünae jáintatsi. Barapomonae Jesús baraichi, jeye:

—Bara yatsikaya ápara xam Nakom Pexantom tatsim, jei barapomonae.

**Meje yábara poxonae Jesús axaibi éxana pomonae peatenewi,
pomonae Genesaret nakuapiwi**

(Mr 6.53-56)

³⁴Bapoxonae Jesús irü pijimonae tatsi jératha yana enapona beya poxonae Genesaret nakua beya pata. ³⁵Pomonae baxota jinompa, barapomonae Jesús kaena yaitainchi. Daxota barapomonae najumekaitoroba ichamonaetha daxita bárapo Genesaret nakuapíwitha beya, xua Jesús pepatopaexae. Bapoxonae daxita jiwi karendena peatenewi ichaxota Jesús pukua itapatha ungua. ³⁶Barapomonae pomonae peatenewi Jesús jumedangweya wüükatsi, xua Jesús bara pekuikopatsinexa xua bara petajayabinéxatsi pía paparuwa tatsi xua peopírawa. Bapoxonae daxita barapomonae axaibi tsane. Pomonae Jesús pía paparuwa tajáyabatsi daxita barapomonae ekeicha axaibi éxanatsi pokotsiwa báyatha átene.

**Meje yábara poxonae Jesús yábara paeba xua pebin abe pía peéxanae
kuirukoyene jüntükoyene webókatsi**

(Mr 7.1-23)

15 ¹Fariseomonae irü pomonae jiwi pekuidubiwi Moisés pía peitorobi koyene tatsi, barapomonae jíwana Jerusalén tómara werendena. Barapomonae Jesús imoxoyo kakuita umenariüküpiya yáíñabatsi, jeye:

²—¿Eta xua metha jiñamonae jopa exanaeyo xua pokotsiwa waámo susato jiwi pía peitorobi kuikoyenewatha itoroba? Barapomonae pomonae jiñamonae barapokuí jopa exanaeyo. Barapomonae jopa matha tsiwanaya nakobekiatéibiyo poxonae beya xaiba xua jopa penataxobinexa tsane pía jüntükoyenéwangtha, jei daxita fariseomonae, írürü pomonae jiwi pekuidubiwi Moisés pía peitorobi koyene tatsi.

³Néxata Jesús xuya yáíñaba, jeye:

—Írürü paxamdü, ¿eta xua metha jopa paexanaem pokotsiwa Nakom Pejume Diwésitha itoroba? ¿Eta xua metha saya meisha paéxaname pokotsiwa paiña amo susato jiwi pía peitorobi kuikoyenewangtha tatsi itoroba? ⁴Jopa bewa paexanaem tsane paiña amo susato jiwi pía peitorobi koyenewa tatsi po petorobi koyenewa paka tsita aiñakuí bichokono beyakaincha xua Nakom Pejume Diwesi. Tspíei Nakom Pejume Diwésitha jeye: ‘Axang barükui-iturajínare, írürü énatha

barükui-iturajinare’, jei Nakom. Yawa ekeicha Nakom jeye: ‘Pong paxa abe yábara paeba matáütano xua pena abe yábara paeba, bapong bewa tüpaena’, jei Nakom Pejume Diwésitha. ⁵⁻⁶Íchitha paxam ba papáebame xua pinae pebin ba itakúüpa-tsi xua pepaebiwa xua pejeiwa páxatha yawa pénatha: ‘Jopa neitaküüpaeyo xua tapaka kayawenáewatsi bara bekein paakopeibim, tsipéi daxita pokotsiwa xeinang baxua yábara tsiwüünae páebang xua Nakomtha bexa katsin’, xua pejeiwa. Matáütano ba pajam: ‘Pong bapokotsiwa paeba, jopa nantawenonaeyo xua paxa yawenaena. Matáüta jopa nantawenonaeyo xua pena yawenaena bara bekein ako-peibi taetha’, ba pajam. Poxonae baxua pakaunutsiya páebame paxam pakana éxaname xua paiña amo susato jiwi pía peitorobi kuikoyenewa tatsi bichokono aiñakuí koyene, beyakaincha xua Nakom Pejume Diwesi xua aiñakuí koyene. ⁷Ítara mexeya pomonae wüünaeya pepaebi jiwi pam, dáichitha ápara peajüntükoyénebe jiwi pam! Bara ápara Isaías kaena báyatha xaniwaicha paka yábara paeba pong Nakom peitorobi jume pepaebin. Bapong paka yábara jeye poxonae tina Pejume Diwésitha:

⁸‘Barapomonae ítara be wüünaeya neyábara paebina jíwitha xua pinae neyábara barükui-iturajina.

Dáichitha barapomonae pía jüntükoyenéwatha jopa xaniwaicha neyábara barükui-iturajinae tsane.

⁹Bekein barapomonae newüünae jainteibina poxonae nakaetuteibina, dáichitha baxua jopa yawenáe tsaibi tsainchi tsipéi barapomonae peajüntükoyenebewi.

Matáütano tsipéi po petorobi koyenewa kuidubina jíwitha,

ápara jopa taitorobi koyenéwiyo tsane,

ápara xua saya jiwi barompaya pía peitorobi koyenewa tatsi tsane’,

jei Isaías xua paka yábara paeba,

jei Jesús.

¹⁰Néxata bapoxonae Jesús waba daxita jiwi xua imoxoyo peumendenaenexa. Yawa namchi bárapo jíwitha, jeye:

—Pana nejumenaitáeware, paiña neyaputaenexa pokotsiwa paka tsipáebatsi.

¹¹Pokotsiwa ba pebin pekoiboto deka tsijain jojonékatsi pexaewang, bekein jopa tsiwüünaeya matha nakobekiatsiyo poxonae xaiba, bárapo koyene ápara ba jopa bápana pebin jüntükoyene taxobichi xua poxonae pokotsiwa pexaexae. Jame pokotsiwa ba pebin pekoibótotha kaunuta, xua peabe jume bárapo jumekoyene ápara pebin jüntükoyene taxóbatsi xua poxonae pekeikueijeixae baxua, jei Jesús.

¹²Néxata Jesús imoxoyo kakuíta umenarükúpatsi pijimonae. Jesús pijimonae yáñabatsi, jeichichi:

—¿Bara yaputáneme xua fariseomonae kayábara muxukonikiya anáepana, xua nepaebixae baxuang? jei.

¹³Jesús jumenota pijimonae, jeye:

—Taxa pong peitabókotha peekaexae xubina pong jopa pejumekowüntsinci. Taxa barapókotsi jüta koyeneya kana ichi tsane jíwitha icha pebin ichi xua poxonae pábitha pona, matáüta poxonae naeyo tabüopina jonta daxita, pexubinexa.

¹⁴Bara bárabü neyábara muxukonakaena, fariseomonae. Jopa payábara jumenaitaewatsinde pokotsiwa barapomonae paeba. Tsipéi barapomonae jopa wüünaeya peyawenae jiwi ichamonaetha. Barapomonae barapókotsi jüta koyeneya éxana,

icha be pong peitatanakútsin ichi, xua poxonae matakápona ichüing xua pong peitatanakútsin matakapoinchi. Bapoxonae bárapo kae peitatanakútsinbe napuna-joparékabe müthütha deka, jei Jesús.

¹⁵Néxata Pedro Jesús baraichi, jeye:

—Yábara pana yaputane éxande po pekayábara jüta pepaebi diwésiyo xua pexaewa yábara, jei Pedro.

¹⁶Jesús biataeya jumenota pijimona, jeye:

—¿Paxam bara páichimdü icha jiwi ichi? ¿Kataunxuae jopa paiña yaputáe jiwi pamdü? ¹⁷Báyatha paxam payaputáneme pokotsiwa pebin tsijain jojonékatsti pexaewa pekoiboto deka báraxua jopa jüntükoyene taxobichi, tsipéi bárapo pexaewa jopa ponaeyo pía jüntükoyenéwatha. Jame bárapo pexaewa pekotsórotha pona, bapoxonae nawexakaeka. ¹⁸Íchitha pokotsiwa pekoiboto tsina kaunuta peabe jume, baxua ápara seikaya pejüntükoyene wétsina jumepíchapa. Tsipéi baxua penantaxeináe koyenewa, daxota pebin abeya paeba. Daxota Nakom tsítatsi xua bapong peajüntükoyenebein Nakomtha. ¹⁹Tsipéi pejüntükoyene wétsina jumepíchapa pokotsiwa abeya penantaxeináe koyenewang, pokotsiwe meje: Ichüing anaya pebexotsi koyenewa, irü ichüing piseuri tatsi pepichi koyene, irü peitakoxanáe koyenéwatsi koyene xua poxonae penayaputáe jiwi naperüü nakóyaba, irü ichüing piáwa tatsi pekaibi koyene, irü ichüing yábara penaerabíwatsi koyene, irü ichüing yábara peaebíwatsi koyene. ²⁰Nakom tsítatsi xua daxita barapókotsi koyenein pebin ajüntükoyenebé éxanatsi xua jüntükoyene taxóbatsi xua daxota jopa itaküüpaetsi xua beta éxana. Íchitha pokotsiwa pebin nábane matáütano xua poxonae bekein tsiwanaya matha jopa nakobekiatsiyo, barapókotsi koyenein pebin jopa jüntükoyene taxobichi Nakom peitütha tatsi, jei Jesús.

Meje yábara poxonae yábüyo powayo penanapaincha poponaewayo Jesús jumekowüntatsi

(Mr 7.24-30)

²¹Néxata bapoxonae Jesús bárapo ira weya wárapa Genesaret nakua weya. Matáütano pona icha nakua beya po nákuatha ichaxota Tiro tómara eka yawa Sidón tómara ékano. ²²Yábüyo, powayo bárapo kananeamonaewayo patopa Jesús pía xantha tatsi. Bapoxonae barapowa wawaya Jesustha jeye:

—¿Tanekanamataxeinaem, David pía pemómoxi susato jiwi jíwanam! Neyábara najüntükoyene kanantaxéinare, xua tana neyawenaenexam tsane. Taxantiyo inta yakauríbatsi; inta bichokono átene éxanatsi, jei bapowa.

²³Dáichitha Jesús jopa jumenotsiyo, saya moya ungkua. Néxata bapoxonae Jesús imoxoyo kakuita umenarükúpatsi pijimona. Matáütano jumedangweya baráichi-chi pijimona, jeye:

—Barapowa itawere, tsipéi barapowa waputha jumedangweya wawái, jei.

²⁴Néxata Jesús jumenota pijimona, jeye:

—Nakom meisha saya neitoroba Israel piamona susato saineiwitha pomona judiomona xua tayawenaenexa barapomona, tsipéi barapomona Nakom tsítatsi xua barapomona nakabeta icha be ovejang ichi xua poxonae pípato napuxanomba, jei.

²⁵Íchitha barapowa pentabókotha ungkua yawa ira betaeungkuareka Jesús peitabaratha tatsi tsipéi bapowa barükui-iturajina peúruxae, yáitama tsipéi Jesús pong jiwi pepa Pekanamataxeinaein. Bapowa namchi, jeye:

—¡Pong Tanekanamataxeinaem, neyawende! jei.

²⁶Jesús jumenota barapowa, jeye:

—Jopa wüünaeyo icha matha kayawénatsi powayo nenanapaincha poponae-wayom poxonae kataunxuae matha jopa yawenaeiño pepa tamonae judiomonae. Icha baxua exanaetsipang, bapoxonae be pitang pexui pía pexaewa taapatsinexa aurimonae, jei.

²⁷Barapowa Jesús jumenótatsi, jeye:

—Aa, bara barichi xuaunxuae netsipáebame pongxaem Tanekanamataxeinaem. Jopa bewa auri katsibi pexui pía pexaewa tatsi, yáitama auri irü xane pokotsiwa pexui sorobaba bárapo pepürüwixi pokotsiwa pexaethopaewa pebüxüpana tsika. Daxota bara ichiya neichinde: Neyawende, tsipéi bara neayapusüü itorobi koyenewa nawita xéiname jiña axaibi exanaenexa judiomonae. Po neayapusüü itorobi koyenewa judiomonae jopa kanantawenonaeyo bárapo neayapusüü itorobi koyenewatha inta axaibi éxande taxantiyo, jei.

²⁸Néxata Jesús jumenota, jeye:

—¡Yábüyo, maisha bichokono neyábara jumekowüntame xua bara tana neita-küüpaewa xua takayawenáewatsi tsainchi! Bara kata exainchi pokotsiwa aunxuae newúükame, jei Jesús.

Poxonae Jesús baxua paeba, bapoxonae naiña bárapo yábüyo pexantiyo tatsi taaxaibi tsuxubichi.

Meje yábara poxonae Jesús axaibi éxana pin bicheitomonae peatenewi

²⁹Néxata bapoxonae Jesús bara weya pona. Galilea pukua ítapa iya pona. Bapoxonae demuxuwa icha juiña, baxota ekopa. ³⁰Ichaxota Jesús eka baxota pin bicheito jiwi ayéi pata. Bárapo bicheito jiwi karendena pejayujayuweiwi, irü peitanakütsi jíwino, irü pemuxusipanáewino, matáüta pomonae irü peakowaebi jiwi xua pomonae jopa xeinaeyo xua xota nakowaeba. Matáütano irü icha bicheitomonae, pomonae peatenewi. Pomonae peatenewi Jesús pexaiña tajebarékatsi. Daxita barapomonae Jesús axaibi éxana. ³¹Poxonae daxita jiwi baxua kuitane, pomonae jopa judiomonae naexanaeyo daxita bárapo jiwi yábara kuikoyene nanthüthü kabenaeka. Bapoxonae Jesús wüünaeya peexanaexae, barapomonae Nakom wüünae jáintatsi, po Nakom Israel nakuapiwi pía Nakom tatsi. Daxota barapomonae baxua éxana, tsipéi Jesús ekeicha paeba kana exanaeya éxana pomonae pemuxusipanaewi. Matáüta tsipéi Jesús taduba éxana pomonae báyatha jopa xeinaeyo xua xota nakowaeba. Matáütano tsipéi pomonae pejayujáyujei jiwi ekeicha beta pona. Matáütano tsipéi pomonae peitanakütsi jiwi ekeicha beta tane.

Meje yábara poxonae Jesús pexaewa ápata cuatro mil pebiwi

(Mr 8.1-10)

³²Néxata Jesús waba pijimonae, jeye:

—Yábara kuikanantaxeinang bárapo pin bicheitomonae tayawenaenexa, tsipéi barapomonae akoibi po matakabíyobe jinompa taxantha, maisha aibi xua barapomonae penabanaewa tsane. Jopa jainbotha bepu-itorobiño piabong beya tatsi, tsipéi icha barapomonae jainbotha pu-itorobíchipang, metha piyain námtotha xuirabathopáetsipa, jei Jesús.

³³Jesús baraichi pijimonae, jeye:

—Xote ira xuépana susato tsúrukuae nakua ichaxota jiwi aibi. ¿Eta beya tsijeitinchí pexaewa barapomonae pomonae pinmonaexae? jei.

³⁴Jesús yáíñaba pijimonae jeye:

—¿Eta po paiñobe paxéiname? jei.

Barapomonae Jesús jumenótatsi, jeye:

—Siete po paiñobe paxeinang yawa be konothano duweixi, poxi tsikirixi, jei.

³⁵Néxata Jesús pijimonae najumekaitoroba xua bepa pinae bárapo pin bicheito jiwi íratha taenaetsei. ³⁶Jesús pekóbetha pita bárapo siete paiñobe yawa duwéixino. Bapoxonae Jesús Páxatha tsipaeba: “Axa, jüntükoyene weiweingang xua pexaewa pata tanekatsiwaxaem”, jei Jesús. Bapoxonae Jesús pijimonae tsikobe epanantarúbiya jajanakiya katsibapona xua xuya pijimonae tatsi pekatsibaponaenexa bárapo jíwitha. ³⁷Daxita barapomonae nábane, beya barapomonae bichokono jain kowúntarúkúpatsi. Bapoxonae Jesús pijimonae tatsi siete po kótebe wünba pokotsiwa xua bárapo jiwi jopa xaeyo petonsanaexae. ³⁸Pomonae xua nábane pexaewa barapomonae cuatro mil pebiwi. Matáütano irü yábüxi nanábane matáütano irü pexui nanábane, dáichitha daxita jopa ununaeyo. ³⁹Bapoxonae Jesús pu-itoroba xua bárapo jiwi penawibiyaenexa pía tómarang beya. Bapoxonae Jesús jératha nontabiya, peponaenexa Magadán nakua beya.

**Meje yábara poxonae fariseomonae irü saduceomonae Jesús
kui-itoróbatsi pía pexeña petsita-itüütsi koyene xua peitabókotha**

(Mr 8.11-13; Lc 12.54-56)

16 ¹Fariseomonae irü saduceomonae, barapomonae pona Jesús beya xua Jesús pejüntükoyene jüjütsinéxatsi. Barapomonae Jesús kui-itoróbatsi pía petsita-itüütsi koyenewa pókotsi koyenewa xua kana éxana itaboko wétsika. Icha Jesús jopa itaküüpaetsi xua éxana baxua, barapomonae pepaebinexa tsane xua deta kou Jesús jopa ápara Nakom Pexanto tatsi. ²Dáichitha Jesús jumenota barapomonaetha, jeye: “Poxonae tabópiya paxam ba pajam: ‘Baya tsane pexeña matakabi tsane tsipéi ánoxuae kiripitha itaboko tsobia’, ba pajam. ³Ichakui-tha tsipae poxonae baya, paxam ba pajam: ‘Ánoxuae ema duneikaena tsipéi itaboko tsaebia yawa itürüna’, ba pajam. ¡Ítara mexeya pomonae wüünaeya pepaebiwi pam, dáichitha abe paiña neexanaewi pam! Paxam peitaboko payábara yaputáneme. Ema ba payábara wüünae yaputáneme. Matáütano pexeña matakábino ba payábara wüünae yaputáneme, deta meisha paxam jopa pana neyábara yaputaem matáütano jopa payábara yaputaem pokotsiwa éxanang tapexeña tsita itüütsi koyenewang. ⁴Bárapo peajüntükoyénebe jiwi irü pomonae jopa tana nejumekowüntsi jiwi, barapomonae nekui-itoroba tapexeña tsita itüütsi koyenewa pókotsi koyene kana éxanang itaboko wétsika dáichitha jopa baxua beexanaeíño pokotsiwa barapomonae nekui-itoroba. Saya meisha bárapo petsita-itüütsi koyene exanaein, icha be pókotsi koyeneya Jonás kana ichichi pong Nakom peitorobi jume pepaebin xua poxonae pin duweintha tsijuntutha eka akoibi po matakábibe beya ekeicha poxonae yakabaxotsi xua asüü pópona”, jei Jesús xua nayábara paeba xua tüpaena xua ekeicha Nakom asiüü exanaena akoibi po merawíthabe.

Bapoxonae Jesús pónataba, yawa kuenta pona barapomonae.

**Meje yábara poxonae Jesús pijimonaе yábara yaputane éxana,
pokotsiwa pan kotowa éxana**

(Mr 8.14-21)

⁵Poxonae Jesús pijimonaе tatsi icha muxunene beya pona jératha xua pukua iya, barapomonaе jüntemaina xua pan kápona. ⁶Néxata Jesús pewünaeya muxuweta pijimonaе xua jopa pejumekowüntsinea tsane fariseomonaе irü saduceomonaе pía pekuidubiwa koyenewa tatsi po pekuidubi koyenewa jopa Jesús pía pekuidubi koyenewa tatsi. Jesús jeye:

—Dota pam jopa pajumenaitaewatsinde fariseomonaе pía pekuidubi koyenewa tatsi xua paiña nejumekowüntsiyainwa. Matáüta dota pam xua saduceomonaе pía pekuidubi koyenewa tatsi xua paiña nejumekowüntsiyainwa. Bárapo pekuidubi koyenewang jiwi ichawa beya ajüntükuikoyeneyapubé kana exanapoinchi icha be pókotsi koyene ichi xua levadura matawüng xua pan kotowa exanapona beya poxonae pin pan, jei Jesús.

⁷Poxonae Jesús yábara paeба pokotsiwa xua pan kotowa éxana, bapoxonae Jesús pijimonaе tatsi katsawiya nantaxeinaeya natsipaeba kaemonaе, najéi:

—Metha Jesús daxota baxua paeба metha poxoru yáitama jopa kaponaetsi pan, najéi barapomonaе.

⁸Jesús yaputane pokotsiwa barapomonaе natsipaeba, daxota Jesús barái, jeye:

—Pokotsiwa pana natsipáebame xua jopa paiña nekaponaexae pan, ápara poxoru jopa pana nejumekowüntsím. ⁹¡Kataunxuae jopa pana nekuiyábara yaputaem! Paxam pana nekuiyábara jüntemáiname poxonae cinco mil pebiwi ápatang pexaewa xua yábara jüntemáiname poxonae saya cinco po panbe. Matáütano pana nekuiyábara jüntemáiname poxonae ekeicha doce po kótebe pawüwünbapóname pokotsiwa jiwi jopa xaeyo. ¹⁰Matáütano paxam pana nekuiyábara jüntemáiname xua poxonae cuatro mil pebiwi ápatang pexaewa xua poxonae saya siete po panbe. Matáütano pana nekuiyábara jüntemáiname poxonae ekeicha siete po kótebe pawüwünbapóname pokotsiwa jiwi jopa xaeyo. ¹¹Matáütano jopa payaputaem xua poxonae yábara paka tsipáebatsi fariseomonaе pía pekuidubi koyenewa tatsi, irü saduceomonaе pía pekuidubi koyenewa tatsi, ápara jopa pan yábara paka tsipaebichi xua jopa paiña nekaponaexae, jei Jesús.

¹²Bapoxonae matapaiña Jesús jume yaputaerükúpatsi pijimonaе, xua ápara yábara paeба fariseomonaе pía pekuidubi koyenewang yainwa tatsi, írürü saduceomonaе pía pekuidubi koyenewang yainwa tatsi. Matáütano matapaiña yaputaerüküpa xua ápara Jesús jopa yábara paebiyo pokotsiwa pan kotowa éxana.

Meje yábara poxonae Pedro Jesús baraichi, jeye:

“Xam ápara Mesías Nakom kaitorobika”, jei

(Mr 8.27-30; Lc 9.18-21)

¹³Bapoxonae pírapae Jesús pona. Poxonae Jesús patopa Cesarea de Filipo tómara pekuariya xua pepa tómaratha, bapoxonae Jesús yáinaba pijimonaе, jeye:

—¿Eta po jintong, po jintong xua jiwi yábara paeба xua pinae bapong Nakom pía Peitapetsin tatsi? jei Jesús.

¹⁴Jesús pijimonaе jumenótatsi, jeye:

—Ichamonaе kayábara jeye: ‘Ápara bapong Juan pong jiwi Pebautisabin, pong ekeicha petüpaein asüü juina’, jei. Irü ichamonaе kayábara jeye: ‘Ápara bapong

Elías pong ekeicha petüpaein asiüü juina', jei. Írürü ichamonae kayábara jeye: 'Ápara bapong Jeremías pong ekeicha petüpaein asiüü juina', jei. Írürü ichamonae kayábara jeye: 'Ápara bapong jíwana pomonae Nakom peitorobi jume pepaebiwi', jei, jei Jesús pijimonae tatsi.

¹⁵Néxata Jesús pijimonae barái, jeye:

—¿Ínkane irü paxamdü? ¿Eta pana neyábara jumichimdü xua xang eta pong-düng? jei Jesús.

¹⁶Simón Pedro Jesús jumenótatsi, jeye:

—Xam ápara Mesías. Nakom kaitorobika, pong asiüü pópona. Xam ápara Nakom Pexanto tatsim, jei Simón Pedro.

¹⁷Jesús barái, Simón Pedro baraichi, jeye:

—Simón, Jonás pexantom, maisha Nakom kajüntükoyene weiweina éxana, tsipéi bápana jintong bapokotsiwa jopa kakuidubi pokotsiwa xua tana neyábara paebiwam. Saya ápara meisha Nakom, Taxa, kakuiduba baxua pokotsiwa tana neyábara paebiwam, pong itabókotha eka. ¹⁸Pokotsiwa xua tana neyábara paebiwam baxua natsita jume itapeiñaxéiname xua bichokono tana nekuiyábara jumekowüntsiwam. Daxota kawüngdútatsi po wüng xua jei: 'Pedro', jei, po wüngkaunuta xua jei: 'iboto', jei, tsipéi ba iboto bichokono matadangwéi. Pokotsiwa xua xaiñeya neyábara páebame baxua be iboto koyene jütiya páebame poxonae jam: 'Xam ápara Mesías. Nakom kaitoroba, pong asiüü pópona. Xam ápara Nakom Pexanto tatsim', jam. Daxita pomonae xua neyábara jumekowünta bárapo pexaiñeya jume tana neyábara paebiwathaxaemxae, barapomonae tajiwimonae exanaein. Tajiwimonae katsin taayapusúü itorobi koyenewa xua bárapo tajiwimonae jopa peamanayabinexa tsainchi pía peaitafaetabí jíwichi pomonae petüpáe kuiru nakua beya ponaena. ¹⁹Xam Pedrom, kakatinchi taayapusúü itorobi koyenewa xua kopiya tsane kaponáename tajume diwesi xua xang yábara pongxaein Mesías, pongxaein Nakom Pexantong. Bárapo tajume diwesi kaponáename judiomonaetha matáütano kaponáename pomonaetha, pomonae jopa judiomonae naexanaeyo. Matáütano xam pong tajintongxaein, pokotsiwa xam jopa kopatsim bárapo kae pin nákuathe, xua pokotsiwa tamonae éxana, baxuang bara irü Nakom jopa kopatsiyo pía peitorobi nakua beicha xua barapomonae bara peexanaenexa báraxua. Pokotsiwa kópatame xua tajiwimonae peexanaenexa bárapo kae pin nákuathe, bapokotsiwa irü Nakom kópata pía peitorobi nakua beicha xua barapomonae bara peexanaenexa baxua, jei Jesús.

²⁰Néxata Jesús pijimonae muxubarái xua pijimonae jopa peyábara pepaebinéxatsi ichamonaetha baxua xua pokoyene bapong ápara Mesías.

**Meje yábara poxonae Jesús nayábara diwesi
paeba pokoyene xua petüpaewa tsane**

(Mr 8.31—9.1; Lc 9.22-27)

²¹Bapoxonae bárapo matakabi weya Jesús tamrópata pítaba xua pijimonaetha tsipaeba pókotsi koyene Jesús kana exanaeinchi ichamonae, jeye:

—Bewa ponaein Jerusalén tómara beya ichaxota pítiri jiwi, írürü sacerdotemona pía pentakaponaewi tatsi, írürü pomonae jiwi pekuidubiwi Moisés pía peitorobi koyene tatsi, daxita barapomonae bichokono nepéraxa jübina. Matáütano barapomonae nebexubina. Dáichitha poxonae akoibi po matakabíyobe tsuxubi tsane ekeicha Nakom tatüpaein asiüü neexanaena, jei Jesús.

²²Íchitha bapoxonae Pedro, Jesús barü natsixitábatsi aishowa beya. Pedro Jesús baráichichi, jeye:

—Xam pong Nekanamataxeinaem. ¡Jamaisha daxua paebameno, bara! Nakom jopa kopatsí tsane xua jiwi kata exanaena baxua, jei Pedro.

²³Néxata Pedro péitabara beya tatsi Jesús napatomeicha kaungkuatábiya namchi, jeye:

—¡Xam newepu natsixitábare, tsipéi be Satanam! ¡Nejüntükoyene jüjútame xua jopa wüünaeya taexanaewa tsane neaichaxaibixae xua tatsitüpaewa tsane jiwi! Xam saya abe nantaxéiname icha pebiwi ichi. Saya jopa nantaxeinaem pokotsiwa Nakom nekayábara nantaxeina xua tatsitüpaewa tsane jiwi, jei Jesús.

²⁴Néxata Jesús barái pijimonae, jeye:

—Icha pebin ichichipa xua tajiwimonae jíwanapin penaexanaewa tsane, bewa bapong yábara naitématsi pokotsiwa xua bapong ichichipa pía peéxanae koyenewang tatsi. Bapoxonae jame bapong bewa eexanaponáe pokotsiwa itorobang, bekein bara bapong bexotsi ichamonae, tajiwimonae jintongxae. ²⁵Pong naantobeya nata éxana pokotsiwa bapong ichichipa, bapong jopa xeinaeyo peajüntüyapusuüwa, po peajüntüyapusüüwa ataya tsiteka xua Nakom pía nakua beicha. Íchitha pong neantobeya inta éxana pokotsiwa ichichipang tana neantobexae bapong xeinaena peajüntüyapusüüwa, po peajüntüyapusüüwa ataya tsiteka xua Nakom pía nakua beicha. ²⁶Icha pebin bichokono kopei xeina pokotsiwa xeina po kae pin nákuathe, íchitha jopa xeinaeyo peajüntükoyenesüüwa po peajüntükoyenesüüwa ataya tsiteka, bapoxonae bapong jopa itaküüpaetsi xua pena jüntükoyene kapanepeawa xua jopa pewerawerakaewa. Tsipéi pebin jopa itaküüpaetsi xua bárapo kopeitha matomatsina Nakomtha xua bapong pekatsinexa tsainchi peajüntükoyenesüüwa xua barapoxonae pepatopaewanexa tsane Nakom pía nakua beicha tatsi. ²⁷Tsipéi xang pongxaein Nakom Tananeitapetsin bewa yawa múxuna patopeikaein Nakom pía peitüpanaewa tatsi. Matáüta matatsunpiwi barü patopeikaein. Daxita karepaya jíwitha katsibin pokotsiwa peyábara kuimatomatsíwatsi. Pomonae jopa xapain exanaeyo ichamonaetha xuya barapókotsi koyeneya exanaein xua antomabeya katsin. Pomonae xua wüünaeya éxana ichamonaetha pokotsiwa kui-itorobang xuya barapókotsi koyeneya exanaein matoma wüünaeya katsibin. ²⁸Bara xaniwaicha paka tsipáebatsi xua pomonae xote umene barapomonae jíwana abü, kopiya matha yábara yaputaena poxonae xang pongxaein Nakom Tananeitapetsin tamrópata pítabin xua itorobiya taewatsiwa tsane pomonae tana nejumekowün-tsiwi, jei Jesús.

**Meje yábara poxonae Jesús pijimonae peitütha
pexeiña itúpanae koicha tsanaya náexana**

(Mr 9.2-13; Lc 9.28-36)

17 ¹Poxonae seis po matakábibe jopa, po matakabin weya poxonae Jesús paeba baxua, bapoxonae icha matakábitha Jesús pona demuxuwa beicha. Pedro Jesús barü pona, írúno Santiago Jesús barü pona, írúno Juan Jesús barü pona, pong Santiago peweicho tatsi. Bárapo akoibi póyobe Jesús matakápona demuxúwatha, po demuxúwatha bichokono taücha ichaxota jiwaibi. ²Baxoteicha daxita Pedrobarü peitütha tatsi Jesús pexeiña itúpanae koicha tsanaya. Bichokono itabara daedaena icha be xometo ichi poxonae pentha. Matáütano pokotsiwa

penamaxatatsiwa bichokono ñapana tsanaya icha pekoicha ichi. ³Bapoxonae Pedro barü taerúkupa Moisés irü Elías xua bapongbe Jesús barü kueikueijeichibe. ⁴Bapoxonae Pedro namchi Jesustha, jeye:

—Pata Tanekanamataxeinaem, maisha wüünae xua xote pata umenaewa. Icha ichichípame, bapoxonae pákata akabinchi akoibi po boutíyobe, kae bouto xam nexa, icha bouto Moisés nexa, icha bouto Elías nexa, jei Pedro.

⁵Poxonae kataunxuae Pedro kueikueije, xua Jesús barü kueikueijeichi, bapoxonae daxita barapomonae pexaiña bematawakaicha tarunéikatsi tsakinaebowa po tsakinaebowa bichokono pentha. Néxata barapomonae tsakinaebówatha pejume jumetane xua Nakom namchi, jeye: “Bapong ápara Taxanto, pong bichokono antobein, pong itapetang. Bapong bichokono nejüntükoyene weiweina éxana. Bapong beta pajumetaema pokotsiwa paka tsipaeba”, jei Nakom.

⁶Poxonae Jesús pijimonae tatsi jumetaerúkupa baxua, bapoxonae barapomonae piakoutha íratha nabebeya, írabe taebobendeka. Barapomonae bichokono pijunuwi. ⁷Bapoxonae Jesús pijimonae imoxoyo kakuita unguataba yawa pijimonae warüba, jeye:

—Panonobaponde, paiñaxoba pajunúwame, jei Jesús.

⁸Poxonae barapomonae nekobarúkupa beya meisha Jesús kompa unguua, ichamonae aichurubena.

⁹Poxonae Jesús pijimonae barü duneika demuxuwa wétsika, pijimonae barái, jeye:

—Ichamonaetha jopa baxua patsipaebinde pokotsiwa aunxuae patáneme xuaunxuae paka tsita itúütatsi, beya abü poxonae xang pongxaein Nakom Tananeitapetsin ekeicha asüüing poponaein tatúpae koyene weya, jei Jesús.

¹⁰Néxata Jesús yáíñabatsi pijimonae, jeye:

—Pomonae jiwi pekuidubiwi Moisés pía peitorobi koyene jeye: ‘Mesías matha tsiwanaya patopáeinchi Elías’, jei. ¿Eta pokotsiwa metha jane? jei Jesús pijimonae tatsi.

¹¹Jesús jumenota, jeye:

—Bara xaiñéi, kopiya matha netsiwanaya patopa pong icha be Elías ichi. Matáütano bapong kana éxana jíwitha xua jiwi kana jüntükoyene weta exanaya éxanatsi xua tana nejumekowüntsiwa tsane xua tapatopaewa tsane. ¹²Íchitha xang paka tsipáebatsi xua báyatha ápara patopa pong kopiya matha netsiwanaya patopa pókotsin xua icha Elías ichi. Poxonae bapong báyatha patopeika jiwi jopa yaitaeyo bapongtha pong icha Elías ichi. Saya bárapo jiwi bapong abe kana éxanatsi be pókotsi koyeneya ichichipa beya poxonae bapong yatsikaya bexotsi. Icha bapong ichichi xua poxonae kana éxanatsi, barapomonae bara neichi tsane pongxaein Nakom Tananeitapetsin. Barapomonae irü nebexubina, jei Jesús.

¹³Jesús pijimonae tatsi matapaiña yaputane xua poxonae Jesús pijimonae tsi-paeba Elías yábara, ápara xua Juan yábara páebatsi pong jiwi Pebautisabin.

Meje yábara poxonae Jesús kauri taitaweta xua pewowin xaina

(Mr 9.14-29; Lc 9.37-43)

¹⁴Poxonae demuxuwa weya pona, bapoxonae Jesús pijimonae barü patopa ichaxota pin bicheito jiwi jinompa. Bapoxonae pebin Jesús imoxoyo kakuita unguakakátabatsi. Bapong pentabokototha unguua Jesús peitabaratha tatsi. Bapong Jesús baraichi, jeye:

¹⁵—Tanekanamataxeinaem, inta taxanto yábara najüntükoyene xéinare xua jiña neyawenaenexa. Taxanto inta wáetabatsi kauri. Inta papái éxanatsi. Inta koibo thamthamei éxanatsi. Matayaiba exanatsino. Matáüta ishótotha inta bebái tsaibichino. Matáütano ménetha inta bebái tsaibichino. ¹⁶Bekein bápapo taxanto xote kapónangje jiñamonaetha yawa jangje: ‘Painta taxanto taitawere kauri’, jang, dáichitha barapomonaе jopa itaküüpaetsi xua taxanto petaitawetsinéxatsi kauri, jei bapong.

¹⁷Jesús namchi daxita barapomonaetha, jeye:

—¡Paxam barapomonaе pam pomonaе jopa xapain kataunxuae pana nejumekowüntsim! ¡Paxam barapomonaе pam, peajüntükoyénebe jiwi pam! ¿Eta po weibe nantawénonang xua bewa tapaka barü ekáewatsi tsainchi xua beya poxonaе tapana nejumekowüntsiwam tsane? Matáütano ¿eta po weibe ekeicha nantawénonang xua tapaka kayawenáewatsi tsainchi? Inta xawena pewowin, jei Jesús.

¹⁸Bapoxonaе Jesús itaweta kauri, matáütano pewowin wepu pónatsi kauri. Bápapo pewowin naiña axaibi tsuxubi.

¹⁹Bapoxonaе pirapaeyo Jesús kompa tsipáebatsi pijimonaе. Jesús jeichichi:

—¿Eta pokotsiwa metha jopa pana neitaküüpaeyo xua pata taitawetsiwa kauri? jei Jesús pijimonaе tatsi.

²⁰Jesús jumebarái pijimonaе jeye:

—Jopa paka itaküüpaeyo xua paiña itawetsiwa kauri tsipéi jopa beta payábara jumekowüntsim xua Nakom paiña nepaka kayawenaewa. Bara xaniyeya paka tsipáebatsi. Icha paxeináetsipame xua be peya pejumekowüntsi koyenéwiyo xua bekein, icha mostaza xutiyo jüta ichi xua tsika xutiyo, íchitha bara paka itaküüpa xua urutotha paiña nejeiwa: ‘Uruto bara jinkoutha natabüjonde, icha ira beya naxore’, xua paiña nejeiwa. Bara jopa bayathiyo tsipae bápapo uruto. Dapokotsiwa ápara pákata aibi, pokotsiwa peyayapubeya dangweiwa icha paxéiname tapana nejumekowüntsiwam xua peyajumekowüntsiwiyo. ²¹Bápapo kauri saya paka itaküüpa xua paiña neitawetsiwa poxonaе matha payábara nainbótame matáütano poxonaе matha Nakomtha matowa pawüükame, jei Jesús.

Meje yábara poxonaе ekeicha Jesús nayábara paeba xua poxonaе tüpaena

(Mr 9.30-32; Lc 9.43-45)

²²Poxonaе kataunxuae Jesús pijimonaе barü pópona Galilea nákuatha, pijimonaе tsipaeba, jeye:

—Xang pongxaein Nakom Tananeitapetsin, jiwi nekaenaetsina ichamonaetha.

²³Bapoxonaе bekein nebexubina, íchitha poxonaе akoibi po matakabíyobe yapukaewina Nakom ekeicha tatüpaеin asüü neexanaena, jei Jesús.

Bichokono Jesús pijimonaе tatsi anthüthütane, xua poxonaе Jesús pejumetae-xaetsi poxonaе baxua paeba.

Meje yábara poxonaе Jesús kata paratiyo xua Nakom pin píabo nexa

²⁴Jesús barü patopa pijimonaе Capernaum tómaratha. Bapoxonaе pomonaе parátixi penotéibiwi po parátixi judiomonaе bewa katsibeibina xua Nakom pin píabo nexa, barapomonaе Pedro pexaiña beya tapónatsi. Barapomonaе Pedro yáíñabatsi, jeichichi:

—¿Pong paiña Nepakakuidubin, bapong bepa pana katséi parátixi xua Nakom pin píabo nexa? jei.

²⁵Pedro jumenota, jeye:

—Aa, bepa paka katséi, jei Pedro.

Poxonae Pedro botha joniya, Jesús kopiya barái bapong, jeye:

—Simón, ¿eta be kaitakuijicha? Bárapo kae pin nákuathe, ¿eta po jiwi wúükatsi parátixi, po parátixi xua jiwi bewa katsibeibina pomonaetha, pomonae jiwi itorobiya pía pepa peewatsíwichi poxonae pomonae jiwi itorobiya pía pepa peewatsíwichi wúüka? ¿Metha bara piamonae matabüxü wúüka? Ichakuitha, ¿metha bara ichamonae wúükatsi pomonae penanapaincha jinompaewi xua icha nakua wérena peponaewi? ¿Eta pomonae kuita wúükatsi? jei Jesús.

²⁶Pedro Jesús jumenótatsi, jeye:

—¡Ápara jame wúükáetsipa ichamonaetha! jei Pedro.

Ekeicha Jesús jumenota, jeye:

—Néxata barapomonae jopa wúükaeyo piamonae matabüxüyo. ²⁷Barichin jopa bewa Taxa katsin tsane parátixi, yáitama tsipéi ápara Taxa Pexantong tatsin. Íchitha xua barapomonae jopa wanaka kasebinexa, matha mene beya ponde. Kurupobo xoyama ménetha bapoxonae po duwein kopiya wanopichina kurupobo, pire bárapo duwein. Bapoxonae bárapo duwein koibototsina paratiyo táename po paratiyo xua naka yajúpabe xua wamatomatsiwabe tsane Nakom pin píabo nexa. Bapoxonae bárapo paratiyo kaponde pomonae parátixi penotébiwi beya bara kareno, jei Jesús.

Meje yábara poxonae Jesús yábara yáíñabatsi pijimonae xua pong peaiñakuí peexanaeinchi

(Mr 9.33-37; Lc 9.46-48)

18 ¹Néxata bapoxonae Jesús imoxoyo kakuita umenarükúpatsi pijimonae, yawa pijimonae yáíñabatsi, jeichichi:

—¿Jintam paxang jíwana pang pong bichokono aiñakuí kana exanaeinchi po matakeitha poxonae Nakom wabina jiwi xua petanaexanaenéxatsi pijimonae pomonae itorobiya pekanamataxeinaexae? jei Jesús pijimonae tatsi.

²Néxata Jesús waba pexuyo, yawa pijimonae tatsi peitabarayo deka tatsi takuaranoreka. ³Jesús namchi pijimonaetha, jeye:

—Bara xaiñeya paka tsipáebatsi bewa paxeinaem icha jüntükoyenewa xua jopa panantaxeinaem peaiñakuí koyenewa yábara. Barapókotsi jüntükoyenewa pexui ba xeina xua jopa taayapubetsi poxonae nejumekowünta. Bewa panantaxeinaem icha pexui ichi poxonae nantaxeina, icha paichichípame xua Nakom paiña nepaka wabiwa xua pijimonae tatsi paiña nepaka exanaewa pomonae pamxaem Nakom itorobiya paka éwata. ⁴Po jintong pong najüntükoyene akaura, xua daxota bichokono Nakom kanantawenónatsi xua pejumekowüntsíwatsi, bapong jame aiñakuí xua pekana exanáewatsi Nakom pijimonae tatsi jíwanapin pomonae pejumekowüntsíwichi, pomonae Nakom itorobiya peewatsixae. ⁵Pong matenta weyataeya waba peyawenaenexa pongtha pong tana nejumekowüntsixae xua pókotsin icha be barapókotsi pexuyo ichi, barapong ápara bara nententa weyataeya waba. Xang jopa meisha nententa weyataeya wábiyo ápara bara irü matenta weyataeya wábatsti pong tana neitoróbixae, xua pong bara Nakom, jei Jesús.

**Meje yábara poxonae Jesús paeba xua jintong jopa bewa kana exanáe
ichüngtha xua irü abe peexanaewa tsane**

(Mr 9.42-48; Lc 17.1-2)

⁶“Nakom tsítatsi xua pebin bichokono abe éxana poxonae ichüng kana éxanatsi xua abe peéxanae kuirukoyene éxana. Bárapo ichüng pong kataunxuae aena tana nejumekowüntsixa. Metha jame wüünae tsipae xua bárapo pebin pong abeya kana exanaeya taéxana ichüngtha, barapong pin iboto wishi kütsípatsi yawa xua tuwüütha xua pin marmentha bárapo iboto kayawa kabutabaichipatsino. Tsipéi jopa wüünae tsipae xua bapong kana éxana xua ichamonae abe peéxanae kuirukoyene éxana pomonae kataunxuae aena nejumekowünta. ⁷Maisha bichokono jopa wüünaeyo bárapo kae pin nákuathe nexa pomonae abe exaneiba. Bárapo kae pin nakuathepiwi ataya xeineiba po jiwi pekana exanáexaetsi xua ichamonae kana éxana xua bárapo jiwi abe peéxanae kuirukoyene peexaneibinexa xua daxota jopa nejumekowüntébiyo. Íchitha pebin tsokúae xua bapong abe taéxana xua ichüng abe exanaeya taexanaetsi.

⁸“Daxota paka tsipáebatsi icha paiña kobe paka éxana xua abe paiña neexanaewa tsane maisha pana nakobe ukubóbare yawa tajü beya pana nakobebebande abe paiña jopa neexanaenexa. Tsipéi baxua wüünae xua kae kobexi pabebam tsane, xua saya kae kobexi paiña neyawa patsiwa tsane Nakom pía nakua beicha tatsi. Baxua jame yatsikaewa wüünae beyakaincha xua aiña kóbebe paiña nekayawa bebái tsane ichaxota po nákuatha ishoto jopa itakounayiyo. Matáütano icha paiña taxu paka éxana xua abe paiña neexanaewa tsane maisha pana nataxu ukubóbare yawa tajü beya pana nataxubebande xua abe paiña neexanaeyainwa. Tsipéi baxua wüünae xua kae taxuxi pabebam tsane, xua kae taxuxi paiña neyawa patsinexa Nakom pía nakua beicha tatsi. Baxua jame yatsikaewa wüünae beyakaincha xua aiña táxube paiña nekayawa bebái tsane ichaxota po nákuatha ishoto jopa itakounayiyo. ⁹Matáütano icha pokotsiwa patáneme paiña itamaikéittha xua icha baxua paka éxana xua abe paiña neexanaewa tsane paiña netaexae paiña itamaikéittha, maisha pana naitamaikéi júkuare. Yawa tajü beya pana naitamaikéi bebande abe paiña neexanaeyainwa. Tsipéi baxua wüünae xua kae itamaikéitoxi pabebam tsane, xua kae itamaikéitoxi paiña neyawa patsiwa tsane Nakom pía nakua beicha tatsi. Baxua jame yatsikaewa wüünae beyakaincha xua poxonae aiña itamaikéitobe paiña nekayawa bebái tsane ichaxota ishoto jopa itakounayiyo”, jei Jesús.

**Meje yábara poxonae Jesús tsipaeba pijimonae pekayábara jüta
pepaebi diwésiyo xua oveja yábara pong penapuxanaein**

(Lc 15.3-7)

¹⁰Ekeicha Jesús jeye: “Barapókotsi pexuyo jopa katsajumeya pakayábara jande: ‘Maisha bárapo pexuyo jopa peaiñakuuiyo’, jopa pajande. Matáüta pomonae aena pejumekowüntsiwi Nakom jopa pakayábara jande: ‘Maisha barapomonae jopa peaiñakuimonaeyo’, jopa pajande. Paka tsipáebatsi pomonae Nakom pejumekowüntsiwi barapomonae nantaüta pía matatsunpiwi po matatsunpiwi barapomonae yawénatsi. Bárapo matatsunpiwi, Taxa Nakom peitabaratha tatsi tajinompéibatsi pía nakuatheicha, xua bárapo pejumekowüntsiwi peyawenaenexa tsaibi tsainchi.

¹¹Tsipéi xang, pongxaein Nakom Tananeitapetsin patopeikang tayawenaenexa pomonae jopa pejumekowüntsiwi xua barapomonae napaeba takana-exanaewa tsane.

¹²”Pana nejudenaitáeware po pekayábara jüta pepaebi diwésiyo xua paka tsi-paebinchi. Bárapo diwésiyo jeye: Jintong ba xeina oveja cien póyobe. Kaein tana-puxánatsi. Jintong demuxúwatha kuenta pona noventa y nueve póyobe oveja, pewenaweneinexa oveja, pong katsawa jopa, beya matapaiña taeba. ¹³Xaniwaicha paka tsipáebatsi poxonae jintong oveja taeba, bapong bichokono weiweina petae-bixae oveja pong katsawa jopa, beyakaincha xua poxonae weiweina poxonae saya noventa y nueve póyobe po ovejamonae jopa katsawa othopaeyo. ¹⁴Barichi barapókotsi jüta koyeneya ichi, Nakom pong Taxa, pong peitabókotha eka, bapong jopa ichichipaeyo xua pebarapentsíwatsi pijiwimonae xua pejumekowüntsíwatsi matáütano xua bara kaeinno irü, pomonae aena pejumekowüntsiwixaetsi”, jei Jesús.

Meje yábara poxonae Jesús yábara paeba xua jintong eta bichi tsane poxonae kayábara jüntemainaena pongtha pong abe petaexanaexaetsi

(Lc 17.3)

¹⁵Ekeicha Jesús barái pijimonae, jeye: “Icha ichüing pong irü pejumekowüntsindü, icha bapong pákata abe éxana, bapong baxua yábara patsipáebare xua bapong peyaputaewa tsane xua deta kou abe éxana. Icha barapong paka jume-taeya jejéi tsane pokotsiwa xua bapong abe éxana bara bapoxonae paka itakoxonaena. ¹⁶Ichakuitha icha ichüing pong pejumekowüntsindü, icha bapong jopa paka jumekowüntsiya jejeyo, bara néxata ekeicha pawábare pebinbe nakuéyatabe xua yóroba paiña netsipaebinexa bapong xua abe peexanaexae. ¹⁷Íchitha icha áwiya bapong jopa kataunxuae paka jumekowüntsiya jejeyo, bara néxata barapong pakáponde pomonaetha, pomonae Nakom pejumekowüntsíwichi, xua barapomonae bapong peyábara paebinéxatsi. Icha bapong áwiya kataunxuae jopa kame jumekowüntsiya jejeyo barapomonaetha barapoxonae barapomonae bewa yábara nantaxeinae xua bapong bara be pókotsi jintong pong jopa bápana pejumekowüntsin Nakom. Ichakuitha bewa yábara nantaxeinae xua bapong bara be pókotsi jintong jíwana, pomonae peajüntükoyenebewi, pomonae parátixi pentomanotéibiwi, po parátixi jiwi bewa katsibeibina pong romanomonae itorobiya pía pepa peewatsinchi nexa.

¹⁸”Xaiñeya paka tsipáebatsi. Pokotsiwa paxam jopa pakopatsim bárapo kae pin nákuathe xua pokotsiwa éxana pomonae tana nejumekowüntsiwi, bapokotsiwa bara irü Nakom jopa kopatsiyo pía peitorobi nakua beicha xua barapomonae peexanaewa tsane baxua. Pokotsiwa pakópatame xua tajiwimonae peexanaenexa bárapo kae pin nákuathe bapokotsiwa irü Nakom kópata pía peitorobi nakua beicha xua barapomonae bara peexanaewa tsane baxua.

¹⁹”Matáütano paka tsipáebatsi icha paxam jíwana nakuéyatabe bárapo kae pin nákuathe icha bapongbe pebürüya jüpaya yábara nantaxéinabe xua Nakomtha pewüükáewabe, bapongbe bara baxua taexanáinchibe pokotsiwa pewüükaexaebe xua Taxa Nakom bara taexanaena pong peitabókotha eka. ²⁰Tsipéi ichaxota ba nayántabe xua nakuéyatabe póyobe, xua poxonae pewüükaenéxabe Nakom xua ichakuitha ichaxota akoibi póyobe, xua pomonae taneántobe jíwixae, bara bekein saya káeyobe dáichitha xang baxota ba ungkueibang irü”, jei Jesús.

²¹Néxata Pedro Jesús yáíñabatsi, jeye:

—Tanekanamataxeinaem, icha inta abe éxana pong írürü jumekowünta, ¿eta pokuíyobe tsipaebokuaein xua bewa takuiyábara jüntemainaewa tsane pokotsiwa inta abe éxana? ¿Metha saya beya poxonae siete pojumekuíyobe tsipae? jei Pedro.

²²Jesús jumenota, jeye:

—Íchitha jopa katsipaebichi xua saya siete pokuiyobetham netsipáebiwa tsane xua jiña nekuiyábara jüntemainaewa tsane pokotsiwa kata abe éxana. Seikaya ápara jame katsipáebatsi, xua jopa kuinaya najumebaxubim tsane xua jiña nekuiyábara jüntemainaewa tsane pong kata abe éxana xua beya bekein jame cuatrocientos noventa pokuiyobetham tsane xua netsipáebiwa tsane, jei Jesús.

Meje yábara poxonae Jesús kuiduba pekayábara jüta pepaebi diwésiyo xua pong jopa yábara jüntemainaeyo ichüngtha

²³Ekeicha Jesús pijimonae barái pekayábara jüta pepaebi diwésiyo, jeye: “Áno-xuae paka kuidúbatsi xua Nakom yábara. Nakom pijimonae bichokono yábara jüntemaina po abe peéxanae koyenein pijimonae tatsi éxana. Nakom baxua éxana icha pebin ichi pong jiwi itorobiya pía pepa peewatsinchi. Bapong wüüka xua kaewa ekeicha pematomsinéxatsi xua po matomang kaena báyatha penakowaebixaetsi. ²⁴Pong jiwi itorobiya pía pepa peewatsinchi tamrópata pítaba xua waba pía petanakuichiwichi. Pong kopiya, bapong pong jiwi itorobiya pía pepa peewatsinchi jopa ekeicha kaewa takanawitichi diez millones po paratiximonaebe.

²⁵Barapong pong kopiya pong petanakuichinxae pong jiwi itorobiya pía pepa peewatsinchi nexa jopa xeinaeyo paratiximonae xua pong jiwi itorobiya pía pepa peewatsinchi kaewa petakanawichinexa tsainchi. Daxota pong jiwi itorobiya pía pepa peewatsinchi itoroba ichüngtha xua bárapo petanakuichinchi kaenaetaxubinchi ichüngtha xua ichüng pekomotsinexa tsane xua pong pebusikuitaetaeinchi pekana exanaenexa tsainchi. Barapong pong jiwi itorobiya pía pepa peewatsinchi matáüta kui-itoroba xua yábüyo pekaenaetsinexa tsáinchino, powa bárapo petanakuichin píowa tatsi. Yáwano kui-itoroba xua pexuino pemuxuna kaenaetsinexa tsainchi. Yáwano kui-itoroba xua pemuxuna kaenaetsinexa pokotsiwang xeina pong petanakuichin, xua bárapo matoma pekatsinéxatsi pong jiwi itorobiya pía pepa peewatsinchi. Íchitha daxita bárapo matoma áwiya seika, bekein bapong daxita baxua kana exanaetsípatsi. ²⁶Néxata pong petanakuichin pentabokototha ungkua pong jiwi itorobiya pía pepa peewatsinchi itabaratha tatsi matáütano jumedangweya namchiya jeye: “Tanentakaponaem, abü nekayábara najüntükoyene xéinare, xua jopa bepijawa neaitakonaenexa. Barápara bexa daxita pentomang kakatsibinchi’, jei pong petanakuichin. ²⁷Pong jiwi itorobiya pía pepa peewatsinchi bara yábara najüntükoyene xeina peyawenaenexa, yawa yábara jüntemaina bárapo paratiximonae, matáütano bara saya pukópata.

²⁸”Dáichitha bapong pong petanakuichinxae poxonae póntaba pong jiwi itorobiya pía pepa peewatsinchi weya, jemeicha kaxina pía jintong pong penabarü nakuichinxaebe. Pong kaxínatsi bapong matoma amanáyaba saya cien po paratiximonaebe. Pong jiwi itorobiya pía pepa peewatsinchi weya pona matoma amanáyabatsi. Pong jiwi itorobiya pía pepa peewatsinchi weya pona bapong pía jintong koibotathü wáetaba, muxu penaichatabi. Pong pekoibotathü waetabixae bapong jei: ‘¿Ekeicha inta kaewa kanawire xua báyatha nentoma amanáyabame!’

jei. ²⁹Bapoxonae pong koibotathü wáetabatsi pentabokototha ungkua pía jintong itabaratha tatsi, matáütano jeye: ‘Abü, neyábara najüntükoyene xéinare, xua jopa bepíjawa neaitakonaenexa. Barápara bexa pentoma kakatsinchi’, jei pong koibotathü wáetabatsi. ³⁰Íchitha pong jiwi itorobiya pía pepa peewatsinchi weya pona bapong aichaxaibi xua abü kame pentoma ewatsiwa. Daxota bapong pía jintong kápona jiwi pekübibó beya, beya abü poxonae matoma katsinchi pía jintong, xua pong jiwi itorobiya pía pepa peewatsinchi weya pona matoma katsinchi. ³¹Poxonae ichamonae pomonae írürü petanakuichiwi baxua kuitane, barapomonae ünthüthüwekoyéi, tsipéi ichüng pong irü petanakuichin jiwi pekübibothe étatsi. Bapoxonae barapomonae pong jiwi itorobiya pía pepa peewatsinchi beya pona. Barapomonae tsipaeba pongtha pong jiwi itorobiya pía pepa peewatsinchi daxita pokotsiwa pong petanakuichin kana éxana ichüngtha pong írürü petanakuichin. ³²Bapoxonae pong jiwi itorobiya pía pepa peewatsinchi itoroba pijimonae xua petawabinexa tsainchi pong petanakuichinxatsi pongtha xua pong peyábara jüntemainaexae pokotsiwa penakowaetsixaetsi. Pong jiwi itorobiya pía pepa peewatsinchi bapongtha jeye: ‘¡Maisha pong inta nakuítame maisha bichokono abem! Xang kayábara jüntemáinatsi daxita bárapo aña paratiximonae tsipéi tanebarü jumichimxaem. ³³Xam bewa býatha barichim. Bewa yábara najüntükoyene xeinaem jiña jintong xua nejüntemainaenexa pokotsiwa bapong kantoma amanáyaba, icha xang ichin xua býatha kayábara najüntükoyene xéinatsi takayawenaenexa tsainchi’, jei. ³⁴Pong jiwi itorobiya pía pepa peewatsinchi bichokono anáepana. Daxota bapong kui-itoroba ichamonae, xua barapong, pong petanakuichinxatsi kaponaeinchi jiwi pekübibó beya. Baraxota péraxa exanaeinchi xua beya abü poxonae barapong pong petanakuichinxatsi matoma katsinchi daxita po pentoma býatha jopa kaewa petakanawichixaetsi”, jei Jesús.

³⁵Ekeicha Jesús jeye:

—Bara jüta koyeneya ichi tsane icha be pong jiwi itorobiya pía pepa peewatsinchi ichi. Poxonae bapong péraxa éxana bárapo pía petanakuichinxatsi xua bapong pía jintong jopa pekuiyábara jüntemainaexae, Nakom pong itaboko peekaein barichi tsane pijíwitha. Nakom exanaena baxua poxonae barapomonae jopa xapain yábara jüntemainaeyo pomonaetha, pomonae abe petaexanaexaetsi, jei Jesús.

Meje yábara poxonae Jesús kuiduba xua jiwi piséurixi pepunapenteibiyainwa

(Mr 10.1-12; Lc 16.18)

19 ¹Poxonae Jesús najumeweta xua tsipaeba pijimonae, bapoxonae Galilea nakua weya wárapa. Bapoxonae Jordán mene deka bara béreka pona, ekeicha dabeya bárapo Jordán mene, mene epa-üngkatábiya xua patopa Judea nákuatha, po nakua eka ichaxota pokotsiwa xometo bejopiya xua po nakua Jordán mene weya eka. ²Pin bicheitomonae punapoinchi. Baxotiya Judea nákuatha Jesús axaibi éxana peatenewi.

³Bapoxonae fariseomonae piraichi Jesús imoxoyo kakuita umenarükúpatsi xua Jesús pejüntükoyene jüjütsinéxatsi daxota jeye Jestutha:

—¿Moisés pía peitorobi koyenewa kópata xua pebin piseuri pepunaxubiwa ichi saya poxonae ichipa? jei fariseomonae.

⁴Jesús fariseomonaē jumenótatsi, jeye:

—¿Jopa payorobim Nakom Pejume Diwesi? Bárapo diwésitha jeye: ‘Poxonaē aena Nakom fórota pebin yawa petsiriwa’, jei bárapo Nakom Pejume Diwésitha.

⁵Matáúita jeyeno Nakom Pejume Diwésitha: ‘Daxota báxuaxae pebin paxa wepu natsata yawa pena wepu natsata xua piowabe imoxoyo penaperüü nakoyobinéxabe. Barapongbe be kae jiwimonaē náexanabe’, jei Nakom Pejume Diwésitha.

⁶Bapoxonaē bapongbe xua aiña jíwibe aibi, bara be kaein náexanabe. Daxota pebin bápana jopa bewa punaxubi píowa, tsipéi ápara báyatha Nakom kana éxana xua bara be bara kaein náexanabe, jei Jesús.

⁷Néxata fariseomonaē Jesús yáíñabatsi, jeye:

—¿Eta xua metha Moisés pía peitorobi koyenewa kópata xua jintong itakúüpa-tsi xua pekatsiwa papera piseuri po papératha tina xua pexubiwa tsane piseuri? jei fariseomonaē.

⁸Jesús jumenota, jeye:

—Moisés kópata xua paxam paiña séurixi paiña nepunapenteibiwa jopa paiña nejumekowüntsi jíwixae Nakom. Ápara kaena báyatha Nakom jopa baxua kopatsiyo poxonaē aena foforotapona jiwi. ⁹Nama paka tsipáebatsi pong píowa punaxuba xua poxonaē yábüyo bekein jopa nasikuí exanaeyo ichüngtha, icha bapong ichowa pita, bapong abe éxana Nakom peitütha tatsi tsipéi Nakom tsítatsi xua powa kopiya barü pópona ápara bara píowa tatsi, jei Jesús.

¹⁰Néxata Jesús tsipáebatsi pijimonaē, jeye:

—Icha Nakom jopa kopatsiyo xua pebin píowa punaxubina poxonaē barapowa saya ü éxana pokotsiwa pebin aichaxaibi, baxua bichokono ajumeyapube. Metha néxata pebin jopa jitha ekáe tsipae. Bara saya pebin metha misha ekáetsipa, jei-chichi Jesús pijimonaē.

¹¹Jesús barái pijimonaē, jeye:

—Daxita jiwi ba jopa itakúüpaetsi xua peyábara yaputaewa pokotsiwa aunxuae payábara kaunútame xua jopa jitha peenaewa. Saya meisha pomonaē Nakom yábara yaputane éxana bárapo koyene, barapomonaē itakúüpaetsi xua pekana exanaewa bárapo koyenetha xua jopa jitha peenaewa. ¹²Barichi akoibi pokuikoyenéwabe xua pebiwi jopa penotsiwa pekotsiwaxi jiwi. Ichamonaē aichaxaibi xua jitha peenaewa tsipéi barapókotsi jiwimonaē bara yakuiya nakatsiwa xua jopa penotsiwa yabüxitha. Ichamonaē jopa itakúüpaetsi xua pekotsiwaxi penotsiwa tsipéi báyatha tobüjúkuatsi, xua ichamonaē tobüjukua. Daxota jopa itakúüpaetsi xua pexui pekana exanaewa. Ichamonaē aichaxaibi xua pekotsiwaxi nota, peichichipaexae xua saya ü peexanaewa pokotsiwa Nakom itoroba. Pong itakúüpaetsi xua peyábara yaputaewa xua pókotsi koyene jopa pepichiwa pekotsiwa, bara moya jopa exanáe tsane xua pepichiwa tsane pekotsiwa, jei Jesús.

**Meje yábara poxonaē Jesús jeye pexuitha:
“Bárabü Nakom beta paka yawenaena”, jei**

(Mr 10.13-16; Lc 18.15-17)

¹³Néxata jiwi Jesús takapónatsi pexui xua Jesús pejayabinexa pekóbetha yawa xua Nakomtha pewüükaenexa bárapo pexui nexa xua pejeinexa: “Bárabü Nakom beta paka yawenaena”, pejeinexa. Íchitha Jesús pijimonaē tatsi poxonaē baxua

tane, tamrópata notarúkupa xua barapomonae kuimatawéntatsi pomonae pexui karendena tsaibi. ¹⁴Íchitha Jesús jumebarái pijimonae, jeye:

—Bara pakópabare pexui xua tana ítata patsinexa. Jopa pexui paitawétsinde, tsipéi Nakom pía peitorobi nakua tatsi saya meisha barapomonae nexa pomonae pejüntükoyene wüünaewi icha pexui ichi. Pexui piakui xua tayapuwüünaetsi xua pía jüntükoyeneintha jumekowünta Nakom, jei Jesús pijimonaetha.

¹⁵Poxonae Jesús nakobeweta xua pexui jáyabatsi yawa xua Nakomtha tawüüka bárapo pexui, xua jeye: “Bárabü Nakom beta paka yawenaena”, jei. Bapoxonae Jesús wepu pona barapomonae.

**Meje yábara poxonae pewowin pong
kopei pexeinaein Jesús tsipáebatsi**
(*Mr 10.17-31; Lc 18.18-30*)

¹⁶Pewowin pona xua Jesús petaenéxatsi. Bárapo pewowin jeye Jesustha:

—Já Tanekuidubim, maisha nejüntükoyene wüünaem. ¿Eta xua kopiya matha exanokuaein xua ajüntüyapusüüya tapoponaewa tsane xua ataya tsane? jei.

¹⁷Jesús jumebarái, jeye:

—¿Eta xua nebaram: ‘Nejüntükoyene wüünaem’, jam? Ápara ichüing dapong aibi pong pejüntükoyene wüünaein. Jame meisha ápara bapong Nakom kompa pejüntükoyene wüünaein. Icha ichichípame xua ajüntüyapusüüya nepoponaewa xua ataya tsane, moya matha éxande pokotsiwa Moisés itoroba pía peitorobi jumekoyenéwangtha, jei Jesús.

¹⁸Pewowin Jesús jumebaraichi jeye:

—¿Eta po peitorobi jumekoyenéwara? jei.

Jesús jumenotsiya namchi xua Moisés pía peitorobi koyenewa namchi, jeye:

—Jopa ichüing bexubinde. Jopa ichowa pichinde ichüing píowa tatsi. Jopa kai-binde ichüing piáwang tatsi. Jopa naerabiya kayábara paebinde pokotsiwa ichamonae éxana. ¹⁹Axang barü jumekuí iturajínare. Matáüta énatha barü jumekuí iturajínare. Antobeinde nekatsikuárabü enaewi icha ichim xua jinkoutha naántobem’, jei Moisés, jei Jesús.

²⁰Pewowin Jesús jumebaraichi, jeye:

—Daxita kaena báyatha bárapo koyenein exaneibang. Poxonae pexúyothang tamrópata pítabang, beya ánoxuae yakuiya piñong. ¿Eta pokotsiwa meisha inta akoibi xua exanaein? jei bárapo pewowin.

²¹Jesús jumebarái, jeye:

—Kataunxuae icha kui koyene kata seika xua pokotsiwa neexanaewam tsane. Icha ichichípame xua jopa nekata akoibiyonexa tsane xua pokotsiwa wüünaeya neexanaewa, matha daxita kaenaere pokotsiwa xéiname yawa katsíbare pomonaetha, pomonae peakopeíbi jiwi. Bapoxonae jame moya anetha, nepunaponde. Bekein bara bapoxonae akopeibim tsane, dáichitha Nakom kakatsina peitaboko beicha pokotsiwa Nakom nekajüntana botsiwa pokotsiwa bichokono wüünae, jei Jesús.

²²Poxonae bárapo pewowin baxua jumetaeba bichokono ünthühüwekoyeya pónataba tsipéi bichokono kopei pexeinaein.

²³Néxata Jesús barái pijimonaetha, jeye:

—Bara xaniyeya paka tsipáebatsi. Maisha bichokono ayapubé kai xua pomonae bichokono kopei pexeinaewi náexana Nakom pijimonae tatsi jíwana pomonae

Nakom itorobiya peewatsixae. Tspíei barapomonaе bichokono antasiwayatane bárapo pía kopei beyakaincha xua Nakom antobetsi. ²⁴Ekeicha paka tspíeбatsi. Bichokono akuiruyapubé xua duwein pong pewüing camello xua pejoniyaewa akuicheto peetabü wang iya. Íchitha nama yatsikaewa pong bichokono kopei pexeinaein taakuiruyapubetsi xua náexana Nakom pijimonaе tatsi jíwana pomonaе Nakom itorobiya peewatsixae beyakaincha xua poxonaе akuiruyapubé xua poxonaе camello akuicheto peetabü wang iya pejoniyaewa, jei Jesús.

²⁵Poxonaе baxua Jesús jumetaerükúpatsi pijimonaе, barapomonaе yábara najüntükuikoyene kabenaeka, yawa Jesús jeichichi:

—Bapoxonaе ¿jintam metha néxata itakúüpatsi xua penakapanepaewa piakoutha? jei barapomonaе.

²⁶Jesús nekotsiya jeye:

—Pebiwí ba jopa itakúüpaetsi xua baxua éxana, saya jame meisha Nakom kompa itakúüpatsi xua jiwi napaeba kana éxanatsi. Tspíei daxua aibi pokotsiwa Nakom taakuiruyapubetsi, jei Jesús.

²⁷Néxata Pedro jeye ichaxota Jesús:

—Pata Tanekanamataxeinaem, paxang daxita pakuenta ponang pokotsiwa paxeinang pata paka punaponaewa tsainchi. Tspíei baxua báyatha paéxanang ¿eta pokotsiwa metha néxata pana nekatsíname? jei.

²⁸Jesús jumenota, jeye:

—Bara xaniyeya paka tspíeбatsi. Po matakeitha tsane Nakom pena ira exanaena, bárapo matakeitha, xang pongxaein Nakom Tananeitapetsin ekaein tapexeiña itúpanae ekaethopáewatha po tapexeiña itúpanae ka-ekaethopaewa bichokono itúpana. Paxam pomonaе tapana nepunajinompawim doce po itúpanae eneibithopeibíwatha paenáename paiña yábara paebinexam tsane pomonaе doce pomatabüxúyobe israelmonaе pía penatsikuentsiwa abe peexanaexae. ²⁹Daxita pomonaе taneántobe jíwixae xua pekueikueijeji tsurubenanaebiyaenexa Nakom Pejume Diwesi, Nakom beta kana exanaena barapomonaе. Nakom beta kana exanaena pomonaе piabong pekuenta ponaexae, matáüta ichakuitha ichamonaе peweicho jiwi pekuenta ponaexae, matáütano ichakuitha pamcho jiwi pekuenta ponaexae, matáütano ichakuitha paxeíwi pekuenta ponaexae, matáütano ichakuitha pena jiwi pekuenta ponaexae, matáüta ichakuitha pía pexui pekuenta ponaexae, matáütano ichakuitha pía irang pekuenta ponaexae. Barapomonaе bárapo koyenein éxana tana neántobe jíwixae, daxota daxita barapomonaetha Nakom jopa juniya katsi tsane bárapo kae pin nákuathe. Matáütano barapomonaetha Nakom katsina pía peitorobi nakuatheicha peajüntükoyeneyapusüüwa, po peajüntükoyeneyapusüüwa ataya tsiteka. ³⁰Pomonaе xua ánoxuae pomonaе jiwi petsita-aiñakuí jíwichi po kae pin nákuathe, barapomonaе bexa Nakom pía peitorobi nakuatheicha jopa peaiñakuí jiwi tsane. Pomonaе xua ánoxuae pepawi náexana, pomonaе jiwi jopa petsita-aiñakuí jíwichi po kae pin nákuathe, barapomonaе Nakom pía peitorobi nakuatheicha peaiñakuí jiwi tsane, jei Jesús.

Meje yábara poxonaе Jesús paeba pekayábara júta pepaebi diwésiyo pomonaе uva pábitha petanakuichiwi

20 ¹Ekeicha Jesús tsipaeba pijimonaе pekayábara júta pepaebi diwesíyotha, jeye: “Nakom pijimonaе matomatsina pía nakuatheicha xua be pematomatsiwa petaexanaexaetsi pía petanakuichiwa tatsi icha pong pabi pexeinaein ichi

xua poxona matoma katsiba pomonaetha, pomona petanakuichixaetsi. Pong pabi pexeinaein kaemúmbbotha pona xua jeita pomona pía petanakuichinexa tsainchi pía uva bakabo. ²Bapong muxutsipaeba pía petanakuichiwichi, jeye: ‘Paxam painta nakuire tauvabakabo, néxata paka matoma katsibebinchi pókotsi paratiyo xua kaentakeitha nexa’, jei. Bapoxonae bapong pía petanakuichiwichi itoroba pía uva bakabo beya. ³Bapoxonae ekeicha bapong pona poxonae xometo tajü beekeina xua pejeichinexa ichamona pomona petanakuichiwichinexa tsainchi pía uva bakabo. Bapoxonae bapong tane ichamona, pomonae pánatha saya jinompa xua jopa nakuitompaeyo. ⁴Bapong barái barapomona jeye: ‘Paxam írürü painta nakuire taúva pabi. Néxata beta paka matoma katsibinchi, xua pókotsi paratiyo po hóratha panakuítame nexa’, jei. Bapoxonae barapomona pona pabi beya penakuichinexa. ⁵Bapong matáeiñaxae ekeicha pona xua pejeichinexa ichamona pomona pía petanakuichiwichi tsainchi. Barichi ekeicha poxonae tabópiya pona xua pejeichinexa ichamona pomona pía petanakuichiwichi tsainchi. ⁶Bapong ekeicha pona pana beya poxonae xometo íriya dukuaicha xua pejeichinexa ichamona pomona pía petanakuichiwichi tsainchi. Bapong ekeicha tane ichamona pomona xua jopa irü nakuitompaeyo. Bapong barái barapomonaetha, jeye: ‘¿Eta xua metha kame saya ánoxuae pauméname po pánathe, xua jopa panakuitompaem?’ jei pabi pexeinaein. ⁷Barapomona jumenota, jeye: ‘Kanta dapong aibi pong pata tana neitorobiwa tsane’, jei. Néxata bapong barái barapomona, jeye: ‘Paxam papónare, írürü painta nakuire taúva pabi, néxata beta paka matoma katsibinchi xua pókotsi paratiyo po hóratha paiña nenakuichixae tsane’, jei pong pabi pexeinaein.

⁸”Poxonae kirei tsanaicha pong pabi pexeinaein, bapong itoroba pong pía petayapukaekaeinchi uva pabi, jeye: ‘Inta wábare pomona inta nakuita yawa matoma katsíbare. Tamrópata wabaponde yawa matoma katsibaponde. Kopiya matha wábare pomona epidubena pomona inta kotakaya nakuita poxonae xometo íriya dukuaicha, beya poxonae papataponaena pomona kopiya inta nakuita kaemúmbbotha’, jei. ⁹Néxata kopiya pata pomona kotakaya nakuita poxonae xometo íriya dukuaicha. Daxita barapóyobe pomona kotakaya nakuita bara beta matoma katsíbatsi xua pókotsi paratiyo kaentakeitha nexa, bekein bara jopa pin matakeitha nakuichiyo. ¹⁰Néxata bara irü bapoxona pata pomona tamrópata notarúküpa xua nakuita poxonae tabópiya, bara barapomona irü beta matoma katsíbatsi pókotsi paratiyo kaentakeitha nexa. Bapoxonae irü pata pomona tamrópata notarúküpa xua nakuita poxonae matáeiñaxae, bara barapomona irü beta matoma katsíbatsi, pókotsi paratiyo kaentakeitha nexa. Bapoxonae irü pata pomona tamrópata notarúküpa xua nakuita poxonae xometo tajü beekeina, bara barapomona irü beta matoma katsíbatsi, pókotsi paratiyo kaentakeitha nexa. Bapoxonae irü nama pata pomona tamrópata notarúküpa xua nakuita kaemúmbbotha. Barapomonae najéi: ‘Metha ekeicha mataropeichiya naka katsibina parátixi tsipéi nakuítatsi kaemúmbbotha’, najéi barapomona. Daümetha barapomona saya matoma katsíbatsi, pókotsi paratiyo kaentakeitha nexa. ¹¹Íchitha poxonae barapomona matoma nota, itakonakarúküpa pongtha pong peitorobixae barapomonaetha. ¹²Barapomona anaya jei bapongtha: ‘Pomona nakuita kotakaya, saya kae hóratha nakuita, barapomona matoma katsíbame pókotsi matoma pana katsíbame. Nama ápara paxang dangweya panakuitang, yawa átsatha dangweya

panakuitang', jei barapomonaē. ¹³Íchitha pong pabi pexeinaein jumenota kaeintha barapomonaē jíwanapintha, jeye: 'Tajintong, ápara jopa bara abe pákata exanaē-tsi. Kanaunxuae paka muxutsipaebatsiba paka jeichi: Paka matoma katsibinchi xua pókotsi paratiyo kaentakeitha nexa, paka jeichi. ¹⁴Bara jiña matoma pire. Bara nawíyama. Xang ichichipang takoya matoma katsibang pomonaē kiripitha nakuita barapókotsi matoma, pókotsi matoma júpa paka katsíbatsi. ¹⁵Ápara xang tawaxae itakoxonang xua tantoma exanaewa. Ápara paúwame ichamonaē xua jopa taasíwaxae xua tantoma exanaewa ichamonaētha', jei pong pabi pexeinaein.

¹⁶"Nakom barapókotsi júta koyeneya kana ichi tsane jíwitha icha pong pabi pexeinaein ichi poxonaē kana éxana pomonaētha, pomonaē pía petanakuichiwi-chi. Pomonaē xua ánoxuae pekuipawi, pomonaē jiwi jopa petsita-aíñakuí jíwichi po kae pin nákuathe, barapomonaē Nakom pía peitorobi nakuatheicha peaiñakuí jiwi tsane. Pomonaē xua ánoxuae pomonaē xua jiwi petsita-aíñakuí jíwichi po kae pin nákuathe, barapomonaē bexa Nakom pía peitorobi nakuatheicha jopa peaiñakuí jiwi tsane", jei Jesús.

**Meje yábara poxonaē Jesús nayábara paeba
akoibi pokoyenebētha xua poxonaē túpaena**

(Mr 10.32-34; Lc 18.31-34)

¹⁷Bapoxonaē pírapae Jesús pona Jerusalén tómara beya. Poxonaē kataunxuae Jesús pijimonaē barü ekapona námtotha pomonaē doce póyobe tatsi, bárapo doce póyobe Jesús meisha waba aishowa beya petsipaebinxē.

¹⁸Jesús jeye:

—Ánoxuae ponaeinchi Jerusalén tómara beya. Bárapo tómaratha xang pong-xaein Nakom Tananeitapetsin nekaenaetsina sacerdotemonaē pía pentakaponáe-witha tatsi yawa pomonaētha, pomonaē jiwi pekuidubiwi Moisés pía peitorobi koyene tatsi. Barapomonaē nekaenaetsina ichamonaētha xua ichamonaē tana nebexubiwa tsane. ¹⁹Bapoxonaē daxita barapomonaē nekaenaetsina pomonaētha, pomonaē penanapaincha jinompaewi xua icha nakua wérena peponaewi xua barapomonaē tana nekuikaponaenexa. Matáütano bárapo penanapaincha jinompaewi nebena yáwano túparukua neexanaena náetotha. Dáichitha poxonaē akoibi po matakábibe yapujopaena ekeicha Nakom asiüü neexanaena petúpáe kuirukoyene weya, jei Jesús.

**Meje yábara poxonaē Jesús wúükatsi powa,
Santiago pena tatsi xua irü Juan pena tatsi**

(Mr 10.35-45)

²⁰Néxata petsiriwa Jesús imoxoyo kakuita unguatábatsi. Barapowa, Juan pena tatsi yawa Santiago pena tatsi. Juan irü Santiago, bapongbe Zebedeo pexántobe tatsi. Bárapo petsiriwa pexántobe barü patopa Jesustha. Bárapo petsiriwa pentabokototha unguua Jesús peitabaratha tatsi, xua Jesús pewüükaenexa tsainchi.

²¹Jesús barái bapówatha, jeye:

—¿Eta pokotsiwa jiña newüükaetsi? jei.

Bapowa Jesús jumenótatsi, jeye:

—Poxonaē matakabi patopaena po matakeitha itorobiya ewatsínname jiwi bárapo matakeitha kawúükatsi xua bara itorobínname bárapo taxántobe, xua nantíyabe

peekaewa tsánebe xamtha, xua ichüing nekoxa weya peekaewa tsane, xua ichüing netsókona weya peekaewa tsane, jei.

²²Íchitha Jesús baraibe barapongbe, jeye:

—Paxambe jopa payaputaembe xua pokotsiwa pana newüikaenamebe. Poxonae ichamonae abe inta exanaena bara saya kopatsin xua barapomonae bara nepéraxa jübina. Barichi poxoru paxambe pana neantobem, ¿bara irü paka itaküüpabe xua bara pakopatsínamebe xua bara ichamonae paka péraxa jübínabe? Barichin bara saya kopatsin xua ichamonae bara tüpa neexanaena. Barichi, ¿bara irü paka itaküüpabe xua bara pakopatsínamebe xua bara ichamonae tüpa paka exanáenabe? jei Jesús.

Santiago pewéichobe jumenótabe, jeibe:

—Aa, bara pana itaküüpabe, jeibe.

²³Jesús jumenota, jeye:

—Bara bara xaiñéi barapókotsi koyene ichamonae paka kana exanáenabe. Ichamonae paka péraxa exanáenabe. Matáütano tüpa paka exanáenabeno icha xang nekana ichi tsane. Nama xua xangtha nantiya paekamebe xua ichüing pokotsiwa takoxa weya eka, yawa xua ichüing tatsokona weya eka, baxua jopa takoya yábara itorobiño. Saya jame Taxa Nakom meisha baxua taexanaena pomonaetha, pomonae kaena báyatha tsiwüünaeta xua peenaewa tsane, jei Jesús.

²⁴Jesús pijimonae pomonae umena, pomonae diez póyobe jumetane xua Santiago irü Juan Jesús wüükatsibe. Bapoxonae bárapo diez póyobe, Santiago irü Juan yábara anaepanarükúpatsibe. ²⁵Íchitha Jesús pía xaiña bérena pijimonae waba yawa namchiya jeye barapomonaetha:

—Paxam báyatha patáneme pokoyenewa ba éxana pomonae jopa judiomonae naexanaeyo. Barapomonae ba nantaüta pomonae pía nakua tatsi pía petaewatsíwichi tatsi. Dáichitha bárapo nakua peewatsiwi aebiya itoroba piamonae, xua daxota bichokono jivi taayapubetsi. ²⁶Íchitha nama paxam barapókotsi koyeneya jopa bara paichim tsane. Seikaya nama icha jüntükoyenéwatha paka itoróbatsi. Icha pong paxam jíwana icha bapong ichichipa náexana be pókotsin kanamataxeina ichamonae, bapong matha bewa kopiya daxita paxam beta amanaya pákata nakui-china. ²⁷Matáütano icha pong paxam jíwana icha bapong ichichipa náexana be pókotsin bichokono aiñakuí penaexanaein xua beyakaincha ichamonae, bapong bewa kopiya matha daxita paxam amanaya pákata nakuichina piakoya peichichi-paexae. ²⁸Icha be pókotsi koyeneya icha ichin, bara paichinde. Xang pongxaein Nakom Tananeitapetsin patopeikang xua tanakuichinexa tsane ichamonae nexa. Ápara jopa baxua tsipatopaeiño xua ichamonae inta penakuichiwanaxa tsane. Saya patopeikang tsipéi ichichipang xua daxita karepaya jivi tayawenaewa tsane. Matáütano patopeikang xua tatsitüpaenexa tsane be pentoma xua daxita jivi pepanenebiyaenexa abe pía peéxanae kuirukoyenein weya tatsi, jei Jesús pijimonaetha.

Meje yábara poxonae Jesús axaibi éxana pongbe peitatanakútsinbe

(Mr 10.46-52; Lc 18.35-43)

²⁹Poxonae Jesús pijimonae barü póntaba Jericó tómara weya, bapoxonae Jesús punapoinchi pin bicheito. ³⁰Bárapo Jerusalén namto iya ékabe pong peitatanakútsinbe. Poxonae bapongbe, pongbe peitatanakútsinbe jumeyaputánebe xua juiña Jesús xentapona, bapoxonae jumedangweya wawaibe, jeibe:

—¡Pong jiwi Nekanamataxeinaem, pongxaem David pía pemómoxi susato jíwanapim, pana neyábara najüntükoyene xeinarebe xua pata taneyawenaenéxamebel! jei barapongbe pongbe peitatanakútsinbe.

³¹Bárapo peitatanakútsinbe jumematawéntatsibe bárapo pin bicheito xua moya peekaenéxabe. Íchitha bapongbe ekeicha jumedangweya wawaibe, beyakaincha xua poxonae kopiya, jéyebé:

—¡Pong jiwi Nekanamataxeinaem, pongxaem David pía pemómoxi susato jíwanapim, pana neyábara najüntükoyene xeinarebe xua pata taneyawenaenéxamebel! jei barapongbe pongbe peitatanakútsinbe.

³²Néxata Jesús narúntaba yawa wabatsibe pongbe peitatanakútsinbe. Bapoxonae bapongbe Jesús yáñaba, jeyé:

—¿Eta xua jiña pata kata exanáetsibe? jei Jesús.

³³Barapongbe Jesús jumenótatsibe, jeibe:

—Pong jiwi Nekanamataxeinaem, bepanekotsinbe kuinaya, jeibe bapongbe.

³⁴Néxata bapongbe Jesús yábara najüntükoyene xéinabe xua pía peyawenaewa tsane. Bapoxonae bapongbe Jesús itamaikéi jáyababe. Bapoxonae bapongbe naiña nekotaxúbabe. Jestutha napunapónabe.

Meje yábara poxonae Jesús Jerusalén tómaratha patopa

(Mr 11.1-11; Lc 19.28-40; Jn 12.12-19)

21 ¹Poxonae bara itiya pona Jerusalén tómara, Jesús bara muxu pebaru patopáe pijimonae Betfagé tómaratha. Bárapo Betfagé tómara demuxuwa itapatorórotha eka po demuxuwa pewüing Olivowa, tsipéi baxota umena olivo naein. Bapoxonae Jesús itoroba pebinbe nakuéyatabe xua doce póyobe jíwanabe. ²Jesús baraibe bapongbe, jeyé:

—Papónarebe po tómara paiña itabaraya ékiya. Poxonae papatopáenamebe bárapo tómaratha pakaxináenamebe burra pesowato xua pong ketanótatsi yáwano xua penüing ketanótatsi pong pebto. Bárapo burra paishanaxórebe yawa payamüükarenándebe koxiwa yawa penüingno. ³Icha ichüing paka barái tsane: ‘¿Eta xua payama ishanaxubamebe burra?’ jei tsane, néxata pajándebe: ‘Pong jiwi Pekanamataxeinaein bepa pata yamakayiyaeinjei, tsipéi pinae nantawénona’, pajándebe. Néxata bapoxonae naiña bapong paka kobe-itorobínabe xua paiña neyamüükarenaenéxambe tsane, jei Jesús.

⁴Poxonae Jesús daxita baxua paeba bara bapoxonae nayábara jumeweta pokotsiwa báyatha Isaiás yábara paeba pijume diwésitha xua Mesías pepatopaewa tsane Jerusalén tómaratha, jeyé:

⁵“Patsipáebare Sión tomarapiwi.

Pajande: ‘Patáename pong itorobiya paiña pepa paka ewatsin.

Pákata jüntema patopaena,

xua burriyotha ekeikaena,

penüingtha xua burra pesowato koxi tatsi’ pajande”,

jei pong Nakom pía peitorobi jume pepaebin,

bapong Isaiás,

xua Mesías yábara páebatsi.

⁶Néxata Jesús pijimonae jintongbe tatsi pónabe. Matáütano bapongbe éxanabe pokotsiwa báyatha Jesús itoroba. ⁷Bapongbe yamakarenabe burra pesowato

yawa yamakarenabe penüng. Bapongbe pía paparuwang tsijumajebíkabe po paparuwang matha werúyabe koxiwathano yawa penüngthano. Bapoxonae Jesús ekeika penüngtha. ⁸Jiwi, bárapo jiwi pin bicheito bichokono. Bapoxonae bárapo pin bicheito námtotha paparuwang yerababa jejebabapoiña. Ichamonae peaxu ukuboba po axu icha koichaxu axu ichi. Bapoxonae bárapo axu, námtotha axu-jejebabapoiña. Daxita barapomonae bárapo koyene éxana xua Jesús pebarükui-iturajinaenexa tsainchi. ⁹Pomonae, xua Jesús tsíwana enapoinchi írürü pomonae Jesús peputha taenapoinchi daxita barapomonae bichokono jumedangweya wawaya jeye:

—¡Pai jáyana, bárabü jiwi barükui-iturajinaena bapong pong David pía pemómoxi susatopin tatsi! Bapong jiwi yábara jei: ‘¡Bapong David pexanto tatsi!’ jei. ¡Maisha Jesús pong jiwi itorobiya pía pepa peewatsinchi, maisha wüünae! ¡Bapong patopa Nakom peitorobixae! ¡Maisha Nakom bichokono wüünae jáintatsi pong athabeicha eka! jei barapomonae.

¹⁰Poxonae Jesús patopa Jerusalén tómaratha, daxita bárapo tomarapiwi najumekayayatsiya paeba. Kae bicheitomonae nayáñaba, jeye:

—¿Jintam metha bapong jane? najéi.

¹¹Ichamonae jumenota, jeye:

—Ápara bapong Jesús pong Nakom pía peitorobi jume pepaebin, pong Nazaret tomarapin po tómaraka eka Galilea nákuatha, jei ichamonae xua írü ichamonae jumenótatsi.

Meje yábara poxonae Jesús aishowa benapuna torobábiya pomonae Nakom pin piabotha pekaenaetsiwi

(Mr 11.15-19; Lc 19.45-48; Jn 2.13-22)

¹²Bapoxonae Jesús joniya Nakom pin piabotha, yawa aishowa benapuna torobábiya pomonae kaenaeta baxota. Jesús tabütayebiya bebái íratha pokotsiwa pexaethopaewang, po pexaethopáewangtha nantiya nakatsiba parátixi yawa xua tabütayebiya bebái íratha peenaewang po peenaewang ichaxota ena pomonae kaenaeta topibo. ¹³Jesús barái barapomonae:

—Nakom Pejume Diwésitha namchi, jeye: ‘Tabo ápara po botha jiwi tanetsipaebinexa tsaibi tsane bárapo botha’, jei Nakom Pejume Diwésitha. Íchitha paxam bárapo bo be pekaibiwi pía müthü tutu pakana éxaname ichaxota pijunuwi nantsiyabeibathopa tsipéi baxota panakaetútame saya ü xua paiña nekaibinexam tsane parátixi pomonaetha, pomonae xua pateiba xua Nakom petsipaebinéxatsi, jei Jesús.

¹⁴Bárapo Nakom pin piabotha tatsi, Jesús imoxoyo kakuita umenarükúpatsi pomonae peitatanakútsiwi. Írürü Jesús imoxoyo kakuita umenarükúpatsi pomonae pejayujayujeiwi. Jesús axaibi éxana daxita barapomonae. ¹⁵Sacerdotemonae pía pentakaponaewi tatsi írürü pomonae jiwi pekuidubiwi Moisés pía peitorobi koyenewa tatsi, daxita barapomonae tane pokotsiwa Jesús éxana pía pexeña petsita-itüütsi koyenéwatha. Daxita barapomonae jumetane xua pexui wawái Nakom pin piabotha tatsi xua pexui Jesús yábara jeichichi: “¡Pai jáyana, bárabü jiwi barükui-iturajinaena bapong pong David pía pemómoxi susato jíwanapin tatsi! Pong jiwi yábara jei: ‘Bapong David pexanto tatsi’, jei”, jei pexui. Bapoxonae daxita pomonae sacerdotemonae pía pentakaponaewi tatsi írürü pomonae jiwi pekuidubiwi Moisés pía peitorobi

koyenewa tatsi anáepana poxonae Jesús kuitainchi yawa xua jumetáinchino. ¹⁶Daxita barapomonaе jopa ichipaeyo xua pexui paeba, daxota anaya Jesús jeichichi:

—¿Báyatha jumetáneme xua baxua pexui kayábara wawaya namchi? jei barapomonaе.

Jesús jumenota barapomonaе, jeye:

—Aa, bara báyatha jumetang xua pexui newüünae jainta. Paxam báyatha payórobame Nakom Pejume Diwesi xua pexui bara kuikópatatsi xua bara wüünae pejainteibiwa tsane. David pexui yábara jeichichi Nakom Pejume Diwésitha, jeye:

‘Xam Nakom,
kana éxaname pexui poxi isháinatsi,
irü poxi jinompena,
xua barapoxi pexeíña weixi kayábara kaununaya naxüna poxonaе
kawüünae jainchina’,
jei David Nakom Pejume Diwésitha,
jei Jesús daxita barapomonaetha.

¹⁷Néxata Jesús daxita barapomonaе wepu pona Jerusalén tómara weya. Bapoxonaе Betania tómara bewarapiya. Baxota mérawi maiteka.

Meje yábara poxonaе Jesús biatane higuera nae xua jopa penakoichixae

(Mr 11.12-14,20-26)

¹⁸Poxonaе Jesús kaemúmbosha ekeicha kaibe iya Jerusalén tómara beya, bichokono jainpapona. ¹⁹Bapoxonaе Jesús imoxoyo námtosha taenota higuera nae. Imoxoyo kakuita pona piyain, pía taetsi pethéi. Dáichitha bárapo naetha Jesús jopa taeyo pethéi, saya ü noxu tane. Néxata Jesús biataenota higuera nae, jeye:

—Bápana ekeicha jopa nakoichim tsane pethéi, jei Jesús higuera naetha.

Bapoxonaе kaena naiña higuera nae yüünungkua. ²⁰Poxonaе Jesús kuitainchi pijimonaе baxua barapomonaе yábara najüntükoyene kuikabenaeka bichokono. Yawa Jesús yáñabatsi pijimonaе, jeye:

—¿Eta xua metha higuera nae naiña yüünungkua? jeichichi Jesús pijimonaе.

²¹Jesús jumenota pijimonaе, jeye:

—Bara xaniyeya paka tsipáebatsi. Icha wüünaeya payábara jumekowúntame xua Nakom paiña nepaka kayawenaewa xuano xua jopa aiña ünthütong paxei-naem bara paka itaküüpaena xua paiña nepaebiwa icha ichin xua kana éxanang higuera nae. Matáütano bara paka itaküüpaena xua paiña nejeiwa uruto beya xua pajam: ‘Uruto natsixitábare, marmene beya jópare’, xua paiña nejeiwa. Bapoxonaе bara baxua jopa bayathiyo tsane. ²²Daxita xua xuang pokotsiwang Nakom beya pawúükame, icha bara wüünaeya pajumekowúntsiya wúükame, bara Nakom paka katsibina baxuang, jei Jesús.

Meje yábara xua Jesús pía peitorobi koyenewa xeina

(Mr 11.27-33; Lc 20.1-8)

²³Néxata bapoxonaе Jesús joniya Nakom pin piabosha tatsi. Poxonaе kataun-xuae Jesús baxota kuidubungkua jiwi, bapoxonaе Jesús imoxoyo kakuita ume-narükúpatsi sacerdotemonaе pía pentakaponaewi tatsi irü judiomonaе pía pítiri jiwi tatsi. Daxita barapomonaе Jesús yáñabatsi, jeye:

—¿Eta po peayapusúü itorobi koyenéwatha kuidúbame baxuang? ¿Jintam kakata bárapo peayapusúü itorobi koyenewa?

²⁴Jesús jumenota barapomona, jeye:

—Xang írürü tha barichichi paka yaiñabinchi. Icha beta pana nejumenotsíname, bapoxonae xuya yábara paka tsipaebinchi xua po peayapusúü itorobi koyenéyatha taexanaewa baxuang. ²⁵¿Jintam Juan kui-itoróbatsi xua bautisaba? ¿Metha bara Nakom kui-itoroba jampa? ¿Metha bara jiwi kui-itoroba jampa? Pana nejumenore, jei Jesús, xua Juan yábara páebatsi pong kaena býatha tüpa.

Néxata daxita barapomona kaemonae najumematsontsónoba, najéi: “¿Eta xua metha jei tsainchi? Icha jei tsipaetsi: ‘Juan kui-itoróbatsi Nakom xua pebautisabiwa jiwi’, metha naka jei tsipae: ‘¿Eta xua metha néxata jopa pajumekowüntsím Juan?’ metha naka jei tsipae Jesús. ²⁶Jiwi kuikunúwatsi icha jeichi: ‘Juan kui-itoróbatsi jiwi xua bautisaba’, icha jeichi. Metha bapoxonae jiwi naka kasebíchipa anaya. Tsipéi daxita jiwi Juan yábara jumekowüntatsi xua bapong ápara pong Nakom pía peitorobi jume tatsi pepaebi jintong”, najéi barapomona. ²⁷Néxata barapomona Jesús baraichi, jeye:

—Kanta jopa payaputaieño, jei barapomona.

Néxata Jesús barái barapomona, jeye:

—Néxata barichin tsane, jopa yábara paka tsipaebi tsainchi po peayapusúü itorobi koyenéyatha xua daxita taexanaewang, jei Jesús.

Meje yábara poxonae Jesús kuiduba pekayábara jüta pepaebi diwésiyo xua pebin aiña pexántobe tatsi

²⁸Ekeicha Jesús namchi Nakom pin piabotha daxita barapomonaetha, xua sacerdotemona pía pentakaponáewitha tatsi, irü judiomona pía pítiri jíwitha tátsino. Jesús jeye:

—Moya pana nejumenaitáeware pokotsiwa paka tsipaebinchi. Pebin nakuéyatabe póyobe tatsi pexántobe tátsibe. Bapong kaeintha nakoxi barái, jeye: ‘Owáe, inta ánoxuae uva bakabo pabi nakuire’, jei. ²⁹Bapong jumenótatsi pexanto jeye: ‘Bara, aichaxaibin’, jeichichi bapong pexanto. Dáichitha ekeicha bapong pexanto tatsi nantaxéinataba, bapoxonae pona xua penakuichinexa uva pabi, paxa tatsi pía pabi tatsi. ³⁰Pírapae ekeicha ichüngtha, nakoxi barái bárapo jumetha, jeye: ‘Owáe, inta ánoxuae uva pabi nakuire’, jei bapong pexántotha. Bapong paxa jumenota, jeye: ‘Je, moya daichane, methaunxuae ponaein’, jei páxatha. Dáichitha bapong jopa ponaeyo. ³¹Ínkane yábara paka yaiñabinchi xua bapong bárapo pexántobe tatsi, ¿eta po pewowinda pong éxana pokotsiwa paxa itoróbatsi? jei Jesús.

Barapomona Jesús jumenótatsi, jeye:

—Pong kopiya paxa itoróbatsi, jeichichi Jesús barapomona.

Néxata Jesús jumebarái barapomona, jeye:

—Bara xaniyang yábara paka tsipáebatsi, pomona parátixi pentomanotéibiwi po parátixi jiwi bewa katsíbina pong romanomona itorobiya pía pepa peewatsinchi nexa, írürü yábüxi powaxi pesikuiweiweináewaxi. Bara bekein barapomona peantükoyenebewi, dáichitha barapomona naexanaena Nakom piamona tatsi jíwana tatsi, beya poxonae paxam irü panáexaname Nakom piamona tatsi jíwana tatsi. ³²Juan pong jiwi Pebautisabin patopa xua pía nepaka kuidubinexa

xua pokotsiwa bewa paexanáename paiña nexeiaenexa tsane po jüntükoyene pewüünae jüntükoyene. Dáichitha paxam jopa pajumekowüntsím pokotsiwa Juan paeba. Íchitha Juan yábara jumekowüntatsi pomonae parátixi pentomanotéibiwi po parátixi jiwi bewa katsibina pong romanomonae itorobiya pía pepa peewatsinchi nexa. Írürü yábüxi powaxi pesikuiweiweináewaxi Juan yábara jumekowüntatsi pokoyene Nakom Juan peitorobíwatsi. Nama paxam bekein bara Juan pakuitáneme pokotsiwa éxana, dáichitha jopa paiña neáuraxae poxonae abe paéxaname. Daxota icha jüntükoyene jopa paxeinaem xua paiña nejumekowüntsínexa Nakom, jei Jesús.

Meje yábara poxonae Jesús paeba pekayábara jüta pepaebi diwésiyo pomonae xua abe éxana, pomonae petayapukaenaewi uva pabi

(Mr 12.1-12; Lc 20.9-19)

³³Néxata Jesús ekeicha namchi jíwitha, jeye: “Ínkane pana nejumenaitáeware xua paka tsipaebinchi pekayábara jüta pepaebi diwésiyo. Matha írürü pebin pía pabi xeina. Bapong üba po ünbo pewüng uvakuéi ünbo. Yáwano yapukurárata bápapo uva pabi ibówangtha xua jopa pejojondenaenexa ichamonae bápapo pábitha. Yáwano baxota ibo fetó éxana, xua bápapo ibo fétotha pekubinexa uvakuéi. Matáütano baxota exananota bo po bo taücha xua baxota pebin bara wenekotekeika uva pabi. Bapoxonae bapong itoroba pomonae pía uva pabi pía petayapukaenaewichi tsainchi, xua bapoxonae barapomonae pejíwana xaenexa pokotsiwa penawetsiwa. Bapoxonae bapong icha nakua beya pona. ³⁴Bápapo matakabi tsuxubi po matakábitha uvakuéi naweta. Bapoxonae bápapo matakéitha pomonae pabi petayapukaenaewi jíwana itapetanota xua penawetsiwa. Bapoxonae pong uva pabi pexeinaein, bapong pomonae petanakuichiwichi jíwana itoroba, xua petawüükaenexa tsainchi uvakuéi pomonae beya, pomonae pabi petayapukaenaewichi. ³⁵Íchitha barapomonae, pomonae pabi petayapukaenaewichi teika, teikébatsi pomonae itoróbatsi, pomonae pabi pexeinaein itoroba uva pabi petayapukaenaewichi tatsi beya. Barapomonae pomonae petayapukaenaewi pabi, kuainta kaeintha pomonae penajumekarutsí jíwichi jíwanapintha. Ichüng bexotsi. Ichüng ibótongtha kuinbábatsi. ³⁶Pong pabi pexeinaein barichi ekeicha itoroba ichamonae pomonae pía petanakuichiwichi. Ekeicha barichi pomonae pabi petayapukaenaewi bara jütiya kana éxana barapomonaetha.

³⁷”Bara nama matapaiña pexanto itoroba. Bapong najéi: ‘Barapomonae metha taxanto inta yábara barükui-iturajinaeinchi, daxota itorobang bapong’, najéi bapong. ³⁸Dapo jumetha pomonae pabi petayapukaenaewi poxonae bapong tainchi barapomonae najéi: ‘Ápara bapong paxa kopiniwa pichina. Daxota bapong bü bexotsi xaiña xéinatsi bápapo uva pabi’, najéi barapomonae. ³⁹Bápapo pexanto tatsi uva pabijuma bemaxü kayíyatsi. Baxotiya bexotsi”, jei Jesús.

⁴⁰Néxata Jesús barái bápapo jiwi Nakom pin piabotha, jeye: “Poxonae pabi pexeinaein patopaena, ¿eta be kana ichi tsane pomonaetha, pomonae bápapo uva pabi pía petayapukaenaewichi?” jei Jesús.

⁴¹Barapomonae Jesús jumenótatsi, jeye:

—Bapong bewa jutebina barapomonae, jopa weyatáe tsane barapomonaetha xua peantükoyenyápube jíwixae. Bapoxonae itorobina ichamonae xua petayapukaenaenexa tsainchi bápapo uva pabi. Bápapo pabi petayapukaenaewi matha

notsina uvakuéi xua naweta. Bapoxonae tsabina pabi pexeinaein nexa yawa írürü barapomonae néxarü, jei bárapo jíwitha pomonae peenaexae Nakom pin piabotha.

⁴²Néxata Jesús barái barapomonae xua nayábara paeba, jeye:

—¡Paxam bara báyatha payórobameba Nakom Pejume diwésitha! Bárapo diwésitha neyábara kaunuta poxonae iboto yábara paeba, xua jeye:

‘Pebiwi pomonae ibo bong peakabiwi,

bárapo pebiwi xuba po iboto tabükaboka po iboto peaiñakuí iboto.

Íchitha Nakom itapeta bárapo iboto xua petabükabokaenexa bárapo peaiñakuí ibótoxae.

Waxainchi nantaxéinatsi jeichichi:

Maisha pokotsiwa Nakom éxana naka tsita wüünae’,

jeichichi,

jei Nakom Pejume Diwésitha xua neyábara kaunuta.

⁴³Daxota paka tsipáebatsi, Nakom paka itawetsina xua jopa paiña nenaexanaenexa tsane Nakom piamonae jíwana tatsi pam. Bárapo koyenewa xua Nakom piamonae jíwana tatsi penaexanáe koyenewa Nakom pichina paiña xaiña weya xua ichamonaetha pekatsinexa pomonaetha, pomonae petsitajüntükoyene-wüünaewichi. ⁴⁴Ínkane iboto yábara paka tsipaebinchi. Bárapo ibótotha poxonae ichauyo jopeika pepürüwixi tsanaya. Matáütano poxonae bárapo iboto ichauyo matatsún jopéikatsi pebeno tsanaya. Icha bárapo iboto ichi poxonae kana éxana icháuxitha peaiñakuí ibótoxae, xang barapókotsi jüta koyeneya barichin pomonaetha, pomonae jopa tana nejumekowüntsiwi. Pía jopa tana neyaputaexae barapomonae daxota péraxa exanaein, jei Jesús.

⁴⁵Sacerdotemonae pía pentakaponaewi tatsi irü fariseomonae, poxonae jume-tane bárapo pekayábara jüta pepaebi diwesi, xua Jesús paeba, barapomonae yaputane xua ápara bara Jesús yábara paeba barapomonae. ⁴⁶Bekein barapomonae Jesús muxu pewaetabichi, íchitha barapomonae junuwa. Jiwi kunúwatsi, tsipéi daxita jiwi Jesús wüünaeya yábara páebatsi xua pinae Jesús Nakom pía peitorobi jume pepaebi jíwana tatsi.

**Meje yábara poxonae Jesús kuiduba pekayábara jüta pepaebi diwésiyo
xua pin penabanaewa peexanaewa tsane**

(Lc 14.15-24)

22 ¹Ekeicha Jesús tsipaeba jíwitha pekayábara jüta pepaebi diwésiyo, jeye: ²“Nakom kana éxana piamonaetha pomonae jüntükoyene itorobiya éwata, icha pókotsin ichi pong jiwi itorobiya pía pepa peewatsinchi poxonae waba, xua poxonae ichamonae wábatsi xua petsinakaetutsinexa pexaewa xua penabanaenexa. Baxua éxana poxonae pexanto tatsi pekotsiwa pepichixae. ³Barapong pong jiwi itorobiya pía pepa peewatsinchi itoroba pomonae pía petanakuichiwichi xua petawabinexa tsainchi pomonae xua báyatha petsipaebixae xua petapatsiwa tsainchi piabotha xua bepa pinae petanabanaewa tsainchi piabotha. Dáichitha barapomonae aichaxaibi xua pepatsiwa tsane. ⁴Bapoxonae barapong pong jiwi itorobiya pía pepa peewatsinchi ekeicha itoroba ichamonae pomonae pía petanakuichiwichi, jeye barapomonaetha: ‘Pomonae báyatha tsiwabang pexaewa xua penabanaenexa painta tsipáebare pajande: Bepa pinae naiña papatsim, tsipéi pinae báyatha pexaewa kanakuiwüünaeta. Tsipéi kaena báyatha pinae kobe-itoroba

xua petajutebiwa tsainchi vacang, yáwano po duwein bichokono nasita. Daxota bewa pinae naiña paponnem bara beya xua paiña nenanabanaenexa pexaewa, yáitama tsipéi pinae pexanto tatsi pichina pekotsiwa, pajande', jei barapong pong jiwi itorobiya pía pepa peewatsinchi. ⁵Dáichitha barapomonae pomonae tsiwábatsi pexaewa, barapomonae jumenaitémata, saya meisha ü naitomatsiya éxana piáwang. Barapomonae jíwanapin pía pábitha pona. Irü ichüng piáwa kaenetauya. ⁶Ichamonaerü teika, pomonae pong jiwi itorobiya pía pepa peewatsinchi itoroba, barapomonae téikatsi. Yáwano bichokono abe exainchi beya poxonae nama wérapa. ⁷Néxata bapong pong jiwi itorobiya pía pepa peewatsinchi bichokono kaseba pomonae petajutebixaetsi pomonae bapong itoroba. Néxata bapong itoroba pía soldadomonae xua barapomonae xuya pejutebinexa tsainchi matáüta xua tómara petatautsinexa tsainchi. ⁸Bapong pírapae ekeicha barái ichamonaetha pomonae pía petanakuichiwichi jíwitha, jeye: 'Báyatha bekein daxita wetang xua penabanaewa tsane, dáichitha pomonae wabang jopa wüünaeya nejumejeyo daxota jopa bewa patsi tsane xua penabanaenexa. ⁹Daxota paponde tómara námtongha, po námtongha pin námtongha, baxotiya pomonae poxonae pakaxibéibame, barapomonae painta wábare', jei bapong. ¹⁰Pomonae petanakuichiwi, barapomonae pona namtong beya. Bapoxonae barapomonae, daxita pomonae kaxiba námtongha, matakayiya pong jiwi itorobiya pía pepa peewatsinchi piábo tatsi beya. Pomonae abe peexanáewino karendénatsi, pomonae wüünaeya peexanáewino karendénatsi, beya poxonae botutu nayüükaxuba.

¹¹"Néxata pong jiwi itorobiya pía pepa peewatsinchi botutu joniya petaenexa tsane pomonae pata. Bapong itabara tane pebin xua írürü pong baxota eka. Íchitha bárapo pebin pexeña paparuwa jopa namaxatatsiyo icha be jopa ichiyo ichamonaetha, tsipéi ichamonaetha pexeña paparuwa namaxátaba xua po paparuwa jiwi ba namaxátaba poxonae pona penakaetutsíwatha xua penabanaenexa pexaewa poxonae pebin pekotsiwa pita. ¹²Pong jiwi itorobiya pía pepa peewatsinchi barái bapong, jeye: 'Tajintong, zeta xua metha xote naékame xua matáüta jopa pexeña paparuwa namaxatatsim?' jei bapong. Íchitha bapong saya moya eka. ¹³Bapoxonae pong jiwi itorobiya pía pepa peewatsinchi barái pomonaetha, pomonae pexaewa karena tsaibi pexaethopáewatha, jeye: 'Bapong pakobekaekuntáküre yawa pataxukaekuntáküre, yawa aishowa beya paxore ichaxota kirei. Baxota bapong wekoyéi tsane yawa baxota nantanuweya nantajayabina, bichokono peatenexae tsane', jei pom jiwi itorobiya pía pepa peewatsinchi. ¹⁴Barapong pong jiwi itorobiya pía pepa peewatsinchi bekein pinmonae waba íchitha saya tsikimonaeyo pata penabanáewatha. Icha barapong ichi Nakom bara júta koyene ichiya kana ichi tsane jiwi. Nakom bekein waba pin bicheitomonae, dáichitha saya tsikimonaeyo itapétatsi, pomonae Nakom pijimonae tatsi penaexanaenexa tsane", jei Jesús.

**Meje yábara poxonae Jesús yábara kuiduba parátixi
matoma po parátixi jiwi bewa katsibina pongtha pong
romanomonae itorobiya pía pepa peewatsinchi**

(Mr 12.13-17; Lc 20.20-26)

¹⁵Néxata fariseomonae pona Jesús weya, kaemonae natsipaeba najéi: "¿Eta po peyaiñabiwa Jesús taexanaeinchi xua katsawa wanaka jumenotsinexa? Bapoxonae waxainchi xain yopítatsi ichamonaetha xua bapong abeya wanaka

jumenotsíwaxae”, najéi fariseomona. ¹⁶Bapoxonae barapomona itoroba pía pepunaponáewichi, matáütano barapomona itoróbano pomona Herodes pía pepunajinompaewichi. Daxita bárapo matabüxúyobe pata Jesustha pomona fari-seomona itoroba. Barapomona Jesús beya jeye:

—Pong jiwi Nekuidubim. Bara payaputang xua bara jumexaiñeya tsipáebame jiwi, matáütano xua jiwi bara beta kuidúbame xua pokotsiwa jiwi bewa exa-naena pexeinaenexa tsane Nakomtha po jüntükoyene pewüünae jüntükoyene. Matáütano jopa jiwi kunuwim poxonae kuidúbame poxonae bekein jiwi jopa ichichipaeyo baxua, tsipéi xam daxita jiwi bara katsita najüpa. ¹⁷Ínkane yábara pana netsipáebare xua nantaxéiname xuaje: ¿Metha bara Nakom pía peitorobi koyene naka itoroba xua waxainchi parátixi katsibinchi pong romanomona itorobiya pía pepa peewatsinchi xua wanaka itorobixae bapong bekein bara bapong pong penanapaincha poponaein xua icha nakua wérena peponaein? Icha jopa tsipae ¿metha daxua abe tsipae? jeichichi Jesús barapomona pomona fariseomona itoroba.

¹⁸Dáichitha Jesús yaputane xua bichokono barapomona abeya nantaxeina xua Jesús abe pekana exanaenexa tsainchi. Jesús barái barapomona, jeye:

—Paxam pomona ítara mexeya wüünaeya pepaebiwi pam, dáichitha abeya pepaebiwi pam. ¿Eta xua metha pana nejüntükoyene jüjútame poxona baxua yábara pana neyáiñabame? ¹⁹Ínkane moya painta xawena tha taetsi bárapo paratiyo, jei Jesús.

Bapoxona barapomona bárapo paratiyo Jesús takapoinchi. ²⁰Poxona Jesús tane bárapo paratiyo, bapoxona yáiñaba barapomona, jeye:

—¿Jintam pejumopere? ¿Yáwano jintam wüingdúkuare? jei Jesús.

²¹Néxata Jesús jumenótatsi barapomona, jeye:

—Ápara romanomona itorobiya pía pepa peewatsinchi, jei barapomona.

Néxata Jesús barái barapomona, jeye:

—Bara néxata romanomona itorobiya pía pepa peewatsinchi pakare pokotsiwa xua bapong piawaxae tatsi. Matáütano bara Nakom pakare xua baxua irü piawaxae tatsi, jei Jesús.

²²Poxona barapomona jumetane xua Jesús beta wüünaeya jumenota, bapoxona barapomona yábara najüntükuikoyene kabenaeka. Bapoxona ponarúküpa Jesús weya.

Meje yábara poxona Jesús yábara yáiñabatsi pokoyene xua ekeicha asüü pomona pewerapeibiwi

(Mr 12.18-27; Lc 20.27-40)

²³Bapoxona kaena bárapo matakeitha saduceomona jíwana pata Jesús pía xantha tatsi xua Jesús piraichi petsipaebinéxatsi. Saduceomona barompaya pía pekuidubi koyenewa xeina xua pinae pomona pewerapeibiwi ekeicha jopa asüü tsaibiyo. Bárapo pekuidubi koyenewa jopa jüpaeyo po pekuidubiwa Jesús pía pekuidubiwa tatsi xua pinae jiwi ekeicha asüü jinompaena poxona wérapa. Daxota bárapo saduceomona Jesús tsipáebatsi jeye:

²⁴—Pong jiwi Nekuidubim, Moisés nákata tina, namchi: ‘Icha pebin píowa kuenta tüpa, yawa jopa xeinaeyo pexui, xuiyapin bewa xuya péntapin pekoutha koseuri pichina xua bapoxona péntapin pekoutha pexeinaenexa tsane pexui’,

jei Moisés. ²⁵Barichi, matha írürü kae peweicho kaepiwi nabarü jinompa siete póyobe. Matapin jitha eka. Bapong píowa kuenta naxuba. Jopa pexui naita-kaetáyobe. Pong xuiyapin xuya péntapin koseuri pita xua bapoxonae péntapin pekoutha pexui petaenexa. ²⁶Bapong irü kuenta tüpa, irü jopa xeinaeyo pexui. Bapoxonae ichüng xuiyapin xuya barapowa pita xua péntapin koseuri pita. Bapong barichi irü kuenta tüpa, irü pexui jopa xeinaeyo. Daxita bárapo siete póyobe kuenta nanapentapona bapowa poxonae bekein xuya pekoutha nonotaponeiba. Bárapo siete póyobe, kaein jíwana jopa pekoutha tapoponaetsi pexuyo. ²⁷Bapoxonae matapaiña irü bapowa tüpa. ²⁸Xam Jesús, ba páebame, ba jam: Matakabi jopaena po matakábitha Nakom asüü exanaena, xua jiwi asüü exanaeinchi müthüng wétsina, ba jam. Poxonae bárapo matakabi jopaena xua daxita jiwi asüü jujuinaena, bárapo matakábitha ¿jintam metha bapowa xuya pichinchi, xua ichüng pichina, xua bárapo siete póyobe kaein jíwana? Tsipéi kaena báyatha bárapo siete póyobe kaepiwi kuenta nanapentapona barapówatha, jei saduceomonae.

²⁹Néxata saduceomonae Jesús jumenota, jeye:

—Paxam ápara katsawiya pana nejumenótame, tsipéi jopa beta payaputaem xua Nakom Pejume Diwésitha payábara yórobame baxua. Matáütano jopa payaputaem Nakom pía peayapusüü itorobi koyenewa tatsi. ³⁰Poxonae petüpaewi ekeicha asüü jujuinaena, jopa jitha eenaponáe tsane. Yawa barapomonae jopa pexántixi jitha kuarebaponae tsane. Tsipéi barapomonae bari-chi tsane icha be matatsunpiwimonae ichi, po matatsunpiwimonae Nakom pía nakuatheicha jinompa, xua po matatsunpiwi jopa jitha enaeyo. ³¹Paxam bekein bara báyatha payábara yórobame pokotsiwa Nakom namchi Pejume Diwésitha, pokoyene xua pomonae pewerapaewi ekeicha asüü jujuina. Bárapo diwésitha Nakom jeye: ³²‘Xang Abraham pía Nakomüng tatsin, irü Isaac pía Nakomüng tatsin, irü Jacob pía Nakomüng tatsin’, jei Nakom. Baxua Nakom paeba tsipéi Abraham irü Isaac irü Jacob pomonae báyatha pewerapaewi ánoxuae ekeicha kaewa asüü jinompa Nakom pía nakuatheicha tatsi. Pomonae pewerapaewi pomonae jopa kaewa ekeicha asüü pejinompaewi, barapomonae jopa pía Nakom tatsi, pong itabókotha eka. Saya jame meisha pomonae báyatha pewerapaewi xua kaewa ekeicha asüü pejinompaewi, pomonae pejumekowüntsiwixaetsi Nakom barapomonae jame pía Nakom tatsi, pong itabókotha eka, jei Jesús.

³³Poxonae jiwi jumetane pokotsiwa Jesús kuiduba, barapomonae yábara najüntüküikoyene kabenaeka.

**Meje yábara poxonae Jesús yábara kuiduba po
peitorobi kuikoyene pepa peaiñakuí koyenewa**

(Mr 12.28-34)

³⁴Poxonae fariseomonae yaputane xua saduceomonae moya umena xua Jesús beta pejumenotsixae, bapoxonae fariseomonae nakaetuta xua ekeicha peyaiñabiwanexa tsainchi Jesús. ³⁵Bárapo fariseomonae kaein jíwana, pong peyábara yaputaein Moisés pía peitorobi koyene tatsi, bapong ichichipa xua Jesús pejüntüküikoyene jüjütsíwatsi xua icha bara metha Jesús abeya jumenotsina. Bapong jeye Jesthatha:

³⁶—Já pong jiwi Nekuidubim, ¿eta po peitorobi koyene pepa aiñakuí koyenewara po peitorobi koyene beyakaincha xua icha peitorobi koyene? jei.

³⁷Jesús jumenota bapong, jeye:

—Po peitorobi kuikoyenewa pepa aiñakuí koyenewa jeye: ‘Antobeinde pong jiwi Pekanamataxeinaein, bapong Nakom xua daxita nejüntükoyene wétsina, matáütano xua daxita jiña nepoponae koyenéwatha, matáütano xua daxita nenantaxeináewatha nentasípatha’, jei. ³⁸Jame bárapo peitorobi koyene bichokono aiñakuí koyenewa beyakaincha icha peitorobi koyene. Bárapo peitorobi koyene, po peitorobi koyene aiñakuí koyenewa, Nakom kopiya itoroba. ³⁹Po peitorobi koyene kotakaya itoroba ichaxota ba ‘dos’ jei, bárapo peitorobi koyene be jumejúpa po peitorobi koyene kopiya dukua. Írürü bárapo peitorobi koyenéwatha jeye: ‘Antobeinde jiña nekatsikuárabü ekaein icha ichim xua jiñakoutha naántobem’, jei bárapo peitorobi koyenéwatha. ⁴⁰Bárapo peitorobi koyenejúmebe kaunuta, xua Moisés pía peitorobi koyenéwatha baxua yábara paeba, irü pomonae Nakom peitorobi jume pepaebiwi pía pekuidubi koyenéwatha baxua yábara páebarü, jei Jesús.

Meje yábara poxonae Jesús nayábara jei:

“Mesías, ¿jintam pía pemómoxi susato jíwanapin tatsira?” jei

(Mr 12.35-37; Lc 20.41-44)

⁴¹Poxonae fariseomonae kataunxuae nakaetutompa bapoxonae Jesús yáinába bárapo fariseomonae, jeye:

⁴²—¿Eta xua paka yábara nantaxéiname Mesías pong Nakom pía Peitapetsin? ¿Jintam pía pemómoxi susato jíwanapin tatsira? jei Jesús.

Barapomonae Jesús jumenótatsi, jeye:

—Ápara David, pong Israel nakuapiwi itorobiya pía pepa peewatsinchi, bapong pía pemómoxi susato jíwanapin tatsi, jei fariseomonae.

⁴³Bapoxonae Jesús barái barapomonae, jeye:

—David yábara paeba xua Mesías ápara pía Pekanamataxeinaeinchi tatsi poxonae David kueikueijeí éxanatsi Nakom pía Pejumopetünaxü tatsi.

⁴⁴David salmos penaxünae wei diwésitha báyatha jeye:

‘Nakom pong Pekanamataxeinaein jiwi,
Tanekanamataxeinaein baraichi pong Mesías,
jeichichi:

Takoxa wérena ékare,

beya abü tsane poxonae neka-aitafáetabi jiwi pía pekanamataxeinaeinchi
tatsi ka-exanaeinchi,

jei Nakom’,

jei David salmos penaxünae wei diwésitha.

⁴⁵Icha David Mesías yábara jei: ‘Bapong Mesías Tanekanamataxeinaein’, jei, ¿eta xua metha tsipae xua Mesías ápara David pía pemómoxi susato jíwanapin tatsi? jei Jesús.

⁴⁶Daxita barapomonae jopa itaküüpaetsi xua Jesús pejumenotsíwatsi tsainchi, poxonae pinae David paeba xua pinae jei: ‘Bapong Mesías Tanekanamataxeinaein’, jei. Bara nama bárapo matakábitha weya, ekeicha nama Jesús jopa bepeyaiñabíwatsi barapomonae.

**Meje yábara poxonae Jesús muxuweta jiwi xua pomonae
fariseomonae irü pomonae jiwi pekuidubiwi Moisés pía
peitorobi koyene tatsi barapomonae pekuiyainwa tatsi**

(Mr 12.38-40; Lc 11.37-54; 20.45-47)

23 ¹Néxata Jesús barái pin bicheito jiwi irü pijimonae, jeye: ²“Pomonae jiwi pekuidubiwi Moisés pía peitorobi koyene tatsi irü fariseomonae daxita barapomonae pía pekuidubi koyene xeina xua pokoyene jiwi yaputane éxanatsi pokoyene Moisés pía peitorobi koyenéwatha paeba. ³Pakuiyábara jumekowünde pokotsiwa barapomonae pía pekuidubi koyenewang tatsi. Matáütano paexande pokotsiwa barapomonae paka itoroba. Dáichitha jopa paexanaeinde pokotsiwa barapomonae éxana tsipéi barapomonae ítara beta pepaebiwi dáichitha yábara jumetoxeinchiya katsawiya éxana, bárapo peitorobi koyenewang. ⁴Barapomonae be pokotsimonae poxonae ichamonae itoróbatsi xua pekaponaeawa pokotsiwa arewe, pokotsiwa jiwi bápana jopa itaküüpaetsi xua pekaponaeawa. Dáichitha barapomonae jopa yawenaeyo pokotsiwa ichamonae itoróbatsi. Matáütano barapomonae jopa tayoichaeyo kae kobesítiyotha. Icha barapomonae ichi poxonae ichamonae itoróbatsi xua pekaponaeawa pokotsiwa bichokono arewe, barapókotsi jüta koyeneya ichi pomonae jiwi pekuidubiwi Moisés pía peitorobi koyene tatsi, irü fariseomonae, daxita barapomonae itoroba pía pekuidubi koyenéwatha pokotsiwa paxam paiña neexanaenexa. Íchitha barapomonae jopa exanaeyo baxua. Pokotsiwa barapomonae paka kui-itoroba pokotsiwa paiña neexanaenexa, paxam bápana jopa paka itaküüpaeyo xua paiña neexanaewa baxuang. ⁵Barapomonae ichichipa nawita xua jiwi pekuitaewa tsane pokotsiwa poxonae barapomonae éxana xua bapoxonae jiwi nenantaxeinaenexa xua barapomonae bara pejüntü-koyene wüünaewi. Daxota barapomonae tsika cájaxi peitapatha kerabaduba xua pebokotong. Bárapo bokotongtha tütutha iya jeya xua xoxitha tinaduba Nakom Pejume Diwesi. Yawa icha cájaxi pemáxütha kerabaduba. Yawa bárapo bokotongtha tütutha iya jeya xua xoxitha tinaduba Nakom Pejume Diwesi. Matáüta barapomonae namaxátaba po paparuwang bichokono apiپیya deka, beyakaincha xua poxonae ichamonae namaxátaba po paparuwang apiپیya. ⁶Matáüta barapomonae nantakaxunaeneiba ichaxota nantakaxunaeneiba pomonae peaiñakuí jiwi penaexanaewi. Matáütano barapomonae judiomonae pía penakaetutsi bongtha ichichipa nawita xua nantakaeneiba ichaxota enathopeiba pomonae peaiñakuí jiwi penaexanaewi. ⁷Matáüta barapomonae ichichipa xua jiwi pejakobeibiwa tsane námtongtha barapomonaetha, xua jiwi pebarükui-iturajineibinexa barapomonae. Matáütano barapomonae ichichipa nawita xua jiwi aiñakuí pekana exanaewa barapomonae poxonae jiwi pejeitsaibinexa ‘Pomonae jiwi pekuidubiwi’ poxonae pejeitsaibinexa jiwi.

⁸”Íchitha nama paxam jopa bewa pakopatsim xua bara jiwi jakobiya paka neka-jéi tsaibinexa: ‘Pata pekuidubi jiwi pam’, paka nekajéi tsaibinexa xua aiñakuí jiwi paiña nepaka exanáe jíwixae. Paiñaxoba jiwi baxua bara pajumekópatame, tsipéi ápara paxam be kaemonae jiwi pam, saya jame panantáütame bara kaein pong aiñakuí penaexanaein paiña itütha. ⁹Pomonae po írathe jinompe jopa bewa wabi pajam ‘Axa’, jopa bewa pajam xua paiña barükui-iturajinaexae pomonae jopa bekein barompaya paiña axeiwi. Paiñaxoba jiwi baxua bara pajumekópatame,

tsipéi paxam panantáütame bara kaein paiña Axa, pong pabarükui-iturajiname pong peitabókotha eka. ¹⁰Matáütano jopa bewa pakopatsim xua bara jiwi jakobiya paka nekajéi tsaibiwa: ‘Pata nekanamataxeinaewi pam’, paka nekajéi tsaibiwa xua aiñakuí jiwi paiña nepaka exanáe jíwixae. Paiñaxoba jiwi baxua bara pajumekópatame, tsipéi ápara paxam panantáütame bara kaein pong paiña Nekanamataxeinaein, jame ápara bapong meisha Cristo. ¹¹Icha pong paxam jíwana, icha bapong ichichipa náexana be pókotsin kanamataxeina ichamonae bapong matha bewa kopiya daxita paxam beta amanaya pákata nakuichina. ¹²Pong xua piakoutha peaiñakuí jintong náexana pejüntükoyénetha, Nakom exanaena xua bapong pekuipawi jintong naexanaena. Ichitha pong xua pekuipawi jintong náexana, pejüntükoyénetha, Nakom exanaena xua bapong peaiñakuí jintong naexanaena.

¹³”¡Paxam pomonae Moisés pía peitorobi koyene tatsi paiña nekuidubiwi jiwi pam tsobenaem! ¡Paxam irü pomonae fariseomonae pam tsobenaem! Daxita paxam ítara mexeya wüünaeya pepaebi jiwi pam, dáichitha ápara abeya peéxanae jiwi pam. Paxam akuikoyeneyapubeya paéxaname xua poxonae jiwi bekein ichichipa náexana Nakom piamonae tatsi jíwana. Paxam jopa pajumekowüntsims Nakom yawa jopa pakopatsim xua ichamonae irü pejumekowüntsiwa Nakom.

¹⁴”¡Paxam pomonae Moisés pía peitorobi koyene tatsi paiña nekuidubiwi jiwi pam tsobenaem! ¡Paxam irü pomonae fariseomonae pam tsobenaem! Daxita paxam ítara mexeya wüünaeya pepaebi jiwi pam, dáichitha ápara abeya peéxanae jiwi pam. Powaxi pekuenta werapaewaxichi piséurixi, barapówaxi pakueranta éname piabong. Náemata Nakom pawüükéibame. Jopa kuinaya pana najumekopabeibim poxonae pawüükéibame Nakom tsipéi paichichípame nawita xua jiwi wüünaeya paka nekayábara paebiwa xua bara kou paxam pejüntükoyene wüünae jiwi pam. Daxota poxonae po matakeitha Nakom yábara paebina daxita jiwi penatsikuentsiwa bárapo matakeitha Nakom bichokono paka péraxa jübina, beyakaincha poxonae péraxa jübinchi pomonae pakuidúbame.

¹⁵”¡Paxam pomonae Moisés pía peitorobi koyene tatsi paiña nekuidubiwi jiwi pam tsobenaem! ¡Paxam irü pomonae fariseomonae pam tsobenaem! Daxita paxam ítara mexeya wüünaeya pepaebi jiwi pam, dáichitha ápara abeya peéxanae jiwi pam. Paxam tajü beya papóname daxita karepayang beya, xua paiña kana exanaenexa ichüngtha xua bapong pejumekowüntsiwa tsane paiña nekuidubi koyenewang xua bapoxonae bapong be judi monaepin penaexanaewa tsane. Bapong pakana éxaname, xua bapong bichokono ekeicha mataropeicha abe peexanaein. Daxota bapong bewa xubinchi ichaxota po nákuatha ishoto jopa itakounayiyó, icha paka kana ichi tsane poxonae paka bebái tsane bárapo nákuatha.

¹⁶”¡Paxam abe peéxanae jiwi tsobenáe pam! Paxam barapókotsi koyeneya jüta pana kana éxaname, icha be pong peitatanakütsin ichi xua poxonae ichüng matakapoinchi pong írürü peitatanakütsin. Paxam ichamonae ba pakuidubéibame ba pajam tsaibim: ‘Icha ichüng nayábara kuiwüünae tsimumuduta xua jeye: Xaniwaicha bara exanaein pokotsiwa xua katsipáebatsi Nakom pía pin bo wüngthaxae tatsi, poxonae jei, baxua ba jopa aiñakuiyiyó poxonae ichüng nayábara kuiwüünae tsimumuduta bapókotsi wüngtha’, ba pajam tsaibim xua ichamonae poxonae pakuidubéibame. Matáütano ba pajam tsaibim: ‘Icha ichüng nayábara kuiwüünae tsimumuduta xua jeye: Xaniwaicha bara exanaein pokotsiwa xua katsipáebatsi oro nainto wüngtha pokotsiwa daedaena po oro nain korotong Nakom pin piabotha

tatsi eka, poxonae jei, baxua ba xua bapong éxana bapókotsi wüingtha, baxua jame aiñakuí poxonae barapong bárapo wüingtha nayábara kuiwüünae tsimumudubeibina', ba pajam tsaibim poxonae pakuidubéibame. ¹⁷¡Paxam barapókotsi koyeneya jüta pana kana éxaname, icha be pomonaе matasipadangwéi ichi poxonae jopa beta jumekowüntsiyo Nakom! Nakom pin píabo bichokono aiñakuí beyakaincha oro nain, po oro nain korotong Nakom pin piabotha tatsi ena. Tsipéi bárapo oro nain poxonae aishowa beekiya Nakom pin píabo weya jopa aiñakuiyiyo. Jame saya meisha poxonae bo tütutha eka bapoxonae aiñakuí bárapo oro nain, tsipéi bárapo bo aiñakuí kana éxanatsi. ¹⁸Matáüta ba pajam tsaibim: 'Icha ichüing nayábara kuiwüünae tsimumuduta, xua jeye: Xaniwaicha bara exanaein pokotsiwa xua katsipáebatsi xua be pexaethopaewa wüingtha xua ichaxota duwéi tauteiba xua túxusi exaneiba Nakom nexa, poxonae jei, baxua ba bapong jopa bewa exanáe poxoru báraxua xua be pexaethopaewa jopa aiñakuiyiyo poxonae ichüing nayábara kuiwüünae tsimumuduta bapókotsi wüingtha', ba pajam tsaibim poxonae ichamonae pakuidubéibame. Matáütano ba pajam tsaibim: 'Icha ichüing nayábara kuiwüünae tsimumuduta xua jeye: Xaniwaicha bara exanaein pokotsiwa xua katsipáebatsi duwéi wüingtha po duwéi xua bokopiya ichaxota xua be pexaethopaewa wüingtha, poxonae jei, baxua ba bapong jame bewa exanáe poxoru po duwéi xua bokopiya ichaxota xua be pexaethopaewa, baxua jame aiñakuí poxonae bapong bárapo wüingtha nayábara kuiwüünae tsimumudubeibina', ba pajam tsaibim poxonae pakuidubéibame. ¹⁹¡Paxam barapókotsi koyeneya jüta pana kana éxaname, icha be pomonaе matasipadangwéi ichi poxonae jopa beta jumekowüntsiyo Nakom! Pokotsiwa xua be pexaethopaewa ichaxota duwéi tauteiba xua túxusi éxana Nakom nexa, poxonae tauta báraxua xua be pexaethopaewa bichokono aiñakuí, beyakaincha aiñakuí poxonae duwein aishówatha bexuba xua saya pexaenexa. Tsipéi duwéi saya aiñakuí poxonae pokotsiwa xua be pexaethopáewatha bokopiya poxonae petúxusi exanaewa tsane Nakom nexa. Bapoxonae bárapo duwein aiñakuí, tsipéi báraxua xua be pexaethopaewa aiñakuí kana éxanatsi. ²⁰Daxota pong nayábara kuiwüünae tsimumuduta xua be pexaethopaewa wüingtha, xua ichaxota duwéi tauteiba xua túxusi exaneiba Nakom nexa, saya meisha jopa bárapo wüingthiyo, matáütano jame nayábara kuiwüünae tsimumudutsina duwéi wüingtha, po duwein baxota bokopiya. ²¹Matáütano pong nayábara kuiwüünae tsimumuduta Nakom pin píabo wüingtha tatsi, saya jopa meisha bárapo wüingthiyo, matáütano jame nayábara kuiwüünae tsimumudutsina Nakom pewüingtha tatsi. Tsipéi bara Nakom pin piabóthaxae eka. ²²Daxota pong nayábara kuiwüünae tsimumuduta itaboko wüingtha, saya meisha jopa bárapo wüingthiyo, matáütano jame nayábara kuiwüünae tsimumudutsina Nakom pía pexeña pekaethopeibiwa tatsi wüingtha beicha matáüta Nakom pewüingtha tatsi pong baxoteicha eka.

²³¡Paxam pomonaе Moisés pía peitorobi koyene paiña nekuidubi jiwí pam tsobenaem! ¡Paxam pomonaе fariseomonaе pam tsobenaem! Daxita paxam ítara mexeya wüünaeya pepaebi jiwí pam, dáichitha ápara abeya peéxanae jiwí pam. Paxam ba kaewaxi pajíwana wetsabéibame xua paiña katsibeibinexa Nakom poxonae diez xóyobe paxeinéibame xua pokotsiwa paiña neübiwang. Barichi pakana éxaname tsiki xutixitha poxútoxi pewüingmenta, matáütano po pexuno pewüing anís barichi matáütano po pexuno pewüing comino. Bara bekein bárapo koyene paexanéibame, dáichitha jopa

paexanaem pokotsiwa bichokono aiñakuí koyenewa pokotsiwa Nakom pía peitorobi koyenéwatha itoroba. Matáütano jopa paexanaem pokuikoyenéwatha bewa bara xaniwaicha pata exanáename jiwi. Matáütano jopa paexanaem pokuikoyenéwatha bewa jiwi payábara najüntükoyene xeináename paiña neyawenaenexa jiwi. Matáütano jopa paexanaem pokuikoyenéwatha xua pana kana éxaname xua beta paiña nejumekowüntsínexa Nakom. Daxita bárapo koyenein jame maisha paexánare, múxuna pa-eexanaponde pokoyene kopiya pa-eexanapóname, pokoyene poxonae pajíwana nonotaponéibame poxonae pokotsiwang diez xóyobe paxeinéibame, xua pokotsiwa paiña neübiwang. ²⁴¡Paxam barapókotsi koyeneya jüta pana kana éxaname, icha be pong peitatanakütsin ichi xua poxonae ichüng matakapoinchi pong írürü peitatanakütsin! Paxam jopa juniya pakayábara jume exaneibim xua Moisés pía peitorobi koyenéwatha itoroba. Dáichitha jopa paexanaem po peitorobi koyene peaiñakuí koyenewa Nakomtha. Barapókotsi jüta koyeneya paéxaname icha jintong ichi poxonae mera mene káewata paparúwatha xua pichixi pemuxuna apaeyainwa, dáichitha ápara yawa apareka xua xuang poxi pekónoxi.

²⁵¡Paxam pomonae Moisés pía peitorobi koyene tatsi paiña nekuidubi jiwi pam tsobenaem! ¡Paxam pomonae irü fariseomonae pam tsobenaem! Daxita paxam ítara mexeya wüünaeya pepaebi jiwi pam, dáichitha ápara abeya peéxanae jiwi pam. Paxam jopa ba juniya paexaneibim poxonae meisha panaperüü ikíkame. Dáichitha búpana iya paiña jüntükoyénetha pekaibi koyene paxéiname, peúwi koyeneno paxéiname. Be barapókotsi jiwi pam pokotsimonae korotong saya matawakaicha ikika yawa paratongno, íchitha atutuxuira bichokono. ²⁶Paxam fariseomonae pam, pókotsi jiwimonae pam pomonae be peitatanakütsi jiwi pam. Kopiya matha pana najüntükuyene barapende bárapo paiña neajüntükoyenebewang, bapoxonae jame wüünaeya painompáename.

²⁷¡Paxam pomonae Moisés pía peitorobi koyene tatsi paiña nekuidubi jiwi pam tsobenaem! ¡Paxam irü pomonae fariseomonae pam tsobenaem! Daxita paxam ítara mexeya wüünaeya pepaebi jiwi pam, dáichitha ápara abeya peéxanae jiwi pam. Jiwi ba ínapana éxana xua pokotsiwa jintong petüpaein peyamüthü akatabíwatsi. Bekein bara baxua ínapana dáichitha xua matha bokareka bichokono ayéi xua jintong petüpaein. ²⁸Barapókotsi jüta koyeneya paéxaname, icha be pókotsi koyene peayeiwa ichi xua jintong petüpaein. Bekein panaperüü wüünáetame, dáichitha paiña jüntükoyene abe bichokono. Bekein jiwi paka yábara nantaxeina poxonae paka kuitane xua paxam deta kou pejüntükoyene wüünae jiwi pam Nakomtha, dáichitha paiña jüntükoyene bichokono paajüntükoyenebem. Matáütano bara bekein paxam ítara mexeya wüünaeya pepaebi jiwi pam, dáichitha ápara abeya pepaebi jiwi pam.

²⁹¡Paxam pomonae Moisés pía peitorobi koyene tatsi paiña nekuidubi jiwi pam tsobenaem! ¡Paxam pomonae irü fariseomonae pam tsobenaem! Daxita paxam ítara mexeya wüünaeya pepaebi jiwi pam, dáichitha ápara abeya peéxanae jiwi pam. Paxam petüpaewi pomonae Nakom pía peitorobi jume pepaebiwi payamüthü ákabame boutixi. Matáütano pomonae pejüntükoyene xeikáe jiwi payamüthü itúpana éxaname. ³⁰Matáüta naerabiya pana najam: 'Icha kaena báyatha jinompaetsípatsi poxonae waámo susato jiwi jinompa metha jopa kueicha

yawenaetsípaetsi poxonae bárapo Nakom peitorobi jume pepaebiwi jutébatsi', pana najam. ³¹Bárapo jumetha poxonae baxua pakaunútame, barápara bárapo kuikoyene paéxaname, icha paiña amo susato jiwi ichi poxonae bárapo jüntükoyeneya éxana poxonae jutébatsi Nakom pía peitorobi jume pepaebiwi. ³²¡Paiña amo susato jiwi abe peexanaexae, kaena báyatha bara paichinde! Poxonae pana nebexubíname moya pana nekuiyábara jumekuiwere icha matha paiña amo susato jiwi ichi poxonae tamrópata notarúkúpa xua bárapo Nakom pía peitorobi jume pepaebiwi jutébatsi.

³³¡Maisha paxam pomonae pemuxuitórobi jiwi pam! ¡Daxota be jomomonae pakuijúpame poxoru jomo ba kuitaya dúkúpa nawa! Bara paichim ánoxuae bekein paichichípame xua Nakom pakuitaya dúkúpame xua abe paka exanaeyainwa. Íchitha Nakom paka itorobina ichaxota ishoto jopa itakounayiyo. Jopa papane-nébiyaem tsane bárapo ishoto weya. ³⁴Itorobikaein paiñaxantha pomonae taitorobi jume pepaebiwi. Matáúta itorobikaein pomonae peyaputaewi. Matáútano itorobikaein pomonae jiwi pekuidubiwi Moisés pía peitorobi koyene tatsi. Íchitha barapomonae pajíwana jutebíname. Ichamonae náetotha pakobematabobíname paiña jutebinexa tsane. Ichamonae judiomonae pía penakaetutsi bongtha tatsi pabéname. Daxita karepaya tómarangtha abe pakana eexanaponáename pomonaetha, pomonae taitorobi jiwi. ³⁵Daxota Nakom paka kana exanaena xua paka péraxa exanaena xua daxita pomonae pejüntükoyene xeikáe jiwi pejutebaponaexaetsi paiña nákuatha. Paiña amo susato jiwi jujutebapona pomonae pejüntükoyene xeikáe jiwi. Kopiya matha Abel bexotsi pong pejüntükoyene xeikaein pong bekein jopa abe exanaeyo, beya poxonae írürü Zacarías bexótsirü pong Berequías pexanto tatsi. Barapong Zacarías pabexúbame Nakom pin piabotha ichaxota xua bárapo bo tútutha unguua pokotsiwa be pexaethopaewa xua ichaxota túxusi éxana Nakom nexa xua irü baxota unguua pepa Nakom piaboyó tatsi xua náitama táeungkuabe. ³⁶Bara xaniwaicha paka tsipáebatsi pomonae xua ánoxuae pajinómpame bichokono paka péraxa jübebina tsipéi daxita paxam barápara Nakom tsítatsi xua paxam patsita xéiname penatsikuentsiwa xua paiña amo susato jiwi pejutebaponaexae pomonae pejüntükoyene wüünae jiwi xua írürü paxam paiña nejutebaponaexaerü", jei Jesús.

Meje yábara poxonae Jesús Jerusalén tomarapiwi siwawekoyeichi

(Lc 13.34-35)

³⁷Bapoxonae Jesús yábara ünthüthüwekoyéi Jerusalén tomarapiwi. Jesús wekoyeya namchi, jeye: "¡Maisha Jerusalén tomarapiwi pam pajutebéibame pomonae Nakom pía peitorobi jume pepaebiwi! ¡Matáúta paxam pajutebéibame íbótongtha pomonae Nakom pákata itoroba! ¡Maisha be paka kaetuteibinchi, tapaka kayawenáewatsi tsainchi, icha wákara ichi poxonae nakoxi kaetuteta pekuarafetha! ¡Maisha be barichokuaein tsane, dáichitha jopa paichichipaem! ³⁸Ínkane pataema Nakom nakuibaraxuba xua jopa paiña nepaka kaewatsiwa tsane. Daxota Nakom jopa poponaeyo pía pin piabotha tatsi paiña tómaratha. ³⁹Paka tsipáebatsi xua ekeicha jopa pana netaem tsane beya abü poxonae pana neyábara jam tsane: '¡Maisha bapong jiwi jüntükoyene weiweina kana éxanatsi pong patopa, Nakom peitorobixae, pong jiwi Pekanamataxeinaeinchi!' pana neyábara jam tsane", jei Jesús fariseomonaetha.

**Meje yábara poxonae Jesús yábara paeba xua ichamonae
abe exanaena Nakom pin píabo tatsi**

(Mr 13.1-2; Lc 21.5-6)

24¹Jesús Nakom pin píabo tatsi wejoniya. Poxonae nama bara weya pona, bapoxonae Jesús imoxoyo kakuita umenarükúpatsi pijimona. Yawa pijimona jeichichi:

—Maisha Nakom pin píabo tatsi bepa wüünae, jei barapomona.

²Dáichitha Jesús jumebarái barapomona, jeye:

—¡Moya kaepatiyo pataema! Bara xaniyang paka tsipáebatsi. Matakabi jopaena bárapo mataketha ichamonae pomona penanapaincha jinompaewi xua icha nakua wérena peponaewi abe kana exanaena Nakom pin píabo tatsi po bo áno-xuae patáneme. Ápara jopa kae ibótiyo nakopatungkuae tsane icha iboto pejúmatha. Daxita abe tsane, jei Jesús.

**Meje yábara poxonae Jesús yábara paeba
xua kopiya matha pewünaeya exanaena petsita-itüütsi
koyenewa poxonae daxita werawerakáenaba**

(Mr 13.3-23; Lc 21.7-24; 17.22-24)

³Bapoxonae Jesús pijimonae barü pona demuxuwatheicha po demuxuwa pewüing demuxu Olivowa tsipéi baxota umena olivo naein. Poxonae Jesús demuxuwatheicha ekopiya, bapoxonae Jesús pijimonae nameicha tsipáebatsi, jeye:

—Paichichipang xua xam tapata netsipaebiwam tsane, ¿eta poxonae metha ichamonae baxua exanaena poxonae abe kana exanaena Nakom pin píabo tatsi? ¿Eta pokotsiwa tsane metha xua pewünaeya tsita itapeiñaxeinaena xua poxonae patopeikáename, matáütano xua poxonae imoxoyo daxita werawerakáenaba? jei Jesús pijimonae tatsi.

⁴Néxata Jesús barái, jeye:

—Dota pam bü ichamonae naerabiya paka muxutsipaeba xua daxota abe paexa-naetsípame. ⁵Tsipéi tsana patsina ayéi bicheito jiwi pomona natsikotaena icha be xang ichin. Barapomona jei tsane: ‘Ápara xang Mesías’, jei tsane. Poxonae barapomona muxutorobiya paebina bapoxonae pinmonae jumekowüntsina. ⁶Pajumetáename xua jiwi juiña nabenoutsina xote yawa xua juiña írürü nabenoutsina icha ira beya. Dáichitha jopa pajunuwinde, tsipéi baxua pewünaeya matha kopiya tsane. Dáichitha kataunxuae dapó matakabi aichika tsane xua poxonae daxita werawerakáenaba yatsikaewa. ⁷Kae nakuapiwi irü icha nakuapíwino, bárapo aiña nakuapíwibe nabenoutsina. Matáütano irü pong nakua peewatsin irü ichüngdü pong icha nakua peewatsin, barapongbe írürü nantiya nabénabe. Matáütano aiña nákuangtha pin jainbo nakua tsane tsipéi pin mayayo tsane. Matáütano domae tsúrukuae tsane aiña nákuangtha. Matáütano aiña nákuangtha ira jijiyatsina. ⁸Báraxua kopiya matha tsane xua jiwi átene tsóponae tsane bichokono, xua beya jopa nama juniya tsane.

⁹“Bapoxonae jiwi paka teikebina, paka átene exanaena matáütano paka jutebina. Daxita nakuangpiwi paka kasebina paiña tana nejumekowüntsixaemxae. ¹⁰Bárapo matakábintha jiwi pentsina xua Nakom pejumekowüntsíwatsi.

Matáütano daxita jiwi nakasebina, matáüta barapomonaе piamonaе kaenaetsina ichamonaetha. ¹¹Pinmonaе tsana pateibina, pomonaе jiwi pemuxuitorobiwi. Tsana jei tsane: ‘Xang Nakom peitorobi jume tapaebin, Nakom yábara paka kuidubinchi’, jei tsane. Bárapo pemuxuitorobi jume diwesi pinmonaе jumekowüntsina bárapo diwesi. ¹²Pinmonaе jopa juniya abe exanaponáе tsane daxota jiwi, jopa kaemonaе nantiya naántobe tsaibi tsane. ¹³Íchitha pong áwiya xua antiyapusiüya nejumekowüntsiya poponaena xua beya yakuiya tüpaeya jopaena poxonaе bekein abe taéxanatsi ichamonaе, bapong jame Nakom napaeba kana exanaena. ¹⁴Tamonaе kapanaena tapexeíña jume diwesi po diwesi xua Nakom waba jiwi petanaexanaenéxatsi pijimonaе pomonaе itorobiya peewatsixae. Bárapo diwesi tajiwimonaе pomonaе tanejumekowüntsi jiwi paebinóutsina daxita jíwitha. Poxonaе bárapo diwesi daxita nakuangpiwi jumetaena, bapoxonaе daxita bárapo jiwi yaputaena xua bara matakabi imoxoyo jopaena po matakeitha poxonaе daxita werawerakáenaba.

¹⁵”Daniel, pong Nakom peitorobi jume pepaebin bapong kaena báyatha yábara tsiwünaeya muxudutsiya tina pokotsiwa xua bichokono abe, pokotsiwa xua werawéraka kana éxana. Patáename pokotsiwa xua ichüing Nakom pin píabo tütutha exananotsina, pokotsiwa jopa bewa notsi baxota, pokotsiwa Daniel báyatha yábara paeba. Bapoxonaе payaputáename xua bara imoxoyo matakabi jopáenaba poxonaе daxita werawerakáenaba”, jei Jesús. (Xang Mateo, paka baraichi: “Pong yorobina pojume diwesi tinang, moya jumenaitawatsina pía peyaputaenexa tsane”, paka jeichi.)

¹⁶Kataunxuae Jesús kueikueije, jeye: “Poxonaе barapokotsiwa patáename bapoxonaе pomonaе Judea nákuatha jinompa, barapomonaе bewa demuxuwang berüküpiyaena. ¹⁷Bárapo matakábitha pong bómüxü tabutsibotha unguwa bapong jopa bewa bo joniyaeyo xua penotsiwa tsane pokotsiwa bómüxü tütutha bobena. Saya jame bewa naiña benaetsirikuaena. ¹⁸Írürü pong pábitha pópona bapong jopa bewa kaibeya po nae tsane botha xua penotsiwa tsane pía paparuwang. Saya jame bewa naiña benaetsirikuaena. ¹⁹¡Pai yábüxi tsobenáе powaxi pexui búpana táenatsi bárapo matakábitha! ¡Pai powaxi irü pexui ishaina, barapówaxi tsobenaerü! Tsipéi ákabe tsobenáе tsane pexui. ²⁰Poxonaе pewünaeya tsane baxua Nakom pawüükare xua jopa paiña nerüküpaewa tsane poxonaе awüübo peake-xáе bichokono, matáütano xua jopa paiña nerüküpaewa tsane poxonaе pentakeiseikáе matakábitha. ²¹Tsipéi bárapo matakábintha jiwi bichokono pin péraxa exanaeinchi. Átene tsane beyakaincha poxonaе jiwi átene tsaibi poxonaе Nakom aena nakua éxana, xua ekeicha nama bichokono pin péraxa tsane. Ekeicha bexa bapoxonaе bápana jopa baxua exanáе tsane poxonaе bichokono jiwi pin péraxa. ²²Icha Nakom jopa be kaentakabíyobe exanáе tsipae, metha dapomonaе aibi tsipae pomonaе panenebiya bárapo peátene koyenewa weya. Dáichitha Nakom be kaentakabíyobe exanaena peantobexae pijimonaе, pomonaе pía peitapetsiwixae tatsi.

²³”Bapoxonaе icha ichüing paka jei: ‘Pataema bapong ápara Mesías unguwe pong Nakom itorobika’, paka jei, irü icha ichüing paka jei: ‘Pataema bapong Mesías xota unguwie’, paka jei, baxuang jopa pajumekowüntsinde bárapo jumein. ²⁴Tsipéi pomonaе pemuxuitorobi jiwi tsana patsina. Barapomonaе natsikotaena icha be xang ichi pongxaein Mesías. Matáütano barapomonaе natsikotaena icha be pomonaе Nakom peitorobi jume pepaebiwi ichi tsane. Barapomonaе pexeíña

petsita-itüütsi koyenewang exanaena peitabókotha, po írathe tsáneno xua jiwi pemuxitorobinexa tsainchi, xua jiwi pejumekowüntsinea pokotsiwa barapomonaepaeba. Barichirü pomonaetha, pomona Nakom pía peitapetsiwi tatsi pemuxitorobinexa tsainchi, xua írirü icha metha barapomonaepajumekowüntsinea tsanerü pokotsiwa barapomonaepaeba. Íchitha jopa itaküüpaetsi tsainchi xua barapomonaepemuxitorobiwa tsainchi. ²⁵Baxua tsiwanaya yábara paka tsiwüünae muxudútsi. ²⁶Daxota icha jiwi paka jei tsane: ‘Pataema bapong Mesías ungkuiye ira xuépana susato tsúrukuae nakua beya’, icha paka jei, jopa bara beya paponaeinde. Matáüta icha paka jei: ‘Pataema bapong Mesías xote ungue bómüxü tütutha’, icha paka jei, jopa baxua pajumekowüntsine. ²⁷Icha yámüxü ichi poxonae jemeicha yakoicha ungueika xua koicha nayotaxuba itabókotha, barichi tsane po matakábitha patopeikaein jemeicha. Xang pongxaein Nakom Tananeitapetsin tsita naitüütsin daxita jiwi. ²⁸Kekeremonae ba nakaetuta ichaxota baurin boka. Bara jüta paichim tsane. Paxam pomonaetana nejumekowüntsi jiwi pam, pana newüünae ewatsíname po mataketha patopeikaein. Bárapo mataketha pana nakaetutsíname”, jei Jesús.

Meje yábara poxonae Jesús nayábara paeba xua poxonae ekeicha patopáetsika pongxae Nakom pía Peitapetsin

(Mr 13.24-37; Lc 21.25-33; 17.26-30,34-36)

²⁹Ekeicha Jesús namchi: “Po matakabin poxonae nakuiwetsina xua jiwi pin péraxa tsane, bapoxonae xometo naiña nakitabina. Jomokóichato jopa pentha tsane. Opitéi peitaboko weothopeikaena. Matáüta Nakom napunatorobabiyaena xua xuang itabókotha dubena. Bapoxonae jopa xapain dubenae tsane. ³⁰Bapoxonae daxita jiwi taena peitabókotha xua kou ekeicha ápara tapatopaewa tsane pongxaein Nakom Tananeitapetsin. Poxonae daxita nakuangpiwi netaena xua patopaein, barapomonaepijunuwi wekoyéi tsane. Jiwi netaena pongxaein Nakom Tananeitapetsin xua patopeikaein tsakinaebówangtha. Nakom pía peayapusüü itorobi koyenéwatha, matáütano bichokono pexeña itúpanae kóichatha patopeikaein. ³¹Matáütano itorobin tamatatsunpiwi xua bichokono dangweya peobinexa tsane, po peobiwa pewüng trompeta. Poxonae baxua jumetaena tamatatsunpiwi inta kaetutsina pomonaetaitapetsiwi. Nakaetutsina daxita nakuangpiwi jíwana, irü ichamonae pomonaetichaxota xometo weekoinapiwi jíwana, irü ichamonae pomonaetichaxota xometo bejopiyapiwi jíwana, irü ichamonae pomonaepokotsiwa werenepiwi jíwana, irü ichamonae pomonaepokotsiwa berekepiwi jíwana”, jei Jesús.

³²Ekeicha Jesús jeye: “Pajumetaema bárapo pekayábara jüta pepaebi diwésiyo xua higuera nae xua paiña nenakuidubiwa tsane. Poxonae ba patáneme xua pena noxu xuxuwapona, bapoxonae ba payaputáneme xua bara imoxoyo wei tsúrukuae tsóponae, xua pentono perubenaenexa. ³³Barapókotsi jüta koyeneya ichi tsane poxonaepatáename daxita baxuang pokotsiwa aunxuae paka tsipáebatsi, pokotsiwa bexa exanaena, bapoxonaepayaputáename, xua bara imoxoyo tsane xua tapatopae wüünae tsane. ³⁴Bara xaiñeya paka tsipáebatsi daxita judiomonaenaitapataya nakatsiwaponaena beya yakuí othopaena poxonae Nakom exanaena daxita baxuang pokotsiwa xuaunxuae paka tsipáebatsi. Bapoxonae bárapo judiomonaewerawerakaena. ³⁵Peitaboko aichúrukuae tsane, matáütano ira aichúrukuae tsane.

Meisha nama tajumein ataya tsitekaena xua daxota daxita nayábara jumewétsina be pókotsi koyeneya báyatha páebang”, jei Jesús.

³⁶Ekeicha Jesús jeye: “Po matakábitha baxua exanaena, matáúta po hóratha baxua exanaena jiwi jopa baxuang yábara yaputaeyo. Irü matatsunpiwi pomonae peitaboko beicha jinompa baxuang írürü jopa yábara yaputaeyo. Irü xang, pongxaein Nakom Pexantong baxuang jopa yábara yaputaeyo. Meisha saya Nakom pong Waxa yaputane poxonae po matakábitha baxua exanaena, matáütano yaputane poxonae po hóratha daxita exanaena baxua xuaunxuae paka tsipáebatsi”, jei Jesús.

³⁷Ekeicha Jesús jeye: “Icha matha ichi poxonae Noé kaena báyatha pópona jiwi jopa tsakeinaeyo xua Nakom pin awüübo exanaena methaunxuae. Saya barompaya icha jüntükuitha jinompa daxota jiwi wérapa. Barichi jüta ichi tsane poxonae patopeikaein bárapo kae pin nákuathe xua pongxaein Nakom Tananeitapetsin. Poxonae patopeikaein jiwi jopa tsakeinae tsane xua Nakom wérapa exanaena bárapo jiwi pomonae jopa pejumekowüntsioxaeitsi. ³⁸Bárapo matakábintha poxonae Noé pópona poxonae kataunxuae pin ema jopa duneikaeyo, jiwi jopa tsakeinaeyo xua bexa pin awüübo tsane. Bárapo jiwi jüntema nabaneiba yawa apeiba. Yawa jíwitha jijinapona, yawa pexántixi jitha dodoubapona beya yakuiya óthopa poxonae po matakábitha Noé pin jera naetha joniya. Bapoxonae pin emamúü jopa. Daxita Noé wepu bunothópatzi pomonae jinompa poxonae Noé pópona. ³⁹Bárapo jiwi jopa awüübo yábara tsaka jinompaeyo. Barapoxonae jemeicha pin ema ungueika. Matáúta monapéntatsi bárapo jiwi. Icha jiwi ichi poxonae Noé pópona poxonae bárapo jiwi jopa nantaxeinaeyo xua nakabetsina, barichi tsane poxonae xang patopeikaein pongxaein Nakom Tananeitapetsin, jiwi jopa baxua yábara tsakeinae tsane xua poxonae ekeicha patopeikaein. ⁴⁰Bárapo matakéitha aiña pebinbe nakuara nakuitauyáenabe pábitha. Ichüng matatsunpin pichina, pejumekowüntsixaetsi Nakom. Ichüng saya kuenta ponaeinchi jopa pejumekowüntsixaetsi Nakom. ⁴¹Írürü aiña yabúyobe nakuara yakatoyorobauyáenabe. Ichowa matatsunpin pichina, pejumekowüntsixaetsi Nakom. Ichowa saya kuenta ponaeinchi, jopa pejumekowüntsixaetsi Nakom.

⁴²”Tsaka pajinompéibare xua tapatopae wüünae tsane, tsipéi jopa payaputaem po matakéitha patopaein pongxaein jiwi Takanamataxeinaein. ⁴³Meje pokotsiwe payaputaema. Icha pong bo pexeinaein yaputáetsipa xua poxonae patopaena pong jiwi pekaibin, bapoxonae bapong jopa maitekaetsipae. Matáúta bapong jopa kopatsipae xua pong pekaibin petajondenáewatsi piabotha. ⁴⁴Daxota bara paichinde. Tawanaetha pana nakuiwüünaere, tsipéi xang, pongxaein Nakom Tananeitapetsin patopeikaein poxonae jopa tsaka payábara jinompaem tsane tsipéi jopa payábara nantaxeinaem tsane xua tapatopaewa tsane”, jei Jesús.

**Meje yábara poxonae Jesús yábara diwesi paeba pongbe
xua bo peyapukaekaeinbe pong xua beta peexanaein irü
xua pong jopa beta peexanaein**

(Lc 12.41-48)

⁴⁵Ekeicha Jesús namchi pijimonaetha pekayábara jüta pepaebi diwésiyo xua pepatopaewa tsane, jeye: “Yábara paka tsipáebatsi pong matakapópona pomonae bo pexeinaein tanakuítatsi. Barapong wüünaeya yaputaeya matakapópona.

Poxonae bo pexeinaein wepu wárapa barapomonae, pong bo pexeinaein itoroba pongtha pong bo petayapukaekaeinchi, jeye: ‘Inta beta matakapóponde, yawa inta beta pexaewa ápare daxita matakabi pomonae xua inta nakuita’, jei bo pexeinaein. ⁴⁶Pong bo petayapukaekaein bara jüntükoyene weiweinaena poxonae patopaena pong bo pexeinaein petaexaetsi xua bara beta tayapukaeka bo, xuano bara beta peexanaexae pokotsiwa xua bo pexeinaein itoroba. ⁴⁷Xaniwaicha paka tsipáebatsi. Bo pexeinaein itorobina xua pong petayapukaekaeaxaetsi bo xua bapong kana exanaeinchi xua ekeicha daxita piáwang beta petayapu enáewatsi xua xuang xeina pong bo pexeinaein. ⁴⁸Íchitha ichakuitha pong bo petayapukaekaein bapong peantükuiyapubein tsipae. Bapong piakoutha nantaxeináetsipa, najéi tsipae: ‘Metha bo pexeinaein jopa kuinaya patopáe tsane’, najéi tsipae pong bo petayapukaekaein. ⁴⁹Bapoxonae bapong kueinta pomonae pong bo pexeinaein tanakuítatsi. Matáütano bapong nanabanáetsipa nawita ichamonae yawa kúüpatsi nanaexanaetsípáno. ⁵⁰Bapoxonae pong bo pexeinaein jemeicha patopaena poxonae pong bo petayapukaekaein jopa wüünae tsakeinaeyo. Poxonae bárapo hora tsuxubi jopa yaputaeyo yawa poxonae bárapo matakabi tsuxubi jopa yaputaeyo. ⁵¹Pong bo pexeinaein itoroba ichamonaetha xua pebenéxatsi yawa pepérxaxa jübinéxatsi tsainchi pong bo petayapukaekaeinchi. Matáütano itoroba xua barapomonae bapong pexubinéxatsi ichaxota jinompa pomonae ítara mexeya wüünaeya pepaebiwi íchitha abe peexanaewi. Bárapo nakua béreka jiwi bichokono wekoyéi pomonae abe peexanáewixae, matáütano nantanuweya nantüjayabina bichokono peatenexae”, jei Jesús.

**Meje yábara poxonae Jesús kuiduba pekayábara jüta
pepaebi diwésiyo xua diez powáyobe xua penowaxi**

25 ¹Néxata Jesús ekeicha icha pekayábara jüta pepaebi diwésiyo kuiduba pijimona, jeye: “Nakom kana exanaena jiwi xua pomonae pejüntükoyene itorobiya ewatsixae, icha pebin ichi poxonae diez powáyobetha xua penowaxi kana éxana powaxi bápana jopa perüünakoyabiyo pebiwi. Bárapo diez powáyobe nota pía dámparang xua peewatsinexa pong pía pekotsiwa nakoyobina. Barapówaxi barompaya kápona pía dámparang xua penasiwa merang épaka. ²Icha cinco powáyobe bárapo diez powaxi jíwana, barapówaxi itakoxánatsi xua penakuiwüünaetsiwa. Icha cinco powáyobe itakoxone xua penakuiwüünaetsiwa. ³Barapówaxi powaxi itakoxánatsi xua penakuiwüünaetsiwa barapówaxi poxonae dámparang kajijinka jopa múxuna kajijinkaeyo icha penasiwa merathang xua ekeicha pemene epakaenexa poxonae ameneibi tsurubena. ⁴Saya meisha powaxi yaputane xua penakuiwüünaetsiwa jame barapówaxi pía dámparang múxuna kajijinka penasiwa merathang xua ekeicha pemene epakaenexa poxonae ameneibi tsurubena. ⁵Tsipéi pong imoxoyo pekotsiwa nakoyobina bapong jopa kuinaya patopaeyo, daxota daxita bárapo diez powáyobe itamaipanarúküpa. Matapaiña maitarúküpa. ⁶Poxonae papáe tsuxubi poxonae barapówaxi kataunxuae maita, bapoxonae jumetane pong wawái xua barapówaxi jeichichi: ‘Bara juiña dawerena pebin pong pekotsiwa nakoyobina. Bapong pamatenta émare paiña nekobejakobinexa’, jei pong wawái. ⁷Daxita bárapo diez powáyobe nakosabarúküpa. Matáüta ekeicha icha penasiwa merathang epakarúküpa xua bapoxonae pekoicha exanaenexa. ⁸Bapoxonae icha cinco powáyobe, powaxi jopa nakuiwüünaetsiyo jeye ichawaxitha xua cinco powáyobetha: ‘Panekatsibare icha penasiwa merathang meraxi pata tha ekeicha

mene epakaetsi, yáitama pata dâmparang akueicheibi’, jei barapówaxi. ⁹Íchitha powaxi penakuiwüunaetsiwaxi jumebarái, jeye: ‘Aibi ápara, kanta peyaxui barompaya pakajijinkang patauxi, jopa pakajijinkaeiño xua paxam néxarü. Maissha ichaxota pekaenaetsithopaewa penasiwa merathang bara bepayíyande matha pakómokare penasiwa merathang xua paiña nemene epakaenexa’, jei barapówaxi poxonae xua jumebarái ichawaxitha. ¹⁰Poxonae kataunxuae icháwaxi enapona xua pekomokaenexa penasiwa merathang ichamonaetha, bapoxónaerü pebin pekoutha patopa, pong pekotsiwa imoxoyo nakoyobina. Powaxi báyatha nakuiwüunaeta napunajoniya bapongtha xua penanabanaenexa pexaewa xua poxonae bárapo pexaewa jiwi tsinakaetuta xua penabanaenexa poxonae bárapo pebin pekotsiwa nakoyobina. Bapoxonae bómüxü bichokono boupa kateitabanota. ¹¹Bapoxonae pírapaeyo icháwaxi pata powaxi penasiwa merathang siwayiya, jeye: ‘Pata Tane-kanamataxeinaem, painta boupa saranaxorena’, jei bapowaxi. ¹²Íchitha bapong barapówaxi jumebaraichichi, jeye: ‘Kanta jopa paka yaitaetsi’, jei bapong”, jei Jesús, xua pijimonaes tsipaeba.

¹³Bapoxonae Jesús barái pijimonaetha, jeye: “Tawanaetha pana najüntükoyene wüunaere, tsipéi jopa payaputaem po matakábitha patopaein, matáütano jopa payaputaem po hóratha patopaein pongxaein Nakom Tananeitapetsin”, jei Jesús.

Meje yábara poxonae Jesús paeba pekayábara jüta pepaebi diwésiyo xua parátixi yábara

(Lc 19.11-27)

¹⁴Ekeicha Jesús pijimonaes kuiduba pekayábara jüta pepaebi diwésiyo xua parátixi, jeye: “Ánoxuae ichichipang xua tapaka tsipaebíwatsi pokoyene xua xang beta matómakang pomonaes inta beta penakuichiwi pomonaes Nakom jüntükoyene itorobiya éwata. Bárapo koyene jüpa icha be poxonae pebin ichi poxonae bara juntukuru warapáenaba icha nakua beya. Pewünaeya poxonae warapáenaba matha waba pomonaes pía petanakuichi jíwichi tsainchi. Barapomonaetha itoroba xua pía parátixi tatsi beta petakakomokaewa tsainchi poxonae kataunxuae wüunaes éwatatsi xua pepatopaewa tsane. ¹⁵Ichüngtha pomonaes barapomonaes jíwana kata cinco mil po paratiximonaebe. Irü ichüngtha kata dos po paratiximonaebe. Irü ichüngtha kata saya be kae mil po paratiximonaebe. Bapong daxita barapomonaetha barompaya katsiba be pókotsi koyeneya barapomonaes yapujúpatsi xua poxonae pekakomokaewa tsane bárapo parátiximonaetha. Bapoxonae bapong wárapa. ¹⁶Pong kátatsi cinco mil po paratiximonaebe, bárapo cinco mil po paratiximonaébetha ekeicha icha cinco mil po paratiximonaebe matoma éxana. ¹⁷Barichi pong kátatsi dos mil po paratiximonaebe, bárapo dos mil po paratiximonaébetha ekeicha matoma éxana icha dos mil po paratiximonaebe. ¹⁸Íchitha pong kátatsi kae mil po paratiximonaebe, bapong müthü kua íratha. Bapoxonae bárapo müthütha bota bárapo kae mil po paratiximonaebe”, jei Jesús.

¹⁹Ekeicha Jesús jeye: “Poxonae aiña matakabin yapukaewa, bapoxonae patopa pong parátixi katsiba barapomonaetha pong barapomonaes pía pekanamataxeinaeinchi tatsi. Bapong pía petanakuichiwichi pía parátixi matoma yábara yáiñaba. ²⁰Kopiya patopa pong cinco mil po paratiximonaebe kátatsi. Bapong icha cinco mil po paratiximonaebe kata pía pekanamataxeináeinchitha, yawa

jeye: ‘Tanekanamataxeinaem, kaena báyatha cinco mil po paratiximonaebe nekátame, ekeicha icha cinco mil po paratiximonaebe kata matoma exainchi’, jei bapong. ²¹Pong Pekanamataxeinaein jumenota, jeye: ‘Maisha jüntükoyene wüünaem matáütano xam pongxaem kayábara jumekowúntatsi xua wüünaeya neexanebiwam pokotsiwa kaitoróbatsi. Tsipéi inta wüünaeya beta éxaname bekein poxona be kónotha kaitoróbatsi, daxota ekeicha ichawa kaitoróbatsi xua bichokono nawita. Moya tabotha nebarü joníyama yawa nebarü jüntükoyene weiwéinare’, jei pong Pekanamataxeinaein. ²²Bapoxona pírapae ichüng patopa pong dos mil po paratiximonaebe kátatsi yawa jeye pía pekanamataxeináinchitha: ‘Tanekanamataxeinaem, kaena báyatha dos mil po paratiximonaebe nekátame, ekeicha icha dos mil po paratiximonaebe kata matoma exainchi’, jei bapong. ²³Pong Pekanamataxeinaein jumenota, jeye: ‘Maisha jüntükoyene wüünaem matáütano xam pongxaem kayábara jumekowúntatsi xua wüünaeya neexanebiwam pokotsiwa kaitoróbatsi. Tsipéi inta wüünaeya beta éxaname bekein poxona be kónotha kaitoróbatsi, daxota ekeicha ichawa kaitoróbatsi xua bichokono nawita. Moya tabotha nebarü joníyama yawa nebarü jüntükoyene weiwéinare’, jei pong Pekanamataxeinaein”, jei Jesús.

²⁴Ekeicha Jesús jeye: “Bapoxona matapaiña patopa pong kae mil po paratiximonaebe kátatsi. Bapong atsakiya jei pía pekanamataxeináinchitha: ‘Tanekanamataxeinaem, xang yaputang xua xam be barapokotsim pong jopa jiwi juniya itorobeibim. Matáütano jiwi kobe-itorobéibame xua penotéibiwa pokotsiwa jopa jiñawiyo. Matáütano pexaewa xua naweta notéibame ichaxota jopa übim. ²⁵Daxota kakunúwatsi baxua neexanaeinxae tsipéi metha inta píchipame bárapo paratiximonaebe poxona ekeicha icha paratiximonaebe kata matoma exainchi daxota jiña paratiximonaebe müthütha xubotang. Xote bárapo paratiximonaebe kaewa kata kanawítatsi’, jei bapong. ²⁶Néxata pong Pekanamataxeinaein namchi jeye: ‘¡Bepa maisha dapong abem, pong fifíname poxona inta nakuítame! Xam ápara neyábara nantaxéiname xua xang pexaewa tanoteibiwa pokotsiwa naweta ichaxota jopa takoya übeibiño. Matáütano xua ichamona kobe-itorobeibang xua noteiba pokotsiwa jopa tawiyo. ²⁷Tsipéi katsawiya neyábara nantaxéiname, xua bichokono dangwéi itorobang daxota báyatha inta bewa bárapo paratiximonaebe bancobotha botsípame. Néxata poxona ekeicha patopang, icha paratiximona ekeicha matoma xeinaetsipang xua ekeicha inta pemataropeicha botsixáetsipae poxona ichamona nakowaeta bárapo taparatiximonaebe’, jei pong Pekanamataxeinaein. ²⁸Bapoxona pong Pekanamataxeinaein barái pomona baxota umena jeye: ‘Bapong pakobewepire bárapo kae mil po paratiximonaebe. Bapoxona bárapo paratiximonaebe pakare pong icha diez mil po paratiximonaebe xeina. ²⁹Pong ba be kónotha Nakom yábara yaputainchi Nakom bapongtha kana exanaena xua ichawa peyábara yaputaewa tsane xua beya poxona bapong ekeicha bichokono Nakom pejumekowúntsiwa tsainchi. Pong ba jopa ichipaeyo xua Nakom peyábara yaputáewatsi, Nakom wepichina pokoyene bapong yaputane xua beya daxota Nakom jopa pejumekowúntsiwa tsainchi. ³⁰Matáüta bapong pong inta beta jopa nakuichiyo bapong paxore peitakiréi nákuatha, xua bárapo nákuatha pewekoyeinexa, xua nantanuweya penantüjayabinexa tsane’, jei pong Pekanamataxeinaein”, jei Jesús.

**Meje yábara poxonae Jesús nayábara paeba xua bepa
pinae Nakom Pexanto tatsi tsabina daxita jiwi**

³¹Ekeicha Jesús pijimonaе tsipaeba, jeye: “Xang, pongxaein Nakom Tananeita-petsin patopeikaein, irü matatsunpiwi nebarü patsikaena. Poxonae patopeikaein, bapoxonae ekaein pexeiña peitüpanáе ekáewatha xua tawa tayábara paebinea daxita jiwi xua penatsikuentsiwa abe peexanaexae Nakomtha. ³²Jiwi nakaetutsina taitabaratha pomonae daxita nákuang wérena pona. Barichin tsane icha pong oveja peewatsin ichi. Bapong ba tsaba ovejamonaе, matáütano tsaba icha duweimonaeno, po duweimonaе pewüng cabra. ³³Pong ovejamonaе peewatsin, bapong ovejamonaе kuaranoba pekoxa weya. Cabra duweimonaе petsokona weya kuaranoba. Bara kana jütiya ichin tsane jíwitha, icha pong ovejamonaе peewatsin ichi. Pomonae wüünaeya peexanaewi tsana nobin. Pomonae abe peexanaewi tsana nobin. ³⁴Bapoxonae xang pongxaein jiwi itorobiya pepa Taéwatsin barang tsane pomonae takoxa weya inta umena, jang tsane: ‘Anetha paxam pomonae Nakom, Taxa, paka jüntükoyene weiweina éxana. Pajojoniyama Nakom pía peitorobi nakuatheicha. Baraxoteicha kaena báyatha Nakom paka tsiwüünaeta pokotsiwa xua paxam nexa, beya poxonae bárapo nakue fórota. ³⁵Paka itaküüpa xua papátame baxoteicha, tsipéi poxonae jainpang báyatha, bapoxonae pana neápatame pexaewa. Matáüta tsipéi poxonae meratsipang, bapoxonae mera pana neápatame. Matáüta tsipéi báyatha poxonae patopang paiña botha poxonae be wawatsiyo koyeneya patopang dáichitha pana nententa weyataeya wábame. ³⁶Matáütano tsipéi poxonae báyatha júmasa patopang, bapoxonae paparuwa pana nekátame. Matáütano tsipéi poxonae báyatha neromaeba yawa poxonae atenein bara pana nesiwapóname paiña tana neyawenaenexam. Matáütano tsipéi poxonae jiwi pekü-bibotha neeta, paxam papátame paiña tana nenekotsinexam’, jang tsane xua pongxaein jiwi itorobiya pepa Taéwatsin. ³⁷Néxata barapomonaе, pomonae takoxa weya inta peumenaexae pomonae wüünaeya peexanaewi, nejéi tsane: ‘Pata Tane-kanamataxeinaem, zeta poxonae paka tainchi xua jáinpame matáüta xua poxonae paka ápatütsi pexaewa? ¿Eta poxonae paka kuitainchi xua meratsípame xua bapoxonae mera paka ápatatsi? ³⁸¿Eta poxonae paka tainchi xua poxonae be wawatsiyo koyeneya patópame xua bapoxonae paka matenta weyataeya wábatsi? ¿Eta poxonae paka tainchi xua poxonae júmasa patópame xua bapoxonae paka kátatsi paparuwa? ³⁹¿Eta poxonae paka tainchi poxonae karomaeba xua poxonae atenemno xua bapoxonae paka siwapoinchi pata paka kayawenaenéxatsi? ¿Eta poxonae paka tainchi poxonae jiwi pekübibotha ka eta xua bapoxonae papatang pata kataenéxatsi?’ nejéi tsane barapomonaе. ⁴⁰Bapoxonae xang pongxaein jiwi itorobiya pepa Taéwatsin, jumenotsin barapomonaetha jang tsane: ‘Xaniyang paka tsipáebatsi. Daxita pokoyenéwang paxam báyatha paéxaname tamonaе jíwitha poxonae bekein barapomonaе jopa peaiñakuí jíwiyo, ápara bara painta éxaname’, jang tsane pongxaein jiwi itorobiya pepa Taéwatsin.

⁴¹”Néxata xang pongxaein jiwi itorobiya pepa Taéwatsin barang tsane pomonaе tatsokona weya peumenaewi, pomonaе jopa beta peexanaewi, jang tsane: ‘Panatsixibarü kúpare taxaiña weya, tsipéi paxam pomonaе abe paiña neexanáе jiwi pam. Maisha po nákuatha ishoto jopa kuinaya itakounayiyo baxota papónare. Bárapo isho nakua kaena báyatha Nakom yábara wüünaeta kaurimonaе

pía pentakaponaein tatsi nexa írürü pía matatsunpiwimonae tatsi nexa pomonae kaurimonae. ⁴²Tsipéi poxonae jainpang báyatha, jopa pexaewa pana nekatsim. Matáúta tsipéi poxonae báyatha meratsipang, jopa mera pana neapatsim. ⁴³Matáú-tano tsipéi kaena báyatha poxonae be wawatsiyo koyeneya patopang, paxam jopa pana nententa weyataeya wabim. Matáúta tsipéi poxonae báyatha júmasa pato-pang, paxam paparuwa jopa pana nekatsim. Matáúitano tsipéi kaena báyatha poxonae neromaeba yawa poxonae jiwi pekübibotha ékang, paxam jopa pana nesiwaponae', jang tsane. ⁴⁴Néxata pomonae abe peexanaewi nejumenotsina, jei tsane: 'Pata Tanekanamataxeinaem, ¿eta poxonae xua pata paka kuitaewathatsi xua jopa paka yawenaetsi? ¿Eta poxonae xua pata paka kataebenáewathatsi poxonae jáinpame? Matáúitano ¿eta poxonae xua pata paka kataebenáewathatsi poxonae meratsípame? Matáúitano, ¿eta poxonae xua poxonae pata paka kataebenáewathatsi poxonae be wawatsiyo koyeneya patópame? Matáúitano, ¿eta poxonae xua poxonae pata paka kataebenáewathatsi poxonae karomaeba? Matáúitano, ¿eta poxonae xua poxonae pata paka kataebenáewathatsi poxonae jiwi pekübibotha ka eta? Daxita baxuang, ¿eta poxonae xua poxonae jopa paka yawenaetsi?' nejéi tsane barapomonae. ⁴⁵Xang pongxaein jiwi itorobiya pepa Taéwatsin jumenotsin barapomonae jang tsane: 'Xaniyang paka tsipáebatsi. Daxita pokoyenewa báyatha jopa paexanaem tamonae jíwitha xua barapomonae jopa peaiñakuí jiwiyoxae, ápara bara jopa painta exanaem', jang tsane pongxaein jiwi itorobiya pepa Taéwatsin. ⁴⁶Bexa bapoxonae tsane bárapo abe peéxanae jiwi ponaena po nákuatha bápana jopa nakuikópatsi xua átene. Pomonae pentükuiwiüünae jiwi ponaena po nákuatha jiwi xeineiba peantükoyeneyapusüüwa, po peantükoyeneyapusüüwa ataya tsiteka", jei Jesús.

Meje yábara poxonae fariseomonae irü sacerdotemonae pía pentakaponaewi tatsi daxita barapomonae Jesús yábara nantaxéinatsi pokoyeneya xua Jesús pewaetabiwa tsainchi

(Mr 14.1-2; Lc 22.1-2; Jn 11.45-53)

26 ¹Poxonae Jesús baxua daxita najumeweta, bapoxonae pijimonae barái, jeye:

²—Paxam payaputáneme xua poxonae pobaya tsane, jiwi nakaetutsina penabanaenexa pexaewa peyábara nantaxeinaenexa bárapo matakabi xua poxonae kaena báyatha matha judiomonae Egipto nakua weya panenebiya, po matakabi pewüng Pascua matakabi wüng. Bárapo matakaiha ichamonae nekaenaetsina xua tüparukua tanaexanaenexa tsane náetotha, pongxaein Nakom Tananeitapetsin, jei Jesús.

³Poxonae Jesús pijimonae baxua tsipaebungkua, bara kaena bárapo matakaiha sacerdotemonae pía pentakaponaewi tatsi nakaetuta. Írürü baxota nakaetuta judiomonae pía pítiri jiwi tatsi. Barapomonae daxita nakaetuta po tütutha pong pewüng Caifás pong sacerdotemonae pía pepa pentakaponaein tatsi pía pexeña tutu botha tatsi. ⁴Daxita barapomonae nabarü muxujéi xua bepa pinae eta bichi tsane poxonae Jesús nameicha waetabinchi xua pebexubiwa tsainchi. ⁵Barapomonae najéi:

—Abü jopa waetabí tsainchi poxonae jiwi Pascua matakabi wüngtha nakaetuta penanabanaenexa pexaewa. Tsipéi icha bárapo matakaiha waetabichípatsi pinmonae anaepanaya najumekayáyata xubíchipa, najéi daxita barapomonae.

**Meje yábara poxonae petsiriwa Jesús mata epatábatsi penasiwa,
po penasiwa petuxueiwa**

(Mr 14.3-9; Jn 12.1-8)

⁶Pírapae Jesús pópona Betania tómaratha. Bárapo tómaratha Jesús pópona Simón piabotha tatsi, pong kopiya báyatha peperüüsawinchi. ⁷Bárapo botha petsiriwa powa pesikuiweiweinaewa Jesús imoxoyo kakuita unguatábatsi. Bárapo petsiriwa kapatopa alabastro ibo wüng bosibü átsato, xua bichokono wüngka penasiwa xua petuxueiwa, po petuxueiwa bichokono aiña matoma. Poxonae Jesús eka pexaethopáewatha, bapoxonae bárapo petsiriwa Jesús mata epatábatsi bárapo petuxuúi túxusi nasíwatha. ⁸Poxonae Jesús pijimonae tatsi tane baxua, barapomona bichokono anáepana, yawa kaemona najeino:

—¿Eta pokotsiwa metha saya baxua xuba jane? ⁹Bárapo petuxueiwa bekaenaetsípatsi bapoxonae bexeinaetsípatsi parátixi nawita xua bapoxonae bárapo paratixitha beyawenaetsípatsi peakopeibí jiwi, najéi barapomona.

¹⁰Jesús yaputane xua pijimonae tatsi baxua pepaebiwa, daxota Jesús jeye:

—¿Eta pokotsiwa metha barapowa pabiatáneme? Pokotsiwa barapowa inta éxana ápara seikáyarü xua pexeiña koyene inta éxana. ¹¹Bárapo írathe peakopeibí jiwi paka barü jinompéibina paiña neyawenaenexa tsai bi tsane bárapo jiwi. Íchitha nama paxam jopa ataya paka barü póponae tsainchi xua pata tana neyawenaenexam bárapo írathe. ¹²Barapowa xua nenta epatáraba tapepongtha xua petuxuúi túxusi nasíwatha ápara xua tsiwanaya nenakuiyábara nakuiwüünaeta xua müthü tana neboyaenexa poxonae tüpaein. ¹³Bara xaniyang paka tsipáebatsi, daxita nákuangtha poxonae jiwi kueikueijejei tsane Nakom pía pekapanenebiyáe diwesi, bárapo jiwi yawa yábara paebina xua pokotsiwa poxonae bapowa inta éxana xua jiwi barapowa peyábara kuinantaxeinaenéxatsi, jei Jesús.

Meje yábara poxonae Judas, Jesús kaenaetaxotsi

(Mr 14.10-11; Lc 22.3-6)

¹⁴Néxata Jesús pijimonae tatsi pomona doce póyobe tatsi, bárapo doce póyobe jíwana bara kaein, bapong pewüng Judas Iscariote. Bapong Judas pona sacerdotemona pía pentakaponaewi tatsi beya xua petsipaebine xua barapomonaetha.

¹⁵Judas jeye barapomonaetha:

—¿Eta po parátixi pana nekatsíneme icha Jesús kaenaetaxubin, paiñaxantha? jei.

Néxata barapomonaetha Judas pentoma kátatsi treinta po paratiximonaebe, xua po parátixi bichokono matoma nawita. ¹⁶Barapoxonae Judas tamrópata pítaba xua jeita xua pokoyenetha Jesús pekaenaetaxubiwa tsainchi barapomonaetha, poxonae peyapuwüünáewatha.

**Meje yábara poxonae Jesús pijimonae barü
nábane Pascua wüng matakábitha**

(Mr 14.12-25; Lc 22.7-23; Jn 13.21-30; 1Co 11.23-26)

¹⁷Néxata kopiya matakabi jopa po matakabi tsíwana penantakarukúae matakabi, xua po matakábintha poxonae jiwi tsinakaetutsina xua penabanaewa tsane pan, po pan jopa múxuna pentsiyo levadura matawüng, pokotsiwa xua

kotowa éxana pan. Jesús imoxoyo kakuita umenarükúpatsi pijimonae yawa Jesús jeichíchino:

—¿Eta xota ichichípame xua ichaxota pexaewa paka tsinakuiwüünaetsinchi wanabanaenexa tsane xua Pascua wüing matakabi nexa? jei barapomonae.

¹⁸Jesús barái pijimonae, jeye:

—Tómara beya paponde, Jerusalén tómara beya. Paponde po botha pong bichokono pin tutu xeina. Bapongtha painta jande: ‘Pong jiwi Pekuidubin namchi: Bara nama tatüpaie wüünae tsane. Jiña tütutha tajiwimonae tha barü nabanaetsi pexaewa Pascua wüing matakabi nexa’, kajéi pong jiwi Pekuidubin, pajande, jei Jesús pijimonaetha.

¹⁹Jesús pijimonae tatsi bara éxana pokotsiwa báyatha Jesús pijimonae peitorobixae. Matáütano barapomonae pexaewa nakuiwüünaeta jeba Pascua wüing matakabi nexa xua penabanaenexa.

²⁰Poxonae kirei tsanaicha bapoxonae Jesús pijimonae barü eka pexaethopáewatha pomonae doce póyobe tatsi. ²¹Poxonae Jesús pijimonae barü xunaeka bapoxonae barái pijimonae, jeye:

—Bara xaniyang paka tsipáebatsi kaein pong paxam jíwana pam, bapong nekaenaetaxubina ichamonaetha xua tana nebexubiwa tsane ichamonae, jei.

²²Néxata bapoxonae Jesús pijimonae tatsi ünthüthüwekoyéi tsürüküpáe, néxata daxita tsana jei tsóponae Jesustha:

—Tanekanamataxeinaem, ápara ¿xang kakaenaetaxubinchi? jei daxita barapomonae xua Jesús tsana yaiñabapoinchi.

²³Jesús jumenota barapomonae, jeye:

—Pong kae paratotha pana nabarü jajaukungkua ponang pan, bapong ápara pong nekaenaetaxubina ichamonaetha. ²⁴Xang pongxaein Nakom Tananeitapepsin bewa tüpaiein, tsipéi Nakom Pejume Diwésitha baxua neyábara paeba kaena báyatha. Íchitha pebin tsokúae pong nekaenaetaxubina ichamonaetha. Metha jame wüünae tsipae icha bapong báyatha jopa naexanáe tsipae, tsipéi bexa tsane bichokono átene tsokúae tsane, bichokono abe tana nekana exanaexae, jei Jesús.

²⁵Néxata Judas pong Jesús kaenaetaxubinchi bapong itakaretaba, jeye Jesustha:

—Pong jiwi Nekuidubim, ¿xang ápara kakaenaetaxubinchi? jei Judas.

Jesús jumenota, jeye:

—Aja, xuaunxuae bara páebame, jei.

²⁶Poxonae Jesús pijimonae barü xunaeka, bapoxonae Jesús pekóbetha pita pan yawa Páxatha tsipaeba, jeye: “Axa, maisha jüntükoyene weiweinang xua pan pata tana nekatsiwam”, jei. Bapoxonae Jesús pekóbetha pan epajánaka yawa katsíba pijimonae. Bapoxonae pijimonae barái, jeye:

—Paxaema po pan epajánakang. Bárapo pan ápara yábara kaunuta tapepong xua poxonae tapaka tsitüpáewatsi tsainchi, jei Jesús.

²⁷Bapoxonae Jesús ekeicha pekóbetha pita korótiyo yawa Nakomtha tsipaeba, jeye: “Axa, maisha jüntükoyene weiweinang xua korotíyotha ekareka pepa uva mera xua pata tana nekatsiwam”, jei. Bapoxonae Jesús pijimonae kata korótiyo xua pejéwana aapaponaenexa. Bapoxonae jeye pijimonaetha:

—Daxita pa-aapaponde xua bárapo kae korotíyotha. ²⁸Pena peyábara tsiwüünae muxudutsi koyenewa paka tsipáebatsi. Bárapo uva mera xua tsijuntutu eka korotíyotha bárapo mera yábara kaunuta tajana xua jana othoparenaein

poxonae tüpaein. Bárapo jana tsita itapeiñaxeinaena xua jiwi pinmonae, yábara jüntemainaein abe pía peéxanae kuirukoyenein tatsi. ²⁹Daxota paka tsipáebatsi bárapo uva mera jopa ekeicha paka barü apáe tsainchi ánoxuae. Meisha abü bexa tsane ekeicha pena koyenéwatha paka barü apaeinchi, bárapo uva mera poxonae Nakom neexanaena xua itorobiya ewatsin jiwi, jei Jesús.

Meje yábara poxonae Jesús namchi xua pinae Pedro Jesús yábara jei tsainchi: “Jopa dapong yaitaeiño”, pinae yábara jei tsainchi Jesús

(Mr 14.26-31; Lc 22.31-34; Jn 13.36-38)

³⁰Poxonae Jesús pijimonae barü najumeweta xua naxüna Nakom nexa, bapoxonae Jesús pijimonae barü pona demuxuwa beya. Bárapo demuxuwa pewüng Olivowa, olivo naein peumenaexae baxota. ³¹Néxata Jesús barái pijimonae, jeye:

—Ánoxuae bárapo merawithe daxita pam pana nekuentarüküpáename, tapaka ura pentsixaetsi tsainchi. Baxua paexanáename tsipéi Nakom Pejume Diwésitha paka yábara kuitsiwüünaeya jeye: ‘Poxonae ovejamonae peewatsin bexubinchi, bapoxonae ovejamonae tsanarüküpaena’, jei Nakom. Penamchixae poxonae ichamonae newáetabina tana nebexubinexa pana nekuentarüküpáename. ³²Íchitha taeyarapaeyo poxonae ekeicha asüü neexanaena, bapoxonae paka tsíwana patopiyaeinchi Galilea nakua beya poxonae bara beya paponáename, jei Jesús.

³³Néxata Pedro Jesús jumenótatsi, jeye:

—Bekein ichamonae kakuentarüküpaena jiña neuraxubixae nama xang bápana jopa kakuentanaetsirikuae naetsirikuae tsainchi tana neuraxubixaemxae, jei Pedro.

³⁴Néxata Jesús Pedro jumebaraichi, jeye:

—Bara xaiñeya katsipáebatsi po merawithe, pewünaeya poxonae beya aiña jumekuiyobetha wákara pebto fibina, bapoxonae xam kopiya akoibi pojumekuíyobetha neyábara jam tsane: ‘Jopa dapong yaitaeiño’, neyábara jam tsane, jei Jesús.

³⁵Pedro Jesús baraichi:

—Bara bekein kapunatüpaeinchi íchitha baxua jopa kayábara paebí tsainchi, jei Pedro.

Írürü daxita Jesús pijimonae tatsi bara jumichi, nantajüpiya paeba.

Meje poxonae Jesús Paxa tsipaeba ichaxota tsika íriyo, po íriyo pewüng Getsemaní

(Mr 14.32-42; Lc 22.39-46)

³⁶Néxata Jesús pijimonae barü patopa ichaxota tsika íriyo, po íriyo pewüng Getsemaní. Baxota Jesús barái pijimonae, jeye:

—Xote abü páenare tha matha Táyatha tsipaebichi paiña kuaríyatha xotiye, jei Jesús.

³⁷Jesús barü pona Pedro. Irü Zebedeo pexántobe tatsi Jesús barü pona. Bapoxonae Jesús bichokono ünthüthüwekoyéi, yawa bichokono ünthüthüdeideijeji.

³⁸Néxata bárapo akoibi póyobetha Jesús barái, jeye:

—Bichokono jüntükoyene natsepiya wekoyang, tsipéi muxu tatüpa. Xote páenare, yawa payoyókare xua paiña tana nebarü naitaewatsinexam, jei Jesús.

³⁹Néxata Jesús ekeicha tsiwiyo dabe natsixitabiya, ira betaeungkuareka tsipéi jopa juniya ajüntitaneyo. Bapoxonae Jesús Paxa tsipaeba, jeye:

—Axa, icha ichichípame xua tana neyawenaewam tsane, newepire pokotsiwa anthüthütane neéxana. Íchitha jopa nekana exanaeinde xua pokotsiwa ichichipang, saya jame nekana éxande xua pokotsiwa ichichípame, jei.

⁴⁰Néxata Jesús ekeicha kaibe iya pijimonae tatsi beya póyobe xua akoibi póyobe, íchitha barapomonaé maita. Jesús Pedro baraichi, jeye:

—Maisha jopa paka itaküüpaeyo xua pata tana nebarü yoyokaewam xua poxonaé bekein bara kae hóratha. ⁴¹Maisha payoyókare. Nakom patsipáebare xua jopa abe paiña neexanaewa tsane poxonaé kaurimonaé pía pentakaponaéin tatsi pirai-chi paka jüntükoyene jüjüta. Paiña jüntükoyene wétsina bichokono paichichípame xua Nakom paiña netsipáebiwa íchitha paiña pepong bichokono paakoyenefáeta-bim xua paiña netsipáebiwa Nakom, jei Jesús.

⁴²Ekeicha Jesús bara nama kaeto pona xua Paxa petsipaébinexa. Poxonaé Paxa tsipaéba, jeye:

—Axa, icha jopa ichichipaem xua tana newepichiwam, pokotsiwa neajüntütane éxana, bara jopa nekana exanaeinde xua pokotsiwa ichichipang saya jame nekana éxande xua pokotsiwa ichichípame, jei Jesús.

⁴³Bapoxonaé ekeicha Jesús pijimonae beya pona xua akoibi póyobe dáichitha bárapo akoibi póyobe kame maitumena, tsipéi bichokono ítata tsakatsakéi xua itamáipana. ⁴⁴Bara néxata Jesús ekeicha saya kuenta pona. Ekeicha Jesús pona xua Paxa petsipaébinexa xua ekeicha akoibi pokuiyobetha, bárapo jumetha ekeicha Jesús Paxa tsipaéba. ⁴⁵Néxata ekeicha Jesús pona pijimonae tatsi beya. Bapoxonaé barái pijimonae, jeye:

—¡Moya bara paiña nepumaitumenaéinde aunxuae jopa Nakom patsipaéxim xua paiña nepaka kayawenaenexa! Báyatha tsuxubiba, po hóratha poxonaé xua xang pongxaein Nakom Tananeitapetsin ichüng nekaenaetaxubina ichamonaétha, pomonaétha, pomonaé peantükoyénebe jiwi. ⁴⁶Panakosapende, panonobapondenó. Antha bü poinchi. Dota dawerena pong nekaenaetaxubina ichamonaétha, jei Jesús pijimonaétha.

Meje yábara poxonaé Jesús wáetabatsi

(Mr 14.43-50; Lc 22.47-53; Jn 18.2-11)

⁴⁷Poxonaé Jesús kataunxuae tsipaébungkua pijimonae bapoxonaé Judas patopa. Bapong Judas doce póyobe jíwana kaein, xua Jesús pepa pijimonae tatsi. Judas pinmonae barü patopa. Ichamonaé kusin kajijinka. Ichamonaé iwabi kajijinka. Daxota daxita barapomonaé pata, tsipéi sacerdotemonaé pía pentakaponaéwi tatsi irü pítiri jíwirü daxita bárapo pentakaponaéwi itoroba barapomonaé. ⁴⁸Judas, pong Jesús kaenaetaxubinchi, pewünaeya tsane xua poxonaé patopa bapong kou tsiwanaya paéba bárapo pin bichéitha, kou jeye: “Pong tsutsubín, bapong ápara bárapo pebin, néxata moya pawáetabare bapong”, kou jei. ⁴⁹Daxota poxonaé patopa, bapoxonaé Judas Jesús imoxoyo kakuita poinchi, matáüta naiña Jesús jeichichi:

—Pong jiwi Pekuidubim, xamda, jei Judas.

Bapoxonaé naiña Judas Jesús tsutsúbatsi. ⁵⁰Néxata Jesús jumenota, jeye:

—Pongxaeim tajitom, moya bara éxande xua jiña nekana exanaétsi, jei.

Néxata barapomonaé pomonaé Judas pebarü patopaexae barapomonaé Jesús imoxoyo kakuita umenarükúipatsi, bapoxonaé Jesús wáetabatsi.

⁵¹Kaein pong Jesús pijimonaе tatsi jíwana, pong Pedro, bapong naiña kusi namarawejonta. Bapoxonaе bapong muxuyoro katsoniba, pong sacerdotemonaе pía pepa pentakaponaеin tatsi tanakuítatsi, bapong muxuyoro katsoníbatsi.

⁵²Néxata Jesús barái pijimonaе jíwana jintongtha, pong Pedro, jeye:

—Maisha kusi jeinka pentakuérutha. Tsipéi pong ba kúsitha namawainta, bapong ba xuya bexubinchi kúsitha. ⁵³Maisha xam jopa yaputaem! Icha ichichipang bara neitaküüpa xua Táxatha tawüükaewa, xua naiña inta peitorobinexa pía matatsunpiwi xua bichokono ayéi pin bicheitomonaе xua tana neyawenaewa tsane. ⁵⁴Icha Taxa wüükáetsipang xua bapong tana neyawenaewa tsane bapoxonaе jopa neyábara jumekuiwetsipae pokoyene báyatha Nakom Pejume Diwésitha neyábara paeba, pokoyene xua tana newaetabiwa tsane xua tana nebexubiwa tsane, jei Jesús.

⁵⁵Néxata Jesús barái pomonaetha, pomonaе Judas barü patopa, jeye:

—Pakápatame kusin yawa iwabi be poxonaе pakana ichim pongtha pong jiwi pekaibin. Daxita matakabin Nakom pin piabotha tatsi paka barü poponéibatsi, paka kuidubéibatsino, dáichitha bapoxonaе jame jopa pana newáetabim. ⁵⁶Íchitha daxita baxuang neyábara kanakuijumeweta éxana, báyatha penekuiyábara wüünaе tsiwanaya paebixae pomonaе Nakom peitorobi jume pepaebiwi, Nakom Pejume Diwésitha, jei Jesús.

Bapoxonaе Jesús kuentarükúpatsi pijimonaе, meisha Jesús barü umeinchi pomonaе Judas báyatha barü patopa.

Meje yábara poxonaе Jesús kapoinchi judiomonaе pía pekanamatakaitorobi jiwi bicheito tatsi pía peitabaratha tatsi

(Mr 14.53-65; Lc 22.54-55,63-71; Jn 18.12-14,19-24)

⁵⁷Pomonaе Jesús téikatsi barapomonaе Jesús kapoinchi pong pewüng Caifás itabaratha tatsi. Bapong Caifás, pong sacerdotemonaе pía pepa pentakaponaеin tatsi pong peaiñakuín yatsikaya. Baxota irü nanakaetuta pomonaе judiomonaе pekuidubiwichi Moisés pía peitorobi koyene tatsi, írürü pítiri jiwi pomonaе judiomonaexae. ⁵⁸Irü Pedro Jesús tsiwiyo tajü putaetaetsiníyatsi beya poxonaе patopa pánatha, po pánatha ichaxota sacerdotemonaе pía pepa pentakaponaеin tatsi táungkuatsi bo. Poxonaе Pedro pana tútutha joniya bapoxonaе imoxoyo naéka policiamonaetha pekuitaenexa xua pokoyeneya Jesús kana exanaeinchi pomonaе nakaetuta.

⁵⁹Sacerdotemonaе pía pentakaponaewi tatsi irü ichamonaeno, pomonaе pekanamatakaitorobi jiwi bicheito, daxita barapomonaе jeita ichamonaе pomonaе xua Jesús naerabiya peyábara paebinéxatsi pokotsiwa xua Jesús paeba xuano xua éxana, pía bárapo jumetha paebichi xua bara Jesús tüpa peexanaewa tsainchi.

⁶⁰Bara bekein pin bicheito pata xua Jesús abeya peyábara paebinéxatsi, íchitha kataunxuae barapomonaе pomonaе pekanamatakaitorobi bicheito, kame jopa xeinaeyo pojume naematajume tsita itapeiñaxeina pokotsiwa xua Jesús paeba xua bárapo jumetha Jesús pebexubinéxatsi. Matapaiña bapoxonaе pebinbe nakuéyatabe patópabe. Bapongbe Jesús abeya yábara páebatsibe. ⁶¹Barapongbe jeibe Jesús yábara:

—Bapong namchi: ‘Neitaküüpa xua Nakom pin píabo abe taexanaewa. Bapoxonaе ekeicha akoibi po matakábibe bárapo Nakom pin píabo tatsi xanebin’, jei, jeibe bapongbe.

⁶²Néxata bapoxonae sacerdotemonae pía pepa pentakaponaein tatsi asiya unguataba yawa bapoxonae Jesús baraichi, jeye:

—¿Jopa jumenotsim barapomonae? ¿Bara xaiñéi xua pojumein barapomonae kayábara paeba? jei sacerdotemonae pía pepa pentakaponaein tatsi.

⁶³Dáichitha saya Jesús moya unguua. Daxota bapoxonae sacerdotemonae pía pepa pentakaponaein tatsi Jesús baraichi, jeye:

—Kaitoróbatsi Nakom peitabaratha tatsi, pong asüü pópona. Yatsikaewa pae-bíname pokotsiwa bara xaiñéi nepaebiwa. Ínkane pana netsipáebare. ¿Bara yatsi-kaya xam Mesías, pong Nakom Pexantom, pong Nakom nekaitorobín? jei.

⁶⁴Jesús jumenota, jeye:

—Aa, xuaunxuae bara páebame. Paka tsipáebatsi xua pana netáename xang pongxaein Nakom Tananeitapetsin Nakom pía pekoxa weya tatsi ekaein pong peyapusúü itorobi koyenewa pexeinaein. Matáütano pana netáename poxonae ekeicha patopeikaein tsakinaebówangtha xua peitaboko wétsika, jei Jesús.

⁶⁵Néxata bapong pong sacerdotemonae pía pepa pentakaponaein tatsi pin anaetha anaya paparuwa nata tsitsinaxuba. Bapoxonae jeye:

—Po jumetha xua bapong paeba bárapo jume Nakom tsita abetsi. Nama ekeicha jopa wanantawenonaewa ichamonae xua wanaka tsipaebiwa tsane xua bapong peyábara paebíwatsi. Bapong natsi-aenae éxana abe pepaebixae bárapo jume poxonae Nakom Pexanto najainta. Paxam bara pajumetáneme pokotsiwa bapong paeba, pokotsiwa Nakom jopa ichipaeyo. ⁶⁶¿Eta xua paka yábara nantaxéiname xua pae-xanáename bapongtha abe pepaebixae? jei.

Daxita bárapo bicheito po bicheito baxota ena, jeye:

—Bara xaiñeya páebame. Jesús abe pía pepaebixae Nakom tsítatsi xua bapong tsita natsikuéntatsi. Daxota bapong bewa tüpaena, jei bárapo pekanamatakaitorobi jiwi bicheito.

⁶⁷Poxonae barapomonae Jesús itakuere kútatsi, bapoxonae peónetha Jesús itabara subábatsi, yáwano bütsino. Ichamonae Jesús itabara tsakibakótatsi. ⁶⁸Bapoxonae barapomonae Jesús baraichi:

—Xam jam: ‘Xang Mesías’, jam, ínkane pana netsipáebare: ¿Jintam káitabara tsakibóbara xua bekein paka itakuere kútatsi? jei barapomonae.

Meje yábara poxonae Pedro Jesús yábara páebatsi xua jeye:

“Jopa dapong yaitaeño”, yábara jeichichi Jesús

(Mr 14.66-72; Lc 22.56-62; Jn 18.15-18,25-27)

⁶⁹Poxonae kataunxuae Jesús kana exanómpatsi bapoxonae írürü Pedro pána-tha eka xua pesato beya. Bapoxonae írürü yábüyo, powa sacerdotemonae pía pepa pentakaponaein tatsi tanakuítatsi, bapowa Pedro imoxoyo kakuita poinchi. Bapowa Pedro jeichichi:

—Ápara xam báyatha írürü napunaponéibame Jesús, pong Galilea nakuapin, jei yábüyo.

⁷⁰Íchitha Pedro jumematawenta bapowa, daxita jiwi peitütha tatsi. Pedro jeye:

—Jopa yaputaeño pokotsiwa xua yábara páebame, jei Pedro.

⁷¹Poxonae kataunxuae Pedro ekaona xua pía ponaetsi bómüxü koiboto beya, bapoxonae irü ichawayo Pedro tainchi. Barapowa tsipaeba ichamonae pomonae baxota irü umena, Pedro yábara páebatsi, jeye:

—Ápara bapong, pong napunapoponeiba Jesús pong Nazaret tomarapin, jei barapowayo.

⁷²Ekeicha Pedro jumematawenta, jeye:

—Bara xaiñang jang. Jopa dapong yaitaeiño pong aunxuae payábara páebame, jei Pedro.

⁷³Ekeicha bapoxonae pirapaeyo Pedro imoxoyo kakuita poinchi pomonae baxota umena. Barapomonae Pedro jeichichi:

—Ápara bara xam írürü bapong pijimonae tatsi jíwanam, daxota barapojume koyeneya páebame, icha barapomonae ichi, jei.

⁷⁴Néxata Pedro dangweya jeye:

—Bara Nakom peitabaratha xaiñeya paka tsipáebatsi pokotsiwa bara xaniwai-cha tapaebiwa. Icha jopa xaiñeya paka tsipaebichipaetsi metha bárabü Nakom abe nekana exanáetsipa. Ekeicha paka tsipáebatsi, jopa dapong yaitaeiño xuaunxuae pong payábara páebame, jei Pedro.

Bapoxonae írürü kaena naiña wákara pebto fíbarü. ⁷⁵Néxata Pedro nantaxéinataba xua báyatha Jesús Pedro tsipáebatsi poxonae jeye: ‘Xam bárapo merawithe, pewünaeya poxonae wákara pebto fibina xam kopiya akoibi pojumekuíyobetha neyábara jam tsane: Jopa dapong yaitaeiño, neyábara jam tsane. Bapoxonae írü naiña wákara pebto fibina’, jeichichi Pedro, xua Jesús paeba. Néxata Pedro pesato bejoniya bichokono wekoyéi, peajüntütanexáe xua Jesús yábara páebatsi.

Meje yábara poxonae Jesús kapoinchi Pilato beya

(Mr 15.1; Lc 23.1-2; Jn 18.28-32)

27 ¹Poxonae pentha tsina sacerdotemonae pía pentakaponaewi tatsi írürü judiomonae pía pítiri jiwí tatsi, daxita barapomonae yábara nakaetuta xua nantajüpaeya pebürüya nenantaxeinaenexa pokoyeneya xua Jesús pebexubiwa tsainchi. ²Daxita barapomonae ekeicha Jesús maxükúitatsi. Bapoxonae Jesús yamaxükútsiya kapoinchi Pilato beya, pong Judea nakuapiwi peyanakua ewatsinchi xua romanomonae peitorobixae.

Meje yábara poxonae Judas piakoutha nabexuba

³Judas Jesús kaenaetaxúbatsi ichamonaetha. Poxonae bapong jumetane xua ichamonae Jesús yábara páebatsi xua bewa tüpaena abe peexanaexae, poxonae bekein jopa abe exanaeyo, bapoxonae Judas bichokono aura xua Jesús pekaenataxubixaetsi. Daxota Judas ekeicha kaewa kápona bárapo treinta po paratiximonaebe. Sacerdotemonae pía pentakaponaewi kátatsi írürü pítiri jiwí kátatsi. ⁴Judas barái barapomonae, jeye:

—Poxonae pebin kaenaetaxubang, xua jopa pong abe exanaeyo, xua poxonae ichamonae pebexubinexa xua pejanapichapabarena, xang ápara bara abe éxanang, jei.

Íchitha barapomonae Judas jumenótatsi, jeye:

—Ápara baxua jopa painta aiñakuíyiyoy. Jame ápara xam jiñakoyam poxonae baxua kana éxaname, jei.

⁵Néxata Judas bárapo treinta po paratiximonaebe anaya xoya Nakom pin piabotha. Poxonae Nakom pin píabo weya pona, bapoxonae Judas nabexuba piakoutha, nakoibotathü katütaba athawétsika.

⁶Bapoxonae sacerdotemonae pía pentakaponaewi tatsi nota po parátixi Judas bebaya. Bapoxonae barapomonae najéi:

—Jopa naka kopatsiyo xua bárapo parátixi bara wajebinxaxa Nakom pin piabotha tatsi nexa. Tsipéi ápara bárapo parátixi taxoba poxonae bárapo paratixitha komotatsi pebin xua ichamonae pebexubinexa, xua pejana pichapabarenaenexa, jei barapomonae.

⁷Bapoxonae daxita barapomonae pebürüya nantaxeinarüküpa, najéi: “Waxainchi bárapo paratixitha komotinchi tsika íriyo, po iriyotha jintong tsórobong noteiba xua juruwatong peexaneibinxaxa. Bárapo iriyotha tsane xua pemüthükeibinxaxa tsainchi poxonae werapeibina pomonae penanapaincha jinompaewi xua icha nakua wérena peponaewi”, najéi. ⁸Daxota bárapo íriyo barapomonae wüngduta po wüng jeye: “Pejana ira”, jei. Po íriyo bárapo wüngtha kataunxuae jiwi wüng ununutapona beya ánoxuae. ⁹⁻¹⁰Báraxua barapomonae éxana xua báyatha pekuiyábara tsiwüünaeya wüünaetsi muxudutsiya jeixae pong Nakom peitorobi jume pepaebin, pong pewüng Jeremías pong kaena báyatha tüpa. Bapong Jeremías jeye: “Israelmonae pía pentakaponaewi tatsi katsina treinta po paratiximonaebe ichüngtha xua poxonae pekaenaetsixae tsainchi pong pejüntükoyene xeikaein. Bárapo matómatha kanamatomatsinchi pong pejüntükoyene xeikaein. Barapomonae baxua kana exanaena bapongtha tsipéi barapomonae pebürüya nantaxeinarüküpa pekanamatomatsinexa. Bapoxonae ekeicha barapomonae kaewa pichina bárapo treinta po paratiximonaebe. Bárapo paratixitha barapomonae íriyo komotsina, po iriyotha jintong tsórobong noteibina xua exaneibina juruwatong. Baxua bara barapomonae éxana be pókotsi koyeneya Nakom pong jiwi Pekanamataxeinaein nejumekuí itoroba”, jei Jeremías.

Meje yábara poxonae Jesús unguia Pilato peitabaratha tatsi

(Mr 15.2-5; Lc 23.3-5; Jn 18.33-38)

¹¹Jesús kataunxuae unguia Pilato peitabaratha, pong Judea nakuapiwi peyanakua ewatsinchi. Bapong Pilato Jesús yáñabatsi, jeye:

—¿Bara yatsíkaya xam judiomonae itorobiya pía pepa Neéwatsin? jei.

Jesús jumenota, jeye:

—Aa, xuaunxuae páebame bara baxua ápara, jei Jesús Pilato beya.

¹²Sacerdotemonae pía pentakaponaewi tatsi irü judiomonae pía pítiri jiwi tatsi, daxita barapomonae Jesús abe yábara páebatsi xua pinae abe éxana. Dáichitha Jesús jopa jumebarabotsiyo barapomonae. ¹³Néxata daxota Pilato Jesús baraichi, jeye:

—¿Jopa jumetaem pokotsiwa barapomonae bichokono abe kayábara paeba? jei.

¹⁴Íchitha Jesús jopa jumenotsiyo Pilato xua pokotsiwa ichamonae Jesús abe peyábara paebíwatsi xua matáüta kae jumekoyenéwatha jopa jumenotsiyo. Daxota Pilato bichokono yábara nantükoyene kuikabenaeka baxua.

Meje yábara poxonae Pilato jumebarü jejéi xua Jesús bara pebexubiwa tsainchi ichamonae

(Mr 15.6-20; Lc 23.13-25; Jn 18.38—19.16)

¹⁵Bara nama, Pilato ba píakui xeina poxonae ba jiwi tsinakaetuta pexaewa penanabanaenexa. Bárapo matakábitha Pilato ba kaein jíwana pusotaba pomonae

jiwi pekübibotha peenaewi. Pilato ba pusotaba pong ba jiwi itapeta kowai xua Pilato peishanaxubinexa. ¹⁶Bárapo jiwi pekübibotha írürü eka pong bichokono abe peexanaein, pong peyaputaeinchi daxita jiwi poxonae abe exaneiba. Bapong pewüing Barrabás. ¹⁷Poxonae jiwi nakaetuta, Pilato barái bárapo jiwi, jeye:

—¿Eta pong pusotabokuaein? ¿Metha Barrabás jampa? ¿Metha Jesús jampa, pong Mesías baraichi? jei Pilato.

¹⁸Baxua Pilato paeba tsipéi bapong yaputane xua pomonae pekanamatakaitorobi bicheito, Jesús peuwixaetsi, kaenaetaxúbatsi Pilatotha.

¹⁹Poxonae Pilato kataunxuae pía peekaethopeibíwatha eka xua Jesús peyábara paebinéxatsi penatsikuentsiwa bapoxonae Pilato píowa tatsi najumekaitoroba ichüingtha xua jeye: “Jopa kopatsinde xua bapong pebexubinéxatsi ichamonae, tsipéi ápara bapong pejüntükoyene xeikaein. Yáitama tsipéi mérawi bapong kamaitang daxota bichokono anthüthürewein, tsipéi bapong dapokotsiwa bexotsi”, jei bapong xua Pilato píowa tatsi najumekaitoroba.

²⁰Íchitha sacerdotemonae pía pentakaponaewi tatsi, írürü judiomonae pía pítiri jiwi tatsi, daxita barapomonae jiwi kuitsakárabatsi, xua bárapo jiwi Pilato pekuiitorobinéxatsi xua Barrabás pepusotabinéxatsi, matáütano xua Jesús pebexubinexatsino. ²¹Bapong Pilato ekeicha barái jiwi, jeye:

—¿Eta pong pusotabokuaein kaein xua bapongbe jíwana? jei. Barapomonae Pilatotha jeye:

—Maisha Barrabás pusotábare bara, jei barapomonae.

²²Ekeicha Pilato yáñaba barapomonae, jeye:

—¿Eta xua kana exanokuaein Jesús pong Mesías baraichi? jei.

Néxata pinmonae Pilato jumedangweya jumenótatsi, jeye:

—¡Bewa maisha náetotha tüparukua exanaem! jei barapomonae.

²³Néxata Pilato jumebarái, jeye:

—¿Eta pokotsiwa xua metha jane xua abe éxana? jei.

Ekeicha daümetha barapomonae jumedangweya jeye:

—¡Bewa maisha náetotha tüparukua exanaem! jei.

²⁴Poxonae Pilato yaputane xua nama ta-aibichiba pokotsiwa bapong pepaebinexa pikoya, xua peajumetsákaxae barapomonae, daxota Pilato itoroba ichüing xua petaxawenaenexa tsainchi mera. Bapoxonae bárapo mérathera nakobekiataxuba bárapo jiwi peitütha tatsi. Bapoxonae bapong namchi, jeye:

—Xang ápara jopa takoutha bexuba exanaeiño bapong xua daxota pejanapichapabarena pong jopa bekein abe exanaeyo. Poxonae nakobekiataxubang mérathera, baxua tsita itapeiñaxeinang xua ápara jopa takouthiño. Ápara jame paiñakoutha pam poxonae bexuba paéxaname pong abe jopa exanaeyo, jei Pilato.

²⁵Daxita barapomonae ekeicha namchi, jeye:

—¡Paxang irü pata tamómoxi susato jiwi pata koutha pang ápara xua bapong bexotsi paéxanang! jei daxita bárapo jiwi.

²⁶Néxata Pilato nama pusotaba Barrabás. Bapoxonae itoroba xua soldadomonae bara Jesús moya bichokono pekuainchinéxatsi pokotsíwatha eewa xua bichokono amüüpiya xua xota ba jiwi kuaintéibatsi poxonae abe exaneiba. Matáütano itoróbano xua moya bara Jesús tüparukua exanaeinchi náetotha.

²⁷Bapoxonae soldadomonae Jesús kapoinchi Pilato píabo tatsi beya po soldadomonae yapu-eena Pilato píabo tatsi. Bapoxonae bárapo soldadomonae waba icha

soldadomonaе xua daxita bárapo soldadomonaе Jesús pematawakaicha umenaenexa tsainchi. ²⁸Bapoxonaе Jesús pía paparuwa jumaxuéna-tsi yawa jumaxátata-tsi icha paparuwa, po paparuwa tsobia xua Jesús be pekana exanaenéxatsi pong jiwi itorobiya pepa Peewatsinchi. ²⁹Bapoxonaе kuane tepa xua peé tepa, yawa bapoxonaе Jesús kanamitontsiya mataxátatatsi baxua xua kana éxanatsi icha be ichi pong jiwi itorobiya pepa peewatsin poxonaе mataxátatatsi tepa. Matáütano Jesús kobenátatsi naewa icha be ichi pong jiwi itorobiya pepa peewatsinchi poxonaе naewa kobenátatsi poxonaе itoroba jiwi. Bapoxonaе Jesús peitabaratha tatsi pentabokototha táenatsi xua Jesús naerabiya pebarükui-iturajinaenexa tsainchi. Bapoxonaе Jesús kuikapónatsi, jeye:

—¡Jako judiomonaе itorobiya pepa Neéwatsim! jei barapomonaе xua Jesús kanamitóntatsi.

³⁰Matáütano Jesús yábara naonesubábatsi. Matáütano Jesús kobewepítatsi naewa. Bapoxonaе bárapo náewatha Jesús matakuaíntatsi. ³¹Poxonaе Jesús kana-kuiwétatsi xua kuikapónatsi, ekeicha bapoxonaе Jesús kaewa jumawejóntatsi xua po paparuwa tsobia. Bapoxonaе ekeicha kaewa jumaxátatatsi po paparuwa pía paparúwaxae tatsi. Bapoxonaе Jesús kapoinchi xua tüparukua peexanaenéxatsi náetotha.

Meje yábara poxonaе Jesús tüparukua éxanatsi náetotha

(Mr 15.21-32; Lc 23.26-43; Jn 19.17-27)

³²Poxonaе Jesús námtotha ka-enapoinchi soldadomonaе, bapoxonaе bárapo soldadomonaе taeba pebin, pong Cirene tomarapin. Bapong pewüing Simón. Bapoxonaе bárapo soldadomonaе Simón itoróbatsi xua pekaponaenexa Jesús pía naeto tatsi, po náetotha tüparukua peexanaenéxatsi Jesús.

³³Bapoxonaе Jesús barü pátatsi ichaxota po uruto be jintong matasipa piwa. Daxota bárapo uruto jiwi wüing únuta “Gólgota”, jei. ³⁴Baraxotiya Jesús ápatatsi vino mera, po vino mera ekeicha múxuna epareka hiel mera matawüing po mera bichokono atsuwüüwa. Poxonaе Jesús mene pana, bapoxonaе Jesús aichaxaibi apa bárapo mera.

³⁵Poxonaе Jesús kanakobewétatsi xua náetotha tüparukua éxanatsi, bapoxonaе soldadomonaе natatsaba Jesús pía paparuwang tatsi. Barapomonaе ibótixi bebeya penakueranta notsinexa Jesús pía paparuwang tatsi. Pong beta xoya ibótiyo bapong kopiya pita Jesús pía paparuwang tatsi. ³⁶Néxata bárapo soldadomonaе Jesús yapukáenatsi poxoru jopa ichipaeyo xua Jesús pepanepaewa tsane. ³⁷Jesús pentutu wétsika tadútatsi napaewa xua bárapo napáewatha tina. Bárapo petinadutsiwa jeye: “Bapongje ápara judiomonaе itorobiya pía pepa Peewatsinchi”, jei bárapo petinadutsiwa xua napáewatha tinaduta.

³⁸Írürü pongbe jiwi pekaibinbe tüparukua exanátsibe náetotha ichaxota imoxoyo Jesús dukua. Ichüing Jesús petsokona wetaungkuíyatsi, ichüing pekoxa wetaungkuarénatsi. ³⁹Pomonaе Jesús xentapoinchi barapomonaе Jesús kuikapoinchi, yawa Jesús yábara ítata naichakébatsi. ⁴⁰Barapomonaе Jesús jeichichi:

—Xam báyatha jam: ‘Nakom pin píabo abe exanaein, bapoxonaе ekeicha akoibi po matakábibe xaneibin’, jam. Moya bara jiñakoutha nakapanépare naeto wétsika icha bara metha Nakom Pexantom tatsim, jei barapomonaе.

⁴¹Írürü barichi sacerdotemonae pía pentakaponaewi tatsi írürü pomonae jiwi pekuidubiwi Moisés pía peitorobi koyene tatsi írürü judiomonae pía pítiri jiwi tatsi, daxita barapomonae Jesús kuikapánatsi. Daxita barapomonae najéi:

⁴²—Bapong kain kapanepeibabei ichamonae, kame jopa nakapanepaeyo. Icha bara bapong israelmonae itorobiya pía pepa Peewatsinchi, bü bapong piakoutha naeto wétsika ekoinka, xaiña bapoxonae jumekowúntatsi. ⁴³Bapong jumekowúnta Nakom, xua bepa pinae kapanepaeinchi, xua Nakom kapanepaena. Icha Nakom ichichipa, bü bara moya kapanepaena, tsipéi kaena báyatha naka jei: ‘Ápara xang Nakom Pexantong’, naka jei, jei barapomonae.

⁴⁴Barichirü baxua paeba pongbe jiwi pekaibinbe, pongbe xua írürü kobemata-tabarútatsibe náetotha. Bapongbe írürü Jesús kuikapónatsi.

Meje yábara poxonae Jesús tüpa

(*Mr 15.33-41; Lc 23.44-49; Jn 19.28-30*)

⁴⁵Poxonae Jesús kataunxuae dukua náetotha, bapoxonae daxita nákuangtha bichokono aitakiri xua poxonae matáeíñaxae weya, beya yatabopiya. Tres po hórabe kirei tsungkuae. ⁴⁶Bapoxonae Jesús jumedangweya wawái, jeye: “Elí, Elí, ¿lema sabactani?” jei, (bárapo jumetha xua jei: “Ta Nakom, Ta Nakom, ¿eta pokotsiwa metha nepunaxúbame?” jei Jesús.)

⁴⁷Ichamonae pomonae Jesús baxota jumetaeumeinchi, barapomonae jeye:

—Pajumetaema. Bapong waba, Elías wábatsi, pong Elías Nakom peitorobi jume pepaebin, pong kaena báyatha tüpa, jei.

⁴⁸Bapoxonae kaein naiña kuinaepoiña pong barapomonae jíwana yawa pítaba esponja xua baxota pemene kapichinexa vino mera xua po mera mene atsu. Poxonae bapong baxota mene kapita, bapoxonae náewatha duta xua Jesús petayoichae-néxatsi xua peapaenexa. ⁴⁹Íchitha ichamonae namchi, jeye.

—Abü, abü jopa apatsinde. Waxainchi abü matha taeinchi icha Elías patopeikaena xua bapong pekapanepaenéxatsi, jei barapomonae.

⁵⁰Ekeicha Jesús jumedangweya wawái, bapoxonae nama tüpanaicha Jesús.

⁵¹Bapoxonae paparuwa, po paparuwa Nakom pin piabotha dukua, bárapo paparuwa naiña bopiya matonta tsitsikeika aiña epatobe náexanabe. Matáütano ira jijiyataxuba, matáüta ibo wapakouna. ⁵²Po múthüngtha pomonae pewerapeibiwi bobena, bárapo múthüng koibotupa wapakouna pokotsiwa koiboxatababanoba xua pin ibo pana wang. Bárapo múthüngtha kataunxuae abü saya bobena pomonae kaena báyatha wérapa. Pirapaeyo akoibi po matakabíyobe poxonae Jesús asüü juina éxanatsi, xua Nakom éxana, bapoxonae írürü pomonae báyatha pejumekowúntsíwichi Nakom pomonae xua báyatha pewerapaexae barapomonae irü asüü jujuina éxanatsi xua Nakom éxana. ⁵³Bapoxonae daxita barapomonae múthü wei-yiya. Daxita barapomonae, Jerusalén tómara beya pona po tómaratha xeina Nakom pin píabo tatsi. Barapomonae naitüüta pinmonaetha Jerusalén tomarapíwitha.

⁵⁴Bapoxonae soldadomonae pomonae Jesús yapuénatsi írürü bárapo soldadomonae pía pentakaponaein tatsi, pong romanomonaepin poxonae daxita barapomonae tane xua ira jijiyata yawa xua tane icháwangno, bapoxonae barapomonae bichokono junuwa. Bapoxonae barapomonae jeye:

—¡Ápara bara yatsikaya bapong Nakom pepa Pexanto tatsi! jei bárapo soldadomonae.

⁵⁵Barichi irü aiñáwaxi yábüxi, barapówaxi Jesús tsiwiyo tajü wetaeuméiñatsi. Barapówaxi Jesús báyatha matha punajinómpatsi xua poxonae Galilea nakua weya pona xua Jesús peyawenaenéxatsi. ⁵⁶Barapówaxi jíwana, ichowayo pewüng María Magdalena, powa Magdala tomarapiwayo. Ichowayo pewüng María, Santiago irü José bapongbe péñabe tatsi. Ichowayo pewüng Salomé bapowa Zebedeo píowa tatsi, xua irü bapowa Santiago irü Juan bapongbe pena tátsibe.

Meje yábara poxonae Jesús petüpaein ibo müthütha yauxatababótatsi

(Mr 15.42-47; Lc 23.50-56; Jn 19.38-42)

⁵⁷Poxonae kirei tsanaicha, pebin patopa ichaxota Jesús náetotha tüparukua. Bapong kopei pexeinaein. Bapong pewüng José. Bapong Arimatea tomarapin. Matáüta bapong irü Jesús pía pepunajinompawewichi jíwanapin tatsi pomonae Jesús pía pejumekowüntsiwichixaetsi. ⁵⁸Bapong pona Pilato beya pewüükaenexa xua Jesús petüpaein. Néxata Pilato najumekaruta xua bara José pekatsinéxatsi Jesús petüpaein. ⁵⁹José néxata pita Jesús petüpaein. Bapoxonae pena paparúwatha matakiontabareka xua pexeña paparuwa. ⁶⁰Bapoxonae José müthü iya Jesús bótatsi pena ibo müthütha, po müthü bekein José pía müthü tatsi xua poxonae petüpaewa tsane. Poxonae José nakobeweta xua yauxatababota pin ibo panáwatha, bapoxonae pónataba. ⁶¹Baxotiya ibo müthü itapatha eka María Magdalena, powa Magdala tomarapiwayo. Irü ichowáyorü María baxota naéka.

Meje yábara poxonae Pilato itoroba soldadomonaexua Jesús peyamüthü eenaenexa tsainchi

⁶²Icha matakábitha po matakábitha pentakeiseikáe matakabi bapoxonae sacerdotemonaexa pía pentakaponaewi tatsi írürü fariseomonaexa daxita barapomonaexa pona Pilato beya. ⁶³Barapomonaexa Pilato jeichichi:

—Pong pata Tanekanamataxeinaem, panantaxeinang xua bárapo pemuxuitorobin poxonae kataunxuae pópona, pana tsipaeba, jeye: ‘Poxonae akoibi po matakábibe tsuxubi tsane ekeicha asüüing tsane petüpáe koyenekuiru weya’, pana jei bapong. ⁶⁴Daxota xam itoróbare soldadomonaexa xua xaniwaicha peyapueenaenexa müthü xua beya poxonae akoibi po matakábibe tsuxubi tsane. Baxua éxande xua jopa pepatsinexa tsane müthü beya Jesús pía pepunajinompawewichi, tsipéi bü mérawi barapomonaexa píchapa Jesús pía pepong. Tsipéi pírapae naerabíchipa jíwitha jei tsipae: ‘Báyatha ekeicha asüü éxanatsi petüpáe kuirukoyene weya’, jei tsipae xua Jesús yábara náerabatsi. Barapomonaexa baxua naerabíchipa jíwitha, baxua bichokono abe tsipae, beyakaincha poxonae Jesús báyatha pokotsiwa paeba xua pemuxuitorobiwa, jei barapomonaexa.

⁶⁵Pilato barái barapomonaexa, jeye:

—Bara moya pataema. Moya panore soldadomonaexa. Moya müthü beya pabarüponde. Paexande pokotsiwa panantawénoname xua bü moya bárapo soldadomonaexa xaniwaicha yapu-eenaena, jei Pilato.

⁶⁶Néxata barapomonaexa irü soldadomonaexa bara beiyiya. Bapoxonae müthü koi-bodangwéi exananota. Bichokono barapomonaexa kateitabanota xua pin ibo panawa xua müthü boupa ata. Matáütano bichokono barapomonaexa pemákatha epataütarena boupa kütabarena bárapo peboupa patsiwa, xua peyaputaenexa icha ichüing

namicha patopa xua pekaibinexa Jesús petüpaein. Bapoxonae barapomonae kuenta dendena soldadomonae xua bárapo soldadomonae peyapuenae nexa müthü.

**Meje yábara poxonae Jesús ekeicha asüü juina
éxanatsi petüpáe kuirukoyene weya**

(Mr 16.1-8; Lc 24.1-12; Jn 20.1-10)

28 ¹Poxonae po pentakeiseikáe matakabi yapukáewaba, bapoxonae matakabi jopa po matakabi xua nantakarukua xua kae semánatha xua penakuichí matakabi. Bárapo matakaiha María Magdalena, powa Magdala tomarapiwayo irü ichawayo María, barapowáyobe kaemúbotha siwapónabe müthü ichaxota Jesús yamüthü ungkua. ²Bapoxonae naiña ira jijiyataxuba tsipéi Nakom itoroba matatsunpin xua peitaboko wétsika pona. Bárapo matatsunpin yaupataxubanota bárapo pin ibo panawa. Bapoxonae bárapo ibo panáwatha ekopiya. ³Bárapo matatsunpin bichokono daedaena icha be yamüxükoicha ichi. Paparuwa bichokono ínapana. ⁴Poxonae soldadomonae baxua taerüküpa bichokono kuitaya jijiyéi tsürüküpáe, mexeya poxi wérapa íratha bobena, tsipéi bichokono junuwa. ⁵Bárapo matatsunpin namchi barapowáyobetha, jeye:

—Jopa pajunuwíndebe. Bara yaputang xua pawenawénambe Jesús xua paiña táetsibe, pong tüpa exanadútatsi náetotha jiwí. ⁶Xote ápara bapong aibi. Ápara báyatha ekeicha asüü juina éxanatsi petüpáe kuirukoyene weya, xua kaena báyatha paiña nepaka katsipáebixae. Ínkane anetha xote, pakoutáemabe ichaxota bapong petüpaein bótatsi báyatha. ⁷Naiña papóndebe weye, patsipáebarebe Jesús pijimonae tatsi. Pajándebe: ‘Bara bekein bapong báyatha tüpa íchitha ekeicha asüü juina éxanatsi petüpáe kuirukoyene weya. Bapong kopiya paka tsíwana ponaena Galilea nakua beya. Baxotiya bapong patáename, pana nejéi matatsunpin’, pajándebe Jesús pijimonaetha. Poxonae bapong patáename, bapoxonae payaputáename xuaunxuae paka tsipáebatsi bara ápara xaniyéi, jei matatsunpin.

⁸Bapoxonae bárapo yabúyobe müthü weya naiña póntababe. Junuwiya jüntükoyene weiwénabe. Barapowáyobe kuinaepoiñabe Jesús pijimonae tatsi beya xua diwesi kapónabe pokotsiwa matatsunpin paeba. ⁹Poxonae barapowáyobe epatotha kataunxuae kuinaekaponabe bapoxonae Jesús jemeicha unguataba barapowáyobe pía xantha tatsi. Jesús jeye barapowáyobetha: “Jako”, jei Jesús. Barapowáyobe imoxoyo kakuita pónabe ichaxota Jesús, bapoxonae pentabokotha úngkuabe yawa taxuwaetábabe xua Jesús wüünae pejainchinéxatsi. ¹⁰Jesús barái barapowáyobe, jeye:

—Jopa pana nekunuwíndebe. Papónarebe tajiwimonae beya. Patsipáebarebe pajándebe: Jesús paka itoroba bepa pinae paponnem Galilea nakua beya. Bepa pinae baxotiya pataem, pajándebe, jei Jesús.

**Meje yábara poxonae soldadomonae naerabiya paeba,
jeye: “Jesús pijimonae petüpaein pítatsi”, jei**

¹¹Poxonae bárapo yabúyobe kataunxuae námtotha ekapónabe, bapoxonae icha soldadomonae jíwana, po soldadomonae Jesús yamüthü eénatsi, bárapo soldadomonae tómara beya pona. Matáüta sacerdotemonae pía pentakaponaewi tatsi tsipáebatsi daxita pokotsiwa xua xuang tane. ¹²Bárapo sacerdotemonae pía pentakaponaewi tatsi pona pítiri jiwí beya xua kaemonae peyábara natsipaebinexa xua

Jesús petüpaein yábara. Bapoxonae daxita barapomonae soldadomonae parátixi nawita katsíbatsi xua jiwi naerabiya petsipaebinéxatsi. ¹³Bapoxonae barapomonae soldadomonae baraichi, jeye:

—Patsipáebare jiwi xua mérawi poxonae pamaituméname Jesús pijimonae tatsi pata, yawa xua bapoxonae petüpaein pítatsi. ¹⁴Icha Pilato pong peyanakua ewatsin jiwi jumetaebina xua Jesús petüpaein aichúrukuae, yawa icha bapong baxua yábara paka yaiñabina, bapoxonae néxata paka yábara jumeyawenaeinchi xua bapong jopa paka jutebi tsane, jei barapomonae.

¹⁵Néxata bárapo soldadomonae nota parátixi yawa jiwi tsipaeba tsiníyatsi xua sacerdotemonae pía pentakaponaewi tatsi peitorobixae. Bárapo penáerabi jume diwesi, judiomonae jumekowüntapona. Ánoxuae barichi po judiomonae ánoxuae jinompa, jumekowüntapona bárapo diwesi.

**Meje yábara poxonae Jesús kui-itoroba pijimonae xua pía diwesi
tatsi daxita nákuangtha petapaebiwa tsainchi**

(Mr 16.14-18; Lc 24.36-49; Jn 20.19-23)

¹⁶Néxata once póyobe pomonae xua Jesús pijimonae tatsi barapomonae nawi-biya Galilea nakua beya. Bapoxonae barapomonae demuxuwa beya pona, po demuxuwa pinae Jesús kaunuta xua pinae baxota patopaena. ¹⁷Poxonae bárapo once póyobe baxota Jesús taerúküpatsi, ichamonae Jesús wüünae jáintatsi, bekein ichamonae aiña jüntükoyenein xeina xua Jesús xapain beta jopa yábara jumeko-wüntichi. ¹⁸Néxata Jesús pijimonae imoxoyo kakuita pona. Bapoxonae jeye:

—Nakom nekata daxita peayapusúü itorobi koyene xua peitabókotha nexa, matáütano po kae pin nákuathe tsikenéxano. ¹⁹Papónare daxita karepaya jíwi-tha xua daxita nákuangtha. Jiwi pakana éxande xua tana nejumekowüntsiwa tsane. Daxita pomonae tana nejumekowüntsiwi pabautisábare. Poxonae pabautisábame Taxa pewüing pawüingtäibare, matáütano pana newüingtäibare, pongxaein Nakom Pexantong, matáütano Nakom pía Pejumopetünaxü tatsi pawüingtäibare xua bárapo akoibi wüingthabe paiña paka nepaka yawenaenexa pía peayapusúü itorobi koyenéwatha. ²⁰Daxita barapomonae pakuidúbare daxita xua xuang pokotsiwa báyatha paka itoróbatsi. Matáütano paiñaxoba pajüntemáiname xua daxita matakabin bara ataya paka barü poponeibinchi beya poxonae tsane xua ekeicha patopeikaein, jei Jesús pijimonaetha.

Baja Mateo.

Jesucristo Pía Pexeiña

Jume Diwesi Tatsi Marcos

Petináe Diwesi

**Meje yábara poxonae Juan pong Pebautisabin jiwi
kuiruba ira xuépana susato tsúrukuae nákuatha**
(Mt 3.1-12; Lc 3.1-9,15-17; Jn 1.19-28)

1 ¹Bárxue tamrópata pítabang xua Jesucristo pía pexaiña jume diwesi tatsi. Bapong Jesucristo, Nakom Pexanto tatsi.

²Báyatha Nakom pía peitorobi jume pepaebin, pong pewüng Isaías, bapong tina petináe diwésitha. Isaías tina Nakom nexa, Nakom bárapo diwésitha jeye Pexántotha:

“Itorobin kopiya pong tana najumekaitorobin xua katsiwanaya itorobinchi. Bapong kana exanaena jíwitha xua jiwi yábara aura tsane abe pía peéxanae kuirukoyenein tatsi, xua poxonae nepatopae wüünaeya tsane.

³Pong itorobin bapong jumetang pong xua wawái ira xuépana susato tsúrukuae nákuatha.

Bapong wawaya jeye:

‘Patsinajüntükoyene wüünaere,

pong jiwi pía pepa Pekanamataxeinaeinchi nexa pía pepatopáe wüünaeya tsane’,

jei pong xua wawái”,

jei Isaías petináe diwésitha.

⁴Néxata Juan pong Isaías peyábara paebixae bapong ira xuépana susato tsúrukuae nákuatha patopa. Bapong Juan bautisaba dukuanaebiya, xua jiwi bautisábatsi mérangtha. Matáütano bapong tsipaeba jíwitha Nakom pía pexaiña jume diwesi tatsi. Bapong Juan jeye jíwitha:

“Icha jüntükoyene paxéinare paiña neáuraxae xua abe paéxaname.

Bapoxonae Nakom paka yábara jüntemainaena abe paiña neexanáe kuirukoyenein”,

jei Juan.

⁵Daxita Judea nakuamonae, írürü Jerusalén tomarapiwi, daxita barapomonae pona ichaxota beya Juan bautisaba jiwi ira xuépana susato tsúrukuae nákuatha. Poxonae barapomonae nayopita Nakomtha xua bepa pinae Nakom tsita áuratsi xua abe peexanaexae bapoxonae barapomonae Juan bautisaba Jordán ménetha.

⁶Juan jumaina duwein nabókoto, po duwein pewüng camello. Koreiña bókoto maraina. Xane pokotsiwa yapupuna pokotsiwang be sure poxi. Matáütano bana daeba. ⁷Barapong pomonaetha pebautisabixae tsipaeba, jeye: “Pong

nepunapatopaena, ápara bapong Mesías. Bapong bichokono peayapusüü itorobi koyenewa xeina beyakaincha xang. Bapong pong jiwi pía Pekanamataxeinaeinchí. Xang bichokono tapawin daxota bapong bichokono tsita pin ura xeinang xua tataxumúü ishanaxubiwa tsane pía penataxuxatatsiwa tatsi. Tsipéi xang bichokono tapawin, beyakaincha pomonae amanaya petanakuichiwi pía pentakaponaewi poxonae barükui-iturajina pía pentakaponáewichi. ⁸Paka bautisábatsi méraþha, íchitha nama barapong Mesías paka bautisabina Nakom pía Pejumopetünáxüþha tatsi poxonae Nakom paka najumopekatsibina”, jei Juan jíwitha xua Jesús yábara.

Meje yábara poxonae Jesús bautisábatsi

(Mt 3.13-17; Lc 3.21-22)

⁹Bárapo dapaetha Jesús Nazaret tómará weya pona, po tómará eka Galilea nákuþha. Bapong Jordán ménetha patopa, ichaxota Juan bautisaba. Baraxota Jesús bautisábatsi. ¹⁰Poxonae mene wejuina barapoxonae kaena naiña Jesús itaboko nekoicha xua peitaboko nayausanaxuba. Jesús tane xua Nakom pía Pejumopetünaxü tatsi patopa bapongþha xua be topiboto yaruneika. ¹¹Barapoxonae Jesús jumetane pokotsiwa peitaboko wetsipaebíkatsi, jeichichi: “Xam ápara Taxantom, pom bichokono kaantobetsi, pom kaitapétatsi. Nejüntükoyene weiweina éxaname”, jei Nakom.

Meje yábara poxonae Jesús jüntükoyene jüjútatsi kaurimonae pía pentakaponaein tatsi xua Jesús abe koyeneya petaexanaenexa tsane

(Mt 4.1-11; Lc 4.1-13)

¹²Poxonae Jesús nanakuiwétatsi xua bautisábatsi bapoxonae Nakom pía Pejumopetünaxü tatsi Jesús naiña itoróbatsi ira xuépana susato tsúrukuae nakua beya. ¹³Jesús ira xuépana susato tsúrukuae nákuþha pópona cuarenta po matakábibe. Baraxota pichiwang xua kamatsawang jinompa ichaxota Jesús pópona pokotsiwang bichokono átsaka. Kaurimonae pía pentakaponaein tatsi, pong Satanás Jesús piraichi jüntükoyene jüjútatsi xua Jesús abe koyeneya petaexanaenexa tsane. Pírapae matatsunpiwimonae po matatsunpiwimonae Nakom itoroba, barapomonae pata Jesustha xua Jesús pekuimatateikaenexa tsainchi, matáütano xua peapatsinéxatsi tsainchi.

Meje yábara poxonae Jesús tamrópata pítaba pía penakuichiwa xua Galilea nákuþha

(Mt 4.12-17; Lc 4.14-15)

¹⁴Néxata poxonae ichamonae Juan maxüwáetabatsi xua peetsinéxatsi jiwi pekübiboþha, bapoxonae Jesús Galilea nákuþha patopa. Jesús paebarukua-naeta jíwitha Nakom pía pexaiña jume diwesi tatsi. ¹⁵Jesús namchi jeye: “Nakom báþha yábara nekanakuiweta éxana pokoyeneya xua poxonae tapatopaewa. Daxota jiwi itakúüpatsi xua náexana Nakom piyamonae, pomonae Nakom itorobiya peewatsixae. Daxota icha jüntükoyene paxéinare Nakomþha xua paiña neáuraxae xua abe paéxaname, Nakom piyamonae paiña nenaexanaenexa tsane. Pajumekowünde Nakom pía pexaiña jume diwesi tatsi”, jei Jesús.

**Meje yábara poxonae Jesús waba cuatro póyobe pebiwi,
pomonaé duwéi peyamaéwéi**

(Mt 4.18-22; Lc 5.1-11)

¹⁶Poxonae Jesús pona Galilea pukua itapatha, bapoxonae tane pongbe peyaxunubinbe duwéi. Ichüing pewüing Simón, ichüing pewüing Andrés. Bapongbe bara kae pewéichobe. Bapongbe pewéichobe duwéi yamonáuyabe púkuatha. ¹⁷Jesús waba, barapongbe wabatsibe. Jesús jeye:

—Anetha, pana nepunapondebe. Paka kuidubínchibe. Ánoxuae nama xang paka exanáeinchibe xua pinmonae payawenáenamebe xua barapomonae pejumekowüntsiwa tsane Nakom icha báyatha páichimbe poxonae payamónamebe duwéi nawita, jei Jesús.

¹⁸Bara kaena barapongbe bótabe bárapo peyamaéwéi. Bapoxonae napunapónabe Jesustha.

¹⁹Jesús ekeicha pona. Bapoxonae ekeicha ichüingbe táinchibe. Barapongbe Santiago, irü Juan. Bapongbe Zebedeo pexántobe tatsi. Jératha matakera báuyabe peyamaéwéi xua ukupona. ²⁰Jesús naiña waba, bapongbe wabatsibe: Jesús baraibe: “Anetha, pana nepunapondebe”, jei Jesús. Bapongbe paxa kuenta pónabe jera weya, pong pewüing Zebedeo. Matáütano kuenta pónabe pomonaé Zebedeo pía peyawenae jíwichi tatsi xua yamaé duwéi. Bapongbe Jesustha napunapónabe.

Meje yábara pebin pong yakauríbatsi

(Lc 4.31-37)

²¹Bapoxonae Jesús pijimonae barü pona Capernaum tómará beya. Bapoxónaerü judiomonaé barompaya pía pentakeiseikáe matakabi tatsi tsuxubi. Bárapo matakábitha Jesús pijimonae barü joniya judiomonaé pía penakaetutsibotha tatsi. ²²Bárapo jiwí yábara najüntükoyene kabenaeka, tsipéi pokotsiwa Jesús barapomonae kuidúbatsi be pong peyaputaéin pía peyapusúü itorobi jumekoyeneya tatsi paeba. Jesús jopa kuidubiyo be judiomonaé pía pekuidubiwi piyakoyeneya tatsi. ²³Pebin pong yakauríbatsi barapong eka bárapo judiomonaé pía penakaetutsibotha tatsi.

²⁴Bapong wawaya jeye:

—¡Jesús Nazaret tomarapim, pana wepu wárapare! ¿Eta xua metha patópame pataxantha xua jiña ápara abe pata neexanaetsim? ¿Ápara patópame jiña pana nejutebichim? Paka yaputainchi yawa paka yaitainchi xam ápara pong Nakom kaitoroba, pong pepa Nentakuiru-yapuwüünaem, jei pebin pong yakauríbatsi.

²⁵Jesús taitaweta, pebin taitawétatsi kauri. Jesús káuritha jeye:

—¡Moyande! ¡Barapong wepu ponde! jei Jesús káuritha.

²⁶Barapoxonae kauri pebin naichababa éxanatsi. Poxonae kauri bárapo pebin bichokono wawái éxanatsi, bapoxonae bárapo kauri pebin wepu poinchi. ²⁷Daxita barapomonae yábara najüntükoyene kabenaeka. Daxota nayáiñaba, jeye:

—¿Eta pokotsiwa jane? ¿Jamaisha baxua mexeya pena Pekuidubi koyenewa? Maisha bárapo pebin Jesús bichokono Peayapusúü itorobi koyenewa pexeinaein. Matáütano kaurimonaé jumekowünta poxonae pokotsiwa bapong itoroba, najéi barapomonae.

²⁸Bapoxonae kaena naiña daxita pomonaé jinompa Galilea nákuatha jumetaerüküpa pokotsiwa juiña Jesús éxana.

Meje yábara poxonae Jesús axaibi éxana Simón Pedro pámiyo tatsi

(Mt 8.14-15; Lc 4.38-39)

²⁹Jesús kaena naiña pona judiomonae pía penakaetútsibo tatsi weya. Bapoxonae Jesús joniya Simón piabotha tatsi po bo xua irü Andrés píabo tatsi. Bárapo botha Santiago irü Juan Jesús barü joniya. ³⁰Simón pámiyo tatsi domae xainchi. Barapowa cámatha boka. Poxonae Jesús patopa barapomonae kaena naiña Jesús tsipáebatsi, jeye: “Simón pámiyo tatsi domae xainchi”, jei. ³¹Jesús kakuita pona Simón pámiyo tatsi. Bapoxonae bapowa kobepítatsi. Barapowa asiya kuaranótatsi. Bapoxonae barapowa kaena naiña ta-aichurukuaetsi domae. Néxata barapowa pexaewa ápata barapomonaetha.

Meje yábara poxonae Jesús axaibi éxana pin bicheitomonae

(Mt 8.16-17; Lc 4.40-41)

³²Poxonae tabópiya tsanaicha xua kirei tsanaicha, bapoxonae jiwi Jesús takapoinchi pomonae peatenemonaewi, irü pomonae yakauríbatsi. ³³Daxita bárapo tomarapiwi nakaetuta bómüxü boupatha. ³⁴Jesús axaibi éxana pinmonae pomonae xeina daxita koyenexi xua xoxi peatenewa. Matáütano Jesús taitaweta pomonae yakauríbatsi. Jesús jopa kopatsiyo xua pekueikueijejewa kaurimonae, tsipéi kaurimonae Jesús kuiyaputainchi.

Meje yábara poxonae Jesús kueikuejei Nakom Pejume Diwesi judiomonae pía penakaetutsi bongtha tatsi

(Lc 4.42-44)

³⁵Baya poxonae kaemúmbbotha poxonae kataunxuae kirikíríka Jesús nakosataxuba. Bapoxonae tómara weya pona xua ichaxota jiwaibi bara beya pona. Baraxotiya Jesús tsipaebauya, Nakom tsipáebatsi. ³⁶Néxata Simón irü pomonae Jesús pepunajinompaewichi, barapomonae Jesús pubaráinatsi. ³⁷Poxonae barapomonae Jesús kaxíbatsi, bapoxonae Jesús tsipáebatsi, jeye:

—Daxita jiwi kawenawenéi, jei.

³⁸Jesús jumenota jeye:

—Bárabü ponaeinchi icha tómarang beya, bárapo tómarangtha irü takueikueijeinexa tsane Nakom pía pexaiña jume diwesi tatsi. Daxota ápara baxua tsipatopeikang, jei Jesús.

³⁹Bapoxonae Jesús siwaponae dukuaeta daxita tómarang Galilea nákuathá. Judiomonae pía penakaetutsi bongtha tatsi Nakom pía pexaiña jume diwesi Jesús tsipaeba bárapo judiomonaetha. Matáütano Jesús taitaweta kaurimonae.

Meje yábara poxonae Jesús axaibi éxana pong peperüüsawinchi

(Mt 8.1-4; Lc 5.12-16)

⁴⁰Bapoxónaerü pebin, pong peperüüsawinchi, Jesús kakuita poinchi. Bapoxonae bapong pentabokototha unguwa Jesús peitabaratha tatsi xua Jesús pebarükui-iturajinaexaetsi. Bapong matowa Jesús wüükatsi, jeye:

—Icha bara ichichípame bara kaitaküüpa xua axaibi tana neexanaewam, tsipéi jiña neayapusúü itorobi koyenewa nexeiaem, jei bapong.

⁴¹Jesús yábara najüntükoyene xeina bapong, xua peyawenaenexa. Jesús nakobeyota, bapoxonae bapong matajáyabatsi, jeye:

—Bara ichichipang. ¡Bara axaibinde! ¡Bara kaaperüüxaibi éxanatsi! jei Jesús.

⁴²Bapoxonae bapong naiña ta-aichurukuaetsi xua peperüüsawíwatsi. Matáütano axaibi tsanáyano. ⁴³⁻⁴⁴Bapoxonae Jesús jumedangweya itorobiya jeye:

—Jopa yábara tsipaebinde ichamonaetha xua neaxaibiwam. Saya jame meisha ponde sacerdotepintha xua nenaitüütsinexa xua bapong nekataenexa xua báyatha nejumewa. Kare bapongtha pokotsiwa xua pekatsiwa Nakomtha, pokotsiwa báyatha Moisés kui-itoroba xua ekeicha jopa jiña nenataxobinexa jiña pepongtha. Bapoxonae daxita jiwi kayaputaena xua tsita itapeiñaxéinatsi xua xam bara jumem yawa xua perüüwüünaem, jei Jesús.

⁴⁵Dáichitha poxonae bapong pona jopa moya yawüngxeinaeyo. Bapong yábara tsipaebapona ichamonaetha pokotsiwa xua báyatha peaxaibiwa. Daxota Jesús jopa itaküüpaetsi xua naitüütsiya patadukuaebiya tómarangtha. Daxota Jesús tómarang kuariya pópona xua aishowangtha. Jiwi pomonae daxita ichawang wérena pona, barapomonae Jesús piyaxantha tatsi tapátatsi.

Meje yábara poxonae Jesús axaibi éxana pong pekuenobinchi

(Mt 9.1-8; Lc 5.17-26)

2¹Poxonae be kaentakabíyobe yapukaewa, bapoxonae Jesús ekeicha kaibeya pona Capernaum tómará beya. Jiwi yopita xua pinae Jesús botha eka. ²Pin bicheito nakaetuta ichaxota po botha Jesús patopa, beya poxonae matáüta koi-bokékona. Barapomonaetha Jesús tsipaeba Nakom pía pexaiña jume diwesi tatsi. ³Bapoxonae pebiwi pata cuatro póyobe. Bárapo pebiwi yapaparuwa kápata pong pekuenobinchi. ⁴Tsipéi pin bicheito, daxota bárapo pebiwi jopa itaküüpaetsi xua Jesús imoxoyo pekakitaponáewatsi. Daxota bárapo pebiwi bomüxüitha pentatupa wéreka atsa kaxinaxoreka ichaxoya Jesús unguquareka. Bárapo müthü deka pong pekuenobinchi yapaparuwa yorékatsi. ⁵Poxonae Jesús yaputane xua barapomonae yábara kuijumekowünta xua bara Jesús peitaküüpáewatsi xua axaibi peexanáewatsi pong pekuenobinchi, bapoxonae pekuenobinchitha Jesús tsipaebiya jeye:

—Tajitom kakuiyábara jüntemainaya jüntüpujana exanátsiba abe jiña neexanáe kuirukoyenein, jei Jesús.

⁶Íchitha baraxota irü naéna pomonae jiwi pekuidubiwi Moisés pía peitorobi koyene tatsi. Barapomonae nantaxeinaeya najéi: ⁷“Maisha bapong bichokono abe tsipéi pokotsiwa bapong paeba bichokono Nakom tsita ajumebetsi. Jintong dapokotsin aibi pong xua jiwi kakuiyábara jüntemainaya jüntüpujana éxanatsi abe pía peéxanae kuirukoyenein tatsi. Jame meisha ápara kaein Nakom yaputane xua jiwi kakuiyábara jüntemainaya jüntüpujana éxanatsi abe pía peéxanae kuirukoyenein tatsi”, najéi. ⁸Barapoxonae kaena naiña Jesús yaputane pejüntükoyenéwatha pokotsiwa barapomonae piyakoutha nayáñaba. Jesús jeye barapomonaetha:

—¿Eta pokotsiwa metha báraxua pana natsipáebame? ⁹¿Eta po jumetha barang tsane pekuenobinchi? ¿Metha jang tsane: ‘Jiña abe neexanáe kuirukoyenein kata jüntemáinatsi’, jang tsane? Ichakuitha ¿metha jang tsane: ‘Nontaponde, bara pire jiña nemaitungkuaewa, yawa bara pónare’, jang tsane?

¹⁰Daxota ánoxuae paka tsita itapeiñaxeinaeinchi, xua xang pongxaein Nakom Tananeitapetsin, xua xeinang taayapusúü itorobi koyenewa xua bara tana neitaküüpaewa xua jiwi tayábara kakuijüntemainaya jüntüpuwana exanaewa abe pía peéxanae kuirukoyenein tatsi pomonae jinompa bárapo kae pin nákuathe, jei Jesús.

Bapoxonae Jesús tsipaeba pongtha pong pekuenobinchi. Jesús jeye:

¹¹—Katsipáebatsi, nontaponde. Jiña nemaitungkuaewa pire. Jiña bo beíyandeno, jei Jesús.

¹²Bapoxonae bapong kaena naiña nontapona barapomonae peitütha tatsi, yawa pita xua pemaitungkuaewa. Bapoxonae bapong botutu weya pona bárapo pin bicheito peitütha tatsi. Daxita barapomonae yábara najüntükoyene kabenaeka, yawa Nakom wüünae jáintatsi, jeye:

—Maisha waxainchi bápana báyatha jopa taetsi pokotsiwa wüünae pokotsiwe icha be iche, jei barapomonae.

Meje yábara poxonae Leví wábatsi, Jesús waba

(Mt 9.9-13; Lc 5.27-32)

¹³Barapoxonae Jesús pona Galilea pukua itapatha. Bapoxonae baxotiya pin bicheito pata Jesús piyaxantha tatsi. Barapomonaetha Jesús kuiduba. ¹⁴Poxonae Jesús kataunxuae eka pona Galilea pukua itapatha, bapoxonae Leví tainchi. Bapong Leví Alfeo pexanto tatsi. Bapong Leví eka ichaxota bapong parátixi matoma noteibeka po parátixi jiwi bewa katsibina pong romanomonae itorobiya pía pepa peewatsinchi. Jesús Leví tsipáebatsi, Jesús jeye:

—Nepunaponde, jei Jesús.

Bapoxonae Leví nontapona, yawa Jesús punapoinchino.

¹⁵Pirapaeyo Jesús Leví barü eka pexaethopeibiwatha, xua Leví piabotha tatsi xua Jesús pebarü xaenéxatsi. Barichi Jesús barü eka pinmonae bárapo pexaethopeibiwatha pomonae parátixi pentomanotébiwi po parátixi jiwi bewa katsibina pong romanomonae itorobiya pía pepa peewatsinchi nexa. Írürü Jesús barü eka ichamonae pomonae abe peéxanae kuirukoyenein peéxanae jiwi. Matáütano Jesús pijimonae barü eka bárapo pexaethopáewatha. Pinmonae Jesús barü eka tsipéi pinmonae Jesús punapoinchi. ¹⁶Íchitha pomonae jiwi pekuidubiwi Moisés pía peitorobi koyenewa tatsi írürü fariseomonae, daxita barapomonae Jesús tainchi poxonae Jesús barü xayeka pomonae parátixi pentomanotébiwi, irü pomonae abe peéxanae kuirukoyenein peéxanae jiwi. Pomonae Jesús tainchi daxita barapomonae Jesús pijimonae tatsi jeichichi:

—Maisha Jesús pong paiña nepakakakuidubin abe éxana poxoru barü xayeka pomonae parátixi penotébiwi, matáütano, barü xayeka pomonae peajüntükoyénebe jiwi, jei barapomonae.

¹⁷Poxonae Jesús jümetane báraxua, bapoxonae Jesús jumenota, jeye:

—Pomonae ba xua xaniwaicha jinompa xua jopa ateneyo barapomonae ba jopa kanantawenonaeyo pong jiwi peyawüübin. Saya jame meisha pomonae ba átene barapomonae jame kanantawénona pong jiwi peyawüübin. Barichi xang patopang ápara tha jopa tawabinexa tsane pomonae pejüntükoyene wüünae jiwi. Saya ápara tawabinexa pomonae abe peéxanae kuirukoyene peexanaewi tayawenaenexa tsane barapomonae, jei Jesús.

**Meje yábara poxonae Jesús yábara yáíñabatsi pokoyene
xua Nakom peyábara nainbotsíwatsi**

(Mt 9.14-17; Lc 5.33-39)

¹⁸Kaentakeitha Juan pía pepunajinompaewichi, írürü fariseomonae, nainbota Nakomtha xua saya pewüükaenexa Nakomtha. Poxonae barapomonae nainbota, bapoxonae ichamonae Jesús siwapoinchi. Barapomonae Jesús yábara yáíñabatsi bárapo penainbotsi koyene. Barapomonae jeye Jestustha:

—Juan pía pepunajinompaewichi, irü fariseomonae jopa juniya Nakom peyábara nainbotsíwatsi poxonae Nakom wüükéibatsi. Íchitha jiñamonae jopa daichiyo, jopa nainbotsiyo Nakomtha xua saya pewüükaenexa Nakomtha, jei barapomonae Jestustha.

¹⁹Jesús jumenota barapomonae, jeye:

—Jiwi ba jopa bewa wekoyeya yábara nainbotsi poxonae ichamonae pexaewa tsinakaetuta penabanaenexa xua poxonae pebin pekotsiwa pita. Poxonae kataunxuae áwiya bapong eka pexaewa penabanáewatha bapoxonae jiwi ba pebürüiya nábane. Jopa bewa yábara najainbotsi tsane. ²⁰Íchitha icha pong aena píowa pita, kaena naiña wáetabatsi, ichamonae wáetaba xua tajü bapong pekaponae néxatsi, bapoxonae jame jiwi ba bewa wekoyeya yábara nainbotsi, xua ekeicha bapong kaewa pepatopaewa tsane.

²¹“Jiwi ba jopa exanaeyo xua pena dorouto tsiwiyo jíwana kaxinaxubeta xua peru dorouto pewangbotsinexa. Icha baxua exanáetsipa xua pena paparúwatha wang bota peru doróutotha, bapoxonae bárapo dorouto abe tsanaya tsipae. Tsi-péi poxonae bárapo dorouto matanaxuba bárapo pena paparuwa natsaketábiya. Poxonae bárapo pena paparuwa natsaketábiya ekeicha wang tsitsipanarena bárapo dorouto. Bapoxonae ekeicha nama bichokono pin wang tsanaya beyakaincha xua poxonae kopiya. ²²Matáúitano jiwi ba pena vino mera jopa eparekaeyo peru bokototha, tsipéi icha baxua exanáetsipa, bárapo pena vino mera abe exanáetsipa bárapo bókoto. Tsi-péi bárapo bókoto jopa nayeyetaponaeyo poxonae bárapo vino mera átsaxa. Bárapo pena vino mera naxuba xuano bárapo bókoto naxuba poxonae bárapo bókoto tsitsika. Daxota bewa jame pena vino mera eparekae pena bokototha. Bapoxonae pena vino mera jopa naxúbiyo. Yawa pena bókoto jopa naxúbiyo poxoru bokoyeyena yawa poxoru pena bókoto”, jei Jesús.

**Meje yábara poxonae Jesús pijimonae tatsi yaboto nota trigoxú
judiomonae barompaya pía pentakeiseikáe matakaiha tatsi**

(Mt 12.1-8; Lc 6.1-5)

²³Kaentakabi poxonae judiomonae barompaya pía pentakeiseikáe matakabi tatsi, bárapo matakábitha Jesús, irü pijimonae tátsino pabi iyiya. Jesús pijimonae tatsi jainpa. Barapomonae tamrópata notarúkupa xua yaboto xunumenapona trigoxú. Bapoxonae pekóbetha xu matapepeta. ²⁴Poxonae fariseomonae kuitane xua Jesús pijimonae tatsi éxana, bapoxonae fariseomonae Jesús tsipáebatsi, jeye:

—Jamaisha jiña jiwimonae nakuita bárapo matakábithe, poxonae yaboto nota trigoxú. Ápara jiwi jopa yábara kuikopatsiyo xua ichamonae penakuichiwa bárapo matakábithe xua judiomonae barompaya pía pentakeiseikáe matakabi tatsi, jei fariseomonae.

²⁵Jesús jumenota, jeye:

—Barapomonae tajiwimonae jopa ápara abe exanaeyo. ¿Jopa payábara yorobim pokotsiwa báyatha David éxana poxonae jainpa, poxonae irü pijimonae tajainpatsirü? Bapong David, pong kaena báyatha israelmonae itorobiya pía pepa peewatsinchi. ²⁶Bapong David, irü pijimonae tatsi, barapomonae jojoniya Nakom pin piabotha tatsi poxonae pong pewüng Abiatar tanakuita Nakom. Bapong Abiatar sacerdotemonae pía pepa pentakaponaein tatsi. David xane pan, po pan ichamonae kana éxana xua Nakom pekatsíwatsi. Irü bárapo pan David pijimonae kata xua pexaenexariü. Barapomonae xane bekein bara Nakom pía peitorobi koyenéwatha kópata xua saya meisha sacerdotemonae itakúüpatsi xua pexaewa tsane bárapo pan, jei Jesús.

²⁷Ekeicha Jesús namchi, jeye:

—Nakom, jiwi pewünaeya taéxanatsi pentakeiseikáe matakabi. Bárapo pentakeiseikáe matakabi Nakom tsiéxana jiwi, xua bárapo matakábitha jiwi penafinakaewatsinexa. Nakom jopa aiñakuí kana exanaeyo pentakeiseikáe matakabi aiñakuí xua beyakaincha jiwi. ²⁸Daxota xang pongxaein Nakom tana neitapétsixae xeinang taitorobi koyenewa xua jiwi takoya taitorobiwa pentakeiseikáe matakábitha, jei Jesús fariseomonaetha.

Meje yábara poxonae Jesús kobewüünae éxana pong pekobemüübinchi

(Mt 12.9-14; Lc 6.6-11)

3 ¹Jesús ekeicha joniya judiomonae pía penakaetutsibotha tatsi. Baraxota pong pekobemüübinchi eka. ²Barichi pomonae jiwi pekuidubiwi Moisés pía peitorobi koyene tatsi, irü fariseomonaebaxota ena. Daxita barapomonae Jesús nekoténatsi pekuitaenéxatsi icha bara metha Jesús kobewüünae exanaena pentakeiseikáe matakéitha pong pekobemüübinchi. Icha Jesús pong pekobemüübinchi axaibi éxanatsi, bapoxonae barapomonae xeinaena pokoyenewa xua Jesús abe peyábara paebíwatsi tsainchi. ³Bapoxonae Jesús barái pongtha pong pekobemüübinchi, jeye:

—Nontapónare. Úngkuare xote, jei Jesús.

⁴Pomonae Jesús tainchi Jesús barái barapomonae, jeye:

—Paka yaiñabinchi, ¿eta xua kópata pentakeiseikáe matakábitha? ¿Wüünae jampa? ¿Abe jampa? ¿Eta xua metha tsipae? ¿Xua pebin kapanépatsi jampa? ¿Xua pebin bexotsi jampa? ¿Eta xua jane? jei Jesús.

Íchitha barapomonae jopa jumenotsiyo, saya moya umena. ⁵Néxata Jesús nekota barapomonae. Anaya Jesús kaseba barapomonae. Matáütano jüntükoyene wekoyéi, tsipéi barapomonae jopa beyaputaeyo pokotsiwa bapong éxana. Jesús barái pong pekobemüübinchi:

—Nakobedoire, jei Jesús.

Bapong nakobedoita. Bapoxonae bapong naiña kobewüünae tsanaya. ⁶Bapoxonae fariseomonae Jesús weya ponarúküpa. Bapoxonae barapomonae nakaetuta Herodes pijimonaetha tatsi xua pekuiyábara paebinéxatsi xua pokuikoyenéwatha Jesús pebexubiwa tsainchi.

Meje yábara poxonae pin bicheito nakaetuta Galilea pukua itapatha

⁷Jesús pijimonae barü pona Galilea pukua ítapa beya. Írürü pin bicheitomonae Jesús punapoinchi pomonae Galilea nakua weya pona. ⁸Írürü pomonae Judea

nakua wérena pona írürü pomonae Jerusalén tómara wérena pona, daxita barapomonae Jesús punapoinchi. Írürü Idumea nakuapiwi Jesús punapoinchi. Írürü ichamonae Jesús punapoinchi pomonae icha muxunénetha jinompa xua Jordán ménetha. Írürü Tiro tomarapiwi Jesús punapoinchi. Írürü Sidón tomarapiwi Jesús punapoinchi. Daxita bárapo bicheito Jesús ítata pátatsi poxonae jumetane daxita xua juiña pokotsiwang Jesús éxana. ⁹Tsipéi pin bicheito, daxota Jesús pijimonae itoroba xua jera petaxawenaewa tsainchi xua petsakibabiyáinwatsi bárapo pin bicheito. ¹⁰Yáitama Jesús axaibi exaneiba pin bicheito pomonae atenemonae, daxota irü ichamonae Jesús imoxoyo kakuíta poinchi. Barapomonae ichichipa xua Jesús pejayabíwatsi xua barapomonae irü axaibi peexanaenéxatsi.

¹¹Pomonae yakauríbatsi, poxonae barapomonae Jesús tainchi, barapomonae pentabokototha umena Jesús peitabaratha tatsi. Barapomonae wawaya jeye xua kaurimonae wawái peexanaexaetsi:

—¡Maisha bara xam Nakom Pexantom! jei barapomonae xua wawaya éxanatsi kaurimonae.

¹²Jesús jumedangweya itoroba barapomonae, jeye:

—Jopa pana neyábara paebinde ichamonaetha xua xang Nakom Pexantong, jei Jesús.

Meje yábara poxonae Jesús itapetsiya waba pía peitorobi jiwí tatsi pomonae xua doce póyobe

(Mt 10.1-4; Lc 6.12-16)

¹³Bapoxonae Jesús demuxúwatha pona. Bárapo demuxúwatha Jesús waba pomonaetha xua peichichipaexae xua itapetsiya waba. Barapoxonae barapomonae Jesús piyaxantha tatsi tapátatsi. ¹⁴Jesús itapetsiya waba doce póyobe xua pomonae pebarü jinompaenéxatsi. Matáütano barapomonae Jesús itoroba xua daxita jíwítha petakueikueijeinéxatsi Nakom Pejume Diwesi. ¹⁵Barapomonaetha Jesús kata pía peayapusúü itorobi koyenewa tatsi, xua kauri ichamonae petaitawetsinéxatsi pomonae xua kauri pepunajinompaewichi. ¹⁶Meje barapomonae pewüngxi tatsi pomonae Jesús waba: Simón pong icha wüng wüngdútatsi “Pedro”, baraichi. ¹⁷Ichüng pewüng Santiago. Ichüng pewüng Juan pong Santiago peweicho tatsi. Barapongbe Zebedeo pexántobe tatsi. Barapóngbetha Jesús icha wüng wüngdútabe “Boanerges” jei (xua po wüngtha xua jei: “Yámüxü pexántobe tatsi”, jei). Bárapo wüng wüngduta tsipéi peajüntükoyenesüübe. ¹⁸Ichüng pewüng Andrés. Irü ichüng pewüng Felipe. Irü ichüng pewüng Bartolomé. Irü ichüng pewüng Mateo. Irü ichüng pewüng Tomás. Irü ichüng pewüng Santiago, pong Alfeo pexanto tatsi. Irü ichüng pewüng Tadeo. Irü ichüng pewüng Simón pong selotemonaepin. ¹⁹Irü ichüng pewüng Judas Iscariote. Barapong Judas pong Jesús kaenaetaxúbatsi ichamonaetha pebexubinéxatsi.

Meje yábara poxonae Jesús baraichi xua pinae xeina Beelzebú pía peayapusúü itorobi koyenewa tatsi

(Mt 12.22-32; Lc 11.14-23; 12.10)

²⁰Bapoxonae Jesús, irü pomonae pía peitapetsiwi tatsi botha jojoniya. Bapoxonae ekeicha pin bicheito nakaetuta Jesús piyaxantha tatsi. Daxota Jesús irü pijimonae tatsi jopa itaküüpaetsi xua penabanaewa tsane. ²¹Jesús piyamonae matabüxiyo

tatsi jümetane xua jiwi paeba xua pinae juiña Jesús matayáibatsi. Daxota barapomonaе pata, xua Jesús pewaetabinéxatsi, xua píabo beya pekaponaeenéxatsi.

²²Matáütano pomonaе jiwi pekuidubiwi Moisés píа peitorobi koyene tatsi, pomonaе Jerusalén wérena pona, barapomonaе jíwitha jeye Jesús yábara: “Bapong kaurimonaе itawétatsi, ápara pexeinaexae Beelzebú píа peayapusúü itorobi koyene tatsi, pong kaurimonaе píа pentakaponaеin tatsi”, jei barapomonaе pomonaе jiwi pekuidubiwi Moisés píа peitorobi koyenewa tatsi.

²³Bapoxonaе Jesús waba barapomonaе píа xaiña bérena. Yáwano Jesús pekayábara júta pepaebi diwésiyo tsipaeba, jeye: “Kaurimonaе píа pentakaponaеin tatsi jopa itaküüpaetsi xua peitawetsiwa icha kaurimonaetha, xua pekaekaurimonaexae. ²⁴Icha kae nakuapiwi nawepu tsátabe xua matáüta náбabe, bapoxonaе jopa xaexaenaekaeyo. ²⁵Matáüta írürü icha kae bo matabüxüyomónaеbe náбabe yawa nawepu tsatajópabe, bapoxonaе jopa xaexaenaekaeyo. ²⁶Barichi icha Satanás, pijimonaе tatsi nawepu tsatajópabe matáütano xua náбabe, bapoxonaе jopa xaexaenaekaeyo. Satanás jopa itaküüpaetsi xua itoroba pijimonaе, tsipéi amsiya éxana.

²⁷”Dapong aibi, pong itaküüpaetsi xua botha joniya po botha pong bichokono maxü dangwéi píabo tatsi xua daxita notsina pokotsiwa bapong xeina pong maxü dangwéi icha jopa kopiya matha maxükütanotsiyo.

²⁸”Bara xaniyeya paka tsipáebatsi. Pokotsiwa jiwi abe Peéxanaе kuirukoyenein éxana, matáütano pokotsiwa xua jiwi abe paeba, bárapo koyenein Nakom itaküüpaetsi xua yábara jüntemainaena xua bárapo jiwi abe éxana. ²⁹Pong abe yábara paeba Nakom píа Pejumopetünaxü tatsi, Nakom bápana jopa yábara jüntemainae tsane xua bapong paeba. Bara bapong ataya átene tsane ichaxota jopa itakounayiyó ishoto xua bapong abe peexanaexae”, jei Jesús.

³⁰Jesús bárxua paeba, tsipéi pomonaе jiwi pekuidubiwi Moisés píа peitorobi koyene tatsi barapomonaе báyatha naerabiya paeba xua pinae Jesús yakauríbatsi. Íchitha pong Jesús xeina ápara Nakom píа Pejumopetünaxü tatsi. Daxota barapomonaе Nakom píа Pejumopetünaxü tatsi tsita natsikuéntatsi, tsipéi Nakom píа Pejumopetünaxü tatsi abe yábara páebatsi.

Meje yábara Jesús pena tatsi, írürü péyapin jiwi tátsino

(Mt 12.46-50; Lc 8.19-21)

³¹Pírapae Jesús pena tatsi, irü péyapin jiwi tatsi pata Jesustha. Íchitha barapomonaе pesato beumeiña. Bapoxonaе najumekaruta ichamonaetha xua petawabinexa tsainchi Jesús. ³²Po bicheito Jesús matawakaicha énantsi, barapomonaе Jesús tsipáebatsi, jeye:

—Ena, írürü néyapin jíwino, pesato beya umena. Bépara bekein katáei. Bépara bekein katsipaebai, jei.

³³Íchitha Jesús jumebarái barapomonaе, jeye:

—¿Jintam powa be taena natsikotánera? ¿Jintam pomonaе be táyapin jiwi natsikotánera? jei Jesús.

³⁴Bapoxonaе Jesús nekota pomonaе pematawakaicha enáewichi. Jesús jeye:

—Barapomonaе pomonaе xote umene ápara be taena tsíkotang, matáütano be táyapin jiwi tsíkotang. ³⁵Pomonaе éxana pokotsiwa Nakom itoroba, pong peita-bókotha pekaeinxae, barapomonaе be táyapin jiwi tsíkotang, matáütano irü be tayapixi tsikotangno, matáütano irü be taena tsikotangno, jei Jesús.

**Meje yábara poxonae Jesús kuiduba jiwi pekayábara
jüta pepaebi diwésiyo xua pong peúbin yábara**

(Mt 13.1-9; Lc 8.4-8)

4¹Ekeicha Jesús tamrópata pítaba xua kuiduba Galilea Pukua itapatha. Bapoxonae pin bicheito nakaetuta ichaxota Jesús kuidubungkua. Tshipéi pin bicheito daxota Jesús jératha nontabiya xua peekaenexa, po nae ménetha dukuiya. Bárapo pin bicheitomonae táetabo itapatha umena. ²Jesús barapomonaetha kuiduba pekayábara jüta pepaebi diwésintha.

Poxonae Jesús kuiduba barapomonae, jeye: ³“Pana nejumenaitáeware bárapo diwésiyo: Pebin pong peúbin pónataba pía übichi pábitha. ⁴Poxonae pong peúbin übauya, icha xu námtotha othopeika. Pepupunaewi yapata. Bapoxonae bárapo xu, xu xane. ⁵Icha xu, xu othopeika ibówangtha ichaxota xua ira itafáfana. Barapoxonae bárapo xu kaena naiña xu xuwa, tshipéi jopa tajü xu xuwarekaeyo. ⁶Íchitha poxonae xometo atsa tsina, bapoxonae yaboto tsakiwa yawa tüpa tshipéi jopa tajü tabüopina xuwarekaeyo. ⁷Icha xu, xu othopeika ichaxota pesoiwang xuwi-naena. Bárapo xu yaboto nantakapánaba poxoru yawa múxuna xuwina pesoiwang. Daxota bárapo xu jopa xu nakoichiyo. ⁸Icha xu, xu othopeika ichaxota ira wüünae. Poxonae bárapo xu, xu xuwa, xu nawüünaeta. Icha xun, xu nanakoitapona treinta poxu matabüxúyobe tsíniya. Icha xun, xu nanakoitapona sesenta poxu matabüxúyobe tsíniya. Icha xun, xu nanakoitapona cien poxu matabüxúyobe tsíniya”, jei Jesús bárapo pin bicheitomonaetha.

⁹Ekeicha Jesús jeye: “Icha pamuxudubéname, moya pana nejumenaitáeware pokotsiwa tapaka tsipaebíwatsi”, jei Jesús poxonae pijimonae muxukonakiya tsipaeba.

**Meje yábara poxonae Jesús namchi xua eta
xua metha pekayábara jüta pepaebi diwesin**

(Mt 13.10-17; Lc 8.9-10)

¹⁰Néxata poxonae Jesús pipatotha eka, bapoxonae barü eka pomonae pía pepunaponáewichi, írüno pijimonae tatsi pomonae doce póyobe. Barapomonae Jesús yáináabatsi jeye: “¿Eta pokotsiwa yábara kaunútame poxonae bárapo Pekayábara jüta pepaebi diwésiyo kuidúbame?” jei barapomonae. ¹¹Jesús jumenota barapomonae, jeye: “Meisha paxam yatsikaewa Nakom yábara paka yaputane éxana po pekuidubiwa xua moya peyawüngxainaewa. Bárapo moya peyawüngxainaewa ápara xua Nakom paka kana éxana xua paiña nepaka itaküüpaewa xua paiña nenaexanaewa Nakom piyamonae tatsi pam, pomonae pamxaem Nakom itorobiya paka éwata. Íchitha meisha jame ichamonae pomonae jopa nejumekowüntsiyo jopa daichichi. Nakom jopa kopatsiyo xua barapomonae peyábara yaputaewa baxua. Daxota barapomonae kuidubang pekayábara jüta pepaebi diwésintha, xua Nakom peyábara yaputaenéxatsi. ¹²Baxua páebang xua bekein pía tana nekui-taibenáewatha tsane íchitha jopa pía tana nekuiyapu-taibenáewatha tsane. Yawa xua bekein pía tana nejumetaibe-náewatha tsane íchitha jopa pía tana nejumekopi-taibenáewatha tsane. Poxoru bapomonae jopa icha jüntükoyene xeinaeyo Nakomtha, daxota barapomonae Nakom tsita natsikuéntatsi abe petsita-exanáexaetsi xuano Nakom jopa yábara jüntemainaeyo abe pía peéxanae koyenein tatsi”, jei Jesús.

**Meje yábara poxonae Jesús pijimonaе muxuyaputane éxana po diwesi
xua pekayábara jüta pepaebi diwésiyo, pong peúbin yábara**

(Mt 13.18-23; Lc 8.11-15)

¹³Ekeicha Jesús barapomonaetha muxutsipaeba, jeye: “Tsipéi jopa payaputaem po pekayábara jüta pepaebi diwésiyo xua peúbin yábara páebang daxota jopa payaputáemtsipae bekein aiña pekayábara jüta pepaebi diwesi paka tsipaebichí-patsi. ¹⁴Paka tsipáebatsi pekayábara jüta pepaebi diwésiyo xua iche: Pong peúbin jüpa, icha be ichi pong Nakom Pejume Diwesi pepaebi dukuanaebiyaein. ¹⁵Poxutong xua namto beothopiya, aichurubenaе. Bárapo xutong yábara kaunuta xua jiwi bara jüntüwé ichichi kaurimonaе píа pentakaponaеin tatsi, pong Satanás. Jiwi jüntükoyene weajumetsurubenaе éxanatsi Nakom Pejume Diwesi xua báyatha pojume jumetane, xua bapoxonaе jopa petajumekowüntsinea tsainchi Nakom, yawa xua jopa petanakapanenebiyaenexa tsainchi Nakom beya, xua Nakom kanantaxeina. ¹⁶⁻¹⁷Poxutong xua xu óthopa ibówangtha, bárapo xutong yábara kaunuta po jiwi wüünaenaya jumetane Nakom Pejume Diwesi, xuano jüntükoyene weiweinaya Nakom jumekowüntatsi. Íchitha bara kaeto jumekowünta, poxoru barapomonaе ajüntüfaetabiya jumejeba Nakom Pejume Diwesi pejüntükoyeneintha. Poxonaе yáitama barapomonaе bichokono peatenexae, matáütano poxonaе barapomonaе yáitama abe petaexanaexaetsi ichamonaе xua pejumekowüntsixaе Nakom, bapoxonaе kaurimonaе abe éxana barapomonaetha, xua barapomonaе jüntükoyene wejüntemaina éxanatsi xua Nakom pekayábara jüntemaináewatsi. ¹⁸⁻¹⁹Poxutong xua xu othopeika pesóiwangtha, bárapo xutong kaunuta xua pomonaе Nakom Pejume Diwesi jumetane, íchitha saya barompaya píа jüntükoyenéwatha jinompa, yawa saya ü kopei kayábara nantaxeina, yawa saya éxana pokotsiwa jüntükoyene weiweina kana exainchi. Pokoyene pebiwi éxana baxuang bara jütiya ichiya éxana xua poxutong be pesóiwangtha othopiya. Bárapo xutong jopa thei dubenaeyo. Barapókotsi jüta koyeneya ichi, bárapo jiwi. Jopa wüünaeya jinompaeyo Nakom nexa. ²⁰Poxutong xua xu othopeika peíra wüünáewatha, bara nakoita. Bárapo xutong yábara kaunuta pomonaе jumetane Nakom Pejume Diwesi, matáütano jumekowüntano poxoru jüntükoyene wüünaeya jumetane. Matáütano beta éxana dubenanáebiya beya matapaiña jiwi kuitane xua barapomonaе jüntükoyene wüünaе Nakom peitabaratha tatsi. Bapoxonaе ichamonaе barapomonaе jíwana beta yawena ichamonaetha icha bárapo xuto ichi xua treinta poxu matabüxúyobe tsíniya tsóponaе. Matáütano ichamonaе barapomonaе jíwana beta yawena ichamonaetha icha bárapo xuto ichi xua sesenta poxu matabüxúyobe tsíniya tsóponaе. Matáütano ichamonaе barapomonaе jíwana beta yawena ichamonaetha icha bárapo xuto ichi xua cien poxu matabüxúyobe tsíniya tsóponaе”, jei Jesús.

**Meje yábara poxonae Jesús pijimonaе tsipaeba pekayábara jüta
pepaebi diwésiyo xua pekoicha yábara**

(Lc 8.16-18)

²¹Ekeicha Jesús barapomonaetha tsipaeba, jeye: “Poxonaе jintong pekoicha, koicha éxana, bapoxonaе jopa koicha matakatsiyo cájatha. Yawa jopa koicha exa-naeyo cama peúpana deka. Jame asiya koicha éxanatsi, xua pekoichataenexa pomonaе jojoneibarena. ²²Daxita pokotsiwa xua moya peyawüngxainaewa bexa

tsane jiwí yábara yaputaena. Barichi po diwesin xua pekayábara jüta pepaebi diwesin xua paebapona jiwí bárapo diwesin jiwí itaküüpaeinchi xua peyábara yaputaewa tsane. ²³Icha pamuxudubéname, moya pana nejumenaitáeware pokotsiwa tapaka tsipaebíwatsi”, jei Jesús poxonae pijimonaé muxukonakiya tsipaeba.

²⁴Ekeicha Jesús barapomonaé barái, jeye: “Pana nejumenaitáeware paiña neexanaenexa pokotsiwa paka tsipáebatsi. Icha ichamonaé dangweya payábara paebíname penatsikuentsiwa xua abe peexanaexae Nakom barichi dangweya paka yábara paebina paiña nenatsikuentsiwa xua abe paiña neexanaexae. Matáütano ekeicha icháwano mataropeicha paka katsina. ²⁵Pong ba be kónotha Nakom yábara yaputainchi Nakom bapongtha kana exanaena xua ichawa peyábara yaputaewa tsane beya poxonae bapong ekeicha bichokono Nakom pejumekowüntsiwa tsainchi. Pong ba jopa ichipaeyo xua Nakom peyábara yaputáewatsi Nakom wepichina pokoyene bapong yaputane xua beya daxota Nakom jopa pejumekowüntsiwa tsainchi”, jei Jesús.

Meje yábara poxonae Jesús pekayábara jüta pepaebi diwésiyo paeba xua peúbi xuto yábara

²⁶Néxata ekeicha Jesús namchi, jeye: “Yábara paka kuidúbatsi pokoyene xua Nakom itorobiya éwata piyamonae. Bárapo koyene bara jüta koyeneya ichi, icha pebin ichi poxonae peübixu xubebeya. ²⁷Poxonae nakobeweta xua üba, bapoxonae pabi weya pona. Bara bekein bapong jopa yawenaeyo xua bárapo xutong xu xuwapona mataketha, merawíthano poxonae pebin maitekeiba, dáichitha áwiya bárapo xu xuwapona. ²⁸Daxota bárapo xu xuwapona tsipéi ira yawena xua bárapo xu xuwapona. Kopiya pepaboto xuwina, bapoxonae pépato náexana. Bapoxonae pépaxu xudubena xua bichokono axukükü. ²⁹Poxonae pépaxu xunaweta bárapo matakábitha pebin pona xua penotsinexa pokotsiwa naweta”, jei Jesús.

Meje yábara poxonae Jesús kuiduba pekayábara jüta pepaebi diwésiyo po peübixútiyo pewüing mostaza xutiyo

(Mt 13.31-32; Lc 13.18-19)

³⁰Jesús barapomonaé tsipaeba, jeye: “Poxonae Nakom jiwí waba xua petanaexanaenéxatsi piyamonae tatsi pomonaé itorobiya peewatsixae, ¿eta pokoyene nakoyenejúpabe? ¿Eta xua paka kuidubinchi xua baxua yábara? ³¹⁻³²Nakom pijimonaé tatsi mataropeicha bichokono pinmonae tsóponae xua pomonaé Nakom jumekowüntapona. Báraxua icha be mostaza xutiyo ichi poxutiyo bichokono tsikixútiyo beyakaincha xua icha petheixútiyo. Bárapo mostaza xutiyo pebin üba pía pábitha. Xuwa beya pin nae tsóponae. Pepin naexae daxota siri kotong éxana pemaxúranangtha. Icha mostaza xutiyo ichi xua beya pin nae tsóponae, bara jüta ichi Nakom pejumekowüntsiwichi, pomonaé bapong itorobiya peewatsixae. Bekein ánoxuae tsika bichéitiyo, bexa tsane beya pin bicheito tsóponae tsane”, jei Jesús.

Meje yábara poxonae Jesús kuiduba jiwí pekayábara jüta pepaebi diwesíxitha

(Mt 13.34-35)

³³Jesús jíwitha aiña pekayábara jüta pepaebi diwésixi tsipaeba poxonae kuiduba Nakom Pejume Diwesi, icha barapókotsi diwésixi ichi xuaunxuae po diwésixi

paeba. Áwiya kuidudubapona beya poxonae barapomonae xainwaicha yaputane. ³⁴Saya meisha barapomonaetha Jesús kuidubeiba Pekayábara jüta pepaebi diwésixi koyenexitha. Poxonae Jesús meisha pijimonae barü eka, bapoxonae Jesús pijimonae yábara muxuyaputane éxana pekayábara jüta pepaebi diwésixi koyenexi.

**Meje yábara poxonae Jesús xaiña dukuanaya éxana joibo,
yawa marátsakano xaiña mene dukuanaya éxanano**

(Mt 8.23-27; Lc 8.22-25)

³⁵Bárapo matakeitha poxonae kirei tsanaicha Jesús pijimonae tsipaeba, jeye:
—Anthá poinchi icha muxunene beya, pukua beicha, jei Jesús.

³⁶Bapoxonae Jesús pijimonae barü wepu pona bárapo pin bicheito. Bapoxonae Jesús pijimonae barü poinchi jératha, po jératha Jesús kuidubeka bárapo pin bicheito. Barichi icha jérangno napónano. ³⁷Bapoxonae ménetha jemeicha naetaba pin joibo. Marátsakang jératha mene óthopa, muxu jera pebunarekae. ³⁸Íchitha Jesús jera tafetha maitungkuwa, nantasipa yüüyüütungkuwa paparúwatha xua xota nakuenákuena. Jesús pijimonae yaübatsi, jeichichi:

—Pong pata Nekuidubin, ¿jopa katsita aiñakuiyo xua waxainchi bunathopaeinchi? jei barapomonae.

³⁹Bapoxonae Jesús asiya unguwa, yawa joibo itawetaxuba. Jesús jeye marátsakangtha:

—¡Barande, bara xaiña mene dukuanáyama! jei Jesús.

Bapoxonae joibo kaewanaya, yawa mene xaiña dukuanaya. ⁴⁰Néxata Jesús barái pijimonae, jeye:

—¿Eta pokotsiwa metha bichokono pajunúwame? ¿Kataunxuae jopa pana nejumekuiyábara jumekowüntsím xua bara tana neitaküüpaewa xua tapaka yawenáewatsi? jei Jesús.

⁴¹Barapomonae bichokono najüntükoyene kabenaeka, yawa kaemonae natsipaeba najéi:

—¿Metha jintamda bapongda? ¡Jamaisha bapong itawetaxuba joibo yawa marátsakang xua daxita xaiña dubenanaya! najéi barapomonae.

Meje yábara xua pebin pong yakauríbatsi pong Gerasa nakuapin

(Mt 8.28-34; Lc 8.26-39)

5 ¹Jesús, irü pijimonae tatsi pata icha muxunene beya xua bárapo pukuathiya. Po íratha Jesusbarü pata bárapo ira pewüng Gerasa nakua. ²Poxonae Jesús jera wenontouna bapoxonae patopa pebin pong yakauríbatsi. Bapong ibowóu weya patopa Jesustha. ³Bárapo pebin poponeiba ibowountha. Dapong aibi pong itaküüpatsi xua bapong pekütsíwatsi, matáütano metha bekein penáintotha tsipae. ⁴Bapong matowa penáintotha taxukübéibatsi, yawa maxükübéibatsi xua bapong peyapukaeneibinexa tsainchi. Dáichitha bapong bárapo nain nain-epaxuneiba. Dapong aibi xua bapong pekui-amanayabíwatsi. ⁵Barapong matakeitha poponeiba, yawa merawitha poponeiba. Matáütano atorórotha yawa ibowountha wawái tso-poponeibi. Matáütano ibotíxitha piyakoutha nathabeiba. ⁶Poxonae bárapo pebin Jesús tajü táebatsi, bapoxonae kuináepona Jesús beya. Bapong pentabokototha unguwa Jesús peitabaratha tatsi xua Jesús pebarükui-iturajinaexatsi peaiñakuinxae. ⁷Bapong wawaya jeye Jesustha:

—Jesús pong Nakom Pexantom, pong peitabókotha eka, ¿eta pokotsiwa metha taxantha patópame? Jumedangweya kabaraichi jopa nepéraxa xanaeinde, jei.

⁸Bapong baxua paeba tsipéi Jesús kopiya namchi, jeye:

—¡Kaurimonae pam, bapong pawepupónare! jei Jesús.

⁹Jesús yáñaba bapongtha:

—¿Eta powüm? jei.

Bapong jumenota jeye:

—Tawüing ayéi, tsipéi paxang kaurimonae pang ayéi jiwi pang, jei bapong xua paeba éxanatsi kaurimonae.

¹⁰Bárapo kaurimonae Jesús muxufayakótatsi xua bepa pinae barapomonae jopa bewa itawetichi icha nakua beya. ¹¹Ichaxota imoxoyo peitapatorórotha baxota jinompa pin marranomona. Bárapo marrano duweimonae xayompa peitapatorórotha. ¹²Kaurimonae Jesús wúükatsi, jeye:

—Icha pana itawétame, moya pana nepukopabare marrano duweimonaetha, jei kaurimonae.

¹³Bapoxonae Jesús kópata xua bara kaurimonae ponaena marrano duweimonaetha pebin weya. Bárapo marranomonae dúkúpa. Pin pitapatororo othopareka. Púkuatha bunothopa. Yawa kaurimonae kabunothópati. Bárapo marranomonae dos mil po duweimonaebe.

¹⁴Bapoxonae pomonae peyapuenaeawi marranomona, barapomonae bichokono junuwiya kuináepona tómara beya, jiwi petsipaebinéxatsi baxua yábara, yawa jiwi petsipaebinéxatsi tómara kuariya beya. Bapoxonae jiwi pata petaenexa pokotsiwa Jesús kana éxana pebintha. ¹⁵Poxonae barapomonae pata Jesthath, bapoxonae barapomonae tane pebin pong báyatha yakauríbatsi. Bárapo pebin moya eka, paparuwa namaxátatano, matáütano jüntema eka. Bapoxonae barapomonae bichokono junuwa. ¹⁶Pomonae báyatha tane xua pokotsiwa Jesús báyatha kana éxana pebintha, pongtha pong yakauríbatsi, baxua yábara paeba ichamonaetha pomonae pata. Matáütano yábara paeba pokotsiwa Jesús kana éxana marrano duweimonaetha. ¹⁷Bapoxonae barapomonae tamrópata notarúkúpa xua Jesús itawétatsi, jeye: “Maisha bewa warapáename Gerasa nakua weya, po nakua pata nakua weya”, jei barapomonae.

¹⁸Poxonae Jesús jératha nontabiya, bapo pebin pong báyatha yakauríbatsi, bapong Jesús wúükatsi xua bepa pinae Jesús punaponaetsi. ¹⁹Íchitha Jesús jopa kopatsiyo xua pepunaponaenexa tsainchi bapong. Saya jame Jesús bapongtha jeye:

—Maisha jiña bo beya pónare ichaxota jiñamonae matabüxüyo beya. Barapomonaetha tsipáebare daxita pokotsiwa Nakom kakana éxana. Matáütano barapomonaetha tsipáebare xua Nakom bara kayábara najüntükoyene xaina pía nekayawenaenexa, jei Jesús.

²⁰Bapoxonae bárapo pebin pónataba. Matáütano tamrópata pítaba xua kueikuei-jei daxita pokotsiwa báyatha Jesús kana éxana bapongtha. Barapong baxua tsi-paeba Decápolis tómarangtha, po tómarang xua diez po tómarangbe xua imoxoyo nakakuita ena. Daxita jiwi bárapo tómarang najüntükoyene kabenaeka poxonae jumetane xua barapong paeba.

**Meje yábara xua poxonae Jairo pexantiyo taaxaibi éxanatsi;
yawa yábara xua bapoxonae irü icha yábüyo axaibi éxanatsi
poxonae Jesús pía paparuwa tajayabatsirü**

(Mt 9.18-26; Lc 8.40-56)

²¹Poxonae Jesús kaibeya pona jératha icha muxunene beya pukua iya, bapoxonae pin bicheito Jesús piyaxantha tapátatsi pitapatha. ²²Bapoxonae kaein patopa pong judiomonae pía penakaetútsibo tatsi pekanamataxeinaewi jiwana monaepin. Bapong pewüing Jairo. Poxonae bapong Jesús tainchi, Jesús peitabaratha tatsi pentabokototha táungkuatsi. ²³Bapong Jairo bichokono Jesús wúükatsi. Jairo jeye:

—Taxantiyo muxu imoxoyo petúpáe. Anetha, inta taxantiyo nekobetha matajáyabare, axaibi jiña neexanaenexa tsane. Bapoxonae inta asüü pepoponaenexa tsane, jei Jairo.

²⁴Bapoxonae néxata Jairo Jesús punapona. Pin bicheito Jesús punapoinchi, yawa bárapo bicheito tsakibábatsi. ²⁵Bárapo pin bichéitha irü nápona yábüyo powa átene. Barapowa kaena báyatha beya yadoce po wéiyobe jopa, xua péntabü jánatha boka xua be nupeiwa. ²⁶Barapowa bichokono átene tsaibi bekein siwaponeiba pomonaetha, pomonae peyawüübiwi jiwi. Barapomonae bapowa daxita kobematapaetéibatsi parátixi xua bapowa peyawüübixaetsi, dáichitha bapowa jopa yawenaetsi baxua. Saya ekeicha bichokono abe tsóponae bapowa. ²⁷Poxonae bapowa jumetane xua pinae juiña Jesús axaibi éxana jiwi, bapoxonae bapowa imoxoyo kakuita unguataba Jesús peputha tatsi xua pin bichéitha. Barapowa Jesús pía paparuwa tatsi tajáyabatsi xua peopírawa. ²⁸Barapowa piyakoutha natsipaeba, najéi: “Icha saya Jesús pía paparuwa tajayabín, bapoxonae axaibin tsane”, najéi. ²⁹Poxonae barapowa tajáyaba Jesús pía paparuwa tatsi, bapoxonae kaena naiña bapowa ajaneibi tsanareka. Bapowa piyakoutha nayaputane xua báyatha axaibi. ³⁰Jesús piyakoutha nayaputane xua ichüing axaibi peexanáewatsi, tsipéi pía pepong weya taajíwana tsurukuaetsi pía peayapusüü itorobi koyenewa tatsi. Bapoxonae Jesús napatomeicha nekota jíwitha, jeye:

—¿Jintam inta paparuwa jayabará? jei Jesús.

³¹Néxata Jesús pijimonae jumenótatsi, jeye:

—Ápara xam báyatha táneme xua pin bicheito katsakibaba. ¿Eta xua metha pana yáiñabame: ‘¿Jintam metha inta paparuwa jayabará?’ jam? jei pijimonae tatsi.

³²Íchitha Jesús daxita jüpaya tane peyaputaenexa pong pejayabíwatsi. ³³Barapowa bichokono junuwa, tsipéi yaputane xua barapowa Jesús jáyabatsi poxonae axaibi éxanatsi. Barapowa jijiyeya patopa Jesthath, yawa pentabokototha unguakua Jesús peitabaratha tatsi xua Jesús pebarükui-iturajinaexaetsi peaiñakuinxae. Barapowa bara xaiñeya paeba daxita pokotsiwa xua éxana. ³⁴Jesús jeye barapówatha:

—Yábüyo, kaaxaibi éxanatsi tana neyábara jumekowüntsixaem xua bara tana neitaküüpaewa xua takaaxaibi exanáewatsi. Saya jüntemiya póponde. Bara axaibim tsaibim tsane xua bara neputsitekae tsane, jei Jesús.

³⁵Poxonae Jesús kataunxuae kueikueije tsungkuae barapówatha, bapoxonae pata pomonae Jairo piabotha petanakuichi jíwichi. Bapong Jairo Pekanamataxeinaein judiomonae pía penakaetútsibo tatsi. Barapomonae jeye Jáirotha pong pexantiyo taaténetsi:

—Nexantiyo báyatha kata tüpa. ¿Eta xua metha kame fayakótame pong jiwi Pekuidubin? jei barapomona.

³⁶Bekein bara baxua Jesús jumetane, íchitha baxua Jesús jopa jumenaitaewa-tsiyo. Jesús jeye Jáirotha:

—Jopa junuwinde, saya maisha nejumekowünde, jei Jesús.

³⁷Bapoxonae Jesús jopa kopatsiyo xua pepunaponáewatsi tsainchi ichamona. Saya meisha Jesús kópata, xua pepunaponaenexa tsainchi Pedro, irü Santiago irü Juan pong Santiago peweicho tatsi. ³⁸Poxonae Jesusbarü pata Jairo piabotha tatsi, bapoxonae Jesusbarü tane pin bicheito xua ajumeyaxa. Barapomona bichokono wekoyéi, yawa wawái xua Jairo pexantiyo petatüpaexaetsi. ³⁹Bapoxonae Jesús joniya botha, yawa tsipaeba barapomonaetha, jeye:

—¿Eta pokotsiwa metha paajumeyaexam, xua yawa pawekoyam? Bárapo pexuyo ápara jopa tüpaeyo, ápara maitungkua, jei Jesús.

⁴⁰Íchitha barapomona Jesús jumekuikapónatsi. Néxata bárapo pin bicheito Jesús pesato beitaweya. Meisha saya Jesús barü joniya koxiyüing, koxíwano ichaxota Jairo pexantiyo tatsi petüpaeyo tabókatsi. Matáütano Jesús pijimona barü joniya póyobe akoibi póyobe. ⁴¹Barapowayo Jesús kobepita, yawa jeye:

—Talita, cum, jeichichi (xua ápara jeichi: ‘Yábüyo, asiya úngkuare, katsipáebatsi’, jei Jesús.)

⁴²Barapoxonae barapowa kaena naiña nontapona, powa xua doce po weibe xeina powayo Jairo pexantiyoaxa tatsi. Barapowa asiya unguua, yawa itakúüpatsi xua peponaewa. Barapoxonae bárapo pin bicheito poxonae baxua Jesús kuitainchi najüntükoyene kabenaeka. ⁴³Bapoxonae Jesús jumedangweya itoroba jíwitha xua baxua jopa peyábara paebínéxatsi ichamonaetha pokotsiwa Jesús kana éxana barapowáyotha. Bapoxonae Jesús itoroba xua bárapo pexuyo bara peapatsiwa tsainchi pexaewa.

Meje yábara poxonae Jesús Nazaret tómaratha pópona

(Mt 13.53-58; Lc 4.16-30)

6¹Néxata Jesús Capernaum tómara weya wárapa, ekeicha kaibeya pía tómara beya wárapa xua Nazaret tómara beya. Írürü Jesús pijimona punapoinchi. ²Poxonae judiomona barompaya pía pentakeiseikáe matakabi tatsi tsuxubi, bárapo matakábitha Jesús tamrópata pítaba xua kuiduba judiomonaetha judiomona pía penakaetutsibotha tatsi. Pinmonae pomona Jesús jumetayénatsi, barapomona najüntükoyene kabenaeka, jeye:

—¿Eta xota metha bapong nakuiduba daxita baxua jane? ¿Jintam metha kata bapongtha bárapo peyaputáe koyene jane, xua daxota bapong pexeiña petsita-itüütsi koyenewa éxana? ³Ápara bapong pong naepawang pematabobin. Bapong ápara María pexanto tatsi, ápara irü Santiago péntapin tatsi, irü José péntapin tatsi, irü ápara Judas péntapin tatsi, irü Simón péntapin tatsi. Ápara bara irü pamchowaxi tatsi watómaratha jinompa, jei barapomona.

Daxota barapomona jopa xapain Jesús yábara jumekowüntsichi. ⁴Íchitha Jesús jeye bárapo jíwitha:

—Daxita jiwi ba barükui-iturajina pongtha pong Nakom peayapusüü itorobi jume pepaebin. Nama pía tomarapiwi tatsi, irü piyamonae tatsi irü píabo matabüxyopiwi tatsi, barapomona ba jopa bapong barükui-iturajinaetsi, jei Jesús.

⁵Daxota Jesús jopa itaküüpaetsi xua pexeiña petsita-itiüütsi koyenewang peexanaewa bárapo Nazaret tómaratha po tómarara pía tómaraxae tatsi. Saya meisha Jesús axaibi éxana tsikimonaeyo pomonae peatenewi. ⁶Jesús najüntükoyene kabe-naeka, tsipéi barapomonae jopa yatsikaewa jumekowüntsichi.

**Meje yábara poxonae Jesús pijimonae itoroba xua barapomonae
peyábara kueikueijeinexa jíwitha pokoyene xua Nakom waba
jiwi xua petanaexanaenéxatsi pijimonae tatsi**

(Mt 10.5-15; Lc 9.1-6)

Daxota Jesús kuidubapona tsiki tomaraxitha po tomaraxi ena Nazaret tómarara pekuariya. ⁷Jesús waba pijimonae pomonae doce póyobe tatsi. Jesús tamrópata pítaba xua tsana itoroba tsíniya tómarangtha be aiña póyobe tsíniya. Jesús pijimonae kata pía peayapusúü itorobi koyenewa, xua pijimonae tatsi peitawetsinexa kaurimona. ⁸Jesús pijimonae itoroba, xua pijimonae tatsi jopa pekaponanexa pokotsiwang xua poxonae námtongtha peponanexa. Itoroba xua saya meisha pekaponanexa naetong po naetong penakobe nabababí naetong. Jopa bewa barapomonae pekaponanexa kotein, yawa jopa bewa pekaponanexa pexaewang, yawa jopa bewa pekaponanexa parátixi. ⁹Yawa Jesús pijimonae itoroba xua baranataxuxatabina sapatong, po sapatong pebüxümüübiwang. Matáütano barapomonae bewa namaxatabina saya be kae kamishang. Jopa bewa kaponáe icha kami-shang. ¹⁰Jesús pijimonae barái, jeye:

—Poxonae papátame tómaratha moya bara páenare po botha papátame, xua beya abü poxonae pawarapáename bárapo tómarara weya. ¹¹Icha, icha tomarapiwi jopa paka matenta weyataeya wábiyo, matáütano icha jopa paka jumenaitaewatsiyo pokotsiwa papáebame, néxata bapoxonae bárapo tómarara weya pawárapare. Po tsórobong paiña táxutha dubena panataxu wenünübábare bárapo tómaratha. Baxua paexande xua barapomonae peyaputaenexa xua ápara barapomonae abe éxana paxamtha, jei Jesús.

¹²Bapoxonae Jesús pijimonae tatsi ponarúküpa Jesús piyaxaiña weya tatsi. Barapomonae kueikueijeí jíwitha xua bewa pinae jiwi icha jüntükoyene xeináe Nakomtha xua peúruxae xua abe peéxanae kuirukoyene éxana Nakomtha. ¹³Barichino barapomonae taitaweta kauri pomonae yakauríbatsi. Matáütano barapomonae kaxueba penasíwatha pomonaetha, pomonae peatenewi. Bapoxonae barapomonae axaibi éxana pinmonae pomonae peatenewi.

Meje yábara poxonae Juan bexotsi pong Pebautisabin jiwi

(Mt 14.1-12; Lc 9.7-9)

¹⁴Herodes pong Galilea nakuapiwi itorobiya pía pepa peewatsinchi bapong jumetane xua juiña jiwi daxita jumetane pokotsiwa Jesús éxana. Daxota bapong jeye:

—Juan pong jiwi Pebautisabin pong bekein báyatha tüpa, ekeicha asüü juina. Daxota barapong Jesús xeina bárapo peayapusúü itorobi koyenewa xua éxana pexeiña petsita-itiüübi koyenewang, jei Herodes.

¹⁵Ichamonae Jesús yábara jeichichi:

—Bapong ápara Elías xua ekeicha asüü, pong báyatha tüpa, jei.

Írürü ichamonae jeye:

—Bapong ápara pong Nakom peitorobi jume pepaebin icha pomonae ichi pomonae Nakom peitorobi jume pepaebiwi pomonae kaena báyatha jinompa, jei xua ichamonae paeba.

¹⁶Poxonae Herodes baxua jumetane, jeye:

—Ápara bapong Juan, pong yábara xua báyatha najumekarutang xua bapong pewishi-ukuibíwatsi. Ánoxuae bapong ekeicha asüü petúpáe kuirukoyene weya, jei Herodes. ¹⁷Bapong baxua paeba, tsipéi kaena báyatha kui-itoroba xua Juan pewaetabinéxatsi, matáütano xua pemaxükübinexatsino matáütano xua jiwi pekübibotha peetsinéxatsi. Herodes baxua éxana tsipéi píowa tatsi powa pewüing Herodías piyakoutha baxua peichichipaexae. Barapowa kopiya Felipe xeina pong Herodes peweicho tatsi. Herodes peweicho yakaiba yábüyo. ¹⁸Daxota Juan jiwi pekübibotha étatsi, tsipéi Juan Herodes tsipáebatsi, jeichichi: ‘Nakom pía peitorobi koyenewa jopa kopatsiyo xua xéiname bapowa tsipéi bapowa eweicho píowa tatsi’, jei Juan.

¹⁹Daxota bapowa Herodías Juan bichokono kasébatsi. Bekein bapowa ichichipa xua Juan pekaenaetaxubíwatsi xua ichamonae pebexubíwatsi tsainchi, íchitha jopa itaküüpaetsi bapowa. ²⁰Herodías jopa itaküüpaetsi xua peexanaewa baxua, tsipéi Herodes Juan kunúwatsi. Bapong yaputane xua Juan bara xaniwai-cha peexanaein, xuano matáütano bara jüntükoyene wüünae Nakomtha. Daxota jopa kopatsiyo xua Juan bara abe pekana exanaenexa tsainchi. Bekein Herodes yábara ünthüthüdeideijeji pokotsiwa Juan pepaebixae, dáichitha áwiya ichichipa pokotsiwa Juan pepaebiwa. ²¹Íchitha matakabi jopa, po matakábitha Herodías itaküüpatsi xua Juan abe pekana exanáewatsi. Herodes yantakabi jopa, po matakábitha kaena báyatha Herodes nakatsiwa poxonae pexuyo. Bárapo matakábitha Herodes éxana pin penabanaewa. Bapong waba pomonae irü pentakaponaewi, pomonaetha itoroba xua irü takanamataxéinatsi icha tómarangtha. Írúno wábano pomonae soldadomonae pía pepa pentakaponaewi tatsi. Írúno wábano pomonae aiñakuí penaexanáe jiwi Galilea nákuatha. ²²Herodías pexantiyo tatsi patopa po tütutha ichaxota nabanathopa. Barapowa tsita yaweibungkua xua barapomonae tane. Baxua Herodes ichichi xeika xua bapowa yaweibungkua. Írürü pomonae baxota naxayena, ichichi xeika baxua. Bapoxonae Herodes jeye bapówatha.

—Newúükare pokotsiwa xua neichichipaewa, bapoxonae kakatsinchi jiña beta neyaweibixae, jei Herodes.

²³Bapong Herodes yábara tsiwüünae muxudutsiya jeye:

—Bara kakatsinchi pokotsiwa xua newúükame. Metha bekein newüükáetsipame xua tanakua epatoyatsipang báraxua bara kakatsinchi, jei.

²⁴Barapowa pona xua peyaiñabinexa pena, jeye:

—Ena, ¿eta pokotsiwa metha wüükakuaein? jei.

Barapowayo pena jumenótatsi, jeye:

—Wüükare Juan pentasipa tatsi, pong jiwi Pebautisabin matasipa, jei Herodías.

²⁵Barapowayo barapoxonae kaena naiña pona ichaxota eka Herodes. Jeye bapongtha:

—Ichichipang xua naiña ánoxuae tanekatsiwam tsane paratongtha Juan pentasipa tatsi, pong jiwi Pebautisabin matasipa, jei.

²⁶Barapoxonae Herodes bichokono ünthüthüwekoyéi. Íchitha tsipéi báyatha yábara petsiwüünae muxudutsixae xua bepa pinae katsina pokotsiwa wüükaeinchi,

matáütano tsipéi pejumetaexaetsi pomonae báyatha waba, daxota Herodes jopa be jumetotábiyo pokotsiwa wúükatsi. ²⁷Bapoxonae kaena naiña Herodes itoroba soldadomonaepin xua pekarenaenexa tsane paratongtha Juan pentasipa tatsi. Bapong pona jiwi pekübibó beya. Baraxotiya Juan wishi ukuíbatsi. ²⁸Bárapo soldadomonaepin matasipakarena paratongtha. Bapong kata yabüyotha. Barapowayo xuya pena kata.

²⁹Pomonae Juan pía pepunajinompaewichi jumetane xua pinae Juan bexotsi. Barapoxonae barapomonae pona jiwi pekübibó beya xua Juan pepichinexa tsainchi petüpaein, yáwano xua peboyaenexa tsainchi ibowóu müthü iya.

Meje yábara poxonae Jesús ápata pexaewa cinco mil pebiwi

(Mt 14.13-21; Lc 9.10-17; Jn 6.1-14)

³⁰Barapoxonae pírapae Jesús pía peitorobiwi tatsi, Jesús barü nakaetútatsi. Barapomonae Jesús tsipáebatsi xua daxita pokotsiwang barapomonae peexanaexae, yáwano pokotsiwa xua báyatha barapomonae kuiduba. ³¹Jesús pijimonae tsipaeba, jeye:

—Anetha poinchi, xua wanafifina ewatsinexa tsainchi saya kaeto ichaxota jiwaibi beya, jei Jesús.

Daxota Jesús baxua paeba, tsipéi pinmonae Jesús ítata patéibatsi, xua poxonae na-epanaya poneiba. Daxota Jesús irü pijimonae tatsi jopa itaküüpaetsi xua pexaewa tsane. ³²Barapoxonae Jesús, irü pijimonae tatsi kompa ponarúkupa jératha icháwatha beya xua ichaxota jiwaibi beya. ³³Íchitha pin bicheitomonae tane poxonae Jesús irü pijimonae tatsi jératha pona. Bárapo pin bicheitomonae Jesusbarü yaitainchi. Bárapo pin bicheitomonae daxita tómarang wekuinaeyiya. Bapoxonae pata ichaxota jiwaibi beya. Barapomonae tsiwanaya pátatsi Jesús. ³⁴Poxonae Jesús jera wenontouna bapoxonae Jesús tane pin bicheito. Jesús yábara najüntükoyene xeina xua barapomonae peyawenaenéxatsi. Barapomonae jopa xeinaeyo pong peyawenaein barapomonaetha icha be oveja ichi poxonae jopa xeinaeyo pong peyapuenaein. Daxota Jesús barapomonaetha kuiduba aiña koyenein. ³⁵Poxonae tabópiya tsanáichaba Jesús pijimonae ítata pátatsi, jeye Jesustha:

—Báyatha tabópiya tsanaicha. Xote ápara bong aibi xua ichaxota jiwi jinompa. ³⁶Barapomonae itoróbare ichaxota po bong pipatotha umena yawa ichaxota xua tomarangxitha xua imoxoyo wakuariya xua barapomonae pekomokaewa pexaewa. Tshipéi xote pexaewa aibi, jei pijimonae tatsi.

³⁷Íchitha Jesús pijimonae barái, jeye:

—Paxam jame moya paápare pexaewa, jei.

Barapomonae jeye:

—¿Xam ichichípame xua pata üpainkomokaewa tsane bárapo bicheitomonae aiña panmonaein xua pata komokaenexa doscientos po paratiximonáebetha póko-tsi paratiximonaebe xeineiba pomonae nakuiteiba doscientos matakabibetha? jei barapomonae.

³⁸Jesús barái pijimonae, jeye:

—Pang ¿eta xóyobe paxéiname? Ínkane matha pataema, jei.

Poxonae barapomonae yaputane jeye Jesustha:

—Cinco po pányobe, yawa aiña póyobe duwéiyobe, jei barapomonae.

³⁹Jesús pijimonaе najumekaruta xua bepa daxita bárapo bicheito íratha tae-naetsei naepanáewatha xua pepa bicheitong tsana náexana tsíniya. ⁴⁰Bárapo pin bicheito pepa bicheito náexana tsíniya. Icha bicheito cien póyobe tsíniya. Icha bicheito cincuenta póyobe tsíniya. ⁴¹Barapoxonaе Jesús pekóbetha pita pan cinco po paiñobe. Yawa pita duwéiyobe xua aiña póyobe. Bapoxonaе Jesús peitaboko benekoicha, Nakomtha tsipaeba jeye: “Axa maisha jüntükoyene weiweinang xua pexaewa pata tanekatsiwaxaem”, jei Jesús. Barapoxonaе Jesús epajanaxuba pan. Jesús pijimonaе kata bárapo pan, xua pijimonaе tatsi xuya pekatsibaponaenexa bárapo pin bichéitotha. Barichi Jesús duwéiyobe epajanaxúbabe. Bapoxonaе ápata bárapo pin bichéitotha. ⁴²Bárapo pin bicheito bara daxita nábane. Bara jain kowúntarükúpatsi. ⁴³Barapoxonaе Jesús pijimonaе tatsi doce po kótebe wumba xua nakópaba xua báyatha bárapo jiwi jopa xaeyo petonsanaexae. ⁴⁴Pomonaе xua bárapo pan pexaexae barapomonaе cinco mil pebiwimonaе.

Meje yábara poxonaе Jesús mene matatsunjúmatha pona

(Mt 14.22-27; Jn 6.16-21)

⁴⁵Pírapae Jesús pijimonaе itoroba xua peponaenexa jératha, xua icha muxunene beya. Barapomonaе Jesús tsíwana páyatsi Betsaida tómara beya. Barapoxonaе Jesús napéyaba bárapo pin bicheito. ⁴⁶Poxonaе Jesús napéyaba bárapo pin bicheito, bapoxonaе Jesús pona demuxuwatheicha xua petsipaebinexa Nakomtha. ⁴⁷Poxonaе báyatha kirei tsanaicha, bapoxonaе Jesús pijimonaе tatsi irü jératha tuwüütha yanapona. Jesús irü kompa pekaetha pópona. ⁴⁸Jesús tane xua barapomonaе bichokono dangweya nowaeta tsipéi dawerena bichokono joibo dangwéi. Poxonaе matakeiwünaeyo tsóponaе, Jesús pijimonaе imoxoyo kakuita pona. Bapong mene matatsunjúmatha pona. Jesús juntukuru xenta iya barapomonaе. ⁴⁹Poxonaе Jesús pijimonaе tainchi xua mene matatsunjúmatha pona, barapomonaе itaraerowiya nantaxeina, xua Jesús ítara mexeya dowatsiwe, jei. Yawa barapomonaе wawái. ⁵⁰Daxota barapomonaе bichokono wawái, tsipéi daxita barapomonaе tane, yawa bichokono kuitaya junuwa. Íchitha Jesús barái barapomonaе, jeye:

—¡Ápara xang! ¡Jopa pajunuwinde! ¡Maisha pajüntükoyene weiwéinare! jei Jesús.

⁵¹Bapoxonaе Jesús jératha nontabiya barapomonaе piyaxantha tatsi. Barapoxonaе joibo kaewanaya éxana. Barapomonaе bichokono najüntükoyene kabenaeka. ⁵²Barapomonaе baxua éxana, tsipéi barapomonaе kataunxuae jopa yaputaeyo xua ápara Jesús pong Nakom itoroba. Bekein bapong pexeíña petsita-itüütsi koyenewa éxana poxonaе ápata pan pin bicheitomonaetha, barapomonaе jopa beyaputaeyo piajüntükoyenéwangtha.

Meje yábara poxonaе Jesús axaibi éxana pomonaе peatenewi, pomonaе Genesaret nakuapiwi

(Mt 14.34-36)

⁵³Jesús, irü pijimonaе tatsi bara pítapa berubenathopiya xua pukua weya. Genesaret nákuatha pata. Baxota jera ketanota pitapatha. ⁵⁴Poxonaе Jesús jera wenontouna, bapoxonaе kaena naiña pinmonaе Jesús yaitaerükúpatsi. ⁵⁵Bapoxonaе bárapo jiwi bara wekuinaeyiya daxita bárapo ira weya. Matáütano karendena

pokotsiwa pemaichíwatha pomonae atenemonae, Jesús piyaxaiña betakayíyatsi. ⁵⁶Daxítangtha ichaxota Jesús ponaena, ichaxota bekein tsika tómaraxi, ichaxótano bekein pin tómarang, ichaxótano bekein tómarang kuariya, daxita barapomonae kápona peatenewi. Bárapo peatenewi jébatsi námtongha. Barapomonae Jesús wúükatsi xua Jesús petajayabinéxatsi pía paparuwa peopírató tatsi. Daxita pomonae Jesús pía paparuwa tajáyabatsi daxita barapomonae axaibi tsürüküpeibi.

**Meje yábara poxonae Jesús yábara paeba xua pebin
abe Peéxanae kuirukoyene jüntüwé bókatsi**

(Mt 15.1-20)

7 ¹Néxata fariseomonae, irü pomonae jiwí pekuidubiwi Moisés pía peitorobi koyene tatsi xua pomonae Jerusalén tómará werendena, daxita barapomonae Jesús imoxoyo kakuita poinchi. ²Barapomonae tane xua Jesús pijimonae tatsi jíwana najüntükoyene taxoba xuano xua daxota Nakom tsita natsikuéntatsi abe peexanaexae poxoru jopa matha nakobekiatsiyo poxonae xane. Daxota barapomonae nantaxeina xua Jesús pijimonae tatsi pomonae peantükuiruyápube jiwí. ³(Barapomonae aichaxaibi xua Jesús pijimonae tatsi jopa matha nakobekiatsiyo poxonae xane, tsipéi fariseomonae irü daxita judiomonae jopa daichiyo. Barapomonae píyakuí xeina xua jopa xaibiyo poxonae jopa matha tsiwanaya dangweya nakobekiatéibiyo. Barapomonae bárapo kuikoyene éxana xua pokuikoyene pía pamo susato jiwí tatsi kopiya kanantafórota. ⁴Poxonae barapomonae kaibe nawibeibarena ichaxota po bong xua pexaewa pekaenaetsiwang weya, bapoxonae kopiya tsiwanaya mérangtha naperüü tsikababeiba xua poxonae xane. Barichi barapomonae icha koyeinno exanapona xua peitorobi koyenéwangtha itoroba xua poxonae korótixi ítapa kíata, yáwano korótongno xua kaseta ítapa kíata yáwano paratong po paratong pekaxae paratong ítapa kíata yawa camang.) ⁵Bapoxonae fariseomonae, irü pomonae jiwí pekuidubiwi Moisés pía peitorobi koyene tatsi, jeye Jesustha:

—¿Eta xua metha jiña jiwimonae jopa exanaeyo xua pokotsiwa waámo susato jiwí pía peitorobi kuikoyenewatha itoroba xua pena jüntükoyene taxobiyainwa? Jiñamonae barapokuí jopa exanaeyo xua jopa matha tsiwanaya nakobekiatéibiyo poxonae beya xaiba. Daxota jiñamonae pomonae peantükuiruyápube jiwí xua pena jüntükoyene taxobixae, jei barapomonae.

⁶Jesús jumenota barapomonae, jeye:

—Bara Isaías pong Nakom peitorobi jume pepaebin beta xaniwaicha paka yábara paeba xua paxam pomonae ítara mexeya wüünaeya pepaebi jiwí pam, dáichitha ápara abeya peéxanae jiwí pam. Bapong paka yábara tinaeya jeye, xua Nakom paeba:

‘Barapomonae neyábara barükui-iturajina poxonae kueikueijeí tsaibi, íchitha pejüntükoyenéwangtha jopa neantobeyo.

⁷Pokotsiwa poxonae barapomonae wüünae nejainta saya pejumepawi. Po pekuidubiwa xua barapomonae kuiduba jíwitha saya ápara jiwí pía peitorobi koyenewa tatsi’,
jei Nakom xua Isaías tatina Nakom,
jei Jesús.

⁸Ekeicha Jesús jeye bárapo fariseomonaetha irü pomonaetha, pomonae pekuidubiwi Moisés pía peitorobi koyene tatsi:

—Saya paxam panaitématame pokotsiwa Nakom pía peitorobi koyenewang tatsi paiña exanaenexa po petorobi koyenewa paiña amo susato jiwi kopiya kana mata fórota. Paxam baxua paéxaname poxonae jiwi paitoróbame xua jiwi matha penakobe kiateibinexa poxonae xaiba pena jüntükoyene taxobiyainwa, jei Jesús.

⁹Ekeicha Jesús barapomonaetha jeye:

—Itapetsiya paiña neexanaenexa pokotsiwa paiña amo susato jiwi pía peitorobi koyenéwatha itoroba, daxota bichoina pajume itawétame Nakom pía peitorobi koyenewa tatsi. ¹⁰Báyatha Moisés pía peitorobi koyenéwatha itoroba, jeye: ‘Axa barükui-iturajínare, irü ena barükui-iturajínare’, jei. Ekeicha bapong Moisés jeye: ‘Pong abe yábara paeba paxa, xua jopa peyawenaewa paxa, ichakuitha tsipae xua pénatha, bara bapong bewa tüpaena’, jei Moisés. ¹¹Íchitha paxam papáebame, xua pinae pebin bara itakúüpatsi xua páxatha tsipaeba, ichakuitha xua pénatha xua jeye: ‘Jopa neitaküüpaeyo xua tapaka kayawenáewatsi, tsipéi daxita pokotsiwa xeinang xua bekein pokotsíwatha tapaka kayawenáewatsi tsainchi baxuang daxita Nakomtha katang’, xua jei pebin. ¹²Poxonae pebürüya payábara nantaxéiname xua bapong baxua paeba, bapoxonae bara pakópatame xua bárapo pebin jopa penantawenonaewa xua peyawenaewa páxatha, írürü xua pénatha. ¹³Poxonae paexanapóname pokotsiwa paiña amo susato jiwi pía peitorobi koyenéwatha itoroba, xuano xua ichamonae pakana éxaname xua baxua irü éxana bapoxonae paxam Nakom pía peitorobi jume pekuipawijume pakana éxaname. Barichi icháwangno xua be jüpa xua peabe koyenein paexanameno, jei Jesús.

¹⁴Ekeicha Jesús waba bárapo bicheito piyaxaiña bérena, jeye:

—Daxita paxam pana nejumetaema yawa pana nejumekopi-yaputaema pokotsiwa paka tsipaebinchi. ¹⁵Pokotsiwa ba pebin pekoiboto deka tsijain jojonékatsi pexaewang, bárapo koyene ápara ba jopa bápana pebin antükuiruyápube exanaetsi xua poxonae pokotsiwa peexanaexae. Jame pokotsiwa ba pebin nantaxeina xua pekoibótotha kaunuta xua peabe jume, barapojume koyenéwatha jame pebin antükuiruyápube éxanatsi xua poxonae pekueikueijeixae baxua. ¹⁶Icha amuxudubéname, moya pana nejumenaitáeware pokotsiwa tapaka tsipaebíwatsi, jei Jesús.

¹⁷Poxonae Jesús jiwi kuenta pona yawa bo bejoniya, bapoxonae Jesús pijimonae yábara yáñabatsi bárapo pekayábara jüta pepaebi diwésiyo. ¹⁸⁻¹⁹Jesús jumenota pijimonae jeye:

—¡Paxam bara paichim icha fariseomonaе ichi! Jopa payábara yaputaem bárapo pekayábara jüta pepaebi diwésiyo xua pexaewa yábara. Báyatha paxam payaputáneme pokotsiwa pebin tsijain jojonékatsi pexaewa pekoiboto deka, bárapo pexaewa jopa abe kana exanaeyo pebin pía jüntükoyenewa. Bárapo pexaewa pebin jopa antükuiruyápube exanaetsi. Bárapo pexaewa jopa ponaeyo pía jüntükoyenéwatha. Jame bárapo pexaewa pekotsórotha pona. Bapoxonae pexaewa aichúrukuae nawexakaeka, jei Jesús.

Poxonae Jesús baxua paeba jiwi yaputané xua daxita pexaewang bara wüünae pexaenexa. Jopa jiwi antükuiruyápube exanaetsi. ²⁰Ekeicha Jesús namchi, jeye:

—Pokotsiwa pebin pekoibótotha kaunuta xua peabe jume, barapojume koyenéwatha jame pebin antükuiruyápube éxanatsi. ²¹⁻²²Tsipéi pejüntükoyenéwatha pebin nantaxeina, xua meje bapokotsíwangje: Abe penantaxeináe koyenewa, irü peitakoxanáe koyenéwatsi xua poxonae penayaputaewi naperüü nakóyaba, irü ichüng piyawa tatsi pekaibi koyenewa, irü ichüng anaya pebexotsi koyenewa,

irü ichüing piseuri tatsi pepichi koyenewa, irü ichüing piyawa tatsi peichichipáe koyenewa, irü abe peéxanae koyenewa, irü ichüing pemuxutorobíwatsi koyenewa, irü peyüüyüüjei koyenewa, irü peúwi koyenewa, irü ichüing peyábara naerabíwatsi koyenewa, irü ichamonae peaabí koyenéwatsi, irü jopa xaiñeya peéxanae koyenewa poxonae bekein yaputaetha xua jopa bewa exanáe. ²³Daxita bárapo koyenein pejüntükoyene weya jumepíchapa. Bárapo jumekoyeneintha pebin antükuiruyápube éxanatsi, jei Jesús.

**Meje yábara poxonae yábüyo powayo penanapaincha
poponaewayo Jesús jumekowúntatsi**

(Mt 15.21-28)

²⁴Bapoxonae Jesús bara weya pona. Tiro tómara beya pona. Sidón tómara beya pónano. Jesús botha joniya. Bekein Jesús aichaxaibi xua jiwi yaputane ichaxota bapong eka, íchitha Jesús jopa itaküüpaetsi xua nameicha eka. ²⁵Barapoxonae kaena naiña petsiriwa jumetane xua Jesús botha eka. Barapowa pexantiyo tatsi yakauríbatsi. Daxota bárapo petsiriwa patopa Jesustha. Yawa pentabokototha unguwa Jesús peitabaratha tatsi xua bapowa petsita-aiñakuixaetsi. ²⁶Barapowa penanapaincha poponaewayo pekueikueijeixae griego jume. Jopa judiomonae jito-wáyiyo. Bapowa sirofeniciamonaewayo nakatsiwa penakatsiwixae Fenicia tómaratha xua Siria nákuatha. Barapowa Jesús wúükatsi jeye:

—Taxantiyo inta taitawere kauri, jei barapowa.

²⁷Íchitha Jesús jumenota barapówatha pekayábara jüta pepaebi diwesíyotha, jeye:

—Jopa bewa ba auri ápatsi pexaewa pokotsiwa pexui pía pexaewa tatsi. Baxua kaunutsiya ápara yábara páebang xua jopa bewa katsin tsane pomonaetha, pomonae penanapaincha jinompaewi pomonae jopa judiomonae naexanaeyo xua pokotsiwa barompaya judiomonae piyawa tatsi. Daxota jopa wüünaeyo xua kayawénatsi, jei Jesús.

²⁸Barapowa jumenota Jesustha pekayábara jüta pepaebi diwesíyotha, jeye:

—Aa, bara barichi xuaunxuae netsipáebame pongxaem Tanekanamataxeinaem. Xaiñéi páebame. Jopa ba bewa auri katsibi pexui pía pexaewa tatsi. Dáichitha auri ba xane pokotsiwa pexui sorobaba bárapo pepürüwixi pokotsiwa pexaethopaewa pebüxüpana tsika othopeika. Bara jütiya ichiya nekana ichinde, dáichitha neyawende, jei bapowa.

²⁹Barapoxonae Jesús barái barapówatha, jeye:

—Bara xaniwaicha páebame daxota kayawénatsi. Moya bara beya pónare. Bara báyatha nexantiyo wepu poinchi kauri, jei Jesús.

³⁰Poxonae barapowa patopa piabotha, pexantiyo taebota xua cámatha jüntema boka. Matáütano tane xua bapowayo báyatha wepu poinchi kauri.

Meje yábara poxonae Jesús axaibi éxana pong pemuxusipanaein

³¹Bapoxonae Jesús Tiro tómara weya pona, xua kaibeya pona, ichaxota Sidón tómara iya pona. Matáütano ichaxota diez po tómarangbe iya pona po tómarang pewüing Decápolis. Bapoxonae Galilea púkuatha patopa. ³²Baraxotiya Jesús pía xaiña bérena takapoinchi pebin pong muxusípana, matáütano xua jopa itaküüpaetsi xua pekueikueijiwa. Pomonae pekarendenaexae bapong, barapomonae

Jesús wúükatsi, xua Jesús pentajayabiwa tsane xua bapong axaibi peexanaenexa tsainchi. ³³Bárapo pebin Jesús aishowa bebarü poiña pin bicheito pía xaiña weya tatsi. Jesús pekobesitobetha nantíyabe muxu yauxátata. Poxonae naonesutaba peone pekóbeta bapoxonae bárapo kóbeta ébato jáyaba bapongtha. ³⁴Bapoxonae Jesús peitaboko benekoicha, yawa najumeikajuina, yáwano jeino bapongtha: “¡Efata!” jeichichi, (xua jeichichi: “¡Muxunasábare!” jeichichi.)

³⁵Bapoxonae kaena naiña bapong muxunasaba nantíyabe. Matáütano bara ébato wüünae. Matáütano bara itakúüpatsi xua pekuiekueijeia beta. ³⁶Bapoxonae Jesús barái barapomonae, jeye: “Jopa ichamonaetha pana neyábara paebinde pokotsiwa éxanang”, jei Jesús. Bekein Jesús matowa tsipaeba baxua, dáichitha barapomonae áwiya baxua yábara paebeiba ichamonaetha beyakaincha xua Jesús jumematawenta. ³⁷Barapomonae najüntükoyene kabenaeka, yawa jeino: “¡Maisha barapong bichokono daxita koyeneya wüünae éxana! Pomonae pemuxusipanaewi ekeicha beta jumetane, yawa bara kueikueijeia”, jei barapomonae.

Meje yábara poxonae Jesús pexaewa ápata cuatro mil pebiwi

(Mt 15.32-39)

8 ¹Bapoxonae icha matakábitha pinmonae nakaetuta Jesús piyaxantha tatsi. Jopa xeinaeyo pokotsiwa xua pexaewa tsane. Bapoxonae Jesús waba pijimonae, yawa jeye:

2—Barapomonae yábara najüntükoyene xeinang tayawenaenexa, tsipéi barapomonae báyatha xote nebarü jinompa akoibi po matakábibe. Ánoxuae jopa xeinaeyo xua pokotsiwa pexaewa tsane. ³Icha barapomonae jainbotha pu-itorobíchipang piabong beya, piyain námtotha xuirabathopáetsipa. Metha xuirabathopáetsipa tsipéi ichamonae báyatha tajü werendena, jei Jesús.

⁴Jesús pijimonae jumenótatsi, jeye:

—Paxang jopa pana itakúüpaeyo xua barapomonae pexaewa pata apatsiwa, tsipéi xote jiwaibi xua pata komokaenexa pexaewa, jei Jesús pijimonae tatsi.

⁵Jesús yáñaba pijimonae, jeye:

—¿Eta po pangyobe paxéiname? jei.

Jesús jumenótatsi pijimonae, jeye:

—Siete po pangyobe paxeinang, jei.

⁶Néxata Jesús pijimonae najumekaruta xua bepa pinae bárapo jiwi íratha taenae-tsei. Jesús pekóbeta pita bárapo siete po pangyobe. Bapoxonae Nakomtha tsipaeba jeye: “Axa, maisha jüntükoyene weiweinang xua pexaewa pata tanekatsiwaxaem”, jei Jesús. Bapoxonae Jesús pan epajanakiya nakobeweta. Bapoxonae Jesús pijimonae katsibapona, xua pijimonae tatsi xuya pekatsibaponaenexa bárapo bichéitotha. ⁷Bari-chino barapomonae be kónotha xeina duweixi poxi tsikirixi. Jesús Paxa tsipaeba jeye: “Axa, maisha jüntükoyene weiweinang xua pata tanekatsiwaxaem duweixi”, jei Jesús. Poxonae Jesús epájánaka, bapoxonae pijimonae kobe-itoroba xua peka-tsibaponaenexa bárapo bichéitotha. ⁸Daxita barapomonae bara xane. Daxita bara jain kowüntarükúpatsi. Pírapae áwiya ekeicha wumba siete po kótebe xua nakópaba pokotsiwa xua barapomonae báyatha jopa xaeyo petonsanaexae. ⁹⁻¹⁰Pomonae nábane pexaewa, barapomonae cuatro mil pebiwi. Bapoxonae Jesús pu-itoroba barapomonae, xua penawibiyaenexa pía tómarang beya. Bapoxonae kaena naiña Jesús, irü pijimonae tatsi, jératha nonobábiya pewarapaenexa Dalmanuta nakua beya.

**Meje yábara poxonae fariseomonaes Jesús kui-itoróbatsi xua
peexanaewa tsane pexeña petsita-itüütsi koyenewa**

(Mt 16.1-4; Lc 12.54-56)

¹¹Bapoxonaes fariseomonaes pata Jesustha. Barapomonaes tamrópata notarúkupa xua najumematsontsónoba éxana Jesustha. Barapomonaes Jesús pejüntükoyene jüjütsinéxatsi, daxota Jesús piraichi kui-itoróbatsi pía petsita-itüütsi koyenewa pókotsi koyenewa xua kana éxana itaboko wétsika. Barapomonaes jopa bapong jumekowüntsichi icha jopa itaküüpaetsi xua éxana petsita-itüütsi koyenewa. ¹²Jesús najumeikauna pejüntükoyene weya poxoru barapomonaes bapong amuxu-koyenefáetabi éxanatsi. Bapoxonaes jeye:

—¿Eta pokotsiwa metha barapomonaes tapexeña tsita itüütsi koyenewa nekui-itoroba jane? Bara xaiñeya paka tsipáebatsi jopa bápána beexanaeíño baxua, xua barapomonaes nekui-itoroba, jei Jesús.

¹³Bapoxonaes Jesús kuenta pona barapomonaes jératha, peponaenexa icha muxunene beya xua pukua iya.

**Meje yábara poxonaes Jesús pijimonaes yábara yaputane
éxana pokotsiwa pan kotowa éxana**

(Mt 16.5-12)

¹⁴Jesús pijimonaes tatsi jüntemaina xua kápona pan. Meisha kae pan kápona jératha, po nae pin naetha. ¹⁵Jesús itoroba pijimonaes, jeye:

—Dota pam, jopa pajumenaitaewatsinde fariseomonaes pía pekuidubi koyenewa tatsi xua paiña nejumekowüntsiyainwa. Matáütano dota pam, xua Herodes pía pekuidubi koyenewa tatsi xua paiña nejumekowüntsiyainwa. Bárapo pekuirubi koyenewang jiwi ichawa beya ajüntükui koyeneyapubé kana exanapoinchi icha be pókotsi koyene ichi xua levadura matawüng xua pan kotowa exanapona beya poxonaes pin pan, jei Jesús.

¹⁶Jesús pijimonaes tatsi tamrópata notarúkupa xua kaemonaes natsipaeba, najéi: “Metha ápara poxoru jüntemáinatsi xua kapónatsi po pan xua levadura kotowa éxana, daxota metha baxua Jesús jüntükonikiya naka muxutsipaeba”, najéi barapomonaes.

¹⁷Jesús yaputane pokotsiwa pijimonaes tatsi natsipaeba. Íchitha poxoru Jesús yábara paeba xua fariseomonaes irü Herodes pía pekuidubiwang tatsi daxota Jesús yáññaba piyamonae:

—¿Eta xua metha pana natsipáebame xua jopa paiña nekaponaexae pan? Baxua papáebame ápara poxoru jopa pana nejumeyábara kowüntsim pokotsiwa paka kuidúbatsi. Kataunxuae jopa pana nekuiyábara yaputaem poxoru jopa paichichipaem xua paiña neyaputaewa tsane paiña jüntükoyeneintha. ¹⁸Paxam bekein pana nekui-táneme, íchitha jopa xaniwaicha pana nekuiyaputaem. Matáütano bekein bara pana nejumetaneme íchitha jopa xaniwaicha pana nejumekopi-yaputaem. Matáütano pajüntemáiname poxonaes pexeña petsita-itüütsi koyenewa éxanang jiwi nexa poxonaes pan katang jíwitha. ¹⁹Poxonaes jánakang pan xua cinco po panbe xua cinco mil pebiwi nexa, ¿eta po kotéthabe pawünbapóname xua pokotsiwa nakópaba? jei Jesús.

Barapomonaes Jesús jumenótatsi, jeye:

—Doce po kótebe ápara, jei Jesús pijimonaes tatsi.

20—Poxonae jánakang pan xua siete po panbe xua cuatro mil jiwi nexa, ¿eta po kotéthabe pawünbapóname xua pokotsiwa nakópaba? jei Jesús.

Barapomonae Jesús jumenótatsi jeye:

—Siete po kótebe ápara, jei Jesús pijimonae tatsi.

21Néxata Jesús pijimonae barái xua muxujéi:

—Metha matapaiña payaputáename xua ápara jopa yábara paka tsipaebichi pan. Ápara jame paka tsipáebatsi xua jopa bewa pajumekowüntsime tsane fariseomonae irü Herodes pía pekuidubiwang tatsi, jei Jesús.

Meje yábara poxonae Jesús itakuere wüünaeta pong peitatanakütsin Betsaida tómaratha

22Jesús pijimonae barü botouna jératha Betsaida tómaratha. Bárapo tomarapiwi jíwana karendena pong peitatanakütsin, Jesús piyaxantha tatsi. Barapomonae Jesús wúükatsi, xua bapong pematajayabinéxatsi xuano xua axaibi peexanae-néxatsi. 23Jesús kobepita pong peitatanakütsin. Bapong kobekapoinchi aishowa beya xua tómara weya. Bapoxonae Jesús naonesutaba bapong peitamaikéitobetha, itakuere jáyabano. Jesús bapong yáñaba jeye:

—¿Bara kaitaküüpa xua netaewa? jei Jesús.

24Bapong nekotaxuba, bapoxonae Jesús jumenótatsi, jeye:

—Pebiwi tang, dáichitha itanonjang. Jiwi saya be naewang jinompa, jei bapong.

25Ekeicha Jesús pekóbetha itamaikéi jáyaba nantíyabe. Bárapo pebin dangweya náitata babatsiya tane. Bapoxonae itamaikéi wüünae. Bapong bara beta matapaiña wüünae tane. 26Jesús itorobiya jeye bapong xua penawiyaenexa píabo beya:

—Jopa tómaratha ponaeinde xua jopa baxua taneyábara kueikueijeinexa jíwi-tha, jei Jesús.

Meje yábara poxonae Pedro namchi Jesustha jeye: “Xam ápara Mesías pong Nakom kaitorobika”, jei

(Mt 16.13-20; Lc 9.18-21)

27Bapoxonae Jesús, irü pijimonae tatsi pata tsiki tomaraxitha, po tómaraxi pewüing Cesarea de Filipo. Poxonae námtotha kataunxuae enapona, bapoxonae Jesús pijimonae yáñaba, jeye:

—¿Eta jiwi neyábara jei pokoyene xua xang bapong áparang? jei Jesús.

28Barapomonae Jesús jumenótatsi, jeye:

—Ichamonae kayábara jei: ‘Ápara bapong Juan, pong jiwi Pebautisabin, pong ekeicha petüpaein asüü juina’, jei. Irü ichamonae kayábara jei: ‘Ápara bapong Elías, pong ekeicha petüpaein asüü juina’, jei. Írürü ichamonae kayábara jei: ‘Ápara bapong jíwana, pomonae Nakom peitorobi jume pepaebiwi’, jei, jei Jesús pijimonae tatsi.

29Bapoxonae Jesús pijimonae yáñaba, jeye:

—¿Ínkane irü paxamdü? ¿Eta paneyábara jumichimdü xua xang eta pongdüng? jei Jesús.

Bapoxonae Pedro, Jesús jumenótatsi, jeye:

—Xam ápara Mesías, pong Nakom kaitorobika, jei Pedro.

30Jesús pijimonae muxubarái xua pijimonae jopa peyábara paebínéxatsi icha-monaetha baxua.

**Meje yábara poxonae Jesús nayábara diwesi
paeba pokoyene xua petüpaewa tsane**

(Mt 16.21-28; Lc 9.22-27)

³¹Bapoxonae Jesús tamrópata pítaba xua pijimonae tsipaeba pókotsi koyene xua Jesús kana exanaeinchi ichamonae, Jesús jeye: “Xang pongxaein Nakom Tananeitapetsin jiwi bichokono nepéraxa jübina. Matáütano pítiri jiwi, írürü sacerdotemonae pía pentakaponaewi tatsi, írürü pomonae jiwi pekuidubiwi Moisés pía peitorobi koyene tatsi, daxita barapomonae neitawétsina. Matáütano barapomonae nebexubina. Íchitha ekeicha asüü poponaein poxonae akoibi po matakabíyobe tsuxubi tsane”, jei Jesús. ³²Baxua Jesús pijimonae wünaeya muxutsipaeba xua barapomonae bara xaniwaicha peyaputaenexa. Bapoxonae Pedro, Jesús kompa aishowa bebarü póĩñatsi, Pedro Jesús jumedangweya tsipáebatsi xua Jesús jopa pepaebinexa baxua. ³³Jesús pijimonae napatomeicha nekota. Bapoxonae jumedangweya jeye Pédrotha:

—¡Xam be pong kaurimonae pía pentakaponaein tatsim! Bara newepu pónare, tsipéi xam jopa beta nantaxeinaem icha be jopa Nakom ichim poxonae xua beta nantaxeina. Saya xam nantaxéiname icha jiwi ichi poxonae nantaxeina, jei Jesús.

³⁴Bapoxonae Jesús waba pin bicheito, matáütano wábano pijimonae, yawa jeye daxita barapomonaetha:

—Icha pebin ichichipa xua tajiwimonae jíwanapin penaexanaewa tsane, bewa bapong yábara naitématsi pokotsiwa xua bapong ichichipa pía peéxanae koyenewang tatsi. Bapoxonae jame bapong bewa eexanaponáe pokotsiwa itorobang, bekein bara bapong bexotsi ichamonae, tajiwimonae jintongxae. ³⁵Pong naantobeya nata éxana pokotsiwa bapong ichichipa, bapong jopa xeinaeyo peajüntüyapüsüüwa, po peajüntüyapusüüwa ataya tsiteka xua Nakom pía nakua beicha. Íchitha pong neantobeya inta éxana pokotsiwa ichichipang tana neantobexae xuano xua pekueikueijeixae Nakom Pejume Diwesi, bapong xeinaena peajüntüyapüsüüwa, po peajüntüyapusüüwa ataya tsiteka xua Nakom pía nakua beicha. ³⁶Icha pebin bichokono kopei xeina pokotsiwa xeina po kae pin nákuathe, íchitha jopa xeinaeyo peajüntükoyenesüüwa po peajüntükoyenesüüwa ataya tsiteka, bapoxonae bapong jopa itaküüpaetsi xua pena jüntükoyene kapanepaewa xua pewerawerakaewa tsane. ³⁷Tsipéi pebin jopa itaküüpaetsi xua bárapo kopeitha Nakom pematomatsíwatsi, xua bapong pekatsinexa tsainchi peajüntükoyenesüüwa xua barapoxonae pepatopaewa tsane Nakom pía nakua beicha tatsi. ³⁸Icha ichüng neakaura, yawa nejume diwesi akáurano jiwi peitabaratha tatsi, pomonaetha, pomonae jopa tana nejumekowüntsi jiwi, pomonaethano pomonae bichokono abe peexanaewi, xang xuya barichin tsane. Xang pongxaein Nakom Tananeitapetsin, bapong xuya akaurang tsane. Baxua exanaein poxonae patopaetsikaein be jiwi pía Pekanamataxéinaein tatsi yaitüpanae susato patopaetsikaein. Taxa pía peitüpanaewa tatsi yawa patopeikaein. Matáütano Taxa pía matatsunpiwi tatsi nebarü patsikaena, jei Jesús.

9 ¹Barichino Jesús jeye:

—Bara xaniwaicha paka tsipáebatsi xua pomonae xote umene barapomonae jíwana abü kopiya matha yábara yaputaena xua pokoyene Nakom waba jiwi xua petanaexanaenéxatsi piyamonae pomonae itorobiya taewatsixae taayapusüüwatha. Bapoxonae barapomonae werapaena, jei Jesús.

**Meje yábara poxonae Jesús pijimonae peitütha
pexeiña itúpanae koicha tsanaya náexana**

(Mt 17.1-13; Lc 9.28-36)

²Poxonae seis po matakábibe jopa, xua Jesús paeba baxua bapoxonae pírapae Jesús barü pona Pedro, irü Santiago irü Juan. Barapóyobe Jesús kompa barü pona demuxuwatheicha po demuxuwa bichokono taücha. Baxoteicha barapóyobe peitütha tatsi, Jesús pexeiña itúpanae koicha tsanaya. ³Pokotsiwa Jesús pía penamaxatatsiwa bichokono daedaena, yawa bichokono íñapana, beyakaincha poxonae jiwi bichokono paparuwa matánaka xua íñapana éxana. ⁴Bapoxonae Pedro, irü Santiago irü Juan Elías taerúküpatsi, irü Moisés pongbe kaena báyatha naxúbabe. Bapongbe Jesús barü kueikueijeichibe. ⁵Bapoxonae Pedro namchi, jeye Jesustha:

—Pong jiwi Nekuidubim maisha wüünae xua xote pata umenaewa. Pákata akabinchi akoibi po boutíyobe, kae bouto xam nexa, icha bouto Moisés nexa, icha bouto Elías nexa, jei Pedro.

⁶Pedro baxua paeba, bekein jopa yaputaeyo pokotsiwa yábara kueikueije, tsipéi poxoru saya barapomonae bichokono pijunuwi. ⁷Bapoxonae daxita barapomonae pía xaiña bematawakaicha tarunéikatsi tsakinaebowa. Bárapo tsakinaebó-watha pejume jumetane, xua Nakom Jesús yábara kueikueijeichi, jeye: “Bapong ápara Taxanto pong bichokono antobein pong itapetang. Bapong beta pajumetaema pokotsiwa paka tsipaeba”, jei Nakom. ⁸Barapoxonae kaena naiña poxonae nekobarúküpa barapomonae, bapongbe jopa taetsi, meisha saya Jesús kompa ungkua. ⁹Poxonae Jesús pijimonae barü juinka demuxuwa wétsika, bapoxonae Jesús tsipaeba bárapo akoibi póyobe, jeye: “Ichamonaetha jopa yábara patsipaebinde pokotsiwa xuaunxuae patáneme xua tapaka katsita exanáewatsi. Jopa payábara paebinde beya abü poxonae ekeicha asüüng poponaein tatüpaе koyene weya, xang pongxaein Nakom Tananeitapetsin”, jei Jesús. ¹⁰Daxota barapóyobe jopa yábara paebiyo ichamonaetha xua tane. Saya barapóyobe piakoutha namicha natsipáebabe najeibe: “¿Eta xua metha baraxuara xua Jesús paeba xua pinae petüpáе koyene weya asüü tsane?” najeibe. ¹¹Barapoxonae bárapo akoibi póyobe Jesús yáíñabatsi, jeibe:

—Pomonae jiwi pekuidubiwi Moisés pía peitorobi koyene tatsi, ¿eta xua metha bapomonae paeba xua pinae bewa kopiya patopaena Elías, xua pinae beya poxonae patopaena Mesías? jei barapóyobe.

¹²Jesús barapóyobe jumenótatsi, jeye:

—Bara xaiñéi, Nakom Pejume Diwésitha paeba xua pong be Elías kopiya netsíwana patopaena. Matáütano paeba xua bapong kananantükoyeneweta exanaena jiwi pía jüntükoyenéwangtha xua jiwi pejumekowüntsínexa Nakom. Matáütano bárapo Nakom Pejume Diwésitha paeba xua xang pongxaein Nakom Tananeitapetsin ichamonaе nepérxaxa jübina. Matáütano bichokono abeya neyábara paebina. ¹³Íchitha nama xang paka tsipáebatsi xua pong be Elías báyatha ápara patopa. Bapongtha abeya kana éxanatsi ichamonaе, icha be pokotsiwa barapomonae ichichipa xua bapong pekana exanáewatsi. Báyatha baxua Nakom Pejume Diwésitha peyábara tsiwüünae muxudutsixae, jei Jesús.

Meje yábara poxonae Jesús kauri taitaweta xua pewowin yakauríbatsi

(Mt 17.14-21; Lc 9.37-43)

¹⁴Bapoxonae pirapaeyo bárapo akoibi póyobe Jesús barü náwiya ichaxota ichamonae pijimonae tatsi tajinómpatsi. Bapoxonae barapomonae tane xua Jesús pijimonae tatsi pomonae baxota petajinompaewixaetsi barü nakaetútatsi pin bicheito. Irü baxota naéna pomonae jiwi pekuidubiwi Moisés pía peitorobi koyene tatsi. Bárapo pekuidubiwi Jesús pijimonae tatsi jumematsontsónobatsi. ¹⁵Bárapo pin bicheito najüntükoyene nabenaeka poxonae Jesús taerúküpatsi. Bapoxonae bárapo pin bicheito kaena naiña Jesús pexaiña betakuinaeýiyatsi xua Jesús pejakobinéxatsi. ¹⁶Bapoxonae Jesús yáíñaba bárapo pin bicheito, jeye:

—¿Eta pokotsiwa metha tajiwimonae pajume matsontsónobame? jei Jesús.

¹⁷Kaein pong ungkua baxota, bapong Jesús jumenótatsi, jeye:

—Pong jiwi Pekuidubim, xote nexantha kata kapónatsi taxanto. Bapong taxanto yakauríbatsi, xua daxota inta muxusípana éxanatsi. ¹⁸Poxonae taxanto táibatsi kauri, inta íratha bebái tsaibichi. Bapoxonae inta koibo thamthamei exanéibatsi. Matáütano inta nawanoxane éxanatsi. Daxota inta kuenokuénona. Bekein wüükang jiñamonae, jangje: ‘Painta taxanto taitawere kauri’, jang, dáichitha jopa itaküüpaetsi xua inta taxanto petaitawetsinéxatsi kauri, jei bapong.

¹⁹Bapoxonae Jesús anaya barái pijimonae, jeye:

—¿Paxam barapomonae pam, pomonae jopa xapain kataunxuae pana nejumekowüntsím! ¿Eta po weibe nantawénonang xua bewa tapaka barü ekáewatsi tsainchi xua beya poxonae tapana nejumekowüntsiwam tsane? Matáütano ¿eta po weibe ekeicha nantawénonang xua tapaka kayawenáewatsi tsainchi? Pong yakauríbatsi painta barü awena, jei Jesús.

²⁰Bapoxonae Jesús pexantha takapoinchi bárapo pewowin. Poxonae Jesús tainchi kauri, bapoxonae pewowin naichababa éxanatsi. Bárapo pewowin bapoxonae íratha xotsi. Yawa íratha natorenababa éxanatsi. Yawa koibo thamthamei éxanatsi.

²¹Pexuyo paxa tatsi, Jesús yáíñaba, jeye:

—¿Eta po wéiyobe bárapo pewowin xeina baxua xua yakauríbatsi? jei.

Barapong Jesús jumenótatsi, jeye:

—Kaena báyatha baxua xeina poxonae pexuyo tsekae. ²²Matowa kauri inta taxanto ishótotha bebái tsaibichi. Matáütano inta ménetha bebái tsaibichi pebexubinéxatsi. Icha kaitaküüpa xua neexanaewa tsane baxua, pana yábara najüntükoyene xéinare jiña tapana neyawenaenexam tsane, jei pexuyo paxa tatsi.

²³Jesús jumenota bapong, jeye:

—¿Eta pokotsiwa metha bárapo jumetha netsipáebame xua tana neitaküüpaewa yábara? Tsipéi pong ba jumekowünta bara Nakom yawena xua peitaküüpáewatsi xua daxítangtha beta kana éxana, jei Jesús.

²⁴Bapoxonae pexuyo paxa tatsi jumedangweya wawaya jeye:

—Bara kajumekowüntatsi. Neyawende xua ekeicha bichokono matowa takajumekowüntsínexa tsainchi, jei pexuyo paxa tatsi.

²⁵Poxonae Jesús tane xua pin bicheito imoxoyo nakaetutapona, bapoxonae Jesús itaweta kauri, jeye:

—Xam kaurim pom muxusípana éxaname jiwí, bara kaitawétatsi. Bara xubirí-ware bárapo pewowin. Ekeicha bápana jopa kaewa patopaeinde bapongtha, jei Jesús.

²⁶Bapoxonae kauri pewowin papái éxanatsi. Yáwano naichababa éxanatsi. Bárapo kauri pewowin kuenta poinchi, barapoxonae bárapo pewowin be petü-paeyo boka íratha. Daxota daxita bárapo pin bicheito paeba xua pinae bárapo pewowin ápara tüpa. ²⁷Bárapo pewowin Jesús kobepita, yáwano asiya kuaranota. Bapoxonae bárapo pewowin nantakotungkuataba.

²⁸Bapoxonae Jesús joniya botha. Jesús pijimonae kompa seikaya tsipáebatsi, jeichichi:

—¿Eta pokotsiwa metha jopa pana neitaküüpaeyo xua pata taitawetsiwa kauri? jei barapomonae.

²⁹Jesús pijimonae jumenota, jeye:

—Barapokotsimonae kaurimonae paka itaküüpa xua paiña neitawetsiwa saya meisha poxonae memekabiya matowa pawúükame Nakomtha, jei Jesús.

Meje yábara poxonae ekeicha Jesús nayábara paeba xua poxonae tüpaena

(Mt 17.22-23; Lc 9.43-45)

³⁰Poxonae Jesús, irü pijimonae tatsi bara weya pona, bapoxonae Galilea nakua iya pona. Bapong jopa beyaputaetsi xua ichaxota ponaena, xua ichamonae yapu-taena. ³¹Baxua Jesús éxana, tsipéi pijimonae kuiduba. Jesús barái pijimonae xua nayábara paeba, jeye:

—Xang pongxaein Nakom Tananeitapetsin jiwí nekaenaetsina ichamonaetha. Yáwano nebexubina. Íchitha poxonae akoibi po matakábibe yapukaewina, bapo-xonae ekeicha asiü poponaein, jei Jesús.

³²Íchitha barapomonae pomonae Jesús pijimonae jopa jumeyaputaetsi xua Jesús yábara paeba. Matáütano barapomonae junuwa xua Jesús peyábara yaiñabiwa tsainchi bárapo jume.

Meje yábara poxonae Jesús yábara yáiñabatsi pijimonae xua pong peaiñakuí peexanaeinchi

(Mt 18.1-5; Lc 9.46-48)

³³Jesús pijimonae barü patopa Capernaum tómaratha. Poxonae Jesús pijimonae botha barü patopa, bapoxonae pijimonae yáiñaba, jeye:

—¿Eta xua námtotha pana najumematsontsónoba póname? jei Jesús.

³⁴Barapomonae saya moya umena peúruxae, tsipéi námtotha najumematson-tsónoba pona xua pokoyene metha jintam aiñakuí peexanáewatsi tsainchi pong barapomonae jíwanaxae. ³⁵Néxata poxonae Jesús eka, bapoxonae pijimonae waba, pomonae doce póyobe, yawa jeye:

—Pong ichichipa xua ichamonae aiñakuí petsita-naexanáewatsi, bapong bewa piakoutha pekuipawí jintong naexanáe petanakuichinexa ichamonae, jei Jesús.

³⁶Bapoxonae Jesús pita pexuyo, yawa pijimonae tatsi peitabarayo deka tatsi takuaranoreka. Jesús ishaeka bárapo pexuyo, jeye:

³⁷—Pong matenta weyataeya waba peyawenaenexa pongtha pong tana nejume-kowüntsixae xua pókotsin icha be barapókotsi pexuyo ichi, barapong ápara bara

nententa weyataeya waba. Xang jopa meisha nententa weyataeya wábiyo, ápara bara irü matenta weyataeya wábatsi pong tana neitoróbixae xua pong bara Nakom, jei Jesús.

Meje yábara poxonae Jesús barái pijimona:

“Pong jopa nákata abe exanaeyo, bapong ba ápara naka yawena”, jei

(Mt 10.42; Lc 9.49-50)

³⁸Néxata Juan namchi Jesththa, jeye:

—Já, Tanekuidubim, paxang kaein patang pong kawüngtaiba poxonae itaweta kaurimona, xua kaurimona itawétatsi. Paxang baxua pakui-itawetang, tsipéi jopa naka punapoponaeyo, jei Juan.

³⁹Íchitha Jesús Juan jumenótatsi, jeye:

—Bapong baxua jopa pakui-itawetsinde, tsipéi dapong aibi pong pexeiña petsita-itüütsi koyenewang éxana poxonae newüngtaiba xua bapoxonae kota-kaya abeya neyábara paeba. ⁴⁰Tsipéi pong abe jopa nákata exanaeyo, bapong ápara naka yawena. ⁴¹Pong paka yawena xua mera paka kata xua bekein tsika korotíyotha xua irü pejumekowüntsixae, xua xang Cristong tajiwimona pam-xaem, baxua peexanaexae, Nakom katsina bapongtha pematomatsiwa baxua nexa, jei Jesús.

Meje yábara poxonae Jesús paeba xua jintong jopa bewa kana exanáe ichüngtha xua irü abe peexanaewa tsane

(Mt 18.6-9; Lc 17.1-2)

⁴²Ekeicha Jesús namchi, jeye: “Nakom tsítatsi xua pebin bichokono abe éxana poxonae natsikuenta ichüng kana éxanatsi xua abe peéxanae kuirukoyene éxana, po bárapo ichüng pong kataunxuae aena tana nejumekowüntsixae. Metha jame wüünae tsipae xua bárapo pebin pong abeya kana exanaeya taéxana ichüngtha, barapong pin iboto wishi kütsípatsi yawa xua tuwüütha xua pin marménetha bárapo ibótotha kayawa kabutabaichipatsino. ⁴³⁻⁴⁴Icha paiña kobe paka éxana xua abe paiña neexanaewa tsane, maisha panakobe ukubóbare. Tsipéi baxua wüünae xua kae kobexi pabebam tsane, xua saya kae kobexi paiña neyawa patsiwa tsane Nakom pía nakua beicha tatsi. Baxua jame yatsikaya wüünae beyakaincha xua aiña kóbebe paiña nekayawa bebaiwa tsane ichaxota po nákuatha ishoto jopa itakounayiyo, xua ataya tsiteka. ⁴⁵⁻⁴⁶Matáütano icha paiña taxu paka éxana xua abe paiña neexanaewa tsane, maisha panataxu ukubóbare. Tsipéi baxua wüünae xua kae taxuxi pabebam tsane, xua kae taxuxi paiña neyawa patsinexa Nakom pía nakua beicha tatsi. Baxua jame yatsikaewa wüünae beyakaincha xua aiña táxube paiña nekayawa bebaiwa tsane ichaxota po nákuatha ishoto jopa itakounayiyo xua ataya tsiteka. ⁴⁷Matáütano icha pokotsiwa patáneme paiña itamaikéitha xua icha baxua paka éxana xua abe paiña neexanaewa tsane, paiña netaexae paiña itamaikéitha, maisha pana naitakuere júkuare. Tsipéi baxua wüünae xua kae itamaikéitoxi pabebam tsane, xua kae itamaikéitoxi paiña neyawa patsiwa tsane Nakom pía peitorobi nakua beicha tatsi. Baxua jame yatsikaewa wüünae, beyakaincha xua poxonae aiña itamaikéitobe paiña nekayawa bebaiwa tsane ichaxota ishoto jopa itakounayiyo. ⁴⁸Bárapo nákuatha ishoto jopa itakounayiyo xua ataya tsiteka yawa oro jopa tüpaeyo.

49”Tsipéi daxita jiwi pía pejäntükoyenein tatsi nakuiwüünaetsina Nakom nexa pókotsi koyenéwangtha xua jiwi taayapubetsi bichokono xua jiwi átene éxanatsi pokotsiwa icha be ishoto ichi. Matáütano daxita pokotsiwang jiwi tauta xua petúxusi exanaewa Nakomtha, barapokotsiwa kopiya yawa múxuna nakuixaxainchina sarebeno. 50Sarebeno, bara bena wüünae. Íchitha icha bárapo sarebeno jopa abenataeyo bapoxonae jopa peitaküüpáewatsi xua ekeicha peabenataewa. Bara paichinde poxonae icha be sarebeno ichi. Paxéinare pókotsi koyene pexeíña jäntükoyene xua jopa po jäntükoyene abeyo. Matáütano jäntema nantiya pana nabarü jinómpare”, jei Jesús.

**Meje yábara poxonae Jesús kuiduba xua jiwi piséurixi
pepunapenteibiyainwa**
(Mt 19.1-12; Lc 16.18)

10¹Jesús pónataba Capernaum tómara weya. Bapoxonae Judea nákuatha patopa. Yawa patopa Jordán mene iya icha muxunénetha, pomuxunene xua Judea nakua weya. Baxotiya ekeicha jiwi pin bicheitomonae nakaetuta ichaxota Jesús unguwa. Ekeicha Jesús kuiduba barapomonaetha, tsipéi píyakui xua kuidubeiba. ²Bapoxonae ichamonae fariseomonae, barapomonaé piraichi Jesús imoxoyo kakuita umenarükúpatsi xua Jesús pejäntüküikoyene jüjütsinéxatsi, daxota jeye:

—¿Metha bara Moisés kópata jampa xua pebin pepunaxubiwa píowa icha saya metha ichichipa jampa? jei.

³Jesús jume epapita barapomonaé, jeye:

—¿Eta xua bapong Moisés paka itoroba? jei.

⁴Barapomonaé Jesús jumenótatsi, jeye:

—Moisés kópata xua jintong itaküüpatsi xua pekatsiwa papera piseuri, po papé-ratha tina xua pexubiwa tsane piseuri. Bara bapoxonae bapong xubina piseuri, jei barapomonaé.

⁵Bapoxonae Jesús jumenota barapomonaetha, jeye:

—Moisés paka kata bárapo peitorobi koyenewa, tsipéi paxam jopa be pajumekowüntsím paiña jäntükoyenéwatha. ⁶Tsipéi poxonae Nakom aena fórota daxita, Pejume Diwésitha jeye: ‘Nakom éxana pebin, matáütano éxana yábüyo’, jei. ⁷Ekeicha Nakom jeye: ‘Daxota pebin paxa wepu natsata, yawa pena wepu natsata xua piowabe imoxoyo penaperüü nakoyobinéxabe. ⁸Barapongbe be kae jiwimonaé náexanabe’, jei. Bapoxonae bapongbe xua aiña jíwibe aibi, bara be kaein náexanabe. ⁹Daxota pebin bápana jopa bewa punaxubi píowa. Tsipéi ápara báyatha Nakom kana éxana xua bara be kaein náexanabe, jei Jesús.

¹⁰Poxonae Jesús, irü pijimonaé tatsi botha jinompa, bapoxonae Jesús pijimonaé yábara yáinábatsi baxua. ¹¹Bapoxonae Jesús jume epapita, jeye:

—Pong punaxuba píowa, yawa ichowa pita, bapong abe éxana piséuritha yawa Nakom peitütha tatsi, tsipéi Nakom tsítatsi xua powa kopiya barü pópona, ápara bara píowa tatsi. ¹²Barichi icha petsiriwa punaxuba pía pebin, yawa pita icha pebin, bapoxonae bapowa abe éxana pía pebintha, yawa Nakom peitütha tatsi, tsipéi Nakom tsítatsi xua pong kopiya xeina, ápara bara pía pebin tatsi, jei Jesús.

**Meje yábara poxonae Jesús jeye pexuitha:
“Bárabü Nakom beta paka yawenaena”, jei**
(Mt 19.13-15; Lc 18.15-17)

¹³Néxata jiwí Jesús pexuí takapónatsi xua Jesús pejayabinexa pekóbetha, yawa xua Nakomtha pewüükaenexa bárapo pexuí nexa xua pejeinexa: “Bárabü Nakom beta paka yawenaena”, pejeinexa. Íchitha Jesús pijimonaé tatsi poxonaé baxua tane, tamrópata notarúkúpa xua barapomonaé kuimatawéntatsi pomonaé pexuí karendena tsaibi. ¹⁴Poxonaé Jesús baxua jumetane, jopa ichipaeyo pokotsiwa pijimonaé tatsi paeaba, daxota anaya jeye:

—Bara pakópabare pexuí xua tana ítata patsinexa. Jopa pexuí paitawétsinde, tsipéi Nakom pía peitorobi nakua tatsi saya meisha barapomonaé nexa pomonaé pejüntükoyene wüünaewi icha pexuí ichi. Pexuí píyakuí xua tayapuwüünaetsi xua pía jüntükoyeintha jumekowünta Nakom. ¹⁵Bara xaiñeya paka tsipáebatsi. Pong jopa yábara jumekowüntsiyo xua icha be jopa pexuí ichiyo xua ba pexuí tayapuwüünaetsi xua jumekowünta, bapong bápana jopa naexanáé tsane Nakom pijimonaé tatsi pomonaé Nakom itorobiya éwata, jei Jesús.

¹⁶Bapoxonaé Jesús tsana tamrópata nonotapona pexuí, yawa pekóbetha pexuí jayabiya tawüükatsi Nakom. Jeye: “Bárabü Nakom beta yawenaena bárapo pexuí”, jei.

**Meje yábara poxonaé pewowin pong kopei
pexeinaein Jesús tsipáebatsi**
(Mt 19.16-30; Lc 18.18-30)

¹⁷Poxonaé Jesús aena wárapa, bapoxonaé pebin Jesús pía xaiña betakuinaerénatsi. Bapong pentabokototha unguwa Jesús peitabaratha tatsi, xua pebarükui-iturajinaenéxatsi Jesús, tsipéi Jesús pong peaiñakuín. Bapong jeye Jesthata:

—Já, Tanekuidubim, maisha nejüntükoyene wüünaem. ¿Eta xua kopiya matha exanokuaein xua ajüntüyapusüüya tapoponaewa tsane xua ataya tsane? jei bapong.

¹⁸Bapoxonaé Jesús jumenota, jeye:

—¿Eta xua nebaram: ‘Nejüntükoyene wüünaem’, jam? Ápara ichüing dapong aibi pong pejüntükoyene wüünaein. Jame meisha ápara bapong Nakom kompa pejüntükoyene wüünaein. ¹⁹Xam bara yaputáneme pokoyene Moisés pía peitorobi koyenéwatha itoroba, xua jeye: ‘Jopa ichüing bexubinde. Jopa ichowa pichinde ichüing píowa tatsi. Jopa kaibinde ichüing piyawang tatsi. Jopa naerabiya kayábara paebinde pokotsiwa ichamonae éxana. Jopa ichamonae yábara muxujaiñabinde xua káibame. Axang barü jumekuí iturajínare. Matáütano énthata barü jumekuí iturajínare’, jei Moisés, jei Jesús.

²⁰Pewowin Jesús jumebaraichi, jeye:

—Pong jiwí Nekuidubim, daxita kaena báyatha bárapo koyenein exaneibang. Poxonaé pexúyothang tamrópata pítabang, beya ánoxuae yakuiya piñong, jei bapong.

²¹Jesús antobeya nekota bapongtha, jeye:

—Kataunxuae icha kuikoyene kata seika xua pokotsiwa neexanaewam tsane. Icha ichichípame xua jopa nekata akoibiyonexa tsane xua pokotsiwa wüünaeya

neexanaewa, matha daxita kaenaere pokotsiwa xéiname, yawa katsíbare pomonaetha, pomonae peakopeibí jiwi. Bapoxonae jame moya anetha, nepunaponde. Bekein bara bapoxonae akopeibim tsane, dáichitha Nakom kakatsina peitaboko beicha pokotsiwa Nakom nekajúntana botsiwa pokotsiwa bichokono wüünae, jei Jesús.

²²Poxonae bárapo pewowin baxua jumetaeba, bichokono nantanuweya póntaba, tsipéi bichokono kopei pexeinaein.

²³Bapoxonae Jesús nekota jiwi, yawa jeye pijimonaetha:

—¡Maisha bichokono ayapubé kai xua kopei pexeinaewi náexana Nakom pijimonaetha tatsi jíwana pomonae itorobiya kanamataxeina! Tsipéi barapomonae bichokono antasiwayatane bárapo pía kopei, beyakaincha xua Nakom antobetsi, jei Jesús.

²⁴Jesús pijimonaetha tatsi yábara najúntükoyene kabenaeka pokotsiwa xua Jesús paeba. Íchitha Jesús pijimonaetha ekeicha tsipaeba, jeye:

—Pomonae tamonaetha pamxaem, ¡maisha bichokono ayapubé kai xua pomonaetha kopei pexeinaewi jumekowüntsina Nakom! Barapomonae nantaxeina xua pía kopeitha nayawena xua daxota jopa kanantawenonaeyo xua Nakom pejumekowüntsíwatsi. ²⁵Bichokono akuiruyapubé xua duwein, pong pewüng camello xua bapong pejoniyawa akuicheto peetabü wang iya. Íchitha nama yatsikaewa pong bichokono kopei pexeinaein taakuiruyapubetsi xua náexana Nakom pijimonaetha tatsi jíwana pomonae itorobiya kanamataxeina beyakaincha xua poxonae akuiruyapubé xua poxonae camello akuicheto peetabü wang iya pejoniyawa, jei Jesús.

²⁶Poxonae Jesús pijimonaetha jumetaerükúpatsi xua paeba bapoxonae najúntükoyene kabenaeka bichokono. Barapomonae kaemonaetha nayáíñaba, najéi:

—Bapoxonae ¿jintam metha néxata itakúüpatsi xua pekapanepaewa piakoutha? jei barapomonae.

²⁷Jesús tane barapomonae, yawa jeye:

—Pebiwí ba jopa itakúüpaetsi xua baxua éxana, saya jame meisha Nakom kompa itakúüpatsi xua jiwi napaeba kana éxanatsi. Tsipéi daxua aibi pokotsiwa Nakom taakuiruyapubetsi, jei Jesús.

²⁸Néxata Pedro Jesús jumenótatsi, jeye:

—Paxang daxita pakuenta ponang pokotsiwa paxeinang pata paka punaponáewatsi tsainchi, jei Pedro.

²⁹Jesús Pedro jumenótatsi, jeye:

—Bara xaiñeya paka tsipáebatsi. Nakom beta kana exanaena daxita pomonaetha pekueikueijeixae Nakom pía pekapanenebiyáe diwesi yawa taneantobexae beyakaincha xua ichamonae antobetsi. Nakom beta kana exanaena barapomonae piabong pekuenta ponaexae inta peexanaexae. Matáütano beta kana exanaena pomonae peweichowi pekuenta ponaexae. Matáütano beta kana exanaena pomonaetha paxeiwí pekuenta ponaexae, matáütano peniwí pekuenta ponaexae. Matáütano beta kana exanaena pomonae pía pexui yawa pía irang pekuenta ponaexae.

³⁰Nakom barapomonaetha katsina po írathe pentoma xua cien pokuíyobe tsane. Barapomonae xeinaena bong, matáütano nantaütsina peweichowi, irü pámchowi tatsi, irü peniwí tatsi, irü pía pexui tatsi, yawa írangno. Daxita barapomonaetha tsikotane be barompaya piyamonae tatsi. Bárapo kae pin nákuathe barapomonae

péraya jübinchi taneantobexae, dáichitha barapomonae xeinaena Nakom pía peitorobi nakuatheicha peajüntüyapusüüwa po peajüntüyapusüüwa ataya tsiteka. ³¹Pomonae xua ánoxuae, pomonae jiwi petsita-aiñakuí jíwichi po kae pin nákuathe, barapomonae bexa Nakom pía peitorobi nakuatheicha jopa peaiñakuí jiwi tsane. Pomonae xua ánoxuae pepawi náexana pomonae jiwi jopa petsita-aiñakuí jíwichi, po kae pin nákuathe, barapomonae Nakom pía peitorobi nakuatheicha peaiñakuí jiwi tsane, jei Jesús.

**Meje yábara poxonae Jesús nayábara paeba akoibi
pokoyenebetha xua poxonae tüpaena**

(Mt 20.17-19; Lc 18.31-34)

³²Poxonae Jesús pijimonae kataunxuae námtotha barü ekaona xua Jerusalén tómara beya, Jesús pijimonae tsíwana nantakápona. Bapoxonae Jesús pijimonae tatsi najüntükoyene kabenaeka, tsipéi Jesús naiña nantakápona. Irü pomonae Jesús punapoinchi yábara junuwa, tsipéi yaputane xua Jesús abe kana exanaeinchi bárapo tomarapiwi. Bapoxonae Jesús pijimonae kompa waba aishowa beya xua pomonae doce póyobe tatsi. Jesús tamrópata pítaba xua tsipaeba pijimonae xua pokotsiwa imoxoyo ichamonae Jesús kana exanaeinchi. ³³Jesús jeye pijimonaetha: “Ánoxuae ponaeinchi Jerusalén tómara beya. Baxotiya xang pongxaein Nakom Tananeitapetsin, nekaenaetsina ichamonae sacerdotemonae pía pentakaponáe-witha tatsi, yawa pomonaetha, pomonae jiwi pekuidubiwi Moisés pía peitorobi koyene tatsi. Barapomonae itorobina xua nebexubina. Matáütano nekanakobensina pomonaetha, pomonae penanapaincha jinompaewi xua pomonae icha nakuá wérena peponaewi. ³⁴Barapomonae nekuikaponaena, yawa nekueinchí-nano. Matáütano yawa nekana onesubabina. Bapoxonae nebexubina. Dáichitha poxonae akoibi po matakábibe werawerakaena ekeicha asüü poponaein petüpáe koyene weya”, jei Jesús.

Meje yábara poxonae Santiago irü Juan Jesús yaiñabatsibe

(Mt 20.20-28)

³⁵Bapoxonae Santiago irü Juan pongbe Zebedeo pexántobe tatsi, bapongbe Jesús imoxoyo kakuita unguatábatsibe, jeibe Jestustha:

—Pong jiwi Nekuidubim, paichichipang xua painta exanáename pokotsiwa paka wüükaeinchi, jei.

³⁶Néxata Jesús yáíñaba bapongbetha, jeye:

—¿Eta pokotsiwa paichichípamebe xua pákata exanáeinchibe? jei.

³⁷Bapongbe Jesús jumenótatsi, jeye:

—Matakabi jopaena, po mataketha itorobiya ewatsíname jiwi poxonae ekáename jíñawa xua pexeíña itúpanae ekaethopáewatha. Bárapo mataketha kópore xua paxangbe nantíyabe paekaeinbe patawangtha xua pexeíña itúpanae ekaethopáewatha. Ichüng pokotsiwa nekoxa weya ekaena. Ichüng pokotsiwa netsókona weya ekaena, jeibe bapongbe.

³⁸Bapoxonae Jesús baraiibe bapongbetha, jeye:

—Paxambe jopa payaputaembe pokotsiwa pana newüükamebe. Poxonae ichamonae abe inta exanaena, xang bara saya kopatsin xua barapomonae bara nepéraya jübina. Barichi poxoru paxambe tapana neantobexaembe, ¿bara irü paka

itakúúpabe xua bara pakopatsínamebe xua bara ichamonae paka péraxa jübínabe? Barichin bara saya kopatsin xua ichamonae bara tüpa neexanaena. Barichi, ¿bara irü paka itakúúpabe xua pakopatsínamebe xua bara ichamonae tüpa paka exanáenabe? jei Jesús.

³⁹Barapóyobe jumenótabe Jesustha, jeye:

—Aa, bara baxua pana neitakúúpabe, jeibe.

Jesús jumenótabe bapongbetha, jeye:

—Bara xaiñéi, barapókotsi koyene ichamonae paka kana exanáenabe. Ichamonae paka péraxa jübínabe. Matáütano ichamonae bara tüpa paka exanáenabe, icha xang nekana ichi tsane. ⁴⁰Nama xua xangtha nantiya paekamebe xua ichüing pokotsiwa takoxa weya eka, yawa xua ichüing tatsokona weya eka, baxua jopa takoya yábara itorobiño. Saya jame Taxa Nakom meisha baxua taexanaena pomonaetha, pomonae kaena báyatha tsiwüünaeta xua peenaenexa tsane, jei Jesús.

⁴¹Jesús pijimonae tatsi pomonae umena, pomonae diez póyobe, barapomonae jumetane xua Santiago irü Juan Jesús wüükatsibe. Bapoxonae bárapo diez póyobe, Santiago irü Juan yábara anaepanarükúpatsibe. ⁴²Íchitha Jesús pía xaiña bérena pijimonae waba yawa namchiya jeye barapomonaetha:

—Paxam báyatha patáneme pokoyenewa ba éxana pomonae jopa judiomonae naexanaeyo. Barapomonae ba nantaüta pomonae pía nakua tatsi pía petaewatsíwichi tatsi. Dáichitha bárapo nakua peewatsiwi aebiya itoroba piyamonae xua daxota bichokono jiwi taayapubetsi. ⁴³Íchitha nama paxam barapókotsi koyeneya jopa bara paichinde. Seikaya nama icha jüntükoyenéwatha paka itoróbatsi. Icha pong paxam jíwana, icha bapong ichichipa náexana be pókotsin kanamataxeina ichamonae, bapong matha bewa kopiya daxita paxam beta amanaya pákata nakui-china. ⁴⁴Matáütano pong xua paxam jíwana, icha bapong ichichipa náexana be pókotsin bichokono aiñakuí penaexanaein xua beyakaincha ichamonae, bapong matha bewa kopiya daxita paxam beta amanaya pákata nakuichina icha pong pebusikuitaetaeinchi ichi. ⁴⁵Icha be pókotsi koyeneya ichin bara paichinde. Xang pongxaein Nakom Tananeitapetsin patopeikang xua tanakuichinexa tsane ichamonae nexa. Ápara jopa baxua tsipatopaeiño xua ichamonae inta penakuichiwánexa tsane. Saya patopeikang tsipéi ichichipang xua daxita karepaya jiwi tayawenaewa tsane. Matáütano patopeikang xua tatsitüpaenexa tsane be pentoma xua daxita jiwi pepanenebiyaenexa abe pía peéxanae kuirukoyenein weya tatsi, jei Jesús.

Meje yábara poxonae Jesús axaibi éxana pong peitatanakütsin, pong pewüing Bartimeo

(Mt 20.29-34; Lc 18.35-43)

⁴⁶Bapoxonae Jesús irü pijimonae tatsi pata Jericó tómaratha. Jesús irü pijimonae tatsi tómarara weiyiya xua írürü pin bicheitomonae nápona. Írürü bapoxonae pebin pong pewüing Bartimeo, pong Timeo pexanto tatsi, bapong námtotha eka. ⁴⁷Poxonae Bartimeo jumetane xua juiña Jesús imoxoyo pona, pong Nazaret tomarapin, bapoxonae bapong Bartimeo tamrópata pítaba xua wawaya jeye:

—¡Jesús, David pía pemómoxi susato jíwanapim, pongxaem Nakom nekaitape-tsim neyábara najüntükoyene xéinare jiña tana neyawenaenexam! jei.

⁴⁸Pinmonae jumematawenta bapongtha xua moya peekaenexa. Íchitha bapong ekeicha bichokono jumedangweya wawái, jeye:

—¡Jesús, David pía pemómoxi susato jíwanapim, pongxaem Nakom Nekaita-
petsim neyábara najüntükoyene xéinare jiña tana neyawenaenexam tsane! jei
bapong.

⁴⁹Bapoxonae Jesús narúntaba yawa namchi pijimonaetha, jeye:

—Maisha painta wábare, jei Jesús.

Bapoxonae pong peitatanakütsin wábatsi, yawa barapomonae jeye bapongtha:

—Bara najüntütsakatábare, jopa amurande. Nontapónare, aunxuae kawaba, jei
barapomonae.

⁵⁰Bapoxonae pong peitatanakütsin pía penauyapatsiwa xubiriwa, yawa jira-
wüüna. Bapoxonae pona Jesththa. ⁵¹Jesús yáñnaba bapongtha, jeye:

—¿Eta xua jiña takata exanaetsi? jei.

Bapong Jesús jumenótatsi, jeye:

—Pong jiwi Pekuidubim, benekotsin kuinaya, jei.

⁵²Jesús jumenota bapongtha, jeye:

—Bara moya ponde. Bara báyatha kaitakuere wüünae éxanatsi, tana neyábara
jumekowüntsixaemxae xua bara tana neitaküüpaewa xua takayawenáewatsi, jei
Jesús.

Bapoxonae kaena naiña pong peitatanakütsin nekotaxuba. Bapoxonae bapong
Jesús punapoinchi námtotha.

Meje yábara poxonae Jesús Jerusalén tómaratha patopa

(Mt 21.1-11; Lc 19.28-40; Jn 12.12-19)

11 ¹Poxonae Jesús, irü pijimonaetha tatsi muxu pepatsi Jerusalén tómaratha
kopiya pata Betfagé tómaratha yawa Betania tómaratha, po tómaraxua
nakakuíta ékabe. Bárapo tómarabe kuariya demuxuwa eka, po demuxuwa pewüing
Olivowa, xua baxota olivo naein peumenaexae. Bapoxonae Jesús nakuéyatabe
póyobe itoroba pongbe pijimonaetha tatsi jíwana. ²Jesús barái bapongbetha, jeye:

—Papónarebe, po tómaraxua paiña itabaraxua ékiya. Poxonae papatopáenamebe
bárapo tómaratha, bapoxonae pakaxináenamebe burro pong penüing pong peke-
tanotsin, po burro ichamonae jopa tsijuma enaeyo. Bárapo burro paishanaxórebe.
Bapoxonae payama karenándebe. ³Icha ichüing paka yaiñabiya jeye: ‘¿Eta xua
payama ishanaxubamebe burro?’ paka jei, néxata pajándebe: ‘Pong jiwi Pekana-
mataxeinaein bepa pata yamakayiaeinjei tsipéi pinae nantawénona. Bexa naiña
ekeicha payamüükarenaein’, pajándebe, jei Jesús.

⁴Barapomonae ponarúküpa. Yawa kaxinarúküpa bárapo burro pebto, pong keta-
nota imoxoyo bokoibótotha xua aishowa beya námtotha. Bapoxonae barapóyobe
yama ishanaxúbabe bárapo burro.

⁵Pomonae baxota jinompa barapomonae bapongbe yáñnabatsi jeye:

—¿Eta xua paexanamebe? ¿Eta xua burro paishanaxúbamebe? jeichíchibe
bapongbe.

⁶Bara barapongbe jumenótabe barapomonaetha pokotsiwa báyatha Jesús
pejume itorobixae. Bara barapongbe takópatatsibe xua bara peyamüü ishanaxu-
binéxabe. ⁷Bapoxonae bapongbe tayamakakáyabe burro Jesús tayamakayatsibe.
Bapoxonae pía paparuwang tsijumajebíkabe, yawa Jesús tsijuma ekeika. ⁸Bapoxo-
nae jiwi pinmonae námtotha yerababa jejabapoiña pía paparuwang. Ichamonae
peaxu po axu be koichaxu axu ukuboba. Bárapo axu námtotha jebapoiña xua

Jesús aiñakuí éxanatsi. ⁹Pomonae Jesús tsíwana nantakajjínkatsi, irü pomonae Jesús peputha tajjínkatsi, barapomonae Jesús yábara wawaya jeichichi:

—¡Pai jáyana, maisha Jesús pong jiwi itorobiya pía pepa peewatsinchi maisha wüünae, bapong patopa Nakom peitorobixae! ¹⁰¡Bara wüünae jáintatsi pong patopeika xua jiwi peitorobinéxatsi, icha David ichi pong waámo susatopin poxonae bapong Israel nakua itorobiya éwata! ¡Maisha Nakom bichokono wüünae jáintatsi pong athabeicha eka! jei barapomonae.

¹¹Bara bapoxonae Jesús patopa Jerusalén tómaratha, yawa joniya Nakom pin piabotha tatsi. Jesús naitakuiwetaba xua tane daxita pokotsiwa jiwi éxana bárapo botha. Bapoxonae ekeicha Jesús pijimonae barü pónataba Betania tómara beya, póyobe xua doce póyobe, tsipéi báyatha tabópiya.

Meje yábara poxonae Jesús biatane higuera nae xua jopa penakoichixae

(Mt 21.18-19)

¹²Icha matakábitha baya, poxonae Jesús irü pijimonae tatsi Betania tómara weya pona, Jesús jainpaponae. ¹³Tajü weya Jesús tane higuera nae xua noxu tsungkuae. Jesús higuera nae beya pona piyain petaenexa pethéi, íchitha saya noxu tane, tsipéi kataunxuae dapó dapae aibi po dapaetha higuera nae nakoita. ¹⁴Bapoxonae Jesús barái higuera nae, jeye:

—Bápana jopa ekeicha nakoichim tsane, xua jiwi jopa nekathéi xaenexa, jei Jesús.

Jesús pijimonae jumetainchi baxua poxonae higuera nae barái.

Meje yábara poxonae Jesús aishowa benapuna torobábiya Nakom pin piabotha pomonae pekaenaetsiwi

(Mt 21.12-17; Lc 19.45-48; Jn 2.13-22)

¹⁵Bapoxonae pirapaeyo Jesús pijimonae barü patopa Jerusalén tómaratha. Jesús joniya Nakom pin piabotha tatsi. Bapoxonae Jesús aishowa benapuna torobábiya bárapo Nakom pin píabo weya pomonae pekaenaeta jiwi baxota. Jesús tabüta-yebiya bebái íratha pokotsiwa pexaethopaewa po pexaethopáewangtha nantiya nakatsiba parátixi, yawa xua írürü baxota topibo kaenaeta. ¹⁶Jesús jopa kopatsiyo xua jiwi piyawang kápona Nakom pin píabo tatsi tútiya iya. ¹⁷Jesús kuiduba barapomonae, jeye:

—Nakom Pejume Diwésitha jeye: ‘Tabo ápara po botha xua daxita nakuang-piwi tanetsipaebinexa tsaibi tsane bárapo botha’, jei Nakom Pejume Diwésitha. Íchitha paxam bárapo bo be pekaibiwi pía müthü tutu pakana éxaname, icha xota pijunuwi nantiyabeibathopa. Tsipéi baxota panakaetútame saya ü xua paiña nekaibinexam tsane parátixi pomonaetha, pomonae xua pateiba xua Nakom petsipaebibinéxatsi, jei Jesús.

¹⁸Sacerdotemonae pía pentakaponaewi tatsi, írürü pomonae jiwi pekuidubiwi Moisés pía peitorobi koyene tatsi, daxita barapomonae jumetane xua Jesús paeba. Bapoxonae barapomonae tamrópata notarúkupa xua jeita pokoyenéwatha Jesús bexubinchi. Barapomonae bekein ichichipa Jesús bexotsi íchitha baxua jopa exanaeyo tsipéi barapomonae junuwa xua jiwi anáepana xua bárapo sacerdotemonae pía pentakaponaewi tatsi pekasebíwatsi írúno xua pekasebíwatsi pomonae jiwi

pekuidubiwi Moisés pía peitorobi koyene. Tspíei barapomonaē jiwí kunúwatsi, xua daxita jiwí peichichipaexae nawita pokotsiwa Jesús kuiduba. ¹⁹Poxonaē xometo íríya ekanaiča bapoxonaē Jesús pijimonaē barü pöntaba bápapo tómara weya.

Meje yábara poxonaē higuera naē yüünungkua

(Mt 21.20-22)

²⁰Baya poxonaē penta tsina, Jesús pijimonaē baxoyo barü ekaḡona yawa tane xua higuera naē yüünungkua xua daxita petabaka opina wétsina. ²¹Bapoxonaē Pedro yábara nantaxéinataba xua mexuae Jesús biatane higuera naē. Bapoxonaē jeye Jesustha:

—Pong jiwí Nekuidubim, taema po higuera naē mexuae biatáneme, báyatha yüünungkua, jei Pedro.

²²Bapoxonaē Jesús jeye pijimonaetha:

—Paxam bichokono pajumekowünde Nakom. ²³Bara xaiñeya paka tspíébat̄si. Iča wüünaeya pana neyábara jumekowüntame xua Nakom paiña nepaka kaya-wenaewa xuano xua jopa aiña ünthütong paxeinaem, bara paka itaküüpaena xua paiña nepaebiwa iča ichin xua kana éxanang higuera naē. Matáütano bara paka itaküüpaena xua paiña nejeiwa uruto beya, xua pajam: ‘Uruto, natsixitá-bare, marmene beya jópare’, xua paiña nejeiwa. Bapoxonaē bara baxua jopa baya-thiyo tsane. ²⁴Daxita xua xuang pokotsiwang Nakom beya pawúükame, iča bara wüünaeya pajumekowüntsiya wúükame, bara Nakom paka katsibina baxuang. ²⁵Poxonaē Nakomtha patsipáebame, iča ichüŋ abe pákata éxana, kopiya payá-bara jüntemáinare bapong pokotsiwa pákata abe éxana, xua xuya beta paiña nekayábara kanantaxeinaenexa. Barichi Nakom pong peitabókotha eka xuya paka yábara jüntemainaena pokotsiwa abe paiña neexanáe kuirukoyenein paéxaname. ²⁶Íchitha iča jopa payábara jüntemainaem ichüŋ pokotsiwa pákata abe éxana, barichi Nakom pong itabókotha eka, jopa paka yábara jüntemaináe tsane pokotsiwa abe paiña neexanáe kuirukoyenein paéxaname, jei Jesús.

Meje yábara xua Jesús pía peitorobi koyenewa xeina

(Mt 21.23-27; Lc 20.1-8)

²⁷Bapoxonaē Jesús, irü pijimonaē tatsi kaibe nawibiya Jerusalén tómara beya. Poxonaē Jesús Nakom pin piabotha joniya xua yawa tütutha iya pónano, bapoxonaē sacerdotemonaē pía pentakaponaewi tatsi, irü pomonaē jiwí pekuidubiwi Moisés pía peitorobi koyene tatsi irü pítiri jiwí, barapomonaē Jesús imoxoyo kakuita umenarükúpatsi. ²⁸Barapomonaē Jesús yáñabatsi, jeichichi:

—¿Eta po peayapusüü itorobi koyenéwatha kuidúbame baxuang? ¿Jintam kakata bápapo peayapusüü itorobi koyenewa? jei barapomonaē.

²⁹Jesús jumenota barapomonaē, jeye:

—Xang írürü tha barichichi paka yaiñabinchi. Iča beta pana nejumenotsíname, bapoxonaē xuya yábara paka tsipaebinchi xua po peayapusüü itorobi koyenéyatha éxanang baxuang. ³⁰¿Jintam Juan kui-itoróbatsi xua bautisaba? ¿Metha bara Nakom kui-itoroba jampa? ¿Metha bara jiwí kui-itoroba jampa? Pana nejumenore, jei Jesús.

³¹Néxata daxita barapomonaē kaemonaē najumematsontsónoba, najéi: “¿Eta xua metha jei tsainchi? Iča jei chipaetsi: ‘Juan kui-itoróbatsi Nakom, xua

pebautisabiwa jiwí', metha naka jei chipae: '¿Eta xua metha néxata jopa pajumekowüntsím Juan?' metha naka jei chipae Jesús. ³²Jiwi kuikunuwinchi icha jei tsainchi: 'Juan kui-itoróbatsi jiwí, xua bautisaba', icha jei tsainchi. Metha bapoxonae jiwí naka kasebíchipa anaya", najéi barapomonae. Barapomonae jiwí kunúwatsi tsipéi daxita jiwí Juan yábara jumekowúntatsi, xua ápara bapong Nakom pía peitorobi jume tatsi pepaebi jintong. ³³Bapoxonae barapomonae namchi Jesús beya, jeye:

—Kanta jopa payaputaeiño, jei barapomonae.

Néxata Jesús barái barapomonaetha, jeye:

—Néxata barichin tsane jopa yábara paka tsipaebi tsainchi po peayapusúü itorobi koyenéyatha éxanang xua daxita taexanaewang, jei Jesús.

Meje yábara poxonae Jesús paeba pekayábara jüta pepaebi diwésiyo pomonae xua abe éxana, pomonae petayapukaenaewi uva pabi

(Mt 21.33-46; Lc 20.9-19)

12 ¹Bapoxonae Jesús tamrópata pítaba xua kuiduba jíwitha pekayábara jüta pepaebi diwesíyotha, jeye: "Matha írürü pebin pin uva pabi xeina. Bapong üba po ünbo pewüing uvakuéi ünbo. Yawa yapukurárata bápapo pía uva pabi íbówangtha xua jopa pejojondenaenexa ichamonae bápapo pábitha. Yáwano baxota ibo fetó éxana, xua bápapo ibo fétotha pekubinexa uvakuéi. Matáütano baxota exananota bo, po bo bichokono taücha xua baxota pebin bara wenekotekeika uva pabi. Bapoxonae bapong itoroba pomonae pía uva pabi pía petayapukaenaewichi tsainchi, xua bapoxonae barapomonae pejíwana xaenexa pokotsiwa penawetsiwa. Bapoxonae bapong icha nakua beya pona. ²Bápapo matakabi tsuxubi, po matakábitha uvakuéi naweta. Bapoxonae bápapo mataketha pomonae pabi petayapukaenaewi jíwana itapetanota xua penawetsiwa. Bapoxonae pong uva pabi pexeinaein, bapong pomonae petanakuichiwichi jíwana itoroba, xua petawüikaenexa tsainchi uvakuéi pomonae beya pomonae pabi petayapukaenaewichi. ³Íchitha barapomonae pomonae uva pabi petayapukaenaewi barapomonae wáetaba pong kopiya patopa, pong uva pabi pexeinaein itoroba. Yawa bapong bütsino. Bapoxonae bapong kaibe kobesa itorobíyatsi. ⁴Pong uva pabi pexeinaein ekeicha itoroba ichüing pong pía petanakuichinchi. Barichirü bapong íbótongtha matasipakuinbábatsi, yawa abe jumetha biatainchi. ⁵Ekeicha pong uva pabi pexeinaein itoroba ichüing pong pía petanakuichinchi. Barichirü bapong bexótsirü. Ekeicha ichamonae itoróbatsi. Ichamonae bütsi, irü ichamonae jutébatsi.

⁶"Kataunxuae áwiya bapong pexanto tanakópatatsi, pong pexanto kompa tatsi, po pexanto bichokono ántobe. Matapaiña bapong pexanto kotakaya itoroba bara beya. Bapong nantaxeinaeya jeye: 'Metha barapomonae taxanto inta yábara barükui-iturajinaeinchi', jei koxiyüing. ⁷Dapo jumetha pomonae uva pabi petayapukaenaewi poxonae bapong tainchi, barapomonae najéi: 'Ápara bapong paxa kopiniwa pichina. Daxota bapong bü bexotsi xua xaiña xéinatsi bápapo uva pabi', najéi barapomonae. ⁸Bapoxonae barapomonae pong uva pabi pexeinaein pexanto tatsi tawáetabatsi. Poxonae bexotsi bapoxonae petüpaein aishowa beya xotsi uva pabi pekuariya beya", jei Jesús.

⁹Bapoxonae Jesús yáíñaba, jeye: "Pong uva pabi pexeinaein, ¿eta be kana ichi tsane pomonaetha, pomonae bápapo uva pabi pía petayapukaenaewichi? Ápara

bapong patopaena xua pejutebinexa tsane pomonae uva pabi pía petayapukaenaewichi. Bapoxonae bárapo uva pabi katsina ichamonaetha xua petayapukaenaenexa tsainchi bárapo uva pabi”, jei Jesús.

¹⁰⁻¹¹Ekeicha Jesús nayábara paeba barapomonaetha, jeye: “¡Paxam bara báyatha payórobameba Nakom Pejume Diwesi! Bárapo diwésitha neyábara kaunuta poxonae iboto yábara paeba, jeye:

‘Pebiwi pomonae ibo bong peakabiwi,
bárapo pebiwi xuba po iboto tabükaboka,
po iboto peaiñakuí iboto.

Íchitha Nakom itapeta bárapo iboto xua petabükabokaenexa peaiñakuí ibótoxae.

Waxainchi nantaxéinatsi jeichichi:

Maisha pokotsiwa Nakom éxana naka tsita wüünae,
jeichichi’,
jei Nakom Pejume Diwésitha”,
jei Jesús.

¹²Poxonae bapomonae jumetane xua Jesús paeba, Jesús muxu pewaetabichi. Tspíei bapomonae yaputane xua ápara barapomonae yábara páebatsi poxonae Jesús kueikuejei bárapo pekayábara jüta pepaebi diwésiyo. Daxota Jesús kasébat-si. Tspíei barapomonae jiwi kunúwatsi, daxota Jesús jopa waetabichi. Bapoxonae bara saya ponarúkupa.

**Meje yábara poxonae Jesús yábara kuiduba parátixi matoma
po parátixi jiwi bewa katsibina pongtha pong romanomonae
itorobiya pía pepa peewatsinchi**

(Mt 22.15-22; Lc 20.20-26)

¹³Bapoxonae pirapaeyo Jesús piyaxaiña betaitoróbíyatsi fariseomonae jíwana, írürü pomonae Herodes pía pepunajinompaewichi jíwana tatsi, xua daxita barapomonae piraichi Jesús petsipaebinéxatsi xua Jesús xuya abeya pejumenotsinexa.

¹⁴Bara barapomonae Jesús piyaxantha tatsi tapátatsi, jeye Jesththa:

—Pong jiwi Nekuidubim. Bara payaputang xua bara jumexaiñeya tsipáebame jiwi, xua matáütano jiwi bara beta kuidúbame xua pokotsiwa jiwi bewa exanaena pexeinaenexa tsane Nakomtha po jüntükoyene pewüünae jüntükoyene. Matáütano jopa jiwi kunuwim poxonae kuidúbame poxonae bekein jiwi jopa ichichipaeyo baxua, tsipíei xam daxita jiwi bara katsita najüpa. Xam jumexaiñeya kuidubéibame jiwi Nakom pía peitorobi koyenewa. Ínkane yábara pana netsipáebare xua nantaxéiname, xuaje: ¿Metha bara Nakom pía peitorobi koyene naka itoroba xua waxainchi parátixi katsibinchi pong romanomonae itorobiya pía pepa peewatsinchi xua wanaka itorobixae bapong bekein bara bapong pong penanapaincha poponaein xua icha nakua wérena pona? Icha jopa tsipae, ¿metha daxua abe tsipae? jeichichi Jesús barapomonae pomonae fariseomonae itoroba.

¹⁵Dáichitha Jesús yaputane, xua barapomonae ítara mexeya wüünaeya pepaebi jiwi íchitha abeya peéxanae jiwi. Jesús jeye:

—¿Eta pokotsiwa metha paiña daichi pana nejüntükoyene jüjútame? Moya painta xawena paratiyo, tha taetsi, jei Jesús.

¹⁶Bapoxonae barapomonae bárapo paratiyo Jesús takapoinchi. Poxonae Jesús tane bárapo paratiyo, bapoxonae Jesús yáñaba barapomonae, jeye:

—¿Jintam pejumopere? ¿Yáwano jintam wüingdúkuare? jei Jesús.

Barapomonae Jesús jumenótatsi, jeye:

—Ápara romanomonae itorobiya pía pepa peewatsinchi, jei barapomonae.

¹⁷Jesús barái barapomonae, jeye:

—Bara néxata romanomonae itorobiya pía pepa peewatsinchi pakare pokotsiwa xua bapong piyawaxae tatsi. Matáütano bara Nakom pakare xua baxua irü piyawaxae tatsi, jei Jesús.

Barapomonae yábara najüntükuikoyene kabenaeka pokotsiwa xua Jesús wüünaeya beta jumenota.

**Meje yábara poxonae Jesús yábara yáíñabatsi pokoyene
xua ekeicha asüü pomonae pewerapeibiwi**

(Mt 22.23-33; Lc 20.27-40)

¹⁸Bapoxonae saduceomonae jíwana pata Jesús piyaxantha tatsi xua Jesús pirai-chi petsipaebinéxatsi. Saduceomonae barompaya pía pekuidubi koyenewa xeina xua pinae pomonae pewerapeibiwi ekeicha jopa asüü tsaijiyo. Bárapo pekuidubi koyenewa jopa júpaeyo po pekuidubiwa Jesús pía pekuidubiwa tatsi xua pinae jiwi ekeicha asüü jinompaena poxonae wérapa. Daxota barapomonae Jesús tsi-páebatsi, jeye:

¹⁹—Pong jiwi Pekuidubim. Moisés nákata tina, namchi: ‘Icha pebin píowa kuenta tüpa, yawa jopa xeinaeyo pexui, xuiyapin bewa xuya péntapin pekoutha koseuri pichina xua bapoxonae péntapin pekoutha pexeinaenexa tsane pexui’, jei Moisés. ²⁰Barichi, matha irü kae peweicho kaepiwi nabarü jinompa siete póyobe. Matapin jitha eka. Bapong píowa kuenta naxuba. Pexui jopa xeinaeyo. ²¹Pong kotakaya nakatsiwa xuya péntapin koseuri pita xua bapoxonae péntapin pekoutha pexeinaenexa pexui. Bapong irü kuenta tüpa, irü jopa xeinaeyo pexui. Bapoxonae ichüing xuiyapin xuya barapowa pita xua péntapin koseuri pita. Bapong barichi irü kuenta tüpa, irü pexui jopa xeinaeyo. ²²Daxita bárapo siete póyobe kuenta nanapentapona barapowa poxonae bekein xuya pekoutha nonotaponeiba. Bárapo siete póyobe, kaein jíwana jopa pekoutha tapoponaetsi pexuyo. Bapoxonae matapaiña irü bapowa tüpa. ²³Xam, Jesús, ba páebame, ba jam: ‘Matakabi jopaena po matakábitha Nakom asüü exanaena, xua jiwi asüü exanaeinchi müthüing wétsina’, ba jam. Poxonae bárapo matakabi jopaena xua daxita jiwi asüü jujuinaena, bárapo matakábitha ¿jintam metha bapowa xuya pichinchi, xua ichüing pichina, xua bárapo siete póyobe kaein jíwana? Tsipéi kaena báyatha bárapo siete póyobe, kaepi jiwi kuenta nanapentapona barapowa, jei saduceomonae.

²⁴Bapoxonae Jesús jumenota barapomonae, jeye:

—Paxam ápara katsawiya pana nejumlahenótame, tsipéi jopa beta payaputaem xua Nakom Pejume Diwésitha payábara yórobame baxua. Matáütano jopa payaputaem Nakom pía peayapusüü itorobi koyenewa tatsi. ²⁵Poxonae petüpaewi asüü jujuinaena jopa jitha eenaponáe tsane. Yawa barapomonae pexántixi jopa jitha kuarebaponae tsane. Tsipéi barapomonae barichi tsane icha be matatsunpiwimonae ichi, po matatsunpiwi Nakom pía nakuatheicha jinompa, xua po matatsunpiwi jopa jitha enaeyo. ²⁶Paxam bekein bara báyatha payórobame pokotsiwa Nakom yábara namchi Pejume Diwésitha xua pomonae ekeicha asüü jujuina pomonae

pewerapeibiwi. Bárapo diwésitha Nakom kueikueijei ichaxota xua poxonae po naewa taxungkua, Nakom jeye: ‘Xang Abraham pía Nakomüng tatsin, irü Isaac pía Nakomüng tatsin, irü Jacob pía Nakomüng tatsin’, jei Nakom. ²⁷Baxua Nakom paeba, tsipéi Abraham, irü Isaac, irü Jacob pewerapaewi ánoxuae ekeicha kaewa asiüü jinompa, Nakom pía nakuatheicha tatsi. Pomonae pewerapaewi, pomonae kaewa ekeicha asiüü jopa pejinompaewi, barapomonae jopa pía Nakom tatsi, pong itabókotha eka. Saya jame meisha pomonae pewerapaewi kaewa ekeicha asiüü pejinompaewi, barapomonae jame pía Nakom tatsi, pong itabókotha eka. Daxota paxam katsawa papáebame, jei Jesús.

**Meje yábara poxonae Jesús yábara kuiduba po peitorobi
kuikoyene pepa peaiñakuí koyenewa**
(Mt 22.34-40)

²⁸Kaein pong jiwana monaepin pomonae jiwi pekuidubiwi Moisés pía peitorobi koyene tatsi, bapong jumetane xua Jesús irü saduceomonae najumematsontsonobiya paeba. Matáütano bapong jumetane xua Jesús wüünaeya betiya jumenota barapomonaetha. Daxota bapong yáñaba Jesustha, jeye:

—¿Eta po peitorobi koyene pepa peaiñakuí koyenewara, po peitorobi koyene beyakaincha icha peitorobi koyene? jei bapong.

²⁹Jesús jumenota bapongtha, jeye:

—Po peitorobi kuikoyenewa pepa peaiñakuí koyenewa jeye: ‘Paxam Israel nakuamonaepiwi pam pajumetaema xuaje meje: Pong jiwi Pekanamataxeinaein bara kompa pepa Pata Nakom, icha Nakom aibi. ³⁰Antobeinde jiña Nekanamataxeinaein bapong Nakom xua daxita nejüntükoyene wétsina, matáütano xua daxita jiña nepoponae koyenéwatha, matáütano xua daxita nenantaxeináewatha nentásípatha, matáütano daxita nedangwéi koyenéwatham’, jei bárapo peitorobi koyenéwatha, po peitorobi koyenewa pepa peaiñakuí koyenewa. ³¹Po peitorobi koyene kotakaya itoroba ichaxótaba ‘aiñáwabe’ jei, bárapo peitorobi koyene be jumejúpa po peitorobi koyene kopiya dukua. Írürü bárapo peitorobi koyenéwatha jeye: ‘Antobeinde jiña nekatsikuárabü ekaein icha ichim xua jiñakoutha naántobem’, jei bárapo peitorobi koyenéwatha. Icha peitorobi koyenewa aibi po peitorobi koyene peaiñakuí koyenewa, po peitorobi koyenewa xua beyakaincha po peitorobi koyenewe, jei Jesús.

³²Bapoxonae kaein jiwana monaepin pomonae jiwi pekuidubiwi Moisés pía peitorobi koyene tatsi, bapong jeye Jesustha:

—Bara beta páebame pokotsiwa xuaunxuae páebame pongxaem jiwi Nekuidubim. Bara xaiñeya páebame xua pinae pepa Nakom bara kompa pópona xua icha pepa Nakom aibi. ³³Matáütano bara xaiñeya páebame xua pinae bewa Nakom antobetsi xua daxita wajüntükoyene wétsina, matáütano xua daxita wajinompae koyenéwatha, matáütano xua daxita wanantaxeináewatha wantasipangtha, matáütano daxita wadangwéi koyenéwangtha. Matáütano bara xaiñeya páebame xua wanaka tsikuárabü enaewi bewa pinae ántobe tsainchi icha ichichi xua wakoutha naantobetsi. Báraxua jame bichokono peaiñakuí koyenein pokotsiwa bewa exanaetsi, beyakaincha xua duwein ompin táutatsi yawa xua ichawang táutatsi xua watuxusi exanaenexa Nakom nexa, jei bapong. ³⁴Poxonae Jesús jumetane xua bapong beta jumenota, Jesús jeye:

—Bara saya tsiwiyo kata seika xua jiña nejumekowüntsinea xua nenantaütsinea Nakom pong jiwi itorobiya pía pepa Peewatsinchi, jei Jesús.
Bapoxonae nama dapong aibi xua pong Jesús peyaiñabinexa tsainchi.

Meje yábara poxonae Jesús nayábara jei:
“Mesías, ¿jintam pía pemómoxi susato jíwanapin tatsira?” jei
(Mt 22.41-46; Lc 20.41-44)

³⁵Bapoxonae Jesús yábara kuiduba Nakom pin piabotha tatsi, xua pong Mesías baraichi xua nayábara paeba Jesús, jeye:

—¿Eta pokotsiwa metha pomonae jiwi pekuidubiwi Moisés pía peitorobi koyene tatsi paeba xua pinae Mesías bapong David pía pemómoxi susato jíwanapin tatsi? ³⁶Nakom pía Pejumopetünaxü tatsi David kueikuejei éxanatsi. David jeye:

‘Nakom pong Pekanamataxeinaein jiwi,
Tanekanamataxeinaein baraichi pong Mesías,
jeichichi: Takoxa wérena ékare,
beya abü tsane poxonae neka-aitafáetabi jiwi pía pekanamataxeinaeinchi
tatsi ka-exanaeinchi,
jei Nakom pía Pejumopetünaxü tatsi’,
jei David.

³⁷Icha David Mesías yábara jei, ‘Bapong Mesías Tanekanamataxeinaein’, jei, ¿eta xua metha tsipae xua Mesías ápara David pía pemómoxi susato jíwanapin tatsi? jei Jesús.

Bárapo pin bicheito bichokono tsimuxuwüünaetsi pokotsiwa Jesús kueikuejei.

**Meje yábara poxonae Jesús muxuweta jiwi xua
pomonae jiwi pekuidubiwi Moisés pía peitorobi
koyene tatsi barapomonae pekuiyainwa tatsi**
(Mt 23.1-36; Lc 11.37-54; 20.45-47)

³⁸Poxonae Jesús kuiduba jíwitha, jeye: “Dota pam, dota pomonae jiwi pekuidubiwi Moisés pía peitorobi koyene tatsi. Barapomonae pía pekuidubi koyenewang tatsi pekuiyainwa pande. Jopa paexanaeinde icha bapomonae ichi xua barapomonae bichokono ichichipa xua penamaxatabiwa po paparuwang apiapiya deka xua be pomonae peaiñakuí jiwi penaexanaewi náexana. Barapomonae bichokono ichichipa xua jiwi námtongha jakobeibina barapomonaetha xua jiwi pebarükui-iturajineibinexa barapomonae. ³⁹Barapomonae bichokono ichichipa xua nanta-kaeneiba judiomonae pía penakaetutsi bongtha tatsi ichaxota ba enathopeiba pomonae peaiñakuí jiwi penaexanaewi. Matáütano barapomonae bichokono ichichipa xua eneiba ichaxota ba eneiba pomonae peaiñakuí jiwimonae poxonae pexaewang tsinakaetuteiba penabaneibinexa tsane. ⁴⁰Matáütano barapomonae powaxi pekuenta werapaewaxichi piséurixi, barapówaxi kueranta énatzi piabong. Barapomonae náemata jopa kuinaya najumekopababéibiyo poxonae tsipaebeiba Nakom. Barapomonae bichokono péraxa jübebinchi poxonae po matakeitha Nakom jiwi yábara paebina penatsikuentsiwa xua abe peexanaexae Nakomtha. Barapomonae átene tsane beyakaincha poxonae ichamonae átene exanaeinchi xua jopa pejumekowüntsixaetsi Nakom”, jei Jesús.

**Meje yábara poxonae Jesús yábara paeba xua petsiriwa paratíyobe
kata Nakomtha, powa pekuenta tüpáewatsi piseuri**

(Lc 21.1-4)

⁴¹Poxonae Jesús eka Nakom pin piabotha tatsi xua péitabara weya, xua ichaxota jiwi jeyeiba parátixi Nakom nexa, bapoxonae Jesús tane xua pinmonae pomonae kopei pexeinaewi parátixi nawita jeya ichaxota jiwi jeyeiba parátixi Nakom nexa. ⁴²Barapoxónaerü yábüyo patopa, powa pekuenta tüpáewatsi piseuri. Barapowa bichokono peakopebiwayo. Bapowa jeka aiña pekakomokáe paratíyobe Nakom nexa. Bárapo paratíyobe tsiki paratíyobe. ⁴³Bapoxonae Jesús pijimonae waba, yawa jeye barapomonaetha:

—Bara xaiñeya paka tsipáebatsi. Bárapo yábüyo, powa pekuenta tüpáewatsi piseuri, bapowa peakopebiwayo. Dáichitha barapowa jeka aiña paratíyobe Nakom nexa. Bapowa kata beyakaincha ichamonae daxita pomonae xua jeya xua Nakom nexa. ⁴⁴Daxita barapomonaetha jeya pokotsiwa tanakopabéibatsi. Íchitha nama bapowa bichokono peantobexae Nakom daxota omeicha jeka pokotsiwa bekein kanantawénona xua pepoponaewa tsane bekein bichokono peakopebiwayo, jei Jesús pijimonaetha.

**Meje yábara poxonae Jesús yábara paeba xua ichamonae abe kana
exanaena Nakom pin píabo tatsi**

(Mt 24.1-2; Lc 21.5-6)

13 ¹Poxonae Jesús Nakom pin píabo wejoniya, bapoxonae kaein Jesús pijimonaetha jéwana tatsi, Jesús tsipáebatsi jeichi:

—¡Pong jiwi Nekuudubim, taema maisha pexeíña ibótong, yawa pexeíña ibo bo! jei bapong.

²Íchitha Jesús jumenota bapongtha, jeye:

—Aunxuae pataebéname bárapo ibótong yawa xua pexeíña bong. Ápara jopa kae ibótiyo nakopatungkuae tsane icha iboto pejúmatha. Daxita abe tsane, jei Jesús.

**Meje yábara poxonae Jesús yábara paeba xua kopiya
matha pewúnaeya exanaena petsita-itüütsi koyenewa
poxonae daxita werawerakáenaba**

(Mt 24.3-28; Lc 21.7-24; 17.22-24)

³Bapoxonae Jesús pijimonae barü pona demuxuwatheicha, po demuxuwa pewüng demuxu Olivowa tsipéi baxota umena olivo naein. Poxonae Jesús ekopiya demuxuwatheicha, po demuxuwa Nakom pin píabo itamatayékatsi, bapoxonae Jesús pijimonae tatsi Pedro, irü Santiago irü Juan, irü Andrés, barapóyobe Jesús namicha tsipáebatsi. ⁴Barapóyobe jeye:

—Paichichipang xua xam tapata netsipaebiwam tsane ¿eta poxonae metha ichamonae baxua exanaena poxonae abe kana exanaena Nakom pin píabo tatsi? ¿Eta pokotsiwa tsane metha xua pewúnaeya tsita itapeiñaxeinaena pokoyene xua poxonae imoxoyo daxita werawerakáenaba? jei Jesús pijimonaetha tatsi.

⁵Jesús jumenota barapomonaetha, jeye: “Dota pam, bü ichamonae naerabiya paka muxutsipaeba, xua daxota abe paexanaetsípame. ⁶Tsipéi tsana patsina ayéi bicheito jiwi pomonae natsikotaena icha be xang ichin. Barapomonaetha jei tsane:

‘Ápara xang Mesías’, jei tsane. Poxonae barapomonae muxuitorobiya paebina, bapoxonae pinmonae jumekowüntsina.

⁷”Pajumetaename xua jiwi juiña nabenoutsina xote, yawa xua juiña írürü nabenoutsina icha ira beya. Dáichitha jopa pajunuwinde, tsipéi baxua pewünaeya matha kopiya tsane. Dáichitha kataunxuae dapó matakabi aichika tsane xua poxonae daxita werawerakáenaba yatsikaewa. ⁸Kae nakuapiwi irü icha nakuapíwino, bárapo aiña nakuapíwibe nabenoutsina. Matáütano irü pong nakua peewatsin irü ichüngdü pong icha nakua peewatsin, bapongbe irü nantiya nabénabe. Matáütano aiña nákuangtha ira jijiyatsina. Matáütano aiña nákuangtha jainbo nakua tsane tsipéi pin mayayo tsane. Baxua kopiya matha tsane xua jiwi átene tsóponae tsane bichokono xua beya jopa nama juniya tsane.

⁹”Íchitha dota pam, tsipéi poxonae baxua pewünaeya tsane jiwi paka teikebina paiña nepaka kaenaetsinexa pomonaetha, pomonae tómarang pentakaponaewi. Matáütano paka kuainchina judiomonae pía penakaetutsi bongtha tatsi. Yawa paka kaponae nakua peewatsiwi peitabaratha tatsi, paiña tana nejumekowüntsixaemxae. Yawa paka kaponae pentakaponaewi peitabaratha tatsi pomonae irü itoroba jíwitha xua pong nakua peewatsin nexa paiña tana nejumekowüntsixaemxae. Barapoxonae bara paka kui-itaküüpaena xua barapomonaetha tapana neyábara paebiwam pokotsiwa báyatha paka tsita éxanatsi. ¹⁰Bárapo pekapanebiyáe diwesi, tamonae bewa paebínóutsina daxita nakuangpíwitha xua poxonae pewünaeya tsane xua daxita werawerakáenaba. ¹¹Poxonae barapomonae paka kaponae pomonaetha, pomonae tómara pekanamataxeinaewi xua pía paiña nepaka kayábara paebinexa tsane xua paiña nenatsikuentsiwa xua abe paiña neexanaexae bapoxonae jopa patsiwanaya junuwiya najüntükoyene exabinde xua paiña netsipáebiwa tsane barapomonae. Paxam jame papáebare pokotsiwa xua kaena bapoxonae Nakom kueikueijeji paka exanaena. Bapoxonae pojume pakueikueijam tsane ápara jopa poxoru paiñakoya paichichipaem, ápara jame Nakom pía Pejumopetünaxü tatsi baxua paka kueikueijeji exanaena. ¹²Jiwi barompaya pía peweicho jiwi kaenaetsina ichamonaetha xua pejutebinexa tsainchi. Írürü koxiyewi ichamonaetha kaenaetsina pía pexui. Irü pexui paxa jiwi kaenaetsina ichamonaetha pejutebinexa tsainchi. ¹³Daxita nakuangpiwi paka kasebina paiña tana nejumekowüntsixaemxae. Íchitha pomonae áwiya antiyapüsüya nejumekowüntsiya jinompaena xua beya yakuiya werapaeya othopaena poxonae bekein abe taéxanatsi ichamonaetha barapomonae jame Nakom napaeba kana exanaena.

¹⁴”Daniel pong Nakom peitorobi jume pepaebin, bapong kaena báyatha yábara tsiwanaya muxudutsiya tina pokotsiwa xua bichokono abe, pokotsiwa xua werawéraka kana éxana. Patáename pokotsiwa xua ichüng Nakom pin píabo tütutha exananotsina, pokotsiwa jopa bewa notsi baxota, pokotsiwa Daniel báyatha yábara paeba. Bapoxonae payaputáename xua bara imoxoyo matakabi jopáenaba poxonae daxita werawerakáenaba”, jei Jesús. (Xang Marcos paka baraichi: “Pong yorobina pojume diwesi tinang moya jumenaitawatsina pía peyaputaenexa tsane”, paka jeichi.) Ekeicha Jesús jeye: “Poxonae barapokotsiwa patáename bapoxonae pomonae Judea nákuatha jinompa, barapomonae bewa demuxuwang berüküpiyaena. ¹⁵Bárapo matakábitha pong bo matatúpatha unguwa, bapong jopa bewa botha jonyáe tsane xua penotsiwa tsane pokotsiwa tabobeinchi bómüxü tütutha. Saya jame bewa naiña benaetsirikuaena. ¹⁶Írürü pong pábitha pópona, bapong jopa

bewa kaibeya po nae tsane botha xua penotsiwa tsane pía paparuwang. Saya jame bewa naiña benaetsirikuaena. ¹⁷¡Pai yábüxi tsobenáe powaxi pexui búpana táenatsi bárapo matakábitha! ¡Pai irü powaxi pexui ishaina barapówaxi tsobenaerü! Tsipéi ákabe tsobenáe tsane pexui. ¹⁸Poxonae pewünaeya tsane baxua Nakom pawüükare xua jopa paiña nerüküpaewa tsane poxonae awüübo peakexáe bichokono. ¹⁹Tsipéi bárapo matakábintha jiwi bichokono pin péraxa exanaeinchi. Átene tsane beyakaincha poxonae jiwi átene tsaibi poxonae Nakom aena nakua éxana, xua ekeicha nama bichokono pin péraxa tsane. Ekeicha bexa bapoxonae bápána jopa baxua exanáe tsane poxonae bichokono jiwi pin péraxa. ²⁰Icha Nakom jopa be kaentakabíyobe exanáe tsipae metha dapomonae aibi tsipae pomonae panenebiya bárapo peátene koyenewa weya. Dáichitha Nakom be kaentakabíyobe exanaena peantobexae pijimonae, pomonae pía peitapetsiwixae tatsi.

²¹”Bapoxonae icha ichüng paka jei: ‘Pataema bapong ápara Mesías ungue pong Nakom itorobika’, paka jei. Irü icha ichüng paka jei: ‘Pataema bapong Mesías xota unguiye’, paka jei, Bárapo jumein jopa pajumekowüntsinde. ²²Tsipéi pomonae pemuxuitórobi jiwi tsana patsina. Barapomonae natsikotaena icha be xang ichin pongxaein Mesías. Matáütano barapomonae natsikotaena icha be pomonae Nakom peitorobi jume pepaebiwi ichi tsane. Barapomonae pexeíña petsita-itüütsi koyenewang exanaena peitabókotha, po írathe tsáneno xua jiwi pemuxuitorobinexa tsainchi xua jiwi pejumekowüntsínexa pokotsiwa barapomonae paeba. Barichirü pomonaetha, pomonae Nakom pía peitapetsiwi tatsi pemuxuitorobinexa tsainchi xua írürü icha metha barapomonae pejumekowüntsínexa tsanerü pokotsiwa barapomonae paeba. Íchitha jopa itaküüpáe tsainchi xua barapomonae pemuxuitorobiwa tsainchi. ²³Tsaka pajinómpare, tsipéi baxua tsiwanaya yábara paka tsiwüünae muxudútatsi”, jei Jesús.

Meje yábara poxonae Jesús nayábara paeba xua poxonae ekeicha patopáetsika pongxae Nakom pía Peitapetsin

(Mt 24.29-35,42,44; Lc 21.25-36)

²⁴Ekeicha Jesús namchi, jeye: “Po matakábintha poxonae nakuiwetsina xua jiwi pin péraxa tsane, bapoxonae xometo naiña nakitabina. Jomokóichato jopa pentha tsane. ²⁵Opitéi peitaboko weothopeikaena. Matáüta napunatorobabiyaena Nakom xua xuang itabókotha dubena. Bapoxonae jopa xapain dubenanaeyo tsane. ²⁶Bapoxonae daxita jiwi taena peitabókotha xua pokoyene ápara tapatopeikaewa tsáneba tsakinaebówatha peitaboko wétsika pongxaein Nakom Tananeitapetsin. Nakom pía peayapusüü itorobi koyenéwatha matáütano bichokono pexeíña itúpanae kóichathano patopeikaein. ²⁷Matáütano itorobin tamatatsunpiwi xua inta pekaetutsínexa pomonae taitapetsiwi. Nakaetutsina daxita nakuangpiwi jíwana, irü ichamonae pomonae ichaxota xometo weekoinapiwi jíwana, irü ichamonae pomonae ichaxota xometo bejopiyapiwi, jíwana, irü ichamonae pomonae pokotsiwa werenepiwi jíwana, irü ichamonae pomonae pokotsiwa berekepiwi jíwana.

²⁸”Payaputaema bárapo pekayábara jüta pepaebi diwésiyo xua higuera nae. Jeye: Poxonae ba patáneme xua pena noxu xu xuwapona, bapoxonae ba payaputáneme xua bara imoxoyo wei tsúrukuae tsóponae, xua pentono perubenaenexa. ²⁹Barapókotsi jüta koyeneya ichi tsane poxonae patáename daxita baxuang pokotsiwa aunxuae paka tsipáebatsi pokotsiwa bexa exanaena, bapoxonae

payaputáename, xua bara imoxoyo tsane xua tapatopae wüünae tsane. ³⁰Bara xaiñeya paka tsipáebatsi daxita judiomonae naitapataya naexanaponaena beya yakuiya othopaena poxonae Nakom exanaena daxita baxuang pokotsiwa xuaunxuae paka tsipáebatsi. Bapoxonae bárapo judiomonae werawerakaena pomonae poxónaerü bárapo matakábitha jinompa. ³¹Peitaboko aichúrukuae tsane. Matáütano ira aichúrukuae tsane. Meisha nama tajumein ataya tsitekaena xua daxota daxita nayábara jumewétsina be pókotsi koyeneya báyatha páebang.

³²”Po matakábitha baxua exanaena, matáütano po hóratha baxua exanaena jiwi jopa baxua yábara yaputaeyo. Irü matatsunpiwi pomonae peitaboko beicha jinompa baxuang írürü jopa yábara yaputaeyo. Irü xang pongxaein Nakom Pexantong baxua jopa yábara yaputaeño. Meisha saya Nakom, pong Waxa yaputane poxonae po matakábitha baxua exanaena. Matáütano yaputane poxonae po hóratha daxita exanaena baxua xuaunxuae Paka tsipáebatsi.

³³”Tsaka pajinompéibare xua tapatopae wüünae tsane. Yawa Nakomtha patsipaeba dubenanaebíyama, tsipéi jopa payaputaem po matakeitha patopaein. ³⁴Barapókotsi koyeneya jüta ichi poxonae xang patopeikaein taitorobinexa tsane jiwi, icha be poxonae pebin ichi poxonae warapaena icha nakua beya. Poxonae bapong pewünaeya tsane xua warapaena píabo weya, kopiya matha waba pía petanakui-chiwichi. Bapong daxita pía petanakuichiwichi barompaya kobenata petanakuichiwangtsi tatsi. Matáütano bapong itoroba pong bokoiboto eena xua wüünaeya bo pe-eeanaenexa. ³⁵Paxam tsaka pajinómpare, tsipéi jopa payaputaem poxonae patopeikaein, icha be barapomonae ichi poxonae jopa yaputaeyo poxonae pepatopaewa tsane pía pekanamataxeinaeinchi pong bo pexeinaeinxae. Barapomonae jopa yaputaeyo icha barapong patopaena poxonae kirei tsanaicha, ichakuitha icha bapong patopaena papaetha, ichakuitha icha bapong patopaena matakeiwünaeyo, ichakuitha icha bapong patopaena baya tsane. ³⁶Barapomonae jopa yaputaeyo xua pía pekanamataxeinaeinchi naiña patopaena xua yaichamaicha matsuna tanonobounaeinchi poxonae maitumena. ³⁷Meje xuaje paka tsipáebatsi, xua paka jeichi: “Tsaka pajinómpare’, paka jeichi, baxua irü daxita jíwitha tsipaebang”, jei Jesús.

Meje yábara poxonae fariseomonae irü sacerdotemonae pía pentakaponaewi tatsi daxita barapomonae Jesús yábara nantaxéinatsi pokoyeneya xua Jesús pewaetabiwa tsainchi

(Mt 26.1-5; Lc 22.1-2; Jn 11.45-53)

14 ¹Akoibi po matakabíyobe kataunxuae seika poxonae jiwi nakaetutsina penabanaenexa pexaewa, peyábara nantaxeinaenexa bárapo matakabi xua poxonae kaena báyatha matha judiomonae Egipto nakua weya panenebiya. Bárapo matakabi pewüng Pascua matakabi wüng. Bárapo Pascua matakabi wüngtha jiwi xane pan, po pan xua jopa kotowiyo. Sacerdotemonae pía pentakaponaewi tatsi, irü pomonae jiwi pekuidubiwi Moisés pía peitorobi koyene tatsi, daxita barapomonae nabarü muxujéi xua bepa pinae eta bichi tsane poxonae Jesús nameicha waetabinchi pebexubinéxatsi. ²Íchitha barapomonae najeye:

—Abü jopa waetabí tsainchi poxonae jiwi Pascua matakabi wüngtha nakae-tuta penanabanaenexa pexaewa. Tsipéi icha bárapo matakeitha waetabichípati pinmonae anaepanaya najumekayáyata xubíchipa, najéi daxita barapomonae xua Jesús yábara páebatsi.

**Meje yábara poxonae petsiriwa Jesús mata epatábatsi penasiwa,
po penasiwa petuxueiwa**

(Mt 26.6-13; Jn 12.1-8)

³Poxonae Jesús Betania tómaratha pópona, bapoxonae Jesús Simón píabo tatsi betajoníyatsi, pong peperüüsawinchi. Poxonae Jesús eka pexaethopáewa-tha, bapoxonae patopa petsiriwa. Bapowa kapatopa alabastro ibo bosibü átsato, xua bichokono wüngka penasiwa xua petuxueiwa. Bárapo petuxueiwa bichokono aiña matoma. Poxonae wakataba bárapo bosibü, bapoxonae Jesús mata epatábatsi bárapo petuxuéi nasiwatha. ⁴Pomonae irü baxota ena, barapomonae jíwana anáepana, yawa kaemonae najéi:

—¿Eta pokotsiwa metha saya xuba jane bárapo petuxuéi nasiwa? ⁵Bárapo petuxuéi nasiwa bekaenaetsípatsi. Bapoxonae bexeinaetsípatsi trescientos paratiximonaebe po paratiximonaebe xua namatómata xua poxonae trescientos matakábibe nexa xua poxonae nakuita. Bárapo paratixitha beyawenaetsípatsi peakopeibí jiwi, najéi barapomonae.

Bapoxonae barapomonae barapowa kasébatsi.

⁶Íchitha Jesús jeye barapomonaetha:

—Moya pande, bara pakópare. ¿Eta pokotsiwa metha barapowa pabiatáneme? Pokotsiwa barapowa inta éxana ápara seikáyarü xua pexeiña koyene inta éxana. ⁷Bárapo írathe peakopeibí jiwi paka barü jinompéibina ataya tsaibi tsane. Paka itaküüpa xua beta pata éxaname barapomonae poxonae paichichípame. Íchitha nama paxam jopa ataya paka barü póponae tsainchi bárapo írathe poxonae paka itaküüpa xua pana neyawéname. ⁸Barapowa xua nenta epatáraba tapepongtha xua petuxuéi túxusi nasiwatha ápara xua tsiwanaya nenakuiyábara nakuiwüünaeta xua müthü tana neboyaenexa poxonae tüpaein. ⁹Bara xaiñeya paka tsipáebatsi. Daxita nákuangtha poxonae jiwi kueikueije tsane Nakom pía pekapanenebiyáe diwesi bárapo jiwi yawa yábara paebina xua pokotsiwa poxonae bapowa inta éxana xua jiwi bapowa peyábara kuinantaxeinaenéxatsi, jei Jesús.

Meje yábara poxonae Judas, Jesús kaenaetaxotsi

(Mt 26.14-16; Lc 22.3-6)

¹⁰Barapoxonae Judas Iscariote pong doce póyobe jíwana, pomonae Jesús pijimonaexae tatsi, bapong sacerdotemonae pía pentakaponaewi tatsi beya pona. Bapong pona xua petsipaebinxexa xua Jesús kaenaetaxubinchi barapomonaetha. ¹¹Poxonae barapomonae baxua jumetaerúküpa bichokono ichichiparúküpa baxua. Yawa barapomonae Judas Iscariote muxutsipáebatsi xua parátixi katsibapáebatsi. Bapoxonae Judas tamrópata pítaba xua jeita, xua pokoyenetha Jesús pekaenaetaxubiwa tsainchi barapomonaetha poxonae peyapuwüünáewatha.

**Meje yábara poxonae Jesús pijimonaebariü
nábane Pascua wüng matakábitha**

(Mt 26.17-29; Lc 22.7-23; Jn 13.21-30; 1Co 11.23-26)

¹²Néxata kopiya matakabi jopa po matakabi tsíwana penantakarukúae matakabi xua po matakábintha poxonae jiwi tsinakaetutsina, xua penabanaenexa pan, po pan jopa múxuna pentsiyo levadura matawüng, pokotsiwa xua kotowa éxana pan.

Bárapo penantakarukúae matakábitha ba cordéroxi pebtoxi xua ovejakoxi jutébatsi xua jiwi pexaenexa. Bapoxonae bárapo jiwi kayábara nantaxeina xua kaena báyatha pía pamo susato jiwi tatsi cordéroxi juteba yawa xane beya poxonae pane-nebiya Egipto nakua weya. Bárapo matakábitha Jesús pijimonae yáíñabatsi, jeye:

—¿Eta xota ichichípame xua xota pexaewa paka tsiwüünaetsinchi wanabanaenexa tsane xua Pascua wüing matakabi nexa? jei barapomonae.

¹³Bapoxonae Jesús itoroba nakuéyatabe póyobe pongbe xua doce póyobe jíwana, pomonae Jesús pijimonae tatsi. Jesús jeye:

—Tómara beya papónarebe. Bárapo tomarathiya pantenta ponaenamebe pebin pong mera yantanaponaena juruwatotha. Bara bapong papunapondebe. ¹⁴Bo beya papónarebe ichaxota bapong joniyaena. Pong bo pexeinaein pabarande: ‘Pong jiwi Pekuidubin kabarái: ¿Ínkane tútura, po tútutha tajiwimonae barü nabanaein pexaewa Pascua wüing matakabi nexa?’ jei bapong, pajándebe. ¹⁵Bapoxonae bapong paka tsita itakayopichínabe po tutu pin tutu po tutu xua asiyeicha po tutu xua báyatha tutu xaneba. Bárapo tútutha pexaewa panakuiwüünaeta jébare xua wanabanaenexa pexaewa bárapo Pascua wüing matakabi nexa, jei Jesús.

¹⁶Bara bapoxonae bapongbe pónatababe. Bara patópabe tómaratha. Bara tánebe daxita be pokoyeneya báyatha Jesús paeba. Bapoxonae pexaewa nakuiwüünaeta-jébabe Pascua wüing matakabi nexa xua penabanaenexa.

¹⁷Poxonae kirei tsanaicha bapoxonae Jesús pijimonae barü patopa bárapo tútutha. ¹⁸Poxonae Jesús pijimonae kataunxuae barü xunaboka pexaethopáewatha, bapoxonae Jesús pijimonae barái, jeye:

—Bara xaiñeya paka tsipáebatsi kaein pong paxam jíwana pam pong nebarü xáeungkua bapong nekanaetaxubina ichamonaetha, jei Jesús.

¹⁹Néxata bapoxonae Jesús pijimonae tatsi ünthüthüwekoyéi tsürüküpáe, néxata daxita tsana jei tsóponae Jestusta:

—¿Ápara xang kakaenaetaxubinchi? jei daxita barapomonae xua Jesús tsana yaiñabapónatsi.

²⁰Jesús jumenota barapomonaetha, jeye:

—Pong paxam jíwana pam xua doce póyobe jíwana xua kae paratotha pana nabarü jajaukungkua pónangbe pan ápara bapong nekaenaetaxubina ichamonaetha. ²¹Xang pongxaein Nakom Tananeitapetsin bewa tüpaein, tsipéi Nakom Pejume Diwésitha baxua neyábara paeba kaena báyatha. Íchitha pebin tsokúae pong nekaenaetaxubina ichamonaetha. Metha jame wüünae tsipae icha bapong jopa naexanáe tsipae, tsipéi bexa tsane bichokono átene tsokúae tsane, bichokono abe tana nekana exanaexae, jei Jesús.

²²Poxonae Jesús pijimonae barü xáeungkua, bapoxonae Jesús pekóbeta pita pan. Yawa Páxatha tsipaeba, jeye: “Axa, maisha jüntükoyene weiweinang xua pan pata tanekatsiwam”, jei. Bapoxonae Jesús pekóbeta pan epájánaka, yawa katsiba pijimonae. Bapoxonae pijimonae barái, jeye:

—Paxaema po pan epájánakang. Bárapo pan ápara yábara kaunuta tapepong xua poxonae tapaka tsitüpáewatsi tsainchi, jei Jesús.

²³Bapoxonae Jesús ekeicha pekóbeta pita korótiyo, yawa Nakomtha tsipaeba, jeye: “Axa, maisha jüntükoyene weiweinang xua korotíyotha ekareka pepa uva mera xua pata tanekatsiwam”, jei. Bapoxonae Jesús pijimonae kata korótiyo xua pejíwana aapaponaenexa. Daxita barapomonae bara jíwana aapapona. ²⁴Bapoxonae Jesús jeye pijimonaetha:

—Pena petsiwüünae muxudutsi koyenewa paka tsipáebatsi. Bárapo uva mera, po mera xua korotíyotha tsijuntu eka, yábara kaunuta tajana bárapo uva mera xua jana othoparenaein poxonae tüpaein. Bárapo jana tsita itapeiñaxeinaena xua jiwi pinmonae yábara jüntemainaein abe pía peéxanae kuirukoyenein tatsi. ²⁵Bara xaiñeya paka tsipáebatsi, bárapo uva mera jopa ekeicha paka barü apáe tsainchi ánoxuae. Meisha abü bexa tsane pena koyenéwatha paka barü apaeinchi bárapo uva mera poxonae Nakom neexanaena xua itorobiya ewatsin jiwi, jei Jesús.

Meje yábara poxonae Jesús namchi xua pinae Pedro Jesús yábara jei tsainchi: “Jopa dapong yaitaeiño”, pinae yábara jei tsainchi Jesús

(Mt 26.30-35; Lc 22.31-34; Jn 13.36-38)

²⁶Poxonae Jesús pijimonae barü najumeweta xua naxüna Nakom nexa, bapoxonae Jesús pijimonae barü pona demuxuwa beya. Bárapo demuxuwa pewüng demuxu Olivowa, olivo naein peumenaexae baxota. ²⁷Néxata Jesús pijimonae barái, jeye:

—Ánoxuae bárapo merawithe daxita pam pana nekuentarüküpáename tapaka ura pentsixaetsi tsainchi. Baxua paexanáename, tsipéi Nakom Pejume Diwésitha paka yábara kuitsiwüünaeya jeye: ‘Poxonae ovejamonae peewatsin bexubín, bapoxonae ovejamonae tsanarüküpaena’, jei Nakom. Penamchixae poxonae ichamonae newáetabina tanebexubinexa pana nekuentarüküpáename. ²⁸Íchitha taeyarapaeyo Nakom ekeicha asüü neexanaena. Bapoxonae paka tsíwana patopiyaeinchi Galilea nakua beya, poxonae bara beya paponáename, jei Jesús.

²⁹Néxata Pedro Jesús jumenótatsi, jeye:

—Bekein ichamonae kakuentarüküpaena jiña neuraxubixae, nama xang bápana jopa kakuentanaetsirikuae naetsirikuae tsainchi taneuraxubixaemxae, jei Pedro.

³⁰Néxata Jesús Pedro jumebaraichi, jeye:

—Bara xaiñeya katsipáebatsi, po merawithe pewünaeya poxonae aiña jumekuiyobetha wákara pebto fibina, bapoxonae xam kopiya akoibi pojumekuíyobetha neyábara jam tsane: ‘Jopa dapong yaitaeiño’, neyábara jam tsane, jei Jesús.

³¹Íchitha Pedro ekeicha jumedangweya, jeye:

—Bara bekein kapunatüpaeinchi íchitha baxua jopa kayábara paebí tsainchi, jei Pedro.

Írürü daxita Jesús pijimonae tatsi bara jumichi, nantajüpiya paeba.

Meje yábara poxonae Jesús Paxa tsipaeba ichaxota tsika íriyo, po íriyo pewüng Getsemaní

(Mt 26.36-46; Lc 22.39-46)

³²Néxata Jesús pijimonae barü patopa ichaxota tsika íriyo po íriyo pewüng Getsemaní. Baxota Jesús barái pijimonae, jeye:

—Xote abü páenare tha matha Táxatha tsipaebichi, jei Jesús.

³³Jesús barü pona Pedro irü Santiago irü Juan. Bapoxonae Jesús bichokono ünthüthüwekoyéi, yawa bichokono ünthüthüdeideije. ³⁴Néxata bárapo akoibi póyobetha Jesús barái, jeye:

—Bichokono jüntükoyene natsepiya wekoyang, tsipéi muxu tatüpa. Xote páenare, yawa payoyókare xua paiña tanebarü naitaewatsinexam, jei Jesús.

³⁵Néxata Jesús tsiwiyo dabe natsixitabiya, ira betaeungkuareka, tsipéi jopa juniya ajüntütaneyo. Jesús yaputane xua bichokono tsiátene tsane xua daxita jiwi

abe pía peéxanae koyenein tatsi. Daxota Jesús Paxa wüüka xua icha itaküüpatsi xua jopa penantawenonaewa xua peatenewa. ³⁶Bapoxonae Jesús Paxa tsipaeba, jeye: “Axa kaitaküüpa xua daxita éxaname. Icha ichichípame xua taneyawenawam tsane, newepire pokotsiwa neajüntütane éxana. Íchitha jopa nekana exanaeinde xua pokotsiwa ichichipang. Saya jame nekana éxande xua pokotsiwa ichichípame”, jei.

³⁷Néxata Jesús ekeicha kaibe iya ichaxota pijimonae jíwana tatsi táenatsi xua akoibi póyobe. Íchitha barapomonae maita. Jesús Pedro baraichi, jeye:

—Simón, ¿maitúnguame? ¿Jopa kaitaküüpaeyo xua yoyókame xua jiña tanebarü naitawatsinexam, matáütano xua bara kae hórathano? ³⁸Maisha payoyókare. Nakom patsipáebare xua jopa abe paiña neexanaewa tsane poxonae kaurimonae pía pentakaponaein tatsi piraichi paka jüntükoyene jüjüta. Paiña jüntükoyene wétsina bichokono paichichípame xua Nakom paiña netsipáebiwa, íchitha paiña pepong bichokono paakoyenefáetabim xua paiña netsipáebiwa Nakom.

³⁹Ekeicha Jesús bara nama kaeto kaibeya pona xua Paxa petsipaebinexa bárapo jumetha, po jumetha kopiya Paxa tsipaeba. ⁴⁰Bapoxonae ekeicha Jesús pijimonae beya pona xua akoibi póyobe. Dáichitha bárapo akoibi póyobe kame maitumena, tsipéi bichokono ítata tsakatsakéi xua itamáipana. Barapomonae jopa yaputaeyo xua Jesús petsipaebíwatsi poxonae yaichamaicha matsuna tanonobounaeinchi. ⁴¹Bara néxata ekeicha Jesús saya kuenta pona pijimonae, xua Paxa ekeicha petsipaebinexa. Ekeicha pijimonaetha patopa akoibi pokuiyobetha. Jesús jeye pijimonaetha:

—¡Moya bara paiña nepumaitumenaeinde, aunxuae jopa Nakom patsipaebim xua paiña nekayawenaenexa! Báyatha tsuxubi po hóratha xua xang pongxaein Nakom Tananeitapetsin, ichüing nekaenaetaxubina ichamonaetha, pomonaetha, pomonae peantükoyénebe jiwi. ⁴²Panakosabapende, panonobapondeno. Antha bü poinchi. Dota dawerena pong nekaenaetaxubina ichamonaetha, jei Jesús.

Meje yábara poxonae Jesús wáetabatsi

(Mt 26.47-56; Lc 22.47-53; Jn 18.2-11)

⁴³Poxonae Jesús kataunxuae tsipaebungkua pijimonae, bapoxonae Judas patopa. Bapong Judas doce póyobe jíwana kaein pomonae Jesús pepa pijimonaexae tatsi. Judas pinmonae barü patopa Jesustha. Ichamonae kusin kajinjinka. Ichamonae iwabi kajinjinka. Daxota daxita barapomonae pata tsipéi sacerdotemonae pía pentakaponaewi tatsi, irü pomonae jiwi pekuidubiwi Moisés pía peitorobi koyene tatsi, irü pomonae pítiri jíwirü daxita bárapo pentakaponaewi itoroba barapomonaetha. ⁴⁴Judas pong Jesús kaenaetaxubinchi beya poxonae bapong patopa kou tsiwanaya paeba bárapo pin bichéitha kou Jesús yábara páebatsi, kou jeye: “Pong tsutsubín bapong ápara bárapo pebin Jesús. Néxata moya bara pawáetabare. Pakáponde xua soldadomonae xainwaicha pekütsinexa tsane”, jei Judas.

⁴⁵Néxata Judas Jesús imoxoyo kakuita poinchi. Bapoxonae naiña Jesús jeichichi: —Pong jiwi Nekuidubim, ¿xamda? jei Judas.

Bapoxonae naiña Judas Jesús tsutsúbatsi. ⁴⁶Néxata barapomonae pomonae Judas pebarü patopaexae, Jesús imoxoyo kakuita umenarükúpatsi. Bapoxonae Jesús wáetabatsi.

⁴⁷Kaein pong Jesús pijimonaē tatsi jíwana, bapong naiña kusi namarawejonta. Bapoxonaē bapong muxuyoro katsoniba, pong sacerdotemonaē pía pepa pentakaponaēin tatsi tanakuítatsi bapong muxuyoro katsoníbatsi. ⁴⁸Bapoxonaē Jesús jeye jíwitha:

—Pakápatame kusin, yawa iwabi ichi be poxonaē pakana ichim pongtha pong jiwi pekaibin. ⁴⁹Daxita matakabin Nakom pin piabotha tatsi paka barü poponéibatsi. Paka kuirubeibatsino. Dáichitha bapoxonaē jame jopa pana newáetabim. Íchitha daxita baxuang neyábara kanakuijumeweta éxana, báyatha Nakom Pejume Diwésitha tana nekuiyábara wüünaē tsiwanaya paebixae pomonaē Nakom peitorobi jume pepaebiwi.

⁵⁰Bapoxonaē Jesús daxita pijimonaē kuentarükúpatsi.

⁵¹Bapoxonaē pewowin Jesús punapoinchi pong saya meisha paparúwatha naépa yábara. Bárapo pewowin wáetabatsi pomonaē Judas barü patopa. ⁵²Íchitha bárapo pewowin nama xuetakuta pía paparuwa épató. Tamasanaetsirikua.

Meje yábara poxonaē Jesús kapoinchi judiomonaē pía pekanamatakaitorobi jiwi bicheito tatsi pía peitabaratha tatsi

(Mt 26.57-68; Lc 22.54-55,63-71; Jn 18.12-14,19-24)

⁵³Pomonaē Jesús téikatsi, barapomonaē Jesús kapoinchi pong sacerdotemonaē pía pepa pentakaponaēin tatsi píabo tatsi beya, pong yatsikaya peaiñakuín. Baxota irü sacerdotemonaē pía pentakaponaēwi tatsi nanakaetuta. Irü pítiri jíwino nanakaetuta. Baxota irü nanakaetuta pomonaē jiwi pekuidubiwi Moisés pía peitorobi koyene tatsi. Daxita bárapo penakaetutsi jiwi, barapomonaētha jiwi wüngduta “Pekanamatakaitorobi jiwi bicheito”, jei. ⁵⁴Irü Pedro Jesús tsiwiyo tajü putaetaetsiníyatsi beya poxonaē patopa pánatha, po pánatha ichaxota sacerdotemonaē pía pepa pentakaponaēin tatsi táungkuatsi bo. Poxonaē Pedro pana tütutha joniya bapoxonaē naéka imoxoyo policiamonaētha pomonaē Nakom pin píabo tatsi pe-eenaēwi. Pedro kuitane pokoyeneya xua Jesús kana éxanatsi pomonaē nakaetuta. Pedro nonopeka ishótotha.

⁵⁵Sacerdotemonaē pía pentakaponaēwi tatsi, irü ichamonaēno pomonaē pekanamatakaitorobi jiwi bicheito, daxita barapomonaē jeita ichamonaē pomonaē xua Jesús naerabiya peyábara paebinéxatsi pokotsiwa xua Jesús paeba, xuano xua éxana, pía bárapo jumetha paebichi xua bara Jesús tüpa peexanaēwa tsainchi. Bara bekein pin bicheito pata xua Jesús abeya peyábara paebinéxatsi, íchitha kataunxuae barapomonaē pomonaē pekanamatakaitorobi jiwi bicheito kame jopa xeinaēyo po diwesi xua daxota Jesús pebexubinéxatsi. ⁵⁶Pinmonaē bekein Jesús yábara naerabiya páebatsi, íchitha tsanaya barompaya pía diwesi paeba. ⁵⁷Ichamonaē asiya umena, yawa naerabiya Jesús yábara páebatsi.

⁵⁸Barapomonaē jeye:

—Paxang pajumetang xua bapong Jesús paeba, jeye: ‘Xang abe exanaēin bárapo Nakom pin píabo, po bo jiwi piyakoutha ákaba. Akoibi po matakábibe icha bo ekeicha exanaēin po bo jiwi jopa exanaēyo’, jei Jesús, jei barapomonaē.

⁵⁹Dáichitha barapomonaē áwiya kame kataunxuae tsanaya barompaya ichawang paeba. Barapomonaē pía pepaebiawang xua Jesús peyábara paebíwatsi jopa pebürüya nantajüpayá nantaxeinaēyo.

⁶⁰Bapoxonaē sacerdotemonaē pía pepa pentakaponaēin tatsi asiya unguataba xua daxita peitabaratha tatsi. Bapoxonaē bapong Jesús yáñabatsi, jeichichi:

—¿Jopa jumenotsim barapomonae? ¿Bara xaiñéi xua pojumein barapomonae kayábara paeba? jei bapong.

⁶¹Dáichitha Jesús saya moya unguua. Jopa jumenotsiyo bapongtha. Daxota ekeicha sacerdotemonae pía pepa pentakaponaein tatsi jeye Jesustha:

—¿Bara yatsikaya xam Mesías pong Nakom nekaitorobín, pong Nakom Pexantom, po Nakom wüünae pajainteibang? jei bapong.

⁶²Bapoxonae Jesús jumenota bapongtha jeye:

—Aa, bara xang tsokuaein ápara, Nakom Pexantong ápara. Paxam pana netáename xua xang pongxaein Nakom Tananeitapetsin ekaein Nakom pekoxa weya tatsi, pong peayapusúü itorobi koyenewa pexeinaein. Matáütano pana netáename poxonae ekeicha patopeikaein tsakinaebówangtha xua peitaboko wétsika, jei Jesús.

⁶³Néxata bapoxonae sacerdotemonae pía pepa pentakaponaein tatsi, pin anaetha anaya pía paparuwa nata tsitsinaxuba, peyábara anaepanáexaetsi Jesús, jeye:

—¡Nama ekeicha jopa wanantawenonaewa ichamonae xua wanaka tsipaebiwa tsane xua bapong peyábara paebíwatsi! Bapong natsi-aenae éxana abe pepaebixae bárapo jume poxonae Nakom pexanto najainta. ⁶⁴Bara paxam pajumetáneme pokotsiwa bapong paeba pokotsiwa Nakom jopa ichipaeyo. ¿Eta xua paka yábara nantaxéiname xua paexanáename bapongtha abe pepaebixae? jei.

Daxita bárapo pekanamatakaitorobi jiwi bicheito jeye:

—Bara xaiñeya páebame. Jesús abe pía pepaebixae, Nakom tsítatsi xua bapong Nakom tsita natsikuéntatsi. Daxota bapong bewa tüpaena, jei bárapo pekanamatakaitorobi jiwi bicheito.

⁶⁵Bapoxonae barapomonae jíwana, peónetha Jesús anaya itabara subábatsi. Poxonae Jesús itakuere kútatsi, bapoxonae Jesús itabara tsakibakótatsi pekóbetha. Barapomonae jeye Jesustha:

—Ínkane pana netsipáebare: ¿Jintam káitabara tsakibóbara xua bekein paka itabara kútatsi? jei barapomonae.

Bapoxonae irü policiamonae pomonae Nakom pin píabo tatsi peanaewi Jesús itabara kuáintatsi.

Meje yábara poxonae Pedro Jesús yábara páebatsi xua jeye:

“Jopa dapong yaitaeiño”, xua yábara jeichichi Jesús

(Mt 26.69-75; Lc 22.56-62; Jn 18.15-18,25-29)

⁶⁶Poxonae kataunxuae Jesús kana exanómpatsi bapoxonae írürü Pedro eka pánatha tsika xua bo pejumawérena. Bapoxonae yábüyo patopa powa sacerdotemonae pía pepa pentakaponaein tatsi tanakuítatsi. ⁶⁷Poxonae barapowa Pedro tainchi xua nonopeka, Pedro kame táeungkuatsi. Pedro jeichichi:

—Ápara xam báyatha írürü napunaponéibame Jesús, pong Nazaret tomarapin, jei yábüyo.

⁶⁸Íchitha Pedro jumematawenta bapowa, jeye:

—Jopa dapong yaitaeiño, matáütano jopa yaputaeiño pokotsiwa xua yábara páebame, jei Pedro.

Bapoxonae Pedro pona bómüxü koiboto beya. Bapoxonae wákara pebto fiba. ⁶⁹Ekeicha bapowa Pedro tainchi. Bapoxonae bapowa tamrópata pítaba xua tsi-paeba pomonaetha, pomonae baxota irü umena. Bapowa Pedro yábara páebatsi, jeye:

—Ápara bapong pomonae Jesús pijimonae tatsi jíwanapin, jei.

⁷⁰Ekeicha Pedro jumematawenta bapowa, jeye:

—Jopa dapong yaitaeiño, jei Pedro.

Pirapaeyo pomonae umena baxota ekeicha Pedro tsipáebatsi jeichichi:

—Bara xaniwaicha barapomonae jíwanam. Ápara xam Galilea nakuapim, jei pomonae umena.

⁷¹Néxata Pedro jumedangweya, jeye:

—Bara Nakom peitabaratha xaiñeya paka tsipáebatsi pokotsiwa bara xaiñeya tapaebiwa. Icha jopa xaiñeya paka tsipaebichipaetsi metha bárabü Nakom abe nekana exanáetsipa. Ekeicha paka tsipáebatsi: ‘Jopa dapong yaitaeiño’, xuaunxuae pong payábara páebame, jei Pedro.

⁷²Bapoxonae írürü kaena naiña wákara pebto ekeicha fiba. Néxata Pedro nantaxéinataba xua báyatha Jesús Pedro tsipáebatsi poxonae jeye: ‘Xam bárapo mera-withe pewünaeya poxonae aiña jumekuiyobetha wákara pebto fibina xam kopiya akoibi pojumekuíyobetha neyábara jam tsane: Jopa dapong yaitaeiño neyábara jam tsane. Bapoxonae naiña irü wákara pebto fibina’, jeichichi Pedro xua Jesús paeba. Néxata bapoxonae Pedro bichokono wekoyéi peanthüthütanexae xua Jesús peyábara paebíwatsi.

Meje yábara poxonae Jesús unguua Pilato peitabaratha tatsi

(Mt 27.1-2,11-14; Lc 23.1-5; Jn 18.28-38)

15 ¹Poxonae pentha tsina sacerdotemonae pía pentakaponaewi tatsi, írürü judiomonae pía pítiri jiwi tatsi, irü pomonae jiwi pekuidubiwi Moisés pía peitorobi koyenein tatsi, írürü ichamonae pomonae pekanamatakaitorobi bicheito jiwi jíwana, daxita barapomonae yábara nakaetuta xua nantajúpaya pebürüya nenantaxeinaenexa pokoyeneya xua Jesús pebexubiwa tsainchi. Bapoxonae barapomonae Jesús maxükútatsi. Bapoxonae kapoinchi Pilato beya. ²Pilato Jesús yáiñabatsi, jeye:

—¿Bara xam yatsikaya judiomonae itorobiya pía pepa neéwatsin? jei.

Jesús jumenota, jeye:

—Xuaunxuae páebame bara baxua ápara, jei Jesús.

³Sacerdotemonae pía pentakaponaewi tatsi namchi Pilatotha, jeye:

—Bapong Jesús bichokono éxana pokotsiwa xua abe, jei barapomonae. ⁴Ekeicha Pilato yáiñaba Jesustha, jeye:

—¿Jopa jumenotsim pokotsiwa barapomonae abe kayábara paeba? Maisha barapomonae bichokono abe kayábara paeba, jei Pilato.

⁵Íchitha Jesús jopa ekeicha jumenotsiyo, Pilato jopa jumenotichi. Daxota Pilato najjüntükoyene kabenaeka poxoru Jesús jopa nayábara paebiyo xua piakoya penayawenaenexa.

Meje yábara poxonae Pilato jumebarü jejéi xua Jesús bara pebexubiwa tsainchi ichamonae

(Mt 27.15-31; Lc 23.13-25; Jn 18.38—19.16)

⁶Bara nama matakabi jopa poxonae ba Pilato píyakui xeina poxonae ba jiwi tsinakaetuta pexaewa penanabanaenexa. Bárapo matakábitha Pilato ba pusotaba pong ba jiwi itapeta kowai xua Pilato peishanaxubinexa pomonae jiwi pekübibotha

peenaewi jiwanamonaepin. ⁷Bárapo jiwi pekübibotha írürü eka pong pewüng Barrabás. Bapong bichokono abe peexanaein tsipéi kaena báyatha matakápona ichamonae xua barapomonaenajumetsákaba kana éxanatsi xuano xua jiwi jutébat. ⁸Bapoxonae pin bicheito jiwi pata Pilatotha, xua Pilato pewüükaenexa tsainchi xua bapong exanaena piakuikoyeneya poxonae xua ishanaxubina kaein pomonaenajiwi pekübibotha peenaewi jíwanapin. ⁹Bapoxonae Pilato yáíñaba barapomonaen Jesús yábara, jeye:

—¿Paichichípame xua tapusotabiwa tsane pong judiomonaen itorobiya pía pepa peewatsinchi? jei. ¹⁰Baxua Pilato paeba, tsipéi bapong yaputane xua sacerdotemonaen pía pentakaponaewi tatsi Jesús úwatsi. Daxota barapomonaen Jesús kaenaetaxúbatsi Pilatotha. ¹¹Íchitha bárapo sacerdotemonaen pía pentakaponaewi tatsi jiwi jumekuitsákabatsi xua anáepana kana éxanatsi, xua Pilato pekui-itorobinéxatsi xua Barrabás pepusotabinéxatsi, xua Jesús jopa pepusotabinéxatsi. ¹²Ekeicha Pilato yáíñaba bárapo jiwi, jeye:

—¿Eta xua kana exanokuaein pong pawüngdútame, xua pajam: ‘Judiomonaen itorobiya pía pepa peewatsinchi?’ pajam, jei.

¹³Barapomonaen Pilato dangweya jumenótatsi, jeye:

—¡Bewa maisha náetotha tüparukua exanaem! jei.

¹⁴Bapoxonae Pilato jeye barapomonaetha:

—¿Eta pokotsiwa xua metha jane, xua abe éxana? jei.

Íchitha ekeicha daümetha jumedangweya, jeye:

—¡Bewa maisha náetotha tüparukua exanaem! jei.

¹⁵Pilato ichichipa xua bapong jopa peita aenae-aenéiwatsi jiwi. Daxota Pilato Barrabás nama pusotábatsi. Bapoxonae Pilato itoroba xua soldadomonaen bara Jesús moya pekuainchinéxatsi pokotsíwatha eewa xua bichokono amüüpiya xua xota jiwi kuaintéibatsi poxonae abe exaneiba. Matáütano itoróbano xua moya bara Jesús tüparukua exanaeinchi náetotha.

¹⁶Bapoxonae soldadomonaen Jesús kapoinchi Pilato píabo tatsi beya po soldadomonaen yapu-eena Pilato píabo tatsi. Bapoxonae bárapo soldadomonaen waba icha soldadomonaen xua daxita bárapo soldadomonaen Jesús pematawakaicha umenaenexa tsainchi. ¹⁷Bapoxonae Jesús pía paparuwa jumaxuénatsi. Yawa jumaxátatatsi icha paparuwa po paparuwa tsobia xua Jesús be pekana exanaenéxatsi pong jiwi itorobiya pía pepa peewatsinchi. Yawa poxonae nakobeweta xua fata péé bapoxonae Jesús múxuna mataxátatatsi bárapo péé tepa. ¹⁸Bapoxonae barapomonaen tamrópata notarúkupa xua Jesús kuikaponaeya jeichichi:

—¿Xamda? ¡Ápara xam barapom pong judiomonaen itorobiya pepa Neéwatsin! jei.

¹⁹Po naewa xua Jesús kobenátatsi báyatha, bárapo naewa Jesús kobewepítatsi. Bapoxonae bárapo náewatha Jesús matakauaintatsi. Matáütano Jesús yábara naonesubábatsi. Bapoxonae barapomonaen Jesús peitabaratha tatsi pentabokototha taumeinchi, xua Jesús naerabiya wüünaen pejainchinexa tsainchi. ²⁰Poxonae Jesús kanakuiwétatsi xua kuikapónatsi ekeicha bapoxonae Jesús kaewa jumawejóntatsi xua po paparuwa tsobia. Bapoxonae ekeicha kaewa jumaxátatatsi po paparuwa pía paparúwaxae tatsi. Bapoxonae Jesús kapoinchi xua pekobematabobinéxatsi náetotha pebexubinéxatsi.

Meje yábara poxonae Jesús tüparukua éxanatsi náetotha

(Mt 27.32-44; Lc 23.26-43; Jn 19.17-27)

²¹Poxonae Jesús námtotha ka-enapoinchi soldadomonae, bapoxonae bárapo soldadomonae taeba pebin, pong Cirene tomarapin pong pewüing Simón. Bapong wexua wérena pona. Bapong Alejandro paxa tatsi, irü xua Rufo paxa tatsi. Bapoxonae bárapo soldadomonae Simón itoróbatsi xua pekaponae nexa Jesús pía naeto tatsi, po náetotha tüparukua peexanaenéxatsi Jesús.

²²Bapoxonae Jesús kapoinchi uruto beya, po uruto be jintong matasipa piwa, daxota bárapo uruto jiwi wüing únuta “Gólgota”, jei. ²³Baraxotiya Jesús ápatatsi vino mera, po vino mera ekeicha múxuna epareka mirra mera matawüing po mera bichokono atsu. Íchitha Jesús jopa apaeyo. ²⁴Matáütano bapoxonae Jesús tüparukua éxanatsi. Bapoxonae bárapo soldadomonae natatsaba Jesús pía paparuwang tatsi. Barapomonae bebeya ibótixi penakueranta notsinexa Jesús pía paparuwang tatsi.

²⁵Poxonae baya a las nueve tsuxubi, bapoxonae Jesús tüparukua éxanatsi náetotha. ²⁶Jesús pentutu wétsika tadútatsi napaewa xua bárapo napáewatha tina. Bárapo petinaedutsiwa Jesús yábara jeichichi: “Bapongje ápara judiomonae itorobiya pía pepa peewatsinchi”, jei bárapo petinaedutsiwa. ²⁷Írürü pongbe jiwi pekaibinbe tüparukua éxanatsi náetotha imoxoyo ichaxota Jesús dukua. Ichüing Jesús petsokona wetarukuíyatsi, ichüing pekoxa wetarukuéinatsi. ²⁸Poxonae barapomonae baxua éxana, bara barapomonae yábara jumekuiweta pokotsiwa xua báyatha Nakom Pejume Diwésitha Mesías yábara páebatsi xua jiwi paeba, xua jeye: “Bapong pomonae abe peexanaewi jíwana”, jei.

²⁹Pomonae Jesús xentapoinchi barapomonae Jesús kuikapoinchi. Yawa Jesús yábara ítata naichakébatsi. Barapomonae jeye Jesustha:

—¡Xam báyatha jam: ‘Nakom pin píabo abe exanaein, bapoxonae ekeicha akoibi po matakábibe xanebin’, jam! ³⁰¡Moya bara jíñakoutha nakapanépare naeto wétsika icha bara metha Nakom Pexantom tsipaem! jei barapomonae.

³¹Irü sacerdotemonae pía pentakaponaewi tatsi, irü pomonae jiwi pekuidubiwi Moisés pía peitorobi koyene tatsi, barapomonae Jesús kuikapoinchi, yawa najéi Jesús yábara:

—Bapong kain kapanepeibabei ichamonae, kame jopa nakapanepaeyo. ³²¡Icha bara bapong Mesías, pong israelmonae itorobiya pía pepa peewatsinchi, bü bapong bara piakoutha naeto wétsika ekoinka! ¡Xaiña bapoxonae jumekowúntatsi xua wataexae tsane! najéi barapomonae.

Barichirü baxua páebabe pongbe jiwi pekaibinbe, pongbe xua írürü kobematabadútatsibe náetotha. Bapongbe írürü Jesús kuikapónatsi.

Meje yábara poxonae Jesús tüpa

(Mt 27.45-56; Lc 23.44-49; Jn 19.28-30)

³³Poxonae Jesús kataunxuae dukua náetotha, bapoxonae daxita nákuangtha bichokono aitakiri xua poxonae matáeiñaxae weya, beya yatabopiya. Tres po hórabe kirei tsungkuae. ³⁴Bapoxonae Jesús jumedangweya wawái jeye: “Eloi, Eloi, ¿lema sabactani?” jei, (bárapo jumetha xua jei: “Ta Nakom, Ta Nakom, ¿eta pokotsiwa metha nepunaxúbame?” jei Jesús.)

³⁵Ichamonae pomonae baxota Jesús jumetaeumeinchi, barapomonae jeye:

—Pajumetaema, bapong waba, Elías wábatsi, pong Elías Nakom peitorobi jume pepaebin pong kaena báyatha tüpa, jei.

³⁶Bapoxonae kaein bapomonae jíwana naiña kuinaepoiña yawa pítaba esponja xua baxota pemene kapichinexa vino mera xua po mera mene atsu. Poxonae bapong baxota mene kapita, náewatha duta xua Jesús petayoichaenéxatsi xua petsutsubinexa. Bapong jeye:

—Abü, abü jopa apatsinde. Waxainchi abü matha taeinchi icha Elías patopeikaena xua bapong pepichinéxatsi naeto wétsika, jei.

³⁷Bapoxonae Jesús jumedangweya wawái. Bapoxonae nama tüpanaicha Jesús. ³⁸Bapoxonae paparuwa, po paparuwa Nakom pin piabotha tatsi dukua, bárapo paparuwa naiña bopiya epamatonta tsitsikeika aiña epatobe náexanabe. ³⁹Soldadomonae pía pentakaponaein tatsi, pong romanomonaepin, pong Jesús peitabaratha táungkuatsi, poxonae bapong tane xua Jesús tüparukua, bapong jeye:

—Ápara bara yatsikaya bapong Nakom pepa Pexanto tatsi, jei.

⁴⁰Barichi irü aiñáwaxi yábüxi barapówaxi Jesús tsiwiyo tajü wetaeuméiñatsi. Barapówaxi jíwana, ichowayo pewüng María Magdalena, powa Magdala tomara-piwayo. Ichowayo irü pewüng María, Santiago pong xuiyapin, irü José matapin, bapongbe pénabe tatsi. Ichowayo irü pewüng Salomé. ⁴¹Barapówaxi Jesús báyatha matha punajinómpatsi xua Jesús peyawenaenéxatsi xua poxonae Galilea nákuatha pópona. Irü ichówaxi yábüxi pinmonae powaxi Jesús barü patopa Jerusalén tómaratha.

Meje yábara poxonae Jesús petüpaein ibo müthütha yauxatatababótatsi

(Mt 27.57-61; Lc 23.50-56; Jn 19.38-42)

⁴²Po matakaitha pewüng penakuixaxainchi matakabi poxonae judiomona ba weta daxita xua penakuichiwa pewünaeya poxonae jopaena pentakeiseikáe matakabi, poxonae kirei tsanaicha bárapo penakuixaxainchi matakábitha bapoxonae patopa pebin Pilatotha. ⁴³Bapong pong pepatopaexae bapong pewüng José, pong Arimatea tomarapin. Bapong pomonae pekanamatakaitorobi jiwi bicheito jíwanapin. Bapong barükui-iturajinéibatsi jiwi. Bapong yábara jumekowüntsiya wüünae ewateiba pokoyenewa xua poxonae Mesías patopáetsika pong jiwi itorobiya peewetsinéxatsi. José ajüntükoyenetsakiya patopa Pilato piyaxantha tatsi pewüükaenexa Jesús petüpaein. ⁴⁴Bapoxonae Pilato yábara najüntükoyene kabenáekataba xua báyatha Jesús tüpa. Daxota bapong itoroba soldadomonae pía pentakaponaein tatsi pía yaputaetsi pokoyene xua eta poxonae báyatha tüpa. ⁴⁵Poxonae bárapo soldadomonae pía pentakaponaein tatsi paeba xua pinae báyatha Jesús tüpa, bapoxonae Pilato kópata xua José bara pichina Jesús petüpaein. ⁴⁶Bapoxonae José pexeña paparuwa kómota. José naeto wepichika Jesús petüpaein. Yawa matakiontabareka bárapo pexeña paparúwatha. Bapoxonae José ibo müthü iya boya Jesús petüpaein. Yawa torenabapoiña pin ibo panawa. Yawa bárapo ibo panáwatha yauxatatabanota. ⁴⁷María Magdalena, powa Magdala tomarapiwayo irü icha María powa José pena tatsi, barapówabe tánebe ichaxota Jesús petüpaein bóyatsi.

**Meje yábara poxonae Jesús ekeicha asüü juina
éxanatsi petüpaé kuirukoyene weya**

(Mt 28.1-10; Lc 24.1-12; Jn 20.1-10)

16¹Néxata bárapo judiomonae pía pentakeiseikáe matakabi tatsi yapu-káewaba poxonae kirei tsanaicha xua icha matakabi jopa. Bapoxonae María Magdalena, powa Magdala tomarapiwayo, irü icha María powa Santiago pena tatsi, irü ichowáyorü powa pewüing Salomé, daxita barapówaxi kómoka petuxueiwang peponaenexa xua Jesús peperüü epababinéxatsi petüpaein. ²Bapoxonae baya kaemúmbottha, po matakábitha xua nantakarukua kae semánatha, barapówaxi kápata petuxueiwang ichaxota Jesús ibo müthü iya bóyatsi. Bapoxonae xometo pichatabina. ³Barapówaxi kaewaxi natsipae-benapona, najéi:

—¿Jintam metha nákata pataxubina bárapo ibo panawa xua yauxatatababótatsi? najéi.

⁴Dáichitha poxonae barapówaxi taerúküpa xua po pin ibo panáwatha yauxatatababota bárapo ibo müthü báyatha kou yaupataxubanota. ⁵Barapówaxi jojoniya bárapo ibo müthü iya. Bárapo ibo müthü tutu iya pewowin eka pomuxunene pekoxa weya. Bapong namaxátata paparuwa, po paparuwa bichokono apiya yawa bichokono ínapana. Bárapo yábüxi bichokono junuwa, pewowin kunúwatsi. ⁶Íchitha bárapo pewowin jeye bárapo yabüxitha:

—Jopa pajunuwinde. Paxam pajéitame Jesús Nazaret tomarapin, pong báyatha náetotha tüpa. Íchitha bapong ánoxuae xote jopa bokaeyo. Báyatha asüü petüpaé kuirukoyene weya. Pataema ichaxota Jesús báyatha bótatsi petüpaein. ⁷Bara papónare, yáwano patsipáebare Pedro irü ichamonae pomonae Jesús pijimonae tatsirü. Néxata pajande: ‘Bepa Jesús Paka tsíwana patopiyáei Galilea nakua beya poxonae bara bepaiyíyáename. Bapoxonae baxotiya patáename bapong icha be pókotsi koyeneya paka tsipaeba báyatha’, pajande, jei pewowin bárapo yabüxitha.

⁸Bárapo yábüxi ibo müthü wejojondena. Yawa bara weya dúküpa tsipéi bichokono pijunuwi jijiyéi. Bárapo yábüxi jopa paebiyo ichamonaetha poxoru bichokono junuwa.

**Meje yábara poxonae Jesús María tsita naitüütatsi
powayo Magdala tomarapiwayo**

(Jn 20.11-18)

⁹Poxonae Jesús asüü exanátsiba petüpaewa weya po matakeitha opikarukua xua kae semánatha poxonae aena pentha, bapoxonae Jesús tsita naitüüta María Magdalena, powa Magdala tomarapiwayo. Barapowa kaena báyatha Jesús taitaweta kauri siete póyobe xua bapowa yakauríbatsi bárapo kauri, xua ekeicha bapowa jopa pexeinaenexa. ¹⁰Poxonae Jesús tainchi bapowa pona pemuxutsipaebinexa pomonaetha, pomonae ánoxuae anthüthütane yawa wekoyéi xua Jesús petüpaexae. Barapomonae báyatha Jesús pepunajinom-paewichi. ¹¹Poxonae barapomonae jumetane xua juiña Jesús asüü pópona, yawa xua bapowa báyatha Jesús tainchi, barapomonae baxua jopa yábara jumekowüntsiyo.

**Meje yábara poxonae Jesús pebinbe tsita naitüüta námtotha
poxonae Emaús tómara beya pónabe**

(Lc 24.13-35)

¹²Pírapae bapoxonae ekeicha Jesús tsita naitüüta pijimonaе tatsi jíwanabetha icha kuikoyenýatha xua poxonae jopa xapain yaitaetsi poxonae námtotha pipathotha ekapónabe aishawatha. ¹³Bapoxonae bapongbe kaibe nawíyabe. Yawa tsi-páebabe ichamonaetha xua Jesús pijimonaetha tatsi xua pokoyene báyatha Jesús bapongbe tsita naitüütatsibe. Íchitha barapomonaе barichirü irü jopa jumekowün-tsíyorü bárapo diwesi pokotsiwa bapongbe páebabe.

**Meje yábara poxonae Jesús kui-itoroba pijimonaе xua pía diwesi tatsi
daxita nákuangtha petapaebiwa tsainchi**

(Mt 28.16-20; Lc 24.36-49; Jn 20.19-23)

¹⁴Pírapae Jesús tsita naitüüta pijimonaе pomonaе once póyobe poxonae barapomonaе pexaethopáewatha íratha ena. Jesús pin jumetha muxutaenakiya éxana xua jopa pejumekowüntsixaetsi matáütano peyábara muxusipanaeаetsi matáüta xua jopa peyábara jumekowüntsixaetsi pokotsiwa paeba pomonaе tane xua Jesús ekeicha báyatha asüü pópona petúpáе kuirukoyene weya. ¹⁵Jesús jeye pijimonaetha: “Papónare, daxita nákuangtha beya. Patsipáebare daxita jíwitha bárapo pekapanenebiyáе jume diwesi. ¹⁶Pomonaе neyábara jumekowüntsina xua xang ápara Nakom Pexantong tatsi, matáütano xua bautisábatsi, barapomonaе kapanenebiyaеinchi xua jopa pewerawerakaenexa. Íchitha pomonaе jopa neyábara jumekowüntsio xua xang Nakom Pexantong tatsi, barapomonaе péraxa jübebinchi xua Nakom peyábara paebixae xua pinae barapomonaе jopa jumekowüntsio. ¹⁷⁻¹⁸Pomonaе neyábara jumekowüntsina xua xang Nakom Pexantong tatsin múxuna exanaeин xua je pokotsiwe: Barapomonaе taitawetsina ichamonaе kauri poxonae tawüingtha wüükeibina; matáütano barapomonaе pena jumeintha kueikueijejе tsane; icha barapomonaе jomong notsina pekóbetha, jopa barapomonaе tüpa exanáе tsainchi jomong; matáütano icha barapomonaе apaena po mera jiwi tüpa éxanatsi bárapo mera jopa abe exanáе tsainchi barapomonaе; matáütano barapomonaе itaküüpaеinchi xua jayabina pekóbetha pomonaе peatenewi, xua bapoxonae bárapo peatenewi peaxaibinexa tsaibi tsane”, jei Jesús.

**Meje yábara poxonae Jesús athabé juiña Nakom pía
peitorobi nakua beicha tatsi**

(Lc 24.50-53)

¹⁹Jesús pong jiwi Pekanamataxeinaeинchi, poxonae bapong najumeweta xua kueikueijejе pijimonaetha, bapoxonae Jesús asiya peitaboko beicha juiña éxanatsi, xua Nakom éxana. Baraxoteicha Jesús Paxa kuarétatsi pekoxa weya aiñakuí peexanaenéxatsi. ²⁰Bara barapomonaе Jesús pijimonaе tatsi ponarúküpa. Yáwano barapomonaе kueikueijejе tsurubenanáеbiya jíwitha bárapo pekapanenebiyáе jume diwesi daxita nákuangtha. Bapong Jesús pong jiwi pepa Pekanamataxeinaeинchi yawena barapomonaetha. Matáütano Jesús kana éxana barapomonaetha xua barapomonaе múxuna éxana pexeíña petsita-itüütsi koyenewang xua daxota pokotsiwa barapomonaе kueikueijejе jíwitha bara pexaiñéi jumein. Je, bara ichi tsane.

Baja Marcos.

Jesucristo Pía Pexeiña

Jume Diwesi Tatsi Lucas

Petináe Diwesi

Meje po diwesi yábara xua Lucas tamrópata pítaba poxonae tina

1 ¹Jako Teófilo. Pongxaem nentükui-wüünaein, kata tínatsi. Pinmonae báyatha xuya kou tina diwesi Jesús yábara, xua ichamonae kou paeba, xua pinae Jesús poxonae wüünaeya pópona pataxantha. ²Pomonae kou xua baxua pepaebixae barapomonae pinae kopiya yatsikaewa tane daxita pokotsiwa Jesús éxana pataxantha. Matáütano pinae barapomonae Nakom Pejume Diwesi tatsi kuidubeiba. ³Xang netsita wüünae daxota nantaxeinang xua yábara tayaiñabiwa pomonae petinaexae yawa pekueikueijeixae daxita bárapo diwesi xua pinae juiña Jesús éxana. Bapoxonae kuita kata tinapoinchi Teófilo jiña neyaputaenexa tsane daxita pokotsiwa Jesús éxana juiña xua kopiya tsóponae xuano xua bapoxonae tsoponaeno. ⁴Bárxua kata tínatsi jiña neyaputaenexa tsane bárapo pexaiñéi jume pokoyene ichamonae báyatha kakuiduba.

Meje yábara poxonae matatsunpin wüünae yábara tsiwüünae paeba xua Juan nakatsiwa pong jiwi Pebautisabin tsane

⁵Kaena báyatha poxonae Herodes pópona Judea nákuatha, xua pong Judea nakuapiwi peyanakua ewatsinchi, bapoxónaerü barichi pópona bárapo nákuatha sacerdotépin pong pewüng Zacarías. Bapong jíwana po sacerdotepiwi pía matabüxü jiwi pewüng Abías. Piseuri tatsi pewüng Isabel. Piséuribe pía pamo susato jíwanapin tátsibe, bapong pewüng Aarón pong yatsikaya tabüdukua sacerdotépin. ⁶Piséuribe Nakom tsita jüntükoyene wunáetsibe xua bara wüünaeya peexanáewabe. Pokotsiwa Nakom pong jiwi Pekanamataxeinaein, nakana jume diwesi itoroba baxua itapeta beta exanéibabe. Daxota jopa yábara paebeibíchibe jiwi pokoyene xua bapongbe natsi-aenaekuéntabe xua abe peexaneibíwabe. ⁷Íchitha pexui jopa xeináeyobe, tsipéi Isabel mawékowa, matáütano tsipéi báyatha pitiriwa irü tsipéi pebin báyatha amo tseae.

⁸Kaentakabi poxonae Zacarías ü pía matabüxü jiwi piakuitha éxana Nakom nexa, bapong Zacarías xuya piamonae itapétatsi. ⁹Barapomonae sacerdotemona, pía kuikoyene xeina xua kaein piamonae jíwana itapétatsi poxonae daxita barapomonae nakuita Nakom pong jiwi Pekanamataxeinaein pin piabotha tatsi. Bapong Zacarías itapétatsi xua pejoniyaenexa po tutu peaiñakuí tutu Nakom pin piabotha po tütutha ichaxota exaneiba xua Nakom nexa. Bárapo tütutha Zacarías tauta petúxusi exanaenexa Nakom nexa xua Nakom peitorobixae. ¹⁰Poxonae Zacarías kataunxuae túxusi exanawiya petuxueiwa xua tauta Nakom nexa, bapoxonae daxita pomonae aishowa beumeiña barapomonae Nakom tsipaebompa.

¹¹Bapoxonae Zacarías tsita naitúütatsi matatsunpin pong Nakom pong jiwi Peka-namataxeinaein itoroba. Pomuxunene pekoxa weya matatsunpin iboto kakuita unguua po ibótotha xua ichaxota tauteiba petuxueiwa Nakom nexa. ¹²Poxonae Zacarías taeba matatsunpin jopa yaputaeyo xua peexanaewa, bichokono pejunu-wixae. ¹³Íchitha matatsunpin Zacarías baraichi, jeichichi:

—Zacarías, jopa junuwinde. Nakom bara kajumetane poxonae tsipaebéibame bapong. Methaunxuae jinsheuri Isabel tanakatsiwinchi pexuyo. Jinsheuri kata pabetsina pebinwüüto. Xam wüingdutsínname bapongtha, po wüing Juan, jei. ¹⁴Jüntükoyene weiweinaename. Barichi pinmonae jüntükoyene weiweinaena xua bapong penakatsiwixae tsane. ¹⁵Bapong Juan Nakom pong jiwi Peka-namataxei-naein tsita aiñakuí tsainchi. Bapong peátsaxae mera jopa apáe tsane. Vino mera jopa apáe tsáneno. Poxonae kataunxuae bütfyotha eka bichokono jüntükoyene yüükaeinchi Nakom pía Pejumopetünaxü tatsi pía peayapusüüwa tatsi. ¹⁶Bapong kana exanaena xua aiña Israel nakuapiwi jumekowüntsina Nakom pong Peka-namataxeinaein jiwi xua barapomonae bárapo Nakom pía Nakom tatsi tsainchi. ¹⁷Juan tsiwanaya poponaena xua pong xua Nakom itorobina bapong tsiwanaya poponaeinchi. Juan xeinaena Nakom pía Pejumopetünaxü tatsi pía peayapusüüwa tatsi icha kain Elías ichi pong Nakom peitorobi jume pepaebin. Bapong Elías báyatha tüpa. Juan exanaena xua pexui paxeiwi ántobe tsaibi tsainchi. Matáütano Juan kana exanaena xua jumekowüntsina Nakom pomonae kopiya Nakom pejumefebíwichi. Tsipéi exanaena baxua, barapomonae tsiwanaya jumekuiyábara najüntükoyene wüünaetsina, xua barapomonae pejumekowüntsinaexa Nakom pong Peka-namataxeinaein jiwi, jei matatsunpin.

¹⁸Zacarías yáíñaba matatsunpin, jeye:

—¿Eta nejumichim yatsikáewara xua inta nakatsiwa pexuyo? Ápara xang amo tsekaein. Irü tapetsiriwa ápara inta pitiriwa tsekaeba, jei.

¹⁹Matatsunpin Zacarías jumenótatsi, jeye:

—Ápara xang Gabriel. Barápara Nakom ba imoxoyo kakuita ungueibang. Nakom neitoroba bépara katsipaebichei bárapo pexaiña jume diwesi. Daxota yatsi-kaya nakatsíwaba nexanto. ²⁰Ínkane jumetaema. Yáitama jame maisha aunxuae jopa yábara nejumekowüntsím, daxota methaunxuae jopa kuinaya paebim tsane. Yajume auñeibiya yantakabi jopáename poxonae beya abü nexanto nakatsiwa xuaunxuae katsipáebatsi, jei.

²¹Poxonae Zacarías tsipaebáuyatsi, Zacarías pesato beya ewatumeinchi pomonae Nakom tsipaeba pesátotha. Barapomonae nabarái: “¿Eta pokotsiwa metha Zacarías kame jopa jondenaeyo Nakom pin píabo wérena?” najéi. ²²Poxonae Zacarías mata-paiña jondena jopa itaküüpaetsi xua petsipaebiwa barapomonaetha. Bapoxonae barapomonae nantaxeina xua metha bara Zacarías tsita naitúütatsi xua wüünae bárapo tütutha poxoru Zacarías pekóbetha kowai barapomonaetha. Íchitha áwiya kame jopa kueikueijeiyoy.

²³Poxonae Zacarías daxita nakobeweta xua éxana Nakom nexa Nakom pin pia-botha, bapoxonae piabotha pona. ²⁴Pirapaeyo Zacarías piseuri tatsi Isabel búpana taékatsi pexuyo. Barapowa jopa naitüütsiyo cinco po xometíyobe. Saya piabotha eka. ²⁵Barapowa nabarái, jeye: “Baxua Nakom inta éxana pong Tanekanamata-xeinaein. Bapong baxua inta éxana xua jiwi jopa aura tana neexanaewa tsane”, najéi bapowa.

**Meje yábara poxonaе matatsunpin wüünae
tsiwanaya paeба xua Jesús naexanaena**

²⁶Poxonaе Isabel seis po xometíyobe yapukaewa poxonaе pexuyo búpana taékatsi, bapoxonaе Nakom itoroba matatsunpin, pong pewüing Gabriel. Gabriel Nazaret tómara beitorobíyatsi po tómara eka Galilea nákuatha. ²⁷Gabriel patopa pesiwaponaenexa yábüyo, powa bápána jopa pebin pichiyo. Bapowa muxu pepichi pekotsiwa, pong pewüing José. Bapong José David pía pemómoxi susato jíwana tatsi. Kaena báyatha David Israel nakuamonae itorobiya pía pepa peewatsinchi. Barapowa powa José pekotsiwaxae tatsi pewüing María. ²⁸Matatsunpin Gabriel, patopa ichaxota María eka. Gabriel barái, María barai-chi, jeye:

—María jako. Nakom itapeta kayábara tsita jüntükoyene wüünaetsi beyakaincha icha yábüxi. Matáütano barápara Nakom pong jiwi Pekanamataxeinaein kabarü pópona, jei matatsunpin.

²⁹Íchitha poxonaе jumetaeba bapowa, yábara jumekuitaya nabenaeka. Piakoutha nayáñaba jeye: “¿Eta xua bapong nejakoba jane?” najéi. ³⁰Matatsunpin María baraichi, jeichichi:

—María, jopa junuwinde, Nakom kayábara tsita jüntükoyene wüünaetsi. ³¹Matha taema xam methaunxuae pexuyo yapúruwa jináename xuano bara pabetsíname nexanto. Bapoyo wüingdutsíname po wüing Jesús. ³²Bapong aiñakuí peexanaeinchi tsainchi. Bapong wüingdutinchi, icha wüing jei tsainchi: ‘Nakom Pexanto tatsi pong peitabókotha eka’, jei tsainchi. Nakom pong Pekanamataxeinaein jiwi, bapong pexanto kana exanaena xua bapong jiwi itorobiya pía pepa Peewatsinchi tsane icha matha David kana ichichi, pong Jesús pía pamo susato jintong tatsi. ³³Bapong yakuitsitekaena xua jiwi peewatsinchi penaexanaewa tsane Israel piamonae susato saineiwi pexantha tatsi. Pía peitorobi koyenewa tatsi jopa werawérakae tsane, jei Gabriel, pong matatsunpin.

³⁴Néxata María jumenota matatsunpin, jeye:

—¿Eta xua yapuruwajinokuaein pexuyo? Ápara kataunxuae jopa nakueyabiño, jei María.

³⁵Matatsunpin jumenota, jeye:

—Nakom pía Pejumopetünaxü tatsi kata patopeikaena. Matáütano Nakom pong bichokono pepa pejüntükoyene wüünaein bapong, pía peayapusüüwa tatsi kanta-tsún atawakaicha nontsikaena icha be tsakinaebowa ichi tsane. Daxota po pexuyo nakatsiwa, bárapo pexuyo Nakom tsita jüntükoyene wüünaeinchi. Bárapo pexuyo yábara jei tsainchi: ‘Nakom Pexanto tatsi’, jei tsainchi. ³⁶Írürü barichi jiñamo-naewayo Isabel, bekein bara pitiriwa tsekae, íchitha ánoxuae pexanto yapuruwajina. Ánoxuae barapowa seis po xometíyobe yapukaewa xua yapuruwajina bekein kopiya mawékowa. ³⁷Dapokotsiwa aibi pokotsiwa Nakom tsita ayapubetsi, tsipéi bapong daxita bara yaputane.

³⁸Néxata María namchi, jeye:

—Xang bara barapowayüing xua taexanaewayong pokotsiwa Nakom pong jiwi Pekanamataxeinaein neitoroba. Bü moya bara Nakom inta exanaena xuaunxuae netsipáebame, jei María, matatsunpintha.

Bapoxonaе matatsunpin napítaba.

Meje yábara poxonae María siwapona, xua Isabel siwapoinchi

³⁹Pirapaeyo María naiña póntaba tómara beya, po tómara eka ichaxota ira marafofowa xua Judea nákuatha. ⁴⁰Baxota barapowa María joniya Zacarías pia-botha tatsi. Bapoxonae Isabel jakóbatsi. ⁴¹Poxonae Isabel jumetane xua María jakoba, bapoxonae pía pexuyo tsiperüü natsixibékatsi Isabel. Bapoxonae Nakom pía Pejumopetünaxü tatsi pía peayapusüüwa tatsi Isabel jüntükoyene yúükatsi. ⁴²Bapoxonae Isabel jumedangweya wawái xua María baraichi, jeye:

—¡Nakom kayábara tsita jüntükoyene wüünaetsi beyakaincha icha yábüxi!
¡Barichi nexanto Nakom yábara tsita jüntükoyene wüünaetsi! ⁴³¡Xam powa Tane-kanamataxeinaein pena tatsim, bichokono aurang xua tana nesiwaponaeawam tsipéi jopa ta-aiñakuiwayong! ⁴⁴Poxoru poxonae kajumetainchi xua nejakóbame bapoxonae pexuyo netsiperüü weiweinaya natsixibeka. ⁴⁵Jüntükoyene weiwéi-name nejumekowüntsixaé tsipéi bara nayábara jumekuiwetsina pokotsiwa Nakom pong jiwi Pekanamataxeinaein yábara katsiwüünae muxuduta pong Pekanamataxeinaein jiwi xua poxonae matatsunpin katsipaeba, jei Isabel.

⁴⁶Néxata María namchi, jeye:

“Tajüntükoyene Nakom wüünae jáintatsi pong jiwi Pekanamataxeinaein.

⁴⁷Matáütano tajüntükoyene Nakom yábara weiwéinatsi pong Tanekapanepaein.

⁴⁸Nakom neweyatane xua xang saya tapawin.

Bara barapowayüing,

powayüing xua taexanaewa pokotsiwa Nakom neitoroba.

Ánoxuae xuano bexa tsánoe daxita jiwi pomonaé naitapataya naexanaponaena wüünae nejainchina tsipéi Nakom nejüntükoyene weiweina éxana bichokono beyakaincha icha yábüxi.

⁴⁹Bapong Nakom pong peayapusüü itorobi koyene pexeinaein inta bichokono wüünae éxana.

Bapong Nakom pepa pejüntükoyene wüünaein.

⁵⁰Bapong Nakom yaweneibina jiwi pía peantobéwaxae pomonaetha, pomonaé kopiya pekunuweibixaetsi.

⁵¹Nakom tsita itüüba xua peayapusüü itorobi koyenewa xeina.

Baxua éxana poxonaé jüntükoyene amanáyaba pomonaetha, pomonaé atsakiya penayábara paebiwi xua ichamonae peabíwichi.

⁵²Nakom kuipita kana éxana pomonaetha pomonaé pekanamataxeinaewi xua ekeicha barapomonaé jopa naexanáé tsane xua pekanamataxeinaewa jiwi.

Íchitha nama pomonaetha, pomonaé pekuipawi náexana barapomonaetha Nakom kana éxana xua barapomonaé penaexanaewa pomonaé pekanamataxeinae jiwi.

⁵³Pomonaé xua piyain barapomonaetha Nakom kana éxana xua barapomonaé petonsanaewa xua penabanaewa po pexaewa pexeíña pexaewang.

Matáütano kopei pexeinaewi barapomonaetha Nakom kana éxana xua barapomonaé pekobesainaewa.

⁵⁴Nakom yaweneiba pijimonaé Israel nakuapiwi pomonaé pía pamo susatopin tatsi, bapong Israel pong tanakuita Nakom.

Nakom jopa yábara jüntemainaeayo xua peyaweneibiwa bárapo pijimonaé peantobexae.

⁵⁵Nakom daxita éxana pokotsiwa Abraham waámo susatopin yábara tsiwüünae muxudútatsi xuano xua yábara tsiwüünae muxudútatsi pía pemómoxi susato jiwi tatsi”,
jei María.

⁵⁶María kataunxuae akoibi po xometíyobe eka Isabel piabotha tatsi. Bapoxonae ekeicha kaibe náwiya piabo beya.

Meje yábara poxonae Juan nakatsiwa pong jiwi Pebautisabin

⁵⁷Néxata Isabel xua búpana taékatsi pexuyo, perüükuinauchitane. Bapoxonae pexuyo tanowáeinkuatsi xua pexanto. ⁵⁸Pomonae Isabel piabotha peta-enaewichi, írürü piamonae tatsi pomonae pekuariya peta-enaewichi daxita barapomonae Isabel siwapoinchi xua pejakobinexa tsainchi. Barapomonae yaputane xua Nakom pong Pekanamataxeinaeinxae jiwi Isabel beta taéxanatsi poxonae Isabel dakotsiwa taitoróbatsi pexuyo. ⁵⁹Poxonae ocho po matakábibe yapukaewa barapoxonae pexuyo withábatsi xua pebinwüütoxae xua ichaxota nareixakaeka. Barapomonae nantaxeina xua pexuyo wüingdutsinchi po wüing pexuyo paxa tatsi xeina, xua po wüing “Zacarías”, jei. ⁶⁰Íchitha pexuyo pena tatsi namchi barapomonaetha, jeye: —Jume, jame bewa jei: ‘Juan’, jei, jei pexuyo pena tatsi.

⁶¹Bapoxonae barapomonae Isabel baraichi, jeye:

—¿Eta xua? Jiñamonae dapókotsi wüing aibiba, po wüing: ‘Juan’, jei, jei barapomonae.

⁶²Néxata barapomonae moya pekóbetha kowai Zacaríastha. Matáütano pekóbetha kowaya yáíñaba, Zacarías yáíñabatsi jeichichi: “¿Eta po wüing jiña nexanto wüingdutsichi?” jei barapomonae. ⁶³Zacarías wüüka napaewa petinaenexa tsane. Bapoxonae bárapo napáewatha jei xua tina: “Ápara pewüing Juan”, jei. Bapoxonae barapomonae najüntükoyene benaeka xua irü bapong namchi: “Bara pewüing Juan”, jei. ⁶⁴Poxonae baxua éxana, kaena bapoxonae jemeicha Zacarías ekeicha kaewa paeba. Ekeicha ébato sadüjei xua kueikueije. Zacarías tamrópata pítaba xua wüünae jainta Nakom. ⁶⁵Bapoxonae daxita pomonae imoxoyo jinompa ichaxota Zacarías piséuribe popónabe, daxita barapomonae junuwa. Matáütano pomonae xua pejinompaewi daxita ichaxota po ira xua marafowaxua bárapo Judea nákuatha, daxita barapomonae paebinouta pokotsiwa xua báyatha petaxae. ⁶⁶Daxita pomonae jumetane, barapomonae najüntükoyene yábara nantaxeina nawita. Matáütano kaemonae nantiya nayáíñaba najéi: “¿Eta bichane metha pexuyo poxonae wichabina?” najéi barapomonae. Ápara poxoru Nakom pong Pekanamataxeinaein jiwi bichokono pexuyo petsitajüntükoyene-wüünaexaetsi daxota barapomonae baxua paeba.

Meje yábara xua Zacarías pía wei

⁶⁷Pexuyo paxa tatsi Zacarías, jüntükoyene yüükatsi Nakom pía Pejumopetünaxü tatsi pía peyapusüüwa tatsi. Matáütano bapong kueikueije po jumetha pojume Nakom kata. Zacarías namchi, jeye:

⁶⁸“Nakom pong Pekanamataxeinaein jiwi,

pong Israel pía Nakom tatsi,

bárabü wüünae jainchinchi bárapo Nakom.

Tsipéi bapong báyatha patopeika waxantha.

- Bapong bara piamonaetsi.
Matáütano bapong býatha naka kapanepa.
- ⁶⁹Pong Nakom nákata itorobika bapong pong jiwi pekapanenebiyaein pía peayapusúüwatha.
Bapong David pía pemómoxi susato jíwana tatsi.
Bapong David pong Nakom pía petanakuitinchi xua peexanaewa pokotsiwa Nakom itoroba.
- ⁷⁰Kaena býatha Nakom yábara naka tsiwüünae muxuduta poxonae itoroba pía peitorobi jume petapaebiwichi xua wanaka tsipaebinexa.
- ⁷¹Bara naka tsipaeba xua pinae bapong pong Nakom wanákata itorobikaexae, pinae naka kapanepaena pomonae wanaka aitafaetabí jiwi pía xaiña weya tatsi.
Matáütano pinae naka kapanepaena pomonae wanaka ita-aenae-aenéi jiwi pía xaiña weya tatsi.
- ⁷²Matáütano Nakom naka tsipaeba xua pinae waámo susatopiwi yábara kanantaxeinaeinchi xua peyawenaenéxatsi.
Matáütano pinae jopa jüntemaináe tsane xua waámo susatopiwi peyawenaponáewatsi xua býatha Nakom yábara petsiwüünae muxudutsixae baxua.
- ⁷³Báraxua Nakom naka tsiwüünae muxuduta xua xaiñeya bara paeba poxonae Abraham tsipáebatsi,
pong waámo susatopin.
- ⁷⁴Nakom Abraham tsipáebatsi xua pinae naka kapanenebiya tsane wanaka aitafaetabí jiwi weya.
Baxua pinae nákata exanaena xua pinae waexanaewa tsane pokotsiwa naka itoroba,
xuano jopa wakunuwinexa tsane ichamonae pinae.
- ⁷⁵Matáütano nákata exanaena xua pinae beta jinompaeinchi bapong peitabaratha,
xuano xua jüntükoyene xeikaeya jinompaeinchi daxita matakábintha xua jopa abe waexanaponaewa.
- ⁷⁶Irü xam taxantom Juan jiwi kayábara wüngdutsina pong Nakom peitorobi jume pepaebin,
pong itabókotha eka,
kayábara jei tsane.
Baxua kayábara jei poxoru xam tsiwanaya patopáename pong jiwi pía pepa Pekanamataxeinaein.
Daxita jiwi jüntükoyene wüünaetsíname pepatopaenexa tsane pong jiwi pía pepa Pekanamataxeinaein,
pong Mesías.
- ⁷⁷Nakom kaitoroba Juan xua jiwi neyaputane neexanaenexa tsane xua Nakom jüntemainena jiwi abe pía peéxanae kuirukoyenein tatsi.
Bapoxonae Nakom barapomonae kapanenebiya exanaeinchi bapong beya xua jopa Nakom petsita-natsikuentaetsíxaetsi xua abe peexanaexae.
- ⁷⁸Wanakom jopa juniya wanaka antobexae xuano xua wanaka yawenaexae nákata itorobikaena pexanto itaboko wétsika.

Nákata wüünae exanaena icha xometo ichi xua nákata wüünae poxonae pentha pena matakabixae.

⁷⁹Poxonae patopeikaena pong Nakom itorobikaena, bapoxonae bapong jiwi jüntükuí weiweinya exanaeinchi. Baxua exanaeinchi, pomonaetha, pomona pejumekowüntsiwi bekein kopiya barapomona muxu pewérapae bichokono abe peexanaexae. Yawa Nakom naka júmope antasúü exanaena, xua jüntema wajinompaenexa tsainchi”, jei Zacarías xua pexanto barái pong Juan.

⁸⁰Bárapo pexuyo Juan wichabeka. Matáütano ajüntüyapusüüya pópona xua Nakom yábara yaputaepona. Juan ira xuépana susato tsúrukuae nákuatha tsana pópona, beya poxonae po mataketha poxonae Juan tsita patopa Israel nakuapiwi pebautisabinexa barapomona.

Meje yábara poxonae Jesús nowáeungkua pebinwüito bárapo kae pin nákuathe

(Mt 1.18-25)

2 ¹Írürü bapoxonae pópona romanomona itorobiya pía pepa peewatsinchi, pong pewüng Augusto. Bapong itoroba piamona peexanaenexa censo matawüng xua pewüng tinaewang xua daxita karepaya tómarang jiwi wüngtinaeinchi. ²Bárapo censo matawüng xua pewüng tinaewang jiwi, baxua matapaña nakobe-kuijüta poxonae Cirenio Siria nakuapiwi pía peyanakua ewatsinchi náexana. ³Daxita jiwi tsanaya barompaya pía pepa tómarang bewa benawibiyaena, ichaxota pía pamo jiwi tatsi tanowae-umeinchi. ⁴Daxota José Nazaret tómara wewarapiya, xua Galilea nakua weya. Belén tómara bewarapiya po tómara eka Judea nákuatha. Baraxota kaena báyatha David pong judiomona itorobiya pía pepa peewatsinchi nakatsiwa, pong José pía pamo jiwi susato jíwana tatsi, pong yatsikaya tabüdu-kua. ⁵José pekotsiwa barü pona pewüngtinaenexa tsáinchibe. Barapowa pewüng María. Barapowa pexuyo búpana taékatsi. ⁶Poxonae kataunxuae baraxota Belén tómaratha ékabe, bapoxonae María xua búpana taékatsi pexuyo, bara weaperüüta-netsiba. ⁷Bara bapowa tanakatsíwatsi pexanto pong kopiya tanakatsíwatsi. Bárapo pexuyo paparúwangtha tsiwixitha matakiontababota jeriyotha, ponaeyotha ichaxota vaca naepanaewa xayathopa. Tsipéi tutu kékona po bomüxütha ichaxota jiwi maiteiba pomonae pateiba pomona siwaponeiba.

Meje yábara poxonae matatsunpiwi patsika ichaxota pomonaetha, pomonae oveja duweimonae peyapueenaewi

⁸Imoxoyo Belén tómaratha, pebiwi oveja duweimonae yapu-eeneiba wéxotha poxonae mérawi. ⁹Néxata jemeicha bárapo pebiwi tsita naitüütatsi matatsunpin po matatsunpin itoróbíkatsi xua pong jiwi Pekanamataxeinaein itorobika. Matáütano Nakom pong jiwi Pekanamataxeinaein pía peitüpanáe koicha tátsino barapomona matawakaicha unguéikatsi. Bárapo pebiwi bichokono junuwa. ¹⁰Néxata matatsunpin barapomonae baraichi jeye: “Jopa pajunuwinde. Ápara paka tsipáebatsi pexaíña jume diwesi xua po diwesi daxita jiwi jüntükoyene weiweina exanaeinchi. ¹¹Poxoru ánoxuae ichowayo tanakatsíwatsi pexuyo. Bárapo pexuyo nakatsiwa

David pía tómaratha tatsi xua Belén tómará. Bárápo pexuyo, pong jiwi pekapanenebiyaein. Bapong ápara pewüng Mesías pong Pekanamataxeinaein jiwi, pong Nakom weitorobíkatsi. ¹²Bara bárápo pexuyo paka itakayopítatsi xua pataebotsíname vaca piaboyotha. Pataebotsíname bárápo pexuyo xua paparúwatha matakiontababótatsi jeriyotha ichaxota ponaeyotha vaca naepanaewang xayathopa”, jei matatsunpin.

¹³Bapoxonae jemeicha ekeicha icha matatsunpiwi pin bicheito naitüübarúküpa ichaxota icha matatsunpin ungkua. Bárápo matatsunpiwi itaboko wepatsika. Barapomonae Nakom wüünae jáintatsi. Bárápo matatsunpiwi namchi, jeye:

¹⁴“¡Maisha bichokono Nakom wüünae jáintatsi pong itabókotha peekaein, peitorobixae pexanto!
¡Bárabü jiwi jüntema jinompa bárápo írathe pomonae xua Nakom jüntükoyene weiweina éxanatsi!”
jei matatsunpiwi.

¹⁵Poxonae matatsunpiwi athabeichicha kaibeicha itaboko beicha, bapoxonae pomonae oveja duweimonae peyapueenaewi barapomonae nabarái, jeye:

—Bü poinchi Belén tómará beya wataenexa tsane pokotsiwa býatha Nakom éxana, xuano xuaunxuae matatsunpin naka tsipaeba pong jiwi Pekanamataxeinaein nexa, jei barapomonae pomonae oveja duweimonae peyapueenaewi.

¹⁶Barapoxonae oveja duweimonae peyapueenaewi naiña ponarúküpa. Barapoxonae María irü José kaxibarükúpatsi. Irü pexuyo poyo bokeka jeriyotha vaca matabotha kaxibarükúpatsi. ¹⁷Poxonae barapomonae taerúküpa pexuyo, barapomonae tsipaeba nawita ichamonaetha pokotsiwa býatha barapomonae petsipaebixaetsi matatsunpin xua pexuyo yábara. ¹⁸Daxita pomonae jumetaerúküpa baxua yábara najüntükoyene kabenaeka xua pomonae oveja duweimonae peyapueenaewi pepaebixae baxua. ¹⁹María bárápo diwesi moya yawüngxaina pejüntükoyenéwatha xua jumekuí kayábara nantaéxaba. ²⁰Bapoxonae oveja duweimonae peyapueenaewi kaibe nawibiya. Barapomonae Nakom wüünae jáintatsi petaexae xuano pejume-taexaeno xua býatha matatsunpiwi pepaebixae. Barapomonae namchi, jeye:

—Maisha Nakom pong pepa yatsikaewa pejüntükoyene wüünaein, jei.

Meje yábara poxonae María irü José kapónabe Jesús Nakom pin piabotha tatsi

²¹Poxonae ocho po matakábibe yapukaewa, pexuyo withábatsi, xua pebinwúütoxae xua ichaxota nareixakaeka. Baxua judiomonae pía kui koyenetha tatsi. Barapoyo wüngdútatsi pewüng Jesús, po wüng býatha matatsunpin wüng únuta xua María muxutspáebatsi poxonae María kataunxuae abü jopa búpana taekaetsi pexuyo.

²²Néxata matakabi jopa, xua po matakaiha María irü José bewa pepong naxanebibe xua sacerdotemonaepin taexanaena be pókotsi koyeneya býatha Moisés pía peitorobi koyenewa tatsi paeba xua daxota jopa penataxobinexa. Bapoxonae María irü José pexuyo kapónabe Jerusalén tómará beya pekatsinexa tsánebe pexuyo Nakomtha pong jiwi Pekanamataxeinaein xua petsita-itapeiñaxeinaenéxabe xua bárápo pexuyo Nakom petanakuichiwa tsainchi poxonae piño tsane. ²³⁻²⁴Baxua éxana tsipéi Nakom pía peitorobi diwésitha tatsi tina, jeyéi: “Daxita jiwi pía pexui tatsi, pebinwúütixi, poxi kopiya nakatsiwena, bapoxi Nakom itapeta

pía taexanaetsi pokotsiwa Nakom ichichipa”, jei Nakom pía peitorobi jume diwésitha tatsi. Yawa pónabe pekaponaeñexabe pepupunaein xua pekatsiwa Nakomtha xua sacerdotemonaepin pebexubinexa xua petautsinexa xua petúxusi exanaenexa tsane Nakomtha María nexa yawa José nexa. Nakom peitorobi koyenewa tatsi jeyéi: “Bara irü aiña tsakeintobe kare. Ichakuitha icha tsakeintobe aibi, bara irü aiña topibótobe kare”, jei.

²⁵Írürü barapoxonae pebin pópona Jerusalén tómaratha, bapong pewüing Simeón. Bapong pejüntükoyene wüünaein. Bapong wüünae jainteiba Nakom. Bapong wüünae ewateiba xua Nakom itorobina pong Israel nakuapiwi pía Peka-namataxeinaein tatsi nexa. Bapong Israel nakuapiwi pukapanepaeinchi romanomonaewe ya. Bárapo romanomonaewe icha nakua wérena pona xua Israel nakuapiwi kueranta énatssi. Tsipéi bárapo romanomonaewe Israel nakuapiwi kanamataxéinatssi. Nakom pía Pejumopetünaxü tatsi Simeón barü popoinchi. ²⁶Nakom pía Pejumopetünaxü tatsi Simeón yaputane éxanatsi xua pinae kopiya taena Mesías pong xua Nakom pong jiwi Peka-namataxeinaein itorobina. Bapoxonae xua pinae pirapaeyo tüpaena. ²⁷Nakom pía Pejumopetünaxü tatsi Simeón joniya éxanatsi Nakom pin piabotha tatsi. Bara José irü pexuyo pena tátsino patópabe Nakom pin piabotha tatsi. Pexuyo kapatopabe petakana exanaenexa tsáinchibe icha be pókotsi koyeneya Moisés pía peitorobi koyenewatha tatsi itoroba. ²⁸Simeón ishapita pexuyo. Nakom wüünae jaintatsino. Simeón namchi, jeye:

²⁹“Nakom pong Tanekanamataxeinaem,

bara ánoxuae kaitaküüpa xua tanekopatsiwam xua bara jüntemiya tatüpaewa tsane.

Tsipéi ánoxuae bara nayábara jumewétame pokotsiwa báyatha yábara netsiwüünae muxudútame.

Poxoru xang bapong tsokuaein xua éxanang xua neitoróbame.

³⁰Xang yatsikaewa bara tangba,

pong Peka-nanenebiyaein jiwi.

³¹Bapong tang pong xua itorobikapáebame,

xua daxita jiwi taena xua bapong taeinchi.

³²Bapong yaputane exanaena xua Nakom yaputaeinchi pomonaewe jopa judiomonaewe naexanaeyo.

Tsipéi bapong be bapókotsin,

xua poxonae jiwi beta tane exainchi mérawi xua xota yonoyonéi.

Yáwano bapong exanaena xua Israel nakuapiwi,

pomonaewe jiñamonae xua wüünae jaintinchi xua ichamonae wüünae jainchina”,

jei Simeón.

³³María irü José yábara najüntükoyene kabenáekabe pokotsiwa Simeón pexuyo yábara páebatsi. ³⁴Néxata Simeón barái, Nakom baraichi xua María yábara yáwano xua José yábara, jeye: “Jüntükoyene weiweina éxande barapongbe”, jei. Néxata Simeón, María baraichi xua pexuyo pena tatsi:

—Bárapo pexuyo Nakom itapeta xua bapong peexanaenexa tsane pokoyene xua Israel nakuapiwi ichamonae Nakom beya peponaenexa xua ichakuitha icha ichamonae Nakom beya jopa peponaenexa tsane. Yawa Nakom itoroba bárapo pexuyo, peitüubinexa Nakom pía peayapusüüwa íchitha ichamonae jumekuí aitafaetabí

tsaibi tsane. ³⁵Daxota bárapo pexuyo yaputaena pokotsiwa jiwi pejäntükoyeneintha nantaxeineibina. Íchitha xam, María, daxita baxuang kaajüntükoyenerewe exanaena be poxonae ichüing kanthüthü tsapinopaena kúsitha, jei Simeón xua María tsipáebatsi.

³⁶Írürü baxota poponarü petsiriwa, pewüing Ana. Barapowayo Nakom peitorobi jume pepaebiwayo. Barapowa Fanuel pexantiyo tatsi. Aser pong yatsikaya tabüdukua bapong pía pemómoxi susato jíwana tatsi. Barapowa bara nama penapataewa tsóponae. Barapowa kaena báyatha poxonae penowayo tsekae jitha eka. Pía pebinbe siete po wéiyobe nabarü popónabe. Bapoxonae pebin tüpa. ³⁷Barapowa kaena báyatha piseuri kuenta túpatsi. Ánoxuae nama barapowa yaochenta y cuatro po wéiyobe jópaba. Barapowa Nakom pin píabo weya jopa pichapébiyo. Saya exaneiba pokotsiwa Nakom itoroba merawintha yawa matakábintha. Najainbotéibano poxonae tsipaebeiba Nakomtha. ³⁸Poxonae Jesús kapónatsi Nakom pin piabotha xua Nakom pekatsinéxatsi bapoxonae Ana imoxoyo kakuita unguua barapomonaetha. Barapowa tsipaeba Nakomtha, jeye: “Nakom maisha jäntükoyene weiweingang xua painta itoróbame bárapo pexuyo”, jei Ana. Bapoxonae Ana yábara paebaxoya pexuyo jíwitha pomonaetha, pomonae wüünae ewateiba pokoyene xua Nakom itorobina Israel nakuapíwitha pong Israel nakuapiwi kapanenebiya exanaeinchi romanomonae weya.

Meje yábara poxonae Jesusbarü kaibe iyiya Nazaret tómara beya

³⁹Néxata María irü José wetabeba daxita xua Nakom, pong jiwi Pekanamataxeinaein, peitorobi jumekeyenewa paeba. Bapoxonae kaibe kanawíyabe pexuyo Galilea nakua beya xua pía tómara béyabe, Nazaret tómara béyabe. ⁴⁰Pexuyo wichabeka. Matáütano bichokono dangwéi nawita, peyaputáe koyene xexeinapónano. Nakom tsita jäntükoyene wüünaepoinchi.

Meje yábara poxonae Jesús siwaponá Nakom pin píabo tatsi

⁴¹Jesús pena tatsi irü paxa tatsi daxita weitha poneiba Jerusalén tómara beya xua nataiba Pascua wüing matakabin. Bárapo Pascua wüing jei, poxonae Israel nakua piwi nantaxeina xua poxonae pinae báyatha pía pamo susato jiwi tatsi kapanenebiya éxanatsi Egipto nakua weya, xua Nakom kapanenebiya. ⁴²Poxonae Jesús doce po wéiyobe yapujopa, María irü José irü Jesús, Jerusalén tómara beiyiya. Tsipéi barapomonae piákui xua poneiba bárapo Pascua wüing matakabin nexa. ⁴³María irü José kaibe nawirénabe pía tómara bérena poxonae bárapo matakabin weta. Íchitha pewowin Jesús narúntaba Jerusalén tómaratha. Jesús pena tatsi irü José jopa taeyobe xua Jesús nakopataba. ⁴⁴Nantaxéinabe xua Jesús mexeya ítara napuna-ekaponawéi pin bichéitha. Kaentakábitha María irü José námtotha na-ekapónabe, bapoxonae itaxanawíyabe pexanto. Nekobáuyabe pexanto pin bichéitha piamatabüxüyo jiwimonaetha, pijiwimonáethano. ⁴⁵Jopa pexanto kaxinaebe. Bapoxonae ekeicha kaibe íyabe Jerusalén tómara beya, pewenaweneinexa tsánebe pexanto baxotiya ekeicha.

⁴⁶Poxonae akoibi po matakabíyobe yapukaewa Jerusalén tómaratha baxota pexanto kaxínabe Nakom pin piabotha tatsi. Jesús naéka ichaxota pomonae jiwi pekuidubiwi Nakom pía peitorobi jume. Jesús jumetane barapomonae. Matáütano yáíñabano nawita barapomonaetha. ⁴⁷Daxita pomonae jumetane, najjäntükoyene kabenaeka tsipéi Jesús peyaputaein tsekae, matáütano tsipéi Jesús beta jumenota.

⁴⁸María irü José poxonae baxua kuitánebe najüntükoyene kabenáekabe. María pexanto barái, jeye:

—Owáe, ¿eta xua metha baxua painta éxaname? Axa irü xang paka yábara najüntükoyene exabátsibe, paka jeitómpatsi, jei.

⁴⁹Jesús jumenota pena, jeye:

—¿Eta pokotsiwa metha ichawa beya pana nejeitómpame? ¿Metha bara jopa payaputaem jampa xua bewa nekui-eenaena xua Taxa píakui yábara tatsi? jei.

⁵⁰Íchitha María irü José jopa xapain yaputáeyobe pokotsiwa Jesús paeba.

⁵¹Jesús kaibe nanáwiya penatatsibarütha Nazaret tómara beya. Jesús pena jumejéji tsaibi yáwano José jumejéji tsaibichino xua daxita éxana pokotsiwa Jesús itorobéibatsi. Jesús pena, daxita baxuang moicha kakuiyábara kanantaxeineíbatsi pejüntükoyenéwatha. ⁵²Néxata Jesús wiwichabapona yawa jüntükoyene ayapusüüya exanapóinchino Nakom pía Pejumópetha tünaxü tatsi. Nakom irü jiwi Jesús ántobe tsozonaetsi.

Meje yábara poxonae Juan pong Pebautisabin jiwi kuiduba ira xuépana susato tsúrukuae nákuatha

(Mt 3.1-12; Mr 1.1-8; Jn 1.19-28)

3 ¹Írürü Tiberio pong romanomona itorobiya pía pepa peewatsinchi tatsi yapu-jopa quince po weibe xua itorobiya kanamataxeina bárapo nakuangthapiwi. Bapoxonae irü Poncio Pilato Judea nakuapiwi peyanakua ewatsinchi náexana. Barichi Herodes Galilea nakuapiwi peyanakua ewatsinchi náexana. Irü Herodes peweicho tatsi Felipe, bapong Iturea nakuapiwi peyanakua ewatsinchi náexana xua Traconite nakuathano. Barichirü Lisantias Abilinia nakuapiwi peyanakua ewatsinchi náexana. ²Barichirü Anás irü Caifás bapongbe sacerdotemona pía pepa pentakaponaeinbe tátsibe. Barapoxónaerü Nakom Juan tsipáebatsi poxonae ira xuépana susato tsúrukuae nákuatha pópona. Juan bapong Zacarías pexanto tatsi. ³Juan pópona dukuanaeta Jordán nákuatha ichaxota Jordán mene. Nakom Pejume Diwesi tsipaeba dukuanaeta jíwitha. Bapong barái jíwitha, jeye:

—Icha jüntükoyene paxéinare paiña neáuraxae xua abe paéxaname. Paka bautisabina ichamonae xua Nakom paka nekayábara jüntemainaenexa abe paiña neexanée kuirukoyenein, jei Juan.

⁴Baxua éxana, peyábara jeichixaetsi xua peyábara jeixae pong Nakom peitorobi jume pepaebin Isaías poxonae bapong tina pejume diwesi. Bárapo diwésitha Isaías kaena báyatha wüünae tsiwünaeya yábara paeba xua Juan yábara. Isaías namchi, jeye:

“Jumetang pong wawái ira xuépana susato tsúrukuae nákuatha.

Bapong wawái jeye:

‘Patsinajüntükuikoyene wüünaere pong jiwi pía pepa

Pekanamataxeinaeinchi pía pepatopáe wünaeya tsane.

⁵Daxita pemarafótongtha paatsa jejebapóñama.

Daxita petsutong paatsakaxikíyama.

Pejeyajéyowa namtong,

bopiya dubeiña paexande.

Pemarafotofótowa namtong,

panamto daméyama.

Ápara jopa yábara jangyo namtong,
jame ápara yábara jang paiña jüntükoyenein.

Ichi paichim xua namtong paxanébame bara paichinde pana najüntükui wüünaere paiña Nepaka kanamataxeinaein nexa poxonae bapong patopeikaena.

⁶Daxita nakuapiwimonae yaputaena Nakom pía pekapanenebiyáe koyene tatsi',
jei pong wawái",
jei Isaías pejume diwésitha.

⁷Pin bicheito pata, xua Juan pebautisabinexa tsane. Juan barái barapomonae jeye: "¡Paxam pomonae pemuxuitórobi jiwi pam! ¡Paxam be bara jomomonae pam, tsipéi jomo ba kuitaya düküpa nawa! Bara paichim ánoxuae paichichí-pame Nakom pakuitaya dükúpame xua abe paka exanaeyainwa. Jopa papanenébiyaem tsane bekein bara paka bautisabinchi tsipéi jopa pajüntükoyene wüünaem Nakomtha. ⁸Xaniwaicha painómpare xain ichamonae paka kuitane xua icha jüntükoyene paiña nexainaewa Nakomtha, pong jiwi Pekanamataxeinaein. Tsipéi bekein paxam pajam: 'Waxainchi Abraham pía pemómoxi susato jíwichixaetsi Nakom naka kapanenebiya exanaena', pajam, dáichitha paxam jopa xaniwaicha pajumekowüntsime Nakom. Daxota Nakom itakúüpatsi xua paka kuimatawenta pía jopa paka nepaka kapanenebiyaenexa tsane. Matáütano barichino Nakom itakúüpatsi xua jiwi forotsinchi bárapo ibótixi weya, po ibótixi xote Jordán mene itapatha bobena. Bárapo jiwi naexanaena, po jiwi yatsikaewa Abraham pía pemómoxi susato jiwi tatsi, pomonae pejumekowüntsixaetsi Nakom. ⁹Poxonae pebin naein üba, sipari ba kanakuiwüünaeta pekaukubobinexa po naein jopa nakoichiyo. Poxonae bárapo naein ukuboba nantatsún eta xua petautsinexa ishótotha. Paxam bara paka jüta ichiya paka kana exanaena. Nakom paka yábara nakuiwüünaeta xua paka bebái tsane ishótotha, ichaxota po ishótotha jopa kuinaya itakounayiyo tsipéi Nakom jopa wüünaeya pata taexanaem", jei Juan.

¹⁰Néxata barapomonae Juan yáñabatsi jeichichi:

—¿Eta pokotsiwa Nakom ichichipa pokotsiwa pata exanaenexa xua ichamonae pata nekuitaenexa tsane xua bara pajüntükoyene wüünaein Nakomtha? jei barapomonae.

¹¹Juan jumenota, jeye:

—Pong aiña kamíshabe xeina, bapong bekatsipa pongtha pong yatsikaewa jopa naümaxatatsiyo kamisha. Írürü pong tamatékatsi penabanaewa bapong bekatsipa ichüng pongtha pong jopa xeinaeyo penabanaewa, jei Juan.

¹²Barichirü pata, pomonae parátixi pentomanotébiwi po parátixi jiwi bewa katsibina pong romanomonae itorobiya pía pepa peewatsinchi nexa. Barapomonae pata xua Juan pebautisabinexa tsanerü barapomonae. Barapomonae Juan yáñabatsi, jeichichi:

—Pong jiwi Nekuidubim, ¿eta pokotsiwa Nakom ichichipa pokotsiwa pata exanaewa tsane? jei barapomonae.

¹³Juan jumenota, jeye:

—Saya meisha jiwi pawüükáename parátixi xua romanomonae paka itoroba. Jopa yábara muxutorobiya pawüükaeinde ichawang, jei Juan.

¹⁴Barichirü soldadomonae Juan yáñabatsi, jeichichi:

—Irü paxang, ¿eta pokotsiwa Nakom ichichipa pokotsiwa pata exanaewa tsane? jei barapomonae.

Juan jumenota, jeye:

—Jopa payábara jumedangweya wekobenteibinde ichamonae piáwang tatsi. Matáütano ichamonae jopa pakuiyopitéibinde pokotsiwa éxana ichamonae poxonae ápara jopa exaneibiyo. Bara saya pajüntükoyene weiwéinare poxonae parátixi paxéiname poxonae ichamonae xua pata éxaname xua soldadomonae pamxaem, jei Juan.

¹⁵Daxita pomonae wüünae ewateiba xua Mesías pepatopeikaewa tsane, barapomonae poxonae Juan jumetaínchi, barapomonae pejüntükoyeneintha nantaxeina, xua ápara Juan metha ápara Mesías wei. ¹⁶Íchitha Juan barái daxita barapomonae, jeye: “Xang paka bautisábatsi mératha. Íchitha nama patopaena pong bichokono aiñakuí beyakaincha xang. Bapong pong pepa Pekanamataxeinaein jiwi. Xang saya tapawin. Daxota aurang xua tataxumüü ishanaxubiwa pía penataxuxatatsiwa. Bapong paka jíwana bautisabina Nakom pía Pejumopetünáxütha tatsi. Bapong paka jíwana kuikopatsinchi xua átene tsane Jesús pejumekowüntsixaetsi tsane. ¹⁷Bapong pong patopaena bapong báyatha tsinakobenata po papárate xua trigoxú nexa. Bapong trigoxú tsanaya seikaya matapepe jehebapona. Trigoxú jehebapona, trigoxú matabotha. Matapepe jehebapona petautsinexa ishótotha, ichaxota po ishoto jopa kuinaya itakounayiyo. Bara júta kana ichi tsane jíwitha icha trigoxú kana ichiya ichichi jiwi Nakom tsana nobina pomonae pejumekowüntsixaetsi pía nákuatha nexa. Ichamonae tsana nobinchi pomonae jopa pejumekowüntsíwichi, petautsinexa ishótotha ichaxota xua jopa itakounayiyo”, jei Juan.

¹⁸Icha diwesi yábara jumeno Juan barapomonaetha paeba Nakom pía pexaiña jume diwesi tatsi. ¹⁹Matáütano Juan biatane, Herodes biataínchi pong Judea nakuapiwi pía peyanakua ewatsinchi poxoru Herodes peweicho kaiba yábüyo powa Herodías. Herodes peweicho tatsi pewüng Felipe. Matáütano Juan biatane poxoru báyatha Herodes abe éxana nawita jíwitha. ²⁰Íchitha daümetha ekeicha Herodes abe éxana xua Juan kaenáetatsi ichamonaetha xua pekaponanexa tsainchi jiwi pekübibotha.

Meje yábara poxonae Jesús bautisábatsi

(Mt 3.13-17; Mr 1.9-11)

²¹Poxonae kataunxuae Juan jopa ekaeyo jiwi pekübibotha, Juan bautisaba dukuanaeta jiwi. Barichi irü Jesús nabautisábatsi. Poxonae Jesús tsipaebungkua paxa, peitaboko nayausanaxuba. ²²Nakom pía Pejumopetünaxü tatsi patopeika Jesustha, be topiboto yaruneika. Jesús jumetane pokotsiwa peitaboko wetsipae-bíkatsi, jeichichi:

—Xam ápara Taxantom pom bichokono kaantobetsi, pom kaitapétatsi. Nejüntükoyene weiweina éxaname, jei Nakom.

Meje yábara pomonae Jesús pía pamo susatopiwi tatsi

(Mt 1.1-17)

²³Poxonae Jesús treinta po weibe yapujopa, bapoxonae nama tamrópata pítaba barompaya pía pepa peéxanae koyenewang, pokoyene Nakom Pejume Diwesi

pekueikueijeiva xuano jiwi axaibi éxana dukuanaebíyano. Jesús, José pexanto tatsi. Daxita jiwi nantaxeina xua mexeya ítara José yatsikaewa pexantowéi. José, Elí pexanto tatsi. ²⁴Bapong Elí, Matat pexanto tatsi. Bapong Matat, Leví pexanto tatsi. Bapong Leví, Melqui pexanto tatsi. Bapong Melqui, Jana pexanto tatsi. Bapong Jana, José pexanto tatsi. ²⁵Bapong José, Matatías pexanto tatsi. Bapong Matatías, Amós pexanto tatsi. Bapong Amós, Nahúm pexanto tatsi. Bapong Nahúm, Esli pexanto tatsi. Bapong Esli, Nagai pexanto tatsi. ²⁶Bapong Nagai, Maat pexanto tatsi. Bapong Maat, Matatías pexanto tatsi. Bapong Matatías, Semei pexanto tatsi. Bapong Semei, Josec pexanto tatsi. Bapong Josec, Judá pexanto tatsi. ²⁷Bapong Judá, Joanán pexanto tatsi. Bapong Joanán, Resa pexanto tatsi. Bapong Resa, Zorobabel pexanto tatsi. Bapong Zorobabel, Salatiel pexanto tatsi. Bapong Salatiel, Neri pexanto tatsi. ²⁸Bapong Neri, Melqui pexanto tatsi. Bapong Melqui, Adi pexanto tatsi. Bapong Adi, Cosam pexanto tatsi. Bapong Cosam, Elmadam pexanto tatsi. Bapong Elmadam, Er pexanto tatsi. ²⁹Bapong Er, Josué pexanto tatsi. Bapong Josué Eliezer pexanto tatsi. Bapong Eliezer, Jorim pexanto tatsi. Bapong Jorim, Matat pexanto tatsi. ³⁰Bapong Matat, Leví pexanto tatsi. Bapong Leví, Simeón pexanto tatsi. Bapong Simeón, Judá pexanto tatsi. Bapong Judá, José pexanto tatsi. Bapong José, Jonam pexanto tatsi. Bapong Jonam, Eliaquim pexanto tatsi. ³¹Bapong Eliaquim, Melea pexanto tatsi. Bapong Melea, Mena pexanto tatsi. Bapong Mena, Matata pexanto tatsi. Bapong Matata, Natán pexanto tatsi. ³²Bapong Natán, David pexanto tatsi. Bapong David, Isaí pexanto tatsi. Bapong Isaí, Obed pexanto tatsi. Bapong Obed, Booz pexanto tatsi. Bapong Booz, Sala pexanto tatsi xua icha wüing Salmón. Bapong Sala, Naasón pexanto tatsi. ³³Bapong Naasón, Aminadab pexanto tatsi. Bapong Aminadab, Admin pexanto tatsi. Bapong Admin, Arni pexanto tatsi. Bapong Arni Esrom pexanto tatsi. Bapong Esrom, Fares pexanto tatsi. Bapong Fares, Judá pexanto tatsi. ³⁴Bapong Judá, Jacob pexanto tatsi. Bapong Jacob, Isaac pexanto tatsi. Bapong Isaac, Abraham pexanto tatsi. Bapong Abraham, Taré pexanto tatsi. Bapong Taré, Nacor pexanto tatsi. ³⁵Bapong Nacor, Serug pexanto tatsi. Bapong Serug, Ragau pexanto tatsi. Bapong Ragau, Peleg pexanto tatsi. Bapong Peleg, Heber pexanto tatsi. Bapong Heber, Sala pexanto tatsi. ³⁶Bapong Sala, Cainán pexanto tatsi. Bapong Cainán, Arfaxad pexanto tatsi. Bapong Arfaxad, Sem pexanto tatsi. Bapong Sem, Noé pexanto tatsi. Bapong Noé, Lamec pexanto tatsi. ³⁷Bapong Lamec, Matusalén pexanto tatsi. Bapong Matusalén, Enoc pexanto tatsi. Bapong Enoc, Jared pexanto tatsi. Bapong Jared, Mahalaleel pexanto tatsi. Bapong Mahalaleel, Cainán pexanto tatsi. ³⁸Bapong Cainán, Enós pexanto tatsi. Bapong Enós, Set pexanto tatsi. Bapong Set, Adán pexanto tatsi. Bapong Adán, Nakom pexanto tatsi.

Meje yábara poxonae Jesús jüntükoyene jüjútatsi kaurimonae pía pentakaponaein tatsi xua Jesús abe koyeneya petaexanaenexa tsane

(Mt 4.1-11; Mr 1.12-13)

4 ¹Poxonae Jesús jüntükoyene yúükatsi Nakom pía Pejumopetünaxü tatsi bapoxonae kaibe náwiya Jordán mene weya. Nakom pía Pejumopetünaxü tatsi Jesús matakáyatsi ira xuépana susato tsúrukuae nakua beya. ²Baraxotiya Jesús pópona cuarenta po matakábibe. Kaurimonae pía pentakaponaein tatsi Jesús pirai-chi jüntükoyene jüjútatsi xua Jesús abe koyeneya petaexanaenexa tsane. Bárapo

cuarenta po matakabibetha Jesús jopa nabanaeyo. Poxonae bárapo matakabin yapukaewa Jesús bichokono jainpa. ³Kaurimonae pía pentakaponaein tatsi, Jesús baraichi, jeichichi:

—Icha xam yatsikaya Nakom Pexantom, netsita-itüüre. Bárapo iboto itoróbare xain pan naexanaxoya, jei kaurimonae pía pentakaponaein tatsi.

⁴Jesús jumenota. Kaurimonae pía pentakaponaein tatsi jumenótatsi, jeye:

—Nakom Pejume Diwésitha namchi: ‘Jopa metha bepa meisha jiwi betiya una-jinompae tsipae pan’, jei Nakom Pejume Diwesi, jei Jesús.

⁵Kaurimonae pía pentakaponaein tatsi Jesús matakapoinchi ichaxota po demuxuwa bichokono atororo. Baraxotiya Jesús tsita itüütárabatsi daxita nákuang, xua bárapo kae pin nákuathe. ⁶Bapoxonae kaurimonae pía pentakaponaein tatsi Jesús baraichi, jeichichi:

—Daxita bárapo nákuang kakatinchi jiwi neitorobinexa tsane. Matáütano daxita kakatinchi nákuang pía pewüünaewang, tsipéi báyatha nekata daxita bárapo nákuang xua taitorobeibiwa koyenewang. Tawaxae katsin ichüngtha pongtha pong xua ichichipang xua takatsiwa. ⁷Ichaunxuae nentabokototha unguáename taitabaratha, xuano ichaunxuae newüünae jainchíname xua nenantaxeináewaxae xua xang jiña taka-kanamataxeinaeinchi, bapoxonae baxuang daxita bara kakatsinchi jiña nekanamataxeinaenexa bárapo nákuang, jei kaurimonae pía pentakaponaein tatsi.

⁸Íchitha Jesús jumenota, jeye:

—Yáitama Nakom Pejume Diwésitha namchi, jeye: ‘Meisha wüünae jainde jiña Nekanamataxeinaein Nakom. Meisha bapong yatsikaewa taexande pokotsiwa kaitoroba’, jei Nakom Pejume Diwésitha, jei Jesús.

⁹Kotakaya nama ekeicha Jesús matakapoinchi Jerusalén tómara beya, Nakom pin piabotha pentatupa beicha kapoinchi. Jesús baraichi, jeichichi:

—Icha bara xaniwaicha Nakom Pexanto tatsim, wenaxoreinke. ¹⁰Nakom Pejume Diwésitha namchi, jeye:

‘Nakom itorobina pía matatsunpiwi nekayanabinexa.

¹¹Bárapo matatsunpiwi asiya kawaetaboutsina pekóbetha,

xua jopa nekataxu tsakitungkuaenexa tsane ibótotha poxonae wenaxorékame’,

jei Nakom Pejume Diwésitha,

jei kaurimonae pía pentakaponaein tatsi.

¹²Jesús jumenota, jeye:

—Barichi Nakom Pejume Diwésitha namchi, jeye: ‘Jopa jüntükoyene jüjütsiya wüükaeinde Nakom pong jiña Nekanamataxeinaein, xua kajumejejeí tsane nekayawenaenexa poxonae jopa xapain exanaem’, jei Nakom Pejume Diwésitha, jei Jesús.

¹³Poxonae kaurimonae pía pentakaponaein tatsi yaputane xua jopa xeinaeyo pokoyenetha ekeicha Jesús pejüntükoyene jüjütsiwa tsainchi, bapoxonae nama Jesús wepu poinchiba xua saya bara kaeto nexa.

Meje yábara poxonae Jesús tamrópata pítaba pía penakuichiwa Galilea nákuatha

(Mt 4.12-17; Mr 1.14-15)

¹⁴Jesús kaibe iya Galilea nakua beya. Matáütano jopa juniya xeinaeyo Nakom pía Pejumopetünaxü tatsi pía peayapusüü itorobi koyenewa tatsi. Daxita jiwi

pomonae jinompa bárapo nákuatha Jesús yábara paebinóutatsi. ¹⁵Jesús kuidu-beiba barapomonae judiomonae pía penakaetutsi bongtha tatsi xua daxita tómarangtha. Barapomonae Jesús wüünae jaintéibatsi.

Meje yábara poxonae Jesús Nazaret tómaratha pópona

(Mt 13.53-58; Mr 6.1-6)

¹⁶Néxata Jesús Nazaret tómaraya beya pona, po tómaratha ichaxota wíchaba. Judiomonae barompaya pía pentakeiseikáe matakábitha tatsi Jesús joniya judiomonae pía penakaetutsibotha tatsi tsipéi píakui xeina xua peponeibiwa barapókotsi botha. Jesús xenta iya barapomonae peungkuaenexa peitabaratha, peyobinexa Nakom Pejume Diwesi, xua barapomonae pejumetaenexa. ¹⁷Néxata Jesús kátatsi Isaías pejume diwesi, pong Nakom peitorobi jume pepaebin, pong kaena báyatha tüpa. Poxonae Jesús díboro pataxuba baxota taeba pokotsiwa baxota paeba, xua jeye:

¹⁸“Nakom pía Pejumopetünaxü tatsi neyanatapópona.

Nakom neitapeta tatakueikueijeinexa tsane pía pexaiña jume diwesi tatsi pomonaetha pomonae peakopeibí jiwi.

Matáütano neitoroba xua tayawenaenexa pomonae anthüthütane.

Matáütano neitoróbano xua tayawenaenexa pomonae kaurimonae itoróbatsi nawita xua barapomonae pepanenebiyaenexa.

Matáütano neitoróbano xua tane takana-exanaenexa pomonae peitatanakütsi jiwi.

Matáütano neitoróbano xua tayawenaenexa pomonae xua bichokono taayapubetsi xua pejinompaewa tsane xua barapomonae jopa pexeinae dubenanaebiyaenexa tsane bárapo koyenein.

¹⁹Matáütano neitoróbano xua jiwi tatsipaebinexa pokoyene xua Nakom nakuiwüünaeta xua jiwi peyawenaewa tsainchi pomonae ichichipa xua Nakom pejumetaewatsi”,
jei Isaías pejume diwésitha,
jei Jesús xua yóroba.

²⁰Poxonae Jesús bárapo díboro akatáraba, bapoxonae kata pongtha pong jiwi peyawenekeibin judiomonae pía penakaetutsibotha tatsi. Bapoxonae Jesús eko-neka. Daxita pomonae baxota ena, Jesús nekoténatsi xua kui-ewaténatsi xua pekueikueijiwa tsane Jesús. ²¹Bapoxonae Jesús tamrópata pítaba xua paeba, jeye:
—Ánoxuae xuaunxae pajumetaneme baxua ápara bárapo matakeithe Nakom nayábara jumekuiweta paiña itütha, jei Jesús.

²²Daxita karepaya jiwi Jesús wüünaenaya yábara páebatsi. Daxita barapomonae najüntükoyene kabenaeka xua pejumetaexae xua pojume barapomonae petsipae-bixaetsi. Barapomonae nantiya nabarái, jeye:

—Maisha jumexeika bapong, jumewüünaeya paeba. ¿Bara bapong José pexanto tatsi jampa? najéi barapomonae.

²³Jesús barái barapomonae, jeye:

—Metha pana netsipaebichípame icha be pókotsi diwésiyo iche xua pekayábara jüta pepaebi diwésiyo xua ba jei: ‘Pong jiwi neyawüübin, jiñakoutha nayawüübare’, xua ba jei. Barichi ánoxuae pana nejam tsane: ‘Xua paxang pajumetang xua juiña Capernaum tómaratha éxaname, barichinde xote éxande jiña tómaratha’, pana nejam tsane, jei Jesús.

²⁴Áwiya kataunxuae Jesús kueikueijei. Ekeicha namchi, jeye:

—Xaniwaicha paka tsipáebatsi pong ba Nakom peitorobi jume pepaebin pía nakua-monaepiwi ba aitafaetabichi. ²⁵Xaniyang paka baraichi xua kaena báyatha poxonae Elías pópona pong Nakom peitorobi jume pepaebin, aiñáwaxi powaxi pekuenta werapaewaxichi pía séurixi Israel nákuatha jinompa. Bárapo nákuatha kuinaya jopa dunei-kaeyo akoibi po wéiyobe xuano seis po xometiyobéthano. Daxita jiwi piyain bárapo nákuatha Israel nákuatha. ²⁶Nakom jopa itorobiyo, Elías jopa itorobichi xua peyawenaenexa tsane kaewayo jíwana powaxi pekuenta werapaewaxichi pía séurixi xua Israel nákuatha. Íchitha saya meisha Nakom itoroba, Elías itoróbatsi pówatha powa pekuenta tüpaewáyotsi piseuri, powa pópona Sarepta tómaratha, xua Sidón nákuatha xua barapowayo peyawenaenéxatsi. ²⁷Barichi Israel nákuatha pinmonae jinompa pomonae peperüüsawíwatsi jiwimona, poxonae Eliseo pópona pong Nakom peitorobi jume pepaebin. Eliseo jopa jíwana axaibi exanaeyo. Íchitha meisha Eliseo Naamán axaibi éxanatsi pong bichokono peperüüsawinchi. Bapong Naamán, Siria nakuapin, jei Jesús.

²⁸Poxonae barapomona jumetane pokotsiwa Jesús paeba pomonae judiomona pía penakaetutsibotha ena, bapoxonae barapomona Jesús kasébatsi. ²⁹Asiya umenarúküpa barapomona. Jesús tómara pejuma beitawéyatsi. Jesús kapoinchi pitapatororo íta pa beya, po tsútutha bomüxüng jeba, xua bara wepexorekaenexa tsainchi Jesús. ³⁰Íchitha Jesús barapomona xenta iya, puseikataba.

Meje yábara poxonae pebin pong yakauríbatsi

(Mr 1.21-28)

³¹Néxata Jesús pona Capernaum tómara beya po tómara eka Galilea nákuatha. Baxotiya Jesús kuiduba jiwi po matakeitha pentakeiseikáe matakábitha. ³²Barapomona yábara najüntükoyene kabenaeka tsipéi pokotsiwa bapong barapomona kuidúbatsi be pong peyaputaein pía peayapusüü itorobi jumekoyeneya tatsi paeba.

³³Judiomona pía penakaetutsibotha tatsi pebin baxota eka, pong yakauríbatsi. Bapong bichokono wawaya éxanatsi kauri. Bapong Jesús baraichi xua namtsébiya wawái, jeye:

³⁴—¡Jesús Nazaret tomarapim, wárapare pata xaiña weya! ¿Eta xua metha patópame pataxantha xua jiña ápara abe pata neexanaetsim? ¿Ápara patópame jiña pana nejutebicham? Paka yaputainchi yawa paka yaitainchi. Xam ápara pong Nakom kaitoroba, pong pepa Nentakuiru-yapuwüunaem, jei kauri.

³⁵Jesús itaweta kauri, jeye:

—¡Moyande! ¡Bapong wepu ponde! jei Jesús.

Néxata kauri pebin íratha xotsi barapomona peitütha tatsi. Pebin wepu poinchi kauri, saya jüntema. Ekeicha jopa ateneyono. ³⁶Daxita barapomona yábara najüntükoyene kabenaeka, nayáíñaba namchi:

—¿Eta pojumera xua bapong paeba? Jamaisha bárapo pebin itaweta kaurimona pía peayapusüüya itorobi koyenéwatha. Matáütano bárapo kaurimona bara pona.

³⁷Daxita jiwi paebinouta Capernaum tómara kuaríyatha pokotsiwa Jesús éxana.

Meje yábara poxonae Jesús axaibi éxana Simón Pedro pámiyo tatsi

(Mt 8.14-15; Mr 1.29-31)

³⁸Bapoxonae Jesús judiomona pía penakaetútsibo tatsi wejoniya. Jesús joniya Simón piabotha tatsi. Simón pámiyo tatsi átene, domáebatsi. Barapowa piamona

tatsi Jesús jumedangweya wúükatsi xua bapowa axaibi peexanaenexa tsainchi.
³⁹Jesús imoxoyo kakuita unguua pentasípatha. Jesús domaetha namchi, jeye:

—Barapówatha jopa báyatha yakakaewiyande, jei Jesús.

Domae aichúrukuae. Naiña barapowa nantakotaxuba. Bapoxonae bapowa pexaewa ápata barapomonaetha.

Meje yábara poxonae Jesús axaibi éxana pin bicheitomonae

(Mt 8.16-17; Mr 1.32-34)

⁴⁰Poxonae tabópiya tsanaicha pomonae piamonae barompaya taaténetsi pomonae xua jopa nayaromae júpaeyo, daxita barapomonae Jesús betakarendénatsi. Jesús ichawa beya jayabapona pekóbetha, bapoxonae daxita karepaya axaibi.

⁴¹Barichi pomonae yakauríbatsi Jesús taitaweta barapomonae. Bárapo kaurimonae wawaya jeye:

—Ápara xam Nakom Pexantom, jei.

Bekein kaurimonae baxua paeba íchitha Jesús áwiya daümetha itaweta kaurimonae. Jesús jopa najumekopatsiyo xua ekeicha pepaebiwa tsane poxoru bárapo kaurimonae yaputane xua bapong yatsikaewa Mesías pong Nakom itorobika.

Meje yábara poxonae Jesús kueikueijei Nakom Pejume Diwesi judiomonae pía penakaetutsi bongtha tatsi

(Mr 1.35-39)

⁴²Poxonae baya juntukuru pentha tsina, Jesús tómara weiya ichaxota jiwaibi bara beya pona. Íchitha jiwi Jesús jéitatsi. Barapoxonae bapomonae pata ichaxota Jesús pópona. Barapomonae aichaxaibi xua Jesús pewepuwarapaewa barapomonae. ⁴³Íchitha Jesús namchi, jeye:

—Bewa irü yábara paebin Nakom pía pexaiña jume diwesi tatsi, po diwesi yábara xua Nakom waba jiwi petanaexanaenéxatsi piamonae pomonae Nakom jüntükoyene itorobiya éwata. Ápara baxua netsiyábara itorobika, jei Jesús.

⁴⁴Daxota Jesús paeba dukuanaeta Nakom Pejume Diwesi Judea nákuatha xua judiomonae pía penakaetutsi bongtha tatsi.

Meje yábara poxonae Jesús piamonae yawena xua duwéi yamona

(Mt 4.18-22; Mr 1.16-20)

5 ¹Kaentakabi Jesús Genesaret pukua itapatha unguua. Pin bicheito pata bichokono nakükünaxuba Jesustha, tsipéi barapomonae ichichipa jumetane Nakom Pejume Diwesi tatsi. ²Jesús aiña jérabe tane púkuatha táetabo itapatha, po jera saya naebe. Tsipéi duwéi peyamonaewi báyatha nakuiwetarúkúpa, matáütano poxoru báyatha nonobouna taetabotha. Barapomonae pía peyamonaewang ikompa. ³Néxata Jesús jératha nontabiya Simón pía naetha tatsi. Jesús Simón baraichi:

—Tsiwiyo neyanatorotaxoyam, jei Jesús.

Bapoxonae Jesús eka jératha. Jesús mene wekuidubekarena jiwi Nakom Pejume Diwesi. ⁴Poxonae Jesús najumeweta, Simón baraichi, jeye:

—Jératha ponde ichaxota pentatheibü. Paxóyama paiña neyakamonaewa paiña nekapirenaenexa duwéi, jei Jesús.

⁵Simón, Jesús jumenótatsi, jeye:

—Pong jiwi Nekuidubim, bekein bárapo merawithe payamónompang, pakobesápantang. Yáitama aunxuae neitoróbame, methaunxuae xoyaein tayamonaewa, jei Simón.

⁶Poxonae barapomonae xoya, duwéi pin tunto kapirena, muxu peukubabi xua peyamaewa. ⁷Néxata barapomonae moya pekóbetha itakowaeba pomonae penabarü yaxunobompaexae, pomonae icha jératha jinompa itakowáebatsi, penayawenaenexa. Barapomonae pata. Jera aiña naebe wúntabe duwéi. Muxu pebunopaebe jérabe. ⁸Simón pong Jesús icha wüngduta, xua Pedro baraichi, bapong tane baxua. Bapoxonae bapong Jesús peitabaratha táungkuatsi pentabókotha. Simón, Jesús baraichi, jeye:

—Tanekanamataxeinaein, newepu pónare, tsipéi xang abe taexanaein, jei Simón Pedro.

⁹Poxoru Simón Pedro junuwiya najüntükoyene kabenaeka yáitama peyakamónáewatha kapirena duwéi pin tunto. Irü pomonae Simón Pedro pía jératha petanaewichi barapomonae irü junuwiya najüntükoyene kabenaeka. ¹⁰Irü Zebedeo pexántobe tatsi, Santiago irü Juan bapongbe irü junuwiya najüntükoyene kabenáekabe. Bapongbe pongbe Simón pebarüyamonaeinbe tátsibe. Íchitha Jesús Simón baraichi, jeichichi:

—Simón, jopa junuwinde, ánoxuae ka-exanaeinchi xua pinmonae yawenáename xua barapomonae pejumekowüntsiwa tsane Nakom icha býatha ichim poxonae yamóname duwéi nawita, jei Jesús.

¹¹Néxata poxonae bárapo jérabe botóunabe, barapoxonae barapomonae baxuang daxita nakuibarapenta. Bapoxonae barapomonae Jesús punapoinchi.

Meje yábara poxonae Jesús axaibi éxana pong peperüüsawinchi

(Mt 8.1-4; Mr 1.40-45)

¹²Jesús icha tómara siwapona. Bapoxonae pebin patopa pong peperüüsawinchi. Poxonae Jesús táebatsi, bapong Jesús peitabaratha tatsi pentabokototha táungkuatsi yawa ira betaeungkuareka. Bapong Jesús jumedangweya wúükatsi, jeichichi:

—Pong Nekanamataxeinaem jiwi, icha bara ichichípame bara kaitaküüpa xua axaibi tana neexanaewam, tsipéi jiña neayapusúü itorobi koyenewa nexainaem, jeichichi Jesús bapong.

¹³Néxata Jesús, nakobeyota, yawa matajáyaba bapong, pong peperüüsawinchi. Jesús barái, jeye:

—Bara ichichipang. ¡Bara axaibinde! ¡Bara kaaperüüxaibi éxanatsi! jei Jesús.

Bapoxonae bapong naiña ta-aichurukuatsi xua peperüüsawíwatsi. ¹⁴Néxata Jesús barái bapong, jeye:

—Jopa yábara tsipaebinde ichamonaetha xua neaxaibiwam. Saya jame meisha ponde sacerdotemonaepintha xua nenaitüütsinexa xua bapong nekataenexa xua býatha nejumewa. Bapongtha kare pokotsiwa xua pekatsiwa Nakomtha, pokotsiwa xua býatha Moisés kui-itoroba xua ekeicha jopa jiña nenataxobinexa jiña pepongtha. Bapoxonae daxita jiwi kayaputaena xua tsita itapeiñaxéinatsi xua xam bara jumem yawa xua perüüwüünaem, jei Jesús.

¹⁵Íchitha daxita jiwi tajü beya jumetaetáepona pokotsiwa Jesús éxana. Pin bicheitong nakaetutapona Jesustha pejumetaenexa tsane pokotsiwa Jesús éxana. Mataütano nakaetutapona xua Jesús peaxaibi exanaenexa barapomonae. ¹⁶Íchitha Jesús ichaxota jiwaibi bara beya poneiba kompa. Baxotiya Páxatha tsipaebeiba.

Meje yábara poxonae Jesús axaibi éxana pong pekuenobinchi

(Mt 9.1-8; Mr 2.1-12)

¹⁷Kaentakabi Jesús kuidubauya. Írürü baxotiya ena pomonaе fariseomonaе jíwana tatsi. Irü baxota ena pomonaе жиwi pekuidubiwi Moisés píа peitorobi koyenewa tatsi. Barapomonaе daxita tsiki tómaraxi werendena po tómaraxi ena Galilea nákuatha. Irü daxita tsiki tómaraxi werendena po tómaraxi ena Judea nákuatha, irü ichamonaе Jerusalén tómaraxi werendena. Nakom píа peayapusúü itorobi koyenewa tatsi Jesús yawénatsi, daxota axaibi éxana peátene жиwi. ¹⁸Néxata pebiwi pata. Bárapo pebiwi karendena pong pekuenobinchi. Xua xota pokotsíwatha maiteiba, barapomonaе barapokotsíwatha karendénatsi pekuenobinchi. Barapomonaе bepa bomüxütha kajojonyáеi xua bepa Jesús peitabaratha tabotichei. ¹⁹Íchitha barapomonaе jopa kajojonyaeayo bomüxütha tsipéi pin bicheito boupa kékona. Bárapo bo matatupa perekа. Néxata daxota bárapo bo matatupa beenoiña. Barapomonaе bárapo pentatupa weatsakaxinaxoreka. Néxata barapomonaе nantiya opikétabe bümákatha bárapo pemaiteibíwatha. Bapoxonaе bara weyawa yorékatsi bárapo pekuenobinchi жиwi pexaiña deka tatsi, Jesús peitabarayo dékano tatsi. ²⁰Jesús tane xua barapomonaе yábara kuijumekowünta xua Jesús bara peitaküüpáewatsi xua axaibi peexanáewatsi pong pekuenobinchi. Daxota Jesús barái pekuenobinchi, jeye:

—Tajintong kayábara kuijüntemainatsiba abe jiña neexanáе kuirukoyenein, jei Jesús.

²¹Néxata pomonaе жиwi pekuidubiwi Moisés píа peitorobi koyene, irü fariseomonaе, daxita barapomonaе kaemonaе natsipaeba, najéi: “Maisha bapong bichokono abe tsipéi pokotsiwa bapong paeba bichokono Nakom tsita ajumebetsi. Jintong dapokotsin aibi pong xua жиwi kakuiyábara jüntemainaya jüntüpuхana éxanatsi abe píа peéxanaе kuirukoyenein tatsi. Jame meisha ápara kaein Nakom yaputane xua жиwi kakuiyábara jüntemainaya jüntüpuхana éxanatsi abe píа peéxanaе kuirukoyenein tatsi”, najéi barapomonaе.

²²Íchitha Jesús yaputane xua barapomonaе kaemonaе natsipaeba. Jesús barái barapomonaе, jeye:

—¿Eta pokotsiwa metha baxua pana natsipáebame? ²³¿Eta po jumetha barang tsane pekuenobinchin? ¿Metha jang tsane: ‘Abe jiña neexanáе kuirukoyenein kata jüntemáinatsi’, jang tsane? Ichakuitha ¿metha jang tsane: ‘Asiya unkuatábare yawa pónare’, jang tsane? ²⁴Daxota aunxuae paka tsita itapeiñaxeinaeinchi xua xang pongxaein Nakom Tananeitapetsin, xua xeinang taayapusúü itorobi koyenewa xua bara tana neitaküüpaewa xua жиwi tayábara kakuijüntemainaya jüntüpuхana exanaewa abe píа peéxanaе kuirukoyenein tatsi pomonaе jinompa bárapo kae pin nákuathe, jei Jesús.

Bara néxata pekuenobinchi Jesús barái, jeye:

—Katsipáebatsi, nontaponde. Jiña nemaitungkuawewa pire. Jiña bo beíyandeno, jei Jesús.

²⁵Bapoxonaе pong pekuenobinchi kaena naiña nontapona barapomonaе peitütha tatsi, yawa píа xua pemaitungkuawewa. Píabo beíya yawa Nakom wüünaе jáintatsi poxonaе námtotha ekaпona. ²⁶Barapomonaе daxita yábara najüntükoyene kabenaeka yawa Nakom wüünaе jáintatsi. Barapomonaе junuwiya namchiya jeye:

—Ánoxuae waxainchi tainchi xua pewüünaewa pokotsiwa jopa yaputaetsi, jei barapomonaе.

Meje yábara poxonae Leví wábatsi, Jesús waba

(Mt 9.9-13; Mr 2.13-17)

²⁷Poxonae baxua Jesús nakuiweta, bapoxonae Jesús póntaba. Jesús tane pebin pong pewüng Leví. Leví bapong pong parátixi pentomanoteibin po parátixi jiwi bewa katsibina pong romanomonae pía pepa peyanakua ewatsinchi nexa. Bapong eka ichaxota parátixi matoma noteibeka. Jesús Leví baraichi, jeichichi:

—Nepunaponde, jei Jesús.

²⁸Bapoxonae Leví nontapona. Daxita baxua xubota, kuenta pona. Bapoxonae Jesús punapoinchi.

²⁹Pirapaeyo Leví pin penabanaewa éxana piabotha xua Jesús tsiéxanatsi. Irü pebiwi pinmonae pomonae parátixi pentomanotéibiwi po parátixi jiwi bewa katsibina pong romanomonae pía pepa peyanakua ewatsinchi nexa, barapomonae Jesús barü eka pexaethopeibiwatha, irü ichamonaeno barü énantsi penabarü nabanaenexa tsane. ³⁰Íchitha fariseomonae irü pomonae jiwi pekuidubiwi Moisés pía peitorobi koyenewa, daxita barapomonae Jesús pijimonae abeya tsipáebatsi xua Jesús yábara. Barapomonae namchi, Jesús pijimonae tatsi baraichi, jeichichi:

—Maisha Jesús abe éxana poxoru barü xayeka pomonae parátixi pentomanotéibiwi po parátixi jiwi bewa katsibina pong romanomonae pía pepa peyanakua ewatsinchi nexa. Matáütano barü xayeka pomonae abe peéxanae kuirukoyene peexanaewi, jeichichi Jesús pijimonae tatsi barapomonae.

³¹Jesús jumenota barapomonae, jeye:

—Pomonae ba xua xaniwaicha jinompa xua jopa ateneyo barapomonae ba jopa kanantawenonaeyo pong jiwi peyawüübin. Saya jame meisha pomonae ba átene kanantawénona pong jiwi peyawüübin. ³²Barichinno xang patopang ápara tha jopa tawabinexa tsane pomonae pejüntükoyene wüünae jiwi. Ápara tha meisha tawabinexa tsane pomonae peajüntükoyénebe jiwi, xua barapomonae icha jüntükoyene pexeinaenexa tsane Nakomtha, jei Jesús.

Meje yábara poxonae Jesús yábara yáñabatsi pokoyene xua Nakom peyábara nainbotsiwatsi

(Mt 9.14-17; Mr 2.18-22)

³³Néxata barapomonae fariseomonae irü pomonae jiwi pekuidubiwi Moisés pía peitorobi koyene, daxita barapomonae Jesús yáñabatsi, jeichichi:

—Pomonae Juan pía pepunajinompaewichi jopa juniya nainboteibiyo xua jopa juniya tsipaebibiyo Nakomtha. Irü pomonae fariseomonae barichirü. Íchitha nama jiñamonae daxua jopa kou daichiyo, saya kou ü penabaneibi xuano saya ü peapeibi kou, jeichichi Jesús.

³⁴Jesús jumenota barapomonae, jeye:

—Paxam jopa bewa paexanaem tsane xua ichamonae nainbotsina, pomonae patsíwabame pexaewa xua penabanaenexa xua poxonae pebin pekotsiwa pita. Poxonae kataunxuae áwiya bapong eka poxonae jiwi nábane, jopa ba bapoxonae nainbotsi. ³⁵Íchitha icha pong aena píowa pita, bapong kaena naiña wáetabatsi, ichamonae wáetaba xua bapong tajü pekaponanénxatsi, bapoxonae jame jiwi ba bewa wekoyeya yábara nainbotsi, xua ekeicha bapong kaewa pepatopaewa tsane, jei Jesús.

³⁶Matáütano Jesús pekayábara jüta pepaebi diwésiyo tsipaeba barapomona, jeye:

—Jiwi ba jopa exanaeyo xua pena dorouto tsiwiyo jíwana kaxinaxubeta xua peru dorouto pewangbotsinexa. Icha baxua exanáetsipa xua pena paparúwatha wang bota peru doróutotha, bapoxonae bárapo dorouto abe tsanaya. Tsipéi poxonae bárapo dorouto matanaxuba bárapo pena paparuwa natsaketábiya. Poxonae bárapo pena paparuwa natsaketábiya ekeicha wang tsitsipanarena bárapo dorouto. Bapoxonae ekeicha pin wang tsanaya beyakaincha xua poxonae kopiya. ³⁷Matáütano jiwi ba pena vino mera jopa eparekaeyo peru bokototha, tsipéi icha baxua exanáetsipa, bárapo pena vino mera abe exanáetsipa bárapo bókoto tsipéi bárapo bókoto jopa nayeyetaponaeyo poxonae bárapo vino mera átsaxa. Bárapo pena vino mera naxuba xuano bárapo bokotono naxuba poxonae bárapo bókoto tsitsika. ³⁸Daxota bewa jame pena vino mera eparekae pena bokototha. Bapoxonae pena vino mera jopa naxúbiyo, xuano pena bókoto jopa nakúbiyo poxoru bokoyeyena xuano poxoru pena bókoto. ³⁹Pong ba xua peru vino mera apa pirapaeyo jopa ichipaeyo pena vino mera. Bapong jei: ‘Maisha peru vino mera xeika, beyakaincha pena vino mera’, jei.

**Meje yábara poxonae Jesús pijimonae tatsi yaboto nota trigoxú
judiomona barompaya pía pentakeiseikáe matakaiha tatsi**

(Mt 12.1-8; Mr 2.23-28)

6 ¹Kaentakábitha judiomona barompaya pía pentakeiseikáe matakábitha tatsi Jesús pijimona barü iya pabi iyiya. Jesús pijimona tatsi xunumenapona trigoxú, bapoxonae barapomonae pekóbeta xu matapepeta yawa xu xane. ²Néxata Jesús pijimona tatsi tayáíñabatsi, fariseomonae yáíñaba, jeye:

—¿Eta pokotsiwa baxua paéxaname? Ápara jiwi jopa yábara kuikopatsiyo xua ichamonae penakuichiwa bárapo matakábithe, xua judiomona barompaya pía pentakeiseikáe matakabi tatsi, jei barapomona.

³Jesús jumenota barapomona, jeye:

—Bárapo tajimona jopa ápara abe exanaeyo. ¿Jopa payábara yorobim pokotsiwa báyatha David éxana poxonae jainpa poxonae irü pijimona tajainpatsirü? Bapong David pong kaena báyatha Israel nakuamonae itorobiya pía pepa peewatsinchi. ⁴Bapong David irü pijimona tatsi barapomona Nakom pin piabotha jojniya. David xane pan, po pan ichamonae kana éxana xua Nakomtha pekatsíwatsi. Irü bárapo pan David pijimona kata xua pexaenexarü. Barapomona xane bekein bárapo Nakom pía peitorobi koyenéwatha kópata xua saya meisha sacerdotemona itakúüpatsi xua pexaewa bárapo pan.

⁵Jesús namchi, jeye:

—Xang pongxaein Nakom Tananeitapetsin taitorobi koyenewa xeinang xua jiwi takoya taitorobiwa pentakeiseikáe matakábitha, jei Jesús fariseomonaetha.

**Meje yábara poxonae Jesús kobewüünae
éxana pong pekobemüübinchi**

(Mt 12.9-14; Mr 3.1-6)

⁶Icha matakábitha judiomona pía pentakeiseikáe matakábitha tatsi Jesús joniya judiomona pía penakaetutsibotha tatsi. Matáütano tamrópata pítaba xua

kuiduba barapomonaē. Bárapo botha eka pong pekoxa weya pekobemüübinchi. ⁷Pomonaē jiwī pekuidubiwi Moisés pía peitorobi koyene tatsi, irü fariseomonaē baxota ena. Daxita barapomonaē Jesús nekoténatsi pekuitaenéxatsi icha bara metha Jesús kobewüünaē exanaena pentakeiseikáē matakēitha pong pekobemüübinchi. Icha Jesús pong pekobemüübinchi axaibi éxanatsi, bapoxonaē barapomonaē xeinaena pokoyenewa xua Jesús abe peyábara paebíwatsi tsainchi. ⁸Íchitha Jesús yaputane pokotsiwa barapomonaē nantaxeina. Jesús barái pongtha pong pekobemüübinchi, jeye:

—Nontaponde, úngkuare xote, jei Jesús.

Bapong nontapona, asiya ungkua Jesús peitabaratha tatsi. ⁹Néxata Jesús barái ichamonaē, jeye:

—Paka yaiñabinchi, ¿eta xua kópata pentakeiseikáē matakábitha? ¿Wüünaē jampa? ¿Abe jampa? ¿Eta xua, xua éxana jane? ¿Xua pebin kapanépati jampa? ¿Xua pebin bexotsi jampa? ¿Eta xua jane? jei Jesús.

¹⁰Néxata Jesús naitamuxunene kaungkuapona, tane pomonaē pematawakaicha enáewichi. Jesús barái pong pekobemüübinchi, jeye:

—Nakobedoire, jei Jesús.

Bapong nakobedoita. Naiña kobewüünaē tsanaya. ¹¹Íchitha barapomonaē bichokono Jesús kasebarükúpati. Barapomonaē kaemonaē natsipaeba najéi:

—¿Eta be kuiyábara ichainchi Jesús? jei barapomonaē fariseomonaē.

Meje yábara poxonaē Jesús itapetsiya waba pía peitorobiwi tatsi pomonaē xua doce póyobe

(Mt 10.1-4; Mr 3.13-19)

¹²Bárapo matakábintha Jesús pona demuxúwatha petsipaebinexa Paxa. Baraxotiya Jesús Paxa matowa tsipaeba bárapo merawitha. ¹³Poxonaē baya xometo pentha tsina bapoxonaē Jesús pijimonaē waba. Barapomonaē jíwana itapetsiya waba doce póyobe, pomonaē baraichi xua jeye: “Jesús pía peitorobi jiwī tatsi”, yábara jeichichi. ¹⁴Meje bárapo doce póyobe pomonaē Jesús pía peitorobiwi tatsi. Meje barapomonaē: Simón, pong icha wüing “Pedro”, baraichi, irü ichüing pewüing Andrés, pong Simón peweicho tatsi, irü ichüing pewüing Santiago, irü ichüing pewüing Juan, irü ichüing pewüing Felipe, irü ichüing pewüing Bartolomé. ¹⁵Irü ichüing pewüing Mateo, irü ichüing pewüing Tomás, irü ichüing pewüing Santiago, pong Alfeo pexanto tatsi, irü ichüing pewüing Simón, pong celotemonaēpin. ¹⁶Irü ichüing pewüing Judas, pong Santiago pexanto tatsi, irü ichüing pewüing Judas Iscariote, pong Jesús kaenaetaxúbatsi ichamonaētha xua Jesús pebexubinéxatsi.

Meje yábara poxonaē Jesús pin bicheitomonaē kuiduba

(Mt 4.23-25)

¹⁷Bárapo doce póyobe Jesús demuxuwa webarüdünaēka, peíra mafatanáewatha barü patopa. Baxota peíra matafatanáewatha pin bicheito Jesús ewatumeinchi. Ichamonaē pomonaē Jesús pejumekowüntsíwichi baxota umena. Irü Jerusalén tomarapiwi pata xua Judea nakuapiwi. Barichi Tiro tomarapiwi, Sidón tomarapíwino pata. Bárapo tómarabe marmene itapatha ékabe. Daxita bárapo pin bicheito pata xua Jesús pejumetaenéxatsi xua kueikueijeji xuano xua Jesús pía axaibi exanaētsi peátene jiwī. ¹⁸Pomonaē kauri pexeinaewi barapomonaē Jesús taitaweta kauri.

¹⁹Daxita jiwi ichichipa xua Jesús pejayabíwatsi tsipéi Jesús daxita jiwi axaibi éxana pía peayapusúúwatha.

**Meje yábara poxonae Jesús yábara kuiduba pejüntükoyene
weiweinaewa, xuano jopa pejüntükoyene weiweinaewa**

(Mt 5.1-12)

²⁰Néxata Jesús pijimonaе nekota. Jesús barái pijimonaе, jeye:

“Pajüntükoyene weiwéiname bekein ánoxuae peakopeibí jiwi pam. Tsipéi Nakom pía pejumekowüntsíwichi tatsi piamonaе tatsi pam, pomonaе Nakom jüntükoyene itorobiya éwata.

²¹”Pajüntükoyene weiwéiname, bekein bara ánoxuae pajáinpame, bexa tsane patonsanéname.

”Pajüntükoyene weiwéiname, bekein bara ánoxuae pawekoyam, bexa tsane bichokono pajüntükoyene weiweináename.

²²”Pajüntükoyene weiwéiname poxonaе bekein jiwi paka ita-aenae-aenéi, bekein paka itaweta bo weya xuano poxonaе bekein abeya paka muxutáñnaba. Matáütano poxonaе bekein jiwi paka yábara abe paeba. Barapomonaе baxua paka kana éxana tamonaе jiwi pamxaem xua xang pongxaein Nakom Tananeitapetsin.

²³Bichokono pajüntükoyene weiwéinare bárapo matakábitha, tsipéi peitabokothicha Nakom paka katsibina pía pexeiña peitüpanaewang pokotsiwang Nakom paka júntüna jeba pía nakuatheicha. Icha barapomonaе paka ichi, barapomonaе pía pamo susato jiwi tatsi, Nakom pía peitorobi jume pepaebiwi barichichi abeya biatainchi yawa abe éxanatsi.

²⁴”¡Ichitha pai jaibó paxam, ánoxuae kopei paakabem tsobenaem poxoru methaunxuae ekeicha jopa paiña neraichiwa tsane!

²⁵”¡Pai jaibó, paxam pomonaе ánoxuae patonsanéname tsipéi methaunxuae bexa tsane pajainpabénéname!

”¡Pai jaibó, paxam pomonaе pajüntükoyene weiweinabéname tsipéi ánoxuae methaunxuae pajüntükoyene wekoyam tsane!

²⁶”¡Pai jaibó, pomonaе jiwi wüünaе paka jainteibena paiña nekueikueijeixae po diwesi jopa Nakom Pejume diwésiyo! ¡Icha barapomonaе paka ichi barichi barapomonaе pía pamo susato jiwi tatsi, wüünaе jainta pomonaetha, pomonaе naerabiya paeba xua pinaе barapomonaе Nakom pía peitorobi jume pepaebiwi!” jei Jesús.

**Meje yábara poxonae Jesús yábara kuiduba xua jiwi bewa ántobe
pomonaetha, pomonaе pía peitafaetabí jíwichi**

(Mt 5.38-48; 7.12)

²⁷⁻²⁸Ekeicha Jesús namchi, jeye: “Paxamtha pomonaе beta pana nejumeté-neme, barapomonaе paka baraichi: Paantobeinde pomonaе bekein paiña nepaka ka-aitafaetabí jiwi. Matáütano beta pata taexande pomonaе paka ita-aenae-aenéi. Matáütano amanaya beta papáebare pomonaetha, pomonaе paka yábara abe paeba. Nakomtha patawüükare pomonaе xua paka biatane. ²⁹Icha ichüng paka júmata tsakinopa pekóbetha, moya ekeicha icha júmata pana najúmata káeware xua paiña nekajúmata tsakinopaenexa. Icha ichüng pákata pita peamütiyüü kamisha, po kamisha xua athawé peruyaewa yawa bara saya moya pakópare xua ekeicha paiña nepákata pichiwa tsane kamisha. ³⁰Daxita koyenexi

pokotsiwa ichamonaе paka wüüka moya bara pakaichabéibare. Pong pákata pita paiñawa jopa ekeicha kaewa pawüükaеinde. ³¹Paexande ichamonaetha xua pokoyene paiña neichichipaewa xua barapomonaе beta paiña nepákata exanaewa tsane.

³²”Icha saya meisha paántobem pomonaе paiña nepaka antobexae, Nakom jopa paka kuiyábara matomakáе tsane. Tsipéi ápara irü pomonaе peajüntükoyenebewi ántobe ichamonaе pomonaе peantobewixaetsi. ³³Barichi icha saya beta pata éxaname pomonaе beta pákata éxana, Nakom jopa paka kuimatomatsiyo tsáneno baxua. Tsipéi pomonaе peaitabé jiwi barapókotsi koyene irü éxana ichamonaetha pomonaе peaitabé jíwitha. ³⁴Barichi icha saya pakatsíbame ichamonaе xua bexa xuya paiña nepaka katsibinexa, Nakom jopa paka kuimatomatsiyo tsane baxua. Tsipéi pomonaе peaitabé jiwi barichi icha peaitabé jíwitha katsiba xua xuya ekeicha pekatsibeibinéxatsi. ³⁵Paxam jame bewa paántobem tsane paiña nepaka ka-aitafaetabí jiwi, xuano jame beta bewa paexanaem ichamonaetha. Matáütano jame bewa bara pakatsibim ichamonaе xua jopa paiña neyábara ewateibiwa xua xuya paiña nepaka katsibeibiwa tsane. Icha baxua paexanáename Nakom paka katsibina pía nakuatheicha pokotsiwa xua paka júntüna jeba pía nakuatheicha. Matáütano Nakom paka kana exanaena pía pexantong jiwi tatsi pam, pong peitabókotha eka. Tsipéi Nakom pejüntükoyene wüünaein, daxota yawena barapomonaetha, pomonaе bekein xua jopa wekobenteibiya jakobeibiyo xuano xua peaitabé jiwi. ³⁶Payábara kuinantaxéinare pokoyene xua ichamonaе paiña neyawenaewa. Icha be Nakom ichi xua yábara kuinantaxeina pokoyene xua peyawenaenéxatsi jiwi, bara paichinde”, jei Jesús.

Meje yábara poxonaе Jesús kuiduba xua jiwi jopa bewa yábara paebina ichamonaе xua penatsikuentsiwa xua abe peexanaexae

(Mt 7.1-5)

³⁷Ekeicha Jesús namchi, jeye: “Jopa ichamonaе payábara paebinde xua penatsikuentsiwa xua abe peexanaexae. Néxata bapoxonaе Nakom jopa paka yábara paebí tsane paiña xua nenatsikuentsiwa xua abe paiña exanaexae. Ichamonaе jumedangweya jopa pajande: ‘Ápara bapong pikoya, ápara bapong pikoya’, jopa pajande. Néxata Nakom jopa paka daichi tsane baxua. Pakuiyábara jüntemáinare pokoyene ichamonaе pákata abe éxana, néxata Nakom paka kuiyábara jüntemainaena xua abe paiña neexanaewa. ³⁸Ichamonaetha, jopa juniya pakatsibinde, néxata Nakom jopa juniya paka katsibi tsane. Paiña dórotha paka katsina, beta pákata pesabina, yawa beta pákata xatabakorekaena pekóbeta yawa pákata nünükütaxuina. Yawa pákata wüngka exanaena. Icha dangweya payábara paebíname xua penatsikuentsiwa ichamonaе xua abe peexanaexae, Nakom barichi dangweya paka yábara paebina xua paiña nenatsikuentsiwa xua abe paiña nexanaexae”, jei Jesús.

³⁹Jesús tsipaeba barapomonaе pekayábara júta pepaebi diwésiyo, jeye: “Pong ba peitatanakütsin jopa itaküüpaetsi xua pematakaponaewa ichüng pong irü peitatanakütsin. Icha bapong baxua exanaetsípabe, bapongbe fétotha joparekaetsípabe. ⁴⁰Pong ba aena nakuiduba xua peyaputaenexa, bapong jopa be bapokotsiño, pong pekuidubin jiwi, pong peyaputaein. Ichitha pong poxonaе wétsina xua nakuiduba, bapong be pía pekuidubin kuijúpa”, jei Jesús.

⁴¹Barichi ekeicha Jesús paeba kaeintha pomonae pijimonae tatsi jíwana icha pekayábara jüta pepaebi diwésiyo, jeye: “Xam be jiña jintong ítata táneme poxonae naepútiyo ítata jopíyatsi, íchitha jopa taem xua írürü xam nama pin naepüto neitakuerétotha dukua. Barapókotsi jüta koyeneya ichi, xam ba jiña jintong kuitáneme xua poxonae abe éxana, íchitha jopa nayaputaem xua írürü xam bara ichim nama bichokono abe éxaname. ⁴²Icha jopa taem pin naepüto xua neitakuerétotha dukua, jopa kaitaküüpaeyo xua nejeiwa jiña jintongtha: ‘Tajintong, kata jutinchi naepútiyo xua dukua neitakuerétotha’, xua nejeiwa. Xam nepaebin xua ichüing éxana xua baxua neexanáewatha irü. Xam kopiya nata jure bárapo pin naepüto xua neitakuerétotha dukua. Bapoxonae beta táename nejutsinexa tsane naepútiyo xua jiña jintong peitakuerétotha tarúkuatsi”, jei Jesús.

**Meje yábara poxonae Jesús yábara kuiduba
xua pinae jiwi yaputane nae penakoichixae**

(Mt 7.17-20; 12.34-35)

⁴³Jesús namchi, jeye: “Po naein pexeíña naein jopa bápana nakoichiyo po pethéi kamatsá thei. Barichi po naein kamatsá naein jopa bápana nakoichiyo po pethéi pexeíña thei. ⁴⁴Jiwi yaputane nae po nae penakoichixae. Daxita jiwi yaputane xua higo thei, po pethéi pexeíña thei jopa bápana terakáe po naetha sojei xua kamatsá nae. Matáütano jiwi yaputane xua uvathéi po thei ün bótotha xuwa jopa bápana terakáe náexitha. Bara jüta ichi jiwi yaputane xua pebin pejüntükoyene wüünaein pong wüünaeya peexanaeinxae. ⁴⁵Pong ba pejüntükoyene wüünaein, bapong ba jame ba paeba pokotsiwa pexeíña koyene, pejüntükoyene wüünaeinxae. Barichi pong ba peajüntükoyenebein bapong ba abe paeba, peajüntükoyenebeinxae. Pokotsiwa jiwi nantaxeina pejüntükoyénetha, baxua ba pekoiboto tsina kueikueijej”, jei Jesús.

Meje yábara poxonae Jesús aiña bomüxübe yábara paeba

(Mt 7.24-27)

⁴⁶Ekeicha Jesús namchi, jeye: “Paxam pana neyábara jam: ‘Pata Tanekana-mataxeinaem’, pajam, dáichitha jopa paexanaem pokotsiwa paka itoróbatsi. ⁴⁷Ínkane yábara paka tsipaebinchi pong xua patopa taxantha, nejumenaitómata pokotsiwa páebang, matáütano éxanano pokotsiwa ichichipang, bapong beta pópona Nakom nexa. ⁴⁸Bapong barapókotsi jüta koyeneya nakana éxana icha be ichi pong bo akabanota peíra matatsukáewatha xua ichaxota ira dangwéi. Meje jeye: Kopiya müthüing tajü exanareka pekuaranobinexa bómüxü naetong. Poxonae mene matakaewaxuba, bárapo bómüxü jopa joparenaeyo poxoru naetong tajü umenareka xuano poxoru bómüxü ungukea pematatsukáewatha ichaxota ira dangwéi. ⁴⁹Íchitha nama pong nejumetaetha, xuano jopa exanaeyo pokotsiwa ichichipang, bapong be meje: Bapong be pókotsin bo akabanota ichaxota ira matafátsana, xuano naetong jopa tajü umenarekaeyo. Poxonae mene matakaewaxuba, bárapo bómüxü joparena poxoru naetong jopa tajü umenarekaeyo, xuano poxoru bómüxü ungukea ichaxota ira matafátsana. Bárapo bómüxü naiña joparena. ¡Maisha bómüxü bichokono abel!” jei Jesús.

**Meje yábara poxonae Jesús axaibi éxana pong soldadomona
romanomonae pía pentakaponaein tatsi tanakuítatsi**

(Mt 8.5-13)

7 ¹Poxonae Jesús baxuang najumeweta xua barapomonae jumetane, bapoxonae Capernaum tómara beya pona. ²Baxotiya pópona romanomonae soldadomona pía pentakaponaein tatsi, pong xeina pía petanakuiteibinchixaetsi. Barapong bichokono ántobe pía petanakuitinchi. Bapong pong petanakuiteibin bichokono átene, xua áwatha petüpáe. ³Poxonae romanomonae soldadomona pía pentakaponaein tatsi Jesús yábara jumetaínchi, bapoxonae itoroba pítiri jiwí judiomona jíwanapiwí Jesús beya xua petaxaibi exanaenexa tsainchi pía petanakuichin tatsi. ⁴Barapomonae Jesús imoxoyo kakuita poinchi. Barapomonae Jesús jumedangweya tsipáebatsi, jeichichi:

—Bárapo pentakaponaein, pentakuiwüünaein, daxota yawende. ⁵Poxoru bapong wanakuamona wüünae yábara kanantaxeinéibatsi. Matáütano bapong itoroba xua ákaba pata penakaetútsibo pía paratixitha, jei bárapo pítiri jiwí.

⁶Néxata Jesús barü poinchi barapomonae. Íchitha poxonae Jesús muxu pepatopáe, romanomonae soldadomona pía pentakaponaein tatsi piabotha tatsi, bárapo soldadomona pía pepa pentakaponaein tatsi, bapong itoroba pía jiwí xua petakajume jeichinexa tsainchi Jestusta: “Tanekanamataxeinaein, xang saya takuipawin. Aurang xua xam nepatopaewa tsane tabotha tsipéi xam aiñakuim. ⁷Daxota jopa patopaeiño nexaiña beya, tsipéi xam aiñakuim, xua paebíname pía peatenéwatha tatsi bapoxonae bapong axaibi bara tsane pong inta nakuiteiba. ⁸Xang bichi xeinang tanekanamataxeinaein, pong neitoroba. Barichirü xeinang soldadomona pomonae itorobeibang. Poxonae ichüng itorobang: ‘ponde’, jang, bapong pona. Poxonae ichüng wabang: ‘antha’, jang, bapong patopa. Pong inta nakuita, itorobang: ‘inta éxande’, jang, inta éxana”, jeye pentakaponaein, jei pomonae penakajume kaitoróbíxaetsi.

⁹Poxonae Jesús baxua jumetaeba, jumekuiyábara kananthüthü nantaxeinanaya kabenaeka beta pepaebixae romanomonae soldadomona pía pentakaponaein tatsi. Jesús nekótaba pomonae punapoinchi, barái, jeye:

—Xaniyang paka tsipáebatsi Israel nákuatha irü dapokotsin jopa kaxinaeiño pókotsin icha pong iche pong tana nekuiyábara jumekowüntsín xua bara neitaküüpa xua axaibi taexanaewa jiwí, jei Jesús.

¹⁰Poxonae barapomonae botha kaibe nawibiya, barapomonae taebadüküpa xua axaibiya boka romanomonae soldadomona pía pentakaponaein tatsi pía petanakuichin tatsi.

**Meje yábara poxonae Jesús petüpaein asüü éxana
pexanto tatsi powa pekuenta tüpaewáyotsi piseuri**

¹¹Poxonae Jesús baxua nakuiweta, bapoxonae Nain tómara beya pona. Jesús kuéyabatsi pijimona, irü pin bicheitomonaeno nápona. ¹²Poxonae Jesús muxu pepatopáe tómaratha, Jesús tane xua pewowin petüpaein kajojondénatsi xua pemüthüthü xubinexa tsáinchiba, pong penatsita kompa. Bárapo pewowin powa pekuenta tüpaewáyotsi piseuri barapowa pexanto tatsi. Barapowa punapoinchi

pin bicheito. ¹³Bapong Jesús pong Pekanamataxeinaeinxae jiwi, barapowa yábara kuinantaxéinatsi. Jesús barái bapowa, jeye:

—Jopa wekóyande, jei Jesús.

¹⁴Néxata Jesús imoxoyo kakuita pona petüpaein, yacaja jáyabano. Pomonae yacaja kápona yacaja kaumenarüküpa. Jesús barái petüpaein, jeye:

—Pewowin katsipáebatsi, nontaponde, jei Jesús.

¹⁵Néxata pewowin pong tüpa, nantakotekataba, yawa tamrópata pítaba xua pekueikueijeíwa. Jesús koxíwatha kanakobenata pexanto. ¹⁶Poxonae pin bicheito taerüküpa baxua, bárapo pin bicheito bichokono junuwa. Barapoxonae bárapo pin bicheito Nakom wüünae jáintatsi, barapomonae namchi:

—Nakom peitorobi jume pepaebin, pong aiñakuí, waxantha patopa. Nakom siwapona peyawenaenexa pijimonae pomonae pía pejumekowüntsíwichi, jei barapomonae.

¹⁷Daxita jiwi jumetane xua Jesús éxana Judea nákuatha, irü po nákuang imoxoyo kakuita ena Judea nákuatha.

Meje yábara poxonae Juan itoroba pijimonae Jesús beya peyaiñabinexa tsainchi Jesús

(Mt 11.2-19)

¹⁸Juan pijimonae tsipáebatsi daxita baxua xua Jesús éxana. Juan waba aiña pebinbe pijimonae jíwana tatsi. ¹⁹Bapongbe Juan itoroba Jesús beya xua najumekaruta bapongbetha matáüta xua Jesús peyaiñabinéxatsi xua icha metha bara bapongde jei pong bewa patopeikaena, bapong Cristo, jei. Ichakuitha metha ichüng jampa, xua pawünae ewatsin jampa jei. ²⁰Bara bapongbe, pongbe Juan peitorobixaebe, bapongbe imoxoyo Jesús kakuita úngkuatsibe. Bapongbe Jesús baraichi:

—Juan pong jiwi Pebautisabin, bapong pana nejumekaruta, bapong namchi: ‘¿Metha bara xaniwaicha bapongda, pong bewa patopeikaena, bapong Cristo?’ jei. ‘¿Ichakuitha metha bara ichüng pawüünae éwatang jampará?’ jei Juan, jei bapongbe.

²¹Poxonae bapongbe patópabe, Jesús axaibi éxana peatenewi, irü pomonae pin domae xainchi, yawa taitaweta pomonae yakauríbatsi. Matáütano yawénano xua ekeicha tane pomonae jopa nekotsiyo. ²²Bapongbe jumenótatsibe. Jesús jume-nota, jeye:

—Papónarebe Juan beya. Juan patsipáebarebe xuaunxuae pokotsiwa panekuitánemebe, matáütano xuaunxuae pokotsiwa pana nejumetanemebeno. Matáütano patsipáebarebe xua pomonae peitatanakütsi jiwi ekeicha tane, matáütano xua pomonae pejayuyajujeimonae beta pona ekeicha. Matáütano xua pomonae peperüüsawichimonae ekeicha perüüwüünae, matáütano xua pomonae pemuxusipanaewi ekeicha muxunasaba, matáüta xua pomonae pewerapaewi ekeicha asüü. Matáütano pomonae xua peakopeibiwi jumetane Nakom pía pexeiña pekapanenebiyáe jume diwesi. ²³Patsipáebare Juan xua xang jangje: ‘Jüntükoyene weiwei-naena pong jopa aiña ünthüthüño, pong xaniwaicha neyábara kuijumekowünta’, xua jang, jei Jesús.

²⁴Néxata pongbe Juan itoróbabe pónabe Juan beya. Bapoxonae Jesús tsipaeba jíwítha, xua Juan yábara páebatsi, jeye barapomonaetha: “Ira xuépana susato

tsúrukuae nákuatha papóname. Poxonae bara beya papóname, ¿eta xua páiñatsi? ¿Paiña jumetaetsi pebin pong aiña ünthüthüto kuixeina icha be naepanaewa ichi xua saya joibo ba jübabiya kaya tsaibi? Jume ápara. ²⁵Bara paichim papóname, ¿paiña nejumetaenexa pebin, pong peitüpanáe paparuwa namaxátata? Jume ápara. Payaputáneme pomonae peitüpanáe paparuwang namaxátaba, barapomonae jinompa pexeña bongtha pomonae jiwi itorobiya pía pepa peewatsfwiwaetsi. ²⁶Jume. Jopa baxua patsiponaem xua jopa paiña jumetaenexa pebin pong aiña ünthüthüto kuixeina, matáütano xua jopa paiña jumetaenexa pebin pong peitüpanáe paparuwa namaxátata. Ápara jame baxua patsipóname xua paiña nejumetaenexa pong Nakom peitorobi jume pepaebin. Bapong Juan bichokono peaiñakuín pong Nakom pía peitorobi jume pepaebiwi jíwanapin beyakaincha ichüng pong Nakom peitorobi jume pepaebin. ²⁷Juan bapong ápara, pong yábara páebatsi Nakom Pejume Diwésitha poxonae Nakom netsipaeba, nejéi:

‘Katsíwanae itorobinchi kopiya pong tana nakajumekarutsin.
Barapong jüntükuí wüünaetsina jiwi,
xua daxita jiwi najüntükui wüünaetsina xam nexa,
xua nekantenta weyataeya wabinexa poxonae patopáename’,
nejéi Nakom Pejume Diwésitha.

²⁸Paka tsipáebatsi, xua daxita Nakom peitorobi jume pepaebiwi pomonae Juan tsiwanaya jinómpatsi báyatha, dapokotsin aibi barapomonae jíwana pong yatsikaewa peaiñakuín beyakaincha pong Juan, pong jiwi Pebautisabin. Juan peaiñakuí diwesi yábara kueikueije pokoyene xua Nakom itorobina jiwi. Íchitha po diwesi xua tamonae ánoxuae paeba bárapo diwesi bichokono aiñakuí diwesi beyakaincha xua Juan kueikueije, bekein jiwi nantaxeina xua tamonae jopa aiñakuí jiwi.

²⁹”Daxita barapomonae baxua jumetaerúküpa. Írürü jumetaerúküpa pomonae parátixi pentomanotéibiwi romanomonae pía pepa peyanakua ewatsinchi nexa, pomonae báyatha Juan bautisaba. Daxita barapomonae nantaxearúküpa xua Nakom bara pepa pentakuiwüünaein. ³⁰Íchitha fariseomonae irü pomonae jiwi pekuidubiwi Moisés pía peitorobi koyene tatsi, barapomonae jume itaweta, Nakom jume itawétatsi pokotsiwa xua Nakom beexanaena barapomonae nexa. Matáütano barapomonae kui-itaweta, Juan kui-itawétatsi xua pía pebautisabi koyenewa.

³¹”Jiwi pía Pekanamataxeinaeinchi tatsi, bapong Jesús namchi, jeye: ¿Eta pokotsimonae kuijúpatsi barapomonae pomonae xote jinompe pomonae Nakom jume itawétatsi? ¿Eta be jüta ichi barapomonae? ³²Barapomonae be pexui, pokotsixi pánatha nabarü jinompa. Nabarü wawái tsurubenanáebiya. Barapoxi nabarái, jeye: ‘Báyatha oibo paka tsimuxu obatsiba íchitha jopa panawirabim. Báyatha paka tsimuxuwekoyeichiba icha be ichi poxonae ichüng tatúpatsi, íchitha jopa pana itanuwé jumenotsim xua paiña newekoyeinexarü’, jei barapoxi. ³³Juan patopa pong jiwi Pebautisabin. Bapong jopa xaeyo pan. Matáütano jopa apaeyo vino mera. Íchitha paxam pajam: ‘Ápara barapong Juan, pong yakauríbatsi’, pajam. ³⁴Bapoxonae xang, pongxaein Nakom Tananeitapetsin patopang. Xang pan taxaein yawa vino mera taápaein. Paxam pana neyábara páebame, pajam: ‘Bapong maisha jopa juniya nabanaeyo, yawa jopa juniya apaeyo. Peátsakae jiwi abe peéxanae jiwi pía jintong tatsi, irü pomonae parátixi pentomanotéibiwi barapomonae pía jintong tatsi’, pana neyábara jam. ³⁵Nakom piamonae tatsi

barapomonaē tsita éxana xua jiwi tsita éxanatsi Nakom pía peyaputáē koyeneintha tatsi. Pokoyene barapomonaē éxana baxua Nakom tsita pexeiña koyénetsi”, jei Jesús.

Meje yábara poxonaē Jesús siwaponā Simón fariseomonaēpin piábo beya tatsi

³⁶Kaein fariseomonaēpin bapong Jesús wábatsi petaxaenexa tsainchi piabotha. Jesús pona bara beya yawa naéka pexaethopáewatha penanabanaenexa tsane. ³⁷Néxata petsiriwa patopa powa pesikuiweiweinaewa, powa bárapo tómaratha pópona. Barapowa yaputane xua Jesús nanabanaeicha fariseomonaē jíwanapintha. Barapowa alabastro ibo wüing bosibü átsato kapatopa Jesustha xua petuxuéi nasiwa xua bichokono wüingka. ³⁸Barapowa Jesús imoxoyo kakuita wekoyéi tsungkuaetsi yawa peitakuere mentha Jesús taxu atatsika éxanatsi. Bapoxonaē barapowa pía pentanatha baxota Jesús taxutsewa éxanatsi. Barapowa Jesús taxu tsutsúbatsi poxoru Jesús Pekanamataxeinaein jiwi. Bapoxonaē barapowa Jesús taxu epatábatsi petuxuéi nasíwatha. ³⁹Poxonaē fariseomonaē jíwanapin pong Jesús pewabixaetsi petaxaenexa tsane piabotha, poxonaē bapong tane baxua, bapong piakoutha nabarái: “Icha bapong xaniwaicha tsipae pong Nakom peitorobi jume pepaēbin tsipae metha yaputáetsipa xua powa jáyabatsi ápara powa pesikuiweiweinaewa, matáütano xua bapowa powa peatsakaewa. Íchitha bapong xaniwaicha jopa dapoiño pong Nakom itoroba”, jei barapong pong fariseomonaēpin. ⁴⁰Néxata Jesús barái fariseomonaē jíwana jintong, jeye:

—Simón ínkane katsipaēbinchi, jei.

Bapong jumenota, jeye:

—Pong jiwi Nekuidubimxae, moya taema, jei.

⁴¹Jesús barái, jeye:

—Pebinbe nakuéyatabe nakowáetabe parátixi ichüingtha. Ichüing jopa kataunxuae xuya katsiyo quinientos po paratiximonaēbe po parátixi quinientos po matakábibe nexa poxonaē nakuita. Ichüing jopa kataunxuae xuya katsiyo cincuenta po paratiximonaēbe pongtha pong penakowaetsixaetsi. ⁴²Poxoru bapongbe jopa itaküüpáetsibe xua xuya ekeicha pekatsiwa tsánebe pongtha pong penakowaetsixaēbe, daxota pong penakowaetsixaetsi parátixi, bapong namchi, jeye: ‘Metha ba saya paka kuiyábara jüntemainatsibe’, jei. Ínkane netsipáebare Simón xua bapongbe, ¿jintam yatsikaewa antobetsirá xua beyakaincha ichüing antobetsi xua ántobe pong nakowáetatsi parátixi? jei Jesús.

⁴³Simón jumenota, Jesús jumenótatsi, jeye:

—Bü, metha moya pong bichokono kakuiyábara jüntemáinatsi bichokono pong penakowaetsixae quinientos po paratiximonaēbe, jei Simón.

Jesús barái:

—Bara beta nejumenótame, jei Jesús.

⁴⁴Néxata Jesús nekota bárapo petsiriwa, bapoxonaē Jesús Simón baraichi: Taema pokotsiwa bárapo petsiriwa inta éxana. Xang patopang jiña botha íchitha jopa mératha netaxuwaexubim xua paiña kuikoyeneyathaxae xua judiomonaē pamxaem. Nama barapowa peitakuere mentha netaxu-atatsika éxana yawa pía pentanatha netaxutsewa éxana. ⁴⁵Xam jopa netsutsubim, íchitha bapowa poxonaē kaena jondenang áwiya kame netaxutsutsuba.

⁴⁶Jopa nenta eatabim petuxuéi nasimera. Íchitha barapowa petuxuéi nasimera netaxu-eataba. ⁴⁷Daxota katsipáebatsi xua bapowa matowa nasikuimatakaeta. Daxita baxuang yábara jüntemainang, daxota bichokono neántobe. Íchitha nama pong be kónotha nasikuimatakaeta, be kónotha yábara kuijüntemainang. Bapong be kónotha neántobe, jei Jesús.

⁴⁸Ekeicha Jesús namchi bapówatha. Petsiriwa baraichi, jei:

—Kakuiyábara jüntemainaya jüntüpxana exanátsiba abe jiña neexanáe kuirukoyenewang, jei Jesús.

⁴⁹Pomonae Jesús pebarü nabanaexaetsi, barapomonae nabarái, jeye:

—Bapong, ¿jintamda, jamaisha bapowa kakuiyábara jüntemainaya jüntüpxana éxanatsi abe pía peéxanae kuirukoyenewang tatsi? jei barapomonae pomonae baxota naéna.

⁵⁰Jesús barái petsiriwa, jeye:

—Báyatha nekakapanepaewa kabexuínchi tsipéi yábara tana nejumekowüntsi-xaem. Saya jüntemiya póponde, jei Jesús.

Meje yábara yábüxi powaxi Jesús yánabatsi

8 ¹Bapoxonae pírapae Jesús daxita tómarangtha pona dukuaeta, tsika tomaxíthano po tómarangtha pin tomarangthano. Matáütano paeba dukuaeta Nakom pía pexaiña jume diwesi tatsi po diwesi yábara xua Nakom waba jiwi petanaexanaenéxatsi piamonae pomonae Nakom jüntükoyene itorobiya éwata. Jesús yánabatsi pía peitorobiwi tatsi pomonae doce póyobe. ²Barichi Jesús yánabatsi petsiríwaxi, powaxi Jesús báyatha taitaweta kauri xuano axaibi éxanano xua domae xainchi. Barapówaxi jíwana kaewayo pewüng María Magdalena, tsipéi pía tómara tatsi pewüng Magdala. Barapowa María powa báyatha taitawétatsi siete póyobe kauri. ³Bichirü petsiriwa, powa pewüng Juana, bapowa nápona. Bapowa Juana, Cuza píowa tatsi. Bapong Cuza pong Herodes píabo tatsi tayapukáekatsi. Irü ichowa pewüng Susana, bapowa nápona. Irü ichówaxi irü aiña yábüxi nápona. Daxita barapówaxi Jesús úpain exanéibatsi xua xoxi barapówaxi pexeinaexae.

Meje yábara poxonae Jesús kuiduba jiwi pekayábara jüta pepaebi diwésiyo xua pong peúbin yábara

(Mt 13.1-9; Mr 4.1-9)

⁴Daxita tomarangpiwi pata. Poxonae pin bicheito nakaetuta Jesús kuiduba bárapo bicheito po diwésiyo pekayábara jüta pepaebi diwésiyo. ⁵Jesús barái: “Pebin pong peúbin póntaba pía übichi pábitha. Poxonae pong peúbin übauya, icha xu námtotha othopeika, pexu jiwi taxunáunaba, yawa pepupunaewi xu xane. ⁶Icha xu, xu othopeika ibówangtha. Poxonae bárapo xu xuwa, bárapo xu, xu yüüna poxoru jopa tajü xuwarekaeyo poxoru ibótixi naküküna yawa poxoru ira tsewa. ⁷Icha xu, xu othopeika ichaxota pesoiwang xuwinaena. Bárapo xu yaboto nantakapánaba poxoru yawa múxuna xuwina pesoiwang. ⁸Icha xu, xu othopeika ichaxota ira wüünae. Poxonae bárapo xu, xu xuwa, xu nawüünaeta. Kae xuto nakoita cien poxu matabüxúyobe”, jei Jesús.

Poxonae Jesús baxua paeba, bapoxonae jumedangweya namchi: “Icha pamuxudubename, moya pana nejumenaitáeware pokotsiwa tapaka tsipaebíwatsi”, jei Jesús.

**Meje yábara poxonae Jesús namchi xua eta xua metha pekayábara
jüta pepaebi diwésiyo yábara, jane jei**

(Mt 13.10-17; Mr 4.10-12)

⁹Néxata Jesús yáinábatsi pijimona, barapomona namchi, jeye: “¿Eta pokotsiwa yábara kaunútame poxona pana netsipáebame bárapo pekayábara jüta pepaebi diwésiyo?” jei bapomona. ¹⁰Jesús jumenota, jeye: “Meisha paxam yatsikaewa Nakom yábara paka yaputane éxana po pekuidubiwa xua moya peyawünxeinaewa. Bárapo moya peyawünxeinaewa ápara xua Nakom éxana xua paka kana éxana xua paiña nepaka itaküüpaewa xua paiña nenaexanaewa Nakom piamonae tatsi pam, pomona pamxaem Nakom itorobiya paka éwata. Íchitha jame ichamona meisha pomona jopa nejumlahewüntsiyo jopa daichichi. Nakom jopa kopatsiyo xua barapomona peyábara yaputaewa baxua. Daxota barapomona kuidubang pekayábara jüta pepaebi diwésintha xua Nakom peyábara yaputaenéxatsi. Baxua páebang xua bekein pía tana nekui-taibenáewatha tsane íchitha jopa pía tana nekuiyapu-taibenáewatha tsane. Yawa xua bekein pía tana nejumlahewüntsiyo-taibenáewatha tsane”, jei Jesús.

**Meje yábara poxonae Jesús pijimona muxuyaputane éxana po diwesi
xua pekayábara jüta pepaebi diwésiyo pong peúbin yábara**

(Mt 13.18-23; Mr 4.13-20)

¹¹Ekeicha Jesús namchi: “Meje ápara baxua yábara kauntang poxona páebang pekayábara jüta pepaebi diwésiyo: Poxuto xua íratha xuwa nakoichiya wüünaeya éxana. Bárapo xuto yábara kaunuta Nakom Pejume Diwesi xua poxona pebin jüntükoyene webókatsi pebin wüünaeya kana éxanatsi. ¹²Poxutong xua namto beothopiya, aichurubena. Bárapo xutong yábara kaunuta xua jiwi bara jüntükoyene weichichi kaurimona pía pentakapona tatsi. Jiwi jüntükoyene weajumetsurubena éxanatsi Nakom Pejume Diwesi xua báyatha pojume jumetane, xua bapoxona jopa petajumekowüntsinexa tsainchi Nakom, yawa xua jopa petanakapanenebiyaenexa tsainchi Nakom beya xua Nakom exanaena. ¹³Poxutong xua xu óthopa ibówangtha, bárapo xutong yábara kaunuta po jiwi wüünaeya jumetane Nakom Pejume Diwesi xuano jüntükoyene weiweinaya Nakom jumekowüntatsi. Íchitha bara kaeto jumekowünta poxoru barapomona anthüfaetabiya jumejeba Nakom Pejume Diwesi pejüntükoyeneintha. Matáüta kauri jüntükoyene wemuxupaeba xua abe peexanaenexa tsane. Daxota barapomona kayábara jüntemaina Nakom. ¹⁴Poxutong xua xu óthopa pesóiwangtha bárapo xutong kaunuta xua pomona Nakom Pejume Diwesi jumetane íchitha saya barompaya pía jüntükoyenyatha jinompa, yawa saya ü kopei kayábara nantaxeina, yawa saya éxana pokotsiwa jüntükoyene weiweina kana éxanatsi. Pokoyene pebiwi éxana baxuang barapókotsi jüta koyeneya éxana icha ichi xua poxutong be pesóiwangtha xu othopiya. Bárapo xutong jopa thei dubenaeyo. Barapókotsi jüta koyeneya ichi, bárapo jiwi jopa wüünaeya jinompaeyo Nakom nexa. ¹⁵Poxutong xua xu othopeika peíra wüünáewatha, bara nakoita. Bárapo xutong yábara kaunuta pomona jumetane Nakom Pejume Diwesi xuano jumekowüntano poxoru jüntükoyene wüünaeya jumetane. Matáütano beta éxana dubenanáebiya beya matapaiña jiwi kuitane xua barapomona jüntükoyene wüünae Nakom peitabaratha tatsi”, jei Jesús.

**Meje yábara poxonae Jesús pijimonaе tsipaeba pekayábara jüta
pepaebi diwésiyo xua pekoicha yábara**

(Mr 4.21-25)

¹⁶Ekeicha Jesús namchi: “Poxonae jintong pekoicha koicha éxana bapoxonae jopa koicha matakatsiyo. Matáüta jopa koicha exanaeyo cama peúpana deka. Jame asiya koicha éxanatsi, pekoichataenexa pomonae jojoneibarena. ¹⁷Daxita pokotsiwa xua moya peyawünxeinaewa bexa tsane jiwi yábara yaputaena. Bari-chi bárapo diwesin xua pekayábara jüta pepaebi diwesin xua paebaponang jiwi itaküüpaeinchi xua peyábara yaputaewa tsane.

¹⁸”Pana nejumenaitáeware paiña neexanaenexa pokotsiwa paka tsipáebatsi. Pong ba be kónotha Nakom yábara yaputainchi, Nakom bapongtha kana exanaena xua ichawa peyábara yaputaewa tsane beya poxonae bapong ekeicha bichokono Nakom pejumekowüntsiwa tsainchi. Pong ba jopa ichipaeyo xua Nakom peyábara yaputáewatsi Nakom wepichina pokoyene bapong yaputane xua beya daxota Nakom jopa pejumekowüntsiwa tsainchi”, jei Jesús.

Meje yábara Jesús pena tatsi írürü péyapin jiwi tátsino

(Mt 12.46-50; Mr 3.31-35)

¹⁹Néxata Jesús pena tatsi írürü péyapin jiwi tátsino pata ichaxota Jesús ungkua. Íchitha jopa Jesús imoxoyo kakuita ponaetsi tsipéi bichokono pin bicheito. ²⁰Ichüing Jesús baraichi:

—Ena, írürü néyapin jíwino pesato beya umena. Bépara bekein katáei, jei bapong.

²¹Jesús namchi barapomonaetha:

—Ápara jame be taena tsíkotang yáwano be táyapin jiwi tsíkotang pomonae xua jumetane Nakom Pejume Diwesi xuano xua éxana pokotsiwa Nakom itoroba, jei Jesús.

**Meje yábara poxonae Jesús xaiña dukuanaya éxana joibo,
yawa marátsakano xaiña mene dukuanaya éxanano**

(Mt 8.23-27; Mr 4.35-41)

²²Kaentakabi Jesús barü pona pijimonaе jératha. Jesús pijimonaе barái:

—Anthá, poinchi icha muxunene beya, pukua beya, jei Jesús. Bara ponarükúpaba.

²³Poxonae kataunxuae jératha yana enapona bapoxonae Jesús maitúngkuataba. Bapoxonae jemeicha pin joibo naetaba ménetha. Matáüta bichokono jera mene wüingka, muxu pebunarekae. ²⁴Néxata Jesús yaüboxotsi. Jesús baraichi:

—¡Jesús, Patatanekuidubim, yanabunarékatsi! jei barapomonaе.

Néxata Jesús nakosataxuba. Jesús itawetaxuba joibo marátsakano. Daxita kae-wanaya joibo yawa marátsakano. ²⁵Néxata Jesús barái pijimonaе:

—¿Jopa pana nejumekuiyábara jumekowüntsim xua bara tana neitaküüpaewa xua tapaka yawenáewatsi? jei Jesús.

Barapomonaе bichokono junuwa yawa najüntükoyene kabenaekarüküpa. Barapomonaе kaemonaе natsipaeba, jeye:

—¿Jintam metha bapongda? ¡Jamaisha bapong itaweta joibo yawa marátsakang xua daxita xaiña dubenanaya! najéi barapomonaе.

**Meje yábara xua pebin yábara pong kaurimonaē
pexeinaein pong Gerasa nakuapin**

(Mt 8.28-34; Mr 5.1-20)

²⁶Pirapaeyo jebouna Gerasa nakua itapatha, po íta pa eka Galilea nakua icha íta pa panawa beya. ²⁷Poxonaē Jesús muxu penontounaē jératha, pebin pong kopiya tomarapin pong ekeicha aishowapin náexana, bapong patopa. Jesús kakuita unguatábat̄si. Kaena báyatha bapong punajinómpatsi kaurimonaē. Paparuwa jopa yawa poponaeyo, matáütano botha jopa poponaeyo, saya ibowouthang poponeiba. ²⁸Poxonaē Jesús tainchi, íratha jopa. Pentabokototha unguwa bapong, Jesús pei-tabaratha tatsi. Jumedangweya wawái:

—Jesús, Nakom Pexantom, pong peitabókotha eka. ¿Eta pokotsiwa metha pató-pame taxantha? ¡Jumedangweya kabaraichi jopa nepérxaxanaeinde! jei.

²⁹Daxota bapong baxua paeba yáitama Jesús taitaweta kauri xua peponaenexa bapong pía xaiña weya tatsi. Bapong matowa teikéibat̄si kauri. Báyatha bekein jiwí taxukúbeiba yawa pemáxüno penáintotha xua bapong xua jopa peponaenexa, íchitha bapong nainxuneiba. Bapong ira xuépana susato tsúrukuaē nakua beya itorobéibat̄si kauri. ³⁰Jesús yáin̄aba:

—¿Eta powüm? jei Jesús.

Bapong jumenota éxanatsi Jesustha. Bapong namchi, jeye:

—Tawüng ayéi, jei.

Baxua namchi tsipéi báyatha kauri bicheitokunto pata bapongtha. ³¹Ekeicha bárapo pebin kueikueijeí éxanatsi bárapo kauri bicheitokunto. Bárapo kaurikunto namchi, jeye: “Jesús jopa pana neitawetsinde po nakua ira béreka ichaxota jiwí átene tsaibi”, jei bapong xua kueikueijeí éxanatsi kauri. ³²Pin marrano duweimonaē pitapatorórotha jinompa xua yawa xayómpano. Kaurimonaē Jesús jumedangweya wúükatsi, jeye: “Pana nepukopabare marrano duweimonaetha”, jei. Jesús namchi: “Moya pataema”, jei. ³³Néxata kaurimonaē pebin wepu pónatsi, yawa marrano duweimonaetha pata. Bárapo marrano duweimonaē dúkúpa, pin pitapatororo othopareka. Púkuatha bunothopa. Kaurimonaē kabunothópatsi.

³⁴Pomonaē yapu-eena bárapo marrano duweimonaē junuwiya kuinaenouta tómarangtha xuano tómarang aishowapiwi, xua pepaebinexa xua baxua éxana. ³⁵Jiwí poxonaē baxua tane, pata baxota ichaxota Jesús unguwa. Tainchi pong wepu poinchi kaurimonaē. Bapong Jesús petaxu deka taékatsi, xuano paparuwa namaxatateka. Axaibiya eka, be pókotsin jopa matsiyaibichi. Bárapo jiwí junuwa nawita. ³⁶Pomonaē kopiya tane, barapomonaē ekeicha tsipaeba ichamonaetha, pomonaetha, pomonaē jopa taeyo pokoyene xua bapong ekeicha jume xua kopiya bekein yakauríbat̄si. ³⁷Poxonaē daxita bárapo Gerasa nakuapiwi jumetane baxua, daxita barapomonaē Jesús itawétatsi xua pewarapaenexa bara weya xua Gerasa nakua weya, poxorú barapomonaē junuwa bichokono. Daxota Jesús jératha nontabiya bara wárapano. ³⁸Pebin, pong wepu poinchi kaurimonaē, Jesús wúükatsi xua bépara punaponaetsei Jesús. Íchitha Jesús jopa kopatsiyo xua pepunaponaewa tsainchi bapong.

³⁹—Jiña bo beya pónare. Daxita páebare jíwítha xua báyatha Nakom kata éxana, jei Jesús.

Pebin náwiya tómara beya yawa daxita páebano tómaratha xua pokoyene báyatha Jesús taéxana xua bapong takanaéxanatsi.

**Meje yábara xua poxonae Jairo pexantiyo taaxaibi éxanatsi;
yawa yábara xua bapoxonae irü icha yábüyo axaibi
éxanatsi poxonae Jesús pía paparuwa tajayabatsirü**

(Mt 9.18-26; Mr 5.21-43)

⁴⁰Poxonae Jesús kaibe patoparena Galilea nakua bérena, jiwi Jesús matenta weiweinaya wábatsi, tsipéi daxita barapomonae Jesús éwatatsi. ⁴¹Néxata pebin patopa pong pewüing Jairo. Bapong Jairo pong kanamataxeina judiomonae pía penakaetútsibo tatsi. Jesús petáxutha írabe tatayekarékatsi. Baxua Jairo éxana poxoru Jesús pong aiñakuí peexanaeinchi. Bapong Jairo Jesús jumedangweya wábatsi, jeye: “Antha tabotha pónare”, jei Jairo. ⁴²Bapong baxua paeba tsipéi Jairo pexantiyo saya kompa tatsi. Barapowayo doce po weibe xeina. Bapowayo muxu petüpáe.

Poxonae Jesús iya irü pin bicheito nápona. Bichokono jiwi akükü. ⁴³Bárapo pin bichéitha yábüyo irü nápona. Bapowa kaena báyatha beya yadoce po wéiyobe jopa xua péntabü jánatha boka xua be nantawane. Barapowa daxita kobekaewítatsi xua peaxaibi exanaenexa tsainchi. Pomonae jiwi peyawüübiwi kobekaewita dáichitha jopa axaibi exanaetsi. ⁴⁴Bapoxonae barapowa imoxoyo kakuita unguataba Jesús peputha tatsi. Barapowa Jesús pía paparuwa tatsi tajáyabatsi xua peopírawa. Bapoxonae kaena naiña bapowa ajaneibi tsanareka. ⁴⁵Néxata Jesús yáñaba bárapo pin bichéitha, jeye:

—¿Jintam nejáyabara? jei.

Daxita barapomonae paeba xua pinae jopa jayabíchiba. Daxota Pedro barái:

—Patatanekuidubim, bárapo pin bicheito akükü kanapunatorobábiya tane, dakotsiwa jam: ‘¿Jintam nejáyaba?’ jam, jei Pedro.

⁴⁶Íchitha Jesús jumenota:

—Ichüing nejáyaba tsipéi taayapusüüwa newepu jíwana aichúrukuae xua axaibi éxanang, jei Jesús.

⁴⁷Petsiriwa yaputane xua kobeyaputainchi xua Jesús kobeyaputane poxonae bapowa jáyaba. Barapowa junuwiya patopa yawa pentabokototha unguua ira betaeungkuarékano Jesús petáxutha tatsi. Baxua éxana bapowa poxoru Jesús aiñakuí peexanaeinchi. Néxata barapowa namchi bárapo bicheito peitabaratha, jeye:

—Ápara xang jáyabang. Poxonae jáyabang kaena naiña axaibin, jei. ⁴⁸Néxata Jesús barái, bapowa baraichi, jeye:

—Yábüyo kaaxaibi éxanatsi tana neyábara jumekowüntsixaem xua bara tana neitaküüpaewa xua takaaxaibi exanáewatsi. Saya jüntemiya póponde, jei Jesús.

⁴⁹Poxonae kataunxuae Jesús tsipaebauya bapówatha, pebin irü patopa pong Jairo píabo tatsi weya pona. Bapong tsipaeba pongtha pong pekanamataxeinaeinxae judiomonae pía penakaetutsibotha tatsi pong Jairo. Jairo baraichi, jeichichi:

—Nexantiyo báyatha kata tüpa. Jopa kame fayakotsinde pong jiwi Pekuidubin, jeichichi Jairo bapong.

⁵⁰Íchitha poxonae Jesús jumetane baxua, xua Jairo baraichi, Jesús barái, Jairo baraichi, jeye:

—Jopa junuwinde, maisha saya nejumekowünde. Nexantiyo kata axaibi tsane, jei Jesús.

⁵¹Poxonae botha pata, Jesús jopa juntukuru bebarü joniyaeyo ichamonae. Saya meisha Pedro irü Santiago irü Juan irü powayo tüpa paxa tatsi, bapong Jairo yawa pena tatsi, Jesús barü joniya barapomonae. ⁵²Daxita barapomonae yábüyo siwawawaya wekoyeichi. Íchitha Jesús barái barapomonae, jeye:

—Jopa pawekóyande, yábüyo ápara jopa tüpaeyo, maitungkua ápara, jei Jesús.

⁵³Íchitha Jesús jumeKapónatsi barapomonae. Tsipéi barapomonae yaputane xua yatsikaewa ápara tüpa barapowayo. ⁵⁴Néxata Jesús jumedangweya kobepichiya barái, jeye:

—¡Já, owáe asiya unguatábare! jei Jesús.

⁵⁵Barapowayo ekeicha petüpaewa nakosataxuba, kaena naiña asiya unguataba. Jesús itoroba barapomonae xua barapowayo peapatsinéxatsi pexaewa. ⁵⁶Barapowayo paxa tatsi irü pena tatsi najüntükoyene kabenaekaeya tánebe. Jesús barapomonae tsipaeba xua jopa kuiyopichi tsainchi ichamonaetha xua pokoyene bapong peexanaexae.

**Meje yábara poxonae Jesús pijimonae itoroba xua barapomonae
peyábara kueikueijeinexa jíwitha pokoyene xua Nakom waba
jiwi xua petanaexanaenéxatsi pijimonae tatsi**

(Mt 10.5-15; Mr 6.7-13)

9¹Jesús pijimonae kaetuta pomonae xua doce póyobe. Yawa pijimonae kata pía peayapusüüwa. Matáütano kátano peitorobi koyenewa xua barapomonae peita-weteibinexa tsane kauri xuano xua peaxaibi exanaenexa tsaibi tsane jiwi pomonae átene. ²Jesús itoroba barapomonae xua barapomonae peyábara kueikueijeinexa tsane jíwitha xua pokoyene Nakom waba jiwi xua petanaexanaenéxatsi pijimonae pomonae itoroba peewatsixae. Matáütano itoroba xua barapomonae peaxaibi exanaenexa tsane jiwi pomonae átene. ³Jesús barái pijimonae:

—Jopa pakaponaeinde ichawa xua paiña nekawarapaenexa. Matáütano jopa iwabi pakaponaeinde, yawa jopa kote pakaponaeinde. Matáütano jopa pakaponaeinde pexaewa, yawa jopa pakaponaeinde parátixi. Saya kae kamisha panamaxátabare, jopa icha kamishang pakaponaeinde. ⁴Botha po botha papatsíname, bárapo botha paiña nepuenaeninde bapoxonae bárapo botha paiña nepuwara-paeinde. ⁵Pomonae xua ichaxota jopa paka matenta weyataya wábiyo bárapo tómara weya pawárapare. Panataxu wenünübábare tsórobong po tsórobong paiña táxutha dubena. Baxua paexande xua barapomonae peyaputaenexa xua abe éxana paxamtha, jei Jesús.

⁶Bara barapomonae ponarúküpa. Matáütano barapomonae pona daxita karepaya peya tomaraxitha. Matáütano papaeba tsíniya Nakom pía pekapanenebiyáe jume diwesi tatsi. Yawa axaibi éxana tsiníyano jiwi pomonae átene.

**Meje yábara poxonae Herodes Juan yábara jume ünthüthü deideijeichi
pebexubixaetsi báyatha**

(Mt 14.1-12; Mr 6.14-29)

⁷Bapoxonae Herodes Galilea nakuapiwi pía peyanakua ewatsinchi daxita jume-tane xua Jesús éxana. Bapong Herodes jopa xapain beta nantaxeinaeyo. Tsipéi ichamonae katsawa Jesús yábara namchichi: “Ápara bapong Juan, pong bekein báyatha tüpa, ekeicha asüü juina”, jei. ⁸Irü ichamonae namchi: “Bapong ápara

Elías, pong tsita naitüüta jíwitha”, jei. Irü ichamonae namchi: “Ápara pomonae báyatha Nakom peitorobi jume pepaebiwi, barapomonae jíwana, bapong ápara, pong petüpaein ekeicha juina”, jei barapomonae. ⁹Íchitha Herodes namchi:

—Bara báyatha ichamonae kobe-itorobakoumba xua Juan pewishi-ukuibíwatsi. ¿Jintam metha bapong xua yábara jumetang nawita xua pinae peitüpanaewang éxana? jei. Herodes bichokono beyaitaena, Jesús beyaitaeinchi pong wüünae peexanaein.

Meje yábara poxonae Jesús ápata pexaewa cinco mil pebiwi

(Mt 14.13-21; Mr 6.30-44; Jn 6.1-14)

¹⁰Poxonae pata pomonae Jesús itoroba, barapomonae Jesús tsipáebatsi daxita pokotsiwa xua barapomonae éxana. Jesús tsana barü jopa bárapo pijimonae tatsi xua pin bicheito weya. Ichaxota jiwí aibi, Jesús bara beya barü pona pijimonae, Betsaida tómara pekuariya beya barü pona. ¹¹Íchitha poxonae bárapo bicheito yaputane xua xota Jesús ponaena, bárapo bicheito irü Jesús punapoinchi. Jesús matenta weiweinaya waba bárapo pin bicheito. Matáütano Jesús yábara tsipaeba bárapo bichéitha pokoyene xua Nakom waba jiwí petanaexanaenéxatsi pijimonae pomonae itorobiya pekanamataxeinaexae. Matáütano Jesús axaibi éxana atenemonae.

¹²Poxonae imoxoyo tabópiya Jesús barompaya pijimonae tatsi pomonae xua doce póyobe, barapóyobe Jesús imoxoyo kakuita umenariükúpatsi. Jesús baráichichi, jeye:

—Bárapo bicheito itoróbare pejeichinexa tsane xua ichaxota maichina xuano xua pexaewa pejeichinexa tsane tomarangxitha yawa po bong pipatotha umena. Poxoru xote aibi pexaewa yawa bong xua ichaxota pemaichiwa tsane, jeichichi Jesús pijimonae.

¹³Íchitha Jesús barái pijimonae:

—Paxam paápare pexaewa, jei Jesús.

Jesús jumenótatsi pijimonae:

—Saya ápara cinco po panbe paxeinang matáütano saya aiñobe paxeinang duwéiyobe. Ápara akoibi tsipéi pin bicheito. Metha paponang pata komotsinexa icha pexaewa, daxita barapomonae nexa, jei.

¹⁴Bárapo bicheito be cinco mil pebiwi. Néxata Jesús pijimonae barái:

—Pana nantaüre xua ichamonae tsana eeniyaena be cincuenta pomatabüxúyobe tsíniya, jei.

¹⁵Bara Jesús pijimonae tatsi éxana pokotsiwa xua Jesús paeba. Bapoxonae bárapo pin bicheito íratha ena. ¹⁶Bapoxonae Jesús pan pita cinco po panbe, yawa duwéi aiñobe pítano. Jesús itaboko benekoicha, Paxa tsipaeba: “Axa, maisha jüntükoyene weiweinang xua pexaewa pata tanekatsiwaxaem”, jei Jesús. Poxonae Jesús epajanakiya nakobeweta, pijimonae kaitoroba xua pekatsibaponaenexa tsane bárapo bichéitha. ¹⁷Bara daxita nábane, yawa bara daxita jain kowüntarükúpatsi. Bapoxonae Jesús pijimonae tatsi doce pokote matabüxúyobe wünba xua báyatha nakópaba pokotsiwa xua báyatha bárapo jiwí jopa xaeyo petonsanaexae.

Meje yábara poxonae Pedro namchi Jesustha jeye:

“Xam ápara Mesías pong Nakom kaitorobika”, jei Pedro

(Mt 16.13-19; Mr 8.27-29)

¹⁸Kaentakábitha Jesús Nakom tsipaebáwiya, meisha pijimonae barü pona. Bapoxonae Jesús yáiñaba pijimonae, jeye:

—¿Eta jiwi neyábara jei pokoyene xua xang bapong áparang? jei Jesús.

¹⁹Barapomonae Jesús jumenótatsi, jeye:

—Ichamonae kayábara jei: ‘Ápara bapong Juan pong jiwi Pebautisabin, pong ekeicha petüpaein asüü juina’, jei. Irü ichamonae kayábara jei: ‘Ápara bapong Elías, pong ekeicha petüpaein asüü juina’, jei. Írürü ichamonae kayábara jei: ‘Ápara bapong jíwana pomonae Nakom peitorobi jume pepaebiwi, pong petüpaein ekeicha asüü juina’, jei, Jesús pijimonae tatsi.

²⁰Néxata Jesús pijimonae yáíñaba, jeye:

—Ínkane irü paxamdü, ¿eta pana neyábara jumichimdü xua xang eta pong-düing? jei Jesús.

Pedro jume epapita:

—Xam ápara Mesías, pong Nakom kaitorobika, jei Pedro.

Meje yábara poxonae Jesús nayábara diwesi paeba pokoyene xua petüpaewa tsane

(Mt 16.20-28; Mr 8.30—9.1)

²¹Jesús pijimonae muxubarái, xua pijimonae jopa peyábara paebinéxatsi icha-monaetha. ²²Yawa barái pijimonae pokoyene xua bexa ichamonae Jesús kana exanaeinchi. Jesús namchi, jeye:

—Xang pongxaein Nakom Tananeitapetsin, jiwi bichokono nepéraxa jübina. Matáütano pítiri jiwi írürü sacerdotemonae pía pentakaponaewi tatsi, írürü pomonae jiwi pekuidubiwi Moisés pía peitorobi koyenewa tatsi, daxita barapomonae neitawétsina. Matáütano barapomonae nebexubina. Íchitha ekeicha asüü poponaein poxonae akoibi po matakabíyobe tsuxubi tsane, jei Jesús poxonae nayábara paeba.

²³Bapoxonae Jesús barái daxita pijimonae, jeye:

—Icha pebin ichichipa xua tajiwimonae jíwanapin penaexanaewa tsane bewa bapong yábara naitématsi pokotsiwa xua bapong ichichipa pía peéxanae koyenewang tatsi. Bapoxonae jame bapong bewa eexanaponáe daxita matakabi pokotsiwa itorobang bekein bara bapong bexotsi ichamonae, tajiwimonae jintongxae. ²⁴Pong naantobeya nata éxana pokotsiwa bapong ichichipa, bapong jopa xeinaeyo peajüntüyapusüüwa, po peajüntüyapusüüwa ataya tsiteka xua Nakom pía nakua beicha. Íchitha pong neantobeya inta éxana pokotsiwa ichichipang bapong xeinaena peajüntüyapusüüwa, po peajüntüyapusüüwa ataya tsiteka xua Nakom pía nakua beicha. ²⁵Icha pebin bichokono kopei xeina pokotsiwa xeina po kae pin nákuathe, íchitha jopa xeinaeyo peajüntükoyenesüüwa, po peajüntükoyenesüüwa ataya tsiteka, bapoxonae bapong jopa itaküüpaetsi xua pena jüntükoyene kapanepaewa xua jopa pewerawerakaewa. ²⁶Icha ichüing neakaura, yawa nejume diwesi akáurano, xang pongxaein Nakom Tananeitapetsin xuya bapong akaurang tsane. Baxua exanaein poxonae patopaetsikaein be jiwi pía Pekanamataxeinaein tatsi yaitüpanae susato patopaetsikaein. Taxa pía peitüpanaewa tatsi yawa patopeikaein. Matáütano Taxa pía matatsunpiwi tatsi nebarü patsikaena, jei Jesús. ²⁷Bara xaniwaicha paka tsipáebatsi xua pomonae xote umene abü barapomonae jopa wérápae tsane. Barapomonae jíwana kopiya matha nekotsina xua pokoyene Nakom waba jiwi xua petanaexanaenéxatsi piamonae pomonae itorobiya peewatsixae, bapoxonae barapomonae werapaena, jei Jesús.

**Meje yábara poxonae Jesús pijimonaе peitútha
pexeiña itúpanae koicha tsanaya náexana**

(Mt 17.1-8; Mr 9.2-8)

²⁸Poxonaе ocho po matakábibe jopa xua poxonaе Jesús bárapo diwesi paeba, bapoxonaе Jesús pona demuxuwa beicha petsipaebinexa Nakom. Pedro irü Juan irü Santiago bárapo matabüxúyobe barü póinchibe. ²⁹Poxonaе Jesús kataunxuae Nakom tsipaebaуа, bapoxonaе icha itabara tsanaya. Matáúta penamaxatatsíwano íñapana tsanaya yawa bichokono daedaena tsanaya. ³⁰Néxata pebinbe yaitúpanae be dámaku patópabe. Bapongbe, irü Jesús, bapóyobe nabarü kueikueijeibe. Pongbe xua Jesús jemeicha tsita patopatsibe, bapong Moisés irü ichüng pewüng Elías, pongbe xua kaena báyatha naxúbabe. ³¹Bapongbe yábara barü kueikueijeibe xua Jesús petúpaewa tsane xua péraxa jübinchi ichamonae Jerusalén tómaratha. ³²Bekein Pedrobarü bichokono itamáipana dáichitha nakosatumena. Pedrobarü tane xua Jesús yamatawakaicha pexeiña itúpanae be dámaku tsungkuaetsi. Matáütano Pedrobarü tane pongbe Jesús barü unguа, Moisés irü Elías. ³³Moisés irü Elías, poxonaе bapongbe Jesús weya nataébabe, bapoxonaе Pedro Jesús baráichichi, jeye:

—Jiwi Nekuidubin, maisha wüünae xua xote pata umenaewa. Pákata akabinchi akoibi po bótobe, kae bouto xam nexa, icha bouto Moisés nexa, icha bouto Elías nexa.

Íchitha Pedro beta jopa yaputaeyo xua baxua paeba. ³⁴Poxonaе Pedro kataunxuae barü kueikueijeie Jesús, bapoxonaе daxita pexaiña bematawakaicha tarunéikatsi tsakinaebowa. Poxonaе barapomonaе tsakinaebowa tütutha nataerúküpa bichokono junuwa. ³⁵Néxata barapomonaе tsakinaebówatha pejume jumetane xua Nakom namchi, jeye: “Bapong ápara Taxanto, pong bichokono antobein, pong itapetang. Bapong beta pajumetaema pokotsiwa paka tsipaeba”, jei Nakom.

³⁶Poxonaе Nakom najumeweta, Pedrobarü nekobarúküpa xua Jesús beya kompa unguа. Pedrobarü saya moya. Jopa pejumeyo ichamonaetha xua tane.

Meje yábara poxonaе Jesús kauri taitaweta xua pewowin kauribatsi

(Mt 17.14-21; Mr 9.14-29)

³⁷Baya poxonaе Jesús bárapo akoibi póyobe pijimonaеbe dabe barü dunareka Jesús pin bicheito matenta poinchi. ³⁸Néxata bárapo bichéitha jíwana pebin, bapong jumedangwéi wawái, jeye:

—Jiwi Nekuidubin, ínkane inta taema taxanto. Bapong taxanto inta kompa pebin. ³⁹Taxanto inta wáetabatsi kauri, inta papái éxanatsi, yawa inta íratha bebaichi. Matáúta inta koibo thamthamei éxanatsi poxoru matayáibatsi éxanatsi. Inta taxanto kuitatainchi jopa bepusorobabeibichi bárapo kauri. ⁴⁰Báyatha bekein jíñamonaе jumedangweya kui-itorobang: ‘Painta taxanto taitawere kauri’, jang. Íchitha jopa itaküüpaetsi xua taxanto inta petaitawetsíwatsi kauri, jei pewowin paxa tatsi.

⁴¹Jesús barái pin bichéitha, jeye:

—¡Paxam barapomonaе pam pomonaе jopa xapain kataunxuae pana nejumeko-wüntsím! ¡Paxam barapomonaе pam, peajüntükoyénebe jiwi pam! ¿Eta po weibe nantawénonang xua bewa tapaka barü ekaewa tsainchi xua beya poxonaе tapana

nejumekowüntsiwam tsane? ¿Matáütano eta po weibe ekeicha nantawénonang xua tapaka kayawenáewatsi tsainchi? jei Jesús.

Néxata Jesús barái pewowin paxa tatsi, jeye:

—¿Nexanto inta karenande! jei Jesús.

⁴²Poxonae pewowin kataunxuae Jesús itiya poinchi, bapoxonae ekeicha pewowin íratha xotsi kauri. Ekeicha pewowin koibo thamthamei éxanatsi. Íchitha Jesús taitaweta kauri pewowin. Jesús axaibi éxana pewowin. Ekeicha Jesús kaewa kata. Koxiyang kaewa kátatsi pexántoxae. ⁴³Daxita bárapo pin bicheito yábara najüntükoyene kabenaeka pokotsiwa pewowin pexeiña koyene taéxanatsi Nakom.

Meje yábara poxonae ekeicha Jesús nayábara paeba xua poxonae tüpaena

(Mt 17.22-23; Mr 9.30-32)

Poxonae áwiya kataunxuae yábara najüntükoyene kabenaekompa bárapo pin bicheito pokotsiwa Jesús éxana, bapoxonae Jesús pijimonae barái:

⁴⁴—Ínkane beta pajumetaema, yawa jopa pana nejume-itoroba kayábara jünte-mainaeinde. Xang, pongxaein Nakom Tananeitapetsin jiwi, nekaenaetsina icha-monaetha xua tanebexubinexa tsane, jei Jesús.

⁴⁵Íchitha Jesús pijimonae jopa xapain jumeyaputaetsi xua barái. Barapomonae jopa takopatichi Nakom xua Jesús pejumeyaputaewa tsainchi. Barapomonae junuwa xua Jesús yábara peyaiñabiwa tsainchi xua Jesús yaputane peexanaenexa xuaunxuae paeba.

Meje yábara poxonae Jesús yábara yáiñabatsi pijimonae pokoyene xua pong peaiñakuí peexanaeinchi

(Mt 18.1-5; Mr 9.33-37)

⁴⁶Néxata Jesús pijimonae tatsi kaemonae yábara nayáiñaba, najéi: “¿Jintam paxangtha bichokono peaiñakuindá xua beyakaincha ichüing?” jei. ⁴⁷Jesús yaputane baxua pokotsiwa barapomonae yábara nantaxeina. Néxata Jesús kobepita pexuyo yawa pexaiña kuaranoreka. ⁴⁸Néxata Jesús barái pijimonae:

—Pong matenta weyataeya waba peyawenaenexa pongtha pong tana nejumekowüntsixa xua pókotsin icha be barapókotsi pexuyo ichi barapong bara ápara nententa weyataeya waba. Xang jopa meisha nententa weyataeya wábiyo ápara bara irü matenta weyataeya wábatsi pong tana neitoróbixae xua pong bara Nakom. Daxota pong paxam jíwana pam, pong jopa paka tsita aiñakuíyo, bapong jame Nakom tsita aiñakuichi, jei Jesús.

Meje yábara poxonae Jesús barái pijimonae:

“Pong jopa nákata abe exanaeyo, bapong ba ápara naka yawena”, jei

(Mr 9.38-40)

⁴⁹Néxata Juan Jesús baraichi, jeye:

—Já Tanekuidubim, paxang kaein patang pong kawüngtaiba poxonae itaweta kaurimonae, xua kaurimonae itawétatsi. Paxang baxua pakui-itawetang tsipéi jopa naka punapoponaeyo, jei Juan.

⁵⁰Íchitha Jesús jumenota, jeye:

—Jopa pakui-itawetsinde, tsipéi pong jopa nákata abe exanaeyo bapong ba ápara naka yawena, jei Jesús.

**Meje yábara poxonae Jesús jume itaweta,
Santiago irü Juan jume itawétatsibe**

⁵¹Poxonae imoxoyo matakabi jopaena, po matakábitha Jesús athabeicha tsane, xua Nakom exanaena, bapoxonae Jesús bichokono áwiya nantüsüüba xua pepo-naewa tsane Jerusalén tómara beya. ⁵²Jesús nawüünae jumekaitoroba pía jintongbe tatsi. Bárapo Jesús pía jintongbe tatsi pónabe Samaria nakua beya. Pónabe xua botutu pewüükaenexa tsánebe po tómara bárapo Samaria nákuatha eka xua Jesús peekaenexa. ⁵³Íchitha bárapo tomarapiwi xua Samaria nákuatha jinompa, barapomonae aichaxaibi xua Jesús weiweinaya pententa wabíwatsi baxota poxoru barapomonae yaputane xua Jesús pona Jerusalén tómara beya. ⁵⁴Íchitha Santiago irü Juan poxonae baxua tánebe, pongbe bekein tawüükabe botutu Jesús nexa, bapongbe Jesús baraichi, jeye:

—Pata Tanekanamataxeinaem, ¿xam ichichípame xua paxang ishoto pawüükaein po ishoto xua itaboko wétsika xua petautsinéxatsi barapomonae? jei bapongbe.

⁵⁵Néxata Jesús pijimonae napatomeicha nekota yawa jume itaweta. ⁵⁶Néxata ekeicha Jesús pijimonae barü pona icha tsiki tomariyo beya.

**Meje yábara poxonae Jesús yábara paeba
pomonaе ichichipa xua pepunaponáewatsi
(Mt 8.19-22)**

⁵⁷Poxonae námtotha enapona, pebin Jesús baraichi, jeye:

—Pata Tanekanamataxeinaem, ichichipang xua takapuna ponáewatsi xua ichaxota póname, jei pebin. ⁵⁸Jesús jumenota, jeye:

—Namomonae ba pía müthüng xeina ichaxota pemaitathopeibiwa. Irü peyapupunaewi ba kotong xeina ichaxota peyamaitathopeibiwa. Nama xang pongxaein Nakom Tananeitapetsin nama jopa dáichino. Nama jopa xeinaeiño bo xua tabo xua ichaxota nafinakáekang, jei Jesús.

⁵⁹Jesús barái ichüngtha, jeye:

—Nepunaponde.

Íchitha bapong Jesús jumenótatsi, jeye:

—Tanekanamataxeinaem, nepukópare xua taxa matha müthütha xubichi kopiya xua bapoxonae takapuna ponaenéxatsi, jei.

⁶⁰Jesús jumenota, jeye:

—Bara kópare xua petüpaewi müthükaeinchi, pomonaе xua be pewerapaewi jopa betanejumekowüntsíwixae, barapomonae müthükaena. Íchitha xam pónare jiña neyábara tsipaebinxae jíwitha pokoyene xua Nakom waba jiwi petanaexanaenéxatsi pijimonae pomonaе itorobiya pekanamataxeinaexae, jei Jesús.

⁶¹Néxata ichüng Jesús baraichi, jeye:

—Tanekanamataxeinaem, ichichipang xua takapuna ponáewatsi. Íchitha kopiya bara nekópare xua tana napeyabiwa tsane tamonaе, tabopiwi, jei bapong.

⁶²Jesús jumenota:

—Pebin ba jopa itaküüpaetsi xua beta penakuichiwa pabi icha saya napatomeicha nekobiya nakuita. Barapókotsi jüta koyeneya ichi, icha pebin éxana Nakom pía petanakuichiwa tatsi jopa xapain exanaeyo xua peyábara paebiwa pokoyene

xua Nakom waba jiwí petanaexanaenéxatsi pijimonae pomonae itorobiya pekanamataxeinaexae icha bapong saya kayábara nantaxeina pokotsiwa bárapo kae pin nákuathe xeina, jei Jesús.

**Meje yábara poxonae Jesús pijimonae itoroba
setenta y dos póyobe pebiwi**

10¹Barapoxonae Jesús pong jiwí Pekanamataxeinaeinxae tatsi, bapong ita-peta ekeicha icha pijimonae tatsi setenta y dos póyobe. Daxita tómarangtha Jesús itoroba be dos póyobe tsíniya, tsika tomaraxíthano, pin tomarangthano xua ichaxota Jesús kotakaya ponaena. ²Jesús barái barapomonae poxonae muxu peitorobi, jeye: “Bara xaniyeya paka tsipáebatsi. Pábita bapokotsiwa peübiwang naweta nawita, dáichitha ba penakuichiwi pomonae jota pinmonae aibi. Bara jüta ichi bárapo kae pin nákuathe. Jiwi pinmonae jinompa pomonae nantawénona pejumetaenexa Nakom pía pexaiña jume diwesi tatsi. Dáichitha pomonae Nakom Pejume Diwesi kueikueijeí tsurubenanáebiya ichamonaetha barapomonae pinmonae aibi saya tsikimonaeyo. Daxota Nakom pawúükare xua pekaitorobinexa tsane ichamonaetha xua petakamuxu tsipaebinexa tsainchi pía pejume diwesi pomonae bárapo kae pin nákuathe pejinompaewi nexa. ³Paponde ichaxota paka itoróbatsi. Paka itoróbatsi pía xaiña beya pomonae jopa jumekowüntsiyo, pomonae itakúü-patsi xua abe paiña nepaka exanaewa icha oveja ichi xua poxonae pona ichaxota neuthü jinompa xua itakúüpatsi xua abe peexanáewatsi. ⁴Jopa pakaponaeinde kote. Yawa parátixi jopa pakaponaeinde. Yawa jopa pakaponaeinde paiña nentaxu xatabiwang. Matáüta jopa ichamonaetha námtotha paewatumeyaeinde xua saya paiña netsipaebinexa. ⁵Poxonae bomüxütha pajojoniyáename, bárapo bopiwi pajakóbare, pajande: ‘Bárabü Nakom jüntema jinompa paka kana exanaena’, pajande. ⁶Icha baxota jinompa pomonae jüntema jinompa, baxua Nakom taexanaena xua papáebame. Íchitha icha baxota jinompa pomonae jopa jüntema jinompaeyo, baxua Nakom jopa taéxanae tsane xua papáebame. Ekeicha kaewa pákata parenaena xua baxua papáebame. ⁷Bárapo botha páenare. Paxaema paapareno pokotsiwa barapomonae paka ápata. Paiñaxoba paauram xua paka kata tsipéí báraxua xua paka kata paiña matoma paiña netanakuichixae Nakom. Jopa ichawa beya paponaeinde bongtha, saya bárapo botha páenare. ⁸Poxonae tómaratha papanenebiyam, icha barapomonae paka matenta weyataeya waba, moya paxaema pokotsiwa barapomonae paka ápata. ⁹Axaibi paexande peátene jiwí, pomonae xua bárapo tómaratha ena. Barapomonae pabarande: ‘Ánoxuae Nakom waba jiwí xua petanaexanaenéxatsi piamonae tatsi pomonae itorobiya peewatsixae’, pajande. ¹⁰⁻¹¹Íchitha poxonae icha tómaratha papatsíname icha bárapo tomara-piwi jopa paka matenta weyataeya wábiyo, pajande barapomonaetha: ‘¡Po tsórobong panataxu wenünübabang paiña tómaratha, ápara xua abe paéxaname pata xaiña bérena poxonae pana nejume-itoroba itawétame! Payaputaema, ánoxuae Nakom waba jiwí petanaexanaenéxatsi piamonae tatsi, pomonae itorobiya peewatsixae íchitha pana nejume-itawétame pomonae Nakom pata tana neitorobiwi pangxaein’, pajande. ¹²Xaniyeya paka tsipáebatsi matakabi patopaena. Bárapo matakábitha Nakom yábara paebina jiwí xua penatsikuentsiwa xua abe petsitaexanáexaetsi. Bárapo matakábitha jopa juniya bichokono átene tsane pomonae paka jume itaweta. Íchitha nama pomonae bárapo tómaratha jinompa pomonae

paka jume itaweta jopa juniya átene tsane, beyakaincha poxonae Sodoma tomarapiwi átene”, jei Jesús.

**Meje yábara poxonae Jesús yábara paeba po
tomarangpiwi jopa pejumekowüntsíwichi**

(Mt 11.20-24)

¹³Jesús ekeicha pijimonaetha namchi, pomonae setenta y dos póyobe xua ichamonae yábara páebatsi, jeye: “¡Pai jaibó Corazín tomarapiwi tsobenáe! ¡Irü Betsaida tomarapiwi tsobenáe! Po tsita itüütsi koyenewang éxanang Corazín tómaratha yawa Betsaida tómaratha ichüng jopa bápana exanaeyo bárapo tsita itüütsi koyenewang Tiro tómaratha yawa Sidón tómaratha. Icha bárapo tsita itüütsi koyenewang exanáetsipa Tiro tómaratha Sidón tomarathano, bárapo tomarangbepiwi icha penantaxeináe koyenéwatha yábara nantapentsipa Nakomtha. Barapomonae íratha enáetsipa yawa paparuwang namaxatabíchipa xua pokotsiwa be peru mapatong xua áxüng, yawa ipuna nakaxuebichipa pía pepongtha. Barapomonae baxua exanáetsipa xua ichamonae petsita-itapeiñaxeinaenexa tsainchi xua icha jüntükoyenein Nakom petsita-xeináewatsi peúruxae xua abe peexanaexae. ¹⁴Poxonae bárapo matakabi patopeikaena po matakábitha Nakom yábara paebina daxita jiwi xua petsita-natsikuentésíxaetsi xua abe petsita-exanáexaetsi, Tiro tomarapiwi, Sidón tomarapíwino, daxita bárapo tomarabepiwi bichokono péraxa jübebinchi. Íchitha nama paxam pomonae Corazín tomarapiwi pam, írürü Betsaida tomarapiwi pamdü, daxita paxam jopa juniya paka péraxa jübebí tsane, beyakaincha xua péraxa jübebinchi Tiro tomarapiwi irü Sidón tomarapiwi. ¹⁵¡Ínkane irü Capernaum tomarapiwi pamdü! ¿Bara panantaxéiname xua paka kapanenebiya tsane peitaboko beicha? Jume, ápara paka itorobina petüpáe koyenekuiru béreka.

¹⁶”Pong xua paka jumenaitáewata, barápara nejumenaitáewatarü. Pong xua paka jume itaweta, barápara nejume-itoroba itaweta xang bérena. Pong xua nejume-itoroba itaweta, barichi Nakom jume itawétatsi pong xua tana neitoróbiae”, jei Jesús.

**Meje yábara poxonae ekeicha kaibe parenana Jesús
pijimonae tatsi pomonae setenta y dos póyobe pebiwi**

¹⁷Bárapo setenta y dos póyobe jüntükoyene weiweinaya kaibe nawibarena, jeye: —Pata Tanekanamataxeinaem, kaurimonae pana nejumekowünta xua paitawentang poxonae paka wüngtáibatsi, jei Jesús pijimonae tatsi.

¹⁸Jesús jumenota, jeye:

—Aa, bara báyatha kauri pía pentakaponaein tatsi Satanás tang xua jopeika itaboko wétsika icha yámüxü ichi poxonae ungueika. ¹⁹Paxam paka kátatsi taayapusüüwa paiña netaxunáunaba ponaewa tsane jomong yawa pütongno, xua jopa paiña nepaka kapepeichinexa. Po peayapusüüwa paka kátatsi bichokono dangwéi, beyakaincha paiña nepaka ka-aitafaetabí jintong, pong kauri pía pentakaponaein pía peayapusüüwa tatsi xua xota jiwi abe éxanatsi. Jiwi dapomonae aibi pomonae abe paka kana éxana. ²⁰Jopa pajüntükoyene weiweinaeinde xua kaurimonae pía paka jumejejeixae xua dúküpa poxonae paitawétame, saya jame pajüntükoyene weiwéinare xua Nakom paiña nepaka wüngdúbixae pía diborotha itabokotheicha.

**Meje yábara poxonae Jesús jüntükoyene weiweina
éxanatsi Nakom pía Pejumopetünaxü tatsi**

(Mt 11.25-27; 13.16-17)

²¹Bara kaena bapoxonae Jesús jüntükoyene weiweina éxanatsi Nakom pía Pejumopetünaxü tatsi. Jesús namchi, jeye: “Axa peitaboko Nekanamataxeinaem, yawa ira Nekanamataxeinaem. Wüünae kajáintatsi tsipéi jopa tsita itüübim pokotsiwa pexaiñéi koyenewa xang yábara pomonaetha, pomonae bichokono penakuidubiwi pomonae be piñong penatsikotaewi tsipéi nantaxeina xua bichokono peyaputaewi daxita. Jame nama tsita itüütame bárapo pexaiñéi koyenewa xang yábara pomonaetha, pomonae jopa bichokono penakuidubiwi pomonae be pexui penatsikotaewi tsipéi jopa nantaxeinaeyo xua bichokono peyaputáe jiwi daxita. Axa baxua éxaname nekatsita wüünaexae baxua”, jei Jesús Páxatha.

²²Ekeicha Jesús pijimonae barái pomonae xua setenta y dos póyobe, jeye: “Taxa daxita nekata xua pía peitorobi koyenewa tatsi matáütano xua pía peyaputáe koyenewang tatsi. Dapong aibi pong xaniwaicha nejüntükuikoyene yaputane. Jame saya meisha Taxa Nakom, nejüntükuikoyene yaputane. Dapong aibi pong Taxa jüntükui-koyene yaputainchi ichüng, saya meisha Táxaxae jüntükuikoyene yaputang. Matáüta barichi Taxa meisha jüntükoyene yaputainchi pong saya bara kopatang xua bara Taxa pejüntükuikoyene yaputaewa tsainchi pomonae ichichipang”, jei Jesús.

²³Néxata Jesús pijimonae napatomeicha nekota pomonae xua doce póyobe. Meisha barapomonáebetha barái, jeye: “Jüntükoyene weiweina pomonae xua tane, pokotsiwang xua patáneme. ²⁴Poxoru paka tsipáebatsi, xua Nakom pía peitorobi jume pepaebi jiwimonae irü nákuang peewatsiwimonae, pomonae báyatha napenta barapomonae bekein be taena pokotsiwa patáneme íchitha jopa taeyo. Matáüta barapomonae bekein be jumetaena pokotsiwa pajumetáneme íchitha jopa jumetaeyo”, jei Jesús.

**Meje yábara poxonae Jesús yábara paeba
Samaria nakuapin, pong wüünae éxana**

²⁵Néxata írürü pong jiwi pekuidubin Moisés pía peitorobi koyene tatsi, barapong Jesús piraichi jüntükoyene jüjütsiya yáíñabatsi xua barapong pejume barabotsinéxatsi. Barapong Jesús jeichichi:

—Já Tanekuidubim, ¿eta xua kopiya matha exanokuaein xua ajüntüyapusüüya tapoponaewa tsane xua ataya tsane? jei.

²⁶Jesús jumenota, jeye:

—¿Eta xuara xua bárapo Moisés pía peitorobi koyene diwésitha tina? ¿Eta xua yábara yórobame bárapo diwésitha? jei Jesús.

²⁷Pong jiwi pekuidubin Moisés pía peitorobi koyene bapong Jesús jumenótatsi, jeye:

—Antobeinde jiña Nekanamataxeinaein, bapong Nakom, daxita xua nejüntükoyene wétsina, matáütano xua daxita jiña nepoponae koyenéwatha, matáütano xua nantaxéiname, daxita xua nenantaxeináewatha nentásípatha, matáütano daxita xua nedangwéi koyenéwatham, matáütano antobeinde nekatsikuárabü ekaein icha ichim xua naántobem jiñakoutha, jei pong jiwi pekuidubin Moisés pía peitorobi koyene.

²⁸Néxata Jesús jumenota, jeye:

—Bara beta nejumenótame. Icha báraxua exanáename peajüntüyapusüüwa xeináename po peajüntüyapusüüwa xua ataya tsiteka, jei Jesús.

²⁹Íchitha pong jiwi pekuidubin Moisés pía peitorobi koyene tatsi, barapong áwiya nantaxeina nawita, pía jiwi nantaxeinaetsi xua bapong xeina pexeña peyaiñabiwa. Bapong Jesús yáíñabatsi, jeye:

—¿Jintambarü pomonae tanetsikuárabü enaewi? jei.

³⁰Néxata Jesús jumenota, jeye:

—Írürü pebin Jericó tómara béreka pona, Jerusalén tómara námtotha weya pona. Poxonae áwiya námtotha ekapona jemeicha wáetabatsi pomonae jiwi pekai-biwi. Barapong daxita wekobénótatsi xua pokotsiwa xeina, yawa bütsi. Barapomona-e aichurubena-e, tsika kuiyotha kopatábatsi. ³¹Bapoxonae irü sacerdotemonaepin bárapo namto ekapona. Poxonae barapong yasusüiñataebótatsi sacerdotemonaepin tajü matawakaicha toketaba. ³²Irü levitamonaeepin baxoyo ekapona, bapong irü tajü matawakaicha toketaba poxonae yasusüiñataebota. ³³Íchitha Samaria nakuapin baxoyo irü ekapona poxonae yasusüiñataebota, yábara najüntükoyene xeinanareka peyawenaenexa. ³⁴Néxata Samaria nakuapin imoxoyo kakuita unguataba pong yasusüiñaboka. Bapong wang yawüübékapona penasíwatha vino mérathano. Bapoxonae paparúwatha wang yarabekápona. Bapoxonae búrrotha kuaretsika piyüngtha. Bómüxü beya kápona ichaxota jiwi maiteibathopa. Baxota wüünaeya bota. ³⁵Bapoxonae baya poxonae juntukuru Samaria nakuapin ponáe-naba, pita aiña parátixi. Bapoxonae kata pongtha pong bo pexeinaein. Samaria nakuapin barái pongtha pong bo pexeinaein: ‘Barapong beta wüünaeya bore. Icha parátixi seikanaya, ekeicha bexa kakatsinchi poxonae kaewa denang tsane’, jei Samaria nakuapin, jei Jesús.

³⁶Ekeicha Jesús namchi, jeye: “Bárapo akoibi póyobe jíwana, ¿jintam yábara kanantaxéiname xua wüünae éxana xua peantobexaetsi pong wáetabatsi pomonae jiwi pekaibiwi, yawa xua bütsino?” jei Jesús.

³⁷Pong jiwi pekuidubin Moisés pía peitorobi koyene tatsi, bapong Jesús jume-nótatsi, jeye:

—Pong xua yábara najüntükoyene xeinanareka xua peyawenaenexa, jei bapong.

Jesús jumenota, jeye:

—Pónare, icha pókotsi koyeneya Samaria nakuapin ichi barichiya éxande, wüü-naeya éxande ichamonaetha, jei Jesús.

Meje yábara poxonae Jesús, Marta yawa María siwapóinchibe

³⁸Jesús pijimonae kataunxuae barü ekapona námtotha Jericó tómara beya barü pona. Pijimonae barü patopa tsika tomaríyotha ichaxota petsiriwa pópona powa pewüng Marta. Barapowa Jesús matenta weyataeya wábatsi piabotha. ³⁹Marta peyapiyo nantaüta powa pewüng María. Barapowa María Jesús kakuita ékatsi xua Jesús pejumetaenéxatsi pokotsiwa paeba. ⁴⁰Íchitha Marta énatsi pía penakuichiwa xua Jesús tsiéxanatsi pexaewa xuano xua pijimonae tatsi néxano. Barapowa pona Jesús beya, namchi, jeye:

—Tanekanamataxeinaem, ¿jopa taem xua tayapiyo nekópata xua kompa nakui-tang? Áwiya bobena penakuichiwang. Itoróbare bü neyawena, jei Marta.

⁴¹Íchitha Jesús jumenota, jeye:

—Marta, ka-enauya jiña nenakuichiwang xua pokotsiwa xua ichichípame neexanaewa. ⁴²Saya kae koyene aiñakuí xua xam nantawenóname pokotsiwa xua María éxana xua barompaya itapeta xua wüünae éxana poxonae nejumetayeka. Jintong dapokotsin aibi xua pong María jüntükoyene we-aichurubena exainchi xua nejumetayeka, jei Jesús.

**Meje yábara poxonae Jesús pijimonaе yábara
kuiduba xua Nakomtha petsipaеbiwa**

(Mt 6.9-15; 7.7-11)

11 ¹Kaentakabi Jesús tsipaebauya Nakom icháwatha. Jesús najumeweta, bapoxonae pijimonaе tatsi jíwana póyobe xua doce póyobe Jesús baraichi, jei: —Jesús, Pata Tanekanamataxeinaem, pana nekuidúbare xua Nakomtha pata tsipaеbiwa, icha Juan ichi xua pijimonaе kuiduba, jei bapong.

²Jesús barái barapomonaе, jeye:

—Poxonae Nakom patsipáebame, pajande:

‘Pata Taxam xam pongxaem peitabókotha athabeicha neekaein.

Bárabü daxita jiwi kabarü kui-iturajina nejüntükoyene wüünaewa nexenaexae.

Bárabü jopaena matakabi po matakabi xua poxonae xam jiwi itorobiya kanamataxeináename bárapo kae pin nákuathe.

³Daxita matakabin pexaewa pana katsibéibare po pexaewa daxita matakabi pata kanantawenonaewa.

⁴Pana neyábara kuikanajüntemáinare xua abe pata katsita exanáewatsi.

Bapoxonae pana neyábara kuikana-exánare xua jopa ekeicha pata katsita natsikuentsíwatsi tsainchi xua abe pata katsita exanáewatsi.

Báraxua painta éxande icha paichin ichamonaetha.

Tsipéi paxang kopiya payábara kuikana-éxanang xua ichamonaе jopa pana netsita natsikuentsiyo xua abe pata tanetsita exanaewa.

Jopa pana kopatsinde xua abe pata exanaewa tsane poxonae jiwi pana nejüntükoyene jüjüta xua abe pata exanaewa tsane’,

pajande poxonae Nakomtha patsipáebame,

jei Jesús.

⁵⁻⁶Ekeicha Jesús barái, jeye:

—Metha beya tsipae xua kaein paxam jíwana bapong nantaüta pong peyaputaеinchi. Bapong pía peyaputaеinchi beya pona papaetha. Pía peyaputaеinchi barái: ‘Tamo, kakowáetatsi akoibi po panbe, yáitama icha taneyaputaеin patopa pong ánoxuae wárapa tabo bérena. Jopa xeinaeíño xua taapatsiwa bapong’, jei pebin. ⁷Metha pong bómüxü tütutha boka bapong jumenotsipa, jei tsipae: ‘Jopa nejumefayakotsinde bómüxü boupa dangwéi, tapexui barü maitungkuang cámatha. Jopa benontaponaеíño xua pan takakatsiwa tsane’, jei tsipae pong bómüxü tütutha boka. ⁸Paka tsipáebatsi bekein bapong bomüxütha jopa benontaponaеyo, bekein bara pía peyaputaеinchi, dáichitha kata poxoru jumefayakótatsi pía peyaputaеinchi. Matáütano kata daxita xua pía peyaputaеinchi nantawénona. ⁹Daxota paka tsipáebatsi. Matowa pawúükare Nakom, bapoxonae paka katsibina pokotsiwa xua pawúükame. Báraxua matowa paexande icha paichim poxonae matowa

pajeitéibame beya poxonae patáebame, yawa icha paichim poxonae matowa pawawam bomüxütha beya poxonae ichüng paka jumenota. ¹⁰Tsipéi pong matowa wüüka ichüng bara kátatsi. Tsipéi pong matowa nekoba, bara taeba. Tsipéi pong bómüxü pekoibótotha matowa wawái bara takoibo saranaxorénatsi yawa jumenótatsino.

¹¹⁻¹²“Paxam pomonae pexui paxéiname paka yáíñabatsi. Poxonae paiña pexui paka wüüka duwéi, ¿paiña pexui pakatsípame jomo? Jume. Ichakuitha tsipae poxonae paiña pexui paka wüüka petobü, ¿paiña pexui pakatsípame püto? Jume, jopa baxua paraichim tsane. ¹³Bara bekein peajüntükoyénebe jiwi pam, íchitha paxam payaputáneme xua pewüunaewang paiña pexui pakatsibéibame. Íchitha nama Nakom paiña axa jopa juniya paka katsiyo Nakom pía Pejumopetünaxü tatsi poxonae pawüükame. Nakom paka kata beyakaincha poxonae paiña pexui pakatsibéibame poxonae paka wüükeiba”, jei Jesús.

Meje yábara poxonae Jesús baraichi xua pinae xeina Beelzebú pía peayapusüü itorobi koyenewa tatsi

(Mt 12.22-30; Mr 3.20-27)

¹⁴Írürü Jesús taitawetauya kauri xua pebin muxusípana exainchi. Poxonae kauri pebin wepu poinchi, bapoxonae pebin ekeicha paeba. Jiwi yábara najüntükoyene kabenaeka poxonae baxua tane. ¹⁵Íchitha ichamonae namchi: “Bapong kaurimonae itawétatsi ápara pexeinaexae Beelzebú pía peayapusüü itorobi koyenewa tatsi pong kaurimonae pía pentakaponaein tatsi”, jei barapomonae.

¹⁶Ichamonae Jesús wüükatsi: “Pana netsita-itüüre peitüpanaewa xua peitaboko wétsika jopeikaena”, jei. Barapomonae baxua paeba poxoru ichichipa xua Jesús tsita itüütsina, pía yaputaetsi icha barapong pong yatsikaewa Nakom itoroba. ¹⁷Íchitha Jesús yaputane xua barapomonae nantaxeina. Jesús barái:

“Icha kae nakuapiwi nawepu tsátabe xua matáüta nábabe, bapoxonae jopa xaexaenaekaeyo. Matáüta írürü icha kae bomonae matabüxúyobe nábabe yawa nawepu tsatajópabe, bapoxonae jopa xaexaenaekaeyo. ¹⁸Barichi icha Satanás pijimonae tatsi nawepu tsatajópabe matáütano xua nábabe bapoxonae jopa xaexaenaekaeyo. Satanás jopa itaküüpaetsi xua itoroba pijimonae tsipéi amsiya éxana. Baxua paka tsipáebatsi tsipéi naerabiya pana baram: ‘Ápara bapong kauri itaweta Beelzebú pía peayapusüü itorobi koyenewa tatsi pexeinaexae pong kauri pía pentakaponaein tatsi’, pana neyábara jam. ¹⁹Icha Beelzebú pía peayapusüü itorobi koyeneya tatsi kauri itawetang pong kauri pía pentakaponaein tatsi, ¿néxata eta po peayapusüü itorobi koyeneya tatsi paiñamonae kauri itaweta? ¿Írürü barapomonae kauri itawétatsi Beelzebú pía peayapusüü itorobi koyeneya tatsi? Daxota paiñamonae paka yaputane xua ápara paxam panáerabame. ²⁰Íchitha nama xang kauri itawetang Nakom pía Pejumopetünaxü tatsi pía peayapusüü itorobi koyenewatha tatsi xua bárapo pía pejumopetünaxü tatsi tanekatsixae. Baxua ápara paka tsipáebatsi paiña neyaputaenexa, xua paiñaxantha patopang pongxaein Nakom Tananeitapetsin.

²¹”Pebin ba, pong bo pexeinaein, pong xua maxü dangwéi, bapong nayánaba xua xuang peopisojeiwang. Daxota pokotsiwang xua xeina piabotha bara xaniwaicha tabobeinchi. ²²Íchitha icha ichüng patopa pong beyakaincha maxü dangwéi, bapong ba nawita yawa kaiba bárapo peopisojeiwang xua xuang bómüxü

pexeinaein nantaxeina xua barapokotsíwangtha bara xaniwaicha nayáewata. Poxonae bárapo peopisojeiwang bapong kaiba tatsana ichamonae bichokono pematatáeungkuaexae.

²³”Pomonae jopa neyawenaeyo, barapomonae ápara inta abe éxana. Barapomonae éxana xua ichamonae jopa tana nejumekowüntsiwa tsane. Barapomonae jopa neyawenaeyo xua ichamonae nenakaetutsina tajiwiwionaexae tsane”, jei Jesús.

**Meje yábara poxonae Jesús yábara paeba kauri
xua kaewa nauyata pebintha**

(Mt 12.43-45)

²⁴Ekeicha Jesús namchi, jeye: “Poxonae pebin wepu poinchi kauri, bapoxonae kauri pona wéxotha ichaxota ira tsewa pepoponaenexa tsane baxota. Íchitha poxonae jopa kaxinaeyo xua ichaxota pepoponaenexa bapoxonae bapong nabarái: ‘Tha kaibeya ponaetsi pebin beya ichaxota báyatha wepu ponang’, jei kauri. ²⁵Poxonae kaibeya pona kauri kaxina, pebin kaxínatsi xua wüünaeya pópona. ²⁶Néxata ekeicha kauri pona pebin weya. Pirapaeyo bapong barü patopa siete póyobe kauri pomonae bichokono abe, beyakaincha bapong pong kopiya. Daxita bárapo kaurimonae pebin xeina. Ánoxuae bapong nama yatsikaya bichokono abe kana exainchi beyakaincha poxonae kopiya abe kana exainchi poxonae saya kaein”, jei Jesús.

**Meje yábara poxonae Jesús yábara paeba pokoyene
pepa pejüntükoyene weiweinaewa**

²⁷Poxonae Jesús kataunxuae kueikueije tsungkuae bárapo diwesi, baxota pin bichéitotha petsiriwa jumedangwéi wawái Jesustha, jeye:

—¡Maisha ena jüntükoyene weiweina powayo xua báyatha kaéxana yawa xua mito kaápatano! jei petsiriwa.

²⁸Íchitha Jesús barái petsiriwa, jeye:

—¡Bekein barichi, jame yatsikaewa jüntükoyene weiweina pomonae jumetane xua Nakom paeba xuano xua éxana pokotsiwa Nakom itoroba! jei Jesús.

**Meje yábara poxonae pomonae peajüntükoyénebe jiwi Jesús
kui-itoróbatsi xua peexanaewa tsane pexeña petsita-itüütsi koyenewa**

(Mt 12.38-42; Mr 8.12)

²⁹Jesús imoxoyo matawakaicha uménatsi pin bicheito. Jesús barái bárapo pin bicheito, jeye: “Jiwi pomonae ánoxuae jinompa barapomonae peajüntükoyénebe jiwi. Barapomonae nekui-itoroba xua bepa pinae tsita exanaein tatsita-itüütsi koyenewa xua pexeña koyenewa. Íchitha jopa exanaein tsane icha tatsita-itüütsi koyenewa xua pexeña koyenewa, saya meisha exanaein icha báyatha jüta koyene kana ichichi Jonás pong Nakom peitorobi jume pepaebin, pong kaena báyatha tüpa. ³⁰Kaena báyatha Nínive tomarapiwi Jonás yaputainchi pong Nakom peitorobi jume pepaebin xua pokoyene bapong Jonás Nakom peitorobinchi, tsipéi Nakom bichokono Jonás aiñakuí éxanatsi. Xang pongxaein Nakom Tananeitapepsin Nakom aiñakuí neéxana. Daxita jiwi pomonae ánoxuae jinompa barapomonae neyaputane pokoyene xua xang Nakom neitorobika peitaboko wétsika. ³¹Matakabi patopeikaena po matakábitha Nakom yábara paebina jiwi xua penatsikuentsiwa daxita pepéraxa exanaenexa xua abe peexanaexae. Bárapo matakéitha tsane

petsiriwa powa kaena báyatha tüpa, bapowa asiya ungkuaena Nakom peitabaratha tatsi. Barapowa pía nakua, nakuapiwayo, po nakua pokotsiwa párowa béreka tajü béreka eka. Barapowa pía nakuapiwi tatsi itorobiya pía pepa peewatsíwayo. Barapowa yábara kueikueije tsane pomonae xua ánoxuae jinompa poxonae ungkuaena Nakom peitabaratha tatsi. Jei tsane bapowa: ‘Maisha pomonae xua jinompa poxonae Mesías pópona po írathe deke, barapomonae abe bichokono peexanaewi tsi-péi ajüntükoyenetaetabiya jumentane pokotsiwa Mesías kuiduba bekein Mesías bichokono peyaputaen’, jei tsane barapowa. Barapowa baxua paebina poxoru bapowa báyatha tajü wérena pona pesiwaponaenéxatsi Salomón, pong kaena báyatha Israel nakuapiwi itorobiya pía pepa peewatsinchi. Bapowa yaputane xua Salomón bichokono peyaputaen xua Nakom peyábara yaputáewatsi. Daxota bapowa ichichipa xua pekuidubinéxatsi xua Salomón pekuidubinexa Nakom yábara. Nama xote úngkuangje pongxaein taexanaein pokotsiwa pepa peaiñakuí koyenewa xua takuidubin daxita jíwitha xua Nakom yábara. Barapókotsi koyenewa toxeinchiya aiñakuí koyenewa beyakaincha pokuikoyene Salomón éxana poxonae kuiduba xua barapowa kuidúbatsi xua Nakom yábara. ³²Barichi bárapo matakábitha Nínive tomarapiwi, pomonae kaena báyatha jinompa barapomonae abeya paka yábara paebina poxonae umenaena Nakom peitabaratha. Barapomonae baxua exanaena tsipéi bárapo Nínive tomarapiwi icha jüntükoyene xeina Nakomtha peúruxae xua abe éxana kaena báyatha poxonae Jonás muxuwetsiya tsipaeba barapomonaetha Nakom pía pexaiña jume diwesi tatsi. Íchitha paxam jopa bara paichim, jopa icha jüntükoyene paxeinaem. Nama ápara xote úngkuangje pongxaein taexanaein pokotsiwa pepa peaiñakuí koyenewa xua takaponaewa Nakom Pejume Diwesi daxita jíwitha. Barapókotsi koyenewa toxeinchiya aiñakuí koyenewa beyakaincha Jonás pokuikoyene éxana poxonae Nakom Pejume Diwesi kápona Nínive tomarapiwitha”, jei Jesús.

Meje yábara poxonae Jesús yábara kuiduba jiwi pokoyene wüünaeya peexanaewa pejüntükoyene wétsina

(Mt 5.15; 6.22-23)

³³Jesús namchi jíwitha jeye: “Jintong dapong aibi pong pekoicha kueicha éxana xua kirei pebüxüpana wétsina, yawa xua kueicha matakateta cájatha. Jume, jame, asiya kueicha éxanatsi xua pekoichataenexa pomonae jojoneibarena. ³⁴Pekoicha ba yonoyonéi mérawi paiña nepaka kayawenaenexa xua beta paiña netaewa tsane kireitha. Barichi paiña itakueretong paiña nepaka kayawenaenexa xua beta paiña netaewa tsane. Icha paiña itakueretong wüünae bara beta patáneme. Íchitha icha paiña itakueretong abe jopa beta pataetsipaem. Barichirü paiña jüntükoyenewang xua paiña nenantaxeinaewang. Icha paiña jüntükoyenewang wüünáetsipa bara beta Nakom payábara najüntükoyene xeinaetsípame. Íchitha icha paiña jüntükoyenewang jopa wüünae tsipae jopa beta Nakom payábara najüntükoyene xeinaetsipaem. ³⁵Paiña jüntükoyenewang paka kana exanáetsipa xua bichokono abe paexanaetsípame daxota dota pam. Paiñaxoba mérawi papóname icha jopa paxeinaem xua peyonoyoneiwa poxoru kotakaya panapapeichípame. Barichi pam, paiñaxoba pajinómpame icha jopa paxeinaem xua pokotsiwa beta paiña neyábara nantaxeinaewa Nakom poxoru kotakaya abe paexanaetsípame. ³⁶Icha paiña jüntükoyene wüünae, xuano xua jopa paxeinaem peabe koyenewa paiña

jüntükoyenewa, bara xaniwaicha Nakom payábara yaputáneme icha poxonae pekoicha paka kana ichi xua beta patáneme”, jei Jesús.

**Meje yábara poxonae Jesús muxuweta jiwi fariseomonaе irü pomonaе
jiwi pekuidubiwi Moisés pía peitorobi koyene tatsi barapomonaе
pekuiyainwa tatsi**

(Mt 23.1-36; Mr 12.38-40; Lc 20.45-47)

³⁷Poxonae Jesús najumeweta, fariseomonaе jíwanapin Jesús wábatsi xua petaxaenexa tsainchi piabotha. Jesús joniya yawa ekoundeka pexaethopáewatha. ³⁸Fariseomonaе najüntükoyene kabenaekaeya nekotekataba xua Jesús jopa matha tsiwanaya penakobe kiatsiyoxae poxonaе xane icha judiomonaе ichi, xua saya pía kui koyene tatsi xua barapomonaе nantaxeina icha jopa matha nakobekiatsiyo Nakomtha natsikuentsipa. ³⁹Néxata Jesús pong Pekanamataxeinaeinxae jiwi, fariseomonaepin baraichi:

—Paxam fariseomonaepiwi pam, paxam jopa ba juniya paexaneibim poxonaе meisha panaperüü ikíkame. Dáichitha búpana iya paiña jüntükoyénetha pekaibi koyene paxéiname, peúwi koyeneno paxéiname. Be barapókotsi jiwi pam, pokotsimonaе korotong saya matawakaicha ikika yawa paratongno, íchitha atutuxuira bichokono. ⁴⁰Jopa peyaputáе jiwi pam. Nakom éxana wapepong yawa éxana wajüntükoyenewa. ¡Baxua payaputánemeba! ⁴¹Xua xoxi paxeinéibame matha abü kopiya pajíwana tsabéibare pomonaе peakopeibiwi nexa. Bapoxonaе xua xoxi nakopabeiba baxua panatakopabéibare. Icha bara paichim tsane, bara xaniwaicha pajüntükoyene wüünaem Nakomtha. Yawa jopa panantawenonaem xua pana nakobe ikikéibame jiwi peitütha xua be panatsikotáneme pókotsi pebin pejüntükoyene wüünaein.

⁴²Ekeicha Jesús namchi, jeye: “¡Paxam fariseomonaepiwi pam tsobenáе, xua pepérxaxa perüüjübiwa bexa paxeináename! Daxita xua paiña neübiwa Nakom pakatsibéibame kaewaxi poxonaе diez xóyobe paxeinéibame. Irü xua tsiwaxino pakatsibéibame. Bekein baxua paexanéibame íchitha Nakom jopa paántobem. Matáúta ichamonaе jopa xapain pata exanaem. Bewa paexanaem xua Nakom pakatsibéibame kaewaxi poxonaе diez xóyobe paxéiname. Yáwano bewa paántobem Nakom. Yáwano bewa xaiñeya paexanaem jíwitha”, jei Jesús fariseomonaepintha.

⁴³Bapoxonaе Jesús fariseomonaе baraichi, jeye: “¡Paxam fariseomonaepiwi pam tsobenáе! Bexa paxeináename xua pepérxaxa perüüjübiwa. Paxam paichichipéibame xua paiña nenantakaeneibiwa pexeíña peenáewangtha judiomonaе pía penakaetutsibotha po peenaewang ichaxota enathopeiba pomonaе aiñakuí penaexanaewi. Matáútano paichichipéibame xua jiwi paka wüünae jainteiba poxonaе paka jakoba námtotha, xua jiwi paiña nepaka barü iturajinaenexa”, jei Jesús.

⁴⁴Ekeicha Jesús namchi, jeye: “¡Moisés pía peitorobi koyene tatsi, jiwi pekuidubiwi pam tsobenáе! ¡Irü fariseomonaе pam tsobenáе! Poxonaе jintong ba pona námtotha jopa tsakeinaeyo xua jintong piwa baxoyo bokareka müthü deka, xua peayeiwa poxoru jopa wüünaeyo. Paxam bara paichim. Jiwi imoxoyo paka kakuita pona jopa tsakeinaeyo xua pokotsiwa paiña jüntükoyénetha panantaxéiname xua abe xua jopa pekuiwüünáewiyo”, jei Jesús.

⁴⁵Néxata pomonae jiwi pekuidubiwi Moisés pía peitorobi koyene tatsi, barapomonae jíwana kaein bapong Jesús baraichi, jeye:

—Jiwi Nekuidubin, poxonae baxua páebame, ápara irü pana neyábara jam poxonae katsawiya páebame, jei.

⁴⁶Néxata Jesús jumenota, jeye:

—¡Irü paxam Moisés pía peitorobi koyene tatsi jiwi pekuidubiwi pam tsobenaem! Tsipéi paxam ichamonae paitoróbame xua kápona pokotsiwa arewe pokotsiwa jiwi bápana jopa itaküüpaetsi xua pekaponae, íchitha paxam jopa pata yoichaem, matáüta bara kae kobesítiyotha jopa pata yoichaem. Jintong ba itoroba ichüngtha xua pekaponae nexa pokotsiwa jopa juniya arewiyo, xua pokotsiwa jopa itaküüpaetsi xua pekaponae pong itoroba. Bara paichim paxam ichamonae pakuidúbame xua jopa itaküüpaetsi xua peexanaenexa baxuang xua pokotsiwa irü xua jopa paka itaküüpaeyo xua paiña neexanaewa baxuang.

⁴⁷“¡Paxam patsobenaem! Paxam petüpaewi pomonae Nakom peitorobi jume pepaebiwi payamüthü ákabame boutixi bekein paiña amo susato jiwi juteba barapomonae. ⁴⁸Poxonae baxua paéxaname, ichamonae patsita-itapeiñaxéiname xua paxam bara irü paichichípamerü pokotsiwa xua paiña amo susato jiwi juteba xua barapomonae pomonae Nakom peitorobi jume pepaebiwi jutébatsi. Daxota bárapo petüpaewi payamüthü ákabame boutixi.

⁴⁹”Daxota Nakom peyaputáe jumetha namchi: ‘Itorobikaein barapomonaetha taitorobi jume pepaebiwi irü pomonae taitorobiwi. Ichamonae pomonae taitorobi jume pepaebiwi jutebinchi. Ichamonae pomonae taitorobi jume pepaebiwi abe exanaeinchi. Ichamonae, pomonae taitorobiwi jutebinchi. Ichamonae, pomonae taitorobiwi abe exanaeinchi’, jei Nakom peyaputáe jumetha”, jei Jesús. ⁵⁰Ekeicha Jesús namchi, jeye: “Pomonae ánoxuae jinompa Nakom kana exanaena xua barapomonae péraxa jübebinchi petsitaxaetsi xua barapomonae penatsikuentsiwa xeina, tsipéi jiwi juteba xua Nakom peitorobi jume pepaebiwi jutébatsi kaena báyatha xua weya xua poxonae Nakom aena fórota bárapo kae pin nakue. ⁵¹Paiña amo susato jiwi jujutebapona xua pomonae pejüntükoyenexeikae jiwi jutébatsi. Kopiya matha Abel bexotsi beya poxonae írürü Zacarías bexótsirü. Barapong Zacarías pabexúbame Nakom pin piabotha ichaxota xua bárapo bo tütutha náitama táeungkuabe xua be pexaethopaewa xua ichaxota duwéi tauteiba Nakom nexa irü ichaxota po tutu yatsikaewa Nakom pía tutu. Daxota paka tsipáebatsi Nakom kana exanaena xua daxita paxam pomonae ánoxuae pajinómpame paka péraxa jübebina tsipéi Nakom patsítame xua paxéiname penatsikuentsiwa xua paiña amo susato jiwi pejutebixae barapomonae”, jei Jesús.

⁵²Ekeicha Jesús namchi, jeye: “¡Paxam jiwi pekuidubiwi pam tsobenaem xua Moisés pía peitorobi koyene tatsi! Paxam ayapubé paéxaname xua jiwi peyaputaewa Nakom Pejume Diwesi poxoru icha kaununaya pakuidúbame, xua jopa xapain pokotsiwa Nakom paebiyo. Paxam jopa pajumekowüntsim Nakom matáüta jopa pakopatsim xua ichamonae irü pejumekowüntsiwa Nakom”, jei Jesús.

⁵³Poxonae Jesús baxua paeba poxonae kataunxae jopa natsixatabiyo, fariseomonae irü pomonae jiwi pekuidubiwi Moisés pía peitorobi koyene, daxita barapomonae Jesús bichokono kasébatsi. Barapomonae Jesús muxufayakótatsi xua yáíñabatsi nawita, peamuxukonae exanaenexa tsainchi. ⁵⁴Barapomonae Jesús piraichi matowa yáíñabatsi peyaputaenexa icha Jesús ajumebeya jumebabotsina.

Meje yábara poxonae Jesús yábara kueikueijeí jíwítha xua fariseomonaé ítara beta paeba íchitha jopa xapain exanaeyo

12¹Poxonae kataunxuae Jesús kueikueijeí tsungkuae, bapoxonae ayéi jiwi nakaetutapona Jesustha. Jiwi nataxutaxunaunaba. Jesús tamrópata pítaba xua kueikueijeí jíwítha. Kopiya matha Jesús pijimonaé tsipaeba, jeye: “Dota pam jopa pajumenaitaewatsinde fariseomonaé pía pekuidubi koyenewa tatsi xua paiña nejumekowüntsiyainwa. Barapomonaé ítara beta paeba íchitha jopa xapain exanaeyo. ²Daxita diwesin xua po diwesin bekein ánoxuae jiwi jopa yaputaeyo, bexa yaputaena. Pokotsiwa jiwi abe nameicha éxana dáichitha ichamonaé bexa yaputaeponaena baxua. ³Paxam xua po diwesi mérawi nameicha pana natsipáebame, bárapo diwesi ichamonaé matakaitha jumetaena. Matáütano pokotsiwa paxam aishawatha pana namuxupaxapáxeya tsipáebame, bárapo diwesi ichamonaé pána-tha paka jumekanawabiya wawái tsane”, jei Jesús.

Meje yábara poxonae Jesús yábara paeba xua pongtha bewa ba jiwi kuitaya kunuwina

(Mt 10.26-31)

⁴Ekeicha Jesús pijimonaé barái, jeye: “Tamonaé paxam paka tsipáebatsi jopa pakuitaya kunuwinde pomonaé xua itakúüpatsi xua paka nekajutebiwa xua meisha paiña pepongtha. Íchitha barapomonaé jopa itakúüpaetsi xua ekeicha paka jumopeintünaxü jutebina. ⁵Íchitha yábara paka tsipáebatsi pongtha jame bewa pakuitaya kunuwim, bapong ápara jame Nakom. Tsipéi bapong itakúüpatsi xua paiña nepaka bebaiwa pin ishótotha po pin ishótotha jopa bápana itakounayiyo xua werawéraka paiña nepaka exanaenexa paiña pepong. Xaniyang paka tsipáebatsi bewa jame pakunuwim bapong Nakom.

⁶Jiwi ba kaenaeta siri cinco póyobe, saya aiña paratíyobe nantómata. Bekein bárapo siri kaenaeta jiwi xua jopa matoma nautsiyo, íchitha Nakom jopa yábara jüntemainaeyo siri, matáütano káeyono jopa yábara jüntemainaeyo. ⁷Iriú daxita paiña néntanang Nakom daxita matapaéicha paka matana ununa. Jopa pajunuwinde tsipéi paxam Nakom bichokono patsita aiñakuim beyakaincha siri”, jei Jesús pijimonaetha.

Meje yábara poxonae Jesucristo yábara paeba xua pomonaé peyábara paebíwichi ichamonaé peitabaratha tatsi

(Mt 10.32-33; 12.32; 10.19-20)

⁸Ekeicha Jesús namchi pijimonaetha, jeye: “Yábara paka tsipáebatsi pomonaé xua nayopita ichamonaetha, pomonaé xua najéi: ‘Ápara paxang Jesús pijimonaé tatsi pang’, najéi. Barichi xang, pongxaein Nakom Tananeitapetsin xuya jang tsane matatsunpíwítha. Barapomonaé ápara tana nejumekowüntsiwi, jang tsane xuya bárapo Nakom pía matatsunpiwi tatsi peitabaratha tatsi. ⁹Íchitha pomonaé xua neyábara jei ichamonaetha: ‘Jopa dapong payaitaeiño’, jei, xang pongxaein Nakom Tananeitapetsin xuya barapomonaé yábara jang tsane Nakom pía matatsunpiwi peitabaratha tatsi: ‘Ápara barapomonaé jopa yaitaeiño’, jang tsane.

¹⁰Xang pongxaein Nakom Tananeitapetsin pong abe neyábara paeba Nakom itakúüpatsi xua bapong peyábara jüntemaináewatsi pokotsiwa bapong abe

neyábara paeba. Íchitha pong nama Nakom pía Pejumopetünaxü tatsi bichokono abe yábara páebatsi Nakom jopa bápana yábara jüntemaináe bapong.

¹¹”Paka kaponaena judiomonae pía penakaetutsi bongtha ichaxota nakaetu-teiba pentakaponaewi. Paka kaponaena pomonaetha, pomonae peyábara paebí jiwí xua penatsikuentsiwa xua abe peexanaexae yawa tómara pía pentakaponaewi peitabaratha tatsi paka kaponaena. Poxonae baxua paka exanaena, jopa payábara najüntükoyene exabinde pokotsiwa xua paiña nejumenotsiwa xuano xua paiña netsipáebiwa tsane barapomonaetha. ¹²Poxonae juntukuru pakaunutsiya paebí-name, bapoxonae Nakom pía Pejumopetünaxü tatsi paka tsijumedubina pokotsiwa paiña netsipáebiwa tsane”, jei Jesús.

Meje yábara poxonae Jesús pijimonae yábara tsipaeba pong kopei pexeinaein

¹³Kaein pin bichéitha, bapong Jesús baraichi, jeye:

—Jiwí Nekuidubim, taeweicho inta itoróbare bü nekata xua tawa xua taxa pekopiniwa xua xuang taxa báyatha pana nejüntüna jeba, jei.

¹⁴Jesús jume epapita, jei:

—Maisha kai, ápara dapong aibi pong nekana éxana xua xang tapaka yábara paebíwatsi xua paiña nenatsikuentsiwa xua abe paiña neexanaexae. Matáütano ápara dapong aibi pong nekana éxana xua xang be pong tapákata tsabibéiwatsi pokotsiwa paiña axa pía pekopiniwang tatsi, xua báyatha paka jüntüna jebeiba paiña axa, jei Jesús.

¹⁵Yawa Jesús namchi, jeye:

—Dota xua asiwiya paántobem xua xoxi paxéiname. Bekein pebin kopei nawita xeinaetha, íchitha bárapo pebin jopa yawenaetsi xua beta pepoponaewa, jei Jesús.

¹⁶Néxata Jesús tsipaeba jíwitha pekayábara jüta pepaebi diwésiyo, xua jeye: “Írü matha pebin pópona pong kopei pexeinaein. Pía pabi tatsi pexaewa tana-wétatsi nawita. ¹⁷Pong kopei pexeinaein néxata piakoutha nabarái: ‘¿Eta bichokuaein tsane? ¿Eta xota jebokuaein pokotsiwang pábitha notang?’ jei. ¹⁸Piakoutha najumenota: ‘Bara yaputang tha xubichi pexaewa matabong. Tha ekeicha akabichi po bong bichokono pin bong. Bárapo pin bongtha daxita pexaewa etsin yawa etsinno daxita pokotsiwa xeinang. ¹⁹Néxata najüntükoyene barang tsane: Bara daxita xéiname aiña wei dapaein nexa. Nafifinakáekare, xáibare, apeibareno, jüntükoyene weiweinéibare’, najéi xua najüntükoyene barái pong kopei pexeinaein. ²⁰Íchitha pong kopei pexeinaein Nakom barái bapong, jeye: ‘Pebin pong jopa xapain nenantaxeinaem, methaunxuae ánoxuae mérawi tüpáename. Daxita baxuang xua yabo nóname, ¿jintam metha piáwa tsane?’ jei Nakom. ²¹Baxua bari-chi pong xua saya kopei yábara nantaxeina nawita pekaetubinexa. Bapong Nakom kopei xeina taetha, Nakom tsítatsi xua bapong ápara akopeibi, tsipéi bapong pejüntükoyene tatsi tsokúae xua Nakom jopa pejumekowüntsixaetsi”, jei Jesús.

Meje yábara poxonae Jesús yábara kuiduba pokoyene xua Nakom eena pijimonae

(Mt 6.25-34)

²²Bapoxonae Jesús pijimonae tsipaeba, jeye: “Paka tsipáebatsi, jopa bichokono payábara najüntükoyene exabinde pexaewa xua paiña neunajinompaewa tsane.

Barichi jopa bichokono payábara najüntükoyene exabinde papabürü xua paiña pepong nexa. ²³Pókotsi asiü pejinompaewa xua Nakom naka kata jame baxua aiñakuí, beyakaincha pexaewa xua peunajinompaewa. Pepong aiñakuí irü, beyakaincha papabürü xua pepong nexa. ²⁴Uni payábara yaputaema. Bapomonae jopa übiyo pábitha. Matáütano jopa jotsiyo pokotsiwa penawetsiwa. Jopa xeinaeyo bomüxüng xua pejebinexa pexaewa. Íchitha Nakom, uni ápatatsi pexaewa. Paxam nama bichokono Nakom patsita aiñakuim jame, beyakaincha peyapupunaewi xua Nakom tsita aiñakuichi. ²⁵Dapong aibi pong paxam jíwana pong itaküüpatsi xua xeinaena icha matakabi xua po matakábitha pepoponaewa tsane poxonae tüpaena. Bekein bapong nayábara nantüéxaba nawita baxua, íchitha jopa itaküüpaetsi xua xeinaena kaentakabi ekeicha. ²⁶Icha jopa paka itaküüpaeyo xua paéxaname xua be kónotha xua kaentakabi nexa, ζeta xua metha ekeicha yábara panantü éxabame ichawang xua dangwéi bichokono?

²⁷”Jame pakayábara nantaxéinare pentonong xua xuwa, xua matono itúpana. Pentonong jopa nakuichiyo yawa jopa natsiexanaeyo papabürü penamaxatabinexa. Íchitha paka tsipáebatsi xua pentonong matono itúpana bichokono beyakaincha pókotsi paparuwa Salomón namaxátata xua pexeíña paparuwa. Bapong Salomón pong kaena báyatha judiemonae itorobiya pía pepa peewatsinchi pong báyatha tüpa. ²⁸Pentonong, po matonong wéxotha ánoxuae xuwa, Nakom kana éxana xua matono itúpana. Íchitha pebiwi baya matono tautsina ichaxota pokotsíwatha pan seba, tsipéi saya pentono. Nakom kana éxana xua pentonong bichokono wüünae bara bekein saya pentonong. Barichi Nakom itaküüpatsi xua beta paka neka-eenaewa xua beta paiña nejinompaenexa. Matáütano Nakom paka katsina paparuwang. ¡Maisha pebiwi pam tsobenáe be kónotha pajumekowúntame Nakom! ²⁹Jopa payábara najüntükoyene exabinde pexaewa xuano xua paiña neapaewang yábara. Jopa panthüthü deideijeya jinompaeyo xua ichawa paka yábara nantaxéiname. ³⁰Tsipéi bárapo kae pin nákuathe jiwi, saya i baxua peka-yábara najüntükoyene éxabi pokotsiwa nantawénona. Íchitha nama paxam paiña Axa Nakom panantáütame pong yaputane daxita pokotsiwa xua xoxi panantawénoname. ³¹Meisha saya bichokono pakayábara nantaxéinare xua paiña neexanaewa xua Nakom ichichipa waba jiwi xua jiwi wábatsi xua petanaexanaenéxatsi pijimonae pomonae itorobiya pekanamataxeinaexae. Icha baxua paexanáename néxata Nakom paka katsibina xua daxita pokotsiwa panantawénoname”, jei Jesús.

**Meje yábara poxonae Jesús yábara kuiduba xua pokotsiwa Nakom
jiwi pejüntanajebíwatsi pía nakuatheicha**

(Mt 6.19-21)

³²Ekeicha Jesús namchi, jeye: “Tamonae pomonae be ovejamonae pam, paiña nejunuwi jiwi pamxaem. Jopa pajunuwinda bekein bara tsikimonaeyo pam. Paiña Axa Nakom piakoya peichichipaexae piakoya paka kana exanaena pijimonae tatsi jíwana pam pomonae pejumekowúntsíwichi pomonae itorobiya pekanamataxeinaexae. ³³Pakaenaere xua paxéiname. Bárapo parátixi pomonae akopeibiwi pakatsíbare. Poxonae baxua paéxaname, bapoxonae xuya Nakom athabeicha paka katsibina pokotsiwa xua paiña nepaka jüntüna jebiwa pokotsiwa xua jopa naxúbiyo. Athabeicha pekaibin jopa patopaeyo paiña nepaka kaibinexa pokotsiwa pajébame baraxoteicha. Matáütano ofo jopa xaeyo pokotsiwa xua pajébame

baraxoteicha. ³⁴Ichaxota ba pajébame xua paiña neichichipaewang baxota ba payábara nantaxéiname nawita”, jei Jesús.

**Meje yábara poxonae Jesús yábara paeba
xua pinae bewa nakuiwüünaetichi**

³⁵⁻³⁶Ekeicha Jesús namchi, jeye: “Pana najüntükoyene kuiwüünaere xua tapatopaewa tsane. Barapókotsi jüta koyeneya paichinde, icha pomonae petanakui-chiwi ichi xua nakuiwüünaeta, xua pong bo pexeinaein imoxoyo pepatopaexae. Bapong pong bo pexeinaein nasiwaponna ichaxota jiwi nakaetuta xua pexaenexa pexaewa poxonae pebin píowa pita. Bapong nawirena bara wérena, pomonae pía petanakuichiwichixaetsi naiña tayausaranaxorénatsi pekoiboto poxonae bapong patopa piabotha. Barapókotsi jüta koyeneya paichinde. Paxam panakuiwüünaetsiya jinómpare xua tapatopeikaewa tsane. ³⁷Poxonae bo pexeinaein patopa icha bapong tane xua pomonae pía petanakuichiwichixaetsi jopa maichiyo bapoxonae barapomonae jüntükoyene weiweina. Bara xaniwaicha paka tsipáebatsi bapong pong bo pexeinaeinxae pía petanakuichiwichi kuareba pexaethopáewatha, bapoxonae apatsina pexaewa. ³⁸Pong bo pexeinaein, bara bekein papaetha patopaetha tsipae, ichakuitha bara bekein metha patopaetha tsipae matakeiwünaeyo, íchitha barapomonae pomonae petanakuichiwi jüntükoyene weiweináetsipa poxonae bo pexeinaein tane xua jopa maichiyo barapomonae. ³⁹Barichi payaputaema, icha bo pexeinaein yaputáetsipa xua poxonae patopaena pong jiwi pekaibin jopa maitekae tsipae. Matáüta bapong jopa kopatsipae xua pong pekaibin petajondenáewatsi piabotha. ⁴⁰Bara paichinde. Tawanaetha pana nakuiwüünaere tsipéi xang pongxaein Nakom Tananeitapetsin patopeikaein poxonae jopa tsaka payábara jinompaem tsane poxonae jopa payábara nantaxeinaem tsane xua tapatopaewa tsane”, jei Jesús.

**Meje yábara poxonae Jesús yábara diwesi paeba pongbe xua
bo peyapukaekaeinbe pong xua beta peexanaein,
irü xua pong jopa beta peexanaein**

(Mt 24.45-51)

⁴¹Néxata Pedro Jesús yáñabatsi:

—Jesús, pata Tanekanamataxeinaem, po diwesi xuaunxuae pana tsipáebame, xua pekayábara jüta pepaebi diwésiyo, ¿saya meisha paxang nexa? ¿Irü ichamo-naenéxano? jei Pedro.

⁴²Jesús pong Pekanamataxeinaeinxae jiwi, Pedro jumenótatsi pekayábara jüta pepaebi diwésiyotha pepatopaewa tsane yábara, jeye: “Yábara katsipáebatsi pong matakapópona pomonae bo pexeinaein tanakuítatsi. Barapong wüünaeya yaputaeya matakapópona. Poxonae bo pexeinaein wepu wárapa barapomonae, pong bo pexeinaein itoroba pongtha pong bo petayapukaekaeinchi, jeye: ‘Inta beta matakapóponde, yawa inta beta pexaewa ápare daxita matakabi pomonae xua inta nakuíta’, jei bo pexeinaein. ⁴³Pong bo petayapukaekaein bara jüntükoyene weiweinaena poxonae patopaena pong bo pexeinaein, petaxaetsi xua bara beta tayapukaeka bo, xuano bara beta peexanaexae xua bo pexeinaein itoroba. ⁴⁴Xaniwaicha paka tsipáebatsi. Bo pexeinaein itorobina, xua pong petayapukaekaxaetsi bo, bapong kana exanaeinchi xua ekeicha daxita piáwa beta petayapu

enáewatsi xua xuang xeina pong bo pexeinaein. ⁴⁵⁻⁴⁶Íchitha ichakuitha pong yapukaeka bo bapong peantükuiyapubein tsipae. Bapong piakoutha nantaxei-náetsipa, najéi tsipae: ‘Metha bo pexeinaein jopa kuinaya patopáe tsane’, najéi tsipae. Bapoxonae bapong kueinta pomonae pong bo pexeinaein tanakuítatsi, pebiwi yawa petsiríwaxi. Matáütano bapong nanabanáetsipa nawita ichamonae yawa kúüpatsi nanaexanaetsípano. Bapoxonae bo pexeinaein jemeicha patopaena poxonae pong bo petayapukaekaein jopa wüünae tsakeinaeyo. Poxonae bárapo hora tsuxubi jopa yaputaeyo yawa poxonae bárapo matakabi tsuxubi jopa yaputaeyo. Pong bo pexeinaein itorobina ichamonaetha xua pebenéxatsi yawa pepé-raxa exabinexa tsainchi pong bo petayapukaekaein icha kana ichichi pomonae jopa pejumekowüntsiwi.

⁴⁷”Pong bo yapukaeka, bapong bekein yaputane pokotsiwa pong bo pexeinaein itoroba xua ichichipa, íchitha jopa exanaeyo pokotsiwa itoróbatsi, xua bo pexeinaein itoroba. Barapong bichokono péraxa jübinchi xua jopa peexanaexae pokotsiwa itoróbatsi. ⁴⁸Íchitha ichüing pong bo yapukaeka jopa kono yaputaeyo pokotsiwa bo pexeinaein itoroba yawa itatemaya abe éxana. Bekein jopa kono yaputaeyo yawa itatemaya abe éxana, íchitha nantawénona xua pepé-raxa exanáewatsi be kónotha, tsipéi abe éxana be kónotha. Pong ba be kónotha Nakom yábara yaputaeinchi, Nakom bapongtha kana exanaena xua ichawa peyábara yaputaewa tsane beya poxonae bapong ekeicha bichokono Nakom pejumekowüntsiwa tsainchi. Pong ba jopa ichipaeyo xua Nakom peyábara yaputáewatsi Nakom wepichina pokoyene bapong yaputane xua beya daxota Nakom jopa pejumekowüntsiwa tsainchi”, jei Jesús.

**Meje yábara poxonae Jesús yábara paeba xua jiwi aiña
bicheitong naexanaena xua Jesús pejumekowüntsixaetsi
xua ichamonae jopa pejumekowüntsixa**

(Mt 10.34-36)

⁴⁹Ekeicha Jesús namchi, jeye: “Patopang bárapo kae pin nákuathe Nakom tana neitoróbixae xua jiwi aperaxatane taexanaenexa abe peexanaexae bárapo jiwi. Tapatopaewaxae jiwi átene tsane icha be ichi poxonae bárapo jiwi táuta-tsi ishótotha. ¡Maisha metha býatha bena baxua exanokuaein bárapo ishoto!
⁵⁰Xang barichin tsane daxita matapaeicha aperaxatanein tsane poxonae tüpaein. Áwiya bichokono anthüthürewein xua beya baxua inta exanaena. ⁵¹¡Panantaxéiname xua xang ápara patopang xua jiwi jüntema pejinompaewa tsane? Ápara aibi, jopa baxua tsipatopaeiño. Ápara jame patopeikang taexanaenexa pokoyene jiwi naba éxanatsi xua daxota aiña bicheitong penaexanaewa tsane.
⁵²Ánoxuae, yawa bexa tsane cinco póyobe kae matabüxüyo xua bomüxütha jinompa barapomonae nawepu tsata jopáenabe. Tres póyobe ita-aenae-aenéi tsane xua aiña póyobe ita-aenae-aenéi tsáinchibe. Nantiya bárapo matabüxüyobe naita anae-anéi tsánebe. Baxua exanaena xua ichamonae tana nejumekowüntsi jíwixae xua irü ichamonae jopa tana nejumekowüntsixa. ⁵³Koxiyang pexanto ita-aenae-aenéi tsane. Koxiyang xuya pexanto ita-aenae-aenéi tsainchi. Koxiwa pexantiyo ita-aenae-aenéi tsane. Koxiwa xuya pexantiyo ita-aenae-aenéi tsainchi. Írürü pámiyobe naita aenae-aenéi tsánebe. Pekopéiñobe naita aenae-aenéi tsánebe”, jei Jesús.

**Meje yábara poxonae Jesús diwesi paeba xua
jiwi itaboko tane peitaboko yaputaenexa**

(Mt 16.1-4; Mr 8.11-13)

⁵⁴Yawa Jesús barái jíwitha, jeye: “Poxonae tsakinaebowa patáneme xua pokotsiwe wejopeine: ‘Ema dawa jopeina’, pajam. Bara duneika. ⁵⁵Poxonae joibo jopa: ‘Wei imoxoyo’, pajam. Bara koicha jopa. ⁵⁶Ítara mexeya pexeíña jüntükoyene paxéiname íchitha peajüntükoyénebe jiwi pam. Itaboko yawa írano panaitakáewatame paiña yaputaetsi icha ema yawa xua icha pexeíña matakabi. Íchitha jopa payábara yaputaem xua bekein peitüpanaewang éxanang, íchitha kataunxuae kame áwiya jopa payábara yaputaem pokoyene xua baxua Nakom taneitorobiwa”, jei Jesús.

**Meje yábara poxonae Jesús paeba xua ichüng jüntükuí wüünae
jüntema pópona kana éxana xua pong peaitafaetabíxaetsi**

(Mt 5.25-26)

⁵⁷Ekeicha Jesús namchi jíwitha, jeye: “¿Eta xua metha paiñakoutha beta jopa pana nayábara nantaxeinaem xua icha metha wüünae paiña neexanaewa? ⁵⁸Icha ichüng be paka itoroba paka nekaponaenexa pongtha pong jiwi peyábara paebin xua penatsikuentsiwa xua abe peexanaexae néxata bapong patsipáebare poxonae kataunxuae námtotha paka barü ekaona xua paiña nenaitakoxone exanaenexa. Xain bapoxonae bapong jopa paka kaponáe tsane pongtha pong jiwi peyábara paebin xua penatsikuentsiwa xua abe peexanaexae. Tsipéi icha bapong bara beya paka kaponáetsipa, bapoxonae pong jiwi peyábara paebin xua penatsikuentsiwa xua abe peexanaexae ekeicha dabeya policiamonae beya paka itorobíchipa. Bapoxonae nama policiamonae jiwi pekübibó beya paka itorobíchipa. ⁵⁹Bara xaniyeya paka tsipáebatsi. Paxam jopa paka pukópabi tsane jiwi pekübibó weya, beya abü poxonae panatsipu matomakáename daxita parátixi kuntha po parátixi xua paxéiname”, jei Jesús.

**Meje yábara poxonae Jesús yábara paeba xua aiñakuí
xua icha jüntükoyene pexeinaewa Nakomtha**

13 ¹Barapoxonae ichamonae pata. Jesús tsipáebatsi, jeye: —Galilea nakuapiwi Jerusalén tómaratha kápata duweimonae, Nakom pin piabotha xua bárapo duweimonae pejutebinexa petautsinexa xua petúxusi exanaenexa Nakom nexa. Íchitha poxonae kataunxuae baxua exanompa Galilea nakuapiwi pong Galilea nakuapiwi peyanakua ewatsinchi, pong pewüng Pilato, poxonae bapong baxua jumetaeba, xua Galilea nakuapiwi exanompa Nakom pin piabotha, bapoxonae bapong pía soldadomonae itoroba Nakom pin píabo beya xua pejutebinéxatsi Galilea nakuapiwi. Daxita duwéi jana, yawa Galilea nakuamonae jiwi jana kae jana naexananaya, jei barapomonae.

²Jesús jumenota, jeye: “¿Eta xua metha panantaxéiname? ¿Bárapo pebiwi jutébatsi bichokono yatsikaya abe peexanáewixae beyakaincha pomonae abe peexanaewi pomonae jinompa Galilea nákuatha? ³Ápara aibi. Icha jopa Nakom patsita xeinaem icha jüntükoyene, bara paichipaem, paka werawéraka exanáetsipa. ⁴Icha-kuitha metha pakuikanantaxéiname pomonae dieciocho póyobe, pomonae báyatha

bomüxütha mataperabábatsi xua po botha bichokono taicha po bo pewüng Siloé. ¿Barapomonaé matatsapabábatsi bichokono abe peexanaexae beyakaincha pomonaé jinompa Jerusalén tómaratha? ⁵Ápara aibi. Icha Nakom jopa patsita xeinaem icha jüntükoyene, paxam bara paichipaem paka werawéraka exanáetsipa”, jei Jesús.

**Meje yábara poxonaé Jesús yábara paeba higuera nae
xua po diwesi pekayábara jüta pepaebi diwésiyo**

⁶Néxata Jesús tsipaeba pekayábara jüta pepaebi diwésiyo. Bapong namchi, jeye: “Matha írürü pebin higuera nae xeina po nae übanota pía pábitha. Bárapo pebin pía pábitha pona pía taetsi icha yakueidubena. Íchitha poxonaé tane jopa yakueidubenaeyo. ⁷Néxata pong pabi pexeinaein tsipaeba pongtha pong pabi petayapu eenaeinchi, namchi, jeye: “Taema akoibi po weibe pábitha poneibang tha bekein taibichi pethéi íchitha jopa yakueidubenéibiyo. Üngkataxore. Jopa ichi-chipaeiño xua kame bárapo nae saya unguua ichaxota übanotinchi icha nae, po nae penakoichi nae’, jei pong pabi pexeinaein poxonaé tsipaeba pong pabi petayapu eenaeinchi. ⁸Íchitha pong pabi petayapu eenaein jumenota: “Tanentakaponaem, abü bárapo nae unguuaena bárapo weithe. Tha yaira tabakanakuenakuena exanaetsi parapáratótha, bapoxonaé duwéi petasin jebarékaetsi petabaka deka. ⁹Metha bapoxonaé matono dubenáetsipa icha weitha. Icha jopa matono dubenáe tsane icha weitha néxata moya beüngkataxotsi’, jei pong pabi petayapu eenaein”, jei Jesús.

**Meje yábara poxonaé Jesús axaibi éxana yábüyo pentakeiseikáe
matakábitha powayo na-epasixurutsiya pona**

¹⁰Kaentakábitha judiomonaé barompaya pía pentakeiseikáe matakábitha tatsi Jesús kuidubauya Nakom Pejume Diwesi judiomonaé pía penakaetutsibotha tatsi. ¹¹Bárapo botha yábüyo eka, powa kaena báyatha átene dieciocho po wéiyobe. Barapowa na-epasixurutsiya pona. Barapowa xua juntukuru epasibóipana aibi. ¹²Poxonaé barapowa Jesús tane, Jesús waba barái, jeye:

—Yábüyo ánoxuae jopa neraichiwa, báyatha wüünaem, jei Jesús.

¹³Néxata barapowa Jesús pekóbetha jáyaba. Bapoxonaé yábüyo epasinaróitaba yawa barapowa wüünae jainta, Nakom wüünae jáintatsi. ¹⁴Íchitha pong Pekana-mataxeinaein judiomonaé pía penakaetútsibo tatsi, bapong Jesús kasébatsi xua axaibi peexanaexae pentakeiseikáe matakábitha. Bapong barái jíwitha, jeye:

—Bara irü seis po matakábibe xua be kae semánatha tsoponeibi xua bárapo matakábintha benakuítatsi. Jame bárapo seis matakábintha moya papare xua axaibi paiña nepaka exanaewa tsane. Nama jopa papatsinde pentakeiseikáe matakábitha, jei bapong pong Pekanamataxeinaein judiomonaé pía penakaetútsibo tatsi.

¹⁵Bapoxonaé Jesús jumenota, jeye:

—Ítara mexeya pexeíña jüntükoyene paiña nexainaewi íchitha peajüntükoyénebe jiwi pam. Íchitha paxam irü panakuítame pentakeiseikáe matakábitha. Burro ba payama ishanaxúbame, bueyno ba payama ishanaxúbame paiña apatsinexa mera pepa mene beya bárapo pentakeiseikáe matakábitha. ¹⁶Barapowa powayo Abraham pía pemómoxi susatopiwi jíwanawayo tatsi. Barapowa kaena báyatha

átene éxanatsi. Satanás átene éxana dieciocho po weiyobetha. Daxota írürü bara-powa xang axaibi éxanang pentakeiseikáe mataketha, jei Jesús.

¹⁷Poxonae Jesús baxua kaunuta, bapoxonae pomonae Jesús pía peaitafaetabíwichi aura tsumenae. Íchitha daxita jiwi jüntükoyene weiweina petaxae xua Jesús pexeña pewüinaewa éxana.

**Meje yábara poxonae Jesús kuiduba pekayábara jüta pepaebi diwésiyo
po peübixútiyo pewüing mostaza xutiyo**

(Mt 13.31-32; Mr 4.30-32)

¹⁸Ekeicha Jesús namchi, jeye: “Poxonae Nakom waba jiwi petanaexanaenéxatsi pijimonae tatsi, pomonae itorobiya peewatsixae, ¿eta pokoyene nakoyenejúpabe? ¿Eta xua paka kuidubinchi xua baxua yábara? ¹⁹Bárxua ápara icha be mostaza xutiyo ichi po mostazaxuto pebin üba pía pábitha. Xuwa beya pin nae tsóponae. Pepin naexae daxota siri éxana kotong pemaxúranangtha. Icha mostaza xutiyo ichi xua beya pin nae tsóponae, bara jüta ichi Nakom pejumekowüntsiwi. Bekein ánoxuae tsika bichéitiyo, bexa tsane beya pin bicheito tsóponae tsane”, jei Jesús.

**Meje yábara poxonae Jesús kuiduba pekayábara jüta pepaebi diwésiyo
xua levadura yábara xua pan kotowa éxana**

(Mt 13.33)

²⁰Barichi Jesús namchi, jeye: “Poxonae Nakom waba jiwi petanaexanaenéxatsi pijimonae tatsi pomonae itorobiya peewatsixae barapomonae pin bicheitomonae naenaexanapona. ¿Eta pokoyene nakoyenejúpabe? ²¹Bárapo koyene bara jüta ichi icha levadura matawüing ichi, pokotsiwa kotowa éxana poxonae pan éxana. Petsiriwa tres po tsoropabe trigoxú beno múxuna kauyentaba levadura matawüing pokotsiwa xua kotowa éxana pan. Bapoxonae péntübü naexananaya kokotowapona tsipéi levadura matawüing múxuna xuba”, jei Jesús.

**Meje yábara poxonae Jesús yábara kuiduba
po boupayo tsika boupayo dena**

(Mt 7.13-14,21-23)

²²Poxonae Jesús Jerusalén namto beya pona, kuiduba tsíniya Nakom Pejume Diwesi po bong epatotha bobena yawa tomarangthano. ²³Pomonae Jesús kuiduba barapomonae kaein jíwana Jesús yáñabatsi, jeichichi:

—Pata Tanekanamataxeinaem, ¿saya tsikimonaeyo pomonae kapanenebíyatsi? jeichichi Jesús.

Néxata Jesús namchi jíwitha, jeye:

²⁴—Bekein bichokono ayapubé xua náexana Nakom pijimonae pomonae Nakom itorobiya éwata, íchitha bichokono pajüjüre xua panáexaname Nakom pijimonae tatsi. Bárxua be poxonae pin bicheitomonae ichichipa xua pejojondenaewa tsika boupayo dena. Bichokono ayapubé. Bekein barapomonae ichichipaena xua pejojondenaewa tsane íchitha jopa itaküüpáe tsainchi. ²⁵Barapoxonae matakabi jopaena po matakábitha poxonae pong bo pexeinaein pekoiboto dangwéi exanaena. Paxam pomonae aishówatha pauméname pekoiboto padakadakatsiname, pajam tsane: ‘Pata Tanekanamataxeinaem, painta koibosaranaxorena bómüxü’, pajam tsane. Íchitha bapong paka jumenotsina. Jei tsane: ‘Bü kanta jopa paka

yaitaetsi xua jopa paka yaputaetsi xua ichaxota wérena paiña neponaewi', jei tsane. ²⁶Paxam pajam tsane: 'Bara kain báyatha paka barü xainchiba yawa paka barü apatsiba, yawa báyatha jiwi kuidúbameba námtotha pata tómaratha', pajam tsane. ²⁷Íchitha Nakom pong paiña Nepaka kanamataxeinaein paka jumenotsina: 'Aunxuae báyatha paka baráichiba: Bü kanta jopa paka yaitaetsi. Jopa paka yaputaetsi xua ichaxota wérena paiña neponaewi', jang. 'Taxaiña weya panatsixibarü kúpare. Ápara paxam peajüntükoyénebe jiwi pam, xua abe paiña neexanaewi', paka jei tsane. ²⁸Barapoxonae patáename xua Abraham, irü Isaac, irü Jacob, irü daxita Nakom peitorobi jume pepaebiwi xua ena Nakom pía peitorobi nakuatheicha. Íchitha paxam baxoteicha jopa pana na-enaem tsane poxoru paka bebái tsane Nakom pía peitorobi nakua weya. Daxota pawekoyam tsane anaya nantanuweya pana nawano tsakibasináename poxoru paka bebái tsane Nakom pía peitorobi nakua weya. ²⁹Poxoru pinmonae patsina Nakom pía peitorobi nákuatha penabanaenexa tsane. Ichamonae pomonae ichaxota xometo ekoina, barapomonaepiwi patsínano. Ichamonae pomonae ichaxota xometo jopeika, barapomonaepiwi patsínano. Ichamonae pomonae ena pokotsiwa béreka, barapomonaepiwi patsínano. Ichamonae pomonae pokotsiwa beweyabeicha ena, barapomonaepiwi patsínano. ³⁰Pomonae xua ánoxuae pepawi náexana pomonae jiwi jopa petsita-aiñakuí jíwichi po kae pin nákuathe barapomonaepiwi Nakom pía peitorobi nakuatheicha peaiñakuí jiwi tsane. Pomonae xua ánoxuae, pomonae jiwi petsita-aiñakuí jíwichi po kae pin nákuathe, barapomonaepiwi bexa Nakom pía peitorobi nakuatheicha jopa peaiñakuí jiwi tsane, jei Jesús.

Meje yábara poxonae Jesús Jerusalén tomarapiwi siwawekoyeichi

(Mt 23.37-39)

³¹Barapoxonae fariseo jíwanamonae pata. Jesús tsipáebatsi. Jeichichi:

—Bewa warapaetsípame bárapo tómara weya. Dota bepa Herodes kabexubei, jei.

³²Íchitha Jesús jumenota, jeye:

—Papónare paiña netsipaebinexa pong jiwi pemuxujaiñabin, bapong Herodes. Pana nejumeyopire pajande: 'Taema ánoxuae yawa baya tsane itawetsin kaurimonae jiwi weya yawa axaibi exanaein peatenewi. Popobaya tsane wetsin', jei pajande. ³³Íchitha ánoxuae yawa baya tsane nantawénonang xua bara beya Jerusalén tómara beya ponaein námtotha. Barapoxonae popobaya patopiyaein Jerusalén tómaratha. Jopa tana neitaküüpaexae xua tatüpaewa tajü Jerusalén tómara pepuya beya pongxaein Nakom peitorobi jume tapaebin. Bewa tüpaein Jerusalén tómaratha, jei Jesús fariseomonaetha.

³⁴Bapoxonae Jesús yábara ünthüthüwekoyéi Jerusalén tomarapiwi. Jesús wekoyeya namchi, jeye: "¡Maisha Jerusalén tomarapiwi pam, pajutebéibame pomonae Nakom pía peitorobi jume pepaebiwi! ¡Matáütano paxam pajutebéibame íbótongtha pomonae Nakom pákata itoroba! ¡Maisha be paka kaetukaetuteibinchi, tapaka kayawenaewa tsainchi, icha wákara ichi poxonae nakoxi kaetukaetuteta pekuarafetha! ¡Maisha be barichokuaein tsane dáichitha jopa paichichipaem!
³⁵Ínkane pataema Nakom nakuibaraxuba xua jopa paiña nepaka kaewatsiwa tsane. Daxota Nakom jopa poponaeyo pía pin piabotha tatsi paiña tómaratha. Paka tsipáebatsi xua ekeicha jopa pana netaem tsane, beya abü poxonae pana

neyábara jam tsane: ‘¡Maisha bapong jiwi jüntükoyene weiweina kana éxanatsi, pong patopa Nakom peitorobixae, po Nakom jiwi Pekanamataxeinaeinchi!’ pana neyábara jam tsane”, jei Jesús fariseomonaetha.

Meje yábara poxonae Jesús axaibi éxana pong perüüputsuna

14 ¹Kaentakabi pentakeiseikáe matakábitha Jesús pona fariseomonae pía pen-takaponaewi tatsi jíwanapin piabotha tatsi penanabanaenexa. Baxota fari-seomonae ichamonae Jesús amanayabiya tainchi pekuiyaputaenexa tsainchi xua éxana. ²Irü baxota pebin patopa ichaxota Jesús naéka. Bárapo pebin pong perüü-putsuna. ³Néxata Jesús yáñaba pomonae jiwi pekuidubiwi Moisés pía peitorobi koyene, yáñabano fariseomonae, jeye:

—¿Bara Moisés pía peitorobi koyenejuméwatha yábara kópata jampa xua pong átene bara axaibi peexanáewatsi pentakeiseikáe matakábitha jampa? ¿Ichakuitha metha jopa yábara kopatsiyo jampa? jei Jesús.

⁴Íchitha barapomonae moya umena. Bara Jesús jáyaba pekóbetha pongtha pong átene, yawa axaibi éxana, tsipáebano xua bara peponaenexa. ⁵Jesús tsipaeba, bárapo fariseomonaetha, jeye:

—Paxam panantawénoname xua panakuítame pentakeiseikáe matakéitha xua poxonae pajutsíname paiña nexanto xua poxonae butékatsi irü ba bueyno bara bekein pentakeiseikáe matakabi, jei Jesús.

⁶Barapomonae jopa itaküüpaetsi xua Jesús pejumenotsíwatsi.

Meje yábara poxonae Jesús yábara paeba pomonae pexaewa petsiwabiwichi penabanaenexa poxonae pebin píowa pita

⁷Néxata Jesús tsipaeba barapomonae pekayábara jüta pepaebi diwésiyo poma-naetha, pomonae xua pata penabanaenexa. Baxua tsipaeba poxonae tane xua barapomonae nantakaeniya, kopiya penabanaenexa. Jesús namchi barapomo-naetha, jeye:

⁸—Poxonae ichüing kawaba jiña nenabanaenexa tsane, jopa nantakaekaeinde ichaxota enothopeiba pomonae peaiñakuí jiwi. Poxoru metha írürü patopáe-tsipa pong bichokono jiwi tsita aiñakuichi pong beyakaincha xam. ⁹Pong xua kawaba, irü xua wábatsi pong jiwi tsita aiñakuí naéxanatsi, bapong kabarái tsipae: ‘Ínkane nontaponde icha muxunénetha ékare. Kotakaya xaema. Ichaxota ékame, baxota ekaena pong jiwi tsita aiñakuí naéxanatsi’, jei tsipae pong xua paka matakanábane. Néxata icha muxunénetha uranaya ekoundekaetsípame.

¹⁰Daxota poxonae kawaba nenabanaenexa, kotakaya ekareinka nekajeinexa poxonae patopa pong paka matakanábane: ‘Tajintong, icha muxunénetha ékare ichaxota xaiba pomonae jiwi tsita aiñakuí naéxanatsi’, jei. Bapoxonae pomonae pata xua penabanaenexa barapomonae kayaitaena xua xam pong jiwi tsita aiña-kuí naexáname. ¹¹Pong piakoutha peaiñakuí jintong náexana pejüntükoyénetha, Nakom exanaena xua bapong pekuipawi jintong naexanaena. Íchitha pong xua pepawi náexana pejüntükoyénetha Nakom exanaena xua bapong peaiñakuí jin-tong naexanaena, jei Jesús.

¹²Yáwano Jesús barái pongtha pong pexaewa petsiwabixaetsi, jeye:

—Poxonae pexaewa tsiéxaname yáwano ichakuitha xua poxonae pin pena-banaewa tsiéxaname, jopa wabinde jiña jiwimonae penabanaenexa. Irü jopa

wabinde eweichomonae irü jiñamonae irü pomonae kopei pexeinaewi. Poxoru barapomonae pentoma exanáetsipa xua xuya katsiwabichipa penabanaewa. ¹³Jame maisha poxonae jiwi pexaewa tsiéxaname yáwano ichakuitha pin penabanaewa tsiéxaname, wábare pomonae peakopeibí jiwi. Yawa wábare pomonae jopa peaiñakuí jiwi, irü pejayujáyujei jíwino, irü pomonae peitanakütsi jíwino. ¹⁴Bapoxonae jüntükoyene weiweináename. Barapomonae jopa itaküüpaetsi xua xuya nekatsiwabiwa penabanaewa xua pentoma nexa. Íchitha Nakom kata exanaena pentoma poxonae jiwi asüü exanaeinchi pomonae pejüntükoyene wüünae jiwi, xuano xua éxana pokotsiwa Nakom itoroba, jei Jesús.

**Meje yábara poxonae Jesús kuiduba pekayábara jüta pepaebi diwésiyo
xua pin penabanaewa peexanaewa tsane**

(Mt 22.1-10)

¹⁵Poxonae baxua jumetane, pomonae xua xayena, barapomonae kaein jíwana Jesús baráichichi, jeichichi:

—¡Pong xua nanábane Nakom pía peitorobi nakuatheicha tatsi, bapong bichokono jüntükoyene weiweina! jeichichi Jesús bapong.

¹⁶Néxata Jesús jumenota, jeye:

—Pebin pin penabanaewa tsiéxana jiwi. Bárapo pebin itoroba ichüng, xua pewabinexa ayéi bicheito. ¹⁷Poxonae bárapo hora tsuxubi poxonae pexaewa nakuiwüünaeta, bapong itoroba pía petanakuichinchi xua pewabinéxatsi pomonae báyatha wábatsi. Barapong namchi: ‘Pajande jiwi: Antha pajojondena jei. Pexaewa weta jei, pajande’, jei pong matakanábane. ¹⁸Íchitha daxita barapomonae paeba xua pinae énatsi xua peexanaewa. Ichüng namchi: ‘Báyatha pabi kómotang, tha kanta matha taetsi. Néxata nejumeyopire pinae jopa kasebinde yáitama pinae jopa patopáe tsane, jande’, jei. ¹⁹Ichüng namchi: ‘Kanta diez póyobe kómotang buey. Tha kanta matha taetsi. Néxata nejumeyopire pinae jopa kasebinde yáitama pinae jopa patopáe tsane, jande’, jei. ²⁰Ichüng namchi: ‘Kanta anoxuaetha taseuri pitang. Néxata nejumeyopire pinae jopa itaküüpaetsi xua pepatopaewa tsane, jande’, jei. ²¹Poxonae kaibe náwiya pong penajumekaitorobinchi bapong daxita baxua tsipaeba pía pekanamataxeináeinchitha. Néxata pong Pekanamataxeinaein kaseba pomonaetha, pomonae bekein pewabixae, xua jopa pepatsixae. Bapong barái pía petanakuichinchi, jeye: ‘Naiña ponde tómara námtongtha, yawa tsiki namtoxitha tómara kuariya. Bérene peakopeibiwi kaponde, penabenaewi kaponde, pejayujayujeimonae kaponde, pomonae peitanakütsi jiwi bérene kaponde’, jei pong Pekanamataxeinaein. ²²Pong petanakuichin pía pekanamataxeinaeinxaetsi, bapong pía pekanamataxeinaeinxaetsi barái: ‘Tanekanamataxeinaem, xua neitoróbame báyatha éxanang, íchitha bómüxü jopa tutu kanaüpaxubiyo, jiwi yáyatha’, jei. ²³Néxata bapong jumenótatsi pía Pekanamataxeinaeinchi: ‘Ekeicha naiña ponde tómara kuariya beya po namtong pin námtongtha, yawa tsiki namtoxíthano tómara kuariya. Baxota jumedangweya itoróbare pomonae xua táneme xua pepatsinexa tabotha petutu kanaüpaxubinexa tsane. ²⁴Katsipáebatsi, pomonae bekein wabang íchitha jopa patsiyo, barapomonae jopa nabanáe tsane tabotha’, jei pong Pekanamataxeinaein, jei Jesús.

**Meje yábara poxonae Jesús paeba xua pinae bewa matha
nakuibarapentsi pía peexanaewang poxonae Jesús
pepunajinompawewa tsainchi**

(Mt 10.37-38)

²⁵Pin bicheitomonae Jesús punapoinchi. Jesús napatomeicha nekota, namchi barapomonaetha, jeye: ²⁶“Icha pebin ichichipa xua tajiwiwimonae jíwanapin penaexanaewa tsane, bapong bewa yábara naitématsi pía peexanaewa. Bapong jame bewa neántobe tsane beyakaincha xua páxatha, beyakaincha xua péna-tha, beyakaincha xua piowatha, beyakaincha xua pía pexuitha, beyakaincha xua peweichowitha, beyakaincha xua pamchoxitha, yáwano xua beyakaincha naántobe piakoutha, néxata bapong bara tajiwiwimonaepin. Íchitha icha jopa baxua exanaeyo xua bichokono nama tana neantobewa, bapong jopa tajiwiwimonaeyo. ²⁷Matáütano pong jopa áwiya éxana dukuanaebiyayo pokotsiwa itorobang, tsipéi jopa be péraxa exanaetsi icha be xua poxonae neichi néxata bapong jopa tajiwiwimonaepiño. ²⁸Poxonae pebin imoxoyo bo éxana, po bo, pin bo, kopiya matha nantaxeina xua bo yábara, kopiya koichaxu ununa, icha jüpa xua pekübaponaenexa pomonae nakuita bo. ²⁹Ichakuítharü saya naewa wetanota, poxoru koichaxu axu werawéraka. Daxota jopa yaputaeyo xua pewetsiwa. Ichamonae pata, barapomona bo taenota. Poxonae tane barapomona kuikápona, bapong kuikapónatsi. ³⁰Barapomona namchi tsane, jei tsane: ‘Barapong tamrópata pítaba bo xua ákaba, íchitha jopa itaküüpaetsi xua pewetsiwa’, jei tsane”, jei Jesús. ³¹Ekeicha Jesús namchi: “Írürü pong jiwi itorobiya pía pepa peewatsinchi ichichipa xua jiwi naba éxana ichüng beya pongtha pong irü jiwi itorobiya pepa peewatsin. Poxona bapong baxua éxana, kopiya nantaxeina, najéi tsane: ‘Jamaisha, saya beisha diez mil po soldadomonae bichéitobe neyaéwatakua, bapong netsi veinte mil po soldadomonae bichéitobe yaéwatatsi. Metha tamona jopa inta itaküüpaetsi xua peamanayabiwa bárapo veinte mil bichéitha xua taxaiña bérena ponaena’, najéi tsane. ³²Icha barapong jopa itaküüpaetsi xua peamanayabiwa, bapong najumekaitorobina ichüngtha, poxona kataunxuae tajü eka, ichüng pong icha nakuapiwi itorobiya pía pepa peewatsinchi xua petapaebinexa tsainchi xua jopa penabiwa tsane yábara, xua ekeicha jüntema pejinompaenexa. ³³Icha bapong ichi pong jiwi itorobiya pía pepa peewatsinchi xua baraxuba xua nantaxeina, xua penabiwa tsane, barichi icha paxam jopa pabarapentsim daxita pokotsiwa paxéiname, jopa paka itaküüpaeyo xua tajiwiwimona paíña nenaexanaewam”, jei Jesús.

**Meje yábara poxonae Jesús diwesi yábara paeba xua bekein sarebeno
xoya pexáewatha íchitha áwiya axaibi**

(Mt 5.13; Mr 9.50)

³⁴Ekeicha Jesús jeye: “Sarebeno, bara beno wüünae. Íchitha icha bárapo sarebeno jopa abenataeyo, bapoxona jopa peitaküüpáewatsi xua ekeicha peabena-taewa. ³⁵Bárapo sarebeno jopa ira néxiyo tsipéi naein jopa beta xuwa exanaetsi. Daxota bárapo sarebeno jiwi bewa xubí. Icha pamuxudubéname moya pana nejumenaitáeware pokotsiwa tapaka tsipaebíwatsi”, jei Jesús.

**Meje yábara poxonae Jesús paeba pekayábara jüta pepaebi diwésiyo
xua oveja pe-enaen yábara xua poxonae pía oveja taeba**

(Mt 18.10-14)

15 ¹Pomonae parátixi pentomanotéibiwi, po parátixi jiwi bewa katsibina pong romanomonae itorobiya pía pepa peewatsinchi nexa, irü pomonae abe peéxanae kuirukoyene peexaneibiwi daxita barapomonae Jesús imoxoyo kakuita umenarükúpatsi xua Jesús pejumetaenéxatsi. ²Daxota fariseomonae írürü pomonae jiwi pekuidubiwi Moisés pía peitorobi koyene tatsi daxita barapomonae Jesús abe yábara páebatsi. Barapomonae namchi, jeye:

—Bárapo pebin nápona pomonaetha, pomonae abe peéxanae kuirukoyene peexanaewi, yawa barapomonaetha nanábane, jei.

³Tsipéi Jesús yábara páebatsi barapomonae, daxota néxata Jesús tsipaeba peka-yábara jüta pepaebi diwésiyo jeye: ⁴“Jintong ba xeina oveja cien póyobe, kaein tanapuxánatsi. Jintong wéxotha kuenta pona noventa y nueve póyobe oveja pewenaweneinexa oveja pong beya matapaiña taeba. ⁵Poxonae jintong oveja taeba pong aichúrukuae, jüntükoyene weiweinaya bota peutukuratha. ⁶Poxonae jintong oveja kapatopa botha bapoxonae piamonae waba pomonae peta-enaewichi piabotha, pía jiwi wábano, wábano pomonae petsikuárabü enáewichi. Jintong daxita barapomonaetha barái, jeye: ‘Panebarü jüntükoyene weiwéinare tsipéi oveja báyatha taebang pong báyatha inta aichúrukuae’, jei bapong piamonaetha. ⁷Xaniyang paka tsipáebatsi. Icha jintong ichi poxonae jüntükoyene weiweina petaebixae oveja, barichi pomonae peitaboko beicha ena. Bapomonae bichokono jüntükoyene weiweina poxonae ichüing Nakom tsita xéinatsi icha jüntükoyene pong kopiya penakuimatakaetsin xua abe peéxanae kuirukoyene éxana. Barapomonae bapong yábara toxeinchiya jüntükoyene weiwéinatsi beyakaincha poxonae yábara jüntükoyene weiwéinatsi pomonae xua noventa y nueve póyobe jiwi pomonae wüünaeya peexanaewi, pomonae jopa Nakom pentichi”, jei Jesús.

**Meje yábara poxonae Jesús paeba pekayábara jüta pepaebi
diwésiyo xua yábüyo yábara xua poxonae taeba paratiyo**

⁸Ekeicha Jesús paeba pekayábara jüta pepaebi diwésiyo, jeye: “Petsiriwa diez po paratíyobe xeina xua pekakomokáe parátixi. Kae paratiyo ta-aichurukuaetsi, daxota pekoicha koicha éxana. Botutu kamona bewayo, beya matapaiña taeba. ⁹Poxonae barapowa paratiyo taeba bapoxonae pía jitowaxi waba, wábano powaxi petsikuárabü enaewaxichi. Barapowa namchi barapowaxitha: ‘Pana nebarü jüntükoyene weiwéinare poxoru báyatha taebang paratiyo, po paratiyo báyatha inta aichúrukuae’, jei. ¹⁰Paka tsipáebatsi barichi peitabokotheicha Nakom pía matatsunpiwimonae tatsi bichokono jüntükoyene weiweina poxonae ichüing Nakom tsita xéinatsi icha jüntükoyene pong kopiya penakuimatakaetsin xua abe peéxanae kuirukoyene peexanaein”, jei Jesús.

**Meje yábara poxonae Jesús paeba pekayábara jüta
pepaebi diwésiyo xua pebin yábara pong pexanto
kayábara kuijüntemaina xua abe éxana**

¹¹Barichi ekeicha Jesús paeba icha pekayábara jüta pepaebi diwésiyo, jeye: “Jintong xeina pexántobe. ¹²Pong xuiyapin paxa barái: ‘Axa, nekare xua nekopiniwa

tsane pokotsiwa xua pana nejúntüna jébame bekein kataunxuae póponame', jei xuiyapin. Néxata bárapo jumetha koxiyang pexántobe tsata kátabe. ¹³Pirapaeyo xuiyapin piáwa kaenaeta xua paxa kátatsi. Bárapo parátixi kuntha tajü beya pona icha nakua beya. Icha nákuatha abe éxana. Bárapo parátixi kobekaewítatsi xua nasikuimatakaeta yabüxitha. ¹⁴Poxonae bapong daxita parátixi wetaxuba, írürü mayayo tsuxubirü bárapo nákuatha, barapong muxu piyain petüpáe. ¹⁵Néxata bapong jeita penakuichiwa ichüngtha xua bárapo nákuatha. Bara barapong itoróbatsi xua petayapu eenaenexa marranomona. ¹⁶Bapong piyain ichichipa xane marranomona pexunenowa xua petsebokotong, tsipéi bapong jopa katichi pexaewa. ¹⁷Néxata bapong piakoutha nantaxeinanaya najéi: '¡Maisha taxa pía petanakuichiwichi tatsi pexaewa ajainbé, tonsana nawita! Nama xota ékangje tain muxu tatüpa. ¹⁸Tha takoyo beya nawiyáetsi ichaxota taxa pópona. Metha jang tsane: Axa, Nakom tsita abe éxanang, yawa katsita abe exanatsino. ¹⁹Daxota ekeicha jopa be taxanto, nejam. Nenatsikotaema be jiña nekatanakuichiwi jíwanang, jang tsane', najéi bárapo xuiyapin. ²⁰Néxata bapong paxa beya kaibe náwiya.

"Poxonae kataunxuae tajü jiniya, paxa taebíyatsi, koxiyang pexanto yábara nantanuweya kuinantaxeina. Koxiyang pexanto matenta kuinaepoiña. Néxata pexanto kobejáyaba. Jüntükoyene weiweinaya pexanto naishakateita wáetaba peantobexae. ²¹Néxata bárapo xuyapinxae paxa barái: 'Axa, Nakom abe tsita éxanang, yawa abe katsita exanatsino. Daxota ekeicha jopa be taxanto nejam. Nenatsikotaema be jiña nekatanakuichiwi jíwanang', jei bárapo xuiyapin. ²²Íchitha koxiyang bárapo jumetha barái pía petanakuichiwichi: 'Naiña papire pexeña paparuwa pamaxátare taxanto. Yawa anillo pakobesixátare. Yawa pataxuxátare xua penataxuxatatsiwa. ²³Vacayo pebtiyo poyo nasiteka pakarénande. Pabexore. ¡Bü xainchi! ²⁴Poxoru bárapo taxanto mexeya nákata tüpawejang, íchitha ánoxuae asüü. Báyatha nákata aicháwiya, ánoxuae matapaiña netsita patopa', jei koxiyang. Néxata bapoxonae tamrópata notarúküpa xua weiweina poxonae xane", jei Jesús.

²⁵Ekeicha Jesús namchi, jeye: "Írürü pin penabanaewa exanompa, írürü matapin pábitha pópona. Poxonae bo benawirena busitaeba xua busitangbaba yawa jumetane xua juiña nawiraba. ²⁶Néxata barapong pong matapinxae waba kaein pomona. ²⁷Néxata barapong pong penakuichiwi jíwana jumenota. Jeye: 'Ápara poxoru néyapin patopa. Axa pana itoroba bepa pinae pabexubin vaca pebtiyo poyo nasiteka, poxoru pinae néyapin wüünaeya asüüya pepatopaexae', jei. ²⁸Íchitha barapong pong matapinxae bárapo jumetha anáepana. Jopa bejoniyaeyo botha. Koxiyang pesato bejoniya, pexanto jumedangweya waba: 'Owáe, antha, antha jondena', jei koxiyang. ²⁹Néxata bárapo koxiyang pexanto jumenótatsi: 'Bara xam kaena báyatha yaputáneme xua aiña wei kata nakuítatsi yawa jopa kajumefebichi. Íchitha bápana jopa nekatsim peweiño cabriyo, tajiwimona. ³⁰Íchitha bárapo nexanto ánoxuae kata patopa, xua jiña parátixi kaewitaxuba xua penasikuimatakáetsiwa yabüxitha. Xam penakuichiwi itoróbame xua vacayo pebtiyo bexubina poyo nasiteka táyapin nexa', jei barapong pong matapinxae.

³¹"Néxata koxiyang jumenota pexanto: 'Owáe, ápara xam kabarü poponébatsi. Daxita pokotsiwang xeinang, ápara bara jiñawa. ³²Íchitha ánoxuae wüünae nawita xua pin penabanaewa, yawa jüntükoyene weiweinaeinchi poxoru bárapo néyapin, pong xua mexeya nákata tüpawejang, ánoxuae asüü pópona. Kaena báyatha

nákata aichúrukuae, yawa ánoxuae matapaiña naka tsita patopa', jei koxiyang poxonae pexanto tsipaeba", jei Jesús.

Meje yábara poxonae Jesús paeba pekayábara jüta pepaebi diwésiyo xua pebin yábara pong jopa wüünaeya peyapukaekaein bo

16 ¹Ekeicha Jesús tsipaeba pijimonae pekayábara jüta pepaebi diwésiyo. Jesús jeye: "Matha irü pebin pópona pong kopei pexeinaein. Bapong xeina pong bo petayapukaekaeinchi. Bapong pong kopei pexeinaein tsipáebatsi ichamonae xua pinae pong bo petayapukaekaeinxatsi jopa pinae xapain exanaeyo, saya pinae abe éxana, jei ichamonae. ²Néxata bo pexeinaein pong kopei pexeinaeinxae, bapong waba pía petayapukaekaeinchi bo. Bapong barái pongtha pong bo petayapukaekaeinchi, jeye: '¿Jame ichamonae jumetang xua pinae inta abe éxaname xua tawang? Ínkane tha taetsi xua po papérangtha tinadúbame pokotsiwa inta kaenáetame, xuano xua inta kómokame. Tsipéi jopa bekaexanaetsi ekeicha xua inta yapukáekame daxita tawang', jei. ³Néxata pong bo peyapukaekaeinxae nakuiyábara nantaxeina piakoutha, nabarái: '¿Eta pokotsiwa exanokuaein ánoxuae tsipéi nama pong tanekanamataxeinaein imoxoyo nekópata xua bapoxonae jopa taxainaewa tsane pokotsiwa taexanaewa? Jopa nebusikoxonaeyo xua naein taüngkatsiwa pábi-tha. Aurang tsipae xua saya amanaya i tawüükeibiwa parátixi. ⁴Jaina, bara yaputang xua pokoyeneya exanaein poxonae tanekanamataxeinaein nekopatsina, xua poxonae jopa xeinaein tsane tanakuichiwa xua ichamonae tanententa wabeibinexa piabotha', jei. ⁵Néxata bapong pong bo petayapukaekaein daxita tamropatsiya wawabapona pomonae pía pekanamataxeinaeinchi petantoma amanayabixaetsi. Bapong matha yáñnaba pongtha pong kopiya patopa jeye: '¿Eta xóyobe matoma amanáyabame xua jopa kataunxuae katsim pongtha pong tanekanamataxeinaein?' jei. ⁶Bapong jumenota, pong bo peyapukaekaein, jumenótatsi, jeye: 'Cien po penasimera bosibübe xua pin bosixibüng tha baxua katichi, íchitha kataunxuae jopa baxota matomatsíño bárapo penasimera bosibüng', jei. Pong bo petayapukaekaein xuya jumenota: 'Taema xote xeinangje jiña papera xua tinadútame, cien ponasibosixibüng, jam, xua bexa matomatsíname. Xote naiña ekoundeinke bárapo netinadutsiwa, ikinaxore. Icha itaneto dure xua saya cincuenta po penasimera bosixibübe, jande', jei pong bo petayapukaekaein. ⁷Bapoxonae ekeicha ichüngtha yáñnaba: 'Ínkane irü xamdü, ¿eta xóyobe tanekanamataxeinaein taakoibichi xua katsíname bapong?' jei. Bapong jumenota, pong bo petayapukaekaein jumenótatsi, jeye: 'Tha katichi cien po sákube aro sakun', jei bapong. Néxata pong bo petayapukaekaein xuya jumenota: 'Taema xote xeinangje jiña papera xua báyatha tinadútame xua cien po sákube, jam, xua bexa matomatsíname pongtha pong tanekanamataxeinaeintha. Xote naiña ekoundeinke bárapo itaneto tsitsinaxore, icha pena netinadutsiwa tinadure xua saya ochenta po sákube, jande', jei pong bo petayapukaekaein. ⁸Íchitha bo pexeinaein yábara paeba pong bo petayapukaekaeinchi xua pinae bekein bara bapong abe taéxana íchitha yaputane xua pokotsiwa piakoutha nayawena xua poxonae pía jiwimonae peexanaewa. Daxota paka tsipáebatsi pomonae ánoxuae jinompa bárapo kae pin nákuathe, pomonae jopa penejumekowüntsiwi nama barichi. Barapomonae yábara najüntükoyene wüünaeta xua pokoyene kae jiwimonae penaexanaewa xua daxota kae jiwimonae nantiya penayaweneibinexa. Baxua barapomonae éxana beyakaincha pomonae Nakom pejumekowüntsiwi.

⁹”Paka tsipáebatsi ichamonae pakatsibéibare parátixi xua paiña jiwi paiña neexaneibinexa po parátixi xeina pomonae bárapo kae pin nakuathepiwi pomonae abe peexanaewi. Bapoxonae poxonae jopa paxeinaem tsane parátixi pomonae báyatha payawéname barapomonae paka matenta weiweinaya wabina po bongtha xua ataya tsitekaeya pajinompáename.

¹⁰”Pong xua wüünaeya yapukaeka xua poxonae peya penakuichiwiyo, barichi beta yapukaeka xua poxonae pin penakuichiwa. Pong naerabiya éxana poxonae peya penakuichiwiyo, barichi naerabiya exanaena xua poxonae pin penakuichiwa. ¹¹Icha paxam jopa wüünaeya patayapu enaem xua parátixi xua bárapo kae pin nákuathe nexa, Nakom jopa paka itorobiyo xua patayapu enáename xua bapong pía pexeíña pexeinaewa tatsi. ¹²Icha jopa wüünaeya payapukaekaem ichüng piáwa, metha néxata jopa paka katsipáe xua paiñawa nexa tsane paiña neyapukaenaewamxae.

¹³”Jintong dapong aibi pong xeina aiña pía Pekanamataxeináeinchibe tatsi xua pong beta tanakuita bárapo pía aiña Pekanamataxeináeinchibe tatsi. Tsipéi bárapo petanakuichin meisha antobeya taéxana kaeintha pong pía pekanamataxeinaeinchi poxonae itoróbatsi. Icha pía pekanamataxeinaeinchi jopa taraichiyo. Kae pía pekanamataxeinaeinchi wüünaeya taéxana. Icha pía pekanamataxeinaeinchi abeya taéxana. Barichi jintong pong bichokono ántobe Nakom, jopa itaküüpaetsi xua bichokono peantobewa parátixi poxonae yawa bichokono antobetsi Nakom”, jei Jesús.

¹⁴Íchitha fariseomonae pomonae xua bichokono ántobe nawita parátixi, barapomonae báraxua Jesús jumetayénatsi, yawa Jesús kuikapónatsi. ¹⁵Néxata Jesús fariseomonae baraichi, jeye: “Paxam barapomonae pam, xua ichamonae paka yábara nantaxeina xua pejüntükoyene wüünae jiwi pam. Íchitha Nakom paka jüntükoyene yaputane xua peajüntükoyénebe jiwi pam. Xua pokotsiwang jiwi bichokono tsita aiñakuichi, baxuang Nakom bichokono tsita abetsi”, jei Jesús.

Meje yábara poxonae Jesús diwesi yábara paeba Moisés pía peitorobi koyene tatsi, yawa pokoyene Nakom waba jiwi petanaexanaenéxatsi pijimonae pomonae itorobiya pekanamataxeinaexae

¹⁶Ekeicha Jesús namchi, jeye: “Kaena báyatha jiwi xeina Moisés pía peitorobi koyenewa tatsi, yáwano xua pomonae Nakom peitorobi jume pepaebiwi pía pekuidubiwa tatsi, beya Juan patopa. Barapoxonae kaena poxonae Juan pópona pong jiwi Pebautisabin, jiwi paebinouta pokoyene Nakom xua waba jiwi petanaexanaenéxatsi pijimonae tatsi pomonae itorobiya peewatsixae. Jiwi bewa yábara najüntükoyene süübi áwiya xua pepatsinexa Nakom pía peitorobi nakua beicha tatsi.

¹⁷”Yapuwüünae xua itaboko yawa ira pewerawerakaewa. Nama Nakom peitorobi jume ajumeyapusüü bápana jopa pewerawerakaewa bekein bara kae peitorobi koyene”, jei Jesús.

Meje yábara poxonae Jesús kuiduba xua jiwi piséurixi pepunapenteibiyainwa

(Mt 19.1-12; Mr 10.1-12)

¹⁸Ekeicha Jesús namchi, jeye: “Pong punaxuba píowa yawa ichowa píchapa, bapong abe éxana piséuritha yawa Nakom peitütha tatsi, tsipéi Nakom tsítatsi

xua powa kopiya barü pópona ápara bara píowa tatsi. Barichi pong pita petsiriwa powa pepunaxubixae piseuri, bapong barichi piakoutha abe natsiéxana, tsipéi Nakom ichowa yábara nantaxeina xua bapowa kataunxuae pía pebin xeina bekein bara punaxuba”, jei Jesús.

**Meje yábara poxonae Jesús diwesi yábara paeba xua
pong kopei pexeinaein irü ichüing pong Lázaro**

¹⁹Ekeicha Jesús tsipaeba icha diwesi, jeye: “Matha írürü barichi pebin pong kopei pexeinaein. Pexeina paparuwang xua pena paparuwa namaxatabapona. Matáüta daxita matakabi peitüpanáe nabanaewa exaneiba. ²⁰Írürü ichüing pebin pópona, pong pewüing Lázaro pong peakopeibin. Bapong Lázaro wang nawita xeina peperüütotha. Bapong íratha eka pong kopei pexeinaein píabo boupatha weya tatsi. ²¹Xua pong kopei pexeinaein pía pexaethopáewatha taothopéikatsi pexaewa pepürüwang, báraxua Lázaro ichichipa xaiba. Yawa aurimonae pata xua Lázaro pewangdaebinéxatsi. ²²Icha matakábitha Lázaro tüpa. Matatsunpiwi Lázaro jumopepítatsi. Jumopekapoinchi ichaxota Abraham pópona athabeicha. Írürü pong kopei pexeinaein tüpa, yawa müthütha xotsi.

²³”Pong kopei pexeinaein patopa ichaxota pateiba pomonae pewerapeibiwi bárapo petüpáe kuirukoyene nákuatha. Bapong bichokono átene. Bapong athabeicha nekoicha. Bapoxonae Abraham tajü taebíyatsi asiyeicha, yawa xua Lázaro barü ekíyatsi. ²⁴Pong kopei pexeinaein wawái: ‘Tamo susato jíwanam, Abraham, nekui-yábara nantaxéinare. Inta Lázaro itorobinka taneébató memeiñatsinexa mératha poxoru bichokono netaxua po ishótothe unguang’, jei. ²⁵Íchitha Abraham jumenota: ‘Tamonae susato jíwanam, nantaxéinatabare xua kaena báyatha poxonae kataunxuae asüü póponame, xéiname xua akabem xua pokotsiwang ichichípame xua nexainaewa. Wüünaeya póponame. Íchitha nama Lázaro jopa daichiyo poxonae kataunxuae asüü pópona. Jopa wüünaeya poponaeyo. Xote bapong wüünae yábara nantanuweya kanantaxéinatsi xua peyawenaenéxatsi. Íchitha nama xam jopa karaichiyo. Bichokono kaperüüwéyawa. ²⁶Yawa pin pitapatororo naka yakaincha dukua. Daxota pomonae ichichipa bara bedunadeka taxaiña wéreka jopa itaküüpaetsi xua bara beparekaena nexaiña béreka. Irü pomonae nexaiña weruneina jopa itaküüpaetsi xua taxaiña bétsina pepatsinaenexa’, jei.

²⁷”Néxata pong kopei pexeinaein jumenota: ‘Néxata tamo susatopim kawüüka-tsi inta Lázaro itoróbare taxa píabo beya. ²⁸Baxota xeinang cinco póyobe táyapin jiwí. Abraham Lazarotha najumekarure xua bü táyapin jiwí jopa pepatsinéxarü tsane ichaxota unguang xua bichokono atenein’, jei. ²⁹Íchitha Abraham jumenota: ‘Ápara néyapin jiwí xeina Moisés pía peitorobi koyene tatsi, yawa Nakom peitorobi jume pepaebiwi pía penakuidubiwang tatsi. Bü barapomonae éxana pokotsiwa báraxua pejumekoya’, jei Abraham. ³⁰Pong kopei pexeinaein jumenota: ‘Aa, tamo susato jintom, Abraham, íchitha icha petüpaewi jíwana kaein siwaponae ponaena barapomonae beya, barapomonae jumekowüntsina yawa icha jüntükoyene pexeinaenexa tsane Nakomtha’, jei. ³¹Íchitha Abraham jumenota: ‘Icha barapomonae jopa exanaeyo xua peexanaewa pokotsiwa Moisés pía peitorobi koyene tatsi itoroba, xuano xua Nakom peitorobi jume pepaebiwi pía pekuidubiwang tatsi, barapomonae jopa jumekowüntsipae bara bekein Nakom taitorobichipa xua jíwana kaein pomonae petüpaewi’, jei Abraham”, jei Jesús.

Meje yábara poxonae Jesús paeba xua jintong jopa bewa kana exanáe ichüingtha xua irü abe peexanaewa tsane

(Mt 18.6-7,21-22; Mr 9.42)

17¹Jesús namchi pijimonaetha, jeye: “Bárapo nakuathepiwi ataya xeineiba po jiwi pekana exanáexaetsi xua ichamonaе kana éxana xua bárapo jiwi abe peéxanae kuirukoyene peexaneibinexa xua daxota jopa nejumekowüntéibiyo. Íchitha pebin tsokúae xua bapong kana éxana, xua ichüing kana éxanatsi, xua ichüing abe peexanaewa tsane. ²Metha jame wüünae tsipae xua bárapo pebin pin iboto wishi kütsípatsi pin marmentha bárapo iboto kayawa kabutabaichipatsino. Tsipéi jopa wüünae tsipae xua bapong kana éxana xua ichamonaе abe peéxanae kuirukoyene éxana pomonaе kataunxuae aena nejumekowünta. ³¡Dota pam, xua jopa bara paichim tsane!

”Icha ichüing pong irü pejumekowüntsindü, icha bapong pákata abe éxana, bapong baxua yábara patsipáebare. Icha icha jüntükoyene paka tsita xeinaena peúruxae xua pákata éxana, bapoxonaе pakuiyábara jüntemáinare pokotsiwa bapong pákata éxana. ⁴Bekein bara bapong abe pákata éxana, siete pokuíyobe xua kae matakábitha, yawa paka tsipaeba siete pojuméyobe, bapong jeye: ‘Maisha aulang tsokúae xua abe pákata éxanatsi, ekeicha jopa pákata abe exanáe tsainchi’, jei pong abe éxana. Daxota paka jeichi xua nantawénona peyábara jüntemainaewa baxua xua pokoyene bapong pákata abe éxana”, jei Jesús.

Meje yábara poxonae Jesús yábara paeba xua pin pejumekowüntsi koyenewa

⁵Jesús pong Pekanamataxeinaein jiwi, ekeicha pía peitorobiwi baraichi, jeye: —Pana kana éxande xua bichokono pata jumekowüntsiwa beyakaincha xua ánoxuae, jei barapomonaе.

⁶Néxata Jesús pía peitorobiwi jumenota, jeye:

—Icha paxeináetsipame xua be peya pejumekowüntsi koyenéwiyo xua bekein icha mostaza xutiyo jüta ichi xua tsika xutiyo íchitha bara paka itaküüpa xua náewatha paiña nejeiwa: ‘Ee, naewa jiñakoutha natabüjonde yawa pin marmene beya ekeicha úngkuare’, paiña nejeiwa. Bapoxonaе bárapo nae jopa báyatha tsipae poxonaе pajam tsipae baxua, jei Jesús.

Meje yábara poxonae Jesús paeba xua pokotsiwa jiwi bewa exanáe pokotsiwa pentakaponaеin itoroba

⁷Ekeicha Jesús namchi, jeye: “Metha ba paxam jíwana kaein xeina pía petanakuichinchi pong penakuichin bapong ira kakobauya, matáüta vaca yapukapópona. Bapoxonaе bapong pong penakuichin wexua wenawirena, bo benawirena. Pong paxam jíwana kaein metha bapong jopa jei tsipae: ‘Ane-tha, jondena matha xaema’, jopa jei tsipae bapong. ⁸Jame bapong jei tsipae: ‘Pexaewa netsi úpain exánare. Inta karena tsaibinde pexaewa pexaethopáewa-tha poxonaе xunaekang. Bapoxonaе kotakaya bexa nabánare’, jei tsipae pong paxam jíwana. ⁹Pong penakuichin jopa jei tsipaetsi: ‘Jako xua taneyawenaewam’, jopa jei tsipae pong paxam jíwana. Tsipéi saya taéxanatsi xua bapong peitorobixae. ¹⁰Icha pong petanakuichin ichi xua taéxana peitorobixaetsi pía

pentakaponaein, paxam bara jüta paichinde. Poxonae pawétame pokotsiwa Nakom paka itoroba, pajande: ‘Paxang pata nebusikuitaetaewimonae pang xuano pata pekuipawi pang, tsipéi saya paéxanang xua pokotsiwa bewa pae-xanaein’, pajande”, jei Jesús.

Meje yábara poxonae Jesús axaibi éxana diez póyobe pebiwi, pomonae peperüüsawichimonae

¹¹Poxonae Jesús kataunxuae ekaona Jerusalén tómara beya nexa, Samaria nakua iya pona yawa Galilea nakua iya pona. ¹²Poxonae Jesús tsika tomaríyotha patopa, diez póyobe pebiwi pata Jesús piaxantha tatsi. Bárapo diez póyobe peperüüsawichimonae, íchitha barapomonae Jesús tajü wetaeumendénatsi. ¹³Barapomonae wawái, jeye:

—Jesús, pong Patatanekuidubim, pana neyábara najüntükoyene xéinare jiña pata tana neyawenaenexam, jei bárapo peperüüsawichimonae.

¹⁴Poxonae Jesús tane barapomonae, Jesús barái, jeye:

—Papónare sacerdotemonaetha paiña nepaka kataenexa, jei Jesús.

Poxonae kataunxuae námtotha enapona, bapoxonae barapomonae perüüjume tsürüküpáe xua peperüüsawíwatsi barapomonae. ¹⁵Bárapo diez póyobe jíwana kaein, poxonae bapong taeba xua axaibi tsürüküpáe, bapoxonae Jesús beya pona, xua kaibeya pona, yawa jumedangweya Nakom wüünae jáintatsi. ¹⁶Barapong pentabokototha ungkua Jesús peitabaratha tatsi. Yawa ira betaeungkuareka xua Jesús pejakobinéxatsi. Bárapo pebin ápara pong seikaya Samaria nakuapin. ¹⁷Néxata Jesús namchi, jeye:

—¿Diez póyobe ítara axaibi éxanang? ¿Ínkane dapó nueve póyobe jane? ¹⁸Bapong ápara penanapaincha jinompaewi jíwanapin. Yawa kou kompa kaibereña pía wüünae jainchichi Nakom, jei Jesús.

¹⁹Néxata Jesús ekeicha pebin baraichi, jeye:

—Nontaponde pónveno, báyatha axaibim tana neyábara jumekowüntsixaemxae xua bara tana neitaküüpaewa xua axaibi taka exanáewatsi, jei Jesús.

Meje yábara poxonae Jesús yábara paeba pokoyene xua poxonae Nakom itorobiya ewatsina jiwi

(Mt 24.23-28,36-41)

²⁰Fariseomonae Jesús yáñabatsi namchi, jeye:

—¿Eta poxonae Nakom itorobina pong peitapetsinxae pata tanekapanenebiwa exanaenexa, xuano xua itorobiya pata taneewatsiwa? jeichichi barapomonae Jesús. Jesús jumenota, jeye:

—Poxonae Nakom itorobiya ewatsina jiwi, bárapo koyene jiwi jopa itaküüpaetsi xua petaewa baxua. ²¹Daxota jiwi jopa jei tsane: ‘Baraxote báyatha patope’, jopa jei tsane. Matáütano jopa jei tsane ‘Xoteiche báyatha patope’, jopa jei tsane. Tsipéi ápara pokoyene xua Nakom itorobiya ewatsina jiwi bárapo koyene patopa jíwitha. Daxota Nakom jüntükoyene itorobiya ewatsina jiwi pomonae pejumekowüntsiwixaetsi Nakom, jei Jesús.

²²Néxata Jesús barái pijimonae, jeye:

—Matakabin othopaena po matakábintha poxonae paichichípame xua paiña tana netaewam xua pongxaein Nakom Tananeitapetsin xuano xua múxuna

bepataebenáename kaentakabi xua bárapo matakabin jíwana. Dapo jumetha jopa paiña nepaka itaküüpaewa tsane xua paiña tana netaewam tsane xuano xua kaentakabi xua bárapo matakabin jíwana. ²³Ichamonae paka jei tsane: ‘Baraxote báyatha patopa bapong’, paka jei tsane. Ichakuitha paka jei tsane: ‘Baraxoteicha báyatha patopa bapong’, paka jei tsane, íchitha jopa paponaeinde bara beya yawa jopa pajumekowüntsinde. ²⁴Icha yámüxü ichi xua jemeicha yakoicha ungueika, xua koicha nayotaxuba itabokototha, barichi tsane po matakábitha poxonae patopeikaein pongxaein Nakom Tananeitapetsin. ²⁵Íchitha kopiya nantawénona xua nepérxaxa júbina ichamonae. Yawa neitawétsinano pomonae xua ánoxuae jinompa. ²⁶Icha matha ichi poxonae Noé kaena báyatha pópona jiwi jopa tsakeinaeyo xua Nakom pin awüübo exanaena methaunxuae. Saya barompaya icha jüntükuiitha jinompa daxota jiwi wérapa. Barichi jüta ichi tsane poxonae patopeikaein bárapo kae pin nákuathe xua pongxaein Nakom Tananeitapetsin. Poxonae patopeikaein jiwi jopa tsakeinae tsane xua Nakom wérapa exanaena bárapo jiwi pomonae jopa pejumekowüntsiyoaetsi. ²⁷Pomonae jinompa poxonae Noé pópona, barapomonae jüntema nabaneiba, yawa apeiba, yawa jíwitha jijinapona yawa pexántixi jitha dodoubapona, beya yantakabi óthopa poxonae po matakábitha Noé pin jera naetha joniya. Bapoxonae pin emamüü jopa. Daxita Noé wepu bunothópatsi pomonae jinompa poxonae Noé pópona. ²⁸Barichirü jiwi pokotsiwa ichamonae éxana poxonae ichüng pebin pópona pong pewüing Lot. Barapomonae nabaneiba, yawa apeiba, yawa komakeiba, yawa kaenaeteiba, yawa pexaewa übeiba, yawa bomüxüing akabeiba. ²⁹Poxonae bapong Lot Sodoma tómara wenaetabiya, barapoxonae isho iteremüü, müü othopeika tómaratha, yawa pokotsiwa be ibo pürü baxua itaboko weothopéikano xua bichokono atou. Daxita Sodoma tomarapiwi wérapa. ³⁰Icha Sodoma tómaratha ichi xua jemeicha isho itaremüü, müü othopeika yawa xua jemeicha ibo pürü itaboko weothopeika, bara jüta ichin tsane jemeicha patopeikaein pongxaein Nakom Tananeitapetsin poxonae jiwi tsita naitüütsin.

³¹“Bárapo matakábitha icha ichüng bo matatúpatha unguea, barapong jopa bewa botha jonyáe tsane xua penotsiwa tsane pokotsiwa tabobeinchi bómüxü tütutha. Irü pong pábitha pópona jopa bewa kaibeya po nae tsane botha, saya jame naiña benaetsirikuaena. ³²Pakuiyábara nantaxéinare Lot piseuri tatsi xua tüpa poxonae jopa naiña naetsirikuaeyo piáwang kaibe pesiwanekoyaexae. ³³Pong naantobeya nata éxana pokotsiwa bapong ichichipa, bapong jopa xeinaeyo peajüntüyapusüüwa po peajüntüyapusüüwa ataya tsiteka xua Nakom pía nakua beicha. Íchitha pong neantobeya inta éxana pokotsiwa ichichipang bapong xeinaena peajüntüyapusüüwa, po peajüntüyapusüüwa ataya tsiteka xua Nakom pía nakua beicha.

³⁴”Paka tsipáebatsi po matakaiitha patopaein, aiña pebinbe pongbe xua nantajúpaya maitékabe, kaein matatsunpin pichina, pong pejumekowüntsixae Nakom. Ichüng saya kuenta ponaeinchi jopa pejumekowüntsíyoxae Nakom. ³⁵Írürü aiña yabúyobe nakuara yakatoyorobauyáenabe, ichowa matatsunpin pichina pejumekowüntsixae Nakom. Ichowa saya kuenta ponaeinchi jopa pejumekowüntsixae Nakom. ³⁶Írürü aiña pebinbe nakuara nakuitauyáenabe pábitha, ichüng matatsunpin pichina, ichüng saya kuenta ponaeinchi”, jei Jesús.

³⁷Poxonae baxua Jesús pijimonae jumetainchi, Jesús yáíñabatsi jeichichi, jeye: —Pata Tanekanamataxeinaem, ¿eta xota metha baxua exanaena? jeichichi pijimonae.

Jesús pijimonae jumenota pekayábara jüta pepaebi diwesíyotha, jeye:

—Kekeremonae ba nakaetuta ichaxota baurin boka. Bara jüta paichim tsane paxam pomonae tana nejumekowüntsi jiwi pam pana newüünae ewatsínname po matakeitha patopeikaein, bárapo matakeitha panakaetutsínname, jei Jesús.

Meje yábara poxonae Jesús paeba pekayábara jüta pepaebi diwésiyo xua yábüyo yábara powa pekuenta tüpaewáyotsi piseuri xua irü pong jiwi peyábara paebin xua penatsikuentsiwa xua abe peexanaexae

18 ¹Jesús pijimonae tsipaeba pekayábara jüta pepaebi diwésiyo xua pekuidubinexa, jeye: “Paxam daxita matakabi bewa pawüükeibim Nakom. Paiñaxoba paajüntükoyenetaetabim tsaibim poxonae pawüükéibame”, jei Jesús. ²Ekeicha Jesús pijimonae barái, jeye: “Matha írürü tómaratha pópona pong jiwi mata diwesi xainxaintsin, penatsikuentsiwangtha diwesi, pong juez matawüing. Bapong jopa Nakom kunuwichi. Yawa bapong jopa beta yábara nantaxeinaeyo jíwitha xua peyawenaenexa. ³Bárapo tómaratha írürü pópona petsiriwa, powa pekuenta tüpaewáyotsi piseuri. Barapowa siwaponeiba pongtha pong jiwi mata diwesi xainxaintsin, penatsikuentsiwangtha diwesi, pong juez matawüing. Barapowa jei tsaibi bapongtha: ‘Neyawende, ichüing inta abe éxana’, jei tsaibi. ⁴Pong jiwi peyábara paebin xua penatsikuentsiwa xua abe peexanaexae bapong aiña matakabin juntukuru jopa beexanébiyo pokotsiwa barapowa wüükeiba. Íchitha bapong matapaiña nantaxeina. Najéi: ‘Xang ápara jopa Nakom kunuwiño. Matáüta jopa beta tayábara nantaxeineibin jiwi xua yawenaenexa. ⁵Íchitha bárapo pekuenta tüpaewáyotsi piseuri matowa nefayakota daxota neamuxufáetabi éxana. Metha moya barapowa yawenaein, xua ekeicha barapowa jopa penesiwa ponaenexa, tsipéi bichokono amuxufáetabin’, najéi pong jiwi peyábara paebin xua penatsikuentsiwa xua abe peexanaexae”, jei Jesús.

⁶Jesús pong Pekanamataxeinaein jiwi ekeicha namchi, jeye: “Baxua ápara pokotsiwa paeba pong jiwi peyábara paebin xua penatsikuentsiwa xua abe peexanaexae xuano pong jopa beta yábara nantaxeinaeyo jíwitha xua peyawenaenexa. Pajumenaitáware pokotsiwa bapong paeba. ⁷¿Eta xua metha panantaxéiname? ¿Metha bara Nakom kame báyatha tsaibi poxonae jiwi yawenéibatsi pomonae xua pewüükeibixaetsi? ¿Jume, ápara! Nakom naiña jiwi yaweneiba poxonae bárapo jiwi abe exanéibatsi ichamonae, beyakaincha xua barapowa yawénatsi. Jame yatsikaewa Nakom yaweneiba pomonaetha, pomonae peitapetsixae pewüükeibixaetsi merawitha yawa matakéithano. ⁸Paka tsipáebatsi xua Nakom jopa báyatha tsaibiyo xua peyaweneibinexa pomonae nejumekowünta. Xang pongxaein Nakom Tananeitapetsin poxonae patopeikaein, ¿metha bara pin bicheito taeyopeikaein jampa, pomonae xua wüünaeya beta tana nejumekowüntsiya jinompaewi pomonae Nakom pewüükeibiwichi?” jei Jesús pijimonaetha.

Meje yábara poxonae Jesús paeba pekayábara jüta pepaebi diwésiyo yábara xua fariseomonae irü pong parátixi matoma penoteibin

⁹Jesús icha pekayábara jüta pepaebi diwésiyo tsipaeba pomonaetha, pomonae jiwi peabiwi pomonae xua nayábara nantaxeina xua pinae beta jumekowünta xua pinae ichamonae jopa daichiyo. ¹⁰Jesús namchi, jeye: “Írürü aiña pebinbe Nakom pin píabo beya pónabe, xua baxotiya pewüükaenéxabe Nakom. Ichüing

fariseomonaepin, ichüing bapong jíwana pomonae parátixi pentomanotéibiwi po parátixi jiwi bewa katsibina pong romanomonaе itorobiya pía pepa peewatsinchi nexa. ¹¹Fariseomonaepin nantakotungkua yawa penthütotha wüüka Nakomtha. Poxonae tsipaeba Nakom, jeye: ‘Nakom meisha xam nejüntükoyene wüünaein. Jüntükoyene weiweinang xua tana neyawenaewam tsipéi xang jopa be ichamonaеiño pomonae xua jiwi pekaibiwi, yawa xua peabewi, xuano xua penasikuimatakáetsiwi yabüxitha. Matáütano xang jopa dapomonaе jíwanaiño pomonae xua parátixi pentomanotéibiwi po parátixi jiwi bewa katsibina pong romanomonaе itorobiya pía pepa peewatsinchi nexa. ¹²Xang kayábara nainbótatsi aiñakuíyobe xua kae semánatha, beta takawüükeibinéxatsi. Matáütano kae parátixi jíwana wetsabeibang xam nexa poxonae diez po paratiximonaеbe xeineibang. Yáwano daxita xua xeinang báxuano jíwana tsabang xam nexa’, jei fariseomonaepin. ¹³Íchitha pong parátixi pentomanoteibin auranaya tajü beungkuiya. Saya írabe nekoreka yawa jopa athabé nekoichaeyo. Saya ü penantanuweya penanthüthüjáyabi abe peexanaeinxae. Bapong Nakom wüüka, jeye: ‘Jaibó, Nakom neyábara najüntükoyene kuixéinare xua tana neyawenaewam tsane bekein bara taajüntükoyenyápubein’, jei pong parátixi matoma penoteibin. ¹⁴Barapong pong parátixi penoteibin poxonae najumeweta xua wüüka Nakom, náwiya píabo beya. Paka tsipáebatsi xua barapong Nakom tsítatsi xua jopa xeinaeyo xua penatsikuentsiwa xua abe peexanaexae. Íchitha fariseomonaepin jopa daichichi tsipéi bapong áwiya peajüntükoyenebein. Pong xua piakoutha peaiñakuí jintong náexana pejüntükoyénetha, Nakom exanaena xua bapong pekuipawi jintong naexanaena. Íchitha pong xua pepawi náexana pejüntükoyénetha, Nakom exanaena xua bapong peaiñakuí jintong naexanaena”, jei Jesús.

**Meje yábara poxonae Jesús jeye pexuitha:
“Bárabü Nakom beta paka yawenaena”, jei**

(Mt 19.13-15; Mr 10.13-16)

¹⁵Néxata jiwi Jesús takapónatsi pexui, xua Jesús pejayabinexa pekóbeta yawa xua Nakomtha petawüükaenexa bárapo pexui xua pejeinexa: “Bárabü Nakom beta paka yawenaena”, pejeinexa. Íchitha Jesús pijimonaе tatsi poxonae baxua tane, tamrópata notarüküpa xua barapomonaе kuimatawéntatsi pomonae pexui karendena tsaibi. ¹⁶Íchitha Jesús waba pexui. Jesús pijimonaе barái:

—Bara pakópabare pexui xua tana ítata patsinexa. Jopa pexui paitawétsinde, tsipéi Nakom pía peitorobi nakua tatsi saya meisha barapomonaе nexa pomonaе pejüntükoyene wüünaewi icha pexui ichi. Pexui píakuí xua tayapuwüünaetsi xua pía jüntükoyeneintha jumekowünta Nakom. ¹⁷Xaniyang paka tsipáebatsi. Pong jopa yábara jumekowüntsiyo xua icha be jopa pexui ichiyo xua ba pexui tayapuwüünaetsi xua jumekowünta, bapong bápana jopa naexanáе tsane Nakom pijimonaе tatsi pomonaе Nakom itorobiya éwata, jei Jesús.

Meje yábara poxonae pewowin pong kopei pexeinaein Jesús tsipáebatsi

(Mt 19.16-30; Mr 10.17-31)

¹⁸Kaein pong pentakaponaewi jíwanapin bapong Jesús yáíñabatsi, jeichichi:

—Já Tanekuidubim, maisha nejüntükoyene wüünaem. ¿Éta xua kopiya matha exanokuaein xua ajüntüyapusüüya tapoponaewa tsane xua ataya tsane? jei.

¹⁹Jesús jume epapita, jeye:

—¿Eta xua nebaram: ‘Nejüntükoyene wüünaem’, jam? Ápara ichüing dapong aibi pong pejüntükoyene wüünaein. Jame meisha ápara bapong Nakom kompa pejüntükoyene wüünaein. ²⁰Xam yaputáneme pokoyene Moisés pía peitorobi koye-néwatha itoroba xua jeye: ‘Jopa ichowa pichinde ichüing píowa tatsi, jopa ichüing bexubinde, jopa kaibinde ichüing piáwang tatsi, jopa naerabiya kayábara paebinde pokotsiwa ichamonae éxana. Axang jumebarükuí iturajínare. Matáütano énátha jumebarükuí iturajínare’, jei Moisés, jei Jesús.

²¹Pong pentakaponaein jume epapita, jeye:

—Daxita kaena báyatha bárapo koyenein exaneibang, poxonae pexúyothang tamrópata pítabang, beya ánoxuae yakuiya piñong, jei.

²²Poxonae Jesús baxua jumetane, Jesús barái, jeye:

—Kataunxuae icha kuikoyene kata seika xua pokotsiwa neexanaewam tsane. Icha ichichípame xua jopa nekata akoibiyonexa tsane xua pokotsiwa wüünaeya neexanaewa, matha daxita kaenaere pokotsiwa xéiname, yawa katsíbare pomonaetha, pomonae peakopeibí jiwí. Bapoxonae jame moya anetha, nepunaponde. Bekein bara bapoxonae akopeibim tsane, dáichitha Nakom kakatsina peitaboko beicha, pokotsiwa Nakom nekajüntana botsiwa pokotsiwa bichokono wüünae, jei Jesús.

²³Poxonae bárapo pebin jumetaeba, bichokono jüntüwekoyéi, tsipéi bichokono kopei pexeinaein. ²⁴Poxonae Jesús tane xua barapong jüntükoyene wekoyéi, Jesús barái, jeye:

—¡Maisha bichokono ayapubé kai xua kopei pexeinaewi náexana Nakom pijimonae tatsi jíwana pomonae itorobiya kanamataxeina! Tsipéi barapomonae bichokono antasiwayatane bárapo pía kopei, beyakaincha xua Nakom antobetsi. ²⁵Nama bichokono akuiruyapubé xua duwein pong pewüing camello xua bapong pejoniyaewa akuicheto peetabü wang iya. Íchitha nama yatsikaewa pong bichokono kopei pexeinaein taakuiruyapubetsi xua náexana Nakom pijimonae tatsi jíwana pomonae itorobiya kanamataxeina beyakaincha xua poxonae akuiruyapubé xua poxonae camello akuicheto peetabü wang iya pejoniyaewa, jei Jesús.

²⁶Pomonae xua baxua jumetaerúkupa, barapomonae Jesús yáinábatsi, jeye:

—Bapoxonae ¿jintam metha néxata itakúüpatsi xua penakapanepaewa piakoutha? jei barapomonae.

²⁷Jesús jumenota, jeye:

—Pebiwí ba jopa itakúüpaetsi xua baxua éxana, saya jame meisha Nakom kompa itakúüpaetsi xua jiwí napaeba kana éxanatsi. Tsipéi daxua aibi pokotsiwa Nakom taakuiruyapubetsi, jei Jesús.

²⁸Pedro barái, Jesús baraichi:

—Tapata Tanekanamataxeinaem, paxang daxita pakuenta ponang pokotsiwa paxeinang pata paka punaponaewa tsainchi, jei Pedro.

²⁹Jesús jumenota, jeye:

—Bara xaiñeya paka tsipáebatsi. Nakom beta kana exanaena daxita pomonae peyábara kueikueijeixae po diwesi xua Nakom waba jiwí petanaexanaenéxatsi pijimonae tatsi pomonae itorobiya peewatsixae. Nakom beta kana exanaena barapomonae piabong pekuenta ponaexae, yawa piseuri pekuenta ponaexae. Matáütano beta kana exanaena pomonae peweichowí pekuenta ponaexae. Matáütano beta

kana exanaena pomonae pámchowi pekuenta ponaexae. Matáütano beta kana exanaena pomonae paxéi jiwi pekuenta ponaexae, matáütano peniwi pekuenta ponaexae. Matáütano beta kana exanaena pomonae pía pexui pekuenta ponaexae. ³⁰Barapomonae bárapo koyenein éxana taneántobe jíwixae, daxota daxita barapomonaetha Nakom jopa juniya katsi tsane bárapo kae pin nákuathe. Matáütano barapomonaetha Nakom katsina pía peitorobi nakuatheicha peajüntükoyeneyapusüüwa po peajüntükoyeneyapusüüwa ataya tsiteka, jei Jesús.

**Meje yábara poxonae Jesús nayábara paeba akoibi
pokoyenebetha xua poxonae tüpaena**

(Mt 20.17-19; Mr 10.32-34)

³¹Bapoxonae Jesús pijimonae kompa waba aishowa beya xua pomonae doce póyobe tatsi. Jesús barái barapomonae, jeye: “Ánoxuae ponaeinchi Jerusalén tómara beya. Baraxotiya tana nayábara jumekuiwetsinexa bara nama, pokoyene Nakom pía peitorobi jume pepaebiwí newüünae tsiwanaya yábara tina xua xang pongxaein Nakom Tananeitapetsin. ³²Yawa nekaenaetsina pomonaetha, pomonae penanapaincha jinompaewi, xua icha nakua wérena peponaewi xua barapomonae tanekuikaponaenexa. Matáütano abe neyábara paebina. Yawa neyábara naone-subábina. ³³Yawa nekuainchina, barapomonae nebexubina. Dáichitha poxonae akoibi po matakábibe yapukaewina ekeicha asüü neexanaena petüpáe kuirukoyene weya”, jei Jesús.

³⁴Íchitha Jesús pijimonae tatsi jopa yaputaeyo baxua xua pokotsiwa Jesús pijimonae tsipaeba. Barapomonae jopa jume itakuiküüpaetsi poxoru Jesús barompaya nabarü jume yábara kanamchi, baxua barapomonae taayapubetsi bichokono.

**Meje yábara poxonae Jesús Jericó tómaratha
axaibi éxana pong peitatanakütsin**

(Mt 20.29-34; Mr 10.46-52)

³⁵Poxonae Jesús itiya pona Jericó tómara, pong peitatanakütsin námtotha eka, yawa jiwi wüükeibeka parátixi. ³⁶Poxonae bapong pongxae peitatanakütsin jumetane xua juiña pin bicheito pona, bapoxonae bapong yáinaba, ichamonae yáinabatsi, jeye: “¿Eta xua metha juiña pin bicheito pona?” jei pong peitatanakütsin. ³⁷Bapong pongxae peitatanakütsin jumenótatsi, jeye: “Ápara Jesús, Nazaret tomarapin xote imoxoyo patope”, jei. ³⁸Néxata bapong pong peitatanakütsin jumedangweya wawái, jeye:

—Jesús, David pía pemómoxi susato jíwanapim, pongxaem Nakom nekaitapetsim neyábara najüntükoyene xéinare jiña tana neyawenaenexam, jei pong peitatanakütsin.

³⁹Pomonae xua pin bicheito matakaenapoinchi, barapomonae pong peitatanakütsin jumematawéntatsi xua moya peekaenexa. Íchitha bapong ekeicha jumedangweya wawái, jeye:

—Jesús, David pía pemómoxi susato jíwanapim pongxaem Nakom Nekaitapetsim neyábara najüntükoyene xéinare jiña tana neyawenaenexam, jei pong peitatanakütsin.

⁴⁰Néxata Jesús narúntaba. Jesús namchi, jeye:

—Painta maxüxawena, jei.

Poxonae pong peitatanakütsin imoxoyo patopa Jesustha, Jesús yáíñaba, barái, jeye:

⁴¹—¿Eta xua jiña takata exanaetsi? jei.

Pong peitatanakütsin jumenota, jeye:

—Jesús Tananekanamataxeinaein, benekotsin kuinaya, jei.

⁴²Jesús jumenota, barái, jeye:

—Moya nekore antha. Axaibi kaéxanatsi tana neyábara jumekowüntsixaemxae xua bara tana neitaküüpaewa xua takayawenáewatsi, jei.

⁴³Kaena naiña bapong nekotaxuba. Yawa Jesús punapoinchi. Matáütano Nakom wüünae jáintatsi. Poxonae pin bicheito baxua kuitane, írürü daxita bárapo bicheito Nakom wüünae jáintatsi.

Meje yábara poxonae pebin pong pewüng Zaqueo Jesús jumekowüntatsi

19¹Jesús Jericó tómaratha patopa. Bapoxonae bapong bárapo tómara xenta iya. ²Baxota Jericó tómaratha pebin pópona, pong kopei bichokono pexeinaein. Bapong pewüng Zaqueo. Bapong pong Pekanamataxeinaein pomonae parátixi pentomanotéibiwi po parátixi jiwi bewa katsibina pong romanomonae itorobiya pía pepa peewatsinchi nexa. ³Barapong Zaqueo bekein ichichipa xua Jesús peyaitáewatsi, íchitha Jesús jopa taetsi tsipéi pin bicheito, matáütano poxoru Zaqueo xataxatekeka. ⁴Néxata Zaqueo nantakakuinaepoiña, peitiya ekoíñaenexa tsane naetha, po nae imoxoyo námtotha unguua ichaxota Jesús ponaena, xua Jesús bárapo naetheicha xaniwaicha peyaitaenéxatsi. ⁵Jesús bárapo nae kakuita ekaona, bara asiya nekoicha. Poxonae Zaqueo naetha tayéichatsi, Jesús namchi, jeye:

—Zaqueo, naiña ekoinka tha jiña botha ekaetsi ánoxuae, jei Jesús.

⁶Bapoxonae Zaqueo naiña dunatabika. Matáütano Jesús matenta weiweinaya wábatsi piabotha. ⁷Poxonae pin bicheito baxua tane, Jesús abe yábara páebatsi, jeye:

—Maisha Jesús bewa jopa po nae bárapo botha, tsipéi bapong abe peéxanae kuirukoyene peexanaein, jei bárapo bicheito.

⁸Néxata Zaqueo nantakotungkua piabotha, yawa jeye Jesustha:

—Taema Jesús Tanekanamataxeinaem, tha daxita jíwana wetsabichi pokotsiwa xeinang, takatsibinexa tsane pomonaetha, pomonae peakopeibiwi. Matáütano pomonae xua naerabiya wüükang kae parátixi ekeicha kaewa tha katsibichi cuatro po parátixi, jei Zaqueo.

⁹Jesús jumenota, jeye:

—Ánoxuae Nakom kana éxana xua barapomonae pekapanenebiyáe jíwichi, pomonae bárapo botha peenaewi. Zaqueo, xam Abraham pía pemómoxi susatopiwi jíwanam. ¹⁰Daxota xang pongxaein Nakom Tananeitapetsin patopang tawenaweneinexa tsane pomonae abe peéxanae kuirukoyene peexanaewi pomonae icha xam ichim, xua takapanenebiyaenexa tsane barapomonae, jei Jesús.

Meje yábara poxonae Jesús paeba pekayábara jüta pepaebi diwésiyo xua diez po parátixi yábara

(Mt 25.14-30)

¹¹Barapomonae jumetayena xua Jesús paeba bárapo jíwitha poxonae Zaqueo yábara páebatsi. Daxota Jesús kuiduba bárapo jiwi pekayábara jüta pepaebi

diwesíyotha, tsipéi barapomonae nantaxeina xua Jesús pona Jerusalén tómara beya xua ítara mexeya barapomonae itorobiya pía pepa peewatsinchi tatsi naexanaenawejei.

¹²Bapoxonae Jesús jeye: “Matha írürü pebin pópona. Bárapo pebin jíwanapin pomonae peaiñakuí jiwi pomonae barompaya piamonae matabüxümonae. Bárapo pebin tajü pona icha nákuatha xua barapong icha nákuatha peexanaenexa tsainchi pókotsin be jiwi itorobiya pía pepa peewatsinchi, xua itorobiya peewatsinexa piamonae. Barapoxonae kaibe nawiyáena pía nákuatha. ¹³Poxonae kataunxuae jopa tajü ponaeyo matha waba diez póyobe pebiwi, xua petanakuichinéxatsi. Daxita barapomonaetha barompaya katsina be kae parátixi xua pokotsiwa aiña matoma. Bárapo pebin namchi pomonaetha, pomonae pía petanakuichiwichi, jeye: ‘Bárapo paratixitha pakómokare, ekeicha pakaenaere xuya, paiña xuya nawita nexaina-ponaenexa parátixi. Payakobe kui-óthopare poxonae beya patopaein’, jei bárapo pebin. ¹⁴Íchitha bapong kasébatsi piamonae, pomonae jinompa pía nákuatha tatsi. Pomonae bapong kasébatsi, barapomonae itoroba ichamonae xua pekoyowe petayiyaenéxatsi poxonae bapong pentakaponaein naexanopiya ichaxota pong jiwi itorobiya pía pepa peewatsinchi. Xua bárapo penakajume kaitoróbíwichi pejeinexa: ‘Pongxaem jiwi itorobiya pía pepa neéwatsin, taema, ápara bapong piamonae aichaxaibichi xua peexanáewatsi pong jiwi itorobiya pía pepa peewatsinchi’, jei penakajume kaitoróbíwichi, xua saya tapaeba.

¹⁵“Dáichitha barapong kana éxanatsi, pong jiwi itorobiya pía pepa peewatsinchi, xua ichüng kana éxana pong irü jiwi itorobiya pía pepa peewatsinchi, bapoxonae ekeicha bapong kaibe náwiya pía nakua beya. Poxonae bapong pía nákuatha patopa bapong waba pía petanakuichiwichi pomonaetha, pomonae katsiba parátixi. Waba peyaputaenexa icha barapomonae metha kómoka yawa kaenaeta icha be pókotsi koyeneya báyatha bapong itoroba. ¹⁶Pong kopiya patopa bapong namchi: ‘Tanekanamataxeinaem, po parátixi nekátame, bárapo paratixitha kómokang, xuya ekeicha kaenaetang, ekeicha diez po parátixi matoma xeineibang’, jei pong kopiya patopa. ¹⁷Pong Pekanamataxeinaein jumenota, jeye: ‘Maisha xam beta éxaname pong inta nenakuichim. Yáitama beta eexanapóname xua peyauyo kaitoróbatsi daxota pentakaponaein kaéxanatsi xua nekanamataxeinaewa tsane diez po tomariyobepiwi’, jei. ¹⁸Irü icha petanakuichinchi patopa. Bapong jeye: ‘Tanekanamataxeinaem, po parátixi nekátame, bárapo paratixitha kómokang, ekeicha kaenaetang, ekeicha matoma xeineibang cinco po parátixi’, jei. ¹⁹Pong Pekanamataxeinaein jumenota. Bapongtha jeye: ‘Xam pentakaponaein ka-exanaeinchi xua nekanamataxeinaenexa cinco po tomariyobepiwi’, jei.

²⁰“Irü icha pía petanakuichinchi patopa, bapong jeye: ‘Tanekanamataxeinaem, taema xote xeinangje jiña paratiyo, katamatakiontábatsi paiñawératha. ²¹Yáitama kakuikunúwatsi, tsipéi be barapokotsim pong jopa jiwi juniya itorobeibim. Matáütano jiwi kobe-itorobéibame xua noteibina pokotsiwa jopa jiñawiyo. Matáütano pexaewa xua naweta notéibame ichaxota jopa übim’, jei. ²²Néxata pong jiwi itorobiya pía pepa peewatsinchi namchi: ‘Bepa maisha dapong abem. Ápara xam jiñakoutha nanatsikuentsiéxaname abe nepaebixae. Xam yaputáneme xua xang pong jopa jiwi juniya taitorobeibin, xuano xua pexaewa naweta tanoteibiwa xua ichaxota jopa takoya übeibiño, matáütano xua ichamonae kobe-itorobeibang xua noteiba pokotsiwa jopa tawiyo. ²³Tsipéi katsawiya neyábara nantaxéiname

xua bichokono dangweya itorobang daxota báyatha inta bewa bárapo paratiyo bancobotha botsípame xua poxonae ekeicha patopang, icha paratiyo ekeicha matoma xeinaetsipang xua ekeicha inta pemataropeicha botsixáetsipae poxonae ichamonae nakowaeta bárapo paratiyo', jei. ²⁴Pong jiwi itorobiya pía pepa peewatsinchi barái, pomonae xua ena baxota baraichi: 'Barapong pakobewepire bárapo paratiyo, néxata bárapo paratiyo pakare pong xua ekeicha diez po parátixi matoma exanaeya xeina', jei pong jiwi itorobiya pía pepa peewatsinchi. ²⁵Pomonae ena, barapomonae jume epanota, jeye: 'Pong jiwi itorobiya pepa neéwatsin, ekeicha icha paratiyo jopa katsinde bapongtha. Báyatha ápara diez po parátixi xeina', jei barapomonae. ²⁶Pong jiwi itorobiya pía pepa peewatsinchi barapomonae jumenótatsi, jeye: 'Paka tsipáebatsi, pong ba be kónotha Nakom yábara yaputainchi Nakom bapongtha kana exanaena xua ichawa peyábara yaputaewa tsane beya poxonae bapong ekeicha bichokono Nakom pejumekowüntsiwa tsainchi. Pong ba jopa ichipaeyo xua Nakom peyábara yaputáewatsi, Nakom wepichina pokoyene bapong yaputane xua beya daxota Nakom jopa pejumekowüntsiwa tsainchi. ²⁷Yábara paka tsipáebatsi pomonae tane aitafaetabí jiwi. Barapomonae neaichaxaibi xua jiwi itorobiya pepa taéwatsin tanekana-exanaewa. Barapomonae pakarenénde ichaxota ékang. Barapomonae pajutébare ichaxota ékang', jei pong jiwi itorobiya pía pepa peewatsinchi", jei Jesús.

Meje yábara poxonae Jesús Jerusalén tómaratha patopa

(Mt 21.1-11; Mr 11.1-11; Jn 12.12-19)

²⁸Poxonae Jesús baxua najumeweta, bapoxonae pona Jerusalén tómara beya. ²⁹Jesús itiya patopa Betfagé tómara, Betania tómarano xua saya patopa demuxúwatha po demuxuwa pewüng Olivowa tsipéi baxota umena olivo naein. Bapoxonae nakuéyatabe póyobe itoroba póyobe xua pijimonaexae tatsi jíwanabe pomonae xua doce póyobe. ³⁰Jesús barái bapongbe, jeye:

—Papónarebe po tómara paiña itabaraya ékiya. Poxonae papatopáenamebe bárapo tómaratha, pakaxináenamebe burro pong penüng pong peketanotsin, pong jopa ichamonae tsijuma enaeyo. Payama ishanaxórebe bepayama karenándebe. ³¹Icha ichüng paka barái: '¿Eta pokotsiwa payama ishanaxubamebe burro?' icha paka jei bapong, néxata pajángdebe: 'Pong Wanaka namataxeinaein bepa pata yamakayiaeinjei, tsipéi pinae nantawénona', pajángdebe, jei Jesús.

³²Poxonae bapongbe tómaratha patópabe, tánebe be pókotsi koyeneya báyatha Jesús namchi. ³³Poxonae bapongbe burro yama ishakáuyabe, bapongbe yaiñabatsibe pomonae bárapo burro pexeinaexae. Bapongbe baráichibe:

—¿Eta pokotsiwa burro payama ishakauyamebe? jeichíchibe bapongbe.

³⁴Barapongbe jumenótabe barapomonaetha, jeye:

—Pong Pekanamataxeinaein jiwi bepa pinae patayama kayiaein, tsipéi pinae nantawénona, jeibe bapongbe.

³⁵Barapongbe burro tayamakakáyabe, Jesús tayamakáyatsi. Barapongbe burro paparuwa tsijumajebíkabe po paparuwang aitiyúú xua bapongbe pía paparuwang tatsi, bapoxonae Jesús kuaretsíkatsi. ³⁶Jesús búrrotha ekaona. Jiwi paparuwang námtotha yerababa jejebabapoiña. Bárapo paparuwang Jesús matatsún ekaona búrrotha. Barapomonae baxua éxana tsipéi Jesús matenta weyatainchi xua patopa.

³⁷Poxonae Jesús muxu perunadekae demuxuwa wéreka, po demuxuwa pewüng

Olivowa, tsipéi baxota umena olivo naein barapoxonae pomonae Jesús pejume-kowüntsíwichi, barapomonae jüntükoyene weiweinaya jumedangweya wawái. Yáwano Nakom wüünae jáintatsi xua báyatha pexeíña petsita-itüütsi koyenewang petaexae xua Nakom éxana. ³⁸Barapomonae jeye:

—¡Pai jáyana! ¡Maisha Jesús pong jiwi itorobiya pía pepa peewatsinchi, maisha wüünae, bapong patopa Nakom peitorobixae! ¡Pomonae xua peitabókotha jinompa jüntükoyene weiweina bichokono! ¡Maisha Nakom bichokono wüünae jáintatsi pong athabeicha eka! jei Jesús pijimonae tatsi.

³⁹Néxata fariseo jíwanamonae, pomonae na-enapona pin bichéitotha, barapomonae Jesús baraichi:

—Pong jiwi Nekuidubim, jiña jiwimonae baxua jumematawende: ¡Moya pande! jande, jei fariseo jíwanamonae.

⁴⁰Íchitha Jesús jume epapita, jeye:

—Paka tsipáebatsi, icha barapomonae metha moya tsipae bara néxata ibótong jumedangweya wawái tsipae, jei Jesús.

⁴¹Poxonae Jesús imoxoyo Jerusalén tómaratha patopa, poxonae tómara tane, Jesús jüntükoyene wekoyéi tsanareka, poxoru Jerusalén tomaramonae yábara wekoyeichi. ⁴²Jesús namchi, jeye: “¡Pai maisha bepapyaputáename xua pókotsi jüntükoyene jüntema jinompa paka kana éxana! Nama ánoxuae baxua nantisyata. Jopa paka itaküüpaeyo xua paiña nexeiaewa paiña jüntükoyénetha. ⁴³Meisha matakabi pákata jopaena po matakabi abe. Bárapo matakábitha paiña nepaka ka-aitafaetabí jiwi paka yatómara yatoxóroto exanaxubina. Tsórobo paka yakaincha akabina. Yawa paka yakaincha umenaena daxita muxunéneinth. ⁴⁴Paxam Jerusalén tomarapiwi pam, yáwano paiña pexuino, ichamonae paka jutebina. Paiña bong íratha paka yawa bebái tsane. Jopa kae iboto asiya unguiyae tsane, omeicha othopeikaena. Tsipéi paxam jopa Nakom payaitaem xua poxonae paka nekasiwaponae”, jei Jesús Jerusalén tomarapiwimonae yábara.

Meje yábara poxonae Jesús aishowa benapuna torobábiya pomonae Nakom pin piabotha pekaenaetsiwi

(Mt 21.12-17; Mr 11.15-19; Jn 2.13-22)

⁴⁵Jesús Nakom pin piabotha joniya. Baxota Jesús aishowa benapuna torobábiya pomonae kaenaeta baxota. ⁴⁶Jesús barái barapomonae, jeye:

—Nakom Pejume Diwésitha jeye: “Tabo ápara po botha xua jiwi tanetsipae-binexa tsaibi tsane bárapo botha’, jei Nakom Pejume Diwésitha. Íchitha paxam bárapo bo be pekaibiwi pía müthü tutu pakana éxaname, ichaxota pijunuwi nantisyabeibathopa, tsipéi baxota panakaetútame saya ü xua paiña nekaibinexam tsane parátixi pomonaetha, pomonae xua pateiba xua Nakom petsipaebebinéxatsi, jei Jesús.

⁴⁷Nakom pin piabotha daxita matakabi Jesús kuidubeiba. Íchitha sacerdotemonae pía pentakaponaewi, irü pomonae jiwi pekuidubiwi Moisés pía peitorobi koyene tatsi, írürü tómara pía pentakaponaewi daxita barapomonae Jesús yábara nantaxéinatsi nawita xua pebexubinexa tsainchi. ⁴⁸Íchitha jopa itaküüpaetsi barapomonae xua Jesús pebexubiwa tsainchi tsipéi pin bicheito beta wüünaeya Jesús jumetayénatsi.

Meje yábara xua Jesús pía peitorobi koyenewa xeina

(Mt 21.23-27; Mr 11.27-33)

20¹Kaentakabi Jesús Nakom pin piabotha joniya. Bárapo botha Jesús kuiduba jiwi. Yawa Nakom pía pekapanenebiyáe diwesi yábara kueikueijei. Bapoxonae irü sacerdotemonae pía pentakaponaewi tatsi pata. Irü pata pomonae jiwi pekuidubiwi xua Moisés pía peitorobi koyenewa tatsi. Irü pata pomonae penapatáe jiwi. ²Daxita barapomonae Jesús baraichi, jeye:

—Ínkane pana tsipáebare, ¿eta po petorobi koyenéwatha kuidúbame baxuang? ¿Jintam kakata bárapo peitorobi koyene? jei.

³Néxata Jesús jumenota, jeye:

—Xang írürü tha barichichi paka yaiñabinchi pana nejumenore. ⁴¿Jintam Juan kui-itoróbatsi jane xua jiwi pebautisabinexa tsainchi? ¿Metha bara Nakom kui-itoroba jampa? ¿Metha bara jiwi kui-itoroba jampa? jei Jesús.

⁵Barapomonae kaemonae yábara natsipaeba pokotsiwa Jesús pepaebiwa. Barapomonae jeye: “¿Eta xua metha jei tsainchi? Icha jei tsipaetsi xua Juan kui-itoróbatsi Nakom xua pebautisabiwa jiwi, metha naka jei tsipae: ‘¿Eta xua metha néxata jopa pajumekowüntsim Juan?’ metha naka jei tsipae Jesús. ⁶Icha jei tsipaetsi Juan kui-itoróbatsi jiwi, metha ápara jiwi naka jutebina ibotoxitha, tsipéi daxita bárapo jiwi nantaxeina xua Juan pong Nakom peitorobi jume pepaebin”, najéi barapomonae. ⁷Barapomonae Jesús jumenótatsi, jeye:

—Kanta jopa payaputaeiño xua pong Juan kui-itoróbatsi xua jiwi pebautisabíwatsi, jei barapomonae.

⁸Néxata Jesús barái barapomonae, jeye:

—Néxata barichin tsane. Jopa yábara paka tsipaebi tsainchi, po peitorobi koyenéyatha éxanang xua daxita taexanaewang, jei Jesús.

Meje yábara poxonae Jesús paeba pekayábara jüta pepaebi diwésiyo pomonae xua abe éxana, pomonae petayapukaenaewi uva pabi

(Mt 21.33-44; Mr 12.1-11)

⁹Néxata Jesús diwesi tsipaeba jíwitha po diwesi pekayábara jüta pepaebi diwésiyo. Jesús jeye: “Matha irü pebin pin uva pabi xeina. Bapong üba po ünbo pewüing uvakuéi ünbo. Bapoxonae bapong itoroba pomonae pía uva pabi petayapukaenaewichi tsainchi, xua bapoxonae barapomonae pejívana xaenexa pokotsiwa penawetsiwa. Bapoxonae bapong icha nakua beya pona aiña wei nexa. ¹⁰Matakabi tsuxubi xua uvakuéi naweta. Bapoxonae bárapo matakeitha pomonae pabi petayapukaenaewi jíwana itapetanota xua penawetsiwa. Bapoxonae pong uva pabi pexeinaein, kaein jíwana itoroba pomonae pía petanakuichiwichi jíwana, xua petawüükaenexa tsainchi uvakuéi pomonae beya pomonae pabi petayapukaenaewichi. Íchitha barapong pong najumekaitoróbatsi, bapong bütsi. Bapong kaibe kobesa iya. ¹¹Pong uva pabi pexeinaein bapong ekeicha kaein jíwana itoroba pomonae pía petanakuichiwichi jíwana. Bapong barichi bichokono bütsi, kaibe kobesa náwiya yawa jopa katichi. ¹²Pong uva pabi pexeinaein ekeicha kaein jíwana itoroba pomonae pía petanakuichiwichi jíwana. Barichi pomonae pabi petayapukaenaewi barapong bütsi yawa wang éxanatsi yawa pabi weya xotsi.

¹³”Pong uva pabi pexeinaein matapaiña nantaxeina najéi: ‘¿Eta xua metha exanaein? Metha taxanto itorobin pong bichokono antobein. Metha poxona taxanto taeinchi, metha inta yábara barükui-iturajinaeinchi’, najéi. ¹⁴Dapo jume-tha pomonae uva pabi petayapukaenaewi poxona bapong taeinchi, bárapo petayapukaenaewi uva pabi najéi tsane: ‘Ápara bapong paxa kopiniwa pichina. Daxota bapong bü bexotsi xua xaiña xéinatsi bárapo uva pabi’, najéi barapomona. ¹⁵Bárapo pexanto tatsi uva pabijuma bemaxü kayíyatsi. Baxotiya bexotsi”, jei Jesús.

Néxata Jesús barái barapomona, pomonae jumetayénatsi Jesús, jeye: “Pong uva pabi pexeinaein, zeta be kana ichi tsane pomonaetha, pomonae bárapo uva pabi pía petayapukaenaewichi? ¹⁶Pong uva pabi pexeinaein patopaena pía uva pábitha, pomonae uva pabi peyapukaenaewi daxita barapomona jutebinchi. Barapoxona bárapo uva pabi ichamona xuya katinchi xua petayapukaenaenexa tsainchi bárapo uva pabi”, jei Jesús.

Pomonae Jesús jumetayénatsi poxona baxua jumetane xua Jesús paeba, barapomona Jesús jume itawétatsi, jeye:

—¡Bara, jopa bepajumetaeíño baxua, tsipéi xua páebame Nakom jopa kopatsiyo pataxantha xua pata tanejutebinexa ichamona! jei barapomona.

¹⁷Íchitha Jesús tane, barapomona tainchi. Jesús jeye:

—Ínkane pajumetaema pokotsiwa Nakom Pejume Diwésitha neyábara kaunuta poxona iboto yábara paeba, jeye:

‘Pebiwi pomonae ibo bong peakabiwi,
bárapo pebiwi xuba po iboto tabükaboka,
po iboto peaiñakuí iboto.

Íchitha Nakom itapeta bárapo iboto xua petabükabokaenexa peaiñakuí
ibótoxae’,

jei Nakom Pejume Diwésitha.

¹⁸Ínkane iboto yábara paka tsipaebinchi. Bárapo ibótotha poxona ichauyo jopeika pepürüwixi tsanaya. Matáütano poxona bárapo iboto ichauyo matatsún jopéikatsi pebeno tsanaya. Icha bárapo iboto ichi poxona kana éxana icháuxitha peaiñakuí ibótoxae, xang barapókotsi jüta koyeneya barichin pomonaetha, pomonae jopa tana nejumekowüntsiwi. Pía jopa tana neyaputaexae barapomona daxota péraxa exanaeinchi, jei Jesús.

¹⁹Sacerdotemona pía pentakaponaewi tatsi, irü pomonae jiwi pekuidubiwi xua Moisés pía peitorobi koyenewa tatsi, daxita barapomona juntukuru Jesús téikatsi poxoru barapomona yaputane xua yábara páebatsi xua Jesús paeba. Néxata Jesús jopa teikaetsi poxoru jiwi kunúwatsi.

**Meje yábara poxona Jesús yábara kuiduba parátixi
matoma po parátixi jiwi bewa katsibina pongtha pong
romanomona itorobiya pía pepa peewatsinchi**

(Mt 22.15-22; Mr 12.13-17)

²⁰Barapomona itoroba, ichamona itoróbatsi xua petataenexa tsainchi. Pomona xua itoróbatsi, barapomona náexana ítara mexeya pentükuiwüunaewi. Barapomona pona Jesús beya, xua Jesús naerabiya pekuijume yopichinexa tsainchi xua éxana yawa xua paeba. Pía bapoxona Jesús waetabichi yawa pía kaponaetsi

pongtha pong Judea nakuapiwi peyanakua ewatsinchi. Bapong peajumeyapusúü itorobiwa xeina, xua po peajumeyapusúü itorobiwa kata pong romanomonaē itorobiya pía pepa peewatsinchi. ²¹Daxota barapomonaē Jesús yáíñabatsi jeye:

—Pong jiwi Nekuidubim. Bara payaputang xua bara jumexaiñeya tsipáebame jiwi, matáütano xua jiwi bara beta kuidúbame xua pokotsiwa jiwi bewa exanaena pexeinaenexa tsane Nakomtha po jüntükoyene pewüünaē jüntükoyene. Matáütano jopa jiwi kunuwim poxonaē kuidúbame poxonaē bekein jiwi jopa ichichipaeyo baxua, tsipéi xam daxita jiwi katsita najüpa. ²²Ínkane yábara pana netsipáebare xuaje: ¿Metha bara Nakom pía peitorobi koyene naka itoroba xua waxainchi impuestos parátixi katsibinchi pong romanomonaē itorobiya pía pepa peewatsinchi xua wanaka itorobixae bapong bekein barapong penanapainchi poponaēin? Icha jopa tsipae, ¿metha daxua abe tsipae? jeichichi Jesús barapomonaē pomonaē fariseomonaē itoroba.

²³Íchitha Jesús yaputane xua piraichi baxua yáíñabatsi.

²⁴Daxota jeye:

—Ínkane moya painta xawena paratiyo, tha taetsi. ¿Jintam pejumopere? ¿Yáwano jintam wüngdúkuare? jei Jesús.

Barapomonaē jumenota, jeye:

—Ápara romanomonaē itorobiya pía pepa peewatsinchi, jei barapomonaē.

²⁵Néxata Jesús barái barapomonaē, jeye:

—Bara néxata romanomonaē itorobiya pía pepa peewatsinchi pakare pokotsiwa xua bapong piawaxae. Matáütano Nakom pakare xua baxua irü piawaxae tatsi, jei Jesús.

²⁶Barapomonaē jopa itaküüpaetsi xua Jesús pewaetabíwatsi daxita jiwi peitütha, tsipéi Jesús beta jumenota barapomonaē. Barapomonaē yábara najüntükui koyene kabenaeka pokotsiwa xua Jesús wüünaeya beta jumenota, daxota barapomonaē saya moya umena.

Meje yábara poxonaē Jesús yábara yáíñabatsi pokoyene xua ekeicha asüü pomonaē pewerapeibiwi

(Mt 22.23-33; Mr 12.18-27)

²⁷Bapoxonaē saduceomonaē jíwana pata Jesús pía xantha tatsi xua Jesús pirai-chi petsipaebinéxatsi. Saduceomonaē barompaya pía pekuidubi koyenewa xeina xua pinae pomonaē pewerapeibiwi ekeicha jopa asüü tsai biyo. Bárapo pekuidubiwa jopa jüpaeyo po pekuidubiwa Jesús pía pekuidubiwa tatsi xua pinae jiwi ekeicha asüü jinompaena poxonaē wérapa. Daxota saduceomonaē Jesús siwapoinchi. Saduceomonaē Jesús baraichi:

²⁸—Pong jiwi Nekuidubim. Moisés nákata tina, namchi: ‘Icha pebin píowa kuenta tüpa, yawa jopa xeinaeyo pexui, xuiyapin bewa péntapin pekoutha koseuri pichina xua bapoxonaē péntapin pekoutha pexeinaenexa tsane pexui’, jei Moisés. ²⁹Barichi, matha irü kae peweicho jiwi xua kaepiwi nabarü jinompa siete póyobe. Matapin jitha eka. Bapong píowa kuenta naxuba. Pexui jopa xeinaeyo. ³⁰Pong kotakaya nakatsiwa xuya péntapin koseuri pita xua bapoxonaē péntapin pekoutha pexeinaenexa pexui. Bapong irü kuenta tüpa, irü jopa xeinaeyo pexui. ³¹Bapoxonaē ichüng xuiyapin xuya barapowa pita xua péntapin koseuri pita. Bapong barichi irü kuenta tüpa, irü pexui jopa xeinaeyo. Daxita bárapo

siete póyobe kuenta nanapentapona barapowa poxonae bekein xuya pekoutha nonotaponeiba. Bárapo siete póyobe, kaein jíwana jopa pekoutha tapoponaetsi pexuyo. ³²Bapoxonae matapaiña irü barapowa tüpa. ³³Xam, Jesús, ba páebame, ba jam: ‘Matakabi jopaena po matakábitha Nakom asüü exanaena xua jiwi asüü exanaeinchi müthü wétsina’, ba jam. Poxonae bárapo matakabi jopaena xua daxita jiwi asüü jujuinaena, bárapo matakábitha, ¿jintam metha barapowa xuya pichinchi, xua ichüing pichina, xua bárapo siete póyobe kaein jíwana? Tsipéi kaena báyatha bárapo siete póyobe kaepiwi kuenta nanapentapona barapowa, jei saduceomonae.

³⁴Néxata saduceomonae, Jesús jumenota. Jesús jeye:

—Bárapo nákuathe pebiwi yawa yábüxi, barapomonae jitha eenapona. ³⁵Pomonae xua Nakom itapeta waba, poxonae barapomonae patsina Nakom pía nákuatha, barapomonae jopa ekeicha jitha eenaponáe tsane, yawa jopa pexántixi jitha kuarebapona tsane. ³⁶Tsipéi bárapo nakuatheicha, barapomonae bexa jopa wérapae tsane icha matatsunpiwi ichi xua jopa werapaeyo. Matáüta barapomonae Nakom pía pexui, tsipéi barapomonae ekeicha asüü bárapo petüpáe koyene weya. ³⁷Kaena báyatha Moisés yábara naka kuiduba xua pomonae pewerapeibiwi xua ekeicha asüü tsaibi tsane, po diwésitha naewa yábara tina po naewa taxungku. Bárapo diwésitha Nakom pong Pekanamataxeinaein jiwi, namchi: ‘Xang Abraham pía Nakomüing tatsin, irü Isaac pía Nakomüing tatsin, irü Jacob pía Nakomüing tatsin’, jei Nakom. ³⁸Baxua Nakom paeba tsipéi Abraham irü Isaac, irü Jacob pomonae báyatha pewerapaewi ánoxuae ekeicha kaewa asüü jinompa Nakom pía nakuatheicha tatsi. Pomonae pewerapaewi pomonae jopa kaewa ekeicha asüü pejinompaewi, barapomonae jopa pía Nakom tatsi, pong itabókotha eka. Saya jame meisha pomonae báyatha pewerapaewi kaewa ekeicha asüü pejinompaewi pomonae pejumekowüntsiwixaetsi Nakom, barapomonae jame pía Nakom tatsi, pong itabókotha eka, jei Jesús.

³⁹Néxata pomonae jiwi pekuidubiwi Moisés pía peitorobi koyene tatsi, barapomonae jíwanamonae Jesús baraichi, jeye:

—Pong jiwi Nekuidubim, maisha bara beta wüünaeya páebame, jei barapomonae.

⁴⁰Saduceomonae ekeicha jopa Jesús yaiñabichi xua ekeicha beta pejumenotsi-watsiyainwa.

Meje yábara poxonae Jesús nayábara jei:

“Mesías, ¿jintam pía pemómoxi susato jíwanapin tatsira?” jei

(Mt 22.41-46; Mr 12.35-37)

⁴¹Ekeicha Jesús nayábara paeba pomonaetha, pomonae jiwi pekuidubiwi Moisés pía peitorobi koyene tatsi. Jesús jeye:

—¿Eta pokotsiwa metha jiwi paeba xua pinae Mesías bapong David pía pemómoxi susato jíwanapin tatsi? ⁴²⁻⁴³Tsipéi David jei salmos penaxünae weixi diwésintha:

‘Nakom pong Pekanamataxeinaein jiwi Tanekanamataxeinaein baraichi
pong Mesías jeichichi:
Takoxa wérena ékare,

beya abü tsane poxonae neka-aitafáetabi jiwi pía Pekanamataxeinaeinchi tatsi ka-exanaeinchi, jei Nakom', jei David salmos penaxünae weixi diwésintha.

⁴⁴Icha David yábara jei xua Mesías yábara jeichi: Bapong Mesías Tanekanamataxeinaein, jei, ¿eta xua metha tsipae xua Mesías ápara David pía pemómoxi susato jíwanapin tatsi? jei Jesús.

**Meje yábara poxonae Jesús muxuweta jiwi xua pomonae
jiwi pekuidubiwi Moisés pía peitorobi koyene tatsi
barapomonae pekuiyainwa tatsi
(Mt 23.1-36; Mr 12.38-40; Lc 11.37-54)**

⁴⁵Pomonae xua umena daxita barapomonae Jesús jumetaeumeinchi poxonae Jesús pijimonae tsipaeba. Jesús namchi, jeye: ⁴⁶“Dota pam, dota pomonae jiwi pekuidubiwi Moisés pía peitorobi koyene tatsi. Barapomonae pía pekuidubi koyenewang tatsi pekuiyainwa pande. Jopa paexanaeinde icha barapomonae ichi xua barapomonae bichokono ichichipa xua penamaxatabiwa po paparuwang apiyiya deka xua be pomonae peaiñakuí jiwi penaexanaewi náexana. Barapomonae bichokono ichichipa xua jiwi námtotha jakobeibina xua barapomonae pejakobinéxatsi xua jiwi pebarükui-iturajineibinexa barapomonae xua barapomonae pebarükui-iturajineibinéxatsi. Barapomonae bichokono ichichipa xua nantakaeneiba judiomonae pía penakaetutsi bongtha tatsi ichaxota ba enathopeiba pomonae peaiñakuí jiwi penaexanaewi. Matáüta barapomonae bichokono ichichipa xua eneiba ichaxota ba eneiba pomonae peaiñakuí jiwimonae poxonae pexaewang tsinakaetuteiba xua poxonae penabaneibinexa tsane. ⁴⁷Matáütano barapomonae powaxi pekuenta werapaewaxichi piséurixi, barapówaxi kueranta éntsi piabong. Barapomonae náemata jopa kuinaya najumekopababéibiyo poxonae tsipaebeiba Nakom. Barapomonae bichokono péraxa jübebinchi poxonae po matakeitha Nakom yábara paebina jiwi xua pía penatsikuentsiwa xua abe petsita-exanáexaetsi. Barapomonae bichokono átene tsane xua poxonae beyakaincha ichamonae átene exanaeinchi xua jopa pejumekowüntsixaetsi Nakom”, jei Jesús.

**Meje yábara poxonae Jesús yábara paeba xua petsiriwa paratíyobe
kata Nakomtha, powa pekuenta tüpáewatsi piseuri
(Mr 12.41-44)**

21 ¹Nakom pin piabotha Jesús tane xua baxota pomonae kopei xeinaewi parátixi jeya Nakom nexa ichaxota jiwi jebeiba parátixi. ²Barichi Jesús tane xua irü aiña tsika paratíyobe jeka baxota powa pekuenta tüpáewatsi piseuri, yawa bapowa peakopebiwayo. ³Jesús jeye:

—Bara xaniyeya paka tsipáebatsi. Bárapo yábüyo powa pekuenta tüpáewatsi piseuri, barapowa peakopebiwayo. Dáichitha barapowa jeka aiña paratíyobe Nakom nexa. Bapowa kata beyakaincha ichamonae daxita pomonae nawita jeya xua Nakom nexa. ⁴Daxita barapomonae jeya pokotsiwa tanakopabéibatsi. Íchitha nama bapowa bichokono peantobexae Nakom daxota omeicha jeka po paratíyobe bekein kanantawénona xua pexaewa tsane, bekein bichokono peakopebiwayo, jei Jesús pijimonaetha.

**Meje yábara poxonae Jesús yábara paeba xua ichamonae abe
exanaena Nakom pin píabo tatsi**

(Mt 24.1-2; Mr 13.1-2)

⁵Ichamonae yábara natsipaeba nawita Nakom pin píabo tatsi. Barapomonaе najéi: “¡Maisha Nakom pin píabo tatsi bepa wüünae! ¡Maisha bepa wüünae xua jiwi tutu pepena peitüpanaewang bárapo Nakom pin piabotha xua Nakom nexa!” jei barapomonaе. Néxata Jesús jeye:

⁶—Matakabi jopaena po matakaiha tsane ichamonae pomonaе penanapaincha jinompaewi pomonaе xua icha nakua wérena peponaewi abe exanaena Nakom pin píabo tatsi, xuaunxuae patáneme po bo. Jopa kae ibótiyo nakopatungkuae tsane icha iboto pejúmatha, daxita abe tsane, jei Jesús.

**Meje yábara poxonae Jesús yábara paeba xua
kopiya matha pewünaeya exanaena petsita-itüütsi
koyenewa poxonaе daxita werawerakáenaba**

(Mt 24.3-28; Mr 13.3-23)

⁷Néxata jiwi Jesús yáñabatsi, jeye:

—Pong jiwi pata Pekuidubim, ¿eta poxonaе metha ichamonae baxua exanaena poxonaе abe kana exanaena Nakom pin píabo tatsi? ¿Eta pokotsiwa tsane xua pewünaeya tsita itapeñaxeinaena pokoyene xua poxonaе imoxoyo daxita werawerakáenaba? jei Jesús pijimonaе tatsi.

⁸Jesús jumebarái: “Dota pam bü ichamonae naerabiya paka muxutsipaeba xua daxota abe paexanaetsípame. Tspéi tsane patsina ayéi bicheito jiwi pomonaе natsikotaena icha be xang ichin. Barapomonaе jei tsane: ‘Ápara xang, Mesías’, jei tsane. Ichüng jei tsane: ‘Ánoxuae Mesías patopaena’, jei tsane. Íchitha paxam jopa payábara jumekowüntsinde pokotsiwa xua barapomonaе paeba. ⁹Pajumetáename xua jiwi juiña nabenoutsina xote, yawa xua juiña írürü nabenoutsina icha ira beya. Dáichitha jopa pajunuwinde, tspéi baxua pewünaeya matha kopiya tsane. Dáichitha kataunxuae dapo matakabi aichika tsane xua poxonaе daxita werawerakáenaba yatsikaewa”, jei Jesús.

¹⁰Ekeicha Jesús namchi: “Kae nakuapiwi irü icha nakuapíwino bárapo aiña nakuapíwibe nabenoutsina. Matáütano irü pong nakua peewatsin irü ichüngdü pong icha nakua peewatsin, bapongbe irü nantiya nabénabe. ¹¹Matáütano aiña nákuangtha ira jijiyatsina. Matáütano aiña nákuangtha jainbo nakua tsane, tspéi pin mayayo tsane. Matáütano domae tsúrukuae tsane aiña nákuangtha. Matáütano Nakom peitabókotha peitüpanaewang itüütsina, xua jiwi bichokono kunuwa.

¹²”Poxonaе baxua pewünaeya tsane jiwi paka teikebina, paka átene exanaena. Judi monaе pía penakaetutsi botha paka kaponaena paiña paka yábara paebinexa paiña nenatsikuentsiwa xua abe paiña neexanaexae. Yawa paka kaponaena jiwi pekübi botha. Paka kaponáenano nakua peewatsiwi peitabaratha tatsi, paiña tana nejumekowüntsixaemxae. Yáwano paka kaponaena pentakaponaewi peitabaratha tatsi, pomonaе irü itoroba jíwitha xua pong nakua peewatsin nexa paiña tana nejumekowüntsixaemxae. ¹³Barapoxonaе paka kui-itaküüpaena xua barapomonaetha tapana neyábara paebiwam pokotsiwa báyatha paka tsita éxanatsi.

¹⁴Panantaxéinare paiña jüntükoyénetha, pana najande: ‘Jopa tsiwanaya yábara

nakuiwüünaetsi tsainchi xua ichamonaе watsipaebíwatsi xua abe wanaka yábara paebiwa', pana najande. ¹⁵Tsipéi xang paka tsimuxudutinchi pojume xua paka unutsíname, xua pojúmetha beta paka yaputane exanaena. Bárapo jume pákata éxanatsi xua paiña paka neka-aitafáetabi jiwi jopa paka jumematanonopéntatsi tsane, xuano xua jopa peitaküüpaenexa tsainchi xua abe paiña nepaka yábara paebiwa. ¹⁶Paka kaenaetsina ichamonaе icha jíwítha pomonaetha, pomonaе jiwi pekanamataxeinaewi. Irü paiña axeiwi yawa paiña ena jiwi paka kaenaetsina ichamonaetha. Irü paiña eweicho jiwi paka kaenaetsina ichamonaetha. Irü paiña amoyo jiwi paka kaenaetsina ichamonaetha. Irü paiña jiwimonaе paka kaenaetsina ichamonaetha. Barichi ichamonaе pomonaе paxam jíwana pam jutebinchi. ¹⁷Daxita nakuangpiwi paka kasebina, paiña tana nejumekowüntsixaemxae. ¹⁸Íchitha Nakom paka kapanenebiyaena paiña nejüntükoyenein panenebiyáenexa. ¹⁹Áwiya paantüyapusüüya nejumekowüntsiya jinómpare poxonaе bekein ichamonaе abe pákata éxana xua beya payakuiya werapaeya othopáename xua paiña xeinaewa tsane peajüntüyapusüüwa po peajüntüyapusüüwa ataya tsiteka.

²⁰"Poxonaе patáename xua soldadomonaе xua icha nakuapiwi yakaincha matawakaicha yatoxóroto naexanaxubina Jerusalén tómara bapoxonaе payaputáename xua bárapo tómara bara imoxoyo abe exanaeinchi. ²¹Bárapo mataketha, daxita pomonaе Judea nákuatha jinompa barapomonaе bewa demuxuwang berüküpiyaena. Irü pomonaе Jerusalén tomarapiwi, barapomonaе bewa bara berüküpiyaena. Irü pomonaе pábitha jinompa, barapomonaе jopa bewa düküpae tsipae tómara beya. ²²Tsipéi bárapo matakábintha Nakom kui-itorobina, ichamonaе kui-itorobinchi, xua jiwi péraxa exanaeinchi, icha be pokoyeneya Nakom Pejume Diwésitha yábara paeba baxua. ²³¡Pai yábüxi tsobenáe powaxi pexui búpana táenatsi bárapo matakábitha! ¡Pai powaxi irü pexui ishaina, barapówaxi tsobenaerü! Tsipéi ákabe tsobenáe tsane pexui. Matáütano Nakom kui-itorobina bárapo nákuathe, ichamonaе kui-itorobinchi xua bárapo nakuathepiwi pin pepéraxa jübíwatsi tsainchi. ²⁴Ichamonaе kúsitha jutebinchi. Ichamonaе yamaxükübiya kaponaeinchi icha nákuang beya. Bárapo Jerusalén tómaratha pomonaе penanapaincha jinompaewi xua icha nakua wérena peponaewi dubenanaebiyaena beya bárapo matakabi yakobekuí othopaena, po matakábitha xua Nakom kobematawentsina xua ekeicha jopa enáe tsane bárapo tómaratha barapomonaе", jei Jesús.

Meje yábara poxonaе Jesús nayábara paeba xua poxonaе ekeicha patopáetsika pongxae Nakom pía Peitapetsin

(Mt 24.29-35,42-44; Mr 13.24-37)

²⁵Ekeicha Jesús jeye: "Bapoxonaе xométotha naitüütsina peitüpanaewa, yawa jomokóichatoha, yawa opiteitha. Bárapo írathe daxita nakuangpiwi yábara najüntükoyene kabenaenoutsina. Matáütano busitaena pin marátsakang busi xua busi jopa xaiña mene dukuaeyo. Bichokono jiwi najuñakaena. ²⁶Jiwi pijunuwi muxu pewérapae tsane poxonaе nantaxeinaena pokoyene Nakom exanaena bárapo kae pin nákuathe. Matáüta junuwina xua exanaena itabókotha poxonaе Nakom napunatorobabiyaena xua xuang itabókotha dubena. Bapoxonaе jopa xapain dubenaeyo tsane. ²⁷Bapoxonaе jiwi netaena pongxaein Nakom Tananeitapetsin xua tsakinaebówatha patopeikaein. Nakom pía peayapusüüwa itorobi koyenéwatha, matáütano bichokono pexeiña itüpanae kóichatha yawa patopeikaein. ²⁸Poxonaе

baxuang juntukuru exanáenaba, panantú süübarüküpare, athabé panekotuméi-ñama, tsipéi bara imoxoyo paka nekapanenebiwa tsane”, jei Jesús.

²⁹⁻³⁰Néxata Jesús pijimonae tsipaeba pekayábara jüta pepaebi diwésiyo xua higuera nae, jeye: “Pataema nae po nae pewüing higuera nae, xuano ichakuitha icha naeinno xua patáneme xua pena noxu xu xuwapona. Néxata bapoxonae payaputaema xua imoxoyo wei tsúrukuae tsóponae. ³¹Néxata barapókotsi jüta koyeneya icha tsane xuaunxuae paka tsipáebatsi xua poxonae jiwi muxu pijunuwi pewérapae tsane. Bapoxonae payaputáename xua bara imoxoyo tsane poxonae xua tapatopae wüünae tsane poxonae jiwi itorobiya ewatsin.

³²”Bara xaniyeya paka tsipáebatsi daxita judiomonae naitapataya naexanapo-naena beya yakuí othopaena poxonae Nakom exanaena daxita baxuang pokotsiwa xuaunxuae paka tsipáebatsi. Bapoxonae bárapo judiomonae werawerakaena. ³³Peitaboko aichúrukuae tsane, matáüta ira aichúrukuae tsane. Meisha nama tajumein ataya tsitekaena xua daxota daxita nayábara jumewétsina be pókotsi koyeneya báyatha páebang.

³⁴”Dota pam, pana neyábara kanantaxeinaeya jinómpare. Paiñaxoba pana najün-tükoyene arárana éxaname xua pana nasikuimatakáetame yabüxitha xuano xua pana naküüpa éxaname peátsaxae mératha, yáwano xua saya i panantaxéiname xua panantawénoname xua saya paxam nexa. Bapoxonae bárapo matakabi xain jopa paka benaekáe tsane poxonae jopaena. ³⁵Tsipéi bárapo matakabi jemeicha jopaena, icha be pókotsi jüta koyeneya ichi poxonae duwein jemeicha aütábatsi máyatha. Bárapo matakabi jopaena daxita bárapo kae pin nákuathe yajiwi-kanauipaxuinchí. ³⁶Tsaka pajinompeíbare xua tapatopae wüünae tsane. Matowa patsipaeba dubena-naebíyama Nakom. Patsipaebéibare xua Nakom paka kapanenebiya exanaena baxua weya xua poxonae Nakom kana exanaena ichamonaetha xuaunxuae paka tsipáebatsi. Barichi patsipaebeibareno xua paiña nepaka itaküüpaewa tsane xua paiña neu-menaewa taitabaratha pongxaein Nakom Tananeitapetsin”, jei Jesús pijimonaetha.

³⁷Daxita matakabi Jesús kuidubeiba jiwi Nakom pin piabotha Jerusalén tómaratha. Merawitha tsaibi demuxuwa beya poneiba xua baxotiya peekaenexa tsaibi tsane, po demuxuwa pewüing Olivos. ³⁸Daxita matakabi jiwi kaemúmbbotha tsaibi pateiba Nakom pin piabotha xua Jesús pejumetaenexa tsaibi tsainchi.

**Meje yábara poxonae fariseomonae irü sacerdotemonae pía
pentakaponaewi tatsi daxita barapomonae Jesús yábara nantaxéinatsi
pokoyeneya xua Jesús pewaetabiwa tsainchi**

(Mt 26.1-5,14-16; Mr 14.1-2,10-11; Jn 11.45-53)

22 ¹Bara nama imoxoyo matakabi jopa po matakábitha xua jiwi nakaetuta pexaenexa pan xua jopa kotowiyo. Bárapo matakabi pewüing Pascua matakabi wüing. Bárapo Pascua matakabi wüingtha jiwi yábara nantaxeina po matakabi poxonae kaena báyatha matha judiomonae Egipto nakua weya panenebiya. ²Sacerdotemonae pía pentakaponaewi tatsi, irü pomonae jiwi pekuidubiwi Moisés pía peitorobi koyene tatsi, daxita barapomonae nabarü muxujéi xua bepa pinae eta bichi tsane poxonae Jesús waetabinchi pebexubinéxatsi. Kataunxuae jopa exa-naeyo, kanta jiwi kunúwatsi.

³Bapong Judas kaein jíwana pomonae doce póyobe pomonae Jesús pijimonaexae tatsi. Judas icha wüing xeina, po wüing “Iscariote”, baraichi. Néxata bapoxonae

Satanás kaurimonae pía pentakaponaein tatsi, Judas imoxoyo peña kakuita unkuatábatsi peitorobinéxatsi xua abe peexanaewa tsane. ⁴Judas siwaponae sacerdotemonae pía pentakaponaewi tatsi, irü policiamonae xua pebarü kueikueijeinexa tsane. Barapomonae policiamonae pentakaponaewi, xua pomonae peyábara ume-naewi Nakom pin píabo tatsi. Daxita barapomonaetha Judas tsipaeba xua pókotsi koyeneya poxonae Jesús kaenaetinchi barapomonaetha. ⁵Barapomonae bichokono ichichiparúküpa baxua. Yawa barapomonae Judas muxutsipáebatsi xua parátixi katsibapáebatsi. ⁶Judas bara yábara jejéi xua barapomonae paeba. Bapoxonae Judas tamrópata pítaba xua jeita xua pokoyenetha Jesús pekaenaetaxubiwa tsainchi barapomonaetha poxonae peyapuwüünáewatha poxonae jiwaibi tsürüküpáe.

**Meje yábara poxonae Jesús pijimonae barü
nábane Pascua wüing matakábitha**

(Mt 26.17-29; Mr 14.12-25; Jn 13.21-30; 1Co 11.23-26)

⁷Nama matakabi jópaba po matakábitha poxonae jiwi tsinakaetutsina xua penabanaenexa pan po pan jopa múxuna pentsiyo levadura matawüing pokotsiwa xua kotowa éxana pan. Bárapo penantakarukúae matakábitha ba cordéroxi pebtoxi xua ovejakoxi jutébatsi xua jiwi pexaenexa. ⁸Pedro irü Juan itorobatsibe, Jesús itoroba. Jesús barái, jeye:

—Papónarebe panakuiwüünáerebe pexaewa Pascua wüing matakabi nexa waxaenexa tsainchi, jei Jesús.

⁹Bapongbe, Pedro irü Juan, Jesús yaiñabatsibe. Jeibe:

—¿Éta xota ichichípame xua xota pexaewa paka tsiwüünaetsinchi wanabanaenexa tsane xua Pascua wüing matakabi nexa? jei barapomonae.

¹⁰Jesús jumenota. Jeye:

—Poxonae tómaratha papatopáenamebe, patáenamebe pebin. Bárapo pebin juruwatotha yantanaponaena mera. Bapong papunaponarebe bo beya ichaxota bapong joniyaena. ¹¹Pong bo pexeinaein pabarande: ‘Pong jiwi Pekuidubin kabarái: ¿Ínkane tútura, po tútutha tajiwimonae barü xaein Pascua wüing matakabi nexa? jeye Pekuidubin’, pajándebe, jei Jesús. ¹²Ekeicha Jesús jeye:

—Bapoxonae pong bo pexeinaein paka tsita itakayopichínabe po tutu pin tutu. Bárapo tutu, po tutu xua asiyeicha, bárapo tutu báyatha xaneba. Bárapo tútutha pexaewa panakuiwüünaeta-jébare xua wanabanaenexa pexaewa bárapo Pascua wüing matakabi nexa, jei Jesús.

¹³Barapóyobe pónabe, penamchixae daxita tánebe be pókotsi koyeneya Jesús báyatha paeba. Bapoxonae pexaewa nakuiwüünaetajébabe Pascua wüing matakabi nexa xua penabanaenexa.

¹⁴Poxonae bárapo hora tsuxubi poxonae kirei tsanaicha, Jesús barü ekoundeka pexaethopáewatha pijimonae pomonae doce póyobe pomonae pía peitorobíwixae tatsi Jesús. ¹⁵Néxata Jesús barái, jeye:

—Maisha bichokono jüntükoyene weiweinang xua tapaka kabarü nakaetutsíwatsi, yawa tapaka kabarü nabanáewatsi bárapo Pascua wüing nabanáe matakábitha, xua baxua matha pewünaeya tsane xua poxonae tatüpaewa tsane. ¹⁶Daxota paka tsipáebatsi xua ekeicha jopa tapaka barü nakaetutsíwatsi tsainchi xua wanabanaewa tsane Pascua wüing matakábitha. Ekeicha exanaeinchi bárapo penabanaewa po matakaita poxonae Nakom neexanaena xua jiwi itorobiya ewatsin, jei Jesús.

¹⁷Néxata Jesús pekóbetha pita korótiyo, Nakomtha tsipaeba, jeye:

—Axa, maisha jüntükoyene weiweinang xua korotíyotha ekareka pepa uva mera xua pata tanekatsiwam, jei.

Yawa barái pijimonae, jeye:

—Bárapo korotiye pana nakobe wenonotaponde tamrópata tsiwixi pa-aapa-ponde. ¹⁸Daxota paka tsipáebatsi bárapo uva mera jopa ekeicha paka barü apáe tsainchi ánoxuae. Meisha abü bexa tsane pena koyenéwatha paka barü apaeinchi bárapo uva mera poxonae Nakom neexanaena xua jiwi itorobiya ewatsin, jei Jesús.

¹⁹Jesús pekóbetha pita pan, Nakomtha tsipaeba, jeye:

—Axa, maisha jüntükoyene weiweinang xua pan pata tanekatsiwam, jei.

Bapoxonae Jesús pekóbetha epajánaka pan, yawa katsiba pijimonae. Pijimonae barái, jeye:

—Paxaema po pan epajánakang. Bárapo pan ápara yábara kaunuta tapepong xua poxonae tapaka tsitüpáewatsi tsainchi. Baxua paexanéibare bapokotsiwa xuaunxuae pan paka barü xainchi. Bárapo koyene paexanéibare paiña tana neyábara jütanaineibinexa tsaibi tsane, jei Jesús.

²⁰Poxonae Jesusbarü najainweta, barapoxonae Jesús yábara paeba korótiyo, icha ichi xua yábara paeba pan. Jesús jeye:

—Nakom éxana pena pekapanenebiyáe koyene jiwi nexa. Bárapo pekaapaewíyotha uva mera paápame, xuaunxuae paápame, ápara natsikotane be tajana xua tatüpaein janajopeikaein. Bárapo pejánatha paka jüntükoyene kuikapanepaeinchi abe paiña neexanáe kuirukoyenein weya. ²¹Pebin taxantha nekakuita namaxü-yüütabota pexaethopáewatha, bárapo pebin nekaenaetsina ichamonaetha xua tanebexubinexa tsane ichamonae. ²²Xang pongxaein Nakom Tananeitapetsin bewa tüpaein, tsipéi Nakom Pejume Diwésitha baxua neyábara paeba kaena báyatha. Íchitha pebin tsokúae pong nekaenaetaxubina ichamonaetha, jei Jesús.

²³Néxata barapomonae kaemonae nantiya nayáíñaba, jeye: “¿Jintam metha kaenáetatsi Jesús?” najéi barapomonae.

**Meje yábara poxonae Jesús pijimonae tatsi, yábara
najumematsontsónoba xua barapóyobe kaein aiñakuí jíwana
exanaeinchi pong xua bárapo doce póyobe jíwana**

²⁴Pirapaeyo Jesús pijimonae tatsi najumematsontsónoba xua barapóyobe kaein aiñakuí jíwana exanaeinchi pong xua bárapo doce póyobe jíwana. ²⁵Néxata Jesús jumebarái: “Pomonae jopa judiomona naexanaeyo, barapomonae ba nantaüta piamonae pomonae nakua peewatsiwi. Barapomonae pomonae jiwi itorobiya pía pepa peewatsíwichi barompaya piamonaexae jopa juniya itorobéibiyo. Barapomonae pomonae jiwi itorobiya pía pepa peewatsíwichi baxua éxana, xua daxita jiwi pía jeichi: ‘Maisha barapomonae pomonae jiwi itorobiya pía pepa peewatsíwichi wüünae nákata éxana xua naka itoroba’, pía jeichi jiwi. ²⁶Íchitha paxam jopa bewa paraichim tsane xua aebiya paiña neitorobiwa tsane. Jame, ichakuí bewa paxéinare. Pong aiñakuí peexanaeinchi paxamtha xua beyakaincha ichamonae bapong bewa naexanaena be pong pekuipawi. Pong xua jiwi itorobeiba, bapong bewa naexanaena be pong amanaya tana-kuita ichüng nexa. ²⁷Irü aiña pebinbe. Ichüng pexaethopáewatha ekoundeka. Ichüng pexaewa ápata. Pong ekoundeka ápatatsi. ¿Jintamda pong aiñakuí

peexanáinchira xua beyakaincha ichüing? Pong xua jiwi ápata pexaewa bapong jopa aiñakuí peexanaeinchi. Jame pong pententa apatinchi bapong jame pong peaiñakuí peexanaeinchi, xua beyakaincha ichüing. Nama paiñaxantha ékang, xua takoya nakana éxanang be pong xua pexaewa jiwi taápatsin, pókotsin jopa aiñakuiyiyo.

²⁸Paxam barapomonaē pam, pomonaē meisha pana nebarü jinompéibame poxonaē bekein ichamonaē inta abe éxana. ²⁹Daxota paka kátatsi taitorobi koyenewang icha Taxa Nakom neichi xua nekata bárapo peitorobi koyenewang. ³⁰Bárapo peitorobi koyenewang paka kátatsi, paiña nenabarü nabanaenexa taitorobeibi nakuatheika. Paenáename pexeña peitüpanáe enáewangtha, paiña neyábara paebinexa tsane pomonaē doce po bicheito kuntíyobe, pomonaē Israel pía pemómoxi susato jiwimonaē tatsi xua penatsikuentsiwa abe pía peexanaexae”, jei Jesús.

Meje yábara poxonaē Jesús namchi xua pinaē Pedro Jesús yábara jei tsainchi: “Jopa dapong yaitaeiño”, pinaē yábara jei tsainchi Jesús

(Mt 26.31-35; Mr 14.27-31; Jn 13.36-38)

³¹Ekeicha Jesús jeye:

—Simón jang, kaurimonaē pía pentakaponaēin tatsi, bapong Satanás newüüka: ‘Jiñamonaēpin nekare’, nejéi. Bapong ichichipa xua abe kata exanaena xua taneitawetsinexam tsane. Icha jiwi ichi xua pebeno dangweya yasisita pexubinexa pesiberapewa. Barichi kaurimonaē pía pentakaponaēin tatsi ichichipa kajüntü-koyene itorobina xua taneitawetsinexam tsane. ³²Íchitha xang Taxa beicha kata tsipáebatsi xua jopa tana neyábara jüntemainaenexam tsane xua tana nejumekowüntsiwam. Íchitha Satanás kakana exanaena xua tana nejumefebiwam saya bara kaeto tsane. Bapoxonaē ekeicha kaewa nejumekowüntsíname. Poxonaē ekeicha kaewa nejumekowüntsíname, néxata ichamonaē pomonaē tana nejumekowüntsiwi barapomonaē yawenáename xua ajüntüyapusüüya tana nejumekowüntsiwa tsane, jei Jesús.

³³Simón Jesús jumenótatsi, jeye:

—Tanekanamataxeinaem, maisha be kabarü poponaēinchi. Bara bekein ichamonaē kakaponaena jiwi pekübibotha íchitha áwiya kapunatüpaēinchi. Matáüta bekein tüpáename íchitha áwiya kapunatüpaēinchi, jei Simón Pedro.

³⁴Jesús jumenota, jeye:

—Pedro, katsipáebatsi bexa nekaunutsíname akoibi pojumekuíyobe neyábara jam tsane: ‘Dapong jopa yaitaeiño’, neyábara jam tsane. Barapoxonaē irü tsane wákara pebto fibina, jei Jesús.

Meje yábara poxonaē bara nama bárapo matakabi tsane po matakábitha Jesús wáetabatsi

³⁵Néxata Jesús pijimonaē yáiñaba, jeye:

—Poxonaē báyatha paka itoróbatsi paka jeichi: ‘Jopa parátixi doró pakaponaēinde, jopa kote pakaponaēinde, jopa panataxu xatabinde xua penataxuxatabiwa’, jang. ¿Eta xoyo pákata seika xua xoyo pakobenapóname? jei Jesús.

Barapomonaē Jesús jumenótatsi, jeye:

—Ajibi, bara paxeinang pokotsiwa panantawénonang, jei.

³⁶Néxata Jesús jumenota. Barapomonaē jumenótatsi. Namchi:

—Ánoxuae paka tsipáebatsi xua icha kuikoyeneya. Pong kote xeina, moya bewa kaponáe. Pong xeina parátixi doro, moya bewa kaponáe. Pong peaitiyúü kami-sha xeina, bapong bewa kaenaetsina bárapo kamisha, bárapo paratixitha bewa komotsina kusi. ³⁷Poxoru paka tsipáebatsi kaena býatha Nakom Pejume Diwésitha neyábara paeba, jeye: ‘Bapong kayábara kanantaxeinaeinchi jei tsane bapong jíwana kaein pomonae peabewi’, jei Nakom Pejume Diwésitha xua pinae jiwi jei tsane. Jiwi nantawénona xua baxua neyábara kaunutsina xua Nakom peneyábara jumichixae baxuang Pejume Diwésitha, jei Jesús.

³⁸Barapomonae Jesús jumenótatsi. Jeye:

—Pata Tanekanamataxeinaem, xote býatha paxeinang aiña watobekusi, jei. Jesús jumenota, jeye:

—Bara, bare, jei Jesús.

Meje yábara poxonae Jesús Paxa tsipaeba ichaxota tsika íriyo po íriyo pewüng Getsemaní

(Mt 26.36-46; Mr 14.32-42)

³⁹Néxata Jesús tómara weya pona. Bapong pona demuxuwa beya po demuxuwa pewüng demuxu Olivowa, olivo naein peumenaexae baxota poxoru píakui xua poneiba baxota petsipaebeibinexa Paxa. Jesús pijimonae punapoinchi. ⁴⁰Poxonae bárapo demuxúwatha patopa, Jesús pijimonae barái:

—Nakom patsipáebare xua jopa abe paiña neexanaewa tsane xua kaurimonae paka itoroba.

⁴¹Néxata Jesús pijimonae tsiwiyo wepu natsixitaba. Saya jopa tajüyo. Be poxonae pebin ibótiyo xoya xua be pokotsíwatha naruntabiya jopeika. Jesús pentabokotha ekoundeka. Paxa tsipaeba. ⁴²Jesús namchi: “Axa, icha ichichípame xua tana neyawenaewam, inta pire xua ajüntükoyenerewe neéxana. Íchitha jopa neexanaeinde be pókotsi koyeneya ichichípang. Saya jame nekana éxande be pókotsi koyeneya ichichípame”, jei Jesús.

⁴³Bapoxonae Jesús tsita naitüütatsi matatsunpin pong itaboko wétsika pona. Bárapo matatsunpin Jesús antüsüüya kana éxanatsi poxonae yawénatsi. ⁴⁴Bichokono Jesús ajüntütane tsipéi Paxa kópatatsi xua jiwi petsitüpaewa tsainchi. Paxa beya bichokono matowa jumedangweya tsipaeba. Yáwano bichokono najaneta. Bárapo penajanetsiwa poxonae íratha othopeika be pejana othothopeika.

⁴⁵Poxonae najumewétaba xuano xua asiya úngkuano bapoxonae pijimonae beya pona. Jesús tane pijimonae xua tamaitumeinchi. Barapomonae maita tsipéi jüntükuerona xua wekoyéi, xua Jesús yáitama petüpapaebixae. ⁴⁶Néxata Jesús pijimonae barái, jeye:

—¿Eta xua metha pamáitame? Panonobaponde Nakom patsipáebare xua jopa abe paiña neexanaenexa tsane pokotsiwa kaurimonae paka itoroba, jei Jesús.

Meje yábara poxonae Jesús wáetabatsi

(Mt 26.47-56; Mr 14.43-50; Jn 18.2-11)

⁴⁷Kataunxuae abü Jesús pijimonae tsipaebungkua poxónaerü jiwi pin bicheito pata. Kaein Jesús pijimonae tatsi jíwana, pong pewüng Judas, pomonae xua doce pýobexae, bapong pin bicheito matakápona. Judas Jesús imoxoyo kakuita unguatábatsi xua Jesús petsutsubinexa tsainchi. ⁴⁸Néxata Judas baraichi, Jesús barái, jeye:

—Xang pongxaein Nakom Tananeitapetsin, ¡Judas, jamaisha netsutsúbame, ápara metha jiña nekaenaetichi ichamonaetha! jei Jesús.

⁴⁹Pomonaes Jesús pijimonaes tatsi kakuita umeinchi, poxonaes barapomonaes baxua tane xua Judas Jesús tsutsúbatsi xua pekaenaetsinéxatsi ichamonaetha, bapoxonaes barapomonaes Jesús baraichi:

—Pata Tanekanamataxeinaem, ¿barapomonaes kúsitha paukubobang? jei Jesús pijimonaes tatsi.

⁵⁰Jesús pijimonaes tatsi jíwana kaein, bapong muxuyoro katsoniba, pong sacerdotemonaes pía pepa pentakaponaein tatsi tanakuítatsi bapong muxuyoro katsoníbatsi pomuxuyoroto pekoxa werukuiya. ⁵¹Íchitha Jesús barái bapong jeye:

—Bara, bara, jei Jesús.

Pong muxuyoro katsoníbatsi Jesús muxuyoro jáyaba pekóbetha. Bapoxonaes bapong ekeicha muxuyoro dukuanaya. ⁵²Jesús tsipaeba, sacerdotemonaes pía pentakaponaewi tatsi tsipáebatsi. Yáwano tsipáebano pomonaetha, pomonaes penapataewi. Barichi tsipáebano pomonaetha, pomonaes Nakom pin píabo peyapuaewi. Daxita barapomonaetha Jesús kueikuejei, pomonaes ichichipa xua Jesús pewaetabíwatsi. Jesús jeye:

—¡Pakápatame kusin yawa iwabi, icha paichim poxonaes pakana éxaname pongtha pong jiwi pekaibin! ⁵³Poxonaes daxita matakabi Nakom pin piabotha paka barü poponéibatsi, jopa pana newáetabim. Íchitha ánoxuae bárapo matakabi tsuxubi nama po matakábitha Nakom paka yábara kuikópata xua paiña neexanaewa tsane pokotsiwa paka nekaitorobixae kauri, bapong Satanás pong peyaitakireyajinaein.

Meje yábara poxonaes Pedro Jesús yábara páebatsi xua jeye:

“Jopa dapong yaitaeiño”, yábara jeichichi Jesús

(Mt 26.57-58,69-75; Mr 14.53-54,66-72; Jn 18.12-18,25-27)

⁵⁴Néxata daxita barapomonaes Jesús téikatsi. Yáwano kapóinchino sacerdotemonaes pía pepa pentakaponaein tatsi píabo beya tatsi. Pedro, Jesús tsiwiyo tajü putaetaetsiníyatsi. ⁵⁵Baraxotiya sacerdotemonaes pía pentakaponaein tatsi piabotha tatsi bárapo botha aishowa beya pánatha tütutha ishoto itutaeta. Soldadomonaes barapomonaes nayatoxóroto exanaxubiya ena ishótotha. Baraxota irü Pedro naéka. ⁵⁶Yábüyo powa sacerdotemonaes pía pepa pentakaponaein tatsi tanakuítatsi, poxonaes Pedro tainchi barapowa, xua irü naéka baxota ishótotha barapowa Pedro kaununaya baráichichi, jeichichi:

—Bapong irü ápara báyatha Jesús punapoponéibatsi, jei.

⁵⁷Íchitha Pedro jumematawenta, jei:

—¡Petsiriwa, bárapo pebin jopa yaitaeiño! jei Pedro.

⁵⁸Bapoxonaes pirapaeyo irü ichüngdü pebin patopa. Bapong Pedro irü tainchi xua irü naéka baxota. Pedro baraichi bapong, jeye:

—Xam ápara irü Jesús pijimonaes tatsi jíwanam, jei.

Íchitha Pedro jumebarái, jeye:

—¡Pebin, jopa dapomonaes jíwanaiño ápara! jei Pedro.

⁵⁹Poxonaes kae hora yapukaewa, írürü ichüng Pedro matowa baráichichi:

—Bapong ápara napunaponeiba Jesús, tsipéi bapong Galilea nakuapindü, jei.

⁶⁰Íchitha Pedro jumebarái, jeye:

—¡Pebin, daümetha jopa taeiño xua páebame! jei Pedro.

Poxonae Pedro kataunxuae baxua kueikueije, bapoxonae kaena naiña wákara pebto kaein fiba. ⁶¹Néxata Jesús napatomeicha nekota, Pedro nekóyatsi. Néxata Pedro nantaxéinatába xua báyatha Jesús Pedro tsipáebatsi, poxonae jeye: “Xam bárapo merawithe, pewúnaeya poxonae wákara pebto fibina xam kopiya akoibi pojumekuíyobetha neyábara jam tsane: ‘Jopa dapong yaitaeiño’, neyábara jam tsane. Barapoxonae irü naiña wákara pebto fibina”, jeichi Pedro xua Jesús paeba. ⁶²Néxata Pedro pesato bejoniya. Bichokono wekoyéi, peajüntütanexáe xua Jesús yábara páebatsi.

Meje yábara poxonae Jesús kuikapónatsi

(Mt 26.67-68; Mr 14.65)

⁶³Pomonae Jesús yapukaumeinchi, daxita barapomonae Jesús kuikapónatsi, yawa bütsino. ⁶⁴Jesús itakuere kútatsi, paparúwatha yawa itabara kuaintatsino. Barapomonae Jesús baraichi:

—Ínkane pana netsipáebare, ¿jintam káitabara tsakibóbara xua bekein paka itabara kútatsi? jei.

⁶⁵Daxita barapomonae Jesús tsümújume barü páebatsi aiña jumeintha.

Meje yábara poxonae Jesús kapoinchi judiomonae pía pekanamatakaitorobi jiwi bicheito tatsi pía peitabaratha tatsi

(Mt 26.59-66; Mr 14.55-64; Jn 18.19-24)

⁶⁶Poxonae pentha tsina nabarü nakaetuta penapataewi judiomonae, irü sacerdotemonae pía pentakaponaewi tatsi, írürü pomonae jiwi pekuidubiwi Moisés pía peitorobi koyene tatsi. Daxita barapomonae Jesús kapoinchi pekanamatakaitorobi bicheito itabaratha tatsi xua peyaiñabinéxatsi, jeichi:

⁶⁷—Ínkane pana netsipáebare, ¿Xam Mesías, pong Nakom nekaitorobín? jei.

Jesús jume epapita jeye:

—Icha: ‘Aa’, paka jei tsipaetsi, ápara jopa pana nejumekowüntsitsipaem. ⁶⁸Icha paka yaiñabichípatsi tayaiñabiwang ápara jopa pana nejumenotsipaem. ⁶⁹Íchitha pongxaein Nakom Tananeitapetsin ekaein Nakom pía pekoxa weya tatsi, po Nakom peayapusúü itorobi koyenewa pexeinaein, jei Jesús.

⁷⁰Bapoxonae daxita barapomonae Jesús baraichi:

—¿Néxata metha xam Nakom Pexanto tatsim? jei.

Jesús jume epapita jeye:

—Aa, barichi xuaunxuae papáebame paiñakoutha, jei.

⁷¹Néxata barapomonae kaemonae natsipaeba najéi:

—Ánoxuae jopa nantawenonaetsi xua ichamonae Jesús peyábara paebíwatsi. Tsipéi ánoxuae nama yatsikaewa jumetainchi, xua bapong piakoutha nayábara paeba, jei barapomonae.

Meje yábara poxonae Jesús ungua Pilato peitabaratha tatsi

(Mt 27.1-2,11-14; Mr 15.1-5; Jn 18.28-38)

23 ¹Néxata daxita penayatoxóroto exanaxubiya enáe jiwi barapomonae asiya umenarúküpa, Jesús téikatsi yawa kapoinchi Pilato peitabaratha tatsi. Pilato bapong pong Judea nakuapiwi peyanakua ewatsinchi. ²Baxota daxita barapomonae Jesús kuiyopítatsi xua abe éxana, jeye:

—Bárapo pebin patang xua wajiwimonae jumekuitsákabatsi xua anáepana kana éxanatsi. Yáwano pajumetangno pokotsiwa jopa bewa pinae parátixi matoma katsi pongtha pong romanomonae itorobiya pía pepa peewatsinchi. Matáüita bapong nayábara paeba: ‘Xang ápara Mesías pong jiwi itorobiya pepa Taéwatsin’, jei, jei barapomonae.

³Néxata Pilato Jesús yáíñabatsi, jeye:

—¿Xam judiomonae itorobiya pía pepa Neéwatsin? jei.

Jesús jumenota namchi, jeye:

—Xuaunxuae páebame bara baxua ápara, jei Jesús.

⁴Néxata Pilato barái sacerdotemonae pía pentakaponaewi tatsi yawa baraino jiwi, jeye:

—Jopa jume itaraerowiño bapong xua po jumetha penayaita aenae exanaewa, xua pebexubinéxatsi bárapo pebin, jei.

⁵Íchitha barapomonae jumedangweya kueikueije, jeye:

—Jiwi jopa juniya jumekuitsakabichi xua anáepana éxanatsi pía pekuidubíwangtha, daxita Judea nákuatha. Baxua Galilea nákuatha tamrópata pítaba, ekeicha aunxuae waxaiña bekuijoparene, jei.

Meje yábara poxonae Jesús ungkua Herodes peitabaratha tatsi

⁶Poxonae Pilato baxua jumetaeba bárapo bicheito baraichi, jeye:

—¿Jesús bara Galilea nakuapin? jei Pilato bárapo bichéitotha.

⁷Bárapo bicheito namchi, jeye:

—Aa, bapong Galilea nakuapin, jei barapomonae.

Bapoxonae Pilato itoroba, Jesús itoróbatsi, Herodes peitabaratha beya. Bapong Herodes pong Galilea nakuapiwi peyanakua ewatsinchi. Herodes siwaponeiba Jerusalén tómara. ⁸Poxonae Jesús táebatsi Herodes, bapong bichokono jüntükoyene weiweinanareka, tsipéi báyatha Herodes kuinaya be taena. Herodes saya jumetaiba xua Jesús yopitéibatsi. Herodes ichichipa tane xua Jesús petsita-itüütsi koyenewa exanaena. ⁹Herodes Jesús matowa yáíñabatsi. Íchitha Jesús jopa jumenotsiyo. ¹⁰Baraxota irü ena sacerdotemonae pía pentakaponaewi tatsi. Írürü baxota ena pomonae jiwi pekuidubiwi Moisés pía peitorobi koyenewa tatsi. Daxita barapomonae Jesús bichokono abe yábara páebatsi Herodes pía xantha tatsi. ¹¹Néxata Herodes yáwano pía soldadomonae tátsino daxita barapomonae Jesús tsümüjume barü páebatsi. Jesús kuikapónatsi, pexeiña paparuwa jumaxátatatsi pókotsi paparuwang namaxátaba pomonae peyanakua éwatsi jiwi. Ekeicha Jesús itoróbatsi Pilato peitabaratha beya, Herodes bara beitorobiya. ¹²Bárapo matakábitha Herodes írüno Pilato naitakoxónabe. Bapongbe kaena báyatha saya penaita aenae-aenéi jintongbe.

Meje yábara poxonae Pilato jumebarü jejéi xua Jesús bara pebexubiwa tsainchi ichamonae

(Mt 27.15-26; Mr 15.6-15; Jn 18.39—19.16)

¹³Sacerdotemonae pía pentakaponaewi tatsi írürü judiomonae pía pentakaponaewi, írürü daxita jiwi, daxita bárapo bicheito Pilato waba xua bárapo bicheito penakaetutsinexa. ¹⁴Pilato barái bárapo bicheito, jeye:

—Paxam bárapo pebin pakáponame taxantha. Pajam: ‘Bárapo pebin daxita jiwi jumekuitsákabatsi xua anáepana éxanatsi’, pajam. Báyatha bekein baxua bárapo

pebin yábara yáñabang paiña itabaratha pokotsiwa báyatha payábara páebame taxantha, íchitha jopa jume itaraerowiño bapong, xua po jumetha penayaita aenáe exanaewa xua yábara pana netsipáebame. ¹⁵Icha ichin xua jopa jume itaraerowiño Herodes barichi. Daxota ekeicha Jesús kaibe itorobarénatsi waxaiña bérena. Yáitama Jesús jopa abe exanaeyo, daxota jopa bewa bexubí. ¹⁶Tha kueintichi bapong. Tha bapoxonae pukopatichi, jei Pilato.

¹⁷Poxonae Pascua matakábintha ichüng ba bewa ishanaxubichi. Pilato bárapo Pascua matakábintha nantawénona xua ishanaxubina kaein pong jiwi pekübibotha peekaein, pong xua jiwi ichichipa, xua bapong peishanaxubinexa tsainchi.

¹⁸Bapoxonae daxita jiwi jumedangweya wawái, jeye:

—¡Soldadomonae itoróbare xua bapong pebexubinéxatsi! ¡Barrabás painta puso-tábare! jei.

¹⁹Barrabás jiwi pekübibotha étatsi, tsipéi kaena báyatha matakápona ichamonae xua bárapo tomarapiwi najumetsákaba kana éxanatsi xuano xua jiwi jutébatsi. ²⁰Pilato ichichipa xua Jesús pukópatatsi. Daxota ekeicha bárapo bicheito tsipáebatsi xua Jesús yábara páebatsi. ²¹Íchitha ekeicha bárapo bicheito jumedangweya wawái Pilatotha, jeye:

—¡Bewa maisha náetotha tüparukua exanaem! ¡Bewa maisha náetotha tüparukua exanaem! jei.

²²Ekeicha Pilato tsipaeba bárapo bicheito, jeye:

—¿Eta pokotsiwa xua metha jane xua abe éxana? Xang jopa jume itaraerowiño bapong xua po jumetha penayaita aenáe exanaewa xua pebexubinéxatsi bapong. Tha kueintichi, tha bapoxonae pukopatabichi, jei.

²³Bárapo bicheito jopa juniya wawayo xua náetotha tüparukua peexanaenéxatsi Jesús. Írürü sacerdotemonae pía pentakaponaewi tatsi irü jumedangweya wawái, beya kapanepa pokoyene ichichipa pekana exanaewa. ²⁴Daxota Pilato namchi: “Moya paexande be pókotsi koyeneya paichichípame”, jei Pilato. ²⁵Néxata Pilato nama pusotaba pong jiwi pekübibotha peekaein, pong jiwi ichichipa xua bapong peishanaxubiwa tsainchi. Bapong pewüng Barrabás, pong wáetabatsi poxonae jiwi najumetsákaba xuano poxonae jiwi jutébatsi. Bapoxonae Jesús kópatatsi, Pilato kópata, xua Jesús bara pebexubinéxatsi judiomonae pejumeyainwa tatsi.

Meje yábara poxonae Jesús tüparukua éxanatsi náetotha

(Mt 27.32-44; Mr 15.21-32; Jn 19.17-27)

²⁶Poxonae Jesús kataunxuae ka-enapoinchi, tüpa peéxana dutsinéxatsi náetotha, pebin wáetabatsi, soldadomonae wáetaba. Bapong pewüng Simón, Cirene tomarapin. Bapong wexua wérena pona. Bapong peutukuratha tabotsíkatsi naeto, xua pekaponanexa Jesús peputha tatsi.

²⁷Jesús peputha tapoinchi pin bicheito, irü aiña yabüxino Jesús peputha tapoinchi. Daxita barapówaxi nantanuweya siwaponanena namtsébiya wekoyeichi Jesús. ²⁸Íchitha Jesús nekotabiya barái barapówaxi, jeye:

—Yábüxi Jerusalén tomarapiwaxi pam, jopa pana nesiwanamtsebiya wekóyande. Jame maisha paiñakoutha pana nasiwawekoyande, paiña pexuino pasiwawekoyande. ²⁹Tsipéi matakabin othopaena po matakábintha jiwi átene tsane. Bárapo matakeinha, jiwi jei tsane: ‘Jüntükoyene weiweina poyábüxi jopa pexui xeinaeyo. Jüntükoyene weiweina poyábüxi jopa bápana bütíxitha taenaetsi pexui.

Jüntükoyene weiweina poyábüxi bápana pexui jopa ishainae', jei tsane jiwi bárapo matakábintha. ³⁰Yáwano jiwi namchi tsane: 'Maisha wüünae xua wawerapaewa xua wanaka künübabiwa demuxuwang, yáwano tsórobong naka matatsún weto-xebabina xua jopa wanaka itüütsiwa tsane', jei tsane jiwi bárapo matakábintha. ³¹Xang wüünae éxanang dakotsiwa jiwi jopa juniya nepérxaxa exanaeyo. Íchitha pomonae abe peexanaewi nama jopa juniya bichokono pérxaxa exanaetsi beya-kaincha xua nepérxaxa éxana, jei Jesús.

³²Kataunxuae Jesús ekapona. Írürü pongbe abe matowa peexanaeinbe, bapongbe Jesús peputha takapoinchibe, xua bapongbe irü pebexubinexa tsáin-chibe poxonae Jesús bexotsi. ³³Daxita jiwi Jesús barü pátatsi ichaxota po uruto be jintong matasipa piwa. Po uruto wüngaunuteiba xua jei tsaibi: "La Calavera", jei. Bárapo uruto matasóittha Jesús tüparukua éxanatsi náetotha. Írürü pongbe jiwi pekaibinbe tüparukua exanátsibe náetotha ichaxota imoxoyo Jesús dukua. Ichüing Jesús petsokona wetaungkuíyatsi, irü ichüing pekoxa wetaungkuarénatsi. ³⁴Poxonae Jesús náetotha dukua, Jesús jeye:

—Axa yábara kuijüntemáinare pokoyene barapomonae nekana éxana, tsipéi barapomonae jopa yaputaeyo xua nekana éxana, jei Jesús.

Soldadomonae natatsaba Jesús pía paparuwang tatsi. Bapomonae ibótixi bebeya penakueranta notsinexa Jesús pía paparuwang tatsi. Pong beta xoya ibótiyo bapong kopiya pita Jesús pía paparuwang tatsi. ³⁵Baraxota Jesús taeumeinchi jiwi. Íchitha nama pentakaponaewi Jesús kuikapónatsi, barapomonae jeye:

—Bapong kain kapanepibabei ichamonae, kame jopa nakapanepaeyo. Icha bara bapong Mesías, pong Nakom pía peitapetsin, bü bara bapong piakoutha nakapanepa naeto wétsika, jei barapomonae.

³⁶Soldadomonae irü Jesús kuikapoinchi, imoxoyo kakuita umenapóinchino. Bárapo soldadomonae Jesús ápatatsi po mera pewüing vino, po mera mene atsu.

³⁷Bárapo soldadomonae Jesús baraichi, jeye:

—¡Icha xaniwaicha judiomonae itorobiya pía pepa Neéwatsim, moya jiñakoutha nakapanépare! ¡Naeto wétsika ekoinka! jei soldadomonae.

³⁸Jesús pentutu wétsika tadútatsi napaewa xua bárapo napáewatha tina. Bárapo petinadutsiwa jeye: "Bapongje ápara judiomonae itorobiya pía pepa peewatsinchi", jei bárapo petinadutsiwa.

³⁹Pongbe Jesús pekuariya takobe-matatabarutátsibe, pongbe matowa abe peexanaeinbe, bapongbe kaein ichüing, bapong Jesús biatainchi petüpaeyainwa náetotha. Bapong namchi:

—¡Icha xaniwaicha xam Mesías, pongxaem Nakom kaitapeta, moya jiñakoutha nakapanépare! ¡Yáwano pana nekapaneparebe! jei bapong.

⁴⁰Pong icha náetotha dukua, bapong jumematawenta, pong Jesús kasébatsi, bapong jumematawéntatsi. Pong icha náetotha dukua namchi, jeye:

—¿Xam jopa kuitaya junuwim Nakom? Aparauunxuae tüpaeinchibe ichaunxuae Jesús ichi tsane. ⁴¹Waxáinchibe jopa juniya naka pérxaxa jübíyobe abe waexanae-xaebe, ápara bara xainwaicha xua nákata éxana tsipéi báyatha ápara abe exanátsibe. Íchitha nama pongje jopa ápara abe exanaeyo, jei.

⁴²Néxata pong baxua penamchixae, bapong Jesús baraichi, jei:

—Jesús, neyábara kanantaxéinare xua tana neyawenaenexam po matakábitha poxonae patopeikáename xua jiwi neitorobinexam tsane, jei bapong.

⁴³Jesús jumenota, jeye:

—Xaniwaicha bara katsipáebatsi, ánoxuae tsane kabarü ekaeinchi ichaxota jiwi jüntükoyene weiweinathopeiba, peitüpanáe nakuatheicha, jei Jesús.

Meje yábara poxonae Jesús tüpa

(Mt 27.45-56; Mr 15.33-41; Jn 19.28-30)

⁴⁴Poxonae Jesús kataunxuae dukua náetotha, bapoxonae daxita nákuangtha bichokono aitakiri xua poxonae matáeiñaxae weya, beya yatabopiya. Tres po hórabe kirei tsungkuae. ⁴⁵Poxonae kataunxuae xometo jopa penthiyo, bapoxonae paparuwa, po paparuwa Nakom pin piabotha dukua, bárapo paparuwa naiña bopiya matonta tsitsikeika. ⁴⁶Néxata Jesús jumedangweya wawái, jeye:

—Axa, nejumopepire, po júmope tana nekatsixaemxae, jei Jesús.

Poxonae Jesús baxua kaunuta, bapoxonae Jesús tüpanaicha.

⁴⁷Soldadomonae pía pentakaponaein tatsi Roma nakuapin, poxonae bapong baxua taeba, bapoxonae Nakom wüünae jáintatsi, jeye:

—Jaina, ápara barapongje jopa abe exanaeyo, ítara ichamonae yopita xua abe éxana, jei bapong.

⁴⁸Daxita pomonae xua baxua taeumena baxota, barapomonae píabo benawibiya. Poxonae námtotha enapona, daxita barapomonae nantákari kuainbobénapona poxoru bichokono ajüntükoyenetane xua Jesús pewishíwatsi. ⁴⁹Íchitha pomonae Jesús peyaitáe jiwi, irü yabüxino, powaxi Jesús punadendénatsi Galilea nakua wérena, daxita barapomonae Jesús tajü wetaeuméiñatsi poxonae ichamonae Jesús bexotsi.

Meje yábara poxonae Jesús petüpaein ibo müthütha yauxatatababótatsi

(Mt 27.57-61; Mr 15.42-47; Jn 19.38-42)

⁵⁰Írürü pebin pópona, bapong pewüng José, Arimatea tomarapin. Arimatea tómara eka Judea nákuatha. Bapong pentakuiwüünaein. Yáwano beta pepoponaein Nakom peitütha tatsi. José, bapong jíwana kaein pomonae judiomonae pía pekanamatakaitorobi bicheito tatsi. ⁵¹Barapong José yábara jumekowüntsiya wüünae ewateiba pokoyenewa xua poxonae Mesías patopáetsika pong jiwi itorobiya peewatsinéxatsi. Poxonae pomonae pekanamatakaitorobi bicheito éxana poxonae Jesús bexotsi, baxua José jopa pebürüya nakayábara nantaxeinaeyo. ⁵²José Pilato siwapoinchi. Pilato wüükatsi Jesús petüpaein, José wüüka. ⁵³José naeto wepichika Jesús petüpaein. Bapoxonae José matakiontabareka bárapo pexeíña paparúwatha. Bapoxonae José ibo müthü iya boya, po müthü jiwi müthü tofobobapona. Bárapo müthütha kataunxuae petüpaein ichüng jopa boyaetsi. ⁵⁴José baxua éxana po mataketha pewüng penakui-xaxainchi matakabi poxonae judiomonae ba weta daxita xua penakuitsiwa pewünaeya poxonae jopaena pentakeiseikáe matakabi. Bárapo pentakeiseikáe matakabi imoxoyo jopaena.

⁵⁵Powaxi Jesús punadendénatsi Galilea nakua wérena, barapówaxi pona müthütha, petanenaxa xua Jesús müthütha xotsi. ⁵⁶Poxonae barapówaxi bo benawibiya, bapoxonae nakuiwüünaeta jeba petuxueiwang yawa penasiwangno, xua Jesús petüpaein tsixaxainta jébatsti.

**Meje yábara poxonae Jesús ekeicha asüü juina
éxanatsi petüpáe kuirukoyene weya**

(Mt 28.1-10; Mr 16.1-8; Jn 20.1-10)

24 ¹Barapówaxi botha kuikuina peseikae matakábitha, Moisés pía peitorobi koyeneya pepaebixae, bárapo matakabi yábara.

Poxonae judiomonae pía pentakeiseikáe matakabi tatsi yapukáewaba bapoxonae patopa matakabi po matakabi xua kopiya dukua kae semánatha. Bárapo matakábitha poxonae aena pentha tsina, yábüxi pona müthü beya ichaxota Jesús boka. Barapówaxi kápona petuxueiwang yawa penasiwangno xua býatha xaxaintajeba. Barapówaxi kuéyabatsi icha yábüxi. ²Poxonae barapówaxi bárapo müthü beya pata, barapówaxi taerúküpa xua po ibo panáwatha yauxatatababota xua pin ibo panawa bárapo ibo müthü býatha kou yaupataxubabota. ³Barapówaxi jojoniya müthiya íchitha barapówaxi jopa taeyo xua Jesús pong Pekanamataxeinaein petüpaein pebokuaewa. ⁴Barapówaxi yábara najüntükoyene kabenaeka. Jopa yaputaeyo xua éxana tsipéi jopa taeyo xua Jesús petüpaein boka. Barapówaxi tsita naitüütatsi nakuéyatabe pebinbe pongbe xua asiya úngkuabe, xuano xua yawa paparuwa namaxátatabe, po paparuwa bichokono daedaena. ⁵Barapówaxi bichokono junuwa, pijunuwi írabe nekobareka. Bárapo pebinbe barapówaxi baraichi, jeibe:

—¿Eta xua metha petüpáe kuirukoyenéwatha panekobómpame pong ekeicha asüü bárapo petüpáe kuirukoyene weya? ⁶Xote jopa bokaeyo bapong. Býatha bapong asüü petüpáe kuirukoyene weya. Payábara jumentaxéinare xua býatha bapong paka tsipaeba poxonae kataunxuae Galilea nákuatha pópona. ⁷Paka jeye: ‘Xang pongxaein Nakom Tananeitapetsin, bewa nekaenaetsina pomonaetha, pomonae abe peexanaewi. Bárapo abe peexanaewi náetotha tüparukua neéxana dutsina. Íchitha ekeicha po matakabi akoibibetha asüüing juina neexanaena petüpáe kuirukoyene weya’, paka jei Jesús, jei bárapo pebinbe xua barapówaxi tsipáebatsi.

⁸Néxata barapówaxi baxua jumekuiyábara nantaxeinarúküpa xua býatha barapówaxi tsipáebatsi, xua Jesús tsipaeba. ⁹Poxonae barapówaxi müthü wenawibiya tómara beya, barapówaxi daxita paeba pokotsiwa tane. Jesús pía peitorobiwi tatsi pomonae xua once póyobe barapomonae tsipáebatsi, ichamonaeno tsipaebatsino, pomonae Jesús jumekowúntatsi. ¹⁰Powaxi yopita, xua powaxi Jesús pía peitorobiwi tsipáebatsi, ichowayo pewüing María Magdalena powa Magdala tomarapiwayo, irü ichowayo Juana, ichowayo María, Santiago pena tatsi, yáwanorü ichowáxino powaxi saya nápona. ¹¹Íchitha Jesús pía peitorobiwi tatsi nantaxeina xua barapówaxi jopa xaiñeyo, yáwano jopa jumekowüntsichi barapówaxi.

¹²Bapoxonae Pedro müthü bekuinaepoiña. Müthü tütutha tane xua meisha paparuwa boka. Bapong píabo benawiya. Bapong baxua yábara nantaxeina nawita.

**Meje yábara poxonae Jesús pebinbe tsita naitüüta námtotha
poxonae Emaús tómara beya pónabe**

(Mr 16.12-13)

¹³Bárapo matakábitha Jesús pijimonae tatsi jíwanabe námtotha ekapónabe, siwapónabe tómara, po tómara pewüing Emaús. Bárapo tómara eka once po

kilómetrobe xua Jerusalén tómara weya. ¹⁴Barapongbe yábara natsipaebeka pónabe námtotha xua mexuaetha éxana. ¹⁵Poxonae kataunxuae yábara natsipaebeka pónabe yawa yábara najumematsontsónobe kapónabe, bapoxonae Jesús imoxoyo kakuita unguatábabe yawa napónano. ¹⁶Bekein barapongbe Jesús tainchi, íchitha bapongbe jopa itakuikanaüpaetsibe xua Jesús peyaitáewatsi. ¹⁷Néxata Jesús yáñaba, bapongbe baráichibe, jeye:

—¿Eta xua námtotha yábara pana natsipaebeka ponámebe? jei Jesús.

Bapongbe jüntüwekoyeya narúntababe peyábara natsipaebeka ponaexaebe xua mexuaetha éxana. ¹⁸Pongbe penakueyatsixaebe kaein pewüing Cleofas. Bapong Cleofas Jesús jumenótatsi, jeye:

—Daxita pomonae jinompa Jerusalén tómaratha, daxita barapomonae yaputane xua éxana bárapo matakábintha. ¿Meisha xam kompam jopa yaputaem xua mexuaetha éxana? jei.

¹⁹Néxata Jesús baraibe bapongbe, jei:

—¿Eta xua exánara bárapo tómaratha? jei.

Barapongbe jumenótabe, jeibe:

—Ápara pana natsipaebeka pónangbe xua jiwi éxana, pajang: ‘Xua pokoyeneya Jesús Nazaret tomarapin kana éxanatsi’, pajang. ‘Pong Nakom peitorobi jume papaebin, pong peitüpanáe petsita-itüütsi koyenein éxana Nakom pía peyapusüü itorobi koyeneya tatsi’, pajang. ‘Pong wüünaeya pekueikueijein Nakom peitütha tatsi, xuano xua jiwi peitütha tatsi’, pajang. ²⁰Sacerdotemonae pata tanekanamata xeinaewi irü pata pekanamatakaitorobiwi piraichi Jesús kobewáetabatsi pía Pilato peitorobinexa soldadomonae xua Jesús tüparukua peexanaenexa tsainchi náetotha. ²¹Bekein pawüünae éwatang xua Jesús patopa xua peyawenaenexa tsane Israel nakuapiwi xua bárapo Israel nakuapiwi panenebiya peexanaenéxatsi, íchitha bapong jopa kapanenebiyaeyo barapomonae. Yáwano akoibi po matakábibe pukaewa poxonae Jesús bexotsi. ²²Yábüxi, powaxi xua paxang jíwana pang, barapówaxi pona müthü beya poxonae aena pentha tsina. Pona ichaxota Jesús boka. Barapówaxi pana tsipaeba xua tane. Daxua pana nenabenaeka éxana bichokono. ²³Barapówaxi pinae jopa taeyo Jesús petüpaein. Bapoxonae pana netsipaeba xua pinae barapówaxi tsita naitüütatsi matatsunpiwi. Pinae matatsunpiwi namchi: ‘Báyatha Jesús asüü’, jei pinae. ²⁴Bapoxonae pata jiwimonae, barapomonae jíwana müthü beya pona. Barapomonae bara tane baxua, xua yábüxi yopita. Íchitha Jesús petüpaein jopa taetsi, jeibe xua Jesús tsipáebatsi.

²⁵Néxata Jesús jumenota barapongbe, jeye:

—Paxam pomonae jopa peyaputáe jiwi pam, xuano xua bewayo pajumekokowüntapóname pokotsiwa báyatha Nakom peitorobi jume pepaebiwi paeba. ²⁶Paxam payaputáneme xua Mesías pong Nakom itapeta, kopiya bewa péraxa exanaeinchi. Nakom kana exanaena xua bapong patopaena Nakom pía peitorobi nakua beicha xua pexeinaenexa tsane Nakom pía peyapusüü itorobi koyenewa tatsi, jei Jesús.

²⁷Néxata Jesús tsipaeba barapongbe xua daxita i dapó diborongtha Jesús yábara páebatsi Nakom Pejume Diwésitha. Kopiya matha Jesús yaputane éxana po diwesin xua Moisés tina xua Jesús yábara páebatsi. Bapoxonae ekeicha Jesús yaputane éxana xua po diwesi Nakom peitorobi jume pepaebiwi tina, xua Jesús yábara páebatsi.

²⁸Jesús, irü bápapo pebinbe imoxoyo pata tómaratha, po tómara siwaponae ponaena. Bápapo pebinbe narúntababe, íchitha Jesús mexeya maisha pona namto tómara weya. ²⁹Íchitha bapongbe Jesús jumedangweya baraichi, jeye:

—Pana nebarü ékare, ápara báyatha tabópiya tsanaicha, kirei tsanaicha ápara, jeibe.

Daxota Jesús punajoniya ichaxota barapongbe patópabe xua barapongbe pebarü ekaenexa tsáinchibe. ³⁰Néxata poxonae Jesús barü eka pexaethopáewatha bapongbe, bapoxonae Jesús wekobepita pan. Paxa barái: “Axa, maisha jüntükoyene weiweingang xua pata tana nekatsiwam bápapo pan”, jei. Bapoxonae Jesús epajanaxuba pan. Bapongbe katatsibe. ³¹Poxonae Jesús baxua éxana, kaena bapoxonae bapongbe Jesús yaitainchi. Bapongbe yaitáebabe. Bapoxonae Jesús yakuinaya jemeicha aichúrukuae tsanaya. ³²Bapongbe natsipáebabe, najeibe:

—Maisha jüntükoyene weiweinsibe poxonae námtotha naka tsipaebekapónabe. Bapong naka yaputane éxanabe xua bapong peyábara paebíwatsi Nakom Pejume diwésitha, jei bapongbe.

³³Bapoxonae kaena yakuinaya kaibe íyabe Jerusalén tómara beya. Baraxotiya Jerusalén tómaratha bapongbe káinabe penakaetutsi jiwi pomonae once póyobe pomonae Jesús pía peitorobiwi tatsi. Írürü nanakaetuta pomonae kueyaba xua pomonae once póyobe pía pekueyabiwichi. ³⁴Bápapo penakaetutsi jiwi namchi bapongbetha, jeye:

—Ápara xaiñéi. Bara Jesús pong Pekanamataxeinaein, asüü. Ápara bapong Jesús Simón tsita naitüütatsi, jei bápapo penakaetutsimonae.

³⁵Néxata bapongbe daxita yábara páebabe bápapo penakaetutsi jíwitha xua bapongbe námtotha kuidubekapóinchibe. Matáüta paebabeno xua bapongbe mata-paiña yaitáebabe xua Jesús yaitáebatsi poxonae Jesús pan epajanaxuba, xuano xua poxonae katatsibeno pan.

Meje yábara poxonae Jesús tsita naitüüta pijimonae Jerusalén tómaratha

(Mt 28.16-20; Mr 16.14-18; Jn 20.19-23)

³⁶Poxonae kataunxuae tsipáebabe bápapo diwesi, bapoxonae Jesús jemeicha tsita naitüüta barapomonae peitabaratha. Jesús jakoba barapomonae, jeye:

—Bárabü Nakom jüntema jinompa paka kana éxana, jei Jesús bápapo penakaetutsimonaetha.

³⁷Barapomonae bichokono nabenaeka, yawa bichokono kuitaya junuwa. Barapomonae nantaxeina xua metha Jesús perowatsi tainchi. ³⁸Íchitha Jesús barái bápapo penakaetutsimonae, jeye:

—¿Eta xua metha junuwiya pana nabenáekame? ¿Eta xua metha aiña ünthütong pam? ³⁹Pana nekobetaema, yawa pana netaxutaema. Ápara bara xang tsokuaein. Pana nejáyabare, yawa pana neyaputaema xua xang pepa jintong. Dowatsi bápana jopa widukuae, yawa bápana jopa piwa dukuáe. Íchitha aunxuae nama yatsikaewa xaniwaicha pana netáneme xua xang pepa jintong icha paxam paichim, jei Jesús.

⁴⁰Poxonae baxua Jesús najumeweta, nakobewang itüüba, yawa nataxuwang itüüba. ⁴¹Íchitha kame áwiya barapomonae jopa jumekowüntsiyo poxoru bápapo diwesi barapomonae tsita jumexéikatsi yawa bápapo diwesi yábara najüntükoyene kabenaeka éxanatsi. Jesús jeye:

—¿Paxam xote penabanáewiyo paxéiname? jei Jesús.

⁴²Néxata barapomonae Jesús kátatsi duweiyó, poyo seba. ⁴³Jesús wekobepita, yawa xane barapomonae peitútha tatsi. ⁴⁴Bapoxonae Jesús namchi barapomonaetha:

—Kaena báyatha paka tsipáebatsi poxonae kataunxuae paka barü ékatsi. Paka jeichiche: ‘Daxita pokoyenein neyábara tina, daxita baxuang peneyábara jeixae, bewa nekana exanaena. Daxita xua Moisés po diwésintha neyábara tina, bewa nekana exanaena. Daxita pokotsiwa Nakom peitorobi jume pepaebiwi neyábara tina, bewa nekana exanaena. Daxita xua salmos penaxünae weixi diwésintha neyábara tina, bewa nekana exanaena’, paka jeichiche, jei Jesús.

⁴⁵Jesús barapomonae yaputane éxana xua Nakom Pejume Diwesi paeaba. ⁴⁶Jesús barái barapomonae, jeye:

—Nakom Pejume Diwésitha neyábara jei: ‘Mesías bewa tüpaena, yawa ekeicha asiüü tsane po matakabi akoibibe petüpáe koyenekuiru weya. ⁴⁷Yáwano bewa barapomonae Mesías pía pejumekowünchiwichi bewa tsipaebina daxita nákuangtha Nakom Pejume Diwesi tatsi Mesías pía peayapusüü itorobi koyenýatha tatsi. Kopiya petamropatanotsinexa Jerusalén tómara weya. Barapomonae jei tsane jíwitha: Bewa icha jüntükoyene Nakom patsita xeinaem xua bapoxonae Nakom paiña nepaka kayábara jüntemainaewa tsane abe paiña neexanáe kuirukoyenewa, jei tsane barapomonae’, jei Nakom Pejume Diwésitha, jei Jesús. ⁴⁸Ekeicha Jesús barái pijimonae, jeye:

—Paxam daxita jiwi patsipaebíname daxita xua patáneme. ⁴⁹Matáüta patáemano xua pákata itorobikaeinchi Nakom pía Pejumopetünaxü tatsi xua báyatha Taxa yábara paka tsiwüünae muxuduta. Bárapo Nakom pía Pejumopetünaxü tatsi yawa patopaena peayapusüü itorobi koyenewa. Páenare xote Jerusalén tómaratha, beya poxonae barapong yawa pákata patopaena pía peayapusüü itorobi koyenewa Nakom pía nakua tatsi wétsika, jei Jesús.

Meje yábara poxonae Jesús athabé juiña Nakom pía peitorobi nakua beicha tatsi

(Mr 16.19-20)

⁵⁰Néxata Jesús pijimonae barü pona Jerusalén tómara weya, Betania tómara bebarü iya. Jesús namaxüyoicha itaboko beicha yawa tsipaeba Nakomtha xua pijimonae tatsi nexa, xua pijimonae petayawenaenéxatsi. ⁵¹Poxonae kataunxuae Jesús tsipaebungkua Nakom xua pijimonae tatsi nexa, bapoxonae Jesús athabé juiña éxanatsi peitaboko beicha, Nakom éxana. ⁵²Poxonae Jesús pijimonae tatsi baxua tane, bapoxonae barapomonae Jesús pekoutha tatsi namchi: “Maisha Wanaka namataxeinaein wüünae”, jei. Barapomonae Jerusalén tómara beya jüntükoyene weiweinaya kaibe nawibiya. ⁵³Barapomonae Jesús pía peitorobi jiwi tatsi Nakom pin piabotha, baxota Nakom jopa juniya wüünae jainteibichi.

Baja Lucas.

Jesucristo Pía Pexeña Jume Diwesi Tatsi Juan Petináe Diwesi

Meje yábara poxonae Mesías jiwi fórotatsi,
pong pewüng “Pejume”, baraichi

1 ¹Poxonae kataunxuae daxita nákuang jopa forotsiyo, bapoxonae írürü kaena báyatha Mesías pópona, pong Nakom Pexanto tatsi, pong pewüng “Pejume”, baraichi. Bapong Nakom kaena báyatha barü poponeiba. Bapong ápara bara Nakom. ²Poxonae aena kopiya, bapoxonae bapong kaena báyatha Nakom barü pópona. ³Nakom kana éxana xua Mesías daxita nákuang fofórota. Dapokotsiwa aibi xua yaseikanaya xua pokotsiwa bapong jopa exanaeyo. ⁴Bapong Mesías, pong “Pejume” baraichi bapong asüü kana éxana daxita jiwi tsipéi bapong ataya xeina peasüü koyenewa. Matáütano bapong pena jüntükoyéneno kanakatsiya taéxanano jiwi xua jiwi yaputaena pokoyene pexaiñéi koyenewa. ⁵Icha pekoicha ichi xua jiwi yaweinchi xua beta pejinompaenexa poxonae kirei, bara jüta ichi Mesías. Bapong jiwi yaweinchi xua beta wüünae pejjinaponaenexa poxonae bapong Mesías kuiduba jiwi. Kaurimonae pía pentakaponaein tatsi bekein ichichipa xua Mesías peamanayabíwatsi, íchitha kaurimonae pía pentakaponaein tatsi jopa itaküüpaetsi xua Mesías peamanayabíwatsi tsipéi bichokono Mesías peayapusüüwa xeina.

⁶Bapoxonae irü Nakom itoroba pebin, pong pewüng Juan. ⁷Bapong patopa xua Mesías peyábara paebinéxatsi, po wüng xua jei “Pong Nakom itorobika”, jei. Bapong Juan daxita jiwi jüntükoyene kuitsakáraba xua jiwi Mesías pewünaeya tatsi, penajüntükui wüünaetsinexa xua daxita jiwi Mesías pejumekowüntsinexa tsainchi. ⁸Juan ápara Mesías aibi. Ápara saya pía Mesías wüünae yábara paebichi xua Juan peitorobixaetsi baxua. ⁹Bapong Mesías patopeika po kae pin nákuathe tsike peyawenaenexa daxita karepaya jíwitha pía pekuidubi koyenéwangtha.

¹⁰Bapong pópona bárapo kae pin nákuathe tsike. Bara bekein bapong éxana piakoya bárapo nakue, po kae pin nákuatha tsika pona, dáichitha bárapo kae pin nakuathepiwi jopa Mesías yaitaetsi pokoyene xua bapong po kae pin nákuathe tsike fórota daxita. ¹¹Bekein bapong bara pía nákuatha patopeika, dáichitha bárapo kae pin nakuapiwi bapong jopa weiweinaya matenta wabichi. Matáütano jopa yaputaetsi xua pokoyene bapong Mesías ápara pong Nakom itoroba. ¹²Íchitha ichamonae pomonae bapong matenta weiweinaya wábatsi xuano xua bapong jumekowüntsatsi, barapomonae Mesías kana éxana xua pokoyeneya barapomonae Nakom piamonae tatsi penaexanaewa tsane. ¹³Tsipéi barapomonae jopa naexanaeyo Nakom pía pexui xua poxoru be jintong koyeneya penaexanumenaponaexae. Matáütano barapomonae jopa naexanaeyo Nakom pía pexui xua poxoru peichichipaexae xua pepichiwa píowa. Matáütano barapomonae jopa naexanaeyo Nakom pía pexui xua poxoru koxiyüng peichipaexae xua pexeinaewa pía pexui. Saya jame barapomonae Nakom pía pexui tatsi náexana, tsipéi Nakom kana éxana baxua.

¹⁴Barapong Mesías pong pewüing “Pejume”, baráichichi, bapong poxonae naka-tsiwa po kae pin nákuathe tsike bara bapong yatsikaya pepa jintong. Matáütano naka barü pópona bapong. Bapong wüing unúnatatsi “Jesús” baráichichi. Matáütano bapong pejüntükoyene wétsina bichokono jiwi antobetsi. Matáütano bapong xaiñeya pepaebin. Matáütano paxang pakuitang xua Jesús exaneiba pía pexeña peyapusüüwatha po pexeña peyapusüüwa Jesús Paxa kátatsi. Bapong Nakom Pexanto tatsi, bara yatsikaya kompa tatsi pepa Pexanto. ¹⁵Juan yábara paeba, Jesús yábara páebatsi. Juan jeye: “Bara barapong ápara pong báyatha yábara páebang xua poxonae jangje: ‘Pong kotakaya patopa xua xang tsíwana patopang, bapong jame bichokono peaiñakuín, beyakaincha xang. Tsipéi bapong kaena báyatha pópona poxonae xang aibin xua poxonae abü kataunxuae jopa naexanaeíño’, jangje”, jei Juan.

¹⁶Bapong Jesús naka kata daxita pía peyaputáe koyenewang. Jopa juniya amana naka katsiyo baxuang, xua pokotsiwa nantawenónatsi jüntema watsita jinompaenexa tsane bapong. ¹⁷Moisés naka kata Nakom pía peitorobi koyenewang tatsi. Baxuang bichokono jopa juniya ayapubeyo. Íchitha Jesucristo, pong “Mesías” baraichi xua pokotsiwa naka kuiduba xua pinae Nakom jopa juniya antobeyo jiwi, xuano xua pokotsiwa naka kuiduba bara baxua yatsikaya pexaiñéi jume. ¹⁸Dapong aibi pong Nakom petáewatsi. Nakom Pexanto tatsi, pong yatsikaewa kompa tatsi bapong naka kana éxana xua Nakom wayaputáewatsi, paxa imoxoyo pebarü poponaexatsi.

**Meje yábara poxonae Juan pong jiwi
Pebautisabin Jesucristo yábara kueikueijeichi**

(Mt 3.11-12; Mr 1.7-8; Lc 3.15-17)

¹⁹Judiomonae pomonae ena Jerusalén tómaratha barapomonae sacerdotemonae itoróbatsi írürü levitamonaé itoróbatsi Juan beya, xua Juan peyaiñabinéxatsi xua pejeinéxatsi: “¿Xam jintamümda?” pejeinéxatsi. ²⁰Juan beta nayábara paeba, jeye:

—Xang Mesías ápara aibin, pong Nakom itorobikaena, pong wanaka kapane-nebiwa tsane, jei Juan.

²¹Néxata ekeicha Juan yáiñabatsi, jeichichi:

—¿Metha néxata xam jintamümda? ¿Bara xam bapom pong Nakom peitorobi jume pepaebim pong pewüing Elías, pong báyatha tüpa? jei barapomonae.

Juan jumenota, jeye:

—Xang bapong ápara aibin, jei.

Ekeicha Juan yáiñabatsi, jeichichi:

—¿Néxata jintam metham? ¿Xam bapom pong Nakom peitorobi jume nepaebim pong bewa patopeikaena juiña pata tanekuidubinexa tsane Nakom Pejume Diwesi? jei barapomonae.

Ekeicha Juan jumenota, jeye:

—Jume, xang ápara aibin dapong, jei Juan.

²²Néxata daxita barapomonae Juan baraichi, jeye:

—¿Eta pom metham? Tsipéi xua pata tanejumenotsiwam pata tha xuya tsipae-bichi pomonae pana nejumekaitoroba. ¿Eta be pana nejumichim tsane xua jiña-koutha nenayábara paebiwam? jei barapomonae.

²³Néxata Juan jumenota, jeye:

—Xang bapong áparang pong wawang ichaxota ira xuépana susato tsúrukuae nakua beya, xua jang: ‘Patsinajüntükoyene wüünaere, pong jiwi pía pepa Peka-namataxeinaeinchi nexa pía pepatopáe wüünaeya tsane’, xua jang pongxaein xua wawang ira xuépana susato tsúrukuae nakua beya. Báyatha Isafás pejume diwésitha taneyábara jumekuiwüünae tsiwanaya paebixae pong Nakom peitorobi jume pepaebin, jei Juan.

²⁴Daxita pomonae Juan barü kueikueijeichi, barapomonae fariseomonae itoroba. ²⁵Daxita barapomonae Juan yáíñabatsi, jeichichi:

—Icha xam bapong Mesías aibim xuano xua icha Elías aibim, yawa icha xam bapong aibim pong Nakom peitorobi jume nepaebin, ¿néxata jintam kakuí itoroba xua nebautisabiwa jiwi? jei barapomonae.

²⁶Juan jumenota, jeye:

—Xang mératha bautisabang, íchitha ichüng beta exanaena beyakaincha xang. Bapong bara bekein paiñamonae pía xantha tatsi pópona íchitha bapong jopa payaitaem. ²⁷Bekein bapong nepunapatopaena, íchitha pokotsiwa bapong éxana bichokono aiñakuí beyakaincha pokotsiwa éxanang. Bichokono pin ura tsita xeinang xua tataxumüü ishanaxubiwa tsane pía penataxuxatatsiwa tatsi, jei Juan.

²⁸Daxita baxuang Juan yáíñabatsi ichaxota po tómara pewüng Betania. Bárapo tómara eka icha pokotsiwa xometo weekoina xua icha muxunénetha eka Jordán ménetha. Bárapo muxunénetha Juan bautisaba jiwi.

Meje yábara xua poxonae Jesús pong “Cordero”, baráichichi

²⁹Icha matakeitha Juan tane, Jesús tainchi xua Juan pexaiña tarénatsi. Bapoxonae Juan jíwitha jeye: “Ínkane pataema pong pejüntükoyene xeikaein pong Nakom itorobika, pong ‘Cordero’, baráichichi xua oveja pebto penüng. Ápara bapong pong jiwi petsitüpaewa tsainchi xua abe pía peéxanae kuirukoyenein tatsi icha poxonae ovejiyo ichi poxonae tsitüpa jiwi abe pía peéxanae kuirukoyenein tatsi. ³⁰Bara bapong ápara pong báyatha yábara páebang poxonae jangje: ‘Pong kotakaya patopa xua xang tsíwana patopang, bapong jame bichokono peaiñakuín, beyakaincha xang. Tspíe bapong kaena báyatha pópona poxonae xang aibin xua poxonae abü kataunxuae jopa nakatsiwiño’, jangje. ³¹Xang kopíyatha jopa yaputaetíño xua Jesús bapong barápara Mesías, pong icha wüng Cristo, pong Nakom itorobika. Íchitha xang patopang tabautisabinexa mératha Israel piamonae susato saineiwi xua barapomonae bapong peyaputaewa tsainchi”, jei Juan.

³²Juan yawa namchi, jeye: “Poxonae bapong bautisabang bapoxonae tang Nakom pía Pejumopetünaxü tatsi xua peitaboko weruneika xua be topiboto yaru-neika. Bárapo Nakom pía Pejumopetünaxü tatsi, bapong pexantha tapatópatsi. ³³Xang kataunxuae bapoxonae xaniwaicha jopa yaitaetíño bapong. Íchitha pong xua nekui-itoroba xua jiwi bautisabang mératha, nejéi bapong: ‘Táename tajumopetünaxü xua be topiboto tsekae xua peitaboko weruneika, po tajumopetünaxü bapong pía xantha tapatópatsi. Poxonae baxua táename bapoxonae yaputáename xua bárapo pebin ápara pong jiwi pebautisabiwa tsainchi tajumopetünaxütha. Bapong barompaya pía pebautisabi koyenewa exanaena xua poxonae bárapo tajumopetünaxü katsibina pomonaetha, pomonae piamonáethaxae. Barapoxonae bárapo tajumopetünaxü barapomonae yánaba jinompaeinchi’, jei Nakom.

³⁴Bapoxonae bapong yaitang xua deta kou ápara Mesías, yáitama tang xua poxonae báyatha Nakom netsipaeba. Daxota paka tsipáebatsi xua bapong barápara Nakom Pexanto tatsi”, jei Juan jíwitha.

**Meje yábara xua poxonae Jesús itapeta pomonae
kopiya pomonae Jesús pijimonae tatsi**

³⁵Icha matakeitha ekeicha Juan pong jiwi Pebautisabin pekoutha patopa xuano xua pebinbe nakuéyatabe punapoinchi pongbe xua pía pepunaponáewichi jíwanabe tatsi. ³⁶Poxonae Juan tane xua Jesús dawerena ichaxoyo Juan dena, bapoxonae Juan jeye xua Jesús yábara jeichi:

—¡Pataema ápara bapong pong ‘Cordero’ baraichi xua oveja pebto penüng, pong Nakom itorobika xua petsitüpaenexa jiwi abe pía peéxanae kuirukoyenein tatsi! jei Juan.

³⁷Bárapo pebinbe pongbe Juan pía pepunaponáewichi jíwanabe tatsi, barapongbe Juan jumetáinchibe xua Juan baxua paeba. Bapoxonae bárapo pebinbe Jesús punapóinchibe. ³⁸Néxata Jesús napatomeicha nekota kaibeya yawa tánebe xua bárapo pebinbe Jesús punapóinchibe. Bapoxonae bapongbe Jesús yáinába, jeye:

—¿Paiña eta xuatsi?

Jesús jumenótatsibe bapongbe, jeibe:

—Pong jiwi Nekuidubim, ¿eta xota póponame? jeibe.

³⁹Jesús jumenota bapongbe, jeye:

—Anetha, matha pataema, jei Jesús.

Néxata napunapónabe yawa natanebe ichaxota Jesús pópona. Bárapo matakeitha náékabe ichaxota Jesús pópona. Jopa nawíyabe tsipéi xometo tabópiya tsanáichaba.

⁴⁰Pongbe Juan pejumetaexáetsibe xuano pepunaponaexáetsibe Jesús, kaein pewüng Andrés, Simón Pedro peweicho tatsi. ⁴¹Andrés kopiya matha peweicho wenawenéi pong pewüng Simón. Andrés barái peweicho, jeye:

—Paxang pakaxinang pong pewüng Mesías, jei Andrés. (Bárapo wüng yábara kaunuta xua jei ‘Cristo’, jei.)

⁴²Bapoxonae Andrés peweicho kápona, Simón kapoinchi ichaxota Jesús unguua. Poxonae Jesús tane xua poxonae Simón tainchi, jeye:

—Xam Simón Juan pexanto tatsim. Íchitha xam ánoxuae newüng Cefas tsane, bárapo wüng Cefas wüng jei: ‘Iboto’, jei, jei Jesús. Seikaya griego jume wüng ‘Pedro’, jei bárapo wüng irü jei: ‘Iboto’, jei.

Meje yábara poxonae Jesús Felipe wábatsi, irü Natanael wábatsi

⁴³Bapoxonae icha matakeitha Jesús ichichipa xua peponaewa Galilea nakua beya. Bapoxonae Jesús, Felipe kaxínatsi, yawa jeichichi:

—Nepunaponde, jei Jesús.

⁴⁴Barapong Felipe Betsaida tomarapin, po tómaratha irü Andrés pópona irü Pedro. ⁴⁵Néxata Felipe Natanael wenaweneichi, yawa Felipe barái bapong, jeye:

—Pebin pakaxinang, pong báyatha Moisés yábara tsiwüünae kuitina pía peitorobi jume diwesi koyenéwatha. Matáütano pong báyatha írürü Nakom peitorobi jume pepaebiwi yábara tsiwüünae kuitina. Bapong ápara Jesús, José pexanto tatsi. Bapong Jesús pong Nazaret tomarapin, jei Felipe.

⁴⁶Natanael jeye:

—Dapong pebin pong pejëntükoyene wüinaein Nazaret tómara weya bápana jopa po nae. Tsipéi daxita bárapo tomarapiwi ápara pejëntükuiruyapubewi, jei Natanael.

Felipe jumebarái, jeye:

—Anetha ínkane matha taema, jei Felipe.

⁴⁷Poxonae Jesús tane xua Natanael imoxoyo kakuita pona, Jesús jeye:

—Patopa pebin pepa israelmonaepin, pong jopa jiwi pemuxuitorobin, pong xaniwaicha pejëmekowüntsin Nakom, jei Jesús.

⁴⁸Néxata Natanael Jesús yáíñabatsi. Natanael jeye:

—¿Eta ichim xua taneyaitaewam? jei.

Jesús jumenota, jeye:

—Báyatha katainchi poxonae higuera nae tabakatha úngkuame poxonae kataun-xuae Felipe jopa kawábiyo, jei Jesús.

⁴⁹Bapoxonae Natanael jumenota, jeye:

—Pong jiwi Nekuidubim. ¡Ápara xam bara Nakom Pexantom! ¡Ápara bara xam Israel nakuamonae itorobiya pía pepa Neéwatsim! jei Natanael.

⁵⁰Jesús jumenota, jeye:

—Xam nejumekowúntame poxonae xua saya katsipáebatsi xua kakatáewatsi higuera naetha. Íchitha bexa nekotsíname xua exanaein pokotsiwa pexeiña peitüpanáe tsita itüütsiwang, beyakaincha xua saya aunxuae katsipáebatsi, jei Jesús.

⁵¹Ekeicha Jesús jeye:

—Xaniyang paka tsipáebatsi paxam patáename xua Nakom peitaboko sara-naxuikaena. Matáütano patáename matatsunpiwi xua jujuneibikaena xote tsike taxantha pía taneyawenaetsi. Matáütano patáename xua ekeicha kaibe jujuneibiyaena taxaiña weicha, pongxaein Nakom Tananeitapetsin, jei Jesús.

Meje yábara poxonae jiwi tsinakaetuta pexaewa Caná tómaratha xua penabanaenexa xua poxonae pebin pita pekotsiwa

2¹Poxonae akoibi po matakábibe yapukaewa, bapoxonae írürü pexaewa tsinakaetuta Caná tómaratha xua Galilea nákuatha xua pebin pekotsiwa pepichixae. Jesús pena tatsi irü baxota natane pewabixaetsi. ²Irü Jesús wábatsi, irü pijimonae tatsi wábatsi xua penaponaewa tsane bárapo pexaewa petsinakaetutsíwatha xua poxonae pebin pekotsiwa pita. ³Vino mera omeicha mene weranapenta tsipéi daxita jiwi apa. Daxota Jesús pena baraichi, jeye:

—Nama ekeicha ameneibi vino mera omeicha mene weranapenta, jei Jesús pena tatsi.

⁴Jesús jumenota, jeye:

—Ena, abü bexabü, abü jopa neyábara yaiñabinde baxua. Kanta daxua aichika xua petsita-itüübiwa taexanaewa, jei Jesús.

⁵Bapoxonae barapowa barái pomonaetha, pomonae pexaewa karena tsaibi, jeye: —Moya paexande xua pokotsiwa bapong paka itoroba, jei barapowa.

⁶Baxota íratha ena seis po jurúwatobe sáyawang. Bárapo pin juruwatong barompaya kae jurutontha tsíniya cincuenta po mera bosibü matabüxúyobe tutu kanaüpa. Icha jurutontha tsíniya setenta po mera bosibü matabüxúyobe tutu kanaüpa. Bárapo jurutontha ba judiomonae mene yaebeiba xua bárapo mérangtha

penakobe kiateibinexa xua daxota jopa Nakom petsita-najüntükoyene taxobeibi-néxatsi. ⁷Pomonae pexaewa karena tsaibi barapomonae Jesús barái, jeye:

—Bárapo saya jurutontha pawúnbare mera, jei.

Bapoxonae barapomonae bárapo juruwatong wünba. ⁸Bapoxonae Jesús barái, jeye:

—Ánoxuae bárapo juruwatong tsiwixi pajíwana mene wenore xua po mera ekeicha vino mera éxanang. Pakapónare pongtha pexaewa matakánábane, jei Jesús.

Daxota barapomonae bara baxua éxana xua Jesús peitorobixae. ⁹Pong matakánábane pexaewa, bapong mene pana bárapo vino mera, po vino mera kopiya saya mera. Íchitha bapong jopa yábara yaputaeyo xua bárapo vino mera xua eta wérena metha mene kápona. Saya meisha pomonae mene eepakápona bárapo jurutontha barapomonae yaputane xua bárapo jurutontha jíwana mene nota xua po mera vino mera náexana. Bapoxonae pong matakánábane pexaewa waba, pong pekotsiwa pita bapong wábatsi. ¹⁰Bapong barái, pong pekotsiwa pita barai-chi, jeye:

—Daxita jiwi ba, poxonae aena, kopiya matha ápata po vino mera mene xeika. Poxonae jiwi ba, wenaxuba po vino mera xeika, bapoxonae ba, bárapo jiwi ba, ekeicha ápatatsi po vino mera be kónotha xaexaeka. Íchitha nama xam icha koyene éxaname. Po vino mera be kónotha mene xaexaeka matha kopiya ápatame jiwi bárapo vino mera. Poxonae bárapo vino mera jiwi wenaxuba po vino mera be kónotha mene xaexaeka bapoxonae ápatame po vino mera bichokono xeika, jei bapong.

¹¹Baxua xua Jesús éxana Caná tómaratha xua Galilea nákuatha. Bárapo pexeiña petsita-itüütsi koyenewa poxonae xua aena kopiya matha éxana pía peayapusüüwatha. Poxonae baxua Jesús pijimonae kuitainchi, Jesús jumekowúntatsi pijimonae.

¹²Poxonae baxua pexaewa najainweta bapoxonae Jesús pona Capernaum tómaro beya. Bapong penabarü pona yawa peweicho jiwi barü pona, matáütano pijimonae barü pona. Baxota Capernaum tómaratha daxita Jesusbarü be kaentakabíyobe ena.

Meje yábara poxonae Jesús aishowa benapuna torobábiya pomonae

Nakom pin piabotha pekaenaetsiwi

(Mt 21.12-13; Mr 11.15-18; Lc 19.45-46)

¹³Tsipéi poxoru imoxoyo bárapo matakabi tsáneba xua Pascua wüing matakabin daxota Jesusbarü Jerusalén tómaro beya pona. Bárapo Pascua wüing matakabin, po matakabin poxonae judiomonae yábara nantaxeina xua pinae kaena báyatha pía pamo susato jiwi tatsi panenebiya Egipto nakua weya. ¹⁴Baxota Jesús kaxina Nakom pin piabotha pomonae baxota kaenaeta buey duweimonae, yawa ovejamaeno yawa topibomonae kaenáetano. Matáütano Jesús tane xua pomonae ena pexaethopáewangtha ichaxota parátixi nantiya nakatsiba jiwi. ¹⁵Poxonae Jesús tane barapomonae, Jesús bapoxonae éxana xua pokotsiwa xota kuainta xua duwein perüümüüto. Daxita barapomonae Jesús Nakom pin píabo wenapunatorobábiya. Yáwano Jesús múxuna itaweta xua barapomonae piawangxae, bueymonaeno, ovejamaeno. Pomonae xua ena pexaethopáewangtha xua ichaxota nantiya nakatsiba parátixi Jesús íratha tabebái parátixi, yawa írabe tayebabareka

torobábiya pexaethopaewang. ¹⁶Pomonae baxota kaenaeta topibo, Jesús barái barapomonae, jeye:

—¡Daxita baxuang panore bárapo Nakom pin píabo weya pokotsiwang pakae-náetame! ¡Bárapo Nakom pin píabo jopa pakana exanaeinde xua be pókotsi bo jiwi ichaxota kaenaeta pexaewa! jei Jesús.

¹⁷Bapoxonae Jesús pijimonae tatsi yábara jumekuí nantaxeinarúkupa xua Nakom Pejume Diwésitha namchi xua Cristo yábara jeichichi xua jeye: “Yábara nejüntükoyene yüüka xua yábara nantaxeingang xua pokotsiwa Taxa pía pin pia-botha tatsi xeina. Daxota jiwi nekaseba”, jei Nakom Pejume Diwésitha xua Cristo yábara páebatsi.

¹⁸Néxata judiomonae Jesús yáñabatsi, jeye:

—¿Eta po pexeiña petsita-itüütsi koyenewa pana netsita-itüütsiname? Bapoxonae xain payaputaen xua bara kou xam deta xéiname Nakom pía peitorobi koyenewa tatsi xua daxota jiwi kui-itawétame Nakom pin píabo tatsi weya, jei.

¹⁹Jesús jumenota, jeye:

—Icha bárapo bo werawéraka paexanáename, ekeicha akoibi po matakabibetha beta kaewa xanebin, jei Jesús.

²⁰Néxata bárapo judiomonae Jesús tsipáebatsi, jeye:

—Jiwi bárapo Nakom pin píabo tatsi ákaba aiña wei, cuarenta y seis po weibetha nakobeweta. ¿Eta pokotsiwa baxua páebame xua jiña saya akoibi po matakabibetha ekeicha wüünae exanaetsi? jei judiomonae.

²¹Po bo xua Jesús yábara paeba ápara xua nayábara paeba pía pepong. ²²Daxota poxonae Jesús ekeicha asüü juina petüpáe kuaríyatha Jesús pijimonae yábara jumekuí nantaxéinatsi xua býatha Jesús paeba. Daxota jumekowünta Nakom Pejume Diwesi. Yáwano Jesús jumekowüntatsi pokotsiwa xua paeba.

Meje yábara xua pokoyene Jesús daxita jüntükoyene yaputane jiwi

²³Poxonae Jesús Jerusalén tómaratha pópona xua Pascua wüing matakábintha bapoxonae pin bicheitomonae Jesús jumekowüntatsi. Daxota bárapo bicheitong jumekowünta tsipéi tane Jesús pía pexeiña petsita-itüütsi koyenewang tatsi. ²⁴Jesús jopa yábara jumekowüntsiyo barapomonae bekein jumekowüntatsi taetha. Tsipéi Jesús daxita jüntükoyene yaputane jiwi xua aiña jüntükoyene pexeinaewa. ²⁵Daxota jopa nantawenonaeyo xua ichamonae Jesús petsipaebíwatsi icha jiwi yábara. Tsipéi bapong Jesús daxita jüntükoyenein yaputane jiwi.

Meje yábara poxonae Nicodemo Jesús tsipáebatsi

3 ¹Írürü pebin pópona pong fariseomonaepin, pong pewüing Nicodemo. Bapong judiomonae kanamataxéinatsi. ²Bapong Nicodemo mérawi Jesús siwapoinchi, yawa Jesús jeichichi:

—Pong jiwi Nekuidubim, bara paxang payaputang xua Nakom kaitoroba xua jiña pata tanekuidubiwam tsane. Tsipéi ichüing jopa itaküüpaetsi xua pexeiña petsita-itüütsi koyenewang peexanaewa Nakom pía peayapusúuwatha tatsi icha Nakom jopa yantsiyo bapong icha be xua poxonae ichim poxonae xua éxaname Nakom nekayantsixae, jei Nicodemo.

³Néxata Jesús Nicodemo jumenótatsi, Jesús jeye:

—Xaniyang katsipáebatsi. Pong ekeicha jopa kaewa nakatsiwiyo xua pena jintong penaexanaenexa tsane, bapong jopa itakúüpaetsi xua Nakom piamonae tatsi penaexanaewa tsane pomonae Nakom itorobiya peewatsixae, jei Jesús.

⁴Nicodemo Jesús jume epanotsiya yáíñabatsi. Nicodemo jeye:

—¿Eta bichi xua jitong pong báyatha piño xua ekeicha kaewa pena tsiperüü wepatopa? ¿Metha bara itakúüpaetsi xua pena ekeicha tsiperüü wepatopa xua ekeicha kaewa penakatsiwinexa jintong? jei Nicodemo.

⁵Jesús jumenota, jeye:

—Xaniyang katsipáebatsi. Pong mératha jopa bautisabichi xuano xua icha jopa xeinaeyo Nakom pía Pejumopetünaxü tatsi po jumopetünaxü bapong icha jüntükoyene xeina pekana exanaenéxatsi, bapong jopa itakúüpaetsi xua Nakom piamonae tatsi penaexanaewa pomonae Nakom itorobiya peewatsixae. ⁶Pomonae pena jiwi tsiperüü wenáexana bara jiwi koyeneya yakuiya náexana. Pomonae náexana Nakom piamonae tatsi barapomonae Nakom pía Pejumopetünaxü tatsi kana éxana xua barapomonae pexeinaewa icha jüntükoyene. Barapomonae yakuiya náexana Nakom piamonae tatsi tsipéi éxana pokotsiwa Nakom pía Pejumopetünaxü tatsi itoroba. ⁷Jopa najüntükoyene kabenaekaeinde xua takatsipaebíwatsi xua takajeichíwatsi: ‘Daxita jiwi bewa pena jiwi naexanáe ekeicha’, takajeichíwatsi xua. ⁸Joibo ba pona ichaxota ichichipa peponaewa. Joibo busítáneme, íchitha jopa yaputaem xua ichaxota weponarena, yawa jopa yaputaem xua xota ponaena. Icha jiwi ichi xua jopa taeyo joibo íchitha tane xua joibo bubujéi barichi jiwi jopa taeyo Nakom pía Pejumopetünaxü tatsi. Saya jiwi yaputane xua icha jiwi jüntükoyene xeika kana exainchi bárapo Nakom pía Pejumopetünaxü tatsi, jei Jesús.

⁹Néxata Nicodemo ekeicha Jesús yáíñabatsi, jeye:

—¿Eta metha bichi Nakom pía Pejumopetünaxü tatsi? jei Nicodemo.

¹⁰Jesús jumebarái, Nicodemo jumebaraichi, Jesús jeye:

—Xam pong daxita neyaputaem israelmonae pexantha tatsi yawa pong jiwi nekuidubim barapomonae pexantha tatsi. Bekein bárapo jintom íchitha jopa baxua yábara yaputaem xua takatsipaebíwatsi. ¹¹Xaniyang katsipáebatsi xua paxangbe, Juan, pong jiwi Pebautisabin, irü xang Jesús paka tsipáebatsi xua pokotsiwang payaputangbe. Matáütano paxangbe bara yatsikaewa pata paebinbe xua patangbe báyatha. Íchitha paxam pomonae judiomonae pam jopa yábara pana nejumekowüntsím pokotsiwa paxangbe paka tsipáebatsi. ¹²Icha jopa pana nejumekowüntsím pokotsiwang xua bárapo kae pin nákuathe yábare paka tsipáebatsi bara paichim jopa pana nejumekowüntsipaem icha yábara paka tsipaebichípaetsi pokotsiwang Nakom pía peitorobi nakua beicha tatsi.

¹³“Dapong aibi pong peitaboko beicha pona Nakom beicha xua ekeicha kaewa patopeika bara wétsika. Daxota jiwi jopa yábara yaputaeyo Nakom pía peitorobi nakua beicha tatsi. Saya meisha jame xang pongxaein Nakom Tananeitapetsin patopeikang tanakua wétsika daxota yábara yaputang Nakom pía peitorobi nakua beicha tatsi. ¹⁴⁻¹⁵Kaena báyatha ira xuépana susato tsúrukuae nákuatha, pinmonae wérapa poxoru jomong sinébatsi. Daxota Moisés penainto asiya duta xua be jomo kanaxóbiya éxana. Pomonae jomong sinébatsi, poxonae barapomonae tane bárapo penain jomo, bapoxonae jopa werapaeyo. Icha Moisés ichi bara neichi tsane jiwi. Xang pongxaein Nakom Tananeitapetsin, ichamonae asiya náetotha tüparukua neexanaena. Barichi tsane pomonae yábara nejumekowüntsina pokoyene xua xang

náetotha tatsitüpaewa tsane xua barapomonae abe pía peéxanae kuirukoyenein tatsi, barapomonae jopa werawérakae tsane. Barapomonae xeinaena peajüntüya-pusüüwa, po peajüntüyapusüüwa ataya tsiteka”, jei Jesús.

**Meje yábara xua Nakom daxita jiwi bichokono
antobetsi bárapo kae pin nákuathe**

¹⁶Ekeicha Jesús nayábara paeba poxonae Nicodemo tsipáebatsi. Jesús jeye: “Nakom ántobe bichokono daxita karepaya jiwi xua bárapo kae pin nákuathe. Daxota Nakom Pexanto itoroba pong yatsikaya kompa tatsi. Pong Nakom Pexanto tatsi jumekowúntatsi, bapong jopa werawérakae tsane. Bapong peajüntüyapusüüwa xeinaena, po peajüntüyapusüüwa ataya tsiteka. ¹⁷Nakom Pexanto jopa itorobikaeyo xua saya bárapo kae pin nakuepiwi átene peexanaenéxatsi xua penatsikuentsexae xua abe peexanaexae Nakomtha. Saya ápara jame Nakom Pexanto itorobika xua jiwi pekapanenebiyaenéxatsi penatsikuentsiwa weya.

¹⁸”Pong Nakom Pexanto tatsi yábara jumekowúntatsi, bapong jopa Nakom tsítatsi xua átene peexanaewa tsainchi xua penatsikuentsexae xua abe peexanaexae Nakomtha. Íchitha nama pong Nakom Pexanto tatsi jopa yábara jumekowúntsichi bapong Nakom býatha tsítatsi xua átene peexanáewatsi tsainchi xua penatsikuentsexae jopa peyábara jumekowúntsixaetsi Nakom Pexanto tatsi, pong bara kompa. ¹⁹Pomonae jopa Nakom Pexanto tatsi yábara jumekowúntichi, barapomonae Nakom býatha tsítatsi xua átene peexanáewatsi xua penatsikuentsexae xua abe peéxanae kuirukoyenein peexanaexae. Tsipéi poxonae Nakom Pexanto tatsi patopeika po kae pin nákuathe tsike, barapomonae ichichipa éxana abe peexanaewang beyakaincha xua peexanaewa pokotsiwa Nakom itoroba. ²⁰Tsipéi daxita pomonae abe peexanaewi barapomonae Nakom Pexanto tatsi aichaxaibichi daxota jopa imoxoyo kakuita ponaetsi bapong. Barapomonae jopa ichichipaeyo xua peyaputáewatsi, xua Nakom Pexanto tatsi peyaputaewa xua pokotsiwa barapomonae abe éxana. ²¹Íchitha pomonae pejumekowúntsiwi, pomonae yatsikaewa beta wüünae éxana, barapomonae Nakom Pexanto tatsi imoxoyo kakuita poinchi. Tsipéi barapomonae ichichipa xua peyaputáewatsi xua Nakom Pexanto tatsi peyaputaewa tsane xua pokotsiwa barapomonae wüünae peexanaexae, xua pokotsiwa Nakom peitorobixae”, jei Jesús Nicodémomtha poxonae nayábara paeba.

**Meje yábara poxonae Juan pong jiwi Pebautisabin
ekeicha Jesús yábara kueikueijeichi**

²²Poxonae Jesús najumeweta xua poxonae Nicodemo tsipáebatsi, bapoxonae pírapae Jesús pijimonae barü pona Judea nakua beya. Bárapo nákuatha Jesús aña matakábintha pijimonae barü pópona. Matáütano baxota Jesús pijimonae kui-itoroba xua jiwi pebautisabiwa tsainchi. ²³Írürü Juan bautisaba jiwi Enón tómaratha, po tómara eka ichaxota imoxoyo po tómara pewüing Salim. Tsipéi baxota menein nawita. Pinmonae Juan ítata pátatsi, yawa Juan bautisaba barapomonae. ²⁴Juan baxua pewünaeya éxana xua poxonae jiwi pekübibotha étatsi.

²⁵Bapoxonae pomonae Juan pía pepunajinompawewichi tatsi irü judiomonaeno, barapomonae yábara barü najumematsontsónobatsi pebautisabi koyenewa. ²⁶Barapomonae Juan siwapoinchi xua Juan yábara peyaiñabinexa tsainchi baxua. Jeye Juantha:

—Pong jiwi Nekuidubim, ínkane matha taema. Pong kaniwi kabarü pópona Jordán ménetha xua icha muxunene beya, pong báyatha yábara pana netsipáebame, bapong nama ánoxuae bautisabauya jiwi yawa bapong punapoinchi daxita jiwi, jei Juan pijimonae tatsi xua Jesús yábara páebatsi.

²⁷Néxata Juan barái barapomona, jeye:

—Jiwi ba jopa xeinaeyo icha Nakom jopa katsiyo. ²⁸Paxam bara yatsikaewa pana nejumetáneme xua paka jeichi: ‘Xang dapong aibin Mesías’, jang. ‘Ápara bapong pía pewúnaeya tatsi Nakom neitoroba’, jang. ²⁹Poxonae ba pebin peko-tsiwa pita bapong pona yábüyo piabotha tatsi. Pong píowa pepichixae bapong pía jintong tatsi bichokono jüntükoyene weiweina xua bapong píowa pepichixae poxonae jumetaengkua xua pía jintong tatsi píowa pita. Icha pebin kana ichichi pía jintong, bara jüta ichin Jesucrístotha ánoxuae. Bichokono jüntükoyene weiwe-nang tsipéi daxita jiwi Mesías punapoinchi. ³⁰Bapong bewa mataropeicha aiñakuí naexanaponáe jiwi peitütha tatsi. Xang bewa jopa aiñakuí naexanaponaein tsane jiwi peitütha tatsi, jei Juan.

Meje yábara poxonae Juan yábara paeba pong peitaboko wétsika pona

³¹Ekeicha Juan piamona barái, jeye:

—Pong peitaboko wétsika pona, bapong jame bichokono peyaputaen beyakaincha xua ichamona. Pong xua po irathepin bapong ápara saya jintong. Bapong saya yábara kueikuejei pokotsiwa po írathe yábara. Íchitha pong peitaboko wétsika pona, bapong daxita kanamataxeina. ³²Bapong bekein jiwi yábara tsipáebatsi pokotsiwa xua báyatha tane peitabókotha, xuano xua pokotsiwa báyatha jumetane peitabókotha, íchitha jiwi jopa jumekowüntsiyo pokotsiwa bapong paeba. ³³Icha pebin jumekowünta pokotsiwa paeba pong peitaboko wétsika peponaexae xua Nakom yábara páebatsi, barapong tsita itapeiñaxeina ichamonaetha, xua ápara Nakom bara xaniwaicha pepaebin. ³⁴Pong xua Nakom itoroba bara bapong kueikuejei Nakom pejumein tatsi, tsipéi Nakom jopa juniya nakana jumopetünaxü katsiyo xua bapong peyawenaewa tsainchi. ³⁵Nakom bichokono ántobe Pexanto. Pexanto kata peayapusüü itorobi koyenewa xua bapong daxitang pekanamataxeinaewa tsane. ³⁶Pong Nakom Pexanto tatsi yábara jumekowüntinchi, bapong peajüntüyapusüüwa xeinaena, po peajüntüyapusüüwa jopa bápana werawerakaeyo. Íchitha pong Nakom Pexanto tatsi jopa yábara jumekowüntichi, bapong jopa xei-náe tsane bárapo peajüntüyapusüüwa. Nama bapong Nakom kana exanaena xua bapong bichokono átene peexanaewa tsainchi, jei Juan.

Meje yábara poxonae Jesús tsipaeba powayo Samaria nakuapiwayo

4 ¹Jesús jumetane xua jiwi tsipaeba fariseomonaetha xua jeye: “Jesús pinmonae xeina, pomona pía pepunaponáewichi. Jesús toxeinchiya jopa juniya bautisabiyo jiwi beyakaincha xua poxonae Juan bautisaba jiwi”, jei jiwi fariseomonaetha. ²(Daümetha Jesús ápara jopa bautisabiyo. Ápara jame Jesús pijimonae tatsi bautisaba jiwi.) ³Poxonae Jesús jumeyaputane xua jiwi paeba fariseomonaetha, bapoxonae Jesús pijimonae Judea nakua webarüwarapiya. Kaibeya wárapa Galilea nakua beya.

⁴Poxonae wárapa Galilea nakua beya bewa ponaena ichaxoyo iya Samaria nakua, tsipéi namto baxoyo dukuiya. ⁵Bapoxonae Jesús pijimonae barü

patopa Sikar tómaratha, po tómara eka Samaria nákuatha. Bárapo tómara, Sikar tómara eka ichaxota imoxoyo po íriyo kaena báyatha Jacob pexanto kata. Bárapo Jacob pexanto tatsi pewüng José. Jacob irü pexanto tatsi kaena báyatha túpabe. ⁶Bárapo iriyotha mene müthü eka, bárapo mene müthü pewüng, “Jacob pía müthü”, jei. Tsipéi Jesús natsepapona namto dena, tsipéi tajü wérena pona, daxota bárapo mene müthü müxübürütha ekopa. Matáütano bapoxonae matáeiñaxae tsuxubi irü. ⁷⁻⁸Irü bapoxonae Jesús pijimonae tatsi tómara beiyiya pekomokaenexa pexaewa. Barapomonae pekoutha tatsi yábüyo Samaria nakuapiwayo patopa ichaxota Jesús po mene müthü müxübürütha eka. Jesús barái bapowa, jeye:

—Mera nekare, jei Jesús.

⁹Bapoxonae bárapo Samaria nakuamonaepiwayo Jesús jumenótatsi. Barapowa jeye:

—¿Eta pokotsiwa metha mera nebarü unúname? Ápara judiomonaepim irü xang ápara Samaria nakuamonaewayong, jei.

Barapowa baxua paeba tsipéi judiomonae irü Samaria nakuamonaexa daxita barapomonae jopa naitakoxonaeyo. ¹⁰Néxata Jesús jumenota, jeye:

—Icha xam yaputaetsípame xua pokotsiwa Nakom kata jíwütha, yawa icha neyaputaetsípame pong aunxuaein mera kawúükatsi, bapoxonae jame newüükáetsípame mera, xua icha mera, po mera jiwi peajüntüyapusüüwa xeina kana exainchi, po peajüntüyapusüüwa jopa bápána werawerakaeyo, jei Jesús.

¹¹Bapowa Jesús jumenótatsi, jeye:

—Pong jiwi Nekanamataxeinaem, ápara jopa xeinaem xua xota mene kapatame. Yawa po mene müthe ápara tajü deka. ¿Jiña eta xota po mene boka inta mene kapitichi, po mera jiwi ajüntüyapusüü exainchi? ¹²Barapong Jacob pata tamo susatopin pana kata bárapo mene müthü. Bapong bárapo mene müthü mene kapaneiba peapeibinexa, irü pía pexui tatsi mene kapaneiba xua peapeibinexa, matáütano mene kapaneiba peapateibinexa pía duweimonaein. ¿Metha bara Jacob toxeincha aiñakuim, beyakaincha bapong? jei bapowa.

¹³Jesús jumenota, jeye:

—Daxita pomonae xua po mene müthüthe mene kapaneiba xua peapeibinexa ekeicha meratsipouneibina. ¹⁴Íchitha pong apa xua po mera katang, bapong ekeicha jopa kaewa meratsipae tsane. Bárapo mera icha ira búpana mene ichi xua epatoya mene jujuina poxoru bichokono ira бүxüpana mene nayüüka. Barichi pokoyene xua kakatínchi bárapo koyene kajüntükoyene yüüka kakana exanaena, bapoxonae xeinaename peajüntüyapusüüwa, po peajüntüyapusüüwa xua ataya tsiteka, jei Jesús.

¹⁵Néxata bapowa Jesús jumenótatsi, bapowa jeye:

—Pong jiwi Nekanamataxeinaem, dapo mera nekare xua jopa kaewa tamératsi pouneibiwa tsane yawa xua ekeicha po mene müthüthe jopa tapateibiwa tsane xua mera takapanathopeibinexa, jei barapowa.

¹⁶Jesús jumenota, jeye:

—Moya matha iyande, matha jinsheuri wábare. Néxata bapoxonae xote papatóparebe, jei Jesús.

¹⁷Bapowa jumenota, Jesús jumenótatsi, jeye:

—Taseuri ápara jopa xeinaeño, jei.

Néxata Jesús jumebarái, jeye:

—Bara xaiñeya páebame poxonae jam, ‘Taseuri jopa xeinaeño’, jam. ¹⁸Tsipéi kaena báyatha cinco póyobe pebiwi punaxúbame. Pong xua ánoxuae barü póponame, ápara jinsheuri aibi. Poxonae páebame baxua bara xaiñeya páebame, bara joga naerabim, jei Jesús.

¹⁹Barapowa poxonae Jesús baxua jumetaínchi barapowa jeye:

—Pong jiwi Nekanamataxeinaem, bara kataínchi xua xam ápara pong Nakom peitorobi jume nepaebim. ²⁰Pata tamo susato jiwi, Samaria nakuamonaepiwi, barapomona wüünae jainteiba Nakom xote po demuxúwathe. Íchitha paxam judiomona pam, papáebame xua pinae bewa jiwi wüünae jainteibina Nakom bomüxütha po bo unguia Jerusalén tómaratha po bo Nakom pin píabo tatsi, jei barapowa.

²¹Jesús jumenota, jeye:

—Yábüyo moya yábara nejumekowüinde xua takatsipaebíwatsi. Tsipéi bárapo matakabi imoxoyo patopaena, po matakeitha xua wüünae pajainteibíname Nakom. Nama jopa paiña nenantawenonaewam tsane xua paiña neponaewa, po demuxúwathe yawa Jerusalén tómara beya xua wüünae paiña nejainteibiwa tsane Nakom. ²²Paxam Samaria nakuamona pam, jopa payaputaem pong wüünae pajaintéibame. Paxang nama judiomona pang payaputang pong wüünae pajainteibang, tsipéi pong pekapanenebiyaein jiwi ápara bapong judiomona jíwanapin. ²³Íchitha ánoxuae nama patopa po matakeitha poxonae pomona xaniwaicha wüünae pejainchiwa Nakom, barapomona icha koyenkuitha Nakom wüünae jaintinchi, xua barapomonae pía Páxaxae tatsi. Barapomona xaniwaicha pía pejüntükoyenéwatha wüünae jainchina Nakom. Tsipéi Nakom baxua ichichipa xua wüünae pejainchíwatsi xua jiwi wüünae pejainchiwa pejüntükoyenéwatha. ²⁴Nakom pejüntükoyene wüünaein pong peiña jumopein. Daxota pomona Nakom wüünae pejainchíwatsi, barapomona bewa xaniwaicha pejüntükoyenéwatha wüünae jainchina Nakom, jei Jesús.

²⁵Barapowa jumenota, jeye:

—Yaputang xua patopeikaena pong pewüng Mesías, (xua pong icha wüng ‘Cristo’ baraichi). Poxonae bapong patopeikaena daxita yábarang pana nekuidubina, jei bapowa.

²⁶Jesús jumenota, jeye:

—Ápara xang bapong, pong aunxuaein katsipáebatsi, jei Jesús.

²⁷Bapoxonae ekeicha Jesús pijimona tatsi pata. Daxita barapomona yábara najüntüküikoyene kabenaeka xua Jesús tsipaeba Samaria nakuamonaewayo. Íchitha dapong aibi xua pong pejeiwa ichaxota Jesús, “¿Eta xua metha jiña xuatsi? ¿Eta pokotsiwa metha bapowa tsipáebame?” xua pong pejeiwa. ²⁸Néxata bapowa jurúwato kuenta iya tómara beíya, naiña yakuinaya iya. Bapowa jiwi tsipaeba, jeye:

²⁹—Anetha, pataema pebin ichaxota müthü mene. Bapong yábara netsipaeba daxita pokotsiwa báyatha kaena éxanang. ¡Ápara bapong metha Mesías! jei bapowa.

³⁰Bapoxonae jiwi tómara weiyiwa peponaenexa ichaxota Jesús pópona. ³¹Írürü Jesús pijimona jumedangweya baráichichi, jeye:

—Pong Patatanekuidubim, matha xaema, jeichichi pijimona.

³²Jesús jumebarái pijimonae, jeye:

—Xang xeinang pexaewa, po pexaewa jopa payaputaem, jei Jesús.

³³Jesús pijimonaexae tatsi néxata bara kaemonae nayáñnaba, jeye:

—¿Metha bara ichüing Jesús ápatatsi pexaewa? najéi barapomonae.

³⁴Íchitha Jesús pijimonae jumebarái, jeye:

—Icha pebin ichi xua bewa nabanaena, barichin xang bewa exanaein pokotsiwa Nakom ichichipa pokotsiwa bapong tana nekui-itorobixae. Matáütano bewa nakui-wetsin Nakom pía penakuichiwa tatsi xua tana neitoróbixae. Daxota xua bapoxonae tanejüntükoyene yüükaewa tsane be poxonae pebin xua pexaewa unatonsana.

³⁵Paxam ba pajam: ‘Abü kataunxuae cuatro po xométo be yapuseika pábitha xua pexaewa penawetsiwa tsane’, ba pajam. Íchitha nama paka jeichi: ‘Pataema báyatha pexaewa naweta xua pábitha’, paka jeichichi. Barapókotsi jüta koyeneya paka jeichi: ‘Jiwi bárapo kae pin nákuathe báyatha najüntüküikoyene wüünaetaba xua pejume-taenexa Nakom Pejume Diwesi xua pejumekowüntsinea’, paka jeichi. ³⁶Katsibin pomonae tamonaexae pokotsiwa xua pematomatsiwa xua inta ichamonae peyawe-naexaetsi xua írürü be tamonae jiwi penaexanaenexa. Pomonae nejumekowünta barapomonae katsibin peajüntüyapusüüwa, po peajüntüyapusüüwa jopa werawerakaeyo. Tspíei pomonae tajume diwesi pekueikuejeiwi kopiya xuano irü pomonae tajume diwesi kotakaya xuya yaputane kana éxana xua daxota jiwi nejumekowünta, daxita barapomonae matabüxüyobe nabarü jüntükoyene weiweina xua ichamonae nejumekowünta pekana exanáexaetsi. ³⁷Tspíei po diwésiyo xua tsika diwésiyo, po diwésiyo yábara kanaüta jütsiya pepaebiwa bara ápara xaniwaicha, po diwésiyo xua ba jeye: ‘Ichüing üba, irü ichüing xuya jota poxonae naweta’, xua jei po diwésiyo. ³⁸Paka itoróbatsi xua inta payawéname jiwi xua tajiwiwimonae penaexanaenexa xua pokoyene jopa pákata ayapubeyo xua poxonae paéxaname baxua. Baxua paexanáename bekein bara jopa dapomonae pam pokotsimonae kopiya tajume diwesi paeba bárapo jíwitha. Jame paxam ápara barapomonae pam, xua xuya kotakaya yaputane pakana éxaname bárapo tajiwiwimonae. Báraxua icha be poxonae ichi poxonae ichüing xuya jota kotakaya poxonae ichüing kopiya üba, jei Jesús.

³⁹Bapoxonae pin bicheitomonae pomonae bárapo tómaratha jinompa xua Samaria nákuatha, Jesús jumekowüntatsi, tspíei bárapo petsiriwa pejeixae: “Bapong Jesús yábara netsipaeba daxita pokotsiwa báyatha kaena éxanang”, jei. ⁴⁰Poxonae bárapo Samaria nakuapiwi ichaxota Jesús pata, bapoxonae Jesús jumedangweya jeichichi: “Panabarü ékare pata tómaratha”, jeichichi. Daxota Jesús aiña matakábibe naéka bárapo tómaratha. ⁴¹Bichokono pinmonae Jesús jumekowüntapónatsi poxonae jumetane xua Jesús paeba. ⁴²Néxata barapomonae bapowa tspíebatsi, jeichichi:

—Ánoxuae nama pajumekowüntang jopa meisha saya poxoru pata tanetsipae-biwam. Matáütano bara pajumekowüntang tspíei yatsikaewa pata muxutongtha pajumetang pokotsiwa bapong paeba. Matáütano bara payaputang xua bapong pong jiwi Pekapanenebiyaeinchi abe pía peéxanae kuirukoyenein tatsi weya xua bárapo jiwi jopa pewerawerakaenexa, jei barapomonae.

Meje yábara poxonae Jesús axaibi éxana pong pentakoponaein pexanto tatsi

⁴³Poxonae bárapo aiña matakábibe yapukaewa, bapoxonae Jesús pijimonae Samaria nakua webarüwarapiya xua barü pona Galilea nakua beya. Íchitha

pijimonae jopa barü patopaeyo pía tómaratha Nazaret tómaratha. ⁴⁴Tsipéi Jesús báyatha pijimonae tsipaeba xua nayábara jeye:

—Pong ba Nakom peitorobi jume pepaebin, bapong ba pía nakuapiwi jopa barü-kui-iturajinaetsi, jei Jesús. ⁴⁵Poxonae Jesús pijimonae barü patopa Galilea nákuatha, bárapo Galilea nakuapiwi Jesús matenta weyataya wábatsi. Tsipéi kaena báyatha bárapo Galilea nakuapiwi Jesús tainchi Jerusalén tómaratha, poxonae jiwi nakaetuta xua penabanaenexa pexaewa po matakábintha pewüing Pascua wüing matakabin poxonae jiwi yábara kanantanaxeina xua kaena báyatha pía pamo susato jiwi tatsi panenebiya Egipto nakua weya. Matáütano tsipéi poxoruru báyatha barapomonae tane daxita pokotsiwa Jesús éxana baxota.

⁴⁶Bapoxonae Jesús pekoyo barü pona pijimonae Caná tómará beya xua po tómará eka bárapo Galilea nákuatha. Bárapo Caná tómará, po tómaratha ichaxota báyatha Jesús mératha ekeicha vino mera kana éxana. Poxonae Jesús Caná tómaratha eka, írürü pebin pong pentakaponaein Capernaum tómaratha pópona. Bapong pexanto taaténetsi. Bárapo pentakaponaein tanakuita, pong jiwi itorobiya pía pepa peewatsinchi tanakuítatsi. ⁴⁷Barapong pong pentakaponaein yaputane xua Jesús pijimonae barü patopa Galilea nákuatha xua Judea nakua weya pona. Bapoxonae Jesús siwapoinchi. Bapong Jesús jumedangwéi jeichichi:

—Tabo beya ponde. Inta taxanto axaibi éxande tsipéi imoxoyo petüpáe, jei bapong.

⁴⁸Néxata Jesús barái bapong xua piamonae tatsirü, jeye:

—Paxam jopa yábara pana nejumekowüntsím. Saya poxonae pexeíña petsita-itüütsi koyenewang paka tsita exanéibatsi bapoxonae deta pana nejumekowüntéibame, jei Jesús.

⁴⁹Íchitha pentakaponaein jumenota, jeye:

—Pong Nekanamataxeinaem jiwi, anetha naiña iyande, xua pewünaeya tsane poxonae taxanto tüpaena, jei.

⁵⁰Néxata Jesús jumebarái bapong, jeye:

—Moya kaibe nawíyama jiña bo beya. Báyatha kata axaibi nexanto, jei Jesús.

Bárapo pentakaponaein yábara jumekowünta pokotsiwa Jesús paeba. Bara pón-taba píabo beya. ⁵¹Poxonae bárapo pentakaponaein kataunxuae eka pona nám-totha xua píabo beya pona, bapoxonae bapong matenta poinchi pomonae pía petanakuichiwiwaetsi piabotha. Bapong jeichichi:

—Nexanto báyatha kata axaibi, jei barapomonae.

⁵²Néxata bapong yáíñaba pía petanakuichiwichi, jeye:

—¿Eta poxonae inta taxanto axaibi? ¿Eta xoyo poxonae ekatábiya xometo? jei bapong.

Barapomonae jumenota, jeye:

—Mexuae axaibi tsuxubi poxonae matáeiñaxae pepuya weya bapoxonae yasa-taxotsi domae, jei barapomonae.

⁵³Néxata pexuyo paxa tatsi yábara nantaxéinataba xua bárapo matáeiñaxae pepuya weya xua mexuae Jesús namchi jeye: “Moya kaibe nawíyama jiña bo beya, báyatha nexanto kata axaibi”, jei Jesús. Bapoxonae bapong irü pomonae piabotha peta-enaewichi Jesús yábara jumekowüntatsi.

⁵⁴Bárapo pexeíña petsita-itüütsi koyenewa xua poxonae ekeicha Jesús kotakaya éxana poxonae kaibe warapiya Galilea nakua beya poxonae Judea nakua wewarapiya.

**Meje yábara poxonae Jesús axaibi éxana pong
pekuenobinchi ichaxota po fétiyo pewüing Betzata**

5¹Bapoxonae pírapae Jesús pona Jerusalén tómará beya. Bárápo tómaratha judiomona nakaetuta xua penabanaenexa pexaewa. ²Bárápo tómaratha xua íbótong peyakaincha toxorodutsi akabiwa koibotong kae boupa iya bárápo boupa pewüing “Oveja piaboupa”, jei. Imoxoyo bárápo boupa iya eka tsika mene fétiyo. Bárápo fétiyo hebreo jumetha pewüing “Betzata”, jei. Bárápo fetíyotha cinco po boutíyobe umena. ³Bárápo boutongtha peatenewi íratha bobenapoiña, ichamona pomona peitatanakütsi jiwi, irü ichamonaeno pomona pejayuyáyujei jiwi, irü ichamonaeno pomona pekuenobiwichi. Barapomona ewatabobena xua bárápo mene fétiyo mene najirababa. ⁴Tsipéi ichakuitha tsaibi matatsunpin patopeikeiba bárápo mene fetíyotha xua peitaboko wétsika pona. Bárápo matatsunpin mene najirababa éxana bárápo mene fétiyo. Pong kopiya maxükáyatsi mene beya xua baxota kuaranótatsi, bapoxona axaibi exainchi. ⁵Baxota pebin irü boka pong kaena báyatha átene treinta y ocho po weibetha. ⁶Jesús tane xua bapong íratha boka. Matáütano Jesús yaputane xua bapong aiña dapaein báyatha éwata boka. Jesús yáñaba bapongtha, jeye:

—¿Ichichípame xua neaxaibiwa? jei Jesús.

⁷Pong átene Jesús jumenótatsi, jeye:

—Pong Nekanamataxeinaem jiwi, dapong inta aibi pong taneyawenaewa xua mene betanemaxükayaenexa poxona matatsunpin mene najirababa éxana. Poxona takoutha táepatotha iya tsaibin ichüing kopiya netsíwana patopeiba. Bapong axaibi, kopiya pekaxinaexae mene, jei pong átene.

⁸Jesús jumebarái, jeye:

—Asiya úngkuare. Pire jiña nebokaewa. Bara ponde, jei Jesús.

⁹Bapoxona kaena naiña axaibi tsuxubi. Yawa pita pía pebokaewa, bara pónano. Íchitha bárápo matakabi ápara po matakabi pentakeiseikáe matakabi. ¹⁰Daxota judiomona barái pongtha pong axaibi exainchi. Jeichichi:

—Ápara ánoxuae po matakabi xua pentakeiseikáe matakabi. Bárápo matakaiha jopa kakopatsiyo xua bara nekaponaewa jiña nebokaewa, jei judiomona.

¹¹Bapong jumebarái judiomona, jeye:

—Pong neaxaibi éxana bapong nebarái: ‘Pire jiña nebokaewa, bara ponde’, nejéi bapong, jei bapong judiomonaetha.

¹²Néxata judiomona yáñaba bapong, jeye:

—¿Jintam bapong pong baxua kabarái: ‘Pire jiña nebokaewa, bara ponde’, jei? jei barapomona.

¹³Íchitha bapong jopa wüingtaeyo pong peaxaibi exanáexaetsi, tsipéi Jesús pin bichéitha naitakafétaba. ¹⁴Pírapae bapong Jesús taeba Nakom pin piabotha tatsi. Jesús barái bapong, jeye:

—Ínkane nejumetaema. Jame kaaxaibi éxanatsi. Ekeicha jinxoba abe éxaname, tsipéi bapoxona bichokono atenem tsipae beyakaincha xua poxona kopiya atenem, jei Jesús.

¹⁵Néxata bárápo pebin pona judiomona beya xua pejeinexa:

—Ápara pong neaxaibi éxana bapong ápara Jesús, jei bapong.

¹⁶Daxota Jesús abe tsiyábara jeitapoinchi xua pebexubiwa tsainchi yáitama Jesús axaibi éxana pong átene po matakaiha pentakeiseikáe matakaiha. ¹⁷Íchitha Jesús jeye barapomonaetha:

—Taxa, ápara kataunxuae nakuiteiba daxita matakábintha. Xang barichin bara bekein pentakeiseikáe matakabi tang, jei Jesús.

¹⁸Daxota bichokono nama judiomonae jopa juniya anaepanaeyo, yawa ichichipa xua Jesús pebexubiwa tsainchi. Barapomonae anáepana tsipéi yáitama Jesús po matakaiha pentakeiseikáe matakábintha nakuita poxonae bekein barapomonae jopa kopatsiyo. Matáütano anáepana tsipéi Jesús náexana xua Nakom pekuijü-páewatsi, yawa tsipéi jeye: “Nakom, Taxa”, jei.

Meje yábara poxonae Jesús yábara paeba xua pexeinaewa pía peayapusúü itorobi koyenewa

¹⁹Néxata ekeicha Jesús barái bárapo judiomonae, jeye: “Xaniyang paka tsipáebatsi xua xang Nakom Pexantong jopa exanaeño pokotsiwa takoutha ichichipang. Saya jame éxanang pokotsiwa Taxa kuitang pokotsiwa éxana. Daxota bapokotsiwang baxua éxanang. ²⁰Taxa bichokono neántobe, yawa netsita-itüüta daxita xua bapong pokotsiwa éxana. Taxa ekeicha icháwangno netsita-itüütsina pokotsiwa xua bichokono wüünae beyakaincha xua báyatha éxanang. Bapoxonae yábara pana najüntükoyene kabenaekáename. ²¹Taxa ekeicha asüü kana éxana pomonae kaena báyatha wérapa. Xang barichin tsane Nakom Pexantoxaein ekeicha asüü kana exanaein pomonae pewerapaewi, pomonae xua ichichipang xua asüü takana-exanaewa. ²²Taxa jopa ba yábara paebiyo jiwi xua penatsikuentsiwa xua abe peexanaexae. Saya meisha xang Pexanto tatsixaein nekata bárapo peayapusúü itorobi koyenewa xua tayábara paebiwa jiwi xua penatsikuentsiwa xua abe peexanaexae Nakomtha. ²³Baxua Taxa bárapo peayapusúü itorobi koyenewa nekata xua daxita jiwi tana nebarükui iturajinaenexa xua icha bárapo jiwi ichi xua poxonae Taxa barükui-iturajínatsi. Xang pongxaein Nakom Pexantoxaein pongxaein Nakom tana neitoróbixae pong jopa nebarükui iturajinaeyo bapong barichi Taxa jopa barükui-iturajinaetsi.

²⁴”Bara xaiñeya paka tsipáebatsi xua xang, Nakom Pexantoxaein, pong wüünae nejumenaitáewata pokotsiwa páebang xuano xua Taxa jumekowúntatsi bapong peajüntüyapusüüwa xeinaena po peajüntüyapusüüwa xua ataya tsiteka. Bapong bápana jopa yábara kaunutsin tsane xua bapong Nakom báyatha tsítatsi xua bapong penatsikuentsiwa xua daxota bapong bewa tüpaena abe peexanaexae. Tsipéi bapong be barapokotsin, Bara be pókotsin xua ekeicha asüü éxanang petüpáe kuirukoyene weya. ²⁵Xaiñeya paka tsipáebatsi. Ápara ánoxuae bárapo matakabi patope, po matakaiha pomonae be pewerapaewi jopa pexeinaexae peajüntüyapusüüwa, barapomonae nejumetaena. Yáwano icha barapomonae nejumekowúntsina bapoxonae xeinaena peajüntüyapusüüwa. ²⁶Taxa xeina xua peajüntüyapusüüwa, po peajüntüyapusüüwa tatsi jopa werawerakaeyo. Daxota bara tayapuwüünaetsi xua ichüng pekatsinéxatsi bárapo peajüntüyapusüüwa. Matáütano Taxa nekata bárapo peajüntüyapusüüwa xua daxota xuya jiwi katang. ²⁷Taxa pía peayapusúü itorobi koyenewa nekata xua jiwi tayábara paebinexa xua penatsikuentsiwa xua abe peexanáewixae Nakomtha. Tsipéi náexanang pepa Jintong daxota nekuijüpa xua bárapo pía peayapusúü itorobi koyenéwatha jiwi tayábara paebiwa xua penatsikuentsiwa xua abe peexanaexae. ²⁸Jopa baxua payábara najüntükoyene kabenaekaeinde pokotsiwa tapaka tsipaebíwatsi. Tsipéi patopaena icha matakabi po matakaiha pomonae pewerapaewi nejumetaena. ²⁹Barapomonae pomonae

pewerapaewi müthü wejujuinaena. Pomonae xua wüünae éxana xua poxonae kaena báyatha jinompa, barapomonae asüü exanaeinchi xua pexeinaewa tsane peajüntüyapusüüwa. Íchitha nama pomonae abe éxana xua poxonae kaena báyatha jinompa, barapomonae asüü exanaeinchi xua peyábara paebinéxatsi xua penatsikuentsiwa xua abe peexanaexae Nakomtha”, jei Jesús.

**Meje yábara poxonae Jesús tsita itapeiñaxeina jiwi
xua bara xeina peayapusüü itorobi koyenewa**

³⁰Kataunxuae áwiya Jesús kueikueijeji judiomonaetha. Jesús jeye: “Jopa exanaeiño pokotsiwa takoutha ichichipang. Jiwi yábara páebang xua penatsikuentsixae xua abe peexanaexae Nakomtha be pókotsi koyeneya Taxa tanekuí itorobixae. Baxua xua pokotsiwa poxonae jiwi yábara páebang xua penatsikuentsiwa xua abe peexanaexae ápara bara wüünae. Tspíei jopa exanaeiño pokotsiwa takoutha ichichipang jame saya éxanang pokotsiwa Taxa ichichipa, pong tana neitoróbixae. ³¹Icha saya meisha nayábara paebíchipang takoutha, yawa icha ichüng jopa neyábara jumeyawenáe tsipae metha bapoxonae pana neyábara jam tsipaem: ‘Ápara pokotsiwa bapong piakoutha nayábara paeba jopa xaiñeyo’, pana neyábara jam tsipaem. ³²Íchitha ichüng neyawena xua tana neyábara paebiwa tspíei páebang xua pokotsiwa bapong paeba. Nantajüpaya papáebangbe. Ápara bapong Nakom bara Taxa. Bara yaputang pokoyene bapong xua tana neyábara paebiwa ápara bara xaiñéi. ³³Paxam ichamonae paitoróbame Juan beya, xua Juan peyaiñabiwa tsainchi, pokotsiwa Juan yábara paka jumenota xua xang yábara, bara ápara xaiñéi. ³⁴Xang jopa jintong nantawenonaeiño xua tana nebarü jumeyawenaewa xua jiwi yábara tana nejumekowüntsiwa xua bara xaiñeya tapaebin. Saya yábara paka tsipáebatsi pokotsiwa Juan tana neyábara paebiwa. Poxonae baxua pajumekowüntsínname pokotsiwa Juan tana neyábara paebiwa bapoxonae paka kapanenebiyaena abe paiña neexanáe kuirukoyenein weya xua jopa paiña átene tsaibiwa tsane abe paiña neexanáewangtha. ³⁵Poxonae pekoicha itanata, jiwi ba kaeto jüntükoyene weiweina poxoru ichichipa bárapo koicha xua yonoyonéi. Icha pekoicha ichi Juan barichi. Poxonae Juan paka kuiduba kopiya pajüntükoyene weiwéiname kaeto, poxoru paichichípame bárapo diwesi pokotsiwa bapong paka tsipaeba. ³⁶Íchitha nama xang xeinang xua pokotsiwa aiñakuí beyakaincha xua po diwesi Juan tana neyábara paebiwa. Baxuang xua xuang pokotsiwa éxanang ápara báraxua pokotsiwa Taxa neitoroba. Po pexeíña petsita-itüübiwang xua éxanang poxonae baxuang jiwi nekuitane bapoxonae nejumekowünta xua Taxa nekata bárapo peayapusüü itorobi koyenewa. ³⁷Matáütano Taxa, pong tana neitoróbixae, beta wüünae neyábara paeba. Íchitha paxam jopa bápana Nakom pajumetaem xua pejume. Matáütano jopa bápana pataem pía pepong. ³⁸Nakom Pejume Diwesi jopa paxeinaem paiña jüntükoyeneintha tspíei jopa pana nejumekowüntsim pongxaein xua Nakom tana neitoróbixae. ³⁹Paxam matowa pana nakuidúbame Nakom Pejume Diwesi, tspíei panantaxéiname xua pía bapoxonae Nakom paiña nepaka katsibichi pía peajüntüyapusüüwa, po peajüntüyapusüüwa jopa werawerakaeyo. Íchitha Nakom Pejume Diwesi, po diwesi payórobame, ápara xua tana neyábara paebiwa. ⁴⁰Íchitha jopa bápana pana nejumekowüntsim xua tapaka katsibinéxatsi bárapo peajüntüyapusüüwa, po peajüntüyapusüüwa jopa werawerakaeyo.

⁴¹”Jopa netsita aiñakuiyiyo xua bara jiwi tana nebarükui iturajinaewa xua aiñakuin tanaexanaexae. ⁴²Matáütano paka jüntükoyene yaputainchi xua paiña jüntükoyeneintha jopa Nakom paántobem. ⁴³Xang, Nakom Taxa tana neitoróbixae, pákata patopatsí, dáichitha jopa pana nejumekowüntsím. Íchitha icha ichüing pákata patopáetsipa pong piakoutha naitoroba, bapong wüüinae pajumekowüntsípame. ⁴⁴Jopa paka itaküüpaeyo xua pana nejumekowüntsíname tsipéi saya panantaxéiname xua pía jiwi paka nekayábara barükui-iturajineibiwa. Jopa panantaxeinaem xua pokoyene Nakom paka nekayábara barükui-iturajinaewa tsane. ⁴⁵Jopa panantaxeinaeinde xua Táchatha tapaka yábara paebíwatsi xua pokoyene abe paiña neexanaewa. Xang dapong ápara aibin xua abe tapaka yábara paebíwatsi. Paxam panantaxéiname, pana najam: ‘Kaena báyatha Nakom nakana jume diwesi kata ichaxota Moisés xua jiwi pejumekowüntsiwa tsane. Jumekowüntsítatsi bárapo diwesi, daxota Nakom naka kapanenebiya tsane’, pana najam. Dáichitha jopa paexanaem pokotsiwa Moisés paka itoroba. Poxoru tsipéi jopa Nakom pajumekowüntsím daxota Nakomtha abe paéxaname. ⁴⁶Icha pajumekowüntsípame pokotsiwa Moisés neyábara tinaeya paeba, metha írürü pana nejumekowüntsípame, tsipéi Moisés neyábara tina. ⁴⁷Icha jopa pajumekowüntsím pokotsiwa Moisés neyábara paeba, bara paichipaem jopa pana nejumekowüntsipaem”, jei Jesús xua judiomona tsipáebatsi.

Meje yábara poxonae Jesús ápata pexaewa cinco mil pebiwi

(Mt 14.13-21; Mr 6.30-44; Lc 9.10-17)

6¹ Poxonae Jesús najumeweta judiomonaetha, bapoxonae Jesús pijimonae barü pona jératha xua Galilea pukua icha muxunene beya. Bárapo pukua icha wüing Tiberias pukua. ²Pin bicheito Jesús punapoinchi, tsipéi Jesús kuitainchi xua éxana pía pexeiña petsita-itüütsi koyenewang, poxonae axaibi éxana peatenewi. ³Néxata Jesús pijimonae barü ekoiña demuxuwa icha. Bapoxonae baxoteicha Jesús pijimonae barü ekopiya. ⁴Imoxoyo bara nama patopaena matakabi xua judiomona pía Pascua wüing matakabi tatsi. ⁵Jesús tane xua punapoinchi pin bicheito. Bapoxonae Jesús barái, Felipe baraichi jeichichi:

—¿Eta xota metha pexaewa barapomonae üpainkomokaeinchi? jei Jesús Felípetha.

⁶Baxua Jesús Felipe yáñabatsi, pía xua Felipe jumetaetsi, xua pokoyeneya Felipe pejumenotsiwa tsane. Tsipéi Jesús yaputane pokoyeneya xua imoxoyo peexanaewa. ⁷Néxata Felipe Jesús jumenótatsi, jeye:

—Bekein doscientos po pan matabüxümonae komokaetsipathatsi jopa áwiya jüpaetsipae xua daxita barompaya pexeinaponaewa bárapo bicheito. Bárapo denario paratiyo matawüing xua bichokono matoma nawita xua kaentakeitha nexa xua matoma xeineiba pomona penakuichiwi, jei Felipe.

⁸Bapoxonae Andrés pong írürü Jesús pijimonae tatsi jíwana jintong, pong Simón Pedro peweicho tatsi, bapong Jesús jeichichi:

⁹—Meje pewowinwüüto ungue. Bapoyo cinco po panbe xeina, po pan xua cebadabeno pan. Matáütano bapoyo duweiyo aiñobe kápána. ¡Íchitha ápara jopa yapujüpaeyo xua pin bicheito! jei Andrés.

¹⁰Néxata Jesús pijimonae jumenota, jeye:

—Daxita jiwi patsipáebare xua peenaewa tsane íratha, jei.

Baxota naepanaewang nawita. Baxota pebiwi íratha ena. Bárapo bicheito bara be kou cinco mil pebiwi. ¹¹Néxata Jesús pekóbeta pita pan, po pan xua pexuyo kapatopa. Bapoxonae Jesús Páxatha tsipaeba: “Axa, maisha jüntükoyene weiweingang xua pata tana nekatsiwaxaem pexaewa”, jei Jesús. Bapoxonae Jesús pijimonae tsikobe jajanakapona pan. Ekeicha Jesús pijimonae tatsi kakatsibapona bárapo pan bárapo cinco mil pebíwitha. Jesús barichiya éxana poxonae duwéiyobe pita. Matáütano pijimonae tsikobe jajanakapona bárapo bicheito nexa. Bárapo cinco mil pebiwi bara xane xua ichichipa piyainxae. ¹²Poxonae daxita tonsanarúküpa, bapoxonae Jesús pijimonae barái:

—Panore xua barapomonae jíwana xane. Pajébare, jopa pabébande, jei Jesús.

¹³Barapomonae Jesús pijimonae tatsi nonotapona pokotsiwa bárapo pin bicheito jíwana xaexaepona. Jesús pijimonae tatsi doce po kótebe wünba xua báyatha po cinco panbe jíwana xaexaepona pin bicheito po pan xua cebadabeno pan. ¹⁴Bárapo cinco mil jiwí poxonae Jesús kuitainchi xua pexeíña petsita-itiütsi koyenewa éxana, jeye:

—Ápara bara bapong pong Nakom peitorobi jume pepaebin, pong xua juiña bewa pinae patopaena po nákuathe xua wanákuatha tsika, jei.

¹⁵Íchitha Jesús yaputane xua barapomonae ichichipa xua pokoyene Jesús penaexanaewa tsane be pong jiwí itorobiya pía pepa peewatsinchi tsane bárapo bicheito pía nákuatha tatsi. Daxota ekeicha Jesús pónataba demuxuwa beya, xua kompa peekaenexa.

Meje yábara poxonae Jesús mene matatsunjúmatha pona

(Mt 14.22-27; Mr 6.45-52)

¹⁶Poxonae kirei tsanaicha Jesús pijimonae tatsi pukua ítapa bepareka. ¹⁷Bapoxonae jératha nonobábiya. Bárapo pukua iya jératha epataüta iyiya xua pepatsiwa tsane Capernaum tómara beya. Jesús kuenta iyíyatsi poxoru báyatha kirei, yáwano poxoru Jesús jopa kataunxae patopaeyo. ¹⁸Bapoxonae pin joibo tsuxubi. Yawa marátsaka muxunenababa jera. ¹⁹Poxonae Jesús pijimonae tuwüütha yanapanebiya, bapoxonae Jesús pijimonae tainchi. Jesús mene matatsún pona jera dena. Bapoxonae barapomonae bichokono junuwa. ²⁰Íchitha Jesús pijimonae barái, jeye:

—¡Ápara xang! ¡Jopa pajunuwinda! jei Jesús.

²¹Bapoxonae Jesús pijimonae yaitaerúkúpatsi. Bapoxonae Jesús jüntükoyene weiweinaya wábatsi pijimonae xua jératha penontabinaenexa. Bapoxonae naiña patarúküpa Capernaum tómaratha.

Meje yábara poxonae jiwí Jesús wenaweneichi

²²Icha matakeitha pin bicheito, pomonae umena pukua itapatha xua icha muxunénetha, barapomonae tane xua Jesús pijimonae kuenta ponarúkúpatsi jératha, po jera saya bara kae nae xua po nae baxota boka. ²³Poxonae kataunxae Jesús yábara nantaxéinatsi baxua, bapoxonae icha jera naein pata xua po naein Tiberias tómara werendena. Bárapo jera naein pata ichaxota po íriyo itamatayeka xua ichaxota báyatha Jesús, pong Wanaka namataxeinaein, Paxa tsipaeba xua jeye: “Axa, maisha jüntükoyene weiweingang xua pata tanekatsiwam pan”, xua jei, xuano xua baxota Jesús ápata pan jíwitha. ²⁴Barapomonae yaputane xua Jesús aichúrukuae. Matáütano yaputane xua Jesús pijimonae tatsi aichurubena. Daxota jerang notarúküpa Capernaum tómara beiyiya xua Jesús pewenaweneiwa tsainchi.

**Meje yábara xua Jesús ápara bapong yábara kaunútatsi xua
poxonae po pexaewa Nakom jiwi itaboko wetaitoróbikatsi**

²⁵Poxonae barapomonae pata icha muxunene beya xua pukua iya, bapoxonae Jesús tainchi. Barapomonae Jesús yáñabatsi, jeichichi:

—Pong jiwi Nekuidubim, ¿eta poxonae xote patópame? jei barapomonae.

²⁶Jesús jumebarái bárapo jiwi, jeye:

—Xaniyang paka tsipáebatsi. Pana newenawenam, tsipéi báyatha pana najain-táneme pexaewa xua beya poxonae patonsáname. Ápara jopa baxua patsipatsim xua báyatha tapaka tsita exanáexaetsi pexeña tatsita-itüütsi koyenewang. ²⁷Jopa panantaxeinaeinde xua saya pexaewa pana natsiúpain nakuítame, po pexaewa saya naiña werawéraka. Saya meisha jame payábara nantaxéinare xua peajüntü-yapusúü koyenewa, po peajüntüyapusúü koyenewa jiwi ajüntüyapusúü éxanatsi, po peajüntüyapusúüwa jopa werawerakaeyo. Taxa, Nakom, bárapo peajüntüyapusúüwa nekata, po peajüntüyapusúüwa xuya paka katsinchi pongxaein Nakom Tananeitapetsin, jei Jesús.

²⁸Néxata barapomonae Jesús yáñabatsi, jeye:

—¿Eta xua bewa paexanaein xua xaiñeya pata exanaewa tsane pokotsiwa Nakom ichichipa? jei.

²⁹Néxata Jesús jumenota barapomonae, jeye:

—Jame Nakom baxua ichichipa xua pata tanejumekowüntsiwam tsane pongxaein xua barapong Nakom, Taxa, neitoroba, jei Jesús.

³⁰Néxata barapomonae Jesús yáñabatsi, jeye:

—¿Eta po jiña pexeña netsita-itüütsi koyenewa, pana netsita-itüütsiname? Icha paka kuitaeinchi baxua xua pana netsita-itüütsiname néxata bapoxonae xua xain paka jumekowúntatsi. ³¹Ichaxota ira xuépana susato tsúrukuae nákuatha waámo susato jiwi xane pexaewa, po pexaewa Nakom taitorobika itaboko wétsika. Bárapo pexaewa maná matawüing. Barapomonae baxua kana éxanatsi be pókotsi koyeneya Nakom Pejume Diwésitha yábara jeichichi: ‘Nakom kata barapomonaetha pexaewa, po pexaewa itaboko wetaitorobika’, jei Nakom Pejume Diwésitha, jei barapomonae.

³²Néxata Jesús jumebarái barapomonae, jeye:

—Xaniyang paka tsipáebatsi, Moisés bárapo pexaewa ápara jopa waámo susato jiwi katsichi, po pexaewa xua itaboko wetaitoróbikatsi. Ápara jame Nakom, Taxa, bárapo pexaiñéi nabanáe pexaewa taitorobika. ³³Po pexaewa Nakom itaboko wetaitorobika, ápara neyábara wüünae kaunuta. Nakom neitorobika xua takana-exanaewa tsane jiwi bárapo kae pin nákuathe xua jiwi pexeinaewa tsane peajüntüyapusúüwa, po peajüntüyapusúüwa jopa werawerakaeyo, jei Jesús. ³⁴Néxata barapomonae Jesús baráichichi, jeye:

—Pata Tanekanamataxeinaem, bárapo pexaewa pana katsibéibare daxita matakabi tsaibi, jei.

³⁵Jesús jumenota, jeye:

—Xang ápara bapong xua po pexaewa Nakom itaboko wetaitorobika jiwi xua po pexaewa tana neyábara wüünaekaunutsixae pongxaein jiwi peajüntüyapusúüwa takatsin. Bekein jiwi xaiba pexaewa dáichitha ekeicha jainpouneiba, yawa ekeicha meratsipouneiba. Jame pong patopa taxantha yawa pong nejumekowünta bara

xeina daxita pokotsiwa penantawenonaewa. ³⁶Bara báyatha bekein paka tsipáebatsi, dáichitha jopa pana nejumekowüntsime bekein pana netáneme. ³⁷Daxita pomonae xua Taxa nekata, barapomonae bara tamonae. Barichi pomonae nejumekowünta, barapomonae jopa bebang tsane. ³⁸Xang ápara jopa baxua tsipatopei-kaeiño itaboko wétsika xua taexanaewa tsane pokotsiwa takoutha ichichipang. Ápara saya jame baxua tsipatopang xua taexanaewa tsane pokotsiwa Taxa ichichipa. ³⁹Tsipéi Taxa pongxae neitoroba, barapong ichichipa xua daxita jiwi beta ta-eenaewa tsane pomonae tana nekatsixae. Matáütano Taxa jopa ichipaeyo xua barapomonae jíwana kaein tanexubiwa. Matáütano Taxa ichichipa xua ekeicha asüü kana exanaein petüpáe koyenekuariya weya pomonae tana nekatsixae xua poxonae po matakabi opidukuáenaba po kae pin nákuathe. ⁴⁰Paxam yábara paka tsipáebatsi xua pokotsiwa Taxa peichichipaewa. Daxita pomonae neyábara pae-bina pokoyene xua xang ápara Nakom Pexantong, xuano xua nejumekowünta, barapomonae xeinaena peajüntüyapusüüwa xua ataya tsiteka. Barapomonae asüü exanaein petüpáe koyenekuariya weya poxonae matakabi opidukuáenaba po kae pin nákuathe, jei Jesús.

⁴¹Poxonae Jesús baxua nayábara paeba bapoxonae judiomonae Jesús abe yábara páebatsi, tsipéi Jesús jeye: “Xang ápara bapong po pexaewa Nakom itaboko wetaitorobika jiwi xua po pexaewa tana neyábara wüünaekaunutsixae pongxaein jiwi peajüntüyapusüüwa takatsin”, jei Jesús. ⁴²Barapomonae najéi kaemonae:

—Ápara bapong Jesús, José pexanto tatsi. Ápara koxiyüing báyatha yaputainchi, koxíwano yaputáinchino. ¿Eta pokotsiwa metha naka tsipaeba xua pinae itaboko wétsika pona? najéi barapomonae.

⁴³Néxata Jesús jumebarái, jeye:

—Jopa kaemonae pana natsipaebinde xua abe papáebame. ⁴⁴Dapong aibi pong peitaküüpáewatsi xua piakoutha pepatopaewa xangtha xua tana nepunaponaewa tsane icha Taxa pong tana neitoróbixae, piakoutha jopa kopatsiyo xua jiwi pepatsinexa xangtha. Barapomonae asüü exanaein petüpáe koyenekuariya weya poxonae po matakai xua daxita werawerakaena po nákuathe. ⁴⁵Nakom peitorobi jume pepaebiwi pía petináe diwésintha jeye: ‘Daxita jiwi Nakom yaputane kana exanaena’, jei bárapo Nakom peitorobi jume pepaebiwi pía petináe diwésintha. Daxota daxita pomonae Taxa jumetainchi xuano xua jumekowüntatsino barapomonae bara pata taxantha.

⁴⁶“Dapong aibi pong Taxa tainchi. Jame meisha pongxaein itaboko wepatopeikang bara Taxa tang. ⁴⁷Xaniyang paka tsipáebatsi, pong nejumekowünta bapong jame xeinaena peajüntüyapusüüwa, po peajüntüyapusüüwa jopa werawerakaeyo. ⁴⁸Xang ápara bapong xua po pexaewa Nakom itaboko wetaitorobika jiwi xua po pexaewa tana neyábara wüünaekaunutsixae pongxaein jiwi peajüntüyapusüüwa takatsin. ⁴⁹Paiña amo susato jiwi pexaewa xane ichaxota ira xuépana susato tsúrukuae nákuatha. Bárapo pexaewa maná matawüing. Bekein bara bárapo pexeña pexaewa nábane dáichitha matapaiña wérapa. ⁵⁰Paxam yábara paka tsipáebatsi po pexaewa Nakom itaboko wetaitorobika jiwi xua po pexaewa tana neyábara wüünaekaunutsixae. Pong nejumekowüntsina jopa werawérakae tsane icha ichüing ichi xua poxonae xane bárapo pexaewa jopa tüpaeyo. ⁵¹Xang ápara bapong xua po pexaewa Nakom itaboko wetaitorobika jiwi, po pexaewa ayapusüü, xua po pexaewa tana neyábara wüünaekaunutsixae. Pong xua nejumekowünta bara ataya

poponaena icha ichüing ichi xua poxonae xane bárapo pexaewa bara asiüi. Po pexaewa xua yábara páebang, ápara tapepong xua paka kátatsi paiña nenabanaewa tsane. Tüpaein xua jiwi pexeinaewa tsane peajüntüyapusüüwa”, jei Jesús.

⁵²Néxata judiomonae kaemonae najumematsontsónoba, najéi:

—¿Eta pokotsiwa metha bapong naka tsipaeba xua naka katapaeba pía pepong xua wanabanaewa tsane? jei barapomonae.

⁵³Jesús barái barapomonae, jeye:

—Xaniyang paka tsipáebatsi xang pongxaein Nakom Tananeitapetsin. Icha jopa paxaem tsane tapepong, yawa icha jopa paapaem tsane tajana, jopa paxeinaem tsane peajüntüyapusüüwa, po peajüntüyapusüüwa jopa werawerakaeyo. ⁵⁴Pong xua tapepong xane yawa xua apa tajana, bapong xeinaena peajüntüyapusüüwa, po peajüntüyapusüüwa jopa werawerakaeyo. Yawa bapong asiüi exanaein petüpáe koyenekuariya weya po matakaitha poxonae daxita werawerakaena po kae pin nákuathe. ⁵⁵Tsipéi tapepong be pexeíña pexaewa poxonae xua jiwi pexaewa tsane. Yawa tajana be pexeíña peapaewa xua jiwi peapaewa tsane. ⁵⁶Pong tapepong xane yawa apa tajana, bapong nebarü poponeibina yawa xang barü poponeibin. Tsipéi poxoru bapong neyábara jumekowünta xua xang bapong pía pepong tatsi tsitüpang, yáwano xua tajana othoparenaewa bapong nexa xua abe pía peéxanae kuirukoyenein tatsi nexa. ⁵⁷Taxa pongxae neitoroba bapong ataya asiüi poponeiba. Írürü xang barichin ataya asiüi poponeibang tsipéi Taxa nekata pía peajüntüyapusüüwa, po peajüntüyapusüüwa jopa werawerakaeyo. Barichirü pong xane tapepong, xua poxonae tana nejumekowüntsiwa, bapong asiüi poponeibina takatsixae peajüntüyapusüüwa. ⁵⁸Xang yábara páebang pexaewa, po pexaewa Nakom itaboko wetaitorobika jiwi. Bárapo pexaewa jopa jüpaeyo, xua icha be maná matawüing ichi, po pexaewa paiña amo susato jiwi xane. Dáichitha barapomonae matapaiña wérapa. Po pexaewa yábara páebang icha ichüing xane bárapo pexaewa, bapong xeinaena peajüntüyapusüüwa, po peajüntüyapusüüwa jopa werawerakaeyo, jei Jesús.

⁵⁹Baxuang Jesús kuiduba judiomonae pía penakaetutsibotha tatsi xua Capernaum tómaratha.

Meje yábara poxonae Jesús yábara paeba peajüntüyapusüüwa, po peajüntüyapusüüwa jopa werawerakaeyo

⁶⁰Pinmonae pomonae Jesús punapoinchi, poxonae barapomonae Jesús jumetaínchi pía pekuidubiwa, bapoxonae barapomonae najéi:

—Pokotsiwa bapong paeba maisha bichokono ayapubé xua wayábara jumekowüntsiwa. ¿Jintam metha itaküüpatsi xua peexanaewa tsane pokotsiwa bapong paeba? najéi.

⁶¹Íchitha Jesús yaputane pokotsiwa xua peyábara paebíwatsi barapomonae xua peayapubexae pokotsiwa Jesús pepaebiwa. Néxata Jesús yáíñaba barapomonae, jeye:

—Pokotsiwa aunxuae paka tsipáebatsi, ¿baxua pákata ayapubé? ⁶²¿Eta xua metha panantaxeinaetsipame icha pana netaetsipame xua athabé taichaewa itaboko beicha ichaxota báyatha póponang pongxaein Nakom Tananeitapetsin?

⁶³Jiwi asiüi jinompa poxoru xeina pejumopetünaxü. Poxonae pejumopetünaxü panepa jintong ba pía pepong tüpa. Icha pejumopetünaxü ichi xua jintong asiüi

exainchi pía pepong, barichi xua xang pokotsiwa tapaka tsipaebíwatsi bápapo jume paka jüntükoyene ayapusúü kana éxana xua jopa paiña newerawerakaewa tsane. ⁶⁴Íchitha kataunxuae pinmonae pomonae paxam jíwana pam, jopa nejume-kowúntsiyo, jei Jesús.

Kaena báyatha Jesús kopiya wüünae tsiwanaya yaputane pomonae jopa pejume-kowúntsiwa tsainchi. Matáütano kaena báyatha Jesús kopiya wüünae tsiwanaya yaputane pong pekaenaetsiwa tsainchi tsane ichamonaetha xua pebexubiwa tsainchi Jesús. ⁶⁵Ekeicha Jesús barái pomonaetha, pomonae pía pepunaponáewichi, jeye:

—Daxota paka jeichi: ‘Dapong aibi pong peitaküüpáewatsi xua piakoutha pepa-topaewa xangtha xua tana nepunaponaewa tsane, icha Taxa piakoutha jopa kopatsiyo xua bara jiwí pepatsiwa xangtha’, paka jeichi, jei Jesús.

⁶⁶Poxonae Jesús baxua paeba bapoxonae pin bicheito pomonae Jesús pepunaponáewichi barapomonae Jesús kuenta wárapatsi. Barapomonae ekeicha nama jopa Jesús punaponaetsi. ⁶⁷Bapoxonae Jesús pijimonae yáíñaba pomonaeyoxae xua doce póyobe, pomonae Jesús pijimonaexae tatsi. Jesús pijimonae barái, jeye:

—¿Paxam paiña irü ponaetsi? jei Jesús.

⁶⁸Néxata Simón Pedro Jesús jumenótatsi. Pedro jeye:

—Pata Tanekanamataxeinaem, dapong aibi tsipae pong papunaponang icha paka kuenta ponáetsipatsi. Saya meisha payaputang xua meisha xam kompam yábara pana netsipáebame peajüntüyapusüüwa, po peajüntüyapusüüwa jopa werawerakaeyo. ⁶⁹Paxang paka jumekowúntatsi. Matáütano payaputang xua xam ápara pong Nakom kaitoroba, pong pepa Nentakuiru-yapuwüünaem, jei Simón Pedro.

⁷⁰Jesús pijimonae jumenota, jeye:

—Paxam pomonae doce póyobe pam pomonae tapaka kaitapetsíwichi pam. Dáichitha kaein jíwana pam kauri piamonae jintong tatsi, jei Jesús.

⁷¹Poxonae Jesús baxua paeba, Jesús yábara paeba Judas, Simón Iscariote pexanto tatsi. Bapong Judas Jesús kaenaetsinchi bekein bapong kaein jíwana pomonae Jesús pijimonaexae tatsi, pomonae doce póyobe tatsi.

Meje yábara poxonae Jesús jopa yábara jumekowúntichi peweicho jiwí

7¹Bapoxonae Jesús pópona dukuanaeta baxota xua Galilea nákuatha. Jesús aichaxaibi xua pepoponaewa Judea nákuatha, tsipéi judiomonae, pomonae baxota jinompa, ichichipa xua Jesús pebexubíwatsi. ²Bara nama imoxoyo tsúrukuae tsozonaeba po matakábintha judiomonae jinompa tsika bomüxüxitha xua penabanaenexa pexaewa. Bápapo matakabin ba judiomonae kayábara nantaxeina xua kaena báyatha pinae pía pamo susato jiwí tatsi jinompa tsika bomüxüxitha ira xuépana susato tsúrukuae nákuatha. ³Jesús baraichi pía peweicho jiwí, jeye:

—Jopa xote poponaeinde. Judea nakua beya warapíyama xain baxotiya jiñamonae kakuitane pokotsiwa éxaname xua jiña netsita-itüütsiwa. ⁴Pong xua ba ichichipa peyaputáewatsi daxita jiwí, bapong ba daxita jiwí peitütha éxana pokoyene xua moya peyawüngxenaewa pokoyene jiwí kopiya jopa yábara yaputaeyo. Bapong ba jopa nameicha exanaeyo. Xam írürü barichinde. Daxita jiwí peitütha éxande xain kakuitane xua jiña netsita-itüübiwa neexanaewam, jeichichi Jesús peweicho jiwí.

⁵Baxua Jesús baráichichi peweicho jiwi, tsipéi Jesús jopa jumekowüntichi peweicho jiwi. ⁶Néxata Jesús jumebarái peweicho jiwi, jeye:

—Ápara inta kataunxuae dapó matakabi aichika, po mataketha tana naitüü-tsiwa judiomonaetha xua Judea nákuatha. Íchitha poxonae paichichípame xua paíña neponaewa moya bara paponde Judea nakua beya. ⁷Pomonae jopa Nakom jumekowüntichi barapomonae jopa paka kasébiyo. Íchitha xang nekaseba tayábara paebixae xua pokoyene pokotsiwa barapomonae éxana pejüntükoyeneintha ápara abe. ⁸Paxam bara moya paponde ichaxota judiomona nakaetuta xua penabanaenexa pexaewa. Xang nama jopa ponaeiño kataunxuae kanta tamatakabi aichika, jei Jesús.

⁹Poxonae Jesús baxua najumeweta, bapoxonae abü kataunxuae Galilea nákuatha pópona be kaentakabíyobe xua pekoyo weya peponaenexa.

**Meje yábara poxonae Jesús nasiwapona Jerusalén tómara ichaxota
judiomona nakaetuta xua penabanaewa tsane pexaewa**

¹⁰Poxonae Jesús peweicho jiwi tatsi báyatha pónaba penanabanaenexa pexaewa irü Jesús bara beya pona. Jesús kompa nameicha pipattha pona. Jopa pebürüya naponaejo jíwitha. ¹¹Bárapo judiomona penakaetutsíwatha Jesús wenaweneichi. Bárapo judiomonae pía pentakaponaewi tatsi kaemonae nayáñaba, najéi:

—¿Ínkane methara? ¿Eta xota metha pópona bapong? najéi barapomonae xua Jesús yábara páebatsi.

¹²Bárapo pin bicheitomonaetha ichamonae Jesús yábara paxapaxeya páebatsi. Ichamonae jeye: “Bapong ápara pejüntükoyene wüünaein”, jei. Ichamonae jeye: “Büü, metha jume, ápara jiwi muxujaiñabéibatsi”, jei barapomonae.

¹³Íchitha dapong aibi pong pentha pejumejinaewa jiwi peitütha xua Jesús peyábara paebíwatsi, tsipéi judiomonae pía pentakaponaewi tatsi kunúwatsi.

¹⁴Poxonae cuatro po matakábinbe yapukaewa xua poxonae judiomonae po matakábintha nakaetuba, bapoxonae Jesús joniya Nakom pin piabotha. Matáütano baxota tamrópata pítaba xua pekuidubiwa jíwitha.

¹⁵Bapoxonae judiomonae yábara najüntükuyene kabenaeka pokotsiwa Jesús beta kaununaya pepaebiwa. Yáwano najéi:

—¿Eta xua metha bapong bichokono yaputane diwesi bekein jopa nakuidubiyo diwesi xua jopa barichiyo xua waxainchi wepu wanakuidubíwatsi diwesi? jei.

¹⁶Jesús jumenota barapomonae, jeye:

—Po diwesi jiwi kuidubang ápara jopa barompaya takuidubi koyenewa. Saya ápara Taxa pía pekuidubi koyenewang tatsi jiwi kuidubang, pong tanekuí itorobixae baxua. ¹⁷Icha ichüing ichichipa éxana pokotsiwa Nakom ichichipa, bapong nekayábara yaputaena xua pokoyene takuidubi koyenewa. Bapong yaputaena icha metha bara kuidubang pokotsiwa Taxa neitoroba, xuano xua ichakuiütha icha metha ápara kuidubang pexeña peayapusüü itorobi koyenéwatha pokoyene xua tawa xua saya takoutha ichichipang. ¹⁸Pong barompaya pía diwesi piakoutha nayábara paeba, ápara bapong pía xua wüünae yábara paebichi xua jiwi wünaeya peyábara paebiwa tsane. Íchitha ichüing pong ichichipa xua jiwi Nakom wüünae pejainchíwatsi pong Nakom bapong peitorobixaetsi, bapong jame po diwesi pexaiñéi diwesi paeba. Bapong jame jopa pemuxuitorobin jiwi.

¹⁹“Moisés paka kata pía peitorobi koyenewa. Dáichitha jopa paka yábara jume-kuikowüntsiya exanaem. Bekein Moisés paka kui-itoroba xua bepa pinae jopa jintong pabexubim tsane. Dapo jumetha, ¿eta xua metha paichichípame xua pata tanebexubiwam?” jei Jesús.

²⁰Daxita barapomonaе Jesús jumenótatsi, jeye:

—¡Ápara kou kauri xéiname! Dapong ápara aibi pong kabexubapaeba, jei judiomonaе.

²¹Jesús jumebarái barapomonaе, jeye:

—Daxita paxam payábara najüntükuikoyene kabenáekame, tsipéi pebin axaibi éxanang po matakábitha pentakeiseikáe matakábitha. ²²Íchitha paxam irü pana-kuiteibame bárapo matakábitha. Moisés paka kata pía peitorobi koyenewa xua pexui paiña newithabiwa xua ichaxota pebíwichi xéinatsi xua ichaxota nareixa-kaena xua ocho po matakabibetha poxonaе yapu othopeiba. Íchitha Moisés jopa tamrópata pitabiyo baxua, saya jame paiña amo susato jiwi tamrópata notarúkupa baxua. Poxonaе ocho po matakábibe yapu othopeiba pawithábame pebinwüütixi bekein poxonaе pentakeiseikáe matakabi pataetham. ²³Paxam paichichípame xua paiña yábara jumekuiwetsiwa xua pokotsiwa Moisés paka kui-itoroba. Daxota pexui pebinwüütixi pawithábame ichaxota pebíwichi xéinatsi xua ichaxota nareixa-kaena bekein pentakeiseikáe matakabi pataetham. Icha bara paichim pentakeiseikáe matakábitha, ¿eta pokotsiwa metha pana nekasébame xua pebin axaibi taexanaexae pentakeiseikáe matakábitha? ²⁴Paiñaxoba pebin payábara páebame xua penatsikuentsiwa xua abe peexanaexae Nakomtha poxonaе kataunxuae jopa payaputaem pokotsiwa pebin abe éxana. Jame metha kopiya pakuiyaputaema xua icha bara metha pebin abe éxana tsipéi methápara bárapo pebin wüünae éxana.

Meje yábara xua Jesús yábara paeba xua ichaxota kopiya pópona

²⁵Pomonaе Jerusalén tómaratha jinompa, poxonaе barapomonaе Jesús baxua jumetainchi, nayáñaba. Barapomonaе najéi:

—¿Metha ápara bapongje, pong yábara páebatsi ichamonaе xua bepa pinae pong bexubichi? ²⁶Bapong ápara jiwi peitabaratha paebungkuajeba. Íchitha dapong aibi pong pejumematawentsíwatsi bapong. ¿Metha poxoru pentakaponaewi bapong yábara nantaxéinatsi xua bapong barápara Mesías pong Nakom itoroba daxota jopa pejumeyo barapomonaе? ²⁷Íchitha waxainchi yaputainchi xua ichaxota wérena pona bapong. Jame poxonaе Mesías patopaena dapong aibi tsane pong yaputaena xua ichaxota wérena peponaewa Mesías, jei barapomonaе, pomonaе Jerusalén tomarapiwi.

²⁸Jesús kuiduba jiwi Nakom pin piabotha tatsi. Poxonaе Jesús baxua jumetane pokotsiwa jiwi paeba, bapoxonaе Jesús jumedangweya wawái, jeye:

—Pana neyábara kanantaxeinaeya yaitáneme. Yawa pana neyábara nantaxéiname xua payaputáneme xua ichaxota wérena taponawa. Ápara jopa tsipatopaeiño xua taexanaewanexa pokotsiwang ichichipang takoutha. Mexeya ápara daxota tsipatopang ichüng tana neitoróbixae pong xua yábara jumexaiñeichi xua barapong bara eka peitabókotha. Bapong paxam jopa payaputaem. ²⁹Bapong bara yaitang tsipéi bapong pexaiña wétsika ponang. Matáütano bapong neitorobika, jei Jesús.

³⁰Bapoxonaе bekein barapomonaе ichichipa xua Jesús pewaetabíwatsi, íchitha Jesús jopa waetabichi tsipéi kataunxuae Jesús pía matakabi jopa tapatopeikaetsi.

³¹Pin bicheitomonaе Jesús yábara jumekowúntatsi xua Jesús ápara bara Mesías. Barapomonaе Jesús yábara jeichichi:

—Bárapo pebin pexeiña petsita-itüütsi koyenewang éxana be pókotsi koyene báyatha Nakom peitorobi jume pepaebiwi paeba xua juiña pinae Mesías pokotsiwa exanaena, jei barapomonaе.

Meje yábara poxonaе fariseomonaе itoroba policiamonaе xua Jesús pewaetabiwa tsainchi

³²Bapoxónaerü fariseomonaе jumetane pokotsiwa jiwi Jesús yábara baraichi: “Bapong ápara Cristo”, xua jei jiwi. Néxata bapoxonaе fariseomonaе írürü sacerdotemonaе pía pentakaponaewi tatsi, daxita barapomonaе itoroba policiamonaе Nakom pin píabo beya xua Jesús pewaetabiwa tsainchi. ³³Néxata Jesús jei jíwitha:

—Saya kaeto paka barü popoinchi. Bapoxonaе pirapaeyo ekeicha takoya beicha Taxa beicha ponaein pong tana neitoróbixae. ³⁴Paxam pana newenawenam tsane íchitha jopa pana nekaxinaem tsane. Tspíeí jopa paka itaküüpáe tsane xua paiña neponaewa xua ichaxota taponawa tsane, jei Jesús.

³⁵Néxata judiomonaе kaemonaе nayáiñaba, najéi:

—¿Eta xota metha bapong ponaena xua jopa wakaxinaewa tsainchi? ¿Metha icha judiomonaetha ponaena jampa po judiomonaе icha nakua wérena pona po judiomonaе griegomonaе barü jinompa jampa? Metha pía bapoxonaе bapong kui-dubichi bárapo judiomonaе, griegomonaeno. ³⁶¿Eta xua metha baxua kaunuta poxonaе naka jei: ‘Paxam pana newenawenam tsane íchitha jopa pana nekaxinaem tsane, tspíeí jopa paka itaküüpáe tsane xua paiña neponaewa xua ichaxota taponawa tsane’, poxonaе xua naka jei? najéi judiomonaе.

Meje yábara poxonaе Jesús yábara paeba xua ira büxüpana mene epatoyaya ichawa beya mene pona

³⁷Po matakabi opidukuanáyaba xua po mataketha judiomonaе nakaetuta xua penabanaenexa pexaewa, bárapo matakabi bichokono peaiñakuí matakabi. Bárapo matakábitha Jesús unguua jiwi peitabaratha tatsi. Matáütano jumedangweya wawaya jeye:

—Icha ichüng meratsipa, bü pona xang bérena xua peapaenexa mera. ³⁸Nakom Pejume Diwésitha paeba: Pinae pong tana nejumekowüntsiwa bichokono jüntü-koyene yüüyüüka exanaponaeinchi pokoyene xua tana nejumekowüntsiwa, icha be pinae mene ichi tsane po mene ira büxüpana mene, po mene xua ichawa beya epatoyaya mene pona bichokono pemene nayüükaponaexae, jei Jesús.

³⁹Baxua Jesús paeba, xua pomonaе pejumekowüntsiwa tsainchi, barapomonaе pinae xeinaena Nakom pía Pejumopetünaxü tatsi. Íchitha kataunxuae Nakom pía Pejumopetünaxü tatsi aichika. Tspíeí kataunxuae Jesús jopa tüpaeyo náetotha. Matáütano tspíeí kataunxuae jopa ponaeyo Nakom beicha. Bapoxonaе bexa tsane barapomonaе pomonaе Jesús pejumekowüntsiwichi xeinaena Nakom pía Pejumopetünaxü tatsi.

Meje yábara poxonaе jiwi Mesías yábara najumematsontsónobatsi

⁴⁰Baxota írürü ena ichamonaе pomonaе Jesús jumetainchi poxonaе yábara paeba mera. Barapoxonaе barapomonaе najumematsontsonobiya paeba. Ichamonaе jeye:

—Ápara bárapo pebin pong Nakom peitorobi jume pepaebin, pong wüünae éwatatsi, pong bewa juiña patopaena, jei.

⁴¹Ichamonae jeye:

—Ápara bárapo pebin, bapong ápara Mesías pong Nakom itorobeika paeba peitaboko wétsika, jei.

Íchitha ichamonaerü jeye:

—Jume ápara, ápara Mesías aibi, tsipéi Mesías jopa patopaeyo Galilea nakua wérena. ⁴²Tsipéi Nakom Pejume Diwésitha jeye: ‘Bapong Mesías itorobarekaein. Bapong Mesías David pía pemómoxi susato jíwanapin tatsi, pong kaena báyatha Judea nakuamonae itorobiya pía pepa peewatsinchi tatsi náexana. Bapong Mesías Belén tómaratha naexanaena, po tómaratha David ichaxota pópona báyatha’, jei Nakom Pejume Diwésitha, jei barapomonae.

⁴³Daxota pinmonae najumematsontsónoba, tsipéi daxita barapomonae Jesús ichawa beya barompaya yábara nantaxéinatsi. ⁴⁴Barapomonae jíwanamonae bekein ichichipa xua Jesús pewaetabíwatsi, íchitha dapong aibi pong Jesús pewaetabíwatsi.

Meje yábara poxonae pentakaponaewi jopa Jesús yábara jumekowüntichi

⁴⁵Bapoxonae policiamonae pomonae Nakom pin píabo peyapueenaewi nawi-biya fariseomonae beya yawa sacerdotemonae pía pentakaponaewi tatsi béyano. Daxita barapomonae policiamonae yáñabatsi, jeichichi:

—¿Eta xua metha jopa pakarendenaem Jesús? jei daxita.

⁴⁶Bárapo policiamonae jumenota barapomonae, jeye:

—¡Dapong aibi ichüing pong beta pepaebiwa, icha bapong ichi xua beta wüünaeya paeba! jei.

⁴⁷Daxita néxata barapomonae policiamonae jumenótatsi, jeye:

—¿Paxam írürü jiwi pakuijúpame, xua írürü pajumekowüntame bekein bara bapong paka muxuitóroba? ⁴⁸Tsipéi ápara jopa payaputaem xua judiomonae pía pentakaponaewi tatsi jopa yábara jumekowüntsiyo bapong. Irü fariseomonae pía pentakaponaewi tatsirü jopa yábara jumekowüntsiyo bapong. ⁴⁹Pomonae Jesús jumekowüntatsi ápara barapomonae jopa yaputaeyo pokotsiwa Nakom paeba pía peitorobi jumeintha. Barapomonae ápara Nakom átene kana exanaena xua petsitansikuentésixaetsi xua abe petsita-exanáexaetsi, jei daxita fariseomonae.

⁵⁰Bárapo fariseomonae jíwanapin baxota eka, pong pewüing Nicodemo, pong merawitha báyatha Jesús siwapoinchi. Bapong Nicodemo jeye fariseomonaetha xua ichamonaetha:

⁵¹—Waitorobí koyenéwatha ba jeichichi: ‘Jopa bewa yábara paebichi pebin xua penatsikuentsiwa xua abe peexanaexae poxonae kataunxuae jopa jumetaetsi bapong pokotsiwa éxana. Jame kopiya matha bewa jumetaetsi xua bapong piakoutha nayopita xua pokotsiwa éxana’, ba jeichichi, jei Nicodemo.

⁵²Néxata fariseomonae Nicodemo jumenótatsi, jeye:

—¿Xam írürü barichim Galilea nakuapin naexáname, po Galilea nakuapiwi jopa beta yaputaeyo? Maisha jame matowa yórobare Nakom Pejume Diwesi. Xain yaputáneme xua dapong aibi pong xua Nakom peitorobi jume pepaebin, pong Galilea nakua wérena pona, jei fariseomonae.

**Meje yábara poxonae yábüyo abe éxana poxonae
nasikuiwainmeinta icha pebintha bekein pía pebin xeinaetha**

⁵³Néxata daxita barapomonaе barompaya piabong beiyiya.

8¹Néxata Jesús pona demuxuwa beya, po demuxuwa pewüing demuxu Olivowa. ²Icha matakábitha poxonaе pentha tsina, bapoxonaе ekeicha Jesús kaibeya pona Nakom pin píabo tatsi beya. Pinmonaе Jesús imoxoyo kakuita poinchi. Jesús eka yawa tamrópata pítaba xua pekuidubiwa jiwi. ³Bapoxonaе judiomonaе, pomonaе jiwi pekuidubiwi Moisés píа peitorobi koyene tatsi, írürü fariseomonaе, daxita barapomonaе karendena petsiriwa Jesús píа xantha tatsi. Barapomonaе kuitaеpona poxonaе bárapo petsiriwa nasikuiwainmeinta icha pebintha bekein píа pebin xeinaetha. Bapoxonaе daxita barapomonaе bárapo petsiriwa kuaranótatsi pin bicheito itabarayo deka xuano xua Jesús peitabarayo deka tatsi. ⁴Daxita fariseomonaе írürü judiomonaе, pomonaе jiwi pekuidubiwi Moisés píа peitorobi koyene tatsi daxita barapomonaе Jesús baraichi, jeye:

—Pong jiwi Nekuidubim, paxang jemeicha pakuitaеponang xua bárapo yábüyo abe éxana, poxonaе nasikuiwainmeinta icha pebintha bekein píа pebin xeinaetha. ⁵Moisés píа peitorobi koyenéwatha naka tsipaeba xua pinae bewa tüpa exanaetsi ibówangtha powaxi poxonaе bárapo koyene éxana xua abe éxana. ¿Ínkane irü xamdü? ¿Jiña eta xua pana netsipaebichi xua pata kana exanaewa bapówatha? jei.

⁶Baxua náemata Jesús yáíñabatsi, píа poxonaе Jesús abeya jumenotsina bapoxonaе píа barapomonaе Jesús abe yábara paebichi. Néxata bapoxonaе Jesús ira betaeungkuareka yáwano ira tınano pekobesítotha. ⁷Tsipéi barapomonaе matowa Jesús yáíñabatsi, daxota Jesús ekeicha nantakotaxuba. Yáwano barái barapomonaе, jeye:

—Kaein paxam jíwana pam, pong bápana jopa abe exanáе, bü bapong jame kopiya matha bapowa kuintábatsi ibótotha, jei Jesús.

⁸Ekeicha Jesús ira betaeungkuareka. Yáwano ekeicha Jesús ira tina pekobesítotha. ⁹Íchitha poxonaе barapomonaе Jesús jumetaинchi, bapoxonaе daxita barapomonaе barompaya nanthüthü kayábara nantaxeina xua irü abe éxana barapomonaе. Daxita barapomonaе Jesús píа xaiña weya tatsi tsana nanatsixibapona. Kopiya penapataewi pona, bapoxonaе kotakaya ichamonaе nawibiya, beya jiwaiibi. Saya meisha bárapo yábüyo kompa ungkua Jesús píа xantha tatsi. ¹⁰Bapoxonaе Jesús ekeicha nantakotaxuba. Yawa Jesús tane bárapo yábüyo xua kompa ungkua píа xantha tatsi. Jesús barái yábüyo, jeye:

—¿Ínkane dapomonaе? ¿Dapomonaе aibi pomonaе kayábara paeba xua nenasikuentsiwa xua abe neexanaexae Nakomtha? jei Jesús.

¹¹Barapowa Jesús jumenótatsi, jeye:

—Jume, Tanekanamataxeinaein, dapomonaе aibi pomonaе neyábara paeba xua tanatsikuentsiwa xua abe taexanaexae Nakomtha, jei.

Néxata Jesús barái bapowa, jeye:

—Xang írürü jopa kayábara paebí tsainchi xua nenatsikuentsiwa xua abe neexanaexae Nakomtha. Nawíyama, ekeicha jopa abe peéxanaе kuirukoyene exanaeinde, jei Jesús.

Meje yábara poxonae Jesús namchi, jeye: “Icha pekoicha ichi xua jiwi beta tanekana-exainchi mérawi, barichin xang jiwi kana éxanang xua Nakom beta peyaputáewatsi”, jei Jesús

¹²Ekeicha Jesús tsipaeba jiwi Nakom pin piabotha. Jesús jeye:

—Icha pekoicha ichi xua jiwi beta tanekana-exainchi mérawi, barichin xang jiwi kana éxanang xua Nakom beta peyaputáewatsi xua pomonae jinompa po kae pin nákuathe. Pong nejumekowünta, bapong xeinaena peajüntüyapusüüwa, po peajüntüyapusüüwa ataya tsiteka xua bapong jopa abe peexanaenexa, jei Jesús.

¹³Néxata fariseomonae Jesús baraichi, jeye:

—Xam ápara jiñakoutha nayábara diwesi páebame, daxota jopa be paka jumekowüntichi tsipéi jopa aiñakuiyo pokotsiwa páebame, jei fariseomonae.

¹⁴Jesús jumenota barapomonaetha, jeye:

—Xua xang nayábara diwesi páebang, baxua ápara xaiñang, bekein bara takoutha nayábara diwesi páebang saya. Tsipéi yaputang ichaxota wérena taponae xua ichaxota beya taponae tsane. Íchitha paxam jopa payaputaem ichaxota wérena taponae xua ichaxota beya taponae tsane. ¹⁵Paxam jiwi payábara páebame xua penatsikuentsiwa xua abe peexanaexae Nakomtha saya xua poxonae patáneme xua éxana icha po kae pin nakuathepiwi ichi. Xang jopa bápana jiwi yábara paebiño xua penatsikuentsiwa xua abe peexanaexae Nakomtha saya xua poxonae tang xua éxana. ¹⁶Icha jiwi yábara páebang xua penatsikuentsiwa xua abe peexanaexae Nakomtha bara pexaiñéi koyeneyatha éxanang. Tsipéi jopa bápana kompaiño poxonae jiwi yábara páebang xua penatsikuentsiwa xua abe peexanaexae Nakomtha tsipéi Taxa Nakom nebarü éxana baxua pong tana neitoróbixae. ¹⁷Paiña itorobi koyenewatha jeye: ‘Icha ichüngbe nantajüpaeya yábara páebabe pokotsiwa tánebe bewa bapongbe pajumekowüntsíname tsipéi baxua ápara aiñakuí’, jei. ¹⁸Xang takoutha nayábara diwesi páebang. Írürü Taxa neyábara diwesi paeba, pong tana neitoróbixae. Daxota Taxa pana nakueyatangbe, jei Jesús.

¹⁹Néxata barapomonae Jesús yáñabatsi, jeye:

—¿Ínkane Axa, eta xota póponara? jei.

Jesús jumenota, jeye:

—Paxam jopa pana neyaitaem, matáütano Taxa jopa payaitaem. Icha pana neyaitáetsipame bapoxonae metha payaitáetsipame Taxa, jei Jesús xua fariseomonae tsipáebatsi.

²⁰Baxuang Jesús kaunuta poxonae tsipaeba jiwi Nakom pin piabotha tatsi. Jesús imoxoyo ungkua ichaxota jiwi jeba parátixi Nakom nexa. Dapong aibi pong Jesús pewaetabíwatsi, tsipéi Jesús pía matakabi kataunxuae ta-aichíkatsi.

Meje yábara poxonae Jesús namchi: “Jopa paka itaküüpáe tsane xua paiña neponaewa tsane ichaxota taponae tsane”, jei Jesús

²¹Ekeicha Jesús jeye bárapo fariseomonaetha:

—Bexa ekeicha kaibeicha ponaein. Paxam pana neitaxanáename paiña tapaka kayawenaenexa tsainchi abe paiña neexanáe kuirukoyenein weya. Jopa paka kapanepae tsainchi abe paiña neexanáe kuirukoyenein weya xua poxonae pawerapáename. Jopa paka itaküüpáe tsane xua paiña neponaewa ichaxota taponae tsane, jei Jesús fariseomonaetha.

²²Néxata judiomonae kaemonae najéi:

—¿Eta pokotsiwa metha bapong naka tsipaeba xua pinae jopa tae tsainchi xuano xua pinae jopa naka itaküüpáe tsane xua waponae wa ichaxota bapong peponae wa tsane? ¿Metha piakoutha pía nabexuichi? jei judiomonae.

²³Néxata Jesús barái judiomonae, jeye:

—Paxam saya betsikepiwi pam. Xang seikaya nama athabeicha tapoponaein. Paxam seikaya nama po kae pin nakuathepiwi pam. Xang nama po kae pin nakua-thepin aibi. ²⁴Daxota báyatha paka jeichi: ‘Paxam jopa paka kapanepae tsainchi abe paiña neexanáe kuirukoyenein weya poxonae pawerapáename’, jang. Tsipéi jopa pana neyábara jumekowüntsime pokoyene xua bara tana neitaküüpaewa xua tapaka kayawenáewatsi, daxota pamuxuna werapáename abe paiña neexanáe kuirukoyenein, jei Jesús judiomonaetha.

²⁵Néxata barapomonae Jesús yáñabatsi, jeye:

—¿Jintam xamda? ¿Eta po jintom? jei.

Jesús jumenota barapomonae, jeye:

—Poxonae aena tamrópata pítabang xua paka kuidúbatsi, bapoxonae báyatha nayopichiya paka tsipáebatsi pokoyene xua ichaxota wérena taponae wa. ²⁶Akoibi nawita xua yábara tapaka tsipaebíwatsi pokoyene xua abe peéxanae kuirukoyenein paiña neexanaewa xua daxota Nakom patsita natsikuéntame xua abe paiña neexanaexae Nakomtha. Taxa neitoroba xua jiwi tatsipaebiwa pokotsiwa báyatha Taxa jumetang. Taxa bara yatsikaya jumexaiñeya paeba, jei Jesús.

²⁷Íchitha barapomonae jopa yaputaeyo poxonae Jesús jeye Nakom yábara: “Taxa”, jei xua ápara Paxa kaunuta, pong Nakom. ²⁸Daxota Jesús barái barapomonae, jeye:

—Poxonae paxam náetotha pana nékobe matatabarutsíname xang pongxaein Nakom Tananeitapétsinxae, bapoxonae pana neyaputáename xua deta kou ápara bárapo jintong xang. Matáütano pana neyaputáename xua xang jopa takoutha nayábara paebiño, saya xua kueikueijang pokotsiwa Taxa nekuiduba. ²⁹Tsipéi pong neitoroba ápara nebarü pópona. Taxa bápana jopa kompa pópona neexanáe tsipéi saya exaneibang pokotsiwa Taxa tsita wüünaetsi, jei Jesús.

³⁰Poxonae Jesús baxua kaunuta pinmonae judiomonae Jesús jumekowüntatsi.

Meje yábara poxonae Jesús yábara paeba Nakom pijimonae tatsi irü pomonae kaurimonae pía pentakaponaein tatsi piamonae tatsi

³¹Néxata bapoxonae Jesús barái judiomonae, po judiomonae Jesús pejumekowüntsixaetsi. Jesús jeye:

—Icha paxam wüünae pana nejumekowüntsiya exanaponaeya jinompáename pokotsiwa tapaka tsipaebíwatsi, bapoxonae bara pepa tajimonae pam tsane. ³²Bapoxonae payaputáename pokoyene pexaiñéi koyenewa. Matáütano papanenebiyáename pexaiña weya pong paka itoroba xua abe paiña neexanaewa, jei Jesús.

³³Bárapo judiomonae, Jesús jumenótatsi, jeye:

—Ápara paxang Abraham pía pemómoxi susato jiwi tatsi pang. Dapong aibi pong pana itoroba xua pata taexanaewa poxonae pana itoroba xua poxonae pana busitatane. ¿Eta pokotsiwa metha pana nejam: ‘Paxam papanenebiyáename pexaiña weya pong paka itoroba xua abe paiña neexanaewa’, pana nejam? jei pomonae Jesús jopa jumekowüntichi.

³⁴Jesús barái barapomonae, jeye:

—Xaniyang paka tsipáebatsi daxita pomonae xua abe peéxanae kuirukoyenein éxana barapomonae bara éxana pokoyenein pía pepong itoróbatsi icha jintong ichi pong amanaya tanakuita ichüing xua poxonae bewa exanáe pokotsiwa peitorobixaetsi poxonae busikuitatainchi. ³⁵Pong ba amanaya tanakuita ichüing, bapong ba ápara piamonae aibi pomonae peitorobixaetsi, tsipéi bapong pebusikuitaetaeinchi. Íchitha pong ba xua ichüing pexántoxae tatsi, bapong ba ataya pexanto tatsi bara piamonae pexeinaexae bapong. ³⁶Daxota xang Nakom Pexantong, icha panenebiya paka kana exainchi kaurimonae pía pentakaponaein tatsi weya, pong xua paka itorobeiba xua abe paiña neexanaewa, barapoxonae bara ataya paka kapanenebiya tsoponeibi tsainchi bapong pexaiña weya tatsi. ³⁷Báyatha yábara paka yaputainchi xua Abraham pía pemómoxi susatopiwi tatsi pam. Dáichitha paichichípame xua pana nebexúbame, jopa paiña neichipaexae xua paiña nejumetaewa pokotsiwa paka tsipáebatsi. ³⁸Xang yábara páebang pokoyenein xua Taxa netsita-itüüta. Paxam paéxaname xua pokoyenein paiña axa paka itoroba, jei Jesús.

³⁹Barapomonae Jesús jumenótatsi, jeye:

—¡Pata tamo susatopin pong be pata taxa patsikotang, bapong ápara Abraham! jei barapomonae.

Íchitha Jesús jumebarái, jeye:

—Icha bara Abraham pía pexui tatsi pam tsipaem, metha bara paexanaetsípame pokotsiwa bapong báyatha kaena éxana. ⁴⁰Bekein bara paka tsipáebatsi pokoyene pexaiñeiwa xua pokoyene Nakom nekuiduba, íchitha paichichípame xua pana nebexúbame. Ápara Abraham jopa bápana baxua daichi. ⁴¹Paxam bara barapokotsiwa paéxaname pokotsiwa paiña axa éxana, jei Jesús.

Néxata barapomonae Jesús baraichi, jeye:

—Paxang dapomonae pang aibi pomonae piakoibi jiwi pang, tsipéi pata taena jopa nasikuiwainmeinchiyó. Paxang xaniwaicha payaputang xua bara kompa painta pata taxa, bapong Nakom, jei barapomonae.

⁴²Néxata Jesús jumebarái, jeye:

—Icha bara Nakom pía pexui pam tsipaem metha pana neántobe tsipaem. Tsipéi Nakom bapong pía xaiña wétsika ponang, anoxuaeno bara úngkuangje. Ápara jopa daxua tsipatopaeiño xua takoutha tana nayábara paebiwa tsane. Saya patopang poxoru Nakom neitoroba. ⁴³Paxam jopa payaputaem xua paka tsipáebatsi poxoru jopa be paiña nejumetaexae baxua pokotsiwa paka tsipáebatsi. ⁴⁴Kaurimonae pía pentakaponaein tatsi, bapong ápara paiña axa. Bárapo kaurimonae pía pentakaponaein tatsi bapong piamonae tatsi pam daxota paéxaname pokotsiwa bapong paka itoroba. Bárapo kaurimonae pía pentakaponaein tatsi jiwi jutebapoinchi poxonae Nakom aena nakua fórota weya, xua beya ánoxuae. Bapong bápana jopa xaiñeya pepaebin tsipéi po jüntükoyene Nakom xaiñeya peyábara paebíwatsi jopa xeinaeyo. Poxonae bapong naerabiya paeba, baxua paeba tsipéi bárapo penáerabi jüntükoyene xeina. Bapong jiwi itoróbatsi xua jiwi naerabiya pepaebiwiwa tsane. ⁴⁵Paxam bapong piamonae tatsi pamxaem daxota jopa xaniwaicha pana nejumekowüntsím pokotsiwa xaiñeya tapaebiwa. ⁴⁶Paxam kaein jíwana pam dapong aibi pong tana neyábara jeiwa: ‘Maisha bapong abe éxana’, pong tana neyábara jeiwa. Bekein bara pexaiñeí jume paka tsipáebatsi dáichitha jopa pana nejumekowüntsím. ⁴⁷Pong ba Nakom piamonae tatsi namuxunáewata pokotsiwa Nakom paeba.

Paxam ápara jopa Nakom piamonae tatsi pam, daxota jopa be pajumekowüntsim pokotsiwa Nakom paeba, jei Jesús xua judiomonae tsipáebatsi.

Meje yábara poxonae Jesús namchi: “Poxonae kataunxuae Abraham jopa poponaeyo, kaena býatha tsiwanaya ataya poponeibang”, jei Jesús

⁴⁸Néxata ekeicha judiomonae Jesús baraichi, jeye:

—Bara xaiñeya paka yábara páebatsi poxonae pana najang: ‘Bapong ápara Samaria nakuamonaepin, ápara yakauríbatsi’, poxonae paka yábara jeichichi, jei judiomonae.

⁴⁹Jesús jumenota, jeye:

—Xang ápara kauri jopa nebarü poponaeyo. Saya xua éxanang barapokotsiwa jiwi kana éxanang xua Taxa wüünae pejainchíwatsi, íchitha nama paxam pana nekasébame, saya abeya pana neyábara páebame. ⁵⁰Jopa netsita aiñakuiyio xua jiwi wüünae tana nejainchiwa. Bekein Taxa ichichipa xua jiwi wüünae tana nejainchiwa. Bapong Taxa yábara paebina jiwi pomonae xua abe peexanaewa xua penatsikuentsiwa xua abe petsita-exanáexaetsi. ⁵¹Xaniyang paka tsipáebatsi pong nejumekowüntsiya exanaena pokotsiwa páebang, bapong jopa bápana túpáe tsane, jei Jesús.

⁵²Bapoxonae judiomonae Jesús jumenótatsi, jeye:

—Bara xaniwaicha payaputang xua xam kayakáuriba. Abraham írürü pomonae Nakom peitorobi jume pepaebiwi daxita barapomonae kaena býatha wérapa. Íchitha xam pana nejam: ‘Pong nejumekowüntsiya exanaena pokotsiwa páebang, bapong jopa bápana túpáe tsane’, pana nejam. ⁵³¡Xam ápara jopa toxeincha aiñakuim Abraham pong pata tamo susatopin! Bapong kaena býatha tupa írürü kaena býatha wérapa pomonae Nakom peitorobi jume pepaebiwi. ¿Eta xua metha jiñakoutha nantaxéiname xua ichamonae kayakábara nantaxeinaena xua xam pong peaiñakuí jintom? jei judiomonae.

⁵⁴Jesús jumenota, jeye:

—Icha saya kompa xang takoutha wüünae najaintang baxua jopa xapain wüünaeyo. Jame pong wüünae nejainta bapong ápara Nakom, pong payábara jam: ‘Ápara pata Taxa, bapong Nakom’, pajam. ⁵⁵Bekein baxua papáebame dáichitha jopa xapain payábara yaputaem Nakom. Xang Nakom yaputang. Íchitha icha jang tsipaein: ‘Bapong jopa yaputaeiño’, jang tsipaein, metha ápara naerabíchipang icha paichim xua naerabiya papáebame. Íchitha xang yatsikaewa yaputang Nakom daxota bara baxuang itapeta éxanang xua pokotsiwa tana neitoróbixae pong Taxa bapong Nakom. ⁵⁶Abraham paiña amo susatopin býatha yábara wüünae yaputane xua tapatopaewa tsane po kae pin nákuathe tsike. Daxota bapong bichokono jüntükoyene weiweina. Bara xaiñéi patopang po kae pin nákuathe tsike daxota bichokono jüntükoyene weiweina bapong.

⁵⁷Néxata judiomonae Jesús baraichi, jeye:

—Ápara pena jintom kataunxuae, jopa xeinaem ápara cincuenta po weibe. ¿Eta pokotsiwa metha jam: ‘Abraham tang’, jam? Bara kaena býatha Abraham túpaba, jei judiomonae.

⁵⁸Jesús jumenota, jeye:

—Xaniyang paka tsipáebatsi poxonae kataunxuae Abraham jopa poponaeyo kaena býatha tsiwanaya ataya poponeibang, jei Jesús judiomonaetha.

⁵⁹Néxata bapoxonae barapomonae anaepanaya ibowang notarúkupa pekuin-babinéxatsi Jesús. Íchitha Jesús nantsiyatáraba yawa pónataba Nakom pin píabo weya. Jesús xenta iya, barapomonae pía xaiña iya tatsi.

**Meje yábara poxonae Jesús axaibi éxana pong
peitatanakütsin, pong xua pexúyotha yawa nakatsiwa**

9¹Írürü Jesús Nakom pin píabo weya barü pona pijimonae xua poxonae nám-totha barü ekaona. Bapoxonae Jesús kaxina pebin pong peitatanakütsin xua pong pexúyotha yawa nakatsiwa. ²Jesús pijimonae yaiñabíyatsi, jeye:

—Patatanekuidubim, ¿eta pokotsiwa metha bapong ítata nakütsiya náexana? ¿Metha poxoru paxa tatsi abe éxana? ¿Metha poxoru pena tatsi abe éxana? ¿Icha-kuiña metha tsipae poxoru bapong piakoutha abe éxana? jei barapomonae.

³Jesús pijimonae jumebarái, jeye:

—Jume ápara, jopa ápara ítata nakütsiyo poxoru abe peexanaexae bapong. Matáütano jopa ápara baxua xua paxa tatsi abe peexanaexae. Matáütano jopa ápara baxua xua pena tatsi abe peexanaexae. Jame ápara bapong ítata naküta xua jiwí peyaputaenexa xua Nakom peyapusüüwa xeina xua axaibi peexanaenexa tsainchi bapong. ⁴Jintong ba nakuíta poxonae kataunxuae pentha tsungkuae. Poxonae kirei tsuxubi pebin ba jopa itaküüpaetsi xua penakuichiwa. Xang barichin. Poxonae kataunxuae póponang po kae pin nákuathe bewa exanaein tanakuichiwa. Bárapo tanakuichiwa ápara pía penakuichiwa tatsi pong tana neitoróbixae. Poxonae tüpaein jopa neitaküüpa tsane xua taexanaewa bárapo tanakuichiwa xua báyatha Nakom neitoroba. ⁵Poxonae kataunxuae po kae pin nákuathe popónangje jiwí yawenang xua Nakom beta peyábara yaputaewa tsainchi, icha jintong ichichi pekoicha xua yawénatsi mérawi xua beta penekotsiwa, jei Jesús pijimonaetha.

⁶Poxonae Jesús baxua najumeweta, bapoxonae íratha naonesutaba, yawa peónetha tsoroboyo nakobena ponaxuba. Bapoxonae Jesús bárapo tsorobóyotha itakuere kaxueba péitata nakütsin. ⁷Néxata Jesús barái bapong, jeye:

—Pónare fétiyo beya, po fétiyo pewüng Siloé. Bárapo Siloé fetíyotha naitakuere waexore, jei Jesús. (Bárapo Siloé fétiyo wüng jei: ‘Po fétiyo Nakom itoroba’, jei.)

Pong péitata nakütsin pona fétiyo beya náitata waexúbano. Poxonae ekeicha bapong kaibe iya Jesús beya, nama bara itaküüpaetsi xua petaewa. ⁸Bapong pía petsikuárabü enáewichi tatsi, írüno pomonae pekuiyaputaexaetsi xua poxonae bapong aitatabeya pópona daxita barapomonae bapong yábara katsipáebatsi. Ichamonae jeye:

—¿Ápara bapongda pong íratha jiwí wüükekéibara parátixi? jei.

⁹Ichamonae jeye:

—Aa, ápara bapong, pong íratha jiwí wüükekeiba parátixi, jei.

Ichamonae jeye:

—Ápara bapong aibi. Saya ápara be bapong, jei.

Íchitha pong peitatanakütsin piakoutha jeye:

—Ápara bara xang tsokuaein, jei.

¹⁰Néxata daxita barapomonae peitatanakütsin yáñabatsi, jeichichi:

—¿Eta xua metha ánoxuae táneme? jei daxita barapomonae.

¹¹Pong peitatanakütsin jumenota barapomonae, jeye:

—Pong pewüing Jesús, bapong tsoroboyo peónetha nakobenapóntaba, bapoxonae bárapo tsorobóyotha neitakuere kaxueba. Yawa nejéi: ‘Fétiyo beya pónare, po fétiyo pewüing Siloé. Bárapo fetíyotha naitakuere waexore’, nejéi. Bara bara beya ponang. Poxonae baxota naitakuere waexubang, bapoxonae bara tang, jei bapong.

¹²Bapoxonae peitatanakütsin yáíñabatsi barapomonae, jeichichi:

—¿Ínkane dapó pebin, pong kaaxaibi éxana? jeichichi.

Bapong jumebarái bapomonae, jeye:

—Bü, kanta jopa taeiño, jei bapong.

**Meje yábara poxonae pong ekeicha xua ítata wüünae
matowa yáíñabatsi xua fariseomonae matowa yáíñaba**

¹³Pong xua ekeicha ítata wüünae, pomonae pía petsikuárabü enáewichi tatsi barapomonae bapong kapoinchi fariseomonae beya. ¹⁴Íchitha po mataketha Jesús axaibi éxana pong peitatanakütsin, xua poxonae tsoroboyo peónetha nakobenapóntaba, bárapo matakabi ápara judiomonae pía pentakeiseikáe matakabi tatsi.

¹⁵Bapoxonae bapong yáíñabatsi fariseomonae, jeye:

—¿Eta bichim xua ánoxuae jamaisha nekótame? jei fariseomonae.

Bapong jumebarái, jeye:

—Bapong tsoroboyo peónetha neitakuere kaxueba. Bapoxonae naitakuere wae-xubang mératha. Bapoxonae yawa bara nekotang, jei fariseomonaetha.

¹⁶Bapoxonae fariseo jíwanamonae bapong baraichi, jeye:

—Pong kaaxaibi éxana ápara Nakom jopa bapong itorobikaeyo, tsipéi bapong jopa yábara barükui-iturajinaeyo bárapo pentakeiseikáe matakabi, jei fariseo jíwanamonae.

Ichamonae jeye:

—Icha bapong peajüntükoyenebein, ¿metha néxata eta pokotsiwa pexeíña petsita-itüütsi koyenewa éxana? jei.

Daxita bárapo fariseomonae nantiya najumematsontsónoba. ¹⁷Ekeicha fariseomonae, pong báyatha itakuere axaibi exainchi, bapong yáíñabatsi, jeichichi:

—¿Ínkane xam, eta xua yábara nantaxéinamerü pong ka-aitakerexaibi éxana? jei fariseomonae.

Bapong jume epapita, jeye:

—Yáitama bapong neaxaibi éxana metha moya bara bapong, pong Nakom peitorobi jume pepaebin, jei bapong.

¹⁸Íchitha judiomonae jopa bejumekowüntsiyo pokotsiwa pong peitatanakütsin báyatha itakuere axaibi exainchi xuano xua ánoxuae itaküüpatsi xua petaewa. Daxota bapoxonae bárapo judiomonae pong itakuere axaibi exainchi paxa tatsi wábatsi, yawa pena tatsi wábatsi. ¹⁹Bárapo judiomonae jeye koxiyüngbetha:

—¿Bapongje bara yatsikaya paiña nexanto? ¿Ápara bara bapong pong báyatha yaitatanakütsiya nakatsiwa? ¿Eta bichi xua ánoxuae itaküüpatsi xua penekotsiwa? jei judiomonae.

²⁰Bárapo koxiyüngbe jumenótabe, jeibe:

—Bara yatsikaewa payaputang xua bapong barápara pata taxanto. Matáütano payaputang xua báyatha bapong ítata nakútsiya nakatsiwa. ²¹Dáichitha jopa payaputaieño xua eta bichi xua bapong ánoxuae nekota. Matáütano jopa payaputaieño xua pong pata taxanto itakuere axaibi exainchi. Paxam moya bara

bapong payáñabare. Bü néxata bapong piakoya paka jumenotsina tsipéi ápara báyatha piño, jeibe koxiyüingbe.

²²Bárapo koxiyüingbe kunuwa judiomonae kunúwatsi. Tsipéi judiomonae báya-tha jei: “Pomonae Jesús yábara jumekowúntatsi, pomonae xua jeye: ‘Jesús ápara bapong Mesías pong Nakom itorobika’, pomonae jeye, barapomonae paitawetang pata penakaetútsibo weya”, jei bárapo judiomonae. Daxota bárapo koxiyüingbe pijunuwi jopa jeibe: “Ápara bapong Jesús pong Mesías bapong painta taxanto itakuere axaibi exainchi”, jopa jeibe. ²³Daxota bárapo koxiyüingbe bárapo judiomonaetha jeibe: “Paxam moya bapong payáñabare. Bü néxata bapong piakoya paka jumenota tsipéi báyatha piño”, jeibe koxiyüingbe.

²⁴Bapoxonae ekeicha judiomonae pong itakuere axaibi exainchi yáñabatsi, jeichichi:

—Yatsikaewa xaiñeya pana netsipáebare xua írürü Nakom nekajumetae-nexa. Paxang payaputang xua Jesús bapong ápara pong peajüntükoyenebein, jei judiomonae.

²⁵Bapong jumenota bárapo judiomonaetha, jeye:

—Xang jopa yábara yaputaeiño xua icha metha bapong pong peajüntükoyenebein. Saya meisha yaputang xua kopiya taitatanakütsin xuano xua ánoxuae neitaküüpa xua tanekotsiwa, jei bapong.

²⁶Ekeicha bárapo judiomonae bapong yáñabatsi, jeichichi:

—¿Eta kaitakuere ichi poxonae ka-aitakuerexaibi éxana? jei judiomonae.

²⁷Bapong jumenota bárapo judiomonae, jeye:

—Bara báyatha paka tsipaebatsiba. Kame jopa yábara pana nejumekowúntsim. ¿Eta xua metha ekeicha bepa baxua matowa paka tsipaebichi? ¿Paiña írürü naexanaetsi Jesús pijimonae tatsi? jei bapong.

²⁸Íchitha bárapo judiomonae bapong biatainchi, jeichichi:

—Xam moya Jesús piamonae jintong tatsi naexande, nama paxang Moisés pía peitorobi koyenewa pata exanaponae jiwi. ²⁹Paxang payaputang xua Nakom Moisés itoróbatsi. Íchitha nama pong ka-aitakuerexaibi éxana jopa payaputaeiño xua ichaxota wérena peponaewa xua ichüing peitorobixae, jei judiomonae.

³⁰Bapong jumenota, jeye:

—¡Jina! Paxam jopa payaputaem xua bapong Jesús ichaxota wérena peponaewa xua bekein paiña tana netaewatham xua Jesús tana neaitakuerexaibi exanaewa.

³¹Waxainchi yaputainchi bara, xua Nakom jopa jumenaitaewatsiyo pomonaetha, pomonae abe peexanaewi xua peyawenaewanexa. Nakom saya meisha jumenaitáewata pomonaetha, pomonae wüünae pejainchixaetsi. Matáütano Nakom saya jumenaitáewata pomonaetha, pomonae peitorobixae xua pía petaexanaewa tsainchi pokotsiwa bapong peichichipaexae. ³²Poxonae aena Nakom nakua fórota, bapoxonae xua beya ánoxuae, dapong aibi pong ichüing itakuere axaibi exainchi pong peitatanakütsin. ³³Icha bapong Nakom jopa itorobi chipae, metha bapong jopa itaküüpáe tsipaetsi xua ichüing itakuere axaibi peexanáewatsi, pong peitatanakütsin, jei bapong.

³⁴Néxata bapong baraichi, jeichichi:

—Daxota ítata nakútsiya naexáname tsipéi ajüntükoyenebeyá naexáname. ¡Dakotsiwa ápara ichichípame pana nekuidúbame kai! jei judiomonae.

Bapoxonae bapong itawétatsi judiomonae pía penakaetútsibo tatsi weya.

Meje yábara poxonae Jesús yábara paeba pomonae jopa Nakom yaputaetsi

³⁵Jesús yaputane xua pong báyatha itakuere axaibi exainchi itawétatsi judiomona pía penakaetútsibo tatsi weya, xua judiomona itaweta. Poxonae bapong Jesús kaxina, Jesús jeye:

—¿Xam yábara jumekowúntame pong Nakom pía Peitapetsin tatsi? jei Jesús.

³⁶Bapong jumebarái Jesús, jeye:

—Pong Nekanamataxeinaem jiwi, ínkané netsipáebare, ¿Ínkane bapong pong Nakom pía Peitapetsin? Bapoxonae tha jumekowúntichi, jei pong peitatanakútsin.

³⁷Jesús jumenota, jeye:

—Xam ápara bapong báyatha táneme pong Nakom pía Peitapetsin tatsi. Pong aunxuaein katsipáebatsi, ápara bara xang, jei Jesús xua nabarái.

³⁸Néxata bapong pentabokototha unguwa Jesús peitabaratha tatsi xua Jesús wüünae pejainchinéxatsi. Bapong jeye:

—¡Tanekanamataxeinaem, kajumekowúntatsi bara! jei bapong.

³⁹Bapoxonae Jesús barái, jeye:

—Bárapo kae pin nákuathe patopeikang xua jiwi tayábara paebinxá xua penatsikuentsiwa xua abe peexanaexae Nakomtha. Pomonae xua báyatha jopa Nakom kayábara yaputaetsi barapomonae kana exanaein xua barapomonae Nakom kayábara yaputaeinchi. Pomonae xua báyatha bekein nantaxeina xua Nakom kayábara yaputainchi barapomonae kana exanaein xua barapomonae ekeicha jopa Nakom kayábara yaputáe tsainchi, jei Jesús.

⁴⁰Bapoxonae fariseo jíwanamona, pomonae Jesús barü unguwa, poxonae barapomonae Jesús jumetaínchi, Jesús yáíñabatsi, jeye:

—¿Ápara pana bará xua ekeicha jopa payábara yaputaein tsane Nakom? jei fariseo jíwanamona.

⁴¹Jesús jumenota, jeye:

—Icha paxam báyatha jopa payábara yaputaem tsipae Nakom, jopa ápara paiñakoutham tsipae xua poxonae abe paiña neexanaewa. Íchitha mexeya poxoru pajam: ‘Payaputang Nakom’, pajam daxota ápara paiñakoutham xua bara abe paiña neexanaewa, jei Jesús.

Meje yábara poxonae Jesús yábara paeba pong oveja pe-eenaein

10¹Ekeicha Jesús namchi: “Xaniyang paka tsipáebatsi diwesi xua pata neyábara yaputaewam tsane. Pebin ba oveja pía kurara boupa iya joniya. Íchitha pong peboupa jopa joniyaeyo, saya ekoiña icha muxunene wérena, bapong ápara pong pekaibin oveja. ²Pong jame joniya pepa boupa iya bapong ápara pong pe-eenaein oveja. ³Pong peboupa xatababin, bapong boupa saranaxorena pong oveja pe-eenaein taboupa saranaxorénatsi. Poxonae pong oveja pe-eenaein júnuta oveja, bárapo oveja jumekopiyaputane baxua. Pong oveja pe-eenaein, bapong daxita bárapo oveja barompaya pía wüngxitha júnuta. Bapoxonae bapong kurara weya matakoniya ovejamona. ⁴Poxonae kurara weya matakoniya daxita bapong matakaekapona yawa puna enapoinchi pejumekopi yaputaexaetsi. ⁵Íchitha bárapo ovejamona jopa punaponaeyo ichüngtha, pongtha pong jopa yaitaeyo. Saya kuitaya dúkupa tsipéi ichüng jopa jumekopiyaputaetsi”, jei Jesús.

⁶Jesús tsipaeba barapomonae bárapo pekayábara jüta pepaebi diwésiyo poxonae oveja yábara paeba, dáichitha kame barapomonae jopa yaputaeyo bárapo diwesi.

Meje yábara xua Jesús pong beta pe-eenaen jiwi

⁷Néxata ekeicha Jesús tsipaeba barapomonae, jeye: “Icha oveja ichi xua kuráratha jojoniya xua peboupa peyawenaexaetsi, barichi jiwi xua Nakom pía nakuathei-cha tatsi pata poxoru xangxaein xua tayawenaexae. ⁸Daxita pomonae netsíwana pata, pomonae xua jei: ‘Nakom pana itoroba’, jei, barapomonae ápara pomonae jiwi pemuxujaiñabiwi. Íchitha jiwi jopa yábara jumekowüntsiyo barapomonae, icha oveja ichi xua aichaxaibi pepunaponaewa ichüngtha jopa pejumekopi yaputaexae. ⁹Xang jiwi tayawenaen daxota pong nejumekowünta yawenang xua pepatopaewa Nakom beicha. Icha oveja ichichi xua mérawi kuráratha yaboupa xatatábatsi xuano xua matakeitha yausaranaxorénatsi xua pexaenexa naepa-naewa, barichi pomonae tana nejumekowüntsiwi barapomonae beta yawenang.

¹⁰”Pong pekaibin patopa xua saya pekaibinexa oveja, yawa xua saya abe peexa-naenexa yawa pebexubinexa. Íchitha nama xang patopang xua jiwi takatsinexa peajüntüyapusüüwa, po peajüntüyapusüüwa jopa werawerakaeyo xua jiwi jopa juniya mataropeichiya xexeinaponae tsane bárapo peajüntüyapusüüwa. ¹¹Pong beta pe-eenaen oveja, bapong tsitüpa pía ovejamonae, tsipéi jopa ichichipaeyo xua petajutebíwatsi pía ovejang tatsi xua poxonae pomonae pekaibiwi jutebina. Barapókotsi koyene ichi jiwi beta ta-eenaen. Jiwi tsitüpaen xua barapomonae takapanepaenexa. ¹²Íchitha pong tanakuita ichüng xua tayapu-eéna oveja ápara saya pía paratixichi. Poxonae bapong neuthü tane pijunuwi, oveja kuenta naetsí-riwa, tsipéi bárapo ovejamonae pía ovejamonae tatsi aibi. Poxonae neuthü icha ovejang téikatsi, bapoxonae icha ovejamonae tsanaóthopa. ¹³Bapong naetsíriwa tsipéi saya oveja eena xua pía paratixichi, xuano xua jopa xapain peyábara nantaxeinaexae ovejamonae.

¹⁴⁻¹⁵”Xang natsikotang be pong ovejamonae beta tayapu-eenaen tsipéi beta ta-eenaen pomonae tana nejumekowüntsiwi. Taxa neyaitane, xuya Taxa yaitang. Barichi yaitang pomonae tana nejumekowüntsiwi, xuya barapomonae neyaitane. Xang tana nejumekowüntsiwi yaitatsin xua tatsitüpaenexa náetotha xua jopa pewerawerakaewa tsane barapomonae. ¹⁶Barichi xeinang icha tana nejumekowüntsiwi pomonae jopa israelmonaeyo. Barapomonae bewa írürü nakaetuta exanaen xangtha pomonae kaena báyatha tana nejumekowüntsiwi irü pomonaeno xua bexa nejumekowüntsinano. Kae bicheito exanaen. Barapomonae exanaena pokotsiwa itorobang. Matáütano xeinaena bara kompa xua xang pongxaein beta ta-eenaen, icha pebin ichi pong ovejamonae peyapuenaein xua poxonae ovejamonae kaetukaetuteta kae kuráratha.

¹⁷”Taxa bichokono neántobe tsipéi tsitüpaen pomonae tana nejumekowüntsiwi. Íchitha ekeicha asüüing tsane. ¹⁸Dapong aibi pong xua piakoutha tana nebexubiwa. Saya jame poxonae takoutha ichichipang. Xang itakoxonang xua bara jiwi tatsitüpaewa. Matáütano itakoxonang xua ekeicha asüü tapoponaewa tsane petüpaewa weya. Baxua itakoxonang xua taexanaewa, Taxa tana neitoróbixae”, jei Jesús.

¹⁹Poxonae bárapo judiomonae Jesús baxua jumetainchi, bapoxonae ekeicha bárapo judiomonae yábara najumematsontsónoba. ²⁰Ichamonae judiomonae yáñaba xua icha judiomonae yáñabatsi, jeichichi:

—¿Eta xua metha bapong pajumenaitáewatame pokotsiwa bapong paeba? ¡Ápara matayáibatsi! ¡Kauri xeina ápara! jei judiomonae.

²¹Ichamonae jeye:

—Dapong aibi pong wüünae pepaebiwa icha yakauríbatsi. Kaurimonaepin jopa bápana itaküüpaetsi xua pong peitatanakütsin axaibi peexanáewatsi, jei ichamonae.

Meje yábara poxonae judiomonae Jesús jume itawétatsi

²²Poxonae awüübo daxita jiwi nakaetuta Jerusalén tómaratha xua penabanaenexa pexaewa. Bárapo penakaetutsi matakabin poxonae nábane jiwi yábara nantaxeina xua kaena báyatha piamonae tatsi ekeicha xaneba Nakom pin píabo tatsi poxonae ichamonae abe éxana. Barapomonae baxua yábara nakaetuta peyábara paebinexa xua bárapo bo Nakom nexa. ²³Jesús pópona Nakom pin píabo tauchipa boutotha. Bárapo Nakom pin píabo tauchipa bouto pewüng Salomón. ²⁴Baxota judiomonae Jesús imoxoyo kakuita umenarükúpatsi yawa Jesús jeichichi:

—¿Eta po matakábibe metha aiña muxu paxeinaein xua pata kayábara yaputaewa tsainchi? Icha bara yatsikaya Mesías xam, moya pana netsipáebare, jei.

²⁵Jesús jumenota, jeye:

—Bara báyatha paka tsipaebatsiba íchitha jopa pana nejumeyábara kowüntsím. Pokotsiwa xua éxanang, xua Taxa tana neitoróbixae, baxua ápara bara paka tsita naitapeiña xéinatsi xua xang ápara bara Mesías. ²⁶Baxua jopa pana neyábara jumekowüntsím tsipéi jopa tajimonae pam be pókotsi koyeneya aunxuae báyatha paka tsipáebatsi. ²⁷Pomonae tana nejumekowüntsiwi nejumekopiyaputane yawa nepunapona, icha ovejamonae ichi xua jumekopiyaputane pongtha pong pe-enaexaetsi xuano xua bárapo ovejamonae punapona xua bapong punapoinchi. ²⁸Tana nejumekowüntsiwi katang peajüntüyapusüüwa, po peajüntüyapusüüwa xua bápana jopa pewerawerakaewa tsane. Matáütano ichamonae jopa itaküüpaetsi xua tana newekobenotsiwa xua tamonae inta nótatsi. ²⁹Taxa barapomonae nekata. Barapong Taxa bichokono toxecha kaein aiñakuí, beyakaincha ichüng xua aiñakuí. Dapong aibi pong Taxa wekobenótatsi xua piamonae tatsi tanótatsi. ³⁰Xang, irü Taxa bara kaein pangbe, jei Jesús.

³¹Néxata judiomonae ibótoxi nota xua Jesús pekuinbabiwa tsainchi. ³²Jesús barái barapomonae, jeye:

—Paxamtha matowa exaneibang pexeiña tatsita-itüütsi koyenewang Taxa pía peayapusüüwatha tatsi. ¿Eta po tatsita-itüütsi koyenewang taexanaexae ibotoxitha paiña nekuinbabichi? jei Jesús.

³³Judiomonae jumenota, jeye:

—Jopa ápara daxota paka kuinbabichi poxoru pexeiña petsita-itüütsi koyenewang neexanaexae. Daxota paka kuinbábatsi tsipéi jam: ‘Xang irü Taxa bara kaein pangbe’, jam. Baxua ápara abe páebame tsipéi be Nakom naexáname jiñakoutha poxonae saya pebim, jei judiomonae.

³⁴Jesús barái, jeye:

—Nakom Pejume Diwésitha yábara páebatsi pomonae Nakom pejumekowüntsíwichi. Nakom jeye: ‘Paxam írürü nakommonae pam’, yábara jei Nakom, pomonae pejumekowüntsiwixaetsi. ³⁵Nakom paeba xua pinae pomonae

petajumekowüntsiwixaetsi pejume diwesi barapomonae pinae bara nakommonae tsenae. Matáütano waxainchi yaputainchi bárapo diwésitha xua jopa bápana Nakom naerabiyo. ³⁶Nakom neitapeta, neitoróbano tapatopaenexa bárapo kae pin nákuathe. ¿Eta xua metha papáebame xua xang abe páebang poxonae jang: ‘Xang Nakom Pexantong’, jang? ³⁷Icha jopa exanaeíño pokotsiwa Taxa neitoroba paiñaxoba pana nejumekowüntame baxua. ³⁸Icha éxanang pokotsiwa Taxa neitoroba, bapoxonae pana nekuiyábara jumekowünde pokotsiwa éxanang, bekein jopa pana nejumekowüntsim xua paka tsipáebatsi. Bapoxonae xain payaputáename xua xang Taxa nebarü pópona, xua barichin xua Taxa barü póponang, jei Jesús.

³⁹Ekeicha barapomonae ichichipa xua Jesús pewaetabíwatsi íchitha Jesús naetsíriwa barapomonae weya.

⁴⁰Néxata Jesús pijimonae kaibe barü náwiya icha muxunene beya xua Jordán ménetha. Baraxotiya Jesús pijimonae barü eka, ichaxota Juan báyatha jiwí bautisaba. ⁴¹Pin bicheitomonae Jesús siwapoinchi pejumetaenéxatsi. Barapomonae Jesús yábara natsipáebatsi, najéi:

—Xaniyéi bekein Juan pexeíña petsita-itüütsi koyenewang jopa exanaeyo dáichitha daxita pokotsiwa xua Jesús yábara páebatsi, daxita baxuang bara ápara xaiñéi, najéi barapomonae.

⁴²Baraxotiya pin bicheitomonae Jesús yábara jumekowüntatsi.

Meje yábara poxonae Lázaro tüpa

11 ¹Irü pebin pópona, pong pewüing Lázaro. Bapong átene. Bapong Betania tomarapin. Írürü bapong Lázaro pámchobe tatsi barichi Betania tomara-piwáyobe. Bárapo pámchobe tatsi ichowayo pewüing María, ichowayo pewüing Marta. ²Barapowa María, powa Lázaro pamcho tatsi, powa Jesús taxu epatabinchi icha matakábitha penasíwatha xua petuxueiwa xuano xua taxutsewa exanaeinchi pentanatha. ³María pámchobe najumekaitoróbabe ichüngtha icha tómara beya xua baxotiya Jesús beya petakajume jeichinexatsibe:

—Pata Tanekanamataxeinaein, jiña jintong átene, petakajume jeichinexatsibe bapong.

⁴Poxonae Jesús baxua jumetane, Jesús jeye:

—Bekein Lázaro átene íchitha bárapo peatenewa jopa exanaeyo xua tüpa peexa-neibiwa ataya. Saya átene, ápara Nakom pía jiwí tsita itüütsichi pía peayapusüüya itorobi koyenewa. Matáütano irü xang Nakom Pexantong jíwítha tatsita itüütsinexa taayapusüüya itorobi koyenewa, jei Jesús.

⁵⁻⁶Bekein Jesús ántobe Marta irü María irü Lázaro íchitha kataunxuae eka baxotiya aiña matakábibe poxonae jumetaetha xua Lázaro báyatha átene nawita. ⁷Pírapae Jesús daxita pijimonae barái, jeye:

—Kaibeya poinchi Judea nakua beya, jei Jesús.

⁸Néxata daxita Jesús pijimonae baraichi, jeye:

—Pong Patatanekuidubim, kain judiomonae, Judea nákuatha ichichichipa kakuinbaba ibotoxitha. Dakotsiwa ekeicha jiña ponaetsi bárapo Judea nakua beya, jeichichi.

⁹Jesús barái, jeye:

—Kaentakabi doce po hórabe xeina poxonae pentha tsungkuae. Icha pebin matakéitha pópona jopa xuirapopaeyo pentha petsungkuaexae bárapo kae pin

nákuathe. ¹⁰Barichin poxonae kataunxuae póponang bárapo kae pin nákuathe bewa exanaein xua Taxa pokotsiwa neitoroba. Tsipéi poxonae tüpaein jopa neita-kiüüpaé tsane xua exanaein baxua, bárapo kae pin nákuathe.

¹¹Pírapae Jesús daxita pijimonaé barái, jeye:

—Wajitong, Lázaro, maitungkua. Íchitha tha bexa yaübaxuichi, jei Jesús.

¹²Néxata daxita Jesús pijimonaé baraichi, jeye:

—Pata Tanekanamataxeinaem, icha bapong maitungkua, ¿metha poxoru áno-xuae yasátatsi, daxota baxua páebame? jeichichi.

¹³Íchitha Jesús namchi: “Lázaro býatha tüpa”, jei, xua poxonaé jei: “Lázaro maitungkua”, jei. Dáichitha Jesús pijimonaé tatsi nantaxeina xua metha Lázaro maitungkua icha mérawi ichi poxonaé maiteka. ¹⁴⁻¹⁵Bapoxonaé Jesús pijimonaé tsita najume itapeiñaxeina, jeye:

—Lázaro býatha naxuba. Pákata daxua wüünae xua jopa baxotiya poponaéiño poxonaé Lázaro tüpa. Tsipéi baxua paiña nejumekowüntsinea, daxota jopa naiña ponaeiño. Antha poinchi bara beya ichaxota Lázaro boka, jei Jesús.

¹⁶Néxata Tomás, pong icha wüing Gemelo pewéichobe penama naexanaexaebe, bapong Jesús pijimonaé tatsi baraichi, jeye:

—Bü naka barü pona Jesús, xain Jesús naka barü wérapa, jei Tomás.

Meje yábara xua Jesús namchi: “Xang pong jiwi asüü taexanaein petüpáe kuirukoyene weya”, jei

¹⁷Poxonaé Jesús pijimonaé barü patopa Betania tómaratha, jiwi Jesús tsipáebatsi xua pinae býatha Lázaro cuatro po matakábibe yapukaewa xua müthütha xotsi. ¹⁸Betania tómara tajüyo itamataeka Jerusalén tómara saya tres po kilómetro epatíyobe xeina. ¹⁹Pinmonae judiomonaé Marta irü María siwaponaeina póinchibe piabotha tatsi peitanuwé matütaenexa tsáinchibe petatüpaexáetsibe peweicho tatsi. ²⁰Poxonaé Marta yaputane xua Jesús pijimonaé barü patopa, bapowa bo wejonarena xua Jesús pententa weyataeya wabinéxatsi. Íchitha nama María botha eka. ²¹Marta Jesús baraichi, jeye:

—Pong Nekanamataxeinaem jiwi, icha býatha xote ekaetsípame, metha býatha jopa tüpaetsipáe taeweicho. ²²Yaputang xua methaunxuae Nakom kakatsina daxita pokotsiwa newüükaewam, jei Marta.

²³Jesús barái, jeye:

—Eweicho ekeicha kata asüü poponaena, jei Jesús.

²⁴Marta Jesús baraichi, jeye:

—Aa, bara yaputang xua ekeicha asüü poponaena poxonaé po matakeitha daxita jiwi Nakom asüü exanaena petüpáe kuirukoyene weya poxonaé po kae pin nakue daxita werawerakaena, jei Marta.

²⁵Néxata Jesús jumebarái, jeye:

—Xang ápara bárapo jintong, pong jiwi asüü jinompa taexanaein petüpáe kuirukoyene weya. Matáütano xang pong jiwi takatsin peajüntüyapusüüwa, po peajüntüyapusüüwa jopa werawerakaeyo. Pong nejumekowünta bekein bara tüpa íchitha ekeicha asüü poponaena. ²⁶Pong xeinaena peajüntüyapusüüwa xuano xua nejumekowüntsina, bapong bápana jopa werawérakae tsane. ¿Baxua bara yábara jumekowüntame? jei Jesús xua Marta tsipáebatsi.

²⁷Bapowa jumenota, jeye:

—Aa, Tanekanamataxeinaem, bara baxua yábara jumekowüntang xua xam Mesías pong Nakom Pexantom, pong bewa juiña patopáename po kae pin nákuathe tsike, jei Marta.

Meje yábara poxonae Jesús itamatawekoyéi tsungkuae ichaxota Lázaro yamüthü unguua

²⁸Poxonae Marta najumeweta xua Jesús tsipáebatsi, bapoxonae Marta pamcho waba powa pewüing María. Marta nameicha pámpchotha jeye:

—Pong jiwi Pekuidubin xote patope, kawaba, jei Marta.

²⁹Poxonae María baxua jumetaeba, bapoxonae kaena naiña pónataba Jesús petae-néxatsi. ³⁰Jesús abü kataunxuae pijimonae jopa barü ponaeyo tómaratha. Jesús kaxínatsi ichaxota kopiya Marta Jesús kaxínatsi. ³¹Judiomonae pomonae María pámpchobe itanuwé matateikatsibe xua pomonae piabotha tatsi taenátsibe, poxonae bárapo judiomonae tane xua María naiña pónataba, írürü barapomonae napunapona. Bárapo judiomonae nantaxeina xua mexeya ítara María pámpchobe müthü beya ponabewéi xua pewekoyeinéxabe ichaxota pewéichobe tatsi tayamüthü úngkuatsibe.

³²Poxonae María itamatapatópatsi, María pentabokototha unguua, yawa Jesús baráichichi, jei:

—Tanekanamataxeinaem, icha báyatha xote ekaetsípame metha báyatha pata taeweicho jopa tüpaetsipáe, jei María xua Jesús tsipáebatsi.

³³Jesús tane xua María wekoyéi. Táneno xua judiomonae pomonae nápona xua írürü wekoyéi. Bapoxonae Jesús ünthüthüwekoyéi yawa anthüthürewewe. ³⁴Jesús baraino barapomonae, jeye:

—¿Eta xota Lázaro pamüthüthü xúbame? jei Jesús.

Jesús jumenótatsi, jeye:

—Pong Nekanamataxeinaem jiwi, xotiye ínkane matha taema, jei barapomonae.

³⁵Írürü Jesús wekoyéi tsanareka. ³⁶Bapoxonae judiomonae Jesús yábara jeichichi, jeye:

—Ínkane pataema maisha bapong Lázaro bichokono antobetsi, najéi judiomonae.

³⁷Íchitha ichamonae judiomonae Jesús yábara jeichichi:

—Icha bapong itaküüpatsi xua pong peitatanakütsin axaibi exainchi, ¿eta xua metha bapong jopa itaküüpaetsi xua Lázaro yawénatsi xua báyatha jopa tüpaetsipáe? najéi judiomonae.

Meje yábara poxonae Lázaro ekeicha asüü pópona

³⁸Ekeicha Jesús bichokono anthüthürewewe. Yawa imoxoyo pijimonae barü pona müthü beya. Bárapo müthü ibo müthü, yawa müthü yauxatatabanota pin ibo panáwatha. ³⁹Jesús barái barapomonae, jeye:

—Papataxore ibo panawa, jei Jesús.

Lázaro pong tüpa bapong pamcho tatsi Marta, Jesús jeichi:

—Pata Tanekanamataxeinaem, ápara báyatha pepong bichokono tuxamna, tsi-péi báyatha cuatro po matakábibe yapukaewa poxonae tüpa, jei Marta.

⁴⁰Íchitha Jesús Marta jumebraichi, jeye:

—Bara báyatha katsipaebatsiba: Icha yábara jumekowúntame, nekotsíname Nakom pía peayapusüüwa, kajéichiba, jei Jesús.

⁴¹Néxata ichamonae ibo panawa pataxuba. Bapoxonae Jesús peitaboko beicha athabeicha nekoicha. Yawa jeye Páxatha:

—Axa, jüntükoyene weiweingang, yáitama nejumetáneme pokotsiwa takawüü-kaexaetsi. ⁴²Bara yaputang xua nejumetáibame poxonae kawüükéibatsi. Ápara katsipáebatsi baxua xua pomonae xote umene barapomonae nexa xua tana neyábara jumekowüntsinea xua xang pong tana neitorobim, jei Jesús.

⁴³Poxonae Jesús najumeweta baxua, bapoxonae jumedangweya wawái, jeye:

—¡Lázaro, bara wejondena! jei Jesús.

⁴⁴Bapoxonae pong xua tüpa müthü wejondena. Xua báyatha paparúwatha maxükaekunta kübaxotsi yawa pesito dékano yawa xua paiñawératha itabara yarabaxotsi, baxuang Lázaro yawa jondena. Jesús barái jiwí, jeye:

—Daxita baxuang paweishákare, bapoxonae bü bara pona, jei Jesús.

**Meje yábara poxonae fariseomonae irü sacerdotemonae pía
pentakaponaewi tatsi daxita barapomonae Jesús yábara nantaxéinatsi
xua pokoyeneya Jesús pewaetabiwa tsainchi**

(Mt 26.1-5; Mr 14.1-2; Lc 22.1-2)

⁴⁵Judiomonae pomonae María pámachobe kueyatatsibe, poxonae bárapo judiomonae baxua Jesús kuitainchi Jesús yábara jumekowúntatsi pinmonae. ⁴⁶Íchitha ichamonae judiomonae fariseomonae beya pona xua peyábara paebinexa pokotsiwa báyatha Jesús éxana. ⁴⁷Néxata fariseomonae irü sacerdotemonae pía pentakaponaewi tatsi daxita barapomonae nakaetuta penakanamata kaitorobí bichéitotha, yawa najéi barapomonae:

—¿Eta xua exanaeinchi metha? Bárapo pebin éxana nawita pexeiña petsita-itiütsi koyenewang. ⁴⁸Icha báraxua saya yábara kuikopatinchi metha pinmonae bapong yábara jumekowüntsinechi. Barapoxonae romanomonae pía pentakaponaewi patsina waxantha, yawa abe exanaena Nakom pin píabo tatsi xua watómara, yawa wanákuatha naka jutebina, najéi barapomonae.

⁴⁹Kaein bapomonae jíwana pewüing Caifás. Bapong Caifás bárapo weitha sacerdotemonae pía pepa pentakaponaein tatsi náexana. Bapong Caifás jei pin bichéitotha:

—Paxam ápara jopa baxua payábara yaputaem. ⁵⁰Matáütano jopa payábara yaputaem xua pokoyene pákata wüünae xua ichüing bara kaein piamonae yaitatsina pebexubinéxatsi xua daxita piamonae tatsi jopa petajutebinexa tsainchi, jei Caifás xua piraichi nantaxeina.

⁵¹Íchitha Caifás jopa baxua piakoutha nantaxeinaeyo. Tshipéi Caifás bárapo weitha sacerdotemonae pía pepa pentakaponaein tatsi náexana, daxota tsiwüünae yábara paeba xua Nakom kueikueijei éxana xua Jesús bewa tsitüpaena judiomonae. ⁵²Meisha bárapo judiomonae Jesús jopa tsitüpaeyo, ápara írürü ichamonaenéxano Jesús tsitüpa xua Jesús kaemonae nakaetuta peexanaenexa pomonae Nakom piamonae tatsi, pomonaeno tajü ena ichaxota icha nákuangtha. ⁵³Daxota barapomonae judiomonae pía pentakaponaewi tatsi nabarü muxujéi pokoyeneya xua poxonae Jesús pebexubiwa tsainchi.

⁵⁴Daxota Jesús jopa naitapeiña xeinaeyo judiomonaetha. Saya Jesús Judea nakua wewarapiya, tómara beya pona po tómara pewüing Efraín, po tómara eka ichaxota ira xuépana susato tsúrukuae nakua. Bárapo tómaratha pijimonae barü eka Jesús.

⁵⁵Bara nama imoxoyo tsúrukuae tsóponae po matakabin xua judiomonae pía Pascua wüng matakabin tatsi. Pin bicheitomonae tómara weya pona xua Jerusalén tómara beya pona xua baxotiya pía kui koyenewa peexanaenexa Nakom nexa, xua Nakom jopa petsita-natsikuentínexatsi xua abe petsita-peexanaexae. Tsipí pía peitorobi koyenéwatha tatsi baxua yábara paeba xua barapomonae bewa baxua exanaena Pascua wüng matakabin pewünaeya. ⁵⁶Daxita barapomonae Jesús wenaweneichi. Poxonae barapomonae Nakom pin piabotha pata, baxota barapomonae najéi:

—¿Eta be payábara nantaxeinaeya ichim? ¿Metha Jesús xote patopaena jampa? ¿Metha jopa patopáe tsane jampa? najéi barapomonae.

⁵⁷Fariseomonae írürü sacerdotemonae pía pentakaponaewi tatsi daxita barapomonae jiwi baraichi, jeichichi:

—Pong tane Jesús, néxata bü pana netsipaeba, xua bapong pata tha waetabichi, jei barapomonae.

Meje yábara poxonae petsiriwa Jesús mata epatábatsi penasiwa, po penasiwa petuxueiwa

(Mt 26.6-13; Mr 14.3-9)

12 ¹Poxonae kataunxuae seis po matakábibe aibi xua Pascua wüng matakabin nexa, Jesús pijimonae barü pona Betania tómara beya. Bárapo Betania tómara, po tómara ichaxota Lázaro pópona, pong Jesús báyatha asiüü éxana petüpáe kuirukoyene weya. ²Baxota pexaewa Jesús üpain sétatsi. Marta ápata pexaewa. Jesús pijimonae tatsi irü naéna pexaethopáewatha. Irü Lázaro baxota naéka xua irü naxane. ³Irü bapoxonae María karena bosibü bichokono wüngka petuxuéi nasiwa. Bárapo túxusi tuxuéi nasiwa bichokono aiña matoma. Bárapo túxusi tuxuéi nasiwa pewüng nardo. Bárapo petuxuéi túxusi nasiwatha María Jesús mata epatábatsi yawa taxu epatábatsino. Bapoxonae María pentanatha Jesús taxutsewa exainchi. Daxita bómüxü tutu kanaüpa dukua xua tuxuéi tsúrukuae. ⁴Írürü naéka Judas Iscariote, pong Simón pexanto tatsi. Bapong Judas Jesús pijimonae tatsi jíwana. Bárapo Judas pong bexa Jesús kaenaetsinchi. Bapong namchi, jeye:

⁵—¿Eta pokotsiwa metha saya xuba bárapo túxusi tuxuéi nasiwa? Bárapo petuxuéi túxusi nasiwa bekaenaetsípame xua nentoma xeinaenexa beyakaincha xua trescientos po paratiximonaebe xua po paratiximonaebe beyakaincha trescientos po matakábibe nexa, poxonae nakuita, jei Judas Iscariote.

⁶Judas ápara jopa baxua paebiyó xua peantobexaetsi pomonae peakopeibiwi. Saya ápara baxua paeba poxoru bapong pong pekaibin jiwi. Bapong Judas Jesús pijimonae parátixi dúnukue takapoinchi. Íchitha bapong kou jíwana wenoteiba parátixi poxonae Jesús pijimonae tatsi jeiba. ⁷Néxata Judas Jesús barái, jeye:

—¡Moyande bara kópare! Ápara xua barapowa netsi bota bárapo petuxuéi túxusi nasiwa tapepong nexa xua tatüpaein tana neperüüwaenexa poxonae po matakéitha müthiya tana neboyaenexa tsane. Baxua netsi bota ápara xua müthü tana neboyaenexa poxonae tüpaein. ⁸Bárapo írathe peakopeibí jiwi paka barü jinompéibina paiña neyawenaenexa tsaibi tsane bárapo jiwi. Íchitha nama paxam jopa ataya paka barü póponae tsainchi xua pata tana neyawenaenexam bárapo írathe, jei Jesús.

**Meje yábara poxonae sacerdotemonae pía pentakaponaewi
tatsi pebürüya nantaxeina xua Lázaro pebexubiwa tsainchi**

⁹Pinmonae judiomonae jumetane xua Jesús pópona Betania tómaratha. Bapoxonae bárapo judiomonae pona Betania tómaraya beya xua Jesús petañéxatsi írürü xua Lázaro petañéxatsi pong Jesús býatha asüü éxana petüpáe kuirukoyene weya. ¹⁰Néxata sacerdotemonae pía pentakaponaewi tatsi pebürüya nantaxeina xua írü Lázaro pebexubiwa tsainchi. ¹¹Tsipéi pinmonae judiomonae penta sacerdotemonae pía pentakaponaewi tatsi pía pekuidubiwang tatsi. Matáütano bárapo judiomonae saya Jesús jumekowúntatsi tsipéi Jesús kuitainchi pokotsiwa Jesús wüünae éxana poxonae Lázaro asüü exainchi petüpáe kuirukoyene weya.

Meje yábara poxonae Jesús Jerusalén tómaratha patopa

(Mt 21.1-11; Mr 11.1-11; Lc 19.28-40)

¹²Icha mataketha baya xua poxonae po mataketha Jesús taxuwainchi petuxuéi nasíwatha, bapoxonae Jesús pijimonae barü pona Jerusalén tómaraya beya. Bapoxónaerü Jerusalén tómaratha ena pin bicheito pomonae xua kopiya býatha pata Pascua wüng matakabin nexa. Daxita barapomonae yaputane xua ánoxuae methaunxuae patopaena Jesús bárapo tómaratha. ¹³Bárapo pin bicheito peaxu ukuboba po axu icha koichaxu axu ichi. Barapomonae Jesús matenta iyíyatsi xua Jesús pententa weyataeya wabinéxatsi. Yawa jumedangweya wawaya jeye:

—¡Pai jáyana! ¡Maisha Jesús pong Pekanamataxeinaein jiwi deta wüünae, bapong patopa Nakom peitorobixae! ¡Maisha Nakom bichokono wüünae jáintatsi pong peitabókotha eka! ¡Maisha Jesús deta wüünae, pong Israel nakuamonae itorobiya pía pepa Peewatsinchi tatsi! jei bárapo pin bicheito.

¹⁴Bapoxonae Jesús tane burro pong penüng. Bapoxonae bárapo búrrótha ekeika yawa pónano námtotha. Jesús éxana be pókotsi koyeneya kaena býatha yábara páebatsi Nakom Pejume Diwésitha, xua Mesías pepatopaewa tsane Jerusalén tómaratha, jeye:

¹⁵“Sión tomarapiwi pam,

jopa pajunuwinde.

Pataema pong itorobiya pepa paiña Nepaka kaewatsin.

Bapong pákata patopaena xua búrrótha ekeikaena”,

jei Nakom Pejume Diwésitha.

¹⁶Bapoxonae Jesús pijimonae tatsi jopa yaputaeyo pokoyene xua kaena býatha Jesús wüünae yábara tsiwüünae páebatsi, xuano xua pokoyene exanáenano. Íchitha pírapae poxonae Jesús kaibe nawicha peitaboko beicha, yawa poxonae Paxa matenta weyataeya wábatsi, bapoxonae barapomonae yaputane pokoyene Jesús yábara tsiwüünae páebatsi Nakom Pejume Diwésitha, xuano xua jiwi éxana poxonae Jesús wüünae jáintatsi.

¹⁷Pomonae nápona poxonae Jesús Lázaro wábatsi petüpáe kuirukoyene weya, barapomonae tamrópata notarúkupa xua jíwitha paeba pomonaetha, pomonae Jerusalén tomarapiwi, pomonae býatha Jesús pekuitaexaetsi poxonae Lázaro asüü exainchi.

¹⁸Daxota pinmonae pona Jesús beya xua Jesús pematentaweyataeya wabinéxatsi. Tsipéi bárapo pinmonae jumetane pokotsiwa Jesús éxana pexeña petsita-itüütsi koyenewa poxonae Lázaro asüü exainchi. ¹⁹Néxata fariseomonae kaemonae natsipaeba, najéi:

—¡Ínkane matha pataema! Barapomonaе jopa naka jumekowúntsiyo, yawa daxita jiwі meіsha napunapona bapongtha, najéi barapomonaе.

Meje yábara poxonae griegomonaе Jesús wenaweneichi

²⁰Bárapo pin bicheito, po bicheito kopiya báyatha Jerusalén tómaratha ena, xua baxota wüünae pejainchinexa Nakom, bárapo pin bicheito jíwanamonaе, griego nakuamonaepiwi jíwana. ²¹Bárapo griego nakuamonaepiwi Felipe imoxoyo kakuita poinchi. Barapong Felipe Betsaida tomarapin xua Galilea nákuatha. Bárapo griego nakuamonaepiwi Felipe tsipáebatsi, jeichichi:

—Ínkane matha pana nejumetaema. Pata bekein Jesús taetsi, jei.

²²Bapoxonaе Felipe jumeyopita Andrés beya, xua ekeicha bapongbe pejumeypichinéxabe Jesús beya. ²³Bapoxonaе Jesús barapongbe baraichi yawa daxita bárapo jiwі baraichi, jeye:

—Nama imoxoyo bárapo matakabi tsóponaе, po matakеitha xang, pongxaein Nakom tana neitapétsixae nebexubina ichamonaе. Bárapo matakеitha Nakom aiñakuí neexanaena. ²⁴Xaniyang paka tsipáebatsi. Poxonaе trigoxuto saya xuboka yawa icha jopa xubokaeyo tsorobotútutha, yawa icha jopa xuwiyo, jopa itaküüpaetsi xua pexaewa náexana. Íchitha icha bárapo trigoxuto tsorobotútutha boka yawa icha xuwa, bapoxonaе jame bara pexaewa náexana. Icha bárapo trigoxuto ichi, xang barapókotsi koyeneya jiwі bara nekana ichi tsane. ²⁵Pong naantobeya nata éxana pokotsiwa bapong ichichipa po kae pin nákuathe, bapong jopa xeinaeyo peajüntüyapusüüwa, po peajüntüyapusüüwa ataya tsiteka xua Nakom píа nakua beicha. Íchitha pong neantobeya inta éxana pokotsiwa ichichipang, bapong xeinaena peajüntüyapusüüwa, po peajüntüyapusüüwa ataya tsiteka xua Nakom píа nakua beicha. ²⁶Pong ichichipa éxana tawa xua penakuichiwa, bapong bara bewa moya exanaena pokotsiwa itorobang. Pong éxana pokotsiwa itorobang, bapong patopaena ichaxota póponang. Icha pebin éxana pokotsiwa itorobang, bapong Taxa kana exanaena xua bapong peaiñakuí jintong tsane Taxa píа nakua beicha tatsi, jei Jesús.

Meje yábara poxonae Jesús nayábara paeba xua petüpaewa tsane

²⁷Ekeicha Jesús jeye: “Ánoxuae bichokono anthüthürewеin tsipéi tatüpaewa tse-neba. ¿Eta jumichikuaein tsane metha Táxatha? ¿Metha jang tsane: ‘Axa, nekapanépare baxua weya’, metha jang tsane? Jume, ápara jopa baxua tsipatopeikaeiño. Ápara tsipatopeikang xua taaperüütanewa tsane jiwі nexa. ²⁸Jame bejang: ‘Axa, bárabü jiwі kana éxaname xua wüünae nekajainchiwa’, bejang jame”, jei Jesús.

Poxonaе Jesús baxua najumeweta, bapoxonaе Jesús jumetane xua Nakom namchi peitaboko wétsika, jeye: “Báyatha ápara baxua jiwі kana éxanang xua jiwі wüünae tana nejaintebiwanexa, tsipéi daxita beta éxanang. Matáütano ekeicha ichawa exanaein xua jiwі wüünae tana nejaintebiwanexa tsane”, jei Nakom.

²⁹Pinmonaе umena xua Jesús jumetaeumeinchi, irü Jesús pijimonaе tatsi baxota umenarü. Bárapo jiwі baxua nayábara yáñaba xua Nakom kueikueijeі. Ichamonaе jeye:

—¡Ápara xua jurujuréi yámüxü! jei.

Ichamonaе jeye:

—¡Ápara bapong tsipáebatsi matatsunpin! jei.

³⁰Néxata Jesús pijimonae barái, jeye:

—Pong pajumetáneme ápara Nakom. Jopa ápara paebiyo xua xang nexa. Ápara paeba pía xua paiña nejumetaenexa daxota baxua Nakom paeba. ³¹Imoxoyo nama matakabi patopaena, po mataketha Nakom yábara paebina jiwi xua penatsikuent-siwa xua abe peexanaexae bapongtha. Pong jiwi jüntükoyene itoróbatsi xua abe peexanaewa po kae pin nákuathe, nama imoxoyo Nakom amanayabina bapong poxonae xubina bárapo kae pin nakue weya. ³²Poxonae ichamonae nedutsina náetotha tatüpaenexa tsane, bapoxonae daxita jiwi kana exanaein xua pomonae peichichipaewa tsane xua tana nejumekowüntsinexa, jei Jesús.

³³Poxonae Jesús baxua paeba jiwi yaputane exainchi xua Jesús pebexubiwa tsainchi poxonae tüpaena. ³⁴Bapoxonae bárapo jiwi Jesús tsipáebatsi. Jesús jeichichi:

—Paxang pajumetang xua poxonae wámonae yóroba Moisés pía peitorobi koye-néwatha pokotsiwa baxota jeye: ‘Bara Mesías ataya asüü poponeiba’, jei baxota. ¿Eta xua metha pana netsipáebame xua pinae pong Nakom Peitapetsin bewa náetotha tüpaena? ¿Jintam metha pong Nakom Peitapetsin? jei barapomonae.

³⁵Néxata Jesús tsipaeba barapomonae xua nakaunuta, jeye:

—Saya kaeto pana netáneme pong paka yaputane exainchi. Beta pajinómpare tapaka yawenaexae tsainchi, icha paichim xua beta pajinómpame poxonae xometo paka yawena xua beta pajinómpame mataketha. Pana nejumekowünde poxonae kataunxuae po kae pin nákuathe popónangje. Matáütano poxonae kataunxuae paka itaküüpa xua pata tanejumekowüntsiwam. Jopa abe paexanaeinde xua poxoru poxonae jopa pata tanejumekowüntsixaemxae. Tsipéi bara jütiya ichi, poxonae jiwi abe éxana be poxonae pomonae pona ichaxota kirei. Jopa beta ponaeyo tsipéi jopa xeinaeyo pekoicha. ³⁶Pana nejumekowünde poxonae kataunxuae po kae pin nákuathe popónangje. Bapoxonae paxam tajimonae pam tsane, jei Jesús.

Poxonae baxua Jesús najumeweta, bárapo jiwi weya natsixitaba yawa wepu aichúrukuae.

Meje yábara poxonae Jesús yábara paeba xua eta xua metha pinae Jesús jopa jumekowüntichi judiomonae

³⁷Bekein Jesús matowa éxana pía pexeña petsita-itüütsi koyenewang barapomonae peitütha tatsi, dáichitha pinmonae barapomonae jopa Jesús yábara jume-kuikowüntichi pokoyene xua Jesús bara bapong Mesías pong Nakom itorobika. ³⁸Baxua éxana xua nayábara jumekuiweta pokoyene báyatha pong Nakom peitorobi jume pepaebin Isaías wüünae tsiwanaya yábara jei:

“Pong jiwi Nekanamataxeinaein barapomonae jopa jumekowüntsiyo xua pakuidubang bekein barapomonae tane matowa poxonae paéxanang Nakom pía peyapusüüwatha”,
jei Isaías.

³⁹Barapomonae jopa jumekowüntsiyo, tsipéi Isaías ekeicha jei:

⁴⁰“Nakom kana éxana xua barapomonae jopa beta xapain naitakuikoyene yaputaeyo.

Matáütano Nakom kana éxana xua jopa pejumekowüntsiwa pejüntükoyene wétsina.

Barapomonae be natsikotane peitatanakütsi jiwi,

tsipéi jopa beyaputaeyo,
 xua icha jüntükoyene pexeinaewanexa.
 Matáütano jopa ichipaeyo xua peyábara jumekowüntsiwa pokoyene xua
 Nakom itakúüpatsi xua pejüntükoyene wüünae peexanaewa”,
 jei Isaías pejume diwésitha.

⁴¹Daxita baxuang Isaías paeba xua Jesús yábara páebatsi. Isaías kaena báyatha tane poxonae eka Mesías pía pexeína pía peitüpanáe peekáewatha. Daxota Isaías yábara paeba, Mesías yábara páebatsi xua pokotsiwa báyatha petaexae.

⁴²Bekein daxita judiomonae Jesús jopa jumekowüntichi, dáichitha ichamonae judiomonae Jesús jumekowüntatsi. Matáütano ichamonae judiomonae xua pomonae judiomonae pía pentakaponaewi tatsi Jesús jumekowüntatsi. Íchitha daxita barapomonae jopa Jesús yábara paebichi jiwi peitütha tatsi tsipéi fariseomonae kunúwatsi. Tsipéi icha barapomonae Jesús yábara paebichípatsi, metha barapomonae itawetsípatsi judiomonae pía penakaetutsibong tatsi weya, xua fariseomonae itawetsipa. ⁴³Tsipéi bárapo Jesús pía pejumekowüntsíwichi pijunuwi daxota itapeta jumenaitáewata xua jiwi jei: “Jopa Jesús payábara paebinde”, jei jiwi. Barapomonae pomonae Jesús pejumekowüntsíwichi baxua itapeta jumenaitáewata beyakaincha xua poxonae bekein Nakom kui-itoroba.

Meje yábara xua pojume Jesús paeba bárapo jumetha jiwi yábara paebinchi xua penatsikuentsiwa xua abe peexanaexae

⁴⁴Ekeicha Jesús jumedangweya jeye: “Pong nejumekowünta meisha jopa nejumekowüntsi tsane, jame Taxa jumekowüntsínchino pong tana neitoróbixae. ⁴⁵Pomonae xua neyaputane barapomonae barichi Taxa yaputainchi. ⁴⁶Xang pong yábara yaputane paka kana exainchi Nakom. Patopeikang po kae pin nákuathe xua pomonae tana nejumekowüntsiwi jopa penantawenonaenexa xua pejinompaewa poxonae jopa Nakom yábara yaputaetsi. ⁴⁷Pong bekein jumetane tajume diwesi xuano xua icha bekein jopa exanaeyo tana nejumetáewatha pokotsiwa itorobang, bapong jopa yábara paebin tsane xua penatsikuentsiwa xua abe peexanaexae Nakomtha. Tsipéi ápara jopa baxua tsipatopaeiño xua takoya barapókotsi jiwimonae tayábara paebinexa xua penatsikuentsiwa xua abe peexanaexae Nakomtha. Jame ápara tsipatopang xua jiwi ü takapanenebiyaenexa tsane. ⁴⁸Pong jopa tsita aiñakuichi xua jopa tsita aiñakuiño, xuano xua icha jopa jumekowüntsiyo pokotsiwa páebang pojume aunxuae páebang, bapong bárapo jumetha yábara paebinchi xua penatsikuentsiwa xua abe peexanaexae poxonae po mataketha nakua werawerakaena. ⁴⁹Tsipéi xang jopa paebiño pokotsiwa takoutha taichichi-paewa. Saya ápara baxua daxita éxanang pokotsiwa Taxa neitoroba pokotsiwa bewa paebin xuano xua pokotsiwa bewa jiwi kuidubin. ⁵⁰Yaputang Taxa pía peitorobi koyenewa, bárapo peitorobi koyenewa jiwi kana exainchi xua pexeinaewa peajüntüyapusüüwa, po peajüntüyapusüüwa ataya tsiteka. Daxota pokotsiwa paka tsipáebatsi ápara xua Taxa báyatha tana neitoróbixae”, jei Jesús.

Meje yábara poxonae Jesús pijimonae taxumatawane mératha

13 ¹Barapoxónaerü bara bárapo matakabi tsuxubi, po matakabi tsiwanaya matakarakua xua Pascua wüng matakabin. Jesús yaputane xua bara nama imoxoyo bárapo matakabi tatsoponaetsiba, po mataketha Jesús kuenta ponaena

po kae pin nakue xua Paxa beicha peponaewa tsane. Jesús ántobe tsaibi pía pejumekowüntsíwichi pomonae xua tajinómpatsi po kae pin nákuathe. Nama imoxoyo Jesús éxana xua pokotsiwa jiwi yaputane xua Jesús jopa juniya antobeyo pomonae pía pejumekowüntsíwichi.

²⁻⁴Judas, pong Simón Iscariote pexanto tatsi, bapong kui-itoróbatsi kaurimonaenae pía pentakaponaein tatsi xua Jesús pekaenaetsinéxatsi ichamonaetha. Jesús yaputane xua báyatha Paxa wétsika pona. Matáütano xua ekeicha Paxa beicha patopaena xuano xua Paxa kátatsi daxita pía peayapusüüya itorobi koyenewa. Baxua bekein xeina, dáichitha poxonae pijimonae barü eka pexaethopáewatha asiya unkuataba. Yawa paparuwa namajonta, po paparuwa matha weruya. Yawa icha paparúwatha na-epaküta. ⁵Bapoxonae Jesús mera épata korótotha. Bapoxonae pijimonae taxumatawaepona mératha. Yawa paparúwatha taxutsewa éxana po paparúwatha na-epaküta.

⁶Poxonae Jesús Simón Pedro muxu petaxumatawaetsi, Simón jeye:

—Tanekanamataxeinaem, ¿eta pokotsiwa metha irü jiña netaxumatawaetsi? jei Simón Pedro.

⁷Jesús jumebarái, jeye:

—Xua baxue kata éxanatsi ánoxuae jopa yábara yaputaem. Íchitha bexa tsane baxua yábara yaputáename, jei Jesús.

⁸Íchitha ekeicha Simón Pedro jumebarái, jeye:

—Bápana jopa netaxumatawaem tsane, jei Simón Pedro.

Jesús jumebarái, jeye:

—Icha jopa kataxu-matawaetsípaetsi mératha néxata jopa tajimonae jintom tsipaem, jei Jesús.

⁹Simón Pedro jumebarái, jeye:

—Tanekanamataxeinaem, meisha jopa netaxumatawaende, jame yawa nekobematawaema, yawa nentasi pamatawaema, jei Simón Pedro.

¹⁰Jesús jumebarái, jeye:

—Pong xua ánoxuae nowaexuba, bapong ekeicha jopa nantawenonaeyo xua pía pepong matawainchi, saya jame meisha petaxu. Paxam pejüntükoyenexeikae jiwi pam, saya kaein jíwana pam jopa daichiyo, jei Jesús.

¹¹Jesús jeye: “Paxam pejüntükoyenexeikae jiwi pam, íchitha kaein jíwana pam jopa daichiyo”, jei. Jesús baxua paeba tsipéi yaputane xua kaein jíwana pomonae Jesús pijimonae tatsi, bapong Jesús kaenaetinchi.

¹²Poxonae Jesús nakobeweta xua pijimonae taxumatawane mératha ekeicha paparuwa namaxátata po paparuwa kopiya namaxuenaxuba. Bapoxonae ekeicha ekoneka pexaethopáewatha. Yawa pijimonae barái, jeye:

—¿Bara payaputáneme xuaunxuae pákata éxanatsi? ¹³Pana neyábara jam: ‘Pong Pata tanekuidubín’, pana neyábara jam. Yáwano pana neyábara jam: ‘Pong Pata Tanekanamataxeinaein’, pana neyábara jam. Bara xaiñeya pana neyábara jam baxua, tsipéi ápara xang bapong. ¹⁴Icha xang paiña Tapaka kuidubinchi xuano xua paiña Tapaka kanamataxeináeinchi xua paka taxumatawainchi mératha bewa paxam bara paichim tsane, bewa nantiya pana nataxumatawaem mératha. ¹⁵Baxua paka tsita exainchi xua paiña bara paichinexam tsane ichaunxuae ichin. ¹⁶Xaniyang paka tsipáebatsi. Pong ba tanakuíta bapong jopa aiñakuiyo. Jame bapong pía pentakaponaein tatsi yatsikaya aiñakuí beyakaincha pong tanakuíta.

Pong ba itoróbatsi jopa aiñakuiyo. Jame pong peitorobixae bapong aiñakuí. ¹⁷Icha baxua payaputáneme yawa icha baxua paexanaenameno bapoxonae pejüntükoyene weiweináe jiwi pam tsane.

¹⁸“Ápara jopa daxita paka yábara paebichi xua pejüntükoyene weiweináe jiwi pam tsane, tsipéi kaein jíwana pam jopa daichiyo. Xang paka jüntükoyene yaputainchi tsipéi tapaka itapetichi jíwichi pam. Íchitha nakuiyábara jumewétsina be pokoyeneya báyatha Nakom tsiwüünae yábara paeba pejume diwésitha. Nakom jeye: ‘Pong barü xang, pong ítara mexeya tajintong, bapong ekeicha kaewa tana neaitafáetabi jintong náexana’, jei Nakom Pejume Diwésitha. ¹⁹Baxua pewünaeya paka tsipáebatsi xua poxonae nekana exanaena pong ekeicha kaewa tana neaitafáetabi jintong náexana. Bapoxonae paiña yábara tana nejumekowüntsineexam tsane xua xang bapong áparang xua pongxaein paka tsipáebatsi. ²⁰Xaniyang paka tsipáebatsi. Po pebin matenta weyataya waba pongtha pong itorobang bárapo pebin barápara nententa weyataya waba. Barichi pong nententa weyataya waba barápara Nakom matenta weyataya wábatsi, pong tana neitoróbixae”, jei Jesús.

Meje yábara poxonae Jesús jeye:
“Judas nekaenaetsina ichamonaetha”, jei
(Mt 26.20-25; Mr 14.17-21; Lc 22.21-23)

²¹Poxonae baxua Jesús najumeweta, bapoxonae bichokono anthüthürewewe tsanareka. Yawa najumenaitapeiñaxeinaeya, jeye:

—Xaniyang paka tsipáebatsi. Kaein jíwana pam bapong nekaenaetsina ichamonaetha, jei Jesús pijimonaetha.

²²Néxata Jesús pijimonaetha tatsi náitabara taerüküpa, nantiya najeye: “¿Jintam metha bepa Jesús kaenaetichi?” najéi. Íchitha barapomonae jopa yaputaeyo xua Jesús yábara jei pong. ²³Kaein Jesús pijimonaetha tatsi jíwana, pong bichokono Jesús ántobe, bapong Jesús imoxoyo barü xunaeka, bárapo pexaethopáewatha. ²⁴Simón Pedro pekóbetha moya jume-itoroba jeye: “Jesús yáñabare: ‘¿Jintam yábara páebame?’ jande”, jei Simón Pedro xua jume itoróbatsi pong Jesús imoxoyo kakuita ékatsi. ²⁵Bapoxonae Jesús imoxoyo kakuita ekarénatsi ekeicha. Jesús yáñabatsi, jeye:

—Tanekanamataxeinaem, ¿jintam kakaenaetsina? jei.

²⁶Jesús jumenota, bapong jumenótatsi, jeye:

—Pang pürüwiyo tha atatsika exanaetsi. Pong katang bárapo pan pürüwiyo, bapong ápara pong nekaenaetsina ichamonaetha, jei Jesús pongtha pong peyáñabixaetsi.

Poxonae Jesús pan pürüwiyo atatsika éxana, bapoxonae Jesús kata, Judas kátatsi pong Simón Iscariote pexanto tatsi. ²⁷Poxonae Judas bárapo pan Jesús wekobepítatsi, bapoxonae kaena naiña Judas jüntükoyene itoróbatsi Satanás kaurimonae pía pentakaponaein tatsi xua Jesús pekaenaetsiwa tsainchi. Bapoxonae Jesús jeye, Judas jeichichi:

—Xua pokotsiwa jiña ánoxuae exanaetsi, moya éxande naiña, jei Jesús.

²⁸Daxita barapomonae pomonae Jesús pijimonaetha tatsi, pomonae pebarü xunaekaexae, jopa xapain yaputaeyo pokotsiwa Jesús itoroba, xua Judas itoróbatsi. ²⁹Tsipéi bapong Judas parátixi doró kapópona, daxota Jesús pijimonaetha tatsi nantaxeina xua mexeya ítara Jesús itorobawejéi xua pía takomotichi pexaewa penabanáe

koyenewa nexa. Yawa nantaxeina xua mexeya ítara Jesús itorobawejéi xua Judas parátixi pekatsinexa peakopeibí jíwitha. ³⁰Poxonae Judas Jesús wekobepítatsi pan púriwiyo, bapoxonae Judas pónataba. Írürü bapoxonae kirei tsanácharü.

**Meje yábara poxonae Jesús yábara kuiduba
jiwi pena peitorobi koyenewa**

³¹Néxata poxonae Judas pónataba Jesús pijimonae barái, jeye:

—Imoxoyo nama paka tsita itüütsinchi taayapusüüya itorobiya koyenewa xua xang ápara bara pongxaein Nakom Tananeitapetsin. Barichino paka tsita itüütsinchi Nakom pía peayapusüü itorobi koyenewa tatsi. ³²Icha xang pongxaein Nakom Tananeitapetsin, icha paka tsita itüütatsi Nakom pía peayapusüü itorobi koyenewa, néxata Nakom xuya naiña paka tsita itüütsina taayapusüü itorobi koyenewa xua xang ápara bara pongxaein Nakom Tananeitapetsin. ³³Pomonae be tapexui tapaka kanatsikotáewichi pam, bara nama saya kaeto paka barü poponaeinchi. Icha ichin xua kaena báyatha xua judiomonae tsipaebang, bara paka jumichichi ánoxuae: ‘Jopa paka itaküüpáe tsane xua pana nepunaponáename ichaxota taponaewa tsane’, paka jeichi. ³⁴Bárapo pena itorobi koyenewe paka kuidúbatsi, xua jangje: ‘Nantiya pana naantobeinde, icha paka ichichi xua paka antobetsi. Bewa bara paichim tsane xua nantiya pana naántobem tsane’, jang. ³⁵Icha paxam nantiya pana naántobem tsurubenanaebiyam tsane, daxita jiwi paka kuiyaputaena xua paxam bara ápara tana nejumekowüntsi jiwi pam, jei Jesús.

**Meje yábara poxonae Jesús namchi xua Pedro jei tsane:
“Jopa dapong yaitaeiño”, pinae yábara jei tsainchi Jesús
(Mt 26.31-35; Mr 14.27-31; Lc 22.31-34)**

³⁶Simón Pedro Jesús yáinábatsi, Pedro jeye:

—Tanekanamataxeinaem, ¿jína eta xota ponaetsi? jei Simón Pedro.

Jesús jumenota, jeye:

—Ánoxuae jopa kaitaküüpaeyo xua tana nepunaponaewam ichaxota ponaein. Íchitha bexa tsane kaitaküüpaena xua tana nepunaponaewam ichaxota ponaein, jei Jesús.

³⁷Néxata Simón Pedro jumebarái, jeye:

—Tanekanamataxeinaem, ¿eta xua metha baxua páebame xua ánoxuae jopa neitaküüpaeyo xua takapuna ponáewatsi ichaxota póname? ¡Íchitha xang bara kopatang xua jiwi tana nebexubinexa takapuna ponaenéxatsi! jei Pedro.

³⁸Jesús jumebarái, jeye:

—¿Bara xaniwaicha xua xam bara kópatame xua jiwi nekabexubinexa tana nepunaponaenexam? Jume, ápara xaniyang katsipáebatsi bárapo merawithe akoibi pojuméyobebe neyábara jam tsane: ‘Jopa dapong yaitaeiño’, neyábara jam tsane. Bapoxonae írürü wákara pebto fibina, jei Jesús.

**Meje yábara poxonae Jesús jeye: “Xang ápara pong
jiwi matakaponang Taxa beicha”, jei Jesús**

14 ¹Ekeicha Jesús pijimonae barái, jeye: “Jopa yábara nantü exabinde ichawang. Pana neyábara jumekowüntéibare yáwano Taxa payábara jumekowünteibareno. ²Taxa pía nakua beicha bong nawita ichaxota jiwi pejinompawea.

Icha bong aibi tsipae, metha báyatha jopa paka tsipaebichipaetsi, daxota ápara páebang tsipéi xaiñang. Daxota paka tsiwanaeya pákata tutu wüünaetnchi bárapo bong. ³Poxonae wetang xua Taxa beicha taponaeewa xuano xua icha nakobewetang xua bong paka tsiwanaeya tutu wunáetatsi, bapoxonae ekeicha patopeikaein. Paka kaponaeinchi ichaxoteicha xua tapoponaewa tsane. ⁴Paxam payaputáneme ichaxota ponaein. Daxota payaputánemeno pokoyeneya xua paiña nepatsiwa tsane baxota”, jei Jesús.

⁵Tomás jeye ichaxota Jesús:

—Pata Tanekanamataxeinaem, jopa payaputaeiño po nakua beya ichaxota ponáename. Tsipéi baxua jopa payaputaeiño, daxota jopa pana neitaküüpaeyo xua pata po naewa po nakua beya ichaxota xam ponáename, jei Tomás.

⁶Jesús jumenota, jeye:

—Xang ápara pong jiwi tamatakaponaein Taxa beicha. Matáütano xang pong xaiñeya tapaebin. Matáütano xang ápara pong jiwi takatsin peajüntüyapusüüwa, po peajüntüyapusüüwa ataya tsiteka. Saya meisha xang ba jiwi yawenang xua pepatsiwa Taxa beicha. ⁷Icha paxam pana neyaputáneme bara paichim Taxa payaputáneme. Daxota ánoxuae nama Taxa payaputáneme yáwano patanemeno tsipéi paxam pana netáneme, jei Jesús.

⁸Néxata Felipe Jesús baráichichi, jeye:

—Pata Tanekanamataxeinaem, kópare xua Axa pata tha taetsi. Bapoxonae jüntema pata jinompaewa tsane, jei Felipe.

⁹Jesús Felipe jumenótatsi. Jesús jeye:

—Felipe, bara báyatha kabarü popóinchiba. ¿Eta xua kame jopa neyaputaem? Pong ba netane barichi ápara bara Taxa tainchi. Daxota jopa benejam: ‘Kópare painta pata tha Axa taetsi’, jopa be pana nejam. ¹⁰¿Eta xua metha jopa jume-kowüntsim xua bara Taxa neyanta xua bara irü Taxa yántangdü? Daxita pokotsiwang paka tsipáebatsi ápara jopa paebiño pokotsiwa takoutha ichichipang. Ápara Taxa pong neyantsiya pópona baxua ápara éxana pokotsiwa xua éxanang. ¹¹Pajumekowünde xua Taxa neyanatapópona, xua Taxa irü yantapóponang xua daxota Taxa be kaein pangbe. Icha jopa paka itaküüpaeyo xua pana nejumekowüntame pokotsiwa yábara paka tsipáebatsi Taxa, moya pana nekuiyábara jume-kowünde xua báyatha éxanang pexeiña tatsita-itüütsi koyenewang. Baxuang jiwi tsita itüübang xua bara xaiñéi xua Taxa neyanatapópona xua daxota Taxa be kaeinbe pangbe. ¹²Xaniyang paka tsipáebatsi, pong nejumekowünta, bapong irü exanaena pokotsiwa éxanang. Matáütano ekeicha ichawang mataropeicha exanaena pewüünaewang beyakaincha xua pokotsiwa éxanang. Tsipéi xang ponaein Taxa beicha. ¹³Daxita pokotsiwang pana newüngaununaya wüükame Taxa beicha, bara baxua exanaein, tapaka katsita-itüütsinéxatsi Taxa pía peayapusüü itorobi koyenewa tatsi. ¹⁴Bara pákata exanaeinchi poxonae pana newüngaununaya wüükame Taxa beicha, jei Jesús.

Meje yábara poxonae Jesús tsiwüünaeya paeba xua bexa Nakom najumopetünaxü itorobina jíwitha

¹⁵Ekeicha Jesús barái pijimonae, jeye: “Icha pana neantobem, moya paexande taitorobi koyenewang. ¹⁶Icha baxua paexanáename tha bapoxonae Taxa wüükaetsi jang tsane: ‘Axa, ichüing itoróbare xua barapomonae peyawenaenéxatsi’, jang

tsane. Bapoxonae Taxa pákata itorobina pong ataya paka yantsiya poponeibina. ¹⁷Pong Nakom itorobina, ápara bapong bara pía Pejumopetünaxü tatsi, po Pejumopetünaxü tatsi paka yaputane éxana xua bara xaiñéi xua pokotsiwa Nakom yábara. Íchitha pomonae jopa nejumlahewüntsiyo, barapomonae jopa yaputaeyo Nakom pía Pejumopetünaxü tatsi. Daxota bárapo Nakom pía Pejumopetünaxü tatsi jopa itaküüpaetsi xua barapomonae peyantsiya jinompáewatsi. Dáichitha payaputáename bárapo Nakom pía Pejumopetünaxü tatsi tsipéi pákata patopaena yáwano ataya paka yantsiya poponaena”, jei Jesús.

¹⁸Ekeicha Jesús barái pijimonae, jeye: “Jopa paka punapentsi tsainchi. Ekeicha kaibe patopeikaein xua tapaka barü poponáewatsi tsainchi. ¹⁹Bara kaeto jiwí jopa netáe tsane pomonae jopa tana nejumlahewüntsiwi. Íchitha paxam pana netáename. Paxam ekeicha asüü pajinompáename tsipéi xang ekeicha asüü poponaein. ²⁰Bárapo mataketha poxonae Nakom pía Pejumopetünaxü tatsi patopeikaena, payaputáename xua xang Taxa be kaein pana náexanangbe irü xua paxam be kaein pana nekana éxaname irü xua xang be kaein paka kana éxanatsi. ²¹Pong yaputane taitorobi koyenewang xuano xua éxana xua bárapo taitorobi koyenewang paeba, bapong tsita itapeiñaxeina jíwitha xua xaniwaicha bara neántobe. Taxa ántobe tsane bapong, pong neántobe. Xang barichin antobein tsane bapong. Matáütano yaputane exanaein xua bara bapong barü póponang”, jei Jesús.

²²Irü Judas pong seikaya ichüngdü, pong Judas Iscariote aibi, bárapo Judas Jesús tsipáebatsi, Jesús jeichichi:

—Pata Tanekanamataxeinaem, zeta xua jiña meisha pana neyaputane exanaetsi xua bara pana nebarü jinómpame xua jopa daichim pomonaetha, pomonae jopa kajumekowüntsiyo? jei Judas.

²³Jesús Judas jumenótatsi, jeye:

—Pong neántobe bapong éxana pokotsiwa itorobang. Bapoxonae Taxa ántobe tsane bapong. Xang írürü Taxa pong kaein pangxaeinbe papatopaeinbe bapongtha pata yantsinexa bapong. ²⁴Pong jopa neantobeyo, bapong jopa exanaeyo pokotsiwa itorobang. Pajume diwesi xuaunxae pana nejumlahéname ápara jopa nata paebiño. Ápara baxua páebang tsipéi Taxa nejumlahaitoroba pong tana neitoróbiae, jei Jesús xua Judas tsipáebatsi.

²⁵Ekeicha Jesús pijimonae barái, jeye: “Daxita baxuang paka tsipáebatsi poxonae kataunxae paka barü popoinchi ánoxuae. ²⁶Inta paxam pákata Nakom najumopetünaxü itorobina. Bárapo Nakom pía Pejumopetünaxü tatsi paka yawenaena. Matáütano paka kuidubina xua pexaiñeiwa xua Nakom yábara. Matáütano bárapo Nakom pía Pejumopetünaxü tatsi paka kana exanaena xua pana neyábara kanan-taxeináename xua pokotsiwang báyatha daxita yábara paka tsipáebatsi.

²⁷”Poxonae paka kuenta ponaeinchi jüntema jinompa paka kana exanaeinchi. Paka katinchi pokoyene jüntema tapoponáe koyenewa. Bárapo jüntema tapoponáe koyenewa jopa bara be jüta ichiyo xua jiwí barompaya jüntema pía pejinompáe koyenewa tatsi. Jopa yábara pana najüntü-exabinde ichawang. Matáüta jopa junuwiya pajinompaeinde. ²⁸Báyatha pana nejumlahéname xua ponaein jang xuano xua ekeicha patopeikaein paxamtha xua paka barü poponaeinchi jang. Icha xaniwaicha pana neantobem tsipaem metha pajüntükoyene weiweináetsipame xua taponawa Taxa beicha. Tsipéi Taxa bichokono aiñakuí, beyakaincha xua xang poxonae kataunxae póponang po kae pin nákuathe. ²⁹Baxua paka tsipáebatsi

xua tsiwüünae páebang paiña tana nejumekowüntsineexam tsane poxonae xaniwaicha baxua tsane.

³⁰”Nama imoxoyo jopa neitaküüpaeyo xua ekeicha kaeto tapaka tsipaebiwa tsainchi, tsipéi nama imoxoyo patopáenaba pong jiwi jüntükoyene itorobéibatsi po jíwitha jopa tana nejumekowüntsiwi. Íchitha bapong jopa xeinaeyo peayapüsüü itorobi koyenewa xua tana neitorobiwa tsane. ³¹Bewa exanaein pokotsiwa xua Taxa neitoroba, xua daxita jiwi peyaputaenexa xua ápara bara xang pongxaein Taxa bichokono tana neantobein.

”¡Panonobaponde! Weye poinchi”, jei Jesús pijimonaetha.

Meje yábara poxonae Jesús yábara paeba uva ünbotu xua pepa ünbotu

15 ¹Ekeicha Jesús jeye: “Icha pepa ünbotu ichi xua petabü opina wejujuina mene xua uvathéi penakoichinexa, xang barapókotsi jüta koyeneya kana ichin jiwi. Jiwi ajüntükoyeneyapusüüya kana éxanang pomonae tana nejumekowüntsi jiwi, icha uva pabi pexeinaein ichi xua yabakaxueta xua wüünae petaxuwiwa tsainchi. Taxa bara jüta koyeneya ichi. Taxa yawena pomonae tana nejumekowüntsiwi, pomonae wüünae inta pejinompaewi. ²Uva pabi pexeinaein daxita ukuboba pomaxúranang xua jopa nakoichiyo. Bapoxonae daxita bárapo pemaxúranang, pomaxúranang xua dubena wüünae nakoita beyakaincha xua kopiya poxonae nakoita. Taxa barapókotsi jüta koyeneya éxana. Taxa itaweta pomonae bekein nejumekowünta íchitha jopa beta jinompaeyo xang nexa. Barichi pomonae bekein nejumekowünta íchitha saya tsiwiyo éxana pokotsiwa itorobang, Taxa átene kana éxana xua barapomonae átene, xua daxota barapomonae beta exanaena pokotsiwa itorobang. ³Pajüntükoyene wüünaem paiña tana nejumekowüntsixaemxae xua báyatha pojume diwesi tapaka tsipaebixaetsi. ⁴Pana nekayawa jinompéibare icha ichin xua ataya paka kayawa poponeibinchi. Uva ünbotu maxúranawa ba poxonae íratha maxúrana boka jopa ba pipatotha matono xuwoungkuaeyo xua pethéi perubenaenexa. Bara jüta koyeneya paichim. Icha jopa pana nekayawa jinompaem, jopa paxeinaem tsane xua pokoyene pexeíña peajüntüya-püsüü koyenewa.

⁵”Icha pepa uva ünbotu ichi xua xeina pemaxúranawang, bara jüta koyeneya ichin. Xeinang pomonae tana nejumekowüntsi jiwi pam. Pepa uva ünbotu nakoita éxana nawita pethéi pemaxúranawangtha tsipéi poxoru pemaxúranawang dubena pepa uva ünbotu totha tsika. Bara jütiya ichi icha pana nekayawa jinómpame bapoxonae bichokono paka kana ichichi wüünae exanaeinchi. Daxota icha pana nepentsiya jinómpame jopa paka itaküüpáe tsipae xua paéxaname pokotsiwa xua Nakom ichichipa. ⁶Pong jopa nekayawa poponaeyo bapong Taxa itawetsina, icha xua uva pabi pexeinaein ichi. Bapong petüpáe maxúranawang nota xua báyatha ukobobeba yawa bapoxonae ishótotha bebeya petautsinexa.

⁷”Icha pana nekayawa jinompáename yawa icha jopa pajüntemainaem tsane pokotsiwa báyatha paka kuidúbatsi, bapoxonae pokotsiwa pana newüükáename bara baxua pákata exanaeinchi. ⁸Jiwi Taxa barükui-iturajínatsi poxonae paka tane xua betiya wüünae pajinómpame paiña neexanaexae pokotsiwa Taxa paka itoroba. Yawa Taxa barükui-iturajínatsi tsipéi barapomonae paka kuiyaputane xua paxam barápara pepa tamonae jiwi pam. ⁹Paka antobetsi icha Taxa ichi xua neántobe. Ataya payakuiya jinómpare xua paxam pokoyene xua pomonae tapana

nejumekowüntsi jiwi pam. ¹⁰Paexanaponde pokotsiwa paka itoróbatsi, bapoxonae bichokono tsitekaeya paka ántobe tsóponae tsainchi, icha xang ichin xua poxonae éxanang pokotsiwa Taxa neitoroba xua daxota ataya tsitekaeya neántobe tsóponae.

¹¹”Baxuang paka tsipáebatsi xua paka kana ichichi wüünae exanaeinchi xua bapoxonae bichokono pajüntükoyene weiweináename. ¹²Bárapo taitorobi koye-newa baxue xua jangje: ‘Nantiya paxam pana naantobeinde, icha paka ichichi xua paka antobetsi’, jang. ¹³Yábara paka tsipáebatsi po peantobewa bichokono aiña-kuí beyakaincha icha peantobewa. Barapókotsi peantobewa xeina pebin poxonae peantobexae pía jintong yaitataba xua pebexubinéxatsi xua pía jintong tatsi jopa bepetabexubiwa tsainchi. ¹⁴Paxam ápara tajiwiwimonae pam, icha paexanaponáename pokotsiwa xua tapaka itoróbíwatsi. ¹⁵Ánoxuae jopa be paka kaunutichi xua paxam pomonae inta amanaya penakuichiwi pam. Nama po kae pin nákuathe pomonae petanakuichiwi jopa yábara yaputaeyo pokotsiwa éxana pomonae pía pekanamataxeináewichi tsipéi jopa baxua yábara paebiyó. Íchitha paka kaunú-tatsi xua paxam ápara tajiwiwimonae pam, tsipéi nama xang paka kana exainchi xua payábara yaputáneme daxita pokotsiwang xuang Taxa nekui-itoroba. ¹⁶Ápara jopa pana neitapetsim. Jame ápara paka itapétatsi. Paka kui-itoróbatsi xua wüünae paiña neexanaewa pokotsiwa Taxa paka itoroba. Ichichipang xua jopa pewerawerakaewa tsane pokotsiwang painta exanáename. Bapoxonae Taxa bara pákata exanaena poxonae Taxa beicha pawúükame poxonae pana nebüxúna bobenóu-name. ¹⁷Daxota ekeicha paka jeichi: ‘Paxam nantiya pana naantobeinde’, jang”, jei Jesús pijimonaetha.

**Meje yábara poxonae Jesús jeye:
“Jiwi nekaseba, irü paka kaseba”, jei Jesús**

¹⁸Ekeicha Jesús jeye: “Pomonae jopa nejumekowüntsiyo icha barapomonae paka kaseba panantaxéinare xua barapomonae kopiya nekaseba daxota paka kasébarü. ¹⁹Icha paxam pomonae jopa pata tana nejumekowüntsiwi jíwana pam tsipaem, bapoxonae pomonae nekaseba paka ántobe tsipae icha ichi xua barompaya ántobe pijimonae. Pomonae xote jinompe, pomonae jopa tana nejumekowüntsiwi, barapomonae pexantha tatsi paka itapétatsi daxota barapomonae paka kaseba. Tsipéi ánoxuae paxam jopa barapomonae jíwana pam. ²⁰Pana nejumekayábara nantaxéinare xua báyatha paka tsipáebatsi xua jangje: ‘Pong ba tanakuita ichüng, bapong jopa aiñakuiyo, jame pía pentakaponaein tatsi aiñakuí pong peitorobixaetsi’, paka jeichi. Tsipéi jiwi inta abe éxana daxota irü pákata abe éxana. Jiwi jopa jumekowüntsiyo takuidubiwa. Barichi jopa jumekowüntsiyo paiña nekuidubiwa. ²¹Daxita baxuang jiwi paka kana exanaena xua paiña neexanaexae pokotsiwa paka itoróbatsi tsipéi jopa yaputaetsi pong neitoroba pong Táxaxae.

²²”Icha jopa patopáeinchipae po kae pin nákuathe, xuano xua icha jopa kuidubinchipae barapomonaetha, barapomonae jopa natsikuentcipae xua abe peexanaexaetsipei jopa yaputaetsipae xua abe éxana. Ichitha ánoxuae jopa itaküüpaetsi xua pejeiwa: ‘Jopa payaputaetíño xua abe paéxanang’, xua pejeiwa, tsipéi patopang yawa kuidubang barapomonae. ²³Pomonae xua nekaseba, barapomonae irü Taxa kasébatsi. ²⁴Barapomonae tane xua xang éxanang pokotsiwa ichüng jopa itaküüpaetsi xua peexanaewa. Icha barapomonae jopa báyatha nekuitáetsipae xua éxanang jopa natsikuentcipae xua abe peexanaexae jopa peyaputaexae tsipae xua abe éxana.

Íchitha barapomonae bara xaniwaicha nekuitane xua éxanang. Matáütano yaputane xua abe éxana. Daxota barapomonae nekaseba irü daxota Taxa kasébatsi. ²⁵Íchitha baxua bewa neyábara jumekuiwetsina tsipéi Moisés pía peitorobi koyenéwatha neyábara tsiwüünaeya jeye: ‘Barapomonae nekaseba poxoru saya ápatsi’, jei bárapo Moisés pía peitorobi koyenéwatha.

²⁶”Itorobin Nakom pía Pejumopetünaxü tatsi xua po pejumopetünaxü Taxa wérena pona, po pejumopetünaxü paka yawenaena po pejúmope xaiñeya pepaebin. Bárapo pejumopetünaxü neyábara paebina poxonae bapong patopeikaena. ²⁷Paxam bara paichim tsane ichamonaetha pana neyábara paebíname. Tshipéi poxonae aena tamrópata pítabang tanakuichiwa bárapo kae pin nákuathe, bapoxonae kaena báyatha pana nebarü jinómpame”, jei Jesús pijimonaetha.

16 ¹Ekeicha Jesús barái pijimonae, jeye: “Baxua paka tsipáebatsi xua jopa paiña nebarapentsiwa tsane xua tapana nejumekowüntsiwam poxonae jiwi abe pákata exanaena. ²Paka itawetsina judiomonae pía penakaetutsibong weya. Po matakeitha poxonae jiwi paka jutebina, bárapo jiwi katsawiya nantaxeinaena xua Nakom pekui-itorobixae xua daxota paiña paka nekajutebiwa tsane. ³Bárapo jiwi baxua pákata exanaena, tsipéi jopa neyaputaeyo matáüta Taxa tsipéi jopa yaputaetsi. ⁴Bárxua paka tsipáebatsi xua paiña tana nekayábara jumekanantaxeinaewam tsane poxonae bárapo matakabi tsane poxonae po matakaihi jiwi abe pákata exanaena.

Meje yábara pokoyene xua Nakom pía Pejumopetünaxü tatsi éxana

”Poxonae aena tamrópata pítabang tanakuichiwa bárxua jopa paka tsipaebichi tsipéi paka barü popoinchi. ⁵Íchitha nama ánoxuae baxua paka tsipáebatsi tsipéi ponaein, xua Taxa beicha taekaeawa tsane pong tana neitoróbixae. Dapong aibi paxam jíwana pam pong neyáñaba xua nejéi: ‘¿Eta xota ponáename?’ pong nejéi, tsipéi daxita pam bara pana neyaputáneme xua xota taponaeawa. ⁶Nama ánoxuae bichokono panthüthü wekoyam tapaka tsipaebixaetsi baxua. ⁷Íchitha bara yatsikaya xaiñeya paka tsipáebatsi. Baxua pákata wüünae xua taponaeawa tsipéi icha jopa ponaein chipae, jopa neitaküüpaee tsipae xua taitorobiwa Nakom pía Pejumopetünaxü tatsi xua paiña nepaka kayawenaenexa. Icha ponaein bárapo júmope pákata itorobinchi. ⁸Poxonae Nakom pía Pejumopetünaxü tatsi patopeikaena, jiwi yábara yaputane kana exanaeinchi pokotsiwa daxita jiwi abe peéxanae kuirukoyenein éxana. Matáütano bárapo Nakom pía Pejumopetünaxü tatsi jiwi yaputane kana exanaeinchi xua xang saya wüünae Nakom tayábara paebin. Matáütano bárapo Nakom pía Pejumopetünaxü tatsi jiwi yaputane kana exanaeinchi xua pokoyene poxonae Nakom exanaena xua Nakom yábara paebina daxita jiwi xua penatsikuentsiwa xua abe peexanaexae. ⁹Poxonae barapomonae abe peéxanae kuirukoyene éxana baxua tsita itapeiñaxeina xua barapomonae jopa tana nejumekowüntsiwi. ¹⁰Matáütano jiwi yaputane kana exanaeinchi xua xang saya wüünae Nakom tayábara paebin, tsipéi Taxa beicha ponaein yawa paxam jopa ekeicha pana netaem tsane. ¹¹Matáüta bárapo Nakom pía Pejumopetünaxü tatsi jiwi yaputane kana exanaeinchi xua pokoyene poxonae Nakom exanaena xua Nakom yábara paebina daxita jiwi xua penatsikuentsiwa xua abe peexanaexae. Tshipéi kaena báyatha bapokotsiwa éxana kaurimonae pía pentakaponaeintha, pong jiwi jüntükoyene itoróbatsi bárapo kae pin nákuathe xua abe peexanaenexa. Matáütano Nakom bapongtha kana exanaena xua bexa bapong werawerakaena.

¹²”Ichawa bekein xeinang xua tapaka tsipaebíwatsi íchitha ánoxuae jopa paka itaküüpaeyo xua paiña neyaputaewa tsipéi jopa paka koyeneküüpaeyo. ¹³Poxonae patopeikaena Nakom pía Pejumopetünaxü tatsi, bárapo pejumopetünaxü paka tsipaebina daxita xua xuang pokotsiwa pexaiñeiwa tsipéi ápara jopa paebí tsane xua piakoutha peichichipaewa. Saya paebina xua Nakom báyatha jumetaínchi. Matáütano bárapo pejumopetünaxü yábara yaputane paka kana exanaena pokotsiwa bexa tsane exanaena po kae pin nákuathe tsike. ¹⁴Bárapo Pejumopetünaxü jiwi kana exanaeinchi xua jiwi wüünae tana nejainchiwa tsane. Pokotsiwa xua paka tsipáebatsi, bárapo pejumopetünaxü xuya yaputane paka exanaena. ¹⁵Daxita xua Taxa pokotsiwa xeina irü ápara xang tawa. Daxota paka jeiche: ‘Pokotsiwa takuidubi koyenewa, bárapo koyenewa bárapo pejumopetünaxü xuya ekeicha paka kuidubina’, paka jeichi.

¹⁶”Kaeto tsane jopa pana netaem tsane. Íchitha bexa tsane bapoxonae ekeicha pana netáename. Bapoxonae pirapaeyo Taxa beicha ponaein”, jei Jesús pijimonaetha.

Meje yábara poxonae Jesús jeye: “Bekein kopiya pawekoyam tsane íchitha bexa ekeicha pajüntükoyene weiweináename”, jei Jesús

¹⁷Bapoxonae ichamonae pomonae Jesús pijimonaetha tatsi kaemonae nayáiñaba, najéi:

—¿Eta xua bapong naka tsipáebará? ¿Eta xua metha naka jei: ‘Kaeto tsane jopa pana netaem tsane. Íchitha bexa tsane, bapoxonae ekeicha pana netáename. Bapoxonae pirapaeyo Taxa beicha ponaein’, naka jei? ¹⁸ ¿Eta xua metha ‘kaeto tsane’, jane? Jopa baxua yaputaetsi, najéi.

¹⁹Jesús pijimonaetha yaputane xua pijimonaetha juntukuru yáiñabatsi. Daxota pijimonaetha barái, jeye:

—Xuaunxuae paka jeichi: ‘Kaeto tsane jopa pana netaem tsane. Íchitha bexa tsane bapoxonae ekeicha pana netáename’, jang ¿baxua ápara pana nekayábara jumeyáiñabame? ²⁰Xaniyang paka tsipáebatsi. Takoutha paxam pawekoyam tsane yáwano paanthüthürewem tsane poxonae írürü jüntükoyene weiweinaena pomonae jopa tana nejumekowüntsi jiwi. Bekein kaeto pawekoyam tsane íchitha ekeicha pajüntükoyene weiweináename. ²¹Poxonae yábüyo búpana taékatsi pexuyo, poxonae imoxoyo nakatsiwa pexuyo, bapowa bichokono wekoyéi. Íchitha poxonae báyatha pexuyo nakatsiwa, bapoxonae bapowa nakayábara jüntemaina xua báyatha yaporowapapái xua peatenexae. Daxota bapowa jüntükoyene weiweina pexuyo báyatha penaexanaexae. ²²Bara jüta koyeneya paichim tsane. Poxonae tüpaein xua taponaein tsane, bekein pawekoyam tsane, íchitha panetáename poxonae asüüng tsane xua ponaein Taxa beicha. Yawa bapoxonae pajüntükoyene weiweináename. Dapong aibi pong bárapo jüntüweiweináe koyenewa paka jüntükoyene wejüntemaina kana exanaena.

²³“Bárapo matakeitha, po matakeitha Taxa beicha ponaein, ekeicha bara nama jopa paiña tana neyáiñabiwam tsane. Saya meisha poxonae Taxa beicha pana newüngaununaya wüükáename, bara baxua daxita pákata exanaena. Baxuang pokotsiwa paka tsipáebatsi bara xaiñang. ²⁴Kaena báyatha xua beya ánoxuae jopa pana newüngaununaya wüükaem Taxa beicha. Ánoxuae nama pana newüngaununaya wüükáename Taxa beicha. Bara baxua pákata exanaena xua bichokono yatsikaya paiña nejüntükoyene weiweinaewa tsane”, jei Jesús pijimonaetha.

Meje yábara poxonae Jesús jeye: “Xang amanayabaxubin pong jiwi jüntükoyene itoróbatsi po kae pin nákuathe”, jei Jesús

²⁵Ekeicha Jesús barái pijimona, jeye: “Pokotsiwang xua báyatha paka tsipáebatsi, bara páebang pekayábara jüta pepaebi diwesíxitha. Íchitha bárapo matakabi patopaena, po matakaiha jopa paka tsipaebi tsainchi pekayábara jüta pepaebi diwesíxitha. Bárapo matakaiha bara Nakom yábara jumepenthiya paka tsipaebinchi. ²⁶Bárapo matakaiha pana newüingkaununaya wüükáename Taxa beicha. Jopa paka tsipaebichi xua Táchatha tapákata wüükaewa tsainchi tsipéi ápara bara paiñakoya paka itaküüpa. ²⁷Taxa paka ántobe pata tana neantobemxaem yawa pata tana nejumeyábara kowüntsixaemxae xua xang bara yatsikaya Taxa wétsika ponang. ²⁸Taxa pía xaiña wétsika ponang xua tapatopaewa tsane po kae pin nákuathe tsike. Íchitha ánoxuae bárapo kae pin nakue kuenta ponang xua ekeicha Taxa beicha taponae tsane”, jei Jesús pijimonaetha.

²⁹Néxata Jesús pijimonaexae baráichichi, jeye:

—Ánoxuae bara yatsikaya jumepenthiya pana netsipáebame. Jopa paebim pekayábara jüta pepaebi diwesíxitha. ³⁰Ánoxuae payaputang pokoyene xua bara daxita neyaputaewang. Matáütano payaputang xua jopa pata nantawenonaewa xua paxang pata paka kayaiñabíwatsi. Daxota pajumekowüntang xua xam bara yatsikaewa Nakom wétsika neponaein, jeichichi Jesús pijimona.

³¹Jesús jumebarái pijimona, jeye:

—¡Ánoxuae matapaiña pana nejumekowüntame! jei Jesús. ³²Bara nama imoxoyo matakabi patopa, po matakaiha tsana parüküpáename poxonae jiwi paka yotabina. Paxam pana nekuentarüküpáename. Dáichitha xang jopa kompaiño tsane tsipéi Taxa neyanta báyatha. ³³Daxita baxuang paka tsipáebatsi paiña nejúntükoyene weiweinaenexam tsane tapana nekayawa jinompaexaem tsane. Poxonae kataunxuae pajinompáename po kae pin nákuathe jiwi paka átene exanaena poxonae abe paka kana exanaena. Dáichitha jüntema pajinómpare. Tsipéi xang amanayabaxubin pong jiwi jüntükoyene itoróbatsi po kae pin nákuathe, jei Jesús pijimonaetha.

Meje yábara poxonae Jesús pijimona tawüüka Páxatha

17 ¹Poxonae Jesús baxua najumeweta xua pijimona tsipaeba, bapoxonae Jesús itaboko nekoicha. Páxatha tsipaeba jeye: “Axa, aunxuae patopaena xua poxonae jiwi tsita itüütsínname xua xang, ápara bara Nexantong, pong ta-aiñakuín. Bapoxonae jiwi tsita itüütsin xua xam jiña neaiñakuim. ²Xam, Nexantongxaein, daxita jiña neitorobi koyenewa nekátame xua taitorobinexa tsane jiwi. Daxita po jiwi nekátame, po jiwi tana nejumekowüntsiwi, bárapo jiwi katsin peajüntüyapusüüwa, po peajüntüyapusüüwa ataya tsiteka. ³Axa, yatsikaya kompam xam Nakom, irü xang Jesucristong kompang pongxaein neitoróbame po kae pin nákuathe tsike. Pomona nejumekowünta irü xuano kajumekowüntano, barapomona xeinaena peajüntüyapusüüwa, po peajüntüyapusüüwa ataya tsiteka.

⁴”Po kae pin nákuathe éxanang xua jiwi wüünae nekajainchiwa. Báyatha wetang xua báyatha nekui-itoróbame xua taexanaewa tsane. ⁵Axa, ánoxuae ekeicha aiñakuí neexande neitabáratha, icha matha neichim poxonae kaena báyatha aiñakuí neéxaname neitabáratha poxonae nexantha póponang poxonae kataunxuae po kae pin nakue jopa forotsiño.

6”Pomonae báyatha itapétame, pomonae nejumekowünta, barapomonae yábara kuidubang xua xam kayábara páebatsi. Barapomonae bara jiñamonae yawa nepunapona éxaname. Barapomonae bara wüünae éxana xua pokotsiwa itoróbame. 7Pokotsiwang xua xang páebang xuano xua éxanang, daxita baxuang éxanang tana nekatsimxae jiña pexeíña ayapusúü itorobi koyenewa. Ánoxuae daxita baxuang barapomonae yaputane. 8Pokotsiwang nekuidúbame xuya barapomonae kuidubang. Daxita baxuang barapomonae yábara nejumeejejei. Barapomonae yaputane xua xang bara yatsikaya xam wétsika ponang. Matáütano yaputáneno xua xam tana neitorobiwam.

9”Kawüükatsi barapomonae nexa xua neyawenaewa tsane barapomonae. Ápara jopa yábara kawüükaetsi pomonae jopa nejumekowüntsiyo xua neyawenaewa tsane. Saya jame yábara kawüükatsi pomonae tana nekatsixaemxae pomonae jiñamonaexae. 10Daxita pomonae xua jiñamonae ápara tamonaerü. Daxita írürü pomonae xua tamona, ápara jiñamonaerü. Ichamona wüünaeya nekayábara nantaxeina xua xang aiñakuin tsipéi wüünae jinompa, pomonae tana nejumekowüntsi jiwi.

11”Xang jopa poponaein tsane po kae pin nákuathe tsipéi ponaein nexaiña beicha xua tapoponaenexa nexantheicha. Nama barapomonae jopa daichiyo, saya po kae pin nákuathe dubenanaebiyaena. Axa, xam pongxaem bichokono nejüntükoyene wüünaein tsaibim. Pomonae báyatha tana nekatsixaemxae barapomonae bebere jiña neayapusúü neitorobi koyenéwatha xua barapomonae jopa pejüntükoyene kui-itorobinexa tsainchi xua abe peexanaewa tsane xua kaurimonae pía pentakaponaein tatsi jüntükoyene kui-itoroba. Bapoxonae barapomonae be kaein kananaexanáeinchibe waantobexaebe barapomonae icha ichíchibe xua be kaein naexainchibe. 12Poxonae kataunxuae póponang po kae pin nákuathe, ápara xang bebeteibang barapomonae jiña neayapusúü neitorobi koyenéwatha pomonae tana nekatsixaemxae. Bárapo tamonaexae beta bebetang yawa jopa kopatsiño xua ichüng tana newepu aichurukuaewa, saya meisha kaein nexubina barapomonae jíwana. Daxota bapong bewa tüpaena tsipéi bichokono peajüntükoyeneyapubein. Bapong abe éxana tsipéi kaena báyatha nejume-itoroba diwésitha bapong yábara páebatsi pokoyeneya xua bapong tana nekana exanaewa tsane.

13”Ánoxuae xang ponang nexaiña beicha ichaxoteicha ékame. Íchitha daxita baxuang páebang poxonae kataunxuae po kae pin nákuathe popónangje xua barapomonae bichokono pejüntükoyene weiweinaenexa, po pejüntükoyene weiweinaewa báyatha xeinang. 14Nejume diwesi katang bárapo tamona. Íchitha bárapo tamona inta kasébatsi ichamona tsipéi bárapo jiwi po kae pin nakuathepiwi. Bárapo tamona nama po kae pin nakuathepiwi aibi, icha ichin xua xang po kae pin nakuathepin aibin. 15Ápara jopa kawüükaetsi xua bárapo tamona nenotsinexa po kae pin nakue weye. Saya ápara kawüükatsi xua barapomonae nebebetinexa kaurimonae pía pentakaponaein tatsi pekuiyainwa. 16Icha xang ichin xua po kae pin nakuathepin aibin, barichi bárapo tamona jopa bárapo kae pin nakuathepiwiyo. 17Nejume diwesi, ápara po diwesi nexaiñéi jume diwesi. Poxonae bárapo tamonae jumetane baxua barapomonae kátame xua pejüntükoyene weiweinaewa xua peexanaewa tsane pokotsiwa ichichípame. 18Icha neichim xua neitoróbame pomonaetha, pomonae jopa jumekowüntsiyo, barichin pomona tana nejumekowüntsiwi itorobang pomonaetha, pomonae jopa tana nejumekowüntsiwi.

¹⁹Najüntükoyene katang nexaiña beya tha xua exanaetsi pokotsiwa ichichípame. Baxua éxanang tsipéi antobein tamona. Éxande xua barapomona irü pena jüntükoyene katsinexa nexaiña beya xua pía peexanaewa tsane pokotsiwa ichichípame. Baxua peexanaenexa tsane pexeinaexae nejume diwesi, po diwesi nexaiñéi jume diwesi.

²⁰”Jopa meisha kawüükaetsi bárapo tamona nexa, ápara yáwano irü yábara kawüükatsi pomona bexa nejumekowüntsina poxona jumetaena tajume diwesi xua poxona pepaebixae tsane bárapo tamona. ²¹Kawüükatsi xua barapomona be kaein penaexanaenexa xuano xua kae penantaxeinaeya nakana barü kayawa nantaxeinaenexa tsáinchibe. Baxua exanátsibe barapomonaetha icha neichim xua neyántame xuano xua xam kayantatsirü. Poxona barapomona be kaein nakayawa naexanaponáinchibe, bapoxona ichamona yábara jumekowüntsina xua xam bara yatsikaya tana neitorobiwam. ²²Bárapo tamona peaiñakuí koyenewa katang, po peaiñakuí koyenewa xam nekátame xua barapomona be kaein penaexanaenexa icha ichíchibe xua bara kaein naéxanatsibe. ²³Xang tamona yantang irü xam neyántame, tsipéi daxítatsi be kaein naexainchi daxota barapomona yatsikaya bara be kaein náexana. Bapoxona daxita jiwi kuiyaputaena xua xam bara yatsikaya tana neitorobiwam. Matáütano bárapo jiwi kuiyaputaena xua tamona antobem icha ichim xua neantobem.

²⁴”Axa, nekátame bárapo tana nejumekowüntsiwi. Íchiphang xua barapomona pomona tana nejumekowüntsiwi ponaena ichaxoteicha taponawa tsane xuano xua pía petaenexa tsane ta-aiñakuí koyenewa xua nekátame. Tsipéi kaena báya-tha neantobem poxona kataunxuae jopa forotsiyo po kae pin nakue. ²⁵Axa, pong bichokono nejüntükoyene wüünaem. Pomona jopa tana nejumekowüntsiwi jopa pepa jiñamonaeyo tsipéi jopa kayaitaeyo. Íchitha xam bara kayaitainchi. Pomona tamona, pomona tana nejumekowüntsiwi barapomona neyábara yaputane xua xam tana neitorobiwam. ²⁶Barapomona pomona tana nejumekowüntsiwi yábara yaputane éxanang xua xam kayábara páebatsi. Abü kataunxuae áwiya baxua exanaein xua jiña nekaantobenexa tsane icha neichim xua neantobem. Matáütano barapomona ataya yaitatapononeibin”, jei Jesús poxona Paxa tsipaeba.

Meje yábara poxona Jesús wáetabatsi

(Mt 26.47-56; Mr 14.43-50; Lc 22.47-53)

18 ¹Poxona Jesús najumeweta xua poxona Paxa tsipaeba, bapoxona pomona Jesús pijimonaexae tatsi Jesús barü pona. Jesús barü pona foto iya icha muxunene beya, po foto kataunxuae ira tsewa. Bárapo foto pewüing Cedrón. Bárapo icha muxunene beya umena xua po naein peúbi naein, baxota Jesús pijimona barü patopa. ²Judas, pong Jesús kaenátatsi, bapong yaputane bárapo momiyo tsipéi baxota matha matowa Jesús pijimona barü nakaetuteiba. ³Judas patopa ichaxota Jesús pijimona barü unguwa. Judas barü pona soldadomona írino policiamona, po policiamona pomona Nakom pin píabo peyábara ume-naewi. Daxita barapomona, pomona Judas barü patopa fariseomona itoroba irü sacerdotemona pía pentakaponaewi tatsi itoróbarü. Daxita barapomona kusin kápona. Irü ichamona dámparang kápata irü ichamona banaxutong kápata. ⁴Bekein Jesús tsíwana yaputane barapomona xua pokoyene pekana exanaewa tsainchi, íchitha Jesús itataya yawa yáiñaba, jeye:

—¿Jintam pawenawenam? jei Jesús.

⁵Daxita barapomonae Jesús jumenótatsi, jeye:

—Ápara Jesús Nazaret tomarapin pawenawenang tsompáe, jei.

Jesús jumenota, jeye:

—Ápara bara bapong úngkuangje, jei Jesús.

Irü Judas, pong Jesús kaenâetatsi, baxota naúngkuarü. ⁶Poxonae Jesús, jeye: “Ápara, bara bapong úngkuangje”, jei, bapoxonae barapomonae pejuma iyiya kai-beya yawa xuirabathopa. ⁷Ekeicha Jesús yáíñaba, jeye:

—¿Jintam pawenawenam tsompáe? jei.

Ekeicha barapomonae, jeye:

—Ápara, Jesús Nazaret tomarapin pawenawenang tsompáe, jei barapomonae.

⁸Néxata Jesús barái, jeye:

—Báyatha paka tsipaebatsiba: ‘Ápara bara bapong úngkuangje’, jang. Icha pana newenawenam bara tamonaie inta painta pukópabare, jei Jesús.

⁹Baxua éxana tsipéi kaena báyatha Jesús jeye Páxatha: “Axa, bárapo tamonaie-xae beta bebetang yawa jopa kopatsiño xua ichüing tana newepu aichurukuaewa”, jei Jesús. ¹⁰Bapoxonae Simón Pedro namarawejonta piawato kusi. Simón Pedro muxuyoro katsoniba pong pewüing Malco, pomuxuyoroto pekoxa werukuiya. Bapong Malco pong sacerdotemonae pía pepa pentakaponaein tatsi tanakuítatsi.

¹¹Jesús Pedro baraichi, jeye:

—Kusi jeinka pentakuérutha. ¿Eta pokotsiwa daxua daichim? ¿Xam ichípame xua jopa taexanaewa tsane pokotsiwa kaena báyatha Taxa neitoroba xua bara bewa jiwí átene tana nekana exanaewa? jei Jesús.

Meje yábara poxonae Jesús unguua Anás peitabaratha tatsi

(Mt 26.57-58; Mr 14.53-54; Lc 22.54)

¹²Bapoxonae soldadomonae irü soldadomonae pía pentakaponaein tatsi írürü policiamonae, po policiamonae pomonae Nakom pin píabo peyábara umenaewi, daxita barapomonae Jesús wâetabatsi yawa maxükúbatsi. ¹³Bapoxonae Jesús kapoinchi Anás píabo tatsi beya. Bapong Anás Caifás paxuyo tatsi. Bapong Caifás irü bárapo weitha sacerdotemonae pía pepa pentakaponaein tatsi náexana. ¹⁴Barapong Caifás, pong kaena báyatha jei judiomonaetha: “Metha wüünae xua bara kaein piamonae yaitatsina pebexubinéxatsi xua daxita piamonae tatsi jopa petajutebinéxatsi”, jei Caifás xua báyatha paeba.

Meje yábara poxonae Pedro Jesús yábara páebatsi xua jeye:

“Jopa dapong yaitaeiño”, yábara jeichichi Jesús

(Mt 26.69-70; Mr 14.66-68; Lc 22.55-57)

¹⁵Simón Pedro irü ichüing pongxaerü Jesús pijimonae tatsi jíwana Jesustha napunapónabe poxonae policiamonae Jesús kapoinchi sacerdotemonae pía pepa pentakaponaein tatsi piabotha tatsi. Barapong pong ichüing bapong yaitainchi xua sacerdotemonae pía pepa pentakaponaein tatsi yáitane. Daxota bapong sacerdotemonae pía pepa pentakaponaein tatsi pía pin píabo pánatha tatsi Jesús punajoníyatsi. ¹⁶Nama Pedro aishówatha unguua peboupajuma wérena. Daxota bapong pong ichüing pana weya pona peboupa beya xua yábüyo petsipaebinéxatsi powayo yapu-eeneiba peboupa. Bapong jeye: “Inta Pedro pu-itorobarena xua bara

jondenaena”, jei. Tspíei bárapo sacerdotemonae pía pentakaponaein tatsi bapong yaitainchi daxota barapowa Pedro bara kópatatsi xua bara jondenaena. ¹⁷Néxata poxonae Pedro jondena, bapowa Pedro yáíñabatsi, jeichichi:

—¿Bara xam, Jesús pijimonae tatsi kaein jiwanamdá? jeichichi Pedro.

Pedro jumenota, jeye:

—Jume, ápara xang dapong aibin, jei Pedro.

¹⁸Yáitama irü ake tsungkuaerü daxota pomonae sacerdotemonae pía pepa pentakaponaein tatsi tanakuítatsi irü policiamonaeno, daxita barapomonae ishoto itutaeta bárapo pánatha. Daxita barapomonae nonopumena bárapo ishótotha. Pedro irü baxota nanonopúngkuarü.

Meje yábara poxonae sacerdotemonae pía pepa pentakaponaein tatsi Jesús matowa yáíñabatsi

(Mt 26.59-66; Mr 14.55-64; Lc 22.66-71)

¹⁹Írürü bapoxonae sacerdotemonae pía pepa pentakaponaein tatsi tamrópata pítaba xua Jesús matowa peyaiñabíwatsi. Jesús jeichichi: “Jesús, ¿jintambarü jiñamonae? ¿Eta po diwesi kuidúbame bárapo jiñamonae?” jeichichi Jesús.

²⁰Jesús jumenota, jeye:

—Kaena báyatha daxita jiwi peitütha kueikueijang tsaibin. Judiomonae pía penakaetutsi bongtha ataya kuidubeibang. Matáütano Nakom pin piabotha ichaxota judiomonae nakaetuteiba, baraxótano ataya kuidubeibang. Bápana jopa jiwi wepu nameicha paebin xua pokotsiwa jiwi jopa tana nejumetaenexa. ²¹¿Eta pokotsiwa metha nejumeyábara yáíñabame? Jame maisha moya yáíñabare pomonae báyatha nejumetane. Moya barapomonae katsipaebina pokotsiwa báyatha tsi-paebang barapomonae petanejumeyaputaexae pokotsiwa báyatha tsipaebang, jei Jesús.

²²Poxonae Jesús baxua najumeweta, bapoxonae kaein policiamonae jíwanapin pomonae baxota umena, po policiamonae Nakom pin píabo peyábara umenaewi bapong Jesús júmata kuaintaxotsi. Yawa bapong Jesús jeichichi:

—¿Eta xua dapo jume páebame poxonae baxua jumenótame sacerdotemonae pía pepa pentakaponaein tatsi? jei bapong.

²³Jesús jumenota, jeye:

—Icha barapokotsiwa abe páebang, moya netsipáebare xua abe. Íchitha icha xua wüünae páebang, ¿eta pokotsiwa metha néxata nejúmata kuaintaxúbame? jei Jesús. ²⁴Bapoxonae Anás Jesús yamaxükübiya itoróbatsi Caifás beya. Bapong Caifás sacerdotemonae pía pepa pentakaponaein tatsi náexana bárapo weitharü.

Meje yábara poxonae ekeicha Pedro Jesús yábara páebatsi:

“Jopa dapong yaitaeiño”, yábara jeichichi Jesús

(Mt 26.71-75; Mr 14.69-72; Lc 22.58-62)

²⁵Poxonae baxuarü, írürü kataunxuae Pedro nanonopungkua. Barapoxonae barapomonae Pedro yáíñabatsi, jeichichi:

—¿Xam ápara Jesús pijimonae tatsi kaein jiwanamdá? jeichichi Pedro.

Íchitha Pedro jumenotsiya jeye:

—Jume, ápara xang bapong aibin, jei Pedro.

²⁶Bapoxonae ekeicha ichüing Pedro yáíñabatsi pong sacerdotemonae pía pepa pentakaponaein tatsi tanakuítatsi. Pong Pedro yáíñabatsi, bapong kaein jíwana pomonae Pedro jíwana muxuyoro katsoniba. Bapong Pedro yaiñabiya jeichichi:

—Xam báyatha kaena katainchi poxonae Jesús paka barü pona momiyó beya. ¿Bara methara? jeichichi Pedro.

²⁷Pedro ekeicha jumenotsiya jeye:

—Jume, jopa dapong yaitaeiño, jei.

Bapoxónaerü kaena naiña wákara pebto fiba.

Meje yábara poxonae Jesús ungkua Pilato peitabaratha tatsi

(Mt 27.1-2,11-14; Mr 15.1-5; Lc 23.1-5)

²⁸Kaemúimbotha Jesús kapoinchi Caifás píabo weya pong jiwi peyanakua ewatsinchi pin píabo tatsi beya, pong pewüing Pilato. Íchitha judiomonae jopa jojoniyaeyo bárapo botha pong jiwi peyanakua ewatsinchi pin piabóthaxae tatsi. Judiomonae pía jüntükoyene kuixaina xua jei: “Judiomonae jopa bewa nanakaetutsi pomonae jopa be judiomonae naexanaeyo piabóthaxae tatsi po mataketha poxonae imoxoyo Pascua wüing matakabin xua poxonae jiwi penabanaewanexa pexaewa”, jei. Tsipéi icha baxua exanáetsipa piakoutha najüntükoyene taxobíchipa yawa barapomonae jopa itaküüpaetsipaetsi xua pexaewa xaena, po pexaewa poxonae xane Pascua wüing matakábintha. ²⁹Daxota Pilato aishowa bejoniya píabo weya xua petsipaebinéxatsi pomonae pesátotha umena. Pilato jeye barapomonaetha:

—¿Eta pokotsiwa paiña yábara netsipaebichi bapong xua abe peexanaewa? jei.

³⁰Barapomonae Pilato jumenótatsi, jeye:

—Icha bapong jopa abe exanáe tsipae, metha bapong jopa kaponaetsípaetsi nexantha, jei barapomonae.

³¹Néxata Pilato barái jiwi, jeye:

—Paxam papire bapong, barompaya paiña neitorobi koyenéwatha payábara páebare xua penatsikuentsiwa xua abe peexanaexae, jei Pilato.

Bárapo judiomonae jumenota, jeye:

—Íchitha paxang judiomonae pang, romanomonae pía peitorobi koyenewa jopa pana kopatsiyo xua ichüing pakui-itorobang xua jintong pebexubíwatsi xua poxonae abe peexanaexae, jei judiomonae.

³²Baxua éxana tsipéi báyatha Jesús tsiwanaya nayábara paeba pokoyeneya jiwi poxonae Jesús pebexubiwa tsainchi. ³³Bapoxonae Pilato ekeicha pía pin píabo bejoniya yawa Jesús wábatsi, jeichichi:

—¿Xam judiomonae itorobiya pía pepa Neéwatsin? jei Pilato.

³⁴Jesús jumenota, jeye:

—¿Ápara jinkoya nekayábara kanantaxeinaeya yáíñabame? Ápara ichüing yábara nekatsipáebixae baxua, ¿daxota bárapo jumetha neyáíñabame? jei Jesús.

³⁵Pilato jumenota, jeye:

—Jopa taeiño tsipéi ápara xang judiomonaepin aibin. Ápara jiña nakuamonae-piwi irü sacerdotemonae pía pentakaponaewi tatsi, ápara barapomonae kakae-naeta taxantha. ¿Eta pokotsiwa metha éxaname? jei Pilato.

³⁶Néxata Jesús jumenota, jeye:

—Taitorobi koyenéwatha jopa itorobiño jiwi po kae pin nákuathe. Icha baxua exanaetsipang, bara néxata tamonae neyawenáetsipa xua judiomonae jopa

tana newaetabinexa. Íchitha taitorobi koyenéwatha jopa itorobiño jiwi po kae pin nákuathe, jei Jesús.

³⁷Néxata Pilato Jesús jeichichi:

—¿Ápara xam pong jiwi itorobiya pía pepa Neéwatsin? jeichichi Jesús.

Jesús jumenota, jeye:

—Aa, ápara bara xang bapong pong jiwi itorobiya pía pepa Taéwatsin xuaun-xuae bara páebame. Daxota nakatsiwang po kae pin nákuathe yawa patopeikang tapaebinexa xua pokotsiwa yatsikaewa pexaiñéi diwesi. Daxita pomonae ichichipa xua pejumekowüntsiwa xua bárapo pexaiñéi jume, barapomonae bara nejumetane, jei Jesús.

³⁸Pilato Jesús baraichi, jeye:

—¿Eta pokotsiwa metha pokotsiwa pexaiñeiwa? jei Pilato.

**Meje yábara poxonae Pilato jumebarü jejei xua Jesús
bara pebexubiwa tsainchi ichamonae**

(Mt 27.15-31; Mr 15.6-20; Lc 23.13-25)

Poxonae Pilato baxua yáñaba, bapoxonae Pilato ekeicha aishowa bejoniya xua ekeicha judiomonae petsipaebinéxatsi. Pilato barái judiomonae, jeye:

—Xang jopa jume itaraerowiño bapong xua po jumetha nayaita anáe exanaena xua pebexubinéxatsi. ³⁹Íchitha paxam peaiñakuí paxéiname xua ba kaein tapá-kata ishanaxubíwatsi pomonae jiwi pekübibotha nóbatsi poxonae xua po mataketha Pascua wüing matakábintha. ¿Bara ánoxuae pákata saya pukopatinchi pong judiomonae itorobiya pía pepa peewatsinchi? jei Pilato.

⁴⁰Néxata bárapo judiomonae jumedangweya wawái, jeye:

—¡Jume, jopa dapong ishanaxubinde! ¡Maisha jame Barrabás ishanaxore! jei bárapo judiomonae.

Barapong Barrabás, pong bichokono jiwi pekaibin.

19¹Néxata Pilato najumekaitoroba xua Jesús bara pekuainchinéxatsi xua pokotsíwatha eewa xua bichokono amüüpiya xua xota ba jiwi kuaintéibatsi poxonae abe exaneiba. Soldadomonae baxua éxana. ²Bárapo soldadomonae Jesús mataxátatatsi peé tepa. Matáütano bapoxonae Jesús pía paparuwa jumaxuénatsi. Icha paparuwa jumaxátatatsi po paparuwa tsobia. ³Bapoxonae bárapo soldadomonae Jesús imoxoyo kakuita umenarükúpatsi. Yawa Jesús kuikaponaeja jeichichi:

—¡Jaina, maisha wüünaem pong judiomonae itorobiya pía pepa Neéwatsin! jei bárapo soldadomonae xua Jesús kuikapoinchi.

Bapoxonae Jesús itabara kuaintatsi.

⁴Ekeicha Pilato pesato bejoniya judiomonae beya. Pilato barái judiomonae, jeye:

—Matha pataema. Bapong pákata karenaeinchi, paiña neyaputaenexa xua xang jopa jumetaiño xua po jumetha penayaita aenáe exanaewa xua pebexubinéxatsi bárapo pebin, jei Pilato.

⁵Bapoxonae Jesús peé tepa pesato beyawajoniya. Yawa paparuwa yawa joniya po paparuwa tsobia. Néxata Pilato barái jiwi, jeye:

—¡Pataema xote ungue bapongje! jei Pilato.

⁶Bapoxonae sacerdotemonae pía pentakaponaeawi tatsi irü policiamonae, poxonae daxita barapomonae Jesús taerükúpatsi, jumedangweya wawaya jeye:

—¡Náetotha bara tüparukua bewa exanaem! ¡Náetotha bara tüparukua bewa exanaem! jei barapomona.

Pilato barái jiwi, jeye:

—Moya paxam jame bara papire, moya paiñakoya náetotha tüparukua paxande. Yáitama xang ápara jopa jumetaeíño po jumetha xua bapong penayaita aenáe exanaewa xua pebexubinéxatsi.

⁷Íchitha judiomona Pilato jumenótatsi, jeye:

—Paxang pata taitorobi koyenewa paxeinang. Bapong piakoutha Nakom Pexanto tatsi natsikotane daxota bapong bewa tüpaena tsipéi pata taitorobi koyenewa baxua peyábara paebixae, jei judiomona.

⁸Poxona Pilato baxua jumetane, Pilato nama bichokono ekeicha junuwa. ⁹Ekeicha Pilato Jesús kaibe maxükoníyatsi bo beya. Baxota Pilato Jesús yáiñabatsi. Jesús jeichichi:

—¿Eta werenapim xam? jei Pilato.

Íchitha Jesús jopa jumenotsiyo. ¹⁰Néxata Pilato Jesús baraichi, jeichichi:

—¿Eta pokotsiwa jopa nejumenotsim? ¿Ápara xam jopa neyaputaem xua xeinang taitorobi koyenewa xua tana neitaküüpaewa xua jiwi taitorobiwa xua tüparukua neka-exanadutsiwa náetotha? Matáütano xeinang taitorobi koyenewa pokoyene xua jiwi taitorobiwa xua saya nekapusotabiwa, jei Pilato.

¹¹Jesús jumenota, jeye:

—Icha Nakom jopa kakatsipae bárapo peitorobi koyenewa metha ichamona jopa itorobim chipae xua ichamona abe tana nekana exanaewa. Daxota pong nekanaeta xamtha bapong jame bichokono abe éxana beyakaincha xam xua abe nekana éxaname, jei Jesús.

¹²Poxona Pilato jumetaeba, bekein bichokono nantaxeina xua Jesús bara saya pepusotabiwa tsainchi, íchitha junuwa poxoru judiomona jumedangweya wawái. Barapomona jeye:

—¡Icha xam bara saya, pusotábame, ápara romanomona itorobiya pía pepa peewatsinchi bapong jopa pía jintong tsipaem! ¡Pong piakoutha náexana xua be natsikotane pong jiwi itorobiya pía pepa peewatsinchi, bapong ápara romanomona itorobiya pía pepa peewatsinchi bapong pía peaitafaetabinchi jintongtsi! jei judiomona.

¹³Poxona Pilato baxua jumetaeba, bapoxona ekoundeka ichaxota piakoutha kayábara kanantaxeinekaeya kueikueije tsekeibi jiwi. Bapong baxota eka yawa najumekaitorobeka xua bara bérena Jesús pekarendenaenéxatsi ichaxota Pilato eka, po pía peekaethopáe tutu ibo pana tatsi hebreo jumetha, “Gabata”, jei. Báraxua jei: “Pefaratsiwa ibowa pana”, jei. ¹⁴Bapoxónaerü bárapo matakabi tsuxubirü, po matakabi kopiya tsiwanaya dukua Pascua wüng matakabi. Bárapo matakaietha judiomona pexaewa xaxaintajeba xua Pascua wüng matakabi nexa xua baya tsane. Poxona mataéiñaxae tsuxubi, bapoxona Pilato barái judiomonaetha, jeye:

—¡Ínkane pataema pong itorobiya pepa paiña Nepakakaewatsin! jei.

¹⁵Íchitha bárapo judiomona jumedangweya wawaya jeye:

—¡Maisha bara tüpaena! ¡Bara náetotha tüparukua éxande! jei.

Pilato jumebarái, jeye:

—¿Bara itorobin jampa xua pebexubíwatsi pong itorobiya pepa paiña Nepaka-kaewatsin? jei Pilato.

Íchitha sacerdotemonae pía pentakaponaewi tatsi Pilato jumenótatsi, jeye:

—Ápara ichüng jopa paxeinaeiño pong jiwi itorobiya pía pepa Peewatsinchi. Jame saya meisha painta bara kompa pong itorobiya pepa pata Neéwatsin, bapong jame ápara pong romanomonae itorobiya pía pepa Peewatsinchi, jei judiomonae.

¹⁶Bárapo jumetha Pilato Jesús kanakobenakátatsi bárapo judiomonaetha. Baxua Pilato éxana xua Jesús bara tüpa peexanaenéxatsi náetotha. Bapoxonae bárapo judiomonae Jesús pítatsi.

Meje yábara poxonae Jesús tüparukua éxanatsi náetotha

(Mt 27.32-44; Mr 15.21-32; Lc 23.26-43)

¹⁷Jesús bara pona, yawa pía naeto utukurápona, xua bárapo náetotha pekobe matatabarutsinéxatsi ichaxota po demuxúwatha be jintong matasipa piwa. Bárapo demuxuwa kaunuteiba xua jei tsaibi: “La Calavera”, jei. (Seikaya hebreo jumetha jei tsaibi: “Gólgota”, jei.) ¹⁸Bárapo demuxu matasóitotha Jesús kobematatabarútatsi náetotha. Irü aíña pebinbe kobematatabarútatsibe. Jesús tutíyotha yanaeto unguua, ichüng Jesús pekoxa weya tayanaeto úngkuatsi irü ichüng Jesús petso-kona weya tayanaeto úngkuatsi. ¹⁹Pilato itoroba xua Jesús pentutu wétsika petarutsinéxatsi napaeuyo. Bárapo napáeuyotha jeye xua tinaduta: “Jesús, Nazaret tomarapin, pong judiomonae itorobiya pía pepa Peewatsinchi”, jei bárapo petináe napáeuyotha. ²⁰Pinmonae judiomonae yóroba bárapo petinadutsiwa tsipéi ichaxota Jesús kobematatabarútatsi imoxoyo itamatayeka tómara, po tómara pewüng Jerusalén. Bárapo petináe napáeuyotha, hebreo jumetha tina, griego jumetha tínano, irü latin jumetha tínano. ²¹Daxota sacerdotemonae pía pentakaponaewi tatsi, pomonae judiomonaexae, Pilato baraichi, jeye:

—Jopa jande ‘Pong judiomonae itorobiya pía pepa Peewatsinchi tatsi’, jopa jande. Jame maisha jande: ‘Pongje najéi: Xang pong judiomonae itorobiya pía pepa Taéwatsin, najéi’, jande, jei sacerdotemonae pía pentakaponaewi tatsi.

²²Íchitha Pilato jumenota, jeye:

—Xuaunxuae tinadutang bara dukuaena, jei Pilato.

²³Soldadomonae poxonae Jesús kanakobenawétatsi xua kobematabóbatsi, bapoxonae nota Jesús pía paparuwang tatsi. Tsipéi cuatro po soldadopinbe daxota natatsaba xua cuatro póyobe nexa xua soldadomonae. Matáüta dorouto Jesús jumawejóntatsi, po dorouto ompareka, xua jopa epaxüxükaeyo. ²⁴Bárapo cuatro póyobe xua soldadomonae kaemonae natsipaeba, najéi:

—Jopa tsana nata epatsitsikae tsainchi. Jame metha wüünae xua ibótixi bebeya tsainchi. Bapoxonae yaputaeinchi xua pong ibótiyo beta xoya, moya kopiya pichina, jei.

Baxua barapomonae éxana peyábara kuiwüünae tsiwanaya jeixae pong Nakom peitorobi jume pepaebin. Bapong jeye Cristo yábara, Nakom Pejume Diwésitha: “Tapaparuwang nata tsabina yawa ibótixi bebeya tsane penakueranta notsinexa tsane tapaparuwang”, jei pong Nakom peitorobi jume pepaebin. Bara baxua éxana bárapo soldadomonae.

²⁵Jesús pena tatsi imoxoyo unguua ichaxota Jesús dukua. Barichi Jesús pena tatsi irü pamcho tatsi baxota umena. Barichi icha María, powa Cleofas píowa tatsi baxota unguua. Barichi icha María, powa María Magdalena, powa Magdala tomarapiwayo, baxota unguua. ²⁶Poxonae Jesús taenota pena yawa poxonae taenota

pong bichokono Jesús ántobe, pong pijimonae jíwanapin bapoxonae Jesús barái pena, jeye:

—Ena, taema bapong nexanto kata unguareke, jei Jesús.

²⁷Bapoxonae Jesús barái bapong, jeye:

—Ínkane taema barapowa, powayo éntaxe, jei Jesús.

Bapoxonae barapowa barapong pena tsikotaeya waba piabotha.

Meje yábara poxonae Jesús tüpa

(Mt 27.45-56; Mr 15.33-41; Lc 23.44-49)

²⁸Bapoxonae pirapaeyo Jesús yaputane xua báyatha yábara jumekuiwétatsi xua báyatha Nakom Pejume Diwésitha paeba. Matáütano xua Jesús penajume-kuiyábara wetsinéxatsi xua báyatha Nakom Pejume Diwésitha yábara tsiwüünae páebatsi, bapoxonae Jesús jeye:

—Meratsipang, jei.

²⁹Baxota jurúwato eka xua yawa eka vino mera, po mera atsu. Néxata bárapo soldadomonaes espónjatha mene yutsiya kapita. Bapoxonae Jesús náewatha tadú-tatsi yawa tayóichatsi pekoiboto deka. ³⁰Jesús tsutsubiya apa bárapo vino mera. Bapoxonae jeye:

—Bara daxita neyábara jumekuiweta, jei Jesús.

Bapoxonae Jesús nawishjetataba. Tüpanaicha.

Meje yábara poxonae soldadomonaepin Jesús epakatsitsinaxubiya kawúichatsi dejónatha

³¹Kataunxuae bárapo matakabi po matakábitha poxonae judiomonaes pewü-naeya nakuiwüünaeta pía pentakeiseikáe matakabi tatsi nexa. Barapomonaes jopa ichipaeyo xua kame náetotha dubenaena po pebiwi náetotha wérapa poxonae jopaena bárapo pentakeiseikáe matakabi, po matakabi peaiñakuí matakabixae. Bárapo pentakeiseikáe matakabi, po matakabi tamrópata pítaba xua Pascua wüing matakabin. Judiomonaes jopa ichipaeyo xua pejontsiwa pepong náetotha bárapo pentakeiseikáe matakábitha. Daxota bárapo judiomonaes Pilato jume itoróbatsi, jeye: “Soldadomonaes itoróbare xua petopajanakaenexa tsainchi pomonaes náetotha dubena xua naiña bárapo pebiwi tüpa peexanaenéxatsi. Matáüta itoróbare xua bárapo pebiwi naetong wétsika penotsinéxatsi icha xaniwaicha daxita bárapo pebiwi báyatha wérapa”, jei bárapo judiomonaes.

³²Néxata soldadomonaes bara beya pona. Yawa bárapo soldadomonaes kopiya topajanaxuba ichüing pong Jesús icha muxunene wetarukuíyatsi. Bapoxonae ekeicha ichüing topajanaxotsi pong Jesús icha muxunene wetarukuíyatsi. ³³Poxonae soldadomonaes imoxoyo umenarúküpa ichaxota Jesús dukua, bapoxonae Jesús tainchi xua báyatha Jesús tüpa. Daxota bárapo soldadomonaes Jesús jopa topajanaxuichi.

³⁴Íchitha kaein bárapo soldadomonaes jíwana, bapong Jesús epakawüicha katsitsinaxubiyatsi dejónatha. Bapoxonae kaena naiña jana othoparena yáwano mera othoparénano. ³⁵Xang, Juan, baxuang daxita tang pokotsiwa soldadomonaes Jesús kana éxanatsi. Daxota pokotsiwa xua baxua páebang bara xaiñang, xua daxota paiña tana nejumekowüntsineexam. ³⁶Barapomonaes baxua éxana tsipéi báyatha Nakom Pejume Diwésitha Cristo yábara tsiwanaya jeichichi: “Jopa piwa janaxubí

tsainchi bapong xua matáüta kae píwano”, jei Nakom Pejume Diwésitha. ³⁷Matáütano icha jume diwésitha xua Nakom Pejume Diwesi, jeye: “Nekoichaeinchi pong xua kawüichatsi”, jei Nakom Pejume Diwésitha.

Meje yábara poxonae Jesús petüpaein ibo müthütha yauxatatabótatsi

(Mt 27.57-61; Mr 15.42-47; Lc 23.50-56)

³⁸Bapoxónaerü pebin, pong pewüng José, pong Arimatea tomarapin, bapong Jesús irü jumekowüntatsi. Íchitha José baxua jopa nayopichiyo ichamonaetha xua Jesús pejumekowüntsíwatsi, tsipéi judiomonae jumekunúwatsi. Bapong José kopiya Pilato muxutsipaebiya jeichichi, jeye:

—Nejumebariüjeyande tha jontichi Jesús petüpaein naeto wétsika, jei José.

—Bara moya taema, jei Pilato.

Daxota José bara beya pona. Bapoxonae José jonta náetotha Jesús petüpaein. ³⁹Írürü ichüng nápona Jesús pía müthütha. Bapong pewüng Nicodemo, pong matha Jesús siwapoinchi mérawi. Daxota bapong Nicodemo patopa xua José peyawenaenéxatsi. Bapong Nicodemo kapatopa treinta po kílobe xua pokotsiwa pebeno, po beno xua tuxuéi. Bárapo bénotha múxuna xuba po petuxuéi nain pewüng mirra, xuano xua icha petuxuéi nainwano po petuxuéi nainwa pewüng áloe. ⁴⁰Bapoxonae José irü Nicodemo pítabe Jesús petüpaein. Yawa paparúwatha petuxuéi beno múxuna kapanaboinka matakiontabíkabe. Baxua éxanabe, tsipéi judiomonae pía kuikoyene xeina xua poxonae pong petüpaein kanakuiwüüinae wétatsi poxonae namüthükeiba. ⁴¹Imoxoyo ichaxota Jesús po demuxúwatha tüpa, baxota peúbi naein umena. Bárapo peúbi naein uníyotha ibo itapatorórotha müthü boka pena müthü, po müthütha kataunxuae jopa müthütha xubichi petüpaein ichüng. ⁴²Bárapo pena müthütha Jesús bóyatsi, tsipéi bárapo pena müthü imoxoyo boka ichaxota Jesús tüpa. Matáüta tsipéi kirei tsanaicha xua poxonae patopa pentakeiseikáe matakabi, po mataketha judiomonae jopa nakuichiyo.

Meje yábara poxonae Jesús ekeicha asüü juina éxanatsi petüpáe kuirukoyene weya

(Mt 28.1-10; Mr 16.1-8; Lc 24.1-12)

20 ¹Bapoxónaerü domingo matakabi jopa, po matakabi xua kopiya dukua kae semánatha. Bapoxonae kaemúmbótha poxonae kataunxuae kirikíríka, bapoxonae María Magdalena, powa Magdala tomarapiwayo, müthütha patopa ichaxota Jesús boka. Barapowa tane xua müthü yapusaungkua xua bekein ichamonaetha yapuxatatabanota pin ibo panáwatha. ²Bapoxonae barapowa naiña pata taxaiña bekuinaerena ichaxota Simón Pedro ungkua irü xang, Juan, baxota ungkuang pongxaein Jesús bichokono neántobe. Yawa pana nejéi:

—Kou Jesús petüpaein pítatsi, pong Wanaka namataxeinaein. Jopa payaputaeiño ichaxota ekeicha bótatsi, pana nejéi.

³Bapoxonae Simón Pedro, irü xang Juan, müthü bepaiyangbe. ⁴Bara beya pana nakuara kuináyangbe. Íchitha xang, Juan, bichokono bichoinang beyakaincha Pedro. Daxota müthütha patopang kopiya. ⁵Yawa müthü beya nabüxütsutiya nekobiyang. Paparuwa tang xua íratha boka, po paparúwatha Jesús petüpaein matakiontábatsi, íchitha jopa joniyaieño. ⁶Bapoxonae Simón Pedro takoya wérena

kotakaya patopa. Bapoxonae müthü joniya. Barichi barapong bárapo paparuwa tane xua íratha boka. ⁷Matáütano táneno po paparúwatha Jesús matasipa kiyontababótatsi. Bárapo paparuwa nantakiyontabiya tsanaya boka. ⁸Bapoxonae xang, pongxaein kopiya patopang, irü jonyang müthü iya. Poxonae daxita baxuang tang, bapoxonae naiña jumekowüntang xua Jesús báyatha asüü. ⁹Báyatha jopa payaputaetíño Nakom Pejume Diwesi, po diwésitha xua xota bapong yábara páebatsi pokoyene xua bapong bewa asüü tsane petüpáe koyenekuiru weya. ¹⁰Néxata xang, Juan, irü Simón Pedro kaibe panawiyangbe bo beya.

**Meje yábara poxonae Jesús María tsita naitüütatsi,
powayo Magdala tomarapiwayo**

(Mr 16.9-11)

¹¹María Magdalena, Magdala tomarapiwayo, powa pana tsiwüing kaya, bapowa ekeicha kaiberena müthütha patopa. Barapowa müthükoiboto jumaweya wekoyéi tsungkuae. Poxonae wekoyéi tsungkuae nantanuweya nabüxüjapasota nekobiya müthü iya. ¹²Bapoxonae bapowa tane pongbe matatsunpinbe xua ékabe ichaxota báyatha Jesús bótatsi petüpaein. Bárapo matatsunpinbe po paparuwa apiya nama-xátatabe pemaíña paparuwa. Icha matatsunpin eka Jesús pentasipa koyo deka tatsi. Icha matatsunpin eka Jesús pía pesito koyo deka tatsi. ¹³Bárapo matatsunpinbe María yáíñabatsi, jeichichi:

—María, ¿eta xua metha wekoyam tsauya? jei.

María jumenota, jeye:

—Yáitama kou Tanekanamataxeinaein petüpaein pítatsi. Jopa taeíño xua ekeicha xota bótatsi petüpaein, jei María.

¹⁴Poxonae bapowa najumewetsiya paebaxoya, xuano xua poxonae napatomeicha nekotaxoya, bapoxonae pebin taenótatsi íchitha bapowa jopa yaputaeyo xua ápara bapong Jesús. Íchitha bapowa Jesús jopa yaitaetsi. ¹⁵Néxata Jesús María yáíñabatsi, jeichichi:

—Já, ¿eta pokotsiwa kame wekoyam tsauyam? ¿Jintam wenawenam? jei.

Barapowa nantaxeina xua mexeya ítara pong peúbi naein yapu-eenawéi. Daxota bapowa, jeye:

—Icha xam báyatha pítame petüpaein pong Tanekanamataxeinaein, ínkane netsipáebare xua ekeicha eta xota bótame. Tha bapoxonae petüpaein ekeicha pitichi, jei María.

¹⁶Néxata Jesús barái, jeye:

—María, jei.

María ekeicha napatomeicha xuba. Yawa hebreo jumetha jeye:

—¡Rabuni! jei (po jumetha xua jei: ‘Pong jiwi Nekuidubin’, jei).

¹⁷Jesús jumenota, jeye:

—Jopa nejayatabinde tsipéi kataunxae jopa ponaeíño ichaxota Taxa ékiya. Jamaisha ponde, paebareno tajimonaetha xua xang páebang xua jang: ‘Taxa beicha ponaein, po Taxa paiña Axa irü’, jang. ‘Barapong Nakom, Ta Nakom irü paxam paiña Nakom’, jang xua, jei Jesús.

¹⁸Barapoxonae María Magdalena, powa Magdala tomarapiwayo, tsiwüing kaya Jesús pijimonaetsi beya. Bapowa tsipaeba xua báyatha tane pong Pekanamataxeinaein jiwi. Yáwano tsipáebano daxita pokotsiwa Jesús paeba bapówatha.

Meje yábara poxonae Jesús pijimonae tsita naitüüta

(Mt 28.16-20; Mr 16.14-18; Lc 24.36-49)

¹⁹Bárapo matakeitha poxonae kataunxuae áwiya domingo, bapoxonae mérawi Jesús pijimonae tatsi nakaetuta. Tsipéi judiomonae kuikunúwatsi daxota bo bichokono boupa dangwéi éxana. Néxata Jesús bárapo tútutha patopa. Yawa pijimonae peitabarayo deka taungkua. Pijimonae jakobiya jeye:

—Maisha jüntema pajinómpare, jei Jesús.

²⁰Poxonae Jesús baxua najumeweta bapoxonae tsita nakobewang itüüta pijimonae yawa naepawang itüüta. Poxonae Jesús pijimonae taerúküpatsi bichokono jüntükoyene weiweina petaxaetsi Jesús pong barapomonae Pekanamataxeinae-xaetsi. ²¹Pirapaeyo ekeicha Jesús pijimonae barái, jeye:

—Maisha jüntema pajinómpare. Icha Taxa neichi xua neitoroba bara paka ichi-chi paka itoróbatsi, jei Jesús.

²²Néxata bapoxonae Jesús pijimonae matatsún ofutaba, jeye:

—Nakom pía Pejumopetünaxü tatsi bara paka yantsina, jei. ²³Pomonae xua pakuikayábara jüntemáiname abe pía peéxanae kuirukoyenein tatsi, bara barapomonae Nakom irü kayábara kuijüntemainaena abe pía peéxanae kuirukoyenein tatsi. Pomonae jopa pakayábara kuijüntemainaem abe pía peéxanae kuirukoyenein tatsi, bara barapomonae Nakom irü jopa kayábara kuijüntemainaeyo abe pía peéxanae kuirukoyenein tatsi, jei Jesús.

Meje yábara poxonae Tomás tane xua Jesús ekeicha asüü

²⁴Tomás, bapong Jesús pijimonae tatsi jíwana. Bapong icha wüing Gemelo, po wüing xua jei: “Najuma ékabe pexúyobe”, jei. Barapong Tomás jopa na-ekaeyo poxonae Jesús pijimonae tsita naitüüta.

²⁵Pírapae poxonae Jesús napítaba ichamonae pomonae Jesús pijimonae tatsi Tomás tsipáebatsi, jeichichi:

—Paxang Jesús, pong Wanaka namataxeinaein, patang, jeichichi Tomás.

Íchitha Tomás jumenota, jeye:

—Jopa jumekowüntsiño baxua. Jopa bejumekowüntsiño icha jopa kobewang taeiño xua penainwang, xuano xua icha jopa jayabiño takobetha. Matáütano jopa bejumekowüntsiño icha jopa yenewang jayabiño, jei Tomás.

²⁶Poxonae ocho po matakábibe yapukaewa xua icha domíngotha, bapoxonae ekeicha bomüxütha nakaetuta Jesús pijimonae tatsi. Bapoxónaerü Tomás jame naéka. Bekein bómüxü boupa bichokono dangwéi éxana íchitha Jesús jondena. Pijimonae peitabarayo deka taungkua. Yawa jakobiya jeye:

—Maisha jüntema pajinómpare, jei Jesús.

²⁷Bapoxonae Jesús jeye Tomás beya:

—Moya nekobewang jáyabare xua penainwang. Moya taema xua nantíyabe takobewangbe. Yáwano neyenewang jáyabare. Jopa aiña muxu xeinaeinde. Moya maisha nejumekowünde, jei Jesús.

²⁸Néxata Tomás jumenota, jeye:

—¡Jaina, deta Tanekanamataxeinaem! ¡Yawa Nakom, Ta Nakom! jei Tomás.

²⁹Jesús jumenota, jeye:

—Tomás ánoxuae nejumekowüntame tanetaemxaem. Íchitha pomonae bekein jopa netaeyo xua dáichitha nejumekowünta, barapomonae bichokono jüntükoyene weiweina, jei Jesús.

Meje yábara xua eta pokotsiwa metha yábara tina bárapo díboro

³⁰Jesús aiña koyenein matowa pijimonae peitütha exaneiba pexeña petsita-itiütsi koyenewang. Daxita bárapo koyenein áwiya yábara seika xua jopa yábara tinaeiño bárapo diborothe. ³¹Daxita xua xuang pokotsiwa yábara tinang po diborothe ápara xua baxuang paiña yábara jumekowüntsineexam tsane xua Jesús ápara bara Mesías. Matáütano yábara tinang xua paiña yábara jumekowüntsinexa xua Jesús ápara Nakom Pexanto tatsi. Matáütano yábara tinang xua paiña nexeine-nexa tsane peajüntüyapusüüwa, po peajüntüyapusüüwa xua ataya tsiteka xua poxonae pajumekowüntsíname Jesús.

Meje yábara poxonae Jesús tsita naitüüta siete póyobe pomonae pijimonaexae tatsi jíwana

21 ¹Bapoxonae pírapae ekeicha Jesús pijimonae tsita naitüüta Tiberias pukua itapatha. Poxonae pijimonae tsita naitüüta poxonae ápara iche: ²Jesús pijimonae tatsi nakaetuta. Bárapo matabüxúyobe meje: Simón Pedro, irü Tomás pong icha wüing Gemelo, irü Natanael Caná tomarapin, po tómara eka Galilea nákuatha, irü xang, Juan, irü taeweicho xua Zebedeo pexántobe tatsi pangbe, irü ichúngberü. Daxita bárapo matabüxúyobe pang panakaetutang Tiberias pukua itapatha. ³Simón Pedro pana jei:

—Tha duwéi yamónaetsi, jei.

Paxang pajangje:

—Paxang irü paka punaponaeinchi, pajang.

Bapoxonae jératha daxita panonobabiyang. Íchitha bárapo merawitha jopa duwéi pataeiño, bekein payamonang. ⁴Poxonae baya pentha tsina, Jesús pana tsita naitüüta pitapathiya, tuwüütha payanadubendenang. Íchitha paxang jopa payaitaeiño xua bapong ápara Jesús. ⁵Néxata Jesús pana nebarái:

—Ínkane, ¿jopa pataem duwéi? jei Jesús.

—Jume, duwéi aibi, pajang.

⁶Néxata Jesús pana barái, jeye:

—Jera koxa beya bara bepaxóyama peyakamonaewa. Bapoxonae pakapirenáe-name duwéi, jei Jesús.

Baxua paéxanang. Pírapae jopa pana itaküüpaeyo xua patajutaxorenaewa peyakamonaewa, poxoru pin duweitunto pakapirenang. ⁷Néxata xang, Juan, pongxaein bichokono Jesús neántobe, Simón Pedro barang, jangje:

—Ápara bapong Jesús, pong Wanaka namataxeinaein, jang.

Poxonae Simón Pedro nejumetaeba, bapoxonae paparuwa xua namaxuena-bota naiña yakuinaya namaxátataba. Bapoxonae mene weitatajopiya. ⁸Íchitha paxang pomonae jopa paraichiño jératha pajebounang. Bárapo jera be kónotha tajü tuwüütha berukuarena saya cien métrobe xaina. Bewayo pajebounenang tsipéi peyakamonaewa ménetha yawa dukuapona pin duweitunto. ⁹Poxonae jera wepanonobábiyang, bapoxonae ishoto patang xua bárapo ishótotha duwein yüü-taboya yáwano xua pan bokiya. ¹⁰Jesús pana barái, jeye:

—Painta xawena duwéi xuaunxuae paka jebóuname, pana jei.

¹¹Simón Pedro jératha nontabiya. Yawa táetabo ítapa bejutabotsina peyamonaewa xua bichokono wüngka duwéi. Ciento cincuenta y tres po duwéi matabükümonaebe. Bekein duwéi bichokono wüngka dáichitha jopa ukupanayiyo peyakamonaewa. ¹²Néxata Jesús pana barái, jeye:

—Antha matha paxaema, pana jei.

Paxang jíwana dapong aibi pong peyaiñabinexa, pong pejeinexa: “¿Jintam xamda?” pong jei, tsipéi daxita paxang payaitang xua bapong ápara pong Pata Tanekanamataxeinaein. ¹³Bapoxonae Jesús ishoto bepoiña pepichinexa pan. Bapoxonae pana nekatsiba yawa duwéi pana nekatsiba.

¹⁴Baxua éxana poxonae nama akoibi pokuíyobe xua Jesús pana netsita naitüüta xua poxonae ekeicha asüü pópona petüpáe kuirukoyene weya.

Meje yábara poxonae Jesús barü kueikueije Simón Pedro

¹⁵Poxonae pana nainwetang xua Jesús pana ápata, bapoxonae Simón Pedro, Jesús yáíñaba, jeye:

—Simón, pong Juan pexantom, ¿bichokono neantobem, beyakaincha xua po pebiwe neántobe? jei.

—Aa, Tanekanamataxeinaem, bara kaena báyatha neyaputáneme xua takaantobéwatsi bichokono, jei Pedro.

Jesús barái, jei:

—Icha neantobem, inta tamona tana nejumlahewüntsiwi yawende, icha pong ovejaxi pe-eenaen ichi xua yawena ovejaxi, jei Jesús.

¹⁶Ekeicha Jesús barái ichaxota Pedro, jeye:

—Simón, pong Juan pexantom, ¿bichokono neantobem? jei.

—Aa, Tanekanamataxeinaem, bara kaena báyatha neyaputáneme xua bichokono takaantobéwatsi, jei Pedro.

Jesús jumenota, jeye:

—Icha neantobem, inta tamona tana nejumlahewüntsiwi yawende, icha pong ovejamona pe-eenaen ichi xua yawena ovejamona, jei Jesús.

¹⁷Ekeicha akoibi pojumekuíyobe Jesús barái ichaxota Pedro, jeye:

—Simón, pong Juan pexantom, ¿bichokono neantobem? jei.

Pedro jüntükoyene wekoyéi yáitama Jesús yáíñaba akoibi pojumekuíyobetha. Pedro jeye ichaxota Jesús:

—Tanekanamataxeinaem, báyatha kaena daxita yaputáibame. Matáütano yaputanemeno xua takaantobéwatsi, jei Pedro.

Jesús jumenota, jeye:

—Icha neantobem, inta tamona pomona tana nejumlahewüntsiwi yawende, icha pong ovejamona pe-eenaen ichi xua yawena ovejamona. ¹⁸Xaniyang katsipáebatsi poxonae matha kataunxuae pewowim jíña paparuwa bara jinkoutha namaxatabéibame. Matáütano matha bara ponéibame xua ichaxota ba ichichipa neponaewa. Íchitha poxonae perum tsane, ichamona kamaxükübiya yotsina. Ichüng paparuwa kamaxatatsina. Ichamona kamaxükaponaena ichaxota jopa ichipaem xua neponaewa, jei Jesús.

¹⁹Poxonae Jesús baxua paeba Pedro wüünae tsiwanaya kuiyaputane exainchi xua jiwí eta bichi tsane poxonae Pedro bexubinchi. Matáütano Jesús tsiwanaya

kuiyaputane éxana xua jivi Nakom wüünae jainchinchí xua poxonae jivi taena xua pokoyenekuirutha xua poxonae Pedro tüpaena peexanaexae pokotsiwa Nakom itoroba. Bapoxonae Jesús jeye ichaxota Pedro:

—¡Bara ataya yakuiya póponare xua tamonaе jintom! jei Jesús.

**Meje yábara poxonae Jesús neyábara paeba
pongxaein xua Jesús bichokono neántobe**

²⁰Poxonae Pedro napatomeicha nekota, bapoxonae netaenota xua punaungkuang pongxaein Jesús bichokono neántobe. Xang ápara bapong pong býatha matha imoxoyo Jesús kakuita xunaekang, poxonae matha jang: “Tanekanamataxeinaem, ¿jintam pong kakaenaetapaeba?” pongxaein matha jang. ²¹Poxonae Pedro netane, bapoxonae jeye Jesustha:

—Tanekanamataxeinaem, ¿ínkane pongje tsanerü? jei Pedro.

²²Jesús Pedro jumenótatsi, jeye:

—Icha xang takoutha ichichipang xua bapong Juan bara ataya asüü poponaena beya poxonae xua ekeicha kaewa patopeikaein po kae pin nákuathe, baxua jopa ápara kata aiñakuiyo. Jamaisha xam bara ataya yakuiya póponde pokoyene xua tamonaе jintom, jei Jesús.

²³Daxota Jesús pijimonaе tatsi, barapomonaе neyábara tsiwüing kápana pijimonaetha xua xang jopa tatüpaewa tsane. Íchitha Jesús jopa paebiyo xua jopa tatüpaewa tsane. Saya ápara jei: “Icha xang takoutha ichichipang xua bapong bara ataya asüü poponaena beya poxonae xua ekeicha kaewa patopeikaein po kae pin nákuathe, baxua jopa ápara kata aiñakuiyo”, jei Jesús.

²⁴Xang, Juan, pongxaein xua Jesús yábara páebang. Daxita pokotsiwa xua xuang páebang, ápara pexaiñeiwang. Matáüta bárapo díborothe xang ápara tinang, pong Juan tsokuaein. Bara paichim daxita xua xuang tinang payaputáne-merü xua baxuang ápara bara pexaiñeiwang.

²⁵Áwiya kuiyapuseika xua tayábara tinaewa pokotsiwa Jesús daxita éxana. Icha daxita diwesin tsana yábara titiniyaetsipang pokotsiwa Jesús éxana, metha bárapo díborong jopa po kae pin nakue tsijuntutu kanaüpaetsípaetsi.

Baja Juan.

Pokoyenein Jesucristo Pía Peitorobiwi Tatsi Pexeiña Koyenein Éxana

**Meje yábara xua Lucas tina xua poxonae Nakom yábara tsiwüünae
muxuduta xua itorobina jíwitha pía Pejumopetünaxü tatsi**

1 ¹Xam, Teófilom, tajintong kata tínatsi. Báyatha kopiya matha kain kata tina-tsi icha diwesi. Bárapo diwésitha yábara katsipáebatsi daxita pokoyenéwang xua Jesús éxana. Kata tínatsi báyatha daxita xua po matakeitha Jesús tamrópata pítaba pokoyene xua peexanaewa, matáütano xua pekuidubíwano, xua beya yakui-werawerakanaya po matakeitha poxonae athabé juiña. ²Poxonae pewünaeya tsane xua Jesús athabeicha, matha pía peitorobiwi itapeta. Jesús kuiduba barapomona-e xua Nakom pía Pejumopetünaxü tatsi pía peayapusúüwatha tatsi. Jesús kata barapomona-e pokoyenéwang xua Jesús petaexanaenexa tsainchi. ³Poxonae Jesús ekeicha asüü, poxonae bekein tüpa, bapoxonae Jesús tsita naitüüta barapomona-e. Cuarenta po matakabibetha Jesús tsita naitüüba dukuanaebiya barapomona-e. Petsitanaitüüba-dukuanaebiyaexae pijimona-e, barapoxonae pijimona-e yaputainchi xua xaniwaicha bara petüpaecin ekeicha asüü. Jesús bárapo pía peitorobiwi yábara kuiduba pokoyene Nakom waba jiwí petanaexanaenéxatsi pijimona-e pomona-e itorobiya peewatsixae.

⁴Poxonae kataunxuae áwiya Jesús pía peitorobiwi barü nakaetuta dukuana-e-biya, Jesús barái, jeye:

—Abü jopa paponaeinde Jerusalén tómara weya. Paéware xua Nakom Taxa báyatha yábara paka tsiwüünae muxuduta. Taxa namchi: ‘Tajumopetünaxü-itorobikaecin’, jei. Báraxua báyatha paka tsipáebatsi. ⁵Barapong Juan bautisaba ü mératha. Íchitha tsiwiyo bayiyo bexa tsane Nakom pía Pejumopetünaxü tatsi paka bautisabina. Pákata patsina Nakom pía Pejumopetünaxü tatsi paiña paka barü poponaenexa tsane, jei Jesús pijimonaetha.

Meje yábara poxonae Jesús athabeicha

⁶Poxonae Jesús pía peitorobiwi barü nakaetútatsi Jesús yáinábatsi pía peitoro-biwi, jeichichi:

—Jesús, Pata Nekanamataxeinaem, ¿methaunxuae ánoxuae exanáename xua Israel nakuapiwi ekeicha xeinaena itorobiya pía pepa peewatsinchi? jeichichi Jesús pijimona-e.

⁷Jesús jumenota pijimona-e, jeye:

—Paxam jopa paka itaküüpaeyo xua paiña neyaputaewa po dapae poxo-nae Nakom peexanaewa tsane baxua, matáütano xua po matakeitha poxonae peexanaewa tsane. Saya meisha Taxa xeina peayapusúü itorobi koyenewa, po

peayapusúü itorobi koyenéwatha xua peexanaewa baxua. ⁸Poxonae Nakom pía Pejumopetünaxü tatsi pákata patsina paiña nepaka barü poponaenexa xua bapoxonae peayapusüüwa paiña nexainaenexa. Tajume diwesi painta papaebíname Jerusalén tómaratha, Judea nakuathano, Samaria nakuathano, daxita karepaya tajü nákuangtha, jei Jesús.

⁹Poxonae Jesús baxua najumeweta, Jesús athabé káichatsi Nakom. Jesús pía peitorobiwi taeuméiñatsi. Barapomonae tsakinaebowa tane xua Jesús matawakai-cha dunéikatsi. Ekeicha Jesús jopa taetsi. ¹⁰Poxonae áwiya kame barapomonae nekotumeiña itaboko, barapomonae jemeicha kakuita umenarükúpatsi pong xua nakuéyatabe, pongbe xua pemaíña paparuwa penamaxatatsinbe. ¹¹Barapongbe Jesús pijimonae tatsi baraichi, jeye:

—Já, pomonae Galilea nakuapiwi pam, ¿eta xua metha kame áwiya paitaboko nekotuméiñame? Bapong Jesús, pong xuaunxuae athabeicha paiña xamtha, bexa tsane ekeicha patopáetsika, barapókotsi jüta koyeneya ichi tsane ichaunxuae aunxuae icha ichi, poxonae athabeicha.

Meje yábara poxonae Jesús pía peitorobi jiwi tatsi Matías itapétatsi Judas pekoutha petanakuichiwa tsainchi

¹²Barapoxonae Jesús pía peitorobi jiwi tatsi demuxuwa weiyiwa po demuxuwa pewüng Olivo demuxuwa xua Jerusalén tómara beiyiya. Poxoru Jerusalén tómara imoxoyo daxota barapomonae itakúüpatsi xua peponaewa Jerusalén tómara beya demuxuwa weya bekein bara judiomonae pía pentakeiseikáe matakabi tatsi saya poxoru Moisés pía peitorobi koyenéwatha baxua peyábara kopatsixae. ¹³Poxonae Jesús pía peitorobiwi tatsi pareka Jerusalén tómaratha, athabé jujuiña po tütutha athawétsika jinompa. Baraxota jinompa Jesús pía peitorobiwi tatsi pewüng Pedro, irü Juan, irü Santiago, irü Andrés, irü Felipe, irü Tomás, irü Bartolomé, irü Mateo. Irü pópona ichüng Santiago pong Alfeo pexanto tatsi. Irü pópona ichüng pong pewüng Simón. Barapong Simón celotemonae jíwanapin. Bárapo celotemonae pomonae ba ichichipa xua pexeinaewa barompaya pía pekanamataxeinaeinchi. Irü pópona ichüng pong pewüng Judas pong Santiago pexanto tatsi. ¹⁴Daxita barapomonae irü Jesús péyapin jiwi tatsi barü nakaetutéibatsi, xua pebarü tsipae-beibinéxatsi Nakomtha. Irü Jesús pena tatsi, bapowa María, irü ichówaxi yábüxi barü nakaetutéibatsi xua pebarü tsipaebeibinéxatsi Nakomtha.

¹⁵Néxata kaentakabi Pedro nontapona ichaxota ena pomonae xua Jesús pejume-kowüntsiwi. Bárapo bicheito be ciento veinte póyobe. Barapomonae Pedro barái, jeye: ¹⁶“Tamonae pam, pomonae irü paiña nejumekowüntsiwixae Jesús. Bewa nayábara jumekuiwetsina pokoyene báyatha Nakom namchi xua Pejume Diwésitha yábara tsiwanaya paeba. Báyatha kaena David kueikueijeji éxanatsi Nakom pía Pejumopetünaxü tatsi xua Judas kuikoyenekaunútatsi xua pinae Jesús waetabinchi pomonae Judas matakápona. ¹⁷Bara Judas yatsikaya pata jintong petain pana nabarü nakuitang bárapo penakuichiwa. ¹⁸Poxonae Judas Jesús kaenátatsi, sacerdotemonae pía pentakaponaewi tatsi Judas kátatsi parátixi. Pírapae sacerdotemonae pía pentakaponaewi tatsi bapo paratixitha Judas petüpaein tsikómotatsi ira. Judas íratha jopeika poxonae tüpa yawa kototsitékatsi, ünüpichatékatsino abe peexanaexae. ¹⁹Néxata pomonae Jerusalén tómaratha pejinompaewi, barapomonae jumetane pokotsiwa Judas éxana. Daxota barapomonae bárapo ira wüngduta po

wüing jei: ‘Acéldama ira’, jei. Bárapo jume, barapomonae pijumetha xua jei: ‘Pejana ira’, jei”, jei Pedro. ²⁰Ekeicha Pedro barái barapomonae pomonae pejumekowüntsiwi, jeye: “Salmos penaxünae wei diwésitha Judas petüpaexae yábara paeba, jeye: ‘Píabo tatsi tausáyabo taungkuaeinchi.

Jopa ichüing ekáe tsane baxota’, jei.

Matáütano namchino:

‘Ekeicha pekoutha tanakuitinchi ichüing’,

jei Salmos penaxünae wei diwésitha,

xua Judas yábara”,

jei Pedro.

²¹Néxata Pedro ekeicha namchi, jeye: “Xote waxantha jinompa pebiwi pomonae matha kain pana nepunajinomparü poxonae Jesús pong Wanaka namataxeinaein pana nebarü jinompa daxita pang. ²²Bárapo pebiwi táneno xua Juan Jesús pebautisabíwatsi. Yawa bárapo pebiwi táneno xua poxonae Jesús kataunxuae éxana dukuanaebiya pokotsiwa xua pewüünaewang. Matáütano bárapo pebiwi táneno poxonae Jesús yantakabi jopa po mataketha poxonae athabé juiña. Bewa wabichí-patsi kaein bárapo pebiwi jíwana, pong pekuiyaputaein pokoyene Jesús ekeicha asiüü pópona. Bapong irü panapunakueikueijei tsane xua pokoyene Jesús ekeicha asiüü pepoponaewa”, jei Pedro bárapo pejumekowüntsíwitha.

²³Barapomonae pomonae pejumekowüntsiwi najíwana itapeta ayunbe. Ichüing pewüing José Barsabás, pong icha wüing Justo. Irü ichüing pewüing Matías. ²⁴Néxata barapomonae Jesús athabeicha tsipáebatsi, jeye: “Nakom, pong jiwi Nekanamataxeinaem, daxita jiwi nejüntükoyene yaputaein. ¿Ínkane methara pongbe jíwana pong xua ichichipamera, pong xua kuita itapeta ichichípame? ²⁵Barapong irü penaexanaenexa jíña neitorobi jintong pong xuya Judas pekoutha petanakuichinéxatsi. Judas tüpa nakabeta abe peexanaexae. Judas pona ichaxota po nákuatha jopa nakoicha duntsiyo ishoto”, jei barapomonae.

²⁶Néxata barapomonae wüing jiyatabaxuba ibotíyobe. Néxata saya Matías wüing naitüütáraba. Daxota bapong Matías itapeta kuita wábatsi. Matías once pomonae-yobetha nápona pomonae Jesús pía peitorobi jiwi tatsi.

Meje yábara poxonae Nakom pía Pejumopetünaxü tatsi patopeika pomonaetha, pomonae Nakom pejumekowüntsiwi

2¹Pentecostés matakabi tsuxubi, po mataketha xua poxonae jiwi tsinakaetu-teiba penabanaenexa pexaewa peyábara nantaxeinaexae xua pexaewa naweta. Bárapo matakábitha daxita pomonae Jesús pejumekowüntsiwi bara kae botha nakaetuta. ²Bárapo mataketha barapomonae busitane, pebusi po busi xua be joibo busi po busi xua busi naiña naetaba itaboko wétsika. Bárapo busi daxita botutu kanaüpa ichaxota barapomonae nakaetuta. ³Barapoxonae barapomonae tsita naitapeiña xéinatsi xua be peébató jumopekoichang. Bárapo peébató jumopekoichang daxita karepaya barompaya barapomonae jajayababa tsíniya táenatsi. ⁴Barapoxonae daxita karepaya barapomonae jüntükoyene yüükatsi Nakom pía Pejumopetünaxü tatsi pía peayapusüü itorobi koyenewa tatsi. Matáütano daxita barapomonae barompaya tsanaya icha jumeintha kueikueijei xua be po jumetha Nakom pía Pejumopetünaxü tatsi kueikueijei kana éxana barapomonae pojumein xua jopa yaputaeyo.

⁵Bárapo matakábintha, írürü pinmonae judiomonae pata Jerusalén tómaratha, po judiomonae i dapókotsi nákuang wérena peponaewi xua penataenexa Pentecostés wüing matakabi poxonae tsinakaetuta pexaewa penabanaenexa. Barapomonae bichokono pejumekowüntsiwi Nakom. ⁶Bárapo ayéi bicheitomonae pomonae judiomonae barapomonae busitane xua po busi, busiduneika ichaxota nakaetuta pomonae barapong Jesús pía pejumekowüntsíwichi tatsi. Bárapo judiomonae jumetane xua daxita barapomonae barompaya pía jumexitha kueikuejei xua judiomonae pía pejume tatsi. Bapoxonae barapomonae nanakaetuta Jesús pejumekowüntsíwitha. Barapomonae pomonae judiomonae najüntükoyene kabenaeka. Yawa jopa yaputaeyo xua peyábara nantaxeinaewa báraxua tsipéi daxita barapomonae pomonae Jesús pejumekowüntsíwichi barompaya judiomonae pijumexitha tatsi kueikuejei. ⁷Daxita barapomonae pomonae judiomonae najüntükoyene kabenaeka. Nantiya kaemonae natsipaeba, jeye:

—¡Jina, bara barapomonae Galilea nakuapíwiba, pomonae bekein barapomonae jopa icha jumeintha pekueikuejei jiwi xua wajumeintha pekueikuejeiwa! ⁸¿Eta pokotsiwa barapomonae metha daxita barompaya tsanaya icha jumeintha kueikuejei xua wajumeintha? ⁹Xote jinompa Partia nakuapiwi irü Media nakuapíwiba, irü Elam nakuapíwiba. Barichi xote jinompe Mesopotamia nakuapiwi, irü Judea nakuapíwiba, irü Capadocia nakuapíwiba, irü Ponto nakuapíwiba, irü Asia nakuapíwiba. ¹⁰Matáütano barichi xote jinompa Frigia nakuapiwi, irü Panfilia nakuapíwiba, irü Egipto nakuapíwiba, irü Libia nakuapíwiba pomonae jinompa imoxoyo Cirene nakua. Matáütano ichamonae pata pomonae Roma tomarapiwi. ¹¹Bárapo Roma tomarapiwi icha judiomonae pepa judiomonae xua yakuináexana. Icha judiomonae jopa pepa judiomonaeyo. Saya judiomonae penaexanaewi, tsipéi barapomonae jumekowünta Nakom icha be judiomonae ichi pomonae pepa judiomonae. Irü pata ichamonae Creta nakuapiwi, irü Arabia nakuapíwiba. Íchitha daxita waxainchi jumetaínchi xua Nakom pewüunaewang éxana peayapusüüwatha, poxoruru bárapo Jesús pijimonae tatsi wajumeintha paeba, jei bárapo judiomonae.

¹²Daxita bárapo judiomonae najüntükoyene kabenaeka. Daxota barapomonae jopa xaniwaicha yábara nantaxeinaeyo baxua. Barapomonae kaemonae nayaiña-biya, jeye:

—¿Eta pokotsiwa metha baxua jane? jei. ¹³Ichamonae saya jumekuikápana. Barapomonae namchi, jeye:

—¡Ápara barapomonae Jesús pijimonae tatsi kúüpaetsi! jei.

Meje yábara poxonae xua Pedro tsipaeba barapomonae

¹⁴Jesús pía peitorobiwi tatsi póyobe xua once póyobe, barapóyobe pía xantha tatsi Pedro nontapona. Matáütano nontapona pepa bicheito itabaratha tatsi. Pedro jumedangweya barái bárapo bichéitha, jeye: “Paxam, pomonae Judea nakuapiwi pamxaem irü daxita pomonae Jerusalén tomarapiwi pamxaem, ínkane pana nejumetaema, yábara paka tsipaebinchi xuaunxuae pajumetaneme. ¹⁵Bárapo pebiwe xua Jesús pijimonae tatsi ápara jopa kúüpaetsi xuaunxuae pakuiyábara nantaxéiname. Ápara áwiya xometo kaewa ekareka. Kataunxuae ápara baya daxota jopa kúüpaetsi. ¹⁶Báraxua xuaunxuae ánoxuae pajumetaneme, kaena báyatha Nakom pía peitorobi jume pepaebin yábara tsiwüünae muxuduta pong pewüing Joel. Joel báraxua Nakom Pejume Diwésitha tina xua saya tatina, xua pinae Nakom paeba.

¹⁷Jeyéi Nakom:

‘Poxonae bárapo kae pin nákuathe po matakabi opiwerawerakaena, bapoxonae bárapo matakábitha daxita karepaya jíwitha najumopetünaxü kayataxubiya katsibin.

Paiña nexanto jiwi irü paiña nexántixi neyábara kueikueijeji tsane pokotsiwa xua yaputane éxanang.

Pewowi yatsikaya tsita naitüüteibinchi be poxonae kamaiteibina.

Pítiri jiwi kamaiteibina poxonae amachinae tsane.

¹⁸Pomonae xua amanaya neyábara diwesi kanantsipaebina, barapomonáethano najumopekatsibin bárapo matakábitha, yabüxithano, pebíwithano.

Barapoxonae inta kueikueijeji tsane.

¹⁹Peitabókotha paka tsita itüütsinchi pokoyenein bichokono pewüünaewang xua jiwi bichokono najüntükoyene kabenaeka éxanatsi.

Íratha tsikano paka tsita itüütsinchi pokoyenein xua jopa juniya be pejana tsúrukuae tsane,

xuano xua jopa juniya be ishoto tsúrukuae tsane,

xuano xua jopa juniya be nobotsüxü tsúrukuae tsane.

²⁰Poxonae patopáetsika pong jiwi Pekanamataxeinaein kopiya báraxue panekotsíneme xua xometo kirijeji tsane, jopa pentha tsúrukuae tsane.

Yawa panekotsíneme xua jomokóichato be jánowa dukuaena.

Bárapo matakabi wüünae tsane poxonae pong jiwi Pekanamataxeinaein patopáetsika.

Bárapo matakabi Nakom pepa peitüpanáe matakabi exanaena.

²¹Pomonae pikoya penatawüükaewa Nakomtha xua Nakom peyawenaenexa tsainchi,

barapomonae kapanenebiya tsainchi Nakom’,

jei Joel xua saya Nakom tapáebatsi”,

jei Pedro.

²²Ekeicha Pedro barái barapomonae jeye: “Pomonae Israel nakuapiwi pamxaem, ínkane pana nejumetaema, xua paka tsipaebinchi. Jesús, pong Nazaret tomarapinxae bapong Nakom itoroba paiñaxantha. Bapong Jesús pewüünaewang éxana pexeña petsita-itüütsi koyenéwangno Nakom pía peyapusüüwatha tatsi, paiña neyaputaenexa tsane xua Nakom yawena xua Jesús peyawenáewatsi. Paxam báyatha payaputáneme xua bapong tsita naitüüba dukuaenabiya. ²³Báyatha Nakom paka kuiwüünae tsiwanaya tane xua pokoyeneya pata exanáename pexántohta tatsi. Nakom bara paka kuikópata xua abe paéxaname. Jesús pawétabame paiña kaenaetsinexa tsane bapong peakuibe jíwitha. Barapomonae Jesús kobematabóbatsi náetohta yawa bexotsi. ²⁴Íchitha ekeicha Nakom asüü éxana pexanto petüpáe kuiru nakua weya. Nakom Pexanto kapanepa pía peantüyapusüüwatha bárapo petüpáe kuiru nakua weya, tsipéi bárapo petüpáe kuiru nakua jopa xeinaeyo peyapusüüwa xua Jesús áwiya pebotsiwatsi bárapo petüpáe kuirunákuatha. ²⁵Irü David, Israel nakuapiwi itorobiya pía pepa peewatsinchi, kaena báyatha tina Nakom Pejume Diwésitha. David tina Jesús jume yábara tatsi. David namchi, jeye:

‘Yaputang xua Tanekanamataxeinaein nebarü poponeiba daxita matakabi.
Bapong neyaweneiba.

Bapong nebarü poponeiba daxota jopa junuwin tsane.

²⁶Daxota bichokono jüntükoyene weiweingang.

Matáütano daxota Nakom Pejume Diwesi jüntükoyene weiweinaya
kueikueijang ichamonaetha.

Bara bekein tüpaein,

müthütha bokuaeinno,

íchitha jumekowüntang xua Nakom ekeicha asüü neexanaena pía
peantüyapusüüwatha.

²⁷Xam Nakom jopa punaxubim tsane tajumope petüpáe kuirukuaríyatha.

Poxoru xang jiña nexantong tajüntükui wüünaein daxota jopa

benekopatsim xua tatüpaein tuxamnungkuaein,

yawa xua tsabanungkuaein.

²⁸Neitakuitsita-itüübame beta xaniwaicha tapoponaenexa tsane poxonae

ekeicha asüü neexanáename petüpáe kuiru nakua weya.

Nejüntükoyene weiweina éxaname tsipéi neyantapoponéibame’,

jei David xua saya Jesús tapáebatsi’,

jei Pedro.

²⁹Ekeicha Pedro barái barapomona, jeye: “Tamonae, daxota beta paka tsi-
páebatsi xua pinae David waámo susato nakuapin báyatha pinae tüpa. Piamonae
müthütha xotsi. Áwiya waxantha boka bárapo müthü ichaxota petüpaein müthü-
tha xotsi. ³⁰Ápara, barapong David, pinae Nakom peitorobi jume pepaebin. Báya-
tha pinae David nakana wüünae tsiwanaya muxutsidútatsi Nakom, xua pinae
David pijimonae tatsi jíwana pong jiwi Pekanamataxeinaein tatsi naexanaena.
Barapong pong Pekanamataxeinaein jiwi Israel nakuapiwi kanamataxeináeinchi
icha kain báyatha David ichi poxonae kanamataxeina bárapo Israel nakuamonae.

³¹Báyatha pinae David yábara tsiwüünae muxuduta xua bexa tsane Nakom Mesías
ekeicha asüü exanaeinchi. Nakom Pexanto tatsi pong David yábara jume jei, ápara
bapong Mesías. David namchi xua Mesías jeyéi xua saya pinae David tapaeba:
‘Xam Nakom jopa punaxubim tsane tajumope petüpáe kuirukuaríyatha. Poxoru
xang jiña nexantong tajüntükui wüünaein, daxota jopa benekopatsim xua tatü-
paein tuxamnungkuaein yawa xua tsabanungkuaein’, jei David xua Mesías jeyéi.

³²Pong Mesías, pong xuaunxuae yábara paka tsipáebatsi ápara bapong Jesús pong
Nakom ekeicha asüü éxana. Báraxua paxang yatsikaewa patakuitaewi. ³³Jesús
asiya icha peekaenexa Nakom pekoxatha tatsi. Jesús pong jiwi pepa Pekanamata-
xeinaein éxanatsi Nakom. Matáütano Jesús nakana jumopekátatsi, Nakom. Barichi
baxua xuaunxuae patáneme yawa pana nejumetanemeno xua daxita karepaya
barompaya icha jumexitha pakueikueijang, báraxua Nakom pía Pejumopetünaxü
tatsi pana kata. ³⁴Poxoru David saya tüpa, jopa athabé ichiyo, icha be jopa Jesús
ichiyo poxonae athabeicha Jesús. Íchitha saya baxua David tapaeba Nakom, xua
Nakom Mesías tsipáebatsi, jeye:

‘Nakom, Tanekanamataxeinaein baraichi.

Takóxatha weya ékare.

³⁵Abü beya poxonae matapaiña neka-aitafáetabi jiwi pía

Pekanamataxeinaein tatsi ka-exanaeinchi.

Barapomonaē beexanáetsipa pokotsiwa xua xam nepaebiwam’,
jeye pinae Nakom xua Mesías tsipáebatsi,
jei David Nakom nexa”,
jei Pedro.

³⁶Ekeicha Pedro namchi barapomonaetha: “Paxam, pomonaē Israel nakuapiwi pamxaem. Ánoxuae payaputáneme pong xua náetotha tüparukua paéxaname, Nakom éxana xua bapong jiwi pía Pekanamataxeinaein tatsi náexana. Yáwano Nakom naka ítata káewata xua pong Mesías jei, pong Nakom itorobika petsitüpaenexa jiwi, ápara bapong Jesús”, jei Pedro.

³⁷Poxonaē daxita karepaya barapomonaē baxua jumetaerüküpa bichokono jüntükoyene wekoyéi tsürüküpáē. Barapomonaē Pedro baraichi irü Jesús pía peitorobi jiwi tatsi baraichi, jeye:

—Patamonaē, ¿eta bewa pabichin tsane metha? jei.

³⁸Néxata Pedro barapomonaē barái, jeye:

—Icha jüntükoyene paxéinare Nakomtha paiña neáuraxae xua abe paéxaname. Matáütano daxita karepaya pam ichamonaē paka bautisabina Jesucristo pewüngtha xua Nakom pía paka nekayábara jüntemainaenexa xua abe paiña neexanáē kuirukoyenein. Barapoxonaē Nakom paka nakana jumopekatsibina. ³⁹Bárapo peyábara tsiwüünaē muxudutsiwa ápara paxam nexa, irü múxuna daxita paiña pexui néxano. Matáütano pomonaē tajü beya jinompa irü barapomonaē nexa. Barichi Nakom pong Wanaka namataxeinaeinxae, pomonaē waba peantobexae barapomonaē irü nexa, jei Pedro.

⁴⁰Bárapo jumeintha yawa icha jumeintha Pedro tsipaeba barapomonaē. Matáütano Pedro bichokono muxuweta poxonaē jeye:

—Pokoyenein xua daxita abe peéxanaē kuirukoyenein paexanéibame, bárapo koyenein pana nakuibarapende, pokoyenein xua daxita karepaya jiwi exaneiba, jei Pedro.

⁴¹Po matakábitha poxonaē Pedro paeba baxua bárapo matakábitha pomonaē jumekowünta xua Pedro paeba barapomonaē bautisábatsi. Bárapo matakábitha tres mil po bicheito jiwimonaēbe náexana xua pomonaē kopiya pomonaē Nakom pejumekowüntsiwixaetsi barapomonaē mataropeicha pinmonaē naéxanatsi.

⁴²Barapomonaē nakuiduba nawita, xua Jesucristo pía peitorobi jiwi tatsi paeba. Barapomonaē nakana kuinantajüpayá jinompa. Nakomtha nabarü tsipaebéibano. Nabarü nakaetutéibano xua penabarü epajanakeibinexa pan xua penabarü xai-binexa. Barapomonaē baxua éxana dubenanáebiya xua Jesucristo peyábara nantaxeina dubenanaebiyaenéxatsi pokoyene xua Jesucristo báyatha icha ichi xua poxonaē pan epajánaka.

Meje yábara pokoyeneya xua jinompa pomonaē kopiya Jesús pejumekowüntsiwi

⁴³Jesucristo pía peitorobiwi tatsi, barapomonaē pexeña petsita-itüütsi koyenewang éxana nawita Nakom pía peayapusüüwatha tatsi. Daxota pomonaē jopa Jesucristo pejumekowüntsiwichi, daxita barapomonaē junuwa, Nakom kunúwatsi poxonaē kuitane baxuang. ⁴⁴Daxita barapomonaē, pomonaē Jesús pejumekowüntsiwixatsi, barapomonaē xaniwaicha kaemonaē pebürüya nabarü jinompa. Matáütano barapomonaē kaemonaē nantiya nakatsiba dubenanáebiya pichiwiwi

pokotsiwang xua xeina. ⁴⁵Matáütano barapomonae daxitang pokotsiwang xua xeina kaenaeta dubenanáebiya. Bapoxonae bárapo parátixi natatsaba dubenanáebiya xua jopa pexeinaexae ichamonae xua icha be pókotsi koyeneya pokotsiwang kanantawénona ichamonae. ⁴⁶Daxita karepaya barapomonae nabarü nakaetuta dubenanáebiya Nakom pin pía botha. Matáütano pía bóxitha nabarü nakaetuta dubenanáebiya pan nabarü epanantarüba janakiya éxana dubenanáebiya. Jüntema nabarü jüntükoyene weiweinaeya xerubenanáebiya. ⁴⁷Daxita barapomonae karepaya Nakom wüünae jainta dubenanáebiya. Matáütano barapomonae barükui-iturajínatsi ichamonae beta peexanaexae. Daxita matakabi tsaibi pomonae Nakom pejumekowüntsiwixaetsi barapomonae Nakom kana éxana xua mataropeicha pinmonae tsóponae tsaibi.

Meje yábara poxonae pong pejayujáyujei jintong ekeicha kuijume éxanatsi

3 ¹Kaentakeitha kiripitha poxonae tres po hórabe tsuxubi po hóratha poxonae jiwi ba poneiba Nakom pin pía botha xua petsipaebibinexa Nakomtha bapoxonae Pedro irü Juan Nakom pin pía botha joníyabe. ²Bárapo bo Nakom pin píabo tatsi icha koiboto jiwi wüngduta, jeye: “Pexeña koiboto”, jei. Bárapo koibótotha daxita matakabi tsaibi pebin kuaretéibatsi pong pejayujáyujei jintong xua yawa nakatsiwa poxonae pexuyo. Daxota bapong baxota kuaretéibatsi xua pewüükekeibinexa pomonaetha, pomonae jojoneibiya bárapo koiboto iya. ³Pong pejayujáyujei jintong wüüka parátixi poxonae Pedro irü Juan táinchibe xua muxu pejoniyaebe bárapo koiboto iya. ⁴Néxata Pedro irü Juan tánebe bapong. Pedro barái bapongtha, jeye:

—Ínkane pana táemabe, jei Pedro.

⁵Néxata nekota bapong. Nantaxéinatába xua katinchi parátixi. ⁶Íchitha Pedro barái bapongtha, jeye:

—Kanta jopa xeinaeño parátixi. Matáütano jopa xeinaeño pokotsiwa oro nain matawüng. Meisha pokoyenewa xua taxeinaewa baxua kakatinchi. Jesucristo, Nazaret tomarapin wüngtha kabaraichi, asiya unguatábare yawa pónveno, jei Pedro.

⁷Néxata Pedro pokotsiwa pekoxa weya kobepita. Yawa asiya kuaranótano. Bapoxonae naiña beta taxuyawere dangweya dukuanaya. Pesitano wüünae tsanáyano. ⁸Néxata bapong pong pejayujáyujei jintong jirawüüna. Asiya unguatábano. Pónano. Bapoxonae Pedro irü Juan punajoniyatsibe bapong, Nakom pin pía botha. Jirajirawiya pónano. Yáwano Nakom wüünae jáintatsi. ⁹Néxata daxita pomonae xua Nakom pin píabo tütutha peenaexae, tainchi pong pejayujáyujei jintongxae xua pona, yáwano xua Nakom wüünae jaintatsino. ¹⁰Barapomonae daxita karepaya najüntükoyene kabenaekaeya tane, tsipéi barapomonae báyatha kuitane xua bapong amanaya jiwi wüükekeiba parátixi pekoibótotha, pokoiboto pewüng “Pexeña koiboto”, jei.

Meje yábara poxonae Pedro diwesi paeba Nakom pin pía botha po tütutha pewüng Salomón bo wüng tütutha

¹¹Poxonae pejayujáyujei jintong áwiya maxüwaetabatsibe Pedro Juanno bapoxonae írürü daxita jiwi najüntükoyene kabenaekaeya kuinaenouta Nakom pin

pía botha xua tútutha po tútutha Salomón bo wüing tútutha ichaxota Pedro barü jinompa. ¹²Poxonae Pedro barapomonae kaetáebiya, Pedro barái: “Já, pomonae Israel nakuamonaepiwi pamxaem, ¿eta xua metha daxita paxam pana najüntükoyene kabenaekaeya táneme baxua? ¿Pana neyábara nantaxéinamebe xua pata taayapusüüwatha paaxaibi exanangbe pejayujáyujei jintong? ¿Matáütano pana neyábara nantaxéinamebe poxoru Nakom pajumekowüntangbe daxota pong pejayujáyujei jintong axaibi? ¹³Ajibi, ápara waámo susato jiwi pía Nakom tatsi axaibi éxana bapong. Bárapo Nakom Jacob pía Nakom tatsi, Abraham bapong pía Nakomno, Isaac bapong pía Nakomno. Ápara bapong baxua taéxana Nakom. Bapong Nakom Pexanto bichokono aiñakuí kana éxana poxonae pexanto asüü éxana petüpáe kuirukoyene weya. Bapong ápara Jesús pong pakaenáetame pomonaetha, pomonae pentakaponaewi, pong bepa bekein ishanaxubéi Pilato poxonae paxam jopa pakopatsim xua bapong peishanaxubiwa. ¹⁴Bapong pong bichokono pejëüntükoyene wüünaein xua jopa xeinaeyo penatsikuentsiwa xua abe peexanaexae tsipéi saya exaneiba pokotsiwa Nakom ichichipa. Íchitha jopa paichipaem xua Pilato peishanaxubiwa tsane bapong. Saya meisha pawüükame xua Pilato peishanaxubiwa ichüing pong jiwi pejutebeibin pong Barrabás. ¹⁵Poxonae baxua paéxaname barápara Jesús pabexúbame. Bapong Jesús pong jiwi kana éxanatsi xua jiwi ajüntüyapusüüya pejinompaewa. Bapong Jesús Nakom ekeicha asüü éxana petüpáe kuirukoyene weya. Bara baxua yatsikaya pakuitang daxita. ¹⁶Pojume wüing peayapusüü wüing, bapo wüing Jesús pía wüing. Daxota pejayujáyujei jintong bárapo jumewüingtha axaibi éxanatsi. Barapong patáneme xua axaibi, tsipéi bapong jumentapitabiya jumekowünta bárapo peayapusüü jume wüing. Daxota barapong paiña itabaratha axaibi tsuxubi poxoru jumekowünta Jesús”, jei Pedro.

¹⁷Ekeicha Pedro jeye: “Tamonae yaputang xua jopa payábara yaputaem xua paéxaname poxonae Jesús pabexúbame. Barichi paiña pentakaponáewino jopa yábara yaputaeyo xua baxua éxana. ¹⁸Nakom peitorobi jume pepaebiwi báyatha Mesías yábara tsíwana páebatsi. Barapomonae paeba, jeye: ‘Bexa tsane Mesías bexubinchi’, jei. Nakom bara nakuíyábara jumeweta baxua xua báyatha Nakom peitorobi jume pepaebiwi paeba. ¹⁹Daxota icha jüntükoyene paxéinare Nakomtha paiña neáuraxae xua abe paéxaname. Yawa pajumekowüinde paiña nepaka kayábara jüntemainaenexa abe paiña neexanáe kuirukoyenein. Yawa Nakom pawüükare xua paka jüntükoyene wüünae exanaena. Bapoxonae Nakom paka jüntükoyene ayapusüüya exanaena. ²⁰Tsipéi Nakom ekeicha athawétsika Jesús itorobikaeinchi pong báyatha Nakom itapeta pong Mesías xua paiña nepaka kapanenebiyae-nexa tsane abe paiña neexanáe kuirukoyenein weya. ²¹Kataunxuae abü Jesucristo ékiya Nakom pía nakuatheicha tatsi. Ekeicha bapong patopáetsika poxonae Nakom wüünae exanaena daxitang, be pókotsi koyeneya báyatha Nakom peitorobi jume pepaebiwi paeba. ²²Barichi Moisés pata amo susato jintong namchi: ‘Paiñamonae jíwana Nakom kana exanaena, pong Nakom pía peitorobi jume pepaebin tsekae tsane icha neichi. Pajumekowüntsiya éxande daxita pokotsiwa xua bapong paka tsipaebina. ²³Daxita pomonae jopa jumekowüntsiyo pokotsiwa bapong paeba, barapomonae Nakom werawéraka kana exanaena xua jopa penaexanaenexa Nakom pijimonae tatsi’, jeyéi Moisés”, jei Pedro.

²⁴Ekeicha Pedro jeye: “Daxita Nakom peitorobi jume pepaebiwi irü Samuel pong xua yatsikaya tabüdukua, báraxua karepaya bapo diwesin yábara paeba bárapo

matakabin. ²⁵Bárapo Nakom pía peyábara tsiwüünae muxudutsiwa po peyábara tsiwüünae muxudutsiwa Nakom tsiwüünaeya muxuduta Nakom pía peitorobi jume pepaebi jíwitha, ápara bara irü paxam nexa. Baxua Nakom pena peyábara tsiwüünae muxudutsiwa Abraham yábara tsiwüünae muxudútsi pong waámo susatopin xua wüünaeya paiña nejinompaenexa. Nakom Abraham baraichi, jeye: ‘Kaein jiña nemómoxi susato jiwi jíwanapin pepatopaexae tsane daxita i dapókotsi nakuangpiwi yawenaein’, jei Nakom Abrahamtha. ²⁶Poxonae Nakom Pexanto asüü éxana petüpáe kuirukoyene weya, bapoxonae kopiya pákata itoroba paiñaxantha pía paiña nepaka kayawenaenexa xua daxita paxam paiña nenakuibarapentsinexa abe paiña neexanáe kuirukoyenein”, jei Pedro.

Meje yábara poxonae Pedro irü Juan kueikueijejei tsungkuaebe pomonae tomarapiwi pía pentakaponaewi tatsi peitabaratha tatsi

4 ¹Poxonae kataunxuae Pedro irü Juan kueikueijeibe barapomonaetha, bapoxonae sacerdotemonae pía pentakaponaewi tatsi pata. Irü patopa pong soldadomonae pía pentakaponaein tatsi pong Nakom pin pía botha tatsi pe-enaen. Yawa saduceomonaeno irü pata baxota. ²Barapomonae bichokono anáepana, yáitama Pedro Juanno páebabe xua pokoyene Jesús petüpaen ekeicha asüü, xua pinae barichi jíwino poxonae tüpa ekeicha asüü. ³Bara néxata Pedro Juanno wáetabatsibe barapomona. Jiwi pekübibotha kapóinchibe. Bárapo botha étatsibe tsipéi kirei tsanaya xua beya poxonae yaitapenakaena. ⁴Pinmonae jumetane po diwesi Juan irü Pedro páebabe, yawa jumekowúntano bárapo diwesi. Barapomonae írürü pomonae kopiya jumekowúnta kaena báyatha, daxita barapomonae néxata daxita cinco mil bicheito tsuxubi xua saya pebiwi unúnatsi.

⁵Icha mataketha judiomona pía pentakaponaewi tatsi, írürü pítiri jiwi, írúno pomonae jiwi pekuidubiwi Moisés pía peitorobi koyenewa tatsi, daxita barapomonae nakaetuta Jerusalén tómaratha. ⁶Baxota irü nanakaetuta Anás pong sacerdotemonae pía pepa pentakaponaein tatsi. Irü nanakaetuta Caifás, Anás perobi. Irü nanakaetuta Juan irü Alejandro, pongbe Anás piamonae tatsi. Barichirü nanakaetuta ichamonae pomonae sacerdotemonae pía pentakaponaewi tatsi barapomonae piamonae tatsi. ⁷Bapoxonae ichamonae itoroba xua Pedro irü Juan pekuaranotatsinexatsibe bárapo penakaetutsiwi itabaratha. Yaiñabatsibe, jéichibe:

—¿Jintam pía peyapusüü itorobi koyenéwatha tatsi matáütano jintam pewüngtha tatsi axaibi paexanamebe? jeichíhibe.

⁸Pedro bichokono jüntükoyene yúükatsi Nakom pía Pejumopetünaxü tatsi pía peyapusüü itorobi koyenewa tatsi. Pedro barapomonae jumenota, jeye:

—Pomonae tomarapiwi pía pentakaponaé jiwi pamxaem, írürü pomonae pítiri jiwi pamxaem, pomonae Israel pijimonae tatsi pamxaem, daxita barapomonae pam paka tsipáebatsi. ⁹Maisha yábara pana yaiñabamebe xua pokoyene pejayujúyujei jintong axaibi xua paiña neyaputaenexa xua eta pokoyeneya xua paexanangbe poxonae bapong axaibi éxantsi pokoyene xua bichokono wüünae. ¹⁰Daxota paxangbe paka jumenótatsi xua irü israelmonaepiwi peyaputaenexa pokoyene xua pong pejayujúyujei jintong axaibi éxantsi poxonae pawüngpaebang Jesús pewüng pong Nazaret tomarapin. Bapong Jesús, pong ápara náetotha tüparukua paéxaname matáütano pong ekeicha Nakom petüpaen asüü éxana petüpáe kuirukoyene weya. ¹¹Báyatha Nakom Pejume Diwésitha tsiwanaya yábara paeba

xua pokoyeneya pakana exanáename Jesustha. Paxam be barapokotsimonae pam, be pokotsimonae xua ibo bo peakabiwi. Barapomonae xuba iboto po iboto bekein aiñakuí náexana beyakaincha icha iboto. Paxam bara paichim Jesucristo paxúbame pong peaiñakuín xua Nakom aiñakuí kana éxana beyakaincha ichamonae. ¹²Bárapo kae pin nákuathe dapokotsin aibi pong kapanepeiba jiji. Saya meisha bapong Jesús kapanepeiba jiji. Ichüing Nakom jopa nákata itorobiyo.

¹³Daxita tomarapiwi pía pentakaponaewi tatsi yábara najüntükoyene kabe-naeka xua Pedro Juanno jopa auríyobe xua atsakiya páebabe. Tsipéi barapomonae pomonae pentakaitorobi bicheito yaputane xua Pedro Juanno jopa nakuidubíyobe petináe botha matáütano xua bapongbe saya pekuipawi jintongbe. Barichi bárapo pentakaitorobi bicheito yaputáneno xua xaniwaicha ápara bapongbe pongbe napu-napoponébabe Jesustha. ¹⁴Barapomonae moya ena tsipéi pong pejayujáyujei jintong Pedro Juanno axaibiya kakuita úngkuatsibe. Daxota barapomonae Pedro Juanno jopa abe yábara paebíhibe. ¹⁵Pedro Juanno matha pesato beitorobíyatsibe. Barapomonae natsipaeba. ¹⁶Nabarái, jeye:

—¿Eta bichainchi metha barapóngbetha Pedro Juanno? Báyatha daxita karepaya Jerusalén tomarapiwi yaputane xua Juan Pédrone éxanabe pexeña petsita-itüütsi koyenewa Nakom pía peayapusúüwatha tatsi. Daxota jopa naka itaküüpaeyo xua wapaebiwa pokoyene xua bapongbe jopa ápara exanáeyobe pexeña petsita-itüütsi koyenewa Nakom pía peayapusúüwatha tatsi. ¹⁷Maisha aichaxaibichi xua daxita karepaya jiji jumetaetáepona baxua. Metha daxota bapongbe jumedangweya itorobinchi xua ekeicha jopa paebí tsánebe xua Jesús peyábara paebíwatsi, jei barapomonae.

¹⁸Bárapo pentakaitorobi bicheito ekeicha Pedro irü Juan wabatsibe. Jumedangweya tsipáebatsibe:

—Ekeicha jopa Jesús payábara paebín-debe. Ekeicha jopa yábara pakuidubín-debe barapokuí, jei barapomonae.

¹⁹Bara néxata Pedro Juanno jumenótabe barapomonae, jeibe:

—Ínkane payábara nantaxéinare icha metha bara Nakom tsita wüünaetsi xua paxangbe pata paka kajumekowüntsíwatsi xua pata exanáewabe pokotsiwa pana itoróbame xua daxota jopa pata exanaewa pokotsiwa Nakom pana itoroba. ²⁰Bewa paexanaeinbe daxita pokotsiwa Nakom pana neitoróbabe. Bewa papaebinde daxita pokotsiwa patangbe xua Jesús éxana yawa xua pajumetangbeno xua Jesús paeba, jeibe Pedro Juanno.

²¹Barapomonae pomonae tomarapiwi pía pentakaponaewi tatsi, Pedro irü Juan jume itawétatsibe. Dáichitha saya pukopatatsibe. Barapomonae jopa itaküüpaetsi xua pekuainchiwatsibe Pedro irü Juan jiji pekunuwixaetsi, tsipéi pinmonae jiji Nakom wüünae jáintatsi, petaexae pokotsiwa Pedro irü Juan éxanabe. ²²Pong pejayujáyujei jintong pongtha pong Nakom pexeña petsita-itüütsi koyenewa taéxana, bapong axaibi éxanatsi poxonae cuarenta po wéiyobe xeina.

**Meje poxonae pomonae Jesús pejumekowüntsíwichi tatsi
wüüka Nakom xua jopa pejunuwinexa tsane poxonae
Nakom Pejume Diwesi kueikueijejei tsane jíwitha**

²³Pedro Juanno naiña póntababe ichaxota Jesús pejumekowüntsíwichi tatsi jinompa. Baxota nanabarü nakaetútatsibe. Barapomonaetha páebabe, xua

baraunchíhíbe sacerdotemonae pía pentakaponaewi, pítiri jíwino. ²⁴Poxonae Pedro irü Juan baxua jumetaerükúpatsibe, barapomonae Nakomtha tsipaeba, jeye: “Nakom, pong Pata Nekanamataxeinaem, xam daxita peitabókotha éxaname, íra-thano, ménethano, daxita icha koyeneinno. ²⁵David pong neitorobi jume pepaebin, nejumopetünaxü kueikueijeji kana éxanatsi xua katapaeba, poxonae jeye:

‘¿Eta xua metha, pomonae jopa judiomonae naexanaeyo kayábara anáepana?
Bara bekein ichipa abe kata éxana íchitha jopa itaküüpaetsi.

²⁶Daxita karepaya nakuangpiwi pomonae jiwi itorobiya pía pepa peewatsíwichi irü ichamonae pomonae jiwi peyanakua ewatsíwichi barapomonae nakaetuta xua abe nekayábara paebinexa yawa xua Nexanto pía abe yábara paebichi pong Mesías, pong jiña Neitapetsin’, jeyéi David, xua pinae Nakom tapáebatsi”, jei barapomonae xua wüüka Nakomtha.

²⁷Ekeicha bapomonae jeye: “Bara yatsikaya baxua éxana poxonae Herodes irü Poncio Pilato, irü icha nakuamonaepíwino, irü Israel nakuamonaepíwino xote nakaetuta Jerusalén tómaratha. Barapomonae nakaetuta xua Jesús abe peyábara paebinéxatsi nexanto pong pejüntükoyene wüünaein pong Mesías pong itapétame.

²⁸Barapomonae, pomonae xote nakaetuta, éxana daxita xua kaena báyatha kui-wüüinae tsiwanaya yábara páebame pokoyene xua barapomonae exanaena. ²⁹Pata Nekanamataxeinaem, matha jumetaema xua pana yábara abe jumebaraunchi xua abe pana exanapaeba. Pana kare xua neajüntüyapusüüwa xua jopa junuwiya pata paebinexa tsane jiña jume diwesi, tsipéi paxang jiña neitorobi jiwi pang. ³⁰Peate-newi axaibi éxande neayapusüüwatha. Matáütano bárabü kópatame xua pexeiña petsita-itüütsi koyenewang paexanaein poxonae pakueikueijang tsane jiña jume diwesi, Jesús nexanto pía peayapusüüwatha tatsi pong pejüntükoyene wüünaein”, jei barapomonae poxonae wüüka Nakomtha.

³¹Barapomonae najumewetarüküpa xua Nakomtha petsipaebiwa. Bapoxonae ichaxota nakaetuta barapomonae ira jijiyataxuba. Daxita barapomonae jüntükoyene yüüka kana éxanatsi Nakom pía Pejumopetünaxü tatsi pía peayapusüü itorobi koyenewa tátsitha. Matáütano barapomonae Nakom Pejume Diwesi jopa junuwiya paebínóutsiyo.

Meje yábara poxonae pomonae Jesús pejumekowüntsiwi pokotsiwang xua xeina daxita baxuang bara barapomonae nexa

³²Pomonae pejumekowüntsiwi Jesucristo pinmonae tsóponae. Barapomonae pebürüya nantaxeina be kaenthüto koyeneya. Ichüng jopa jeyo: “Ápara pokotsiwa xeinang meisha tawa”, jopa jeyo. Íchitha daxita xua barapomonae xeina baxua saya daxita bara barapomonae nexa. ³³Jesús pía peitorobi jiwi tatsi ajumeyapusüüya yábara paeba pokotsiwa báyatha tane poxonae Jesucristo pong jiwi Pekanamataxeinaeinchi xua ekeicha petüpaein asüü pópona éxanatsi. Matáütano yábara kueikueijeji pokoyene Nakom bichokono wüünae éxana daxita barapomonaetha peantobexaetsi. ³⁴⁻³⁵Jopa ichüng akopeibiyo pomonae Jesús pejumekowüntsiwi. Daxita barapomonae xeina xua pokotsiwa penantawenonaewa poxoru ichamonae pomonae nawita pexeinaewi kaenaeta dubenanáebiya pabin, bomüxüngno.

Bárapo parátixi poxonae xeineiba, katsibéibatsi Jesucristo pía peitorobi jiwi tátsitha. Néxata xuya bárapo parátixi Jesucristo pía peitorobi jiwi tatsi katsibeiba pomonaetha, pomonae peakopeibí jiwi xua daxota jopa petaseikaenéxatsi pokotsiwa nantawénona. ³⁶Barichi éxana bapong José pong Leví pía pemomo susato jíwanapin. Jesucristo pía peitorobi jiwi tatsi icha wüngduta bapongtha, po wüng Bernabé. (Bárapo wüng, xua hebreo jume jei: “Pong jiwi pentateikeibin”, jei.) Barapong José, Chipre tunáetotha náexana. ³⁷Bapong pía pabi kaenaeta. Bapoxonae bárapo parátixi Jesucristo pía peitorobi jiwi tatsi kátatsi peakopeibiwi nexa.

Meje yábara poxonae Ananías irü píowa Safira abe éxanabe

5¹Bapoxonae irü ichüng pong pewüng Ananías irü píowa pewüng Safira, pabi xéinabe. Bapong piowabe pía ira kaenáetabe. ²Bapong piowabe najüpa nantaxéinabe. Bapongbe icha parátixi nata bótabe. Icha parátixi Jesucristo pía peitorobi jiwi tatsi kátabe bekein Ananías paeba xua daxita kátabe Jesús pía peitorobi jíwitha tatsi. ³Bara néxata Pedro Ananías baraichi, jeye:

—Ananías, ¿eta xua metha Satanás jumejeyam xua kajumetsiduta xua Nakom pía Pejumopetünaxü tatsi muxuitórobame? ¿Eta xua metha parátixi nata bótame xua ira matoma kakata? ⁴Po ira kaenáetame ápara bara jiña ira. Yawa bárapo matómano ápara bara jiñawa. Bárapo parátixi icha kanantawenóname bara ba moya tainchi. ¿Eta xua metha baxua najüntükoyene xéiname? Jopa ápara muxuitorobim pebiwi. Jame yatsikaya ápara Nakom pía Pejumopetünaxü tatsi muxuitórobame, jei Pedro.

⁵Poxonae báraxua Ananías jumetaeba, petüpaein Ananías íratha jopa. Daxita pomonae xua jumetane xua bapong tüpa, bichokono junuwa. ⁶Pewowi pata. Ananías petüpaein matayarábatsi pesato bekáyatsi, xua pemüthütha xubinéxatsi.

⁷Pirapaeyo poxonae tres po hórabe weta, Ananías píowa tatsi patopa ichaxota Pedrobarü ena. Barapowa jopa yaputaeyo xua pía pebin tatsi tatúpatsi. ⁸Néxata Pedro barái barapowa, jeye:

—¿Bara daxita pana kátame xoxi pakaenáetame pentoma pabi? jei Pedro.

Barapowa jumenota, jeye:

—Aja, bara daxita, jei barapowa.

⁹Néxata Pedro barái barapowa, jeye:

—¿Eta xua metha pana muxuwetamebe xua Nakom pía Pejumopetünaxü tatsi pamuxuitorobinamebe? Taema, pewowi pomonae aunxuae jiña pebin müthütha xotsi, pekoibótotha pata, nekamüthütha xubinexa tsanerü.

¹⁰Barapoxonae kaena naiña Safira Pedro petáxutha petüpaein tanabotábatsi. Poxonae pewowi taeba xua barapowa báyatha tüpa, bapoxonae bapowa jontaxorénatsi. Pía pebin kakuita müthütha xorékatsi. ¹¹Daxita Jesús pejumekowüntsiwi, ichamonaeno ünthüthü nayotarúküpa pejunuwixae poxonae báraxua jumetane.

Meje yábara poxonae Jesús pía peitorobi jiwi tatsi aiña pexeíña petsita-itüütsi koyenewang éxana, Nakom pía peayapusüüwatha tatsi

¹²Jesús pía peitorobi jiwi tatsi pexeíña petsita-itüütsi koyenein éxana jíwitha Nakom pía peayapusüüwatha tatsi. Pinmonae Jerusalén tomarapiwi pomonae jumekowünta Jesús, Nakom pin pía botha nakaetuta. Po tutu pewüng Pórtico de Salomón tutu, bapo tütutha nakaetuta. ¹³Ichamona, pomonae xua jopa

jumekowüntsiyo Jesús, junuwa xua penanakaetútsiwa Jesús pejumekowüntsiwítha tatsi. Íchitha bárapo Jerusalén tomarapiwi tsita kuiwüünaetsi Jesús pejumekowüntsiwi tatsi. ¹⁴Pin bicheito nayoyotapona, pebíwino, yabüxino pomonae xua jumekowüntapona Jesús pongxae jiwi Pekanamataxeinaeinchi. ¹⁵Jesús pía peitorobi jiwi tatsi wüünae peexanaexae, Nakom pía peayapusüüwatha tatsi, daxota pomonae átene námtotha kapoinchi. Ichamonae cámatha bobena námtotha. Ichamonae weintha bobena. Barapomonae ichipa jayabábatsi xua Pedro pejúmope tatsi, xua barapomonae peaxaibi exanaenexa tsainchi. ¹⁶Jiwi nakaetuta Jerusalén tómaratha pomonae xua pía tómarang jeba Jerusalén tómarara pepuya weya. Barapomonae kápata peatenewi irü pomonae xua matajemábatsi éxanatsi kauri. Daxita barapomonae pebürüya axaibi éxanatsi. Daxita barapomonae karepaya ekeicha axaibi.

Meje yábara poxonae Jesús pía peitorobi jiwi tatsi péraxa éxanatsi

¹⁷Néxata sacerdotemonae pía pepa pentakaponaein tatsi, irü pomonae xua napunapona, pomonae saduceomonae, daxita barapomonae Jesús pía peitorobi jiwi tatsi anaepanaya jumeúwatsi. ¹⁸Daxota pomonae xua anáepana Jesús pía peitorobi jiwi tatsi téikatsi. Jiwi pekübibóthano kapoinchi. ¹⁹Íchitha Jesús itoroba matatsunpin. Bapong mérawi patopa. Jiwi pekübikoiboto yausaranaxuba. Matatsunpin aishowa bemaxü kayiya Jesús pía peitorobi jiwi tatsi. ²⁰Matatsunpin Jesús pía peitorobi jiwi tatsi tsipáebatsi, jeye: “Paponde Nakom pin pía botha. Baxota paumende. Payábara páebare daxita jíwítha bárapo pena jüntükoyene pokoyene xua Nakom kata jíwítha xua beta pejinompaenexa”, jei matatsunpin. ²¹Poxonae baya kaemúmbbotha Jesús pía peitorobi jiwi tatsi bara éxana xua matatsunpin paeba. Bara Nakom pin pía botha yakuinaya joniya pekuidubinexa jiwi.

Barapoxonae sacerdotemonae pía pepa pentakaponaein tatsi, irü saduceomonaeno waba daxita karepaya Israel nakua pía penapatáe jiwi xua penakaetutsinexa pentakaitorobi bichéittha. Barapoxonae barapomonae itoroba ichamonae xua Jesús pía peitorobi jiwi tatsi pekuaranobinéxatsi pin bichéittha peitabaratha tatsi. ²²Íchitha poxonae policiamonae jiwi pekübibbotha pata, Jesús pía peitorobi jiwi tatsi jopa taetsi. Daxota policiamonae diwésiyo kaibeya kápona pin bicheito peitabaratha. ²³Policiamonae namchi, jeye:

—Poxonae papatang jiwi pekübibbotha, soldadomonae pomonae peewatsiwi bárapo pekübibbotha bárapo soldadomonae pekoiboto yábara umena, dangwéi tsungkuae. Poxonae pasaranaxoyang jopa paitaraerowiño Jesús pía peitorobi jiwi tatsi. Jiwaibi. Aichurubena, jei.

²⁴Poxonae sacerdotemonae pía pepa pentakaponaein tatsi, irü Nakom pin píabo peyábara umenaewi pía pentakaponaein tatsi, irü sacerdotemonae pía pentakaponaein tatsi jumetane baxua, bapoxonae najüntükoyene benaekaeya nayáíñaba, jeye: “¿Eta xota metha jane Jesús pía peitorobi jiwi tatsi? ¿Eta xua jane?” jei. ²⁵Írürü barapoxonae pebin patopa. Barapomonae baraichi, jeye:

—Já, pomonae jiwi pekübibbotha pakáponame, barapomonae Nakom pin pía botha umena. Matáütano kuiduba jiwi, jei bapong.

²⁶Nakom pin píabo peyábara umenaewi barapomonae pía pentakaponaein tatsi bapong barü pona policiamonaeno Nakom pin pía botha. Ekeicha kaewa barü dendénatsi Jesús pía peitorobi jiwi tatsi ichaxota nakaetuta pentakaitorobi bicheito. Saya jopa abe exanaetsi poxonae téikatsi. Saya barükui-wüünaeya karendénatsi

poxoru bárapo policiamonae jiwi kuikunúwatsi. Daxota policiamonae saya be xaiñatha teika barapomonae xua jiwi pekuiyáinwaxae tatsi xua policiamonae pekuinbabiwa tsipaetsi ibotíxitha. ²⁷Nakom pin píabo peyábara umenaewi pía pentakaponaein tátsino, barapomonae Jesús pía peitorobi jiwi tatsi kapoinchi pentakaitorobi bicheito peitabaratha. Sacerdotemonae pía pepa pentakaponaein tatsi bapong, Jesús pía peitorobi jiwi tatsi baraichi, jeye:

²⁸—Báyatha jumedangweya paka tsipaebatsiba: ‘Ekeicha jopa Jesús payábara paebinde’, pajang. ¿Íchitha eta xua paéxaname? Daxita karepaya Jerusalén tomara piwi yaputane pokotsiwa paxam pakuidúbame Jesús yábara. Yawa paiña metha paebichi xua paxang panatsi aenakuentang Nakomtha tüpa pata exanaexae Jesús, jei bárapo pentakaitorobi bicheito.

²⁹Néxata Pedro irü ichamonae pomonae Jesús pía peitorobi jiwi tatsi daxita bárapo matabüxúyobe jumenota barapomonaetha, jeye:

—Ápara jame bewa paexanaein pokotsiwa Nakom pana itoroba. Nakom pía peitorobi koyenewa aiñakuí beyakaincha jiwi pía peitorobi koyene tatsi. ³⁰Pata amo susato jiwi pía Nakom tatsi, bárapo Nakom Jesús ekeicha petüpaein asüü éxanatsi pong xua pabexúbame, poxonae náetotha tüparukua paexanadútame. ³¹Nakom Pexanto pía peayapusüüwatha éxana yatsikaya jiwi pía pepa Pekanamataxeinaein tatsi. Yawa éxana pexanto pong jiwi Pekapanenebiyaein. Baxua éxana poxonae pekoxatha taékatsi pexanto. Nakom baxua éxana tsipéi ichichipa xua Israel nakuapiwi icha jüntükuikoyene xeinaena bapongtha, xua bapoxonae barapomonae Nakom pekuiyábara jüntemainaenexa pokoyene xua barapomonae Nakom tsita natsikuéntatsi xua abe pe-eexanaexae. ³²Bara yatsikaya patakuitaewi daxita baxuang, Nakom pía Pejumopetünaxü tatsi irü tánerü. Daxota paka tsipaebatsi baxua, pokotsiwa xua Jesús éxana. Nakom najumopekata pomonaetha, pomonae xua peichichipaewa xua peexanaewa pokotsiwa Nakom itoroba, jei Jesús pía peitorobi jiwi tatsi.

³³Pentakaitorobi bicheito jumetaerüküpa xua pokotsiwa paeba barapomonae pomonae Jesús pía peitorobiwi tatsi. Bapoxonae barapomonae bichokono kasebarükúpatsi. Bárapo pentakaitorobi bicheito ichichipa xua bárapo Jesús pía peitorobiwi tatsi pejutebíwatsi. ³⁴Bárapo pentakaitorobi bichéitotha eka fariseomonaepin pewüng Gamaliel, pong jiwi pekuidubin Moisés pía peitorobi koyene tatsi. Jiwi bapong barükui-iturajinéibatsi. Bapong asiya unguwa yawa itoroba xua bara kaeto pesato bekayiya tsainchi barapomonae pomonae Jesús pía peitorobi jiwi tatsi. ³⁵Bapoxonae bapong Gamaliel barái barapomonae pomonae pentakaitorobi bichéitotha, jeye:

—Paxam pomonae Israel nakuamonaepiwi pamxaem, dota pam xua pókotsi koyeneya pakana exanáename barapomonae. ³⁶Metha bara pajüntemáiname poxonae matha bapong Teudas poxonae piakoya pentakaponaein náexana, nayábara paeba xua pinae bichokono peaiñakuí jintong. Cuatrocientos pebiwimonae matabüxübe punajinómpatsi bapong. Íchitha poxonae Teudas bexotsi ichamonae, bapoxonae pijimonae tatsi dúküpa, poxonae daxita yótabatsi. Saya xua Teudas éxana baxua pekuipawi. ³⁷Barichi Teudas pepuya weya ichüng patopa pong pewüng Judas. Bapong pentakaponaein najainta poxonae jiwi pewüngtinae matakabi tsuxubi. Bapong Galilea nakuapin. Piamonae pin bicheito punajinompatsirü, íchitha barichi bapong Judas bexotsi ichamonae. Barichirü pijimonae tatsi

tarükúpatsi poxonae yótabatsi. ³⁸Daxota paka jeichi: ‘Jesús pía peitorobi jiwi tatsi bara pakuikópabare’, jang. Icha barapomonae saya exanáetsipa xua jiwi itoroba, néxata barapomonae jopa amanayabichipae pokotsiwa xua ichichipa peexanaewa. ³⁹Íchitha icha barapomonae exanáetsipa pokotsiwa Nakom itoroba, néxata paxam jopa pakui-amanayabichipaem barapomonae. Dota pam. Daxota jopa paexanaponaende pokoyene xua Nakom pía peaitafaetabí jíwichi pana naexanapóname, jei Gamaliel.

Barapomonae pomonae pentakaitorobi bicheito bara jopa pekuiyo Gamaliel pepaebixae. ⁴⁰Barapoxonae barapomonae pomonae pentakaitorobi bicheito ekeicha wábatsi Jesús pía peitorobi jiwi tatsi. Bapoxonae matha kopiya ichamonae itoróbatsi xua Jesús pía peitorobi jiwi tatsi pekuainchinéxatsi. Ekeicha jumedangweya tsipáebatsi: “Ekeicha jopa Jesús payábara papaebim tsane”, jei. Bapoxonae pukopabábatsi nama Jesús pía peitorobi jiwi tatsi. ⁴¹Jesús pía peitorobi jiwi tatsi pentakaitorobi bicheito weya pona. Barapomonae jüntükoyene weiweina tsipéi péraxa éxanatsi ichamonae, Jesús pijimonaexae xua baxua saya Nakom pekopatsixae. ⁴²Áwiya barapomonae amsiya yábara kuiduba, Nakom pin pía botha Jesús pía pexaiña jume diwesi yawa xua boxíthano. Matáütano kuidúbano xua Jesús ápara Mesías pong Nakom itorobika.

Meje yábara poxonae Jesús pía peitorobi jiwi tatsi itapeta siete póyobe peyawenaenexa tsane ichamonaetha

6 ¹Barapoxonae bárapo matakeitha pinmonae jumekowünta Jesús. Pomonae xua griego jume pekueikueijeijiwi anaya tsipaeba, pomonae xua hebreo jume pekueikueijeijiwi baraichi, jeye: “Patamonae, powaxi pekuenta werapaewaxichi piséurixi powaxi griego jume pekueikueijeijiwaxi poxonae judiomonae ápata pexaewa, barapówaxi saya peyauxi ápatatsi pexaewa. Íchitha meisha judiomonae-waxi powaxi pekuenta werapaewaxichi barapówaxi jopa juniya nabaneibiyo”, jei. ²Jesús pía peitorobi jiwi tatsi, pomonae doce póyobe, barapomonae barü nakaetuta ichamonae pomonae irü Nakom pejumekowüntsiwi. Barapomonae pomonae Jesús pía peitorobi jiwi tatsi jeye barapomonaetha:

—Painta jopa wüünaeyo xua pata nakuibarapentsiwa xua pata kueikueijeijiwa Nakom Pejume Diwesi xua saya pexaewa pata apatsinexa jiwi. ³Daxota wajiwi-monae paitapere siete póyobe pebinbe paxam jíwana. Paitapere pomonae xua daxita jiwi itakuijüntükoyene wüünéibatsi, pomonae xua jüntükoyene yúükatsi Nakom pía Pejumopetünaxü tatsi pía peayapusúüwatha tatsi, pomonae xua peyaputaewi. Bárapo siete póyobe pakui-itorobín xua pexaewa apateibina. ⁴Bapoxonae paxang Jesús pía peitorobiwatsi tatsi pang, jopa paapatsin tsane pexaewa. Saya meisha Nakom pata tsipaebibichi nawita yawa pata kueikueijeiji tsaibichi Jesús pejume diwesi, jei barapomonae.

⁵Jesús pejumekowüntsiwi tatsi nantajüpaya nantaxearúkúpa. Bapoxonae Esteban itapétatsi. Bapong Esteban pong bichokono jumekowünta Jesús yawa bichokono jüntüyúükatsi Nakom pía Pejumopetünaxü tatsi pía peayapusüüwa tatsi. Itapétatsi Felípeno, irü Prócoro, irü Nikanor, irü Timón, irü Parmenas, irü Nicolás. Bapong Nicolás Antioquía tomarapin. Bapong kopiya jopa naexanaeyo judiomonaepin. Poxonae jumekowünta Nakom, bapoxonae judiomonaepin náexana.

⁶Barapoxonae bárapo siete póyobe Jesús pejumekowüntsiwi tatsi kápona Jesús

pía peitorobi jiwi tátsitha. Jesús pía peitorobi jiwi tatsi matajayabiya tawüüka Nakomtha xua Nakom yawenaena barapomona.

⁷Pinmonae jumetane Nakom Pejume Diwesi. Pinmonaeno irü jumekowünta Cristo Jesús, pomona Jerusalén tómaratha jinompa. Irü judiomona pía sacerdotemona tatsi, barapokotsimona pin bicheito jumekowünta.

Meje yábara poxona Esteban wáetabatsi

⁸Esteban pexeiña petsita-itüütsi koyenewang exaneiba jíwitha Nakom pía peayapusüü itorobi koyenéwatha tatsi. Tsipéi Nakom yantapópona bapong daxota Esteban Nakom yawenéibatsi pekatsixaetsi peayapusüüwa. ⁹Néxata nakaetuta pinmonae judiomona pía penakaetsibotha tatsi. Ichamonae wüngdútatsi xua jeichichi: “Pomona pepusorobabebíwichi poxona busikuitatayebébatsi”, yábara wüng jeichichi. Irü nanakaetutapona Cirene tomarapiwi, irü Alejandría tomarapiwi, irü Cilicia nakuapiwi irü Asia nakuapiwi. Daxita barapomona Esteban jumematsontsónobatsi. ¹⁰Íchitha Esteban xaniwaicha kueikueijeí éxanatsi Nakom pía Pejumopetünaxü tatsi. Daxota poxona Esteban paeba barapomona jopa itaküüpaetsi xua beta pejumenotsiwa. ¹¹Néxata barapomona po pin bicheito penakaetsimona ichamona nantsiyatsiya kátatsi parátixi petakamuxu itorobinexa tsainchi xua Esteban paeba. Barapomona pomona pemuxuitórobi jiwi namchi xua Esteban Moisés baraunchichi abe jei, yawa xua Nakom baraunchichi abe jei. ¹²Bárapo jumetha pemuxuitórobi jiwi daxita jiwi anáepana éxanatsi xua Esteban jumekanáerabatsi. Pítiri jíwino anáepana. Irü pomona jiwi pekuidubiwi Moisés pía peitorobi koyene tatsi barapomonaeno irü anáepana. Daxota bárapo penapatáe jiwi irü pomona jiwi pekuidubiwi Moisés pía peitorobi koyene tatsi barapomona Esteban yorobatéikatsi. Pentakaitorobi bicheito peitabaratha kapoinchi. ¹³Bárapo pentakaitorobi bicheito ekeicha waba pomona Esteban jumekuikanáerabatsi wábatsi. Barapomona pomona penaerabiwi Esteban yábara jeichichi:

—Bapong Esteban Nakom pin píabo tatsi baraunchichi abe jei. Barichi bapong Esteban Moisés pía peitorobi koyenewa tatsi baraunchichi abe jei. ¹⁴Pajumetang, xua Esteban paeba xua pinae Jesús Nazaret tomarapin paeba. Jesús pinae namchi, pinae jeye: ‘Bárapo bo Nakom pin píabo tantánaka exanaein’, pinae jei Jesús. Ekeicha Esteban namchi xua pinae Jesús paeba pinae jeye: ‘Tamrópata pítabang po petorobi koyenewa xua báyatha Moisés paka itoroba’, jei pinae bapong Jesús, jei barapomona pomona penaerabiwi.

¹⁵Pomona baxota ena pomona pentakaitorobi bicheito, barapomona Esteban nekoténatsi. Barapomona itabara tayena xua Esteban péitabara be matatsunpin itabara, xua bichokono wüünae.

Meje yábara poxona Esteban pentakaitorobi bicheito itabaratha piakoya paeba

7¹Néxata sacerdotemona pía pepa pentakaponaein tatsi bapong Esteban barai-chi, jeichi: “¿Bara xaiñéi xua barapomona kabarái?” jei sacerdotemona pía pepa pentakaponaein tatsi. ²Esteban jumenota, jeye: “Tamona pam pana neju-metaema. Wanakom wüünae nawita. Bapong Abraham tsita naitüütatsi poxona kaena báyatha áwiya Mesopotamia nákuatha pópona. Bapong Abraham waámo susatopin matha kopiya tsiwanaeya pópona Mesopotamia nákuatha poxona

Harán tómará bewarapiya. ³Nakom pinae Abraham baraichi: ‘Bárapo ira jiña ira kuenta wárapare. Jiñamonaeno kuenta wárapare. Icha ira bewarapíyama ichaxota po ira beya kakaponaeinchi’, jei pinae Nakom. ⁴Néxata pinae Abraham Caldea nakua wewarapiya. Harán tómará pinae bewarapiya. Poxonae pinae Abraham Harán tómaratha pópona pinae Abraham paxa tatúpatsi pong pewüng Taré. Bapoxonae Nakom, Abraham pinae itoróbatsi bárapo írathe po írathe pajinómpame ánoxuae. ⁵Barapoxonae pinae Abraham kataunxuae jopa katichi ira. Saya pinae takayábara wüünae tsimuxudútatsi. Nakom pinae Abraham barai-chi: ‘Jiña ira tsane, irü jiña jiwi penaitapataya náexana dubenaponeibiwi tsane pomonae jiña nemomo susato jiwi pía ira nexa tsanerü’, jei pinae Nakom. Íchitha pinae barapoxonae jopa xeinaeyo pexui. ⁶Báraxua Nakom pinae Abraham barai-chi: ‘Jiña nemomo susato jiwi icha nákuatha jinompaena. Be pomonae penanapaincha jinompaewi tsikotaeinchi xua be pókotsi jiwimonae icha nakua wérena peponaewi. Tanakuitinchi ichamonae xua amanaya tanakuichina. Busikuitatye-beibínchino. Kaitakueintínchino yawa. Cuatrocientos po wéiyobe tsane xua jiñamonaenae naitapataya átene exaneibinchi’, jei Nakom Abrahamtha. ⁷Ekeicha Nakom tsipaeba Abraham, jeye: ‘Barapomonae xua abe pákata exanaena poxonae paka busikuitataibina barapomonae jopa kuijüntemainaein tsane. Barapomonae itawetsiya péraxa jübin. Bapoxonae jiña nemómoxi susato jiwi warapaena po nákuathe ichaxota úngkuame yawa wüünae nejainchina xote’, jei pinae Nakom Abrahamtha. ⁸Nakom pinae Abraham itoróbatsi xua peexanaenexa pokoyene xua pexui pebinwüütixi pewithabíwatsi xua ichaxota nareixakaena. Bárapo koyene éxana Abraham nenantaxeinaenexa irü piamonae tatsi xua pokoyene báyatha Nakom pinae yábara tsiwüünae muxuduta, xua bepa pinae yaweneibina xua barapomonae pinae bepa yaweneibinchi. Daxota pinae poxonae Abraham pexanto tanakatsíwatsi pexanto withaba, pinae pewüng Isaac. Isaac irü pinae barichi pexanto withaba, pinae pewüng Jacob. Jacob irü pinae barichi withaba pexanto jiwi, pomonae báyatha Israel nakuamonaepiwi pía pentakaponaewi tanaexánatsi bárapo doce póyobe.

⁹”Jacob pía pexanto jiwi tatsi, bárapo doce póyobe, waámo susatomonae. Bárapo doce póyobe jíwana kaein pewüng José. José péntapin jiwi úwatsi. Daxota José péntapin jiwi kaenáetatsi. Pomonae bapong José komotatsi barapomonae José Egipto nakua bekayíyatsi. Pong be jiwi pebusikuitaetaebinchi be bapókotsin petsikotaenexa tsainchi. Íchitha Nakom José yawénatsi pebarü poponaexaetsi. ¹⁰Poxonae José abe jumebaraunchaibichi ichamonae, yawa poxonae muxu átene peexaneibichi áwiya José kapanepéibatsi Nakom. Poxonae faraón peitabaratha tapónatsi José, Nakom éxana xua José faraón tsita jüntükoyene wüünaetsi. Matáütano Nakom peyaputaen éxanano. Bapong faraón Egipto nakuamonaenae pía pepa peewatsinchi tatsi. Faraón kana éxana xua José Egipto nakuapiwi yanakua éwatsi faraón nexa. Matáütano faraón kana éxana xua José kanamataxeina daxita xua xuang faraón xeina.

¹¹”Barapoxonae Egipto nákuatha jainbo nakua tsurukuaeno, Canaán nakua-thano irü. Pata amo susato jiwi jopa pexaewa taeyo. Yawa piyain pewérapae nakua tsúrukuae poxoru pexaewa aibi. ¹²Poxonae Jacob jumetane xua trigoxú xeina Egipto nákuatha, pía pexui bara beitorobiya. Barapong Jacob pía pexui tatsi, pata amo susato jiwi. Báraxua poxonae xua kopiya aena pona Egipto nákuatha. ¹³Poxonae ekeicha pona José péntapin jiwi tsita naitapeiña xeina xua bapong

bara peweicho jiwi tatsi. Bapoxonae faraón yaputane xua barapomonae ápara bara José piamonae tatsi. ¹⁴Pírapae José péntapin jiwi itoroba xua petabarü dendenaenéxatsi paxa tatsi, pong pewüng Jacob, matáütano piamonae tatsi petabarü dendenaenéxatsi po jiwimonaexae xua setenta y cinco póyobe. ¹⁵Daxota Jacob irü pijimonaeno Egipto nakua beya wárapa. Baxota pírapae bapong tüpa. Irü pírapae pata amo susato jíwino wéraparü baxota. ¹⁶Pirapaeno Jacob piwang kapoinchi Siquem tómara beya. Baxota piwang müthütha xotsi, po ira báyatha Abraham kómota, po ira Hamor pexántixi tatsi kaenaeta.

¹⁷”Aiña wei tsuxubi. Poxonae barapomonae Egipto nakua wewarapiyáenaba, be pókotsi koyeneya báyatha Nakom yábara tsiwüünae muxuduta, bapoxonae Israel nakuapiwi pinmonae náexana. ¹⁸Néxata Egipto nákuatha ichüng nakua peewatsin náexana, pong José jopa yaputaetsi. ¹⁹Bárapo Egipto nakuapiwi itorobiya pía pepa peewatsinchi tatsi pata amo susato jiwi muxuitorobéibatsi. Yawa kuaintéibatsino. Yawa kobe-itorobeibatsino xua pexui saya pebebainexa tsaibi tsane aishó-watha xua pewerapeibinexa. ²⁰Barapoxonae irü Moisés nakatsíwarü. Moisés paxa pía botha wíchatatsi akoibi po xometíyobe. Barapong Moisés pexeñang nawita Nakom tsita jüntükoyene wüünaetsi bárapo pexuyo. ²¹Poxonae Moisés pena xotsi yawa paxa xotsi namicha jeriyotha yanabotétatsi ménetha xua musuripawa küba, barapoxonae faraón pexantiyo tatsi Moisés pítatsi. Be pexanto tsikotane, pía botha wíchata. ²²Bapong Moisés nakuiduba nawita pokotsiwa Egipto nakuamonae yaputane. Daxota peyaputaein tsekaeno, wüünae peexanaein tsekaeno.

²³”Pírapae poxonae Moisés yakuarenta po weibe jopa, bapong nantaxeina xua piamonae pesiwaponaewa pomonae Israel nakuamonaexae. ²⁴Poxonae Moisés piamonae siwaponae, bapong tane xua piamonae jíwana tatsi tabütsi, Egipto nakua-pin. Daxota Moisés yawena pong piamonae jíwanaxae tatsi yawa bexuba Egipto nakuapin. ²⁵Moisés nantaxeina, piakoutha nabarái: ‘Tamonae, Israel nakuamonae-piwi neyaputaena xua Nakom neitoroba. Matakawarapaein barapomonae Egipto nakua weya, penakapanenebiyaenexa tsane’, najéi. Íchitha daümetha barapomonae jopa tsakeinaeyo. ²⁶Icha matakábitha Moisés tane xua kaepinbe irü nábabe Israel nakuamonaepinbe. Moisés barái bapongbe: ‘Já, ¿eta xua metha kaepinbe pana nabamebe?’ jei. ²⁷Pong piamonae ba, Moisés napunatorobapoinchi. Moisés baraichi: ‘¿Jintam kaitoroba pataxantha xua pong be jiwi neyábara paebin penatsikuentsiwa xua abe peexanaexae, xuano xua jiwi Nekanamataxeinaem naexá-name? ²⁸¿Jiña nebexuichi icha mexuae ichim Egipto nakuapin?’ jeichichi Moisés. ²⁹Poxonae Moisés jumetaebiriwa baxua, Moisés naetsirikua Madián nakua benaetsirikuiya. Baxota Moisés tanakatsíwatsi pexúyobe, pebinwúütobe”, jei Esteban.

³⁰Ekeicha kame Esteban barapomonae barü kueikueijeí. Namchi, jeye: “Kaentakabi pírapae poxonae cuarenta po weibe pukaewa, xua poxonae ekeicha icha cuarenta po weibe xeina, Moisés pópona ichaxota ira xuépana susato tsúrukuae nákuatha. Imoxoyo demuxuwang, po demuxuwang pewüng Sinaí baraxota Moisés tsita naitüütatsi matatsunpin xua poxonae ishótotha unguua xua taxungkua tsika naeyo. ³¹Moisés yábara najüntükoyene kabenaeka. Bapong ítata poiña tspíei ichipa yáitane. Bapoxonae baxota Moisés jumetane xua Nakom namchi: ³²‘Ápara jiña amo susato jiwi pía Nakom tatsin. Irü ápara, Abraham pía Nakom tatsin. Írürü ápara Isaac pía Nakom tatsin. Ápara irü Jacob pía Nakom tatsin’, jei Nakom. Moisés pijunuwi bichokono jiyijiyéi daxota aichaxaibi xua tane. ³³Nakom pinae

Moisés baraichi: ‘Xua nataxuxátatame nataxuwejonde, poxoru po íratha póname ápara tairiyo. ³⁴Tamonae, pomonae Egipto nákuatha jinompa bichokono átene exanéibatsi yawa jumetangno xua nanénaba. Daxota barapomonae kapanepang. Antha, kaitoróbatsi ekeicha nekoyo beya, Egipto nakua beya’, jei pinae Nakom”, jei Esteban.

³⁵Ekeicha Esteban namchi, jeye: “Pomonae Egipto nákuatha jinompa, barapomonae Moisés aichaxaibichi. Barapomonae Moisés baraichi: ‘¿Jintam kaitoroba pataxantha xua naexáname pong be jiwi neyábara paebin xua penatsikuentsiwa xua abe peexanaexae xuano xua naexáname pong be nekanamata-xeinaein?’ jei barapomonae. Bekein barapomonae baxua paeba íchitha Nakom kana éxana xua bapong Moisés náexana be pong jiwi peyábara paebin xua penatsikuentsiwa xua abe peexanaexae. Matáütano Moisés kana éxanatsi pong pekapanepaein piamonae. Baxua Moisés náexana poxonae matatsunpin itoroba po matatsunpin Moisés tsita naitúütatsi poxonae ishótotha unguua xua taxungkuua tsika naeyo. ³⁶Bapong Moisés pong waámo susato jiwi kapanépatzi Egipto nakua weya. Moisés petsita-itúütsi koyenewang éxana Nakom pía peayapusúüwatha. Baxua éxana Egipto nákuatha, Mar Rojo ménethano. Matáütano éxanano ichaxota ira xuépana susato tsúrukuae nákuatha cuarenta po weibetha. ³⁷Moisés Israel nakuamonae jíwitha namchi: ‘Nakom paka jíwana kana exanaena pong pía peitorobi jume peta-paebinchi icha neichi barichi tsane. Bapong xua pong Nakom itorobina, ápara pong painámonae jíwana tsane’, jei Moisés. ³⁸Matáütano ápara bapong Moisés pong nanakaetuta poxonae Israel nakuamonae nakaetuta ichaxota ira xuépana susato tsúrukuae nákuatha. Matáütano bapong Moisés diwesi tsipaeba jíwitha xua petsipaebixaetsi matatsunpin poxonae tsipáebatsi demuxúwatha po demuxuwa pewüng Sinaí. Bárapo diwesi po diwesi Moisés waámo susato jiwi tsipáebatsi bárapo diwesi jiwi kana éxanatsi xua peajüntüyapusüüwa pexeinaewa. Bárapo diwesi irü waxainchi néxarü.

³⁹Íchitha barapomonae waámo susato jiwi jopa be jumejejeyo xua peexanaewa pokotsiwa Moisés itoróbatsi Nakom. Moisés jumematawéntatsi. Saya barapomonae ichipa xua ekeicha kaibeya penawibiwa Egipto nakua beya. ⁴⁰Poxonae kataunxuae Moisés demuxúwatha pona, barapoxonae barapomonae Moisés peweicho tatsi pong pewüng Aarón, bapong baraichi: ‘Painta éxande aiña ibo nain nakomüng. Bárapo ibo nain nakomüng naka tsíwana kopiya kajjinkaena námtotha. Jopa payaputaieño xua Moisés aicháwiya pong pana matakápona Egipto nakua weya’, jeichichi Aarón. ⁴¹Barapoxonae barapomonae penain Nakom éxana be vacayo pebtiyó kanaxóbeta. Bapoxonae barapomonae tabexuba oveja, penain Nakom vacayo nexa. Tsipéi barapomonae nantaxeina xua metha penain Nakom ichichipa baxua. Barapomonae bichokono jüntükoyene weiweina penain Nakom piakoya peexanaexae, xua pin penabanaewa xua pebarü iturajinaenéxatsi bárapo ibo nakom. ⁴²Barapomonae Nakom wepu tsatajopa tsipéi barapomonae pía penain Nakom éxana. Nakom bara kópata barapomonae xua bara barapomonae bara exanaena be pókotsi koyeneya xua ichichipa peexanaewa. Daxota barapomonae opitéi be Nakom kana éxana, po opitéi barapomonae wüünae jainta. Barapomonae pomonae waámo susatomonae, éxana pokotsiwa kaena báyatha Nakom pía peitorobi jume pepaebin yábara kuitsiwüünae muxudutsiya tina. Bapong diwesi tina xua Nakom jume yábara tínatsi xua Nakom namchi bárapo diwésitha, jeye:

‘Israel nakuamonae, paxam oveja pabexúbame paiña penain nakomüng nexa, íchitha xang nexa jopa paraichim.

Báraxua paéxaname poxonae pajinómpame ichaxota ira xuépana susato tsúrukuae nákuatha xua cuarenta po weibetha.

⁴³Yawa pakáponame penain boutiyo Nakom po penain boutiyo Nakom pewüng Molok.

Yawa pakáponame icha penain opitéi Nakom po opitéi penain Nakom pewüng Refán.

Bárapo penain nakombe paéxaname paiña wüünae jaintichi.

Daxota xang itorobin ichüng xua paka matakawarapaena Babilonia nakua beya.

Bekein jopa bepawarapaem íchitha áwiya paka itorobinchi’,
jei Nakom.

⁴⁴‘Waámo susato jiwi éxana xua be bo xua anseraboko, xua ichaxota tútutha jeba ibo xua po ibótong Moisés matatina xua Nakom pejumekaitorobiwang. Barapomonae kuita ákaba be pókotsi boyo Moisés tsita itüütatsi Nakom. ⁴⁵Waámo susato jiwi poxonae tawerapatsi paxa tatsi, itoreinpita bárapo boyo xua anseraboko boyo. Pata tamo jiwi Nakom pía boyo kápona poxonae Josué nápona. Poxonae pata tamo jiwi aiña nákuang nonota tsíniya barapoxonae ekeicha bárapo anseraboko boyo kápona beya yakobekuí matakabi óthopa poxonae David pópona pong Israel nakuapiwi itorobiya pía pepa peewatsinchi. ⁴⁶Bapong David pong Israel nakuapiwi itorobiya pía pepa peewatsinchi tatsi, Nakom tsita pejüntükoyene wüünaeinchi. Bapong David ichichipa xua ákaba pin bo Nakom nexa po Nakom Jacob pía Nakom tatsi. ⁴⁷Íchitha Salomón bapong ápara pong Nakom pin píabo éxana. ⁴⁸Bekein Nakom pong pepa Nakom jopa poponaeyo botha pókotsi bo jiwi ákaba Nakom nexa. Nakom peitorobi jume pepaebin baxua yábara paeba xua Nakom tapáebatsi, jeye:

⁴⁹‘Peitaboko ápara ichaxota taekeibithopeibiwa.

Ira ápara ichaxota nataxuyüütatobang.

¿Eta pókotsi bo netsi exanáename?’

jei pong Wanaka namataxeinaein.

Matáütano jeino:

‘Ichakuitha ¿eta po írara xua ichaxota nafifinakaekaein?’

⁵⁰Ápara xang takoutha éxanang daxita ira yawa peitaboko daxota jopa

nantawenonaeiño xua ichawa tana netsi exanaewam’,

jei Nakom”, jei Esteban.

⁵¹Ekeicha Esteban barái, jeye: “Maisha bichokono pajüntükoyene dangwam xua jopa bepayaputaem. Matáütano pamuxututu dangwam, yáwano pajüntükoyene dangwam icha be pokotsimonae ichi pomonae jopa peyaputaewi Nakom. Barichi pa-aichaxaibim Nakom pía Pejumopetünaxü tatsi. Paxam bara paichim icha paiña amo susato jiwi ichi. ⁵²Ápara paiña amo susato jiwi báyatha Nakom pía peitorobi jume pepaebiwi katsajume barü páebatsi, yawa kueintatsino. Matáütano báyatha jutébatsi barapomonae pomonae Nakom pía peitorobi jume pepaebiwi, pomonae namchi: ‘Bexa patopaena pong pepa pejüntüwüünaein pong Mesías baraichi’, jei. Kain paxam, barapong poxonae patopa, pakaenátame, pabexúbameno. ⁵³Nakom pía peitorobi diwesi pajumetáneme xua matatsunpiwi paka tsipaeba Nakom nexa.

Íchitha jopa paexanaem pokotsiwa Nakom paka itoroba bárapo pía peitorobi diwé-sitha”, jei Esteban pentakaitorobi bichéitotha.

Meje yábara poxonae Esteban tüpa

⁵⁴Poxonae pentakaitorobi bicheito jumetane pokotsiwa Esteban paeba, bapoxonae bichokono Esteban yábara kui-anaepanarükúpati. ⁵⁵Íchitha Esteban bichokono jüntükoyene yüüka kana exainchi Nakom pía Pejumopetünaxü tatsi pía peayapusúüwatha. Esteban athabeicha nekoicha. Bapong nekota Nakom pía peitüpanáe koicha tatsi irü Jesucristo xua unguwa Nakom pekoxatha tatsi. ⁵⁶Néxata Esteban namchi, jeye:

—Ínkane pataema. Nekotang xua peitaboko naitaboko koiboyausaranaxuba. Tang Jesús xua unguwa Nakom pekoxa weya tatsi pongxae Nakom pía Peitapetsin tatsi, jei Esteban.

⁵⁷Barapomonaе jume itapataya namuxu ákaba pokotsiwa Esteban paeba. Yawa anaepanaya wawái. Barapomonaе be kae bicheito náexana pomonaе Esteban beta-kuinaeyíyatsi. ⁵⁸Barapomonaе Esteban aishowa bexóyatsi tómará weya. Yawa baraxota ibótongtha kuinbábatsi. Pomonaе abe peexanáewichi Esteban, barapomonaе Saulo kamisha jumajeba xua pokotsiwang naiña werubiya. Bapong Saulo pong pewowin xua báyatha piño.

⁵⁹Poxonaе barapomonaе Esteban kuinbabómpatsi ibótongtha bapoxonaе Esteban tsipaeba Nakomtha, jeye: “Jesús, pong Tanekanamataxeinaem, nejumopetünaxü pire”, jei Esteban. ⁶⁰Bapoxonaе pentabokototha unguwa. Namtsébiya wawaino, jeye: “¡Jesús, Tanekanamataxeinaem! ¡Nekanakuí jüntemáinare, yawa jopa neyantomatsinde xua barapomonaе inta abe éxana!” jei Esteban.

Poxonaе najumewétaba, tüpanaicha Esteban.

8 ¹Saulo irü barü itakuiwüünaetsi poxonaе ichamonaе Esteban bexotsi.

Meje yábara poxonae Saulo abe éxana pomonaetha, pomonaе Jesús pejumekowüntsiwi

Po matakábitha Esteban bexotsi, bárapo matakábitha judiomonaе tamrópata notarüküpa xua Jesús pejumekowüntsiwi tatsi bichokono abe éxanatsi Jerusalén tómaratha. Daxita Jesús pejumekowüntsiwi tatsi yótabatsi. Ichamonaе Judea nakua berüküpiya, ichamonaе Samaria nakua berüküpiya. Meisha Jesús pía peitorobi jiwí tatsi pomonaе xua doce póyobe ena Jerusalén tómaratha. Jopa düküpaeyo. ²Ichamonaе, pomonaе Nakom pejumekowüntsiwichi, Esteban müthütha xotsi. Barapomonaе Esteban bichokono siwawekoyeichi. ³Saulo jeita dukuaeta Jesucristo pía pejumekowüntsiwi tatsi. Daxita bomüxüng jüpaya Saulo jiwí teteika tsíniya yabüxino, pebíwino. Jiwi pekübibó beya kaponeiba.

Meje yábara poxonae Jesús pejumekowüntsiwi tatsi paeba dubenanáebiya Jesús pía pexeíña jume diwesi tatsi Samaria nákuatha

⁴Pomonaе bewa Jerusalén tómará werüküpiyaena barapomonaе Jesucristo pía pekapanepáe jume diwesi paeba dubenanáebiya daxita po tómarangtha xua pateiba. ⁵Barapomonaе jíwana tatsi pong Felipe baraichi bapong pona pepa tómaratha Samaria nákuatha. Bárapo tómaratha tamrópata pítaba xua pekueikuejjeiwa Cristo yábara. ⁶Jiwí nakaetuta dubenanáebiya. Matáütano jumenaitomatsiya jumetéa

dubenanáebiya pokotsiwa Felipe kueikueijeji Cristo yábara. Matáütano barapomonaе taerubenanáebiya pexeña petsita-itüütsi koyenewang xua Felipe éxana Nakom pía peayapusüü itorobi koyenéwatha. ⁷Pomonaе xua kauri pexeinaewi, barapomonaе ekeicha axaibi éxanatsi poxonae Felipe taitaweta kauri. Matáütano kaurimonaе barapomonaе wawaya wepu düküpéibatsi. Ichamonaе pomonaе pekuenobichi jiwi, pejayujayujeimonaeno, daxita barapomonaе axaibi éxanatsi. ⁸Felipe baxua peexanaexae daxota bárapo tomarapiwi bichokono jüntükoyene weiweinaya jinompa.

⁹Bárapo Samaria tómaratha pópona pong pentawüing Simón. Bapong Simón mara pexeinaein. Matáütano bapong bárapo Samaria tomarapiwi muxujaiñabéibatsi poxonae bapong piakoya pentakaponaein náexana. ¹⁰Daxita tomarapiwi pomonaе peakopeibiwi irü pomonaе nawita pexeinaewino, barapomonaе beta jumenaitáewata pokotsiwa Simón paeba. Barapomonaе namchi, jeye: “Barapong Simón ápara pong yábara jeichichi: ‘Pong bichokono Nakom pía peayapusüüwa tatsi xeina’, yábara jeichi”, jei barapomonaе.

¹¹Daxita bárapo tomarapiwi itapeta jumenaitáewata pokotsiwa Simón paeba, tsipéi saya kaena báyatha barapomonaе muxujáñabatsi mara peexanaewi pía koyenýatha tatsi. ¹²Barapomonaе jumekowünta po pexaiña jume diwesi Felipe kueikueijeji xua Nakom yawa Jesucristo yábara, po diwesi xua Nakom waba jiwi petanaexanaenéxatsi pijimonaе tatsi jíwana pomonaе Nakom itorobiya éwata. Bapoxonaе barapomonaе bautisábatsi pebiwi yawa yabüxino. ¹³Bapoxonaе bapong Simón irü jumekowünta. Írúno bapong bautisábatsi. Matáütano bapong tamrópata pítaba xua Felipe peyantíwatsi. Bapong Simón yábara najüntükoyene kabenaeka bichokono poxonae Felipe pexeña petsita-itüütsi koyenewang éxana Nakom pía peayapusüüwatha.

¹⁴Jesucristo pía peitorobi jiwi tatsi, pomonaе peenaexae Jerusalén tómaratha, jumetane xua Samaria nakuamonaе jumekowünta Nakom Pejume Diwesi. Daxota barapomonaе Pedro itoróbatsi irü Juan itoróbatsi, Samaria nakuamonaе beya. ¹⁵Poxonaе Juan Pédrobe patópabe barapomonaetha, bapoxonaе Nakomtha tawüükabe Samaria nakuapiwi nexa, pomonaе pejumekowüntsixaе Nakom. Bapongbe ichichípabe xua barapomonaе peyánaba jinompaenéxatsi Nakom pía Pejumopetünaxü tatsi. ¹⁶Pedro irü Juan tawüükabe barapomonaе Nakomtha. Tsi-péi barapomonaе áwiya kataunxuae jopa tapatichi pía jüntükoyeneintha Nakom pía Pejumopetünaxü tatsi. Saya meisha poxoru bautisábatsi Jesús pong Pekanamataxeinaein jiwi bapong pewüingtha tatsi. ¹⁷Pedro irü Juan, pekóbeta matajáyababe barapomonaе. Barapoxonaе barapomonaе tapátatsi pía jüntükoyeneintha tatsi Nakom pía Pejumopetünaxü tatsi.

¹⁸Poxonaе Simón kuitane xua Pedro Juanno pekóbeta matajáyababe xua daxota Nakom pía Pejumopetünaxü tatsi tapátatsi barapomonaе, Simón ichichipa xua pekatsiwa parátixi bapongbetha. ¹⁹Simón namchi, jeye:

—Dapo peayapusüüwa nekare. Tha irü poxonae matajayabeibang ichamonaе tapateibinchi Nakom pía Pejumopetünaxü tatsi, jei Simón.

²⁰Néxata Pedro Simón baraichi, jeye:

—Bárabü xam yawa jíña paratixino kayawa múxuna werawéraka exanaena, tsipéi saya nantaxéiname xua nekaitaküüpaewa xua Nakom pía peayapusüüwa tatsi nekomotsiwa paratixitha, po peayapusüüwa bekein Nakom amanaya pekatsiwa jíwitha. ²¹Jopa kaitaküüpaeyo xua nexainaewa Nakom pía peayapusüüwa tatsi, tsipéi ápara Nakom kajüntükoyene yaputane xua neajüntükoyenebewa.

²²Nakuibaraxore jiña abe neexanáe kuirukoyenein. Nakom wúükare, xain Nakom kayábara jüntemaina xua nantaxéiname baxua. ²³Katainchi xua pejume uwiwa nenthútotha xéiname. Xam neabewa kanthüthü yangkababa daxota beta jopa xapain poponaem, abe nantaxéiname jinkoutha, jei Pedro.

²⁴Néxata Simón jumenota. Pedro irü Juan jumenótatsibe, jeye:

—Painta yábara wüükarebe Nakomtha baxua xuaunxuae pana netsipaebamebe, xain bapoxonae xeinaein bárapo koyene xua jopa abe tana nekana exanaenexa, jei Simón.

²⁵Bapoxonae Pedro Juanno ichamonaetha nakuiyopítabe pokoyene xua báyatha jumekowúntabe Nakom. Yawa xua penthútotha ta-ekátsibe Nakom pía Pejumope-tünaxü tatsi. Bapongbe Nakom pía pexaiña jume diwesi tsipáebabe barapomonaetha. Jerusalén tómará bewarapíyabe. Poxonae wárapabe, Jesús pía pexaiña jume diwesi papaebe tsíníyabe Samaria nákuatha. Aiña tómarangtha kueikueijeibe.

Meje yábara xua poxonae Felipe írürü Etiopia nakuapin nantentaponabe námtotha

²⁶Barapoxonae pírapae, Jesucristo pong Pekanamataxeinaein jiwi, bapong pía matatsunpin tatsi, Felipe tsita naitüütsiya tsipáebatsi, jeichichi: “Nontaponde, yawa ponde pokotsiwa párowa béreka. Jerusalén namto iyande xua po namto Gaza tómará betaerukuiya”, jei matatsunpin. Bárapo namto dukuiya ichaxoyo ira xuépana susato tsúrukuae nakua iya. ²⁷Felipe nantakotaxuba, bapoxonae bara pónataba. Poxonae Felipe námtotha ekapona, bapoxonae kaxina pebin Etiopia nakuapin. Barapong pong pentakaponaein pong peaiñakuí jintong. Matáütano bapong parátixi tayapu-eéna xua yábüyo nexa powa Etiopia nakua pepa peewatsíwayo. Bapong Etiopia nakuapin báyatha pona Jerusalén tómará beya xua wüünae pejainchinexa Nakom. ²⁸Bapong kaewa pía nakua siwaponaena ekapona Etiopia nakua. Kawayu pekaponaenáeyotha ekapona yawa yorobékapona po diwesi báyatha Isaías tina, pong Nakom peitorobi jume pepaebin.

²⁹Nakom pía Pejumopetünaxü tatsi Felipe baraichi, jeye: “Imoxoyo ponde kawayu pekaponaenaeyo beya yawa imoxoyo kakuita na-ekaponde”, jeichichi Felipe. ³⁰Felipe kuináepona kawayu pekaponaenaeyo beya, ichaxota jumetane xua yóroba Etiopia nakuapin. Bapong yóroba Nakom Pejume Diwesi, xua po diwesi báyatha Isaías tina. Felipe barái bapongtha jeye:

—¿Bara yaputáneme xuaunxuae yórobame? jei.

³¹Bapong Felipe jumenótatsi, jeye:

—¿Eta bichin xua tayaputaewa icha dapong aibi pong yábara neyaputane éxana bárapo diwesi? jeichi Felipe.

Felipe wábatsi xua penontabinaenexa xuano xua peekaenexa ichaxota bapong eka. ³²Po diwesi ichaxota bapong yóroba xua baxue meje:

“Be poxonae jiwi oveja yamüükápona pebexubinexa tsane,

barichi tsane jiwi kaponaena jintong pebexubinexa tsane.

Be cordero moya, jopa papayo poxonae na thábatsi barichi tsane jintong moya tsane,

jopa papái tsane poxonae kaitakueintinchi poxonae yawa aperüütane tsáneno.

³³Jintong ura exanaeinchi.

Jiwi ura exanaena.

Jopa beta yábara exanáe tsainchi poxonae jintong átene tsane poxonae jopa bekein abe exanaeyo.

Jiwi jopa yábara paebí tsane xua pía pexui tatsi, poxoru jopa nantáutsi tsane pexui, pemomoxino.

Jiwi bárapo jintong bexubinchi”,

jei Nakom Pejume Diwesi,

po diwesi Isaías tina xua ichaxota yóroba Etiopia nakuapin.

³⁴Néxata Felipe yáinábatsi Etiopia nakuapin, jeichichi:

—Ínkane netsipáebare, ¿jintam Isaías yábara jei? ¿Piakoutha nayábara jei jampa? ¿Bara metha ichüing yábara jeichi? jeichichi Felipe Etiopia nakuapin.

³⁵Felipe yaputane éxana Etiopia nakuapin po diwesi xua Isaías tina Jesús jume yábara. Bapoxonae nama paeba pokoyene Jesús pía pexaiña jume diwesi tatsi.

³⁶Poxonae Felipe Etiopia nakuapinno námtotha ekapónabe, bapoxonae Etiopia nakuapin namchi, jeye:

—Taema méniyo ekejebá. ¿Jopa nebautisabim tsane? jeichichi Felipe.

³⁷Felipe barái, jeye:

—Icha daxita karepaya jumekowüntame nejüntükoyénetha, methaunxuae bara kabautisabinchi, jei Felipe.

Etiopia nakuapin Felipe jumenótatsi, jeye:

—Bara yábara jumekowüntang xua Jesucristo, bara Nakom pexanto tatsi, jei bapong.

³⁸Néxata Etiopia nakuapin kobe-itoroba xua duntabina pong xua kawayu pekomaekaein. Néxata dunéikabe Felipe Etiopia nakuapinno. Méniyo bejonékabe. Néxata Felipe meníyotha bautisaba Etiopia nakuapin. ³⁹Poxonae méniyo wejuínabe, Nakom pía Pejumopetünaxü tatsi Felipe puxánatsi. Felipe ekeicha jopa taetsi Etiopia nakuapin. Saya ekeicha Etiopia nakuapin jüntema pona pía nakua beya. ⁴⁰Felipe taerüküpatsi ichamonae Azoto tómaratha. Felipe daxita tómarang tamropatékaponna xua pekueikueijejwa Jesucristo pía pexaiña jume diwesi tatsi, beya yakuijopa Cesarea tómaratha.

Meje yábara poxonae Saulo jumekowünta Jesús

(Hch 22.6-16; 26.12-18)

9¹Áwiya kame Saulo ichipa daxita pejutebiwa pomonae Jesucristo pejumekowüntsiwi tatsi, pong Jesús Pekanamataxeinaein jiwi. Daxota Saulo siwapona sacerdotemona pía pepa pentakaponaein tatsi. ²Saulo wüüka: “Nekare cartang judiomona pía penakaetutsibong pía pentakaponaewi nexa. Tha takaponaetsi Damasco tómarara beya. Icha kaxinaein pomonae Jesús pejumekowüntsiwi tha jiwi pekübibotha kaponaeetsi Jerusalén tómaratha, pebíwino, yabüxino”, jei Saulo. ³Saulo Damasco tómarara beya pona. Poxonae bara muxu pepatopáe, bapoxonae pin koicha yakaincha matawakaicha matatsún unguatabíkatsi. Bárapo koicha peitaboko wejopeika. ⁴Néxata íratha jopa Saulo. Yawa jumetáneno xua pejume xua baráichichi, jeichichi: “Saulo, Saulo, ¿eta xua metha tamona inta abe éxaname?” jei pejume.

⁵Saulo jumenota, jeye: “Pong jiwi Pekanamataxeinaem, ¿jintamümda?” jei Saulo. Saulo ü pejume jumenótatsi, jeye: “Ápara bara xang Jesús, pongxaein inta abe kana éxaname tamona. ⁶Nontaponde, tómarara beíyande. Baraxotiya katsipae-bina pokotsiwa bewa exanáename”, jeichichi Saulo.

⁷Pebiwi, pomonae Saulo punapoinchi bichokono pijunuwi moya umena tsipéi saya ü pejume jumetane íchitha pepong jopa xapain taeyo. ⁸Saulo nantakotaxuba asiya unguua. Poxonae nekotaxuba jopa xapain taeyo. Daxota pomonae Saulo punapoinchi kobekapoinchi Damasco tómará beya. ⁹Baraxota Damasco tómaratha Saulo eka akoibi po matakábibe. Jopa xapain nekotsiyo. Bárápo akoibi po matakabibetha jopa nabanaeyo, jopa apáeyono.

¹⁰Baxota Damasco tómaratha pópona pong pejumekowüntsín Jesucristo. Bapong pewüing Ananíás. Ananíás tsita naitapeiña xéinatsi Jesús poxonae kamaita. Ananíás tsipáebatsi Jesús jeichichi: “¡Ananíás!” jeichi. Ananíás jumenota, jeye: “Jai, ápara xote ékangje, pong jiwi Pekanamataxeinaem”, jei.

¹¹Néxata Jesús Ananíás baraichi: “Nontaponde. Namto beya ponde, po namto pewüing Bopiya perukuiyae namto. Poxonae Judas pía botha patópame, yáíña-bare bárápo botha. ‘¿Ínkane Saulo, Tarso tomaramonaepin?’ jande. Iráunxuaerü Saulo Nakom tsipaebauya. ¹²Saulo amachinae xua kakamaita, xua Ananíam xua itakuere wüünaetsínname Saulo nekobetha”, jei Jesús.

¹³Néxata Ananíás jumenota, jeye: “Pong jiwi Pekanamataxeinaem, pinmonae netsipaeba xua pinae bapong kata abe éxanatsi jiña jiwimonae, pomonae Jerusalén tómaratha jinompa. ¹⁴Bapong carta kapatopa xote, po carta báyatha sacerdotemonaepía pentakaponaewi kaitoroba. Saulo carta kapatopa poxoru sacerdotemonaepía jumejéi xua Saulo pinae bara kaponaena jiwi pekübibó beya pomonae kawüing ununeiba poxonae Nakom tsipaebéibatsi”, jei Ananíás.

¹⁵Jesús Ananíás baraichi, jeichichi: “Ponde tsipéi yáitama bapong báyatha Saulo itapetang. Bapong Saulo tsipaebina tajume diwesi icha nákuangtha, po nákuangtha jinompa pomonae jopa judiomonaepía naexanaeyo. Matáütano tsipaebina pomonaetha, pomonae jiwi itorobiya pía pepa peewatsíwichi. Matáütano tsipaebina bárápo tajume diwesi israelmonaetha. ¹⁶Tha bexa Saulo tsita itüütichi pokoyene xua bewa átene tsane tajume diwesi penatsipéi kueikueijeixae tsane”, jei Jesús.

¹⁷Néxata Ananíás pona ichaxota Saulo eka. Poxonae joniya botha, Saulo pekó-betha aiña kobéthabe matajáyabatsi. Ananíás namchi, jeye:

—Saulom, pong be táyapín katsikotainchi, nejumekowüntsixae Jesús. Bapong Jesús pong jiwi Pekanamataxeinaein neitoroba, pong námtotha katsita naitüüta xuano xua katsipáebano. Jesús neitoroba nenekotsinexa tsane yawa Nakom neka-jüntükoyene yüüka exanaenexa pía Pejumopetünáxütha, jei Ananíás xua Saulo tsipáebatsi.

¹⁸Barapoxonae kaena naiña peitakuerétotha be petsebokotong taothopéinatsi. Bapoxonae ekeicha kaewa wünaeya daxita karepaya tane. Saulo asiya unguua bapoxonae kaena bautisábatsi. ¹⁹Poxonae nábane bapoxonae kuithünei tsanaya. Be kaentakabíyobe Saulo eka Damasco tómaratha ichaxota ena pomonae pejumekowüntsiwi Jesucristo.

Meje yábara poxonae Saulo Jesús pejume diwesi paeba Damasco tómaratha

²⁰Kaena naiña Saulo pona judiomonaepía penakaetutsi bongtha tatsi. Tsipaeba barapomonaetha, jeye: “Barapong Jesús, ápara Nakom Pexanto tatsi”, jei. ²¹Daxita pomonae jumetayena barapomonaepía yábara najüntükoyene kabenaeka, nabarái, najéi:

—Bara barapongda, pong kain matha Jerusalén tómaratha patopa xua abe peexanaponaenéxatsi pomonae Jesucristo pewüng ununaewichi poxonae Nakom wüükéibatsi. Ápara bapong pong báyatha xote patope xua peteikaenéxatsi pomonae pejumekowüntsiwi xuano xua pekaponaeenéxatsi pomonaetha, pomonae sacerdotemonae pía pentakaponaewi xua Jerusalén tómara beya, najéi.

²²Íchitha bapong Saulo áwiya jumetsakatsakapiya kueikueijeji. Bapong tsita itapeiñaxeina xua Jesús ápara Mesías. Daxota barapomonae judiomonae moya umenarúkupa tsipéi yábara najüntükoyene kabenaeka pokotsiwa xua Saulo paeba.

Meje yábara poxonae Saulo panepa judiomonae pekuiyainwa

²³Poxonae aiña matakabin yapukaewa judiomonae kaemonae pebürüya nanta-xeina xua bepa bexubichei Saulo. ²⁴Saulo ichüing muxubaraichi: “Bepa kabexubei ichamonae”, jei. Saulo ewatumeinchi tómara koibótongtha pokoibotong xua tómara peyakainchatoxorotodutsiwa koibotong. Bárapo koibótongtha Saulo ewatumeinchi daxita matakabi, yawa merawino. ²⁵Íchitha Saulo mérawi panepa poxonae pijimonae pítatsi yawa yakote yorékatsi pepa tómara jumadeka xua tómara peyakainchatoxorotodutsiwa jumadeka.

Meje yábara poxonae Saulo Jerusalén tómaratha pópona

²⁶Poxonae Saulo Jerusalén tómaratha patopa bepa bekein barü nakaetutéi Jesús pejumekowüntsiwichi tatsi, íchitha barapomonae Saulo kunúwatsi tsipéi nanta-xeina xua Saulo jopa xapain Jesús pejumekowüntsiwichi jíwana tatsi. ²⁷Íchitha Bernabé Saulo kuaranótatsi Jesús pía peitorobi jiwi tatsi peitabaratha tatsi. Bernabé barapomonaetha namchi, jeye: “Pinae báyatha Saulo námtotha tsita naitúütatsi Jesús pong jiwi Pekanamataxeinaein. Matáütano pinae Saulo muxutsipáebatsi. Matáütano pinae tsipaeba Jesús pejume diwesi Damasco tómaratha xua pinae kuitsakatsakapiya kueikueijeji”, jei Bernabé. ²⁸Daxota Saulo napópona dukua-naeta Jerusalén tómaratha ichaxota Jesús pía peitorobi jiwi tatsi. Saulo Jerusalén tómaratha jumetsakatsakapiya kueikueijeji dukua-naeta Jesús pejume diwesi tatsi pong jiwi Pekanamataxeinaein. ²⁹Saulo yábara barü natsipaeba Jesús pejume diwesi, yawa barü najumematsontsónobatsi judiomonae, pomonae xua griego jume penatsipaebiwi. Barapomonae judiomonae, ichichipa xua Saulo pebexubíwatsi. ³⁰Pomonae irü Jesús pejumekowüntsiwi tatsi jumetane, xua bepa Saulo imoxoyo bexubichei judiomonae. Daxota Saulo Cesarea tómara bekayíyatsi. Baxota punaxubathópatsi. Ekeicha Saulo dabe pu-itorobíyatsi Tarso tómara beya.

³¹Daxita Jesús pejumekowüntsiwi tatsi jüntema jinompa Judea nákuatha, Galilea nakuatharü, Samaria nakuatharü, tsipéi jopa ichamonae abe exanaeyo barapomonaetha. Matáütano barapomonae mataropeichiya nakuidubapona xua pejumekowünta ponaewa Nakom. Matáütano exanapona pokotsiwa Nakom ichichipa. Nakom pía Pejumopetünaxü tatsi barapomonae yaweinchi pejüntükoyeintha tatsi. Pinmonae Jesús jumekokowüntapona.

Meje yábara poxonae Eneas axaibi éxanatsi

³²Poxonae Pedro siwapona dukua-naeteiba daxita tómarang Jesús pejumekowüntsiwi tatsi, bapoxonae yawa siwapónano pomonae Jesús pejumekowüntsiwi pomonae ena Lida tómaratha. ³³Baxota Pedro kaxina pong pekuenobinchi xua

saya cámatha boka. Báyatha kaena xeina baxua ocho po weibe. Bapong pewüing Eneas. ³⁴Pedro, Eneas baraichi:

—Eneas, Jesucristo kaaxaibi éxana. Asiya unguatábare. Jiña cama xaxaintaxore, jei Pedro.

Barapoxonae kaena yakuinaya nantakotaxuba Eneas. ³⁵Néxata Lida tomara-piwi, irü Sarón tomarapíwino, barapomonae Eneas tainchi xua ekeicha beta pona. Bapoxonae barapomonae nakuibarapenta xua kopiya jumekowünta pejumekowüntsinexa Jesucristo, pong jiwi Pekanamataxeinaein.

Meje yábara poxonae Dorcas ekeicha kaewa asüü éxanatsi poxonae tüpa

³⁶Írürü jame kaena báyatha Jope tómaratha pópona powa pejumekowüntsiwayo Jesús. Bapowa pewüing Tabita. Bárapo wüing seikaya griego jume wüing “Dorcas” baraichi. Barapowa pokotsiwa wüünae itapeta exaneiba nawita. Matáütano barapowa yaweneiba pomonaetha, pomonae peakopeibiwi. ³⁷Barapowa kaena naiña átene tsanaya. Kaena naiña tüpanaya. Daxita petüpaein matapaeta perüü ikíkatsi. Bapoxonae po tutu athabeicha baxota bóichatsi. ³⁸Jope tómara Lida tómara imoxoyo nakakuita ékabe. Baxota Pedro pópona Lida tómaratha. Baxota Jope tómaratha pomonae Jesús pejumekowüntsiwichi tatsi jumetane xua juiña Pedro Lida tómaratha pópona. Bapoxonae itoroba pebinbe nakuéyatabe xua bepa pinae tawabathopiyaetsi xua Pedro pewabathopiyaenéxatsi Lida tómara beya. Bapongbe namchibe. Pedro baraichi: “Kawaba pomonae Jesús pejumekowüntsiwichi tatsi. Bepa pinae anetha iyaem”, jeibe bapongbe.

³⁹Bara Pedro punapona bapongbetha. Poxonae Pedro patopa Jope tómaratha, barü jojoníyatsi Pedro, ichaxota po tütutha boka petüpaewa Dorcas. Daxita pekuenta werapaewaxichi piséurixi kakuita wekoyéi tsumenaetsi Pedro. Yawa barapówaxi Pedro tsita itüübatsi dorobürü, kamíshangno xua báyatha Dorcas taxüxüka poxonae kataunxuae abü pópona. ⁴⁰Pedro pesato beitaweya daxita barapomonae. Pedro imoxoyo kakuita eka pentabokototha. Nakomtha tsipaeba. Bapoxonae powa tüpungkua Pedro pexaiña benekoya, Pedro barái bapowa, jeye: —Tabita, asiya unguatábare, jei Pedro.

Bapoxonae powa tüpungkua nekotaxuba. Poxonae Pedro tainchi, bapoxonae nantakotekataba. ⁴¹Pedro Dorcas kobepítatsi. Asiya kuaranótatsi. Bapoxonae Pedro waba pomonae Jesús pía pejumekowüntsiwi tatsi, írürü powaxi pekuenta werapaewaxichi piséurixi. Barapomonae Pedro tsita itüüta xua ekeicha Dorcas asüü. ⁴²Jope tomarapiwi jumetaerüküpa xua ekeicha Dorcas petüpaewa nakosata. Bapowa ekeicha asüü pópona. Daxota pinmonae jumekowünta Jesús pong jiwi Pekanamataxeinaeinchi. ⁴³Jope tómaratha Pedro baxota pópona aiña matakabin. Pedro pópona Simón pía botha tatsi pong xua duwéi pebokowüünaeteibin.

Meje yábara Pedro irü Cornelio

10¹Írürü jame Cesarea tómaratha pebin warapaeya pópona. Bapong pewüing Cornelio. Cornelio, jame yatsikaya pía nakua tatsi Italia nakua. Bapong soldadomonae pía pentakaponaein tatsi. Írürü soldadomonae pía nakua tatsi Italia nakua. ²Cornelio piamonae barü jumekowünta Nakomtha. Matáütano Nakom wüünae jáintatsi. Barapong Cornelio matowa yaweneiba

judiomonae, pomonae peakopeibiwi. Bapong parátixi katsibeiba barapomonaetha. Bapong Cornelio tsipaebeiba Nakomtha. ³Icha matakeitha, Cornelio kiripitha amachinae.

Cornelio tane Nakom pía matatsunpin tatsi be poxonae kamaita. Matatsunpin patopaeya namchi, jeye: “¿Cornelio!” jei. ⁴Cornelio junuwiya kamaitiya tane matatsunpin. Cornelio jume epapita, jeye: “Pong jivi Pekanamataxeinaem, ¿eta xua jíñatsi?” jei Cornelio. Cornelio jumenótatsi matatsunpin jeye: “Báyatha Nakom kajumetane poxonae tsipáebame pexaiña beya. Kakuitáneno xua yawenéibame peakopeibiwi. Nakom kayábara nantaxeina. ⁵Cornelio, ichamonae Jope tómara beitorobíyama pewabinexa tsainchi pong aiña wüingbe pexinaein. Bapong Simón baraichi yawa Pedro baraichi. ⁶Barapong Simón Pedro eka icha Simón pía botha tatsi pong Simón seikaya pong duwein pebokowüinaeteibin. Barapong Simón marmene itapatha yabo unguua”, jeichichi Cornelio matatsunpin.

⁷Poxonae matatsunpin napítaba, barapoxonae Cornelio ichamonae waba, pomonae xua pía botha petanakuichiwichi. Irü soldadomonaepin waba, pong xua pía botha tanakuítatsi. Barapong soldadomonaepin pejüntükoyene wüinaein Nakomtha. ⁸Barapomonaetha tsipáebatsi pokotsiwa báyatha Cornelio tsipáebatsi matatsunpin. Kotakaya Cornelio itoroba barapomonae Jope tómara beya.

⁹Icha matakeitha barapomonae wárapa Jope tómara beya. Poxonae kataunxuae itiya pona poxonae matáeiñaxae, poxonae bara imoxoyo patíchaba, bapoxonae írürü Pedro bo matatupa beekóiñarü, po bo matatupa pereka. Nakom tsipaebéwiya poxonae báyatha matáeiñaxae tsuxubi. ¹⁰Pedro bichokono jainpeka, bepa bekein xaei. Íchitha poxonae áwiya kataunxuae tasétatsi, Pedro tsita naitüütatsi be poxonae kamaita. ¹¹Pedro athabé nekoicha xua peitaboko nayausaranaxuba. Yawa táneno xua pin paparuwa pexaiña betarunéikatsi, be xua jintong nantiya karunéikabe. ¹²Bapoxonae bárapo paparúwatha Pedro tane daxita xua xuang saya pekóbetha pona be kawayun. Yawa tane daxita xua xuang saya petáxutha bobenapona be makibüing. Yawa tane daxita xua xuang saya petompokuetongtha bobenapona be jomong. Matáütano tane daxita xua xuang saya yapupuna be peyapupunaewi. ¹³Néxata Pedro peitabókotha jumetane xua namchi, jeye: “Pedro asiya unguatábare. Pong xua ichichípame, pire. Moya bexore. Yawa xaema”, jei bárapo jume.

¹⁴Néxata Pedro jumenota, jeye: “Bara, báyatha ápara jopa bápana kamatsawang xaeiño, xua tamona jopa kopatsiyo xua pexaewa”, jei Pedro. ¹⁵Ekeicha Pedro jumetane pejume xua tsipáebatsi, xua jeichichi: “Xua Nakom katsijaiña éxana, báraxua jopa kamatsawa jaintokuaetsi”, jeichichi.

¹⁶Pedro matha akoibi pojuméyobe tsipáebatsi baxua. Bapoxonae paparuwa kaibe juiña peitaboko beicha. ¹⁷Xua Pedro baraichi Nakom, baxua Pedro yábara nantaxeina nawita: “¿Eta xua metha Nakom yábara nejumíchira?” najéi. Pomonae Cornelio itoroba, barapomonae i dapong yainyáinyaba tsíniya: “¿Ínkane Simón píabo?” jei. Bapoxonae bapomonae pata Simón pía kurara koibótotha tatsi. Poxonae barapomonae pata, Pedro kataunxuae yábara nantaxeina xua tsipáebatsi xua Nakom tsipaebe. ¹⁸Poxonae Cornelio pijimonae tatsi pata baxota, pin jume tha namchi, jeye: “¿Ínkane Simón pong icha wüing ‘Pedro’ baraichi? ¿Baxota bara ekará?” jei.

¹⁹Áwiya kame Pedro baxua yábara nantaxeinékiya xua pokotsiwa bapong tane. Néxata bapoxonae Nakom pía Pejumopetünaxü tatsi Pedro baraichi, jeye: “Pedro, nejumetaema. Akoibi póyobe pebiwi kawenawení tsompáe. ²⁰Nontaponde naiña ira bedunatabareinka. Barapomonae naponde, beitatema napontábare, yáitama barapomonae itorobang”, jeichichi Pedro.

²¹Bara néxata Pedro ira bedunatabareka. Pedro barái barapomonae, jeye:

—Ápara bara xang, po jintong xua pana newenawenei tsompaem. ¿Eta xua metha papátame? jei.

²²Barapomonae Pedro jumenótatsi, jeye:

—Papatang yáitama Cornelio, pong soldadomonae pía pentakaponaein tatsi, bapong pana itoroba. Barapong pejüntükoyene wüünaein. Barapong Nakom jume-kowúntatsi. Írürü daxita judiomonae barapong barükui-iturajinéibatsi yawa antobetsi. Pinae Nakom pía matatsunpin tatsi Cornelio itoróbatsi Simón Pedro wábare nejumetaenexa tsane jei pinae, jei barapomonae, xua Pedro tsipáebatsi.

²³Néxata Pedro waba barapomonae xua petamaitenaewa tsainchi bárapo botha. Icha matakábitha piáwa xaxainta xua kaponaena. Bapoxonae Pedro nápona barapomonae. Irü ichamonae napónano, pomonae irü Jesús pejumekowüntsiwi tatsi, pomonae xua ena Jope tómaratha.

²⁴Icha matakábitha pata Cesarea tómaratha. Baraxota Simón Pedro éwatatsi. Cornelio pía matabüxiyomonae pewabixae barü ewateka, yawa pía jiwi tásino.

²⁵Poxonae Pedro Cornelio pía botha tapatópatsi, Cornelio Pedro jakóbatsi. Bapoxonae Cornelio Pedro peitabaratha pentabokototha táungkuatsi, pewüünae jainchinexa tsainchi Pedro. ²⁶Íchitha Pedro, Cornelio asiya kuaranotsiya baráichichi, jeye:

—Cornelio, nontaponde. Saya ápara jintongxaein be icha xam ichim barichin ápara, jei Pedro.

²⁷Poxonae Pedro natsipaebiya joníyabe, baxota Pedro pin bicheito tane xua nakaetuta. ²⁸Néxata Pedro barái barapomonae, jeye:

—Bara báyatha payaputáneme xua waxainchi judiomonae jíwichi wakuikoyenewa xéinatsi xua jopa nakuiyábara kopatichi xua wabarü akaetutébiwa pomonae jopa judiomonae naexanaeyo. Matáütano jopa nakuiyábara kopatichi xua pía bónghthano waponeibiwa. Íchitha Nakom aunxuae nekuiduba xua pinae jopa bewa ichamonae katsapiwi jaintin tsane. ²⁹Daxota bichoina patopang yáitama pinae pana wábame. ‘Bara’, jopa jangyo. Methaunxuae paka yaiñabinchi: ¿Eta xua metha pana tsiwábame? jei Pedro.

³⁰Néxata Cornelio, Pedro jumenótatsi, jeye:

—Petain cuatro po matakábibe tsuxubi, kiripitha xote tabohta poxonae yábara nainbotang xua Nakom tsipaebang barapoxonae matatsunpin jemeicha tabohta patopa. Bárapo matatsunpin paparuwa namaxátata po paparuwa bichokono daedaena. ³¹Matatsunpin nebarái: ‘Cornelio, báyatha Nakom kajumetane poxonae tsipáebame pexaiña beya. Kakuitáneno xua yawenéibame peakopebiwi daxota Nakom kayábara nantaxeina’, jei. ³²Nebaraino: ‘Ichamonae Jope tómara beitorobíyama, pewabinexa tsainchi pong aiña wüngbe pexeinaein. Bapong Simón barai-chi, yawa Pedro baraichi. Pedro eka ichüng Simón pía botha tatsi, pong Simón pong seikaya duwein pebokowüunaeteibin. Barapong Simón marmene itapatha yabo ungkua’, nejéi. ³³Daxota naiña itorobang ichüngbe akoibi póyobe yáitama

ápara kawábatsi. Bárabü patópame. Daxita paxang xote Nakom peitabaratha pajinompang. Matáütano paka éwatatsino tsipéi yáitama tha paka jumetaetsi xua Nakom, pong Pekanamataxeinaein, kana kajume-itoroba, jei Cornelio.

Meje yábara poxonae Pedro pin diwesi paeba Cornelio pía botha tatsi

³⁴Pedro barapomonaetha namchi, jeye:

—Ánoxuae yaputang xua Nakom jopa kana exanaeyo jiwi xua ichüing aiñakuf xua beyakaincha ichüing. Nakom daxita jiwi tsita najúpatsi. ³⁵Daxita nákuangtha pomonae xua Nakom wüünae jáintatsi xuano wüünaeya éxanano, Nakom ántobe barapomonae. ³⁶Báyatha payaputáneme xua Nakom Pejume Diwesi naka diwesi itoroba paxangtha pomonae Israel pía pemómoxi susato jiwi tatsi pangxaein. Bárapo pexaiña jume diwesi jüntema jinompa pana éxana poxonae Jesucristo pajumekowüntang. Nakom Jesús Pekanamataxeinaein éxanatsi daxita karepaya jiwi nexa. ³⁷Paxam bara payaputáneme xua Juan Jesús yábara kueikueijeichi yawa bautisaba jiwi Galilea nákuatha. Bapoxonae írürü Jesucristo tamrópata pítaba xua kueikueije Galilea nákuatha yawa daxita Judea nákuatha. ³⁸Matáütano bara payaputánemeno xua Nakom kata pía peayapusüü itorobi koyenewa, Jesucristo Nazaret tomarapin kátatsi. Yáwano Jesucristo nakana jumopetünaxü kátatsi. Bapoxonae Jesús daxita karepaya tómarangtha pópona dukuaeta. Yawa axaibi éxana dukuanáetano peátene jiwi. Yawa taitaweta dukuanáetano pomonae xua yakauríbatsi. Daxota bapong baxua beta éxana Nakom pebarü poponaexae. ³⁹Báyatha pakuitang daxita karepaya xua Jesús éxana Judea nákuatha, Jerusalén tomarathano ichaxota jinompa judiomonae. Bapoxonae nama Jesús náetotha kobematatabarútatsi, xua poxonae tüpa exanadútatsi náetotha. ⁴⁰Poxonae akoibi po matakábibe tsuxubi Nakom petüpaein ekeicha asüü éxana. Matáütano bapong pana netsita naitüüta éxana. ⁴¹Íchitha daxita jiwi jopa tsita naitüüta exanaetsi. Saya paxang pana netsita naitüüta éxana. Nakom pana itapeta pía patayopichinexa ichamonaetha pokotsiwa Jesús éxana xuano xua páebano. Paxang Jesús pabarünábanang, matáütano pabarü-ápangno poxonae ekeicha asüü pópona. ⁴²Jesús pana itoroba daxita nákuangtha pata paebinexa tsane Nakom Pejume Diwesi, xuano bapong pejume diwésino. Nakom kana éxana, Jesucristo kana éxanatsi be pong jiwi peyábara paebin penatsikuentsiwa xua abe peexanaexae. Bexa tsane Jesús daxita jiwi nanantaütsiya jíwana torotsiya itawetsina, pomonae kataunxuae jinompa yawa pomonae báyatha wérapano. ⁴³Báyatha pomonae Nakom pía peitorobi jume pepaebiwi Jesús pejume diwesi paeba. Barapomonae namchi: ‘Daxita pomonae Jesús pejumekowüntsíwichi barapomonae Nakom yábara jüntemainaena abe pía peéxanae kuirukoyenein tatsi Nakom pía peayapusüüwathaxae’, jei barapomonae, jei Pedro.

Meje yábara poxonae pomonae jopa judiomonae naexanaeyo pejäntükoyeneintha tapátatsi Nakom pía Pejumopetünaxü tatsi

⁴⁴Poxonae kataunxuae Pedro kueikueije, bapoxonae Nakom pía Pejumopetünaxü tatsi tapátatsi pomonae jumetane xua Pedro paeba. ⁴⁵Judiomonae, Jope tomarapiwi, pomonae pejumekowüntsixae Jesucristo, barapomonae Pedro punapoinchi. Barapomonae daxita yábara najüntükoyene kabenaeka xua irü barapomonae pomonae jopa judiomonae naexanaeyo irü pejäntükoyeneintha táenatsi

Nakom pía Pejumopetünaxü tatsi. ⁴⁶Judiomonae yaputane xua bara xaniwaicha Nakom pía Pejumopetünaxü tatsi tapátatsi pomonae jopa judiomonae naexanaeyo. Yaputane tsipéi barapomonae barompaya tsanaya icha jumeintha kueikueijei. Íchitha barapomonae jopa xapain najumekopiyaputaeyo. Judiomonae jümetáneno xua pomonae jopa judiomonae naexanaeyo Nakom wüünae jáintatsi. ⁴⁷Pedro namchi, jeye:

—Barapomonae ápara Nakom pía Pejumopetünaxü tatsi xeina icha waxainchi ichichi. Jintong dapong aibi pong jeye: ‘Jopa bewa bautisabí, ápara pomonae jopa judiomonae naexanaeyo’, xua pong pejeiwa, jei Pedro.

⁴⁸Pedro kui-itoroba judiomonae. Pedro namchi, jeye: “Pabautisábare barapomonae pomonae jopa judiomonae naexanaeyo. Jesucristo pewüing pawüingtaíbare poxonae pabautisábame”, jei Pedro. Bapoxonae pírapae barapomonae, pomonae xua aena táenatsi Nakom pía Pejumopetünaxü tatsi, Pedro apusíwatsi xua jopa warapáe tsane yawa xua kaeto abü ekáenano.

Meje yábara poxonae Pedro diwesi tsipaeba pomonaetha, pomonaé Jesús pejumekowüntsiwi Jerusalén tómaratha

11 ¹Jesús pía peitorobi jiwi tatsi írürü pomonae pejumekowüntsiwi Jesús, pomonae ena Judea nákuatha, barapomonae daxita jümetane xua írürü pinae pomonae jopa judiomonae naexanaeyo báyatha jumekowünta Nakom Pejume Diwesi. ²Poxonae Pedro Jerusalén tómara bewarapiya, judiomonae pomonae xua jumekowünta xua aiñakuí Jesús pejumekowüntsiwi tatsi pewithabiwa tsainchi, barapomonae Pedro jumedangweya tsipáebatsi. ³Pedro baraichi, jeye:

—¿Eta xua metha barapomonae siwapóname pomonae jopa judiomonae naexanaeyo? ¿Eta xua metha naxáneme barapomonaetha? jei judiomonae.

⁴Néxata Pedro diwesi eetapona xua kueikueijei barapomonaetha. Po diwesin eetapona, bárapo diwesin xua poxonae siwaponae pomonae jopa judiomonae naexanaeyo. Pedro namchi:

⁵—Poxonae Jope tómaratha Nakom tsipaebang, pin paparuwa tang be poxonae kamaitang. Bárapo paparuwa peitaboko weruneika be pemüütongtha nantiya yakaincha opikéraba. Taxaiña duneika. ⁶Bárapo paparúwatha tang xua bobena. Báraxuang tang xua saya pekóbetha pona be kawayun. Baraxuangno tang xua saya petáxutha bobenapona be makibüng. Baraxuangno tang xua saya petompakuetongtha bobenapona be jomong. Baraxuangno tang xua saya yapupuna be peyapupunaewi. ⁷Peitabókotha jümetang xua nebarái: ‘Pedro asiya unguatábare. Pong xua ichichípame, pire. Moya bexore. Yawa xaema’, nejéi. ⁸Jumeno-tang néxata: ‘Bara, báyatha ápara jopa bápana kamatsawang xaeiño xua tamonae jopa kopatsiyo xua pexaewa’, jang. ⁹Ekeicha peitaboko wenebaráichika: ‘Xua Nakom katsijaiña éxana, baxua jopa kamatsawa jaintokuaetsi’, nejéi. ¹⁰Akoibi pojuméyobe nebarái. Saya ü bárapo juméthabe nebarái. Bapoxonae paparuwa ekeicha peitaboko beicha kaibe kaicha. ¹¹Paparuwa kaibe juiña, írürü pebiwi akoibi póyobe patarü. Bapóyobe Cesarea tomarapiwi, taxantha pata. Bárapo akoibi póyobe, pomonae Cornelio itoroba. ¹²Nakom pía Pejumopetünaxü tatsi nebarái: ‘Napunaponde. Beitatema póntabare’, nejéi. Irü nebarü pona seis póyobe Cesarea tómara beya pomonae pejumekowüntsiwi Jesús. Pajojoniyang Cornelio pía botha tatsi. ¹³Cornelio pana netsipaeba xua pinae pía botha tapatópatsi matatsunpin.

Matatsunpin namchei: ‘Pebiwí Jope tómara beitorobíyama, pewabinexa tsainchi pong xua aiña wüingbe xeina, Simón yawa Pedro. ¹⁴Barapong Simón Pedro paka tsipaebina Jesús pejume diwesi, paka nekayawa kapanenebiyaenexa tsane Nakom’, jei pinae matatsunpin poxonae pinae Cornelio tsipáebatsi, jei Pedro barapomonaetha. ¹⁵Pedro ekeicha namchi:

—Poxonae Jesucristo pejume diwesi paebaxoyang Corneliobarütha, barapoxonae Nakom pía Pejumopetünaxü tatsi tapátatsi barapomonaetha. Icha kain painta ichi, barichi pomonaetha Nakom nakana jumopekatsiba. ¹⁶Bapoxonae nantanapítambang Jesús pejume, poxonae pana barái: ‘Juan saya ü mératha bautisaba. Íchitha Nakom seikaya barompaya piakuitha paka bautisabina. Bapoxonae paiña jüntükoyeneintha pákata patsina Nakom pía Pejumopetünaxü tatsi’, jei Jesús. ¹⁷Xaniwaicha beta yaputang xua Nakom nakana jumopetünaxü kata barapomonaetha, pomonaetha jopa judiomonaetha naexanaeyo, icha kain ichi poxonae Nakom nakana jumopetünaxü kata pataxantha poxonae Jesucristo pajumekowüntang. Daxota Nakom jopa kuiyangkatabiño poxonae ichichipa éxana barapomonaetha, jei Pedro.

¹⁸Poxonae Jesucristo pejumekowüntsiwi, pomonaetha ena Jerusalén tómaratha, poxonae baxua jumetaerúkupa moya umenarúkupa. Matáütano Nakom wüünae jaintatsino. Barapomonaetha namchi, jeye:

—¡Maisha wüünae, irü Nakom nakana kuikata pomonaetha, pomonaetha jopa judiomonaetha naexanaeyo xua barapomonaetha pejumekowüntsiwa tsanerü Jesús, yawa xua jüntema pejinompaewa tsanerü! Báraxua Nakom ichichipa xua barapomonaetha najüntükuyoyene barapenta xua abe, petaxeinaenexa tsainchi peajüntüyapusüüwa, po peajüntüyapusüüwa xua jopa werawerakaeyo, jei barapomonaetha.

Meje yábara poxonae Jesús pejumekowüntsiwi tatsi jinompa Antioquía tómaratha

¹⁹Jesucristo pía pejumekowüntsiwi tatsi dúkupa, tsipéi peanaepanaewi yótaba, poxonae po matakábitha Esteban bexotsi. Barapomonaetha tsanarúkupa, ichüing Fenicia nakua beya, ichüing Chipre nakua tunaeto beya, ichüing Antioquía tómaraba beya. Barapomonaetha saya judiomonaetha kueikueije Jesús Pejume Diwesi. ²⁰Ichamonaetha, pomonaetha pejumekowüntsiwi Jesús, Chipre nakua tunaetopiwi, Cirene tomarapíwino, barapomonaetha Antioquía tómaratha pata. Daxita barapomonaetha tsipaeba pomonaetha, pomonaetha jopa judiomonaetha naexanaeyo Jesús Pejume Diwesi tatsi pong jiwí pía Pekanamataxeinaeinchi. ²¹Barapomonaetha yawénatsi nawita Nakom pía peayapusüüwa tatsi. Daxota pin bicheito pomonaetha jopa judiomonaetha naexanaeyo, barapomonaetha jumekowüntatsi Jesús, pong jiwí Pekanamataxeinaeinchi.

²²Jerusalén tómaratha, Jesucristo pejumekowüntsiwi tatsi, barapomonaetha, jumetane xua Antioquía tomarapiwi jumekowünta Jesucristo pomonaetha jopa judiomonaetha naexanaeyo. Daxota Bernabé Antioquía tómaraba be itakuiwüünaetsi xua Nakom yawena barapomonaetha. Bapoxonae Bernabé jüntükoyene weiweina. Bernabé barapomonaetha barái, jeye: “Paajüntükoyene yapusüüya jinómpare Nakomtha. Matáütano Nakom ajüntüyapusüüya pajumekowüntaponde”, jei Bernabé. ²⁴Bernabé peajüntükoyene wüünaein. Bapong jüntükoyene yúükatsi Nakom pía Pejumopetünaxü tatsi tsipéi daxita i daxuang éxana pokotsiwa Nakom itoroba. Matáütano

bichokono Nakom jumekowúntatsi. Daxota pin bicheito jumekowúnta Jesús, pong jiwi Peksanamataxeinae inchi.

²⁵Néxata Bernabé Tarso tómará bewarapiya, pewenaweneinéxatsi Saulo. ²⁶Poxonae Saulo kaxínatsi baxota, Antioquía tómará bebarú warapíyatsi Saulo. Barapongbe kae wei naékabe baxota, kuidúbabe pin bicheito xua Jesús Pejume Diwesi. Baraxota jiwi matha Jesús pijimonae tatsi wüngdútatsi xua Antioquía tomarapiwi wüngduta xua jeye: “Cristobarümonae”, jeichichi barapomonae pomonae Jesús pijimonae tatsi.

²⁷Poxonae Bernabé irü Saulo kataunxuae kuidubapoponabe Antioquía tómará matha, Nakom píá peitorobi jume pepaebiwi baxota pata, Jerusalén tómará wendena. ²⁸Bara kaein jíwana pewüng Agabo. Agabo asiya unguua barapomonaetha. Bapong wüünae tsiwanaya paeba. Agabo yaputane éxanatsi Nakom píá Pejumopetünaxü tatsi. Agabo namchi, jeye: “Bexa tsane daxita karepaya nákuangtha jainbo tsane”, jei Agabo. Báraxua xaiñéi poxonae jümba matha Claudio romanomonaé itorobiya píá pepa peewatsinchi tatsi náexana, bapoxonae pin jainbo tsúrukuae. ²⁹Daxota Jesús pejumekowüntsiwi tatsi, pomonae ena Antioquía tómará matha, ichipa yawena pomonae irü pejumekowüntsíwixae Jesús pomonae peenaxae Judea nákuatha. Daxota barapomonae pomonae Jesús pejumekowüntsíwixae pebürüya nantaxeina xua parátixi taitorobina. Daxita barapomonae karepaya parátixi kata be xua pokoyene kobe-itakúüpatsi xua pekatsiwa. ³⁰Barapomonae baxua éxana. Bárapo parátixi Bernabé irü Saulo kaitoróbatsibe pítiri jiwi nexa xua Judea nakua beya.

Meje yábara poxonae Santiago bexotsi irü xua poxonae Pedro jiwi pekübibotha kapoinchi

12 ¹Meje yábara xua Lucas yábara tina xua Nakom yábara tsiwüünae muxuduta xua itorobina jíwitha píá Pejumopetünaxü tatsi. Barapoxonae Herodes pong Judea nakuapiwi peyanakua ewatsinchi, bapong tamrópata pítaba xua pomonae Jesús pejumekowüntsiwi tatsi péraxa éxanatsi. ²Herodes itoroba píá jiwi, xua pin kúsitha Santiago pebexubíwatsi, pong Juan peweicho tatsi. ³Herodes jumetane xua judiomonaé tsita wüünaetsi xua Santiago bexotsi. Daxota Herodes kui-itoroba piamonaé xua Pedro pewaetabíwatsi xua pekaponaeinéxatsi jiwi pekübibotha. Baxua éxana poxonae Pascua wüng matakábintha poxonae jiwi pan xane po pan xua jopa xeinaeyo lewadura xua pokotsiwa kotowa éxana. ⁴Poxonae Pedro jiwi pekübibotha eka, soldadomonaé yapukaumena, Pedro yapukaumeinchi. Soldadomonaé, cuatro po bicheito matabüxúyobe. Kae matabüxúyo xeina be cuatro póyobe. Be kae matabüxúyo tamrorópata pona poxonae yakaincha umenéibatsi Pedro. Herodes yábara nantaxeina xua peexanaewa tsane xua Pedro pin bicheito peitabaratha kuaranotinchi pepa tómará matha poxonae Pascua wüng matakabin yapukaewina. ⁵Áwiya kame Pedro jiwi pekübibotha eka. Íchitha Jesús pejumekowüntsíwichi jumedangweya wüüka Nakom, Pedro tawüükatsi.

Meje yábara poxonae Nakom, Pedro kapanépati jiwi pekübibó weya

⁶Herodes mérawi nantaxeina xua baya tsane Pedro kuaranotinchi pepa bichéitha peitabaratha. Bárapo merawitha, abü kataunxuae Pedro nantiya kobenain kamaitungkuátsibe soldadomonaepinbe. Irü soldadomonaepinbe yakaincha

úngkuabe jiwi pekübibó boupa. ⁷Kaena naiña Jesús pía matatsunpin tatsi Pedro tsita naitúütatsi. Jiwi pekübibotha pin koicha pentha tsuxubi bichokono. Mata-tsunpin Pedro yaüibaxotsi. Néxata Pedro nakosataxuba. Matatsunpin namchi, jeye: “Pedro, nanaiña nontaponde”, jei matatsunpin. Bapoxonae Pedro nantiya kobenain jopéikabe íratha. ⁸Bapoxonae matatsunpin Pedro baraichi, jeye: “Koreiña bókoto bichokono nakoto epakatütábare. Naiña nataxuxátare jiña nenataxu xatatsiwa”, jei. Báraxua Pedro éxana. Ekeicha matatsunpin namchi, jeye: “Pire jiña kamisha po paparuwa xua naiña werúyame. Antha nepunaponde”, jei matatsunpin.

⁹Néxata matatsunpin Pedro pekoiboto bepunajoniya, pesato beya. Íchitha Pedro xapain jopa naitakuikoyene taeyo xua jiwi pekübibó wepu najoniya matatsunpin. Saya nantaxeina be amachinae. ¹⁰Pedro irü matatsunpin xenta joníyabe solda-domonaepin pong yakaincha unguua ichaxota Pedro étatsi. Bapoxonae ekeicha icha soldadomonaepin xenta joníyabe pong ewatungkuwa pepa boupa xua pesá-totha. Pedro irü matatsunpin peboupa penainwa xua peyakainchadutsiwa bara wejoníyabe tómara beya. Bárapo boupa jemeicha nakoibo yausaranaxuba. Pedro matatsunpinno námtotha pónabe. Poxonae icha námtotha patópabe bapoxonae jemeicha matatsunpin Pedro kuenta aichurukuaetsi tómara námtotha.

¹¹Barapoxonae Pedro xaniwaicha naitakuikoyene tane. Bapong nabarái, jeye: “Bara yatsikaya xaiñéi Jesús pía matatsunpin inta itoroba tsipéi metha bepa neka-panepáe Herodes pía xaiña weya tatsi xuano xua judiomonae pía xaiña weya tatsi, pomonae ichichipa abe inta peexanaewa”, najéi.

¹²Poxonae baxua nakuikanantaxeina, Pedro pona María píabo tatsi beya. Bapowa Juan pena tatsi. Juan icha wüing xeina Marcos. María pía botha tatsi pin bicheito nakaetuta pewüükeibinexa Nakomtha. Baxota Pedro patopa. ¹³Pedro kurara koiboto dadákata. Yábüyo powa pewüing Rode muxu naya pía yaputaetsi pong patopa. ¹⁴Poxonae barapowa Pedro jumekopitainchi xua wawái abü jopa saranaxubiyo peboupa. Bapowa bichokono jüntükoyene weiweina daxota kaibe kuinaya piamonae tsiwüing kaya. Namchi:

—Pedro kurara koibótotha unguua, jei Rode.

¹⁵Barapomonae namchi, jeye:

—¡Ápara kamatayaiba! jei.

Ekeicha bapowa jumenota, jeye:

—¡Ba bara xaiñang, Pedro bapong yatsikaya! jei.

Ekeicha barapomonae jumenota, jeye:

—Metha ápara Pedro pía matatsunpin tatsi, pong yántatsi, jei.

¹⁶Áwiya kame Pedro peboupa dakadakatungkuwa. Poxonae barapomonae peboupa saranaxoya, Pedro yábara najüntükoyene benaekaeya tainchi. ¹⁷Pedro pekóbetha moya jumematawenta. Kotakaya Pedro diwesi tsipaeba barapomonae xua báyatha kapanépati jiwi pekübibó weya, xua Jesús kapanepa pong jiwi Peka-namataxeinaeinxae tatsi. Pedro namchi, jeye:

—Bárapo diwesi Santiago patsipáebare irü ichamonae patsipáebare pomonae Jesús pejumekowüntsiwi tatsi, jei Pedro.

Barapoxonae Pedro icha namto beíya.

¹⁸Poxonae baya pentha tsina soldadomonaenabenaenompa tsipéi jopa yábara yaputaeyo pokoyene xua Pedro aichúrukuae. ¹⁹Herodes soldadomonaenatoróbat-si xua jéitatsi Pedro. Íchitha jopa Pedro taebichi. Daxota Herodes kana éxana

xua bárapo soldadomonae natsi-aenaekuenta pepanepaexae Pedro. Barapoxonae Herodes icha soldadomonae kui-itoróbatsi xua bárapo soldadomonae jutebinchi. Barapoxonae Herodes Judea nakua wewarapiya, Cesarea tómaratha pepoponaenexa.

Meje yábara poxonae Herodes tüpa

²⁰Herodes pong Judea nakuapiwi peyanakua ewatsinchi, bapong Tiro tomara-piwi kasébatsi irü Sidón tomarapíwino kasébatsi. Bekein báyatha kopiya Herodes itoroba pexaewa bárapo tómarabe nexa íchitha ánoxuae jopa daichiyo poxoru Herodes kaseba bárapo tomarapíwibe. Daxota Sidón tomarapiwi irü Tiro tomarapíwino itoroba pebiwi pesiwaponaenexa tsainchi Blasto pong peaiñakuí jintong xua Herodes pong tanakuítatsi. Barapomonae ichichipa xua Herodes xaniwaicha kaewa be piamonae éxana, daxota barapomonae Blasto tsipáebatsi xua barapomonae peyábara jumeyawenaenéxatsi xua poxonae petsipaebinéxatsi Herodes. ²¹Daxota Herodes wüngduta, bárapo matakabi, po matakábitha xua Herodes siwaponae ponaeinchi barapomonae. Poxonae matakabi tsuxubiba bárapo matakábitha Herodes pía paparuwa namaxátataba po paparuwa tsobia, pókotsi paparuwang namaxátataba pentakaponaewi. Bapoxonae pía peekáewatha eka. Herodes piamonaetha tsipaeba. ²²Néxata barapomonae wawái Herodes baraichi, jeye: “¡Ápara xua bapong paeba, jopa be pebiño, ápara bara Nakom tsekae!” jei barapomonae. ²³Bara kaena bapoxonae Nakom pía matatsunpin tatsi Herodes íratha xotsi. Íratha xotsi yáitama bapong jopa Nakom barükui-iturajinaetsi poxonae piakoya Nakom náexana. Oro ünükaewita poinchi. Janakaewita póinchino. Tsapita póinchino. Herodes tüpanaicha.

²⁴Pomonae xua jumekowünta Jesús, barapomonae tajü tsipaebapona Nakom Pejume Diwesi daxita nákuangtha. Daxota daxita pinmonae jumekowüntatsi Jesús.

²⁵Poxonae Bernabé Saulono nakuwétabe baxua, Jerusalén tómaru wewarapíyabe. Antioquía tómaru bewarapíyabe. Juan Marcos barü wárapatsi.

Meje yábara poxonae Bernabé Saulono Nakom Pejume Diwesi kapónabe

13 ¹Baraxota Antioquía tómaratha jíwana jinompa pomonae pejumekowün-tsiwi Nakom pomonae Nakom pía peitorobi jume pepaebiwi irü pomonae jiwi pekuidubiwi Moisés pía peitorobi koyene. Barapomonae meje: Bernabé irü Simón pong icha wüngno, Negro baraichi, irü Lucio Cirene tomarapin ékarü. Irü Saulo ékarü. Irü Manaén ékarü, pong Herodes báyatha kaepinbe náexanabe xua nakuara wíchaba pónabe. Herodes Galilea nakuapiwi peyanakua ewatsinchi náexana. ²Kaentakabi, poxonae barapomonae Nakom pejumekoyene kanatsipaeba éxana, yawa yábara nainbota, barapoxonae Nakom pía Pejumopetünaxü tatsi barapomonae tsipáebatsi, jeye: “Paitoróbare Bernabé, Saulono, petsipaebinexa tsánebe Nakom pía pexaiña jume diwesi tatsi po penakuichiwa bapongbe báyatha tsiwábangbe”, jei Nakom pía Pejumopetünaxü tatsi.

³Néxata poxonae xua Nakom wüüka najumeweta, xuano poxonae weta xua yábara nainbota, barapoxonae Bernabé Saulono pekóbeta mataboko jayabatsibe. Bapoxonae napeyabatsibe.

**Meje yábara poxonae Nakom pía peitorobi jiwi tatsi,
Nakom pía diwesi tatsi kueikueijeji Chipre tunáetotha**

⁴Bapoxonae Bernabé Saulonürü itorobatsibe Nakom pía Pejumopetünaxü tatsi. Seleucia tómarabe bewarapíyabe. Bapoxonae pónabe jératha po naetha po nae pin nae, petunaeto beya. Bárapo tunaeto pewüing Chipre. ⁵Poxonae patopa Salamina tómaratha, Nakom pía pexeña diwesi tatsi kueikueijeji judiomonae pía penakaetutsi bongtha tatsi. Juan Marcos bichi nápona Bernabé Saulono peyawenaenéxatsi.

⁶Barapóyobe daxita bárapo tunaeto matawakaicha enapona petsipaebinexa Nakom pía pexaiña jume diwesi tatsi. Bapoxonae Pafos tómaratha pata. Bárapo tómaratha bapóyobe káinabe judiomonaepin pong pewüing Barjesús. Bapong Barjesús mara pexeinaein, pong saya náeraba paeba. Bapong Barjesús namchi, jeye: “Xang takueikueijein Nakom nexa”, jei. ⁷Barapong napunaponeiba pongtha pong Chipre tunaetopiwi peyatunaeto ewatsinchi pongxae pewüing Sergio Paulo. Bapong Sergio Paulo peyaputaen. Bernabé Saulono wabatsibe pía jumetáetsibe xua Nakom Pejume Diwesi tatsi pepaebiwa. ⁸Barapong pong mara pexeinaein icha wüing xeina, griego jume, “Elimas”, baraichi. Bapong Bernabé Saulono jumeyangkatábatsibe, tsipéi jopa ichipaeyo xua Sergio Paulo jumekowüntsina Nakom Pejume Diwesi. ⁹Néxata Saulo, pong icha wüingxae Pablo, Nakom pía Pejumopetünaxü tatsi jüntükoyene yúükatsi. Pablo bichokono pexaiña beya tane. ¹⁰Pablo barái, jeye:

—¡Barjesús, xam pong jiwi nemuxitorobeibin, abe neexanaein, kauri pexantom, daxita xua pewüinaewang neaichaxaibim! ¿Eta xua daichim jiwi kuiyangkababéibame xua pejumekowünthebiwa Jesús, pong jiwi Pekanamataxeinaeinchi? ¹¹Bara ánoxuae Nakomtha natsi-aenaekuentésiname. Daxota kaitakuere piontababa. Jopa kaeto pesato taem tsane, beya poxonae matapaiña Nakom kopatsina xua netaewa tsane, jei Pablo.

Bapoxonae Elimas naiña ítata kirei. Bapong ichawa beya ichüing nakobenajáyaba, pekobekaponaenéxatsi peitatanakútsinxae. ¹²Poxonae Sergio Paulo baxua tane bapoxonae bapong Nakom jumekowüntatsi tsipéi tsita wüunaetsi pokotsiwa Pablo Bernabeno yábara kuidúbabe Nakom pong jiwi Pekanamataxeinaeinchi.

**Meje yábara poxonae Bernabé Páblono Antioquía
tómaratha ékabe xua Pisidia nákuatha**

¹³Pablo irü pijimonaе tátsino Pafos tómarabe bewarapiya. Perge tómarabe beiyiya jératha, po nae pin nae. Perge tómaratha pata, Panfilia nákuatha. Bárapo nákuatha daxita barapomonaе Juan Marcos wüpona. Barapoxonaе Jerusalén tómarabe bewarapiya. ¹⁴Néxata Pablo irü pijimonaе tatsi Antioquía tómarabe beiyiya. Bárapo tómarabe Pisidia nakua nakakuita ékabe. Bárapo matakábitha, po matakábitha pentakeiseikáe matakábitha, judiomonaе pía penakaetutsibotha tatsi pata, yawa enoundeka. ¹⁵Baraxota ichüing yóroba Moisés pía peitorobi koyene diwesi tatsi. Yawa yóroba xua Nakom peitorobi jume pepaebiwi paeba. Bapoxonaе poxonaе najumeweta pentakaponaewi, pomonaе peyábara umenaewi penakaetútsibo, barapomonaе Pablo wábatsi irü piamonaе tatsi wábatsi. Barapomonaе jeye:

—Pata tajiwimonaem, icha paxéiname diwesi, po diwesi xua barapomonaе pejüntükoyene tsakabíwatsi xua jüntema pejinompaewa nexa barapomonaе pomonaе xote ene, bara moya papáebare bárapo diwesi, jei barapomonaе.

¹⁶Néxata Pablo asiya unγκua. Pekóbetha jumematawenta xua moya peenaenexa. Pablo barái, jeye:

—Ínkane pajumetaema, israelmonae pam, irü paxamno pomonae Nakom abe paka neka-exanaeyainwa pam xua icha abe paéxaname, pomonae judiomonae jopa naexanaeyo pam. ¹⁷Waámo susato jiwi, pomonae Israel piamonae, barapomonae Nakom kana éxana xua barapomonae nayoyotapona beya xua pin bicheito naexanapona, poxonae kataunxuae Egipto nákuatha jinompa. Nakom itapeta waba barapomonae, xua petanaexanaenéxatsi pijimonae jíwana tatsi. Daxota Nakom pía peayapusúüiwatha waámo jiwi kapanépati Egipto nakua weya. ¹⁸Waámo jiwi ira xuépana susato tsúrukuae nakua beya wárapa cuarenta po weibe. Nakom yaweneiba barapomonae bekein barapomonae abe exaneiba cuarenta po weibe. ¹⁹Waámo susato jiwi tsimaxüdúbatsi Nakom poxonae jutébatsi Canaán nakuamonae. Nakom kaewitaxuba Canaán nakuamonae siete po bicheito matabüxúyobe. Waámo susato jiwi bárapo ira xuya kátatsi, Nakom kata. ²⁰Daxita báraxua Nakom éxana barapomonaetha cuatrocientos cincuenta po weibetha.

“Bapoxonae Nakom jíwana kana éxana pomonae jiwi peyábara paebíwichi xua penatsikuentsiwa xua abe peexanaexae pentakainompaenexa tsane barapomonae. Nakom baxua éxana beya poxonae pong pewüing Samuel pópona pong Nakom pía peitorobi jume pepaebin. ²¹Néxata israelmonae Nakomtha wüüka pong be yatsikaya barapomonae barompaya itorobiya pía pepa peewatsinchi tatsi tsane. Daxota Nakom taéxana barapomonaetha pong pewüing Saúl, Cis pexanto tatsi, pong Benjamín pía pemómoxi susato jíwana tatsi. Bapong Saúl, pong jiwi itorobiya pía pepa peewatsin náexana cuarenta po wéiyobe. ²²Bapoxonae Saúl kuimatawéntatsi Nakom abe peexanaexae. Ekeicha éxana ichüing pong jiwi itorobiya pía pepa peewatsinchi, pong pewüing David. Nakom yábara jume jei David: ‘David tang, pong Isaí pexanto. David netsita jüntükoyene wüünae yawa wüünae éxano. David itapeta exanaena daxita pokotsiwa ichichipang’, jei Nakom. ²³David pía pemomo susato jíwana tatsi, bapong pewüing Jesús. Jopa kain báyatha Nakom Pejume Diwesi paebí penamchixae Jesús kapanepa Israel nakuamonae. Báraxua kaena báyatha Nakom yábara tsiwüünae muxuduta. ²⁴Pewünaeya poxonae Jesús tamrópata pitabina xua pekuidubiwa Nakom nexa kopiya matha Juan daxita Israel nakuapiwi tsipaeba xua pinae bewa nakuibarapentsina abe peéxanae kuirukoyenein xua Nakom petsita-xeinaenéxatsi icha jüntükoyenein, xuano xua bewa pinae nabautisábina. ²⁵Poxonae Juan bara imoxoyo tüpa, jeye: ‘¡Jopa dapoiño xang, pong xua payábara nantaxéiname, pong Mesías baraichi! Kotakaya ichüing patopaena xua pong nepunapatopaena. Pokotsiwa bapong éxana bichokono aiñakuí beyakaincha pokotsiwa éxanang. Bichokono pin ura tsita xeinang xua daxota bewa jopa tataxumüü ishanaxubiwa tsane pía penataxuxatatsiwa tatsi’, jei Juan”, jei Pablo.

²⁶Ekeicha Pablo jeye: “Tamonae pam, Abraham pía pemómoxi susato jiwi tatsi pamxaem, írürü pomonae Nakom abe paka neka-exanaeyainwa pam xua icha abe paéxaname. Nakom pákata itoroba bárapo pekapanenebiyáe jume diwesi po diwesi Juan yábara paeba. ²⁷Barapomonae pomonae Jerusalén tómaratha jinompa irü pía pentakaponaewi tatsi jopa Jesús yaitaetsi pokoyene xua bapong ápara Mesías. Matáütano barapomonae jopa yaputaeyo xua báyatha Nakom peitorobi jume pepaebiwi yábara wüünae tsiwanaya paeba xua bexa Jesús kana exanaeinchi. Pentakeiseikáe matakábitha poxonae ichamonae yóroba po diwesi xua Nakom

pía peitorobi jume pepaebiwi tina, judiomonae pía penakaetutsibotha tatsi barapomonae jopa yábara yaputaeyo bárapo diwesi. Poxonae Jesús náetotha tüparukua éxanatsi, barapomonae nantajüpiya éxana Jesustha icha be pókotsi koyeneya báyatha Nakom pía peitorobi jume pepaebiwi paeba. ²⁸Bárapo judiomonae jopa xeinaeyo pokoyeneya xua Jesús pebexubiwa tsainchi. Bekein Jesús jopa abe exaeyo íchitha barapomonae Pilato wúükatsi xua Pilato itorobina soldadomonae xua Jesús pebexubiwa tsainchi. ²⁹Barapomonae éxana daxita pokoyene báyatha xua Jesús yábara wüünae tsiwanaya páebatsi Nakom Pejume Diwésitha. Barapomonae Jesús pijimonae petüpaein naeto wepichíkatsi. Pijimonae müthütha xotsi petüpaein pitapatororo müthütha. ³⁰Íchitha Nakom, Jesús ekeicha kaewa asüü éxanatsi petüpáe kuirukoyene weya. ³¹Matha kain Jesús punajinompéibatsi ichamonae poxonae Galilea nákuatha pópona, Jerusalén tomarathano. Barapomonae-tha ekeicha Jesús tsita naitüüta dukuanaebiya aiña matakabi dapaein. Pomonae Jesús báyatha tsita naitüüta, barapomonae ápara pomonae xua ánoxuae daxita tómarang tsipaeba dubenanáebiya Jesús yábara.

³²Daxota paka tsipáebatsi Jesucristo pía pexaiña jume diwesi xua báyatha Nakom yábara tsiwüünae muxuduta waámo susato jíwitha. ³³Baxua Nakom éxana poxonae Jesús ekeicha asüü éxanatsi. Nákata éxana poxoru waxainchi waámo susatopiwi pijimonaetsi. Icha be pókotsi koyeneya báyatha tina Nakom Pejume Diwésitha xua salmos penaxünae weixi diwésintha, po wei xua ichaxota ‘dos’, jei xua jeye: ‘Xam, taxantom, ítowang kaéxanatsi bara’, jei. ³⁴Nakom, Jesús asüü éxanatsi, xua ekeicha jopa petüpaenexa tsane, xua ekeicha jopa tsabanungkuae tsane. Daxota jei pejume diwésitha: ‘Paka katinchi xua báyatha David tayábara tsiwüünae muxudutang’, jei. ³⁵Daxota pong xua tina salmos penaxünae weixi diwésintha, bárapo diwésintha Nakom baraichi: ‘Jopa kopatsim xua nexanto petsabanungkuaewa tsane pong bichokono pejüntükoyene wüünaein’, jei. ³⁶Xaiñéi, David éxana xua Nakom ichipa poxonae barü pópona Israel nakuapiwi. David báyatha tüpa. Müthütha xotsi ichaxota pamo jiwi tatsi yamüthü umena. Yawa báyatha tsabanungkua. ³⁷Íchitha bárapo pepong po pepong Nakom asüü éxana, bárapo pepong jopa tsabanaeyo. ³⁸Tamonae pam, maisha be payábara yaputáename Jesús pokoyene xua bapong Jesús pákata kayawa tüpa abe paiña neexanáe kuirukoyenein xua daxota Nakom jüntemaina bárapo abe paiña neexanáe kuirukoyenein. ³⁹Tsipéi Jesús tüpa daxota daxita pomonae jumekowünta bapongtha, Nakom jüntükoyene wüünaetsina. Bekein jiwi éxana daxita pokotsiwa Moisés pía peitorobi koyenéwatha itoroba, íchitha bárapo koyenewa bápana jopa jiwi jüntükoyene wüünae exanaetsi abe pía peéxanae kuirukoyenein tatsi weya. ⁴⁰Dota, icha metha jopa Nakom pajumekowüntsipaem, bara paichim tsipae icha be pókotsi koyeneya báyatha pomonae Nakom peitorobi jume pepaebiwi yábara tina. Namchiya tina, jeye:

⁴¹‘Já, jiwi pekuikaponaemonae pam,

bara pana nabenáekare, pawérapare.

Xang, Nakom, ánoxuae exanaein bichokono pepa pewüünaewa poxonae kataunxuae pajinómpame.

Baxua xua éxanang, jopa pajumekowüntsím,

bara bekein ichamonae paka tsipaeba’,

jei Nakom”,

jei Pablo.

⁴²Pablo, irü pía pepunaponáewichi daxita barapóyobe judiomonae pía pena-kaetútsibo tatsi wejojoniya. Pomonae baxota umena pomonae jopa yakuiya naexanaeyo xua judiomonae penaexanaewa, barapomonae Pablo wüükatsi xua bepa pinae Pablo ekeicha kuidubina po diwesi ánoxuae paeba xua ekeicha icha diwesi mataropeichiya kuidubina xua icha matakéitha tsane xua pentakeiseikáe matakábitha. ⁴³Poxonae najumeweta Pablo irü Bernabé, punapóinchibe judiomonae irü pomonae jopa judiomonae naexanaeyo. Barapomonae Nakom jumekowünta nawita icha judiomonae ichi. Pablo Bernabeno tsipáebabe barapomonae: “Nakom pajumekowünta dubenanaebíyama xua Nakom wüünae pía pákata exanaenexa paiña jüntükoyeintha pía paka nekaantobexae”, jeibe.

⁴⁴Icha matakabi, po matakábitha pentakeiseikáe matakábitha, pin bicheito pomonae tómaratha ena, nakaetuta xua pejumetaenexa Nakom pía pexaiña jume diwesi tatsi, pong Pekanamataxeinaeinchi jiwi. ⁴⁵Íchitha poxonae judiomonae pinmonae nekota, jumeúwa tsipéi pinmonae nakaetuta pejumetaenéxatsi Pablo. Pablo jumematawéntatsi xua paeba yawa tsümüjume barü páebatsino. ⁴⁶Néxata Pablo Bernabeno tsipáebabe barapomonae. Jopa auriya paebiyobe. Jeibe:

—Bara wüünae xua kopiya Nakom Pejume Diwesi paka tsipáebatsi pomonae judiomonae pamxaem. Dáichitha, jopa bepajumetaem bárapo diwesi tsipéi jopa paichichipaem xua paiña nexenaewa peajüntüyapusüüwa po peajüntüyapusüüwa ataya tsiteka. Daxota ánoxuae ichamonaetha pata tha ponaetsi pomonaetha, pomonae jopa judiomonae naexanaeyo. ⁴⁷Pata Tanekanamataxeinaein Nakom pana itoroba. Pana baraino, jeye:

‘Paka éxanatsi xua paiña neyawenaewa daxita pomonae jopa judiomonae naexanaeyo xua wüünaeya pejinompaenexa tsane.

Matáütano paka éxanatsi xua beta paiña netsipaebinxexa Nakom Pejume

Diwesi daxita nákuangtha,

xua jiwi pekapanenebiyaenexa tsainchi Nakom abe pía peéxanae

kuirukoyenein weya tatsi’,

jei Nakom,

jei Pablo.

⁴⁸Poxonae baxua jumetaerúkupa, pomonae jopa judiomonae naexanaeyo, barapomonae bichokono jüntükoyene weiweinarúkupa, jüntema jinómpano. Pablo tsipáebatsi: “Nakom Pejume Diwesi jumexeika. Bichokono jumewüünae”, jei. Daxita barapomonae jumekowünta pomonae Nakom kuita itapeta petaxeinaenexa tsainchi peajüntüyapusüüwa, po peajüntüyapusüüwa ataya tsiteka. ⁴⁹Barapomonae pomonae Jesús pejumekowüntsíwichi daxita nákuangtha tsipaeba Jesús pía pexaiña jume diwesi tatsi, pong jiwi Pekanamataxeinaein. ⁵⁰Íchitha judiomonae anáepana éxana yábüxi powaxi Nakom kanantaxéinatsi bichokono. Yawa pebiwi pomonae peaiñakuí jiwi, irü bárapo pebiwi anáepana éxanatsi. Irü judiomonae Pablo Bernabeno abe yábara kueikueijeichibe, daxota daxita jiwi Pablo irü Bernabé kasebatsibe. Bárapo jiwi Pablo Bernabeno itawetaxótsibe pía nakua beya. ⁵¹Néxata Pablo Bernabeno nataxunünütababe tsórobo. Baxua éxanabe petsita-ita-peíñaxeinaenexa pokoyene bapomonae abe éxana poxonae jume itaweta Nakom Pejume Diwesi. Barapoxonae wárapabe Iconio tómará beya. ⁵²Íchitha pomonae Jesús jumekowünta, barapomonae bichokono jüntükoyene weiweina. Matáütano barapomonae jüntükoyene yüükatsi Nakom pía Pejumopetünaxü tatsi.

Meje yábara poxonae Pablo Bernabeno Iconio tómaratha popónabe

14¹Iconio tómaratha Pablo Bernabeno judiomonaе pía penakaetutsibotha tatsi joníyabe. Beta páebabe daxota pinmonae Jesús jumekowünta. Judiomonaе jumekowünta, írürü pomonaе jopa judiomonaе naexanaeyo jumekowünta Jesús.²Íchitha po judiomonaе jopa Jesús pejumekowüntsíwichi barapomonaе kuitsákabapomonaе jopa judiomonaе naexanaeyo kuitsákabatsi. Daxota barapomonaе pomonaе jopa judiomonaе naexanaeyo abe yábara nantaxeina xua pomonaе Jesús pejumekowüntsiwi tatsi abe yábara nantaxéinatsi.³Pablo Bernabeno bárapo tómaratha ékabe. Aiña matakabi dapaein barapongbe ékabe baraxota. Nakom Pejume Diwesi jumedangweya kueikueijeibe Pekanamataxeinaein nexa. Bapongbe Nakom kata pía peayapusüüwa peexanaenéxabe pexeíña petsita-itüütsi koyenewang. Poxonaе jiwi kuitane xua bapongbe éxanabe, bárapo jiwi yaputane xua Nakom yawena bapongbe, peantobexáetsibe.⁴Daxita jiwi tómaratha be aiña jíwibe natsababe. Ichamonaе judiomonaе ichichipa. Ichamonaе Jesús pía peitorobi jiwi tatsi ichichipa. Daxota aiña bichéitobe nakana éxanabe.⁵Néxata bapoxonaе judiomonaе irü pomonaе jopa judiomonaе naexanaeyo pebürüya yábara jumebarü nantaxinarüküpa xua pentakaponaewi paeba pokoyene xua Pablo yawa Bernabé abe peexanaewa tsáinchibe xuano xua ibótongtha pekuinbabinexatsibe.⁶Poxonaе Bernabé Pálobe jumetáebabe naiña naetsirúkuabe Listra tómara beya, Derbe tómara béyano. Bárapo tómarabe Licaonia nákuatha ékabe. Matáütano icha tómarang beya pónabe Pablo Bernabeno xua po tómarang ena bárapo Licaonia nákuatha.⁷Bárapo tómarangtha kuiduba dukuanaebíyabe Jesús pía pexaiña jume diwesi tatsi.

Meje yábara poxonae Pablo Listra tómaratha ibótongtha kuinbábatsi

⁸Listra tómaratha pebin pópona pong pemübinchi, pong xua jopa peponaein. Bapong pexúyotha kaena yawa naexaneka, xuano bápana jopa po nae.⁹Bapong pong pemübinchi Pablo jumetaínchi xua pokotsiwa kueikueijeí. Pablo pemübinchi tane. Pablo nantaxeina, xua pong pemübinchi bara Nakom jumekowüntatsi. Pablo nantaxéinataba xua axaíbi peexanaewa tsainchi pong pemübinchi. Daxota bichokono Pablo naitakuiduya bapongtha beya.¹⁰Néxata Pablo jumedangweya barái, jeye:

—Asiya úngkuare, jei.

Pong pemübinchi asiya unguatabiya jirawüüna yawa naiña pónano.¹¹Poxonaе Pablo kuitainchi barapomonaе, jumedangweya wawái pin jumetha, Licaonia pijumetha tatsi:

—¡Nakombe be pebin jüta tsekaе waxaiña bérena patópabe! jei.

¹²Barapomonaе namchi: “Maisha Bernabé bara mexeya Nakom tsekaе, po Nakom pewüing Zeus. Irü Pablo bara mexeya icha Nakom tsekaе, po Nakom pewüing Hermes”, jei. Barapomonaе bapo wüingduta poxoru tsipéi Pablo penantakapaebin tsekaе.¹³Irü bárapo Nakom Zeus irü pía sacerdotemonaepin xeina, pong Zeus wüünae jaintéibatsi pía penakaetútsibo tátsitha. Bárapo penakaetútsibo unguakua tómara koibotojuma weya. Bárapo sacerdotepin vaca pebtong wíyaba pentonong pekaponaenexa Zeus pía penakaetutsibotha tatsi. Bárapo tomarapiwi irü Zeus pía sacerdotepin ichichipa juteba vaca pebtong petautsinexa xua petúxusi exanaenexa Pablo irü Bernabé néxabe pía yábara nantaxéinaebe barapomonaе xua bara

pejüntükoyene wüünaewi. ¹⁴Bernabé irü Pablo jumeténebe xua taexanáeinchibe baxua barapomona. Bapoxona anaya nama paparuwa tsitsinaxúbabe. Kuinaepo-naya wawaibe poxoru aichaxaibibe xua baxua barapomona exanaena. Jeibe:

¹⁵—¿Eta xua daxua pana kanáütame? Ápara saya jiwi pangbe. Be paxam paichim bara paichinbe. Papatopangbe tsipéi ápara pata paka katsipaebinexa tsainchi xua paiña nenakuibarapentsiwa tsane bárapo koyenexi xua jopa pekuiwüünáewiyo. Maisha Nakomtha panajüntüpende. Bárapo Nakom pong peantükuiyapusiung, éxana peitaboko, írangno, pin meneinno. Daxita xua xuangno yawa múxuna dubena tsíniya Nakom báyatha éxana. ¹⁶Wawünaeya Nakom kuikópata daxita nakuapiwi xua bara pejinompaenexa icha be pókotsi koyeneya ichichipa xua pejinompaewa. Daxita jiwi píakui nata éxana saya. ¹⁷Nakom xua pewüünaewang nakopiniwa tsita itüüba daxota jiwi naitakuikoyene tane xua Nakom éxana. Barapong Nakom ápara pong ema pákata itorobika, pexuwiwangno paka tsjain exaneika katsíkano. Pexaewa paka kata. Paka jüntükoyene weiweina éxana, jei.

¹⁸Bekein Bernabé irü Pablo jumedangweya yábara páebabe báraxua, áwiya barapomona ichichipa jutebina vaca pebtong xuano xua wüünae pejainchinéxatsibe Pablo irü Bernabé. Barapomona muxu pejutebí vaca dáichitha jopa jutebiyo.

¹⁹Bapoxona judiomona, pomona jopa pejumekowüntsiwi, Antioquía tómara weparena, irü Iconio tómara weparena. Daxita bárapo judiomona Listra tomarapiwi barü kueikueijeichi pebarü anaepanaenexátsibe Pablo yawa Bernabé. Néxata barapomona Listra tomarapiwi ibótongtha kuinbábatsi Pablo. Barapomona najüntükoyene xeina xua báyatha Pablo tüpa. Pablo tómara koibotojuma bejontapóñatsi. ²⁰Jesús pejumekowüntsiwichi Pablo kakuita matawakaicha umenarükúpatsi. Bapoxona Pablo asiya unguataba. Ekeicha tómara bepoña. Icha mataketha Bernabé yawa Pablo Derbe tómara beya pónabe.

²¹Barapoxona Bernabé yawa Pablo muxutsipáebabe Jesús pía pexaiña jume diwesi tatsi. Pinmona jumekowünta Jesús. Ekeicha bapoxona Listra tómara beya, kaibeya pónabe. Iconio tomarano, Antioquía tómara béyano bara bewarapíyabe. ²²Bernabé irü Pablo bárapo tómarangtha jüntükoyene tsakábame pomonaetha, pomona pejumekowüntsiwi xua wüünaeya pejinompaewa tsane. Matáütano kui-itoróbabe barapomonaetha xua bewa beta wüünaeya jumekowünta dubena-naebiyaena. Barichino matáütano tsipáebabe xua pinae poxona ichamona pepatsiwa tsane Nakom pía peitorobi nakua beicha bewa matha ajüntükoyenetane exaneibinchi xua ichamona taexanaena. ²³Bernabé yawa Pablo tamrorópata itapetatsiníyabe pítiri jiwi daxita Jesús pejumekowüntsiwi pía penakaetutsi bongtha. Bárapo pítiri jiwi itapétatsi peyawenaenexa xua peyawenaenéxatsi pomona Jesús pejumekowüntsiwi. Poxona daxita najumeweta xua Nakomtha petsipaebiwa, xuano xua yábara nainbota pítiri jiwi nexa, barapoxona Pablo irü Bernabé, Nakom pong Pekanamataxeinaein jiwi, jeichichi: “Nakom, bárapo pítiri jiwi beta éenare jiña nekajumekowüntsixa”, jeibe.

**Meje yábara poxona Bernabé irü Pablo Antioquía tómaratha
ekeicha kaibe patopíyabe xua po tómara peekaexae Siria nákuatha**

²⁴Kopiya matha Pisidia nakua bewarapíyabe. Bapoxona Panfilia nákuatha patópabe. ²⁵Jesús pía pexaiña jume diwesi tsipáebabe Perge tómaratha. Barapoxona ekeicha Atalia tómara bewarapíyabe. ²⁶Baraxotiya Atalia tómaratha Antioquía

bewarapíyabe jératha, po naetha po nae pin nae. Antioquía tómara bárapo tómara ichaxota báyatha matha barapomonaе Bernabé irü Pablo tawüükatsibe Nakomtha poxonaе juntukuru wárapabe. Báyatha kain bárapo Antioquía tomarapiwi tawüüka Nakomtha, xua Nakom beta eenaena peantobexae xua Pablo irü Bernabé beta eenáeinchibe poxonaе nakuítabe Nakom pía penakuichiwa. Baxota ekeicha Pablo Bernabeno pekoutha patópabe tsipéi bárapo pía penakuichíwabe báyatha wétabe. ²⁷Bernabé irü Pablo poxonaе patópabe Antioquía tómaratha kae-tútabe pomonaе pejumekowüntsiwi Jesús. Bapongbe barapomonaetha tsipáebabe pokoyene báyatha Nakom Pablo irü Bernabé taéxanatsibe. Matáütano tsipáebabe xua Nakom pong Pekanamataxeinaein jiwi, pomonaе jopa judiomonaе naexanaeyo takópatatsi xua irü barapomonaе peitaküüpáewatsi xua pejumekowüntsinéxatsi Jesús. ²⁸Bernabé irü Pablo baraxotiya aiña dapaein naékabe barapomonaе pía xantha tatsi pomonaе Jesús pejumekowüntsi jíwichi.

**Meje yábara poxonaе nakaetuta Jerusalén tómaratha
Jesús pía peitorobi jiwi tatsi irü penapatáe jiwi**

15 ¹Barapoxonaе irü pebiwi, pomonaе Judea nákuatha jinompa, pata Antioquía tómaratha. Barapomonaе tamrópata notarúküpa xua pekuidubiwa pomonaetha, pomonaе irü pejumekowüntsíwixae Jesús. Jeye: “Icha paichichí-pame xua paiña nepaka kapanenebiwa matha pana nawithábare pebiwi pam ichaxota pana nareixakáename icha be ichi pókotsi koyeneya báyatha Moisés paka itoroba”, jei. ²Pablo irü Bernabé jumedangweya tsipáebabe xua baxua jopa xaiñeyo. Íchitha jumematsontsónobatsibe barapomonaе. Daxota Pablo irü Bernabé wüngdutatsibe, irü ichamonaе wüngdúbatsi xua daxita barapomonaе peponaenexa Jerusalén tómara beya. Matáütano barapomonaе itoróbatsi xua bárapo penawithabi koyene yábara petsipaebinéxatsi Jesús pía peitorobi jiwi tatsi, írürü pítiri jiwi petsipaebinéxatsi pomonaе penakaetutsi jiwi jíwana xua Jerusalén tómaratha.

³Bárapo Antioquía tomarapiwi pomonaе Jesús pejumekowüntsiwi putaeumena. Pablo irü Bernabé irü icha pebiwi putaeumeinchi. Barapoxonaе Pablo, Bernabé irü icha pebíwino wárapa. Barapomonaе siwapona Fenicia nakua beya, Samaria nakua béyano. Barapomonaе Pablo Bernabeno tsipáebabe, jeibe: “Pomonaе xua jopa judiomonaе naexanaeyo, barapomonaе pía kuikoyenein nakuibarapenta pokoyenein xua jumekowünta báyatha pía jumekowüntichi Nakomtha”, jeibe Pablo, Bernabeno. Daxita pomonaе irü pejumekowüntsíwixae Jesús bichokono jüntükoyene weiweina poxonaе jumetane baxua.

⁴Bernabé irü Pablo poxonaе patópabe Jerusalén tómaratha, pomonaе pejumekowüntsiwi bapongbe matenta weiweinaya wabatsibe. Írürü Jesús pía peitorobi jiwi tatsi matenta weiweinaya waba. Barichirü pítiri jiwi matenta weiweinaya waba. Bernabé irü Pablo tsipáebabe barapomonaetha pokoyene báyatha Nakom taéxana bapongbetha. ⁵Íchitha ichamonaе fariseomonaе, pomonaе báyatha jumekowünta Jesús, asiya umena. Barapomonaе namchi, jeye:

—Pomonaе jopa judiomonaе naexanaeyo xua pejumekowüntsiwi Jesús bewa exanaetsi xua penawithabiwa tsane xua ichaxota nareixakaena xua ichaxota pebíwixae xeina. Matáütano bewa kui-itorobichi xua bewa exanaponaena pokotsiwa báyatha Moisés itoroba pía peitorobi koyenéwatha, jei.

⁶Bapoxonae Jesús pía peitorobi jiwi tatsi irü pítiri jiwimonaeno nakaetuta peyábara paebinexa bárapo penawithabi koyene. ⁷Kaena báyatha bapomonaenajume matsontsonobompa. Bapoxonae Pedro asiya unguatataba. Barái barapomonaetha, jeye:

—Tamonaenapam, pomonaenapejumekowüntsíwixae Jesús, paxam payaputáneme, xua kaena báyatha Nakom neitapeta paiñaxantha. Newaba takueikueijeinexatsane Jesús pía pexeña pekapanenebiyáe jume diwesi pomonaetha, pomonaenajopajudiomonaenaexanaeyo, xua írürü barapomonaenapejumekowüntsínexa bárapodiwesi. ⁸Nakom pejüntükoyene yaputaenjiwi daxota naka yaputane éxana xua bapong tsítatsi xua barapomonaenapejüntükoyene wüünaewi bekein jopajudiomonaenaexanaeyo. Nakom bara nanajumopetünaxü kata barapomonaetha ichamatha naka kana ichi. ⁹Nakom bichokono ántobe barapomonaetha icha ichi xua bichokono naka ántobe. Nakom jüntükoyenepuxana éxana barapomonaenaxua abepía peéxanaekuirukoyenein tatsi pejumekowüntsixaetsi icha naka ichi. ¹⁰Maisha ánoxuae jopa be payábara yaputaem pokotsiwa Nakom éxana. Matáütano bárapopejumekowüntsiwipomonaenajopajudiomonaenaexanaeyopakui-itoróbame xua penawithabiwa xua ichaxota nareixakaena xua ichaxota pebiwi xeina. Matáütano be paka itakuijicha xua barapomonaebewa exanaena pokotsiwa Moisés itoroba. Ápara báraxua jopa naka itaküüpaeyo xua waexanaewa. Írürü waámo susato jiwi jopa itaküüpaetsi xua peexanaewa baxua. ¹¹Nama ápara waxainchi wanakakapanenebiyae jíwichi xua saya amanaya xua Jesús pong jiwi Pekanamataxeinaein peichichipaexae baxua. Bárapo pejumekowüntsiwiriü bara kana ichichi, jei Pedro barapomonaetha.

¹²Bapoxonae barapomonaenamoya umena. BarapomonaenBernabé irü Pablo jumetaeumenatsibe. Tsipáebabe: “Paponéibangbepomonaetha, pomonaenajopajudiomonaenaexanaeyo. Paexanéibangbepomonaethapexeña petsita-itüütsi koyenewang Nakom pía peayapusüüwíyatha tatsi”, jeibe. ¹³Poxonae Bernabé irü Pablo najumewétabe xua páebabe, bapoxonae Santiago namchi, jeye:

—Tamonaenapam, pomonaeniriü paiña nejumekowüntsíwixae Jesús, pana nejumetaema: ¹⁴Simón Pedro aunxuae naka tsipaeba. Pedro namchi: ‘Poxonae Nakom kopiya tamrópata pítaba xua yawena pomonaenajopajudiomonaenaexanaeyo, Nakom jíwana itapeta pomonaenaxua peantobenexatsainchi bapong’, jei Pedro. ¹⁵Xuaunxuae Pedro paeba kaena báyatha Nakom pía peitorobi jume pepaebiwi yábara tsiwüünae muxudutsiya tina Nakom Pejume Diwésitha xua Nakom nexa, jeye:

¹⁶Poxonae daxita báraxua wétsina,
xang Nakom ekeicha patoparekaein.
Exanaein xua kaein,
pong David pía pemomo jiwi tatsi jíwana matakapoonaena piamonaen,
icha matha David ichi poxonae piamonaenatakapoona.

¹⁷Poxonae báraxua exanaein,
barapoxonae ichamonaenapomonaenajopajudiomonaenaexanaeyonewenawenei tsane pía tanejumekowüntsínexatsane.
Barapomonaepía Pekanamataxeinaein tatsi naexanaein taitapetsixae barapomonaen.

¹⁸Nakom pong jiwi yaputaeya éxanatsi bárapo koyenein kaena báyatha pepaebixae baxua daxota xaniwaicha Nakom exanaena',
 jei Nakom pía peitorobi jume pepaebiwi,
 Nakom Pejume Diwésitha xua Nakom nexa,
 jei Santiago.

¹⁹Santiago kataunxuae áwiya kueikueijeji, jeye: “Daxota nantaxeinang, ekeicha waxainchi jopa bewa itorobi tsainchi pomonae jopa judiomonae naexanaeyo xua peexanaewa pokoyenein xua taayapubetsi. Barapomonae nakuibarapenta pía kui-koyenein pokoyenein xua jumekowünta báyatha pía jumekowüntichi Nakomtha.
²⁰Betatinaetsípatsi carta pomonae jopa judiomonae naexanaeyo. Bárapo cártatha jei tsipaetsi: ‘Jopa ekeicha pewi paxaeinde powi jiwi tajeba ibo nakom nexa. Paiñaxoba yábüxi panótame poyábüxi jopa paiña séurixi. Paiñaxoba duwéi pawixáneme pong saya pípato tüpa xuano pong saya bunopa. Matáütano jopa paxaeinde peja’, bejéi tsipaetsi. ²¹Báraxua bewa exanaetsi poxoru kaena kain báyatha pomonae Nakom Pejume Diwesi pekanatsipaebi jiwi yorobeiba bárapo diwesi judiomonae pía penakaetutsi bongtha tatsi. Daxita tómarangtha xua po matakábintha pentakeiseikáe matakábintha barapomonae yorobeiba Nakom Pejume Diwesi, po diwesi xua Moisés tina báyatha pokotsiwa yábara tsiwüünae muxuduta Nakom”, jei Santiago.

**Meje yábara poxonae bárapo bicheito carta tatina pomonaetha,
 pomonae jopa judiomonae naexanaeyo**

²²Jesús pía peitorobi jiwi tatsi írürü pítiri jiwi, irü daxita pomonae pejume-kowüntsiwi juntukuru najíwana itapeta. Bapoxonae xua Antioquía tómara beya penajíwana itorobinexa Pablo irü Bernabé. Judas wüngdútatsi pong icha wüng Barsabás. Irü Silas wüngdútatsi, bapongbe pongbe bichokono peaiñakuí jintongbe xua pomonae irü pejumekowüntsiwi pía xantha tatsi. ²³Jesús pía peitorobi jiwi tatsi írürü pítiri jiwi, irü pomonae Jesús pejumekowüntsiwi, barapomonae carta tina xua pekaitorobinexa xua Pablo irü Bernabé irü Judas irü Silas barapóyobe pekaitorobinéxatsi. Bárapo carta namchi, jeye:

“Paxang Nakom pía peitorobi jiwi tatsi pang, irü pítiri jiwi pangno xua nakae-monae jíwichi xua wajumekowüntsiwichi Jesús. Paxang pajakobang patamonae pomonae jopa judiomonae naexanaeyo pomonae irü Jesús pejumekowüntsiwichi, pomonae pejinompaexae Antioquía tómaratha, xuano xua pejinompaexae Siria nákuatha, Cilicia nakuathano. ²⁴Payaputang ichamonae xua patamonae pata tómara weya pípato paka siwaponá paiña tómara beya. Paka kajume-akaura. Barapomonae namchi: ‘Pana nawithábare. Matáütano paexande pokotsiwa Moisés pía koyenéwatha itoroba’, jei. Jopa paitorobiño bárapo jume. ²⁵Daxota be juntukuru pawüünaein xua kuita panantajüpaya nantaxeinang. Paitorobang ichamonae pata xaiña weya pía paka nekataenexa tsane. Napunapónabe Bernabé Páblono pongbe bichokono paantobein. ²⁶Bapongbe Pablo irü Bernabé muxu pebokaebe xua pebe-xubíwatsibe pekueikueijeji tsurukuaenaebiyaexaebe Jesucristo nexa, pong Wanaka namataxeinaein. ²⁷Paitoróbangbe Judas Silasno. Barapongbe saya piakoutha paka tsipaebínabe daxita xua bárapo cártatha papaebang paiña neyaputaenexa. ²⁸Paxang irü Nakom pía Pejumopetünaxü tatsi panantajüpaya nantaxeinang xua jopa be paka itorobichi icha kuikoyene pokuikoyene bichokono pákata ayapubé xua paiña neexanaewa tsane. Meisha saya ü baxua xua pákata tínatsi po cártathe

baxua panantawénoname xua paiña neexanaewa tsane. ²⁹Paiñaxoba paxáneme pewi powi jiwi tajeba ibo nakom nexa poxonae tauta bárapo duwéi xua túxusi éxana bárapo ibo nakom nexa. Barichi paiñaxoba duwéi pawixáneme pejánano po duwéi pípato tüpumena. Matáütano ichamonae paiñamonae jíwana piaxoba nota yábüxi powaxi jopa piséurixi tatsi. Icha báraxua panakuibarapentsíname wüünaeya pajinompáename. Baja”, jei bárapo cártatha.

³⁰Bernabé irü Pablo, irü Judas Silasno barapomonáeyobe peitorobixaetsi bara Antioquía tómara beiyiya. Bárapo tomarathiya barapomonáeyobe kaetuteta pomonae pejumekowüntsiwi. Matáütano barapomonáeyobe bárapo carta kata barapomonaetha. ³¹Pomonae irü pejumekowüntsiwixae Jesús bara yóroba bárapo carta. Barapomonae bichokono jüntükoyene weiweina tsipéi bárapo cártatha kuimata-teikaeya yábara páebatsi. ³²Judas irü Silas peitaküüpaexáetsibe xua beta petsipae-bíwabe Nakom Pejume Diwesi xua Nakom yaputane éxana, daxota jüntükoyene tsakábame barapomonaetha, pomonae irü Jesús pejumekowüntsiwi tatsi xua beta pejinompaewa tsane. Matáütano bapongbe kuimatateikabe. ³³Barapóyobe bárapo pejumekowüntsiwíthi naékabe kaena bayiyo. Barapoxonae barapomonae pomonae pejumekowüntsiwixae Jesús barapóyobe jüntükoyene wüünae punapeyabatsi xua penawibiyaexae kaibeya ichaxota wérena báyatha pomonae peitorobirenaexaetsi. ³⁴Íchitha Silas juntukuru narunta. ³⁵Pablo irü Bernabé Antioquía tómaratha ékabe. Bapongbe irü ichamonaeno pomonae pinmonae, daxita barapomonae kuiduba dubenanáebiya yawa tsipaeba dubenanáebiya Jesús pong Pekanamataxeinaein jiwi pía pexeiña jume diwesi tatsi.

Meje yábara poxonae Pablo ekeicha wárapa nakuéyatabe pokuiyobetha xua Jesús pía pexeiña jume diwesi tatsi pekueikueijeiwane

³⁶Pirapaeyo icha mataketha, Pablo barái, Bernabé baraichi, jeye:

—Anthá ekeicha Jesús pejumekowüntsiwi siwaponaeina ponaeinchi daxita jüpaya tómarangtha ichaxota matha kain Jesús pong jiwi Pekanamataxeinaein pía jume diwesi tatsi tsipáebatsibe. Wayaputaenéxabe icha metha bara beta jinompa bapomonae, jei Pablo.

³⁷Bernabé ichichipa xua punapóinchibe pong Juan, pong icha wüngno Marcos. ³⁸Íchitha Pablo jopa ichipaeyo xua pebarü ponáewatsi Juan Marcos tsipéi báyatha Panfilia tómaratha Bernabé irü Pablo kuenta pónatsibe. Báyatha Juan Marcos juntukuru jopa benapuna nanakuichiyo Jesús pía pexeiña jume diwesi tatsi. ³⁹Najumematsóntabe. Bernabé irü Pablo nawütsatajópabe. Bernabé tsana barü jopa Marcos. Wératha pónabe Chipre tunaeto beya. ⁴⁰Barapoxonae Pablo kuita waba Silas. Antioquía tómaratha pomonae pejumekowüntsiwixae Jesús, Pablo Silasno tatsipaebatsibe Nakomtha xua Nakom peenaenexa peantobexae xua Pablo irü Silas peenaenéxatsibe poxonae kueikueijeibe Nakom Pejume Diwesi. ⁴¹Pablo irü Silas wárapabe Siria nakua beya, Cilicia nakua béyano. Bapongbe jüntükoyene tsakarabábabe pomonaetha, pomonae pejumekowüntsiwi Jesús xua beta pejinompaewa nexa.

Meje yábara poxonae Timoteo kuéyata, Pablo irü Silas kueyatatsibe

16 ¹Pablo irü Silas Derbe tómaratha patópabe. Ekeicha bapoxonae Listra tómaratha patópabe. Baraxota Listra tómaratha káinabe pebin pong pejumekowüntsin Jesús. Bapong pewüng Timoteo. Pena tatsi saya judiomonaewayo.

Barapowa irü pejumekowüntsiwayo Jesús. Timoteo paxa tatsi griegomonaepin. ²Jesús pejumekowüntsiwi, pomonae jinompa Listra tómaratha, irü pomonae Iconio tómaratha jinómpa, barapomonae Timoteo beta yábara páebatsi xua pinae pejüntükoyene wüünaein. ³Pablo ichichipa xua bepunaponáeichatsi Timoteo xua peyawenaenéxatsi. Íchitha matha kopiya kui-itoróbatsi Timoteo xua pewithabinéxatsi xua ichaxota nareixakaeka xua ichaxota pebinxae xeina. Pablo baxua éxana tsipéi jopa ichipaeyo xua judiomonae anáepana peexanaewa tsainchi xua jopa pewithabixae tsipaetsi Timoteo. Tsipéi Pablo yaputane xua judiomonae nawita ichaxota poneibínabe. Barapomonae judiomonae nawithabeiba tsipéi píakui. Matáütano barapomonae judiomonae yaputane xua Timoteo paxa tatsi griegomonaepin. Daxota Timoteo jopa kaena báyatha withabichi tsipéi kanta griegomonaepin jopa daxua exaneibiyo. ⁴Daxita júpaya tómarangtha pateiba, Páblono, Silasno, Timoteono. Barapomonáeyobe tsipáebabe pomonaetha, pomonae Jesús pejumekowüntsiwi pokotsiwa báyatha Jesús pía peitorobi jiwi tatsi irü pítiri jiwi tina cártatha poxonae nakaetuta Jerusalén tómaratha pomonae pejumekowüntsiwi Jesús. ⁵Daxota pomonae penakaetutsi jiwi bara wüünaeya beta jumekowünta. Daxótano pinmonae jumekowünta. Daxita matakabi mataropeicha pinmonae tsóponae xua jumekowüntapona Jesús.

Meje yábara poxonae Pablo kamaita Macedonia nakuapin

⁶Nakom pía Pejumopetünaxü tatsi Pablo jopa kopatichi xua pekueikueijeixa tsane Nakom Pejume Diwesi Asia nákuatha. Daxota Pablobarü Frigia nakua iya pona xuano xua Galacia nakua iya pona. ⁷Misia nakua iyiya. Baraxotiya bekein ichichipa pata Bitinia nákuatha, íchitha Jesús pía Pejumopetünaxü tatsi apusiwa. ⁸Daxota Misia nakua iyiya. Troas tómaratha mene itapatha pata. ⁹Baraxota mérawi Pablo kamaita pebin pong Macedonia nakuapin. Bapong Macedonia nakuapin nantakotungkuwa. Pablo jumedangweya wábatsi: “¡Anetha dénande! Macedonia nakua bérena. ¡Pana yawende!” jeichichi Pablo. ¹⁰Pablo kamaita bapong, daxota paxainxaiñang xua pata warapaenexa Macedonia nakua beya. Irü xang, Lucas tsokuaein, náponang. Paxang tsipéi payaputang xua bara Nakom pana itoroba bárapo nákuatha xua pata kueikueijeixa tsane Jesús pía pexeña jume diwesi tatsi.

Meje yábara poxonae Pablo irü Silas Filipos tómaratha ékabe

¹¹Jératha pawárapang, po naetha po nae pin nae. Paponarüküpang Troas tómarara mene ítapa weya. Wératha bopiya payiyang petunaeto kakuitiya Samotracia tunaeto. Icha matakábitha papatang Neápolis tómaratha. ¹²Ekeicha baxotiya Filipos tómarara bepaiyang, po tómaratha xua romanomonae kueranta ena. Bárapo Filipos tómarara yatsikaya pepa tómarara, pepa Macedonia nakua. Baraxota aiña matakabin paenang. ¹³Kaentakabi, po matakabi pentakeiseikáe matakábitha, tómarara pepuya beya paponang mene ítapa beya, ichaxota judiomonae Nakom wüükeiba. Paenang baraxotiya. Jesús pejume diwésino pakueikueijang yabüxitha powaxi xua kou báyatha nakaetuta. ¹⁴Barapówaxi kaewayo jíwana pana jumetane. Barapowa pewüng Lidia, Tiatira tomarapiwayo. Bapowa kaenaeteiba papabürü, po papabürü müü tsofia po papabürü aiña matomang. Barapowa wüünae jainteiba Nakom. Barapowa beta jumetane pokotsiwa Pablo paeba. Nakom pong jiwi

Pekanamataxeinaein, barapowa icha jüntükoyene kana éxanatsi xua peexanae-nexa pokotsiwa Pablo paeba. ¹⁵Barapowa bautisábatsi, yawa piamonae matabüyo xüyo tatsi bautisábatsi. Bapoxonae bapowa pana barái, jeye:

—Icha bara metha xaniwaicha panantaxéiname xua Jesús tajumekowüntsiwayo, pong jiwi Pekanamataxeinaein, néxata antha tabotha pamaire, pana nejéi Lidia. Pekono juméyotha pana barái, bepa pinae xua pía botha pamaichin.

¹⁶Icha matakeitha poxonae námtotha paenapónang xua poxonae paponang icha-xota jiwi wüükeiba Nakomtha, baxota yábüyo pakaxinang námtotha. Barapowayo yakauríbatsi. Barapowayo pebusikuítaetaewáyotsi xua amanaya petanakuichiwa pía pentakaponaein nexa. Matáütano barapowayo parátixi kaetuba pía pentakaponaein tatsi nexa xua bapowa pekueikueije tsaibixae pokotsiwa kauri yaputane éxana. ¹⁷Barapowa, Pablo, irü paxang pana puwabapona. Bapowa wawaya namchi, jeye:

—¡Barapomonae tanakuita Nakom nexa, po Nakom itabókotha eka! ¡Paka muxutsipaeba Nakom pía pekapanenebiyáe diwesi! jei barapowayo.

¹⁸Bapowa baxua exaneiba aiña matakabin. Pablo amuxufáetabi. Pablo barapowa taitaweta kauri. Pablo káuritha namchi, jeye:

—Jesucristo wüngtha kaitawétatsi. Naetsiríware. Xubaríware bapowayo, jei Pablo.

Bara kaena barapowayo kopatábatsi kauri.

¹⁹Barapoxonae yábüyo kuitainchi pía pentakaponáewichi tatsi xua ekeicha jopa amanaya takaetubi tsane parátixi barapomonae nexa. Daxota Pablo Silasno wáetabatsibe. Pematikaitorobi bicheito jiwi peitabaratha kapóinchibe tómara pánatha. ²⁰Barapomonae Pablo irü Silas kuaranotatsibe peitabaratha tatsi pomonae jiwi peyábara paebiwi xua penatsikuentsiwa xua abe peexanaexae. Barapomonaetha jeye:

—Bapongbe judiomonae jintongbe, watómaratha bapongbe wámonae kuitsákabatsi xua najumematsontsónoba. ²¹Barapongbe piakuikoyeneya naka kuiduba. Bárapo koyene jopa be kopatichi xua wajumetaenexa xuano xua waexanaenexa, tsipéi romanomonaetsi, jei barapomonae.

²²Bara néxata Pablo irü Silas barü anáepana düküpatsibe jiwi. Matáütano pomonae jiwi peyábara paebiwi xua penatsikuentsiwa xua abe peexanaexae, barapomonae ichamonae kui-itoróbatsi xua Pablo irü Silas pejuma xuenaxubinexatsibe paparuwa, bapoxonae xua pekuainchinexatsibe iwatongtha. ²³Matha bichokono kuaintatsibe. Bapoxonae kapónatsibe jiwi pekübibó beya. Pong peyábara ekeibin pomonae kübébatsi jiwi pekübibotha bapong kui-itoróbatsi jeichichi: “Beta yapu-eénare, xua jopa penaetsiriwanéxabe”, jeichichi barapong. ²⁴Poxonae bapong jumetane pokotsiwa pentakaponaei kui-itoroba, bapoxonae po tutu tajü beya baxota Pablo irü Silas kuaranoyatsibe. Bichokono naepáewatha taxukateitabetsibe jiwi petaxu kateibabináewatha.

²⁵Papaetha Pablo irü Silas Nakomtha tsipáebabe yawa Nakom pijumeweino naxúnabe. Ichamonae baraxota kübébatsi jiwi pekübibotha. Barapomonae Pablo irü Silas jumetayénatsibe. ²⁶Barapoxonae jemeicha bichokono jijiyataxuba. Ibówano jijiyataxúbano xua bómüxü peyüütanotsiwa. Bapoxonae jemeicha naiña saya dubenanaya peboupang. Matáütano pomonae jiwi pekübibotha jébatsi daxita taxunain sarabábatsi. ²⁷Pong peyábara ekeibin pomonae kübébatsi, bapong nako-sataxuba. Bapong tane xua bárapo jiwi pekübibó saya peboupa umenarúkupa.

Bapoxonae pía kusi namarajonta. Muxu penabexubi, tsipéi bapong nantaxeina xua bara daxita panenebiya, Pablo, Silasno irü ichamonaeno. ²⁸Íchitha Pablo waba bapong pong peyábara ekeibin pomonae kübébatsi jiwi pekübibotha, jeye:

—¡Jopa jiñakoutha nabexubinde, tsipéi ápara kataunxuae xote pajinompang! jei Pablo.

²⁹Néxata pong peyábara ekeibin pomonae kübébatsi jiwi pekübibotha, wawaya namchi, jeye: “Painta itanatábare”, jei. Jijiyeya kuinaependena. Pablo irü Silas imoxoyo petáxutha pentabokototha kakuita taungkuatabatsibe. ³⁰Bapoxonae bapong pong peyábara ekeibin pomonae kübébatsi jiwi pekübibotha, bapong Pablo irü Silas pesato bekayatsibe. Pablo irü Silas baraichichibe, jeye:

—Já, ¿eta bichokuaein tsane xua tana nekapanepeawa tsane Nakom beicha? jei bapong.

³¹Pablo irü Silas jumenótabe, jeye:

—Jumekowüinde Jesús pong jiwi Pekanamataxeinaein, bapoxonae nekakapane-páe jintom tsane irü jiñamonae matabüxüyo pekapanenebiyáe jiwi tsainchi, jeibe.

³²Tsipáebabe bapongtha, Jesús pong jiwi Pekanamataxeinaein, pía pexeíña jume diwesi tatsi. Matáütano tsipáebabe piamonae matabüxüyo jíwitha tatsi, pomonae pía botha peta-enaexatsi. ³³Kaena barapoxonae, pong peyábara ekeibin pomonae kübébatsi jiwi pekübibotha, Pablo, irü Silas wang kiatátsibe. Bapoxonae bapong bautisábatsi irü piamonae matabüxüyo tatsi bautisábatsi. Pablo, irü Silas bautisábabe. ³⁴Bapoxonae Pablo irü Silas bo beya kapónatsibe. Pexaewa katatsibe. Bapong piamonae matabüxüyo tátsino bichokono jüntükoyene weiweina pejume-kowüntsixa Nakom.

³⁵Pomonae jiwi peyábara paebiwi penatsikuentisiwa xua abe peexanaexae, barapomonae kaemúbotha itoroba, policiamonae itoróbatsi ichaxota pong peyábara ekeibin pomonae kübébatsi jiwi pekübibotha. Bapong kópatatsi xua bara Pablo irü Silas pepukopatsinexatsibe. ³⁶Néxata pong jiwi peyábara ekeibin pomonae kübébatsi jiwi pekübibotha, bapong Pablo baraichi, jeye:

—Pomonae jiwi peyábara paebiwi penatsikuentisiwa xua abe peexanaexae, barapomonae nekui-itoroba xua tapaka ishanaxubiwa tsáinchibe. Bara paka itaküü-pabe xua bara papuseikáenamebe, jei bapong.

³⁷Íchitha Pablo barái policiamonaetha, jeye:

—Ápara barapomonae pana kuainta pepa bicheito peitabaratha. Dakotsiwa barapomonae abe painta éxana. Seikaya ápara romanomonae pang. Kopiya matha jopa pana kaponáeyobe ichaxota pong jiwi peyábara paebin xua penatsikuentisiwa xua abe peexanaexae. Saya barapomonae piakoutha paeba xua abe paexanangbe. Daxota jiwi pekübibotha pana kapónabe. Deta aena poxonae juntukuru pana ishanaxuba páebabe moya namicha pana itoróbabe. Pentakaponaewi patsipáebare, pomonae pana kuainta, bü jame barapomonae piakoutha pana nepusotábabe, jei Pablo.

³⁸Baxua policiamonae báyatha jumeyopita pomonaetha, pomonae jiwi peyábara paebiwi xua penatsikuentisiwa xua abe peexanaexae. Barapomonae bichokono junuwa poxonae jumetane xua Pablo irü Silas ápara romanomonaepinbe. ³⁹Barapomonae ponarúkupa jiwi pekübibotha, Pablo, irü Silas siwaponae póinchibe peúruxae xua báyatha Pablo, irü Silas kuaintatsibe. Barapomonae Pablo irü Silas tsipáebatsibe, jeichichibe: “Maisha paaurang tsipéi abe paka exanátsibe.

Moya papónarebe. Jopa po tómarathe paekaeindebe. Jopa pana neyopichinde”, jei. ⁴⁰Poxonae Pablo irü Silas jiwi pekübibó wenaetabíyabe, Lidia píabo tatsi beíyabe. Siwaponae pónabe pomonae pejumekowüntsíwixae Jesús. Barapomonaetha bapongbe jüntükoyene tsakábame xua wüünaeya pejinompaewa tsane. Bapoxonae bara wewarapíyabe.

Meje yábara poxonae Tesalónica tomarapiwi namtsébiya anaepanaeya wawái xua Pablo, irü Silas pekasebixáetsibe

17 ¹Pablo irü Silas Anfípolis tómara íyabe. Apolonia tómara iyabeno. Barapoxonae Tesalónica tómaratha patópabe po tómara ichaxota judiomonae pía penakaetútsibo tatsi ungua. ²Pablo piákui xeina xua judiomonae pía penakaetutsi bongtha tatsi pateiba. Daxota baxota eka akoibi po semánabe. Matáütano daxita pentakeiseikáe matakábintha bárapo judiomonae pía penakaetutsibotha Pablo irü Silas kuidúbabe. ³Pokotsiwa Nakom Pejume Diwesi paeba, baxua Pablo tsipaeba pokoyene xua pinae pong Mesías bewa bexubinchi ichamonae, xuano xua pinae bapoxonae ekeicha asüü tsane. Pablo jeye barapomonaetha:

—Pong xua Jesús xuaunxuae yábara paka muxutsipáebatsi, bapong ápara bara Mesías, jei Pablo.

⁴Ichamonae, judiomonae jumekowünta. Barapomonae Pablo, irü Silas kaemonae naéxanatsibe. Barichi pin bicheitong griegomonae jumekowüntarü, pomonae Nakom wüünae jáintatsi. Barapomonae jumekowünta Jesús. Írürü aiña yábüxi bicheitong jumekowünta Jesús powaxi barükui-iturajinéibatsi xua jiwi barükui-iturajineiba. ⁵Íchitha icha judiomonae pomonae jopa pejumekowüntsiwi, baxua yábara uwa. Daxota barapomonae pebiwi barü nakaetuba po pebiwi peajüntükoyeneyapubewi xua po pebiwi saya pejinompaewi nám-tongtha. Daxita barapomonae namtsébiya wawái tómaratha. Jasón pía botha tatsi anaepanaya jojoniya xua Pablo irü Silas pejeichinéxatsibe xua pewaetabinexatsibe xuano xua pekaenaetsinexatsibe jíwitha. ⁶Íchitha baxota Pablo irü Silas jopa taebíchibe. Daxota katsaya wáetabatsi Jasón, irü ichamonae pomonae pejumekowüntsíwixae Jesús. Pablo irü Silas wáetabatsibe. Daxita barapomonae pentakaponáe jíwitha bekayíyatsi. Daxita barapomonae yábara wawaichiya jéichibe:

—¡Bárapo pebinbe daxita nákuangtha abe paebadukuauebíyabe yawa waxaiña bekuijoparénabe! ⁷Jasón barapomonae matenta weiweinaya waba pía botha. Jasón pía botha maitékabe. Daxita Pablobarü jopa exanaeyo po peitorobi koyenewang xua pong romanomonae itorobiya pía pepa peewatsinchi itoroba. Matáütano barapomonae paeba xua pinae ichüng pópona pong jiwi itorobiya pía pepa peewatsinchi, bapong pinae Jesús, xua jopa yábara kanantaxeinaetsi pong romanomonae itorobiya pía pepa peewatsinchi, jei barapomonae xua namtsébiya wawái.

⁸Poxonae baxua jumetane, pentakaponaewi irü pomonae xua baxota umena, daxita barapomonae anaepanaeya namtsébiya wawái. ⁹Bárapo pentakaponaewi wekobenota parátixi xua Jasón irü pomonae pejumekowüntsiwi wekobenótatsi. Bárapo pentakaponaewi namchi xua pinae ekeicha kaewa katsinchi Jasón bárapo parátixi poxonae Pablobarü tómara weya ponaena. Bapoxonae pentakaponaewi Pablo barü pusorobábatsi pewarapaenexa tsane tómara weya.

Meje yábara poxonae Pablo irü Silas Berea tómaratha popónabe

¹⁰Bárapo merawitha pomonae irü pejumekowüntsíwixae Jesús, barapomonae Pablo, irü Silas itorobatsibe xua naiña pewarapaenéxabe Berea tómaraba beya. Poxonae bárapo tómaratha patopíyabe judiomonae pía penakaetutsibotha tatsi joníyabe. ¹¹Judiomonae, pomonae Berea tomarapiwi, barapomonae pejäntükoyene wüünaewi icha be jopa Tesalónica tómaratha ichiyo. Jame bárapo Berea tomarapiwi bara wüünaeya jumetane Jesús pejume diwesi. Daxita matakabi barapomonae Nakom Pejume Diwésitha yorobeiba pía yaputaetsi bárapo diwesi, po diwesi xua Pablo irü Silas páebabe icha metha báraxua bara xaiñéibe. ¹²Daxota pinmonae jumekowünta Jesús. Judiomonae jumekowünta Jesús. Irü griegomonae jumekowüntano, yábüxi, irü pebiwi. Powaxi jumekowünta Jesús, barapowaxitha jäwi barükui-iturajineiba. ¹³Judiomonae, Tesalónica tomaramonae, jumetane xua Pablo kuiduba Nakom Pejume Diwesi Berea tómaratha. Daxota bapomonae Berea tómaraba beiyiya. Baxotiya barapomonae namtsébiya wawái xua Pablo irü Silas pekasebixáetsibe. ¹⁴Íchitha pomonae pejumekowüntsíwixae Jesús, Pablo itorobatsi xua naiña peponaenexa imoxoyo marmene beya poxonae kataunxuae Silas irü Timoteo ékabe Berea tómaratha. ¹⁵Pomonae Pablo kuéyabatsi barapomonae Pablo punaxubathópatsi Atenas tómaratha. Barapomonae ekeicha kaibe nawibiya Berea tómaraba beya. Barapomonae Silas irü Timoteo tsipáebatsibe xua Pablo najumekaruta xua bepa pinae Silas irü Timoteo naiña patopáenabe Atenas tómaratha.

Meje yábara poxonae Pablo Atenas tómaratha pópona

¹⁶Pablo éwata, Silas irü Timoteo éwatatsibe Atenas tómaratha. Barapoxonae bárapo tómaratha Pablo tane xua barapomonae aiña ibo nakomüng xeina. Daxota bichokono yábara najüntükoyene éxaba. ¹⁷Daxota Pablo tsipaeba Nakom Pejume Diwesi judiomonaetha judiomonae pía penakaetutsibotha tatsi. Matáütano baxótano tsipaeba pomonae bekein jopa judiomonae naexanaeyo, barapomonae Nakom wüünae jáintatsi. Barichi daxita matakabi pomonae Pablo kaxibeiba pomonae nakaetuteiba tómaraba pin pánatha barapomonaéthano Pablo kuidubeiba Nakom Pejume Diwesi. ¹⁸Barichi griegomonae ichichipa xua pejumetaewa pokotsiwa Pablo paeba. Ichamonae griegomonae itapeta jumekowünta pokotsiwa epicureomonae kuiduba. Irü ichamonae griegomonae itapeta jumekowünta pokotsiwa estoicomonae kuiduba. Barapomonaebe Pablo tsipaeba. Bapoxonae ichamonae Pablo yábara jeichichi, jeye:

—¿Eta xua bapong naka barái tsipae, pong xua jopa juniya kueikueijeji tsaibiyo? jei.

Ichamonae jeye:

—Mexeya maisha bapong kueikueijeji pía nakomüng nexa, jei.

Barapomonae báraxua paeba, tsipéi Pablo Jesús pía pexeña jume diwesi paeba dukuanaebiya, matáütano poxoru paeba xua Jesús ekeicha pinae asüü. ¹⁹Néxata ichamonae Pablo téikatsi pekaponanéxatsi atorórotha ichaxota ba pentakaponaewi nakaetuteiba, poxonae ichauxi muxu peexaneibi. Bárapo pentakaponaewi matabüxüyo pewüng Areópago, Pablo yáñabatsi, jeichichi:

—Pana netsipáebare be payábara yaputaein po diwesi xua kuidubiya paeba dukuanaebíyame. ²⁰Xuaunxuae pana tsipáebame, bárapo diwesi jopa payaputaetíno

báyatha. Pata bekein yábara yaputaetsi xua po diwesi baxua yábara kaunuta, jei barapomonaе.

²¹Atenas tomaramonaе irü pomonaе penanapaincha jinompaewi xua icha nakua wérena peponaewi, pomonaе ánoxuae jinompa xote, daxita barapomonaе ü saya pepaеbeibi. Yawa saya ü kou paebeiba poxonaе pena jume jumetaiba, saya baxua paebeiba.

²²Néxata Pablo Areópago wüing matabüxyüyo peitabaratha tatsi asiya unguataba. Pablo namchi, jeye:

“Paxam Atenas tomaramonaе pam. Bara paka kuiyaputainchi xua paiña nakomüing wüünaе pajáintame. ²³Poxonaе ponang ichaxota paiña nakomüing wüünaе pajaintathopéibame tang aiña ibo nakom matabong. Matáütano tang baxota, ichaxota Nakom wüünaе pajáintame, xua kou ichaxota pokotsíwatha xua be pexaethopaewa xua ichaxota duwéi patautathópame baxua kou pantatinadútame. Baxua panamchim kouje: ‘Bárapo Nakom xua pong jiwi jopa yaputaeyo’, pajam. Xuaunxuae kou asiya pawüingdútame pong, bapong, ápara pepa Nakom. Xuaunxuae po diwesi yábara paka tsipáebatsi, barapong pejume diwesi ápara.

²⁴”Barapong pong pepa Nakom, daxita bárapo ira éxana. Daxita karepaya jüpaya éxana. Barapong pong piakoya peewatsin bárapo susato nakuano, yawa bárapo itabókono. Po bong patsiakabéibame Nakom xua po botha jiwi wüünaе pejaintithopeibinexa Nakom, ápara ba Nakom jopa poponaeyo barapókotsi botha. ²⁵Xua pokotsiwang jiwi taéxana Nakom nexa, báraxua Nakom jopa nantawenonébiyo. Bárapo Nakom saya piakoutha daxita nákata éxana. Peayapusúüwano, naka kata. Daxita bárapo petusato tutu joibo naka kata. Baxuang daxita amanaya saya nákata éxana. Daxita icháuxino múxuna éxanano.

²⁶”Kopiya meisha bapong Nakom kompa éxana pebin, bara kaein. Bárapo kae jánatha daxita yanakua éxana jiwi. Daxita wüünaе tsiwanaeya yaputáneno poxonaе naexanaena daxita jiwi. Matáütano yaputane xua eta po weiyobetha jinompaena. Matáütano yaputane xua pía írangtha bexa naexanumenaponaena. ²⁷Icha pebin kuita kanantaxeináetsipa Nakom, bara Nakom kana exanáetsipa xua bapong bara Nakom pejumekowüntsiwa tsainchi. Nakom jopa tajü ekaeyo íchitha bara waxantha imoxoyo pópona. ²⁸Nakom pepoponaexae daxota asüü jinómpatsi. Nakom naka éxana, daxota beta nakuiyénabatsi, yawa daxota wakobexitha ü waexanáe. Ichaunxuae ichin xua paka tsipáebatsi barichi paiñamonaе baxua paeba pomonaе diwesi petinaewi poxonaе jei, ‘Nakom ápara pía jíwichi waxainchi’, jei. ²⁹Waxainchi Nakom pía jíwichixaetsi, daxota jopa bewa nantaxeinaetsi xua Nakom po Nakom pepa Nakom, ápara jüpa po nakomüing jiwi éxana pekóbetha. Bárapo nakomüing po nakomüing xua jiwi kana éxana xua oro naintong yawa xua plata naintong yawa xua ibowang, saya jiwi pía koyenekuirutha nantaxeina xua peexanaewa bárapo nakomüing. ³⁰Matha kopiya báyatha Nakom saya beitaemaya tane jiwi abe pía peexanaewang tatsi, tsipéi barapomonaе jopa yábara yaputaeyo pokotsiwa Nakom ichichipa. Íchitha matapaiña ánoxuae daxita jiwi Nakom kui-itoroba xua petsita-xeinaenéxatsi icha jüntükoyene, xua jopa ekeicha peexanaenexa abe peéxanae koyene. Saya ü nenantaxeinaenexa tsane pokotsiwa Nakom ichichipa. ³¹Nakom matakabi wüingduta xua po mataketha tsane Jesús kaetukaetutetsina daxita jiwi pía peitabaratha. Bárapo matakábitha tsane Jesús

xaniwaicha yábara paeбина daxita jiwi xua penatsikuentsiwa xua abe peexanae-xae. Pomonae xua abe éxana itawetsinchi, pomonae xua wüünae éxana jopa itawetsi tsainchi. Nakom itapeta, xua Jesús tsi-itapétatsi bárapo penakuichiwa tsipéi Jesús saya xaniwaicha pepaebin. Poxonae Nakom Jesús asüü éxanatsi petüpaewitha, Nakom naka tsita itapeñaxeina xua ápara Jesús tsi-itapétatsi bárapo penakuichiwa”, jei Pablo.

³²Poxonae barapomonae Pablo jumeta인치 pokoyene xua ekeicha petüpaewi pinae asüü tsaibi tsane, ichamonae Pablo jumekuikapónatsi nawita. Ichamonae namchi, jeye:

—Bexa paka jumetaeinchí ekeicha xuaunxuae páebame, jeichichi Pablo.

³³Néxata Pablo kuenta pónataba barapomonae. ³⁴Íchitha ichamonae Pablo punapoinchi yawa bapomonae Jesús jumekowúntatsi. Ichüing barapomonae jíwana pewüing Dionisio. Bapong Dionisio Areópago wüing matabüxüyo jíwanapin. Petsiriwa powa irü nápona powa irü pejumekowüntsixae Jesús, bapowa pewüing Dámaris. Ichamonae irü nápona pomonae írürü Jesús pejumekowüntsíwichi.

Meje yábara poxonae Pablo Corinto tómaratha pópona

18 ¹Pírapae ekeicha Pablo Atenas tómarara wewarapiya. Corinto tómarara bewarapiya. ²Baraxota Pablo kaxina judiomonaepin, pong pewüing Aquila. Bapong Ponto nakuapin. Píowa tatsi pewüing Priscila. Piséuribe mexuaetha Italia nakua wewaraparénabe, tsipéi pong romanomonae itorobiya pía pepa peewatsinchi pong pewüing Claudio, bapong judiomonae daxita itoróbatsi xua pewarapaewa tsane bárapo Roma tómarara weya. Daxota Corinto tómaratha patópabe. Pablo siwaponna, Aquila petsiríwano siwaponnaena póinchibe. ³Pablo naéka Aquila pía botha tsipéi bapong pía penakuichiwiyo irü xeina icha Aquila piáwabe ichi. Pía penakuichiwiyo xeina xua chivoboko boutong éxana. Aquila piowabe nakuítabe, irü Pablo piáwa nakuita. ⁴Daxita matakabi, po matakábintha pentakeiseikáe matakábintha Pablo poneiba judiomonae pía penakaetutsibotha tatsi. Baxota Pablo jumedangweya kueikueijeí pomonaetha pepa judiomonaetha irü pomonaetha jopa judiomonae naexanaeyo. Pablo kueikueijeí barapomonaetha tsipéi ichichipa xua barapomonae Jesús pejumekowüntsiwa tsainchi.

⁵Poxonae Silas irü Timoteo Macedonia nakua wepatoparenabe, barapoxonae daxita matakábintha Pablo kuidubeiba judiomonaetha. Pablo paeба xua pinae pong Jesús jeichichi xua ápara pinae bapong ápara bara Mesías, pong xua pinae barapomonae pewüünae ewatsixae. ⁶Barapomonae tamrópata pítaba xua Pablo abe yábara páebatsi yawa tsümüjume barü páebatsi. Néxata Pablo pepatomeicha nama paparuwa nünütaba. Baxua éxana poxoru barapomonae anthüfaetabiya jumetane. Pablo barái barapomonae, jeye:

—Bara ápara paiñakoutha icha pana natsikuéntame xua daxota poxonae pawerawerakáename. Jopa takouthiño xua jopa paxeinaem tsane peajüntükuiyapüsüwa, tsipéi báyatha yábara paka tsipáebatsi bárapo peajumeyapusüü diwesi. Tha ánoxuae Nakom Pejume Diwesi kaponaetsi pomonaetha, pomonae jopa judiomonae naexanaeyo, jei Pablo.

⁷Barapoxonae Pablo judiomonae pía penakaetútsibo tatsi wewarapiya. Pablo pona Justo píabo beya tatsi. Bapong Justo, icha wüing xeina, Ticio baraichi. Bapong wüünae pejainteibin Nakom. Bapong yabo ungkua ichaxota imoxoyo

judiomonae pía penakaetútsibo tatsi pejumawérena. ⁸Irü Crispo, pong judiomonae pía penakaetútsibo peyapukaungkuaein, bapong piamonae matabüxüyo barü jumekowünta Jesús pong jiwi Pekanamataxeinaein. Barichi pinmonae pomonae Corinto tómaratha jinompa poxonae jumetane Nakom Pejume Diwesi, bapomonae irü jumekowünta Jesús. Pomonae pejumekowüntsiwi barapomonae daxita bautisábatsi. ⁹Bapoxonae Pablo mérawi kamaitungkua Nakom pong Pekanamataxeinaein jiwi. Pablo baráichichi, jeye: “Jopa junuwinde. Nakom Pejume Diwesi paeba dukuanaebíyama. Jinxoba moyam. ¹⁰Tsipéi ápara, xang kabarü popoinchi, daxota ichamonae jopa itaküüpaetsi xua abe neka-exanaewa. Bárapo tómarathe tamonae, pinmonae ápara inta jinompa”, jei Jesús. ¹¹Pablo baxota pópona dieciocho po xometíyobe Corinto tómaratha. Baxota Pablo kuiduba dukuanaebiya Nakom Pejume Diwesi.

¹²Írürü pebin pópona pong pewüng Galión. Bapong Galión Acaya nakuapiwi pía peyanakua ewatsinchi éxanatsi. Barapoxonae judiomonae pomonae Acaya tomarapiwi nakaetuta Pablo yábara nakaetútatsi pekasebixaetsi xua pekaponaenéxatsi Galión peitabaratha tatsi. ¹³Judiomonae namchi, Galión baraichi, jeye:

—Poxonae bapong Pablo paeba dukuanaebeiba pinmonae báraxua jumejéi tsaibi. Pablo kuidubeiba jiwi, xua pinae jame bewa jiwi wüünae jainteibi Nakom pokoyene jopa jüpaeyo Moisés pía peitorobi koyenewa tatsi, jei barapomonae.

¹⁴Pablo bara muxu pepaebi, irü Galión paebaxóyarü. Néxata barapong namchi judiomonae baraichi, jeye:

—Ü judiomonae pam. Paiñaxoba pana tsipáebame. Jame icha bapong kaiba, icha jintong bexotsi, icha ichawiyo éxana xua abe, metha jame bapoxonae paka jumejéi tsipaetsi. Íchitha bapong jopa abe exanaeyo. ¹⁵Saya ü payábara kueikueijam tsaibi barompaya paiñakuí xua paiña amo jiwi piakuikoyeneya tatsi. Moya baxua paxam paexande pokotsiwa Pablo payábara páebame. Tsipéi jopa be pákata naexanaetsi be pong jiwi peyábara paebin xua penatsikuentsiwa xua abe peexanaexae. Moya paiñakoutha pakui-itawere, jei Galión.

¹⁶Bapoxonae Galión pesato benapuna torobábiya bárapo judiomonae. ¹⁷Bara néxata daxita judiomonae Sóstenes wáetabatsi pong judiomonae pía penakaetútsibo tatsi peewatsin. Barapomonae Sóstenes bütsi Galión peitabaratha tatsi. Dáichitha baxua Galión saya kuitane, jopa tsita aiñakuichi.

Meje yábara poxonae Pablo ekeicha Antioquía tómaru beya kaibeya wárapa. Baxotiya tamrópata pítaba xua wárapa akoibi pokuiyobetha xua pekueikueijeinexa Jesús pía pexeña jume diwesi tatsi

¹⁸Pablo áwiya kame baxota pópona aiña matakabin Corinto tómaratha. Bapoxonae nama kopiya napéyaba pomonae pejumekowüntsíwixae Jesús. Siria nakua bewarapiya wératha, po naetha po nae pin nae. Aquilano piowabe napónabe. Barapoxonae juntukuru bara ponatabíchiba kopiya matha nantakatepateya sibaxuba Cencrea tómaratha xua penayábara tsita itapeiñaxeinaenexa xua nayábara jume-kuiwetsina xua exanaena xua báyatha Nakomtha nayábara tsiwüünae muxuduta. ¹⁹Bara Efeso tómaratha patarúküpa. Baxota Pablo Aquila piséuribe xubetatsibe pía ponaetsi ichaxota judiomonae nakaetuta barompaya pía penakaetutsibotha. Baraxota Pablo barü kueikueijeinei bárapo judiomonae. ²⁰Efeso tomarapiwi bekein Pablo apusíwatsi xua abü peekaewa tsane. Íchitha Pablo juntukuru jopa beekaeyo

baxota aiña matakabin. ²¹Néxata Pablo napéyaba barapomona. Pablo namchi, jeye: “Tha nama Jerusalén tómarabe beekiyaetsi. Tha na-ewatekiyaetsi xua jiwi petsinakaetutsinexa pexaewa xua penabanaewa. Metha ekeicha paka taeyoparenaeinchi icha Nakom metha newüünae ichipaena”, jei Pablo.

—Bara warapataba Pablo. Efeso tómarabe wewarapiya jératha po naetha po nae pin nae. ²²Poxona Cesarea tómaratha patopa Jerusalén tómarabe beíya, pía jakobichi pomona Jesús pejumekowüntsíwichi. Bapoxona ekeicha Antioquía tómarabe bewarapiya. ²³Poxona bara juntukuru yaáíña merawin jopa baxotiya ekeicha icha nákuabe bewarapiya. Galacia nakua bewarapíyano. Frigia nakua bewarapíyano. Baxota Jesús pejume diwesi kuiduba Pablo pomonaetha, pomona Jesús pejumekowüntsíwi. Pablo jüntükoyene tsakáraba xua barapomona ajüntüyapüsüya pejumekowünta ponaewa tsane Jesús.

Meje yábara poxona Apolos Nakom Pejume Diwesi kueikueije Efeso tómaratha

²⁴Kaein judiomona jíwanapin Efeso tómaratha patopa. Bapong pewüing Apolos. Bapong seikaya irü Alejandría tomarapin. Bapong Nakom Pejume Diwesi peyaputaein yawa beta kakueikueije bárapo diwesi. ²⁵Apolos beta yábara kuidúbatsi ichamona xua Jesús, pong Pekanamataxeinaein jiwi, píakui. Jüntükoyene weiweinyaya paeba. Xaniwaicha piamona kuiduba Jesús yábara bekein saya yaputane xua pokoyene pinae Juan pebautisabiwa jiwi xua icha jüntükoyene pexeinaenexa Nakomtha. ²⁶Apolos judiomona pía penakaetutsibotha tatsi bichokono jüntükoyene wüünaeya kueikueije Nakom Pejume Diwesi. Priscila, Aquila piowabe jumetánebe bapong. Wábabe bapong, píabo bekáyabe. Aquila, Priscila pía pebinbe yábara muxutsidútabe icha diwesi xua Nakom pía pepa diwesi po diwesi xua jopa yaputaeyo. ²⁷Apolos ichichipa xua peponaewa Acaya nakua beya. Bapoxona pomona pejumekowüntsíwixae Jesús, Apolos kanatsíwana tinaxotsi carta xua tatínatsi pomona pejumekowüntsíwixae Jesús. Daxota barapomona tatina xua Apolos pententa weiweinyaya wabinéxatsi. Poxona Apolos patopa Acaya nákuatha, bapong yawena pomonaetha, pomona báyatha Nakom jumekowüntatsi pomona Nakom peantobexae. ²⁸Apolos daxita jiwi peitabaratha jume amanáyaba poxona Jesús beta yábara páebatsi. Daxota barapomona judiomona jopa itaküüpaetsi xua pejumenotsíwatsi bapong pokoyene xua poxona bapong abe pepaebiwa. Poxona Apolos yóroba Nakom Pejume Diwesi bapong tsita itapeñaxeina xua Jesús ápara Mesías pong Nakom itorobika.

Meje yábara poxona Pablo Efeso tómaratha pópona

19 ¹Poxona Apolos Corinto tómaratha eka, bapoxona irü Pablo seikaya dukuanaebiya daxita tómarang jüpayaya, po tómarangtha ichaxota atorong. Efeso tómaratha patopa, baxota Pablo kaxina ichamona pomona Cristo pejumekowüntsíwichi. ²Pablo yáíñaba barapomona, jeye:

—¿Báyatha Nakom pía Pejumopetünaxü tatsi paiña jüntükoyénetha pákata pata poxona pajumekowüntame Jesús? jei.

Barapomona Pablo jumenótatsi, jeye:

—Jume, jopa payaputaieño. ¿Eta pokotsiwara xua Nakom pía Pejumopetünaxü tatsi? Báyatha jopa payábara jumetaieño baxua, jei.

³Pablo yáñaba, jeye:

—¿Eta pabichim poxonae pajumekowúntame poxonae paka bautisaba? jei.

Pablo jumenótatsi, jeye:

—Ápara saya payábara jumekowúntang xua Juan kuiduba, pokoyene xua Juan itoróbatsi xua jiwi pebautisabíwatsi, jei.

⁴Pablo jumenota, jeye:

—Aja, Juan bautisaba pomonaetha, pomonae abe pía peéxanae kuirukoyenein nakuibarapenta xua pomonae pejumekowúntsiwíchi Nakom. Daxota metha Juan piamonaetha barái: ‘Pajumekowúnde pong xua tsíwana patopang’, jei Juan piamonaetha. Xua Juan namchi: ‘Pong xua tsíwana patopang’, jei, bapong ápara Jesús, pong ‘Mesías’ baraichi, jei Pablo.

⁵Poxonae báraxua Pablo jumetaerükúpatsi, kaena barapomonae bautisábatsi Jesús pía pewüingtha tatsi pong Pekanamataxeinaein jiwi. ⁶Poxonae Pablo barapomonae pekóbetha matajáyaba, barapoxonae barapong Nakom pía Pejumopetünaxü tatsi barapomonae tapátatsi pejüntükoyeneintha, yawa kueikueijeji exanéibatsi icha jumeintha xua ichamonae pía jume tatsi. Matáütano barapoxonae barapomonae kueikueijeji Nakom Pejume Diwesi pokotsiwa Nakom yaputane éxana. ⁷Daxita bapomonae pomonae baxota ena doce pomonae matabüxúyobe pomonae xua Jesús pejumekowúntsixaetsi.

⁸Baxota Efeso tómaratha, Pablo judiomonae pía penakaetutsibotha tatsi poneiba akoibi po xometíyobetha Nakom Pejume Diwesi pekueikueijejiwanexa. Bapong jopa junuwiyo poxonae kueikueijeji. Matáütano yábara tsipaeba pokoyene Nakom waba jiwi petanaexanaenéxatsi piamonae tatsi pomonae itorobiya peewatsixae. ⁹Íchitha ichamonae aichaxaibi jumetane. Jopa juntukuru bejumekowúntsiyo. Saya barapomonae jiwi peitütha tatsi abe yábara paeba Jesús pía pena pekuidubiwa tatsi. Néxata barapomonae pía xaiña weya tatsi Pablo napítaba. Saya meisha barü pona pomonae Jesús pejumekowúntsiwíchi po bo penakuidúbibo beya. Pebin pong pewüing Tirano bárapo bo, bapong píabo tatsi. Bárapo botha Pablo daxita matakabi Nakom Pejume Diwesi kuidubeiba. ¹⁰Baraxota Pablo aiña weibe paeba dukuanaebiya Nakom Pejume Diwesi. Daxita pomonae Asia nakuapiwi judiomonae irü pomonae jopa judiomonae naexanaeyo barapomonae jumekowúnta Jesús pía pexeña jume diwesi tatsi, pong Pekanamataxeinaein jiwi. ¹¹Nakom Pablo yawénatsi xua pexeña petsita-itiütsi koyewang éxana Nakom pía peayapusúüwatha tatsi. ¹²Ichamonae paparuwang yawa paiñawerang kápona Pablo beya xua bárapo paparúwangtha Pablo peperüü jayabinéxatsi. Bárapo paparuwang nata kápona peátene jíwítha. Bapoxonae bárapo paparúwangtha naiña axaibi tsouneibi. Irü pomonae yakauríbatsi bárapo paparúwangtha nakapanenébiya tsai. Barapomonae kauri wepu ponéibatsi.

¹³Ichamonae judiomonae, pomonae saya pejinompaewi, barapomonae piakui xeina xua jiwi taitawetéibatsi kauri. Barapomonae ichichipa Jesús wüing wüingtáibatsi poxonae itaweta kauri. Barapomonae kaurimonae baraichi, jeye: “¡Bara Jesús pewüingtha paka itawétatsi, pong Pekanamataxeinaein jiwi, xua pong Pablo wüing yopita dukuanaebiya!” jei barapomonae.

¹⁴Irü barapoxónaerü judiomonaepin pong pewüing Esceva, xeina siete póyobe tatsi pebiwi. Barichi bárapo siete póyobe wüing wüingtáibatsi Jesús, poxonae itaweta kauri. Esceva sacerdotemonae pía pentakaponaewi jíwana tatsi. ¹⁵Poxonae barapomonae paeba bárapo wüingtha, Jesús pewüingtha tatsi, barapomonae

jumenótatsi kauri, jeye: “Bara tayaputaein Jesús, Páblono bara yaputangno. ¿Ínkane paxamda? ¿Jintam pamda?” jei bapong kauri.

¹⁶Bapoxonae bárapo siete póyobe pexaiña betanaxorénatsi pong yakauríbatsi. Barapomonae bütsi. Matáütano barapomonae jopa nakuiyenabiyo. Bárapo siete póyobe daxita tamasajebómpatsi yawa wang dúbatsi. Bo be júmasa dükúpiya. ¹⁷Pomonae Efeso tómaratha peanaewi, judiomonae, irü pomonae jopa judiomonae naexanaeyo, daxita bapomonae jumetane xua siete póyobe júmasa düküpa. Barapomonae junuwa bichokono. Daxota barapomonae Jesús pong Pekanamataxeinaein jiwi wüünae jáintatsi.

¹⁸Pomonae Jesús jumekowúntatsi pinmonae barapomonae jíwana baxota pata. Barapomonae jiwi peitütha tatsi paeba xua bepa pinae báyatha abe éxana poxonae mara koyeneya éxana nawita. ¹⁹Pomonae Jesús pejume diwesi koyene nakuiduba, barapomonae karendena díborong po díborong xua mara yábara penakuidubi-wang. Bárapo díborong tauteba. Poxonae bárapo díborong tauteba daxita natae-umena. Barapomonae yábara matoma ununa xua pinae bárapo díborong matoma nawita, cincuenta mil po paratiximonaebe pinae nantómata. ²⁰Barapoxonae pin bicheito jumekowünta Jesús, pong Pekanamataxeinaein jiwi. Yawa barapomonae tsita itapeiñaxeina dubenanáebiya xua bara Nakom ápara xeina peayapusüü itorobi koyenewa.

²¹Poxonae baxua weta Pablo najüntükoyene weta xua pesiwaponaewa tsane tómarang xua Macedonia nákuatha, yawa xua Acaya nakuathano xua bapoxonae Jerusalén tómará bepewarapiyaenexa. Nantaxéinano xua peponaewa tsane Roma tómará beya. ²²Pongbe Pablo yawénatsi, Timoteono, Erastono, bapongbe Pablo Macedonia nakua beitorobíyabe. Kataunxuae abü bapong Pablo Asia nákuatha eka.

Meje yábara poxonae jiwi namtsébiya wawái Efeso tómaratha Pablo pekasebixaetsi

²³Barapoxonae Efeso tomarapiwi anaya anaepanaeya najumekayáyata xuba poxoru aichaxaibi xua pejumetaewa xua Pablo yábara kueikueijeí Jesús pía pena pekuidubiwa tatsi. ²⁴Pong xua abe penajumekayayataxubin xua poxonae namtsébiya wawái bapong pewüing Demetrio. Bapong pinmonae xeina pomonae petanakuichiwichi xua petaexanáewichi penainwixi. Barapomonae Demetrio taéxanatsi tsiki penain boxi xua Artemisa píabo kanaxóbeba. Artemisa Efeso tomarapiwi pía nakomwa tatsi. Barapowa jopa be pepa nakomiyo. ²⁵Bapong Demetrio pía petanakuichiwichi waba. Pomonae irü Artemisa pía penain boxi peexanaewi wabatsino. Demetrio namchi daxita barapomonaetha, jeye: “Bara metha payaputáneme xua parátixi xéinatsi poxoru Artemisa pía penain boxi éxanatsi wakaenaetsinéxatsi, daxota xéinatsi parátixi. ²⁶Pong patáneme yawa pajumetánemeno, bapong Pablo. Bapong paeba dukuanaebiya xua pinae pomonae icha Nakom kanaütsiya éxana ápara pinae xapain jopa daxua pepa nakomiyo. Pomonae Pablo kuidubeiba jumejejí tsaibichi ayéi jiwi Efeso tomarathano, irü Asia nakuathano pinmonae jumejejí. ²⁷Baxua bichokono nákata abe, tsipéi icha jiwi jopa komokaetsipae bárapo penain boxi xua waxainchi exanéibatsi bapoxonae jopa xeinaetsípaetsi parátixi. Jiwi namchi tsane: ‘Artemisa pía pin bo tatsi abe. Xapain jopa pepa Nakom pin pía boyo’, jei tsane. Kataunxuae ánoxuae bárapo jiwi Asia nakuapiwi

irü daxita nakuangpiwi Artemisa wüünae jointéibatsi. Íchitha icha jumekowüntsínchi Pablo, metha ekeicha jopa be wüünae jointeibichípaetsi Artemisa”, jei Demetrio.

²⁸Poxonae baxua Demetrio jumetaerükúpatsi, anaepanarúkúpa barapomonae. Yawa barapomonae namtsébiya wawái, jeye: “¡Maisha Artemisa powa pata tane-kanamataxeinaewa, barapowa bichokono pejüntükoyene wüünaewa! ¡Maisha Efesiomonae pang Artemisa wüünae pajaintang!” jei barapomonae.

²⁹Barapoxonae daxita tomarapiwi júpaya anáepana. Gayo irü Aristarco, pongbe Macedonia nakuapinbe, pongbe Pablo pepunaponaexáetsibe, barapongbe wáeta-batsibe. Po botha ichaxota jiwi nakaetuteiba pekueikueijeinexa tsaibi tsane bara bemaxü kayatsibe. ³⁰Bepa bekein Pablo najoniyáei bárapo botha, petsipaebinexa tsane barapomonae, íchitha Jesús pejumekowüntsíwichi Pablo jopa pukopatichi. ³¹Barichi pomonae pentakaponaewi jíwana Asia nákuatha, barapomonae Pablo pía jiwi tatsi kou tana kajumekaitoróbatsi xua bepa pinae Pablo jopa najoniyáe tsane baxota. ³²Barapoxonae bárapo penakaetutsíwatha, ichamonae icha kaununaya wawái irü ichamonae icha kaununaya wawái. Daxita barapomonae najumekayáyata xubiya wawái. Ichamonae jopa yaputaeyo pokoyene xua barapomonae yábara nakaetuta. ³³Bárapo penakaetutsimonae anáepana. Pablo yábara anaepánatsi irü pijimonae tatsi tayábara anaepánatsi. Daxota judiomonae kaemonae najíwana napunatotábiya pebin xua bapong peitabaratha peungkuaenexa bárapo penakaetutsíwatha. Bapong pewüng Alejandro. Bapong pekóbetha jumematawenta tsipéi ichichipa bekein yábara jumeyawena judiomonae barompaya piamonae. ³⁴Poxonae barapomonae Alejandro yaitaerükúpatsi xua Alejandro judiomonaepin, barapoxonae ekeicha daxita namtsébiya wawái tsompáe aña hórabe. Barapomonae namchi, jeye: “¡Maisha pata tanekanamataxeinaewa Artemisa! ¡Maisha barapowa pejüntükoyene wüünaewa! ¡Maisha efesiomonae pang Artemisa wüünae pajaintang!” jei barapomonae.

³⁵Néxata, pong xua tómara peewatsin, bapong ungkua bárapo penakaetutsi itabaratha. Bapong jumematawenta xua ekeicha jopa penamtsébiya wawainexa tsane barapomonae. Bapoxonae bapong namchi, jeye: “Pomonae Efeso tomaramonae pam. Bara daxita nakuamonaepiwi naka yaputane xua waxainchi nótatsi Artemisa pin píabo tatsi. Matáütano yaputane xua waxainchi bótatsi po iboto xua athawé jopeika. Bárapo iboto ápara bara Artemisa tsipéi be Artemisa pía pawí. ³⁶Jintong dapokotsin aibi pong xua nejumebarái xua náerabang, daxota saya irü moya pande. Paiñaxoba ichawa panantaxéiname poxonae jopa beta panantaxei-naem. ³⁷Pongbe, Gayo irü Aristarco, pongbe pakarendéname, bapongbe jopa abe paebiyobe. Bapongbe jopa kaibíyobe xua xoyo boka Artemisa pin pía botha tatsi. Matáütano Artemisa nakomwa jopa kui-aebíyobe. ³⁸Icha Demetrio irü petanakuichiwichi nantaxeina xua ichamonae Demetriobarü abe taexainchi moya jame barapomonae bewa ponaena po bo ichaxota ena pomonae jiwi peyábara paebiwi xua penatsikuentsiwa xua abe peexanaexae. Bapoxonae barapomonae itakúüpatsi xua petsipaebiwa pomonaetha, pomonae tómara pentakaponaewi pokoyene xua ichamonae abe éxana barapomonaetha. ³⁹Icha ichawa paiña paebichi abü ánoxuae jopa papaebinde. Po matakeitha poxonae pentakaponaewi ba nakaetuta pejume-taenexa xua jiwi paeba bapoxonae jame papáebare. ⁴⁰Wanamtsebiya wawaijeixae ánoxuae daxota romanomonae naka yábara anaepanaena tsipéi nantaxeinaena

xua waxainchi aichaxaibichi xua barapomonaē naka itoroba. Jopa xéinatsi po diwese xua yábara tsipaebinchi barapomonaētha pokotsiwa xua yábara namtsé-biya wawaichi”, jei tómara peewatsin. ⁴¹Poxonaē najumewétaba baxua, barapomonaē pesato beitoróbíyatsi.

Meje yábara poxonaē Pablo siwaponā Macedonia nakua, Grecia nakua

20 ¹Bara najumewetarúkūpa daxita poxonaē namtsébiya wawái tsompáe. Bapoxonaē Pablo waba pomonaē Jesús pejumekowüntsíwichi pebarú nakaetutsinexa. Barapomonaētha Pablo yábara tsipaeba Jesús pejume diwesi xua barapomonaē peajüntüyapüsüya wüünaeya pejinompaenexa tsane Nakomtha. Bapoxonaē Pablo barapomonaē napéyaba. Macedonia nakua bewarapiya. ²Daxita bárapo tómarang, Pablo siwaponā bárapo Macedonia nákuatha, kuidúbano pomonaētha, pomonaē Jesús pejumekowüntsíwichi, xua peajüntüyapüsüya wüünaeya tajinompaenexa tsainchi Nakomtha. Poxonaē nakuiwétaba ekeicha Grecia nakua bepatopiya. ³Baraxota Pablo akoibi po xometíyobe yapukaewa. Bara juntukuru Siria nakua beya wárapa jératha po nae pin naetha. Bapoxonaē jumetane xua pinae judiomonaē anáepana xua Pablo bexubapáebatsi. Daxota Pablo najüntükui weta xua kaibeya peponaewa tsane petáxutha Macedonia nakua beya. ⁴Pablo yánabatsi ichamonaē. Irü ichüng nápona bapong pewüing Sópater, pong Berea tomarapin, pong Pirro pexanto tatsi. Irü ichüngbe napónabe bapongbe pewüingbe Aristarco irü Segundo, bapongbe Tesalónica tomarapinbe. Irü ichüng nápona, bapong pewüing Gayo, Derbe tomarapin. Irü ichüng nápona, bapong pewüing Timoteo. Irü ichüngbe napónabe, pongbe pewüingbe Tíquico irü Trófimo, bapongbe Asia nakuapinbe. ⁵Barapomonaē daxita pana netsíwana nantakápona, Troas tómaratha kou baxota pana éwata. ⁶Íchitha Filipos tómara weya pawárapang jératha, po naetha po nae pin nae poxonaē weta Pascua wüing matakabin. Bárapo Pascua matakábintha jiwí xane pan xua pokotsiwa jopa kotowiyo. Poxonaē cinco po matakábibe kaewa papatang Troas tómaratha, baxota barapomonaē pakaxibang. Baraxota paenang siete po matakábibe.

Meje yábara poxonaē Pablo Troas tómarā siwaponā

⁷Pentakeiseikáe matakábitha, domíngotha, pana nakaetutang, pata epananta-rübi janakaenexa tsane pan. Pablo kuiduba pomonaē Jesús pejumekowüntsíwichi, tsipéi baya warapaena Pablo. Daxota poxonaē kueikueijeí beya yapapae. ⁸Po tutu athabeicha bárapo tututheicha pana nakaetutang. Bárapo tútutha aiña koi-chang dubena. ⁹Pewowindü pewüing Eutico, barapoyo bómüxü tútutha ventánatha pemüxübürütha eka. Pablo bayiyo tsuxubi xua Nakom Pejume Diwesi kueikueijeí. Barapoxonaē Eutico nantakotiya maitekataba. Tajü wejopeika. Po tútutha Pablo kueikueijeí tsungkuae xua ichaxota akoibi tututheicha bárapo tutu wejopeika. Eutico petüpaeyo pítatsi. ¹⁰Bara néxata Pablo dunatabika. Pablo Eutico kakuita ékatsi pentabokototha. Pablo naishakateita wáetaba. Piamonaē barái Pablo, jeye: —Jopa pajunuwinde, bara ápara asüü, jei.

¹¹Néxata Pablo ekeicha kaibe juiña. Pan epajanaxuba, yawa xane. Barapoxonaē ekeicha Pablo matowa kueikueijeí Nakom Pejume Diwesi, beya yajumepen-thatsina. Bapoxonaē weta. Bara kou nama matakabi wüünae tsuxubiba Pablo

wárapa. ¹²Bárapo pewowin Eutico ekeicha bara asiü. Eutico piamonae bo beka-yíyatsi. Daxita saya jüntükoyene tsakábatsi xua jüntema jinompa xua ekeicha Eutico peasüüxae.

Meje yábara poxonae Pablo jératha Troas tómará wewarapiya po naetha po nae pin nae xua Mileto tómará bewarapiya

¹³Paxang kopiya jératha paponang wératha Aso tómará beya tsipéi yáitama Pablo pana itoroba xua bepa pinae wératha paponaein. Bapong yáitama bepa petáxutha ponáei. Baraxotiya, Aso tómaratha paichichipang payapitang Pablo. ¹⁴Poxonae Pablo Aso tómaratha pakaxibarüküpang, bapong ekeicha pana yántaba. Mitilene tómará beya pawárapang. ¹⁵Mitilene tómará wewarapiyang. Bapoxonae icha matakábitha imoxoyo Quío tunáetotha papatang icha muxunénetha. Baraxota kaentakábitha paenang. Ekeicha icha matakábitha Samos tunáetotha papatang. Barapoxonae ekeicha icha matakábitha Mileto tómaratha papatang. ¹⁶Baxua Pablo éxana tsipéi bapong nantaxeina xua jopa beekaeyo aiña matakabin Asia nákuatha. Bapong aichaxaibi pona Efeso tómaratha. Ichichipa Jerusalén tómará beya bichoina peponaewa tsane, tsipéi imoxoyo bara Pentecostés matakabi tsane, icha bara pekuijüpaenéxatsi.

Meje yábara poxonae Pablo tsipaeba penapatáe jiwi Efeso tómaratha

¹⁷Pablo Mileto tómaratha eka. Pablo najumekaitoroba ichamonae xua Efeso tomaramonae pítiri jiwi pewabinéxatsi pomonae Jesús pejumekowüntsíwichi, xua Mileto tómaratha pepatsinexa. ¹⁸Poxonae Efeso tomarapiwi, penapatáe jiwi pata baxota, Pablo barái, jeye: “Bara paxam payaputáneme xua wüünae póponang poxonae kopiya patopang Asia nákuatha paiñaxantha. Áwiya kataunxuae barichin wüünae póponang. ¹⁹Daxita matakabi Jesús pejume diwesi kueikueijang tsaibi. Jopa bichokono átsaka tsaibiño. Jumewüünaeya natsipaebang saya. Poxonae Nakom pong jiwi Pekanamataxeinaein pejume diwesi kueikueijang, bichokono yaitawanaeya kueikueijang yawa nejumeyangkababeiba judiomonae yawa bepa nejutebeibe. ²⁰Paxam payaputáneme xua jopa nakuibaraxubiño xua tapaka tsipaebíwatsi Jesús pejume diwesi xua pokoyene paiña nepaka yawenaewa tsane. Paka kuidúbatsi jiwi peitabaratha tatsi. Matáütano paiña boxíthano paka kuidúbatsi. ²¹Judiomonae jumedangweya kuidubang. Írürü pomonae jopa judiomonae naexanaeyo jumedangweya kuidubang xua barapomonae bewa icha jüntükoyene pexeinaenexa Nakomtha xuano pejumekowüntsínéxatsi Jesús pong Wanakana mataxeinaein. ²²Nakom pía Pejumopetünaxü tatsi neitoroba xua bewa ponaetsipangjei Jerusalén tómará beya. Íchitha jopa nayaputaeiño pokotsiwa xua baxotiya tsane ichamonae inta exanaena. ²³Jame ánoxuae saya meisha yaputang xua Nakom pía Pejumopetünaxü tatsi yábara netsipaeba xua daxita tómarang ichaxota pateibin. Nebarái, jeye: ‘Jiwi pekübibongtha kajebéibina, yawa kapérxaxa exaneibínano’, nejéi Nakom pía Pejumopetünaxü tatsi. ²⁴Juntukuru xua icha tüpang, bárxua jopa netsita aiñakuio. Bara jemba tsane icha saya poponaein. Icha tüpang, bara jemba tsane. Daxota neitaküüpa xua jüntükoyene weiweinaya exanaein pokotsiwa Jesús neitoroba beya yakuiya tüpajopaein. Matáütano daxota neitaküüpa xua wetsin pokotsiwa Jesús neitoroba, pong Pekanamataxeinaeinchi jiwi, xua tapaka tsipaebíwatsi bárapo pexeíña jume diwesi pokoyene xua bichokono jiwi peantobéwatsi Nakom.

²⁵”Báyatha paka tsipáebatsi Nakom Pejume Diwesi po diwesi yábara xua Nakom waba jiwi, petanaexanaenexa tsainchi pijimonae jíwana tatsi pomonae itorobiya peewatsixae. Ánoxuae bara xaniwaicha yaputang paxam pomonae pamxaem xua paka tsipáebatsi bárapo diwesi, ekeicha jopa pana netaem tsane. ²⁶Daxota ánoxuae paka tsipáebatsi icha jopa pajumekowüntsím, báraxua ápara jopa takoyiyo. Bara ápara paiñakoyam tsipéi báyatha bekein matowa paka tsipaebéibatsi pexeña jume diwesi. ²⁷Daxita xua Nakom neitoroba bárapo diwesi omeicha paka tsipáebatsi. Jopa icha diwésiyo kopatsiño. ²⁸Paiñakoutha wüünaeya pana najüntükoyene yábara nantaxéinare. Matáütano xaniwaicha payapu éenare pomonae Jesús pejumekowüntsíwichi. Paxam pítiri jiwi pam, baxua paexande tsipéi Nakom pía Pejumopetünaxü tatsi paka itoroba paiña neyapukainompaenexa tsane Jesús pejumekowüntsiwi tatsi. Matáütano baxua paexande tsipéi barapomonae Nakom piamonae tatsi, tsipéi pexanto tatsi tsitüpa xua barapomonae jopa pewerawerakaewa tsane. ²⁹Yaputang poxonae warapaein takoutha patsina ichamonae. Barapomonae Jesús pejumekowüntsíwichi abe exanaeinchi. Barapomonae Jesús pejumekowüntsíwichi dúküpa exanetnchi icha neuthü ichi. ³⁰Barichi paiña jiwi jíwanamonae ajumebeya kuidubina xua jopa xaiñeyo. Barapomonae kuidubina penáerabi diwesi, xua pomonae Jesús pejumekowüntsíwichi pejumekowüntsinexa bárapo penáerabi diwesi. ³¹Dota pam, xua peabe jume, paiña nejumekowüntsiwa. Pana nekuiyábara nantaxéinare xua paka kuidúbatsi akoibi po wéiyobe. Paka kuidúbatsi merawíthano, matakéithano. Matáütano paka siwawekoyeichi ichakuitha.

³²”Tamona pam, Nakomtha pákata tsipáebatsi xua paka nekayawenaewa tsane, xuano xua Nakom Pejume Diwesi paiña nekayawenaenexa po diwesi xua paka kuiduba xua pinae Nakom paka ántobe. Bárapo Nakom Pejume Diwesi peayapusüüwa xeina xua ajüntüyapusüüya paka kana exanapona. Matáütano paka katsina daxita pokotsiwa báyatha pepa piamonaetha yábara tsiwüünae muxuduta xua katsibapaeba. ³³Jopa taichichi tsaibiño xua ichüng pía parátixi tatsi matáütano xua ichüng pía paparuwang tatsi. ³⁴Jame bara payaputáneme xua takoutha natsiyábara nakuitang. Bara tawa kómotang. Matáütano xua pexaewa kómotang, paparúwano. Matáütano yawenang pomonae xua nekuéyaba. ³⁵Báyatha payaputáneme xua dangweya nakuitang. Baxua éxanang tsipéi ichichipang xua paiña neyaputaewa tsane, xua paiña neyawenaenexa pomonae peakopeibí jiwi. Jopa pajüntemainaeinde xua Jesús pong Pekanamataxeinaein jiwi namchi, xua jeye: ‘Ba jüntükoyene weiweina bichokono pong kata beyakaincha xua pong pekatsixaetsi’, jei Jesús”, jei Pablo.

³⁶Poxonae Pablo najumewetsiya paeba, poxonae xua pítiri jiwi tsipáebatsi, bapoxonae pentabokototha unguwa. Pablo daxita barü tsipaeba Nakomtha. ³⁷Barapoxonae daxita matowa wekoyéi. Yáwano matowa naishateikatsino Pablo poxonae tsutsúbatsi, peantobexaetsi. ³⁸Barapomonae bichokono wekoyéi tsipéi Pablo báyatha namchi, jeye: “Ekeicha jopa pana netaem tsane”, jei. Barapoxonae barapomonae Pablo jera bepumatayathopiyatsi po naetha po nae pin nae.

Meje yábara poxonae Pablo wératha Jerusalén tómara bewarapiya po naetha po nae pin nae

21 ¹Poxonae Jesús pejumekowüntsíwichi pakuenta ponang, barapoxonae Cos tómara bepawarapiyang wératha. Barapoxonae icha matakábitha Rodas tómara bepapiyang wératha. Barapoxonae ekeicha icha matakábitha Pátara tómara

bepawarapiyang wératha. ²Pátara tómaratha baxota ekeicha icha nae panotarükü-pang. Fenicia tómara bepawarapiyang. ³Poxonae Chipre tunaeto patang pamatawa-kaicha tokebang. Bárapo tunaeto pata tatsokona iya paxenta iyiyang. Siria nakua bepaiyang. Bárapo nae Tiro tómaratha botouna, pejotsinexa tsane xua kápona. Tiro tómaratha paxubarükü-pang bárapo nae. Baxota painómpangno. ⁴Baraxota Tiro tómaratha pakaxibarükü-pang pomonae Jesús pejumekowüntsíwichi. Barapomonae pía xantha tatsi pajinompang siete po merawíyobe. Barapomonae Pablo tsipáebatsi, jeichichi: “Jopa Jerusalén tómara beya ponaeinde”, jeichichi. Nakom pía Pejumope-tünaxü tatsi barapomonae yábara tsiwanaya tsipáebatsi pokoyene xua ichamonae Pablo kana exanaeinchí bárapo tómaratha. ⁵Poxonae bárapo siete merawíyobe paya-pukaewang paponarükü-pang. Daxita pomonae Jesús pejumekowüntsíwichi, tómara weya pana neputae umenathopiya yabüxino pexuino. Táetabo mene íta-pa bepaiyang. Baraxota pentabokototha paumenang. Nakom patsipaebang. ⁶Pana napéyabang barapomonae, pana naishateika pata taneantobexae. Bapoxonae ekeicha jera panotarükü-pang, barapomonae ekeicha pía boxi benawibiya.

⁷Bara papanenebiyang tsürüküpáe xua Tiro tómara weya paponang. Tolemaida tómara beya papanenebiyang. Baxota ekeicha pajakobang pomonae Jesús pejumekowüntsíwichi. Kaentakábitha baxota pajinompang. ⁸Icha matakábitha, Páblono yawa xua pomonae pata takueyabixae pang Cesarea tómaratha papatang. Bárapo tómaratha Felipe píabo tatsi bepaiyang. Bapong Nakom Pejume Diwesi pekuei-kueije dukuanaebíyabe jintong. Bapong jíwana pomonae siete póyobe pomonae peyawenae jiwi. Bárapo siete póyobe, matha kain itapétatsi Jerusalén tómaratha xua Jesús pía peitorobi jiwi tatsi peyawenaenéxatsi. Barapong pía xantha tatsi paenang. ⁹Felipe cuatro po pexantíyobe tatsi xeina. Barapówaxi kataunxuae jopa jitha enaeyo. Barapówaxi tsipaeba jiwi Nakom Pejume Diwesi xua Nakom yaputane éxana. ¹⁰Baxota kaentakabíyobe paenang Cesarea tómaratha. Barapoxonae Judea nakuapin patopa, pong Nakom pía peitorobi pepaebin, pong pewüng Agabo. ¹¹Agabo pana nesiwapon. Pablo koreiña bókoto mara wejóntatsi. Bárapo koreiña bokototha petaxuno, pemáxüno Agabo piakoutha nakaekunta kübaxuba. Bapoxonae Agabo namchi, jeye:

—Báyatha Nakom pía Pejumopetünaxü tatsi netsipaeba pokoyene xua judiomonae exanaena Jerusalén tómaratha. Bepa pinae barapomonae kaiche tsane pong xua pía bókoto pexeinaein pókotsi bókote, ichaunxuae naichin, bara júta kaichi tsane pinae. Matáütano bepa pinae barapomonae kakaponáe pomonaetha, pomonae penanapaincha jinompaewi xua icha nakua wérena peponaewi, jei Agabo.

¹²Poxonae baxua pajumetang, paxang irü pomonae Cesarea tomarapiwi Pablo pabarang, pajangje:

—Bara, jinxoba póname Jerusalén tómara beya, pajang.

¹³Íchitha Pablo pana jumenota, jeye:

—¿Eta xua metha pana siwawekoyam? ¿Eta xua metha pana itanuwé fórotame? Bara báyatha nakuiyábara jumewetang tanekübínexa tsane, matáütano tatüpaenexa tsane Jerusalén tómaratha tajumekowüntsixae Jesús, pong jiwi Pekanamataxeinaein, jei Pablo.

¹⁴Bekein Pablo jumedangweya pabarang xua jopa po nae tsane íchitha Pablo dapo jumetha bepa ponáei. Matapaiña saya jopa ekeicha pata jumeyo. Matáütano pajang:

—Ba saya moya baxua exanaena be pókotsi koyeneya xua Nakom ichichipa, pajang.

¹⁵Bapoxonae poxonae pana jumewetang baxua, bara nama paxainxaiñang. Bapoxonae Jerusalén tómara bepawarapiyang. ¹⁶Ichamonae Cesarea tomarapiwi, pomonae Jesús pejumekowüntsíwichi pana nepunapona. Pana kápona bo beya pata tajinompaenexa tsane, pebin pong pewüng Mnasón, bapong píabo beya tatsi. Bapong Mnasón Chipre tunáetopin. Bapong pinae kaena báyatha jumekowünta Jesús.

Meje yábara poxonae Pablo, Santiago siwapoinchi

¹⁷Poxonae Jerusalén tómaratha papatang, baxota pomonae Jesús pejumeko-wüntsíwichi weiweinaya pana matenta waba bichokono. ¹⁸Icha matakábitha Pablo pana nebarü pona. Pasiwaponang Santiago. Baraxota irü daxita pítiri jiwi jinóm-parü. ¹⁹Barapomonae Pablo jakoba. Bapoxonae tsiwiyo bexa Pablo tsipaeba daxita pokoyene xua Nakom éxana pomonaetha, pomonae jopa judiomonae naexanaeyo. Yáwano paeba pokoyene Pablo itoróbatsi Nakom, xua petakaponaenexa Nakom Pejume Diwesi tatsi. ²⁰Poxonae jumetane baxua xua Pablo paeba, barapoxonae barapomonae Nakom wüünae jáintatsi. Néxata Santiago Pablo baraichi, jeye:

—Taema, ínkane jumetaema. Judiomonae pin bicheitong tsóponae, pomonae báyatha Jesús jumekowüntatsi. Daxita barapomonae namuxutáñaba xua pinae daxita jiwi nantawénona xua Moisés pía peitorobi koyene exanapona. ²¹Kayopita ichamonae xua pinae kuidúbame judiomonae pomonae icha nákuangtha pejinompaewi. Pinae kuidúbame xua ekeicha pinae barapomonae bewa jopa yábara jumekuí exanáe pokotsiwa báyatha Moisés itoroba. Matáütano pinae kuidúbame barapomonae xua pinae jopa bewa penawithabi koyene exanáe tsane xua pewithabiwa pía pexui ichaxota nareixakaena xua ichaxota pebíwixae xeina. Matáütano pinae kuidúbame xua barapomonae bewa jopa exanáe bárapo peitorobi koyenewang xua pinae pokotsiwa waámo jiwi báyatha exaneiba. ²²¿Eta xua waxainchi exanaeinchi? Tsipéi judiomonae, pomonae pejumekowüntsiwi Jesús, nakaetsina xote bárapo Jerusalén tómarathe, poxonae jumetaena xua patópame. ²³Paxang xua paka itoróbatsi baxua éxande. Taema xote pataxantha cuatro póyobe popónabe pebiwi. Barapóyobe yábara nakuiwüünae tsijumedútabe Nakomtha pokotsiwa xua exanapaeba. Ánoxuae baxua barapomonae bewa exanáe pokotsiwa báyatha exanapaeba. ²⁴Barapomonae matakayande parátixi nanakuibarü nantómare sacerdotemonaepintha, xam néxano irü barapomonae néxano xua jopa paiña nenajüntükoyene taxobinexa. Nanakuibarü nantómare, barapóyobe penantakatepateya sibapentsinexa tsane. Icha baxua exanáename, daxita jiwi kakuiyaputaena xua báyatha jopa exanaem xua ichamonae abe kayábara paeba. Yawa daxita jiwi kakuiyaputaena xua xam xaniwaichiya éxaname pokotsiwa Moisés itoroba. ²⁵Paxang pata tinang carta pomonae Jesús pejumekowüntsíwichi, pomonae jopa judiomonae naexanaeyo. Pata yábara tinang baxua xua panantaxeinang xua barapomonae beexanáetsipa. Pajang bárapo cártatha: ‘Paiñaxoba duwéi pawixáneme po duwein jiwi tsiseba ibo nakom. Matáütano paiñaxoba paxáneme po duwein pong saya pípato tüpunkua, xuano paiñaxoba pajanaxáneme. Paiñaxoba pasiwaxéiname yábüxi xua jopa paiña séurixi’, pajang, jei Santiago.

**Meje yábara poxonae soldadomonaе Pablo
maxüwáetabatsi judiomonaе pin pía botha tatsi,
bapoxonaе jiwi pekübibó beya kapónatsi**

²⁶Néxata Pablo barü poiña bárapo cuatro póyobe. Icha matakabi Pablo irü bárapo cuatro póyobe éxana pokoyene xua jopa pena jüntükoyene taxobiwa Nakomtha. Bapoxonaе Pablo irü bárapo cuatro póyobe Nakom pin pía botha tatsi jojoniya. Pablo namchi, jeye: “Ekeicha papatsinang siete po matakábibe poxonaе pawetsin pokoyene xua daxota jopa pata najüntükoyene taxobiwa Nakomtha. Pakaponaein duwein sacerdotemonaepin pebexubinexa tsane xua pata katsinexa Nakom”, jei Pablo.

²⁷Poxonaе bárapo siete matakabíyobe imoxoyo yapukaewínaba, bapoxonaе Pablo judiomonaе Nakom pin pía botha tainchi. Pomonaе Pablo tainchi, barapomonaе judiomonaе pomonaе Asia nakua weya pona. Pomonaе Pablo tainchi, barapomonaе éxana xua pin bicheito namtsébiya wawái xua Pablo pekasebixae-tsi. Bapoxonaе Pablo wáetabatsi. ²⁸Jumedangweya wawái, jeye: “¡Pajumetaema, paxam pomonaе Israel nakuapiwi pamxaem! ¡Pana yawende! Barapong kuiduba dukuaеbiya daxita jiwi. Abeya naka yábara kuikueikueije. Matáütano abeya yábara kueikueije Moisés pía peitorobi koyenewang tatsi. Matáütano bárapo Nakom pin píabo abeya yábara kueikueije barapong. Matáütano bapong griegomonaе matakapoinchi bárapo Nakom pin píabo bérena. Poxonaе Pablo mataká-pona griegomonaе, Nakom pin pía botha tatsi atútube éxana”, jei barapomonaе.

²⁹Baxua paeba, tsipéi poxoru báyatha barapomonaе Pablo tainchi Jerusalén tómaratha. Baxota Pablo barü pona Efeso tomarapin, pong pewüng Trófimo. Daxota barapomonaе katsawa nantaxeina xua metha báyatha Pablo Nakom pin pía botha barü pona Trófimo. Daümetha Trófimo baxota jopa naponaeoyo.

³⁰Daxita tomarapiwi júpaya ekeicha jumedangweya wawái. Daxita kuinaeren-dena, barapomonaе Pablo yorobatéikatsi. Nakom pin píabo wemaxükapóinñatsi. Barapoxonaе barapomonaе bichokono yaboupa kateitabanota Nakom pin píabo. ³¹Barapomonaе, pomonaе peanaepanaewi muxu Pablo pebexubichi. Bara néxata romanomonaе soldadomonaе pía pepa pentakaponaein tatsi jumetane xua daxita Jerusalén tomaramonaе najumekayáyata xuba. ³²Néxata soldadomonaе pía pepa pentakaponaein tatsi, bapong pía soldadomonaе kopiya piamonaе ka-ekaetuteta. Bapoxonaе bárapo soldadomonaepin bicheito bekuinaeyiya ichaxota Pablo muxu pebexubichi. Poxonaе bárapo soldadomonaе taerúküpatsi bárapo bicheito xaiña umenarúküpa. Barapoxonaе barapomonaе ekeicha jopa Pablo bütsi. ³³Néxata soldadomonaе pía pepa pentakaponaein tatsi Pablo imoxoyo kakuita unguatá-batsi. Bapoxonaе Pablo maxüwáetabatsi. Bapong soldadomonaе pía pepa penta-kaponaein tatsi piamonaе itoroba xua aiña naintóthabe pemaxükübaxubinéxatsi Pablo. Bapoxonaе bapong soldadomonaе pía pepa pentakaponaein tatsi yáinaba pin bichéitha, jeye: “¿Jintam barapongda? ¿Eta xua metha bapong éxana?” jei. ³⁴Íchitha barapomonaе ichawang kaununaya wawái. Ichamonaе ichawa wawái. Daxota bapong soldadomonaе pía pentakaponaein tatsi jopa xapain jumetaeyo. Bapoxonaе bapong soldadomonaе pía pentakaponaein tatsi Pablo itoróbatsi solda-domonaе píabo beya tatsi. ³⁵Poxonaе patopa soldadomonaе píabo beya, penona-babeiyáewatha xua nonobabéibiya soldadomonaе Pablo yoichiya peutokuáratha

kapoinchi bara beya. Pin bicheito bichokono anáepana daxota Pablo yoichiya kapoinchi. ³⁶Bárapo pin bicheito soldadomonaē kayábara wawaya puna enapoinchi, jeye: “¡Maisha pabexore bapong!” jei barapomonaē.

Meje yábara poxonaē Pablo paeba barapomonaē peitabaratha

³⁷Poxonaē juntukuru Pablo soldadomonaē píabo beya kapoinchi, Pablo barái soldadomonaē pía pentakaponaēintha tatsi, jeye:

—¿Metha ichauyo katsipaebichípatsi? jei Pablo.

Poxonaē baxua jumetaeba, soldadomonaē pía pentakaponaēin tatsi yáñnaba, jeye: —¿Xam nekueikueijeimdá griego jumerá? ³⁸¿Xam bárapo jintomda egipcio nakuapimda, pong nakaetuteiba exaneiba pijimonaē xua ichamonaē pejutebeibinexa tsainchi? ¿Xam barapomonaē pía pentakaponaēm tatsi, pong xua matakaponapóname cuatro mil jiwi ichaxota ira xuépana susato tsúrukuaē nákuatha? jei soldadomonaē pía pepa pentakaponaēin tatsi.

³⁹Néxata Pablo jumenota, jeye:

—Ápara pepa judiomonaēpiyong. Tarso tómaratha nakatsiwang. Tatómara aiñakuí tsipéi pepa tómara. Tarso tómara Cilicia nákuatha eka. Nejumekuiyábara kópare xua barapomonaē tatsipaēbiwa tsane, jei Pablo.

⁴⁰Soldadomonaē pía pepa pentakaponaēin tatsi bara Pablo yábara jumekópata tsi xua Pablo bara pepaēbiwa tsane. Pablo ichaxota nonobabébiya baxota asiya ungua. Yawa pekóbetha jumematawenta barapomonaē xua moya peenaenexa. Poxonaē moya enarúkupa barapomonaē, Pablo hebreo jumetha kueikueije. Namchi, jeye:

22 ¹“Tamonaē pam, irü pomonaē pítiri jiwi pam, pana nejumetaema xua tapaka tsipaēbiwa tsainchi xua tana nabarü jumeyawenaewang”, jei Pablo.

²Poxonaē barapomonaē jumetaerúkupa, xua Pablo hebreo jumetha kueikueije, barapomonaē moya enarúkupa. Pablo barapomonaē barái, jeye:

³“Xang ápara judiomonaēpin. Báyatha nakatsiwang Tarso tómaratha, Cilicia nákuatha. Saya ápara Jerusalén tómaratha wíchabang. Baxota nakuidubang pokoyenein waámo susato jiwi itorobeiba. Daxita bárapo koyenein pebin pewüng Gamaliel, nekuiduba. Nekui-eneiba xua Nakom tanakuiteibang xua daxita tajüntükoyénewatha icha ánoxuae daxita paichiponaēm. ⁴Báyatha jeiteibang pomonaē pejumekowüntsiwi Jesús pía pena pekuidubiwa tatsi. Teikéibangno, jiwi pekübibó beya kaponeibang, pebíwino yawa yabüxino. Tsipéi ichichipang xua ichamonaē jutebeiba xua barapomonaē pejutebeibinéxatsi. ⁵Sacerdotemonaē pía pentakaponaēin tatsi irü pítiri jiwi paka tsipaēbina xua báyatha barapomonaē nekata cartang xua barompaya wajudiomonaē nexa xua Damasco tómaratha. Bárapo cártangxae neitaküüpa xua tateikaewa tsane pomonaē Jesús pejumekowüntsiwichi. Baxota Damasco tómaratha ponang tajeichinexa pomonaē Jesús pejumekowüntsiwichi, tsipéi tha Jerusalén tómara bekáyaetsi barapomonaē, matáütano tsipéi tha yamaxükübiya kaponaetsi tapérxaxa exanaenexa tsane barapomonaē”, jei Pablo.

Meje yábara poxonaē Pablo diwesi paeba xua poxonaē pokoyene pejumekowüntsiwa Jesustha

⁶Ekeicha Pablo jeye: “Damasco tómara námtotha ekaponang, bara nama matáeiñaxae tsuxubi. Poxonaē bara muxu tapatopaeba bárapo tómaratha,

bapoxonae pin koicha neyáŋkataba. Taxaiña benematawakaicha jopeika. Peitaboko wejopeika. ⁷Íratha jopang. Bapoxonae peitaboko wenebaráichika. Jumetaeungkuang, nebarái, jeye: ‘Saulo, Saulo, ¿eta xua metha tamonae inta abe éxaname?’ jei. ⁸Néxata yáíñabang: ‘Pong jiwi Nekanamataxeinaem, ¿jintamümda?’ jang. Nejume-itoroba epapita, jeye: ‘Ápara xang Jesús, Nazaret tomarapin pongxaein tamonae inta abe éxaname’, nejéi. ⁹Pomonae nepunapona irü koicha táneno. Bichokono bapomonae junuwa. Saya meisha koicha tane, saya jopa jumetaeyo pojume xua nebaráichika. ¹⁰Néxata yáíñabang: ‘Pong jiwi Nekanamataxeinaem, ¿eta pokotsiwa metha exanokuaein?’ jang. Bapong nebarái, jeye: ‘Nontaponde Damasco tómara beíyande. Bárapo tómaratha, ichüŋ yábara katsipaebina pokotsiwa xua bewa exanáename’, nejéi. ¹¹Bárapo koicha bichokono néitata nakitaba éxana. Pomonae nepunapona Damasco tómara benemaxü kayiya.

¹²”Bárapo tómaratha, Damasco tómaratha, kou pebin pópona, bapong pewüŋ Ananías. Bapong daxita yábara jumekuiya exaneiba Moisés pía peitorobi koyene tatsi. Bárapo judiomonae, Damasco tómaratha, barapomonae Ananías wüünaeya yábara paebéibatsi. ¹³Ananías nesiwapona. Bapong nebarái: ‘Saulo, tamonae jintom, ekeicha kaewa nepunekotsinde’, jei. Bara kaena barapoxonae ekeicha kaewa nekotaxubang. Bapong bapoxonae taenotang. ¹⁴Ananías nebarái, jeye: ‘Pata amo jiwi pía Nakom tatsi báyatha itapeta kawaba xua neyaputaenexa tsane xua Nakom kaitoroba. Kaitapeta xua netaenexa pong yatsikaewa pejüntükoyene wüünaein, matáütano nejumetaenexa pokotsiwa katsipaeba. ¹⁵Aunxuae Jesús yábara kueikueijam tsane daxita nákuang jüpáyangtha. Yábara paebíname daxita xua táneme xuano xua jumetanemeno. ¹⁶Ánoxuae, ¿eta xua metha kame ékame? Nontaponde. Bárabü ichüŋ kabautisabina Jesucristo pewüŋtha, pong jiwi Pekanamataxeinaein, nekayábara jüntemainenexa abe jiña neexanáe kuirukoyenein’, nejéi Ananías”, jei Pablo.

Meje yábara poxonae Pablo nayábara paeba xua peitorobíwatsi ichaxota pomonaetha, pomonae jopa judiomonae naexanaeyo

¹⁷Pablo kataunxuae kueikueijei, jeye: “Poxonae kaibe nawíyang Jerusalén tómara beya, Nakom pin pía botha tatsi ponang. Bárapo botha Nakom tsipaebang. Bapoxonae kamaitang xua netsita naitüüta. ¹⁸Jesús nekotang, pong jiwi Pekanamataxeinaein. Bapong nebarái: ‘Antha yakuinaya póntabare Jerusalén tómara weya, tsipéi barapomonae jopa xapain kajumekowüntsi tsane xua tana neyábara paebiwam’, jei Jesús. ¹⁹Néxata jume epapitang: ‘Pong jiwi Nekanamataxeinaem, barapomonae báyatha nekuiyaputane xua poneibang daxitang judiomonae pía penakaetutsi bongtha tatsi. Báyatha jiwi pekübibotha kaponeibang, pomonae nekajumekowüntsiwi. Matáütano bichokono béibangno. ²⁰Poxonae Esteban bichokono jana othopeika xang saya kuinekotungkuang. Bapong Esteban pong kajumekowünta báyatha. Bapong jiña diwesi pekanantsipaebin. Poxonae Esteban bexotsi, saya kuimatü-taeungkuang. Yábara jumebárükúf jejang poxonae barapomonae Esteban bexubapáebatsi. Barapomonae pipaparuwang tajebang’, jang Jestustha. ²¹Íchitha bapong pong jiwi Pekanamataxeinaein nebarái: ‘Antha ponde. Aunxuae tajü kaitorobinchi barapomonae beya, pomonaetha, pomonae jopa judiomonae naexanaeyo beya’, nejéi”, jei Pablo.

**Meje yábara poxonae soldadomonaе pía
pentakaponaein tatsi Pablo wáetabatsi**

²²Pablo kataunxuae paebungkua bárapo penonobabeibi yathopáewatha soldadomonaе pía botha. Poxonaе Pablo jumetaerükúpatsi xua bepa pinae ponaena pomonaetha, pomonaе jopa judiomonaе naexanaeyo beya, bapoxonaе bárapo bicheito namtsébiya wawái, jeye: “¡Maisha bapong pabexore bara! ¡Dapokotsin jopa bewa póponaе!” jei. ²³Áwiya kame barapomonaе wawái tsompáe. Yawa pía paparuwang anaya nünübaba. Yawa táetowang anaya athabé bebeicha. ²⁴Romanomonaе soldadomonaе pía pepa pentakaponaein tatsi, bapong pía soldadomonaе itoroba xua Pablo pekaponaenéxatsi soldadomonaе píabo beya tatsi xua jiwi pekübibó. Baxota Pablo kapoinchi pekuainchinexa tsainchi xua daxota Pablo peyábara paebiwa tsane baxua xua Pablo peyábara namtsébiya wawaichíwatsi judiomonaе. ²⁵Poxonaе bara juntukuru Pablo maxükütanótatsi xuano juntukuru muxu pebetsino, Pablo barái soldadomonaе pía pentakaponaein tatsi, jeye:

—Jopa be pana nekuainchipaem tsipéi ápara xang romanomonaepin. Matáütano baxua jopa pana nekanaichipaem icha jopa neyábara paebiyo pong jiwi peyábara paebin penatsikuentsiwa xua abe peexanaexae, jei Pablo.

²⁶Poxonaе baxua jumetane, soldadomonaе pía pentakaponaein tatsi, bapong pona pía pepa pentakaponaein tatsi beya. Bapong namchi pía pepa pentakaponaeintha, jeye:

—Dota xua xam kana exanáename bapongtha. Ápara kou deta Pablo irü romanomonaepin, jei.

²⁷Néxata soldadomonaе pía pepa pentakaponaein tatsi, bapong Pablo imoxoyo kakuita unguatábatsi. Bapong Pablo yáñabatsi, jeichichi:

—¿Bara yatsikaya xaiñéi bara xam romanomonaepim? jeichichi Pablo.

Pablo jumenota, jeye:

—Aa, bara xang tsokuaein, jei Pablo.

²⁸Soldadomonaе pía pepa pentakaponaein tatsi Pablo jumenótatsi, jeichichi:

—Xang irü barichin romanomonaepin. Nakuuyábara matómatang bichokono pin parátixi matoma xua romanomonaepin tana naexanaewa tsane, jei.

Pablo namchi, jeye:

—Ápara seikaya nama xang kaena báyatha pexúyothang yakuiya nakatsiwang romanomonaepin, jei.

²⁹Poxonaе Pablo baxua paeba, bapoxonaе pomonaе Pablo muxu pekuainchichi Pablo pexeña wetanatsixi barü küpíyatsi. Írürü bara wenatsixitabiya soldadomonaе pía pepa pentakaponaein tatsi tsipéi bapong yaputane xua Pablo ápara romanomonaepin. Daxota junuwa xua Pablo pemaxükübixaetsi.

**Meje yábara poxonaе Pablo pentakaitorobi bicheitomonaе
peitabaratha ungkua pomonaе judiomonaе**

³⁰Icha matakábitha soldadomonaе pía pepa pentakaponaein tatsi bepa yaputáei, bepa jeyéi: “¿Eta xua metha Pablo yábara anaepánatsi judiomonaе?” bepa jeyéi. Daxota bapong, Pablo taxuenaxotsi xua maxükútatsi. Néxata bapong itoroba xua sacerdotemonaе pía pentakaponaewi tatsi irü pentakaitorobi bicheito nakaetutsina. Pablo bara bebarü íyatsi. Baraxota kuaranótatsi barapomonaе peitabaratha tatsi.

23¹Pablo pentakaitorobi bicheito beya bichokono naitakuidutsiya nekoya. Pablo barapomonaē beya namchi, jeye:

—Tamonae, kaena báyatha beya ánoxuae jüntükoyene wüünae póponang Nakom peitütha tatsi, jei Pablo.

²Néxata sacerdotemonaē pía pepa pentakaponaēin tatsi, Ananías, bapong itoroba xua Pablo pekoibo kuainchinéxatsi pomonaē Pablo imoxoyo kakita peume-naexaetsi. ³Íchitha Pablo jumenota, Ananías jumenótatsi, jeye:

—Xam pongxaem ítara mexeya wüünaeya nepaēbin íchitha jiwi nemuxuitórobin, Nakom kakuainchina. Xam ékame xote jiña tana neyábara paēbinexam tana natsikuentsiwa xua abe taexanaexae icha be pókotsi koyeneya Moisés pía peitorobi koyenetha baxua yábara paēba. Íchitha xam jopa xapain exanaem poxonaē ichamonae itoróbame xua tana nekoibokuainchinexa poxonaē Moisés pía peitorobi koyenéwatha jopa baxua itorobiyo, jei Pablo.

⁴Pomonaē Pablo imoxoyo kakuita umeinchi, jeichichi:

—Ápara sacerdote pía pepa pentakaponaēin tatsi abe tsipáebame pong Nakom tanakuítatsi, jei barapomonaē.

⁵Pablo jumenota, jeye:

—Tamonae, jopa yaputaēiño xua pong tsipaebang ápara sacerdotemonaē pía pepa pentakaponaēin tatsi. Icha yaputaetsipang, jopa paēbin chipae. Nakom Pejume Diwésitha namchi, jeye: ‘Jopa bewa paiña pentakaponaēwi jíwana abe pajainchim pomonaē xua paiña tómaratha’, jei Nakom Pejume Diwésitha, jei Pablo.

⁶Néxata Pablo kuiyábara nantaxeina barapomonaētha tsipéi aiña bichéitobe, ichamonae saduceomonaerü, ichamonae fariseomonaerü. Daxota bapong Pablo jumedangweya wawái barapomonaētha, jeye:

—Tamonae, bara xang ápara fariseomonaēpin, yawa fariseomonaēpin pexantong. Tsipéi jumekowüntang xua jiwi petüpaēwi ekeicha asüü tsaibi tsane daxota pana nekáponame paiña tana neyábara paēbinexam xua tana natsikuentsiwa xua abe taexanaexae, jei Pablo.

⁷Poxonaē Pablo baxua paēba saduceomonaē irü fariseomonaē najumematsontsónobabe. Bárapo bicheito aiña bichéitobe náexanabe, tsipéi bárapo bichéitobe seikaya barompaya nabarü nantaxeina. ⁸Saduceomonaē paēba xua pinae petüpaēwi jopa ekeicha asüü tsaibi tsane. Matáütano barapomonaē paēba xua pinae mata-sunpiwi jopa jinompaeyo, matáütano pinae dowatsi dapomonaē pinae aibi. Íchitha meisha fariseomonaē jumekowünta daxita bárapo diwesin, xua pinae pewerapeibiwi ekeicha asüü tsaibi tsane, matáütano xua pinae dowatsi jinompa, xuano xua pinae matatsunpiwi bara jinompa. Daxita bárapo diwesin fariseomonaē jumekowünta. Íchitha nama saduceomonaē jopa daichiyo. ⁹Daxita bárapo bichéitobe namtsébiya wawái. Fariseomonaē jíwana ichamonae nonobapona. Barapomonaē yaputane nawita Moisés pía peitorobi koyene tatsi. Barapomonaē namchi, jeye:

—Bapong Pablo jopa abe exanáeyoba, metha dowatsi bapong tsipáebatsi, icha-kuihitha metha matatsunpin bapong tsipáebatsi, jei barapomonaē.

¹⁰Barapomonaē daxita najumematsontsonobiya biatane. Bapong romanomonaē soldadomonaē pía pepa pentakaponaēin tatsi, bapong bichokono junuwa tsipéi Pablo tsana perüüxunaēinchi. Daxota bapong romanomonaē soldadomonaē pía pepa pentakaponaēin tatsi itoroba pía soldadomonaē xua Pablo ekeicha kaponaēinchi soldadomonaē píabo beya tatsi.

¹¹Icha matakeitha mérawi pong Pekanamataxeinaein jiwi, Pablo imoxoyo kakuita úngkuatsi xua tsita naitáütatsi. Bapong namchi, Pablo baraichi, jeye: “Pablo, najüntükoyene tsakatábare. Icha ichim xua Jerusalén tómaratha neyábara páebame barichinde ekeicha Roma tómaratha neyábara páebare”, jei Jesús.

**Meje yábara poxonaе judiomonaе nantaxeina
xua Pablo pebexubiwa tsainchi**

¹²Icha matakeitha, ichamonaе judiomonaе pebürüya nantajüpaya nantaxeina xua Pablo pebexubiwa tsainchi. Barapomonaе nayábara tsiwüünaе muxuduta Nakomtha xua bepa pinae jopa nabanáе tsane, xuano jopa apáе tsáneno xua beya pinae yajainbonaya othopaena poxonaе Pablo bexubinchi. ¹³Barapomonaе pomonaе Pablo bexubapáebatsi xuano xua yábara nainbotapáebatsi bichokono pinmonaе beyakaincha xua pókotsi cuarenta po pebiwimonáeyobe. ¹⁴Barapomonaе pona sacerdote píа pentakaponaewi tatsi beya, yawa judiomonaе píа pítiri jiwi tatsi beya. Bárapo pebiwimonáeyobe barái barapomonaetha, jeye:

—Báyatha pana nayábara tsiwüünaе muxudubang Nakomtha xua jopa pata nabanaewa tsane beya tsane poxonaе kataunxuae jopa pabexúbiño tsane Pablo. ¹⁵Paxam irü pomonaе pentakaitorobi bicheito, romanomonaе soldadomonaе píа pepa pentakaponaein tatsi patsipáebare xua bapong píа soldadomonaе peitorobinexa xua Pablo pekuaranotsinexa tsainchi paiña itabaratha baya tsane. Romanomonaе soldadomonaе píа pepa pentakaponaein tatsi pamuxuitoróbare. Náemata bapong pabarande: ‘Áwiya peyaiñabiwa paxeinang pata tha yaiñabichi Pablo’, pajande. Paxang pata tha nama námtotha ewatumenatsi. Pata tha bexuichi, poxonaе barapomonaе Pablo kaponaeinchi, jei barapomonaе.

¹⁶Pablo perobi tatsi jumetane xua bárapo cuarenta po pebiwimonáeyobe námtotha nantsiyatsiya bobenapaeba pewaetabinexa tsainchi Pablo. Daxota Pablo perobi tatsi pona soldadomonaе píabo tatsi beya. Baxota Pablo perobi tsipáebatsi xua barapomonaе Pablo bepa bexubichei. ¹⁷Néxata Pablo waba pong xua romanomonaе soldadomonaepin píа pentakaponaewi jíwana. Pablo namchi, jeye:

—Poye pewowinwüüto kaponde romanomonaе soldadomonaе píа pepa pentakaponaein tatsi beya, tsipéi bapoyo diwésiyo xeina xua petsipaebiwa tsane, jei Pablo.

¹⁸Romanomonaе soldadomonaе píа pentakaponaein tatsi Pablo perobi tatsi kapoinchi xua romanomonaе soldadomonaе píа pepa pentakaponaein tatsi beya. Bapong namchi, jeye:

—Pablo soldadomonaе píа botha peekaein, bapong neitoroba xua pinae bepa kaponaeinjei poye. Tsipéi pinae xeina diwésiyo xua nekatsipaebinexa, jei bapong soldadomonaе píа pentakaponaein tatsi. ¹⁹Pablo perobi tatsi kobepítatsi romanomonaе soldadomonaе píа pepa pentakaponaein tatsi. Barü natsixitábatsi aishowa beya. Bapoyo baráichichi, jeichichi:

—¿Jiña eta xua netsipaebichi? jeichichi.

²⁰Néxata pewowinwüüto jumenota romanomonaе soldadomonaе píа pepa pentakaponaeintha, jeye:

—Judiomonaе pebürüya nantaxeina xua bepa kawüükáеi xua Pablo baya nekaponaenexa pentakaitorobi bichéitotha. Bepa kamuxu itorobéi. Bepa jeyéi: ‘Panantawénonang pata tha Pablo yaiñabichi ichawiyo’, bepa jeyéi barapomonaе. ²¹Íchitha jopa jumekowüntsinde, barapomonaе námtotha nantsiyatsiya

bobenapaeba pewaetabinexa tsainchi taxuyo. Bárapo cuarenta po pebiwimonáe-yobe natsiwüünae yábara muxuduba Nakomtha xua bepa pinae jopa nabanáe tsane yawa jopa apáe tsane beya pinae poxonae tsane poxonae Pablo bexubinchi. Ánoxuae barapomonaе kajumekuiéwata xua jam tsane: ‘Baya tsane Pablo penta-kaitorobi bichéitha itorobinang’, jam tsane, jei Pablo perobi tatsi.

²²Néxata romanomonaе soldadomonaе pía pepa pentakaponaein tatsi barapoyo napéyabatsi. Pewowinwüüto pónataba. Pewowinwüüto baraichi, jeye:

—Ichüingtha jopa tsipaebinde xuaunxuae po diwésiyo netsipáebame, jei soldadomonaе pía pepa pentakaponaein tatsi.

**Meje yábara poxonaе soldadomonaе pía pepa
pentakaponaein tatsi Pablo itoróbatsi Félix beya pong
Judea nakumonaе pía peyanakua ewatsinchi**

²³Romanomonaе soldadomonaе pía pepa pentakaponaein tatsi waba aiña pentakaponaeinbe. Bapong barapóngbetha itoroba. Barái: “Soldadomonaе pakuiwüü-náerebe doscientos po soldadomatabüxübe pomonaе xua petáxutha ponaena, irü setenta po soldadomatabüxübe pomonaе xua kawáyutha ponaena, irü doscientos po soldadomatabüxübe pomonaе dejonang kajijinkaena. Bárapo bicheito daxita pepo-naenexa Cesarea tómará beya merawitha poxonaе a las nueve tsuxubi. ²⁴Matáütano pakuiwüüináerebe kawayu ayunbe xua Pablo peekeikaenexa tsane. Matáütano paitoróbarebe xua Pablo beta pekaponaenéxatsi, xua asiüüno Félix beya”, jei. ²⁵Bapong pía soldadomonaе kaitoroba carta. Bárapo cártatha namchi, jeye:

²⁶“Xang Claudio Lisias. Félix, pongxaem takabarükuí iturajinaeinchi, kajá-kobatsi. ²⁷Pong ánoxuae kata itoróbatsi nexaiña beya bárapo pebin wáetabatsi, judiomonaе wáetaba. Muxu pebexuichi. Poxonaе jumetang xua bapong romano-monaepin najainta daxota naiña soldadomonaе barü ponang bapoxonaе bapong kapanepang. ²⁸Tsipéi tha yaputaetsi xua barapomonaе Pablo yábara páebatsi, daxota Pablo kuaranotang judiomonaе pía pentakaitorobi bichéitha tatsi. ²⁹Jumetang xua barapomonaе Pablo yábara páebatsi xua pinae bapong jopa exa-naeyo icha be pokotsiwa barapomonaе pía peitorobi koyenewang tatsi paeba. Íchitha barapomonaе jopa xeinaeyo pokoyene xua daxota Pablo pebexubinéxatsi, xuano xua daxota jiwi pekübibotha peetsinéxatsi. ³⁰Íchitha bapoxonaе jumetang xua judiomonaе namuxuweta pebexubinexa tsainchi Pablo. Daxota Pablo nexaiña beya itorobang. Tsipaebang judiomonaе pía pentakaitorobi bicheito tatsi. Jangje: ‘Icha áwiya Pablo pakui-itawetsíname xua abe bapong kabaraichi bapong pía xaiña beya papónare. Papáebare Félixtha baxua, pokotsiwa Pablo éxana’, jang. Baja, Claudio”, jei bárapo cártatha.

³¹Bárapo soldadomonaе éxana pokotsiwa xua báyatha itoroba pong romanomonaе soldadomonaе pía pepa pentakaponaein tatsi itoroba pong pewüng Claudio. Bárapo soldadomonaе bárapo merawitha Pablo kapoinchi Antípatris tómará beya. ³²Icha matakeitha barapomonaе soldadomonaе pomonaе petáxutha pona, kaibe nawibiya ichaxota táungkuatsi soldadomonaе píabo beya. Pomonaе kawáyutha pona áwiya Pablo barü poinchi. ³³Soldadomonaе Pablo kapoinchi Cesarea tómará beya. Barapomonaе soldadomonaе Félix kátatsi bárapo carta. Páblono baxota punaxubothópatsi. ³⁴Félix matha yóroba carta. Bapoxonaе Pablo yáinábatsi, jeichichi:

—Pablo, ¿eta po nakua jintomda? jei.

Pablo jumenota, jeye:

—Bara Cilicia nakua piyong, jei.

³⁵Félix namchi, jeye:

—Poxonae judiomonae patsina, pomonae xua abe kayábara paeba, bapoxonae kajumetaeinchi xua tana netsipaebiwam tsane, jei Félix.

Bapoxonae Félix itoroba soldadomonae xua Pablo yapukaenaeinchi ichaxota po botha peitüpanáe bo, po bo Herodes kuenta naxuba.

Meje yábara poxonae Pablo Félix peitabaratha tatsi nayábara jumepaeba

24 ¹Icha matakábitha poxonae cinco po matakábibe tsuxubi, pebiwi pata Cesa-rea tómaratha. Ichüing pewüing Ananías. Bapong Ananías sacerdotemonae pía pepa pentakaponaein tatsi. Irü pítiri jiwimonaeno pata. Irü pong xua petapae-beibin jiwi, pong pewüing Tértulo bapong napatopa. Barapomonae nakuara pata Cesarea tómaratha. Barapomonae Félix peitabaratha taumeinchi, xua Pablo abeya peyábara paebinéxatsi. ²Poxonae Pablo karendénatsi, Tértulo Pablo abe yábara páebatsi. Félix baraichi, jeye:

—Félix, xam pong pana yanakua éwatame. Daxota jüntema wüünaeya paji-nompang. Maisha bara beta itorobiya kanamataxéiname jiwi jiña neyaputáe koye-néwatha. Daxota xam beta éxaname bárapo nákuathe. ³Félix, xam pong pata paka barü iturajinaeinchim, xua éxaname yatsikaya wüünae nawita bárapo nakue nexa. ⁴Jopa ichichipaeiño xua takayatakutsíwatsi. Daxota katsipáebatsi xua saya kaeto pana nejumetaema xua pata paka katsipaebiwa tsainchi. ⁵Ánoxuae payaputang xua Pablo bichokono pana kuifayakota xua abe éxana. Matáütano bapong judiomonae kuitsákabatsi xua nakaseba éxanatsi daxita nákuangtha. Matáütano bapong, ápara pomonae nazarenomonae barapomonae pía pentakaponaein tatsi, pomonae pekuidubi jiwi icha koyeneya pokotsiwa jopa xaiñeyo. ⁶Yawa Nakom pin pía bono tatsi juntukuru abe taéxanatsino, poxonae juntukuru barü joníyatsi pong jopa judiomonae naexanaeyo Nakom pin pía botha. Daxota pawáetabang. Paxang paichichipang Pablo papéraxa éxanang barompaya pata peitorobi koyenewakuitha. ⁷Íchitha soldadomonae pía pepa pentakaponaein tatsi, Lisias, dangweya pana wekobe maxüpítatsi Pablo. ⁸Soldadomonae pía pepa pentakaponaein tatsi, Lisias, pana barái: ‘Pomonae Pablo abe jáintatsi moya Félix peitabaratha papáebare’, pana jei Lisias, jei Tértulo.

Tértulo ekeicha namchi, jeye:

—Félix icha yaiñabatsípame Páblotha metha bara yaputaetsípame xuaunxuae kabaraichichi. Xuaunxuae Pablo yábara páebang baxua xaniyang yatsikaya, jei Tértulo.

⁹Judiomonae, pomonae Tértulo punapoinchi namchi: “Tértulo bara xaniyéi paeba”, jei. ¹⁰Néxata Félix Pablo moya pekóbetha jume itoróbatsi. Bapoxonae Pablo Félix baraichi, jeye:

—Yaputang xua kaena báyatha aiña wei xam naexaname pong jiwi neyábara paebin xua penatsikuentsiwa xua abe peexanaexae xua bárapo tómarathe nexa. Daxota jüntükoyene weiweinang xua tana nayábara paebiwa neitabáratha. ¹¹Icha yaiñabame barapomonae, Jerusalén tomarapiwi, katsipaebíchipa xua báyatha Jerusalén tómara beya ponang. Baxota ponang tsipéi Nakom pin pía botha wüünae

tajainchinexa Nakom. Ánoxuae petain doce matakábibe yapukaewang poxonaexua báyatha ponang bara beya. ¹²Jopa jumematsontsonobéibiño jiwi. Yawa jiwi jopa jumekuitsakabeibiño xua anaepanaya penajumekayayatsinexa. Baxuang jopa exanaeíño Nakom pin pía botha. Matáütano judiomonaexua pía penakaetutsi bongthata tati, baxuang jopa exanaeíño. Matáütano tómarang pekuariyathang jopa baxuang exanaeíño. ¹³Pomonaexua paeba xua pinaexua abe éxanang, barapomonaexua jopa jumekuí kiiüpaetsi xua tana nekuiyopichiwa xua abe éxanang. ¹⁴Xaniwaicha katsipáebatsi xua xang Nakom tanakuitang pong tamo susato jiwi pía Nakom tati. Báraxua éxanang xua jiwi kuidubang be pókotsi koyeneya xua paeba Jesús pía pena pekuidubiwa tati po pekuidubiwa judiomonaexua yábara nantaxeina xua pinaexua bárapo pekuidubiwa jopa xaiñeyo. Xang jumekowüntang daxita Moisés pía peitorobi koyenewang. Matáütano po diwesin Nakom pía peitorobi jume pepaebiwa tina, bárapo diwésino jumekowüntang. ¹⁵Xang irü barichin, Nakom yábara barü jumekowüntsiya éwang icha barapomonaexua ichi xua pokoyene pomonaexua pewerapaewi ekeicha asiü tsane, pomonaexua peajüntükoyénebe jiwi irü xua asiü tsane pomonaexua peajüntükoyene wüünaexua jíwino. ¹⁶Daxota jopa najüntükoyene akáuriño tsipéi nayaputang xua Nakom beta taéxanang. Jíwithano jopa najüntükoyene akáuriño.

¹⁷“Aíña wei dapaein saya icha nákuangtha póponang. Bapoxonaexua ekeicha tatómara beya póponang, Jerusalén tómarara beya. Patopang baxota Nakom pin pía botha poxoru yáitama parátixi káponang xua tamonaexua nexa po parátixi ichamonaexua taitoroba. Matáütano bara beyang xua baxotiya Nakom tatsita exanaenexa xua pokotsiwa be takatsiwa Nakomtha, xua duwein tatautsiwa tsane. ¹⁸Bárapo koyenein áwiya exanawiyang, bekein báyatha nenakuiyábara jumeweta éxana pokoyene xua daxota Nakom jopa tsitaiño xua taajüntükoyenebewang be pókotsi koyeneya xua judiomonaexua itoroba. Bapoxonaexua judiomonaexua pomonaexua Asia nakua weparena netaeba Nakom pin pía botha. Barapomonaexua baxota nekaxiba bekein poxonaexua jopa jiwi namtsébiya wawaya exanaeíño. ¹⁹Pomonaexua netane Nakom pin pía botha pomonaexua Asia nakua wérena pepatsiwi bewa dapomonaexua xote patsi xua nekatsipaebinexa tsane xua tana neyábara paebinexa tsane xua abe taexanaewa. ²⁰Icha barapomonaexua jopa patsiyo pomonaexua xote ena bü paeba. Barapomonaexua netane poxonaexua kain matha judiomonaexua pía pentakaitorobi bicheito peitabaratha unguang. Barapomonaexua bü katsipaeba, icha metha bara abe éxanang poxonaexua bárapo pentakaitorobi bicheito peitabaratha tati unguang. ²¹Saya ü baxua éxanang poxonaexua peitabaratha unguang, bapoxonaexua bichokono wawang. Jangje: ‘Ánoxuae poxonaexua paxam pana neyábara páebame xua tanatsikuentisiwa xua abe taexanaewa paxam panantaxéiname xua abe éxanang yáitama jumekowüntang xua pewerapaewi ekeicha asiü tsaibi tsane’, jang jei”, Pablo.

²²Félix kaena báyatha yábara yaputane Jesús pía pena pekuidubiwa tati. Daxota Félix kataunxuaexua abü jopa baxua yábara paebiyo pokotsiwa barapomonaexua paeba. Daxota Félix namchi, bapomonaetha, jeye:

—Abü bexa paka tsipaebinchi, poxonaexua soldadomonaexua pía pepa pentakaponaexua tati patopaena pong Lisias, bapoxonaexua yábara paebin pokotsiwa Pablo éxana, jei Félix.

²³Néxata Félix itoroba soldadomonaexua pía pentakaponaexua tati xua soldadomonaexua Pablo kataunxuaexua yapu-eéniya pebarü jinompaenéxatsi Herodes pía botha tati, bekein bara kópata xua Pablo bara exanaena be pokotsiwa xua bapong

ichichipa éxana bárapo botha. Matáütano kopatano xua Pablo bara pesiwaponaenéxatsi piamonae xua piamonae peyawenaenéxatsi xua pokotsiwa nantawénona bapong.

²⁴Icha matakábitha pirapaeyo Félix piowabe patópabe. Petsiriwa pewüing Drusila. Barapowa judiomonaewayo. Félix najumekaitoroba ichüingtha xua Pablo pewabinéxatsi Félix bérena, matáütano xua Pablo Félix yábara petsipaebinéxatsi xua pokoyene jiwi jumekowünta Jesucristo. ²⁵Pablo Félix tsipáebatsi xua pinae aiñakuí xua jiwi beta yanthüthüya jinompa icha be Nakom ichi xua beta yanthüthüya pópona. Matáütano páebano xua pinae jiwi piaxoba abe exaneiba. Matáütano namchino xua pinae kaentakábitha tsane Nakom wabina daxita jiwi xua peyábara paebinexa xua penatsikuentsiwa xua abe peexanaexae bárapo kae pin nákuathe. Félix najüntükoyene kabenaeka poxonae jumetane baxua. Pablo tsi-páebatsi, jeichichi:

—Jiña tutu beya bara ponde. Bexa ekeicha kawabinchi icha ichawiyo jopa nee-naeyo, jei Félix.

²⁶Félix nantaxeina xua parátixi pekatsiwa tsainchi xua Pablo pekatsiwa tsane xua daxota Pablo pepukopatsinéxatsi. Daxota memekabiya wábatsi Pablo. ²⁷Báru-xua éxana beya yaáíña weibe jopa. Barapoxonae Félix weta xua pong peyanakuaéwatsin jiwi náexana bárapo Judea nákuatha, xua icha nakua beya pewarapaexae. Ichüing Félix pekoutha tatsi tapatópatsi pong pewüing Porcio Festo pong xuya pong peyanakuaéwatsin jiwi náexana Judea nákuatha. Félix ichichipa xua peweyataéwatsi xua judiomonae peweyataewa daxota Pablo jopa kopatichi xua bara yatsi-kaewa pepukopatsíwatsi xua pepanepaewa tsane.

Meje yábara poxonae Pablo Festo peitabaratha tatsi táungkuatsi

25 ¹Festo bara patopa xua penaexanaenexa pong peyanakuaéwatsin jiwi. Poxonae akoibi po matakábibe weta Cesarea tómara weya pona, Jerusalén tómara beya pona. ²Bárapo tómaratha Jerusalén tómaratha sacerdotemonae pía pentakaponaewi tatsi irü judiomonaeno pomonae pentakaponáewino, barapomonae Pablo abeya kuiyábara kanantsipáebatsi. ³Barapomonae Festo baraichi: “Bü painta ichamonae Pablo Jerusalén tómara beya kapoinchi”, jei. Barapomonae baxua Festo jeichichi, tsipéi Pablo námtotha ewatabobenapáebatsi pebexubinéxatsi. ⁴Festo jumenota, jeye:

—Kanta Pablo Cesarea tómaratha eka xua soldadomonae barü jinómpatsi. Tha nama imoxoyo bara beya ekeicha kaibeya ponaetsi. ⁵Paiñamonae jíwana pomonae pentakaponaewi moya bü barapomonae nepunapona Cesarea tómara beya. Icha Pablo abe éxana, metha moya baraxota Pablo jame be kuiyábara paeichípatsi barapomonae, jei Festo.

⁶Festo kataunxuae Jerusalén tómaratha ocho po merawíyobe yapukaewa xua ekeicha aiña dapáeyobe. Barapoxonae Cesarea tómara bewarapiya kaibeya. Icha matakábitha Festo eka peekeibithopeibíwatha po tütutha ichaxota yábara paebe-keiba jiwi xua penatsikuentsiwa xua abe peexanaexae. Festo barái soldadomonae: “Painta kaponde Pablo taxaiña bérena”, jei. ⁷Poxonae Pablo patopa, judiomonae imoxoyo umenarúküpa pomonae Jerusalén tómara weparena. Barapomonae judiomonae Pablo yakaincha matawakeicha uménatsi. Barapomonae Pablo kuiyábara páebatsi xua abe éxana nawita. Íchitha xua barapomonae paeba jopa tsita

itapeñaxeinaeyo xua ápara bara xaiñéi pokotsiwa barapomonaе paeba. ⁸Néxata Pablo piakoya nayábara paeba, jeye:

—Xang jopa abe exanaeiño. Jopa abe yábara paebiño Moisés pía peitorobi koyene tatsi. Matáütano Nakom pin píabo jopa abe yábara paebiño. Matáütano jopa abe yábara paebiño romanomonaе itorobiya pía pepa peewatsinchi tatsi, jei Pablo.

⁹Festo bépara antobetséi judiomonaе. Daxota Festo Pablo yáíñabatsi, jeichichi:

—¿Jiña ponaetsi Jerusalén tómara beya xua baxotiya kayábara paebinchi nena-sikuentsiwa xua abe neexanaexae? jei Festo.

¹⁰Pablo jumenota, Festo jumenótatsi, jeye:

—Xang unguang peitabaratha tatsi pomonaе pentakaponaewi, pomonaе romanomonaе itorobiya pía pepa peewatsinchi tatsi itoroba. Barapomonaе pentakaponaewi bara itakúüpatsi xua bárapo tómarathe tana neyábara paebinexa xua tana natsikuentsiwa xua abe taexanaexae. Jopa nantawenonaeiño xua taponae wa tsane Jerusalén tómaratha. Xam býatha beta yaputáneme xua jopa abe exanaeiño judiomonaetha. ¹¹Icha xaniwaicha abe éxanang barapomonaetha, metha moya benebexubina. Jopa junuwiño xua tatüpaewa tsane. Íchitha icha jopa xaiñeyo xua barapomonaе neyábara paeba, metha néxata barapomonaе jopa nebexubíchipae. Tha nama warapaetsi romanomonaе itorobiya pía pepa peewatsinchi beya, takoya nayábara paebichi, jei Pablo.

¹²Kopiya matha Festo tsipaeba pejumeyaweneibíwichi. Barapoxonaе Festo, Pablo baraichi, jeye:

—Yáitama aunxuae siwaponae páebame romanomonaе itorobiya pía pepa peewatsinchi tatsi, xua nekayábara paebinexa xua nenatsikuentsiwa xua abe neexanaexae daxota moya ponáename bapong beya, jei Festo.

Meje yábara poxonaе Pablo unguua Agripa peitabaratha tatsi pong peyanakuaéwatsin jiwi

¹³Icha matakábitha Agripa, pong peyanakuaéwatsin jiwi, bapong pona Cesarea tómara beya. Petsiriwa punapoinchi, bapowa pewüng Berenice. Festo siwapoinchi Cesarea tómaratha iya. ¹⁴Baraxotiya Agripa petsiríwano aiña matakabin ékabe. Festo namchi Agrípatha, jeye:

—Xote eke pong kain Félix xubeta Cesarea tómaratha xua bapong pebarü jinom-paenéxatsi soldadomonaе. ¹⁵Poxonaе Jerusalén tómaratha ékang, sacerdotemonaе pía pentakaponaе jiwi tatsi, pítiri jíwino, barapomonaе netsipaeba xua bepa pinae Pablo itorobin xua petüpaewa tsane. ¹⁶Barapomonaе barang: ‘Barapókotsi koyene romanomonaе pang pata kuikoyene. Paxang jopa pakopatsiño xua ichüng amana-ya bexotsi. Jame kopiya pomonaе xua abe yábara paeba ichüngtha, barapomonaе bewa paebina bapong peitabaratha tatsi icha bara metha bapong xaniwaicha abe éxana. Bapoxonaе bapong piakoutha beya nayábara paebíchipa xua barapomonaе paeba’, jang. ¹⁷Daxota poxonaе barapomonaе pata xote, jopa be bayathiño yáitama. Daxota baya kaena naiña ekoundekang, po tútutha yábara paebekeibang jiwi xua penatsikuentsiwa xua abe peexanaexae. Itorobang soldadomonaе xua Pablo pekaponaenéxatsi taxaiña bérena. ¹⁸Xang nantaxeinang xua Pablo bichokono abe éxana. Íchitha poxonaе barapomonaе asiya umena peyábara kueikuei-jeinexa tsainchi, Pablo jopa paebiyo po diwesi xua daxota tanantaxeinaenexa

xua Pablo bara abe éxana kou. ¹⁹Pokotsiwa xua Pablo yábara kueikueijeichi, saya xua ápara pía pejumekowüntsiwa tatsi yábara, matáütano xua Pablo peyábara kueikueijeixae pebin pong Jesús baraichi, xua pinae ekeicha asüü poxonae tüpa. Seikaya nama barapomonae paeba xua pinae bapong ápara tüpa, xua ekeicha jopa asüüyo. ²⁰Jopa yaputaeiño xua baxua éxanang xua Pablo abe yábara páebatsi. Daxota kopiya matha Pablo yáñabang, jangje: ‘¿Xam, jiña ponaetsi Jerusalén tómara beya xua baraxotiya kayábara paebinchi xua nenatsikuentsiwa xua abe neexanaexae?’ jang. ²¹Íchitha Pablo dapo jumetha netsipaeba xua bepa ponáei Augusto beya, romanomonae itorobiya pía pepa peewatsinchi beya, pong xua bepa pinae yábara paebinchi xua penatsikuentsiwa xua abe peexanaexae. Daxota itorobang soldadomonae xua Pablo abü pebarü jinompaenéxatsi soldadomonae, beya abü poxonae nekuijüpa xua itorobin pongtha pong romanomonae itorobiya pía pepa peewatsinchi, jei Festo xua Agripa tsipáebatsi.

²²Néxata Agripa Festo baraichi, jeye:

—Tha bekein irü jumetáetsirü Pablo, jei Agripa.

Agripa jumenótatsi, Festo jumenota, jeye:

—Metha moya baya tsane jumetáename, jei Festo.

²³Bara icha matakábitha Agripa irü Berenice patópabe. Paparuwa peitüpanaewa namaxátatabe. Agripa pinmonae barü pata, soldadomonae pía pepa pentakaponaewi tátsino, irü Cesarea tómara pía pentakaponáewino. Bárapo bicheito Agripa barü pona. Festo itoroba soldadomonae xua Pablo pekarendenaenexa tsainchi.

²⁴Festo barái, jeye:

—Agripa, xam pong neyanakua ewatsin jiwi, irü pomonae pekanamataxeinae jiwi pamdü. Bapong xote ungkue Pablo. Daxita judiomonae irü Jerusalén tomarapiwi, irü Cesarea tomarapiwi, daxita barapomonae Pablo jume yábara páebatsi xua pinae abe éxana. Matáütano barapomonae neitoroba nawita xua bepa pinae Pablo itorobin xua petüpaewa tsane. ²⁵Íchitha xang saya takoya nantaxeinang be jopa neichichi abe exanaeyo, poxonae nejumenota, poxonae tsipaebang. Daxota jopa bekaenaetaxubiño xua pebexubiwa tsainchi. Íchitha Pablo netsipaeba xua bepa ponáei romanomonae itorobiya pía pepa peewatsinchi tatsi beya, pong pewüng Augusto, tsipéi bepa pinae yábara paebichi xua penatsikuentsiwa xua abe peexanaexae. Daxota yábara najüntükoyene wetang xua bapong Pablo taitorobiwa tsane bara beya. ²⁶Yáitama bapong jopa abe exanaeyo, jopa yaputaeiño xua eta be tajumichiwa tsane bárapo cártatha poxonae Pablo itorobin xuano xua cártano kayábara kuipukatsin bara beya. Daxota ánoxuae Pablo paiña itabaratha kuaranotang. Xam Agripa, pong neyanakua ewatsin jiwi, moya matha kopiya yáñabare Pablo, tsipéi tha beta kuiyábara tatinaetsi bara beya pongtha pong romanomonae itorobiya pía pepa peewatsinchi. ²⁷Tsipéi inta jopa wüünae tsipae icha itoróbichipang Pablo pong pewaetabinchi icha jopa yábara paebin tsipae xua pokotsiwa bapong peexanaexae, jei Festo xua Agripa tsipáebatsi.

**Meje yábara poxonae Pablo piakoutha kuita paeba,
Agripa peitabaratha tatsi, pong peyanakuaéwatsin jiwi**

26 ¹Bara néxata Agripa Pablo baraichi, jeye:

—Icha jiña paebichi, moya taema, jei.

Barapoxonae Pablo namaxüyoicha xua Agripa jakó batsi. Bapoxonae namchi, jeye: ²“Agripa, pong neyanakua ewatsin jiwi, maisha bichokono jüntükoyene

weiweinang, xua ánoxuae neitabáratha tana nayábara jumepeabixae tsane pokotsiwa báyatha neyábara paeba judiomonae pokoyene xua pinae abe exaneibang. ³Poxoru yáitama, xam Agripa, báyatha yaputáneme pata jüntükoyenein pomonae judiomonae pangxaein. Yaputanemeno baxuang xua pana najumematsontsóno-bang. Daxota kabaraichi xua saya beta nejumetaema xua jopa aitakonaeinde”, jei Pablo.

Meje yábara poxonae Pablo nayábara paeba, poxonae pinae kataunxuae jopa jumekowüntsiyo Jesús

⁴Ekeicha Pablo namchi, jeye: “Daxita judiomonae barapomonae neyaputane xua poxonae pexuyong, poxonae kaena báyatha pía xantha tatsi póponang xua tanákuaxae. Barichino neyaputane poxonae Jerusalén tómaratha póponang. ⁵Icha yaiñabatsípame barapomonae, yábara katsipaebíchipa pokotsiwa exaneibang xua fariseomonae pókotsi jüntükoyene kuidubeiba, pokotsiwa judiomonae kuidubéibatsi, tsipéi xang fariseomonaepin. Daxita barapomonae yaputane xua kaena báyatha jumekowüntang daxita pokotsiwa xua barapomonae itoroba. Fariseomonae itapeta kuita exaneiba pokotsiwa Nakom itoroba beyakaincha ichamonae xua exaneiba. ⁶Judiomonae nekápona xote tsipéi saya poxoru yábara wüünae éwatang xua bexa Nakom asüü exanaena pomonae xua wérapa. Baxua pinae Nakom waámo susato jiwi yábara tsiwüünae muxudútatsi. ⁷Patamonae pomonae Israel nakuamonaepiwi pomonae xua doce pomonae bichéitobe, baxua yábara jumekuiwüünae éwata poxonae petüpaewi ekeicha asüü exanaeinchi, xua poxonae Nakom exanaena. Daxota barapomonae Nakom wüünae jointéibatsi. Matáütano itapeta éxana pokotsiwa Nakom itoroba, merawíthano, matakábithano. Xam Agripa pong neyanakua ewatsin jiwi katsipáebatsi baxua tayábara jumekowüntsixaerü, daxota judiomonae neyábara paeba xua pinae abe éxanang. ⁸Paiñaxoba panantaxéiname xua Nakom jopa itaküüpaetsi xua ekeicha jiwi asüü peexanáewatsi pomonae xua wérapa”, jei Pablo.

Meje yábara poxonae Pablo nayábara paeba xua pinae kopiya abe éxana nawita pomonaetha, pomonae pejumekowüntsíwichi Jesús

⁹Ekeicha Pablo jeye: “Xang kopiya takoutha nantaxeinang xua bewa bichokono abe exanaein pomonaetha, pomonae Jesús pejumekowüntsíwichi pong Nazaret tomarapin. ¹⁰Jerusalén tómaratha baxua éxanang. Sacerdotemonae pía pentakaponaewi pía peitorobi koyenewa nekata xua daxota tana nekuijüpaewa xua jiwi takaponaewa jiwi pekübibotha. Pinmonae kai káponang, pomonae Jesucristo pejumekowüntsiwi. Xang yábara jumejejang xua barapomonae pejutebíwatsi. ¹¹Anaya kaenaetang, péraxa exanangno poxoru íchipang xua barapomonae pentsina xua Jesús pejumekowüntsíwatsi. Ü baxua éxanang. Daxita judiomonae pía penakaetutsi bongtha tatsi exanangno. Bichokono anáepanang. Daxota icha nákuangtha ponang tajeichinexa pomonae pejumekowüntsíwichi Jesús xua barapomonae abe taexanaenexa”, jei Pablo.

Meje yábara poxonae ekeicha Pablo nayábara paeba poxonae pinae jumekowünta Jesús

¹²Ekeicha Pablo namchi, jeye: “Barichi sacerdotemonae pía pentakaponaewi tatsi pía peitorobi koyenewa nekata xua daxota tana nekuijüpaewa xua taponawa

Damasco támara beya, xua pomonae jumekowünta Jesucristo takaponaenexa tsane Jerusalén támara bérena. ¹³Xam pong neyanakua ewatsin jiwi bara xaniwaicha katsipáebatsi poxonae námtotha paenapónang poxonae matáeiñaxae tsuxubi pekoicha tang xua peitaboko wejopeika, pin koicha po koicha beyakaincha xua xometo. Bárapo koicha pomonae nepunapona nebarü matawakaicha mata-tsún ungueika. ¹⁴Néxata daxita íratha paóthopang. Jumetang xua pong hebreo jumetha nebarái, jeye: ‘Saulo, Saulo, ¿eta xua tamonae inta abe éxaname? Poxonae tamonae péraxa éxaname, ápara jiñakoutha átene nakana éxaname icha be buey ichi poxonae ba piakoutha xua xota sojei nataxumatababa’, nejéi. ¹⁵Néxata jumenotang jangje: ‘Pong jiwi Nekanamataxeinaem, ¿jintam xamda?’ jang. Nejumenota jeye: ‘Ápara bara xang, Jesús pongxaein inta abe éxaname tamonae pomonae tana nejumekowüntsiwi. ¹⁶Nontaponde. Xua ánoxuae nekótame katsita naitúütatsi. Ápara tha tana nejumeyopichim. Matáütano béxano ekeicha ichawa nekotsíname tana neyábara paebinexam tsane baxuangno. ¹⁷Kakuí itoróbatsi xua Nakom Pejume Diwesi nekueikueijamnexam. Néxata kakapanepaeinchi poxonae juntukuru kapérxaxa éxana judiomonae irü pomonae jopa judiomonae naexanaeyo. ¹⁸Kaitoróbatsi judiomonaetha irü pomonaetha, pomonae jopa judiomonae naexanaeyo xua jopa ekeicha pejinompaenexa poxonae jopa jumekowüntsiyo. Matáütano kaitoróbatsi xua barapomonae jopa peexanaponaenexa pokotsiwa kaurimonae pía pentakaponaein tatsi itoroba, pong Satanás, jame meisha peexanaenexa pokotsiwa Nakom itoroba. Matáütano kaitoróbatsi xua barapomonae tana nejumekowüntsinexa. Bapoxonae yábara jüntemainaein barapomonae abe pía peéxanae kuirukoyenein tatsi, matáütano xua pexeinaenexa pokotsiwa Nakom yábara tsiwüünae muxuduba’, nejéi Jesús”, jei Pablo.

Meje yábara poxonae Pablo éxana pokotsiwa Nakom itoroba poxonae tsita naitúütatsi námtotha

¹⁹Ekeicha Pablo namchi, jeye: “Agripa, xam pong neyanakua ewatsin jiwi, xang jopa jumefebiño xua Jesús neitoroba poxonae itaboko we netsita naitüütsika xua námtotha netsita naitüüta poxonae pekóichatha jumetang xua Jesús netsipaeba. ²⁰Kopiya matha Damasco tomarapiwi tsipaebang Nakom Pejume Diwesi. Bapoxonae ekeicha bárapo diwesi tsipaebang Jerusalén tomarapiwi. Bapoxonae ekeicha daxita Judea nakuamonaepiwi bárapo diwesi tsipáebangno. Irü pomonaetha, pomonae jopa judiomonae naexanaeyo tsipáebangno. Bárapo diwesi tsipaebang xua barapomonae icha jüntükoyenein pexeinaenexa, yawa Nakom pejumekowüntsinéxatsi, matáütano xua barapomonae petsita-itapeiñaxeinaenexa jíwitha xua bara Nakom jumekowüntatsi xua beta peexanaexae. ²¹Daxota judiomonae newáetaba poxonae Nakom pin pía botha patopang yawa bepa nebexubéi. ²²Íchitha Nakom neyawena. Daxota áwiya Nakom Pejume Diwesi páebang bichokono daxita i dapomonaeintha pomonaetha, pomonae pepawi jiwi irü poponáethano pomonae peaiñakuí jiwi. Báraxua saya meisha páebang be pókotsi koyeneya matha juiña Moisés yábara wüünae tsiwanaya paeba írürü be pókotsi koyeneya matha juiña Nakom peitorobi jume pepaebiwi yábara wüünae tsiwanaya paeba. ²³Barapomonae tsipaebang po diwesi yábara xua pinae bexa Mesías péraxa exanaeinchi ichamonae. Matáütano bapong pinae pong xua kopiya pomonae pewerapaewi astüü nantaka-exanaeinchi. Matáütano xua pinae judiomonae irü pomonae jopa

judiomonae naexanaeyo yábara yaputane exanaeinchi pekapanenebiyáe jume diwesi”, jei Pablo xua Agripa tsipáebatsi.

**Meje yábara poxonae Pablo paeba Jesús pejume diwesi
Agrípatha xua Agripa pejumekowüntsinea**

²⁴Poxonae báraxua Pablo najumeweta xua nayábara jumepaeba, Festo jumedangweya wawái, jeye:

—¡Pablo, maisha kantsiyaibeka poxoru saya ü nekuidubi daxota kantsiyaiba! jei Festo.

²⁵Pablo jumenota, jeye:

—Festo pongxaem takabarükuí iturajinaeinchi, jopa nentsiyaibiyo ápara. Xuaunxuae páebang, ápara seikáyarü xua xaniwaicha páebang xua bara ápara pexaiñeiwa. ²⁶Ee taema, Agripa, pong pepa peyanakuaéwatsin jiwi pong xote eke. Bapong yaputane xua xaniwaicha páebang. Bapongtha jopa junuwiño xua tsipaebang. Xuaunxuae katsipáebatsi bapong baxua daxita yaputane poxoru jopa namicha exanaeiño. ²⁷Agripa, xam pong neyanakua ewatsim jiwi. ¿Jumekowüntame pokotsiwa Nakom pía peitorobi jume pepaebiwi paeba? Bara yaputang xua bara jumekowüntame, jei Pablo.

²⁸Agripa jumenota, Pablo jumenótatsi, jeye:

—Saya kaeto netsipáebame. Saya bárapo jumetha nantaxéiname xua xang naiña jumekowüntsinaang Jesús, jei Agripa.

²⁹Néxata Pablo namchi, jeye:

—Xua kaeto paka tsipáebatsi yawa icha matowa paka tsipáebatsi bara ba Nakomtha pákata wúükatsi xam nexa, irü pomonae nexa, pomonae nejumetane paiña nejumekowüntsinaexam tsane Jesús. Ichichipang xua paiña neexanaewa icha ichin xua tajumekowüntsiwa, bara bekein jopa ichipaeiño xua paiña nemaxütha paiña nexeiñaeewa jiwi pekübinainto be pókotsi nainto xuaunxuae tamáxütha dukua, jei Pablo.

³⁰Poxonae Pablo najumeweta baxua, Agripa pong peyanakuaéwatsin jiwi irü Berenice asiya unguatábabe. Irü Festo pong peyanakuaéwatsin jiwi asiya unguataba. Pomonae irü ena asiya umenarüküpa. ³¹Aishowa beiyiya barapomonae natsipaeba, najéi:

—Barapong Pablo jopa ápara abe exanaeyo pokoyeneyatha xua daxota bapong pebexubinéxatsi, matáütano pokoyeneyatha xua daxota bapong jiwi pekübibotha peetsinéxatsi, najéi barapomonae.

³²Agripa tsipaeba, Festo baraichi, jeye:

—Icha metha jopa naka wüükae tsipae Pablo xua peponaewa tsane pongtha pong romanomonae itorobiya pía pepa peewatsinchi xua baxotiya peyábara paebinéxatsi penatsikuentsiwa xua abe peexanaexae metha pukopatsípatsi xua bara pepanepaewa tsane yatsikaewa, jei Agripa.

Meje yábara poxonae Pablo Roma tómara beitorobíyatsi

27 ¹Barapomonae najüntükoyene weta xua pata taneitorobiwa Italia nakua beya. Pablo irü ichamonaerü pomonae peteikebiwichi daxita barapomonae itoróbatsi Roma tómara beya. Pong barapomonae matakapoinchi bapong pewüing Julio, pong soldadomonae pía pentakaponaein tatsi. Bárapo matabüxyüo

soldadomonaē bicheito wüingdútatsi “Augusto soldado bicheito”, jei, poxoru bárapo soldadomonaē Augusto tanakuítatsi, pong romanomonaē itorobiya pía pepa peewatsinchi. Bárapo soldadomonaē Pablo irü ichamonaē kapónatsi Augusto beya. ²Pepa weranaetha pawárapang, po nae Adramitio tómara wérena pona. Bárapo nae ekeicha Asia nakua beya ponaena. Po tómaraxi pitapatha ena bárapo tómaraxi bepa siwaponae na ponáei. Ichüing pana kuéyata. Bapong pewüing Aristarco Tesalónica tomarapin. Bárapo tómara Tesalónica tómara eka Macedonia nákuatha. ³Icha matakábitha Sidón tómaratha papatang. Baraxota barapong Julio, Pablo barü jumewüunaetsi. Matáütano bapong Julio, Pablo kópatatsi xua bara Pablo piamonaē pesiwaponae tsainchi, xuano xua bara Pablo peyawenaenéxatsi xua xoxi nantawénona. ⁴Bara Sidón tómara wepawarapiyang wératha. Bara wératha paenapónang joibo kuiyainwa Chipre tunaeto pantawakebang, yáitama bichokono pin joibo dena ichaxoyo kopiya payiyang. ⁵Bara marmene iya paenapónang, Cilicia nakua, Panfilia nakuano imoxoyo pakakita enaponang. Bapoxonaē Mira tómaratha papatang, po tómara Licia nákuatha eka.

⁶Baraxota pong soldadomonaē pía pentakaponaēin tatsi, bapong icha nae taeba baraxota. Bárapo nae Alejandría tómara wérena pona. Bárapo nae irü seikaya Italia nakua beya ponaena. Bárapo naetha ekeicha Julio panabarü iya Italia nakua beya. ⁷Aiña matakabin saya bewayo paenaponeibang, poxoru yáitama joibo jera kaewa karena tsaibi. Gnido tómara paxenta enaponang. Salmón tómarano paxenta enaponang. Creta tunáetono pantawakebang. ⁸Bewayo wératha paenapónang, pítapa pakakita enaponang. Tómaratha papatang ichaxota pexutoroto. Baxota pajebounang, po tómara pewüing Buenos Puertos. Bárapo tómara imoxoyo eka ichaxota Lasea tómara.

⁹Baraxota kame áwiya aiña matakabin paenang. Báyatha yapukaewa bárapo matakabin poxonaē barapomonaē warapapaeba bárapo matakábitha xua pin mara mene iya. Tsipéi imoxoyo awüübo tsúrukuaē tsóponaē, daxota Pablo nantaxeina xua icha metha paponáetsipang, panakabétsipang. Daxota barapomonaē Pablo muxuweta. ¹⁰Pablo namchi, jeye:

—Pebiwí pam, pana nejumetaema. Ichaunxuae warapaeinchi methaunxuae nakabetinchi. Matáütano methaunxuae wéranaē abe exanaena. Matáütano xoxino xua kapoinchi methaunxuae napentsina. Matáütano jiwi methaunxuae napentsina, jei Pablo.

¹¹Íchitha soldadomonaē pía pentakaponaēin tatsi, bapong Julio, jopa jume-naitomatsiyo xua Pablo tsipaeba. Íchitha dapó jumetha saya meisha pong jera Pekanamataxeinaēin irü pong jera pexeinaēin, bapongbe itapeta jumenaitomatatsibe. ¹²Barapomonaē nantaxeina, xua baraxota jopa beenaeyo poxoru bárapo tómara jopa kuiwüunaeyo xua jera pebokaewa poxonaē awüübo pin jóiboxaē. Pinmonaē barapomonaē jíwana tsita wüünaetsi xua Buenos Puertos weya pewarapaenexa jératha Fenice tómara beya, po tómara eka Creta tunáetotha. “Methaunxuae tsiwanaya payaeinchi penakabetsi awüübo, jóibono”, jei. Bárapo tómara kuiwüünaē xua ichaxota jera jebouneiba. Baxota joibo yáyapa poxoru tómara naitakafeteka, poxoru joibo jopa patopaeyo pokotsiwa wétsika yawa pokotsiwa wétsina. Baraxota bepa enáei poxonaē awüübo tsuxubi.

Meje yábara poxonae marátsaka dangwéi pepa marmentha

¹³Néxata bewayo joibo tsungkuae, be pokotsiwa párowa wejopeina. Daxota barapomonae namchi: “Bü poinchi kataunxuae saya tsiki jóibiyo”, jei. Bapoxonae totabiya jera. Bárapo Creta tunaeto imoxoyo pítapa pakakita enaponang wératha. ¹⁴Poxonae saya kaeto paenapónang bapoxonae pin joibo pana epataepona, Creta nakua tunaeto wejoparena. Jera epayüütaba. ¹⁵Néxata joibo jera muxunenababa. Kanta joibo nawita, daxota jopa paponaeño joibo beya. Daxota saya pakópatang xua saya bara joibo pana yanakaputabiyáenaba. ¹⁶Kauda tunaetiyo be pana yanakaputábiya. Baraxota ichaxota joibo yáyapa, tsika naeyo jériyo ponaeyo paketoutang, pajontaxuinang pepa naetha. ¹⁷Panakuitongtang xua pajontaxuinang. Bárapo naeyo pepa jératha pakütabotang. Néxata jera penakuichiwi pepa bümákangtha pejumawé müxübürü kapabina, müxübürü babataruba xua pewakatabiyainwa joibo. Néxata barapomonae bichokono junuwa poxoru nantaxeina xua mexeya ítara jera naxatatabawéi taetabotha, po táetabo pewüing Sirte. Daxota wera jontabota jératha. Saya jera kaputábiya jóibotha. ¹⁸Icha matakábitha kame áwiya marátsakang bichokono dangwéi. Daxota ichawang ménetha bebái xua xuang kápona. ¹⁹Icha matakábitha daxota pabebang xua jératha jeba tsipéi ichichipa xua tafafánatsi. ²⁰Aiña matakabin kame áwiya jopa panekotsiño xometo. Opiteino jopa panekotsiño. Pajunuwang. Panantaxeinang: “Metha aparaunxuae jopa nakapanenébiya tsainchi. Bunothopaeinchi aunxuae”, pajang.

²¹Aiña matakabin pana yapuxénaka xua jopa panabanaeño. Pablo nontapona. Barapomonae baraichi, jeye:

—Bara báyatha paka tsipaebatsiba: ‘Creta tunaeto beya, jopa pawarapaeinde’, paka baráichiba. Daümetha ekeicha pawárapame. Daxota aunxuae jera abe éxana. Matáütano panantapuxanameno xuaunxuae pabebam xoxi pakáponame. ²²Íchitha saya jopa pajunuwinde. Jopa pajíwana tüpaem tsane, bekein meisha jera naxubina. ²³Mérawi matatsunpin netsita naitüüta. Bárapo matatsunpin Nakom itoroba pong Ta Nakom xuano xua taexanaexae pokotsiwa bapong neitoroba. ²⁴Bárapo matatsunpin nebarái: ‘Pablo jopa junuwinde poxoru bexa tsane romano-monae itorobiya pía pepa peewatsinchi pong Augusto, peitabaratha tatsi unguáename. Daxota pomonae xua nápona kata kapanépati Nakom’, nejéi matatsunpin. ²⁵Daxota, paxam pana najüntükoyene tsakábare, poxoru xang nantaxeinang xua pokotsiwa matatsunpin netsipaeba bara baxua exanaena. ²⁶Íchitha petunaetha naka monapentsina, jei Pablo.

²⁷Poxonae catorce po matakábibe tsuxubi, barapoxonae marmene pakaxibang. Bárapo pepa marmene pewüing Adriático mene. Bárapo ménetha joibo pana yanamuxunenababa. Mérawi papaetha, pomonae petanakuichiwi bárapo naetha, barapomonae nantaxeina xua imoxoyo ira itiya pona. ²⁸Barapomonae mene epatutukanaübareka. Treinta y seis pomüü epatíyobe xeina xua íratha deka. Kaeto ekeicha mene epatutukanaüba, baxota veinte y siete pomüü epatíyobe xeina xua íratha deka. ²⁹Barapomonae pejunuwixae xua jera tofotabina poxonae yüütabina ibówangtha, daxota barapomonae ponainto arewe, xua jera duntaba exanaduta petafe xoreka. Cuatro ponáintobe xoreka peruntaba exanadutsinexa. Matáütano barapomonae Nakomtha wüüka xua xometo pentha tsane, penekotsinexa tsane.

³⁰Pomonae petanakuichiwi bárapo naetha barapomonae nantaxeina xua perükü-paewa. Daxota barapomonae náemata ponainto arewe dureka pebüxüreka. Íchitha tsiki naeyo, jériyo, ménetha durékano, poxoru pía namicha düküpaetsi bárapo náeyotha. ³¹Pablo barái Julio, pong soldadomonae pía pentakaponaein tatsi, xuano baraino soldadomonaetha, jeye:

—Icha pomonae petanakuichiwi bárapo naetha icha jopa enáe tsane bárapo pin naethe, jopa Nakom kapanenebiyae tsane, jei Pablo.

³²Daxota soldadomonae jériyo müü ukuiba. Jériyo ménetha jopeika.

³³Poxonae kaemumbo, Pablo pijiwimonae jain itoroba. Pablo pijiwimonae barái, jeye:

—Báyatha aiña po semánabe paiña junuwí jopa bichokono panabanaem poxoru pajunúwame xua pabunothópame. ³⁴Daxota pin jumetha paka jeichichi. Moya matha paxaema tsipéi baxua aiñakuí xua paiña nenakapanenebiyaenexam. Bara kaein jopa napuxanae tsane. Matáütano jopa kaentanátiyo aichúrukuae tsane.

³⁵Poxonae Pablo najumeweta, pekóbetha pan pita, Nakomtha tsipaeba barapomonae peitabaratha tatsi. Barapoxonae pan epajanaxuba. Bapoxonae xane.

³⁶Bapoxonae barapomonae najüntükoyene tsakabarúküpa. Matáütano barapomonae daxita jüntema nabanerúküpa. ³⁷Jerapiwi doscientos setenta y seis po matabüxümonaebe pang xua daxita pang. ³⁸Poxonae barapomonae najainwetarúküpa, daxita barapomonae trigoxú bebái pepa ménetha poxoru bepa jera tafafanaetsei.

Meje yábara poxonae jera bunareka

³⁹Poxonae xometo baya pentha tsina, pomonae petanakuichiwi barapomonae jopa yaitaeyo ira, po íratha muxu pepatsi. Poxonae barapomonae pexutoroto tane, barapomonae nantaxeina xua juntukuru jebounaena táetabo itapatha. ⁴⁰Daxota barapomonae nayanamüü ukuiba, xua ponaintong arewe mene búpana bobendeka. Po katénano pekabobotsi katena, bárapo katénano ishanaxoreka. Néxata paparuwa duta wera náetotha. Bárapo wera pebüxüütha duta. Jera naiña kakuita kaputábiya ira. ⁴¹Íchitha barapoxonae bárapo nae ichaxota tsewa tuwüütha naxatatabarena. Büxü naxatatabungkua bichokono. Petafe fotaba marátsakatha.

⁴²Soldadomonae bépara jutebéi pomonae peteikebi jíwichi, tsipéi poxonae ménetha othopaena mexeya ítara düküpaenawéi. ⁴³Íchitha soldadomonae pía pentakaponaein tatsi, bapong Julio, ichipa xua Pablo asüü pópona. Daxota Julio jopa yábara jumekopatsiyo xua jutebinchi pomonae peteikebi jíwichi. Bapoxonae Julio itoroba pomonae yaputane xueiba, kopiya pepatsinexa tsane pepa íratha.

⁴⁴Pomonae xua jopa xueibiyo napaewang kobenaxuéibiya. Matáütano bárapo jera pepang kobenaxuéibiya. Daxota daxita panenebiya pepa íratha.

Meje yábara poxonae Pablo Malta tunáetotha patopa

28 ¹Poxonae potunaetotha papanenebiyang ichamonae pana tsipaeba: “Ápara Malta tunaeto”, jei. ²Malta tunaetopiwi beta pana matenta weiweinaya waba. Bichokono ema duna. Ema pana átsana, akeno. Daxota barapomonae pin ishoto itutaeta. Bapoxonae barapomonae pana waba: “Anthá panonopenare”, jei. ³Pablo ishotong nota po ishotong tsewa. Poxonae bárapo ishotong pepa ishótotha bebebeya, bárapo ishotongtha jomo athabé jopeina poxoru bichokono atou. Pablo kobesinadúkuatsi bárapo jomo. ⁴Malta tunaetomonaepiwi, Pablo kuitainchi xua

jomo kobesinadúkuatsi. Barapomonae nantiya natsipaeba, najéi: “Bárapo pebin ápara pong jiwi pejutebin. Bekein panepa pepa marmentha íchitha bárapo Nakom, po Nakom pewüing Justicia, bapong itoroba jomo pesinarukuaenexa tsainchi, xua bapong jopa pepoponaenexa tsane”, jei barapomonae.

⁵Íchitha Pablo nakobenünütaba jomo ishótotha. Saya axaibi tsungkuae Pablo. ⁶Daxita barapomonae Pablo kuinekotumeinchi xua kobeputsunanaya yawa icha íratha jopiyaena petüpaein. Báyatha kuiwenaewatumena. Poxonae baxua jopa dai-chiyo, daxota ekeicha ichawa nantaxeinarúküpa: “Metha moya bara Pablo Nakom tsekae”, jei bapomonae.

⁷Ichaxota ishoto, baxota aiña irang bobena Malta tunaeto peewatsin, bapong pía irang tatsi. Bapong, akoibi po matakábibe beta pexaewa pana ápata. Baxota yawa pamaitenang. Bapong pewüing Publio pong irang pata tang. ⁸Publio paxa tatsi cámatha boka. Domáebatsi. Suibatsino. Pablo bárapo tutu bejoniya ichaxota bapong boka. Bapoxonae Pablo kobejayabiya tsipaeba Nakomtha. Bara bapong axaibi tsanaya. ⁹Poxonae báraxua éxana Pablo, daxita Malta tunaetomonae, pomonae peatenewi, baxota pata. Irü Pablo axaibi éxana daxita barapomonae. ¹⁰Malta tunaetomonae pana barükui-iturajina nawita. Bapoxonae poxonae ekeicha pawaraparükü pang jératha, pana nepukatsiba xua xoxi pata nantawenonaenexa poxonae wératha pawárapang.

Meje yábara poxonae Pablo Roma tómaratha patopa

¹¹Poxonae akoibi po xometíyobe payapukaewang bárapo Malta tunáetotha, barapoxonae pawárapang. Pawárapang wératha po naetha po nae bárapo Malta tunáetotha yawüüibo tsungkuae. Bárapo nae Alejandría tómara wérena peponáe nae. Barapomonae bárapo naetha petáfetha kuareta naewiyo be jintóngyobe. Saya kanaxoba pía nakombe. Icha Nakom pewüing Cástor. Icha Nakom pewüing Pólux. ¹²Siracusa tómaratha pajebounang. Bárapo tómaratha akoibi po matakabibetha paenang. ¹³Bárapo tómara wewarapiyang, Siracusa tómara weya. Bapoxonae Regio tómaratha papatang. Icha matakábitha joibo wexubiye Puteoli tómara be pana yanakai-cha aiña merawibe. Baxota papatang Puteoli tómaratha. ¹⁴Baraxota pakaxibang pomonae irü pejumekowüntsíwichi Jesús. Barapomonae pana waba: “Kae semánatha panabarü énae”, jei. Bapoxonae ekeicha Roma tómara bewarapiyang. Pekae payiyang. ¹⁵Pomonae irü pejumekowüntsíwichi Jesús, Roma tomaramonaepiwi, kou pana yábara jumetane xua imoxoyo papatang. Daxota kou ichamonae pana siwaponaena dendena pekaerena. Foro de Apio tómara beparena. Ichamonae Tres Tabernas tómara beparena pía pana taetsi. Poxonae Pablo barapomonae tane, Nakomtha tsipaeba. Pablo jüntükoyene sadüjei xua jüntema pepoponaewa poxonae tane pomonae pejumekowüntsíwichi Jesús. ¹⁶Poxonae Roma tómaratha papatang, soldadomonae pía pentakaponaein tatsi, kópata xua Pablo bara saya pepoponaenexa icha botha, xuano xua saya kaein Pablo peyapueenaenéxatsi soldadomonaepin.

Meje yábara poxonae Pablo Nakom pexeíña jume diwesi paeba Roma tómaratha

¹⁷Poxonae akoibi po matakábibe yapukaewa, Pablo najumekaruta ichamonaetha petawabinexa tsainchi Roma tomarapiwi, pomonae judiomonae pía pentakaponaewi tatsi. Poxonae barapomonae pata, Pablo barái barapomonae, jeye:

—Tamonaē, jopa abe exanaeiño wamonaetha pomonaē judiomonaēxae. Matáütano bekein jopa abe exanaeiño waámo susato jiwi piamonaē pía koyenekuitha tatsi, íchitha barapomonaē newáetaba. Matáütano jiwi pekübibotha nekápona Jerusalén tómaratha xua romanomonaē pía pentakaponaēwi tatsi pía xantha tatsi. ¹⁸Barapomonaē, romanomonaē, neyábara yáñnaba nawita xua icha abe éxanang. Íchitha barapomonaē neyaputane xua jopa abe exanaeiño. Daxota barapomonaē ichipa xua saya tana nekopatabiwa tsane. Romanomonaē aichaxaibi xua jemeicha saya nenakuikayantómata xua tana nebexubiwa tsane tsipéi pinae jopa abe exanaeiño. ¹⁹Íchitha judiomonaē neapusiwa xua jopa taponaeua tsane. Daxota bewa wüükaein xua taponaeua tsane romanomonaē itorobiya pía pepa peewatsinchi beya, xua tana neyábara paebinxeta tsane icha metha abe éxanang. Baxota ponang bekein jopa xeinaeiño xua pokoyene tayábara paebiwa tamonaē xua abe éxana. ²⁰Daxota paka wábatsi tha paka kataetsi xuano xua tha panejumetaei-cham. Waxainchi israelmonaēxaetsi wüünaē éwatatsi pong Nakom itorobikapaeba. Tajumekowüntsixaē baxua daxota ánoxuae penainto tamáxütha dukua, jei Pablo bárapo pentakaponáēwitha.

²¹Barapoxonaē romanomonaē Pablo baraichi, jeichichi:

—Jopa painta patopaeyo carta Judea nakua wérena xua xam nekayábara tinaewa. Po judiomonaē, Judea nakua wérena pata pomonaē patamonaē, barapomonaē jopa abe kayábara paebiyo. ²²Paichichipang paka jumetaiuchi xua jiñakoutha nantaxéiname. Poxoru daxita nákuang pajumetang, xua Jesús pía pena pekuidubi koyenewang tatsi abe yábara paeba, jei bárapo judiomonaē pía pentakaponaēwi tatsi xua Pablo tsipáebatsi.

²³Pablo muxutsipáebatsi po matakeitha xua patsina. Bárapo matakeitha Pablo pía botha tapátatsi pin bicheito. Pablo baya tamrópata pítaba xua tsipaeba barapomonaetha, beya yapentha. Pablo jumedangweya yábara kueikueije barapomonaetha po diwesi pokoyene xua Nakom waba jiwi petanaexanaenéxatsi piamonaē tatsi poxonaē Jesús jumekowüntatsi. Matáütano tsipaeba barapomonaetha Jesús yábara xua Jesús ápara pong Moisés yábara paeba pía peitorobi koyenéwatha. Matáütano Jesús ápara pong Nakom pía peitorobi jume pepaebiwi yábara tina pía petináē diwésintha. ²⁴Xua Pablo pojume diwesi paeba, ichamonaē jumekowünta poxonaē kataunxuaerü ichamonaē jopa jumekowüntsiyo. ²⁵Barapomonaē be aiña bichéitobe natsikotane. Daxota bapomonaēbe tamrópata notarüküpa xua peponaewa. Pablo namchi, jeye:

—Po diwesi Nakom pía Pejumopetünaxü tatsi kata xua Isaías kátatsi xua bapong petsipaebinxeta xua waámo susato jiwi petsipaebinéxatsi, bárapo diwesi po diwesi pexeña diwesi, xua jeye:

²⁶‘Ponde, barapomonáethano jande:

Pajumetaneme íchitha jopa xapain payábara jumeyaputaem pokotsiwa pajumetaneme.

Patáneme paiña itakueretongtha íchitha jopa xapain payaputaem pokotsiwa panekotame.

²⁷Barapomonaē najüntükoyene arárana éxana, jopa peichichipaexae xua pejumetaewa.

Matáütano antüfaetabiya jumetane.

Barapomonaē báraxuang éxana,

poxoru jopa betaeyo peitakuerétongtha,
 poxoru jopa bejümetáeyono pemuxutongtha,
 yawa poxoru pejüntükoyeneintha jopa beyaputaeyo.
 Barapomonae jopa ichipaeyo xua tana netsita xeinaewa icha jüntükoyene
 xua daxota jopa neitaküüpaeyo xua tayábara jüntemainawa abe pía
 peéxanae kuirukoyenein tatsi',
 jeyéi Nakom pía Pejumopetünaxü tatsi xua Isaías kueikuejei éxanatsi
 pinae,
 jei Pablo.

²⁸Pablo kataunxuae kueikuejei, jeye:

—Ánoxuae xuano bexa tsáneno payaputáename xua pomonae jopa judiomonae
 naexanaeyo jumetaena Nakom pía pekapanenebiyáe diwesi. Bara barapomonae
 beta jumenaitawatsina.

²⁹Poxonae Pablo najumeweta natsixibarúküpa judiomonae. Poxonae pona bara-
 pomonae yábara najumematsontsónoba xua Pablo paeba.

³⁰Pablo Roma tómaratha pópona aiña weibe. Pía botha eka xua saya tanako-
 waeicha eka. Bárapo botha daxita matenta weiweinaya wabeiba pomonae pesi-
 waponeibixaetsi Pablo. ³¹Pablo tayapuwüünaetsi xua pepoponaewa. Barapoxonae
 Pablo barapomonaetha yábara tsipaeba po diwesi pokoyene Nakom waba jiwi
 petanaexanaenéxatsi pijimonae tatsi pomonae itorobiya peewatsixae. Matáütano
 yábara kuidúbano xua Jesucristo yábara, pong Pekanamataxeinaein jiwi. Roma-
 nomonae pía pentakaponaein tatsi Pablo jopa kuimatawentichi.

Baja Lucas.

Meje Po Carte Pablo Tatina, Roma Tomarapiwi Tatínatsi

Meje yábara poxonae Pablo tamrópata pítaba xua tatina pomonae Roma tomarapiwi

1 ¹Xang, Pablo, ápara pong tanakuichin amanaya Jesucristo nexa. Nakom newaba yawa tsana nenota xua nekana éxana Jesucristo pía peitorobi jiwi jíwana tatsin xua takueikueijeinexa Nakom pía pekapanenebiyáe jume diwesi.

²Bárapo pekapanenebiyáe jume diwesi kaena báyatha Nakom yábara tsiwüünae muxuduta Nakom pía peitorobi jume pepaebi jíwitha poxonae barapomonae tina Nakom Pejume Diwesi xua Nakom yaputane éxana, po diwesi xua pía pexeíña jume diwesi tatsi. ³Bárapo diwesi yábara tínatsi Jesucristo, pong Wanaka namataxeinaein, pong Nakom Pexanto tatsi. Poxonae bapong Jesucristo be jintong koye-neya náexana, xaniwaicha bapong David pía pemómoxi susato jíwanapin tatsi. Bárapo David pong kaena báyatha Israel nakuapiwi itorobiya pía pepa peewatsinchi. ⁴Poxonae Nakom pía peayapusüü itorobi koyenéwatha Jesucristo pong Wanaka namataxeinaein asüü éxanatsi petüpáe kuirukoyene weya, bapoxonae Nakom tsita itapeíñaxeina jíwitha xua bapong Jesucristo bara Nakom Pexanto tatsi po pexántoxae tatsi pía jumopetünaxü tatsi jüntükoyene wüünae Nakomtha.

⁵Jesucristo pata tana neantobexae, Nakom pana kata pókotsi koyene xua pana netsita wüünae xua pata tana nekana exanaewa tsane Jesucristo pía peitorobi jiwi tatsi. Nakom pana itoroba pata kueikueijeinexa daxita nakua jíwitha xua barapomonae pejumekowüntsineja yawa xua peexanaenexa pokotsiwa xua Jesucristo itoroba. ⁶Daxita barapomonae pomonae jumekowünta, paxam barapomonae jíwana pam. Nakom irü paka waba xua paxam Jesucristo piamonae tatsi jíwana pam paiña nenaexanaenexa. ⁷Daxita pam pákata tínatsi pomonae pajinómpame Roma tómaratha, pomonae pam xua Nakom paántobem. Yáwano Nakom paka waba xua bapong paiña tsita nenajüntükoyenein wüünae exanaenexam tsane. Bárabü Nakom, pong Waxa, irü Jesucristo pong jiwi Pekanamataxeinaein bapongbe paka yawenáenabe pía paka nekaantobexae. Matáütano bárabü jüntema jinompa paka kana exanaena.

Meje yábara poxonae Pablo ichichipa xua pesiwaponaewa Roma tómarara

⁸Matha kopiya Jesucristo wüngaununaya tsipaebang Nakomtha, jangje tsai-bin: “Nakom, yábara jüntükoyene weiweinang Roma tomarapiwi, tsipéi daxita nákuang jiwi yábara paeba xua pinae bárapo Roma tomarapiwi xaniwaicha beta kajumekowünta”, jang tsai-bin Nakomtha. ⁹Ajüntüyapusüüya Nakom tanakuitang. Nakom takueikueijang pía jume diwesi xua pókotsi jume Pexanto tatsi tayábara páebang. Barapong Nakom bara yatsikaewa neyaputane xua matowa paka yábara

nantaxeinaeaya tsipaebapónatsi bárapo Nakomtha. ¹⁰Nakomtha yaiñabeibang xua icha bapong ichichipa xua bara metha neitaküüpáetsipa xua matapaiña tapaka siwaponáewatsi tsainchi. ¹¹Paka siwaponaeana ponaeinchi tsipéi bichokono ichichipang xua tapaka taewatsí. Ichichipangno xua tapaka kuidubíwatsi tsainchi xua Nakom pía Pejumopetünaxü tatsi paiña nepaka kayawenaenexa tsane paiña jüntükoyenéwatha. Bapoxonae paka jüntükoyene ayapusúü exanaena. ¹²Pokotsiwa xuaunxuae yábara páebang ápara xua waxainchi kaemonae nantiya wanajüntükoyene tsakabinexa xua jüntema wajinompaenexa. Baxua nakana exanaeinchi poxonae wanatsipaebebinexa Nakom Pejume Diwesi, pojume diwesi pajumekowúntame xua írürü jumekowúntangdü.

¹³Tamonae pam, pomonae irü paiña nejumekowüntsíwixae Jesucristo. Ichichipang xua payaputáneme xua matowa ichichipeibang xua tapaka siwaponéibiwa tsaibi tsainchi. Íchitha beya ánoxuae jopa neitaküüpaeyo xua tapaka siwaponáewatsi. Ichichipang xua tapaka kuidubíwatsi Nakom Pejume Diwesi xua pejumekowüntsínexa pomonae jopa kopiya jumekowüntsiyo, xua írürü pejüntükoyene tsakabinéxatsi pomonae kopiya jumekowúnta. Baxua barichin tsane icha býatha ichin ichamonaetha xua poxonae yawenang pomonae jopa judiomonae naexanaeyo xua pejumekowüntsínexa. ¹⁴Nakom neitoroba daxita jíwitha. Daxota bewa kueikueijang tsane Nakom Pejume Diwesi daxita jíwitha, bekein metha bara tomarapiwi tsipae, ichakuitha metha bara bekein unupiwi tsipae, bekein metha peyaputaewi tsipae, ichakuitha metha bekein jopa peyaputaewi tsipae. ¹⁵Daxota bichokono ichichipang xua paxam irü tapaka kuidubíwatsi tsainchi Nakom Pejume Diwesi pomonae pamxaem xua paiña nejinompaewi pam Roma tómaratha.

Meje yábara xua Nakom Pejume Diwesi xeina peayapusúü itorobi koyenewa xua jiwi pekapanenebíwatsi

¹⁶Jopa ajumeuriño xua takueikueijeija Nakom pía pexeiña jume diwesi. Poxonae jiwi jumekowúnta bárapo diwesi, Nakom kapanenebiya éxana barapomonae abe pía peéxanae kuirukoyenein weya tatsi pía peayapusúü itorobi koyenéwatha. Nakom kapanenebiya pomonae pía pejumekowüntsíwichi, matha kopiya judiomonae, bapoxonae irü pomonae jopa judiomonae naexanaeyo. ¹⁷Bárapo diwesi naka yaputane éxana xua Nakom naka kana jüntükoyene wüünae éxana bapongtha, xua jopa watsita natsikuentisixae xua abe waexanaexae bapongtha. Nakom baxua naka kana jüntükoyene éxana saya poxoru ü meisha wayábara jumekowüntsixae pokotsiwa exanapaeba, bapong. Nakom Pejume Diwésitha jeye baxua yábara: “Pongtha, pong Nakom jüntükoyene wüünae éxana pía peyábara jumekowüntsínxaetsi pokotsiwa exanapaeba bapong ataya tsitekaeya poponaena”, jei Nakom Pejume Diwésitha.

Meje yábara xua jiwi penatsikuentisiwa Nakomtha abe peexanaexae

¹⁸Waxainchi yaputainchi xua Nakom anáepana pomonaetha, pomonae abe peexanaewi. Daxota itorobika athawétsika pokoyenetha xua bárapo jiwi átene peexanáewatsi. Nakom anáepana, jiwi abe peexanaexae bapongtha yáwano abe peexanaexae ichamonaetha. Matáütano barapomonae abe peexanaexae, jopa kopatsiyo xua bara pía jüntükoyeneintha peyaputaewa pexaiñéi jumein.

¹⁹Barapomonaē bewa xaniwaicha báyatha yaputaena pokoyene xua Nakom pejuñtükoyene tatsi. Tsipéi báyatha Nakom tsita najüñtükoyene itüüta barapomonaetha. ²⁰Jiwi jopa itaküüpaetsi xua paeba xua pinae jopa Nakom yábara yaputaetsi. Beya poxonaē Nakom aena fórota bárapo kae pin nakue, jiwi yaputane xua Nakom xaniwaicha pópona yawa pía peyapusúü itorobi koyenewa bápána jopa werawérakae tsane. Jiwi yaputane baxua poxonaē tane pokotsiwa Nakom fórota bekein Nakom jopa taetsi. Daxota jiwi natsi-aenaekuenta éxana Nakomtha piakoutha poxonaē abeya paeba xua pinae jopa yaputaetsi Nakom. ²¹Bekein barapomonaē yábara yaputane xua bara Nakom pópona, dáichitha barapomonaē jopa barükui-iturajinaeyo Nakom pongxae xua yatsikaewa pía pepa Nakom tatsi. Yáwano barapomonaē jopa jei tsaibiyo Nakomtha: “Nakom, pajüñtükoyene weiweinang xua pokotsiwa painta neexanáewamxae”, jopa jei tsaibiyo. Saya meisha barapomonaē yábara nantaxeina dubenanáebiya pokotsiwa xua pepawi. Saya abeya nantaxeina dubenanáebiya xua daxota jopa yaputaeyo pexaiñéi jume. ²²Bekein barapomonaē paeba xua pinae peyaputaewi dáichitha be pomonaē xua jopa xapain peyaputáé jiwi naexanaeyo. ²³Barapomonaē jopa wüünaē jainchiyo Nakom, pong ataya tsi-tekaeya pópona. Saya ü wüünaē pejainchi ibo nakomüñg, po ibo nakomüñg be tsita jíwichi xua saya pewerawérakae koyene. Yáwano icha ibo nakomüñg éxana xua xuang be peyapupunaewi, yáwano po ibo nakomüñg be jomong xua petompakuetongtha pona, yáwano po ibo nakomüñg be duwein xua pekobe xeina yawa pesito xeina.

²⁴Daxota Nakom kópata xua barapomonaē bara moya peexanaenexa abe peexanaewa be pókotsi koyeneya xua ichichipa. Bapoxonaē barapomonaē nantiya nata éxana pokotsiwa xua aura éxanatsi pía pepongtha. ²⁵Baxuang Nakom kópata xua peexanaewa barapomonaē, tsipéi barapomonaē jopa jumekowüñtsiyo Nakom pía pexaiñéi jume diwesi. Saya barapomonaē itapeta ü jumekowüñta xua xuang penáerabi jume diwesin. Pokotsiwang Nakom fórota baxuang barapomonaē be pía nakomüñg kana éxana pejumekowüñtsinexa, matáütano xua barapomonaē pebarükui-iturajinaenexa xua wüünaē pejainchiwanexa. Barapomonaē jopa wüünaē jainchiyo pepa Nakom, pong daxita pefórotsin. Barapong waxainchi bewa wüünaē jainteibinchi xua ataya tsaibi tsane pía peexaneibixae waxainchi nexa. Je, bara ichi tsane.

²⁶Daxota Nakom kópata xua barapomonaē bara moya peexanaenexa pokotsiwang xua aura éxanatsi pía pepongtha pokotsiwang abe koyenewa peichichipae-wang. Matáütano barapomonaē pía yábüxi tatsi jopa ekeicha exanaeyo pokoyene yábüxi ba éxana poxonaē peichichipaewa pía pebin. Bapoxonaē bárapo yábüxi éxana xua kae yábüxi naichichipa. ²⁷Barichi pebiwi aichaxaibi pokoyene pebiwi ba éxana poxonaē peichichipaewa pía petsiriwa. Saya meisha bichokono penthütongtha ichichipa éxana xua kae pebiwi naichichipa. Bárapo pebiwi nantiya nata éxana pokotsiwa xua pin ura xeina éxanatsi. Barapomonaē abe peexanaexae Nakomtha natsikuenta. Daxota Nakom kópata xua barapomonaē pía pepong átene nata éxana.

²⁸Poxoru barapomonaē jopa ichipaeyo xua jopa pejumekowüñtsiwa Nakom, daxota Nakom kópata xua barapomonaē moya bara abeya nenantaxeinaenexa. Matáütano Nakom kópata xua barapomonaē bara moya exanaena pokotsiwang jopa bewa exanáé pokotsiwa xua abe. ²⁹Barapomonaē jopa juniya jüñtükoyene

yüükaetsi xua peabe koyenewang. Barapomonaē nasikuiweiweina exanaduta, yáwano abe éxana ichamonaetha. Yáwano éxana xua ichichipa pokotsiwa ichamonaē xeina. Yáwano ichichipa xua ichamonaē átene éxanatsi. Barapomonaē ichamonaē úwatsi. Yáwano barapomonaē ichamonaē jutébatsi. Yáwano penabi koyene éxana. Yáwano barapomonaē jiwi muxujáíñaba nawita. Yáwano barapomonaē bichokono piamonaē kaseba nawita. Yáwano kaemonaē nabarü paxapaxéi xua ichamonaē abe yábara páebatsi. ³⁰Yáwano barapomonaē jume atsakiya abeya yábara paeba xua ichamonaē pokotsiwa éxana. Barichi barapomonaē Nakom kasébatsi. Yáwano barapomonaē biatane ichamonaē. Yáwano piakoutha penayábara paebiwi xua pinae peaiñakuí jiwi. Yáwano barapomonaē paebiwi xua ichamonaē áebatsi. Yáwano jeita nawita pokotsiwang xua peabe koyenewa. Yáwano jopa exanaeyo pokotsiwang xua paxeiwi itorobéibatsi. ³¹Barapomonaē jopa ichichipaeyo xua Nakom peyábara yaputáewatsi. Yáwano barapomonaē jopa jumexaiñeya exanaeyo pokotsiwang xua exanapaebeiba. Yáwano barapomonaē jopa xapain antobeyo ichamonaē. Yáwano barapomonaē jopa ichamonaē yábara jüntemáinaetsi xua abe éxana. Yáwano barapomonaē jopa ichamonaē xapain yábara nantaxeinaetsi xua peyawenaenéxatsi. ³²Barapomonaē yaputane pokotsiwa xua Nakom itoroba. Yáwano barapomonaē yaputane xua pomonaē bápapo peabe koyenewang éxana bewa werapaena. Bekein barapomonaē yaputane baxuang íchitha áwiya abe eexanapona. Yáwano barapomonaē jüntükoyene weiweina, poxonaē ichamonaē irü bápapo peabe koyenewang éxana.

**Meje yábara xua Nakom yábara paebina penatsikuentsiwa jiwi,
xua yatsikaewa pexaiñéi koyenéwatha**

2 ¹Paka tsipáebatsi paxam judiomonaē jíwana pam pomonaē xua ichamonaē pekayábara nantaxeinaewichi xua icha abe éxana xuano xua icha jopa abe exanaeyo. Paxam jopa bewa pajam tsane ichüngtha: “Xam abe éxaname, natsikuenta éxaname Nakomtha”, jopa bewa pajam tsane. Tsipéi poxonaē ichüng payábara páebame xua penatsikuentsiwa xua abe peexanáewaxae, ápara paiñakoutha panatsikuéntame Nakomtha xua abe paiña neexanaexae. Poxoru bichokono abe paiña neexanaewi icha ichi pomonaē payábara páebame xua penatsikuentsiwa xua abe pía peexanáewaxae. ²Waxainchi yaputainchi xua Nakom yábara paebina daxita jiwi xua penatsikuentsiwa xua abe peexanaexae xua yatsikaewa pexaiñéi koyenéwatha xua abe peexanaexae bapongtha. Poxonaē Nakom yábara paebina xua penatsikuentsiwa jiwi, bapong paebina xua pomonaē bápapo peabe koyenewang éxana bewa péraxa jübebinchi xua átene tsane. ³Paxam ichüng payábara páebame penatsikuentsiwa xua abe pía peexanáewaxae. Ápara paiñakoutha panatsikuéntame Nakomtha xua irü paxam paiña nebarichíwatham xua abe paiña neexanaexae. Paxam jopa paka itaküüpaeyo xua paiña nepanenebiwa poxonaē Nakom átene exanaena xua poxonaē yábara paebina jiwi xua penatsikuentsiwa xua pomonaē abe peexanaewi. ⁴Paxam pa-aichaxaibim poxonaē Nakom bichokono peichichipaexae xua paiña nepaka yawenaewa xua paiña nepaka antobexae. Yawa paxam pa-aichaxaibim poxonaē Nakom abü saya jüntema éwata xua beta pákata exanaena xua pomonaē pamxaem xua pajumekowüntsíname yawa átene paka exanaena pomonaē pamxaem jopa paiña nejumekowüntsiwi. Nakom baxua éxana pía xua paxam paiña áuratsi abe paiña neexanaexae. Yáwano pía paiña bapoxonaē

Nakom wüükaetsi xua paiña nepaka kayábara jüntemainaenexa paiña abe exanée koyenewang. ⁵Paxam aiña ünthütong paxéiname. Yáwano jopa paichipaem xua icha jüntükoyene paiña tsita xeinaewa Nakom. Daxota paxam mataropeicha paexanapóname xua pokotsiwang abe. Daxota bexa Nakom paka yábara anae-panaena xuano átene paka exanaena paiña tsita natsikuentsixae po matakeitha Nakom paebina xua bewa átene exanaeinchi pomonae bárapo peabe koyenewang éxana. Nakom yábara paebina jiwi xua penatsikuentsiwa xua abe peexanaexae xua yatsikaewa pexaiñéi koyenéwatha abe peexanaexae bapongtha. ⁶Nakom katsibina pentomang daxita karepaya jíwitha xua pokotsiwang pía petanakuichiwi-xaetsi. Pomonae abeya tanakuita xuya abeya matoma katsibebinchi. Pomonae wüünaeya tanakuita xuya wüünaeya matoma katsibebinchi. ⁷Ichamonaes Nakom peajüntüyapusúü koyenewa katsibina pomonaetha, pomonae jopa aitakonaeya éxana dubenanaebiyaeyo pokotsiwa Nakom ichichipa. Barapomonae ichichipa nawita xua pokoyene Nakom petsita-wüünaewa tsainchi. Matáütano barapomonae ichichipa nawita pía pebarükui-iturajinaewa Nakomtha. Matáütano barapomonae ichichipa nawita xua pía xéinatsi peajüntüyapusúü koyenewa po peajüntüyapusúü koyenewa ataya tsiteka. ⁸Ichamonaetha, Nakom anaya exanaena xua átene éxanatsi barapomonae pomonae saya ü piáwa nata éxana. Yawa Nakom átene exanaena pomonae jopa jumekowüntsiyo Nakom pía pexaiñéi jume diwesi. Barapomonae Nakom bichokono kaseba itapeta peichichipáewaxae xua abe koyenewa peexanaewa. ⁹Átene exanebinchi yawa ajüntürewewe exanebinchi daxita pomonae abe koyenewang peexanaewi, matha kopiya pomonae judiomonae, bapoxonae irü katsibinchi pomonae jopa judiomonae naexanaeyo. ¹⁰Íchitha nama Nakom seikaya katsibina pomonaetha, pomonae wüünaeya betiya peexanaewi pokoyenewa xua Nakom petsita-wüünaewa tsainchi. Yáwano katsibina pokoyenewa xua pebarükui-iturajinae koyenewa. Yáwano katsibina pokoyenewa xua jüntema pejinompáe koyenewang. Matha kopiya katsibinchi judiomonae, bapoxonae irü katsibinchi pomonae jopa judiomonae naexanaeyo.

¹¹Barapomonáethabe Nakom katsina bárapo koyenein tsipéi Nakom tsita najúpatsi daxita jiwi. ¹²Pomonae jopa judiomonae naexanaeyo daxita barapomonae yaputane poxonae abe éxana pía peitorobi koyenewang pexeinaexae. Icha barapomonae áwiya eexanapona pokotsiwa xua abe, Nakom tsita natsikuéntatsi. Barapomonae werapaena abe peexanaexae bekein jopa yaputaeyo Moisés pía peitorobi koyenewa tatsi. Pomonae judiomonae barapomonae yaputane Moisés pía peitorobi koyenewa tatsi. Daxota yaputane poxonae abe éxana. Poxonae barapomonae abe eexanapona Nakom tsita natsikuenta éxanatsi abe peexanaexae, poxoru yaputane Moisés pía peitorobi koyene tatsi. ¹³Pomonae jumetane Moisés pía peitorobi koyenewa tatsi xuano éxana pokotsiwa itoroba, barapomonae Nakom tsita jüntükoyene wüünaetsi. Pomonae saya jumetane Moisés pía peitorobi koyenewa tatsi dáichitha jopa exanaeyo pokotsiwa itoroba, barapomonae Nakom jopa tsita jüntükoyene wüünaetsi. ¹⁴Pomonae jopa judiomonae naexanaeyo barapomonae jopa xeinaeyo Moisés pía peitorobi koyenewa tatsi. Íchitha ichakuitha barapomonae éxana xua be pókotsi koyene Moisés pía peitorobi koyenéwatha itoroba. Baxua barapomonae éxana, tsipéi peajüntükoyenewangtha yaputane pokotsiwa xua abe xuano pokotsiwa xua wüünae bekein bara jopa xeinaeyo Moisés pía peitorobi koyenewa tatsi. Poxonae baxuang éxana be barompaya pía peitorobi koyenewang

xeina pía jüntükoyenéwangtha. ¹⁵Poxonae barapomonae beta éxana, baxua itapeiñaxeina xua barapomonae pía jüntükoyenéwangtha xeina Nakom pía peitorobi koyenewa tatsi. Barapomonae yakuiya náexana. Barapomonae pía jüntükoyenein yaputane kana éxanatsi xua poxonae wüünae éxana xuano xua poxonae ichakuitha abe éxana. ¹⁶Jemeicha jopaena matakabi po mataketha poxonae Nakom itorobina xua Jesucristo yábara paebina daxita jiwi xua pía penatsikuentsiwa xua abe peexanaexae Nakomtha. Bárapo mataketha Jesucristo yábara paebina jiwi xua penatsikuentsiwa xua abe peexanaexae xua pokotsiwang namicha abeya peexanaexae matáütano pokotsiwang namicha abeya nenantaxeinaexae. Báraxua Jesucristo bara exanaena icha be pókotsi koyeneya páebang poxonae kueikueijang Nakom pía pexeña pekapanenebiyáe jume diwesi.

Meje yábara xua judiomonae yawa Moisés pía peitorobi koyenewa tatsi

¹⁷Paxam papáebame, pajam: “Paxang seikaya judiomonaepiwi pang”, pajam. Panantaxéiname xua Moisés pía peitorobi koyenewa tatsi paka kapanepaena. Atsakiya papáebame xua barompaya paiña Nakom, yatsikaya pepa Nakom. ¹⁸Barichi paxam papáebame xua pinae payaputáneme pokotsiwa xua Nakom pía peichichipáe koyenewa. Matáütano papáebame xua pinae Moisés pía peitorobi koyenewa paka kuiduba xua paiña neitapetsiwa pokoyene xua pexaiñéi koyenewa. ¹⁹Matáütano atsakiya papáebame, pajam: “Paxang pakuidubang pomonae jopa peyaputáe jiwi Nakom. Yawa jumekowünta pakana éxanang pomonae jopa jumekowüntsiyo Nakom”, pajam. ²⁰Paxam panantaxéiname xua paka itaküüpa xua pakuidúbame pomonae Nakom jopa peyaputáe jiwi. Barichi panantaxéiname xua paka itaküüpa xua yaputane pakana éxaname pomonae pena pejumekowüntsiwi. Paka itaküüpa bárapo aiña koyenéwabe paiña neyaputaexae Moisés pía peitorobi koyenewa xua xeina pexaiñéi yaputáe koyenewang. ²¹Poxonae ichamonae pokoyenein yábara pakuidúbame paxam jopa ápara matha pajumeyábara kowüntsiya exanaem bárapo koyenein. Paxam pakuidúbame pókotsi koyenewa xua jopa bewa kaibi ichamonaetha xua irü paiña barichiwatham. ²²Paxam pakuidúbame xua jopa bewa ichüng píowa tatsi tapichichi xua irü paiña barichiwatham. Paxam papáebame xua pinae pa-aichaxaibim ibo nakomüng, íchitha paxam pakáibame pokotsiwang xua jeba ibo nakomüng piabotha tatsi. ²³Atsakiya papáebame xua paxéiname Moisés pía peitorobi koyenewa. Íchitha irü ápara paxam jopa paexanaem xua paiña nebarükui iturajinaewa Nakom, poxonae jopa payábara jumequí koyeneya exanaem bárapo Moisés pía peitorobi koyenewa. Daxota ichamonae jopa Nakom barükui-iturajinaetsi. ²⁴Daxota Nakom Pejume Diwésitha jeye: “Ápara paxam paiñakoutha pam poxonae pomonae jopa judiomonae naexanaeyo Nakom abe yábara páebatsi tsipéi kopiya paxam abe paéxaname”, jei Nakom Pejume Diwésitha.

²⁵Paxam judiomonae pam, xua pebiwi pam paka withaba poxonae kataunxuae pexui pam. Paka jumapaperüü muxunenekaxika xua ichaxota pebíwichi xéinatsi ichaxota pana nareixakáename. Baxua paka kana éxana poxoru Moisés pía peitorobi koyene paka itoroba xua paiña tsita itapeiñaxeinaenexa xua bara ápara Nakom piamonae tatsi pam. Bárapo koyenewa xua Moisés pía peitorobi koyene tatsi paka yawena xua Nakom pajumekowünta dubenanaebiyame icha paéxaname daxita pokotsiwa Moisés paka itoroba. Íchitha icha jopa paexanaem pokotsiwa

xua Moisés paka itoroba jopa paka yawenaeyo xua Nakom pajumekowünta dube-nanaebíyame bekein paka withabitha tsipae. ²⁶Pong jopa withabichi poxonae bapong éxana pokotsiwa Moisés pía peitorobi koyenéwatha itoroba, Nakom tsítatsi be xua bapong báyatha ápara withábatsi. Nakom tsítatsi xua bapong bara pijimonae jintong tatsi bekein bara jopa withabichi. ²⁷Ichakuitha pebiwi bekein jopa withabichi, dáichitha éxana pokotsiwa Moisés pía peitorobi koyenéwatha itoroba. Barapomona paka jüntükuikoyene yábara nantaxeinaena xua icha abe paéxaname Nakomtha xuano xua icha wüünae paéxaname Nakomtha. Bekein payaputaetham Moisés pía peitorobi koyenewa xua petináe diwesi, íchitha jopa payábara jumekuiya exanaem pokotsiwa bárapo Moisés pía peitorobi koyenéwatha paeba. ²⁸Pong jiwi tsítatsi xua pepa judiomonaepin saya poxoru pewithabixae-tsi xua pepongtha, bapong Nakom jopa tsítatsi xua pía jintong tatsi. ²⁹Jame xua pepa judiomonaepin penaexanaenexa tsane, saya jame poxonae Nakom jüntükoyene wüünae éxana bárapo jintong xua Nakom jopa bapong tsita natsikuentichi abe peexanaexae pía jüntükoyenéwatha. Poxonae jintong xaniwaicha withábatsi, ápara baxua, xua poxonae jintong xaniwaicha jumekowünta pejüntükoyenéwatha Nakom. Pokotsiwa xua Moisés pía petináe koyenewa, jopa exanaeyo xua jintong icha jüntükoyene pexeinaewa Nakomtha xua pewüünaewa. Saya ápara meisha Nakom pía Pejumopetünaxü tatsi baxua éxana. Jiwi wüünaeya yábara paeba pomona xua pewithabíwichi. Íchitha nama Nakom wüünaeya yábara paeba pongtha pong icha jüntükoyene xeina bapongtha xua pewüünaewa.

3¹Metha beya ichüing yaiñabichipa jei tsipae: “¿Eta pokoyene, pokoyene Nakom tsita wüünaetsi, pokoyene beta wepu toxeinchiya éxana pomona judiomona xua wepu beta toxeincha éxanatsi pomona jopa judiomona naexanaeyo? ¿Eta pokoyene, pokoyene Nakom tsita wüünaetsi, pokoyene beta wepu toxeinchiya éxana pong pewithabinchi xua wepu beta toxeincha éxanatsi pong jopa pewithabinchi?” jei tsipae. ²Metha jumenotsipang bapong, jang tsipae: “Ápara bara bichokono jopa juniya wüünaeyo xua penaexanaewa judiomona xuano xua withábatsi, poxoru kopiya Nakom Pejume Diwesi nakana jume diwesi kata judiomonaetha”, jang tsipae. ³Ichakuitha metha beya ekeicha bapong yaiñabichipa jei tsipae; “Dáichitha ¿eta bichi tsipae icha barapomonae jíwana nakuibarapentsipa xua jopa peyábara jumekowüntsiwa xua Nakom bexa exanaena pokotsiwa Nakom yábara tsiwüünae muxuduta? ¿Daxota metha Nakom xuya nakuibaraxubíchipa xua jopa ekeicha peexanaewa pía peyábara tsiwüünae muxudutsiwa?” jei tsipae. ⁴Metha jang tsipae: “¡Jume, ápara Nakom bápana jopa baxua exanáe! Ápara jame Nakom daxitang pexaiñéiwangtha exaneiba. Nakom bewa exaneibina baxuang bara bekein jiwi pemuxuitórobi jiwi. David baxua yábara paeba Nakom Pejume Diwésitha xua Nakom tapáebatsi, jeye:

‘Nakom, poxonae kueikueijam jiwi yaputaena xua xam xaiñeya bara nepaebin.

Bapoxonae jiwi jume amanáyabame poxonae baxua éxaname poxonae bekein jiwi kayábara paeba xua abe éxaname’,

jei David Nakom Pejume diwésitha”,

jang tsipae.

⁵Íchitha metha ichamona jumekoxonaya najumematsontsonobíchipa jei tsipae: “Poxonae waxainchi abe éxanatsi bapoxonae Nakom naka átene éxana. Abe

waexanáe koyenéwangtha jiwi tsita itapeñaxéinatsi xua bara Nakom aichaxaibi abe peéxanae koyenewa xua bara Nakom wüünaeya peexanaein. Daxota abe waexanáe koyenéwatha Nakom yawénatsi. ¿Eta xua metha yábara paebinchi baxua? ¿Metha Nakom jopa xaniwaicha exanaeyo icha naka átene éxana abe peéxanae kuirukoyene waexanaexae?” jei tsipae barapomona, xua saya paeba icha jiwi ichi pomona jopa peyaputáe jiwi. ⁶Metha barapomona jumenotsipang, jang tsipae: “¡Jume ápara, baxua jopa xaiñeyo! Icha Nakom jopa xaniwaichiya exanáe tsipae poxona naka yábara paeba xua penatsikuentsiwa bapoxona jopa itaküüpaetsípaetsi xua daxita yábara páebatsi jiwi xua penatsikuentsiwa xua abe peéxanae kuirukoyene peexanaexae. Íchitha Nakom ápara xaniwaichiya éxana daxota itaküüpatsi xua daxita jiwi yábara páebatsi penatsikuentsiwa”, jang tsipae.

⁷Metha ichamona jeí tsipae: “Nakom jopa bewa naka yábara paebí penatsikuentsiwa tsane wanaka yábara paebinexa xua abe waexanaewang poxonae naerabiya kueikueijeichi. Poxoru poxonae naerabiya kueikueijeichi ichamona tsita itapeñaxéinatsi xua Nakom seikaya éxana xua Nakom bichokono xaiñeya pepaebin xuano xua Nakom bara peaiñakuín”, jeí tsipae barapomona. ⁸Ichamona irü jeí tsipae: “Daxota waxainchi bewa abe exanaeinchi, xua watsita-itapeñaxeinaexa xua Nakom bara xaiñeya pepaebin”, jeí tsipae barapomona. Barapomona naerabiya paeba xua pinae xang bárapo koyene kuidubang ichamona. Bárapo naerabiya pepaebiwi xua neyábara jumekaenáeraba, barapomona Nakom tsita natsikuentinchi abe taneyábara paebixae.

Meje yábara xua daxítatsi pomonaetsi pomona Nakom watsita natsikuentsiwichi abe waexanaexae bapongtha

⁹¿Waxainchi pomona judiomonaetsi Nakom tsítatsi xua jopa wanatsikuentsi jíwichi xua beyakaincha pomona jopa judiomona naexanaeyo xua naka toxeinchiya bichokono abe peexanaewi? Jume. Tsipéi bayathaunxuae páebang: “Waxainchi judiomonaetsi irü pomona jopa judiomona naexanaeyo daxítatsi abe waexanáe jíwichi”, jang. ¹⁰Nakom Pejume Diwésitha baxua yábara jeye:

“¡Dapomona aibi pomona xua wüünaeya peexanaewi,
xua matáütano bara kaeinno!

¹¹Matáütano dapong aibi pong ichichipa xua peyábara yaputaewa pexaiñéi koyenewa.

Matáütano dapong aibi pong xua ichichipa penaponaewa Nakomtha.

¹²Daxita jiwi Nakom péntatsi yáwano abe peéxanae jiwi bichokono.

¡Dapong aibi pong xua wüünaeya beta éxana,
xua matáütano bara kaeinno!

¹³Barapomona kaunuta nawita pokotsiwa peabe jumein,
icha müthü tsina ichi xua kawenabeina xua tuxamna baxoyareka
pebokarekaexae pong tüpa.

Bapomona pepaebiwangtha ichamona muxujaiñabéibatsi.
Bárapo pepaebiwangtha ichamona ajüntükoyenetane éxanatsi,
icha jomo ichi xua ichüng sínatsi poxona bichokono átene éxanatsi
pewanotsapa pexeinaexae.

¹⁴Barapomona saya ü kueikueijeí xua xuang peabejumein,
pojumein xua átsaka pepaebiwa.

¹⁵Barapomonaē bichokono ichichipa nawita xua ichamonaē bichokono átene peexanáewatsi xuano xua pejutebíwatsi.

¹⁶Daxita ichaxota poneiba barapomonaē, ichamonaē abe exanéibatsi.

Matáütano exaneiba pokotsiwa ichamonaē ajüntükoyenetane kana éxanatsi.

¹⁷Barapomonaē jopa yaputaeyo xua pokoyene kaemonaē nantiya jüntema jinompa penaexanáē koyenewa.

¹⁸Matáütano barapomonaē jopa kunuwiyo Nakom xua abe peexanaeyáinwatsi”, jei Nakom Pejume diwésitha.

¹⁹Waxainchi yaputainchi xua daxita Nakom paeba Moisés pía peitorobi koyenéwatha báraxua judiomonaē nexa. Barapomonaē bewa exanáē Moisés pía peitorobi koyenewa tatsi. Íchitha judiomonaē jopa itaküüpaetsi xua peexanaewa bárapo koyenewa. Barichi pomonaē jopa judiomonaē naexanaeyo jopa itaküüpaetsi xua peexanaewa baxua. Bárapo koyeneya Nakom yaputane éxana xua daxita jiwi jopa pepaebinxua xua pinae jopa abe peexanaewa bárapo jiwi. Matáütano Nakom tsita itapeñaxeina jíwitha xua Nakom yábara paebina xua penatsikuentsiwa daxita jiwi xua abe peexanaexae bapongtha. ²⁰Dapong aibi pong itaküüpaetsi xua pejeiwa: “Xang bichokono tajüntükoyene wüünaein xua Nakom jopa tatsita natsikuentsixae abe taexanaexae bapongtha. Tsipéi daxita yábara jumekuiya éxanang pokotsiwa Moisés pía peitorobi koyenéwatha itoroba”, xua pejeiwa. Tsipéi jame ápara bárapo Moisés pía peitorobi koyenewa tatsi naka yaputane éxana xua waxainchi ápara abe waexanáē jíwichi.

Meje yábara xua jiwi kapanenebíyatsi pejumekowüntsixae Nakom

²¹Íchitha ánoxuae Nakom jiwi yaputane éxanatsi pokoyeneya bapong éxana xua poxonaē jiwi jüntükoyene wüünae éxanatsi bapongtha. Nakom jopa tsita natsikuentsichi barapomonaē xua abe peexanaexae. Nakom baxua éxana jopa poxóruyo xua peexanaexae pokotsiwa Moisés pía peitorobi koyenéwatha itoroba. Moisés pía peitorobi koyenewa tatsi, irü Nakom pía peitorobi jume pepaebiwi paeba xua bewa jiwi Nakom tsita jüntükoyene wüünaetsi.

²²Nakom jüntükoyene wüünae kana éxana jiwi poxonaē bárapo jiwi jumekowünta Jesucristo. Nakom bara daxita najüntükoyene jupiya éxana pomonaetha, pomonaē pejumekowüntsiwi Jesucristo, poxoru Nakom tsita najúpatsi bárapo pejumekowüntsíwichi.

²³Tsita najúpatsi yáitama daxita jiwi peabe koyenewang éxana. Yáwano bárapo jiwi taséikatsi pokoyene xua Nakom tsita wüünaetsi barapomonaē.

²⁴Íchitha Nakom peantobexae jopa tsita penatsikuentsíwatsi bárapo jiwi. Baxua Nakom amanaya taéxana. Nakom pentoma éxana xua jiwi pejüntükoyene wüünaenexa poxonaē Cristo Jesús náetotha tsitüpa, xua jiwi tsitüpaetsi.

²⁵Nakom Pexanto itorobika, pong Cristo. Bapong jana pichapabarena poxonaē tsitüpa jiwi pía peabe koyenewang tatsi. Nakom jüntemaina jiwi pía peabe koyenewang poxonaē barapomonaē jumekowünta Cristo. Bárapo koyenéwatha Nakom yaputane éxana xua bara jüntükoyene wüünae kana éxana jiwi xua jopa Nakom petsita-natsikuentsíwatsi xua abe peexanaexae. Báyatha bapong beitatemaya kuitaetaepona jiwi abe pía peéxanae kuirukoyenewang tatsi pomonaē xua kaena báyatha jinompa poxonaē kataunxuae Jesús jopa tüpaeyo.

²⁶Íchitha ánoxuae Nakom yaputane éxana jíwitha xua beta wüünaeya peexanaewa. Ánoxuae Nakom jopa beitatemaya kuitaeyo jiwi abe pía peéxanae kuirukoyenewang tatsi. Ápara jame Nakom jüntükoyene wüünae kana éxana jiwi poxonae Nakom yábara jüntemaina jiwi xua pía penatsikuentsiwa xua abe peexanaexae. Baxua éxana daxita pomonaetha, pomonae pejumekowüntsiwi Jesús.

²⁷Daxota waxainchi jopa naka itaküüpaeyo xua atsakiya nayábara páebatsi xua beta waexanaewa. Waxainchi jopa najüntükoyene wüünae exanaetsi bekein ichichípati xua waexanaewa pokotsiwa Moisés pía peitorobi koyenéwatha itoroba, dáichitha jopa exanaetsi. Nama ápara wajumekowüntsixae Jesús, daxota bapong naka jüntükoyene wüünae kana éxana Nakomtha. ²⁸Nama ánoxuae waxainchi yaputainchi xua Nakom jüntükoyene wüünae kana éxana pongtha pong jumekowünta Jesús. Nakom jopa jüntükoyene wüünae exanaeyo poxonae bekein ichüing ichichipa xua peexanaewa pokotsiwa Moisés pía peitorobi koyenéwatha itoroba xua dáichitha poxonae jopa exanaeyo.

²⁹Nakom jopa meisha ápara judiomonae pía Nakom tatsi. Ápara irü pomonae jopa judiomonae naexanaeyo barapomonae irü pía Nakom tatsi. ³⁰Icha Nakom aibi, saya meisha bapong Nakom nákata bara kompa. Bárapo Nakom jüntükoyene wüünae kana éxana jiwi, pomonaetha, pomonae jumekowünta Jesucristo, bekein pomonae withábatsi xuano bekein pomonae jopa withabichi. ³¹Waxainchi jopa nakuibarapentichi Moisés pía peitorobi koyenewa tatsi yáitama jumekowüntatsi Jesús. Jame poxonae xaniwaicha jumekowüntatsi Jesús bapoxonae bara xaniwaicha éxanatsi pokotsiwa Moisés pía peitorobi koyenéwatha itoroba.

Meje xua Abraham yábara

4 ¹Ánoxuae paka tsipáebatsi xua pokotsiwa Nakom éxana Abrahamtha. Bapong waámo susatopin, írürü daxita judiomonae pía pamo susatopin tatsi pong kaena báyatha tüpa. ²Abraham jopa piakoya najüntükoyene wüünae exanaeyo xua jopa Nakom petsita-natsikuentsiwatsi xua abe peexanaexae. Daxota jopa itaküüpaetsi xua atsakiya nayábara paeba xua wüünaeya peexanaewa. Bapong jopa itaküüpaetsi xua atsakiya paeba Nakom peitütha tatsi. ³Nakom Pejume Diwésitha Abraham yábara páebatsi, jeye: “Abraham jumekowünta Nakom. Peyábara jumekowüntsixae pokotsiwa xua Nakom exanapaeba, Nakom jüntükoyene wüünae kana éxana bapong”, jei Nakom Pejume Diwésitha. ⁴Poxonae jintong ba tanakuíta ichüing, jopa jintong pentoma bekatsichi xua saya amanaya nexa poxoru ichüing peyábara nantaxeinaexae bapong. Jame jintong ba bewa pentoma katsichi xua poxoru penakuichixae. ⁵Íchitha nama Nakom seikayiya éxana. Pong yábara jumekowünta pokotsiwa Nakom exanapaeba xua Nakom peyábara jüntemainaenexa xua bapong pía penatsikuentsiwa tatsi, bara Nakom yawena bapong. Bárapo jintong Nakom tsita jüntükoyene wüünaetsi, bekein bapong jopa exanaeyo pokotsiwa bewa bapong exanáe xua daxota Nakom peyawenaenexa tsane. ⁶David pong waámo susatopin, pong kaena báyatha tüpa, bapong kaena báyatha Israel nakuapiwi itorobiya pía pepa peewatsinchi. Bapong David yábara paeba po jintong bichokono jüntükoyene weiweina. Jeye: “Pong peyábara jumekowüntsixae pokotsiwa Nakom exanapaeba, Nakom jüntükoyene wüünae kana éxana. Jopa ápara Nakom jüntükoyene wüünae exanaeyo xua poxoru bapong wüünaeya xanapanaya peexanaexae. Ápara poxoru Nakom peichichipaexae, daxota baxua éxana”, jei David. ⁷Ekeicha David jei:

“Jüntükoyene weiweina pomonae Nakom yábara jüntemaina xua puxana éxana abe pía peéxanae kuirukoyenewang tatsi.

⁸Jüntükoyene weiweina pong Nakom jopa tsita natsikuenta xua abe peexanaexae”,
jei David.

⁹Po pejüntükoyene weiweinaewa xua David yábara paeba, meisha saya ü pomonae pewithabíwichi jopa néxiyo. Ápara bárapo pejüntükoyene weiweinaewa irü pomonae jopa pewithabíwichi néxano ápara. Bayathaunxuae paka tsipáebatsi xua Abraham yábara jumekowünta pokotsiwa Nakom exanapaeba, daxota Nakom jüntükoyene wüünae kana éxana bapong xua jopa Nakom tsítatsi xua Abraham penatsikuenta xua abe peexanaexae. ¹⁰Abraham jopa jüntükoyene wüünae exanaetsi poxonae nakana kuiwétatsi xua pewithabíwatsi. Ápara Nakom Abraham jüntükoyene wüünae éxanatsi poxonae kataunxuae jopa withabichi. ¹¹Abraham peyábara jumekowüntsixa pokotsiwa Nakom exanapaeba, Nakom jüntükoyene wüünae éxana. Kotakaya bapoxonae Abraham withábatsi. Bárapo pewithabi koyene tsita itapeñaxeina xua bara Nakom jüntükoyene wüünae éxana Abraham, peyábara jumekowüntsixa pokotsiwa Nakom exanapaeba. Abraham petsíwana exanaexae xua pewithabíwatsi, daxota Nakom tsítatsi xua Abraham be koxiyüing poxonae kana éxanatsi xua kanamataxeinaena xua daxita nakuangpiwi pomonae jopa pewithabíwichi. Barapomonae be Abraham pía pexui. Baxua Nakom kana éxana po jíwitha, po jiwi peyábara jumekowüntsiwixaetsi pokotsiwa exanapaeba bara bekein daxita bárapo jiwi jopa pewithabíwichi kopiya. Daxota Nakom irü yábara nantaxeina xua bara irü barapomonae jüntükoyene wüünae bapongtha. ¹²Barichi Abraham be koxiyüing kana éxanatsi, xua pomonae báyatha pewithabíwichi barapomonae be pía pekanamataxeinaeinchi. Jopa Abraham be koxiyüing kana exanaetsi xua poxoru barapomonae pewithabixaetsi. Jame ápara be koxiyüing kana éxanatsi poxoru irü peyábara jumekowüntsiya jinompaexae pokotsiwa Nakom exanapaeba icha Abraham ichi, pong waámo susatopin xua beya poxonae withábatsi.

Meje yábara xua poxonae Nakom kata pía peyábara tsiwüünae muxudutsiwa, Abraham kátatsi

¹³Nakom yábara tsiwüünae muxuduta Abrahamtha irü pía pemómoxi susato jíwitha tatsi. Nakom yábara tsiwüünae muxuduta xua katsina daxita bárapo kae pin nakue Abrahamtha, irü pía pemómoxi susato jíwitha tatsi. Daxita barapomonaetha Nakom jopa ápara katsiyo bárapo yábara petsiwüünae muxudutsiwa xua poxoru Abraham peexanaexae pokotsiwa Moisés pía peitorobi koyenéwatha itoroba tsipéi Moisés jopa kataunxuae naexanaeyo poxonae báyatha Abraham tüpa. Ápara Nakom kata bárapo yábara petsiwüünae muxudutsiwa poxoru Abraham peyábara jumekowüntsixa pokotsiwa Nakom exanapaeba. Daxota Nakom yábara tsítatsi xua bara Abraham pejüntükoyene wüünaein bapongtha. ¹⁴Icha pomonae xeináetsipa pokotsiwa Nakom yábara tsiwüünae muxuduta, icha barapomonae ápara barapomonae tsipae pomonae éxana daxita pokotsiwa Moisés pía peitorobi koyenéwatha itoroba bapoxonae barapomonae jopa nantawénonae tsipae xua yábara jumekowünta pokotsiwa Nakom exanapaeba. Matáütano pokotsiwa xua Nakom yábara tsiwüünae muxuduta barapomonae jopa tsita xaiñéi tsipaetsi.

¹⁵Íchitha báraxua jopa xaiñeyo, tsipéi Moisés pía peitorobi koyenewa saya éxana xua jiwi átene peexanáewatsi. Átene éxanatsi poxoru jiwi beta jopa daxita yábara jumekuiya exanaeyo bárapo Moisés pía peitorobi koyenewa tatsi. Íchitha pomonae jopa xeinaeyo Moisés pía peitorobi koyenewa, barapomonae Nakom jopa tsita penatsikuentíswatsi xua abe peexanaexae xua poxonae jopa exanaeyo bárapo peitorobi koyenewa.

¹⁶Daxota Nakom yábara tsiwüünae muxuduta Abrahamtha peyábara jumekowüntsixaetsi pokotsiwa Nakom exanapaeba. Nakom pía yábara petsiwüünae muxudutsiwa, Nakom bara xaniwaicha amanaya katsina Abraham pía pemó-moxi susato jíwitha tatsi. Nakom jopa meisha katsiyo pomonaetha, pomonae peexanaewi xua Moisés itoroba. Ápara Nakom irü kata pomonaetha, pomonae pejumekowüntsíwichi icha Abraham ichi poxonae jumekowünta Nakom. Bapong Abraham be koxiyüing kana exainchi xua daxita waxainchi be xua wanaka namataxeinaein, kopiya pejumekowüntsixaet. ¹⁷Nakom jeye Abrahamtha pejume diwésitha: “Xam kakana éxanatsi xua aiña nakuangpiwi nekayábara nantaxeinaenexa xua xam kompam daxita nakuangpiwi kakana matakaéxanatsi be koxiyüm”, jei Nakom Pejume Diwésitha. Daxota bárapo yábara petsiwüünae muxudutsiwa Nakom tsita koyenewüünaetsi. Barapong Nakom Abraham yábara jumekowünta pokotsiwa Nakom exanapaeba. Matáütano bárapo Nakom ekeicha asüü éxana pomonae býatha wérapa. Matáütano barapong Nakom itoroba xua fórota pokotsiwang jiwi bápana jopa tae kopiya, poxoru Nakom kataunxuae abü jopa forotsiyo bapokotsiwang.

¹⁸Abraham poxonae naweiwétaba xua jopa itaküüpaetsi xua pexeinaewa pexui, áwiya kataunxuae yábara jumekowüntsiya wüünae éwata pokotsiwa Nakom exanapaeba. Bapong jumekowüntsiya pópona xua Nakom exanaena xua býatha paeba xua Abraham pinae bapong pexanto xeinaena. Abraham yábara jumekowünta pokotsiwa Nakom exanapaeba pokotsiwa yábara tsiwüünae muxuduta. Bapong Abraham kana éxanatsi xua daxita karepaya nákuang jiwi peyábara nantaxeinaenexa xua Abraham kompa daxita nakuangpiwi kanamata éxanatsi be koxiyüing. Kaena býatha Nakom tsipaeba Abraham. Nakom jeye: “Abraham, exanaein ayéi jiwi jiña nemómoxi susato jiwi”, jei Nakom. ¹⁹Abraham jopa jüntükoyene natsepaeyo xua peyábara jumekowüntsiwa pokotsiwa Nakom exanapaeba, bekein bara bapong cien po weibe xeina. Bapong Abraham yaputane, xua bapong irü píowa tatsi Sara bara imoxoyo methaunxuae tüpáenabe. Abraham piséuribe bichokono perunbe. Matáütano yaputáneno xua Sara jopa itaküüpaetsi xua pexui pexeinaewa. ²⁰Bapong Abraham jopa aiña muxu xeinaeyo. Matáütano jopa nakui-baraxubiyo xua peyábara jumekowüntsiwa pokotsiwa Nakom exanapaeba xua pokotsiwa Nakom yábara tsiwüünae muxuduta xua pinae Abraham pexanto xeinaena. Jame bapong Abraham beta xaniwaicha jumekokowüntapona. Abraham wüünae jaintapona Nakom. ²¹Baxua Abraham exanapona poxoru bara yatsikaewa yaputane xua Nakom itaküüpaetsi xua peexanaewa pokotsiwa xua bapong yábara tsiwüünae muxuduta. ²²Abraham peyábara jumekowüntsixaet pokotsiwa Nakom exanapaeba, daxota bapong Nakom tsítatsi xua bapong bara peyábara jüntükoyene tsita wüünaeinchi xua jopa petsita-natsikuentísaetsi abe peexanaexae bapongtha.

²³Pojumein xua býatha Abraham yábara páebatsi xua jeye: “Nakom tsítatsi xua bapong bara pejüntükoyene wüünaein xua jopa petsita-natsikuentísaetsi

abe peexanaexae bapongtha”, jei, bárapo jumein jopa meisha tinaeyo xua bapong nexa. ²⁴Bárapo jumein xua pojumein tina ápara irü bara waxainchi nexa xua naka yábara páebarü. Wajumekowüntsixae Nakom, daxota Nakom tsítatsi xua bara waxainchi irü wajüntükoyene wüünae jíwichi xua jopa watsita natsikuentíwatsi xua abe waexanaexae bapongtha. Waxainchi yábara jume-kowúntatsi pokotsiwa Nakom exanapaeba, pong Jesús asüü éxanatsi petüpáe kuirukoyene weya, pong Wanaka namataxeinaein. ²⁵Nakom itoroba xua bapong Jesús naka tsitüpa abe waexanáe kuirukoyenewang. Matáütano Nakom asüü éxanano, xua Jesús asüü petüpáe kuirukoyene weya xua wanaka kana exa-naenexa xua jopa Nakom watsita natsikuentisiwa tsane xua abe waexanaexae bapongtha.

Meje yábara xua Nakom wanaka kana exanaewa xua jopa wanatsikuentisiwa tsane bapongtha, xua abe waexanaexae

5 ¹Nakom naka kana éxana xua bapong jopa watsita natsikuentisiwa tsane abe waexanaexae bapongtha. Baxua Nakom naka kana éxana wayábara jumekowüntsixae pokotsiwa Nakom exanapaeba. Daxota waxainchi jüntema dubenanaebíyatsi Nakom peitütha tatsi Jesucristo wanaka tsitüpaexae, pong Wanaka namataxeinaeinxae. ²Cristo wajumekowüntsixae, daxota naka kana éxana xua Nakom bara wanaka yawenaewa tsane wanaka antobexae. Nakom wanaka yawenaexae ajüntükoyenesüüya jinómpatsi. Yawa waxainchi jüntükoyene weiwéinatsi wawüünae ewatsixae xua bexa irü xeinaeinchi pebarükui-iturajinaewa po pebarükui-iturajinaewa jiwi Nakom tsita xéinatsi peañakuinxae icha bapong ichi. ³Jopa meisha baxua néxiyo, jame yawa jüntükoyene weiweinéibatsi poxonae ichamonae naka átene exaneiba. Tsipéi waxainchi yaputainchi xua wanaka jüntükoyene ayapusüü exanaewa xua daxota jopa wa-aitakonaewa poxonae bekein ichamonae naka átene éxana. ⁴Poxonae ajüntüyapusüüya jinómpatsi xua daxota jopa wa-aitakonaewa poxonae bekein ichamonae naka átene éxana, bapoxonae Nakom naka weyatane xua bara beta waexanaewa. Poxonae Nakom naka weyatane, baxua naka kana éxana xua wawüünae ewatsíwatsi xua Nakom nákata exanaena pokotsiwa yábara naka tsiwüünae muxuduta. ⁵Bárapo wawüünae ewatsiwa jopa naka jüntükoyene kana exanaeyo xua wajüntükoyene wekoyeiwa xua jopa wataxae pokotsiwa wawüünae ewatsiwa. Nakom bichokono naka jüntükoyene yüüka kana éxana pía peántobe koyenewa pía Pejumopetünáxütha. Bárapo pía Pejumopetünaxü tatsi naka nakana jumopekata wajüntükoyenéwatha.

⁶Poxonae waxainchi jopa naka itaküüpaeyo xua wakoutha wanaka panenebiwa, bapoxonae Cristo naka tsitüpa abe waexanáe kuirukoyenewang nexa. Bapong Cristo tüpa poxonae po matakeitha Nakom kópata xua bapong petüpaewa tseneba. ⁷Bárapo kae pin nákuathe nákata ayapubé xua nantaxéinatsi xua jintong wayábara nantaxeinaewa xua ichüng peita-araranáewatsi xua peyapukabokaewa xua daxota petüpaewa bekein bárapo ichüng daxita yábara jumekuiya éxana pokotsiwa Moisés pía peitorobi koyenéwatha paeba. Tsipéi jiwi ba anatsiüntobe, jopa ichipaeyo xua petüpaewa. Íchitha ichakuitha tsipae metha jintong yaita-araranáetsipa xua peyapukabokaewa xua daxota petüpaewa pong wüünaeya petaexanaein ichamonae. ⁸Jame Nakom xaniwaicha naka tsita

itapeiñaxeina pía wanaka antobexae. Baxua Nakom naka kana éxana poxonae Cristo naka yapukaboka xua wanaka tsitüpaewa bara bekein kataunxuae abe waexanáe jíwichi. ⁹Nakom naka éxana xua waxainchi pejüntükoyene wüü-nae jíwichi xua poxonae jopa natsikuentaichi bapongtha abe waexanaexae, xua poxonae Cristo naka tsitüpa. Bapoxonae yawa jana pichapabarena. Barichi icha koyenéwano exanáenano. Cristo naka yaputane éxana xua wanaka kapanenebiwa tsane Nakom pía pewanaka kasebiwa weya. Po matakeitha Nakom yábara paebina daxita jiwi xua penatsikuentaicha xua abe peexanaexae, bárapo matakeitha Nakomtha jopa natsikuentaí tsainchi xua abe waexanaexae. ¹⁰Kopíyatha waxainchi Nakom pía peaitafaetabí jíwichi. Íchitha bapong Nakom naka kana éxana xua waitakoxonaewa xua daxota Nakom pía jiwi tatsi wanaexanaenexa, Pexanto tatsi pewanakatsitüpaexae. Íchitha ánoxuae Nakom pía jiwi tatsixaetsi, Jesucristo naka kapanenebiya pía peasuüpóponae koyenéwatha. ¹¹Jopa meisha baxuiyo, jame jüntükoyene weiweinatsino Nakomtha xua xuang Jesucristo peexanaexae waxainchi nexa, pong Wanaka namataxeinaein. Bapong Cristo naka kana éxana xua waxainchi Nakom wanaka itakoxonaewa xua daxota Nakom pía jiwi tatsi wanaka kana exanaewa.

Meje xua Adán yábara irü Cristo

¹²Kaein pong xua kopiya abe éxana bárapo kae pin nákuathe, bapong Adán. Bapong kaena býatha tüpa kopiya abe peexanaexae. Bapoxonae daxita jiwi abe eexanapona bárapo kae pin nákuathe. Jiwi abe peexanaponaexae daxota werapaena, tsipéi daxita jiwi abe éxana. ¹³Bárapo kae pin nákuathe jiwi abe eexanapona beya poxonae Moisés pía peitorobi koyene tatsi xeina bárapo kae pin nakuathepiwi. Poxonae jiwi kataunxuae jopa yaputaeyo Moisés pía peitorobi koyenewa tatsi, jopa Nakom tsítatsi xua barapomona pexeinaewa penatsikuenta koyenewa bapongtha bekein barapomona abe exanaetha. ¹⁴Íchitha po dapaetha poxonae Adán pópona weya xua beya poxonae irü Moisés pópona, jiwi abe eexanapona. Daxota jiwi xeinapona pokoyenéwatha xua daxota werapaena bárapo jiwi. Barapomona wérapa bekein pía peabe koyenewang tatsi jopa barichiyo icha Adán ichi. Adán abe éxana poxonae bekein Nakom itoroba xua jopa bewa pinae xae tsane petheito. Bapong Adán bara be bapong pong bexa patopeikapaeba, bapong Cristo. Adán piakoutha xua jiwi abe peexanaewa xua jiwi pekanamataka-exanaexaetsi. Seikaya nama Cristo piakoutha xua jiwi beta peexanaewa xua jiwi pekanamataka-exanaexaetsi.

¹⁵Pókotsi koyene xua Adán naka tsiéxana jopa be ichiyo xua pókotsi koyene naka tsiéxana Jesucristo. Jiwi nawita wérapa poxoru kaein abe pekanamata-exanaexae bapong Adán. Íchitha Nakom amanaya naka tsiéxana pekapanenebiyáe koyenewa poxoru kaein, pong Jesucristo, naka tsitüpa abe waexanaexae. Bárapo koyene xua pokoyene Nakom naka tsiéxana bichokono peaiñakuí koyene, beyakaincha pokuikoyene Adán naka tsiéxana. Bárapo koyene Nakom naka tsiéxana xua peantobexae daxita jiwi peyawenaenexa ayéi jíwitha. ¹⁶Po peabe koyenewa kaein kana mataéxana bapong Adán jopa koyenejüpaetsi xua nakuikoyenejüpa éxanabe pokuikoyene xua Nakom amanaya naka tsiéxana. Kopiya Adán kana mataéxana abe peéxanae kuirukoyene. Bapoxonae daxita jiwi jüpa éxana. Nakom yábara paeba Adán xua penatsikuentaicha abe peexanaexae. Daxota Nakom Adán

yábara jeichichi xua Adán bewa pinae tüpaena abe peexanaexae. Barichi Nakom tane xua daxita jiwi bewa werapaena bichokono abe peexanaexae. Daxota Nakom ichichipa xua jiwi peyawenáewatsi. Nakom amanaya jüntükoyene wüünae éxana jiwi xua bárapo jiwi jopa natsikuentsiyo bapongtha, abe peexanaexae. Baxua éxana Cristo petsitüpaexae jiwi. ¹⁷Bara xaniwaicha kaein abe pekanamata-exanaexae, daxita jiwi bewa werapaena abe peexanaexae. Íchitha nama ánoxuae pokotsiwa kaein peexanaexae pong Jesucristo, barapokotsiwa bichokono ayapúsüü beyakaincha xua Adán éxana. Jesucristo petsitüpaexae jiwi daxota Nakom bichokono jopa juniya yawenaeyo jiwi peantobexae. Bárapo jiwi Nakom amanaya jüntükoyene wüünae éxana. Daxota Nakom weyatane xua barapomonae jopa xeinaeyo penatsikuentsi koyenewa bapongtha bekein barapomonae abe éxana taetha. Barapomonae Jesucristo ayapusüüya nanabarü yawa pópona penanabarü yawa itorobinexa tsane ichamonaetha.

¹⁸Barapong Adán pía peabe koyenéwaxae, daxita jiwi natsikuenta Nakomtha xuya abe peexanaexae icha Adán ichi. Po pewüünae koyenexae xua Jesucristo éxana, bárapo koyene jiwi kana éxanatsi xua kapanenebíyatsi penatsikuentsi koyenewa weya xua abe peexanaexae. Daxota daxita jiwi pomonae pejumekowüntsixae Jesucristo itaküüpatsi xua ataya asüü jinompaena. ¹⁹Baxua kaunutang xua kaein jopa pejumejejeixae xua peexanaewa pokotsiwa xua Nakom itoroba, daxota jiwi ayéi jiwi abe eexanapona. Barichi xua kaein pejejeixae xua peexanaewa pokotsiwa Nakom itoroba, daxota ayéi jiwi najüntükoyene wüünae exanapona Nakomtha. Matáüta barapomonae Nakom kapanenebiya éxana xua pía penatsikuentsi koyenewa weya, xua abe peexanaexae.

²⁰Nakom itoroba, xua Moisés tina pía peitorobi koyenewa xua jiwi peyaputaewa tsane xua bara jiwi daxita abe peexanapona jiwi poxonae jopa yábara jumekuiya exanaeyo pokotsiwa Moisés itoroba. Poxonae jiwi ekeicha mataropeicha yaputane Moisés pía peitorobi koyenewa, bapoxonae ekeicha bichokono mataropeicha yaputane abe peéxanae koyenewang. Dáichitha Nakom bichokono mataropeicha aantobe tsóponae xua peyawenaenéxatsi barapomonae. ²¹Kopiya daxita jiwi wérapa abe peexanaexae. Ichitha ánoxuae Nakom peantobexae jiwi daxota kana éxana xua jopa xeinaeyo penatsikuentsi koyenewa xua abe peexanaexae. Nakom jiwi kátatsi peajüntüyapusüü koyenewa po peajüntüyapusüüwa ataya tsiteka Jesucristo pong Wanaka namataxeinaein wanaka tsitüpaexae.

Meje yábara xua waxainchi asüü jinómpatsi kaemonae wanaexanaexae Crísto

6¹Waxainchi jopa bewa abe eexanaponaeinchi xua Nakom wanaka yawa-wenaponaenexa xua daxota wayaputaenexa xua bara Nakom naka ántobe. ²Jopa bewa baxua exanaetsi. Waxainchi báyatha wétatsi xua abe waexanaewa. Ekeicha jopa bewa abe exanaetsi, icha be pong petüpaein ichi, xua jopa itaküüpaetsi xua ekeicha abe peexanaewa, tsipéi báyatha tüpa. ³Paxam payaputáneme baxue: Poxonae waxainchi ichamona naka bautisaba, bapoxonae kaemonae nanaexainchi Cristo Jesththa. Waxainchi kaemonae wananaexanaexae Crísto poxonae naka bautisaba, bapoxonae be kae kuikoyeneya nanaexánatsi xua wawerapaewa, icha bapong ichi poxonae tüpa. Baxua be icha waxainchi xua báyatha wérapatsi xua daxota ekeicha jopa naka itaküüpaeyo xua abe

waexanaewa. ⁴Wanaka bautisabí koyenewa baxua be poxonae Cristo naka kayawa müthüthü xotsi. Yáwano be Cristo naka kayawa tüpa poxonae bapong tüpa. Icha Cristo ichichi xua ekeicha asüü éxanatsi petüpáe kuirukoyene weya, Nakom bara naka ichi tsane. Nakom Cristo paxa asüü kana éxanatsi pía peitüpanáe koicha ayapusüü itorobi koyenéwatha. Barichi Nakom bara naka ichi tsane wayawa jinompaenexa pena jüntükoyenewa. Bapoxonae xéinatsi pena jüntükoyenewa, xua po jüntükoyenéwatha jinómpatsi icha Cristo ichi. Nakom, baxua Cristo paxa kana éxanatsi Nakom pía peitüpanáe koicha ayapusüü itorobi koyenéwatha.

⁵Tsipéi waxainchi be kaemonae nanaexanaeinchi po petüpáe koyenéwatha poxonae bapong tüpa. Barichi tsane poxonae ekeicha asüü naka exanaena petüpáe kuirukoyene weya icha matha Cristo ichichi poxonae asüü exainchi petüpáe kuirukoyene weya. Bapoxonae kaemonae nanaexanaeinchi Crístotha. Daxota icha Cristo ichichi xua poxonae asüü exainchi ekeicha petüpáe kuirukoyene weya, naka barichi tsane. Nakom ekeicha asüü naka exanaena petüpáe kuirukoyene weya kaemonae wananaexanaexaetsi Crístotha poxonae be naka yawa tüpa Cristo. ⁶Waxainchi yaputainchi, xua pokotsiwang éxanatsi xua xuang waperüü jüntükoyenein pokoyenein naka kana éxana xua abe waexanaewa, bárapo koyenein be werawéraka poxonae Cristo tüpa exanadútatsi náetotha. Baxua nákata éxana xua jopa ekeicha bichokono waichichipaewa tsane xua waexanaewa abe koyenewa poxonae bekein wajüntükoyene naka itoroba xua abe waexanaewa tsane. ⁷Daxota ba, pong xua báyatha tüpa, jopa itaküüpaetsi xua ekeicha abe peexanaewa. Waxainchi barichichi jopa naka itaküüpaeyo xua ekeicha abe waexanaewa tsane. ⁸Waxainchi Cristo naka kayawa tüpa, daxota jumekowúntatsi xua bexa bapong Cristo barü jinompaeinchi. ⁹Waxainchi yaputainchi, xua poxonae Cristo ekeicha asüü éxanatsi petüpáe kuirukoyene weya, bapoxonae bápana ekeicha jopa tüpa exanáe tsainchi. ¹⁰Poxonae Cristo tüpa bapong saya bara kae koyenéwatha tüpa xua daxita jiwi nexa abe peexanaexae xua ataya tsiteka. Íchitha xua Cristo ánoxuae asüü pópona, bárapo pepoponáe koyenewa xua beta peexanaenexa pokotsiwa Nakom peichichipaewa xua bara ataya tsane. ¹¹Barichi ánoxuae paxam bewa panantaxeináename be pomonae xua wérapa xua ekeicha jopa itaküüpaetsi xua abe peexanaewa. Bara paichinde paexande xua jopa paexanaeinde icha barapomonae ichi. Paexande pokotsiwa Nakom tsita wüünaetsi xua pokotsiwa Nakom ichichipa xua kaemonae paiña nanaexanaexae Cristo Jesustha.

¹²Daxota jopa pakopatsinde xua paiña jüntükoyenein paka itoroba xua abe paiña neexanaewa. Paiña pepong werapaena daxota jopa paexanaem tsane xua pokotsiwa paiña pepong paka itoroba xua pokotsiwa ichichipa paéxaname xua peabe koyenewang. ¹³Paiñaxoba pakópatame xua bara paiña jüntükoyenein paka itorobina xua paiña neexanaewa tsane peabe koyenewang. Jame maisha bara pakópare xua bara Nakom paka jüntükoyene itorobeibina paiña neexanaenexa pokotsiwa Nakom paka itoroba. Bara paichinde icha be ichi xua pomonae báyatha wérapa xua ekeicha asüü éxanatsi xua jopa ekeicha abe exanaeyo. ¹⁴Ánoxuae bárapo abe peéxanae koyenewa pokoyene xua kopiya paexanapóname jopa itaküüpaetsi xua paka kana éxana xua ekeicha abe paiña neexanaponaewa tsane. Barichi ánoxuae ekeicha jopa panantawenonaem xua paexanáename pokotsiwa

Moisés paka itoroba pía peitorobi koyenéwatha Nakom paiña paka kapanenebiyaenexa. Jame paéxana dubenanaebíyama pokotsiwa xua Nakom ichichipa pía paka nekayawenae koyenéwatha, pía paka nekaantobexae.

**Meje yábara xua waxainchi bewa exanaetsi
pokotsiwa pexaiñéi koyenewa**

¹⁵Waxainchi jopa bewa abe eexanaponaeinchi! Ánoxuae jopa Moisés naka itorobiyo pía peitorobi koyenéwatha xua waexanaewa. Ápara Nakom naka itoroba wanaka yawenaenexa xua wanaka antobexae. ¹⁶Paxam payaputáneme icha pebin nakaenaeta xua ichichipa éxana pokotsiwa xua ichüing itoroba, bapoxonae bapong náexana be pong xua amanaya petanakuichin pong pía pentakaponaeinchi nexa. Daxota poxonae paxam paichichípame xua itapeta paiña neexanaewa peabe koyenewang, bapoxonae bárapo peabe koyenewa be paka kanamataxeina. Bapoxonae be pana nakana éxaname be pókotsin amanaya petanakuichin pía pentakaponaeinchi nexa. Daxota pawerapáename, paiña neexanaexae bárapo abe peéxanae koyenewa. Ichakuitha icha paichichípame xua itapeta paiña neexanaewa pokotsiwa xua Nakom itoroba, bapoxonae xaniwaichiya painómpame. Nakom tsítatsi xua paiña jüntükoyenein wüünae xua jopa paiña nenatsikuentsiwa abe paiña exanaexae bapongtha. ¹⁷Íchitha baxua yábara Nakom tsipaebang, jangje: “Nakom maisha jüntükoyene weiweingang, bárapo Roma tomarapiwi pía peexanaexae. Tsipéi kopiya ü saya xua abe koyenewang peexanaewi. Íchitha ánoxuae barapomonae kajumekowünta. Barapomonae bichokono jumekowünta pía jüntükoyenewatha pokotsiwa pexaiñéi jume xua barapomonae nakuiduba”, jangje Nakomtha. ¹⁸Daxota ánoxuae Nakom paka kapanenebiya éxana bárapo abe paiña neexanáe koyenewang weya. Yáwano paxam amanaya paiña netanakuichi jiwí pam Nakom nexa xua beta paiña neexanaewam. ¹⁹Xang kueikueijang pókotsi jumeintha xua jiwí itaküüpatsi peyaputaenexa, tsipéi yaputang xua pákata ayapubé xua paiña neyaputaewa. Kaena báyatha paxam saya payábara kópatame xua bara paiña neexanaewa peabe koyenewang xua paichichípame. Jamaisha ánoxuae payábara kópare xua paiña pepong peexanaponaeinchi pokotsiwa xua pewüünae koyenewang Nakom nexa. Bapoxonae Nakom patsita jüntükoyene wüünae jinómpame.

²⁰Poxonae kataunxuae saya ü paiña neexanaewi abe peéxanae koyenewang, bapoxonae jopa ü paiña neexanáe jiwí pokotsiwa pewüünae koyenewang. ²¹Poxonae báyatha peabe koyenewang paéxaname báraxua ápara jopa paka yawenaeyo. Ápara saya paka aura éxana ánoxuae. Íchitha bárapo abe peéxanae koyenewang saya paka kana éxana xua paiña newerapaewa tsane. ²²Íchitha ánoxuae panebiya paiña nepaka exanaexae bárapo abe paiña neexanáe koyenewang weya, daxota ánoxuae paéxaname pokotsiwa xua Nakom paka itoroba. Daxota pokotsiwa Nakom paiña nepaka matomatsiwa, baxua ápara poxonae Nakom paka jüntükoyene wüünae kana éxana bapongtha. Matáütano Nakom paka katsibina pokotsiwa peajüntükoyenesüüwa, po peajüntükoyenesüüwa ataya tsiteka. ²³Bárapo peabe koyenéwaxae saya jiwí werapaena kana exanaeinchi. Íchitha pokotsiwa xua Nakom amanaya wanaka katsiwa, baxua ápara pokoyene xua peajüntüyapusüü koyene, po peajüntüyapusüü koyene ataya tsiteka. Bárapo peajüntüyapusüü koyenewa naka kana éxana xua kaemonae naexainchi Cristo Jesustha, pong Wanaka namataxeinaein.

**Meje yábara xua po petorobi koyenewa
poxonae jitha peekaewa yábüyo**

7¹Tamonae pam, pomonae pam pomonae irü paiña nejumekowüntsi jíwixae Jesucrístotha. Paxam barapomonae pam xua payaputáneme Moisés pía peitorobi koyenewa tatsi. Yáwano payaputáneme xua jiwi saya bewa exanaena pokotsiwa Moisés itoroba bárapo peitorobi koyenéwatha poxonae kataunxuae jinompa bárapo kae pin nákuathe. Íchitha poxonae jiwi wérapa barapomonae jopa ekeicha bewa exanáe pokotsiwa bárapo peitorobi koyenewa itoroba. ²Paka tsipáebatsi peyábara jüta paebiwa: Petsiriwa powa xeina piseuri bewa piséuritha kuikuinae pepaebixae bárapo peitorobi koyenewa, xua poxonae pía pebin tatsi áwiya asüü pópona. Íchitha icha barapowa pía pebin tatsi tatúpatsi barapowa jopa nantawenonaeyo xua peexanaewa pokotsiwa Moisés itoroba bárapo peitorobi koyenéwatha xua pokoyene pebin yábara páebatsi. ³Daxota icha barapowa ishamaiteka icha pebin xua nasikuí éxana icha pebintha poxonae kataunxuae barü pópona pía pebin, bapowa bapoxonae Nakom tsita natsikuéntatsi xua abe peexanaexae. Íchitha icha bapowa pía pebin tatsi tatúpatsi barapowa itaküüpatsi xua pepichiwa icha pebin. Barapowa jopa Nakom tsita natsikuenttsichi xua abe peexanaexae. Poxonae baxua éxana, tsipéi bárapo peitorobi koyenewa jopa yábara paebiyo baxua.

⁴Tamonae pam, paxam pomonae irü paiña nejumekowüntsíwixae Jesucristo. Barichi bara jüta ichi poxonae Cristo tüpa, paxam irü be pawérapame. Daxota jopa panantawenonaem xua paexanáename pokotsiwa Moisés itoroba pía peitorobi koyenéwatha. Ánoxuae paxéiname ichüng pong paka itoroba. Báraxua barichi icha yábüyo ichi xua pita icha pebin pong bapowa itoróbatsi poxonae piseuri tatsi tatúpatsi. Ánoxuae paxam Cristo piamonae tatsi pam, pong ekeicha asüü éxanatsi petüpáe kuirukoyene weya. Bárapo koyenéwatha Nakom naka kana éxana xua wanaka itaküüpaewa xua waexanaewa tsane pokotsiwa wüünae Nakom nexa. ⁵Poxonae waxainchi kopiya jumekowüntatsi, Moisés yábara naka itoroba pía peitorobi koyenéwatha pokoyenewa jopa bewa exanaetsi. Íchitha wajüntükoyenéwatha ichichípatsi nawita xua waexanaewa bárapo abe peéxanae koyenewang poxonae jumetainchi xua jopa bewa exanaetsi bárapo koyene. Bárapo koyene naka kana éxana xua saya wawerapaewa tsane. ⁶Íchitha ánoxuae jopa wanantawenonaewa xua waexanaewa pokotsiwa Moisés itoroba pía peitorobi koyenéwatha. Waxainchi báyatha be wérapatsi xua daxota bárapo Moisés pía peitorobi koyene tatsi jopa itaküüpaetsi xua wanaka itorobiwa. Daxota ánoxuae naka itaküüpa xua watanakuichiwa Nakom. Waxainchi xéinatsi pena jüntübükoyene po pena jüntükoyene Nakom pía Pejumopetünaxü tatsi naka kata. Nama jopa ekeicha exanaetsi pokotsiwa Moisés itoroba bárapo pía peru itorobi koyenéwatha xua báyatha tina.

Meje yábara xua Pablo jeye:

“Meje xua po peabe exanáe koyene xeinang”, jei

⁷Waxainchi jopa bewa paebichi xua Moisés pía peitorobi koyenewa tatsi abe. Tsipéi bárapo Moisés pía peitorobi koyenewa tatsi nekuiduba xua bara abe éxanang. Kopiya jopa yaputaeiño xua peabe koyenewa poxonae yábara uwiya ichichipang pokotsiwang ichamonae xeina. Íchitha bárapo peitorobi koyenewa naka tsipaeba, naka jeye: “Jopa yábara uwiya paichichipaeinde pokotsiwa xua

ichamonae xeina”, jei bárapo peitorobi koyenewa. ⁸Poxonae kopiya jumekowüntang, Moisés yábara neitoroba pía peitorobi koyenéwatha pokoyenéwang xua jopa bewa uwiya ichichipaein tsane ichamonae piáwang. Íchitha jame ichichipang nawita tajüntükoyénéwatha xua taxeinaewa tsane xua ichamonae piáwang poxonae jumetang xua jopa bewa ichichipaein tsane xua taxeinaewa tsane ichamonae piáwang. Poxonae áwiya jopa yaputaeiño Moisés pía peitorobi koyenewa jopa ichipaeiño xua taxeinaewa pokotsiwa ichamonae piáwang. ⁹Kaena báyatha poxonae jopa yaputaeiño Moisés pía peitorobi koyenewa xang saya jüntema póponang, tsipéi jopa yábara yaputaeiño xua abe taexanaewa. Íchitha pírapae bekein yábara yaputang bárapo peitorobi koyenewa, xua ichamonae piáwang peuwiwa yábara, áwiya bichokono abe exanaponang. Bapoxonae bara be tatüpa, ba tsipéi jopa jüntema tapoponaewa abe taexanaewaxae. ¹⁰Bárapo Moisés pía peitorobi koyenewa tatsi Nakom kata xua jiwi pejüntükoyene weiweinaenexa xua poxonae pejüntükoyene wüünaewa tsane. Poxonae jiwi jumekowüntsiya éxana daxita xua bárapo koyenéwatha itoroba, bárapo jiwi bexa tsane xeinaena peajüntüyapusüüwa xua bara ataya tsane xeinaena. Dáichitha bárapo koyenewa wekoyéi nekana éxana tsipéi bewa tatüpa koyenewa tsane poxoru jopa neitaküüpaeyo xua éxanang daxita xua bárapo koyenewa itoroba. ¹¹Bárapo Moisés peitorobi koyenewa be netsita penáerabi koyenewa. Mexeya ítara xeinakuaein jántokuae peajüntüyapusüüwa poxonae exanaein pokotsiwa Moisés itoroba pía peitorobi koyenéwatha. Dáichitha poxonae abe éxanang Moisés pía peitorobi koyenewa netsita-itüüta xua bewa tüpaein tanatsikuentsíwaxae abe taexanaexae Nakomtha.

¹²Daxita po peitorobi koyenewang Nakom kata Moísesta daxita bara wüünae, yawa bara pexaiñéi koyenewang. ¹³Bárapo Moisés pía peitorobi koyenewa jopa nekana exanaeyo xua bewa tüpaein tanatsikuentsíwaxae abe taexanaexae Nakomtha. Ápara jame bárapo abe taéxanae koyene nekana éxana xua be tüpaein tanatsikuentsíwaxae abe taexanaexae Nakomtha. Bekein bárapo Moisés pía peitorobi koyene tatsi wüünae, dáichitha bárapo peitorobi koyene neyaputane éxana xua abe taexanaein. Bárapo peitorobi koyenéwatha xua Nakom naka yaputane éxana xua poxonae abe éxanatsi bárapo abe peéxanae koyenewa bara xaiñéi, bara abe bichokono. Jopa bichokono juniya abeyo.

¹⁴Yaputainchi xua Moisés pía peitorobi koyenewa tatsi ápara wüünae, Nakom weya pejumepichipaexae. Íchitha poxoru saya jintong jüntükoyeneya taxeinaeinxae tajüntükoyene nekana éxana xua abe taexanaewa. ¹⁵Tsipéi jopa xapain yaputaeiño pokotsiwa xua éxanang, poxoru jopa exanaeiño pokotsiwa xua wüünae xua pokotsiwa ichichipang xua taexanaewanexa. Íchitha pokotsiwa aichaxaibin xua jopa pewüünaexae, dáichitha ápara baxua exaneibang. ¹⁶Íchitha icha abe éxanang xua bekein aichaxaibin abe taexanaewa, bapoxonae yaputang xua Moisés pía peitorobi koyenewa tatsi wüünae. Tsipéi bárapo peitorobi koyenewa nekuiduba xua jopa bewa exanáe abe peéxanae koyenewang. ¹⁷Takoutha jopa ichipaeiño xua abe taexanaewa bekein baxua éxanang. Íchitha bárapo abe peéxanae koyenewa xua tajüntükoyénéwatha xeinang, bárapo koyene nekana éxana xua ápara abe taexanaewa. ¹⁸Tsipéi xang yaputang xua xeinang jintong pía koyene. Daxota jopa xeinaeiño pewüünae koyenewa. Bekein ichichipang xua wüünae taexanaewa, íchitha jopa neitaküüpaeyo xua baxua éxanang takoutha. ¹⁹Jopa exanaeiño po pewüünae koyenewa bekein ichichipaethang xua taexanaewa. Íchitha ü exanaponang po abe

peéxanae koyenewang bekein aichaxaibithang xua taexanaewa. ²⁰Daxota icha abe éxanang pokotsiwa bekein aichaxaibithang xua abe taexanaewa, bapoxonae jopa neitaküüpaeyo xua takoutha nayawenang xua jopa abe taexanaewa. Bárapo abe peéxanae koyenewa xua tajüntükoyénewatha xeinang, bárapo koyene nekana éxana xua ekeicha mataropeicha abe taexanaewa.

²¹Daxota nayaputang pokotsiwa exaneibang tajüntükoyénewatha, xua poxonae bekein ichichipang beta taexanaewa tsane bapoxonae abe exaneibang. ²²Bichokono ichichipeibang tajüntükoyenetha Nakom Pejume Diwesi tatsi. ²³Íchitha yaputang xua po peabe koyenewa tajüntükoyénewatha xeinang neitoroba xua abe taexanaewa tsaibi, bekein nantaxeinang xua beta taexanaewa, icha Nakom ichichipa. Íchitha bárapo peabe koyenewa neitoroba xua ekeicha mataropeichiya abe taexanaewa, po peabe koyenewa xua tajüntükoyénewatha xeinang. Xang be pong tanebusikuitaetaein ichamonae tsipéi bárapo abe taexanaewa neitorobeiba xua abe taexanaewa.

²⁴¡Ooo, jopa tawüünae tsokuaeiño! ¡Jopa tajüntükoyene wüünae tsokuaeiño! ¿Jintam metha nekapanepaena bárapo tapepong weya po pepong xua bewa tüpaena? ²⁵Daxota Nakomtha jangje: “Nakom jüntükoyene weiweingang xua Jesucristo, pong Tanekanamataxeinaein, itaküüpatsi xua tanekapanepaewa tsane bárapo tapepong weya”, jang Nakomtha. Daxota yaputang xua nantaxeinang xua bara beta taexanaewa pokotsiwa Nakom neitoroba, íchitha tajüntükoyénewatha éxanang pokotsiwa xua abe taexanaewa.

Meje yábara xua peajüntüyapusüüya pejinompaewa po peajüntüyapusüüwa Nakom pía Pejumopetünaxü tatsi naka kata

8 ¹Dapong aibi pong itaküüpatsi peyábara paebiwa xua pomonae kaemonae penaexanaewi Cristo Jesustha natsikuenta abe peexanaexae Nakomtha. ²Nakom pía Pejumopetünaxü tatsi naka kata peajüntüyapusüüwa xua wajinompae koyenewa nexa xua kaemonae xua wanaexanaexaetsi Cristo Jesustha. Bárapo Nakom pía Pejumopetünaxü tatsi neyawena pía peayapusüü itorobi koyenéwatha. Nekapanepa éxana po peitorobi koyene weya xua neitoroba xua abe taexanaewa. Matáütano nekapanepa éxana xua po peitorobi koyene weya tüpa nekana éxana. ³Moisés pía peitorobi koyenewa tatsi jopa itaküüpaetsi xua jiwi kapanenebiya exainchi abe pía peéxanae kuirukoyenein weya. Jiwi jopa itaküüpaetsi xua daxita yábara jumekuiya éxana bárapo Moisés pía peitorobi koyenewa tatsi. Íchitha Nakom Pexanto itorobika pong yatsikaya pepa Pexanto tatsi. Bárapo Pexanto tatsi nakatsiwa be bara jintong pía pepong tatsi, bara naka perüü koyene jüpa, po pepongtsi xua abe waexanáe jíwichi. Poxonae Cristo tsitüpa waabe exanáe kuirukoyenewang, bapong amanáyaba bárapo waabe exanáe kuirukoyenewangtha. Bárapo peabe koyenewang jopa peitaküüpaenexa tsainchi xua wanaka kana exanaewa tsane xua ekeicha abe waexanaewa tsane. ⁴Nakom baxua éxana xua waxainchi wanaka itaküüpaenexa xua waexanaewanexa tsane pokotsiwa Moisés itoroba pía peitorobi koyenéwatha. Waxainchi naka itaküüpa xua waexanaewa pokotsiwa Moisés pía peitorobi koyenéwatha itoroba, poxoru jopa ápara exanaetsi xua wapepong peichichipaexae. Ápara jame exainchi xua pokotsiwa Nakom pía Pejumopetünaxü tatsi wanaka itorobixae.

⁵Pomonae éxana dubenanáebiya pokotsiwa pía pepong ichichipa éxana, saya barapomonae yábara nantaxeina xua abe peéxanae koyenewa. Pomonae éxana

dubenanáebiya icha pokotsiwa Nakom pía Pejumopetünaxü tatsi ichichipa, barapomonaе saya yábara nantaxeina xua wüünaeya peéxanae koyenewa pokotsiwa Nakom nexa. ⁶Jiwi ba yábara nantaxeina abe peéxanae kuirukoyenewang pokotsiwa pía pepong tatsi ichichipa. Bapoxonaе bárapo jiwi werapaena peexanae-xae bárapo abe peéxanae koyene. Irü icha jiwi ba yábara nantaxeina wüünaeya peéxanae koyenewang xua pokotsiwang Nakom pía Pejumopetünaxü tatsi ichichipa, barapomonaе xeinaena peajüntüyapusüüwa po peajüntüyapusüüwa xua bara ataya tsane. Matáütano xeinaena jüntema pejinompáе koyenewa. ⁷Pomonaе saya peyábara nantaxeinaewi xua abe peéxanae koyenewa xua pokotsiwa pía pepong tatsi ichichipa éxana, barapomonaе ápara Nakom pía peaitaetafabi jíwichi. Barapomonaе jopa ichipaeyo xua peexanaewa pokotsiwa Nakom itoroba pía peitorobi koyenéwatha xuano xua jopa itaküüpaetsi xua peexanaewa bárapo koyene. ⁸Pomonaе naitomatsiya éxana pokotsiwa xua pía pepong tatsi itoroba xua abe peéxanae koyenewa peexanaewa, barapomonaе Nakom jopa tsita wüünaetsi.

⁹Íchitha nama paxam jopa paexanaem baxua po abe peéxanae kuirukoyenewang paiña pepong paka kana éxana xua abe paiña neexanaewa. Íchitha nama paxam pajinómpame icha be pókotsi koyeneya Nakom pía Pejumopetünaxü tatsi ichichipa, icha bárapo júmope yatsikaewa paka barü jinompa. Pong jopa Nakom pía Pejumopetünaxü tatsi barü poponaetsi, bapong jopa Cristo pijimonaе tatsi. ¹⁰Íchitha icha Cristo paka barü pópona, Nakom pía Pejumopetünaxü tatsi paka kana éxana xua jopa paiña nenatsikuentisiwam xua abe paiña neexanaexae Nakomtha. Baxua paka kana éxana bara bekein paiña pepong wérapa éxanatsi abe peéxanae koyenewang. Baxua paka kana éxana paiña nejüntükoyene wüünaexae Nakomtha. ¹¹Nakom pía Pejumopetünaxü tatsi Jesús asüü éxanatsi petüpáе kuirukoyene weya. Icha Nakom pía Pejumopetünaxü tatsi paka barü pópona, bapoxonaе Nakom asüü exanaena paiña pepong, po pepong xua werapaena. Baxua Nakom pákata exanaena, icha Nakom pía Pejumopetünaxü tatsi ichi poxonaе Cristo asüü éxanatsi petüpáе kuirukoyene weya. Baxua Nakom exanaena paiña nepaka barü jinompaexae Nakom pía Pejumopetünaxü tatsi.

¹²Tamonaе pam, paxam pomonaе irü paiña nejumekowüntsíwixae Jesucristo. Waxainchi jopa bewa exanaetsi pokotsiwang xua wapepong naka kana éxana xua abe waexanaewa tsane. ¹³Tsipéi icha paxam paéxana dubenanaebíyame xua pokotsiwa paiña pepong ichichipa xua abe paiña neexanaewa tsane, bapoxonaе pawerapáename. Íchitha jame paéxana dubenanaebíyama pokotsiwa Nakom pía Pejumopetünaxü tatsi paka kui-itoroba xua paiña neexanaewa tsane. Bapoxonaе jopa paexanaem pokotsiwang xua paiña pepong paka kana éxana xua abe paiña neexanaewa tsane. Bapoxonaе bexa tsane ajüntüsüüya pajinompáename Nakom pía nakuatheicha.

¹⁴Daxita pomonaе Nakom pía Pejumopetünaxü tatsi itorobiya éwata, barapomonaе bara Nakom pía pexui tatsi. ¹⁵Nakom paka nakana jumopekata. Bárapo pejúmope jopa paka kana exanaeyo pomonaе be paiña nepaka busikuitatayebeibiwi pam xua ichamonaе amanaya paiña netanakuichi jiwi pam, xua daxota ekeicha pajunúwame. Jame bárapo Nakom pía Pejumopetünaxü tatsi paka kana éxana xua Nakom pía pexui tatsi pam. Bárapo Nakom pía Pejumopetünaxü tatsi naka éxana xua barompaya wajeiwa: “Axa”, wajeiwa Nakomtha. ¹⁶Nakom pía Pejumopetünaxü tatsi irü wajüntükoyenewa natsipáebabe xua pinae bara Nakom pía pexui

tatsi wanaexanaewichiba. ¹⁷Waxainchi Nakom pía pexui tatsi wanaexanaexae, daxota xéinatsi pokotsiwa Nakom wanaka jüntanajebiwa xua bexa tsane naka katsibina. Barapokotsiwa báyatha yábara naka tsiwüünae muxuduba. Poxonae Nakom baxua naka katsibina, Cristo matha katsinchi xua waxainchi wajíwana xeinaenexa. Icha waxainchi ichamonae naka átene éxana, icha poxonae Cristo ichichi xua matha átene éxanatsi ichamonae, bapoxonae waxainchi Cristo barü xeinaeinchi pokotsiwa Nakom wanaka jüntanajebiwa. Nakom naka katsibebina po pexeiña peitüpanáe koicha xua báyatha Cristo kátatsi.

**Meje yábara xua Nakom piamonaetha katsikaena
pía pexeiña peitüpanáe koicha**

¹⁸Xang yaputang xua bekein ichamonae naka átene éxana bárapo kae pin nákuathe, baxua jopa aiñakuiyo. Matáütano yaputang xua Nakom kata pía pexeiña peitüpanáe koicha Jesustha. Barichi naka katsibina bárapo pexeiña peitüpanáe koicha po pexeiña peitüpanáe koicha xua jopa juniya wüünaeyo. ¹⁹Daxita po jiwi Nakom fórota bárapo kae pin nákuathe, bárapo jiwi wüünae weyataeya éwata po matakeitha poxonae Nakom tsita itüütsina piamonae. Nakom tsita itüütsina piamonae xua daxita jiwi peyaputaenexa tsane xua xaniwaicha barapomonae ápara Nakom pía pexui. ²⁰Daxita baxuang xua xuang Nakom éxana po kae pin nákuathe bárapo koyenein abe naexanaena. Jopa ápara bárapo koyenein piakóuthiyo xua pewerawerakaewa tsane peabexae, saya ápara poxoru Nakom baxua pekopatsixae poxoru Nakom namchi xua daxita bewa werawerakaena Adán abe peexanaexae. Íchitha Nakom yábara kana jüntükoyene weta éxana xua pejopaewa tsane matakabi po matakeitha xua bárapo kae pin nakue pena nakua naexanaena.

²¹Bárapo kae pin nákuatha xua pena nakua, jiwi jopa bápána ekeicha wérapae tsane. Matáütano daxita koyenein xua Nakom fórota jopa bápána ekeicha werawérakae tsane. Bárapo matakeitha daxita xua xuang Nakom fórota Nakom wüünae kana exanaena, icha pijimonaetha kana ichi tsane xua pijimonae tatsi bichokono wüünaeya xanepana naexanaena. ²²Waxainchi yaputainchi daxita baxuang xua pejinompaewang xua Nakom peforotsiwang kaena báyatha átene xua beya ánoxuae. Átene icha yábüyo ichi xua bichokono átene poxonae imoxoyo pexuyo tanakatsíwatsi. ²³Daxita baxuang meisha jopa ateneyo. Bara irü waxainchi daxítatsi aténetsi bekein Nakom pía Pejumopetünaxü tatsi naka yawa jinompa. Bárapo pejúmope, ápara pokotsiwa xua kopiya matha Nakom naka kata xua pokotsiwa jíwana Nakom bexa naka katsibina. Bichokono ajüntükoyeneréwetsi xua jünthüthüwekoyeichi, poxonae waxainchi éwatatsi po matakeitha poxonae Nakom yatsikaewa naka kana exanaena pía pexuichi, xua barichino naka katsibinano pena pepong. ²⁴Poxonae Nakom naka kapanenebiya, Nakom naka tsipaeba pinae naka katsibina pena pepong. Bárapo pepong kataunxuae abü wüünae éwatatsi. Icha waxainchi xeinaeinchi pokotsiwa xua wüünae éwatatsi bapoxonae jopa nantawenonaetsi xua kame wüünae éwatatsi, tsipéi báyatha xeinaéinchiba. Poxoru jintong ba jopa kame wüünae ewatsiyo pokotsiwa xua báyatha xéinaba. ²⁵Íchitha icha wüünae éwatatsi pokotsiwa xua kame jopa xéinatsi bapoxonae bewa wüünae ewatichi xua jopa bepijawa aitakonaetsi.

²⁶Barichi Nakom pía Pejumopetünaxü tatsi naka yawena tsipéi waxainchi wajüntükoyene faefaenaewi. Waxainchi jopa yaputaetsi xua betiya kuitiya

wúükatsi Nakom. Íchitha poxonae jüntükoyene bojeichi, poxoru jopa wanaka itakúüpaewa xua po jumetha wakaunutsiwa, bapoxonae Nakom pía Pejumopetünaxü tatsi nákata wúüka Nakomtha. ²⁷Nakom, bapong yaputane pokotsiwa xua jiwi pía jüntükoyenéwatha nantaxeina. Matáütano barapong yaputane pokotsiwa Nakom pía Pejumopetünaxü tatsi ichichipa paeba jiwi nexa. Nakom pía Pejumopetünaxü tatsi Nakom wúükatsi icha be pókotsi koyeneya Nakom ichichipa pomonae xua Nakom piamonae tatsi nexa.

**Meje yábara xua waxainchi amanáyabatsi
pokoyenein xua bekein naka átene éxana**

²⁸Waxainchi yaputainchi xua daxita pokoyenein xua nákata éxana bekein wüünae, ichakuitha bekein abe, dáichitha Nakom ekeicha daxita baxuang nákata wüünae éxana. Baxua Nakom taéxana pomonaetha, pomonae pía pean-tobexaetsi. Barapomonae Nakom waba petaexanaewa tsainchi pokotsiwa bapong ichichipa. ²⁹Kaena báyatha poxonae aena nakua fórota, Nakom tsíwana yaputane barapomonae pomonae pejumekowüntsíwichi tsainchi. Matáütano Nakom itapeta xua pekana exanaenexa icha be pexanto tatsi ichi. Baxua Nakom éxana xua Pexanto tatsi bapong Jesús, be matapin náexana xua daxita jiwi péntapin tatsi. ³⁰Pomonae xua Nakom itapeta xua kaena báyatha xua kopiya poxonae aena nakua fórota, bara yáwano Nakom waba xua peexanaenexa pía pexui tatsi. Pomonae Nakom pewabixae bara yáwano éxana xua barapomonae jopa penatsikuentsiwa xua abe peexanaexae pekatsixae pejüntükoyene wüünaewa bapongtha. Pomonae xua Nakom pejüntükoyene wüünae exanaexae, bara yáwano yábara tsiwüünae muxuduta xua barapomonae naexanaena icha be Nakom Pexanto tatsi ichi.

³¹Ánoxuae waxainchi yaputainchi xua Nakom naka yawena daxota dapong aibi pong naka jüntükoyene amanáyaba xua abe wanaka exanaenexa. ³²Poxoru Nakom Pexanto jopa asiwiyo daxota Nakom kópata xua wanaka tsitüpaenexa. Daxita waxainchi yaputaeinchi xua daxota daxita koyenein Nakom amanaya naka katsiba pokoyenein kanamatawenónatsi. ³³Dapong aibi xua itakúüpatsi yábara paeba xua pinae Nakom tsita natsikuéntatsi pomonae pía peitapetsiwi-xae tatsi xua abe petsita-exanáexaetsi. Nakom yábara paeba xua pinae ápara jopa barapomonae tatsi natsikuentsichi xua abe petsita-exanáexaetsi bekein abe éxana taetha. ³⁴Matáütano dapong aibi xua itakúüpatsi yábara paeba xua barapomonae bewa werapaena penatsikuentsixae xua abe peexanaexae Nakomtha. Barapomonae jopa bewa wérapae tsane, tsipéi Cristo Jesús tsitüpa barapomonae, abe peexanaexae Nakomtha. Bapong Cristo Jesús ekeicha asüü éxanatsi. Ánoxuae eka Nakom piakoxa weya tatsi. Bapong Cristo Jesús Páxatha wüüka xua nákata wüüka. ³⁵Cristo naka ántobe, daxota dapong aibi pong itakúüpatsi xua tsanayiya naka kana éxana Cristo weya. Ichakuitha ichamonae átene wanaka exanaewíchitha áwiya Cristo naka ántobe. Ichakuitha ichamonae dangwéi wanákata exanaewíchitha áwiya naka ántobe. Ichakuitha ichamonae abe wanákata exanaewichiwathatsi wayábara kueikueijeixae Jesús áwiya bapong naka ántobe. Ichakuitha wajainpaewichiwathatsi áwiya naka ántobe. Ichakuitha wanákata akoibichiwathatsi paparauwa áwiya naka ántobe. Ichakuitha wana-peipeichiwathatsi poxonae ichamonae abe nákata éxana áwiya naka ántobe.

Ichakuitha ichamonae wanaka jutebichíwathatsi áwiya naka ántobe. Daxita bárapo koyenein jopa kanáüpaetsi xua tsanayiya wanaka exanaewa Cristo weya. ³⁶Icha naka ichi daxita bárapo koyenein, barichirü Nakom Pejume Diwésitha báyatha baxua yábara naka tsiwüünae muxuduta, jeye:

“Nakom poxoru tapaka kajumekowüntsí jiwixaetsi daxita matakabin tsaibi ichamonae ichichipa pana jutebeiba.

Barapomonae pana nekana exaneiba icha jiwi ichi xua poxonae daxita matakabin ovejang kapaneiba pong oveja pejutebeibin beya”,
jei Nakom Pejume Diwésitha,

xua yábara naka tsiwüünae muxuduta.

³⁷Íchitha bekein waxainchi daxita bárapo koyenein naka átene éxana, dáichitha amanáyabatsi bárapo koyenein Cristo pía peayapusúü itorobi koyenéwatha pong wanaka antobein. ³⁸⁻³⁹Daxota bara yatsikaewa yaputang, xua dapókotsi koyene aibi pokoyenetha xua tsanayiya naka éxana Nakom pía peántobe koyene weya tatsi. Jopa tsanayiya naka exanaeyo bara bekein poxonae tüpáethatsi, yawa bara bekein poxonae jinompáethatsi. Irü matatsunpiwi jopa kanáüpaetsi xua tsanayiya wanaka kana exanaewa, bekein irü kaurimonae, bekein irü pokotsiwang xua áno-xuae exanapónarü, bekein irü xua pokotsiwang bexa tsanerü, bekein irü xua pokotsiwang wétsika patopáenano, bekein irü xua pokotsiwang ira wetsínano, bekein irü icháwano xua pokotsiwa Nakom fórota. Bara bekein daxita bárapo koyenein, íchitha jopa kanáüpaetsi xua tsanayiya pewanaka exanaewa Nakom pía wanaka ántobe koyene weya tatsi. Nakom naka kata bárapo peantobewa xua Cristo Jesús xeina, pong Wanaka namataxeinaein.

Meje yábara xua Nakom itapeta judiomonae

9¹Pokotsiwang paka tsipáebatsi barapokotsiwang pexaiñéi jumein. Tajumekowüntsixae Cristo, bara jopa naerabiño. Tajüntükoyenetha Nakom pía Pejupopetünaxü tatsi neitoroba. Barapong jumedangweya netsipaeba xua pinae bara yatsikaewa xaiñeya kueikueijang. ²Xaiñang, wekoyang. Bichokono tamonae siwaponae anthüthütanein tsaibi jopa pejumekowüntsixae Cristo. ³Bichokono antobein barapomonae pomonae tanakuapiwi. Daxota nayábara páebang, jangje: Bena bekein siwatüpakuaein tamonae xua bekein tsana tanaexanaewa Cristo weya, xua be poxonae Nakom tsita tanatsikuentsiwa xua barapomonae abe pía peéxanae koyenewang nexa. Bapoxonae xua Nakom tamonae pía pekapanenebiyaenéxatsi, daxota Nakom kópata xua ichamonae nebexubina, najangje. ⁴Pong Israel, pong kaena báyatha tüpa, bapong nawüngkata tamonaetha. Daxota tamonae “israelmonae”, baraichi. Bapong pía pemómoxi susato jiwi tatsi pomonae tamonaexae Nakom barapomonae pía pexui éxana. Barapomonae báyatha Nakom yantapópona xua daxota barapomonae tane Nakom pía pexeiña peitüpanáe koicha poxonae xua beta éxana barapomonae nexa, Nakom tsipaeba barapomonae pokotsiwa xua bapong peichichipaewa. Matáütano Nakom yábara tsiwüünae muxuduta pomonaetha, pomonae xua ataya yaweneibina barapomonae peexanaenexa xua bapong ichichipa. Barapomonaetha Nakom kata Moisés pía peitorobi koyenewa tatsi. Matáütano Nakom kata barapomonae pokoyene xua barapomonae xaniwaicha wüünae pejainchinexa bapongtha. Matáütano Nakom yábara tsiwüünae muxuduta barapomonae xua Cristo pepatopeikaewa tsane. ⁵Barapomonae waámo susato jiwi

pía pemómoxi susato jiwi tatsi. Cristo be jintong koyeneya náexana barapomonae jíwana pomonae pía pemómoxi susatopiwi jíwana tatsi. Bapong Cristo ápara bara Nakom. Bárabü Nakom bara ataya wüünae jainteibinchi pong xua daxita koyeintha kanamataxeina.

⁶Íchitha barapomonae bekein Nakom kata daxita bárapo koyenein, dáichitha ánoxuae barapomonae jopa Nakom wüünaeya beta tsita jinompaetsi jopa Cristo peyábara jumekowüntsixaetsi. Bekein ichamonae nantaxeináetsipa xua pinae Nakom Pejume Diwesi jopa aiñakuiyo xua barapomonae jopa peexanaexae pokotsiwa Nakom itoroba, íchitha báraxua jopa xaiñeyo pokotsiwa barapomonae nantaxeina. Báraxua jame tsita itapeñaxeina xua ápara jopa daxítiyo pomonae Israel pía pemómoxi susato jiwi tatsi xua Nakom piamonae tatsi. ⁷Matáütano Abraham pía pemómoxi susato jiwi tatsi ápara jopa daxítiyo barapomonae xua Nakom piamonae tatsi. Nakom kaena býatha tsipaeba Abrahamtha, jeye: “Xam xeináename pomonae pepa jiña nemómoxi susato jiwi xua Isaac pong nexanto xua pía pexui jíwana tatsi”, jei Nakom. ⁸Baxua naka yaputane éxana xua Nakom jopa exanaeyo daxita xua Abraham pía pemómoxi susato jiwi tatsi be Nakom pía pexui tatsi. Nakom meisha be pía pexui kana éxana pomonaetha, pomonae pejumekowüntsixae xua Nakom pía peyábara tsiwüünae muxudutsiwa. Barapomonae jumekowünta Nakom pía peyábara tsiwüünae muxudutsiwa xua Cristo kapanenebiyaena barapomonae. ⁹Tsipéi Nakom tsipaeba Abrahamtha poxonae yábara tsiwüünae muxuduta. Nakom jeye: “Bárapo xométotha xua icha weitha taitorobi koyenéwatha bapoxonae Sara pexanto pabetsina pebinwüüto xua nexanto tsane”, jei Nakom.

¹⁰Jopa meisha baxuiyo, icháwano Nakom éxana Sara pexanto tatsi nakatsiwa pewüng Isaac. Poxonae Isaac piño, bapong nakuéyoba, powayo pewüng Rebeca. Rebeca tanama-ekatsibe pebinwüütobe. Bárapo pexúyobe kae axa nantáütabe bapong Isaac, pong waámo susatopin. ¹¹⁻¹³Kaena býatha barapóyobe pewünaeya xuano poxonae jopa nakatsiwibe, xuano pewünaeya xua poxonae barapóyobe jopa abe exanáeyobe matáütano pewünaeya xua poxonae jopa wüünae exanaebe, bapoxonae Nakom tsipaeba, Rebeca tsipáebatsi. Nakom jeye: “Pong xua kopiya nakatsiwina bapong péyapin kanamataxeináeinchi”, jei Nakom. Bárapo jume bara nayáraba jumejúpabe xua icha diwésitha Nakom Pejume Diwésitha xua Rebeca pexántobe tatsi yábara páebatsi xua ichaxota, jeye: “Kuita itapetang Jacob xuiyapin, íchitha nama Esau naitématang matapin”, jei Nakom Pejume Diwésitha. Baxua naka yaputane éxana xua Nakom piakoya itapeta pomonaetha, pomonae xua peichichipaewa, xua pewabiwa barapomonae. Nakom jopa yábara itapetsiyo barapomonae peexanaexae pokotsiwa Nakom peichichipaewa. ¹⁴Ichamonae paeba, xua pinae Nakom jopa xapain exanaeyo poxonae kaein jíwana itapeta, xua poxonae ichüng naitématatsi. Ápara jopa xapain wüünaeyo xua barapomonae Nakom yábara páebatsi. ¹⁵Tsipéi Nakom paeba Moiestha, jeye: “Pomonae wüünaeya yábara nantaxeinaein xua tayawenaenexa, barapomonae beta yawenaein”, jei Nakom. ¹⁶Baxua naka kuiduba xua jopa jintong itapetichi poxoru wüünae peexanaexae. Matáütano jopa itapetichi xua poxoru peichichipaexae xua peitapetsiwa-tsi. Saya jame pebiwi itapétatsi poxonae Nakom wüünaeya yábara nantaxeina xua peyawenaenexa tsane barapomonae. ¹⁷Nakom kueikueijej Pejume Diwésitha nakua peewatsintha pong Egipto nakuapiwi itorobiya pía pepa peewatsinchi. Nakom jeye bapongtha: “Ápara xang pongxaein takoya kakana éxanatsi pong

Egipto nakuapiwi itorobiya pía pepa peewatsinchi. Paiña xangtha tapexeiña tsita itüütsi koyenewa exanaein xua tsita itapeiñaxeinaein xua xang xeinang bichokono peayapusüü itorobi koyenewa. Matáütano exanaein xua daxitang nákuang jiwi taneyábara jumetaenexa”, jei Nakom. ¹⁸Daxota yaputainchi xua Nakom itaküüpa-tsi xua wüünaeya yábara nantaxeina xua peyawenaenexa pongtha pong ichichipa xua peyawenaewa. Matáütano Nakom saya yábara kópata xua ichüing pejüntü-koyénetha pexeinaewa pokoyene pejumefebí koyenewa. Baxuang Nakom kana éxana pomonaetha, pomonae Nakom ichichipa xua xeinaena bárapo koyenein.

¹⁹Metha paxam pana nebaram xua barapomonaeyábara xua pajam: “Poxonae Nakom átene éxana pomonaetha, pomonae petsita-natsikuentsíxaetsi xua abe peexanaexae ¿baxua Nakom jopa xaniwaicha exanaeyo jampa? Nakom kópata xua barapomonaeyxina pejüntükoyeneintha pejumefebí koyenewang. ¿Barapomonaey Nakom tsita natsikuéntatsi jampa, poxonae Nakom bekein kópata baxua jampa?” pajam. ²⁰Íchitha paka jumenótatsi, jangje: “¿Paxam pebiwi tsobenáe pam! ¿Eta po jiwi pam xua paiña nejumematsontsonobiwi Nakom? Jurúwato jopa itaküüpaetsi xua pejeiwa pongtha pong peexanaexaetsi: ‘¿Eta xua metha bara nekanáüta jütsiya éxaname?’ xua pejeiwa jurúwato. Bápana jurúwato jopa itaküüpaetsi xua pepae-biwa baxua”, paka jeichi. ²¹Pong xua jurúwato peexanaein bapong itaküüpaetsi xua kae tsorobotha jíwana éxana aiña juruwatong xua seikayang be pókotsi koyeneya xua ichichipa. Bapong itaküüpaetsi xua pexeiña jurúwato éxana xua bichokono aiña matoma. Matáütano bapong itaküüpaetsi xua bara kana éxana xua jopa wüünaeyo xua saya pekasetxinexa.

²²Nakom barichi itaküüpaetsi xua jiwi pekana exanáewatsi be pókotsi koyeneya xua ichichipa. Bekein Nakom ichichipa tsita itüüta pía peanaepanaewa pomonaetha, pomonae abe peexanaewi, íchitha jopa kataunxuae baxua exanaeyo. Matáütano bekein ichichipa tsita itüüta pía peayapusüü itorobi koyenewa pokoyene xua barapomonaeytüpa peexanáewatsi, íchitha Nakom jopa kataunxuae baxua kana exanaeyo barapomonaetha. Íchitha Nakom kaena báyatha beitatemaya taetáepona xua barapomonaeyabe pía peéxanaey koyenewang, po abe koyenewang xua Nakom anáepana éxanatsi. Barapomonaeymuxu pewerawérakae exanaetsi abe peexanaexae. ²³Nakom beitatemaya naka taetáepona wanaka tsita itüütsinexa daxita waxainchi xua bichokono bara ichichipa xua wanaka yawenaewa tsane báyatha itapeta wanaka antobéwaxae. Kaena báyatha Nakom yábara naka tsiwüünaeta xua irü waxeinaenexa Nakom pía pexeiña jüntükoyenewa xua bichokono peantobewa. ²⁴Nakom naka waba pomonaexaetsi pomonae judiomonaeyjíwanatsi. Matáütano Nakom naka waba pomonaexaetsi pomonae jopa judiomonaeynaexanaeyo jíwanatsi. ²⁵Baxua Nakom yábara paeba Pejume Diwésitha pomonae yábara, pomonae jopa judiomonaeynaexanaeyo po diwésitha ichaxota Oseas tina. Nakom jeye:

“Pomonae kopiya jopa tamonaeyo,

barapomonaey yábara jang tsane,

‘Ápara tamonaey’, jang tsane.

Matáütano pomonae kopiya jopa antobeiño barapomonaey yábara jang tsane:

‘Ápara taántobe jiwi’, jang tsane.

²⁶Matáütano ichaxota ba jiwi yábara jang:

‘Paxam jopa tamonaey pam’, jang,

baraxota barapomonaey yábara jang tsane:

‘Ápara paxam tapexui pam,
po Nakomxaein ataya tsitekaeya jiwi asüü jinompa taexanaein’,
jang tsane”,
jei Nakom,

ichaxota po diwésitha Oseas tina pong kaena báyatha tüpa.

²⁷Barichi irü Isaiás yábara jeye judiomonae: “Bekein judiomonae bichokono jiwi ayaxa icha táetowang ichi xua bobena marmene itapatha, dáichitha saya be kóno-
tha bárapo judiomonae jíwana pomonae xua Nakom kapanenebiya. ²⁸Saya kóno-
tha kapanenebiya tsipéi Nakom methaunxuae yábara paebina daxita jiwi bárapo
kae pin nakuathepiwi pía petsita-natsikuentsíxaetsi xua abe petsita-exanáexaetsi.
Yáwano jiwi ayéi werawéraka exanaeinchi xua Nakom exanaena”, jei Isaiás.

²⁹Isaiás kopiya yábara tsiwüünae muxuduta, jeye:

“Nakom ápara bapong pong xua itoroba daxita koyeneintha.

Bapong wüünaeya nakayábara nantaxeina xua wanaka yawenaewa tsane xua
áwiya be kóno-
tha pejinompaenexa pomonae wamomoxi susato jiwi jíwana,
xua daxita jopa pewerawerakaewa tsane.

Icha Nakom jopa baxua exanáe tsipae,

bapoxonae waxainchi bara naka júta ichipáe icha báyatha Sodoma
tomarapiwi kana ichichi,

matáütano icha matha Gomorra tomarapiwi kana ichichi xua daxita
werawéraka”,

jei Isaiás Nakom Pejume Diwésitha.

Meje yábara xua judiomonae jopa jumekowüntsiyo Nakom pía pexeña jume diwesi tatsi

³⁰Bárapo peyábara jútiya paebiwang naka yaputane éxana xua ápara pomonae
jopa judiomonae naexanaeyo Nakom jopa tsítatsi xua barapomonae penatsikuen-
tsiwa xua abe peexanaexae. Baxua Nakom kana éxana barapomonaetha bekein
barapomonae jopa tsakeinaeyo xua pexeinaewa pejúntükoyene wüünaewa Nakom-
tha. Barapomonae xeina pejúntükoyene wüünaewa Nakomtha Cristo pejume-
kowüntsixaetsi. ³¹Íchitha nama bárapo judiomonae paeba, jeye: “Nakom naka
júntükoyene wüünae exanaena xua jopa Nakom watsita natsikuentsinéxatsi xua
abe waexanaexaetsi bapongtha. Bapong baxua naka kana exanaena icha exa-
naeinchi pokotsiwa Moisés pía peitorobi koyenéwatha itoroba”, jei barapomonae.
Dáichitha barapomonae judiomonae jopa itaküüpaetsi xua daxita peyábara jume-
kuiya exanaewa pokotsiwa Moisés itoroba pía peitorobi koyenéwatha. ³²¿Eta xua
metha jane xua barapomonae jopa itaküüpaetsi xua éxana pokotsiwa Moisés pía
peitorobi koyenéwatha itoroba? Metha poxoru barapomonae nantaxeina xua poxo-
nae beta éxana bapoxonae jopa pexeinaewa tsane penatsikuentsiwa Nakomtha.
Barapomonae jopa jumekowüntsiyo xua Nakom itorobika Cristo, daxota barapo-
monae Nakom tsita natsikuéntatsi xua abe petsita-exanáexaetsi. Barapomonae
nakabeta éxana, poxonae jopa jumekowüntsiyo Nakom, átene peexanaexaetsi
tsane icha jintong ichi poxonae xuirapopa ibótotha xua piakoutha nakabeta éxana
xua átene náexana. ³³Nakom Cristo yábara páebatsi Pejume Diwésitha. Icha jiwi
ichi poxonae nakabeta poxonae xuirabathopa ibótotha, barichi jiwi nakabeta poxo-
nae Cristo jopa jumekowüntichi. Nakom jeye:

“Jerusalén tómaratha po tómara atororo xua po tómara pewüng Sión bápapo tómaratha notsin pong jiwi pekapanenebiyaenexa tsainchi. Jiwi nakabeta éxana poxoru bápapo jiwi jopa jumekowüntsiyo bapongtha, icha jiwi ichi xua nakabeta éxana poxona xuirabathopa ibótotha. Pong jumekowüntsina bapongtha, jopa bápapa jüntü natsepanayae tsane”,
 jei Nakom.

10¹Tamonae pam, paxam pomonae irü paiña nejumekowüntsíwixae Jesu-cristo. Maisha bichokono tajüntükoyénewatha ichichipang daxota bichokono Nakomtha tsipaebang judiomonae nexa, xua barapomonae pekapanenebiyaenexa tsainchi abe pía peéxanae kuirukoyenein weya. ²Barapomonae yábara páebang xua barapomonae judiomonae bekein ichichipa nawita xua Nakom petanakuichíwatsi, dáichitha jopa yaputaeyo xua pokotsiwa Nakom xaniwaicha ichichipa xua barapomonae peexanaewa. ³Barapomonae jopa yábara yaputaeyo xua pokotsiwa poxona Nakom jüntükoyene wüünae éxana jíwitha xua jopa xeinaeyo penatsikuentsiwa Nakomtha xua abe peexanaexae. Barapomonae jüjüta xua icha barompaya pía kuikoyenyátha exanaena xua bapoxonae pexeinaenexa tsane pejüntükoyene wüünaewa Nakomtha xua jopa penatsikuentsiwa xua abe peexanaexae. Barapomonae jopa exanaeyo be pókotsi koyene Nakom itoroba jíwitha xua Cristo pejumekowüntsixaetsi xua bapoxonae jiwi pexeinaenexa pejüntükoyene wüünaewa Nakomtha. ⁴Barapomonae jopa yábara yaputaeyo xua pokoyene Cristo jopa aiñakuí kana exanaeyo Moisés pía peitorobi koyenewa tatsi. Daxota ánoxuae jiwi jopa kanamatawenonaeyo bápapo Moisés pía peitorobi koyenewa tatsi xua po petorobi koyenewa bekein jiwi yábara nantaxeina xua pinae poxonae yábara jumekuiya exanaena pinae xeinaena pejüntükoyene wüünaewa.

⁵Kaena báyatha Moisés yábara paeba xua pinae pía peitorobi koyene tatsi itaküüpatsi xua jiwi jüntükoyene wüünae éxanatsi Nakomtha xua jopa petsita-natsikuentsiwa xua abe peexanaexae. Moisés jeye: “Pong daxita yábara jumekuiya eexanaponaena bápapo taitorobi koyenewa xua tinang, bapoxonae bapong bara ataya tsitekaeya poponaena peajüntüyapusúü koyenéwatha”, jei Moisés. ⁶Nakom Pejume Diwésitha yábara paeba pomonae jopa xeinaeyo penatsikuentsiwa Nakomtha pejumekowüntsixae Crístotha. Nakom jeye: “Jopa pananthüthü yaiñabinde, jopa pajande: ‘¿Jintam metha itaboko beicha ponaena xua Cristo pekatsikaenexa tsainchi bápapo kae pin nákuathe tsike xua wanaka yawenaenexa?’ jopa pajande. ⁷Matáütano jopa pajande: ‘¿Jintam metha ira béreka ponaena xua Cristo pekatsinaenexa tsainchi bápapo kae pin nákuathe xua petüpáe kuirukoyene weya?’ jopa pajande”, jei Nakom. ⁸Nakom ekeicha Pejume Diwésitha pejüntükoyene wüünaewa yábara jeye: “Tajume diwesi bara imoxoyo dubena xua paka itaküüpa paiña nekueikueijeinexa bápapo diwesi. Matáütano paka itaküüpa xua paiña neyábara nantaxeinaewa bápapo diwesi”, jei Nakom xua Pejume Diwésitha. Bápapo diwesi bara najúpabe po diwesi xua yábara paka kuidúbatsi xua paiña nejumekowüntsiwa. ⁹Icha paichichípame xua Nakom paiña nepaka kapanenebiwa bewa paxanáename bápapo koyenéwabe: Bewa ichamonaetha payábara paebim xua Jesús paiña Nepaka kanamataxeinaein. Matáütano bewa pajumekowüntsim paiña nejüntükoyeintha xua Nakom Jesús ekeicha asüü éxanatsi petüpáe kuirukoyene weya. Bapoxonae Nakom paka kapanenebiyaena abe paiña neexanáe koyenewang weya.

¹⁰Poxonae jintong jumekowünta pía jüntükoyenéwatha Jesustha bapoxonae jopa Nakom tsita natsikuentsichi xua abe petsita-exanáexaetsi. Poxonae jintong yábara kueikueijeji xua Jesucristo ápara pía Pekanamataxeinaeinchi, bapoxonae Nakom kapanepa bapong abe pía peéxanae kuirukoyenewang weya.

¹¹Nakom Pejume Diwésitha jeye: “Pong jumekowünta Crísthatha, Cristo yawe-naena xua daxota jopa bápana jüntükoyene natsepanayae tsane”, jei Nakom, xua Pejume Diwésitha. ¹²Nakom jopa tsita seikáyatsi daxita jiwi, bara saya tsita najúpatsi, bekein bara metha judiomonae tsipae írúno metha bekein jopa dapomona-e tsipae pomonae jopa judiomonae naexanaeyo. Bapong Cristo Pekanamataxei-naein éxanatsi daxita jiwi nexa. Yáwano bapong Cristo Wanaka namataxeinaein jopa juniya katsiyo daxita piáwang pomonaetha, pomonae pewüükae jiwixae-tsi. ¹³Tsipéi Nakom Pejume Diwésitha jeye: “Daxita pomonae wüüka pongtha pong jiwi Pekanamataxeinaein, pong Cristo, xua pekapanenebiyaenexa tsainchi, barapomonae bara kapanenebiya tsainchi”, jei Nakom. ¹⁴Jiwi jopa itaküüpaetsi xua petsipaebiwa pongtha pong jiwi Pekanamataxeinaein icha jopa jumekowün-tsiyo bapongtha. Matáütano jopa itaküüpaetsi xua pejumekowüntsiwa pongtha pong jiwi Pekanamataxeinaein icha jopa bápana yábara jumeyaputáe bapong-tha. Matáütano jiwi jopa itaküüpaetsi xua peyábara jumeyaputaewa bapong icha ichamonae jopa kapanaeyo bárapo diwesi xua pekueikueijeinexa bárapo jíwitha, xua peyábara paebíwatsi pong jiwi Pekanamataxeinaein. ¹⁵Matáütano jiwi jopa itaküüpaetsi xua pekueikueijejiwa xua po diwesi pong jiwi Pekanamataxeinaein peyábara paebíwatsi icha dapomonae aibi pomonae itoroba barapomonaetha xua barapomonae pekueikueijeinexa. Nakom Pejume Diwésitha yábara jei baxua: “Maisha bichokono daxua wüünae xua poxonae jiwi pata xua pekueikueijeinexa Nakom pía pexeiña jume diwesi xua Cristo peyábara paebíwatsi”, jei Nakom Pejume Diwésitha.

¹⁶Dáichitha jopa daxita jíwiyo xua ichichipa pejumetaewa bárapo pexeiña jume diwesi. Baxua Isaías yábara jei Nakom Pejume Diwésitha: “Tanekanama-taxeinaem ¿jintam jumekowünta pokotsiwa papaebang? Saya be kónotha jiwi, pomonae jumekowünta xua pata takayábara paebíwatsi”, jei Isaías. ¹⁷Daxota jiwi jumekowünta poxonae jumetane bárapo pexeiña jume diwesi. Po pexeiña jume diwesi jiwi jumekowünta ápara po diwesi xua Cristo yábara.

¹⁸Takoya nayáñabang. Nabarang, jangje: ¿Metha bara barapomonae judiomona-e bárapo pexeiña jume diwesi jopa jumetaeyo jampa? ¡Jume ápara, ápara bara jumetane bárapo pexeiña jume diwesi! najang. Nakom Pejume Diwésitha baxua yábara jeye:

“Nakom piamonae tatsi kápona Nakom Pejume Diwesi tajü beya.

Po diwesi xua barapomonae paeba tajü beya jumepichapapona daxita bárapo kae pin nákuathe”,

jei Nakom Pejume Diwésitha.

¹⁹Ekeicha nayáñabang, jangje: ¿Metha bara barapomonae judiomonae jopa yapu-taeyo xua bárapo diwesi ichamonae jumekowüntsina? najang. ¡Jume! ¡Ápara bara yaputane! najang. Barapomonae yaputane tsipéi Moisés baxua kaena báyatha kopiya yábara tsiwüünae muxuduta. Moisés tatina Nakom, xua Nakom jeye:

“Ichamonae kapanenebiyang pomonae jopa judiomonae naexanaeyo.

Paxam paka éxanatsi xua barapomonae paúwame.

Ichamonae kapanenebiyang pomonae jopa bichokono peyaputáe jiwi.
Paxam paka éxanatsi xua baxua paka anáepana éxana,
jei Nakom”,
xua Moisés tatina.

²⁰Bapoxonae irü pírapäe Isaías atsakiya yábara tsiwüünae muxuduta Nakom nexa xua Nakom jeye:

“Pomonae jopa nejeichiyo bara nekaxiba.
Pomonae jopa neyábara yaiñabiyo bara barapomonae kana éxanang xua
barapomonae neyaputane”,
jei Nakom, xua Isaías tatina.

²¹Ekeicha Isaías yábara tsiwüünae muxuduta judiomonae Nakom nexa, xua Nakom jeye: “Daxita matakabi wabeibang barapomonae. Íchitha barapomonae jopa exaneibiyo pokotsiwa itorobeibang tsipéi barapomonae tanejume-torobabei-biwi xua jopa, tanejumekowüntsiwa”, jei Nakom, xua Isaías tatina.

Meje yábara xua Nakom itapeta judiomonaepiwi pomonae Israel, pong kaena báyatha tüpa, bapong piamonae tatsi

11 ¹Ekeicha nayáñabang najang: ¿Metha bara Nakom tórota daxita piamonae israelmonae jampa? najang. Jume ápara, tsipéi ápara xang bápapo israelmonae jíwanapin, daxota jopa netorotsiyo, Abraham pía saineiwimonae jíwana tatsin ápara, matáütano Benjamín pía pemómoxi susato jiwi jíwana tatsin ápara. ²Nakom jopa torotsiyo piamonae pomonae xua kaena báyatha peitapetsixae xua kana éxana be piamonae tatsi. Paxam payaputáneme xua Nakom Pejume Diwésitha paeba, po diwésitha ichaxota Elías tsipaeba Nakomtha. Elías pong Nakom pía peitorobi jume pepaebin pong kaena báyatha tüpa. Elías anaya yábara paeba israelmonae, jeye: ³“Nakom pongxaem Tanekanamataxeinaem, bápapo israelmonae juteba, jutébatsi pomonae jiña neitorobi jume pepaebiwi. Matáütano bápapo israelmonae kayatsiya abe éxana pokotsiwang ibótong xua xuang xota duwéi yüübeibiya jutebathopeiba xua poxonae katsita túxusi éxana. Xang kom-pang napaebang xua pomonae beta nekajumekowüntsiwi barapomonae jíwanang. Írürü barapomonae ichichipa nebexúbarü”, jei Elías poxonae tsipaeba Nakomtha. ⁴Íchitha Nakom Elías jumenótatsi. Nakom jeye: “Áwiya kataunxuae xeinang siete mil pebiwi xua tamonae, pomonae tanejumekowüntsi jiwi. Barapomonae jopa pentabokototha umenaeyo xua poxonae wüünae pejainchinexa ibo nakom, po ibo nakom pewüing Baal”, jei Nakom. ⁵Nama ánoxuae áwiya barichi israelmonae be kónotha pomonae jumekowünta Nakomtha pomonae Nakom peitapetsiwi, pía peantobexae barapomonae. ⁶Nakom itapeta barapomonae, pomonaetha, pomonae peichichipaexae xua peyawenaewa barapomonaetha pía peantobexae. Baxua Nakom amanaya éxana barapomonaetha. Nakom jopa itapetsiyo barapomonae, xua peyábara kuimatomaticsinexa xua peexanaexae pokotsiwa wüünae. Tsipéi icha Nakom saya itapeta jiwi, xua peyábara kuimatomaticsinexa xua bápapo jiwi peexanaexae barapoxonae Nakom be jopa bápana amanaya exanaeyo jiwi nexa.

⁷Daxota yaputainchi xua pinmonae xua bápapo israelmonae jíwana jopa katsibichi pejüntükoyene wüünaewa xua bekein baxua tsiéxana nawita pokoyenein Moisés itoroba. Jame Nakom kata bápapo koyene pomonaetha, pomonae peitape-tsiwixae, xua pomonae israelmonae jíwana. Barapomonae, pomonae israelmonae

jíwana barapomonae Nakom jopa katsibiyo bárapo pejüntükoyene wüünaewa. Nakom kópata xua barapomonae pejüntükoyenéwatha xeina pejumetorobabi koyenewa. ⁸Nakom Pejume Diwésitha Moisés yábara paeba barapomonae. Moisés jeye: “Nakom kópata xua barapomonae xeinaena po jüntükoyene jopa itaküüpaetsi xua peyaputaewa. Bekein barapomonae yóroba xua pejumexaiñéi koyenewa dáichitha jopa yaputaeyo. Matáüta bekein barapomonae jumetane pexaiñéi jume dáichitha jopa jumekowüntsiyo. Bárapo koyenein ánoxuae kataunxuae baxuang eexanapona”, jei Moisés xua Nakom Pejume Diwésitha. ⁹Írürü David yábara paeba israelmonae poxonae Nakom tapáebatsi. David jeye:

“Barapomonae beitatemaya jüntükoyene weiweinapona pin penabanaewangtha.

Barapomonae nantaxeina xua jopa katsita natsikuentsiyo xua abe peexanaexae.

Poxonae barapomonae kataunxuae eexanapona baxua bárabü xam Nakom jemeicha átene kana exanáename barapomonae, jopa pía nekajumekowüntsixa.

¹⁰Daxota bárabü kopatsíname xua barapomonae israelmonae jopa yaputaeyo pokoyene xua barapomonae katsita natsikuenta abe nekatsita exanaexae. Matáütano bárabü kopatsíname xua barapomonae xeinaena po peátene koyenewa anthüthürewewe kana éxanatsi xua ataya, abe peexanaexae”, jei David, israelmonae yábara, Nakom Pejume Diwésitha.

Meje yábara xua pomonae jopa judiomonae naexanaeyo Nakom jumekowúntatsi

¹¹Ekeicha takoya nayáñabang, najang: Poxonae judiomonae, pomonae israelmonaexae, Nakom nawepu tsábatsi, jopa pejumekowüntsixaetsi ¿metha bara Nakom itawetsina barapomonae xua ataya tsane jampa? ¡Jume ápara! ¡Barápara Nakom jopa itawetsi tsane xua bara ataya tsane! Nakom kapanenebiyaena icha judiomonae bexa tsane. Bekein ánoxuae Nakom jopa kapanenebiyaeyo barapomonae judiomonae, ápara bara kapanenebiya abe pía peéxanae kuirukoyenein weya tatsi pomonae jopa judiomonae naexanaeyo. Nakom baxua éxana xua judiomonae peuwinexa, xua úwatsi pomonae jopa judiomonae naexanaeyo xua barapomonae Nakom pekapanepaexae. ¹²Poxoru judiomonae Nakom nawepu tsábatsi daxota Nakom wüünae éxana ichamonaetha, xua daxita karepaya bárapo kae pin nákuathe. Judiomonae jopa Nakom pejumekowüntsixaetsi daxota Nakom wüünae éxana, pomonaetha, pomonae jopa judiomonae naexanaeyo xua Cristo pejumekowüntsiwaxaetsi. Bexa tsane Nakom wüünae exanaena judiomonaetha pokotsiwa bichokono daxita nakuangpiwi tsita wüünaetsi, xua beyakaincha poxonae wüünae éxana pomonaetha, pomonae jopa judiomonae naexanaeyo. Baxua Nakom kana exanaena poxonae judiomonae irü Cristo jumekowüntsinchi.

¹³Ánoxuae paka tsipáebatsi pomonae pam pomonae jopa judiomonae naexanaeyo pam. Yáitama Nakom taneitorobixae pomonaetha, pomonae jopa judiomonae naexanaeyo, pomonae icha paichim, daxota tsitsipaebaponang Nakom Pejume Diwesi. Bárapo tatanakuichiwa Nakom bichokono netsita aiñakuí.

¹⁴Beexanaein xua tamonae judiomonae paka uwa, xua bapoxonae barapomonae

pejumekowüntsinea icha paichim. Yáwano barapoxonae bárapo tamonae jíwana Nakom kapanenebiya tsane taexanaexae Nakom nexa. ¹⁵Tsipéi poxonae Nakom itaweta barapomonae judiomonae bapoxonae Nakom itapeta ichamonae pomonae bárapo kae pin nakuapiwi jíwana xua pekana exanaenexa pía jiwimonae tatsi. Poxonae judiomonae irü kana exanaeinchi Nakom pía jiwimonae tatsi Cristo pejumekowüntsixaetsi baxua bichokono wüünae tsane be poxonae jiwi ekeicha asüü éxanatsi petüpáe kuirukoyene weya. ¹⁶Aiña pekayábara jüta pepaebi diwésyobe paka tsipáebatsi. Poxonae jiwi ba péntübü tseketa xua kae pan éxana peka-tsinexa Nakomtha bárapo pan matabüyo bara Nakom piáwa tatsi. Barichi pepa mátabü barápara Nakom piáwa tatsi. Barichi poxonae jiwi ba paeba xua pinae nae petabü opina katsina Nakomtha bara Nakom piáwa tatsi. Barichi pepa maxúranang barápara Nakom piáwa tatsi. Icha barapókotsi naxobe koyenéwabe kana ichiya éxana jiwi, barapókotsi jüta koyeneya Nakom kana éxana jíwitha. Poxoru Abraham irü pomonae Nakom peitorobi jume pepaebiwi barapomonae Nakom piamonae tatsi daxota irü pía pexui tatsi irü Nakom piamonae tatsi.

¹⁷Ekeicha pekayábara jüta pepaebi diwésiyo paka tsipáebatsi. Jiwi itaküüpatsi xua olivo nae jíwana maxúranang weukuboba po nae úbanota pábitha xua bebái. Icha olivo nae maxúranang jíwana weukuboba, po nae untha unguwa. Bárapo maxúranang wangtha japateita kütsiya duba po naetha po nae unguwa pábitha, po nae kopiya jíwana maxúranang bebái. Bárapo nae tabüopina opinang aisha kana éxana xua bárapo maxúranang beta nakoita tsipéi mene nota bárapo nae tabüopina opina tsina. Bara jüta koyeneya ichi, icha olivo naetha kana ichichi, Nakom jiwi barapókotsi koyeneya kana ichi. Nakom jíwana tórota po judiomonae jopa pejumekowüntsixaetsi xua bapoxonae Nakom paka kana éxana piamonae tatsi pam. Nakom paka kana éxana xua peajüntüyapusüüwa paiña nexeiaewa paiña nejumekowüntsixaes Jesucristo. Bárapo koyene icha be poxonae pemaxúranang kana ichichi poxonae aisha kana exainchi pemene notsixae petabü opinang tsina, xua beta xu xuwa éxana pena maxúranatha. ¹⁸Daxota jopa paatsakiya aebiya nantaxeinaeinde xua aiñakuí jiwi pam xua Nakom paiña nepaka wabixae beyakaincha icha judiomonae pomonae Nakom tórota. Payábara nantaxéinare bárapo olivo nae xua pekayábara jüta paebiwa. Bárapo maxúranang jopa ápara nakoita exanaeyo bárapo nae tabüopina opina deka. Jame ápara bárapo nae tabüopina opina nakoita exaneina bárapo maxúranangtha.

¹⁹Metha papaebichípame, pajam tsipae: “Nakom tórota judiomonae xua wanaka exanaenexa piamonae tatsichi, xua icha jiwi kana ichi olivo naetha”, pajam tsipae. ²⁰Metha moya bara xaiñéi tsipae. Bara Nakom tórota barapomonae judiomonae jopa pejumekowüntsiwixaetsi Jesucristo. Paxam Nakom piamonae tatsi paka kana éxana, tsipéi saya ápara pajumekowúntame Jesucristo, saya meisha báxuaxae. Jopa pana najüntükoyene yábara atsakande xua paiña nexeiaexae pokotsiwa Nakom paka kata. Jame saya dota pam xua jopa wüünaeya pajumekowüntsim Jesucristo xua daxota Nakom paiña nepaka torotsiwa tsane. Jiwi pemaxúranang ukubobiya bebái po nae pábitha unguwa. ²¹Bara jüta koyene ichi, Nakom tórota judiomonae pomonae kopiya piamonaexae tatsi jopa pejumekowüntsixaes Jesucristo. Nakom bara paka ichipáe paka torotsipa icha jopa pajumekowüntsipaem. ²²Ánoxuae waxainchi yaputainchi xua Nakom yawena jiwi, peantobexae. Yáwano yaputainchi xua Nakom ayapubé taéxana ichamonae pomonaetha, pomonae abe

peéxanae jíwixae. Nakom dangweya yábara paeba penatsikuentsiwa pomonae xua jopa pejumekowüntsíwichi. Íchitha Nakom beta wüünaeya paka kana éxana. Nakom baxua paka kana exanaena icha áwiya pajumekowünta dubenanaebiyáename. Íchitha icha áwiya jopa pajumekokowüntaponaem tsane Nakom paka torotsina. ²³Matáütano Nakom itakúüpatsi xua ekeicha kaewa kana éxana piamonae judiomonae, pomonae Nakom báyatha kopiya bekein petorotsixae. Nakom baxua kana exanaena icha jame barapomonae Cristo jumekowüntsínchi. Nakom baxua kana exanaena icha jintong ichi xua ekeicha kaewa pekoutha japateita kütanota wangtha pemaxúrana, pomaxúrana bekein ukuibiya xuba. ²⁴Paxam pomonae jopa judiomonae naexanaeyo pam, Nakom paka kana éxana piamonae tatsi pam, bekein kopiya jopa piamonae tatsi pam. Nakom bara paka kana ichi, icha be pókotsi koyeneya pebin ichi xua únupi olivo nae maxúrana ukuiba. Ekeicha bárapo maxúrana icha olivo nae maxüranáwangtha japateita kütsiya duta po olivo nae pábitha übanota. Bapoxonae bárapo únupi olivo nae maxüranatha pexeíña thei xuwa. Íchitha icha pebin ekeicha pita pomaxúrana xua ukuiba pepa olivo nae weya yawa ekeicha kaewa pekoutha japateita kütanota wangtha, bárapo maxúrana beta xuwa beyakaincha xua xuwa únupi olivo nae maxúrana poxonae japateita kütanota wangtha. Icha pebin ichi, Nakom bara itakúüpatsi kana éxana judiomonaetha. Nakom tayapuwüünaetsi xua ekeicha éxana piamonae tatsi pomonae kopiya tórota pomonae judiomonae.

Meje yábara xua Nakom bexa tsane israelmonae kapanenebiya tsainchi

²⁵Tamonae pam, paxam pomonae irü paiña nejumekowüntsíwixae Jesucrístotha. Maisha ichichipang xua paxam yábara paiña neyaputaewa tsane xua moya peyawüngxainaewa pokoyene xua Nakom yábara pokoyene ichamonae jopa yaputaeyo. Tspíei jopa ichipaeíño xua paiñakoutha paiña nenayábara nantaxeinaewam xua peyaputáe jiwi pam. Meje baxue xua moya peyawüngxainaewang: Ánoxuae israelmonae xeina pejüntükoyenéwatha pokoyene xua Nakom pejumetorobabi koyenéwatsi xua daxota Nakom jopa pejumekowüntsíwatsi. Íchitha jame bexa poxonae abü daxita karepaya jumekowüntsina Nakom pomonae jopa judiomonae naexanaeyo pomonae Nakom itapeta, bapoxonae ekeicha judiomonae jumekowüntsina. ²⁶Bapoxonae daxita israelmonaexae pomonae judiomonaexae pomonae Nakom itapeta, kapanenebiya tsainchi abe pía peéxanae kuirukoyenewang weya tatsi. Nakom baxua yábara jeye Pejume Diwésitha:

“Pong jiwi Pekapanenebiyaein patopaena israelmonae jíwanatha pomonae Sión tómara wüngmonae.

Bapong jüntükoyene wepichina Jacob pía pemómoxi susato jiwi tatsi abe pía peéxanae kuirukoyenewang tatsi, pomonae israelmonaexae.

²⁷Jüntükoyene wepichin bárapo judiomonae abe pía peéxanae kuirukoyenewang tatsi.

Barapoxonae kayábara jumeweta exanaein pokotsiwa kaena báyatha yábara tsiwüünae muxudutang barapomonae pía pamo susato jintongtha tatsi pong pewüng Jacob, pong Israelxae”, jei Nakom Pejume Diwésitha.

²⁸Ichamonae xua israelmonae jíwana ánoxuae barapomonae Nakom pía peaitafaetabí jíwichi tsipéi barapomonae jopa jumekowüntsiyo Nakom pía pexeíña jume diwesi tatsi po diwesi Cristo pepatopaewa yábara. Tsipéi barapomonae baxua éxana, daxota paxam pomonae jopa judiomonae naexanaeyo pam, bara paka itaküüpa xua paiña nejumekowüntsiwa Cristo. Íchitha bárapo israelmonae Nakom kaena báyatha kopiya itapeta. Bárapo israelmonae áwiya Nakom ántobe, pía pamo susato jiwi tatsi kopiya peitapetsixaetsi. ²⁹Tsipéi Nakom jopa ichawa beya paebiyo. Pokotsiwa Nakom kata ekeicha jopa kaewa pichiyo. Pomonae Nakom itapeta ekeicha jopa itawetsiyo. ³⁰Paxam pomonae jopa judiomonae paiña nenaexanaewi pam, kopiya paxam jopa paiña neexanáe jiwi pam pokotsiwa Nakom paka itoroba. Dáichitha ánoxuae judiomonae jopa peexanaexae pokotsiwa Nakom itoroba, daxota Nakom wüünaeya paka yábara nantaxeina pía nepaka kayawenaewa tsane. ³¹Íchitha ánoxuae bekein barapomonae judiomonae jopa exanaeyo pokotsiwa xua Nakom ichichipa, bexa tsane barapomonae judiomonae jumekowüntsina. Poxonae baxua exanaena Nakom, xua wüünaeya paka yábara nantaxeina pía nepaka kayawenaewa tsane irü wüünaeya yábara nantaxeinaena peyawenaenexa tsane xua barapomonae peyawenaenéxatsi pía peantobéwixae. Nakom baxua exanaena barapomonaetha icha báyatha pákata ichi xua poxonae Nakom pákata éxana. ³²Nakom bara kópata xua daxita jiwi bara najüpa xua penatsikuentsiwa xua jopa pejumekowüntsixaetsi. Nakom bara baxua kópata, xua penantajúpiya yawenaenexa daxita jiwi, peantobexae.

³³¡Maisha jopa juniya Nakom yawenaeyo jíwitha! ¡Maisha Nakom jopa juniya xeinaeyo peyábara yaputáe koyenewang pokoyene xua xaniwaicha pekayábara exanaewa! ¡Maisha Nakom jopa juniya yábara tsiwüünae yaputaeyo peyaputáe koyenein xua bexa exanaena! ¡Dapong aibi pong itaküüpatsi xua pekayábara yaputaeya paebiwa pokotsiwa Nakom kuita yábara éxana! ¡Barichi dapong aibi pong itaküüpatsi xua peyaputaewa Nakom pía kuikoyenewang tatsi! ³⁴Nakom Pejume Diwésitha tatsi yábara jeye baxua: “Dapong aibi, pong yaputane pokotsiwa Nakom nantaxeina, pong jiwi Pekanamataxeinaeinxae. Matáütano dapong aibi, pong xua Nakom pekuidubíwatsi. ³⁵Matáütano dapong aibi pong kata Nakomtha xua daxota xuya bewa Nakom matomatsina”, jei Nakom Pejume Diwésitha tatsi. ³⁶Ápara daxita koyenein Nakom fórota. Nakom kanamataxeina pía peayapusüü itorobi koyenéwatha daxitang pokotsiwang xua xuang éxana. Daxitang bara piáwa tatsi. ¡Bárabü Nakom wüünae jaintéibatsi xua ataya tsaibi tsane! ¡Je, bara ichi tsane!

Meje yábara xua wajinompawea wataexanaenexa Nakom

12¹Tamonae pam, paxam pomonae irü paiña nejumekowüntsíwixae Jesús. Paxam payaputáneme xua Nakom bichokono naka yawena pía wanaka antobexae. Daxota paka itoróbatsi daxita pam. Pana najüntükoyene doure Nakomtha paiña nenakuichinexa pokotsiwa Nakom paka itoroba. Baxua bara be poxonae jintong ovejiyo asüü kata xua pebexubinexa Nakom nexa. Poxonae pana najüntükoyene dóutame Nakomtha bárapo koyene Nakom tsita wüünaetsi. Barapókotsi koyenéwatha bewa wüünae pajaintsíneme Nakom paiña jüntükoyeintha. ²Jopa bara paichiponaende xua abe paexanapóneme pokoyenéwang icha ichi xua éxana dubenanáebiya pomonae bárapo kae pin nákuathe jinompa. Jame maisha bara pakópare xua Nakom paka nekana exanaenexa xua icha jüntükoyene paxéiname

xua beta paiña nenantaxeina ponaenexam tsane. Bapoxonae payaputáename xua bara paiña neexanaewa pokotsiwa Nakom ichichipa. Pokotsiwa Nakom peichichi-paewa xua ápara paiña neexanaponaewa tsane xua meje: pokotsiwa bara wüünae, matáütano pokotsiwa Nakom pejüntükoyene weiweina exanáewatsi, matáütano pokotsiwa daxita bichokono matapaeicha wüünae.

³Nakom taneantobexae nekata bárapo peayapusúú itorobi koyenewa xua tapaka itorobíwatsi pokotsiwa yábara bewa paexanáename. Daxota baxua paka tsipáebatsi xua paxam jopa bewa pana nayábara nantaxeinaem xua peaiñakuí jiwi pam beyakaincha poxonae Nakom piakoutha aiñakuí paka kana éxana. Nakom paka katsiba pejumekowüntsiwa daxita karepaya paxamtha. Daxota bewa daxita paxam xaiñeya pana nayábara nantaxeinaem pokotsiwa paiña neexanaexae xua icha be pókotsi koyeneya Nakom paiña nepaka itorobixae pokotsiwa bewa paexanáename. ⁴Wapepongtha nawita xéinatsi xua wanaka kueyatsiwang, bara bekein kae pepongtsi. Daxita bárapo wanaka kueyatsiwang wapepongtha jopa nantajü-pae koyeneya exanaeyo. ⁵Waxainchi bara ichichi bara bekein pinmonaetsi íchitha waxainchi be kae pepongtsi Crístotha. Íchitha ápara daxítatsi bara kaemonae naexainchi wajumekowüntsixae Cristo. Kaemonae wanaexanaexae Crístotha, daxota nantiya nayawénatsi.

⁶Nakom daxita karepaya barompaya naka katsiba wajüntükoyeneya waexanáe koyenewang, peichichipaexae xua naka yawenaena wanaka antobexae. Bárapo jüntükoyenéwatha waxainchi barompaya bewa beta taexanaetsi Nakom wanaka katsixae bárapo koyene. Ichamonaetha Nakom naka jíwana kátatsi pokoyene xua peyábara yaputaeya kueikueijeí koyenewa Nakom Pejume Diwesi. Bapoxonae barapomonaewatsi bewa kueikueijeí bárapo diwesi jíwitha. Bapomonaewatsi bewa exanáe baxua daxita po pejumekowüntsiwatha Nakom bapomonaetha kata. ⁷Ichamonaetha Nakom naka jíwana kátatsi, pokoyene xua ichamonaewatsi. Barapomonaewatsi bewa moya ichamonaewatsi bara beta yawenaetsi. Ichamonaewatsi Nakom naka jíwana kátatsi pokoyene xua ichamonaewatsi pekuidubíwatsi. Pomonaewatsi yaputane xua pekuidubiwa ichamonaetha, bewa moya bara beta kuidubina ichamonaetha. ⁸Ichamonaetha Nakom naka jíwana kátatsi peyaputáe koyenewa pokoyenewa xua pejüntükuikoyene tsakabinexa pejumekowüntsiwi xua jüntema pejinompae-nexa. Pomonaetha Nakom kata bárapo peyaputáe koyenewa bapomonaewatsi bewa moya bara beta jüntükuikoyene tsakabina ichamonaewatsi. Ichamonaetha Nakom naka jíwana kátatsi peyaputáe koyenewa pokoyenewa xua piáwang peroutsiwa ichamonaetha. Bapomonaewatsi bewa jopa asiwiyo, moya bara bewa amanaya doutsina ichamonaetha. Ichamonaetha Nakom naka jíwana kátatsi peyaputáe koyenewa pokoyenewa xua piamonaewatsi kanamataxeinaeya itoroba. Bapomonaewatsi bewa moya bara saya dangweya beta kanamataxeinaeya itorobaponaewatsi. Ichamonaetha Nakom naka jíwana kátatsi peyaputáe koyenewa pokoyenewa xua yawena peakopeibí jiwi. Bapomonaewatsi bewa moya jüntükoyene weiweinaeya yawenáe.

Meje yábara xua pokotsiwa bewa exanáe pomonaewatsi pejumekowüntsiwi Cristo

⁹Poxonae pana naántobem xaniwaicha nantiya kaemonae pana naantobeinde. Panaitémare abe peéxanaewatsi koyenewang. Saya naitomatsiya paexanaponde pokotsiwa pewüünaewatsi koyenewang. ¹⁰Bewa kaemonae nantiya pana naántobem, icha

kaepi jiwi ichi xua yatsikaewa naántobe xua kae peweicho jiwi. Bewa ichamonae pabarükui-iturajinaem xua barapomonae peaiñakuí jiwi beyakaincha paxam.

¹¹Jüntükoyene dangweya patanakuire pong jiwi Pekanamataxeinaein. Jopa paa-koyenefáetabinde poxonae patanakuítame. Antükoyeneyapusüüya bapong pata-nakuire, bichokono paiña neichichipaexae.

¹²Paiña newüünae ewatsixae pokotsiwa xua Nakom paka katsibapaeba bexa daxota pajüntükoyene weiweinaeya jinómpare. Poxonae ichamonae jopa xapain pákata exanaeyo, xua paka kana éxana xua paajüntükoyenetanem, bara saya jüntema pajinómpare. Jopa pa-aitakonaeinde. Jopa panakuibarapentsinde xua paiña tsipaebeibiwa Nakom.

¹³Nakom piamonae xua irü pomonae Nakom pejumekowüntsiwixaetsi payawende pokotsiwa xua barapomonae nantawénona. Pantenta weyataeya wabéibare paiña bongtha pomonae paiña nepaka kasiwaponeibiwi, pomonae pejumekowün-tsiwi Nakom pomonae jopa paiña yaitaibi jiwi.

¹⁴Pomonae paka átene éxana paiña nejumekowüntsixae Jesucristo, barapomonae patawüükare Nakomtha xua Nakom peyawenaewa tsane barapomonae. Nakom jopa patsipaebinde xua abe pekana exanaewa tsane barapomonaetha.

¹⁵Írürü pajüntükoyene weiweinéibare poxonae ichamonae jüntükoyene wei-weineiba. Ichakuitha pajüntükoyene wekoyéi tsaibindeno poxonae ichamonae jüntükoyene wekoyéi tsaibi.

¹⁶Pebürüya nantakuijüpaeya pajinómpare xua jüntema nantiya pana nabarü dubenanaebíyame. Jopa ichamonae pa-aebinde. Pakana éxande paiña jiwi xua be pomonae pekuipawi jiwi. Jopa pana nayábara nantaxeinaeinde xua paiña neyaputáe jiwi pam.

¹⁷Poxonae ichamonae abe pákata éxana jopa xuya abe pata exanaeinde barapomonaetha. Jame maisha panantaxéinare xua daxita jiwi xaniwaicha paiña netaexanaewa tsane pokotsiwa barapomonae tsita kuiwüünaetsi. ¹⁸Paexana-ponde daxita pokotsiwang paka itaküüpa, xain bapoxonae jüntema pana nabarü jinómpame daxita jiwi. ¹⁹Tamonae pam paxam pomonae tapaka kaántobe jíwichi pam irü paiña nejumekowüntsi jíwixae Jesucristo. Paxam jopa bewa xuya panayantomatéibim tsane poxonae ichamonae abe pákata exaneiba. Jame bara saya pakópare xua bara Nakom peyantomatsiwa exanaena pomonaetha, pomonae abe pákata éxana. Tsipéi Nakom Pejume Diwésitha tatsi baxua yábara jeye: “Jame xang saya ba takoyang xua jiwi átene éxanang abe peexanaexae ichamonaetha. Xang peyantomatsiwa xuya exanaein pomonaetha, pomonae paka abe éxana, jei pong Pekanamataxeinaein jiwi”, jei Nakom Pejume Diwésitha. ²⁰Jopa xuya payantomatéibim tsane. Jame paexande xua Nakom Pejume Diwésitha tatsi jeye: “Icha paiña nepaka ka-aitafaetabí jintong jainpa, paápare pexaewa. Yáwano icha meratsípáno, paápare pokotsiwa xua peapaewa. Poxonae baxua pata exanáename, bapoxonae barapong pin ura paka tsita xeinaena xua báyatha abe pía pákata exanaexae”, jei Nakom Pejume Diwésitha. ²¹Jopa pakopatsinde xua ichamonae abe pía paka exanáe koyenein tatsi paka jüntükoyene amanáyaba xua daxota abe paéxaname barapomonaetha, pomonae paiña nepaka ka-aitafaetabí jiwi. Jame maisha beta exanaeya pata éxande poxonae bekein ichamonae abe pákata éxana. Bapoxonae pakoyene amanáyabame pokoyenein abe peéxanae koyenewang.

13¹Daxita jiwi bewa exanáe pokotsiwa itoróbatsi pomonae itorobiya pekanamataxeinae jiwi pomonae peayapusúü itorobi koyenewa xeina. Jiwi jopa itaküüpaetsi xua pekanamataxeinaewa ichamonae xua peitorobinexa icha Nakom jopa yábara kopatsiyo baxua. Tsipéi jiwi pomonae peayapusúü itorobi koyenewa xeina xua pakana mataxeináewatsi ichamonae saya meisha Nakom bara yábara kuikópaba xua bárapo jiwi bara pekanamataxeinaewa tsane ichamonae.²Daxota icha ichüing jumenaitémata xua pokotsiwa itoróbatsi xua itoroba pong piamonae itorobiya Pekanamataxeinaein barápara bapong barichi jumenaitémata pokoyene xua Nakom éxana xua poxonae kana éxana xua barapomonae pekanamataxeinaewa ichamonae. Pokotsimonae xua baxua éxana xua pejumenaitematsiwa, barapokotsimonae ápara bara Nakom tsita natsikuéntatsi xua bárapo abe koyenewa peexanaexae.³Pomonae beta peéxanae jiwi jopa bewa kuitaya junuwí tsane xua pekuitaya junuwíwatsi pomonae itorobiya pekanamataxeinaewi. Jame saya meisha pomonae abe peéxanae jiwi bewa kuitaya junuwina xua pekuitaya junuwíwatsi pomonae itorobiya pekanamataxeinae jiwi. Icha jopa paichichipaem xua junuwa paiña nepaka exanaewa pong itorobiya Pekanamataxeinaein, moya jame beta patsita éxande. Bapoxonae bapong bara patsita wüünáename.⁴Tsipéi ápara pong itorobiya Pekanamataxeinaein jiwi tanakuita Nakom xua paiña nepaka kayawenaewa tsane. Íchitha icha paxam abe paéxaname moya bara bewa pajunúware, tsipéi bapong pong itorobiya Pekanamataxeinaein jiwi, xeina po peayapusúü itorobi koyenéwatha peitaküüpáewatsi xua átene paka éxana. Bapong tanakuita Nakom. Daxota bapong Nakom taexainchi xua pomonae abe peexanaewi átene tsane xua penatsikuentsixae xua abe peexanaexae Nakomtha.⁵Daxota bewa paxanáename pokotsiwa paka itoroba pong itorobiya paiña nepaka kanamataxeinaein. Jopa ápara bewa paexanaem tsane baxua xua poxoru Nakom átene paiña nepaka exanaeyainwa, jame ápara poxoru xua paiña jüntükoyénetha payábara yaputáneme xua bewa beta paiña neexanaewa tsane.⁶Daxota xain barapomonae pakatsíbame pematómatsi parátixi pókotsi parátixi jiwi bewa katsibina pomonae-tha, pomonae itorobiya pekanamataxeinae jiwi. Tsipéi barapomonae nantawénona parátixi xua beta pe-eexanaponaewa tsane poxonae Nakom tanakuitapoinchi.

⁷Daxita barapomonae barompa parátixi pakatsíbame po parátixi bewa pakatsibim barapomonae. Pomonae paiña nepaka kanamataxeinaewi pakatsíbame daxita pokoyenein peyábara matomatsiwang xua xuang paka wüüka. Daxita pomonae pekanamataxeinae jiwi pabarükui-iturajínare, xua daxota betiya paiña nebarü kueikueijejewa tsane.

⁸Paiñaxoba ichamonae pantoma amanayabéibame. Jame saya kae koyene bewa paxeinaem pokoyene xua nantiya paiña nenaantobewam. Tsipéi pong ántobe ichamonae bapong jumekowüntsiya éxana daxita pokotsiwa xua Moisés itoroba pía peitorobi koyenéwatha.⁹Moisés pía peitorobi koyenéwatha jeye: “Jopa pichinde ichüing piseuri tatsi. Jopa bexubinde ichamonae. Jopa kaibinde xua ichamonae piáwang. Jopa yábara úwinde pokotsiwa ichüing xeina”, jei bárapo itorobi koyenéwatha. Bárapo koyenein xuaunxuae páebang, írúno daxita icha peitorobi koyenéwano be kae peitorobi koyenewajume náexanabe ichaxota xua po jumetha jeye: “Ichamonae antobeinde icha ichim xua jiñakoutha naántobem”, jei bárapo peitorobi koyenéwatha.¹⁰Pong ba beta ántobe tsaibi ichamonae bápana jopa abe taexanaeyo barapomonaetha. Daxota icha antobetsi ichamonae bapoxonae barápara

jumekowüntsiya exainchi daxita pokotsiwa Nakom itoroba Moisés pía peitorobi koyenéwatha.

¹¹Daxita baxuang bewa paexanáename tsipéi payaputáneme xua ánoxuae po dapaetha pajinómpame bichokono peayápube dapae. Bárapo dapaetha tsaka pajinómpare, tsipéi imoxoyo naka itiya pona po mataketha Nakom naka kapanenebiyaena. Bárapo matakabi imoxoyo beyakaincha xua poxonae aena jumekowúntatsi Jesucristo. ¹²Pekireiwa ba bewayo kaewanaya poxoru matakabi dawétsina. Bara jüta koyeneya ichi poxonae pomonae ba abe peexanaewi bara ápara pekireitha abe éxana. Barapomonae barapenta xua abe éxana poxonae matakabi tsuxubi. Barichi waxainchi bewa barapentichi xua abe waexanáe koyenewa icha barapomonae ichi xua saya mérawi abe éxana íchitha mataketha jopa exanaeyo. Waxainchi bewa beta exanaetsi icha pomonae ba ichi pomonae jinompa mataketha xua beta éxana. Baxua éxanatsi poxonae najüntükoyene wüünáetatsi xua najüntükoyene ayapusúü éxanatsi abe waexanaeyainwa. Baxua icha be poxonae ba soldadopin ichi poxonae matakábitha nakuiwüünaeta penabinexa. Bapong penáintongtha nayáitata xua daxita pepongtha xua pebexotsiyáinwatsi. ¹³Bárabü beta wüünaeya dubenanaebiyatsi, icha jiwi ichi xua beta dubenanáebiya matakéithaxae. Jopa bewa naküüpa exanáe dubenanaebiyáe tsainchi xua peamenetsaxawa. Matáütano jopa bewa ponaeinchi po penabanaewang xua ichaxota pinmonae penakaetutsiwa yawa abe éxana. Jopa bewa nasikuí exanáe tsainchi. Matáütano jopa bewa tanotsichi ichamonae piseuri jiwi tatsi. Yáwano jopa bewa nantiya jumedangweya najumematsontsónobi tsainchi. Matáütano jopa bewa naúwi tsainchi. ¹⁴Jame ichawa bewa paexanáename. Bewa Jesucristo patsipaebíname xua paiña nepaka yaitatsinexa pong jiwi Pekanamataxeinaein, xua abe paiña exanaeyainwa tsane. Bapoxonae jopa paexanaeinde pokoyene xua abe paiña exanaewam pokotsiwa paiña jüntükoyenein ichichipa xua peexanaewa.

**Meje yábara xua jopa bewa abeya yábara paebichi pokoyene
xua pejinompaewa pomonae irü pejumekowüntsiwi**

14 ¹Icha ichüng jüntükoyene faefaena pejumekowüntsiwa Crístotha, bapong pakana éxande be paiñamonae jiwi jíwana pomonae paiña nejumekowüntsi jíwixae pam. Jopa bapong yábara pajumematsontsonobinde xua pía pekayábara nantaxeináewatsi xua pokoyeneya bapong bewa exanáe xuano xua ichakuitha pokoyeneya xua bapong jopa bewa exanáe. ²Ichamonae ba nantaxeina xua itakúü-patsi penabanaewa xua daxita koyenein pexaewang. Ichamonae ba pomonae jüntükoyene faefaena xua pejumekowüntsiwa Crístotha barapomonae ira pipexaewa xane jopa pewi xaeyo. ³Pong penabanaein daxita koyeneya pexaewang, bapong jopa bewa paebí tsane ichüngtha pongtha pong xua jopa penabanaeinxae pewi. Jopa bewa paebí tsane “Abe éxaname jopa nenabanaexae pewi”, jopa bewa jei tsane. Barichi pong pewi jopa penabanaein, bapong jopa bewa paebí tsane pongtha pong pewi penabanaeinxae: “Abe éxaname nenabanaexae pewi”, jopa bewa jei tsane. Tsipéi pong daxita koyeneya penabanaein pexaewa Nakom yábara nantaxeina xua bara irü pexanto tatsi, icha ichi pong jopa penabanaein pewi. ⁴Xam jopa bewa daxua paebim tsane xua pong ichüng tanakuítatsi xua bapong natsikuenta pongtha pong pekanamataxeinaeinchi abe peexanaexae. Po pebin xua Nakom tanakuítatsi bapong nantaüta pong jiwi Pekanamataxeinaein. Bapong jopa

nantawenonaeyo xua irü xam kanamataxéiname bapong. Saya meisha Nakom itakúüpatsi xua yábara paeba poxonae pokoyene icha bapong wüünae éxana xuano xua icha jopa xapain exanaeyo. Íchitha bapong wüünaeya exanaena tsipéi Nakom itakúüpatsi xua kana éxana, xua pía petanakuichi jiwi tatsi wüünaeya peexanaewa.

⁵Ichamonae nantaxeina xua kaentakeitha bichokono peaiñakuí matakabi beya-kaincha xua icha matakabi tsipéi bárapo matakábitha xua Nakom wüünae pejainchíwatsi. Ichamonae nantaxeina xua daxita matakabin bara najüpa xua peaiñakuí matakabin xua Nakom wüünae pejainchiwanéxatsi bárapo matakábintha. Daxita barapomonaewa bewa barompaya pía jüntükoyenéwatha yábara nantaxeinae xua barápara pexaiñeiwa pokoyenewa xua peyábara nantaxeinaexae. Jopa bewa nantaxeinae pokoyenewa ichüng yábara nantaxeina. ⁶Pong jopa nakuichiyo po matakeitha xua peaiñakuí matakabi, bapong baxua éxana xua Nakom wüünae pejainchinéxatsi pong jiwi Pekanamataxeinaein. Barichi pong xua penabanaein daxita koyeneya pewi, ápara xua Nakom wüünae pejainchinéxatsi, pong jiwi Pekanamataxeinaein, tsipéi bapong jeye: “Nakom maisha jüntükoyene weiweinang xua tanekatsiwam daxita koyeneya pexaewang”, jei. Írüno pong jopa pewi xaeyo, bapong barápara xua Nakom wüünae pejainchinéxatsi pong jiwi Pekanamataxeinaein, tsipéi bapong jeye: “Nakom maisha jüntükoyene weiweinang xua tanekatsiwam ira pipexaewa”, jei bapong.

⁷Tsipéi dapong aibi pong waxainchi jíwanatsi pomonaexaetsi pomonaewa waju-mekowüntsiwichi, xua pong pepoponaewa penakana exanaewa xua be pókotsi koyeneya bapong ichichipa. Jame ápara pópona icha be pókotsi koyeneya bara Cristo pong jiwi Pekanamataxeinaein ichichipa xua pepoponaewa tsane. Barichi icha bapong tüpáetsipa ápara saya poxoru Jesucristo pong jiwi Pekanamataxeinaein bara kópata xua bapong petüpaewa tsane. ⁸Icha Nakom pong jiwi Pekanamataxeinaein kópata xua áwiya wajinompáewatsi bewa beta jinompaetsi xua daxota jiwi Nakom wüünae pejainchinéxatsi. Icha Nakom pong jiwi Pekanamataxeinaein kópata xua bara watüpaewa tsane bárapo koyene bewa kana exanaetsi xua jiwi wüünae pejainchiwa Nakom. Daxota bekein icha waxainchi jinompaetsí-patsi, yáwano poxonae bekein icha tüpaetsipatsi bara barápara bárapo koyeneña waxainchi bewa kana exanaetsi xua jiwi Nakom wüünae pejainchinéxatsi pong jiwi Pekanamataxeinaein poxoru waxainchi piamonaewa tatsichi. ⁹Daxota Cristo tüpa, yáwano ekeicha asüü pópona xua penaexanaenexa tsane pong jiwi Pekanamataxeinaeinchi xua daxita jiwi nexa pomonaewa wérapa írüno pomonaewa kataun-xuae jinómpano.

¹⁰Daxota dapong aibi pong paxam jíwana pam pong bewa yábara paebina pomonaetha, pomonaewa irü pejumekowüntsiwi Cristo, xua pejeiwa: “Barapomonaewa Nakom tsita natsikuéntatsi abe peexanaexae bapongtha”, xua pejeiwa. Matáütano ichamonae paxam jíwana jopa bewa yábara paebí tsane pomonaetha, pomonaewa irü pejumekowüntsiwi, xua jei: “Maisha barapomonaewa jopa peyaputaewi xua jopa peaiñakuí jiwi”, jopa bewa jei. Tsipéi poxoru daxita waxainchi bexa tsane ume-naeinchi Cristo peitabaratha. Cristo daxita naka yábara paebina xua wanatsikuen-tsiwa xua abe waexanaexae Nakomtha. ¹¹Tsipéi Nakom Pejume Diwésitha jeye:

“Xang bara xaniwaicha yábara paka tsiwüünae muxudútatsi xua daxita jiwi patsina xua pentabokototha peumenaenexa taitabaratha tanewüünae jainchinexa.

Daxita jiwi neyábara paebina jei tsane:

‘Ápara barapong yatsikaewa pepa Nakom’, jei tsane”,

jei Nakom pong jiwi Pekanamataxeinaein xua Pejume Diwésitha.

¹²Bapoxonae bárapo matakeitha yábara kueikueijejei tsainchi Nakomtha pokotsiwa xua kaena býatha éxanatsi xua bárapo kae pin nákuathe icha bara metha wüünae exainchi yáwano icha bara metha abe exainchi.

Meje yábara xua jopa bewa exanaetsi pókotsi koyeneya pomonae pejumekowüntsiwi abe peexanaewa tsane

¹³Daxota waxainchi jopa bewa yábara nantiya namuxutaiñabichi pokotsiwa waexanaexae. Jame bewa paexanaem xua meje: Paiñaxoba pakana éxaname paiñamonae pomonae irü pejumekowüntsiwi xua pókotsi koyeneya barapomonae peexanaewa tsane xua daxota jopa pejumekowüntsiwa tsane Nakom. ¹⁴Tsipéi xang tajumekowüntsixae Jesús pong jiwi Pekanamataxeinaein daxota bara yatsikaya yaputang, xua dapokotsiwa aibi po pexaewa tanejüntükoyene taxobiwa xua icha taxaewa tsane. Íchitha icha ichüng yábara nantaxeina xua po pexaewa betaxobichípatsi icha xáetsipa bapoxonae bara tsita xaiñeichi, betaxobichípatsi icha xáetsipa. ¹⁵Íchitha icha paxaetsípame pokotsiwa xua paiña jintong jopa ichichipaeyo xua pexaewa, pong irü pejumekowüntsin bapoxonae peántobe koyenewa jopa patsita xeinaem bapong. Paiñaxoba paéxaname pókotsi koyenetha xua ichüng baraxuba Nakom xua poxoru pokotsiwa paiña nexaexae. Tsipéi ápara Cristo býatha tsitüpa bapong. ¹⁶Paxam panantaxéiname xua bara wüünae paéxaname pokoyenein ichamonae tsita abetsi pejüntükoyenein taxobixaetsi. Bekein baxua payábara nantaxeinaetham tsipae íchitha jopa paexanaem tsipae bárapo koyenein. Tsipéi icha paexanaetsípame bárapo koyenein, ichamonae yábara jei tsipae bárapo koyenein: “Maisha pokoyenein barapomonae éxana bichokono abe”, jei tsipae. ¹⁷Nakom ichichipa xua waxainchi pebürüya jüntema wajinompawea. Daxota poxonae Nakom naka itoroba pokoyene yábara pokoyeneya bewa nabarü jinompaeinchi, jopa yábara paebí tsainchi xua po peitorobi koyenein xua waxaewa yawa waapaewa yábara. Jame pokoyenein yábara naka itoroba xua ápara jame pinae bewa Nakom tsita xeinaeinchi pejüntükoyene wüünaewa. Matáütano bewa pinae jüntema nabarü jinompaeinchi Nakom nexa. Matáütano bewa jüntükoyene weiweinaeya jinompaeinchi. Daxita bárapo koyenein xéinatsi wanaka katsibixae Nakom pía Pejumopetünaxü tatsi. ¹⁸Poxonae bárapo koyeneya Cristo taexainchi bapoxonae Nakom tsita wüünaetsi pokotsiwa xua exainchi. Matáüta jiwi naka yábara paeba xua pinae bara beta exainchi.

¹⁹Daxota bewa waxainchi exaneibinchi pókotsi koyenein xua jüntema nabarü jinómpatsi éxanatsi. Yáwano bewa exaneibinchi pókotsi koyeneintha xua nantiya jume-kokowüntapónatsi naexainchi. ²⁰Jopa bewa paxaem ichüng peitabaratha pong paiñamonae jíwana pokotsiwa xua bapong yábara nantaxeina xua jopa bewa xae. Icha paxaetsípame bapong peitabaratha, bapong irü metha xáetsipa bárapo pexaewa. Bapoxonae bapong nantaxeináetsipa xua bapong pomonae jíwana pomonae penatsikuentsiwa Nakomtha xua abe peexanaexae. Paiña xaexae bapong pakana éxaname xua jopa beta pejumekowüntsiwa Nakom. ²¹Jame pokotsiwa xua wüünaeya paiña neexanaewa tsane meje baxue: Jopa bewa paxaem pewi. Matáütano jopa bewa paapaem peamenetsaxawa. Matáütano jopa bewa

paexanaem pókotsi koyenéwatha paiña jintong exanaena pong irü pejumekowüntsini Cristo xua abe peexanaewa tsane. ²²Icha paxam pajumekowüntame xua bara Nakom paka kópata xua bara paiña nenabanaewang daxita koyeneya pexaewang, po pexaewang jopa paka jüntükoyene taxobiyo saya jame meisha Nakomtha yábara patsipáebare baxua. Paiñaxoba ichamonae yábara patsipáebame pexaewa po pexaewa barapomonae jopa bápána xae. ¡Maisha jüntükoyene weiweina pong daxita koyeneya pexaewa penabanaein pong pía jüntükoyenewa jopa tsipaebichi xua pinae penatsikuentisiwa xua abe peexanáewaxae Nakomtha poxonae bápapo pexaewa xane! ²³Pong yábara aiña ünthütong xeina xua pokotsiwa penabanaewang, bapong barápara piakoya natsikuenta Nakomtha xua abe éxana xua poxonae dáichitha xane bápapo pexaewa. Daxota daxita pokotsiwang waxainchi éxanatsi icha jopa beta yábara jumekowüntichi xua waexanaewa pokotsiwa Nakom ichichipa bapoxonae barápara abe éxanatsi, poxonae baxuang éxanatsi.

**Meje yábara xua pokotsiwa bewa exanaetsi
xua ichamonae tsita wüünaetsi**

15 ¹Waxainchi pomonaetsi pomonae ajüntükoyenesüütsi xua wajumekowüntsiwa Crístotha. Daxota bewa yawenaetsi pomonae xua jüntükoyene faefaena xua pejumekowüntsiwa Crístotha xua barapomonae áwiya jumekowüntsina. Jopa meisha bewa exanaetsi pokotsiwa xua waxainchi wakoya ichichípati. ²Daxita waxainchi bewa exanaetsi pókotsi koyenewa tsita koyenewüünaetsi pomonae ichamonae pomonae irü pejumekowüntsiwi pókotsi koyenetha xua barapomonae yawénatsi xua pejumekokowünta ponaenexa. ³Tsipéi Cristo jopa exanaeyo xua piakoya ichichipa pokotsiwa tsita koyenewüünaetsi. Jame saya bapong yábara jumekuikópatatsi xua jiwi bapong átene peexanáewatsi poxonae abe yábara páebatsi. Jiwi Cristo bara bápapo koyeneya kana éxanatsi icha be pókotsi koyeneya kaena báyatha Cristo yábara páebatsi Nakom Pejume Diwésitha xua Cristo jeye Nakomtha: “Poxonae jiña neka-aitafáetabi jiwi abeya kayábara paeba, barichi barápara xang bérena abeya neyábara paeba”, jei Cristo Nakomtha. ⁴Daxita xua pokotsiwang kaena báyatha tina Nakom Pejume Diwésitha, baxuang yábara tina xua wanaka kuidubinexa Nakom yábara. Baxuang naka kuiduba xua Cristo wawüünae ewatsinexa. Xéinatsi baxua poxoru Nakom Pejume Diwesi naka kana éxana xua jopa dapó koyene xéinatsi xua bepijawa aitakonaetsi xua bekein ichamonae abe nákata éxana. Yáwano bápapo diwese naka kana éxana xua najüntükoyene tsakábatsi xua wajumekowünta dubenanaebiyawa. ⁵Nakom bapong naka kana éxana xua jopa bepijawa aitakonaetsi yáwano xua naka jüntükoyene tsakáraba éxana. Bárabü barapong Nakom paka yawena xua pebürüya nantajüpiya panantaxéiname xua paiña nabarü exanaewa tsane, icha be pókotsi koyeneya Cristo Jesús éxana. ⁶Bárabü be kaemonae pana nabarü wüünae jáintame Nakom, pong Jesucristo Paxa tatsi, pong Jesucristo Wanaka namataxeinaein.

**Meje yábara xua pokoyene pomonae jopa judiomonae naexanaeyo
tsipáebatsi Nakom pía pekapanenebiyáe jume diwesi**

⁷Daxota icha Cristo naka ichi xua naka matenta weyataeya waba, paxam bara paichinde. Nantiya pana nantenta weyataeya wabéibare xua bapoxonae jiwi wüünae pejainteibinexa Nakom paiña neexanáewamxae baxua. ⁸Xang paka tsipáebatsi

xua Cristo patopa xua judiomonae peyawenaenéxatsi. Cristo baxua éxana xua tsita itapeiñaxeina xua Nakom bara éxana pokotsiwa bapong exanapaeba. Matáütano Cristo baxua éxana pía nayábara jumekuiwetsinexa pokotsiwa báyatha Nakom yábara tsiwüünae muxuduta waámo susato jíwitha. ⁹Yáwano Cristo daxota patopa xua pomonae jopa judiomonae naexanaeyo wüünae pejainchinexa Nakom xua Nakom wüünaeya peyábara nantaxeinaexae xua peyawenaenexa barapomonae. Nakom Pejume Diwésitha baxua yábara jeye xua Cristo paeba páxatha:

“Wüünae kajáintatsi daxita nákuang jíwitha pomonae jopa judiomonae naexanaeyo pía xantha tatsi.

Wüünae kajáintatsi xua poxonae kata naxúinatsi”,
jei Nakom Pejume Diwésitha xua Cristo Páxatha paeba.

¹⁰Ekeicha Nakom Pejume Diwésitha jeye:

“Bárabü daxita nákuang jiwi kaemonae nabarü jüntükoyene weiweinaena pomonae Nakom itapeta xua pekana exanaenexa piamonae tatsi”,
jei Nakom Pejume Diwésitha.

¹¹Ekeicha Nakom Pejume Diwésitha jeye:

“Bárabü daxita pam pomonae jopa judiomonae naexanaeyo pam wüünae pajainchíname pongtha pong jiwi Pekanamataxeinaein.
Matáütano bárabü daxita nakuangpiwi wüünae jainchina bapongtha”,
jei Nakom Pejume Diwésitha.

¹²Ekeicha Nakom Pejume Diwésitha xua Isaías tatina, jeye:

“Pebin patopaena pong Isaí pía pemómoxi susato jiwi jíwana tatsi,
pong David paxa tatsi.

Bapong Nakom kana éxana xua bapong itorobiya pekanamataxeinaenexa tsane pomonae jopa judiomonae naexanaeyo.

Barapomonae jumekowüntsiya wüünae ewatsina xua barapong barapomonae pekapanenebiwa tsainchi abe pía peexanaexae kuirukoyenein weya tatsi”,
jei Isaías Nakom Pejume Diwésitha.

¹³Bárabü Nakom pong naka kana éxana xua wawüünae ewatsiwa Cristo bichokono paka jüntükoyene weiweina exanaena. Matáütano bárabü Nakom jüntema jinompa paka kana exanaena. Nakom baxua pákata éxana paiña nejumekowüntsixae bapong. Bapoxonae bárabü Nakom paka kana éxana xua jopa juniya paiña newüünae eewataponaewa tsane Cristo. Nakom pía Pejumopetünaxü tatsi baxua paka kana éxana pía peayapusúü itorobi koyenéwatha.

¹⁴Tamonae pam, paxam pomonae irü paiña nejumekowüntsixae Jesucristo. Bara xaniwaicha beta yaputang, xua paxam beta paiña neexanaewam po peantobewa xuaunxuae yábara paka tsitínatsi. Matáütano paxam payaputáneme daxita xua pokotsiwa bewa paexanáename. Matáütano payaputáneme xua pokoyene bewa nantiya pana namuxuwetsim. ¹⁵Bárapo cártathe pekono juméyotha atsakiya pákata tínatsi. Baxuang xua pokotsiwang pákata tínatsi jopa ichipaeiño xua paiña nejüntemainaewa. Daxota atsakiya pákata tínatsi baxuang Nakom tanebarükú iturajinaexae poxonae nekata bárapo tanakuichiwa. ¹⁶Nakom neitoroba xua Jesucristo tatanakuichinexa tayawenaenexa pomonae jopa judiomonae naexanaeyo. Tanakuitang Nakom poxonae kueikueijang Nakom pía pekapanenebiyáe jume diwesi pomonaetha, pomonae jopa judiomonae naexanaeyo. Barapomonae pejumekowüntsixae Cristo, Nakom pía Pejumopetünaxü tatsi kana

éxana xua barapomonaē pejäntükoyene wüünaewa Nakomtha. Pokoyene éxanang baxua be pokoyene icha sacerdotemonaēpin ichi. Poxonaē bapong duwéi jiwī tsitáutatsi abe pía peéxanaē koyenein nexa tatsi bapoxonaē bárapo jiwī Nakom petsitajüntükoyene-wüünaewichi.

¹⁷Tajumekowüntsixaē Cristo Jesús daxota bichokono netsita wüünaē xua tataexanaexaē bárapo penakuichiwa xua Nakom nexa. ¹⁸Jopa yábara paebiño xua Cristo éxana ichamonaē nexa. Saya meisha bichokono netsita wüünaē pokotsiwa xua Cristo éxana xang nexa. Cristo neyawena xua pomonaē jopa judiomonaē naexanaeyo pejumekowüntsinyaē Nakom. Barapomonaē Nakom jumejejeichi poxonaē jumetane pokotsiwa kueikueijang xuano xua tane pokotsiwang xua exanangno. ¹⁹Nakom neéxana xua pía Pejumopetünaxü tatsi pía peayapusüü itorobi koyenéwatha éxanang pexeiña petsita-itüübi koyenewang pokoyene jiwī jüntükoyene nabenaeka kana exainchi. Daxota poxonaē Jerusalén tómara wewarapiyang daxita jiwītha kueikueijang tsóponaē Nakom pía pekapanenebiyáē jume diwesi xua Cristo yábara. Baxua éxanang beya Iliria nákuatha yakuijopang. ²⁰Daxota ichichipeibang xua takueikueijiwa Nakom pía pekapanenebiyáē jume diwesi xua Cristo yábara ichaxota kataunxuaē jiwī jopa yábara jumetaeyo Cristo. Jopa bekueikueijangyo Nakom Pejume Diwesi ichaxota ichamonaē kopiya báyatha kueikueiji bárapo diwesi. ²¹Poxonaē xang baxua éxanang, éxanang be pokotsiwa báyatha Nakom Pejume Diwésitha pepaebixaē, xua Cristo yábara jeichichi:

“Pomonaē kataunxuaē jopa tsipaebichi po diwesi xua bapong peyábara paébiwatsi,
barapomonaē jumetaena,
xua bapong yábara jumetaeinchi.
Bapoxonaē barapomonaē yaputaena po diwesi xua bapong peyábara paébiwatsi xua daxota bapong jumekowüntsinihi”,
jei Nakom Pejume Diwésitha tatsi.

Meje xua poxonaē Pablo paeba xua pinaē beponaena Roma tómara beya

²²Ichamonaē tatsipaebaponaexaē bárapo diwesi jopa neitaküüpaeyo xua tapaka kasiwaponáewatsi. Bekein báyatha ichichipeibang xua tapaka kasiwaponeibiwa tsainchi íchitha jopa neitaküpeibiyo. ²³Íchitha ánoxuaē wetang bárapo penakuichiwa daxita bárapo nákuangthe. Kaena báyatha aiña wei ichichipeibang xua tapaka kasiwaponeibíwatsi. ²⁴Ánoxuaē ichichipang xua tapaka kasiwaponaewa tsainchi poxonaē warapaein España nakua beya. Poxonaē paxam panejäntükoyene weiweina kana exanáenamebe xua tapaka kasiwaponaexaetsi ekeicha warapaein España nakua beya. Ichichipang xua tapana neyawenaewam tsane pokotsiwa nantawénonang tawarapaewanexa poxonaē paiña tómara weya ponaēin. ²⁵Íchitha anoxuaetha kopiya ponaēin Jerusalén tómara beya. Kapanaein pokotsiwa xua bárapo Jerusalén tomarathapiwi peyawenáewatsi, pomonaē írürü pejumekowüntsiwi Cristo. ²⁶Macedonia nakuapiwi irü Acaya nakuapiwi pomonaē pejumekowüntsíwixaē Cristo daxita barapomonaē piakoya juntukuru éxana pokoyene tsita koyenewüünaetsi. Barapomonaē taitoroba parátixi Jerusalén tomarapiwi nexa, pomonaē peakopeibiwi pomonaē irü jumekowünta Jesús icha paxam paichim. ²⁷Bárapo pejumekowüntsiwi pomonaē Macedonia nakuapiwi irü Acaya nakuapiwi

barapomonaē juntukuru nantaxeina piakoya xua peexanaewa baxua. Barapomonaē jopa itorobichi ichüing. Íchitha barapomonaē bewa yawenaena pomonaētha, pomonaē akopeibiwi. Barapomonaē pomonaē jopa judiomonaē naexanaeyo jumetane Nakom pía pekapanenebiyáē jume diwesi poxoru báyatha judiomonaē yawena pekuēikueijeixae bárapo diwesi barapomonaētha. Daxota ánoxuae pomonaē jopa judiomonaē naexanaeyo bewa xuya yawenáē barapomonaētha judiomonaētha pokotsiwangtha xua barapomonaē pexeinaexae Nakom weya. ²⁸Daxota poxonaē wetsin bárapo penakuichiwa xua katsin daxita bárapo parátixi Jerusalén tomarapíwitha, bapoxonaē ponaēin España nakua beya. Paka siwaponana ponaēinchi kopiya, bapoxonaē bara beya warapaēin España nakua beya. ²⁹Bara xaniwaicha yaputang xua poxonaē paka siwaponana ponaēinchi, Cristo nekatsina po diwesi paxam nexa po diwesi bichokono paka tsita jüntükoyene wüünaē xua daxota paiña nejüntükoyene weiweinaewa tsane.

³⁰Tamonaē pam, paxam pomonaē irü paiña nejumekowüntsíwixae Jesucristo. Paka wüükatsi xua be kaemonaē panaexande xua ajumesüüya dangweya paiña pana nebarü tsipaēbinexa Nakomtha xua bapong tana neyawenaewa tsane xua tatanakuichiwa bapong. Baxua paka wüükatsi irü paiña jumekowüntsixae Jesucristo pong Wanaka namataxeinaēinxae. Barichi paka wüükatsi irü paiña xei-naexae po peántobe koyenewa Nakom pía Pejumopetünaxü tatsi naka kata. ³¹Nakomtha painta tsipaēbare xua jopa abe tana neexanaenexa pomonaē Judea nákuatha pejinompaewi, pomonaē jopa pejumekowüntsiwi. Matáütano Nakomtha painta tsipaēbare xua bárapo Jerusalén tomarapiwi pomonaē pejumekowüntsiwi tanententa kobewenotsinexa bárapo parátixi. ³²Bapoxonaē icha Nakom ichichi-paena jüntükoyene weiweinaya paka siwaponana patopáēinchi. Matáütano nafi-finakáewatsin xua tapaka kasiwaponawatsixae tsainchi. ³³Bárabü Nakom pong jüntema jinompa naka kana éxana paka barü poponaena daxita. Je, bara ichi tsane.

Meje yábara poxonaē Pablo jakoba Roma tomarapiwi

16 ¹Ánoxuae yábara paka tsipaēbatsi powa pewüing Febe, powa beta peexanáewayo. Bapowa paka siwaponana ponaena. Bapowa be wamcho watsikotaewa irü pejumekowüntsixae Jesús. Barapowa Nakom tanakuítatsi xua yawénatsi pomonaē pejumekowüntsiwi Cencrea tómaratha. ²Barapowa wüünaeya pantenta weyataeya wábare Jesucristo piamonaē jíwanaxae pong Wanaka namataxeinaēin. Baxua bewa paexanaem icha pomonaē pejumekowüntsiwi ichi xua bewa nantiya nantenta weyataeya wabeibina. Barapowa payawende xua pokotsiwa barapowa nantawénona, tsipéi barapowa báyatha yawena nawita pin bicheitomonaē. Yáwano barapowa báyatha irü neyawena.

³Painta jakóbare powa pewüing Priscila. Irü painta jakóbare, pía pebin tatsi, Aquila, tsipéi barü nakuítangbe bárapo tanakuichiwa pokoyenein éxanang Cristo Jesús nexa. ⁴Barapongbe bara muxu petüpaēbe tana nekapanepaenéxabe poxonaē ichamonaē juntukuru muxu tana nebexubi. Daxota xang barangbe: “Maisha jüntükoyene weiweinang xua tapaneyawenaemxaebe”, jang. Barichirü daxita pomonaē Nakom pejumekowüntsíwichi pomonaē jopa judiomonaē naexanaeyo pomonaē Nakom petsita-nakaetuteibíwichi xua wüünaē pejainteibinéxatsi, jeye: “Maisha pajüntükoyene weiweinang xua paxambe pana neyawéname xua Pablo

jopa petüpaewa”, jei barapomona. ⁵Írúno painta jakóbare pomona nakaetuta Priscila pía pebinbe piabotha tátsibe. Matáütano painta jakóbare Epeneto pong tajintong, pong bichokono antobein. Bapong pong kopiya jumekowünta Cristo Asia nákuatha. ⁶Matáütano painta jakóbare María. Barapowa powa bichokono pákata nakuita. ⁷Matáütano painta jakóbarebe Andrónico irü Junias pongbe irü judiomonaepinbe icha xang ichin. Bapongbe neyawa barü múxuna étabe jiwi pekübibotha. Matáütano bapongbe Jesucristo pía peitorobi jiwi tatsi jíwanabe. Jiwi beta yaputaena xua bapongbe bara Jesucristo pía peitorobi jiwi jíwanabe tatsi. Bapongbe kaena báyatha netsíwana jumekowúntabe Cristo.

⁸Painta jakóbare Ampliato pong tajintong, pong bichokono antobein, pong irü pejumekowüntsixa pongtha pong jiwi Pekanamataxeinaein. ⁹Painta jakóbare Urbano, pong xua naka barü múxuna tanakuita Cristo. Matáütano painta jakóbare Estaquis, pong tajintong, pong bichokono antobein. ¹⁰Painta jakóbare Apeles, pong tsita itapeiñaxeineiba xua bapong bara xaniwaicha Cristo pejumekowüntsíwatsi poxona bekein abe taexanéibatsi ichamona. Matáütano painta jakóbare Aristóbulo piamona tatsi. ¹¹Matáütano painta jakóbare Herodión pong irü judiomonaepinbe icha xang ichin. Irü painta jakóbare Narciso piamona tatsi pomona pejumekowüntsixaerü pongtha pong jiwi Pekanamataxeinaein. ¹²Irü painta jakóbare powa Trifena írúno powa Trifosa. Barapowáyobe, powáyobe irü tanakuítabe xua pong jiwi Pekanamataxeinaein tanakuitatsibe. Irü painta jakóbare Pérsida powayo tajitowayo, powayo antobein írürü pejumekowüntsixaerü. Barapowa írürü nawita dangweya tanakuítarü xua pong jiwi Pekanamataxeinaein dangweya tanakuítatsi. ¹³Írúno painta jakóbare pong Rufo. Bapong pong jiwi Pekanamataxeinaein itapeta, Rufo itapétatsi xua wüünaeya petanakuitsinéxatsi. Írúno painta jakóbareno bapong Rufo pena tatsi, powa irü be taena tsíkotang. ¹⁴Irü painta jakóbare pong Asíncrito, írúno pong Flegonte, írúno pong Hermes, írúno pong Patrobas, írúno pong Hermas. Írúno painta jakóbare daxita pomona irü pejumekowüntsíwixae Cristo pomona xua barü jinómpatsi barapomona. ¹⁵Matáütano painta jakóbare pong Filólogo. Írúno painta jakóbare powa Julia. Írúno painta jakóbare pong Nereo, írúno Nereo pamcho tatsi. Írúno painta jakóbare pong Olimpas. Matáütano painta jakóbare daxita pomona irü pejumekowüntsíwixae Cristo, pomona barü jinómpatsi barapomona.

¹⁶Betiya painta nantiya pana nakobe najakóbare paiña neantobéwaxae Cristo. Daxita barapomona pomona Cristo pejumekowüntsíwichi pomona xote jinompe, daxita barapomona paka jakoba.

¹⁷Tamona pam, paxam pomona irü paiña nejumekowüntsíwixae Jesucristo. Paxam paka muxuwétatsi xua dota pam paiña nekuinaitaewatsinexa pomona xua tsana paka neka-exanáe jiwi xua aiña bichéitobe paka kana éxana. Barapomona pákata ayapubé éxana xua paiña nejumekowüntsiwa Cristo. Barapomona katsawa yábara jumetoxeinchiya éxana xua Jesucristo pía pekuidubi koyenewa tatsi xua báyatha pokotsiwa pana nakuidúbame. Maisha barapomona tajü pajumekuitaya ponde. ¹⁸Barapomona jopa tanakuichiyo xua Jesucristo jopa tanakuichichi pong Wanaka namataxeinaein. Barapomona saya nakuita xua saya piakoutha peexanaenexa xua pokotsiwa barapomona ichichipa xua peexanaewa. Barapomona muxujáinaba nawita pomonaetha, pomona be kónotha peyaputáe jiwi xua abe peéxanae koyene yábara. Baxua éxana po jumeintha xua pexeña jumein yawa po

jumeintha ítara mexeya bara jumewüünae, íchitha jopa pexaiñéi jume. ¹⁹Daxita jiwi paka yaputane xua paxam paéxaname pokotsiwa Nakom paka itoroba Pejume Diwésitha. Daxota bichokono jüntükoyene weiweingang. Ichichipang xua paiña nexainaewa tsane paiña neyaputáe koyenewang, pokoyenéwang xua pewüünae koyenein paiña neexanaenexa. Matáütano ichichipang xua jopa paiña neexanaewa tsane icha be ichi xua poxonae éxana pomonae jopa peyaputaewi, xua jopa abe paiña neexanaewa tsane. ²⁰Nakom bapong ápara pong jüntema jinompa naka éxana. Barapong aunxuae paka yawenaena xua paiña neamanayabiwa tsane pong bichokono abe peexanaein, bapong Satanás. Bárabü Jesús, pong Wanaka namataxeinaein, paka yawenaena pía paka nekaantobexae.

²¹Írúno Timoteo paka jakoba pong nebarü nakuita Jesucristo nexa. Matáütano pong Lucio, írúno pong Jasón, írúno pong Sosípater, barapóyobe paka jakoba. Barapóyobe irü judiomonaepinbe, icha xang ichin.

²²Xang Tercio, bárapo carte saya tatinang Pablo. Xang bapong írürü paka jakóbatsi írürü taantobexae pong jiwi Pekanamataxeinaein.

²³Írürü pong Gayo bapong paka jakoba. Xang Pablo bapong Gayo piabotha tatsi ánoxuae póponang. Baxota piabotha tatsi tanakaetútatsi pomonae pejume-kowüntsiwi, Nakom wüünae pejainchinéxatsi. Írúno Erasto irü paka jakoba pong parátixi peenaein Corinto tómaratha xua Corinto tomarapiwi pía parátixi tatsi. Írúno Cuarto bapong paka jakoba, pong irü pejume-kowüntsin Cristo.

²⁴Bárabü Jesucristo, pong Wanaka namataxeinaein, daxita paxam paka yawenaena pía paka nekaantobexae. Je, bara ichi tsane.

Meje xua Pablo Nakom wüünae jáintatsi poxonae najume opiduta éxana bárapo carte

²⁵Bárabü wüünae jáintatsi Nakom. Nakom itakúüpatsi xua paka ajüntüyapu-süüya kana éxana xua beta paiña nejumekowüntsinexa bárapo pexeíña pekapanenebiyáe jume diwesi koyenéwathaxae. Bárapo diwesi Jesucristo yábara kueikueijang. Kaena báyatha poxonae Nakom aena nakua fórota, bárapo pexeíña pekapanenebiyáe jume diwesi Nakom kataunxuae jopa tsita jume itapeiñaxeinaeyo, tsipéi abü be namicha jume yawüngxaina xua jiwi jopa yaputaeyo. Íchitha ánoxuae Nakom tsita jume itapeiñaxeina bárapo diwesi. ²⁶Bárapo pexeíña pekapanenebiyáe jume diwesi, ánoxuae jiwi bárapo diwesi yaputane, Nakom pía peitorobi jume pepaebiwi peyábara tinaexae bárapo pexaiñéi jume diwesi. Matáütano jiwi yaputane poxoru Nakom peitorobixae, pong xua ataya tsitekaeya pópona. Bárapo diwesi Nakom jumetane éxana daxita nakuangpíwitha, xua bárapo jiwi pejume-kowüntsinexa Cristo. Matáütano jumetane éxana xua bárapo jiwi peexanaewa tsane pokotsiwa Nakom itoroba.

²⁷Bárabü Nakom wüünae jáintatsi, pong meisha kompa yatsikaewa daxita peyaputaein. Jesucristo naka kana éxana xua Nakom wüünae wajainchiwa xua ataya nexa. Je, bara ichi tsane.

Baja Pablo. (Xang Tercio, bárapo carte saya tatinang Pablo).

Meje Po Carte Kopiya Pablo Tatina, Corinto Tomarapiwi Tatínatsi

Meje poxonae Pablo tatina Corinto tomarapiwi

1 ¹Xang, Pablo, pákata tínatsi Nakom peichichipaexae xua tana newabiwa xua tana neexanaewa Jesucristo pía peitorobi jiwi jíwana tatsin. Írúno Sóstenes pong irü pejumekowüntsín Jesucristo, bapongbe pangbe pákata tínatsi. ²Paxam pomonaе paiña nejumekowüntsi jiwi pam Corinto tómaratha. Barapomonaе pam pákata tínatsi pomonaе Nakom piamonaе tatsi pam paiña neyawa jinompaexae Cristo Jesús. Nakom paka waba paiña nenajüntükoyene wüünae exanaenexa Nakomtha. Pákata tínatsi daxita nakuapiwi pam, pomonaе irü paiña nejumekowüntsíwixae pam Jesucristo, xua pomonaе paiña newüng ununeibiwi Jesús pewüng poxonaе pawüükéibame Nakomtha. Bapong Jesucristo Wanaka namataxeinaein írürü daxita nakuangthapiwi pomonaе pejumekowüntsiwi barapomonaе pía Pekanamataxeinaeinchi tatsi. ³Bárabü Nakom Waxa, irü Jesucristo pong jiwi Pekanamataxeinaein jüntema jinompa paka exanaena. Matáütano bárabü bapongbe paka yawenaena pía paka nekaantobéwaxae.

Meje poxonae Pablo tawüüka Nakomtha Corinto tomarapiwi

⁴Daxita matakabi tsaibi Nakomtha pákata tsipaebéibatsi, jang tsaibin: “Nakom maisha jüntükoyene weiweingang xua barapomonaе tana neyawenaewa xua Cristo Jesús peantobexae barapomonaetha”, jang tsaibin. ⁵Paiña neyawa múxuna jinompaexae Cristo, daxota Nakom peayapusüüwa jopa juniya paka katsiyo xua xaniwaicha paiña nepaebiwa pejume diwesi. Barapong Nakom paka kata pokoyene beta yábara paiña neyaputaewa bapong. ⁶Po diwesi paka tsipáebatsi Cristo yábara xua bapong paka kana éxana paiña nejinompaewa bapong nexa baxua ánoxuae xaniwaicha paexanapóname. ⁷Paxam paxéiname pokotsiwa Nakom pía Pejumopotünaxü tatsi paka kata, daxita xua pokotsiwang panantawénoname xua betiya paiña nejinompaewa tsane Nakom nexa. Daxita baxuang paxeina dubenanaebi-yáename poxonaе kataunxuae pawünae ewatsíname xua poxonaе Jesucristo po matakeitha ekeicha patopeikaena pong Wanaka namataxeinaein. ⁸Nakom paka yaweneibina xua paajüntüsüüya jinompáename beya poxonaе Jesucristo ekeicha patopáetsika. Dapong xain aibi tsane pong paka yábara paeba xua paiña nena-tsikuentsiwa xua abe paiña neexanaexae Nakomtha xua poxonaе ekeicha patopáetsika pong Wanaka namataxeinaein Jesucristo. ⁹Nakom bara ataya exaneiba pokotsiwa pía petsiwüünae muxudutsiwang. Barapong Nakom paka waba paiña neyawa múxuna jinompaenexa tsane Jesucristo pong Wanaka namataxeinaein, Nakom Pexanto tatsi.

**Meje poxonae Pablo yábara paeba pokoyene pomona
pejumekowüntsiwi Cristo xua natsaba nakana éxana**

¹⁰Tamonae pam, paxam pomonae irü paiña nejumekowüntsíwixae Jesucristo. Jumedangweya paka tsipáebatsi tajüntükoyenetha tsipéi daxita paxam Jesucristo piamona tatsi pam pong Wanaka namataxeinaein. Kaemonae pebürüya kuita pakueikueijang tsurubenanaebiyama. Jopa pana najumematsontsonobinde xua daxota paiña nenatsabiwam tsipae. Jame maisha pebürüya panantaxéinare xua be bara kaemonae pam. ¹¹Tamonae pam, pomonae irü paiña nejumekowüntsíwixae Jesucristo. Daxota baxua paka tsipáebatsi, yáitama yábüyo powa pewüing Cloé piamona tatsi netsipaeba pinae paxam nantiya pana najumematsontsónoba dubenanaebíyame. ¹²Jumetang xua paxam jíwana xua barompaya tsanaya paeba, jeye: “Pablo yábara jumekowüntang pokotsiwa kuiduba”, jei. Ichamonae jeye: “Apolos yábara jumekowüntang pokotsiwa kuiduba”, jei. Ichamonae jeye: “Pedro yábara jumekowüntang pokotsiwa kuiduba”, jei. Ichamonae jeye: “Cristo yábara jumekowüntang pokotsiwa kuiduba”, jei. ¹³Daxita paxam jopa bewa bárapo koyene paxanaem xua aiñamonaein pana naexáneme. Cristo jopa piakoutha nanantarübiya exanaeyo tsipéi Cristo ápara bara kaein. Xang, Pablo, jopa ápara paka tsitüpaetsi náetotha. Jopa ápara paka bautisabichi tawüingtha xua daxota tamona paiña nenaexanaenexam. ¹⁴¡Pai jaibó! ¿Ínkane metha barichipaein? ¿Ínkane metha bautisabíchipang? Daxota Nakom tsipaebang jangje: “Nakom maisha jüntükoyene weiweinang xua barapomonae jopa tabautisabiwa”, jang. Saya meisha bautisabang Crispo írürü Gayo. ¹⁵Daxota dapong aibi pong itakúüpatsi xua pejeiwa: “Xang nebautisaba Pablo pewüingtha”, xua pejeiwa. ¹⁶Jaina írürü Estéfanos piamona tatsi bautisabang. Íchitha ichamonae jopa yábara nantaxeinaeño xua tabautisabiwa báyatha. ¹⁷Cristo jopa neitorobiyo xua tabautisabinexa jiwi. Jame saya Cristo neitoroba xua yábara takueikueijeinexa pekapanenebiyáe diwesi. Íchitha jopa kueikueijangyo icha be ichi pong bichokono kueikueije poxoru bichokono peyaputaexae. Ichi baxua exanaetsipang jiwi jopa yábara yaputáe tsipae Jesucristo pía pekapanenebiyáe diwesi xua poxonae Cristo náetotha tsitüpa jiwi.

**Meje poxonae Pablo yábara paeba xua Cristo xeina Nakom pía
peyapusüüwa tatsi xuano Nakom pía peyaputáe koyenéwano tatsi**

¹⁸Ichamonae jopa beta yábara nantaxeinaeyo po diwesi xua Cristo petsitüpaewa náetotha jiwi. Barapomonae yawa múxuna werawerakaena abe peexanaewang. Barapomonae jopa pejumekowüntsixae Jesucristo daxota nantaxeina xua bárapo diwesi be tsita penamitakueinchi jume diwésitsi. Íchitha ichamonae beta yábara nantaxeina bárapo diwesi. Barapomonae Nakom kapanenebiyaena abe pía peéxanae kuirukoyenein tatsi weya. Barapomonae yaputane xua bárapo diwesi bichokono peyapusüü diwesi xua Nakom weya. ¹⁹Nakom Pejume Diwésitha baxua yábara paeba. Nakom jeye:

“Werawéraka exanaein peyaputáe koyenewang,
po peyaputáe koyenewang xeina pomona peyaputaewi.
Pekuidubi koyenewang bebang tsane,
po pekuidubi koyenewang xeina pomona peyaputaewi”,
jei Nakom.

²⁰Pong xua peyaputaen irü pong xua pekuidubin, irü pong jumedangweya yábara kueikueijeji po nákuathe, barapomona Nakom jopa tsita aiñakuichi. Nakom kuikápona peyaputáe koyenewang, po peyaputáe koyenewang xeina pomona peyaputáe jiwi bárapo kae pin nákuathe. ²¹Nakom xaiñeya xeina peyaputáe koyenewa. Nakom jopa kopatsiyo jiwi xua peyaputáewatsi bapong, peyaputáe koyenéwatha po peyaputáe koyenewa xeina pomona jinompa bárapo kae pin nákuathe. Jame Nakom ichichipa xua kapanepa jiwi abe pía peéxanae kuirukoyenein weya pejumekowüntsixaetsi poxonae pakueikueijang Nakom Pejume Diwesi. Bárapo diwesi ichamona tsita penamitakueinchi diwesichi. ²²Judiomona ichichipa tane nawita Nakom pía pexeña petsita-itüütsi koyenewang xua pejumekowüntsixinexa tsane Nakom Pejume Diwesi. Seikaya nama griegomona yábara jeita nawita bárapo írathe pía peyaputáe koyenewang xua pejumekowüntsixinexa tsane Nakom Pejume Diwesi. ²³Íchitha paxang payábara kueikueijang Mesías pong náetotha tsitüpa xua jiwi abe pía peéxanae kuirukoyenein tatsi. Bárapo diwesi judiomona jopa be jumejejeyo poxoru tsita ajumebetsi. Seikaya nama pomona jopa judiomona naexanaeyo tsita penamitakueinchi diwesichi bárapo diwesi. ²⁴Íchitha pomona Nakom waba pomona bara metha bekein judiomona tsipae írürü pomona metha bekein jopa judiomona naexanaeyo tsipae barapomona jame Jesucristo jumekowüntatsi. Barapomona nantaxeina xua Mesías xeina Nakom pía peyapusüü koyenewa tatsi matáütano xua Nakom pía peyaputáe koyenewa tatsi xua jiwi pekapanenebiyaenexa tsainchi. ²⁵Pokotsiwa jiwi tsita penamitakueinchi diwesichi xua Nakom éxana baxua ápara bara jame Nakom bichokono tsita peyaputáe koyenéwatsi, beyakaincha po peyaputáe koyenewa jiwi xeina bárapo kae pin nákuathe. Matáütano pokotsiwa jiwi jopa tsita peyapusüütsi xua Nakom xeina baxua ápara bara jame Nakom tsita peyapusüü koyenéwatsi bichokono, beyakaincha po peyapusüü koyenewa jiwi xeina bárapo kae pin nákuathe. ²⁶Tamona pam, paxam pomona irü paiña nejumekowüntsíwixae Jesucristo. Paxam bewa pana nakayábara nantaxeinaem xua eta po jiwi pam xua poxonae Nakom aena paka waba. Bapoxona panantaxéiname xua saya paxam káeyobe pam pomona peyaputáe jiwi pam. Barichi paxam saya káeyobe pam pomona peyapusüüya itorobi jiwi pam. Matáütano paxam saya káeyobe pam pomona peaiñakuí jiwi pam. ²⁷Nakom itapeta pomona xua ichamona yábara jeichi: “Barapomona ápara pomona jopa peyaputáe jiwi”, jei. Íchitha barapomona Nakom pía peitapetsiwixae barapomona aura éxana pomonaetha, pomona abe peyábara paebixaetsi, pomona bichokono peyaputaewi. Barapomona pomona piakoutha peyaputaewi penaexanáewixae aura tsane, tsipéi yaputaena xua pomona Nakom pía peitapetsiwixae tatsi xaniwaicha barapomona peyaputaewi. Matáütano Nakom itapeta pomona xua ichamona yábara jeichi: “Ápara barapomona pomona pejüntükoyene faefaenawi pejumekowüntsíwatha”, jei. Íchitha barapomona pomona Nakom pía peitapetsiwixae barapomona aura éxana pomonaetha, pomona abe peyábara paebixaetsi pomona piakoutha penayábara nantaxeinaewa xua bichokono pexeinaewa peajüntükoyenesüüwa. ²⁸Nakom itapeta pomona bárapo kae pin nakuathepiwi jíwana, pomona pekuipawi jiwi xua piamona peexanaenexa. Barapomona pomona ichamona abe peyábara paebíwichi, matáütano xuano pomona ichamona jopa petsita-aiñakuí jíwichi. Nakom itapeta pomona jopa peaiñakuí jiwi xua penajume tsita itapeiñaxeinaenexa xua

Nakom jopa peitapetsiwa pomonae piakoutha penakayábara nantaxeinaewa xua peaiñakuí jiwi. ²⁹Daxota dapong aibi pong peitakuüpáewatsi xua Nakom peita-baratha atsakiya penayábara paebiwa xua peaiñakuí jintongxae. ³⁰Nakom paka éxana xua paiña neyawa jinompaewa Cristo Jesús pía peajüntüyapusüüwa tatsi. Matáütano Nakom naka éxana xua xéinatsi Cristo Jesús pía peyaputáe koyenewa tatsi wayaputaenexa Nakom. Matáütano Cristo naka kana éxana xua wajüntükoyene wüünaewa xua jopa wanatsikuentsiwa xua abe waexanaexae Nakomtha. Matáütano Cristo naka éxana xua watanakuichinexa Nakom, bapong piamonae-xae tatsichi. Nakom naka yantómata xua Jesucristo naka tsitüpa náetotha wanaka kapanenebiyaenexa abe waexanáe kuirukoyenein weya. ³¹Daxota Nakom Pejume Diwésitha paeba jeye: “Jiwi jopa bewa piakoutha atsakiya nayábara paebí xua peaiñakuí jíwixae. Bü jame moya bárapo jiwi bewa saya atsakiya yábara paebina pokoyene Nakom pía peaiñakuí koyenewa tatsi pong jiwi Pekanamataxeinaeinchi”, jei Nakom Pejume Diwésitha.

Meje xua Cristo petüpaewa diwesi yábara

2 ¹Tamonae pam, paxam pomonae irü paiña nejumekowüntsíwixae Jesucristo. Patopang paiñaxantha tapaka katsipaebinéxatsi Nakom pía pexaiñéi jume diwesi. Bapoxonae jopa paka tsipaebichi po diwesi ayapubé xua takueikueijejiwa xua poxonae icha ichi xua paeba pong peyaputaein bichokono. ²Poxonae póponang paiñaxantha, saya meisha Jesucristo yábara nantaxeinang xua tapaka katsipaebinéxatsi. Matáütano yábara tapaka katsipaebinéxatsi pokoyene poxonae bapong náetotha tüpa. ³Poxonae paxamtha naitüütang nayábara nantaxeinang xua neitakoxana xua beta takueikueijejiwa. Matáütano tajunuwi ünthüthüdeideijang. ⁴Poxonae paka tsipáebatsi Nakom Pejume Diwesi jopa paka tsipaebichi pojumein ayapubé xua icha ichi poxonae kueikueijeji pong bichokono peyaputaein. Íchitha seikaya nama paka tsipáebatsi tana neitoróbixae Nakom pía Pejumopetünaxü tatsi yáwano Nakom pía peayapusüü itorobi koyenewathano. ⁵Daxota poxonae pajumekowüntame Jesucristo ápara poxoru jopa paiña nejumekowüntsixae jiwi pía peyaputáe koyenewa. Ápara jame poxoru Nakom paiña nepaka yawenaexae pía peayapusüü itorobi koyenéwatha daxota pajumekowüntame.

Meje yábara xua Nakom naka yaputane éxana pía Pejumopetünáxütha tatsi

⁶Paxang pakueikueijang pomonaetha, pomonae bichokono pejumekowüntsíwi Nakomtha xua Nakom pía peyaputáe koyenewa tatsi. Nakom pía peyaputáe koyenewa tatsi jopa ápara bárapo kae pin nákuathe weya ponaeyo. Matáütano jopa ápara bárapo koyene xua pokoyene jopa ponaeyo pomonae piamonae itorobiya pekanamataxeinaewi weya. Pomonae ánoxuae piamonae itorobiya pekanamataxeinaewi werapaena, yáwano werawerakaena pía peyaputáe koyenewang tatsi. ⁷Pokoyene xua paka tsipáebatsi ápara Nakom pía peyaputáe koyenewa tatsi. Bárapo koyene kaena báyatha Nakom namicha yawüngxaina xua jiwi jopa yábara yaputaeyo beya ánoxuae Nakom najumetsita-itapeiñaxeina. Kaena báyatha pewünaeya poxonae Nakom nakua forotsina bapong nantaxeina xua naka kapanepaena. Baxua ápara Nakom pía peyaputáe koyenewa tatsi xua matapaiña naitüüta. ⁸Barapomonae pomonae piamonae itorobiya pekanamataxeinaewi jopa

yábara yaputaeyo Nakom pía peyaputáe koyenewa tatsi. Icha metha barapomonae yaputáetsipa metha jopa Jesucristo náetotha tüpa exanáe tsipaetsi, pong jiwi Peka-namataxeinaein, pong pexeña peitüpanáe koicha pexeinaein. ⁹Nakom Pejume Diwésitha baxua yábara jeye:

“Nakom báyatha jiwi tsiwüünaeta po jiwi peantobewixaetsi pokotsiwang xua bichokono pewüünaewang xua éxana bárapo jiwi nexa.

Barapokotsiwang jiwi jopa yábara yaputaeyo, matáütano jopa yábara jumetaeyo.

Matáütano Nakom tsiwüünaeta pokotsiwa xua jiwi jopa bápana yábara nantaxeinae jopa juniya pewüünaexae”,

jei Nakom Pejume Diwésitha.

¹⁰Nakom yábara naka yaputane éxana baxuang pía Pejumopetünáxütha tatsi. Nakom pía Pejumopetünaxü tatsi daxita yaputaeya nekota pokotsiwa naka yaputane éxana, beya yawa múxunano naka yaputane éxana pokotsiwa Nakom namicha yawüngxaina.

¹¹Jintong dapong aibi pong itaküüpatsi xua yaputane ichüing pía pejüntükoyene tatsi. Saya jame meisha ichüing itaküüpatsi xua piakoutha najüntükoyene yaputane. Bara jüta ichi meisha Nakom pía Pejumopetünaxü tatsi yaputane xua Nakom pía pejüntükoyenewa tatsi. ¹²Nakom jopa naka kopatsiyo xua bara wakoutha wayaputaewa tsane xua be pókotsi koyene Nakom pía penantaxeinaewa tsane. Ápara jame seikaya naka kata pía Pejumopetünaxü tatsi, wanaka yaputane exanaenexa xua pokotsiwang yábara Nakom wanaka katsiwa wanaka antobexae. ¹³Waxainchi diwesi kueikueijeichi pomonaetha, pomonae Nakom pejumekowüntsiwi pokoyenetha Nakom pía Pejumopetünaxü tatsi naka yaputane éxana. Jopa ápara bárapo diwesi kueikueijeichi xua saya bárapo kae pin nakuathepiwi pía koyenetha tatsi xua saya ba wakoutha wanantaxeinaewa. Daxota yábara páebatsi pokotsiwang xua Nakom pía Pejumopetünaxü tatsi ichichipa paeba pomonaetha, pomonae Jesús pejumekowüntsiwichixaetsi. Barapomonae yaputane barapokotsiwang.

¹⁴Nama pong jopa pejumekowüntsin Jesús jopa yaputaeyo pokotsiwang wakueikueijeia, pokotsiwang Nakom pía Pejumopetünaxü tatsi naka yaputane éxana. Tspíeí bapong tsita penamitakueinchi jumetsi. Bapong jopa yaputaeyo bárapo diwesi tspíeí jopa xeinaeyo Nakom pía Pejumopetünaxü tatsi xua peyawenaenéxatsi xua peyaputaewanexa. ¹⁵Jame pong pejumekowüntsin Nakom, bapong yawénatsi Nakom pía Pejumopetünaxü tatsi xua yábara peyaputaewa daxitang. Ichamonae jopa itaküüpaetsi xua bapong peyábara paebíwatsi xua penatsikuentsiwa xua abe peexanaexae. ¹⁶Nakom Pejume Diwésitha bárapo koyene yábara jeye: “¿Jintam yaputane Nakom pía penantaxeinaewa tatsi xua pekuidubinexa tsane Nakomtha pong jiwi Peka-namataxeinaein? Jume ápara, ápara dapong aibi”, jei Nakom Pejume Diwésitha. Waxainchi nantaxéinatsi icha be pókotsi koyeneya Cristo ichi xua penantaxeinaewa.

Meje xua Pablo yábara paeba pomonae penabarü nakuichiwi Nakom nexa

3¹Tamonae pam, paxam pomonae irü paiña nejumekowüntsiwixae Jesucristo. Jopa neitaküüpaeyo xua tapaka katsipaebiwa tsainchi icha bichokono pajumekowüntame Nakomtha icha be pókotsi jiwimonae ichi pomonae bichokono

jumekowünta Nakom. Íchitha daxota paka tsipáebatsi tsipéi paxam be barapókotsi jiwimonae pam pomonae jopa bichokono Nakom yábara yaputaetsi. Paxam paka tsipáebatsi be pexui pam xua aena pajumekowüntame Cristo. ²Pókotsi koyene xua ayapubé jopa paka kuidubichi, icha be koxiwa ichi xua poxonae ápata mito pexuyo poxonae kataunxuae jopa yaputaeyo xua xane pexaewa. Kataunxuae jopa neitaküüpaeyo xua tapaka kuidubinéxatsi po diwesi bichokono dangwéi poxoru áwiya jopa payaputaem. Paxam be barapókotsi pexui pam xua po pexui kataunxuae jopa itaküüpaetsi xua pewito pexaewa. ³Paxam kataunxuae painómpame icha be ichi poxonae jinompa pomonae jopa pejumekowüntsiwi Nakom. Poxonae paxam nantiya pana naúwa dubenanaebíyame, yawa nantiya pana naba dubenanaebíyame, painómpame icha be ichi xua jinompa xuano abe éxana dubenanaebíya pomonae jopa pejumekowüntsiwi Nakom. ⁴Ichamonae pomonae paxam jíwana pam, jeye: “Pablo yábara jumekowüntang pokotsiwa kuiduba”, jei. Ichüing jeye: “Apolos yábara jumekowüntang pokotsiwa kuiduba”, jei. Poxonae papáebame baxua bapoxonae bara pajinómpame icha jiwi ichi poxonae jinompa pomonae jopa pejumekowüntsiwi Nakom.

⁵Daxota paka tsipáebatsi: Xang Pablo jopa ta-aiñakuí jintong, barichirü Apolos. Ápara paxangbe saya pongbe amanaya pata tanakuichinbe Nakom. Nakom Apolos pana neitoróbabe xua pata kueikueijeinéxabe Nakom Pejume Diwesi. Apolos baxua pata exanaexaebe daxota pajumekowüntame Jesucristo pong jiwi Pekanamataxeinaein. ⁶Xang Pablo paka kuidúbatsi Nakom Pejume Diwesi. Apolos xuya ekeicha ichawa paka kuiduba Nakom yábara. Íchitha nama Nakom ápara bapong, pong paka yawena xua paiña nejumekokowünta ponaenexa. Bárapo koyene icha be nae ichi xua peúbi nae. Ichüing übanota. Ichüing mera mata epababapona. Íchitha nama Nakom, ápara bapong, pong éxana xua xaniwaicha xuwa. ⁷Ichüing kopiya üba irü ichüing xuya mata epababa mératha. Pong peübixae jopa aiñakuí jintoiño. Irü pong xuya pemata epababaponaexae mératha, bapong jopa aiñakuí jintoiño. Jame saya meisha Nakom aiñakuí, tsipéi Nakom daxita xuwa éxana naewang. Daxota Nakom bichokono aiñakuí beyakaincha xua bárapo pebinbe. Barichi Apolos irü xang Pablo jopa aiñakuí jintoiño pangbe. Jame Nakom bichokono aiñakuí beyakaincha paxangbe. ⁸Pomonae xua üba irü pomonae xuya mératha mata epababapona barapomonae Nakom tsita najúpatsi. Nakom pentoma kata barapomonaetha be pókotsi koyeneya xua barapomonae petanakuichiwa. Pong xua abeya petanakuichixae, be kónotha matoma katsinchi. Pong xua wüünaeya petanakuichixae, wüünaeya matoma katsinchi. ⁹Paxang pana nabarü yawa tanakuitang Nakom xua pata kueikuejeiwa Nakom Pejume Diwesi poxonae paka kuidúbatsi xua paiña nejumekowüntsiwa tsane Nakom. Barapókotsi jüta koyeneya paéxanang poxonae Nakom Pejume Diwesi paka kuidúbatsi icha pebin ichi poxonae üba pábitha xua petanaforotsinéxatsi pexaewa. Nakom paka éxana xua beta paiña nejumekokowünta ponaewa bapong xua beya bichokono paiña nejüntükoyene wüünaewa tsane. Baxua Nakom paka kana éxana, icha be pókotsi jüta koyeneya ichi poxonae pebin bómüxü akabapona xua beya poxonae bichokono pexeña bo. ¹⁰Nakom nekópata xua pongxaein kopiya matha tapaka kayawenáewatsi xua paiña nejumekowüntsinexa bapong. Nama bapoxonae xuya ichamonae paka kuidubapona Nakom Pejume Diwesi xua paiña nejumekokowünta ponaenexa. Barapókotsi jüta koyeneya éxanang poxonae tapaka kayawenáewatsi, icha

pebin ichi pong peyaputaein xua bo peakabiwa poxonae bo ákaba po bo ibo bo. Bapong kopiya matha tsikobe nobabareka po ibótong beta petabükaumenaewa xua ichamona tsikobe nobabarékatsi. Athawétsika xuya ichamona exanapona. Daxita pomonae ákaba bárapo ibo bo bewa beta wüünaeya exanaena icha jiwi ichi xua poxonae bewa beta taexanaena xua pokotsiwa taéxana Nakom nexa. ¹¹Poxonae jintong ibo bo ákaba bapong kopiya beta noba po ibótong xua kopiya nantakaumena. Bapoxonae ichüing bewa icha ibótong beta kuaranobi bárapo ibótong pekoyoreka xua bo pexeiña bo petsungkuaenexa. Barapókotsi jüta koyeneya ichi, poxonae paka kuidúbatsi Jesucristo pejume diwesi. Ichüing bewa beta yábara paka kuidubina icha koyene xua baxua paiña nejumekowüntsinea. ¹²Po pebin ibo bo ákaba bárapo pebin itakúüpatsi xua jebabapona ichawa bárapo ibótongtha, po ibótongtha kopiya nantakaumena. Pokotsiwang bapong itakúüpatsi xua jebabapona bichokono ayapusüü be pokotsiwa pewüing oro nain, yáwano pokotsiwa xua pewüing plata nain yawa pokotsiwa be ibótong po ibótong xua bichokono aiña matoma. Ichakuitha bárapo pebin itakúüpatsi xua bárapo ibótongtha jebabapona pokotsiwang xua pepawi be naepawa, yawa be naepanaewang yawa be musuribotong. Bara jüta ichi, pebin itakúüpatsi xua yawenaena ichamonaetha. Ichakuitha beta kuidubina pomona xua jumekowünta Jesucristotha pokotsiwa xua bichokono ayapusüü. Ichakuitha kuidubina pokotsiwa xua pepawi pomona xua jumekowünta Jesucristotha xua jopa ayapusüüyo. ¹³Jopaena matakabi po matakaiha Nakom yábara paebina jiwi xua penatsikuentsiwa xua abe peexanae-xae. Bárapo matakaiha Nakom taena pokoyene xua jiwi taéxana Nakom. Nakom bichokono tsita wüünaetsi pokotsiwa xua bichokono ayapusüü pokoyenein jiwi taéxana bapong nexa. Íchitha nama Nakom naitémata pokoyene jopa tsita wüünaetsi xua pokotsiwa bekein jiwi taéxana bapong nexa. ¹⁴Icha pebin éxana pokotsiwa xua bichokono ayapusüü xua Nakom nexa, Nakom matoma katsina bapongtha. ¹⁵Íchitha icha ichüing taéxana Nakom pokotsiwa Nakom jopa tsita wüünaetsi, daxita bárapo koyenein Nakom naitémata pokoyene bekein bapong Nakom taéxanatsi. Íchitha bapong kapanépati poxonae Nakom naitémata pokoyene bapong éxana, icha pebin ichichi xua kapanépati ishoto weya bekein daxita tataxotsi xua pokotsiwa xeina.

¹⁶Barápara paxam payaputáneme xua paiña jüntükoyene Nakom tsítatsi xua bara be Nakom pin píabo tatsi tsipéi Nakom pía Pejumopetünaxü tatsi pópona paiña jüntükoyénetha. ¹⁷Icha ichüing saraboba Nakom pin píabo, Nakom xuya werawéraka exanaena bárapo jintongtha. Nakom pin píabo tatsi, bárapo bo Nakom tsita wüünaetsi poxoru pía Pejumopetünaxü tatsi pepoponaexae bárapo botha. Icha Nakom ichi xua werawéraka kana éxana pongtha pong petasarabobi-xaetsi pin píabo tatsi, barichi xuya Nakom werawéraka kana exanaena pongtha pong paka jüntükoyene itoroba xua abe paiña neexanaewa tsane. Nakom baxua éxana tsipéi Nakom pía Pejumopetünaxü tatsi pópona paiña jüntükoyénetha.

¹⁸Jopa pakopatsinde xua paiñakoutha pana namuxuitórobame. Icha ichüing piakoutha nakayábara nantaxeina xua bichokono peyaputaein icha bárapo kae pin nakuathepiwi ichi, bewa bapong piakoutha ekeicha kaewa naexanáe be pókotsin jopa peyaputaein. Bapoxona bapong bara Nakom tsita be pong pepa peyaputaeinchi. ¹⁹Nakom tsita penamitakueinchi jumetsi po peyaputáe koyenewang yaputane jiwi pomonae bárapo kae pin nákuathe jinompa. Nakom Pejume Diwésitha

bárapo jiwi yábara jeichi: “Nakom tsítatsi xua ápara xeina penatsikuentsiwa xua abe peexanaexae pókotsi jintong peyaputaecin, peexanaexae barompaya pía peyaputáe koyenéwatha”, jei Nakom Pejume Diwésitha. ²⁰Matáütano Nakom Pejume Diwésitha baxua yábara jeino: “Nakom yaputane pokoyenein nantaxeina pomonae peyaputaewi. Barapókotsi koyenein Nakom tsita penamitakueinchi jumetsi”, jei Nakom Pejume Diwésitha. ²¹Pomonae pejumekowüntsiwi Jesucristo jopa bewa atsakiya pana neyábara paebí tsane xua pejeiwa: “Pong jumekowüntang pokotsiwa kuiduba bapong bichokono peyaputaecin beyakaincha ichüing pong peyaputaecin”, xua pata taneyábara jeiwa pomonae pejumekowüntsiwi. Tsipéi paxang pomonae pekuidubiwi pang saya pebiwi pang xua jopa bichokono peyaputaewi pang. Dapokotsiwa aibi xua pokotsiwa payawerawérakame xua jopa paxeinaem. Daxita pomonae paiña nepaka kuidubiwi, írúno daxita koyenein pokotsiwa Nakom fórota, bara Nakom éxana paxam nexa paiña nepaka kayawenaewa tsane. ²²Xang Pablo Nakom neitoroba, irü Apolos itoróbatsi, irü Pedro itoróbatsi xua pata paka kayawenaenéxatsi. Nakom paka kata daxita xua bárapo ira piáwang, xua paiña nepaka yawenaenexa. Matáütano yábara paka yaputane éxana xua peajüntüyapusüüwa, pokoyenewano petüpáe koyenewa, matáütano pokoyene ánoxuae piáwa yábara, pokoyenewano bexa piáwa yábara xua paiña nepaka yawenaenexa. ²³Bárxuang daxita paxéiname Cristo piamonae jiwi tatsi pamxaem. Barichi Cristo barápara Nakom Pexanto tatsi.

Meje xua Jesucristo pía peitorobi jiwi tatsi taéxana, Nakom taéxanatsi

4 ¹Paxam bewa pana neyábara nantaxeináename xua paxang meisha saya barapomonae pang xua pomonae Cristo amanaya pata tanakuichi jiwi pang. Paxang yábara pakuidubang Nakom moya pía peyawüngxainaewa tatsi pokoyene kopiya bekein báyatha moya yawüngxaina xua jiwi jopa yábara yaputaeyo. Bárapo koyene xua moya peyawüngxainaewa, ánoxuae Nakom najumeyábara kópata xua jiwi bara peyaputaenexa. ²Pong tanakuíta pía pekanamataxeinaeinchi, barapong bewa bara xaniwaicha exanaena pokotsiwa pía pekanamataxeinaeinchi tsipaeba xua bepa exanaena pinae xua daxota pejumekowüntsinéxatsi pía pekanamataxeinaeinchi xua bara xaniwaicha éxana. ³Jopa netsita aiñakuiyo xua paxam tapaneyábara paebiwam xua takuidubiwa yábara xua icha metha bara éxanang pokotsiwa Nakom neitoroba. Matáütano jopa netsita aiñakuiyo xua jiwi taneyábara paebiwa xua bárapo koyene xua icha metha bara éxanang. Barichi takoutha jopa nayábara nantaxeinaeiño xua icha metha bárapo koyene jopa exanaeiño, xua daxota tanatsikuentsixae abe taexanaexae Nakomtha. ⁴Tajüntükoyene netsipaeba xua bara pinae wüünaeya taexanaewa. Bekein tajüntükoyene baxua netsipaeba íchitha jopa nayaputaieiño xua metha ápara abe taexanaewa xua daxota Nakom tsita natsikuentang. Nakom pong jiwi Pekanamataxeinaein bapong ápara pong taneyábara paebin xua tanatsikuentsiwa xua abe taexanaexae. Bapong meisha nejüntükoyene yaputane icha bara metha tsita xeinang xua tanatsikuentsiwa xua abe taexanaexae. ⁵Jopa bepijawa payábara paebinde ichamonae xua abe pía peexanaewa. Abü tsane beya poxonae patopáetsika pong jiwi Pekanamataxeinaein bapoxonae payábara paebíname abe pía peexanaewa. Barapong Nakom tsita itüütsina pokoyene xua jiwi pía pejüntükoyenéwatha namicha xeina pokoyene xua ichamonae jopa taeyo. Bapong Nakom pong jiwi Pekanamataxeinaein itüütsina

pokoyenein jiwi namicha xeina pejüntükoyeneintha xua penatsikuentsiwang pokoyenein xua Nakom petsita-exanáewatsi. Daxita barompaya jíwitha Nakom yábara paebina pokoyene pía petaexanáewichi. Pongtha pong wüünaeya petana-kuitsinchi Nakom wüünae jainchina bapongtha. Nakom jopa wüünae jaintí tsane pong jopa wüünaeya petanakuitinchi.

⁶Tamonae pam, paxam pomonae irü paiña nejumekowüntsíwixae Jesucristo. Yábara paka tsipáebatsi bárapo koyenein pokoyenein paéxanang, wüünaeya paiña nejinompaenexa. Barichi paka tsipáebatsi Apolos yábara irü xua xang yábara paiña nenakuidubinexam pokotsiwa paéxanang. Bapoxonae paiña neexanaewa tsane icha paichin poxonae xua paéxanang. Pajinompa dubenanaebíyama icha be pókotsi koyeneya Nakom Pejume Diwésitha paeba. Jopa paiña neéxana dubenanaebiyaenexa pokotsiwa jopa paebiyo Nakom Pejume Diwésitha. Paiñaxoba atsa-kiya paka yábara nantaxéiname pongbe Nakom petanakuichinchibe, xua ichüng bichokono peaiñakuí jintong beyakaincha ichüng. ⁷Nakom jopa paka exanaeyo xua peaiñakuí jiwi pam beyakaincha xua ichamonae pomonae irü pejumeko-wüntsiwi Nakom. Pokotsiwa paxéiname jopa ápara pana nakatsim paiñakoutha barapokotsiwa. Ápara jame daxita baxuang paxéiname pokotsiwa Nakom paka katsiba. Daxota jopa bewa atsakiya pana nayábara paebim paiñakoutha. Poxonae baxua papáebame ápara pajüntemáiname pokotsiwa xua Nakom paiña nepaka katsibiwa daxita.

⁸Ítara mexeya daxita paiña nexeiaenae jiwi pam pokoyenein xua paichichípame paiña neyaputaewa Nakom yábara dáichitha jopa barapomonae pam. Panantaxéiname icha pomonae kopei pexeinaewi ichi irü icha ichi pomonae jiwi itorobiya pía pepa peewatsíwichi xua xeina daxita xua ichichipa yawa daxita xua xuang pokotsiwa pekanantawenonaewa. Paxang jopa nama bara paichiño. Maisha ánoxuae bekein pana itakuijicha xua yatsikaewa paxam pomonae paiña neyaputáe jiwi pam daxita xua Nakom Pejume Diwesi yábara xua bapoxonae pata tana nebarü yaputaewam tsane daxita Nakom Pejume Diwesi. ⁹Paxang Jesucristo pía peitorobi jiwi tatsi pang. Xang nantaxeinang xua Nakom bara be kópata tanakanaexanaewa xua jiwi pata tana nekuikaponae xua poxoru imoxoyo pata werapaewa tsane. Paxang be pókotsi jiwimonae pekuipawi jiwimonae pang xua daxota daxita nakuangpiwi irü matatsunpiwi pana ichichi xeika. ¹⁰Jiwi pana neyábara nantaxeina xua paxang patanemuxuxenae jiwi pang, yáitama paxang Cristo payábara kueikueijang. Jaina maisha paxam jiwi paka yábara nantaxeina xua paxam beta yábara paiña neyaputáe jiwi pam Cristo. Paxang nama jopa pana daichibenaieño. Paxang jiwi pana yábara nantaxeina xua pajüntükoyene faefaenabenang. Jaina nama pana nayábara nantaxéiname xua pajüntükoyene dangwam Nakomtha. Jaina maisha jiwi paka barükui-iturajina, jopa pana daichibenaieño. Nama atsakiya abeya pana yábara paeba. ¹¹Kaena báyatha beya ánoxuae, paxang bichokono pajainpang. Matáütano pamerátsipangno bichokono. Matáütano painta paparuwang bichokono jónopa. Jiwi pana neba bichokono. Yáwano jopa bo paxeinaieño. ¹²Pana nakobefifinatontang, patain pata nakuichixae bichokono. Bekein jiwi tsümüjumetha pana kasebeiba dáichitha barapomonae Nakomtha patawüükeibang xua barapomonae peyawenaenexa tsaibi tsainchi. Poxonae jiwi pana átene exa-neiba bara saya pakuikópatang. ¹³Bara bekein jiwi abeya pana neyábara paebeiba ichamonaetha, dáichitha baxua jopa pajumenaitaewatsiño. Saya jame wüünaeya

patsipaebang barapomonaetha. Jiwi pana neyábara nantaxeina xua pinae peabe jiwi pang. Bárapo jiwi pana itaweta icha be poxonae jintong ichi poxonae piáwa basúratha xuba. Baxua jiwi painta exanapona beya ánoxuae.

¹⁴Jopa baxua pákata tinaetsi xua paka aura éxanatsi. Jame pákata tínatsi xua pata kayawenaenéxatsi xua paiña neexanaenexa pokotsiwa bewa paexanáename. Paxam be tapexui pam, tsipéi bichokono paka antobetsi. ¹⁵Bekein icha bara metha paxeináetsipame diez mil póyobe pomonae paiña kakuidubi jiwi pokoyene xua Cristo yábara, íchitha saya pákata kompa pong be paiña axa natsikotane. Saya meisha xang kompanyang pong be paiña axa tapákata natsikotaeinchi, tsipéi paxam kopiya Cristo Jesús pajumekowúntame poxonae paka kuidúbatsi Nakom Pejume Diwesi. ¹⁶Daxota bichokono paka muxujeichi, paexanaponde icha xang ichin xua exanaponang.

¹⁷Daxota pákata itoróbatsi Timoteo pong bichokono antobein. Bapong bara be taxanto, tsipéi yawenang xua pejumekowúntsiwa Jesucristo pong jiwi Pekana-mataxeinaein. Bapong exaneiba pokotsiwa itorobeibang. Bapong Timoteo paka tsipaebina xua tana neyábara paebiwa tsane pokoyene xua wüünaeya tapoponaewa tajumekowúntsixae Cristo Jesús. Bárapo koyenein kuidubeibang ichaxota poneibang daxita i dapókotsi penakaetutsibong jíwitha pomonae Nakom pejumekowúntsiwichi. ¹⁸Ichamonae pomonae paxam jíwana pam, bichokono jüntükoyene yúükatsi xua ichamonae peabíwatsi. Baxua éxana tsipéi barapomonaen nantaxeina xua xang jopa tapaka siwaponae tsainchi. ¹⁹Icha Nakom pong jiwi Pekana-mataxeinaein kopatsina xua bara taponae tsane aunxuae paka siwaponaeinae kopatsina. Bapoxonae taein pomonae xua ichamonae peabíwichi icha metha barapomonaen xaina Nakom pía peayapusúü itorobi koyenewa tatsi. Ichakuitha metha tsipae ápara metha saya paeba. ²⁰Jiwi jopa patsi tsane Nakom pía peitorobi nakua beicha xua poxoru wüünae pepaebixae tsane piakoutha. Ápara jame jiwi patsina bara beicha pexeinaexae Nakom pía peayapusúü itorobi koyenewa tatsi. ²¹¿Eta xua páñatsi? ¿Paka tsikapatinchi naewang xua xota paka beinchi? Jume ápara. Ichakuitha metha tsipae ¿paichichípame xua tapaka kasiwaponáewatsi tapaka kaantobexaetsi? ¿Matáütano beta pákata exanaeinchi xua jopa taanaepa-naexae? Aa jame baxua.

Meje xua poxonae Pablo itaweta pong pénowa tsiperüü nakóyoba

5 ¹Ichüing netsipaeba xua pinae kaein pong paxam jíwana pam pinae bichokono abe éxana. Pinae bapong pénowa tsiperüü nakóyoba powa paxa tatsi báyatha barü pópona. Bárapo peéxanae koyenewa bichokono abe. Pomonae bekein jopa peyábara yaputaewa Nakom bárapo koyene jopa kopatsiyo xua jiwi peexanaewa tsane baxua. ²Paxam pomonae paiña nenantaxeinae jiwi pam xua peaiñakuí jiwi pam xua daxota jopa panantawenonaem xua paiña neitawetsiwa bapong. Jame bewa baxua payábara jüntükoyene wekoyam. Pong paiñaxantha pita pénowa powa paxa tatsi xaina bewa patorotsim paiña xaiña weya. ³Bekein jopa yatsikaewa paka barü ekaetsi íchitha paka yábara nantaxeinéibatsi be poxonae paka barü ékatsi yatsikaewa. Bara bapong yábara páebang xua penatsikuentsiwa xua abe peexanaexae tsipéi yábara páebang Jesucristo pía peayapusúü itorobi koyenewatha tatsi, pong Wanaka namataxeinaein. Baxua éxanang icha be poxonae yatsikaewa tapaka barü ekáewatsi. ⁴Poxonae panakaetútame daxita pam, pomonae

paiña nejumekowüntsi jiwi Jesús, paka yábara nantaxeineibinchi icha be poxona tapaka barü ekáewatsi yatsikaewa. Matáütano Jesús pong jiwi Pekanamataxeinaein pía peitorobiwa tatsi xua peayapusüüwa tatsi paxeina dubenanaebíyama. ⁵Pong xua áwiya abe exanapona bárapo jintong bara pakópare Satanastha pong kaurimonae pía pentakaponaeintha tatsi. Bapoxonae bárapo kaurimonae pía pentakaponaein tatsi átene kana exanaena bapongtha xua saya pía pepongtha tatsi poxoru bárapo jintong ichichipa xua abe peexanaewa. Bapoxonae bárapo pebin ekeicha jumekowüntsina Nakom po pebin kopiya abe peexanaexae. Pía pejumopetünaxü tatsi Nakom kapanepaena po mataketha poxona Jesús patopeikaena, pong jiwi Pekanamataxeinaein.

⁶Paxam jopa bewa atsakiya pajinompam xua poxoru pokotsiwa paiña neéxana dubenanaebiyaexae. Icha kaein payábara kuikópatame xua bara abe exanapona paiñaxantha pong abe peexanaein bekein xua saya kónotha éxana, bapoxonae pinmonae paiñamonae abe exanapona. Bara paxam payaputáneme pókotsi diwésiyo ba jiwi yábara kanaüta jütsiya paeba baxua yábara xua pejeiwa: “Levadura matawüing xoyo bekein peyauyo baxoyo daxita pantha kotowa éxana”, xua pejeiwa. ⁷Paiña xaiña weya patorore pong abe peexanaein abe peexanaeyainwa daxita paiñamonae xua icha bapong ichi xua abe éxana. Bárapo koyene icha be ichi poxona jiwi levadura bebái, po levadura peru levadura abe peexanaeyainwa pan matabütha. Poxonae bapo pebin patorótame bapoxonae paiñamonae pomonae pejumekowüntsiwi wüünaeya jinompaena. Kaena báyatha judiomonae juteba oveja xua poxonaewünaeya tsane poxonaewünaeya Egipto nakua weya pona. Bapoxonae Nakom yábara jüntemaina judiomonae abe pía peéxanae kuirukoyenein tatsi poxonaewünaeya cordero bexotsi xua oveja pebto penüing. Nakom tsítatsi xua Cristo bara be cordero poxonaewünaeya tüpa náetotha. Cristo naka tsitüpa xua abe waexanáe kuirukoyenein icha cordero ichi xua tsitüpa xua judiomonae abe pía peéxanae kuirukoyenein tatsi. ⁸Waxainchi jopa bewa peabe koyenewa exanaetsi. Jame bewa xaniwaicha jüntükoyene wüünaeya jinompa dubenanaebiyaetsi Jesucristo pía pejumekowüntsiwichixaetsi.

⁹Icha cártatha paka tsipáebatsi xua jopa bewa paiñamonae jiwi pakana exaenam pomonae pesikuiweiweinae jiwi xua bekein jopa piseuri jiwi. ¹⁰Barapomonae pomonae pesikuiweiweinae jiwi pomonae jopa pejumekowüntsiwi Jesús ápara jopa paka tsipaebichi barapomonae yábara. Pomonae jimüing jiwi xua ichichipa kopei xeinaewi náexana xua beyakaincha ichamonae pomonae jopa pejumekowüntsiwi Jesús ápara jopa paka tsipaebichi barapomonae yábara. Pomonae jopa pejumekowüntsiwi Jesucristo pomonae pekaibi jiwi ápara jopa paka tsipaebichi barapomonae yábara. Pomonae ibo nakomüing wüünae pejainchiwi ápara jopa paka tsipaebichi barapomonae yábara. Barapomonae pexaiña weya paiña newarapaenexa maisha jame bewa pawarapaem bárapo kae pin nakua weya, xua ichaxota po nakua jiwaibi beya xua bara beya paiña newarapaenexa. ¹¹Pokotsiwa aunxuae paka tsipáebatsi báraxua icha cártatha báyatha pákata tínatsi. Jang: “Jopa bewa payawamuxunajinompam pomonae abe peéxanae jiwi bekein paeba xua pinae jumekowüntsiwi Jesucristo. Barapomonae jopa bewa payawamuxunajinompam pomonae pesikuiweiweinae jiwi, írúno pomonae jimüing jiwi xua ichichipa kopei xeinaewi náexana beyakaincha xua ichamonae írúno pomonae ibo nakomüing wüünae pejainchiwi, írúno pomonae naküüpa penaexanaewi,

írüno pomonae jiwi pebiataewi, írüno pomonae pekaibi jiwi daxita barapomonaewa jopa bewa pabarüxaem bekein paka wabitha tsipaeno xua paiña nenanabanaewa tsane”, jang. ¹²Xang jopa neitaküüpaeyo xua jiwi tayábara paebiwa xua penatsikuentisiwa Nakomtha xua abe peexanaexae pomonae jopa jumekowüntsiyo. ¹³Jame ápara meisha Nakom yábara paeba xua penatsikuentisiwa xua abe peexanaexae pomonae jopa Nakom pejumekowüntsiwichi. Íchitha bewa payábara paebim xua penatsikuentisiwa pomonae penakaetutsi jiwi pomonae pejumekowüntsiwixae xua abe peexaneibixae poxonae. Daxota bewa paxam patorotsim pong abe éxana paiñaxantha pong pénowa tsipertüü wenakóyoba xua áwiya barü jijinapona.

**Meje yábara pomonae pejumekowüntsiwi Jesucristo
xua peponaewa pongtha pong jiwi yábara paeba
xua penatsikuentisiwa xua abe peexanaexae**

6 ¹Poxonae ichamonae pomonae pejumekowüntsiwi jíwana pákata abe éxana paiñaxoba papóname ichaxota eka pong jiwi yábara paeba xua penatsikuentisiwa xua abe peexanaexae. Jamaisha baxua paéxaname xua pawüükame pong jopa pejumekowüntsin pong jiwi yábara paeba xua penatsikuentisiwa xua bapong peitawetsinexa pomonae abe peexanaewi. Bapoxonae paiña pía bapong paka tsi-paebichi xua barapomonae paka tsita natsikuenta xua abe peexanaexae. Jame bewa paponáename ichaxota nakaetuta pomonae pejumekowüntsiwi Jesucristo. Bapoxonae barapomonae yábara paebina pomonae xua penatsikuentisiwi xua abe peexanaexae paxamtha. ²Paxam payaputáneme xua pomonae pejumekowüntsiwi Jesucristo, barapomonae yábara paebina pomonae xua penatsikuentisiwi xua abe peexanaexae pomonaetha, pomonae bárapo nakuathepiwi. Barichi bexa tsane poxonae Cristo patopeikaena payábara paebíname pomonae bárapo nakuathepiwi xua penatsikuentisiwa xua abe peexanaexae. Daxota ánoxuae bewa paexanaem xua payábara paebíname xua penatsikuentisiwa xua bekein bara kónotha abe peexanaexae pomonaetha, pomonae pejumekowüntsiwi Jesucristo pokoyenein bara bekein bichokono jopa abeyo. ³Waxainchi yaputainchi xua bexa tsane wayábara paebiwa matatsunpiwi penatsikuentisiwa xua abe peexanaexae Nakomtha. Baxua exanaeinchi poxonae Cristo patopeikaena. Daxota ánoxuae paka itaküüpa xua paiña neyábara paebiwa xua penatsikuentisiwa xua abe paiña nepaka tsita exanaexae pomonaetha, pomonae pejumekowüntsiwi xua wajinompawa yábara bárapo kae pin nákuathe. ⁴Icha paxéiname pokoyenein xua abe pákata éxana pomonae írürü pejumekowüntsiwi, jopa bewa paponam ichaxota pong jiwi peyábara paebin jiwi xua penatsikuentisiwa xua abe peexanaexae pong jopa pejumekowüntsin. ⁵Baxua paka tsipáebatsi xua paiña neauramnexa tsane. Pong ba peyaputaein bapong ba itaküüpatsi xua jiwi peyábara paebiwa pomonaetha, pomonae xua penatsikuentisiwa xua abe peexanaexae, xua ichamonaetha abe peexanaexae pomonaetha, pomonae irü pejumekowüntsiwixae Jesucristo. Íchitha poxonae papóname ichüngtha pongtha pong jiwi peyábara paebin xua penatsikuentisiwa xua abe peexanaexae, pong jopa pejumekowüntsin, ápara jopa xapain paexanaem. ¿Metha bara paiñamonae jíwanapin dapokotsin yatsikaewa aibi jampa pong jiwi peyábara paebin xua penatsikuentisiwa xua abe peexanaexae jampa? ⁶Pongbe paxam jíwana pam, pongbe pejumekowüntsinbe Jesucristo, bapongbe nábabe.

Ichüing xua bapongbe jíwana pona ichaxota pong jiwi peyábara paebin, pong jopa pejumekowüntsín, xua peyábara paebínéxatsi pong abe peexanaexae ichüingtha.

⁷Poxonae paxeinéibame pokoyenein xua pana nabéibame xua daxota paponéibame pongtha pong jiwi peyábara paebin baxua abe paéxaname. Poxonae ichamonae abe pákata éxana saya bara pakuiyábara kópabare. Jame baxua pákata wüünae. Bapoxonae jopa paiña nenantawenonaewa xua paiña neponaewa pongtha pong jiwi peyábara paebin xua penatsikuentsiwa xua abe peexanaexae. Barichino poxonae ichamonae paka kaiba saya bara pakópare xua jopa abe paiña neexanae-nexa tsane bapomonaetha. ⁸Payopítame xua pinae paiñamonae pákata abe éxana, yawa xua pinae paka kaiba. Íchitha ápara paxam bara paichim abe paéxaname, xua poxonae papóname pomonaetha, pomonae jopa pejumekowüntsiwi xua peyábara paebínéxatsi pomonae abe pákata éxana.

⁹⁻¹⁰Paxam payaputáneme xua pomonae abe peexanaewi jopa patsi tsane Nakom pía peitorobi nakua beicha. Paiñaxoba pana nayábara kuikópatame xua paiñakoutha paiña nenamuxuitorobiwa bárapo koyene yábara xua daxota panantaxéiname xua barapomonae ápara patsina Nakom pía nakua beicha. Pomonae jopa patsi tsane Nakom pía peitorobi nakua beya xua peexanaexae pokoyenein xuaje: Pomonae pesikuiweiweinae jiwi, pomonae wüünae pejainchiwi ibo nakomüing, irü pomonae penotsiwi yábüxi powaxi bara bekein pía pebiwi xeina, irü po pebiwi kae pebiwi penaishamaichiwi, irü pomonae pekaibi jiwi, irü pomonae jimüing jiwi xua ichichipa kopei xeinaewi náexana beyakaincha xua ichamonae, írürü pomonae naküüpa penaexanaewi, peátsaxae merang, írüno pomonae jiwi pebiataewi, írüno pomonae peyábara muxuitórobi jiwi pekaibinexa. ¹¹Kopíyatha paxam be barapókotsi jiwimonae pam xua poxonae matha aena pajumekowúntame xua abe paiña neexanáe jiwi pam. Dáichitha Nakom paka yábara jüntemaina abe paiña neexanáe kuirukoyenein. Matáütano Nakom paka yábara kaunuta jeye: “Tapexuimonae jiwi”, paka yábara jei. Matáütano Nakom jopa paiña tsita natsikuentsiwa xua abe paiña neexanaexae. Nakom pía Pejumopetünaxü tatsi irü Jesucristo pákata éxana baxua xua poxonae pajumekowúntame Jesucristo pong jiwi Pekanamataxeinaein.

Meje xua Pablo jei: “Wapepong Nakom piáwa”, jei

¹²Jiwi ba jeye: “Xang nekópata xua bara taexanaewanexa pokotsiwa xua ichichipang”, jei. Bara bekein xaiñéi jiwi xua pepaebiwa, íchitha ichakuitha bárapo jiwi jopa xapain piakoutha nata exanáe tsipae. Bekein barichin bekein nekópata xua bara daxita taexanaewa, dáichitha ichakuitha jopa xapain nata exanaein chipae xua poxonae icha nantaxeinaetsipang xua jopa neitaküüpaeyo xua bara tana nekuikopatsiwa. ¹³Bara jiwi ba xaiñeya paeba poxonae jeye: “Pexaewa wüünae xua pekotsoro nexa, irü pekotsoro wüünae xua pexaewa nexa”, jei. Íchitha bexa tsane Nakom werawéraka kana exanaena bárapo naxobe júmebe. Nakom ápara jopa nákata exanaeyo wapepong xua wapepong abe wanata exanaewa xua wanasikuitaetaewa. Wapepong Nakom éxana xua piakoutha natsiéxana, xua watankuichinexa bapong, pong jiwi Pekanamataxeinaein. Nakom yawena xua wapepong yawénatsi xua pía wanaka kapanepaenexa. ¹⁴Icha Nakom ichi xua asüü éxana petüpáe kuirukoyene weya pong jiwi Pekanamataxeinaein Jesucristo, Nakom bara naka ichi tsane, asüü naka exanaena petüpáe kuirukoyene weya pía peayapusüü itorobi koyenáyatha.

¹⁵Paxam Corinto tomarapiwi pam. Payaputáneme xua daxita karepaya paxam Cristo piamonae jíwana tatsi pam, pomonae pejüntükoyene wüünae jiwi. Xang irü bárapo pejüntükoyene wüünae jiwi piamonae jíwanang tatsin. Daxota jopa benatsiperüü jayababiño powáxitha powaxi pesikuiweiweináewaxi, tsipéi tapepong ápara Cristo tatanakuichinexa bapong. ¹⁶Paxam payaputáneme icha pebin natsiperüü jayababa pówatha powa penasikuimatakáetsiwa barapongbe bara be kaein náexanabe. Nakom Pejume Diwésitha jeye: “Poxonae pebin píowa pita bara be kaein náexanabe”, jei Nakom Pejume Diwésitha. ¹⁷Poxonae ichüing kae jüntükoyene náexana Crístotha pong jiwi Pekanamataxeinaein, bapong bara ápara kaein náexana Crístotha pía pejüntükoyenéwatha.

¹⁸Paiñaxoba paexanáename icha pókotsi koyeneya ichi xua peexanaewa pomonae pesikuiweiweinaewi. Daxita pokoyenein pebiwi éxana xua abe peexanaewa ápara jopa piakoutha abe nakana exanaeyo. Ápara jame ichüingtha abe éxana. Saya jame poxonae pebiwi pesikuiweiweinaewi bapoxonae bárapo pebiwi piakoutha abe nakana éxana. ¹⁹Paxam payaputáneme xua Nakom pía Pejumopetünaxü tatsi paka barü jinompa pía paka nakana jumopetünaxü katsixae paxamtha. Icha bárapo Nakom pía Pejumopetünaxü tatsi ichi xua paka barü jinompa, barichi bárapo Nakom pía Pejumopetünaxü tatsi pópona Nakom pin piabotha tatsi. Tsipéi ánoxuae Nakom piamonaexae tatsi pam, ápara paxam jopa paiñakoutha paiña nenakanamataxeinaewi jiwi pam. ²⁰Nakom báyatha pákata pematomatsiwa éxana xua poxonae Jesús náetotha paiña nepaka tsitüpaewa xua abe paiña neéxana kuirukoyenein. Daxota beta pajumekowüntsiya jinómpare ichamonae peitütha tatsi. Bapoxonae barapomonae Nakom barükui-iturajínatsi xua pong wüünaeya peexanaein poxonae paka kuitane xua wüünaeya pajinómpame.

Meje xua Pablo yábara muxuweta xua jitha peenaewa yábara

7 ¹Ánoxuae paka jumenótatsi po peyaiñabiwa pana yáiñabame cártatha. Icha pebin jopa jitha beekaeyo bü bara moya jopa jitha ekáe tsane, bekein bara baxua tawüünaetsi bapong. ²Ichakuitha poxonae pebin jopa jitha ekaeyo besikuiweiweinaena pówatha xua bekein pía pebin xeina. Daxota pekuiyainwa bárapo koyene bapong bewa jitha ekaena, xua barompaya píowa tatsi. Barichi daxita yábüxi bewa barompaya seikaya notsina pía pebiwi. ³Pebin bewa bara exanaena piowatha xua poxonae peishamaitekáe koyenewa. Barichirü yábüyo bewa bara exanaena pía pebintha xua poxonae petsikuaramaitekae koyenewa. ⁴Petsiriwa powa jitha eka, jopa bewa nayábara nantaxeinae xua penaperüüxeinaewa xua saya piakoutha nexa. Jame bewa nantaxeinae xua ápara bara pía pebin tatsi pía perüüto tatsirü. Barichi pebin jopa bewa nayábara nantaxeinae xua penaperüüxeinaewa xua saya piakoutha nexa. Jame bewa nantaxeinae xua ápara bara píowa tatsi pía perüüto tatsirü. ⁵Petsiriwa jopa bewa aichaxaibi tsane xua ishamaiteka pía pebin. Pebin irü jopa bewa aichaxaibi tsane xua píowa peishamaitekáewatsi. Poxonae pebin piowabe eénatsibe kaentakabiyobetha xua Nakomtha wüükáuyabe bapoxonae bapongbe itaküüpatsi xua itompa exanáenabe xua peexanaewa pokoyene penaishamaitekae kuikoyenewa. Saya kaentakabiyobetha baxua bewa itompa exanaena pokoyene xua penaishamaitekae kuikoyenewa. Jame poxonae po matakeitha najumewetsina xua Nakomtha pewüükáewabe bapoxonae jame bara bewa exanáenabe ekeicha penaishamaitekae kuikoyenewa. Baxua bewa

exanáenabe xua jopa pejäüntükoyene jüjütsinexa tsáinchibe kaurimonae pía pentakaponaein tatsi xua abe peexanaenexa tsánebe xua naitompa penaexanáexaebe.

⁶Saya baxua paka muxuwétatsi ápara xua jitha paiña neenaewa xua daxota jopa abe paiña neexanaewa tsane. Jopa ápara paka itorobichi daxita pam xua jitha paiña neenaewa. Bara moya jitha ekaena pong ichichipa. ⁷Ichichipang xua daxita jiwi jinompa dubenanaebiyaena icha pokoyeneya ichin xua poxonae póponang xua jeiña ékang. Dáichitha Nakom kata daxita jíwitha xua daxita jiwi barompaya pía kuikoyenewang xexeina tsíniya. Pokoyenein xua Nakom kata daxita barompaya jíwitha jopa nakuikoyenejüpaeyo.

⁸Pomonaе pemishadubenaewi pam irü powaxi paiña séurixi paiña nekakuenta werapaewaxichi pam, daxita barapomonaе pam paka tsipáebatsi. Bara wüünae tsipae icha jopa jitha paenaem tsipae icha be xang ichin xua jopa jitha taekaewa. ⁹Íchitha icha jopa paka itaküüpaeyo xua paiña nejeiña enaewa moya bara jitha bewa paenaem. Jame baxua pákata wüünae xua jitha páename xua daxota jopa paiña nesikuiweiweinaewa.

¹⁰Íchitha pomonaе xua báyatha jitha paiña neenaewi pam barapomonaе pam paka itoróbatsi. Jopa ápara taitorobi koyeneya paka tsipaebichi. Jame ápara Nakom taneitorobixae xua pokoyeneya tapaka katsipaebinéxatsi. Paka jeichi: “Yábüyo jopa bewa kuenta warapaena pía pebin xua pexubinexa”, paka jeichi. ¹¹Powa punaxuba pía pebin, barapowa bara misha ekaena. Jopa pitsi tsane icha pebin ekeicha. Metha jame wüünáetsipa icha bapowa kaewa píchapa pía pebin. Barichi pebin jopa bewa punaxubi tsane píowa.

¹²Ánoxuae nama icha koyene paka tsipáebatsi pokoyenewa jopa Nakom neitorobiyo saya xua takoutha tanantaxeinaewa. Icha pebin pong pejumekowüntsín xeina piseuri powa jopa pejumekowüntsiwayo bapong jopa bewa punaxubi tsane bapowa icha bapowa ichichipa xua bapong pebarü poponáewatsi. ¹³Barichi icha yábüyo powa jumekowünta xeina pebin pong jopa pejumekowüntsín bapowa jopa bewa punaxubi tsane icha bapong ichichipa xua bapowa pebarü poponáewatsi. ¹⁴Po pebin bekein jopa jumekowüntsiyo, Nakom tsítatsi xua pokoyene barapong penakoyobiwa bara wüünae, tsipéi bapong píowa xeina powa pejumekowüntsiwayo. Barichi powa jopa bekein pejumekowüntsiwayo, Nakom tsítatsi xua pokoyene barapowa jitha peekaewa bara wüünae, tsipéi bapowa xeina pía pebin pong pejumekowüntsín. Icha Nakom barapókotsi koyeneya jopa exanáe tsipae néxata paiña pexui be pomonaе jopa Nakom pejumekowüntsiwi pía pexui tatsi tsipae. Íchitha poxoru bárapo koyene paiña netsita xeinaexae Nakom daxota Nakom yawa múxuna tsítatsi xua bárapo paiña pexui barapoxi jüntükoyene wüünaena. ¹⁵Ichakuitha pebin pong jopa pejumekowüntsín ichichipa punaxuba píowa powa pejumekowüntsiwayo. Bapoxonaе bapowa bara kópata xua pepunaxubíwatsi pía pebin. Barichi ichakuitha yábüyo powa jopa pejumekowüntsiwayo ichichipa punaxuba pía pebin pong pejumekowüntsín. Bapoxonaе bapong bü bara kópata xua pepunaxubíwatsi pía petsiriwa. Nakom kópata barapomonaе jopa pejumekowüntsiwixae xua piséuriwi pepunapentsiwa tsipéi ichichipa xua jüntemiya wanabarü jinompaewa tsane saya. ¹⁶Yabüyom icha ewatsíwatham tsipae xua jiña pebin pejumekowüntsínexa, dáichitha jopa jumekowüntsiwatsi Nakom. Barichi pebin icha ewatsíwatham tsipae xua jinsheuri pejumekowüntsínexa, dáichitha jopa jumekowüntsiwatsi Nakom.

¹⁷Daxita paxam bewa wüünaeya pajinompáename icha pókotsi koyeneya Nakom paiña nepaka katsixae tsane. Baxua bewa paexanáename xua pokoyene Nakom paka yábara tsiwaba bara bekein paiña séurixi paxéiname ichakuitha bara metha bekein jopa paxeinaem tsane paiña séurixi. Baxuang kuidubang daxita karepaya penakaetutsi bongtha pomonae Nakom pejumekowüntsíwichi. ¹⁸Ichakuitha Nakom waba xua pebin wábatsi pejumekowüntsínexa tsane. Icha bárapo pebin kaena báyatha withábatsi bü saya bárabü tsane baxua. Barichi ichakuitha Nakom waba xua pebin wábatsi pejumekowüntsínexa tsane. Barichi icha barapókotsi pebin kaena báyatha jopa withabichi bü saya bárabü tsane baxua xua jopa pewithabinéxatsi. ¹⁹Bápana Nakom jopa tsita aiñakuichi, metha bekein pebin báyatha withábatsi, ichakuitha metha bekein jopa withabichi. Pokoyene xua peaiñakuí koyene xua jiwi bewa exanaena, jame maisha bewa jiwi jumekowüntsiya exanaena pokotsiwa Nakom itoroba. ²⁰Daxita paxam bewa jüpa paéxana dubenanaebiyáename icha kopiya paichim xua paéxana dubenanaebíyame poxonae kopiya aena Nakom paka waba. ²¹Poxonae Nakom waba pong paxam jíwana pam xua poxónaerü bapoxonae amanaya tanakuitha pía pentakaponaein, bapong jopa bewa yábara nantüéxabi baxuang xua pía saya poponaetsi. Íchitha icha bapong itaküüpatsi xua saya pepoponaewa bü moya saya pópona xua jopa penantawenonaenexa tsane xua amanaya petanakuichiwa ichüing. ²²Barichi ichakuitha pong báyatha éxanatsi xua amanaya petanakuichínexa ichüing bapong jumekowünta Jesús. Bapoxonae bapong náexana pong saya pepoponaein pía pentakaponaein weya, peexanaenexa pokotsiwa Cristo itoroba. Barichi ichakuitha pong saya pepoponaein xua jopa amanaya tanakuichiyo ichüing bapong jumekowünta Jesucristo. Bapoxonae bapong náexana pong Jesús amanaya pía petanakuitinchi tatsi tsipéi éxana pokotsiwa Cristo itoroba. ²³Nakom pin matómatha pákata matómata poxonae Jesús náetotha paka tsitüpa abe paiña neexanáe kuirukoyenein nexa. Paiñaxoba pakópatame xua jiwi ekeicha kaewa paiña nepaka itorobiwa xua abe paiña neexanaewa. ²⁴Tamonae pam daxota paka itoróbatsi xua paiña nejumekowünta dubenanaebiyaenexa Nakom, icha paichim xua pajumekowünta dubenanaebíyame poxonae kopiya Nakom aena paka waba.

²⁵Jopa xeinaeiño po jumetha xua takueikueijejiwa pokoyenewa xua Nakom pong jiwi Pekanamataxeinaein neyaputane éxana xua pomonae piséuriwi penotsiwi nexa. Saya ápara paka tsipáebatsi pokoyeneya xua saya takoutha tanantaxei-naewa. Íchitha paxam paka itaküüpa xua pata tana nejumekowüntsiwam tsipéi Nakom nekata bárapo peyaputáe koyenewa tana neantobexae. ²⁶Xang takoya nantaxeinang xuaje: Bara bewa saya jiwi jeiña enaena. Jopa jitha peenaewa tsane, tsipéi ánoxuae bárapo dapaetha xéinatsi nawita pokoyenein bichokono nákata ayapubé tsounae xua wanapapeichíwatsi. ²⁷Icha jitha páename paiñaxoba pana napunapéntame. Barichi icha pajeiña éname paiñaxoba pasikuiweiwéiname. ²⁸Icha jitha páename jopa ápara bara abe paexanaem. Irü icha yábüyo jitha eka bapowa ápara jopa abe exanaeyo. Dáichitha pomonae jitha peenaewi bichokono taayapubetsi xua pejinompaewa nexa bárapo kae pin nákuathe. Xang ichichipang paka yawénatsi daxota baxuang yábara paka tsipáebatsi xua pákata ayapubeyainwa xua jitha paiña neenáewaxae tsipae.

²⁹Tamonae pam, paxam pomonae irü paiña nejumekowüntsíwixae Jesucristo. Pokoyenewa xua ichichipang tapaka tsipaebíwatsi tsainchi xua meje xua jangje:

“Waxainchi pin dapae jopa xeináe tsainchi po matakeitha poxonae Jesús patopeikaena”, jang. Daxota pomonae jitha ena bewa jinompa dubenanaebiyáe icha be poxonae ichi poxonae xua jinompa dubenanaebiya pomonae jeiña peenaewi xua xaniwaicha Nakom dangweya petanakuichíwatsi. ³⁰Daxita jiwí bewa eenaetsi xua Nakom petanakuita dubenanaebiyáewatsi. Daxota pomonae anthúthütane xua pewekoyeixae bü barapomonae jinompa icha ichi xua jinompa pomonae jopa anthúthütáneyo xua jopa pewekoyeixae xua dangweya penakuichixae Nakom nexa. Barichi pomonae xua bichokono jüntükoyene weiweina bü barapomonae jinompa icha ichi xua jinompa pomonae jopa jüntükoyene weiweinaeyo xua dangweya penakuichixae Nakom nexa. Barichi pomonae xua pekómoka dubenanaebiyaewi bü barapomonae jinompa icha ichi xua jinompa pomonae jopa pekómoka dubenanaebiyaewi xua dangweya penakuichixae Nakom nexa. ³¹Poxonae kataunxuae pajinómpame bárapo kae pin nákuathe jopa paichichipa dubenanaebiyaeinde pokotsiwang xua bárapo kae pin nákuathe xeina. Tspéi pokotsiwa bárapo kae pin nákuathe xeina daxita werawerakaena.

³²Ichichipang xua bichokono jopa paiña neyábara nantaxeinaewa pokotsiwa bárapo kae pin nákuathe xeina xua paka jüntüdeideijéi éxana. Po pebin jeiña eka itakúüpatsi xua pena jüntükoyene eena exanaewa xua petaxanáewatsi Nakom pong jiwí Pekanamataxeinaein. Bárapo koyene Nakom jüntükoyene weiweina éxanatsi. ³³Po pebin jitha eka bapong bichokono yábara éenatsi nawita xua yábara nantaxeina nawita xua pokoyeneya piseuri peewatsiwa xua daxota bapowa piseuri peyábara barü jüntükoyene weiweinaenexa. ³⁴Barapong bárapo naxobe koyenéwabe múxuna yawa nantaxeina. Barichi yábüxi powaxi jeiña ena írürü powaxi jitha ena barompaya tsanaya piáwang yábara nantaxeina. Powa xua bápana jopa jitha ekáe bapowa itakúüpatsi xua pena jüntükoyene eena exanaewa xua petaxanaewa pokoyene Nakom ichichipa pong jiwí Pekanamataxeinaein. Barapowa ichichipa éxana xua Nakom pejüntükoyene weiweina exanáewatsi tsainchi pokotsiwa xua bapowa peexanáewaxae xuano bapowa pokotsiwa penantaxeináewaxae. Íchitha nama powa jitha eka bapowa bichokono yábara éenatsi nawita xua yábara nantaxeina nawita xua pokoyeneya pía piseuri peewatsinexa xua daxota bapong piseuri peyábara bara jüntükoyene weiweinaenexa.

³⁵Baxua paka tsipáebatsi tspéi ichichipang xua tapaka kayawenáewatsi. Ápara jopa paka itorobichi xua jopa paiña nenotsiwa tsane paiña séurixi. Ichichipang xua beta paiña nejinompaewa xua paiña netanakuita dubenanaebiyaenexa Nakom daxita paiña jüntükoyeneintha.

³⁶Pebin irü yábüyo nantaxéinabe xua penapichinexa tsánebe. Íchitha kataunxuae éwatabe xua penapichiwa tsánebe. Bapong ichichipa nawita xua pepichiwa bapowa, irü petsiriwa býatha wei weta. Daxota moya bara bewa napichínabe. Baxua jopa abeyo pokoyene bapongbe éxanabe. ³⁷Íchitha icha pebin itakúüpatsi xua jopa nantawenonaeyo xua pepichinexa pekotsiwa, xuano juntukuru jopa pichi tsane pekotsiwa, bara jemba tsane icha bapong pekotsiwa jopa pichi tsane. Bara saya jeiña ekaena. Bapoxonae bapong bara saya beta éxana. ³⁸Pong pekotsiwa pita beta éxana bekein. Íchitha nama pong jopa jitha ekaeyo bapong jame bichokono beta éxana beyakaincha pong pekotsiwa pita.

³⁹Petsiriwa powa jitha eka powa pejumekowüntsiwa bewa piseuri kuikuinaena poxonae kataunxuae jopa tatüpaetsi piseuri. Icha pía pebin tatüpatsi barapowa

itaküüpatsi xua pichina icha pebin pong saya pejumekowüntsín. ⁴⁰Jame metha bapowa bichokono yatsikaewa jüntükoyene weiweináetsipa icha jopa ekeicha píchipae icha pebin. Bapoxonae bapowa bichokono jüntükoyene weiweináetsipa beyakaincha poxonae pita icha pebin. Baxua nantaxeinang xua saya tanantaxeinaewa. Matáütano írürü barichin jumekowüntang xua Nakom pía Pejumopetünaxü tatsi tana nebarü poponaewa. Daxota neitaküüpa xua yábara tapaebiwa bárapo koyenein.

Meje xua Pablo peyábara paebiwa pexaewa po pexaewa jiwi tajeba ibo nakomüng

8 ¹Ánoxuae ichichipang xua pexaewa yábara tapákata tináewatsi po pexaewa jiwi tajeba ibo nakomüng poxonae jiwi wüünae jainteiba ibo nakomüng. Bekein xaiñéi xua baxuang yábara yaputainchi, dáichitha bárapo peyaputáe koyenewang naka átsaka éxana. Íchitha jame po peántobe koyenewa xéinatsi ápara naka yawena xua beta wanabarü jinompáewatsi. ²Pong xua nantaxeina xua pinae yaputane bichokono bapong ápara taakoibichi pokotsiwa xua bapong bewa yaputaena. ³Icha ichüng Nakom antobetsi bara Nakom jüntükoyene yaputane bapongtha.

⁴Daxota ekeicha pexaewa yábara paka tsipáebatsi, po pexaewa jiwi tajeba ibo nakomüng. Bárapo pexaewa xuya ichamonae xane kotakaya. Waxainchi yaputainchi xua ibo nakomüng jopa xaniwaicha xeinaeyo peayapusüüwa xua ápara saya jiwi pekóbetha fórota. Jame nama yaputainchi pepa Nakom, pong kompa. ⁵Jiwi jumekowünta xua pinae pinmonae jinompa, pomonae nakomüng, itabókotha, bárapo kae pin nakuatheno. Barichino xua pinae pentakaponaewi jinompa itabókotha bárapo kae pin nakuatheno. ⁶Nama waxainchi yaputainchi xua kompa pópona Nakom, pong Waxa. Daxita koyenein Nakom pía xaiña wérena tapichipapoinchi, bara bekein daxita baxuang Cristo fórota Waxa nexa. Matáütano Nakom naka kana éxana pía watanakuichinexa bapong. Barichi meisha kompa pópona pong pepa jiwi Pekanamataxeinaein, bapong Jesucristo. Bapong Jesucristo daxita fórota Nakom nexa. Waxainchi xéinatsi peajüntükoyenesüüwa, po peajüntükoyenesüüwa xua bapong naka kata.

⁷Ichamonae pomonae pejumekowüntsiwi Nakom, jopa yábara yaputaeyo xua ibo nakomüng. Barapomonae áwiya nantaxeina xua ibo nakom peayapusüüwa xeina bekein ánoxuae barapomonae jumekowünta Nakom. Barapomonae báyatha píakui xeina xua pexaewa tajebeiba ibo nakomüng poxonae wüünae jainteiba bárapo ibo nakomüng. Barapomonae abetha nantaxeina jeye: “Icha xáetsipang pewi po pewi ichamonae tajeba ibo nakomüng metha neajüntükoyénebe kana exanáetsipa poxoru bárapo pewi ibo nakomüng piáwa”, jei xua abetha nantaxeina. Bekein barapomonae jumekowünta Nakom íchitha jopa yaputaeyo xua ibo nakomüng pía pexaewa jopa itaküüpaetsi xua ajüntükoyenebé kana éxanatsi barapomonae icha jíwana xáetsipa bárapo ibo nakomüng pía pexaewa. ⁸Pexaewa jopa naka yawenaeyo xua wanajüntükoyene wüünae exanáewatsi xua daxota Nakom wanaka weyataewa tsane. Icha waxainchi nabúnatsi pexaewa jopa naka yawenaeyo xua Nakom tsita jüntükoyene wüünaetsi beyakaincha xua poxonae jopa nabanaetsi. Barichi icha najainbótatsi baxua jopa naka yawenaeyo xua Nakom tsita jüntükoyene wüünaetsi beyakaincha xua poxonae nabúnatsi. ⁹Paka itaküüpa

xua paxáneme xua pokotsiwa paiña neichichipaewa. Icha pajíwana xáneme po pexaewa jiwi tajebe ibo nakomüng, baxua jopa paka tsita abeyo. Íchitha poxonae paéxaname baxua pomonae aiña ünthütong pexeinaewi, aena pejumekowüntsíwixae, barapomonae tsita ayapubetsi. Icha barapomonae xaena bárapo pexaewa paiña neexanáewaxae bekein barapomonae tsítatsi xua abe peexanaewi poxonae xane bárapo ibo nakomüng pía pexaewa tatsi. Daxota paiñaxoba paéxaname pokoyene paiña neichichipaewa. ¹⁰Metha beya paka táetsipa pong pejumekowüntsín poxonae panábaname pexaewa po pexaewa jiwi tajebeiba ibo nakomüng poxonae wüünae jainteiba bárapo ibo nakomüng. Írürü metha beya tsipae bapong naxáetsipa bárapo pexaewa poxonae bapong paka jaintane. Paxam pomonae paiña neyábara yaputaewi pam bárapo pexaewa. Payaputáneme xua bárapo pexaewa ápara jopa itaküüpaetsi xua jiwi ajüntükoyenebé kana éxanatsi. Íchitha pomonae aiña ünthütong pexeinaewi aena pejumekowüntsíwixae jopa yaputaeyo baxua yábara icha paxam paichim. Barapomonae áwiya nantaxeina jeye: “Icha bárapo pexaewa xaein neajüntükoyénebe exanaena”, jei. ¹¹Ichakuitha paxáneme bárapo pexaewa bekein payábara yaputaetham xua jopa abe paka kana exanaeyo. Paiña neexanaexae baxua xua paxáneme bárapo pexaewa daxota bichokono abe paéxaname pongtha pong aiña ünthütong xeina, pong abetha nantaxeina, jeye: “Icha bárapo pexaewa xaein neajüntükoyénebe exanaena”, jei. Daxota bapong payábara nantaxéinare xua ápara irü Cristo tsitüpa bapong icha ichi xua paka tsitüpa. ¹²Pákata jopa abeyo xua poxonae paxáneme bárapo pexaewa. Jame ápara abe paéxaname poxonae írürü xane bárapo pexaewa pomonae aiña ünthütong xeina. Poxonae abe paéxaname barapomonaetha ápara bara irü abe paéxaname Crístotha, tsipéi ápara barapomonae pomonae irü pejumekowüntsíwixae Cristo. ¹³Metha beya xáetsipang pewito pokotsiwito xua ichüng, pong irü pejumekowüntsín yábara nantaxeineiba xua jopa bápana xae po pewi xua jiwi tajebeiba ibo nakomüng. Poxonae bapong nejáintane, bapong irü xane, najüntükoyene taxoba. Bapoxonae abe éxana kana éxanang. Daxota metha wüünáetsipa icha bápana jopa xáetsipaein ekeicha barapókotsi wito xua jopa taexanaewanexa xua bapong abe peexanaewa tsane.

**Meje pokoyenein yábara pomonae Jesús pía peitorobi
jiwi tatsi itaküüpaetsi xua peexanaewa**

9 ¹Tajüntükoyene jopa netsipaebiyo xua abe taexanaewa icha xaein bárapo pexaewa xua jiwi tajebe ibo nakomüng. Ichüng jopa itaküüpaetsi xua yábara tana neitorobiwa bárapo pexaewa tsipéi xang Jesús pía peitorobi jiwi jíwana tatsin. Xang bara yatsikaewa tang Jesús, pong Wanaka namataxeinaein. Paxam pajumekowüntame Jesús dangweya tatanakuichixae pong jiwi Pekanamataxeinaein. ²Ichamonae jopa neyábara tsakeinaeyo xua xang Jesús pía peitorobi jiwi jíwana tatsin. Jame paxam pana neyábara yaputáneme xua xang Jesús pía peitorobi jiwi jíwana tatsin. Paiña nejumekowüntsixae pong jiwi Pekanamataxeinaein ichamonae patsita-itapeiñaxéiname xua xang bara pongxaein Jesús tana neitorobin.

³Báraxua jumenotang pomonaetha, pomonae yábara neyáñnaba xua pinae icha bara metha yatsikaewa pong Jesús tana neitorobin. ⁴Barapomonaetha jangje: Bernabé irü xang bara pana neitaküüpabe xua pata wekobenteibíwabe pokotsiwa

xua jiwa pata nekatsibíwabe pexaewa. Matáütano pana neitakúüpabe xua pata wekobenteibíwabe pokotsiwa paapang xua poxonae patanakuita dukuanabíyangbe Jesús. ⁵Matáütano icha jitha ekaetsipang bara neitakúüpáetsipa xua tabarüponaewa taseuri icha Jesús pía peitorobi jiwa tatsi ichi xua itakúüpatsi xua peexanaewa báraxua xua piséuriwi barü wárapa. Írürü barichi Jesucristo pong jiwa Pekanamataxeinaein pía peweicho jiwa tatsi baxua éxana. Irü Pedro éxana baxua xua piseuri barü pona. ⁶Poxonae ichamona paka tsipaeba Nakom Pejume Diwesi, payawéname barapomona pokotsiwa penantawenonaewa. Paxangbe Bernabé irü xang panakuitangbe paxam nexa poxonae Nakom Pejume Diwesi paka tsipáebatsi. Íchitha jopa pana neyawenaem pokotsiwa panantawenonangbe. Paxangbe bewa panakuichinbe icha penakuitsiwa yawa pata komokaenexa pokotsiwa panantawenonangbe. Meisha paxangbe baxua paexanangbe, ichamona jopa daichiyo. ⁷Soldadomonaepin poxonae ba naba pía pentakaponaein nexa jopa ba natamatomatsiyo pía pexaewa. Pong ba jame itoroba ápata pexaewa pía soldadomona. Barichi pong ba uva pabi nakuita itakúüpatsi xua yawa uvakuéi xaexaepona. Barichirü pong ba vaca yapu-eena bapong ba itakúüpatsi mipi yuyúkapona vaca xua peapaponaenexa. ⁸Saya jopa meisha jiwa yábara nantaxeinaeyo baxua xua pong tanakuita itakúüpatsi yawa xane. Ápara irü Moisés pía peitorobi koyenéwatha baxua yábara páebarü. ⁹Moisés tina po diwesi pía peitorobi koyenéwathaxae, xua jeye: “Poxonae po duwein, pong buey pematawüing xua pexu taxunaunabapona, bapoxonae pebin jopa kopatsiyo xua pekoibo akatsiwa xua jopa pexaenexa. Saya bara kopatsina xua yawa xaeungkuaponaena poxonae kanakuitapona”, jei. Nakom jopa yábara paebiyo baxua xua saya meisha poxoru peyábara nantaxeinaexae buey. Jame saya ápara poxoru peyábara nantaxeinaexae jiwa. ¹⁰Nakom pana nekayábara jütapaeba poxonae buey yábara paeba. Baxua painta éxana xua pata taneyawenaenexa. Pong ba nakobeweta xua üba pábitha, írürü pong xuya nota poxonae naweta, bapongbe xeináenabe pexaewa xua penawetsiwa. ¹¹Paxang paka kuidúbatsi Nakom Pejume Diwesi. Tspíe paka yawénatsi daxota bewa xuya pana nekatsibim pokotsiwa xua panantawénonang xua pata jinompawanexa. ¹²Paxam pakatsíbame pokotsiwa xua nantawénona ichamona pomona Nakom Pejume Diwesi paka kuiduba, íchitha paxang paka yawénatsi beyakaincha xua barapomona paka yawena. Daxota bewa pana nekatsibeibim icha paka wüükeibichípatsi beyakaincha xua pakatsibéibame ichamona.

Íchitha baxua jopa paexanaeíño xua pata kawüükáewatsi. Paxang bichokono paatenein xua jopa pata xeinaexae pokotsiwa xua pata nantawenonaewa pata jinompeibiwana bekein jopa paka wüükeibichi. Jopa paka wüükaetsi tspíe jopa paichipaeíño xua jopa paiña nejumekowüntsiwa Cristo pía pexeíña jume diwesi. Jopa paka wüükaetsi poxoru metha panantaxeinaetsipame xua paxang ápara pata paratixichi paka tsipáebatsi Nakom Pejume Diwesi. ¹³Paxam payaputáneme xua pomona ba nakuita Nakom pin piabotha barapomona ba ápatütsi pexaewa Nakom pin piabotha. Barichirü pomona ba nakuita ichaxota iboto ungkua po ibótotha duwein bexuba xua tauta xua petúxusi exanaenexa Nakom nexa barapomona ba itakúüpatsi xua xuya penabanaewa bárapo duwein xua saya jíwana xane. ¹⁴Barichi Nakom pong jiwa Pekanamataxeinaein jeye: “Pomona inta nakuita xua paeba dubenanébiya takapanenebiyae jume diwesi, barapomona ápatatsi pexaewa xua poxonae ichamona apateiba be pematomakeibíwatsi tspíe barapomona kueikueije

tsurubenanáebiya tajume diwesi”, jei Nakom. ¹⁵Íchitha jopa bápana wüükaeiño jiwi xua tana apatsinexa pexaewa xua be tanamatomatsiwa. Pákata tínatsi xua jopa tapaka wüükáewatsi. Ichichipang xua tatüpaewa tsane pewünaeya xua poxona tapaka wüükáewatsi tsainchi. Bichokono jüntükoyene weiweingang poxona tapaka tsipaebíwatsi Nakom Pejume Diwesi. Yáitama jopa pana nekatsibeibim xua be pata tanematomakébiwam, daxota atsakiya paka tsipaébatsi.

¹⁶Jopa neitaküüpaeyo xua átsakang xua takueikueijeixae Nakom pía pekapanenebiyáe jume diwesi. Nakom neitoroba xua bewa takueikueijeixa tsane bárapo diwesi. ¡Íchitha xang tsokuaein tsipae icha jopa kueikueijang tsipae bárapo diwesi! ¹⁷Bekein icha Nakom jopa neitorobi chipae xua saya xang takoutha tsipaebaponáetsipang Jesucristo pía pexeña diwesi néxata ewatsipang xua jiwi tanematomatsinexa takueikueijeixae bárapo diwesi. Íchitha jame tsipaebaponang pexeña jume diwesi Nakom tana neitoróbixae. Jumekowüntaponang be pókotsi koyeneya Nakom neitorobapona. ¹⁸Daxota xua be tanematomatsiwa ápara xua poxona jüntükoyene weiweingang tapaka tsipaebixaetsi bárapo Nakom Pejume Diwesi bekein metha jopa pana katsibeibi chipaem xua patanematomatsiwam, matáütano metha poxona bara tapanekatsibeibichipaem pokotsiwa tapanematomatsiwam. Paxam jopa pana nekatsim pokotsiwa be patanematomatsiwam. Jopa paka wüükaetsi bekein bara neitaküüpa xua tapaka wüükáewatsi pókotsi matoma bewa panekatsibeibim. Barapókotsi matoma jiwi bewa katsina pomonaetha, pomona Nakom Pejume Diwesi tsipaébatsi xua pejinompeibiwa tsane.

¹⁹Bekein jopa bewa amanaya tanakuichin tsane ichüng, íchitha takoutha nakana éxanang be pong amanaya tanakuichin daxita jiwi nexa. Bárapo koyene éxanang xua pinmonae pejumekowüntsineha Cristo. ²⁰Poxona póponang judiomona pía xantha tatsi, éxana dukuanaebiyang icha be bárapo judiomona ichi xua éxana dubenanáebiya pokotsiwa Moisés itoroba pía peitorobi koyenéwatha. Barapókotsi koyenein éxanang xua Moisés itoroba, bara bekein jopa bewa exanaein tsane. Saya éxanang tsipéi ichichipang xua tayawenaewa xua barapomona pejumekowüntsineha Cristo Jesús. ²¹Poxona póponang pexantha tatsi pomona jopa exanaeyo pokotsiwa Moisés pía peitorobi koyenéwatha itoroba, bapoxona pópona dukuanaebiyang icha barapomona ichi xua jinompa dubenanáebiya. Bapoxona jopa exanaeiño pokotsiwa Moisés pía peitorobi koyenéwatha itoroba, xua barapomona tayawenaenexa, xua pejumekowüntsiwanexa Jesús. Jopa paka tsipaebichi xua tajumenaitematsiwa Nakom xua tana neitorobiwa. Jame bara éxanang pokotsiwa Cristo neitoroba. ²²Poxona póponang pexantha tatsi pomona jüntükoyene faefaena Nakomtha xua pejumekowüntsiwa xua aena pejumekowüntsixae bapoxona éxana dukuanaebiyang icha barapomona ichi xua éxana dubenanáebiya tayawenaenexa xua ekeicha bichokono mataropeicha pejumekowüntsiwanexa Jesucristo. Daxita karepaya jíwitha peitütha poponeibang, poxona be pókotsi koyeneya jinompeiba bárapo jiwi tayawenaenexa xua ekeicha bichokono mataropeicha pejumekowünteibinexa Jesucristo. ²³Daxita baxuang éxana dukuanaebeibang takueikueijéi tsaibinexa Nakom pía pekapanenebiyáe jume diwesi, matáütano tsipéi ichichipang xua tajüntükoyene weiweinaewa tsane poxona barapomona jumekowüntsina Jesucristo.

²⁴Paxam payaputáneme poxona jiwi ba námtotha kuináepona saya kaein meisha kopiya patopa. Bapong ba kátatsi pokotsiwa pematomatsíwatsi kopiya

pepatopaexae xua beta kuináepona. Barapókotsi jüta koyeneya ichi, beta pata exanaponde Jesucristo pía petanakuichiwa tatsi xua paiña nepaka katsibinexa xua paiña nepaka matomakaewang. ²⁵Pomona ba xua nakuiwüünaeta xua pena-xenakaenexa ichawa jopa exanaeyo pokotsiwa taayapubetsi poxona pekuinae-ponaenexa. Barapomona ba baxua éxana pía xéinatsi pokotsiwa pekuiyábara matomakáewatsi. Bárapo pentoma noxutepa pokotsiwa xua saya kaena naxuba xua werawéraka. Nama waxainchi beta exanapoinchi Nakom pía petanakuichiwa tatsi, xua Nakom wanaka katsibiwa tsane pokotsiwa wanaka yábara kuimato-makaewa, pokotsiwa xua ataya ayapusúü xua jopa werawerakaeyo. ²⁶Dangweya exanaponeibang Nakom pía petanakuichiwa tatsi be poxona xua bichoina kuin-aenonang xua tatoxeincha patopaewa. Jopa exanaeiño icha ichi xua pong naitakueinchiya iraba. ²⁷Íchitha nama seikayiya éxanang xua tapepong dangweya takoya naitorobang xua daxota jopa abe exanaeiño. Tapepong itorobang xua tana nejumekowüntsiwa xua peexanaewa pokotsiwa itorobang. Antüyapusüüya tana-kuitang Nakom tajunuwixae xua jopa beta taexanaewa xua bekein bara ichamona kuidubithang bárapo koyenein. Icha jopa beta exanaein chipae Nakom jopa tsita wüünaein chipae xua daxota taneitawetsiwa tsipae.

Meje xua Pablo muxuweta pomona wüünae jainta ibo nakomüing

10 ¹Tamona pam, paxam pomona irü paiña nejumekowüntsíwixae Jesucristo. Ichichipang xua paiña neyaputaewa tsane pokoyene xua poxona waámo susato jíwitha pekana exanáewatsi. Barapomona Egipto nakua weya pona. Bapoxona tsakinaebowa matatsún dubenapoinchi. Bárapo tsakinaebowa barapomona matakapoinchi xua ichaxota ichichipa peponaewa barapomona. Daxita barapomona icha muxunene beepa-üngkabábiya po pin pukua pewüing Mar Rojo wüing pukua. Bárapo pin bicheito epataüta iya pona xua poxona Nakom tsewa taexaniya xua be namto taexaniya. ²Barapomona tsakinaebowa be kaemona matatsún dubenapoinchi. Matáüta barapomona be kaemona Mar Rojo wüing pukua epataüta iya pona. Barapoxona be kaemona náexana Moiestha xua Moisés pematakapanaenexa barapomona. Barapomona barapókotsi jüta koyeneya éxana icha be poxona jintong ichi xua poxona bautisábatsi ménetha kaemona penaexanaenexa Crístotha, xua Cristo pekanamata-exanaexae bapongtha. ³Daxita barapomona xane po pexaewa Nakom taitorobika itaboko wétsika. ⁴Yáwano barapomona apa po mera xua Cristo itoroba ira xuépana susato tsúrukuae nákuatha. Bárapo mera ibótong weya mene píchapa. Cristo bárapo mera ápatapona poxona yanta xua barapomona yántatsi. ⁵Dáichitha pin bicheitomona xua barapomona jíwana jopa exanaeyo pokotsiwa Nakom ichichipa. Daxota Nakom kópata xua barapomona bara pejíwana werapaponaewa tsane bárapo ira xuépana susato tsúrukuae nákuatha.

⁶Baxua éxana xua nákata yábara kanaüta jütsiya éxana. Jopa bewa waichichipaewa tsainchi pokotsiwa jopa nákata wüünaeyo xua icha barapomona ichi poxona piakoutha abe nata éxana. ⁷Daxota jopa bewa wüünae pajainchim ibo nakomüing icha be barapomona jíwana ichi. Barapomona wüünae jainta ibo nakomüing. Nakom Pejume Diwésitha barapomona yábara jeichi: “Barapomona ena xua pexaenexa yawa xua peapaenexa. Bapoxona yatsikaewa barapomona nawiraba ibo nakom tsita nawirábatsi”, jei Nakom Pejume Diwésitha.

⁸Waxainchi jopa bewa exanaetsi xua nasikuiweiweina éxanatsi icha be barapomona-e jíwana ichi. Barapomona-e jíwana nasikuí éxana yabüxitha xua jopa piséurixi. Daxota kaentakeitha veintitrés mil pebiwi wérapa abe peexanaexae. ⁹Matáütano jopa bewa najüntükoyene jüjüta exanaetsi Nakomtha xua wanaka barü anaepa-naenexa, icha barapomona-e jíwana ichi. Barapomona-e najüntükoyene jüjüta éxana Nakomtha. Daxota Nakom kópata xua barapomona-e wérapa poxona-e jomong siné-batsi barapomona-e. ¹⁰Jopa bewa Nakom anaepanaya barü paebichi, icha be barapomona-e jíwana ichi. Barapomona-e Nakom anaepanaya barü páebatsi, daxota Nakom kópata xua barapomona-e werawéraka poxona-e matatsunpin juteba po matatsunpin jiwi pejutebin.

¹¹Nakom éxana daxita baxuang barapomonaetha, xua wanaka muxuweta exa-naenexa xua jopa waraichiwanexa icha barapomona-e ichi. Moisés yábara tina barapomona-e xua yaputane wanaka exanaewa xua bara nama imoxoyo bárapo nakue werawerakaena. ¹²Daxota tsipaebang pong paxam jíwana pam pong xua nayábara nantaxeina xua pinae bichokono pejumekowüntsixae peajüntükoyene-süüwa xeina Nakomtha. Jangje: “Dota jiñaxoba abe éxaname. Poxoru icha metha nantaxeinaetsípame xua jopa abe exanaem, bapoxona-e metha abe exanaetsípame”, jang. ¹³Jopa meisha paxam kaurimona-e pía pentakapona-ein tatsi paka jüntükoyene jüjütsiyo. Barápara irü ichamona-e pomona-e pejumekowüntsiwi barichichi jüntükoyene jüjútatsi abe peexanaenexa. Paxam paka itaküüpa xua pajüntükoyene amanáyabame bárapo kaurimona-e pía pentakapona-ein tatsi. Báraxua paéxaname icha barapomona-e ichi xua jüntükoyene amanáyaba bárapo kaurimona-e pía pentakapona-eintha tatsi. Dáichitha paka itaküüpa xua payábara jumekowüntame Nakom xua bara bapong paka yawenaena. Nakom jopa kopatsiyo xua kaurimona-e pía pentakapona-ein tatsi bichokono paka jüntükoyene jüjütsina xua pokotsiwa bichokono pákata ayapubé xua daxota abe paiña neexanaewa tsane. Íchitha poxona-e kaurimona-e pía pentakapona-ein tatsi paka jüntükoyene jüjüta, Nakom paka yawenaena xua paiña nerüküpaewa bapong weya xua daxota jopa abe paiña neexanaenexa.

¹⁴Tamona-e pam paxam pomona-e irü paiña nejumekowüntsíwixae Jesucristo. Paxam pomona-e tapaka kaántobe jíwichi pam. Paiñaxoba wüünae pajáintame ibo nakomüng. ¹⁵Paka tsipáebatsi paxam pomona-e paiña neyaputáe jiwi pam. Paxam payaputáneme xua paiña neyábara nantaxeinaewa pokotsiwa paka tsipáebatsi icha metha bara xaniwaicha páebang. ¹⁶Waxainchi nakaetútatsi wayábara jünta-nainaenexa xua Cristo wanaka tsitüpaewa náetotha. Bapoxona-e ápatsi vino mera yawa xainchi pan. Bárapo vino mera Cristo pía pejana tatsi yábara kaunútatsi. Matáütano bárapo pan Cristo pía pepong tatsi yábara kaunútatsi. Poxona-e ápatsi bárapo vino mera Nakom tsipáebatsi bárapo vino mera nexa po vino mera tsijuntu eka korotíyotha. Jeichichi: “Maisha Nakom painta pexeíña koyene éxaname”, jeichichi. Bapoxona-e be kaemona-e naexainchi Crístotha waapaexae bárapo vino mera. Barichi poxona-e pan jánakatsi be kaemona-e naexainchi Crístotha waxaexae bárapo pan. ¹⁷Bekein waxainchi pinmonaetsi xua kae pan nabarü xainchi, íchitha waxainchi be kaemonaetsi bapong Crístotha tsipéi bara kae pan nabarü xainchi.

¹⁸Payábara nantaxéinare xua judiomona-e pomona-e Israel nakuamonaepiwi. Barapomona-e judiomona-e xane po duwein ichamona-e tauta xua petúxusi exa-naewa Nakom nexa. Bapoxona-e barapomona-e be kaemona-e náexana Nakomtha.

¹⁹Jopa ápara paka tsipaebichi xua ibo nakom xeina peajüntüyapusüüwa. Matáütano jopa paka tsipaebichi xua powi jiwi tajeba ibo nakomüing aiñakuí barapowi beyakaincha xua icha pewi. ²⁰Paka tsipáebatsi xua jiwi tajeba pewi ibo nakomüing pomonae jopa yaputaeyo Nakom. Barapomonae tajeba bárapo pewi kaurimonae. Jopa ápara tajebiyó Nakom. Jopa ichichipaeiño xua kaemonae pana naexáneme kaurimonae pijimonaetha. Metha báraxua paexanaetsípame poxonae panabarü xáneme pomonae nakaetuta pexaenexa powi jiwi tajeba ibo nakomüing. ²¹Paxam panábaname pong jiwi Pekanamataxeinaein pía penabanaethopáewatha tatsi yawa xua paapameno. Jopa paka itaküüpaeyo xua panábaname yawa xua paapameno ichaxota exanempa kauri pía kuikoyene pomonae jopa pejumekowüntsiwi.

²²Icha waxainchi wüünae jáintatsi kaurimonae poxonae xainchi po pewi jiwi tajeba ibo nakom, bapoxonae waxainchi éxanatsi xua pong jiwi Pekanamataxeinaein naka kaseba pía wanaka asíwixae. Waxainchi jopa xéinatsi po peyapusüüwa xua bichokono dangwéi xua beyakaincha Nakom.

Meje xua Pablo yábara paeba xua bewa jiwi yábara nantaxeinae pewi poxonae xane

²³Báraxua bekein xaiñéi poxonae jintong jeye: “Neitaküüpa xua taexanaewa pokotsiwa ichichipang”, jei bapong. Dáichitha jopa daxita nákata wüünaeyo xua pokotsiwa éxanatsi. Bekein waxainchi naka itaküüpa xua waéxana dubenanaebiyaewa pokotsiwa xua waichichipáewatsi. Dáichitha daxita baxuang jopa naka yawenaeyo xua wajumekowünta dubenanaebiyaewa Jesús. ²⁴Jopa bewa payábara nantaxeinaem xua saya paiñakoutha nexa xua paiña nenayawenaenexam. Jame bewa payábara nantaxeinaem xua ápara irü ichamonae paiña neyawenaenéxarü.

²⁵Po pewi pakomokéibame powi jiwi kaenaeta pekaenaetsi bongtha, paiñaxoba matha payábara yaiñabéibame bárapo pewi. Jopa payaiñabinde icha metha xua ápara powi báyatha jiwi tajeba ibo nakom. Jame bara saya itatemaya paxáibare. Xain bapoxonae paiña jüntükoyene jopa paka tsipaebiyó xua ápara abe paéxaname. ²⁶Nakom Pejume Diwésitha jeye: “Bárapo kae pin nakue yawa xua xuang xeina bárapo kae pin nákuathe Nakom pong Pekanamataxeinaein bapong piáwang”, jei Nakom Pejume Diwésitha. ²⁷Poxonae jintong pong jopa pejumekowüntsin Jesús, paka tsiwaba pexaewa xua pía paka barü xaetsi, icha paichichípame moya pana napunaxaema. Paxaema pokotsiwa xua pexaethopáewatha bobena. Jopa payábara yaiñabinde bárapo pexaewa icha metha bárapo pewi ibo nakom wérena kápona. Xain bapoxonae paiña jüntükoyene jopa paka tsipaebiyó xua ápara abe paéxaname. ²⁸Ichakuitha metha ichüing paka tsipaebichipa, xua jeye: “Ápara bárapo pewi jiwi tajeba ibo nakom poxonae wüünae jainta bárapo ibo nakomtha”, jei bapong. Bapoxonae paiñaxoba paxáneme bárapo pewito. Tsipéi icha bárapo pewi pajiwana xáename abe éxana pakana éxaname pongtha pong xua yábara paka tsipaeba bárapo pewi. Poxoru ichamonae pomonae pejumekowüntsiwi Nakom, yábara nantaxeina xua ápara jiwi abe éxana icha barapowi xane. Daxota bapong junuwa xua abe éxana icha pexaewa tsane bárapo pewito. Icha jopa baxua peitütha paexanaem tsane bapoxonae bapong jüntükoyene wüünaeya poponaena Nakomtha. ²⁹Yábara paka tsipáebatsi pokoyene xua ichüing yábara nantaxeina bárapo pewi pejüntükoyenéwatha. Jopa ápara yábara paka tsipaebichi pokoyene paxam xua payábara nantaxéiname bárapo pewi paiña jüntükoyenéwatha.

Íchitha metha ichüing neyainábichipa, jei tsipae: “¿Eta pokotsiwa metha nanta-wénonang xua taexanaewa pokotsiwa ichüing yábara nantaxeina bárapo pewi?” jei tsipae. ³⁰Ekeicha metha bapong jei tsipae: “Poxonae pexaewa nábanang Nakomtha tsipaebang bárapo pexaewa nexa, jangje: Nakom, maisha jüntükoyene weiweinang xua bárapo pexaewa tanekatsiwam, jang. Icha baxua éxanang ¿eta pokotsiwa metha néxata ichamonae abe neyábara paeba poxonae xang bárapo pexaewe?” jei tsipae. ³¹Yábara paka tsipáebatsi báraxuang daxita xua xuang paiña neapaewang yawa daxita xua xuang paiña nenabanaewang yawa daxita icha koyeneinno xua xuang paiña neexanaewang daxita barapókotsi koyenein beta paexanéibare xua daxota poxonae jiwi paka kuitaibina bapoxonae jiwi wüünae jainteibina Nakom. ³²Jopa paexanaeinde pokotsiwa xua abe paéxaname xua pokotsiwa daxota ichamonae jüpa exanaena. Báraxua jopa paexanaeinde judiomonaetha, irü pomonaetha, pomonae jopa judiomonae naexanaeyo, irü pomonaetha, pomonae Nakom pejumekowüntsíwichi jíwanamonae. ³³Xang ichichipang beta taexanaewa pokoyene xua ichamonae tsita wüünaetsi. Jopa exanaeíño pokotsiwa xua takoutha taichichipaewa. Saya meisha beta éxanang pokoyene ichamonae tsita wüünaetsi xua pokoyenéwatha barapomonae peyawenaenéxatsi xua pekapanenebiyaenéxatsi abe pía peéxanae kuirukoyenein weya.

11 ¹Paexanaponde icha be pókotsi koyeneya ichin poxonae exanaponang, tsi-péi éxanang pokotsiwa Cristo exanapona.

Meje xua Pablo yábüxi yábara paeba powaxi poxonae ena penakaetutsibotha xua poxonae wüünae jainta Nakom

²Tamonae pam paka weyatainchi tsipéi paneyábara nantaxeinapóname xua daxita koyeneyatha. Paxam paéxana dubenanaebíyame pokotsiwa xua paka kuidúbatsi. ³Íchitha ichichipang xua paiña neyaputaewa xua Cristo kanamataxeina daxita pebíwitha. Barichirü daxita pebiwi barompaya piséuriwi kanamataxeina. Barichi Nakom Cristo kanamataxéinatsi. ⁴Icha pebin nantasipa ákata poxonae Nakomtha tsipaeba xuano poxonae kueikueijeji Nakom Pejume Diwesi, barapong Cristo jopa barükui-iturajinaetsi. Saya piakoutha aiñakuí nakana éxana. ⁵Jame icha yábüyo jopa nantasipa akatsiyo xua poxonae kueikueijeji Nakom Pejume Diwesi, xuano poxonae Nakomtha tsipaeba, bapowa pía pebin jopa barükui-iturajinaeyo poxonae jopa nantasipa akatsiyo paparúwatha. Bapowa tsita itapeñaxeina xua jopa exanaeyo pokotsiwa pía pebin itoróbatsi. Báraxua jüpa icha be poxonae ichi xua daxita matanasífbatsi abe peexanaexae. ⁶Icha jopa yábüyo nantasipa akatsiyo bewa barapowa daxita nantasibina. Íchitha icha barapowa aura xua penantasibiwa daxota bewa nanta-akatsina. ⁷Poxonae Nakom éxana pebin bárapo pebin Nakom kuijúpatsi. Daxota bárapo pebiwi irü xeina bárapo pekanamataxeinae koyenewa pokoyenewa Nakom xeina. Pebin jopa bewa nantasipa akatsina poxonae Nakomtha tsipaeba, xuano poxonae Nakom Pejume Diwesi kueikueijeji xua daxota pebarükui-iturajinaenexa xua Nakom pebarükui-iturajinaenéxatsi. Íchitha yábüyo bewa barükui-iturajinae pía pebin, tsipéi pía pebin kanamataxéinatsi. ⁸Poxonae Nakom fórota jopa Nakom exanaeyo pebin yábüyo weya. Saya jame Nakom éxana yábüyo pebin pexaiña weya tatsi. ⁹Nakom jopa forotsiyo xua pebin yábüyo tsiéxanatsi. Jame Nakom

fórota xua yábüyo pebin tsiéxanatsi. ¹⁰Daxota yábüyo bewa nanta-akatsina penakaetutsibotha. Bapoxonae bapowa tsita itapeiñaxeina matatsunpiwimonaetha xua bapowa barükui-iturajina pía pebin pekanamataxeinaexaetsi. ¹¹Dáichitha pomonae Nakom pejumekowüntsíwixae, pebin nantawénona yábüyo, irü yábüyo nantawénona pebin. ¹²Bekein Nakom éxana yábüyo pebin peyene weya tatsi, íchitha pebiwi ba nowaeuménapona yábüxi weya. Bárapo naxobe koyenéwabe Nakom fórota, pebin yawa yábüyo.

¹³Panantaxéinare xua icha bara xaniwaicha xua yábüyo jopa nanta-akatsiyo poxonae Nakomtha tsipaeba penakaetutsibotha xua poxonae wüünae pejainchinexa Nakom. ¹⁴Wakuikoyenewa ba naka yaputane éxana xua pebíwichi jopa bewa antanapiya naexanaetsi. Baxota ba aura naka éxana. ¹⁵Barichirü wakuikoyenewa ba naka yaputane éxana xua yábüxi wüünae éxana poxonae nantanakópaba xua antanapiya. Bapoxonae yábüyo pía pentanangtha nantasipa ákata. ¹⁶Pong ichichipa xua yábara pana nejumematsontsónoba baxuang, pajangje bapongtha: “Bárapo koyene pakuidubang. Matáüta daxita penakaetutsi bongmonae jiwi pomonae Nakom pejumekowüntsiwi pebüriya pana nabarü jüpaya nantaxeinang tsipéi icha koyene jopa payaputaéiño”, pajang.

**Meje xua Pablo yábara paeba xua abe éxana pomonae
pejumekowüntsiwi Nakom poxonae naiña xane po penabanaewa
kayábara nantaxeina xua Jesús pía petsitüpaewa jiwi**

¹⁷Pákata tñatsi ánoxuae xua pokoyenein yábara xua jopa tana neitaküüpaewa xua tapaka tsipaebíwatsi xua beta paiña neexanaewa. Bekein pana nabarü nakaetútame íchitha paiña jüntükoyene jopa paka kana exanaeyo xua paayapusúü tsoponaem. Maisha ápara abe paéxaname. ¹⁸Kopiya matha paka tsipáebatsi jangje: “Ichüng netsipaeba xua pinae poxonae pana nabarü nakaetútame, wüünae paiña nejainchinexa Nakom, pinae aiñamonaein tsanaya pana natsábame. Bapoxonae pinae pana najumematsontsónobame”, jang. Nantaxeinang xua ápara xaiñéi pokoyene ichamonae netsipaeba xua paka yábara paeba. ¹⁹¡Moya aiña bicheitong pana naexande xain bapoxonae pana najumematsontsónobame! ¡Xain bapoxonae ichamonae tane xua ichamonae petanéxatsi pomonae jopa irü najumematsontsonobiyo pomonae xua beta peexanaewi! ²⁰Bekein pana nabarü nakaetutéibame xua paiña xaenexa pexaewa poxonae paka yábara nantaxéiname xua pong jiwi Pekanamataxeinaein paka tsitüpa, dáichitha saya paxáneme. Ápara jopa paka yábara nantaxeinaem bárapo koyene. ²¹Daxita paxam karepaya barompaya pía pexaewa naiña xane. Jopa pawünae ewateibim ichamonae xua paiña nenabarü xaenexa. Daxota ichamonae jainpa pomonae kotakaya pata. Ichamonae bichokono tonsana beya poxonae naküüpa éxana peátsaxae merang xua apa poxonae múxuna xane pexaewa. ²²Ápara paxéiname paiña bong ichaxota paka itaküüpa xua pana napenajúbame. Báraxua be pa-aicha-xaibim pomonae Nakom pejumekowüntsíwichi pomonae penakaetutsibomonae jiwi poxonae baxua paéxaname. Aura paéxaname pomonaetha, pomonae peakopeibiwi pomonae jopa itaküüpaetsi xua kápana pexaewa, pomonae kotakaya pepatsixae. ¿Eta paka yábara jumichikuáe tsainchi? Paka yábara jei tsainchi: ¿Bara beta wüünaeya paéxaname jang tsane? ¡Jume! Baxua jopa neitaküüpaeyo xua tapaka yábara paebíwatsi.

**Meje xua Pablo yábara kuiduba pexaewa po pexaewa
poxonae jiwi kayábara nantaxeina Jesús**

(Mt 26.26-29; Mr 14.22-25; Lc 22.14-20)

²³Pokoyene xua paka kuidúbatsi baxua kopiya Nakom nekuiduba. Paka jeichi: Po merawitha Jesús kaenáetatsi pong jiwi Pekanamataxeinaein, bárapo merawitha Jesús pan pita pekóbetha. ²⁴Poxonae najumeweta xua paxa tsipaeba xua jei: “Axa maisha jüntükoyene weiweinang xua tanekatsiwam pan”, jei, bapoxonae pan epajánaka. Bapong barái pijimonae jeye: “Panore pan yawa paxáemano. Bárapo pan neyábara kaunuta xua tapepong. Tapepong inta átene exanaeinchi paiña nepaka kayawenaenexa tsane xua paiña tanejumekowüntsíwaxaem tsane. Poxonae baxua paexanéibame xua paxáibame panekayábara jüntanainéibare paiña jüntükoyenéwatha”, jei Jesús xua pijimonae tsipaeba. ²⁵Barichiya éxana poxonae najainweta. Bapoxonae korótiyo pita pekóbetha yawa jeye: “Pena petsiwüünae muxudutsi koyenewa paka tsipáebatsi. Bárapo uva mera po mera xua korotíyotha tsijuntu eka, bárapo uva mera yábara kaunuta tajana xua jana othoparenaein poxonae tüpaein. Bárapo jana tsita itapeñaxeinaena xua jiwi pinmonae yábara jüntemai-naein abe pía peéxanae kuirukoyenein tatsi. Daxita koyeneintha poxonae baxua paexanéibame xua paapéibame bárapo uva mera, bapoxonae panekayábara jüntanainéibare paiña jüntükoyenéwatha xua tapaka katsitüpaewaxaetsi”, jei Jesús, xua pijimonae tsipaeba. ²⁶Daxita tsaibi poxonae paxáibame pan yawa paapeibameno barapókotsi uva mera xua tsijuntu eka korotíyotha, jiwi patsita-itapeñaxéiname xua Cristo pakuiyábara jüntanáiname xua paiña nepaka tsitüpaewa. Baxua paexanéibare beya poxonae ekeicha Jesús patopáetsika, pong jiwi Pekanamataxeinaein.

**Meje yábara xua poxonae jiwi bewa beta exanáe xua poxonae
xane po pexaewa poxonae kayábara nantaxéinatsi Jesús**

²⁷Pong xane bárapo pan xuano apa bárapo uva mera xua tsijuntu eka korotíyotha xua Jesucristo kayábara nantaxéinatsi, icha bapong jopa jüntükoyene wüünaeyo Nakomtha, ápara abe éxana Crístotha. Bapoxonae bapong Nakom tsita xéinatsi xua penatsikuentsiwa xua abe peexanaexae Cristo pepongtha tatsi xuano xua pía pejánathano tatsi tsipéi bapong jopa barükui-iturajinaeyo bárapo koyene. ²⁸Daxota daxita jiwi bewa barompaya matha pewünaeya najüntükoyene kayábara nantaxeinaena. Bárapo jiwi bewa nantaxeinaena icha metha bara wüünaeya éxana beya poxonae xaena bárapo pan xuano poxonae apa bárapo uva mera xua tsijuntu eka korotíyotha. ²⁹Pong xane bárapo pan xuano xua apa bárapo uva mera xua tsijuntu eka korotíyotha xua Jesucristo peyábara xaenexa ichakuitha bapong natsikuenta Nakomtha abe peexanaexae. Bapong natsikuenta Nakomtha tsipéi matha jopa yábara nantaxeinaeyo bárapo pexaewa xua ápara bichokono aiñakuí koyenewa xaina beyakaincha icha pexaewa. ³⁰Daxota pinmonae pajíwana atenem xuano jopa xeinaeyo peajüntüyapusüüwa. Daxota ichamonae báyatha pajíwana wérapame. ³¹Poxonae ápatsi uva mera xuano poxonae xainchi pan po pexaewa poxonae Cristo kayábara nantaxéinatsi, matha bewa najüntükoyene kayábara nantaxeinaetsi, xua icha metha bara wüünae waexanaewa. Bapoxonae xain Nakom jopa naka átene exanaeyo xua wanatsikuentsíwaxae xua abe waexanaexae. ³²Bekein baxua Nakom nákata éxana wanaka kuidubinexa xua ekeicha

wüünaeya waexanaenexa tsane. Nakom baxua nákata exanaena xua jopa wanaka yábara jeinexa: “Paxam abe paéxaname icha ichi pomonae jinompa bárapo kae pin nákuathe pomonae bichokono abe peexanaewi, pomonae jopa pejumekowüntsíwi”, xua jopa pewanakayábara jeinexa.

³³Daxota tamonae pam poxonae pana nakaetútame xua paiña nabarü xaenexa po pexaewa xua poxonae Jesucristo kayábara nantaxéinatsi, matha abü ichamonae paewatéibare. ³⁴Icha ichüing jainpa bü bapong matha piabotha xane pewünaeya xua poxonae napatopaena penakaetutsibotha xua poxonae wüünae jainta Nakom. Bapoxonae itakúüpatsi xua bapong penaxaewa po pexaewa poxonae Jesucristo kayábara nantaxéinatsi. Bapoxonae Nakom jopa péraxa júbí tsane bapong xua abe peexanaexae poxonae nanakaetuta pomonaetha, pomonae Nakom pejumekowüntsíwichi. Poxonae paka siwaponana ponaeinchi xua tapaka taenexa tsainchi, bapoxonae paka kuidubinchi pokotsiwang xua yábara pana neyáíñabame.

**Meje xua pejüntükuikoyenein yábara po pejüntükoeyenein
Nakom pía Pejumopetünaxü tatsi amanaya kata daxita karepaya
pomonaetha, pomonae Nakom pejumekowüntsíwichi**

12¹Tamonae pam, paxam pomonae irü paiña nejumekowüntsíwixae Jesucristo. Yábara paka tsipáebatsi pokoyene ichichipang xua paiña neyaputaewa. Nakom pía Pejumopetünaxü tatsi kata pejüntükuikoyenein daxita barompaya karepaya pomonaetha, pomonae Nakom pejumekowüntsíwichi.

²Paxam payaputáneme xua abe paéxaname pewünaeya poxonae pajumekowüntame. Pakópatame xua bara ichamonae ichawa beya paka matakápona xua wüünae paiña nejainchinexa ibo nakomüing, po ibo nakomüing jopa kueikueijeiyó.

³Daxota ichichipang xua paiña neyaputaewa tsane xua poxonae jeye: Dapokotsin aibi, pong itakúüpatsi xua jeye: “Jesús ápara jopa Nakom Pexanto tatsi”, xua poxonae jei, icha bapong xeina Nakom pía Pejumopetünaxü tatsi pía peayapusüü itorobi koyenewa tatsi. Barichi dapokotsin aibi pong itakúüpatsi xua poxonae jeye: “Bapong Jesús ápara pong jiwi Pekanamataxeinaein”, xua poxonae jei, icha bapong jopa xeinaeyo Nakom pía Pejumopetünaxü tatsi pía peayapusüü itorobi koyenewa tatsi.

⁴Jiwi itakúüpatsi xua daxita karepaya barompaya pexeinaewa aiña jüntükui-koyenein pomonae pejumekowüntsíwixae Nakom. Bárapo jüntükui-koyenein jopa nakuikoyenejüpaeyo. Bekein daxita jiwi xeina bárapo koyenein dáichitha bara saya kompa pong pekatsixae ápara bapong Nakom pía Pejumopetünaxü tatsi.

⁵Jiwi pomonae pejumekowüntsíwixae Nakom, itakúüpatsi xua daxita karepaya barompaya pexeinaewa aiña petanakuichi koyenewang Nakom nexa. Íchitha meisha saya bapong Nakom kompa pong jiwi Pekanamataxeinaein daxítatsi waxainchi tana-kuítatsi bapong.

⁶Jiwi pomonae Nakom pejumekowüntsíwixae itakúüpatsi xua pexeinaewa aiñakuí koyenein pokoyeneiña xua Nakom petanakuichíwatsi. Íchitha daxita bárapo koyenein jopa nakuikoyenejüpaeyo. Saya kompa Nakom pong daxita bárapo jiwi kana éxanatsi xua peexanaewa daxitang bárapo koyenéiñatha.

⁷Nakom pía Pejumopetünaxü tatsi tsita itapeiñaxeina Nakom pía peayapusüü itorobiwa tatsi. Baxua éxana poxonae Nakom barompaya naka kana éxana xua beta waexanaewa wayawenaenexa tsane daxita jíwitha.

⁸Ichamonae jíwanatha, Nakom pía Pejumopetünaxü tatsi kata pejüntükuikoyenewa xua pokoyene barapomonae

pejüntükoyénetha beta yaputane xua peexanaenexa pokotsiwa pekueikuejeiwa ichamonaetha. Barichi ichamonaé jíwanatha Nakom pía Pejumopetünaxü tatsi kata pejüntükuikoyenewa pokoyene xua beta pekuidubiwa pokoyene peyaputaewa xua dangwéi yábara yaputane pekana exanaenexa xua ichamonaé yábara yaputane pekana exanaenéxatsi. ⁹Ichamonaé jíwanatha Nakom pía Pejumopetünaxü tatsi kata peyábara jumekowüntsí koyenewa xua daxota bapomonaé nantaxeína xua bara itakúüpatssi xua peexanaewa daxita koyenein xua Nakom itoroba xua bapomonaé peyawenaexaetsi Nakom. Barichi ichamonaé jíwanatha Nakom pía Pejumopetünaxü tatsi kata xua pokoyenéwatha peatenewi axaibi peexanáewatsi. ¹⁰Ichamonaé jíwanatha, Nakom pía Pejumopetünaxü tatsi kata pokoyenéwatha pexeña petsita-itüütsi koyene peexanaewa. Ichamonaé jíwanatha, Nakom pía Pejumopetünaxü tatsi kata pokoyeneya xua pekueikuejeiwa Nakom Pejume Diwesi. Ichamonaé jíwanatha Nakom pía Pejumopetünaxü tatsi kata pokoyeneya beta peyaputaewa xua pokoyene poxonaé Nakom pía Pejumopetünaxü tatsi jiwi kueikuejei éxanatsi yawa pokoyene poxonaé jiwi kueikuejei éxanatsi kaurimonaé. Ichamonaé jíwanatha Nakom pía Pejumopetünaxü tatsi kata pokoyeneya xua ichamonaé pekueikuejeiwa icha jumeintha, pojumein bekein jopa nakuidubiyo. Ichamonaé jíwanatha Nakom pía Pejumopetünaxü tatsi kata pokoyeneya xua barapomonaé xuya jume yaputane éxana pojumein xua ichamonaé paeba pojumein xua ichamonaé bekein jopa nakuidubiyo. ¹¹Daxita bárapo jüntükoyenein éxana dukuanaebiya pong Nakom pía Pejumopetünaxü tatsi. Bárapo júmope daxita koyenein meisha kompa éxana, po júmope Nakom pía Pejumopetünaxü tatsi. Bárapo pejúmope daxita karepaya jíwitha kata icha be pókotsi koyeneya bárapo júmope peichichipaexae xua pekatsiwa.

Meje yábara xua daxítatsi be kaemonaetsi Jesustha

¹²Pepong bekein kaein íchitha nawita xeina xua pía pekueyabíwatsi, petáxube, pesitobeno, pemaxübeno yawa icháwangno. Bárapo pepong pekueyabíwatsi bekein aiñawang dáichitha daxita bara kaewa ompin náexana pepongtha. Barapókotsi jüta koyeneya ichi, Cristo pinmonaé xeina pía pejumekowüntsíwichi bekein bara barapong Jesús kaein. ¹³Barapókotsi jüta koyeneya ichi, waxainchi seikaya jíwichi. Dáichitha daxita waxainchi be kaemonaé jíwichi wajumekowüntsixae Jesús. Ichamonaé waxainchi jíwanatsi judiomonaetsi. Ichamonaetsi pomonaé jopa judiomonaé naexanaeyo. Ichamonaetsi pomonaé amanaya tanakuítatsi ichamonaé nexa. Ichamonaetsi pomonaé saya wajinompawéi xua saya wawang wanata exanaewi. Dáichitha daxita waxainchichi naka bautisaba. Waxainchi be kaemonaetsi naéxanatsi Nakom pía Pejumopetünaxü tatsi wanaka barü jinompaxae. Nakom daxita waxainchi barompaya karepáyatsi naka kata bárapo pejumopetünaxü, pong bara saya meisha kaein.

¹⁴Pepong jopa xeinaeyo bara kaewa xua pekueyatsíwatsi. Ápara nawita xeina xuang pekueyabíwatsi. ¹⁵Metha petaxu jei tsipae: “Xang ápara jopa pekobeño, daxota xang pepong nexa aibi”, jei tsipae. Bekein baxua paebíchipa dáichitha ápara bara pepong kueyatatsi icha itakúüpatssi xua paeba. ¹⁶Metha pemuxuyoroto jei tsipae: “Xang ápara jopa peitamaikeitüño daxota xang pepong nexa aibi”, jei tsipae. Bekein baxua paebíchipa dáichitha ápara bara pepong kueyatatsi icha itakúüpatssi xua paeba. ¹⁷Icha daxita wapepong ü peitakuereto tsipae, jopa naka

itaküüpaeyo xua wajumetaewa tsipae. Barichi icha wapepong daxita ü pemuxuyoroto tsipae, jopa naka itaküüpaeyo xua watuxubiwa tsipae. ¹⁸Íchitha Nakom pitakuiya duba xua ichaxota ichichipa duba daxita baxuang xua pokotsiwang pepong pekueyabíwatsi. ¹⁹Icha daxita baxuang saya ü najüpáetsipa, bapoxonae jopa xapain xeinaetsípaetsi pepong. ²⁰Bekein ánoxuae nawita xéinatsi xuang wanaka kueyabiwang wapepongtha, dáichitha áwiya bara kae pepongtsi.

²¹Peitakuereto jopa itaküüpaetsi xua pejeiwa pekóbetha: “Xam jopa kakana matawenonaetsi”, jopa pejeiwa. Barichi pentasipa jopa itaküüpaetsi xua pejeiwa petaxubetha: “Paxambe jopa paka kanamatawenonáetsibe”, jopa pejeiwa. ²²Po wanaka kueyatsiwa wapepongtha xua jopa naka tsita aiñakuiyo, ápara bara baxua aiñakuí wakana matawenonaenexa. ²³Wapepong xua wanaka kueyatsiwa xua jopa naka tsita aiñakuiyo, paparúwatha najuma ákatatsi xua wabarü iturajinaenéxatsi. Pokotsiwa wanaka kueyatsiwa xua wapepongtha xua pokotsiwa jiji jopa benakataeyo, naákabatsi paparúwangtha wapin úraxae. ²⁴Po wanaka kueyatsiwa wapepongtha pokotsiwa jiji nákata tane baxuang jopa aiñakuiyo xua waakabinexa paparúwatha xua jopa wa-auraxaetsi. Nakom nákata éxana pepong xua waxainchi beta nayáewatatsi paparúwatha, po wanaka kueyatsiwa wapepongtha xua bichokono pekanantawenonaewa baxua. ²⁵Nakom baxuang éxana xua jopa baxuang penaweputsabinexa pepong weya. Daxita baxuang xua wanaka kueyabiwang eénatsi xua nantiya penayawenaewa tsane icha pomonae Nakom pejumekowüntsíwichi ichi xua nantiya bewa nayawenáe. ²⁶Icha bárapo wanaka kueyabiwang kaewa jíwana wepu átene, bara barichi pepong daxita aténerü. Matáüta icha baxuang kaewa jíwana aiñakuí kana éxanatsi bara daxita nabarü weiweinaya dubena pepongtha.

²⁷Paxam Jesucristo piamonae tatsi jíwana pamxaem, kaemonae pana naexáname, icha Jesucristo ichi xua xeina pía pekueyabíwatsi pía pepongtha. Bekein bara kaemonae pana naexáname íchitha karepaya barompaya patanakuítame Cristo. ²⁸Nakom itapeta xua pomonae pejumekowüntsíwichi xua pomonae pía petanakuichinexa tsainchi. Kopiya itapétatsi pomonae Jesucristo pía peitorobi jiji tatsi. Bapoxonae írürü itapétatsi pomonae Nakom pía peitorobi jume pepaebiwi. Ekeicha bapoxonae írürü itapétatsi pomonae jiji pekuidubiwi Nakom Pejume Diwesi. Bapoxonae írürü itapétatsi pomonae pexeíña petsita-itüütsi koyenewang éxana. Bapoxonae irü itapétatsi pomonae axaibi peexanaewi peatenewi. Írüno bapoxonae itapétatsi pomonae jiji peyawenaewi. Bapoxonae írürü itapétatsi pomonae peitorobiwi pomonaetha, pomonae pejumekowüntsiwi. Írüno bapoxonae itapétatsi pomonae kueikueijeji icha jumeintha, pojumein bekein jopa nakuidubiyo. ²⁹⁻³⁰Nakom jopa ápara daxita piamonae exanaeyo pomonae Jesús pía peitorobi jiji tatsi. Matáütano Nakom jopa ápara daxita piamonae exanaeyo pomonae Nakom pía peitorobi jume pepaebiwi. Barichi Nakom jopa ápara daxita piamonae exanaeyo pomonae jiji pekuidubiwi Nakom Pejume Diwesi. Barichi jopa ápara daxita jíwiyo pomonae éxana pexeíña petsita-itüütsi koyenewang. Matáütano jopa ápara daxita jíwiyo pomonae axaibi peexanaewi peatenewi. Barichi jopa ápara daxita jíwiyo pomonae kueikueijeji icha jumeintha pojumein bekein jopa nakuidubiyo. Barichi jopa ápara daxita jíwiyo pomonae xuya piamonae yábara yaputane éxana pojumein ichamonae kueikueijeji pojumein bekein jopa nakuidubiyo. ³¹Íchitha paxam bewa paichichipáename po jüntükuikoyenein xua bichokono wüünae pokoyenein xua Nakom amanaya kata piamonaetha.

Meje xua Pablo yábara paeba peántobe koyenewa

Íchitha ánoxuae yábara paka kuidubinchi icha jüntükui koyénewa po jüntükui koyénewa bichokono toxeinchiya wüünae beyakaincha xua po jüntükui koyenein aunxuae yábara páebang.

13 ¹Metha icha bekein neitaküüpáetsipa xua takueikueijeíwa aiña jumein pojumein ichamonae kueikueijeí, xuano pojumein matatsunpiwi kueikueijeí. Bekein metha neitaküüpáetsipa dáichitha icha jopa ichamonae tsita xeinaeíño peántobe koyenewa, bapoxonae saya ápara pin busijumein éxanang poxonae saya kueikueijang. ²Metha xang Nakom pía peitorobi jume takueikueijang tsipae, matáütano metha yaputaetsipang daxita pokoyenein Nakom moya yawüngxeina xua bexa Nakom exanaena, matáütano metha yaputaetsipang daxita peyaputáe koyenewang, matáütano metha beta jumekowüntsipang xua taneitaküüpaewa xua tsipaebang demuxúwatha xua peponaenexa. Bekein metha xeinaetsipang daxita bárapo koyenein íchitha kame jopa xeinaein chipae peántobe koyenewa barapoxonae jopa aiñakuí jintoiño. ³Icha peakopeibí jíwitha katang daxita pokotsiwa xeinang, yáwano icha kaenaetang tapepong xua tanetautsinexa tatüpaein tajumekowüntsixae, íchitha áwiya kame jopa xeinaein chipae peántobe koyenewa daxita jiwi nexa, Nakom jopa tsita aiñakuiyüño.

⁴Jame pong xua peántobe koyenewa xeina daxita jiwi nexa bapong jame jüntema pópona poxonae bekein ichamonae abe taexanaetha xua bapong bekein abe taexanáethatsi. Barichi pong peántobe koyenewa xeina, bapong jame amana yábara nantaxeinaeya yawena ichamonae. Bapong jame jopa peyábara uwin pokotsiwa ichamonae xeina. Matáütano bapong jame jopa piakoutha penayábara nantaxeinaein xua peaiñakuí jintong. Matáütano jame bapong jopa pepaebin jiwi. ⁵Barichi bapong jame jopa atsakiya pepaebin. Matáütano bapong jame jopa peyábara nantaxeinaein xua saya ü piáwa nexa. Bapong jame jopa peanaepanaein ichamonaetha. Bapong jame xuya jopa peyantomateibin xua xuya peexanaenexa abe bapongtha. ⁶Barichi bapong jame jopa jüntükoyene weiweinaeyo poxonae ichamonae abe éxana. Saya bapong jame jüntükoyene weiweina poxonae ichamonae bara xaiñeya éxana. ⁷Pong ba jame peántobe koyenewa xeina ichamonae nexa, bapong jame exanapona beta bekein ichamonae dangweya ayapubeya taexanaetha xua bapong dangweya ayapubeya taexanáethatsi. Bapong ba jame yábara jumekowüntapona ichamonae xua barapomonae pomonae ichamonaexae itaküüpatsi xua wüünaeya peexanaewa. Matáütano bapong jame yábara jumekowüntsia ewatapona xua ichamonae bexa beta peexanaewa tsane bekein abe peexanaewi. Matáütano bapong ba saya jüntema pópona bekein bapong abe taexanáethatsi ichamonae.

⁸Pokoyene xua jiwi ántobe ichamonae bárapo koyenewa bápana jopa wera wérakae tsane. Jopaena matakabi po matakábitha jopa nantawénonae tsane xua pomonae pekueikueijeí jiwi Nakom nexa pokotsiwa Nakom yaputane éxana. Barichino jopa kueikueijeí tsane icha jumeintha pojumein barapomonae jopa bekein nakuidubiyo. Matáütano jopa nantawénonae tsainchi pokoyene peyaputáe koyenewa. ⁹Ánoxuae wayaputáe koyenewa nákata seika daxota be kónotha yaputainchi. Matáütano Nakom yábara wakueikueijeíwa nákata seika daxota be kónotha yábara kueikueijeíchi Nakom. ¹⁰Íchitha poxonae Cristo patopáetsika pong daxita

koyenein peyaputaen bapoxonae bapong naka yaputane exanaena pokoyene xua nákata seika xua wayábara kueikueijeíwa bapong, xuano xua bapong yábara yaputainchi. Bárapo aiña koyénebe werawerakaena bapoxonae.

¹¹Poxonae xang áwiya pexuyong kueikueijang xua najume pexuinang. Yáwano nantaxeinang icha pexuyo ichi. Matáütano yaputang xua pexuyoxaein. Íchitha poxonae píñongba nakuibaraxubang pokotsiwa exanaponang poxonae pexuyong. ¹²Bara jüta koyeneya ichi ánoxuae. Saya be kónotha Nakom yábara yaputainchi. Báraxua be icha be pókotsi jüta koyeneya ichi poxonae tsabókototha nayatainchi xua düüdüüina xua dáichitha jopa nataetsi. Íchitha bexa tsane yatsikaewa Nakom pentha taeinchi péitabara. Ánoxuae be kónotha Nakom yábara yaputang. Íchitha bexa tsane xaniwaicha daxita beta yaputaen icha ánoxuae Nakom neichi xua tanejüntükoyene yaputaewa. ¹³Akoibi pokoyenéwabe ataya ayapusúü tsane. Meje bárapo akoibi pojumekoyenéwabe xuaje: Pejumekowüntsi koyenewarü Nakomtha, barichi peyábara jumekowüntsiya éwatsi koyenewarü Nakomtha, matáütano peántobe koyenewarü. Jame pojumekoyenewa bichokono toxeinchiya aiñakuí beyakaincha xua icha koyenewa bárapo koyenewa jame ápara xua peántobe koyenewa, xua ichamonae waántobe koyenéwatsi. Bárapo jumekoyenewa bichokono toxeinchiya aiñakuí.

Meje xua Pablo yábara paeba xua aiña jumein pepaebiwa yábara pojumein bekein jopa nakuidubiyo

14 ¹Bewa paichichipáename xua paiña nexainaewa peántobe koyenewa. Barapoxonae béwano paichichipáename icha jüntükoyenein pókotsi jüntükui-koyenein Nakom amanaya paka kata. Pojüntükui-koyene xua bichokono wüünae beyakaincha xua icha jüntükui-koyenewa, ápara bárapo jüntükui-koyenetha pakueikueijam Nakom pía peitorobi diwesi. Baxua jame bewa paichichipáename. ²Pong ba icha jumetha kueikueijeí po jumeintha xua bapong bekein jopa nakuidubiyo bapong ápara tsipaeba Nakomtha. Bapong ápara jopa tsipaebiyo jíwitha tsipéi jiwi jopa yaputaeyo pokotsiwa paeba bapong. Pokotsiwa bapong paeba ápara Nakom pía Pejumopetünaxü tatsi kueikueijeí éxana. Bapong ápara paeba pokotsiwa Nakom moya yawüngxeina, pokotsiwa xua bekein jiwi jopa yaputaeyo. ³Íchitha nama seikaya pong jame Nakom Pejume Diwesi kueikueijeí jíwitha, jiwi yaputane exanaeinchi Nakom yábara. Matáütano bapong poxonae Nakom Pejume Diwesi kueikueijeí yawena ichamonaetha xua barapomonae jüntükui-koyene tsakábatsi xua Nakom pejumekowüntsiwatsi. Barichi poxonae kueikueijeí Nakom Pejume Diwesi jüntükoyene sadüjei éxana pomonae anthüthürewa xua anthüthütane. ⁴Pong ba kueikueijeí aiña jumeintha po jumeintha bekein bapong jopa nakuidubiyo, bapong ba saya piakoutha nayawena xua peyábara yaputaewa Nakom. Íchitha pong ba kueikueijeí jíwitha Nakom nexa pokoyene Nakom yaputane éxana, bapong jiwi yaputane exainchi Nakom yábara pomonae xua Nakom pejumekowüntsiwichi.

⁵Ichichipang xua daxita paxam paiña nekueikueijeíwa icha jumeintha, pojumein bekein jopa panakuidubim. Jame yatsikaewa bichokono ichichipang xua paiña nekueikueijeíwa Nakom Pejume Diwesi ichamonaetha. Pong ba xua Nakom Pejume Diwesi kueikueijeí ichamonaetha, bapong ba jame wüünae éxana beyakaincha pong icha jumeintha kueikueijeí. Ichakuitha bapong pong icha jumeintha

paeba itaküüpatsi xua yábara jumeyputate éxana jíwitha pojumein xua pípato pepaebi jumein. Icha bapong bárapo koyene éxana bapoxonae bapong yawena pomonae pejumekowüntsiwi Nakom xua beta mataropeicha pejumekokowünta ponaenexa Cristo. ⁶Tamonae pam, icha poxonae paka siwaponae ponaétsipatsi paka tsipaebichípatsi po jumeintha jopa nakuidubiño takoutha, bapoxonae ápara jopa paka yawenaetsípaetsi. Íchitha icha paka tsipaebichípatsi po diwesi Nakom neyaputate éxana, baxua jame paka yawenáetsipa xua beta paiña nejumekowüntsiwa Nakom. Íchitha icha ichakuitha paka tsipaebichípatsi pokotsiwa xua nakuidubang baxua jame paka yawenáetsipa. Matáütano icha ichakuitha paka tsipaebichípatsi pokotsiwa xua Nakom Pejume Diwesi paeba pokotsiwa bexa Nakom exanaena, baxua jame paka yawenáetsipa. Ichakuitha icha paka kuidubichípatsi Nakom Pejume Diwesi baxua paka yawenáetsipa.

⁷Jiwi ba tangbaba po petanabiwa arpa matawüing, xuano ba oba po peobiwa pewüing flauta. Íchitha icha bárapo aiña pekajume exanaewang jopa xapain busipichapaetsipae bapoxonae jiwi jopa xapain yaputaetsipae po wei xua icha jiwi wei tangbaba. ⁸Barichi poxonae ba jiwi naba ichamonaetha bapoxonae ba oba xua penajunutsiwa. Íchitha icha bárapo busi, busikaewa, jiwi jopa xapain busitaeyo. Bapoxonae jiwi jopa itaküüpaetsi xua penakuiwüinaetsiwa xua penabinexa. ⁹Barichi paxamtha. Icha icha jumeintha papaebichípame jíwitha, po jumeintha bekein jopa panakuidubim, xuano irü bárapo jiwi jopa nakuidubiyo bapoxonae jiwi jopa xapain paka yaputáe tsipae. Báraxua ápara be saya poxonae sito patsipáebame. ¹⁰Metha beya tsipae xua bárapo nákuathe aiña jumein xeináetsipa xua jiwi barompaya tsanya pijumeintha paeba. Daxita barompaya pía matabüxümonaein tsíniya xeina pojumein xua yaputate barapomonae. ¹¹Íchitha icha xang jopa yaputaeiño po jumetha xua ichüing netsipaeba bapoxonae xang be tsita tana nanapaincha poponaein xua be icha nakua wérena taponaein irü bapong be netsita penanapaincha poponaein xua be icha nakua wérena peponaein. ¹²Paxam paichichípame po jüntükui koyenein Nakom pía Pejumopetünaxü tatsi amanaya kata piamonaetha. Yáitama baxuang paichichípame daxota bichokono pawúükare bárapo Nakom pía Pejumopetünaxü tatsi xua paiña nepaka katsibinexa po jüntükui bichokono wüinae. Baxua pawúükare xua paiña neyawenaenexa pomonae pejumekowüntsiwi Nakom, xua beta pejumekokowünta ponaenexa Nakom.

¹³Daxota pong icha kueikueijeji icha jumetha po jumetha bekein bapong jopa nakuidubiyo, bapong bewa wüikaena Nakomtha xua Nakom bapongtha yábara jumeyputate pekana exanaenexa bárapo jume. Bapoxonae bapong itaküüpatsi xua yábara yaputate éxana bárapo jume xua ichamonae yaputate éxanatsi. ¹⁴Icha icha jumetha tsipaebang Nakomtha pojume bekein jopa yaputaeiño saya ápara tajumopetünaxü tsipaeba Nakomtha. Tajüntükoyene jopa yaputaeyo xua tatsipaebiwa Nakom. Barichi ichamonae jopa yaputaeyo xua tatsipaebiwa Nakom. ¹⁵¿Eta xua bewa exanokuaein? Jame, bewa wüükaein Nakom tajumopetünaxütha pojumein jopa yaputaeiño. Matáütano bewa wüükaein Nakom tajüntükoyénewatha pojumein yaputang. Barichi bewa naxünaein Nakomtha tajumopetünaxütha pojumein jopa yaputaeiño. Matáütano bewa naxünaein tajüntükoyénewatha pojumein yaputang. ¹⁶Ichakuitha metha icha jumetha wüünae jainchípame Nakom xua nejumopetünaxü kueikueijeji kakana éxana. Pomonae xua kajumetáetsipa jopa kajumeyaputáe tsipae. Daxota jopa itaküüpaetsípaetsi xua pebürüya nekajumenotsiwa

Nakom nexa, xua pejeinexa: “Bara ichi tsane”, xua pejeiwa. ¹⁷Poxonae bekein Nakomtha wüükáetsipame icha jumetha bara bekein wüünae pokotsiwa xua páebame, dáichitha ichüng jopa yawenaetsípaetsi xua beta pejumekowüntsiwa Nakom. ¹⁸Nakomtha tsipaebang paxam yábara, jangje: “Nakom maisha jüntü-koyene weiweinang, xua icha jumeintha takatsipaebiwatsi, beyakaincha daxita barapomonae xua icha jumeintha katsipaeba”, jang. ¹⁹Íchitha poxonae pomonae Nakom pejumekowüntsiwichi nakaetuta penakaetutsibotha bara saya wüünae tsipae xua icha saya cinco pojúmebe takuidubiwa tsipae xua jiwi peyaputaewa tsane. Baxua beyakaincha xua poxonae icha metha kueikueijang tsipae diez mil pojúmebe, pojume xua jopa nakuidubiño. Bekein bárapo diez mil pojúmebe pae-bíchipang dáichitha jiwi jopa yaputáe tsipae xua takueikueijejiwa.

²⁰Tamonae pam, paxam pomonae irü paiña nejumekowüntsíwixae Jesucristo. Paiñaxoba panantaxéiname icha pexui ichi poxonae nantaxeina. Jame pajinompa dubenanaebíyama icha pexui ichi poxi penkuetixi xua jopa abe exanaeyo. Maisha jame panantaxeina dubenanaebíyama icha pomonae piñong ichi xua nantaxeina dubenanaébiya. ²¹Nakom jeye pía peitorobi jume diwésitha: “Paebin bárapo judiomonaetha poxonae kueikueijeji kana exanaein pomonae penanapaincha jinompaewi xua icha nakuapiwi pojumein xua jopa yaputaeyo pomonae xua petsipaebixaetsi. Bekein baxua exanaein íchitha kataunxuae bárapo judiomonae jopa nejumetáe tsane”, jei pong jiwi Pekanamataxeinaein pía peitorobi jume diwésitha. ²²Daxota xua pekueikueijejiwa icha jumeintha tsita itapeiñaxeina xua pomonaetha, pomonae jopa pejumekowüntsiwi xua ápara Nakom átene exanaena barapomonae jopa pejumekowüntsixae. Bárapo jumein jopa ápara néxiyo pomonae xua báyatha pejumekowüntsiwi, poxoru Nakom jopa átene exanáe tsane barapomonae. Íchitha xua kueikueijeji Nakom Pejume Diwesi, baxua tsita itapeiñaxeina pomonaetha, pomonae pejumekowüntsiwi xua ápara Nakom yawenaena barapomonae peantobexae tsipéi barapomonae Nakom jumekowúntatsi. Bárapo Nakom Pejume Diwesi pekueikueijejiwa jopa ápara néxiyo pomonae jopa pejumekowüntsiwi poxoru Nakom jopa yawenáe tsane barapomonae jopa pejumekowüntsixae Nakom. ²³Ichakuitha metha patsipa paiña nenakaetutsíwatha xua poxonae Nakom wüünae pajáintame pomonae jopa yábara yaputaeyo poxonae ichamonae pekueikueijejiwa icha jumeintha, írürü pomonae jopa pejumekowüntsiwi Nakom. Icha metha daxita paxam barompaya papaebichípame icha jumeintha barapomonae jopa paka yaputáe tsipae. Bapoxonae barapomonae paka yábara nantaxeináetsipa xua ápara paiña nepaka matajemabi jiwi pam. ²⁴Íchitha metha pebiwi patsipa paiña nenakaetutsíwatha xua poxonae Nakom wüünae pajáintame pomonae jopa yábara yaputaeyo poxonae ichamonae pekueikueijejiwa icha jumeintha, irü pomonae jopa pejumekowüntsiwi Nakom. Poxonae daxita paxam Nakom Pejume Diwesi papaebichípame barapomonae paka yaputáetsipa xua papáebame. Bapoxonae barapomonae najüntükoyene kayábara nantaxeináetsipa xua abe peexanaewa. Matáütano barapomonae yaputáetsipa xua Nakom petsita-natsikuentíwatsi xua abe peexanaexae xua poxonae paiña nekajumetaexae poxonae papáebame Nakom Pejume Diwesi. ²⁵Nakom éxana xua barapomonae peyaputaewa pokoyene xua Nakom daxita beta yábara yaputane pokoyene xua barapomonae nantaxeina pejüntükoyenéwatha. Bapoxonae barapomonae yaputaena xua bara Nakom jüntemaina barapomonae abe pía peéxanae kuirukoyenein tatsi. Bapoxonae pentabokototha umenaena xua

Nakom wüünae pejainchinexa tsainchi. Barapomonaе jeі tsane paxamtha: “¡Jaina, maisha deta Nakom paka barü jinompa!” paka jeі tsane barapomonaе.

Meje xua Pablo jeye: “Beta wüünaeya paexanaponde penakaetutsi bongtha poxonaе wüünae pajaintéibame Nakom”, jeі

²⁶Tamonaе pam, paxam pomonaе irü paiña neјumekowüntsíwixae Jesucristo. Paka tsipáebatsi xuaje: Poxonaе pana nakaetútame, ichamonaе paiñamonaе jíwana bárabü naxünaena peweіxi xua wüünae pejainchinexa Nakom. Ichamonaе irü bárabü kuidubina ichamonaetha. Ichamonaе irü bárabü kuidubina pokoyenein Nakom yaputane éxana. Ichamonaе irü bárabü icha јumeintha kueіkueіjeі tsane јojumein bekein јopa nakuidubiyo. Ichamonaе irü bárabü xuya bárapo јumein yábara јumeyaputane exanaena daxita jíwіtha јojumein ichamonaе paeba. Daxita pokoyenein xua paéxaname bara wüünae paexande poxonaе panakaetútame wüünae paiña јaintsinexa Nakom xua daxota wüünaeya mataropeicha paiña neјumekokowünta dubenanaebiyaenexa Nakom. ²⁷Poxonaе icha јumeintha pakueіkueіjam bewa saya kueіkueіjeі nakuéyatabe póyobe ichakuіtha poxonaе akoіbi póyobe. Íchіtha ichamonaе aіbi tsane. Bárapo akoіbi póyobe bewa xuya kotakaya barompaya tsana kueіkueіjeі tsóponaе tsane. Bewa bapoxonaе xuya ichüng kotakaya yábara јumeyaputane exanáe pokotsiwang xua bárapo akoіbi póyobe barompaya seikaya paeba. ²⁸Ichüng dapokotsin aіbi pong itakúüpatsi xua xuya kotakaya peyábara јumeyaputane exanaewa, јopa bewa bárapo akoіbi póyobe icha јumeintha paebí tsane penakaetutsi jíwіtha xua poxonaе Nakom wüünae pejainchinexa. Saya bewa moya piakoutha kueіkueіjeі Nakomtha. ²⁹Bara wüünae tsipae icha saya pakopatsípame nakuéyatabe póyobe xua pekueіkueіjeіwa Nakom Pejume Diwesi xua ichakuіtha poxonaе saya akoіbi póyobe. Ichamonaе bewa јumetaena icha metha bara xaniwaicha paeba bárapo akoіbi póyobe. ³⁰Icha ichüng eka baxota pong Nakom yaputane éxana јojumein bewa kueіkueіjeі tsane bapoxonaе pong xua kopiya asiya ungua bewa moya ekaena xua daxota barapong pong ichüng itakúüpatsi xua kueіkueіjeі јojumein Nakom yaputane éxana. ³¹Daxita paxam paka itakúüpa xua paiña nekueіkueіjeіwa Nakom Pejume Diwesi, paiña nekana exanaenexa xua daxita barapomonaе penakuidubinexa. Matátano paka itakúüpa paiña nekueіkueіjeіwa paiña neјúntükui tsakabinexa daxita јiwi neјumekowüntsínexa Nakom. Íchіtha јame paxam barompaya tsanaya xuya patamropatsiya kueіkueіjam tsoponeibim tsane. ³²Pomonaе Nakom Pejume Diwesi pekueіkueіjeіwi barapomonaе itakúüpatsi xua pena јúntükoyene itorobiwa. Daxota barapomonaе éwata xua ichüng matha pekueіkueіjeіnexa, xua bapoxonaе bara pekueіkueіjeіnexa tsane ichamonaetha. ³³Tsipéі Nakom јopa ichipaeyo xua јiwi ajumeyaxa poxonaе daxita јiwi pebürüya kueіkueіjeі Nakom Pejume Diwesi. Јame Nakom ichichіpa xua pomonaе neјumekowüntsiwi јúntema penabarü јinompaewa poxonaе nakaetuteіba xua wüünae pejainchinexa Nakom.

Daxita pomonaе xua nakaetuta neјumekowüntsіxae Jesucrístotha, éxana xuaje: ³⁴Yábüxi bewa saya moya poxonaе nakaetuta pomonaе Nakom neјumekowüntsiwi xua Nakom Pejume Diwesi pekueіkueіjeіnexa. Nakom baxua јopa kopatsiyo xua yábüxi pekueіkueіjeіwa baxota. Bárapo yábüxi bewa јumekowüntsina pía séurixi pokotsiwa itorobéibatsi icha be pókotsi koyeneya báyatha Moisés pía peitorobi koyenéwatha paeba. ³⁵Icha bárapo yábüxi ichichіpa xua peyaputaewa pokotsiwa

ichamonae paeba, bewa barapówaxi piaboxitha yáíñabi pía séurixi. Tspíeí jopa wüünae tsipae icha yábüyo kueikueijeí penakaetutsimonaetha pomonae Nakom pejumekowüntsíwichi xua poxonae yáíñaba pía pebiwi.

³⁶Paxam bewa payaputáename xua Nakom Pejume Diwesi jopa kopiya matha tamrópata pitabiyo paiñaxantha. Matáütano jopa paxam kompa pam pomonae meisha paxéiname Nakom Pejume Diwesi. ³⁷Ichamonae pomonae paxam jíwana pam nantaxeina xua xeina po jüntükoyenéwatha pekueikueijeíwa Nakom Pejume Diwesi. Bárapo jüntükoyene xua Nakom pía Pejumopetünaxü tatsi amanaya kata. Matáütano ichamonae pomonae paxam jíwana pam nantaxeina xua xeina icha jüntükoyenewa po jüntükoyene Nakom kata. Daxita paxam bewa payaputáename xua pokoyenein yábara pákata tínatsi xua ápara Nakom wanaka itorobiwa. ³⁸Icha pebin jopa bejumekowüntsiyo pokotsiwa páebang, bapoxonae paiñaxoba pajumekowüntame pokotsiwa bapong paeba.

³⁹Tamonae pam, paxam pomonae irü paiña nejumekowüntsíwixae Jesucristo. Bewa jame paichichipáename xua paiña nekueikueijeíwa Nakom Pejume Diwesi. Paiñaxoba pajume itawétame poxonae ichamonae kueikueijeí icha jumein pojumein bekein jopa nakuidubiyo. ⁴⁰Daxita beta wüünaeya paexanaponde poxonae pana nakaetútame penakaetutsibotha xua poxonae wüünae paiña nejainchinexa Nakom, xua barompaya tsanaya patamropatsiya exanaponde.

Meje xua Pablo yábara paeba poxonae Cristo ekeicha asüü exainchi

15 ¹Tamonae pam, paxam pomonae irü paiña nejumekowüntsíwixae Jesucristo. Ichichipang xua paka yábara nantaxéiname po diwesi pekapanenebiyáe jume diwesi, po diwesi paka tsipáebatsi. Bárapo pekapanenebiyáe diwesi pajumekowüntame, xua daxota beta pajumekowüntsiya jinómpame Nakomtha. ²Paiña nejumekowünta dubenanaebiyaxae bárapo pekapanenebiyáe diwesi, ánoxuae paiña nepaka kapanenebiyae jiwí pam abe paiña neexanáe kuirukoyenein weya. Bárapo koyene paxeina dubenanaebiyáename icha beta payábara jüntanáiname pokotsiwa paka kuidúbatsi xuano icha xaniwaicha pajumekowüntame baxuang. Icha kopiya jopa pajumekowüntsím tsane paiña jüntükoyénetha bárapo pekapanenebiyáe diwesi bapoxonae Nakom jopa paka kapanenebiyae tsane.

³Kopiya paka kuidúbatsi pokotsiwa xua ichüing nekuiduba xua Cristo yábara. Paka kuidúbatsi xua Cristo naka tsitüpa abe waexanáe kuirukoyenein nexa icha be pókotsi koyeneya báyatha Nakom Pejume Diwésitha yábara paeba baxua. ⁴Poxonae Jesucristo tüpa bapoxonae müthütha xotsi. Íchitha poxonae akoibi po matakábibe jopa, bárapo matakábitha ekeicha asüü éxanatsi, icha be pókotsi koyeneya báyatha Nakom Pejume Diwésitha yábara paeba baxua. ⁵Bapoxonae Pedro tsita naitüütatsi Jesucristo. Bapoxonae ekeicha Jesucristo tsita naitüüta pía peitorobi jiwí tátsitha pomonae doce póyobe. ⁶Bapoxonae kaena ekeicha Jesucristo tsita naitüüta pomonaetha, pomonae pía pejumekowüntsi jiwixaetsi, pomonae beyakaincha quinientos póyobe jiwí. Áwiya pinmonae bárapo bicheito jíwanamonae jinompa ánoxuae pomonae xua Jesús tainchi bekein ichamonae wérapa báyatha, pomonae barapomonae jíwana. ⁷Bapoxonae ekeicha Santiago tsita naitüütatsi Jesucristo. Bapoxonae ekeicha Jesús tsita naitüüta daxita pomonaetha, pomonae pía peitorobi jiwí tatsi.

⁸Bapoxonae nama matapaiña xang Pablo netsita naitüüta Jesucristo. Nakom nekana éxana pong pía peitorobi jiwi jíwana tatsin, xua pong tabüdukuang. Xang be pong xua naiña jemeicha jumekowüntang icha be pókotsi koyeneya ichi poxonae pexuyo pena naiña jemeicha tsiperüü wenáexana. ⁹Xang wepu be kónotha aiñakuin pomonae Jesucristo pía peitorobi jiwi tatsi. Ichamonae pomonae Jesucristo pía peitorobi jiwi tatsi bichokono aiñakuí beyakaincha xua xang. Bekein Nakom neyábara kaunuta xua xang Jesucristo pía peitorobi jiwi tatsi jíwanang íchitha aurang tsipéi bichokono abeya éxanang pomonaetha, pomonae penakae-tutsimonae jíwitha pomonae pejumekowüntsiwi Nakom. Pebaraxuaxae jopa bewa neyábara kaunutsi baxua. ¹⁰Íchitha xang nama ánoxuae seikayiya éxanang Nakom taneyawenaexae. Bapong tana neantobexae jopa abeya taexanaeíño. Jame nama seikaya bichokono ayapusüüya nakuitang Jesucristo nexa beyakaincha ichamonae pomonaexae Jesucristo pía peitorobi jiwi tatsi. Íchitha xang jopa takouthiño xua tanakuichiwa, ápara jame Nakom neyawena tana neantobexae. ¹¹Jopa aiñakuiyiyiyo pomonae báyatha paka kuiduba Nakom Pejume Diwesi. Jopa aiñakuiyiyiyo icha ichamonae pomonae Jesús pía peitorobi jume pepaebi jiwi báyatha paka kuiduba. Matáütano jopa aiñakuiyiyiyo icha xang báyatha paka kuidúbatsi. Saya jame aiñakuí xua daxita paxang nantajúpaya tapaka kuidubíwatsi bárapo Nakom pía pekapanenebiyáe jume diwesi xuano xua paiña nejumekowüntsiwa baxua.

Meje xua Pablo yábara paeba pomonae xua ekeicha asüü éxanatsi petüpáe kuirukoyene weya

¹²Paka kuidúbatsi xua Cristo ekeicha asüü éxanatsi petüpáe kuirukoyene weya. Dáichitha pomonae paxam jíwana pam paeba xua pinae Nakom jopa ekeicha asüü exanaeyo jiwi petüpáe kuirukoyene weya. ¿Eta xua néxata metha baxua paeba paiñamonae jíwana? Bara báyatha payábara yaputanemeba. ¹³Icha jiwi jopa ekeicha asüü exanáe tsipaetsi petüpáe kuirukoyene weya, bara néxata Cristo barichipaetsi, jopa ekeicha asüü exanáe tsipaetsi petüpáe kuirukoyene weya. ¹⁴Icha Cristo jopa ekeicha asüü exanáe tsipaetsi petüpáe kuirukoyene weya, bapoxonae jopa aiñakuí tsipae pokotsiwang paka kuidúbatsi. Bapoxonae baxua be xua pejumexáei tsipae tsipéi jopa paka yawenáe tsipae. Matáütano barichi paiña nejumekowüntsiwa jopa aiñakuí tsipae jopa paiña nepaka yawenaexae tsipae. ¹⁵Icha baxua xaniyéi paxang be pomonae pemuxuitórobi jiwi pang tsipaein pokotsiwa Nakom payábara páebang, tsipéi paxang ápara papaebang xua Cristo ekeicha asüü éxanatsi petüpáe kuirukoyene weya. Papaebang xua Nakom ekeicha Cristo asüü éxanatsi petüpáe kuirukoyene weya íchitha baxua jopa xaiñeyo icha jiwi jopa ekeicha asüü exanaetsi petüpáe kuirukoyene weya. ¹⁶Icha petüpáe jiwi jopa ekeicha asüü exanáe tsipaetsi petüpáe kuirukoyene weya, barichi Cristo báyatha jopa ekeicha asüü exanáe tsipaetsi petüpáe kuirukoyene weya. ¹⁷Icha Cristo jopa ekeicha asüü exanáe tsipaetsi petüpáe kuirukoyene weya bapoxonae jopa paka yawenáe tsipae xua paiña nejumekowüntsiwa. Daxota áwiya paéxana dubenanaebiyaetsípame abe paiña neexanáe kuirukoyenein. ¹⁸Icha baxua xaiñéi tsipae xua Cristo jopa asüü exanáe tsipaetsi petüpáe kuirukoyene weya bapoxonae pomonae xua báyatha wérapa bekein jumekowüntsiwa tsipae Jesús, íchitha werawerakáetsipa xua abe peexanaexae. ¹⁹Waxainchi jumekowüntsiya wüünae éwatatsi xua bexa tsane Cristo naka asüü exanaena poxonae werapaeinchi. Íchitha icha saya jumekowünta

dubenanaebiyaetsípatsi xua Nakom wanaka yawenaewa tsane bárapo kae pin nákuathe, bapoxonae wajumekowüntsiwa jopa naka yawenáe tsipae xua pokoyene Nakom bexa asüü wanaka exanaewa tsane poxonae werapaeinchi. Bapoxonae jiwi pomonae jopa pejumekowüntsiwi naka yábara jei tsipae: “¡Pai barapomonae tsobenáe beyakaincha ichamonae bekein jumekowüntsitha tsobenáe!” xua wanaka yábara jeichiwa tsipae.

²⁰Íchitha pokotsiwa xua yatsikaya jame xaiñéi, ápara jame xua Cristo bara yatsikaya asüü éxanatsi petüpáe kuirukoyene weya. Bapong Cristo kopiya jiwi asüü kanamata éxanatsi xua petüpáe kuirukoyene weya pomonae xua ataya tsitekaeya peasüünexa xua jopa werawerakaeyo. ²¹Jiwi abe peéxanae kuirukoyenein peexanaexae daxota wérapa, tsipéi jintong kopiya abe kana mataéxana, bapong Adán. Nama jiwi ekeicha asüü éxanatsi, tsipéi jintong kopiya asüü kanamata éxanatsi, bapong Jesucristo. ²²Jiwi werapaena icha Adán ichi abe peexanaexae. Daxita pomonae Cristo piamonae tatsi ekeicha asüü exanaeinchi petüpáe kuirukoyene weya icha Cristo kana ichichi xua asüü éxanatsi xua petsitekaenexa. ²³Nakom iche tsane xua poxonae exanaena xuaje: Kopiya matha Cristo asüü éxanatsi. Bexa tsane pomonae Cristo piamonae tatsi asüü exanaeinchi petüpáe kuirukoyene weya poxonae Cristo ekeicha patopáetsika bárapo írathe tsike. ²⁴Cristo werawéraka exanaena daxita, xua peitorobi koyenewang. Matáütano múxuna werawéraka exanaena xua nákuang peewatsí koyenewang. Matáütano múxuna werawéraka exanaena peayapusüüya itorobi koyenewa po peayapusüü itorobi koyenewa xua jopa Nakom pía koyenewa tatsi. Bapoxonae poxonae wétsina daxita, Cristo pía peayapusüü itorobi koyenewa Paxa kaewa katsina, pong Nakom. ²⁵Tsipéi Cristo bewa tsiwanaya exanaponaena daxita jíwitha be pong jiwi itorobiya pía pepa peewatsinchi. Baxua bewa exanaena beya poxonae Nakom werawéraka exanaena pomonae Cristo pía peaitaetafabi jíwichi. ²⁶Pokoyene Nakom kotakaya exanaena xua ápara piamonae asüü kana exanaena xua bápana jopa pewerawerakaewa tsane. ²⁷Tsipéi Nakom Pejume Diwésitha paeba xua pinae Nakom itorobina Pexanto pong Jesucristo xua itorobiya pekanamataxeinaenexa daxítangtha. Bekein bara Jesucristo daxítangtha itorobiya kanamataxeinaena saya Páxatha meisha jopa itorobiyo tsane. ²⁸Kopiya Nakom exanaena xua Cristo itorobiya kanamataxeinaena daxítangtha. Bapoxonae Cristo Nakom Pexanto tatsi piakoutha nakana exanaena xua Paxa itorobiya pekanamataxeinaenexa tsainchi. Bapoxonae Nakom xaniwaicha itorobiya kanamataxeinaena daxítangtha.

²⁹Ichakuitha ichamonae bautisábatsi pomonae pewerapaewi tsibautisábatsi xua barapomonae ekeicha peasüünexa pepatsinexa Nakom pía nákuatha. Icha pewerapaewi jopa ekeicha asüü exanaetsi petüpáe kuirukoyene weya bapoxonae barapomonae pomonae pewerapaewi jopa yawenaetsi bekein petsibautisabíthatsi xua ichamonae bautisábatsi xua peasüünexa pomonae wérapa. ³⁰Daxita matakabi jinompéibatsi xua naka peipeita ichamonae xua naka abe éxana wajumekowüntsixa. Icha jopa ekeicha asüü naka exanáe tsipae jopa aiñakuí tsipae xua wakueikueijéi tsurubenanáebiwa Nakom Pejume Diwesi. ³¹Tamonae pam, paxam pomonae irü paiña nejumekowüntsiwixae Jesucristo. Daxita matakabi muxu tatüpeibi xua ichamonae tanepeipeita exaneibixae. Báraxua xaniyéi icha ichi xua xaniyéi xua jüntükoyene weiweinang xua Jesucristo pong Wanaka namataxeinaein wüünaeya peexanaexae paiñaxantha. ³²Xang bara imoxoyo tatüpa poxonae Efeso tomarapiwi inta abe éxana. Barapomonae báraxua nekana éxana icha

neuthü ichi poxonae ichüing wáetabatsi. Bekein barapomonaе baxua nekana éxana xua muxu tatüpaе íchitha jopa asüü neexanáetsipae petüpaе kuirukoyene weya icha jiwi ekeicha jopa asüü exanáе tsipaetsi. Icha jopa ekeicha kaewa asüü naka exanáе tsipae bara saya éxana dubenanaebiyaetsípatsi pokotsiwa ichichípatsi. Poxonae báraxua éxanatsi júpa éxanatsi icha ichamonae ichi pomonaе jopa peyábara jumekowüntsiwa xua bara asüü peexanáewatsi. Barapomonaе jeye: “Ánoxuae nabanaeinchi yawa apaeinchi, tsipéi baya werapaeinchi jopa naka tsita aiñakuiyo”, jei barapomonaе, pomonaе jopa pejumekowüntsiwi.

³³Paiñaxoba pakópatame xua bara ichamonae paiña nepaka muxuitorobeibiwa. Jiwi ba pía pekayábara júta pepaebi diwésiyo ba jei: “Pomonaе abe peexanaewi kuiduba ichamonaetha pomonaetha, pomonaе ichipa beta éxana, xua barapomonaе abe peexanaenexa”, ba jei bárapo diwésiyo. ³⁴Ekeicha kaewa paexande po júntükoyene xua bichokono Nakom tsita wüünaetsi. Paiñaxoba ekeicha abe paéxaname. Ichamonae paxam jíwana pam jopa Nakom yaputaetsi. Baxua paka tsipáebatsi xua paiña neauranexa.

Meje pokoyeneya xua Nakom exanaena poxonaе jiwi ekeicha asüü exanaeinchi petüpaе kuirukoyene weya

³⁵Metha ichüing yaiñabina, jei tsane: “¿Eta pokoyeneya Nakom exanaena poxonaе pewerapaewi ekeicha asüü exanaeinchi? ¿Eta pókotsi pepong barapomonaе xeinaena?” jei tsane. ³⁶Bárapo peyaiñabiwa saya pejumexáei. Poxonaе paúbame peúbi xuto, bárapo xuto búpana bokareka íratha xua pexunantafobabinexa poxonaе xua nae pexuwinexa. ³⁷Poxonaе paúbame jopa ápara pepaboto paúbim xua pepa nae pexuwinexa. Jame ápara ba pexu paúbame, metha beya xua trigo-xuto tsipae, ichakuitha metha icha pexutong tsipaeno. ³⁸Kotakaya Nakom éxana xua bárapo pexu xuwa icha be pókotsi koyeneya Nakom ichichipa. Daxita peúbi xutong tsanaya seikaya píakui barompa poxonaе xuwa. ³⁹Barichi jiwi pepong daxita jopa najüpaeyo. Jiwi pía pepong seikaya tsanaya barompa. Duwéi unupiwi pía pepong seikaya tsanaya barompa. Duwéi menepiwi seikaya pía pepong tsanaya barompa. Pepupunaewi seikaya pía pepong tsanaya barompa. ⁴⁰Peitabókotha xeina aiña pepong po aiña pepong peitabókotha pejinompaewi nexa. Barichi bárapo írathe xeina aiña pepong pomonaе bárapo írathe pejinompaewi nexa. Po pepong pexeiña peitüpanáе koicha xeina xua peitabókotha jinompa bárapo pepong bichokono pexeiña pepong. Barichi wapepong pexeiña pepong po pepong xéinatsi po kae pin nákuathe. ⁴¹Xometo poto átsato pía pexeiña peitüpanáе koicha barompa. Barichi jomokóichato pía peitüpanáе koicha barompa. Opiteino pía peitüpanáе koicha barompa. Icha opitéi pía peitüpanáе koicha jopa nakoicha júpaeyo icha opiteitha po opitéi pía peitüpanáе koicha xeina. ⁴²Barapókotsi júta koyeneya ichi pomonaе xua ekeicha asüü éxanatsi petüpaе kuirukoyene weya. Poxonaе pomonaе pewerapaewi íratha müthúkatsi ekeicha kaewa tsórobo náexana petsabanaexae. Bapoxonaе ekeicha Nakom asüü exanaena pena pepong xua petsitekaenexa. Bárapo pena pepong bápana jopa tüpaе tsane ekeicha, jopa petsabanaexae tsane. ⁴³Bárapo peru pepong jopa xeinaeyo peitüpanáе koicha poxonaе müthütha xotsi. Íchitha jame bárapo pena pepong xeina pexeiña peitüpanáе koicha. Bárapo peru pepong jopa xeinaeyo peasüüwa poxonaе müthütha boka. Íchitha jame bárapo pena pepong xeina peasüüwa. ⁴⁴Bárapo peru pepong saya

bárapo kae pin nákuathe nexa. Daxota poxonae tüpa, tsábana náexana, tsórobo ekeicha kaewa penaexanaenexa. Íchitha poxonae bárapo pepong asiüü exanaeinchi, bapoxonae pena pepong naexanaena pejumopetünaxü nexa xua Nakom pía nákuatha peponaenexa. Icha jiwí xeina peru pepong xua bárapo kae pin nákuathe nexa, barichi pena pepong xeinaena xua Nakom pía nakuatheicha nexa.

⁴⁵Nakom Pejume Diwésitha jeye: “Po jintong kopiya Nakom fórota, bapong Adán. Bapong peasüüwa xeina xua peponaenexa bárapo kae pin nákuathe”, jei Nakom. Íchitha Cristo Adán bichokono toxecha aiñakuichi ekeicha kaewa asiüü peexanaexaetsi. Daxota bapong Cristo itakúüpatsi xua ichamonaetha kana éxana xua pexeinaewa peajüntüyapusüüwa xua po peajüntüyapusüüwa ataya tsiteka. ⁴⁶Kopiya jopa xéinatsi po pepong Nakom pía nákuatha nexa. Saya kopiya xéinatsi po pepong bárapo kae pin nákuathe nexa. Íchitha kotakaya bexa tsane xeinaeinchi po pepong pena pepong Nakom pía nákuatha nexa. ⁴⁷Po jintong kopiya éxanatsi, pong tsórobo weya éxanatsi, bara bapong ápara saya bárapo kae pin nákuathe nexa. Po jintong xua kotakaya patopa bapong ápara Cristo pong itaboko wepatopeika. ⁴⁸Po jiwí xua bárapo nákuathe jinompe pía pepong éxanatsi icha Adán ichichi xua pía pepong tsórobo weya éxanatsi. Íchitha pomonae Jesucristo piamonae tatsixae barapomonae xeinaena pepong icha ichi xua pókotsi pepong xeina Cristo, pong xua itaboko wétsika pona. ⁴⁹Ánoxuae wapepong werapaena icha Adán pía pepong tatsi ichi xua báyatha tüpa. Íchitha poxonae Nakom pía nákuatha patinchi wapepong xeinaeinchi pókotsi pepong icha Cristo pía pepong tatsi ichi xua pexeina peitüpanáe koicha xeina.

⁵⁰Tamonae pam paxam pomonae irü paiña nejumekowüntsíwixae Jesucristo, yábara paka tsipáebatsi po pepong yawa jinómpatsi. Bárapo pepong jopa naka itakúüpaeyo xua wayawa patsiwa Nakom pía peitorobi nakuatheicha xua ataya tsitekaeya wajinompaenexa tsane, tsipéi bárapo pepong tüpa. ⁵¹Paka tsipáebatsi pokotsiwa xua namicha xua jiwí jopa yábara yaputaeyo xua Nakom moya yawüngxaina. Daxita pomonae waxainchi jíwanatsi jopa werawérakae tsainchi xua ataya tsane. Íchitha daxita waxainchi xeinaeinchi icha pepong. ⁵²Poxonae trompeta matawüing asiya obina xua poxonae Nakom daxita wétsina, bapoxonae Nakom jemeicha naiña asiüü exanaena pomonae pewerapaewi pomonae pejumekowüntsíwixae Cristo. Baxua naiña exanaena icha be pókotsi jüta koyeneya ichi poxonae jintong naiña naichaketabiya nekótaba. Pewerapaewi asiüü exanaeinchi xua ekeicha bápana jopa pewerawerakaenexa tsane. Bapoxonae waxainchi pomonaetsi kataunxuae jinómpatsi naiña icha pena pepong xeinaeinchi. ⁵³Wapepong po pepong tsórobo weya náexana bewa naexanaena icha pepong xua jopa werawéraka exanaetsi. Wapepong xua itakúüpatsi xua pewerapaewa, bewa pepong naexanaena po pepong xua jopa werapaeyo. ⁵⁴⁻⁵⁵Wapepong xua werawerakaena Nakom ekeicha asiüü exanaena pena pepong po pepong jopa werawérakae tsane. Poxonae baxua exanaena jopa werawerakaeyo. Yawa bárapo pepong itakúüpatsi xua wérapa íchitha bárapo pepong naexanaena po pepong xua jopa werapaeyo. Bapoxonae baxua nayábara jumekuiweta xua éxana pokotsiwa báyatha Nakom Pejume Diwésitha tsiwüünae yábara muxuduta. Nakom Pejume Diwésitha jeye: “Poxonae Nakom pena pepong kana exanaena piamonae, bapoxonae Nakom amanayabina pongtha pong jiwí tüpa peexanaein”, jei Nakom Pejume Diwésitha. ⁵⁶Pokotsiwa xua naka amanáyaba, ápara xua wawerapaewa abeya waexanaexae. Pomonae exanaetha pokotsiwa Moisés pía peitorobi

koyenéwatha itoroba, barapomonae áwiya wérapa poxoru barapomonae áwiya abe peexanaexae. ⁵⁷Paxang pajang Nakomtha: “Nakom, maisha pajüntükoyene weiweining xua pata tanekatsiwam jiña neayapusúü itorobi koyenewa pata amanayabinexa abe peéxanae kuirukoyenein. Bárapo koyene pana kátame xua poxonae Jesucristo pong pata Nekanamataxeinaein náetotha pata tana tsitüpaexae”, pajang.

⁵⁸Tamonae pam, paxam pomonae tapaka kaántobe jíwichi pam. Paiña neamanayabixae abe paiña neexanáe kuirukoyenein, pana najüntü-ayapusúü éxande Nakomtha. Paiñaxoba payábara kuikópatame xua bara ichamonae paka kana exanaena xua icha koyeneya paiña neexanaewa tsane. Ataya beta panakuita dubenanaebíyama Nakom nexa. Tsipéi paxam payaputáneme po penakuichiwa Nakom pata tanakuita dubenanaebíyame, bara Nakom tsita wüünaetsi.

**Meje xua Pablo parátixi yábara paeba po parátixi jiwi katsiba
ichamonaetha pomonaetha, pomonae pejumekowüntsiwi Nakom**

16 ¹Yábara paka tsipáebatsi parátixi po parátixi penakaetutsimonae jehebapona ichamonae nexa pomonae pejumekowüntsiwi Nakom. Paexande icha pomonae penakaetutsi jiwimonae ichi xua éxana pokotsiwa itorobang pomonae Galacia nakuamonaepiwi. ²Daxita domingo wüing matakábintha paxam daxita barompaya paiña parátixi pajíwana wetsabiya pajehebaponáename pókotsi matoma panabusimatoma xeinéibame. Pomonae pin matomang nabusimatoma xeineiba bewa aiña parátixi jehebaponaena. Pomonae tsiki matómaxi nabusimatoma xeineiba bewa kae parátixi jehebaponaena. Abü parátixi pajébare xua jopa paiña neexanaewa tsane bárxua xua poxonae ekeicha patopaein. ³Poxonae patopaein bapoxonae paitapetsíname pebiwi po pebiwi pekaponaenexa carta. Bárapo pebiwi Jerusalén tómara beya kaitorobin carta. Barapomonae carta kaponae yawa múxuna kaponae parátixi po parátixi pajehebapóname Jerusalén tomarapiwi nexa pomonae pejumekowüntsiwi Nakom. ⁴Icha nantaxeinaein xua yapuwüünaein parátixi penawichixae metha moya bara ponáetsipang Jerusalén tómara beya. Bapoxonae barapomonae nepunaponaena.

Meje xua Pablo yábara nantaxeina, xua pewarapaewa tsane

⁵Poxonae ponaein, bewa Macedonia nakua iyang tsane. Bapoxonae kotakaya paka siwaponaena ponaeinchi Corinto tómaratha. ⁶Metha beya paka barü ekaetsípatsi be kaentakabiyobetha. Ichakuitha metha poxonae awüübo paka barü ekaetsípatsi. Bapoxonae poxonae weta xua awüübo, paka itaküüpa xua pata neyawenaewam pokotsiwa nantawénonang poxonae warapaein icha tómara beya. ⁷Jopa ichipaeiño xua saya bara káetotha tapaka siwaponáewatsi. Jame ichichipang xua be pekono daepáyobe tapaka barü ekáewatsi tsainchi poxonae patopaein. Baxua exanaein icha Nakom baxua inta kopatsina. ⁸Ékang xote Efeso tómaratha beya poxonae matakabi jopaeina po matakabi pewüing Pentecostés. Bárapo matakabi po matakabi jiwi yábara jüntainaina xua poxonae matha Nakom pía Pejumopetünaxü tatsi patopa penakaetutsi jíwitha pomonaetha, pomonae pejumekowüntsiwi. ⁹Ánoxuae neitaküüpa xua bichokono tatanakuichiwa Nakom xua jiwi pinmonae pejumekowüntsinexa bárapo tómaratha. Íchitha ayéi jiwi ichichipa abe nekana éxana xua jopa taexanaenexa tsane.

¹⁰Icha Timoteo patopaena paiñaxantha, pantenta weyataema xua bapong jüntema pepoponaenexa paiñaxantha. Baxua pata éxande poxoru bapong éxana

pokotsiwa Nakom ichichipa, icha xang ichin xua éxanang pokotsiwa Nakom ichichipa. ¹¹Daxita paxam jopa payábara jande: “Ápara bapong Timoteo pewowin, jopa ápara peyaputaen”, jopa payábara jande. Jame maisha bapong payawende xua ekeicha jüntema kaewa peponaenexa taxaiña bérena. Baxua paexande tsipéi xang irü ichamonae pomonae irü pejumekowüntsíwixae Jesucristo, panabariü wüünae éwatang bapong xua Timoteo paéwatang.

¹²Apolos pong irü pejumekowüntsín matowa tsipaebang xua paiña nepaka kataenexa xua bapong pekueyabinexa tsainchi ichamonae pomonae irü pejumekowüntsíwixae Jesucristo. Íchitha bapong nantaxeina xua ánoxuae jopa yapujúpaetsi xua peponaewa tsane xua paiña nepaka siwaponae. Bapong ponaena íchitha poxona tayapujüpaenchi.

Meje poxonae Pablo najumewetsiya paeba

¹³Dota pam, pomonae xua abe pákata éxana. Beta paajüntüsüüya pajumekowünta dubenanaebíyama. Paéxana dubenanaebíyama icha pebiwi ichi xua jopa kunuwiya éxana dubenanaebiyaeyo xua beta peexanaewa. ¹⁴Daxita pokotsiwang xua paexanéibame, peántobe koyenényatha paexanéibare ichamonaetha.

¹⁵Tamonae pam, paxam pomonae irü paiña nejumekowüntsíwixae Jesucristo. Paxam payaputáneme xua Estéfnas piamonae tatsi kopiya jumekowünta Jesucristo Acaya nákuatha. Barapomonae bichokono yawena ichamonaetha pomonaetha, pomonae irü pejumekowüntsiwi Nakom. ¹⁶Paka tsipáebatsi xua paxam xuya paéxana dubenanaebíyama pokotsiwang barapomonae paka itoroba. Pabarünakuire barapomonae xuanu ichamonae irü pabarünakuítame pomonae jüpaeya éxana icha barapomonae ichi. ¹⁷Maisha bichokono jüntükoyene weiweinang xua Estéfnas irü Fortunato irü Acaico xote pate. Barapomonae inta éxana pokotsiwa jopa paka itaküüpaeyo xua painta éxaname xua jopa xote tapaka barü ekaexaetsi. ¹⁸Barapomonae nejjüntükuikoyene tsákaba éxana xua xaniwaicha tapoponaenexa Nakom nexa. Barichi irü baxua pákata éxana. Beta paweyatáename barapókotsi jiwimonae.

¹⁹Pomonae penakaetutsimonaepiwi, pomonae pejumekowüntsiwi Nakom, pomonae Asia nákuatha jinompa, barapomonae paka jakoba. Aquila irü píowa tatsi Priscila, irü pomonae petanakaetutsi dubenanaebiyáe jíwichi piabotha tatsi, barapomonae bichokono paka jakoba peántobe jíwixae xua peantobexaetsi pong jiwi Pekanamataxeinaein. ²⁰Daxita pomonae pejumekowüntsíwixae Cristo pomonae xote jinompe daxita paka jakoba. Betiya painta nantiya pana najakóbare paiña neantobéwaxae Cristo.

²¹Xang Pablo pákata tínatsi po diwésiyo xua kotakaya opidukua. Yatsikaya takoutha takobekouya pákata tínatsi tapaka jakobinéxatsi.

²²Icha ichüng jopa Jesucristo antobetsi pong jiwi Pekanamataxeinaein bárabü Nakom itawetsina pexaiña weya, xua bapong be pong abe peéxanae jintong tsane. ¡Xam pongxaem Pata Nekanamataxeinaem naiña antha patópare!

²³Bárabü Jesucristo pong jiwi Pekanamataxeinaein paka yawenaena pía paka nepaka kaantobéwaxae xua wüünaeya paiña nejinompaenexa. ²⁴Daxita paxam pákata itoróbatsi pokoyene xua tapaka kaántobe koyenéwatsi taantobéwaxae Cristo Jesús.

Baja Pablo.

Meje Po Carte Kotakaya Pablo Tatina, Corinto Tomarapiwi Tatínatsi

Meje poxonae Pablo tamrópata pítaba xua tatina pomonaetha, pomonae Corinto tomarapiwi

1 ¹Xang Pablo pákata tínatsi. Nakom peichichipaexae bapong nekana éxana xua Jesucristo pía peitorobi jiwi jíwana tatsin. Xang irü Timoteo pong pejumeko-wüntsín bapongbe pangbe pákata tínatsi. Paxam pomonae irü paiña nejumeko-wüntsixae Jesucristo pana nakaetútame penakaetutsibotha Corinto tómaratha xua wüünae paiña nejainchinexa Nakom. Matáütano pata tínangbe pomonae irü Nakom piamonae tatsi xua Acaya nákuatha jinompa. ²Bárabü Nakom pong Waxa irü Jesucristo pong jiwi Pekanamataxeinaein bapongbe paka yawenaena pía paka nekaantobexae. Matáütano bárabü bapongbe paka kana exanaena xua jüntema paiña nejinompaewa tsane.

Meje yábara xua poxonae Pablo átene éxanatsi

³Bara Nakom wüünae jáintatsi pong Wanaka namataxeinaein Paxa tatsi xua Jesucristo Paxa tatsi. Bapong Nakom Waxa nakayábara nantaxeina xua wanaka yawenaewa tsane. Bapong Nakom naka itanuwé matateika wanaka antobexae. ⁴Daxita xua xuang ichamonae pana átene éxana, xuang Nakom pana kuimatateikeiba, baxua Nakom painta éxana xua xuya irü ichamonae pata kuimatateikaenexa tsaibi tsane pomonae poxonae átene exanéibatsi ichamonae. Paxang ichamonae pakuimatateikang icha Nakom pana ichi xua pana kuimatateika. ⁵Icha Cristo ichichi poxonae átene éxanatsi ichamonae, barichi ichamonae pana átene éxana pata jumekowüntsixae Jesucristo. Nakom, Cristo kuimatatéikatsi poxonae átene éxanatsi ichamonae. Bara pana ichi Nakom pana kuimatateikeiba poxonae ichamonae pana átene exaneiba. ⁶Ichamonae pana anthüthütane éxana. Bekein baxua painta éxana, dáichitha áwiya pana itaküüpa xua tapaka kayawenáewatsi poxonae paka kuimatatéikatsi. Matáütano pana átene éxana pata paka kuidubi-xaetsi paiña nepaka kapanenebiyaenexa abe paiña neexanáe kuirukoyenein weya. Nakom pana kuimatateika xua paxang xuya pata paka kuimatateikaenéxatsi. Baxua paka kana éxanatsi poxonae áwiya jüntema pajinompa dubenanaebíyame bekein poxonae ichamonae paka átene éxana icha barapomonae pana ichi xua pana átene éxana. ⁷Paxang ajüntüsüüya paka kuiyábara jumekowüntsiya éwatatsi xua paxam bara beta pajinompa dubenanaebiyáename poxonae bekein ichamonae paka átene éxana. Paxang payaputang xua paxam írürü paajüntükoyenetanem poxonae ichamonae pana átene éxana. Barichi Nakom paka kuimatateika icha pana ichi xua pana nekuimatateika.

⁸Tamonae pam, paxam pomonae irü paiña nejumekowüntsíwixae Jesucristo. Paichichipang xua paiña neyaputaewa xua ichamonae bichokono painta ayapubé éxana Asia nákuatha. Baxua bichokono ayapusüüya pana jüntükoyene jüjüta, beya poxonae áwatha muxu jopa jüntema pata dubenanaebiyawa. Ichakuitha panantaxeineibang xua jopa pana itaküüpaeyo xua pata panenebiwa xua pata asüüwa tsane. ⁹Ichakuitha panantaxeinang xua bara metha pata werapaewa tsane. Íchitha baxua Nakom saya bara kópata xua pata yábara jumekowüntsiwa tsane xua meisha Nakom bara kompa piakoutha pata taneyawenaewa tsane xua jopa pata tana nayawenaewa tsane pata koutha. Nakom ápara pong ekeicha asüü éxana pewerapaewi petüpáe kuirukoyene weya. ¹⁰⁻¹¹Nakom pana nekapanenebiya ichamonae weya poxonae barapomonae bichokono abe painta éxana poxonae áwatha muxu pata wérapae. Matáütano áwiya Nakom baxua painta exanapona. Yatsikaewa Nakom payábara jumekowüntang xua bexa tsane pana nekapanenebiyáenano icha áwiya painta wüükapóname Nakomtha. Nakom pana neyawena poxonae pinmonae painta tsipaebina Nakomtha. Bexa poxonae Nakom pana nekapanenebiyaena barapoxonae pin bicheitomonae jei tsane: “Nakom maisha pajüntükoyene weiweinang xua neyawenaewa Pablobarü xua jopa pewerapaewa neantobexae poxonae jiwi pin bicheito kawüüka barapomonae nexa”, jei tsane bárapo pin bicheitomonae.

Meje poxonae Pablo jopa yapujúpaetsi xua peponaewa Corinto tómara beya

¹²Pajüntükoyene weiweinang, daxota atsakiya pata jeiwa pokotsiwe: Daxita pokotsiwa paéxanang po kae pin nákuathe, xuano poxonae pata paka barü jinompáewatsi, pata jüntükoyene bara pana tsipaeba xua pinae bara beta paéxanang. Pajüntükoyene wüünaenang Nakomtha. Matáütano bara xaiñeya paéxanang daxita koyenein. Nakom pana neyawena xua beta pata jinompaewa tsane pata antobexae Nakom. Ápara baxua jopa paexanaeño barompaya pata tayaputáe koyenéwatha. ¹³Daxita xua pákata tínatsi jopa icha diwesi pákata yawa múxuna tinaetsi. Pokotsiwa pákata tínatsi saya pokotsiwa paiña nepaka itaküüpaewa xua paiña neyorobiwa tsane xuano xua paiña nejumekopi-yaputaewa tsane. Ichichipang xua betiya paiña neyaputaewa tsane daxita pokotsiwa xua pákata tínatsi. ¹⁴Ánoxuae daxita pam be kónotha pana neyaputáneme. Poxonae Jesús pong Wanaka namataxeinaein ekeicha patopáetsika, pana neyábara jüntükoyene weiweinaename icha paichin tsane xua paka yábara jüntükoyene weiweinaeinchi.

¹⁵Poxoru pana neyábara jüntükoyene weiweiname daxota nantaxeinang xua tapaka siwaponáewatsi tsainchi. Bapoxonae icha neitaküüpa ekeicha bexa paka siwaponaeina ponaeinchi xua daxota aiñakuiyobetha paka siwaponaeina ponaeinchi tapaka kayawenaewa tsainchi. ¹⁶Báyatha paka tsipáebatsi jangje uaje: “Poxonae ponaein Macedonia nakua beya kopiya ichichipang xua matha tsiwanaeya tapaka siwaponáewatsi tsainchi. Ekeicha paka taeinchi poxonae kaewa denang tsane Macedonia nakua wérena. Bapoxonae paka itaküüpa xua tapana neyawenaewam poxonae warapaein Judea nakua beya”, paka jeichi. ¹⁷Bekein baxua páebang, dáichitha baxua jopa neitaküüpaeyo xua taexanaewa baxua. Poxonae báraxua páebang pana nejumekayábara kanantaxéiname xua xang ápara pong ichawa beya tapaebin xua be pókotsi jintong pong saya éxana pokotsiwa bapong ichichipa xua

ichawa beya ba paeba. Xang baxua jopa exanaeiño. Jopa ba paka jeichi “aja”, jopa paka jeichi. Ichakuitha jopa ba paka jeichi “jume”, jopa paka jeichi xua poxonae kae koyene yábara paka tsipáebatsi. ¹⁸Nakom bapong bara xaniwaicha tana neyábara paebin pokotsiwa taexanaewa. Bapong Nakom netane xua jopa ichawa beya tapaebiwa. Saya poxonae, ba “aja”, pejeinexa, ba “aja”, jang. Matáütano saya poxonae ba “jume” pejeinexa, ba “jume”, jang. ¹⁹Timoteo irü Silvano irü xang paka kuidúbatsi Nakom Pejume Diwesi pokoyene xua Cristo Jesús yábara, pong Nakom Pexanto tatsi. Bapong Cristo jopa bápana jei tsaibiyo bara káetotha: “jume”, yawa “aja”, jopa bápana jei tsaibiyo. Saya jame ba jei: “aja”, ba jei tsaibi. ²⁰Cristo bara daxita éxana pokotsiwa Nakom Pexanto yábara tsiwüünae muxuduta. Bara Cristo “je” jei xua peexanaenexa pokotsiwa Paxa itoróbatsi. Daxota waxainchi barichichi jei tsaibichi: “je, barichi tsane bara Cristo Jesús exanaena baxua”, jei tsaibichi waxainchi poxonae Nakom wüünae jaintéibatsi. ²¹Bapong Nakom pana ajüntükoyenesüü éxana xua beta pata jumekowüntsinexa Cristo. Matáütano irü bara paka ichi Nakom, paka yawena. Bapong Nakom naka itapeta watanakuichinexa bapong. ²²Barapong Nakom naka kana éxana xua wanaka barü jinompaewa pía Pejumopetünaxü tatsi wanaka yaputaenexa xua piamonae jíwichi. Báraxua Nakom naka tsita itapeñaxeina xua bexa tsane naka katsina ichawang.

²³Nakom neyábara jüntükoyene yaputane xua xaiñeya páebang. Bekein juntukuru nantaxeinang xua paka siwaponaeina ponaeinchi íchitha jopa ponaeiño. Jopa paka siwaponaeina ponaetsi Corinto tómaratha tsipéi jopa dangweya be paka tsipaebichi xua paka jüntükoyene wekoyéi exanaetsípatsi. ²⁴Jopa be paka yábara itorobichi xua pokotsiwa bewa paiña nejumekowüntsiwa tsane. Tsipéi barápara ayapusüüya pajumekowünta dubenanaebíyame. Pokotsiwa jame paichichipang ápara xua pata paka barü nakuichíwatsi jame, paiña nejüntükoyene weiweinaenexa.

2¹Daxota juntukuru nantaxeinang xua jopa ekeicha tapaka siwaponaeina tsainchi, tsipéi jopa be paka wekoyéi exanaetsi. ²Icha paka jüntüwekoyéi exanaetsípatsi, dapomonae albi tsipae pomonae nejüntükoyene weiweina éxana. Jame meisha paxam paka itaküüpa xua tapana nejüntükoyene weiweina exanaewam. Íchitha icha paxam saya pajüntükoyene wekoyam tsipae jopa pana nejüntükoyene weiweina exanaem tsipae. ³Daxota báyatha pákata tínatsi icha carta tsipéi jopa be paka siwaponaeina ponaetsi icha saya paka jüntükoyene wekoyéi éxanatsi poxonae yábara paka muxuwétatsi pokotsiwa paéxaname xua abe paéxaname. Ápara jame paxam pomonae bewa pana nejüntükoyene weiweina exanaem. Xang nantaxeinang icha jüntükoyene weiweinang paxam bara paichim tsane pajüntükoyene weiweinaenexa. ⁴Poxonae báyatha po carta pákata tínatsi bichokono ünthüthüwekoyang, tsipéi bichokono paka yábara najüntükoyene eena éxanatsi pokotsiwa paiña neexanaexae beya poxonae yatsikaewa wekoyang xua yatsikaewa taitakuere mene jujuinkaewa. Jopa ichipaeiño xua tapaka wekoyéi exanáewatsi. Jame ichichipang xua paiña neyaputaewa xua tapaka kaantobéwichi bichokono.

Meje poxonae Pablo itoroba xua Corinto tomarapiwi peyábara jüntemainawa tsane pokotsiwa éxana pong pénowa pita

⁵Kaein pong paxam jíwana pam abe éxana ichamonaetha. Bapong jüntükoyene wekoyéi éxana ichamonaetha. Bapong jopa meisha ápara kompa nejüntükoyene

wekoyéi exanaeyo. Barichi bapong bara irü paka jüntükoyene wekoyéi éxana daxita paxam bekein saya bapong abe éxana pong paiñamonae jíwana jintong. ⁶Pong yábara icha cártatha pákata tínatsi pong abe peexanaein, pebürüya nantajüpaya paitawétame bapong xua pepatopaeyainwa paiña nenakaetutsíwatha poxonae wüünae pajáintame Nakom. Ánoxuae bapong nakuibaraxuba xua abe peexanaewa. Báraxua bara wüünae. Paiñaxoba ekeicha paitawétame bapong. ⁷Ánoxuae paxam bewa pakuiyábara jüntemainaem abe pía peéxanae kuirukoyene tatsi. Matáütano bewa pakuimatateikáename xua peaurayainwa. Icha jopa baxua paexanaem tsipae, bapoxonae bapong metha jopa juniya bichokono jüntükoyene wekoyéi tsipae, xua daxota anaya piakoutha penakabétsiwa xua pebaraxubixae xua pejumekowüntsiwa. ⁸Daxota paka tsipáebatsi, bapong patsita-itapeiñaxéinare xua peántobe koyenewa paiña netsita xeinaewa bapong. ⁹Báyatha yábara pákata tínatsi xua bewa pamuxuwetsim bapong. Paka jüntükoyene jüjútatsi xua tayaputaenexa icha metha bara xaniwaicha pana nejumekowüntame daxita pokotsiwa paka itoróbatsi, bara báyatha pamuxuwétame bapong. ¹⁰Icha paxam ichüng pakuiyábara jüntemáiname abe pía peéxanae kuirukoyenein tatsi, barichin tsane irü bapong kuiyábara jüntemainaem abe pía peéxanae kuirukoyenein tatsi. Tsipéi icha ichüng kuiyábara jüntemainang abe pía peéxanae kuirukoyenein ápara poxoru kopiya paiña nekuiyábara jüntemainaexae abe pía peéxanae kuirukoyenein tatsi. Baxua éxanang Cristo tana neitoróbixae. Baxua Cristo nekuitane xua éxanang. ¹¹Waxainchi ichamonae abe pía peéxanae kuirukoyenein tatsi yábara jüntemáinatsi xua kaurimonae pía pentakaponaem tatsi jopa wanaka kui-amanayabinexa. Kuiyaputainchi xua bapong bichokono dangweya jiwi jüntükoyene jüjútatsi xua abe peexanaenexa.

Meje poxonae Pablo Tito bichokono yábara najüntükoyene éxabatsi Troas tómaratha

¹²Poxonae Troas tómaratha patopang xua takueikueijeinexa Cristo pejume diwesi bara inta yapuwünae xua tanakuichinexa Nakom nexa, pong jiwi Pekanataxeinaein poxoru bárapo tomarapiwi bara beta nejumetane. ¹³Íchitha bichokono jopa jüntema poponaieño poxoru bichokono yábara najüntü-éxabang Tito pong irü pejumekowüntsin Jesucristo, yáitama jopa kaxinaieño bapong. Daxota Troas tomarapiwi napéyabang. Bapoxonae ponang Macedonia nakua beya.

Meje yábara pokoyeneya xua Cristo naka yawena xua waamanayabinexa kaurimonae pía pentakaponaem tatsi

¹⁴Nakom patsipaebang, pajang: “Nakom maisha pajüntükoyene weiweinang xua painta éxaname”, pajang. Nakom pana kana éxana xua Cristo betiya pana kananataxeina poxonae Nakom Pejume Diwesi pakueikueijang. Matáütano Nakom pana kana éxana xua pata amanayabiwa kaurimonae pía pentakaponaem tatsi poxonae jiwi yaputane pakana éxanang xua peyábara yaputéwatsi Cristo. Daxita nákuangtha ichaxota paponeibang, bapong payábara paebeibang. Bárapo pexeña jume diwesi xua papaebeibang tajü beya pajumepichipaponang, icha be poxonae petuxuéi túxusi ichi xua tajü túxusi pona. ¹⁵Nakom ichipa nawita poxonae beta patakueikueijang xua Cristo payábara kueikueijang icha be poxonae ichi poxonae bichokono túxusi ichichipa incienso túxusi matawüing. Barichi po diwesi xua

Cristo payábara kueikueijang, tajü pajumepichipaponang pomonaetha, pomonaetha Cristo kapanenebiya dukuanaebiya xuano pomonaetha, pomonaetha werawerakapona jopa pejumekowüntsixaetha Cristo. ¹⁶Poxonae jiwi jopa jumekowüntsiyo bárapo diwesi po diwesi pakueikueijang be tsita tuxusichi xua po túxusi barapomonaetha túpáe peexanáewatsi. Íchitha poxonae jiwi jumekowünta, bapoxonae bárapo diwesi tsita muxuwünaetsi icha xua jiwi ichi poxonae po túxusi tuxune xua bichokono ponxo túxusi wünaetsi. Barapomonaetha pejüntükoyénetha yaputane xua bárapo jume diwésixaetha Nakom kata barapomonaetha peajüntüyapusüüwa po peajüntüyapusüüwa ataya tsiteka. ¿Jintam metha itaküüpatsi xua bárapo Nakom pía petanakuichiwa tatsi peexanaewa xua piakoutha kompa éxana? Ápara dapong aibi. ¹⁷Paxang jopa paexanaeño icha be jopa ichamonaetha ichiyo xua poxonae barapomonaetha pía paratixichi paeba dubenanáebiya Nakom Pejume Diwesi. Paxang po pebiwi pang xua xaniwaicha pata tsipaebi jiwi pang ichamonaetha, Nakom pata taneitorobixaetha. Daxota Nakom Pejume Diwesi papaebang kaemonaetha wanaexanaethaetsi Crísto.

Meje poxonae Pablo yábara paeba Nakom pía pena petsiwüünaetha muxudutsiwa tatsi

3 ¹Poxonae baxua pákata tínatsi, metha pana neyábara nantaxeinaetsípame xua paxang pomonaetha aiñakuí jiwi pata naexanáe jiwi pang. Nama ichamonaetha cartang kápona po cártangtha piamonaetha beta yábara tina barapomonaetha, xua paiña nekopatsiwa tsane xua bara pía paka tsipaebibichi Nakom Pejume Diwesi poxonae barapomonaetha pateibina paiña tómaratha. Metha paxam pana neyábara nantaxeinaetsípame xua xang irü barichindü icha ichamonaetha ichi xua poxonae bárapo carta kápona pía xua paiña nekopatsiwa tsane xua bara pía paka tsipaebibichi Nakom Pejume Diwesi. Bekein metha pana neyábara nantaxeinaetsípame xua xuya painta tinaetsípame xua paxang yábara íchitha jopa ápara paka wüükaetsi baxua. ²Poxonae daxita jiwi paka kuitane xua beta paiña jinompaewa Nakom nexa, bapoxonae jiwi pana neyábara nantaxeinaetha xua bara beta pata exanaewa xua pata paka yawenaethaetsi xua paiña nejumekowüntsiwa. Pata jüntükoyenewang pana tsipaeba xua bara pinaetha pajumekowüntame Cristo. Poxonae jiwi paka kuitane xua beta paiña nejinompaewa Nakom nexa, bárapo jiwi pana nejüntanainaetha xua beta pata paka kayawenaethaetsi. Baxua be poxonae jiwi yóroba pexeñaetha carta xua paxang yábara xua daxota jopa nantawenonaeyo xua xuya painta petinaenexaetha carta. ³Cristo ichichipaetha xua jiwi tane xua bapong bichokono wüünaetha éxanaetha paxam nexa pojumein weya xua paxang paka tsipáebatsi. Íchitha bapong Cristo jopa tinaeyoetha carta peanainkuitongthaetha xua jiwi petanexaetha pejumein itanetong. Matáütanoetha jopa tinaeyoetha peitanetongetha xua ibo panáwathaetha ichi Moisés ichi. Jame Nakom pía Pejumopetünaxü tatsi icha jüntükoyene paka kata xua daxota jiwi tsita itapeñaxéinatsietha xua Cristo beta éxanaetha paxam nexa.

⁴Paxang pana itaküüpaetha xua baxua papaebang Cristo pata neyawenaethaetha xua pata jumekowüntsiwaetha Nakom. ⁵Íchitha jopa pana neitaküüpaeyoetha xua pata kouthaetha pata exanaewaetha baxua. Daxita pokotsiwangetha pana itaküüpaetha xua pata exanaewaetha áparaetha Nakom pata taneyawenaethaetha. ⁶Nakom pana nekanaetha éxanaetha xua pomonaetha yatsikaewaetha pata yábara kueikueijejietha jiwi pang Nakom pía pena petsiwüünaetha muxudutsiwaetha koyenewaetha. Nakom pía pena petsiwüünaetha muxudutsiwaetha koyenewaetha jíwithaetha

jopa xeinaeyo xua tina aiña koyenein xua jiwi peitorobi koyenéwatsi xua jiwi bewa exanaena. Bárapo Nakom pía pena petsiwüünae muxudutsi koyenewa paeba xua saya meisha xua beta pejinompaenexa. Nakom pía Pejumopetünaxü tatsi itaküüpatsi xua naka kata pena pejüntükoyenein. Nama Moisés pía peitorobi koyenewa seikaya paeba xua bekein jiwi éxana xua Moisés itoroba, barapomonae áwiya werapaena abe peexanaexae. Nama seikaya Nakom pía Pejumopetünaxü tatsi peajüntüyapusüüwa naka kata.

⁷Moisés pía peitorobi koyenewa ibo panawangtha tina. Bárapo koyene jiwi kana éxanatsi xua pewerapaewa abe peexanaexae. Poxonae bárapo koyenewa Moisés kata israelmonaetha barapomonae israelmonae jopa itaküüpaetsi xua Moisés péitabara taewatsí tsipéi Nakom pía pexeíña peitüpanáe koicha tatsi bichokono pentha Moisés peitabaratha. Íchitha bárapo Nakom pía pexeíña peitüpanáe koicha tatsi Moisés pía xaiña weya tatsi bewayo kaewanaya. ⁸Po pena jüntükoyene Nakom pía Pejumopetünaxü tatsi naka kata bichokono wüünae tsipéi jiwi kana éxanatsi xua pexeinaewa peajüntüyapusüüwa po peajüntüyapusüüwa ataya tsiteka. Bárapo pena jüntükoyene bichokono wüünae beyakaincha po peitorobi koyene Moisés itoroba. ⁹Bekein Moisés pía peitorobi koyenewa wüünae, bárapo koyenéwaxae Nakom tsítatsi xua jiwi penatsikuentsiwa xeina xua abe peexanaexae. Nama Nakom bichokono wüünae pía pena jüntükoyenewa po jüntükoyenewa jiwi kátatsi beyakaincha Moisés pía peitorobi koyenewa. Bárapo Nakom pía jüntükoyenéwaxae, jopa tsítatsi xua piamonae tatsi pexeinaewa xua penatsikuentsiwa xua abe peexanaexae. ¹⁰Moisés pía peitorobi koyenewa tatsi kopiya bichokono wüünae, nama ánoxuae jopa peraichiwa, tsipéi jopa naka yawenaeyo. Nama Nakom pía pena petsiwüünae muxudutsi koyenewa tatsi jame bárapo koyene jiwi bichokono yawénatsi. Daxota bárapo koyene yatsikaewa wüünae beyakaincha Moisés pía peitorobi koyenewa tatsi. ¹¹Poxonae Moisés kata pía peitorobi koyenewa israelmonaetha bapoxonae barapomonae tane Moisés peitabaratha tatsi Nakom pía pexeíña peitüpanáe koicha tatsi. Bárapo pexeíña peitüpanáe koicha kaewanaya. Nama Nakom pía pena petsiwüünae muxudutsi koyenewa jopa kaewanayiyo. Nama ataya ayapusüüya tsiteka bárapo koyene.

¹²Tsipéi pajumekowüntsia éwatang xua Nakom exanaena daxita pokotsiwa báyatha yábara pana netsiwüünae muxuduta, daxota jopa paauriño xua pata yábara paebiwa daxitang. ¹³Paxang jopa paexanaeiño icha Moisés ichi. Bapong Moisés náitabara ákata paparúwatha xua israelmonae jopa peyaputaenexa xua poxonae bárapo pexeíña peitüpanáe koicha kaewanaya. ¹⁴Bárapo israelmonae jopa yaputaeyo Moisés pía peitorobi koyenewa tatsi. Nakom kópata xua barapomonae jopa peyaputaewa pía jüntükoyenintha bárapo koyenewa. Barichi ánoxuae poxonae bárapo israelmonae yóroba Moisés pía peitorobi koyenewa tatsi, kataunxuae kame jopa yábara yaputaeyo baxua. Báraxua icha poxonae Moisés ichi poxonae náitabara ákata paparúwatha poxonae barapomonae jopa yaputaeyo xua bárapo koicha kaewanaya. Matáüta ánoxuae barapomonae jopa yaputaeyo xua icha jiwi jumekowüntsina Cristo saya meisha bapoxonae bárapo jiwi itaküüpatsi xua peyaputaewa Moisés pía peitorobi koyenewa. ¹⁵Israelmonae beya nama ánoxuae, kame jopa yaputaeyo Moisés pía peitorobi koyenewa tatsi poxonae yóroba. Barapomonae jopa peyaputaewa Moisés pía peitorobi koyenewa

tsipéi najüntükoyene arárana jopa be peyaputaewaxae. ¹⁶Íchitha poxonae jiwi jumekowünta Jesucristo pong jiwi Pekanamataxeinaein, bapoxonae Nakom kana éxana xua pejüntükoyeneintha peyaputaewa Moisés pía peitorobi koyenewa tatsi. ¹⁷Jesucristo pong jiwi Pekanamataxeinaein irü Nakom pía Pejumopectünaxü tatsi najüntükoyene júpabe. Pomonae ba Nakom pía Pejumopetünaxü tatsi xeina jopa nantawenonaeyo xua peexanaewa pokotsiwa Moisés pía peitorobi koyenéwatha itoroba xua daxota Nakom jopa átene peexanaewa tsane barapomonaetha. ¹⁸Daxita waxainchi wajumekowüntsixaes Jesucristo pong jiwi Pekanamataxeinaein, jiwi tsita itúütatsi xua bara Nakom pía Pejumopetünaxü tatsi jopa juniya naka yawenaeyo. Jopa daichichi icha Moisés ichi poxonae paparúwatha náitabara ákata xua jopa peichichipaexae xua peitabarátáewatsi ichamonae, tsipéi bichokono itabara daedaena xua Nakom pía peitüpanáe koicha tatsi. Jame waxainchi jinómpatsi xua ichamonae naka jüntükoyene tane, xua jiwi beta peyaputaenexa xua bara Nakom pong bichokono pexeinaein pejüntükoyene wüünaewa. Nakom pía Pejumopetünaxü tatsi naka yawena dukuanaebiyaena bexa tsane xua waxeinaeponaewa tsane pena jüntükoyenewang. Icha Jesucristo ichi pía jüntükoyenéwatha, barichi tsainchi xua wajüntükoyenéwangtha xua poxonae jinómpatsi.

4 ¹Nakom pata tana antobexae pana kata bárapo penakuichiwa. Daxota paxang jopa bápana paajüntükoyenefaetabiya kueikueijangyo Nakom Pejume Diwesi. ²Jopa paexanaeño xua pata yábara kueikueijiwa pokoyene ba jiwi aura éxanatsi pokoyene jiwi moya yawüngxaina. Matáütano jopa paexanaeño pokoyene xua pata muxujaiñabiya paebiwa. Barichi jopa payábara jumetoxeinchiya exanaeño Nakom Pejume Diwesi xua poxonae ichamonae pata kana exanaenexa xua Jesús pejumekowüntsíwatsi. Nama ápara seikaya papaebang pexaiñéi jume diwesi. Daxota poxonae daxita jiwi pana nejumetane pía jüntükoyenein tsipáebatsi xua bara xaiñeya papaebang. Nakom pana jumetane daxita pokotsiwa papaebang. ³Poxonae Nakom pía pekapanenebiyáe jume diwesi pakueikueijang, icha jiwi jopa yaputaeyo baxua, ápara poxoru barapomonaes werawerakaena, jopa pejumekowüntsixaes. ⁴Jintong ba, pong peitatakrein jopa itaküüpaetsi xua petaewa. Barapókotsi júta koyeneya ichi pomonae werawerakaena jopa itaküüpaetsi xua pejumekowüntsiwa Nakom. Kaurimonae pía pentakaponaein tatsi jiwi jüntükoyene itoróbatsi bárapo kae pin nákuathe. Bapong barapomonaes kana éxanatsi xua jopa peyaputaewa. Daxota jopa Cristo jumekowüntsichi. Matáütano bapong jopa kopatsiyo xua barapomonaes peyábara jumekowüntsiwa Nakom pía pekapanenebiyáe diwesi tatsi. Bárapo diwesi bichokono wüünaes xua yábara kaunuta xua Cristo pexeíña peitüpanáe koicha xeina. Bapong Cristo bara Nakom kuijúpatsi. ⁵Poxonae pakueikueijang, ápara jopa pata koutha pana nayábara kueikueijangyo. Ápara Jesucristo payábara kueikueijang xua bapong yatsikaya pepa Wanaka namataxeinaein. Paxang amanaya panakuitang paxam nexa pata taantobexaes Jesús. ⁶Nakom pong xua jeye: “Bárabü pekoicha ba pentha pekiréiwatha”, jei. Bapong Nakom éxana xua pepatopaewa pata tha pía pexeíña jume diwesi tatsi, po diwesi kopiya jopa pata yaputaewa. Pata tha pata xeinaexaes bárapo diwesi pana itaküüpa xua pata yábara yaputaewa Nakom pía pexeíña peitüpanáe koicha xua paxang patang, xua Jesucristo pata itabara taewa.

**Meje xua Pablo yábara paeba xua pejinompaeya
koyenewa xua pejumekowüntsi koyenáyatha**

⁷Paxeinang pata tha peyaputáe koyenewa po peyaputáe koyenewa pana kana éxana xua pata yábara yaputaewa Nakom pía pexeíña peitüpanáe koicha. Pata pepong saya bichoina werawéraka icha jurúwato ichi xua bichoina werawéraka. Pata xeinaexae Nakom pía peyaputáe koyenewa, daxota ichamonae patsita-itapeíñaxeinang xua peyapusúü itorobi koyenewa paxeinang xua Nakom pana kata. Daxota ápara Nakom piáwa, jopa ápara patawiyo. ⁸Bekein jiwi ichawa beya pana jüntükoyene jüjüta xua abe pata exanaenexa poxonae abe painta éxana, íchitha áwiya pana itaküüpa xua pata panenebiwa bara weya. Bekein bichokono yábara pana najüntükoyene éxabang pokotsiwa jiwi painta éxana, íchitha áwiya jopa paa-jüntükoyene faetabiño. ⁹Bekein jiwi pana nepubaraina pía abe pata neexanaetsi íchitha Nakom jopa pana kopabiyo xua kompa pang xua pata nekuentaponaewa. Bekein barapomonaе íratha pana bebái xua pata tanejutebiwa tsane, íchitha Nakom jopa pana kopabiyo xua barapomonaе pata tanejutebiwa. ¹⁰Daxita nákuangtha ichaxota paponeibang jiwi abe pana exaneiba. Barapomonaе pana wang dubeibina pata tanejutebeibiwa tsane icha Jesús ichichi xua poxonae bexotsi. Poxonae jopa pabobenaеiño xua ichamonae jopa pata tanejutebiwa, baxua patsita-itapeíñaxeinang jiwi xua ápara Jesús asüü pong pata taneyawenaexae pía peyapusúü koyenéwatha. ¹¹Poxonae kataunxuae pajinompang bárapo kae pin nákuathe jiwi ichichipa pata tanejutebeibiwa pata yábara paebí dubenanaebiyaexae Jesús. Daxota baxua jíwitha patsita-itapeíñaxeinang xua xaniwaicha bara Jesús pana yantsiya pópona poxonae jiwi pana wang tane xua poxonae bekein muxu pata bobeneibi. ¹²Pata yábara paebixae Jesucristo jiwi muxu pata tanejutebeibi. Íchitha pata yábara paebixae Jesucristo daxota peajüntüyapusüüwa paxéiname po peajüntüyapusüüwa ataya tsiteka.

¹³Nakom Pejume Diwésitha jeye: “Jumekowüntang daxota kueikueijang”, jei. Paxang pajumekowüntang icha David ichi xua poxonae baxua paeba. Írürü paxangdü pajumekowüntang daxota pakueikueijang. ¹⁴Payaputang xua Nakom Jesús asüü éxanatsi xua petüpáe kuirukoyene weya pong jiwi Pekanamataxenaеin. Barichi tsane Nakom asüü naka exanaena petüpáe kuirukoyene weya, kaemonae waexanaeatsi Jesthа. Paxang irü paxamdü Nakom naka kaponaena pía xaiña beicha. ¹⁵Daxita pokotsiwang xua ichamonae pana nekana éxana xua paatenein baxuang paka yawena xua paiña nejumekowüntsinexa. Poxonae jiwi ekeicha mataropeicha jumekokowüntaponaena Cristo, bapoxonae ayéi jiwi Nakom wüünae jainchínchi, jei tsane: “Nakom maisha pajüntükoyene weiweingang xua pata taneyawenaewam pata taneantobexaemxae”, jei tsane. Bapoxonae jiwi bichokono wüünae jainchina Nakom xua bapong bara beta peexanaexae.

¹⁶Daxota jopa bápana paajüntükoyenefaetabiya jinompaein. Pata pepong fifinapona. Íchitha pata jüntükoyene ekeicha mataropeichiya asüüya ayapusúü tso-poneibi daxita matakabin. ¹⁷Pokoyenein xua bárapo kae pin nákuathe ichamonae átene pata tana neexanaewa jopa pana netsita aiñakuiyo tsipéi saya bara kaeto pana átene éxana. Bárapo atenewa pata tana neexanaewa pana neyábara nakui-wüünaeta xua bexa tsane Nakom pata tana nekatsibiwa tsane pokoyenein xua bichokono wüünae xua pokoyene ataya pata xeinaewa tsane pokoyene xua pexeíña peitüpanáe koichaxae. ¹⁸Jopa bichokono pakayábara nantaxeineibiño pokoyenein

painta dangwéi xua jiwí átene pata tana neexaneibixae bárapo kae pin nákuathe. Jame maisha bichokono pakayábara nantaxeinang pokoyenein xua Nakom pana jüntükoyene weiweina exanaena. Pokotsiwang xua jiwí pana nekana éxana bárapo kae pin nákuathe werawerakaena. Nama xua pokotsiwang Nakom painta exanaena baxua ataya ayapusüü tsóponae.

5¹Pata pepong xua saya pata yawa jinompaenexa bárapo kae pin nákuathe nexa icha bouto ichi xua saya pekuenta werapaenexa bárapo kae pin nákuathe. Poxonae pawarapaein pata pepong werawerakaena icha bouto ichi. Bapoxonae payaputang xua Nakom icha pepong painta xeina xua pena pepong pía nakuatheicha. Bárapo pepong ataya payawajinompaein. Bárapo pena pepong Nakom éxana, jiwí jopa exanaeyo. ²Ánoxuae bichokono pana najüntükoyene éxabang tsipéi bichokono bepaxeinaein icha pena pepong po pena pepong Nakom xeina pía nakuatheicha. ³Bárapo pena pepong Nakom pana kata xua jopa patajinompaenexa athabeicha poxonae jopa paxeinaeiño pepong. ⁴Poxonae kataunxuae bárapo pepong payawajinómpang bárapo kae pin nákuathe bichokono pana najüntükoyene éxabang tsipéi jiwí painta ayapubé éxana pata pepongtha. Íchitha jopa paichichipaeiño xua pata jinompaewa be poxonae jopa paxeinaeiño bárapo peru pepong xua pata bebeixae. Jame paichichipang xua pata yawa jinompaewa pena pepong. Po pepong ánoxuae payawajinómpang saya werapaena. Paichichipang xua ekeicha pata xeinaewa pena pepong po pena pepong xua ataya asüüya pata yawa jinompaewa tsane. ⁵Nakom pana nekuiyábara wüünaeta xua bárapo pena pepong pana katsina. Nakom pana kata pía Pejumopetünaxü tatsi xua pana netsita-itapeiñaxeina xua bexa tsane Nakom pena pepong xaniwaicha pana katsina.

⁶Daxita matakabin ajüntüsüüya pajumekowünteibang Nakom pong jiwí Pekanamataxeinaein. Payaputang xua poxonae kataunxuae bárapo kae pin nákuathe payawajinómpang bárapo peru pepong. Kataunxuae yatsikaya Jesucristo tajü tsana pana kuenta eka, jopa kataunxuae pata xeinaexae bárapo pena pepong. ⁷Pajinompang pata jumekowüntsiya koyenýatha Jesús, xua bapong exanaena pokotsiwang bapong paeba, bekein kataunxuae jopa pana nebarü jinompaeyo itabokotha. Ápara jopa pajinompaeiño xua pata tatáewaxae ichawa. ⁸Ajüntüsüüya pajumekowünteibang Nakom. Paichichipang pata bebeiwa bárapo peru pepong xua po pepong ánoxuae payawajinómpang patajinompaenexa ichaxota Jesús pópona pong jiwí Pekanamataxeinaein. ⁹Bichokono paichichipang xua pata exanaewa pokotsiwa bapong Jesús pong jiwí Pekanamataxeinaein ichichipa bekein bárapo pepong payawajinómpang bárapo kae pin nákuathe, matáütano ichakuitha metha bekein poxonae painompang Nakom pía nákuatha. ¹⁰Bexa tsane daxita waxainchi bewa umenaeinchi Cristo peitabaratha. Bapoxonae bárapo matakaitha bapong yábara paebina jiwí xua penatsikuentsiwa xua abe peexanaexae Nakomtha. Daxita barompaya matoma xeinaena pokotsiwa pía peexanaexae poxonae kataunxuae jinompa bárapo kae pin nákuathe. Pomonae wüünaeya tanakuitha xuya wüünaeya matoma katsibinchi. Pomonae jopa xapain tanakuichiyo xuya antomabeya katsibinchi.

**Meje xua Pablo yábara paeba xua jüntema
pejinompáe koyenewa yábara**

¹¹Yáitama payaputang xua bewa pakunuwin Nakom pong jiwí Pekanamataxeinaein pata barükui-iturajinaenexa bapong. Daxota pamuxuwetang jiwí xua

bewa jumekowüntsina Jesús. Nakom pana jüntükoyene yaputane xua xaiñeya be pata exanaein. Barichi paichichipang xua paxam pana jüntükoyene yaputáne beta. ¹²Paxang jopa paichichipaeiño xua pata koutha pata nayábara paebiwa xua pata paka katsipaebiwa tsainchi xua pata aiñakuí jíwixae xua daxota pata tanebarúkuí iturajinaewam tsane. Jame nama paka tsipáebatsi pokoyene xua pana nayábara páebang xua paiña pata taneweyataenexa. Matáütano paka tsipáebatsi xua ichamonae paiña nejumenoteibinexa poxonae ichamonae abeya pana neyábara paebeiba. Barapomonae piakoutha atsakiya nayábara paebeba xua daxita wüünaeya peexanaexae pokoyenein xua jiwi kuitane. Íchitha barapomonae jopa najüntükoyene yábara tsakeinaeyo xua po jüntükoyenein xeina pía jüntükoyeneintha po jüntükoyene jopa wüünaeyo. ¹³Barapomonae pana neyábara nantaxeina xua paxang pomonae pata tanentsiyabi jiwi pang xua poxonae pata kueikueijeixae Nakom Pejume Diwesi. Icha barapomonae baxua pana neyábara nantaxeina ápara poxoru Nakom pata taantobexae. Icha barapomonae jopa pana yábara nantaxeinaeyo xua paxang pomonae pata tanentsiyabi jiwi pang, ápara poxoru saya pata paka yawenaexaetsi. ¹⁴Cristo pata tana neantobexae paichichipang xua pata tatanakuichiwanexa bapong. Bara xaniwaicha payaputang xua Cristo tsitüpa daxita jiwi pomonae pía pejumekowüntsiwichixaetsi. Daxota Nakom patsitang xua paxang be pomonae pata werapaewi pang abe pata exanaexae. ¹⁵Cristo tsitüpa daxita jiwi, xua daxita jiwi pejinompaenexa Cristo nexa peexanaexae pokotsiwa bapong tsita wüünaetsi. Barapoxonae jopa jinompáe tsane pokoyeneya poxonae tsita wüünaetsi barapomonae. Jame barapomonae bewa jinompáe Cristo nexa pong náetotha tüpa xuano xua ekeicha asüü éxanatsi. ¹⁶Ánoxuae jopa payábara nantaxeinaeiño xua pata yaputaewa jiwi pía pejüntükoyenein tatsi xua saya poxonae pakuitang poxonae pokoyenein éxana icha pomonae jopa pejumekowüntsiwi ichi. Barapomonae nantaxeineiba xua jiwi pejüntükoyene yaputaenéxatsi xua saya poxonae kuitainchi xua exaneiba. Bekein kopiya báyatha Cristo jopa wüünaeya payábara nantaxeinaeiño, íchitha ánoxuae jopa baxua paraichiño poxoru ánoxuae bara xaniwaicha payaputang bapong. ¹⁷Pong kaein náexana Crístothe pejumekowüntsixae bapong pena jüntükoyene xeina. Pokoyenein xua báyatha éxana xua peru jüntükoyenein werawerakaena. Ánoxuae ekeicha icha pena jüntükoyenein exanaena.

¹⁸Daxita bárapo pena jüntükoyenein Nakom wérena pona. Nakom naka kana éxana xua piamonae jiwi tatsichi pomonaexaetsi bekein kopiya Nakom pía peaitafaetabí jiwi tatsichi. Baxua Nakom naka kana éxana Cristo wanaka tsitüpaexae. Matáütano Nakom pana itoroba xua paxang xuya ichamonaetha pata kana exanaenexa Nakom piamonae tatsi pomonaexae bekein kopiya Nakom pía peaitafaetabí jíwichi. ¹⁹Pokotsiwa xuaunxuae paka tsipáebatsi xua ápara meje: Nakom jüntema jinompa kana éxana bárapo kae pin nákuathe pomonae kopiya pía peaitafaetabí jíwichi poxonae barapomonae yábara jumekowünta xua Cristo tsitüpa bárapo jiwi. Bapoxonae Nakom jopa tsítatsi xua bárapo jiwi penatsikuentsiwa xua abe peexanaexae. Matáütano Nakom pana kata penakuichiwa po penakuichiwa xua pata kueikueijeinexa jíwitha. Po diwesi yábara xua Nakom piamonae kana éxana jiwi, pomonae bekein kopiya pía peaitafaetabí jíwichi, bárapo diwesi pakueikueijang. ²⁰Paxang pomonae Cristo pata taneitorobí jiwi pang pata kueikueijeinexa bapong nexa. Bekein bara paxang paka tsipáebatsi, ápara jame yatsikaewa Nakom

paka tsipaeba poxonae paka tsipáebatsi. Cristo patakueikueijang poxonae jumedangweya paka jeichi: “Pana nakuibarapende abe paiña neexanáe kuirukoyenein. Pajumekowünde Cristo kaemonae paiña nenaexanaenexa Nakomtha”, paka jeichi. ²¹Cristo bápana jopa abe exanáe. Íchitha Nakom tsítatsi xua Cristo penatsikuentsiwa xua poxoru abe waexanaexae. Bapoxonae Nakom naka kana éxana xua kaemonae wanaexanaewa bapongtha xua wajüntükoyenein wüünaenexa Cristo pía peexanaexae poxonae naka tsitüpa. Bapoxonae Nakom tsítatsi xua jopa watsita natsikuentsiwa bekein abe waexanáethatsi.

6 ¹Nakom pata tana nebarü nakuita dubenanaebiyaxae, jumedangweya paka muxutsipaebiya jeichi: “Paiñaxoba panaitématame po diwesi xua Nakom paka kata paka nekaantobexae. Bárapo diwesi ápara xua Nakom jüntükoyene wüünae éxana jiwi pomonae pejumekowüntsixae”, paka jeichi. ²Tsipéi Nakom, pewünaeya poxonae xua jiwi yábara kuikanantaxeinaeinchi peyawenaenexa tsainchi, Nakom Pejume Diwésitha namchi, jeye:

“Po matakabi jiwi yábara kuikanantaxeinaein tayawenaenexa tsane, bárapo matakai xua jemetainchi.

Po matakábitha jiwi kapanenebiyaein paxam yawa paka yawenaeinchi”, jei Nakom Pejume Diwésitha.

Ánoxuae ápara bárapo matakabi jopa, po matakai xua Nakom naka yábara kuikanantaxeina wanaka yawenaenexa.

³Poxonae Nakom patanakuita dubenanaebiyang paichichipang xua daxita jiwi xaniwaicha pata tatsita jinompaewa, xua daxota daxita jiwi pejumekowüntsiwanexa. Jopa abe paexanaeño bekein xua tsiwiyo xua abe pata exanaewa xua jiwi pata nejume-itoroba aebiyainwa Nakom Pejume Diwesi poxonae patsipaebang.

⁴Jame ápara daxita beta paéxana dubenanaebiyang jiwi pata tsita itapeiñaxei-naewa xua ápara jiwi pata taneyaputaenexa xua Nakom patanakuitang. Baxua paéxanang poxonae áwiya saya jüntema pajinompang poxonae bekein ichamonae átene pana éxana, xuano bekein painta seika pokotsiwa panantawénonang, xuano bekein poxonae bichokono painta yapudangwéi tsaibi poxonae paexaneibang.

⁵Ichakuitha jiwi pana beiba bichokono. Matáütano ichakuitha jiwi pana kuaranobeiba jiwi pekübibongtha. Matáütano ichakuitha jiwi ayéi jiwi anaepanaya pana netsakibabeiba poxonae jiwi ayéi akükü. Poxonae panakuiteibang, bichokono ayapusüüya panakuiteibang. Ichakuitha merawitha jopa pamaitéibiño tsipéi saya paexaneibang Nakom pía penakuichiwa tatsi. Ichakuitha tsaibi bichokono pajainpeibang.

⁶Jiwi patsita-itapeiñaxeinang xua paxang pomonae Nakom pía petanakuichi jiwi tatsi pang xua Nakom pata tsita jüntükoyene wüünaexae, matáütano tsipéi poxoru payaputang pokotsiwa pexaiñéi jume, matáütano jopa pata kasébi xae pomonae bekein painta abe éxana, xuano xua wüünaeya pata taexanaexae ichamonae, matáütano Nakom pía Pejumopetünaxü tatsi pata tanebarü jinompaexae, xuano xua ichamonae xaniwaicha pata taantobexae.

⁷Bara xaniwaicha payábara páebang pokoyene pexaiñeiwa. Paxang paxeinang Nakom pía peayapusüü itorobi koyenewa tatsi. Pata Nakom pata tsita jüntükoyene wüünaexae, paxeinang pókotsi koyenewa xua panantawénonang xua pata takueikueijeinexa Nakom. Paxang panakuwetang xua Nakom patanakuitang. ⁸Ichakuitha jiwi pana nebarükui iturajineiba, ichamonae jopa pana tsita daichéibiyo. Ichakuitha ichamonae wüünaeya pana neyábara paebeiba. Ichakuitha ichamonae abeya pana neyábara paebeiba.

Ichamonae pana neyábara paebeiba xua paxang pomonae jiwi pata muxuitórobi jiwi pang. Ichamonae pana neyábara paebeiba xua paxang pomonae ápara xaniwaicha pata pabí jiwi pang. ⁹Ichakuitha ichamonae jopa ichipaeyo xua pata taneyábara yaputaewa xua paxang Jesús pía peitorobi jiwi tatsi pang. Pana yábara nantaxeina xua saya jiwi pang bekein daxita jiwi bara xaniwaicha pana neyaputane xua paxang Jesús pía peitorobi jiwi tatsi pang. Ichakuitha ichamonae pana neyábara nantaxeineiba xua paxang bara imoxoyo muxu pata bobeneibi, íchitha áwiya asüüya pajinompeibang. Jiwi pana neatene exaneiba, íchitha jopa pana nejutebeibiyo. ¹⁰Bekein ichakuitha bara pajüntükoyene wekoyang pata painta exanaexae ichamonae, dáichitha áwiya pajüntükoyene weiweinaya jinompeibang. Metha bekein paxang be pomonae peakopeibiwi pang tsipae íchitha paxeinang nawita Nakom weya pokotsiwang xua payawenang ichamonae. Bapoxonae bárapo ichamonae be pomonae kopei pexeinaewi náexana tsipéi jumekowünta Nakom Pejume Diwesi xua papaebang. Bekein bara be pomonae jopa pata xeináe jiwi pang pokotsiwa xeina po kae pin nákuathe, dáichitha ápara bara paxeinang daxita pokoyenein Nakom pana kata pokoyenein xua jopa pewerawerakaewa.

¹¹Tamonae pam, paxam pomonae Corinto tomarapiwi pam. Daxita xua pokoyenein tajüntükoyénewatha nantaxeinang baxuang paka tsipáebatsi. ¡Bichokono tajüntükoyénewatha paka antobetsi! ¹²Amanaya bichokono jopa juniya paka antobetsi. Íchitha nama paxam barapomonae pam, pomonae pam jopa paichichi-paem xua paiñamonae jiwi tapana neexanaewam. ¹³Xang paka tsipáebatsi xua be poxonae icha koxiyüing ichi xua tsipaeba pía pexúyotha. Paka jeichi: “Xuya daxita paiña nejüntükoyenéwatha paneantobeinde icha paka ichichi xua tapaka antobéwatsi bichokono”, paka jeichi.

Meje poxonae Pablo jeye: “Icha Nakom ichi xua pópona pía pin botha barichi Nakom pana nebarü jinompa”, jei

¹⁴Jopa kaemonae pana naexanaeinde pomonaetha, pomonae jopa pejumekowüntsiwi. Tsipéi pong pejüntükoyene wüünaein jopa itaküüpaetsi xua pekueyatsiwa pongtha pong peajüntükoyenebein. Barichi xua pekiréiwatha peyonoyoneiwa jopa itaküüpaetsi xua kirei tsanaya baxota, áwiya peyonoyoneixae. ¹⁵Barichi Cristo pong wüünaeya peexaneibin jopa itaküüpaetsi xua pekueyatsiwa kaurimonae pía pentakaponaeintha tatsi, pong abe peexaneibin. Barichi pong pejumekowüntsin jopa itaküüpaetsi xua pekueyatsiwa pongtha pong jopa pejumekowüntsin, poxoru jopa jüpaeyo xua nantaxéinabe. ¹⁶Barichi Nakom pin piabotha jiwi jopa bewa wüünae jainchina ibo nakomüing. Saya meisha bewa wüünae jainchina Nakom bárapo botha. Nakom patsitang xua paxang bara be Nakom pin píabo tatsi. Icha Nakom ichi xua pópona pía pin botha, barichi Nakom naka barü jinompa, pong ataya asüüya pópona. Nakom kaena báyatha baxua yábara jeye:

“Barapomonae barü poponaein yawa kuéyata dukuanaebiyaein.

Matáütano barapomonae pía Nakomüing tatsin tsane.

Barapomonae tamonae naexanaena”,

jei Nakom.

¹⁷Daxota Nakom pong Pekanamataxeinaein jiwi, ekeicha yábara paeba pomonae jopa pejumekowüntsiwi. Nakom piamonaetha jeye:

“Barapomonae pía xaiña weya papónare.

Jopa kaemonae pana nayawa exanaeinde barapomonae.

Jopa paexanaeinde peabe koyene pokoyene barapomonae éxana.

Néxata xang paka matenta weyataeya wabinchi.

¹⁸Xang náexanang xua xang paiña Axang.

Matáütano paxam taxantong jiwi pam tsane,
xuano irü taxantixi jiwi pamdü”,

jei Nakom piamonaetha pong daxita peayapusüü itorobi koyenewang pexeinaein.

7¹Tamonae pam, paxam pomonae tapaka kaántobe jíwichi pam. Xuaunxuae po diwesi paka tsipáebatsi báraxuang ápara Nakom yábara naka tsiwüünae muxuduta xua pokotsiwa wanaka kana exanaewa. Daxota waxainchi bewa daxita abe waexanáe kuirukoyenewang pentichi pokoyenéwang xua wapepong éxana, xuano xua wajüntükoyene nantaxéinano. Matáütano bewa xua Nakom junuwiya wabarükuí iturajináewatsi tsainchi. Matáütano bewa wüünaeya exanaponaetsi beya poxonae bichokono Nakom watsita jüntükoyene wüünaewa tsane xua jopa wanatsikuentsiwa xua abe waexanaexae bapongtha.

Meje xua poxonae Corinto tomarapiwi icha jüntükoyene xeina xua Jesús pejumekowüntsixaetsi

²Ekeicha kaewa pana neantobeinde tsipéi paxang jopa abe pákata exanaetsi. Paxang jopa abeya pamatakaponaeiño ichamonae xua xuya abe peexanaenexa. Matáütano ichamonae jopa pamuxujaiñabeibiño. ³Jopa báraxua paka tsipaebichi xua paka yábara páebatsi xua abe paiña neexanaewam. Báyatha kopiya paka tsipáebatsi, paka jeichi: “Tajüntükoyénewatha bichokono paka antobetsi, bekein metha poxonae paka barü werapáetsipatsi, xuano metha bekein poxonae paka barü jinompaetsipátsino”, paka jeichi. ⁴Bara bichokono paka yábara jumekowüntatsi xua pokoyene tapaka katsipaebíwatsi tsainchi pokotsiwa tajüntükoyénewatha nantaxeinang xua pokotsiwa paiña neexanaenexa tsane. Matáütano paka yábara wüünae jáintatsi poxonae ichamonae tsipaebang poxoru tapaka kuiyábara paebixaetsi. Bekein ichamonae átene neéxana, dáichitha poxonae jumetang pokotsiwa paéxaname pana nejüntükoyene tsákaba éxaname xua jüntema tapoponaewa. Matáütano barichi bichokono panejüntükoyene weiweina éxaname.

⁵Poxonae po mataketha weya papatang Macedonia nakua weya jopa kuinaya jüntema painompaeiño xua jiwi abe pata tana nekana exanaewa daxita koyeneintha. Pomonae jopa pejumekowüntsiwi bichokono pana kasebeiba pata natsipéi kueikueijeixae Jesús pejume diwesi. Barichi pomonae pejumekowüntsiwi junuwiya payábara najüntükoyene exabeibang nawita xua jopa wüünaeya pejinompaewa tsipae. ⁶Dáichitha Nakom pana jüntükoyene tsakáraba xua jüntema pata jinompaewa poxonae bekein paatenein tsai. Barapong Nakom ápara pong jiwi kana éxanatsi xua jüntema pejinompaewa poxonae bekein jüntükoyene wekoyéi. Baxua Nakom pana nekana éxana poxonae Tito patopa pataxantha. ⁷Pajüntükoyene weiweingang xua bapong pepatopaexae. Íchitha jame yatsikaewa pana nejüntükoyene tsakábame xua poxonae bapong pana netsipaeba xua pinae wüünaeya pata éxaname bapong. Bapong pana netsipaeba paxam yábara xua pinae pajam: “Maisha Pablobarü bepataebenaein. Bichokono pawekoyang yáitama Pablobarü abe éxanatsi ichamonae. Daxota payábara najüntükoyene éxabang bapong”, pinae pajam. Poxonae baxua jumetang bichokono jüntükoyene weiweingang.

⁸Bekein xang paka jüntükoyene wekoyéi éxanatsi xua po cártatha kopiya pákata tínatsi, dáichitha ánoxuae baxua jopa yábara auraño bekein kopíyatha yábara aurang baxua. Bárapo carta saya bara kaeto paka jüntükoyene wekoyéi éxana. ⁹Íchitha ánoxuae jüntükoyene weiweingang xua jopa ápara poxoru paiña nejüntükoyene wekoyeixae poxonaé payórobame bárapo carta, saya ápara jame poxoru Nakom icha jüntükoyene paiña netsita xeinaexae. Paxam pajüntükoyene wekoyam icha be pókotsi koyeneya Nakom peichichipaewa xua abe paiña neexanaexae. Daxota paxang jopa abe pákata exanaetsi. ¹⁰Poxonaé jiwi jüntükoyene wekoyéi icha be pókotsi koyeneya Nakom ichichipa, bárapo peitanuwetha jiwi kana éxanatsi xua peurawa abe peexanaexae, bapoxonaé bárapo jiwi Nakom jume-kowúntatsi. Bapoxonaé Nakom jopa tsita natsikuentichi xua abe peexanaexae. Barapomonaé icha jüntükoyenein xeina poxonaé barapomonaé kapanenebíyatsi abe pía peéxanaé kuirukoyenein weya tatsi. Bapoxonaé barapomonaé jopa bewa aura tsane xua kopiya jüntükoyene wekoyéi. Ichamonaé pomonaé jopa pejume-kowúntsiwi Nakom, poxonaé barapomonaé wekoyéi xua jopa peúruxae poxonaé abe éxana, íchitha bárapo itanuwetha barapomonaé jopa yawenaetsi. Ápara saya barapomonaé werapaena Nakom petsita-abe exanáexaetsi. ¹¹Po itanuwé Nakom pákata kópata báyatha jame bárapo itanuwé paka yawena. Bárapo itanuwé paka éxana xua paka jüntükoyene tsakáraba xua beta paiña neexanaenexa. Matáütano paka éxana xua pakuiyábara nantaxéiname pong abe peexanaein. Bapoxonaé naiña paitawétame bapong, abe peexanaexae. Barichi be patsita-itapeiñaxéiname Nakom xua paxam jopa panatsikuentisim xua jopa be barapókotsi koyenéwiyo pókotsi koyenewa xua bapong éxana. Matáütano paauram xua paiña nekopatsiwa bapong xua bara abe peexanaewa. Matáütano pajunúwame xua Nakom átene paka éxana poxoru bapong abe peexanaexae. Bapoxonaé be pabebam paiña xaiña weya pokoyene xua bichokono abe. Daxota paitawétame bapong. Daxita beta paéxaname. Paiña netsita-itapeiñaxeinaewa Nakomtha xua ápara daxita paxam jopa abe paexanaem. Saya meisha bapong abe peexanaexae. ¹²Báyatha pákata tínatsi po carta xua paka itanuwé éxana xua Nakom paiña tsita itapeiñaxeinaenexa xua xaniwaicha bara pana neantobem paiña neexanaexae pokotsiwa paka itoróbatsi. Ápara jopa pákata tinaetsi xua saya poxoru tayábara nantaxeinaexae pong abe éxana, xuano irü pong koseuri pítatsi, xua tayawenaewa tsane. ¹³Pata taneantobemxaem pana nejüntükoyene tsakábame xua tajüntükoyene weiweinaewa.

Barichirü daxita paxam Tito pajüntükoyene kuitsákabame daxita pokotsiwangtha xua beta paiña paebixaem bapongtha. Jame yatsikaewa bapoxonaé bichokono pajüntükoyene weiweingang xua poxonaé Tito pakana éxaname, beyakaincha poxonaé pana nekana éxaname xua poxonaé pajüntükoyene weiweingang. ¹⁴Poxonaé Tito taxaiña weya bara muxu peponaeba matha beta paka yábara páebatsi bapongtha, jangje: “Maisha Corinto tomarapiwi pomonaé pejumekowúntsiwi weyatang xua bichokono pejüntükoyene wüünaexae Nakomtha”, jang. Paxam jopa panejüntükoyene aura exanaem. Xua ba paka tsipaebéibatsi báraxua bara pexaiñeiwa tsaibi. Matáütano pokotsiwa paka yábara páebatsi Títotha baxua ápara bara pexaiñéiwano irü. ¹⁵Bapong Tito bichokono paka ántobe ánoxuae beyakaincha poxonaé kataunxuae jopa paka siwaponaeoyo. Bapong paka yábara jüntanaina xua paxam pabarüjumejejam tsaibi pokotsiwa paka itorobeiba. Matáütano bapong pantenta weyataeya wábame paiña barü iturajinaexae bapong. Matáütano pajunuwéibame

xua abe paiña neexanaeyainwa bapong. ¹⁶Maisha bichokono jüntükoyene weiweingang xua tapaka yábara jumekowüntsíwatsi xua daxita koyenewang paiña neexanáewaxae pokoyene xua wüünae.

**Meje xua poxonae Pablo yábara paeba xua Cristo
piamonae tatsi parátixi pekakomokáe parátixi
jejebapona pomonae peakopeibiwi nexa**

8 ¹Tamonae pam, paichichipang xua paiña neyábara yaputaewa xua Nakom pía peyawenaewa jiwi, pía peantobexae. Ichichipang xua tapaka tsipaebíwatsi pokoyene Nakom tsita itapeñaxeina bárapo pía peántobe koyenewa pomonaetha, pomonae pejumekowüntsíwichi, pomonae penakaetutsi bongmonae jiwi xua pomonae wüünae pejainteibiwi Nakom pomonae xua Macedonia nákuatha jinompa. ²Bekein barapomonae bichokono dangweya jüntükoyene jüjútatsi poxonae ichamonae abe taéxana barapomonaetha, dáichitha áwiya kataunxuae barapomonae jüntükoyene weiweina. Bekein barapomonae peakopeibí jiwi, dáichitha barapomonae katsibeiba nawita parátixi pekakomokáe parátixi petaitorobinexa pomonaetha, pomonae peakopeibí jiwi Jerusalén tomarapiwi be poxonae yatsikaewa pepa kopei pexeinaewi. ³Xang tang xua barapomonae kata nawita be pokoyeneya xua daxita itakúüpatsi xua pekatsibiwa. Matáütano icháwano katsiba beyakaincha xua poxonae itakúüpatsi xua pekatsibiwa. ⁴Barapomonae bichokono pana muxu fayakotsiya jeye: “Bara pana kópare xua bara Jerusalén tomarapiwi patakatsibinexa parátixi pekakomokáe parátixi pomonae irü pejumekowüntsiwi, pomonae peakopeibí jiwi”, pana jei. ⁵Barapomonae baxua éxana beyakaincha xua pokotsiwa panantaxeinang xua barapomonae itakúüpatsi xua pókotsi koyeneya pekatsibiwa tsane. Matáütano barapomonae juntukuru nantaxeina xua bara petanakuichinexa tsane Nakom nexa daxita pejüntükoyeníñatha. Bapoxonae juntukuru nantaxeina xua barapomonae bara pata taneyawenaenexa tsane be pókotsi koyeneya Nakom ichichipa. ⁶Daxota Tito paitorobang xua nakuiwetsina xua penotaponaewa tsane parátixi pekakomokáe parátixi, tsipéi bapong báyatha kaena tamrópata pítaba xua penotaponaewa parátixi paiñaxantha. Poxonae bárapo parátixi pakatsibapóname bara pexeíña koyene paexanapóname peakopeibíwítha paiña neantobéwaxae. ⁷Paxam bichokono jopa juniya paxeinaem pokoyenein xua paiña neexanaewa. Bichokono pajumekowúntame Nakom. Matáütano betiya pakueikueijam Nakom Pejume Diwesi, xuano bichokono payábara yaputáneme Nakom Pejume Diwesi. Matáütano bichokono paiña jüntükoyenéwatha paichichípame xua ichamonae paiña neyawenaewa. Matáütano bichokono pana neantobem. Daxota bichokono jopa juniya toxeinchiya paexanaeinde xua paiña neyawenaewa xua poxonae parátixi pakatsíbame pomonaetha, pomonae irü pejumekowüntsíwixae. Báraxua paexande paiña neantobexae barapomonae.

⁸Poxonae baxua paka tsipáebatsi jopa paka itorobichi xua paiña neexanaewanexa. Saya ápara jame paka tsipáebatsi baxua xua tayaputaenexa icha bara metha paxam bichokono paántobem ichamonae icha Macedonia nakuamonaepiwi ichi. Barapomonae bichokono ántobe ichamonae daxota yawena nawita. ⁹Paxam payaputáneme xua Jesucristo naka ántobe pong Wanaka namataxeinaein. Jesucristo poxonae Páxatha pópona kopiya daxita xeina be poxonae yatsikaewa kopei pexeinaein. Dáichitha bapong piakoutha nakana éxana be pókotsin jopa kopei

pexeinaein poxonae paxa kuenta pona. Poxonae jintong pía koyeneya nakana éxana bapoxonae akopeibi nakana éxana pía paka nekaantobéwaxae. Daxota xuya nawita paiña nexeiñae jiwi pam tsane xua pokoyenewa Jesucristo xeina.

¹⁰Paka tsipáebatsi baxua paiña tapaka kayawenonaexaetsi. Nantaxeinang xua paxam bewa panakuiyábara wetsíname pokotsiwa xua báyatha icha weitha patamrópata notarükúpame xua parátixi paiña nejehebaponaewa Jerusalén tomarapiwi nexa. Baxua báyatha paéxaname paiña jüntükoyeneintha bichokono paiña neichichipaexae xua paiña neexanaewa baxua. ¹¹Icha kopiya paichim xua paichichípame nawita xua paiña neexanaewa baxua, paexanaponde beya poxonae panakuiyábara wetsíname. Padodoutaponde xua be pókotsi koyene paka kuijüpa xua pókotsi matoma paxeinéibame xua pajiwana tsabeibíname parátixi. ¹²Icha pebin ichichipa xua pekatsiwa parátixi Nakomtha bapong bara nata jíwana wetsatsina parátixi xua katsina be pókotsi koyene xua kuijúpatsi xua pekatsiwa. Pokotsiwa bapong kata bara Nakom wekobepita. Saya poxoru Nakom jopa pewüikaexae poxonae pebin bekein jopa xeinaeyo táethatsi. Saya jame icha jiwi kuijúpatsi xua pekatsiwa poxonae xeina, bapoxonae jame Nakom wekobepita.

¹³Jopa paka tsipaebichi xua ichamonae bewa payawenáename xua paiña nekatsibiwa daxita xua paxéiname xua beya poxonae daxota paiña neakopeibiwa tsane. ¹⁴Saya jame paka tsipáebatsi xua paxam kopei pexeinaewi pam irü peakopeibiwi Jerusalén tomarapiwi bewa pebürüya jüpaeya paxeináename. Metha ánoxuae paxéiname nawita, íchitha barapomonae jopa xeinaeyo. Daxota paxam pomonae nawita paiña nexeiñae jiwi pam bewa pakatsibíname pomonaetha, pomonae jopa xeinaeyo pokotsiwa barapomonae nantawénona. Metha bexa tsane barapomonae xeinaena nawita íchitha paxam jopa paxeinaem tsane. Bapoxonae bewa barapomonae xuya paka katsibina pokotsiwa panantawéname. Bapoxonae daxita pam nantajüpaeya paxeináename. ¹⁵Nakom Pejume Diwésitha baxua yábara jeye: “Pong nawita pexeinaein kopiya, beyakaincha xua pokotsiwa nantawénona, bapong jíwana wekata ichüngtha pokotsiwa xua jopa pekanantawenonaexae. Pong xua tsiwiyo xeina kopiya xua daxota taséikatsi pokotsiwa nantawénona, pírapae xeina pokotsiwa pekanantawenonaewa poxoru pong nawita xeina piáwa jíwana wekata bapongtha”, jei Nakom Pejume Diwésitha.

Meje xua Tito yábara irü pomonae pía peyanabiwatsirü

¹⁶Tsipaebang Nakom, jangje: “Nakom maisha jüntükoyene weiweinang xua Tito pejüntükoyenéwatha yábara nantaxeina dukuanaebiya Corinto tomarapiwi xua peyawenaenexa barapomonae icha xang ichin”, jangje. ¹⁷Bapong Tito jüntükoyene weiweina poxonae patsipaebang xua pía paka nekayawenonaewa tsane. Daxota ánoxuae bapong piakoutha paka siwaponae ponaena peichichipaexae xua pía paka yawenaetsi.

¹⁸Ichüngdü paitorobang pong pejumekowüntsindü xua Tito pepunaponae néxatsi. Daxita pomonae pejumekowüntsiwi pomonae penakaetuteibi jiwi xua wüünae pejainteibiwi Nakom barapomonae bapong beta yábara nantaxéinatsi, tsipéi pinae bapong beta wüünaeya kuiduba Nakom pía pekapanenebiyáe jume diwesi. ¹⁹Jopa meisha pebaxuaxae. Jame yawa matáütano barapomonae pomonae pejumekowüntsiwi peitapetsixae bárapo pebin xua bapong pata tanebarü ponaenexa poxonae

pakápanang parátixi peakopeibíwitha pata antobexae barapomona. Bárapo penakuichiwa pata exanaexae pabarükui-iturajinang Nakom pata exanaexae pokotsiwa bapong pana itoroba. Matáütano poxona baxua paéxanang patsita-itapeiñaxei-nang xua paichichipang xua nantiya pata tanayawenaewa. ²⁰Paichichipang xua xaniwaicha beta paéxanang poxona pin parátixikun pakáponang xua jiwi abe pata neyábara paebiyainwa. ²¹Paichichipang nawita xua xaiñeya pata exanaewa Nakom peitabaratha tatsi xuano xua jiwi peitütha tátsino.

²²Barichino ichüngno paitorobang pong pejumekowüntsindü xua bapongbe Tito pepunaponaenexa tsáinchibe. Bapong pong kotakaya paitorobang, pajüntükoyene jüjütang pata yaputaenexa icha bara metha beta nakuita Nakom nexa. Bara bapong beta jumekowünta dukuanaebiya. Daxota bapong irü paitorobang. Bapong ichichipa nawita xua pía paka yawenaewa tsane pía paka yábara jume-kowüntsixae xua bara beta paéxaname. ²³Icha ichüng paka yábara yáíñaba Tito pana nejumekayábara jumejande bapongtha xua jangje: “Bapong taneyantsin. Bapong neyanta xua penakuichiwa po penakuichiwa xua tapaka yawenáewatsi. Pongbe Tito punapóinchibe bapongbe itorobatsibe pomona pejumekowüntsiwi. Bapongbe tsita itapeiñaxéinabe barapomonaetha xua bara xaniwaicha pejume-kowüntsibe Cristo, xua daxota barapomona wüünae pejainchinexa Nakom”, pana nejumekayábara jande. ²⁴Bárapo akoibi póyobe xaniwaicha pantenta weyataeya wábare poxona patsina paiñaxantha. Bapoxona poxona baxua paéxaname patsita-itapeiñaxeináename pomona pejumekowüntsiwi xua xaniwaicha bara paántobem bárapo akoibi póyobe. Bapoxona barapomona paka yábara kuiyaputaena, xua paxang xaniwaicha papaebang xua poxona jüntükoyene weiweinaya atsakiya tapaka yábara paebíwatsi xua paiña nejumekowüntsixae.

**Meje xua parátixi pejehebaponaewa yábara pomona
pejumekowüntsiwi nexa, pomona peakopeibiwi
xua pomona Jerusalén tomarapiwi**

9¹Jopa nantawenonaeiño xua ekeicha tayábara tinaewa xua paiña neyawenaenexa ichamona pomona irü jumekowünta xua paiña nekatsibinéxarü parátixi pomona Jerusalén tomarapiwi. ²Bara yaputangba báyatha xua bichokono paiña neichichipaewa xua paiña nekatsibiwa parátixi. Paka yábara paebéibatsi Macedonia nakuamonaepíwitha, jangje: “Báyatha icha weitha Acaya nakuapiwi najüntükuikoyene wüünaeta xua jehebaponaena parátixi peakopeibiwi nexa”, jang. Bárapo Macedonia nakuapiwi, najüntükuikoyene tsakáraba xua irü pebarichinéxarü pejumetaexae xua pinae paxam paichichípame nawita pokoyene paiña neyawenaewa. ³Bárapo akoibi póyobe itorobang xua ichamona jopa taneyábara paebinxae tsane xua tanaerabiwa xua báyatha tapaka yábara paebixae. Daxota bewa pana nakuiwüünaetsíname xua paiña nejehebaponaewa parátixi xua paiña nekatsibinxae ichamonaetha. ⁴Metha bárapo Macedonia nakuamonaepiwi jíwana nebarü ponaena poxona paka siwaponaena ponaeinchi. Metha barapomona paka táetsipa xua jopa pana nakuiyábara wüünaetsim xua paiña nejehebaponaewa parátixi xua paiña nekatsibiwa ichamona. Bapoxona bichokono paaurang tsipae tsipéi báyatha paka yábara páebatsi xua paxam pakátame nawita. Írürü paxam paauram tsipae. ⁵Nantaxeinang xua bewa kopiya itorobin bárapo akoibi póyobe xua barapóyobe kopiya paka siwaponaena ponaena beya poxona xua

paka siwaponae na ponaeinchi. Barapoxonae barapóyobe paiña nepaka yawenaenexa xua penotaponaewa parátixi. Báyatha pana nemuxutsipáebame xua pinae paichichípame paiña nekatsibiwa ichamonae bárapo parátixi. Po parátixi panotapóname panakuiyábara wetsíname, baxua patsita-itapeiñaxéiname xua saya jopa ápara poxoru bewa pakatsibim. Saya poxoru paiñakoutha paiña neichichipaexae xua paiña nekatsibiwa.

⁶Payábara nantaxéinare po diwesi ba xua jeye: Pong ba kónotha üba ba kónotha jota pokotsiwang xua penawetsiwang. Pong ba jopa juniya übiyo ba jopa juniya jotsiyo pokotsiwang xua penawetsiwang. ⁷Daxita pomonae pejumekowüntsiwi bewa katsibeibina be pókotsi koyeneya nantaxeina pejüntükoyenéwatha. Jopa bewa asiwiya katsibeibi icha aichaxaibi xua pekatsibiwa. Matáütano jopa bewa katsibeibi poxoru ichüing pekui-itorobixae xua pekatsibeibiwa tsane. Nakom tsita jüntükoyene wüünaetsi nawita pong jüntükoyene weiweinaya douteiba ichamonaetha. ⁸Nakom bara itaküüpatsi xua daxita paiña nepaka katsibiwa pokotsiwang panantawénoname, matáütano icháwano xua bichokono nawita beyakaincha pokotsiwa xua panantawénoname. Bapoxonae paxeináename pókotsi koyeneya xua paka kuijüpa xua pajüntükoyene weiweinaya katsibíname ichamonaetha. ⁹Nakom Pejume Diwésitha pong nawita pekatsibin jiji bapong yábara jeichichi, jeye:

“Pong katsibeiba poneiba nawita pomonaetha pomonae peakopeibiwi
Nakom jopa juniya xuya katsibeibi tsane bapongtha,
wüünaeya peexanaexae”,
jei Nakom Pejume Diwésitha.

¹⁰Ápara Nakom pong katsibeiba jiji po pexu xua jiji peübinexa. Matáütano ápara Nakom pong katsibeiba pexaewa xua jiji pexaenexa. Barichi Nakom paka katsibeibina beyakaincha xua pokotsiwa panantawénoname. Bapoxonae paka kuijüpaena xua ichamonae paiña nekatsiba dubenanaebiyawa tsane nawita, pokotsiwa jopa panantawenonaem. ¹¹Nakom nawita paka katsibina xua daxota paka itaküüpaena xua ichamonae pakatsíname nawita. Poxonae pakaponaein bárapo parátixi xua pata itoróbame peakopeibiwi nexa, Jerusalén tómaratha, bapoxonae barapomonae Nakomtha jeye tsane: “Nakom maisha pajüntükoyene weiweingang xua painta éxaname xua daxota bárapo Corinto tomarapiwi painta itoroba parátixi”, jei tsane. ¹²Poxonae bárapo parátixi pakátame bárapo pejumekowüntsiwítha, bara barapomonae pakátame pokotsiwa barapomonae penantawenonaewa. Matáütano paiña neexanaexae baxua barapomonae wüünae jainteiba Nakom. ¹³Barapomonae wüünae jainta Nakom paiña nejejeixae xua paéxaname pokoyene Cristo pía pekapanenebiyáe diwésitha paka itoroba. Matáütano barapomonae Nakom wüünae jainchinchí, paiña neyawenaexae poxonae pakátame parátixi nawita barapomonaetha xuano xua daxita ichamonáetharü. ¹⁴Barapomonae Nakomtha pákata wüükaena pía paka nekaantobéwaxae poxoru barapomonae patsita-itapeiñaxéiname xua Nakom bichokono paka yawena pía paka nekaantobéwaxae. ¹⁵Nakomtha patsipaebang, pajangje: “Nakom maisha pajüntükoyene weiweingang xua nexanto painta amanaya itorobíkame pataxantha. Baxua pokotsiwa xua painta éxaname bichokono jopa juniya wüünaeyo xua jopa pana itaküüpaeyo xua po jumetha pata yábara paebiwa”, pajang.

Meje xua Pablo yábara paeba pía peitorobi koyenewa

10¹Xang Pablo paka jumefayakótatsi. Paka tsipáebatsi icha be pókotsi koyenewa Cristo ichi poxonae paeba. Bapong tsipaeba jíwitha pebarükui-iturajinae koyenetha xuano peántobe koyenényatha. Paxam pinae pana neyábara páebame pinae pajam: “Poxonae Pablo pópona pataxantha saya jopa jumedangweyo poxonae pana netsipaeba. Íchitha poxonae tajü wepainta tineibarena jumedangweya painta tineibarena”, pinae pana neyábara jam. ²Poxonae paka siwaponaeinae ponaeinchi jopa paexanaeinde pokotsiwa xua daxota bewa paka tsipaebinchi pókotsi jumeintha xua daxota jumedangweya tapaka katsipaebiwa tsainchi. Ichamonae paxam jíwana pana neyábara paeba xua pinae abe paéxanang poxonae paéxanang pokotsiwa Nakom pana itoroba icha pókotsi jiwimonae ichi pomonae jopa pejumekowüntsiwi. Bewa jumedangweya tsipaebin barapomonaetha xua baxua yábara xua taneyábara paebiwa. ³Bara xaniwaicha xua paxang ápara saya jiwi pang. Bekein paxang pajinompang bárapo kae pin nákuathe, íchitha poxonae pakuidubang Nakom Pejume Diwesi jopa paexanaeíño icha bárapo kae pin nakuathepiwi ichi poxonae ba yábara naba peexanaenexa pokotsiwa ichichipa. ⁴Jopa paxeinaeíño xua pesojeiwang xua pata nabinexa xua pokotsiwa bárapo kae pin nakuathepiwi xeina. Dáichitha paxeinang Nakom pía peayapusúü itorobi koyenewa tatsi xua baraxota pata nayaewatsinexa. Barapong Nakom pía peayapusúü itorobi koyenewa tatsi pana nekana éxana xua paamanáyabang po peayapusúüwa bárapo kae pin nakuathepiwi xeina xua saya kaurimonae pía pentakaponaein tatsi pía peayapusúüwa tatsi. ⁵Ichamonae najumematsontsónoba poxonae pakueikueijang Nakom Pejume Diwesi jopa peichichipaexae xua Nakom peyaputaewa tsainchi. Barapomonae pajume amanáyabang poxonae najumematsontsónoba. Barichi pomonae atsakiya penayábara paebiwi piakoutha poxorü jopa ichipaeyo xua Nakom peyaputaewa tsainchi, barapomonae pakui-amanayabündü. Paxang pakópatang xua bara Cristo pata tanekanamataxeinaewa daxita pata tanantaxeináewatha, xua daxota pata exanaewa pokotsiwa Cristo pana itoroba. ⁶Paxang panakuiwüünaetang xua pata muxuwetsiwa pomonae jumefeba Nakom pomonae paiñamonae jíwana pamxaem. Baxua paexanaein barapomonaetha poxonae paxam matha tsiwanaya xaniwaicha pajumejejam tsurubenanaebiyam tsane xua paéxana dubenanaebíyame pokotsiwa Cristo ichichipa.

⁷Paxam paka tsítatsi xua paxang be pomonae jopa peaiñakuí jiwi pang poxonae saya pana táneme. Jopa pana nejüntükoyene yaputaem pokoyene xua paxeinang pata jüntükoyeneintha. Icha ichüng xaniwaicha piakoutha nayábara nanta-xeina xua bapong Cristo piamonae jíwana tatsi, bapong bewa barichi xua bewa pana yábara jüntanaináe xua paxang bara Cristo piamonae jíwana tatsi pang icha bapong ichi. ⁸Jopa auraño xua pata koutha pata nayábara paebiwa baxua bekein pata koutha atsakiya pana nayábara páebang xua jangje baxue: “Ápara Nakom pana kata pía peayapusúü itorobi koyenewa xua pata paka kayawenaenexa tsainchi xua paiña nejüntükoyene wüünaeponaenexa. Ápara jopa pana katsiyo bárapo peayapusúü itorobi koyenewa xua pata paka abe exanáewatsi tsainchi”, xua jang. ⁹Jopa ichipaeíño xua pata taneyábara nantaxeinaewam xua pana pata tanejumekunuwiwam xua pákata tínatsi cartang. ¹⁰Ichamonae neyábara paeba, jeye: “Pablo pía cártangtha xua tajü wenaka tatineibarena bichokono ayapubé xua wayábara

jumekowüntsiya exanaewa yawa bichokono jumedangwéi tsaibi. Íchitha poxonae bapong patopa waxantha pía pepong saya pekuipawi xuano poxonae kueikueijeji jopa naka tsita aiñakuiyiyo”, jei barapomona. ¹¹Barapomonae ápara bara bewa pana neyaputaena xua paexanaein pokotsiwa xua cártangtha papaebang poxonae papatsin barapomona pía tómaratha tatsi.

¹²Pata koutha jopa pana nayábara nantaxeinaeño xua paxang pakuijü pang xua pomona piakoutha penayábara nantaxeinaewi xua peaiñakuí jiwi náexana. Saya barapomona piakoutha nayábara nantaxeina xua bara betiya éxana daxita, beyakaincha ichamona pomonae piamona tatsi. Barapomonae ápara jopa peyaputáe jiwi, poxoru saya jeita nawita xua pokoyene beyakaincha piamona tatsi éxana. ¹³Paxang saya tsiwiyo atsakiya yábara papaebang pokoyene xua Nakom pata tanekuikopatsiwa xua bara pata tanakuichiwa Nakom. Jopa toxei-nchiya atsakiya papaebiño xua beyakaincha xua poxonae Nakom pana kópata xua pata exanaewa tsane. Saya paéxanang po penakuichiwa xua Nakom pana kata. Nakom pana kópata xua papatang ichaxota paxam Corinto tómaratha xua pata paka kayawenaenéxatsi Nakom Pejume Diwesi. ¹⁴Jopa patoxeinchiya exanaeño pokoyene Nakom pana itoroba poxonae paka siwapoinchi. Paxang pomona pang pomona kopiya papatang paiñaxantha xua pata paka katsipaebinéxatsi Cristo pía pexeña jume diwesi. ¹⁵Ichamona pomona paxam jíwana pam jumekowünta Cristo pejume diwesi pekuidubixaetsi ichamona. Barapomona pomona pejumekowüntsiwi Cristo pejume diwesi, jopa atsakiya be payábara jangyo: “Barapomona jumekowünta ápara poxoru barapomona pata kuidubixae”, jopa bepajangyo. Jame xua paichichipang xua paxam bewa mataropeichiya pajumekowünta dubenanaebiyáename. Bapoxona pana itaküüpa xua mataropeichiya pata nakuichiwa paiñaxantha. Saya meisha bewa paexanaein pokotsiwa Nakom pana itoroba. ¹⁶Paichichipang pata kuidubiwa ichamona Nakom Pejume Diwesi xua tajü beya xua paiña tómará weya poxonae pawetang xua pata paka kuidubíwatsi Nakom Pejume Diwesi. Íchitha jopa paichipaeño xua pata kuidubiwa Nakom Pejume Diwesi ichaxota irü ichamona kuidúbarü bárapo Nakom Pejume Diwesi yáwano xua jiwi jumekowünta bárapo diwesi. Tspíeí bárapo pejumekowüntsiwi jopa paichichipaeño xua pata yábara jeinexa: “Barapomona tajü weya jumekowünta bárapo Nakom Pejume Diwesi pata kueikueijeixae bárapo diwesi”, jopa be payábara jangyo.

¹⁷Icha ichüng ichichipa atsakiya penayábara paebiwa xua pinae beta éxana, jame bara bewa moya bara atsakiya yábara paebí pokoyene Nakom pía peyaputáe koyenewang tatsi yábara xua petsita-itapeiñaxeinaenexa xua ápara Nakom beta peexanaein. ¹⁸Pokotsiwa xua pebin piakoutha nayábara wüünae jainta xua beta peexanaexae baxua Nakom jopa tsita aiñakuichi. Pokotsiwa xua Nakom yábara nantaxeina xua bárapo pebin yábara nantaxéinatsi baxua jame Nakom tsita aiñakuichi.

Meje xua Pablo yábara paeba pomona xua muxutorobiya pejeiwa:

“Paxang Jesús pía peitorobi jiwi tatsi pang”, pomona pejeiwa

11 ¹Ichichipang xua jopa paiña neaitakonaewa xua tapana nejumeyábara ewatsiwam xua tapaebiwa pókotsi jume xua po diwésiyo xang yábara.

²Tspíeí yáitama bichokono paka asíwatsi icha Nakom pana ichi xua pana asiwa.

Paxang paka dóutatsi Nakomtha xua paiña nejumlahewüntsineha Cristo. Barapókotsi koyeneya paka kana éxanatsi icha be pókotsi koyeneya pebin ichi poxonae ba pexantiyo douta xua ichüing pepichinexa powa býatha ichüing jopa pichiyo. Bapowa ántobe pía pebin. Paxam bewa bara paichim, bewa Cristo pantobem. ³Kaurimonae pía pentakaponaein tatsi pong piakoutha náexana be jomo, bapong Eva muxuitórobatsi peajüntükoyenebéwatha. Pajunuwang xua bapong paka muxuitorobina bárapo jüntükoyenéwatha. Bapong paka kana exanaena xua paiña nenantaxeinaewa Cristo jopa beta peyábara nantaxeináewatsi, xua ekeicha jopa wüünaeya paiña neantobewa tsane Cristo, meisha xua bapongtha paiña neantobeneha. ⁴Paka yábara junúwatsi poxoru pajumenaitáewatame pókotsi diwesin xua daxita jiwi paeba. Paxam itapeta pajumenaitáewatame ichüingtha pongtha pong peyábara paebin Jesús xua ichüing xua pong pepa Jesús aibi. Paxam payábara jumenaitáewatame icha júmope xua po júmope jopa xapain Nakom pía Pejumo-petünaxü tatsi. Matáütano yábara pajumenaitáewatame icha diwesi po diwesi xua jopa xapain Nakom pía pekapanenebiyáe jume diwesi xua pojume diwesi kopiya pajumetaneme. ⁵Pomonae baxuang paka tsipaeba, barapomonae piakoutha nayábara nantaxeina, jeye: “Paxang Jesús pía peitorobi jiwi tatsi pang, xua pata peaiñakuí jiwi pang”, jei. Íchitha jopa yábara nantaxeinaeíño xua barapomonae netoxeincha peaiñakuí jiwi beyakaincha xua xang. ⁶Xang saya táepato kueikueijang Nakom Pejume Diwesi tatsi. Jopa bichokono wüünae takueikueijeija jopa be bapokotsiño be pókotsin xua beta pekueikueijeija. Dáichitha bara yaputang xua yábara takueikueijeija. Paka tsita itapeiñaxeinéibatsi xua bara tayaputaewa, xua poxonae daxita pokotsiwangtha paka tsipaebéibatsi.

⁷¿Metha bara abe éxanang jampa poxonae jopa paka wüükaetsi pokotsiwa nantawénonang xua takueikueijeixae Nakom pía pekapanenebiyáe diwesi? Jume ápara, ápara jopa abe exanaeíño. Takoutha akopeibi náexanang xua takuipawi náexanang xua saya meisha aiñakuí paka kana éxanatsi poxonae paka kuidúbatsi Nakom Pejume Diwesi. ⁸Ichamonae pomonae pejumlahewüntsiwi, pomonae penakaetuteibi jiwi, xua pomonae wüünae pejainteibiwi Nakom, barapomonae wekobepitang parátixi tanekatsixae. Bárapo paratixitha kómokang pokotsiwa xua nantawénonang poxonae tapaka barü ekáewatsi xua amanaya tapaka kayawenonaenéxatsi. ⁹Poxonae kataunxuae paka barü ékatsi bapoxonae inta akoibi pokotsiwa takanantawenonaewa. Jopa wüükaeíño paiñamonae jintong xua pokotsiwa dangweya pákata exainchi xua saya paiña tana nekatsibiwaxaem. Pomonae Macedonia nakuamaepiwi pomonae pejumlahewüntsiwi barapomonae inta karendena pokotsiwa xua takanantawenonaewa. Býatha jopa paka wüükaetsi xvano xua ekeicha bexa jopa paka wüükae tsainchi xua daxota jopa pákata dangwéi exanáe tsainchi xua daxita koyenéwangtha. ¹⁰Tajüntükoyénewatha xeinang Cristo pía pexaiñéi koyenewa tatsi. Dapong aibi xua neéxana xua taitompa exanaewa xua yábara takueikueijeija baxua xua jopa parátixi paka wüükaetsi. Baxua kueikueijang daxita Acaya nákuatha. ¹¹¿Eta xua metha baxua paka tsipáebatsi? ¿Metha poxoru jopa tapaka antobéwatsi? Ajibi ápara, Nakom yaputane xua bichokono tapaka antobéwatsi.

¹²Íchitha áwiya exanaponaein pokotsiwa xua ánoxuae exanaponang xua jopa tapaka wüükaponáewatsi parátixi. Baxua éxanang xua tajumekui-matawentsineha, pomonae xua naerabiya atsakiya paeba, xua jeye: “Paxang júpa paéxanang icha

Pablobarü ichi xua parátixi nonotapona be pentoma xua pekiekueijeixae Cristo pejume diwesi”, jei. ¹³Barapomonae pemuxuitórobi jiwi xua pinae barapomonae Jesús pía peitorobi jiwi tatsi. Barapomonae jiwi muxujáñaba pía penakuichiwa koyenéwatha. Barapomonae be natsikotane Jesús pía peitorobi jume pepaebi jiwi tatsi. ¹⁴Pókotsi koyeneya xua barapomonae nakana éxana jopa yábara najün-tükoyene kabenaekaeiño. Payaputang xua barapomonae ápara Satanás piamonae tatsi tsipéi barapomonae piakoutha nakana éxana xua ítara mexeya beta peexanaewi icha bapong ichi. Satanás pong kaurimonae pía pentakaponaein tatsi piakoutha nakana éxana xua ítara mexeya pong wüünaeya peexanaein icha mata-tsunpin ichi xua pexeña peitüpanáe koicha xeina Nakom weya. ¹⁵Daxota jopa bewa najüntükoyene kabenáekaetsi xua poxonae Satanás pía petanakuichi jiwimonae tatsi éxana icha Satanás ichi poxonae éxana. Barapomonae natsikotane be pokotsimonae xua beta peexanaewi. Daxota poxonae Nakom yábara paebina barapomonae xua penatsikuentsiwa xua abe peexanaexae, barapomonae bichokono átene exanebinchi xua be pókotsi koyeneya bichokono abe peexanaexae.

Meje xua poxonae Pablo piakoya nayábara paeba xua átene éxanatsi Jesús pía peitorobi jiwi jíwana tatsixae

¹⁶Ekeicha paka tsipáebatsi: Jopa paneyábara nantaxeinaeinde xua xang be pong tanentajemabin bekein kueikueijeithang bárapo koyeneya. Íchitha icha panekayábara nantaxéiname baxua bara saya beitatemaya amuxuya pana nejumetaema pokotsiwa xua kueikueijang icha be pókotsin pong pematajemabinchi ichi. Bapoxonae xang takoutha atsakiya kónotha nayábara paebin icha ichamonae ichi xua piakoutha atsakiya nayábara paeba. ¹⁷Ápara jopa paebiño xua tana itorobixae Jesús pong jiwi Pekanamataxeinaein. Ápara saya takoutha atsakiya nayábara páebang icha pong matajemábatsi ichi xua piakoutha natsipaeba. ¹⁸Tsipéi ayéi jiwi atsakiya yábara paeba pokotsiwa bárapo kae pin nákuathe xeina. Daxota xang barichin takoutha atsakiya nayábara páebang. ¹⁹Panantaxéiname xua daxita pam paiña neyaputáe jiwi pam. Íchitha jopa peyaputaewi pam. Bara saya pakuiyábara kópatame xua pajumenaitómatame pomonaetha, pomonae be pematajemabi jiwi pomonae naerabiya paeba xua poxonae jeye: “Paxang Jesús pía peitorobi jiwi pang”, jei. ²⁰Matáütano bara saya pakuiyábara kópatame xua bara amanaya paiña netanakuichinexa tsane ichamonae. Matáütano saya pakuiyábara kópatame xua bara ichamonae amanaya parátixi paiña nepaka kobewenotéibiwa xua saya barapomonae nexa. Matáütano saya pakuiyábara kópatame xua bara ichamonae paka yábara muxuitóroba paiñawang xua paiña nepákata notsiwa. Barichi bara saya pakuiyábara kópatame xua bara ichamonae paiña nepaka aebiwa xua barapomonae aiñakuí jiwi beyakaincha paxam. Matáütano saya pakuiyábara kópatame xua bara paiña nepaka itabara kuainchiwa. ²¹¡Bekein aurang xua paka tsipáebatsi baxua, íchitha jopa padangwang tsobenaeiño icha paichim poxonae ichamonae pákata abe éxana!

Icha daxita jiwi ichi xua atsakiya nayábara paeba, xang barichin irü atsakiya nayábara papaebang takoutha icha pong pematajemabinchi ichi xua poxonae nayábara paeba. ²²Barapomonae atsakiya nayábara paeba xua barapomonae pinae judi monaepiwi. Xang írürü ápara barichin judi monaepin. Matáütano pinae barapomonae Israel pong báyatha tüpa pía pemómoxi susato jiwi tatsi. Xang ápara

írürü barichin barapong Israel pía pemómoxi susato jiwi jíwana tatsin. Matáütano barapomonaе atsakiya nayábara paeba xua pinae Abraham pía pemómoxi susato jiwi tatsi. Xang ápara írürü barichin Abraham pía pemómoxi susato jiwi jíwana tatsin. ²³Matáütano barapomonaе atsakiya nayábara paeba xua pinae Cristo pía petanakuichi jíwichi tatsi. Nama ápara xang írürü barichin Cristo pía petanakuichin tatsin beyakaincha barapomonaе. Poxonaе baxua páebang ápara icha pókotsin ichi pong pematajemabinchi xua piakoutha nayábara paeba. Xang bichokono dangweya ayapusüüya nakuitang Cristo nexa beyakaincha barapomonaе. Jiwi matowa nejebeiba jiwi pekübibongtha beyakaincha barapomonaе. Ichamonaе bichokono nebeiba beyakaincha barapomonaе. Matowa muxu tatüpeibi xua ichamonaе inta éxana. ²⁴Daxota cinco pokoyenewathabe judiomonaе newáetaba pía tanekuainchinexa. Daxita koyenéwatha nekuainta barapomonaе treinta y nueve pokuiyobetha kopabeiba xua nejumakuainta xua xota kuainta xua duwein perüümüüto. ²⁵Ichakuitha tsaibi akoibi pokuiyobetha nekuainteiba iwatongtha. Kae koyenéwatha ibótongtha nekuinbabeiba. Akoibi pokoyenewathabe jératha po naetha pin naetha payothopang poxonaе pawárapang xua jera bunareka. Kae merawitha yawa kae matakéithano xoyopang pin marmentha. ²⁶Matowa warapeibang takaponaenexa Cristo pejume diwesi xua jiwi tatsipaebinexa. Ichakuitha inta dangwéi xua icha muxunene beya mene iya tapateibiwa tsane poxoru metha awüübo tsipae. Ichakuitha inta dangwéi poxonaе poneibang námtongtha xua metha pomonaе pekaibi jiwi tawanaetha jinompeiba xua tanekaibiwa tsane pokotsiwa xeinang. Ichakuíthano inta dangwéi poxonaе tanakuamonaepiwi metha inta abe exaneibitsipa. Ichakuitha inta dangwéi poxonaе pomonaе jopa pejume-kowüntsiwi metha abe tana neexanaewa tsipae. Ichakuitha inta dangwéi poxonaе jiwi tómarangtha metha abe tana neexanaewa tsipae. Ichakuitha inta dangwéi poxonaе ira xuépana susato tsúrukuaе nákuatha taponeibiwa xua metha abe tana neexanaewa tsipae. Ichakuitha inta dangwéi poxonaе pin marmentha metha abe tana neexanaewa tsipae poxonaе jératha ponang po nae pin naetha. Ichakuitha inta dangwéi poxonaе metha abe tana neexanaewa tsipae pomonaе naerabiya pepaebiwi xua pinae pejume-kowüntsiwi. ²⁷Xeinang penakuichiwa po penakuichiwa inta bichokono dangwéi xua neatene éxana. Matáütano aiña merawin tsaibi xua jopa maiteibiño. Matáütano tain atenein tsaibi. Matáütano bichokono tamératsi tsaibi. Matáütano aiña matakabin inta pexaewa aibi tsaibi. Matáütano bichokono akein tsaibi poxonaе inta seikeiba paparuwa.

²⁸Matáütano írü icha koyeneinno xua seika xua tapaka tsipaebíwatsi. Matáütano xeinang icha koyene pokoyene xua neajüntükoyenerewe éxana xua poxonaе yábara nantaxeineibang pomonaе Nakom pejume-kowüntsiwichi pomonaе penakaetutsi bongmonaepiwi poxonaе ne-eena xua tayawenaenexa barapomonaе. ²⁹Icha ichüing pong bárapo penakaetutsi bongmonaе jíwanapin, icha bapong jüntükuikoyene faefaena xua pejume-kowüntsiwa Nakom, nantanuweya yábara nantaxeinang bapong. Icha ichüing jüntükoyene jüjútatsi xua abe peexanaenexa aurang bapong nexa, yáwano kasebang pongtha pong pejüntükoyene jüjütsixae. ³⁰Icha bewa atsakiya nayábara paebin, bapoxonaе atsakiya yábara paebin pokotsiwa xua jiwi tsita itapeiñaxeinang xua xang faefaenang xua jopa neitaküüpaeyo xua takoutha tana nayawenaewa. ³¹Nakom neyaputane xua xaniwaicha bara yábara páebang pokoyenein xua inta dangwéi. Nakom Jesucristo Paxa tatsi, pong Wanaka

namataxeinaein. Barapong jiwi bewa wüünae jainteibina ataya. ³²Kaena báyatha Damasco tómaratha póponang. Bapoxonae pong kanamataxeina bárapo tómaratha, bapong itoroba soldadomonae xua tómara peyakaincha toxorotsidutsiwa koibótotha peumenaenexa. Bárapo soldadomonae tómara koibótongtha umena xua pía tanewaetabichi poxonae tómara wewarapiyang xua tanekaponaenexa jiwi pekübibotha. Barapong pong kanamataxeina bárapo tómaratha bapong tanakuítatsi pong yatsikaewa nakua peewatsin bapong tanakuítatsi, pong pewüng Aretas. ³³Bekein bárapo soldadomonae bepa newáetabei, íchitha jopa ponaeiño tómara koiboto iya. Ichamonae neyakoteyoreka ventana wéreka xua pepa tómara jumadeka. Bara panepatabang.

**Meje xua Pablo yábara paeba xua petsita-itüübíwatsi xua abe
poxonae kamaita pokotsiwang Nakom tsita itüüteiba bapongtha**

12 ¹Bewa takoutha atsakiya paka tsita nayábara paebichi, xua paiña neyaputaenexa xua bara beta taexanaewa. Dáichitha jopa xapain neyawenaeyo baxua. Jame ápara áwiya paka tsipáebatsi xua pokotsiwang Nakom netsita-itüüta xua be poxonae kamaitang. Matáütano paka tsipáebatsi pokotsiwang xua Nakom neyaputane éxana xua bapong pía peyábaraxae. ²⁻³Kaena báyatha aiña wei xua poxonae kopiya tajumekowüntsiwa Cristo. Kaena báyatha catorce po weibe yapukaewa xua poxonae nekápona jemeicha peitaboko beicha po itaboko bichokono tajü beicha ichaxota Nakom pópona. Jopa taeiño icha metha pepong daxita nekaicha ichakuitha saya metha moya nejumopekaicha. Xang jopa baxua yaputaeiño saya meisha kompa Nakom yaputane. ⁴Xang yaputang xua nekaicha paraiso matawüng nakua beicha. Poxonae patopang bárapo nakua-theicha jumetang baxoteicha pojume xua nameicha moya yawüngxaina xua jiwi jopa yábara yaputaeyo. Nakom jopa yábara nekopatsiyo xua bara barapojume tatsipaebiwa tsane ichamonaetha. ⁵Bekein neitaküüpa xua atsakiya tayábara paebiwa xua pokotsiwang wüünae xua xuang tataexae, dáichitha jopa bárapo koyeneya exanaeiño. Saya meisha atsakiya yábara páebang pokotsiwang xua inta ayapubé xua pokoyene tatsita-itapeiñaxeinaewa xua ápara nefaefaena éxana xua dáichitha Nakom neyawena. ⁶Bara neyábara kuikópata xua bara atsakiya tanayábara paebiwang tsane pokotsiwang xua beta taexanaewang. Poxonae baxua éxanang jopa paebiño icha be pókotsin pematajemabinchi ichi, xua nayábara paeba tsipéi páebang pokotsiwang xua pexaiñeiwang. Íchitha xang jopa baxua atsakiya nayábara kuipaebiño, tsipéi jopa ichipaeiño xua ichamonae taneyábara nantaxeinaewa xua xang bichokono ta-aiñakuín, beyakaincha xua pokotsiwa barapomonae nekuitane xua éxanang, xuano xua beyakaincha nejumetane xua kueikueijang. ⁷Pokotsiwa xua Nakom neyaputane éxana bichokono wüünae nawita. Nakom kópata xua bara saya atenein tsaibi tsane xua atsakiya tapaebiyainwa pokotsiwang xua Nakom yábara neyaputane éxana. Bárapo peátene koyenewa kaurimonae pía pentakaponaein tatsi, pong Satanás, itoroba xangtha xua átene tana nekana exanaenexa. Bárapo peatenewa bichokono atenein tsaibi be poxonae xua xaneéto nexatempa. ⁸Akoibi pojumeyothabe tsaibi Nakom jumefayakotsiya wüükeibang xua tanepérxaxa kapanepaenexa bárapo peátene koyenewa weya. ⁹Íchitha Nakom netsipaeba, jeye: “Jume, jopa kaa-xaibi exanaetsi. Jame kata itoróbatsi Tajumopetünaxü jiña nekayawenaenexa

daxita takaantobetsíxaetsi. Saya meisha baxua nantawenóname. Po jintong ba axaibiya pópona bara itakúüpatsi xua daxita piakoutha peexanaewa. Jopa ba kanantawenonaeyo taayapusúü koyenewa. Íchitha nama pong ba taayapubetsi xua piakoutha beta peexanaewa, bapong jame kanantawénona taayapusúü koyenewa. Bara bapong yawenang”, jei Nakom. Daxota ichichipang poxonae inta ayapubé tsaibi xua jopa tana neitakúüpaewa xua daxita beta taexanaewa takoutha. Bapoxonae jiwi tanetaenexa xua bara Cristo neyawena pía peayapusúü koyenéwatha. ¹⁰Daxota jüntükoyene weiweingang poxonae inta ayapubé tsaibi xua beta taexanaewa. Matáütano jüntükoyene weiweingang poxonae jiwi abe neyábara paebeiba. Matáütano jüntükoyene weiweingang bekein jopa xeinaeiño pokotsiwa xua tanantawenonaewa. Barichino jüntükoyene weiweingang poxonae bekein jiwi neatene exaneiba tajumekowüntsixa Cristo. Matáütano jüntükoyene weiweingang poxonae bekein jiwi inta ayapubé exaneiba. Daxita baxuang nejüntükoyene weiweina éxana, poxonae inta ayapubé tsaibi xua beta taexanaewa xua ichamonae inta dangwéi peexanaexae. Bapoxonae bara xaniwaicha asüüing tsipéi Cristo tana neyawenaexae.

Meje poxonae Pablo yábara najüntükoyene eena éxana nawita Corinto tomarapiwi

¹¹Kueikueijang icha ichi poxonae kueikueijeji pong pematajemabinchi xua atsa-kiya nayábara paeba. Íchitha paxam pana nekana éxaname xua atsakiya tana-yábara kueikueijejiwa. Jame ápara paxam barapomonaе pam pomonaе bekein bewa wüünaeya pana neyábara paeбim. Bekein xang jopa peaiñakuiyiño, íchitha barapomonaе jopa peaiñakuí jiwi beyakaincha xua xang pomonaе pajumenaitáewatame. Barapomonaе naerabiya paeба xua pinae barapomonaе bichokono peaiñakuí jiwi pomonaе Cristo pía peitorobi jiwi jíwana tatsi. Íchitha barapomonaе xainwaicha bichokono jopa peaiñakuí jiwi. ¹²Poxonaе kataunxuae paka barú popoinchi paka tsita itapeiñaxéinatsi xua xang yatsikaya Jesucristo pía peitorobi jiwi jíwana tatsin. Matáütano jopa aitakonaeyiya exanaeiño poxonaе bekein ichamonae inta dangwéi éxana poxonaе abe neyábara paeба. Jame saya jüntema éxana dukuanaebiyang petsita-itüütsi koyenewang paiñaxantha bekein ichamonae abe neyábara paeба. Matáütano éxana dukuanaebiyang pokotsiwang jiwi nabe-naeka exainchi. Daxita baxuang éxanang Nakom pía peayapusúü itorobi koyenéwatha tatsi. ¹³Paka yábara nantaxéinatsi xua paxam metha panantaxéiname xua paxam jopa peaiñakuí jiwi pam. Matáütano metha panantaxéiname xua meisha icha penakaetutsi bongmonae jiwi pomonaе wüünae pejumekowüntsiwi Nakom bichokono peaiñakuí jiwi beyakaincha paxam. Metha panantaxéiname baxua poxoru jopa paka wüükaetsi xua tapana neyawenaenexam tsane pokotsíwatha tanantawenonaewa pokotsíwatha xua ayapubé pákata exainchi.

¹⁴Ánoxuae nakuiyábara wüünaetang xua tapaka siwaponáewatsi tsainchi ekei-cha xua nama akoibi pokuiyobetha tsane. Kaena báyatha kopiya nakuéyatabe pokuiyobetha paka siwapoinchi. Íchitha jopa paka wüükaetsi xua pokotsíwatha tapana neyawenaenexam tsane xua pákata ayapubé exainchi. Íchitha jopa paka yábara siwaponae ponaetsi taichichipaexae pokotsiwa xua paxéiname. Ápara saya paxam kuita paka siwapoinchi. Pexui ba jopa nantawenonaeyo xua paxeiwi júntüna jeba parátixi, jame saya ba koxiyeiwi bewa pía pexui júntüna jebí

parátixi. Barapókotsi jüta koyeneya ichin bewa paka yawenaeinchi. Jopa panantawenonaem xua tapana neyawenonaewam. ¹⁵Jüntükoyene weiweinang xua paka katsinchi daxita xua xeinang. Barichi kopatang xua bara ichamonae átene tana neexanaewa tapaka kayawenaenéxatsi. Poxonae bekein matowa toxeinchiya paka ántobe tsoponaetsi dáichitha be kónotha xuya pana neantobem.

¹⁶Ichamonae pomonae paiñamonae jíwana pam naerabiya neyábara jei: “Bara xaniwaicha Pablo jopa painta ayapubé exanaeyo xua pana newüüka parátixi bapong nexa. Dáichitha ichakuitha tsipae metha ápara bapong naka muxuitorobiya wekobenotsipa parátixi”, jei. ¹⁷¿Metha parátixi paka yábara muxuitorobiya wekobenotsinchi poxonae pebiwi itorobin paiñaxantha? ¡Jume ápara! ¡Jopa baxua exanaeíño! ¹⁸Tito itorobang xua paiña nepaka siwaponaeewa tsane, írúno ichüingno itorobang pong írú pejumekowüntsín xua Tito pekueiyatsiwa tsainchi. ¿Metha Tito bara paka yábara muxuitorobiya wekobenotsina parátixi? ¡Jume ápara! Paxam bara payaputáneme bara Tito betiya xaniwaicha panantajüpaya paexanangbe, xuano pana najüntükoyene júpangbe.

¹⁹Jopa payábara nantaxeinaeinde bárapo jumein xua pata paka katsipaebíwatsi xua saya poxoru pata ichichipaexae xua paxam paka tsita wüünaetsi. Jopa baxua paexanaeíño. Jame pojume xua Cristo ichichipa xua patapaebiwa, ápara barapojume kuikoyeneya papaebang. Daxita baxuang pakueikueijang Nakom peitütha xua wüünaeya mataropeicha beta Nakom paiña nejumekokowünta ponaewa tsane. Baxua paéxanang tsipéi paxam tamonae pam, pomonae pata paka kaántobe jíwichi pam. ²⁰Junuwang xua poxonae tapaka siwaponaeewa tsainchi xua metha pajinompáetsipame be pokotsimonae aichaxaibin tataewa poxoru metha aichaxaibin tsipae pokotsiwa xua paéxaname. Matáütano metha paneyábara nantaxeinaetsípame xua xang jopa paka kuijúpaetsi xua poxonae pokotsiwa éxanang. Barichi junúwangno xua poxonae tapaka siwaponaeewa tsainchi xua metha nantiya pana najumematsontsónobame. Matáütano junuwang xua nantiya pana yábara úwame pokotsiwang paxéiname, xuano xua nantiya pana nakasébame. Matáütano junuwang xua nantiya pana naasiwam xua ichamonae jopa bepawenaem. Matáütano junuwang xua nantiya pana nabiatáetsipame xuano xua nantiya tsümüjumeya pana nakuiyopitsípame pokotsiwang xua paéxaname. Junúwangno xua nantiya pana na-aebichípame paiña neyaputaexae pokotsiwang xua paéxaname, xuano xua nantiya pana natsakibábame poxoru paiña neanaepanaexae. ²¹Matáütano junuwang xua poxonae ekeicha tapaka siwaponáewatsi tsainchi, Ta Nakom neéxana xua paka yábara áuratsi. Bichokono ünthüthüwekoyang tsane pomonae nexa pomonae xua kaena báyatha abe peexanaexae. Barapomonae kataunxuae jopa akui-uriyo pokotsiwang xua abe eexanapona xua poxonae barapomonae yábüxi nata nota xua bekein jopa piséurixi xuano poxonae yábüxi nota pebiwi poxonae jopa piséuriyo. Matáütano barapomonae atsakiya abe eexanapona.

Meje poxonae Pablo napeyabiya najumeweta

13 ¹Ánoxuae ekeicha paka siwaponaeena ponaeinchi xua nama akoibi pokuiyobetha tsane xua taponaeewa tsane bara beya. Icha ichüing ichichipa kuiyopita xua ichüing abe peexanaexae Nakom pía peitorobi koyenewa baxua yábara naka tsipaeba, naka jeye: “Poxonae jiwi kuiyopita xua ichüing abe peexanaexae bewa akoibi póyobe yábara paebina bapongtha, xua abe peexanaexae bapong.

Ichakuitha saya nakuéyatabe póyobe yábara paebíchipa bapongtha bapoxonae jiwi tsita itapeiñaxéinatsi xua bara bapong abe peexanaein”, jei Nakom pía peitorobi koyenéwatha tatsi. ²Báyatha poxonae paka siwapoinchi yábara paka tsipáebatsi pomonae xua abe peexanaewi pomonae paiñamonae jíwana pam xua irü ichamonae. Ánoxuae bekein kataunxuae tajü paka kuenta popónatsi, ekeicha paka tsipáebatsi xua báyatha pokotsiwa paka muxuwétatsi, jangje: “Poxonae ekeicha paka siwaponae ponaeinchi ayapubé taexanaein pomonaetha, pomonae xua áwiya abe peexanaponaewi”, jang. ³Baxua paka kana exanaeinchi yáitama paichichípame xua paka tsita itapeiñaxeinaeinchi xua pokotsiwa Cristo neitoroba takueikueijeinexa bapong nexa. Paka muxuwetsinchi Cristo nexa tapaebixae bapong nexa. Cristo jopa jumefaefaenaeyo poxonae yábara paka muxuwétatsi paiña abe exanáe kuirukoyenein. Jame ápara bapong jumedangweya paka tsipaeba. ⁴Poxonae Jesucristo tüpa náetotha jiwi yábara nantaxeina xua bapong Cristo saya jüntükoyene faefaena, tsipéi jopa piakoutha nayawenaeyo. Íchitha ánoxuae Jesucristo asiüü pópona Nakom pía peayapusüü itorobi koyenéwatha tatsi. Bekein pajüntükoyene faefaenang ánoxuae, dáichitha poxonae paka itawetinchi bapoxonae jopa pajüntükoyene faefaenaein tsane. Jame asiüü pajinompaein. Bapoxonae Nakom pía peayapusüü itorobi koyenéwatha ayapusüüya paka itawetsina.

⁵Ínkane paiñakoutha pana najüntükoyenein jüjüre icha bara xaniwaicha metha beta pajumekowüntsiya jinómpame. Icha bara xaniwaicha pana payaputáneme xua bara yatsikaewa Jesucristo piamonae tatsi pam, barapoxonae pana neyaputáename xua bara ápara Jesucristo paka barü jinompa. Icha jopa Jesucristo piamonae tatsi pam, bapoxonae Jesucristo jopa paka barü jinompaeyo. ⁶Ichichipang xua paxam payaputáneme xua paxang Cristo pana barü pópona. Paxang jopa pemuxuitórobi jiwi pang xua poxonae pata jeiwa: “Paxang Jesucristo pía peitorobi jiwi tatsi pang”, poxonae pata jeiwa. ⁷Pawüükang Nakomtha xua jopa abe paiña neexanaewa tsane. Jopa Nakomtha baxua payábara wüükaeiño xua paka tsita itapeiñaxeinaeinchi xua paxang Jesucristo pía peitorobi jiwi tatsi pang xua daxota beta paiña neexanaewa tsane. Íchitha pákata wüükatsi Nakom xua áwiya ü meisha pexeiña koyene paiña neexanaponaewa tsane bekein metha pana neyábara nantaxéiname xua paxang jopa pomonae Jesucristo pía peitorobi jiwi tatsi pangyo. Bekein paxang jopa paka tsita itapeiñaxéinatsi xua bara Cristo pía peitorobi jiwi tatsi pang. ⁸Paxang jopa paichichipaeiño xua pata yábara jumetoxeinchiya exanaewa pokotsiwa itoroba bárapo Nakom pía pexaiñéi jume diwesi. Jame ápara itapeta paéxanang pokotsiwa itoroba bárapo pexaiñéi jume diwésitha. ⁹Daxota pajüntükoyene weiweingang poxonae ichamonae pana neyábara paeba xua pinae jopa dangweya papaebiño. Saya paichichipang xua beta paiña nejumekowüntsiwa tsane. Áwiya Nakomtha pákata wüükatsi xua paxam xaniwaicha paiña nejüntükoyene wüünaeponaewa tsane Nakomtha xua jopa patsita natsikuentsim tsane abe paiña neexanaexae bapongtha. ¹⁰Pewünaeya xua poxonae tapaka siwaponae tsainchi, matha bárapo carte pákata tínatsi. Daxota tinang xua jopa bewa paka tsipaebi tsainchi pokotsiwa pákata ayapubé éxanatsi poxonae paka siwaponae ponaeinchi. Bapoxonae jopa nantawenonaein tsane xua tapaka itorobiwa tsainchi xua taxeiñaxae Nakom pía peitorobi koyenewa tatsi po petorobi koyenewa Nakom nekata. Nakom nekata bárapo peitorobi koyenewa xua paiña nejüntükoyene wüünaeponaenexa Nakomtha. Ápara jopa baxua nekatsiyo xua abe tapaka exanaenéxatsi.

¹¹Tamonae pam, bara wetang ánoxuae bárapo carte. Ichichipang xua paiña nejüntükoyene weiweinaya jinompaewam tsane. Itapeta pajumejejande pokotsiwa xua paka muxuwétatsi xua daxota beta mataropeicha paiña neexanaponaewa tsane. Pana najüntükoyene tsakábare xua daxota pebürüya kaemonae pana nabariü nantaxeinaeya jinómpare. Jüntema pana barü jinómpare. Bapoxonae Nakom pong jüntema pepoponaein, xuano xua peántobe tsurukuanaebiyaein, barapong paka barü poponeibina. ¹²Betiya painta nantiya najakóbare paiña neantobéwaxae Cristo. ¹³Daxita pomonae xote jinompe pomonae pejumekowüntsiwi Jesucristo barapomonae paka jakoba.

¹⁴Bárabü Jesucristo pong jiwí Pekanamataxeinaein paka yawenaena pía paka nekaantobexae. Bárabü Nakom pía peántobe koyenéwatha tatsi pajinompáename. Matáütano bárabü Nakom pía Pejumopetünaxü tatsi daxita pam paka barü jinompaena.

Baja Pablo.

Meje Po Carte Pablo Tatina, Galacia Nakuapiwi Tatínatsi

Meje yábara poxonae Pablo tamrópata pítaba xua tatina pomonaetha, pomonae Galacia nakuapiwi

1 ¹Xang, Pablo, Jesucristo pía peitorobi jiwi jíwana tatsin. Ápara ichüing jopa neitapetsiyo yawa pebiwi jopa neitorobiyo. Ápara jame Jesucristo bapong neitoroba, yawa Nakom, Waxa, neitoroba, pong Pexanto asüü éxana petüpáe koyene weya. ²Xang, írürü ichamonae pomonae pejumekowüntsiwi daxita barapomonae pang paka jakóbatsi. Bárapo carte pákata tínatsi pomonae Nakom piamonaе tatsi pam, paiña nejumekowüntsixae Jesucristo pomonae Galacia nákuatha paiña nejinompaewa. ³Bárabü Nakom, pong Waxa, irü Jesucristo, pong jiwi Pekanamataxeinaein, bapongbe amanaya paka yawenaena pía paka nekaantobexae. Yáwano bárabü Nakom jüntema jinompa paka exanaena. ⁴Bapong Jesucristo naka tsitüpa xua wanaka kapanenebiya exanaenexa bárapo abe waexanáe koyene weya xua po abe exanáe koyene éxana pomonaе jinompa po kae pin nákuathe. Nakom pong Waxa ichichipa naka kapanepa daxita bárapo koyenein weya. ⁵¡Bárabü Nakom wüünae jáintatsi jiwi xua ataya tsane!

Meje yábara xua aibi icha pekapanenebiyáe koyenewa

⁶Najüntükoyene benaekang xua naiña papéntame Nakom, pong paka waba. Tsipéi ápara bapong paka yawena po peántobe koyenéwatha Cristo írürü xeina waxainchi nexa. Yawa najüntükoyene benaekang xua pajumekowüntame icha jume diwesi xua be pekapanenebiyáe jume diwesi xua saya jiwi paeba. ⁷Bara xaniwaicha, xua icha pekapanenebiyáe diwesi aibi. Pokotsiwa xua ichamonaе paka kana éxana baxua paka jüntükoyene tsakáraba xua paiña nejumekowüntsinexa icha diwesi, xua toxeinchiya paiña nejumekowüntsinexa Cristo pía pekapanenebiyáe jume diwesi tatsi. ⁸Icha ichüing toxeinchiya ichawiya yábara paka tsipaeba xua pokotsiwa báyatha paka tsipáebatsi pekapanenebiyáe diwesi koyene bárabü Nakom bapongtha kabeta exanaena abe peexanaexae. Metha bara bekein xang tsipaein, íchitha Nakom nekabetsipa. Ichakuitha metha bara bekein matatsunpin tsipae pong itaboko wétsika pona, íchitha Nakom kabétsipa bapongtha. ⁹Baxua báyatha paka tsipáebatsi íchitha ekeicha baxua paka tsipáebatsi. Paka jeichi: Icha ichüing toxeinchiya ichawiya yábara paka tsipaeba xua pokotsiwa báyatha paka tsipáebatsi pekapanenebiyáe diwesi koyene bárabü Nakom bapongtha kabeta exanaena abe peexanaexae, paka jeichi.

¹⁰Poxonae páebang baxua jopa kueikueijangyo pokotsiwa jiwi beta tana neyábara nantaxeinaewa. Ápara jame kueikueijang Nakom wüünae tana neyábara nantaxeinaexae. Icha saya nantaxeineibichipang xua éxanang pokoyeneyatha xua jiwi beta tana neyábara nanantaxeineibiwa tsane bapoxonaе xang jopa Cristo pía peitorobi jiwi jíwana tatsin tsipae.

Meje yábara xua poxonae Pablo Jesucristo pía peitorobi jiwi jíwanapin tatsi kana exainchi

¹¹Tamonae pam, pomonae irü paiña nejumekowüntsíwixae Jesucristo. Ichichipang xua paiña neyaputaewa xua po diwesi pekapanenebiyáe diwesi xua po diwesi kueikueijang, bárapo diwesi ápara jopa jiwi pía diwésiyo tatsi. ¹²Matáüta bárapo diwesi ápara xua jopa jintong netsipaebiyo. Yawa matáütano dapong aibi xua pong nekuiduba bárapo diwesi. Ápara saya Jesucristo neyaputane éxana poxonae netsita-itüüta piakoutha.

¹³Paxam pajumetaneme xua pokotsiwa býatha éxanang, xua poxonae kataunxuae eexanaponang xua pokoyene judiomonae éxana pía pejumekowüntsiwa xua abe yábara, yawa pejinompáe koyene yábara. Býatha payaputáneme xua bichokono abe kana éxanang pomonaetha, pomonae Nakom piamonae tatsi daxita pomonae pejumekowüntsiwixae Cristo. Ichichipang xua daxita werawéraka taexanaewa. ¹⁴Xang bichokono yábara nakuidubaponang pokoyene judiomonae pía pejumekowüntsiwa tatsi. Yawa yábara nakuidubaponang pokoyene pía pejinompáe koyene tatsi. Bichokono nakuidubaponang beyakaincha xua ichamonae nakuidubapona pomonae tanakuapiwi pomonae tana neweijüpaewi. Bichokono ichichipang xua taexanaewa pokoyene tamo susato jiwi éxana, beyakaincha xua ichamonae éxana. ¹⁵Íchitha kaena býatha Nakom neitapeta xua tajumekowüntsiwa tsane bapong pewünaeya poxonae beya tanakatsiwa tsane. Daxota Nakom newaba, bichokono petananeantobexae. ¹⁶Bapong Nakom yábara neyaputane éxana Pexanto tatsi, pong Jesucristo. Baxua Nakom inta éxana Pexanto tatsi tayábara kueikueijeinexa tsane pomonaetha, pomonae jopa judiomonae naexanaeyo. Poxonae bárapo koyeneya nekana éxana jopa baxua yábara paebiño ichamonaetha. ¹⁷Matáütano jopa ponaeiño Jerusalén tómara beya xua baxua tayábara paebinexa Jesucristo pía peitorobi jíwitha tatsi pomonae býatha netsíwana kana exainchi Jesucristo pía peitorobi jiwi tatsi. Seikaya nama xang naiña ponang Arabia nakua beya. Bapoxonae pirapaeyo Damasco tómara beya ponang.

¹⁸Jopa naiña ponaeiño Jerusalén tómara beya. Saya bara beya ponang poxonae akoibi po wéiyobe yapukaewa. Bapoxonae Pedro tang, yawa baxota naékang quince po matakábibe. ¹⁹Jopa taeiño daxita pomonae Jesucristo pía peitorobi jiwi tatsi. Saya meisha Santiago tang pong Jesús pía peitorobi jiwi jíwanapin tatsi, pong jiwi Pekanamataxeinaein bapong peweicho tatsi. ²⁰Bara xaniwaicha tinang. Nakom yaputane xua jopa naerabiño pokotsiwa pákata tínatsi.

²¹Néxata bapoxonae Siria nakua beya ponang, yáwano Cilicia nakua beya ponang. ²²Nama pomonae jinompa Judea nákuatha, pomonae Cristo pejumekowüntsiwi, kataunxuae barapomonae jopa xaniwaicha neyaitaeyo. ²³Saya barapomonae jumetane xua ichamonae neyábara jeye: “Ápara bapong, pong kaena býatha abe naka kana éxana wajumekowüntsixa Cristo. Ánoxuae bapong yábara kueikueijei tsurukuanáebiya Jesucristo pía pejumekowüntsi diwesi, bekein kopiya ichichipa werawéraka kana éxana ichamonae pomonae pejumekowüntsiwi Jesucristo”, neyábara jei. ²⁴Barapomonae wüünae jainteiba Nakom poxoru ánoxuae wüünae éxanang Nakom nexa.

**Meje yábara poxonae Jesús pía peitorobi jiji
tatsi Pablo kaemonae nabarü naéxanatsi**

2¹Jerusalén tómará weya ponang xua jiji tatsipaebinexa Nakom Pejume Diwesi icha nákuangtha. Poxonae catorce po weibe yapukaewa bapoxonae Bernabé ekeicha papónangbe Jerusalén tómará beya. Yawa irü Tito barü ponang. ²Bara beya ponang tsipéi Nakom netsita-itüüta xua bewa ponaein. Baraxota Jerusalén tómaratha pomonae pekanamataxeinaewi Nakom piamonae tatsi daxita pomonae pejumekowüntsixaetsi Cristo barapomonae kompa nebarü nakaetuta. Barapomonaetha yábara tsipaebang po diwesi pekapanenebiyáe jume diwesi, xua po diwesi tsipaebang pomonaetha, pomonae jopa judiomonae naexanaeyo. Báraxua éxanang tsipéi jopa ichipaeiño xua bárapo diwesi pejumexáei tsane po diwesi báyatha tsipaeba dukuaeteibang yawa xua ánoxuae tsipaebang pomonaetha jopa judiomonae naexanaeyo. ³Tito baxota nabarü ékang. Bekein bara bapong griego nakuamonaepin íchitha jopa itorobichi xua pewithabíwatsi xua ichaxota pebiwi nareixakaena. Bekein ichamonaebaxua ichichipa xua baxua Tito pekana exanáewatsi, íchitha jopa baxua kana exanaetsi. ⁴Ichamonaebaxua pomonaebaxua Cristo Jesús jopa xapain jumekowüntsichi, barapomonaebaxua namicha pata poxonaebaxua pana nakaetutang. Barapomonaebaxua ichichipa xua Tito pewithabíwatsi xua ichaxota pebiwi nareixakaena. Barapomonaebaxua namicha pata poxoru ichichipa yaputane xua icha paxang jopa paexanaeiño pokotsiwa Moisés pía peitorobi koyenéwatha itoroba xua ánoxuae pata jumekowüntsixae Cristo Jesús. Barapomonaebaxua ichichipa xua ekeicha bewa paexanaein pokotsiwa Moisés pía peitorobi koyenéwatha yábara itoroba xua penawithabi koyene. ⁵Matáütano bara káetono barapomonaebaxua jopa pajumekowüntsia taeiño. Yáwano jopa paexanaeiño pokotsiwa xua barapomonaebaxua pana neitoroba xua jame saya poxoru ápara paiña neyaputaewa tsane pexaiñeiwa xua pokoyene Nakom pía pekapanenebiyáe jume diwesi xeina.

⁶Jerusalén tómaratha tsipaebang pomonaebaxua pekanamataxeinaewi Nakom piamonaebaxua tatsi daxita pomonaebaxua pejumekowüntsixaetsi Cristo. Nayábara páebang barapomonaetha, pomonaebaxua Nakom piamonaebaxua tatsi pekanamataxeináewichi pokoyene Nakom Pejume Diwesi tsipaebang pomonaetha, pomonaebaxua jopa judiomonaebaxua naexanaeyo. Íchitha bárapo matakábitha barapomonaebaxua pomonaebaxua Nakom piamonaebaxua tatsi pekanamataxeináewichi jopa neitorobiyo xua tamuxuna kueikueijejiwa xua icha diwesi xua Jesucristo yábara poxonaebaxua takueikueijéi dukuaenebiyang po diwesi xua yábara páebang pomonaetha, pomonaebaxua jopa judiomonaebaxua naexanaeyo. Jopa inta aiñakuiyo xua barapomonaebaxua bichokono peaiñakuí jiji xua pekanamataxeinaewi xua nama xang jopa dáichino, tsipéi Nakom daxita tsítatsi xua xang irü barapomonaebaxua penajüpaebaxua jiji pang. ⁷Barapomonaebaxua jopa nekatsiyo pena pekuidubiwa xua takueikueijeinexa. Barapomonaebaxua yaputane xua Nakom neitoroba takueikueijeinexa pía pekapanenebiyáe diwesi pomonaetha, pomonaebaxua jopa judiomonaebaxua naexanaeyo pomonaebaxua jopa pewithabíwichi. Icha Nakom ichi xua Pedro itoróbatsi xua pekueikueijejiwa tsane bárapo pekapanenebiyáe diwesi judiomonaetha, barichi Nakom neitoroba xua takueikueijejiwa tsane bárapo diwesi pomonaetha, pomonaebaxua jopa judiomonaebaxua naexanaeyo. ⁸Nakom Pedro exainchi Jesucristo pía peitorobi jiji jíwanapin tatsi xua pomonaebaxua judiomonaebaxua nexa. Barichi Nakom neéxana xua Jesucristo pía peitorobi jiji jíwanapin tatsin xua pomonaebaxua jopa judiomonaebaxua naexanaeyo nexa.

⁹Santiago, irü Pedro, irü Juan bárapo akoibi póyobe jiwí yábara nantaxeina xua bárapo akoibi póyobe pepa pekanamataxeinaewi xua kanamataxéinatsi pomonae Nakom piamonae tatsi daxita pomonae pejumekowüntsixaetsi Cristo. Bárapo akoibi póyobe yaputane xua Nakom nekata bárapo penakuichiwa. Bapoxonae bárapo akoibi póyobe nekobejáyaba xua patsita-itapeñaxeinang xua pebürüya kuita pata nantaxeinaewa xua xang barapóyobe jíwanang póyobe xua Nakom Pejume Diwesi kueikueijei jíwítha. Bárapo akoibi póyobe irü Bernabé kobejáyabatsi. Barapomonae baxua éxana poxoru pata jiwimonae pana náexanang, yáwano poxoru barapomonae pebürüya nantaxeina, xua paxangbe Bernabé pangbe paponaeinbe ichaxota pomonae jopa judiomonae naexanaeyo xua írürü poxonae barapomonae nabarü nakuichina pomonae judiomonaetha. ¹⁰Bárapo akoibi póyobe pana itoroba, pana nejéi: “Panantaxéinare xua paiña neyawenaewa tsane peakopeibí jiwí Jerusalén tómaratha”, pana jei. Baxua bichokono ichichipang xua taexanaewa tsane.

**Meje yábara poxonae Pablo muxutáñaba,
Pedro muxutáñabatsi Antioquía tómaratha**

¹¹Néxata poxonae Pedro Antioquía tómaratha patopa, bapong itabara taeya muxutáñabang tsipéi bapong báyatha abe éxana. ¹²Pokotsiwa bapong éxana baxue: Kopiya bapong Pedro naxane pomonaetha, pomonae jopa judiomonae naexanaeyo, pomonae xua jopa ba withabichi xua ichaxota pebiwi pía penareixakae-naewa bekein bapong judiomonaepin. Íchitha poxonae pata pebiwi, po pebiwi Santiago barü pópona, bapoxonae Pedro tsana xane jopa ekeicha naxaeyo pomonaetha, pomonae jopa judiomonae naexanaeyo. Baxua Pedro éxana poxoru Santiagobarü kunúwatsi xua poxoru Santiagobarü paeba xua pinae bewa daxita pebiwi withabichi, metha bekein tsipae pomonae pepa judiomonae, matáütano metha bekein tsipae pomonae jopa judiomonae naexanaeyo. ¹³Bapoxonae ichamonae icha judiomonae pomonae pejumekowüntsiwi Jesucristo, barichi júpa éxana icha Pedro ichi xua tsana xane. Bekein bárapo ichamonae yaputane xua jopa bewa itorobi xua pewithabíwatsi pomonae pejumekowüntsiwi, íchitha áwiya barapomonae paeba xua bewa pinae withabichi pomonae pejumekowüntsiwi. Barichi Bernabé bara jútiya ichi irü éxana xua tsana wepu xane pomonae jopa judiomonae naexanaeyo. ¹⁴Íchitha poxonae tang xua barapomonae jopa xapain exanaeyo pokotsiwa xua Nakom pía pekapanenebiyáe jume diwésitha paeba bapoxonae Pedro tsipaebang peitabaratha tatsi daxita pomonae Nakom piamonae tatsi pejumekowüntsixaetsi Cristo pomonae nakaetuta. Jangje: “Xam bekein judiomonaepim íchitha póponame icha ichi poxonae pópona pong jopa judiomonae naexanaeyo. Jopa exanaem icha ichi poxonae éxana pong judiomonaepin. Xam jopa bewa itorobim pomonae jopa judiomonae naexanaeyo xua bewa exanaena icha judiomonae ichi xua poxonae éxana”, jang.

**Meje yábara xua judiomonae xuano pomonae jopa
judiomonae naexanaeyo xua irü kapanenebiya tsainchi
xua Jesucristo pejumekowüntsiwixaetsi**

¹⁵Waxainchi judiomonae naéxanatsi. Íchitha waxainchi jopa abe waexanáe jíwichi xua jopa icha ichamonae ichiyo pomonae jopa judiomonae naexanaeyo,

tsipéi barapomonaē abe peexanaewi. ¹⁶Waxainchi yaputainchi xua bekein éxanatsi pokotsiwa Moisés pía peitorobi koyenéwatha itoroba, íchitha jopa jüntükoyene xéikaetsi Nakomtha xua jopa Nakom watsita natsikuentsiwa tsane abe waexanaexae bapongtha. Jiwi ba jüntükoyene xeika poxonaē Jesucristo jumekowúntatsi. Waxainchi jüntükoyene xéikatsi poxoru jumekowúntatsi Jesucristo xua poxoru jopa wajumekowúntsiya exanaexae pokotsiwa Moisés pía peitorobi koyenéwatha itoroba. Dapong aibi pong pejüntükoyene xeikaein xua pejumekowúntsiya exanaexae pokotsiwa Moisés pía peitorobi koyenéwatha itoroba.

¹⁷Waxainchi ichichípatsi xua wajüntükoyene xeikáē jíwichi wanaka yawenaexae Cristo. Íchitha icha waxainchi nakuidubapónatsi xua xéinatsi peajüntükoyenebewa xua bekein Cristo naka yawena, bapoxonaē jopa naka yawenaeyo Cristo. Matáütano bapoxonaē bapong abe naka kana éxana. ¡Jume, baxua ápara Cristo jopa bápána nákata exanáē! ¹⁸Nakom tsitang xua tatsita natsikuentsiwa abe taexanaexae bapongtha icha ekeicha jiwi kaewa itorobang xua bewa exanaena pokotsiwa Moisés naka itoroba pía peitorobi koyenéwatha wanaka kapanenebiyaenexa abe waexanáē koyenewa weya. ¹⁹Bárapo Moisés pía peitorobi koyene jopa neyawaeneyo xua nekana éxana xua tajüntükoyene wüünaewa Nakomtha. Saya nekana éxana xua tatüpaewa tsane, poxoru áwiya tanatsikuentsiwa xeinang. Íchitha ánoxuae Cristo tana netsitüpaexae neitaküüpa xua tapoponaewa Nakom nexa. Matáüta ánoxuae jopa neitorobiyo Moisés pía peitorobi koyenewa tatsi poxoru jopa xeinaeyo peayapusüü itorobi koyenewa xua tana nekapanepaewa tsane abe taéxanaē koyenewa weya. ²⁰Poxonaē Cristo tüpa náetotha inta yawa múxuna tüpa abe taéxanaē koyenewang. Daxota ánoxuae xang be ichüing, tsipéi Cristo neyawa pópona. Po peajüntüyapusüüwatha póponang, bárapo peajüntüyapusüüwa Nakom nekata tajumekowúntsixae Cristo. Bapong Cristo, pong Nakom Pexanto, bichokono neántobe, daxota inta tsitüpa abe taéxanaē koyenewang. ²¹Jopa benaitematsiño Nakom pía peantobewa tatsi. Icha nantaxeinang xua jiwi najüntükoyene xeika éxana Nakomtha peexanaexae pokotsiwa Moisés pía peitorobi koyenewa itoroba, xua daxota bapoxonaē Cristo jopa nantawenonaeyo xua jiwi petsitüpáewatsi bara be poxonaē xubang Nakom pía peantobewa tatsi.

Meje yábara xua Moisés pía peitorobi koyenewa tatsi

3¹¡Eta bichi tsobenáē Galacia nakuapiwi! ¿Jintam pong mara pexeinaein paka barü xuajei xua jopa paiña nejumekowúntsiwa Nakom pía pejumexaiñeiwa tatsi? Poxonaē paka tsipáebatsi paka yaputane exainchi xua Jesucristo tsitüpa jiwi náetotha xua jiwi tsitúpatsi. ²Báraxua pana nejumenore: ¿Nakom paka kata pía Pejumopetünaxü tatsi paiña neexanaexae pokotsiwa Moisés pía peitorobi koyenéwatha itoroba? Jume. Nakom paka kata pía Pejumopetünaxü tatsi paiña nejumekowúntsixae pokoyene xua yábara paka tsipáebatsi xua pejumekowúntsiwa Jesucristotha. ³¡Maisha bichokono kai! ¿Eta pomonaē pam tsobenaem? Poxonaē kopiya pajumekowúntame Nakom pía Pejumopetünaxü tatsi paka yawena xua Nakom paiña netsita xeinaewa pejüntükoyene xeikaewa. ¿Ánoxuae panantaxéiname xua bichokono pejüntükoyene xeikaewa paxéiname beyakaincha xua kopíyatha paxéiname, xua Moisés pía peitorobi koyenewa paiña exanaexae? Ajibi, jopa bewa baxua panantaxeinaem. ⁴Ichamonae bichokono paka átene éxana Jesucristo pexeíña jume diwesi paiña nejumekowúntsixae. Jopa bewa pana nakuibarapentsim

xua paiña nejumlahewüntsiwa Jesucristo pejume diwesi, po diwesi yábara xua ichamonaé átene paka exaneiba. Tsipéi icha pana nakuibarapentsípame xua paiña nejumlahewüntsiwa Jesucristo pejume diwesi jopa pexaiñéi jume tsipae pokotsiwa xua papáebame. ⁵Nakom paka kata pía Pejumopetünaxü tatsi. Matáütano Nakom pexeña petsita-itüübi koyenewa éxana paiñaxantha. ¿Eta pokotsiwa metha Nakom baxua éxana? Baxua Nakom jopa pákata exanaeyo xua poxoru paiña neexanaexae pokotsiwa Moisés pía peitorobi koyenéwatha itoroba. Ápara jame baxua pákata éxana poxoru paiña nejumlahewüntsixaé po diwesi xua pajumetaneme.

⁶Abraham pong kaena báyatha pópona yábara jumlahewünta xua Nakom exanaena pokotsiwa Abraham yábara tsiwüünae muxudútatsi. Daxota Nakom tsítatsi xua bapong Abraham bara pejüntükoyene wüünaein xua jopa Nakom tsita xéinatsi penatsikuentsiwa xua abe peexanaexae. ⁷Daxota paxam bewa payaputáename xua pomonaé xaniwaicha Jesucristo nejumlahewüntsiwichi, Nakom tsítatsi xua barapomonaé bara be yatsikaewa Abraham pía pemómoxi susato jiwi tatsi bekein bara jopa yatsikaewa Abraham pía pemómoxi susato jíwiyo tatsi. ⁸Kaena báyatha Nakom Pejume Diwesi paeba, xua Nakom kapanenebiya tsane pomonaé jopa judiomonaé naexanaeyo xua jopa peatenenexa tsane xua abe peexanaexae. Baxua Nakom éxana, icha ichichi pomonaé judiomonaé xua kapanenebiya tsainchi. Daxita pewünaeya baxua Nakom paeba pía pexeña jume diwésitha xua Abrahamtha jeye Nakom: “Daxita nakuangpiwi jüntükoyene weiweina exanaein tana nejumlahewüntsixaemxae”, jei Nakom. ⁹Daxota daxita pomonaé jumlahewünta, jüntükoyene weiweina, xua Abraham múxuna, xua irü Abraham nejumlahewüntsixaé.

¹⁰Pomonaé bekein jumlahewüntsiya eexanapona pokotsiwa Moisés pía peitorobi koyenéwatha itoroba xua pekapanenebiyaewa tsainchi, barapomonaé bexa átene tsane xua Nakom exanaena abe peexanaexae. Tsipéi Nakom Pejume Diwésitha jeye: “Pomonaé jopa exanaeyo daxita pokoyene itoroba Moisés pía peitorobi koyenéwatha, daxita barapomonaé átene tsane xua Nakom exanaena abe peexanaexae”, jei. ¹¹Yaputainchi beta, dapong aibi pong pexeinaein xua pokoyene pejüntükoyene wüünaewa, xua daxota Nakom tsítatsi xua jopa penatsikuentsiwa abe peexanaexae. Tsipéi bekein ichichipa xua peexanaewa xua pokoyene Moisés pía peitorobi koyenéwatha itoroba, dáichitha jopa itaküüpaetsi xua éxana daxita xua Moisés itoroba. Íchitha Nakom Pejume Diwésitha jeye: “Pong xua Nakom jüntükoyene wüünae éxana pong nejumlahewüntsixaetsi, barapong bara ataya asüü poponaena”, jei. ¹²Jintong jopa nantawenonaeyo xua Jesucristo jumlahewüntatsi peexanaewa tsane daxita pokotsiwa Moisés pía peitorobi koyenéwatha itoroba. Bárapo peitorobi koyenetha jeye: “Bewa exanáename daxita pokotsiwa xua bárapo peitorobi koyenéwatha paeba ayapusüüya nepoponaewa tsane”, jei.

¹³Cristo naka kapanepa poxonaé náetotha naka tsitüpa wanaka yantomatsixaé xua abe peéxanaé koyene waexanaexae po peabe exanáé koyene Moisés pía peitorobi koyenéwatha yábara paeba. Cristo baxua éxanatsi xua tüpa be pong xua bichokono abe peexanaein xua abe waexanáé kuirukoyene peyawatüpaexae. Baxua yábara Nakom Pejume Diwésitha jeye: “Pong petüpaein náetotha dukua bapong Nakom tsita abetsi xua bapong abe peexanaexae”, jei. ¹⁴Cristo Jesús náetotha petüpaexae daxota Nakom katsina pomonaétha, pomonaé jopa judiomonaé naexanaeyo pokoyene xua báyatha Nakom Abraham tsiwüünae yábara muxudútatsi. Nakom Abraham tsiwüünae yábara muxudútatsi xua pekatsinéxatsi peantüyapusüüwa.

Matáütano Nakom Abraham tsiwüünae yábara muxudútatsi xua Nakom pía Pejumopetünaxü tatsi naka yawa jinompaena poxonae jumekowúntatsi Jesucristo.

Meje yábara xua Nakom pía petsiwüünae yábara muxudutsiwa tatsi

¹⁵Tamonae pam, pomonae irü paiña nejumekowúntsiwixae Jesucristo. Paka tsipáebatsi tsika diwésiyo jüta koyenýatha xua pokotsiwa jiwi ba éxana. Poxonae ba nakuéyatabe pebinbe pebürüya nantaxéinabe xua nantiya penata exanaenéxabe yawa daxota nawüngdútabe papératha, bara bapongbe bewa exanáenabe pokoyene bapongbe tsiwüünae yábara muxudútabe. Ichüng jopa itaküüpaetsi xua ichawa ekeicha matarópata tina icha báyatha nawüngtínabe. ¹⁶Nakom éxana pía petsiwüünae yábara muxudutsiwa Abrahamtha yawa irü Abraham pía pemómoxi susato jiwi jíwanapintha tatsi. Nakom Pejume Diwésitha jopa jeyo: “Pía pemómoxi susato jíwitha”, jopa jeyo. Jame meisha kaeintha yábara jei: “Pía pemómoxi susato jiwi jíwanapintha”, jei. Baxua yábara paeba xua Cristo yábara kaunútatsi. ¹⁷Baxua paka tsipáebatsi meje: Poxonae Nakom yábara tsiwüünae muxuduta Abrahamtha, bapoxonae poxonae cuatrocientos po weibe yapukaewa bapoxonae Moisés pía peitorobi koyenewa tatsi patopa. Moisés pía peitorobi koyenewa tatsi jopa aiñakuiyiyo beyakaincha Nakom pía peyábara tsiwüünae muxudutsiwa tatsi xua daxota jiwi jopa nantawenonaeyo bárapo Nakom pía peyábara tsiwüünae muxudutsiwa tatsi. ¹⁸Icha jiwi itaküüpatsi xua panenebiya abe pía peéxanae kuirukoyene weya xua peexanaexae pokotsiwa Moisés pía peitorobi koyenéwatha itoroba, bapoxonae aiñakuí aibi po peyábara tsiwüünae muxudutsiwa Nakom yábara tsiwüünae muxuduta Abrahamtha. Íchitha poxoru jiwi jopa itaküüpaetsi xua pepanenebiwa abe pía peéxanae kuirukoyene weya poxonae bekein exanaetha pokotsiwa Moisés pía peitorobi koyenéwatha itoroba, daxota bichokono aiñakuí po peyábara tsiwüünae muxudutsiwa, Nakom amanayiya yábara tsiwüünae muxuduta Abrahamtha.

¹⁹¿Eta xua metha kanamatawenónatsi Moisés pía peitorobi koyenewa? Nakom naka kata baxua abe waexanaexae beya poxonae Cristo patopa, pong Abraham pía pemómoxi susato jiwi jíwanapin tatsi pong yábara tsiwüünae muxuduta Nakom. Nakom kata pía peitorobi koyenewa matatsunpíwitha xua barapomonae xuya Moisés kátatsi jiwi nexa. ²⁰Íchitha poxonae Nakom yábara tsiwüünae muxuduta Abrahamtha, bapoxonae dapong aibi pong kápona bárapo peyábara tsiwüünae muxudutsiwa Abrahamtha Nakom weya. Jame saya meisha Nakom kompa yábara tsiwüünae muxuduta Abrahamtha.

Meje yábara xua daxota Nakom itoroba Moisés pía peitorobi koyenewa tatsi

²¹Paka yáinábatsi: ¿Moisés pía peitorobi koyenewa abe kana éxana Nakom pía peyábara tsiwüünae muxudutsiwa tatsi? Jume, ápara tsipéi Nakom jopa kapanebiyae tsane jiwi peexanaexae Moisés pía peitorobi koyenewa tatsi. Icha jiwi itaküüpaetsípatsi xua kapanenebíyatsi abe pía peéxanae koyenein weya peexanaexae pokoyene Moisés pía peitorobi koyenéwatha itoroba, bapoxonae jiwi jüntükoyene wüünáetsipa Nakomtha peexanaexae pokoyene Moisés pía peitorobi koyenéwatha itoroba. ²²Nakom Pejume Diwésitha jeye: “Daxita jiwi bewa átene tsane abe peéxanae koyenein peexanaponaexae xua jopa itaküüpaetsi xua penakuibara-pentsiwa. Daxota daxita pomonae Jesucristo pejumekowúntsiwichi Nakom kana

exanaena jiwi pokoyene xua býatha yábara tsiwüünae muxuduta xua bepa pinae jiwi kapanenebiya tsainchi Jesucristo pejumekowüntsixaetsi”, jei.

²³Pewünaeya xua poxonae Cristo pepatopeikaewa tsane po petorobi koyenewa Nakom Moisés kátatsi naka yaputane éxana xua poxonae Cristo patopeikaena bapoxona waxainchi bara bewa jumekowüntichi Cristo. Bárapo peitorobi koyenewa yábara naka yaputane éxanano xua pokoyenewa waxainchi wakoutha nata exainchi. Jopa naka exanaeyo xua Nakom wanaka kapanenebiwa. Daxota po diwesi Nakom Moisés kátatsi bárapo diwesi naka jüntükoyene yawenapona beya poxonae Cristo patopáetsika. ²⁴Moisés pía peitorobi koyenewa naka yawena xua wayaputaewa Cristo. Bárapo Moisés pía peitorobi koyenewa tatsi naka yawena xua najüntükoyene wüünae exainchi Nakomtha wajumekowüntsixae Cristo. ²⁵Áno-xuae jumekowüntatsi Cristo, daxota jopa nantawenonaetsi Moisés pía peitorobi koyenewa tatsi. ²⁶Paxam paiña nejumekowüntsixae Cristo Jesús, daxota daxita paxam Nakom pía pexui tatsi pam. ²⁷Daxita paxam poxonae býatha ichamona paka bautisaba kaemonae pana naexáname Cristo Jesustha, Cristo pijimonae tatsi pamxaem. Daxota paxam pakoyenejúpame Cristo. ²⁸Nakom daxita jiwi tsita najúpatsi. Daxota Nakom jopa tsita aiñakuichi metha bekein judiomona pam tsi-paem, irü metha bara bekein griegomona pam tsipaem pomona jopa judiomona naexanaeyo. Matáütano jopa tsita aiñakuichi metha bekein pomona amanaya paiña nepaka busikuitatayebeibiwi pam tsipaem, irü bara bekein pomona jopa amanaya paiña netanakuichi jiwi pam tsipaem. Matáütano jopa tsita aiñakuichi metha bekein bara pebiwi pam tsipaem, irü metha bekein yábüxi pam tsipaem. Nakom tsítatsi xua paxam be kaemonae jiwi pam xua kaemonae pana nabarü éxaname Cristo Jesustha. ²⁹Icha paxam Cristo pijimonae pam, bara néxata paxam Abraham pía pemómoxi susato jiwi pam. Pokoyene Nakom Abraham yábara tsiwüünae muxudútatsi bara baxua paxam nexa.

4 ¹Xua ichichipang xua tapaebiwa baxua meje: Icha pexuyo paxa kuenta túpatsi poxonae kataunxuae pexuyo tsekae barapoyo jopa bepijawa katichi ichamona pokotsiwa xua koxiyüng pekopaniwa tatsi tsipéi kataunxuae pexuyo tsekae. Bárapo pexuyo bewa exaneibina pokotsiwa peitorobeibixaetsi pomona wichitiya pebarü jinompaewichi icha ichi xua poxonae éxana pomona amanaya petanakuichiwi ichamona nexa. ²Bárapo pexuyo nantaüta pomona peyawenaewichi, pomona bapong wichitiya pebarü jinompaewichi. Matáütano pexuyo itoróbatsi pokotsiwa bárapo pexuyo bewa exanaena. Barapomona ewata xua bárapo pexuyo katsinchi poxonae piño tsane be pokoyeneya býatha koxiyüng paeba. ³Waxainchi barapókotsi jüta koyeneya ichichi beya poxonae Cristo patopeika. Waxainchi be pexui natsikotainchi tsipéi pemayainwa éxanatsi pokotsiwa Moisés pía peitorobi koyenewatha naka itoroba. ⁴Poxonae bárapo matakabi patopa, po matakai-tha xua Nakom ichichipa xua Pexanto itorobika, bapoxonae bárapo matakai-tha Nakom Pexanto itorobika xua yábüyo petsiperüü wenaexanaenéxatsi bárapo kae pin nákuathe. Bapong yakuiya nakatsiwa judiomonaepin. Matáütano bewa exanáe pokotsiwa judiomona ba itoroba xua pokotsiwa pepaebixae Moisés pía peitorobi koyenewa tatsi. ⁵Bapong patopa xua jopa wanantawenonaenexa xua waexanaewa tsane pokotsiwa Moisés pía peitorobi koyenewatha naka itoroba, xua bapoxonae Nakom wanaka kana exanaewa tsane xua Nakom pía pexuichi. ⁶Nakom pía pexui tatsi paiña nenaexanaexae, daxota pákata itorobika pía Pejumopetünaxü

tatsi pía paiña nepaka kayawenaewa tsane poxonae paka jüntükoyene tsipaeba. Bárapo Nakom pía Pejumopetünaxü tatsi naka kana éxana xua wajeiwa: “Axa”, xua wajeiwa Nakomtha. ⁷Ánoxuae paxam jopa barapokotsimonae pam pokotsimonae xua amanaya tanakuita kaurimonae pía pentakaponaein tatsi nexa icha be pokotsimonae ichi xua pokotsimonae pebusikuitaetaeyebéwichi. Nakom paka éxana pía pexui tatsi. Tsipéi paxam Nakom pía pexui tatsi pam, daxota Nakom paka katsibina daxita pokoyenein Nakom xeina pía pexui tatsi nexa.

Meje yábara poxonae Pablo yábara nantaxeineiba pomonae pejumekowüntsiwi Jesucristo

⁸Pewünaeya xua poxonae payaputáename Nakom, kopiya paxam be barapokotsimonae pam be pokotsimonae bewa exanáe xua pía nakomüing itorobéibatsi, po nakomüing xua saya jiwí piakoya kana éxana xua jopa pepa nakomüño. ⁹Íchitha ánoxuae Nakom payaputáneme, yawa paka tsipáebatsi xua Nakom paka yaputane. Jopa bewa ekeicha kaewa pana naexanaem xua paéxaname pokotsiwa Moisés pía peitorobi koyenéwatha paka itoroba xua pokotsiwa kaena báyatha kopiya paéxaname poxonae kataunxuae jopa pajumekowüntsim Nakom. Bárapo Moisés pía peitorobi koyenewa jopa paka yawenaeyo xua paiña nepatsiwa Nakom beya. Bewa paexanáename pokoyene bárapo peitorobi koyene itoroba. Poxonae saya ü paiña neexaneibi bárapo koyene barapoxonae be barapokotsimonae pam be pokotsimonae xua bewa amanaya exaneibina pokotsiwa itorobéibatsi pía pekanamataxeinaeinchi tatsi. ¹⁰Paxam áwiya kataunxuae paxéiname pókotsi koyenewang xua judiomonae itoróbatsi Moisés pía peitorobi koyenéwatha. Bárapo koyenewa itoroba xua matakabin yábara yawa xua xometong yábara yawa xua wei yábara, pokoyene jiwí bewa exanaena penajainbotsi yábara, yawa xua pin penabanaewa peexanaewa matakabin yábara. Barapókotsi koyenein paéxaname paiña nentaxeinaexae xua paiña nenajüntükoyene wüünae exanaenexa Nakomtha. ¹¹Tsipéi kataunxuae baxua paéxaname, daxota jüntükoyene wekoyang, poxoru pokotsiwa xua paka kuidúbatsi jopa paka yawenaeyo, tsipéi paexanapóname pokotsiwa xua kaena báyatha paexanapóname xua abe paexanapóname.

¹²Tamonae pam, pomonae irü paiña nejumekowüntsiwixae Cristo. Paka itoróbatsi xua paiñakoutha pana naexande xua jopa paexanaeinde pokotsiwa Moisés pía peitorobi koyenéwatha paka itoroba, icha xang ichin xua takoutha náexanang xua jopa exanaeño pokotsiwa Moisés pía peitorobi koyenéwatha itoroba. Bara bekein xang judiomonaepin, íchitha Nakom nekanepa xua jopa tanantawenonaewa tsane xua jopa taexanaewa tsane pokotsiwa Moisés pía peitorobi koyenéwatha itoroba, icha paxam paichim xua jopa panantawenonaem xua jopa paexanaem pokotsiwa Moisés pía peitorobi koyenéwatha itoroba. Paxam pomonae jopa judiomonae panaexanaem. Báyatha paxam jopa painta abe exanaem, daxota nantaxeinang xua bara pana nejumetáneme pokotsiwa paka itoróbatsi. ¹³Payaputáneme poxonae kopiya paka tsipáebatsi Nakom pía pekapanenebiyáe diwesi, tsipéi atenein daxota jopa warapaeño. ¹⁴Bekein pákata ayapubé xua poxonae pana netáneme xua atenein, íchitha jopa pana nekuikapanaeya itawetsim. Seikaya paéxaname, bara beta pana nententa weyataeya wábame icha be poxonae mata-sunpintha paichipaem poxonae patopa po matatsunpin Nakom pía matatsunpin tatsi, pong peaiñakuín, yáwano xua icha be poxonae pakana ichipaem Jesucristo

poxonae patopáetsipa. ¹⁵Kopiya báyatha bichokono pajüntükoyene weiwéiname, ánoxuae jopa paraichim. Bekein baxua paéxaname dáichitha áwiya wüünae paka yábara páebatsi ichamonaetha xua paxam bichokono pana neantobem. Matáütano bichokono jopa juniya pana neantobem pata tana neyawenaexaem tsane xua beya poxónaeno pana naitakuere júkame xua pata tana neantobexaem. ¹⁶Ánoxuae pana neéxaname be pata tana neaitafáetabi jiwim, tsipéi yábara paka tsipáebatsi pexaiñéi jume diwesi.

¹⁷Po judiomonae jiwi pekuidubiwi barapomonae náemata wüünaeya paka tsi-paeba, íchitha peajüntükoyénebe jiwi. Daxota barapomonae baxua pákata éxana pía paiña tana nepenticham pía bapoxonae xuya paiña ichichipaetsi barapomonae. ¹⁸Báraxua bara bekein wüünae xua ichamonae paka ichichipa, dáichitha saya jame poxonae jüntükoyene wüünae. Barapomonae bewa daxita matakabi paka yaweneibina jopa meisha metha poxoru ekaeinchipae. Matáütano bara bewa paka yawenaena poxonae jopa ekaeiño. ¹⁹Tamonae pam, paxam be pomonae tapexui pam. Paxam nexa bichokono ajüntükoyenerewein xua anthüthütanein, icha be poxonae yábüyo ichi poxonae bichokono átene poxonae beya pexuyo pabeta. Báraxua kataunxuae exanaponaein beya poxonae pajüntükoyene wüünaem tsane icha Cristo ichi xua jüntükoyene wüünae. ²⁰¡Maisha ichichipang bichokono xua tapaka barü ekáewatsi ánoxuae xua tapaka tsipaebinéxatsi icha jumetha, xua jumewüünaeya tapaka tsipaebinéxatsi! Tajü taekaexae xang jopa yaputaeiño xua eta bichin xua tapaka yábara nantaxeináewatsi xua tapaka yawenaenéxatsi.

Meje yábara xua yabúyobe Agar irü Sara

²¹Paxam pomonae pam pomonae paiña neichichipaewa xua paiña neexanaewa pokotsiwa Moisés pía peitorobi koyenéwatha itoroba. Pana nejumenore. ¿Paxam jopa pajumetaem xua bárapo peitorobi koyenéwatha paeba? ²²Bárapo peitorobi koyenéwatha paeba jeye: Abraham xeina aiña pexántobe. Abraham icha pexanto éxana pówatha xua powa Abraham piabotha tanakuítatsi amanaya, powa pebusikuitaetaexae. Icha pexanto éxana pówatha powa yatsikaya Abraham píowa tatsi powa xua jopa amanaya petanakuichíwatsi. ²³Powa Abraham tanakuítatsi amanaya, bapowa pexanto tanakatsíwatsi bara júpa icha be ichi xua poxonae ichamonae tanakatsíwatsi pexui. Powa Abraham pepa píowa tatsi, powa xua jopa pebusikuitaetaéwatsi, Nakom kana éxana xua bapowa pexanto tanakatsíwatsi tsipéi báyatha Nakom Abraham yábara tsiwüünae muxudútatsi. ²⁴Báraxua be pákata éxanatsi xua peyábara kaunutsiwa. Bárapo aiña petsiríwabe báraxua yábara kaunuta xua Nakom pía aiña petsiwüünae muxudutsíwabe tatsi. Agar pexanto tatsi bapong pía pemómoxi susato jiwi tatsi bewa exanáe xua Moisés itoroba pía peitorobi koyenéwatha tatsi. Bárapo peitorobi koyenewa Nakom Moisés kátatsi ichaxota demuxuwa, po demuxuwa pewüng Sinaí. Barapong, Agar pexanto tatsi yakuiya nakatsiwa xua pong pebusikuitaetaeinchi. Barichi barapong pía pemómoxi susato jiwi tatsi bárapo koyeneya yakuiya naexanuménapona. Daxota barapomonae bewa exanaponáe po peitorobi koyene Moisés itoroba. ²⁵Barapowa Agar kaunuta po demuxuwa pewüng Sinaí xua Arabia nákuatha, po demuxuwa Arabia nakuamonae pijumetha: “Agar”, jei. Barapowa Agar xaniwaicha yábara kaunútatsi ánoxuae po tómara Jerusalén tómara, poxoru bárapo tomarapiwi nantaxeina xua bewa exanaena Moisés pía peitorobi koyenewa tatsi icha Agar ichi xua bewa exanáe

pokotsiwa Abraham itoroba xua powa pebusikuitaetáewatsi pekana exanáexaetsi. ²⁶Icha Jerusalén tómara, po tómara seikaya Nakom pía nakuatheicha eka xua Nakom pía tómara, bárapo tómara yábara kaunuta pokotsiwa xua bichokono wüünae. Bárapo Jerusalén tomarapiwi jopa bewa exanáe tsane Moisés pía peitorobi koyenewa tatsi. Waxainchi ápara bárapo tomarapíwichi. ²⁷Nakom Pejume Diwésitha Sara tsipáebatsi, jeichichi:

“Petsiriwa powa mawekowam,
xam powa jopa xeinaem pexui,
jüntükoyene weiweínare.

Jüntükoyene weiweinaya najumetsébare,
tsipéi xam jopa xeinaem pokotsiwa peatenewa.

Po petsiriwa jopa pexui xeinaeyo,
bárapo petsiriwa bichokono ayéi jiwi xeinaena pexui beyakaincha po
petsiriwa piseuri barü pópona”,
jei Nakom Pejume Diwésitha.

²⁸Tamonae pam, paxam pomonae irü paiña nejumekowüntsíwixae Jesucristo. Waxainchi Nakom naka kana éxana icha Isaac ichichi pong Abraham pexanto tatsi, pong báyatha Nakom Abraham yábara tsiwüünae muxudútsi. Waxainchi bárapo pexuichi, po pexui Nakom yábara tsiwüünae muxuduta wajumekowüntsixae. ²⁹Po pexanto Agar tanakatsíwatsi xua pong nakatsiwa bara kuijüpa icha be ichi xua ichamonae pexui tanakatsíwatsi pong pewüng Ismael. Bapong Isaac taayápube éxanatsi, pong tanakatsíwatsi poxorü Nakom pía Pejumopetünaxü tatsi peitorobixae. Bara jütiya ichi ánoxuae pomonae xua Nakom pía Pejumopetünaxü tatsi pexeinaewi taayápube exainchi xua ichamonae éxana, pomonae peexanaponaewi pokoyene Moisés pía peitorobi koyenéwatha itoroba. ³⁰Íchitha pajumetaema xua Nakom Pejume Diwésitha paeba, jeye: “Powa amanaya jiña nekatanakuichiwa powa nebusikuitaetaexae jiña botha itawere yawa múxuna itawere pía pexanto tatsi. Tspíe bárapo pexanto tatsi jopa itaküüpaetsi xua pexeinaewa pokotsiwa koxiyüng pekopaniwa tatsi xua saya kuita pepa pexanto tatsi nexa powa jopa pebusikuitaetáewatsi amanaya”, jei Nakom Pejume Diwésitha. ³¹Tamonae pam, paxam pomonae irü paiña nejumekowüntsíwixae Jesucristo. Jopa dapomonaetsi icha be ichi po pexui powa pebusikuitaetáewatsi amanaya pía pexui tatsi pomonae bewa exanaena pokotsiwa Moisés itoroba. Waxainchi jame barapomonaetsi icha be ichi po pexui powa jopa pebusikuitaetáewatsi amanaya pía pexuichi. Daxota waxainchi jopa nantawenonaetsi xua waexanaewa pokoyene Moisés itoroba.

Meje xua Pablo yábara paeba xua jopa bewa ekeicha exanáe Moisés pía peitorobi koyenewa

5 ¹Cristo naka yawena xua ekeicha jopa wanantawenonaewa tsane xua wae-xanaewa pókotsi koyenewang Moisés pía peitorobi koyenéwatha itoroba xua Nakom jopa watsita xeinaewa tsane xua watsita natsikuentsiwa xua abe waexanaexae. Beta ajüntiyapustüüya pajumekowüntaponde Nakom, xua bapoxonae jopa paiña nekopatsiwa tsane xua ichamonae paka itorobina xua paiña neexanaewa pokotsiwa Moisés itoroba.

²Xang, Pablo, pana nejumetaema. Jopa ekeicha pakopatsinde xua bara judiomonae paka withabina, pomonae pebiwi pam, ichaxota panareixakáename. Tspíe

icha baxua paexanaetsípame bapoxonae Cristo jopa paka yawenáe tsipae pokoyene bapong nepaka jüntükoyene wüünae exanaewa tsane Nakomtha. ³Ekeicha ichichipang xua tapaka tsipaebíwatsi. Po pebin xua withábatsi xua judiomonae éxana, bárapo pebin bara be judiomonaepin náexana. Bapoxonae bapong bewa daxita matapaeicha koyenein exanaena pokotsiwa Moisés pía peitorobi koyenéwatha itoroba. ⁴Paxam pomonae panantaxéiname xua paka jüntükoyene wüünae exanaena Nakomtha paiña neexanaexae pokotsiwa Moisés pía peitorobi koyenéwatha itoroba, ápara paxam Cristo papéntame. Yawa panaitématame Nakom pía peantobewa tatsi. ⁵Nama jumekowüntsiya éwatatsi xua Nakom naka jüntükoyene wüünae exanaena xua jopa watsita xeinaewa tsane wanatsikuentsiwa xua abe waexanaexae. Nakom pía Pejumopetünaxü tatsi baxua nákata éxana wajumekowüntsixa Nakom. ⁶Waxainchi kaemonae pebürüya Cristo Jesús piamonae wanaexanaexaetsi jopa naka yawenaeyo icha ichamonae naka withaba xua judiomonae wanaexanaewa tsane. Ichakuitha icha jopa naka withábiyo baxua írürü jopa naka yawenaeyo. Jame pokotsiwa xua wanaka yawenaewa bewa jame jumekowüntichi Cristo Jesús. Bárapo pejumekowüntsiwa naka éxana xua antobeya wajinompawea.

⁷Báyatha kopiya beta pajinómpame paiña nejumekowüntsíwatha. ¿Jintam metha pákata ayapubé éxana xua daxota jopa paiña neexanaewa pokotsiwa Nakom pía pejumexaiñéiwatha paeba? ⁸Ápara Nakom jopa pákata exanaeyo baxua xua pákata ayapubé éxana pong paka waba. ⁹Payábara nantaxéinare po diwésiyo xua jeye: “Levadura ba peyauyo xoyo átsaxa tsekæe daxita karepaya matapaeicha átsaxa éxana pangtha”, jei. Bárapo koyene icha be ichi poxonae abe peéxanae koyene pokoyene bewayo paiña xaiña bejojopa tsíniya. ¹⁰Jumekowüntang Nakomtha pong jiwi Pekanamataxeinaein xua jopa paiña neitapetsiwa tsane icha paiña barompaya nenantaxeinaewa xua icha be jopa ichiyo pokotsiwa nantaxeinang. Icha ichüng paka jüntükoyene tsakáraba xua paka itoroba xua abe paiña neexanaewa tsane Nakom átene exanaena bapongtha. Jopa Nakom tsita aiñakuíyotsi metha bekein pong jopa peaiñakuíyo, matáütano metha bekein pong peaiñakuín jintong, íchitha áwiya átene kana exanaena.

¹¹Tamonae pam, paxam pomonae irü paiña nejumekowüntsíwixæe Jesucristo. Icha kueikueijang tsipae xua bewa jiwi withabichi metha judiomonae jopa inta abe exanáe tsipae. Yawa bapoxonae bárapo judiomonae jopa aichaxaibi tsipae Nakom Pejume Diwesi, po diwesi xua Cristo yábara páebatsi pokoyene xua náetotha tüpa. ¹²Pomonae xua paka jüntükoyene kuitsákaba xua paka itoroba xua paka withaba barapomonae pin jumetha yábara jangje: “Jame maisha bü moya bara piakoutha natobüjukaena xua daxota jopa ichamonae peitorobiwa tsainchi xua penawithabiwa tsane”, jang.

¹³Tamonae pam, paxam pomonae irü paiña nejumekowüntsíwixæe Jesucristo. Nakom paka itapeta xua jopa paiña nenantawenonaenexa tsane xua jopa ekeicha paiña neexanaewa tsane pokotsiwa Moisés pía peitorobi koyenetha itoroba xua Nakom jopa paiña netsita xeinaewa tsane paiña tsita natsikuentsiwa xua abe paiña neexanaexae. Poxoru jopa paiña nenantawenonaemxæe xua paiña exanaewa bárapo Moisés pía peitorobi koyenewa tatsi paiña nepaka kapanenebiyaenexa tsane daxota jopa paexanaeinde pokotsiwa xua abe, pokotsiwa xua jiwi piakoutha ichichipa éxana. Jame paexande pókotsi koyene xua ichamonae payawende xua nantiya kaemonae paiña nenaantobexæe. ¹⁴Paxam paéxaname daxita pokotsiwa

Moisés pía peitorobi koyenéwatha itoroba poxonae paéxaname bárapo kae koyenewa xua jeye: “Antobeinde jiña nekatsikuárabü enaewi, icha ichim xua naántobem jiñakoutha”, jei. ¹⁵Icha paxam bichokono nantiya átene pana naexáname, yawa icha bichokono nantiya dangwéi pana nata éxaname, dota pam pepu paiña nenaaitafáetabi jiwi pam tsipae xua jopa beta paiña nejumekowüntsiwa Nakom.

Meje xua Pablo yábara paeba pomonae yawa jinompa Nakom pía Pejumopetünaxü tatsi

¹⁶Xua pokotsiwa paka tsipáebatsi meje baxue: Nakom pía Pejumopetünaxü tatsi payawajinómpare. Bapoxonae jopa paexanaem tsane xua abe paéxaname pokotsiwa xua saya jiwi ichichipa piakoutha éxana. ¹⁷Pokoyene xua wakoutha wajüntükoyenetha najüntükoyene xéinatsi xua abe waexanáe koyenewa báraxua Nakom pía Pejumopetünaxü tatsi jopa ichichipaeyo. Pokoyene Nakom pía Pejumopetünaxü tatsi naka itorobeiba xua pexeíña koyene waexaneibinexa báraxua, bárapo abe wanantaxeinaewa jopa ichipaeyo bárapo koyene, pokoyene Nakom pía Pejumopetünaxü tatsi naka itoroba. Bapoxonae wajüntükoyene irü Nakom pía Pejumopetünaxü tatsi pía pejüntükoyene tatsi jopa pebürüya jüpaeya nantaxéinaebe. Daxota bekein paichichípame xua paiña neexanaewa xua pexeíña peexanaewang íchitha jopa paexaneibim pokoyenein pexeíña koyenein. ¹⁸Íchitha icha Nakom pía Pejumopetünaxü tatsi itorobiya paka matakainompa bapoxonae jopa bewa panantaxeinaem xua Nakom paka kapanenebiyaena abe paiña neexanáe koyenein weya paiña neexanaexae pokoyene Moisés paka itoroba pía peitorobi koyenéwatha tatsi.

¹⁹Pokotsiwang jiwi ichichipa piakoutha éxana xua abe meje baxue: Ichamonae nata siwaxeina xua bekein jopa piseuri jiwi. Ichamonae bichokono nantaxeineiba pokotsiwa bichokono xua abe, yawa xua pekuitsakatsakapáe koyenewa xua weiweina. ²⁰Ichamonae wüünae jainta ibo nakomüng. Barichi ichamonae máratha kataerubenanáebiya xua icha jiwi máratha kataerubenanaebíyatsi. Ichamonae kaemonae nantiya naita anae-anéi. Ichamonae nantiya naba. Ichamonae nantiya naúwa. Ichamonae nantiya nakaseba. Ichamonae asiwa piáwang. Ichamonae natsátabe éxana. Ichamonae pía matabüxümonae nakana éxana be pomonae seikaya barompaya penantaxeinaewi. ²¹Ichamonae yábara uwa pokotsiwa xua ichamonae xeina. Ichamonae juteba xua icha jiwi pejutebíwatsi. Ichamonae kúüpatsi. Ichamonae penajainjübi jiwi bichokono. Ichamonae ichawang éxana xua peabe koyenewang. Yábara paka tsiwüünae muxudútatsi xua jüpa be pokoyeneya báya tha paka tsipáebatsi, po jiwi bapokotsiwang éxana barapomonae jopa patsi tsane Nakom pía peitorobi nakua beicha tatsi.

²²⁻²³Íchitha nama pókotsi koyenewang Nakom pía Pejumopetünaxü tatsi kana exanaena jiwi pejüntükoyenetha tatsi baxuangje: Peantobewa ichamonaetha, yawa pejüntükoyene weiweinaewa pejumekowüntsixae Nakom, yawa xua jüntema pejinompaewa, yawa xua jüntema pejinompaewa xua bepijawa jopa aitakonaeyo poxonae bekein ichamonae abe éxana, yawa xua beta peexanaewa ichamonaetha, yáwano xua peyawenaewa ichamonae pejüntükoyene xeikáewaxae, yáwano xeina xua bichokono pejumekowüntsiwa Nakom, yawa bichokono piakoutha jopa penayábara nantaxeinaewa, xua saya yábara nantaxeina ichamonaetha, yawa pokoyene xua beta penaitorobiwa piakoutha. Icha peitorobi koyenewa aibi po petorobi koyenewa xua yábara paeba xua daxita bárapo koyenewang pinae abe.

²⁴Waxainchi pomonaetsi xua Jesucristo piamonae tatsichi, jeichichi: “Poxonae Jesucristo náetotha kobematatabarútatsi, wajüntükoyene, po jüntükoyene jopa wüünaeyo, nákata yawa múxuna tüpa. Bapoxonae nákata aichurubenaé éxana pokoyene xua abe waexanaewa”, jeichichi waxainchi. ²⁵Waxainchi jinómpatsi wanaka yawenaexae Nakom pía Pejumopetünaxü tatsi. Daxota bewa bara kopatichi xua Nakom pía Pejumopetünaxü tatsi bara naka matakarakua dukuanaebiyaena xua ichaxota daxita pokotsiwangtha xua exanéibatsi.

²⁶Jopa bewa waxainchi ichamonaetha aebichi. Matáütano jopa bewa nantiya naanáepana exanaetsi. Matáütano jopa bewa nantiya naúwichi.

Meje yábara poxonae Pablo jeye: “Nantiya pana nayawende”, jei

6¹Tamonae pam, paxam pomonae irü paiña nejumekowüntsíwixae Jesucristo. Icha ichüng pakuitáneme xua abe éxana, pong pejumekowüntsín Jesucristo, bapong payawende xua ekeicha beta peponaewa tsane Nakomtha. Payawende bapong paxam jíwana pomonae pam Nakom pía Pejumopetünaxü tatsi pajumekowüntsiya jinómpame. Jopa anaya bichokono pamuxukonaéinde xua abe peexanaexae. Íchitha dota pam, xua írürü paka jüntükoyene kana éxana xua abe paiña neexanaewa tsane. ²Nantiya kaemonae pana nayawende xua poxonae ichamonaé ajüntükoyenerewe tsaibi pokotsiwa xua ajüntükoyenetane éxanatsi. Poxonae nantiya kaemonae pana nayawéname bapoxonae bara paexanáename pokotsiwa Cristo itoroba xua poxonae jeye: “Nantiya kaemonae pana naantobeinde”, jei.

³Pong piakoutha nayábara nantaxeina xua jopa abe exanaeyo xua daxota jopa nantawenonaeyo xua peyawenáewatsi tsainchi, bapong piakoutha namuxuitóroba. ⁴Jintong bewa piakoutha nakuiyábara nantaxeinae xua éxana, bapoxonae bapong jüntükoyene weiweina icha piáwa beta éxana. Bapong jopa bewa yábara nantaxeinae pokotsiwa xua ichüng éxana xua bichokono wüünae xua beyakaincha bapong éxana. Daxita jiwí karepaya bewa barichi bewa piakoutha nakuiyábara nantaxeinae icha metha bara wüünae xua pokotsiwang éxana. ⁵Daxita jiwí karepaya barompaya bewa exanaena pía penakuichiwang Nakom nexa be pókotsi koyeneya xua Nakom itoroba.

⁶Pong xua nakuiduba Nakom Pejume Diwesi, bapong bewa xuya katsina ichawa pokotsiwa xua penantawenonaewa pongtha pong xua pekuidubinchixaetsi xua be pematómatsi koyenewa éxana.

⁷Jopa paiñakoutha pana namuxuitorobinde. Dapong aibi pong itakúüpatsi xua Nakom muxuitórobatsi. Pokotsiwa xua pebin éxana bara barapókotsi koyenetha kuita yábara kana éxanatsi. Icha bapong abeya éxana barichi bara abeya kuita yábara kanakuimatómatatsi. Matáütano icha bapong wüünaeya éxana bara wüünaeya kuita yábara kanakuimatómatatsi. ⁸Icha ichüng éxana pokotsiwa xua piakoutha ichichipa éxana pokotsiwa xua jopa wüünaeyo, bapoxonae bapong xuya kuita xeinaena pokotsiwa xua abe xua jiwí tüpa éxanatsi. Íchitha icha bapong éxana pokotsiwa xua Nakom pía Pejumopetünaxü tatsi ichichipa, bapoxonae bárapo Nakom pía Pejumopetünaxü tatsi bapong katinchi peajüntüyapusiüwa xua ataya tsiteka. ⁹Jopa bewa ajüntükoyenefaetabí tsainchi pokoyenewa xua beta waexanaewa Nakom nexa. Icha jopa ajüntükoyenefaetabiya jinompáe tsainchi xua beta waexanaewa Nakom nexa, bapoxonae po mataketha Nakom daxita wétsina

Nakom naka katsina pentoma pokotsiwa wüünae xua beta waexanaexae. ¹⁰Daxota poxonae daxita koyeneintha naka itaküüpa xua exanaeinchi pokotsiwa wüünae bara bewa exaneibinchi ichamonaetha pokotsiwang wüünae. Báraxua bewa exaneibinchi daxita jíwitha. Nakom tsítatsi xua bichokono aiñakuí xua yawénatsi pomonae Jesucristo pejumekowüntsíwichi, beyakaincha poxonae yawénatsi pomonae jopa pejumekowüntsiwi.

Meje yábara xua Pablo najumewetsiya paeba

¹¹Pataema xua matapaiña takoutha tinang, daxota pin itanetong tsika. ¹²Pomonae judiomonae xua paka itoroba xua paiña nepaka withabiwa tsane, barapomonae saya baxua éxana pía icha judiomonae wüünae yábara nantaxeinaetsi barapomonaetha. Yawa barapomonae pomonae xua paka itoroba pomonae judiomonaexae naerabiya nantaxeinaeya jeye: “Poxonae Cristo Pejume Diwesi kueikueijeichi pomonaetha, pomonae jopa judiomonae naexanaeyo, bara múxuna itoróbatsi xua barapomonae bara bewa pebiwi withabinchi ichaxota nareixakaena. Bapo koyenewa icha waxainchi éxanatsi baxua wámonae, pomonae judiomonae jüntükoyene weiweinaena. Bapoxonae barapomonae jopa nákata abe exanáe tsane, bekein tsipáebatsi pomonaetha, pomonae jopa judiomonae naexanaeyo xua Cristo naka tsitüpa náetotha”, jei xua naerabiya nantaxeina. ¹³Bekein barapomonae paka itoroba xua paka withaba íchitha jopa exanaeyo pokotsiwa Moisés pía peitorobi koyenewa itoroba. Barapomonae ichichipa xua paka withaba ichamonaetha, pía barapomonae paka yábara paebichi ichamonaetha xua barapomonae paka itoroba. Bárapo judiomonae ichichipa xua icha judiomonae yábara nantaxeina xua pomonae paka itoroba bara beta éxana pía paka kui-itorobixae bárapo penawithabi koyenewa. ¹⁴Íchitha xang aichaxaibin xua takoutha atsakiya nayábara páebang ichamonaetha. Saya meisha bichokono atsakiya yábara páebang xua Jesucristo petüpaewa náetotha pong Wanaka kanamataxeinaein. Cristo náetotha netsitüpa daxota pókotsi koyenein xua xeina po írathe jopa netsita aiñakuiyiyo, xua taxeiinaenexa yawa xang jopa tsita aiñakuiyiño bárapo kae pin nakuathepiwitha. ¹⁵Jopa naka yawenaeyo icha naka withaba. Barichino jopa naka yawenaeyo icha jopa naka withábiyo. Jame pokotsiwa aiñakuí xua bewa Jesucristo tsita xéinatsi pena jüntükoyene. ¹⁶Bárabü Nakom paka kata jüntema paiña nejinompawea. Matáütano bárabü Nakom nantanuweya paka yábara nantaxeinaena pía paiña nepaka yawenaenexa. Bárabü Nakom daxita paxamtha bárapo koyénebe paka kana exanaena pomonae pam paéxaname pokoyenewa bárapo peitorobi koyenewa paeba, po petorobi koyenewa xua yábara paeba pena jüntükoyenewa, yáwano bárabü Nakom paka kana exanaena daxita paxamtha pomonae pam xaniwaicha paiña nejumekowüntsiwi pam Nakom.

¹⁷Ánoxuae yáwano xua bexa tsáneno jopa ichichipaeiño xua ichüng inta aya-pubé exanaena xua poxonae neyábara paeba xua pokoyene pinae Nakom jopa neitorobiyo xua takueikueijiwa tsane bapong nexa. Tsita itapeñaxeinang xua Nakom xaniwaicha bara neitoroba tsipéi ichamonaetha newangduba taperüütotha tajumekowüntsixae Jesús.

¹⁸Tamonae pam, paxam pomonae irü paiña nejumekowüntsíwixae Jesucristo. Bárabü bapong pong Wanaka namataxeinaein, paka jüntükoyene weiweina exanaena pía paiña nepaka antobexae. Je bara ichi tsane.

Baja Pablo.

Meje Po Carte Pablo Tatina, Efeso Tomarapiwi Tatínatsi

Meje yábara poxonae Pablo tamrópata pítaba xua tatina pomonaetha, pomonaefeso tomarapiwi

1 ¹Xang Pablo, pákata tínatsi. Nakom nekana éxana xua Cristo Jesús pía peitobí robi jiwí jíwana tatsin xua bapong peichichipaexae. Pákata tínatsi pomonaepam pomonaefeso Nakom piamonaefeso pamxaem, pomonaefeso pajinómpame Efeso tómaratha. Paxam beta wüünaeya pajumekowüntéibame Cristo Jesús xua Nakom kaemonaefeso paiña nepaka exanaexae Cristo Jesustha. ²Bárabü Nakom, pong Waxa irü Jesucristo, pong jiwí Pekanamataxeinaein, bapongbe paka yawenaena pía paka nekaantobexae. Matáütano bárabü bapongbe pebürüya jüntema jinompa paka kana exanaena.

Meje yábara xua poxonaefeso Nakom wanaka yawenaewa, wanaka antobexae

³Bárabü waxainchi tsipáebatsi Nakomtha, Jesucristo Wanaka namataxeinaein, pía Nakom tatsi xuano xua Paxa tatsi. Jeichichi: “Nakom maisha pajüntükoyene weiweinang jíña pata taneyawenaewaxaem”, jeichichi. Daxita waxainchi Nakom kaemonaefeso wanaka kana exanaexae Crísto, daxota Nakom naka yawena. Nakom bara tsitekaeya naka kata daxita karepaya pejüntükoyenein po pejüntükoyenein xeina pía nakuatheicha. Bapo jüntükoyenein naka katsiba xua wanantawenonáewatsi xua wanaka ajüntükoyenesüü exanaenexa beta xua Nakom watsita jinompaenéxatsi. ⁴Kaena báyatha pewünaeya xua poxonaefeso nakua forotsina, Nakom naka wüngduba xua piamonaefeso tatsi wanaka exanaenexa tsane poxoru Cristo kaemonaefeso wanaka exanaewa tsane bapongtha. Matáütano Nakom naka wüngduba xua bichokono watsita jüntükoyene wüünaenexa tsane bapong xua matáüta jopa watsita natsikuentsíwatsi tsane xua abe waexanaexae bapongtha. ⁵Nakom pía wanaka antobéwaxae kaena báyatha naka yábara nantakuiyapuweta xua pía pexui tatsi wanaka kana exanaewa tsane. Baxua Nakom naka kana éxana xua pokotsiwa Jesucristo pía wanákata exanaexae. Nakom ichichipa éxana baxua petsita-wüünaexaetsi. ⁶Daxota bárabü Nakom wüünaefeso jaintéibatsi pong bichokono pexeíña koyenewa éxana poxonaefeso naka yawena wanaka antobexae. Matáütano Nakom bichokono wanaka antobexae amanaya daxítatsi kaemonaefeso naka kayawa éxana Pexánto, po Pexanto bichokono ántobe. ⁷Nakom pía pin wanaka antobexae naka kapanenebiya éxana abe waexanáefeso kuirukoyenein weya. Nakom tsítatsi xua jopa watsita natsikuentsíwatsi xua abe waexanaexae, yawa naka kayábara kuijüntemaina barapokuí. Baxua éxana poxoru Nakom Pexanto tatsi jana pichapabarena poxonaefeso bexotsi, poxonaefeso abe waexanáefeso kuirukoyene naka yábara tsitüpa náetotha. ⁸Nakom naka tsita itapeíñaxeina xua bichokono jopa juniya

naka antobeyo. Matáütano naka kana éxana xua wayábara yaputáewatsi bapong.⁹Nakom báyatha éxana pokotsiwa xua kaena báyatha juntukuru éxana. Nakom naka yaputane éxana xua wayaputaewa pokotsiwa bapong moya yawüngxaina xua jiwi jopa yábara yaputaeyo pokoyene xua bapong ichichipa peexanaewa. Baxua xua pokotsiwa moya yawüngxaina kaena báyatha Nakom juntukuru nantaxeina xua Pexanto peitorobiwa tsane po kae pin nákuathe tsike pong pewüing Jesucristo.¹⁰Kaena báyatha Nakom kayábara nantaxeina pokotsiwa xua exanaena. Bárapo koyene exanaena pokoyene xua daxita kaetutsina pokotsiwang Cristo pekanamataxeinaewa tsane pikoya xua xuang peitabókotha piáwang xuano xua xuang po írathe piáwang. Baxuang exanaena poxonae jopaena bárapo matakabi xua poxonae po matakaiha Nakom ichichipa beexanaena báraxua.

¹¹Daxita pokoyenein Nakom éxana, bapong éxana pokoyeneya xua ichichipa. Daxota kaena báyatha Nakom pana wüingduba pata tanaexanaewa tsane piamonae tatsi poxoru Cristo kaemonae wanaka exanaewa tsane bapongtha. Daxita pokotsiwang xua Nakom pana kana éxana kaena báyatha bapong tsiwanaya juntukuru nantaxeina xua exanaena baxuang tsipéi Nakom éxana daxita xua pokotsiwang tsita wüünaetsi. ¹²Paxang, judiomonae pang, pomonae pang xua kopiya pawüünae éwatang xua Cristo pepatopaewa tsane. Bárabü daxota Nakom bichokono wüünae pajainchin pexeíña peitüpanaewa peexanaeinxae. ¹³Pokotsiwa xua pexaiñéi jume diwesi, bárapo diwesi ápara Nakom pía pekapanenebiyáe diwesi tatsi. Poxonae bárapo pexaiñéi jume diwesi pajumetaneme Nakom paka kana éxana piamonae tatsi paiña nejumekowüntsixaem Cristo paiña nepaka kapanenebiyaenexa. Bapoxonae Nakom tsita itapeiñaxeina xua paxam piamonae tatsi pam poxonae paka kata pía Pejumopetünaxü tatsi. Báyatha Nakom yábara paka tsiwüünae muxuduta xua pinae paka katsina bárapo pía Pejumopetünaxü tatsi. ¹⁴Nakom pía Pejumopetünaxü tatsi naka kata wanaka barü poponaenexa. Baxua naka tsita itapeiñaxeina xua daxota xaniwaicha yaputainchi xua bexa ichawang xua Nakom naka katsina pokotsiwang yábara naka tsiwüünae muxuduta xua naka katsina. Nakom baxua exanaena poxonae daxita kana exanaena piamonae tatsi, pomonae daxita bewa jumekowüntsina Jesucristo. Bapoxonae jiwi wüünae jainchina Nakom bichokono pexeíña peitüpanaewa peexanaeinxae.

**Meje yábara poxonae Pablo Nakomtha tawüüka pomonae
pejumekowüntsiwi xua Nakom yaputane pekana exanaewa
tsane barapomonae pomonae pejumekowüntsiwi**

¹⁵Paka yábara jumetaínchi xua paxam pinae beta pajumekowüntame Jesús, pong jiwi Pekanamataxeinaein. Matáütano paka yábara jumetaínchi xua pinae beta paántobem pomonae irü pejumekowüntsiwi. ¹⁶Daxota ataya pákata wüükéibatsi Nakom, jangje: “Nakom maisha jüntükoyene weiweinang xua Efeso tomarapiwi neyawenaewa, pomonae nekajumekowüntsiwi”, jang. ¹⁷Wüükang Nakom, Jesucristo Wanaka namataxeinaein, pía Nakom tatsi, pong Waxa pong bichokono pexeíña peitüpanaewa peexanaein. Wüükang xua paiña nepaka kakatsinexa pía Pejumopetünaxü tatsi paiña neyaputaewa tsane pokotsiwang xua xaiñéi xua Nakom yábara. Matáütano wüükang xua paiña beta neyaputaeponaenexa Nakom. ¹⁸Nakom wüükang xua paiña neyaputaenexa paiña jüntükoyeneintha. Bapoxonae paka itaküüpaena xua payaputáename pokotsiwa Nakom yábara paka tsiwüing

duba xua paiña nexeiñenexa pokotsiwa yábara paka tsiwüünae muxuduba. ¡Masha bichokono jopa juniyiyo xua pokotsiwa Nakom katsina pomonaetha, pomonae pía pejumekowüntsi jíwithaxaetsi pokotsiwa bapong jüñtúna jeba barapomonae! ¹⁹Matáütano wüükang xua paiña neyábara yaputaewa tsane Nakom pía peyapusúü itorobi koyenewa, po peyapusúü koyenewa bichokono wüünae xua jopa wetsiyo. Bárapo peyapusúü itorobi koyenéyatha Nakom naka yawena wajumekowüntsiwixae. ²⁰Bárapo peyapusúü itorobi koyenewa jüpa po peyapusúü itorobi koyenéwatha Cristo asüü exainchi petüpáe kuirukoyene weya xua Nakom éxana. Bárapo pía peyapusúü itorobi koyenéwatha Nakom Pexanto kuareta pía pekoxa weya xua peitabokotha xua Pexanto aiñakuí kana éxana. ²¹Nakom Pexanto kana éxana xua Jesucristo toxecha kanamataxeina pomonaetha daxita pomonae ichamonae kanamataxeínatsi itabókotha, matáütano xua bárapo kae pin nákuathe. Matáütano bapong kanamataxeina daxita pomonaetha, pomonae nákuang peewatsiwi, barichino pomonaetha, pomonae piamonae pematakaponae-wichi. Cristo kanamataxeina pía peyapusúü itorobi koyenéwatha, po peyapusúü itorobi koyenéwatha bichokono ayapusúü beyakaincha ichamonae pía peitorobi koyenewang tatsi. Po wüing xua Jesucristo xeina xua “Cristo”, jeichichi bárapo wüing yábara matawüing dútatsi pía peexanaewa. Bárapo wüing bichokono peaiñakuí wüing, beyakaincha ichamonae pewüingxi, po wüingxi xua yábara matawüing dúbatsi xua peexanaewa pomonae ánoxuae jinompa irü pomonae bexa jinompáenano. ²²Nakom éxana xua daxita koyenéwangtha Cristo itoroba pía peyapusúü itorobi koyenéwatha. Matáütano Nakom éxana xua Cristo daxita pepa Pekanamataxeinaein piamonae daxita pomonae pejumekowüntsiwixae. ²³Pomonae pejumekowüntsiwi Cristo barapomonae be bara Cristo pía pepong tatsi tsipéi Cristo kana éxana xua barapomonae kaemonae náexana bapongtha. Dapokotsiwa aibi pokotsiwa Cristo petaseikáewatsi tsipéi nantaüta pomonae pejumekowüntsiwichi. Barichi dapokotsiwa aibi pokotsiwa petaseikáewatsi pomonae Cristo pejumekowüntsiwichi tsipéi Cristo ataya tsitekaeya barü pópona barapomonae daxita nákuangtha.

Meje yábara poxonae xua Nakom naka kapanenebiya, wanaka antobexae

2 ¹Kopiya báyatha poxonae jopa pajumekowüntsim Nakom bichokono abe paéxana dubenanaebíyame. Matáüta pajumefébame Nakom poxoru paxam be pomonae pewerapaewi pam jopa paiña yawa jinompaexae Nakom pía Pejumopetünaxü tatsi. ²Báyatha jopa xapain painompaem. Painómpame icha bárapo kae pin nakuathepiwi ichi xua bichokono abe éxana dubenanaébiya. Paéxaname báyatha xua kaurimonae pía pentakaponaein tatsi paiña nepaka kui-itorobixae. Bapong kanamataxeina kaurimonae po kaurimonae jinompa itabókotha bárapo nakue matatsuntha xua béyano Nakom pía nakua beicha tátsino. Bárapo kaurimonae pía pentakaponaein tatsi, pomonae Nakom jumefébatsi, barapomonae jüñtükoyene itoróbatsi xua abe peexanaewa tsane. ³Kaena báyatha waxainchi barichichi éxana dubenanaebíyatsi barapókotsi koyenein xua abe. Exainchi pokotsiwa xua ichichípatsi xua wajüñtükoyenewa naka kui-itoroba xuano xua wapepong naka kui-itoroba. Tsipéi waxainchi jíwichi xua yakuiya naéxanatsi xua abe wae-xanaewa, daxota báyatha Nakom anaya nantaxeina xua naka átene éxana icha

ichamonae ichichi xua átene éxanatsi abe peexanaexae. ⁴Dáichitha Nakom jopa juniya naka matateikaeyo xua wanaka yawenaewa bichokono wanaka antobexae. ⁵Bekein poxonae kataunxuae bichokono abe éxana dubenanaebíyatsi waxainchi, xua daxota be petüpaewi jinómpatsi abe waexanaexae, bapoxonae Nakom naka yawena. Báraxua be bapong naka barü ajüntükoyenesüü xua Cristo wanaka kana exanaexae xua kaemonae naexainchi bapongtha. Nakom naka kapanenebiya saya ápara poxoru wanaka antobexae. ⁶Wajumekowüntsixae Jesucristo, waxainchi Nakom tsítatsi xua ápara be bara báyatha bapong naka asiüü éxana petüpáe koyene weya icha Cristo Jesús ichichi xua asiüü éxanatsi petüpáe koyene weya. Matáütano waxainchi tsítatsi xua ápara be bara báyatha naka éxana xua wa-enaewa ichaxota Cristo Jesús eka pía nakuatheicha. ⁷Nakom juntukuru baxua éxana petsita-itapeiñaxeinaenexa xua xeina pía pin peántobe koyenewa xua waxainchi nexa xua daxita matakábintha tsóponae tsane. Nakom naka tsita itapeiñaxeina xua bichokono naka ántobe poxonae naka éxana xua kaemonae naexanaeinchi Cristo Jesustha. ⁸Tsipéi Nakom paka ántobe daxota paka kapanenebiya poxonae pajumekowüntame bapong. Ápara jopa baxua paiñakoutha paexanaem, ápara Nakom jame baxua amanaya paka kana éxana. ⁹Nakom ápara jopa baxua paka kana exanaeyo xua paiña nenakuichixae. Icha paka itaküüpa xua poxonae payábara nakuichípame xua paiña nepaka kapanenebiyaenexa bapoxonae be paiña neatsakáe jiwi pam tsipae xua poxonae ichüngtha pajam: “Beta paéxanang daxota Nakom pana kapanenebiya”, pajam. ¹⁰Nakom naka éxana xua penajüntükoyenewatha koyenewatha jinómpatsi Cristo Jesús nexa xua beta wüünaeya waexaneibinéxano bapong nexa poxonae jinómpatsi. Kaena báyatha baxuang Nakom yábara nantaxeina xua naka jüntükoyene kanakuiweta éxana xua pokoyeneya waxainchi beta wataexanaewa tsane ichamonae.

Meje yábara po jüntükoyénetha Nakom naka kana éxana xua jüntema wajinompawea kaemonae wanaexanaexae Crísto

¹¹Poxonae panáexaname jopa panaexanaem judiomona. Paxam pomona jopa judiomonaeyo paiña nenaexanáe jíwixam pana nakuiyábara jüntanáinare xua eta po jiwi pamda kaena báyatha poxonae jopa pajumekowüntsím. Judiomona paka yábara jei: “Barapomona jopa pewithabíwichi xua ichaxota pía penareixakaenaewa xua petsita-itapeiñaxeinaewa tsane xua barapomona Nakom piamona”, paka yábara jei. Judiomona piakoutha nayábara jei: “Waxainchi pomonaetsi, pomona naka withaba xua ichaxota wanareixakaenaewa watsita-itapeiñaxeinaewa tsane xua Nakom piamonaetsi”, nayábara jei. Bárapo pewithabi koyene xua ichaxota pebiwi penareixakaenaewa saya jiwi piakoya nakanaütsiya éxana. ¹²Báyatha bárapo dapaetha poxonae kataunxuae jopa pajumekowüntsím jopa Cristo payábara yaputaem. Matáütano paxam be paiña nenanapaincha jinompawei pam xua icha nakua wérena paiña neponaewi xua jopa Israel nakuapiwi jíwana pam. Po petsiwüünae yábara muxudutsi koyenewang xua Nakom juntukuru nantaxeina xua kaemonae náexana piamonaetha, xua judiomonaetha, bárapo koyenein ápara jopa paxam nexa. Matáütano pajinómpame bárapo kae pin nákuathe íchitha jopa pawünae ewatsím xua pokotsiwa xua wüünae xua Nakom exanaena paxam nexa kataunxuae jopa paiña nejumekowüntsixae. Tsipéi jopa paiña neyábara yaputáe jiwi pam Nakom. ¹³Íchitha ánoxuae Cristo Jesús paka

éxana xua kaemonae pana naexáname bapongtha. Paxam pomonae báyatha jopa Nakom paiña nejumlahewüntsi jiwi pam xua jopa paiña yábara yaputaexaem bapong. Íchitha ánoxuae pajumlahewüntame paiña neyábara yaputaexae Cristo Jesús, pong náetotha paiña abewang paka yábara tsitüpa, poxonae jana pichapabarena poxonae bexotsi. ¹⁴Cristo meisha bapong naka kata po jüntükoyenéwatha xua ichamonaetha xuya jüntema jinompa éxanatsi. Cristo éxana xua kaemonae náexana pomonae xua judiomonae irü pomonae jopa judiomonae naexanaeyo. Cristo kuiwerawéraka éxana po jüntükoyenein xua judiomonae irü pomonae jopa judiomonae naexanaeyo pena aitafaetabí jiwi náexana xua saya be kaemonae penaexanaewa tsane. Baxua éxana poxonae náetotha tsitüpa jiwi. ¹⁵Poxonae Cristo náetotha tüpa bapoxonae bapong kana éxana xua Moisés pía peitorobi koyenewa tatsi jopa ekeicha xeinaeyo peayapusüü itorobi koyenewa xua jiwi peitorobíwatsi pókotsi koyenein jiwi bewa exanáe. Bapong Cristo kana éxana xua barapomonae Cristo kaemonae pebarü naexanaewa tsainchi pomonae xua kopiya pía peaitaetafatabí jiwixaetsi. Poxonae Cristo baxuang kana éxana bapoxonae bárapo bicheitomonaebe jüntema nabarü jinompa kana éxana. ¹⁶Petüpaexae náetotha Cristo éxana xua ekeicha barapomonaebe jopa nabiyoy. Matáütano bapoxonae Cristo naitakoxone éxana xua barapomonaebe jüntema pejinompaewa Nakomtha xua icha be jopa ichiyo xua poxonae kopiya jinompa xua Nakom pía peaitaetafatabí jíwichi. Cristo éxana xua barapomonaebe Nakom kaemonae exainchi.

¹⁷Cristo patopa po kae pin nákuathe tsike. Bapong daxita paxam paka tsi-paeba Nakom pía pexeña jume diwesi tatsi. Bárapo jüntükoyenéwatha jiwi ekeicha kaewa Nakom itakoxónatsi xua Nakom jüntema petsita-jinompaewa tsainchi. Daxita paxamtha paka tsipaeba bárapo diwesi pomonaetha irü pam pomonae kopiya jopa Nakom payábara yaputaem, xua pomonae jopa judiomonae pam. Irü tsipáebatsi pomonae yatsikaya judiomonae pomonae Nakom yaputainchi pejumlahewüntsixa. ¹⁸Cristo jiwi petsitüpaexaetsi abe pía peéxanae koyenewang tatsi daxota Nakom pía Pejumopetünaxü tatsi yawena xua pomonae judiomonae irü pomonae jopa judiomonae naexanaeyo be kaemonae náexanabe xua kae axa xeina, bapong Nakom. ¹⁹Daxota ánoxuae jopa be paiña nenanapaincha jinompaewi pam xua be icha nakua wérena paiña neponaewi. Paxam irü ichamonae pomonae Nakom pejumlahewüntsíwirü be pomonae kae nakuapiwi pam. Paxam Nakom piamonae jíwana tatsi pam. ²⁰Poxonae ba jiwi Nakom pin píabo ákaba kopiya matha beta noba po ibótong xua íratha tabükaumena. Néxata beta nota po iboto xua aiñakuí xua po iboto bo dangweya babatanota po iboto xua epataüta botabiya. Bapoxonae nantakajejabapona icha ibótong, xua pépabo éxana. Icha pebiwi ichi poxonae bo ákaba, Nakom piamonae bara kana jütsiya kana ichi. Pomonae Cristo pía peitorobi jiwi tatsi irü pomonae Nakom pía peitorobi jume pepaebiwi barapomonae be barapókotsi ibótong xua tabükaumena tsipéi barapomonae kopiya paka kuiduba Nakom Pejume Diwesi tatsi. Irü Jesucristo be barapókotsi aiñakuí iboto po iboto dangweya babatanota po iboto epataüta botabiya, tsipéi Cristo paka yawena xua paiña nejumlahewüntsiwa bapong. Irü paxam be po ibótong xua jiwi nantakajejabapona, pomonae penantakarubenáe jiwi pam, tsipéi kotakaya paiña nejumlahewüntsixa. ²¹Cristo piamonae bara kana jütsiya ichiya kana éxana, icha po iboto ichi xua aiñakuí xua bo dangweya babatanota éxana. Cristo pong jiwi Pekanamataxeinaein, éxana xua piamonae tatsi pinmonae

tsóponae xua wüünaeya kaemonae nabarü jjinapona, pomonae Nakom tsita jüntü-koyene wüünaetsi. ²²Poxonae jiwi weta bárapo pin bo, bapoxonae kana éxana xua bárapo bo ápara Nakom píabo tatsi ichaxota Nakom pópona. Nakom paka kana éxana xua paxam irü daxita ichamonae pomonae irü pejumekowüntsiwi Nakom, kaemonae pana naexáname xua Nakom pía Pejumopetünaxü tatsi pía paka barü jinompaenexa icha Nakom ichi xua pía pin botha pópona.

**Meje yábara poxonae Nakom Pablo itoróbatsi xua
pekueikueijeiva Nakom Pejume Diwesi pomonaetha,
pomona jopa judiomona naexanaeyo**

3 ¹Xang Pablo, jiwi pekübibotha ékang yábara tanatsipéi kueikueijeixae Cristo Jesús poxonae bapong yábara tapaka kuidubíwatsi pomonae pam jopa judiomonae panaexanaem. ²¡Bara pajumetáneme xua Nakom nekata bárapo tatana-kuichiwa xua inta bichokono wüünae! ¡Nakom neitoroba tana neantobexae xua tapaka kuidubinéxatsi tapaka yawenaenéxatsi! ³Nakom itüüta xua pokoyene xua moya yawüingxeina pokoyene xua Nakom kapanenebiyaena jiwi xua jiwi kopiya jopa yábara yaputaeyo. Nakom neyaputane éxana bárapo koyene xua moya peyábara kuiyawüing xeinaewa pokoyene bexa exanaena xua jiwi jopa yábara yaputaeyo. Baxua býatha yábara pákata tínatsi xua imoxoyo diwesi tsekae. ⁴Poxonae bárapo carte payorobíname payaputáename xua bara xang yaputang pokoyene xua Cristo moya yábara kuiyawüing xéinatsi pokoyene xua bexa Nakom exanaena xua jiwi jopa yábara yaputaeyo. ⁵Býatha jiwi jopa yaputaeyo pokoyene xua Nakom Cristo moya yábara kuiyawüing xéinatsi pokoyene xua Nakom exanaena. Íchitha ánoxuae Nakom pía Pejumopetünaxü tatsi baxuang yaputane kana éxana pomonaetha, pomonae piakoya Nakomtha nakana éxana xua Nakom petanakuichiwa tsainchi pomonae Cristo Jesús pía peitorobi jíwixae tatsi, matáütano Nakom pía peitorobi jume pepaebi jíwitha tatsi. ⁶Meje baxue xua pokotsiwa moya peyawüingxeinaewa: Pomonae jopa judiomona naexanaeyo barapomonae irü xeinaena pokoyene xua Nakom kata judiomonaetha pokoyene bichokono wüünae xua býatha Nakom jüntüna jeba. Barapomonae pomonae jopa judiomona naexanaeyo Jesucristo pejumekowüntsixaetsi kaemonae nanaexana pepa judiomonaetha pomonae írürü Cristo Jesús pejumekowüntsiwixae-tsi. Barapomonae irü xeinaena pokoyene Nakom yábara tsiwüünae muxuduta judiomonaetha xua Cristo Jesús yábara. Barapomonae pomonae jopa judiomona naexanaeyo daxita baxuang irü xeinaena poxoru jumekowüntarü Nakom pía pekapanenebiyáe jume diwesi.

⁷Nakom neitoroba xua takueikueijeiva bárapo pexeña jume diwesi amana tatanakuichixae Cristo. Nakom nekata bárapo tatanakuichiwa pía tana neantobexae xua tayawenaewa tsane ichamonae. Matáütano Nakom nekata pía peyapusüü itorobi koyenewa xua takueikueijeiva tsane bárapo pexeña jume diwesi. ⁸Pomonae xua be kónotha aiñakuí xua Cristo piamonae tatsi barapomonae aiñakuí beyakaincha xua xang. Dáichitha Nakom nekata bárapo tatanakuichiwa xua inta bichokono wüünae. Nakom neitoroba xua takueikueijeiva tsane pía pexeña jume diwesi pomonaetha, pomonae jopa judiomona naexanaeyo. Kueikueijang po pexeña jume diwesi xua Cristo bichokono peantobexae jopa juniya yawenaeyo barapomonae pomonae jopa judiomona naexanaeyo.

⁹Matáütano Nakom neitoroba xua daxita jíwítha yábara yaputane taexanaewa tsane pokoyene xua Nakom exanaena bexa tsane, pokoyene Nakom moya yawüngxaina. Bárapo koyene Nakom pong daxita pefórotsin, kaena báyatha moya nayawüngxaina xua jiwi jopa peyaputaewa tsane xua pokotsiwa bapong exanaena. ¹⁰Ánoxuae Nakom yaputane éxana matatsunpiwi, pomonae itoroba itabókotha, matáütano pomonae pekanamataxeinaewa itabókotha. Barapomonae Nakom yaputane éxana pokotsiwa bapong moya yawüngxaina kaena báyatha xua jiwi jopa yábara yaputaeyo. Bárapo itabokopiwi nakuiduba xua bara Nakom bichokono yaputane daxita karepaya koyenewang. Báraxua yaputane poxonae tane xua pomonae judiomonae matáütano pomonae jopa judiomonae naexanaeyo daxita barapomonae kaemonae náexana pejumekowüntsiwichixae-tsi Cristo Jesús. ¹¹Nakom éxana baxua icha be pókotsi koyeneya kaena báyatha yábara nantaxeineibapona. Bapong baxua éxana Jesucristo pong Wanaka namataxeinaein petüpaexae náetotha. ¹²Naka itaküüpa xua watsipaebíwatsi Nakom wajumekowüntsixae Cristo. Waxainchi yaputainchi xua bapong bara naka jumetane kaemonae wanaexanaexae Crístotha, daxota kuitsakatsakapiya watsipaebiwa Nakom. ¹³Daxota jopa ichichipaeño xua paajüntükoyenerewiya jinómpame xua ichamonae átene tana neexanaexae paxam nexa. Íchitha jame bewa baxua paichichipaem tsipéi baxua jame paka yawena.

Meje yábara xua Cristo jiwi peantobéwatsi

¹⁴Poxonae yábara nantaxeinang xua pokoyenewa xua Nakom éxana bapoxonae tantabokototha unguang xua tatsita-itapeiñaxeinaewa tsane xua barükui-iturajinang Waxa pong itabókotha pepoponaein. ¹⁵Daxita Nakom piamonae pomonae pejumekowüntsiwichi, pomonae itabokopiwi irü pomonae po irathepiwi, daxita barapomonae Nakom tsítatsi xua barapomonae be kaemonae náexana. Bapong daxita barapomonae paxa tatsi. ¹⁶Nakomtha pákata wüükatsi. Tsipéi Nakom pexeinaexae peitaboko beicha pokotsiwa jopa juniyiyo xua bichokono wüünae daxota jang: “Nakom kare Efeso tomarapiwi xua bichokono jiña neayapusüü itorobi koyenewa. Barapomonae nejumópetha jüntükoyene dangweya jinompa éxande. ¹⁷Bárabü Cristo barü poponeibina barapomonae pejumekowüntsixaetsi. Bárabü barapomonae bichokono ántobe jiwi bichokono pejüntükoyene yüükaewa-xaetsi peántobe koyenewa. ¹⁸Bárabü barapomonae beta yábara yaputaena Cristo pía peántobe koyenewa tatsi xua írürü daxita ichamonaerü yaputaena pomonae pejumekowüntsiwi. Barapong Cristo pía peántobe koyenewa tatsi bichokono ayéi xainto jüntükoyenewa. ¹⁹Kawüükatsi Nakom xua barapomonae bárabü yaputaena bárapo koyene pokoyene Cristo pía peántobe koyenewa tatsi, xua po peántobe koyenewa ayéi xainto jüntükoyenewa xua jiwi jopa itaküüpaetsi xua peyábara yaputaewa. Kawüükatsi xua barapomonae nejüntükoyene yüüka exanaenexa daxita jiña nejüntükoyenéwatha.

²⁰”Wüünae kajáintatsi poxoru kaitaküüpa xua bichokono pata tana neyawenaewam beyakaincha xua pata takawüükáewatsi, xuano beyakaincha pata nantaxeinaewa. Baxua painta éxaname poxonae jiña neayapusüü itorobi koyenewa nakuita pata jüntükoyenéwatha. ²¹Bárabü daxita pomonae pejumekowüntsiwi pomonae kaemonae náexana Cristo Jesustha wüünae kajainchina xua ataya petsitekaeponaewa tsane. Je bara ichi tsane”, jang xua pákata wüükatsi Nakomtha.

**Meje yábara xua Nakom pía Pejumopetünaxü tatsi kana
éxana xua kaemonae náxana Nakom piamonae tatsi**

4¹Tatanakuichixae Jesucristo pong jiwi Pekanamataxeinaein daxota jiwi neeta jiwi pekübibotha. Pekono jumetha paka muxuwétatsi xua beta wüünaeya paiña nejinompaewa xua Nakom itapeta paiña nepaka wüingdúbixae paiña nejumekowüntsixae bapong icha be pókotsi koyeneya xua Nakom tsita wüünaetsi. ²Ita-uranaya pajinompéibare xua jopa paiña neatsakaewa tsane. Matáütano jumewüünaeya nantiya pana natsipaebéibare xua jopa paantütsáxande. Matáütano saya jopa pa-aitakonaende xua daxota jüntema painompáename poxonae bekein ichamonaе abe pákata éxana. Matáütano patsita-itapeñaxéinare xua nantiya pana nakuiyábara antobem pokotsiwa bekein jopa pana nakuikoyenejúpaem. ³Nakom pía Pejumopetünaxü tatsi paka kana éxana xua kaemonae paiña nenaexanaewa tsane. Daxota peajüntükoyenesúüwatha paexande daxita koyeneya xua kaemonae jüntema paiña nenabarü jinompaewam tsane. ⁴Paxam pomonae paiña nejumekowüntsi jíwixae Cristo Jesús daxota kaemonae paka éxana. Bekein daxita karepaya paxam barompaya paxéiname Nakom pía Pejumopetünaxü tatsi, íchitha bárapo pejúmope saya bara kaein. Nakom yábara paka wüingduba xua daxita paxam paiña nexeiñaxanaewa tsane kae koyenewa xua pokoyene pebüriya pana nabarü wüünae éwatame pokotsiwa xua bexa Nakom exanaena. ⁵Matáütano bara kaein pong jiwi Pekanamataxeinaein. Matáütano kae koyenewa xéinatsi pokoyenewa xua wajumekowüntsiwa Cristo. Matáütano saya kae wüingtha nabautisábatsi xua Cristo pewüingtha tatsi. ⁶Matáütano bara kaein Nakom pong Waxa xua daxítatsi waxainchi. Bapong daxita jiwi kanamataxéinatsi, matáütano daxita karepaya nákuangtha pópona. Matáütano daxita waxainchi karepaya naka barü pópona.

⁷Daxita waxainchitha seikaya kabarompaya naka kana jüntükuikoyene duba éxana pókotsi koyeneintha xua watsita exanaewa tsane bapong. Bárapo koyenein Cristo naka katsiba pokoyenein jíwana xua bapong nawita xeina icha bapong ichi-chipa. ⁸Daxota Nakom Pejume Diwésitha jeye Cristo yábara:

“Bapong athabé juiña tajü beicha.

Poxonae athabé juiña barü juiña pomonae pía peaitafaetabí jíwichi petsita-itapeñaxeinaenexa xua amanáyaba bárapo peaitafaetabí jíwichi.

Matáütano bapong pía pejumekowüntsiwíwichi katsiba po jüntükuikoyenéwangtha xua barapomonae Nakom petsita-exanaenéxatsi”,
jei Nakom Pejume Diwésitha.

⁹¿Eta xua metha baxua kaunuta poxonae paeba xua “athabé juiña tajü beicha”? jei. Baxua kaunuta xua kopiya matha Cristo po írathe patopeika xua bapoxonae ekeicha kaibe juiña athabeicha itaboko beicha. ¹⁰Pong xua po írathe patopeika, barichi bapong athabé juiña tajü beicha xua bapong pepoponaewa tsane daxita nákuangtha xuano daxita itabókotha. ¹¹Cristo katsiba jíwitha xua seikaya barompaya pejüntükuikoyenein. Ichamonaetha kana éxana pomonae pía peitorobi jíwixae tatsi. Ichamonaetha kana éxana pomonae pekueikueijeji jiwi pía peitorobi jume diwesi tatsi. Ichamonaetha kana éxana pomonae xua pekueikueijeji dubenanoutsiwi Nakom pía pexeiña jume diwesi tatsi xua pekapanenebiyáe jume diwesi. Ichamonaetha kana éxana pomonae eena jiwi pomonaetha, pomonae pejumekowüntsiwi. Ichamonaetha kana éxana pomonae xua pekuidubi jiwi

pomonaetha, pomonae pejumekowüntsiwi. ¹²Poxonae bárapo koyene Cristo éxana, piamonae kana jüntükoyene wetsiya kana éxana xua beta petaexanaewa tsainchi pía petanakuichiwa tatsi. Bapoxonae daxita piamonae tatsi mataropeichiya ajüntüyapusüüya jumekokowüntapona pomonae piamonaexae tatsi pomonae bara be Cristo pía pepong tatsi. ¹³Baxua Cristo éxana xua beya waxainchi kaemonae wanaexanaewa tsainchi xua kaemonae wanabarü jumekowüntsixaetsi Crístotha. Bapoxonae naéxanatsi xua pebüriya kaemonae wanabariyábara yaputaewa tsainchi Nakom Pexanto tatsi. Matáütano bapoxonae yatsikaya beta jumekowüntatsi, bapoxonae jinómpatsi be pomonae býatha pínontsi xua pokotsimonae itakúüpatsi xua Nakom beta petsita-jinompáewatsi. Bapoxonae wajüntükoyene naka kayábara kuiwétsiya éxana xua wajüntükoyene wüünaewa icha Cristo ichi xua bichokono pejüntükoyene wüünaewa. ¹⁴Bapoxonae jopa be pexui natsikotáe tsainchi ekeicha. Pexui ba aiña muxu xeina, ichawa beya ba jumekowünta xua pókotsi koyenein xua poxonae nakuidubeiba xua poxonae kuiduba pomonae jiwi pemuxuitorobiwi. Bárapo pemuxuitorobi jiwi yaputane nawita po tha xua jiwi pemuxujaiñabíwatsi. ¹⁵Jame bewa pexaiñéi jume tsipaebichi ichamonaetha pokoyeneya xua barapomonae yaputane xua waxainchi antobetsi barapomonae. Bapoxonae beta wüünaeya exanaeinchi wanajüntükoyene wüünae exanaponaenéxatsi daxita koyenéwangtha xua icha be Cristo ichi. Bapong kanamataxeina pomonae pía pejumekowüntsíwichi. Bapong bara be pentasipa pomonae pejumekowüntsíwichi be bapong pepong tatsi. ¹⁶Cristo kanamataxeina pía pejumekowüntsíwichi. Matáütano kana éxana xua barapomonae barompaya xeina pía petanakuichiwangtsi. Bekein barapomonae piáwang barompaya xeina íchitha Cristo kana éxana xua kaemonae nantiya nayawena be kaemonae náexana. Poxonae barapomonae barompaya piáwa beta exanapona pía penakuichiwang, bapoxonae be kaemonae beta naajüntükoyenesüü wüünae eexanapona, nantiya penaantobexae.

Meje yábara po penajüntükoyenéwatha wajinompaewa wajumekowüntsixaé Cristo

¹⁷Ánoxuae paka tsipáebatsi xua paiña tapaka muxuwetsinéxatsi, Cristo pong jiwi Pekanamataxeinaein taneitorobixae: Jopa bewa pajinompaem icha bárapo kae pin nakuathepiwi ichi xua poxonae jinompa poxonae jopa Nakom yaputaetsi. Pokotsiwa xua barapomonae pía penantaxeináe koyenewang tatsi, jopa aiñakuiyo. Jopa pejüntükoyene yawenaexaetsi bárapo penantaxeináe koyenéwangtha. ¹⁸Barapomonae pía peyaputáe koyenewang tatsi jopa xapain pepa peyaputáe koyenéwiyo. Barapomonae jopa xeinaeyo peajüntükoyenesüüwa pókotsi peajüntükoyenesüüwa Nakom kata piamonae. Bárapo koyene barapomonae jopa xeinaeyo poxoru aichaxaibi xua Nakom peyábara peyaputáewatsi, xuano poxoru barapomonae najüntükoyene arárana xua jopa peichichipaexae xua Nakom peyábara jumetáewatsi. ¹⁹Barapomonae jopa ajüntükoyeneúriyo poxonae abe éxana. Matáütano barapomonae atsakiya abe eexanapona, xua peküpáewatsi átsaxa mera yawa weiweina ichamonae piseurixitha tatsi. Barapomonae kuixeika xua daxita koyenewang abe peexanaponaewa. ²⁰Íchitha poxonae ichamonae yábara paka kuiduba Cristo, jopa ápara paka kuidubiyo bárapo koyene xua abe paiña neexanaewa tsane. ²¹Xaniwaicha yábara pajumetáneme Cristo, xuano piamonae tatsi paiña nenaexanaewa poxonae ichamonae paka kuiduba po pexaiñéi jumein xua

pexeña jume diwesi xua Jesucristo yábara. ²²Pana nakuibarapende po jüntükoyene xua báyaname poxonae jopa kataunxuae pajumekowüntsím. Bárapo jüntükükoyene bichokono abe, tsipéi paka kana éxana xua paéxaname pokotsiwang xua paiñakoya paichichípame poxonae paka muxuitóroba éxana xua daxota abe paiña neexanaewam. ²³Pakópare xua bara Nakom paka jüntükoyene wüünae exanaponaena, xua daxota pena koyene paiña nenantaxeinaponaewa tsane. ²⁴Painómpare pena jüntükoyénetha, po jüntükoyene Nakom éxana xua paiña paka katsibinexa. Bapoxonae paxeináename be pókotsi jüntükoyene Nakom xeina. Poxonae paxéiname bárapo jüntükoyene po jüntükoyene xua pexaiñeiwa, bapoxonae beta nantiya pana nabarü jinómpame yawa xua bichokono paka tsita wüünae Nakomtha.

²⁵Daxota ánoxuae jopa nantiya bewa pana namuxuitorobim. Bewa daxita pam wüünaeya patsipaebim pomonaetha, pomonae irü pejumekowüntsiwi, tsipéi waxainchi daxítatsi kaemonae naéxanatsi Crístotha.

²⁶Icha paanáepaname jopa pakopatsinde xua paiña jüntükoyene paka itoroba xua anaya anaepanaya abe paiña neexanaewa ichüngtha. Icha paanáepaname jopa abe paexanaeinde. Kame jopa paanáepana dubenanaebiyaeinde xua beya kirei tsanaicha, saya jame bara káetotha pande. ²⁷Jopa pakopatsinde xua bara kaurimonae pía pentakaponaein tatsi paka jüntükoyene jüjüta abe paiña neexanaewa tsane.

²⁸Pong xua pekaibin, bü jopa ekeicha kaibéibiyo. Bewa jame bapong tsina-kuichina pokotsiwa xua xaiñeya yábara nakuita xua jopa naerabiyo. Bapoxonae bapong itaküüpatsi xua ichamonaetha xuya katsina pomonaetha xua akopeibiwi pomonae jopa xeinaeyo xua pokotsiwa nantawénona.

²⁹Jopa ajumebeya pakueikueijam tsurubenanaebiyaeinde. Jame maisha jume-wüünaeya pakueikueijam tsurubenanaebiyama. Papáebare pókotsi jumeintha xua ichamonae jumekokowüntapona éxanatsi po jumeintha xua jiwi muxuxeika éxanatsi xuano xua yawénatsi pojumein xua paka jumetane. ³⁰Nakom pía Pejumopetünaxü tatsi jopa pajüntükoyene wekoyéi exanaeinde xua paiña nepaka kuitaxae xua paéxaname. Tsipéi paka barü pópona Nakom pía Pejumopetünaxü tatsi, bára-xua tsita itapeiñaxeina xua bara xaniwaicha Nakom piamonae tatsi pam. Nakom pía Pejumopetünaxü tatsi naka jüntükoyene arárana wanaka yawenaenexa beya poxonae po matakeitha Jesucristo naka kapanenebiya exanaena.

³¹Jopa paxeinaeinde paiña jüntükoyenein weya pokoyenein xua ichamonae payábara ajüntüjom xua kame bichokono paiña neyábara nantaxeinaexae xua ichamonae abe pía pákata exanaexae. Matáütano jopa paxeinaeinde pokoyene xua jemeicha anaya paéxaname. Matáütano jopa paxeinaeinde pokoyene xua saya bichokono panthüthü anaepanéibame. Matáütano jopa paxeinaeinde pokoyene xua tsümüjume pabarüpáebame ichamonae. Barichi jopa paxeinaeinde pokoyene xua ichamonae pabiatáneme. Matáütano daxita jopa paxeinaeinde pokoyenein xua bichokono pa-aitafáetabim ichamonae. ³²Jame seikaya maisha nantiya kaemonae wüünaeya pana nata éxande. Matáütano nantiya pana naweyataema xua nantiya paiña nenayawenaewam tsane. Matáütano nantiya pana naku iyábara jüntemáinare xua abe nantiya pana nata éxaname, icha Nakom paka yábara ichi xua paka kayábara jüntemaina abe paiña neexanáe kuirukoyenein Cristo paiña nepaka tsitüpaexae poxonae náetotha tüpa exanadútatsi poxonae bexotsi.

**Meje yábara xua po jüntükoyenéwatha bewa
jinompaena Nakom pía pexui tatsi**

5 ¹Tsipéi paxam Nakom pía pexui tatsi pam xua bapong bichokono paiña nepaka kaántobe jiwi pam, daxota bewa pakuijontsiya jinompáename icha bapong ichi poxonaé pópona. ²Nantiya pana naantobeya jinómpare icha Cristo ichi xua naka ántobe. Bapong Cristo pía pepong nakaenaeta xua naka tsitüpa xua abe waexanáe kuirukoyenein poxonaé bexotsi. Baxua be poxonaé icha duwéi ichichi xua poxonaé jiwi tsibexotsi xua daxota bárapo jiwi jopa penatsikuentsiwa xua abe peexanaexae Nakomtha. Bapoxonaé Nakom tsita wüünaetsi bárapo jiwi. Barichi xua Cristo éxana Nakom tsita wüünaetsi icha be pókotsi duwéi túxusi xeikaewa ichi xua poxonaé jiwi duwéi tauta xua Nakom pekatsinéxatsi.

³Tsipéi paxam Nakom pía pexui tatsi pam, daxota jopa bewa paexanaem pokoyenein xua daxota ichamonae pomonae paiñamonae paka yábara paeba xua abe paéxaname. Matáütano jopa bewa pana nasikuimatakáetsim xua paweiwéiname xua jopa bekein paiña seurijiwi. Jopa bewa payábara paebim pojume xua jiwi aura éxanatsi. Matáütano jopa bewa bichokono paiña itakopeichi xua payábara úwame xua ichamonae xeina. ⁴Jopa nantiya pana nayábara yüüyüüjande. Matáütano jopa nantiya pana najumekuikaponaeinde pojumein xua jopa wüünaeyo. Matáütano jopa nantiya tsümüjume pana nayábara paebinde. Daxita bárapo koyenein bichokono abe. Jame maisha bewa itapeta Nakom wüünae pajainchim paiña nepaka kapanenebiyaexae bárapo koyenein weya. ⁵Tsipéi paxam báyatha payaputáneme xua Nakom kana exanaena pomonaetha, pomonae meje: Pomonae xua penasikuimatakáetsiwa xua jopa poxonaé piseuri jiwi, yáwano pomonae xua yábara paeba pojume xua jiwi aura éxanatsi, yáwano pomonae bichokono pitakopeichi xua yábara uwa xua ichamonae xeina. Nakom tsita abetsi bárapo koyenein icha tsita ichichi xua poxonaé jintong bichokono beitakuijíchatsi xua wüünae jainta ibo nakom. Pomonae bárapo koyenein éxana bapomonae bápána jopa itaküüpaetsi xua jiwi itorobiya peewatsíwatsi xua ichaxota Cristo itorobiya pekanamataxeinaewa jiwi xua irü ichaxota barichi Nakom. ⁶Jopa pakopatsinde xua ichamonae paka nekamuxuitorobiwa peyábara paebixae bárapo koyenein, po jumeintha xua jopa xaiñeyo. Poxoru jiwi peexanaexae bárapo abe peéxanae koyenein daxota Nakom anaya péraxa exanaena barapomonaetha. Nakom anaya péraxa exanaena barapomonaetha tsipéi jopa jumejejeyo pokotsiwa xua Nakom itoroba. ⁷Barapomonaetha jopa imoxoyo pakuikuinaeinde, pomonae Nakom jopa jumejejeichi.

⁸Paxam kopitha abe paéxaname jopa paiña yábara yaputaexaem Nakom. Baxua be poxonaé pomonae pona pekiriówatha jopa beta ponaeyo jopa beta penekotsixae. Íchitha ánoxuae beta paéxaname paiña yábara yaputaexaem Nakom pong jiwi Pekanamataxeinaein. Baxua be poxonaé pomonae pona poxonaé pentha, beta pona beta pía petaexae. Pajinómpare beta paiña nejinompaenexa Nakom nexa icha pomonae ichi poxonaé pona poxonaé pentha. ⁹Pomonae yawa jinompa Nakom barapomonae beta jinompa icha pomonae ichi xua poxonaé beta jinompa poxonaé pentha. Barapomonae peyawajinompaexae Nakom exaneiba pokotsiwa xua wüünaeya peexanaewa yawa xua pokotsiwa tsita wüünaetsi Nakom, yawa xua pokotsiwa pexaiñeiwa. ¹⁰Ínkane pana nakuidúbare pokotsiwa xua Nakom pong

jiwi Pekanamataxeinaein ichichipa pokotsiwa Nakom tsita wüünaetsi. ¹¹Jopa pae-xanaeinde pokotsiwa jopa aiñakuiyo pokotsiwa ichamonae éxana pomonae xua be poxonae pekiriéwatha jinompa poxoru Nakom jopa peyábara yaputaexaetsi. Jame maisha barapomonae patsita-itapeiñaxéinare pokotsiwang xua barapomonae abe peexanáewangxae. ¹²Icha payábara paebíchipang pokoyenein barapomonae abe peexanaewa, bichokono aura pana exanáetsipa pokotsiwa namicha peexanaewa barapomonae tsipéi bichokono abe. ¹³Poxonae pekoicha pentha éxana poxonae kirei bapoxonae daxita pichiwang beta patáneme pentha perubenaexae. Barichi poxonae barapomonae jumetane pojumein xua yaputane exainchi, bapoxonae tsita itapeiñaxeinaeinchi xua pokotsiwa namicha éxana, ápara deta kou abe. Bapoxonae barapomonae itakúúpatsi xua naexanaena Nakom piamonae tatsi. ¹⁴Daxota Nakom piamonae tatsi ichüing yábara jeichi:

“Nakuikayábara kanantaxeinatábare,
tsipéi xam be pong abe neexanaein.

Natsixire pía xaiña weya tatsi pomonae be petüpaewi pejinompaewi jopa tana nejumekowüntsi jíwixae.

Cristo kakana exanaena xua yábara neyaputaewa bapong pokotsiwa xua pía pexaiñéi koyenewa tatsi”,
jei xua ichüing yábara páebatsi.

¹⁵Dota pam, xua abe paiña neexanaewa. Jame maisha wüünaeya pajinómpare. Jopa pajinompaeinde icha be ichi poxonae jinompa pomonae Nakom jopa jumekowüntsiya yaputaetsi. Barapomonae jopa peyaputaewi. Jame maisha pajinómpare icha be ichi poxonae jinompa pomonae jumekowüntsiya peyaputaewi Nakom. Barapomonae peyaputaewi. ¹⁶Beta pa-eexanaponde daxita koyeneya xua paka itakúúpa poxonae kataunxuae ánoxuae pajinómpame, tsipéi bárapo matakábintha jiwi abe bichokono peexanaewi. ¹⁷Jopa pajinompaeinde icha be ichi poxonae jinompa pomonae amaméibatsi jopa Nakom peyábara yaputaexaetsi. Jame maisha payaputaeya exanaponde pokotsiwa xua Cristo ichichipa, pong jiwi Pekanamataxeinaein. ¹⁸Jopa pana nakúúpa exanaeinde peátsaxae merang xua jintong akoyenebeya exanaeya exainchi. Jame maisha Nakom pía Pejumopetünaxü tatsi pakopabéibare xua daxita bara paka jüntükoyene itorobeiba xua beta paiña neexaneibiwa tsane. ¹⁹Nantiya pana patsipáebare pokotsiwa xua Nakom paka jüntükoyene weiweina éxana. Nantiya pana nabarü naxúnare David pía weixi, po weixi pewüing salmos. Matáütano panaxúnare po wei pomonae pejumekowüntsiwi pía weixi tatsi xua pewüünae jainchiweixi Jesucrístotha, pong jiwi Pekanamataxeinaein. Panaxúnare paiña jüntükoyene weya po weixi xua Nakom wüünae pejainchíwatsi. ²⁰Nakom pong Waxa bapongtha pajakobéibare, pajang tsaibinde: “Nakom maisha pajüntükoyene weiweing xua pokotsiwa daxita pata tana nekatsixaemxae. Paka wüükatsi Jesucristo pata Tanekanamataxeinaein pabüxüna bobenounang”, pajang tsaibinde.

**Meje yábara pokoyene xua pebin piséuribe bewa nabarü
poponáenabe pongbe pejumekowüntsinbe**

²¹Daxita pam bewa bara pakopatsim xua nantiya pana nakana mataxéiname xua paiña neexaneibinexa pokotsiwa xua nantiya pana nakui-itorobéibame. Bapoxonae xua paiña itapeiñaxeinaenexa xua paiña nebarü iturakuijinaewa pokotsiwa Cristo paka kui-itoroba.

²²Yábüxi pam, bewa bara pakopatsim xua paiña séuriwi paka kanamataxeina xua paiña neexanebiwa pokotsiwa paiña séuriwi paka kui-itorobeiba. Báraxua paexande icha paichim poxonae Cristo pong jiwi Pekanamataxeinaein paka kui-itoroba. ²³Tsipéi pebin kanamataxeina píowa, icha Cristo ichi xua kanamataxeina piamonae pomonae pía pejumekowüntsiwichixaetsi. Bapong Cristo barapomonae pía Pekapanenebiyaeinchi tatsi. Barapomonae pomonae pejumekowüntsiwi bara be Cristo pía pepong tatsi. Cristo bara be pentasipa pekanamataxeinaexae barapomonae. ²⁴Icha barapomonae ichi pomonae Cristo pejumekowüntsiwichi xua pichichi xua peexanaewa pokotsiwa Cristo itoroba, yábüxi bewa barichi. Bewa exanáe daxita pokotsiwa piséuriwi itoróbatsi.

²⁵Pebiwi pam paantobeinde paiña seuriwi, icha Cristo ichi xua ántobe daxita xua i dapomonae pomonae pejumekowüntsiwichixaetsi. Cristo pía peantobexae barapomonae tsitüpa poxonae náetotha tüpa exanadútsi poxonae bexotsi. ²⁶Cristo tsitüpa barapomonae xua daxita i dapomonae pomonae peyábara jumekowüntsiwixaetsi pokoyene xua Cristo jüntükoyene wüünae pekana exanaenexa Nakom nexa. Baxua éxana xua barapomonae jopa pexeinaewa tsane xua penatsikuentsiwa xua abe peexanaexae. Baxua Cristo kana éxana poxonae barapomonae tabautisábatsi mératha, xuano xua poxonae paeba xua pinae jumekowünta Nakom Pejume Diwesi. ²⁷Cristo baxua éxana daxita pomonaetha, pomonae pía pejumekowüntsiwichi xua pekuaranobinexa tsane pía itabaratha, xua yawa pemuxuna kuaranobinexa pía pexeña peitüpanáe koicha. Poxonae barapomonae umenaena Cristo peitabaratha jopa yawa umenae tsane peabe koyenewang. Matáütano jopa yawa umenae tsane pokotsiwa xua barapomonae abe éxanatsi. Barapomonae pejüntükoyene wüünaewi tsane Nakomtha xua jopa xeinaeyo xua penatsikuentsiwa xua abe peexanaexae. ²⁸Pebiwi bewa ántobe pía séurixi, pekui-üntabexae icha bárapo pebiwi ichi xua pía pepong natsiúntabe. Pong piakoutha natsiúntabe bapong píowa ántobe xua be kaein penaexanaewa tsánebe. ²⁹Dapong ba aibi pong piakoutha na-aitafáetabi. Saya jame naapatsina pexaewa yáwano naewatsina beta. Cristo bara jüta ichiya kana ichi pomonae Nakom piamonae tatsi daxita xua i dapomonae pomonae Cristo pejumekowüntsiwichixaetsi. ³⁰Cristo beta eena barapomonae tsipéi barapomonae be pía pepong tatsi. Waxainchi yaputainchi baxua tsipéi barapomonae jíwanatsi. Waxainchi pomonaetsi xua kaemonae wanaexanae jíwichi Crístotha. ³¹Xua pebin yawa piseuri kaein náexanabe Nakom Pejume Diwésitha baxua yábara jeye: “Daxota pebin paxa wepu natsata, yawa pena wepu natsata xua piséuribe penaperüü kuikuinaenéxabe. Bapoxonae bapongbe piséuribe be kaein náexanabe”, jei Nakom Pejume Diwésitha. ³²Bárapo Nakom Pejume Diwesi xua pebin piséuribe yábara báraxua bara be Nakom moya yawüingxeina xua pokoyene bichokono aiñakuí xua jiwi jopa yábara yaputaeyo. Bárapo diwesi yábara kaunuta xua Cristo irü Nakom piamonae tatsi pomonae pejumekowüntsiwichi, daxita be kaemonae náexana icha pebin piséuribe ichi xua be kaein náexanabe. ³³Barichi bárapo diwesi paka yábara kaunuta. Daxita pebiwi pam bewa paántobem paiña séurixi, icha paichim xua paiñakoutha pana natsiúntabem. Barichi daxita yábüxi pam paiña séurixi bewa paka yábara barükui-iturajinaena.

6 ¹Pexui pam, paxam pomonae paiña nejumekowüntsi jiwi pam Cristo. Paiña neantobemxae pong jiwi Pekanamataxeinaein daxota paxam bewa pajumebarujejam pokotsiwa paiña axeiwi paka itoroba, tsipéi baxua pexeña kuikoyene.

²⁻³Moisés pía peitorobi koyenewa aiña koyenewang xeina. Po peitorobi koyenewa kopiya po peitorobi koyene xua ichaxota múxuna xeina xua peyábara tsiwüüinae muxudutsiwa, bárapo koyenéwatha baxua jeye: “Axa kuibarü iturajínare, yawa ena kuibarü iturajínare, xua paiña jüntükoyene wüünae jinompaenexa, matáütano xua paiña nejinompaenexa aiña wei dapaein bárapo kae pin nákuathe”, jei Moisés pía peitorobi koyenéwatha.

⁴Paxam pomonae koxiyei jiwi pam, jopa anaepanaya paitorobeibinde xua daxota paiña pexui paka kaseba. Jame maisha bewa antobeya pawichitim pókotsi koyeneya Jesucristo, pong jiwi Pekanamataxeinaein, tsita wüünaetsi. Pakuidúbare paiña pexui xua beta pejinompaenexa. Matáütano pamuxuwere xua peexanaenexa pokotsiwa bewa exanáe.

⁵Pomonae amanaya paiña nepaka kabusitatayebeibi jiwi pam xua poxonae ichamonae patanakuítame pajumebarujejande pokotsiwa xua paiña nepaka kanamataxeinaewi paka itoroba bárapo kae pin nákuathe. Barapomonae pabarükui-iturajínare, yáwano pakuikunúware bárapo paiña nepaka kanamataxeinaewi xua abe paiña nepaka exanaeyainwa. Matáütano yatsikaya jumexaiñeya pata éxande. Barapomonae beta patanakuire icha poxonae paichim poxonae Cristo patanakuítame. ⁶Dangweya patanakuire bekein paiña nepaka kanamataxeinaewi jopa paka taeyo. Jopa saya dangweya pata nakuichinde xua barapomonae paiña nepaka taexae. Poxonae baxua paéxaname ápara saya poxoru paiña pía nepaka kanamataxeinaewi wüünaeya paka yábara nantaxeinaetsi. Jame maisha patanakuire icha paichim poxonae paiña ichichi xua amanaya paiña netanakuichiwa paiña nepaka kanamataxeinaein nexa Cristo. Bichokono dangweya panakuire pokotsiwa xua Nakom tsita wüünaetsi pokotsiwa xua bapong ichichipa. ⁷Poxonae patanakuítame pomonae paiña nepaka kanamataxeinaewi weiweinaya panakuire icha be poxonae paichim xua poxonae patanakuítame pong jiwi Pekanamataxeinaein, pong Cristo Jesús. Jopa bara paichinde xua poxonae jopa xapain patanakuichim pomonae xua poxoru saya jíwixae. ⁸Paxam payaputáneme pokotsiwa xua daxita beta paéxaname bara Nakom paka busikuimatómata. Báraxua Nakom pong jiwi Pekanamataxeinaein jüpa barapókotsi matoma paka kata, poxonae bekein amanaya paiña nepaka busikuitatayebeibiwi pam xua poxonae ichüing patanakuítame, xuano xua saya poxonae bekein parátixi patsinakuítame.

⁹Paxam pomonae pekanamataxeinae jiwi pam, bewa beta pata exanaem xuya bárapo amanaya paiña nebusikuitatayebeibi jiwi. Jopa yábara pamuxuwetsinde xua paiña nekuainchiwa tsane icha jopa xapain exanaeyo barapomonae. Panantaxéinare xua barapomonae bewa exanáe pokotsiwa itoroba pong jiwi Pekanamataxeinaein icha paichim xua irü bewa paexanáename pokotsiwa bapong paka itoroba, pong eka itabókotha. Bapong daxita tsita najúpatsi jiwi poxonae yábara paeba peyaputaenexa icha barapomonae natsikuenta xua abe peexanaexae.

**Meje yábara xua pomonae pejumekowüntsiwi Cristo
pokoyeneintha bewa amanáyabi kaurimonaetha**

¹⁰Tamonae pam, ánoxuae wetang pokotsiwa xua tapaka tsipaebíwatsi. Ajüntü-süüya pajinómpare pong Pekanamataxeinaein jiwi pía peayapusúü itorobi koyenéwatha tatsi kaemonae paiña nenaexanaexae bapongtha. ¹¹Paiña jüntükoyene pana naewatsiya yawénare daxita pokoyenewangtha xua Nakom paka kata xua

xota pana nayáewatame paiña jüntükoyenewa. Bapoxonae paka itaküüpa xua kaurimonae pía pentakaponaein tatsi paamanáyabame poxonae paka jüntükoyene jüjüta xua abe paiña neexanaenexa. ¹²Tsipéi ánoxuae jopa nabetsi xua pepa jíwítha. Jame ápara ánoxuae penabi koyene éxanatsi pomonaetha, pomonae peiña pejinompaewi xua kaurimonaetha. Bárapo yakauríbatsi pía peayapusüüwa yawa peitorobi koyene xua jiwi kanamataxéinatsi bárapo kae pin nákuathe tsike, pomonae abe peéxanae jiwi. Matáütano jinompa bárapo kae pin nakua matatsunthe. ¹³Daxota paxéinare daxita pókotsi jüntükoyenein xua Nakom paka kata pókotsi koyeneintha xua pana nayáewatame. Ánoxuae pana najüntükoyene wüünaere xua paiña jüntükoyene amanáyabi dubenanaebiyaenexa tsane bárapo peiña pejinompaewi. Baxua paexande xain áwiya bichokono pajüntükoyene dangwam poxonae po matakeitha paka jüntükoyene jüjütsina xua abe paiña neexanaewa tsane. Bekein paka jüjütsina, áwiya ajüntükoyenesüüya pajinompáename.

¹⁴Pana nakuiwüünare icha soldadomonae ichi xua yábara nakuiwüünaeta penabinexa ichamonaetha. Paiña jüntükoyenéwatha paxéinare Nakom pía pexaiñéi koyenewa paiña tsita itapeiñaxeinaenexa báraxua xua bara xaiñeya pata éxaname Nakom. Barapókotsi jüta koyeneya paichinde icha be soldadomonae ichi xua poxonae yábara nakuiwüünaeta penabinexa ichamonaetha. Bapoxonae na-epakatürüba paparúwangtha xua tsita itapeiñaxeina xua bapomonae nakuiwüünaeta xua bara xaiñeya penabinexa xua pong pentakaponaein peitorobixae. Matáütano pejüntükoyene wüünaewa Nakom patsita xéinare paiña jüntükoyénetha, paiña nenaewatsinexa icha be poxonae soldadomonae ichi xua xeina po penáintotha xua nantákari ákaba poxonae nakuiwüünaeta xua penabinexa. ¹⁵Pana najüntükoyene wüünaere xua paiña nekueikuejei tsurubenanaebiyaenexa Nakom pía pexeíña jume diwesi xua po diwesi yábara xua jiwi jüntema pejinompaewa. Barapókotsi jüta koyeneya bara paichinde icha be poxonae soldadomonae ichi, xua poxonae nataxuwüünaeta duba sapatong xua penakuiwüünaetsinexa xua naba. ¹⁶Matáütano pamuxuna xéinare xua bichokono paiña nejumekowüntsiwa Nakom, xua pana najüntükoyene yawéname poxonae kaurimonae pía pentakaponaein tatsi paka jüntükoyene jüjüta. Barapókotsi jüta koyeneya bara paichinde icha be soldadomonae ichi xua pemáxüngtha duba pepérase nain xua naita-arababa. Poxonae pía peaitafaetabí jiwi kawabábatsi pokotsiwangtha xua peopisojéiwangtha xua isho ítare xeina, bapoxonae bárapo pepérase naintongtha naita-arababa barapomonae, yáwano baxota itaxubaba isho ítare. ¹⁷Pakópare xua bara Nakom paka kapanenebiyaena paiña paka jüntükoyene araranaenexa kaurimonae pekuiyainwa. Barapókotsi jüta koyeneya bara paichinde icha be soldadomonae ichi xua penain yoreitha nantaákaba. Nakom Pejume Diwesi paiña jüntükoyénetha paxéinare xua pojume Nakom pía Pejumopetünaxü tatsi paka kata xua po jumetha paiña nenayaewatsinexa paiña nepaka ka-aitafaetabí jiwi pekuiyainwa. Barapókotsi jüta koyeneya bara paichinde icha be soldadomonae ichi xua kápona kusi penayaewatsinexa pía peaitafaetabí jíwichi pekuiyainwa. ¹⁸Nakomtha matowa patsipaebéibare daxita matakábintha be pókotsi koyeneya paka yawena Nakom pía Pejumopetünaxü tatsi. Nakomtha pawüükéibare daxita paiña newüükae koyenéwatha tsaibi pokotsiwang xua panantawénoname. Xain daxita matakábintha tsaibi tsaka painompéibame, matáüta bápana jopa paajüntükoyene faetabinde xua pawüükame Nakom. Bichokono matowa patawüükare daxita pomonae Nakom

piamonae tatsi. ¹⁹Barichi painta wúükare Nakomtha xua bapong tanekatsinexa pojume diwésitha xua takueikueijeinexa. Matáütano painta wúükare xua tana neitaküüpaewa xua kuitsakatsakapiya takueikueijeinexa, xua jiwi yábara yaputane taexanaenexa pokotsiwa xua Nakom moya yawüingxeina pokoyene yábara xua Nakom kapanepa éxana pomonae jopa judiomonae naexanaeyo. ²⁰Nakom neitoroba icha nákuangtha xua takueikueijeinexa Nakom Pejume Diwesi bapong nexa. Daxota ánoxuae ichamonae neeta jiwi pekübibotha takueikueijeixae Nakom nexa. Painta Nakomtha wúükare xua kuitsakatsakapiya takueikueijeinexa tsane poxonae icha bewa kueikueijang tsane.

Meje yábara poxonae Pablo najumewetsiya paeba bárapo cártathe

²¹Tíquico pong paxang paantobein, pong irü pejumekowüntsín Jesucristo, bapong pákata itoróbatsi. Bapong Tíquico bara xaiñeya éxana poxonae pana neyawena Nakom pía petanakuichiwa tatsi pong jiwi Pekanamataxeinaein. Bapong daxita paka tsipaebina xua neyábara paebina, yáwano pokotsiwa xua éxanang baxua yábara paka tsipaebina. ²²Bapong Tíquico pákata itoróbatsi yáitama ichi-chipang xua bapong yábara paka tsipaebina xua pata jinompaewa. Bapoxonae bapong paka jüntükoyene tsakabina, jüntükoyene weiweinaya sadüjei paiña nejinompaewa tsane xua bara beta tapoponaexae.

²³Bárabü Nakom, pong Waxa, írürü Jesucristo, pong jiwi Pekanamataxeinaein, bapongbe jüntema jinompa kana exanáenabe pomonaetha daxita pomonae pía pejumekowüntsiwixaetsi. Matáütano bárabü exanáenabe xua barapomonae nantiya naántobe tsane. Matáütano bárabü exanáenabe xua barapomonae ajüntükoyenesüüya jumekowünta dubenanaebiyaena. ²⁴Matáütano bárabü Nakom peantobexae yawenaena daxita pomonaetha, pomonae peantobewi Jesucristo pong Wanaka namataxeinaein. Bapoxonae barapomonae pexeinaenexa tsane pokoyene ántobe ichamonaetha pokoyenewa xua ataya tsiteka.

Baja Pablo.

Meje Po Carte Pablo Tatina, Filipos Tomarapiwi Tatínatsi

Meje poxonae Pablo tamrópata pítaba xua tatina, Filipos tomarapiwi tatínatsi

1 ¹Xang, Pablo, irü Timoteo, paxangbe pongbe amanaya pata tanakuichinbe Jesús pata taichichipaexaebe. Bárapo carte pata títangbe pomonae jinompa Filipos tómaratha. Pata títangbe daxita pomonae Cristo Jesús pejumekowüntsíwichi, pomonae yatsikaewa Nakom piamonae tatsi. Matáütano irü pata títangbe pomonae pekanamataxeinaewi pejumekowüntsiwi. Matáütano irü pata títangbe pomonae peyawenaewi pejumekowüntsíwitha, poxonae yawena peatenéwitha, xuano xua poxonae ápata pexaewa peakopeibíwitha. Barapomonae Nakom piamonae tatsi, yawa barapomonae kaemonae náexana Cristo Jesustha. ²Bárbü Nakom, pong Waxa, amanaya paka yawenaena paiña pía paka nekaantobexae, yawa xua jüntema jinompa paka exanaena. Irü bárbü Jesucristo pong jiwí Pekanamataxeinaein baxua pákata exanaena.

Meje yábara poxonae Pablo tawüüka Nakomtha pomonae Nakom pejumekowüntsiwi

³Poxonae paka yábara nantaxeinéibatsi Ta Nakom tsipaebelang paxam yábara. Jang tsaibinje: “Nakom jüntükoyene weiweingang xua barapomonae betiya neka-tsita dubenanaebiyaexae”, jang tsaibin. ⁴Poxonae Nakom pákata wüükéibatsi bichokono jüntükoyene weiweinaeya pákata wüükéibatsi xua daxita paxam. ⁵Nakomtha yábara tsipaebelang xua paxam tapana nebarü nakuichiwam Nakom Pejume Diwesi xua poxonae aena pajumekowüntame xua beya ánoxuae. ⁶Bara xaniwaicha yaputang xua Nakom tamrópata pítaba xua wüünaeya beta paka kana jüntükoyene éxana. Baxua Nakom paka kana jüntükoyene éxana dukuanaebiyaena beya poxonae Nakom wüünaeya paka kana jüntükoyene wétsina poxonae po matakeitha Jesucristo patopáetsika. ⁷Baxua jame inta wüünae xua tapaka yábara nantaxeináewatsi, tsipéi bichokono paka antobetsi. Poxonae bekein ánoxuae jiwí pekübibotha neeta, yáwano poxonae bekein kaena báyatha pekapane-nebiyáe jume diwesi yábara jumeyawenaeya kueikueijang jíwíwitha, yáwano xua jíwíwitha tsita itapeñaxeingang xua bárapo diwesi bara pexaiñéi jume diwesi, bapoxonae bara pana nebarü atenem. Daxota poxonae Nakom amanaya neyawena poxonae átene neéxana ichamonae pía taneantobexae Nakom, írürü Nakom amanaya paka yawena pía paka nekaantobexae poxonae paka átene éxana ichamonae. ⁸Nakom yaputane xua bichokono bara paka antobetsi daxita paxam, icha Jesucristo ichi xua daxita paka ántobe. ⁹Yáwano Nakom paka tsiwüükatsi xua ekeicha matowa mataropeicha paiña nepaka katsinexa peantobewa. Yawa múxuna wüükang xua Nakom paka kana exanaena xua paiña neyábara yaputaewa daxita koyenewang. Matáütano múxuna wüükang xua Nakom paka kana exanaena xua

paiña neitapetsiwa pókotsi koyene xua betiya paka kana exanaena. ¹⁰Bapoxonae payaputáename xua itapetsiya paexanáename pókotsi koyene bichokono wüünae. Bapoxonae bichokono pajüntükoyene wüünae jinompáename. Yáwano poxonae Cristo patopáetsika bapong jopa paka yábara paebí tsane xua panatsikuéntame abe paiña neexanaewang. ¹¹Paka tsiwüükatsino xua Jesucristo paka nekajüntükoyene yüüka exanaenexa, xua po jüntükoyene bichokono wüünae, xua daxota paiña neexanaenexa pokotsiwa xua bichokono Nakom tsita wüünaetsi. Poxonae jiwi baxua paka kuitaena bapoxonae jiwi Nakom wüünae jaintsinchi jei tsane: “Maisha Nakom paka barükui-iturajínatsi, xua jiña neexanaexae bárapo jiwi pía jüntükoyénetha tatsi”, jei tsane bárapo jiwi.

**Meje poxonae Pablo namchi: “Xua tapoponáe
koyenewa bara ápara Cristo nexa”, jei**

¹²Tamonae pam, pomonae irü paiña nejumekowüntsixaé Jesús, ichichipang xua paiña neyaputaewa tsane xua pokoyene poxonae nekana éxana ichamonae xua jiwi pekübibotha neeta tayábara kueikueijeixae Jesucristo. Baxua tana nekana exanaexae ichamonae jiwi tajü jumetane Nakom pía pekapanenebiyáe jume diwesi tatsi. ¹³Daxota daxita soldadomonae pomonae xote umene pomonae peyapue-enaewi pepa pentakaponaein píabo tatsi írürü seikáyano ichamonaerü, daxita barapomonae yaputane xua xang jiwi pekübibotha neeta tapaebi dukuanaebiyae-xae Cristo nexa. ¹⁴Pin bicheito, pomonae pejumekowüntsiwi Nakom, barapomonae netane xua jiwi pekübibotha ékang. Daxota barapomonae bichokono ichichipa xua pekueikueijiwa Nakom Pejume Diwesi. Barapomonae jopa junuwiyo xua kuitsakatsakapiya pekueikueijiwa Nakom Pejume Diwesi, tsipéi bichokono jumekowüntatsi pong jiwi Pekanamataxeinaein.

¹⁵Ichamonae Cristo yábara kueikueijeichi ápara poxoru saya tana neuwixae, tsi-péi ichichipa xua jiwi barükui-iturajinaena barapomonaetha, beyakaincha xua tana nebarükui-iturajinaewa tsane bárapo jiwi. Íchitha jame, ichamonae beta xaniwaicha yábara páebatsi Cristo, pejüntükoyene wüünaexae. ¹⁶Barapomonae baxua éxana taneantobexae peyaputaexae xua jiwi pekübibotha ékang tayábara jumeyawenaeya kueikueijeixae Cristo pía pexeña jume diwesi tatsi poxonae ichamonae abe yábara paeba bárapo diwesi. ¹⁷Pomonae Cristo yábara páebatsi tana neuwixae, saya ápara poxoru peasiwixae xua ichamonae tana nepunaponaewa tsane. Baxua éxana poxoru ichichipa inta bichokono ayapubé éxana tsipéi ánoxuae ékang jiwi pekübibotha. ¹⁸Bekein jiwi Cristo xaiñeya yábara páebatsi poxoru tana neantobexae, ichakuitha metha tsipae poxoru tana neuwixae baxuang bápana jopa netsita aiñakuiyiyo. Saya jame poxonae ba jiwi Cristo yábara páebatsi, baxua ba jame bichokono nejüntükoyene weiweina éxana.

¹⁹Yawa ekeicha bichokono nejüntükoyene weiweina exanaponaena, tsipéi yaputang xua painta wüükame nawita Nakomtha. Yawa yaputang xua Jesucristo pía Pejumopetünaxü tatsi neyawena, pebaxuaxaebe bara Nakom nekapanepaena pomonae tana neaitafáetabi jiwi weya. ²⁰Pokotsiwa xua taichichipaewa yáwano pokotsiwa xua tawüünae ewatsiwa, xua bápana jopa takoutha naakaurang tsane tajunuwixae xua tayábara kueikueijiwa Cristo. Jame bewa yábara kuitsakatsakapiya kueikueijang tsane Cristo, ánoxuae, yawa xua bexa tsáneno. Ichichipang xua jiwi beta jumekowüntsina xua poxonae netane xua beta tapoponaewa Cristo nexa.

Bapoxonae jiwi Cristo barükui-iturajinaeinchi poxonae nekuitaena xua beta wüünaeya póponang Cristo nexa. Baxua jiwi exanaena poxonae bekein asüü poponaethang tsane, xua Cristo tatsita poponaewa yawa poxonae bekein tüpae-thang tsane xua Jesucristo tayábara kueikueijeixae. ²¹Jame pokotsiwa netsita wüünae ápara xua jiwi Cristo barükui-iturajínatsi, xua Cristo tatsita poponáewaxae. Íchitha icha tüpaein Cristo taein, baxua netsita wüünae bichokono, beyakaincha xua poxonae abü kataunxuae póponang, tsipéi Cristo taein. ²²Áwiya kataunxuae póponang daxota neitaküüpa xua áwiya tanakuichiwa pokotsiwa pewüünae koyenewa pong jiwi Pekanamataxeinaein nexa. Jopa yaputaeiño xua bárapo naxobe koyenéwabe jíwana itapetokuaein. ²³Inta bichokono ayapubé xua bárapo naxobe koyenéwabe jíwana itapetang. Ichakuitha saya be tüpaein xua tapoponaenexa tsane ichaxota Cristo pópona, tsipéi baxua jame inta bichokono wüünae. ²⁴Dáichitha ichakuitha jame bichokono inta aiñakuí xua áwiya tapoponaewa tapaka kayawenaenéxatsi. ²⁵Íchitha yaputang bara, xua áwiya póponang xua tapaka yawenaenéxatsi xua áwiya paiña nejumekowünta dubenanaebiyaenexa Cristo. Matáütano yaputang xua bichokono ekeicha matowa paiña nejüntükoyene weiweina tsozonaenexa tsane. ²⁶Daxota poxonae paka siwaponanaena ponaeinchi Cristo Jesús wüünae pajainchíname xua ekeicha tapaka kasiwaponaxaetsi tsainchi.

²⁷Saya beta wüünaeya painómpare wanaka itorobixae Cristo pejume diwesi tátsitha. Daxota icha bekein paka siwaponanaena ponaeinchi, ichakuitha icha tajü ékang, maisha ichichipang xua ichüng yábara benetsipaebina xua beta paiña nejinompaewa. Bejumetaein xua wüünaeya beta ajüntüyapustusüüya pajumekowünta dubenanaebíyame Nakom. Matáütano bejumetaein xua kaemonae pebürüya jumedangweya pana nabarü kueikueijam paiña nejumekowüntsiwa Cristo. ²⁸Jopa paju-nuwinde poxonae imoxoyo abe paka exaneiba paiña nepaka ka-aitafaetabí jiwi. Baxuang barapomonae éxana be tsita itapeiñaxeina xua barapomonae werawerakaena xua poxonae po matakeitha poxonae Nakom yábara paebina jiwi xua penatsikuentsiwa abe peexanaexae xua irü Nakom paka kapanenebiyaena bárapo matakeitha. ²⁹Nakom pexeíña koyene paka kata paiña netanakuichinexa Cristo xua poxonae pajumekowüntame bapong, matáütano xua poxonae ichamonae paka átene éxana poxonae ichamonae abe paka yábara paeba paiña nejumekowüntsi-xae bapong. ³⁰Waxainchi bara nantajüpaya jumekowüntsiya dangweya páebatsi Nakom Pejume Diwesi. Baxua éxanatsi icha be pókotsi koyeneya ichi poxonae báyatha pana netáneme xua poxonae jumedangweya páebang Nakom Pejume Diwesi, matáüta xua poxonae bara pana neyábara jumetáneme xua áwiya kataunxuae exanaponang bárapo koyeneya.

Meje yábara xua Cristo peakopeibin piakoutha náexana, xua jopa peaiñakuí jintoiño

2 ¹Payaputáneme xua Cristo paka jüntükoyene tsakáraba xua beta paiña nejinompaenexa. Matáütano payaputáneme xua Cristo paka matateika pía paiña nepaka kaantobexae poxonae ichamonae abe pákata éxana. Matáütano payaputáneme xua Nakom pía Pejumopetünaxü tatsi paka barü jinompa. Matáütano payaputáneme xua bapong paka ántobe. Matáütano payaputáneme xua Cristo nantanuweya paka yábara nantaxeina pía paka nekayawenaenexa.

²Icha daxita bárapo pexaiñéi koyenein payaputáneme, bichokono pana nejüntükoyene weiweina éxande. Baxua painta exanáename poxonae kaemonae jüntema pajinómpame, xua kaemonae nantiya pana naántobem. Matáütano baxua painta exanáename poxonae xua kaemonae nantajüpaya pana nabarü nantaxéiname yáwano poxonae nantajüpaya ichipaeya paéxaname. ³Jopa paexanaeinde xua pokotsiwa be paasiwam xua saya meisha paiñakoutha nexa. Jopa paxeinaeinde pokuikoyene xua jiwi peabéi koyene. Jame maisha paiñakoutha pana nayábara nantaxéinare xua pomonae pekuipawi jiwi pam. Jame maisha sáyano ichamonae pakuiyábara nantaxéinare xua pepa peaiñakuimonae xua beyakaincha paxam. ⁴Jopa bewa panantaütsim paiñamonae jintong pong saya ichichipa nawita xua saya meisha penata exanaewa pewüünae koyene. Jame bewa múxuna bapong taéxanae ichamonae pokotsiwa xua ichamonae tsita pexeiña koyénetsi. ⁵Paxam beta pebürüya panantajüpaya nantaxéinare icha Cristo Jesús ichi xua poxonae beta ba nantaxeina. Bapong bara iche:

⁶Bapong Cristo peyakuiyajinaein Nakom.

Bapong bekein barápara Nakom,

dáichitha bapong jopa piakoutha ichichipaeya dangweya botsiyo bárapo koyenewa xua peyakuiyajüpaejinaein icha Nakom ichi poxonae patopeika po kae pin nákuathe tsike.

⁷Dáichitha bárapo koyene naitematsiya kuenta pona.

Bapong Cristo be jintong yakuiya nakatsiwa po kae pin nákuathe tsike xua Nakom amanaya petanakuichinéxatsi xua piakoya peichichipaexae.

⁸Poxonae bapong nakatsiwa po kae pin nákuathe tsike bara yatsikaya be jintong koyene.

Bapoxonae piakoutha nakana éxana be pong peakopeibin xua jopa peaiñakuí jintoiño.

Bapong éxana pokotsiwa Nakom itoroba poxonae jejéi xua tüpa pekana exanáewatsi ichamonae,

bekein bárapo petüpaewa bichokono pin ura éxanatsi xua tüpa náetotha.

⁹Daxota Nakom, Cristo bichokono barükui-iturajínatsi poxonae Nakom athabé juiña éxana xua Cristo athabé juiña éxanatsi.

Matáütano Nakom barükui-iturajina,

Cristo barükui-iturajínatsi poxonae Nakom bapongtha wüngduta, po wüng xua jei:

“Pepa Pekanamataxeinaein”, jei.

Bárapo wüngtha Jesús kópatatsi xua bara pekanamataxeinaenexa pía peayapusúü itorobi koyenéwatha daxita karepaya jiwi, matatsunpíwithano.

¹⁰Nakom bárapo wüng kata xua daxota daxita jiwi poxonae jumetaena bárapo wüng pentabokotongtha umenaena,

xua Jesús wüünae pejainchinexa tsainchi,

pepa Pekanamataxeinaeinxae itabokopiwi,

írürü po irathepiwi,

írürü pomonae jinompa ira büxüpana wétsina.

¹¹Daxita barapomonae Nakom wüünae jainchinchinchi pong Nakom, Waxa, jei tsane:

“Maisha, Nakom paka bariükui-iturajínatsi, tsipéi bapong Jesucristo bara yatsikaya pong pepa Pekanamataxeinaein jiwi”, jei tsane daxita barapomona.

Meje yábara xua ichamona, Nakom pejumekowüntsiwi beta kuiyaputainchi

¹²Tamona pam paxam pomona bichokono tapaka kaantobéwichi pam. Tsipéi báyatha pana nejumekowüntéibame pokotsiwa paka itorobéibatsi poxona paka barü ékatsi, daxota ánoxuae nama bichokono pana nejumekowünde beyakaincha xua poxona imoxoyo paka barü ékatsi bekein tajü ékang. Áwiya kataunxuae karepaya daxita paxam barompaya paéxana dubenanaebíyama pokotsiwa wüünae xua pokotsiwa Nakom ichichipa xua Nakom paiña nepaka kapanepaexae. Pana najüntükoyene aura éxande xua jopa paatsakande. Yáwano pana najüntükoyene junuwa éxande Nakomtha, abe paiña neexanaeyainwa. ¹³Bapong Nakom paka kana jüntükoyene yawena xua paiña jüntükoyene jumebarü jejéi pokotsiwa Nakom paka itoroba. Matáütano Nakom paka yawena xua paiña neexanaewam pokotsiwa Nakom ichichipa.

¹⁴Daxita koyenewang poxona paexanéibame jopa paexanaeinde pokotsiwa anaya paiña jüntükoyenéwatha payábara páebame ichamona. Matáütano jopa payábara najumematsontsonobinde baxua poxona Nakom pata exanéibame. ¹⁵Bapoxona poxona jiwi paka kuitaena, bárapo jiwi jopa abeya paka kuiyábara paebí tsane xua paiña nenatsikuentsiwa xua abe paiña neexanaexae. Matáütano paka kuitaena xua jopa ajüntükoyenebeya pajinompam. Jame maisha painómpare be Nakom piamona tatsi koyeneya. Matáüta jopa abe paexanaeinde xua icha pomona ánoxuae paka barü jinompa pomona pemu-xitorobiwi xua pomona peantükuiruyapubewi xua poxona abe éxana dubenanaebiya. Icha paxam beta pajinómpame barapomona peitütha tatsi, bara paka tane xua bara beta pajinómpame bekein abe peéxanae jiwi nataetha, icha be pókotsi jüta koyeneya ichi xua opitéi ba potong pentha tsurubena poxona kirei tsungkuae, bara ba jiwi tane bárapo opitéi bekein kirei tsungkuae taetha. ¹⁶Dangweya pajumekowünta dubenanaebíyama po diwesi jiwi ajüntüyapusúü éxanatsi. Daxota poxona Cristo patopáetsika bichokono paka weyataeinchi tajüntükoyenewatha beta xaniwaichiya paiña nejinompaexae Nakom nexa. Bapoxona yaputaein xua xaniwaicha bara beta paka yawénatsi xua paiña nejumekowüntsiwam. ¹⁷Bekein metha jiwi nebexubina xua tapaka kayawenaexaetsi, xua paiña nejumekowüntsinea, dáichitha áwiya jüntükoyene weiweinang, írürü paxam paka kayawa jüntükoyene weiweinaeinchi. ¹⁸Daxota paxam bewa pana nebarü jüntükoyene weiweinaename, bekein tüpaein xua tapaka kayawenaexaetsi xua paiña nejumekowüntsinea.

Meje Timoteo yábara irü xua Epafrodito yábara

¹⁹Icha Jesús pong jiwi Pekanamataxeinaein ichichipaena, methaunxuae itorobin Timoteo paiña nepaka kataenexa tsane. Bapoxona jüntükoyene weiweinaein xua poxona paka yábara jumetaeinchi xua netsipaebina Timoteo. ²⁰Tsipéi ichüng aibi pong paka siwaponana yábara nantaxeina icha xang ichin. Saya meisha bapong Timoteo bichokono paka siwaponana yábara nantaxeina xua beta paiña

nejinompae koyenewa icha xang ichin xua bichokono paka siwaponae na yábara nantaxéinatsi. ²¹Ichamonae saya itapetsiya yábara nantaxeineiba barompaya pía peéxanae koyenewang. Barapomonae jopa nantaxeinaeyo xua pokotsiwa Jesu-cristo pía petaexanáewatsi koyenewang tatsi. ²²Paxam patáneme xua Timoteo neyawena xua pekueikueijejwa Nakom Pejume Diwesi, icha be koxiyüing ichichi xua poxonae pexanto yawénatsi. ²³Xua poxonae yaputaein xua ichamonae nekana exanaena, bapoxonae beitorobin Timoteo xua pía paka nekataenexa. ²⁴Jumeko-wüintang pong jiwi Pekanamataxeinaein xua nekópata xua irü methaunxuae paka siwaponae na ponaeinchi.

²⁵Matáütano nantaxeinang xua bewa pákata itorobinchi Epafrodito, pong be taeweicho tatsikotaein, irü pejumekowüntsixae Jesús, pong taneyawenaein xua kueikueijang Nakom Pejume Diwesi. Bapong jumedangweya pakuidú-bangbe poxonae bekein ichamonae abe yábara paeba Nakom Pejume Diwesi. Bapong Epafrodito, pong báyatha painta itoróbame xua taneyawenaewa tsane pokotsiwa nantawénonang. ²⁶Maisha bichokono bapong be paka taena daxita paxam. Bapong bichokono jüntükoyene wekoyéi tsipéi pinae paxam payábara nantaxéiname, pinae pajam: “Maisha bichokono Epafrodito nákata átene tsokúae”, pinae pajam. ²⁷Bara xaiñéi, bapong báyatha bichokono átene bara muxu petüpaé. Dáichitha Nakom nantanuweya yábara nantaxeina xua Epafrodito axaibi peexanaewa tsainchi. Matáütano Nakom irü nantanuweya neyábara nantaxeina xua jopa bichokono tajüntükoyene wekoyeiwa tsane icha bapong petüpaexae tsipae, xua beyakaincha jüntükoyene wekoyang poxonae xua kopiya, xua poxonae saya átene. ²⁸Daxota bichokono ichichipang xua bapong naiña pákata itorobinchi. Bapoxonae pajüntükoyene weiweináename xua ekeicha paiña netaexae tsane bapong. Matáütano bapong itorobin xua jopa tapaka yábara jüntükoyene wekoyeinéxatsi. ²⁹Moya bara bichokono pantenta jüntükoyene weiweinaeya jakóbare Epafrodito xua pepatopaexae, pong jiwi Pekanamataxeinaein peitorobixae. Epafrodito beta pabarükui-iturajínare. Bara paichinde ichamonaetha, pabarükui-iturajínare pokotsimonae icha bapong ichi. ³⁰Bapong bara muxu pebexubichi xua Cristo petanakuichixaetsi. Bapong penapepeichíwatha náexana, inta pewetsinexa pokotsiwa xua jopa paka itaküüpaeyo xua painta éxaname.

Meje yábara xua pokoyene pepa pejüntükoyene wüünaewa

3¹Tamonae pam, pomonae irü paiña nejumekowüntsixae Jesús, pajüntükoyene weiweínare pong jiwi Pekanamataxeinaein pía pákata exanaexae. Jopa afaetabiño xua ekeicha jüpa matowa tapákata tináewatsi pokotsiwa báyatha pákata tínatsi. Bara ápara baxua paka yawena xua beta paiña netsita jinompaenexa Nakom. ²Dota pam pomonae peantükoyénebe jiwi yáwano xua abe peexanaewi. Matáüta dota pam pomonae judiomonae pía kuikoyeneyatha tatsi paka itoroba xua paiña nenawithabiwam pokoyene xua pawithábame pebiwi xua ichaxota nareixakaena. Barapomonae nantaxeina xua icha baxua exanaena Nakom kapanenebiya exanaena. ³Waxainchi xaniwaicha barapomonaetsi pomonae yatsikaewa Nakom watsita jüntükoyene wüünaewichi, tsipéi Nakom pía Pejumopetünaxü tatsi naka yawena xua jumekowüntatsi watanakui-chinexa Nakom. Matáütano wajumekowüntsixae Cristo Jesús, daxota bapongtha

wüünae jáintatsi pía wanákata exanaexae. Waxainchi jopa nantaxeinaetsi xua poxonae ichamonae naka withaba, bárapo koyene naka jüntükoyene wüünae éxana Nakomtha. ⁴Icha pebiwi itaküüpaetsípatsi xua jumekowünta xua piakoutha nakapanenébiya, barapoxonae irü xang neitaküüpáetsipa xua jumekowüntang xua takoutha tanakapanepaewa beyakaincha xua bárapo pebiwi. Íchitha pebiwi irü xang, jopa pana neitaküüpaeyo xua pana nakapanenebiyang pata koutha. ⁵Kaena báyatha takoutha nantaxeinang xua takoutha tana nakapanepaewa pokotsiwe taexanaexae. Poxonae náexanang ocho po matakábitha newithaba. Matáütano xang bara israelmonae pía saineiwi jíwanang. Matáütano Benjamín piamonae tatsi jíwanang tsipéi pía pemómoxi susato jiwi jíwanapin tatsin. Matáütano yakuiya náexanang xua hebreo jume takueikueijeíwa, taxa irü taena hebreo jume pepaebiwixae. Matáütano báyatha fariseomonaepin náexanang, xua daxota daxita koyeneya beta wüünaeya éxanang be pókotsi koyeneya Moisés pía peitorobi koyenéwatha itoroba. ⁶Bichokono jumekowüntang pokotsiwang fariseomonaepin pía pekuidubi koyenewang tatsi. Daxota abe éxanang pomonaetha, pomonae Jesús pejumekowüntsíwichi. Tsipéi daxita koyenein éxanang pokotsiwa Moisés pía peitorobi koyenewa itoroba, daxota nantaxeinang xua yatsikaewa jüntükoyene wüünae Nakomtha xua jopa xei-naeiño tanatsikuentisiwa xua abe taéxanae koyenewa. ⁷Daxita pokoyenein xua báyatha inta netsita aiñakuí, porukae jopa daichiyo. Ánoxuae netsita akoyenebé bárapo koyenein, tajumekowüntsínexa Cristo. ⁸Matáütano daxita inta newepu napuxana pokotsiwa xua báyatha nantaxeinang. Xua yaputang Cristo Jesús Tanekanamataxeinaein, baxua jame inta wüünae bichokono beyakaincha xua daxita pókotsi koyenewang kopiya báyatha xeinang. Cristo Pejume Diwesi takueikueijeixae daxita newepu napuxana pókotsi koyenewang báyatha xeinang. Bárapo koyenein yábara nantaxeinang, xua bárapo koyenein abe, be pokotsiwa jiwi xuba pokotsiwa abe. Pokoyenein xua kopitha xeinang bárapo koyenein pentang tanantaütsínexa Cristo pong Tanekanamataxeinaein. ⁹Ichichipang xua be kaein náexanang Crístotha xua tajüntükoyene Nakom petsita-wüünaenéxatsi bapong pía tana nekana exanaexae bárapo koyene. Bárapo koyene nekana éxana Nakom, jopa poxóruyo xua tajumekowüntsíxae Moisés pía peitorobi koyenewa xua daxota tajüntükoyene wüünae Nakomtha. Jame bárapo koyene nekana éxana Nakom xua be kaein náexanang Crístotha, poxonae jumekowüntang, poxoru Nakom tanekatsíxae pejüntükoyene wüünaewa. Barapókotsi koyenewa ba Nakom kata jíwitha pomonaetha, pomonae pejumekowüntsiwixae. ¹⁰Pokotsiwa taichichipaewa báraxua xua ápara jame tayaputaewa Cristo. Matáütano be yaputaein peyapusúü itorobiwa, po peyapusúü itorobi koyenéwatha Jesús asüü exainchi bárapo petüpáe kuirukoyene weya. Bekein ichamonae átene neexanaena, icha Cristo ichichi xua poxonae átene éxanatsi ichamonae, dáichitha áwiya kataunxuae ichichipang xua taexanaewa pokotsiwa xua Nakom ichichipa. Poxonae Jesús tsitüpa jiwi, barápara éxana pokotsiwa Nakom ichichipa, jopa exanaeyo xua pokotsiwa bapong piakoutha ichichipa. Xang bara jüta ichiya ichichipa éxanang xua pokotsiwa Nakom ichichipa. ¹¹Yáwano ichichipang xua baxuang exanaein beya poxonae Nakom asüü neexanaena po mataketha Nakom asüü exanaena petüpáe kuirukoyene weya pomonae irü pejumekowüntsiwixae.

**Meje yábara xua po pentoma Nakom pía wanaka
katsiwa, jüntema beta waexanaexae**

¹²Jopa paebiño xua xeinang bárapo koyene, pokoyeneyatha xua Nakom asüü neéxana petüpáe kuirukoyene weya. Matáütano jopa paebiño xua Nakom báya-
tha xaniwaicha jüntükoyene wüünae neéxana xua jopa daxota abe taexanaewa.
Dáichitha áwiya yábara nakuichiya éxana dukuanaebiyang xua taxeinaenexa
bárapo koyenewa tsipéi Cristo Jesús kopiya neéxana be piamonae jintong tatsin.
¹³Tamonae pam, pomonae irü paiña nejumekowüntsixae Jesús, paka tsipáe-
batsi xua jopa kataunxuae baxua wetsiño xua tajüntükoyene bara xaniwaicha
báyatha nejüntükoyene wüünae éxana xua jopa xeinaeyo peabe koyenéwiyo.
Íchitha bara saya kae koyene éxanang. Jüntemainang xua pokotsiwang báya-
tha éxanang, saya meisha bichokono yábara nakuitang pokotsiwa bexa tsane
xeinaein. ¹⁴Bichokono ajüntüyapusüüya éxana dukuanaebiyang xua pokotsiwa
Nakom ichichipa, beya taxeinaenexa po pentoma pokotsiwa Nakom naka katsina
poxonae naka wabina pía nakua beicha kaemonae wayawa jinompaexae Cristo
Jesús.

¹⁵Daxita waxainchi, pomonaetsi xua báyatha beta yábara yaputaetaepoinchi
wajumekowüntsiwa Nakom, waxainchi bewa yábara nantaxeinaetsi pokoyene
xua waxainchi kataunxuae abü jopa xéinatsi po jüntükoyene xua yatsikaya
wüünae xua daxota jopa abe exanaetsi. Dáichitha icha paxam, icha koyeneya
payábara nantaxéiname pokotsiwa xuaunxuae paka tsipáebatsi, bapoxonae
Nakom yábara paka yaputane exanaena baxua. ¹⁶Dáichitha waxainchi bewa
áwiya jumekowünta dubenanaebiyaetsi pokotsiwa báyatha Nakom naka yapu-
tane éxana.

¹⁷Tamonae pam, pomonae irü paiña nejumekowüntsixae Cristo Jesús, pae-
xanaponde icha ichin pokotsiwa xua exanaponang. Beta pakuitaema poxonae
pomona xua jinompa xua poxonae exanapona, icha pókotsi koyeneya paichin
poxonae paka kuidúbatsi. ¹⁸Báyatha matowa paka tsipáebatsi. Ánoxuae ekeicha
paka tsipáebatsi, beya nama wekoyeya paka tsipáebatsi. Paka jeichi: “Pinmonae
jinompa pomona aichaxaibi po diwesi pokoyene xua Cristo náetotha tsitüpa
jiwi”, paka jeichi. ¹⁹Nakom barapomona werawéraka exanaena. Barapomona
saya yábara nantaxeineiba penabanaewa xua matáütano pokotsiwa Moisés pía
peitorobi koyenéwatha itoroba xua bárapo pexaewa yábara. Barapomona yábara
átsaka pókotsi koyene bekein barapomona bewa ita-aura tsane baxua. Dáichitha
barapomona jopa yábara ita-auriyo baxua. Saya barapomona yábara nantaxeina
nawita pokotsiwang xua xeina po írathe. Jopa yábara nantaxeinaeyo pokotsiwang
xua Nakom nexa. ²⁰Íchitha nama waxainchi Nakom pía nakua tatsipíwichi. Áno-
xuae waxainchi éwatatsi xua patopáetsika itaboko wétsika pong jiwi Pekapane-
nebiyaein, pong jiwi Pekanamataxeinaein, bapong Jesucristo. ²¹Wapepong, po
pepong jopa wüünaetsi, po pepong átene yawa xua tüpaena bapong ekeicha icha
pepong naka exanaena, pókotsi pepong icha Cristo ichi xua po pía pepong tatsi
bichokono xeina pexeiña peitüpanáe koicha, xua po pía pepong tatsi jopa ate-
neyo, yawa xua jopa tüpaeyo. Baxuang Cristo nákata exanaena pía peayapusüü
itorobi koyenéwatha, po peayapusüü itorobi koyenéwatha itakúüpatsi xua daxita
pekanamataxeinaewa.

**Meje yábara xua Pablo jei: “Ataya pajüntükoyene
weiweinébare pong jiwi Pekanamataxeinaeintha”, jei**

4¹Tamonae pam, pomonae irü paiña nejumlahewüntsixae Cristo Jesús, paxam pomonae bichokono tapaka kaantobéwichi pam. Bichokono ichichipang xua tapaka kataewa tsainchi. Paxam pomonae bichokono pana nejüntükoyene weiweina éxaname. Matáütano paxam pomonae Nakom nekata paiña nejumlahewüntsixinexa Jesustha xua be tana nematomatsiwa, xua neyaputane éxana xua bara éxanang pokotsiwa wüünae poxonae tanakuitang bapong. Tamonae pam, paxam pomonae tapaka kaantobéwichi pam. Áwiya beta pajumlahewünta dubenanaebíyama pong jiwi Pekanamataxeinaein.

²Itorobang powa pewüng Evodia, ichawáyono xua powa pewüng Síntique xua barapowáyobe ekeicha penaitakoxonaenéxabe xua be yatsikaewa kaemonae jito-wayo penaexanaenéxabe pong jiwi Pekanamataxeinaein piamonae jitowáyobexae tatsi. ³Xam pongxaem yatsikaewa tanebarü nakuichim Nakom Pejume Diwesi, kaitoróbatsi xua barapowáyobe neyawenaenexa tsane. Barapowáyobe báyatha neyawénabe poxonae kueikueijang Nakom pía pekapanenebiyáe diwesi. Barapoxonae barapowáyobe, irü Clemente irü ichamonaeno daxita barapomonae dangweya nebarü nakuita. Daxita barapomonae wüngdúbatsi diborotha po diborotha xua Nakom kapanenebiya tsaibi jiwi xua jiwi pekatsibeibinéxatsi peajüntüyapusüüwa poxonae wüngdubeiba bárapo diborotha, xua Nakom pía díboro tatsi.

⁴Paka jeichi: “Ataya patsita jüntükoyene weiweinébare pong jiwi Pekanamataxeinaein”, paka jeichi. Ekeicha paka jeichi: “Ataya patsita jüntükoyene weiweinébare”, paka jeichi. ⁵Bárabü beta pajinompáename xua daxita jiwi paiña pía paka yábara yaputaenexa xua bara paxam pomonae peajüntükoyene wüünaewi pam, tsipéi imoxoyo patopáetsika pong jiwi Pekanamataxeinaein.

⁶Jopa payábara nantaxeinaeinde nawita pokotsiwa ba paka jüntüdeideijéi éxana. Jame maisha Nakom patsipaebéibare daxita koyenein yábara. Nakom yábara pawüükéibare daxita koyenein. Matáütano payábara jakobéibare Nakom poxonae pokotsiwang paka katsibeiba, pokotsiwang xua panantawénoname. ⁷Barapoxonae Nakom paka jüntükoyene jüntemiya jinompa exanaena. Bárapo jüntemiya jinompáe koyenewa jiwi ba jopa yábara yaputaeyo, tsipéi bichokono pexeíña koyenewa. Bárapo jüntemiya jinompáe koyenewa paka jüntükoyene eenaena. Matáütano paka eenaena xua daxota beta paiña nenantaxeinaewa tsane. Baxua paka kana éxana paka nekayawa jinompaexae Cristo Jesús.

**Meje yábara poxonae Pablo jei: “Payábara nantaxéinare
daxitang pokotsiwang xua wüünae”, jei**

⁸Tamonae pam, pomonae irü paiña nejumlahewüntsixae Jesús, paka tsipáebatsi nama ánoxuae pokotsiwa xua tabüdukua paka tsipáebatsi pokotsiwa xua nama-wetang. Payábara nantaxéinare daxitang meje xuaje pokoyenein: pokoyenein xua pexaiñeiwang, matáütano pokoyenein xua jiwi yábara nantaxeina xua pewüünaewang, matáütano pokoyenein xua xaniwaichiya pekana exanaewang, matáütano pokoyenein xua Nakom petsita-exanáewatsi pexeíña jüntükoyenein, matáütano xua pokoyenein pexeíña peitüpanáe koyenewang, matáütano pokoyenein xua jiwi peyábara barükui-iturajinaewang. Matapaiña payábara nantaxéinare daxita

koyenein pokoyenein Nakom tsita koyenewüünaetsi, matáütano daxita pokoyenein jiwi bewa wüünae jainchina xua bárapo koyenein pewüünaexae.

⁹Paexanaponde pokoyene xua paka kuidúbatsi xua daxota panejumejejam. Paexanaponde pokoyene xua panejümetáneme xua kueikueijang. Matáütano paexanaponde pokoyene xua pana nekuitáneme xua éxanang. Bara baxuang paexanaponde bapoxonae Nakom pong peyawajinaein jüntema pepoponáe jüntükoyenewa, bara bapong paka yawa poponaena.

Meje yábara parátixi po parátixi jiwi kata Pablo nexa

¹⁰Tsita jüntükoyene weiweingang pong jiwi Pekanamataxeinaein xua matapaiña ekeicha tapana neyábara nantaxeinaewam. Báyatha bekein pana neyábara nantaxéiname, dáichitha jopa paka itaküüpaeyo xua tapana neyawenaenexam. ¹¹Jopa paka tsipaebichi xua ichawa yábara pokotsiwa tanantawenonaewa, tsipéi báyatha takoutha yábara nakuidubang xua jüntema tapoponaewa pokotsiwa xua xeinang bekein inta akoibi ichawa. ¹²Yaputang xua beta póponang poxonae bekein be pong taakopeibin. Matáütano yaputang xua beta póponang poxonae nawita taxei-naein. Báyatha nakuidubang xua jüntema tapoponáe koyenewa nexa tsane bekein tonsanang, yáwano bekein ichakuitha jainpeibang. Nakuidubang xua jüntema tapoponáe koyenewa nexa tsane bara bekein xeineibang beyakaincha pokotsiwa tanantawenonaewa, yáwano ichakuitha bekein inta aibi pokotsiwa xua tanantawenonaewa. ¹³Neitaküüpa xua daxita taexanaewa tsipéi Cristo nekata pía peantü-yapusüüwa. ¹⁴Dáichitha paxam bichokono wüünae painta éxaname poxonae pana neyawéname tapana nesiwamxae poxonae ichamonae jopa wüünaeya nekana exanaeyo.

¹⁵Paxam Filipos tomarapiwi pam, payaputáneme poxonae kopiya tamrópata pítabang xua kueikueijang Nakom Pejume Diwesi, barapoxonae meisha paxam parátixi pana nekatapóname poxonae Macedonia nakua weya ponang. Icha tomarapiwi pomonae pejumekowüntsiwi jopa nekatsiyo parátixi. Bárapo parátixi pana nekatapóname be pentoma painta éxaname yábara tapana netsipaebinexam pokoyene xua tapaka kayawenáewatsi paiña nejumekowüntsiwanexa Nakom. ¹⁶Poxonae kataunxuae Tesalónica tómaratha póponang, paxam painta itoróbame parátixi. Bapoxonae ekeicha kotakaya painta itoróbame icha parátixi xua takana-nantawenonaenexa. ¹⁷Paka tsipáebatsi baxua jopa poxóruyo xua saya taichichipaexae ekeicha xua tapane-katsiwam tsane icha parátixi. Jame ápara poxoru ichichipang xua paxam bexa paxeináename po pentoma xua Nakom paka katsina tapana neyawenaemxaem. ¹⁸Báyatha matowa pana nekátame beyakaincha pokotsiwa xua nantawénonang. Pókotsi parátixi painta itoróbame xua inta kápona Epafrodito, baxua inta bichokono nawita beyakaincha xua pokotsiwa nantawénonang. Barapokotsiwa pokotsiwa painta itoróbame, Nakom bichokono ichichipa. Nakom baxua ichichipa icha ichi poxonae bichokono ichichipa po petúxusi tuxueiwa jiwi túxusi éxana Nakom nexa, yawa xua poxonae po duwéi petautsiwa xua túxusi éxana Nakom nexa. Bárapo pekana exanáe koyenéwabe Nakom tsita koyenewüünaetsi, yawa jüntükoyene weiweina éxanatsi. ¹⁹Ta Nakom paka katsina daxita pokotsiwa xua panantawénoname, tsipéi bapong bichokono kopei pexeinaein pokotsiwa xua bichokono peitüpanaewa. Paka katsina baxua paiña neyawa jinompaexae Cristo Jesús. ²⁰¡Bárabü jiwi, Nakom pong Waxa, ataya wüünae jainchinchí! Je, bara ichi tsane.

Meje yábara xua Pablo najumeweta bárapo carte

²¹Painta jakóbare pomonae baxotiya jinompa pomonae Jesucristo pejumekowüntsíwichi pomonae yatsikaewa Nakom piamonae tatsi. Irü pomonae nebarü jinompa xote pomonae xua irü pejumekowüntsíwichi Cristo Jesús, barapomonae paka jakoba. ²²Írürü daxita pomonae Jesús pejumekowüntsíwichi pomonae yatsikaewa Nakom piamonae tatsi, pomonae po tomarathepiwi, barapomonae irü paka jakoba. Írürü paka jakoba pomonae romanomonae itorobiya pía pepa peewatsinchi piabotha tatsi tanakuítatsi. Barapomonae bichokono paka jakoba, beyakaincha ichamonae poxonae paka jakoba.

²³Bárabü Jesucristo, pong Wanaka namataxeinaein, daxita paxam paka pía paka nekaantobexae.

Baja Pablo.

Meje Po Carte Pablo Tatina, Colosas Tomarapiwi Tatínatsi

Meje yábara poxonae Pablo tamrópata pítaba xua tatina pomonae Colosas tomarapiwi tatínatsi

1 ¹Xang, Pablo, irü Timoteono, pong be paiña néyapin jintong patsikotáneme xua xangno irü pong be táyapin tsíkotang. Bapongbe, pangbe, paka jakóbatsi. Xang, Pablo, Cristo Jesús pía peitorobiwi tatsi jíwanang xua Nakom peichichipáewaxae. ²Bárapo carte pákata tínatsi pomonae paiña neenaewi Colosas tómaratha, pomonae Cristo pajumekowúntame, irü pomonaeno yatsikaewa wüünaeya Cristo peitabaratha paiña nejinompáewino. Bárabü Nakom pong Waxa, paka yawenaena pía paka nekaantobexae, yáwano jüntema jinompa paka exanaena.

Meje yábara poxonae Pablo Nakomtha tawüüka pomonae Jesús jumekowúntsiwi

³Poxonae Timoteo pangbe pákata wüükéibatsi Nakomtha, pong Jesucristo Paxa tatsi, pong Wanaka namataxeinaein, pajang tsaibinbe: “Nakom maisha pajüntükoyene weiwéinangbe xua barapomonae nekajumekowúntsixae”, pajang tsaibinbe. ⁴Baxua papaebéibangbe tsipéi báyatha Timoteo pangbe Epafras pana netsipaeba. Epafras namchi: “Colosas tomaramonae Cristo Jesús jumekowúnta jei, yawa ántobe ichamonaeno pomonae pejumekowúntsiwi Jesucristo”, jei Epafras. ⁵Paántobem ichamonae, pomonae pejumekowúntsiwi Jesús, yawa xua pajumekowúnta dubenanaebíyame. Baxua paéxaname tsipéi payaputáneme xua bexa tsane Nakom paka katsina xua pía nakuatheicha xeina, xua peantüyapusüüwa po peantüyapusüüwa jopa werawerakaeyo. Kaena báyatha yábara paka tsiwüünaeya muxuduta poxonae Nakom Pejume Diwesi pajumetáneme. Baxua ánoxuae kataunxuae paéwatame. ⁶Po diwesi xua pajumetáneme Nakom pía pekapanenebiyáe diwesi, bárapo diwesi pejume xaiñéiwa. Matáütano bárapo diwesi jiwi foforotapoinchi xua jumekokowúntapona, daxita karepaya tómarangtha bárapo kae pin nákuathe. Icha paxam paichim báyatha, bárapo diwesi paka foforotapona xua pajumekokowúntapóname poxonae aena pajumetáneme bárapo diwesi. Barichi payaputánemeno xua Nakom paka nekaantobewa xua áwiya kataunxuae paexanapóname. ⁷Bárapo Nakom pía pekapanenebiyáe diwesi xaniwaicha kaena báyatha Epafras paka tsipaeba. Bapong Epafras paantobein. Bapong Epafras xaniwaicha Cristo yábara kueikueijeichi. Bapong baxua painta exanapona xua pana yawenapona xua Timoteo pangbe pata ekaexaebe jiwi peküibotha. ⁸Epafras xote patopa. Bapong Epafras Timoteobe, pana netsipáebabe xua pinae paxam paántobem daxita pomonae Jesús pejumekowúntsiwi Nakom pía Pejumopetünaxü tatsi paiña nepaka yawenaexae.

⁹Bara kaena poxonae aena, poxonae pajumetangbe xua pinae Jesucristo pajumekowúntame, pomonae Colosas tomarapiwi pam, Nakomtha pákata wüükéibatsi.

Jopa seika paexaneibíñobe xua pákata wüükéibatsi Nakomtha, pajang tsaibinbe: “Nakom, yawende Colosas tomarapiwi yábara neyaputáe exanaenexa xua peexanaewa tsane pokotsiwa ichichípame. Yawa kare barapomonae daxita peyaputáe koyenewang pokoyenéwang nejumopetünaxü kata jíwitha”, pajang tsaibinbe Nakomtha. ¹⁰Icha paxam payaputáneme pokoyene xua pokotsiwa Nakom ichichipa pong jiwi Pekanamataxeinaein xua pokotsiwa paiña neexanaewa, bapoxonae beta pajjinaponáename Nakom pía paka nekayawenaenexa. Bara be Nakom pía pexui pana natsikotáneme tsipéi baxua Nakom ünthüthüjopa xua ünthüthüweiweina. Jiwi pafoforotapóname xua Jesucristo jumekokowüntapoinchi. Daxota baxua Nakom ünthüthüjopa xua ünthüthüweiweina. Paka anthüthüyapusúü éxana. Matáütano yábara paka yaputane éxana xua paiña neexanaewa tsane pokotsiwa Nakom ichichipa. ¹¹Timoteo irü xangno Nakomtha patsipaebéibangbe xua Nakom pía paka katsinexa tsane pía peitüpanaewa xua peyapusüüwa, icha Nakom ichi xua xeina bárapo peitüpanaewa xua peyapusüüwa. Bárapo peyapusüüwa paka yawena xua pajumefébame xua poxonae ichamonae paka itoroba xua abe paiña neexanaewa. Yawa paka yawena xua jüntükoyene weiweinaya paéxaname xua jopa pa-aitakonaem, xua poxonae bekein ichamonae abe pákata éxana. ¹²Poxonae Nakom patsipáebame, jüntükoyene weiweinaya pajakóbare tsipéi bapong Nakom paka yábara jüntemaina abe paiña neexanáe kuirukoyenein. Bapoxonae Nakom tsita wüünaetsi paiña jüntükoyenein barompaya paiñawang paiña nexeiaenexa pokotsiwa Nakom paka jüntüna jeba pía nakuatheicha xua paiña nejumekowüntsixaebapong. Paka katsibina poxonae paxam baraxoteicha papatsíname. ¹³Waxa, Nakom, wanaka kapanepaexae Satanás pía peyapusüü itorobi koyene weya tatsi, daxota ánoxuae kauri pía pentakaponaein tatsi jopa ekeicha kana exanaetsi xua wanaka kanamataxeinaewa tsane. Ápara jame Nakom yatsikaewa naka kana éxana xua bapong piamonae tatsi naexainchi pomonaexaetsi xua Pexanto tatsi pong Jesús itorobiya naka éwata, po Pexántoxae bichokono ántobe. ¹⁴Nakom Pexanto tatsi naka kapanepa, náetotha wanaka tsitüpaexae. Daxota daxita abe waexanáe kuirukoyenein Nakom naka kayábara jüntemaina.

Meje yábara xua waxainchi pomonaetsi jüntema jinómpatsi Cristo wanaka tsitüpaexae náetotha

¹⁵Nakom bapong peiña pepoponaein, pong jopa pataeiño. Íchitha Jesucristo bapong paxa yatsi itapeiñaxeina, pong yatsikaewa patang. Kaena báyatha poxonae aena bapong Jesucristo pópona xua pewünaeya poxonae Nakom daxita fórota bárapo kae pin nákuathe. ¹⁶Nakom daxita fórota bárapo kae pin nákuathe poxonae Jesucristo saya paxa taéxana. Yawa daxita fórota itabókotha. Matáütano fórotano xua jopa penatsita-itapeiñaxeinaewa, xuano xua penatsita-itapeiñaxeinaewa. Nakom éxana daxita peitorobi koyenewang xua pomonae pentakaponaewi nexa. Ichamonae jiwi itoroba nawita, ichamonae be kónotha itoroba jiwi, dáichitha daxita bárapo koyenein Nakom éxana xua bárapo peitorobi koyenein. Jesucristo penakuiyaputaexae xua ichichipa daxota daxita fórota yawa bapong nata éxana. ¹⁷Kaena báyatha bapong Cristo ataya pópona poxonae kataunxae jopa bapong foforotaponaeyo daxita. Cristo kanamataxeina daxita daxota nakua xanepanaya wüünaeya dukua. ¹⁸Daxita pomonae Cristo jumekowünta be kaein náexana. Bapong Cristo barapomonae pía Pekanamataxeinaeinchi tatsi. Baxua kaunuta xua Cristo kanamataxeina

barapomonaetha, pomonae pía pejumekowüntsiwixaetsi. Bapong Cristo antüjumopeyapusüü éxana pomonae pejumekowüntsiwichi. Bapong Jesucristo kopiya asüü nantakanáexanatsi petüpaéwatha weya. Daxota bapong kanamata éxanatsi xua kanamataxeina daxita koyenein. ¹⁹Nakom, Waxa, ünthüthüweiweina bichokono poxonae Pexanto kuitane xua kuijúpatsi Pexanto tsipéi daxita xeina icha bapong ichi xua daxita xeina. ²⁰Daxita pomonae jinompa po kae pin nákuathe itakoxánatsi Nakomtha. Írürü pomonae jinompa athabeicha itakoxánatsi Nakomtha. Daxota Nakom Pexanto itoroba xua petsitüpaenexa náetotha pomonae po kae pin nakua-thepiwi, írürü pomonae athabeicha jinompa nexa, xua bapoxonae Nakom peitakoxonaewa tsainchi yawa petsita-najüntükoyene wüünae exanaewa tsainchi.

²¹Paxam kopiya Nakom jopa paitakoxonaem, be pomonae penanapaincha jinompaewi patsita naexáname Nakomtha. Yawa Nakom pía peitafaetabí jíwichi pam, abe paiña neexanáe dubenanaebiyaxae paiña jüntükoyenéwatha. ²²Íchitha nama ánoxuae payaputáneme xua Cristo báyatha tüpa náetotha xua poxonae bara jintong kuirukoyeneya. Daxota ánoxuae Cristo paka kana éxana xua Nakom paitakoxóname pomonae pam pomonae kopiya Nakom pía peitafaetabí jíwichi pam. Poxonae Cristo tüpa pía paka exanaenexa pomonae pam pomonae Nakom peitütha tatsi penthüthü kuiwüünae jiwi pam. Matáüta paka kana éxana xua ichamonae paiña jopa nepaka yábara paebiwa xua abe paiña neexanaewa. ²³Cristo paka éxana xua wüünaeya paiña nejinompaewa tsane Nakom peitabaratha. Baxua paka kana éxana icha beta pajumekowünta dubenanaebiyáename Nakom pía pexeña pekapanenebiyáe jume diwesi. Yawa jopa papentsinde xua paéwatame xua pinae Nakom paka katsibapaeba, xua báyatha pajumetáneme. Nakom paka katsina pokotsiwa pía nakua beicha xeina xua peantüyapusüüwa xua jopa werawerakaeyo xua kaena báyatha yábara paka tsiwüünae muxuduta Nakom. Bárapo pexeña pekapanenebiyáe diwesi báyatha Jesucristo pía pejumekowüntsiwi tatsi kueikueijeji xua daxita nákuang yajüpayaya. Irü xang, Pablo, paebapónangdü bárapo diwesi.

Meje yábara poxonae Pablo Nakom Pejume Diwesi tsipaeba pomonaetha, pomonae Jesucristo pejumekowüntsiwichi

²⁴Xang, Pablo, ánoxuae jüntema weiweinaya póponang bekein nepérxaxa éxana paxam nexa. Icha Cristo ichi poxonae pérxaxa éxanatsi jiwi nexa, barichin xang nepérxaxa eexanaponaena paxam nexa pomonae Cristo pijimonae pamxaem. Ate-nein beya poxonae wetsin pókotsi koyenekuiru Cristo bewa ajüntükoyenetane tsóponae tsane pomonae pía pejumekowüntsiwichinexa. Bapoxonae Cristo piakoutha paebina xua xang ekeicha jopa atenein tsane. ²⁵Xang, Pablo, Nakom Pejume Diwesi takueikueijéji jintong tana neitoróbixae Nakom tapaka kayawenaenéxatsi xua irü daxita karepayaya jiwi pejumetaetaeponaewa tsane bárapo Nakom Pejume Diwesi. ²⁶Bárapo diwesi kaena báyatha Nakom moya yawüngxaina xua jiwi jopa yábara yaputaeyo. Íchitha ánoxuae bárapo diwesi matapaiña Nakom yábara yaputane éxana pomonaetha, pomonae pejumekowüntsi jiwixaetsi. ²⁷Bárapo pexeña jume diwesi Nakom kaena báyatha moya yawüngxaina xua jiwi jopa yábara yaputaeyo, íchitha ánoxuae ichichipa irü yábara yaputane éxana bárapo pexeña jume diwesi pomonaetha, pomonae jopa judiomonae naexanaeyo. Bárapo Nakom moya peyawüngxainaewa xua ápara Cristo paka yánaba. Daxota paéwatame xua bexa Cristo paka katsina, xua kaena báyatha yábara paka tsiwüünae muxuduta Nakom.

²⁸Daxota pakueikueijang bárapo diwesi po diwesi xua Cristo yábara. Daxita jiwi pamuxujang. Daxita jiwi pakuidubang Nakom pía peyaputáe koyenetha tatsi, tsipéi paichichipang xua Nakomtha xaniwaicha yajüntükoyene wüünaeya patsina xua be kaemonae penaexanaewa tsane Crístotha. ²⁹Daxota dangweya nakuitang Cristo tana nekatsixae pía peayapusüüwa xua bichokono ayapusüü takueikueijeinexa tsane Nakom Pejume Diwesi poxonae barapomonae tsipaebang. Bárapo peayapusüüwa jiwi tsita itüütang poxonae dangweya nakuitang.

2¹Baxua paka tsipáebatsi pomonae paiña nejumekowüntsiwa Jesucristo tsi-péi ichichipang xua paiña neyaputaewa xua bichokono tapaka antobéwatsi. Daxota bichokono pákata wüüwüükaponéibatsi Nakomtha. Írúno pomonae Jesucristo jumekowünta, pomonae jinompa Laodicea tómaratha, barapomonae írú tawüükang. Írürü daxita ichamonae pomonae jopa netaeyo, tawüükang. ²Antüya-pusüüya Nakomtha pákata wüükatsi, xua paiña nepaka kajüntükoyene tsakárabi exanaenexa xua jüntema paiña nejinompaenexa xua kaemonae nantiya paiña nenaantobenexa. Matáütano pákata wüükatsi xua paiña neyaputaenexa xua daxita peyaputáe koyene xua daxota paiña neyaputaewa tsane pokoyene xua kopiya Nakom moya yawüngxaina pokoyene xua Cristo yábara. ³Cristo pong peyaputaecin, pong daxita koyenein yaputane. Icha kaein jíwana paxam, icha bapong ichichipa xua pexeinaewa bárapo peyaputáe koyene, bü jame wüüka. ⁴Baxua paka muxujeichi, tsipéi jopa ichipaeiño xua ichamonae paka kuikaranababa xua naerabiya paka muxujáíñaba po jumeintha xua náemata beta paeba. ⁵Paka yábara kanantaxeinébatsi, be natsikotang xua be paka barü popoinchi bekein tajü ékang. Jüntükoyene weiweingang wüünaeya jumekowüntsiya paiña nejinompaexae Cristo, yawa jüntükoyene weiwéinangno xua paiña nenakuixainwaetsiya jinompaexae Crístotha.

Meje yábara xua jiwi pena jüntükoyene xeina Crístotha

⁶Mexeya poxoru paiña neyábara jumekowüntsixae xua pinae Jesucristo pong paiña Nepaka kanamataxeinaecin, daxota bewa bara paraichim bewa kaemonae pana naexanaem Crístotha xua xaniwaicha paiña nejinompaenexa bapongtha. ⁷Paitakoxonaya yaputaeponde Cristo paiña pewüünaecin jintong. Matowa yábara pana nakuidudubaponde Cristo pokotsiwa báyatha éxana. Matowa paexande xua pokotsiwa bapong paka itoroba. Mataropeicha payaputaeponde xua pexaiñeiwa jume, icha matha ichi xua ichüng paka kuiduba poxonae pajumekowüntame Jesucristo. Yawa matowa pajande: “Nakom, maisha pajüntükoyene weiweingang xua painta éxaname”, pajang tsaibinde.

⁸Dota pam tsipéi jopa ichipaeiño xua ichamonae paka kuikaranababa xua naerabiya paka muxujáíñaba xua paiña neexanaewa tsane xua náemata beta paeba. Pomonae xua paka kuiduba pía peitorobi koyenein, báraxua ápara jopa Cristo pía peitorobi koyenewa tatsi. Ápara saya pong pepawi, bapong pía peitorobi koyenein tatsi, ápara saya nakua pía peitorobi koyenein tatsi.

⁹Nakom Pexanto kana nayawa éxana xua Cristo xeina daxita ü dapo koyenein, pokoyenein Nakom xeina. Bárapo koyenein bapong Cristo xeina pong pepa pebin nakatsiwa Nakom Pexanto tatsi. ¹⁰Ápara Cristo piamonae tatsi pam. Cristo, bapong kompa yatsikaya Pekanamataxeinaecin kana éxanatsi xua daxita kanamataxeinatsi pomonae itabókotha peitorobiwi pía peayapusüüwatha. Poxonae Cristo panantáütame, jopa ichauyo pákata seikaeyo xua paxéiname xua pokotsiwa Cristo

jüntema pópona paka éxana. ¹¹Paxam ánoxuae icha jüntükoyene paxéiname Cristo paiña nejumekowüntsixaemxae, yáwano poxoru paiña nenantükuí barapentsixaemxae xua abe paéxaname. Icha judiomonaé ichi xua nawithaba ichaxota pebiwi nareixakaena bápána baxua jopa paka jüntükoyene kapanepae abe paiña neexanáé kuirukoyenein weya. Jame xua Jesucristo náetotha tupa, baxua jame paka ünthüthükoyene kapanepa abe paiña neexanáé kuirukoyenein weya. ¹²Poxonaé ichüng paka bautisaba, be paka müthütha penta, icha Cristo ichichi poxonaé müthütha xotsi. Bara paka jüta ichi. Yawa poxonaé xua pamatawúname be ekeicha asüü pajinómpame, icha Cristo ichichi poxonaé Nakom asüü éxana Pexanto poxonaé ekeicha ítawang pópona. Bara paka jüta ichi paiña nejumekowüntsixaé Nakom. ¹³Kaena báyatha paxam jopa paichichipaem xua paiña neexanaewa pokotsiwa Nakom paka itoroba poxoru saya abe paiña neexanáé jiwi pam. Daxota Nakom be pomonaé pewérapae jiwi patsita jinómpame. Saya ü abe peéxanaé kuirukoyenein paiña nenantaxeina dubenanaebiyaexaemxae, poxoru saya abe paiña neexanaewi. Baxua paéxaname poxoru bápapo peabewa paka ítata kadopiteiba xua abe paiña neexanaewa tsaibi tsane. Jopa Nakom pajeichim poxoru paxam barapokotsimonaé pam, pomonaé jopa judiomonaé naexanaeyo pam po judiomonaé nawithaba ichaxota pebiwi nareixakaena, Nakom paka éxana xua anthüthükoyenesüüya paiña nejinompaewa xua Cristo paiña neyawa jinompaewa. Bapong Nakom nákata jüntemaina xua daxita abe waexanáé kuirukoyenein. ¹⁴Nakom jopa naka yábara paebiyó xua abe exainchi poxonaé bara bekein jopa exanaetsi po peitorobi koyenein judiomonaé éxana xuano xua naka kui-itoroba xua po peitorobi koyenein bekein Nakom itoroba. Daxota Nakom jopa naka yábara paebiyó xua abe exainchi tsipéi Cristo náetotha kobematatabarútatsi xua pentoma nákata éxana xua wanaka kapanenebiya exanaenexa abe waexanáé kuirukoyenein weya. ¹⁵Poxonaé Cristo náetotha tupa, Cristo pekuipawi kana éxana po pentakaponaewi xua abe peexanaewi xua barapomonaé peamanayabixaetsi. Daxota barapomonaé jopa xeinaeyo peitorobi koyene xua peayapusüü koyene. Pin bicheito itabaratha Cristo aura éxana pentakaponaewi. Ánoxuae Cristo pentakaponaéin éxanatsi xua daxita bápapo jiwi pekanamataxeinaenéxatsi.

Meje yábara xua jei: “Itapeta payábara nantaxéinare xua pokotsiwa Nakom jüntüna jeba jiwi, pía nakuatheicha”, jei

¹⁶Daxota dapong aibi pong itaküüpatsi xua paiña nepaka yábara paebiwa xua abe paiña neexanaewa xua pokotsiwa paiña nexaexae, xuano xua pokotsiwa paiña neapaexae. Matáütano bapong jopa itaküüpaetsi xua paiña nepaka yábara paebiwa xua abe paiña neexanaewa po matakábitha poxonaé jiwi tsinakaetuta pin pexaewa xua penabanaewa tsane, matáütano xua paéxaname po matakéitha poxonaé jomokóichato aena ekeika, matáütano po matakábintha poxonaé pentakeiseikáé matakabin poxonaé jiwi jopa nakuichiyo. ¹⁷Kaena báyatha bápapo peitorobi koyenein judiomonaé kuidúbatsi Nakom, xua saya ü pejume. Bápapo jumeintha judiomonaé kuidúbatsi Nakom, xua yábara yaputane peexanaenexa tsainchi pokotsiwa bexa Cristo exanaena. Ápara báyatha Cristo patopeika. Icha paxam paichichípame xua paiña nenaexanaewa tsane Nakom piamonaé tatsi bewa paexanaem pokotsiwa Cristo paka itoroba. ¹⁸Jopa pakopatsinde xua ichamonaé paka yábara paeba xua pana natsi-aenaekuéntame xua jopa paiña neexanaexae icha barapomonaé ichi.

Barapomonae paka áeba poxoru tane petsita-itüübi koyenewang pokoyenéwang xua ichamonae jopa taeyo. Barapomonae paka itoroba xua pepawi jiwi paiña nenaexanaewa tsane paiñakoutha icha barapomonae ichi xua bekein jumexaeya paeba xua pinae pekuipawi jiwi. Matáütano barapomonae paka itoroba xua mata-sunpiwi wüünae paiña nejainchiwa tsane icha bapomonae ichi. ¹⁹Barapomonae jopa Cristo peyawa jinompaewichi, pong Wanaka namataxeinaein xuano xua pong asüü jinompa naka éxana. Matáütano bapong kaemonae naka kana éxana bapongtha wajumekowüntsixae. Nakom naka kana éxana xua beta wajumekokowüntaponaewa, icha be pókotsi koyeneya xua Pejume Diwésitha paeba, icha poxonae jiwi ichi xua poxonae pía pexui wihatapona pexaewa peapatsixae.

²⁰Tsipéi Cristo báyatha paka kayawa tüpa. ¿Eta xua kame áwiya payábara nantaxéiname? Poxonae Cristo tüpa bapong paka kana éxana xua pana naka panenebiyam abe paiña neexanáe kuirukoyenein weya. Matáütano paka kapanenebiya éxana po peitorobi koyene weya xua jiwi éxana pía nakapanenebíyaetsi. Poxonae baxua paka kana éxana, Nakom tsítatsi xua bara be Cristo payawawérapame. Dáichitha áwiya paichichípame xua paéxaname bárapo peitorobi koyene, bekein bárapo peitorobi koyenein jopa paka kapanepaeyo abe paiña neexanáe kuirukoyenein weya. Ápara saya jame Cristo paka kapanepa, náetotha petüpaexae. ²¹Judimonae aiña peitorobi koyenewang xeina xua pía peitorobi koyenewangxae pokotsiwa be iche: “Jopa jayabinde baxua. Jiña ébato opitha jopa panaeinde baxua. Jopa baxua nekobetha pichinde”, jei.

²²Barapókotsi koyenein pokoyenein xua jopa bewa pinae paexanaem tsane bárapo koyenein, bápana jopa paka yawenáe xua beta paiña neexanaewa pokotsiwa Cristo paka itoroba. Barapokotsiwa jopa pajumenaitaewatsinde, poxoru bárapo pekuidubi koyenein ápara pía peitorobi koyenein tatsi pomonae saya jiwi. Ápara bárapo peitorobi koyenewang saya naiña werawéraka icha pexaewa ichi xua naiña werawéraka poxonae jiwi xane. ²³Paxam panantaxéiname xua bárapo peitorobi koyenewa xeina peantüyapusüüwa poxoru be paka éxana xua wüünaeya pajinómpame, yawa be paka éxana xua Nakom wüünae pajáintame. Barapomonae judimonae pía abe exaneibi piakoutha napérxaxa exaneiba pía jüntemáinaetsi xua abe éxana. Íchitha áwiya yábara nantaxeina pokotsiwa abe éxana poxoru bárapo peabewa itakuidopítatsi xua baxua peexanaewa tsane. Barapomonae saya ü pepaebeibi, íchitha kataunxuae jopa wüünaeya jinompaeyo.

3 ¹Tsipéi Cristo báyatha paka kayawa asüü, daxota panaitómare xua paiña neexanaewa xua Cristo pokotsiwa ichichipa. Bapong Cristo eka Nakom pía nakuatheicha tatsi. Paxa pekoxa weya eka bapong. ²Saya panaitomatsiya nantaxéinare Jesucristo pía peitorobi koyenewang tatsi. Jopa payábara nantaxeinaeinde xua kopei pexeinae koyenein pokotsiwa bárapo kae pin nákuathe xeina. ³Tsipéi báyatha paxam paka kayawa tüpa Cristo, daxota jopa paexanaeinde pokotsiwa bárapo kae pin nákuathe xeina. Paiña neantüjumope yapusüüwang jiwi jopa taeyo tsipéi Nakom Cristo paka kayawa itakafetsiya xeina pía nakuatheicha. Mexeya poxoru Cristo peyawapoonaexae Nakom, daxota waxainchi poxonae yawa jinómpatsi Cristo barápara írürü yawa jinómpatsi Nakom. Baxua jiwi jopa paka kuiyaputaeyo. ⁴Bapong Cristo naka antüjumopeyapusüü éxana. Poxonae Cristo ekeicha patopáetsika paka kayawa barü naitüütsina jíwitha pexeiña peitüpanáe kóichatha.

Meje yábara xua peru jüntükoyene, xuano xua pena jüntükoyene

⁵Pokoyenein xua jiwi éxana pía pepongtha bara panakuibarapende. Paiñaxoba pana nasikuimatakáetame xua paweiwéiname. Paiñaxoba paéxaname pokoyene abe pokoyene ba aura éxana poxonae paéxaname. Paiñaxoba pakuiyábara nantaxéiname xua abe paiña neexanaewa tsane. Paiñaxoba paichichaxéikame xua ichamonae xeina. Bü bichokono pakuiyábara nantaxéiname beyakaincha xua poxonae pakuiyábara nantaxéiname Nakom. Baxua icha be poxonae paichim poxonae ibo nakom paántobem beyakaincha xua Nakom paántobem. ⁶Pomonae xua barapokotsiwa éxana, Nakom kasebina barapomonaetha. Bexa tsane Nakom itawetsina xua jopa petapatsiwa tsainchi pía nakuatheicha, poxoru barapomonaé saya jumefeba nawita pokotsiwa Nakom itoroba. ⁷Icha barapomonaé ichi, xua abe éxana, paxam bara paichim kaena býatha barapokotsiwa paéxaname poxonae jopa kataunxuae Jesucristo pajumekowüntsím. ⁸Íchitha ánoxuae daxita panakuibarapende xua daxita peabe koyenein: xua peanaepanáe koyenewang, xua juniya pejeikoyenewang, xua jopa wüünaeya peéxanae koyenein, xua saya abeya peyábara kueikueijiwa koyenewang, xua peyüüyüüjeiwa koyenewang. ⁹Jopa kaemonae nantiya pana namuxuitorobeibinde, ánoxuae pena jüntükoyenein paiña nexainaexae tsipéi peru jüntükoyenein býatha papéntame. Tsipéi bárapo peru jüntükoyenein jiwi ba ajumebeya kui-itoróbatsi xua abe éxana. ¹⁰Tsipéi ánoxuae pena jüntükoyenein paxéiname tsipéi Nakom éxana bárapo pena jüntükoyenein. Bárapo pena jüntükoyenein paka itakoxone exanapona Nakomtha. ¹¹Poxonae jiwi pena jüntükoyenein xeina pejumekowüntsixae, bapoxonae Nakom tsita najúpatsi, metha bara bekein griegomonaepin tsipae, irü metha bekein judiomonaepin tsipae, irü metha bekein pong xua pewithabinchi tsipae xua ichaxota pebiwi nareixakaena, irü metha bekein pong jopa pewithabinchi tsipae xua ichaxota pebiwi nareixakaena, irü metha bekein pong penanapaincha poponaein tsipae, irü metha bekein pong unupin tsipae, irü metha bekein pong pebusikuitaetaeinchi tsipae, irü metha bekein pong pepukopatinchi tsipae xua bara piáwa penata exanaewa tsane. Ápara jame meisha bapong Cristo aiñakuí peexanaeinchi. Matáütano Cristo barü pópona pomonae peantobewixaetsi.

¹²Nakom paka itapeta xua piamonae tatsi pía paka neka-exanaenexa pía paka nekaantobexae. Daxota nantanuweya pakuiyábara kanantaxéinare ichamonae xua paiña neyawenaewa tsane. Yawa betiya payawende ichamonae. Yawa jopa ichamonae patsita atsakande xua icha koyene paiña neexanaenexa. Yawa jopa pa-aebinde ichamonae. Yawa jopa pa-aitakonáe tsaibinde poxonae bekein ichamonae abe pákata exaneiba. ¹³Nantiya pana natsita xéinare po jüntükoyene xua jopa paiña neaitakonaewa xua poxonae bekein ichamonae abe pákata éxana. Pakuiyábara jüntemáinare poxonae ichamonae pákata abe éxana, icha Cristo ichi pong jiwi Pekanamataxeinaein éxanatsi xua daxita paka kuiyábara jüntemaina xua abe paéxaname. Bara paichinde pana nakuiyábara jüntemáinare daxita pokotsiwa abe pana nata éxaname. ¹⁴Bárapo koyenein paexande, yawa mataropeichiya paexándeno xua bichokono nantiya pana naantobeinde. Poxonae baxua paexanáename xua paiña nenaantobewam, bapoxonae xaniwaicha paéxaname pokotsiwa býatha paka itoróbatsi xua bewa paexanaem icha paxéiname pewüünaekui-ünthüthüng. Íchitha poxoru paiña nenaantobexae daxota bapo koyenein paéxaname. ¹⁵Saya

pakópare xua bara Cristo paiña jüntükoyeneintha pákata itorobina jüntema pía pepoponaewa tatsi xua daxota jüntema paiña nejinompaewa tsane. Tsipéi Nakom paka nekajainchixae: “Kaemonae paiña nenaexanaewi pam”, paka nekajainchixae. Paxéinare pokoyene xua pajam tsaibi: “Nakom, maisha pajüntükoyene weiweingang xua painta éxaname”, xua pokoyene pajam tsaibi.

¹⁶Po diwesi Cristo paka tsipaeba xua yawa paka itoroba, moya paexanéibare. Icha Cristo ichi xua paka kuiduba Pejume Diwésitha, barichi xuya ichamonae pakuidudubaponde. Matáütano nantiya pana nakuitsakárabare xua wüünaeya paiña nejinompaewa tsane xua poxonaе pajumétáneme Cristo pejume diwesi. Nakom patanaxúnare daxita weixi. Jüntükoyene weiweinaya patsita naxúnare Nakom. ¹⁷Pokotsiwa paichichípame xua paiña nepaebiwa tsane, moya papáebare pókotsi pepaebiwa ichichipa Jesús. Yáwano pokotsiwa paichichípame xua paiña neexanaewa tsane, moya paexande xua pókotsi peexanaewa ichichipa Jesús pong jiwi Pekanamataxeinaeinae. Bapongtha pajande: “Jesús inta Axang jande: ‘Maisha jüntükoyene weiweingang xua bapong yawéname’, inta, jande”, pajande ichaxota Jesús.

Meje yábara xua pokotsiwa bewa exanáe pomonae Jesucristo pejumekowüntsiwi

¹⁸Yábüxi pamxaem paka tsipáebatsi. Pajumetaema. Paiña séuriwi pajumejejang tsaibinde xua paka itorobeiba. Baxua paexanéibare tsipéi pejumekowüntsiwi pam Jesús pong jiwi Pekanamataxeinaein. ¹⁹Pebiwi pamxaem paka tsipáebatsi. Pajumetaema. Paiña séurixi paántobe tsaibinde. Baxua paexanéibare. Poxonaе paitorobéibame, bichokono jopa pajang tsaibinde.

²⁰Pexui pamxaem paka tsipáebatsi. Paiña axa jiwi xua irü paiña ena jiwi beta pajumenaitaewatébiya exanéibare pokotsiwa paka itorobeiba tsipéi baxua Jesús pong jiwi Pekanamataxeinaein tsita itakuiwüünaetsi. ²¹Koxiyei jiwi pam, xua saya pebiwi jiwi pam paka tsipáebatsi. Paiñaxoba paiña pexui pamuxutáñabame xua jopa beta exanaeyo. Icha baxua paéxaname pexui jopa beta jinompáe tsipae.

²²Pomonae amanaya pebusikuitaetaewichi pam, beta pajumenaitáware paiña nepaka kanamataxeinaewi, pomonae paka itoroba, pomonae xua po kae pin nákuathe jinompa. Jopa metha bepa meisha beta pajumenaitaewatsipaem poxonaе paka tane pomonae paiña nepaka kanamataxeinaewi. Ápara jame beta paiña nejudenaitaewatsinexa poxonaе pomonae paiña nepaka kanamataxeinaewi jopa imoxoyo paka taeyo. Jopa metha bepa meisha paiña wüünae taexanaetsi pomonae paiña nepaka kanamataxeinaewi. Ápara jame paiña wüünae taexanaetsi irü Jesús pong jiwi Pekanamataxeinaein, tsipéi paxam pomonae Jesucristo paiña nejumekowüntsi jiwi pam. ²³Daxita ü daxuang xua paéxaname wüünaeya paexánare. Saya ü pakanantaxeinaeya exanéibare xua Cristo nexa, pong jiwi Pekanamataxeinaein. Jopa meisha saya panantaxeinaeya taexaneibinde xua pong paiña nepaka kanamataxeinaein, pong saya pepawi, xua saya jintong. ²⁴Báyatha payaputáneme xua bexa Cristo pong jiwi Pekanamataxeinaein paka katsibina xua paka jüntüna jeba pía nakuatheicha xua paiña newetsixae pokotsiwa bapong paka itoroba. Paxam Cristo pía petanakuichi jíwichi pam pong yatsikaya jiwi pepa Pekanamataxeinaein. ²⁵Íchitha pong jopa wüünaeya exanaeyo, bapong xeinaena pentoma xua

jopa pewüünae matoma. Nakom jiwi jopa natoxeincha nekotsiyo. Pomonae pebusikuitaetaewichi, barapomonae Nakom nantajüpaya tane, icha pomonae pentakaponaewi ichi xua poxonae Nakom nantajüpaya tane. Daxota pong jopa wüünaeya exanaeyo, bapong xeinaena pentoma xua jopa pewüünae matoma.

4¹Pomonae pentakaponaewi pam, wüünaeya pakana éxande pomonae paiña nebusikuitaetaeibi jiwi, tsipéi paxam paxéiname paiña pepa Nepaka Kanamataxeinaein itabokotheicha.

²Nakomtha kuitiya pana kuibabatsiya wüüka dubenanaebíyama. Poxonae Nakomtha pawüükéibame, pajang tsaibinde: “Nakom, maisha pajüntükoyene weiweingang xua pata tanekatsiwaxaem yawa xua painta éxaname beta”, pajang tsaibinde. ³Yáwano painta wüükare Nakom xua Jesús pong jiwi Pekanamataxeinaein pata tana neyawenaewa tsane xua pata kueikueijeinexa bapong pejume diwesi tatsi daxita koyeneintha xua ichaxota pata ichipaewa xua pata paebeibiwa tsane. Bárapo diwesi kaena báyatha jiwi jopa yaputaeyo tsipéi Nakom moya yawüngxaina xua jiwi jopa yábara yaputaeyo. Íchitha ánoxuae Nakom ichichipa xua jiwi yaputaena bárapo diwesi. Bárapo diwesi xua ánoxuae ápara xua Cristo naka yánaba. Jiwi pekübibotha neeta tana natsipéi kueikueijeixae bárapo diwesi. ⁴Painta wüükare Nakom, xua wüünaeya takaununaya kueikueijeinexa tsane Cristo pijume diwesi xua jiwi beta tana nejumetaewa tsane pokotsiwa xua bewa kueikueijang tsane, pokotsiwa Nakom ichichipa.

⁵Dota pam, wüünaeya beta jumewüünaeya pajinómpare, tsipéi paka tane pomonae jopa jumekowüntsiyo Jesucristo. Barapomonae patsipaebéibare xua pokotsiwa Nakom ichichipa xua poxonae po matakeitha kataunxuae paka itaküüpa xua paiña netsipáebiwa. ⁶Poxonae ichamonaе patsipáebame, beta wüünaeya patsipáebare. Yáwano bewa wüünaeya pajumenotsim daxita jiwi.

Meje yábara poxonae Pablo najumeweta po carte

⁷Daxita Tíquico neyábara diwesi paebina xua paka tsipaebina. Bapong be wayapin watsikotaein tsipéi Jesucristo pejumekowüntsin. Bapong paantobein. Irü bapong Tíquico Jesús pong jiwi Pekanamataxeinaein pía petanakuichin tatsi. Bapong Tíquico neyaweneiba xua Jesucristo pijume diwesi kueikueijeji tsaibi. ⁸Daxota Tíquico paiña xaiña beya itorobang paiña neyaputaenexa xua paxang wüünaeya bara jüntema pajinompang. Yawa bapong paka nekakuí tsakarabinexa xua jüntema paiña nejinompaewa tsane. ⁹Tíquico bara beya pona irü ichüng nápona, pong pewüng Onésimo, pong be pata táyapin patsikotang pejumekowüntsixaerü Jesucristo, yáwano bapong paantobein. Barapong beta wüünaeya pepoponaein Nakomtha. Tíquico írüno Onésimo, bapongbe daxita yábara paka tsipaebina xua pokotsiwa xote exanangje.

¹⁰Irü Aristarco tajintong, pong jiwi pekübibotha paekangbe, bapong paka jakoba. Irü Marcos paka jakoba, pong Bernabé pamoyo tatsi. Tsipéi báyatha payaputáneme xua Marcos pepatopaewa tsane. Paka itoróbatsi bapong yábara. Icha patopaena bara beya, bapong pantenta weyataeya wábare. ¹¹Írürü Jesús paka jakoba, pong icha wüngno, Justo. Po akoibi póyobe, póyobe xuaunxuae paka jakoba meisha saya barapóyobe neyawena xote póyobe xua jíwana judiomonaе, po judiomonaе Jesucristo pejumekowüntsiwichi jíwanabe. Bárapo akoibi póyobe neyawénabe xua yábara kueikueijeibe Nakom Pejume Diwesi po diwesi

xua Nakom waba jiwi xua petanaexanaenéxatsi piamonae tatsi petajumekowüntsi-xaetsi Pexántotha. Barapóyobe nejúntükui tsakarababe xua jüntema tapoponaewa tsane. ¹²Írürü Epafras paka jakoba, pong paiñamonae jíwana. Bapong Epafras Cristo Jesús pía petanakuichin tatsi. Bapong jumedangweya pákata wüükeiba Nakomtha, xua Nakom wüünaeya paka nekaantüyapusüüya dangweya exanaenexa tsane. Xaniwaicha paiña neyaputaenexa pokotsiwa paiña neexanaenexa, pokotsiwa Nakom ichichipa. ¹³Xang bara yatsikaewa takuitaewa xua Epafras pákata jumedangweya wüükeiba Nakomtha. Pokoyene xua bapong baxua éxana xaniwaicha, ápara paxam nexa, irü Laodicea tomaramonaepiwi nexa, irü Hierápolis tomaramonaepiwi nexa. ¹⁴Írürü Lucas paka jakoba, pong jiwi peyawübin, pong bichokono antobetsi xua jiwi ántobe. Írürü Demas paka jakoba.

¹⁵Painta jakóbare Jesucristo pejumekowüntsíwichi, pomonae Laodicea tómaratha ena. Irü painta jakóbare powa pewüing Ninfa. Írürü painta jakobareno pomonae pejumekowüntsiwi, pomonae nakaetuteiba Ninfa piabotha tatsi. ¹⁶Poxonae bárapo carte payórobame ekeicha ichüing pakare xua pekaponae nexa Laodicea tómaraya beya, xua xuya peyorobinexa bárapo carte pomonaetha, pomonae pejumekowüntsiwi poxonae nakaetuta. Yawa poxonae Laodicea tomaramonae pía carta tatsi papítame paiña xaiña bérena bárapo carta xuya payórobame paiña penakaetutsibotha xua Colosas tómaratha. ¹⁷Paxam Arquipo pabarande: “Taema Arquipo, xaniwaicha baxua éxande xua býatha Jesucristo pong jiwi Pekanamataxeinaein pokotsiwa kaitoroba xua beta wüünaeya nakuiyábara jumewetsíname xua éxaname”, pajande.

¹⁸Xang, Pablo, paka jakóbatsi. Baxoyo takobekouyeje, xoyo tinaxubang. Jopa pajüntemainaeinde xua jiwi pekübibotha taekaewa. Nakomtha painta wüükéibare. Bárabü Nakom jüntema jinompa paka éxana pía paka nekaantobexae.

Baja Pablo.

Meje Po Carte Kopiya Pablo Tatina, Tesalónica Tomarapiwi Tatínatsi

Meje yábara poxonae Pablo tamrópata pítaba xua tatina pomonaetha, pomonae Tesalónica tomarapiwi

1 ¹Xang, Pablo, irü Silvano, irü Timoteo, barapóyobe pang, bárapo carte pákata tínatsi. Pákata tínatsi paxam pomonae Tesalónica tomarapiwi pamxaem paiña nejumekowüntsíwixae Jesucristo. Paxam pomonae paiña neyawa jinompaewi Nakom, pong Waxa, xua matáütano Jesucristo, pong jiwi Pekanamataxeinaein. Bárabü Nakom Waxa, irü Jesucristo, pong jiwi Pekanamataxeinaein, paka yawena xua jüntükoyene weiweinaya paiña nejinompaewa tsane xuano beta wüünaeya jüntema paiña nejinompaenexa.

Meje yábara xua Pablo yábara paeba xua Tesalónica tomarapiwi pinae beta jumekowünta

²Pákata tsipaebéibatsi Nakomtha, pajang tsaibi Nakomtha: “Nakom maisha pajüntükoyene weiweinang xua daxita Tesalónica tomarapiwi beta jinompa, pomonae pekajumekowüntsiwi”, pajang tsaibi Nakomtha. ³Pajang tsaibi Nakomtha: “Pata Taxam, Nakom, maisha bárapo Tesalónica tomarapiwi bichokono kajumekowüntsiya kata éxana dubenanáebiya. Matáütano, bichokono nekaantobexae daxota ayapusüüya kata nakuita dubenanáebiya. Maisha bichokono barapomonae wüünae ewateiba xua Jesucristo pía pepatopeikaewanexa tsane, pong Pata Tanekanamataxeinaein”, pajang tsaibi Nakomtha. ⁴Paxam pomonae paiña nejumekowüntsiwi pam Nakom. Bara payaputang xua Nakom bichokono paka ántobe, yawa kaena báyatha paka itapeta pía piamonae paka exanaetsi. ⁵Poxonae Nakom pía pekapanenebiyáe jume diwesi paka tsipáebatsi jopa saya meisha ü patajume. Jame ápara Nakom pía Pejumopetünaxü tatsi pía peayapusüü itorobi koyenéwatha tatsi pana yawena, xua pata kueikueijejiwa. Bárapo diwesi bara xaniwaicha jumekowüntatsi xua bárapo diwesi bara pexaiñéi jume. Bara beta payaputáneme xua bara beta pajinompang paiña itütha xua pata paka ajüntükoyenesüü exanaenéxatsi xua irü jüntükoyene wüünaeya paiña nejinompaenexa.

⁶Paxam paexanapóname icha paichin xua pokotsiwa paexanaponang. Matáütano beta paexanapóname icha ichi poxonae beta exanapona, pong jiwi Pekanamataxeinaein. Bekein ichamonae átene paka éxana paiña nejumekowüntsixae Jesucristo, íchitha bárapo diwesi áwiya jüntükoyene weiweinaya pajumekowüntame. Bárapo pejüntüweiweinae koyene Nakom pía Pejumopetünaxü tatsi paka kata. ⁷Baxuang paiña neexanaexae daxota ichamonae pomonae pejumekowüntsiwi Jesucristo, pomonae Macedonia nakuapiwi, barapomonae éxana pokotsiwa

paéxaname. Írürü baxuang éxana pomonae Acaya nakuangpiwi. ⁸Jesucristo, pong jiwi Pekanamataxeinaein, pía pekapanenebiyáe jume diwesi pakueikueijam ichamonaetha. Bárapo diwesi Macedonia nakuapiwi irü Acaya nakuapiwi jumetane. Jopa meisha bárapo nakuabepiwi bara ápara daxita nakuangpiwi írürü jumetánerü. Daxita bárapo jiwi paka yábara yaputane xua paiña nejumekowüntsiwa Nakom. Daxota jopa panantawenonaeiño xua paka yábara páebatsi ichamonaetha. ⁹Nama barapomonae pana neyábara paeba xua paxam panententaweyataeya wábame. Matáütano barapomonae paka yábara paeba xua pinae paxam ibo nakomüng po ibo nakomüng kopiya wüünae pajaintéibame pabebam paiña nejumekowüntsixae Nakom. Matáütano paka yábara paeba xua bapoxonae patamropatarükúpame xua pata taéxaname Nakom pía petanakuichiwa tatsi, pong yatsikaewa pepa Nakom, pong ataya tsitekaeya asüü pepoponaein. ¹⁰Matáütano barapomonae pana netsipaeba xua pinae paxam Jesús pawünae éwatame xua pepatopeikaewa peitaboko wétsika. Barapong Jesús Nakom Pexanto tatsi, po Pexántoxae Nakom asüü éxana petüpáe koyenekuiru weya. Barapong Jesús naka napaeba exanaena Nakom beya, poxonae Nakom kopatsina xua jiwi bichokono péraxa jübebinchi abe peexanaexae.

Meje yábara pokoyeneya Pablo tanakuita Tesalónica tomarapiwi

2 ¹Patamonae paxam pomonae irü paiña nejumekowüntsiwi Jesucristo icha paxang paichin. Payaputáneme xua tapaka siwaponáewatsi baxua wüünae pata kayawenaexaetsi. ²Poxonae Filipos tómaratha paponang, barapomonae abe pana éxana. Yawa tsümüjumeya pana tsipaeba. Bekein barapomonae baxua pana kana éxana íchitha payaputáneme xua Nakom pana yawena tapata katsipaebinéxatsi bárapo Nakom pía pekapanenebiyáe jume diwesi. Baxua paéxanang xua jopa jüntüdeideijeya paka tsipaebichi bárapo diwesi bekein barapomonae panajumematawenta. ³Poxonae paka tsipáebatsi Nakom Pejume Diwesi jopa ápara paka tsipaebichi pojume xua jopa xaiñeyo xua pojume pejumexáei. Matáütano jopa paka tsipaebichi po jüntükoyene wajüntükoyene abeya naka tsipaeba. Matáütano jopa paka muxujaiñabichi xua daxota abe paiña neexanaenexa. ⁴Nama Nakom patsita jüntükoyene wüünaein xua xaiñeya pata takueikueijeixae. Daxota Nakom pana neitoroba xua pata tapaebinexa pía pekapanenebiyáe jume diwesi. Ápara jopa baxua paexanaeiño xua daxota jiwi pata taneweyataenexa. Jame ápara baxua paéxanang xua Nakom pata taneweyataenexa. Barapong pana nejüntükoyene yaputane xua poxonae paexaneibang. ⁵Paxam báyatha payaputáneme xua jopa paka tsipaebichi pojume ba jiwi piraichi jumewüünaeya paeba xua bepa pía weyataetsi. Matáütano payaputáneme xua jopa pakueikueijangyo pata paratixichi. Nakom bara pana tane xua jopa baxua bara paexanaeiño. ⁶Jopa bápana paichichipaeiño xua jiwi wüünae pata tanejainchiwa, xua poxonae metha bekein bara barapomonae pam, ichakuitha xua poxonae bekein ichamonae irü. ⁷Bekein paxang pana itaküüpa xua pata kaitoróbíwatsi, bekein bara Cristo pía peitorobi jiwi tatsi pang, dáichitha jopa paexanaeiño bárapo koyene. Nama ápara saya bewayo paka yayawenapónatsi, icha be pókotsi koyeneya petsiriwa ichi poxonae pía pexui bewayo wichiya yayawenapona. ⁸Bichokono paka antobetsi, daxota paichichipang xua pata paka katsíwatsi Nakom Pejume Diwesi. Jopa meisha xua poxonae daxota bárapo koyenewa, bara yawa daxita múxuna paka yawénatsi

daxita pata jüntükoyeneintha. ¡Bara jopa juniya pata paka antobéwatsi! ⁹Patomonae pam, paxam pomonae irü paiña nejumekowüntsixae Jesucristo. Paxam payaputáneme xua bichokono panakuitang pata xeinaenexa pokotsiwa panantawénonang xua pata nabanaewanexa. Jopa juniya panakuiteibiño matakábintha, yawa merawínthano. Daxota jopa panantawenonaem xua pana kátame xua pokotsiwa pata nantawenonaewa pata jinompaewanexa. Jopa paichipaeiño xua paka nakuimatowa xeina éxanatsi poxonae paka kuidúbatsi Nakom Pejume Diwesi.

¹⁰Paxam pomonae paiña nejumekowüntsixaemxae Jesucristo pana yaputáneme irü Nakom pana yaputane xua jüntükoyene wüünaeya pata jinompaewa paiñaxantha daxita karepaya paxamtha. Matáütano Nakom patsita jüntükoyene wüünaein, xua penatsikuentisiwa jopa bapong patsita xeinaeiño. Daxota ichamonae jopa pana neyábara paebiyo xua abe pata pákata exanáewatsi. ¹¹Matáütano payaputáneme xua paka itoróbatsi xua beta pajinómpame. Matáütano yawa payaputáneme xua paka jüntü tsakárbatsi xua wüünaeya paiña nejinompaenexa. Matáütano bara payaputáneme xua daxita paxam paka kuimatatéikatsi xua poxonae bichokono paanthüthütanem tsaibi xua abe paiña nepákata exanaexae ichamonae. Daxita bárapo koyenein bara paéxanang icha be pókotsi koyeneya koxiyang kana ichiya éxana pía pexuitha. ¹²Paka itoróbatsi xua bewa beta pajinompae, icha pomonae Nakom pejumekowüntsiwi ichi xua bewa beta jinompáe. Báraxua paexande poxoru Nakom paka wüingduba piamonae paiña paka exanaenexa xua paiña nebarü itorobinexa tsane jiwi Nakom pía peitorobi nakua beicha tatsi. Nakom pía peitorobi koyenewa xua jiwi peitorobi koyenéwatsi bichokono peitüpanáe koyenewa.

¹³Matáütano paxang Nakomtha patsipaebang pajangje: “Nakom maisha pajüntükoyene weiweinang xua Tesalónica tomarapiwi kajumekowünta poxonae patsipaebang jiña jume diwesi. Barapomonae nantaxeina xua po diwesi patsipaebang barápara jiña jume diwesi. Jopa nantaxeinaeyo xua bárapo diwesi ápara saya jiwi pía diwesi”, pajang Nakomtha. Xaniwaicha bárapo diwesi ápara Nakom Pejume Diwesi paiña paka kana exanaexae xua icha jüntükoyene paiña nexeiñawa pomonae paiña nejumekowüntsixae Jesucristo. ¹⁴Patamonae pam. Ichamonae átene paka éxana pomonae paiñamonaexae. Baxua paka kana éxana, icha Judea nakuapiwi ichichi pomonae pejumekowüntsiwi Cristo Jesús. Daxita barapomonae ajüntükoyenetane exainchi pomonae piamonaexae pomonae judiomonaexae. ¹⁵Kaena báyatha judiomonae pía pamo susato jiwi tatsi juteba, pomonae Nakom pía peitorobi jume pepaebiwi tatsi jutébatsi. Kotakaya icha judiomonae Jesús pong jiwi Pekanamataxeinaein tüpa exanadútatsi náetotha. Matapaiña ánoxuae icha judiomonae pana yótaba pata penakaetútsibo weya. Pokotsiwang barapomonae éxana Nakom baxuang jopa tsita wüünaetsi. Barapomonae nakana éxana pomonae daxita jiwi pía peaitaetabí jíwichi. ¹⁶Paichichipang xua patsipaebang Nakom Pejume Diwesi pomonaetha, pomonae jopa judiomonae naexanaeyo xua irü Nakom pekapanenebiyaenexa tsane bekein judiomonae pata tanejume-itawetsiwatha tsane poxonae patsipaebang Nakom Pejume Diwesi. Poxonae judiomonae bárapo abe peéxanae koyene pana tsiéxana bapoxonae opiduta wetsiya éxana daxita po peabe koyenewang xua báyatha itaküüpatsi xua eexanapona. Daxota ánoxuae nama matapaiña Nakom bichokono anáepana barapomonaetha. Nakom juntukuru péraxa jüba exanaena barapomonae, penatsikuentisixae abe peexanaexae bapongtha.

Meje yábara xua ekeicha Pablo besiwaponaena Tesalónica tomarapiwi

¹⁷Paxam pomonae patamonae pam, poxonae bekein paxang tajü paka kuenta énatzi, xua saya bara káetotha jopa imoxoyo paka taetsi, íchitha paka yábara nantaxeinéibatsi pata paka itaxaneibixaetsi. Bichokono paichichipang xua pata paka kataéwatsi. ¹⁸Paxang matowa paichichipang xua kaewa pata paka siwaponáewatsi. Xang, Pablo, ichakuitha matowa nantaxeineibang xua paka siwaponéibinchi. Íchitha kaurimonae pía pentakaponaein tatsi, Satanás, pana nekuiyangkaba-beiba. ¹⁹Ichichipang paka siwapónatsi poxoru paxam pana nekana éxaname xua pajüntükoyene weiweingang. Barichi paxam pomonae pana nekana éxaname xua pawüüinae éwatang. Barichi paxam pomonae pana nekana éxaname xua matowa payábara páebang pokotsiwa xua paéxanang poxonae paka kuidúbatsi. Poxonae Jesucristo pong jiwi Pekanamataxeinaein ekeicha kaewa patopeikaena bapongtha paka yábara paebinchi pokoyene xua paxam pana nekana éxaname. ²⁰Xaniwaicha paxam pomonae pam pana nejüntükoyene weiweina kana éxaname. Matáütano paxang pomonae pana nekana éxaname xua paka yábara wüüinae jainchinchí Jesucristo peitabaratha poxonae bapong peitabaratha tatsi paka barü umenaechi beta paiña neexanaexae.

3 ¹⁻²Jopa pana itaküüpaeyo xua áwiya ekeicha pata ewatsiwa xua pata paka yábara yaputaewa tsainchi. Daxota juntukuru panantaxeingang xua paitorobang Timoteo pong jumekowünta Nakom paiña pía paka nekataenexa tsánebe. Matáütano juntukuru panantaxeingang xua Silvano kompa paekaeinbe Atenas tómaratha. Timoteo paitorobang, tsipéi bapong beta tanakuita Nakom nexa. Barapong Timoteo pana yawena poxonae pakueikueijang Cristo pía pexeíña jume diwesi tatsi. Bapong Timoteo itaküüpatsi xua ajüntükoyeneyapusüü paka kana éxana. Matáütano itaküüpatsi xua paka jüntükúí tsakáraba éxana xua áwiya matoropeichiya paiña nejumekowünta ponaenexam Nakom. ³Bapoxonae dapong aibi tsane paxam jíwana pong ajüntükoyenefaetabiya jumekowünta xua ichamonae abe peexanaexae bapongtha. Paxam báyatha payaputáneme xua daxota bewa ichamonae átene naka exanaena wajumekowüntsixaes Jesucristo. ⁴Matáütano poxonae kataunxuae paka barü énatzi, paka tsipáebatsi xua daxota bewa ichamonae naka átene exanaena poxonae nákata abe éxana. Bara baxua báyatha éxana barapomonae icha be pókotsi koyeneya báyatha paka tsipáebatsi, xuano payaputánemeno. ⁵Tsipéi xang jopa neitaküüpaeyo xua ekeicha taewatsiwa xua tapaka yábara yaputaewa tsainchi, daxota Timoteo itorobang. Bapong inta paka yaiñabiya jei: “¿Bara áwiya pajumekowünta dubenanaebíyame Jesucristo?” jei. Baxua be yaputaecin tajunuwixae xua kaurimonae pía pentakaponaein tatsi pong jiwi pejüntükoyene jüjütsin paka kuijüjütsipa xua abe paiña neexanaewa tsane. Bapoxonae pokotsiwa xua pata tapákata nakuichíwatsi jopa paka yawenáe tsipae xua jopa xapain paiña nejumekowüntsixaem tsipae.

⁶Íchitha báyatha bapong Timoteo kaewa patopa xua bara wérena xua paiña tómara wérena. Bapong yábara pana tsipaeba, bichokono jumewüüinae xua pinae áwiya pajumekowünta dubenanaebíyame Jesucristo. Matáütano yábara pana tsipaeba xua pinae nantiya pana naántobe tsurubenanaebiyam. Matáütano yábara pana tsipaeba xua pinae pana neyábara antobeya nantaxéiname matáüta xua pinae be pana netáename, icha paichin xua bena tapaka taewatsí tsainchi.

⁷Patamonae pam, paka tsipáebatsi bekein ichamonae painta ayapubé éxana yawa pana átene éxana, íchitha pajüntükoyene sadüjang poxonae pajumetang xua pinae beta pajumekowünta dubenanaebíyame Jesucristo. ⁸Poxonae paxam áwiya beta pajumekowünta dubenanaebíyame Jesucristo, pong jiwi Pekanamataxeinaein, baxua pajüntükoyene sadüjang patajinompáewatha Nakom nexa. ⁹Ánoxuae pana itaküüpa xua pata jeiwa: “Nakom maisha pajüntükoyene weiweingang Tesalónica tomarapiwi beta nekajumekowüntsixae”, pata jeiwa. Paxam pomonae pana nejüntükoyene weiweina kana éxaname poxonae Nakom patsipaebang. ¹⁰Matakábintha, merawínthano Nakomtha pákata wüükéibatsi. Nakom pawüükeibang xua bara pata nekopatsinexa xua pata tapaka kasiwaponae nexa tsainchi. Paichichipang xua pata paka yawenáewatsi xua beta paiña nejumekowüntsiwa Jesucristo pokotsiwa yábara pákata seika xua paiña yábara neyaputaewa Jesucristo.

¹¹Paichichipang xua Nakom pong Waxa irü Jesús pong jiwi Pekanamataxeinaein pana yawenaena xua pata paka kasiwaponae néxatsi. ¹²Matáütano paichichipang xua Jesús, pong jiwi Pekanamataxeinaein, paka kana exanaena xua ekeicha bichokono toxeinchiya paxeinaponáename peántobe koyenewa xua nantiya paiña nenaantobexaem tsane. Matáütano paichichipang xua bárapo peántobe koyenewa daxita jiwi paiña tsita xeinaenexa icha paka ichichi xua bichokono paka antobetsi. ¹³Matáütano paichichipang xua Nakom pong Waxa, paiña nepaka kana exanaenexa xua bichokono paiña nejüntükoyene wüünaewa. Matáütano paichichipang xua Nakom pong Waxa bichokono ajüntüyapusüüya paka kana exanaena. Bapoxonae paxam bichokono Nakom tsita jüntükoyene wüünaeinchi. Bapoxónaeno jopa patsita natsikuentsim tsane abe paiña neexanaexae bapongtha. Barapókotsi jüta koyene áwiya paexanaponáename beya poxonae Jesús pong Wanaka namataxeinaein, piamonae barü patopeikaena daxita.

Meje yábara pojüntükoyeneya bewa jiwi tajinompae Nakom pokoyene xua Nakom tsita wüünaetsi

4 ¹Patamonae pam ánoxuae jumedangweya paka jeichi, yawa paka itorobiya jeichi: “Tsipéi Jesús pong jiwi Pekanamataxeinaein, pana nekayawa pópona daxota paka itoróbatsi. Pokotsiwa paka kuidúbatsi paxam bara paichinde. Báyatha paka kuidúbatsi xua bewa ekeicha mataropeichiya payajüntükoyene jinompaem po jüntükoyene xua Nakom tsita wüünaetsi. Matáütano ánoxuae ekeicha matowa paexanaponde bárapo koyenein, pokoyenein xua ánoxuae paexanapóname”, paka jeichi.

²Paxam payaputáneme po pekuidubiwang paka kuidúbatsi ápara bárapo pekuidubiwang Jesús pana itoroba, pong jiwi Pekanamataxeinaein. ³Xua jame Nakom pokotsiwa ichichipa xua paxam bewa bichokono jüntükoyene wüünaeya pajinompaem Nakom peitabaratha xua daxota ichamonae patsita-itapeiñaxéiname xua bara Nakom paiña neántobe jiwi pam. Jopa panasikui-éxana dubenanaebiyaeinde ichamonae pía seurixitha tatsi. ⁴Pebin bewa yaputaena xua beta kuikuinaena píséuritha pokoyeneya xua Nakom tsita wüünaetsi xuano xua jiwi tsita wüünaetsi. Matáütano bapong bewa barükui-iturajinaena píowa pía peantobexae. Daxita barompaya pebiwi pam bewa irü bara paichim tsane. ⁵Barichi bárapo pebin jopa bewa exanáe tsane barapówatha pokoyene xua saya pía penakenta exanaetsi. Tsipéi ichamonae pomonae jopa Nakom yaputaeyo, barapomonae abe nantaxeina

nawita xua yábüxi yábara xua penakentsiwa yábara. Bárapo koyene paiñaxoba paéxaname. ⁶Jopa paexanaeinde bárapo abe peéxanae koyenéwatha pongtha pong írürü pejumekowüntsín Nakom. Jopa bewa papichim barapong píowa tatsi. Icha baxua paexanaetsípame pong jiwi Peksanamataxeinaein bichokono átene paka kana exanáetsipa abe paiña neexanaexae. Báyatha barapokotsiwa paka muxuwétatsi. ⁷Nakom jopa naka wüingdúbiyo píamonae wanaka exanaenexa xua abe waexanaponaewa tsane. Jame ápara Nakom naka wüingduba xua wajinompae-nexa Nakom peitabaratha tatsi xua daxota ichamonae tsita itapeiñaxéinatsi xua bara Nakom pijimonae tatsi wanaexanaenéxatsi. ⁸Pong jume itaweta pokoyene xua ichüing pepichiwa yábara xua ichüing píowa tatsi, ápara bara bapong jume itaweta Nakom píá pekuidubi koyenewa tatsi. Jopa ápara jume itawetsiyo pebin píá pekuidubi koyenewa tatsi. Barapong Nakom paka kata píá Pejumopetünaxü tatsi xua paiña yawa jinompaenexa.

⁹Po peantobewa xeina pomonae pejumekowüntsiwi Nakom, xua nantiya kaemona-e penaantobewa, xang jopa nantawenonaeiño xua yábara tapákata tináewatsi bárapo koyene. Tsipéi Nakom piakoya paka kuiduba pokoyene xua nantiya paiña nenaantobewam tsane. ¹⁰Bara baxua paexanéibame xua paántobe tsurubenanae-biyam daxita pomonae jinompa Macedonia nákuatha, pomonae pejumekowüntsiwi Nakom. Íchitha paxam patamonae pam paiña nejumekowüntsiwixae Nakom, paka itoróbatsi xua áwiya mataropeicha paántobe tsurubenanaebiyama ekeicha matowa. ¹¹Bichokono paichichípare xua paiña neexanaewa xua pokoyene meje: Jüntema parubenanaebíyama, xua jopa pana najumematsontsónoba dubenanaebiyam. Matáütano paiñaxoba patsipaebéibame ichamonaetha pokoyenein barapomona-e bewa exanáe. Matáütano barompaya paiña penakuichiwang pana natsiéxana dubenanaebíyama icha be pókotsi koyeneya báyatha paka tsipáebatsi. ¹²Icha barapokotsiwa paexanáename ichamonae pomonae jopa Nakom pejumekowüntsiwi paka barükui-iturajinaena xua bara beta paiña neexanaexaem. Matáütano jopa panantawenonaem xua ichamonae pawüükame pokotsiwa xua panantawénoname.

Meje yábara poxonae Jesucristo pong jiwi Peksanamataxeinaein ekeicha kaewa patopáetsika

¹³Patamonae pam, paichichipang xua paiña neyaputaewa pokoyene pexaiñéi koyene, xua petüpaewi yábara. Matáütano jopa paichichipaeiño xua be wekoyeya pajinómpame icha be ichamonae ichi pomonae jopa pejumekowüntsiwi Nakom. Barapomonae be wekoyeya jinompa jopa wüünaeya pewüünae ewatsixae pokoyene xua poxonae petüpaewi ekeicha asüü tsane. ¹⁴Waxainchi jumekowüntatsi xua Jesús tüpa náetotha xuano ekeicha Nakom asüü juina éxana. Icha Nakom pexanto kana ichi, waxainchi jumekowüntatsi xua Nakom bara kana ichi tsane pomonaetha, pomonae báyatha wérapa. Barapomonae pejumekowüntsixae Jesús, poxonae wérapa asüü jujuina exanaeinchi xua Nakom exanaena. Nakom barapomonae barü jujuiña exanaeinchi Jesús, xua Jesús pemuxuna kaponaenéxatsi Nakom pexaiña beicha.

¹⁵Daxota paka tsipáebatsi pokotsiwa xua Jesús pana netsipaeba pong jiwi Peksanamataxeinaein. Yábara paka tsipáebatsi xua pomonae kataunxuae asüü jinompa poxonae patopaena pong jiwi Peksanamataxeinaein barapomonae kopiya jopa jujuiña exanáe tsainchi xua Jesús pekaxibinexa tsainchi athabeicha. Jame kopiya

matha asüü jujuiña exanaeinchi pomonae báyatha wérapa. ¹⁶Jesús pong jiwi Peka-namataxeinaein patopáetsika peitaboko wétsika. Bárapo matakeitha jiwi jume-taena peajumeyapusüü itorobi wawaiwa, xuano xua kueikueije matatsunpiwi pía pentakaponaein tatsi, xuano xua trompeta busixubina Nakom pía trompeta tatsi. Bapoxonae pomonae Cristo jumekowúntatsi xua pomonae báyatha yakuiwera-paeya óthopa bapomonae kopiya asüü jujuiña exanaeinchi. ¹⁷Bapoxonae kotakaya waxainchi pomonae kataunxuae asüü jinómpatsi, pomonae wajumekowúntsiwi Jesús naka kayawa múxuna kaetukaetutsiya kaponaeina pomonae kopiya pewera-paewi. Daxita barapomonaetsi Nakom naka kaponaeina xua naka kaponaeina tsa-kinaebówatha xua Jesús pong jiwi Peka-namataxeinaein wakaxibiyaenexa tsainchi athabeicha. Baxoteicha ataya tsitekaeya daxita waxainchi Jesús pong jiwi Peka-namataxeinaein, naka barü jinompéibina. ¹⁸Daxota bárapo jumetha kaemonae nantiya pana najüntükoyene tsakábare xua paiña neyaputaewa tsane, pokoyene xua pewerapaewi yábara.

5 ¹Patamonae pam, jopa nantawenonaeiño xua yábara pákata tínatsi matakabi, yawa dapae yábara xua poxonae Jesucristo pepatopeikaewa tsane. ²Báyatha payaputáneme xua ekeicha patopeikaena pong jiwi Peka-namataxeinaein. Matáütano payaputáneme xua bapong patopáetsika poxonae xapain jopa nantaxeinae tsainchi, icha pong pekaibin ichi xua jemeicha patopa merawitha. ³Poxonae jiwi jei tsane: “Maisha jüntema jinómpatsi tsipéi daxita wüünae tsúrukuae”, jei tsane, bapoxonae patopaena jemeicha po dapaetha poxonae jiwi bichokono átene ex-naeinchi. Jiwi jopa itaküüpáe tsainchi xua panenebiyaena bárapo peatenewa weya. Jiwi átene exanaeinchi icha yábüyo ichi xua bichokono bewa átene tsane xua pexuyo poxonae nakatsiwina. ⁴Patamonae pam, paxam jopa dapokotsimo-nae pam, pokotsimonae jopa jumekowúntsiyo Nakom. Poxonae ekeicha patopáe-tsika, pong jiwi Peka-namataxeinaein jopa pana nabenaekaem tsane, icha jopa be ichiyo poxonae jiwi nabenaeka xua pekaibin jemeicha patopa. ⁵Paxam pomonae Nakom payábara yaputáneme. Daxota beta painómpame icha be ichamonae ichi, xua matakeitha beta taeya jinompa xua pentha petsungkuaexae. Waxainchi jopa dapomonaetsi xua icha be ichi pomonae abeya jinompa jopa pejumekowúntsi jíwixae Nakom. Barapokotsimonae be pomonae poxonae jinompa pekiréiwatha, jopa beta jinompaeyo pekiréi tsungkuaexae. ⁶Pomonae jopa pejumekowúntsiwichi Jesucristo barapomonae jopa tsaka jinompaeyo xua pewüünae ewatsinexa Jesucristo pía pepatopeikaewa tsika tsane. Barapomonae be pokotsimonae xua maita, xua jopa itaküüpaetsi xua penakosabiwa. Íchitha jame bewa waxainchi wakoutha barompaya jüntükoyene koxonaetsi xua tsaka wajinompaewa poxo-nae wüünae éwatatsi Jesucristo pía pepatopeikaewa tsika tsane. ⁷Pomonae ba xua maita, bara mérawi maita. Írürü pomonae ba kúüpatsi peátsaxae mera, bara mérawi kúüpatsi. Daxita barapomonae jopa xapain Jesucristo wüünae ewatichi. ⁸Íchitha waxainchi wajumekowúntsixaetsi Jesucristo, daxota bewa jüntükoyene koxonaetsi xua tsaka jinómpatsi xua wawüünae ewatsiwa Jesucristo. Waxainchi wüünaeya bewa beta jumekowúntichi Nakom. Matáütano bewa beta nantiya naantobetsi. Bárapo koyénebe naka jüntükoyene yáitata xua jopa abe exanaetsi, icha soldadomonaepin ichi xua nayáitata penáintotha xua nantákari xátata xua pekawatsiyáinwatsi dejónatha. Barichi waxainchi bewa jumekowúntsiya wüünae ewatichi xua Nakom naka kapanenebiya tsane. Bárapo koyeneya naka yáitata xua

abe waexanaeyainwa icha soldadomonaepin ichi xua nantasipa yáitata penain yoreitha xua peantasípabe exanaeyáinwatsi. ⁹Nakom jopa naka itapetsiyo xua wanaka átene exanaenexa wanatsikuentésíwaxae abe waexanaexae bapongtha. Saya ápara naka itapeta wanaka kapanenebiyaenexa xua Jesucristo wanaka tsitüpaexae náetotha pong Wanaka namataxeinaein. ¹⁰Jesucristo naka tsitüpa náetotha wanaka barü jinompaewa tsane pía nakuatheicha, bekein waxainchi báyatha wérapatsi, yáwano ichakuitha bekein waxainchi áwiya asüü jinómpatsi, poxonae bapong patopáetsika. ¹¹Daxota paxam bewa áwiya daxita nantiya pana najüntükoyene tsakabim. Matáüta bewa nantiya pana naajüntükoyenesüü exanaem beta paiña nejumekowüntsínexa icha paichiponaem xua ánoxuae paexanapóname.

Meje yábara xua Pablo muxuweta pomonae Jesucristo pejumekowüntsíwichi

¹²Patamonae pam, paka muxuwétatsi xua pabarükui-iturajínare pomonae paiñaxantha Nakom tanakuítatsi xua pomonae paka matakápona. Barapomonae paka muxuweta xua Jesucristo pong jiwi Pekanamataxeinaein pekui-itorobixae abe paiña neexanaeyainwa. ¹³Bewa barapomonae beta pabarükui-iturajinaem peaiñakuí jíwixae. Matáütano bewa bichokono paántobem xua barapomonae betiya paiña nepaka mataxeinaexae. Daxita pam nantiya jüntema jinompa pana naexande.

¹⁴Patamonae pam, paka itoróbatsi xua jumedangweya pamuxuwere pomonae afaetabí xua penakuichiwa. Pajüntükoyene kuitsákabare pomonae jüntükoyene junuwiya jinompa ichamonae átene peexanaexae barapomonaetha. Matáütano payawende pomonae jopa ajüntükoyenesüüya jinompaeyo Nakomtha. Bewayo payawende barapomonae xua jopa paiña neaitakonaewam.

¹⁵Paiñaxoba ichamonaetha abe pata éxaname, xua kopiya abe pía pákata exanaexae. Seikaya jame ínkane beta wüünaeya dangweya pajüjütéibare xua nantiya paiña nenata exaneibínexa, xuano irü daxita jíwino.

¹⁶Bárabü tsitekaeya pajüntükoyene weiweina dubenanaebíyama. ¹⁷Daxita matakabi Nakomtha patsipaebéibare matowa. ¹⁸Daxita pokotsiwa pákata éxana bekein jopa pákata wüünaeyo, íchitha áwiya barapokotsiwang yábara Nakomtha patsipaebéibare, pajam tsaibinde: “Nakom maisha pajüntükoyene weiweinang xua pata tana neyawenaewam poxonae bekein painta dangwéi tsaibi”, pajam tsaibinde. Poxonae baxuang papáebame bichokono Nakom tsita wüünaetsi paiña neexanaexae pokotsiwa Nakom ichichipa Cristo Jesús pía paka barü jinompaexae.

¹⁹Jopa paitawétsinde Nakom pía Pejumopetünaxü tatsi poxonae paka itoroba pokotsiwa bewa paexanaem. ²⁰Jopa pajume itawétsinde po diwesi xua ichamonae paeba pomonae Nakom Pejume Diwesi pepaebiwi. ²¹Ínkane pajumetaema daxita po diwesin xua barapomonae paeba icha bara metha xaniwaicha po diwesin pona Nakom weya. Saya paitapere pokoyene xua pexaiñeiwa. ²²Daxita pokoyenein peabe koyenein panaitémare xua jopa paiña neexanaewam abe peéxanae koyenein.

²³Bara Nakom, pong jüntema jinompa naka éxana, bárabü barapong paka jüntükoyene ayapusüü exanaena xua jüpa paka kana exanaena icha bapong ichi xua jüntükoyene wüünae. Matáütano bárabü Nakom paka jüntükoyene wüünae exanaena paiña nejinompaewa tsane bapong nexa xua jopa paiña nexainaewam

penatsikuentsiwa xua abe paiña neexanaexae bapongtha. Bárabü Nakom beta paka júmope eenaena, yáwano xua paiña jüntükoyenewa, matáütano xua paiña pepong xua Jesucristo nexa pong Wanaka namataxeinaein xua beya poxonae bapong patopáetsika. ²⁴Nakom pongxae xua paka wüingduba pía paka exanaenexa piamonae tatsi, bapong xaiñeya pepaebin. Matáütano bapong exanaena pokotsiwa xua báyatha yábara paka tsiwüüinae muxuduta.

Meje yábara xua Pablo najumewetsiya paeba

²⁵Patamonae pam, painta Nakomtha wüükéibare.

²⁶Antobeya painta jakóbare daxita pomonae patamonae pomonae Jesucristo pejumekowüntsíwichi.

²⁷Xang paka itoróbatsi tsipéi Jesucristo, pong jiwí Pekanamataxeinaein neit-roba. Paka jeichi: “Bárapo carte painta yórobare daxita pomonaetha, pomonae Jesucristo pejumekowüntsíwichi”, paka jeichi.

²⁸Jesucristo, pong Wanaka namataxeinaein, bárabü paka yawena pía paka nekaantobéwaxae.

Baja Pablo, irü Silvano, irü Timoteono pongbe nekuéyatabe.

Meje Po Carte Kotakaya Pablo Tatina, Tesalónica Tomarapiwi Tatínatsi

Meje yábara poxonae Pablo tamrópata pítaba xua tatina pomonaetha Tesalónica tomarapiwi

1 ¹Xang Pablo, irü Silvano, irü Timoteo, barapóyobe pang, bárapo carte pákata tínatsi. Pákata tínatsi pomonaetha Tesalónica tomarapiwi pam, pomonaetha panakae-tútame xua wüünae paiña nejainchinexa Nakom. Paxam irü pomonaetha pejumekowüntsiwi pam, pomonaetha paiña neyawa jinompaewi Nakom, pong Waxa. Matáüta paxam pomonaetha xua paiña neyawa jinompaewi Jesucristo, pong jiwi Pekanamataxeinaein. ²Bárabü Nakom, Waxa, irü Jesucristo, pong jiwi Pekanamataxeinaein, paka yawenaena pía paka nekaantobéwaxae xua jüntükoyene weiweinaya paiña nejinompaewa tsane. Matáütano bárabü betiya wüünaeya jüntemiya jinompa paka kana exanaena.

Meje yábara xua poxonae Nakom yábara paeibina jiwi xua penatsikuentsiwa xua abe peexanaexae poxonae Cristo ekeicha patopáetsika

³Patamonaetha pam paxam irü paiña nejumekowüntsi jíwixae Jesucristo. Bewa pákata wüükaponeibinchi Nakom, xua pata jei tsaibiwa: “Nakom maisha pajüntü-weiweinang xua Tesalónica tomarapiwi beta wüünaeya kajumekowünta”, xua pata jei tsaibiwa tsane Nakomtha. Baxua painta wüünae xua paéxanang, tsipéi ekeicha matowa mataropeichiya pajumekokowüntapóname. Matáütano ekeicha matowa nantiya pana naántobem tsoponaem xua daxita paxam. ⁴Daxota jüntükoyene weiweinaya paka yábara páebatsi Nakom piamonaetha xua ichamonaetha matabüxü. Paka yábara jeichi: “Maisha Tesalónica tomarapiwi jumekowünta beta, yawa saya beta dubenanáebiya poxonaetha bekein átene éxanatsi abeya peyábara paebeibixae-tsi ichamonaetha. Matáütano barapomonaetha beta éxana dubenanáebiya xua bekein átene éxanatsi xua poxonaetha ichamonaetha abe peexaneibixae-tsi”, paka yábara jeichi barapomonaetha. ⁵Baxuang tsita itapeiñaxeina xua poxonaetha bekein Nakom yábara paeiba jiwi xua penatsikuentsiwa yawa péraxa jübitha bárapo jiwi, barápara beta éxana. Tsipéi bárapo jiwi natsikuenta Nakomtha abe peexanaexae. Daxota Nakom bara paka yábara kuikópata xua paiña patsinexa pía peitorobi nakua beicha tatsi, tsipéi bichokono paatenem paiña nejumekowüntsixaem bapong.

⁶Pomonaetha xua paka átene éxana, bexa tsane Nakom xuya kana exanaena xua barapomonaetha péraxa jübinchi. Barápara Nakom baxua beta éxana pía abe pákata exanaexae barapomonaetha. ⁷Nakom paka nafifina kapanenebiya exanaena xua paka yábara kui-opidukua exanaena xua ichamonaetha átene paka éxana. Írürü paxangtha

barichi tsane Nakom, xua poxonae Jesús patopáetsika, pong jiwi Pekanamataxeinaein. Bapong Jesús barü patopeikaena pía matatsunpiwi, xua matatsunpiwi peayapusúüwatha patsikaena. Matáütano Jesús múxuna patopeikaena pexeiña peitüpanáe koicha xua be ishoto. ⁸Jesús patopáetsika xua átene peexanaenexa jíwitha abe peexanaexae pomonae jopa yaputaeyo Nakom, penaitematsixaetsi. Matáütano átene exanaeinchi pomonae jopa jumekowüntsiyo Jesús pía pekapanenebiyáe jume diwesi tatsi, pong Wanaka namataxeinaein. ⁹Bárapo jiwi ataya tsitekaeya ajüntükoyenetane tsane tsana penobixae tsainchi tajü beya xua bapong pong jiwi Pekanamataxeinaein pía xaiña weya tatsi. Matáütano bárapo jiwi jopa tae tsane pong jiwi Pekanamataxeinaein pía pexeiña peitüpanáe koicha tatsi, xuano xua pía peayapusúü itorobiwa tatsi xua bichokono pexeiña koyene. ¹⁰Baxuang Nakom exanaena po matakábitha abü poxonae patopeikaena pong jiwi Pekanamataxeinaein, xua daxita piamonae pebarükui-iturajinaenexa tsainchi. Matáütano bapong daxita piamonae nabenaekaeya wüünae jainchinchinchi pomonae pejumekowüntsiwichixae-tsi. Paxam bara paichim tsane bárapo matakábitha paiña nejumekowüntsixaem-xae pojume diwesi báyatha paka tsipáebatsi.

¹¹Daxota ataya paka yábara wüükéibatsi Nakomtha. Pajang: “Nakom yawende barapomonae xua jinompaena pokoyeneya icha xua xam ichichípame poxonae wüngdúbame barapomonae xua penaexanaenexa jiñamonae. Matáütano yawende barapomonae pewetsinexa tsane jiña neayapusúü itorobi koyenéwatha pokoyene xua wüünae, pokoyene barapomonae ichichipa xua peexanaewa. Matáütano yawende barapomonae pewetsinexa po penakuichiwa éxana neka-jumekowüntsixaé”, pajang Nakomtha. ¹²Icha beta pajinómpame, jiwi wüünae jainchina Jesús, pong Wanaka namataxeinaein, paiña nejumekowüntsixaé tsane bapongtha. Matáütano Jesús kana éxana xua bárapo jiwi wüünae paka jainchina paiña paka kataexae tsane xua Nakom paka yawena, pía paka nekaantobéwaxae, xuano xua Jesucristo paka yawénarü pía paka nekaantobéwaxae pong jiwi Pekanamataxeinaein.

Meje yábara xua ekeicha patopáetsika pong jiwi Pekanamataxeinaein

2¹Patamonae pam, ánoxuae nama yábara be paka tsipaebinchi xua Jesucristo, pong Wanaka namataxeinaein, ekeicha pepatopaewa tsika. Matáütano ichichipang yábara xua tapaka tsipaebíwatsi xua wanaka barü nakaetutsiwa bapong. Daxota jumedangweya paka tsipáebatsi baxua. ²Icha ichamonae paka tsipaeba xua pinae ánoxuae matakabi jopa, po matakaiha xua Jesucristo, pong jiwi Pekanamataxeinaein báyatha patopa, paiñaxoba bepijawa payábara najüntükoyene kabenaekáename xua daxota jopa beta panantaxeinaem. Jopa bichoina payábara jumekowüntsinde bekein paebitha tsane xua pinae baxua barapomonae tsipáebatsi Nakom pía Pejumopetünaxü tatsi. Matáütano paiñaxoba payábara jumekowüntame bekein paebitha tsane xua pinae báraxua yábara paebangdü. Matáütano paiñaxoba payábara jumekowüntame bekein paebitha tsane xua pinae barapomonaetha báraxua payábara títangdü. ³Jopa pakopatsinde xua ichamonae yábara paka muxuitóroba baxua bekein pinmonae paka tsipaebitha tsane baxua. Tsipéi baxua pewünaeya tsane xua poxonae bárapo matakabi jopaena, bewa matha patopaena xua pokoyene jiwi Nakom naitematinchi. Bapoxonae pebin patopaena pong bichokono jopa juniya abe exanaeyo. Bapong ápara pong Nakom werawéraka

éxana ishótotha po ishótotha bápana kuinaya jopa ataya tsitekaeya itakounayiyo. ⁴Nakom abe yábara paebinchi. Bapong jopa tsita aiñakuiyo tsainchi daxita pokotsiwa jiwi wüünae jainta. Matáütano bapong jopa tsita aiñakuiyo tsainchi bekein po nakomüng jiwi éxana. Bapong piakoutha penakanamataxeinaein náexana xua peewatsiwa daxita pokotsiwang Nakom piáwa, xua pía wüünae jaintichi, xua jiwi wüünae jainchina. Matáüta bapong ekaena Nakom pin piabotha xua piakoya Nakom najainta.

⁵¡Bara baxuang yábara kaena báyatha paka tsipaebatsiba poxonae kataunxuae paka barü popoinchi! ¿Bara pajüntemáiname jampa? ⁶Ánoxuae paxam payábara yaputáneme pokoyene xua peayapusúü itorobi koyenewa bapong kuimatawéntatsi xua pepatopaewa. Saya beya jame patopáetsika poxonae bárapo matakabi tsane xua bapong kopatinchi xua pepatopaewa tsika tsane. ⁷Pinmonae ánoxuae bichokono abe exanapona. Saya waxainchi yábara yaputaeninchi baxua Nakom pía wanaka yaputane exanaexae wajumekowüntsixae. Nama pomonae jopa jume-kowüntsiyo jopa yábara yaputaeyo baxua. Saya meisha akoibi xua pitinchi pong xeina bárapo peayapusúü itorobi koyenewa xua pekuimatawentsíwatsi pongtha pong bichokono abe peexanaein. ⁸Saya bapoxonae naitüütsina bapong pong bichokono abe peexanaein. Íchitha poxonae Jesús, pong jiwi Pekanamataxeinaein patopáetsika, bapong bexubina pong bichokono abe peexanaein bexubinchi poxonae ofutarabina, xua ataya werawéraka pekana exanaenexa pexeña peitüpanáe koicha peyawanaitüütsiya patopeikaexae tsane. ⁹Pewünaeya tsane xua poxonae Jesús bexubina pongtha pong bichokono abe peexanaein, Satanás pong kaurimonae pía pentakaponaein tatsi, bapongtha katsina pía peayapusúü itorobi koyenewa xua katinchi pong abe peexanaein. Bapong pong bichokono abe peexanaein bichokono peayapusúüwa yawa patopaena. Matáütano bapong daxita koyeneintha pexeña petsita-itüübiwang exanaena peayapusúüwatha xua jopa xaiñeyo xua jiwi pemuxujaiñabinéxatsi. ¹⁰Bapong exanaena daxita peabe koyenewang xua daxita jiwi pemuxujaiñabinexa tsainchi. Nakom exanaena xua bárapo jiwi werawerakaena jopa peichichipaexae xua pejumekowüntsiwa pexaiñéi jume diwesi po diwesi xua barapomonae pekapanenebiyaenexa tsainchi. ¹¹Daxita bárapo koyeneinxae daxota Nakom bara saya yábara kuikópata xua bárapo jiwi bara muxujaiñabinchi xua daxota jumekowüntsina bárapo penáerabi jume diwesi. ¹²Pomonae jopa bejumekowüntsiyo pexaiñéi jume diwesi barapomonae saya ichichipa nawita xua peabe koyenewang éxana. Barapomonae Nakom kaununaya itawetsina poxonae yábara paebina xua barapomonae Nakom tsita natsikuéntatsi xua abe peexanaexae.

Meje yábara pomonae Nakom itapeta pekapanenebiyaewa tsane

¹³Patamonae pam, paxam pomonae pam pomonae paka ántobe pong jiwi Pekanamataxeinaein. Paxang bewa daxita matakabi pákata wüükueibinchi Nakomtha. Bewa pajang tsaibin tsane: “Nakom maisha pajüntükoyene weiweingang beta nekajumekowüntsixae Tesalónica tomarapiwi”, bewa pajang tsaibin tsane. Daxota baxua papaebang Nakomtha tsipéi báyatha kaena paka itapeta paiña nepaka kapanenebiyaenexa xua tsiwanaya poxonae aena Nakom fórota bárapo kae pin nákuathe. Nakom baxua éxana pía peayapusúüwatha po peayapusúüwa pía Pejumopetünaxü tatsi xeina pongxae paka jüntükoyene wüünae éxana Nakom nexa. Matáütano baxua éxana poxoru paiña nejumekowüntsixae pexaiñéi jume diwesi.

¹⁴Daxota Nakom báyatha paka waba bapong paiña nejumekowüntsinea poxona paka kuidúbatsi Nakom pía pekapanenebiyáe jume diwesi. Daxótano paka waba xua Jesucristo pong Wanaka namataxeinaein paiña nenabarü xeinaenexa pía pexeiña peitüpanáe koyenewang.

¹⁵Patamonae, daxota pajumekowünta dubenanaebiyama ekeicha matowa. Paiñaxoba pajüntemáiname po pekuidubiwang xua ichamonae pana kuiduba xua xuya ánoxuae yatsikaewa paka kuidúbatsi, xua yawa cártano pákata tíntsi. ¹⁶⁻¹⁷Nakom Waxa, pía wanaka antobexae naka yawena. Bapong ataya tsitekaeya naka matateika pía pexeiña jüntükoyenéwatha. Matáütano Nakom naka kata xua wawüünae ewatsiwa pokotsiwa xua bapong naka katapaeba, pokotsiwa xua wüünae. Paka yábara páebatsi bapongtha. Matáütano paka yábara páebatsi Jesucrístotha pong Wanaka namataxeinaein. Pajang bapongbetha: “Bárabü payawenáenamebe Tesalónica tomarapiwi. Bárabü pajüntükoyene kuitsakabinamebe barapomona. Matáütano bárabü jüntükoyene jumekowüntsiya ayapusüüya pakana exanáenamebe barapomonaetha, xua pía pepaebeibinexa pokotsiwa wüünae xvano pía peexaneibinexa pokotsiwa wüünae”, pajang bapongbetha.

Meje yábara poxona Pablo namchi: “Painta Nakomtha wúükare”, jei

3¹Patamonae, paxam pomona irü paiña nejumekowüntsixa Nakom. Ánoxuae paka tsipáebatsi pokotsiwa xua pawetang xua pata paka tsipaebíwatsi. Paka jeichi xua painta Nakomtha wúükare xua xain pong jiwi Pekanamataxeinaein pejume diwesi tatsi áwiya naiña tajü patsipaebaponaein daxita nákuangtha. Matáütano painta wúükare xua xain ichaxota patsipaebang bárapo diwesi daxita jiwi beta jumebari jejei peaiñakuí diwésixa, icha paichim poxona pajumetáneme bárapo diwesi. ²Matáütano Nakom painta wúükare xua xain Nakom jopa kopatsiyo xua painta abe éxana pomona bichokono ajüntükoyenebé. Tsipéi jopa daxita jíwiyo pomona beta jumekowünta po diwesi patsipaebang. ³Íchitha jame bara itakoxoinchi xua wajumekowüntsiwa pong jiwi Pekanamataxeinaein tsipéi bara bapong xaiñeya naka yawena. Matáütano bapong paka ajüntüyapusüüya exanaena. Matáütano bapong paka ita-arárana xua abe paka exanaeyainwa pong bichokono abe peexaneibin. Paka yawenaena xua jopa paiña neexanaenexa abe peéxanae kuirukoyenewang. ⁴Bara paka yábara jumekowúntatsi xua bara bapong pong jiwi Pekanamataxeinaein paka yawena. Bapong paka yawenaena xua paéxaname, xvano xua paéxana dubenanaebiyáename pokotsiwang xua paka itoróbatsi. ⁵Bárabü bapong, pong jiwi Pekanamataxeinaein, paka yawenaena xua bichokono paiña neyábara yaputaenexa Nakom pía paka ántobe koyenewa tatsi. Matáütano bárabü paka yawenaena xua áwiya antükoyenesüüya paiña nejumekowünta dubenanaebiyaenexa tsane. Bapoxona bekein ichamonae abe pákata exanaetha tsane jopa pa-aitakonaem tsane. Bara paichim tsane icha Cristo ichi xua poxona jiwi barapókotsi koyene éxana jopa aitakonaeyo.

Meje yábara poxona Pablo yábara paeba xua jiwi bewa nakuichina

⁶Patamonae pam, paka itoróbatsi tsipéi Jesucristo Wanaka namataxeinaein pana kata pía peitorobi koyenewa. Paiñaxoba imoxoyo pabarü-jinómpame peafaetabiwi pomona aichaxaibi nakuita, xua pomona irü pejumekowüntsíwixae. Barapomona jopa yábara jumekuiya exanaeyo po pekuidubi koyenein xua Jesucristo

weya báyatha, xuano xuya barapomonaetha pakuidubang. ⁷Paxam payaputáneme, xua bewa wüünaeya betiya pajinompae, icha báyatha paichin. Poxonae paka barü jinómpatsi jopa paakoyenefáetabiño, ápara panakuitang nawita. ⁸Poxonae paxaibang paiñaxantha bara pentoma paexaneibang pexaewa nexa. Jopa amanaya panabanéibiño. Jame ápara dangweya panakuiteibang merawintha, matakábinthano xua jopa dangweya pata pákata exanáewatsi tsainchi. Jopa panantawenonaem xua painta kómokame pexaewa. ⁹Bekein pana yábara kuikópata xua pata paka wüükáewatsi pata neyawenaenexam tsane, íchitha bara pana netáneme xua pexaewa pana natsiúpain nakuítang, xua irü bara paiña neichinéxarü. ¹⁰Tsipéi poxonae paka barü énantsi baxua yábara paka tsipáebatsi xua bárapo peitorobiwe paka jeiche: “Pong jopa benakuichiyo bü jopa xae tsane”, paka jeiche. ¹¹Ichamonaem pana tsipaeba xua paiñamonae jíwana yábara, xua pinae paiñamonae jíwana jopa natsiúpain nakuichiyo pexaewa. Saya pinae dubenanáebiya. Barapomonaem saya pinae ichamonaem yábara yüüyüüjeichi. Barapomonaem jopa pinae exanaeyo piáwa. Saya pinae penabarü yüüyüüjéi poxonae ichamonaem enéibatsi poxonae nakuiteiba. ¹²Barapomonaem pomonaem saya dubenanáebiya, paitorobang pajangje: “Tsipéi Jesucristo pana kata pía peitorobi koyenewa pong jiwí Pekanamataxeinaein, daxota pekono juméyotha paka tsipáebatsi. Bara panakuire paiña nenukuichiwa xua pexaewa paiña natsiúpain nakuichinexa. Jopa ichamonaem payábara nabarü yüüyüüjande”, pajangje.

¹³Íchitha paxam patamonae pam, pomonaem pam irü pajumekowúntame jopa paajüntükoyene faetabinde xua wüünaeya paiña neexanaewam. Áwiya wüünaeya paexanaponde. ¹⁴Icha ichüing paiñamonae jíwana jintong jopa exanaeyo pokotsiwa paka tsipaebiya tñatsi bárapo cártathe bárapo pebin pakuinaitáeware paiña nekuiyaputaenexa. Bárapo pebin jopa pabarü-jinompaeinde, xain bapoxonae aura xua jopa peexanaexae xua bárapo cártathe papaebang. ¹⁵Íchitha jopa bapong pakana exanaeinde be pong paiña nepaka ka-aitafaetabí jintong. Saya jame maisha pamuxuwere xua bapong maisha penakuichinexa. Matáüta maisha bapong patsipáebare icha paichim poxonae patsipáebame pongtha pong pejumekowúntsin.

Meje yábara xua Pablo najumewetsiya paeba

¹⁶Jesucristo pong jiwí Pekanamataxeinaein xua jüntema pópona peyakuiyajinaein, bü bara bárapo jüntema pejinompáe koyene paka katsina daxita matakabin tsabi poxonae bekein ichamonaem abe pákata exaneiba. Bárabü bapong pong jiwí Pekanamataxeinaeinxae daxita paxam paka barü jinompaena.

¹⁷Xang Pablo saya meisha bárapo kouye takoutha bara tinang, po jumeyo xua paka jakóbatsi. Baxua tsita itapeiñaxeing xua bárapo carte ápara bara tacarta. Daxita tacartangtha bárapo jumekouxí wetsiya tineibang icha bárapo carte ichi. ¹⁸Pong Wanaka namataxeinaein, Jesucristo, bárabü daxita paxam bichokono paka yawenaena pía paka antobexae.

Baja Pablo, irü Silvano, irü Timoteono pongbe nekuéyatabe.

Meje Po Carte Kopiya Pablo Tatina, Timoteo Tatínatsi

Meje yábara poxonae Pablo tamrópata pítaba xua tatina, Timoteo tatínatsi

1 ¹Jako Timoteo. Xang, Pablo, Jesucristo pía peitorobi jiwi jíwana tatsin. Nakom pong Wanaka kapanenebiyaein neitoroba. Matáütano Jesucristo, pong Peka-namataxeinaein jiwi, pong wüünae éwatatsi írürü neitoroba. ²Timoteo, xam kata tínatsi bárapo carte, xam bara xaniwaicha be taxantom kanatsikotainchi, tsipéi kayawénatsi xua nejumekowüntsiwa Nakom. Ichichipang xua Nakom pong Waxa, irü Cristo Jesús, pong Wanaka namataxeinaein, bapongbe bara amanaya kayawenaena pía nekaantobexaebe. Matáütano ichichipang xua bapongbe nantanuweya kayábara nantaxeináenabe pía nekayawenaenéxabe. Matáütano ichichipang xua jüntema pópona jiña neka-exanaenéxabe.

Meje yábara xua Pablo yábara muxuweta pomonaе abeya pekuidubiwi pía pekuidubi koyenewa tatsi pekuiyainwa

³Poxonae matha kain muxu taponáe Macedonia nakua beya, bapoxonae jume-dangweya kajeichi, jangje: “Ékare Efeso tómaratha jiña nekui-itorobinexa tsane pomonaе abeya pekuidubiwi pía pekuidubi koyenéwatha. Barapomonaе seikayiya kuiduba ichi be jopa paxang ichiyo pomonaе Jesucristo pía peitorobi jiwi tatsi pangxaein. Itoróbare xua barapomonaе jopa kuidubi tsane ichamonaetha bárapo koyene pokoyene xua jopa xaiñeyo. ⁴Matáütano barapomonaе jopa bewa jüntü-koyene enáe tsainchi po diwesin xua pía pamo susato jiwi tatsi paeba po diwesin xua pejemái diwesin, matáütano po ayéi diwésino, xua pía pamo susato jiwi tatsi yábara”, kajeichi. Bárapo diwesin saya jiwi najumematsontsónoba éxana. Bárapo diwesin jopa naka yawenaeyo xua beta wakana mataxeinaewa Nakom piamonaе wajumekowüntsixaе Nakom.

⁵Xua tapaebixae xua bárapo peitorobi koyenéwatha paeba ápara xua daxita jiwi nantiya kaemonaе penaantobenexa tsane. Bárapo peántobe koyenewa jiwi pía jüntü-koyene wétsina pona poxonaе pía jüntükoyenein wüünae xua jopa xeinaeyo peabe koyenewa yawa poxonaе bárapo jiwi piakoutha najüntükoyene tsipaeba xua jopa peexanaenexa peabe koyenewa Nakomtha. Yawa bárapo peantobewa jiwi pía jüntü-koyene wétsina pona poxonaе bárapo jiwi xaniwaicha jumekowünta Nakomtha. ⁶Ichamonaе jopa xeinaeyo bárapo peántobe koyenewa poxoru jume itaweta, matáütano poxoru najüntükoyene eena éxana penajumematsontsonobí diwesin. ⁷Barapomonaе ichichipa bekuidubina Nakom pía peitorobi jume diwesi. Bekein barapomonaе baxua éxana, íchitha jopa beta exanaeyo tsipéi jopa yábara yaputaeyo Nakom pía peitorobi jume diwesi. Matáütano barapomonaе jopa yábara yaputaeyo pokoyeneya xua atsakiya yábara kuiduba ichamonaе Moisés pía peitorobi jume diwesi.

⁸Bara yaputainchi xua Moisés pía peitorobi diwesi wüünae jiwi nexa, icha po jiwi kuiduba bárapo diwesi, bara xaniwaicha kuiduba icha be pókotsi koyeneya xua Nakom ichichipa. ⁹⁻¹⁰Waxainchi matáütano yaputainchi xua Nakom pía peitorobi jume diwesi jopa barapomonae néxiyo pomonae báyatha pejüntükoyene xeikaewi tsipéi daxita koyenein ba beta peexanaewi. Jame bárapo Nakom pía peitorobi jume, barapomonae nexa pomonae meje: pomonae jopa exanaeyo pokotsiwa Nakom pía peitorobi jume diwésitha itoroba, pomonae jopa jumekowüntsiyo Nakom, pomonae jopa ichipaeyo Nakom, pomonae abe peexanaewi, pomonae jopa jüntükoyene wüünaeyo Nakomtha, pomonae aichaxaibi Nakom pía peitorobi jume diwesi, pomonae pía paxewi pebewi pomonae pía pena jiwi pebewi, pomonae jiwi pejutewi, pomonae penataxiwaxeinaewi yabüxitha xua jopa piseuri jiwi, pomonae kae pebiwi penaishamaichiwi xua be yábüxi penatsikotaewi, pomonae parátixi xeineiba xua ichamonae pejíwana noteibíxaetsi poxonae ekeicha kaewa pejíwana kanawibeibixaetsi, pomonae jiwi pemuxuitorobiwi, pomonae naerabiya jumedangweya paeba xua ichamonae naerabiya peyábara paebíwatsi. Bárapo peitorobi jume írürü barapomonae nexa daxita pomonae seikayiya yábara jumetoxeinchiya éxana pokoyene xua Jesucristo pía pexeña pekuidubi koyenewa. ¹¹Bárapo pexeña pekuidubi koyenewa, bara najumejúpabe Nakom pía pexeña jume diwesi tatsi, po diwesi yábara pokoyene xua Nakom bara bichokono pewüünaein, xuano bichokono pejüntükoyene weiweinaein. Bárapo diwésibe Nakom itoroba xua takueikuejeiwa tsane.

Meje yábara poxonae Pablo jüntükoyene weiweina Jesucristo

¹²“Jüntükoyene weiweinang tanekatsixaemxae peantüyapusüüwa”, jang Jesucristo, pong Wanaka namataxeinaein. Bapong nekata peantüyapusüüwa takueikuejeiwa tsane jíwitha Nakom pía Pexeña jume diwesi tatsi. Bapong neyábara nantaxeina xua bara beta jumekowüntang, daxota nekana éxana xua xang pía petanakuichin tatsin. ¹³Bapong baxua inta éxana bekein bara báyatha bapong abeya yábara páebang. Matáütano bapong piamonaetha tatsi abeya takanaéxanang. Matáütano abeya tayábara páebang bárapo pijimonae tátsitha pomonaetha, pomonae pía pejumekowüntsiwixaetsi. Íchitha Nakom nantanuweya neyábara nantaxeina pía tana neyawenaenexa, tsipéi bapoxonae jopa jumekowüntsiño Jesucristo poxonae abe éxanang. Matáütano jopa yaputaeiño pokotsiwa xua báyatha éxanang. ¹⁴Daxota Nakom pong Wanaka namataxeinaein bichokono amanaya neyawena taneantobexae. Nakom nejüntükoyene yüüka éxana po pejumekowüntsiwa xuano xua po peantobewa tsita xéinatsi Cristo Jesús.

¹⁵Cristo Jesús patopeika po kae pin nákuathe tsike pekapanenebiyaenexa tsainchi pomonae abe peexanaewi, xua kapanenebíyatsi abe pía peéxanae kuirukoyenein weya. Pomonae abe peexanaewi barapomonae jíwanang xua bichokono abe taexanaein beyakaincha barapomonae poxonae abe éxana. Baxuang ápara xaiñéi pokotsiwa xua yábara páebang. Jiwi bewa jumekowüntsina baxuang. ¹⁶Bekein bichokono abe taexanaein, dáichitha Nakom nantanuweya neyábara nantaxeina pía tana neyawenaewa tsane. Tsipéi xang pong Jesucristo nenaitüüta éxana jíwitha, xua báyatha tana nekuiyábara ewatsixae xua tajumekowüntsiwa tsane Jesucristo xua poxonae jopa aitakonaeyo. Daxota ichamonae poxonae netaena Nakom exanaena xua barapomonae

Jesucristo pejumekowüntsiwa tsainchi, pexeinaenexa peantüyapusüüwa po peantüyapusüüwa xua ataya tsiteka. ¹⁷Nakom, wüünae paka jáintatsi: “¡Xam Nakom pong ataya jiwi itorobiya pepa Neéwatsin! ¡Xam Nakom pong bápana jopa tüpaem tsane! ¡Xam pong xua jiwi jopa itaküüpaetsi xua nekataewa! ¡Xam yatsikaewa kompam pepa Nakomüm! ¡Ataya paka tsita barükui-iturajínatsi! ¡Bárabü ataya jiwi wüünae kajainchina! Je bara ichi tsane”, paka jeichi Nakom.

¹⁸⁻¹⁹Xam, Timoteo, bara xaniwaicha be taxantom kanatsikotainchi. Kaitoróbatsi ichi be pókotsi koyeneya báyatha Nakom pía peitorobi jume pepaebiwi kaitoroba poxonae kayábara tsiwüünae muxuduta xua bexa kuidubínabe jíwitha Nakom pía pexeña jume diwesi. Xang kaitoróbatsi icha be pókotsi koyeneya báyatha barapomona kaitoroba. Kajeichi: jumedangweya antüyapusüüya beta éxande Nakom pía petanakuichiwa tatsi. Poxona baxua éxaname, beta jumekowüntsiya éxande, yawa pexeña jüntükoyene xéinare po jüntükoyene xua xaiñeya natsipáebame, xua jopa abe exanaem Nakomtha, kajeichi. Ichamonae bekein beta natsipaeba pijüntükoyéneintha, íchitha barapomona najüntükoyene barapenta pokoyene Jesucristo pejumekowüntsíwatsi tsipéi jopa jumekowüntsiyo pokotsiwa pía jüntükoyene tsipáebatsi. ²⁰Barapókotsi koyene Himeneo éxana írürü Alejandro éxana. Bapongbe kaenátangbe pong kaurimona pía pentakaponaeintha tatsi pong Sata-nás beya poxona barapongbe nakuidubínabe xua jopa bewa abe yábara paebí tsánebe Nakomtha.

Meje yábara xua Pablo yábara kuiduba pokoyene xua Nakomtha petsipaebiwa

2¹Kopiya kaitoróbatsi baxuangje xua exanáename: Nakomtha tsipáebare daxita jiwi nexa; Nakomtha wüükare xua Nakom peyawenaenexa daxita jiwi; yawa jande Nakomtha: “Nakom, maisha jüntükoyene weiweingang xua daxita wüünaeya jiña netaexanaewam jiwi”, jande. ²Bewa Nakomtha tawüükáename daxita nakua peewatsiwimona. Matáütano bewa Nakomtha tawüükáename daxita pentakaponaewimona. Baxua bewa exanáename xua jüntema beta wajumekowünta dubenanaebiyaenexa Nakomtha, yawa jüntema wajinompaeenexa jiwi peitütha. Bárapo jüntema wajinompaeewa bara bewa Nakom tsita xeinaeinchi bárapo koyene, yawa bara jiwi xaniwaicha naka kuitane xua bara beta xaniwaicha jinómpatsi daxita karepaya koyenekuintha. ³Bárapo koyenein jame Nakom tsita wüünaetsi pong Wanaka kapanenebiyaein. ⁴Nakom bichokono ichipa xua daxita jiwi pekapanenebiwa tsainchi abe pía peéxanae kuirukoyenein weya. Matáütano Nakom ichichipa xua jiwi yaputaena pokotsiwa xua pexaiñéi koyenewa. ⁵Meisha kompa Nakom pong pepa Nakom, bapong meisha pópona. Barichi saya meisha kaein pong itaküüpatsi xua jiwi yábara jumeyawénatsi Nakomtha, ápara barapong Jesucristo. ⁶Jesucristo kópata xua bara náetotha tsitüpa xua daxita jiwi yantómatatsi xua jiwi pekapanenebiyaenexa tsainchi abe pía peéxanae kuirukoyenein weya tatsi. Poxona Jesús tüpa náetotha, baxua tsita itapeñaxeina xua Nakom Pexanto itoroba po matakeitha Nakom peichichipaexae xua daxita jiwi pekapanenebiwa tsainchi. ⁷Daxota Nakom newüngduta, jeye: “Bapong ápara pong tajume diwesi pekaponaein yawa bapong taitorobiwi jíwanapin”, jei Nakom. Bara xaniyeya páebang, jopa naerabiño. Daxota Nakom neitoroba takuidubinexa pomonaetha, pomona

jopa judiomonae naexanaeyo xua Nakomtha pejumekowüntsiwa yábara yáwano xua Nakom pía pexaiñeiwa yábarano tatsi.

⁸Daxota ichichipang xua daxita nakuangpiwi Nakom pewüükaewa tsainchi. Poxonae wüükaena Nakomtha bewa namaxüyoichaena xua yatsikaewa pexei-naexae tsane pejäntükoyene wüünaewa. Matáütano jopa bewa yajüntükoyeneya paebí tsane xua peita aenae-aeneiwa ichüngtha. Matáütano jopa bewa yajüntükoyeneya paebí tsane xua penajumematsontsonobí koyenewa. ⁹Ichichipang xua yábüxi namaxatabina pókotsi paparuwa be kónotha wüünae. Saya uuranaya jinompaena xua bichokono jopa átsaki tsane xua pebarü yüüyüüjeiwa pebíwitha. Jopa bichokono wüünaeya nantanafabi tsane. Jopa bichokono nantanapepena exanée tsane pokotsíwatha xua bichokono aiña matomang, pokotsiwa pewüng oro, matáütano pokotsiwa pewüng perlang. Matáütano jopa namaxátabi tsane pókotsi paparuwa bichokono aiña matoma. ¹⁰Jame yábüxi bewa exanaena pokotsiwa jiwí tsita koyenewüünaetsi, xua pókotsi koyene jiwí yawénatsi. Baxuang jame bichokono wüünae xua yábüxi éxana, poyábüxi xaniwaicha jumekowüntsiya jinompa xua Nakom pejumekowüntsíwatsi. ¹¹Yábüxi bewa saya moya jumenaitaewatsiya jumetaena pokotsiwa xua nakuiduba. Saya bewa moya jumejéjéi tsane. ¹²Tsipéi yábüxi jopa kopatsiño xua kuidubina Nakom Pejume Diwesi pin bicheito itabaritha. Matáütano jopa kopatsiño xua yábüxi pentakaponaewi penaexanaewa tsane pebiwi nexa. Jame bewa yábüxi saya moya enaena poxonae pejumekowüntsiwi nakaetuta xua Nakom wüünae pejainchinéxatsi. ¹³Tsipéi Nakom kopiya éxana pebin pong pewüng Adán, bapoxonae yábüyo exainchi powa pewüng Eva. ¹⁴Kaena báyatha Adán jopa muxujaiñabichi pong kaurimonae pía pentakaponaein tatsi xua abe peexanaewa tsane. Ápara jame bapowa Eva muxujaiñabatsi, daxota bapowa abe éxana. ¹⁵Bekein yábüyo átene poxonae tanakatsíwatsi pexuyo, íchitha Nakom kapanepaena bapowa icha bapowa jumekowüntsiya poponaena Nakomtha, yawa icha antobeya poponaena, yawa icha betiya poponaena xua yatsikaewa Nakom nexa, yawa icha ita-uranaya poponaena Nakomtha.

Meje yábara xua bewa exanaena pomonae pekanamataxeinaewi pejumekowüntsiwi

3 ¹Baxua ápara xaiñéi xua tapaka tsipaebíwatsi. Icha pebin ichichipa naexanaena xua pomonae Nakom pejumekowüntsíwichi pekanamataxeináewatsi, bara baxua bara wüünae. ²Daxota pong pomonae Nakom pejumekowüntsiwi kanamataxeínatsi, bapong bewa wüünaeya beta poponaena xua bapong jopa abe peyábara paebinexa tsainchi ichamonae. Bapong bewa saya kae piseuri barü jjiinaena. Matáütano bapong jopa bewa bichokono apáe tsane xua vino mera pía beta nenantaxeinaenexa. Bapong bewa beta nayaputane exanaena, xua daxota wüünaeya peexanaewa tsane, xua bapoxonae ichamonae bapong wüünaeya peyábara nantaxeinaewa tsainchi. Bapong bewa matenta weiweinaya wabeibina pomonae petapateibeibixaetsi piabotha. Bapong ba piákuí xeina xua beta kuidubina ichamonaetha. ³Bapong jopa bewa naküüpa exanée tsane peátsaxae mera. Yáwano jopa bewa bapong naba exanée tsane, saya jame bewa jüntema poponaena. Bapong jopa bewa najumematsontsónoba exanée tsane. Yáwano bapong jopa bewa pitaparátixichi xua parátixi peasiwiwa. ⁴Bapong bewa beta itorobiya kanamataxeinaena pía bomonae matabüxüyo. Matáütano bapong bewa pía pexui jumenaitaewatichi

poxonae itorobeiba pía pexui. Yawa pía pexui bewa tsita xéinatsi pebarü iturajinae koyenewa. ⁵Icha barapókotsi jintong itakoxánatsi xua beta itorobiya kanamataxeina pía bomonae matabüxüyo, bapong néxata jopa itaküüpaetsi xua kanamataxeina Nakom nexa pomonae Nakom pejumekowüntsiwixaetsi. ⁶Pebin jopa bewa naexanáe tsane xua pomonae Nakom pejumekowüntsiwichi pekanamataxeináewatsi poxonae kataunxuae abü pena pejumekowüntsin Jesucristo. Icha bapong pena pejumekowüntsin tsipae Jesucristo, metha bapong aebatsipa nawita jíwitha, bapoxonae Nakom kana exanáetsipa bapongtha, icha be pókotsi koyeneya ichi poxonae kaurimonae pía pentakaponaein tatsi itawétatsi, xua Nakom itaweta pía nakua weya, xua Nakom peaebíxaetsi. ⁷Matáütano bapong bewa beta poponaena, xua pomonae jopa pejumekowüntsiwi Nakom, bapong beta peyábara nantaxeinaenexa tsainchi. Icha bapong jopa beta póponae tsane, bapoxonae jiwi abeya yábara paebina, bapong abeya yábara paebinchi. Yáwano metha bapong exanáetsipa pokotsiwa kaurimonae pía pentakaponaein tatsi kuijüjüta xua pokuikoyeneyatha bapong peexanaenexa.

**Meje yábara pomonae jiwi peyawenaewi
pomonaetha, pomonae pejumekowüntsiwi**

⁸Barichirü pomonae jiwi peyawenaewi pomonaetha, pomonae pejumekowüntsiwi, xua peyawenaewi peatenéwitha, xua múxunano peapatsíwano peakopeibíwitha, barapomonae bewa beta jinompáe, xua jiwi pebarükui-iturajinaenexa barapomonaetha. Matáütano barapomonae jopa bewa icha kaununaya paebí tsane. Jopa barapomonae naküüpa exanáe tsane peátsaxae merang. Matáütano jopa bewa pitaparatixichi tsane xua parátixi peasiwiwa. ⁹Barapomonae bewa beta jumekowüntsi Jesucristo pokoyene xua Nakom yábara tsita itüüta xua wajumekowüntsiwa, yáwano barapomonae bewa múxuna xeináe po jüntükoyénetha beta xaniwaicha natsipáebatsi xua jopa abe exanaetsi Nakomtha. ¹⁰Bara matha bü ichamonae kuijüjütsina barapomonaetha icha beta xaniwaicha jinompa yawa icha ichamonae jopa abeya yábara paebiyo barapomonaetha. Bapoxonae barapomonae kana exanaeinchi pomonae jiwi peyawenaewi pomonaetha, pomonae pejumekowüntsiwi, xua peyawenaewi peatenéwitha, xua múxunano peapatsíwano peakopeibíwitha. ¹¹Barichi yábüxi bewa beta jinompaena xua barapówaxi pebarükui-iturajinaewa tsainchi jiwi. Jopa bewa bapowaxi abe yábara paebí tsane ichamonaetha, xua ichamonae abe peexanaexae. Matáütano bapowaxi jopa bewa bichokono apáe tsane vino merang. Matáütano bapowaxi bewa beta jinompáe, xua ichamonae peyábara jumekowüntsiya nantaxeinaenexa xua pokotsiwa bapowaxi daxitang éxana pokotsiwang báyatha exanapaebeiba. ¹²Barapókotsi jiwi jíwana jintong pomonae peyawenaewi pomonaetha, pomonae pejumekowüntsiwi, bapong bewa saya kae piseuri barü jijinaena. Matáütano bapong bewa beta itorobiya kanamataxeinaena pomonae pía bomonae matabüxüyo xua daxota bewa beta itorobiya kanamataxeinaena pía pexui. ¹³Tsipéi barapókotsi jiwi pomonae peyawenaewi pomonaetha, pomonae pejumekowüntsiwi poxonae barapomonae beta éxana pía petanakuichiwa, bapoxonae ichamonae barapomonae wüünae jáintatsi beta pía petanakuichiwxaxae. Matáütano barapomonae ichamonaetha kuitsakatsakapiya yábara paeba xua pía pejumekowüntsiwa xua Cristo Jesús pejumekowüntsiwatsi.

**Meje yábara pokoyene xua naitüüta xua pokoyene kopiya moya
peyawüngxainaewa pokoyene xua wajumekowüntsiwa**

¹⁴⁻¹⁵Bekein ichichipang xua methaunxuae kataeinchi, dáichitha daxota kata tñatsi xua icha pirapaeyo tapatopaewa tsane, bapoxonae yaputáename pokoyene xua jiwi bewa exanaena. Bárapo koyene beta wüünaeya penabarü jinompáe koyenewa Nakom peitabaratha tatsi, pomonae Nakom piamonae tatsi. Ápara yábara páebang pomonae Nakom piamonae tatsi, pomonae Jesucristo pejumekowüntsiwichi, pomonae nakaetuta xua Nakom wüünae pejainchiwa tsainchi, po Nakom ataya asüü pepoponaein. Barapomonae yajüntükoyeneya jinompa Nakom pía pexaiñéi koyenewa tatsi. Matáütano barapomonae yábara jumeyawena Nakom pía pexaiñéi jume diwesi poxonae ichamonae abeya yábara paeba bárapo pexaiñéi jume diwesi. ¹⁶Waxainchi páebatsi jeichichi: “Pokotsiwa jumekowüntatsi Jesucristo, maisha bichokono wüünae bara be pokoyenewa xua moya peyawüngxainaewa, pokoyenewa jiwi jopa yaputaeyo”, jeichichi. Wayábara jumekowüntsiwa baxua meje:

Nakom náexana be jintong pía jüntükoyeneya tatsi,
xua barápara bapong Cristo.

Nakom pía Pejumopetünaxü tatsi yábara paeba,
xua bapong yábara páebatsi,
xua bara bapong yatsikaewa bara Nakom.

Irü matatsunpiwi tane,
xua bapong tainchi.

Bapong yábara kueikueijeichi jiwi yábara kueikueijeiji daxita nakuangpíwitha.
Daxita nakuangpiwi jíwanamonae,
bapong yábara jumekowüntatsi.

Yáwano ekeicha bapong peitaboko bekáichatsi.

**Meje yábara xua pomonae naerabiya pekuidubiwi pomonae
seikayiya kuiduba xua ichi be jopa paxang ichiyo**

4 ¹Nakom pía Pejumopetünaxü tatsi beta xaniwaichiya jeye xua poxonae po dapae tabüdukuaena xua poxonae po dapaetha Nakom daxita wétsina, bapoxonae pomonae pejumekowüntsiwi jíwana Nakom pentinchi xua Nakom pejumekowüntsiwatsi. Yawa barapomonae napunaponaena kaurimonae po kaurimonae jiwi muxuitorobiya muxujáinabatsi. Matáütano barapomonae exanaponaena po pekuidubiwa kaurimonae pía pekuidubiwa tatsi. ²Matáütano barapomonae jumenaetaewatsiya jumetaena pokotsiwa paeba pomonae jiwi pemuxuitorobiwi. Bárapo pemuxuitorobiwi kuinakópata xua bara abe éxana nawita, po pejüntükoyénetha wüünaeya natsipaeba poxonae abe éxana. Daxota barapomonae jopa yaputaeyo po jüntükoyene wüünae. ³Barapomonae pomonae pemuxuitorobiwi, jiwi kuimatawéntatsi xua jitha peenaewa. Matáütano jiwi jain matawéntatsi xua jopa xae tsane icha penabanaewang, bekein taetha xua bárapo penabanaewang Nakom tsijain éxana jiwi. Pomonae pejumekowüntsiwi xuano pomonae peyaputaewi Nakom pía pexaiñéi koyenewa tatsi, poxonae barapomonae najumeweteiba xua natsijain jakobeiba Nakomtha, jei tsaibi: “Nakom maisha jüntükoyene weiweinang xua tana nekatsiwaxaem pexaewa”, jei tsaibi. Bapoxonae barapomonae bara xane

bárapo penabanaewang. ⁴Daxita xua pokotsiwang Nakom fórota baxuang wüünae. Jopa bewa naitématsi tsainchi pokotsiwa xua Nakom naka kata. Saya jame bewa noteibichi, yáwano bewa Nakom natsijain jakobeibichi xua jei tsaibichi: “Maisha Nakom jüntükoyene weiweinang xua tana nekatsiwaxaem pexaewa”, xua jei tsaibi tsainchi. ⁵Nakom naka tsijain bétsina bárapo penabanaewang, matha wayorobixae Nakom Pejume Diwesi, yawa wanatsijain jakobeibixae Nakomtha xua jei tsaibichi: “Nakom maisha jüntükoyene weiweinang xua tana nekatsiwaxaem pexaewa”, wajéi tsaibixaetsi.

Meje yábara xua pong Jesucristo beta tanakuítatsi

⁶Daxita bárapo koyenein xuaunxuae katsipáebatsi, icha bárapo koyenein tsipae-biya kuidúbame ichamonaetha pomonae irü pejumekowüntsiwi Cristo, bapoxonae xam pong beta netanakuichim tsane Jesucristo. Bapoxonae ichamonaekakuita ena xua xam bara bichokono jiñakoutha jumekowünta na-eexanapóname, yáwano xua neexanaexaeno pokotsiwang kakuidúbatsi po pekuidubiwa bichokono pexeña koyene. ⁷Jumenaitémare po diwesi xua saya jiwi kueikueiji xua jopa Nakom pía diwésiyo tatsi, po diwesi xua pejemái diwesi xua jopa xapain wüünaeyo. Jiñakoutha nakuidúbare, xua nenajüntükoyene kana exanaenexam tsane icha be Nakom pía jüntükoyene ichi. ⁸Bekein penakuijüjütsiwa wüünae xua pepong dangwéi penaexanaenexa, íchitha jame xua pena jüntükoyene wüünae exanaewa Nakomtha, baxua jame bichokono wüünae beyakaincha xua penakuijüjütsiwa. Tsi-péi bárapo pena jüntükoyene wüünae exanaewa Nakomtha naka yawena ánoxuae poxonae kataunxuae áwiya jinómpatsi po kae pin nákuathe, yawa xua bexa tsá-neno naka yawenaena Nakom pía nakuatheicha. ⁹Báraxua yatsikaya ápara xaiñéi. Daxota daxita jiwi bewa yábara jumekowüntsina pokoyene xua pena jüntükoyene wüünae exanaewa Nakomtha. ¹⁰Barapókotsi koyene waxainchi ajüntüyapusüüya dangweya éxanatsi. Ichamonaekakuita naka átene exaneiba xua poxonae abe naka yábara paebeiba, tsipéi waxainchi jumekowüntsiya wüünae éwatatsi Nakom, pong ataya pepoponaein. Barapong Nakom ichichipa xua daxita jiwi pekapanenebiwa tsainchi abe pía peéxanae kuirukoyenein weya tatsi. Bapong jiwi Pekapanenebiyaein abe pía peéxanae kuirukoyene weya tatsi xua pomonae pía pejumekowüntsiwixaetsi.

¹¹Bárapo koyenein bewa ichamonaekakuita kui-itorobíname, xua nekuidubiwa pokotsiwa barapomonae peexanaewa tsane. ¹²Jopa jumenaitaewatsinde xua ichamonaekayábara paeba xua poxonae jopa kabarü kui-iturajinaeyo xua poxoru nepewowixaem. Jame bewa beta exanaponaem xua nekakuitaeponaenexa pomonae pejumekowüntsiwi Jesucristo. Xua barapomonae tsita éxaname, xua irü barapókotsi koyeneya peexanaenexa. Beta kueikueijande, matáütano beta póponde, yawa matáütano ántobe tsurukuaenabíyama jiwi xua ichamonaekakuitaenexa. Yawa matáüta beta póponde xua bichokono jumekowüntame Jesucristo xua ichamonaekakuitaenexa. Yawa beta póponde xua nejüntükoyene bichokono wüünae Nakomtha xua ichamonaekakuitaenexa. ¹³Poxonae kataunxuae jopa patopaein tsane, jiwi peitabaratha yorobébare Nakom pía pexeña jume diwesi tatsi. Bárapo diwesi yábara kueikueijande, matáütano kuidubareno pomonae pejumekowüntsiwi Jesucristo. ¹⁴Kaena báyatha pítiri jiwi, po pítiri jiwi pejumekowüntsiwi jíwanamonaekakuitaenexa. Yawa beta póponde xua nekueikueijiwa tsane Nakom pía pexeña jume diwesi tatsi. Bárapo pítiri jiwi kanta jáyaba Nakom peitorobixae. Barompaya

jiña neexanáe koyenéwatha jopa yábara toxechiya exanaeinde pokuikoyenewa Nakom báyatha kakata poxonae bárapo pítiri jiwi kanta jáyaba, pokuikoyeneyatha neexanaewa tsane pokotsiwa Nakom ichichipa.

¹⁵Daxita bárapo koyenein naitematsiya eexanaponde xua ichamonae nekakui-taenexa xua bara wüünaeya jumekowüntapóname. ¹⁶Dotam xua nejüntükoyénewa kanantaxéiname. Matáütano dotam xua pokotsiwa nekuidubiwam. Áwiya beta ajüntüyapusüüya jumekowünta dukuanaebíyama. Icha baxua exanáename jiñakoutha nakapanepa exanáename xua Nakom kakapanepaena petüpáe kuiru-koyene weya. Irü barichim tsane kapanenebiya exanáename xua Nakom kapane-nebiyaena pomonae nekajumenaitaewatsiwi.

Meje yábara xua pokotsiwa Timoteo bewa kuidubina pomonae Jesucristo pejumekowüntsíwichi

5 ¹Jopa jume itawetsinde pong pítirin. Jame saya bewayo muxuwere icha be ichim xua poxonae axa bewayo muxuwétame. Barichinde pewowi saya bewayo muxuwere icha be ichim xua poxonae eweicho jiwi saya bewayo muxuwétame. ²Pitiriwaxi saya bewayo kuidúbare icha be ichim xua poxonae ena saya bewayo kuidúbame. Matáütano saya bewayo kuidúbare penawaxi icha be ichim xua poxonae amcho jiwi saya bewayo kuidúbame xua tsita auram. Jüntükoyene wüünaeya yábara nantaxéinare barapówaxi, xua jopa abe neexanaewam.

³Nakom piamonae, pomonae pejumekowüntsiwi, barapomonae bewa yawenaena powaxi pekuenta werapaewaxichi piséuriwi, saya jame poxonae barapówaxi jopa xeinaeyo piamonae tatsi, pomonae peyawenaewichi. ⁴Icha ichawayo powayo pekuenta tüpaewáyotsi piseuri, icha bapowa pipexui xeina yawa ichakui-tha icha xeina pía pemomo jiwi, barapomonae bewa yawenaena barapówatha. Barapomonae kopiya bewa nakuidubina xua Nakom kui-itoroba xua bewa ba tsita barükui-iturajinaena bapówatha. Bárapo koyene tsita exaneibina xua poxonae yaweneibina bapówatha. Barapomonae bewa yawenaena bapówatha xua bapowa piamonaexae tatsi. Bapoxonae bapowa jopa nantawénonae tsane xua ichamonae bapowa peyawenáewatsi. Barapomonae bewa antobeya apatsina xua bapowa antobeya apatsinchi be pentoma xua kaena báyatha kopiya pía peantobeya apatsixaetsi poxonae pexui. Jame bárapo koyene Nakom tsita koyenewüünaetsi, matáütano bárapo koyene Nakom jüntükoyene weiweina éxanatsi. ⁵Powa bara xaniwaicha pekuenta tüpaewáyotsi piseuri, powa xaniwaicha kompa, powa jopa xeinaeyo piamonae matabüxü pomonae peyawenaewichi, bapowa jumekowüntsiya wüünae éwata xua Nakom yawenaena xua bapowa yawenaechi. Pebaxuanexa tsane bapowa wüükeiba Nakomtha merawintha, yawa matakábintha. ⁶Íchitha nama powa pekuenta tüpaewáyotsi piseuri, powa saya piakoutha nayábara nantaxeina nawita xua penasiwaimeinchiwa pebíwitha, bapowa saya jopa nantaxeinaeyo xua jumekowüntsiya wüünae ewatsina Nakomtha, xua peyawenaewa tsainchi. Daxota bapowa pía jüntükoyene tatsi be tüpa, xua Nakom be tsita túpatsi bara bekein bapowa pópona. ⁷Daxota xua ichamonae jopa abeya peyábara paebinxaxa pomonaetha, pomonae pejumekowüntsiwi, kuidúbare bárapo peyawenaeyo koyenewa barapomonaetha, pomonae pejumekowüntsiwi. ⁸Meje xua pokotsiwe baxue: Icha pong jopa yábara nantaxeinaeyo xua piamonae peyawenaewa tsane, bapong ápara bara éxana be poxonae jopa jumekowüntsiyo. Bapong ápara bichokono

ajüntükoyeneyapubeya éxana, beyakaincha pong jopa jumekowüntsiyo, pong dáichitha piamonae yawena.

⁹⁻¹⁰Bárapo papératha, po papératha ichaxota saya wüngdúbatsi powaxi pekuenta werapaewaxichi piséuriwi, bárapo papératha wüngtinadúbare. Saya wüngtinadúbare powaxi xua beyakaincha sesenta po weibe xeina, powaxi xua kaena báyatha kae pebintha kuikuina, matáütano wüngtínare powaxi xua ichamonae yábara paeba xua pinae bapowaxi wüünaeya éxana. Pókotsi koyenein xua poxonae barapówaxi xua wüünaeya éxana baxue meje: Bapowaxi beta wíchita pía pexui; yawa bapowaxi beta matenta weiweinaya apateiba pomonae petapateibiwichi piabongtha; yawa bapowaxi taxukiateiba pomonae pejumekowüntsiwi Cristo pomonae petapateibiwichi piabongtha; yawa bapowaxi yaweneiba pomonae peakopeibiwi; yawa bapowaxi daxita karepaya koyeneintha exaneiba pokoyenein bichokono jiwí tsita wüünaetsi.

¹¹Íchitha jopa wüngtinaeinde powaxi kataunxuae taakoibichi xua xeina sesenta po weibe. Tspíé ichakuitha bapowaxi jüntemaináetsipa pokotsiwa báyatha Cristo yábara tsiwüünae muxuduta xua jopa ekeicha penotsiwa icha pebiwi. Bexa barapówaxi ekeicha icha pebiwi benotsipa. ¹²Barapówaxi Nakom yábara paeba xua pinae barapówaxi barápara natsikuenta xua abe peexanaexae, poxoru jopa exanaeyo pokotsiwa báyatha yábara tsiwüünae muxuduba Crístotha pokotsiwa xua exanapaebeiba. ¹³Matáütano barapówaxi fifina, jopa ichichipaeyo xua penakui-chiwa daxota saya daxita bongtha siwaponeiba, matáüta saya kueikueijejé tsurubenanáebiya xua ichamonae peyábara paebíwatsi pokotsiwa xua jopa xapain pexeiña diwésiyo. Matáütano barapówaxi fayakota dubenanáebiya ichamonaetha. ¹⁴Daxota powaxi piséuriwi pekuenta werapaewaxichi, powaxi xua penawaxi, xang saya nantaxeinang xua barapówaxi bárabü moya jitha enaena ekeicha. Bárabü moya ekeicha xexeinaponaena pexui, yawa moya bárabü xua piaboxi bara beta ewatsina. Matáütano barapówaxi jopa bewa abe exanáe xua daxota ichamonae pomonae jiwí peaitafaetabí jiwí abe yábara paebina xua abe yábara paebinchi pomonae pejumekowüntsiwi. ¹⁵Barapówaxi jíwana powaxi penawaxi, powaxi pekuenta werapaewaxichi piséuriwi, barapówaxi báyatha bara ápara éxana dubenanáebiya pokotsiwa xua kaurimonae pía pentakaponaein tatsi kui-itoroba, pong Satanás.

¹⁶Icha petsiriwa, powa pejumekowüntsiwayo Jesucristo, icha bapowa tapopoinchi piabotha pijimonae jíwanawayo tatsi powayo pekuenta tüpaewáyotsi piseuri, bárapo pejumekowüntsiwayo bewa yawenaena bapówatha. Bárapo pejumekowüntsiwayo jopa bewa kopatsí tsane xua pomonae pejumekowüntsiwi apatsina pexaewa bapówatha, powa pekuenta tüpaewáyotsi piseuri. Bapoxonae pejumekowüntsiwi itakúüpatsi xua yawenaena powaxi xua xaniwaicha pekuenta werapaewaxichi piséuriwi xua powaxi jopa pexeinaexae piamonae matabüxü jiwí tatsi pomonae peyawenae jíwichi.

¹⁷Pomonae pejumekowüntsiwi bewa bichokono wüünaeya barükui-iturajinaena xua pítiri jiwí barükui-iturajinaeinchi, po pítiri jiwí betiya wüünaeya kanamataxéinatsi pomonae pejumekowüntsiwi. Po pítiri jiwí kueikueijejé Nakom Pejume Diwesi, matáütano xua kuiduba bárapo diwesi, bárapo pítiri jiwí bewa bichokono wüünaeya barükui-iturajinaetsi yawa bewa pentoma katsibichi beyakaincha icha pítiri jiwí. ¹⁸Nakom Pejume Diwésitha jeye: “Duwein pong pewüng buey,

pong pexu xutanakapona xua poxonae nakuitapona jopa wano atsinde pokotsiwa bapong taayapubetsi poxonae nabusimatoma xaexaepona pentakona”, jei. Ekeicha Nakom jeye: “Pong ba tanakuita ichüing bapong nantawénona xua xeina pía petanakuichiwa matoma”, jei Nakom.

¹⁹Jopa kuiyopichinde pítirin xua abe éxana pong pomonae pejumekowüntsiwi kanamataxeínatsi icha jopa xeinaem aiña póyobe xua írürü kuitánerü xua ichakuitha akoibi póyobe xua írürü kuitánerü pokotsiwa bárapo pítirin xua baxua bara éxana.

²⁰Íchitha pítirin pong kataunxuae abe exanapona, bewa kuiyopichiya itawetsim bapong xua daxita pomonae pejumekowüntsiwi peitabaratha tatsi, xua bapoxonae irü ichamonae pejunuwinexa xua abe peexanaewa, icha be poxonae xua bapong ichi.

²¹Kaitoróbatsi Nakom peitabaratha tatsi yawa Jesucristo peitabaratha tatsi. Matáütano kaitoróbatsi matatsunpiwi peitabaratha tatsi, po matatsunpiwi Nakom itapeta. Exanaponde bárapo takaitorobi koyenewangtsi íchitha jopa xeinaeinde po jüntükoyenéwatha xua nantaxéiname xua kaein pebin bichokono peaiñakuín beyakaincha ichüing. Icha barapókotsi jüntükoyenéwatha kayábara nantaxeinaeya exanaetsípame jopa xaiñeya exanaetsipaem. ²²Abü bepijawa jopa matajayabinde pítirin, xua pekanamataxeinaenéxatsi pomonae pejumekowüntsiwi, tsipéi icha bapong abe exanáetsipa ápara baxua be irü xam yawéname xua bapong abe peexanaewa. Dotam jiñakoutha beta wüünaeya najüntükoyene eénare xua abe neexanaeyainwa.

²³Bichokono nekotsoroxaewa, yawa bichokono neparaxaewa, jopa saya ü meisha apaeinde mera. Jame moya tsiwiyo yawa múxuna ápare vino merayo.

²⁴Ichamonae kuitáneme abe pía peéxanae kuirukoyenewang tatsi, pewünaeya xua po matakeitha poxonae Nakom yábara paebina xua jiwí penatsikuentsiwa xua abe peexanaexae. Íchitha nama ánoxuae jopa ichamonae kuitaem abe pía peéxanae kuirukoyenewang tatsi, ápara jame bexa yaputáename po matakeitha poxonae Nakom yábara paebina jiwí xua penatsikuentsiwa xua abe peexanaexae. ²⁵Barichi pokotsiwa jiwí wüünaeya éxana ichamonae nexa, baxua ba jiwí ánoxuae kuitane. Bekein ichakuitha barapókotsi wüünaeya peéxanae koyenewang jiwí jopa kuitaeyo ánoxuae, íchitha bexa tsane jiwí taena bárapo koyenewang, tsipéi poxoru bárapo koyenein jopa bápana ataya tsitekaeya moya peyawüngxenaewa.

6¹Pomonae ba pebusikuitaetaeyebéwíchi, pomonae pejumekowüntsiwi Jesucristo, xua pomonae amanaya tanakuita pía pekanamataxeináewíchi, po pekanamataxeináewíchi jopa jumekowüntsiyo Jesucristo, barapomonae ba bewa barükui-iturajinae pía pekanamataxeináewíchi. Bewa baxua exanaena xua barapomonae pomonae pekanamataxeinaewi jopa abe peyábara paebinexa Nakom pía kuikoyenewa tatsi, matáütano xain jopa abe peyábara paebinexa pata pekuidubiwa xua pokotsiwa pakuidubang Jesús yábara. ²Ichamonae pomonae pebusikuitaetaeyebéwíchi, pomonae pejumekowüntsiwi Jesús, barapomonae xeina pía pekanamataxeináewíchi, pomonae irü jumekowünta Jesucristo. Bárapo pebusikuitaetaeyebéwíchi jopa bewa exanáe pokoyene xua poxonae jopa xeinaeyo pebarükui-iturajinae koyenewa pía pekanamataxeináewitha, xua be kae peweicho penatsikotáewixae xua pejumekowüntsixae Cristo. Jame bárapo pebusikuitaetaeyebéwíchi bewa barükui-iturajinae pía pekanamataxeináewíchi. Matáütano bewa

beta tanakuichi barapokotsimonae, beyakaincha ichamonae pomonae jopa jume-kowüntsiyo Jesucristo pomonae pebusikuitaetaeyebewíwichirü pía pekanamataxeináewichi. Bárapo pebusikuitaetaeyebewíwichi bewa beta tanakuichina pía pekanamataxeináewichi, peyawenaenexa barapomonae pomonae irü jume-kowüntarü Jesucristo. Matáütano bewa beta tanakuichina tsipéi Nakom ántobe barapomonae, xua antobetsi barapomonae pomonae pía pekanamataxeinaewichixaetsi.

**Meje yábara xua waxeinaewa pepa pexaiñéi
koyenewa xua ápara wajumekowüntsiwa**

Bárapo kuikoyene kuidúbare jíwitha xua jiwi beta peexanaewa tsane: ³Ichakui-tha ichüng kuiduba pókotsi koyenewa xua penaerabiwa. Matáütano jopa yábara barü jumejejeyo po pexeña pekuidubi koyenewa Jesucristo pía pekuidubi koyenewa tatsi, pong Wanaka namataxeinaein. Matáütano bapong pong ichüng jopa yábara barü jumejejeyo po pekuidubi koyenewa xua Nakom jüntükoyene wüünae éxana jíwitha. ⁴Pong ba barapókotsi koyeneya éxana bara ápara pong jiwi pepae-bin xua peyaputaeinxae. Bapong ápara íchitha jopa peyaputaein. Bapong náemata yáñaba nawita ichamonaetha pía xua jiwi penajumematsontsonobinexa bapong-tha. Daxota barapomonae nantiya naúwa. Matáütano bárapo jiwi nantiya naba. Matáütano bárapo jiwi nantiya abeya nayábara paeba. Matáütano nantiya abeya nayábara nantaxeina. ⁵Po pebiwi jopa wüünaeya nantaxeinaeyo, bárapo pebiwi najumematsontsónoba nawita. Barapomonae jopa yaputaeyo pokotsiwa pexaiñéi koyenewa. Bapomonae najéi piakoutha: “Icha jang tsane: ‘Jumekowüntang Jesucristo’, jang tsane bapoxonae xain kopei nawita xeinaein”, najéi barapomonae piakoutha. ⁶Bara xaniyéi, poxonae Jesucristo jumekowüntatsi baxua bara bichokono naka yawena. Íchitha saya naka yawena icha waxainchi múxuna xéinatsi wajüntükoyeneintha xua beta jüntema wajinompaeewa bekein xua naakopeibi táethatsi. ⁷Tsipéi poxonae naéxanatsi jopa kayawa naexanaetsi bárapo kopei po kae pin nákuathe. Matáütano tsipéi poxonae werapaeinchi jopa bárapo kopei kawérapae tsainchi. ⁸Íchitha icha xéinatsi pexaewa, yawa paparuwang bara bapoxonae bewa jüntema jinompaeinchi. ⁹Seikaya nama pomonae bichokono ichichipa xua kopei pexeinaewa, barapomonae éxana pokotsiwa kaurimonae pía pentakaponaein tatsi jüntükoyene jüjüta. Daxota barapomonae éxana pokotsiwa xua ichichipa, xua jopa wüünaeyo, xua pókotsi koyenéwatha abeya piakoutha nakana éxana. Baxuang éxana pókotsi koyenéwatha xua barapomonae pewerawerakaewa tsane. ¹⁰Poxonae jiwi bichokono ichichipa parátixi, bapoxonae tamrópata notarúküpa xua bichokono abe peexanaponaewa. Bárapo peichichipáe koyenewa xua paratixitha, jiwi kana éxanatsi xua pepentsiwa pokoyene xua Jesucristo pejumekowüntsíwatsi. Daxota barapomonae be piakoutha najüntükoyene jopojopéi éxana xua saya peyábara nantaxeinaexae parátixi, xua peichichipaexae parátixi.

**Meje yábara xua bewa Timoteo beta ajüntüyapusüüya
jumekowünta dukuanaebiyaena**

¹¹Tsipéi xam Timoteo Nakom piamonae tatsi jíwanam, baxuang kuitaya nae-tsiríware, pokotsiwa pokoyenéwatha werawéraka neka-exanaewa. Beta póponde Nakom nexa xua nejüntükoyene wüünaewa tsane Nakomtha. Eexanaponde pokotsiwa Nakom ichichipa. Jumekowünta dukuanaebiyama Nakom, yáwano ántobe

tsurukuanaebíyama Nakom, yawa jíwithano. Matáütano saya jüntema poponaeya éxana dukuanaebíyama pokotsiwa Nakom kaitoroba poxonae ichamonae bekein kata abe éxana. ¹²Wüünaeya antüyapusüüya jumekowüntsiya éxana dukuanaebíyama pokotsiwa Nakom ichipa. Peantüyapusüüwa po peantüyapusüüwa ataya tsiteka, bárapo peantüyapusüüwa jopa kopatsinde xua nekajüntükoyene we-ai-churukuaewa. Bárapo peantüyapusüüwa Nakom kakata. Xam baxua wüünaeya yábara páebame pin bichéitoha. ¹³Katsipáebatsi Nakom peitabaratha, pong pía peantüyapusüüwa kata daxitang koyeneintha. Matáütano katsipáebatsi Jesucristo peitabaratha, pong beta jumenota, xua pong Poncio Pilato beta jumenótatsi. ¹⁴Kaitoróbatsi xua neexanaewa tsane pokotsiwa katsipáebatsi. Beta xéinare Nakom pía peitorobi koyenewa xua jopa icha koyeneya yábara kuiya exanaem tsane. Éxande bárapo peitorobiwa xua jopa Nakom abeya nekayábara paebiwa tsane xua abe neexanaewam. Baxua eexanaponde, beya poxonae Jesucristo ekeicha patopeikaena pong Wanaka namataxeinaein. ¹⁵Poxonae po matakeitha Nakom ichichipaena bapoxonae bárapo matakeitha Jesucristo naitüütsina jíwitha. Jiwi yaputaena xua bapong Nakom meisha kompa xeina daxita peayapusüü itorobi koyenewang. Bapong meisha kompa peyawajinaein pejüntükoyene weiweinæ koyenewa. Bapong pong jiwi itorobiya pía pepa Peewatsinchi tatsi pía peayapusüü itorobi koyenewa xeina beyakaincha xua ichamonae xeina pomonae jiwi itorobiya pía pepa peewatsíwichi xua irü xeina pía peayapusüü itorobi koyenewa. Matáütano bapong pong jiwi pía pepa Pekanamataxeinaeinchi pía peayapusüü itorobi koyenewa xeina beyakaincha xua ichamonae xeina pomonae jiwi pekanamataxeinæwichi. ¹⁶Barapong Nakom meisha kompa peyakuiyajinaein peantüyapusüüwa po peantüyapusüüwa xua ataya jopa pewerawerakaewa. Bárapo Nakom pekoicha yawa pópona po pekoicha bichokono dangweya pentha. Baxota jiwi jopa itaküüpaetsi xua imoxoyo peponaewa xua bichokono pekoicha pexeinaexae. Dapong aibi, pong báyatha tainchi Nakom. Matáütano dapong aibi pong itaküüpaetsi xua Nakom petáewatsi tsainchi. Bárabü jiwi Nakom barükui-iturajinaeinchi, xua ataya tsane. Matáütano bárabü Nakom itorobina jíwitha pía peayapusüü itorobíwatha xua bara ataya tsane. Je bara ichi tsane.

¹⁷Pomonae xua bichokono kopei pexeinae jiwi itoróbare xua jopa ichamonae aebí tsainchi. Matáütano itoróbare xua jiwi jopa pekayábara nantaxeinaewa tsane parátixi xua bárapo paratixitha peyawenaenexa tsainchi xua daxota barapomonae jopa Nakom kanantawenonæ tsainchi. Tshipéi parátixi saya bichoina nakaewita daxota barapomonae bewa jumekowüntsina Nakom, pong jopa juniya naka kataponaeyo daxita pokotsiwa xua pokoyenein nantawenónatsi xua wanaka jüntükoyene weiweina exanaenexa. ¹⁸Kui-itoróbare barapomonae pomonae kopei pexeinaewi xua wüünaeya peexanaewa tsane. Matáütano barapomonae itoróbare xua nawita pexeinaewa tsane pokotsiwang xua wüünaeya peéxanae koyenewang, icha be jüta koyeneya ichi poxonae kopei nawita xeina. Barapomonae bewa piáwa jíwana wekaenaetsina xua ichamonae pekatsibiwa tsainchi pomonaetha, pomonae xua jopa xeinaeyo xua pokotsiwang nantawénona. Matáütano barapomonae bewa yawenaena piamonae. ¹⁹Icha barapomonae bárapo koyenein éxana, bapoxonae barapomonae piakoutha nayawena xua nakuiwüünaeta pókotsi koyenewa xua bexa tsane, xua daxota bapoxonae pexeinaewa tsane peajüntüyapusüüwa, po peantüyapusüüwa xua ataya tsiteka.

Meje yábara xua Pablo najumewetsiya paeba

²⁰Xam Timoteo, xaniwaicha xeinaeya kapoponde po pekuidubiwa Nakom kakata. Jopa jumenaitaewatsinde pojumein xua bápana jiwi jopa yawenaetsi. Matáütano jopa jumematsontsónoba exanaeinde ichamonaetha pomonae yábara kueikueijeji pokotsiwa xua peyaputáe koyenewa, po peyaputáe koyenewa jopa xaniwaicha peyaputáe koyenéwiyo. ²¹Pomonae jumekowünta pokotsiwa poxonae yábara kueikueijeji peyaputáe koyenewa, barapomonae jíwana nakuibarapenta pokoyene xua Jesucristo pejumekowüntsíwatsi.

Bárabü Nakom pong jiwi Pekanamataxeinaein, bichokono kayawenaena pía nekaantobexae.

Baja Pablo.

Meje Po Carte Kotakaya Pablo Tatina, Timoteo Tatínatsi

Meje yábara poxonae Pablo tamrópata pítaba xua tatina, Timoteo tatínatsi

1 ¹Jako Timoteo, xang Pablo, Cristo Jesús pía peitorobi jiwi jíwana tatsin. Nakom neitoroba poxoru bapong baxua peichichipaewa. Xang Cristo Jesús pía peitorobi jiwi jíwana tatsin, tsipéi Nakom báyatha peexanaexae pokotsiwa báyatha tsiyábara wüünaemuxuduta jíwitha. Po peyábara tsiwüünae muxudutsiwa, xua Nakom katsina jíwitha peajüntüyapusüüwa, po peajüntüyapusüüwa ataya tsiteka. Bárapo peajüntüyapusüüwa jiwi katsibeibinchi poxonae jiwi jumekowünteibina Cristo Jesús. ²Xam, Timoteo, bárapo carte kata tínatsi, xam be taxantom katsikotainchi. Xam bichokono kaantobetsi. Ichichipang xua Nakom pong Waxa, irü Jesucristo, pong Wanaka namataxeinaein, barapongbe bárabü amanayiya kayawenáenabe pía nekaantobexaebe. Matáütano bapongbe nantanuweya kayábara nantaxeináenabe pía nekayawenaenexa tsánebe. Matáütano ichichipang xua bapongbe jüntema pópona ka-exanaena.

Meje yábara xua Pablo yábara paeba xua Timoteo bewa jumekowünta dukuanaebiyaena

³Poxonae Nakom tsipaebelang jang tsaibinje: “Nakom, maisha jüntükoyene weiweinang xua Timoteo neyawenaewam”, jang tsaibin. Barapong Nakom tanakuitang, tsipéi tajüntükoyene netsipaeba xua pinae bara beta éxanang. Barichi tamo susato jiwi tanakuita barapong Nakom. ⁴Xam kayábara nantaxeinéibatsi xua poxonae matha kain bichokono nesiwawekoyem poxonae kakuentawárapatsi. Maisha be kataeinchi merawintha, yawa matakábintha xua bichokono tajüntükoyene weiweinaewa tsane. ⁵Xang nantaxeineibang xua xam bara xaniwaicha beta jumekowüntsiya póponame Nakom. Po pejumekowüntsiwa xam Nakom tsita xéiname, bárapo pejumekowüntsiwa kopiya matha akue Loida, irü ena Eunice Nakomtha tsita xéinabe, beya poxonae xam irü jumekowüntame. Bara beta yaputang xua xam irü bárapo pejumekowüntsi koyenewa Nakom tsita xéiname ánoxuae.

⁶Daxota katsipáebatsi, beta najüntükoyene tsakábare, xua yábara nantaxéiname pokuikoyenewa Nakom kakata xua pokuikoyeneyatha xua wüünaeya neexanáe dukuanaebiyaenexa pokotsiwa Nakom kaitoroba. Bárapo kui koyene báyatha Nakom kakata poxonae kanta jáyabatsi. ⁷Tsipéi Nakom poxonae naka kata pía Pejumopetünaxü tatsi, bárapo pejumopetünaxü tatsi jopa jiwi junuwa kana exanaetsi. Jame Nakom naka kata bárapo pejumopetünaxü tatsi, xua waxeinaewa tsane peayapusüü itorobi koyenewa. Matáütano Nakom naka kata bárapo pejúlope xua waxeinaewa tsane pokuikoyene peántobe koyenewa xua

watsita xeinaewa tsane Nakom matáütano xuano jíwithano. Matáütano Nakom naka kata bárapo júmope xua waxeinaewa tsane pokuikoyene beta penayábara nantaxeinae koyenewa xua beta peexanaewa tsane. ⁸Jopa aurande poxonae yábara kueikueijam Jesucristo, pong Wanaka namataxeinaein, xua poxonae bekein ichamonaе kakuikápona. Matáütano jopa neyábara aurande xua jiwi pekübibotha taekaewa. Baxua nekana éxana tayábara kueikueijeixae Jesucristo, xua jiwi katsawiya taneyábara nantaxeinaexae xua pinae abe éxanang. Kuibarü jejande xua ichamonaе bara kanthüthü jopojopeya átene éxana, icha xang ichin xua yábara kuikópatang xua bara ichamonaе átene tana neexanaewa tsane. Baxua kakana éxana neyábara kueikueijeixae Nakom pía pexeiña jume diwesi. Nakom kakata peayapusüüwa baxua nexa, xua jopa nejunuwiwa tsane poxonaе kaátene éxana. ⁹Nakom naka kapanepa abe waexanáe kuirukoyenein weya. Matáütano Nakom naka waba xua Nakom watsita najüntükoyene wüünae exanaewa tsainchi. Ápara jopa naka wábiyo poxoru wüünaeya waexanaexaetsi. Ápara jame naka waba, tsipéi kaena báyatha yábara nantaxeina baxua, beya poxonaе fórota bárapo kae pin nakue xua amanayiya pía wanaka yawenaetsi pía wanaka antobexae. Nakom naka yawena kaemonaе pebürüya wanabarü jinompaexae Cristo Jesustha. ¹⁰Nakom naka tsita itüüta pía peantobewa poxonaе itoróbíkatsi Jesucristo, pong Wanaka kapanenebiyaein. Bapong werawéraka kana éxana po peayapusüüwa xua xota jiwi tüpa éxanatsi. Matáütano naka tsita itüüta pokoyenéwatha xéinatsi peantüyapusüüwa, po peantüyapusüüwa ataya tsiteka wajumekowüntsixaе Nakom pía pexeiña jume diwesi tatsi, po diwesi xua Jesucristo yábara.

¹¹Nakom newaba xua takueikueijeinexa bárapo pía pexeiña jume diwesi tatsi. Matáütano neitoróbano xua tana nekana exanaenexa Jesucristo pía peitorobi jiwi jíwana tatsin xua takuidubinexa pomonaе jopa judiomonaе naexanaeyo. ¹²Taexanaexae baxua, daxota átene neéxana ichamonaе. Dáichitha jopa auriño xua tayábara kueikueijeíwa Cristo, poxonaе bekein ichamonaе átene neéxana, tsipéi yaputang pongtha pong tajumekowüntsixaе xua peitaküüpáewatsi xua tana neyawenaewa. Bara beta yaputang xua bapong xeina peayapusüüwa xua tana neyawenaewa. Bapong neyawena xua takueikueijéi tsurukuaenaebiyaenexa tsane pokotsiwa báyatha bapong neitoroba, beya poxonaе bárapo matakabi tsane, po matakábitha poxonaе patopeikaena Jesucristo.

¹³Nekuikoyene jüpaeya éxana dukuaenaebiyama, po pekuidubiwa bichokono wüünae xua báyatha katsipáebatsi. Jumekowüntsíya póponare, matáütano antobeya póponde Nakom, irü jíwithano, kaemonaeya pebürüya wanabarü jinompaexae Cristo Jesustha. ¹⁴Kateitéichiya yawa múxuna póponde pexaiñéi koyenewa, po pexaiñéi koyenewa Nakom pía Pejumopetünaxü tatsi kakata, po pejumopetünaxü tatsi naka barü jinompa.

¹⁵Báyatha yaputáneme pomonaе Asia nákuatha jinompa daxita barapomonaе nepunapenta. Pomonaе nepunapenta, barapomonaе jíwana ichüing pewüing Figelo, ichüing pewüing Hermógenes. ¹⁶Bárabü Nakom pong jiwi Pekanamataxeinaein yábara nantanuweya nantaxeinaena pomonaе Onesíforo piamonaе tatsi, xua Nakom peyawenaewa tsane barapomonaе. Bapong Onesíforo nejüntütsákaba poxonaе beta wüünaeya neyaweneiba. Bapong jopa neakáuriyo xua jiwi pekübibotha taekaewa. ¹⁷Poxonaе bapong patopa Roma tómaratha bapong matowa

newenawenei tsurukuanáebiya beya poxona matapaiña nekaxina. ¹⁸Bárabü Nakom pong jiwi Pekanamataxeinaein, bapongtha nantanuweya yábara nantaxeinaena peyawenaenexa tsane, poxona po matakeitha Nakom yábara paebina jiwi xua penatsikuentsiwa xua abe peexanaexae. Xam yaputáneme bara, xua bapong neyawena nawita Efeso tómaratha.

**Meje yábara xua Pablo yábara paeba xua pong ba
beta tanakuita pía pekanamataxeinaeinchi**

2 ¹Xam Timoteom, be taxantom katsikotainchi. Najüntükoyene kuitsákabare xua nenantaxeinaenexa xua Nakom amanayiya jiña nekayawenaewa tsane pía nekaantobexae. Nakom baxua kata éxana kaemonae pebürüya jiña nenaexanaexae Cristo Jesustha. ²Pokotsiwa xua báyatha nejumetáneme xua kueikueijang pin bicheito itabaratha, bapokotsiwa xuya kuidúbare pebíwitha, po pebiwi xua xuya jumekowüntsiya xaniwaicha kuidubina ichamonaetha pokotsiwa xua kueikueijang.

³⁻⁴Yábara barükui-kópare xua bara ichamonae átene neka-exanaewa tsane, nejumekowüntsixa Jesucristo icha xang ichin xua yábara kuikópatang xua bara ichamonae átene tana neexanaewa tsane. Poxona baxua éxaname, xam bara jüta koyene ichim icha be soldadomonaepin ichi. Bapong ba átene éxanatsi poxona naba, xua peexanaexae pokotsiwa itoróbatsi pía pentakaponaein. Soldadomonaepin ba dapokotsin aibi pong natsiéxana piáwa poxona kataunxuae áwiya naba éxana ichamonaetha, tsipéi bapong bewa baxua exanaena xua pong pentakaponaein peitorobixae. ⁵Barapókotsi jüta koyeneya ichi, pong ba xua penaxenakaewa. Bapong jopa itaküüpaetsi xua xeinaena pokotsiwa pematomatsíwatsi xua poxona bichoina kuináepona icha jopa beta yábara exanaeyo pókotsi koyene xua peitorobi koyenewa bárapo penaxenakaewa. ⁶Pong ba bichokono nakuita pábitha bapong ba kopiya bewa xeinaena xua pokotsiwa kopiya penawetsiwa. ⁷Beta yábara nantaxéinare xuaunxuae katsipáebatsi. Pong jiwi Pekanamataxeinaein kayawenaena xua yaputáneme daxita.

⁸Jesucristo yábara nantaxéinare. Bapong Jesucristo pong nakatsiwa xua David pía pemómoxi susato jiwi jíwana tatsi, po David Israel nakuapiwi itorobiya pía pepa peewatsinchi. Bapong Jesucristo ekeicha Nakom Pexanto asüü éxana petüpáe kuirukoyene weya. Nakom pía pexeíña jume diwesi tatsi, po diwesi xua Cristo yábara, bárapo diwesi kueikueijang jíwitha. ⁹Bárapo diwesi takueikueijeixae daxota ichamonae átene neéxana, beya poxona penáintotha neküba. Xang be pókotsin xua abe bichokono taexanaein nenatsikotane. Íchitha jopa itaküüpaetsi xua jumeyangkataba Nakom Pejume Diwesi xua ajumetsúrukuae pekana exanaewa tsane xua poxona jiwi pekübibotha tana neetsixae. Tsipéi áwiya kataunxuae jiwi jumetane bárapo diwesi. ¹⁰Daxota jopa junuwiño xua ichamonae átene tana neexanaewa, matáütano bara kopatang xua bara moya nekana exanaena baxua. Daxota baxua bara kopatang pomona Nakom pía peitapetsi jiwi tatsi barapomona nexa, xua barapomonae irü pekapanenebiyaenexa tsainchi xua Cristo Jesús kapanenebiyaena. Poxona barapomonae bárapo diwesi xeinaena, po diwesi pekapanenebiyáe koyenewa, bapoxonae múxuna xeinaena pexeíña peajüntüyapusüüwa, po peajüntüyapusüüwa ataya tsiteka xua Nakom pía nakuatheicha tatsi.

¹¹Báraxue bara xaiñéi xua jei:

Icha kópatatsi xua bara ichamonaе naka átene éxana wajumekowüntsixae
Cristo beya poxonaе naka tüpa éxana,
icha poxonaе Cristo kana ichichi,
bapoxonaе yawa múxuna jinompaeinchi Cristo xua pía nakuatheicha.

¹²Icha waxainchi áwiya jumekowünta dubenanaebiyatsi xua poxonaе bekein
ichamonaе naka átene éxana,

icha Cristo kana ichichi,
bapoxonaе bárapo koyenewa yawa múxuna waxainchi Cristo,
barü kanamataxeináeinchi jíwitha,
waitorobiya ewatsinexa tsane bárapo jiwi.

Icha waxainchi itawetsiya yábara jeichichi Cristo:

“Bapong jopa yaputaeiño”,
jeichichi,

bapong xuya itawetsiya naka yábara jei tsane:

“Bapomonaе jopa yaputaeiño”,

naka yábara jei tsane Cristo.

¹³Icha jopa beta xaniwaicha jumekowüntsiya jinompaetsi,

dáichitha bapong kataunxuae éxana dukuanaebiyaena pokotsiwa xua
báyatha jiwi yábara páebatsi.

Baxua éxana, tsipéi Nakom jopa itaküüpaetsi xua éxana pokotsiwa jopa be
pía kuiyiyo tatsi.

Meje yábara xua pong beta petanakuichin xua ichüng beta petanakuichíwatsi

¹⁴Xuaunxuae katsipáebatsi báraxua páebare ichamonaetha yáwano kui-itoróbare
báraxua barapomonaе Nakom peitabaratha tatsi. Jande barapomonaetha: “Jopa
yábara pana najumematsontsónoba exanaeinde xua po diwesin ichamonaе pepae-
bixae”, jande. Bárapo penajumematsontsonobiwa bárapo koyenéwatha bápana
jopa naka yawenáe. Bárapo koyenewa saya abe kana éxana pomonaetha, pomonaе
jumetane. ¹⁵Éxande daxita pokotsiwang pewüünae koyenewa xua Nakom nexa,
xua Nakom jiña nekakuitaenexa xua bara beta tanakuítame Nakom. Bapoxonaе
xam jopa nayábara akauram tsane pokotsiwa xua beta xaniwaicha nekaunutsiya
paebixaem Nakom Pejume Diwesi, po diwesi pejumexaiñéi jume. ¹⁶Jopa yábara
najumematsontsónoba exanaeinde pojumein xua pejumexáei, pojumein xua saya
yábara kueikueijei pokotsiwa xeina bárapo kae pin nákuathe, pojumein xua bápana
jiwi jopa yawenaetsi. Tsipéi pomonaе bapokotsiwang paeba, eexanapona pokotsi-
wang abe peéxanaе kuirukoyenewang. ¹⁷Barapomonaе abeya pía pekuidubi koye-
newang tatsi tajü nayoyotapona, icha be ichi xua tsuweto xua búpana putsuna xua
beya tajü putsuna pona. Barapókotsi koyene xua tajü nayoyotapona, éxanabe pong
pewüng Himeneo irü pong pewüng Fileto. ¹⁸Barapongbe jumenaitématabe poko-
tsiwa pexaiñéi koyenewa. Bapongbe naerabiya jeibe: “Báyatha Nakom nakuiweta
xua asüü éxana, xua jiwi ekeicha jopa asüü peexanaewa tsainchi pomonaе báyatha
wérapa”, jei bapongbe xua náeraba páebabe. Bapongbe aiña muxu kana éxanabe
ichamonaetha xua barapomonaе jopa xapain pejumekowüntsiwa tsane Nakom-
tha. ¹⁹Nakom pía pexaiñéi koyenewa, peayapusüüwa, xua icha kuikoyeneya jopa

naexanaeyo. Barapong Nakom pía pexaiñéi koyenewa tatsi jeye: “Nakom pong jiwi Pekanamataxeinaein yaputane pomonae piamonaexae tatsi”, jei. Matáütano ekeicha jeye: “Daxita pomonae xua nawüngduba xua jei: ‘Paxang Cristobarü pang, pong jiwi Pekanamataxeinaein’, jei, bewa barapomonae naitematsina abe peéxanae kuirukoyenewang”, jei Nakom pía pexaiñéi koyenéwatha.

²⁰Botha ba ichaxota pin bo, bárapo bo xeina penain korotong pokotsiwa pewüng oro nain, yáwano icha penainwang pokotsiwa pewüng plata nain. Matáütano ba múxuna xeina napae korotong. Matáütano ba xeina tsórobo korotong pokotsiwang be juruwatong. Po korotong xua pexeña korotong, bárapo korotong pekanamatawenonaenexa penabarü ítata weiweináe matakábintha. Po korotong xua saya pexeña korotong aibi, bárapo korotong pekanamatawenonaenexa daxita matakábintha. ²¹Bara jütiya ichi, icha pebin ichichipa éxana xua pokotsiwa pewüünae koyenewa pong jiwi Pekanamataxeinaein nexa, bapong bewa naitematsina abe peéxanae kuirukoyenewa xua Nakom pejüntükoyene wüünae exanaenexa bapongtha. Bapoxonae bapong itaküüpatsi xua peexanaewa daxita karepaya koyenein pókotsi koyenein Nakom tsita wüünaetsi.

²²Xam naitémare pókotsi koyenewang pewowi éxana xua poxonae abe éxana. Éxana dukuanaebiyama pokotsiwa pexeña jüntükoyenewa. Matáütano beta jumekowünta dukuanaebiyama. Matáütano ántobe tsurukuanaebiyama Nakom, matáütano jíwithano. Matáütano jüntema pópona dukuanaebiyama. Xam itapeta napunaponde pomonae pejüntükoyene wüünaewi poxonae Nakomtha tsipaeba pong jiwi Pekanamataxeinaein. ²³Naitémare po peyábara najumematsontsonobiwa jopa xapain wüünaeyo xua jopa xapain peyaputáe koyenéwiyo, tsipéi xam yaputáneme xua jiwi barapókotsi jumetha ba yábara naba. ²⁴Pong nama Nakom pong jiwi Pekanamataxeinaein, amanaya tanakuítatsi jopa bewa bapong jumematsontsónobi tsane. Jame bewa bapong beta wüünaeya exanaena xua daxita karepaya koyenekuintha daxita jíwitha. Matáütano bewa bapong beta kuidubina ichamonae. Matáütano bapong bewa saya jüntema poponaena poxonae bekein abe taéxanatsi ichamonae. ²⁵Matáütano bapong bewa saya bewayo jüntükoyene wüünaeya muxuwétsina pomonaetha, pomonae peakui-itafaetabíwichi xua bapong xaiñeya pía pekuidubiwa ichamonae. Matáütano bapong bewa abü ewatsina xua icha metha Nakom kopatsina xua barapomonae icha jüntükoyene pexeinaenexa xua peúruxae xua abe éxana. Matáütano barapong bewa abü ewatsina xua barapomonae peyaputaewa tsane pokotsiwa xua Nakom pía pexaiñéi koyenewa tatsi. ²⁶Poxonae baxua yaputaena, bapoxonae barapomonae, pomonae kopiya pemuxufebiwi itaküüpaeinchi xua beta nantaxeinaena pejüntükoyenéwatha. Barapomonae yaputaena xua deta kou eexanapona pokotsiwa kaurimonae pía pentakaponaein tatsi jüjüta, xua pokotsiwa abe peexanaewa, pokotsiwa bapong peitorobixae. Bapoxonae barapomonae itaküüpaeinchi xua panenebiyaena bapong weya, matáütano xua tamrópata notarüküpaena xua éxana pokotsiwa Nakom ichichipa.

**Meje yábara xua pokoyeneya jiwi exanaena
poxonae po matakábintha opidukuaena**

3 ¹Ichichipang xua neyaputaewa tsane xua poxonae po matakábintha opidubenaena bárapo matakabin jiwi taayápube tsainchi. ²Jiwi bárapo matakábintha bichokono piakoutha naántobe tsane. Bárapo jiwi bichokono ü pitaparatiwichi tsane.

Yáwano matáütano aebina ichamonaetha. Matáütano bichokono átsaka tsáneno. Matáütano biatáenano ichamonaetha, matáütano Nakom biataeinchi. Matáütano barapomonae jopa jumejejéi tsaibi tsane paxeiwi. Matáütano barapomonae jopa wekobe jakobiya noteibiyo tsane poxonae ichamonaes katsibeiba. Matáütano abe yábara nantaxeineibina pokotsiwa Nakom piáwa tatsi. ³Matáütano piamonae jopa tsita xeináe tsane peántobe koyenewa. Matáütano ita-aenae-aenéi tsurubenanáebiya tsane ichamonaetha. Matáütano yopita dubenanaebiyaena xua ichamonaes pokotsiwa abe peexanaewa. Matáütano jopa itaküüpáe tsainchi xua najüntükoyene itorobina xua wüünaeya peexanaewa tsane. Matáüta barapomonae bichokono anaepanaena xua ichamonaes beinchi. Matáütano barapomonae bichokono aichaxaibi tsane pokotsiwang wüünae. ⁴Barapomonae pomonae jiwi pekaenaetsi jiwi tsane. Jopa matha kopiya yábara nantaxeineibi tsane pokotsiwang xua éxana. Barapomonae piakoya nakayábara nantaxeinaena xua peaiñakuí jiwi tsane. Saya barapomonae itapetsiya naitomatsina xua pokotsiwa kuixeika penaexanaewa. Barapomonae naitematsina pokotsiwa Nakom piá pexaiñéi koyene tatsi. ⁵Bekein barapomonae wüünaeya éxana dubenanaebiyaena icha be ichi xua poxonae pomonae xaniwaicha pejumekowüntsiwi, dáichitha barapomonae jopa xaniwaicha jumekowüntsiyo xua icha jüntükoyene pexeinaewa tsane.

Jopa bewa barapokotsimonae imoxoyo napunaponaem xua barapomonae nekuiyainwam. ⁶Barapomonae jíwana pomonae bomüxüngtha pateibina muxujaiñabeibinchi yábüxi, poyábüxi jinompa bárapo bomüxüngtha, poyábüxi xua anakaura xua penakuiyaputaexae xua abe éxana báyatha. Barapówaxi áwiya kame jopa wüünaeya exanaeyo, poxoru saya éxana pokotsiwa piakoutha ichichipa éxana. ⁷Bárapo yábüxi jumenaitáewata nawita, daxita karepaya pokoyenein xua jiwi paeba, bara bekein jopa wüünaeya paebiyo. Daxota bárapo yábüxi jopa itaküüpaetsi xua peyaputaewa pokotsiwa xua Nakom piá pexaiñéi koyenewa tatsi. ⁸Kaena báyatha pong pewüng Janes, irü ichüng pewüng Jambres, bapongbe mara pexinaeinbe, bapongbe kuimatawentabe Moiestha, xua Moisés piá peéxanae koyenewatha. Icha bapongbe ichi, barichi barapomonae yábara jumematawenta Nakom piá pexaiñéi koyenewa tatsi. Barapomonae saya yábara nantaxeina nawita pokotsiwa peabe koyenewa. Barapomonae taséikatsi pejumekowüntsiwa, po pejumekowüntsiwa pexaiñéi jume. ⁹Barapomonae jopa beta dubenanaebiyáe tsane, tsipéi daxita nakuangpiwi kuiyaputaena xua barapomonae ápara pomonae jopa wüünaeya peexanaewi, icha be ichi poxonae kaena báyatha jiwi kuitane xua Janes irü Jambres jopa beta exanáeyobe.

Meje yábara po diwesi xua Pablo najumewetsiya paeba poxonae Timoteo itoróbatsi

¹⁰Íchitha xam bara beta exanapóname pokotsiwa takuidubiwa. Matáütano nekuitáneme xua bara beta póponang. Matáütano nekuitáneme xua takoutha yaputang pokotsiwa taexanaewa tsane Nakom nexa. Matáütano nekuitáneme xua bara beta jumekowüntsiya póponang Nakomtha. Matáütano nekuitáneme xua saya áwiya beta jüntema póponang poxonae bekein ichamonaes jopa xapain nekana exanaeyo. Matáütano nekuitáneme xua bara antobeya póponang jiwi, matáütano Nakomtha. Matáütano nekuitáneme xua bara áwiya Nakom tanakuitang. ¹¹Xam

yaputáneme xua jiwi bichokono abe nekana éxana tajumekowüntsixae Cristo. Matáütano neyaputáneme xua jiwi bichokono átene neéxana Antioquía tómaratha, Iconio tomarathano, Listra tomarathano. Íchitha pong jiwi Pía Pekanamataxeinaeinchi neyawena xua nekapanepa barapomonae pía xaiña weya. ¹²Bara xaniwaicha, daxita pomonae ichichipa xua najüntükoyene wüünae éxana dubenánaebiya Cristo Jesustha, barapomonae irü átene exanaeinchi ichamonae. ¹³Íchitha pomonae peajüntükoyénebe jiwi, írürü pomonae pemuxujaiñabi jiwi, daxita barapomonae bichokono abe eexanaponaena beyakaincha xua kopiya. Barapomonae muxujaiñabiya kanamataxeina ichamonae, xua irü abe peexanaenexa, matáütano xua bárapo ichamonae irü xuya pemuxujaiñabiya kanamataxeinaenexa ichamonae, xua irü abe peexanaenexa.

¹⁴Íchitha xam áwiya beta éxana dukuanaebíyama pokotsiwa xua nakuidúbame, xuano xua bichokono nejumekowüntsiwa. Xam báyatha yaputáneme pomonae xua kakuiduba bárapo koyenein, pomonae pejüntükoyene xanepanaewi. ¹⁵Poxonae pexúyotham yaputáneme Nakom Pejume Diwesi. Bárapo diwesi itakúüpatsi xua nekakuidubiwa xua nekakapanepaewanexa abe jiña neexanáe kuirukoyene weya nejumekowüntsixae Cristo Jesús. ¹⁶Daxita karepaya Nakom Pejume diwesi sin tatsi, bárapo diwesi Nakom ayapusüü diwesi éxana. Daxita bárapo diwesi wüünae xua jiwi pekuidubiwa tsainchi. Matáütano daxita bárapo diwesi wüünae xua jiwi yaputane peexanaenéxatsi poxonae abe éxana. Matáütano daxita bárapo diwesi wüünae xua jiwi pemuxuwetsinéxatsi xua wüünaeya peexanaewa tsane. Matáütano daxita bárapo diwesi wüünae xua jiwi peyawenaenéxatsi xua pejüntükoyene wüünae dubenanaebiyaenexa Nakomtha. ¹⁷Bárapo diwesi jintong wüünaeya kanakuiweta éxanatsi xua beta peexanaewa tsane pong Nakom piamonae jwana jintong tatsi. Bárapo diwesi sintha daxita koyenein xeina xua barapong nantawénona, pókotsi koyeneintha xua bapong Nakom petanakuitsinéxatsi, daxita karepaya po penakuichiwang wüünae.

4 ¹Nakom peitabaratha tatsi yawa Cristo Jesús peitabaratha tatsi, bapongbe peitabaratha tatsi kaitoróbatsi. Bapong Cristo Jesús patopáetsika be pong jiwi itorobiya pía pepa Peewatsinchi. Matáütano bapong yábara paebina jiwi xua penatsikuentsiwa xua abe peexanaexae, pomonae xua ánoxuae kataunxuae asiüü jinompa, írüno pomonae xua báyatha wérapa. ²Kaitoróbatsi xua kueikueijande Nakom Pejume Diwesi. Beta jumedangweya kueikueijam tsaibinde Nakom Pejume Diwesi poxonae jiwi ichichipa kajumetaibina, matáütano poxonae bekein jiwi jopa ichichipaeyo xua nekajumetaewa. Barapomonae jüntükoyene yaputane éxande xua barapomonae petaseikáewatsi pejüntükoyene wüünaewa Nakomtha. Matáütano barapomonae yábara muxuwere abe pía peéxanae kuirukoyenein tatsi. Matáütano barapomonae jüntükoyene kuitsákabare xua Jesucristo pejumekowüntsiwa tsainchi. Matáütano bápana barapomonae jopa tsita xeinaeinde peaitakonaewa. Matáütano bápana jopa nakuikopatsim tsane xua nekuidubaponaewa barapomonae, xua bekein barapomonae jopa Jesucristo pejumekowüntsiwichi taetham tsane. ³Tsipéi jopaena matakabi poxonae po matakábitha jiwi jopa jumekowüntsi tsane bárapo pexaiñéi kuidubijume. Barapomonae saya ü jeichina po pekuidubiwi saya kuiduba pokotsiwa xua jiwi ichichipa jumetane. ⁴Barapomonae saya naitemapenta xua aichaxaibi pejumetaewa pokotsiwa pexaiñéi jume. Saya barapomonae ü jumenaitaewatsina aiña diwesi,

po diwesiin xua saya pejemái diwesiin. ⁵Íchitha xam dotam. Najüntükoyene bábare xua neexanaeyainwa pokotsiwa barapomonaé éxana. Jopa junuwinde xua ichamonae poxonaé kaátene exanaena nejumekowüntsixaé Jesucristo. Íchitha xam éxana dukuanaere jiña nenakuichiwa xua Nakom pía pexeiña jume diwesi nekueikueijeí dukuanaetsiwa. Daxita wetsiya exánare pokotsiwa jiña netanakuichiwa Nakom.

⁶Bara nama imoxoyo nebexubina tajumekowüntsixaé Cristo. Matáütano bara nama imoxoyo xua po matakeitha tsane ponaein Nakom pía nakuatheicha. ⁷Ajüntükuiyapusüüya amanáyabang kaurimonaetha Jesucristo nexa, icha soldadomonaé ichi xua poxonaé amanáyaba pía peaitaetaéwíwíchi. Báyatha nakuiwetang pokotsiwa xua báyatha Nakom neitoroba, icha jintong ichi xua patopa poxonaé penaxenakaewa. Matáütano jumekowüntsiya póponang Jesús, icha be pókotsi koyeneya ichi poxonaé jintong beta yapu-eena pokotsiwa itoróbatsi pía pekanamataxeinaéinchi. ⁸Ánoxuae éwatang po pentoma Nakom nekatsina xua tajüntükoyene wüünaexae bapongtha. Pong jiwi Pekanamataxeinaéin, pong xua yatsikaewa xaiñeya jiwi yábara páebatsi xua penatsikuentsiwa xua abe peexanaexae, bapong pentoma nekatsina po matakeitha bapong patopeikaena. Saya meisha jopa kompa nekatsi tsane, irü barichi tsainchi baxua katsibinchi pomonaé wüünaé ewatsiya ichichipa xua pía pepatopaewa tsane bapong.

Meje yábara xua Pablo waba xua Timoteo wábatsi

⁹Naiña nesiwaponde poxonaé kaitaküüpa. ¹⁰Pong Demas, bapong nepunaxuba, tsipéi bapong saya kopei yábara kanantaxeina nawita pokotsiwa po kae pin nákuathe xeina. Bapong Tesalónica tómara beya pona. Pong Crescente, bapong Galacia nakua beya pona. Pong Tito, bapong Dalmacia nakua beya pona. ¹¹Meisha pong Lucas, bapong xote barü ékang. Wenawenande Marcos, kabarü dena tsane, tsipéi bapong itaküüpatsi xua tana neyawenaewa tsane. ¹²Pong Tíquico bapong Efeso tómara beitorobiyang. ¹³Poxonaé nesiwadenam, inta karenande po paparuwa aitiyüü, po paparuwa kuentang pong Carpo, bapong piabotha tatsi Troas tómaratha. Diborongno inta karenande, yawa papérangno inta karenande xua inta aiñaküí pokotsiwa.

¹⁴Pong Alejandro, pong penain penakuichin, bapong inta abe éxana. Pong jiwi Pekanamataxeinaéin, bapong Alejandro pentoma katsinchi po pentoma po peka-yábara matomatsíwatsi xua abe peexanaexae. ¹⁵Dotam xua bapong, tsipéi bapong aichaxaibi pokotsiwa po diwesiin kueikueijeichi.

¹⁶Poxonaé takoutha nayábara jumeyawenaeya kueikueijang pentakaponaewi peitabaratha, dapong aibi pong tana neyábara jumeyawenaewa tsane. Daxita nepunapenta. Ichichipang xua Nakom bü jopa kabetsi tsane barapomonaetha xua tana nepunapentsixaé. ¹⁷Dáichitha Nakom pong jiwi Pekanamataxeinaéin, neyawena poxonaé bekein ichamonae nepunapenta. Bapong peantüyapusüüwa nekata xua beta takueikueijeinexa pijume diwesi xua pejumetaewa tsane daxita pomonaé jopa judiomonaé naexanaeyo. Bapoxonaé Nakom neyawena xua jiwi jopa nekabetsiyo xua tatüpaewa. ¹⁸Bapong pong jiwi Pekanamataxeinaéin, bapong nekana éxana xua tapanepaewa daxita karepaya abe peéxanaé kuirukoyenein weya, xua daxota patopaein pía peitorobi nakua beicha. Bárabü jiwi ataya wüünaé jainchina Nakomtha. Je bara ichi tsane.

Meje yábara xua Pablo najumewetsiya paeba

¹⁹Inta jakóbare powa Priscila, irü pía pebin tatsi, bapong Aquila. Írürü inta jakóbare pong Onesíforo piamonae matabüxüyo tatsi. ²⁰Pong Erasto bapong eka Corinto tómaratha. Pong Trófimo, bapong kuenta ponang Mileto tómaratha yáitama átene. ²¹Jüüre xua patópare xua pewünaeya poxonae beya awüübo tsane. Pong Eubulo, irü pong Pudente, irü pong Lino, irü powa Claudia, írürü daxita pomonae pejumekowüntsiwi, daxita barapomonae kajakoba.

²²Bárabü Jesucristo, pong jiwi Pekanamataxeinaein kabarü poponaena. Bárabü Nakom amanayiya kayawenaena jiña nekaantobexae.

Baja Pablo.

Meje Po Carte Pablo Tatina, Tito Tatínatsi

Meje yábara poxonae Pablo tamrópata pítaba xua tatina, Tito tatínatsi

1 ¹Xang, Pablo, pong Nakom tatanakuichin matáütano Jesucristo pía peitorobi jintong tatsin. Jesucristo neitoroba xua tayawenaewa tsane jiwi xua barapomonae pejumekowüntsinea Nakom. Pewünaeya kopiya Nakom itapeta barapomonae, xua pejumekowüntsiwa tsainchi. Matáütano neitoroba xua barapomonae yaputane taexanaenexa Nakom pía pexaiñéi jume diwesi xua daxota barapomonae Nakom peitabaratha wüünaeya pejinompaewa tsane. ²Poxonae barapomonae jumekowünta Nakom, barapomonae éwata xua Nakom katsina pía peajüntüyapüsüüwa po peajüntüyapusüüwa ataya tsiteka. Bapong Nakom bápana jopa penéerabin. Bárapo peajüntüyapusüüwa po peajüntüyapusüüwa ataya tsiteka, kaena báyatha Nakom yábara tsiwüünae muxuduta jiwi poxonae kataunxuae jopa nakua forotsiyo. ³Íchitha ánoxuae nama Nakom peichichipaexae bárapo matakábitha daxota jiwi yábara yaputane exainchi xua pía pexeiña jume diwesi tatsi. Nakom nekópata xua bara takueikueijejiwa tsane bárapo diwesi daxita jíwitha. Nakom pong xua jiwi Pekapanenebiyaein neitoroba xua takueikueijejiwa bárapo diwesi poxonae nekata bárapo pía penakuichiwa tatsi xua tatanakuichinea bapong. ⁴Bárapo carte kata tínatsi Tito, pongxaem be yatsikaewa taxantom katsikotainchi irü nejumekowüntsixaes Jesucristo. Bárabü Nakom pong Waxa, irü Jesucristo pong Wanaka kapanenebiyaein petüpáe kuirukoyene weya, kayawenáenabe pía nekaantobewaxaabe. Matáütano jüntema pópona ka-exanáenabe.

Meje yábara xua Tito Creta tunaeto nákuatha nakuita

⁵Kaena báyatha Creta nakua tunáetotha kakuentapoinchi xua neyawenaenexa Jesucristo pejumekowüntsiwi pokotsiwa xua nákata séikabe. Daxota kakuentapoinchi xua neitapetsinea pítiri jiwi xua barapomonae pekanamataxeinaenexa pomonae pejumekowüntsiwi Nakom. Baxua eexanaponde daxita i dapó tómarangtha icha be pókotsi koyeneya báyatha kaitoróbatsi. ⁶Báyatha katsipáebatsi xua pong barapókotsi pítiri jiwi jíwanapin bewa poxonae poponaena bewa iche: Bapong bewa wüünaeya póponae xua ichamonae jopa petsita-natsikuentsinea tsainchi xua abe peexanaexae bapong. Matáütano bapong saya bewa kae petsiriwa xeináe. Matáütano pía pexui tatsi bewa jumekowüntsi Nakom. Matáütano pía pexui tatsi wüünaeya bewa jinompáe xua daxota ichamonae jopa peyábara paebiwa tsane xua abe éxana bárapo pexui. Barichi matáütano xua ichamonae jopa peyábara paebiwa tsane xua bárapo pexui jopa jumejejeyo pokotsiwa koxiyüing itoroba. ⁷Po pítiri jiwi kanamataxeina pomonae pejumekowüntsiwi Nakom, barapomonae tanakuitta Nakom piáwa. Daxota aiñakuí xua barapomonae wüünaeya bewa jinompáe. Barapomonae jopa bewa jumefebí pokotsiwa xua

Nakom itoroba. Matáütano jopa bewa exanáe pokotsiwa jiwi naiña bichoina anaepanaya jumenota. Yáwano jopa bewa naküüpa exanáe, yáwano jopa bewa nakáyatsi. Yáwano jopa bewa pitaparatixichi poxonae jopa xapain exanaeyo penakuichiwa. ⁸Jame bewa barapomonaе matenta weiweinaya wabeibi pomonaе pesiwaponeibiwichi piabongtha. Yawa bewa ichichipáe pokotsiwa xua wüünae. Yawa bewa wüünaeya kayábara nantaxeinae. Yawa bewa beta exanáe ichamonaetha. Yawa bewa exanáe pokotsiwa Nakom itoroba. Yawa bewa yaputáe xua piakoutha najüntükoyene itoroba xua beta peexanaewa. ⁹Bewa ajüntükoyene-süüya jumekowüntsina Nakom pía pexaiñéi jume diwesi tatsi po diwesi barapomonaе kuidúbatsi. Bapoxonaе barapomonaе itaküüpatsi xua xuya ichamonaе jüntükoyene tsakáraba xua pejumekowüntsiwa tsainchi poxonae kuiduba bárapo pexaiñéi jume diwesi. Matáütano barapomonaе itaküüpatsi xua jumejejéi kana éxana pomonaetha, pomonaе bekein kopiya pejume itawetsixaetsi pokotsiwa xua barapomonaе kuiduba.

¹⁰Tsipéi judiomonaе jíwanapiwi bichokono pinmonaе pomonaе pejumefebiwi xua Nakom itoroba. Bichokono pinmonaе pomonaе jiwi peitorobiwi xua pebiwi bewa withabinchi ichaxota penareixakaenaewa. Pokotsiwa barapomonaе kuiduba ichamonaetha saya pejumexáei. Yáwano jiwi muxuitórobatsi nawítano. ¹¹Barapomonaе bewa pajumematawentsim xua jopa pepaebiwa tsane bárapo jumein, yáitama barapomonaе kana éxana xua jopa jumekowüntsiyo pomonaе xua daxita matabüxümonaеin tsíniya. Baxua éxana poxonae kuiduba pejemái diwesi po diwesi jopa bewa kuidubi, jiwi peyamuxujaiñabiya wüükaenéxatsi parátixi.

¹²Kaena báyatha pópona pong Creta tunaetopiwi jíwanapin, pong piamonaе yábara jeichi: “Wanakom pía peitorobi jume pepaebin tatsi”, jei. Barapong yábara kueikueijeji Creta tunaetopiwi pomonaе piamonaexae. Bapong yábara jeye piamonaе: “Maisha Creta tunaetomonaе, barapomonaе jiwi muxuitorobeiba, yawa be unupiwi pomonaе peaitoisha jiwi yawa napenajüba nawita yawa fifina nawita”, jei bapong. ¹³Poxonaе bapong baxua paeba barápara jumexaiñeya paeba. Daxota xam Tito barapomonaе bichokono jumematawende xua barapomonaе xaniwaicha jüntema pejinompaewa tsane xua Jesucristo pejumekowüntsiwatsi. ¹⁴Matáütano kuimatawende barapomonaе xua jopa ekeicha pejumenaitaewatsinexa judiomonaе pía pejemái diwesi tatsi. Matáütano kuimatawende xua jopa pejumenaitaewatsinexa pomonaetha, pomonaе xua jiwi peitorobíwatsi xua jiwi pejume itawetsiwa tsane Nakom pía pexaiñéi jume diwesi tatsi.

¹⁵Pomonaе yábara jumekowünta xua Cristo tsitüpa barapomonaе, barapomonaе jame pejüntükoyene xanepanaewi. Barapomonaе daxita pokoyenein xua tane tsita wüünaetsi. Seikaya nama pomonaе jopa yábara jumekowüntsiyo xua Cristo tsitüpa xua barapomonaе tsitüpatsi, barapomonaе ápara peajüntükoyenebewi. Barapomonaе daxita pokoyenein xua tane tsita abetsi. Barapomonaе pía penantaxeinaewang jopa xaexaenaekaeyo, yawa pía jüntükoyenein tatsi po jüntükoyenein itorobéibatsi xua poxonae peexaneibinexa, bichokono jopa xaexaenaekaeyo. ¹⁶Barapomonaе jei: “Nakom pajumekowüntang”, jei. Dáichitha poxonae exaneiba, icha koyene exaneiba icha ichi pomonaе jopa pejumekowüntsiwi Nakom. Bara barapomonaе Nakom tsita abetsi pejumefebixaetsi pokotsiwa itoroba. Matáütano jopa itaküüpaetsi xua éxana pokotsiwa xua pexeíña penakuichiwa.

Meje yábara pokotsiwa Nakom pía pexaiñéi jume diwesi tatsi

2¹Íchitha xam Tito pokotsiwa kuidúbame bewa kayábara kuita kanantaxei-neibim xua ü pokotsiwa Nakom pía pexaiñéi jume diwesi tatsi. ²Pítiri jiwi muxuwere xua jopa bewa naküüpa naexanáe peátsaxae merang. Matáütano muxuwere xua xaniwaichiya pejinompaewa tsane xua daxota ichamonae pebarükui-iturajinaewa tsane, xua bárapo pítiri jiwi pebarükui-iturajinaewa tsainchi. Matáütano muxuwere xua pena jüntükoyene itorobeibinexa xua peexaneibinexa pokoyenein xua wüünae. Matáütano muxuwere xua xaniwaichiya pejumekowünta dubenanae-biyaewa tsane xua Nakom xaniwaicha pejumekowünta dubenanaebiyaewa tsainchi. Yáwano muxuwere xua piamonae peántobe tsurubenanaebiyaenexa. Yáwano muxuwere xua ayapusüüya jumekowüntsina poxonae bekein ichamonae abe taé-xanatsi. ³⁻⁴Barichi pitiriwaxi muxuwere xua wüünaeya pejinompaewa tsane, icha be ichi poxonae jinompa powaxi jumekowünta Nakom. Matáütano barapówaxi jopa bewa kueikueijeji tsane pojumein xua abe xua ichamonae yábara páebatsi. Yawa jopa bewa naküüpa naexanáe peátsaxae merang. Matáütano bárapo pitiriwaxi muxuwere xua piséuriwi peantobenexa tsaibi tsane, xua daxota irü xuya penawaxi pebarichinexa xua peexanaenexa pokoyene wüünae xua peantobenexa tsaibi tsane piséuriwi yawa pía pexuithano. ⁵Matáütano muxuwere bárapo pitiriwaxi xua pena jüntükoyene itorobeibinexa xua peexaneibinexa pokoyenein xua wüünae. Matáütano muxuwere xua pena jüntükoyene wüünae exanaenexa. Matáütano muxuwere xua wüünaeya peewatsinexa piaboxi. Matáütano muxuwere xua peyábara kuikanantaxeinaenexa xua peyawenaenexa pomonaetha, pomonae piabotha petajinompáewichi. Yawa muxuwere bárapo pitiriwaxi xua jumejejei tsaibi tsane poxonae itorobéibatsi piséurixi xua ichamonae jopa abe peyábara paebinexa Nakom Pejume Diwesi.

⁶Matáütano barichi pewowi muxuwere xua pena jüntükoyene itorobeibinexa xua peexaneibinexa pokoyenein xua wüünae. ⁷Xam Tito bárapo pewowi peitütha tatsi wüünaeya eexanaponde daxita koyenein poxonae exanéibame. Barapoxonae bárapo pewowi xua pebarichinexa wüünaeya peexanaenexa pokoyenein wüünae. Poxonae pewowi kuidúbame xaiñeya kuidúbare nejüntükoyene wétsina. Matáütano wüünaeya beta kuidúbare. ⁸Wüünaeya betiya kueikueijande xua ichamonae jopa abe nekayábara paebiwa tsane. Daxota barapomonae aura tsaibi tsane xua abe nekayábara paebebiwa beta neexanaexae. Bapoxonae barapomonae jopa itaküüpáe tsainchi xua abe wanaka yábara paebiwa.

⁹Tsipáebare pomonaetha, pomonae pebusikuitaetaeyebéwichi xua amanaya tanakuita xua poxonae ichamonae tanakuítatsi, jande: “Paexande daxita xua paiña nepaka kanamataxeinaewi paka itoroba. Matáütano wüünaeya patsita éxande paiña nepaka kanamataxeinaewi. Jopa pin jumetha pajumenotéibinde poxonae paka itorobeiba paiña nepaka kanamataxeinaewi”, jande. ¹⁰Yawa jande: “Jopa pakaibinde, jame saya beta pata éxande paiña nepaka kanamataxeinaewi, xua daxita jiwi paiña nepaka kuiyaputaenexa xua bara paéxaname pokotsiwa Nakom paka kuiduba pía pexeña jume diwesi tatsi, pong Wanaka kapanenebiyaein abe waexanáe kuirukoyene weya”, jande.

¹¹Nakom báyatha naka yaputane éxana xua bara naka yawena pía wanaka antobexae. Naka yawena poxonae naka kapanenebiya. Bárapo pekapanenebiyáe

koyene daxita nakuangpiwi nexa. ¹²Bárapo koyene xua Nakom pía peyawenae koyene jíwitha pía peantobéwaxae, naka kuiduba xua wanakuibarapentsiwa tsane abe waexanáe kuirukoyenein. Yáwano naka kuiduba xua wapentsinexa xua pokoyenein kayábara kanantaxéinatsi pokoyenein éxana pomonae jopa pejume-kowüntsiwi, xua pomonae jinompa po kae pin nákuathe. Matáütano naka kuiduba xua najüntükoyene itorobeibinchi xua waexaneibinexa pokoyenein xua wüünae bárapo kae pin nákuathe yawa wüünaeya wajinompa dubenanaebiyaenexa xuano xua xaiñeya waéxana dubenanaebiyaenexa pokotsiwa Nakom itoroba. ¹³Yawa naka kuiduba xua wawüünae ewatsiya jinompaewa xua ekeicha kaewa patopáetsika pong xua báyatha Nakom yábara naka tsiwüünae muxuduta. Waxainchi éwatatsi xua Jesucristo pía pepatopaewa pexeña peitüpanáe kóichatha. Bapong barápara wapepa Nakom xuano xua Wanaka kapanenebiyaenexa. ¹⁴Jesucristo nakaenaeta xua naka tsitüpa wanaka kapanenebiyaenexa daxita koyenein weya xua abe waexanáe kuirukoyenein. Matáütano nakaenaeta wanaka jüntükoyene wüünae exanaenexa poxonae naka yábara jüntemaina abe waexanáe kuirukoyenein. Baxua Jesucristo éxana xua piamonae tatsi pía wanaka exanaenexa, xua pomonaetsi xua waichichipáewatsi xua waexanaewa pokotsiwa wüünae.

¹⁵Xam Tito bárapo koyenein bewa kuidubim. Jüntükui koyene tsakábare xua barapomonae jüntema pejinompaewa tsane. Matáütano muxuwere daxita bárapo Creta tunaetopiwi xua bara wüünaeya peexanaewa tsane daxita peitorobi koyeneyatha po peitorobi koyene xua Nakom kakata. Jinxoba barapomonae peitütha éxaname pokoyenewa xua daxota barapomonae tsita pekuipawi nenaexanaewa.

Meje yábara pokoyene bewa exanáe pomonae Nakom pejumekowüntsíwichi

3 ¹Xam Tito bárapo Creta tunaeto nakuapiwi ekeicha kaewa yábara nantaxeina exánare xua bewa barapomonae jumejejí xua peexanaewa tsane pokotsiwa barapomonae itorobéibatsi pomonae barapomonae pía peyanakua ewatsíwichi xuano pokotsiwa barapomonae itorobéibatsi pomonae pía pentakaponáewichi. Matáütano muxuwere xua bewa barapomonae najüntükui wüünaetsiya exaneibina xua peexanaenexa tsalibi tsane pokotsiwa xua wüünae. ²Matáütano muxuwere xua bewa barapomonae jopa abe paebí tsane xua ichamonae abe peyábara pae-bíwatsi. Matáütano muxuwere xua barapomonae jopa bewa jumematsontsónobi ichamonaetha. Matáütano muxuwere xua barapomonae bewa jüntükoyene wüünaeya kueikueijeje ichamonaetha. Matáütano muxuwere xua bewa barapomonae barükui-iturajina dubenanaebiyaena daxita jiwi.

³Kaena báyatha kopiya waxainchi jopa wajumekowüntsiwi, jopa Nakom wayaputaexae. Yawa jopa wajume její jiwi pokotsiwa Nakom naka itoroba. Yawa waxainchi naka itaxanumena. Waxainchi wajüntükoyene naka itoroba xua waexanaewa pokotsiwa waichichipaewa pokotsiwa xua abe. Matáütano naka itoroba xua bewa exanaetsi po peabe koyene naka weiweina éxana icha ichi pomonae jinompa po nakuathepiwi. Matáütano abe peéxanae kuirukoyenein éxana dubenanaebiyatsi, xuano xua peúwi jüntükoyeneya jinompa dubenanaebiyatsi. Matáütano ichamonae naka ita-aenae-aenéi tsurubenanaebiyatsi, yáwano xua waxainchi nantiya naita aenae-aenéi tsurubenanaebiyatsi. ⁴Íchitha Nakom pong Wanaka kapanenebiyaenexa yábara naka yaputane éxana xua

pokoyene bapong naka jüntükoyene wüünae éxana, xuano xua wanaka antobewa poxonae naka kapanenebiya abe waexanáe kuirukoyenein weya. ⁵Naka kapanenebiya, ápara jopa poxóruyo xua wüünaeya waexanaexae bapong nexa, ápara poxoru nantanuweya naka yábara nanthükoyene xeina pía wanaka yawenaenexa. Poxonae naka bautisaba mératha báraxua saya yábara kaunuta xua Nakom pía Pejumopetünaxü tatsi naka jüntükoyene wüünae éxana. Poxonae baxua naka kana éxana bapoxonae pena jüntükoyene xéinatsi, xua poxonae Nakom pía Pejumopetünaxü tatsi naka jüntükuyekoyene yábara kajüntemaina abe waexanaewang. ⁶Jesucristo pong Wanaka kapanenebiyaein nákata itorobika Nakom pía Pejumopetünaxü tatsi pía jopa juniya wanaka yawenaenexa. ⁷Poxonae Nakom naka jüntükoyene wüünae éxana, bapoxonae naka kana éxana xua jopa wanatsi anaekuentínéxatsi bapongtha. Bapong naka yawena pía wanaka antobexae. Daxota waxainchi éwatatsi xua Nakom wanaka katsibiwa tsane peajüntüyapusüüwa, po peajüntüyapusüüwa ataya tsiteka, tsipéi bapong pía pexuichi.

⁸Baxua jame xaiñeya pepaebiwa. Ichichipang xua xam jumedangweya tsipae bíname barapomonae xua bewa barapomonae bárapo koyene exanaena pomonae xua pejumekowüntsíwixae Nakom. Bapoxonae barapomonae kui-énatsi xua peyábara nantaxeinaewa po penakuichí koyenein xua ichamonae tsita wüünaetsi. Bárapo petanakuichi koyenein jame wüünae, yawa bárapo koyenein jiwi yawénatsi. ⁹Dotande xua nekuiyáinwande xua ichamonae yábara nekabarü najumematsontsonobiwa tsane po diwesin xua pejemái diwesin. Matáütano kuiyáinwande xua yábara nekabarü kueikueijejiwa judiomonae pía pamo susatopiwi tatsi pía wüngxi tatsi. Matáütano kuiyáinwande xua penajumematsontsonobiwa xuano xua anaya peyábara pepaebiwa Moisés pía peitorobi koyene tatsi. Tsipéi ba poxonae bárapo koyene éxana jiwi, jopa yawenaetsi xua xaniwaichiya pejinompaewa xua jiwi jopa pexaiñeiwangxae.

¹⁰Icha ichüng kana éxana xua pomonae Nakom pejumekowüntsíwichi, kana éxanatsi xua barapomonae pomonae Nakom pejumekowüntsíwi be pomonae jopa penayaitáe jiwi penaexanaewa tsane xua penaita aenae-aeneiwa, bara bapong muxuwere. Icha ekeicha jopa xapain exanaeyo ekeicha muxuwere. Icha ekeicha jopa beta exanaeyo bapoxonae bapong itawere paiña xaiña weya. ¹¹Yaputáneme xua barapong piakoutha najüntükoyene matanonoxuba xua abe peéxanae kuirukoyene peexanaewa. Daxota abe peexanaexae piakoutha natsikuenta éxana Nakomtha.

Meje yábara xua Pablo muxutsipaeba pokotsiwa bewa Tito exanaena

¹²Poxonae nexaiña beya kata itoróbatsi Artemas, ichakuitha tsipae icha kata itoróbatsi Tíquico, néxata bapoxonae yakuinaya pónare Nikópolis tómará beya. Néxata bárapo tomarathiya netáename, tsipéi báyatha nantaxeinang xua baxotiya taekaewa tsane awüübotha. ¹³Zenas pong jiwi yawenéibatsi peyábara yaputaexinxae peitorobi koyenein, írürü pong pewüng Apolos pong xua kasiwapónabe bapongbe yawendebe. Bara éxande be pókotsi koyeneya xua kaitaküüpa xua yawéname. Bapongbe kárebe pokotsiwa xua kanantawenónabe poxonae pewarapaenéxabe xua jopa petaseikaenexa tsáinchibe. ¹⁴Bárabü wajiwimonae wüünaeya exanaponaena xua daxota peyawenaenexa xua peyawenaenéxatsi pomonae

peakopeibiwi pokotsiwa xua kanantawénona. Bapoxonae pía jüntükoyenein tatsi Nakom tsita wüünaetsi.

Meje yábara xua Pablo najumewetsiya paeba

¹⁵Pomonae taxantha ena barapomonae kajákoba. Painta jakóbare pomonae Jesucristo pejumekowüntsíwichi, pomonae bichokono paantobein pejumekowüntsixa. Bárabü Nakom paka yawenaena daxita paxam pía paka nekaantobexae.

Baja Pablo.

Meje Po Carte Pablo Tatina, Filemón Tatínatsi

Meje poxonae Pablo tamrópata pítaba xua tatina, Filemón tatínatsi

¹Xang Pablo, pongxaein jiwi pekübibotha taneétsin xua tanatsipéi kueikueijeixae Cristo Jesús yábara. Irü Timoteo, pong irü pejumekowüntsins Jesús, bapongbe pangbe bárapo carte pákata tínatsi. Xam Filemón pongxae bichokono paka antobetsi tsipéi pana yántame xua kueikueijam Nakom Pejume Diwesi. ²Irü pata tínangbe pomonaetha, pomona pejumekowüntsiwi Jesús pomona jínna botha nakaetuteiba. Irü bárapo carte yábüyo nexa powa pewüng Apia, powa be wamcho watsikotaewa pejumekowüntsixaerü Jesús. Irü bárapo carte pebin nexa pong pewüng Arquipo, pong dangweya pana nebarü nakuita xua poxonae pata kueikueijeixa Nakom Pejume Diwesi. ³Bárabü Nakom Waxa irü Jesucristo pong jiwi Pekanamataxeinaein paka yawenaena pía paka nekaantobexae, xuano xua jüntema jinompa paka exanaena.

Meje yábara xua Filemón Cristo antobetsi xuano xua jumekowúntano

⁴Poxonae Nakomtha tsipaebeibang kayábara nantaxeinéibatsi jang tsaibin: “Axa, Nakom kawüünae jáintatsi tsipéi Filemón nejüntükoyene weiweina éxana”, jang tsaibin. ⁵Daxota baxua kaunuteibang, yáitama jumetang xua pinae jumekowúntame Jesús pong jiwi Pekanamataxeinaein. Matáütano jumetang xua pinae antobem Jesús xua írüno pinae antobem daxita pomona pejumekowüntsiwi. ⁶Nakomtha tawüükang xua pomona Jesús pejumekowüntsiwi xua barapomona taena xua waxainchi be nakaemonaetsi wajumekowüntsixa. Matáütano Nakomtha tawüükang xua barapomona wüünaeya peyaputaenexa xua Nakom naka kana éxana pokotsiwa bichokono nákata wüünae poxoru be nakaemonaetsi wajumekowüntsixa Cristo Jesús. ⁷Taneantobemxae nejüntükoyene tsakárabame yawa nejüntükoyene weiweina éxaname xua xaniwaicha jüntema tapoponaewa tsane. Xam pongxae be táyapin kanatsikotainchi irü nejumekowüntsixa Jesús. Beta nepoponaexae daxota beta jinompa daxita pomona pejumekowüntsiwi Cristo Jesús.

Meje xua Pablo Filemón wúükatsi xua Onésimo tawúükatsi, pong Filemón pía pebusikuitaetaeinchi

⁸⁻⁹Bekein bara taitorobi koyene xeinang xua pokoyeneya bewa exanáename xua xang Cristo pía peitorobi jiwi jíwana tatsixaein, íchitha ichichipang xua xam neexanaewa tsane xua takaantobexaetsi. Xang Pablo bara nama bichokono perun tsekaein matáütano ánoxuae jiwi pekübibotha neeta tanatsipéi kueikueijeixae Cristo Jesús yábara. ¹⁰Kakuí itoróbatsi xua neyawenaenexa Onésimo. Bapong taxanto be tatsikotaein taneyawenaexae xua kueikueijeixae Jesús yábara poxonae

kataunxuae xote ékangje jiwi pekübibotha. Bapong báyatha nexaiña weya name-taba, pong báyatha amanaya nekatanakuichin.

¹¹Bekein kaena báyatha Onésimo amanaya jiña nebusikuitaetaeinchi, dáichitha jopa wüünaeya kata nakuichiyo. Íchitha ánoxuae bara wüünaeya penakuichin xam nexa yawa xang néxano Jesucristo pejumekowüntsixaetsi. ¹²Kaewa kata ito-róbatsi bapong. Poxonae bapong Onésimo patopiya, weyataeya jakóbare tsipéi bapong bichokono antobein. ¹³Xang ichichipang xua bapong taxantha eka xua barapong tana neyawenaenexa po penakuichiwa inta éxaname xua irü poxonae kataunxuae jiwi pekübibotha neeta tanatsipéi kueikueijeixae Jesucristo pejume diwesi. ¹⁴Íchitha jopa ichipaeiño xua Onésimo tana neyawenaewa tsane icha jopa bekopatsim. Saya ichichipang xua xam exanáename pokotsiwa jiñakoutha ichi-chípame xua jopa neexanaenexa pokotsiwa takaitoróbíwatsi. ¹⁵Metha báyatha Onésimo nametaba nexaiña wérena saya be káetotha nexa xua ánoxuae bara tsi-tekaeya nebarü poponaenexa tsane. ¹⁶Ánoxuae nama bapong jopa bewa yábara nantaxeinaem xua bapong be pong pebusikuitaetaeinchi jintongtsi. Ánoxuae nama bewa katsita tsane xua bapong peaiñakuí jintong, beyakaincha be pong pebusi-kuitaetaeinchi. Baxua jei pong bichokono peántobe jintongtsi pejumekowüntsi-xae Cristo Jesús. Xang bapong Onésimo bichokono antobein. Íchitha xam nama bapong bewa bichokono antobem jiña nekatanakuichixae jame yáwano be néyapin tsikotaema irü pejumekowüntsixaes Jesucristo, pong jiwi Pekanamataxeinaein.

¹⁷Jiña eweicho tana nekana exanaemxaem irü tajumekowüntsixaes Jesús, daxota moya beta weyataeya matenta wábare Onésimo, icha be neichim poxonae nententa weiweinaya wábame. ¹⁸Icha bapong kata abe éxana, icha ichauyo kantoma amanáyaba moya newüükare xua bárapo matoma takakatsinéxatsi. ¹⁹Xang Pablo kata tínatsi xua barompaya takobetha yáwano xua takobe kou itaneto, xuaje: Bexa tsane pentoma kakatsinchi. Bekein jopa kawüükaetsi pentoma, pomatoma xua tanematoma amanayabiwam xua báyatha takayawenáexaetsi xua nejume-kowüntsiwa Jesús. ²⁰Bara barichinde, be pong taeweicho takanatsikotaeinchi nejumekowüntsixaerü Cristo. Inta éxande xua kaitoróbatsi Jesús, pong jiwi Peka-namataxeinaein, pía pejumekowüntsiwi pía pejüntükuikoyeneya. Nejüntükoyene tsakárabare xua jüntema xaniwaicha tapoponaewa tsane.

²¹Daxota kata tínatsi tsipéi yaputang xua jumejejam pokotsiwa kaitoróbatsi xuano xua ekeicha nawita exanáename beyakaincha xua takakui-itoróbíwatsi. ²²Bapoxonae inta botutu netsiwüünaere. Tsipéi bexa tsane paka taeyopiyaeinchi xua báyatha Nakom paiña newüükaexae xua tapaka taeyopiyáewatsi tsainchi.

Meje yábara xua ichamonae Filemón jakóbatsi

²³Epafras kajákoba pong irü xota eke jiwi pekübibotha penatsipéi kueikueijeixae Cristo Jesús yábara. ²⁴Matáütano irü Marcos, írúno Aristarco, írúno Demas, írúno Lucas, daxita barapomonae matabüxüyo neyawena xua takueikueijeiwa Jesucristo yábara.

²⁵Bárabü Jesucristo pong jiwi Pekanamataxeinaein, paka yawenaena daxita paxam pía paka nekaantobexae.

Baja Pablo.

Meje Po Carte Nakom Pía Jintong Tatsi Tatina, Hebreomonae Tatínatsi

Meje yábara xua Nakom Pexanto itoroba jíwitha petakueikueijeinéxatsi

1 ¹Kaena báyatha Nakom itoroba pía peitorobi jume diwesi petakueikueijeji jíwichi. Barapomonae Nakom takueikueijeichi xua poxonae tsipáebatsi waámo susato jiwi. Barapomonae matowa takueikueijéi tsaibi xua Nakom takueikueijéi tsaibichi matáütano aiña koyeneintha tsipaeba xua Nakom tatsipáebatsi. ²Íchitha nama ánoxuae matapaiña bárapo matakábinthe po matakabin opidubena Nakom itorobika Pexanto wanákata kueikueijeinexa, yawa wayábara yaputaenexa Nakom. Barapong Nakom Pexántoxae tatsi kaena báyatha bárapo nakue fórota. Matáütano Nakom Pexanto kaena barapoxonae kana éxana xua Pexanto tatsi pekanamataxeinaenexa daxita koyeneintha. ³Nakom Pexanto tatsi pexeíña peitüpanáe jüntükoyenein xeina po jüntükoyenein Nakom xeina. Bapong Nakom Pexanto kuikoyenejónatsi. Matáütano bapong Nakom Pexanto tatsi pía pejume ayapúsüü itoróbíwatha babatiya éxana daxita karepaya nákuang. Nakom Pexanto tatsi nakuiyábara jumeweta xua Nakom Pexanto peyábara paebixae Pejume Diwésitha. Baxua éxana poxonae naka tsitüpa xua wanaka jüntükoyene wüünae exanaenexa. Bapong naka kapanepa abe waexanáe kuirukoyenein weya. Bapoxonae bapong itaboko beicha pona penakuaretsinexa pexeíña peekaethopeibíwatha Nakom piakoxa weya tatsi xua itaboko beicha xua Nakom pía peekaethopeibíwatha tatsi beicha.

Meje yábara xua Nakom Pexanto tatsi peaiñakuín beyakaincha matatsunpiwi

⁴Nakom Pexanto aiñakuí kana éxana beyakaincha matatsunpiwi. Nakom baxua tsita itapeiñaxeina xua poxonae wüngduta Pexanto xua po wüng jei: “Nakom Pexanto”, jei, po wüng bichokono aiñakuí beyakaincha matatsunpiwi pewüng.

⁵Tsipéi Nakom bápana jopa jeyo matatsunpintha:

“Xam Taxantom, ánoxuae jiwi tsita itapeiñaxeinang xua xang jiña axang”,
jopa bápana jei Nakom matatsunpintha.

Matáütano bápana jopa jei matatsunpin yábara:

“Xang bapong pía paxa tatsin tsane,
bapong bara taxanto tsane”,

jopa bápana jei Nakom xua matatsunpin peyábara paebíwatsi.

Saya ba meisha Nakom Pexántotha yábara paeba bárapo jume.

⁶Matáütano poxonae Pexanto itorobika po kae pin nakuamonaepíwitha tsike, pong yatsikaya kompa tatsi, Pexanto yábara jei:

“Bárabü daxita tamatatsunpiwimonae Taxanto wüünae jaintinchi”,
 jei Nakom.

⁷Nakom yábara jei matatsunpiwi:

“Tamatatsunpiwi itorobang xua naiña inta nakuita icha joibo ichi xua
 naiña pona poxonae itorobang bárapo joibo.
 Barichi barapomonae itorobang xua inta dangweya nakuita icha nawa
 koicha ichi xua dangweya taxua poxonae itorobang bárapo nawa”,
 jei Nakom.

⁸Íchitha nama Nakom Pexántotha jei:

“Jaina, xam pongxaem Nakom,
 ataya tsitekaeya itorobiya ewatsíname xua itorobathopekéibame jiwi.
 Jiña neitorobiya éwatsi koyenewa bara ataya pexaiñéi koyenewa.

⁹Xam ichichípame pokotsiwa éxana pomonae wüünaeya peexanaewi.
 Matáütano bichokono aitafaetabim pokotsiwa éxana pomonae abe
 peexaneibiwi.

Daxota xang Nakom pongxaein,
 jiña Nakom bichokono kajüntükoyene weiweina éxanatsi,
 beyakaincha xua jiña jiwimonae jüntükoyene weiweina éxanang”,
 jei Nakom Pexántotha.

¹⁰Ekeicha Nakom Pexántotha jei:

“Xam pong pepa Nekanamataxeinaem jiwi,
 kaena báyatha fórotame bárapo kae pin nakua poxonae aena.
 Jiñakoya éxaname peitaboko.

¹¹Daxita baxuang pokotsiwang xua jiña neexanaewam werawerakaena.
 Tsipéi daxita baxuang saya peruwang tsane,
 icha be poxonae paparuwa ichi xua peruwa tsane xua tsapatsápaka.
 Íchitha xam nama ataya tsitekaeya poponáename.

¹²Bárapo kae pin nakua irü bárapo itaboko poroxu peruwa tsane pichíname
 xua nexubinexa,
 xua pena ira ekeicha neexanaenexa yawa xua itaboko.
 Barapókotsi jüta koyeneya exanáename icha be poxonae pebin ichi xua
 peruwa namaxuena xua xuba,
 xua penawa penamaxatatsinexa.
 Íchitha xam nama ataya tsitekaeya póponame.
 Matáütano jiña nepoponae koyenewa ataya jopa werawérakae tsane”,
 jei Nakom Pexántotha.

¹³Nakom bápana jopa jeyo matatsunpintha:

“Xam takoxa weya ékare,
 beya poxonae abü ka-exanaeinchi xua itorobíname jiña neka-aitafáetabi
 jiwi”,
 bápana jopa jeyo Nakom matatsunpintha.
 Saya meisha Pexántotha baxua paeba.

¹⁴Daxita matatsunpiwi peiña pejinompaewi jíwitha. Bárapo matatsunpiwi éxana
 dubenanáebiya pokotsiwa Nakom itoroba. Nakom itoroba barapomonae xua
 petayawenaenexa tsainchi pomonaetha, pomonae bexa Nakom kapanenebiyaena
 pomonae pejumekowüntsi jiwixaetsi.

Meje yábara xua poxonae naka muxuweta xua jopa bewa pepawi kana exanaetsi Nakom pía pekapanenebiyáe koyenewa tatsi

2¹Nakom Pexanto aiñakuí kana éxana beyakaincha matatsunpiwi. Daxota bewa matowa itapeta jumenaitawatchi pokotsiwa bapong yábara xua jumetaínchi. Bapoxonae jopa wayábara jüntemainaponae tsainchi pokoyene xua Nakom pía pekapanenebiyáe koyenewa tatsi. ²Po peitorobi koyenein kaena báyatha matatsunpiwi Nakom takueikueijeichi, bárapo koyenein bara xaiñéi. Pomonae jopa jumekowúntsiyo bárapo peitorobi koyenein xuano xua abe exanapónano, barapomonae átene exanaeinchi xua kana kuimatajüpiya kana éxanatsi. ³Cristo naka kana éxana xua pane-nebíyatsi abe waexanáe kuirukoyenein weya. Cristo pía pekapanenebiyáe koyenewa bichokono aiñakuí koyenewa. Icha Cristo pía pekapanenebiyáe koyenewa kayábara nantaxéinatsi xua pepawi xua jopa aiñakuiyiyo, waxainchi bápana jopa naka kapane-nebiyae tsane xua poxonae jiwi átene exanaeinchi abe peexanaexae. Barapong Cristo pong jiwi Pekanamataxeinaein bárapo pekapanenebiyáe koyenewa yábara tsipaeba kopiya. Bapoxonae xuya bárapo pekapanenebiyáe koyenewa naka tsipaeba pomonae jumetane pokotsiwa xua bapong paeba pong jiwi Pekanamataxeinaein. ⁴Nakom tsita itapeiñaxeina xua barapomonae bara xaniwaicha yábara paeba Nakom pía pekapanenebiyáe koyenewa. Baxua éxana poxonae Nakom kana éxana xua barapomonae pexeiña petsita-itüübi koyenewang múxuna éxana poxonae kueikuejei. Matáütano baxua éxana poxonae kana éxana xua barapomonae múxuna éxana pokotsiwa bichokono wüünae xua jiwi nabenaeka kana éxanatsi. Matáütano baxua éxana poxonae kana éxana xua barapomonae pexeiña peayapusüü itorobi koyenewang múxuna kueikuejei. Matáütano Nakom tsita itapeiñaxeina xua bara barapomonae xaniwaicha kueikuejei poxonae Nakom pía Pejumopetünaxü tatsi itoroba barapomonae pía jüntü-koyeneintha tatsi xua pekatsibinexa pokiukoyeneya peexanaenexa daxita barompaya tsíniya. Baxua éxana bárapo Nakom pía Pejumopetünaxü tatsi icha be pókotsi koyenewa Nakom ichichipa xua barapomonae bárapo kuikoyeneya exanaena.

Meje yábara xua Jesucristo be jintong koyeneya náexana

⁵Nakom jopa kopatsí tsane xua matatsunpiwi kanamataxeinaena bárapo pena nákuatha po nakua yábara xuaunxuae pákata tínatsi. ⁶Jame nama Nakom Pejume Diwésitha ichüing yábara jeye xua pomonae bárapo pena nakua pekanamataxeinaewa tsane, jeye:

“Nakom xam jiwi toxeincha bichokono pin jüntükoyene xéiname.

¿Eta xua metha yábara nantaxéiname jiwi xua aiñakuí éxaname xua pekanamataxeinaenexa tsane ichamonae?

⁷Nakom kopiya saya káetotha éxaname xua jiwi be kónotha aiñakuí.

Baxua éxaname poxonae matatsunpiwi toxeinchiya aiñakuí éxaname beyakaincha jiwi.

Íchitha kotakaya éxaname xua jiwi aiñakuí náexana.

Jiwi kana éxaname xua pexeiña peitüpanáe koicha xaina yawa kátame barapomonae peayapusüü itorobi koyenewa xua icha jiwi pekanamataxeinaewa tsainchi.

⁸Po jiwi kajumekowúnta bárapo jíwitha kátame peayapusüü itorobi koyenewa daxita xua pekanamataxeinaenexa xuangtha xua fórotame”, jei xua ichüing tsipaeba Nakomtha.

Poxonae Nakom kana éxana jiwi xua kanamataxeinaena daxita xua xuang fórota, dapókotsi koyenewa aibi xua jiwi jopa itaküüpaetsi xua pekanamataxeinaewa. Dáichitha áwiya kataunxuae jopa jiwi kuitaetsi xua daxita pekanamataxeinaewa. ⁹Íchitha waxainchi Jesús yaputainchi pongtha pong Nakom saya káetotha kana éxana xua jopa aiñakuiyo. Matatsunpiwi kónotha aiñakuí beyakaincha xua Jesús xua poxonae káetotha kana éxanatsi xua jopa aiñakuiyo xua poxonae pópona be jintong. Nakom bichokono peantobexae daxita jiwi daxota bapong kópata xua Cristo tsitüpa daxita jiwi abe pía peexanaexae. Ánoxuae ekeicha Nakom aiñakuí kana éxana xua Jesús aiñakuí kana éxanatsi. Matáütano Nakom kana éxana xua Jesús jopa juniya aiñakuiyiyo xua jiwi itorobiya peewatsíwatsi. Matáütano Nakom Jesús kátatsi pexeiña peitüpanáe koicha. Nakom baxua éxana xua Jesús pía petsitüpaexae jiwi.

¹⁰Nakom fórota daxita koyenein. Matáütano daxita baxuang Nakom nata éxana. Matáütano Nakom ichichipa xua daxita piamonae tatsi pexeinaewa tsane pía pexeiña peitüpanáe koicha tatsi peponaenexa tsane pía nakuatheicha tatsi. Daxota Nakom tsita wüünaetsi xua poxonae Jesucristo átene éxanatsi beta yatsikaewa pejüntükoyene wüünaetsinéxatsi xua jiwi pekanamataxeinaenéxatsi Nakom pía nakuatheicha. Baxua Nakom éxana poxonae Jesucristo átene éxanatsi poxonae tsitüpa xua jiwi pekapanenebiyaenéxatsi abe pía peéxanae kuirukoyenein weya tatsi. ¹¹Tsipéi daxita pomonae jüntükoyene wüünae éxanatsi Nakomtha, írürü Jesús pong kana éxana baxua barapomonaetha, daxita barapomonaenantaüta kaein Paxa pong Nakom. Daxota Nakom Pexanto tatsi jopa auriyo poxonae naka yábara jei: “Táyapin jiwi pam”, poxonae jei. ¹²Nakom Pexanto tatsi pong Jesucristo, kaena báyatha Nakom Pejume Diwésitha xua salmos penaxünae weixi diwésintha jeye Nakomtha:

“Kayábara paebinchi tayapinmonae jíwitha.

Kata naxünaeinchi pewéi xua wüünae takajainchinexa poxonae nanabarü nanakaetutsin jiña botha pomonae kajumekowünta”,
jei Jesucristo Nakomtha.

¹³Ichakuitha kaena báyatha Jesucristo jeye xua Isaías pía diborotha:

“Xang jumekowüntsiya wüünae ewatsin Nakom xua tana neyawenaewa”,
jei.

Ekeicha Jesucristo jeye:

“Xote ékang, barü ékang tapexui pomonae tana nejumekowüntsiwi pomonae Nakom nekata”,
jei Jesucristo.

¹⁴Pexui ba bara xeina pejana yawa pewito icha be koxiyeiwi ichi tsipéi jíwi-xae. Barichi Jesús xeina jintong pía pepong tatsi pexeinaexae jiwi pía pewito tatsi xuano xua jiwi pía pejana tatsi. Jesús baxua xeina xua petsitüpaenexa jiwi. Daxota itaküüpatsi xua peamanayabiwa pongtha pong xua peayapusüü itorobi koyenewa xeina xua jiwi pejutebíwatsi. Bapong ápara pong kaurimonae pía pentakaponaein tatsi. ¹⁵Jesús baxua nákata éxana wanaka kapanenebiyaenexa wajunuwi koyene weya xua poxonae yábara junúwatsi xua wawerapaewa tsane. Jiwi daxita matakabin junuwiya jinompeiba xua pewerapaewayainwa. ¹⁶Bara xaniyéi Jesús jopa tsipatopeikaeyo xua peyawenaenexa tsane matatsunpiwi. Ápara jame Jesús tsipatopeika peyawenaenexa tsane Abraham pía pemómoxi susato jiwi tatsi

xua yatsikaewa jiwi. ¹⁷Daxota Jesús poxonae nakatsiwa bewa yawa nanakatsi-wina daxita koyeneya icha jiwi pía pepong tatsi ichi. Bapong bewa baxua yawa nakatsiwina pía penaexanaenexa pepa wasacerdotepin pókotsin nákata paebeiba Nakom beicha. Matáütano bapong Jesús pong pepa wasacerdotepin xaiñeya taé-xana pokoyene xua ba sacerdotemonae pía petaexanáe koyenewa xua Nakom tsita éxanatsi. Bapong Jesús naka weyatane xua wanaka yawenaenexa, xua jiwi petsitü-paenéxatsi xua Nakom jiwi pejüntükoyene yábara jüntemainaenexa tsaibi tsainchi abe pía peéxanae kuirukoyenein tatsi. ¹⁸Jesús átene éxanatsi poxonae kaurimonae pía pentakaponaein tatsi jüntükoyene jüjútatsi petaenexa tsainchi icha abe éxana. Daxota ánoxuae bapong Jesús itaküüpatsi xua peyawenaewa pomonaetha, pomonae írürü jüntükoyene jüjútatsi kaurimonae xua abe peexanaewa tsane.

Meje yábara xua Jesús peaiñakuín beyakaincha Moisés

3¹Nakom irü paka wüingduba poxonae itapeta pomonae pepatsinexa tsane pía nakuatheicha tatsi. Tamonae pam, paxam jíwana pam pomonae pejumekowüntsiwi Jesucristo, pomonae pam Nakom paka jüntükoyene wüünae éxana xua piamonae tatsi paiña paka kana exanaenexa. Daxota Cristo Jesús pakayábara nantaxéinare. Bapong Jesús Nakom pía peitorobin tatsi pong naka tsipaeba Nakom nexa. Matáütano bapong wapepa sacerdotepin pong wanákata paebeibin Nakom beicha. Bapong payábara kueikueijang ichamonaetha wajumekowüntsixa bapong. ²Jesús bara xaiñeya éxana Nakom pía petanakuichiwa tatsi Nakom peyábara tsiwüünae muxudutsixa bapong bárapo penakuichiwana xua Nakom pía peitorobin tatsi tsane yawa wapepa sacerdotepin tsane. Jesús beta xaiñeya taéxana, icha matha Moisés ichi xua poxonae daxita koyene beta xaiñeya taéxana Nakom piamonaetha xua Nakom nexa. ³Jesús pekapanepaexae jiwi bewa bichokono toxeincha barükui-iturajinaetsi bapong beyakaincha xua barükui-iturajínatsi Moisés. Barapókotsi jüta koyeneya ichi, bewa Jesús kana exanaetsi icha be poxonae jintong ichi xua bewa barükui-iturajinaeinchi xua aiñakuí éxanatsi peakabixae bo beyakaincha xua bo xua aiñakuí tsungkuae. ⁴Daxita ba bong tsóponae poxoru ápara jintong peexanaexae. Íchitha jame pong yatsikaewa nama daxita koyenewang éxana ápara bapong Nakom. ⁵Báyatha Moisés ápara pong petanakuichinchi Nakom. Bapong xaiñeya daxita éxana Nakom piabotha pokotsiwa Nakom itoroba. Bapong Moisés pía penakuichiwa tatsi saya xua yábara tsiwüünae kaunuta pokotsiwang xua bexa Nakom exanaena. ⁶Íchitha nama Cristo Nakom Pexántoxae tatsi xaiñeya daxita éxana Nakom nexa tsipéi kana éxana xua bapong kanamataxeína daxita pomonae Nakom piamonae tatsi. Waxainchi Nakom piamonaetsi icha ajüntüyapusüüya jumekowüntapoinchi Cristo beya xua poxonae tüpaeinchi. Matáütano waxainchi Nakom piamonaetsi icha jüntükoyene weiweinaya wüünae éwatatsi pokotsiwa bexa Nakom wanaka tsixanaewa tsane.

Meje yábara xua nafinakaéwata Nakom piamonae tatsi

⁷Cristo aiñakuí peexanaexaetsi beyakaincha xua Moisés aiñakuí éxanatsi daxota Nakom pía Pejumopetünaxü tatsi naka itoroba xua bewa jumetaetsi Cristo. Baxua paeba Nakom pía Pejumopetünaxü tatsi. Nakom Pejume Diwésitha, jeye:
 “Ánoxuae pana nejumetaema pokotsiwa paka tsipáebatsi pongxaein Nakomxaein.

⁸Paiñaxoba pana nejumefébame paiña jüntükoyenéwatha xua daxota jopa paiña tana nejumekowüntsiwam.

Jopa bara paichinde icha pomonae ichi xua poxonae báyatha nejumematawenta xua éxanang poxonae jinompa ichaxota ira xuépana susato tsúrukuae nákuatha.

Barapomonaefayakoteiba poxonae nejüntükoyene jüjüteiba beya poxonae anáepanang barapomonaetha poxonae jopa xapain exaneibiyo.

⁹Barapomonaefayakoteiba poxonae nejüntükoyene jüjüta, ápara paiña amo susato jiwi.

Barapomonaefayakoteiba poxonae nejüntükoyene jüjüta, ápara paiña amo susato jiwi.

Baxua exaneiba beya poxonae cuarenta po weibe tsuxubi bekein taiba pokotsiwa xua taexaneibang barapomonaefayakoteiba poxonae nejüntükoyene jüjüta, ápara paiña amo susato jiwi.

¹⁰Daxota barapomonaefayakoteiba poxonae nejüntükoyene jüjüta, ápara paiña amo susato jiwi.

¹¹Barapomonaefayakoteiba poxonae nejüntükoyene jüjüta, ápara paiña amo susato jiwi.

Takoutha jumedangweya najang:

‘Barapomonaefayakoteiba poxonae nejüntükoyene jüjüta, ápara paiña amo susato jiwi.’

jei Nakom pía Pejumopetünaxü tatsi,

Nakom Pejume Diwésitha.

¹²Tamonae pam, pomonaefayakoteiba poxonae nejüntükoyene jüjüta, ápara paiña amo susato jiwi.

¹³Daxota ekeicha paka tsipáebatsi xuaunxuae po diwesi paka tsipáebatsi xua Nakom Pía Pejumopetünaxü tatsi kueikueije, jeye:

“Ánoxuae pana nejumetaema pokotsiwa paka tsipáebatsi, pongxaein Nakomxaein.

Icha pana nejumetaneme bapoxonae paiñaxoba pana nejumefébame paiña jüntükoyenéwatha xua daxota jopa pata tana nejumekowüntsiwam tsane.

Jopa bara paichinde icha pomonae ichi xua poxonae nejumematawenta poxonae jinompa ichaxota ira xuépana susato tsúrukuae nákuatha”,

jei Nakom pía Pejumopetünaxü tatsi.

¹⁶Payábara nantaxéinare pomonaefayakoteiba poxonae nejüntükoyene jüjüta, ápara paiña amo susato jiwi.

matakawárapa Egipto nakua weya. ¹⁷Payábara nantaxéinare Nakom xua kaseba xua beya cuarenta po weibetha tsuxubi. Bapomonae ápara israelmonae pomonae xua abe éxana poxonae jinompa ichaxota ira xuépana susato tsúrukuae nakua beya, xuano xua baxota wérapano. ¹⁸Payábara nantaxéinare pomonae Nakom dangweya yábara paeba, xua jei: “Barapomonae bápana jopa patsi tsane tanákuatha ichaxota po nakuatheicha nafifinakaewatsina pomonae tana nejumekowüntsisiwi”, jei. Bapomonae ápara israelmonae pomonae xua jopa exanaeyo pokotsiwa Nakom itoroba. ¹⁹Bara yaputainchi xua barapomonae jopa itaküüpaetsi xua pepatsiwa Nakom pía nakuatheicha tsipéi jopa Nakom jumekowüntsichi.

4 ¹Waxainchi yábara jumekowünta dubenanaebíyatsi xua Nakom naka tsiwüünae muxuduta. Nakom naka tsiwüünae muxuduta xua bara wanaka itaküüpaewa tsane xua wapatsiwa pía nakuatheicha po nakua xua Nakom pía penafifinakaewatsi nakua. Daxota poxonae kataunxuae naka itaküüpa xua wapatsiwa tsane bárapo nákuatha bewa yábara najüntükoyene exabichi xua paxam jíwana jopa itaküüpaetsípaetsi xua pepatopaewa Nakom pía nákuatha. ²Waxainchi barichichi jumetainchi bárapo Nakom pía pekapanenebiyáe diwesi, icha báyatha barapomonae ichi xua jumetane bárapo diwesi. Íchitha bárapo diwesi jopa yawenaetsi barapomonae xua pejumekowüntsínexa Nakom, tsipéi jopa jumekowüntsiyo bárapo diwesi. ³Waxainchi nama barapomonaetsi xua wajumekowüntsiwi bárapo pekapanenebiyáe diwesi. Daxota naka itaküüpa xua wapatsiwa Nakom pía nakuatheicha ichaxota bapong naka barü nafifinakaewatsina baxoteicha. Nakom waámo susato jiwi yábara páebatsi xuaunxuae paka tsipáebatsi. Jeye:

“Barapomonae kasebang.

Takoutha jumedangweya najang:

‘Barapomonae bápana jopa patsi tsane tanákuatha ichaxota po nakuatheicha nafifinakaewatsina pomonae tana nejumekowüntsisiwi’, najang”,

jei Nakom Pía Pejumopetünaxü tatsi.

Bekein baxua Nakom paeba íchitha kaena báyatha weta bárapo nakua ichaxota jiwi nafifinakaewatsina poxonae nakobeweta xua daxita fórota bárapo kae pin nákuathe. ⁴Po matakabi pewüng “siete matakabi”, jei, bárapo matakabi Nakom Pejume Diwésitha yábara paeba. Bapong jeye:

“Nakom nakuita seis po matakábibe.

Bapoxonae nafifinakaeka po mataketha pewüng ‘siete matakabi’, jei”, jei Nakom Pejume Diwésitha.

⁵Ekeicha Nakom Pejume Diwésitha jeye:

“Barapomonae bápana jopa patsi tsane tanákuatha ichaxota po nakuatheicha nafifinakaewatsina pomonae tana nejumekowüntsisiwi”, jei Nakom.

⁶Íchitha kataunxuae akoibi ichamonae pomonae xua bexa tsane Nakom kopatsina xua nafifinakaewatsina ichaxota bapong nafifinakaewata. Barapomonae jumekowüntsina xua Nakom paeba. Pomonae kopiya bekein jumetaetha Nakom pía pekapanenebiyáe jume barapomonae Nakom kaena báyatha jopa kopatsiyo xua barapomonae nafifinakaewata tsipéi jopa jumekowüntsiyo pokotsiwa Nakom paeba. ⁷Daxota Nakom nantaxeina xua ekeicha pena matakabi éxana. Bárapo matakabi xua wüngduta “ánoxuae” jei xua pena koyene. Bárapo matakábitha

xua piamonae tatsi petaitakiüüpáewatsi tsainchi xua nafifinakaewatsina. Baxua Nakom éxana kaena báyatha poxonae David pópona xua aiña wei pírapae poxonae jinompa pomonae jopa kopatsichi xua nafifinakáewata. Ánoxuae Nakom bapokotsiwa naka tsipaeba pokotsiwa báyatha tsipaeba piamonae jíwitha, poxonae David pópona, pong jeye:

“Icha ánoxuae pajumenaitáewatame pokotsiwa Nakom paka tsipaeba jopa pajumefebinde paiña jüntükoyenéwatha xua daxota jopa Nakom paiña nejumekowüntsiwam”,

jei David kaena báyatha Nakom nexa.

⁸Josué kaena báyatha waámo susato jiwi matakapoinchi Canaán nakua bérena pomonae Israel piamonaexae tatsi. Ápara jopa matakaponae yo ichaxota po nakua Nakom yábara paeba xua barapomonae nafifinakaewatsina. Icha Josué báyatha matakaponáetsipa barapomonae bárapo nákuatha bapoxonae Nakom jopa nantawénonae tsipae xua exanaena icha matakabi po matakábitha poxonae barapomonae itakúüpatsi xua pepatsiwa tsane bárapo nákuatha, po nakua ichaxota Nakom yábara paeba. ⁹Daxota kataunxuae áwiya bárapo matakabi tsóponae po matakábitha poxonae Nakom piamonae tatsi nafifinakaewatsina Nakom pía nakuatheicha. ¹⁰Tsipéi pong weta pía penakuichiwa pokotsiwa Nakom itoroba bara itakúüpatsi xua nafifinakáewata ichaxota Nakom nafifinakáewata. Bapong baxua exanaena icha Nakom ichi poxonae nafifinakaeka, poxonae nakobeweta pía penakuichiwa xua poxonae fórota daxitang. ¹¹Daxota bewa ajüntüsüüya jumekowünta dubenanaebiyaeinchi xua wanafifinakaewatsinexa tsane ichaxota Nakom nafifinakáewata. Baxua exanaeinchi xua ichamonae waxainchi jíwanatsi jopa peyaseikaewa tsane xua nafifinakáewata. Waxainchi jopa ichipaetsi xua icha ichamonae ichi xua jopa nafifinakaewatsiyo jopa pejumekowüntsixae pokotsiwa Nakom paeba.

¹²Nakom Pejume Diwesi peajüntüyapusüü diwesi xuano peayapusüü itorobi koyene xeina. Bárapo Nakom Pejume Diwesi barapókotsi jüta koyeneya ichi xua icha ba kusi ichi xua po wato nantiya barü dúkuabe. Bárapo kusi tajü unguuiya pebarüwa xua pepongtha. Barapoxonae bárapo kusi itapeiñaxeina daxita pokotsiwang xeina wang iya xua matha iyadubeiña büpaniya. Íchitha Nakom Pejume Diwesi ayapusüü beyakaincha kusi tsipéi bárapo Nakom Pejume Diwesi itakúüpatsi tajü béreka pona wajüntükoyenéwatha ichaxota nantaxéinatsi. Bárapo diwesi naka yaputane éxana pokoyenein xua wajüntükoyenéwatha xéinatsi. Naka yaputane éxanano pokoyenein yábara nantaxéinatsi wajüntükoyeneintha. ¹³Dapokotsiwang aibi bárapo kae pin nákuathe xua Nakom fórota pokotsiwang xua xuang nantiyatarubena Nakom peitabaratha pokotsiwang xua bapong jopa taeyo. Daxitang naitüutarubena xuano xua Nakom itakúüpatsi xua beta petaewa daxita koyenein. Nakomtha bexa yábara tsipaebinchi xua pokotsiwang báyatha exainchi.

Meje yábara xua Jesús pepa sacerdotepin

¹⁴Jesús ápara Nakom Pexanto tatsi. Bapong wasacerdotepin, pong pepa sacerdotepin, pong bichokono yatsikaya peaiñakuín. Bapong báyatha patopa Nakom peitabaratheicha tatsi. Daxota bewa ajüntüyapusüüya jumekowünta dubenanaebiyaetsi bapong, pong yábara kueikueijeichi ichamonaetha. ¹⁵Bárapo wasacerdotepin pong pepa sacerdotepin, naka weyatane xua wanaka yawenaenexa poxonae jüntükoyene faefaenounéibatsi abe waexanaexae. Bapong baxua nákata éxana,

tsipéi bapong barichichi jüntükoyene jüjütatsi xua abe peexanaenexa. Kaurimona nae pía pentakaponaein tatsi jüntükoyene jüjüta icha naka ichi. Dáichitha nama bapong Jesús bápana jopa abe exanáe. ¹⁶Daxota bewa ajüntüyapusüüya wüükaetsi Nakom pong bichokono naka ántobe. Jopa bewa junuwí tsainchi xua wakueikueije iwa Nakomtha. Bapoxonae Nakom naka weyataena wanaka yábara jüntemai naenexa xua abe waexanáe kuirukoyenein. Matáütano bapong wanaka antobexae naka yawenaena poxonae po matakábitha kanantawenonéibatsi, poxonae naka jüntükoyene jüjüta.

5 ¹Jiwi ba barompaya pía xantha tatsi jíwana taitapétatsi pomonae xua daxita kana éxanatsi pepa sacerdotepiwi. Bárapo sacerdotepiwi itoróbatsi xua bárapo sacerdotepiwi kaunuta jiwi yábara poxonae kueikueije Nakom peitabaratha xua jiwi nexa. Matáütano bárapo sacerdotepiwi yábara tsiwüing dúbatsi pokoyene jiwi petaexaneibiwa tsainchi Nakomtha pokotsiwang xua jiwi amanaya peka-tsiwa Nakomtha abe peexanaexae. Matáütano bárapo sacerdotepiwi yábara tsiwüing dúbatsi pokoyene xua jiwi petaexaneibiwa tsaibi tsainchi xua poxonae duwéi pejutebiwa pókotsi duwein xua jiwi amanaya pekatsiwa Nakomtha abe peexanaexae. ²Bárapo sacerdotepiwi ichakuitha jüntükoyene faefaenouneiba, poxonae jüntükoyene jüjütéibatsi kaurimona nae pía pentakaponaein tatsi xua abe peexanaenexa. Tsipéi barapomona nae nakuiyaputane xua poxonae jüntükoyene jüjütéibatsi, daxota bara itakúüpatsi xua peyawenaewa ichamonaetha. Itakúüpatsi xua peyawenaewa pomonaetha, pomona nae abe peexanaewi xua bekein jopa yaputaeyo xua abe éxana, írürü pomona nae yatsikaewa nakuiyaputane xua abe éxana. ³Bárapo sacerdotepiwi írürü abe exaneiba xua pejüntükoyene faefaenaexae poxonae jüntükoyene jüjütéibatsi kaurimona nae pía pentakaponaein tatsi. Daxota bewa írürü piakoutha nata exanáe pokoyene xua duwéi penatatautsinexa Nakom nexa icha poxonae jiwi takana-ichichi poxonae abe peexanaexae. ⁴Dapong aibi xua piakoutha náexana pong pepa sacerdotépin. Jame ba Nakom bapókotsin yábara tsiwüing duta xua penaexanaenexa pepa sacerdotépin. Matáütano bapongtha Nakom kata bárapo peaiñakuí yábara matawüing dutsiwa icha báyatha Nakom kana ichi pong pewüing Aarón pong kopiya pepa sacerdotépin náexana. ⁵Cristo bara kana ichichi. Bapong Cristo piakoutha jopa naexanaeyo pong pepa sacerdotépin xua peaiñakuín penaexanaenexa. Ápara jame Nakom kata bárapo peaiñakuí yábara matawüing dutsiwa xua pepa sacerdotépin penaexanaenexa. Báyatha Nakom yábara paeba Pexanto Pejume Diwésitha, bárapo peaiñakuí yábara matawüing dutsiwa xua penaexanaenexa pepa sacerdotépin, xua jeye:

“Xam ápara taxantom.

Ánoxuae xang jiña axaxáein.

Yábara katsiwüing dútatsi bárapo jiña nenakuichiwana”,
jei Nakom.

⁶Ekeicha Nakom Pejume Diwésitha xua Pexanto yábara paeba, jeye:

“Xam pong sacerdotépin,

xua bara ataya tsitekaeya tsane,

icha Melquisedec matha ichi pong kaena báyatha pópona.

Bapong pepa sacerdotépin náexana xua ataya tsitekaeya pepoponaein”,
jei Nakom.

⁷Poxonae kataunxuae Cristo pópona po kae pin nákuathe bichokono jumedangweya tsipaebeiba Nakomtha xuano jumedangweya wüükéibano beya poxonae bichokono wekoyéi. Cristo wüükeiba Nakomtha, pong bekein itaküüpatsi xua Cristo peyawenáewatsi xua jopa petüpaewa. Mexeya poxoru bapong itapetsiya peexanaexae pokotsiwa Nakom ichichipa daxota bara Nakom jumetane pokotsiwa Cristo wüüka. ⁸Bekein Cristo Nakom Pexanto tatsi, íchitha nakuiduba xua Paxa jumejéi xua éxana pokotsiwa Paxa itoróbatsi xua poxonae átene éxanatsi xua ichamonae éxana. ⁹Bapong piakoutha daxita najúntükui yábara wüünaeta poxonae átene xua penaexanaenexa pepa sacerdotépin. Daxota bapong Cristo éxana xua jiwi kapanenebíyatsi abe pía peéxanae kuirukoyenein weya xua ataya tsitekaeya tsane daxita pomonae pía pejumekowüntsiwichixaetsi. ¹⁰Nakom yábara tsiwüing duta xua Cristo pepa sacerdotépin náexana, icha matha Melquisedec ichichi xua yábara tsiwüing dútatsi xua pepa sacerdotépin náexana, pong kaena býatha pópona.

**Meje yábara xua poxonae muxuwétatsi pomonae
Nakom pejumekowüntsiwi xua pebarapentsiyainwa
pokoyene xua pejumekowüntsiwa Nakom**

¹¹Waxainchi xéinatsi nawita xua pokoyene wayábara natsipaebinexa Cristo xuaunxuae ánoxuae paka tsipáebatsi. Dáichitha bichokono ayapubé xua paka yaputane exainchi tsipéi paiñakoutha jopa pana nayábara kopatsim xua bara paiña neyábara yaputaewa tsane baxuang. ¹²Kaena býatha bewa pana naexanaem pomonae jiwi paiña nekuidubi jiwi pam. Dáichitha kataunxuae panantawénoname xua ichamonae ekeicha kaewa yábara paka kuiduba Nakom Pejume Diwesi pokotsiwang xua jiwi nantawénona kopiya nakuiduba poxonae aena jumekowünta. Paxam pomonae ekeicha kaewa pajüntükoyene faefáename, xua paiña nejumekowüntsiwa. Bárapo koyene icha be poxonae pexui ichi xua nantawénona mito, jopa peitaküüpaexaetsi xua pexaewa pewito. ¹³Pexui poxi isháinatsi ba nantawénona mito poxoru pewito jopa xaeyo. Barapókotsi jüta koyeneya paichim. Paxam jopa paka itaküüpaeyo xua paiña neyábara yaputaewa Cristo pía pekuidubiwa xua pokoyene wüünae paiña nejinompaewa. ¹⁴Nama pewi jopa ápara pexui néxiyo poxi isháinatsi, jame ápara ba pomonae piñong nexa. Barapókotsi jüta koyeneya ichi pomonae ba xaniwaicha jumekowünta pía jüntükoyeneintha barapomonae jopa abe exanaeyo. Barapomonae nakuiduba xua yábara yaputane pokoyene abe yáwano pokoyene wüünae.

6 ¹Bárabü nakuibarapéntatsi xua nayábara kueikueijeichi pókotsi koyenein xua kopiya naka kuiduba xua Cristo yábara poxonae aena jumekowüntatsi. Jame bárabü nantaxéinatsi, pokoyene pepa pena koyene icha pomonae piñong ichi xua pokotsiwang nantaxeina pomonae beta jumekowünta. Pokoyenein xua býatha kopiya naka kuiduba xua Cristo yábara, jopa nantawenonaetsi xua ekeicha wanakuidubíwatsi pokoyenein xua abe waexanaexae bewa aura tsainchi xua daxota nakuibarapéntatsi pokoyenein abe, pokoyenein xua ba naka wepu tsana éxana Nakom weya. Matáütano jopa nantawenonaetsi xua jumekowüntsinchi Nakom. ²Barapokotsíwangje jopa nantawenonaetsi xua ekeicha kaewa nayábara kueikueijeichi tsainchi tsipéi býatha payaputáneme. Matáütano jopa ekeicha nantawenonaetsi xua kaewa nayábara kueikueijeichi tsainchi xua bewa bautisabinchi.

Matáütano jopa nantawenonaetsi xua ekeicha kaewa nayábara kueikueijei tsainchi xua poxonae Nakom pejumekowüntsiwi pekóbetha pemataboko jayabíwatsi xua pexeinaenexa pejüntükoyeyenein po pejüntükoyene Nakom pía Pejumopetünaxü tatsi kata. Matáütano jopa nantawenonaetsi xua ekeicha kaewa nayábara kueikueijei tsainchi xua ekeicha jiwi asiü peexanáewatsi petüpáe kuirukoyene weya. Bari-chi jopa nantawenonaetsi xua ekeicha kaewa nayábara kueikueijei tsainchi xua poxonae Nakom yábara paebina jiwi xua penatsikuentsiwa xua abe peexanaexae Nakomtha. Barapoxonae Nakom itawetsina xua bara ataya tsitekaeya tsane abe peexanaexae. ³Jame bábabü nayábara kueikueijei tsóponae tsainchi icha koyeyenein xua pena koyene icha Nakom bara naka kuiyábara kopatsina.

⁴Ichamonaе penta xua Cristo pejumekowüntsíwatsi. Daxota jopa neyapuküü-paeyo xua ekeicha takuidubiwa Nakom Pejume Diwesi barapomonaetha. Barapomonaе Nakom pía pejumexaiñeiwa nakuiduba, xuano yaputane Cristo pong Nakom itoroba po kae pin nákuathe tsike. Matáütano barapomonaе xeina po pejüntükoyeyenein Nakom pía Pejumopetünaxü tatsi kata. ⁵Matáütano barapomonaе yábara jumekuijüjüta Nakom Pejume Diwesi xua daxota yaputane xua bápapo diwesi bara wüünae. Matáütano barapomonaе tane po peayapusüü itorobi koyenewa Nakom pía Pejumopetünaxü tatsi kata jíwitha xua bápapo jiwi bápapo koyenewatha éxana pexeina petsita-itüübi koyenewang beya poxonae Cristo ekeicha patopaena. ⁶Icha daxita bápapo koyeyenein barapomonaе ekeicha nakuibarapenta xua jopa Nakom pejumekowüntsixaetsi, bapoxonae nama jopa itaküüpaetsi xua ekeicha kaewa pejumekowüntsiwa Nakom. Poxonae Nakom ekeicha péntatsi baxua be barapomonaе ekeicha Jesús kaewa bexotsi náetotha. Barapomonaе éxana xua jiwi Nakom Pexanto tatsi yábara jumekuikapónatsi tsipéi jopa Nakom jumekowüntsichi. Baxua icha be poxonae ichamonaе ichi poxonae matha Jesús náetotha bexotsi xua daxota daxita jiwi Jesús kuikapónatsi. ⁷Pabi bapo íratha emamüü jojoneka poxonae ema duneiba bápapo íratha, bápapo pábitha jiwi pexaewa üba. Nakom éxana bápapo íratha xua pexaewa xaniwaicha taxainwaetsina xua pomonaе peübimonaе taxainwáetatsi. ⁸Íchitha icha icha pabi saya ü pesoiwang xuwa, bápapo pabi jopa wüünaeyo poxoru jiwi jopa yawenaetsi poxonae üba bápapo pábitha. Daxota Nakom éxana xua bápapo pabi jiwi tautsina xua pesoiwang daxita tüpa peexanaenexa. Icha Nakom kana ichi pabintha bara jüta kana ichiya éxana jíwitha. Icha jiwi Nakom jumekowünta dubenanáebiya, bara Nakom beta exanaena bápapo jiwi. Íchitha icha bápapo jiwi Nakom péntatsi, Nakom jopa yawenáe tsane bápapo jiwi. Saya jame Nakom itoroba xua bápapo jiwi petautsiwa tsainchi po ishótotha xua bápapa jopa itakounayiyó.

**Meje yábara xua wawüünae ewatsiwa xua pokotsiwa
Nakom yábara wanaka tsiwüünae muxudutsiwa**

⁹Tamonaе pam, paxam pomonaе tapaka kaántobe jíwichi pam. Bekein baxuang yábara paka tsipáebatsi, xua jiwi petautsíwatsi íchitha paka yábara yaputainchi xua jopa papentsim Nakom. Yaputang xua bara beta paéxaname Nakom paiña nepaka kapanenebiyaexae. ¹⁰Tsipéi Nakom bara xaiñeya éxana. Nakom jopa paka yábara jüntemaináe tsane pokotsiwang xua báyatha paéxaname. Matáütano jopa paka yábara jüntemaináe tsane xua ichamonaе paiña neyawenaewa pomonaе irü pejumekowüntsiwi Nakom. Baxua patsita-itapeiñaxéiname xua paiña neantobexae

Nakom. Baxuang kaena báyatha paexanapóname, áwiya kataunxuae baxuang paexanapóname. ¹¹Bekein baxua paéxaname dáichitha paichichipang xua daxita paxam áwiya payawenaponáename ichamona. Ajüntüyapusüüya pawünae ewatapónare pokotsiwa Nakom yábara paka tsiwüünae muxuduta xua beya payakuiya werapaeya othopáename. ¹²Jopa paichichipaeño xua payábara ajüntükoyenefae-tabim xua pawünae éwatame baxua tsipéi jopa pana nayábara kopatsim xua paiña neyábara yaputaewa tsane baxua. Jame maisha bara jütiya paichiponaende, icha ichamona ichi xua poxonae bichokono jumekowünta Nakom. Matáütano barapomona jopa bepijawa aitakonaeyo xua wünae éwata pokotsiwa Nakom yábara tsiwüünae muxuduta.

¹³Poxona Nakom yábara tsiwüünae muxuduta Abrahamtha, Nakom pía wüingtha yábara tsiwüünae muxuduta Abrahamtha. Baxua Nakom pía wüingtha paeba tsipéi dapong aibi pong bichokono aiñakuí xua beyakaincha Nakom. Nakom ataya jume xaiñéi paeba daxota Nakom jopa icha wüingtha paebiyó. ¹⁴Nakom jeye Abrahamtha: “Bara xaniwaicha bichokono kayawenaeinchi. Jiña nemómoxi jiwi pía pemómoxi susato jiwi tatsi pinmonae exanaein”, jei Nakom. ¹⁵Abraham abü saya beitemaya wüünae ewatapona pokotsiwa Nakom yábara tsiwüünae muxuduta, jopa aitakonaeyo. Bapoxonae pírapae Abraham kátatsi pokotsiwa Nakom báyatha yábara tsiwüünae muxuduta bapongtha. ¹⁶Poxonae jiwi ba yábara natsiwüünae muxuduta xua pokotsiwa bepa pinae exaneibina, pewüingtha paeba, po wüing xua ichüing pewüing tatsi pong xua bichokono aiñakuí beyakaincha xua barapomona. Barapomona baxua éxana xua ichamona peyaputaenexa xua bara xaniwaicha xaiñeya peexaneibinexa pokotsiwa xua penayábara tsiwüünae muxudubéibixae. Bapoxonae ichamona jopa itaküüpaetsi xua baxua yábara jumematsontsónoba barapomonaetha. ¹⁷Nakom ichichipa xua tsita itapeiñaxeina piamonaetha, pomonaetha, pomonae pekatsixae tsane pía petsiwüünae muxudutsiwa xua jopa ekeicha ichawa nantaxeinae tsane xua pokotsiwa exanaena. Nakom ichichipa xua barapomona peyaputaewa tsane xua bapong xaniwaicha exanaena pokotsiwa báyatha yábara tsiwüünae muxuduta Abrahamtha. Daxota Nakom yábara tsiwüünae muxuduta pía wüingtha. ¹⁸Aiña koyenéwabe Nakom éxana pokoyenéwabe xua jopa itaküüpaetsi xua ichawa yábara jumetoxeinchiya éxana. Meje baxue: Icha koyenewa Nakom yábara tsiwüünae muxuduta; icha koyenéwano xua Nakom pía wüingtha yábara paeba xua pokotsiwa exanaena. Nakom jopa itaküüpaetsi xua peyábara naerabiwa bárapo naxobe koyénebe. Waxainchi pomonaetsi xua péntatsi pokoyenein bárapo nakue pía koyenein, pokoyenein xua abe éxanatsi naka kana éxana. Matáütano jumekowüntsiya wüünae éwatatsi xua Nakom wanaka yawenaewa tsane xua naka kapanenebiya abe waexanáe koyenewa weya. Barapokotsiwa báyatha naka yábara tsiwüünae muxuduta. ¹⁹Waxainchi wüünae éwatatsi xua Nakom bexa naka kapanenebiya tsane. Wajumekowüntsixae baxua daxota naka jüntükoyene ayapusüü éxana. Naka itaküüpa xua wayábara jumekowüntsiwa. Wawüünae ewatsixae baxua naka yawena xua beta jinómpatsi Nakom nexa. Báraxua icha be poxonae jera ichi xua tuwüütha babatabaruta pokotsiwa xua xota bichokono arewe xua jera beta perukuaenexa. Tsipéi xaniwaicha wüünae éwatatsi pokotsiwa Nakom exanapaeba, baxua naka kana éxana xua nakáewabatsi Nakomtha xua kaemona nanaexánatsi bapongtha. Nakom itaboko beekiya, paparuwa

pejumawérena piabotha eka xua tututhiya xua pin botha ichaxota wapatsiwa tsane. ²⁰Jesús itaboko beicha naka tsiwüünae patopiya Nakom pexaiña beicha tatsi. Bapong kopiya bewa bara bepatopiyaena xua wanaka matakaponae xua irü wanaka itaküüpaewa tsane xua wapatsiwa tsane bara beicha Nakomtha. Daxota poxonae baxua éxana Jesús náexana pepa sacerdotepin icha matha Melquisedec ichi pong kaena báyatha pópona.

**Meje yábara xua Jesús pepa sacerdotepin náexana,
icha matha Melquisedec ichi**

7¹Bapong Melquisedec kaena báyatha Salem tomarapiwi itorobiya pía pepa peewatsinchi. Matáütano bapong sacerdotepin pong petsipaebin Nakomtha jiwi nexa, pong Nakom xua itaboko beekiya. Abraham kaibe nawirena xua poxonae nawabchüta xua poxonae yótaba aiña nakuangpiwi pomonae jiwi itorobiya pía pepa peewatsíwichi xuano xua poxonae Abraham juteba barapomonae. Bapoxonae Melquisedec matenta iya, Abraham matenta íyatsi. Melquisedec Abraham jeichi-chi: “Bárabü Nakom beta kayawenaena”, jei Melquisedec. ²Abraham nota pokotsiwang xeina pomonae jiwi itorobiya pía pepa peewatsíwichi xua peamanayabixae poxonae juteba. Abraham aiñawang kápana, xua diez xuangbe. Jíwana wetsatsaba tsíniya xua Melquisedec pekatsinéxatsi sacerdotepinxae. Bapong Melquisedec hebreomonae pijumetha yábara wüngaunuta xua jei: “Bapong jiwi itorobiya pía pepa peewatsinchi pong xua beta peexanaein”, jei. Bapong Melquisedec Salem tomarapiwi itorobiya pía pepa peewatsinchi. Barichi bárapo Salem wüng hebreomonae pijumetha yábara wüngaunuta xua jei: “Jüntema pópona”, jei. Daxota bárapo naxobe wüngbe yábara wüngaunútatsi xua jeye: “Pong jiwi itorobiya pía pepa peewatsinchi xua beta peexanaein xuano xua jüntema pópona”, jei xua hebreo jumetha. ³Nakom Pejume Diwésitha Melquisedec paxa tatsi pewüng jopa yábara yopitichi. Matáütano pena tatsi jopa yábara yopitichi. Barichi jopa yábara yopitichi pía pamo susato jiwi tatsi. Matáütano bapong jopa yábara paebichi ichaxota nakatsiwa. Matáütano jopa yábara yopitichi ichaxota bapong naxuba. Bapong ápara sacerdotepin xua ataya tsitekaeya pong petsipaebin Nakomtha jiwi nexa. Bapong sacerdotepin xua ataya tsitekaeya icha ichi pong Nakom Pexanto tatsi pong pepa sacerdotepin.

⁴Payábara nantaxéinare xua bapong Melquisedec bichokono Abraham tsita aiñakuichi. Abraham pong waámo susatopin bapongtha kata xua báyatha diez xuangbetha kaewang jíwana wetsatsaba tsíniya. Baxua xua xuang Abraham kata ápara xua báyatha yábara amanáyaba pomonaetha, pomonae jiwi itorobiya pía pepa peewatsíwichi xua poxonae Abraham juteba. ⁵Moisés pía peitorobi koyenéwatha jeye: “Sacerdotepiwi pomonae Leví pía pemómoxi susato jiwi tatsi, itaküüpatsi xua bara nota kaewang pokotsiwa xua jiwi katsiba xua poxonae jiwi diez xuangbe kaewang jíwana wetsaba pokotsiwang xua xuang xeina”, jei Moisés pía peitorobi koyenéwatha. Bárapo sacerdotepiwi baxuang éxana bárapo jíwitha yáitama piamonae tatsi. Matáütano exaneiba yáitama bárapo jiwi Abraham pía pemomo susato jiwi tatsi icha bárapo sacerdotepiwi ichi. ⁶Íchitha Melquisedec jopa Leví pía pemómoxi susato jiwi tatsi. Bekein bapong jopa dapomonaeyo dáichitha Abraham katsiba bapongtha poxonae kaewang jíwana wetsaba tsitsíniya daxita xua diez xuangbetha jíwanang. Abraham xeina peyábara tsiwüünae

muxudutsiwang, po peyábara tsiwüünae muxudutsiwang báyatha Nakom yábara tsiwüünae muxuduta. Bekein Abraham xeina po petorobi koyenewa xua itaküü-patsi xua jeye ichamonaetha: “Bárabü Nakom beta kayawenaena”, xua jei, íchitha Melquisedec baxua Abraham tsipáebatsi. ⁷Jiwi ba yaputane xua ba bichokono aiñakuí pong xua jeye: “Bárabü Nakom beta kayawenaena”, pong jei. Bapong bichokono aiñakuí beyakaincha pong xua pebaraunchixaetsi. Daxota yaputainchi xua Melquisedec bichokono aiñakuí beyakaincha xua Abraham tsipéi Melquisedec tsipaeba Abraham xua Abraham tsipáebatsi. ⁸Ánoxuae po dapaethe sacerdotepiwi pomona, pomonaetha xua jiwi katsibeiba xua poxona diez jíwana wetsabeiba, bárapo sacerdotepiwi saya jiwi, xua saya pewerapaewa tsane. Íchitha nama Nakom Pejume Diwésitha Melquisedec yábara páebatsi pong xua ataya tsitekaeya pepoponaein xua jopa petüpaewa. ⁹⁻¹⁰Metha jame be icha icha: Poxonae Abraham kata Melquisedectha poxonae kaewang jíwana wetsaba diez xuangbe jíwana, bapoxonae kataunxuae abü Leví jopa naexanaeyo. Matáütano Leví pía pexui tatsi kataunxuae jopa naexanaeyo. Barichi kataunxuae pía pemómoxi susato jiwi tatsi kataunxuae jopa naexanaeyo. Bapong Leví pong matapaiña pepa sacerdotepin kanamata kanáexana poxonae kotakaya ichamona irü sacerdotemonae náexana. Bapoxonae sacerdotepiwi naexanuménapona. Bapong tsipaebaiha Nakomtha jiwi nexa. Poxonae Abraham katsiba Melquisedectha xua poxonae kaewang jíwana wetsaba diez xuangbe Nakom be tsítatsi xua ápara be Leví irü kata xua írürü be bara Leví pía pemómoxi susato jiwi tatsi katsiba. Poxonae Abraham kata Melquisedectha xua diez xuangbe kaewang jíwana wetsaba, bapoxonae yawa múxuna kata pía pemómoxi susato jiwi tatsi nexa bekein barapomona jopa kataunxuae naexanaeyo.

¹¹Sacerdotepiwi po sacerdotepiwi Leví kanamata kanáexana sacerdotepin, bárapo sacerdotepiwi israelmonae kátatsi Moisés pía peitorobi koyenewa tatsi. Daxita bárapo sacerdotepiwi Aarón pía pemómoxi susato jiwi tatsi. Bárapo sacerdotepiwi jopa itaküüpaetsi xua jiwi kana éxanatsi xua pena jüntükoyene wüünae exanaewa Nakomtha xua penatsikuentsiwa yábara xua abe peexanaexae Nakomtha. Bekein sacerdotepiwi exanapona pokotsiwa itoroba bárapo Moisés pía peitorobi koyenewatha íchitha áwiya jopa itaküüpaetsi xua jiwi yawénatsi. Daxota jiwi ekeicha kanamatawénona icha sacerdotepin. Bárapo sacerdotepin jopa bewa exanáe icha Aarón pía pemómoxi susato jiwi tatsi jíwana ichi. Jame bárapo sacerdotepin bewa exanaena icha Melquisedec ichi. ¹²Poxonae Nakom icha sacerdotepin kana éxana be pókotsin icha Melquisedec ichi bapoxonae yawa múxuna bewa exanaena pena peitorobi koyenewa. ¹³Bárapo pena sacerdotepin pong Wanaka namataxeinaein, bapong baxua yábara páebatsi Nakom Pejume Diwésitha. Bapong ápara Israel pemómoxi susato jiwi jíwanapin pomonae jíwana xua doce po bichéitobe. Íchitha bapong náexana icha bicheito dena xua Judas pía bicheito dena po bicheito dena báyatha bápana jopa jíwana naexanaeyo sacerdotepin. ¹⁴Daxita jiwi yaputane xua barapong pong Wanaka namataxeinaein náexana Judá barompaya pía pemómoxi susato jiwi dena tatsi. Poxonae Moisés yábara paeba sacerdotepiwi Moisés jopa yábara paebiyo xua Judá pía pemómoxi susato jiwi jíwana tatsi naexanaena sacerdotepin.

¹⁵Daxota waxainchi xaniwaicha bara yaputainchi xua bárapo pena sacerdotepin náexana icha sacerdotepiwi yaiwi, icha Melquisedec ichi pong pepa sacerdotepin.

¹⁶Bapong Cristo jopa naexanaeyo sacerdotépin xua poxoru Moisés pía peitorobi koyenéwatha pepaebixae xua Leví pía pemómoxi susato jiwi jíwana tatsi bewa naexanaena sacerdotépin. Jame ápara Cristo sacerdotépin náexana Nakom pía peayapusúü itorobi koyenéwatha xua pexeinaexae peajüntükoyenesüüwa po peajüntükoyenesüüwa ataya tsiteka xua jopa itaküüpaetsi xua pewerawerakaewa.

¹⁷Nakom Pejume Diwésitha Cristo baxua yábara jeichichi:

“Xam sacerdotepim naexáname ataya xua petsitekaenexa,
 bárapo sacerdote yajiwim icha Melquisedec ichi xua sacerdotépin”,
 jei Nakom Pejume Diwésitha,
 xua Cristo yábara páebatsi.

¹⁸Nakom kana éxana xua Moisés pía peitorobi koyenewa tatsi jiwi jopa kanantawenonaeyo tsipéi bárapo koyenewa jopa xeinaeyo peayapusüüwa xua jiwi kana éxanatsi xua jopa pexeinaewa penatsikuentsiwa xua abe peexanaexae Nakomtha. Matáütano jopa itaküüpaetsi xua jiwi pekana exanáewatsi xua pekapanenebíwatsi abe pía peéxanae kuirukoyene weya. ¹⁹Bárapo Moisés pía peitorobi koyenewa tatsi bápana jopa itaküüpaetsi xua jiwi jüntükoyene wüünae éxanatsi Nakomtha. Daxota ánoxuae pena koyenewa xéinatsi xua aiñakuí beyakaincha pokoyene xua kopiya. Bárapo pena koyenewa naka kana éxana xua wüünae éwatatsi pokotsiwa Nakom exanapaeba xua bárapo pena koyenéwaxae daxota ánoxuae Nakom naka yaputane xua piamonaexae tatsichi.

²⁰Nakom xaiñeya yábara tsiwüünae muxuduta pía pewüngtha xua Cristo naexanaena sacerdotépin xua ataya tsitekaeya. Jopa nama Nakom pía pewüngtha yábara tsiwüünae muxudutsiyo xua sacerdotepiwi penaexanaenexa pomonae Leví pía pemómoxi susatopiwi tatsi. ²¹Íchitha poxonae Cristo pong jiwi Pekanamataxeinaein sacerdotépin náexana, bapoxonae ichüing, Cristo yábara páebatsi Nakom Pejume Diwésitha, jeye:

“Nakom pía pewüngtha yábara tsiwüünae muxuduta,
 ichawa jopa toxeincha yábara exanáe tsane.
 Poxonae Nakom yábara tsiwüünae muxuduta,
 bapong jeye Pexántotha:
 ‘Xam sacerdotepim xua ataya petsitekaenexa’,
 jei Nakom”,
 jei ichüing xua Nakom tapáebatsi Nakom Pejume Diwesi.

²²Poxoru Nakom tsiwüünae muxuduta xua Jesús naexanapaeba sacerdotépin daxota Nakom tsita itapeñaxeina xua exanaena xua báyatha paeba bárapo pena koyenéwatha. ²³Báyatha sacerdotepiwi pinmonae tsóponae. Íchitha bárapo sacerdotepiwi naitapataya werapouneiba, yawa ichamonae náexana sacerdotepiwi. Dapong aibi bárapo sacerdotepiwi jíwana pong itaküüpatsi xua pewetsiwa pía peéxanae koyenewang tsipéi daxita werapouneiba. ²⁴Íchitha poxoru Jesús ataya asüü pepoponaexae daxota ataya tsitekaeya exanaena pía peéxanae koyenewa icha pepa sacerdotépin ichi. Jopa nantawenonaeyo xua ichüing Jesús pekoutha tanakuítatsi pong xuya sacerdotépin náexana. ²⁵Daxota bapong ataya tsitekaeya itaküüpatsi xua jiwi ataya pekapanenebíwatsi pomonae xua pepatsiwa tsane Nakomtha pomonae xua Nakom peyaputaewi pejumekowüntsíwixae Jesús. Jesús baxua éxana ataya tsitekaeya asüü pepoponaexae xua pewüükaenexa Nakomtha xua bárapo jiwi peyawenaenéxatsi.

²⁶Nakom tsita wüünaetsi xua Jesús pepa sacerdotépin náexana xaniwaicha, po sacerdotépin wakana matawenonaexae. Yatsikaewa bapong bichokono pejüntükoyene wüünaein Nakomtha. Bapong Jesús jopa abe exanaeyo ichamonaetha. Nakom tsítatsi xua Jesús jopa natsikuentsiyo poxoru abe jopa exanaeyo Nakomtha. Bapong Jesús seikaya éxana dukuanaebiya. Jopa exanaeyo icha be ichi pomonae abe peéxana dubenanaebiyaewi. Bapong Jesús Paxa kapoinchi po itaboko tajü beicha po itaboko beyakaincha xua nekóichatsi xua Jesús bárapo itaboko beicha Paxa aiñakuí éxanatsi. ²⁷Pepa sacerdotepiwi ba bewa exaneibina pokoyene xua duwéi jutebeiba iboto matatsuntha xua túxusi exaneiba Nakom nexa, daxita matakábintha tsaibi. Baxuang nata exaneiba kopiya abe pía peéxanae koyenewang nexa. Bapoxonae kotakaya jiwi taexanéibatsi abe pía peéxanae koyenewang nexa. Nama Jesús jopa barichiyo. Nama seikayiya icha koyeneya éxana. Bapong Jesús pía pepong nata kaenaeta xua tüpa éxanatsi saya bara kae kuikoyenetha daxita karepaya jiwi nexa xua jiwi abe pía peéxanae kuirukoyenewang tatsi nexa. ²⁸Moisés pía peitorobi koyenewa tatsi kanakuikoyene éxanatsi xua bara saya jiwi náexana pepa sacerdotepiwi. Bárapo pepa sacerdotepiwi abe éxana xua saya pekuipawi. Barapomonae jopa pejüntükoyene wüünae jiwi Nakomtha. Íchitha Nakom yábara tsiwüünae muxuduta pía wüingtha xua Pexanto kana éxana pepa sacerdotépin, po sacerdotépin yatsikaewa ataya tsitekaeya bichokono pejüntükoyene wüünaeinxae Nakomtha. Baxua Nakom éxana xua yábara tsiwüünae muxuduta xua pepuya weya tatsi poxonae Moisés kátatsi peitorobi koyenewa.

Meje yábara xua Jesús pong pejumeyawenaein jiwi Nakomtha

8 ¹Ánoxuae xua pokotsiwa xua bichokono peaiñakuí koyenewa meje baxue: Waxainchi xéinatsi yatsikaya pepa wasacerdotépin, pong yatsikaewa bichokono pejüntükoyene wüünaein Nakomtha xuaunxuae yábara paka tsipáebatsi. Bapong eka pía peitüpanáe ekaethopáewatha Nakom pía pekoxa weya tatsi, peitabokotheicha. ²Ánoxuae Jesús nakuita Nakom pía xantheicha tatsi po penakuichí koyeneya sacerdotepiwi éxana Nakom piabotha tatsi xua itabokotheicha. Bárapo bo yatsikaewa Nakom pía pexaiñeibo tatsi ichaxota pópona xua itabokotheicha. Nakom pong jiwi Pekanamataxeinaein éxana bárapo bo. Jiwi jopa exanaeyo bárapo bo.

³Nakom daxita karepaya pepa sacerdotepiwi yábara tsiwüing dúbatsi xua jiwi petaexanaenexa tsaibi tsainchi pokoyene pokotsiwa xua jiwi amanaya pekatsiwa Nakomtha. Matáütano bárapo pepa sacerdotepiwi yábara tsiwüing dúbatsi xua jiwi petaexanaenexa tsaibi tsainchi pokoyene xua duwéi pejutebiwa pókotsi duweín xua jiwi amanaya pekatsiwa Nakomtha xua abe peexanaexae. Daxota Jesús irü bewa bara ichiya exanáe xua Nakom taéxanatsi ichi sacerdotepiwi ichi poxonae Nakom taéxanatsi. ⁴Icha metha bárapo dapaetha Jesús poponáetsipa bárapo írathe poxonae írirü jinompa bárapo sacerdotepiwi po sacerdote Aarón yaiwi jopa itaküüpaetsípaetsi xua kana exainchi pepa sacerdotépin. Tsipéi kataunxuae bárapo írathe sacerdotepiwi yaiwi exanapona pokotsiwa Nakom nexa xua Moisés pía peitorobi koyenéwatha pekui-itorobixae. ⁵Íchitha bárapo sacerdotepiwi tanakuita be pokotsiwa xua saya penajüpaе koyenewa xua jopa pexaiñéi koyenewa. Pokotsiwa jame xua pexaiñéi koyenewa, baxua jame Jesús éxana peitabókotha. Pokotsiwa xua bárapo sacerdotepiwi tanakuita saya be penajüpaе koyenewa íchitha

xaniwaicha jopa najüpaeyo xua be pokotsiwa Jesús éxana peitabókotha. Baxua yaputainchi poxonae Nakom Moisés tsipáebatsi. Poxonae Moisés muxu pekua-ranotsi anseraboko xua ichaxota jiwi wüünae jainteibina Nakomtha bapoxonae Nakom Moisés tsipáebatsi. Nakom jeye: “Yábara nantaxéinare xaniwaicha xua daxita beta neexanaenexa anseraboko xua báyatha pokotsiwa yábara katsita-ita-peñaxéinatsi demuxúwatha. Barapókotsi anserabokotongtha seikaya jiwi newüünae jainchina”, jei Nakom. ⁶Nama Cristo, yatsikaya pong wasacerdotepin, bapong éxana itaboko beicha pokotsiwa xua yatsikaewa bichokono peaiñakuí koyenewa. Bárapo koyene bichokono aiñakuí beyakaincha pokoyenewa xua peru koyenewa xua pokoyeneya icha sacerdotepiwi exaneiba bárapo írathe. Cristo jiwi yábara jumeyawénatsi Nakom beicha xua jiwi pepatsinexa Nakomtha. Bárapo pena koyenewa Nakom yábara tsiwüünae muxuduta xua bichokono wüünae beyakaincha bárapo peru koyenewa, pokoyenewa pokotsiwa sacerdotepiwi exaneiba. Bárapo pena koyenewa jiwi jüntükoyene wüünae éxanatsi Nakomtha. Íchitha bárapo peru koyenewa jopa daichiyo.

⁷Báyatha peru petsiwüünae yábara muxudutsiwa Nakom Moisés yábara tsiwüünae muxudútsi. Icha bárapo koyenewa xeináetsipa peyapusüüwa xua daxota jiwi beta jüntükoyene wüünae éxanatsi Nakomtha, metha jopa nantawénonae tsipae icha pena petsiwüünae muxudutsiwa. ⁸Íchitha Nakom tane xua bárapo jiwi jopa pejüntükoyene wüünae jiwi bapongtha poxonae bárapo peru peyábara tsiwüünae muxudutsiwa xeina. Daxota ichüng Nakom Pejume Diwésitha jeye:

“Nakom jeye: Matakabin othopaena,
po matakábintha pena petsiwüünae muxudutsiwa exanaein Israel
nakuapiwi pía pemómoxi susato jíwitha tatsi irü Judea nakuapiwi pía
pemómoxi susato jíwitha tatsirü.

⁹Jopa bara jüta koyeneya ichin tsane poxonae matha icha ichin paiña amo susato jíwitha.

Bárapo koyene barapomonaetha katang poxonae matakaponang Egipto nakua weya.

Dáichitha barapomonaetha jopa nakuiyábara wüünaetsiyo xua peexanaenexa pokotsiwa itorobang poxonae katang bárapo peyábara tsiwüünae muxudutsiwa barapomonaetha.

Daxota barapomonaetha punapentang,
xua jopa tayawenaewa tsane,
jei Nakom”,
jei ichüng.

¹⁰Ekeicha ichüng jeye:

“Nakom jeye: Bárapo peyábara tsiwüünae muxudutsiwa Israel
nakuamonaetha,

poxonae bárapo matakabin wétsina bara baxua exanaein.

Jangje: Jiwi pejüntükoyenéwatha ichaxota nantaxeina taitorobi koyenewa baxota dubín.

Bapoxonae barapomonaetha neyaputaena yawa nejumekowüntsiya jejéi tsane.

Takoutha barapomonaetha pía Nakom tatsi naexanaein.

Barapomonaetha tamonaetha naexanaena.

¹¹Dapong aibi pong bewa kuidubina ichüngtha xua xang yábara,

xuano xua kuidubina pía jintongtha xua xang yábara,
matáütano xua kuidubina peweicho xua xang yábara
petananeyaputaewanexa tsane.

Jopa bewa kuidubi tsane barapomonaе tsipéi daxita jiwi neyaputaena
pomonaе pekuipawi jiwi,
írüno pomonaе peaiñakuí jiwi.

¹²Xang barapomonaе kuiyábara jüntemainaein abe pía peéxanae
kuirukoyenein tatsi,
xua jopa pexeinaewa tsane xua tana netsita natsikuentaе xua abe
peexanáewaxae.
Bápana ataya ekeicha jopa yábara nantaxeinaein tsane bárapo abe
peéxanae kuirukoyenein,
jei Nakom”,
jei ichüng Nakom Pejume Diwésitha xua saya Nakom tapáebatsi.

¹³Nakom yábara paeba pena peyábara tsiwüünae muxudutsiwa tsipéi po peyábara
tsiwüünae muxudutsiwa kopiya Moisés yábara tsiwüünae muxudútatsi saya peru
jume. Pokotsiwa ba peru koyenewa ba saya werawéraka. Daxota bárapo peru
peyábara tsiwüünae muxudutsiwa saya irü werawéraka.

Meje yábara xua Nakom pin píabo tatsi po bo xua itabokotheicha ungkua xuano írürü po bo xua po írathe tsike unguа

9¹Nakom kopiya Moisés yábara tsiwüünae muxudútatsi. Bárapo peyábara tsi-
wüünae muxudutsiwa peitorobi koyenein xeina xua pókotsi koyeneya israel-
monaе bewa exanaena poxonaе nakaetuta xua wüünae pejainchinéxatsi Nakom.
Matáütano bárapo peyábara tsiwüünae muxudutsiwa itoroba xua jiwi xeina po bo
xua Nakom píabo tatsi xua po írathe. ²Bárapo Nakom píabo jiwi éxana duwein
pebokotong xua be anseraboko. Bárapo anseraboko aiña tútube xeina. Po tutu
kopiya dena pewüng: “Nakom pía tutu po tutu aiñakuí tutu xua jopa pexeinaewa
peabe kuiru”, jei. Bárapo tútutha unguа candelabro matawüng xua penainto,
po penáintotha itanatanota penasiwa. Matáütano bárapo tútutha unguа xua
pexaethopaewa po pexaethopáewatha xua baxota jeba pan, po pan xua Nakom
kátatsi. ³Paparuwa xua dutsika bárapo paparuwa pejumawérena icha tutu xeina
po tutu pewüng: “Yatsikaewa Nakom pía tutu po tutu bichokono pepa peaiñakuí
tutu xua jopa xeinaeyo peabe kuiru”, jei. ⁴Bárapo tútutha unguа xua be peka-
xathopaewa xua ü penainto xua oro wüng nainto. Baraxota yüübébiya tauteba-
thopa petuxueiwa po petuxueiwa túxusi tuxuéi bénata poxonaе tauta. Matáütano
bárapo tútutha unguа xua be caja po caja pewüng: “Nakom pía peyábara tsi-
wüünae muxudútatsi caja”, jei. Bárapo caja pejuma weya daxita matapaeicha
kaxueba oro naintongtha. Bárapo caja juntútutha eka oro nainto koroto. Bárapo
korótotha tsijuntutuboka po pexaewa pewüng maná matawüng xua itaboko pía
pexaewa. Matáütano bárapo caja juntútutha boka penakobe nababí naewa po
penakobe nababí naewa báyatha Aarón xeina. Bárapo naewa báyatha Nakom
xuwa éxana xua tsiwixi pirürürüjei poxonaе pexeña petsita-itüütsi koyene éxana
pía peayapusüü itorobi koyeneyatha. Matáütano bárapo caja juntútutha bobena
ibótong po ibótongtha matatinaduba Moisés pía peitorobi koyenewa. ⁵Bárapo caja
pemataxatatsiwa júmatha nakuéyatabe ékabe aiña querubinbe matawüngbe xua

jumopekanaxobiya éxana oro naintotha, pongbe be matatsunpinbe. Bárapo aiña querubinbe matawüingbe yábara kaunuta xua Nakom baxota eka. Bárapo aiña querubinbe matawüingbe náitama táekabe yawa nakuárafe yeyetékabe xua ítata bárapo caja pemataxatatsiwa. Matáütano írabe tayekarékabe ichaxoya pejana nünübabareka po jana duwein jana. Bárapo duwein sacerdotépin bexuba jiwi abe pía peéxanae kuirukoyenein tatsi nexa. Ánoxuae baxua yábara ekeicha jopa be paka tsipaebichi.

⁶Daxita nakuiwüünaeta pokotsiwa xua bárapo tutubetha nexa. Bapoxonae sacerdotepiwi jojoneibeibiya daxita matakabi po tútutha xua kopiya dena. Bárapo sacerdotepiwi bárapo tútutha exaneiba pía penakuichiwa. ⁷Íchitha nama po tutu dabeya saya meisha joniyeiba pong pepa sacerdotépin xua saya káetotha tsaibi xua daxita weithang tsaibi. Poxonae bárapo pepa sacerdotépin bárapo tutu iya joniya bewa nata kajoniyaena duwein jana. Bárapo jana nünübaba ichaxota querubinbe matawüingbe itabarayo deka xua bapong abe pía peéxanae kuirukoyenewang tatsi nexa xuano xua irü jiwi abe pía peéxanae kuirukoyenewang tatsi nexa xua poxonae jiwi jopa nakuiyábara yaputaeyo. ⁸Peyábara exanaewa daxita baxuang Nakom pía Pejumopetünaxü tatsi naka kuiduba xuaje: Poxonae kataunxae sacerdotepiwi taéxana dubenanáebiya Nakom po tútutha xua kopiya dena, jiwi jopa kopatsichi xua pata po tutu dabeya ichaxota Nakom pópona. ⁹Daxita pokotsiwang bárapo anserabokototha kaena báyatha éxana yábara kaunuta xua ánoxuae wayábara yaputaenexa baxua xua pokotsiwa ánoxuae éxana. Jiwi Nakom wüünae jaintéibatsi poxonae sacerdotépin exaneiba pokotsiwa xua jiwi pekatsiwa Nakomtha xuano xua poxonae exanéibano xua duwéi pejutebiwa xua tóxusi éxana Nakom nexa. Bara bekein jiwi baxua exaneiba íchitha kataunxae pía jüntükoyenein tatsi kana éxanatsi xua áwiya yábara nantaxeina dubenanáebiya abe pía peéxanae kuirukoyenein tatsi. Bárapo koyene pokoyene jiwi éxana jopa beta jüntükoyene wüünae exanaetsi xua jopa penatsikuentisiwa tsane Nakomtha xua abe peexanaexae. ¹⁰Bárapo peru peitorobi koyenewa xua Moisés pía peitorobi koyenewa tatsi jiwi jopa yawenaetsi xua pena jüntükoyene wüünae exanaewa Nakomtha. Saya ápara yábara paeba xua jiwi bewa pokotsiwa xaibina poxonae nabaneiba, matáütano xua xuang pokotsiwa bewa apeibina. Matáütano jiwi itoróbatsi xua pokoyenein yábara xua jiwi beta penaperüxainwaetsiya nowaewa yábara pía wüünae jainteibichi Nakom. Bárapo koyenein xua saya jiwi bewa kana exanáe pía pepongtha beya xua ánoxuae Nakom pena koyenewa ekeicha éxana.

¹¹Nama Cristo patopa pong pepa sacerdotépin. Bichokono yatsikaewa pexeíña koyenewa xua pena koyenewa nákata kapatopa pokoyenewa xua ánoxuae waxainchi xéinatsi. Po tutu ichaxota bapong nakuiteiba icha pepa sacerdotépin ichi xua itabokotheicha bichokono wüünae tsipéi Nakom daxita matapaeicha wetsiya éxana. Bárapo tutu bichokono wüünae beyakaincha po tutu ichaxota sacerdotepiwi tanakuita Nakom xua bárapo kae pin nákuathe. Jiwi jopa akabiyo bárapo tutu xua itabokotheicha tsipéi bárapo tutu jopa ápara po kae pin nákuathe tsike néxiyo. ¹²Cristo joniya ichaxota yatsikaewa Nakom pía xantha. Baraxoteicha Cristo jopa kaponaejo duwein jana po duwein pewüing chivo, xuano xua vaca jana jopa kaponaejo xua penüing jana, xua pebto jana. Saya jame Cristo Nakom tsita itüütatsi xua bapong jiwi tsitüpatsi xua abe pía peéxanae koyenewang tatsi. Bapong Cristo saya bara kae koyenéwatha joniya baxoteicha xua daxita karepaya

jiwi nexa. Daxota bapong Cristo bara ataya tsitekaeya naka kapanepa. ¹³Sacerdotepiwi ba nota vaca pebtong pía pejanang, yawa chivo pía pejana xuano ipuna xua poxonae táutatsi vaca pesowátiyo peweiño. Sacerdotepiwi matawenünübaba jiwi daxita baxuangtha pomonaetha, pomonae xua abe peéxanae kuirukoyenein peexanáewixae. Bara bapoxonae bárapo koyene jiwi itakúüpatsi xua kana éxanatsi xua jopa penataxobiwa pía pepongtha bekein áwiya xeina penatsikuentsiwa. ¹⁴Bekein bara baxuang bárapo jiwi tsiwiyo yawénatsi xua jopa petaxobíwatsi pía pepongtha íchitha nama Cristo pía pejana tatsi barapomonae bichokono yawénatsi. Cristo pejana bichokono peayapusúü koyenewa xeina beyakaincha xua duwein pejana. Nakom pía Pejumopetünaxü tatsi po júmope ataya tsitekaeya pópona bárapo pejumopetünaxü tatsi Cristo yawénatsi poxonae saya Cristo nayábara kuikópata xua bara pebexubinéxatsi poxonae pejanapichapabarena pewang weya petüpáewatha. Bapong Cristo jopa bápana exanaeyo peakoyenebewa. Cristo wanaka tsitüpaexae Nakom naka jüntükoyene wüünae éxana. Daxota Nakom jopa tsita natsikuentichi abe waexanaexae. Wajüntükoyene ekeicha jopa yábara wanaka tsipaebinexa abe waexanáe koyene. Daxota jopa bewa ponáe tsainchi ichaxota ataya átene tsaiibi pomonae jopa pejumekowüntsiwi. Ánoxuae jame naka itaküüpa xua ajüntüsüüya taéxana dubenanaebíyatsi Nakom pong xua ataya tsitekaeya asiü pepoponaein.

¹⁵Daxota bapong Cristo náexana pong nákata paeba Nakomtha yawa pong naka tsipaeba Nakom nexa. Bapong Cristo nákata katsika Nakom pía pena peyábara tsiwüünae muxudutsiwa tatsi. Bapong naka kana éxana xua daxítatsi kaemona naéxanatsi Nakomtha. Poxonae naka tsitüpa, Nakom yábara jüntemainna abe peéxanae kuirukoyene po peabe exanáe kuirukoyenein xua jiwi kaena báyatha éxana poxonae kataunxuae exanapona pokoyene báyatha Nakom Moisés yábara tsiwüünae muxudútsi xua peru peyábara tsiwüünae muxudutsiwa. Daxita pomonae Nakom pewabixae barapomonae katsibinchi peajüntüyapusüüwa po peajüntüyapusüüwa xua ataya tsitekaeya tsane xua báyatha Nakom peyábara tsiwüünae muxudutsixae barapomonaetha. ¹⁶Poxonae pebin ba ichichipa kata pía pekopiniwa ichamonaetha xua poxonae tüpaena, kopiya matha yábara kaununaya wüngtinaduba papératha pomonae xua pekopiniwa xeinaewa tsainchi. Pomonae xua pekopiniwa xeinaewa tsainchi barapomonae bewa tsita itapeiñaxeinaena xua bárapo pebin xaniwaicha bara túpaba xua poxonae beya pewünaeya tsane xua pekopiniwa notsinéxatsi pong xua tüpa. Bapoxonae barapomonae bara itakúüpatsi xua pexeinaewa pokotsiwa xua bapong xeina pong tüpa. ¹⁷Bárapo papera, po papératha báyatha pebin nakopiniwa yábara jumetinaduba kataunxuae jopa aiñakuiyiyo poxonae abü kataunxuae bapong pópona tsipéi jopa kopiniwa notichi barapomonae. Saya jame poxonae bapong yatsikaewa túpaba bapoxonae jame aiñakuí bárapo papera, tsipéi barapomonae itakúüpatsi xua pexeinaewa tsane pokotsiwa bapong xeina. ¹⁸Barichi bárapo kopiya peyábara tsiwüünae muxudutsiwa. Pewünaeya tsane xua poxonae jiwi xeinaena pokotsiwa báyatha Nakom, Moisés yábara tsiwüünae muxudútsi sacerdotépin bewa matha duwein bexubina xua bapoxonae bárapo koyene jiwi pexeinaewa tsane. ¹⁹Poxonae Moisés daxita Nakom pía peitorobi koyenewang yábara paeba daxita jíwitha nakuiweta, bapoxonae pejana nonota tsíniya xua pena vacang xua ü pebtong yawa cabrang yawa xua bárapo jánangtha múxuna xuba meráyotha yawa bárapo meráyotha múxuna xuba hisopo axu ponaeyo petuxeiwa naeyo matáütano múxuna xuba xua oveja

na peyatusetsiwa. Barapoxonae Moisés baraxotha Nakom Pejume Diwésitha díboro tsikababa yawa jiwi tsikabábatsi. ²⁰Bapoxonae Moisés daxita jíwitha jeye: “Bárapo jana, po jánatha paka matawenünübátsi, ápara Nakom itoroba xua tapákata exanáewatsi tsainchi. Baxua paka tsita itapeiñaxeina xua Nakom xaniwaicha bara pákata exanaena pokotsiwa pía peyábara tsiwüünae muxudutsiwa”, jei Moisés. ²¹Barichino Moisés éxana xua anseraboko matawenünübaba pejánatha. Matáütano múxuna matawenünübaba xua xuang bárapo anserabokototha tútutha umena pokotsiwang sacerdotepiwi kanakuiteiba poxonae jiwi nakaetuteiba xua Nakom wüünae pejainchinéxatsi. ²²Moisés pía peitorobi koyenéwangtha tatsi itoroba xua bara imoxoyo daxita koyeneintha bewa pejánangtha matawenünübabi xua daxita baxuang Nakom jopa petsita-nataxobinéxatsi. Nakom jopa yábara jüntemainaeyo jiwi abe pía peéxanae kuirukoyenein tatsi icha jopa pejana epa-epakaeyo xua bárapo jiwi nexa.

Meje yábara xua Cristo tsitüpa jiwi abe pía peéxanae kuirukoyenewang tatsi

²³Sacerdotepiwi bewa jutebina duwéi pematawé nüünübabinexa pejánatha anseraboko. Bapoxonae Nakom petsita-wüünaenéxatsi xua jopa nataxobiyo bárapo anseraboko xuano xua xuang tútutha umena. Bárapo koyene saya yábara kaunuta xua yatsikaewa pepa koyenewa Cristo éxana peitabokothaicha. Íchitha nama bárapo yatsikaewa pepa koyenéwatha peexanaenexa peitabokothaicha jame bewa pejana epaépakae pejana pong pejüntükoyene wüünaein pong peaiñakuín pía pejana tatsi xua Nakom tsita jiwi wüünaetsi xua jopa penatsikuentsiwa xua abe peexanaexae Nakomtha. Bárapo jana bichokono aiñakuí beyakaincha duwein jana po jana xua sacerdotepiwi nüünübaba po kae pin nákuathe. ²⁴Poxonae Cristo joniya Nakom pin piabotha tatsi xua itabokothaicha jopa joniyaeyo po bo saya jiwi éxana po kae pin nákuathe xua Nakom pin píabo tatsi. Bárapo bo xua Nakom pin píabo saya yábara kaunuta xua yatsikaewa peitabokothaicha xeina pepa Nakom pin píabo tatsi. Jame Cristo joniya Nakom pin piabotha tatsi, xua Nakom pía nakuatheicha tatsi xua itabokothaicha. Baxoteicha ánoxuae Cristo naitüüta Nakomtha xua wanákata tsipaebinexa Nakom peitabaratha. ²⁵Pong pepa sacerdotepin bewa joniyaena bara saya káetotha tsaibi xua daxitang weithang tsaibi ichaxota po tutu yatsikaewa Nakom pía tutu xua po tutu bichokono yatsikaewa peaiñakuí tutu xua bárapo anserabokototha. Barapong pejana kapaneiba bárapo tútutha xua duwein jana xua jopa barompaya pía pejana tatsi. Nama Cristo jopa nantawenonaeyo xua nayábara kuikópata xua matowa tüpa pekana exanáewatsi xua jiwi abe peéxanae kuirukoyenein tatsi nexa. ²⁶Icha baxua tsipae bapoxonae bapong matowa tüpa exaneibichípatsi xua bexubéibatsi xua poxonae Nakom aena bárapo kae pin nakue fórota xua beya ánoxuae. Íchitha nama ánoxuae weta xua peru dapae tsipéi bapong Cristo patopeika bárapo kae pin nákuathe petüpaenexa xua saya bara kae koyenéwatha ataya petsitekaenexa tsane. Bapong Cristo náetotha tsitüpa jiwi xua Nakom jiwi peyábara kuijüntemainaenéxatsi abe pía peéxanae kuirukoyenein tatsi. ²⁷Daxita jiwi ba werapouneibina saya káetotha. Bapoxonae pírapae Nakom yábara paebina daxita jiwi xua penatsikuentsiwa xua abe peexanaexae. ²⁸Barichirü, icha jiwi ichi Cristo saya káetotha tsitüpa jiwi pinmonae, xua Nakom jiwi abe pía peéxanae kuirukoyenein tatsi pekayábara

jüntemainaenexa tsainchi. Ekeicha bexa tsane patopeikaena po kae pin nákuathe. Jopa tsipatopeikae tsane xua ekeicha petsitüpaewa tsane jiwi abe pía peéxanae kuirukoyenein tatsi. Jame tsipatopeikaena xua pekapanenebiyaenexa pomonaetha, pomonae pía pewüünae éwatsi jiwixaetsi xua bapong pepatopaewa po kae pin nákuathe tsike.

10¹ Moisés pía peitorobi koyene tatsi, baxua saya yábara kaunuta xua yaputane wanaka exanaenexa pokoyene xua wüünae pokoyene xua bexa Nakom exanaena itabokotheicha. Bárapo koyene, jopa pepa koyenéwiyo poxoru jopa jüpaeyo pokoyene xua Nakom yatsikaewa xeina itabokotheicha. Moisés pía peitorobi koyenewa tatsi jopa itaküüpaetsi xua jiwi pejüntükoyene wüünae exanáewatsi Nakomtha pomonae wüünae jainteiba Nakom. Bekein pepa sacerdotepiwi daxita weitha exaneiba xua duwéi jutebeiba jiwi abe pía peéxanae kuirukoyenein tatsi nexa dáichitha kataunxuae jopa itaküüpaetsi xua jiwi jüntükoyene wüünae éxanatsi xua jopa pexeinaenexa xua penatsikuentsiwa xua abe peexanaexae Nakomtha.² Icha Moisés pía peitorobi koyene tatsi jiwi jüntükoyene wüünae exanaetsípatsi Nakomtha bapoxonae sacerdotepiwi jopa ekeicha nantawénonae tsipae xua ekeicha pejutebeibiwa duwéi jiwi abe pía peéxanae kuirukoyenein tatsi nexa. Icha jiwi káetotha jüntükoyene wüünáetsipa Nakomtha, bapoxonae jiwi jopa natsikuentsipae xua abe peexanaexae Nakomtha.³ Ichitha poxonae bárapo sacerdotepiwi jutebeiba duwéi jiwi abe pía peéxanae kuirukoyenein tatsi nexa bekein baxua éxana kataunxuae jiwi kana éxanatsi xua yábara jüntanaina bárapo abe pía peéxanae kuirukoyenein tatsi. Jiwi yábara jüntanaineiba baxuang daxita weitha poxonae duwein jutebéibatsi bárapo jiwi nexa.⁴ Vaca pebto pía pejana tatsi yawa chivo pía pejana tatsi jopa bápana jiwi jüntükoyene wenotichi abe pía peéxanae kuirukoyenein tatsi xua jopa penatsikuentsiwa nexa Nakomtha xua abe peexanaexae.

⁵ Daxota poxonae Cristo patopa po kae pin nákuathe tsike, Cristo jeye Nakomtha:

“Xam jopa ichichipaem pokoyene xua duwein pebexubiwa jiwi abe pía peéxanae kuirukoyenein tatsi nexa.

Matáütano jopa ichichipaem xua pokoyenein xua jiwi amanaya nekakatsiwa.

Jame pebaxuanexa yatsikaewa pepa jintong nekana éxaname xua náexanang,

tatsitüpaenexa jiwi abe pía peéxanae kuirukoyenein tatsi nexa.

⁶ Xam jopa kajüntükoyene weiweina exanaeyo poxonae duwein ompin táutatsi xuano xua pexaewa tauta petúxusi exanaenéxano xua xam neyábara jüntemainaenexa jiwi abe pía peéxanae kuirukoyenein tatsi.

⁷ Bapoxonae xang Cristo, jangje:

‘Xam Ta Nakom.

Xang xote po nákuathe patopéikangje taexanaenexa xua pokotsiwa ichichípame be pókotsi koyeneya nekuiyábara tina jiña diwésitha’, jang”, jei Cristo.

⁸ Kopya Cristo paeba xua jeye: “Xam jopa ichichipaem yawa jopa kajüntükoyene weiweina exanaeyo pokoyene xua poxonae jiwi bexuba duwein xuano poxonae exaneiba pokoyene poxonae jiwi amanaya kakatsibeiba. Matáütano jopa ichichipaem poxonae duwein ompin táutatsi xua jiwi abe pía peéxanae kuirukoyenein tatsi nexa”, jei Cristo. Baxua Cristo paeba tsipéi Moisés pía peitorobi koyenéwatha

itoroba xua jiwi bewa exanaena bárapo koyenein Nakom nexa. ⁹Ekeicha bapoxonae Cristo kotakaya jeye: “Xang xote po kae pin nákuathe patopéikangje taexanaenexa pokotsiwa ichichípame”, jei. Poxonae Cristo baxua kaunutsiya paeba kopidukua kana éxana pokoyene peru koyene. Cristo ánoxuae ekeicha pekoutha pena koyene éxana poxonae náetotha tsitüpa jiwi abe pía peéxanae kuirukoyenein tatsi. ¹⁰Nakom naka jüntükoyene wüünae éxana wanaka kana exanaenexa piamonae tatsi poxoru Jesucristo éxana pokotsiwa Nakom peichichipaexae. Jesucristo pía pepong nakaenaeta Nakomtha xua náetotha petsitüpaenexa daxita jiwi abe pía peéxanae kuirukoyenein tatsi xua bara kae koyenéwatha xua ataya petsitekaenexa tsane.

¹¹Daxita sacerdotepiwi pomonae judiomonae daxita matakabi exaneiba xua duwein pebexubiwa, bekein bárapo koyenewa jopa itaküüpaetsi xua jiwi jüntükoyene wenótatsi abe pía peéxanae kuirukoyenein tatsi. ¹²Nama Jesucristo bara kae koyenéwatha éxana poxonae náetotha tsitüpa jiwi abe pía peéxanae kuirukoyenein tatsi, xua bara ataya tsane. Poxonae Cristo baxua nakuiweta Nakom pía pekoxatheicha tatsi ékiya xua itabokothaicha. ¹³Baxoteicha Cristo abü éwata beya poxonae abü tsane poxonae Nakom kana exanaena xua Cristo kana exanaeinchi xua pekanamataxeinaenexa pía peaitafaetabí jíwichi. ¹⁴Cristo piamonae jüntükoyene wüünae éxana xua ataya tsane poxonae náetotha tsitüpa kae koyenéwatha. Barapomonae pomonae xua Nakom tsítatsi xua jopa xeinaeyo penatsikuentisiwa pomonae piamonaexae tatsi. ¹⁵Nakom Pía Pejumopetünaxü tatsi baxua yábara irü naka tsipaeba báyatha Nakom Pejume Diwésitha, jeye:

¹⁶“Matakabin othopaena po matakábintha xang tayábara tsiwüünae muxudutsiwa xua pena koyenewa exanaein barapomonaetha.

Jiwi pía jüntükoyenéwangtha xua ichaxota nantaxeina taitorobi koyenewa baxota dubín”,

jei Nakom pía Pejumopetünaxü tatsi.

¹⁷Bapoxonae ekeicha Nakom pía Pejumopetünaxü tatsi jeye:

“Bápana ataya ekeicha jopa yábara jüntanainaein tsane jiwi abe pía peéxanae kuirukoyenein tatsi”,

jei Nakom pía Pejumopetünaxü tatsi,

Nakom Pejume Diwésitha.

¹⁸Daxota poxonae Nakom yábara jüntemaina jiwi abe pía peéxanae kuirukoyenein tatsi, ekeicha jopa nantawenonaeyo xua jiwi duwein pebexubiwa xua túxusi éxana Nakom nexa xuano xua pokoyene exaneiba xua pokoyene Nakom amanaya pekatsibeibíwatsi.

**Meje yábara xua waxainchi bewa wajüntükoyenáyatha
nantaxeinaetsi xua bara ápara imoxoyo itiya jinómpatsi Nakom**

¹⁹Tamonae pam, daxota ánoxuae naka itaküüpa xua jopa junuwiya patsi tsainchi itabokothaicha ichaxota yatsikaewa Nakom pía tutu, po tutu bichokono peaiñakuí tutu. Daxota baxua naka itaküüpa tsipéi Nakom yábara kópata xua bara Jesucristo naka tsiwanaya patopa bárapo tütutha pejana pichapabarenaexae poxonae náetotha naka tsitüpa. ²⁰Ánoxuae naka itaküüpa xua wapatsiwa Nakomtheicha pena jüntükoyene waxeinaexae po pena jüntükoyene ataya ayapüsüü xua poxonae Cristo wanaka tsitüpaexae. Báraxua be poxonae metha Cristo

nákata pataxubíchipa paparuwa po paparuwa yakaincha dukua Nakom pía tutu po tutu yatsikaewa peaiñakuí tutu. Daxota jojoniyaeinchi wajinompaeinxa Nakomtha. ²¹Bapong Jesús, yatsikaewa wasacerdotepin, pong kanamataxeina Nakom píabo tatsi xua itabokotheicha. ²²Daxota bewa wajüntükoyenényatha nantaxeinaetsi xua bara ápara imoxoyo itiya jinómpatsi Nakom, xua yatsikaewa xaiñeya wajüntükoyene wüünaexae bapongtha. Matáütano bewa wajüntükoyenényatha nantaxeinaetsi xua bara ápara imoxoyo itiya jinómpatsi Nakom wüünaeya wajumekowüntsiya jinompaexae. Matáütano bewa wajüntükoyenényatha nantaxeinaetsi xua bara ápara imoxoyo itiya jinómpatsi Nakom tsipéi jopa jüntükoyene áuratsi xua jopa watsita natsikuentisixae xua abe waexanaexae. Matáütano bewa wajüntükoyenényatha nantaxeinaetsi xua bara ápara imoxoyo itiya jinómpatsi Nakom tsipéi poxonae ichamonae naka bautisaba mératha tsita itapeiñaxéinatsi xua Nakom báyatha naka jüntükoyene wüünae éxana. ²³Bárabü naajüntükoyenesüü exainchi xua jopa junuwiya wayábara paebiwa tsainchi wawüünae ewatsiwa. Baxua exanaponaeinchi tsipéi bara yaputainchi xua Nakom bara exanaena pokotsiwa báyatha yábara naka tsiwüünae muxuduta xua jopa yábara aiña ünthütongtsi. ²⁴Bárabü yábara nantaxeinaeinchi pokoyenewa xua nantiya nakuitsakabinchi xua wanayawenáewatsi. Bapoxonae nantiya naántobe tsainchi, matáütano xua wüünaeya beta nantiya nata exanaeinchi. ²⁵Jopa bewa bara jüta koyeneya ichiya exanaetsi be pokotsimonae waxainchi jíwanatsi pomonae jopa pateibiyo poxonae nakaetutéibatsi xua poxonae Nakom wawüünae jainchinexa. Íchitha jame bewa nantiya najüntükoyene tsakabichi xua jüntema wajinompáewatsi. Bárapo koyene bewa exanaponaeinchi beyakaincha xua pokuikoyene kopiya báyatha. Baxua éxanatsi tsipéi ánoxuae yaputainchi xua matakabi jopaena, po mataketha pong jiwi Pekanamataxeinaein patopáetsika.

²⁶Tsipéi icha ichamonae waxainchi jíwanatsi icha barapomonae áwiya abe exanapona xua pokotsiwa peichichipaexae xua abe éxana xua poxonae bekein peyaputáewatha pokoyene pexaiñéi jume, nama icha koyenewa aibi, xua ichüng ekeicha petsitüpaenexa bárapo peabe koyenewa. ²⁷Saya jame meisha tanakópatatsi pomonae áwiya abe exanapona xua matakabi kunuwa po mataketha poxonae Nakom yábara paebina jiwi xua penatsikuentsiwa xua abe peexanaexae. Matáütano tanakópatatsi xua ishoto yábara kunuwa, po ishoto bichokono atou, po ishótotha Nakom werawéraka kana exanaena daxita pomonae pía peitafaetabí jíwichi. ²⁸Po pebin jumefeba pokoyene Moisés itoroba pía peitorobi koyenéwatha, xua poxonae nakuéyatabe pebinbe ichakuitha poxonae akoibi póyobe bapongbe yábara páebabe: “Bapong pajumetang poxonae jumefeba”, jei, bapoxonae bapong bewa tüpaena. Tsipéi pomonae bapong yábara páebatsi xua penatsikuentsiwa xua abe peexanaexae, barapomonae tsita itapeiñaxéinatsi xua bara bapong xaiñeya abe éxana. Daxota bapong bewa tüpaena tsipéi barapomonae jopa yábara nantaxeinaeyo xua bapong peyawenáewatsi. ²⁹Xuaje payábara nantaxéinare: Nakom bichokono átene éxana pomonaetha, pomonae Pexanto tatsi itaweta. Matáütano átene éxana pomonaetha, pomonae abe yábara paeba xua pinae Jesús pejana jopa aiñakuiyo bekein Jesús tsitüpa jiwi. Jesús petsitüpaexae daxota Nakom yábara tsiwüünae muxuduta xua jiwi pejüntükoyene wüünae exanaenéxatsi Nakom. Matáütano barapomonae jopa natsikuentsí tsane

xua abe peexanaexae. Matáütano Nakom átene éxana pomonaetha, pomonae Nakom pía Pejumopetünaxü tatsi tsümüjumeya barü páebatsi po pejúmope jiwi yawénatsi pía peantobexaetsi. Barapomonae nama bichokono átene exanaeinchi beyakaincha xua ichamonae átene exanaeinchi pomonae jopa exanaeyo pokotsiwa Moisés itoroba. ³⁰Waxainchi yaputainchi xua Nakom báyatha jeye: “Xang takoya exanaein pentoma xua jiwi átene tsane abe peexanaexae”, jei Nakom. Ekeicha Nakom Pejume Diwésitha jeye: “Nakom yábara paebina piamonae xua penatsikuentsiwa xua abe peexanaexae”, jei. ³¹Po pebin abe éxana bichokono junuwa kana éxanatsi poxonae Nakom yábara paebina bapong tsipéi bárapo pebin Nakom tsítatsi xua bapong bara penatsikuentsiwa xua abe peexanaexae. Bapoxonae Nakom, pong ataya asüü pepoponaein, bichokono jopa juniya átene kana exanáe tsane bapongtha.

³²Bara ataya payábara jüntanáinare po dapaetha poxonae bekein aena pajumekowüntame Nakom, xua íchitha beta paéxaname. Bapoxonae áwiya íchitha jüntema parubenanaebíyame poxonae bekein ichamonae pákata abe éxana. ³³Ichamonae xua paxam jíwana pam barapomonae tsümüjumeya biatainchi xuano jiwi itútha átene exanéibatsi. Írürü ichamonaerü pomonae paxam jíwana pam barapomonae nakayábara nantaxeina xua barápara írürü átene exanéibatsi poxonae ichamonae átene exanéibatsi. ³⁴Paxam paiña antobexae paka yábara nantaxéiname pomonae jiwi pekübibotha jébatsi xua paiña neyawenaenexa. Bekein bara ichamonae dangweya pákata nota xua xuang daxita paxéiname, dáichitha áwiya kataunxuae pajüntükoyene weiweiname. Bara payaputáneme xua paxéiname itabokotheicha pokotsiwa bichokono yatsikaewa wüünae beyakaincha pokotsiwa po kae pin nákuathe paxéiname. Baxua xua pokotsiwa paxéiname itabokotheicha ataya tsitekaeya paxeináename baxua. ³⁵Jopa pana nakuibarapentsinde xua payábara jumekowünta dubenanaebíyame xua paiña nepaka katsinexa pokotsiwa báyatha Nakom yábara paka tsiwüünae muxuduta. Tsipéi wajumekowünta dubenanaebiyaexae tsane Nakom, baxua nexa Nakom pentoma naka katsibina xua bichokono nawita xua pía nakuatheicha. ³⁶Paxam panantawénoname xua ajüntüyapusüüya parubenanaebíyama áwiya xua jopa pa-aitakonaem bekein ichamonae pákata abe éxana xua paiña neexanaenexa pokotsiwa Nakom ichichipa. Bapoxonae Nakom paka katsibina pokotsiwa xua báyatha yábara paka tsiwüünae muxuduta. ³⁷Nakom Pejume Diwésitha jeye:

“Methaunxuae patopáetsika,
pong bewa patopeikaena.
Jopa bayathiyo tsane.

³⁸Pong bara netsita pejüntükoyene wüünaein,
bapong bara ataya poponaena tana nejumekowünta dukuanaebiyaexae.
Íchitha icha bapong ekeicha kaewa jopa nejumekowüntsiyo jopa wüünaeya
be yábara jüntükoyene weiweinaeño,
pokotsiwa bapong peexanaexae”,
jei Nakom.

³⁹Íchitha nama waxainchi jopa be barapomonaetsi, pokotsimonae ekeicha kaewa jopa jumekowüntsiyo Nakom. Barapomonae Nakom werawéraka exanaena. Nama waxainchi pomonaetsi áwiya jumekowünta dubenanaebíyatsi Nakom beya poxonae wajüntükoyenewa nákata kapanepa exanaeinchi.

Meje yábara xua Nakom pejumekowüntsíwatsi

11 ¹Pong jumekowünta dukuanaebiya Nakom, bapong bara xaniwaicha yaputane xua xeinaena pokotsiwa wüünae éwata. Matáütano pejüntükoyene tsita najume itapeiñaxéinatsi xua barápara xaiñéi pokoyene xua barapong yábara jumekowünta bekein kataunxuae yatsikaewa jopa taeyo. ²Waámo susato jiwi wüünaeya beta yábara páebatsi xua Nakom beta yábara paeba ayapusüüya pejumekowüntsiwaxaetsi.

³Waxainchi wayábara jumekowüntsixae xua Nakom naka yawenapaeba daxota yaputainchi xua bárapo kae pin nakue írú bárapo itaboko susato fórotatsi, Nakom peitorobixae. Pokotsiwang xua ánoxuae tainchi, Nakom fórota pokotsiwang weya xua bápana jopa taetsi, pokotsiwang xua péiñaxae.

⁴Abel pong kaena báyatha pópona yábara jumekowünta xua Nakom yawenapaeba. Daxota bapong duwein bexuba xua túxusi éxana Nakom nexa. Nakom tsita wüünaetsi pokotsiwa Abel éxana. Daxota Nakom yábara paeba xua bara bapong pong pejüntükoyene wüünaein. Írürü Caín Abel péntapin tatsi, bapong írürü bekein pexaewa éxana pokoyene xua Nakom pekatsíwatsi. Dáichitha bárapo koyene Nakom jopa tsita wüünaetsi. Nakom bichokono beitakuijíchatsi pokotsiwa Abel éxana, beyakaincha xua pokotsiwa Caín éxana. Nakom baxua beitakuijíchatsi tsipéi Abel peyábara jumekowüntsixae pokotsiwa Nakom exanapaeba. Bekein Abel báyatha tüpa íchitha naka itaküüpa xua áwiya wayábara nakuidubaponáewatsi pokotsiwa Nakom exanapaeba poxonae yábara yórobatsi Abel pía pejumekowüntsiwa tatsi.

⁵Enoc pong kaena báyatha pópona yábara jumekowünta xua Nakom yawenapaeba. Daxota bapong Enoc pichíkatsi. Nakom pichika xua bapong pekapanaenéxatsi itabokothicha, xua bapong Enoc jopa petüpaenexa bárapo kae pin nákuathe. Enoc piamonae jopa kaxinaetsi, poxoru Nakom pichika. Nakom Pejume Diwésitha paeba xua poxonae pewünaeya tsane xua pichikaeinchi Enoc, Nakom tsita wüünaetsi pokotsiwa Enoc peexanaexae. ⁶Jopa itaküüpaetsi xua jiwi Nakom tsita wüünaetsi icha bárapo jiwi jopa beta jumekowüntsiyo Nakom. Pong xua ichichipa imoxoyo itiya pópona Nakomtha jame bewa matha yábara jumekowüntsina xua Nakom bara xaniwaicha pópona. Matáütano jame bewa yábara jumekowüntsina xua Nakom bara kata pokotsiwa báyatha yábara tsiwüünae muxuduta pomonaetha, pomonae pía pejeichíwichi xua pejumekowüntsinéxatsi. Barapomonae Nakom yaputainchi.

⁷Noé pong kaena báyatha pópona yábara jumekowünta xua Nakom yawenapaeba. Daxota Noé piamonae tsíéxana pin jera nae xua piamonae matabüxüyo pebarü nakapanepaenexa. Nakom Noé pewünaeya yábara muxuwétatsi xua pokotsiwa bexa exanaena pokotsiwa Noé bápana báyatha jopa taeyo, xua pin awüübo tsane xua Nakom itorobina. Noé bara jumekowüntsiya éxana pokotsiwa Nakom itoroba poxonae pin jera nae éxana xua piamonae matabüxüyo pebarü nakapanepaenexa. Noé pejumekowüntsixae Nakom, bapong tsita itapeiñaxeina xua pomonae bárapo kae pin nakuepiwi ápara abe éxana poxonae jopa yábara jumekowüntsiyo xua Nakom itorobapaeba pin awüübo. Nakom tsítatsi xua bárapo jiwi átene tsane penatsikuentíwaxae jopa pejumekowüntsixaetsi. Jame Noé Nakom jüntü tsita koyenewüünaetsi pejumekowüntsixaetsi bapong. Daxota Nakom Noé piamonae matabüxüyo barü kapanépati.

⁸Abraham pong kaena báyatha pópona yábara jumekowünta xua Nakom yawenapaeba. Daxota poxonae Nakom pewabixae, bapong bara éxana pokotsiwa Nakom itoroba. Bapong Abraham pía nakua weya pona xua peponaenexa icha nákuatha, po nakua báyatha Nakom yábara tsiwüünae muxuduta, xua bapong katapáebatsi. Bapong Abraham pía ira weya pona xua icha nakua beya pona po nakua bekein jopa yaputaeyo ichaxota pona. ⁹Abraham peyábara jumekowüntsixa Nakom, bapong pópona po íratha xua báyatha Nakom yábara tsiwüünae muxuduta. Bapong Abraham be pong penanapaincha poponaein xua icha nakua wérena poponaexae xua poxonae icha nákuatha pópona. Bapong Abraham poponeiba anserabokong bomüxüxitha icha Isaac ichi irü icha Jacob ichi poxonae poponeibabe anserabokong bomüxüxitha. Abraham, irü Isaac, irü Jacob barapóyobe Nakom tsiwüünae yábara muxuduta bárapo ira xua Nakom pekatsinexa. ¹⁰Abraham nakuiyábara wüünae éwata xua patopaena po tómaratha ichaxota xua pepu umenae bong xua Nakom pía nakuatheicha. Ápara Nakom bapong pong yábara nantaxeina xua forotsina bárapo tómara po tómara xua Nakom piakoya bara éxana.

¹¹Barichi Sara Abraham piseuri tatsi yábara jumekowünta xua Nakom yawenapaeba. Bekein bapowa akue xua jopa peitaküüpáewatsi xua pexeinaewa pexui áwiya jumekowünta Nakom. Sara pejumekowüntsixa, Nakom kata, barapowa kátatsi peajüntüyapusüüwa, xua barapowa pepabetsinexa pexuyo. Baxua barapowa taéxanatsi tsipéi barapowa jumekowünta pokotsiwa Nakom taexanaena bapówatha xua báyatha Nakom yábara tsiwüünae muxuduta. ¹²Bara barichi Abraham. Bapong bichokono amo tsekae xua bara imoxoyo petüpáewaba tsane xua jopa itaküüpaetsi xua peexanaewa pexui. Dáichitha Nakom kópata xua bapong pexanto xeina xua daxota bapoxonae bapong pía pemómoxi jiwi tatsi bichokono pinmonae naenaexanapona. Bárapo bicheito bichokono pinmonae icha opiteimonae ichi xua bichokono nawita. Matáütano barapomonae icha taetowabeno ichi xua bichokono beno küküjei xua marmene itapatha. Jopa itaküüpaetsi xua bárapo jiwi peununáewatsi icha taetowabeno ichi.

¹³Daxita pomonae jumekowünta Nakom barapomonae yajumekowüntsiya wérapa. Abü kataunxuae jopa katsibichi pokotsiwa báyatha Nakom yábara tsiwüünae muxuduta xua pokotsiwa bapomonae katsibapáebatsi. Dáichitha barapomonae yábara jumekowünta xua pokotsiwang bexa xeinaena xua Nakom bexa katsibina. Barapomonae baxuang yábara jumekowüntsiya tsita wüünaetsi. Barapomonae nantiya nayábara nantaxeina, jeye: “Waxainchi pomonae be wananapaincha jinompaewichi bárapo pena nákuathe xua be icha nakua wérena waponae wi, pomonaetsi xua áwiya jeita dubenanaebíyatsi po nakua yatsikaewa pepa wankua”, jei daxita barapomonae. ¹⁴Tsipéi barapomonae baxua paeba, naka yaputane éxana xua áwiya jeitapona po nakua yatsikaewa pía nakua tatsi. ¹⁵Barapomonae jopa ápara yábara kaunutsiyo ichaxota kopiya po nakua weya Abraham pona. Icha metha baxua yábara paebíchipa metha bara itaküüpaetsípatsi xua kaewa pewarapaewa pía nákuatha ichaxota kopiya báyatha jinompa. ¹⁶Íchitha barapomonae ichichipa po nakua xua bichokono wüünae beyakaincha xua icha nákuang. Báraxua xua po nakua ichichipa, ápara Nakom pía nakua tatsi. Daxota Nakom jopa auriyo xua barapomonae yábara páebatsi xua pinae Nakom barapomonae pía Nakom tatsi. Daxota Nakom barapomonae tsiwüüináetatsi tómara.

¹⁷Nakom Abraham jüntükoyene jüjútatsi peyaputaenexa icha bara metha yatsikaya jumekowúntatsi. Daxota Nakom Abraham itoróbatsi xua pexanto pebexubiwa tsane icha be pókotsi koyeneya ichi xua poxonae duwein bexuba Nakom nexa. Abraham pejumekowúntsixae Nakom daxota pexanto kápana atororo beya pong yatsikaewa kompa tatsi pong pewüng Isaac. Abraham muxu pexanto pebexubi icha be pókotsi koyeneya ichi xua poxonae duwein bexuba Nakom nexa. Bapong baxua éxana bekein Nakom yábara tsiwüünae muxuduta bárapo Abraham pexanto tatsi, jeye: ¹⁸“Bárapo nexanto Isaacxae nantaütsíname nemómoxi susato jiwi”, jei Nakom. ¹⁹Abraham jumekowúnta xua icha Isaac tüpáetsipa Nakom itakúüpatsi xua ekeicha Isaac kaewa asüü éxanatsi poxonae bekein pexanto bexubíchipa. Poxonae Abraham muxu pexanto pebexubi, ápara bara be xua báyatha tüpa, matáütano ápara be xua Abraham pexanto ekeicha kaewa asüü taexainchi.

²⁰Barichi Isaac yábara jumekowúnta xua Nakom yawenapaeba. Daxota bapong Isaac pexántobe tsipaeba, jeye: “Bárabü Nakom paka yawenaena pía paka nekaantobexaebe”, jei Isaac pexantobetha, Jacob irü Esaú.

²¹Barichi Jacob yábara jumekowúnta xua Nakom yawenapaeba. Daxota poxonae bapong juntukuru imoxoyo tüpáenaba barompaya tsipáebabe José pía pexantobetha tatsi xua pía pemomobexae tatsi. Bapong jeye: “Bárabü Nakom paka yawenáenabe pía paka nekaantobexaebe”, jei Jacob José pía pexantobetha tatsi. Bapoxonae bapong Nakom wüünae jáintatsi poxonae náewatha nabüxübabatanotsiya yüüyüütanota tsipéi bichokono amo tsekae.

²²Irü José yábara jumekowúnta xua Nakom yawenapaeba. Daxota poxonae bara imoxoyo tüpáenaba yábara paeba israelmonae. José yábara paeba xua bexa tsane Israel pía pemómoxi susato jiwi tatsi warapaena Egipto nakua weya, xua po nákuatha beya po nakua báyatha Nakom yábara tsiwüünae muxuduta xua Nakom katapaeba. Matáütano José pía pexui kui-itoroba, xua José pía pexui piwa kapanaeinchi Egipto nakua weya po nakua beya ichaxota israelmonae warapaena po nakua xua Nakom yábara tsiwüünae muxuduta xua Nakom katapaeba.

²³Moisés pena tatsi irü paxa tatsi yábara jumekowúnta xua Nakom yawenapaeba. Daxota Moisés matsiyátatsi botha akoibi po xométope poxonae aena nakatsiwa. Moisés penayábara nantaxéinatsi yawa paxa yábara nantaxéinatsi xua Moisés itübüng tsekae. Bapongbe jopa yábara jumekuitaya junuwíyobe xua pokoyene kui-itoroba Faraón pong Egipto nakuapiwi itorobiya pía pepa peewatsinchi xua pinae daxita pexui pebinwüütixi bewa jutebinchi.

²⁴Írürü Moisés yábara jumekowúnta xua Nakom yawenapaeba. Daxota poxonae báyatha piñoba Moisés jume aichaxaibiya naitémata, jeye: “Xang barapowa jopa pexantong tatsin powa Faraón pexantiyo tatsi”, jei Moisés. ²⁵Saya jame bapong Moisés itapétatsi xua irü yawa múxuna átene exanaeinchi Nakom piamonae tatsi xua poxonae barapomonae átene exanaeinchi xua ichamonae átene exanaena pomonae Egipto nakuamonaexae. Moisés ichichipa xua pekana exanaewa tsainchi icha piamonae tatsi takana-ichichi. Moisés jopa benaexanaeyo xua daxitang pexei-naewa tsane pekoutha pokotsiwang xua Faraón xeina. Icha baxuang xeináetsipa Moisés jüntükoyene weiweina exanaetsípatsi bárapo nákuatha xua saya kaepatiyo nexa tsipae pokoyene xua jiwi weiweina éxanatsi xua abe peexanaponaewa. Moisés piamonae jopa benaitematsiyo daxota jopa benotsiyo Faraón pekopiniwa tatsi.

²⁶Ichamonae Moisés tsümüjumetha biatainchi xua ajüntükoyenetane éxanatsi

icha Mesías ichichi pong Nakom itoroba. Poxonae Moisés nayábara jumetane baxua tsita koyenewüinaetsi, beyakaincha xua poxonae bárapo kopei pexeinaewa tsane Egipto nákuatha. Baxua Moisés itapeta tsipéi ichichipa xua pexeinaewa po pentoma bexa tsane Nakom katsina bapongtha peatenexae po pentoma báyatha Nakom yábara tsiwüünae muxuduta.

²⁷Moisés yábara jumekowünta xua Nakom Moisés yawenapáebatsi. Daxota najüntükoyene weta xua pewarapaewa tsane Egipto nakua weya. Moisés jopa junuwiyo bekein yaputane xua Faraón bara kasebina. Bapong Moisés bara saya amsiya pona bara be xaniwaicha tane Nakom xua be yatsikaewa barü poinchi pong peña peponaein xua jiwi jopa itaküüpaetsi xua petaewa. ²⁸Moisés pejume-kowüntsixae Nakom, piamonae kui-itoroba xua peexanaenexa penabanaewa xua Pascua wüing matakabi nexa. Matáütano bapong kui-itoroba piamonae xua pejá-nangtha pekapibinexa daxita bómüxü pekoibotongtha. Bárapo Moisés piamonae tatsi pomonae Israel pía pemómoxi susato jíwixae tatsi baxuang éxana xua daxota matatsunpin jopa tüpa exanaeyo piamonae. Bárapo matatsunpin mérawi patopaena xua pejutebiwa tsane matapin jiwi pomonae piabongtha jopa xeinaeño po jana xua Moisés kui-itoroba xua jiwi bómüxü pekoibotongtha pekapibiwa tsane.

²⁹Bárapo Israel pía pemómoxi susato jiwi tatsi yábara jumekowünta xua Nakom yawenapaeba. Daxota Mar Rojo mene ménetha icha muxunene beya panenebiya xua epataüta iya pona be poxonae xua ira tsewa iya peponaewa. Íchitha poxonae Egipto nakuamonae baraxoya iyiya daxita bunothopa.

³⁰Israel pía pemómoxi susatopiwi tatsi yábara jumekowünta xua Nakom yawenapaeba. Daxota matawakaicha tokuekuéniya enaponeiba pemüxübürü iya siete po matakábibe xua bárapo Jericó tómara peyakaincha toxorotsidutsiwa xua be ibótong. Barapoxonae bárapo Jericó tómara peyatoxorotsiya yakainchadutsiwa baxua íratha jopiya. ³¹Báyatha yábüyo powa Jericó tomarapiwayo Rahab yábara jumekowünta Nakom pong Israel pía pemómoxi susato jiwi tatsi pía Nakom tatsi. Daxota bapowa jopa barü tüpaeyo piamonae xua pía tomarapíwixae poxonae tomarapiwi wérapa jopa pejume-kowüntsixae Nakom pong Israel pía pemómoxi susato jiwi tatsi pía Nakom tatsi. Bapowa Rahab powa kopiya báyatha pesikuiwei-weinaewa pebíwitha. Poxonae Israel pía pemómoxi jíwanamonae namicha pata xua pekui-amanayabiya taenexa Jericó tómaratha, bapoxonae barapowa Rahab matenta weyataeya waba, xua bárapo israelmonae jíwanamonae wábatsi piabotha tatsi.

³²Jopa ekeicha paebiño xua ekeicha pinmonae tayábara paebiwa pomonae pejume-kowüntsiwi Nakom. Jopa neyapujüpaeyo xua jopa taxeinaewa matakabi xua takueikueijeinexa Gedeón yábara, írúno Barac yábara, írúno Sansón yábara, írúno Jefté yábara, írúno David yábara, írúno xua Samuel yábara, írúno pomonae Nakom pía peitorobi jume petapaebiwi tatsi yábara. ³³Daxita barapomonae jumekowünta Nakom. Ichamonae barapomonae jíwana, amanáyaba aiña nakuangpíwitha, pejume-kowüntsixae xua Nakom yawenaena. Ichamonae pejume-kowüntsixae Nakom daxota jíwitha beta xaniwaicha kanamata itoroba. Ichamonae pejume-kowüntsixae Nakom barapomonae katsíbatsi pokotsiwang xua báyatha Nakom yábara tsiwüünae muxuduta. Ichamonae pejume-kowüntsixae Nakom, Nakom éxana xua koibo ákaba neuthüing, xua barapomonae jopa átene peexanaenéxatsi bárapo neuthüing. ³⁴Matáütano ichamonae pejume-kowüntsixae, daxota Nakom

yawena barapomonaexae poxonaexae Nakom itaxutaba éxana po ishoto bichokono pin ishoto xua barapomonaexae po ishótotha táutatsi. Barichi ichamonaexae pejumekowüntsixaexae daxota Nakom kapanenebiya tsaibi barapomonaexae poxonaexae muxu pejutebeibichi peópi sojeiwangtha xua be kusi. Matáütano pomonaexae faefaena, ekeicha Nakom dangwéi éxana. Daxota barapomonaexae dangwéi poxonaexae naba. Ichamonaexae Nakom peyawenaexae amanáyaba pía peaitafaetabí jíwichi xua aiña soldadomonaexaein bicheitongtha. ³⁵Barichi ichamonaexae yábüxi pejumekowüntsixaexae ekeicha kaewa piamonaexae xeina, pomonaexae ekeicha kaewa taasiütsi petüpaewa weya.

Ichamonaexae itakúüpatsi xua panenebiya xua jopa wérapaexae tsane xua icha poxonaexae Nakom itawetatsina. Nama barapomonaexae jopa bepaebiyo baxua daxota barapomonaexae wérapa poxonaexae bichokono kaitakuéintatsi ichamonaexae. Barapomonaexae, pomonaexae pewerapaewi yaputane xua pejumekowüntsixaexae Nakom, daxota Nakom ekeicha asiüü exanaena xua barapomonaexae pepatsiwa tsane Nakom pía nakuatheicha. ³⁶Ichamonaexae pejumekowüntsixaexae Nakom, bichokono ajüntükuikoyenetane tsipéi bichokono kuikapanébatsi ichamonaexae. Matáütano ichamonaerü kuaintébat-si. Ichamonaerü penain müütongtha kübébatsi. Ichamonaerü jiwi peküibongtha kuaranóbatsi. ³⁷Ichamonaexae pejumekowüntsixaexae Nakom, ibótongtha tüpa éxanatsi poxonaexae kuinbábatsi. Matáütano ichamonaexae wérapa poxonaexae epanantarabóbiya thabébatsi serúchotha. Írürü ichamonaexae pejumekowüntsixaexae jutébatsi peopisojéiwangtha xua kusi. Ichamonaerü pejumekowüntsixaexae Nakom, taséikatsi pexaewa, yawa taséikatsi bong, xua daxota saya dubenanáebiya, yawa naxátaba oveja bokotong xuano xua cabra bokotong. Barapomonaexae akopeibiwi tsobenáe, barainebatsino abe taexanebatsino. ³⁸Pomonaexae bárapo kae pin nakuathepiwi Nakom pejumekowüntsiwi yábara páebatsi, yábara jeichiche: “Jopa be kuikopatichi xua barapomonaexae pejinompaewa tsane watómaratha”, yábara jeichichi. Íchitha barapomonaexae Nakom tsita aiñakuichi beyakaincha barapomonaexae, pomonaexae bárapo kae pin nakuathepiwixae. Bárapo Nakom pejumekowüntsiwi dubenanáebiya ichaxota ira xuépana susato tsúrukuaexae nákuatha. Matáütano barapomonaexae demuxúwangtha dubenanáebiya, müthúngthano jinompa, xuano xua duwéi pía múthúngtha jinómpano.

³⁹Bekein Nakom yábara paeba barapomonaexae xua beta peexanaexae pejumekowüntsixaetsi, dáichitha kataunxuae abü barapomonaexae jopa katsibichi pokotsiwa Nakom báyatha yábara tsiwüünaexae muxuduta barapomonaexae, matáütano xua káeinthano. ⁴⁰Barapomonaexae kataunxuae abü jopa katsibichi baxua tsipéi Nakom nakayábara nantaxeina xua bexa tsane irü naka katsibina pokotsiwa bapong tsita wüünaetsi. Pokotsiwa bapong katsibina xua ápara barapomonaexae Nakom naka kayawa múxuna jüntükoyene wüünaexae exanaena.

Meje yábara xua waxainchi bewa exanaponaetsi icha Jesús ichi poxonaexae exanapona

12 ¹Pomonaexae xuaunxuae yábara pákata tínatsi barapomonaexae bichokono pin bicheitomonaexae, pomonaexae pejumekowüntsiwi pokoyene xua Nakom yawenapaeba. Barapomonaexae naka tsita itapeiñaxeina xua áwiya wüünaeya jumekowünta dubenanáebiya bekein átene éxanatsi ichamonaexae. Baxua naka kuiduba xua irü bewa wüünaeya jumekowünta dubenanaebiyaeinchi bekein naka átene éxana ichamonaexae. Bárabü waxainchi daxita nakuibarapentinchi abe waexanáe

kuirukoyenein pókotsi koyenein xua jopa naka yawenaeyo xua Nakom beta wataexanáewatsi. Bárabü waxainchi beitemaya ajüntüsüya áwiya exanapoinchi pokotsiwa Nakom naka kui-itoroba. ²Saya meisha Jesús jütanainaeya jinómpatsi wanaka yawenaenexa. Bapong kopiya bichokono pejumekowüntsixa Nakom daxota bapong wanaka kanamataxeinaein xua wajumekowüntsinea. Matáütano bapong betiya naka éxana xua beta wajumekowüntsiwa poxona kataunxuae áwiya wajinompawea bárapo kae pin nákuathe. Jesús bara saya kópata xua átene exanadútatsi náetotha ichamonae poxonae tüpa éxanatsi. Bapong jopa auriyo bekein náetotha tüpa éxanatsi jiwi peitütha tatsi. Ichamonae ba bichokono aura xua poxonae petüpáe exanáewatsi náetotha. Nama bapong Jesús jopa auriyo poxoru nayábara yaputane xua pírapae poxonae nakana kuiwetinchi xua átene éxanatsi, xuano xua poxonae tüpa éxanatsi náetotha, bapoxona bichokono jüntükoyene weiweinaena. Ánoxuae bapong Jesús eka pía pexeiña peekaethopeibíwatha xua Nakom pía pekoxa weya tatsi xua itabokotheicha ichaxota Nakom eka pía pexeiña peekaethopeibíwatha.

³Jesús pakayábara jütanainaponde xua báyatha pokoyene Jesús abeya éxanatsi pomonae abe peéxanae jiwi. Jesús áwiya beitemaya saya pópona poxonae bekein bichokono átene éxanatsi barapomonae pomonae abe peexanaewi. Daxota jopa paraichinde xua poxonae jopa pana najüntükoyene tsakabim. Matáütano jopa paajüntükoyene faetabinde xua poxonae daxota jopa beta paiña taexanaewa Nakom. ⁴Paiña jüntükoyenéwatha pajumetorobábame abe peéxanae kuirukoyenein xua paiña neexanaeyainwa bárapo koyenein. Bapoxonae jopa panaitematsim xua paiña nejumekowüntsiwa Nakom. Bekein bara baxua dangwéi paéxaname íchitha áwiya kataunxuae jopa pawerapaem xua bárapo koyene paiña neexanaexae icha báyatha Cristo ichi xua tüpa xua bichokono dangweya peexanaexae bárapo koyene. ⁵Paxam pajüntemáiname xua báyatha Nakom paka muxuweta xua paxam bara Nakom pía pexui tatsi pam. Baxua yábara Nakom Pejume Diwésitha paka jeye:

“Tapexui pam, jopa amsiya payábara nantaxeinaeinde pokotsiwa yábara paka muxuwétatsi tapaka kuidubinéxatsi.

Poxonae átene paka éxanatsi jopa ajüntükoyenefaetabiya pajinompaeinde xua yábara tapana nejumekowüntsiwam.

⁶Tsipéi muxuwetsiya kuidubang pomonaetha pomonae antobein.

Matáütano átene exanangno pomonaetha,
pomonae tapexui tsíkotang”,
jei Nakom Pejume Diwésitha.

⁷Áwiya jüntema pajinómpare poxonae bekein Nakom paka átene éxana xua paka nekakuidubixae. Baxua Nakom pákata éxana tsipéi paka nakana éxana pía pexui tatsi pam. Dapo pexuyo aibi, po pexuyo jopa paxa muxuwetsiya kuidubichi xua poxonae icha bichokono antobetsi paxa. ⁸Nakom pía pexui muxuwetsiya kuiduba. Icha Nakom jopa paka muxuwetsiya kuidubichipae, bapoxonae paxam jopa Nakom pía pexui tatsi pam tsipae. Saya be katsa pexui pam tsipae icha be pókotsi pexui ichi po pexui seikaya icha paxa barompa. ⁹Matáütano kaena báyatha poxonae kataunxuae pexuichi waxeiwi naka átene éxana wanaka muxuwetsiya kuidubixae. Dáichitha waxeiwi barükui-iturajínatsi. Waxainchi bewa ichichipatsi xua wataxanáewatsi pokotsiwa naka kui-itoroba pong Waxa Nakom, pong itabokotheicha

pópona. Barapokotsiwa bewa exanaeinchi beyakaincha pokotsiwa éxanatsi xua poxona waxeiwi naka kui-itoroba poxona jinómpatsi bárapo kae pin nákuathe. Baxua bewa exanaeinchi Waxa Nakom pong itabokotheicha pópona wanaka katsinexa peajüntüyapusúü koyenewa. ¹⁰Waxeiwi poxona pexuichi bárapo kae pin nákuathe saya kaepatiyo naka muxuwetsiya kuiduba. Baxua nákata éxana icha be pókotsi koyeneya xua ichichipa xua tsita wüünaetsi. Íchitha nama Nakom naka muxuwetsiya kuiduba wanaka yawenaewa tsane. Matáütano baxua nákata éxana xua wanaka kana exanaewa tsane xua bichokono wajüntükoyene xanepanaewichi, icha Nakom ichi xua bichokono pejüntükoyene wüünaein. ¹¹Poxona naka átene éxana bara bapoxona nantaxéinatsi xua jopa nákata xaexaenaekaeyo, tsipéi bara xaniwaicha naka átene éxana. Ichamona yábara kuikópaba xua bara nakuiduba xua poxona bekein Nakom átene éxana, pemuxuwetsiya kuidubixae. Barapomona jame jopa natsikuentsí tsane xua abe peexanaexae bapongtha. Barapomona xeinaena pejüntükoyene wüünaewa Nakomtha xuano jüntema dubenanaebiyaena.

Meje yábara xua poxona Nakom naka muxuweta xua jopa bewa Nakom itawetichi

¹²Yáitama pajüntükoyene faefáename, xua paiña nejumekowüntsiwa daxota paiñakoutha pana najüntükoyene tsakábare xua beta paiña nejumekowüntsiwa tsane Nakom. Matáütano xua payábara ajüntükoyenerewem tsaibi ichawang. Pana najüntükoyene itoróbare xua áwiya ayapusüüya paiña neexanaponaewa tsane. ¹³Paiñaxoba icha diwesi pajumekowüntame po diwesi xua jopa Nakom Pejume Diwesi tatsi. Ü meisha paexánare pokotsiwa Nakom Pejume Diwésitha yábara paeba xua beta paiña nejumekowüntsiwa. Icha baxua paexanaetsípame irü ichamona barichipáe. Bekein barapomona kopiya jüntükoyene faefaenáetsipa pejumekowüntsiwatha íchitha bapoxona beta exanaponáetsipa xua pejumekowüntsiwa pía paka kuitaexae.

¹⁴Nantiya daxita jiwi ajüntüyapusüüya betiya pana nabarü jüntemiya jinómpare. Bichokono pana najüntükoyene wüünae éxande Nakomtha xua jopa paiña nenatsikuentsinexa xua abe paiña neexanaexae bapongtha, xua paiña netaenexa bapong. Tsipéi pomona jopa xeinaeyo bárapo koyene jopa itakuüpaetsi xua Nakom petáewatsi tsainchi. ¹⁵Dota pam xua ichamona pomona paxam jíwana pam piaxoba jopa ichipaeyo pokoyenewa Nakom yawena barapomonaetha pía peantobéwaxae. Matáütano bárapo ichamona pomona paiñamona jíwanaxae piaxoba abe éxana ichamona peitütha tatsi xua daxota irü ichamona pebarichinexa xua abe peexanaewa. ¹⁶Ichamona pomona paxam jíwana pam, piaxoba nota icha yabüxitha, powaxi jopa xapain barompaya pía séurixi. Matáütano dota pam xua ichamona paxam jíwana pam jopa tsita pekuipawi tsainchi pokoyénéwang xua Nakom piáwang tatsi. Bárapo koyene Esaú éxana pong kaena báyatha tüpa. Bapong Esaú jopa tsita aiña jumekuíyotsi pokotsiwa báyatha Nakom yábara tsiwüünae muxuduta xua bepa pinae Nakom Esaú yaweneibichi. Barapong Esaú piyainxae peyapintha Jacobtha kata pokoyene xua piakoya pekanamataxeinae koyenewa pokoyene matapin ba xeina. Tsipéi Esaú jopa jumekowüntsiyo Nakom daxota nata kaenaeta bárapo koyenewa xua nata matómata pexaewa xua saya kae penabanáewiyo. ¹⁷Paxam payaputáneme xua bapong Esaú pirapaeyo ichichipa xua ekeicha kaewa pexeinaewa tsane xua pokoyene peaiñakuí koyene, pokoyene

matapin ba xeinaena xua paxa kátatsi. Bárapo koyene pokoyene xua koxiyüing tawüüka pexanto pong matapin xua Nakom peyawenaewa tsane. Íchitha bapong Esaú péyapin kata bárapo koyene xua matómata púpara. Bekein bara bapong aurana naya kauntsiya wekoyeya paeba, íchitha jopa itaküüpaetsi xua kaewa xeinaena bárapo koyene pokoyene xua ba matapin xeina.

¹⁸Kaena báyatha pía Nakom kakuita ponaetsi Israel pía pemómoxi susato jiwi tatsi demuxuwa itabaratha umena poxonae Nakom Moisés kátatsi pía peitorobi koyenewa. Barapomonaе jumetane pokotsiwa Nakom paeba yawa tane demuxuwa. Íchitha nama paxam jopa beparaichim. Jopa panantawenonaem xua paumenáename demuxuwa itabaratha xua paiña nekakitaponaenexa Nakom. Poxonae Israel pía pemómoxi susato jiwi tatsi umena bárapo demuxuwa itabaratha, baxoyo pin ishoto ungueika bárapo demuxúwatha. Matáütano bapoxonaе bichokono kirei, yáwano nobongno. Matáütano pin joibo baxoyo ungueika. Íchitha jopa bara paichim, jopa pataem baxuang. ¹⁹Paxam jopa pajumetaem peobiwa jume po peobiwa pewüing trompeta nain matawüing, icha poxonaе bárapo Israel pía pemómoxi susato jiwi tatsi ichi xua jumetane bárapo trompeta jume. Paxam jopa pajumetaem Nakom pejume poxonaе Nakom kueikueijeі bárapo Israel pía pemómoxi susato jíwitha tatsi bárapo demuxúwatha. Pomonaе jumetane bárapo jume, bárapo israelmonaexae Moisés jume itoróbatsi xua bepa pinae Nakom ekeicha jopa pepaеbiwa tsane. ²⁰Barapomonaе baxua Nakom jumematawéntatsi tsipéi bichokono pijunuwi xua pokotsiwa Nakom itorobina. Poxonaе itoroba Nakom jeye: “Pong nataxunajáyata bárapo demuxuwa bewa bapong pabexubim ibótongtha. Jopa aiñakuiyo bekein icha metha duwein tsipae, xuano icha metha bekein jintong tsipae”, jei Nakom. ²¹Barapomonaе bichokono junuwa pokotsiwa xua tane bárapo demuxúwatha irü Moisés bichokono junuwa. Daxota paeba, jeye: “Bichokono tajunuwiji-jiyang”, jei Moisés.

²²Jame ánoxuae paiña nejumekowüntsixae Nakom, bapong paka yábara kui-kópata xua paiña nepatsiwa tsane bapong pía tómaratha tatsi, po tómara pewüing Jerusalén tómara. Bárapo tómara eka ichaxota po demuxuwa pewüing Sión. Bárapo tómara Nakom pía tómara tatsi pong ataya tsitekaeya asüüya pepoponaein. Bárapo tómara xua pepa Jerusalén tómara Nakom pía nakuatheicha tatsi eka. Matáütano papatsíname baxoteicha ichaxota jinompa ayeimonaе matatsunpiwi, xua weiwei-naeya nanakaetutsina xua pía nanabarü wüünae jainchinexa Nakom. ²³Matáütano pajumekowúntame Jesús xua paiña nepatsinexa ichaxota Nakom piamonaе tatsi nakaetuta pomonaе Nakom pía diborotha wüingdubena xua itabokotheicha. Bari-chi papatsíname Nakomtha, pong yábara paebina daxita jiwi xua penatsikuentsiwa xua abe peexanaexae. Matáütano papatsíname ichaxota jiwi pía jumopeintünaxü tatsi jinompa pomonaе xua beta éxana xuano xua Nakom beta kana jüntükoyene wetsiya wüünaeya éxana. ²⁴Matáüta papatsíname ichaxota Jesús pópona pong jiwi peyábara jumeyawenaein Nakomtha xua jiwi pepatsiwa tsane Nakomtheicha. Matáütano bapong nákata katsika Nakom pía pena peyábara tsiwüünae muxudutsiwa tatsi. Bapong pía pejana tatsi xua bárapo jana pepichapabarenaexae Nakom naka yábara jüntükoyene jüntemaina abe waexanáе kuirukoyenein. Barapong pía pejana tatsi jiwi beta kana éxanatsi beyakaincha Abel pía pejana tatsi. Tsipéi poxonaе bapong bexotsi, jopa nantawenonaeyo xua bapong peyantomatsíwatsi. Íchitha poxonaе Abel bexotsi, nantawénona xua peyantomatsíwatsi.

²⁵Dota pam. Jopa bewa pajume itawetsim Cristo pong wanaka tsipaebixáe Nakom yábara. Pomonae báyatha Nakom jume itawétatsi poxonae bekein Moisés muxuweta jiwi bárapo írathe Nakom nexa, barapomonae jopa Nakom kapanene-biyaeyo xua átene abe pía peexanaexae. Waxainchi jopa naka itaküüpaeyo xua panenebíyatsi xua aténetsi abe waexanáe koyenéwangtha icha jopa Nakom jume-naitaewatichi xua itaboko wétsika wanaka tsipaebiwa. Waxainchi bichokono nama aténetsi, beyakaincha barapomonae xua átene abe pía peéxanae koyenéwangtha pomonae Moisés barü pópona. ²⁶Kaena báyatha Nakom tsipaeba bárapo irathe-piwi tsike poxonae Moisés pópona, Nakom pía jumetha ira jijíyata éxana. Íchitha ánoxuae Nakom tsiwanaya jeye: “Abü ekeicha bara kaeto tsane ira jijitsin yáwano itaboko théichano jijitsin”, jei Nakom. ²⁷Poxonae Nakom jei: “Abü ekeicha bara kaeto tsane”, jei, naka yaputane éxana xua Nakom aichúrukuae exanaena pokotsiwang xua bárapo kae pin nákuathe xeina pokotsiwang itaküüpatsi xua pejijiyatsíwatsi. Saya meisha jopa aichúrukuae exanáe tsainchi pokotsiwang xua jopa itaküüpaetsi xua pejijiyatsíwatsi xua pokotsiwang Nakom piamonaetha peyábara tsiwüünae muxudutsi koyenewa. ²⁸Nakom pía nakua, ichaxota Nakom itoroba, yáwano xua waxainchi baxota itoróbatsi, bárapo nakua jopa itaküüpaetsi xua jijíyatatsi xua aichúrukuae peexanaenéxatsi. Daxota bewa jeichichi Nakomtha: “Nakom, maisha pajüntükoyene weiweingang pebaxuaxae”, bewa jeichichi. Poxonae Nakom wüünae jaintinchi waxainchi bewa yábara nantaxeinaetsi pía pejüntükoyene wüünae koyenewa tatsi. Matáütano bewa bapong kunuwiya wüünae jaintichi pía peayapusüüwa pexeinaexae. ²⁹Wanakom werawéraka kana éxana jiwi, pomonaetha, pomonae jopa pejumekowüntsíwichi. Nakom baxua exanaena icha be poxonae nawa ichi xua poxonae daxita topowa poxonae taxua.

Meje yábara xua pokotsiwa bewa exanaetsi xua pokotsiwa Nakom tsita wüünaetsi

13 ¹Jopa pana nakuibarapentsinde xua kaemonae nantiya paiña nenaantobewam pomonae be paiña eweicho jiwi paiña nenatsikotáe jiwi pam paiña nejumekowüntsixa Jesucristo. ²Jopa pajüntemainaeinde xua beta paiña netaexaneibiwa tsane pomonae pateiba paiña bongtha pomonae irü pejumekowüntsiwi Nakom tsipéi metha beya jemeicha barapomonae tsipae pomonae Nakom itoroba xua beta paiña nepákata exanaenexa. Kaena báyatha ichamonae pexaewa ápata poxonae matha jemeicha piabotha tapátatsi, xua poxonae jopa xapain yaputaeyo xua deta kou ápara matatsunpiwi.

³Payábara nantükoyene xéinare pomonae jiwi pekübibotha kuaranobébatsi paiña neyawenaenexa barapomonae icha be poxonae paichim xua irü jiwi pekübibotha irü paka kuaranoba. Payábara nantükoyene xéinare pomonae péraxa jübébatsi xua ichamonae éxana paiña neyawenaenexa barapomonae. Tsipéi paxam irü jiwi pam, paka yábara itaküüpatsi xua ichamonae paka nekaperaxajübiwa.

⁴Paxam bewa beta panantaxeinaem poxonae jitha páename xua bárapo koyene paka tsita aiñakuí. Daxota jopa bewa ichawa beya panasikui-weiweina exanaem poxoru paiña séurixi báyatha paxéiname. Tsipéi Nakom yábara paebina jiwi xua penatsikuentsiwa xua abe peexanaexae pomonaetha, pomonae jopa xapain exanaeyo xua be poxonae yábüxi jeita xua pokoyene jiwi jopa yábara kopatsiyo. Matáütano barichi Nakom yábara paebina jiwi xua penatsikuentsiwa xua abe

peexanaexae pomonaetha, pomonae nasikuiweiweina éxana poxonae bekein pía séurixi xeina.

⁵Jopa bichokono paichichipaeinde parátixi. Jame maisha pajüntükoyene weíwéinare paiña nexainaexae pokotsiwa Nakom paka katsiba. Baxua paexande tsipéi Nakom jeye: “Bápana jopa kompa kapópona exanáe tsainchi. Bápana jopa kakuentaponáe tsainchi”, jei Nakom. ⁶Daxota naka itaküüpa xua jumekowüntsiya jeichichi:

“Nakom, pong jiwi Pekanamataxeinaein,
bapong pong xua tana neyawenaein.

Jopa junuwiño poxonae jintong xua abe tanaexanaewa”,
jeichichi.

⁷Payábara kuijüntanáinare paiña nepaka kanamataxeinaewi pomonae báyatha paka kuiduba Nakom Pejume Diwesi. Barapomonae pakuitaema, tsipéi barapomonae beta jumekowüntsiya jinompa beya poxonae barapomonae yakuiya wérapa. Paxam beta pajumekowüntsiya jinómpare icha barapomonae ichi xua beta jumekowüntsiya jinompa.

⁸Jesucristo saya tsitekaeya pepu jüpa exanaponáe. Baxua éxana kaena báyatha, anoxuaeno, xuano xua bara ataya tsitekaenano xua jiwi beta peyawenáewatsi. ⁹Daxota jopa pakopatsinde xua ichamonae paiña nepaka kuidubiwa icha pekuidubi diwesi po diwesi pía diwesi barompa, po diwesi jopa Cristo pía diwesi tatsi. Jame aiñakuí xua naajüntüyapusúü exainchi Nakom pía peántobe koyenéwatha. Pokoyenein xua itoroba xua penabanaewa yábara bárapo koyenein jopa naka ajüntüyapusúü exanaeyo Nakomtha. Bárapo peitorobi koyenewang bápana jopa yawenaetsi pomonae bekein xua exanapona bárapo koyenewang.

¹⁰Waxainchi xéinatsi barompaya wakoyene pokoyene be poxonae xua túxusi éxanatsi Nakom nexa poxonae kaein náetotha naka tsitüpa xua daxota Nakom jopa tsítatsi xua penatsikuentsiwa xéinatsi xua abe waexanaexae. Baxua ápara xua poxonae Cristo tüpa náetotha abe waexanáe kuirukoyenein nexa. Po sacerdotepiwi xua nakuita Nakom pía tütutha anserabokototha xua kaena báyatha barapókotsi koyene jopa itaküüpaetsi xua pexeinaewa bárapo koyene tsipéi bárapo sacerdotemonae kataunxuae jutebeiba duwéi jiwi abe pía peéxanae kuirukoyenein tatsi nexa. ¹¹Kaena báyatha pong pepa sacerdotépin, duwein jana kapaneiba ichaxota po tutu yatsikaewa Nakom pía tutu tatsi po tutu bichokono peaiñakuí tutu. Bapong baxua éxana xua Nakom peyábara jüntemainaenexa jiwi abe pía peéxanae koyenewang tatsi. Bapoxonae bárapo duwein ompin táutatsi tómara kuariya beya. ¹²Cristo barichichi. Tómara kuariya beya tüpa exanadútatsi náetotha, xua daxita jiwi pejüntükoyene wüünae exanaenexa tsainchi Nakom. Cristo pejana pichapabarenaexae poxonae tüpa, Nakom jopa tsítatsi xua jiwi penatsikuentsiwa xua abe peexanaexae. ¹³Ichamonae Jesús aura éxanatsi poxonae tómara kuaríyatha tüpa exanadútatsi náetotha. Bárabü kópatatsi xua ichamonae irü naka aura éxana wajumekowüntsixa Jesús xua daxota naka átene éxana icha Jesús ichichi. ¹⁴Bárapo kae pin nákuathe jopa xéinatsi tómara, po tómara ataya tsitekaeya ayapusúü tsungkuae. Jame wüünaeya éwatatsi, po tómara xua bexa patopáetsika Nakom pía nakua wétsika tatsi. ¹⁵Daxota waxainchi bewa wüünae jainteibichi Nakom tsipéi Jesucristo naka tsitüpa. Poxonae Nakom wüünae jáintatsi wajúmetha baxua icha be poxonae ichi poxonae duwein táutatsi poxonae túxusi éxanatsi Nakom nexa.

Nakom wüünae jáintatsi jeichichi: “Nakom maisha bichokono nejüntükoyene wüünaein”, jeichichi. ¹⁶Jopa pajüntemainaeinde pokoyene xua beta paiña taexanaewa ichamona. Paiñawang panata jíwana wetsábare pokotsiwang xua paxéiname xua paiña nekatsibinexa pomona xua jopa xeinaeyo. Tsipéi poxona xua paéxaname, bichokono wüünae icha be ichi poxona xua paéxaname poxona duwein patáutame xua patúxusi éxaname Nakom nexa pokotsiwa Nakom tsita wüünaetsi.

¹⁷Paexande pokotsiwa paka kui-itoroba pomona xua paiña nepaka kanamataxeinaewi. Matáütano saya barapomonaetha pajumenaitáware. Pabarükui-iturajínare barapomona xua tsipéi barapomona paka jüntükoyene eéniya éwata. Barapomona yaputane xua bexa tsane Nakom barapomona yábara paebina xua penatsikuentsiwa xua abe peexanaexae icha barapomona xua jopa beta paka jüntükoyene eéniya ewatsiyo. Bara pakópare xua barapomona xua jüntükoyene weiweina éxanatsi poxona xua jüntükoyene eéniya éwata xua jopa pejüntükoyene wekoyeinexa xua abe paiña neexanaexae. Tsipéi icha barapomona xua jüntükoyene wekoyéi baxua xapain jopa paka yawenaeyo.

¹⁸Nakomtha painta wüükare. Bara payaputang xua pata jüntükoyene pana netsipaeba xua pinae bara beta paéxanang. Paxang paichichipang xua áwiya beta pata exanaewa daxita koyenewang. ¹⁹Paka wüükatsi xua paiña inta wüükaenexam tsane Nakomtha xua Nakom bara inta pekopatsinexa xua methaunxuae tapaka siwaponae xua tsainchi ekeicha.

Meje yábara xua najumewetsiya paeba pong tina

²⁰Nakom, barapong peyajüntükoyenejinain xua jüntema pepoponaewa. Barapong Nakom Jesús kaewa asiüü éxanatsi petüpaewa weya pong Wanaka namataxeinaein. Bapong Jesucristo pong pepa Peewatsin xua daxita karepaya jiwí peewatsinchi icha be pókotsin oveja beta peewatsin ichi. Bapong Jesucristo pejana pichapabarenaexae poxona tüpa, kana kuiwétsiya éxana pokoyene xua báyatha Nakom yábara tsiwüünae muxuduta pokoyene xua ataya tsitekaeya tsane. ²¹Bárabü barapong Nakom paka jüntükoyene wüünae exanaena xua jopa paiña nenatsikuentsinexa xua abe paiña neexanaexae. Matáütano bü bara paka katsina xua daxita pokotsiwang panantawénoname xua xuang wüünaeya paiña exanaenexa pokoyenein Nakom ichichipa. Barichi bárabü Jesucristo pía peayapusüüwa naka kana exanaena xua exanaeinchi pokoyene Nakom tsita wüünaetsi. ¡Bárabü jiwí Cristo ataya wüünae jaintinchi pexeinaexae peayapusüü koyenewang! Je, bara ichi tsane.

²²Tamona pam, pomona pam irü paiña nejumekowüntsixa paka itoróbatsi xua bepijawa jopa payábara jumekuí aitakonaende pojumein paka muxuwétatsi, bárapo tsika cártiyo po cártiyo imoxoyo jume tsekae. ²³Maisha ichichipang xua paiña neyaputaewa tsane xua Timoteo báyatha kópatatsi jiwí pekübibó weya. Barapong be wayapin watsikotaein pejumekowüntsixaerü Jesucristo. Ichaunxuae bapong taxantha patopaena bapong methaunxuae nebarü iya tsane paiña xaiña beya xua ekeicha tapaka siwaponae xua tsainchi.

²⁴Painta jakóbare daxita pomona xua paiña nepaka kanamataxeinaewi. Írüno painta daxita jakóbare pomona xua pejumekowüntsíwirü Jesucristo. Italia nakua-monaepiwi barapomona paka jakoba, pomona xua irü pejumekowüntsiwi.

²⁵Bárabü Nakom daxita pam bichokono paka yawenaena pía paiña nepaka kaantobéwaxae.

Meje Po Carte Santiago Tatina, Pomonaes Jesucristo Pejumekowüntsiwi Tatínatsi

Meje yábara poxonaes Santiago tamrópata pítaba xua tatina pomonaetha, pomonaes pejumekowüntsiwi pomonaes xua tajü jinompa

1 ¹Xang, Santiago pongxaein Nakom amanaya pía petanakuichin tatsin irü Jesucristo pong jiwi Pekanamataxeinaein amanaya pía petanakuichin tátsinno. Paka jakóbatsi pomonaes Israel pía saineiwi tatsi pam, pong kaena báyatha tüpa. Israel doce po pexántobe xeina, pomonaes kaena báyatha wérapa.

Paxam bárapo doce po bicheito matabüxümonaebe pía sainei jiwi tatsi pam, pomonaes pam xua ánoxuae tajü nakayayatsiya pajinómpame daxita nákuangtha xua paiña pepa nakua weya.

Meje yábara xua po peyaputáe koyene Nakom pía peyaputáe koyenewa tatsi

²Tamonaes pam pomonaes irü paiña nejumekowüntsi jiwi pam Cristo, bewa jüntükoyene weiweinaya pajinompaein poxonaes bekein pákata ayapubé tsaibi tsane ichauxi. ³Poxonaes pákata ayapubé tsouneibi ichauxi íchitha beitatemaya áwiya ayapusüüya pajumekokowüntapóname, bapoxonaes payaputáneme xua paantüyapusüüya amanáyabame pokotsiwa xua paka átene éxana. ⁴Bara saya beitatemaya payábara kuikópare bárapo koyene xua ayapusüüya jumekokowüntapona paka nekana exanaenexa beya poxonaes paiña jüntükoyene Nakom petsita-wüünaenéxatsi. Bapoxonaes paiña jüntükoyeneintha jopa paxeinaem tsane pokotsiwa pákata seika. ⁵Icha kaein paxam jíwana pam taséikatsi peyaputáe koyene xua jopa yaputaeyo pokotsiwa Nakom ichichipa bapong bewa Nakomtha tsipaebina xua pekatsinéxatsi peyaputáe koyene pokotsiwa bapong ichichipa. Nakom amanaya katsina nawita bárapo peyaputáe koyene. Matáütano Nakom jopa aenae-aeneya itawetsiyo poxonaes kata. ⁶Dáichitha jame bewa jumekowüntsiya pawüükáename. Matáüta jopa bübüjeya pawüükaeinde Nakomtha. Tsipéi pong bübüjeya wüüka Nakomtha, bapong ichawa beya tamrópata nantaxeinapenteiba icha be pókotsi koyene jüta ichi poxonaes ba marátsaka joibo ichawa beya kaya tsaibi icha muxunene beya. ⁷Pong barapókotsi koyeneya éxana, Nakom ba jopa katsiyo bapókotsi jintongtha, tsipéi jopa jumekowüntsiya wüükaeyo Nakom pong jiwi Pekanamataxeinaein. ⁸Bapong jopa xeinaeyo pokotsiwa Nakom kata tsipéi bapong ánoxuae kaewa yábara nantaxeina. Baya ekeicha ichawa yábara nantaxeina. Jopa itaküüpaetsi xua beta peponaewa.

⁹Pong xua Jesucristo pejumekowüntsin, bapong bekein saya tsiwiyo kopei xeina, bapong bewa jüntemiya jüntükoyene weiweinaeya poponaena tsipéi bapong

Nakom peitabaratha aiñakuí penaexanaein. ¹⁰⁻¹¹Matáütano pong kopiya kopei pexeinaein pongtha pong bekein Nakom kuiyábara kópata xua bapong peakopei-bin náexana, bewa jüntema poponaena pejumekowüntsixae Nakom. Poxonae bapong tüpaena, bápána jopa kuenta tüpáe pokoyene xua bapong pejumekowüntsiwa. Íchitha icha bapong jopa jumekowüntsiyo kopei pexeinaexae, bapong saya kaeto nakuita dukuanaebiya bapoxonae kuenta tüpa kopei poxonae nakuita dukuanaebiya. Bárapo koyene icha be pókotsi jüta koyeneya ichi xua pentono. Bara kaeto matono weiweinaeya umena. Kotakaya xometo ekoina yáwano atsa bichokono, naepanaewang tsakiwa, pentónongno othopeika. Werawéraka xua matono itúpana. Pong kopei pexeinaein bapong tüpaena, saya werawerakaena icha pentono ichi xua werawéraka.

**Meje yábara poxonae jiwi pemuxujaiñabíwatsi
xua abe peexanaewa tsane**

¹²Nakom jüjüta pomonaetha, pomonae pejumekowüntsíwichi pía yaputaetsi icha barapomonae xaniwaicha antobetsi. Pong xua akuiyapusüüya jumekowüntsiya pópona poxonae bara bekein Nakom jüntükoyene jüjüta, jame bapong jüntükoyene weiweinaeya pópona. Poxonae yapukaewa xua bapong jüntükoyene jüjútatsi bapoxonae Nakom yábara wüünae muxudutsina xua bexa bapong Nakom pía nakua beicha peajüntükoyenyapusúüwatha ponaena. Bárapo peyábara tsiwüünae muxudutsiwa Nakom kata pomonaetha, pomonae peantobewixaetsi. ¹³Poxonae ichüng matowa jüntükoyene jüjútatsi xua abe peexanaenexa, bapong jopa bewa nantaxeinae xua metha baxua Nakom kana éxana bapongtha. Tsipéi Nakom bápána jopa jichipáe xua abe peexanaewa tsane. Matáüta Nakom ichamonaetha jopa bápána kana exanaeyo xua pejüntükoyene jüjütsiwa xua barapomonae abe peexanaewa tsane. ¹⁴Ápara jame nama pong jüntükoyene jüjútatsi abe peexanaenexa, bapong kopiya pejüntükoyénetha nantaxeinaeya pópona xua abe peexanaenexa. Bapoxonae poxonae xaniwaicha jüntükoyene jüjútatsi xua abe peexanaenexa bara bapong éxana xua abe éxana. ¹⁵Pong xua abe éxana bapong éxana po peabe exanáe kuirukoyene kopiya yábara nantaxeina. Icha bapong áwiya abe éxana dukuanaebiya matapaiña tüpa abe peéxanae kuirukoyene peexanaexae bichokono.

¹⁶Tamonae pam paxam pomonae tapaka kaantobéwichi pam. Jopa paiñakoutha panantaxeinaeinde xua pajam: “Nakom nemuxujáiñaba xua abe taexanaewa tsane”, jopa pajande. ¹⁷Daxita xua wüünae, saya meisha baxuang Nakom nákata itorobika peitaboko wétsika. Bapong Nakom exanaduba daxitang xua pokotsiwa yonoyonojei tsurubena peitabókotha. Nakom jopa bápána ichawa beya pepaebiya exanaein. Bapong peyapenthiya jinaein matakeitha yawa merawíthano. Jopa exanaeyo icha bárapo pekoichang ichi xua pentha tsaibi yawa kirei tsaibi. Dapong aibi pong itaküüpatsi xua itoróbatsi Nakom xua icha koyeneya peexanaewa xua pokotsiwa bapong piakoya ichichipa éxana. ¹⁸Poxoru saya Nakom piakoutha ichichipa daxota naka kata peantüyapusüüwa po peantüyapusüüwa ataya tsiteka. Baxua naka kata poxonae jumekowüntsiya jumetaínchi Nakom pía pexaiñéi jume diwesi tatsi. Poxonae Nakom baxua naka kana éxana bara waxainchi piamonae jiwi tatsichi xua waxainchi ichamonae toxéinchiya jumekowúntatsi. Xua kopiya wajumekowüntsixae, Nakom naka kana éxana xua pomonaetsi pomonae

wajüntükoyene wüünae jíwichi Nakom nexa. Daxota Nakom tsita be peaiñakuí jíwichi beyakaincha ichamonaе.

Meje yábara pomonaе xaniyeya pepa pejumekowüntsiwi Nakom

¹⁹Tamonae pam pomonaе bichokono tapaka kaántobe jíwichi pam pakayábara nantaxéinare bárapo diwesi xua jeye: Daxita paxam bewa pewünaeya pana najüntükoyene wüünaeteibim paiña nenamnaewa teibinexa Nakom Pejume Diwesi. Jopa bewa paxainxaiñam xua paiña kueikueijeinexa bárapo diwese ichamonaetha poxonaе kataunxuae jopa paexanaem pokotsiwa bárapo diwesi itoroba. Yawa jopa bichokono anaepanaya pakueikueijande. ²⁰Tsipéi pong anáepana, Nakom jopa taexanaetsi pexeiña koyene pokoyene xua Nakom tsita wüünaetsi. ²¹Bara pabarapende pokoyene abe peéxanae kuirukoyene pokotsiwa panantaxéiname, xuano xua pokotsiwa ichamonaetha pata éxaname. Matáütano panakuibarapende po peabe exanáе kuirukoyene bichokono nawita pokotsiwa ichamonaetha pata éxaname. Matáütano paiña jüntükoyeneintha ita-urakiya pajumekowünde Nakom pía pexaiñéi jume diwesi tatsi. Tsipéi bárapo pexaiñéi jume diwesi xeina peayapüsüüwa xua paka kana éxana xua pajüntükoyene panenebiyam abe paiña neexanáе kuirukoyenein weya.

²²Itapeta paexande, pokotsiwa Nakom Pejume Diwésitha paeba. Jopa metha bepa saya pajumetaem tsipae. Tsipéi paxam paiñakoutha pana namuxuitorobeibichípame icha jopa paexaneibim pokotsiwa xua pajumetaíbame. ²³Pong xua saya jumetane Nakom Pejume Diwesi yawa jopa exanaeyo pokotsiwa Nakom paeba, bapong be pókotsi jintong tsabókototha nayaitane. ²⁴Bara nayaitane. Poxonaе bapong pona kaena bapong yakuinaya náitabara itaxananaya. ²⁵Nakom Pejume Diwesi bichokono wüünae. Bárapo peitorobi diwesi naka jüntükoyene kapanepa éxana abe waexanáе kuirukoyene weya. Íchitha pong jopa jüntemai-naeyo xua pokotsiwa Nakom Pejume Diwésitha paeba, xuano wüünaeya éxana dukuanaebiya pokotsiwa bárapo diwesi itoroba, bapong jüntükoyene weiweina xua pokotsiwa peexanaexae.

²⁶Icha pebin nantaxeina xua daxita jumekowüntsiya éxana Nakom nexa, xua dáichitha jopa naébatо yatakutsiyo poxonaе ichamonaе katsawiya yábara páebatsi, bapong piakoutha namuxuitóroba. Matáütano pokotsiwa jumekowüntsiya exanapona Nakom nexa saya pejumexáеi. ²⁷Pomonaе xaiñeya pepa pejumekowüntsiwi Nakom, barapomonaе jopa abe exanaeyo Nakom peitabaratha, pong Waxa. Pomonaе wüünaeya éxana bewa iche: Bewa yawenáе pomonaе peakoibiwi, yawa bewa yawenaeno powaxi pekuenta werapaewaxichi piséurixi. Matáüta jopa bewa exanáе pókotsi koyene éxana pomonaе jopa pejumekowüntsiwi Nakom.

Meje yábara xua poxonaе jiwi bewa daxita tsita najüpaetsi

2¹Tamonae pam, pomonaе irü paiña nejumekowüntsixae Jesucristo pong Wanaka namataxeinaein. Bapong Jesucristo pong bichokono pejüntükoyene wüünaein. Jopa bewa paexanaem paiñaxantha paiña nejumekowüntsixae xua ichüng bichokono peaiñakuín wüünae penaexanaeinxae beyakaincha ichüng xua jopa wüünae penaexanaeinxae xua daxota bapong katsapin pakana éxaname. ²Ichakuitha metha be pókotsi koyeneya tsipae, xua meje: Metha poxonaе paxam panakaetutsípame, bapoxonaе írürü pebinbe patopaetsípabe. Metha bapongbe

joniyaetsípabe baxota. Ichüing nakobesí xátaba anillong pokotsiwang daedaena. Matáütano paparuwa namaxátata xua müü daedaena. Nama irü ichüing akopeibi, nama dapong saya pía penamaxatatsiwa taabetsi. ³Metha pong kopei pexeinaein pantenta weyataeya wabichípame. Metha pajam tsipaem bapongtha: “Xote ékare ichaxota pexeña peekáewatha”, pajam tsipaem. Íchitha nama pongtha akopeibi, jopa pantenta weyataeya wabichipaem. Bapongtha pajam tsipae: “Bara beungkuíyama, ichakuitha bara saya íratha ékare”, pajam tsipaem. ⁴Icha metha baxua paexanaetsípame bapoxonae abeya panantaxeinaetsipame xua jiwi jopa najüpaeyo. Bapoxonae paxam pana nakana éxaname be pomonae jiwi paiña neyábara paebí jiwi pam xua penatsikuentsiwa yábara xua abe peexanaexae.

⁵Tamonae pam pomonae irü paiña nejumekowüntsixae Jesucristo, bichokono paka antobetsi. Ínkane pajumetaema, xuaje: Nakom itapeta pomonae peakopeibiwi xua barapomonae bichokono pejumekowüntsinea. Matáütano Nakom katsibina barapomonaetha pokotsiwa báyatha júntüna jeba pía peitorobi nakuatheicha pía peantobewixaetsi. ⁶Íchitha nama jopa paweyataem pong bárapo peakopeibin. ¿Eta xua metha baxua paraichim? Pomonae ba kopei pexeinaewi pomonae paweyatáneme barapomonae ba dangweya paka itoroba nama. Matáütano barapomonae ba pentakaponaewi peitabaratha paka kápona xua abeya pía paka nekayábara paebinexa. ⁷Barapomonae pomonae kopei pexeinaewi ápara Jesucristo abe yábara páebatsi, pongtha pong waxainchi wajumekowünta dubenanaebiyaxaetsi, naka jei, “Cristobarümonae”, naka jei.

⁸Icha ichichipa paéxaname Nakom peitorobi jumekoyenewa, moya pejumekoya paexande xua Nakom Pejume Diwésitha jeye: “Paantobeinde ichamonae, pomonae paiña nepaka tsikuárabü enaewi icha paichim xua paiñakoutha pana naántobem”, jei xua bárapo diwésitha. Moya bara beta paexanáename. ⁹Poxonae ichamonae aiñakuí pakana éxaname xua beyakaincha ichamonae, bapoxonae paxam ápara abe paéxaname. Matáütano ápara paxam pomonae abe paiña neexanaewi, tsipéi jopa paexanaem pokotsiwa Nakom penajumekaitorobí koyenéwatha paeba. ¹⁰Icha ichüing jumejejei xua peexanaewa tsane pokotsiwa Nakom penajumekaitorobí koyenéwatha paeba, dáichitha bara kaewiyo seikanaya xua peexanaewa tsane, bapong Nakom tsita natsikuéntatsi xua abe peexanaexae. Bara bekein saya kaewiyo seikanaya, barápara Nakom tane xua daxita tsita abetsi. ¹¹Nakom namchi: “Jopa panasikui-wainmeinichinde poxonae jitha paiña neenáewatha”, jei Nakom. Yawa namchino: “Jopa bexubinde ichüing”, jei Nakom. Íchitha icha bekein jopa panasikui-wainmeinichim, dáichitha pabexúbame ichüing báraxua be poxonae daxita abe pakayábara éxaname Nakom penajumekaitorobí koyenewa. ¹²Paxam bewa beta wüünaeya papaebim. Matáütano bewa beta pajinompam. Tsipéi bexa tsane Nakom paka yábara paebina paiña nenatsikuentsiwa abe paiña neexanaexae bapongtha. Paxam jopa payábara jumekuiya exanaem pokotsiwa Nakom itoroba penajumekaitorobí koyenéwatha. Icha bárapo koyene éxanatsi naka kana éxana xua wapanenebíwatsi Nakom beya. ¹³Pomonae jopa yábara nantanuweya nantaxeinaeyo xua ichamonae peyawenaenexa tsainchi xuya Nakom bara jútiya ichane barapomonaetha. Íchitha pomonae xua yábara nantanuweya nantaxeina xua ichamonae peyawenaenexa tsainchi, xuya Nakom bara jútiya ichane po matakábitha jiwi yábara paebinchi xua penatsikuentsiwa xua abe peexanaexae.

**Meje yábara xua Nakom pejumekowüntsíwichi
pía pexeiña peéxanae koyenewang tatsi**

¹⁴Tamonae pam, irü pomonae paiña nejumekowüntsixae Jesucristo. ¿Eta xua metha tsipae? Metha ichüing jei: Xang Nakom Pejume Diwesi jumekowüntang, jei, íchitha jopa betiya wüünaeya exanaeyo. ¿Bara metha bapong najüntükoyene kapanepáetsipa Nakom beya? Ápara jume tsipae, jopa najüntükoyene kapanepae tsipae. ¹⁵⁻¹⁶Ichakuitha metha tsipae, metha panantaütsipame pomonae pejumekowüntsiwi Jesucristo paiñaxantha. Barapomonae metha ta-aibichipaetsi paparuwang xua pokotsiwa ake nexa, yawa xua taséikatsi pexaewa penabanaewanexa. Metha ichüing pong paiñamonae jíwana jintong bapomonaetha jeye: “Bara jüntema panawibíyama, paparuwa panamaxatabareno, bara beta panabanareno”, jei. Dáichitha bapong jopa katsiyo barapomonaetha pokotsiwa barapomonae nantawénona xua pejinompaewa nexa. Baxua bápána ba ichamonae jopa yawenaetsi icha saya ba ü xua páebatsi. ¹⁷Barichi xua pong pejumekowüntsín Nakom Pejume Diwesi. Icha bapong jopa yawenaeyo ichüingtha pongtha pong nantawénona ichawa xua pía peponaewa nexa, bapoxonae bapong pía pejumekowüntsiwa Nakomtha be kayábara jüntemaina.

¹⁸Ichakuitha jintong jeye: “Ichamonae bichokono jumekowünta pokotsiwa Nakom itoroba bekein jopa yawenaeyo ichamonae. Seikaya ichamonae bichokono beta yawena ichamonae bekein jopa beta jumekowüntsiyo pokotsiwa Nakom itoroba”, jei. Xang pongxaein Santiago jumenotsin bapongtha: “Pong beta jumekowünta jopa itaküüpaetsi xua netsita éxana xua bapong xaniwaicha jumekowünta pokotsiwa Nakom itoroba poxonae bekein jopa beta yawenaeyo ichamonae. Bapoxonae xang tsita éxanang bapongtha xua xaniwaicha jumekowüntang pokotsiwang Nakom itoroba poxonae éxanang pokotsiwa Nakom neitoroba xua poxonae yawenang ichamonae”, jang tsane. ¹⁹Xam jumekowüntame xua bara kompa pepa Nakom pópona, xua ichüing bapókotsin aibi. Báraxua bara beta nantaxéiname. Íchitha baxua irü kaurimonae jumekowünta yawa bichokono pijunuwi jijiyéi. ²⁰Xam bapokotsim pókotsin ba jopa peyaputaen, ínkane jumetaema. Pong paeba xua pinae jumekowünta pokotsiwa xua Nakom itoroba, xua dáichitha jopa beta exanaeyo ichamonae nexa, bapong pía pejumekowüntsiwa bara be kayábara jüntemaina. ²¹Nakom tsita jüntükoyene wüünaetsi Abraham, pong waámo susatopin, pong kaena báyatha tüpa. Bapong Abraham Nakom jopa tsita natsikuentisichi xua abe peexanaexae, íchitha yábara jumekowüntsiya peexanaexae pokotsiwa Nakom itoroba. Bapong pexanto ishoto beya kápona, petautsinexa xua petúxusi exanaenexa Nakomtha, po pexanto tatsi pewüing Isaac. ²²Ánoxuae payaputáneme xua Abraham jumekowüntsiya éxana pokotsiwa Nakom itoroba. Daxota bapong tsita itapeiñaxeina xua poxonae éxana baxua xua yatsikaewa bara xeina pepa pejumekowüntsi koyenewa. ²³Nakom éxana xua kaena báyatha Pejume Diwésitha jeye: “Abraham jumekowüntsiya éxana pokotsiwa Nakom itoroba. Daxota Nakom tsita jüntükoyene wüünaetsi jopa penatsikuentisixae xua abe peexanaexae bapongtha”, jei Nakom Pejume Diwesi. Bárapo Nakom Pejume Diwesi tatsi xaiñéi, tsipéi Nakom éxana baxua. Daxota kaena báyatha Abraham yábara jeichichi: “Ápara Abraham Nakom pía jintong tatsi”, jeichichi.

²⁴Ánoxuae bara payaputáneme pokotsiwa Nakom tsita jüntükoyene wüünaetsi xua jopa tsita natsikuentisichi xua abe peexanaexae pong éxana pokotsiwa Nakom itoroba. Jopa meisha metha poxoru pejumekowüntsixae. ²⁵Bara kana ichirü Nakom petsiríwatha powa nasikuimatakaeta pebíwitha, pía paratixichi, powa pewüing Rahab, powa kaena báyatha pópona. Nakom tsita jüntükoyene wüünaetsi barapówatha xua poxonae peyawenaexae icha pebinbetha pongbe peitorobínchibe xua poxonae peyantabinéxabe tómara. Barapowa bárapo pebinbe búpana étatsibe piabotha poxonae bapongbe jeitómpatsibe ichamona. Bapoxona pirapaeyo bapowa bapongbe kapanepatsibe icha namto iya xua tómara weya. ²⁶Daxota ánoxuae paka tsipáebatsi, icha pepong ba jopa xeinaeyo pejúmope, ba pepong tüpa. Barichi icha pebin jumekowünta Nakom dáichitha jopa exanaeyo pokotsiwa Nakom itoroba bapoxona pía pejumekowüntsiwa bara be kayábara jüntemaina.

Meje yábara pokotsiwa xua peébatotha pepaebiwa

3 ¹Tamonae pam pomonae irü paiña nejumekowüntsixae Jesucristo. Paxang pajumetang xua pinmonae paiñamonae jíwana ichichipa xua penaexanaewa pomonae jiwi pekuidubiwi Nakom Pejume Diwesi. Dáichitha pinmonae jopa bewa naexanáe pomonae jiwi pekuidubiwi. Báyatha daxita paxam payaputáneme xua paxang pakueikueijang tsurubenanaebiyang Nakom Pejume Diwesi xua jiwi jopa bewa abe exanaena. Daxota poxonae baxua pakueikueijang xua dáichitha abe paéxanang bapoxona Nakom bichokono pana péraxa jübina beyakaincha xua poxonae bapong kana exanaena ichamonaetha. ²Daxita waxainchi ichichípatsi nawita xua abe waexanaewa. Ánoxuae payaputaema, icha ichüing jopa abe exanaeyo xua poxonae paeba bapong jame penthüthü yapuwüünaein. Matáütano bapong itakúüpatsi xua najüntükoyene itoroba daxita pía pepongtha xua beta peexanaewa abe peexanaeyainwa. ³Poxonae waxainchi kawayu wano átatsi penainto xua wanaka kuijejeinexa báraxua ápara xua wakafebabinexa daxita pepong ichaxota waponae. ⁴Barichi payábara nantaxéinare jera po nae pin nae. Bara bekein bichokono pin nae yáwano bara bekein po joibo pin joibo kapubábiya tsaibi, dáichitha pong tafekaeka bapong kafebabekapona ichawa beya xua ichaxota ichichipa peponaewa xua xoyotha tsiwiyo tsekae xoyo ira werukueina. ⁵Icha jera ichi po nae pin nae xua dapokotsiwíyotha kafebabekapona, barichi peébató xua dapókotsi ebatíyo tsekae pepong nexa. Dáichitha bárapo ebatíyotha itakúüpatsi xua yábara eetaponaeya paeba pía peexanaewa poxonae ichamonaéebatsi. Barichi unu itakúüpatsi xua petaxuiwa dákotsi iteretíyotha. ⁶Icha nawa iteretíyo kana ichi unu, peébató bara ichiya éxana daxita koyeneintha. Bekein waébató peyawíyo tsekae xua wapepong jíwana xua pinxáintotsi, íchitha bara itakúüpáekatsi xua bichokono abe éxanatsi naka kana éxana. Waébató naka kana éxana xua waexanaewa daxita abe waexanáe kuirukoyenein xua poxonae wakueikueijeixae wa-ebatotha xua kaurimona pía pentakaponaein tatsi wanaka kui-itorobixae. ⁷Jintong ba itakúüpatsi xua itakoxone éxana daxita duweimonae, pepupunaewi, jomong yawa mene pipichiwangno. Daxita baxua i daxua jintong ba itakoxone éxana. ⁸Nama peébató jopa be baráichichi. Jopa wanaka yapuwüünaewa xua waébató kuidúbatsi xua jopa abe jume pepaebiwa tsane. Waébató bichokono abe tsekae. Itakúüpatsi xua jiwi kana éxanatsi xua ichamonaé pejumetaya anthüthütánewa, icha jomo ichi

xua jiwi ba átene éxanatsi pewánotha xua ichakuitha ba jiwi tüpa éxanatsi xua pewanotsapa pexeinaexae. ⁹Bárapo ebatotha wüünae jáintatsi Nakom pong Waxa. Matáütano abe yábara páebatsi pebiwi bárapo ebatotha. Íchitha bárapo pebíwitha Nakom kaena báyatha fórota daxota bárapo jiwi pía jüntükoyene tatsi jüpa icha Nakom pía jüntükoyene tatsi ichi. ¹⁰Matáütano bárapo koibótotha jumepíchapa xua wüünae pejainchiwa Nakomtha, xuano xua abeya pepaebiwa. Tamonae pam pomonae irü paiña nejumekowüntsixae Jesucristo. Jopa bewa barapókotsi koyenewa paexanaem xua poxonae Nakom wüünae pajáintame xuano xua jiwi abe payábara páebame. ¹¹Po mera natsibotarukua ira büxüpana wétsina, poxonae mene jujuina barapoxonae kaena yawa jopa múxuna jujuinaeyo po mera xeika yawa po mera átsaxa. ¹²Tamonae pam barapókotsi jüta koyeneya ichi poxonae waxainchi úbatsi. Higuera nae jopa ba nakoichiyo olivo naethei, po pethéi aceitunathei matawüing. Yáwano uva ünótotha jopa ba nakoichiyo higuera naethei. Barichi bárapo mene po mera mene natsibotarukua poxonae mene jujuina barapoxonae kaena yawa jopa múxuna jujunaeyo po mera xeika yawa po mera atáe. Barichi wa-ebatotha jopa bewa xéinatsi aiña jumekoyenéwabe pojume wüünae yawa pojume abe.

Meje yábara xua pepa pexaiñeiwa xua peyaputáe koyenewa

¹³Icha paiñaxantha pópona pong bichokono peyaputaein xua yawa pekoxonaein bapong bara bewa moya wüünaeya beta póponae yawa bara bewa moya ita-urakiya póponae. Beta peexanaexae jiwi peitütha, bapoxonae jiwi tane xua bara bapong pong bichokono pepa peyaputaein. ¹⁴Metha paiña jüntükoyénetha paxéiname peuwiwa xua paka jüntükoyene átsaka éxana ichamonaetha. Yawa metha paiñakoutha pana nata éxaname paiñawang pía jiwi wüünae paka yábara paebichi xua pía aiñakuí paka exanaetsi xua beyakaincha ichamonae. Icha paxéiname bárapo peyaputáe koyénebe bapoxonae paiñaxoba paáebame ichamonae paiña pepa neyaputáe jiwi pamxaem. Poxonae baxua papáebame ápara saya panáerabame xua jopa paxaiñam. ¹⁵Ápara bárapo peyaputáe koyene xuaunxuae po peyaputáe koyene yábara paka tsipáebatsi bárapo koyene ápara jiwi nantaxeina bárapo kae pin nákuathe pomonae jopa pejumekowüntsiwi Nakom. Barichi bárapo peyaputáe koyene kauri nantaxeina. Ápara bárapo peyaputáe koyene Nakom wérena jopa ponaeyo. ¹⁶Daxota poxonae ba jiwi pejume uwiwa xeina ichamonaetha yawa ü penata exanáe koyene piáwang bapoxonae ba jiwi jopa beta penantaxeinaewa yawa éxana daxita abe peéxanae kuirukoyenein. ¹⁷Nama pomonae xua peyaputáe koyene xeina xua po peyaputáe koyene Nakom wérena pona, barapomonae kopiya jüntükoyene wüünaeya jinompa yáwano barapomonae jopa naita aenae-aeneyo saya jüntema pejinompaexae. Yawa barapomonae yábara jumebariúkuí iturajina pokotsiwa ichamonaetha paeba. Yawa jumejéjéi xua peexanaewa pokotsiwa ichamonaetha itoroba. Matáütano nantanuweya yábara najüntükoyene xeina peyawenaenexa tsaibi tsane ichamonaetha. Matáütano barapomonae beta wüünaeya exaneiba ichamonaetha nexa xua jopa ichawa beya nantaxeinaeyo xua saya xaniwaichiya éxana. ¹⁸Pomonae xua bichokono ichichipa xua jüntema pejinompaewa, barapomonae kana éxana ichamonaetha, xua ichamonaetha jüntema jinompa xua daxota bárapo ichamonaetha bichokono wüünaeya betiya éxana dubenanáebiya.

**Meje yábara pomonae ichichipa náexana pomonae
jopa pejumekowüntsiwi piamonae tatsi**

4 ¹¿Eta wérena pona bárapo koyene xua pana najumematsontsónobame? ²¿Yáwano eta wérena pona bárapo koyene xua pana nábame? Ápara bárapo koyénebe nafóroba paiña jüntükoyeneintha ichaxota paichichípame xua abe paiña nenantaxeinaewa. ³Ichawa paichichípame íchitha jopa paxeinaem daxota ichüng anaya pabexúbame. Ichawa payábara kui-úwame, íchitha jopa paka itaküüpaeyo xua paxéiname daxota anaya pana nayábara bame. Jopa paxeinaem pokotsiwa paichichípame tsipéi Nakomtha jopa pawüükaem. ⁴Poxonae Nakomtha payábara wúükame pokotsiwa paichichípame, jopa Nakom paka katsiyo tsipéi jopa wüünaeya pawüükaem, saya paiña nata wüükaexae pokotsiwa xua abe paiña neexanaewa tsane. ⁵Maisha paxam kaurimonae pía pepunajinompaewichi pam! Payaputáneme xua pomonae ichichipa náexana pomonae jopa pejumekowüntsiwi Nakom piamonae tatsi, barapomonae ápara ba Nakom peaitafaetabíwichi. Daxota poxonae paichichípame xua pana éxaname bárapo kae pin nakuamonae-piwi piamonae tatsi, ápara panáexaname Nakom pía peaitafaetabíwichi tatsi pam. ⁶Daxota Nakom Pejume Diwesi jeye: “Nakom asiwiya ántobe po jumopetünaxü naka kayawa exanaeya jinompa éxana”, jei. ⁷Íchitha Nakom pía peantüyapusúüwatha naka yawena xua jopa abe waexanaewa tsainchi. Nakom Pejume Diwésitha jeye: “Nakom jopa yawenaeyo pomonaetha, pomonae jiwi peabiwi. Íchitha pía peajüntüyapusúüwatha yawena pomonaetha, pomonae ita-uranaya jinompa xua jopa atsakiyo”, jei. ⁸Pajumejande xua Nakom paka itoroba yawa paexande. Jopa pamuxujande kauri pía pentakaponaein tatsi xua paka tsipaeba. Bapoxonae bapong naetsirikuaena paiña xaiña weya. ⁹Nakomtha patsipáebare, bapoxonae Nakom paka yawenaena. Paxam pomonae abe peéxanae jiwi pam, tsipéi Nakom paántobem yawa pamuxuna antobem po peabe exanáe koyenewa bárapo kae pin nakuathepiwi éxana. Bara panakuíbarapende bárapo abe paiña exanáe koyene. Yáwano Nakom patsita najüntükoyene wüünae éxande. ¹⁰Abe paiña nexanaexae, pana najüntükoyene akáurande, pawekóyande, yawa panantú éxabare. Poxonae pajüntükoyene weiwéiname xua paiña neexanaexae pokotsiwa bárapo kae pin nakuathepiwi éxana, bara ekeicha kaewa pajüntükoyene wekóyande xua paiña neáuraxae. ¹¹Nakom pong jiwi Pekanamataxeinaein pabarükui-iturajínare xua jopa aiñakuí pana nakana exanaem. Bapoxonae Nakom aiñakuí paka kana exanaena.

**Meje yábara xua jopa bewa ichamonae yábara paebichi
tsainchi xua penatsikuentsiwa xua abe peexanaexae**

¹¹Pomonae paiña nejumekowüntsi jiwi pam Jesucristo, jopa bewa ichamonae yábara paebichi tsainchi xua penatsikuentsiwa xua abe peexanaexae. Pong abe yábara paeba pongtha pong Cristo pejumekowüntsindü, bapong múxuna abe yábara paeba Nakom pía peitorobi diwesi. Bapong jopa jumekowüntsiyo pokotsiwa xua bárapo diwesi itoroba xua pinae jopa bewa abe yábara paebichi ichüng xua xeina penatsikuentsiwa xua abe peexanaexae. Bapoxonae bapong natsikuenta Nakomtha bárapo koyenetha tsipéi abe paeba nawita. Poxonae bapong abe yábara paeba Nakom pía peitorobi diwesi bapoxonae bapong be jopa exanaeyo pokoyene

Nakom pía peitorobi koyenéwatha itoroba. ¹²Ápara meisha bapong Nakom pong naka kata pía peitorobi koyenewa. Matáütano bapong kompa pong jiwi peyábara paebin xua penatsikuentsiwa xua abe peexanaexae. Meisha saya bapong itaküü-patsi xua jiwi kapanépati pía nakuatheicha, xua ichakuitha ba jiwi itawétatsi pía nakua weya xua abe peexanaexae. Nama paxam ápara jopa paka itaküüpaeyo xua payábara páebame xua ichamonae pía peéxanae koyenewa tatsi. Matáütano jopa paka itaküüpaeyo xua jiwi pakapanépame Nakom pía nakua beicha tatsi, xuano xua jiwi ba ichakuitha paitawétame Nakom pía nakua weya tatsi abe peexanaexae.

Meje yábara xua kataunxuae jopa nayaputaeyo pokotsiwa xua baya nexa tsane

¹³Ánoxuae pajumetaema xuaje, xua paxam ba pajam: “Ánoxuae, ichakuitha icha jopa ánoxuae tsipae, baya tsane paponaein icha tómaratha. Ichakuitha icha jopa bárapo tómaratha tsipae, paponaein icha tómaratha. Baxota pata tha kae wei yapu othopaetsi, pata kaenaeta dubenanaebiyaetsi, yawa pata parátixi kaetuba dubenanaebiyaetsi”, xua pajam. ¹⁴Jopa baxua panantaxeinaeinde tsipéi jopa payábara yaputaem pokotsiwa baya paiña nejinompaewa tsane. Barapókotsi jüta koyeneya pana natsikotáneme, icha nobo ichi, xua ba kaeto nobo tsungkuae ekeicha kaewana. Barichi jiwi bara kaeto jinompa, ekeicha wérapa. ¹⁵Jame bewa pokotsiwa papaebim xua jeye: “Icha Nakom pong jiwi Pekanamataxeinaein ichichipa xua wajinompaewa, moya jinompaeinchi, yawa exanaeinchi pokotsiwa xuaje, ichakuitha xua icháwano”, xua bewa jei. ¹⁶Ichitha nama paxam, jopa baxua papaebim pokotsiwa icha Nakom ichichipa. Saya paéebame poxoru paichichípame xua paiña neexanaewa pokotsiwa paiñakoutha paichichípame. Icha poxona paichimje xua poxona paéebame bapoxona bara ápara abe peéxanae kuirukoyene paéxaname. ¹⁷Pong xua yaputane xua beta peexanaewa, xua dáichitha jopa baxua exanaeyo, ápara bapong bara abe peéxanae kuirukoyene éxana.

Meje yábara xua pemuxuwetsí koyene pomonaetha, pomonae kopei pexeinaewi

5 ¹Pomonae kopei pexeinaewi pam, pajumetaema xuaje: Payábara siwaweko-yande yawa pana nantanuweya namtsébare xua paiña nepaka tsita jopaexae pokotsiwa xua jopa xaexaenaekaeyo, pokotsiwa xua paka átene éxana. ²Daxita xua xuang paxéiname baxuang daxita tsábana, yawa paiña pexeina pabübürüng xua pemüüftane wüunaewang baxuang daxita ofo xane. ³Paiñawang xua pokotsiwa pewüng oro nain yawa xuano pokotsiwa pewüng plata nain, daxita baxuang tasi-bóunatsi. Baxua paka tsita naitapeiña xeina xua paxam jopa pakatsim ichamonae saya asiwiya pantaropeicha xexeinapóname bárapo kopei. Bárapo kopei pajéebame ánoxuae. Ichitha po matakeitha poxona Nakom yábara paebina jiwi xua penatsikuentsiwa xua abe peexanaexae bapongtha, bárapo matakabi imoxoyo tsane. Nakom werawéraka éxana bárapo kopei xua paiña kopei, icha ishoto ichi xua tauta éxana xua topowa. Bichokono kopei pakaetúbame bekein jopa baxua paka yawenaeyo paiña nepanenebiyaewa po matakeitha nexa, po matakeitha Nakom yábara paebina pokotsiwa jiwi pía peéxanae koyenewang ichakuitha xua metha wüünae, ichakuitha xua metha abe. ⁴Jopa pantomatsim pomonaetha, pomonae pákata nakuita poxonae pákata naweta pexaewa. Paiña kaibixae bárapo pentoma

barapomonaē paka yábara namtsébiya wawái. Yawa Nakom pong jiwi Pekanamataxeinaein, pong daxita pía peitorobi koyene pexeinaein bapong daxita baxua jumetane xua barapomonaē namtsébiya wawái. ⁵Bárapo írathe bichokono kopei paxeina dubenanaebíyame, matáütano paéxana dubenanaebíyame pokotsiwa xua paka jüntükoyene weiweina éxana. Bichokono kopei paakabem po matakeitha poxonaē Nakom paka jutebina, icha jiwi ichi xua natsixuruwéi naxíñaba éxana vaca xua bexa pebexubinexa tsane. ⁶Paxam pomonaē kopei pexeinaē jiwi pam abe payábara páebame pomonaē pejüntükoyenexeikae jiwi. Yáwano pajutébame barapomonaē, bekein jopa itaküüpaetsi xua piakoutha penayawenaewa.

Meje yábara poxonaē Santiago jei: “Jopa pa-aitakonaēinde poxonaē bekein ichamonaē abe pákata éxana”, jei

⁷Tamonaē pam pomonaē irü Jesucristo paiña nejumekowüntsixaē. Beitate-maya pawünaē éware pong jiwi Pekanamataxeinaein, pong Cristo. Jopa pa-aitakonaēinde poxonaē pawünaē éwatame xua poxonaē bekein ichamonaē abe pákata éxana. Bárapo koyene baxua bara paichinde, icha pong pabi pexeinaein ichi poxonaē beitatemaya éwata xua naweta xua naxainwaeta. Bapong jopa aita-konaeyo poxonaē beitatemaya éwata xua ema taatsanaeinchi pía pabi. ⁸Paxam irü bara paichinde. Jopa pa-aitakonaēinde poxonaē pawünaē éwatame pong jiwi Pekanamataxeinaein. Pana najüntükoyene tsakábare xua jüntema paiña nejinom-paewa tsane, tsipéi pong jiwi Pekanamataxeinaein bara nama imoxoyo pewünaeyo tatsoponaetsi xua pepatopaewa.

⁹Tamonaē pam pomonaē irü Jesús paiña nejumekowüntsixaē. Jopa kaemonaē nantíya aita-konaeya pana nayábara paebinde xua abe paiña nenata éxana dubenanaebíyaexae. Icha baxua paéxaname paxam panatsikuéntame Nakomtha tsipéi Nakom pong jiwi peyábara paebin xua penatsikuentsiwa xua abe peexanaexae. Nama imoxoyo tsóponaē poxonaē Nakom itorobina xua jiwi péraxa jübebinchi pomonaē abe peexanaewi. ¹⁰Tamonaē pam matha pataema po diwesi yábare: Pomonaē Nakom peitorobi jume pepaebiwi pomonaē kaena báyatha jinompa, barapomonaē bichokono átene éxanatsi ichamonaē. Bekein bara barapomonaē átene, dáichitha áwiya jopa aita-konaeyo poxonaē abe taéxanatsi ichamonaē. Áwiya barapomonaē pomonaē Nakom peitorobi jume pepaebiwi ba kueikueijeí tsaibi Nakom nexa, pong jiwi Pekanamataxeinaein. ¹¹Waxainchi ba yábara nantaxéinatsi barapomonaē, xua bichokono jüntükoyene weiweina poxonaē beitatemaya áwiya jumekowüntsiya éxana dubenanaebíya poxonaē bekein abe taéxanatsi ichamonaē. Báyatha kaena pajumetaneme xua pinaē pong pewüng Job jopa aita-konaeyo Nakomtha poxonaē bekein Nakom yaperaxaeya jumekowünta dukuanaebíyatsi. Matáütano payaputáneme xua Job ekeicha matapaiña beta taexainchi Nakom, pong jiwi Pekanamataxeinaein tsipéi Nakom jiwi nantanuweya peyábara nantükoyene xeinaeinchi xua jiwi peyawenaenéxatsi.

¹²Jame xuaje aiñakuí: Jopa Nakom pawüngkaunutsinde xua bapong paiña nepaka taewa tsane xua xaniwaicha paiña nepaebiwa poxonaē yábara pana natsíwana wüünaē páebame ichamonaetha pokotsiwa bexa paiña exanaetsi. Poxonaē pajam: “Je”, pam bara, bara paichinde. Poxonaē pajam: “Bara”, pam, bara moya bara jopa paexanaeinde. Bapoxonaē jopa Nakomtha panatsikuentsim tsane abe paiña neexanaexae. Barichi jopa itaboko pawüngkaunutsinde, yawa írano jopa pawüngkaunutsinde, matáütano jopa icha wüngno pawüngkaunutsinde.

¹³Icha ichüing pong paiñamonae jíwana jintong ajüntükoyenetane xua abe petaexanaexaetsi ichamonae, bárabü bewa bapong Nakomtha wüükaena xua peyawenaewa tsainchi. Icha ichüing jüntükoyene weiweina, bárabü bewa bapong peweixi naxünáe xua Nakom wüünae jainchiya peyábara naxünáewatsi. ¹⁴Icha ichüing átene, bewa pawabim penapatáe jiwi, pomonae pekanamataxeinaewi xua kanamataxéinatsi pomonae Nakom pejumekowüntsiwi. Bapoxonae barapomonae bewa tawüükaena xua pong peatenein petawüükaewatsixua Nakom axaibi peexanaenexa. Bapoxonae barapomonae bewa juiña penasíwatha matakaxuebina Cristo pewüingtha pong jiwi Pekanamataxeinaein. ¹⁵Poxonae barapomonae Nakomtha wüüka bewa yábara jumekowüntsiya wüükaena xua bara Nakom pong jiwi Pekanamataxeinaein axaibi éxana bapongtha. Bapoxonae pong átene, jume tsane. Matáütano pong Wanaka namataxeinaein, bapong pong átene, axaibi exanaeinchi. Icha pong átene abe peéxanae kuirukoyene éxana baxua Nakom kayábara jüntemainaena. ¹⁶Daxota paxam, kaemonae nantiya pana natsipaebébare xua poxonae abe nantiya pana nata exanéibame, pajam tsaibinde: “Pin urang, yáitama jopa xapain kata exanaetsi nekayábara jüntemáinare”, pajam tsaibinde. Pong Nakom peitabaratha tatsi jüntükoyene wüünae pópona, poxonae bapong Nakomtha wüüka bichokono peyapusüüwa xeina xua daxota Nakom beta kana éxana bapongtha. ¹⁷Nakom peitorobi jume pepaebin Elías, bapong bara jintong bara wanaka kuijüpaein, pong kaena býatha pópona. Poxonae bapong Nakomtha matowa wüüka xua jopa peruneikaewa tsane, bapoxonae jopa duneikaeyo tres po weibe yawa ekeicha bara kaeto nama. Bapoxonae bárapo nákuatha pin jainbo nakua tsúrukuae. ¹⁸Bapoxonae, poxonae ekeicha Nakomtha wüüka, bapoxonae ekeicha duneika yawa pexuwiwang wüünaeya nawetsiya xuwa.

¹⁹Tamonae pam metha ichüing pong paxam jíwana abe exanapona bekein yaputane xua bewa exanaena pokotsiwa pexaiñeiwang. Icha ichüing yawena bapongtha xua ekeicha kaewa beta peexanaewa tsane bapong, pong yawena, bara beta éxana. ²⁰Pong yawena bewa yaputaena xuaje: Po jintong xua kana éxana ichamonae xua penakuibarapentsiwa abe peéxanae kuirukoyenein, xua ekeicha pejumekowüntsinexa Nakom, barapong jüntükoyene kapanepa éxana barapomonae petüpáe kuirukoyene weya. Matáütano bapong jüntükoyene yawena xua Nakom peyábara jüntemainaewa xua barapomonae abe pía peéxanae kuirukoyenein tatsi xua bekein bichokono nawita.

Baja Santiago.

Meje Po Carte Kopiya Pedro Tatina, Pomonae Jesucristo Pejumekowüntsiwi Tatínatsi

**Meje yábara poxonae Pedro tamrópata pítaba xua tatina
pomonaetha, pomonae Jesucristo pejumekowüntsiwichi**

1 ¹Xang, Pedrong, Jesucristo pía peitorobi jiwí jíwana tatsin. Daxita barapomonaenae pam, pákata tínatsi pomonae paiña nakayayatsiya pawüjinómpame xua ichamonae paiña nepaka yotabixae. Pomonae paiña nejinompaewi pam Ponto nákuatha, írürü pomonae paiña nejinompaewi pam Galacia nákuatha, írürü Capadocia nákuatha paiña nejinompaemdü, írürü Asia nákuatha paiña nejinompaewi pamdü, írürü Bitinia nákuatha paiña nejinompaewi pamdü. ²Kaena báyatha poxonae aena, bapoxonae Nakom paka itapeta. Barapong Nakom, pong Waxa, paka yaputane xua pía pexui tatsi pana naexáname. Nakom pía Pejumopetünaxü tatsi paka éxana xua bichokono pajüntükoyene wüünaem Nakomtha paiña neexanaenexa pokotsiwa Nakom paka itoroba. Poxonae Jesucristo paka tsitüpa náetotha jana pichapabarena paiña nejumekowüntsinexa Jesucristo pokotsiwa bapong paka itoroba. Bapoxonae pajüntükoyene wüünaem Nakomtha. Bárabü Nakom bichokono paka yawenaena pía paka nekaantobéwaxae. Matáütano bárabü barapong jüntema jinompa paka éxana.

Meje yábara xua pokoyeneya bewa beta jinompaetsi Jesucristo nexa

³Nakom wüünae jáintatsi pong Jesucristo Paxa tatsi. Jesucristo bapong pong Wanaka namataxeinaein. Nakom jeichichi: “Nakom maisha pajüntükoyene weinang xua pena jüntükoyenein patanekatsibiwam xua poxoru bichokono nantanuweya pana yábara nantaxéiname. Baxua painta éxaname poxonae Jesucristo ekeicha asiüü éxaname petüpáe kuirukoyene weya”, jeichichi. Jesucristo naka kana éxana xua wüünaeya jumekowüntsiya éwatatsi xua Nakom naka katsina peajüntüyapusüüwa. ⁴Bara Nakom paka katsibina pokotsiwa paka jüntüna jeba pía nakuatheicha pokotsiwa xua jopa itaküüpaetsi xua pewerawerakaewa xua matáüta jopa abe kakiyo. Matáüta jopa abe tsozonaeyo xua jopa daichiyo icha pentono ichi. ⁵Nakom paka yapu-eena pía peayapusüüwatha paiña neyábara jumekowüntsixae bapong. Barapong Nakom paka kapanepa xua jopa paiña neatenenexa xua abe paiña neexanaexae xua poxonae daxita bárapo nakue werawerakaena.

⁶Daxota pajüntükoyene weiwéiname, bara bekein saya kae dapaeyobetha paka ajüntükoyenerewe éxana xua ichamonae abe paiña nepákata exanaexae matowa. ⁷Bárapo paiña nepaka kaajüntükoyenerewe exanaewang piraichi pákata éxana baxua xua pía yaputaetsi icha xaniwaicha bara metha pajumekowüntame Jesucristo. Po penainto pewung oro nainto, jiwí ba piraichi ishótotha tauta

peyaputaenexa icha bara metha pepa oro nainto. Po pejumekowüntsiwa jiwi xeina bichokono dangwéi beyakaincha oro nainto bekein ichamonae jüntükoyene jüjüta xua abe peexanaenexa. Bárapo oro nainto werawéraka. Barapoxonae poxonae Jesucristo patopáetsika xua áwiya beta paiña nejumekowünta dubenanaebiyæxæ daxota Nakom wüünae paka jainchina. Matáütano paka kana exanaena xua peaiñakuí jiwi pam. Matáütano paka kana exanaena xua jiwi paka barükui-iturajinaena paiña nejumekowüntsiwixæ.

⁸Paxam paántobem Jesucristo bara bekein jopa bapong pataem. Matáütano ánoxuæ pajumekowüntame bekein jopa bapong ánoxuæ pataem. Paxam bichokono pajüntükoyene weiwéiname. Bara bekein bárapo pexeiña pejüntükoyene weiweináe koyenewa báyatha payábara páebame dáichitha áwiya pákata seika xua po jumetha beta payábara páebame bárapo peajüntükoyenesüüwa. Daxota bichokono pajüntükoyene weiwéiname tsipéi panantaxéiname xua paiña nexei-naewa tsane pebarükui-iturajinaewa Nakom pía nakuatheicha. ⁹Paiña nejumekowüntsixæ Jesucristo, Nakom paka jüntükoyene kapanepaena xua jopa paiña neatenenexa xua abe paiña neexanaexæ.

¹⁰Kaena báyatha pomonae Nakom pía peitorobi jume pepaebiwi yábara jejeita-ponaewa nawita bárapo pekapanenebiyæ diwesi, xuano yábara yaiñabeiba nawita. Barapomonae yábara paeba pekapanenebiyæ diwesi, xua Nakom paka katsibina bárapo diwesi pía paka nekaantobexæ. ¹¹Nakom pía Pejumopetünaxü tatsi, po júmope Cristo weya pona, bárapo júmope kweikuejei barapomonae pejüntükoyenewatha tatsi. Nakom pía Pejumopetünaxü tatsi kweikuejei barapomonaetha, jeye: “Payábara tínare xua bexa tsane Cristo, pong Nakom itorobina, átene tsane. Matáütano bapong Cristo xeinaena pexeiña peitüpanæ koicha”, jei. Barapomonae nayáñaba, jeye: “¿Eta bichi tsane jíwitha poxonae baxua exanaena? ¿Yawa eta poxonae metha baxua exanaena?” najéi barapomonae. ¹²Íchitha Nakom, barapomonae yábara yaputane exainchi xua po diwesi barapomonae xua Jesucristo yábara tsiwüünae páebatsi ápara jopa barapomonae nexa. Ápara jame bárapo diwesi paxam nexa. Po diwesi xua kaena báyatha barapomonae yábara paeba, bárapo diwesi júpa po diwesi xua ánoxuæ ichamonae yábara paka tsipaeba. Bárapo diwesi xua pekapanenebiyæ diwesi barapomonae paka tsipaeba Nakom pía Pejumopetünaxü tatsi pía peayapusüü itorobi koyeneyatha tatsi po júmope itoróbatsi itaboko wétsika. Barapomonae yábara paeba bárapo pekapanenebiyæ diwesi po diwesi matatsunpiwi bekein irü ichichipa yábara yaputane.

Meje yábara xua Nakom naka itoroba xua bewa xéinatsi pepa pejüntükoyene wüünaewa

¹³Daxota pana najüntükoyene wüünaere Nakom nexa xua pana najüntükoyene itoróbare xua barompaya paiña nenantaxeináewatha. Ajüntüyapusüüya payábara jumekowüntsiya éware pokotsiwa Nakom paka katsibina pía paka nekaantobéwaxæ xua poxonae Jesucristo patopáetsika. ¹⁴Paexande icha pexui ichi xua ba éxana pokotsiwa koxiyüing itoroba. Jopa paichichipaeinde xua abe paéxaname pokoyenewa icha be paichim kopiya xua abe paéxaname poxonae kataunxuae jopa payábara yaputaem Nakom. ¹⁵Seikaya pajinómpare pepa paiña nejüntükoyene wüünáewatha, tsipéi Nakom pong paka waba bichokono pepa pejüntükoyene wüünaein. ¹⁶Baxua paexande poxoru Nakom Pejume Diwésitha jeye: “Paxam daxita

bichokono pajüntükoyene wüünaende, tsipéi bichokono tajüntükoyene wüünaein”, jei.

¹⁷Nakom Waxa, pong jiwi peyábara paebin xua penatsikuentsiwa xua abe peexanaexae, barapong Nakom jopa nantaxeinaeyo xua ichüng bichokono peaiña-kuín beyakaincha ichüng. Icha paxam bárapo Nakomtha pajam: “Axa”, pajam, xua pía paiña nepaka yawenaenexa bapoxonae pajunúware xua abe paiña neexanaeyainwa Nakomtha. Matáütano barapong Nakom bichokono paantobeinde daxita matakabin poxonae pajinómpame po írathe. ¹⁸Jesucristo paka kapanepa paiña abeya nejinompaewa weya. Poxonae Jesucristo paka yantómata xua paka kapanebiya, jopa katsiyo po penainto pewüng oro nainto. Matáütano jopa katsiyo po penainto pewüng plata nainto. Bárapo naxobe penáintobe saya werawéraka. Barichino payaputáneme xua Jesucristo jopa paka kapanepaeyo tsipéi bara paichim xua paéxaname icha paiña amo susato jiwi ichi xua bárapo abeya jüntükoyenéwatha jinompa. Baxua paka yawena aibi. ¹⁹Saya meisha Cristo naka yantómata abe waexanáe kuirukoyenein weya. Baxua ápara xua poxonae Jesucristo naka tsitüpa náetotha, icha kaena báyatha oveja ichichi xua poxonae bexotsi xua tüpa éxanatsi xua Nakom peyábara jüntemainaenexa jiwi abe pía peéxanae kuirukoyenein tatsi. Bárapo oveja pexeña oveja xua jopa matáüta xeinaeyo wangno, icha Cristo ichi xua jopa xeinaeyo peabe koyenewa tsipéi pejüntükoyene wüünaein. ²⁰Nakom itapeta xua Cristo itapétatsi petüpaenexa tsane náetotha kaena báyatha poxonae kataunxuae jopa forotsiyo po kae pin nakue. Nakom paka tsita itüüta bapong Cristo bárapo petabüdukuae matakábitha. ²¹Cristo paiña nepaka tsitüpaexae náetotha xua abe paiña neexanáe kuirukoyenein daxota Nakom pajumekowúntame. Nakom ekeicha Cristo asüü éxanatsi petüpáe kuirukoyene weya. Matáütano Nakom pía nakuatheicha kana éxana bapongtha xua xeina pepa peaiñakuí koyenewa. Daxota ánoxuae pajumekowúntame Nakom. Matáütano pajumekowúntsiya éwatame Nakomtha xua bexa Nakom paka katsina pokotsiwa xua báyatha yábara paka tsiwüünae muxuduta.

²²Ánoxuae pajumekowúntame Nakom pía pexaiñéi jume diwesi xua Nakom pía Pejumopetünaxü tatsi paka tsipaeba. Daxota paka itaküüpa xua pana najüntükoyene wüünae éxaname Nakomtha xua xaniwaicha paiña neantobenexa ichamonaepomonae irü pejumekowúntsiwi Nakom. Daxota bewa bichokono nantiya pana naántobem daxita paiña nejüntükoyene dangwéyatha. ²³Paxam icha jüntükoyene paxéiname tsipéi be pena jiwi pana naexáneme, xua pajüntükoyene wüünaem. Jopa panaexanaem xua pokotsiwa pewerawerakaewa wérena. Ánoxuae nama panáéxaname pokotsiwa xua jopa pewerawerakaewiyo wérena. Íchitha pena jiwi pana naexáneme paiña nejumekowúntsixae Nakom Pejume Diwesi, pojume diwesi jopa werawerakaeyo, xua ataya tsitekapona. ²⁴Nakom Pejume Diwesi jeye:

“Naepanaewa ba tsewa tsóponae yawa pentono ba othopeika.

Icha naepanaewa ichi jiwi ba barichi,
ba wérapa.

Matáütano pokotsiwa jiwi éxana xua bekein tsita aiñakuichi íchitha werawerakaena.

²⁵Íchitha nama Nakom Pejume Diwesi ataya ayapusüü tsóponae”,
jei Nakom Pejume Diwésitha.

Bárapo diwesi ápara pekapanenebiyáe diwesi xua po diwesi paka tsipáebatsi.

2¹Daxota daxita pana nakuibarapende daxita abe peéxanae kuirukoyenein, yáwano xua pemuxuitórobi koyenewang, yáwano xua naerabiya peéxanae koyenewang xua náemata wüünae pepaebiwa, yáwano xua peyábara uwi koyenewang xua ichüing xeina, yáwano xua abe peyábara paebiwa ichamonaetha xua ichüing peyábara paebíwatsi. ²Pexui ba, poxi anoxuaetha nakatsiwa, ba jeita mito pía apae-tsi xua pewichibinexa peapaexae mito. Icha pexui ichi, barapókotsi jüta koyeneya paichinde. Saya ü meisha Nakom Pejume Diwesi payórobame nawita xua paiña nejumekowünta dubenanaebiyaenexa tsane, matáütano xua paiña nepaka kapane-nebiyaenexa tsane Nakom. ³Icha paitakoxóneme Nakom, paiña jüntükoyénetha bara payaputáneme xua pong jiwi Pekanamataxeinaein bichokono bara pewüünaein.

Meje yábara iboto, po iboto peaiñakuí iboto

⁴Jesucristo pajumekokowüntaponde, pong jiwi Pekanamataxeinaeinchi, pong xua ataya tsitekaeya ajüntüyapusüüya pepoponaein. Barapong Jesucristo yábara kaunútatsi be pókotsi iboto xua kopiya boka xua poxonae bómüxü éxana. Icha jiwi ichi xua bárapo iboto xuba jiwi barichi Jesucristo péntatsi. Íchitha Nakom itapeta xua Jesucristo itapétatsi, tsipéi bapong Jesucristo Nakom tsita aiñakuichi. ⁵Poxonae jintong ibo bo éxana xua Nakom pin píabo nexa, itapeta po ibótong wüünae. Bara jütiya ichi Nakom itapeta jiwi, xua pomonae piamonae tatsi kana éxana pomonae pejumekowüntsi jíwixixaetsi. Paiñakoutha pana najüntükoyene doure Nakomtha beta paiña netanakuichinexa icha sacerdotemonae ichi xua najüntükoyene douta Nakomtha poxonae beta tanakuitha. Poxonae baxua paéxaname bara baxua Nakom tsita wüünaetsi xua Jesucristo paiña nejumekowüntsixae. ⁶Nakom Pejume Diwésitha jeye:

“Pajumetaema, itorobarekang Jesucristo Sión tómaratha tana nejumekowüntsiwi taitorobarekang.

Bapong itapetang xua bichokono peaiñakuixae,
icha iboto ichi,

po iboto babatanota bómüxü.

Pong Jesucristo jumekowüntatsi,

bapong jopa aura tsane xua bapong Jesucristo pejumekowüntsixaetsi”,
jei Nakom Pejume Diwésitha.

⁷Paiña nejumekowüntsixae bapongtha, daxota payaputáneme xua bapong bichokono asiwiya paántobem. Íchitha pomonae jopa bapong jumekowüntsichi barapomonae kanakuiyábara jumewétatsi be pókotsi koyeneya báyatha Nakom Pejume Diwesi paeba, xua Jesucristo yábara kaunútatsi, jeye:

“Po iboto xua jiwi naitémata xua pomonae ibo bong peakabiwi,
bárapo iboto pekanamatawénonae ibótatsi náexana”,

jei Nakom Pejume diwesi,
xua Jesucristo yábara kaunútatsi.

⁸Nakom Pejume Diwésitha ekeicha jeye:

“Bárapo ibotíyotha jintong taxu aütábatsi.

Matáütano bárapo iboto,
ichakuitha jintong xuirapopa exainchi”,

jei Nakom Pejume Diwesi.

Jintong ba xuirapopa poxoru jopa taeyo bárapo iboto. Po iboto Nakom yábara paeba bárapo iboto Jesucristo yábara jütsiya kanaütapáebatsi. Jiwi jopa beta

exanaeyo poxoru jopa jumekowüntsiyo xua Nakom Pejume Diwésitha Jesucristo yábara páebatsi. Kaena býatha Nakom pewünaeya yábara kuiyaputane xua barapomonaе peexanaewa tsane baxua.

⁹Paxam Nakom paiña nepaka itapetsí jiwi pam. Paxam po sacerdotemonaе pam xua patanakuítame Nakom pong jiwi itorobiya pía pepa Peewatsinchi. Matáütano paxam pomonaе Nakom patsita jüntükoyene wüünaem jopa paiña tsita natsikuent-sixae bapong. Matáütano Nakom pía pepa piamonaе tatsi pam. Nakom baxuang pákata éxana pía paiña yábara netakueikueijeinexa xua pía pexeíña petsita-itüübi koyenewang tatsi. Barapong Nakom paka waba abe paiña neexanáе kuirukoyenein weya. Paka waba pía paiña yábara neyaputaenexa Nakom xua xeina pexeíña peitüpanáе koicha. ¹⁰Kopiya paxam jopa Nakom piamonaе tatsi pam, íchitha ánoxuae nama Nakom piamonaе tatsi pam. Matáütano kopíyatha jiwi jopa paka yábara nantanuweya nantaxeinaeyo xua pía paka nekayawenaewa tsane. Íchitha ánoxuae Nakom paka yábara nantanuweya nantaxeina xua pía paka nekayawenaewa tsane.

Meje yábara xua jiwi bewa beta jinompáе xua Nakom petanakuita dubenanaebiyaenéxatsi

¹¹Tamonaе pam, pomonaе tapaka kaántobe jíwichi pam. Paxam pomonaе be penanapaincha jinompaewi pam xua icha nakua wérena paiña neponaewi. Daxota paka itoróbatsi xua jopa paiña neexanaewa tsane pokotsiwa abe pokotsiwa xua paiña jüntükoyenéwatha ichichipa xua peexanaewa. Bárapo abe peéxanae kuirukoyenein paka jüntükoyene itoroba bichokono xua paiña neexanaenexa pokoyenein abe peéxanae kuirukoyenein. ¹²Beta pajinómpare Nakom nexa xua peitütha tatsi pomonaе Nakom jopa jumekowüntsichi. Icha barapomonaе abe paka yábara paebíchipa be pomonaе abe paiña neexanáе jiwi pam tsipae bichokono dáichitha barapomonaе taena xua beta paiña neexanaewa. Bapoxonaе barapomonaе Nakom wüünae jaintinchi wüünae paiña neexanaexae xua po matakeitha Nakom yábara paebina jiwi xua penatsikuentsiwa xua abe peexanaexae.

¹³Paiña nejumekowüntsixae pong jiwi pepa Pekanamataxeinaeinchi bara paexande pokotsiwa paka itoroba daxita pomonaе pekanamataxeinaewi paiña nakua. Matáüta paexande pokotsiwa paka itoroba pong romanomonaе itorobiya pepa peewatsinchi. Jame Nakom ichichipa xua waexanaewa baxua. ¹⁴Paexande pokotsiwa paka itoroba pomonaе nákuang peewatsiwi pomonaе xua tanakuítatsi pong romanomonaе itorobiya pepa peewatsinchi. Nakom itoroba barapomonaetha, pomonaе nakua peewatsiwi xua barapomonaе kuainchina pomonaetha, pomonaе abe peexanaewi. Matáütano Nakom itoroba barapomonaetha xua wüünae jainchina pomonaetha, pomonaе beta peexanaewi. ¹⁵Nakom ichichipa xua beta paiña neexanaewa tsane pomonaetha, pomonaе xua jopa Nakom yábara yaputaetsi xua barapomonaе pemoyanexa xua jopa abe paiña nepaka yábara paebinexa.

¹⁶Pajinómpare, icha be ichi pomonaе jopa nantawenonaeyo xua ichamonaе amanaya petanakuichíwatsi. Íchitha jopa abe paexanaeinde xua poxoru saya paiña nejinompaexae. Beta pajinómpare, icha be ichi pomonaе Nakom amanaya tanakuita dubenanaebíyatsi. ¹⁷Beta payábara nantaxéinare daxita jiwi. Matáütano paantobeinde ichamonaе pomonaе irü pejumekowüntsiwi Jesucristo. Nakom pakunúware xua abe paiña nepaka exanaeyainwa, xua abe paiña neexanaexae. Pabarükui-iturajinarenó pong romanomonaе itorobiya pepa peewatsinchi.

Meje yábara pokoyene xua Cristo átene peexanáewatsi

¹⁸Paxam pomonae amanaya paiña netanakuichi jiwi pam ichamonae barapomonaepam paka tsipáebatsi. Bewa pajumebariükuijijam tsaibim tsane pomonae xua paka itorobeiba pomonae paiña nepaka kanamataxeinaewi. Baxua paexande poxonae bekein ichamonae wüünae peexaneibiwi, matáütano xua poxonae ichamonae bekein abe peexaneibiwi poxonae paka itoroba. ¹⁹Baxua Nakom tsita wüünaetsi xua pabarükui-iturajíname barapomonaepomonae paiña nepaka kanamataxeinaewi xua poxonae bekein paka kuainta barapomonaepomonae xua xaniwaicha paiña neexanaexae paiña nejumekowüntsixaepomonae Nakom. ²⁰Icha abe paéxaname xua daxota paka kuainta, baxua Nakom jopa tsita koyenewüünaetsi xua bekein saya beitatemaya moya pauméname poxonae paka kuainta. Íchitha icha jame paka kuainta xua wüünae paiña neexanaexae xuano xua icha beitatemaya moya pauméname baxuang jame Nakom tsita koyenewüünaetsi. ²¹Xua ichamonae átene paiña nepaka ka-exanaexae daxota Nakom itapeta paka waba. Ichamonae Jesucristo átene exainchi waxainchi nexa. Jesucristo kanakaunutsiya éxanatsi xua waxainchi bewa exanaetsi icha bapong ichi xua pokotsiwa éxana. ²²Bapong Jesucristo bápana jopa abe exanáe. Matáütano bápana jopa muxuitórobi ichamonaetha. ²³Poxonae ichamonae Jesucristo biatainchi jopa xuya jumebabarabotsiyo Jesucristo. Poxonae Jesucristo bütsi, jopa Jesucristo jeyo, “Aunxuae xuya paka kuaintinchi”, jopa jeyo. Íchitha Jesucristo jumekowünta Nakom xua pokotsiwa poxonae Nakom exanaena barapomonaetha, pokotsiwa xua be Jesucristo peyantomatsíwatsi. Tsipéi Nakom xaniwaicha beta yábara paebe jiwi, xua penatsikuentisiwa xua abe peexanaexae. ²⁴Cristo pía pepongtha yawa múxuna tüpa abe waexanáe kuirukoyenein poxonae tüpa náetotha. Poxonae bapong Jesucristo nákata éxana bárapo koyene, waxainchi abe waexanáe kuirukoyenein weya panenebíyatsi xua jopa ekeicha waexanaewa tsane abe waexanáe kuirukoyenein, yáwano xua beta jüntükoyene wüünaeya jinompaeinchi Nakomtha. Daxota Cristo wang éxanatsi xua ekeicha jopa abe paiña neexanaenexa tsane. ²⁵Ichakuitha oveja itaxanúnguatsi, pípato pepoponaexae jopa penantaütsixaepong peenaen ovejang. Icha oveja ichi paxam barapókotsi jüta koyeneya paichim. Kopiya jopa wüünaeya painompaem, jopa paiña nenantaütsixaepomonae Jesucristo. Íchitha ánoxuae wüünaeya pajinómpame, tsipéi ánoxuae Jesucristo panantáütame pong paka yawena. Bapong nepaka eenaen, icha be ichi pong oveja peenaen. Yáwano bapong Cristo paka jüntükoyene kanamataxeina.

Meje yábara xua pokoyeneya bewa jinompáe pomonae jitha peenaewi

3¹Paxam powaxi jitha paiña neenáewaxi pam, paexande pokotsiwa paiña séurixi paka itoroba. Paiña pebiwi ichakuitha jopa jumekowüntsiaepomonae Nakom. Paiña neexanaexae pokotsiwa paiña séurixi paka itoroba bárapo paiña séurixi jumekowüntsina Nakom paiña nepaka kuitaexae bara bekein Jesucristo jopa payábara paeibim. ²Bárapo paiña séurixi paka taena xua Nakom paántobem. Yáwano xua paka taena xua jüntükoyene wüünaeya painómpame. ³Jopa metha meisha paiña pepong pexeñowa pana naexanaem tsipaem, xua daxota jiwi paiña nepaka yábara paebeibiwa, xua pexeñowaxi pam. Jopa matowa pana matakai-chetsinde xua bichokono pexeñowa pana naexáname. Jopa pana napepenaeinde

po penáintotha pewüing oro nainto. Matáütano jopa pana namaxatabinde po paparuwang bichokono aiña matomang xua bichokono pexeíñowaxi pana naexáname. ⁴Icha pexeíñowaxi ichichipa pana naexáname moya maisha pana najüntükoyene wüünae éxande. Bárapo pexeíñowa koyenewa búpana xeina jiwi pejüntükoyenéwatha. Bárapo pexeíñowa koyenewa jopa itaküüpaetsi xua pewerawerakaewa. Paiña pexeíñowa koyenewa bewa payábara ita-uranaya pajinompam, yáwano jüntema pajinompam. Baxuang jame bichokono tsita koyenewüünaetsi Nakom. ⁵Bárapo pexeíñowa koyenewa kaena báyatha xeina poyábüxi xua bichokono pepa pejüntükoyene wüünaewaxi. Bárapo yábüxi jumekowüntsiya éwata Nakomtha, xua Nakom exanaena pokotsiwa yábara tsiwüünae muxuduta. Matáütano bárapo yábüxi éxana pokotsiwa piséuriwi itoróbatsi. ⁶Petsiriwa powa pewüing Sara bara jütiya ichiya éxana. Barapowa exaneiba pokotsiwa piseuri itorobéibatsi pong pewüing Abraham. Barapowa piséuritha jeye: “Tanekanamataxeinaem”, jei bapowa. Paxam bara paichim tsane icha barapowa Sara ichi icha beta paexanáname, yáwano xua jopa pajunuwim, bekein paiña séurixi jopa wüünaeya paka itorobéibiyo.

⁷Barichi pam pebiwi pam, po pebiwi paiña séurixi paiña nexeinea jiwi pam. Beta payábara kuiyaputaema paiña séurixi. Yáwano paiña séurixi pabarükui-itorajínare tsipéi yábüxi jopa akuikoyenesüüyo icha jopa be pebiwi ichiyo. Panantaxéinare xua pebin piséuribe xéinabe po peajüntüyapusüüwa jopa bápána werawérakae, po peajüntüyapusüüwa Nakom kata piamonaetha pomonae píapeantobewixaetsi. Baxua paexande paiña seuriwitha xua wüünae paiña nexanaewa xua Nakom bara beta paiña nepaka jumetaenexa poxonae pawúükame.

Meje yábara xua jiwi átene pomonae xua beta peexanáewixae

⁸Matapaiña paka tsipáebatsi nantiya beta jinompa pana naexande. Yáwano nantiya beta pana nayábara nantaxéinare xua paiña nenayawenaexaem tsane. Nantiya pana naantobeinde paiña nejumekowüntsixae Nakom, icha be ichi poxonae barompaya paiña eweicho jiwi nantiya pana naántobem. Pomonae jiwi peyawenae jiwi pana naexande xua paiña neantobexae bárapo jiwi. Matáütano jopa bichokono paiñakoutha pana nayábara nantaxéinaeinde. Jame maisha ichamonae itapeta bichokono payábara nantaxéinare. ⁹Poxonae ichamonae abe pákata éxana xuya jopa paexanaeinde. Yáwano poxonae ichamonae paka biatane jopa xuya pabiataeinde. Seikaya nama paexande. Jame Nakomtha patawúükare barapomonae xua Nakom pekana exanaenexa xua barapomonae pejüntükoyene weiweinaenexa. Daxota Nakom paka waba xua xuya pákata éxana tsipéi barapomonae beta pakana éxaname. ¹⁰Tsipéi Nakom Pejume Diwésitha jeye:

“Pong xua ántobe xua pokoyene kataunxuae pepoponaewa,
xuanu xua daxita matakabi jüntükoyene weiweina poneiba,
bapong bewa peébatotha jopa paebí tsane peabe jumeyo.
Matáütano peopiratotha jopa bewa paebí tsane xua ichamonae naerabiya
peyábara paebíwatsi.

¹¹Bewa tajü beya paponam xua peabe koyenewang weya.

Yáwano saya bewa beta paexanaem.

Itapeta paexande pokotsiwa xua jiwi jüntema jinompa exainchi.

Bara ajüntüyapusüüya paexanaponde baxua.

¹²Tsipéi Nakom,
 pong jiwi Pekanamataxeinaein,
 yawena pomonaetha,
 pomonae pejüntükoyene wüünaewi.
 Yáwano Nakom jumetane xua pewüükáewatsi.
 Íchitha Nakom jopa yawenaeyo pomonae abe peexanaewi”,
 jei Nakom Pejume Diwésitha.

¹³Dapong aibi pong itakúüpatsi xua abe pákata éxana icha saya paexanéibame pokotsiwa xua wüünae. ¹⁴Bekein icha ichamonae pákata abe exanaena jüntükoyene wüünae paiña nejinompaexae, dáichitha Nakom paka kana éxana xua pajüntükoyene weiweinaya jinómpame. Jopa ichamonae pakunúwinde, yáwano jopa pakuitaya jüntüdeideijande. ¹⁵Jame maisha Cristo bichokono payábara nantaxéinare paiña jüntükoyénetha xua bapong bichokono aiñakuí. Pajande: “Pong jiwi Nekanamataxeinaem”, pajande. Pana najüntükoyene wüünaetébare xua paiña nejumenoteibinexa pomonae paka yaiñabiya jeye: “¿Eta pokotsiwa pajumekowüntsiya éwatame xua Jesucristo bexa paka kapanepaena?” paka jei. ¹⁶Íchitha saya ita-urakiya pajumenotébare, jopa pa-aebeibinde. Yáwano pajunúware Nakomtha xua abe paiña nepaka exanaeyainwa Nakom, abe paiña neexanaexae. Pajinómpare xua paiña jüntükoyenewa paka tsipaeba xua wüünae bara paéxaname. Bapoxonae icha ichamonae abe paka yábara paeba, barapomonae aura tsane wüünaeya paiña nejumekowüntsiya jinompaexae Cristo.

¹⁷Icha Nakom ichichipa xua ichamonae átene paka éxana, beta paiña neexanaexae, baxua jame wüünae, beyakaincha xua poxonae átene paka éxana poxoru abe paéxaname. ¹⁸Tsipéi Cristo átene éxanatsi poxonae tsitüpa abe waexanáe kuirukoyenein daxita xua poxonae kae koyenetha tüpa. Cristo bápana jopa abe exanáe. Íchitha bapong Cristo naka tsitüpa pomonae abe waexanáe jíwichi. Baxua Cristo nákata éxana, xua wanaka exanaenexa xua wapatsiwa tsane Nakom beicha. Bapong Cristo bekein tüpa pepong íchitha ekeicha asüü éxanatsi pía pejumopetünaxü tatsi. ¹⁹Bapoxonae Jesucristo pía pejumopetünaxü tatsi pona ichaxota jiwi pía pejumopein tatsi be kübathopéibatsi pomonae xua kaena báyatha wérapa. Barapong Jesucristo pía jumopetünaxü tatsi yábara kueikueijeí bárapo jumopeintha xua Nakom pía pekapanenebiyáe diwesi tatsi. ²⁰Kaena báyatha barapomonae jopa jumekowüntsiyo Nakom poxonae po matakeitha Noé pópona po írathe. Nakom beitatemaya ewateiba barapomonae, aiña dapaein xua pejumekowüntsinéxatsi poxonae xua kataunxuae Noé kobenáemata xua pin jera nae éxana. Íchitha saya ocho póyobe jiwi panenebiya poxonae bichokono awüübo xua butuxuba po kae pin nakue. ²¹Bárapo awüübo kaunuta xua be naka bautisaba. Poxonae naka bautisaba ápara jopa wanaka perüü ikikaenexa tsane xua tsoreichi, ápara jame daxota naka bautisaba Nakom, wanaka kapanepaexae abe waexanáe kuirukoyenein weya. Yáwano Nakom wüükatsi xua wanaka jüntükoyene wüünae exanaewa tsane. Bapoxonae wajüntükoyene naka tsipaeba xua bara beta éxanatsi. Waxainchi naka itaküüpa xua wanaka bautisabiwa tsipéi Jesucristo ekeicha asüü éxanatsi petüpáe kuirukoyene weya. ²²Jesucristo peitaboko beicha pona. Bapong Jesucristo eka Nakomtha, xua Nakom pía pekoxa weya tatsi. Matatsunpiwi, írürü pomonae itoroba itabókotha barapomonae éxana pokotsiwa Jesucristo itoroba.

**Meje yábara xua jiwi bewa beta tanakuichi Nakom icha be pokoyeneya
Nakom kata jiwi barompaya pía peéxanae koyenewang tatsi**

4 ¹Yáitama kopiya Cristo átene éxanatsi ichamonae, waxainchi daxota bewa nantaxeinaetsi xua irü naka átene exanaena ichamonae. Pong átene éxanatsi ichamonae bapong abe pía peéxanae kuirukoyenein wepu pona xua bichokono pejumekowüntsixaes Jesucristo. ²Paxam jopa bewa paexanaem pokotsiwa xua paichichípame xua abe paiña neexanaewa poxonaes kataunxuae pajinómpame. Íchitha kataunxuae paexanaponde pokotsiwa Nakom ichichipa poxonaes kataunxuae pajinómpame bárapo kae pin nákuathe. ³Kaena báyatha paéxaname pokotsiwa xua ichamonae éxana pomonae jopa yaputaeyo Nakom. Barapomonae abe exaneiba xua nasikuí éxana icha yabüxitha xua jopa piséuriwi. Yáwano exaneiba xua pokotsiwa abe yábara nantaxeina pejúntükoyeneintha. Yáwano naküüpa exaneiba peátsaxae merang. Yáwano pin penabanaewang exaneiba po penabanaewangtha jiwi weiweinaya abe éxana xua napenajúba yawa bichokono kúüpatsi. Yáwano ibo nakomüing wüünae jaintéibatsi. ⁴Pomonae jopa yaputaeyo Nakom, barapomonae paka kuiyábara nantaxeina, jeye: “¿Eta xua metha jopa naka barü exanaeyo xua waxainchi abe éxanatsi?” najéi barapomonae. Barapomonae paka kuikápana yawa daxota abe paka yábara paeba. ⁵Payábara nantaxéinare pomonae abe éxana. Barapomonae bewa yábara kaununaya jumenotsina Nakomtha pokotsiwa xua abe éxana. Nakom yábara paebina pomonaetha, pomonae xua kataunxuae jinompa yawa pomonaetha, pomonae báyatha wérapa xua penatsikuentisiwa xua abe peexanaexae. ⁶Beraxota Nakom pejume diwesi tsimuxupáebatsi pomonae wérapa, xua xaiña kae jiwi asüü pejinompaexae mata diwesi xainxainta abe peexanaexae, íchitha xaiña jinompa Nakom pejumopetünáxütha be Nakom.

⁷Bara nama imoxoyo po dapaetha poxonaes Nakom daxita werawéraka exanaena bárapo kae pin nakue. Daxota paiñakoutha pana najüntükoyene itoróbare xua wüünaeya paéxaname Nakomtha beta paiña wüükaenexa tsane. ⁸Pokotsiwa xua aiñakuí xua jame bewa bichokono nantiya pana naantobeinde. Poxonaes ichüing paántobem, pajüntemáiname poxonaes bekein xua bapong abe pákata éxana. ⁹Paxam nantiya pana nantenta weyataeya wabéibare paiña bóxitha xua paiña nenaapateibinexa tsane, xua jopa pana naita aenae-aenande. ¹⁰Daxita barompaya paxam Nakom paka kana éxana xua paiña nexeiñawa barompaya paiña neexanáe koyenewang. Paxam nantiya pana nayawende bárapo kuikoyenetha, bapoxonaes paxam pomonae beta paiña neexanáe jiwi pam tsane pókotsi koyenéwatha xua Nakom paka kana éxana. ¹¹Icha ichüing kueikueije, bü bara kueikueije pokotsiwa Nakom kueikueije éxana bapong. Icha pebin yawena xua ichüing yawénatsi bü bara bárapo pebin yawena ichüingtha po peyapusüüwatha xua Nakom kata. Daxita pokotsiwang xua paéxaname bara beta paexande xua jiwi wüünae pejainchinexa Nakom xua beta paiña neexanaexae xua Jesucristo peyábaraxae. Bü bara Jesucristo ataya xeinaena peaiñakuí koyenewa, yáwano xeinaena xua peyapusüü itorobi koyenewa. Je bara ichi tsane.

**Meje yábara pokoyeneya xua bewa exanaetsi wajumekowüntsixaes
Cristo xua poxonaes bekein ichamonae átene naka éxana**

¹²Tamonae pam paiña tapaka kaantobetsi jíwichi pam irü paiña nejumekowüntsixaes Jesucristo. Jopa yábara pana nabenaekaeinde poxonaes bichokono átene

paka kana éxana ichamonae paiña nejumekowüntsixaé Jesucristo. Jopa pananta-xeinaeinde xua baxua pokotsiwa jopa bewa pákata exanáé tsane. ¹³Jame seikaya pajüntükoyene weiwéinare xua paiña nepaka itaküüpaewa xua ichamonae átene paka éxana icha Cristo ichichi xua átene éxanatsi. Yáwano bexa pajüntükoyene weiwéináename poxonae Jesucristo yawa patopáetsika pía peaiñakuí koyenewa. ¹⁴Icha ichamonae paka muxukona paiña nejumekowüntsixaé Cristo, saya pajüntükoyene weiwéinare, tsipéi Nakom pía Pejumopetünaxü tatsi, po júmope pexeíña peitüpanáé koicha yawa pópona, bárapo pejúmope paka yawa pópona. ¹⁵Jopa bewa paexanaem tsane xua ichamonae pajutébame xua daxota ichamonae paka átene éxana. Matáütano jopa bewa paexanaem tsane xua ichamonae piáwang tatsi pakáibame xua daxota ichamonae paka átene éxana. Matáütano jopa bewa paexanaem tsane xua ichamonae pajüntükoyene anáepana éxaname xua daxota ichamonae paka átene éxana. Matáütano jopa bewa paexanaem tsane xua ichüing pajüntükoyene itoróbame xua abe peexanaewa tsane xua daxota ichamonae átene paka éxana. ¹⁶Icha ichüing átene éxanatsi ichamonae, pejumekowüntsixaé Jesucristo, jopa bewa bapong aura tsane. Íchitha jame bapong bewa wüünae jainchina Nakom tsipéi átene éxanatsi pejumekowüntsixaé Jesucristo.

¹⁷Po matakábitha aena Nakom tamrópata pítaba xua Nakom yábara paebina daxita jiwi xua penatsikuentsiwa xua abe peexanaexae, ápara bárapo matakabi báyatha patopa. Bárapo matakábitha Jesucristo piamonae tatsi umenaena Nakom peitabaratha xua Nakom peyábara paebinexa tsane xua penatsikuentsiwa xua barapomonae abe peexanaexae. Yáitama Nakom baxua nákata éxana nama yatsikaya jopa Nakom juniya exanaeyo pomonaetha, pomonae jopa pejumekowüntsiwi Nakom pía pekapanenebiyáé diwesi tatsi. ¹⁸Dangwéi nawita pong kapanépati abe pía peéxanae kuirukoyenein weya pong wüünae peexanaein. Íchitha nama bichokono tangweichi xua pong kapanépati abe pía peéxanae kuirukoyene weya pong bichokono abe peexanaein. ¹⁹Poxonae ichamonae paka átene éxana, bara áwiya beta paexande icha bara báraxua xua pokotsiwa Nakom kuita jíchipa. Bewa pajumebaruíjjam tsane Nakom xua paéxaname bara bekein paayapubetaetham. Nakom paka nekaforotsixaé yawa peexanaexae xua pokotsiwa yábara paka tsiwüünae muxudubeiba xua éxana paebeiba, daxota Nakom piakoya kanamataxeina paiña jüntükoyene.

Meje yábara xua Pedro muxuweta pomonaetha, pomonaé pejumekowüntsiwi

5 ¹Ichichipang xua tamuxuwetsiwa penapatáé jiwi pomonae paxam jíwana pam pomonae paiña nejumekowüntsi jiwi pam. Xang irü bichokono penapataein icha barapomonae ichi. Xang natang poxonae Cristo náetotha tüparukua éxanatsi. Xang irü yawa xeinaein po peaiñakuí koyenewa Cristo xeina poxonae patopáetsika. ²Beta pa-eénare pomonaetha xua Nakom paka kana éxana xua pamatakáponame, icha pong oveja peyapuenaein ichi xua beta yapu-eena ovejamonae. Jopa meisha baxua paexanaeinde xua poxoru Nakom pía paka nekaitorobixae. Jame maisha baxua paexande xua poxoru paiñakoutha paiña neichichipaexae. Baxua jame Nakom ichichipa. Matáütano jopa baxua paexanaeinde xua poxoru parátixi paiña neichichipaexae, íchitha poxoru Nakom paiña neantobexae bichokono. ³Jopa atsakiya pamatakaponaeinde pomonae xua pamatakáponame. Jame

saya maisha beta pamatakáponde xua paiña nekakuitaenexa xua bara jüta ichiya peexanaenexa. ⁴Néxata poxonae patopáetsika pong jiwi itorobiya pepa Peewatsin, bapong Jesucristo, paka katsina po pematomatsiwa peaiñakuí koyenewa, po peaiñakuí koyenewa xua bápana jopa werawerakaeyo.

⁵Barichi pomonae pewowi jiwi pam, bewa paexanaem pokotsiwa xua penapatáe jiwi paka itoroba. Daxita paxam bewa nantiya pana naántobem, yawa bewa nantiya pana nayábara ita-uranaya jinompaem. Baxua paexande tsipéi Nakom Pejume Diwésitha jeye:

“Nakom aichaxaibi pomonae peabiwi ichamonaetha.

Íchitha Nakom yawena xua peantobexae pomonae barü ita-uranaya jina ichamonaetha”, jei.

⁶Daxota papende pokoyene xua paáebame ichamonaetha. Paexande pokotsiwa xua Nakom pekóbetha paka itakowái pía peayapusüü itorobíwatha xua Nakom aiñakuí paka neka-exanaenexa tsane poxonae Jesucristo ekeicha patopáetsika. ⁷Bara pakópare xua Nakom bara daxita paka wepichina daxitang pokoyenein xua jüntükoyene natsepa paka kana éxana tsipéi Nakom paka yábara nantaxeina nawita xua paiña nepaka kayawenaewa tsane.

⁸Paiñakoutha pana najüntükoyene itoróbare xua beta pajinómpare. Tsaka pajinómpare poxoru kaurimonaetha pía pentakaponaetha tatsi ichichipa paka abe éxana. Bapong pákata éxana icha neuthü ichi xua ba piyain fiba poxonae jeita dukua-naeta pong ichichipa be xaena. ⁹Dota pam panaitémare bapong xua beta paiña nejumekowüntsíwatha. Panantaxéinare xua daxita nakuangpiwi jíwana pomonae pejumekowüntsiwi Jesucristo barapomonaetha átene éxanatsi icha paka ichi. ¹⁰Íchitha bexa tsane xua kaeto poxonae paka átene exanaena ichamonaetha, bapoxonaetha Nakom paka jüntükoyene wüünaetha exanaena. Yáwano Nakom paka exanaena xua beta paiña nejumekowüntsiwa tsane. Yáwano paka exanáenano xua bichokono paiña neajüntükoyenesüüwam tsane. Barapong Nakom paiña nepaka antobexaetha paka waba pía paka katichi po peaiñakuí koyenewa xua ataya tsiteka xua Jesucristo xeina. ¹¹Bü bara Jesucristo ataya xeinaena peaiñakuí koyenewa, yáwano xua peayapusüü itorobi koyenewa. Je bara ichi tsane.

Meje yábara poxonae Pedro najumewetsiya paeba

¹²Pong pewüing Silvano, pong be táyapin tatsikotaetha írürü pejumekowüntsixae Jesucristo, bapong kobe-itorobang xua inta tina bárapo peya cártiyo xua bapoxonaetha tapákata itorobinéxatsi xua tapaka muxuwetsinéxatsi. Bárapo cártatha paka jüntükoyene tsakáraba éxanatsi xua Nakom xaniwaicha paiña nepaka kayawenaewa tsane paiña nepaka kaantobexaetha. Daxota baxua áwiya pajumekowüntsiya jinómpare.

¹³Pomonae Babilonia tómaratha jinompa pomonae Nakom pejumekowüntsíwichi, barapomonaetha paka jakoba. Barapomonaetha pomonae Babilonia tomarapiwi Nakom itapeta icha paka ichi xua paka itapeta. Irü Marcos paka jakoba be pong taxanto tatsikotaetha tsipéi yawenang xua pejumekowüntsiwa Jesucristo. ¹⁴Paxam nantiya pana najakóbare paiña nenaantobexaetha.

Paxam pomonae Cristo piamonaetha tatsi pam barapomonaetha pam bara Nakom jüntema jinompa paka éxana. Je bara ichi tsane.

Baja Pedro.

Meje Po Carte Kotakaya Pedro Tatina, Pomonae Jesucristo Pejumekowüntsiwi Tatínatsi

**Meje yábara poxonae Pedro tamrópata pítaba xua tatina
pomonaetha, pomonae Jesucristo pejumekowüntsíwichi**

1 ¹Xang, Simón Pedro, pong Jesucristo amanaya tanakuitang. Xang pongxaein Jesucristo pía peitorobi jiwi jíwana tatsin. Pákata tínatsi bárapo carte paiña nexeiaexae xua pejumekowüntsiwa Jesucristo xua bichokono wüünae icha paxang paichin. Bárapo pejumekowüntsi koyenewa Nakom wérena píchapa, pong bichokono pejüntükoyene wüünaewa pexeinaein. Yáwano bárapo pejumekowüntsi koyenewa Jesucristo wérena píchapa pong irü bichokono pejüntükoyene wüünaewa pexeinaein. Bapong jiwi Pekapanenebiyaein abe pía peéxanae kuirukoyenein weya. ²Bárabü Nakom paka yawenaena pía paka nekaantobexae. Yáwano bárabü Nakom paka katsina jüntema pejinompáe koyenewa. Bárabü bárapo naxobe koyenéwabe bichokono paxeinaponáename xua poxonae payábara yaputaepónáename Nakom xuano xua payábara yaputaepónáename Jesucristo pong Wanaka namataxeinaein.

**Meje yábara pókotsi koyenéwano bewa
exanaena Cristo piamonae tatsi**

³Nakom naka kata daxita pokotsiwa nantawenónatsi xua jüntema wajinom-paewanexa yawa xua wüünaeya wajinompaenexa Nakom nexa. Daxita baxuang Nakom naka kata pía peayapusüü itorobi koyenéwatha. Poxonae yábara yaputaeponaeinchi Nakom, nakuidúbatsi xua bapong naka waba xua irü waxeinaenexa peaiñakuí koyenewa, xuano xua irü waxeinaenexa Nakom pía pexeíña peéxanae koyenewa. ⁴Poxonae Nakom naka kata pía peaiñakuí koyenewa, yáwano pía pexeíña peéxanae koyenewa bapoxonae nama naka kata pía peyábara nakatsiwüünae muxudutsiwang. Nakom pía peyábara nakatsiwüünae muxudutsiwang bichokono aiñakuí xua jiwi jopa itaküüpaetsi xua pekomotsiwa. Bárapo peyábara nakatsiwüünae muxudutsiwang paiña nekakatsixae ánoxuae paxéiname xua Nakom pía peajüntüyapusüüwa xua jopa werawerakaeyo. Yáwano bárapo peyábara nakatsiwüünae muxudutsiwang paiña nexeiaexae paka itaküüpa xua papanenebiyam abe paiña neexanáe kuirukoyenewa weya xua bárapo kae pin nakuathepiwi pokoyene ichichipa abe éxana. ⁵⁻⁷Bekein pajumekowüntame íchitha panantawénoname xua múxuna paéxaname xua beta paiña nejinompae koyenewang. Poxonae beta pajinómpame, bapoxonae panantawénoname xua múxuna paéxaname xua Nakom payábara yaputáneme. Poxonae Nakom payábara yaputáneme, bapoxonae panantawénoname xua múxuna paéxaname xua paiñakoutha

pana nenajüntükoyene itorobiwam. Poxonae paiñakoutha pana najüntükoyene itoróbame, bapoxonae panantawénoname xua múxuna paéxaname xua jüntema pajinómpame bekein ichamonae abe pákata éxana. Poxonae jüntema pajinómpame xua bekein ichamonae abe pákata éxana, bapoxonae panantawénoname xua múxuna paéxaname xua paantobeya jinómpame Nakom. Poxonae paantobeya jinómpame Nakom bapoxonae panantawénoname xua múxuna paéxaname xua paántobem pomonae pejumekowüntsiwi Jesucristo. Poxonae paántobem pomonae pejumekowüntsiwi Jesucristo, bapoxonae panantawénoname xua múxuna paéxaname xua paántobem daxita jiwi.

⁸Icha paxéiname daxita bárapo koyenewang yawa xua paexanapóname daxita baxuang bapoxonae beta paiña neexanáe jiwi pam tsane Nakom nexa. Yáwano beta payábara yaputáneme Jesucristo pong Wanaka namataxeinaein. ⁹Íchitha icha pebin jopa yábara exanaeyo bárapo koyenein, bapong be pong naitatsaketa poxoru jopa ichipaeyo xua peyábara yaputaewa bárapo koyene. Daxota bapong jüntemaina xua báyatha wejüntemaina éxanatsi abe pía peéxanae kuirukoyenewang tatsi xua Nakom wejüntemaina éxana. ¹⁰Tamonae pam, paxam pomonae be táyapin jiwi tapaka kanatsikotáewichi pam írürü paiña nejumekowüntsixae Jesucristo. Daxota paka tsipáebatsi xua xaniwaicha pana naexande xua daxota patsita-itiütsíname xua paxam pomonae Nakom pía pewabiwi tatsi jíwana pam. Yáwano paxam pomonae Nakom pía peitapetsiwi tatsi jíwana pam. Poxonae baxuang paexanapónáename jopa ekeicha abe paexanaem tsane pokoyene xua daxota paitawétame Nakom. ¹¹Bapoxonae Nakom bara paka matenta weiweinaya kópata xua paiña nepatsinexa tsane Nakom pía peitorobi nakua beicha tatsi. Nakom pía peitorobi nakua ataya ayapusúü tsóponae ichaxota Jesucristo jiwi itorobiya éwatatsi, pong Wanaka namataxeinaein, xua pong Pekapanenebiyaein jiwi.

¹²Bekein baxua báyatha payaputáneme, íchitha ekeicha paka tsipáebatsi xua jopa paiña jüntemainaenexa. Ánoxuae paxam ajüntüyapusüüya pajumekowüntame pexaiñéi jume Jesucristo yábara. ¹³Poxonae kataunxuae póponang yábara nantaxeinang xua aiñakuí xua baxuang yábara tapata katsipaebiwa tsainchi. ¹⁴Yaputang tsipéi Jesucristo, pong Wanaka namataxeinaein, netsipaeba xua bara nama imoxoyo tüpaein. ¹⁵Daxota xaniwaicha pákata tínatsi xua baxuang jopa yábara paiña nejüntemainaewa tsane poxonae tüpaein. Bapoxonae bexa tsane pana nekuiyábara jüntanaináename pokotsiwang yábara paka tsiwüüinae muxudútatsi.

Meje yábara xua pomonae tane Cristo pía peaiñakuí koyenewa tatsi

¹⁶Poxonae paxang paka tsipáebatsi Jesucristo pía peayapusúü itorobi koyenéwatha yáwano xua pepatopeikaewa yábara pong Wanaka namataxeinaein, ápara jopa paka tsipaebichi po diwesi pejemái diwesi po diwesi xua saya jiwi paeba. Bara pana natang Jesucristo pía pexeíña peitüpanáe koicha tatsi pong jiwi Pekanamataxeinaein. ¹⁷Pana natang poxonae Jesucristo aiñakuí éxanatsi xua Nakom Pexanto aiñakuí éxana, pong Jesucristo Paxa tatsi. Yawa pana natang xua Nakom Pexanto kata pexeíña peitüpanáe koicha. Bapoxonae Nakom pejume pajumetang pexeíña peayapusúü jume, jeye: “Bapong ápara Taxanto, pong bichokono antobein, pong itapetang. Bapong bichokono nejüntükoyene weiweina éxana”, jei Nakom. ¹⁸Paxang baxua pajumetang xua Nakom kueikueije peitaboko wétsika poxonae

Jesucristo pong jiwi Pekanamataxeinaein demuxúwatha pana nebarü pona po demuxuwa ichaxota Nakom kueikuejei itaboko wétsika.

¹⁹Daxita baxuang naka yawena po diwesin xua Nakom pía peitorobi jume pepaebiwi tina xua bárapo diwesin pexaiñéi jume diwesin. Pajumenaitáware pokotsiwang xua barapomonaе paeба, beya poxonae yatsikaewa payaputáename pokotsiwa barapomonaе paeба. Bárapo pejumein jumewüinae. Bichokono naka yawena icha pekoicha ichi xua pentha éxana poxonae kirei xua ba naka yawena. Bárapo pekoicha waxainchi jopa nantawenonaetsi poxonae jarawato ekoina xuano poxonae matakabi pentha tsina. Barichi poxonae Jesucristo patopáetsika jopa kanamatawenonáe tsainchi bárapo diwesin tsipéi báyatha patopeikaena Jesucristo. ²⁰Matha kopiya bewa payaputaem xua meje: Nakom pía peitorobi jume diwésitha dapó jumein aibi pokotsiwa piakoya ichichipa paeба bárapo Nakom pía peitorobi jume pepaebiwi. ²¹Tsipéi Nakom pía peitorobi jume pepaebiwi jopa kueikuejeiyo pokotsiwa ichichipa piakoutha paeба xua poxonae tina Nakom Pejume Diwesi. Íchitha barapomonaе tatina pokotsiwa Nakom ichichipa, xua Nakom pía Pejumopetünaxü tatsi peitorobixae.

Meje yábara xua pomonaе naerabiya pekuidubi jiwi

2¹Kaena báyatha israelmonae jíwana jinompa pomonaе naerabiya peitorobi jume diwesi pepaebiwi. Barichi paiñaxantha patsina pomonaе naerabiya pekuidubi jiwi. Barapomonaе kuidubina po diwesin xua paka werawéraka exanaena. Barapomonaе nameicha nakuita xua naerabiya paka kuiduba. Pong jiwi pía Pekanamataxeinaeinchi pong Jesucristo, barapomonaе itawetsinchi xua Jesucristo itawetsina, pong xua báyatha barapomonaе tsitúpatsi. Nakom naiña werawéraka exanaena barapomonaе, abe peexanaexae. ²Pin bicheitomonaе exanaena xua abe éxana pokotsiwa xua barapomonaе kuiduba pomonaе naerabiya pekuidubi jiwi. Barapomonaе pomonaе naerabiya pekuidubi jiwi naerabiya pekuidubixae tsane pin bicheito abe yábara paeбиya exanaena pokotsiwa Nakom pía pexaiñéi jume diwesi tatsi. ³Barapomonaе paka muxuitorobina nawita, yáwano paka itorobina xua paiñamonae amanaya paitorobíname pedoutsinexa parátixi barapomonaetha, pomonaе naerabiya pekuidubi jiwi. Íchitha kaena báyatha Nakom yábara paeба barapomonaе, jeye: “Barapomonaе bichokono abe peéxanae jiwi, daxota bewa werapaena tsipéi bichokono abe peexanaexae”, jei Nakom.

⁴Nakom báyatha jopa yábara jüntemainaeyo po peabe koyenewang matatsunpiwi éxana. Íchitha Nakom bebái ichaxota be pukua xua ishoto xua jopa itakounayiyo. Yáwano Nakom napenta éxana peitakiréi nákuatha beya poxonae bárapo matatsunpiwi umenaena Nakom peitabaratha poxonae po mataketha Nakom yábara paeбina daxita jiwi xua penatsikuentsiwa xua abe peexanaexae. ⁵Barichi Nakom jopa báyatha yábara jüntemainaeyo po peabe koyenewa jiwi éxana pomonaе kaena báyatha jinompa. Bárapo matakábintha Nakom itoroba pin awüübo xua bunothopa peexanaenexa pomonaе abe peéxanae jiwi. Meisha saya Noé írúno piamonaе tatsi xua siete póyobe tatsi daxita barapóyobe kapanenebíyatsi bárapo awüübotha. Barapong Noé kuiduba jíwitha xua jiwi bewa jüntükoyene wüünaeya jinompaena Nakomtha. ⁶Pomonaе Sodoma tomarapiwi írúno Gomorra tomarapíwino, barapomonaе abe peexanaewi. Bárapo tomarabemonaе yawa tómarabe Nakom yábara paeба xua pinae abe éxana daxota Nakom werawéraka éxana

ishótotha beya poxonae daxita saya ü ipunang náexana. Bárapo koyenein Nakom tsita itüüta xua bapong bexa jüpa exanaena pomonaeintha pomonae abe éxana dubenanáebiya. ⁷Íchitha meisha saya Nakom kapanepa bárapo pin ishoto weya pong pewüing Lot. Bapong Lot pejüntükoyene wüünaein Nakomtha. Lot kuitaya ünthüthüdeideijeji pokotsiwa jiwi abe éxana.

⁸Bapong Lot, pong pejüntükoyene wüünaein Nakomtha, barü pópona pomonae peajüntükoyénebe jiwi. Daxita matakabi bapong bichokono anthüthütane xua pejüntükoyene wüünaexae Nakomtha xua poxonae bapong taiba yáwano xua poxonae jumetaiba xua jiwi abe exaneiba. ⁹Íchitha Nakom pong jiwi Pekana-mataxeinaein yaputane xua peyawenaewa pomonae peantobewixaetsi poxonae barapomonae bichokono jüntükoyene jüjütéibatsi kaurimonae pía pentakaponaein tatsi. Yáwano Nakom yaputane xua átene peexanaewa pomonaetha, pomonae jopa pejumekowüntsíwichi. Nakom baxua exanaena beya abü poxonae barapomonae umenaena Nakom peitabaratha poxonae Nakom yábara paebina daxita jiwi xua penatsikuentsiwa xua abe peexanaexae. ¹⁰Pomonae xua abe éxana pokotsiwa xua saya jiwi ichichipa éxana yáwano aichaxaibi éxana pokotsiwa pong jiwi Pekana-mataxeinaein itoroba, daxita barapomonae Nakom átene exanaena. Barapomonae bichokono átsaka yawa ichamonae áebatsino. Jopa junuwiyo xua abe peyábara paebiwa xua matatsunpiwi abe peyábara paebíwatsi. ¹¹Matatsunpiwi xeina peayapusüüwa yáwano xeina peitorobi koyenewa xua beyakaincha pomonae naerabiya pekuidubi jiwi. Íchitha bárapo matatsunpiwi jopa abe yábara paebiyo xua barapomonae pomonae naerabiya pekuidubi jiwi poxonae bárapo matatsunpiwi kueikueijeji tsumenae Nakom péitabara tatsi, pong jiwi Pekanamataxeinaein.

¹²Barapomonae pomonae abe peyábara paebí jiwi, barapomonae éxana xua icha duwéi ichi, xua duwéi ba jopa beta nantaxeinaeyo, xua ba saya jiwi tsikobe náéxanatsi xua jiwi Peteikaenexa yawa pebexubinexa pexaenexa. Bárapo pebiwi abe yábara paeba pokotsiwa jopa yaputaeyo. Barapomonae werapaena pía domáewatha icha duwéi icha xua wérapa. ¹³Barapomonae xuya átene tsane abe peexanaexae ichamonaetha. Barapomonae jopa auriyo xua abe peexanaewa mataketha. Barapomonae paka muxuitóroba abe peexanaexae bekein naxaiba poxonae pin penabanaewang paexanéibame. Ichamonae paka abe yábara paeba abe peexanaexae barapomonae yawa aura paka neka-exanaexae.

¹⁴Barapomonae ichichipa nawita xua peyakaibiwa yábüxi daxita xua powaxi taiba. Jopa juniya abe eexanaponaeyo xua abe éxana. Barapomonae nantaüta pía pepunaponáewichi pomonae pejüntükoyene faefaenaewi Nakomtha. Barapomonae ichichi xeika nawita pokotsiwang xua tane daxita. Barapomonae yakuiya náexana xua abe peexanaewa. Daxota barapomonae Nakom bichokono átene kana exanaena. ¹⁵Barapomonae jopa Nakom yábara yaputaetsi pejumenaitematsixae pokoyene xua Nakom pejüntükoyene wüünae exanaewa barapomonae. Barapomonae bárapo kanaüta jütsiya eexanapona icha Balaam ichi xua pokotsiwa éxana. Bapong kaena báyatha pópona. Bapong Balaam, Beor pexanto tatsi. Bapong Balaam abe éxana pexeinaenexa parátixi. ¹⁶Balaam pong naerabiya peitorobi jume diwesi pepaebin, poxonae ichichipa abe peexanaewa, kuimatawéntatsi xua abe éxana. Po duwein pewüing burra, bapong kuimatawenta, Balaam kuimatawéntatsi. Burra kueikueijeji icha jintong ichi, xua saya jintong kueikueijeji. Bárapo duwein jopa kopatsiyo xua Balaam abe peexanaponaewa xua exanapona icha be ichi xua

exanapona pong pematajemabinchi. Daxota Balaam kuimatawéntatsi poxonae ichichipa abe peexanaponaewa.

¹⁷Bárapo pebiwi po pebiwi naerabiya pekuidubi jiwi, jopa yawenaeyo ichamo-naetha, icha be feto mene ichi xua weitha bichokono ameneibi xua ba jiwi jopa yawenaetsi. Yáwano barapomonaе icha be tsakinaebowa ichi xua ba saya dubena-pona xua joibo kápana, xua ba kuinaya jopa duneikaeyo, yáwano xua ba jiwi jopa yawenaetsi xua peruneikaenexa. Nakom itaweta barapomonaе xua barapomonaе itawétatsi ichaxota ataya pejinompaenexa peitakiréi nákuatha. ¹⁸Barapomonaе bichokono átsaka poxonaе kueikueije. Yáwano barapomonaе pía jume, bárapo jume jopa jiwi yawenaetsi. Yáwano barapomonaе náemata jumewüünaeya tsipaeba pomonaetha, pomonaе aena pejumekowüntsiwi Jesucristo xua barapomonaе irü abe peexanaenexa pokotsiwa bekein barapomonaе aichaxaibi éxana xua jiwi pía kuikoyenewa tatsi xua pokotsiwa báyatha kopiya éxana xua abe. ¹⁹Barapomonaе wüünaе tsimumuduta ichamonaetha xua ichamonaе beta pejinompaenexa. Íchitha barapomonaе piakoutha éxana be pomonaе xua kaurimonaе pía pentakaponaеin tatsi amanaya petanakuitsíwatsi. Tsipéi daxita jiwi píakui xeina xua barompaya amanaya tanakuita pongtha xua bara kópata xua bara jüntükoyene itoróbatsi. ²⁰Bárapo kae pin nákuathe ichamonaе jinompa pomonaе kapanenebíyatsi abe pía peéxanaе kuirukoyenein weya xua po abe peéxanaе kuirukoyene po kae pin nakuathepiwi éxana. Barapomonaе baxua éxana poxonaе jumekowünta Jesu-cristo, pong jiwi Pekanamataxeinaеin, xuano xua pong jiwi Pekapanenebiyaеin. Íchitha icha barapomonaе ekeicha abe éxana xuano xua icha áwiya éxana dube-nanáebiya baxuang, bapoxonaе barapomonaе bichokono abe beyakaincha xua poxonaе kopiya éxana xua pewünaeya poxonaе jumekowünta Jesucristo. ²¹Icha barapomonaе jumekowünta yáwano icha penta Nakom peitorobi koyenewa, bapo-xonaе barapomonaе bichokono abe éxana Nakomtha. Íchitha icha barapomonaе kopíyatha jopa jumetaétsipae bárapo peitorobi koyenewa, bapoxonaе barapomo-naе saya be kónotha abe exanáetsipa Nakomtha. Íchitha poxoru barapomonaе pejumetaexae bárapo peitorobi jume yawa pejumekowüntsixae, daxota barapo-monaе Nakom bichokono átene kana éxana, beyakaincha xua poxonaе jopa jume-taeyo bárapo diwesi. ²²Barapomonaе ekeicha kaewa abe yábara jumekuiya éxana pokoyenein kopitha nakuibarapenta. Bara barapomonaе nakuiyábara jumeweta xua po tsika diwesíyotha jeye: “Auri ba xua nakabeta íratha ekeicha kaewa xane. Bekein marrano ba matawainchi pemene itaranáe mératha íchitha ekeicha kaewa xota tsoréi nairáinaba”, jei tsika diwésiyo xua Nakom Pejume Diwésitha paeba.

Meje yábara xua Jesucristo ekeicha pía pepatopeikaewa tsika tsane

3¹Tamonaе pam, pomonaе tapaka kaantobéwichi pam, irü paiña nejumekowün-tsixae Jesucristo. Aiña cártabe pákata tínatsi. Bárapo carte, po carte kotakaya tinang xua bárapo aiña cártabe. Bárapo aiña cartabetha íchipang xua beta paiña neyábara nantaxeinaewa tsane pokotsiwang xua paka tsipáebatsi. ²Panantaxéi-nare pokotsiwa xua Nakom pía peitorobi jume pepaebiwi paeba poxonaе kaena báyatha. Yáwano jopa pajüntemainaeinde po petorobi koyenewa naka kuiduba Jesucristo pía peitorobi jiwi tatsi. Bárapo peitorobi koyenewa Cristo pong jiwi Pekanamataxeinaеin xuano xua pong jiwi Pekapanenebiyaеin pía peitorobi koye-newa tatsi.

³Kopiya matha panantaxéinare xua meje: Pewünaeya poxonae po matakábitha Nakom ira werawéraka exanaena, bárapo matakábitha patsina jiwi xua po jiwi kuikapanaena pokotsiwa Nakom pía pejumexaiñeiwa tatsi. Barapomonae exanaena pokotsiwa saya ichichipa xua abe éxana. ⁴Barapomonae yaiñabiya jei tsane xua Cristo yábara: “Bapong báyatha paka tsiwüünae muxuduta xua ekeicha patopáetsika. ¿Eta xua metha áwiya bapong pawünae éwatame bara jopa patopeikáeyoba? ¿Ínkane bapong? Bekein waámo susato jiwi jumekowünta xua pinae bapong patopáetsika íchitha jopa daichiyo beya nama poxonae barapomonae wérapa kataunxuae bapong jopa patopaeyo. Bara saya jüjüpaona wanákuatha xua bapong jopa patopeikaeyo xua poxonae Nakom nakua fórota beya ánoxuae”, jei tsane barapomonae. ⁵Íchitha barapomonae jopa ichipaeyo xua yábara jumejüntanaina xua kaena báyatha Nakom pepaebixae daxota itaboko dukua xua kaena báyatha yawa xua ira éxana poxonae mene büxüpana weyotsina. Bárapo ira Nakom ménetha éxana. ⁶Yáwano barapomonae jopa ichipaeyo xua jüntanaina xua kaena báyatha xua poxonae Noé pópona Nakom itoroba pin awüübo xua ekeicha ira mene büxüpana boka yawa xua daxita pokotsiwa bárapo íratha werawéraka. ⁷Íchitha bárapo itaboko xua ánoxuae tainchi yawa ira xua ichaxota ánoxuae jinómpatsi Nakom dubena éxana daxita baxuang poxonae Nakom kueikueije pía peayapusüü itorobi koyenéwatha. Nakom baxuang duba beya abü poxonae werawéraka exanaena daxita baxuang pin ishótotha bárapo pía peayapusüü itorobi koyenéwatha. Báraxuang Nakom werawéraka exanaena daxita poxonae po matakéitha Nakom yábara paebina daxita jiwi xua penatsikuentisiwa xua abe peexanaexae.

⁸Tamonae pam pomonae tapaka kaantobéwichi pam, irü paiña nejumekowüntsi jíwixae Jesucristo. Jopa pajüntemainaeinde pokoyene xua daxita bara Nakom tsita najúpatsi pong jiwi Pekanamataxeinaein. Kaentakabi tsita najúpatsi xua mil po weibe. Matáütano mil po weibe Nakom tsita najúpatsi xua kaentakabi. Bekein mil po weibe bichokono aiña wei íchitha Nakom saya be tsita káetotsi. ⁹Nakom jopa ápara bewayo exanaeyo pokotsiwa yábara naka tsiwüünae muxuduta bekein ichamonae nantaxeina xua Nakom jopa naiña exaneibiyo. Íchitha Nakom jopa aitakonaeyo daxota paka éwata paiña nejumekowüntsinea. Bapong ichichipa xua dapong aibi tsane pong werawerakaena. Jame Nakom ichichipa xua maisha daxita jiwi peauranexa tsane abe peexanaexae xua icha jüntükoyene pexeinaenexa tsane po jüntükoyenein xua Nakom tsita wüünaetsi.

¹⁰Íchitha po matakéitha pong jiwi Pekanamataxeinaein patopáetsika bárapo matakábitha jiwi jopa wüünae éwatsi tsane. Bapong pong Wanaka namataxeinaein jemeicha patopeikaena icha be ichi pong pekaibin xua poxonae namicha patopa. Peitaboko werawerakaena poxonae pin busi tsúrukuae tsane. Jomokóichato, xometono, opiteino, daxita baxuang tautinchi ishótotha. Yawa bárapo ira tautinchi, yáwano múxuna tautinchi xua bárapo íratha xeina.

¹¹Tsipéi daxita baxuang tautinchi daxota bewa pajinompam be pomonae pejüntükoyene wüünaewi Nakomtha pomonae jopa Nakom tsita xéinatsi penatsikuentisiwa xua abe peexanaexae. Beta pajinómpare icha Nakom ichi xua beta pópona. ¹²Paéware xua po matakéitha daxita Nakom wétsina. Yáwano paexande pokotsiwa xua yawénatsi xua pepatopeikaewa tsane bichoina bárapo matakabi. Bárapo matakéitha itaboko tautsina ishótotha. Jomokóichato, xometono, opiteino,

daxita baxuang tautsina pin ishótotha. ¹³Íchitha waxainchi éwatatsi xua Nakom nákata exanaena pena ira yawa pena itaboko xua báyatha Nakom yábara naka tsiwüünae muxuduta. Bárapo pena ira yawa bárapo pena itaboko daxita wüünae exanaena pokotsiwa pexaiñeiwanexa tsane.

¹⁴Tamonae pam, pomonae tapaka kaantobéwichi pam, irü paiña nejumekowüntsixaes Jesucristo. Paka tsipáebatsi baxua xua daxota poxonae kataunxuae paéwatame baxuang, xua pokotsiwa Nakom exanaena bara beta paexande. Bapoxonae Nakom paka kaxinaena xua jüntema pajinómpame, matáütano xua jopa paxeinaem peabe koyenewa paiña jüntükoyenéwatha, yáwano xua ichamonae jopa paka yábara paebí tsane xua abe paiña neexanaewa. ¹⁵Yáwano payaputáneme xua kaena báyatha Nakom pong Wanaka namataxeinaein beitatemaya naka éwata xua wajumekowüntsínexa xua pía wanaka kapanenebiyaewa tsane. Yáwano irü Pablo baxua yábara pákata tina. Bapong Pablo, pong waantobein, pong irü jumekowüntariü Jesucristo. Pablo yaputane exainchi baxuang yábara xua Nakom yaputane éxana. ¹⁶Bapong Pablo daxita pía cártangtha baxuang yábara paka tsi-paeba. Íchitha ichawang dangwéi xua paiña neyaputaewa. Íchitha pomonae jopa beta peyaputáe jiwi irü pomonae pejüntükoyene faefaenaewi Nakomtha, barapomonae seikaya toxeinchiya éxana pokotsiwang xua Pablo paeba. Barichi yábara jumetoxeinchiya éxana ichawa pokotsiwa Nakom Pejume Diwésitha paeba. Barapomonae piakoutha nanatsiéxana xua abe éxana xua pewerawerakaewa tsane, xua Nakom exanaena.

¹⁷Tamonae pam, pomonae tapaka kaantobéwichi pam, irü paiña nejumekowüntsixaes Jesucristo. Paiña neyaputaexae baxuang pewünaeya xua Nakom exanaena baxuang, daxota dota pam pomonae abe pákata neka-exanáe jiwi xua jopa paka nekantakapanaewa tsane. Jopa pakopatsinde xua barapomonae baxua pákata éxana, xua jopa paiña nepentsiwa tsane Nakom. ¹⁸Bichokono pana najüntüwüünae exanaponde Wanaka namataxeinaein pía peantobéwathaxae. Jesucristo beta payábara yaputaeponde, pong Wanaka kapanenebiyaein. ¡Bárabü bapong ataya xeinaena peaiñakuí koyenewa ánoxuae yawa xua bexa tsáneno! Je bara ichi tsane.

Baja Pedro.

Meje Po Carte Kopiya Juan Tatina, Pomonae Jesucristo Pejumekowüntsiwi Tatínatsi

Meje yábara po diwesi xua pong naka ajüntüyapusüüya éxana

1 ¹Pákata yábara tínatsi pong pewüing “Pejume”, baraichi, pong jiwí ajüntüyapusüüya exainchi. Bapong asüü kaena býatha poxonae Nakom abü kataunxuae jopa exanaeyo wanakua. Poxonae bapong nakatsiwa wanákuatha, bapoxonae bexa poxonae bapong kueikueijeí diwesi bara bapoxonae barapong pajumetang. Barapong bara yatsikaya patang. Yawa bapong bara pakobejayabeibang. ²Bárapo peajüntüyapusüüwa Nakom éxana, po peajüntüyapusüüwa xua ataya tsiteka, xua pata yábara yaputaewa baxua. Barapong Nakom Pexanto tatsi xeina bárapo peajüntüyapusüüwa, matáütano patang barapong. Daxota yábara paka tsipáebatsi bapong. Yáwano daxota yábara paka tsipáebatsi bárapo peajüntüyapusüüwa xua bapong xeina, pong Páxatha peekaexae. ³Paka tsipáebatsi xua býatha patang yawa xua pajumetangno, kaemonae paiña naexanaenexa paxangtha, pebürüya wajumekowüntsixae Jesucristo. Icha paxang paichin xua Nakomtha Waxatha kaemonae panaexanang yawa Pexántotha pong Jesucristo, bara paichínderü. ⁴Daxota bárapo koyenein pákata tínatsi xua bichokono pata tajüntükoyene weiweinaewa tsane.

Meje yábara xua Nakom pexaiñéi jüntükoyene peyakuiyajinaein

⁵Po diwesi Jesucristo pana kuiduba bárapo diwesi xuya paka tsipáebatsi xua Nakom pexaiñéi jüntükoyene peyakuiyajinaein. Bapong jopa xeinaeyo peakuirube koyenewa pejüntükoyenéwatha, tsipéi bapong bichokono pejüntükoyene xeikaein. ⁶Icha jeichichi: “Waxainchi Nakom yawa jinómpatsi, be kaemonae pebürüya nakayawa jinómpatsi Nakomtha”, jeichichi, dáichitha kaena poxonae saya abe éxanatsi, bapoxonae saya ápara náerabatsi xua pokotsiwa wapaebiwa baxua, yawa náerabatsi xua éxanatsi. Matáütano jopa yawa múxuna jinompaetsi Nakom pía pexaiñéi koyenewa tatsi. ⁷Íchitha icha kajinompáetsipatsi Nakom Pejume Diwesi wajüntükoyeneintha yawa xua exanaetsípatsi pokotsiwa xua Nakom ichichipa bara néxata pebürüya kaemonae naéxanatsi. Jesucristo jana pichapabarena poxonae tüpa, pong Nakom Pexanto tatsi. Barapong pong Nakom Pexanto tatsi petüpaexae náetotha, daxota Nakom naka jüntükoyene wejüntemaina éxana daxita abe waexanáe kuirukoyenein.

⁸Icha jeichichi: “Jopa abe taexanaewa”, jeichichi, ápara bara wakoutha namuxjáiñabatsi pokotsiwa tapaebixae. Matáütano wajüntükoyeneintha jopa xéinatsi pexaiñéi koyenewa. ⁹Íchitha icha Nakomtha yábara tsipáebatsi xua abe waexanaewa, xua jeichichi: “Nakom aurang yáitama abe éxanang”, jeichichi, bapoxonae Nakom naka jüntükoyene wejüntemaina éxana abe waexanáe kuirukoyenein xua

daxita naka wexuba. Baxua Nakom éxana, tsipéi bapong yábara barü jumeukuikowúntatsi xua peexanaewa tsane pokotsiwa pepaebiwa. Matáútano tsipéi bapong bara xaniwaichiya peexanaein. ¹⁰Icha jeichichi: “Jopa abe exanaetsi”, jeichichi, ápara bara yábara jume kuiya éxanatsi xua Nakom pong jiwi pemuxuitorobin, tsipéi Nakom naka yábara jei: “Barapomonaé abe peexanaewi”, naka yábara jei. Yáwano Nakom Pejume Diwesi jopa xéinatsi wajüntükoyeneintha.

Meje yábara xua Cristo pong wanaka yábara jume yawenaein Nakomtha

2 ¹Pomonaé be tamonaé tapaka kanatsikotáewichi pam, irü paiña nejumekowúntatsi Jesucristo, yábara pákata tínatsi bárapo koyene xua abe paiña neexanaeyainwa. Dáichitha icha waxainchi abe éxanatsi barápara waxainchi naitúutatsi Jesucristo pong wanaka yábara jume yawenaein Nakomtha xua Páxathaxae. Bapong matáúta jüntükoyene wüünaeya peexanaein. ²Barapong Jesucristo petüpaexae naka yantómata daxota Nakom naka kapanepa abe waexanáe kuirukoyenein weya. Jopa meisha waxainchi nexa ápara bara irü daxita bárapo kae pin nakuangthapiwi tatsitüpatzi abe pía peéxanaé kuirukoyenein tatsi.

³Icha jumekowúntsiya éxanatsi pokotsiwa Nakom pía peitorobi jume diwésitha paeba, néxata bara yaputainchi, xua bara xaniwaicha wayaputáewaba Nakom. ⁴Icha ichüing jei: “Xang Nakom yaputang”, jei, xua dáichitha jopa exanaeyo pokotsiwa Nakom pía peitorobi jume diwesi paeba, ápara bapong pong jiwi pemuxuitorobin, yawa pejüntükoyenéwatha jopa xeinaeyo pexaiñéi koyenewa. ⁵Seikaya nama pong éxana pokotsiwa xua Nakom itoroba pong waxainchi jíwanatsi, néxata bara yaputainchi xua bapong wüünaeya ántobe Nakom. Daxota waxainchi nayaputainchi xua bara pebürüya kaemonaé nakayawa jinómpatsi Nakomtha. ⁶Pong xua jei: “Nakom yawa póponang, kaemonaé pebürüya nakayawa póponang Nakom”, jei, bapong bewa jajüntükoyene wüünaeya póponaé, icha báyatha Jesucristo ichi xua bapong beta wüünaeya jajüntükoyeneya pópona.

Meje yábara xua Nakom pía pena peitorobi jume diwesi

⁷Tamonaé pam pomonaé bichokono tapaka kaantobéwichi pam, irü paiña nejumekowúntatsi Jesucristo, ánoxuae pákata tínatsi bárapo peitorobi diwesi xua jopa pena diwésiyo, tsipéi kaena báyatha bárapo diwesi paxéiname poxonaé aena pajumekowúntame. Bárapo peru itorobi jume diwesi kaena báyatha pajumetaneme. ⁸Íchitha po diwesi xua ánoxuae pákata tínatsi, bárapo diwesi be pena diwesi náexana. Bárapo peitorobi diwesi Cristo bara tsita pexaiñéi diwesichi, írürü paxam paka tsita pexaiñéi jume diwesi. Tsipéi jiwi, kopitha jopa yaputaeyo bárapo Nakom pía pena peitorobi koyenewa tatsi ichaxota xua jei: “Nantiya pana naantobeinde”, jei. Icha be pókotsi koyeneya jüta ichi poxonaé jiwi jopa beta taeyo poxonaé kirei. Íchitha ánoxuae jiwi yaputane bárapo Nakom pía pena peitorobi koyenewa tatsi daxota bara itakúüpatzi xua wüünaeya pejinompaewa, icha be pókotsi koyeneya jüta ichi poxonaé jiwi beta jinompa matakeitha.

⁹Icha ichüing jei: “Xang Nakom yaputang”, jei, xua dáichitha ita-aenae-aeneya kaseba nawita pongtha xua irü jumekowúntarü Cristo, bapong ápara kataunxuae jopa yaputaeyo Nakom. ¹⁰Pong ántobe pongtha xua irü jumekowúntarü Cristo, bapong ápara jame yaputane Nakom. Daxota bapong jopa exanaeyo pokoyenein

xua abe peexanaewa xua irü ichamonae peexanaewa tsane. ¹¹Íchitha pong ita-aenae-aenéi pongtha xua irü jumekowünta Cristo, bapong akuikoyenebeya pópona be pókotsin jopa yaputaeyo Nakom. Bapong jopa wüünaeya poponaeyo, icha be pókotsi koyene jüta ichi poxonae pong peitatanakütsin katsawa pona poxoru jopa xapain taeyo.

¹²Pomonae pexui pam, pákata tínatsi tsipéi Nakom paka jüntüwejúntemaina éxana abe paiña neexanáe kuirukoyenewang xua Jesucristo paiña nejumekowüntsi-xae. ¹³Pomonae piñong pam, pákata tínatsi tsipéi payaputáneme Nakom, pong Waxa, pong ataya pepoponaein, pong kopiya pópona poxonae aena daxita fórota. Pomonae pewowi jiwi pam, pákata tínatsi, tsipéi kaurimonae pía pentakaponaein tatsi paanáyabame poxonae paka jüntükoyene jüjüta xua abe paiña neexanaewam tsane.

¹⁴Pomonae pexui pam, pákata tínatsi, tsipéi payaputáneme Nakom, pong Waxa. Pomonae piñong pam, pákata tínatsi tsipéi payaputáneme Nakom, pong ataya pópona, pong kopiya pópona poxonae aena daxita fórota. Matáütano pewowi jiwi pam, pákata tínatsi tsipéi bichokono paajüntükoyenesüüm, yáwano wüünaeya pajumekowüntame Nakom Pejume Diwesi, matáütano tsipéi pajüntükoyene amanáyabame kaurimonae pía pentakaponaein tatsi.

¹⁵Jopa bichokono paichichipaeinde pokotsiwa xua abe po kae pin nákuathe. Matáütano jopa bichokono paka yábara nantaxeinaeya ichichipaeinde xuang pokotsiwang xeina pomonae jopa pejumekowüntsiwi pomonae jinompa po kae pin nákuathe. Icha ichüng saya ichichipa bichokono xua xuang xeina pomonae jopa pejumekowüntsiwi bapong jopa ápara antobeyo Nakom, pong Waxa. ¹⁶Penasikuitatáe koyene Nakom jopa itorobiyo xua bárapo kae pin nákuathe tsike nexa. Ápara pomonae jopa pejumekowüntsiwi piakoutha éxana bárapo penasikuitatáe koyene. Matáütano Nakom jopa itorobiyo xua abeya peichichipáe koyene xua peuwiyatáe koyene. Matáütano Nakom jopa itorobiyo pokoyenein xua peaebí koyenein icha-monaetha, xua pexeinaexae kopei. Barapókotsi koyenein Waxa Nakom wérena jopa pichipaeyo. Saya ápara pomonae jopa pejumekowüntsiwi pía koyene tatsi. ¹⁷Bárapo kae pin nakue werawerakaena, yáwano múxuna werawerakaena xua xuang abe peéxanae kuirukoyenein. Íchitha pong éxana pokotsiwa Nakom ichichipa bapong jame ataya poponaena Nakomtha.

Meje xua pexaiñeiwa yábara, yawa xua penaerabiwa yábara

¹⁸Pomonae pexui pam, bara nama imoxoyo tsane po matakabi Nakom daxita werawéraka exanaena bárapo kae pin nakua. Báyatha pajumetáneme xua jei: “Imoxoyo patopaena pong Cristo pía peaitafaetabinchi”, jei. Íchitha báyatha pata pinmonae, pomonae Cristo pía peaitafaetabíwichi. Daxota yaputainchi xua bara nama imoxoyo tsane po matakaiha Nakom werawéraka exanaena bárapo kae pin nakue. ¹⁹Barapomonae pomonae Cristo pía peaitafaetabíwichi kopiya naka barü nakaetuta poxonae nakaetutéibatsi, íchitha ánoxuae bara weya naka wepu pona. Icha xaniwaicha barapomonae waxainchi jíwana tsipaetsi metha áwiya kataunxuae naka barü nakaetuta dubenanaebiyáetsipa. Barapomonae waxaiña weya pona, xua daxota jiwi taena xua barapomonae bara jopa wámonae jíwiyo xua jopa pejumekowüntsi jíwixae Cristo.

²⁰Íchitha paxam Cristo paka kata Nakom pía Pejumopetünaxü tatsi pía paiña nepaka barü jinompaenexa. Daxota paxam daxita yábara paka yaputane éxana

pexaiñei koyenewa. ²¹Paxam pákata tínatsi tsipéi payaputáneme xua pexaiñeiwa. Icha jopa payaputaetsipaem baxua, jopa pákata tinaetsípaetsi. Paxam payaputáneme pong ba xua xaniwaicha pepaebin jopa ba naerabiya paebiyo. ²²¿Jintam pong pemuxitorobinda? Pong xua jei: “Jesús ápara Mesías aibi, pong Nakom itoroba”, jei, bapong ápara pong pemuxitorobin. Bapong Cristo pía peaitafaetabí jintongtsi tsipéi jumematawenta poxonae jiwi paeba xua pinae Cristo Nakom Pexanto tatsi xuano xua Nakom Cristo Paxa tatsi. ²³Pomonae xua Nakom Pexanto tatsi jume itawétatsi xua pejumekowüntsiwa, barapomonae jopa nantaütsiyo Nakomtha xua be Paxa tatsi. Íchitha pong Nakom Pexanto tatsi wüünaeya yábara páebatsi, xua jei: “Jesús ápara Mesías pong Nakom itoroba”, jei, jame bapong nantaüta Nakom be Paxa tatsi.

²⁴Daxota paiña jüntükoyeneintha pajumexéinare Nakom Pejume Diwesi xua báyatha pajumetáneme poxonae aena pajumekowüntame. Icha paiña jüntükoyeneintha pajumexéiname xua pajumetáneme báyatha, néxata bapoxonae pebürüya kaemonae pana naexanáename Pexanto tátsitha yawa koxiyüngtha, xua Nakomtha. ²⁵Matáütano Jesucristo yábara naka tsiwüünae muxuduta, naka jei: “Peajüntüyapusüüwa paka katinchi po peajüntüyapusüüwa xua ataya tsiteka”, naka jei.

²⁶Yábara pákata tínatsi bárapo koyenein pomonae xua paiña nepaka muxujaiñabiwa. ²⁷Íchitha paxam Nakom pía Pejumopetünaxü tatsi paxéiname, po pejumopetünaxü tatsi paka kata Jesucristo. Bapoxonae jopa nantawenonaeyo xua ichamonae paka kuiduba poxoru bárapo Nakom pía Pejumopetünaxü tatsi paka kuiduba daxita koyenein. Pokoyenein Nakom pía Pejumopetünaxü tatsi paka kuiduba báraxua pexaiñeiwa, matáütano jopa pemuxitorobiwa. Bara paichinde kaemonae pebürüya pana naexande Crístotha, icha Nakom pía Pejumopetünaxü tatsi ichi xua yábara paka kuiduba xua pokoyene paiña neexanaewa tsane.

²⁸Pomonae pexui pam, antübüsüüya kaemonae pebürüya pana naexande Crístotha xua jopa wajunuwinexa xua poxonae bapong patopáetsika bárapo kae pin nákuathe. Yawa kaemonae pana naexande Crístotha xua jopa wa-aura tsane barapong peitabaratha xua abe waexanaexae poxonae patopáetsika. ²⁹Báyatha payaputáneme xua Jesucristo pong jüntükoyene wüünaeya peexanaein. Barichi bewa payaputáename pomonae jüntükoyene wüünaeya peexanaewi, barapomonae barápara Nakom pía pexui tatsi.

Meje yábara xua Nakom pía pexuimonae tatsi

3¹Maisha Nakom Waxa jopa juniya naka antobeyo. Daxota Nakom kópata xua naka yábara jei: “Nakom pía pexui tatsi”, naka yábara jei. Jopa jume, bara barapomonaetsi. Daxota bárapo kae pin nakuepiwi jopa naka yaputaeyo xua Nakom pía pexuimonaetsi, tsipéi barapomonae jopa báyatha yaputaeyo Nakom. ²Pomonae tapaka kaantobéwichi pam xua irü paiña nejumekowüntsixa Nakom, waxainchi bara Nakom pía pexuimonaetsi. Ánoxuae kataunxae jopa nayaputaetsi xua bexa tsane eta pokoyeneya naka kana exanaena. Íchitha yaputainchi xua poxonae Jesucristo patopáetsika, waxainchi naexanaeinchi icha barapong jüta koyeneya ichi. Tsipéi bapong bara yatsikaewa taeinchi. ³Pomonae Jesucristo wüünae éwatatsi xua pepatopáe wüünae, barapomonae najüntükoyene wüünae éxana, xua jopa xeinaeyo peabe koyenewa, icha Jesucristo ichi xua bichokono pejüntükoyene wüünaein xua jopa xeinaeyo peabe koyenewa.

⁴Daxita pomonae abe peexanaewi, barapomonae Nakom yábara paebina xua penatsikuentsiwa abe peexanaexae bapongtha. Tspíei poxonae abe éxana taakoi-bichi xua éxana pokotsiwa Nakom pía peitorobi jume diwesi paeba. ⁵Paxam payaputáneme xua Jesucristo patopeika bápapo kae pin nákuathe, wanaka jüntükoyene jüntemaina exanaenexa abe waexanáe kuirukoyenein. Matáütano payaputáneme xua bapong jopa abe exanaeyo. ⁶Daxita pomonae pebürüya kaemonae náexana Cristotha, barapomonae jopa abe éxana dubenanaebiyayo. Íchitha nama pomonae abe éxana dubenanáebiya, barapomonae jopa Jesucristo yaputaetsi, matáütano jopa pijimonae tatsichi. ⁷Pomonae pexui pam, jopa pakopatsinde xua bara ichamonae paka muxujaiñabina. Pong ba wüünae éxana bapong ba bichokono pejüntükoyene wüünaein, icha Jesucristo ichi xua bichokono pejüntükoyene wüünaeya exanaein. ⁸Íchitha pong ba xua abe éxana dukuanaebiya, ápara bapong ba kaurimonae pía pentakaponaein tatsi pijimonae jíwanapin tatsi. Tspíei kaena báyatha, poxonae aena Nakom daxita fórota, kaurimonae pía pentakaponaein tatsi bapong abe peexanaein. Nakom Pexanto tatsi patopeika xua kana koyenewerawéraka peexanaenexa kauri pía pentakaponaein tatsi pía koyenewang tatsi.

⁹Pomonae Nakom pía pexui tatsi barapomonae jíwana dapong ba aibi pong ba abe éxana dukuanaebiya, tspíei bapong yajüntükui koyeneya pópona Nakom pía kui koyenewa tatsi. Bapong jopa itaküüpaetsi xua abe éxana dukuanaebiya tspíei Nakom pía pexui jíwanapin tatsi. ¹⁰Daxota yaputainchi pomonae Nakom pía pexui tatsi, matáütano yaputainchi pomonae kauri pía pentakaponaein tatsi pía pexui tatsi. Yábara yaputainchi pomonae jopa beta exanaeyo, barapomonae jopa Nakom pía pexui tatsi. Matáütano yábara yaputainchi pomonae jopa antobeyo ichamonae pomonaetha, pomonae irü pejumekowüntsiwi, barapomonae jopa Nakom pía pexui tatsi.

Meje yábara xua poxonae jei: “Kaemonae pebürüya bara nantiya naántobe tsainchi”, jei

¹¹Poxonae aena pajumekowüntame, xua beya ánoxuae, pajumetáneme Nakom Pejume Diwesi. Bápapo diwésitha jeye: “Kaemonae pebürüya bara nantiya naántobe tsainchi”, jei bápapo diwésitha. ¹²Waxainchi jopa bewa naexanaetsi icha ichi pong pewüng Caín, pong kaena báyatha tüpa. Bapong Caín kaurimonae pía pentakaponaein tatsi pía jintong tatsi. Bapong peweicho bexuba. ¿Eta xua metha Caín peweicho bexuba? Caín peweicho uwiya bexuba, tspíei pokotsiwa Caín éxana Nakom nexa, Nakom tsita abetsi. Íchitha nama pokotsiwa Caín peweicho tatsi éxana Nakom nexa baxua jame Nakom tsita wüünaetsi.

¹³Tamonae pam, pomonae irü paiña nejumekowüntsixaes Jesucristo. Paiñaxoba panantü éxabame icha ichamonae paka ita-aenae-aení pomonae jinompa po kae pin nákuathe, pomonae jopa pejumekowüntsiwi. ¹⁴Waxainchi yaputainchi xua bewa werapaeinchi abe waexanaexae. Íchitha ánoxuae peajüntüyapusüüwa xéinatsi, po peajüntüyapusüüwa ataya tsiteka waantobexae pomonaetha, pomonae irü pejumekowüntsixaes. Pong xua jopa antobeyo piamonae jíwanapin tatsi, pong irü pejumekowüntsin Nakom, bapong bekein pópona íchitha jopa xeináe tsane peajüntüyapusüüwa. ¹⁵Pong ita-aenae-aeneya kaseba ichamonae pomonaetha, pomonae irü pejumekowüntsiwirü Nakom, bapong Nakom tsítatsi be pong jiwi pejutebin. Payaputáneme xua pong jiwi pejutebin bápána jopa xeináe peajüntüyapusüüwa

pejüntükoyenéwatha, po peajüntüyapusüüwa ataya tsiteka. ¹⁶Waxainchi yábara yaputainchi xua Nakom wanaka antobewa, tsipéi Jesucristo naka tsitüpa náetotha wanaka antobexae. Daxota bewa kopatinchi xua bara ichamonae naka átene exanaena, xua bekein beya poxonae tüpa naka exanaena ichamonae nexa pomonae irü pejumekowüntsíwirü. ¹⁷Pebin ba xeina nawita xuang pokotsiwa ba nantawénona xua jüntema pópona penaexanaewa tsane. Bapong kuitane pía jintong pong irü pejumekowüntsindü Nakom xua pong jopa xeinaeyo pokotsiwa nantawénona. Icha bapo pebin jopa pía jintong yábara nantanuweya nantaxeinaeyo xua peyawaenexa, bárapo pebin ápara jopa Nakomtha tsita xeinaeyo peantobewa, po peantobewa Nakom xeina jiwi nexa. ¹⁸Tamonae pam, pomonae irü paiña nejumekowüntsixae Jesucristo. Jopa bewa saya ichamonaetha jeichi: “Paka antobetsi”, jopa bewa saya jeichi, poxonae jopa yawenaetsi barapomonae. Jame bewa xaniwaicha yawenaetsi barapomonae, bapoxonae jame yatsikaewa ántobe tsainchi barapomonae.

Meje yábara xua wajumekowüntsiya jinompawa Nakomtha

¹⁹⁻²⁰Poxonae yawénatsi ichamonae bapoxonae yaputainchi xua bara xéinatsi pokoyene pexaiñéi koyenewa. Xaniwaicha yaputainchi xua Nakom ichichipa pokotsiwa waxainchi éxanatsi, bara bekein wajüntükoyene naka jei: “Jamaisha jopa beta exanaem”, bekein naka yábara jei. Waxainchi yaputainchi xua Nakom bichokono aiñakuí, beyakaincha wajüntükoyene poxonae abe naka yábara paeba, tsipéi Nakom daxita yaputane. ²¹Tamonae pam, paxam pomonae tapaka kaántobe jíwichi pam, paiña nejumekowüntsixae Jesucristo. Bekein wajüntükoyene jopa abeya naka yábara jeyo: “Jamaisha jopa beta exanaem”, jopa jeyo, daxota áwiya Nakom jumekowüntatsi xua waexanaewa pokotsiwa Nakom ichichipa. ²²Yawa Nakom naka kata pokotsiwa wúükatsi wajumekowüntsixaetsi pía peitorobi jume diwesin tatsi, yáwano poxoru waexanaexae pokotsiwa Nakom ichichipa. ²³Yawa Nakom pía peitorobi jume diwesi naka itorobiya jeye: “Taxanto Jesucristo pajumekowünde, yawa nantiya pana naantobeinde”, naka jei. ²⁴Daxita pomonae ba éxana pokotsiwa Nakom pía peitorobi diwésitha paeba, barapomonae Jesucristo yawa jinompa, barichi barapomonae Jesucristo barü jinómpatsi. Waxainchi yaputainchi xua bapong naka yawena dukuanaebiya, tsipéi nanajumopekata waxantha wanaka kuidubinexa bárapo koyene.

Meje yábara xua Nakom pía Pejumopetünaxü tatsi, irü pomonae Jesucristo abe peyábara paebíwichi

4 ¹Tamonae, pomonae tapaka kaántobe jíwichi pam, irü paiña nejumekowüntsixae Jesucristo. Jopa pajumekowüntsinde xua daxita pomonae paka jei: “Paxang Nakom peitorobi jume pata paebiwi pang”, paka jei. Jame maisha pajüjüre saya barapomonae paiña neyaputaenexa barapomonae icha metha bara Nakom itoroba barapomonae. Tsipéi bárapo kae pin nakuathepiwi jiwi ayéi pomonae penaerabiwi, pomonae jei: “Paxang Nakom peitorobi jume pata paebiwi pang”, jei. ²Íchitha paka itaküüpa xua payaputáneme pomonae xeina Nakom pía Pejumopetünaxü tatsi. Icha barapomonae paka jei: “Nakom Pexanto tatsi, pong Jesucristo, pepa jintong nakatsiwa bárapo kae pin nákuathe”, jei, bapoxonae payaputáneme xua barapomonae ápara Nakom pía Pejumopetünaxü tatsi yawa jinompa. ³Icha

ichamonae paka jei: “Nakom jopa itorobiyo Pexanto bárapo kae pin nákuathe xua penaexanaenexa pepa jintong pewüng Jesús”, paka jei, bapoxonae paxam payaputáneme xua barapomonae ba jopa yawa jinompaeyo Nakom pía Pejumopetünaxü tatsi. Barapomonae ba seikaya xeina icha pejumopetünaxü po jumopetünaxü Cristo ita-aenae-aeneichi. Paxam báyatha pajumetáneme xua bárapo pejumopetünaxü bewa patopáetsika po kae pin nákuathe tsike. Bara xaiñéi bara báyatha bárapo jumopetünaxü patopa po kae pin nákuathe tsike.

⁴Tamonae pam, paxam Nakom pijimonae tatsi pam. Paxam pakuikoyene amánábame bárapo penáerabi jíwitha. Tsipéi po pejumopetünaxü paka yawa pópona xua Nakom pía Pejumopetünaxü tatsi, bárapo pejumopetünaxü bichokono peyapúsüü itorobiya koyenewa pexeinaein, beyakaincha po pejumopetünaxü po kae pin nakuathepiwi jüntükoyene itoroba dubenanaebíyatsi xua abe peexanaenexa. ⁵Bárapo jiwí ápara bárapo kae pin nakuathepiwi, daxota barapomonae yábara kueikueijej pokotsiwang bárapo kae pin nákuathe xeina. Ichamonae irü pomonae po kae pin nakuathepíwixae bárapo koyene baxuang jumenaitaewatsiya éxana. ⁶Íchitha waxainchi Nakom piamonaetsi. Pomonae Nakom yaputainchi, barapomonae bara naka jumenaitáewata. Íchitha nama pomonae jopa Nakom yaputaetsi, barapomonae jopa naka jumenaitaewatsiyo. Daxota naka itaküüpa xua wayaputaewa pomonae kueikueijej pexaiñéi jume. Matáütano naka itaküüpa xua wayaputaewa pomonae kueikueijej pemuxuitórobi jume.

Meje yábara xua Nakom peyawakuijinaein xua bichokono peántobe koyenewa

⁷Tamonae pomonae tapaka kaantobéwichi pam, irü paiña nejumekowüntsixae Nakom. Bewa waxainchi nantiya naántobe tsainchi. Tsipéi bárapo peántobe koyenéwatha Nakom naka kana éxana xua waxeinaewa waántobe koyenewa. Daxita pomonae xua ántobe ichamonae ápara barapomonae bara Nakom pía pexui tatsi náexana. Matáütano barapomonae bara Nakom yaputainchi. ⁸Nakom ba peyakuiyajinaein peántobe koyenewa. Daxota pong jopa tsita xeinaeyo ichamonae peántobe koyenewa ápara poxoru jopa yaputaeyo Nakom, tsipéi Nakom peyakuiyajinaein peántobe koyenewa. ⁹Poxonae Nakom Pexanto itoroba Nakom naka tsita itüüta pía peántobe koyenewa. Nakom Pexanto itoroba pong yatsikaya kompa tatsi, bárapo kae pin nákuathe tsike waxeinaenexa tsane peantüyapusüüwa, po peantüyapusüüwa ataya tsiteka. ¹⁰Bárapo yatsikaewa pepa peántobe koyenewa baxue meje: Poxonae ba Nakom antobetsi, báraxua ba jopa pepa peántobe koyenéwiyo. Jame ba Nakom naka ántobe báraxua ba jame yatsikaewa pepa peántobe koyenewa. Poxoru Nakom itorobika Pexanto wanaka wejüntemaina exanaenexa abe waexanáe kuirukoyenein. Bárapo koyene jame yatsikaewa pepa peántobe koyenewa.

¹¹Tamonae, pomonae tapaka kaántobe jíwichi pam, irü paiña nejumekowüntsixae Nakom. Tsipéi Nakom bichokono naka ántobe, daxota xuya waxainchi bewa nantiya naántobe tsainchi. ¹²Dapong ba aibi pong báyatha Nakom tainchi. Íchitha icha waxainchi nantiya naántobe tsainchi, bapoxonae Nakom naka yawa poponaena. Nakom beta xaniwaichiya kana éxana pía peántobe koyene wajüntükoyene bérena. ¹³Waxainchi natsita itapeiñaxéinatsi, xua bara Nakom yawa jinómpatsi, yawa xua Nakom naka yawa pópona, tsipéi Nakom nanajumopetünaxü

kata waxantha. ¹⁴Paxang patang Jesucristo poxonae Nakom Pexanto itorobika. Daxota pajang: “Bara xaiñéi xua Nakom Pexanto itorobika, xua barapong pekanenebiyaenexa po kae pin nakuathepiwi xua abe pía peéxanae kuirukoyenein weya tatsi”, pajang. ¹⁵Pong ba xua jeye: “Bapong Jesús Nakom Pexanto tatsi”, jei, bapong ápara bara yawa pópona Nakom, irü Nakom yawa pópona bapong.

¹⁶Daxota waxainchi Nakom yaputainchi, yawa jumekowúntatsi xua xaniwai-cha bara Nakom naka ántobe. Nakom ápara pong peyanthüthüya jinaein xua pokotsiwa bichokono peántobe koyenewa. Pong xua bichokono ántobe ichamona, bapong ápara bara yawa pópona Nakom, irü Nakom yawa pópona bapong. ¹⁷Daxota waxainchi yábara nakuiduba dubenanaebíyatsi xua bichokono peántobe koyenewa. Poxonae matakabi tsuxubi tsane po mataketha Nakom jiwi yábara pae-bina xua penatsikuentsiwa Nakomtha, bárapo matakábitha jopa junuwí tsainchi. Jumekowúntinchi xua Nakom jopa wanaka yábara paebiwa tsane xua abe waexanaexae. Icha Jesucristo ichi xua jopa abe éxana dukuanaebiyaeyo poxonae pópona po kae pin nákuathe, waxainchi barapókotsi koyeneya ichichi poxonae jinómpatsi po kae pin nákuathe. ¹⁸Poxonae antobetsi ichamona bárapo jüntükoyenéwatha ba jopa kunuwichi barapomona. Tsipéi bárapo peántobe koyenéwatha tórotatsi pokotsiwa xua pejunuwiwa xua wajüntükoyene weya. Tsipéi pong junuwa nayaputane xua átene tseneba, penayaputaexae xua abe éxana. Pong ba junuwa jopa xeinaeyo peántobe koyenewa, po peántobe koyenewa Nakom weya.

¹⁹Waxainchi daxota Nakom antobetsi tsipéi bapong kopiya pewünaeya naka ántobe. ²⁰Icha pebin jei: “Xang Nakom antobein”, jei, xua dáichitha kaena itaenaenaeyo kaseba pía jintong pongtha xua irü jumekowúntarü Nakom, ápara bárapo pebin pong jiwi pemuxuitorobin. Icha jopa antobeyo pía jintong pong peyaitaexae, barichi bapong jopa antobeyo Nakom pongtha xua jopa yaitaeyo. ²¹Nakom nákata itoroba pía peitorobi jume diwesi. Bárapo diwésitha naka jeye: “Pong xua Nakom antobetsi, bapong bewa múxuna ántobe tsane pía jintong pongtha xua irü jumekowúntarü Nakom”, naka jei bárapo diwésitha.

Meje yábara poxonae xua waxainchi jüntükoyene amanáyabatsi pomona jopa pejumekowúntsiwi

5 ¹Pong ba bichokono tsita xeina pejumekowúntsiwa Jesús pong xua jei: “Jesús ápara bara bapong pong Nakom itorobika, pong Mesías jeichichi”, jei, bapong jame Nakom Pexanto tatsi náexana. Daxita pomona ántobe Nakom xua páxatha, barichi barapomona múxuna ántobe Nakom pía pexui tatsi pomona írürü pejumekowúntsixae. ²Poxonae waxainchi Nakom antobetsi xuano exainchi pokotsiwa Nakom pía peitorobi koyenéwangtha itoroba, bapoxonae yaputainchi xua bara antobetsirü Nakom pía pexui tatsi. ³Poxonae Nakom antobetsi, bapoxonae jumekowúntsiya éxanatsi pokotsiwa paeba Nakom pía peitorobi jume diwésintha. Nakom pía peitorobi jume diwesin jopa ayapubeyo xua yábara jumequí kana éxana. ⁴Daxita pomona Nakom piamona tatsi, barapomona jüntükoyene amanáyaba pongtha pong jiwi jüntükoyene itoróbatsi po kae pin nakuathepiwi xua abe peexanaewa tsane. Wajumekowúntsi koyenewa Nakomtha, bárapo koyenéwatha naka yawena xua wajüntükoyene amanayabiwa pongtha pong jiwi jüntükoyene itorobéibatsi po kae pin nakuathepiwi xua abe peexanaewa tsane. ⁵Saya pomona jame jumekowúnta, xua pejeiwa: “Jesús ápara Nakom Pexanto tatsi”, jei, jame

barapomonaе jüntükoyene amanáyaba bapongtha pongtha pong jiwi jüntükoyene itorobéibatsi po kae pin nakuathepiwi xua abe peexanaewa tsane.

Meje yábara xua po diwesi Nakom Pexanto tatsi yábara

⁶Bapong Jesucristo patopeika po kae pin nákuathe tsike. Poxonaе bapong bautisábatsi, yawa poxonaе náetotha tüpa éxanatsi, xua poxonaе jana pichapabarena, bárapo naxobe kuikoyénebe naka yaputane éxana xua bapong Jesucristo, ápara bara Nakom Pexanto tatsi. Saya meisha jopa naka yaputane exanaeyo xua poxonaе bautisábatsi, bara yawa irü naka yaputane éxana xua poxonaе náetotha tüpa éxanatsi, yawa xua poxonaе jana pichapabarena. Nakom píа Pejumopetünaxü tatsi yábara paeba daxita baxua. Bárapo Nakom píа Pejumopetünaxü tatsi bara xaniyeya pepaebin. ⁷Nakom naka yaputane éxana xua Jesucristo bara Nakom Pexanto tatsi poxonaе kueikueijejé akoibi pojuméyobe peitaboko wétsika. ⁸Bárapo jume ápara poxonaе Nakom naka tsipaeba wajüntükoyenéwatha. Yáwano bárapo jume pojume xua kueikueijejé poxonaе Jesús bautisábatsi. Yáwano bárapo jume pojume xua kueikueijejé poxonaе bara nama imoxoyo tüpaena Jesús. Bárapo akoibi juméyobe pebürüya kuita kaunuta xua jei: “Bapong Jesús ápara Nakom Pexanto tatsi”, jei. ⁹Ba jumekowüntatsi pojumein jiwi paeba. Íchitha pojume nama Nakom Pexanto yábara paeba, bárapo jume jame bichokono peaiñakuí jume, beyakaincha pojumein xua jiwi paeba. Daxota bewa jumekowüntichi pokoyene xua Nakom Pexanto yábara paeba. ¹⁰Pong ba Nakom Pexanto tatsi jumekowüntatsi, bapong ba píа jüntükoyenewa tsipáebatsi xua bara bapong ba Jesucristo yatsikaewa Nakom Pexanto tatsi. Pong jopa Nakom jumekowüntichi, bapong nantaxeina xua Nakom náeraba xua pong jiwi pemuxuitorobin, tsipéi bapong jopa jumekowüntsiyo pokoyene Nakom Pexanto yábara paeba. ¹¹Bárapo jume, pojume Nakom Pexanto yábara paeba, bárapo jume wajüntükoyenéwatha jumetaínchi, naka jeye: “Nakom peajüntüyapusüüwa naka kata po peajüntüyapusüüwa ataya tsiteka, po peajüntüyapusüüwa Nakom Pexanto tatsi píа xaiña wérena tapichapatsi”, jei bárapo jume. ¹²Pong ba Nakom Pexanto tatsi yawa popoinchi, bapong xeina bárapo peajüntüyapusüüwa. Íchitha pong Nakom Pexanto tatsi, jopa yawa poponaetsi, bapong jopa xeinaeyo bárapo peajüntüyapusüüwa, po peajüntüyapusüüwa ataya tsiteka.

Meje yábara poxonaе Juan muxutsipaeba, poxonaе imoxoyo nakobeweta xua tina

¹³Pákata tínatsi paxam, pomonaе pajumekowüntame, Nakom Pexanto tatsi. Pokoyenein xua pákata tínatsi, ápara xua paiña neyaputaenexa xua bara paxéiname peantüyapusüüwa, po peantüyapusüüwa xua ataya tsiteka.

¹⁴Waxainchi bichokono yábara jumekowüntatsi Nakom xua wanaka yawenaewa tsane. Tsipéi yaputainchi poxonaе wüükatsi pokotsiwa Nakom ichichipa, bapoxonaе Nakom bara naka jumetane pokotsiwa yábara xua wawüükaexae. ¹⁵Tsipéi yaputainchi xua Nakom naka jumetane poxonaе wüükatsi, daxota yaputainchi xua bara xéinatsi pokotsiwa wüükatsi Nakom.

¹⁶Icha táneme xua ichüng abe éxana, pong irü jumekowünta, xua íchitha pokotsiwa bapong éxana jopa tüpa naexanaeyo, bapoxonaе Nakomtha tawüükare bapong. Bapoxonaе Nakom kana éxana xua bapong xeina peantüyapusüüwa. Íchitha icha jintong abe éxana pokotsiwa xua tüpa náexana jopa katsipaebichi

xua Nakomtha tawüükame bapong. ¹⁷Daxita pokotsiwang jiwi abe éxana, daxita baxuang Nakom tsita abetsi. Dáichitha bárapo abe peéxanae koyene jíwana xua icha abe peéxanae koyenewa bárapo abe peéxanae koyene jopa tüpa naka kana exanaeyo.

¹⁸Yaputainchi pong yawa pópona Nakom xua pía Páxaxae, bapong jopa exanae dukuanaebiyaeyo abe peéxanae kuirukoyenein, tsipéi Nakom Pexanto tatsi yawena xua bapong yawénatsi. Matáütano kaurimonae pía pentakaponaein tatsi jopa itaküüpaetsi xua bapong peitorobíwatsi xua abe peexanaewa tsane. ¹⁹Yaputainchi xua bara Nakom piamonae tatsichi, yawa yaputainchi xua kaurimonae pía pentakaponaein tatsi itoroba daxita po kae pin nakuathepiwi xua abe peexanaewa tsane. ²⁰Yaputáinchino xua Nakom Pexanto tatsi báyatha patopeika bárapo kae pin nákuathe, yawa naka tsipaeba Nakom Pejume Diwesi wayaputaenexa Nakom, pong pexaiñein. Matáütano yawa jinómpatsi Nakom Pexanto tatsi, pong pexaiñein, pong Jesucristo. Bárapo Nakom pexaiñein pong naka kata peantüyapusüüwa, po peantüyapusüüwa xua ataya tsiteka. ²¹Tamonae pam, jopa pajumekowüntsinde ibo nakomüing.

Baja Juan.

Meje Po Carte Juan Epatotha Tatina, Pomonae Jesucristo Pejumekowüntsiwi Tatínatsi

Meje xua pexaiñéi diwesi yábara, yáwano peántobe diwesi yábara

¹Xang Juan, pong báyatha pítirin náexanang, pákata tínatsi bárapo carte pomonae pam pomonae panakaetútame Nakom paiña nejumekowüntsixaem. Nakom paka itapeta paiña paka exanaenexa piamonae. Irü tatinang pomonae paka barü nakaetuta pomonae be paiña pexui natsikotane. Xaniwaicha betiya paka antobetsi paiña neyaputaexae pexaiñeiwa. Matáütano ichamonae paka ántobe pomonae yaputane pexaiñéi jumein. ²Xang bichokono paka antobetsi poxoru paiña nejumekowüntsixaem Nakom pía pexaiñéi diwesi tatsi. Bárapo pexaiñéi diwesi wajüntükoyenéwangtha kajinompéibatsi ánoxuae, matáütano xua ataya tsane. ³Kajinómpatsi Nakom pía pexaiñéi koyenewa tatsi pía peántobe koyenewa tátsino. Daxota Nakom Waxa irü Jesucristo Wanaka namataxeinaein pong Nakom Pexanto tatsi bapongbe naka yawénabe. Bapongbe naka yawenaena, matáütano amanayiya bapongbe naka yábara nantanuweya nantaxeinaena pía wanaka yawenaenexa. Matáütano bapongbe jüntema jinompa naka exanaena.

⁴Jüntükoyene weiweinang tsipéi paiñamonae jíwana kuitang, xua beta pejinompaewa. Bárapo paiñamonae éxana pokoyenewa xua pexaiñéi koyenewa, icha be pókotsi koyeneya xua Nakom Waxa naka kui-itoroba. ⁵Paxam, irü paiña nejumekowüntsixaem Nakom, paka tsipáebatsi bewa waxainchi nantiya naántobe tsainchi. Po peitorobi koyenewa pákata tínatsi jopa pena peitorobi koyenéwiyo. Bárapo peitorobi koyenewa kopiya xéinatsi poxonae aena jumekowúntatsi. ⁶Icha waxainchi Nakom antobetsi, barapoxonae bewa jumekowüntsiya jinompaeinchi icha be pókotsi koyeneya Nakom naka itoroba pía peitorobi jume diwésitha. Bárapo peitorobi jume diwesi pajumetáneme poxonae aena pajumekowúntame. Bárapo peitorobi jume diwesi naka jeye: “Nantiya pana naantobeinde”, jei.

Meje yábara pomonae jiwi pemuxujáíñabi jiwi

⁷Po kae pin nákuathe jiwi ayéi jinompa, pomonae jiwi pemuxujáíñabi jiwi. Barapomonae jeye: “Nakom jopa itorobiyo Pexanto bárapo kae pin nákuathe, pong pewüng Jesucristo xua pepa jintong náexana”, jei barapomonae. Pomonae xua bapokotsiwa paeba, bapomonae ápara pomonae jiwi pemuxujáíñabi jiwi yawa bapomonae Cristo abe peyábara paebíwichi. ⁸Dota pam bü kaurimonae paka jüntükoyene jüjüta, abe paiña neexanaewa tsane, xua daxota Nakom paiña nepaka katsinexa pentoma xua abe paiña neexanaexae. Maisha jame beta wüünaeya paexande, xua Nakom paiña nepaka katsinexa daxita bárapo pentoma xua beta paiña neexanaexae.

⁹Pong xua ekeicha ichichipa icha koyenewa xua pekuidubiwa beyakaincha xua Cristo pía pekuidubi koyenewa tatsi, bapong jopa nantaütsiyo Nakom xua be Paxa. Íchitha jame pong éxana dukuanaebiya pokotsiwa xua Jesucristo pía pekuidubi koyenéwatha paeba, bapong jame nantaüta Nakom be Paxa, matáütano nantaüta Jesucristo pong Nakom Pexanto tatsi. ¹⁰Icha ichüing paka siwaponá pía nepaka kuidubinexa icha koyenewa xua pekuidubiwa xua Nakom yábara, po pekuidubi koyenewa xua jopa Jesús pía pekuidubi koyenewa tatsi bapoxonae bapong jopa matenta weiweinaya pajakóbinde paiña bo bérena. ¹¹Tsipéi pong matenta weiweinaya waba pongtha pong pekuidubinéxatsi icha pekuidubi koyenéwatha, bapong ápara írürü abe éxana icha be bapong ichi pong ichüing pong piabotha petapatopaexaetsi.

Meje yábara poxonae xua Juan opiwetaba po carte

¹²Aiña diwesin bekein kataunxuae xeinang xua tapaka kamuxutsipaebiwa tsainchi, íchitha jopa be yábara tinaeiño papératha bárapo diwesin. Dáichitha éwatang xua tapaka kataewa tsainchi bexa, matáütano xua tapaka katsipaebiwa tsainchi. Bapoxonae wajüntükoyene weiweinaenexa tsainchi bichokono.

¹³Pomonae irü Nakom pejumekowüntsiwi icha paxam paichim, pomonae irü Nakom itapeta, barapomonae paka jakoba.

Baja Juan.

Meje Po Carte Juan Kotakaya Tatina, Pomonae Jesucristo Pejumekowüntsiwi Tatínatsi

Meje yábara poxonae Juan jüntüweiweinaya tatina, Gayo tatínatsi

¹Jako Gayo, pong takaantobetsí jintom. Xang, pong báyatha pítirin náexanang. Bárapo carte kata tínatsi, yáitama bichokono xaniwaicha kaantobetsi, jiña nejume-kowüntsixa Nakom pía pexaiñéi jume diwesi tatsi.

²Pong takaantobetsim, pong be táyapin takana-tsikotaeinchi irü nejumekowün-tsixae Nakom. Nakomtha kata wüükatsi xua jüntema nepoponaewa tsane xuano xua axaibiya nepoponaewa tsane, icha be ichim xua beta xaniwaicha póponame Nakom peitabaratha tatsi. ³Bichokono jüntükoyene weiweingang poxonae ichamona-e pomonae pejumekowüntsiwi jíwana taxantha pata yawa netsipaeba. Barapomonae kayábara paeba xua pinae yajüntükoyeneya pópona dukuanaebíyame Nakom pía pexaiñéi koyenewa tatsi. Bara xaiñéi bara bárapo koyenewa éxaname. ⁴Dapokotsiwa aibi pokotsiwa jumetang pokotsiwa xua nejüntükoyene weiweina éxana beyakaincha xua poxonae jumetang xua tajiwimonae xaniwaicha beta jinompa Nakom peitabaratha tatsi pejumekowüntsixa Jesucristo.

⁵Pong takaantobetsim, pong be táyapin takana-tsikotaeinchi irü nejumekowün-tsixae Jesucristo. Bichokono wüünaeya éxaname xua Nakom nexa xua poxonae yawéname pomonae Jesucristo pejumekowüntsíwichi, matáütano poxonae yawéname pomonae icha nákuang wérena pepatsiwi, pomonae bekein jopa neyaitée jiji. ⁶Barapomonae pomonae icha nákuang wérena pepatsiwi pomonae Jesucristo pejumekowüntsíwichi jeichichi: “Maisha bichokono pana ántobe Gayo tsipéi pana yawena”, jei barapomonae. Kawüükatsi xua barapomonae ekeicha neyawenaenexa xua pokotsiwa barapomonae nantawénona xua poxonae warapaena jiña neexanaenexa pokoyenewa Nakom ichichipa bichokono. ⁷Barapomonae ponarúküpa xua Jesucristo petanakuichiwa tsainchi. Barapomonae jopa wüükaeyo pomonaetha, pomonae jopa pejumekowüntsiwi Nakom xua peyawenaenéxatsi pokotsiwa penantawenonaewa. ⁸Daxota bewa barapomonae yawenaetsi xua bapoxonae barápara irü barapomonae nanabarü kueikueijeichi pexaiñéi jume diwesi.

Meje yábara po diwesi xua Diótrefes abe éxana xuano írürü Demetrio beta éxana

⁹Xang kaena báyatha icha koyenéwiyo tatinang Jesucristo pejumekowüntsíwichi. Dáichitha Diótrefes jopa jumekowüntsiyo taitorobi koyenewa, tsipéi barapomonae pomonae Jesucristo pejumekowüntsíwichi pía xantha tatsi Diótrefes ichichipa náexana be pong Pekanamataxeinaein. ¹⁰Daxota icha ponaein nexaiña beya, yábara katsipaebinchi bapong tsipéi bapong katsawa neyábara paeba,

peabe jumetha. Barapong jopa beta exanaeyo tsipéi jopa wüünae weyataeya wabeibiyo pomonaetha, pomonae Jesucristo pejumekowüntsíwichi. Írürü pomonae jiwi pententa weyatáibiya wabeibiwi, baxuang kuimatawéntatsi, yawa bapong barapomonae itaweta pomonae Jesucristo pejumekowüntsíwichi itawétatsi.

¹¹Pong takaantobetsim, pong be táyapin takana-tsikotaeinchi irü nejumekowüntsixae Jesucristo jopa akuikoyenebeya poponaeinde icha poxonae ichüing ichi xua akuikoyenebeya pópona. Saya jame maisha beta exanaponde icha poxonae ichüing ichi xua beta exanapona. Pong ba beta éxana pokotsiwa Nakom itoroba ápara bara Nakom piamonae jiwi jíwana tatsi. Íchitha pong ba abeya pópona, ápara jopa poxoru yaputaeyo Nakom.

¹²Daxita jiwi Demetrio wüünaeya yábara páebatsi. Pokotsiwa xua bapong éxana, naka yaputane éxana xua bara bapong xaiñeya peexanaein. Írürü xang wüünaeya yábara páebang Demetrio. Matáütano yaputáneme xua pokotsiwa páebang bara xaiñéi.

Meje yábara xua Juan opiwetaba po carte

¹³Xam Gayo aiña diwesin bekein kataunxuae xeinang xua takamuxutsipaebiwa tsainchi, dáichitha jopa be yábara tinaeiño papératha bárapo diwesin. ¹⁴Bara nama methaunxuae katayopiyaeinchi néxata bapoxonae wanatsipaebiwa tsánebe.

¹⁵Bara Nakom jüntema pópona ka-exanaena. Pomonae xote jinompa pomonae be jiña jiwimonae, barapomonae kajákoba. Inta jakóbare daxita wajiwimonae.

Baja Juan.

Meje Po Carte Judas Tatina Pomonaetha Pomonae Jesús Pía Pejumekowüntsíwichi

**Meje poxonae Judas tamrópata pítaba xua tatina pomonaetha,
pomonae báyatha Nakom waba xua pía pejumekowüntsínéxatsi**

¹Xang, Judas, pongxaein tanakuitang amanaya Jesucristo takoya taichichipae-
xae. Xang Santiago peweicho tatsin. Bárapo carte pákata tínatsi pomonae pam,
pomonae báyatha Nakom Waxa itapetsiya paka waba, xua paiña nejumekowüntsí-
nexa. Nakom bichokono paka ántobe. Nakom Pexanto tatsi pong Jesucristo beta
paka yapu-eena xua beta paiña nejumekowüntsínexa Nakom. ²Bárabü Nakom jopa
juniya paka yábara nantaxeinae tsane xua nantanuweya paka yábara nantaxei-
neibina pía paka kayawenaenexa. Matáütano bárabü Nakom bichokono jüntema
jinompa paka exanaena. Matáütano bárabü Nakom paka katsibina pía peántobe
koyenewa paiña neyawa múxuna jinompaenexa.

Meje yábara xua pomonae pemuxujaiñabiya kuidubi jiwi

³Paxam pomonae bichokono tapaka kaantobéwichi pam. Maisha bichokono
ichichipang xua yábara tapákata tináewatsi pekapanenebiyáe koyenewa xua
pokoyenéwatha Nakom paka kapanepa abe paiña neexanáe kuirukoyenein weya.
Bárapo koyenéwatha Nakom nekapaneparü bárapo koyene weya. Bekein ichichi-
pang yábara pákata tínatsi baxua, dáichitha ánoxuae jopa neitaküüpaeyo. Jame
bewa kopiya yábara pákata tinaeinchi xua paiña nejumekowüntsiwa. Paka itoró-
batsi xua naitomatsiya jumedangweya yábara paiña paebinexa paiña nejumeko-
wüntsiwa, bekein ichamonae paka átene éxana paiña nejumekowüntsixae Jesús.
Bárapo pejumekowüntsiwa Nakom kaena báyatha káetotha nakuikoyene kata piji-
monae, xua barapomonae xuya penakuikoyene kakataponaenexa ichamonaetha.
⁴Bara barapokotsiwa paka tsipáebatsi, tsipéi jiwi namichiya jinompa paiñaxantha
pomonaetha pemuxujaiñabiya kuidubi jiwi xua jopa pakuiyaputaem pokotsiwa bara-
pomonaetha éxana. Kaena báyatha barapomonae Nakom Pejume Diwésitha yábara
tínatsi xua barapomonae pinae bewa átene tsane abe peexanaexae. Barapomonae
peajüntükoyénebe jiwi. Matáütano barapomonae jiwi muxujaiñabiya kuidúbatsi
xua pinae Nakom amanayiya kapanepa jiwi pía peantobexae. Nakom peantobexae
jiwi, daxota pinae Nakom kópata xua jiwi bara abe peexanaenexa. Barapomonae
yábara jume itaweta, poxonae po jumetha ba jiwi jeye: “Jesucristo, bapong yatsi-
kaya kompa pong Wanaka itorobin xuano Wanaka namataxeinaein”, jei.

⁵Bekein payaputáneme xua báyatha Nakom, pong jiwi Pekanamataxeinaein
éxana, dáichitha ichichipang xua ekeicha yábara tapaka tsipaebíwatsi baxuang.
Nakom éxana xua piamonae tatsi Egipto nakua wepanenebiya xua Israel nakua

bepanenebiya. Bekein Nakom baxua kana éxana dáichitha pirapaeyo Nakom kana éxana xua bárapo israelmonae jíwanamonae jutébatsi pomonae jopa pejumeko-wüntsiwixaetsi. ⁶Matáütano payaputáneme xua Nakom kana éxana matatsunpí-witha. Bárapo matatsunpiwi nakuibarapenta pía peitorobi koyenewang bekein Nakom kata. Matáütano barapomonae Nakom pía nakua weya tatsi pona xua nakoutómara kuenta wárapa xua itaboko weyaxáe. Daxota Nakom itoroba xua bárapo matatsunpiwi peyamaxükübiya jebinéxatsi pekiréi nákuatha beya, beya abü poxonae po matakabi tsane poxonae átene tsane poxonae Nakom yábara pae-bina daxita jiwi xua penatsikuentsiwa xua abe peexanaexae. Bárapo matatsunpiwi penáintongtha maxükübébatzi, po penaintong jopa werawerakaeyo. ⁷Pakayábara nantaxéinare xua poxonae po tomarabeta Nakom kana éxana, po tómara pewüng Sodoma yawa xua Gomorra, yáwano xua poxonae ichaxota po tómarangtha xua kuariyatha ena. Bárapo tomarangpiwi abe éxana xua poxonae kanasiwaiñameinta éxana pebíwitha xua jopa be ichiyo xua pókotsi koyenéwatha ba pebiwi kana éxana yabüxitha. Nakom kaunutsiya yábara paeba barapomonae xua barapomonae ataya tsitekaeya péraxa exainchi abe peexanaexae. Barapomonae naka tsita itapeiñaxeina xua Nakom bara kana ichi tsane daxita jíwitha icha bárapo tomarabepiwi kana ichichi.

⁸Íchitha pomonae ánoxuae yábara paka tsipáebatsi, pomonae pemuxujaiñabiya kuidubi jiwi, barapomonae abeya nantaxeina dubenanáebiya, xua poxonae baxua yábara amachinae tsurubenanáebiya. Daxota barapomonae pía pepong abeya taxoba éxana dubenanáebiya. Barapomonae itaweta Nakom pía peitorobi koyenewa pong jiwi Pekanamataxeinaein. Matáütano barapomonae abe yábara paeba Nakom pía matatsunpiwi. ⁹Nakom pía matatsunpin, po matatsunpin matakápona icha matatsunpiwi, bapong pewüng Miguel. Bapong Miguel najumematsontsó-nobabe kaurimonae pía pentakaponaein tatsi. Yábara najume-matsontsó-nobabe xua Moisés pía pepong xua jintam metha pinae xeinaena. Miguel jopa nantaxeinaeyo xua xuya anaepanaya jumenota xua pejeiwa: “Maisha abe éxaname daxota Nakom pong jiwi Pekanamataxeinaein átene kakana exanaena”, jopa jeyo, bara bekein itaküüpatsi xua pepaebiwa baxua. Saya jame Miguel jei: “Bárabü Nakom kaitawé-tsina”, jei Miguel. ¹⁰Íchitha barapomonae pomonae pemuxujaiñabiya kuidubi jiwi abe yábara paeba pokotsiwa barapomonae jopa yaputaeyo. Matáütano barapomonae éxana icha be pókotsi koyeneya ichichipa xua abe peexanaewa. Barapomonae baxua éxana bekein jopa pewüunaeyo taetha, icha duweimonae ichi xua poxonae éxana be pókotsi koyeneya ichichipa. Daxota barapomonae piakoutha naajüntü-koyénebe kana éxana.

¹¹¡Jaibó, barapomonae tsobenáe! Tsipéi barapomonae Nakom jopa bejumeko-wüntichi icha be ichi pong pewüng Caín, pong kaena báyatha peweicho bexuba, peweicho peuwixae. Matáütano barapomonae katsíbatsi parátixi xua ichamonae katsiba xua barapomonae abeya koyeneya pekuidubixae. Tsipéi barapomonae bichokono pitaparátixichi icha be poxonae ichi pong pewüng Balaam poxonae parátixi katsíbatsi xua ichamonae katsiba xua Balaam abeya koyeneya pekuidubixae. Matáütano barapomonae jiwi jüntükoyene tsakábatsi xua jiwi naba peexanaenexa Nakomtha daxota barapomonae werapaena. Baxua éxana icha be poxonae pong pewüng Coré ichi poxonae jiwi jüntükoyene tsakábatsi xua jiwi naba peexanaenexa Moiestha, xua bapoxonae Coré tüpa xua bexotsi. ¹²Poxonae paxam

paéxaname xua jiwi nakaetuta paiña nenabanaenexa paiña nenaantobexaem, barapomonae pomonae pemuxujaiñabiya kuidubi jiwi paka kaxinta pía peéxanae koyeneintha. Barapomonae atsakiya nábane, yawa atsakiya apa. Saya jopa yábara nantaxeinaeyo ichamonae. Saya meisha barapomonae nayábara nantaxeina nawita. Poxonae bárapo koyene éxana, barapomonae abe paka kana éxana. Po tsakinaebowang ba xua jopa jiwi katichi mera, xua ekeicha pin joibo tabütorota peíra tsewi weya xua jopa peruneikaenexa tsane, bárapo tsakinaebowang ba jiwi jopa katichi mera, jiwi jopa yawenaetsi. Bara jüta ichi barapomonae pomonae pemuxujaiñabiya kuidubi jiwi. Bekein barapomonae piakoutha beta nayábara paeba, dáichitha jiwi jopa yawenaetsi. Po naein ba xua jopa nakoichiyo pía matakábintha xua poxonae nakoiteiba bárapo naein jiwi ba yatabakajona tsipéi jopa naein penakoichixae. Bara jüta ichi barapomonae pomonae pemuxujaiñabiya kuidubi jiwi, jiwi jopa beta xapain jinompa kana exanaetsi. Daxota jiwi itaweta barapomonae.¹³ Ichamonae aura éxanatsi poxonae barapomonae abeya kuiduba xua jopa jiwi peyawenaexaetsi. Barapomonae bichokono abe éxana icha pin marátsaka dori-tong ichi xua pítapa beya bebeya xua thamthamei xua bichokono petsoreixae. Bara jüta ichi barapomonae saya jiwi aura éxanatsi abe peexanaexae daxota jiwi kuenta pona barapomonae. Poxonae opitéi ba potong pía namtong weya itaxanuméiñatsi saya pípato dubenanáebiya ataya ichaxota pekiréiwatha. Bara jüta ichi bárapo pemuxujaiñabiya kuidubi jiwi, jopa xapain jinompaeyo po kae pin nákuathe. Daxota Nakom bebái tsane barapomonae pía xaiña weya ichaxota pekiréiwatha xua bara ataya tsitekaeya tsane abe peexanaexae.

¹⁴Barapomonae pomonae pemuxujaiñabiya kuidubi jiwi yábara páebatsi, xua ichüing yábara paeba pong pewüing Enoc. Adán xeina seis póyobe pía pemomo susatopiwi xua napuna-nakatsiwapona beya poxonae bapong nakatsiwa pong Enoc. Bapong Enoc pong kaena býatha Nakom pía nakua beicha káichatsi. Bapong Enoc yábara paeba barapomonae pomonae pemuxujaiñabiya kuidubi jiwi, poxonae kueikuejei pokotsiwa Nakom yaputane éxana. Bapong Enoc jeye: “Tang pong jiwi Pekanamataxeinaein. Bapong tang xua pía matatsunpiwi barü patopeika, bichokono pin bicheito matatsunpiwi.”¹⁵ Bapong barü patopeika matatsunpiwi xua jiwi átene peexanaewa tsainchi. Bapong yábara paebina daxita jiwi xua penatsikuentsiwa xua abe peexanaexae. Matáütano bapong yábara paebina xua pokotsiwa bapomonae abe éxana Nakomtha. Matáütano bapong yábara paebina pokotsiwa barapomonae Nakom abe peyábara paebíwatsi”, jei Enoc.¹⁶ Barapomonae pomonae pemuxujaiñabiya kuidubi jiwi ichawa beya daxita koyeneintha abeya yábara paeba. Xua daxita koyenein petsita-aitakoyenebexaetsi daxota barapomonae jopa jüntükoyene weiweinaya jinompaeyo. Matáütano meisha yábara nantaxeina xua piáwang meisha penata exanaewang. Barapomonae peátsakae jiwi bichokono. Bara bekein barapomonae beta paeba ichamonaetha, saya poxoru xua peyábara muxujaiñabinexa xua ichamonae peyábara muxujaiñabinéxatsi pokotsiwa xeina.

**Meje yábara xua Judas muxuweta pomonaetha, pomonae
pejumekowüntsiwi xua pejumekowüntsiyainwa pemuxuitórobi diwesi**

¹⁷Ekeicha paka tsipáebatsi pomonae bichokono tapaka kaantobéwichi pam. Paxam bewa payábara jütanainaem pokotsiwa býatha paeba pomonae Jesucristo

pong jiwi Pekanamataxeinaein pía peitorobi jiwi tatsi. ¹⁸Barapomonaе paka jeye: “Pewünaeya tsane poxonae po dapaetha Nakom yábara paebina jiwi xua penatsikuentsiwa xua abe peexanaexae kopiya patsina pomonaе kuikaponaena, pokotsiwa Nakom piáwa tatsi baxua kuikaponaeinchi. Matáütano barapomonaе ichichipaeya éxana dubenanaebiyaena icha be pókotsi koyeneya ichichipa xua abe peexanaewa”, jei barapomonaе pomonaе Jesús pía peitorobi jiwi tatsi. ¹⁹Pokotsimonaе baxua éxana xua abe éxana, bapokotsimonaе tsaba éxana piamonaetha xua bárapo bichéitobe nakasébabe. Barapomonaе pomonaе abe peexanaewi éxana xua pokotsiwang ichichipa peexanaewa. Barapomonaе jopa exanaeyo pokotsiwa Nakom ichichipa, tsipéi jopa yawa jinompaeyo Nakom pía Pejumopetünaxü tatsi.

²⁰Íchitha nama paxam pomonaе bichokono tapaka kaantobéwichi pam. Báyatha paiña nejumekowüntsixaem Nakom, daxota áwiya pana najüntükoyene tsakábare. Áwiya mataropeichiya paiña nejumekowüntsi ponaenexa po pejumekowüntsi koyeneya Nakom weya pona. Nakom pía Pejumopetünaxü tatsi pía peayapusüüwatha tatsi pawüükare Nakom. ²¹Beta payajüntükoyeneya jinómpare Nakom pía peántobe koyenewa tatsi. Pawünae éware po matakábitha poxonae Jesucristo Wanaka namataxeinaein naka katsina peajüntüyapusüüwa, po peajüntüyapusüüwa ataya tsiteka. Baxua naka katsina tsipéi Nakom nantanuweya nakayábara nantaxeina pía wanaka yawenaenexa tsane.

²²Ichamonaе pomonaе yábara aiña muxu pexeinaewi pemuxujáiñabi diwesi barapomonaе payábara nantanuweya yawende paiña neantobexae xua jopa pejumekowüntsinea bárapo pemuxujáiñabi diwesi. ²³Ichamonaе muxu pejumekowüntsi bárapo pemuxujáiñabi diwesi. Naiña payawende barapomonaе paiña neantobexae xua Nakom pekapanenebiyaenexa bapo abe peéxanae kuirukoyene weya pejumekowüntsixaе tsane Nakomtha. Panantanuweya yábara nantaxeinde ichamonaе, paiña neyawenaenexa tsane paiña neantobexae xua irü pejumekowüntsinea tsane Nakom. Íchitha dota pam xua abe paiña neexanaeyainwa icha poxonae xua barapomonaе ichi xua poxonae abe éxana.

Meje yábara xua Judas najumewetsiya wüünae jainta Nakom

²⁴⁻²⁵Ánoxuae nama yábara paka tsipáebatsi Nakom pong pepa Nakom pong nákata kompa. Bapong bichokono peyaputaеin. Barapong Nakom Wanaka kapanebiyaеin. Barapong pía peayapusüü itorobiya koyenéwatha paka yapu-enaena xua jopa abe paiña neexanaewa tsane. Matáüta Nakom paka kana exanaena xua jüntükoyene wüünae paiña neumenaenexa tsane bapong peitabaratha tatsi. Matáütano bapong paka kana exanaena xua bichokono paiña nejüntükoyene weiweinyaya neumenaenexa tsane bapong pía pexeiña peitüpanáе koicha itabaratha tatsi. Barapong Nakom waxainchi wüünae jáintatsi Jesucristo pong Wanaka namataxeinaein petüpaexae. Waxainchi jeichichi Nakomtha: “Bárabü ataya tsitekaeya xeinaeya poponáename jiña pexeiña itüpanae koicha yawa jiña neaiñakuí koyenewa. Matáütano bárabü ataya xeinaeya poponáename jiña neayapusüü itorobi koyenewa, xuano xua jiña neayapusüü exanáе koyenewa. Daxita baxuang kaena báyatha xéiname poxonae aena, xuano xua anoxuaeno xéiname yáwano xua bexa tsane bara ataya xeináename”, jeichichi Nakomtha. Je, bara ichi tsane.

Baja Judas.

Meje Po Díboro Juan Tina Xua Yábara Tsiwanaya Tsita Itúütatsi Pokotsiwa Exanaena Po Kae Pin Nákuathe

**Meje yábara po diwesi pokotsiwang xua Jesucristo Paxa
tsita itúütatsi xua pokotsiwang xuya Juan tsita itúütatsi**

1 ¹Bárapo diboroje xang Juan tinang. Pokotsiwang yábara tinang xua Nakom Jesucristo tsita itúütatsi. Barapokotsiwang Jesucristo xuya pijimonaetha tsiwanaeya tsita itúüta pokotsiwang xua imoxoyo bara exanáenaba. Jesucristo pía matatsunpin inta itoroba xua xang Juan xuya tatsita-itúütsinexa daxita baxuang xua imoxoyo bara exanáenaba. ²Daxota xang xuya xainwaichiya yábara tinang daxita xua pokotsiwa tang. Matáütano tínangno xua jumetang xua Nakom paeba írúno xua Jesucristo paeba.

³Pong xua yorobina jíwitha po diwese pomonaetha, pomonae Nakom pejumekowüntsíwichi tatsi, bapong jüntükoyene weiweina exanaeinchi xua Nakom jüntükoyene weiweina exanaena. Írúno pomonae jumetane bárapo diwese yáwano xua éxanano xua pepaebixae bárapo diwese, barapomonae jüntükoyene weiweina exanáeinchirü. Daxota barapomonae jüntükoyene weiweina tsipéi baxuang imoxoyo exanáenaba.

**Meje yábara xua Juan tatina pomonae pejumekowüntsiwi,
pomonae siete po matabüxümonaebe, pomonae
nakaetuta xua Nakom wüünae pejainchinéxatsi**

⁴Xang, Juan, pákata tínatsi pomonae paiña nejumekowüntsiwi pam pomonae siete po matabüxümonaebe pam xua paiña nenakaetutsi jiwi pam, xua wüünae paiña nejainchinexa Nakom. Paxam pomonae Asia nákuatha pajinómpame. Paka tsipáebatsi xua Nakom ánoxuae pópona yawa kaena báyatha pópona yawa bexa ataya poponaena. Pákata wúükatsi Nakomtha xua paiña nepaka jüntükoyene weiweina exanaenexa tsane. Yawa pákata wúükatsi xua Nakom paka yawenaena pía paiña nepaka kaantobexae. Yawa pákata wúükatsi Nakom pía Pejumopetünaxü tatsi beya xua bapong baxuang pákata exanaena tsipéi Nakom pía Pejumopetünaxü tatsi siete po pexeína jüntükoyénebe pexeinaein. Bárapo Pejumopetünaxü Nakom peitabaratha táungkuatsi ichaxota Nakom eka pía pexeína peekaethopáewatha. ⁵Yáwano pákata wúükatsi Jesucristo xua bapong baxuang pákata exanaena. Barapong Jesucristo ataya xaniwaicha pepaebin. Bapong kopiya ekeicha asiü náexana. Bapong asiü kanamata kanáexana jiwi petüpáe koyene weya. Yawa bapong itoroba pomonaetha, pomonae itorobiya pepa peewatsiwi ichamonae po

kae pin nákuathe. Cristo naka ántobe daxota naka tsitüpa náetotha wanaka jüntükoyene jüntemainaenexa abe waexanáe kuirukoyenewang. ⁶Matáütano Jesucristo naka éxana xua piamonae tatsichi. Yáwano sacerdotemonae naka kana éxana watanakuichinexa tsainchi Nakom, pong Jesucristo Paxa tatsi. ¡Bárabü Nakom ataya xeinaena xua pexeiña jüntükoyene xua peaiñakuí koyenewa! ¡Yáwano bárabü Nakom ataya xeinaena xua pía peayapusúü itorobi koyenewa! Je, bara ichi tsane.

⁷¡Matha pataema!

Cristo patopeikaena tsakinaebówatha.

Daxita jiwi taena bapong xua bapong taeinchi.

Írürü pomonae bapong kobematatabarútatsi náetotha bapong taeinchi.

Daxita nakuangpiwi,

pomonae bapong jopa jumekowüntichi,

daxita barapomonae jüntükoyene wekoyéi tsane poxonae bapong taeinchi.

Je bara ichi tsane.

⁸Nakom jeye: “Xang pongxaein ápara ataya tsitekaeya tapoponaein xua poxonae aena daxita tamrópata pítabang. Matáütano béxano daxita koyenein wetsin tsipéi ataya tsitekaeya bara tapoponaewa tsane”, jei Nakom pong jiwi Pekanamataxeinaein, pong itoroba pía peayapusúü itorobi koyenéwatha daxita nakuangmonae jíwitha. Bapong Nakom ánoxuae pópona, kaena báyatha pópona, yawa bexa tsane ataya poponaena.

Meje yábara poxonae Cristo pía peitüpanáe tsita itüütsi koyenéwatha tatsi Juan tsita itüütatsi

⁹Xang Juan pongxaein be pong paiña eweicho nanatsikotang Jesús pijimonaexatsi. Icha jiwi paka ichi xua paka anthüthürewé éxana xua poxonae jopa xapain pákata exanaeyo, ánoxuae bara neichi. Jiwi anthüthürewé neéxana tsipéi waxainchi Nakom piamonaetsi jíwanatsi pomonae Nakom itorobiya éwata. Tspéi Jesucristo paka yawena daxota kataunxuae pajumekowünta dubenanaebíyame Nakom, irü xangdü barichin. Jiwi pekübibotha Patmos tunáetotha neeta tapaebixae Nakom Pejume Diwesi yáwano Jesús pejume diwésino tapaebixae. ¹⁰Kaenta-keitha, po matakeitha peseikae matakeitha bichokono Nakom pía Pejumopetünaxü tatsi nejüntükoyene yüüka éxana. Taüma wérena jumetang pejume xua bichokono jumedangweya ajumetsaka be poxonae icha xua oba po peobiwa pewüing trompeta. ¹¹Nejéi xua netsipaeba: “Xam yábara tínare diborotha daxita xua táneme. Bárapo díboro bapoxonae kaitoróbare pomonaetha, pomonae tana nejumekowüntsíwitha pomonae siete po matabüxümonaebe pomonae nakaetuta xua Nakom wüünae pejainchinéxatsi. Barapomonae jinompa Asia nákuatha. Bárapo siete po matabüxümonaebe nakaetuta barompaya pía tómarangtha tsíniya. Barapomonae meje: Efeso tomarapiwi, irü Esmirna tomarapiwi, irü Pérgamo tomarapiwi, irü Tiatira tomarapiwi, irü Sardis tomarapiwi, irü Filadelfia tomarapiwi, irü Laodicea tomarapiwi”, nejéi Jesucristo.

¹²Bapoxonae napatomeicha nekótabang tayaputaenexa pong xua netsipaeba. Poxonae nekoyang bapoxonae tang siete xóyobe penainwang xua ponain pewüing oro nain xua pentatútuntha itanakanoba. ¹³Bárapo siete xóyobe xua ichaxota pentatútuntha itanakanoba baxoyo pía xaiña deka pong be pebin taenotang. Pong

ungkua ápara pongxae itaboko wétsika pona, pong Nakom itapeta. Bapong naxá-tata paparuwa, po paparuwa apiya deka bichokono yawa taxujayarékatsi. Yawa na-epakúita paparuwa po paparuwa bichokono pereka yawa jüntákari jayatsínatsi yawa bichokono daedaena icha be oro nain ichi. ¹⁴Pentanang tatsi bichokono ñapana icha be papüü ichi, yawa icha be main axuto ichi. Yáwano peitamaikéitobe be ishoto itareto. ¹⁵Petaxu bichokono taxudaedaena icha be bronze nainto ichi xua bichokono naindaedaena poxona kataunxuae ishótotha nainbokiya. Pejume bichokono ajumetsá be poxona xua aiña menein busín. ¹⁶Pemaxükoxa iya xeina siete po opitéitobe. Yawa pekoiboto tsina pichapeina kusi xua nantiya barü dúkuabe. Péitabara bichokono daedaena icha be poxonae xometo ichi poxonae xua pentha xua poxonae atsa.

¹⁷Poxonae bapong Jesucristo tang, imoxoyo íratha nabotabang bapong peitararatha. Bara be tatüpaeyo nabotabang. Bapoxonae bapong pekóbetha nejáyaba pokobe pekoxa weya. Yawa Jesucristo nejéi: “Jopa junuwinde. Xang pongxaein xua daxita taforotsin xua poxonae aena. Yáwano xang pongxaein xua tawetsin tsane daxita xua bexa tsane. ¹⁸Xang pongxaein xua kopiya báyatha tapoponaein. Bekein báyatha tüpang íchitha ekeicha ánoxuae asüü póponang xua ataya petsitekaenexa. Nakom nekata taitorobi koyenewa xua petüpaewi taitorobeibinexa petüpáe koyene nakua beya. ¹⁹Daxota yábara tínare xuaunxuae pokotsiwa táneme. Yáwano yábara tínare xua aunxuae taeponáename. ²⁰Bárapo siete opitéitobe xua táneme takobekoxa weya yábara kaunútatsi xua pomona Nakom Pejume Diwesi pepaebiwí, pomona Nakom pejumekowüntsíwichi pekanamataxeináewichi. Yawa bárapo siete xóyobe xua pentatútuntha itanakanoba xua baxoyo pía xaiña deka unguang baxua yábara kaunútatsi pomonae siete po tómarabe matabüxü jiwí, pomona Nakom pejumekowüntsíwichi”, jei Jesucristo pong xua unguua.

Meje yábara xua po diwesi Juan tatina Efeso tomarapiwi

2 ¹Jesucristo, pong xua unguua nejéi: “Tatínare pong Nakom Pejume Diwesi pepaebin pomonaetha tana nejumekowüntsiwi pomona Efeso tomaramona xua bapong petayorobinexa xua barapomona petayorobinéxatsi. Jande: ‘Meje xua paeba pong pekobekoxa weya tatsi siete po opitéitobe táungkuatsi xuano xua unguua siete xóyobe pía xaiña deka xua ichaxota pentatútuntha itanakanoba. ²Bapong jeye: Yaputang xua painta éxaname po penakuichiwa xua dangwéi xua jopa pabaparentsim. Yáwano paka kuiyaputainchi xua pa-aichaxaibim xua éxana pomona peajüntükoyenebewi. Yáwano bara yaputang xua jopa paka ítata kuixaiñéi tsaiñiyo poxona xua ichamona atsakiya paka jei: Paxang Jesús pía peitorobiwi tatsi pang, jei. Bara paxam payaputáneme xua barapomona pemuxuitorobiwi. ³Beta pana najüntüwüináetame. Matáüta jopa paakoyenefáetabim, bekein ichamona bichokono abe paka éxana paiña inta nakuichixaem. ⁴Íchitha paka kuiyaputainchi xua kae koyene paéxaname xua pokoyene aichaxaibin. Ánoxuae be kónotha pana neantobem. Jopa be ichiyo poxona kopiya matha pana neantobem nawita. ⁵Payábara nantaxéinare xua poxona kopiya pana nejumekowúntame xua poxona bichokono pana neantobem. Icha jüntükoyene paxéinare. Painta exánare icha paichim xua poxona matha kopiya beta painta éxaname. Icha jopa pana neantobem tsane, naiña patopaein, yawa pichin paiñawa xua pokotsiwa ichaxota pentatútuntha paitanakanóbame, xua pichin paiña tómar weya. Ápara xua jang,

daxita paiña nenakaetutsi jiwi pam pana nenepentaponáename xua pata tana nejumekowüntsiwam xua daxota jopa pana nejumekowüntsim tsane, jang. ⁶Dáichitha kae koyenewa ichichipang xua paéxaname. Jüntükoyene weiweinang tsipéi panantaxéiname icha ichin xua pokotsiwa nantaxeinang. Paxam pa-aichaxaibim pokotsiwa nikolaitamonae xua éxana, pomonae bichokono abe peexanaewi. Xang írürü aichaxaibin xua pokotsiwa éxana barapomonae. ⁷Paxam pomonae paiña nejumekowüntsi jiwi pam. Icha pamuxudubéname, pajumenaitáware xua pokotsiwa Nakom pía Pejumopetünaxü tatsi paka tsipaeba. Bapong jeye: Pomonae xua Jesucristo jumekowünta dubenanaebiyaeinchi beya xua yakuiya werapaeya othopaena barapomonae katsin Nakom pía peitorobi nakua beicha peajüntüyapüsüüwa, po peajüntüyapusüüwa xua jopa werawerakaeyo, jei Nakom pía Pejumopetünaxü tatsi, jei Nakom Pexanto', jande", nejéi Jesucristo pong xua unguua bárapo siete xóyobe xua pentatútuntha itanakanoba xua baxoyo pía xaiña deka tatsi.

Meje yábara po diwesi Juan tatina Esmirna tomarapiwi

⁸Pong Jesucristo xua unguua ekeicha nejéi: "Barichinde tatínare pong Nakom Pejume Diwesi pepaebin pomonaetha tana nejumekowüntsiwi pomonae Esmirna tomaramonae, xua bapong petayorobinexa xua barapomonae petayorobinéxatsi. Jande: 'Meje xua paeba pong xua daxita fórota poxonae aena. Yáwano bapong daxita wétsina xua bexa tsane. Bekein bapong báyatha tüpa íchitha ekeicha asüü pópona xua ataya tsitekaeya tsane. ⁹Bapong jeye: Yaputang daxita xua pokotsiwang paéxaname. Bara paka tainchi xua paanthüthütanem poxonae xua ichamonae pákata abe éxana. Bekein paka tainchi xua paakopeibim íchitha ápara bara paxeináename pokotsiwa bexa Nakom paka katsibina. Daxota paxam be kopei pexeinae jiwi pam. Yaputang pomonae atsakiya najéi: Paxang judiomonae pang, jei. Barapomonae abe paka yábara paeba. Dáichitha barapomonae ü kaurimonae pía pentakaponaein tatsi bapong piamonae tatsi. ¹⁰Jopa pajunuwinde xua pokotsiwa ichamonae paka anthüthütane exanaena xua tsipéi pákata abe exanaena. Kaurimonae pía pentakaponaein tatsi itorobina ichüngtha xua pirai-chi paka jíwana kapanaena jiwi pekübibó beya xua daxota daxita paxam paiña nenakuibarapentsiwa tsane xua paiña nejumekowüntsiwa Nakom. Paxam paanthüthütanem tsane diez po matakábibe. Dáichitha pana najüntükoyene dangweya wüünaere beya poxonae payakuiya werapaeya othopáename. Bapoxonae paxam paka katsibinchi xua be pentoma xua peantüyapusüüwa po peantüyapusüüwa xua jopa werawerakaeyo. ¹¹Paxam pomonae paiña nejumekowüntsi jiwi pam. Icha pamuxudubéname, moya pajumenaitáware xua pokotsiwa Nakom pía Pejumopetünaxü tatsi paka tsipaeba. Bapong jeye: Pomonae xua Jesucristo jumekowünta dubenanaebiyaeinchi beya xua yakuiwerapaeya othopaena, Nakom jopa kopatsí tsane xua barapomonae ekeicha jopa ateneya wérapae tsane, jei Nakom pía Pejumopetünaxü tatsi, jei Nakom Pexanto', jande", nejéi Jesucristo pong xua unguua.

Meje yábara xua po diwesi Juan tatina Pérgamo tomarapiwi

¹²Pong Jesucristo xua unguua ekeicha nejéi: "Barichinde tatínare pong Nakom Pejume Diwesi pepaebin pomonaetha tana nejumekowüntsiwi pomonae Pérgamo tomaramonae xua barapong petayorobinexa xua barapomonae peyorobinéxatsi. Jande: 'Meje xua paeba pong pekoiboto tsina tapichapéinatsi kusi po wato nantiya

barü dúkuabe. ¹³Bapong jeye: Bara yaputang xua daxita paéxaname. Yáwano yaputang xua painómpame ichaxota kaurimonae pía pentakaponaein tatsi itorobeiba xua bárapo tomarapiwi itorobéibatsi. Dáichitha áwiya pana nejumlahewünta dubenanaebíyame. Jopa pabarapentsinde xua pata tana nejumlahewüntsiwam. Antipas bichokono nejumlahewünta. Bekein bapong bexotsi paiñaxantha, dáichitha áwiya pana nejumlahewünta dubenanaebíyame. Pomonae bárapo tómaratha jinompa pomonae xua kaurimonae pía pentakaponaein tatsi itorobeiba barapomonae Antipas bexotsi. ¹⁴Dáichitha paka kuiyaputainchi xua icha koyenein paéxaname, pokoyenein xua jopa ichichipaeiño. Paxéiname Pérgamo tómaratha pomonae xua paiñamonae jíwana, pomonae barichi xua abe éxana xua daxota jopa ichichipaeyo xua pepentsiwa xua pekuidubiwa pokotsiwa Balaam pía pekuidubi koyenewa tatsi. Bapong Balaam kuiduba, Balak kuidúbatsi xua xuya Balak pekuidubinexa xua israelmonae pekuidubinéxatsi xua israelmonae abe peexanaenexa. Po peabe koyene Balak kuiduba xua pinae israelmonae itakúüpatsi xua xane duwein po duwein poxonae bexuba ibo nakom nexa. Yáwano Balak kuiduba xua pinae bárapo israelmonae jopa abe exanaeyo poxonae nata siwaxeina dubenánaebiya yábüxi. ¹⁵Barichi pomonae paiñamonae jíwana pomonae abe éxana, barapomonae ichichipa po pekuidubiwa pokotsiwa nikolaitamonae pía pekuidubi koyenewa tatsi. Bárapo nikolaitamonae pía pekuidubi koyenewa tatsi bichokono aichaxaibin. ¹⁶Daxota icha jüntükoyene paxéinare. Icha jopa icha jüntükoyene paxeinaem, naiña jemeicha baxota patopaein yawa paka beinchi kúsitha, powátotha xua takoiboto pichapeina. ¹⁷Paxam pomonae paiña nejumlahewüntsi jiwí pam. Icha pamuxudubéname, moya pajumenaitáware xua pokotsiwa Nakom pía Pejumopetünaxü tatsi paka tsipaeba. Bapong jeye: Pomonae xua Jesucristo jumlahewünta dubenanaebiyaeinchi beya xua yakuiwerapaeya othopaena, barapomonae katsin po pexaewa pewüng maná, po pexaewa namicha boka xua ichamonae jopa yábara yaputaeyo. Yawa barapomonae katsin iboto, po iboto íñapana, bárapo íbótotha tinaena pena wüng xua ichamonae jopa wüngtaeyo. Saya meisha wüngyaputaena pong xua katsin bárapo iboto, jei Nakom pía Pejumopetünaxü tatsi, jei Nakom Pexanto', jande", nejéi Jesús pong xua ungua.

Meje yábara po diwesi Juan tatina Tiatira tomarapiwi

¹⁸Jesucristo pong ungua ekeicha nejéi: “Barichinde tatínare pong Nakom Pejume Diwesi pepaebin pomonaetha tana nejumlahewüntsiwi pomonae Tiatira tomaramonae xua bapong petayorobinexa xua barapomonae petayorobinéxatsi. Jande: ‘Meje xua paeba Nakom Pexanto tatsi, pong peitamaikéitobetha be ishoto itareto tarúkuatsi. Yáwano bapong bichokono taxudaedaena be penainto, pókotsi nainto pewüng bronce. ¹⁹Bapong jeye: Yaputang daxita xua pokoyene paéxaname, yáwano yaputang xua paxam pana neantobem. Yáwano yaputang pokotsiwa paiña tana nejumlahewüntsiwam. Yáwano yaputang xua pokotsiwa payawéname ichamonae. Yáwano yaputang xua saya beitatemaya jüntema painómpame poxonae bekein ichamonae pákata abe éxana. Yáwano yaputang xua ánoxuae nawita paexanapóname beyakaincha xua poxonae kopiya paéxaname. ²⁰Dáichitha paka kuiyaputainchi xua pokotsiwa paéxaname xua pokotsiwa aichaxaibin, xua jopa paitawetsim powa pewüng Jezabel. Powa jei: Nakom nexa tapaebiwayong, jei. Dáichitha tana nejumlahewüntsi jiwí muxuitórobatsi.

Barapowa Jezabel tamonae kuidúbatsi xua bara nata siwaxeineibina yábüxi. Yawa bapowa kuidúbano pokoyene aichaxaibin xua tamonae jain itoróbatsi xua tamonae xaena duwein, po duwein poxonae bexuba ibo nakom nexa. Bárapo duwein jiwi kata ibo nakomtha poxonae wüünae jainta pía ibo nakom. ²¹Kaena báyatha éwatang xua bapowa icha jüntükoyene pexeinaenexa, íchitha bapowa baxua jopa beexanaeyo. Bapowa jopa juniya exanaeyo xua abe exanaponeiba. ²²Xang exanaein xua naiña bapowa átene tsanaya tsane, xua cámatha pebokaenexa, abe peexanaexae. Írürü pomonae xua bapowa abe nanabarü exainchi barapomonae átene tsane exanaein xua icha barapomonae jopa nakuibarapentsi tsane pokotsiwa bapowa kuiduba. ²³Yáwano bapowa pía pexui tatsi tajutebin. Bapoxonae daxita pomonae Nakom pejumekowüntsíwichi neyaputaena pokoyene xua xang deta kou jiwi tanthüthüyaputaen daxita xua poxonae exaneiba yawa daxita poxonae xua nantaxeineiba. Bapoxonae daxita paxam barompaya paka katsibinchi be xua pentoma. Pomonae xua wüünaeya paéxaname, xua wüünae paka katsibinchi. Pomonae xua abe paéxaname, xua peatenewa paka katsibinchi. ²⁴Paka tsipáebatsi daxita pam pomonae Tiatira tomarapiwi jíwana pam, xua pomonae jopa paexanaem pokotsiwa xua Jezabel paka kuiduba, saya ichamonae paxam jíwana pam, baxua éxana. Paka tsipáebatsi pomonae pam pomonae jopa pana nabarü nakuidubim pokotsiwa kaurimonae pía pentakaponaein tatsi pía koyenewang tatsi. Tsipéi jopa paexanaem bárapo koyenewa daxota jopa paka itorobi tsainchi icha koyene xua paiña neexanaewa tsane, pokoyene bichokono ayapubé. ²⁵Dáichitha áwiya pana nejumekowünta dubenanaebíyama beya poxonae ekeicha patopeikaen. ²⁶Áwiya pajumekowünta dubenanaebíyama Nakom paiña amanayabinexa tsane kaurimonae. Yawa áwiya paéxana dubenanaebíyama pokotsiwa xua xang ichichipang xua beya payakuiwerapaeya othopáename. Pomonae baxua exanaena, barapomonae katsin taayapusúü itorobi koyenewa xua peitorobeibinexa tsane po kae pin nakuathepiwi. ²⁷Paka katsibinchi taitorobi koyenewa icha Taxa neichi xua nekata pía peitorobi koyenewa. Icha pebin ichi xua poxonae barapong dangweya wakataxuba jurúwato penáintotha xua peexanaenexa pepürüwixi, bara jüta ichi tsane pomonae nejumekowünta. Barapomonae dangweya itorobina bárapo kae pin nakuathepiwi beya poxonae daxita werawerakaena abe peexanaexae. ²⁸Bapoxonae yawa paka katsibinchi pokoyene xua tapaka barü poponáewatsi. Bárapo koyene bichokono wüünae tsane, icha jarawato ichi xua jiwi bichokono tsita wüünaetsi poto matakei pewünaeya ekoina. ²⁹Paxam pomonae paiña nejumekowüntsi jiwi pam. Icha pamuxudubename, moya pajumenaitáware xua pokotsiwa Nakom pía Pejumopetünaxü tatsi paka tsipaeba, jei Nakom Pexanto', jande", nejéi Jesús, pong xua ungua.

Meje yábara po diwesi Juan tatina Sardis tomarapiwi

3¹Jesucristo, pong xua ungua siete xóyobe pía xaiña deka xua ichaxota penta-tútuntha itanakanoba, ekeicha nejéi: “Barichinde tatínare pong Nakom Pejume Diwesi pepaebin pomonaetha tana nejumekowüntsiwi pomonae Sardis tomaramonae xua bapong petayorobinexa xua barapomonae petayorobinexa. Jande: ‘Meje xua paeba Jesucristo pong xua xeina siete po pexeíña jüntükoyénebe, pokoyénebe xua Nakom pía Pejumopetünaxü tatsi Jesucristo kátatsi. Yawa bapong xeina siete po opitéitobe pekobe weya, pokobe pekoxa weya. Bapong jeye: Yaputang daxita

xua paxam paéxaname. Bekein jiwi paka yábara nantaxeina xua paxam painta beta éxaname, dáichitha ápara jopa painta beta exanaem. Daxota paxam netsita be pomonae pewérapae jiwi pam. ²Pana najüntükoyene tsakábare. Payawende pomonae tana nejumekowüntsiwi xua pejüntükoyene wüünaenexa, tsipéi barapomonae be pewerapaewi pejüntükoyene natsepaexae. Paka tainchi xua pokotsiwa paéxaname. Baxua jopa Nakom tsita wüünaetsi. ³Daxota panantaxéinare xua pokotsiwa báyatha paka kuiduba. Bapoxonae bapokotsiwa paexande yáwano bapoxonae icha jüntükoyene paxéinare Nakomtha xua ekeicha kaewa paiña nejumekowüntsiwa tsane. Icha jopa baxua paexanaem tsane, bapoxonae naiña jemeicha patopaein paxamtha poxonae jopa payaputaem xua patopaein. Exanaein icha be pókotsin pong pekaibin ichi xua jemeicha patopa. ⁴Dáichitha paxéiname bárapo tómaratha, Sardis tómaratha, pomonae tana nejumekowüntsiwi. Barapomonae penthüthü xeikáe jiwi. Jopa xeinaeyo pokoyene xua peajüntükoyenebewa tsipéi jopa abe exanaeyo. Barapomonae nebarü jinompaena. Yawa namaxatabina paparuwang, po paparuwang íñapana tsipéi barapomonae éxana dubenanaébiya pokotsiwa xua itorobang. ⁵Pomonae xua nejumekowünta dubenanaébiyaena xua beya yakuiwerapaeya othopaena barapomonae namaxatabina po paparuwang íñapana. Yawa pomonae wüngdubena Nakom pía díborotha xua pomonae ataya pejinompaenexa tsane xua jopa werawerakaeyo, barapomonae jopa wüng iki-kaein tsane. Yáwano wüngyaputane exanaein Taxa Nakomtha yáwano Nakom pía matatsunpiwi tatsi peitabarathano. ⁶Paxam pomonae paiña nejumekowüntsi jiwi pam. Icha pamuxudubéname, moya pajumenaitáeware xua pokotsiwa Nakom pía Pejumopetünaxü tatsi paka tsipaeba, jei Nakom Pexanto', jande", nejéi Jesús pong xua unguia.

Meje yábara po diwesi Juan tatina Filadelfia tomarapiwi

⁷Ekeicha Jesucristo pong xua unguia nejéi: “Barichinde tatínare pong Nakom Pejume Diwesi pepaebin pomonaetha tana nejumekowüntsiwi pomonae Filadelfia tomarapiwi xua bapong petayorobinexa xua barapomonae petayorobinéxatsi. Jande: ‘Nakom Pexanto tatsi, bapong bichokono pejüntükoyene wüünaein Nakomtha xua jopa penatsikuentsiwa Nakomtha xua abe peexanaexae. Yawa bapong bara xaniwaicha pepaebin. Yawa bapong pong naka yawena xua patinchi Nakom pía peitorobi nakua beicha. Bapong naka yawenaena icha matha pong peboupa peewatsin ichi xua poxonae David yawénatsi. Bapong pong peboupa peewatsin David taewatatsi pía pexeña peekaethopeibibo tatsi. Bapong David pong kaena báyatha Israel nakuamonae itorobiya pía pepa peewatsinchi. Bapong pong peboupa peewatsin pía peitorobi koyenewa xeina xua poxonae bapong peboupa saranaxuba ichüng jopa itaküüpaetsi xua peboupa xatataba. Yawa poxonae bapong peboupa xatataba ichüng jopa itaküüpaetsi xua saranaxuba. Icha bapong ichi, barichi Nakom Pexanto tatsi pía peitorobi koyenewa xeina. Bapong kópata xua pijimonae tatsi patsina Nakom pía nakua beicha. Yáwano jopa kopatsiyo xua ichamonae patsina Nakom pía nakua tatsi beicha. Ichüng jopa itaküüpaetsi xua ichawa paeba Nakom Pexanto tatsi beya. Ánoxuae nama Nakom Pexanto paka tsipaeba, jeye: ⁸Yaputang xua daxita paéxaname. Xang kopatang xua tajume diwesi pakáponame ichamonaetha. Ichüng jopa itaküüpaetsi xua paka jume itaweta xua daxota jopa paiña nekaponaewa bárapo diwesi. Bekein saya tsiwiyo

paajüntükuikoyenesüüm, dáichitha áwiya tajume diwesi pakueikueijam yawa jopa pana nepentsim xua paiña tana nejumekowüntsiwam. ⁹Íchitha pomonae naerabiya jei: Paxang, judiomonae pang, jei barapomonae, Satanás, kaurimonae pía pentakaponaein tatsi bapong piamonae tatsi tsipéi jopa benejumekowüntsiyo. Xang exanaein xua barapomonae patsina paxamtha pentabokototha peumenaenexa tsane paiña itabaratha wüünae paiña nepaka jainchinexa tsane. Bapoxonae barapomonae yaputaena xua xang tapaka kaantobéwichi pam. ¹⁰Pajumekowüntsiya éxana dubenanaebíyama pokoyene xua paka itoróbatsi xua beitemaya painómpame xua jopa paiña neitakonaewa poxonae bekein ichamonae paka yábara abe éxana. Daxota bárapo matakabi, po mataketha poxonae kaurimonae pía pentakaponaein tatsi daxita bárapo kae pin nákuathe jiwi jüntükoyene jüjütinchi, poxonae jiwi bichokono átene exanaeinchi bara paka kapanenebiya exanaeinchi. Kaurimonae pía pentakaponaein tatsi jüntükoyene jüjütsina pomonaetha, pomonae Nakom pejumekowüntsiwichi poxonae bichokono átene exanaeinchi xua daxota Nakom jopa pejumekowüntsiwa tsainchi. ¹¹Imoxoyo patopeikaein. Xaniwaicha beta paxéinare pokotsiwa xua tapana nejumekowüntsiwam xua bexa Nakom paka katsina pokotsiwa paka jüntüna jeba pía nakuatheicha beta paiña tana nejumekowünta dubenanaebiyaexaemxae. Jopa pakopatsinde xua ichüng paka exanaena xua abe paiña neexanaewa tsane xua daxota jopa paiña nexenaewa tsane pokotsiwa paka jüntüna jeba pía nakuatheicha. ¹²Pomonae xua nejumekowünta dubenanaebiyaena barapomonae bichokono jüntükoyene ayapusüüya dangweya exanaein xua pepatsinexa tsane Nakom pía nakua beicha. Bapoxonae bápana jopa ponáe tsane Nakom pía nakua weya. Bapoxonae barapomonaetha katsin po wüng Taxa Nakom pewüng, xua jiwi peyaputaenexa xua barapomonae ápara Nakom piamonae tatsi. Yawa katsin po wüng pena Jerusalén tómara pewüng, po tómara Nakom pía tómara tatsi ichaxota jinompa pomonae peantobéwichi Nakom. Bárapo Jerusalén tómara itaboko wétsika pona ichaxoteicha xua Ta Nakom pópona. Yáwano katsin barapomonaetha tawüng, po wüng pena wüng. ¹³Paxam pomonae paiña nejumekowüntsi jiwi pam. Icha pamuxudubéname, moya pajumenaitáware xua pokotsiwa Nakom pía Pejumopetünaxü tatsi paka tsipaeba, jei Nakom Pexantó, jande”, nejéi Jesús pong xua unguia.

Meje yábara po diwesi Juan tatina Laodicea tomarapiwi

¹⁴Jesucristo, pong xua unguia siete xóyobe pía xaiña deka xua ichaxota pentatútuntha itanakanoba, ekeicha nejéi: “Barichinde tatínare pong Nakom Pejume Diwesi pepaebin pomonaetha tana nejumekowüntsiwi, pomonae Laodicea tomarapiwi xua bapong petayorobinexa xua barapomonae petayorobinexa. Jande: ‘Meje xua paeba pong xaniwaicha pepaebin pong xua xaniwaicha beta naka yábara kaunutsiya paeba Nakomtha. Pong xua kaena báyatha daxita fórota. ¹⁵⁻¹⁶Yaputang daxita pokotsiwa paxam paéxaname. Paxam paka tsipáebatsi xua be paichimje: Ichamonae ba aichaxaibi xua apa poxonae po mera mene tüna xuano xua poxonae ake aibi yawa poxonae atou aibi. Bapoxonae mene sutabina. Paxam be barapókotsi mera pana nakayábara tsikotáneme. Paxam kónotha pana nejumekowüntame. Jopa panepentsim xua pata tana nejumekowüntsiwam. Matáütano jopa bichokono paichhipaem xua paiña neexanaewa pokotsiwa paka itoróbatsi. Daxota anaya paka xubinchi tsipéi kónotha pana nejumekowüntame icha

xua pebin ichi xua anaya mene sutabina tsipéi mene tüna. ¹⁷Payábara páebame pokoyene xua kopei paiña nexeiñawewi pam. Yawa payábara páebame pokoyene xua paiñakoutha pana nayawenéibame xua jopa pákata akoibi tsaibiyo xua pokotsiwang panantawénoname. Íchitha jopa payaputaebenaem xua pokotsiwa paka yábara nantaxéinatsi xua pebiwi tsobenáe, paka yábara jeichi. Matáütano jopa payaputaem xua paxam be pomonae peakopeibiwi pana natsikotáneme. Yáwano be pomonae peitatanakütsi jiwí pana natsikotáneme. Yáwano be pomonae tamasaina pana natsikotáneme. Ápara xua jang: Paxam be barapomonae pam tsipéi jopa beta paiña jüntükoyenéwatha pana nejumekowüntsím. Yawa jopa beta painta nakuichim, jang. ¹⁸Daxota paka tsipáebatsi. Pana nekómokare po penainwang pewüng oro nain, po nain xua dangwéi xua poxoru ishótotha pesetsixae xua pexubinexa pokotsiwa abe. Bapoxonae xaniwaicha bara kopei paiña nexeiñawewi pam tsane. Yáwano pana nekómokare po paparuwang íñapana tha tapaka kajumaxatabinexa tsane, tha tapaka kajuma-akabinéxatsi xua pajumasáiname xua paiña neáuraxae. Matáütano pana nekómokare pewouwa tabotsinexa paiña itamaikéitha bapoxonae beta patáename. Ápara xua jang: Pana newúükare xua poxonae pokoyene xua beta paka jüntükoyene exanaeinchi xua jopa paiña nexeiñawewam tsane paiña jüntükoyéineintha, pokotsiwa xua abe, jang. ¹⁹Pomonae xua antobein kui-itawetang xua abe éxana. Ekeicha kuidubang xua jopa peexanaenexa baxuang. Yáwano bichokono pana nejumekowüñde yáwano icha jüntükoyene paxéinare. ²⁰Pataema bokoibótotha unguang yawa wawang. Icha pebin nejumetane yawa inta koibosaranaxorena bara jonyang yawa bara pana nabarü xangbe piabóthaxae. ²¹Taxa jumekowüñta dukuanabiyang xua neitoroba beya xua poxonae báyatha tüpang. Daxota Taxa nekópata xua taekaenexa imoxoyo ichaxota Taxa pía pexeíña peekaethopeibiwa tatsi táungkuatsi. Icha Taxa neichi baxua, barichin tsane pomonaetha, pomonae tana nejumekowüñtsiwi. Pomonae nejumekowüñta dubenanaebiyaena xua itorobang, xua beya yakuiwerapaeya othopaena, barapomonae kopatsin xua peenaenexa ichaxota imoxoyo pexeíña taekéibithopeibiwa inta unguua. ²²Paxam pomonae paiña nejumekowüñtsi jiwí pam. Icha pamuxudubéname, moya pajumenaitáeware xua pokotsiwa Nakom pía Pejumopetünaxü tatsi paka tsipaeba, jei Nakom Pexanto', jande", nejéi Jesús pong xua unguua.

Meje yábara po diwesi xua xuang Juan tsita naitúütatsi peitabókotha

4 ¹Poxonae baxua weta, tang peitabókotha be boboupa xua boupa yeyetanota. Yáwano jumetang pejume, pojume xua kopiya jumetang, pojume xua bichokono jumedangweya ajumetsaka be poxonae xua oba po peobiwa pewüng trompeta. Bapong Jesús nejéi: “Anetha tsínande taxaiña bétsina. Katsita-itüütsinchi xua pokotsiwa bexa tsane exanaena”, nejéi Jesús.

²Bapoxonae nama bichokono Nakom pía Pejumopetünaxü tatsi nejüntüyüüka éxana. Peitabókotha tang xua dukua pokotsiwa pexeíña peenaethopeibiwa, yáwano tang pong xua ékiya baxota. ³Pong xua ékiya baxoteicha bichokono itabara daedaena icha iboto ichi pókotsi iboto xua bichokono daedaena pókotsi iboto xua bichokono aiña matoma, po iboto pewüng jaspé, yawa be pókotsi iboto pewüng cornalina. Yáwano matawakaicha matatsún unguéikatsi koinwawa. Bárapo koinwawa bichokono süüjeya pentha éxana icha iboto ichi pókotsi iboto pewüng esmeralda. ⁴Bárapo pexeíña peekaethopeibiwa pía matawakaicha

tatsi, tang icha peenaethopeibiwang veinticuatro po peenaethopeibiwang xóyobe. Bárapo peenaethopeibíwangtha ena pítiri jiwi xua matáüta veinticuatro póyobe. Yáwano bárapo pítiri jiwi namaxátaba paparuwang, po paparuwang íñapana yáwano nantaxátaba pokotsiwa be tepa xua penainwang, po penainwang pewüing oro nain. ⁵Bárapo pexeiña peekaethopeibiwa weya be yamüxübusi xua jurujuréi. Yáwano jerajeréi. Yáwano bárapo peekaethopeibiwa peitabaratha tatsi umena pekoicha be xua pokotsiwa banaxú. Bárapo siete banaxútobe kóichabe yábara kahunta xua Nakom pía Pejumopetünaxü tatsi xeina siete po pexeiña jüntükoyénebe. ⁶Bárapo peekaethopeibiwa peitabaratha dukua xua pokotsiwa pentha pokotsiwa icha pin marmene ichi xua mene itarana yawa icha bosibü muxupawa ichi xua penthiya.

Bárapo peekaethopeibiwa baxota imoxoyo umena cuatro póyobe pokotsiwa xua asüü. Bárapo cuatro póyobe nantiyang itamaikéi dubena péitabara wéyano yawa pejuma wérenano. ⁷Bárapo cuatro póyobe jíwana xua xuang asüü, pong kopiya be neuthü itabara, irü ichüing be vaca pebto itabara, irü ichüing be jintong itabara, irü ichüing be kótsara itabara, pong pepupunaein. ⁸Bárapo cuatro póyobe daxita barompaya xeina seis pokuarafeinbe. Matáütano barompaya aiña itamaikéi xeina daxita matapaeicha pepongtha yáwano matha iya itamaikéi dubeiña. Matakeitha, merawíthano jopa kuinaya najumekopabábiyo xua kueikueijeji Nakomtha pong xua eka bárapo pía peekaethopeibíwatha, jeye:

“¡Xam pong bichokono nejüntükoyene wüünaem,
xua bápana jopa nexeiñaeua abe peexanaewa!

¡Xam pong jiwi Nekanamataxeinaem!

¡Xam Nakom, pong neayapusüü itorobi koyenewa xéiname!

¡Xam pong kaena býatha poponéibame xuano xua ánoxuae poponéibame xuano xua bexa ataya tsitekaeya poponáename!”

jei bárapo cuatro póyobe poxonae kueikueijeji Nakomtha.

⁹Pong xua pexeiña pía peekaethopeibíwatha eka, pong xua ataya pópona, bapong wüünae jáintatsi, bárapo cuatro póyobe wüünae jainta. Baxua éxana tsipéi bapong pexeiña jüntükoyene pexeinaein, matáütano tsipéi bapong aiñakuí koyenewang peexanaein. Matáütano bapong jeichichi: “Maisha pajüntükoyene weiweingang pokotsiwang pata tana nekatsixaemxae”, jeichichi bapong. ¹⁰Poxonae bárapo cuatro póyobe wüünae jainta, bapoxónaerü pítiri jiwi xua veinticuatro póyobe xua barompaya pía peenaethopeibíwatha ena, barapomonae irü pentabokototha umena xua wüünae pejainchinéxatsi pong ataya pepoponeibin. Yawa bárapo veinticuatro póyobe nantatapa wejonapenta. Bapoxonae jeba pong ataya pepoponaein peitabaratha tatsi. Bapoxonae jeye:

¹¹“Pata Tanekanamataxeinaem,
yáwano xam pata Nakom.

Maisha wüünae xua paéxana dubenanaebiyang ichamonaetha pata yábara kueikueijeinexa jiña pexeiña jüntükoyene yawa jiña pexeiña aiñakuí koyenewang,

yáwano jiña neayapusüü itorobi koyenewa.

Baxuang paéxanang tsipéi xam daxita fórotame.

Tsipéi xam neichichipaexae daxota baxuang fórotame”,

jei bárapo pítiri jiwi.

Meje yábara po diwesi xua poxonae Juan tane Nakom pía díboro

5¹Bapoxonae tang díboro pekobe weya, pokobe pekoxa weya xua pong xua eka peekaethopeibíwatha. Bárapo díboro kiyontsiya matüüba yáwano bárapo díboro nantíyabe muxunene tina yawa katsábaba siete xóyobe xua pokotsiwa pekatsababiwa. ²Yáwano tang matatsunpin pong peitorobi koyenewa xeina. Yáwano jumedangweya yáíñaba jeye: “¿Jintam Nakom tsítatsi pong pejüntükoyene wüünaein pongtha pong xua Nakom daxota kopatsina xua bárapo pekatsatabiwa petsitsinaxubiwa tsane xua pepataxubiwa tsane bárapo díboro?” jei bapong. ³Íchitha dapokotsin aibi pong itabókotha pópona, irü pong xua pópona po írathe, írürü pong pópona po ire pejuma béreka. Tsipéi dapong aibi pong bichokono pejüntükoyene wüünaein xua pongtha pong Nakom kópata xua peitaküüpáewatsi xua pepataxubiwa tsane yawa xua peyorobiwa tsane bárapo díboro. ⁴Bapoxonae bichokono wekoyang tsipéi dapong aibi pong xua bichokono pejüntükoyene xeikaein xua pong itaküüpatsi pepataxubiwa tsane yawa xua peyorobiwa tsane bárapo díboro. ⁵Bapoxonae kaein bárapo pítiri jiwi, nejéi: “Jopa ekeicha wekóyande. Tsipéi pong unguua pong wüngdútatsi: ‘León’, jei xua po wüng jei: ‘neuthü’, jei bapongtha Nakom kópata xua éxana baxua tsipéi pía peayapusüü itorobiwa kanamataxeina. Ápara bapong Judá piamonae jiwi jíwana tatsi, pong Judá kaena báyatha tüpa. Barichi bapong ápara David pía pemómoxi susato jíwana tatsi, pong David Judea nakuapiwi itorobiya pía pepa peewatsinchi kaena báyatha. Saya meisha bapongtha Nakom kópata xua itaküüpatsi xua tsita kutsina bárapo siete xóyobe xua katsátaba bárapo díboro peamanayabixae xua poxonae ekeicha kaewa asüü poxonae tüpa náetotha”, jei pítirin.

⁶Bapoxonae tang Cordero xua oveja pebto penüng, pong unguua Nakom pía pexeña peekaethopeibíwatha peitabaratha tatsi yawa xua bárapo cuatro póyobe peitabaratha tatsi xua xuang asüü, yáwano pítiri jiwi pía xaiña deka tatsi. Bárapo Cordero unguua bekein wang xeina xua poxonae báyatha tsibexotsi jiwi abe pía peéxanae kuirukoyenein tatsi. Bárapo Cordero siete po itamaikéitobe xeina matáütano siete pontétobe xeina. Bárapo siete itamaikéitobe yábara kaunuta siete po pexeña jüntükoyénebe xua Nakom pía Pejumopetünaxü tatsi xeina. Nakom najumope itoroba daxita írangtha. ⁷Bárapo Cordero wekobepita bárapo díboro pekobe weya, pokobe pekoxa weya tatsi pong xua eka pía pexeña peekaethopeibíwatha. ⁸Poxonae Cordero pita bárapo díboro, bapoxonae bárapo veinticuatro pítiri jiwi, irü cuatro póyobe xua xuang asüü daxita barapomonae pentabokototha umena bárapo Cordero peitabaratha tatsi. Daxita bárapo pítiri jiwi barompaya xeina xua pokotsiwang pexeña petaünbabiwang pokotsiwang pewüng arpa. Yáwano barompaya xeina pokotsiwang pekaapaewang xua pokotsiwang pewüng oro nain. Yawa bárapo pekaapaewíxitha wüngba xua pokotsiwang petuxueiwang pokotsiwa túxusi bénata poxonae tauta. Bárapo petuxueiwa yábara kaunuta xua pokotsiwa poxonae pewüükaewa Nakomtha pomonae xua Nakom piamonae, pomonae pía peantobéwichi tatsi. ⁹Barapomonae pena wei naxüna, jeye:

“Xam maisha pong bichokono nejüntükoyene wüünaein xua netsitsinaxubiwa bárapo siete xóyobe xua katsátaba bárapo díboro. Tsipéi báyatha pana netsitúpame poxonae painta pentoma éxaname pata naexanaenexa tsane Nakom piamonae tatsi.

Yáwano jíwana itapétame,
pomonaē tsikimonaēxi xua daxita karepaya tsikimonáēxitha xua
nekajumekowüntsiwa tsane.

Matáütano jíwana itapétame daxita ü dapomonaē,
pomonaē barompaya icha jume penatsipaēbiwa.

Matáütano daxita karepaya tomarangpiwi jíwana itapétame.

Matáütano daxita karepaya nakuangpiwi jíwana itapétame.

¹⁰Pana nekana éxaname be pomonaē jiwí itorobiya pía pepa peewatsíwichi
tatsi pang.

Yawa pana exanamenō be pomonaē sacerdotemonaēpiwi pang xua Nakom
pata tanakuichinexa.

Yáwano pana éxaname pata itorobiya ewatsinexa po kae pin
nakuathepiwi”,

jei barapomonaē poxonaē naxüna.

¹¹Bapoxonaē nekotang, yawang jumetang xua bichokono pinmonaē juiña pomonaē
Nakom pía matatsunpiwi, xua juiña bárapo pexeña peekaethopeibíwatha
matawakaicha umena, yawa xua juiña bárapo pítiri jiwí matawakaicha umeinchi,
yawa xua juiña matawakaicha umeinchi bárapo cuatro póyobe xua xuang asüü.
Pomonaē jumetang bichokono ayéi jiwí küküjei. ¹²Bapoxonaē barapomonaē bicho-
kono jumedangweya paēba, jeye:

“¡Cordero, po Cordero býatha jiwí tsibexotsi abe pía peéxanaē
koyenewang tatsi,

maisha bárapo Cordero Nakom tsita jüntükoyene wüünaetsi!

Daxota Nakom kópata xua bapong xeina pía peayapusüü itorobi koyenewa.

Matáütano Nakom kópata xua bapong xeina daxita pokotsiwang xua
Nakom xeina.

Yáwano xeina pía peyaputáē koyenewang.

Yáwano xeina pía peayapusüüwa xua dangweya peexanaewa.

Matáütano jiwí bewa barükui-iturajinaēna barapong, pong Cordero.

Matáütano jiwí bewa wüünaē jainchina barapong, pong Cordero.

Matáütano jiwí bewa beta exanáē jüntükoyene weiweina peexanaēnéxatsi
bapong xua petsitüpaēxae jiwí abe pía peéxanaē kuirukoyenein tatsi”,

jei bárapo matatsunpiwi.

¹³Yáwano ekeicha jumetang daxita pomonaē kaēna býatha Nakom fórota:
pomonaē peitabókotha fórotatsi, írúno pomonaē po kae pin nákuathe fórotatsi,
írúno pomonaē po ire pejuma wétsina fórotatsi. Yáwano jumetang xua pokotsi-
wang pin marmentha jinompa. Daxita baxuang karepaya Nakom fórota. Jumetang
xua jeye:

“Xam Nakom, pong ékame jiña pexeña neekaethopeibíwatha írúno xam
Corderom,

bárabü ataya jüntükoyene weiweina paka exanáēnabe xua jiwí Jüntükoyene
weiweina paka exanáēnabe xua pokotsiwa paiña neexanaēxaebe.

Bárabü daxita jiwí paka barükui-iturajineibínabe.

Yáwano bárabü daxita jiwí wüünaē paka jainteibínabe.

Yáwano bárabü paxeineibínabebe peayapusüüwa xua dangweya paiña
neexaneibíwabe.

Daxita bárapo koyenein ataya tsitekaeya paxeineibínamebe”,
 jei daxita barapomonaе,
 pomonaе Nakom fórota.

¹⁴Bárapo cuatro póyobe xua xuang asüü, jeye: “¡Bara bara, bara baxua exa-naena!” jei. Pítiri jiwi, pomonaе veinticuatro póyobe, pentabokototha umena, xua Nakom wüünae pejainchinéxatsi, pong ataya tsitekaeya pópona.

Meje yábara po diwesi xua siete xóyobe xua xuang pekatsababiwang

6¹Bapoxonaе tang poxonaе Cordero tsitsinaxuba kaewa xua katsátaba. Bapoxonaе kaein jíwana pomonaе cuatro póyobe xua xuang asüü jumetang xua dangweya paeba xua be yamüxübusi, nejéi: “¡Anetha, taema!” jei. ²Bapoxonaе tang kawayu pemañang. Pong kawáyutha ekeika, bapong bicheibi ka-ekeika. Bapong pexeña tepa kátatsi penamataxatatsinexa. Bapong kawáyutha pónataba xua beta penabinexa. Bapong amanáyaba pía peaitafaetabíwichi.

³Poxonaе Cordero ekeicha tsitsinaxuba icha pekatsatabiwa, bapoxonaе bárapo cuatro póyobe jíwana xua xuang asüü jumetang, nejéi: “¡Anetha, taema!” jei. ⁴Ekeicha patopa ichüng kawayu petsobiang. Pong tsijuma ekeika, bapong kátatsi peayapusüü itorobi koyenewa xua jiwi pejüntükoyene wepuxana exanaenéxatsi pokoyene xua jüntema pejinompaewa. Yáwano peexanaenexa xua pebiwi penajutebinexa. Matáütano bapong pin dejona kátatsi.

⁵Poxonaе Cordero ekeicha tsitsinaxuba icha pekatsatabiwa, bapoxonaе ekeicha bárapo cuatro póyobe jíwana xua xuang asüü jumetang, nejéi: “¡Anetha, taema!” jei. Ekeicha kawayu tang petsaebiang. Pong tsijuma ekeika, bapong komaekeika pokotsiwa pepesabiwa. ⁶Bapoxonaе bárapo cuatro póyobe pía xantha jumetang xua nejéi: “Saya kae kilo trigoxú kae denario nantomatsina, pókotsi parátixi xua nantómata kaentakeitha poxonaе nakuita. Yáwano tres po kílobe cebadabeno kae denario nantomatsina pókotsi parátixi xua nantómata kaentakeitha poxonaе nakuita. Íchitha jopa kopatsin tsane xua abe exanaena penasiwa merathang mera yáwano vino mera”, jei pong jumetang.

⁷Barapoxonaе bárapo cuatro póyobe xua opidukuanaya jumetang yawa nejéi: “¡Anetha, taema!” jei. ⁸Bapoxonaе kawayu ichüng tang pong nadaena. Pong tsijuma ekeika wüngdútatsi: “Pong Petüpaein”, jei. Bárapo kawayu peputha tapoinchi ichüng kawayu. Pong tsijuma ekeika wüngdútatsi: “Petüpaewa Nakua”, jei. Pong tsijuma ekéikabe bapongbe katatsibe Cordero pía peayapusüü itorobi koyenewa tatsi xua bapongbe pejíwana bexubinéxabe poxonaе cuatro póyobe nekótabe pomonaе po kae pin nákuathe jinompe, yáwano xua pejutebinéxabe poxonaе jiwi naba, yáwano pejutebinéxabe poxonaе jiwi piyain poxoru pexaewa aibi tsane, yáwano pejutebinéxabe poxonaе jiwi átene, yáwano pejutebinéxabe unupiwi xua xuang bichokono anáepana.

⁹Poxonaе Cordero tsitsinaxuba ichaxota xua cinco pokuíyobe xua pekatsatabiwa, bapoxonaе tang xua be pexaethopaewa ichaxota tauteiba duwéi xua túxusi exaneiba Nakom nexa. Báraxua xua be pexaethopaewa juma béreka tang pomonaе báyatha jutébatsi ichamonaе, nekaponaexae Nakom Pejume Diwesi xua amsiya áwiya pekueikueijeixae. ¹⁰Pomonaе xua báyatha jutébatsi ichamonaе, barapomonaе jumedangweya paeba, jeye: “Nakom pongxaem pepa Nekanamataxeinaem daxita jiwi, Nakom pongxaem bichokono nejüntükoyene xeikaem. Xam pongxaem

pokotsiwang yábara tsiwüüinae muxudúbame baxuang xaniwaicha éxaname. ¿Eta poxonae exanáename xua poxonae jiwi yábara paebíname xua penatsikuentsiwa xua abe peexanaexae, xuano xua pana yantomatsíname xua nejutebinexa pomonae jinompa po kae pin nákuathe kopiya pata tana nejutebixae?” jei barapomonae. ¹¹Bapoxonae barapomonae jumaxátabatsi paparuwang, po paparuwang ínapana. Yáwano barapomonae baráichichi: “Abü kataunxuae paéware beya poxonae yakuí opidukuiya werawerakaena xua kataunxuae jujutebaponaeinchi pomonae irü Cristo pejumekowüntsiwi. Barapomonae jujutebaponaeinchi pekueikueijeixae Cristo pejume diwesi, icha xua poxonae paichim”, jei Nakom.

¹²Poxonae Cordero tsitsinaxuba pekatsatabiwa xua seis pokuiyobetha, bapoxonae tang xua bichokono ira jijíyata. Xometo bichokono tsaebia tsanaya icha paparuwa ichi, pókotsi paparuwa bichokono tsaebia. Jomokóichato bichokono tsobia tsanaya icha pejana ichi. ¹³Opitéi xua peitabókotha dubena othopeika po írathe tsike, icha be joibo ichi xua jübaba higuera nae xua pethéi othothopeika. ¹⁴Peitaboko aichúrukuae icha be poxonae ichüing ichi xua poxonae matakiontaba papera. Matáütano demuxuwang, petunaetongno ekeicha ichawa bepoiña poxonae ira jijíyata. ¹⁵Bapoxonae daxita pomonae jiwi itorobiya pía pepa peewatsíwichi tatsi xua bárapo kae pin nákuathe, barapomonae nantsiyaba. Irü pomonae pentakaponaewi irü pomonae kopei pexeinaewi, irü pomonae soldadomonae pía pentakaponaewi xua pomonae jiwi peamanayabeibí jiwi daxita barapomonae nantsiyaba. Daxítarü pomonae pebusikuitaetaeyebéwichi irü pomonae xua saya penata exanaewi piáwang nantsiyabarü. Ichamonae barapomonae jíwana ibo müthüingtha nantsiyaba. Ichamonae barapomonae jíwana nantsiyaba po ibótongtha xua saya bobena xua demuxuwang itapatororong tsika. ¹⁶Barapomonae demuxuwang beya yawa ibótong beya jeye: “Pana mataperabábare xua pata werapaewa tsane xua daxota pong xua eka pía pexeíña peekaethopeibíwatha jopa pata tana netaewa tsane, yawa xua bárapo Cordero pekuiyainwa xua pata nepérxaxa jübiya exanaeyainwa xua abe pata exanaexae. ¹⁷Tsipéi bárapo matakabi patopa po mataketha daxita jiwi pérxaxa jübebinchi. Dapong aibi pong panepa bárapo mataketha”, jei pomonae nantsiyaba.

Meje yábara po diwesi xua Nakom ítapa tina Israel pía pexui tatsi pía pemómoxi susato jíwanapiwi tatsi xua peyaitaenexa

7 ¹Bapoxonae cuatro póyobe tang matatsunpiwi xua íratha umena. Ichüing ungkua ichaxota pokotsiwa xometo weekoina, ichüing ungkua ichaxota pokotsiwa xometo bejopiya, ichüingbe epataütiya úngkuabe. Bárapo matatsunpiwi jopa kopatsiyo xua joibo pejojondenaewa bárapo íratha dena, yawa xua pin marmenein dena, yáwano naeintha dénano. ²Barichi ichüing tang ichüing matatsunpin pong pokotsiwa wétsina pona ichaxota pokotsiwa xometo weekoina. Bárapo matatsunpin kápona Nakom piáwa xua pokotsiwa peyaputaewa piawaxae, pokotsiwa pekati-naewa pong Nakom peyapusüü itorobi koyenewa pexeinaein. Bárapo matatsunpin jumedangweya wawái icha matatsunpiwi beya xua cuatro póyobe, po cuatro póyobe pía peyapusüü itorobi koyenewa xeina xua itakúüpatsi xua abe exanaena pin marmentha yawa íratha. ³Bárapo matatsunpin jeye: “Jopa abe paexanaeinde íratha yawa pin marmentha, paéware abü beya poxonae jiwi paitapatinaein Nakom pía pejumekowüntsíwichi, pong pata Nakom”, jei bárapo matatsunpin.

⁴Jumetang barapomonaē yábara, xua ichüŋg jeye: “Ciento cuarenta y cuatro po jiwimonaēbe paitapatinang xua Israel pía pemómoxi susatomonaē jíwana tatsi”, jei. ⁵Bárapo Israel pong icha wüŋg Jacob. Bapong xeina doce po pexántobe tatsi pomonaē kaena báyatha wérapa. Israel pía pexantong tatsi pía pemómoxi susato jiwí tatsi xeina. Pong Judá, barapong pía pemómoxi susato jíwanapiwi tatsi Nakom ítapa tina saya doce mil pomonaē matabüxümonaēbe. Pong Rubén, barapong pía pemómoxi susato jíwanapiwi tatsi Nakom ítapa tina saya doce mil pomonaē matabüxümonaēbe. Pong Gad, barapong pía pemómoxi susato jíwanapiwi tatsi Nakom ítapa tina saya doce mil pomonaē matabüxümonaēbe. ⁶Pong Aser, barapong pía pemómoxi susato jíwanapiwi tatsi Nakom ítapa tina saya doce mil pomonaē matabüxümonaēbe. Pong Neftalí, barapong pía pemómoxi susato jíwanapiwi tatsi Nakom ítapa tina saya doce mil pomonaē matabüxümonaēbe. Pong Manasés, barapong pía pemómoxi susato jíwanapiwi tatsi Nakom ítapa tina saya doce mil pomonaē matabüxümonaēbe. ⁷Pong Simeón, barapong pía pemómoxi susato jíwanapiwi tatsi Nakom ítapa tina saya doce mil pomonaē matabüxümonaēbe. Pong Leví, barapong pía pemómoxi susato jíwanapiwi tatsi Nakom ítapa tina saya doce mil pomonaē matabüxümonaēbe. Pong Isacar, barapong pía pemómoxi susato jíwanapiwi tatsi Nakom ítapa tina saya doce mil pomonaē matabüxümonaēbe. ⁸Pong Zabulón, barapong pía pemómoxi susato jíwanapiwi tatsi Nakom ítapa tina saya doce mil pomonaē matabüxümonaēbe. Pong José, barapong pía pemómoxi susato jíwanapiwi tatsi Nakom ítapa tina saya doce mil pomonaē matabüxümonaēbe. Pong Benjamín, barapong pía pemómoxi susato jíwanapiwi tatsi Nakom ítapa tina saya doce mil pomonaē matabüxümonaēbe.

Meje yábara po diwesi xua pomonaē jumaxátabatsi pemaiña paparuwang

⁹Bapoxonaē ekeicha tang ichamonaē pomonaē bichokono jiwí ayéi. Daxita nakuangpiwi jíwanamonaē, yáwano daxita karepaya tsikimonaēxi jíwanamonaē, yáwano daxita karepaya icha jumexitha pepaēbiwi jíwanamonaē, yáwano daxita karepaya tómarang jíwanamonaē. Daxita barapomonaē umena ichaxota imoxoyo Nakom pía pexeña peekaethopeibiwa, yawa xua Cordero peitabaratha tatsi. Barapomonaē bichokono pin bicheito xua ichamonaē jopa itaküüpaetsi peununaewa. Daxita barapomonaē jumaxátabatsi pemaiña paparuwang. Yáwano barapomonaē pekóbetha kajijinka xua be koichaxu axu. ¹⁰Daxita barapomonaē jumedangweya jeye:

“¡Wanakom pong xua eka pía pexeña peekaethopeibíwatha yáwano Cordero pong unguwa,
naka kapanepa xua jopa waatenewa tsane xua abe waexanaexae!” jei
barapomonaē.

¹¹Bárapo matatsunpiwi matawakaicha yatoxóroto umena xua pítiri jiwí matawakaicha yatoxóroto umeinchi. Yawa pítiri jiwí matawakaicha yatoxóroto umena xua xuang cuatro póyobe xua xuang asüü matawakaicha yatoxóroto umeinchi. Yáwano cuatro póyobe xua xuang asüü matawakaicha yatoxóroto umena xua Nakom pía pexeña peekaethopeibiwa matawakaicha yatoxoyoroto umeinchi. Bapoxonaē bárapo matatsunpiwi írabe taeumendeka bárapo pexeña peekaethopeibiwa peitabaratha. Yáwano Nakom wüünaē jáintatsi. ¹²Bárapo matatsunpiwi jeye:

“¡Bárabü Nakom jüntükoyene weiweina exanéíbatsi pokotsiwa xua beta waexanaewa!

¡Bara ichi tsane!

¡Bárabü daxita jiwi wüünae jainteibina Nakom!

¡Matáütano bárabü Nakom xeineibina pía peyaputáe koyenewa!

¡Matáütano bárabü jiwi jei tsaibi:

‘Nakom maisha pajüntükoyene weiweinang xua amanaya pata tana neyawenaemxae’,

jei tsaibi jiwi!

¡Bárabü daxita jiwi kayábara barükui-iturajineibina!

¡Matáütano bárabü xeineíbinae jiña neayapusúü itorobi koyenewa, xuano xua xeináename jiña neayapusüüwa xua dangweya neexanáe koyene!

¡Baxuang bárabü ataya xeináename!

¡Je bara ichi tsane!” jei bárapo matatsunpiwi.

¹³Bárapo pítiri jiwi jíwana kaein neyáíñaba, nejéi: “¿Jintam barüre pomonae pemaíña paparuwa namaxátaba? ¿Eta wérena pona?” nejéi pítirin. ¹⁴Jumenotang, jangje: “¡Pong pentakaponaem, ápara xam yaputáneme jame!” jang. Barapoxonae nejéi: “Barapomonae ápara pomonae wérena pona ichaxota poxonae po matakeitha jiwi bichokono átene exanéíbatsi. Barapomonae abe pía peéxanae koyenewang tatsi Nakom tajüntemaina, tsipéi barapomonae jumekowúntatsi xua pong tsitüpa barapomonae, pong ‘Cordero’ baráichichi. Barapomonae jüntükoyene wüünae éxanatsi Nakom. Yawa pemaíña paparuwa jumaxátabatsi”, nejéi pítirin.

¹⁵Ekeicha nejéi pítirin:

“Daxota barapomonae umena ichaxota imoxoyo Nakom pía pexeíña peekaethopeibiwa.

Barapomonae tanakuita dubenanáebiya Nakom matakeitha,

yawa merawíthano Nakom pía pin botha tatsi xua pía nakuatheicha tatsi.

Pong xua eka pía pexeíña peekaethopeibíwatha bapong eenekeibina barapomonae,

tsipéi barü pópona.

¹⁶Bapoxonae barapomonae jopa piyaiño,

yawa jopa pía meratsino,

yawa jopa tsakiwichi xométotha xua bichokono jainchi.

¹⁷Bárapo koyene jopa abe exanaeyo barapomonaetha,

tsipéi Cordero Nakom Pexanto tatsi,

pong unguua ichaxota imoxoyo Nakom pía pexeíña peekaethopeibíwatha, bapong yawena xua barapomonae yawénatsi.

Barapong Cordero barapomonae beta yapu-eenaechi,

icha be poxonae pong ovejang peewatsin ichi poxonae pía ovejang

matakápona beta ichaxota penatong mene,

po merang mene xeika,

xua peasüüwa tsane.

Bapoxonae barapomonae Nakom itakuere mene tsewa exanaena xua pewekoyeixae”,

nejéi pítirin.

Meje yábara po diwesi xua siete po pekatsatabiwa xua tabüdukua

8¹Poxonae Cordero tsitsinaxuba siete pokuiyobetha xua bárapo díboro katsátaba, bapoxonae peitaboko moya dukua saya be aiña dapáeyobe. ²Bapoxonae tang siete póyobe matatsunpiwi, pomonae xua umena Nakom peitabaratha tatsi. Bárapo matatsunpiwi daxita barompaya katsíbatsi siete xóyobe xua pokotsiwang pekaobiwang, po pekaobiwang pewüng trompeta. ³Bapoxonae pirapaeyo patopa ichüing matatsunpin. Bárapo matatsunpin kapatopa xua be koroto xua pokotsiwa oro nain koroto. Bárapo oro nain korótotha boka petuxuéi tsapato xua petautsinea Nakom nexa. Barapoxonae bárapo matatsunpin yüütabotsiya tautabota xua ichaxota pokotsiwa be pexaethopaewa, bichokono tuxuéi tsúrukuae. Bárapo matatsunpin ungkua ichaxota pokotsiwa be pexaethopaewa ichaxota tauteiba petuxueiwang, po petuxueiwang xua túxusi exaneiba Nakom nexa. Bapoxonae bárapo matatsunpin kátatsi nawita xua petuxueiwang. Pomonae Nakom peantobewixaetsi poxonae tsipaebeiba Nakom, bárapo jumein yawa múxuna jujuiña Nakom beicha bárapo petuxueiwa xua poxonae tauta. Báraxua xua be pexaethopaewa ichaxota xua tauteiba petuxueiwang, baxua Nakom pía pexeña peekaethopaewa itabaratha tatsi ungkua. ⁴Bárapo petuxuéi túxusi mureiwa matatsunpin pía maxüwetajujuñatsi Nakom péitabara beya yawa athabé múxuna jujuiña pejume, pojume xua jiwi poxonae tsipaebeiba Nakom. ⁵Bapoxonae bárapo matatsunpin bárapo oro nain koroto pita, yawa bárapo korótotha bichokono wüngka éxana isho ítare, po iteretong xua taxua bárapo petúxusi exanathopeibíwatha. Bapoxonae daxita baxua po írathe xuba, bapoxonae yámüxü busi, yawa jerajeréi, yawa ira jijíyatano po kae pin nákuatha tsike.

Meje yábara po diwesi xua trompeta xua pekaobiwang

⁶Bárapo siete póyobe matatsunpiwi daxita barompaya nakuiwüunaeta pía trompetang xua peobinexa.

⁷Pong xua kopiya, bapong oba pía trompeta. Bapoxonae othopeika be ibótixi, pokotsiwa xua bénata ichaxota po emang bichokono ake. Yáwano múxuna isho ítare othopeika. Yawa múxuna othopeika pokotsiwa be pejanang. Daxita baxuang matatsunpin íratha bebaichika. Bapoxonae ichaxota akoibi po írangbe tsitsíniya, kae irang jíwana wetataxua tsíniya aiña írabe jopa daichiyo. Matáütano taxua ichaxota akoibi po únube tsitsíniya, kae unun jíwana wetataxua tsíniya aiña únube jopa daichiyo. Matáütano naepanaewang ichaxota akoibi po wéxuabe tsitsíniya, kae wexua jíwana wetataxua tsíniya aiña wéxuabe jopa daichiyo.

⁸Bapoxonae ekeicha ichüing matatsunpin oba pía trompeta. Bapoxonae pokotsiwa be demuxuwa taxuapona. Bárapo demuxuwa xúbatsi pin marmentha, yáwano pin marmene pejana mene tsanaya. Aiña po pin marménebe jopa daichiyo. ⁹Po pin marmentha pejana tsanaya baxota duwéi wérapa, po duwéi jinompa baxota. Matáütano barakunaein fobaba pókotsi naein bichokono pin naein.

¹⁰Bapoxonae ekeicha icha matatsunpin xua tres póyobetha, bapong pía trompeta oba. Bapoxonae opiteito, poto pinto jopeika itaboko wétsika po írathe tsike, yawa taxuayekapona icha banaxuto ichi. Bárapo pin opiteito jopeika ménetha xua yawa jopeika ichaxota ira büxüpana mene mene natsibotarukua. Saya xua daxita ménetha aibi. Saya poxonae tres po ménebe bara kae ménetha jopeika,

yawa jopeika xua kae ira büxüpana ménetha. Icha ira büxüpana ménethabe jopa daichiyo. ¹¹Bárapo pin opiteito wüngdútatsi “Amargura”, jei, pojume xua “Atsu”, jei. Daxota poxonae jopeika bárapo ménetha mene atsu tsanaya. Pinmonae jiwi wérapa poxoru apa bárapo peátsu mera.

¹²Bapoxonae ekeicha icha matatsunpin xua cuatro pýobetha pía trompeta oba. Bapoxonae jíwana muxunene weábe éxana xometo. Aiña muxunénepabe jopa daichiyo. Yawa jíwana muxunene weábe éxana jomokóichato. Aiña muxunénepabe jopa daichiyo. Yawa jíwana weábe éxana opitéi. Icha opitéi nakópaba. Poxonae akoibi po opiteibe dudubena tsíniya, bapoxonae kae opiteito jíwana weábe eéxana tsíniya. Yawa aiña opitéitobe jopa abe eéxana tsiniyaeyo. Po opitéi abe éxanatsi jopa wüünaeya pentha tsurubenaeyo. Yáwano jomokóichato muxunénepa, pomuxunenepa abe éxanatsi, jopa pentha tsurukuaeyo. Yawa xometo muxunénepa, pomuxunenepa abe éxanatsi, bárapo muxunénepa jopa wüünaeya pentha tsurukuaeyo. Daxota matakeitha tsiwiyo kirikíríka, yawa mérawi bichokono nama.

¹³Bapoxonae pirapaeyo tang matatsunpin pong be kuiyausi xua juiña pupuna dukuanaebiya itabókotha. Bapong jumedangweya jeye: “¡Pai jiwi tsobenáe xua bárapo jiwi abe exanaeinchi pomonae jinompa po íratha deke xua poxonae jume-taena xua poxonae matatsunpiwi obina trompetang, tsipéi akoibi pýobe mata-tsunpiwi kataunxuae jopa obíyobe ánoxuae!” jei bapong, pong be kuyaushi.

9¹Bapoxonae ekeicha icha matatsunpin xua cinco pýobetha oba pía trompeta. Bapoxonae tang pong xua be opiteito jopeika íratha báyatha, xua peitaboko wejopeika. Bapong kátatsi pokoyenetha itakúüpatsi xua pekoibo saranaxubiwa tsane bárapo pin müthü deka xua ira béreka. ²Bapoxonae bapong koibosaranaxuba. Bárapo müthükoiboto tsina be pin tsüxü jujuína, po tsüxü icha pabi koichatsüxü ichi poxonae pin pabi. Bárapo tsüxü po írathe nakitaba éxana yawa xometo nakitaba éxanano. ³Bárapo tsüxü weya pupuna sure, xua daxita írangtha pupuna. Bárapo sure kátatsi, pókotsi koyene icha püto ichi xua poxonae naka kawata. ⁴Bárapo sure itoróbatsi xua jopa abe peexanaewa tsane naepanáewatha xua wéxotha xuwa yawa xua tsika naexi. Yáwano xua jopa abe peexanaewa tsane naeintha. Saya jame itoróbatsi xua abe peexanaewa tsane jíwítha pomonae Nakom jopa itapatinaeyo. ⁵Íchitha jopa kopatsiyo xua jiwi pejutebíwatsi tsainchi. Saya jame kópata xua saya jiwi átene exanaeinchi beya poxonae cinco po xometíyobe tsane. Bárapo peatenewa bichokono átene icha be poxonae ichi xua poxonae ichüng káwatatsi püto.

⁶Bárapo matakeitha, po matakeitha jiwi bichokono átene tsane, kuinaya bewerapabenaena íchitha jopa kuinaya werapabena tsane.

⁷Sure be kawayumonaein nakuiwüünaeta xua penabinexa. Bárapo suremonaein mataina pokotsiwang be tepang be pokotsiwang penaintong xuang pewüng oro nain. Matáüta péitabarang be jiwi itabarang. ⁸Pentanang bichokono antanapipiya be yábüxi, pewanong awanoyéi be neuthü wanong. ⁹Pía pepong tsebokong dubena be penain xuang baxota penayaewatsinexa, po penain pewüng hierro nain matawüng. Pekuarafein busín be kawayu busín poxonae kawayu kakuinaejijinka aiña naein xua kawayu pekaponaenaexi xua penabiwa tsane. ¹⁰Pebosotong be pütong bosotong xua edubena. Pía pebosotongtha itakúüpatsi xua abe peexanaewa jíwítha xua beya poxonae cinco po xométo. ¹¹Bárapo suremonaein xeina pía pentakaponaein, po pentakaponaein peewatsin bárapo pía pin müthü, po müthü írabe müthü taerukuareka. Bárapo matatsunpin pong suremonaein pía pentakaponaein

tatsi hebreo jumewüingtha “Abadón”, jei. Seikaya griego jumewüingtha “Apolión”, jei. Bárapo jumewüingtha jeye: “Pong Pekaewitaxubin daxita”, jei.

¹²Baxua weta xua kopiya abe peexanaewang, íchitha áwiya seika aiña peabe koyenéwabe.

¹³Bapoxonae ekeicha icha matatsunpin xua seis pýobetha oba pía trompeta. Bapoxonae jumetang xua kueikueijeji cuatro po pentétobe weya. Bárapo cuatro po pentétobe umena pemüxübürütha xua be pexaethopaewa xua ichaxota tauteiba petuxueiwa xua túxusi exaneiba Nakom nexa. Báraxua xua be pexaethopaewa daxita matapaecha jumakatsababa oro nain. Báraxua Nakom pía pexeña pekaethopeibiwa itabaratha tatsi unguia. ¹⁴Bárapo matatsunpin xua pong seis pýobetha xua pong pía trompeta xeina bárapo jumetha tsipáebatsi barapong. Bárapo matatsunpin jeichichi: “Bárapo cuatro pýobe matatsunpiwi pomonae maxükübébatzi maxü-ishakapende xua pomonae umena ichaxota po mene pin mene, po mene pewüing Eufrates”, jei. ¹⁵Bapoxonae bárapo cuatro pýobe sorobábatsi, xua jiwi pejutebiwa tsainchi. Icha bicheito jutébatzi. Aiña po bichéitobe jopa jutebichi. Bárapo cuatro pýobe báyatha kuiwüünáetatsi xua po hórathe nexa, yawa xua po matakábithe nexa yawa xua po xométothe nexa yawa po weithe nexa xua poxonae pesorobabíwatsi tsainchi. ¹⁶Jumetang xua pía soldadomonae yábara paeba xua pomonae bichokono ayeixainto bicheitong, jeye: “Bapong doscientos millones xeina po soldadomonae kawáyutha pona”, jei.

¹⁷Xua xuang tang kawayumonaein iche: Pomonae kawáyutha eneika pentakaritha kajjinka penain bokotong, petsobíwangno, yawa pesüüjéiwangno, yawa pedaedaenáewangno. Bárapo kawayumonaein péitabarang be neuthü itabarang. Bárapo kawayumonaein pekoibotong tsina isho iteretong tajujuínatsi xua tsüxü tsobia, yáwano icha tsüxüno xua koicha süüjei. Yáwano icha koicha po tsüxükoi-cha daena. ¹⁸Pin bicheitomonae wérapa tsipéi bárapo kawayumonaein pekoibotong tsina tajujuínatsi isho ítare, petsüxüno xua süüjei, yawa icha tsüxü po koicha bichokono koicha daena. Aiña po bicheito kuntíyobe jopa daichiyo. ¹⁹Bárapo kawayumonaein pekoibotong tajujuínatsi pía peyapusüüiwang tatsi yáwano pebosotong tsínano. Bárapo kawayumonaein bosotong be jomong matanaein. Bárapo jomo matanaeintha jiwi abe exainchi.

²⁰Íchitha ichamonae pomonae jopa werapaeyo bárapo pewerapáewangtha, barapomonae jopa pentsiyo abe pía peéxanae koyenewang. Matáütano jopa barapentsiyo xua antobeya wüünae pejainchiwa kaurimonaetha. Matáütano jopa barapentsiyo po nakom oro nainto nakom, yawa plata nainto nakom, yawa bronze nainto nakom. Yáwano wüünae jainta ibo nakom. Yáwano wüünae jainta nae nakom. Bárapo nakomüngmonae jopa itaküüpaetsi xua penekotsiwa. Yawa jopa itaküüpaetsi xua pejumetaewa. Yawa jopa itaküüpaetsi xua peponaewa. ²¹Matáütano jopa barapentsiyo xua ichamonae pejutebíwatsi. Yáwano matáüta jopa barapentsiyo pokoyene xua mara peexanaewa pía koyenewang tatsi. Yáwano jopa barapentsiyo xua penata-siwaxeinaewa yabüxitha. Matáütano jopa barapentsiyo pekaibi koyenewang.

Meje yábara po diwesi xua matatsunpin kápona tsika dibiriyo

10 ¹Xang pongxaein Juan, bapoxonae ekeicha tang icha matatsunpin pong bichokono peyapusüüing xua peitaboko wétsika pona po írathe tsike. Bárapo matatsunpin tsakinaebowa múxuna dederakiya duneika. Yáwano matatsún

ungkuéikatsi koinwawa. Péitabara bichokono itabara pentha icha xometo ichi poxonae pentha. Yawa pesítobe be ishoto koicha xua bichokono koicha tsofia. ²Tsika dibiriyo pekóbetha kápona xua itüütaduta. Po sito xua pekoxa weya pin marmentha unguwa, yawa po sito petsokona wérena íratha unguwa. ³Bapoxonae bapong jumedangweya wawái be poxonae neuthü jumedangweya fiba. Poxonae bapong wawái, bapoxonae jümetang xua be jurujuréi yámüxü siete pojuméyobe xua paeba. ⁴Poxonae baxua najumeweta xua be jurujuréi yámüxü siete pojuméyobe xua paeba, póntabang xua tatinaenexa xua baxua paeba. Íchitha jümetang pong peitaboko wenetsipaebika. Nejéi: “Moya yawüngxéinare yawa jopa tinaeinde xua bárapo siete juméyobe xua be jurujuréi yámüxü”, nejéi.

⁵Bapoxonae bárapo matatsunpin pong xua po sito pekoxa weya unguwa pin marmentha yawa xua po sito petsokona weya unguwa íratha, bapong namaxüyoicha peitaboko beicha pomaxü xua pekoxa weya. ⁶Matatsunpin pong namaxüyoicha peitaboko beicha pomaxü pekoxa weya, bapong jeye: “Nakom, pong ataya pópona, bapong itaboko fórota. Bapong írano fórota, pin marméneno fórota. Daxita ichawang múxuna fórotano, pokotsiwa itabókotha dubena yawa pokotsiwa írathano xeina yawa pokotsiwa pin marmenéthano jinompa. Barapong peitabaratha tatsi unguwang. Bara xaniwaicha páebang bapong peitabaratha tatsi. Yábara tsiwüünae muxudutang: ‘Ekeicha daxua aibi xua peewatsiwa’, jang”, jei matatsunpin. ⁷Ekeicha bárapo matatsunpin jeye: “Poxonae matakabi patopaena po mataketha icha matatsunpin obina pía trompeta xua siete póyobetha, bapoxonae Nakom nakuijütsina xua daxita wétsina. Nakom wétsina xuang pokotsiwang kaena báyatha Nakom yábara tsiwüünae muxuduta piamonae tátsitha, pomonae Nakom peitobirobi jume pepaebiwi. Barapokotsiwang xua Nakom yábara tsiwüünae muxuduta, baxuang jiwi jopa yaputaeyo poxoru jopa Nakom yatsikaewa tsita itüütsiyo jíwítha”, jei bárapo matatsunpin.

⁸Bárapo jume pong xua itaboko wenetsipaebika, bapong ekeicha netsipaeba, nejéi: “Pónare yawa pire bárapo dibiriyo xua po dibiriyo naitüütarukua. Bárapo dibiriyo pire, po dibiriyo bárapo matatsunpin komaungkuwa. Bárapo matatsunpin pong po sito pekoxa weya unguwa pin marmentha, yawa unguwa íratha po sito petsokona weya”, nejéi. ⁹Bapoxonae matatsunpin beya ponang yawa wüükang bárapo dibiriyo, jangje: “Nekare bárapo dibiriyo”, jang. Nejumenota, jeye: “Moya pire, moya yawa xaema bárapo dibiriyo. Poxonae bárapo dibiriyo xáename nekóibotha katsi jainxeikaena be banto tsane. Íchitha nekotsórotha atsu tsane”, nejéi matatsunpin.

¹⁰Bapoxonae bárapo matatsunpin wekobepitang bárapo dibiriyo yawa xang. Poxonae xang netsikoiboxeika be banto íchitha takotsórotha bichokono atsu tsanaya. ¹¹Bapoxonae netsipaeba, nejéi: “Xam bewa ekeicha yábara tsiwüünae muxudutsiya paebínname pokoyene báyatha Nakom yábara paeba jiwi, xua aiña nakuangpiwi, yawa pomonae barompaya pijume pepaebiwi, yáwano pomonae jiwi itorobiya pía pepa peewatsíwichi”, jei xua pong netsipaeba.

Meje yábara po diwesi xua aiña pongbe, pongbe yatsikaewa Nakom pía petapaebinchibe xua petaxaebe pokotsiwa Nakom éxana

11 ¹Bapoxonae nekata naeto pokotsiwa xua peepakanaübiwa. Yáwano matatsunpin nejéi xua Nakom tapáebatsi: “Asiya úngkuare yáwano pire bárapo náetiyo. Bapoxonae Nakom pin píabo beya pónare, yawa bárapo bo epakanáübare.

Yáwano epakanáübare xua be pexaethopaewa ichaxota tauteiba xua petuxueiwa xua túxusi exaneiba Nakom nexa. Yáwano unúnare pomonae baxota Nakom wüünae jáintatsi, pomonae yatsikaewa Nakom peantobéwichi. ²Íchitha jopa pana epakanáübinde, po pana pesato beya boka ichaxota Nakom pía pepa pin píabo tatsi unguwa. Tshipéi bárapo pana ichamonae kátatsi pomonae penanapaincha jinompaewi xua icha nákuang wérena peponaewi, pomonae Nakom jopa pejumekowüntsíwichi. Barapomonae abe exanaena Nakom pía pexeiña tómara tatsi po tómara xua bárapo kae pin nákuathe xua beya cuarenta y aiña po xométo be yakuinakuiwetsiya jopaena. ³Xang itorobin aiña póyobe, pongbe xua inta yatsikaewa paebínabe xua petaexaebe xua pokotsiwa éxanang. Bapongbe inta yábara tsiwüünae muxudutsiya paebínabe jíwitha xua beya kae mil doscientos sesenta po matakabibetha tsane. Bapongbe jumexatatsinbe pókotsi paparuwa xua áxüng, xua jiwi namaxatabeiba poxoru wekoyéi”, nejéi matatsunpin xua Nakom tapáebatsi.

⁴Bárapo pebinbe pongbe xua inta páebabe, bapongbe ichawa yábara kaunúatsibe. Kaena báyatha Nakom pía peitorobi jume pepaebin, pong pewüng Zacarías yábara tina olivo naebe, yawa yábara tina aiñáwabe pokotsiwa petabüyüübeibiwa pekoichang. Barapokotsíwangbe kaunuta xua pongbe inta páebabe. Bárapo aiña olivo naebe yawa bárapo aiñáwabe xua pekoichang petabüyüübeibiwa umena pentakaponaein peitabaratha tatsi, pong po kae pin nakuepiwi pía Pekanamataxeinaeinchi tatsi. ⁵Icha ichamonae ichichipa xua bapongbe abe peexanáewatsibe bapongbe itakúüpatsibe xua werawéraka peexanáewabe barapomonae pekoiboto tsina icha be pókotsi koyeneya metha ichípabe xua poxonae daxita werawéraka éxanabe poxonae be ishoto tajuínatsibe. Bárapo ishótotha bapongbe omeicha táutabe pía peitafaetabíwichi jíwitha. Barichi werapaena pomonae ichichipa xua bapongbe abe peexanáewatsibe. ⁶Barapongbe xéinabe pía peitorobi koyenewa xua itakúüpatsibe peitaboko akatsiwa tsánebe xua jopa ema peruneikaewa tsane. Baxua itakúüpatsibe xua éxanabe poxonae bapongbe po matakábitha kataunxuae Nakom tapaebi dukuanaebiyatsibe. Matáüta bapongbe pía peitorobi koyene xéinabe xua mératha ekeicha pejana tsanaya éxanabe. Matáütano bapongbe itakúüpatsibe xua éxanabe poxi xua abe éxana íratha. Aiña koyenein bapongbe éxanabe xua xuang be pókotsi koyeneya ichichípabe xua peexanáewabe.

⁷Poxonae bapongbe nakuiwetsínabe xua tapaeba dukuanaebíyabe xua Nakom tapaeba dukuanaebiyatsibe, bapoxonae juinaena po müthü pin müthü tsina pong ayéi pong bichokono abe peexanaein. Barapongbe be xua bútsibe natsikotainchi yawa amanayabínchibe xua tüpa peexanaenéxatsibe. ⁸Petüpaeinbe saya pesátotha bokáenabe tómara námtotha, po pepa tómaratha ichaxota matha náetotha tüpa exanadútatsi pong jiwi Pekanamataxeinaein xua bapongbe pía Pekanamataxeináeinchibe tatsi. Jiwi bárapo pepa tómara yábara jeichiya jeye: “Bárapo Jerusalén tomarapiwi ápara be ‘Sodoma tomarapiwi’, jei, yawa barichi be ‘Egipto nakua-piwi’, jei”, jei jiwi. Jiwi bárapo Jerusalén tomarapiwi yábara kaunutsiya paeba tshipéi kaena báyatha Sodoma tomarapiwi abe peexanaewimonae. Yawa írú Egipto nakuamonaepiwi abe peexanaewimonae, icha bárapo pepa tomaramonae ichi xua Jerusalén tómara xua abe éxana. ⁹Daxita pomonae tomarapiwi jíwana, írúno tsikimonaeyo jíwana, írúno pomonae barompaya icha jumexitha pekueikueijeji jiwi jíwana, írúno daxita pomonae nakuangpiwi jíwana, daxita bárapo jiwimonae taeumenaena bárapo petüpaeinbe. Bapongbe petüpaeinbe bokáenabe akoibi

po matakábibe yawa xua ekeicha bara káetono. Daxita barapomonae pomonae taeumena, jopa kopatsí tsane xua ichamonae bara petüpaeinbe pemüthüthüxubiwa tsáinchibe. ¹⁰Pomonae xua jinompaena po írathe jüntemiya jinompaena xua petüpaexaebe bapongbe. Daxota daxita barapomonae jüntükoyene weiweinaena, yáwano daxota barapomonae nantiya nakatsibina pokotsiwang amanaya penakatsibiwang. Barapomonae baxua exanaena tsipéi ajumeitafáetabi tsane pokotsiwa páebabe Nakom nexa, pongbe Nakom peitorobi jume pepaebinbe.

¹¹Íchitha poxonae yapukaewínaba akoibi po matakábibe yawa xua ekeicha bara kaeto bokáenabe, bapoxonae ekeicha Nakom asüü exanáenabe. Bapoxonae asiya unguáenabe. Daxita pomonae xua poxonae bapongbe taeinchibe, bichokono junuwina. ¹²Bapoxonae bapongbe jumetaénabe xua pong itaboko wétsika jumedangweya baraunchi tsáinchibe, jei tsáinchibe: “¡Bara wepajuinamebe!” jei tsáinchibe. Bapoxonae bapongbe itaboko beicha juiñáenabe tsakinaebówatha yawa putaeumenáeinchibe pía peaitafaetabí jíwichi. ¹³Barapoxonae kaena ira jijiyatsina bichokono. Ichaxota diez po bongbe uumena tsíniya kae bong jíwana óthopa jujuinkaena, nueve po bongbe tsíniya jopa daichi tsane. Siete mil po pebiwi matabüxümonaebe werapaena ira pejijiyatsixae tsane. Pomonae jopa wérapae tsane bichokono junuwina daxota Nakom wüünae jainchinchí, po Nakom itaboko beekiya.

¹⁴Báyatha nakuiweta xua aiña xóyobe xua daxita jiwi átene tsane bichokono. Íchitha imoxoyo ekeicha methaunxuae tsane ichawa pokotsiwa akoibi pokuíyobe nexa pokotsiwa xua jiwi bichokono átene tsane.

Meje yábara po díwesi poxonae xua matatsunpin xua pong siete póyobetha oba pía trompeta

¹⁵Bárapo matatsunpin xua pong siete póyobetha pía trompeta oba. Bapoxonae pejume itaboko wétsika jumedangweya jeye:

“Pokoyene xua jiwi itorobiya peewatsíwatsi bárapo kae pin nákuathe, ánoxuae bárapo peitorobi koyenewa Nakom pong Wanaka namataxeinaein piáwa írúno Mesías pong Nakom pía peitorobarekaein, bapong piáwa tatsi.

Bapongbe daxita jiwi itorobiya ewatsinchi bárapo kae pin nákuathe xua ataya tsane”,

jei pomonae xua itabókotha jumedangweya wawái.

¹⁶Bapoxonae tang bárapo pítiri jiwi, po pítiri jiwi veinticuatro póyobe. Bárapo pítiri jiwi ena pía pexeña peenaethopeibíwatha, Nakom peitabaratha tatsi. Bárapo pítiri jiwi pentabokototha írabe taeumendeka xua Nakom wüünae pejainchinéxatsi. ¹⁷Bárapo pítiri jiwi jeye Nakomtha:

“Xam pata Nakom,
pongxaem jiwi Nekanamataxeinaem pajüntükoyene weiweinang xua pokotsiwa painta neexanaexae.

Xam bárapo pata Nakom,
pong neayapusúü itorobi koyenéwangtha neexanaein.

Xam pong ánoxuae ataya poponeibíname yawa xua kaena báyatha ataya poponeibameno,
yáwano xua bexa tsane ataya poponeibinameno.

Tsipéi ánoxuae po matakeithe nama tamrópata pítabame jiña neayapusúü itorobi koyenewa xua tsita itúútame xua poxonae daxita karepaya nakuangpiwi itorobíname.

¹⁸Daxita nakuangpiwi kakaseba,
 íchitha ánoxuae matakabi patopa,
 po matakeitha bichokono anaya átene exanáename barapomonaе abe peexanaexae.
 Yáwano bárapo matakeitha daxita jiwi yábara paebíname xua penatsikuentsiwa pomonaе xua wüünae peexanaewi irü pomonaе xua abe peexanaewi.
 Daxita barapomonaе báyatha wérapa.
 Bárapo matakeitha irü pomonaе xua kata nakuita,
 pomonaе jiña neitorobi jume pepaebiwi,
 irü pomonaе xua pejüntükoyene wüünaewi,
 barapomonaе matabüxümonaеbe katsibíname pokotsiwang xua báyatha júntüna jébame xua nematomatsiwang.
 Barichi katsibíname pomonaetha,
 pomonaе jopa judiomonaе naexanaeyo pomonaе bekein bara ichamonaе saya pekuipawimonaе,
 matáütano bekein bara ichamonaе peaiñakuí jiwimonaе.
 Íchitha xam saya bara katsita najüpa.
 Matáütano bárapo matakeitha daxita omeicha átene exanáename pomonaе abe peexanaewi bárapo kae pin nákuathe”,
 jei bárapo pítiri jiwi.

¹⁹Bapoxonaе Nakom pin píabo tatsi nakoibo saranaxuba xua itabokotheicha. Bárapo Nakom pin piabotha jiwi tane pokotsiwa xua ichawa yantaxatatababota xua be caja. Bárapo cájatha boka Nakom petináe diwesi, pokotsiwa xua Nakom yábara tsiwüünae muxuduta pomonaetha, pomonaе pía petanakuichiwichi pokotsiwa bexa Nakom taexanaena xua barapomonaе taexanaeinchi. Bapoxonaе yamü-xübusi xua be jurujuréi yawa jerajeréi. Matáütano ira jijíyata, yáwano nawita othopeika xua dedérawa, pokotsiwang bénata poxonae po emang ichaxota bichokono ake.

**Meje yábara po diwesi xua petsiriwa yawa pong piño,
 pong be jomowabi, bapong pong be Joyoiña**

12¹Bapoxonaе itabókotha naitüüta xua pokotsiwa bexa exanaena po kae pin nákuathe tsike. Tang petsiriwa powa namaxátata po paparuwa bichokono wüünae, icha be xometo ichi poxonae pentha. Bapowa nataxuyüütungkua jomokóichatotha. Barapowa mataina tepa, po tépatha doce xóyobe xeina opitéi. ²Bapowa yaporowajina pexuyo. Bapowa wawái tsipéi átene, poxoru pexuyo nakatsiwa imoxoyo. ³Bapoxonaе itabókotha ekeicha naitüüta ichawa. Tang pong piño, pong be jomowabi, pong be Joyoiña. Bapong pong be Joyoiña bichokono tsobia yawa siete po pentasípabe xeina yawa diez po pentétobe xeina. Daxita karepaya pentasípangha mataina tepang. ⁴Pebosótotha ira béreka bebaireka opitéi. Ichaxota akoibi po opitéi dudubena tsíniya kae opitéi jíwanang abe eéxana tsíniya. Barapong pong be Joyoiña ewatungkua, yábüyo ewatúngkuatsi, powa xua

imoxoyo nakatsiwina pexuyo. Bapong pong be Joyoiña ichichipa xane pexuyo poxonae nakatsiwinae. ⁵Bárapo petsiriwa tanakatsíwatsi pexuyo pebinwüito. Bárapo pexuyo, po pexuyo poxonae wíchaba itorobiya éwata pomonae jinompa po kae pin írathe xua daxita karepaya nákuangtha. Bapong dangweya beta éwata barapomonae icha pong oveja peewatsin ichi xua poxonae dangweya beta éwata ovejang. Bapong éxana baxua naewa xua be naebarüpató. Poxonae bárapo pexuyo nakatsiwa, pítatsi yawa kapoinchi Nakom pía pexeiña peekaethopáewatha beicha. ⁶Bapoxonae bárapo petsiriwa naetsíriwa ira xuépana susato tsúrukuae nakua beya. Baxotiya Nakom tsiwüünaeta xua pía ira nexa yawa xua bapowa pexaewa peapatsinéxatsi mil doscientos sesenta matakabibetha.

⁷Bapoxonae itabókotha matatsunpiwi naba. Matatsunpin pong pewüing Miguel, bapong matakápona pía matatsunpiwi. Írürü pong be Joyoiña, bapong pía matatsunpiwi matakápona. Daxita bárapo bicheito nantiya naba. ⁸Íchitha pong be Joyoiña irü pía matatsunpiwi tatsi jopa kuijüpaetsi xua Miguel peamanayabaxubíwatsi yawa xua pía matatsunpiwi tatsithano. Daxota pong be Joyoiña yawa pía matatsunpiwi tátsino jopa kuijüpaetsi xua peitabókotha pejinompaewa tsipéi amanayabapéntatsi. ⁹Bapong pong be Joyoiña yawa pía matatsunpiwi tátsino itawetsíkatsi po írathe tsike. Bapong pong be Joyoiña pong kaena báyatha yábara páebatsi xua jeye: “Bapong ápara jomo”, jei. Bapong kaurimonae pía pentakaponaein tatsi xua icha wüing pewüing Satanás. Bapong pong jiwi pemuxujaiñabeibin pomonaetha, pomonae jinompa daxita po kae pin írathe tsike.

¹⁰Bapoxonae itabókotha pejume jumetang pong xua jumedangweya wawái, jeye: “Ánoxuae Nakom naka kapanepa éxana pía peayapusüü itorobi koyenéwatha xua pong be Joyoiña jopa wanaka namataxeinaenexa. Yáwano ánoxuae Wanakom itorobiya éwata daxita karepaya nákuangtha pomonae jinompa po kae pin írathe tsike. Yáwano ánoxuae Nakom Mesías kátatsi pía peayapusüü itorobi koyenewa pong Nakom pía peitorobin tatsin. Daxita bárapo koyenein ánoxuae pata, tsipéi pong be Joyoiña itawetsíkatsi po kae pin írathe tsike. Pong Nakom itawétsika, bapong wajiwimonaetha, pomonae jumekowünta Nakom, abeya muxujaiñabéibatsi merawitha yawa matakéithano xua Nakom peitütha tatsi.

¹¹Wajiwimonae pomonae irü xua pejumekowüntsiwi Nakom, barapomonae amanáyaba bapongtha pejumekowüntsixae xua Mesías tsitüpa barapomonae. Bapong pong Cordero, xua pong oveja pebto penüing. Yáwano amanáyaba bapomonae tsipéi Mesías yábara paeba dubenanaebíyatsi pokotsiwa bapong barapomonae taexainchi. Barapomonae amanáyaba, tsipéi najéi: ‘Bekein bapong pong be Joyoiña ichichipa naka juteba íchitha jopa junuwichi xua werapaeinchi.

Áwiya jumekowünta dubenanaebiyaeinchi Nakom', najéi.

¹²¡Pajüntükoyene weiwéinare pomonae itabókotha paiña nejinompaexae!
¡Dáichitha tsobenáe pomonae jinompa po kae pin nákuathe deke,
yáwano xua xuang pin marmentha jinompa,
tsipéi Satanás bara béreka bichokono anaepanaya patopareka!
Bapong Satanás yaputane xua jopa báyatha tsaibi tsane poxonae abe
exaneibina po kae pin nákuathe deke", jei.

¹³Poxonae barapong pong be Joyoiña, pong Satanás itawetsíkatsi po kae pin írathe tsike, bapoxonae yábüyo baráinatsi, powa xua báyatha pexuyo éxana pebinwüüto. ¹⁴Íchitha Nakom, barapowa pekuárafe kátatsi, aiña kuárafebe xua kuiyausi piáwang. Daxota Nakom kata xua bapowa tajü beya pepupunaenexa ichaxota po ira beya xua Nakom báyatha tsiwüünaeta, xua pepupunaenexa pong be Joyoiña weya. Barapowa pupuna bárapo ira xuépana susato tsúrukuae nakua beya. Nakom ápata bapówatha pexaewa tres po weibetha yawa xua seis po xometobetha. ¹⁵Bapong pong be Joyoiña pekoiboto tsina mene sutaba xua peawüübonexa xua bapowa pemonoxubinexa tsainchi awüübotha. ¹⁶Íchitha ira bapowa yaweinchi. Bárapo ira, náira yetaxuba yawa mene apaxoreka, po mene báyatha sutaba bapong pong be Joyoiña. ¹⁷Bapoxonae bapong pong be Joyoiña bichokono anáepana bapówatha. Daxota bapong naiña pona bapowa piamonae tatsi beya tatsi xua penabinexa. Bapong ba xua bütsi pomonae jumekowünta Nakom penajumekaitorobí diwesi xuano xua paeba dubenanáebiya Jesús pejume diwesi. ¹⁸Bapoxonae bapong pong be Joyoiña, pong be jomowabi, pin marmene ítapa taetabotha ungkua xua pewabinexa ichamonae xua peyawenaenéxatsi.

**Meje yábara po diwesi pong ayéi, pong be Koréi, írüno
xua ichüng pong ayéi, pong be Metsamétsawa**

13 ¹Bapoxonae ichüng tang pong pin marmene juina pong ayéi, pong be Koréi. Bapong xeina siete po pentasípabe yawa diez po pentétobe. Daxita karepaya pentetongtha mataina tepang. Daxita karepaya pentasípangtha tinaduba pewüngxi, po wüngxi xua Nakom abe yábara páebatsi. ²Barapong pong be Koréi be neuthü xua yakikíbiya. Petaxu be tsong taxu. Pekoiboto be neuthü koiboto. Pong petsobiang, bapong pong be Joyoiña kata pía peayapusüü koyenewa, pong be Koréi kátatsi. Yáwano múxuna kátatsi pía pexeiña peekaethopaewa. Yáwano kátatsi pía peayapusüü itorobi koyenewa. ³Kae matasípatha xua pong be Koréi matasipa, wang dukua be poxonae xua pókotsin tüpaena. Íchitha bárapo matasipa naawangxaebi éxana. Daxita bárapo írathe nakuangpiwi nabenaeka, tsipéi naawangxaebi éxana bárapo matasipa. Daxota po írathe nakuangthepiwi jumekowünta bapong, pong be Koréi jumekowüntatsi. ⁴Barapong pong be Joyoiña wüünae jáintatsi, jiwi wüünae jainta, tsipéi barapong kata pía peayapusüü itorobi koyenewa pongtha pong be Koréi. Barichi pong be Koréi wüünae jáintatsi, jiwi wüünae jainta. Jiwi jeye: "Maisha barapong, pong be Koréi aiñakuí, peayapusüü itorobi koyenewa pexeinaein. Dapong aibi pong pekuijüpáewatsi xua bapong peamanayabixubíwatsi", jei jiwi.

⁵Yáwano barapong, pong be Koréi kópatatsi xua Nakom abe peyábara paebinéxatsi. Yáwano barapong, pong be Koréi kópatatsi xua jíwitha peitorobinexa cuarenta y aiña po xometobetha. ⁶Bapoxonae barapong, pong be Koréi bara baxua

éxana, xua kópata tsi. Bapong Nakom abe yábara páebatsi. Matáütano Nakom pin píabo tatsi abe yábara páebatsi. Matáütano Nakom piamonae tatsi, pomonae jinompa itabókotha abe yábara páebatsi. ⁷Yáwano barapong, pong be Koréi kópata tsi, xua bena xua beinchi pomonae Nakom pejumekowüntsíwichi, beya xua poxonae barapomonae amanayabapentsinchi. Yáwano barapong, pong be Koréi kátatsi peitorobi koyenewa, xua daxita jiwi peitorobíwatsi xua pomonae daxita karepaya tsikimonaexi peitorobíwatsi. Matáütano kátatsi xua daxita karepaya tomarangpiwi peitorobíwatsi. Matáütano kátatsi xua daxita karepaya pomonae icha jumeintha pekueikueijeijiwi peitorobíwatsi. Matáütano kátatsi xua daxita karepaya nakuangpiwi peitorobíwatsi. ⁸Barapong, pong be Koréi wüünae jáintatsi xua daxita karepaya po kae pin írathe nakuangpiwi wüünae jainta. Barapomonae jopa wüingdubenaeyo diborotha, po díboro pong Cordero xeina pekóbetha, pong Mesías pong náetotha tüpa. Bárapo diborotha Nakom wüingduba pejumekowüntsíwichi kaena báyatha poxonae Nakom aena fórota nakua. Pomonae wüingdubena bárapo diborotha jopa wewerakaeyo.

⁹Paxam pomonae paiña nejumekowüntsi jiwi pam. Icha pamuxudubéname, moya pajumenaitáware xua pokotsiwa Nakom pía Pejumopetünaxü tatsi paka tsipaeba xua meje:

¹⁰“Pomonae xua ichüing wáetabatsi xua átene peexanaenéxatsi barapomonae xuya bara teikaeinchi ichamonae átene peexanaenéxatsi tsane.
Pong xua kúsitha namawainta xua ichüing bexúbatsi,
bapong xuya kúsitha bexubinchi”,
paka jei Nakom pía Pejumopetünaxü tatsi.

Daxota pomonae pejumekowüntsiwi Nakom bewa saya jüntükoyene dangweya jinompáe xua xuya jopa taéxanae tsane ichamonaetha xua bekein abe taexanaeinchi ichamonae. Yáwano bewa jumekowünta dubenanaebiyaena Nakomtha.

¹¹Bapoxonae tang ichüing pong ayéi pong be Metsamétsawa. Bapong ira wejuina. Yawa mate dukua icha Cordero ichi pong oveja pebto penüing. Dáichitha poxonae kueikueijeji, be poxonae kueikueijeji pong be Joyoiña. ¹²Bapong xeina peyapusúü itorobi koyenewa, po peyapusúü itorobi koyenewa xeina pong be Koréi. Bapong pong be Metsamétsawa, daxita jiwi itoróbatsi xua wüünae pejainchinéxatsi pong be Koréi, pong piakoutha nantasipa awangxaeibi éxana. ¹³Yáwano pong be Metsamétsawa éxana nawita xua pexeña petsita-itüütsi koyenewa. Yáwano bapong éxana xua itorobika itaboko wétsika xua pokotsiwa be ishoto xua po kae pin íratha tsike xua jiwi petaenexa. ¹⁴Barapong pong be Metsamétsawa petsita-itüütsi koyenewa éxana pong be Koréi peitabaratha tatsi. Bárapo petsita-itüütsi koyenéwangtha bapong muxujáinbaba xua muxujáinbatsi pomonae jinompa daxita karepaya nákuangtha xua bárapo kae pin nákuathe. Bapong pong be Metsamétsawa itoroba jíwitha xua peexanaenexa ibo nakom xua kanaxóbiya éxana pong be Koréi, pong xua xeina pentasípatha xua dejona wang, pong bekein wang dukua, íchitha jopa tüpaeyo. ¹⁵Barapong pong be Metsamétsawa peitorobi koyene kátatsi xua asüü éxana bárapo ibo nakom pong be Koréi. Poxonae bárapo ibo nakom asüü tsane, kueikueijeji tsane yawa jutebina daxita pomonae jopa wüünae jainchichi. ¹⁶Yáwano bapong itoroba ichüingtha xua daxita kobejumatinaeinchi po kobein pekoxa weya, yawa xua ichakuitha itapatinaeinchi, xua pomonae jopa aiñakuiyiyo, írürü pomonae xua peaiñakuí jiwi, irü pomonae xua kopei pexeinae jiwi,

irü pomonae peakopeíbí jíwino, yáwano pomonae piakoutha penata exanáe jiwi, írúno pomonae xua pebusikuitaetaeyebéwichi. ¹⁷Dapong aibi pong itakúüpa-tsi xua piáwang kómoka yawa xua kaenaeta piáwang icha jopa xeinaeyo bárapo pekobejumatinaewa. Bárapo pekatinaewa pong be Koréi pewüing tatsi, ichakuitha bárapo pekatinaewa saya número xua pewüing tatsi pía número tatsi.

¹⁸Beta panantaxéinare xua yábara paiña neyaputaenexa baxuang. Pong xua yaputane baxua bü bapong yábara nantaxeina xua pong be Koréi pía número tatsi. Bárapo número jüpa xua pebin pewüing. Barapong pong be Koréi pía número tatsi baxue: seiscientos sesenta y seis.

Meje yábara po diwesi xua pomonae naxüna 144,000 po bicheitomonae matabüxübe

14 ¹Bapoxonae tang Cordero xua oveja pebto penüing xua unguua demuxúwatha, po demuxuwa pewüing Sión. Bárapo Cordero barü unguua ciento cuarenta y cuatro mil po bicheitomonae matabüxübe. Bárapo ciento cuarenta y cuatro mil po bicheitomonae matabüxübe daxita karepaya itapatínatsi bárapo Cordero pía wüing tatsi, yáwano xua Paxa tatsi pía wüing tátsino. ²Bapoxonae jumetang pejume itaboko wétsika. Bárapo pejume bichokono jumedangwéi be poxonae xua aiña pin menein busín xua poxonae tajü wemene othopeika. Yáwano be poxonae xua yámüxü nameta, yawa be poxonae aiña busín xua pinmonae tangbaba. ³Barapomonae, pomonae tangbaba pexeña wei, naxüna Nakom pía pexeña peekaethopaewa itabaratha tatsi, xuano xua bárapo cuatro póyobe peitabaratha tatsi xua xuang asüü, yáwano xua pítiri jiwi pía peitabaratha tatsi. Ichamonae jopa itaküüpaetsi bárapo wei xua peyaputaewa xua po wei naxüna barapomonae. Saya jame barapomonae, pomonae ciento cuarenta y cuatro mil po bicheitomonae matabüxübe yaputane bárapo wei xua pomonae po irathepiwi jíwanamonae, pomonae býatha Cordero kapanenebiya abe pía peexanaewang weya poxonae tsitüpa barapomonae. ⁴Barapomonae jopa nataxobiyo xua penasikui-exanaewa xua yabüxitha pejeña enaexae. Yáwano barapomonae exaneiba daxita xua pokotsiwang Cordero itoroba xua poxonae barapomonae napunaponeiba ichaxota Cordero poneiba. Barapomonae kapanenebíyatsi, Nakom kapanenebiya xua daxita karepaya jiwi jíwanamonae tatsi xua bapomonae pekana exanaenéxatsi pomonae bichokono pepa pejüntükoyene wüünaewi Nakomtha írúno Cordérotha pomonae xua kopiya, pomonae xua Nakom pejumekowüntsíwichi. ⁵Barapomonae jopa penaerabiwi tsi-péi barapomonae bichokono pepa pejüntükoyene wüünae jiwi, Nakom peitabaratha tatsi. Barapomonae jopa xeinaeyo xua penatsikuentsiwa Nakom peitabaratha tatsi xua abe peexanaexae.

Meje yábara po diwesi xua kueikueijeji akoibi póyobe matatsunpiwi

⁶Bapoxonae tang ichüing matatsunpin xua pupuna itabókotha. Bárapo matatsunpin kápána pexeña jume diwesi po diwesi xua ataya tsiteka, po diwesi xua jiwi pekanenebíwatsi abe pía peexanaewang weya. Bárapo diwesi daxita karepayang jiwi nexa: pomonae daxita nakuangmonaepiwi nexa, írúno pomonae tsikimonaexipiwi nexa, írúno pomonae barompaya icha jumein pekueikueijejiwi nexa, írürü daxita tomarangpiwi néxano. ⁷Barapong jumedangweya paeba, jeye: “Pakunuwiya jinómpare Nakom xua beta paiña nejumekowüntsiwa. Yáwano Nakom wüünae pajainde.

Tsipéi ánoxuae nama bárapo matakabi patopa po mataketha Nakom yábara pae-bina jiwi xua penatsikuentsiwa xua abe peexanaexae. Wüünae pajainde pong éxana itaboko, xuano xua éxana pin marmene, yawa éxana ira büxüpana mene”, jei barapong pong jumedangweya paeba.

⁸Ichüing matatsunpin kotakaya patopa, bapong jeye: “¡Báyatha Babilonia tomarapiwi wetaxotsi po tómara pepa tómara, tsipéi bárapo tomarapiwi bichokono abe éxana! ¡Barapomonaе kuiduba ichamonaе xua ichamonaе abe peéxanae koyene peexanaenexa xua penasikui-exanaewa tsane yabüxitha, xua irü pebíwitha!” jei matatsunpin.

⁹Bapoxonaе ichüing matatsunpin patopa, bapong jumedangweya jeye: “Icha ichüing wüünae jainta ibo Koréi nakomtha xua saya kanaxoba yawa icha itapatínatsi, yawa ichakuitha xua icha kobejumatfnatsi, bapoxonaе Nakom bichokono kasebina bapong xua bapong kasebinchi. ¹⁰Bapoxonaе Nakom bichokono abe exanaena bapong. Baxua Nakom exanaena xua báyatha bapong peyábara nakuiwüünaetsixaetsi. Jopa juniya exanáе tsane poxoru bichokono Nakom yábara anáepana. Barapong bichokono átene tsane poxonaе Nakom tautsina barapong ishótotha, yawa xua po tsüxü, tsüxüdaena, po tsüxü pewüing azufre matawüing. Nakom baxua exanaena pía matatsunpiwi peitabaratha tatsi yawa Cordero peitabaratha tatsi. ¹¹Po ishótotha Nakom tautsina bapong, bárapo ishotsüxü athabé jujuneibiyaena ataya. Bárapo petautsiwa jopa itaküüpáе tsainchi xua pewetsiwa matakéithano, yawa merawíthano. Bárapo ishótotha tautinchi pomonaе pong be Koréi wüünae jáintatsi xuano xua bárapo ibo Koréi nakom wüünae jáintatsi, yáwano xua barapomonaе itapatínatsi bárapo Koréi pía wüingtha tatsi”, jei matatsunpin.

¹²Pomonaе éxana dubenanáеbiya pokoyene Nakom itoroba pía peitorobi koyenéwangtha, yáwano xua Jesús beta jumekowünta dubenanaebíyatsi, barapomonaе ápara xaniwaicha Nakom piamonaе tatsi. Barapomonaе tsita itapeñaxeina xua Nakom piamonaetsi tsipéi barapomonaе bepíjawa jopa aitakonaeyo xua peewatsiwa pokotsiwa bexa Nakom exanaena pomonaetha, pomonaе abe éxana Nakom piamonaetha tatsi.

¹³Bapoxonaе jumetang pejume xua peitaboko wenebaráichika. Nejéi: “Baxua tínare: ‘Bü bara jüntükoyene weiweina pomonaе jumekowüntsiya werapaena Jesustha, pong jiwi Pekanamataxeinaein’, jei”, nejéi.

Nakom pía Pejumopetünaxü tatsi jeye: “Aa baxua. Yawa wétsina pía penakui-chiwang po penakuichiwang Nakom taexainchi yawa nafifina ewatsina Nakom pía nakuatheicha. Pokoyene xua barapomonaе jüntükoyene wüünae dubenanáеbiya, yawa pokoyene xua barapomonaе beta taéxana dubenanáеbiya xua ichamonaе taéxana dubenanaebíyatsi, bárapo jüntükoyene barapomonaе yawa ponaena Nakom pía nakua beicha tatsi”, jei Nakom pía Pejumopetünaxü tatsi.

Meje yábara po diwesi xua matatsunpiwi kusin kaukuboba po kae pin írathe tsike

¹⁴Bapoxonaе ekeicha tang tsakinaebowa xua ñápana. Bárapo tsakinaebo júmatha eka pongxae itaboko wétsika pona, pongxae Nakom peitapetsinxae. Bapong mataina tepa, yawa komaeka pokotsiwa be kusi xua xuiyói. ¹⁵Bapoxonaе icha matatsunpin Nakom pin píabo weya pona. Bapong jumedangweya wawái pong tsakinaebo júmatha eka beya, jeye: “¡Bárapo kusi kaukubóbare yawa jore pokotsiwa

xua naweta tsipéi bárapo matakabi patopa, po mataketha naweta po kae pin írathe deke!” jei matatsunpin. ¹⁶Bapoxonae pong tsakinaebówatha eka yawa xua kusi komaeka, bárapo kusi kaukuboba po kae pin írathe, daxita kanakuiwetsiya éxana.

¹⁷Bapoxonae ekeicha ichüng matatsunpin Nakom pin píabo weya pona xua itaboko weya. Bárapo matatsunpin kusi kápona, po wato bichokono xuiyói. ¹⁸Bapoxonae ekeicha icha matatsunpin pokotsiwa be pexaethopaewa weya pona ichaxota duwéi tauteiba xua túxusi exaneiba Nakom nexa. Bárapo matatsunpin kanamataxeina xua tauta pekana exanaewa. Bárapo matatsunpin irü kusi xeina, po wato xuiyói. Yawa bapong jumedangweya wawái icha matatsunpin beya pong irü piawato xeina kusi. Bapong jeye: “¡Bárapo kusi kaukubóbare yawa nore uva péparun xua po kae pin írathe deke dubena tsipéi báyatha naweta!” jei bárapo matatsunpin. ¹⁹Néxata barapoxonae bárapo matatsunpin kusi kaukuboba yawa nota uva péparun. Yawa bárapo uva péparun bebaireka pin pekakubifétotha xua pemene yukaenexa bárapo uvakuéi. Icha jintong ichi xua bichokono dangweya kuba uvakuéi, bara jüta ichi Nakom jíwitha, xua poxonae bichokono átene exanaena jíwitha xua abe peexanaexae jiwí. ²⁰Bárapo uvakuéi tómara juma beya kuba. Bárapo pekakubifeto wétsina jujuina petsobia mera, be pokotsiwa pejana, beya xua kawayu ponxo jayéichatsi yawa xua íratha iya xua tajü beya xua trescientos po kilómetrobe. Icha jintong ichi uvakuéi xua tómara juma beya kuba Nakom jíwitha barichi tsane bichokono átene exanaena pomonaetha, pomonae abe peexanáewitha, beya poxonae pejanang tajü ayéi tsóponae tsane.

Meje yábara po diwesi xua matatsunpiwi kápona siete pokoyenéwabe xua pokoyenewa peabe kuikoyenewa

15 ¹Bapoxonae ekeicha tang peitabókotha icha pin petsita-itüütsi koyenewa xua nebenaeka. Tang siete póyobe matatsunpiwi yawa xua kajijinka siete pokuikoyenéwabe xua pokoyenewa peabe koyenewang. Poxonae weta xua éxana bárapo matatsunpiwi bárapo siete po peabe kuikoyenéwabetha bapoxonae Nakom nakuiweta xua poxonae anaya bichokono átene éxana jiwí abe peexanaexae.

²Bapoxonae tang pokotsiwa be pin marmene, po pin marmene kopiya tang. Bárapo pin marmene icha be bosibü muxupawa ichi xua penthiya. Yawa tang xua múxuna xuba pokotsiwa be ishoto xua itadudúbiya. Yawa tang pomonae amanáyaba xua pong be Koréi amanáyabatsi. Barapomonae jopa wüünae jainchiyo pong be Koréi yawa pong be ibo Koréi nakom, yáwano jopa itapatinaetsi pong be Koréi pewüingtha. Barapomonae imoxoyo kakuita umena bárapo pin marmene. Yáwano barapomonae kaumena arpa matawüing xua pokotsiwa pekatanbabiwang xua Nakom katsiba. ³Barapomonae naxüna Moisés pía wei tatsi, pong Nakom pía penakuichiwa tatsi taexainchi. Yáwano barapomonae naxüna Cordero pía wei tatsi, bárapo naxobe weibe jeye:

“Pata Nakom, pong jiwí Nekanamataxeinaein,
daxita xam éxaname bichokono peaiñakuí koyenewa yáwano bichokono wüünae.

Xam pong, daxita neayapusüü itorobiya koyenewang xéiname.

Jiña koyenewang bara pexaiñeiwang poxoru beta éxaname.

Xam itorobiya neéwatsin daxita karepaya nakuangpiwi.

⁴Xam pong jiwí Nekanamataxeinaein.

Daxita jiwi junuwiya kabarü kui-iturajinaena.

Yáwano daxita jiwi wüünae kajainchina tsipéi saya meisha xam nejüntükoyene xeikaem.

Daxita karepaya nakuangpiwi patsina xua wüünae nekajainchinexa tsipéi barapomonaе báyatha tane pokotsiwa xua betiya wüünaeya éxaname”, jei barapomonaе.

⁵Bapoxonaе ekeicha tang peitabókotha Nakom pin píabo. Po boyotútutha ungkua bárapo Nakom pin piabotha tatsi po bóyotha ichaxota Nakom pópona, bárapo tutu nakoibo saranaxuba. ⁶Bárapo tutu weya matatsunpiwi pona pomonaе xua siete póyobe yawa kápona siete pokoyenéwabe xua peabe kuikoyenewang. Yáwano namaxátaba paparuwang, po paparuwang bichokono ínapana yáwano daedaena. Yawa na-epapaba pokotsiwang be koreiña bokotong xua beya jüntákari jayabéinatsi. ⁷Bapoxonaе tang kaein, xua jíwana bárapo cuatro póyobe xua xuang asiüi. Bapong bárapo siete póyobe matatsunpiwi katsíbatsi korotong xua wünba pokoyenéwang peabe kuikoyenewang pokotsiwang Nakom exanaena, pong ataya pópona. ⁸Bapoxonaе bárapo tütutha, bichokono petsüxü wüngka. Bárapo tsüxü Nakom pía xaiña weya tatsi tapichapatsi pong peaiñakuín yawa xua peayapusüü itorobi koyenewa pexeinaein. Dapong aibi pong pekopatsíwatsi xua pejoniyaewa bárapo tütutha poxonaе kataunxuae jopa wetsiyo (xua epataba bárapo kae pin nákuathe) bárapo siete pokoyenéwabe pokoyenéwang peabe kuikoyenewang xua matatsunpiwi kápona.

Meje yábara po diwesi xua bárapo korótotha xeina siete pokoyenéwabe pokoyenewa xua peabe kuikoyenewang

16 ¹Bapoxonaе jümetang xua jumedangweya wawái bárapo tutu weya, xua wawái bárapo siete póyobe matatsunpiwi beya, jeye: “Papónare po kae pin írathe deke, yawa bárapo siete pokoyenéwabe pokoyenéwang xua peabe kuikoyenewang xua xeina bárapo korotong juntútutha baxua pa-epabábare bara béreka. Pokoyenéwang xua korotongtha tsijuntutha xeina bárxuang pokoyenein xua Nakom bichokono átene exanaena jiwi penatsikuentsixae xua abe peexanaexae Nakomtha”, jei.

²Matatsunpin pong xua ichaxota ba “uno”, jei, bapong kopiya piáwa epataba. Bapoxonaе pomonaе itapatínatsi xua pong be Koréi pewüng tatsi, xuano xua wüünae jainta ibo Koréi nakom, bapomonaе barapoxonaе naiña xeina xua peaperüübewang xua bichokono aperüütane.

³Bapoxonaе ekeicha icha matatsunpin pong ichaxota ba jei “dos”, jei, bapong piáwa epataba pin marmentha. Bapoxonaе bárapo pin marmene bichokono mene janowanaya be poxonaе xua petüpaein boka. Bárapo pin marmentha daxita wérapa xua xuang baxota jinompa.

⁴Bapoxonaе ekeicha ichüng matatsunpin pong xua ichaxota ba jei: “tres”, jei, bapong piáwa epataba meneintha yawa ira büxüpana meneintha, bapoxonaе bárapo menein be pejanang tsanaya. ⁵Bapoxonaе jümetang bárapo matatsunpin xua yapukaungkua bárapo menein. Bapong jeye:

“Nakom maisha xaniwaicha betiya yábara páebame poxonaе átene éxaname jiwi xua penatsikuentsixae xua barapomonaе bichokono abe peexanaewi.

Bápana jopa abe exanaem.
 Xam nejüntükoyene xeikaem,
 yawa xua pong ánoxuae nepoponaem,
 yawa xua pong kaena báyatha nepoponaemno.

⁶Tsipéi barapomonaе jiñamonae jutébatsi,
 yáwano tsipéi jutébatsi pomonaе neitorobi jume pepaеbiwi.
 Daxota barapomonaе xuya wérapa éxaname,
 peyantomatsiwa éxaname abe peexanaexae kopiya”,
 jei bárapo matatsunpin Nakomtha.

⁷Ekeicha ichüing jumetang pong kueikueijei, pong ungkua ichaxota pokotsiwa be pexaethopaewa xua ichaxota tauteiba duwéi xua túxusi exaneiba Nakom nexa, bara weya jeye: “Xam, Nakom pong jiwi Nekanamataxeinaem daxita peayapusúüi itorobi koyenewang nexeiinaem. Tsipéi xam yábara páebame xua jiwi penatsikuent-siwa xua abe peexanaexae daxota bewa átene tsane. Pokotsiwa xua éxaname bara xaniwaicha betiya éxaname, tsipéi bápana jopa abe exanaem”, jei pong xua paeba.

⁸Bapoxonaе ekeicha icha matatsunpin pong ichaxota ba jei “cuatro”, jei, bapong piáwa epatáraba xométotha. Bárapo matatsunpin xometo kátatsi pokoyene xua xometo exanaena xua jiwi petautsinéxatsi xua xota bichokono atsa. ⁹Bichokono daxita karepaya jiwi táxuatsi. Íchitha barapomonaе icha jüntükoyene jopa xei-naeyo matáütano Nakom jopa wüünae jainchichi, yawa barapomonaе Nakom abe yábara páebatsi yáitama Nakom xeina peayapusüüiwa xua itoroba bárapo koyenewang pokoyenéwang xua peabe kuikoyenewa.

¹⁰Bapoxonaе ekeicha icha matatsunpin pong ichaxota ba jei: “cinco”, jei, bapong piáwa epatáraba pong be Koréi pía peekaethopáewatha tatsi. Yáwano barapong pong be Koréi pokoyene xua itoroba piamonaе jopa xapain piamonaе matakaponaeayo be pong xua pona poxonaе kireitha. Daxota piamonaе tatsi jüntükoyene deideijei. Barapomonaе peparaxaewa nawanosine. ¹¹Jopa juniya exanaponaeyo bárapo koyenewang pokoyenéwang xua peabe kuikoyenewang, yáwano kataun-xuae barapomonaе exanapona xua Nakom abe yábara páebatsi po Nakom itabókotha eka. Daxota barapomonaе Nakom abe yábara páebatsi yáitama Nakom bárapo peátene kuikoyenewa itoroba yáwano xua itoroba peaperüüitanewang.

¹²Bapoxonaе ekeicha icha matatsunpin pong ichaxota ba jei “seis”, jei, bapong piáwa epatáraba po pin ménetha pewüing Eufrates. Bárapo Eufrates mene namto naexaniya xua pepatsinexa pomonaе pokotsiwa werenepiwi pomonaе jiwi itorobiya pía pepa peewatsíwichi.

¹³Néxata bapoxonaе tang xua pong be jomowabi, pong Joyoiña. Irü tang pong ayéi, pong be Koréi. Irü tang pong xua naerabiya jeye: “Xang Nakom peitorobi jume tapaebin”, pong jei. Daxita barapomonaе barompaya pía koibotong tsina tajujuínatsi akoibi póyobe kauri xua xuang be pokotsiwang kuei. ¹⁴Bárapo kaurimonaе éxana pexeña petsita-itüütsi koyenewang. Bárapo kaurimonaе ponarúküpa xua penakaetuta exanaenexa daxita pomonaе jiwi itorobiya pía pepa peewatsíwichi. Baxua éxana xua naba peexanaenexa po matakeitha Nakom nabénabe pong jomowabi pong Joyoiña. Barapong Nakom daxita peayapusúüi itorobi koyenewang pexeinaein.

¹⁵Nakom jeye: “Taema, jemeicha patopaein icha be pong pekaibin ichi poxonaе jemeicha patopa. Jüntükoyene weiweina pong xua yoyoka tsipéi namaxátata

paparuwa xua jopa petamsaponaenexa jiwi itütha xua bapong petáewatsi daxita pía pepong”, jei Nakom.

¹⁶Daxita pomonae jiwi itorobiya pía pepa pekanamataxeináewichi, barapomonae nakaetuta ichaxota po íratha pewüing Armagedón xua hebreo jumetha. Bárapo íratha nakaetuta xua naba peexanaenexa xua po matakeitha Nakom nabénabe pong be jomowabi, pong Joyoiña.

¹⁷Bapoxonae ekeicha ichüing matatsunpin pong ichaxota ba jei “siete”, jei, bapong piáwa epataba bárapo írathe matatsún susátotha. Bapoxonae itabókotha xua tutu wétsika ichaxota Nakom pía pexeña peekaethopáewatha baxota jumetang pong xua jumedangweya kueikueijeiya jeye: “Bara báyatha nakuixainwáetaba”, jei pong xua paeba. ¹⁸Bapoxonae bichokono jerajeréi itabókotha, yawa pejumein, yawa bichokono jurujuréi. Matáütano bichokono ira jijiyata beyakaincha xua poxonae ira jijiyateiba poxonae kopiya jiwi aena nakatsiwa po kae pin nákuathe xua beya ánoxuae. ¹⁹Po tómara, pepa tómara bárapo tómara aiña wangbe éxanabe poxonae baxua ira jijiyata. Icha írangtha barichi baxota tómarang abe éxana. Nakom yábara nantaxeina Babilonia tómara tsipéi bárapo tomarapiwi abe peexanaewi. Daxota Nakom bárapo pepa tómara abe éxana poxoru bichokono anáepana barapomonaetha. ²⁰Daxita petunaetong yáwano daxita demuxuwang aichurubenae xua ira pejjiyatsixae. ²¹Barichino itaboko weothopeika xua jiwi matatsún othopéikatsi pokotsiwang dedérawa xua xuang bénata ichaxota po emang bichokono ake. Bárapo pedederawiwang bichokono arewe. Bapoxonae bárapo jiwi Nakom bichokono abe yábara páebatsi yáitama Nakom itoroba bárapo pedederawiwang pokotsiwa bichokono abe barapomonae nexa.

**Meje yábara po diwesi xua Nakom itaweta powa xua
bichokono penasikuimatakáetsiwa xua weiweina pía
paratixichi powa xua yábara kaunútatsi Babilonia tómara**

17¹Néxata bapoxonae taxantha patopa kaein matatsunpin jíwana, po mata-tsunpiwi siete póyobe yawa xua siete xóyobe matáüta kápona korotong. Bapong nejéi: “Anetha katsita-itüütinchi xua yábüyo powa bichokono penasikuimatakáetsiwa xua weiweina. Barapowa eka ichaxota pin marmene, pówaxae xua yábara kaunútatsi Babilonia tómara. ²Pomonae jiwi itorobiya pía pepa peewatsinchi bárapo kae pin nákuathe barapomonae yawa múxuna abe nanabarü éxana bapowa. Matáütano daxita karepaya pomonae po kae pin írathe jinompa bárapo koyene éxana bara jüpa, icha barapomonae ichi. Barapowa kana éxana xua bárapo jiwi abe éxana, tsipéi bárapo jiwi ichichipa po penasikuimatakáetsiwa bapowa éxana”, nejéi matatsunpin.

³Poxonae kataunxuae Nakom pía Pejumopetünaxü tatsi netsita-itüüta baxua, bapoxonae matatsunpin nekapana ira xuépana susato tsúrukuae nakua beya. Baxotiya petsiriwa tang xua eka pong ayéi, pong be Koréi bapong pejúmatha, xua pong tsofia. Bapong daxita karepaya pepongtha tinaduba pojumein xua Nakom abe yábara páebatsi. Yáwano bapong siete pomatasípabe xeina yawa diez po pentétobe xeina. ⁴Bapowa namaxátata paparuwa, po paparuwa müü süüjei yawa müü tsofia. Bapowa yawa napepena xua pokotsiwang pewüing oro nain, yáwano be ibótixi xua pokotsiwang aiña matomang, yáwano po wárowaxu ínapana xua po wárowaxu pewüing perla. Barapowa pekóbetha xeina koroto penain koroto xua oro nain yawa

wünta pokotsiwang xua be mara, yawa barapowa pía penasikuimatakaetsi koyene xua weiweina. ⁵Powa xua yábara kaunútatsi Babilonia tómara, barapowa peitapatha tinaduta pewüing, po wüing jiwi jopa yábara yaputaeyo. Bárapo wüing jeye: “Powa xua yábara kaunútatsi pepa Babilonia tómara, bapowa be koxiwa natsikotane, xua powaxi nasikuimatakaeta xua weiweina barapówaxi pena tatsi. Matáüta bapowa daxita pomonae xua bichokono abe peexanaewi barapomonae pena tatsi”, jei xua tinaduta. ⁶Pirapaeyo jumetang xua bárapo Babilonia tomarapiwi yábara jeichi: “Icha pebin ichi xua peátsaxae mera bichokono kúüpatsi, bárapo Babilonia tomarapiwi barapókotsi koyeneya jüta ichiya éxana. Baxua éxana, tsipéi bárapo Babilonia tomarapiwi juteba pinmonae pomonae Nakom pijimonae tatsi, irü pomonae Jesús pejume diwesi pepaebiwi”, yábara jeichi bárapo Babilonia tomarapiwi.

Poxonae tang xua bárapo tomarapiwi be kúüpatsi bichokono, yábara nabenaekang bapoxonae. ⁷Bapoxonae matatsunpin nejéi: “¿Eta xua metha nabenáekame? Yábara kayaputane exanaeinchi bapowa xua pokotsiwa jopa yaputaem. Yáwano yábara kayaputane exanaeinchi barapong pong be Koréi, pongtha xua bapowa eka pejúmatha. Bapong siete po pentasípabe xeina xuano xua diez po pentétobe xeina. ⁸Barapong, pong be Koréi, pong táneme kaena býatha pópona bárapo kae pin nákuathe. Ánoxuae jopa poponaeyo. Íchitha bexa tsane juinaena po müthü bichokono pin müthü tsina. Bapoxonae nama yatsikaewa wewerakaena. Bapoxonae jinompaena jiwi bárapo kae pin írathe. Barapomonae jopa wüingdubenaeyo Nakom pía diborotha tatsi, po diborotha xua jei: ‘Pomonae wüingdubena bárapo diborothe jopa wewérakae tsane’, jei. Bárapo jiwi kaena býatha jopa wüingtinaetsi bárapo diborotha. Bárapo jiwi poxonae taena barapong xua taeinchi pong be Koréi bichokono najüntükoyene kabenaekaena. Daxota najüntükoyene kabenaekaena tsipéi kaena býatha pópona, xua ánoxuae aibi íchitha ekeicha bexa patopaena xua peponaewa tsane bárapo kae pin írathe”, nejéi matatsunpin.

⁹Ekeicha matatsunpin nejéi: “Meje tha xua paebichi xua ichamonae itakúüpatsi peyábara yaputaewa baxua: Bárapo siete po pentasípabe xua pong be Koréi, bárapo siete matasípabe demuxuwang yábara kaunuta xua pomatasipangtha ichaxota barapowa pejúmatha eka, powa xua Babilonia tómara yábara kaunútatsi. Barichi bárapo siete po pentasípabe xua pong be Koréi, yábara kaunútatsi pomonae jiwi itorobiya pía pepa peewatsíwichi. ¹⁰Cinco póyobe barapomonae pomonae jiwi itorobiya pía pepa peewatsíwichi býatha naitapataya werapoinka. Kaein ánoxuae bárapo siete póyobe jíwana matakápona po kae pin irathepiwi, ichüing bexa tsane patopaena xua matakaponae bárapo kae pin irathepiwi. Íchitha poxonae bapong patopaena jopa aiña dapaein matakapoponáe tsane po kae pin irathepiwi. ¹¹Bapong pong be Koréi, pong kaena býatha pópona xua ánoxuae jopa poponaeyo, bapong ichaxota ba jei: ‘ocho’, jei, bapong pong jiwi itorobiya pía pepa peewatsinchi naexanaena po kae pin irathepiwi nexa, bekein bapong kaena býatha tüpa xua bárapo siete póyobe jíwana. Bapoxonae nama ekeicha wewerakaena poxonae tüpaena”, nejéi matatsunpin.

¹²Ekeicha matatsunpin nejéi: “Bárapo diez po pentétobe xua táneme xua po pentetong yábara kaunútatsi pomonae jiwi itorobiya pía pepa peewatsíwichi, barapomonae kataunxuae jopa patsiyo xua itorobiya peewatsinéxatsi po kae pin irathepiwi. Íchitha po petorobi koyenewa barapomonae katsibinchi xua saya bara kaeto itorobiya ewatsinchi po kae pin irathepiwi xua irü barapong pong be Koréi

itorobiya ewatsina. ¹³Bárapo diez póyobe pomonae piamonae itorobiya pepa peewatsiwi pebürüya nantaxearúkupa. Matáütano bárapo diez póyobe pomonae piamonae itorobiya pepa peewatsiwi pía peayapusüüya exanaewang pong be Koréi kátatsi, yáwano peayapusüü itorobi koyenewa kátatsi. ¹⁴Daxita barapomona, pomonae diez póyobe, pomonae piamonae itorobiya pepa peewatsiwi irü pong be Koréi, Cordero bütsi. Íchitha bárapo Cordero amanayabina daxita barapomonaetha. Tspíeí barapong pong jiwi pía pepa Pekanamataxeinaeinchi pía peayapusüü itorobi koyenewa xeina beyakaincha xua ichamonae xeina pomonae jiwi pekanamataxeináewichi. Matáütano bapong pong Cordéroxae jiwi itorobiya pía pepa Peewatsinchi tatsi pía peayapusüü itorobi koyenewa xeina beyakaincha xua ichamonae xeina pomonae jiwi itorobiya pía pepa peewatsíwichi xua irü xeina pía peayapusüü itorobi koyenewa. Pomonae Cordero nabarü yawénatsi xua poxonae amanáyaba barapomonaetha, Nakom waba barapomona poxoru Nakom pía peitapetsíwichi tatsi, matáütano tspíeí éxana pokotsiwa Nakom itoroba”, nejéi matatsunpin.

¹⁵Ekeicha bárapo matatsunpin nejéi: “Xua xam po menein táneme marmenein xua ichaxota yábüyo eka pong be Koréi pejúmatha, bárapo marmenein yábara kaunútatsi be tomaramonaepiwi, xua yábara kaunútatsi tsikimonaexipiwi, yáwano yábara kaunútatsi pomonae icha jumeintha pekuiekuejiwi, yáwano yábara kaunútatsi daxita nakuangpiwi. ¹⁶Báyatha táneme barapong pong be Koréi diez po pentétobe, po pentetong yábara kaunútatsi diez póyobe pomonae jiwi itorobiya pía pepa peewatsíwichi. Barapomona pomonae jiwi itorobiya pía pepa peewatsíwichi barapowa bichokono kasebinchi powa pesikuiweiweinaewa. Yáwano wekobepitinchi xua bapowa pía peitorobi koyenewa tatsi yáwano júmasa xubinchi. Yáwano barapomona wixaena, xua bapowa wixaeinchi. Bapoxonae bapowa pía pepong tautinchi ishótotha. ¹⁷Nakom itoroba xua barapomona pía pejüntükoyénetha peexanaewa tsane xua pokotsiwang Nakom ichichipa. Daxota barapomona pomonae jiwi itorobiya pía pepa peewatsíwichi pomonae diez póyobe, pebürüya nantaxearúkupa xua barapomona pía peayapusüü itorobi koyenewangxae tatsi pong be Koréi katsinchi. Baxuang katsina beya abü poxonae wétsina pokotsiwa Nakom báyatha paeba. ¹⁸Petsiriwa powa táneme xua powa nasikuimatakaeta xua weiweina, bapowa kayábara kaunútatsi: ‘Po tómara pepa tómara’, jei. Pong itorobiya pepa peewatsin xua bárapo pepa tómaratha, bapong itoroba daxita ichamonae pomonae jiwi itorobiya pía pepa peewatsíwichi pomonae bárapo kae pin nakua thepiwi itorobiya éwatatsi”, nejéi matatsunpin.

**Meje yábara po diwesi xua daxita omeicha kayábara
wetapéntatsi Babilonia tomarapiwi xua múxuna tómarano**

18 ¹Bapoxonae ekeicha tang ichüing matatsunpin xua pong peitaboko wétsika pona po kae pin írathe tsike. Bárapo matatsunpin xeina aiña peayapusüü itorobi koyenewang. Bapoxonae bapong éxana xua ira bichokono pentha tsúrukuae xua pía pepong weya kueicha pona. ²Yáwano bapong jumedangweya wawái, jeye:

“¡Báyatha Babilonia tomarapiwi wetapéntatsi yawa tómarabe éxanatsi,
po tómarapepa tómarapepa!

¡Yáwano ánoxuae kaurimonae baxota jinompa!

- ³Tsipéi daxita karepaya nakuangthapiwi bichokono abe éxana,
po abe peéxanae koyenewa pokotsiwa xua bárapo Babilonia tomarapiwi éxana.
Yáwano pomonae jiwi itorobiya pía pepa peewatsíwichi barapomonae
kuiduba piamonae xua abe peexanaewa tsane icha bárapo Babilonia
tomarapiwi ichi xua abe éxana.
Yáwano pomonae pekaenaetsiwi piáwang,
bapomonae xuya kopei pexeinaewi náexana,
tsipéi bárapo tomarapiwi kopei ayéi ichichipa xua beta pejinompaewa
tsane”,
jei matatsunpin.
- ⁴Bapoxonae ekeicha ichawa jumetang xua wawái itabókotha, jeye:
“Pomonae tamonaepiwi pam,
bárapo tómara weya paponarükúpare,
xua jopa irü abe paiña neexanaenexa icha bárapo tomarapiwi ichi xua
bichokono abe peexanaewi.
Bapoxonae Nakom jopa paka átene exanáe tsane icha báyatha ichichi xua
átene exainchi bárapo Babilonia tomarapiwi.
- ⁵Tsipéi bárapo abe peéxanae koyenewang xua bárapo tomarapiwi éxana
bichokono ayéi xua daxota Nakom pong itabókotha peekaein tane baxuang.
Daxota Nakom yábara nantaxeina xua átene éxana barapomonaetha.
- ⁶Bárabü ichamonae jüpa exanaena barapomonaetha,
icha be pókotsi koyeneya xua bapomonae abe taéxana ichamonaetha.
Bárabü barapomonae pentoma katsibinchi xua po pentoma ekeicha
mataropataba xua peatenewa.
Bárabü barapomonae bichokono átene tsane,
icha be pókotsi koyeneya xua poxonae barapomonae átene taéxana
ichamonaetha.
- ⁷Pokotsiwa xua bapomonae éxana xua átsaka náexana xua
penasikuimatakaetsi jiwi náexana,
bárabü barapomonae bichokono átene tsane,
yawa wekoyéi tsane.
Tsipéi bapomonae piakoutha natsipaeba, jeye:
‘Waxainchi xote énatzi.
Waxainchi jopa dapomonaetsi,
pomonaetsi pomonae waseuri jiwi wanaka kuentawerapaewi.
Matáütano waxainchi pomonae jiwi itorobiya pía pepa peewatsí jíwichi,
jopa bichokono átene tsainchi’,
jei bapomonae.
- ⁸Daxota saya kaentakeitha tsane jopaena pokoyene xua abe peexanaewa
tsainchi bapomonae,
xua bichokono pepérxaxa jübiwa tsainchi,
matáütano xua pejainpaewa tsane bichokono,
yáwano xua petautsiwa tsainchi xua werapaena.
Tsipéi Nakom pong pepa Pekanamataxeinaein jiwi peayapusüü itorobi
koyenewa xeina,

yáwano bapong piakoutha yábara paeбина pokoyene xua tsítatsi xua bapomonaе natsi-aenaekuenta abe peexanaexae”,
 jei matatsunpin.

⁹Pomonaе jiwi itorobiya pía pepa peewatsíwichi xua po kae pin írathe, pomonaе xua báyatha írürü abe éxana poxonaе bárapo Babilonia tomarapiwi abe éxana, barapomonaе bichokono wekoyéi tsane poxonaе xua taena ishotsüxü xua poxonaе bárapo Babilonia tomarapiwi tautsinchi. ¹⁰Barapomonaе tajü wetaeumeiñaena poxoru kunuwa xua pokotsiwa Nakom kana exanaena bárapo Babilonia tomara-piwi. Barapomonaе pomonaе jiwi itorobiya pía pepa peewatsíwichi najéi tsane:

“¡Pai jaibó Babilonia tomarapiwi pam tsobenáe!

¡Babilonia tómara tsokuaem!

Bekein pepa tómara tsokuaem,

íchitha saya bara kae hóratha bárapo tómaram omeicha Nakom kawetaxubina”,

najéi tsane barapomonaе.

¹¹Daxita pomonaе kaenaeta piáwang barapomonaе bichokono wekoyéi tsane xua bárapo Babilonia tómara siwawekoyeichi tsainchi tsipéi barapomonaе jopa xeináe tsane xua komokaeinchi xua pía pekaenaetsiwang. ¹²⁻¹³Barapomonaе xua pokotsiwang kaenaeta dubenanáebiya baxue: xua pokotsiwang pewüng oro nain matawüng, yáwano xua pokotsiwang penainwang xua plata nain matawüng, yáwano xua ira büxüpana ibótong xua bichokono aiña matomang, yáwano xua pokotsiwang be wárowaxu pokotsiwang perla matawüng, yáwano papabürü pokotsiwang bichokono aiña matomang pokotsiwang seda matawüng, yáwano po paparuwang müü süüjei, yawa xua xuang müü tsobia; yáwano napaewang, po naein xua bichokono tuxuéi; yáwano xua ichawang weya fórobano xua pokotsiwang marfil matawüng, yáwano xua ichawang weya fórobano xua naewang xua po naewang bichokono aiña matomang, yáwano xua ichawang weya fórobano xua pokotsiwa bronze nain matawüng, yáwano xua ichawang weya fóroba xua penaintong, po penaintong hierro nain matawüng, yáwano xua ichawang weya fóroba xua ibótong, po ibótong mármol ibo matawüng; yáwano kápana po petuxueiwang canela tseboko matawüng, yáwano icháwangno kápana xua ichawang xua petuxueiwang; yáwano kápana icha petuxueiwang xua incienso xua po túxusi tuxueiwa bénata poxonaе taxua éxana, yáwano icha petuxueiwa pokotsiwang be mauto xua jiwi tauta petúxusi tuxuéi exanaenexa, yáwano icha petuxuéiwangno; yáwano vino merang, yáwano penasiwang, yáwano pebenong xua trigoxubeng, yáwano pépaxu xua trigoxú; yáwano jota duweimonaein, ovejamonaein, kawayumonaein, yawa karonaeimonaein, xua kawayu pekaponaein, yáwano jíwino kapoinchi pekaenaetsinéxatsi xua pomonaе jiwi pebusikuitaetaeyebéwichi peexanaenexa tsainchi. ¹⁴Barapomonaе jei tsane xua bárapo Babilonia tomarapiwi yábara jei tsainchi:

“¡Ánoxuae jopa paxeinaem pethéi,

po pethéi aiña matomang po pethéi paichichípame bichokono!

¡Ánoxuae nama pákata aichurubenaе xua kopei xeina paiña nenaexanaewam xua bara ataya tsane!” jei tsane.

¹⁵Pomonaе xua kaenaeta dubenanáebiya pokotsiwang xua aiña matomang yawa xua kobekaewita parátixi xua bárapo tomarapiwi kobekaewítatsi, barapomonaе

tajü wenewatumendena xua abe peexanaeyáinwatsi xua Nakom exanaena. Barapomonaē bichokono wekoyéi tsane. ¹⁶Barapomonaē jei tsane:

“¡Pai jaibó pepa Babilonia tómarā tsobenáe!

Xam Babilonia tómarā bichokono pexeiña tómarā,

icha yábüyo ichi xua pexeiñawayo poxonaē paparuwa namaxátata po paparuwa bichokono süüjei yawa bichokono tsobia.

Yáwano bapowa napepena xua pokotsiwa pewüng oro nain yawa xua be ibótixi xua pokotsiwang aiña matomang yáwano po wárowaxu xua ñapana xua pewüng perla.

¹⁷¡Saya bara kae hóratha daxita aichurubenaē xua xuang bárāpo tómarā xeina!” jei tsane barapomonaē.

Pomonaē barakunaēin pekanamataxeinaēwi, yáwano pomonaē xua nápona xua wárapa icha tómaratha nexa, irü pomonaē petanakuichiwi bárāpo barakunaēintha, (írüino pomonaē nakuita jératha,) daxita barapomonaē tajü wenekotumendena. ¹⁸Poxonaē barapomonaē tane xua ishotsüxü xua bárāpo Babilonia tómarā táutatsi, barapomonaē jumedangweya wawái, jeye: “Icha pepa tómarā aibi po tómarā wüünaē pókotsi tómarā icha Babilonia tómarā ichi”, jei. ¹⁹Barapomonaē piakui xeina xua tsorobotha nantatsaēba poxoru bichokono wekoyéi. Wawaya jeye:

“¡Pai pepa Babilonia tómarā tsokúae!

¡Ánoxuae jopa peraichiwa xua pokotsiwang býatha barakunaē wúnbatsi xua kopei xeina naexainchi xua poxonaē naka kómoka bárāpo tomarapiwi!

¡Daxita baxuang akayawaichúrukuaē exainchi tómarā!” jei barapomonaē.

²⁰¡Chitha paxam pomonaē itabókotha paiña nejinompaēwi pam irü pomonaē tamonaē pam,

irü pomonaē Jesús píā peitorobiwi tatsi pam,

irü pomonaē Nakom peitorobi jume pepaēbiwi pam.

Daxita barapomonaē pam,

pajüntükoyene weiwéinare xua pákata peaichurukuáexae bárāpo Babilonia tómarā.

Nakom xuya abe éxana bárāpo Babilonia tómarā tsipéi býatha bárāpo tomarapiwi pákata abe éxana.

²¹Bapoxonaē matatsunpin pong bichokono píā peayapusüü itorobiwa xeina, bapong pita iboto, po iboto bichokono pin iboto xua be pókotsi ibótotha jiwi kuba trigoxú. Bapoxonaē bárāpo matatsunpin xuba bárāpo iboto pin marmentha. Bapong jeye:

“Icha bárāpo iboto ichin xua xubang bárāpo pin marmentha,

Nakom barichi wetaxuba bárāpo Babilonia tómarā xua ekeicha jiwi jopa petaewa tsane.

²²Yáwano bápana ekeicha jiwi jopa jumetáē tsane xua petanbabiwang busín xuang pewüng arpa matawüng,

yáwano xuang po peobiwa jumein pewüng flauta matawüng,

yáwano icha peobiwang jumein xuang pewüng trompeta matawüng.

Matáütano jopa tae tsane pomonaē xua barompaya piáwang penata exanáē jiwi.

Matáütano jopa busitáē tsane bárāpo pin tómaratha xua busixuyakatoyéraba trigoxú xua pin ibótotha.

²³Matáütano jopa yonoyonéi tsane pekoichang.

Matáütano jopa jumetáe tsane xua pin penabanaewa éxana xua poxonae pebin pekotsiwa pita.

Pomonae pekaenaetsiwi bárapo pin tómaratha bichokono kopei pexeinaewi xua daxota daxita nakuangpiwi yábara kuiyaputane xua barapomonae peaiñakuí jiwi.

Barapomonae pomonae Babilonia tomarapiwi itakúüipatsi xua daxita nakuangpiwi muxuitórobatsi mara peexanaewi pía koyenáyatha xua daxota irü abe peexanaenexa tsane, icha bárapo Babilonia tomarapiwi ichi xua abe éxana”,
jei matatsunpin.

²⁴Nakom werawéraka exanaena bárapo tómará. Bárapo tomarapiwi Nakom tsítatsi xua barapomonae penatsikuentsiwa xeina xua ichamonae pejutebixaetsi, pomonae Nakom pía peitorobi jume pepaebiwi, irü pomonae Nakom pejumeko-wüntsíwichi tatsi yáwano daxita pomonae býatha jutébatsi po kae pin nakuang-thepiwi xua ichamonae juteba icha tómarangtha.

19 ¹Bapoxonae peitabókotha jumetang xua juiña pinmonae jeye:

“¡Bárabü Nakom wüünae jáintatsi,

Nakom naka kapanepa abe waexanáe koyenewang weya!

¡Maisha Nakom pexeña jüntükoyene pexeinaein!

¡Maisha Nakom bepa juniya xeináe peayapusíü itorobi koyenewa!

²Nakom wüünae jáintatsi tsipéi bapong Wanakom.

Poxonae yábara paeba jiwi xua penatsikuentsiwa xua abe peexanaexae, bara beta xaniwaicha éxana.

Yáwano bapong bichokono átene éxana barapowa powa xua penatsikuentsiwa xeina xua abe peexanaexae.

Bapowa penasikuimatakáetsiwa xua weiweina pebíwitha pía paratixichi.

Barapowa yábara kaunútatsi Babilonia tómará po tomaramonae xua penatsikuentsiwa xeina xua abe peexanaexae icha bapowa ichi.

Bapowa býatha kuiduba bárapo kae pin nakuapiwi xua irü abe éxana icha xua barapowa ichi.

Tsipéi bapowa Nakom pijimonae tatsi jutébatsi daxota xuya Nakom pijimonae yantómata xua poxonae bapowa bexotsi powa peyábara kaunutsixaetsi Babilonia tomarapiwi”,

jei xua juiña pinmonae.

³Bárapo pin ayéi jiwi jeye:

“¡Bárabü Nakom wüünae jáintatsi!

¡Ishotsüxü xua bapomonae táutatsi bárabü bápana jopa athabé jujuináe tsane xua pepu ataya tsane!”

jei barapomonae xua juiña pinmonae.

⁴Bapoxonae veinticuatro póyobe pomonae pítiri jiwi, írürü cuatro póyobe xua xuang asüü daxita barapomonae írabe taeumenareka xua Nakom wüünae pejainchinexa tsainchi, jeye: “¡Je bara ichi tsane! ¡Bárabü Nakom wüünae jáintatsi!” jei daxita bárapo matabüxümonaebe. ⁵Bapoxonae Nakom pía pexeña peekaethopei-bíwatha, jumetang pejume, xua jeye:

“¡Daxita pam, pomonae Nakom pata éxaname,

Nakom pong pata Nakom, wüünae pajainde!
 ¡Írürü pomonae paéxaname pokotsiwa Nakom paka itoroba,
 Nakom wüünae pajainde!
 ¡Írürü pomonae peakopeíbí jiwi írürü pomonae kopei pexeinae jiwi,
 daxita paxam Nakom wüünae pajainde!”
 jei pejume xua paeba.

**Meje yábara po diwesi xua poxonae jiwi tsinakaetuta pexaewa
 penabanaenexa poxonae Cristo, pong Cordero, pekotsiwa nakuéyaba**

⁶Yáwano jumetang peitabókotha xua pejumein be pin bicheitomonae, be poxonae xua aiña pin marmenein busín, yáwano be xua xuang yámüxü jurujuréi. Bárapo jumein jeye:

“¡Bárabü Nakom wüünae jáintatsi pong jiwi Pekanamataxeinaein!

Bapong nama ánoxuae tamrópata pítaba xua daxita karepaya
 nakuangthapiwi itorobiya ewatsinchi.

Bapong xeina daxita koyenewang xua pía peayapusúü itorobi koyenewang.

⁷¡Jüntükoyene weiwéinatsi yáwano jakóbatsi,
 jeichichi:

‘Maisha pexeiña jüntükoyene pexeinaein’,
 jeichichi!

Baxua bewa exanaetsi tsipéi patopa matakabi poxonae po matakábitha jiwi
 tsinakaetuta pexaewa penabanaenexa poxonae pong Cordero,
 píowa nakuéyaba.

Barapong pong Cordero,
 pekotsiwa tatsi nakuixainwaeta,
 poxonae po matakábitha jiwi pin penabanaewa tsinakaetuta xua
 penabanaewa tsane.

⁸Barapowa kópatatsi xua penamaxatatsinexa paparuwa,
 po paparuwa bichokono pexeiña paparuwa.

Bárapo paparuwa bichokono íñapana yawa xua bichokono müü daedaena.

Bárapo pexeiña paparuwa kaunuta xua pokoyenein Nakom pía
 peantobéwichi tatsi éxana xua pokoyenein Nakom tsita wüünaetsi.

Bárapo yábüyo yábara kaunútatsi Nakom pijimonae tatsi,
 pomonae Nakom pejumekowüntsixaetsi”,
 jei bárapo pin bicheitomonae.

⁹Bapoxonae matatsunpin nejéi: “Tínare xuaje: ‘Bichokono jüntükoyene weiweina pomonae Nakom waba poxonae pin penabanaewa tsinakaetuta xua penabanaewa tsane poxonae pong Cordero, nakuéyaba pekotsiwa’, jande poxonae xua tíname”, nejéi bárapo matatsunpin. Ekeicha nejéi: “Daxita pojumein xua katsipáebatsi bárapo jumein xaniwaicha Nakom paeba”, nejéi bárapo matatsunpin.

¹⁰Bapoxonae bárapo matatsunpin petáxutha írabe taeungkuarekang xua wüünae tajainchinexa. Íchitha bapong nejéi: “¡Bara! Jopa baxua neexanaeinde. Ápara xang irü pongxaein Nakom piáwa taexanaein, icha xam ichim xuano xua icha jiña jiwimonae ichi pomonae Nakom pejumekowüntsíwichi, xuano xua jumekowünta dubenanáebiya pokotsiwang xuang Jesús paeba. Jame Nakom bapong wüünae jainde”, nejéi matatsunpin.

Baxuang xuang pokotsiwang Jesús paeba xua xuang pexaiñeiwang, baxuangtha yawénatsi nawita pomonae Nakom peitorobi jume pepaebiwi.

Meje yábara po diwesi xua pebin ekeika kawáyutha, pong pemaiñang

¹¹Bapoxonae peitabókotha tang xua naitaboko yausaranaxuba. Baxota naitüüta kawayu, pong pemaiñang. Pong xua kawáyutha ekeika, wüngdútatsi, jeichichi: “Pong xua pejumekowünta dukuanaebiyaein, yáwano xua xaniwaicha pepaebin”, jeichichi. Bapong xaiñeya betiya yábara paeba jiwi xua penatsikuentsiwa xua abe peexanaexae. Matáütano bapong xaiñeya betiya éxana poxonae naba ichamonae-tha. ¹²Bapong peitamaikeito be ishoto itareto xua yonoyonéi. Yáwano bapong nantatsún etouña pentasípatha aiña tepang. Yáwano bapong tinaduta pewüng po wüng xua saya meisha bapong wüngyaputane. ¹³Yáwano namaxátata paparuwa, po paparuwa pejanang dubena be poxonae xua jautuxuba pejánatha. Bapongtha Nakom wüngduta: “Nakom Pejume”, jei. ¹⁴Bapong punapoinchi soldadomonae itabókopi soldadomonae, pomonae Nakom pía soldadomonae tatsi. Bárapo soldadomonae pexeiña paparuwang namaxátaba xua xuang müü ññapana, yawa xua axuiruibi. Yáwano barapomonae eneika kawayumonaeintha xua xuangtha pemaiñawangtha. ¹⁵Barapong pong matakápona pía soldadomonae pekoiboto tsina tapi-chapéinatsi kusi, po wato bichokono xuiyói. Bapong bárapo watotha ukuboba xua jiwi ukubóbatsi, pomonae po írathe jinompe. Yáwano bapong ajumeyapusüüya itorobi ewatsina jiwi. Yáwano bapong dangweya yábara paebina jiwi xua penatsikuentsiwa xua abe peexanaexae, icha jintong ichi xua dangweya nataxutsapabatouba uvakuéi xua vino mera pía exanaetsi. Bapong bichokono átene kana exanaena pomonaetha, pomonae jopa pejumekowüntsíwichi, tsipéi bichokono Nakom kaseba barapomonae. Barapong Nakom pía peyapusüü itorobi koyenewang xeina xua jiwi pepérxaxa exanáewatsi. ¹⁶Bapong nawüngtinaduta pía pejumináewatha, yawa nawüngduta pethútotha xua po wüng jeye: “Pong Cordéroxae jiwi itorobiya pía pepa Peewatsinchi tatsi, pía peyapusüü itorobi koyenewa xeina beyakaincha xua ichamonae xeina pomonae jiwi itorobiya pía pepa peewatsíwichi xua irü xeina pía peyapusüü itorobi koyenewa. Matáütano bapong pong jiwi pía pepa Pekanamataxeinaeinchi pía peyapusüü itorobi koyenewa xeina beyakaincha xua ichamonae xeina pomonae jiwi pía pepa pekanamataxeináewichi”, jei bárapo wüng.

¹⁷Bapoxonae matatsunpin tang xua xometo kóichatha unguwa, bapong jumedangweya wawái peyapupunaewi beya xuang jinompa itabókotha, jeye: “Anetha xua paiña nexaewa tsane Nakom pin pía penabanaewa. ¹⁸Bárapo penabanaewang paxaema, xua pomonae jiwi itorobiya pía pepa peewatsíwichi pewi, yáwano soldadomonae pía pentakaponaewi tatsi barapomonae pewi, yawa pomonae peamanayabeibí jiwi barapomonae pewi, yawa kawayu pewi, yawa pomonae xua eneika pewi. Daxita xua írürü ichamonaeno barapomonae pewi. Irü pomonae penata exanaewi piakoutha barapomonae pewi, ichakuitha xua irü pomonae amanaya petanakuichi jiwi barapomonae pewi. Írúno pomonae jiwi pebusikuitaetaeyebébiwichi barapomonae pewi, írúno pomonae kopei pexeinaewi barapomonae pewi”, jei matatsunpin.

¹⁹Bapoxonae tang pong ayéi pong be Koréi, yáwano tang pomonae jiwi itorobiya pía pepa peewatsíwichi xua barü pona pía soldadomonaein. Daxita barapomonae

nakaetuta xua nantiya penabinexa tsane pongtha pong pía soldadomonaē matakápona xuano yawa pía soldadomonaēintha tatsi petanabinexa tsainchi. ²⁰Barapong pong ayéi, pong be Koréi, bapong maxükübiya wáetabatsi irü maxükübiya wáetabatsi pong naerabiya jeye: “Xang Nakom peitorobi jume tapaēbin”, jei, pong xua petsita-itüütsi koyenewang éxana xua pong be Koréi taéxanatsi xua pong be Joyoiña pía peayapusüü itorobi koyenéwatha tatsi. Bárapo petsita-itüübüwangtha bapong jiwi muxuitórobatsi xua bárapo jiwi peitapatinaēwa tsainchi barapong pong be Koréi pewüngtha tatsi. Yáwano jiwi itoróbatsi xua wüünaē pejainchiwa tsane ibo Koréi nakom. Barapong pong be Koréi írürü pong xua naerabiya jeye: “Xang pong Nakom peitorobi jume tapaēbin”, jei bapongbe Nakom kana éxana xua ítowa pexubiwa tsáinchibe ichaxota ishoto púkuatha. Bárapo pukua ataya tsitekaēya taxungkua bichokono áitare yapusüü tsungkuae po péitare pewüng azufre matawüng. ²¹Írürü daxita ichamonaerü jutébatsi kúsitha, powátotha xua pekoibótotha tapichapéinatsi pong xua matakápona pía soldadomonaē. Daxita pepupunaēwi bichokono tonsana pewixaēxaetsi pomonaē xua jutébatsi.

Meje yábara po diwesi xua Cristo itorobiya ewatsina jiwi mil po weibetha

20 ¹Bapoxonaē tang matatsunpin xua peitaboko wétsika pona, bapong káta-tsi pokoyenetha xua itaküüpatsi xua pekoibo saranaxubiwa tsane bárapo pin müthü deka xua ira béreka. Yawa bapong kápona pekóbetha penainto, po penainto xua pewüng cadena xua bichokono pin nainto. ²Bárapo matatsunpin wáetaba, pong be Joyoiña wáetabatsi, pong po jomo xua poxonaē kopiya jiwi muxujáinabatsi. Bapong ápara kaurimonaē pía pentakaponaēin tatsi. Bapong icha wüng Satanás. Barapong Satanás maxükübiya wáetabatsi cadénatha xua mil po weibe nexa. ³Yáwano barapong Satanás xorékatsi bárapo pin müthü deka. Bichokono yauxatatababótatsi müthütha. Yaukateitababotatsino bichokono, xua jopa ekeicha pemuxujaiñabeibiwa tsane xua jopa ekeicha pemuxujaiñabeibiwa tsainchi po irathepiwi xua beya poxonaē abü yapukaewina mil po weibe. Bapoxonaē ishanaxubinchi xua saya bara kaeto tsane.

⁴Bapoxonaē tang xua pexeña peenaethopeibiwang. Baxota ena pomonaē xua báyatha katsíbatsi peitorobi koyenewang xua jiwi peyábara paēbiwa tsainchi daxita xua penatsikuentsiwa xua abe peexanaēxae. Bapomonaē pomonaē xua báyatha wishi ukubobébatsi xua ichamonaē namawainta, ápara xua barapomonaē peyábara kueikueijeixae Nakom Pejume Diwesi, xua peyábara kueikueijeixaeno pokoyene xua Jesús pejumekowüntsíwatsi. Barapomonaē báyatha jopa wüünaē jainchiyo pong be Koréi. Matáütano jopa wüünaē jainchiyo bárapo ibo Koréi nakom. Matáütano barapomonaē jopa kopatsiyo xua peitapatináewatsi tsainchi pong be Koréi pía wüngtha tatsi ichakuitha xua pekobejumatináewatsi. Barapomonaē tang xua ekeicha asüü exainchi. Barapomonaē irü Cristo, nabarü kaemonaē xua barapomonaēbe bárapo kae pin nakuepiwi itorobiya éwatatsi xua mil po weibetha tsane. ⁵Íchitha nama ichamonaē pomonaē xua kaena báyatha wérapa kataunxuae jopa asüü exanaētsi. Barapomonaē asüü exanaēinchi beya abü poxonaē yapukaewina mil po weibe. Bárapo peasüü xua ápara kopiya nantakarukua xua kopiya matha Nakom éxana xua jiwi asüü exanéibatsi petüpaēwa weya. ⁶Maisha bichokono jüntükoyene weiweina pomonaē ekeicha Nakom asüü éxana

petüpáe koyene weya po peasúü xua kopiya! Barapomonaе Nakom piamonaе tatsi. Barapomonaе jopa wérapae tsane poxonaе ekeicha jiwi kaewa werapaena po jiwi jopa pejumekowúntsiwi. Saya barapomonaе exanaeinchi Nakom pía sacerdotemonaepiwi tatsi xua irü Cristo pía sacerdotepiwi tatsi. Matáütano barapomonaе nabarü kaemonaе xua barapomonaе bárapo kae pin nakuepiwi itorobiya éwatatsi mil po weibetha tsane.

Meje yábara poxonaе kaurimonaе pía pentakaponaein tatsi xotsi

⁷Poxonaе yapukaewina mil po weibe bapoxonaе bárapo Satanás ishanaxubinchi xua peponaewa tsane müthü weya. ⁸Poxonaе bara weya pona jiwi muxujaiñabinchi nawita daxita nákuangtha. Yáwano muxujaiñabinchi nawita Gog nakuamonaepiwi, írúno muxujaiñabinchi nawita Magog nakuapiwi. Bárapo Satanás kana éxana xua bárapo naxobe nakuapiwi penakaetutsiwa tsane pía soldadomonaе tatsi xua penabinexa pomonaetha, pomonaе Nakom piamonaе tatsi. Bárapo naxobe nakuapiwi pomonaе soldadomonaexae barapomonaе bichokono pin bicheitongmonaеin icha táetowa pürüng ichi xuang taetabotha bobena xuang akükü xua marmentha bobena.

⁹Bárapo pin bicheitong pomonaе soldadomonaexae, pana beiyiya daxita yaira jüpa beya poxonaе yakaincha matawakaicha umeinchi ichaxota Nakom piamonaе tatsi jinompa, yáwano xua po tomarapiwi Nakom jumekowúntatsi. Íchitha bapoxonaе Nakom pin ishoto itoroba deka peitaboko wéreka, daxita bárapo soldadomonaеin táxuatsi omeicha. ¹⁰Barapong Satanás, pong be Joyoiña, pong kaurimonaе pía pentakaponaеin tatsi, pong xua bárapo soldadomonaеin muxujaiñabatsi, bapong Nakom xuba ishoto púkuatha, po púkuatha ichaxota ataya tsitekaeya taxungkua xua bichokono aitareyapusúü tsungkuae po péitare pewüng azufre matawüng. Bárapo púkuatha kaena báyatha xotsi pong be Koréi irü pong xua naerabiya jeye: “Xang Nakom peitorobi jume tapaebin”, jei. Barapomonaе baxota bichokono átene tsaibi tsane, mataketha yawa merawíthano tsaibi tsane xua bara ataya tsane.

Meje yábara po diwesi xua Nakom yábara paeba jiwi xua penatsikuentsiwa poxonaе eka pía pexeíña ekaethopeibíwatha, po pexeíña ekaethopeibiwa xua pemáíñawa

¹¹Bapoxonaе tang xua pexeíña peekaethopeibiwa xua pemáíñawa. Múxuna tang xua pong eka bárapo pexeíña peekaethopeibíwatha. Bapong peitabaratha tang ira xua po ire yawa itaboko, baxua daxita aichurubenaе, ekeicha jopa naitüütsiyo. ¹²Bapong Nakom peitabaratha tatsi umena pomonaе xua kaena báyatha wérapa xua pomonaе peakopeibí jiwi írúno pomonaе kopei pexeinaе jiwi. Bapoxonaе díborong patapenta, yáwano pataxuba po diborotha ba nakapanenébiya tsaibi pomonaе Nakom pía peantobéwichi poxonaе wüngtinadúbatsi bárapo diborotha. Pomonaе xua kaena báyatha wérapa daxita itawétatsi. Barapomonaе yábara kuijüpiya éxanatsi be pokoyeneya báyatha abe éxana xua bárapo diborotha pekuiyábara tinaexaetsi xua poxonaе barapomonaе abe éxana. Daxota barapomonaе átene tsane. ¹³Barichi pomonaе irü pin marmentha nótsi, barapomonaе Nakomtha pata. Irü pomonaе íratha bobena ira wejjuina xua Nakomtha pepatsinexa. Daxita barapomonaе Nakom peitabaratha tatsi umena xua baxota peyábara paebinéxatsi

xua Nakom yábara paebina xua penatsikuentsiwa xua abe peexanaexae Nakomtha. Barapomonae átene exanaeinchi xua Nakom býatha pekuiyábara tinaexae pokoyene xua abe éxana. ¹⁴Nakom kana éxana pokoyenewa xua jiwi tüpa pekana exanáewatsi, xua bárapo koyenewa ishoto púkuatha xotsi xua nakaewita kana éxanatsi. Barichi Nakom kana éxana xua po nakua pomonae pewerapeibiwi pía nakua tatsi xua bárapo nakua xotsi ishoto púkuatha xua nakaewita kana éxanatsi po púkuatha ichaxota ataya tsitekaeya taxungkuwa. Bárapo petüpáe koyenewa ápara xua jiwi kaewa werapaena po jiwi jopa pejumekowüntsiwi. ¹⁵Írürü pomonae xua jopa wüingdubenaeyo bárapo diborotha po diborotha ba jiwi nakapanenébiya tsaibi poxonae wüingdubéibatsi, barapomonae irü bárapo ishoto púkuatha bebai-chi, Nakom bebái.

Meje yábara po diwesi xua pena itaboko yawa xua pena ira

21 ¹Bapoxonae tang pena itaboko yáwano pena írano, tsipéi po itaboko kopiya dukua yawa po ira kopiya dukua aichurubena, ekeicha jopa naitüütsiyo. Yáwano pin marmene aichúrukua. ²Xang, pong Juan tsokuaein, tang Nakom pía pepa pexeña tómara tatsi ichaxota jinompa pomonae peantobéwichi Nakom. Bárapo tómara pena Jerusalén tómara, po tómara Nakom pía xaiña wétsika tatsi pona xua itaboko wétsika. Bárapo tómara nakuixaxainchiya weta, icha yábüyo ichi xua poxonae nakuixaxainchiya weta xua poxonae pekotsiwa perüünakoyobina. ³Jumetang pejume xua peitaboko wétsika jumedangweya jeye: “Taema ánoxuae Nakom pópona pebíwitha. Nakom barü poponaena, bara barapomonae Nakom pijimonae tatsi tsane. Nakom ataya tsitekaeya barü poponaena barapomonae penakana exanaexae xua piamonae tatsi pía Nakom tatsi. ⁴Barapomonae Nakom itakuere mene kanotsina xua pewekoyeixae, xua barapomonae ekeicha jopa peatenewa tsane. Ekeicha jiwi jopa wérapae tsane bárapo petüpáe koyenewatha. Matáütano jopa pewekoyeinexa tsane, tsipéi xua xuang kopiya éxana po írathe býatha aichurukuaeya nakaewita”, jei pojume xua itaboko wétsika paeba.

⁵Bapong Nakom pong eka pía pexeña peekaethopáewatha nejéi: “Taema daxita éxanang xua xuang penawang”, nejéi Nakom. Ekeicha nejéi: “Baxuang tínare, tsipéi bárapo jumein pexaiñéi jumein, daxota ichamonae itaküüpatsi xua tana neyábara jumekowüntsiwa xua bara exanaein pokotsiwa xua táneme”, nejéi Nakom.

⁶Bapoxonae ekeicha nejéi: “Bara baxuang býatha nakuiweta. Xang pongxaein ápara ataya tsitekaeya tapoponaein xua poxonae aena daxita tamrópata pítabang. Matáütano béxano ataya tsitekaeya bara tapoponaewa tsane. Po pebin xua bichokono meratsipa xua daxota bara amanaya mera neapatsiwa bárapo koyenewa icha be ichin poxonae jiwi yawenang. Pong xua bejüntükoyene jíchat-si xua ajüntükoyeneyapusüü peexanáewatsi bara bapong amanaya katsin peajüntükoyeneyapusüüwa, po peajüntükoyeneyapusüüwa xua ataya tsiteka. ⁷Pong xua jüntükoyene amanáyaba kaurimonae poxonae kaurimonae bekein abe éxana bapongtha, bapong xeinaena pokotsiwa be pentoma pokotsiwa xua býatha jüntüna jebang bapong. Barapong pía Nakom tatsin tsane yawa barapong ápara bara taxanto tsane. ⁸Íchitha pomonae pijunuwi jopa nejumekowüntsiyo xua ichamonae abe peexanaewa tsane barapomonaetha írürü pomonae jopa benejumekowüntsiyo, írürü pomonae peajüntükoyenebewi, írürü pomonae jiwi pejutebiwi, írürü pomonae xua penasikui-exanaewi xua peweiweinaewa, írürü pomonae mara

pexeinaewi írürü pomonae wüünae pejainchiwi ibo nakom, írüno pomonae naera-biya pepaebiwi, daxita barapomonae bebái tsainchi ishoto púkuatha po púkuatha ichaxota ataya tsitekaeya taxungkua xua bichokono aitareyapusüü tsungkuae po péitare pewüng azufre matawüng. Bárapo petüpáe koyenewa ápara xua poxonae ekeicha jiwi kaewa werapaena pomonae pejumekowüntsiwi”, jei Nakom pong eka pía pexeña peekaethopáewatha.

Meje yábara po diwesi xua pena Jerusalén tómara

⁹Bapoxonae matatsunpin patopa pong xua siete póyobe jíwana, po siete póyobe matatsunpiwi xua xeina korotong siete xóyobe xua wünba peabe kui-rukoyenewang xua bara nama opidukua pokotsiwa Nakom exanaena. Bapong nejéi: “Anetha katsita-itüütsinchi Cordero pekotsiwa tatsi xua bara yatsikaya píowa tatsi”, jei matatsunpin. ¹⁰Tana netsita-itüütsíwatha xua poxonae Nakom pía Pejumopetünaxü tatsi netsita-itüüta bapoxonae matatsunpin nekápona pin demuxuwa beya po demuxuwa xua bichokono taücha. Yáwano baxotiya matatsunpin netsita-itüüta Nakom pía pepa pexeña tómara tatsi ichaxota jinompa pomonae peantobéwichi Nakom. Bárapo tómara pena Jerusalén tómara, po tómara Nakom pía xaiña wétsika tatsi pona xua itaboko wétsika. ¹¹Bárapo tómara bichokono wüünae xua pentha exanungkua Nakom pía pexeña itúpanae koicha tatsi, tsipéi Nakom baxota pópona. Bárapo pepentha tsungkuae koichawa bichokono daedaena icha iboto ichi xua po iboto itúpana po iboto ira бүxüpana iboto. Barapókotsi itúpanae iboto jaspe matawüng, po iboto xua epanasaba. ¹²Bárapo Jerusalén tómara yakaincha matawakaichiya úngkuatsi xua pokotsiwa be kurara xua ü ibo xua bichokono amüxübürütiyüü xuano xua bichokono taücha. Yáwano xeina doce pokoibótobe. Daxita bárapo koibótongtha tsíniya umena matatsunpiwi, xua be kaein tsíniya. Bárapo koibótongtha tsitsíniya wüngdudubenapoiña Israel pía pemómoxi susato bicheitong tatsi. ¹³Matáütano akoibi pokoibótobe dukua ichaxota pokotsiwa xometo weekoina. Icha akoibi koibótobe dukua ichaxota pokotsiwa xometo bejopiya. Yáwano epataüta dena aiña akoibibe pokoibótobe nantiya dúkuabe. ¹⁴Yáwano bárapo kuráratha ira wétsina umena ibótong. Bárapo ibótong doce po ibótongbe xua bárapo ibótongtha tsíniya wüngdubena pewüngxi xua doce póyobe pomonae Cordero pía peitorobi jiwi tatsi.

¹⁵Bárapo matatsunpin, po matatsunpin netsipaeba, bapong kapatopa pokotsiwa xua pekakanaübiwa xua be naewa xua oro nainto peepakanaübinexa tómara yawa pekoibotong yawa kurara. ¹⁶Tómara nantiya namüxübürü júpabe xua apiya dena. Bárapo matatsunpin epakanaübarena bárapo tómara dos mil doscientos po kilómetrobe xeina xua apiya dena yawa xua taücha xua asiyeicha daxita baxuang nantiya naépa júpa. ¹⁷Bapoxonae epakanaüba kurara müxübürü sesenta y cinco po métrobe xeina xua pemüxübürü xua aitiyüü. Baxuang matatsunpin éxana be jiwi pía pekanaübiya koyenewa tatsi.

¹⁸Kurara ibótong ü xuang pexeña ibótong, xua ira бүxüpana ibótong xuang jaspe matawüng. Tómara ákaba ü xuang pokotsiwang oro matawüng be xuang peepanasabiwang. ¹⁹Po ibótong ira weumeina xua doce po ibótongbe, daxita matapepena xua matawüünae éxana icha be ibótong ichi pókotsi ibótong aiña matomang.

Po iboto kopiya bárapo iboto matapepena xua jaspe ibótong matawüing.

Po iboto ichaxota ba “dos”, jei,

bárapo iboto matapepena xua zafiro ibo matawüing.

Po iboto ichaxota ba “tres”, jei,

bárapo iboto matapepena ágata ibo matawüing.

Po iboto ichaxota ba “cuatro”, jei,

bárapo iboto matapepena esmeralda ibo matawüing.

²⁰ Po iboto ichaxota ba “cinco”, jei,

bárapo iboto matapepena ónice ibo matawüing.

Po iboto ichaxota ba “seis”, jei,

bárapo iboto matapepena cornalina ibo matawüing.

Po iboto ichaxota ba “siete”, jei,

bárapo iboto matapepena crisólito ibo matawüing.

Po iboto ichaxota ba “ocho”, jei,

bárapo iboto matapepena berilo ibo matawüing.

Po iboto ichaxota ba “nueve”, jei,

bárapo iboto matapepena topacio ibo matawüing.

Po iboto ichaxota ba “diez”, jei,

bárapo iboto matapepena crisoprassa ibo matawüing.

Po iboto ichaxota ba “once”, jei,

bárapo iboto matapepena jacinto ibo matawüing.

Po iboto ichaxota ba “doce”, jei,

bárapo iboto matapepena amatista ibo matawüing.

²¹ Bárapo doce po bóupangbe éxana ü xuang be perla matawüing xua daxita barompaya peboupang tsíniya. Bárapo pepa namto xua tómaratha éxana ü pokotsiwa xua xuang be oro naintong xua xuang peepanasabiwang poxoru xua be pepa oro naintong.

²² Bárapo tómaratha jopa taeiño Nakom pin píabo tatsi tsipéi bara Nakom baxota pepoponaexae po Nakom daxita pía peayapusúü itorobi koyenewang xeina. Írürü xua baxota pepoponaexae Cordero daxota jopa nantawenonaeyo Nakom pin píabo tatsi. ²³ Bárapo tómara jopa nantawenonaeyo xometo xua tómara pentha peexanaewa tsane yáwano xua jomokóichatono, tsipéi Nakom baxota pópona peyakoichajinaexae xua barompaya pía pexeiña pekóichaxae tatsi, xuano írürü xeina Cordero bárapo koicha. ²⁴ Pomonae xua báyatha Nakom kapanenebiya, barapomonae bárapo kóichatha ponaena bárapo tómaratha po koicha Nakom pía koicha. Daxita pomonae jiwi itorobiya pía pepa peewatsíwichi barapomonae Nakom katsibinchi bárapo tómaratha pokoyene xua Nakom wüünae pejainchíwatsi pokoyene xua tsita éxanatsi xua báyatha jiwi tsita éxana barapomonaetha. ²⁵ Peboupang jopa bápana koiboxatababanobi matakeitha, xua baxota jopa ataya tsitekaeya pekiréi tsaibi tsouniebixae. ²⁶ Daxita nakuangpiwi Nakom kápona bárapo tómaratha xua Nakom pekatsibiwa tsainchi pokotsiwang pewüünaewang xua be kopei. Matáütano Nakom kátatsi pokoyene xua Nakom wüünae pejainchíwatsi. ²⁷ Íchitha xua xuang peabe koyenein bápana jopa patsi tsane bárapo tómaratha. Matáütano jopa patsi tsane baxota pomonae abe peexanaewi írürü pomonae pemuxuitorobiwi. Saya meisha patsina baxota pomonae wüingdubena po diborotha ba jiwi nakapanenébiya tsaibi poxonaewüingdubéibatsi baxota, xua po díboro xeina Cordero.

22¹Néxata matatsunpin netsita-itüüta mene, po mene xua mene itarana, po mene xua jiwi axumerasüü éxanatsi, xua icha Nakom ichi xua jiwi ajüntükoyeneyapusüü éxanatsi. Bárapo mene bichokono mene itarana icha bosibü ichi xua epanasaba, baxua xua Nakom pía pexeña peekaethopeibiwa wérena pona, yáwano xua Cordero pía pexeña peekaethopeibiwa tatsi wérena pona. ²Bárapo mene, mene dukuaponarena pepa namto dena tómaratha. Bárapo mene dena nantiya aiña muxunene dénabe naein xuwa xua po naein jiwi ajüntükoyeneyapusüü exainchi. Bárapo naein nakoiteiba doce pokuíyobe xua kae weitha. Daxita xometongtha nawetouneiba. Bárapo naein noxutong jiwi yawénatsi xua jüntema pejinompaewa xua jopa peatenewa. ³Bárapo tómaratha jopa xeináe tsane xua peabe koyenein. Bárapo tómaratha ungkuaena Nakom pía pexeña peekaethopeibiwa tatsi irü baxota ungkuaena Cordero pía pexeña peekaethopeibiwa tatsi. Pomonae Nakom pía petanakuichiwichixaetsi bárapo tómaratha barapomonae Nakom wüünae jainchinchí. ⁴Bapoxonae jiwi Nakom itabara taeya kueikueijeí tsainchi. Barapomonae peitapatha kainompaena Nakom pewüng tatsi. ⁵Bárapo tómaratha ataya tsitekaeya jopa kirei tsounae tsaibi tsane. Pomonae baxota jinompa jopa nantawénonae tsane pekoicha xua dámpara koicha xuano xua xometo kóichano. Daxota jopa nantawenonaeyo tsipéí Nakom pong jiwi Pekanamataxeinaein baxota pópona, barompaya pía pekoicha peyakoichajinae-xae xua pía pepongtha. Irü pomonae baxota jinompa jiwi itorobiya ewatsinchí xua ataya tsitekaeya tsane.

**Meje yábara po diwesi xua Jesucristo poxonae
patopeikaena xua imoxoyo bara nama**

⁶Bapoxonae ekeicha matatsunpin nejéí: “Bárapo jumein pexaiñéí jumein. Daxota ichamonae itakúüpatsi xua tana neyábara jumekowüntsiwa xua bara exanaein pokotsiwa xua táneme. Pong jiwi Pekanamataxeinaein bapong Nakom itoroba pía Pejumopetünaxü tatsi xua jiwi peyawenaewa tsainchi xua poxonae jiwi kueikueijeí Nakom nexa. Yáwano Nakom itoroba pía matatsunpin xua petsita-itüütsinexa pomonae pía penakajume kaitorobí diwesi tatsi petakueikueijeichiwichi xua bárapo matatsunpin barapomonae yábara petsipaebinéxatsi pokoyene Nakom imoxoyo exanáenaba”, nejéí.

⁷Ekeicha matatsunpin nejéí xua saya Jesús tapáebatsi, jeye: “¡Bara nama imoxoyo patopeikang! ¡Jüntükoyene weiweinaena pong xua éxana xuang pokotsiwang Nakom ichichipa xuang pokotsiwang paeba po diborothe!” jei bárapo matatsunpin xua Jesús tapáebatsi.

⁸Xang, pong Juan tsokuaein, tang daxita baxuang yáwano jumetang. Poxonae báyatha jumetang, yawa xua báyatha tang xua pokotsiwang matatsunpin netsita-itüüta, bapoxonae bapong petáxutha írabe taeungkuarekang xua wüünae tajainchinexa bapong. ⁹Íchitha bapong nejéí: “¡Bara! Jopa baxua neexanaeinde. Ápara xang pongxaein taexanaein Nakom piáwa tatsi, icha xam ichim yawa icha pomonae jiña jiwimonae ichi, pomonae Nakom peitorobi jume pepaebiwi, írúno pomonae xua jumekowünta dubenanáebiya daxita pokoyenein xua po diborothe tinang. Jame Nakom bapong wüünae jainde”, nejéí matatsunpin.

¹⁰Yáwano nejéí: “Jopa moya yawüngxeinaeinde Nakom Pejume Diwesi, xua xuang pokotsiwang paeba po diborothe. Tsipéí imoxoyo nama Nakom exanaena

xua pokotsiwang po diborothe pepaebixae. ¹¹Poxonae kataunxuae Nakom jopa wetsiyo, pong xua abe peexanaein, bü moya bara abe éxana dukuanaebiya. Irü pong xua nanthükoyene xeina peakuirukoyenebewang, bü moya bara baxuang nantaxeina dukuanaebiyaena. Íchitha pong wüünae éxana Nakom nexa, bü moya éxana dukuanaebiya. Pong xua Nakom petsita-naexanáewatsi xua penthüthü xeikaein penaexanaewa, bü moya bara Nakom jumekowünta dukuanaebiyatsi”, nejéi.

¹²Bapoxonae Jesús jeye: “Aa, bara nama imoxoyo patopeikaein. Kapatopeikaein pokotsiwang be pentomang, xua kaeintha barompaya piáwang katsibin. Pong xua nawita inta éxana xuya nawita katsin. Pong xua be kónotha inta éxana xuya be kónotha katsin. ¹³Xang pongxaein ápara ataya tsitekaeya tapoponaein xua poxonae aena daxita tamrópata pítabang. Matáütano béxano daxita koyenein wetsin tsipéi ataya tsitekaeya bara tapoponaewa tsane”, jei Jesús.

¹⁴Jüntükoyene weiweinaena pomonae najüntükoyene kuibarapenta peabe koyenewang. Baxuang be poxonae barapomonae pía paparuwang matánaka xua jopa tsoreiyo. Bapoxonae barapomonae itaküüpaeinchi xua jojoniyaena tómarara koiboto iya tsipéi pía paparuwang íñapana yawa jüntükoyene wüünae. Yawa barapomonae itaküüpaeinchi xua tómaratha iya xaena po pethéi pexaewa, po pethéi jiwi ajüntükoyenesüü exainchi. ¹⁵Íchitha nama aishówatha xua tómarara júmatha umenaena pomonae peajüntükuirukoyenebewi írürü pomonae mara pexeinaewi. Yáwano pesátotha umena pomonae penatasiwaxeinaewi yabüxitha, írüno pomonae jiwi pejutebiwino, írüno pomonae ibo nakom wüünae pejainchiwi. Daxítano pomonae bekuijíchatsi xua naerabiya pepaebiwi xua naerabiya éxanano, barapomonae pesátotha umenaena.

¹⁶Ekeicha Jesús nejéi: “Xang, pong Jesús, itorobang tamatatsunpin xua daxita baxuang pepaebinexa pomonaetha, pomonae pejumekowüntsiwi. Xang bara yatsikaya David pía pemómoxi susato jiwi jíwanapin tatsin, pong David Israel nakuapiwi itorobiya pía pepa peewatsinchi tatsi. Icha be jarawato ichi poto xua bichokono wüünae xua poto baya ekoina poxonae icha matakabi patopa, xang barichin. Patopang takapatopaenexa jíwitha pokoyene xua bichokono wüünae pokoyene xua Nakom tsiéxana, xua jiwi tsiéxanatsi”, nejéi Jesús.

¹⁷Nakom pía Pejumopetünaxü tatsi, irü Cordero pía pekotsiwa tatsi, pomonae Nakom pía pejumekowüntsiwichixaetsi, jeye Jestustha: “Anetha”, jei Nakom pía Pejumopetünaxü tatsi irü Cordero pía pekotsiwa tatsi. Pomonae xua írürü jumetane, jeye: “Anetha”, jei. “Xang Juan páebang pong xua meratsipa yawa beapaena, moya antha, bü apa po mera jiwi ajüntüyapusüü exainchi xua saya amanaya nexa”, jang.

¹⁸Daxita pomonae xua jumetane bárapo diwesi xua Nakom Pejume Diwesi xua bárapo diborothe tinang barapomonae tsipaebang, meje baxue: Icha ichüng mataropeicha paeba icha diwesi xua jopa xaiñeyo xua po diwésithe, bapoxonae bapongtha Nakom itorobina peabe koyenewang be pókotsi koyenekuirung yábara kaunuta po diborothe. ¹⁹Icha ichüng jíwana jumewexuba xua po diborothe paeba, xuya Nakom pía diborotha wüngxubina, po diborotha jiwi nakapanenébiya tsaibi poxonae wüngdubéibatsi baxota. Yáwano Nakom jopa kopatsiyo xua bapong pepatopaewa Nakom pía pepa pexeina tómaratha tatsi po tómarara pena tómarara ichaxota jinompa pomonae peantobéwichi Nakom. Bárapo pekapanenebiya koyenewa irü bárapo tómarano bárapo diborothe yábara tina.

²⁰Jesús pong pía matatsunpin peitorobixae xua bárapo matatsunpin yábara tana netsipáebiwa pokotsiwa xua bexa exanaena, bapong nejéi: “Aa, bara nama imoxoyo patopeikaein”, jei.

Je, moya anetha patopeinka xam, Jesús, pongxaem Tanekanamataxeinaem, jang.

²¹Jesucristo, pong jiwi Pekanamataxeinaein, bárabü paka yawenaena pía paiña nepaka kaantobexae daxita paxam. Je bara ichi tsane.

Baja Juan.

Pojumexi Xua Jopa Yaputaetsi

Vocabulario

- altar** Pokotsiwa “altar”, jei, báraxua be xua pexaethopaewa. Barapokotsiwa xua “altar”, jei, aiña koyeneintha exaneiba xua saya ibo exaneiba xua baraxota Nakomtha pewüükeibinexa. Icha altar matawüingtha ichikuitha duwéi baraxota jutebeiba xua petautsinexa Nakom nexa, po Nakom pepa Nakom, ichikuitha xua petautsinexa Nakom nexa, po Nakom jopa xaiñeyo.
- amalecitas** Pomonae “amalecitamonae” baraichi, ápara barapomonae Esaú pía pemómoxi susato jiwi tatsi. Bapong Esaú pong Isaac pexanto tatsi. Barapomonae amalecitamonae jinompa ichaxota “sur”, jei, xua ichaxota Canaán nakua, xuano xua baraxota ichaxota demuxuwa eka po demuxuwa pewüing Sinaí. Barapomonae amalecitamonae, Israel pía pemómoxi susato jiwi tatsi yótabatsi poxona Egipto nakua weya pona, amalecitamonae yótaba. Nakom kaseba, amalecitamonae kasébatsi. Daxota Nakom itoroba Israel pía pemómoxi susato jíwitha tatsi xua daxita amalecitamonae pejutebíwatsi.
- amonitas** Pomonae “amonitamonaē” baraichi, ápara barapomonae Ben-ammi pía pemómoxi susato jiwi tatsi. Bapong Ben-ammi pong Lot pexanto tatsi. Barapomonae amonitamonaē jinompa ichaxota “oriente”, jei, xua ichaxota Jordán mene, xuano xua ichaxota ánoxuae pewüing Jordania nakua. Nakom jopa kopatsiyo xua Israel pía pemómoxi susato jiwi tatsi pejíwana pichiwa tsane ira xua amonitamonaē pía ira tatsi. Íchitha barapomonae amonitamonaē Israel pía pemómoxi susato jiwi tatsi yábara kanantanaxeinébatsi xua ápara barapomonae peita aenaenéi jiwi.
- amorreos** Pomonae “amorreomonaē” baraichi, ápara barapomonae cananeomonaē yajiwi. Daxita cananeomonaē ápara Cam pía pemómoxi susato jiwi tatsi. Bapong Cam pong Noé pexanto tatsi. Barapomonae amorreomonaē jinompa Canaán nákuatha, yáwano icha muxunénetha jinompa xua ichaxota “oriente”, jei, xua Jordán mene, xuano xua ichaxota ánoxuae pewüing Jordania nakua. Barapomonae amorreomonaē abe koyeneya exaneiba, daxota Nakom wekobepita ira, yáwano kata bárapo ira Israel pía pemómoxi susato jíwitha xua amorreomonaē pejutebíwatsi.
- árabes** Pomonae “árabemonaē” baraichi, ápara barapomonae Ismael pía pemómoxi susato jiwi tatsi. Bapong Ismael pong Abraham pexanto tatsi. Barichi barapomonae árabemonaē, ápara barapomonae Abraham pía pexui tatsi pía pemómoxi susato jiwi tatsi, po pexui ichowa itakatainchi xua powa kotakaya. Madianitamonaē, ápara barapomonae árabemonaē yajiwi. Barichi powa Sabá nakua itorobiya peewatsiwa, powa xua icha matakeitha Salomón siwapoinchi pong nakua itorobiya peewatsin, barapowa irü árabemonaē yajiwiwayo.
- asírios** Pomonae “asiriomonaē” baraichi, ápara barapomonae Asiria nakuapiwi. Bárapo Asiria nakua po nakua eka ichaxota “norte”, jei, xua ichaxota

imoxoyo Irak nakua. Barapomonae Asiria nakuapiwi bichokono pedangwéi jiwí náexana. Báraxua éxana poxonae Judá nakua irü Efraín nakua nawepu tsátabe xua seikaya aiña nákuabe penaexanaenéxabe. Barapomonae Asiria nakuapiwi éxana xua Efraín nakua werawéraka.

Baal Pong “Baal” baraichi, ápara bapong Nakom po Nakom jopa xaiñeyo. Bárapo Nakom Canaán nakuapiwi irü Tiro tomarapiwi wüünae jainteiba. Barapomonae yábara jumekowünta, xua ápara bárapo Nakom pong xua pexaewang wüünaeta xuwa éxana. Barapomonae wüünae jainteiba Baal. Matáütano barapomonae kenta exaneiba yábüxi powaxi pesikuiweiweináewaxi, powaxi xua jinompeiba Baal piabongtha tatsi. Barapomonae báraxua exaneiba xua poxonae jutebeiba duwéi xua be ofrenda matawüing xua Baal nexa. Barichi pebiwi kenta exaneiba icha pebíwitha po pebiwi jinompeiba Baal piabongtha tatsi. Barichi barapomonae pía pexui ichikuitha jutebeiba xua be ofrenda matawüing xua Baal nexa.

Basán Xua “Basán”, jei, ápara nákuíyo, po nákuíyo tsiki nákuíyo, po nákuíyo eka ichaxota “noreste”, jei, xua ichaxota imoxoyo Canaán nakua, xuano xua ánoxuae eka ichaxota “sur”, jei, xua ichaxota imoxoyo Siria nakua. Ichamonae baraxota jinompa pomonae amorreomonae. Israel pía pemómoxi susato jiwí tatsi yótaba, amorreomonae yótabatsi. Matáütano Israel pía pemómoxi susato jiwí tatsi irang kaibeba barapomonaetha.

brea Xua “brea”, jei, ápara xua anainkuito xua jerang pekatsabiwa pejuma weya, xuano xua barichino po naein xua pin naein xua jopa pejujuwiwa tsane.

caldeos Pomonae “caldeomonae” baraichi, ápara barapomonae Caldea tomarapiwi. Bárapo Caldea tómará eka ichaxota “sur”, jei, xuano xua ichaxota ánoxuae pewüing Irak nakua. Caldea nakuapiwi bichokono pedangwéi jiwí náexana. Báraxua barapomonae éxana xua poxonae Asiria nakuapiwi werawéraka éxana Efraín nakua. Barapomonae Caldea tomarapiwi daxita werawéraka éxana Judá nakua. Matáüta barapomonae teikeba ichamonae, yawa kaponébano Babilonia tómará beya xua pepa tómará xua Caldea nakua.

camello Pong “camello”, jeichi, ápara pong xua pejumakaeneikaewa. Icha nákuangtha barapókotsi caméllongtha jota xua xuang arewe. Báraxua yábara paeiba ichaxota “Antiguo Testamento”, jei. Xua tajüicha imoxoyo xeina be aiña po métrobe. Pejúmátha xeina xua jumatóroka, ichikuitha kaewa, ichikuitha aiñáwabe. Petaxún bichokono taxudangwéi xua jopa taxujojonekaeyo taetówatha. Barapong itakúüpatsi xua jopa penabanaewa, yáwano aiña matakabin kuinaya jopa apaeyo mera.

cananeos Pomonae “cananeomonae” baraichi, ápara barapomonae Cam pía pemómoxi susato jiwí tatsi. Bapong Cam pong Noé pexanto tatsi. Barapomonae cananeomonae jinompa Canaán nákuátha, xuano xua icha írangtha xua po irang imoxoyo ena. Barapomonae abe koyeneya exaneiba. Pokoyenein xua barapomonae jumekowünta, xua barapomonae bara itakúüpatsi xua kenta peexanaewa yábüxi, powaxi xua pesikuiweiweináewaxi. Barichino xua barapomonae bara itakúüpatsi xua pebiwi kenta peexanaewa icha pebíwitha, po pebiwi jinompeiba nakomüing piabongtha tatsi, po nakomüing xua barapomonae pía nakomüing tatsi, po nakomüing jopa xaiñeyo. Íchitha barapomonae pía pexui jutebeiba xua be ofrenda matawüing xua pía

nakomüng tatsi nexa. Daxota Nakom kata irang Israel pía pemómoxi susato jíwitha tatsi, po ira xua barapomonae pía irang tatsi. Matáütano Nakom itoroba Israel pía pemómoxi susato jíwitha tatsi xua pejutebiwa tsane xua pejutebiwa tsainchi cananeomonae.

candelabro Xua “candelabro”, jei, ápara xua pokotsiwa aiña maxüng xeina, xuano xua baxota itanakajeba penasiwang xua peyonoyoneinexa.

ceneos Pomonae “ceneomonae” baraichi, ápara barapomonae madianitamonaе yajiwi. Barapomonae ceneomonae pomonae xua ichikuitha tsaibi xua kaemonae naexaneiba Israel pía pemómoxi susato jíwitha tatsi poxonae naba exaneiba ichamonaetha.

cusitas Pomonae “cusitamonaе” baraichi, ápara barapomonae Cam pía pemómoxi susato jiwi tatsi. Bapong Cam pong Noé pexanto tatsi. Barapomonae cusitamonaе jinompa ichaxota po ira pewüng “Cus”, jei. Ánoxuae bárapo ira pewüng “Etiopia”, jei. Bárapo ira eka ÁFRICA nákuatha ichaxota “sur”, jei, xua imoxoyo Egipto nakua.

edomitas Pomonae “edomitamonaе” baraichi, ápara barapomonae Esaú pía pemómoxi susato jiwi tatsi. Bapong Esaú pong Isaac pexanto tatsi. Barapomonae edomitamonae jinompa ichaxota “sureste”, jei, xua imoxoyo ichaxota Canaán nakua. Ánoxuae bárapo ira pewüng “sur”, jei, xua ichaxota “Jordania nakua”, jei. Nakom jopa kopatsiyo xua Israel pía pemómoxi susato jiwi tatsi pejíwana notsiwa tsane irang xua edomitamonae pía irang tatsi. Íchitha barapomonae edomitamonae Israel pía pemómoxi susato jiwi tatsi yábara kanantanaxeinéibatsi xua ápara barapomonae peita aenaenéi jiwi.

Egipto Xua “Egipto”, jei, ápara nakua. Egipto nakua bárapo nakua eka ichaxota “noreste”, jei, xua ÁFRICA nákuatha, xuano xua ichaxota imoxoyo Canaán nakua. Kaena báyatha aiña wei, Egipto nakuapiwi bichokono pedangwéi jiwi náexana. Barapomonae Egipto nakuapiwi busikuitaetaeyeba, Israel pía pemómoxi susato jiwi tatsi busikuitaetaeyebébatsi. Íchitha Nakom yawena xua Israel pía pemómoxi susato jiwi tatsi panenebiya.

Elam Xua “Elam”, jei, ápara nakua. Bárapo nakua, Elam nakua, po nakua kaena báyatha eka ichaxota ánoxuae “sur”, jei, xua ichaxota Irán nakua. Jiwi xua Elam nakuapiwi, barapomonae matawüng dútatsi “elammonae”, jei.

filisteos Pomonae “filisteomonae” baraichi, barapomonae jinompa ichaxota “suroeste”, jei, xua imoxoyo Canaán nakua. Barapomonae filisteomonae yábara kanantanaxeinéibatsi xua barapomonae pomonae kaena báyatha petunaetopiwi potunaeto pewüng Creta. Ichamonaе filisteomonae kaena báyatha jinompa Canaán nákuatha poxonae Abraham pópona. Barapomonae Canaán nákuatha ekeicha bichokono pinmonae papatapona poxonae kataunxuae irü Israel pía pemómoxi susato jiwi tatsi jinompa Egipto nákuatha. Bara kaena barapoxonae weya, Israel pía pemómoxi susato jiwi tatsi poxonae Egipto nakua weya pona ita-aenaenei cheibichi, xua filisteomonae ita-aenaenei.

gobernador Pong “gobernadormonaepin” baraichi, ápara pong kanamata itoroba po ira jíwana ichaxota pepa nakua. Bapong pong “gobernadormonaepin” baraichi, barapong jopa barichichi xua poxonae icha kana ichichi pomonae nakua itorobiya peewatsiwi. Pong ba “gobernadormonaepin”

baraichi, bapong ba yábara nabotaba éxanatsi ichamonae xua gobernadormonaepin penaexanaenexa. Ichikuitha bapong ba saya itapétatsi xua gobernadormonaepin penaexanaenexa. Barapokotsin ápara jopa gobernadormonaepin exanaetsi xua koxiyüng býatha penaexanae-xae gobernadormonaepin. Kaena býatha poxonae aena kopiya, poxonae ichüng gobernadormonaepin éxanatsi, jame pong nakua itorobiya peewatsin piakoya itapeta.

griegos Pomonae “griegomonaes” baraichi, barapomonaes jinompa Grecia nákuatha. Bárapo nakua, Grecia nakua eka ichaxota “sureste”, jei, ichaxota imoxoyo Europa nakua. Barapomonaes griegomonaes bichokono pedangwéi jiwi náexana xua poxonaes býatha jinompa persamonae. Matáütano barapomonaes griegomonaes bichokono dangweya kanamataxeina aiña irang ichaxota jinompa Israel pía pemómoxi susato jiwi tatsi.

heteos Pomonae “heteomonaes” baraichi, barapomonaes kaena býatha bichokono pedangwéi jiwi náexana. Barichi, poxonaes Moisés pópona barapomonaes kaena býatha bichokono dangweya kanamataxeina ichaxota po nakua ánoxuae pewüng Siria nakua. Ichamonae xua heteomonaes kaena býatha jinompa Canaán nákuatha. Heteomonaes ápara barapomonaes yajiwi, pomonaes býatha pía irang tatsi Nakom kata Israel pía pemómoxi susato jíwitha tatsi.

idumeos Pomonaes “idumeomonaes” baraichi, ápara barapomonaes pomonaes edomitamonae baraichi. Barapomonaes bárapo wüng wüngdútatsi, poxonaes jumeyapukaewa xua paeba dubenanáebiya xua jei: “Antiguo Testamento”, jei. Juan Hircano, pong nakua itorobiya peewatsin, bapong itorobeba, xua idumeomonaes itorobébatsi xua wüünaes pejainta dubenanaebiyaenexa Nakomtha ichi Israel pía pemómoxi susato jiwi tatsi ichi.

impuesto Xua “impuesto”, jei, xua ápara pebaxu, po pebaxu xua gobiernomonaes dangweya wüüka jíwitha xua jiwi bewa katsina xua daxota bárapo gobiernomonaes beta nakua éwata. Ichikuitha bárapo gobiernomonaes yawena icha tómaratha xua puesto de salud nexa, yawa namtong xua xaneba.

incienso Xua “incienso”, jei, xua ápara penain xua tuxuéi, xua xuang túxusi bénata poxonaes tauta. Bárapo incienso nain sacerdotemonaes tauteiba xua be ofrenda matawüng xua Nakom nexa. Báraxuang sacerdotemonaes tauteiba Nakom piabotha.

jebuseos Pomonaes “jebuseomonaes” baraichi, ápara barapomonaes cananeomonaes yajiwi. Barapomonaes, pomonaes cananeomonaes, Cam pía pemómoxi susato jiwi tatsi. Barapong Cam pong Noé pexanto tatsi. Barapomonaes cananeomonaes jinompa Canaán nákuatha ichaxota imoxoyo Jerusalén tómara. Barapomonaes cananeomonaes abe koyeneya exaneiba bichokono. Daxota barapomonaes cananeomonaes pía irang tatsi Nakom kata Israel pía pemómoxi susato jíwitha tatsi. Matáütano Nakom itoroba Israel pía pemómoxi susato jíwitha tatsi xua cananeomonaes pejutebíwatsi.

Jerusalén Xua “Jerusalén tómara”, jei, ápara bárapo tómara pepa tómara xua Judá nákuatha.

jubileo Xua “jubileo”, jei, ápara xua wei. Xua jubileo wei yábara paeba, báraxua ápara tsaibi xua poxonaes cincuenta po weibe othopeiba. Israel pía pemómoxi susato jiwi tatsi bewa bárapo cincuenta weitha pía irang itompa exanáe

xua jopa peübiwa. Matáütano bárapo cincuenta po weibetha Israel pía pemómoxi susato jiwi tatsi bewa saya pukopabina pía pebusikuitaetaeyebebí jiwi pomonae xua irü Israel pía pemómoxi susato jiwi tatsi. Barichino bárapo cincuenta po weibetha, Israel pía pemómoxi susato jiwi tatsi bewa irang kaewa katsibeibina pomonaetha, pomonae xua kaena báyatha bárapo irang kopiya xeineiba xua poxonae komokéibatsi bárapo irang.

juez Xua pong “juezmonaepin” baraichi, ápara pong ba jumenaitáewata poxonae nakuéyatabe pongbe yábara najumematsontsónobabe pokotsiwa jopa wüünaeyo. Daxota barapong ba jumenaitáewata pokotsiwa bapongbe yábara najumematsontsónobabe pía yábara paebichi pong xua xaniwaicha paeba pokotsiwa bapongbe yábara najumematsontsónobabe. Ichikuiitha gobernadormonae itapeta juezmonae xua peexanaenexa pokotsiwa ba éxana pomonae juezmonae. Kaena báyatha poxonae Israel pía pemómoxi susato jiwi tatsi yábara amanáyaba Canaán nakua, barapomonae saya xeina juezmonae pekanamataxeinaenexa piamonae. Bárapo juezmonae ápara pomonae báyatha Nakom itapeta. Daxota Nakom itapeta barapomonae xua xaniwaicha pekanamataxeinaenexa piamonae, matáütano xua barapomonae petsipaebinexa jíwitha xua barapomonae kueikueijei pokotsiwa xua Nakom ichichipa.

levita Pomonae xua “levitamonaepin” baraichi, ápara barapomonae Israel pía pemómoxi susato jiwi tatsi, pomonae xua Leví pía pemómoxi susato jiwi tatsi. Bapong Leví pong Jacob pexanto tatsi. Daxota bárapo Israel pía pemómoxi susato jiwi tatsi levitamonaepin baraichi. Moisés irü sacerdotemonae pomonaexae irü Israel pía pemómoxi susato jiwi tatsi, barapomonae pía pamo susato jintong barompa pong pewüing Leví. Nakom itapeta levitamonaepin xua peyawenaenexa, xua sacerdotemonae peyawenaenéxatsi, poxonae Nakom tanakuítatsi.

lino Xua “lino”, jei, ápara xua linonaeyo matawüing. Bárapo linonaeyo matawüing jiwi piabongtha athawétsika ebeiba ichaxota matatupa pereká. Báraxua exaneiba xua poxonae tsewa pacheteiba xua paparuwang peexaneibinexa.

madianitas Pomonae “madianitamonaepin” baraichi, ápara barapomonae Abraham pexanto tatsi pía pemómoxi susato jiwi tatsi, po pexanto xua píowa itakatainchi ichowa, powa kotakaya. Barapomonae madianitamonaepin jinompa ichaxota po ira ira tsewa nawita ichaxota “sur”, jei, yáwano ichaxota “oriente”, jei, xua Canaán nakua wérena. Moisés kaena báyatha napópona madianitamonaetha poxonae naetsirikua Egipto nakua weya. Íchitha pírapae icha weitha barapomonae madianitamonaepin, Israel pía pemómoxi susato jiwi tatsi ita-aenaenei cheibichi.

maná Xua “maná”, jei, ápara pexaewa. Bárapo maná pexaewa matawüing Nakom taitorobika itaboko wétsika Israel pía pemómoxi susato jiwi tatsi nexa ichaxota irasaina xuépana tsúrukuae nákuatha xua poxonae pona Canaán nakua beya. Barapomonae daxita baya tsaibi noteiba. Maná bichokono xeika, icha be xua poxonae galleta banto mera múxuna kaxane.

medos Pomonae “medomonaepin” baraichi, ápara pomonae jinompa Media nákuatha. Bárapo nakua, Media nakua eka ichaxota “norte”, jei, ichaxota ánoxuae Irán nakua. Barapomonae medomonaepin irü persamonae kaemonae

nabariü pomonae pedangwéi jiwí náexana. Barapomonae báraxua éxana xua poxonae caldeomonae abe éxana Judá nakua, yáwano Israel pía pemómoxi susato jiwí tatsi kaponébatsi Babilonia tómará beya xua pepa tómará xua Caldea nákuatha.

Mesopotamia Xua “Mesopotamia”, jei, ápara ira, po ira pexeña ira xua pexaewa nexa, ichaxota po ira ánoxuae Irak nakua. Barichi ichaxota “oriental”, jei, xua ánoxuae Siria nakua.

moabitas Pomonae “moabitamonae” baraichi, ápara barapomonae Moab pía pemómoxi susato jiwí tatsi. Bapong Moab pong Lot pexanto tatsi. Barapomonae moabitamonae jinompa ichaxota “oriente”, jei, xua imoxoyo mar Muerto mene, xuano xua ichaxota ánoxuae pewüing Jordania nakua. Nakom jopa kopatsiyo xua Israel pía pemómoxi susato jiwí tatsi petajiwánapichiwa ira xua moabitamonae pía ira tatsi. Íchitha barapomonae moabitamonae Israel pía pemómoxi susato jiwí tatsi yábara kanantanaxeinéibatsi xua ápara barapomonae pomonae peita aenaenéi jiwí.

nazareo Pong ba “nazareomonaepin” baraichi, ápara pong xua éxana pokoyene xua nayábara tsiwüünae muxuduta Nakomtha xua saya meisha petanakuichiwa tsane Nakomtha pokotsiwa xua aiñakuí. Báraxua éxana xua saya poxonae kaeto, ichikuitha xua poxonae xua ataya tsane. Poxonae ichüing báraxua éxana xua poxonae nayábara tsiwüünae muxuduta, bapong jopa kopatsichi xua vino mera peapaewa, xuano xua uvakuéi pexaewa, xuano xua penantanasibiwa, xuano xua imoxoyo pekakitaponaewa pong petüpaein.

ofrenda Xua “ofrenda”, jei, ápara xua pokotsiwa jiwí amanaya kata Nakomtha. Báyatha Israel pía pemómoxi susato jiwí tatsi éxana cinco po ofrendang koyenéwabe xua baxuangje:

po ofrenda xua ompin,

po ofrenda xua pexu,

po ofrenda xua petsabiwa,

po ofrenda xua poxonae yaputaeya abe éxana,

po ofrenda xua poxonae jintong itatemaya éxana xua jopa exanaeyo pokotsiwa Nakom itoroba pía peitorobi koyenéwangtha.

Pascua Xua “Pascua”, jei, bárapo Pascua ápara xua fiesta, po fiesta poxonae Israel pía pemómoxi susato jiwí tatsi wüünae jainteiba Nakomtha. Bárapo fiesta matakabin exaneiba daxita wei tsaibi xua poxonae Semana Santa tsaibi. Bárapo fiesta matakabin exaneiba peyábara nantaxeinaenexa xua poxonae pona Egipto nakua weya. Kaena báyatha, bárapo merawitha Nakom itoroba matatsunpin. Bárapo matatsunpin daxita matabüxüing juteba tsíniya matapin jiwí xua pebiwi pomonae Egipto nakuapiwi. Báraxua matatsunpin éxana xua poxoru barapomonae ovejájangtha jopa pekaxuebixae bo peboupang. Matáütano bárapo matatsunpin duwéi tajutebatsiniyano po duwéi xua kopiya náexana xua Egipto nakuapiwi pía duweimonae tatsi. Nama bárapo matatsunpin daxita matabüxüing jopa jutebatsiniyaeyo matapin jiwí xua pebiwi pomonae Israel pía pemómoxi susato jiwí tatsi. Báraxua matatsunpin éxana xua poxoru barapomonae ovejájangtha pekaxuebixae bo peboupang. Matáütano bárapo matatsunpin duwéi jopa tajutebatsiniyaeyo po duwéi xua kopiya náexana xua Israel pía pemómoxi susato jiwí tatsi pía duwéi tatsi.

persas Pomonae “persamonae” baraichi, barapomonae jinompa ichaxota ánoxuae po nakua pewüng Irán, po nakua kopiya pewüng Persia. Barapomonae persamonae bichokono pedangwéi jiwi náexana poxonae xua weta poxonae caldeomonae abe éxana Judá nakua, xuano xua Israel pía pemómoxi susato jiwi tatsi kaponéibatsi Babilonia tómara beya xua pepa tómara xua Caldea nakua. Poxonae persamonae yábara amanáyaba Babilonia tómara, barapoxonae Israel pía pemómoxi susato jiwi kópabatsi xua kaewa peponaenexa Judá nákuatha.

querubín Xua “querubín”, jei, ápara xua pomonae peitabókotha jinompa, pomonae xua Nakom éxana.

romanos Pomonae “romanomonae” baraichi, kaena báyatha barapomonae jinompa Italia nákuatha. Bárapo nakua, Italia nakua eka ichaxota “sur”, jei, xua Europa nákuatha, po nakua pin nakua. Barapomonae romanomonae bichokono pedangwéi jiwi náexana xua poxonae báyatha weta xua griegomonae pedangwéi jiwi náexana. Barapomonae romanomonae dangweya kanamataxeina ichaxota po írangtha jinompa Israel pía pemómoxi susato jiwi tatsi xua poxonae Jesús nakatsiwa.

sacerdotes Pomonae “sacerdotemonae” baraichi, ápara pomonae Nakomtha tsita exaneiba xua poxonae duwéi tauteiba xua be ofrenda matawüng. Barapomonae bárxua exaneiba jiwi nexa po duwéi xua jiwi kaponeiba. Daxita sacerdotemonae pomonae xua Israel pía pemómoxi susato jiwi tatsi ápara Aarón pía pemómoxi susato jiwi tatsi. Barapong Aarón pong Moisés peweicho tatsi. Barapomonae sacerdotemonae pía penakuichiwa tatsi, ápara xua Nakom petsita-exaneibíwatsi xua duwéi petautsiwa xua be ofrenda matawüng xua poxonae ichamonae kaponeiba, yáwano icháwangno bara kana ichiya exaneiba. Poxonae aena, bárapo penakuichiwa exaneiba Nakom piabotha xua chivonamüübotha. Pírapae ekeicha exaneiba ichaxota po bo “templo”, jei, xua Nakom píabo tatsi, po bo pin bo.

Satanás Pong “Satanás” baraichi, ápara pong Nakom pía peitafaetabí jintongtsi. Nakom Pejume Diwésitha bárxua jopa yábara naka tsipaebiyo xua ichaxota wérena pona Satanás. Íchitha Nakom Pejume Diwésitha yábara paeba xua pinae Nakom daxitang fórota. Matáütano paeba xua pinae pokotsiwang Nakom fórota pinae ápara wüünae. Daxota jiwi yábara jumekowünta xua bapong, pong Satanás, ápara matatsunpiwimonae jíwana, po matatsunpiwimonae báyatha Nakom fórota. Íchitha pinae barapong pong “Satanás” baraichi pinae itaweta, pinae Nakom itawétatsi. Daxota bapong pebintha kana éxana xua bárapo pebin irü peitawetsinexa xua Nakom peitawetsinéxatsi. Barichino pinae yábüyo, po yábüyo powa kopiya, pówatha powa Satanás kana éxana xua irü peitawetsinexa xua Nakom peitawetsinéxatsi.

sello Xua “sello”, jei, ápara xua pokotsiwa penainto. Bárxuang ba pentakaponaewi xeina. Matáütano ba cartang markaba xua peaiñakuí cartang. Ichikuitha pewüng xeina pong xua piyawa tatsi.

Sidón Xua “Sidón”, jei, ápara tómara. Bárapo tómara Sidón tómara feniciomonae pía tómarang jíwana tatsi. Barapomonae feniciomonae pomonae kaena báyatha jinompa ichaxota “norte”, jei, imoxoyo Israel nakua.

Barapomonaē baxota dubenanáebiya ichaxota mar Mediterráneo mene ichaxota ánoxuae po nakua pewüŋ Líbano. Jezabel, barapowa pexantiyo tatsi, powa Sidón tómara itorobiya peewatsiwa. Jezabel pítatsi pebin, pong pewüŋ Acab, pong Efraín nakua itorobiya peewatsin. Jezabel barapowa kapatopa Efraín nákuatha pokoyenein xua Baal pía pejumekowüntsiwa tatsi po Nakom jopa xaiñeyo.

Sinar Xua pojume “Sinar”, jei, ápara ira, po ira eka ichaxota “sur”, jei, xua Irak nákuatha. Kaena báyatha bárapo íratha eka tómara, po tómara pewüŋ Ur. Kaena báyatha Abraham náexana baraxota Ur tómaratha. Barichi kaena báyatha baxota Sinar íratha icha tómarano eka po tómara pewüŋ Babilonia tómara, po tómara xua pepa tómara xua Caldea nákuatha.


sirios Pomonaē “siriomonaē” baraichi, ápara barapomonaē pomonaē jinompa Siria nákuatha. Bárapo nakua, Siria nakua eka ichaxota “noreste”, jei, xua po nakua ánoxuae pewüŋ Israel. Barapomonaē siriomonaē bichokono peabewi. Barapomonaē, Israel pía pemómoxi susato jiwi tatsi ita-aenaenei tsaibichi xua poxonaē po dapaetha Judá nakua irü Efraín nakua aiña nakua náexanabe.

tabernáculo Xua “tabernáculo”, jei, ápara Nakom píabo tatsi xua chivonámüübo. Nama bárapo chivonámüübo xua Nakom píabo tatsi saya jonokeiba poxonaē warapeiba. Bárapo chivonámüübo, Israel pía pemómoxi susato jiwi tatsi éxana xua baxota wüünaē pejainteibinexa Nakomtha poxonaē jinompaduta irasaina xuépana tsúrukuae nákuatha. Bárapo chivonámüübotha jutebeiba duwéi xua be ofrenda matawüŋ xua Nakom nexa. Bárapo chivonámüübo éxana icha be pókotsi koyeneya báyatha Nakom kui-itoroba, xua poxonaē Moisés kui-itoróbatsi, poxonaē tsita itüütatsi ichaxota po demuxuwa pewüŋ Sinái.


Tiro Xua “Tiro”, jei, ápara tómara. Bárapo tómara, Tiro tómara, feniciomonaē pía tómarang jíwana tatsi. Barapomonaē feniciomonaē, pomonaē kaena báyatha jinompa ichaxota “norte”, jei, xua Israel nákuatha. Barapomonaē baxota dubenanáebiya ichaxota mar Mediterráneo mene, ichaxota ánoxuae po nakua pewüŋ Líbano. Kaena báyatha Tiro tomarapiwi kaemonaē nayawa éxana Israel pía pemómoxi susato jíwitha tatsi poxonaē naba éxana ichamonaetha. Báraxua barapomonaē éxana poxonaē pópona David, pong nakua itorobiya peewatsin, irü poxonaē pópona Salomón, pong nakua itorobiya peewatsin.

Ur Xua “Ur”, jei, ápara tómara, po tómara pepa tómara, po tómara peaiñakuí tómara. Ur tómara, bárapo tómara eka Sinar íratha. Kaena báyatha Ur tómara eka ichaxota ánoxuae po nakua pewüŋ Irak. Kaena báyatha pomonaē Ur tómaratha jinompa yaputane xua petinaewa, yáwano peyaputaewi xua artesanía éxana. Kaena báyatha Abraham náexana baraxota Ur tómaratha. Barichino bárapo Ur tomarapiwi aiña nakomüŋ xeina, po nakomüŋ jopa xaiñeyo, po nakomüŋgtha wüünaē jainteiba.


II Poxonaē “II”, jei, yábara kaunúnuta pong xua kotakaya nakatsiwa ichi be iche: Jeroboam II, ápara pong xua kotakaya nakatsiwa. Ichüŋ Jeroboam pong kopiya nakatsiwa.









El Templo en el tiempo de Jesucristo




Plano del Interior del Templo




1. La Mesa y los Panes de la Proposición
2. El Candelabro
3. El Altar del Incienso
4. El Velo
5. El Arca del Pacto
6. Los Querubines



PRIMER VIAJE MISIONERO DE SAN PABLO



SEGUNDO VIAJE MISIONERO DE SAN PABLO



TERCER VIAJE MISIONERO DE SAN PABLO



VIAJE DE SAN PABLO A ROMA